


Janeruwarete 'Ga
Je'eg



New Testament in Kayabí (BR:kyz:Kayabí)

Janeruwarete 'Ga Je'eg New Testament in Kayabí (BR:kyz:Kayabí)

copyright © 2012 Wycliffe Bible Translators, Inc.

Language: Kayabí

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayabí

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files dated 29 Jan 2022
4079b71d-584e-51a5-ad2a-7eb18ed8c7d4

Contents

Mateu	1
Maku	70
Luka	110
Juã	186
Atos	231
Romanũ	299
1 Korĩtu	327
2 Korĩtu	354
Garasi	371
Efesu	382
Firiposi	393
Korosi	400
1 Tesarũn	408
2 Tesarũn	414
1 Timoteo	417
2 Timoteo	426
Tito	432
Firemõ	436
Epyreu	438
Tiago	462
1 Pedro	471
2 Pedro	480
1 Juã	485
2 Juã	492
3 Juã	493
Judas	494
Apocalipse	497

Mateu

Mateu 'ga Jejuu 'ga remimu'efera mü. Levi 'ga rer irüa. Jejuu 'ga kwaawe'emauwe 'ga ka'aranüü puyka 'wyriararete 'ga upe. A'ere 'ga Jejuu 'ga omo'wyr ire 'ga oporowyky rejari awau watau Jejuu 'ga rupi. Ywag ipe Jejuu 'ga jewyr ire Janeruwarete 'ga 'Agesagea ka'arana kwasiarukari Mateu 'ga upe. A'eramü 'ga ka'arana kwasiaa inuga Jejuu 'ga ree.

Jejuu 'ga pytunet (Luka 3.23-38)

¹ 'Agamü Jejuu Kristu 'ga pytunera 'gã. Abraão 'ga juapyrera 'ga Davia. Davi 'ga juapyrera 'ga Jejuu Kristua.

² Abraão 'ga Isaki 'ga ruwa.

Isaki 'ga Jako 'ga ruwa.

Jako 'ga Juda 'ga ruwa, 'ga rewirera 'gã netee.

³ Juda 'ga Peres 'ga ruwa, Sera 'ga retee. 'Gã y eë rera Tamar.

Peres 'ga Esrom 'ga ruwa.

Esrom 'ga Arão 'ga ruwa.

⁴ Arão 'ga Aminatape 'ga ruwa.

Aminatape 'ga Nasom 'ga ruwa.

Nasom 'ga Saumō 'ga ruwa.

⁵ Saumō 'ga Poasi 'ga ruwa. Poasi 'ga y eë Raape eë.

Poasi 'ga Opete 'ga ruwa. Opete 'ga y eë Rute.

Opete 'ga Jese 'ga ruwa.

⁶ Jese 'ga Davi 'ga ruwa. Davi 'ga 'üina 'wyriaramü judeu 'gã nupe rakue.

Davi 'ga Uri 'ga remirekofera eë rerekou. 'Gã na'yra 'ga Sarumãu 'ga.

⁷ Sarumãu 'ga Ropoãu 'ga ruwa.

Ropoãu 'ga Apiasi 'ga ruwa.

Apiasi 'ga Asa 'ga ruwa.

⁸ Asa 'ga Josafa 'ga ruwa.

Josafa 'ga Jorãu 'ga ruwa.

Jorãu 'ga Usiasi 'ga ruwa.

⁹ Usiasi 'ga Jotãu 'ga ruwa.

Jotãu 'ga Akasi 'ga ruwa.

Akasi 'ga Esekiasi 'ga ruwa.

¹⁰ Esekiasi 'ga Manase 'ga ruwa.

Manase 'ga Amom 'ga ruwa.

Amom 'ga Josiasi 'ga ruwa.

¹¹ Josiasi 'ga Jekoni 'ga ruwa, 'ga rewirera 'gã nuwa nanë nü.

Jekoni 'ga rekoramü Israeu juapyrera 'gã nee iporomutare'ema 'gã 'ua ojemorypa 'gã nee, 'gã puyka, 'gã faa, 'gã nerawau Papironi wyy pe.

¹² Papironi wyy pe weroo re Jekoni 'ga wa'yramü.

Jekoni 'ga Saratieu 'ga ruwa 'ga.

Saratieu 'ga Soropapeu 'ga ruwa.

¹³ Soropapeu 'ga Apiute 'ga ruwa.

Apiute 'ga Eriakī 'ga ruwa.

Eriakī 'ga Aso 'ga ruwa.

¹⁴ Aso 'ga Satoki 'ga ruwa.

Satoki 'ga Akī 'ga ruwa.

Akī 'ga Eriute 'ga ruwa.

¹⁵ Eriute 'ga Eriesa 'ga ruwa.

Eriesa 'ga Matā 'ga ruwa.

Matā 'ga Jako 'ga ruwa.

¹⁶ Jako 'ga Jose 'ga ruwa.

Jose 'ga Mari eë mena. Mari eë ra'yra 'ga Jejuu 'ga. Eë wi futat 'ga 'ari rakue. Jejuu Kristu 'ga Janeruwarete 'ga remimurera te.

¹⁷ Abraão 'ga remyminü juapyret awau ojemomytuna katosi rakue. Awau owaëma Davi 'ga upe rakue. A'eramü Davi 'ga remyminü juapyrera nãñewëjëmī ojemomytuna katosi rakue. Awau owaëma Papironi wyy pe 'gã nerooawa upe. Papironi wyy pe weroo re 'gã

nānēwējēmī 'gā nemymīnū juapyrera ojemomytuna katosi rakue. Awau owaēma Kristu 'ga l'aawa upe.

*Jejui Kristu 'ga 'aawet
(Luka 2.1-7)*

¹⁸ Nan Janeruwarete 'ga Jejui Kristu 'ga muri wyy pe rakue. Janeruwarete 'ga 'Agesagea Jejui 'ga mua Mari ēē upe rakue, ēē ra'yramū rakue. Mari ēē merama 'ga Jose 'ga. A'ere Jose 'ga ēē rerekoe'emaue Janeruwarete 'ga 'Agesagea kunumī muri ēē upe rakue.

¹⁹ “Mari ēē ta'yt” 'e kwaapawe Jose 'ga 'jau ojeupe: “Najera'yra rūi futat. Nakoi we je ēē ree”, 'jau 'ga ojeupe. “Narekokatui je ēē 'awamū. Maran ajee je ēē rerekoi 'awamū 'ū? Namome'ua'uweri je ēē 'gā nupe. 'Ta'yr ēē' 'e kwaawe'emaue pa je ēē retygi kwyy”, 'jau 'ga ojeupe. Jose 'ga esage ma'ea. Ajeteetewi tee 'ga mama'e apoi rakue. A'eramū 'ga a'eramū oporekowere'emamū ēē ree. A'ere 'ga nafutari ēē mojenosia nanē nū.

²⁰ Wemiaporam are 'ga wea'aramū oser enune. 'Ga ser ire Janeruwarete 'ga pyriwara 'ga amū 'ua ojesaukaa 'ga upe, 'ga fayupaw ipe. A'eramū 'ga oje'ega Jose 'ga upe, judeu 'gā 'wyriat ymanera 'ga juapyrera 'ga upe, Davi 'ga juapyrera 'ga upe:

—Ku 'jywa 'ga 'Agesagea te kunumī amut Mari ēē upe. A'eramū ene epy'a 'wyre'emamū ēē ree. “Narekoi je ēē”, ere awi.

²¹ Kūima'ea futat ēē ra'ya 'ga. 'Ga 'aramū ene 'ga re'roka. 'Ga futat 'ut opytuna 'gā tywera moiawamū 'gā nui. A'eramū ene Jejui nuga 'ga ree— 'jau ywagipewara 'ga Jose 'ga fayupaw ipe 'ga upe.

(Grego 'gā je'eg imū aekatu'okat 'ea futat poromū Jejui 'ea.)

²²⁻²³ Ymā te 'ā Janeruwarete 'ga oje'ega mome'ui Isai 'ga upe rakue. “Anure nipo kūjāmuku ēē mū ra'yramū. Kunumī 'ga 'ar ire nipo 'ga 'jau Emanueu 'jau 'ga upe”, 'jau 'ga Isai 'ga upe rakue. (Epyreu 'gā je'eg imū *Emanueu* 'ea Janeruwarete 'ga ako jane pyri 'ea futat.) U'eawer imū etee futat Janeruwarete 'ga Jejui 'ga muri kūjāmuku ēē mū upe.

²⁴ Opag ire Jose 'ga awau Mari ēē 'wyr ipe, ēē rerua oje'wyr ipe, ywagipewara 'ga 'eawer imū etee futat rakue.

²⁵ A'ere 'ga ēē ra'ya 'ga 'are'emaue nokoi futari ēē ree. Ēē ra'ya 'ga 'ar ire Jose 'ga 'ga re'rogi. Jejua 'ga inuga 'ga ree, ywagipewara 'ga 'eawer imū etee futat.

2

Kwara poawa katy awi 'ut ma'e 'gā

¹ Perēi me Jejui 'ga u'aa rakue. Judeja wyy pype Perēi 'jawa amunawa 'upa. Israeu juapyrera 'gā nupe 'wyriaramū Erote 'ga renamū Jejui 'ga u'aa rakue. Jejui 'ga 'ar ire kūima'e 'gā amū 'ua Jerusareg ipe, Erote 'ga rekwaw ipe. Muku awi 'gā nuri. Kwara poawa katy awi 'gā nuri. Jaytata mojoyrūara 'gā.

² 'Gā poromū 'ut muku awi. A'eramū 'gā oporonupa ee judeu 'gā nupe:

—Ma'ape te pē'wyriarareterama 'ga 'ari 'awamueu rai'i? Oroje'wyr ipe ore rekoramū jaytata yau renyfugamū ojesaukaa ore ai'i. Esakawe ore 'jau arajaupe ai'i: “Judeu 'gā 'wyriarareterama 'ga u'at ra'e”, 'jau ore arajaupe ai'i. A'eramū ore arajua koromū 'ga muorypa arakou— 'jau 'gā Jerusareg ipewara 'gā nupe.

³ A'eramū Erote 'ga opy'a'wyrāmū ee. “Ma'ape te judeu 'gā 'wyriarareterama 'ga 'ari rai'i” 'e renupawe 'ga opy'a'wyrāmū ee. “Tÿy. Je futat nā'ā a'yi 'wyriaramū judeu 'gā nupe re'ā”, 'jau 'ga ojeupe. “Awÿja upe sipō 'gā 'i poromū 'wei?” 'jau 'ga ojeupe. A'eramū 'ga opy'a'wyrāmū akou ee. Jerusareg ipewara 'gā juejue futat nanē opy'a'wyrāmū aipo are nū.

⁴ A'eramū Erote 'ga mainana 'wyriara 'gā murukaa ojeypyri Moisesi 'ga je'eger are moromu'jara 'gā neewe.

—Ma'ape te Janeruwarete 'ga remimurama 'ga 'ari e'i te 'gā nakue— 'jau 'ga 'gā nupe.

⁵ —“Perēi me nipo 'ga 'ari”, e'i 'gā nakue. “Judeja wyy pype 'up ma'e pype nipo 'ga 'ari”, e'i 'gā nakue— 'jau mainana 'gā Erote 'ga upe.

⁶ —Ymā te Janeruwarete 'ga oje'ega kwasiarukari ka'aran are oje'ega mome'wara 'ga upe rakue:

“Perēi mewaramū pēē pejejenosūe'em pejeje'wyr awi.

Sikōi'ī agawewi pē'wya. A'etea nipo pē'wyr ipe futat pē'wyriarareterama 'ga u'at anure.

Poromū futat nipo 'ga 'ua ajemogou 'wyriarareteramū jeremiayuwamū pē nupe, Israeu juapyreramū pē nupe”,

'jau 'ga ikwasiarukaa Mikeiasi 'ga upe rakue— 'jau mainana 'wyriara 'gā imome'wau Erote 'ga upe.

⁷ A'eramū Erote 'ga muku awi 'ut ma'efera 'gā nenūina.

—Pe'je pejejua. 'Gā nemianuwa tywi saporogyta jarejete 'jau— 'jau 'ga 'gā nupe.

A'eramū 'gā awau oporogytau 'ga upe.

A'eramū 'ga 'jau 'gā nupe:

—Maranime te peesak jaytata yaua rai'i? Ma'e 'ara rupi te peesak rai'i?— 'jau 'ga 'gā nupe. A'eramū 'gā jaytata yau resakawera mome'wau esage 'ga upe.

⁸ A'eramū Erote 'ga 'jau 'gā nupe:

—Pe'je pejewau Perēi me. “Perēi me futat ore'wyriarareterama 'ga 'ari”, e'i mainana 'wyriara 'gā jee— 'jau 'ga jaytata yau resakarera 'gā nupe. —A'eramū pēē pejewau 'ga rekaa. 'Ga resag ire tepejot 'ga rekwawa mome'wau jee 'jau. A'eramū je nanē tewau 'ga muorypa— 'jau Erote 'ga 'gā nupe.

A'ere o'meramū te Erote 'ga 'i 'gā nupe. “Ga rekwawa tejeupe 'gā imome'u re too 'ga jukau 'jau kwy”, e'i te 'ga ojeupe.

⁹⁻¹⁰ Ojeupe 'ga imome'u re 'gā awau nū. 'Gā waw ipe jaytata yau ojesaukaru'japa 'gā nupe nū.

—Kuu. Kweramū janeremiesagera reko'i ra'e kūi— 'jau 'gā ajaupe.

A'eramū 'gā aku'iramū jaytata yau are.

Jaytata weny rerawau 'gā nenune. A'eramū 'gā jaytata reny rewiri etee futat akou. Awau jaytata opytaw Jeju'i 'ga rekwawa 'oga 'arimū.

¹¹ A'eramū 'gā awau osou 'ga 'wyr ipe. Kunumī'ī 'ga 'gā esaka 'ga y ēē retee, Mari ēē retee. A'eramū 'gā wapyka wenupy'āu Jeju'i 'ga rowase 'ga muorypa. A'eramū 'gā wemirerurera okaraemā renū'jāu imua wepyrū awi imonou 'ga upe. Ouru, Janeruwarete 'ga upe iapypyra jany kasig, mira 'jawa jany kasig. Mīmera 'gā imonou Jeju'i 'ga upe. 'Ga upe 'gā nemirerurera epy ete mama'ea.

¹² Ypytunimū Janeruwarete 'ga oje'ega jaytata mojopyrūara 'ga amū upe 'ga fayupaw ipe:

—Pejewyt kasi pejewau Erote 'ga pyu ne— 'jau 'ga 'ga upe, 'ga fayupaw ipe.

Opag ire ofayup ma'efera 'ga imome'wau opytuna 'gā nupe. A'eramū 'gā awawe'em Erote 'ga pyu. Amutee pe rupi etee 'gā awau ojewya oje'wyr ipe nū.

Oka'jama 'gā awau Egitu wyy pe

¹³ 'Gā o re ywagipewara 'ga amū ojesaukaa Jose 'ga upe. 'Ga fayupaw ipe 'ga ojesaukaa oje'ega 'ga upe:

—Erote 'ga ifuwet Jeju'i 'ga ree. Anurenure'i nipo 'ga wemiayuwa 'gā murukari Jeju'i 'ga rekaa, 'ga jukaawamū. A'eramū ene 'awauwe futat 'ga rerawau 'ga y ēē retee eroka'jama 'ga wi. Egitu wyy pe pekwap. Peu futat pejepytaw. “Pe'je pejewya Judeja wyy pe”, pejejeupe je'e'emamū pēē pejekou Egitu wyy pe etee futat— 'jau ywagipewara 'ga Jose 'ga upe, 'ga fayupaw ipe.

¹⁴ A'erauwe Jose 'ga ojypa, okaraemā mogatyrūmū. Ypytunimūwe futat 'ga Jeju'i 'ga rerawau 'ga y ēē reewe 'gā neroka'jama erawau Egitu wyy pe.

¹⁵ Erote 'ga manū'e'emamū 'gā akou Egitu wyy pe etee futat. Ymā te Janeruwarete 'ga oje'ega kwasiarukari Oseja 'ga upe rakue: “Egitu wyy awi je teja'yra 'ga muri”, 'jau 'ga ikwasiarukaa 'ga upe rakue. A'eramū 'ga u'eawer imū etee futat 'gā monoukaa Egitu wyy pe.

Kunumīakya apisiawet

¹⁶ Erote 'ga jaytata mojopyrūara 'gā napesaka 'ūina numiamū. A'ere 'gā nooi 'ga pyu. “Tÿÿ. Nuri futari te 'gā imome'wau jee 'wei. Je morytee pa 'gā nai'i”, 'jau 'ga ojeupe. A'eramū 'ga amara'neramū 'ūina 'gā nee. A'eramū 'ga wea'aramū jaytata mojopyrūara 'gā je'e'eger are jaytata yau resakawer are. A'eramū 'gā 'jau: “Nomagwawi we kunumī 'ga mukūi kwara”, 'jau 'ga ojeupe. A'eramū 'ga 'jau wemiayuwa 'gā nupe:

—Pe'je pejewau kunumī'ī apisaupap. Perēi mewara 'gā na'yra 'gā, ipyriu'i ajemogy ma'e 'gā na'yra 'gā. Mīmera ki peapisi. Mukūi kwara magwapare'ema 'gā juejue ki peapisi— 'jau Erote 'ga wemiayuwa 'gā nupe.

¹⁷⁻¹⁸ Ymā te Jeremi 'ga ka'arana kwasiasi ee rakue.

“Rama 'jaw ipewara 'gā wapirū wa'yra 'gā.

Opapap 'gā na'yra 'gā nui.

Rakeu ēē taetu wa'y'ri are u'arasigeteteramū.

Ni'arasimawa'uweri te ēē wa'yra 'gā nee”,

'jau Jeremi 'ga ikwasiaa inuga rakue. A'jea futat 'ga remikwasiarera. 'Ga remikwasiarer imū etee futat Erote 'ga kunumī'ī apisaupawukaa wemiayuwa 'gā nupe.

Egitu wyy awi 'gā 'ua nū

¹⁹ Anure, Erote 'ga manū re, Janeruwarete 'ga ojepyriwara 'ga amū resaukaa Jose 'ga upe, 'ga fayupaw ipe.

²⁰—Jeju'i 'ga ree ifuwet ma'e 'ga amanū 'awamū. A'eramū ene 'ga rerawau erojewya 'ga y ēē retee pejewya Israeu juapyreramū pejeywy pe— 'jau ywagipewara 'ga Jose 'ga upe 'ga fayupaw ipe.

²¹A'erauwe Jose 'ga ojypa, okaraemā mogatyrūmū. A'eramū 'ga Jeju'i 'ga rerawau 'ga y ēē reewe, 'gā nerojewya oywy pe nū.

²²Oywy upe owaēmawe Jose 'ga 'wyrriara 'ga rera renupa. “Erote 'ga ra'yra 'ga, Akirau 'ga 'ūi 'wyrriaramū Judeja ywy pewara 'gā nupe”, 'jau 'ga amū Jose 'ga upe. A'eramū 'ga okyjau 'ga pyri oo awi. A'eramū ywagipewara 'ga ojesaukaa 'ga upe nū, 'ga fayupaw ipe nū. “Garireja ywy pe pekwap”, 'jau 'ga 'ga upe, 'ga fayupaw ipe. A'eramū Jose 'ga 'gā nerawau Garireja ywy pe.

²³Nasare 'jawa amunawa 'upa Garireja ywy pype. A'eramū Jose 'ga 'gā nerawau 'gā neropytau Nasare pe. Ymā te Janeruwarete 'ga je'ega mome'wara 'gā 'i rakue: “Anure nipo 'gā 'i 'ga remimono 'ga upe, Nasare pe waranup ma'efera 'ga, 'jau nipo 'gā 'ga upe”, 'jau Janeruwarete 'ga je'ega mome'wara 'gā nakue. A'eramū Jose 'ga Jeju'i 'ga muaranupa Nasare pe futat, 'gā 'eawer imū etee futat.

3

Juā Batista 'ga remimome'ufet

(Maku 1.1-8; Luka 3.1-18; Juā 1.19-28)

¹Anure, Jeju'i 'ga aranuw ire, Juā Batista 'ga awau amunawe'em ipe oje'ega ojeypyri oo ma'e 'gā nupe. Judeja ywy pype 'ga reko'i oje'ega 'gā nupe:

²—Peru 'arasig tee awi pejetywera. Pepoit tāmējē pejetywer awi— 'jau 'ga 'gā nupe. —Anurenure'i nipo Janeruwarete 'ga wemimura 'ga resaukari janee. 'Ga remimurera 'ga 'ā Janejararetea. A'eramū ki pēē pejejoipa pejetywer awi 'ga rur enune— 'jau 'ga 'gā nupe.

³Ymā te Janeruwarete 'ga ka'arana kwasiarukari Isai 'ga upe, Juā 'ga rekwawam are rakue:

“Amunawe'em ipe nipo 'ga amū awau akou wafukaita 'ga nupe:

Pe'je Jarejararete 'ga rape katu'oka imonou 'ga renune.

Pepyo esage etee futar iki imonou jarejeupe 'ga ruawamū, 'jau nipo 'ga akou wafukaita amunawe'em ipe”,

'jau Janeruwarete 'ga ikwasiarukaa Isai 'ga upe rakue. “Jarejararete 'ga rapea pekatu'ok imonou 'ga renunewe”, 'jau 'ga 'gā nupe. Aipo 'ga “pejetywer awi pepoit”, e'i te 'ga 'ua janee.

⁴Juā 'ga kameru rawa apopyrera rerekou waityramū imunepa. Wyrā pirera 'ga erekou aku'afaawamū. 'Ga raitya ymāwarera 'ga raity 'jawerimū etee futat, Eliasi 'ga raity 'jawerimū etee futat. 'Ga remi'ua tukut, eit. Mīmēra etee 'ga remi'ua rakue.

⁵A'eramū 'gā 'ua Jusareg awi 'ga je'ega renupa ajatykau. Judeja ywy awi, Jotāuy ka'a awi. Mīmer awi 'gā 'ua ajatykau 'ga je'ega renupa.

⁶Otywer awi 'gā poir ire Juā 'ga 'gā pymīāu 'y pe. Jotāuy pe 'ga 'gā pymīāu. “Awamū je mama'e esage etee iapoi, Jarejuwarete 'ga je'eg imū”, 'jau 'gā oje'pymīāukaa 'y pe 'ga upe.

⁷A'eramū fariseu 'gā satuseu 'gā netee 'ua kwaiwete oje'pymīāukaa Juā 'ga upe. A'eramū 'ga 'gā nesakawe 'jau 'gā nupe:

—Ma'eramū pēē pejejuu peje'epymīāukaa ekoete jee ki 'ei, pejetywer awi opoit ma'e 'jawe 'ū? Pejetywer awi ra'ne pepoit kūi. A'eramū te je pē pymī kūi— 'ga 'i etee 'gā nupe ojee 'gā jatykaramū. A'eramū 'ga 'jau 'gā nupe: —Janeruwarete 'ga imara'ne pē nee. Pētywer are 'ga mara'neramū pē nee. A'eramū nipo 'ga pē nerekou tyweaete pētywer are. “Ene'me awi”, pe'je awi etee jee. A'jea futat nipo 'ga pē nereko tyweretei. “Nore rereko tywera'uweri 'ga”, pe'je awi. A'jea futat 'ga pē nereko tyweretei— 'jau Juā 'ga 'gā nupe.

⁸—Pe'je pejewau mama'e esage mū apou pejetywer awi pejejoira resaukaawamū kūi— 'jau 'ga oje'ega moywrafena 'gā nupe.

⁹—“O'meramū 'ga 'i”, pe'je kasi jee ne. “Je 'ā Abraão 'ga juapyrera te. A'eramū 'ga a'eramū je rereko tywere'ema”, pe'je kasi ne. Janeruwarete 'ga ifutar ire amunipo 'ā 'ga ita mu 'jagi Abraão 'ga juapyreramū— 'jau 'ga 'gā nupe.

¹⁰—Sā 'ā ae 'ywa 'i'a a'wre'ema iypy mosoga. A'eramū 'ā ae erawau imonou imomoa tata pe. Nan tee futat 'ga pē nerekoi pejetywer awi pepoire'emamū— 'jau 'ga fariseu 'gā nupe satuseu 'gā netee.

¹¹A'eramū 'ga 'jau najuejue etee 'gā nupe:

—Je 'ā a'jea futat apymī pēē 'y pe tekou pejetywer awi pē poira resaukaawamū. A're je rewiri 'ut ma'e 'ga te Jarejuwarete 'ga 'Agesage muri pē nupe. Je rewiri 'ut ma'e 'ga te kūima'eeteetea te. Je naani. Je akotee'i ma'ea te. Apoat te je 'ga tekou— 'jau 'ga 'gā nupe. —Werowiaara 'gā nupe 'ga 'Uwarete 'ga 'Agesage muri. Werowiare'ema 'gā te nipo aje 'ga werekou tywerete anure— 'jau Juā 'ga 'gā nupe.

¹² —Sā'ā ae juowuuran ape 'oga. A'eramū 'ā ae a'yi esage mū'jāu jui. A'eramū 'ā ae iapefera monou tata pe. Nan tee futat nipo 'ga werowiare'ema 'gā monoi mama'eukwaawa rapyaw ipe. Aipoa tata nowewi futari. Nitywi futari imowepara 'ga amū— 'jau 'ga 'gā nupe imome'wau.

'Y pe Jejuī 'ga pymīawet

(Maku 1.9-11; Luka 3.21-22; Juā 1.31-34)

¹³ Jotāuy pe Juā Batista 'ga rekoramū, Jejuī 'ga 'ua owaēma 'ga upe rakue. Garireja ywy awi 'ga 'ua owaēma ojepymīāukaa 'y pe Juā 'ga upe.

¹⁴ A'ere Juā 'ga 'i:

—Naani nū'ū. Naje rūi ene pymīara. Ene te 'ā kūima'eteetea. Je 'ā naani. Je 'ā akotee'i ma'ea te. A'eramū je te amunipo 'ā tejepymīāukaa enee— 'jau Juā 'ga Jejuī 'ga upe.

¹⁵ A'ere Jejuī 'ga 'i 'ga upe:

—A'jea futat ere poromū jee. A'ere Janeruwarete 'ga ene je pymīa futari. A'eramū jane iapou 'ga remifutar imū etee futat— 'jau Jejuī 'ga Juā 'ga upe.

—Nai'i— 'jau 'ga 'ga upe.

A'eramū 'ga 'ga pymīau 'y pe.

¹⁶ Opymī re Jejuī 'ga 'ua awua 'y awi. 'Y awi 'ga wyrauwe ywaga owoka 'ga upe. A'eramū 'ga 'Uwarete 'ga 'Agesage rura resaka. Pykau 'jawe 'ua ywag awi wapyka 'ga ree.

¹⁷ U'agesage jyw ire Janeruwarete 'ga oje'ega mua ywag awi:

—Koromū futat jera'yarete 'ga. Jeremifutararete 'ga. 'Ga etee futat je muorypararetea ojee— 'jau 'ga oje'ega mua ywag awi 'gā nupe, Jejuī 'ga 'ga imome'wau 'gā nupe.

4

Amunawe'em ipe Jejuī 'ga rerawaawet

(Maku 1.12-13; Luka 4.1-13)

¹ 'Y pe 'ga jepymī re Janeruwarete 'ga 'Agesagea Jejuī 'ga rerawau erekou amunawe'em ipe, mama'eukwaawa 'wyriara 'ga resakaawamū.

² Peu akou Jejuī 'ga ojemī'ware'ema akou. Kwarēta 'ara 'ga imagwapa akou ojemī'ware'ema. A'eramū 'ga opy'arayaramū akou.

³ A'eramū mama'eukwaawa 'wyriara 'ua 'ga resaka. “Taesak 'ga paira 'uwa 'ga rerowiar awi 'jau kwy”, 'jau akou ojeupe etee futat. “Teje'ega taenuwukat esaka 'ga upe 'jau kwy”, 'jau 'ūina ojeupe etee futat. A'eramū 'jau Jejuī 'ga upe:

—“Ku'jywa 'ga ra'ya je”, ere 'ā. A'eramū ene ita mu'jaga ejemi'uramamū— 'jau mama'eukwaawa 'wyriara 'ua Jejuī 'ga upe.

⁴ Aipo ojeupe 'eramū Jejuī 'ga 'jau jupe:

—Naani. Naene rūi je arowiat tekou. Tejuwarete 'ga etee te je arowiat tekou. Jeruwarete 'ga e'i oree: “Nawemi'uram are tee rūi ae rekoī”, 'jau oree jepi— 'jau etee 'ga jupe. —“Jeje'ega renupara 'gā etee te ajemogy a'jea futat”, e'i 'ga ikwasiarukaa inuga oree rakue. A'eramū je 'ga je'ega renupa tekou— 'jau Jejuī 'ga mama'eukwaawa 'wyriara upe.

⁵ A'ere mama'eukwaawa 'wyriara Jejuī 'ga rerawau Jerusareg ipe. Jerusarega pype Janeruwarete 'ga mogytaawa 'ūina. A'eramū 'gā 'jau, Janeruwarete 'ga 'wyrarete, 'jau 'gā Jerusarega upe. Peu futat 'ga rerawau. Janeruwarete 'ga mogytaawa apyte'rarimū 'ga rerawau erojeupia. Ywatewate 'ga mogytaawa.

⁶ A'eramū mama'eukwaawa 'wyriara 'jau 'ga upe nū:

—Ku'jywa 'ga ra'ya 'ā ene. A'eramū ene ewau epoa 'aw awi. Nerepena'uweri ewau. Jaruete ereo e'aa. Ymā ako Ku'jywa 'ga ka'arana kwasiarukari 'ga amū upe wa'yramū ene ree ikue.

“Tejepyriwara 'gā je omono enee.

A'eramū 'gā ojejukau ene ree.

A'eramū ene ejemokanāje'ema ewau e'aa.

Epya miamū ene imokanāje'ema ita are”,

'jau ako Ku'jywa 'ga ka'arana kwasiarukaa wa'ya 'ga ree ikue— 'jau mama'eukwaawa 'wyriara Jejuī 'ga upe. “Omorytee pa je 'ga kwy”, 'jau ojeupe numiamū.

⁷ A'ere Jejuī 'ga 'i etee jupe:

—A'jea futat aipo 'ea numiamū. A'ere je narowiari futari eneje'ega. Jeruwarete 'ga ka'arana okwasiarukat ajepēja 'ga upe nanē nū: “A'jea futat sipo ajee 'ga jejukai je ree, pe'je kasi jee ne, je rerowiare'ema ne”, e'i 'ga ikwasiarukaa ajepēja 'ga upe rakue— 'jau 'ga jupe. —A'eramū je eneje'ega mojerowiare'ema— 'jau etee Jejuī 'ga mama'eukwaawa 'wyriara upe.

⁸ A'eramū mama'eukwaawa 'wyriara Jejuī 'ga rerawau 'ga roerojeupia wytyr apyte'rarimū nū. Peu 'ga rerowaēm ire mama'eukwaawa 'wyriara ywy resaukaa 'ga

upe. Mama'ea ipype ajemogy ma'e reewe futat esaukapap 'ga upe. Kamēsīete futat mama'e resaukaa wyy pypewara resaukapap 'ga upe.

⁹—Ikaturam te 'ā eneremiesaga. Je rowase eapyk ejenupy'āu je muorypa. A'eramū je eneremiesagera monoupap enee— 'jau Jejuī 'ga upe.

¹⁰ A'eramū Jejuī 'ga 'jau jupe:

—Ere ejepe'au je wi, ki mama'eukwaawaiwet. Ymā 'ā Jeruwarete 'ga oje'ega kwasiarukari ka'aran are 'ga amū upe rakue. “Je te 'ā Pējararetea. Je te 'ā Pēnuwaretea. A'eramū ki pēē jeje'ega tee enupa pejejemogyau. Je tee ki je muoryp pejepe pejejemogyau”, 'jau 'ga 'ā ikwasiarukaa 'ga amū upe rakue— 'jau etee Jejuī 'ga jupe.

¹¹ Amojerowiare'emauwe mama'eukwaawa 'wyriara ojepe'au awau Jejuī 'ga wi. 'Ga wi iorauwe ywagipewara 'gā amū 'ua ojejukau 'ga ree.

Jejuī 'ga porowyky ypyruga
(Maku 1.14-15; Luka 4.14-15)

¹² Aipo re Jejuī 'ga Juā Batista 'ga rera renupa. “Juā Batista 'ga 'gā opyyk imonou imunepa im'ina moromunepawa pype” e renupa. A'eramū Jejuī 'ga awau ojewya Garireja wyy pe nū.

¹³ A'ere 'ga nopytai oje'wyr ymaner ipe, Nasare pe. Kafanaū 'jaw ipe etee 'ga awau opytau. Kafanaū 'jawa 'upa ypiauu pyri, Garireja 'jawa pyri. Ymā te Sepurō 'ga juapyrera 'gā 'upa Garireja wyy pype Nafitari 'ga juapyrera 'gā netee 'gā 'upa rakue.

¹⁴⁻¹⁶ Ymā te Janeruwarete 'ga je'ega mome'wara 'ga, Isai 'ga ka'arana kwasiari ee rakue, peuwara 'gā mome'wau rakue. Sepurō 'ga juapyrera 'gā nekwaw ipewat, Nafitari 'ga juapyrera 'gā nekwaw ipewat, Jotāu pyriwat, 'yē'ē pyriwat, Garireja wyy pewat. Mīmēra 'gā 'ga imome'wau rakue. Garireja wyy pe judeue'ema 'gā nekoi judeu 'gā pyri rakue: “Anure nipo pyytunimū ajemogy ma'e 'jawewara 'gā mama'e reny 'jawewara resagi.

'Awamū 'gā nokwaawi Janeruwarete 'ga.

A'ere nipo 'gā anure 'ga kwaawi”,

'jau Isai 'ga ikwasiaa rakue. Isai 'ga 'eawer imū etee futat Jejuī 'ga oi peu, Garireja wyy pe Jarejuwarete 'ga mome'wau 'gā nupe.

¹⁷ A'eramū Jejuī 'ga 'jau 'gā nupe:

—Pejetywer are ki pēnea'at peje'arasagamū pejejemogyau. A'eramū futat pejepoia pejetywer awi. Anurenure'i nipo Janeruwarete 'ga wemimureramū je m'yi 'wyriaramū pē nupe. Pejetywer awi pepoir ire 'ga pē mogyi wemiayuwamū— 'jau Jejuī 'ga 'gā nupe.

Jejuī 'ga remimu'e ypy 'gā
(Maku 1.16-20; Luka 5.1-11)

¹⁸ A'ere Jejuī 'ga awau watau Garireja ypiauu reme'y'warimū. Aipo pe awau 'ga ipira rewara 'gā nesaka. Simāo 'ga, Andre 'ga. Mīmēra 'gā 'ga esaka. Simāo 'ga rer ir'ua Pedroa. Andre 'ga Simāo Pedro 'ga rewirera. Jejuī 'ga wesagamū 'gā taityuu monou etyka 'y pe.

¹⁹ A'eramū Jejuī 'ga 'jau 'gā nupe:

—Pe'je pejejua je rupi. Simu'e pēē 'jau. Naipira rewara rūi pēē 'awamū. Jarejuwarete 'ga je'ega mome'wara te pēē 'awamū— 'jau 'ga 'gā nupe.

²⁰ A'erauwe 'gā taityuu rejaa awau 'ga rupi.

²¹ Awaw ipe Jejuī 'ga Tiago 'ga resaka 'ga rewirera 'ga retee, Juā 'ga retee. Sepeteu 'ga ra'yra poromū. Yaruu pype 'gā 'upa 'uwa 'ga pyri, taityuu momyka. A'eramū Jejuī 'ga 'gā mo'wya:

—Pe'je pejejua je rupi— 'jau 'ga Tiago 'ga upe, Juā 'ga retee.

²² A'erauwe 'gā ū'jāu yaruu awi, 'uwa 'ga rejaa awau Jejuī 'ga rupi.

Kwaiwete Jejuī 'ga 'gā katu'oka
(Luka 6.17-19)

²³ Garireja wyy pyterimū Jejuī 'ga awau akou peuwara 'gā mu'jau 'Uwarete 'ga ree.

—Pejetywer awi pēpoiireramū Janeruwarete 'ga pētywera moiri pē nui. A'eramū 'ga pē mogyau wemiayuwamū— 'jau 'ga 'gā nupe, 'gā mu'jau 'Uwarete 'ga ree.

'Gā jatykaaw ipe 'ga 'gā mu'jau 'ga ree. Ojero'wu ma'e 'gā 'ga ikatu'oka.

²⁴ “Jejuī 'ga ojero'wu ma'e 'gā okatu'ok” 'ea awau uāina Siria wyy pypiaruga. A'eramū kwe pewara 'gā we futat ikwaapa. A'eramū kwe pewara 'gā ojero'wu ma'e 'gā nerua 'ga upe. Ojero'wu ma'e, iypip ma'e, ika'na ma'e, iteu ma'e, mama'eukwaawa rerekwat. Mīmēra 'gā 'gā erua Jejuī 'ga upe. A'eramū Jejuī 'ga 'gā katu'okapap.

²⁵ A'eramū kwaiwete 'gā awau Jejuī 'ga rewiri. Tekapuru wyy awi, Garireja wyy awi, Jerusareg awi, Judeja wyy awi, Jotāu ry owajara katywar awi. Mīmēra awi 'gā 'ua ajatykau Jejuī 'ga ree, 'ga je'ega renupa. Ojero'wu ma'e 'gā katu'oga resaka nanē 'gā 'ua ajatykau 'ga ree nū.

5

¹ Kwaiwete 'gā nesakawe Jeju 'ga ojeupia'i awau wwytyra rupi. A'eramū 'ga wapyka. 'Ga apygauwe 'ga ree ijemu'ewet ma'e 'gā 'ua wapyka 'ga pyri.

² A'erauwe Jeju 'ga oje'ega 'gā nupe, 'gā mu'jau 'Uwarete 'ga remifutar are.

Iku'i ma'e

(Luka 6.20-23)

³—Jarejuwarete 'ga upe "Jetywerete je tekou. Ejejuka je ree" 'jara 'gā aku'iramū ajemogyau. A'e 'gā Janeruwarete 'ga imogyau wemiayuwamū.

A'eramū 'gā aku'iramū ajemogyau.

⁴ Ojoo'o ma'e 'gā aku'iramū ajemogyau.

Anure nipo Janeruwarete 'ga 'gā mojemogyppyka'i 'gā mogyau 'gā 'arasig awi.

A'eramū nipo 'gā aku'iramū ajemogyau.

⁵ Ajuue ipota'wa ma'e 'gā aku'iramū ajemogyau.

'Gā nupe Janeruwarete 'ga mama'e esage monoi u'eawer imū etee futat.

A'eramū 'gā aku'iramū ajemogyau.

⁶ A'jea futat Janeruwarete 'ga remifutar imū etee mama'e are iparuapowet ma'e 'gā aku'iramū ajemogyau.

A'e 'gā a'jea futat Janeruwarete 'ga opoat mama'e apoukaa wemifutar imū.

A'eramū 'gā aku'iramū ajemogyau.

⁷ Ajuue ajemuaēm ma'e 'gā a'jea futat iku'i ajemogyau.

'Gā nee nipo Janeruwarete 'ga jemuaēmi.

A'eramū 'gā aku'iramū ajemogyau.

⁸ A'jea futat mama'e esage are etee ea'at ma'e 'gā iku'i futat ajemogyau.

"Tamuoryp Jarejuwarete 'ga 'jau", 'jau nipo 'gā ojeupe.

A'eramū nipo anure aipo 'gā awau Jarejuwarete 'ga pyri.

A'eramū 'gā a'e are aku'iramū ajemogyau.

⁹ Ajaupe ojomota'waara 'gā aku'iramū ajemogyau.

Anure nipo Janeruwarete 'ga 'i 'gā nupe: "Agamū jera'yra 'gā", 'jau nipo 'ga 'gā nupe.

A'eramū 'gā aku'iramū ajemogyau.

¹⁰ Jarejuwarete 'ga remifutara apo are ereko tyweripyrrera 'gā nipo aku'iramū ajemogyau.

A'e 'gā Janeruwarete 'ga amogy wemiayuwamū.

A'eramū 'gā aku'iramū ajemogyau—

'jau Jeju 'ga 'gā nupe, 'gā mu'jau ee.

¹¹—Jeremiyuwamū pejemogyramū nipo je rerowiare'ema 'gā pē kurawi. Pē nerekou tyweaete je ree. Pē je 'ēwu'jaga je ree. A'ere pēē pejereko tywereteramū pēku'i etee futat pejemogyau— 'jau 'ga 'gā nupe.

¹²—Anure nipo Janeruwarete 'ga mama'e esage monoi pē nupe kwaiwete. A'eramū pēē pejeku'iramū etee pejemogyau. Ymā te 'ā Janeruwarete 'ga rerowiare'ema 'gā 'ga je'ega mome'wara 'gā nereko tyweretei rakue. A'eramū nipo 'ga rerowiare'ema 'gā pēē nanē pē nerekou tyweaete 'ga rerowiaaramū— 'jau Jeju 'ga 'gā nupe, 'gā mu'jau ee.

Pēē 'ā jukyra 'jawe

(Maku 9.50; Luka 14.34-35)

¹³—Jukyra 'jawe pēē. Sā'ā jukyra. Ipyu omosa re 'ā miaro'oa oneme'emamū. Nan tee futat pēē. Mama'e esage apo re mama'e tywera apoukare'ema 'gā nupe. Sā'ā ae jukyra tyweramū monoa imyīna imomoa ukupepe. A'eramū 'ā ipyu wata ma'e 'gā opyruga ee. Nan tee futat pēē. Mama'e tywera aporamū 'gā mu'jawarūe'em mama'e esage apo are. Nepē nerowiari 'gā a'eramū— 'jau Jeju 'ga 'gā nupe, 'gā mu'jau ee.

Pēē 'ā tata reny 'jawe

(Maku 4.21-25; Luka 8.16-18)

¹⁴—Tata reny 'jawe nanē pēē nū. Tata reny 'ā ypytunaiwa mojesaka. Nan tee futat pēē. Jarejuwarete 'ga remifutar imū etee mama'e apo re pē nesakara 'gā neapyoramū Jarejuwarete 'ga ree. A'eramū nipo 'gā 'ga muorypa pē nee. Wwytyr apyte'rarimū amunawa apo re ipyriwara 'gā juejue esaka. Nomimarūi 'ga amū. Nan tee pēē. Pē pyriwara 'gā juejue pēnemiapofera resaka ajemogyau— 'jau Jeju 'ga 'gā nupe.

¹⁵—Nomonyga'uweri ae arāparīna mū imyīna imima mama'e 'ag are. Imonyg ire ae imonoi imyīna ajuesawamū te.

¹⁶ Nan tee futat ki pēē. Jarejuwarete 'ga rerowiare'ema 'gā nowase mama'ea peapo. A'eramū nipo pē nesakara 'gā Jarejuwarete 'ga muorypa pē nee, pē nemiapofer are— 'jau Jeju 'ga 'gā nupe, 'gā mu'jau ee.

Moisesi 'ga remikwasiaret

¹⁷ —NaMoisesi 'ga remikwasiarera mateepapa rūi je ruri. “Moisesi 'ga remikwasiarer imū kasi mama'ea peapo ne”, na'e rūi je tekou. “Janeruwarete 'ga je'ega mome'wara 'gā je'ega nia'wryri”, na'ea'uweri je tekou. Naani. Ee pē mueapyo katuawamū te je ruri.

¹⁸ A'jea futat 'gā nemikwasiarer ymanera resageramū janee 'awamū miamū futat. A'jea futat nateepawa'uweri Janeruwarete 'ga je'ega jane wi. Ywaga teepawamū ywy reewe 'eramū miamū futat nateepawa'uweri Janeruwarete 'ga je'ega— 'Jau Jejui 'ga 'gā nupe.

¹⁹ —Anure, Jarejuwarete 'ga pyri 'ga je'ega renuparera 'gā jemogyi kūima'eeteeteramū. A'ere 'ga je'ega renupap katuare'ema 'gā naani. 'Ga je'ega renup katuare'ema 'gā ajemogyau akotee ma'e 'jawe 'ga pyri oo re. “Peapo kasi mama'ea aipo 'ga je'eg imū ne” 'jara 'gā nanē ajemogyau akotee ma'e 'jawe 'ga pyri oo re nū. Aipo 'gā namojeupawa rūi 'ga pyri oo re— 'Jau Jejui 'ga 'gā nupe.

²⁰ —Fariseu 'gā, Moisesi 'ga remikwasiarer are moromu'jara 'gā netee mama'e esagea wapo 'me ae reape etee. A'eramū nipo 'gā nesakara 'gā 'Jau: “Mama'e esagea 'gā wapo”, 'Jau nipo 'gā 'gā nesakara 'gā. A'ere 'gā najarejuwarete 'ga muorypawamū rūi mama'e apoi. 'Gā 'jawe kasi peko ne. Jarejuwarete 'ga muorypawamū etee mama'e apou 'eramū etee nipo 'ga pē mogyi wemiayuwamū— 'Jau 'ga 'gā nupe, 'gā mu'Jau ee.

Pēmara'ne kasi pejepytuna 'gā nee ne

²¹ —Ymā te 'ga amū 'i janyepy 'gā nupe rakue: “Pejuka kasi 'ga amū ne. Oporojuka ma'e 'ga nipo 'gā weroo amū 'wryriara 'ga upe. A'eramū nipo 'wryriara 'ga oporojuka ma'e 'ga jukaukaa 'gā amū nupe, 'ga remijukafera repyaawamū”, 'Jau 'ga amū janyepy 'gā nupe rakue— 'Jau Jejui 'ga 'gā nupe, 'gā mu'Jau ee.

²² —A'jea futat 'gā 'eawera. A'ere 'awamū je 'i pē nupe: Pēmara'ne ekoete kasi pejepytuna 'ga ree ne. Opytuna 'ga ree imara'ne ekoete ma'e 'ga nanē nipo 'gā erawau ekoete 'wryriara 'ga upe nū. Opytuna kurapara 'ga nanē nipo 'gā erawau ekoete 'wryriara poara 'gā nupe nū. “Nene'akwaawi te 'ā ene” 'ga amū upe 'eramū Janeruwarete 'ga aipo 'jara 'ga monoi mama'eukwaawa rapyaw ipe— 'Jau Jejui 'ga 'gā nupe, 'gā mu'Jau ee.

²³ —A'eramū ki pēē pejemogyau esage Jarejuwarete 'ga upe. Jarejuwarete 'ga mogytaaw ipe mama'e mū rerooaw ipe pejejea'aramū pejepytuna 'ga ree, pejejee iporomutare'ema 'gā nee 'Jau.

²⁴ A'eramū ki pejejee iporomutare'ema 'ga upe ra'ne pejewau 'ga mojrūmū pejejeupe. Pejejeupe 'ga mojrūmū re tāmējē pejewau Jarejuwarete 'ga mogytaaw ipe nū, mama'e rerawau 'ga upe— 'Jau Jejui 'ga 'gā nupe, 'gā mu'Jau ee.

²⁵ —“Mama'e tywera 'ga wapo jee”, pejejeupe 'ga amū 'eramū pejewau pejeporogytau 'ga upe, 'ga mota'wau pejejeupe. Kasi a'e pe 'ga pē nerooi 'wryriara 'ga upe ne. A'eramū 'wryriara 'ga pē monoukaa jefaruu 'ga upe, pē munewukaa ne.

²⁶ Moromunepawa pype pejemono re nipo nepe'earūi jui. Mama'e tywera apo mepy re tāmējē te pe'ē jui— 'Jau Jejui 'ga 'gā nupe, 'gā mu'Jau ee.

Peko kasi pejejemireko are ne

²⁷ —Ymā te 'ā Moisesi 'ga 'i janee rakue: “Peko kasi pejejemireko are ne”, 'ga 'i janee rakue.

²⁸ A'jea futat 'ga 'eawera. A'ere 'awamū je 'i pē nupe: Kūjā mū resag ire nipo pēē mū 'Jau: “Kuu. Ikatura'mū te ēē nū'ū. Ako pa je ēē ree kwy”, 'Jau nipo pēē pejejeupe. Aipo 'jara 'ga wemirekoe'em are ako ma'ea futat. Wea'aw imū etee futat aipo 'ga akou wemirekoe'em are— 'Jau Jejui 'ga 'gā nupe, 'gā mu'Jau ee.

²⁹ —“Jerea je motywet. Ēē resage'em ire amunipo 'ā je najerea'ari ēē ree teko are”, 'Jau nipo pēē pejejeupe. A'eramū je 'Jau pē nupe: “Orereaa ore motywerukat”, 'Jau pejejea pemosok imonou imomoa pejejewi. Kasi a'e pe pēnea pē motywerukaru'Jaw ine— 'Jau 'ga 'gā nupe. —Wea mosoga ay futat wea mosokara 'gā nupe numiamū. A'ere mama'eukwaawa rapyaw ipe pēo te naay teepawi pē nui. Janeruwarete 'ga mama'e tywera apoara 'gā monou mama'eukwaawa rapyaw ipe. A'ea te nipo ayay futat aipo pype imonopyra 'gā nupe— 'Jau Jejui 'ga 'gā nupe.

³⁰ —“Mama'e apoa ore motywerukat”, 'Jau pejepoa pemonok imonou imomoa pejejewi. Aepo monoga ay futat numiamū. A'ere Janeruwarete 'ga mama'e tywera apoara 'gā mama'eukwaawa rapyaw ipe imomopora teayramū. A'eramū waywayramū imonopyra 'gā nupe— 'Jau Jejui 'ga 'gā nupe.

Peetyg awi pejejemirekoa

(Maku 10.11-12; Luka 16.18)

³¹ —Ymā te Moisesi 'ga 'i rakue: “Pejejemireko retyka ki ka'arana pekwasiarukat 'ga amū upe ēē ree. 'Aetyk je ene tejemirekoferamū akiko”, pe'je ki ikwasiarukaa pejejemirekofera ēē ree, imonou ēē upe”, 'Jau 'ga rakue— 'Jau Jejui 'ga 'gā nupe.

³²—A'ere je 'awamū je 'i pē nupe: Peetyk ekoete kasi pejemirekoa ne. 'Ga amū ēē ree 'ga reko re etee pēē etyka. Kasi a'e pe tekotee 'gā 'i ēē upe: "Okō nipo ēē amutee 'ga ree ra'e. A'eramū ēē mena 'ga ēē retyka", 'jau nipo 'gā ēē upe— 'jau Jeju' 'ga 'gā nupe, 'gā mu'jau ee. —A'eramū 'gā anure kūima'e ēē ree amū remiarūnamū 'jau ēē upe ne: "Kuu. Emā'ē 'ga kūjā tywera ēē 'ga wereko wemirekoramū", 'jau nipo 'gā ēē upe. A'eramū 'ga ēē rereko re nipo amutee 'gā 'jau: "Amutee 'ga remireko ēē 'ga wereko", 'jau nipo 'gā 'ga upe— 'jau Jeju' 'ga 'gā nupe, 'gā mu'jau ee.

Pē'me kasi Jarejuwarete 'ga upe ne

³³—Ymā te Moisesi 'ga 'i janeypy 'gā nupe rakue: "Pē'me kasi Jarejuwarete 'ga upe ne. 'Taapo mama'e esagea ene upe 'jau' Jarejuwarete 'ga upe 'jaramū pēē aipoa etee futat iapou 'ga upe peje'eawer imū etee futat. A'ere kasi pē'me ne", 'jau 'ga rakue.

³⁴ A'ere je 'i pē nupe: "Ywaga teepawe'emamū je mama'e apoi enee", 'jawe'em pēē pejejaupe, pejeje'ega rerowiarukaawamū. Pe'je peje'me'emamū pejejaupe. Ywag ipe Janeruwarete 'ga reko'i. A'eramū pēē ywaga mome'wau ekoete'em pejejaupe erowiarukaa futatee.

³⁵ Ywya nanē pēē imome'wau ekoete'em pejejaupe nū. Ywya 'ā 'ga py rupawa futat. A'eramū pēē peje'me'emamū ee nū. Jerusareg are nanē peje'me ekoete'emamū nū. Jerusarega jane'wyriarareterete 'ga 'wyraretea te. A'eramū pēē imome'wau ekoete'em pejejaupe erowiarukaa futatee.

³⁶ "Mama'ea taapo ene upe 'jau' 'eramū pēē aipo etee futat iapou peje'eawer imū etee futat. Pejeje'ega ekoete'em futat pejemogyau. "Teakag are je 'i enee mama'ea taapo enee 'jau", 'jawe'em pēē pejejaupe erowiarukaa futatee. Naene rūi e'awa mosigara. Naene rūi nanē e'awa mo'nara nū. A'eramū ki pēē pejeakag are peje'me'emamū pejejaupe.

³⁷ "Mama'ea taapo enee 'jau' 'eramū pēē aipo etee futat iapou. Mama'e are pejeparu-apowere'emamū pēē "Naani. Najeparuapoweri je ee", 'jau tāmējē ki pēē pejejaupe. Pē'me kasi pejejaupe ne. Ojeupe pē'me'emamū 'gā pēje'ega rerowiaa. Ojeupe pē'meramū 'gā pēje'ega nuerowiari futari. "I'me ma'e 'gā te ako", 'jau etee 'gā pē nupe ne. "Janeruwarete 'ga remianuwamū je 'i enee: Mama'ea taapo enee 'jau, a'e je enee", 'jau nipo 'gā o'me rerowiarukaawamū ajaupe. Mama'eukwaawa 'wyriara i'me ma'ea futat. A'eramū ki pēē peje'me'emamū pejejaupe— 'jau Jeju' 'ga 'gā nupe.

*Pejepyk kasi 'gā nee ne
(Luka 6.29-30)*

³⁸—Ymā te 'ā Moisesi 'ga 'i rakue: "Pejepyg iki 'gā amū nee. 'Gā amū nipo pēnea mamuka 'eramū pejepjyka 'ga ree, 'ga rea mamuka. 'Ga amū pejejāja mopen ire pēē 'ga rāja mū mopena, pejepjyka 'ga ree", 'jau 'ā Moisesi 'ga rakue— 'jau Jeju' 'ga 'gā nupe.

³⁹—A'ere je 'i awamū je 'i pē nupe: Pejepyk kasi nanuara 'gā nee ne, a'e je pē nupe. 'Ga amū nipo eneretywape nupāu. A'eramū ki ejetywape nupānamū erowag etee amogaty 'ga upe— 'jau Jeju' 'ga 'gā nupe u'ama.

⁴⁰—Eneraitya nipo futaa nipo 'ga amū ene rerawau 'wyriara 'ga upe. "Ejaitya emut amū 'ga upe, 'ga mepyawamū", ere ki 'ga upe, 'jau futatee nipo 'ga ene rerawau 'wyriara 'ga upe. A'eramū ki ejaitya emono etee 'ga upe ejaity poakuwuu reewe— 'jau Jeju' 'ga 'gā nupe, 'gā mu'jau ee.

⁴¹—"Majepi kilometro rupi ene jekaraemā eroo jee", ejeupe 'ga amū 'eramū ene erawau mukūi kilometro rupi 'ga upe— 'jau Jeju' 'ga 'gā nupe, 'gā mu'jau ee.

⁴²—"Mama'e mū emut jee", ejeupe 'ga amū 'eramū imonou etee futat 'ga upe— 'jau Jeju' 'ga 'gā nupe. —"Ekaraemā mū emut jee ra'ne", ejeupe 'ga amū 'eramū "naani", ere kasi 'ga upe ne. Emono futat 'ga upe— 'jau Jeju' 'ga 'gā nupe, 'gā mu'jau ee.

*Pēporomutar iki pēē pejeeje iporomutare'ema 'gā nee
(Luka 6.27-28, 32-36)*

⁴³—Pēmu'jara 'gā 'ā e' i pē nupe: "Pēporomutar ete ki pēē pejejekoty'aawa 'gā nee. Pereko esage etee ki 'gā. A'ere ki pejeeje iporomutare'ema 'gā pereko tywet", 'jau 'gā pē nupe.

⁴⁴ A'ere 'ā je 'i pē nupe: Pereko esage pejejekoty'aawa 'ga. Pejeeje iporomutare'ema 'gā nee nanē pejejekau esage nū. "Ejejuka esage ki ore rereko tywera 'gā nee", 'jau etee ki pēē Jarejuwarete 'ga upe 'ga nee.

⁴⁵ Aipo apo re nipo pē nesakara 'gā 'i: "A'jea futat. 'Gā Ku'jywa 'ga remiayuwaretea. A'eramū 'gā 'ā 'ga 'jawe 'gā ojee iporomutare'ema 'gā nereko esagei", 'jau nipo 'gā pē nesaka. Janeruwarete 'ga mama'e esagea wapo pāwē pāwē janee. Kwara 'ga imuenyu esage ma'e 'gā nupe, ia'wyre'ema 'gā nupe we. Amana 'ga imogyrukaa mama'e esage apoara 'gā nupe, mama'e tywera apoara 'gā nupe we— 'jau Jeju' 'ga 'gā nupe, 'gā mu'jau ee.

⁴⁶—Pejeee iporomutat ma'e 'gã nereko esagea etee sipo Janeruwarete 'ga afutat? Pejeee iporomutare'ema 'gã nereko tywera sipo 'ga afutat? Naani. Pë mepy sipo 'ga pejeee iporomutat ma'e 'gã nereko esage are? Naani. Nomepyi futari 'ga pë nupe. "Itywereite 'wyriara upe ka'aranüü reroora 'gã", 'jau 'ã pëë jepi. A'etee 'gã miamü wereko esage ojee iporomutat ma'e 'gã.

⁴⁷ Pejeee iporomutat ma'e 'gã nupe etee oporogyta ma'eramü 'ã pejejemogyau Janeruwarete 'ga rerowiare'ema 'gã 'jawe. 'Ga rerowiare'ema 'gã miamü oporogytau ojee iporomutat ma'e 'gã nupe. A'eramü je 'jau pë nupe: 'Gã nupe juejue ki peporogyta. Pejeee iporomutat ma'e 'gã nupe, pejeee iporomutare'ema 'gã nupe. Mïmera 'gã nupe pejeporogytau pejejemogyau— 'jau Jejuü 'ga 'gã nupe, 'gã mu'jau ee.

⁴⁸—Janeruwarete 'ga 'jawe futat— 'jau Jejuü 'ga 'gã nupe, 'gã mu'jau ee.

6

Pejeeuae kasi pemono mama'ea Jarejuwarete 'ga upe ne

¹ A'eramü Jejuü 'ga 'jau akou 'gã nupe, 'gã mu'jau 'gã neko esage are:

—Jarejuwarete 'ga upe mama'e apou kasi peapo amutee 'gã nupe pejeee 'gã moporesakawamü etee ne. Pënemïapo resakara 'gã nipo 'jau: "Kuu. Esage ma'e 'ga ra'e", 'jau nipo 'gã pë nupe. A'eramü nipo nanuaramü Janeruwarete 'ga pë mepyawe'em pënemïapofer are. Aipo 'gã 'ea te futat pënemïapofera repya ra'e— 'jau 'ga 'gã nupe.

²—A'eramü pëë, imama'e'ema 'gã nupe mama'e mono re imonowe'em amutee 'gã neape. Pejeeuae tywi pejeeuae mama'e mü monou miamü pëë imome'wawe'em pejeeuae, pejejerowiarape'ema pejejemïapofer are. Sã'ã ae mama'e esage apoaramü. Nan tee futat aipo 'gã numiamü. A'ere 'gã iapoi amutee 'gã ojee 'gã moporesakawamü etee. Judeu 'gã jatykaaw ipe kwaiwete 'gã ajatykau 'upa. A'eramü 'gã 'gã neape mama'e monou imama'e'ema 'ga amü upe. Amunawa myter ipe nanë 'gã mama'e monou 'gã nupe nü. Wemiapoa 'gã iapou mytuna 'gã nemiesagamü. 'Gã nupe esaukaripyramü te 'gã iapoi. A'eramü nipo 'gã nesakara 'gã 'jau: "Kuu. Esage pa'e 'gã na'e nü. Mama'ea 'gã omonu imama'e'ema 'gã nupe", 'jau nipo 'gã 'gã nesakawe. A'eramü nipo 'gã nesakarera 'gã 'eawera etee futat 'gã nemïapofera repya. Janeruwarete 'ga 'gã mepyawe'em anure— 'jau 'gã 'gã nupe.

³⁻⁴—A'eramü ki pëë, ikaraemãe'ema 'gã amü nupe mama'e mono re, imonou jemime futat. 'Gã nupe imonou kasi amutee 'gã nupe pejesaukar etee ne. Pejeeekoty'aawa 'gã nupe miamü pëë pejejemïapofera mome'wawe'em. Jarejuwarete 'ga upe pejejesakawamü futat pëë iapou. A'eramü nipo Janeruwarete 'ga pë mepyau pënemïapofer are— 'jau Jejuü 'ga 'gã nupe.

Jarejuwarete 'ga upe ki pejee'ega pemono

(Luka 11.2-4)

⁵—Jarejuwarete 'ga upe pejee'ega monou ki, 'ga upe etee futat peje'eg. A'ere 'ã 'ga upe oporogyta 'me ma'e 'gã porogyta 'mei etee 'ga upe. Judeu 'gã jatykaaw ipe 'gã 'ã Jarejuwarete 'ga upe oporogytau 'me ajemogyau. Amunawa pyter ipe nanë 'ã 'gã oporogytau 'me ajemogyau 'ga upe nü. A'ere 'gã amutee 'gã nemianuwamü tee 'gã porogyta 'me 'ga upe. 'Gã wesakawamü etee 'gã porogyta 'mei 'ga upe. A'eramü nipo Janeruwarete 'ga 'gã mepyawe'em anure— 'jau Jejuü 'ga 'gã nupe, 'gã mu'jau ee.

⁶ A'eramü 'ga 'jau wenupara 'gã nupe:

—Pejemogy kasi 'gã 'jawe ne. Jarejuwarete 'ga upe pejeporogytau pejeepe'au'i 'gã nui ra'ne. Pejejetee pejewau peje'ÿina pejeporogytau 'ga upe. Jarejuwarete 'ga upe ete'i futat peporogyta pejejemogyau. A'eramü nipo 'ga anure pë mepyau ojeupe pëporogyta are— 'jau Jejuü 'ga 'gã nupe, 'gã mu'jau ee.

⁷—Peporogyta ekoete kasi Jarejuwarete 'ga upe ne, 'ga upe pejeporogytau ne. 'Ga rerowiare'ema 'gã oporogyta 'me etee 'ga upe. Oporogytau 'me kwaiwete 'ga upe. "Ojeupe je porogyta kwajamü nipo 'ga jeje'ega renuwü", 'jau 'gã ojeupe numiamü.

⁸ A'ere kasi peporogyta 'ga upe aipo 'gã 'jawe ne. Pejeea'awa etee peentü 'ga upe. Ojeupe peporogyta enune 'ga pënemïfutara kwaawi. A'eramü ki pëë pejejemïfutara etee enüina 'ga upe— 'jau 'ga 'gã nupe.

⁹—Nan iki peporogyta 'ga upe:

"Kiapi'ni. Ene 'ã Ooreruwaretea. Ywag ipe 'ã ere'ÿi. A'eramü ore oroje'ega arajupa enee. Tene muoryp ki 'gã najuejue etee.

¹⁰ Kamësiete ki 'gã najuejue etee tene rerowiat ajemogyau.

Kamësiete tere'ÿi 'wyriaramü oree najuejue etee 'jau.

Ywagipewara 'gã 'ã mama'ea wapo eneremïfutar imü etee futat.

Nan tee futat ywy pewara 'gã iapoa ore arafutat.

¹¹ 'Awamũ ki mama'ea emut oree oreremi'uramamũ.

¹² Norerea'aru jawi ore mama'e tywera orojeupe 'ga iapoawer are.

A'eramũ ki ene ejea'aru jawe'emamũ oretywer are.

¹³ Ore mamuakat futar iki ape mama'e tywera apoe'em are.

Mama'e tywera jar awi ene ore a'gwau, mama'eukwaawa 'wyriar awi",

pe'je ki 'ga upe— 'jau Jeju'i 'ga 'gã nupe, 'gã mu'jau 'Uwarete' 'ga upe 'gã porogyta are.

¹⁴—'Gã amũ pejejereko tyweawer are pëë 'gã naykae'emamũ Janeruwarete 'ga nanë nepë naykai pënemapio tywer are. Imoia etee futat 'ga pëtywera pë nuu.

¹⁵ A'ere 'ga pejejuaykapawe'emamũ 'ga nanë pë nakaupawe'em ee nü— 'jau Jeju'i 'ga 'gã nupe, 'gã mu'jau ee.

¹⁶—'Ga upe pejeporogytaawa upe iwaëmauwe pëë pejewau pejemim'ware'ema pejeporogytau Jarejuwarete 'ga upe. Aipoa esage. Aipoa Janeruwarete 'ga amuoryp. A'ere kasi pejejeakwara pemu'arasig ee ne. Janeruwarete 'ga remiayup 'me 'gã i'arasig ajemogyau. Weakwara nipo 'gã imotyaiipa ajemogyau. A'eramũ nipo 'gã nesakara 'gã 'jau: "Kwe 'ga ty'ara weroporogyta Ku'jywa 'ga upe ra'e", 'jau nipo 'gã nesakara 'gã 'gã nupe. A'eramũ 'gã 'eawera etee futat 'gã nemiapofera repya. Janeruwarete 'ga nomepyi futari 'gã ee— 'jau Jeju'i 'ga 'gã nupe 'gã mu'jau ee.

¹⁷—A'eramũ pëë 'ga upe pejeporogytaawa upe iwaëmauwe pejelowaeita, pejemoyma peje'wyr awi peje'jãue'ëwe.

¹⁸ A'eramũ pë nesakara 'gã ty'ara pereko kwaape'ema ajemogyau. A'eramũ Janeruwarete 'ga etee futat ikwaapa 'ũina. A'eramũ 'ga pë mepyau ee anure— 'jau Jeju'i 'ga 'gã nupe, 'gã mu'jau ee.

Jarejuwarete 'ga ree 'gã mu'eawet

(Luka 11.34-36; 12.22-34; 16.13)

¹⁹—Anure nipo Janeruwarete 'ga pë mepyai ojeupe pënemapiofer are. A'eramũ ki pëë pejejea'aramũ pejejeupe imepyram are. 'Au kasi pemomytun pejekaraemã ne. 'Auwara mama'ea teepaw etee. Jypemeruua etee taity a'upap. Itaju apopyrera miamũ eposipopora etee a'upap. Muna'ywa nanë amunarũm pëkaraemã are 'jau. A'eramũ atee pawamũ etee pë nuu.

²⁰ A'eramũ ki pëë mama'e apou Jarejuwarete 'ga upe etee. A'eramũ 'ga anure mama'e esage monou pë nupe, ojeupe pënemapiofera mepyawamũ. Peu te mama'ea nateepawa'uweri. Nitywi futari mama'e mateepaara. Nitywi futari jypemeruua. Naeosipopori futari mama'ea. Nitywi futari amunarũ ma'ea peu.

²¹ Ojeupe pëë mama'e aporamũ 'ga mama'e mũ mÿigatui pë nupe peu ojeypyri. Ojeupe pënemapiofer imũ etee futat 'ga pë mepyau peu. Ojeupe kwaiwete mama'ea pëë iapo re 'ga kwaiwete futat mama'e mÿigatui pë nupe. Ojeypyri peo re te nipo 'ga wemimÿigatufera muri pë nupe. A'eramũ ki pëë mama'e apou 'ga upe kwaiwete futat. 'Auwara karaemã momytunara 'gã ea'at 'auwara ako ma'e are etee ajemogyau. A'ere ywag ipe karaemã momytunara 'gã nearamũ Jarejuwarete 'ga ree— 'jau Jeju'i 'ga 'gã nupe.

²²⁻²³—Tata reny 'jawe aereaa. Sã'ã tata enya mama'e resaukara janee. Nan tee futat jarejeau jane mama'e resagi. Ea ma'e 'gã wesak katu katu futat mama'ea. Eawep ma'e 'ga te aje 'ã nuesakatui mama'ea. Nan tee futat pëë. Ea ma'e 'gã 'jawewaramũ pëë pëneapyo pejememogyau jeje'eg are, erowiaa pejememogyau. A'eramũ pëë mama'ea apou Jarejuwarete 'ga je'eg imũ etee futat. A'ere eawep ma'e 'jawewaramũ nepëneapyoi futari jeje'eg are. Neperowiara jeje'ega. A'eramũ pëë pejemifutar imũ etee futat mama'ea apou pejememogyau. Ypytunaiwa pype wata ma'e 'jawe pëë— 'jau Jeju'i 'ga 'gã nupe.

²⁴—Namukũja 'wyriara 'gã nemiayuwamũ rui 'ga amũ reko. Noporowykya'uweri 'ga amũ mukũja 'wyriara upe. Kasi a'e pe 'ga majepeja 'ga ree etee 'ga poromutaramũ akou ne. Ajepeja 'ga ree jëmi oporomutare'emamũ ne. Wemifutara 'ga je'eg imũ etee mama'ea apou ne. A'eramũ 'ga wemifutare'ema 'ga je'eg imũ mama'ea apowe'em ne. Nan tee futat pëë. Pejeka'aranũm kwai are etee ea'at ma'eramũ nepënea'aru jawi Jarejuwarete 'ga ree— 'jau Jeju'i 'ga 'gã nupe.

²⁵—Ma'eramũ 'ã je 'i pë nupe: Pënea awi mama'ea are etee pejememogyau, je 'i pë nupe. "Ma'ja je 'i'wau 'awamũ", pe'je awi pejejeupe— 'jau Jeju'i 'ga 'gã nupe 'ũina. —Pënea'ar awi pejejaity are etee pejememogyau. Jarejuwarete 'ga ree te pejemogyppyk pejememogyau, 'jau je 'ã pë nupe— 'jau 'ga 'gã nupe 'ũina. —'Ga te 'ã pë apo rakue. A'eramũ 'ga ojee pejemogyppygamũ mama'ea mua pë nupe.

²⁶ Sã'ã wyra'ia. Wyra'ia 'ã nuapoi agawewi mama'ea. Nitywi agawewi 'ã mama'ea tymawa. A'etea 'ã Janeruwarete 'ga mama'ea omono jupe— 'jau Jeju'i 'ga 'gã nupe. —Niapoi

agawewi wyra'ia 'ga upe. A'etea 'ga ojejukau ee. Pêê taetu aje 'ã aeramũ 'ga upe. A'etea sipo 'ga nojejukai pê nee?— 'jau 'ga 'gã nupe.

²⁷ —Peko sipo amũ pejeyman'e'em are ete ea'at ma'eramũ amũ pejeyman'e'emamũ namutat?— 'jau Jeju'i 'ga 'gã nupe. —Naani. Nia'wyr'i futari aipoa miamũ pê nupe ee pêne'a'ara. A'etea te nipo pëyman pejejemogyau. Pejejwyr are tee pejejea'aramũ miamũ pëmanũ futat. Mama'e are etee pêne'a'at pê nekoa nepê koga'uweri— 'jau Jeju'i 'ga 'gã nupe.

²⁸ —A'eramũ ki pêê pejejea'are'emamũ pejejemogyau pejejaity are ete. Sã'ã 'ywyotyra jũ mewara. 'Ywa 'ã noporowykyi agawewi opotytr are. A'ere 'ã ipotytra esageteeramũ— 'jau 'ga 'gã nupe.

²⁹ —Ymã te janepytunera 'ga, Sarumãu 'ga, ikaraemã kwai ma'ea rakue. 'Ga te 'ã taity esage ma'ea rakue. A'ere 'ã 'ywyotyra te 'ga raity esage apyraawi.

³⁰ 'Ywyotyra 'ã majepëi 'ara rupi etee wesageramũ. A'eramũ 'ã ai'iwe opýjagamũ. A'eramũ nipo 'ga amũ iapyau. A'etea 'ã Janeruwarete 'ga omokaturam ipotytra jupe— 'jau 'ga 'gã nupe. —Jupe iapo re sipo 'ga nomonoi mama'e esagea pê nupe? Pêê taetu aje 'ã pënesage 'ywyotyra resage apyraapa 'ga upe. Ma'eramũ pêê 'ga rerowiaraipe etee 'ũ? Pe'je 'ga rerowiaa a'jea futat pejejemogyau— 'jau Jeju'i 'ga 'gã nupe.

³¹ —Au'je mama'e are etee pêne'a'ar ire. Pejemuaëm awi pejejemi'uram are etee. Pejemuaëm awi nanê pejejaity are etee nũ— 'jau Jeju'i 'ga 'gã nupe.

³² —Janeruwarete 'ga rerowiare'ema 'gã te ajemuaëm mama'e are etee. A'ere kasi pêê 'gã 'jawe peko ne. Janeruwarete 'ga pënemifutara okwaap. Ojejuka 'ga pê nee— 'jau Jeju'i 'ga 'gã nupe.

³³ —Jarejuwarete 'ga remifutar are etee pejejea'aramũ pejejemogyau. 'Ga je'ega renuw are ki pêne'a'at. "Ga remifutar imũ sipo je mama'e apoi" 'e are etee ki pejejea'aramũ pejejemogyau. Wemifutar imũ mama'e apo are pejejuka re 'ga mama'e esage muri pê nupe, ojejukau pê nee— 'jau Jeju'i 'ga 'gã nupe.

³⁴ —A'eramũ ki pêê pejemuaëme'ema ai'iwewar are. "Au'je pa 'awauwewara kwy", pe'je ki pejemuaëme'ema ee— 'jau Jeju'i 'ga 'gã nupe, 'gã mu'jau ee.

7

Pëpota'wa ki pejejuee

(Luka 6.37-38, 41-42)

¹ —"Nepë'a'wyr'i pêê Jarejuwarete 'ga upe", pe'je kasi 'gã amũ nupe ne. Aipoa 'gã nupe 'e'emamũ Janeruwarete 'ga nanê aipo ne'i pê nupe. "Mama'e tywerete 'ã ereapo ekou", pe'je kasi 'gã nupe ne. Aipoa 'gã nupe pêê 'e'emamũ Janeruwarete 'ga nanê aipo ne'i pê nupe nũ— 'jau Jeju'i 'ga 'gã nupe 'ũina.

² —Gã nupe pë'eawera 'jawerimũ etee futat nipo Janeruwarete 'ga 'i pê nupe. Mama'ea 'gã nupe iapoawera 'jawerimũ etee futat Janeruwarete 'ga iapoi pê nupe— 'jau 'ga 'gã nupe 'ũina.

³⁻⁴ —Najuejue etee futat pëtywet. A'eramũ pêê "Itywet ma'ea pêê" 'jawarũ'e'em pejejaupe. A'eramũ ki pêê pejejaupe aipo 'e enune pejetywera ra'ne etyka.

⁵ "Najetywi je tetywera pyu", pe'je nipo numiamũ. A'ere pëtyt futat. A'eramũ pêê pejetywer awi ra'ne pejejoia. A'ere pejejewirera tepepoat 'jau. "Ere epoia etywer awi", tepe'je pejejewirera 'ga upe 'jau— 'jau Jeju'i 'ga 'gã nupe 'ũina. —Sã'ã ae 'ywa tuwyrera weape i'aramũ ajuea pewara resage'ema ajau'i. A'eramũ 'ã ae enuëmkaa ra'ne wea awi. Ojewi enuëm ire 'ã ae ojoma'e resaka ajuea awi. Nan tee futat ae otywer awi ra'ne ae poiri. A'ere ojopoa— 'jau Jeju'i 'ga 'gã nupe.

⁶ —Pe'je pejewau kwe pewara 'gã mu'jau Jarejuwarete 'ga ree, a'e je 'awamũ pê nupe. Ee iporenuwiwere'ema 'gã nipo e'i pê nupe: "Noreporenuwiweri ore 'ga je'eg are", 'jau nipo 'gã pê nupe. A'eramũ pêê 'ga mome'wau'jape'ema 'gã nupe. Pejewau kamësiete 'gã nui. Amutee 'gã nupe etee pejewau imome'wau nũ. Kasi a'e pe iparuerowiariwere'ema 'gã mara'neramũ pê nee ne. Kasuru jarũ 'jawe aipo 'gã. Sã'ã kasuru jarũ ujure'emamũ ae murukare'ema ojeypyri. Nan tee futat aipo 'gã. Sã'ã tajaarana. Ojeupe ita esage momor ire ipyruga etee ee. Nan tee futat aipo 'gã— 'jau Jeju'i 'ga 'gã nupe, 'gã mu'jau ee.

Esage futat Janeruwarete 'ga

(Luka 11.9-13)

⁷ A'eramũ Jeju'i 'ga 'gã mu'jau Jarejuwarete 'ga upe 'gã porogyta are:

—Ojeupe pêê mama'e renũjamũ Janeruwarete 'ga imuri pê nupe. "Je poar ape" ojeupe 'eramũ 'ga pê poari futari. Kamësiete 'ga pejejoare'emamũ, pejeje'ega pejejemogyau pejejoere'emamũ 'ga upe. Sã'ã mama'e 'ara ae wi. A'eramũ 'ã ae ijarahũ awau ekaa. Esag ire tãmêjê 'ã ae opoia ekar awi. Nan tee futat kasi peojet 'ga upe mama'e renũi awi ne. A'eramũ 'ga mama'e mua pê nupe— 'jau Jeju'i 'ga 'gã nupe. —'Okwara mopogara 'ga 'jawe ki

peko. 'Okwara rawopytymo'wog ire etee 'ga poiri imopog awi. Nan tee futar iki pēē. Pepoit kasi 'ga upe pejeporogya awi ne. A'eramū 'ga pē poari futari— 'Jau Jejuī 'ga 'gā nupe.

⁸—“Mama'e emut amū jee” 'jara 'gā nupe 'ga imuri futari. “Je poar ape” 'jara 'gā 'ga opoat futat. Ojeupe peje'egamū 'ga je'egi futari pē nupe— 'Jau 'ga 'gā nupe.

⁹—Pejenosī kasi mama'ea 'ga upe enūina ne. Mama'e esage tee te 'ga amut pē nupe. Namura'uweri 'ga mama'e tywera pē nupe. Sā'ā pēē. “Mama'ea emut amū jee, Kiapi'ni”, pejeja'ya pejejeupe i'eramū mama'e katurama etee imonoa pejeja'ya upe. Nan tee futat Janeruwarete 'ga mama'e esagea etee imuri pē nupe, “mama'e esagea emut jee” 'eramū. Ta'yriaramū sipo ita pemono pejeja'ya upe, mani'oko'o renūjamū? Naani.

¹⁰ Moja sipo pemono pejeja'ya upe, ipira renūjamū? Naani. Mama'e esagea etee futat pemono pejeja'ya upe— 'Jau Jejuī 'ga 'gā nupe.

¹¹—Pēē 'ā aetywera agawewi. A'etea 'ā mama'e esagea etee pemono pejeja'ya upe. Nan tee futat ywag ipe 'ūi ma'e 'ga— 'Jau 'ga 'gā nupe. —Janeruwarete 'ga taetu 'ā esage te. Ma'eramū sipo 'ga mama'e esage mure'ema pē nupe, ojeupe pēē enūjamū? Amut futat 'ga mama'e esagea ojeupe enūinaramū pē nupe— 'Jau Jejuī 'ga 'gā nupe, 'gā mu'Jau ee.

¹²—Pēē 'ā Jarejuwarete 'ga remiayuwa. Pefutat 'gā pejejereko esagea. A'eramū pēē nanē pejejujukau esage 'gā nee nū. Aipo are Moisesi 'ga ikwasiani inuga janee rakue. Janeruwarete 'ga je'ega mome'wara 'gā nanē ikwasiaa ee rakue nū— 'Jau 'ga 'gā nupe 'ūina.

Mukūi pea

(Luka 13.24)

¹³⁻¹⁴—Pe'i'i rupi ki pekwap. Pe'i'ia ywag ipe oo ma'ea. A'ere noko ayeteramū jupi ae oa. Amume'riramū etee te peo aipoa pe'i'i rupi. Pe'i'i rupi oo ma'eramū etee te peo Jarejuwarete 'ga pyri nakwaparimū warāu rūi pejemogyau peu. Peuu rupi ae oa te ajee naayi futari numiamū. Kwaiwete te 'gā oi peuu rupi. A'ere peuu rupi oo ma'e 'gā oi mama'eukwaawa rapyaw ipe te. Peu futat 'gā oi ajemogyau nakwaparimū warāu rūi. Peu 'gā awau ajemogyau tywet— 'Jau Jejuī 'ga 'gā nupe.

I'me ma'e are 'gā mu'eawet

(Luka 6.43-44)

¹⁵—A'eramū ki pēē pejejea'gwau Jarejuwarete 'ga je'ega mome'wararūare'ema 'gā nui. 'Ga je'ega nipo 'gā omome'u 'me pē nupe. 'Ga je'ega mome'wara 'jawe futat nipo 'gā numiamū. A'ere 'gā o'meramū te 'gā 'i. “Tamomoirukat 'gā Jarejuwarete 'ga rerowiar awi 'Jau kwy”, e'i tee 'gā ajemogyau. A'eramū pēē 'gā nerowiare'ema pejemogyau— 'Jau Jejuī 'ga 'gā nupe.

¹⁶—'Gā je'eg are ki pekwaap 'gā. Jarejuwarete 'ga je'eg imū etee 'gā mama'e mome'uramū pēē 'gā kwaapa. “Aipo 'gā a'ea futat 'ga je'ega omome'u”, pe'je ki 'gā je'ega renupa. 'Ga 'eawer imū moromu'jare'ema 'gā sigaty etee omome'u 'ga je'ega ajemogyau. Sā'ā y'waa 'ywa. Nooi ae ju'yw are maga rekaa. Nopo'oi ae mamāūūa amnyeju 'yw awi. Nan tee kasi peo moromu'jat tywera 'gā je'ega renuwu'japa ne— 'Jau Jejuī 'ga 'gā nupe.

¹⁷—Y'wa 'yp katurama i'a katuram tāmējē futat. Y'wa 'yw a'wyre'ema o'ywa 'jawe etee futat ni'aa'wyri. Y'wa 'yp katurama pekwaap i'a esage are.

¹⁸ Ni'a katurama'uweri futari y'wa 'ywa tywera. Y'wa a'wyre'ema etee 'ā akā are. Y'wa katurama 'aa o'ywa katurama 'jawe tāmējē futat— 'Jau Jejuī 'ga 'gā nupe, 'gā mu'Jau ee.

¹⁹⁻²⁰—Nan tee futat pēē. Jarejuwarete 'ga je'eg are moromu'jat tywera 'gā ia'wyre'ema futat. 'Gā je'eg are pēē moromu'jat tywera 'gā kwaapa tāmējē futat. O'me are 'gā mu'e re nipo moromu'jat tywera 'gā wa'wyre'emamū. Sā'ā y'wa a'wyre'ema jara 'gā y'wa 'ywa retyga imonoa imonoa tata pe. Nan tee futat nipo Janeruwarete 'ga moromu'jat tywera 'gā monoi imomopoa mama'eukwaawa rapyaw ipe anure— 'Jau 'ga 'gā nupe, 'gā mu'Jau ee.

Janeruwarete 'ga remiayuwarete

(Luka 13.25-27)

²¹—“Ore 'ā Jejuī 'ga remiayuwa”, e'i futatee nipo 'gā amū. “Jejuī 'ga Orejararetea”, 'Jau futatee nipo 'gā. A'ere 'gā nosei futari ywag ipe. Nuapoi futari 'gā mama'ea Jeruwarete 'ga remifutar imū. Nuenuwi 'gā 'ga je'ega. A'eramū 'gā osowe'em ywag ipe. 'Ga je'ega renupara 'gā etee futat oo ajemogyau ywag ipe— 'Jau Jejuī 'ga 'gā nupe.

²²—Anure nipo Jarejuwarete 'ga rowase pejemajatykaaw ipe kwaiwete 'gā 'i ekoete jee: “Jarejuwarete 'ga je'eg are ore oi kwe pewara 'gā mu'Jau ikue”, 'Jau nipo 'gā jee. “Eneremiyuwa 'jawe futat ore mama'eukwaawa moia erekwara 'gā nui. Eneremiyuwa 'jawe futat ore aeremiapoe'ema apou ikue”, 'Jau nipo 'gā jee— 'Jau 'ga 'gā nupe.

²³—A'ere nipo je 'i 'gā nupe: “Pēē pekwap futat je wi muku. Jeremiayup 'mea te pēē. Mama'e tywera apoarera te pēē”, 'Jau nipo je 'gā nupe— 'Jau Jejuī 'ga 'gā nupe.

I'akwaap ma'e

(Luka 6.47-49)

²⁴—Jeje'ega renuparamū pē'akwaap pejemogyau. Sā'ā i'akwaap ma'e 'ga 'oga m̄yja ywya ātā pype.

²⁵ Kwaiwete agawewi 'ā amana 'ua. Ywytuu agawewi 'ā erua. A'etea 'ā 'oga nu'ari futari ywytuu upe. 'Y ruwiretea miamū 'ā owaēme'ema jupe. A'eramū 'ā aipoa 'oga awawe'em ypy pe. Nan tee futat jeje'ega renuparamū pēē— 'jau Jejuī 'ga 'gā nupe.

²⁶—A'ere jeje'ega renupare'emamū pejemogy i'akwaawe'ema 'ga 'jawe. I'akwaawe'ema 'ga te ajee 'oga om̄yi amū 'y apopewa pype.

²⁷ A'eramū amanakyr ppy are we 'ga roga awau ppy pe 'ga wi. A'eramū futat 'ā 'y rypojuga 'ga roga retyka 'ga wi. A'eramū nipo jeje'ega renupare'emamū pēē aipoa 'oga apoara 'ga 'jawe etee futat. Aipo 'ga 'jawewaramū nipo pēē anure pejepapa— 'jau Jejuī 'ga 'gā nupe.

²⁸⁻²⁹ Jejuī 'ga porogytapaw ire, 'ga renuparera 'gā oporesagamū ajemogyau 'ga ree.
—Kuu. 'Ga pa'e aipo e'i ae mu'jau ra'e nū— 'jau 'gā ajaupe. —NaMoisesi 'ga remikwasiarer are moromu'jara 'gā 'jawe rūi 'ga porogytai. Moisesi 'ga 'eawer are moromu'jara 'gā Moisesi 'ga 'eawer imū etee futat 'gā ae mu'ei— 'jau 'gā ajaupe. —A'ere Jejuī 'ga nanarūi. U'eawer imū etee futat 'ga jane mueapyoi ee— 'jau 'gā ajaupe, oporesagamū 'ga ree.

8

Ipito'om ma'e

(Maku 1.40-45; Luka 5.12-16)

¹ Gā nupe oporogytapaw ire Jejuī 'ga 'ua ojypa ywytyr awi nū. Kwaiwete 'gā 'ua ojypa 'ga reewe te futat.

² Poje ipito'om ma'e 'ga amū 'ua wapyka wenupy'āu 'ga rowase. A'eramū 'ga 'jau Jejuī 'ga upe:

—Je resag ape, ki Ku'jyp. “Jejuī 'ga ae katu'okara”, e'i 'gā jee. A'eramū je tejuja tejesaukaa enee. Je ree ejemuaēmiweramū je mokā'ē ape— 'jau 'ga Jejuī 'ga upe.

³ Aipo ojeupe 'erauwe Jejuī 'ga opo monou 'ga 'arimū:

—Ko ajee je ene mokā'ēi 'wei— 'jau Jejuī 'ga 'ga upe.

Oje'arimū 'ga po mono ppyrauwe okā'jāu 'ga pito'oma 'ga wi. A'eramū futat 'ga pira ojekatu'oka.

⁴ 'Ga mokā'ē re Jejuī 'ga 'jau 'ga upe:

—Eremome'u kasi emokā'ēawera tekotee 'gā nupe ne. Ere ewau ejesaukaa mainana 'ga upe ra'ne. “Je resag ape. Jepito'oma okā'ē je wi”, ere ewau 'ga upe. “A'jea futat ra'e”, te'i 'ga enee 'jau, ene resag ire 'jau— 'jau Jejuī 'ga 'ga upe. —A'ere ene ejeymawa mū rerawau 'ga upe. A'eramū 'ga iapyau Jarejuwarete 'ga upe, 'ga muorypa enekā'ēawer are— 'jau Jejuī 'ga 'ga upe. —Moisesi 'ga 'eawer imū etee futat ene ejeymawa mū rerawau iapyaukaa Jarejuwarete 'ga muorypawamū. Ejeymawa mū rapyukara ene ekā'ēawera resaukaawa futat— 'jau Jejuī 'ga 'ga upe.

A'eramū ipito'om ma'efera 'ga awau ojeupe 'ga 'eawer imū etee futat iapou.

Jefaruu 'ga remiayup

(Luka 7.1-10)

⁵ Kafanaū pe 'gā waēm ire jefaruu 'gā 'wyrira'ri 'ga amū 'ua owaēma Jejuī 'ga upe. Papy'yi amuteea te 'ā 'ga, romanūa te 'ā 'ga.

⁶ A'eramū 'ga 'jau Jejuī 'ga upe:

—Jeremiayuwa 'ga ojero'wu 'upa ayrūgatugatu 'ga 'upa— 'jau 'ga Jejuī 'ga upe.

⁷ Aipo ojeupe 'eramū Jejuī 'ga 'jau 'ga upe:

—Ere iruukwe. Too ene rupi 'ga katu'oka 'jau— 'jau Jejuī 'ga 'ga upe.

⁸—Naani nū'ū. Ene 'ā kūima'eteetea te. Je 'ā akotee ma'ea te. Eje'eg imū etee futat ekatu'ok 'ga. “Ojekatu'ok futat 'ga” ene 'eramū 'ga jekatu'ogi futari— 'jau 'ga Jejuī 'ga upe.

⁹—Je 'ā jefaruu. A'eramū je te 'wyrira'ri 'ga je'eg imū etee futat mama'e apou tekou jepi. Je 'ā jefaruu 'gā 'wyrira'ria. Sēg jeremiayuwa jefaruu 'gā pytuna. A'eramū jeremiayuwa 'gā jeje'eg imū etee futat mama'e apou ajemogyau. 'Ga amū upe je 'jau: “Ere ewau peu jee”, 'jau je 'ga upe. A'eramū 'ga awau. Ajepeja 'ga upe je 'jau jepi: “Ere ejua 'au je pyri”, 'jau je 'ga upe jepi. A'eramū 'ga 'ua je pyri jepi. Tejeupe oporowyky ma'e 'ga amū upe je 'jau: “Ekwap mama'e apou jee”, 'jau je 'ga upe. A'eramū 'ga jeje'eg imū etee futat mama'e apou jee jepi. A'eramū ene nanē eje'eg imū etee futat jeremiayuwa 'ga katu'oka jee— 'jau 'ga Jejuī 'ga upe.

¹⁰ Aipo ojeupe 'eramū Jejuī 'ga oporesagamū etee 'ga ree. A'eramū 'ga 'jau wewiri ako ma'e 'gā nupe:

—Israeu juapyrera agawewi 'ā pēē. A'etea 'ā naje rerowiari pejepe. Inānānī'ī etee futat 'ā pēē je rerowiaa pejemogyau. Ko 'ga judeue'ema agawewi. A'etea 'ga je rerowiat kwaiwete ra'e jepi— 'jau Jejuī 'ga wewiri ako ma'e 'gā nupe.

¹¹—Peapyaka jeje'eg are? Anure nipo kwaiwete 'gā oi osou ywag ipe. Amunap tesirūmer awi we futat nipo 'gā oi ajatykau ore ree ywag ipe. Peu futat 'gā jemi'wari ymāwarera 'gā pyri. Abraão 'ga, Isaki 'ga, Jako 'ga. Mīmera 'gā pyri nipo 'gā awau ojemi'waa. Judeue'ema 'gā agawewi. A'etea 'gā je rerowiat ajemogyau. A'eramū nipo 'gā awau ajatykau ore ree peu Jarejuwarete 'ga pyri.

¹² A'ere 'ā judeu 'gā jēmī naani. Ywag ipe oo ma'eramera 'gā futat numiamū. A'ere 'gā naje rerowiari etee. Amume'ri 'gā etee 'ā je rerowiaa. A'eramū nipo Jeruwarete 'ga je rerowiare'ema 'gā monou 'gā pe'au muku ojewi. Ypytunaiwayay pype nipo 'ga 'gā monoi. Peu futat nipo 'gā wayrū ojere'emamū ajemogyau. Aya nipo 'gā nerekou, 'gā maema 'gā na'jywa mokāina 'gā mogyau— 'jau Jejuī 'ga wewiri ako ma'e 'gā nupe.

¹³ A'ere 'ga 'jau jefaruu 'gā 'wyrīa'ri 'ga upe nū:

—Ere ewau ejewya eje'wyr ipe nū. Je rerowiar ape ekou ra'e jepi. A'eramū eneremiyauwa 'ga ojekatu'oka enee nū— 'jau Jejuī 'ga 'ga upe.

A'eramū 'ga awau ojewya oje'wyr ipe nū. Owaēma ppy we 'ga wemiyauwa 'ga resaka, jaruete 'ga reko esaka. Jejuī 'ga 'eawa rupi we etee futat 'ga remiyauwa 'ga ojekatu'oka.

Pedro 'ga rojo ēē

(Maku 1.29-34; Luka 4.38-41)

¹⁴ A'ere Jejuī 'ga awau Pedro 'ga 'wyr ipe nū. 'Ga roga pype osouwe 'ga Pedro 'ga rojo ēē resaka. Iro'y ēē 'upa.

¹⁵ A'eramū 'ga awau ēē poppyka. A'erauwe ēē ro'ya atee pawamū ēē wi. A'erauwe ēē afu'ama okama awi mama'e apou 'ga upe 'ga mojemī'waa.

¹⁶ Kaaruwamū peuwara 'gā kwaiwete mama'eukwaawa rerekwara 'gā nerua Jejuī 'ga upe. A'eramū 'ga mama'eukwaawa moia 'gā nui, oje'eg imū etee futat. Ojero'wu ma'e 'gā nanē 'ga ikatu'oka nū.

¹⁷ Ymā te Janeruwarete 'ga je'ega mome'wara 'ga, Isai 'ga 'ga mome'ui rakue: "Janekaruara 'ga omoit jane wi, jane katu'oka", 'jau Isai 'ga ikwasiaa ka'aran are rakue. Jejuī 'ga remiaporama 'ga imome'wau inuga ka'aran are rakue. A'eramū 'ga 'gā katu'oka, Isai 'ga 'eawer imū etee futat.

"Too ene rupi 'jau" 'ga 'eawet

(Luka 9.57-62)

¹⁸ Anure kwaiwete 'gā 'ua ajatykau 'ga ree. 'Gā nesakawe Jejuī 'ga 'jau wemimu'e 'gā nupe:

—Kwe katy soo jareyaapa 'jau, 'y owajara katy 'jau— 'jau 'ga 'gā nupe.

¹⁹ 'Gā o enunewe Moisesi 'ga remikwasiarer are moromu'jara 'ga amū 'ua oje'ega Jejuī 'ga upe:

—Too ene rupi 'jau, ki Ku'jyp— 'jau 'ga 'ga upe. —Taata tekou ene rewiri kwe pe ene orauwe 'jau— 'jau 'ga 'ua Jejuī 'ga upe.

²⁰ A'eramū Jejuī 'ga 'jau 'ga upe:

—A'jea futat nipo eneatawet je rupi ki sa? A'ere 'ā je najerogi te tekou a'i kūi. Kasuru'miara te 'ā ok. Ywy kwara 'ā 'ga roga. Wyrā'i nanē 'ā waityramū nū. A'eramū 'ā kaaruwauwe ojewya 'ua waity pype osea. A'ere je nanarūi. Aset ekoete tee futat je tekou. Tekaarupaw ipe je tesa ekoete tee futat tekou. Je 'ā pēneki'yra agawewi. A'etea 'ā je najerogi tekou. Jeremiyauwamū nan tee futat pejemogy nū. A'etea futat te eneatawet je rupi?— 'jau 'ga 'ga upe.

²¹ A'eramū Jejuī 'ga rerowiaara 'ga amū 'jau 'ga upe:

—Tene ajee jeruwa manūi ra'ne. Tejuwa 'ga manū re too ene rupi 'jau. 'Ga manū re nipo a'jea futat tekou wyyapi ene rewiri. Tejuwa 'ga manūa ra'ne je aesak— 'jau 'ga Jejuī 'ga upe.

²² A'ere Jejuī 'ga 'i etee 'ga upe:

—Naani. Ene'me awi. 'Awauwe futat ejot je rupi. Eneruwa 'ga manū re amutee 'gā totym 'ga enee 'jau— 'jau 'ga 'ga upe.

Ywyrūu muojeawet

(Maku 4.35-41; Luka 8.22-25)

²³ A'ere Jejuī 'ga u'aa yaruu pype, wemimu'e 'gā netee.

²⁴ 'Gā yaapaw ipe ywyrūua 'ua erujewi 'gā nupe. 'Y ryjuapia yara matyneema imotyppywka ja'wyja'wy 'gā nupe. A'ere Jejuī 'ga seri etee futat 'upa.

²⁵ A'eramū 'ga remimu'e 'gā 'ga renūina 'ga momaka:

—Ku'jyp! Ere ejua epaka kūi! Sapap jane kūi!— 'jau 'gā 'ga upe.

²⁶ Opag ire 'ga 'jau 'gā nupe:

—Ma'eramū pejekyjau nanimenime 'ū? Maran ajee nepejemogypygyi etee je ree 'ū? Nepeesagi nipo pejejepype je rekoa ki sa? Je te 'ā areko pēē. Je rerowia'ri etee 'ā pejepe pejejemogyau— 'jau 'ga wemimu'e 'gā nupe.

A'erauwe 'ga fu'ami oje'ega wyruu upe, tyjapetega upe nanē nū. A'erauwe futat wyruu wojeramū. 'Y rajapetega nanē wojeramū nū.

²⁷ A'eramū 'ga remimu'e 'gā oporesagamū etee 'ga ree.

—Ma'e pājē 'ga te jane sireko jarejepype nū'ū?— 'jau etee 'gā ajaupe. —Wyruu te 'ā 'ga amuojet erujewi jarejewi a' i kūi. 'Y rajapetega nanē 'ga 'ā imuojea erujewi nū. Ma'e pājē 'ga te nū'ū? Naesagi pa je 'ga amū je'ega wyruu upe jepi nū, wyruu muojera erujewi jepi nū— 'jau 'gā ajaupe oporesagamū 'ga ree. —Janeruwarete 'ga te wapoukat 'ga upe nū'ū— 'jau 'gā ajaupe.

Mama'eukwaawa rerekwat

(Maku 5.1-20; Luka 8.26-39)

²⁸ Garireja ypiauu owajara katy owaēm ire 'gā oyaruu monou imojekoka Gataru ywy are. Yaruu awi Jejuū 'ga em pyyruuwe mukūja 'gā 'ua 'ga rowosōu. Mama'eukwaawa rerekwara 'gā poromū. Tywy 'arimū etee futat 'gā nekoi. A'eramū 'gā 'ua tywy awi Jejuū 'ga repejāna. Mama'eukwaawa 'gā muarūukare'ema 'gā mamara'neu 'gā mogyau. Ipojte 'gā ajemogyau. A'eramū 'gā pyriwara 'gā okyjau 'gā nui. Nooi futari 'gā 'gā pyri.

²⁹ A'eramū Jejuū 'ga resakawe mama'eukwaawa werekwara 'gā muafukajukaa Jejuū 'ga upe:

—Ku'jywa 'ga ra'yra 'ā ene. Maran te ore rereko ape? Norowaēmi we ore orojereko tyweawa upe— 'jau mama'eukwaawa Jejuū 'ga upe.

³⁰ Aipo 'eramū mukuu 'i tajaurationa ajemogyau ojemi'waa. Kwaiwete tajaurationa.

³¹ A'eramū mama'eukwaawa 'jau Jejuū 'ga upe:

—'Gā nui ore moir ire ore monoukar ape tajaurationa wywyterimū ore mojejaga— 'jau mama'eukwaawa 'ga upe.

³² —Pe'je ajee pejewau— 'jau Jejuū 'ga jupe.

A'erauwe mama'eukwaawa awau ū'jāu 'gā nui. Awau ojejaga tajaurationa pype. A'eramū tajaurationa mama'eukwaawa ojeyppe ijejagamū erowawaka erajemogyau. A'eramū erawau enujāna ywy'amuku rupi eropopoa erawau eropapa 'y pe.

³³ A'erauwe tajaurationa are omaenun ma'e 'gā awau imome'wau amunaw ipewara 'gā nupe: —Ekoay Jejuū 'ga 'ua tywy 'arimū ako ma'e 'gā pirowara omoit 'gā nui ko, imonou tajaurationa pype ko. A'eramū tajaurationa opapa ko— 'jau 'gā awau imome'wau amunaw ipewara 'gā nupe.

³⁴ A'erauwe amunaw ipewara 'gā 'uapap Jejuū 'ga resaka. A'eramū 'gā 'jau Jejuū 'ga upe:

—Ere ejepe'au orewy awi. Nenea'wyrī ene ra'e. Orereymawa 'ā ereapisipap— 'jau 'gā Jejuū 'ga upe.

A'eramū Jejuū 'ga awau 'gā nui.

9

Iteu ma'e

(Maku 2.1-12; Luka 5.17-26)

¹ A'eramū Jejuū 'ga awau 'gā nui. Awau u'aa yaruu pype, awau oyaapa nū. Oje'wyr ipe 'ga awau ojewya nū.

² A'eramū peuwara 'gā teewi iteu ma'e 'ga rerua Jejuū 'ga upe nū. 'Ga rerua 'ga rupia 'ga rupawa reewe Jejuū 'ga upe. "Je rerowiat pa 'gā ajemogyau ra'e", 'jau Jejuū 'ga ojeupe. A'eramū 'ga 'jau iteu ma'e 'ga upe:

—Erekyje awi je wi kūi. Enetywera je amoit ene wi— 'jau Jejuū 'ga 'ga upe.

³ A'eramū Moisesi 'ga remikwasiarer are moromu'jara 'gā 'ga rerowiare'ema ajemogyau. A'eramū 'gā 'jau ajaupe:

—Aw'jja 'agamū 'ū? Janeruwarete 'ga etee te janetywera omoit jane wi— 'jau 'gā ajaupe. —Enetywera je amoit ene wi 'eramū 'ga Jarejuwarete 'ga 'jawe je rekoi 'ga 'i te janee— 'jau 'gā ajaupe 'upa.

⁴ A'ere Jejuū 'ga 'gā kwaawi ojee. A'eramū 'ga 'jau 'gā nupe:

—Ma'eramū pēē poromū 'jau pejejeupe 'ū?— 'jau Jejuū 'ga 'gā nupe.

⁵ —Je upe naayi. Iteu ma'e mafu'amaramū ae nanē ojotywera moiri ajau nū kūi— 'jau 'ga 'gā nupe.

⁶ —Pēneki'yra je 'ā. A'eramū je tepājē resaukaa pē nupe. Iteu ma'e 'ga je amafu'am pē neape— 'jau 'ga 'gā nupe. —'Ga fu'ama resaka taje kwaap pejepe 'jau— 'jau Jejuū 'ga 'gā nupe. —'Aeteuferu 'ga amafu'am. Aetywera 'ga omoit nanē ae wi nū", tepe'je 'jau. Jeruwarete 'ga te 'ā opājē amut jee. A'eramū je pētywera moia pē nui, iteu ma'e mafu'ama nanē nū— 'jau 'ga 'gā nupe.

A'eramū 'ga 'jau iteu ma'e 'ga upe:

—Ere efu'ama jui. Ejupawa pyyka erawau eje'wyr ipe— 'jau 'ga 'ga upe.

⁷ Aipo ojeupe 'erauwe iteu ma'e 'ga afu'ama 'gã neape. A'eramũ 'ga wupawa ppyka erawau oje'wyr ipe.

⁸ A'eramũ esakarera 'gã ajemogyau okyjau, oporesagamũ 'ga ree. A'e pype 'gã aku'iramũ 'ga ree. A'eramũ 'gã 'jau ajaupe.

—Kuu. Namafu'ami sipo 'ga 'ga pa, a'e ako je ko re'ã— 'jau 'gã ajaupe. —Ku'jywa 'ga 'ga amafu'amukat 'ga upe— 'jau 'gã ajaupe.

A'eramũ 'gã 'jau Jarejuwarete 'ga upe:

—Ene te 'ã esage ma'eramũ, ki Ku'jyp. Ene 'ã eremafu'amukat 'ga 'ga upe. Epãjã 'ã eremut 'ga upe rai'i— 'jau 'gã Jarejuwarete 'ga upe, 'ga muorypa ee.

Mateu 'ga mo'wyawet

(Maku 2.13-17; Luka 5.27-32)

⁹ A'eramũ Jejuu 'ga awau watau nũ. Awaw ipe 'ga Mateuramũ je resaka. 'Wyriararete upe ka'aranũ ppykara je. Jeporowyky je renamũ Jejuu 'ga 'ua oje'ega jee:

—Ere ejua je rupi— 'jau 'ga jee, je mo'wya ojeupi.

A'erauwe je tepoia teporowyky awi ejaa inuga a'e pe te futat. A'eramũ futat je tewau 'ga rupi, 'ga remimu'eramũ.

¹⁰ A'ere je 'ga mo'wya teje'wyr ipe:

—Ere ejua ejemi'waa je pyri. Ere ejemiayuwa 'gã nenũina erua erojemi'waa jerog ipe— 'jau je 'ga upe.

A'eramũ 'gã 'ua ojem'i'waa jerog ipe. Orojemi'waaw ipe kwaiwete 'wyriararete 'ga upe ka'aranũ ppykara 'gã 'ua ojem'i'waa ore pyri. Mama'e tywera apoara 'gã nanẽ 'ua ojem'i'waa ore pyri nũ.

¹¹ Poje fariseu 'gã amũ 'ua ore resaka. A'eramũ 'gã 'jau Jejuu 'ga remiayuwa 'gã nupe:

—Kuu. Ma'eramũ pẽmu'jara 'ga ojem'i'waa 'wyriararete 'ga upe ka'aranũ ppykara 'gã pyri 'ũ? Nia'wyr'i 'gã kũ. Mama'e tywera apoara 'gã pype nanẽ 'ga reni ojem'i'waa kũ. Nojem'i'wari noko ae 'gã pyri 'ja. Nia'wyr'i 'gã ajemogyau kũ— 'jau 'gã 'gã nupe.

¹²⁻¹³ Aipo 'gã 'e renupawe Jejuu 'ga 'jau 'gã nupe:

—'Gã pyri je reko'i 'gã poaawamũ te nũ'ũ. Je 'ã morofuanugara 'jawewara te ako 'gã nupe. Sã'ã morofuanugara 'ga muaga monoa ojero'wu ma'e 'gã nupe etee. Monono ekoetei futari 'ga ijero'wue'ema 'gã nupe muaga. Nan tee futat je. Ia'wyr'e'ema 'gã katu'okawamũ te je ruri. “Je jeresage”, pe'je 'ã. A'ere je naesage ma'eramũ rũ je ruri pẽ katu'oka. Itywet ma'e katu'oka tee je ruri. Pe'je pejewau pejem'u'jau Jarejuwarete 'ga 'eawer are— 'jau 'ga 'gã nupe. —Ymã te Janeruararete 'ga oje'ega kwasiarukari Oseja 'ga upe rakue:

“Je upe mama'e mura esage futat jee.

A'ere pejejee pẽpota'wa esagea taetu esageramũ jee. Nafutari je tejeupe pẽnemimurera, pejejee pejepota'wa esage'em ire”,

'jau 'ga ikwasiarukaa 'ga upe rakue— 'jau Jejuu 'ga fariseu 'gã nupe.

'Gã jemi'ware'em are 'gã mu'eawet

(Maku 2.18-22; Luka 5.33-39)

¹⁴ Anure Juã Batista 'ga remiayuwa 'gã amũ 'ua oje'ega Jejuu 'ga upe:

—Juã Batista 'ga remiayuwaamũ ore orojemi'ware'ema futat oroje'ega monou Jarejuwarete 'ga upe jepi. Fariseu 'gã nemiayuwa 'gã nanẽ ojem'i'ware'ema futat oje'ega 'ga upe jepi nũ. 'Ga upe oporogytaa upe iwaẽmauwe ore orojemi'ware'ema Jarejuwarete 'ga upe oropogytau jepi. A'ere 'ã eneremiayuwa 'gã nanarũ. Niojeri agawewi 'gã 'ã ojem'i'war awi. A'etea 'ã 'gã oje'ega omono Jarejuwarete 'ga upe— 'jau 'gã Jejuu 'ga upe.

¹⁵ A'eramũ Jejuu 'ga 'jau 'gã nupe:

—Akokatu ma'e 'gã nekokaturamũ sipo 'gã nekokatu resakara 'gã ty'ara rerajemogyi maraka are? Naani. Maraka teepaw ire tãmẽjẽ te 'gã py'arayparamũ nũ— 'jau Jejuu 'ga 'gã nupe. —'Gã nui akokatu ma'e 'gã jepe'aramũ tee esakara 'gã poiri ojem'i'war awi oporogytau Jarejuwarete 'ga upe— 'jau Jejuu 'ga oje'ega 'gã nupe u'ama. —Nan tee futat jeremiayuwa 'gã wojere'emamũ ojem'i'war awi ojeypyri je rekoramũ. Ojewe je o re te nipo 'gã nojem'i'wari ajemogyau. Je o re te nipo 'gã 'arasigamũ ajemogyau je ree. A'eramũ te nipo 'gã nojem'i'wari ajemogyau wea'aramũ etee je ree— 'jau Jejuu 'ga 'gã nupe.

¹⁶ —Ymã te 'ã aeypy 'gã pẽ mu'ei mama'e are rakue. A'ere je 'ã 'awamũ pẽ mu'ei nũ. Amutee are je 'awamũ pẽ mu'ei nũ. A'ere nepemojopypea'uweri jeporogyta aeypy 'gã nemimome'ufer are. Jeporogyta are ojemu'e ma'eramũ ki a'ea etee futat pejemu'e. Pemojopype kasi morogyta ymaner are ne. Morogyta ymaner are ojemu'e ma'e 'gã nuapoi jeporogytau mama'ea— 'jau Jejuu 'ga 'gã nupe. —Naperugi ae taity ymanera taity yau pyu. Kasi a'e pe taity yau opoeramũ erojefuapygi etee ne. A'eramũ futat taity ymanera otoroka etee nũ— 'jau Jejuu 'ga 'gã nupe, 'gã mu'jau ee.

17—Y'way yau ae nueko'wogi yrū ymanera pype. Yrū yau pype te ae eko'wogi. Yrū ymana pype sieko'wok'eramū ajaiwayramū erujewi. A'eramū futat opy'apefugamū wajaiwamū yrū pype. A'eramū futat wyrū kakau. A'eramū ojeko'woka—'jau'ga'gā nupe. —Yrū yau pype eko'wog'ire ojeko'woke'ema. Yrūa kaw'e'em nanē nū—'jau'Jejui'ga'gā nupe'gā mu'jau ee. —Nan tee futat nepemojopypea'uweri jeporogytafera morogyta ymaner are—'jau'Jejui'ga'gā nupe.

Kūjā ēē mū kūjāmuku ēē retee

(Maku 5.21-43; Luka 8.40-56)

18'Ga porogyta'ga renamū kūima'e'ga amū'ua owaēma Jejui'ga upe. Judeu'gā'wyrira'ri'ga amū'ua wapyka wenupy'āu'ga rowase. A'eramū'ga'jau'ga upe:

—Jera'jyr ēē amanū'awamue futat ko. A'eramū ene ejua ēē resaka. Epoa ēē'arimū imonoramū nipo ēē ferawi nū—'jau'ga'ua'ga upe.

—Ere ajee iruukwe. Taesak ēē enee'jau—'jau'Jejui'ga'ga upe.

19 A'eramū Jejui'ga afu'ama awau'ga rupi. 'Ga remimu'eramū ore nanē arawau'gā nupi nū.

20 Orewaw ipe kūjā ēē mū'ua Jejui'ga rupisika,'ga raity pypireme'ywa ppyka. Ojero'wu ma'e ēē. Tusi kwara ēē imu'aa akou ojero'wau. Nuogi futari ēē ry ēē wi. Ymā te ēē rekoirakue.

21 A'eramū ēē'jau ojeupe etee futat: "Kīā raity pygamū tajekatu'ok'jau kwy", 'jau ēē ojeupe etee futat. A'eramū ēē'ua'ga raity pypireme'ywa etee agawewi ipyyka. A'etea ēē ojekatu'ok'ga raity pypireme'ywa ppyg ppyrauwe futat.

22 A'erauwe Jejui'ga ojerowaka amā'jāu ēē ree. A'eramū'ga'jau ēē upe:

—Erekyje awi kari. Je rowiari ape ekou ra'e jepi. A'eramū je ene katu'oka akiko—'jau'ga ēē upe.

Ēē upe aipo'ga'erauwe ēē ojekatu'oka.

23 A'ere Jejui'ga ore reruatau nū. "Jera'jyra ēē ree epoa emono" 'jara'ga'wyrā upe orowaēm ire orosou. Orosouwe Jejui'ga ēē ree ajatyka ma'e'gā nesaka. 'Ga mo'wyrarera'ga ra'jyra ēē rapirūmū ēē rerekou. Jumi'ara'nī moje'egara'gā nanē'ga esaka nū * Kwaiwete'gā'upa'oga pype.

24 A'eramū Jejui'ga'jau'gā nupe:

—Pe'je peje'jāu pejewau ukupepe. Namanūi ēē. Oset tee ēē'upa. Peesag iki je ēē momaga—'jau'ga'gā nupe.

Aipo ojeupe'ga'eramū'gā'ga rerekoemāu etee.

—Ene'me awi nū'ū. Amanū futat akiko—'jau'gā'ga upe.

"Amoferap nipo je ēē re'ā", 'jau'ga ojeupe. A'eramū'ga'poromū'jau'gā nupe, "oset tee ēē'upa", 'jau etee'ga'gā nupe.

25 'Og awi'gā mū'ē re'ga amanū ma'efera ēē poppyka.

—Ere ejua ewya, ky'ri—'jau'Jejui'ga ēē upe.

A'erauwe ēē ferawi owya afu'ama.

26 A'eramū'gā ēē moferapawera mome'wau imuāina ojepeyriwara'gā nupe.

Mukūi eae'ema'gā

27 Ēē moferaw ire Jejui'ga awau pe awi nū. 'Ga remimu'eramū ore arawau'ga rupi. Orewaw ipe mukūja eae'ema'gā'ua ore rewiri wafukaita Jejui'ga upe:

—Jejui! Ene'ā Janeruwarete'ga remimurera! Ore resag ape. Epājē mū ore katu'og ape—'jau'gā wafukaita'ga upe.

28 'Og ipe ore se re,'gā nanē awau osou nū, Jejui'ga rerowyka. A'eramū Jejui'ga'jau'gā nupe:

—Je rowiat te pejepe pejemogyau jepi? "Ore mamā'ē'ga nū" 'ea te perowiat pejemogyau?—'jau'ga'gā nupe.

—Aruerowiat futat ore ene—'jau'gā'ga upe.

29 A'eramū Jejui'ga opo monou'gā nea are.

—Tejerowiat pejemogyramū je pē mamā'ēi—'jau'ga'gā nupe.

30 A'erauwe futat'gā amā'jāu. A'eramū Jejui'ga'jau'gā nupe:

—Je mome'u kasi pejepe kwe pewara'gā nupe kamēsiete ne, jerera muāje'ema kamēsiete amunawa pype ne—'jau'ga'gā nupe.

31 A'ere'gā naani. Nuereko katui'gā'ga'eawera,'ga rera muāina kamēsiete peuwara'gā nupe.

Jje'ege'ema'ga

* 9:23 Ajamanūnamū ipypra poromū jumi'ara'nīa.

³² Jejuí 'ga wi 'gã o pyrauwe 'gã amũ mama'eukwaawa rerekwara 'ga rerua Jejuí 'ga upe.
—Mama'eukwaawa mũ 'upa 'ga pir are. A'eramũ 'ga oje'ege'ema akou. Mama'eukwaawa 'ga nomoje'egukari imogou— 'jau 'gã Jejuí 'ga upe.

A'erauwe Jejuí 'ga imoia 'ga wi.

³³ Ojewi Jejuí 'ga imoir ire 'ga oje'ega nũ. A'eramũ 'ga resakara 'gã oporesagamũ 'ga ree ajemogyau.

—Niesagi pa jane nanuara Israeu juapyreramũ jareywy pe jepi nũ— 'jau 'gã ajaupe, oporesagamũ 'ga ree ajemogyau.

³⁴ A'ere fariseu 'gã nuerowiari 'ga. A'eramũ 'gã 'jau:

—Naani nũ'ũ. Mama'eukwaawa 'wyriara je'eg imũ tee 'ga 'ga pirewara moiri 'ga wi nũ'ũ— 'jau futatee 'gã 'gã nupe.

Jejuí 'ga ajemuaẽma 'gã nee

³⁵ Pe awi Jejuí 'ga awau nũ. Awau 'ga amunawa moy moyka akou. 'Ga remimu'eramũ ore arakou 'ga retee te futat. Judeu 'gã jatykaaw ipe 'ga awau 'gã mu'jau 'Uwarete 'ga ree:

—Pejetywer awi pẽpoiireramũ Janeruwarete 'ga pẽtywera moiri pẽ nui. A'eramũ 'ga pẽ mogyau wemiayuwamũ— 'jau 'ga 'gã nupe akou, 'gã mu'jau 'Uwarete 'ga ree.

Ojero 'wu ma'e 'gã 'ga ikatu'oka akou.

³⁶ Kwaiwete 'gã jatykai 'ga ree, 'ga porogyta renupa. 'Gã nesakawe Jejuí 'ga ajemuaẽma 'gã nee. “Karupa'mĩ jare'ema 'jawe 'gã jemogyi. Ojejukawe'emamũ nanẽ nũ. Worypawamũ 'gã ajemogyau. Nitywi futari 'gã poara 'ga amũ”, 'jau Jejuí 'ga ojeupe.

³⁷ A'eramũ 'ga 'jau wemimu'eramũ oree:

—Inãinãni'ĩ etee Janeruwarete 'ga je'ega mome'wara 'gã jemogyi. A'ere 'ã kwaiwete je te 'gã jemogyi Janeruwarete 'ga kwaape'ema— 'jau 'ga oree.

³⁸ —A'eramũ ki pẽ pejeje'ega monou Jarejuwarete 'ga upe aipo are: “Emonou'jau'jap ejemiyauwa 'gã emome'waramũ kwe pewara 'gã nupe”, pe'je ki 'ga upe aipo are— 'jau Jejuí 'ga oree. —Sã'ã juowuurana. Omonookara ae mũ tywe'emamũ 'ã ototokapaw ekoete. Nan tee futat nipo 'gã 'ga je'ega ojeupe 'gã imome'ue'emamũ 'gã pawe etee mama'eukwaawa rapyau ipe— 'jau Jejuí 'ga oree.

10

Jejuí 'ga remimu'e 'gã

(Maku 3.13-19; Luka 6.12-16)

¹ Jejuí 'ga wemimu'eramũ ore majatykau ojee, tusiramũ ore majatykau ojee. Opãjẽa 'ga imua ore upe ore moporowykawamũ.

—Tepãjẽa je amono pẽ nupe amutee 'gã poaawamũ. Pe'je pejewau mama'eukwaawa moia erekwara 'gã nui. Ojero 'wu ma'e 'gã nanẽ pẽẽ ikatu'oka nũ— 'jau 'ga oree ikue.

²⁻⁴ 'Ga remimonoramũ orepytuna tusi. Simão, Andre, Tiago, Juã, Filipe, Patarumeu, Tome, Mateuramũ je, ajejeja Tiago, Tadeu, ajejeja Simão, Judas. Mimeramũ ore Jejuí 'ga remimu'eramũ. Simão 'ga mukũ 'ga rera. Pedro 'ga rer irũa. Ajejeja Simão 'ga rera nanẽ mukũ nũ. Serote 'jau 'ga rer irũa. Andre 'ga Pedro 'ga rewirera 'ga. Tiago 'ga rewirera 'ga Juãnamũ. Sepeteuramũ Tiago 'ga ruwa 'ga Juã 'ga retee. Je Mateuramũ 'wyriara upe ka'aranũ pykareramũ. Ajejeja Tiago 'ga Aufeu 'ga ra'yra 'ga. Judas 'ga nanẽ mukũ 'ga rera nũ. Iskariote 'ga rer irũa. Kũima'e tywera 'gã nupe 'ga monoara 'ga poromũ. Mimeramũ ore Jejuí 'ga remimonoramũ.

Jejuí 'ga wemimu'e 'gã monoawet

(Maku 6.7-13; Luka 9.1-6)

⁵ Wemimu'eramũ Jejuí 'ga 'jau oree:

—Pe'je pejewau je mome'wau kwe pewara 'gã nupe. A'ere ki judeu 'gã nupe etee je mome'u pejepe. Judeue'ema 'gã nupe kasi je mome'u pejepe ne. Samari ywy pewara 'gã nupe nanẽ je mome'wawe'em nũ.

⁶ Israeu juapyrera 'gã nupe etee futat pejewau morogyta esage mome'wau. Sã'ã karupa'mĩ ka'jama ujar awi. Nan tee futat Israeu juapyrera 'gã jemogyi. Ymã te 'gã ypya Jarejuwarete 'ga je'ega renuwi rakue. A'eramũ 'gã 'ga kwaapa katu katu rakue— 'jau 'ga oree. —A'ere 'awauwara 'gã nokwaawi futari 'ga. 'Ga remifutara nanẽ 'gã ikwaape'ema nũ. A'eramũ 'gã ajemogyau karupa'mĩ ka'jama 'jawe— 'jau Jejuí 'ga oree.

⁷ —“Otywer awi opoit ma'e 'gã Janeruwarete 'ga omogy wemiayuwamũ. A'eramũ ki pẽẽ pejepeia pejetywer awi”, pe'je ki pejewau 'gã nupe.

⁸ Ojero 'wu ma'e 'gã pẽẽ ikatu'oka. Amanũ ma'e 'gã pẽẽ imoferapa. Ipito'om ma'e 'gã pẽẽ imokã'jãu. Mama'eukwaawa pẽẽ imoia mama'eukwaawa rerekwara 'gã nui— 'jau Jejuí 'ga oree. —Tepãjẽa je amono pẽ nupe. A'ere naje mepyi pejepe tepãjẽa pejejeupe imono

are. A'eramū pēē pejewau 'gā katu'oka ekoete te futat pejejemogyau. “Je mepy pejepe. Pejekatu'okawera pemepy jee”, 'jawe'em futat pēē 'gā nupe— 'jau Jejuī 'ga oree.

⁹—Ka'aranūā kasi peroo ne.

¹⁰ Pejekaraemā nanē erawawe'em nū. Pejejyrū, pejeypyapaap. Mīmera miamū kasi peroo ne. Pejepir arewara etee futar iki peroo. Ywyrā nanē pēē erawawe'em pejepe pe. Ojeupe peporogytaramū 'gā pē mojeri'waa. Aipoa esage— 'jau Jejuī 'ga oree.

¹¹—Gā 'wyrarete upe pejewaēma pejewau pejeseawa rekaa. “Pe'je pejejuā pejesea 'au ore pyri” 'jara 'gā noga pype etee futar iki pejup. Peo kasi kwe pe pejejemogyau ne.

¹²—Gā nog ipe pejewau ki “Awamū Janeruwarete 'ga nepē mu'arasigukari pē mogyau”, pe'je pejewau pejesou 'gā nupe. “Arafutar ore Jarejuwarete 'ga pē muekōējā pē mogya”, pe'je ki 'gā nupe— 'jau Jejuī 'ga oree.

¹³—“Pe'je pejejuā pejepytau ore'wyr ipe” 'gā 'eramū ki pe'je 'gā nupe: “A'jea futat. Janeruwarete 'ga aku'i muri pē nupe, pē mopy'ata'wau a'jea futat”, pe'je ki 'gā nupe— 'jau Jejuī 'ga oree. —“Narafutari ore pēpyta oroje'wyr ipe” 'gā 'eramū pēē 'jau 'gā nupe: “Janeruwarete 'ga aku'ia namura'uweri pē nupe”, pe'je ki 'gā nupe— 'jau Jejuī 'ga oree.

¹⁴—A'eramū nipo pēē pejewau majepeja 'gā amū 'wyr ipe nū. A'eramū nipo 'gā 'jau: “Noreporenuwiwiri ore Jarejuwarete 'ga je'eg are”, 'jau nipo 'gā pē nupe. A'eramū ki pe'je 'gā nupe “Janeruwarete 'ga 'ā wemiayuwamū pefutat numiamū. A'ere 'ā nepefutari etee 'ga. A'eramū nipo 'ga anure pē mu'arasiga pē mogyau”, pe'je ki 'gā nupe— 'jau Jejuī 'ga oree u'ama. —A'eramū pēē 'gā 'wyrarete awi peje'jāu pejeypyapaawa nupānupāu ajuee, 'yja motototoka jui. “Janeruwarete 'ga pē katu'og are ifuwet numiamū. A'ere 'ā nepefutari etee 'ga”, pe'je ki pejeypyapaawa nupāu ajuee 'gā nupe— 'jau Jejuī 'ga oree.

¹⁵—A'jea futat je 'i. Anure, wowase pē majatykaaw ipe nipo Janeruwarete 'ga Sodom ipewarera 'gā nereko tyweretei Gomora pewarera 'gā netee. Sodom ipewarera 'gā ityweretei Janeruwarete 'ga upe, Gomora pewarera 'ga netee rakue. A'eramū nipo 'ga 'gā nerekou tyweate 'gā tywer are. A'ere “noreporenuwiwiri ore Jarejuwarete 'ga je'eg are” 'jara 'gā Sodom ipewara 'gā tywera apyraawi. A'eramū nipo 'ga taetu 'gā nerekou tyweate etee te nū Sodom ipewarera 'gā apyraapa— 'jau Jejuī 'ga oree.

*Jejuī 'ga rur enune ojeapo ma'e
(Maku 13.1-13; Luka 21.12-19)*

¹⁶—Sā'ā kasuraa tajau jarū pyterimū isea. A'eramū 'ā tajaua iu'wau. Nan tee futat pēē. Jarejuwarete 'ga kwaapare'ema 'gā pyterimū pese. 'Gā amū nipo amara'neramū akou pē nee. A'ere ki pē'akwaap pejejemogyau 'gā nupe. Pejepota'waramū etee futar iki 'gā nee— 'jau Jejuī 'ga oree.

¹⁷—Pejea'gu te ki ajee pejejerowiare'ema 'gā nui. 'Gā amū nipo pē pyyka pē nerawau o'wyrīa'ri 'gā nowase pē moporogytaukaa o'wyrīara upe. Judeu 'gā jatykaaw ipe nipo 'gā amū pē pyyka pē nupānupāu.

¹⁸ Je rerowiaaramū pē nekoramū nipo 'gā pē pyygi pē nerawau judeue'ema 'gā 'wyrīara 'gā nowase. O'wyrīararete 'gā nowase pejejeroroomū pēē je ree morogyta esage mome'wau 'gā nupe. A'eramū futat nipo o'wyrīara 'gā nowase pē nerawarera 'gā morogyta esage pēē imome'u renuwi o'wyrīara 'gā neewe futat— 'jau Jejuī 'ga oree.

¹⁹—A'ere kasi pekyje pejejeroroomū ne. “Ma'ja 'jau sipo je teje'ega 'gā nupe 'wei”, pe'je kasi ne, pejeky'jau ne. Janeruwarete 'ga te peje'egawa amut pē nupe peu pē nerooramū— 'jau 'ga oree.

²⁰—Napēē tee rūi peporogyta 'gā nupe. Pēnuwarete 'ga 'Agesagea te nipo pē mueapyo pē'eaw are— 'jau Jejuī 'ga oree.

²¹—Je rerowiare'ema 'gā nipo wewirera 'ga miamū futat omono 'gā nupe, ijukaukaa, wewirera 'ga je rerowiar ire. Wa'yra 'gā miamū nipo 'gā imonou 'gā nupe iapisaukaa. 'Uwa miamū, oya miamū 'jau nipo 'gā imonou iapisaukaa 'gā nupe je rerowiaaramū 'gā jemogyramū— 'jau Jejuī 'ga oree.

²²—Je rerowiare'ema 'gā oporomutare'emamū je ree. A'eramū nipo 'gā je rerowiarāmū pē nee nanē oporomutare'emamū ne. A'ere Janeruwarete 'ga je rerowiar awi ipoire'ema 'gā nerooi imogyau ojeypiri nakwaparimū ete rūi futat— 'jau 'ga oree.

²³—Amunaw ipewara 'gā pejejeroko tyweramū, pejeka'jama pejewau 'gā nui. Ajepeja amunaw ipe pejewau je mome'wau. Israeu ywy pypewara amunawa moyge'emaue nipo je ruri tejewya nū— 'jau 'ga oree.

²⁴—Ojemu'e yau ma'e 'gā amū'jara 'ga naupyraawi futari. I'wyrīat ma'e 'gā o'wyrīara 'ga nanē naupyraawi nū.

²⁵ Ojemu'e ma'e 'ga e'i ojeupe: “Tako temu'jara 'ga 'jawe 'jau kwy”, 'jau nipo 'ga ojeupe. Ma'eramū 'ā je 'i pē nupe: Je rerowiare'ema 'gā je kurapara te ajemogyau. “Mama'eukwaawa 'wyrīara je'eg imū tee 'ga mama'eukwaawa moia 'gā nui”, 'jau futatee

nipo 'gā jee je kurapa ajemogyau. A'eramū nipo 'gā pēē taetu je rerowiamū pē kurapa—'jau Jejuī 'ga oree.

Pekyje ki Jarejuwarete 'ga wi
(Luka 12.2-7)

²⁶—Pekyje awi pejee ifuwet ma'e 'gā nui. Nomima'uweri futari ae mama'ea. Anure te nipo imimipyreera jesaukari katu katu 'gā nupe.

²⁷'Awamū je je'egi pē nupe etee futat. A'ere tepeo jeje'ega mome'wau 'gā nupe najuejue etee futat 'jau—'jau Jejuī 'ga oree.

²⁸—Pekyje awi pejee ma'e 'gā nui. Pē apisi 'gā numiamū. A'ere 'gā pē'aga nomateepawa'uweri. Jarejuwarete 'ga wi te a'jea futat pekyje ete. 'Ga te a'jea futat pē matepap yawuwe futat werowiare'emamū. Pē'aga we futat 'ga imonou mama'eukwaawa rapyaw ipe—'jau 'ga oree. —'Ga te a'jea futat mama'e tywera ojeupe iapoaramū ae apisi—'jau 'ga oree.

²⁹—Janeruwarete 'ga te 'ā pājēretea. A'ere 'ga jejuka esagei futari ae ree. Peesak wyra'ia. Wyra'ia 'ā niapoi agawewi. A'etea Janeruwarete 'ga imanūnamū wesak 'ūina. 'Ga remifutarimū etee te wyra'ia imanū.

³⁰Ae taetu aje 'ā ae ate 'ga upe. Ma'eramū 'ā 'ga jejukai ae ree taetu—'jau 'ga imome'wau oree 'ūina. —Pē'awa we futat ojemopyrūmap ajemogyau pēakag are. Aeakag are ijemogya we futat 'ga okwaapap. "Nojejukai nipo 'ga ore ree?" pe'je kasi ne. Naani. Ojejuka futat 'ga pē nee.

³¹A'eramū ki pēē pejekyjawe'em pejereko tyweara 'gā nui—'jau 'ga oree.

³²—Pejenosi kasi je mome'wau 'gā nupe ne—'jau 'ga 'gā nupe. —'Gā nowase pēē je mome'u renosi'em ire je nanē najenosī pē mome'wau nū. "Je Jejuī 'ga remiayuwamū je" pēē 'eramū je ywag ipe peoramū je nanē futat ywagipewara 'gā nowase a'e 'gā nupe nū: "Koromū noko jeremiayuwa 'gā 'ja", 'jau nipo je pē nupe ywag ipe peoramū, ywagipewara 'gā nowase pē mome'wau enosōue'em 'gā nupe—'jau Jejuī 'ga oree.

³³—"Je najejuī 'ga remiayuwa rūi" 'jaramū je ywag ipe peoramū pēē 'jawerimū etee futat nipo je pē nenosōu pē mome'wau Tejuwarete 'ga rowase: "Najeremiayuwa 'ga rūi noko 'agamū", 'jau nipo je pē nupe pē mome'wau 'ga rowase. A'eramū je aipo 'jarera 'gā monou muku tejewi—'jau 'ga oree.

Jejuī 'ga ree nipo ae ajamueu
(Luka 12.51-53; 14.26-27)

³⁴—"Jarejuwarete 'ga remimurera 'ga rur ire nipo ore jamuepawi", pe'je kasi ne. Naani. Je ree taetu nipo pejamue pejemogyau—'jau 'ga oree.

³⁵—Kūima'e 'ga amū nipo je rerowiaa. A'ere nipo 'ga ra'yra naje rerowiari. A'eramū nipo 'gā ajamueu je ree. Kūjā ēē mū nipo je rerowiaa. A'ere nipo ēē ra'yra ēē naje rerowiari. ēē ra'yrtatya nanē nipo je rerowiare'ema nū. A'eramū nipo aipo 'gā je rerowiaara ēē mueu je ree.

³⁶Amumē je rerowiaara 'gā pytuna 'gā we futat nipo 'gā nereko tyweaete je ree. Je rerowiaara 'gā nereko tyweara 'gā 'gā pytuna futat—'jau Jejuī 'ga oree.

³⁷—Pēporomutat 'ā pēē pejepytuna 'gā nee. A'eramū pēē mama'e apou 'gā maku'iu. A'ere je 'i 'awamū pē nupe: Jeremiayuwamū pejekoweramū ki pēporomutat je ree, pejepytuna 'gā nee pejeporomutara pyraapa. Pejejuw are, pejeje are, pejeja'yr are. Mimera 'gā nee pejeporomutara pyraapa. Je ree pejeporomutaramū ki mama'e apou jeremifutar imū etee je muorypawamū. "Ereapo awi nanuara ki sa", 'jau nipo pēpytuna 'gā pē nupe. A'ere kasi eremojerowiat 'gā ne. Jeje'eg imū etee futat pēē iapou. Kasi a'e pe pēē najeremiayuwa rūi ne—'jau 'ga oree.

³⁸—Anure nipo 'gā pē nereko tyweretei je ree, pē apisau je ree. A'eramū futat nipo pēē mū je rerowiar awi pejepoia. A'ere pēē je rerowiar awi opoit ma'eramū najeremiayuwa rūi pejemogy. Jeremiayuwamū pejekoweramū jeremifutara etee futat pēē iapou, pejekyjawe'em 'gā pejereko tywer awi. "Tene 'gā je jukai kwy. Napoira'uweri je Jejuī 'ga rerowiar awi", 'jau etee ki pēē—'jau 'ga oree.

³⁹—"Najemanūweri je Jejuī 'ga mome'u are" 'jara 'gā nooa'uweri futari ywag ipe Jarejuwarete 'ga pyri. "Je naapoa'uweri futari mama'ea Jejuī 'ga remifutar imū" 'jara nanē awawe'em ywag ipe Jarejuwarete 'ga pyri nū—'jau Jejuī 'ga oree. —A'ere "tene 'gā je jukai kwy. Napoira'uweri je 'ga rerowiar awi" 'jara 'gā oi futari ywag ipe, Jarejuwarete 'ga pyri—'jau Jejuī 'ga oree.

Janeruwarete 'ga jane mepyawam
(Maku 9.41)

⁴⁰—“Pe’je pejewau je mome’wau kwe pewara ‘gā nupe”, a’e ako je pē nupe ko. A’jea futat je ‘i: Je rerowiarāmū pē nereko esageara ‘gā je nanē je rereko esage nū. Je rereko esageara ‘gā je muarera ‘ga nanē wereko esage nū.

⁴¹Ojeupe ‘ga amū waēmamū nipo ‘gā ‘jau: “Janeruwarete ‘ga ‘ga mut janee, ojee jane mu’jauwamū. Ma’eramū ‘ā oreporenuwiweramū ‘ga je’eg are”, ‘jau nipo ‘gā. “Torojejuka esage ‘ga ree nanē ‘jau nū”, ‘jau nipo ‘gā. A’jea futat je ‘i: Anure nipo Janeruwarete ‘ga oje’eg are moromu’jarera ‘gā mepyi. ‘Ga ree ojejuka esage ma’e ‘gā nanē ‘ga omepyi nū, moromu’jarera ‘ga repy ‘jawe etee futat. Ojeupe ‘ga amū waēm ire nipo ‘gā amū ‘jau: “Koromū esage ma’e ‘ga. Ma’eramū ‘ā ore jejuka esagei ‘ga ree”, ‘jau nipo ‘gā. A’jea futat je ‘i: Anure nipo Janeruwarete ‘ga esage ma’e ‘gā mepyi. A’eramū ‘ga esage ma’e ‘gā nee ojejuka esage ma’e ‘gā nanē imepyau nū, esage ma’e ‘gā nepy ‘jawe etee futat nū— ‘jau Jejuu ‘ga oree.

⁴²—A’jea futat je ‘i: Anure nipo Janeruwarete ‘ga je rerowiaara ‘gā nereko esageara ‘gā mepyi. ‘Yro’ysaga etee agawewi nipo ‘gā imonou je rerowiaara ‘ga amū upe, i’yuwei ma’eramū. A’etea Janeruwarete ‘ga ‘yro’ysaga monoara ‘gā mepyau ‘ga upe imonoawer are— ‘jau ‘ga oree, kwe pe omome’wawamū ‘ga ore monoi.

A’eramū ore arawau kwe pe ‘ga mome’wau oropytuna judeu ‘gā nupe.

11

Juā Batista ‘ga remiayup (Luka 7.18-35)

¹Ojewi ‘ga remimu’e ‘gā orauwe Jejuu ‘ga awau ipyriu’iwara ‘gā mu’jau ‘Uwarete ‘ga ree.

²A’e pype Juā Batista ‘ga remiayuwā ‘gā amū ‘ua owaēma Jejuu ‘ga upe. Juā Batista ‘ga remiayuwā ‘gā Jejuu ‘ga remiapofera mome’wau ‘ga upe moromunepawa pype ‘ga renaw ipe rakue. A’eramū Juā ‘ga ‘gā amū monou ‘gā moporonuwukaa ee Jejuu ‘ga upe:

—“Ene te Jarejuwarete ‘ga remimurera? ‘Ga amū te ra’u nū?” pe’je ki pejewau ‘ga upe jee— ‘jau ‘ga wemiayuwā ‘gā nupe.

³A’eramū ‘gā awau oporonupa ee Jejuu ‘ga upe:

—“Ene te Jarejuwarete ‘ga remimurera? ‘Ga amū te ra’u nū?” e’i Juā ‘ga enee ko— ‘jau ‘gā awau ‘ga upe.

⁴A’eramū Jejuu ‘ga ‘jau ‘gā nupe:

—Pe’je pejewau pejemiesagera mome’wau ‘ga upe.

⁵“Eae’ema ‘gā ‘ga amamā’ē akou. Iteu ma’e ‘gā ‘ga amafu’am. Ipito’om ma’e ‘gā ‘ga imokā’jāu. Iapyae’ema ‘gā ‘ga imuapyau. Amanū ma’e ‘gā ‘ga imoferapa. Iporiay’i ma’e ‘gā nupe ‘ga morogyta esage mome’wau akou” pe’je ki, jeremiapofera mome’wau ‘ga upe.

⁶“Je rerowiar awi ipoire’ema ‘gā niku’ipawi futari ajemogyau”, e’i ‘ga enee ko, pe’je ki ‘ga upe— ‘jau Jejuu ‘ga ‘gā nupe.

⁷Ojewi Juā ‘ga remiayuwā ‘gā o ppyrauwe Jejuu ‘ga oporonupa Juā ‘ga rekwawer are ojeypyriwara ‘gā nupe.

—Amunawe’em ipe pejewau te maran peesak ‘ga rai’i? Ma’ja ‘jawe te ‘ga rai’i? Sā’ā juowa ywytua erojetyjetyga erekoa. Nan te ‘ga reko’i rai’i? Naani te ra’u nū?— ‘jau ‘ga ‘gā nupe. —Nanarūi futat ‘ga reko’i— ‘jau ‘ga ‘gā nupe. —Najuejue etee futat ‘ga reko’i oje’egawer imū etee futat ‘ga oje’ega ‘gā nupe ai’i, wesakara ‘gā nupe ai’i. “Pejetywer awi pēpoiweramū Ku’jywa ‘ga imoiri pē nui”, ‘jau pāwē pāwē etee futat ‘ga akou ‘gā nupe. Kūima’eteete ‘gā nupe, akotee ma’e ‘gā nupe ‘jau ‘ga akou ‘ga mome’wau ‘gā nupe ai’i— ‘jau Jejuu ‘ga ‘gā nupe.

⁸—Taity esagea sipo ‘ga wereko eruatau pēnemiesagamū rai’i? Naani. Taity esage ma’e ‘gā ako ‘og esage pype etee. A’ere Juā ‘ga nanarūi. Taity ekoetea etee futat ‘ga wereko imunepa. Nu’ari futari ‘ga taity esage rerekwar ipe. Ikaraemā kwai ma’e ‘gā ‘ā waity esage etee te wereko imunepa. A’ere Juā ‘ga nanarūi— ‘jau Jejuu ‘ga uka’i ‘gā nupe.

⁹—Juā ‘ga ‘ā Jarejuwarete ‘ga mome’wararete ako rai’i.

¹⁰Ymā te ‘ā Janeruwarete ‘ga ka’arana kwasiarukari Juā ‘ga ree inuga rakue. “Koromū jeje’ega mome’wara ‘ga”, ‘jau ‘ga ‘ā ikwasiarukaa inuga ‘gā nupe rakue— ‘jau Jejuu ‘ga imome’wau ‘gā nupe. —“Tomono ‘ga ene renunewe ‘jau, kwe pewara ‘gā mu’jau ene ree ‘jau, ene rura futarukaa ‘gā nupe ‘jau”, ‘jau ‘ga inuga ikwasiaa ka’aran are rakue— ‘jau Jejuu ‘ga ‘gā nupe.

¹¹—Aeppy ‘gā porogytafera wesageramū agawewi. A’ere Juā ‘ga porogytafera te ‘gā porogytafera resage apyraawi Jarejuwarete ‘ga upe. A’ere ‘awamū je rerowiaara ‘gā te Juā ‘ga porogytafera apyraawi. Imu’epyre’ema ‘gā agawewi ‘ā. A’etea ‘gā ‘ga ma’e apyraapa Jarejuwarete ‘ga upe— ‘jau Jejuu ‘ga ‘gā nupe imome’wau.

¹²—Juā ‘ga ra’ne ‘ā ‘gā mu’jau Jarejuwarete ‘ga ree rakue. “Pejetywer awi pēpoiweramū Janeruwarete ‘ga pētywera moiri pē nui, pē mogyau wemiayuwamū”, ‘jau ‘ā Juā ‘ga ‘gā

nupe rakue. 'Awamū 'ā je nanē aipo 'jau pē nupe nū— 'jau Jejuī 'ga 'ūina 'gā nupe. —A'eramū kwaiwete itywet ma'e 'gā oreje'ega rerowiaa. 'Gā ku'ia 'gā nerekou. "Arowiat je 'gā je'ega. A'eramū Janeruwarete 'ga jetywera moia je wi, je mogou wemiayuwamū. Tene 'ga rerowiare'ema 'gā je rereko tyweretei kwy. Napoiri futari je 'ga rerowiari awi", 'jau nipo 'gā aku'iramū ajemogyau— 'jau Jejuī 'ga 'gā nupe.

¹³—Ymā we te 'ā Janeruwarete 'ga je'ega mome'warera 'gā Moisesi 'ga retee imome'ui pē nupe rakue. "Anure nipo Janeruwarete 'ga wemimurama 'ga muri, 'ga mogou 'wyriaramū ae upe. Otywer awi opoit ma'e 'gā nipo 'ga imogyau wemiayuwamū", 'jau 'gā nakue. Juā 'ga nanē Janeruwarete 'ga remimureramū je mome'wau pē nupe rai'i nū.

¹⁴Ymā te Janeruwarete 'ga je'ega mome'wara 'gā amū 'i rakue: "Anure nipo Eliasi 'ga 'jawewaramū ra'ne ijesaukari pē nupe. 'Ga rewiri etee nipo ajee Janeruwarete 'ga remimura 'ga jesaukari", 'jau 'gā ikwasiaa ee rakue. A'eramū je ee iparuerowariwet ma'eramū pē mueapyou 'gā je'eg are. Juā 'ga futat Eliasi 'ga 'jawewara. A'eramū 'ga 'ua Jarejuwarete 'ga remimuramamū je renune ai'i.

¹⁵Ee pejejeapyoweramū ki peapyaka katu jeje'eg are— 'jau Jejuī 'ga 'gā nupe.

¹⁶⁻¹⁷—Ma'ja 'jawe te 'awauwaramū pēē?— 'jau 'ga 'gā nupe. —Kunumīarū'ema 'jawe futat pēē. Sā'ā kunumīa. "Soo jarejerokyau 'jau" 'eramū, "Naani. Najeataweretei je", 'jau etee 'ā ajaupe. "Pe'je ajee sajeawotee 'ū", 'jau 'ā kunumīa ajaupe nū. "Najeawoteeweri futari je", a'e ako je ko, 'jau ete 'ā kunumīa ajaupe. Nan tee futat pēē.

¹⁸Juā Batista 'ga 'ā ojemi'ware'ema akou Jarejuwarete 'ga upe oporogytau rakue. A'eramū 'ā pēē "mama'eukwaawa 'ga wereko opir are ra'e", 'jau 'ā pēē 'ga upe, 'ga jemi'ware'emamū rakue— 'jau Jejuī 'ga 'gā nupe.

¹⁹—A'ere 'ā je ruri Juā 'ga rewiri nū. Je 'ā tekou teojere'emamū tejemi'waa Jarejuwarete 'ga upe teporogytau. A'eramū 'ā pēē "Emi'uu 'ā 'ga ra'e", 'jau etee jee nū— 'jau 'ga 'gā nupe. —"Itywet ma'e 'gā jekoty'aawa 'ga ra'e, 'wyriararete upe ka'aranūū ppykara 'gā jekoty'aawa 'ga ra'e", 'jau etee 'ā pēē jee nū— 'jau 'ga 'gā nupe. —Kunumī 'jawe pēē. Juā 'ga ree ra'ne 'ā pēē pejeporomutare'emamū rai'i. 'Awamū 'ā pēē je ree nanē pejeporomutare'emamū nū— 'jau Jejuī 'ga 'gā nupe. —Kunumī 'jawe 'ā pejemogy. Jarejuwarete 'ga je'eg imū mama'ea jane iaporamū nipo jane pyriwara 'gā 'i janee: "A'jea futat. Janeruwarete 'ga 'ā i'akwaap. Sā'ā 'ga remiayuwa 'gā neko esagea", 'jau nipo 'gā janee, janereko esage resag ire— 'jau 'ga 'gā nupe u'ma.

*Jejuī 'ga je'ega moywyrafenawet
(Luka 10.13-15)*

²⁰A'eramū Jejuī 'ga oje'ega moywyrafena wemiapofera resakara 'gā nupe. 'Gā 'wyr ipe agawewi Jejuī 'ga aeremiapoe'ema apou 'gā nowase. A'etea 'gā nopoiri futari otywer awi. A'eramū Jejuī 'ga oje'ega moywyrafena 'gā nupe:

²¹—A'e je ki 'ei. Naje moporomutarukari te 'ā pejepe a'i kūi. Pēporiay'i 'ā pejejemogyau numiamū a'i kūi. Korasi pewaramū, Pesaita pewaramū. Mimer ipewaramū 'ā pēporiay'i pejejemogyau numiamū. Pē'wyr ipe ako je Jarejuwarete 'ga mome'ui tekou pē nupe ikue numiamū. Ojero'wu ma'e 'gā katu'oka ako tekou pē neape ikue numiamū. A'ere ako nepēporenuwiwari jeje'eg are ikue. Nepēpoiriwari ako pejetywer awi ikue. Pejetywera retee ako pēē ikue. Tiro pe 'gā katu'og ire amunipo 'ā peuwara 'gā poiri otywer awi rakue. Sidom ipe. Mimer imū 'gā katu'og ire amunipo 'ā peuwara 'gā poiri futari otywer awi rakue. Tanimuga amunipo 'ā 'gā wereko wapyte'rarimū otywer awi opoira resaukaawamū. A'ere ako je 'au agawewi iapoi tekou pē'wyr ipe ikue. A'etea ako nepēpoiri pejetywer awi ikue— 'jau Jejuī 'ga 'gā nupe, wemiapofera resakarera 'gā pyu oje'ega magwamagwapa.

²²—A'eramū nipo Janeruwarete 'ga pē majatykaawa 'ara rupi Tiro pewara 'gā majatykau wowase. A'eramū nipo 'ga 'gā nerekou tyweaete. Sidom ipewarera 'gā nanē nipo 'ga erekou tyweaete nū. 'Gā tywer are wejue nipo 'ga 'gā nerekou tyweaete etee. A'ere nipo 'ga pēē te pē nerekou tyweretei kwaiwete. Pēē te 'ā neperowiari 'ga, 'ga pājē resakareramū miamū— 'jau Jejuī 'ga 'gā nupe.

²³—Pēporiay'i pejejemogyau numiamū, a'e je 'ā pē nupe, Kafanaū pewaramū nanē nū. "Ore Kafanaū pewaramū oreresage", pe'je numiamū. "A'eramū ore arawau ywag ipe", pe'je pejejaupe numiamū. A'ere je 'i pē nupe: Mama'eukwaawa rapyaw ipe oo ma'eramū futat pēē, a'e je 'ā pē nupe— 'jau Jejuī 'ga Kafanaū pewarera 'gā nupe. —Nepēpoiri te 'ā pejetywer awi. A'eramū pēē pejewau mama'eukwaawa rapyaw ipe futat— 'jau Jejuī 'ga 'gā nupe. —Pē neape futat je ako pēnemiapoe'ema apou tekou ai'i. A'ere ako nepēpoiriwari pejetywer awi ikue. Sodom ipe iapo re amunipo 'ā peuwara 'gā poiri otywer awi rakue. A'eramū amunipo 'ā 'gā 'wyr a'atepawe'emamū futat rakue. 'Upa we futat amunipo 'ā 'gā 'wyr a'awamū miamū futat— 'jau Jejuī 'ga 'gā nupe.

²⁴ —Wowase pē majatykaaw ipe nipo Janeruwarete 'ga pē nereko tyweretei te futat kwaiwete Sodom ipewarera 'gā nereko tywera apyraapa— 'jau 'ga oje'ega moywyrarfena Kafanaū pewara 'gā nupe.

*Jejui 'ga oporopoariweramū jane ree
(Luka 10.21-22)*

²⁵ A'ere Jejui 'ga 'jau 'Uwarete 'ga upe:

—Kiapi'ni. Ene 'ā mama'e jararetea. Ene 'ā ywag ipewara mama'e jara. Ywy pewara jara nanē 'ā ene nū. Ene te 'ā mama'e jararetea. Nai'akwaap ma'e 'gā etee rūi 'ā eremueapyo jeje'eg are. Akotee ma'e 'gā na'ne 'ā eremueapyo ee nū. I'akwaap ma'e 'gā jēmī 'ā ene imueapyowe'em ee.

²⁶ Ejemifutar imū etee futat 'ā ene akotee ma'e 'gā mueapyo ee. Nanuara futat te 'ā erefutat rakue— 'jau 'ga oje'ega 'Uwarete 'ga upe.

²⁷ A'eramū 'ga 'jau ojepyriwara 'gā nupe nū:

—Jeruwarete 'ga je mu'akwaap mama'e are ikue. Ma'eramū je 'ā ikwaawi— 'jau 'ga 'gā nupe imome'wau. —Jeruwarete 'ga je kwaap katu katu futat. Nitywi 'gā amū je kwaaparamū. Jeruwarete 'ga etee te je kwaap. Je 'ā Tejuwa 'ga akwaap katu katu futat. A'ere 'gā nitywi amū je 'jawewara Jeruwa 'ga kwaapa katu katuara 'gā amū— 'jau Jejui 'ga 'gā nupe. —Ma'eramū je 'ā tejemipyyrūmera 'gā mu'ei Tejuwarete 'ga ree. A'eramū 'gā a'eramū 'ga kwaapa je pyri— 'jau 'ga 'gā nupe.

²⁸ A'eramū Jejui 'ga 'jau ojepyriwara 'gā nupe nū:

—Pe'je pejejua jee jeje'ega renupawamū je pyri. Tejerowiar ire je jejuka esagei pē nee. Pēē mū mama'e poyjuu rupiara 'jawe. Sā'ā ae mama'e poyjuu upiaramū. Nan tee futat pēfuakapawamū. Pejepy'a'wyrāmū pejejemogyau mama'e are. A'eramū pēē pejejuakapawamū pejejemogyau. Tejerowiar ire je jejukai pē nee. A'eramū nipo pejepy'a'wyre'emamū mama'e are pejejemogyau— 'jau Jejui 'ga 'gā nupe.

²⁹ —Pejemu'e je ree. Jeje'eg are nanē pejejemu'jau nū. Je te 'ā ajemuaēm pē nee. Jeporopoariwet je tekou pē nee. Je ree pejejemu'e re nipo pēē pejepy'a'wyre'emamū mama'e are pejejemogyau.

³⁰ Naayi futari jeje'ega renuwa. Ay futat numiamū. Je futat apoat pēē mama'e apo are teje'eg imū futat. A'eramū aye'ema 'jawe akou pē nupe. Jeje'ega renuw ire nipo pēē pejeku'iramū pejejemogyau— 'jau Jejui 'ga 'gā nupe.

12

*Morowykye'em are 'gā mu'eawet
(Maku 2.23-28; Luka 6.1-5)*

¹ Morowykye'ema mū rupi Jejui 'ga awau juowuurana ko pyterimū akou. 'Ga rewiri oo ma'e 'gā opy'arayparamū ajemogyau. A'eramū 'gā a'ŷja pa'wau erawau opo pe. A'eramū 'gā ipe'oka i'wau.

² 'Gā nesakawe fariseu 'gā amū 'jau Jejui 'ga upe:

—Kuu. Emā'ē 'gā nee ki sa. Eneremiayuwa 'gā opo'o a'ŷja i'wau ra'e ki sa. “No-porowyky'a'uweri ae morowykye'ema rupi”, e'i nā'ā Moisesi 'ga jepi re'ā. Juowuurana a'ŷja po'oa aeporowyky'a futat. Ymā te 'ā Moisesi 'ga 'i rakue: “Pe-porowyky kasi morowykye'ema rupi ne”, 'jau 'ga 'ā rakue a'i kūi— 'jau 'gā Jejui 'ga upe.

³ A'eramū Jejui 'ga 'jau 'gā nupe:

—Ma'ja te Davi 'ga wapo rakue? Nepemogytai nipo ka'arana 'ga remiapofer are? Ymā te 'ā 'ga py'arayparamū opytuna 'gā netee akou rakue.

⁴ A'eramū 'ā 'ga awau Jarejuwarete 'ga mogytaaw ipe osou rakue. A'e pe 'ga 'ā kanape pyyka i'wau opytuna 'gā netee rakue. Pekwaap 'ā aipoa. Na'gā nemi'ua rūi poa numiamū. Mainana 'gā etee te a'u aipoa rakue. A'etea Davi 'ga a'u opytuna 'gā netee rakue. Ipy'araypat 'gā awau osou peu. A'eramū 'ga amū “Nepēa'wryi pēē” 'jawe'em 'gā nupe rakue— 'jau Jejui 'ga 'gā nupe.

⁵ —Morowykye'ema rupi mainana nanē oporowykyau nū. Nepemogytai nipo Moisesi 'ga remikwasiarera ka'arana mainana 'gā porowyky are ki sa? Morowykye'ema mū magwamagwapa 'gā wyra rapyau Jarejuwarete 'ga upe. A'ere 'gā amū “Iro peporowyky morowykye'ema rupi pejejupa” ne'i 'gā 'gā nupe— 'jau Jejui 'ga 'gā nupe.

⁶ —A'jea futat je 'i: Esage futat Janeruwarete 'ga mogytaawa. Esage futat 'ga mogytaawa pype 'gā nemiapofera— 'jau 'ga 'gā nupe. —A'ere 'awamū je reko. A'eramū jeje'ega renuwa wesageramū futat 'ga mogytaawa pype 'gā nemiapofera apyraapa— 'jau Jejui 'ga 'gā nupe.

⁷ —Ymā Janeruwarete 'ga oje'ega kwasiarukari Oseja 'ga upe rakue: “Je upe mama'e mura esage futat jee. A'ere pejejee pēpota'wa esagea etee esageramū jee. Nafutari je tejeupe pēnemimurera, pejejee pejepota'wa esage'em ire”, 'jau 'ga ikwasiarukaa rakue.

Nepēneapyoi nipo pēē 'ga remikwasiarer are pejejemogyau ki sa. Ee pejejeapyo re amunipo 'ā "Nia'wyrī pēnemīapofera" nepe'jei 'gā nupe, a'ŷja po'wara 'gā nupe. Nuapoi futari 'gā mama'e tywera— 'jau Jejuī 'ga 'gā nupe.

⁸—Je 'ā pēneki'yraretea, Jarejuwarete 'ga remimurera. A'eramū je 'jau pē nupe: "Je 'ā morowykye'ema jara". A'eramū je tee pē mu'jau morowykye'ema rupi pēnemīapoe'em are— 'jau 'ga 'gā nupe.

Ipoteu ma'e

(Maku 3.1-6; Luka 6.6-11)

⁹'Gā nupe oporogytapaw ire Jejuī 'ga awau osou judeu 'gā jatykaaw ipe.

¹⁰A'e pe ipoteu ma'e 'ga wapyka 'ūina. A'eramū Jejuī 'ga ree iporomutare'ema 'gā 'jau ajaupe:

—Awamū morowykye'ema. Maran sipo 'ga 'awamū ipoteu ma'e 'ga rerekoi nū?— 'jau 'gā ajaupe. —'Ga po katu'ogamū ki sa'e 'ga upe: "Nuenuwī futari 'ga Moisesi 'ga porogytafera ra'e", sa'e ki 'ga upe a'i kūi— 'jau 'gā 'upa ajaupe.

A'eramū 'gā 'jau Jejuī 'ga upe:

—Esageay te Moisesi 'ga remikwasiarer imū ae katu'oga morowykye'ema rupi enee?— 'jau 'gā 'ga upe.

¹¹A'eramū Jejuī 'ga 'jau 'gā nupe:

—Pejejemawa ywykwara pype i'aramū sipo nepenuēmi ywykwara awi morowykye'ema rupi? Morowykye'ema rupi agawewi nipo i'ari ywykwara pype pē nui. A'etea nipo penuēm futat jui morowykye'ema rupi. Nepeejara'uweri ywykwara pype im'ina— 'jau 'ga 'gā nupe.

¹²—Pē nupe pēnemīawā repyramū futat. A'eramū pēē pejejejukau esage futat ee. Ae taetu ajee 'ā ae ate Jarejuwarete 'ga upe. A'eramū 'ga ajemuaēma iteu ma'e 'ga ree taetu pejejejmaw are jemuaēma apyraapa. Ma'eramū sipo jane jarejopoare'ema morowykye'ema rupi? "Pejopoar iki", e'i 'ā Janeruwarete 'ga ikwasiarukaa Moisesi 'ga upe rakue— 'jau 'ga 'gā nupe.

¹³A'eramū 'ga 'jau ipoteu ma'e 'ga upe:

—Epo epopyo— 'jau 'ga 'ga upe.

A'erauwe futat 'ga opo popywau. A'eramū futat 'ga po ojekatu'oka 'ga po owajara 'jawe etee futat.

¹⁴A'e resakawe fariseu 'gā awau ū'jāu jui. Morowykye'ema rupi 'ga katu'ogamū 'gā amara'neramū Jejuī 'ga ree. A'eramū 'gā afuwereteteramū 'ga ree.

—Maran te jane Jejuī 'ga rerekoi? Jemime te ra'u jane 'ga jukai nū?— 'jau 'gā ajaupe.

Janeruwarete 'ga remipyryūmet

¹⁵"Fariseu 'gā ifuwerete te ene ree" 'e renupawe Jejuī 'ga awau jui. Kwaiwete 'gā awau 'ga rupi. A'eramū 'ga ojero'wu ma'e 'gā katu'okapap.

¹⁶'Gā katu'og ire 'ga 'jau 'gā nupe:

—Je mome'u kasi pejepe 'gā nupe ne— 'jau 'ga 'gā nupe.

¹⁷Ymā te Janeruwarete 'ga oje'ega mome'wara 'ga upe ka'arana kwasiarukari Jejuī 'ga ree rakue. A'eramū Jejuī 'ga mama'e apou Isai 'ga remikwasiarer imū etee futat rakue.

¹⁸"Koromū je upe oporowyky ma'e 'ga, jeremipyryūmera 'ga. Jeremifutararete 'ga. A'eramū je teku'iramū tekou 'ga ree.

Te'agesagea je amono 'ga upe 'ga rerekwaramū. A'eramū nipo 'ga jepājē mū etee futat mama'e apou akou.

Ywy pewara 'gā nupe nipo 'ga jeremiaporama mome'wau akou.

'Otywer awi opoit ma'e 'gā nipo 'ga imogyau wemiayuwamū', 'jau 'ga 'gā nupe najuejue etee.

¹⁹Nimara'nei 'ga ae ree. A'eramū 'ga oje'egayawe'em.

Wafukaite'ema 'ga kwe pewara 'gā nupe. Ojee etee 'ga ojerowiarape'ema.

²⁰Ajemuaēm te 'ga ae ree. Ojero'wu ma'e 'gā nee 'ga opota'waramū.

Iku'ipap ma'e 'gā nee 'ga ojejukau esage. A'eramū 'gā aku'iramū ajemogyau nū.

Afuakaramū 'ga 'gā nee. 'Jeruwarete 'ga oje'ega pē nupe', 'jau 'ga 'gā nupe, 'ga je'ega 'gā erowiare'emaewe.

A'eramū nipo 'gā 'ga je'ega rerowiaa ajemogyau.

²¹'Ga ree nipo judeue'ema 'gā jemogyppygi. 'Anure nipo 'ga jane katu'ogi Jarejuwarete 'ga upe', 'jau nipo 'gā ajaupe",

'jau Isai 'ga ikwasiaa Jejuī 'ga ree rakue. A'eramū Jejuī 'ga mama'e apou 'ga remikwasiarer imū etee futat.

Mama'eukwaawa rerekwat

(Maku 3.20-30; Luka 11.14-23)

²² Anure 'gã amũ mama'eukwaawa rerekwara 'ga rerua Jejui 'ga upe. 'Gã nemierurera 'ga noje'egi futari. Mama'eukwaawa 'ga moje'egukare'ema 'ga mogou. Mama'e resagukare'ema nanẽ 'ga upe nũ. A'eramũ 'gã 'ga rerua Jejui 'ga upe. A'erauwe Jejui 'ga 'ga katu'oka, mama'eukwaawa moia 'ga wi. A'erauwe ikatu'ogipyrrera 'ga je'egi 'gã nupe. Mama'e resaka nanẽ 'ga akou nũ.

²³ A'e resakarera 'gã oporesagamũ ajemogyau Jejui 'ga ree.

—Tÿÿ. Okatu'ok 'ga 'ga ra'e— 'jau 'gã ajaupe. —Janeruwarete 'ga remimurera 'ga te 'ũi? Janeremiapesagera 'ga te 'agamũ 'ũi?— 'jau 'gã ajaupe.

²⁴ A'e renupawe fariseu 'gã 'jau 'gã nupe:

—Mama'eukwaawa 'wyrriara je'eg imũ te 'ga 'ga pirewara moiri 'ga wi— 'jau 'gã 'gã nupe. —Pesepu* pãjẽ mũ etee 'ga imoiri 'ga wi— 'jau 'gã 'gã nupe.

²⁵ 'Gã 'eawera kwaapawe Jejui 'ga 'jau 'gã nupe:

—'Gã amũ nipo ojo'oka oywy pype ajamueu— 'jau 'ga 'gã nupe. —Maran sipo 'gã amũ a'eramũ ojo'oka oywy pype ajamueu. Ajaupi etee futat ajuapisaupap, ojomateepapa ajaupi etee futat— 'jau Jejui 'ga u'ama oporogytau 'gã nupe. —Maran sipo a'eramũ majejeja amunaw ipewara 'gã ojo'oka ajaupi tee futat ajuapisawamũ— 'jau Jejui 'ga 'gã nupe u'ama.

²⁶ —Nan iapo re amunipo 'ã mama'eukwaawa remiayua ijomateepawi ajaupi etee futat— 'jau Jejui 'ga 'gã nupe.

²⁷ —'Pesepu pãjẽ mũ 'ga mama'eukwaawa pe'ai 'gã nui", pe'je ako jee ko. A'eramũ je 'jau pẽ nupe: Ma'ja pãjẽ mũ ajee pẽnemiayua 'gã mama'eukwaawa moiri 'gã nui jepi? Najarejuwarete 'ga pãjẽ mũ rui nipo 'gã imoiri 'gã nui jepi?— 'jau 'ga 'gã nupe.

²⁸ —Je nanẽ futat 'ã Jarejuwarete 'ga pãjẽ mũ etee futat je amoit 'ga wi nũ. A'eramũ pẽẽ a'e are je kwaapa. "Janeruwarete 'ga remimurera 'ga futat ra'e, janeremiapesagera 'ga futat ra'e", 'jau amunipo 'ã pẽẽ jee— 'jau 'ga 'gã nupe.

²⁹ —Ose sipo muna'ywa ifuakat ma'e 'ga rog ipe, 'oga jara 'ga fare'emamũ? Naani. Nosei futari. Ifuakat ma'e 'ga far ire etee isei 'ga rog ipe, 'ga karaemã pojekaw 'ga wi— 'jau Jejui 'ga 'gã nupe. —Mama'eukwaawa 'wyrriara ifuakat ma'e 'jawe. Ipãjẽ futat numiamũ. A'ere Janeruwarete 'ga te pãjẽreteka, mama'eukwaawa 'wyrriara pãjẽ apyraap. Ma'eramũ 'ã ae Jarejuwarete 'ga pãjẽ mũ etee mama'eukwaawa moiri 'gã nui— 'jau Jejui 'ga 'gã nupe.

³⁰ —Je ree iporomutare'ema 'gã najeremiayua rui — 'jau Jejui 'ga 'gã nupe. —Jeporowyky are je poare'ema 'gã nanẽ naje upe rui oporowyky. Mama'eukwaawa upe te 'gã porowyky— 'jau Jejui 'ga 'gã nupe.

³¹ —Ma'eramũ 'ã je 'i pẽ nupe: Janeruwarete 'ga petywera omoit pẽ nui, jui pẽpoiriweramũ, je 'i pẽ nupe. A'ere 'ga nomoiri futari U'agesage kuraparamũ petywera pẽ nui— 'jau Jejui 'ga 'gã nupe.

³² —Pẽẽ mũ nipo je kurapa agawewi pejemogyau. A'etea nipo Janeruwarete 'ga petywera moiri pẽ nui, ojeupe peporogytaramũ. A'ere 'ga U'agesage kuraw ire petywera nomoiri futari pẽ nui. Jarejuwarete 'ga 'Agesage pãjẽ mũ etee je mama'eukwaawa moiri 'ga wi. "Pesepu pãjẽ mũ te 'ga mama'eukwaawa moiri 'ga wi" 'jaramũ pẽẽ Jarejuwarete 'ga 'Agesage kuraparamũ. A'eramũ nipo Janeruwarete 'ga petywera moire'ema pẽ nui. 'Awamũ miamũ 'ga namoiri futari petywera pẽ nui. Anure nanẽ nipo 'ga imoire'ema U'agesage kuraparamũ pẽ nui nũ— 'jau Jejui 'ga 'gã nupe.

Y'wa 'yp

(Luka 6.43-45)

³³ —Y'wa 'ywa 'jawe pẽẽ. Y'wa 'yp katurama i'a katuram tãmẽjẽ futat. Y'wa 'yw a'wyre'ema o'ywa 'jawe etee futat ni'aa'wryi. A'eramũ ki pẽẽ y'wa katurama resag ire 'jau jupe: "Agamũ 'ywa katurama. Sã'ã i'a katurama tãmẽjẽ", 'jau ki pẽẽ jupe. A'ere pẽẽ y'wa a'wyre'ema resag ire ki 'jau tãmẽjẽ jupe: "Agamũ 'ywa a'wyre'ema. Sã'ã i'a a'wyre'ema", 'jau tãmẽjẽ pẽẽ jupe esaka— 'jau 'ga 'gã nupe.

³⁴⁻³⁵ —Esage ma'e 'jawe futat pejemogy numiamũ. A'ere petywet futat pejemogyau— 'jau 'ga 'gã nupe. —Maran sipo ajee nanuaramũ pejemogy esage ma'e 'jawe pejeje'ega? Naesage ma'e arũi futat pẽẽ. Esage ma'e 'gã ea'at mama'e esage are etee futat. A'eramũ 'gã mama'e esage are etee futat oporogytau. Ia'wyre'ema 'gã ea'at mama'e tywer are etee futat. A'eramũ mama'e tywer are etee futat 'gã oporogytau— 'jau Jejui 'ga 'gã nupe.

³⁶ —Pẽẽ mũ nipo pejeje'ega ekoete pejemogyau. A'eramũ je 'jau pẽ nupe: Anure wowase pẽ majatykaaw ipe nipo Janeruwarete 'ga 'i pẽ nupe: "Ma'eramũ te ereje'eg ekoete ekou rakue?" 'ga 'i pẽ nupe.

³⁷ Pẽ'eawer imũ etee futat nipo Janeruwarete 'ga pẽ mepyau. Mama'e esage mome'wareramũ te nipo ajee Janeruwarete 'ga 'i pẽ nupe: "Eneresage jee", 'jau nipo

* 12:24 Mama'eukwaawa 'wyrriara rera mukũi tapy'ÿja je'eg imũ. Satanasi 'jawamũ, Pesepu 'jau nũ.

'ga pē nupe. A'ere nipo 'ga mama'e tywer are tee nipo peporogyta pejemogyau 'eramū nipo 'ga 'i pē nupe: “Pētywet jee”, 'jau nipo 'ga pē nupe— 'jau Jeju 'ga 'gā nupe.

*Aeremiapoe'ema fariseu 'gā enūinawet
(Maku 8.11-12; Luka 11.29-32)*

³⁸ A'eramū Moisesi 'ga remikwasiarer are moromu'jara 'gā oje'ega 'ga upe, fariseu 'gā netee:

—Oreremiapoe'ema eapo amū oree. Taruesak 'jau— 'jau 'gā 'ga upe.

³⁹ A'eramū Jeju 'ga 'jau 'gā nupe:

—'Awauwaramū miamū 'ā nepēa'wryi futari pejemogyau 'ga upe. “Oreremiapoe'ema eapo amū oree”, pe'je 'ā jee numiamū. A'ere je naapoa'uweri mama'ea pē nupe pēnemiesagamū. Juna 'ga ree etee je pē muea'ari pē mogyau— 'jau Jeju 'ga 'gā nupe.

⁴⁰ —Sā'ā ipira Juna 'ga mokona rakue. A'eramū 'ga 'ā muapyt osea ipira reweg ipe rakue. Nan tee futat nipo pēneki'yramū je seri muapyr etee ywy pe, 'gā tejuka re— 'jau Jeju 'ga 'gā nupe.

⁴¹ —Ymā te 'ā Juna 'ga reko'i Jarejuwarete 'ga je'ega mome'waramū rakue. A'eramū 'ā Janeruwarete 'ga 'ga monou ojemome'waukaa Ninewa pewara 'gā nupe rakue. “Kwe pe ekwap je mome'wau Ninewa pewara 'gā nupe”, 'jau 'ga 'ā 'ga upe rakue. Ipira amun ire te 'ā Juna 'ga awau Jarejuwarete 'ga mome'wau Ninewa pewara 'gā nupe rakue. Juna 'ga je'ega renupawe peuwara 'gā opoia otywer awi rakue. A'eramū nipo 'gā 'jau pē nupe: “Norokwaawi futari ore Ku'jywa 'ga ikue. A'etea ore orojeupe Juna 'ga 'ga mome'u ppyrauwe oropoit orotywer awi ikue”, 'jau nipo 'gā pē nupe, Jarejuwarete 'ga rowase pē majatykaaw ipe— 'jau Jeju 'ga 'gā nupe. —Juna 'ga a'jea futat esage ma'ea rakue. A'ere 'ā je te esage ma'ea Juna 'ga apyraapa. A'etea 'ā naje rerowiari pejepe pejemogyau— 'jau Jeju 'ga 'gā nupe.

⁴² —Janeruwarete 'ga rowase pē majatykaaw ipe nipo Sepa ywy pewara 'wryiara ēē nanē nipo 'jau pē nupe: “NaKu'jywa kiā remiayuwa rūi agawewi je ikue. A'etea je ojot muku awi Sarumāu kiā je'ega renupa ikue. Sarumāu kiā i'akwaawa agawewi kiā ikue”, 'jau nipo ēē pē nupe. A'eramū je 'jau pē nupe: A'jea futat Sarumāu 'ga i'akwaap ma'ea rakue. A'ere 'ā je te i'akwaawete ma'ea je reko'i. Ma'eramū gatu nipo 'ā naje rerowiari pejepe, a'e je 'ā pē nupe— 'jau Jeju 'ga 'gā nupe.

*Werekwarera upe mama'eukwaawa jewyawet
(Luka 11.24-26)*

⁴³⁻⁴⁴ A'eramū Jeju 'ga 'jau 'gā nupe nū:

—Pē nui omoir ire nipo mama'eukwaawa ioi ywy akyme'ema rupi opytaawa mū rekaa akou. A'eramū nipo opytaawa mū resake'emawe 'jau ojeupe etee futat nū: “Maran te 'ā nooi tejekwawer ipe etee futat tejewya nū 'i?” 'jau nipo ojeupe. A'eramū nipo ojewya 'ua werekwarera 'ga resaka. Erekwarera 'wryiar amuteeramū nipo akowe'em ee. Ijekatu'oguu tuwamū.

⁴⁵ A'eramū nipo opytuna majatykau awau. Sete nipo opytuna rerua. A'ea te nipo itywerete. A'eramū te nipo erekwarera 'ga te'arareteramū— 'jau Jeju 'ga 'gā nupe imome'wau. —Nan tee pēē. Jeje'ega rerowiare'emamū pētywet pejemogyau jee— 'jau 'ga 'gā nupe.

*Jeju 'ga y ēē 'ga rewirera 'gā netee
(Maku 3.31-35; Luka 8.19-21)*

⁴⁶ 'Ga porogyta pype Jeju 'ga y ēē 'ua, 'ga rewirera 'gā netee. Ukupepewara 'gā nupe owaēma.

—Toroporogyta Jeju kiā upe 'jau— 'jau ēē 'gā amū nupe.

⁴⁷ A'eramū 'ga amū 'jau Jeju 'ga upe:

—Eney ēē 'ut owaēma enerewirera 'gā netee janee. “Toroporogyta kiā upe 'jau”, e'i ēē oree— 'jau 'ga Jeju 'ga upe.

Aipo ojeupe 'eramū Jeju 'ga 'jau 'ga upe:

—A'jea— 'jau 'ga 'ga upe.

⁴⁸ A'eramū Jeju 'ga 'jau ojepyriwara 'gā nupe:

—Maranuaramū te pēē jey 'jawe jee? Maranuaramū te pēē jerewirera 'gā 'jawe jee?— 'jau 'ga 'gā nupe.

⁴⁹ A'eramū 'ga wemimu'eramū ore mome'wau 'gā nupe:

—Koromū jey ēē 'jawewara 'gā, jerewirera 'gā 'jawewara 'gā— 'jau 'ga 'gā nupe.

⁵⁰ —Jeruwarete 'ga je'ega renuparamū pēē jepytunamū pejemogy, jerewireramū nanē pejemogy nū. Kūjāmeramū pēē jerenyramū pejemogyau nū, jeyramū nanē pejemogyau nū. Jarejuwarete 'ga remifutar imū mama'e apoaramū jepytunamū pejemogy jee— 'jau Jeju 'ga 'gā nupe.

13

*Mama'e a'ŷi tymawet**(Maku 4.1-20; Luka 8.4-15)*

¹ Aipo 'ara rupiwewe futat Jejuu 'ga uēma 'og awi awau wapyka ypia reme'y'warimū. Ajatyka ma'e 'gā nupe oporogytau.

² A'eramū kwaiwete 'gā 'ua ajatykau 'ga ree.

³ A'eramū 'ga awau u'aa wapyka yaruu pype. A'eramū 'ga yaruu pype u'ar ire 'gā oporogytau ojee ajatyka ma'e 'gā nupe, mama'e mū mome'wau 'gā nupe, 'gā mu'jau 'Uwarete 'ga ree. 'Ga renupara 'gā 'upa 'yisiga pype.

—Kūima'e 'ga amū akou oko pe juowuuran a'ŷja momopoa.

⁴ A'eramū a'ŷja mū u'aa pe pe 'ga wi. A'ere 'ga imomopor ire wyra'i ruri i'wau etee 'ga wi.

⁵ Amumera u'aa wyy a'wyyre'ema pype 'ga wi. Kwaiwete ita. A'eramū 'yja otywe'emamū jupe. 'Yi tywe'ria te. Jaruete futat opopoa numiamū.

⁶ A'ere nooi apoa kwe pe. A'eramū kwaraya imomŷijaga etee. Ita rakuwa ijukau etee.

⁷ Amumera a'ŷja u'aa juemy pype. A'eramū jua imoteu etee 'ga wi. A'eramū jawaiwa iapisau etee.

⁸ Amumera a'ŷja te ajee u'at wyy katurama pype. A'eramū opopoa. A'eramū wyy esage pype u'at ma'efera te u'aramū kwaiwete. Ajepeja 'ywa'aa sēg i'aa. Ajepeja 'ywa'aa sesēta i'aa. Ajepeja 'ywa'aa trīta i'aa— 'jau Jejuu 'ga imome'wau 'gā nupe.

⁹ —Ee pejeepyoramū ki peapyaka katu jeje'eg are— 'jau Jejuu 'ga 'gā nupe.

¹⁰ Oporogytapaw ire 'ga uēma yaruu awi nū. A'eramū ore 'ga remimu'eramū 'ga rerowyka, oroporonupa ee 'ga upe:

—Ma'eramū te ereporogyta sigaty etee te 'gā nupe? Ma'eramū ene 'gā mu'jau morogytau etee ki 'ei?— 'jau ore 'ga upe.

¹¹ A'eramū Jejuu 'ga 'jau oree:

—Tejuwarete 'ga je'eg imū futat je ruri pē mu'jau 'ga ree. 'Awamū Jeruwa 'ga pē mogyi wemiayuwamū jeje'ega renupa katu katuaramū, a'e je 'ā pē nupe— 'jau 'ga oree. —A'ere je porogytai sigaty etee te pē mu'jau ee. Kasi a'e pe tesirūmera 'gā we ikwaawi erujewi ne, a'e je— 'jau Jejuu 'ga oree.

¹² —Jeje'eg are eapyowet ma'eramū Janeruwarete 'ga pē mueapyoi ee. A'ere 'ga jeje'eg are eapyowere'ema 'gā namueapyoi ee. Ee 'gā neapyoweramū etee te 'ga 'gā mueapyoi ee— 'jau 'ga oree. —A'ere ee eapyowere'ema 'gā 'gā amu'eawera moka'jamawi etee.

¹³ Jeje'eg are eapyowere'ema 'gā wanup futat jeje'ega numiamū. A'ere 'gā naeapyoi futari ee. Amā'jāu agawewi 'gā jeremiapofer are. A'etea 'gā naeapyoi ee. Ma'eramū je 'ā morogytau etee imome'ui pē nupe pē mu'jawamū. Imome'u katu re 'gā neapyo ekoeteramū ajemogyau ee ne— 'jau Jejuu 'ga oree.

¹⁴ —Ymā te Janeruwarete 'ga ka'arana kwasiarukari 'gā nee Isai 'ga upe rakue:

“Jeje'eg are nipo 'gā apyakai agawewi ajemogyau. A'etea nipo 'gā naeapyoi ee.

Amā'jāu nipo 'gā mama'e are. A'ere nipo 'gā nuesakatui.

¹⁵ U'akwaawe'emamū nipo 'gā ee. Wapya rawopytyma ete nipo 'gā jui. Wapymāu ete nipo 'gā jui nanē nū. 'Kasi janereapyoramū ee ne', 'jau nipo 'gā.

Ee weapyo re amunipo 'ā 'gā poiri futari otywer awi. A'eramū amunipo 'ā je 'gā katu'ogi 'gā tywer awi”.

'jau Janeruwarete 'ga oje'ega kwasiarukaa 'gā nupe rakue— 'jau Jejuu 'ga wemimu'eramū oree.

¹⁶ —'Gā amū nipo naeapyoweri futari jeje'eg are. A'eramū 'gā weapyoe'emamū futat ajemogyau ee. A'ere 'ā na'gā 'jawe rūi te pēē. Pēneapyowet te pēē jeje'eg are pejejemogyau. A'eramū pēē pejeepyoramū pejejemogyau ee. A'eramū pēē a'eramū pejeku'iramū pejejemogyau ee.

¹⁷ Janepy 'gā 'ā iporesagiwet futat jeremiapo are rakue numiamū. Janeruwarete 'ga je'ega mome'wara 'gā, amumera 'ga remiayuwa 'gā. Mīmira 'gā iporesagiwet ee rakue numiamū. Iporenuwiwet jeje'eg are rakue numiamū. A'ere 'ā 'gā manūi erujewi je rure'emauwe rakue— 'jau Jejuu 'ga oree.

¹⁸ —Peapyaka ki jeje'eg are. Tamueapyo pēē teje'eg are 'jau— 'jau 'ga oree.

¹⁹ —Sā'ā y'wa a'ŷja. Nan tee futat Janeruwarete 'ga je'ega. A'ŷja mū nipo 'ā u'aa pe pe 'ga wi. A'ea nipo 'ā wyra'ia 'ua i'wau etee 'ga wi. Nan tee futat nipo Janeruwarete 'ga je'ega renupara 'gā amū. 'Ga je'ega renuwi futari numiamū. A'ere nipo 'gā naeapyoi ee. A'eramū mama'eukwaawa 'wyyriara 'ua erowiarukare'ema 'gā nupe: “Perowiar awi”, 'jau 'ua 'gā nupe. A'eramū futat 'gā momoirukaa je rerowiar awi— 'jau Jejuu 'ga oree.

²⁰ —Sā'ā y'wa a'ŷja mū 'ara wyy a'wyyre'ema pype ipopora numiamū. A'ere nitywi apoa. A'eramū 'ā opapapa etee. Nan tee futat nipo 'gā amū je rerowiaraiwi etee. Kamēšiete

nipo 'gā je rerowiar. A'ere 'gā poiri kamēsīete je rerowiar awi nū. Ojeupe mama'eay jesaukarauwe nipo 'gā opoia je wi.

²¹ A'ere nipo amumera 'gā “Iro ererowiat aipoa?” 'jau nipo 'gā 'ua 'gā nupe, 'gā nerekou tyweaete je rerowiar are. A'erauwe nipo 'gā poiri je rerowiar awi je upe oporogyta awi. “Nia'wyrī 'ga porogyta ra'e”, ojeupe 'erauwe nipo 'gā poiri je wi— 'jau Jejuī 'ga oree ore mueapyou ee.

²² —Sā'ā y'wa a'ŷja 'ara ju pype. A'eramū 'ā opopoa futat numiamū. A'eramū 'ā jua imoteu etee. Nan tee futat nipo 'gā amū Jarejuwarete 'ga je'ega renuwaiwi etee. A'eramū nipo 'gā wemifutar are etee wea'aramū ajemogyau nū. Wea'aru'jawe'emamū nipo 'gā jeje'eg are. Ojemuorypaw are etee nipo 'gā wea'aramū akou. Okaraemā momytun are etee nipo 'gā wea'aramū akou nū. A'eramū futat nipo 'gā wea'aru'jawe'emamū jeje'eg are. Jeremifutar imū nipo 'gā mama'e apowe'em futat— 'jau Jejuī 'ga oree.

²³ —Sā'ā y'wa a'ŷja ywy katurama pype u'at ma'ea. A'ea nipo awau waranupa u'aramū. Nan tee futat Ku'jywa 'ga je'ega renupara 'gā neapyoramū ajemogyau ee. Wago'oramū miamū 'gā nopoiru'weri futari je rerowiar awi. Ojemogyppyka etee futat nipo 'gā ajemogyau je ree. Janeruwarete 'ga pājē mū etee futat nipo mama'e esage apou ajemogyau. Sā'ā ywy katurama pype u'at ma'e 'ara. A'eramū 'ā u'aramū kwaiwete. Ajepeja 'ywa'aa sēg i'aa. A'ere ajepeja 'ywa'aa sesēta i'aa. Ajepeja 'ywa'aa trīta i'aa. Nan tee futat jeje'ega renupara 'gā mama'e esage apou Jarejuwarete 'ga remifutar imū etee futat— 'jau Jejuī 'ga oree, ore mueapyou ee.

Juowuunan

²⁴ A'eramū Jejuī 'ga mama'e mū mome'wau 'gā nupe najuejue etee futat nū:

—Mama'e mū je amome'u pē nupe. Jarejuwarete 'ga rowase pē majatykaaw are je pē mu'ei— 'jau 'ga 'gā nupe.

—Kūima'e 'ga amū akou juowuu ra'ŷja tyma oko pe.

²⁵ A'ere ppytun imū, 'ga seramū, 'ga ree iporomutare'ema 'ga ruri juowuunana ra'ŷja tyma juowuu ra'ŷja pō'ō me 'ga wi. A'ere 'ga itym ire awau jui nū.

²⁶ A'eramū opopoa waranupa awau. Aju'jaju'jawe futat numiamū. I'ywa nanē nū aju'jaju'jawe etee futat. A'ere i'a oteei ajau. A'eramū 'gā i'aramū tāmējē esaka.

²⁷ A'eramū ko jara 'ga remiayuwa 'gā 'jau 'ga upe: “Juowuunana nipo eretym eko pype rai'i ki sa. Ma'eramū nā'ā ipopori eewe re'ā”, 'jau 'gā 'ga upe— 'jau Jejuī 'ga imome'wau 'gā nupe.

²⁸ —A'eramū ko jara 'ga 'jau 'gā nupe: “Je ree iporomutare'ema 'ga nipo a'ŷja werut ityma jeko pe rai'i. “Tamote'at 'ga koa 'jau' e'i nipo 'ga jee rai'i”, 'jau 'ga 'gā nupe.

—A'eramū 'ga remiayuwa 'gā 'jau 'ga upe: “Juowuunana jui ipo'oa te erefutat?” 'jau nipo 'gā 'ga upe.

²⁹ —A'ere 'ga 'i etee 'gā nupe: “Naani. Pepo'o awi. Kasi a'e pe pemososok eewe te ne.

³⁰ Tene ijuwamū ra'ne. A'ere tamū'ēukat ajau imonookara 'gā nupe 'jau. Pemū'ē ra'ne juowuunana jui. A'eramū pē imono'oga, iku'afaa, erawau iapyyau. Iapy re pēē juowuurete monooka erawau ejay yrū pype' ta'e 'gā nupe 'jau”, 'jau ko jara 'ga wemiayuwa 'gā nupe— 'jau Jejuī 'ga imome'wau 'gā nupe.

Jejuī 'ga rerowiaara 'gā jemomytunawam

(Maku 4.30-34; Luka 13.18-21)

³¹⁻³² Imome'upaw ire Jejuī 'ga mama'e mū mome'wau 'gā nupe nū, 'gā mu'jau Jarejuwarete 'ga remiayuwa 'gā nee:

—Sā'ā y'wa'ŷi'ī'ā, mostarda 'jawa. A'eramū 'ā ae ityma. A'eramū 'ā opopoa awau o'ywuoramū. A'eramū 'ā wyra'ia aja'yrapyau akā are, waity mogyau ee— 'jau Jejuī 'ga u'ama 'gā nupe.

Aipo Jejuī 'ga 'ea wemiayuwa jemomytunawama upe 'ga 'i poromū. 'Awamū 'ga rerowiaara 'gā ināinānī'ī etee. A'ere 'gā anure kwaiwete 'gā jemomytuni nipo ajemogyau.

³³ A'eramū 'ga mama'e mū mome'wau 'gā nupe, 'gā mu'jau ee nū:

—Sā'ā kūjā u'i mojerawa. A'eramū 'ā imojopypeawa monou ipype. Ināinānī'ī etee agawewi 'ā imonou ipype. A'etea 'ā awua— 'jau Jejuī 'ga 'gā nupe u'ama.

Aipo Jejuī 'ga 'ea nanē wemiayuwa jemomytunawama upe 'ga 'i poromū.

³⁴ Mama'e mū 'ga omome'u 'gā nupe 'gā mu'jawamū nū. Mama'e mū mome'ue'em ire amunipo 'ā 'ga nimu'jawi futari.

³⁵ Ymā te 'ā Janeruwarete 'ga ka'arana kwasiarukari ee 'ga amū upe rakue: “Mama'e mū je amome'u 'gā nupe Tejuwarete 'ga ree 'gā mu'jawamū.

Ywy apoe'emaue 'gā naeapyou ee. A'eramū je 'gā mueapyou ee”,

'jau 'ga ikwasiaa Jejuī 'ga ree rakue. A'eramū Jejuī 'ga morogyta mome'wau 'gā nupe, ee 'gā mu'jawamū, 'ga remikwasiarer imū etee futat.

Jejuí 'ga 'gã mueapyoawet

³⁶ 'Gã nupe oporogytapaw ire Jejuí 'ga awau 'gã nui. Awau osou 'og ipe nũ. 'Ga remiayuwamũ nanẽ ore arawau orosou 'ga rupi nũ. A'eramũ ore 'jau 'ga upe:

—Ore mueapyo ape eporogyta are, juowuu pype opopot ma'e are— 'jau ore 'ga upe.

³⁷ A'eramũ Jejuí 'ga 'jau oree:

—Sã'ã ae a'ÿja esage tyma. Nan tee futat je, Jarejuwarete 'ga remimureramũ.

³⁸ Awa ywya ko 'jawewara. Je rerowiaara 'gã a'ÿi esagea 'jawewara. Je rerowiare'ema 'gã a'ÿi esage pype opopot ma'e 'jawewara. Mama'eukwaawa 'wyriara remiayuwa futat aipo 'gã.

³⁹⁻⁴¹ Je ree iporomutare'ema 'gã mama'eukwaawa 'wyriara futat. A'eramũ mama'eukwaawa 'wyriara je rerowiare'ema 'gã mokwasi'wau jeremiayuwa 'gã pype. Anure nipo je Jarejuwarete 'ga rowase pẽ majatykaramũ, Jarejuwarete 'ga remimureramũ ywagipewara 'gã monou kwe pe mama'e tywera apoara 'gã mono'ogukaa. Ojomotywerukaarera 'gã neewe nipo je 'gã mono'ogukaa 'gã nupe, mama'eukwaawa rapyawa pype 'gã momopoawamũ.

⁴² Tata rakuwa pype futat nipo 'gã awau ajemogyau. Eukwere nipo 'gã jemogyi wae-mamũ. Wa'jykãjamũ nipo 'gã ajemogyau ay upe— 'jau 'ga oree imome'wau.

⁴³ —Janeruwarete 'ga remiayuwa 'gã etee te ywagipewara 'gã weroo ywag ipe 'gã mogyau Jarejuwarete 'ga pyri. A'eramũ nipo 'gã najuejue etee 'ga remiayuwa 'gã nesaka, 'ga pyri 'gã jemogyramũ. A'eramũ nipo 'gã nesakara 'gã 'jau: "A'jea futat 'gã jemogyi Ku'jywa 'ga remiayuwamũ", 'jau nipo 'gã 'gã nesakawe— 'jau Jejuí 'ga oree, ore mueapyou ee.

—Ee pejejeapyoweramũ ki peapyaka katu jeje'eg are— 'jau Jejuí 'ga oree.

*Wemiayuwamũ 'gã neko are**'gã mu'eawet*

⁴⁴ A'eramũ Jejuí 'ga mama'e mũ mome'wau oree nũ:

—Sã'ã 'ga amũ mama'e epy mũ resaga ywy pype. A'eramũ nipo esakarera 'ga 'jau ojeupe: "Kuu. Ymã te sipo 'ã 'ga amũ imimi imÿina rakue. 'Awa pa je ywy amut tejee kwy", 'jau 'ga ojeupe etee futat. "A'eramũ jema'ea futat imimipyra 'jau kwy", 'jau nipo 'ga ojeupe. A'eramũ 'ga imÿina gatu ra'ne. A'eramũ nipo 'ga awau okaraemã me'ega ka'aranũ are. A'eramũ nipo 'ga ka'aranũ rerawau ywy jara 'ga upe, ojeupe imuawamũ. Nan tee futat pẽ. Jarejuwarete 'ga remiayuwamũ pejejemogyweramũ pẽ pejejoia pejejemifutar imũ mama'e apo awi— 'jau Jejuí 'ga oree.

⁴⁵⁻⁴⁶ A'eramũ 'ga mama'e mũ mome'wau oree nũ:

—Jarejuwarete 'ga remiayuwamũ ae rekoa ita epy 'jawe. Sã'ã ita muara 'ga ita epy resaga. Esakawe nipo 'ga 'jau ojeupe: "Koa je afutat", 'jau nipo 'ga ojeupe. A'eramũ nipo 'ga okaraemã me'ega ita epy muawamũ— 'jau Jejuí 'ga oree. —Nan tee futat pẽ. Jarejuwarete 'ga remiayuwamũ pejejemogyweramũ pẽ pejejoia pejejemifutar imũ etee mama'e apo awi— 'jau Jejuí 'ga oree.

⁴⁷ A'eramũ 'ga mama'e mũ mome'wau oree nũ:

—Jarejuwarete 'ga rowase pẽ majatykaaw are je pẽ mu'eí— 'jau 'ga oree. —Taityuu momoara 'gã 'ã taityuu monou imomoa 'y pe.

⁴⁸ Ipye kwaiwete pira jejjag ire 'ã, 'gã imatãu imua nũ. A'eramũ nipo 'gã ipira renũ 'jau jui. Pira esage etee nipo 'gã imonou yrũ pype. Pira a'wyre'ema nipo 'gã imomopoa etee.

⁴⁹ Nan tee futat Janeruwarete 'ga rowase pẽ majatykaaw ipe ywagipewara 'gã oi mama'e tywera apoara 'gã pe'au esage ma'e 'gã nui, 'gã mojo'oka 'gã monou mama'eukwaawa rapyaw ipe.

⁵⁰ Tata rakuwa pype futat nipo 'gã oi ajemogyau akuekuewamũ. Aya nipo 'gã maema 'gã na'jywa mokãina 'gã mogyau— 'jau 'ga oree imome'wau.

⁵¹ A'eramũ 'ga oporonupa ee oree:

—Pẽneapyo te pejejeupe jeremimome'u are ra'e?— 'jau 'ga oree.

—Orereapyo ore ee arajemogyau— 'jau ore 'ga upe.

⁵² A'eramũ Jejuí 'ga 'jau oree:

—Pejejeupe jeremimome'ufer are pejejeapyoramũ pejejemogyau pejemu'jara 'gã 'jawe etee futat. Jarejuwarete 'ga remikwasiarukarer are pejamu'jaramũ nipo pẽ. Ymã we te 'ã pẽneapyo Jarejuwarete 'ga je'eg are rakue. A're 'ã 'awamũ pẽneapyo jeje'eg are nũ. A'eramũ nipo pẽ 'gã mu'earũmũ 'ga je'eg ymaner are, jeje'eg reewe— 'jau 'ga oree. —Karaemã jara 'jawe pẽ pejejemogyau. Sã'ã karaemã jara 'ga okaraemã rerekoa. Iymanera 'ga nuetygi futari. Okaraemã momytuna erekou ipyu. Mama'e pyaua nanẽ 'ga 'ã erekou nũ. Nan tee futat pẽ. Pẽneapyo jeje'eg are. Jarejuwarete 'ga je'eg ymaner are nanẽ 'ã pejejeapyoramũ pejejemogyau nũ— 'jau Jejuí 'ga oree.

Nasare pe 'ga oawet
(Maku 6.1-6; Luka 4.16-30)

⁵³ Morogyta mome'upaw ire Jejui 'ga awau uēma amunaw awi.

⁵⁴ Oje'wyr ipe 'ga awau, Nasare pe 'ga awau opytawaipa. Peu wekwaw ipe 'ga peuwara 'gā mu'jau judeu 'gā jatykaaw ipe. A'eramū peuwara 'gā ajemogyau oporesagamū 'ga ree:
—Awjya te 'ga amu'akwaap mama'e are nū'ū? Ma'ja pājē mū sipo 'ga aeremiapoe'ema apoi?— 'jau 'gā ajaupe.

⁵⁵ —Ma'eramū sipo 'ga jane mu'ei mama'e are? NaMoisesi 'ga remikwasiarer are moromu'jara 'ga ra'yra rūi agawewi 'ga. A'etea 'ga 'ā ifuwet jane mu'e are. A'ere jane nienuwi 'ga porogytaa— 'jau 'gā 'ga upe. —Yjepana pinara 'ga ra'yra 'ga te 'ā. Mari ēē te 'ā 'ga ya. Tiago 'ga, Jose 'ga, Simão 'ga, Judas 'ga. Mīmera 'gā 'ā 'ga rewirera.

⁵⁶ 'Ga renyra 'gā nanē 'ā ajemogyau 'au jane pype nū. Maran ajee 'ga jane mu'ei 'ū? Ma'ja pājē mū sipo 'ga mama'e apoi akou?— 'jau 'gā ajaupe.

⁵⁷ Nuerowiari futari 'gā 'ga.

A'ere Jejui 'ga 'i 'gā nupe:

—Sā'ā Janeruwarete 'ga je'ega mome'wara 'gā oa kwe pe 'ga je'ega mome'ua. A'eramū 'ā kwe pewara 'gā jēmī 'gā je'ega rerowiaa. A'ere 'ā 'gā 'wyr ipewara 'gā jēmī nuerowiari 'gā. 'Gā pytuna 'gā miamū 'ā 'ga rerowiare'ema ajemogyau— 'jau Jejui 'ga oje'wyr ipewara 'gā nupe. —Nan tee futat ajee 'ā kwe pewara 'gā jēmī je rerowiari. A'ere 'ā je'wyr ipewaramū jēmī naje rerowiari pejepe pejejemogyau— 'jau 'ga 'gā nupe.

⁵⁸ Nuerowiari wejue 'gā 'ga. A'eramū 'ga aeremiapoe'ema mama'e apoarūme'em oje'wyr ipe. Ināinānī'ī etee 'ga iapoi peu.

14

Juā Batista 'ga jukaawet
(Maku 6.14-29; Luka 9.7-9)

¹ Anure Erote 'ga, Garireja ywy pewara 'gā 'wyrriara 'ga, Jejui 'ga rera renupa. 'Ga amū Jejui 'ga remiapofera mome'wau 'ga upe.

² A'eramū 'ga 'jau wemiayuwa 'gā nupe:

—Juā Batista 'ga nipo 'ut oferapa rai'ī nū. A'eramū nipo a'e 'ga aeremiapoe'em apou— 'jau 'ga 'gā nupe.

Erote 'ga Juā 'ga jukaukaa 'gā nupe rakue. A'eramū 'ga wea'aramū 'ga ree, Jejui 'ga remiapofera renupawe.

³⁻⁴ Ymā te Erote 'ga wewirera 'ga remireko ēē pojekai 'ga wi rakue. Erotiasi ēē pojekau 'ga wi rakue, Filipe 'ga wi rakue. A'eramū 'ga ēē rerekou katu rakue. A'eramū Juā 'ga 'jau 'ga upe: “Nia'wyrī nanuara. Ejewirera remireko 'ā erepojeka 'ga wi. Ymā 'ā Janeruwarete 'ga oje'ega kwasiarukari Moisesi 'ga upe rakue: 'Peko awi pejejemireko are', 'jau 'ga 'ā ikwasiarukaa 'ga upe rakue. A'etea 'ā ereapo nanuara. A'eramū ene etywereteramū ekou Jarejuwarete 'ga upe” 'jau Juā 'ga Erote 'ga upe rakue.

A'eramū Erote 'ga amara'neramū Juā 'ga ree, 'ga pofaa, 'ga munewukaa moromunepawa pype rakue.

⁵ 'Ga jukaa 'ga ifutaa numiamū. A'ere 'ga kyjei judeu 'gā nui. “Juā 'ga 'ā Janeruwarete 'ga je'ega mome'wara futat”, e'ī te 'ā judeu 'gā ajaupe jepi. A'eramū Erote 'ga okyjau Juā 'ga juka awi.

⁶ Anure Erote 'ga maraka apou. U'aawera 'ara rupi 'ga maraka apoi. A'eramū Erotiasi ēē ra'yra ēē ojerokyau maraka are ajatyka ma'e 'gā nowase. A'eramū Erote 'ga aku'iramū ēē jeroky are.

⁷ A'eramū 'ga 'jau ēē upe:

—Ma'ja te erefutat? Tamono eneremifutara enee 'jau— 'jau 'ga ēē upe. —Ma'ja te erefutat? Na'e ekoetei je enee. “Tamono eneremifutara enee 'jau”, a'e te je enee— 'jau 'ga ēē upe rakue.

⁸ A'erauwe ēē awau ujāna oy ēē upe 'jau:

—“Ma'ja te erefutat?” e'ī kiā jee. “Tomono eneremifutara enee 'jau”, e'ī kiā jee. Ma'ja te je aenū kiā upe?— 'jau ēē oy ēē upe rakue.

—“Juā Batista kiā akagera erurukat imonogukaa paratu pype jee”, ere kiā upe kyn— 'jau ēē wa'yra ēē upe rakue.

A'eramū ēē awau ojewya 'jau 'ga upe:

—Juā Batista kiā akagera erurukat paratu pype imonogukaa wā nupe jee kī'ī— 'jau ēē 'ga upe rakue.

⁹ Aipo ojeupe ēē 'eramū Erote 'ga u'arasigamū 'ūina ēē 'e are. “Ma'eramū je 'jau ēē upe ra'e 'ū: 'Eneremifutara tomono enee 'jau', 'jau ēē upe ra'e 'ū”, 'jau 'ga ojeupe, u'arasigamū 'ūina.

A'ere 'ga wemimo'wy'wyrera 'gā nemianuwamū aipo 'ga 'i ēē upe. A'eramū 'ga ojenosōu iapoe'em are. "Kasi a'e pe je'me are 'gā nekoi ajaupe ne kwy", 'jau 'ga ojeupe. A'eramū 'ga ēē remienūiwera apoukaa ojeupe.

¹⁰ A'eramū 'ga wemiyauwa 'gā amū monou Juā 'ga ajuwonogukaa rakue.

—Moromunepawa pype Juā 'ga 'ami. Pe'je pejewau 'ga ajuwonoka. A'eramū pēē 'ga akagera rerua paratu pype ēē upe— 'jau 'ga 'gā nupe rakue.

¹¹ A'eramū 'gā iapou, ojeupe 'ga 'eawer imū etee futat. A'eramū 'gā paratu pype Juā 'ga akagera rerua 'ga upe. A'eramū Erote 'ga imonou Erotiasi ēē ra'ya ēē upe. Ojeupe 'gā imurauwe ēē imonou oy ēē upe.

—Kweramū, a'ni— 'jau ēē oy upe rakue.

¹² "Erote 'ga 'ga jukaukat 'gā nupe" 'e renupawe Juā 'ga remiyauwa 'gā awau 'ga reumera upe erawau imonou inuga ita kwara pype. A'eramū 'gā awau imome'wau Jejuu 'ga upe.

Kanape'i me'yitawet

(Maku 6.30-44; Luka 9.10-17; Juā 6.1-14)

¹³ Ojeupe Juā 'ga jukaawera mome'urauwe Jejuu 'ga 'jau wemimu'eramū oree:

—Awotywe'eme soo ra'ne 'jau— 'jau 'ga oree.

A'eramū ore arawau oroyaapa yaruu pype. A'ere 'gā kwaiwete oreo kwaawi.

—Soo 'ga rewiri 'ga porogyta renupa 'jau— 'jau 'gā ajaupe.

A'eramū 'gā awau ypia ywyrri.

¹⁴ Ojekog ire Jejuu 'ga uēma yaruu awi. Ko'iko'i ete mytuna 'gā 'ua owaēma oree. 'Gā nesakawe Jejuu 'ga ajemuaēma 'gā nee. Ojero'wu ma'e 'gā 'gā erua 'ga upe. A'eramū 'ga 'gā katu'oka.

¹⁵ Kaaruwamū ore 'ga remimu'eramū 'jau 'ga upe:

—Kaarup, ki 'ei. A'ere nitywi mama'ea 'au 'gā nemi'uramū ki 'ei— 'jau ore 'ga upe. —Emono 'gā jarejewi. Too 'gā amunawa mū pype wemi'urama mua ojeupe 'jau— 'jau ore 'ga upe.

¹⁶ A'ere Jejuu 'ga 'i etee oree:

—Naani. Nooi futari 'gā. Pēē te mama'ea pemono 'gā nupe— 'jau etee 'ga oree.

¹⁷ —Nitywi futari mama'ea— 'jau ore 'ga upe. —Siku etee kanape'ia. Mukū'i' i etee ipira'ia. A'ea niapoi 'gā nupe— 'jau ore 'ga upe.

¹⁸ A'eramū 'ga 'jau oree:

—Perut ajee jee— 'jau 'ga oree.

A'eramū ore erawau 'ga upe.

¹⁹ A'eramū 'ga ojee ajatyka ma'e 'gā nupe 'jau:

—Pe'je pejeapyka juo'wi 'arimū— 'jau 'ga 'gā nupe.

A'eramū 'gā wapyka. A'ere Jejuu 'ga kanape'i ppyka opo pe ipira'i reewe. A'ere 'ga eramū 'jau ywau opo pe. A'eramū 'ga 'jau 'Uwarete 'ga upe:

—Au'jete mama'ea eremut oree. Ene te 'ā eneresage oree— 'jau 'ga 'Uwarete 'ga upe.

Aipo 'e re 'ga kanape'i mowowoka ipira reewe 'ga imopēpena imonou wemimu'eramū oree. Omowowogamū ojeme'yita oree. A'eramū ore imonou wapyk ma'efera 'gā nupe.

²⁰ A'eramū futat 'gā ojemi'waa. Ojemi'wapaw ire 'gā 'jau:

—Niapoi agawewi akiko. A'etea ojeme'yi 'ga upe 'ga omowowogamū— 'jau 'gā ajaupe. —Janeruwarete 'ga te ome'yi janee. A'eramū jane jarejewegamū rēwējēmī jarejemogyau.

Janeruwarete 'ga jarejeupe ime'yje'em ire amunipo 'ā jane ty'ara rerekoī— 'jau 'gā ajaupe. 'Gā jemi'wapaw ire ore emyrera mono'oga yrū pype. Tusi yrupemūū matyneema.

²¹ Kwaiwete 'gā ojemi'waa. Siku miu agawewi kūima'efera 'gā pytuna. A'e pe kūjāmera nū kunumīmera 'gā netee. A'etea 'gā na'upawi kumia. Wewegamū 'gā jui.

'Y rajape 'arimū 'gā ataawet

(Maku 6.45-52; Juā 6.16-21)

²² A'ere Jejuu 'ga wemimu'eramū ore monou ojewi:

—Pe'je iruukwe je renune. Kwe katy pejewau pejeyaapa— 'jau 'ga oree. —Je apyta ra'ne. Tamono 'gā 'gā 'wyr ipe 'jau nū. A'eramū pēē pejewau je renune— 'jau 'ga oree.

A'eramū ore arawau 'ga wi 'ga rejaa ojete'e'i.

²³ Ojewi mytuna 'gā mono re Jejuu 'ga awau ojeupia ywytyra rupi. Ojete'e futat 'ga 'ūina oporogytau 'Uwarete 'ga upe ppytunimū.

²⁴ A'e pe ore arawau arakou oroyaapa. Mukuu te ore oi. Poje ywytuua 'ua oree, 'y ryjuapi retee.

²⁵ Ku'em 'ja wy'ja wyramū Jejuu 'ga 'ua ore rewiri. 'Y rajape 'arimū etee futat 'ga 'ua watau akou. 'Ua 'ga ore rupisika.

²⁶ 'Y rajape 'arimū 'ga ata resakawe ore orokeyau 'ga wi. Orekeyea ore pifuaka'roka.

—Ajaga nipo kwe 'ut owaēma janee kūi— 'jau ore aruafukaita arajaupe.

²⁷ A'erauwe Jejuu 'ga 'jau oree:

—Pekyje awi je wi. Je te ojut pē newiri— 'jau 'ga oree.

²⁸ A'erauwe Pedro 'ga 'jau 'ga upe:

—Ene futat nipo ereko, ki Ku'jyp? Je futat 'jau, je mono ape je muatau 'y rajape 'arimū eje'jawe— 'jau Pedro 'ga 'ga upe.

²⁹ A'eramū Jeju 'ga 'jau 'ga upe:

—Ere ajee ejua— 'jau 'ga 'ga upe.

A'erauwe Pedro 'ga awau ojypa yaruu awi. A'eramū futat 'ga awau watau 'y rajape 'arimū Jeju 'ga repejāna.

³⁰ Poje 'ga wea'aramū erujewi wytyu are. A'erauwe 'ga kyjei. A'eramū 'ga awau wypywygamū. A'eramū 'ga wafukaita Jeju 'ga upe:

—Je poar ape, ki Ku'jyp! Jerypywyk je tekou— 'jau 'ga wafukaita, Jeju 'ga upe.

³¹ A'eramū Jeju 'ga 'ga popyyka oje'ega 'ga upe:

—Ma'eramū ene ekjyau ete 'ū? Ma'eramū te ene nerejemogypygyi etee je ree? Je rerowia'ri'i tāmējē 'ā ape— 'jau 'ga Pedro 'ga upe.

³² A'eramū 'ga 'ga rerua eru'aa yaruu pype. Ore pype 'gā 'arauwe wytyu wojeramū.

³³ A'erauwe ore 'jau Jeju 'ga upe, yaruu pype ajemogy ma'eramū:

—A'jea futat. Ene te 'ā Jarejuwarete 'ga ra'yraretea— 'jau ore 'ga upe, 'ga muorypa.

Genesare wyw pewat

(Maku 6.53-56)

³⁴ A'eramū ore arawau oroyaapa orojekoka Genesare wyw are.

³⁵ Jeju 'ga kwaaw ire peuwara 'gā oje'ega monou kwe pewara 'gā nupe:

—Pe'je pejeju Jeju 'ga resaka. Ojero'wu ma'e 'gā nerua 'ga upe— 'jau 'gā oje'ega monou 'gā nupe.

A'eramū 'gā ojero'wu ma'e 'gā nerua 'ga upe.

³⁶ A'eramū 'gā 'jau Jeju 'ga upe:

—Tene 'gā eneraity pypireme'ywa pygyi etee agawewi— 'jau 'gā 'ga upe.

A'eramū 'ga raity pypireme'ywa pygarera 'gā ojekatu'okapap najuejue etee futat.

15

Judeu 'gā nemiapo

(Maku 7.1-23)

¹ Anure fariseu 'gā amū 'ua Moisesi 'ga remikwasiarer are moromu'jara 'gā netee Jerusareg awi oporonupa ee Jeju 'ga upe:

² —Ma'eramū te eneremiayuwa 'gā nuapoi mama'ea jareypy 'gā je'eg ymaner imū?— 'jau 'gā 'ga upe. —Ymā te 'ā janepy 'gā 'i ajaupe rakue: “Janeruwarete 'ga janejepoeja afutat. Mama'e 'u enune jarejepoeite'ema 'eramū janetyweramū Jarejuwarete 'ga upe”, 'jau 'gā ajaupe rakue. A'eramū ore orojepoeita orojemi'war enune 'gā 'eawer imū etee futat jepi. A'ere 'ā eneremiayuwa 'gā nojepoei ojemi'war enune 'gā 'eawer imū— 'jau 'gā Jeju 'ga upe.

³ A'eramū Jeju 'ga 'jau 'gā nupe:

—Ma'eramū ajee nepeenuwi Jarejuwarete 'ga je'ega pejejemogyau 'ū? Na'ga je'eg imū rūi nanē pēē mama'e apou nū. Peje'eawer imū etee 'ā pēē mama'e apou. A'eramū kasi pēē jeremiayuwa 'gā ago'wau ekoete pejejemimu'e tywer are ne— 'jau 'ga 'gā nupe.

⁴ —Ymā te 'ā Janeruwarete 'ga 'i rakue: “Peanuw etee ki pejejuwa 'ga je'ega. Pejeje ēē je'ega nanē ianupa etee nū”, 'jau 'ga 'ā rakue. “Ujara 'gā kurapara 'gā ki peapisi”, 'jau 'ā Janeruwarete 'ga ikwasiarukaa rakue— 'jau Jeju 'ga 'gā nupe.

⁵ —A'ere 'ā pemu'e 'gā 'gā jara 'gā je'ega renuw etee'em are etee pejejemogyau. “Pejejara 'gā nupe mama'e are pejeporomonowere'emamū ki pe'je 'gā nupe: 'Pē nupewara je amono Jarejuwarete 'ga upe ai'i. A'eramū je mama'e mū monowe'em pē nupe', pe'je ki pejejara 'gā nupe”, 'jau 'ā pēē 'gā mu'jau tywet pejejemogyau— 'jau Jeju 'ga 'gā nupe.

⁶ —Aipo apoaramū pēē pejejar are iporomutare'emamū futat. A'eramū pēē aipo apoaramū Jarejuwarete 'ga je'ega renupare'emamū futat nanē nū. Jarejuwarete 'ga je'eg imū jēmī 'ā mama'e apowe'em. Pejejea'aw imū etee te 'ā pēē mama'e apou ekoete pejejemogyau— 'jau Jeju 'ga 'gā nupe.

⁷ —“Ore Jarejuwarete 'ga je'eg are oreporenuwiwet jepi”, 'jau futatee 'ā pēē pejejemogyau. A'ere pē'me ate. Ymā we te 'ā Janeruwarete 'ga oje'ega kwasiarukari inuga ka'aran are Isai 'ga upe pē nee rakue:

⁸ “Nomyi agawewi 'gā weaa je ree. A'etea nipo 'gā e'i ekoete futat:

'Arafutar ore Jarejuwarete 'ga. Oroporenuwiweramū 'ga je'eg are’, 'jau futatee nanē 'gā ajemogyau nū.

⁹ 'Aramuoryw ore Orojuwarete 'ga, 'jau futatee 'gā jee’, 'jau Janeruwarete 'ga. “A'ere 'ā 'gā 'meramū te.

Nomŷi 'gā weaa je ree. Naje rerowiari tāmējē 'gā.
 U'eawer are etee 'gā jamu'ei. A'ere 'gā 'jau ajaupe:
 'Jarejuwarete 'ga je'eg are je pē mu'ei', 'jau futatee 'gā ajaupe",
 'jau Janeruwarete 'ga ikwasiarukaa inuga ka'aran are Isai 'ga upe rakue— 'jau Jeju 'ga 'gā nupe.

¹⁰ A'eramū Jeju 'ga 'jau mytuna 'gā nupe:

—Pe'je pejeju pejeapyakau jeje'eg are. Pejejeapyoramū ee pejejemogyau.

¹¹ Napē pype oo ma'efera rūi pē motywet Janeruwarete 'ga upe pē mogyau. Pē nui uēm ma'ea te pē motywet Janeruwarete 'ga upe. Pēje'egaiwa te pē motywet Janeruwarete 'ga upe— 'jau Jeju 'ga 'gā nupe.

¹² A'eramū ore Jeju 'ga remimu'eramū 'ga rerowyka arajua oroporogytau 'ga upe:

—Nafutari fariseu 'gā eneje'ega ra'e— 'jau ore 'ga upe.

¹³ A'eramū Jeju 'ga 'jau oree:

—Anure nipo Janeruwarete 'ga 'gā nereko tyweretei 'gā 'eawer are. Sā'ā koa. Ko jara 'ga 'ā opopot ekoete ma'e ka'a po'oa. Wemitymera etee 'ā 'ga imuaranuwukaa oko pype. Nan tee futat nipo Janeruwarete 'ga iapoi. Oje'eg are ajamu'jatyweara 'gā nereko tyweri.

¹⁴ A'eramū pēē pejejemuaēme'ema 'gā nee. Eae'ema 'jawe 'gā. Eae'ema 'gā ojopopyyk ekoete ajuerawau kwe pe. A'ere nipo 'gā ajueru'ari etee ajuerawau ywy kwara pype. Nan tee fariseu 'gā. Naepoyoi 'gā Jarejuwarete 'ga je'eg are. A'etea 'gā ajamu'e ekoete ee. A'eramū nipo 'gā wemimu'e 'gā nerawau mama'eukwaawa rapyaw ipe— 'jau Jeju 'ga oree.

¹⁵ A'eramū Pedro 'ga 'jau 'ga upe:

—Ore mueapyo ape e'eawer are, ki Ku'jyp. “Napē pype oo ma'efera rūi pē motywet Janeruwarete 'ga upe pē mogyau. Pē nui uēm ma'ea tee pē motywet Janeruwarete 'ga upe. Pēje'egaiwa te 'ā pē motywet Janeruwarete 'ga upe” eawer are— 'jau 'ga 'ga upe.

¹⁶ A'eramū Jeju 'ga 'jau oree:

—Pēē nanē nipo nepepyygi we pejeakag imū ra'e ki sa? Ekoay pēē na'e ki 'ei. Pēē nanē meewe etee pēneapyo ee ra'e ki 'ei.

¹⁷ Nepēneapyoi we futat nipo je'eawer are ki sa? Pejejemi'ua nipo pēē imonou pejejuru pe. A'ere nipo pēē imokona. Pēnemi'ua osou pēnawyrū pype. A'ere nipo “pēnemi'ufera okwapa pē nui” ea miamū pē motywere'ema Janeruwarete 'ga upe— 'jau Jeju 'ga oree.

¹⁸ —Pēje'egaiwa te a'jea futat pē motywet 'ga upe. Pejejea'aw imū etee pejeje'ega. Pēje'egaiwa te a'jea futat pēywyter a'wre'ema wesaukat Janeruwarete 'ga upe.

¹⁹ Mama'e tywer are etee pejejea'aramū. A'eramū pēē mama'e apou pejejea'ar imū. 'Ga amū nipo wea'aramū akou oporojuka are. A'eramū nipo 'ga oporojukau. 'Ga amū nipo wea'aramū akou wemirekoe'ema kūjā are oko are. A'eramū nipo 'ga okou ēē ree. Kūjā ēē mū nipo wea'aramū akou omene'ema kūima'e are oko are. A'eramū nipo ēē okou 'ga ree. 'Gā amū nipo wea'aramū mama'e tesirū apo are. A'eramū nipo 'ga otyweramū akou Jarejuwarete 'ga upe. 'Ga amū nipo ojokaraemā futaa akou. A'eramū nipo 'gā amunarūmū ee. Wemifutar imū etee o'meramū nipo. Wea'aw imū etee futat nipo 'gā ajuago'wau ajemogyau. Wea'aw imū etee futat nipo 'gā Jarejuwarete 'ga kurapa.

²⁰ Poromū te 'gā jemotyweawa Jarejuwarete 'ga upe. Na'gā nemi'ua rūi futat 'gā motywet 'ga upe. 'Gā jepoje'ema miamū nomotyweri 'gā Janeruwarete 'ga upe— 'jau Jeju 'ga oree, ore mueapyo ee.

Judeu'ema ēē

(Maku 7.24-30)

²¹ A'ere Jeju 'ga ore rerawau pe awi nū. Tiro 'jawa pyri ore oi, Sidoma 'jawa pyri 'jau.

²² Peu ore rekoramū peuwara ēē mū, judeu'ema ēē mū 'ua oje'ega Jeju 'ga upe:

—Ene 'ā Jarejuwarete kiā remimurera, Ku'jyp. Ejemuaēm iki je ree, Ku'jyp— 'jau ēē 'ua 'ga upe. —Mama'eukwaawa 'up jera 'yra kynā pir are. Ojero'wu etee te kynā. Epe'a kynā wi jee, Ku'jyp— 'jau ēē 'ga upe au'jeteramū.

²³ A'ere Jeju 'ga ēē je'eg anupare'ema 'jawe etee futat. A'eramū ore 'ga remimu'eramū 'jau 'ga upe:

—Emono ēē jarejewi. Jane rewiri etee 'ā ēē rekoi wafukaita— 'jau ore 'ga upe.

²⁴ A'eramū Jeju 'ga 'jau oree:

—Janeruwarete 'ga je mua Israeu juapyrera 'gā nupe etee. Judeu 'gā karupa'mī ka'jama 'jawe jee. A'eramū 'ga je mua 'gā nupe, 'gā mu'jaukaa ojee— 'jau 'ga oree. —A'ere ēē najudeu arūi. Amutee ēē te— 'jau 'ga oree.

²⁵ A'ere 'ā ēē ruri ojea'gwawe'em futat wapyka wenupy'āu 'ga rowase 'jau 'ga upe:

—Je resag ape, Ku'jyp. Ejemuaēm je ree— 'jau ēē 'ga upe.

²⁶ A'eramū Jeju 'ga 'jau ēē upe:

—Sā'ā ae kunumīa mama'e 'ue'emamū ae kunumī remi'urama monoe'ema weymawa upe. Nan tee futat je— 'jau Jeju'i 'ga ēē upe.

²⁷—A'jea futat ere. A'ere ywyu mama'e 'ar ire wā neymawa i'ui futari— 'jau ēē 'ga upe.

²⁸A'eramū Jeju'i 'ga 'jau ēē upe:

—Je rerowiat ape ekou ra'e ī. A'eramū je enera'yra ēē katu'oka enee— 'jau 'ga ēē upe.

Aipo 'ga 'e pyyrauwe futat mama'eukwaawa ojepe'au ēē ra'yra ēē wi.

²⁹A'ere Jeju'i 'ga wemimu'eramū ore rerawau pe awi nū. Arawau orowaēma Garirei ypiauu reme'y'warimū. A'eramū ore arawau orojeupia wyytyra rupi. A'eramū Jeju'i 'ga wapyka wewiri oo ma'e 'gā mu'jau 'Uwarete 'ga ree.

³⁰Kwaiwete 'gā 'ua owaēma 'ga upe. Ojero'wu ma'e 'gā 'gā erua 'ga upe 'gā katu'okawamū. Iteu ma'efet, eae'em, ika'na ma'e, ije'ege'em, ikaruat ma'e. Mīmera 'gā 'gā werut 'ga upe. A'eramū Jeju'i 'ga 'gā katu'okapap.

³¹'Gā katu'oga resakara 'gā oporesagamū 'gā nee.

—Kuu. Ije'ege'emera 'gā 'ga omoje'egukat! Iteu ma'e 'gā 'ga amafu'amukat! Ika'na ma'e 'gā 'ga ikatu'oka. Eae'ema 'gā 'ga imamā'jāu. Israeu juapyrera 'gā Nuwarete 'ga 'gā katu'ogukaa 'ga upe— 'jau 'gā ajaupe.

A'eramū 'gā Ku'jywa 'ga muorypa ee.

—Ene te 'ā eneresage oree, ki Ku'jyp. Ojero'wu ma'e 'gā erekatu'ogukat 'ga upe ore reape— 'jau 'gā Ku'jywa 'ga upe, 'ga muorypa ee. —Israeu juapyrera 'gā Nuwareteramū ene 'gā katu'ogukaa 'ga upe oree— 'jau 'gā Ku'jywa 'ga upe, 'ga muorypa 'gā nee.

Kwaturu miu 'gā mojemi'waawet

(Maku 8.1-10)

³²Kwaiwete 'gā katu'og ire, Jeju'i 'ga 'jau wemimu'eramū oree:

—Ajemuaēm je tekou 'gā nee. Muapyt 'ā 'gā kaaruwamū jane pyri. A'eramū 'awamū 'gā nemi'urama ateepawamū 'gā nui. A'ere je najeporomonoweri 'gā nee tejewi, 'gā nupe mama'e monowe'emamū. Kasi 'gā oje'wyr ipe awau 'gā manūaiwi ty'ara upe ne kwy— 'jau 'ga 'gā nupe.

³³A'eramū ore 'jau 'ga upe:

—Amunawe'em ipe jane rekoī nū'ū. Nitywi mama'ea 'au. Mō awi sipo ore mama'e muri 'gā mojemi'waawamū?— 'jau ore 'ga upe.

³⁴A'eramū 'ga 'jau oree:

—Marāmaran te pēkanape'i pytuna?— 'jau 'ga oporonupa ee oree.

—Sete kanape'i pytuna muapyapy'ri etee pira'ia— 'jau ore 'ga upe.

³⁵A'eramū Jeju'i 'ga 'jau mytuna 'gā nupe:

—Pe'je pejeapyka ywyu— 'jau 'ga 'gā nupe.

A'erauwe 'gā wapyka.

³⁶A'eramū 'ga kanape'i pyyka opo pe ipira'i reewe. A'eramū 'ga 'jau 'Uwarete 'ga upe:

—Au'jete mama'ea eremut oree. Ene te 'ā eneresage oree, Kiapi'ni— 'jau 'ga 'Uwarete 'ga upe.

A'ere 'ga kanape'i mowowoka imonou wemimu'eramū oree. Omowowogauwe ojeme'yita oree. A'eramū ore imonou wapyk ma'e 'gā nupe.

³⁷A'eramū futat 'gā ojemi'waa wewegamū.

—Niapoī agawewi akiko re'ā. A'etea ojeme'yi 'ga upe janee 'ga omowowogamū— 'jau 'gā ajaupe. —Janeruwarete 'ga te 'ā ome'yi janee. A'eramū 'ā jane jarejewegamū rēwējēmī jarejemogyau. Janeruwarete 'ga jarejeupe ime'yje'em ire amunipo 'ā jane ty'ara rerekoi— 'jau 'gā ajaupe.

'Gā jemi'wapaw ire ore emyrera mono'oga ijaga yrūūū pype. Sete yrupemūū ore imatnyeema.

³⁸Kwaiwete te ojemi'wat ma'efera 'gā pytuna. Kwaturu miu kūima'efera 'gā pytuna. A'e pe 'ā kūjāmera 'gā pytunamū nū, kunumīmera 'gā netee. Kwaiwete ojemi'wat ma'efera 'gā pytuna.

³⁹'Gā jemi'wapaw ire Jeju'i 'ga 'gā monou ojewi:

—Pe'je pejewau peje'wyr ipe nū— 'jau 'ga 'gā nupe.

'Gā mono re Jeju'i 'ga ore reru'aa yaruū pype nū. A'eramū ore arawau oroyaapa arawau orojekoka Magatā ywy are.

16

Aeremiapoe'ema fariseu 'gā enūinawet
(Maku 8.11-13; Luka 12.54-56)

¹ Anure fariseu 'gā amū satusu 'gā amū netee 'ua oporogytau Jeju 'ga upe. Nuerowiari 'gā 'ga. “Najarejuwarete 'ga pājē mū rūi 'ga mama'e apoi akou”, e'i etee 'gā ajaupe. A'eramū 'gā 'ua 'ga resaka. A'eramū 'gā 'jau Jeju 'ga upe:

—Aeremiapoe'ema eapo amū ore reape. Taruesak ene mama'e apoa orojemiesagamū 'jau ki sa— 'jau 'gā 'ua 'ga upe.

² A'ere Jeju 'ga 'gā kwaawi ojee. A'eramū 'ga 'jau 'gā nupe:

—Naani. Naapoa'uweri je amū pē neape. Naje rerowiari te 'ā pejepe. A'eramū je mama'e apowe'em pē nemiesagamū— 'jau ete 'ga 'gā nupe. —Kaaruwamū ywak piraga resaka ki pe'je pejejaupe: “Ai'iwe nipo 'ā nokyri amana”, pe'je ki ywak piraga resag ire.

³ A'ere nipo ku'emamū ywak piragamū resag ire pe'je pejejaupe: “Awamū amana ra'e”, 'jau nipo pēē ywak piragūū resag ire. Ywaga resag ire nipo pēē mū amana kwaapa futat. A'ere nipo naje kwaawi pejepe. Jeremiapofera resaka agawewi nipo pēē. A'etea nipo naje rerowiari pejepe. “Janeruwarete 'ga futat 'ga mut janee”, 'jawe'em nipo pēē jee jeremiapofera resag ire miamū— 'jau Jeju 'ga 'gā nupe.

⁴ —'Awauwaramū miamū 'ā nepēa'ywiri futari pejejemogyau 'ga upe. “Oreremiapoe'ema eapo amū oree”, pe'je 'ā jee numiamū. A'ere je naapoa'uweri mama'ea pē nupe pēnemiesagamū. Juna 'ga ree etee je pē muea'ari pē mogyau— 'jau Jeju 'ga 'gā nupe.

'Gā nupe oporogytapaw ire Jeju 'ga awau pe awi nū. 'Ga remimu'eramū nanē arawau 'ga rupi nū.

*Wemimu'e 'gā momoranupawet
(Maku 8.14-21)*

⁵ Arawau yaru pype aru'aa. A'eramū ore oroyaapa arawau. Garireja ry owajara katy ore arawau. A'ere ore 'ga remimu'eramū kanape'i roero moka'jami.

⁶ Arawaw ipe Jeju 'ga 'jau oree:

—Pejea'gu ki fariseu 'gā nui, 'gā mani'oko'o jopype awi, satusu 'gā ma'e awi 'jau— 'jau 'ga oree.

⁷ Aipo orojeupe 'ga 'eramū ore 'jau arajaupe:

—Kanape'i rerura jane simoka'jam ra'e. Ma'eramū 'ā 'ga poromū 'ga 'i janee— 'jau ore arajaupe.

⁸ A'ere Jeju 'ga, arajaupe 'e renupawe, 'ga 'i oree:

—Naje rerowiari tāmējē pejepe pejejemogyau ki 'ei. Ma'eramū nā'ā aipo pe'je pejejaupe re'ā “Kanape'i rerure'em are 'ga 'i poromū janee”, pe'je re'ā— 'jau 'ga oree. —Nakanape'i upe rūi je 'i poromū pē nupe. “Pejea'gu ki fariseu 'gā mani'oko'o jopypeaw awi, satusu 'gā ma'e awi nanē nū”, a'e te je pē nupe kūi. “Morogyta 'gā pejejeupe imowuwut ekoete awi ki pejea'gu”, a'e te je pē nupe kūi— 'jau Jeju 'ga oree.

⁹ —Nepēneapyo'i we jeje'eg are ra'e. Pemoka'jam nipo jeremiapofera rai'i? Kanape'ia je ime'yitawera rai'i? Siku etee agawewi ako ai'i. A'etea ako je kanape'ia omowowok imonou siku miu kūima'e 'gā mojemi'waawamū ai'i. 'Gā jemi'wapaw ire ako pēē emyrera jaga tusi yrū pype ai'i— 'jau 'ga oree.

¹⁰ —A'ere ako je sete kanape'i mowowoka kwaturu miu 'gā mojemi'waawamū ai'i nū. 'Gā jemi'wapaw ire marāmaran yrūa ajee pematyneem emyrera pyu rai'i? Sete yrū etee futat ako ai'i. Pemoka'jam te ra'u jeremiapofera rai'i nū? Ma'eramū sipo ajee jerea'aramū kanape'i pyu jaretywe'em are?— 'jau 'ga oree.

¹¹ —Nakanape'ia rūi je amome'u pē nupe “Pejea'gu ki fariseu 'gā mani'oko'o jopypeaw awi” je'ea. A'ere 'ā nepēneapyo'i je'eawer are— 'jau 'ga oree.

¹² Aipo orojeupe 'ga 'eramū ore orojeapyoramū 'ga 'eawer are.

—“Pejea'gu ki fariseu 'gā 'e awi, satusu 'gā 'e awi nanē nū” 'e upe te je 'i numiamū— 'jau 'ga oree.

*Pedro 'ga Jeju 'ga mome'uawet
(Maku 8.27-30; Luka 9.18-20)*

¹³ Orojekog ire ore arawau ywyu. Sesariafiripai ywy pe ore arawau. Peu orowaēm ire Jeju 'ga oporonupa ee oree:

—Ma'ja e'i te tekotee 'gā jee, pēneki'yramū jee jepi?— 'jau 'ga oree.

¹⁴ —“Juā Batista 'ga te nipo 'ā 'ut oferapa rai'i nū”, e'i 'gā amū enee jepi. Amumera 'gā: “Eliasi 'ga nipo 'ā 'ut ojewya rai'i nū”, 'jau enee jepi. Amumera 'gā: “Jeremi 'ga nipo, 'ga je'ega mome'warera 'ga amū te nipo 'ua oferapa oporogytau akou janee nū”, 'jau 'gā enee jepi— 'jau ore 'ga upe.

¹⁵ —Pēē nū. Ma'ja pe'je ajee jee jepi nū'ū?— 'jau 'ga oree.

¹⁶ A'eramū Simão Pedro 'ga 'jau 'ga upe:

—“Janeruwarete 'ga remimurera 'ga futat”, aru'e ore jepi— 'jau Pedro 'ga 'ga upe. —“Okoeteete ma'e 'ga ra'yrarete 'ga futat”, aru'e ore jepi— 'jau 'ga 'ga upe.

17 A'eramū Jeju'i 'ga 'jau 'ga upe:

—A'jea futat ere poromū, Simão— 'jau 'ga 'ga upe, Juā 'ga ra'ya 'ga upe. —Janeruwarete 'ga mama'e esage wapo enee, 'agamū ene mueapyoukaa je ree. Na'ga amū rūi ene mueapyo je ree. Ywag ipe ako ma'e 'ga, Jeruwarete 'ga futat ene mueapyo je ree— 'jau 'ga Simão 'ga upe.

18 —Enerer irūa Pedroa. Ita enerer irūa. Sā'ā pēē 'oga apoaramū ita 'arimū imyinarāmū itauu monoa ikokaramū. Aipoa te itauua 'oga opyygete etygukare'ema. Nan tee futat ene'eawera "Janeruwarete 'ga remimurera 'ga. Okoeteete ma'e 'ga ra'yrarete 'ga futat", ene'eawera. Aipo ene'eawera rerowiaara 'gā je amogy tejemiayuwamū. Ene 'ā je amogo tejerowiarukaawamū kwaiwete 'gā nupe. Anure nipo ene je rerowiaara 'gā 'wyriaramū futat ereko. Kwaiwete nipo 'gā je rerowiaa. Je rerowiar wyyapi futat nipo 'gā ajemogyau. Mama'eukwaawa 'wyriara remiayua agawewi nipo afuwereteramū 'gā nee. A'etea nipo 'gā nopoiri futari je rerowiar awi. Sā'ā 'oga om'yi esage re i'are'ema. Nan tee futat je rerowiaararetea 'gā nopoiru'jawi je wi— 'jau Jeju'i 'ga 'ga upe.

19 —Sā'ā saawi rerekwara. 'Wyriararete 'ga woga saawi monou wemiayua 'ga amū upe. A'eramū aipo 'ga mama'e apou o'wyriara 'ga upe, o'wyriara 'gā je'eg imū etee futat. Nan tee futat je ene mogou 'wyriaramū teje'eg irūnamū. Ene futat 'awamū ereko jeremiayua 'gā mu'jau jeremifutar are. "Nan tee siapo 'jau", 'jau nipo ene ekou 'awamū. Jeremiayua 'gā nupe aipo ene 'eramū Janeruwarete 'ga nanē aipo 'jau enee nū. "Nan siapo awi", 'gā nupe ene 'eramū Janeruwarete 'ga nanē aipo 'jau enee nū— 'jau Jeju'i 'ga 'ga upe.

20 A'eramū 'ga 'jau oree nū:

—Je mome'u kasi pejepe tekotee 'gā nupe ne. "Jeju'i 'ga Janeruwarete 'ga remimurera", 'jawe'em pēē 'gā nupe— 'jau 'ga oree.

Amanūawama mome'uawet

(Maku 8.31-9.1; Luka 9.22-27)

21 A'e pe futat Jeju'i 'ga amanūawama mome'wau ypy oree:

—Too Jerusareg ipe 'jau. Peu futat nipo judeuramū jane'wyria'ri 'gā je rereko tyweri. Jane'wyria'ri, mainana 'wyriat, Moisesi 'ga remikwasiarer are moromu'jat. Mīmera 'gā nipo je rerekou tyweaete je jukaukaa jefaruu 'gā nupe. A'ere nipo imuapyra 'ara rupi Janeruwarete 'ga je moferawi nū— 'jau 'ga oree.

22 Aipo 'ga 'eramū Pedro 'ga 'ga rerojepe'au'i ore wi, oje'egayau 'ga upe:

—Ene'me awi nū'ū. Nene rereko tywera'uweri 'gā nū'ū. Janeruwarete 'ga nene rereko tywerukara'uweri 'gā nupe kūi— 'jau Pedro 'ga 'ga upe.

23 A'eramū Jeju'i 'ga ojerowaka amā'jāu 'ga ree:

—Ejepe'a je wi, ki Satanasi. Mama'eukwaawa 'wyriara ene mu'eukat poromū jee, ki Pedro. "Tamomoirukat 'ga 'ga Ruwarete 'ga remifutara apo awi 'jau", e'i te Satanasi ojeupe. A'eramū poromū ene mu'jaukaa jee kūi— 'jau 'ga Pedro 'ga upe. —NaJarejuwarete 'ga remifutar imū rūi ere aipo 'jau jee. Ejemifutar imū te ere aipo 'jau jee— 'jau 'ga 'ga upe.

24 A'ere 'ga 'jau oree:

—Jeremiayuwamū pejekoweramū ki jeremifutar imū etee futat mama'ea peapo. Pejekyjawe'em futat pejereko tywer awi— 'jau 'ga oree. —Pejemanū awi miamū pejekyjawe'em futat. "Tene 'gā je jukai kwy. Napoira'uweri je Jeju'i 'ga rerowiar awi", pe'je etee kūi— 'jau 'ga oree.

25 —"Najemanūweri je Jeju'i 'ga mome'u are" 'jara 'gā nooa'uweri futari ywag ipe Jarejuwarete 'ga pyri— 'jau 'ga oree. —"Je naapoa'uweri futari mama'ea Jeju'i 'ga remifutar imū" 'jara 'gā nanē nooa'uweri ywag ipe Jarejuwarete 'ga pyri— 'jau Jeju'i 'ga oree. —Amumera 'gā te nipo ajee e'i "tene 'gā je jukai kwy. Je napoira'uweri Jeju'i 'ga rerowiar awi", 'jau. Aipo 'jara 'gā etee awau ywag ipe, Jarejuwarete 'ga pyri— 'jau Jeju'i 'ga oree.

26 —Okaraemā mono'og are etee ea'at ma'e 'gā ni'akwaawi futari. Kwaiwete agawewi 'gā karaemā. A'ere aipo 'gā miamū nooi futari ywag ipe. Nom'yi 'gā weaa Jarejuwarete 'ga ree. A'eramū 'gā awawe'em 'ga pyri. Mama'eukwaawa rapyaw ipe etee 'gā oi. Peu oo re 'gā nuēmarūi futari jui. Nitywi mama'e mū mama'eukwaawa rapyaw awi 'gā nēnū'jāawamū— 'jau 'ga oree.

27 —Anure nipo pēneki'yramū je ruri tejewya nū. Tejuwarete 'ga renyfuga pype nipo tejua, 'ga pyriwara 'gā netee. A'eramū futat je pē mepyaū pēnemapiofer are najuejue etee futat. Teje'eg imū mama'ea apoarera 'gā je imonou imogyau ywag ipe Jarejuwarete 'ga pyri. Tejerowiare'ema 'gā nipo je imonou imogyau mama'eukwaawa rapyaw ipe— 'jau 'ga oree.

28 —A'jea futat je 'i. A'eramū futat nipo je tejua pē'wyriarareteramū te'yina pē nupe. Pēē mū nipo je resaka pejemanū enune, peje'wyriarareteramū je ruramū— 'jau 'ga oree.

17

*'Gā neape Jeju'i 'ga jesowo'gō'kawet
(Maku 9.2-13; Luka 9.28-36)*

¹ Anure seis oser ire Jeju'i 'ga awau ywyty'rarimū. Ore mū etee 'ga erawau ojeupi. Muapyyra 'gā etee 'ga erawau ojeupi. Pedro 'ga, Tiago 'ga, 'ga rewirera Juā 'ga. Mīmera 'gā etee 'ga erawau erojeupia ywyty'rarimū ojeupi.

² Peu Jeju'i 'ga ojesowo'gōka 'gā neape. 'Ga reakwara wenyfugamū kwara reny 'jawe. 'Ga raitya nanē waparasiagamū 'ga ree nū. Iaparasi enyufuk te 'ga raitya 'ga ree.

³ A'erauwe 'gā Moisesi 'ga resaka Eliasi 'ga reewe. Ywag awi 'gā nuri oporogytau Jeju'i 'ga upe.

⁴ Ywag awi 'ut ma'e 'gā nesakawe Pedro 'ga 'jau Jeju'i 'ga upe:
—Awa esageay janee ra'e. 'Au etee sapyta 'jau, ki Ku'jyp— 'jau Pedro 'ga Jeju'i 'ga upe. —Ere futat te je tapŷja apoa pejejeupe? Muapyyra tapŷja taruapo pē nupe 'jau. Ene upe, Moisesi 'ga upe, Eliasi 'ga upe 'jau— 'jau Pedro 'ga Jeju'i 'ga upe.

⁵ 'Ga porogyta pype ywasiga mū 'ua ojyja 'gā nee nū. Enyufug esage te ywasiga. A'e rupi futat Janeruwarete 'ga oje'ega mua 'gā nupe:

—Koromū futat jera'yrarete 'ga. Jeremifutararete 'ga. 'Ga 'ā je muorypararetea ojee. A'eramū ki pēē pejeapyakau 'ga je'eg are— 'jau Janeruwarete 'ga oje'ega mua ywasiga rupi 'gā nupe.

'Ga porogytapaw ire ywasiga ojeupiapap 'gā nui nū.

⁶ Jarejuwarete 'ga je'ega renupawe Jeju'i 'ga remimu'e 'gā piryyjamū jui. 'Ga je'ega 'gā mogyjau etee. A'eramū 'gā awau wāāpyramū anuruka ywyu.

⁷ A'erauwe Jeju'i 'ga awau 'gā nepejāna opo mowyka 'gā nee.

—Pekyje awi. Pe'je pejejua pejefu'ama— 'jau 'ga 'gā nupe.

⁸ A'eramū 'gā wowoworamū warekou. A'ere 'gā Jeju'i 'ga etee futat esagi 'ga'amamū. Ywag awi 'ut ma'efera 'gā awau ojeupia ywasiga rupi 'gā nui nū.

⁹ Ywytyr awi 'gā neruaw ipe Jeju'i 'ga 'jau wemimu'e 'gā nupe:

—Pemome'ua'ne kasi 'gā nupe ne. Pejejeki'yramū je feraw ire tāmējē tepemome'u 'gā nupe 'jau— 'jau 'ga 'gā nupe.

¹⁰ A'eramū 'gā 'jau Jeju'i 'ga upe:

—Ma'eramū ajee Moisesi 'ga remikwasiarer are moromu'jara 'gā 'i 'ū: Ymā 'ā Janeruwarete 'ga ka'arana kwasiarukari 'ga amū upe rakue: “Eliasi 'ga ra'ne nipo oje-saukat 'gā nupe. A'ere nipo 'ga rewiri jeremimonorama 'ga oi ojesaukaa 'gā nupe”, 'jau 'ga 'ā ikwasiarukaa inuga ka'aran are rakue, 'jau 'gā imome'wau oree jepi— 'jau 'gā Jeju'i 'ga upe.

¹¹⁻¹² A'eramū Jeju'i 'ga 'jau 'gā nupe:

—A'jea futat 'gā 'i. Eliasi 'ga 'jawewara 'ga ra'ne futat ako 'ut ai'i. “Au'je ki mama'e tywera apo re. Pe'je ki pejeipoia pejetywer awi. Ku'jywa 'ga tepē mogy wemiyuwamū 'jau”, 'jau ako 'ga awau pē nupe ai'i je renune ai'i. A'ere nepekwaawi futari 'ga. A'eramū 'gā 'ga rerekou tyweaete wemifutar imū etee futat. Anure nipo 'gā je miamū je rerekou tyweaete 'ga 'jawerimū futat— 'jau Jeju'i 'ga 'gā nupe.

¹³ Aipo ojeupe 'ga 'eramū 'gā weapyoramū ee ajemogyau.

—Juā Batista 'ga 'ga omome'u janee— 'jau 'gā. —Juā Batista 'ga Eliasi 'ga 'jawewara futat— 'jau 'gā ajaupe.

*Kunumī 'ga katu'okawet
(Maku 9.14-29; Luka 9.37-43)*

¹⁴ Ywytyr awi ojywa ire 'gā kwaiwete 'gā nesaka ywytyra raimy 'wyr ipe. Poje kūima'e 'ga amū 'ua, wapyka wenupy'āu Jeju'i 'ga rowase.

¹⁵ —Ejemuaēm jera'yra 'ga ree, ki Ku'jyp. Mama'eukwaawa 'up 'ga pir are. A'eramū 'ga moypipa— 'jau 'ga Jeju'i 'ga upe. —Oypiwauwe 'ga 'ari tata pe jepi. 'Y pe nanē 'ga u'aa jepi nū— 'jau 'ga imome'wau Jeju'i 'ga upe.

¹⁶ —Arut futat je 'ga eneremimu'e 'gā nupe esaukaa ko numiamū. A'ere 'gā nomoiri etee 'ga wi ko— 'jau 'ga imome'wau Jeju'i 'ga upe.

¹⁷ A'eramū Jeju'i 'ga 'jau oree:

—Ma'eramū sipo pēē je rerowiare'ema pejejemogyau 'wei? Ymā agawewi nā'ā je pē mu'ei re'ā. A'etea nipo 'ā naje rerowiari tāmējē 'ā pejepe. “Nokoa'uweri je namutamutat pē pype”, a'e agawewi je 'ā pē nupe jā'nū'ū— 'jau 'ga tesirūmera 'gā nupe nanē nū. —Pe'je 'ga ra'yra 'ga rerua jee— 'jau Jeju'i 'ga ore mū upe.

¹⁸ Kunumī 'ga resakawe Jeju'i 'ga 'jau 'ga pirowara upe:

—Ejepe'a 'ga wi— 'jau 'ga jupe.

'Ga 'e ypyrauwe ojepe'au 'ga wi. A'eramū kunumī 'ga ajarueteramū.

¹⁹ A'eramū ore 'ga remimu'eramū arawau 'ga repejāna 'ga pyri katu katu. A'eramū ore 'ga upe etee oroporonupa ee:

—Ma'eramū ajee ore norope'aarūi 'ga wi ra'e 'ū?— 'jau ore 'ga upe.

²⁰⁻²¹ —Naje rerowiari wejue te 'ā pejepe. A'eramū pēē a'eramū 'ga pirewara moirarūme'em 'ga wi— 'jau Jejuī 'ga oree. —Mostarda 'jawa ra'yi 'ā sikōsikōi'i agawewi. A'etea 'ā otym ire waranup. Aipoa aranuwa 'jawe pejemogy re amunipo 'ā pēē peapo futat mama'ea. Je rerowiar etee te te nipo 'eramū tee pearanup— 'jau 'ga oree. —Je rerowia'ri re amunipo 'ā peapo mama'ea pejejemiapoe'ema jepājē mū. Ywytyra upe amunipo 'ā pēē 'jau: “Ejepe'a 'aw awi. Peu'i ewau e'yina”, 'jau amunipo 'ā ywytyra upe. Aipo ojeupe pēē 'erauwe amunipo 'ā ywytyra ojepe'au awau pē'eawer imū etee futat. Tejerowiarāmū te je tepājē monoi pē nupe pēnemiapoe'ema apoawamū— 'jau Jejuī 'ga oree.

Amanūawama Jejuī 'ga imome'wau'japa

(Maku 9.30-32; Luka 9.43-45)

²² Anure Jejuī 'ga remimu'eramū ore arajatykau 'ga ree Garireja ywy pe nū. A'eramū 'ga 'jau oree:

—Pēneki'yra agawewi je 'ā. A'etea nipo Janeruwarete 'ga je pyygukat anurenure'i je ree iporomutare'ema 'gā nupe.

²³ A'eramū nipo 'ga je jukaukaa 'gā nupe. A'ere nipo 'ga imuapya 'ara rupi ete je moferawi nū— 'jau 'ga oree.

A'eramū ore aru'arasigamū arajemogyau. Aipo 'ga 'ea ore mu'arasiga.

Pira juru awi ka'aranūū ywope'ia renūēmawet

²⁴ Anure Jejuī 'ga wemimu'eramū ore rerawau Kafanaū 'jaw ipe nū. Peu ore waēmauwe Janeruwarete 'ga mogytaawa upe ka'aranūū pyykara 'gā 'ua oporonupa ee Pedro 'ga upe:

—Omepy te pē mu'jara 'ga ka'aranūū pyu Jarejuwarete 'ga mogytaawa apokatuawa?— 'jau 'gā Pedro 'ga upe.

²⁵ A'eramū 'ga 'jau 'gā nupe:

—Omepy futat 'ga— 'jau Pedro 'ga 'gā nupe.

Pedro 'ga rog ipe osouwe Jejuī 'ga 'jau 'ga upe:

—Maran te enereapyo ee, ki Simão? Awyja te ka'aranūū amono ywy jara 'ga upe? 'Ga remiayuwa 'gā te omepy ywy jara 'ga upe, ywy are ako ma'e 'gā te ra'u nū?— 'jau 'ga Simão Pedro 'ga upe.

²⁶ —Ywy are ako ma'e 'gā omepy ywy jara 'ga upe. Naywy jara 'ga remiayuwa 'gā nū omepy— 'jau Pedro 'ga 'ga upe.

—A'jea futat— 'jau Jejuī 'ga 'ga upe. —'Ga remiayuwa 'gā nomepyi futari— 'jau Jejuī 'ga. —Janeruwarete 'ga futat omogytaawa jara. Je 'ā 'ga remiayuwa.

²⁷ A'ere 'ā je ka'aranūū pyykara 'gā mepyi. Kasi a'e pe 'gā je raykai ee ne— 'jau Jejuī 'ga Pedro 'ga upe. —A'eramū ene ewau ypiauu reme'y'warimū epinaetyka. Eneremimu'ar ypya pira juru pe ka'aranūū ywope'ia mū ruwi. A'ea tereroo 'gā mepyau jarejee 'jau— 'jau Jejuī 'ga Pedro 'ga upe.

A'eramū Pedro 'ga awau iapou 'ga 'eawer imū etee futat.

18

Esage ma'e are 'gā mu'eawet

(Maku 9.33-37; Luka 9.46-48)

¹ Anure Jejuī 'ga remimu'eramū ore arajua oroporonupa ee Jejuī 'ga upe:

—Manamū te jane Jarejuwarete 'ga upe esage ma'eramū jarejuapyaapa?— 'jau ore 'ga upe.

² Ojeupe aipo ore 'erauwe Jejuī 'ga kunumī renūina:

—Ere ejua 'au je pyri— 'jau 'ga 'ga upe.

A'erauwe kunumī 'ga amū 'ua 'ga repejāna 'ga rerowyka.

³⁻⁴ A'eramū Jejuī 'ga 'jau oree:

—Peesak te kunumī 'ga 'ama je pyri?— 'jau 'ga oree. —Kunumī 'gā nojerowiaraiwi ojee tee jepi. Ujar are 'gā jemogypygi. Ujara 'gā je'eg imū etee 'gā mama'e apoi. A'eramū je 'jau pē nupe: Kunumī 'jawewara 'gā etee je amogy 'wyriaramū tejepyri. Kunumī 'gā 'jawe pejemogy re te je pē mogyau 'wyriaramū tejepyri. Kunumī 'jawewara 'gā etee esage ma'eramū jee— 'jau Jejuī 'ga oree.

⁵ —Kunumī 'gā nee ojejukau esage ma'eramū je reewe futat pejejuka esage— 'jau 'ga oree.

⁶ —Kwaiwete kunumī 'gā je rerowiari ajemogyau. 'Ga amū nipo je rerowiar awi kunumī 'gā momoirukaa 'eramū nipo Janeruwarete 'ga 'gā nereko tyweretei— 'jau 'ga oree. —Sā'ā ae ita moga ojojuri. A'eramū 'ā ae ojomonou ojomomoa 'ye'ē pype ajajukau. A'ere nipo 'y pe

imomoripyra 'ga reko tyweri'i etee. A'eramū futat 'ga amanūmū. A'ere nipo je rerowiar awi kunumī 'gā momoirukarera 'gā Janeruwarete 'ga ereko tyweretei futari— 'jau 'ga oree.
⁷—Nateepawi futari nipo ajaupe mama'e tywera apoara 'gā. Iporiai'i aipo 'gā numiamū. Aipo 'gā te nipo Ku'jywa 'ga wereko tywerete futat imojero'wau etee— 'jau 'ga oree.

⁸—“Jepoa je motywerukat Jarejuwarete 'ga upe. Mama'e tywera apoukaa jee, je motywerukaa Jarejuwarete 'ga upe”, 'jau ki pejepoa pemonok imonou imomoa pejewi. Kasi a'e pe pēpoa pē motywerukaru'jaw ine. “Tepyu nanē je mama'e tywer apoi ra'e” 'jaramū pejepya nanē imonoka nū. Kasi a'e pe pēpya pē motywerukaru'jaw ine nū. Pēpo monoga rayramū futat pē nupe. A'ere Janeruwarete 'ga mama'e tywera apoaramū pē momopori pē monou mama'eukwaawa rapyaw ipe. Aipoa te ayrete ma'ea imomoripyra 'gā nupe. “Janepoa jane motywet” 'jau pejepoa pemososopap pejewi. A'eramū te nipo mama'e tywera nepeapou'jawi. A'eramū te peo ywag ipe.

⁹“Jarejea pyu mama'e resaga jane motywet” 'jaramū pejejea mosoka imonou imomoa pejewi. Imosog ire te nipo mama'e tywera nepeapou'jawi— 'jau Jejui 'ga oree. —Wea mosoga ay futat wea mosokara 'gā nupe. A'ere nipo Janeruwarete 'ga te mama'e tywera apoara 'gā momopori imonou mama'eukwaawa rapyaw ipe. A'ea te nipo ayay futat aipo pype imonopyrera 'gā nupe— 'jau Jejui 'ga oree.

Oka'jam ma'ea karupa'mīa

(Luka 15.3-7)

¹⁰⁻¹¹—Kunumī 'gā nupe kasi pe'je ne, “nepeapoi pēē kunumīT”, 'jawe'em pēē kunumīT 'gā nupe, 'jau je pē nupe. Ywagipewara 'gā futat kunumī are ojejuka ma'ea. Weape futat 'gā kunumī rerekoi. Ywag ipe futat 'gā nee ojejuka ma'e 'gā jemogyi Jarejuwarete 'ga pyri— 'jau Jejui 'ga oree.

¹²—Maran te pekwaap? Wyra jara 'ga amū sēg karupa'mī wereko. Poje karupa'mīa mū awau oka'jama 'ga wi. Ma'ja sipo ijara 'ga wapo? Wejat futat 'ga weymawa jū me, juowa 'wawamū. A'eramū 'ga awau oka'jam ma'e rekaa akou.

¹³ Esakawe 'ga aku'iramū oka'jam ma'efer are. A'e pe 'ga aku'iramū agawewi futat oka'jame'em are. A'eramū 'ga oka'jam ma'efer are taetu aku'iramū.

¹⁴ Nan tee futat Janeruwarete 'ga nafutari kunumī amū oa mama'eukwaawa rapyaw ipe— 'jau Jejui 'ga oree.

Mama'e tywera apoara 'gā

¹⁵—Je rerowiaara 'ga amū nipo mama'e tywera wapo enee. A'eramū ki ekwap eporogytau 'ga upe ejete'e'i ra'ne— 'jau Jejui 'ga oree. —Ojeupe 'ga tywera ene imome'u re nipo 'ga 'jau enee: “A'jea futat ako je mama'e tywera apoi enee ai'i. A'ere je 'awamu naapou'jawi”, 'jau nipo 'ga enee. A'eramū ene 'ga mojekoty'aa ejee nū.

¹⁶ A'ere ki 'ga ejaykapawe'emamū epytuna 'gā amū eroo ejeupi eroporogytau 'ga upe. Ymā te Janeruwarete 'ga ka'arana kwasiarukari 'ga amū upe rakue: “Ga upe 'ga remiapo tywera mome'uramū ki pemome'u 'gā amū nemianuwamū 'jau. Majepei 'ga remianuwamū ki pemome'u maranamū mukūja 'gā nemianuwamū. A'eramū 'gā ene'e kwaapa 'jau”, 'jau 'ga ikwasiarukaa ka'aran are rakue.

¹⁷ A'ere ki mama'e tywera apoara 'ga 'gā je'ega renuwetee'emamū pē mome'u 'ga Jejui 'ga rerowiaara 'gā nupe. A'eramū 'gā oje'ega 'gā nupe Jejui 'ga rerowiaara 'gā je'ega renuwetee'emamū pēē 'jau 'ga upe: “NaJaneruwarete 'ga remiayuwā rūi ene. Mama'eukwaawa 'wyriara remiayuwā te ene ra'e”, pe'je ki otywer awi ipoire'ema 'ga upe— 'jau 'ga oree.

¹⁸—A'eramū je 'jau pē nupe: “Gā amū nupe “Janeruwarete 'ga pētywera omoit pē nui”, pēē 'eramū 'ga imoiri futari 'gā nui. “Gā amū nupe te nipo aje pe'je “Nepēpoiriweri 'ā pejetywer awi. A'eramū 'ga imoire'ema futat pē nui”, pēē 'eramū 'ga nomoiri futari 'gā nui— 'jau Jejui 'ga oree.

¹⁹—A'jea futat je'ea: Ojeupe mukūjamū pēē mama'e renūjamū, Jeruwarete 'ga mama'e apoi futari pē'eawer imū.

²⁰ Je rerowiaara 'gā ajatykau 'upa je upe oje'ega. A'eramū je nanē tekou 'gā pype nū. Maranamū mukūi etee agawewi. Maranamū muapy'ri etee agawewi nipo 'gā 'upa. A'ete je ako 'gā pype— 'jau Jejui 'ga 'gā nupe.

Ajaupe 'gā mota'wa are 'gā mu'eawet

²¹ A'eramū Pedro 'ga awau Jejui 'ga rerowyka oporonupa ee 'ga upe:

—Tepytuna 'ga mama'e tywera tejeupe iapou'jau'jawanū sipo je maran tejemota'wau 'ga upe? Sete te sipo je teta'waramū 'ga upe?— 'jau 'ga 'ga upe.

²² A'ere Jejui 'ga 'i 'ga upe:

—Naani nū'ū. Ejeupe 'ga mama'e tywera apou'jau'jawanū ene nanē ejemota'wau'jau'japa etee futat ekou 'ga upe, au'jeteramū— 'jau Jejui 'ga 'ga upe.

²³—Mama'e mū je amome'u pē nupe pē mu'jau pēmota'wa are— 'jau' ga oree. —'Wyriara' ga amū nipo 'jau ojeupe oporowyky ma'e 'gā nupe: "Pe'je jeremiayuwa 'gā nerua jee. Taje mepy 'gā 'jau. Kwaiwete ako 'gā jekaraemā rerooi imepyawe'em ai'i. A'eramū 'awamū pejewau 'gā nerua je mepyawamū", 'jau' ga ojeupe oporowyky ma'e 'gā nupe— 'jau' Jeju'i 'ga imome'wau oree.

²⁴—A'eramū 'ga upe oporowyky ma'e 'gā awau 'ga remiayuwa 'ga amū rerua 'ga upe. Kwaiwete karaemā 'ga weroo imepyawe'em rakue. A'eramū "Je mepy ape", ojeupe 'wyriara' ga 'eramū 'ga 'jau etee 'ga upe "nitywi futari", 'jau' ga o'wyriara' ga upe.

²⁵A'eramū 'wyriara' ga 'jau ojeupe oporowyky ma'e 'gā nupe: "Peroo 'ga me'ega tekotee 'gā nupe 'gā nemifajamū. 'Ga remireko, 'gā na'yt, 'ga karaemā. Mīmera peroo ime'ega. A'eramū pēē 'gā nepyfera rerua jee", 'jau' ga opoirū 'gā nupe— 'jau' Jeju'i 'ga imome'wau oree.

²⁶—O'wyriara' ga 'e renupawe, 'ga wapyka wenupy'āu 'ga rowase: "Ejemuaēm te je ree. Erejeaei awi je ree. Tene je ra'ne. Tamepy ene 'jau", 'jau' ga 'ga upe— 'jau' Jeju'i 'ga imome'wau oree.

²⁷—A'eramū 'wyriara' ga ajemuaēma 'ga ree. A'eramū 'ga 'jau' ga upe: "Ajemuaēm je ene ree. A'eramū je tejea'aru'jawe'emamū temepye'em are. Ere ewau", 'jau' ga 'ga upe.

²⁸A'erauwe imepyare'ema 'ga awau uēma 'ga rog awi. Awaw ipe 'ga opytuna 'ga amū rowosōu. Ināinānī' agawewi 'ga pytuna 'ga 'ga mepyawe'em rai'i. A'etea 'ga 'ga ajue'opyyk 'ga majaetyetyka: "Ere je mepyau 'awamū", 'jau' ga oje'ega moywyrafena 'ga upe.

²⁹—A'eramū 'ga pytuna 'ga wapyka wenupy'āu 'ga rowase: "Ejemuaēm te je ree. Tene je ra'ne. Tamepyap ene 'jau", 'jau' ga 'ga upe— 'jau' Jeju'i 'ga imome'wau oree.

³⁰—A'ere 'ga 'i etee 'ga nupe: "Naani. Napoiri futari je ene wi", 'jau' etee 'ga 'ga upe, 'ga monou imomoa moromunepawa pype. "Je mepye'emamū nereēmi jui", 'jau' ga 'ga upe.

³¹—'Wyriara' ga poirū 'gā 'ga resaka. A'eramū 'gā awau 'ga mome'wau o'wyriara' ga upe. "Ene 'ā erejemuaēm agawewi 'ga ree. A'etea 'ga najemuaēmi opytuna 'ga ree", 'jau' 'gā imome'wau o'wyriara' ga upe.

³²—A'eramū 'wyriara' ga 'ga renūina: "Ere ejua. Taporogyta enee 'jau", 'jau' ga 'ga upe. —Ojepyri 'ga rurauwe 'wyriara' ga oje'ega moywyrafena 'ga upe. "Enetywerete jee 'awamū. 'Ejemuaēm je ree' ere ako jee ai'i. A'eramū ako je tejemuaēma ene ree ai'i.

³³A'etea 'ā nerejemuaēmi epytuna 'ga ree rai'i. Ejee je jemuaēma 'jawe ki ejemuaēma epytuna 'ga ree", 'jau' ga 'ga upe— 'jau' Jeju'i 'ga imome'wau oree.

³⁴—Opytun are wemiayuwa 'ga jemuaēme'emamū 'wyriara' ga amara'neramū 'ga ree. "Nerejemuaēmi epytuna 'ga ree. A'eramū je tejemuaēmu'jape'ema ene ree", 'jau' ga wemiayuwa 'ga upe 'gā monou imu'ama moromunepawa pype. A'eramū 'ga 'jau' moromunepawa raarana 'gā nupe: "Naje mepyi 'ga. Najemuaēmi nanē 'ga opytuna 'ga ree. A'eramū pēē 'ga rerekou tyweaete jee, 'ga mayrūmū jee", 'jau' ga 'gā nupe. "Je mepyawe'em 'ga nuēma'uweri", 'jau' ga 'gā nupe— 'jau' Jeju'i 'ga imome'wau oree.

³⁵—Nan tee futat Jeruwarete 'ga. Pejepytuna 'gā pē nereko tyweawer are pēē au'jeteramū 'gā nayka re Janeruwarete 'ga nanē pē naykau pētywer are. Pēnaykaupawe'em pētywer are. Nomoiri futari 'ga pētywera pē nui. A'eramū 'ga pē monou pē nereko tyweaete mama'eukwaawa rapyaw ipe— 'jau' Jeju'i 'ga oree, ore mu'jau ee.

19

Peetyg awi pejejemirekoa (Maku 10.1-12; Luka 16.18)

¹'Gā nupe oporogytapaw ire Jeju'i 'ga ore reruatau nū. Garireja ywy awi arawau oroyaapa. Jotāu ry owajara katywara rape rupi arawau. A'eramū ore orojewya oroyaapa nū. Judeja ywy pe arajua nū.

²A'eramū mytuna 'gā awau ore rewiri. Amumera 'gā ojero'wau. A'eramū Jeju'i 'ga ojero'wu ma'e 'gā katu'okapap.

³Poje fariseu 'gā amū 'ua 'ga rerowyka. "Siesak 'ga je'eg amutee jarejee 'jau", 'jau' 'gā ajaupe. "'Ga je'eg ekoeteramū, 'Nuenuwi 'ga Moisesi 'ga je'ega ra'e, sa'e 'ga upe 'jau", 'jau' 'gā ajaupe. A'eramū 'gā 'jau' ga upe:

—Jaruate sipo kūima'e 'ga amū wemireko retygi mama'e'emete are we?— 'jau' 'gā 'ga upe.

⁴A'eramū Jeju'i 'ga 'jau' 'gā nupe:

—Pēnea'ar iki pejejemimogytafer are. "Mama'e apoawamū Janeruwarete 'ga kūima'e 'ga apoi, kūjā ēē reewe rakue" eawer are pejejea'aramū pejejemogyau.

⁵Janeruwarete 'ga te 'ā e'i rakue: "Kūima'e 'ga je aapo kūjā ēē reewe. A'eramū 'ga wemirekoramū kūima'e 'ga opojo'ogamū ujara 'gā nui ojemujaawemireko ēē ree etee", 'jau

Janeruwarete 'ga rakue. “Ajuee ojemujar ire 'gã jemogyi majepe teewara 'jawe jee”, 'jau Janeruwarete 'ga rakue.

⁶ Ajuerokoe 'ewe 'gã mukûi futat 'gã nekoi. A'ere ajueroko re 'gã majepe teewara 'jawe 'gã nekoi Jarejuwarete 'ga upe. Janeruwarete 'ga wejue werekoukat 'gã ajaupe. A'eramû pêê pejejomojo 'ogukararûme'em pejejau, pejejuereko re— 'jau Jejui 'ga 'gã nupe.

⁷ —Ma'eramû sipo ajee Moisesi 'ga 'i rakue: “Pejemireko retyka ki ka'arana pekwasiarukat 'gã amû nupe êê ree. 'Aetyk je ene tejemirekoramû akiko', pe'je ki ikwasiarukaa pejemirekofera êê ree, imonou êê upe”, 'jau 'ga ikwasiaa rakue— 'jau fariseu 'gã 'ga upe.

⁸ A'eramû Jejui 'ga 'jau 'gã nupe:

—A'jea futat. Niporenuwiweri wejue pêypy 'gã Jarejuwarete 'ga ree rakue. A'eramû Moisesi 'ga 'gã muéapyoukaa aipo are rakue. A'ere Janeruwarete 'ga aipo ne'i aepy 'gã nupe rakue— 'jau Jejui 'ga 'gã nupe.

⁹ —A'ere a'jea futat je 'i: 'Ga amû êê ree 'ga reko re etee ki pejemirekoa peetyk. A'ere kasi ee pejeporetygiwera'emamû peetyg ine. 'Ga amû êê ree 'ga reko'e'emamû pêê pejemireko retyka ekoete'em. Kasi a'e pe pejemirekoe'em are ako ma'e 'jawe pejemougoukat amutee êê rereko re ne— 'jau Jejui 'ga fariseu 'gã nupe.

¹⁰ A'eramû ore Jejui 'ga remimu'eramû 'jau 'ga upe:

—Ma'eramû sipo ae wemireko retyke'ema najemogyi nan etee futat— 'jau ore 'ga upe.

¹¹ A'eramû Jejui 'ga 'jau ore:

—'Gã amû nauagi ojetee ajemogyau. Jarejuwarete 'ga remifutar imû etee futat 'gã amû remirekoramû. A'ere 'ga amû naemirekoi, 'ga remifutar imû etee futat— 'jau 'ga ore.

¹² —'Gã amû nipo u'aa oteuramû. A'eramû 'gã wemirekowere'emamû. Amumera 'gã nipo ojeapi'a oogukaa 'ga amû upe. A'eramû 'gã wemirekoe'emamû futat ajemogyau. Amumera 'gã te nipo ajee naemirekoweri futari. “Jarejuwarete 'ga upe toporowyky 'jau kwy. A'eramû 'je tejemirekoe'emamû tekou”, 'jau nipo 'gã ojeupe. A'eramû emirekowere'ema 'gã wemirekoe'emamû futat ajemogyau— 'jau Jejui 'ga ore.

Jejui 'ga kunumî 'gã netee

(Maku 10.13-16; Luka 18.15-17)

¹³ Anure kûjã 'gã amû wa'yra 'gã nerua Jejui 'ga upe nû:

—Orera'yra apyte'rarimû epo emono a'i kî'î— 'jau 'gã erua 'ga upe. —Jarejuwarete kîã upe eporogyta wã nee. A'eramû Janeruwarete kîã ojejukau esage wã nee, aru'e ore enee kî'î— 'jau kûjãmera 'gã 'ga upe.

A'ere ore Jejui 'ga remimu'eramû ore 'i etee 'gã nupe:

—Perur awi pejeja'yra 'gã 'ga upe 'ga porogyta 'ga 'amamû. Nepemaruukari 'ga porogyta— 'jau ore 'ga remimu'eramû 'gã nupe.

¹⁴ A'eramû Jejui 'ga 'jau ore:

—Naani. Peapo awi nanuara. Tene kunumî 'gã nuri je pyri— 'jau etee 'ga ore. —Janeruwarete 'ga kunumî 'gã afutat wemiayuwamû. Kunumî 'jawewara 'gã nupe etee Janeruwarete 'ga reni 'wyrriaramû. Kunumî 'gã ojemogyppyk Jarejuwarete 'ga ree. Ojerekokatuuakat 'gã 'ga upe. 'Gã 'jawe peko— 'jau 'ga ore.

¹⁵ A'eramû 'ga opo monou kunumî 'gã apyte'rarimû. A'eramû 'ga 'jau 'gã nupe:

—Janeruwarete 'ga ojejuka esage pê nee, kunumî— 'jau 'ga 'gã nupe.

'Gã apyte'rarimû opo mono re 'ga awau 'gã nui.

Jarejuwarete 'ga pyri oo are

'ga poronupawet

(Maku 10.17-31; Luka 18.18-30)

¹⁶ Anure kûima'e 'ga amû 'ua Jejui 'ga rerowyka'i oporonupa ee 'ga upe:

—Ma'ja te je aapo esage ma'eramû Jarejuwarete 'ga upe tewawamû ywag ipe temanû re?— 'jau 'ga oporonupa ee Jejui 'ga upe.

¹⁷ A'eramû Jejui 'ga 'jau 'ga upe:

—Ma'eramû ene ejua eporonupa ee jee nû ki 'ei? Mama'e esagerete are ki 'ei?— 'jau Jejui 'ga 'ga upe. —Janeruwarete 'ga etee futat esage ma'ea. “Ene 'ã Jarejuwarete 'ga 'jawewara futat”, ere te jee?— 'jau 'ga 'ga upe. —Ywag ipe eoweramû mama'ea eapo 'ga je'eg imû etee, Moisesi 'ga upe 'ga remikwasiarukarer imû etee— 'jau Jejui 'ga 'ga upe.

¹⁸ —Maranuara a'eramû je mama'e apou ki 'ei?— 'jau 'ga Jejui 'ga upe.

—Ymã te 'ã Moisesi 'ga Janeruwarete 'ga je'ega kwasiari inuga ka'aran are janee rakue. A'e are ejea'at.

“Peporojuka awi. Peko awi pejejuemireko are.

Pemunarû kasi mama'e are ne. Peje'ëwu'jag kasi 'ga amû ne.

¹⁹Pejejara 'gā je'ega ki peanuw etee.

Pereko esage ki 'gā pejereko esage 'jawe etee futat",

'jau 'ga 'ā ikwasiaa inuga ka'aran are rakue. Mīmera 'ā erekwaapap— 'jau Jeju 'ga 'ga upe.

²⁰A'eramū 'ga 'jau Jeju 'ga upe:

—Je kunumāwe futat aipoa akwaap ikue. Moisesi 'ga je'eg imū etee futat je mama'e apoi tekou. Ma'ja'ja jee je aapo 'ū?— 'jau 'ga Jeju 'ga upe.

²¹A'eramū Jeju 'ga 'jau 'ga upe:

—A'jea futat ere. A'ere 'awamū mama'e mū eapo, 'ga ree eparuerowiar wywapiweramū. Ekaraemā eme'ēmap. A'ere ene ka'aranūū monou ika'aranūū'e'ema 'gā nupe. Aipoa ene iapo re, Janeruwarete 'ga ene monoi ojeypyri ene manū re. Mama'e esagea te nipo 'ga amut enee anure, ekaraemā 'gā nupe imonoawera mepyau enee anure. Ekaraemā me'eg ire ene ejua je rewiri— 'jau Jeju 'ga 'ga upe.

²²Aipo ojeupe Jeju 'ga 'eramū 'ga u'arasigamū etee okaraemā are. Kwaiwete te 'ga karaemā. A'eramū 'ga oporome'egiwere'emamū okaraemā are. A'eramū 'ga 'jau ojeupe etee futat: "Naani. Naapoa'uweri je nanuara", 'jau 'ga ojeupe etee futat. A'eramū 'ga u'arasigamū awau Jeju 'ga aipo ojeupe 'eramū.

²³A'eramū Jeju 'ga 'jau wemimu'eramū oree:

—Ayay te ikaraemā kwai ma'e 'gā jemogyi Jarejuwarete 'ga remiayuwamū— 'jau 'ga oree.

²⁴—Ayay te ikaraemā kwai ma'e 'gā jekatu'ogukari Jarejuwarete 'ga upe. Kwaiwete 'gā karaemā. A'eramū 'gā okaraemā are etee wea'aramū. Okaraemā are etee aipo 'gā jemogyppygi akou. NaJarejuwarete 'ga ree rūi 'gā jemogyppygi ajemogyau. Jarejuwarete 'ga opoara futare'ema ajemogyau. Jeje'ega renupe'ema futat ajemogyau— 'jau Jeju 'ga oree. —Sā'ā kawarua 'jawewara kamerua aguja kwara rupi ikwawe'ema. Nan tee futat ayayramū ikaraemā kwai ma'e 'gā ojekatu'ogukaa Jarejuwarete 'ga upe. Ikaraemā kwai ma'e 'gā nijekatu'ogukariwiri futari Jarejuwarete 'ga upe— 'jau Jeju 'ga oree.

²⁵Aipo renupawe ore oroporesagamū etee 'ga ree arajemogyau. A'eramū ore oroporonupa ee arajaupe etee futat:

—Maranuara 'gā tete Janeruwarete 'ga okatu'ok?— 'jau ore arajaupe.

²⁶Aipo ore 'eramū Jeju 'ga amā'jāu ore ree 'jau oree:

—Pē nupe nayrareferi futari. Ayay futat mama'e apoa pē nupe. A'ere nitywi futari Janeruwarete 'ga remiapoe'ema mū mama'ea. Mama'ea naayi futari 'ga upe. Ikaraemā kwai ma'ea miamū Janeruwarete 'ga okatu'ok, "Jekatu'og ape" ojeupe 'gā 'eramū— 'jau etee Jeju 'ga oree.

²⁷A'eramū Pedro 'ga 'jau 'ga upe:

—Ore ako aruejat orokaraemā arajua ene rupi ai'i. Oropytuna nanē futat ako ore ejaa ai'i nū. Ma'ja te ore mama'e rejaawera repya?— 'jau 'ga Jeju 'ga upe.

²⁸A'eramū Jeju 'ga 'jau 'ga upe:

—A'jea futat ako ai'i. A'eramū je 'jau pē nupe: Anure nipo Janeruwarete 'ga mama'e momyau nū. Aipoa 'ara rupi nipo je te'ŷina pēneki'yrareteramū 'wyriarareteramū pē nupe. A'eramū nipo je pēē nanē futat pē mogyau 'wyriaramū tejeypyri. Israeu 'ga ra'yra 'gā pytuna tusi. A'eramū je pē monou pē mogyau 'wyria'riramū 'gā nupe Israeu juapyrera 'gā nupe. A'eramū Israeu juapyrera 'gā nipo awau pē nowase. A'eramū nipo pēē 'jau mama'e esage apoara 'gā nupe: "Mama'e esage ereapo rakue, Jarejuwarete 'ga je'eg imū rakue. A'eramū 'ga ene mepyau eneremiapofer are", 'jau nipo pēē 'gā nupe— 'jau Jeju 'ga oree. —Mama'e tywera apoarera 'gā nupe nipo pēē 'jau: "Mama'e tywera etee ereapo Jarejuwarete 'ga upe rakue. 'Ga je'eg imū jēmū mama'e apowe'em rakue. A'eramū 'ga pē mepyau pēnemiao tywer imū etee futat", 'jau nipo pēē 'gā nupe— 'jau Jeju 'ga oree.

²⁹—Amanū re je ree omama'e rejaarera 'gā juejue awau ajemogyau Jarejuwarete 'ga pyri. Peu te 'ga mama'e teepawe'ema muri 'gā nupe kwaiwete, je ree 'gā mama'e rejaawera repyramū futat mua 'gā nupe. Oy ēē rejaarera 'gā, 'uwa 'ga rejaarera 'gā, wa'yra 'gā nejaarera 'gā, welki'yra 'gā nejaarera 'gā, wenyra 'gā nejaarera 'gā, okywyra 'gā nejaarera 'gā, wykiera 'gā nejaarera 'gā, woga rejaarera 'gā, oywy rejaarera 'gā. Mīmera 'gā juejue ajemogyau Jarejuwarete 'ga pyri amanū re. 'Gā nupe juejue futat Janeruwarete 'ga mama'e esage muri kwaiwete— 'jau Jeju 'ga oree.

³⁰—'Awamū 'gā amū reni 'wyriaramū ajaupe. A'ere nipo anure aipo 'gā jemogyi akotee ma'eramū etee nū. 'Awamū 'gā amū jemogyi akotee ma'e 'gā 'jawe. A'ere anure nipo aipo 'gā jemogyi 'wyriara 'jawewaramū nū. 'Awamū omama'e rejaarera 'gā akotee ma'e 'jawe etee futat 'gā jemogyi. A'ere nipo anure, 'wyriarareteramū je renamū, je ree omama'e rejaarera 'gā jemogyi 'wyriaramū je pyri— 'jau Jeju 'ga oree.

20

Wemifutar imū etee Janeruwarete 'ga jane mepyawam

¹ A'eramū Jejuī 'ga 'jau:

—Mama'e mū je amome'u pē nupe pē mu'jau tejeupe pēnemiapofera mepy are. Sā'ā uwa ko jara 'ga amū oa ai'iwetetewe ojeupe oporowyky ma'e 'gā amū nekara.

² Iporowykye'ema 'gā nesakawe 'ga 'jau 'gā nupe: “Pejot pejeporowykyau jee”, 'jau 'ga 'gā nupe.

—“Maran sipo ajee ore mepy ape?” 'jau 'gā 'ga upe.

—“Majepeja ka'aranūū ywope'i pyu etee futat je tejeupe pēporowykawera mepyi pē nupe”, 'jau 'ga 'gā nupe.

³ —A'eramū 'gā awau 'ga rupi oporowykyau 'ga ko pe. Kwarawyrūū'iramū ko jara 'ga awau amunawa pyter ipe nū, iporowykye'ema 'gā amū nesaka nū.

⁴ A'eramū 'ga 'jau 'gā nupe: “Pejot pejeporowykyau jeko pe. Kaaruwamū tamepy pēē 'jau, tejeupe pēporowykawer are 'jau”, 'jau 'ga 'gā nupe.

⁵ A'eramū 'gā awau oporowykyau 'ga upe.

—Aje kwara kwawamū ko jara 'ga awau, 'gā amū nerua 'gā moporowykaukaa ojeupe nū. Kwara jerewamū 'ga awau, 'gā amū nerua nū.

⁶ Kaarup ja'wyja'wyrāmū 'ga awau amunawa pyter ipe nū. A'eramū 'ga iporowykye'ema 'gā amū nesaka nū. A'eramū 'ga 'jau 'gā nupe: “Ma'eramū pēē pejeporowykawe'em pejejemogyau 'ū?” 'jau 'ga 'gā nupe.

⁷ —“Nitywi 'pe'je pejejuā pejeporowykyau jee” 'jara 'ga amū oree”, 'jau 'gā 'ga upe.

—A'eramū 'ga 'jau 'gā nupe: “Pe'je ajee pejewau pejeporowykyau jee 'ū”, 'jau 'ga 'gā nupe.

⁸ —Kaarup katu katuramū ko jara 'ga 'jau opoirū 'ga upe: “Emepy ki oporowyky ma'e 'gā jee. Kaarup ja'wyja'wyrāmū oporowyky ma'e 'gā na'ne ki emepy jee. A'ere aje 'ut ma'efera 'gā, a'ere 'ut ppy ma'efera 'gā maapawamū 'jau”, 'jau 'ga opoirū 'ga upe.

—“Nai'ī”, 'jau 'ga poirū 'ga 'ga upe.

⁹ —A'eramū 'ga ka'aranūū ywope'ia mū monou kwara ooramū oporowyky ma'e 'gā nupe.

¹⁰ 'Gā mepy resakawe, oporowyky ppy ma'e 'gā 'jau ajaupe: “Kuu. Ka'aranūū ywope'ia 'ga omono 'gā nupe jane upe 'ga 'eawera 'jawe etee futat”, 'jau 'gā ajaupe. “Jane upe taetu sipo ajee 'ga imuri kwaiwete'i. Ko'aramuku te ako jane porowykyi ko a'i kūi”, 'jau 'gā ajaupe.

¹¹ —A'ere naani. Kaaruwamū oporowyky ma'e 'gā mepy 'jawe etee futat 'ga imonoi 'gā nupe. A'eramū 'gā amara'neramū ko jara 'ga ree.

¹² “Ko'aramuku agawewi ako ore porowykyi ko, kwaray pype ko. A'etea 'ga 'ā ore mepy kaaruwamū oporowyky ma'e 'gā 'jawe etee. Nore mepy esagei ako ape ko”, 'jau 'gā oje'egayau ko jara 'ga upe.

¹³ —A'eramū ko jara 'ga 'jau 'gā nupe: “Naani. Pē nupe teporogytau ako je 'i pē nupe ko: 'majepei tee ka'aranūū ywope'ia tomono pē nupe 'jau, tejeupe pēporowyky mepyawamū 'jau”, a'e ako je pē nupe ko. 'Nai'ī”, 'jau ako pēē jee ko. A'eramū 'ga je'eawer imū etee futat pē mepyau.

¹⁴⁻¹⁵ Pe'je pejeka'aranūū pyyka erawau pejejog ipe”, 'jau 'ga 'gā nupe. “Jema'ea te 'ā ka'aranūūa. A'eramū je tema'ea etee futat erekou nan oporowyky'i ma'e 'gā mepyau pē 'jawe etee futat. Mama'e esage te je aapo 'gā nupe. A'e are 'ā pēmara'ne je ree?” 'jau ko jara 'ga 'gā nupe— 'jau Jejuī 'ga imome'wau 'gā nupe.

¹⁶ —Nan tee futat Janeruwarete 'ga wemiayūwa 'gā mogyi pāwē pāwē ojepyri anure— 'jau 'ga oree. —Werowiaar ymanera 'gā, amanū ja'wyja'wy pype werowiaara 'gā nanē 'ga imonou ojepyri futat nū. Wemifutar imū etee futat 'ga werowiaaramū pē mogyau ojepyri futat. Aju'jaju'jawe etee futat 'ga 'gā mogyi ojepyri— 'jau Jejuī 'ga oree.

Amanūawama Jejuī 'ga imome'wau'japa

(Maku 10.32-34; Luka 18.31-34)

¹⁷ A'eramū Jejuī 'ga ore rerawau Jerusareg ipe wemimu'eramū. A'ere mytuna 'gā oi ore rupi. A'eramū 'ga ore renūina ojeupe:

—Pejepe'a'i 'gā nui ra'ne. Taporogyta pē nupe etee 'jau— 'jau 'ga oree.

A'eramū ore orojepe'au'i mytuna 'gā nui.

¹⁸ A'eramū 'ga 'jau oree:

—Jerusareg ipe jane oi 'awamū. Peu futat nipo 'ga amū pēneki'yramū je monoi mainana 'wyriara 'gā nupe, Moisesi 'ga remikwasiarer are moromu'jara 'gā netee— 'jau 'ga imome'wau oree. —A'eramū nipo 'gā 'jau jee: “Sijukaukat 'ga 'gā nupe 'jau”, 'jau nipo 'gā jee.

¹⁹ A'eramū nipo 'gā je monou judeue'ema 'gā po pe. A'eramū nipo judeue'ema 'gā je kurapa, je nupānupāu, je monou je mu'ama 'ypeywar are jejywa pypiraa je manamamū futat. A'ere nipo imuaprya 'ara rupi Janeruwarete 'ga je moferawi etee nū— 'jau 'ga oree.

*Sepeteu 'ga remireko ēē 'eawet
(Maku 10.35-45)*

²⁰ A'ere Sepeteu 'ga remireko ēē wa'yra 'gā nerua Jejui 'ga rerowyka'i. A'eramū ēē wāāpyramū 'jau Jejui 'ga upe:

—Mama'e esagea eapo jera'yra wā nupe, Ku'jyp— 'jau ēē 'ga upe.

Tiago, Juā. Mīnamū ēē ra'yra 'gā.

²¹ A'eramū 'ga 'jau ēē upe:

—Ma'ja ene ifutaa 'gā nupe je iapoa?— 'jau 'ga ēē upe.

A'eramū ēē 'jau 'ga upe:

—Jera'yra wā emuapygukat ejepyri, oree 'wyriarareteramū e'yīnaaw ipe. Ejakwatawa katy kīā amū emuapygukat. Ajepeja kīā ejau katy emuapygukat, wā mogyau 'wyriaramū ejepyri— 'jau ēē 'ga upe.

²² A'eramū Jejui 'ga 'jau ēē ra'yra 'gā nupe:

—Nepēneapyoi futari nipo ee ki sa. 'Wyriarareteramū je reko enune nipo 'gā naje rerekoarūi. Je rereko tywerete te nipo 'gā. Pejereko tywerukat sipo je pyri? Pēnuag sipo pejejereko tywera upe?— 'jau 'ga ēē ra'yra 'gā nupe.

—Oreruag futat ore jupe nū'ū— 'jau 'gā 'ga upe.

²³ —A'jea futat nipo 'gā pē nereko tyweri anure. A'ere je miamū namuapygarūi pēē tejepeyri tepoaawamū. Jeruwarete 'ga etee te okwaap. Wemifutar imū etee 'gā amū mū'jāu 'gā muapygukaa je pyri— 'jau Jejui 'ga 'gā mu'jau ojepeyri wapyk ma'e 'gā nee.

²⁴ 'Gā je'ega renupawe ore amumeramū Jejui 'ga remimu'eramū aramara'neramū mukūja 'gā nee.

²⁵ A'eramū Jejui 'ga ore renūina ore majatykau ojee. A'eramū 'ga 'jau oree:

—Pekwaap judeue'ema 'gā 'wyriara 'gā nemiapoa. 'Gā 'wyriara 'gā wemiayuwa 'gā monou kwe pe mama'e apoukaa ojeupe: “Nan iki peapo jeje'egawer imū etee futat”, 'jau nipo 'wyriara oje'ega wemiayuwa 'gā nupe. Iapo esage'emamū nipo 'gā 'wyriara 'gā nereko tyweretei. A'etea nipo 'ga 'jau ojeupe: “Je 'ā kūima'eeteeteramū”, 'jau nipo 'ga 'ūina ojeupe— 'jau Jejui 'ga oree.

²⁶⁻²⁷ —A'ere pēē jeremiayuwamū na'gā 'jawe rūi pejemogy. 'Wyriaramū pejejekoweramū pēē mama'e apou pejejaupe, pejejopoa etee futat mama'e apou pejejaupe. Pejejaupe oporowyky ma'eramū etee futat pejemogy. A'eramū nipo je pē mogyau 'wyriaramū— 'jau 'ga oree.

²⁸ —Je 'ā pēneki'yratea agawewi. A'etea je 'ā ojet 'awa ywy pe mama'e apou pē nupe. Natejeupe mama'e apou pejejaupe, pejejopoa rūi je ruri. Pē nupe mama'e apoawamū te je ruri. Temanūmū te 'ā je ruri 'au pē nupe. Pē katu'okawamū te je ruri 'awa ywy pe. A'eramū taetu 'gā taje rerowiat 'jau kwy, a'e te je 'ā— 'jau 'ga oree.

*Mukūi eae'ema 'gā
(Maku 10.46-52; Luka 18.35-43)*

²⁹ Jerikoa 'jawa amunaw awi ore oramū mytuna 'gā 'ua ore rewiri.

³⁰ Mukūi eae'ema 'gā 'upa wapyka peyse pe. A'eramū 'gā kwaiwete 'gā je'ega renupa 'upa.

—Aw'yja te poromū ako?— 'jau 'gā ojepeyriwara 'gā nupe.

—Jejuī 'ga okwap akou— 'jau 'gā 'gā nupe.

Aipo ojeupe 'gā 'eramū 'gā wafukaita 'ga upe:

—Ku'jyp! Ene 'ā Davi 'ga juapyrera, Jarejuwarete 'ga remimurera! Ejemuaēm ore ree. Epājē mū ore katu'og ape!— 'jau 'gā wafukaita Jejui 'ga upe.

³¹ A'eramū mytuna 'gā 'jau 'gā nupe:

—Pepije pejejupa. Aereau toko re'ā— 'jau 'gā 'gā nupe.

A'ere 'gā jero'wuro'wui etee futat wafukaita 'ga upe:

—Ku'jyp! Ene te 'ā Davi 'ga juapyrera, Jarejuwarete 'ga remimurera. Ejemuaēm ore ree. Ore resag ape, aru'e ore enee— 'jau 'gā ojero'waro'wau etee wafukaita 'upa.

³² A'eramū Jejui 'ga opytau pe pe 'gā nee.

—Pe'je ajee pejejua— 'jau 'ga eae'ema 'gā nupe.

A'erauwe eae'ema 'ga 'ua 'ga je'ega repejāna. A'eramū Jejui 'ga 'jau 'gā nupe:

—Ma'ja te pefutat pejejeupe je iapoa?— 'jau 'ga 'gā nupe.

³³ —Taramā'ē 'jau nū, aru'e ore enee, ki Ku'jyp. Orereapaw ore ikue— 'jau 'gā Jejui 'ga upe.

³⁴ A'eramū Jejui 'ga ajemuaēma 'gā nee. A'eramū 'ga opo monou 'gā nea 'arimū.

—Amamā'ē je pēē nū— 'jau Jejui 'ga 'gā nupe.

Aipo 'ga 'erauwe 'gā amā'jāu nū. A'eramū futat 'gā awau Jejui 'ga rupi.

21

Kawaru'i 'arimū Jeju'i 'ga ataawet

(Maku 11.1-11; Luka 19.28-40; Juā 12.12-19)

¹ Jerusarega pyriu'i ore oropytau amuna'wi pe, Pefaje pe. Pefajea 'upa ywytyra pyri, Oriweira 'jawa pyri. A'eramū Jeju'i 'ga 'jau mukūjamū ore:

²—Pe'je pejewau pejekwapa je renune pejewau pejewaēma iruupeuwara amunawa upe. Pejesouwe nipo pēē kawaru'i mū resaka. Nuatai we nipo 'gā amū i'arimū. A'ea ki perut iamoiā jee—'jau Jeju'i 'ga ore.

³—“Ma'eramū te peko ee?” pejejeupe 'gā 'eramū ki “Janejara 'ga te e'i ore ko: Kawaru'ia perut jee ra'ne, e'i 'ga ore ko. A'ere nipo 'ga ko'iko'i ete imuri pē nupe nū”, pe'je ki 'gā nupe—'jau 'ga ore.

⁴ Ymā te 'ā Janeruwarete 'ga ka'arana kwasiarukari oje'ega mome'wara 'ga amū upe ee rakue:

⁵ “Pe'je Jerusareg ipewara 'gā nupe: ‘Owaēm futat pē'wyriararete 'ga ra'e.

Iputa'wa ma'e 'ga. Kawaru'i aranuamueuu 'arimū 'ga ruri akou', pe'je ki Jerusareg ipewara 'gā nupe”,

'jau Janeruwarete 'ga ikwasiarukaa Sakari 'ga upe rakue. A'eramū Jeju'i 'ga ore mū monou kawaru'i rerurukaa ojeupe.

⁶ A'eramū 'gā awau 'ga 'eawer imū etee erua 'ga upe.

⁷ A'eramū 'gā kawaru'i rerua ta'yra reewe 'ga upe. A'ere 'ga amū opiara mosoka imonou kawaru'i 'arimū Jeju'i 'ga apykawamū. A'ere 'gā kawaru'i pyyka Jeju'i 'ga upe 'ga apykawamū. A'eramū Jeju'i 'ga awau Jerusareg ipe kawaru'i 'arimū. 'Ga remimu'eramū ore arawau 'ga rupi.

⁸ Kwaiwete 'gā awau ujāna 'ga renune opiara mososoka, imonou pe rupi imogyau 'ga kwapawamū. 'Ga ree oporomutaawa resaukaawamū 'gā iapou. Pinowa nanē 'gā imonou pe rupi 'ga kwapawamū.

Ymā 'gā aipo apou 'wyriararete upe rakue, 'ga ree ipojejuka resaukaawamū rakue. A'eramū 'gā a'eramū iapou Jeju'i 'ga upe.

—'Ga nipo ako 'wyriaramū 'awamū janee—'jau 'gā ajaupe numiamū.

⁹ 'Ga renune oo ma'e 'gā wafukaita 'ga rewiri oo ma'e 'gā netee:

—Au'je katu te 'ā Janeruwarete 'ga resageayramū janee. Ene 'ā 'ga remimurera futat. Ene 'ā ore'wyriar ymanera juapyreramū, Davi 'ga juapyreramū. Janeruwarete 'ga ojejuka esage ene ree. A'eramū ene eku'iramū ekou. Janeruwarete 'ga 'ā esage ore. Ene 'ga 'ā ene mua ore—'jau 'gā wafukaita Jeju'i 'ga upe.

Arawau orowaēma Jerusareg ipe.

¹⁰ Jerusareg ipe Jeju'i 'ga reserauwe peuwara 'gā aku'iaiwamū 'ga ree. A'eramū 'gā 'jau ajaupe:

—Aw'jā te 'agamū?—'jau peuwara 'gā ajaupe.

¹¹ A'eramū Jeju'i 'ga rupi oo ma'e 'gā 'jau 'gā nupe:

—Agamū futat Jeju'i 'ga, Nasare pe waranup ma'efera 'ga, Garireja wyw pewarera 'ga. Jarejuwarete 'ga je'ega mome'wara 'ga futat—'jau 'gā 'gā nupe.

Wyra me'egara 'gā mū'ēawet

(Maku 11.15-19; Luka 19.45-48; Juā 2.13-22)

¹² Jerusareg ipe owaēmawe Jeju'i 'ga ojypa kawaru'i awi. A'eramū 'ga awayayayau osou Jarejuwarete 'ga mogyaaw ipe wemimu'eramū ore retee. Irāā'ā wyra me'egara 'gā jemogyramū. A'eramū Jeju'i 'ga amara'neramū 'gā nee:

—Pe'je pejewau peje'jāu 'aw awi. Nawyra me'egawa rūi te 'ā. Jeruwarete 'ga mogyaawa te 'ā 'oga. 'Au futat jane ruri jareporogytau 'ga upe. A'ere 'ā pēē nanarūi pereko. Pem'yi wyra me'egawamū etee. Pejejeymawa etee 'ā pēē erua ime'ega erupa 'ga mogyaawa 'oga pype—'jau 'ga 'gā nupe.

Wyra muara 'gā nanē 'ga imū'jāu jui nū. A'eramū 'ga ka'aranūū mojoy'ruara 'gā 'yjepana monou imuewiwya imojerepa 'gā nui. Aipo ka'aranūū mojoy'ruara 'gā kwe pewara 'gā ka'aranūū mojoy'rau ajaupe. A'eramū Jeju'i 'ga 'gā 'yjepana monou imuewiwya imojerepa 'gā nui. Ka'aranūū monou imomopomopoa 'gā nui. Pykau me'egara 'gā kanawaa nanē 'ga imojerepa nū.

¹³ A'eramū 'ga 'jau 'gā nupe:

—Ymā te 'ā Janeruwarete 'ga ka'arana kwasiarukari Isai 'ga upe rakue: “Agamū jemogytaawa 'oga futat. 'Au futat 'gā nuri oporogytau jee”, 'jau 'ga 'ā ikwasiarukaa 'ga upe rakue. A'ere 'ā pem'yi wyra me'egawamū etee. Pejejeymawa me'ega pejejaupe pejejeymawa repy rowoupia ekoete 'ā pejejupa 'au pejejaupe. Ma'eramū pēē 'ga mogyaawa 'oga m'jina pejemunarūawamū etee 'ū?—'jau 'ga 'gā nupe, 'gā mū'jāu jui.

¹⁴ 'Ga mogyaaw ipe Jeju 'ga rekoramū kwaiwete ojero 'wu ma'e 'gā 'ua owaēma 'ga upe. Eae'em, iteu ma'e. Mīmera 'gā 'ua owaēma Jeju 'ga upe. A'eramū 'ga 'gā katu'oka.

¹⁵ Jeju 'ga remiapofera resakawe kunumī 'gā amū wafukaita:

—Eneresage futat. Ene 'ā ore 'wyrīar ymanera juapyreramū, Davi 'ga juapyreramū— 'jau kunumī 'gā wafukaita Jeju 'ga upe.

Mainana 'gā nanē Jeju 'ga remiapofera resaka nū Moisesi 'ga remikwasiarer are moromu'jara 'gā netee. A'etee 'gā imara'ne Jeju 'ga ree aipo kunumī 'gā 'e renupawe.

¹⁶ A'eramū 'gā 'jau Jeju 'ga upe:

—Nereenuwī nipo kunumī 'gā 'ea ki sa? “Ene 'ā Janeruwarete 'ga remimurera” 'gā 'ea ki sa?— 'jau 'gā Jeju 'ga upe.

—Aenup futat je te'ama— 'jau 'ga 'gā nupe. —Pēnea'ar iki 'ga amū remikwasiarer are. Janeruwarete 'ga je'ega rerekwara ka'aran are 'ga amū ikwasiaa rakue: “Kunumī 'gā nupe Janeruwarete 'ga ene muorywukari, oy popewara 'gā neewe futat. 'Ene te 'ā eneresage' 'ea 'ga 'gā mu'eukaa”, 'jau 'ga ikwasiaa ka'aran are rakue. Pēnea'ar iki ee— 'jau Jeju 'ga 'gā nupe.

¹⁷ A'eramū 'ga awau 'gā nui nū. 'Ga remimu'eramū nanē ore arawau 'ga rupi nū. Petani 'jau ipe ore arawau orosea.

Y'wa ywa upe Jeju 'ga 'eawet

(Maku 11.12-14, 20-24)

¹⁸ Ai'iwe ore arawau orojewya Jerusareg ipe nū. Arawaw ipe Jeju 'ga opy'arayparamū akou.

¹⁹ A'eramū 'ga y'wa 'ywa repejāna. Peyse pe u'at ma'e repejāna i'a rekaa akā are, figu 'jawa rekaa akā are. A'ere nitywi i'a ee. Oowa etee esaka akā are. A'eramū 'ga 'jau 'ywa upe:

—Au'je katu katu ki e'a re 'awa y'wa 'ywa mū— 'jau 'ga y'wa 'ywa upe.

Aipo 'ga 'e pyrauwe wakā oypiwamū amanūmū osiniga.

²⁰ Esakawe ore 'ga remimu'eramū oroporesagamū ee.

—Kuu. Kamēšiete nipo imanū osiniga ki sa— 'jau ore arajaupe esakawe. —Ma'eramū sipo oypiwamū erujewi 'wei?— 'jau ore arajaupe.

²¹ A'eramū Jeju 'ga 'jau oree:

—Pēnea'ar iki je'eawer are. Je rerowiar ire nanē pejemiapoe'ema peapo je 'jawe nū. Y'wa nipo pēē imosinigukaa je 'jawe je rerowiar ywyapiramū— 'jau 'ga oree. —Ywytyra miamū futat nipo pēē imojepe'aukaa tenaw awi imonou 'yē'ē rpypter ipe im'ina. “Ekwap 'aw awi 'yē'ē rpypter ipe e'ina”, ojeupe pēē 'eramū nipo awau pē'eawer imū etee futat— 'jau Jeju 'ga oree.

²²—Je rerowiar ire Janeruwarete 'ga mama'e monou pē nupe, “Mama'ea emut amū oree”, ojeupe pēē 'eramū— 'jau Jeju 'ga oree, Jerusareg ipe arawaw ipe.

“Aw'ya rer imū te erejot?” Jeju 'ga upe 'gā 'eawet

(Maku 11.27-33; Luka 20.1-8)

²³ Jerusareg ipe orowaēma Jeju 'ga awau osou Jarejuwarete 'ga mogyaaw ipe ore retee. Peu wekwaw ipe Jeju 'ga ojeypyriwara 'gā mu'jau 'Uwarete 'ga ree. 'Gā mu'jau mainana 'wyrīara 'gā 'ua judeu 'gā 'wyrīa'ri 'gā netee oporonupa ee 'ga upe:

—Aw'ya rer imū te erejot rakue? Aw'ya pājē mū te mama'ea ereapo? Aw'ya te ene mut oree rakue?— 'jau 'gā 'ua oporonupa ee Jeju 'ga upe.

²⁴ A'eramū Jeju 'ga 'jau 'gā nupe:

—Pe'je ajee pēē na'ne imome'wau jee 'ū. Tejeupe pēē imome'u re je nanē tajemome'u pē nupe 'jau nū— 'jau etee 'ga 'gā nupe.

²⁵—Aw'ya je'eg imū ajee Juā Batista 'ga ruri ae pymiāu 'y pe rakue 'ū? Jarejuwarete 'ga je'eg imū te 'ga ruri rakue? Kūima'e 'ga amū je'eg imū te ra'u nū?— 'jau Jeju 'ga oporonupa ee 'gā nupe u'ama.

A'eramū 'gā 'jau ajaupe:

—Ma'ja sa'e te jane 'ga upe?— 'jau 'gā ajaupe etee futat. —“Jarejuwarete 'ga je'eg imū 'ga ruri”, ojeupe jane 'eramū te 'ga 'i janee nū a'i kūi, “A'etee neperowiari 'ga”, 'ga 'i janee nū a'i kūi— 'jau 'gā ajaupe.

²⁶—“Kūima'e 'ga je'eg imū 'ga ruri”, jane 'eramū te tekotee 'gā jane apisi etee ita pyu nū a'i kūi. “Juā 'ga Jarejuwarete 'ga je'ega mome'wara futat janee”, e'i 'gā jepi. A'eramū nipo 'gā aipo jane 'eramū amara'neramū jane ree ne nū'ū— 'jau 'gā ajaupe.

²⁷ A'eramū 'gā 'jau Jeju 'ga upe:

—NorokwaaWi ore Juā 'ga muarera 'ga nū'ū— 'jau 'gā o'meramū 'ga upe.

A'eramū Jeju 'ga nanē 'jau 'gā nupe nū:

—A'eramū je nanē temuarera 'ga mome'wawe'em pē nupe nū— 'jau Jeju 'ga 'gā nupe.

Mukūja 'ga ra'yra 'gā

²⁸ A'eramū Jejuī 'ga 'jau 'gā nupe nū:

—Morogyta je amome'u amū pē nupe. Maran te pēnea'at pejejemogyau ee? Kūima'e 'ga amū mukūi 'ga ra'yra. A'eramū 'ga 'jau tuwī ma'e 'ga upe: “Ekwap eporowykyau ko pe jee 'awamū, kisit”, 'jau 'ga 'ga upe.

²⁹ A'ere nipo 'ga 'i 'uwa 'ga upe: “Naani. Nooi je. Najeporowykyweri je enee ko pe 'awamū”, 'jau 'ga 'uwa 'ga upe. A'ere nipo anure 'ga 'arasigamū 'uwa 'ga upe u'eawer are. A'eramū nipo 'ga awau anure oporowykyau 'ga ko pe akou.

³⁰ Ajepeja wa'yra 'ga upe nanē nipo 'ga 'jau nū: “Ekwap eporowykyau jeko pe, kisit”, 'jau nipo 'ga wa'yra 'ga upe. A'eramū 'ga ra'yra 'ga 'jau 'ga upe: “Nai'i. Too teporowykyau enee 'jau”, 'jau nipo 'ga 'uwa 'ga upe. A'ere 'ga nooi futari— 'jau Jejuī 'ga imome'wau 'gā nupe.

³¹ —Maranuara te 'ga ra'yra 'ga wapo mama'ea 'uwa 'ga remifutar imū?— 'jau Jejuī 'ga 'gā nupe.

A'eramū 'gā 'jau 'ga upe:

—Tuwī ma'e 'ga.

A'eramū Jejuī 'ga 'jau 'gā nupe:

—A'jea futat ere poromū. A'eramū je 'jau pē nupe: Nia'wyri agawewi 'wyriararete 'ga upe ka'aranūū pyykara 'gā, kūjāmene'ema 'gā netee. Nuerowiari futari 'gā Jarejuwarete 'ga rakue. A'etea 'gā jēmī je rerowiat ajemogyau 'awamū. Tejerowiarāmū je 'gā tywera moia 'gā nui. A'eramū nipo 'gā awau ywag ipe ajemogyau Jarejuwarete 'ga pyri. A'ere 'ā pēē naani. “Jarejuwarete 'ga ore aruerowiat arajemogyau”, 'jau futat te 'ā pēē pejejemogyau numiamū. A'ere 'ā naje rerowiari pejepe pejejemogyau. A'eramū nipo pēē pejewawe'em ywag ipe.

³² Juā Batista 'ga 'ā pē mu'jau agawewi Jarejuwarete 'ga remifutar are rakue. “Pe'je pejepoia pejetywer awi. Au'je ki mama'e tywera apo re. Mama'e esagea etee futar iki peapo Jarejuwarete 'ga remifutar imū”, 'jau 'ga 'ā pē nupe rakue. “A'eramū 'ga pē mogyau wemiayuwamū”, 'jau 'ga 'ā pē nupe rakue numiamū. A'ere 'ā neperowiari 'ga 'eawera rai'i. Ia'wyre'ema 'gā etee 'ā 'ga rerowiaa rai'i, opoia otywer awi rai'i. A'eramū 'ā Janeruwarete 'ga 'gā mogyau wemiayuwamū. A'ere 'ā neperowiari 'ga. Ia'wyre'ema 'gā otywer awi 'gā poira resag ire miamū 'ā pēē 'ga rerowiare'ema pejejemogyau rai'i— 'jau Jejuī 'ga 'gā nupe.

Ko raaran a'wyre'ema 'gā

(Maku 12.1-12; Luka 20.9-18)

³³ A'eramū Jejuī 'ga 'jau 'gā nupe nū:

—Peapyaka jeje'eg are. Mama'e mū je amome'u pē nupe, pē mu'jawamū ee pē mueapyoawamū— 'jau 'ga 'gā nupe. —Kūima'e 'ga amū y'wa 'ywa rakā otyem oko pe, uwa 'jawa 'ywa rakā otyem oko pe. Kwaiwete 'ga uwa rakā tyma. A'ea tee futat 'ga ityma ipype. A'eramū 'ga oko osōū. A'ere 'ga y'wa apikawa apou. Y'wa tyarūnamū 'gā iapikau y'wayramū. A'eramū futat 'ga y'wa apikawa apou. A'ere 'ga 'og ywate apou iaarana 'ga upe. A'eramū 'ga 'gā amū monou oko raaranamū im'ina ojeupe. “Y'waa mū jema'ea futat. Emyreramū te aje pēma'e futat pēporowykawera repya futat”, 'jau ijara 'ga 'gā nupe. A'ere 'ga awau watau 'gā nui. A'eramū 'ga namutamutat awau akou muku 'gā nui.

³⁴ Y'wa tyarama upe iwaēmauwe ijara 'ga wemiayuwa 'gā amū monou oma'ea uwa 'a piaramū.

³⁵ A'ere ko raarana 'gā 'gā pyygi etee 'gā nerekou tyweaete. 'Ga amū 'gā inupānupāu etee. 'Ga amū 'gā ijukau etee. 'Ga amū 'gā ijukau ita pyu.

³⁶ A'eramū ko jara 'ga wemiayuwa 'gā monou kwaiwete. A'ere ko raarana 'gā nānēwējēmī 'gā nerekoī nū 'gā pyygi etee 'gā apisau.

³⁷ A'eramū ko jara 'ga 'jau ojeupe: “Teja'yra 'ga pa je omono kwy. 'Ga nipo 'gā opojeup re'ā. Jera'yra 'ga ree nipo 'gā pojyramū re'ā”, 'jau nipo 'ga ojeupe— 'jau Jejuī 'ga imome'wau 'gā nupe.

³⁸ —A'eramū 'gā 'ga ra'yra 'ga resakawe 'jau ajaupe: “Wa'yra 'ga 'ga amut y'wa piaramū ra'e. 'Ga futat 'uwa 'ga py'rau ko jaramū 'uwa 'ga manū re. A'eramū jane 'ga jukau jui. A'eramū janema'ea futat koa 'ga ruwa 'ga manū re kūi”, 'jau nipo 'gā ajaupe.

³⁹ A'eramū 'gā 'ga pyyka 'ga rerawau enuēma ko awi 'ga jukau— 'jau Jejuī 'ga imome'wau 'gā nupe.

⁴⁰ A'eramū Jejuī 'ga oporonupa ee mainana 'wyriara 'gā nupe:

—Maran sipo ko jara 'ga wa'yra jukaarera 'gā nerekoī?— 'jau 'ga 'gā nupe.

⁴¹ A'eramū 'gā 'jau 'ga upe:

—'Ga futat oo ko raarana 'gā apisau nū'ū. A'ere nipo 'ga 'gā amū monou 'gā py'rau oko raaranamū nū. Aipo 'gā te nipo y'wa mono ijara 'ga upe y'wa tyarama rupi— 'jau 'gā 'ga upe.

⁴² A'eramū Jeju'i 'ga 'jau 'gā nupe nū:

—A'jea futat pe'je poromū. Pēnea'ar iki 'ga amū remikwasiarar are. Ymā te 'ā Janeruwarete 'ga oje'ega kwasiarukari 'ga amū upe rakue:

“Mīa ita nia'wyrui ra'e, 'jau nipo itaoga apoara 'gā ajaupe, ita monou imomoa ajau.

A'ere nipo 'ga amū aipoa ita eroyrūmyrera ita pyygi etee imonou imyina tenawera pype 'oga ppywotyapawamū.

Janeruwarete 'ga imyūjkaa 'gā nupe rakue.

A'eramū 'ga remiapofera wesageayramū futat oree”,

'jau 'ga ikwasiarukaa ka'aran are inuga rakue— 'jau Jeju'i 'ga 'gā nupe.

⁴³ —A'jea futat je 'i. Ymā te 'ā Janeruwarete 'ga Israeu juapyreramū pē mū'ēi wemi-ayuwamū rakue. A'ere 'ā nepeenuwi futari 'ga. Nepefutari 'ga peje'wyrirareteramū. A'eramū nipo 'ga wenupara 'gā mogyau wemiayuwamū pē py'rau— 'jau Jeju'i 'ga 'gā nupe.

⁴⁴ —'Ga amū nipo u'aa ita 'arimū. A'e 'ga open futat. A'ere 'ga amū 'arimū ita 'ar ire a'e 'ga ku'jo'jogi futari. Nan tee futat Janeruwarete 'ga oje'ega renupare'emamū pē nereko tyweretei— 'jau Jeju'i 'ga 'gā nupe.

⁴⁵ 'Ga je'ega renupawe mainana 'wyrira 'gā fariseu 'gā netee 'jau ajaupe:

—Mama'e mū mome'uramū 'ga 'i janee poromū— 'jau 'gā ajaupe.

A'eramū 'gā amara'neramū akou 'ga ree.

⁴⁶ A'eramū 'gā oporopygiweramū 'ga ree. A'ere 'gā kyjei mytuna 'gā nui.

—“Jeju'i 'ga te 'ā Jarejuwarete 'ga je'ega mome'wararetea ra'e”, 'jau 'gā ajemogyau ajaupe.

A'ere nipo 'gā jane apisi etee Jeju'i 'ga jane ipyygamū— 'jau 'gā ajaupe, okyiau Jeju'i 'ga rerowiaara 'gā nui.

22

Maraka pe imo'wy'wyrirera 'gā

(Luka 14.15-24)

¹ Mama'e mū Jeju'i 'ga imome'wau 'gā nupe 'gā mu'jau nū:

² —Morogyta mū je amome'u pē nupe pē mu'jawamū Tejuwarete 'ga rerowiaara 'gā nee. Janeruwarete 'ga 'ā 'wyrirarete 'ga 'jawe janee— 'jau 'ga 'gā nupe. —Sā'ā 'wyrirarete 'ga maraka apoa wa'yra 'ga remirekoramū. Kwaiwete 'ga 'ā kumi apoukaa wemiayuwa 'gā nupe.

³ Erojyw ire 'ga 'jau wemiayuwa 'gā amū nupe: “Pe'je pejewau 'gā nupe kwe pe, jeremimo'wy'wyrera 'gā nerua jee”, 'jau 'ga 'gā nupe 'gā monou kwe pe. A'ere 'wyrira 'ga remimo'wy'wyrera 'gā nioweri maraka pe.

⁴ A'eramū nipo 'wyrira 'ga amumera 'gā wemiayuwa 'gā monou wemimo'wy'wyrera 'gā nupe. “Pe'je jeje'ega rerawau 'gā nupe. ‘Pe'je pejeju pejejemi'waa ore pyri, e'i 'ga pē nupe ko. Kwataua je aapisiuk at'i. A'eramū je eyrukāa 'gā nupe. A'eramū pēē pejeju pejejemi'waa ore pyri, e'i 'ga pē nupe ko', pe'je ki 'gā nupe”, 'jau 'ga wemiayuwa 'gā nupe oje'ega rerawaukaa— 'jau Jeju'i 'ga imome'wau 'gā nupe.

⁵ —A'eramū 'ga remiayuwa 'gā awau 'ga remimo'wy'wyrera 'gā nupe. A'ere 'gā ojeupe aipo 'gā 'eramū 'gā 'i etee 'gā nupe: “Naani. Najeoweri je”, 'jau etee 'gā 'gā nupe. A'eramū 'gā awau etee oporowykyau 'gā nui.

⁶ Amumera 'gā 'wyrira 'ga remiayuwa 'gā ppyka inupānupāu 'gā apisau.

⁷ A'eramū 'wyrira 'ga amara'neramū akou 'gā nee. A'eramū 'ga 'gā amū monou wemiayuwa 'gā apisara 'gā apisau. 'Gā apisi re 'gā 'gā 'wyrira rapyau.

⁸ A'eramū 'wyrira 'ga wemiayuwa 'gā amū nenūina nū. “Mama'ea ako je aapo maraka are ko numiamū. A'ere 'ā jeremimo'wy'wyrera 'gā nia'wyr futari.

⁹ A'eramū pēē pejewau 'gā 'wyrarete rukawō'ō rupi ajemogy ma'e 'gā mo'wy'wya jemaraka are”, 'jau 'ga wemiayuwa 'gā nupe— 'jau Jeju'i 'ga 'gā nupe imome'wau.

¹⁰ —A'eramū 'ga remiayuwa 'gā awau amunawarete rukawō'ō rupi ajemogy ma'e 'gā majatykau erawau werekwara 'ga maraka pe. Esage ma'e 'gā 'gā erawau ia'wyr'ema 'gā netee. 'Gā waēmauwe 'wyrira 'ga remiayuwa 'ga amū taity esage monou imunewukaa 'gā nupe. A'eramū 'gā awau ojejaga 'wyrira 'ga roga matyneema.

¹¹ Poje 'wyrira 'ga 'ua ajatyka ma'e 'gā nesaka. A'eramū 'ga taity esage rerekware'ema 'ga resaka.

¹² A'eramū 'ga 'jau 'ga upe: “Ma'eramū te neremunewi taity esagea?” 'jau 'ga 'ga upe.

—Taity esage rerekware'ema 'ga noje'egi 'ga upe.

¹³ —A'eramū 'wyrira 'ga 'jau wemiayuwa 'gā nupe: “Pepyyk 'ga, 'ga po faa 'ga py faa 'jau. A'ere pēē 'ga monou imomoa ukupepe. Ypytunaiwa pype pēē 'ga momoa. Peu ajemogyaw ipe nipo 'ga waemamū akou wa'jywa mokāina akuwa rerekou”, 'jau 'ga 'gā nupe— 'jau Jeju'i 'ga 'gā nupe imome'wau.

14—Aipoa morogyta je amome'u pē nupe, pē mu'jau Jarejuwarete 'ga remiayuwarete 'gā nee. Mytuna 'gā nupe Jarejuwarete 'ga 'i: “Tejerowiar ire je pē mogyi tejemiayuwamū”, 'jau 'ga mytuna 'gā nupe. A'ere ināinānī'ī etee 'gā 'ga rerowiarī. A'eramū 'ga ināinānī'ī etee 'gā mogyau wemiayuwamū— 'jau 'ga 'gā nupe.

Jeju 'ga upe fariseu 'gā 'eawet
(Maku 12.13-17; Luka 20.20-26)

15 A'eramū fariseu 'gā amū awau 'ga wi.
—Siesak Jeju 'ga ra'ne 'jau— 'jau 'gā ajaupe. —Tesarūgatu 'ga rekoramū sipyyk 'ga 'jau. 'Gā amū simono imoporogytaukaa 'ga upe ra'ne 'jau. Morogyta 'gā nupe imowuwuramū sipyyk 'ga 'jau— 'jau 'gā ajaupe.

16 A'eramū 'gā wemimu'e 'gā amū monou Jeju 'ga upe imoporogytaukaa. Erote 'ga remiayuwā 'gā amū netee Jeju 'ga upe 'gā monou imoporonuwukaa ee:

—A'jea futat 'ā ereporogyta a'jeteetewi— 'jau 'gā 'ga upe. —Nereporogyta ekoetei futari te 'ā. A'jea futat 'ā erejejuka pāwē pāwē ae ree. A'jea futat te 'ā ore mu'e ape mama'e are. Eneje'eg are 'gā amū oporenuwiwere'emamū agawewi. A'ere 'ā mama'e a'jea etee eremome'u— 'jau 'gā oporonupa 'me Jeju 'ga upe.

17—A'eramū ene 'awamū 'jau oree: Jane 'ā judeua. Simono te jane ka'aranūūa 'wyri-ararete 'ga upe, Sesa 'ga upe? Naani te ra'u nū?— 'jau 'gā 'ga upe. —Najudeu arūi te 'ā 'wyriararete 'ga. Tapy'yi amuteea te 'ā 'ga. Romanūa te 'ā 'ga. A'etea te jane simepy 'ga?— 'jau 'gā Jeju 'ga upe.

18 A'ere Jeju 'ga 'gā kwaawi ojee. “Jeje'ega renupa 'gā nuri numiamū. 'Siesak 'ga mama'e mū mome'ua sigaty jarejee 'jau' e'i 'gā jee numiamū”, 'jau 'ga ojeupe. A'eramū 'ga 'jau 'gā nupe:

—Nepeporonuwī tee pejeju ee jee. “Simowuwut ekoete jarejaupe 'ga 'eawera jarejaupe 'jau”, pe'je te jee— 'jau 'ga 'gā nupe.

19—Ka'aranūū ywope'ia pemut amū jee ra'ne, Sesa 'ga mepyawa mū jee ra'ne— 'jau 'ga 'gā nupe.

A'eramū 'gā amū imonou 'ga upe.

—Kweramū ajee 'wei— 'jau 'ga imonou 'ga po pe.

20 A'eramū Jeju 'ga ka'aranūū ywope'i resaukaa 'gā nupe:

—Awŷja ra'agawa te 'up ee? Awŷja rera ajee 'awamū 'up ee nū'ū?— 'jau 'ga esaukaa 'gā nupe.

21—'Wyriararete 'ga ma'ea futat— 'jau 'gā 'ga upe.

A'eramū Jeju 'ga 'jau 'gā nupe:

—'Ga ra'agawa rerekwara 'ga ma'ea futat. A'eramū pēē imonou 'ga upe etee futat. A'ere Jarejuwarete 'ga mama'ea pemono 'ga upe etee futat— 'jau 'ga 'gā nupe.

22 A'e renupawe 'ga upe ee oporonup ma'efera 'gā oporesagamū etee 'ga ree:

—Kuu. I'akwaap 'ga ra'e nū'ū— 'jau 'gā ajaupe.

A'eramū 'gā awau 'ga wi.

Oferap ma'e are 'gā mu'eawet
(Maku 12.18-27; Luka 20.27-40)

23 Ko'iko'i satuseu 'gā amū 'ua oporogytau Jeju 'ga upe ee nū. Aipo 'gā e'i ajaupe: “Amanū re ae noferawu'jawi nū. Amanūnū ae teepawamū ywawuje futat”, 'jau agawewi satuseu 'gā ajaupe jepi. A'etea 'gā 'ut oporonupa ee Jeju 'ga upe.

24 A'eramū 'gā 'jau 'ga upe:

—“Moromu'jara 'ga”, e'i 'gā enee jepi. A'eramū ene ore mueapyou katu mama'e are. Ymā te 'ā Moisesi 'ga ka'arana kwasiari inuga janee rakue. “Kūima'e 'ga amū nipo amanū wa'yre'emaue. A'eramū nipo 'ga manū re 'ga rewirera 'ga 'ga remirekofera ēē rerekou. A'eramū nipo 'ga aja'yrapyau ēē pype. A'eramū nipo 'ga ra'y'r ppy 'ga amanū ma'efera 'ga ra'y'rera 'jawe futat”, 'jau 'ā Moisesi 'ga ikwasiaa inuga rakue— 'jau 'gā Jeju 'ga upe.

A'eramū Jeju 'ga 'jau 'gā nupe:

—A'jea futat— 'jau 'ga 'gā nupe.

25 A'eramū 'gā 'jau 'ga upe nū:

—A'ere nipo kūima'e 'ga amū 'ga ra'yra sete. A'eramū nipo u'at ppy ma'efera 'ga kūjā mū rerekou. A'ere nipo 'ga wa'yre'emaue 'ga manūi jui. A'eramū wemireko ēē rejaa wewirerera 'gā nupe.

26 A'eramū nipo imanū re a'e rewirerera 'gā amū ēē rerekou ipy'rau nū. A'ere a'ea nanē imanū nū wa'yre'emaue nū, ēē rejaa wewirerera 'gā nupe nū. A'eramū nipo 'gā ojopy'rapy'rau etee ēē ree, ajamanūnamū. A'ere 'gā nata'yri'i futari ēē pype.

27 Ojee 'gā jomoypaw ire nipo ēē nanē amanūmū nū.

²⁸ A'eramũ nipo 'ga ae moferapawa 'ara rupi manamũ sipo eẽ menaretea?— 'jau 'gã Jejuu 'ga upe. —'Gã juejue futat eẽ wereko kũ— 'jau 'gã Jejuu 'ga upe.

²⁹ A'eramũ Jejuu 'ga aipo ojeupe 'gã 'eramũ 'jau 'gã nupe:
—Pẽ'me awi. Nanarũi. Nepẽneapyo Jarejuwarete 'ga je'ega rerekwara ka'aran are ra'e. 'Ga pãjẽa nanẽ 'ã pẽẽ ikwaaape'ema ra'e nũ— 'jau Jejuu 'ga 'gã nupe.

³⁰ —'Au etee te 'gã nemirekoramũ kũi. A'ere 'gã oferaw ire naemirekou'jawi kũi. Ywagipewara 'gã 'jawe etee futat 'gã jemogyi. Niporekoweru'jawi 'gã kũjã are. Kũjãmera 'gã nanẽ omenariwere'emamũ futat nũ kũi, kũima'e 'gã 'jawe etee futat nũ kũi— 'jau Jejuu 'ga 'gã nupe.

³¹⁻³² —Nepẽneapyo nipo Jarejuwarete 'ga 'eawer are. Ymã te 'ã 'ga 'i rakue: “Je te 'ã 'gã Nuwaretea ako. Abraão 'ga, Isaki 'ga, Jako 'ga. Mĩmera 'gã Nuwaretea je ako”, 'jau 'ga 'ã ikwasiarukaa rakue. 'Gã manũ re 'ga poromũ 'jau rakue. A'ere 'gã 'aga namanũi futari, atepawe'emamũ futat 'gã 'aga. A'eramũ Janeruwarete 'ga poromũ 'jau Moisesi 'ga upe. 'Gã 'aga tywe'em ire amunipo 'ã 'ga aipo ne'ia'uweri Moisesi 'ga upe. Ako ma'e 'gã nupe etee te 'ga aeruwamũ— 'jau Jejuu 'ga 'gã nupe 'u'ama.

³³ Aipo 'ga 'e renupawe mytuna 'gã oporesagamũ etee 'ga ree.
—Kuu. Nomoryteea'uweri futari ae 'ga ra'e nũ'ũ— 'jau 'gã ajaupe.

Janeruwarete 'ga 'eaweraretea
(Maku 12.28-34; Luka 10.25-28)

³⁴ Aipo ojeupe 'ga 'eramũ satuseu 'gã ajemogyau etee futat. Nopronuwu'jawi futari 'gã ee 'ga upe nũ. A'eramũ fariseu 'gã amũ 'jau ajaupe: “Satuseu 'gã nopronuwu'jawi futari ee 'ga upe nũ”, 'jau 'gã ajaupe. A'eramũ 'ga amũ awau oporonupa aipo 'ga 'eawer are Jejuu 'ga upe.

³⁵ Moisesi 'ga je'eger are moromu'jara 'gã poromũ awau oporonupa Jejuu 'ga 'eawer are 'ga upe: “Je pa 'ga omorytee kwy”, 'jau 'ga ojeupe numiamũ.

³⁶ A'eramũ 'ga poromũ awau oporonupa 'ga 'eawer are 'ga upe:
—Ene te 'ã ore mu'e ape Jarejuwarete 'ga ree. A'ere 'ã kwaiwete Janeruwarete 'ga u'eawera kwasiarukari Moisesi 'ga upe rakue. Maranuara te ajee 'ga 'eaweraretea?— 'jau 'ga Jejuu 'ga upe.

“Tomojenosĩ Jejuu 'ga 'jau kwy”, 'jau 'ga ojeupe numiamũ.
A'ere Jejuu 'ga ikwaaawi futari ojee. “Tamu'akwawukar eme 'ga, e'i 'ga jee numiamũ”, 'jau Jejuu 'ga ojeupe. A'eramũ Jejuu 'ga 'jau 'ga upe:

³⁷ —“Je te 'ã Pẽjararetea. Pẽporomutat je ree pejepytuna 'gã apyraapa”, e'i 'ã Janeruwarete 'ga pẽ nupe rakue. “Mama'ea peapo jee, jeremifutar imũ. Pejejea'aramũ pejejemogyau je ree 'gã nee pejejea'ara apyraapa. Aipo aporamũ nipo pejeporomutamũ je ree”, e'i futat Janeruwarete 'ga pẽ nupe— 'jau Jejuu 'ga 'ga upe.

³⁸ —Aipoa te 'ga 'eaweraretea— 'jau Jejuu 'ga 'ga upe.
³⁹ —Ajepeja 'ga 'eaweraretea nanẽ nũ. “Pẽporomutat pejejepyriwara 'gã nee pejee pejeporomutara 'jawe”, e'i 'ga 'ã ikwasiarukaa Moisesi 'ga upe rakue— 'jau Jejuu 'ga 'ga upe.

⁴⁰ —Aipoa 'ga remikwasiarera renupara 'gã wenup katu katu 'ga remikwasiarera ajemogyau. Ajepeja 'ga remikwasiarera moromu'jau ajuee aejejuka esage are etee futat. Janeruwarete 'ga je'ega mome'wara 'gã nanẽ oporomu'jau aipo are nũ— 'jau Jejuu 'ga 'ga upe.

Janeruwarete 'ga remimurera 'ga Davi 'ga juapyrete
(Maku 12.35-37; Luka 20.41-44)

⁴¹ Ojee fariseu 'gã jatykaramũ Jejuu 'ga oporonupa ee 'gã nupe:
⁴² —Maran te pẽneapyo Jarejuwarete 'ga remimurera 'ga ree? Awjya juapyrera te 'ga?— 'jau 'ga 'gã nupe.

—Davi 'ga juapyrera 'ga— 'jau 'gã 'ga upe.
A'eramũ Jejuu 'ga 'jau 'gã nupe:
⁴³ —Ma'eramũ sipo ajee Janeruwarete 'ga 'Agesagea Davi 'ga mu'eukari “Jejara 'ga” 'ga mu'eukari ajuapyrera 'ga upe?

⁴⁴ Ymã te 'ã Davi 'ga ka'arana kwasiari 'ga ree rakue:
“Jeruwarete 'ga 'jau Jejarete 'ga upe rakue:
'Eapyk 'au je pyri. Je 'jawe futat ene.
Enepãjẽreteja je 'jawe. A'eramũ ene eapyka je yse katy.
Anure nipo je ene mogoi 'wyriaramũ 'gã nupe najuejue etee futat.
Ene ree iporomutare'ema 'gã 'arimũ je ene magwawukari.
A'eramũ ene je iapoe'emauwe eapyka 'au je yse katy', 'jau 'ga Janejararete 'ga upe”, 'jau Davi 'ga ikwasiaa rakue— 'jau Jejuu 'ga 'gã nupe.

45—Janeruwarete 'ga remimurera 'ga ree 'ga ka'arana kwasiari rakue. Ma'eramū sipo ajee 'ga 'i, "Jejararete 'ga", 'jau ajuapyrera 'ga upe nū— 'jau Jeju 'ga 'gā nupe.

46 Aipo 'ga 'e renupawe 'gā ajemogmogyou etee futat. Ojenosōu 'gā 'ga wi. A'eramū 'gā oporonuwu'jape'ema ee 'ga upe.

23

Moisesi 'ga remikwasiarer are moromu'jat

(Maku 12.38-40; Luka 11.39-52; 20.45-47)

1 A'eramū Jeju 'ga oje'ega wemimu'eramū oree, mytuna 'gā nupe we futat:

2 —Moisesi 'ga remikwasiarer are moromu'jara 'gā weapyoramū Moisesi 'ga remikwasiarer are fariseu 'gā netee.

3 A'eramū ki pēē 'gā je'ega renupa etee futat 'gā pejemu'eramū. A'eramū ki pēē mama'e apou 'gā pejemu'eawer imū etee futat. A'ere kasi pejemu'e 'gā nemiapo are ne. Nuapoi futari 'gā pē mu'eawer imū mama'ea. A'eramū pēē pejemu'jawe'em 'gā nemiapo are.

4 "Nan iki peapo", 'jau nipo 'gā pē nupe numiamū. A'ere nipo 'gā nepē poari mama'e apo are u'eawer imū.

5 Tekotee 'gā nupe ojesaukaawamū te 'gā mama'e apoi. "Je te 'ā a'jea futat kūima'eeteetea", 'jau nipo 'gā ajaupe. A'eramū nipo 'gā mama'e apou ekoete ajemogyou ojesaukaawamū 'gā nupe. "Tiporesagete 'gā je ree 'jau", 'jau nipo 'gā ajemogyou. Jane 'ā kūima'eferamū juejue Jarejuwarete 'ga je'ega kwasiaa ka'ara'nī pe ree. A'eramū jane imonou yrū'ī'i pype ifaa jareakag are. A'eramū jane jarejeapykag are erekou, jarejywaypy are nanē erekou nū. A'ere 'ā fariseu 'gā imonoi yrūūū pype. Aipo 'gā erekou ifaa im'ina weapykag are, ojywa are 'jau. "Tiporesak 'gā ore ree 'jau kwy", 'jau 'gā 'ā ajemogyou. "Gā te a'jea futat Jarejuwarete 'ga ree iporomutarete ma'ea ra'e, te 'i 'gā janee jane resaka 'jau", 'jau 'gā akou ojeupe. Jane 'ā kūima'eramū juejue taity pēū'ī sireko jarejasi'y'warimū. A'e pyu jane 'ā jareakaga au'jau Jarejuwarete 'ga upe jareporogytauwe. A'ere 'ā fariseu 'gā imopypireme'ytyra fukui oma'ea. "Tiporesagete 'gā jane ree 'jau", 'jau 'gā 'ā ajaupe. A'eramū 'gā taity pypireme'ytyra fuku rerekou— 'jau Jeju 'ga oree.

6—Maraka apoaw ipe ojemi'waaup ipe nanē 'gā na'ne wējēmī awau wapyka. Kūima'eeteete 'gā apykaw ipe etee 'gā wapygiweramū. Jarejatykaaw ipe nanē 'gā kūima'eeteete 'gā apykaw ipe etee wapygiweramū nū.

7 Amunawa pyterimū awaw ipe nanē 'gā kūima'eeteete 'gā 'jawe wapeje'ega 'gā ifutaa. "Moromu'jara 'ga" ojeupe 'ga amū 'eramū 'gā aku'iramū ajemogyou— 'jau Jeju 'ga oree.

8—A'ere kasi pejemogy 'gā 'jawe ne. "Ga 'ā ore mu'jara", 'gā mu'eukare'ema pejejeupe. Majepi tee tup ma'e 'jawe futat pēē pejeju'jaju'jawe etee pejemogy. Majepi tee futat je pē mu'jaramū— 'jau 'ga oree.

9—Kiapi'ni pe'je nanē kasi pejejuwe'ema 'ga amū upe ne. Majepi tee Pēnuwaretea. Ywag ipe ako ma'eramū etee futat Pēnuwaretea.

10 "Ga nanē 'ā ore'wyrara", 'gā amū mu'eukare'ema nanē pejejeupe nū. Janeruwarete 'ga remimureramū etee te je pē'wyraramū je rekoi— 'jau Jeju 'ga oree.

11—A'jea futat je 'i. Pejejaupe mama'e apoaramū pēē eteete ma'ea Jarejuwarete 'ga upe.

12 "Je te 'ā kūima'eeteetea" 'jara Janeruwarete 'ga imogyou tywet. A'ere 'ga "Je nakūima'eeteete arūi" 'jara 'gā etee 'ga mogyou kūima'eeteeteramū 'gā nupe— 'jau Jeju 'ga oree.

13-14 A'eramū Jeju 'ga 'jau fariseu 'ga nupe nū, Moisesi 'ga remikwasiarer are moromu'jara 'gā nupe we futat:

—Pēporiay'i pejemogyou numiamū. Esage ma'e 'jawe futat nipo pēē numiamū. A'ere nipo anure Janeruwarete 'ga pē nerekou tyweri futari. Nepefutari te 'ā Jarejuwarete 'ga remiayuwamū pejejemogya. A'eramū nipo pēē 'ga remiayuwamū 'gā jemogy futare'ema nanē nū. A'eramū nipo anure Janeruwarete 'ga pē nerekou tyweaete— 'jau 'ga 'gā nupe.

15 —Pēporiay'i pejemogyou numiamū— 'jau Jeju 'ga Moisesi 'ga remikwasiarer are moromu'jara 'gā nupe, fariseu 'gā nupe nanē 'ga 'jau nū. —Kwe pe 'ā peo amunawa moy moyka kwe pewara 'gā amū mu'jau pejejee etee. Pejejemiapo are te 'ā pemu'e 'gā. A'eramū nipo pēē 'gā mu'jau pejejemiapo are te. "Pe'je pejemū'jau je ree", 'jau nipo pēē 'gā nupe numiamū. A'ere nipo anure Janeruwarete 'ga wowase pē majatykaaw ipe nipo 'ga 'i pē nupe: "Je rerowiat 'me etee pejeje. A'eramū pēē pejea'wre'emamū jee", 'jau nipo 'ga pē nupe, pē monou mama'eukwaawa rapyaw ipe. A'eramū nipo 'ga pē nee ojemu'e ma'efera 'gā nupe 'jau: "Je rerowiat 'me are etee pejemū'e. A'eramū pēē pejea'wre'emamū jee. A'eramū je mama'eukwaawa rapyaw ipe pē momopoa", 'jau nipo 'ga pē nee ojemu'e ma'e 'gā nupe, 'gā monou mama'eukwaawa rapyaw ipe— 'jau 'ga 'gā nupe.

16 —Pēporiay'i futat pejemogyau numiamū. A'ere pēē Jarejuwarete 'ga ree moromu'jat tyweramū pejemogy. Nepēneapyoī agawewi 'ga je'eg are. A'etea nipo pēē 'gā mu'jau 'me ee— 'jau 'ga 'gā nupe. —“Jarejuwarete 'ga mogytaawa renamū je mama'e apoi enee 'e ekoete re nepeapoi futari mama'ea ee pejeparuapowere'emamū”, 'jau pēē 'gā nupe. “A'ere ki Jarejuwarete 'ga mogytaawa pypiara ouru apopyrera renamū je mama'e apoi enee peje'e re mama'ea peapo futat peje'eawer imū. Kasi a'e pe pejemotywet Jarejuwarete 'ga upe ne, mama'e apoe'em ire ne”, 'jau 'ā pēē pejemogyau pejejaupe— 'jau Jejuī 'ga 'gā nupe.

17 —A'eramū taetu nipo peje'akwaawe'emetyg etee te. Maranuara sipo esage ma'eramū Janeruwarete 'ga upe? 'Ga mogytaawa tee esage ma'eramū 'ga upe. Ouru apopyrera 'ūi 'ga mogytaawa pype. A'eramū wesageramū 'ga upe. Omogytaawa pype tene'em ire amunipo 'ā 'ga naea'ari ee— 'jau 'ga 'gā nupe.

18 —“Jarejuwarete 'ga upe wyra rapyawa ruwamū je mama'e apoi enee 'e ekoete re nepeapoi futari mama'ea peje'eawer imū ee pejeparuapowere'emamū”, 'jau pēē pejejemogyau. “A'ere ki Janeruwarete 'ga upe Jeremimonofera 'up wyra rapyawa 'arimū 'e re mama'ea peapo futat peje'eawer imū. Kasi a'e pe pejemotywet Jarejuwarete 'ga upe ne”, 'jau 'ā pejejemogyau 'gā mu'jau tywet.

19 Peje'akwaawe'emamū futat nipo pēē pejejemogyau. Maranuara ajee esage ma'eramū Janeruwarete 'ga upe? Mama'ea jane imyina wyra rapyawa 'arimū Jarejuwarete 'ga upe imonopyramū. A'eramū 'ā wyra rapyawa i'arimū 'up ma'e retee wesageramū 'ga upe— 'jau Jejuī 'ga 'gā nupe.

20 —“Janeruwarete 'ga upe wyra rapyawa ruwamū je mama'e apoi enee” 'jaramū pēē i'arimū 'up ma'e upe nanē futat pe'je poromū nū.

21 “Jarejuwarete 'ga mogytaawa renamū je mama'e apoi enee” 'jaramū pēē Jarejuwarete 'ga upe nanē futat pe'je poromū. Omogytaawa pype futat 'ga reni. A'eramū pēē aipo 'jaramū 'ga upe futat 'jau pejejemogyau aipo 'jaramū— 'jau 'ga 'gā nupe.

22 —“Ywaga ruwamū je mama'e apoi enee” 'ga upe 'jaramū nanē Jarejuwarete 'ga renawa upe futat pe'je nū. Ywag ipe futat 'ga renawaretea. A'eramū aipo 'jara 'gā 'ga renawa upe futat 'jau poromū. 'Ga renawa renūinara 'gā Jarejuwarete 'ga futat wenūi. Wenawa 'arimū futat 'ga reni. A'eramū 'ga renawa renūinara 'gā 'ga futat enūina— 'jau Jejuī 'ga 'gā nupe.

23 —Pēporiay'i pejejemogyau numiamū— 'jau 'ga Moisesi 'ga remikwasiarer are moromu'jara 'gā nupe, fariseu 'gā nupe nanē nū. —Pēē 'ā esage 'me ma'ea te. A'eramū nipo anure Janeruwarete 'ga pē nerekou tyweaete pētywer are. Nepekoarūi futari te 'ā 'ga upe. A'eramū nipo 'ga pē nerekou tyweaete pētywer are. Mama'ea pēē imojo'oka pejepe 'jawe pejejeupe. Ko pypiara nanē pēē imojo'oka nū. A'eramū pēē majepeja monou Jarejuwarete 'ga upe. A'eramū emyrera pēma'ea. Kumi kasiga miamū pēē imojo'oka imonou Jarejuwarete 'ga upe. Nanuara te esage 'ga upe numiamū. A'ere namā etee rūi peapo. “Mama'ea pemojo'ok amū imonou jee” 'ga 'eawera 'ā pēē enupa. Aipoa pēē iapoa Janeruwarete 'ga afutat. A'ere 'ā ajepeja 'ga 'eawera nepeenuwi futari. “Pejuereko esage ki” 'ga 'eawera nepeenuwi. “Pēpota'wa esage ki pejejeuee” 'ga 'eawera nepeenuwi. “Pejejaupe peje'eawer imū etee futat pēē mama'e apou pejejaupe” 'ga 'eawer imū jēmī 'ā mama'e apowe'em— 'jau 'ga 'gā nupe. —“Pejuereko esage te esage Janeruwarete 'ga upe. 'Gā nee pēpota'wa esage nanē esage 'ga upe nū” 'ea te esage ete 'gā upe. Mīmera pēē iapoa Janeruwarete 'ga afutarete. Peenupaw iki 'ga 'eawera 'ga je'ega— 'jau 'ga 'gā nupe.

24 —'Ga 'eawera jēmī 'ā nepeapoi. A'eramū 'ā pēē 'ga 'eawere'ema jēmī iapou— 'jau Jejuī 'ga 'gā nupe.

25 —Pēporiay'i pejejemogyau numiamū— 'jau 'ga Moisesi 'ga remikwasiarer are moromu'jara 'gā nupe, fariseu 'gā nupe nanē nū. —Pēē 'ā esage 'me ma'ea te. A'eramū nipo anure Janeruwarete 'ga pē nerekou tyweaete pētywer are. Sā'ā ae y'a kupe pireja futat numiamū. A'ere 'ā ae waipy katu nokatu'ogi. Nan tee futat 'ā pēē. Pēpira esageay futat numiamū. Pejauk futat pejepiky'a awi numiamū. A'eramū 'ā pēpira ojekatu'oka futat numiamū. A'ere pēwytera nia'wyri. Nepepouri futari mama'e tywera apo awi— 'jau Jejuī 'ga 'gā nupe oporogytau 'ūina.

26 —Pē'akwaawe'ema pē nereko, a'e je 'ā pē nupe jā'nū'ū. Janeruwarete 'ga 'ā pē katu'oga futaa numiamū. Napēpira katu'og are tee rūi 'ga fuweramū. Pēwytera katu'oga we futat 'ā 'ga afutat numiamū. Pēporiay'i 'ā pejejemogyau numiamū— 'jau 'ga oje'ega moywyrafena 'gā nupe. —Pejetywer awi pepoir ire amunipo 'ā 'ga pē katu'ogi. A'eramū amunipo 'ā pēē pejejesageramū pejejemogyau 'ga upe, a'e je 'ā tekou pē nupe— 'jau Jejuī 'ga 'gā nupe.

27 —Pēporiay'i pejejemogyau numiamū. Pēē 'ā esage 'me ma'ea te— 'jau 'ga Moisesi 'ga remikwasiarer are moromu'jara 'gā nupe. Fariseu 'ga nupe nanē 'ga 'jau nū. —A'eramū nipo anure Janeruwarete 'ga pē nerekou tyweaete pētywer are. Sā'ā teumera rupawa ita kwara. A'eramū 'ā pēē ita pitupa ipitupawa parasiga pyu. A'eramū 'ā i'arimū etee okaturāturamamū. A'ere 'ā ita kwara pype teumera nema ete.

²⁸ Nan tee futat pëë. Esage ma'e 'jawe futat pejemogy numiamü. A'ere mama'e tywera peapo, o'meramü te pe'je pejejemogyau— 'jau Jejuí 'ga oje'ega moywyrafena 'gã nupe.

²⁹ —Pëporiay'i pejejemogyau numiamü— 'jau Jejuí 'ga Moisesi 'ga remikwasiarer are moromu'jara 'gã nupe, fariseu 'gã nupe nanë nü. —Esage 'me ma'e ate pëë. A'eramü nipo anure Janeruwarete 'ga pë nerekou tyweaete pëtywer are. Pëypy 'gã 'ã Jarejuwarete 'ga mome'wara 'gã je'ega nuenuwi etee rakue. Ma'eramü 'ã 'gã 'gã apisi rakue. A'eramü 'ã pëë iapisipyrera rywy mojewaka. Ita esage apopyrera pyu imogyau ekoete iapisipyrera 'arimü. “Ita esagea simowyt esage ma'efera 'gã nee jarejea'awamü 'jau”, 'jau futatee 'ã pëë pejejaupe rakue— 'jau Jejuí 'ga 'gã nupe.

³⁰ —'Ymä we jarejeko re amunipo 'ã jane nipoari jareypy 'gã Jarejuwarete 'ga je'ega mome'wara 'gã apisi are. Niapisiukari amunipo 'ã jane 'gã”, 'jau futatee 'ã pëë pejejaupe, pejejerowiarapa 'ã pejejee.

³¹ A'ere 'ã pë'me ate. A'ere 'ã pejeypy 'gã 'jawerimü etee futat pejemogy— 'jau 'ga 'gã nupe.

³² —Pejeypy 'gã 'jawerimü etee pejejemogy re nipo pejemogy mama'e apou 'gã 'jawerimü etee futat. A'eramü nipo Janeruwarete 'ga pë nerekou tyweaete 'gã 'jawerimü etee futat.

³³ Moja 'jawe pëë. Sã'ã moja ae u'ua ae jukau 'ã. Nan tee futat pejomomoirukat Jarejuwarete 'ga rerowiari awi. A'eramü nipo anure Janeruwarete 'ga pë monou pë mogyau mama'eukwaawa rapyaw ipe pëtywer are— 'jau Jejuí 'ga oje'ega moywyrafena 'gã nupe.

³⁴ —Anure nipo je teje'ega mome'wara 'ga monoi pë nupe. I'akwaap ma'e 'gã, pë mu'jara 'gã. Mímera 'gã nipo je imonou pë nupe. A'ere nipo pepyyg etee 'gã amü iapisau. Amumera 'gã nipo pëë imonou imu'ama 'ypeywar are iapisau. Amumera 'gã nipo pëë inupãnuãu etee pejejatykaaw ipe. A'eramü nipo 'gã oka'jama awau kwe pe. Ajejeja amunaw ipe nipo 'gã awau. A'ere nipo peo etee 'gã newiri 'gã nerekou tyweru'japa nü.

³⁵ A'eramü nipo a'e are futat Janeruwarete 'ga werowiaara 'gã nepyaa pë nerekou tyweaete. Pëypy 'gã nemiapofer are we futat nipo 'ga pë nerekou tyweaete. Pëypy 'gã 'ã Jarejuwarete 'ga je'ega mome'wara 'gã apisau ekoete rakue. Ywy apo pyyrauwe 'ã 'gã 'ga rerowiaara 'gã apisi rakue— 'jau Jejuí 'ga 'gã nupe 'üina. —Apeu 'ga ra'ne 'ã 'gã ijukau pyy pyy rakue. Nuapoi agawewi 'ga 'ã mama'e tywera rakue. A'etea 'ga 'ã 'ga jukau ekoete rakue. Ma'eramü 'gã 'ã 'awamü taetu Jarejuwarete 'ga rerowiaara 'gã apisi kwaiwete. 'Awamue 'gã 'ã Sakari 'ga, Pereki 'ga ra'yra 'ga jukau rai'i nü. Jarejuwarete 'ga rukawõ'õ me agawewi 'ga 'ami. A'etea 'ã 'gã 'ga jukau rai'i— 'jau Jejuí 'ga 'gã nupe.

³⁶ —A'jea futat je'ea. Anurenure'i nipo Janeruwarete 'ga pë nereko tyweretei 'gã nepyaa, iapisipyrera 'gã juejue epyaa— 'jau Jejuí 'ga oje'ega moywyrafena 'gã nupe.

Jejuí 'ga u'arasigamü Jerusareg ipewara 'gã nee

(Luka 13.34-35)

³⁷ A'eramü 'ga 'jau Jerusareg ipewara 'gã nupe:

—Jerusareg ipewaramü futat te 'ã pëë Jarejuwarete 'ga je'ega mome'wara 'gã apisaramü pejup— 'jau Jejuí 'ga 'gã nupe. —Sã'ã wyrasokwëa kwanü resakawe wa'yra renüja imajatykau wakape 'wyripe. Nan tee futat je— 'jau Jejuí 'ga 'gã nupe. —Tajejuka esage Jerusareg ipewara 'gã nee 'jau, je 'i pë nupe numiamü. A'ere 'ã nepefutari etee.

³⁸ A'eramü 'awamü Janeruwarete 'ga opoia futat pë nui— 'jau Jejuí 'ga 'gã nupe. —A'eramü nipo pë nee iporomutare'ema 'gã 'ua pë'wyrarete pojekau pë nui.

³⁹ 'Awamü 'ã je nanë tewau pë nui nü. A'eramü pëë 'awamü je resagu'jape'ema. “Esageay Janeruwarete 'ga remimurera 'ga”, 'jawe'ëwe pëë je resagu'jape'ema futat— 'jau Jejuí 'ga 'gã nupe u'ama.

24

Jejuí 'ga rur enune ojeapo ma'e

(Maku 13.1-37; Luka 21.5-33; 17.26-30, 34-36)

¹ 'Gã nupe oporogytapaw ire Jejuí 'ga wemimu'eramü ore renü'jäu Jarejuwarete 'ga mogytaaw awi. Jui aru'ë re ore 'jau 'ga upe:

² —Kuu. Ikaturam te Janeruwarete 'ga mogytaawa 'oga jã'nü'ü— 'jau ore 'ga upe.

² A'eramü 'ga 'jau ore:

—A'jea futat esageramü numiamü. A'ere nipo anurenure'i jane ree iporomutare'ema 'gã nuri imonou etyka. Nom'yi'i futari nipo 'gã itaa müaju'arimü— 'jau 'ga ore.

³ Arawau wytyr ipe. Oriweira 'jaw ipe ore arawau orojeupia wytyra 'arimü. A'eramü Jejuí 'ga wapyka opytu'wau. Nitywi futari 'ga amü ore pyri. A'eramü ore 'ga rerowyka 'jau 'ga upe:

—“Jane ree iporomutare'ema 'gā 'ut Janeruwarete 'ga mogytaawa monou etyka”, ere ako oreo ko. Maranime te 'gā nuri imonou etyka? Maranime sipo ene ejua nū? Ma'ja ra'ne sipo ajee ojesaukat oreo ene rur enune? Maranime sipo mama'e teepawamū?— 'jau ore 'ga upe.

⁴ A'eramū Jejuī 'ga 'jau oreo:

—Je renune 'ut ma'e 'gā nipo i'me ma'ea. Perowiat kasi 'gā 'mea ne.

⁵ Anure nipo kwaiwete 'gā nuri 'Janeruwarete 'ga je mut pē katu'okaramū”, 'jau nipo 'gā 'ua pē nupe. A'ere kasi perowiat 'gā ne. O'meramū te nipo 'gā 'i. Kwaiwete nipo 'gā 'gā moryteeu ojee— 'jau Jejuī 'ga oreo.

⁶⁻⁷ —Anure nipo amutee amunaw awi 'gā nuri 'wyrararete 'ga rowajaa, 'ga remiayua 'gā neewe futat. A'ere kasi aipo renupa pēpiryyi ne. Nan futat nipo mama'e teepaw enune. A'ere nipo naporomū rūi mama'e mateepaawa. Naporomū etee rūi futat nipo mama'e rekoī— 'jau Jejuī 'ga oreo. —Akou'jau'jap futat nipo mama'ea. Amunap tesirūmera pypewara 'gā we futat nipo ajuowajat. Ywya we futat nipo oyyi peu peu 'jau. Ty'ara nipo amunawa pype peu peu 'jau. A'eramū 'gā nipo kwaiwete ty'ara rerekou.

⁸ Sā'ā kūjā wa'yra ray ypyrauwe wa'yra 'a ja'wyja'wy kwaawa. Ayyypeyperaue 'ā 'i'ara kwaapa. Ēē wi u'aa ja'wyja'wy taetu 'ā wayreteramū ēē upe. Nan tee futat nipo pēē. Aipo ijeapo resakawe je rura pekwaap. “Owaēm 'ga ruawa upe ra'e”, 'jau nipo pēē pejejaupe. A'ere nipo je rur enune mama'e tywera jeapoī kwaiwete— 'jau 'ga oreo.

⁹ —Je rure'emaue nipo 'gā je rerowiaaramū pē nerekou tyweaete. Oporomutare'emamū jeremiayuwamū pē nee. A'eramū nipo pē nee iporomutare'ema 'gā pē pyyka pē monou pē munepa moromunepawa pype. A'eramū nipo 'gā pē nerekou tywurukaa 'gā nupe. A'eramū nipo 'gā pē apisaukaa 'gā nupe.

¹⁰ Aipo jeaporamū nipo 'gā kwaiwete opoia je rerowiar awi. Je wi opoir ire nipo 'gā oporomutare'emamū je wi ipoire'ema 'gā nee. A'eramū nipo 'gā 'gā monou 'gā nee ifuwerete ma'e 'gā po pe— 'jau Jejuī 'ga oreo.

¹¹ —A'ere nipo 'gā kwaiwete 'ga u'o'meramū tekotee 'gā nupe. “Je te 'ā Jarejuwarete 'ga je'ega mome'waramū”, 'jau futatee nipo 'gā 'gā nupe. A'eramū nipo 'gā 'gā moryteeu ojee. A'ere 'gā o'meramū te 'gā 'i. A'eramū nipo 'gā kwaiwete 'gā nerowiaa.

¹² A'eramū nipo mama'e tywera apoara 'gā ojeme'yita ajemogyau. Mama'e tywera etee nipo 'gā iapou'jau'japa nū. A'eramū nipo 'gā kwaiwete opoia je ree oporomutar awi.

¹³ A'ere nipo Janeruwarete 'ga je rerowiar awi ipoire'ema 'gā nerooi imogyau ojeypyri nakwaparimū warāu rūi futat— 'jau 'ga oreo.

¹⁴ —Mama'e teepawe'emaue nipo pēē je rerowiaaramū pejewau je mome'wau 'gā nupe. “Jejuī 'ga rerowiaara 'gā Janeruwarete 'ga 'gā omogy wemiayuwamū”, 'jau nipo pēē pejewau je mome'wau 'gā nupe, amunawa moymoyka. Kwe pewara 'gā jerera renupaw ire te nipo mama'e teepawamū. A'eramū futat nipo tejuā— 'jau 'ga oreo.

¹⁵ —Ymā te 'ā Janeruwarete 'ga ijeaporama kwasiarukari oje'ega mome'wara 'ga upe rakue, Danieū 'ga upe rakue. “Anure nipo 'gā amū mama'e tywywera apoī Jarejuwarete 'ga mogytaaw ipe”, 'jau 'ga ikwasiaa inuga janee rakue. A'eramū nipo 'gā anurenure'i iapou Danieū 'ga 'eawer imū etee futat. (A'eramū je 'ga remikwasiarera ka'arana mogytaaramū ee pēneapyoa futaa)— 'jau Jejuī 'ga oreo.

¹⁶⁻²¹ A'ere Jejuī 'ga 'jau oreo nū:

—Anure nipo 'gā amū nuri 'auwara rerekou tyweaete. Ywy apo ypyramū nitywi futari ae rereko tyweara aipo 'jawe rakue. A'ere nipo anure mama'earū'e'eme ete jesaukari. 'Auwara 'gā nipo ajemogyau tywytywet futat. A'eramū pēē Judeja ywy pe ako ma'eramū 'gā nesakawe pejeka'jama pejewau wytytyr ipe. Kasi a'e pe 'gā pē apisi ne. Pejejopewuu apyte'rarimū wapyk ma'eramū pēē pejewawe'em pejesowe'em pejekaraemā pyyke'ema. Pejeka'jamayayau etee futat pejejemima 'gā nui. Ko pewaramū nanē pēē pejejewyre'ema pejejoj ipe pejejaity mojoy'rawe'em— 'jau Jejuī 'ga oreo. —Iporiay'i nipo ta'yryrū ma'e kūjā ajemogyau, ta'yky'ri ma'ea nanē nipo nū. Nujānarūi eweguu ma'ea. Ta'y'ri ma'ea nanē nujānarūi nū— 'jau 'ga oreo. —A'eramū ki nanuar are pejeporogytau Jarejuwarete 'ga upe ee: “Eremurukat kasi 'gā 'ara ro'ysaga rupi oreo ne. Morowykye'ema rupi nanē ene 'gā murukare'ema nū. Morowykye'ema rupi ore noroka'jama'uweri. Ymā te 'ā Moisesi 'ga 'i oreypy 'gā nupe rakue: “Peata kasi morowykye'ema rupi ne”, 'jau 'ā 'ga rakue. A'eramū ore oroka'jamarū'me'em morowykye'ema rupi 'gā nui”, pe'je ki Jarejuwarete 'ga upe ee— 'jau Jejuī 'ga oreo.

²² —A'ere Janeruwarete 'ga mama'e tywera 'gā nupe iapoukaru'jau'jaw ire nipo 'ga 'gā muojeri 'gā mogyau jui nū. Kasi a'e pe ywy pewaramū pepap najuejue etee ne. A'ere Janeruwarete 'ga pēē mū mū'jāu 'gā nui pē katu'oka. Wemimū'ēmeramū pē nee Janeruwarete 'ga 'gā muojeri 'gā mogyau jui nū— 'jau Jejuī 'ga oreo.

²³⁻²⁴ —Je jewyre'emaue nipo kwaiwete 'gā nuri o'meramū pē nupe. “Je Jarejuwarete 'ga je'ega mome'waramū”, 'jau futatee nipo 'gā 'ua pē nupe. Amumera 'gā nipo 'ua

'jau "Janeruwarete 'ga je mut. Je 'ga remimurera futat", 'jau futatee nipo 'gā pē nupe. Pēnemiapoe'ema we futat nipo 'gā iapou pē neape je rerowiar awi pē momoirukaawamū. "Simomoirukat 'gā Jarejuwarete 'ga rerowiar awi 'jau", e'i te 'gā pē nupe. A'eramū nipo 'gā mama'e apou pē neape ojerowiarukaawamū pē nupe. A'ere kasi a'e are miamū perowiat 'gā ne. Pē nupe nipo 'gā amū 'jau: "Koromū Kristu 'ga", 'jau nipo 'gā amū pē nupe. A'ere kasi perowiat 'gā ne. "Kwe pe Kristu 'ga oi", 'gā 'eramū pēē 'gā nerowiare'ema.

²⁵ Pemoka'jam kasi je'eawera ne. Ijeapoe'emauwe je imome'ui pē nupe, ee pē mueapyoawamū— 'jau Jeju'i 'ga oree ikue.

²⁶ —"Jū me Kristu 'ga reko'i. Pe'je pejewau 'ga resaka", 'gā 'eramū kasi peo jū me ne. O'meramū te 'gā 'i pē nupe. "Pe'je pejewau Kristu 'ga resaka. 'Au 'ga jemimi 'ūina ore pyri", 'gā 'eramū kasi perowiar ine. O'meramū te 'gā 'i.

²⁷ Pejejek'i'yramū je jewyramū nipo najuejue etee je resak pejepe. Sā'ā tupā werawa. A'eramū 'ā ae najuejue etee esaka. Nan tee futat nipo je jewyramū najuejue etee je resak pejepe. Najemimi futari je tejewya tejuu nū— 'jau Jeju'i 'ga oree ikue.

²⁸ —Je rura nipo pēē najuejue etee ikwaapa. Sā'ā uruwua mama'e nema kwaawa. A'eramū 'ā 'ua ajatykau ee. Nan tee futat nipo pēē ikwaapa. Je jewyru'jawamū nipo pēē je kwaapa katu katu futat— 'jau Jeju'i 'ga oree imome'wau ikue.

²⁹ —Ae rereko tyweawa 'ara kwaw ire nipo kwara owepa. Jaya nanē nipo owepa nū. Jaytataa nipo ototoka ywag awi 'ua. Ywag ipewara nipo oyyita nū. Kwat, jay, jaytata. Mīmera nipo oyyita— 'jau Jeju'i 'ga oree imome'wau ikue.

³⁰ —Ywag ipe nanē nipo mama'e ojesaukaa pē nupe nū. Aipo resaga nipo pēē je rura kwaapa. "Anurenure'i nipo Jeju'i 'ga ruri", 'jau nipo pēē pejejaupe. Aipo resaka nipo je rerowiare'ema 'gā okyjau. 'Gā kyjea nipo 'gā nerekou— 'jau Jeju'i 'ga oree. —A'erauwe nipo pēneki'yramū je tejuu tejewya. Ywasiga rupi nipo tejuu tejyppa. A'eramū nipo ywy pewara 'gā je resaka najuejue etee futat. Tepājē mū nipo je ruri, tejenyfuga pype futat nipo tejuu tejyppa— 'jau 'ga oree ikue.

³¹ —A'e pype futat nipo pēē jumi'aranūū py renupa. Jumi'aranūū pyrauwe nipo Janeruwarete 'ga ywagipewara 'gā monou wemiayuwa 'gā majatykaukaa. "Pe'je pejewau amunawa moy moyka jeremiayuwa 'gā majatykau 'gā nerua jee", 'jau nipo 'ga 'gā nupe. A'eramū nipo 'gā awau 'gā nerua 'ga upe— 'jau Jeju'i 'ga imome'wau oree ikue.

³² A'ere Jeju'i 'ga mama'e mū mome'wau oree nū, ore mu'jau ee:

—Mama'ea je amome'u pē nupe pē mu'jau tejuaw are— 'jau 'ga oree. —Sā'ā ae siaka'gywa potyramū amana jewyra kwaawa. Ipotyrauwe 'ā ae amana jewyt ja'wyja'wy kwaapa.

³³ Nan tee futat ki je'eawer imū mama'e jeaporamuerauwe pe'je pejejaupe: "Ut ja'wyja'wy Jeju'i 'ga janee 'wyriaramū akou ra'e", pe'je ki pejejaupe.

³⁴ A'jea futat je 'i. Je'eawer imū mama'e jeapo resakara 'gā papawe'emauwe nipo je ruri tejewya nū— 'jau Jeju'i 'ga oree.

³⁵ —Ywaga nipo atepawamū futat. Ywya nanē nipo atepawamū futat nū. A'ere nipo jeremimome'ufera nateepawa'uweri futari. Je'eawer imū etee futat nipo aipoa ojeapou— 'jau Jeju'i 'ga oree ikue.

³⁶ —Nitywi futari je ruawa kwaapara 'gā amū. Nepekwaawi futari je ruawa. Ywagipewara 'gā miamū nokwaawi. Je miamū nanē nakwaawi tejuawa 'ara. Jeruwarete 'ga etee te okwaap.

³⁷⁻³⁸ A'ere nipo anure je ruru'jawi erujewi pē nupe. Je kwaapare'ema 'gā nipo aipoa 'ara rupi ajemogyau oporowykyau. Ojemi'waa, wemirekoramū 'jau nipo ajemogyau. Wemiapo apo are tee futat wea'aramū ajemogyau— 'jau Jeju'i 'ga 'gā nupe u'ama. —Janeruwarete 'ga ree jēmī nipo 'gā wea'are'emamū ajemogyau. Sā'ā Nue 'ga rekoramū 'gā jemogyau rakue. Wemiyarete 'ga ree 'gā 'ā wea'are'emamū ajemogyau rakue.

³⁹ Nokwaawi futari 'gā Janeruwarete 'ga remiaporama rakue. Poje 'ga 'ā amana mua erujewi 'gā nupe rakue, 'gā apisaukaa 'y pyu rakue. Nan tee futat nipo je ruri erujewi 'gā nupe. Wemiapo are etee 'gā nea'at 'gā jemogyramū nipo je tejuu erujewi 'gā nupe— 'jau Jeju'i 'ga oree ikue.

⁴⁰ —Je jewyramū nipo mukūja 'gā akou oporowykyau oko pe. A'eramū nipo majepeja 'ga je rerowiaa. A'eramū nipo 'ga awau ojeupia je repejāna. Ajepeja 'ga nipo naje rerowiari. A'eramū nipo a'e 'ga awawe'em.

⁴¹ Kūjāmera 'gā nanē nipo 'upa mukūi ygu'ai nū. A'eramū nipo majepeja ēē awau je repejāna. A'eramū nipo ajepeja ēē awawe'em.

⁴² Je ruawa 'ā nepekwaawi futari. A'eramū ki pēē pejetywer awi pejeipoia pejejemogyau je rapesaka— 'jau Jeju'i 'ga oree ikue.

⁴³ —Sā'ā 'oga jara 'ga muna'ywa rura kwaawe'ema. Muna'ywa rura kwaaw ire amunipo 'ā 'oga jara 'ga woga rarūi 'ūina. A'ere 'ga nokwaawi futari muna'ywa rura wog ipe.

⁴⁴ Nan tee futat nepekwaawi pejejeki'yramū je ruawa. A'eramū ki pēē pejemogyau au'jeteramū je rapesaka pejeojere'emamū futat je rerowiarāmū— 'jau Jejuī 'ga oree ikue.

⁴⁵ A'ere Jejuī 'ga mama'e mū mome'wau oree, ore mu'jau 'uaw are nū.

—'Wyriara 'ga remiayuw esage 'ga i'akwaap ma'ea. O'wyriara 'ga je'eg imū etee futat 'ga mama'ea wapo. A'eramū 'wyriara 'ga wata enune wemiayuw esage 'ga m'īina wemiayuwa 'gā nesakawamū. "Aata je. A'eramū je ene m'īina 'gā nesakawamū", 'jau 'wyriara 'ga wemiayuw esage 'ga upe. "Mama'ea ki emono 'gā nupe 'gā nemi'uramamū", 'jau 'ga 'ga upe. A'eramū nipo 'ga 'wyriara 'ga awau watau 'gā nui. Anure nipo 'ga ojewya 'ua nū.

⁴⁶ 'Ga 'eawer imū etee mama'e apo re nipo 'wyriara remiayuw esage 'ga aku'iramū 'ūina o'wyriara 'ga resakawe.

⁴⁷ 'Wyriara 'ga nanē nipo aku'iramū wemiayuw esage 'ga ree nū. 'Ga porowyky resag ire nipo 'ga 'ga m'īina okaraemā are ojejuka ma'eramū.

⁴⁸ A'ere nipo ajepeja 'wyriara 'ga remim'īimera 'ga 'i ojeupe: "Mukuu nā'ā je'wyriara 'ga oi re'ā, oporomukuramū re'ā", 'jau nipo 'ga ojeupe.

⁴⁹ A'eramū nipo 'ga opytuna 'gā nupā are etee futat 'ūina. A'eramū nipo 'ga awau ojemi'waa kawīajaiwa 'wara 'gā pyri. A'eramū nipo 'ga kawīajaiwa rykua 'gā pyri.

⁵⁰ Aipo aporamū nipo 'ga 'wyriara 'ga 'ua owaēma erujewi 'ga upe. Wapesage'emeteramū nipo 'ga 'ua owaēma erujewi 'ga upe.

⁵¹ A'eramū nipo 'wyriara 'ga wemiayup tywera 'ga mopēpēpēpena 'ga monou tata pe i'me ma'e 'gā pyri. Peu nipo 'ga waemamū akou wa'jywa mokāina akuwa rerekou— 'jau Jejuī 'ga imome'wau oree.

—Jeje'eg imū etee futat mama'e apoaramū pēē 'wyriara remiayuw esage 'ga 'jawe jee. Jeje'eg imū etee mama'e apoare'emamū pēē 'wyriara remiayup tywera 'ga 'jawe jee. A'eramū ki pēē pejemogyau 'ga remiayuw esage 'ga 'jawe. A'eramū nipo je tejua 'jau pē nupe: "Pēē 'ā jeremiayuw esageramū. Pe'je pejeju pejesou jeruwa 'ga rog ipe je rupi", 'jau nipo je pē nupe— 'jau Jejuī 'ga oree ikue.

25

Teis kūjāmuku 'gā mome'uawet

¹ A'ere Jejuī 'ga mama'e mū mome'wau oree ore mu'jawamū nū. 'Wyriaramū Jarejuwarete 'ga omogo are 'ga ore mu'jau.

—Anure nipo Janeruwarete 'ga je mogoi 'wyriaramū pē nupe— 'jau 'ga oree. —A'eramū nipo pēē je ruramū pejewau je rupi. Jeruwarete 'ga pyri. A'ere nipo 'gā amū nooi futari. Sā'ā maraka apoaw ipe oo ma'e 'gā. Opytuna 'gā nekokaturamū 'gā 'ā maraka apoa. A'eramū 'ā kūjāmuku 'gā awau akokatu ma'e 'ga rapesaka maraka pe okwap ma'e 'gā napesaka. Teis 'ā kūjāmuku 'gā awau 'gā napesaka 'upa. "Ko rupi nipo wā kwawi", 'jau 'gā 'upa. "A'eramū jane jarejupa 'au wā napesaka. Wā nuramū soo wā nupi maraka pe 'jau", 'jau 'gā ajaupe 'upa. A'eramū 'gā 'upa peyse pe.

² Siku nipo i'akwaap ma'e 'gā kūjāmuku 'gā. Siku wējēmī i'akwaawe'ema 'gā 'upa nū.

³ I'akwaawe'ema 'gā arāparīna ppyka erawau. A'ere 'gā nuerooi miarakawenana tyramū ojeupe.

⁴ I'akwaap ma'e 'gā te ajee miarakawenana weroo tyramū ojeupe.

⁵ A'ere nipo akokatu ma'e 'gā poromukuramū 'ua 'gā nupe. A'eramū nipo 'gā woepyjamū 'upa— 'jau Jejuī 'ga imome'wau oree.

⁶ —A'eramū nipo ppyaje 'ga amū 'ua wafukaita 'gā nupe. "Kwe 'gā nuri. Pe'je pejeju pejepaka pejewau 'gā nowosōu", 'jau nipo 'ga 'ua 'gā nupe.

⁷ A'erauwe nipo kūjāmuku 'gā opaka arāparīna monyka.

⁸ A'eramū nipo i'akwaawe'ema 'gā 'jau: "Miarakawenana pemut ara oree. Orema'ea owep ja'wyja'wy ore wi", 'jau nipo 'gā miarakawenana rerekwara 'gā nupe.

⁹ A'ere nipo miarakawenana rerekwara 'gā 'i etee 'gā nupe: "Naani. Pē nupe ore imono re orema'e wewi ne. Pekwap ara mua pejejeupe", 'jau etee nipo 'gā 'gā nupe— 'jau Jejuī 'ga imome'wau oree.

¹⁰ —A'eramū nipo i'akwaawe'ema 'gā awau miarakawenana mua. A'ere nipo miarakawenana muaw awi 'gā jewyra'ne'emauwe akokatu ma'e 'gā nuri. A'eramū nipo miarakawenana ojeupe erawarera 'gā etee awau akokatu ma'e 'ga rowosōu. A'eramū nipo 'gā osou maraka apoaw ipe 'gā nupi. 'Gā nesepaw ire nipo maraka'ywa 'ga 'okwara motypa 'gā nee.

¹¹ —A'ere'ere'i nipo miarakawenana muaw awi ojewyt ma'efera 'gā 'ua owaēma. A'eramū nipo 'gā 'upa wafukaita ukupepe 'ga upe. "Ku'jyp. 'Okwara eawopytymo'wok oree. Torose orosou ore nanē 'jau nū", 'jau nipo 'gā 'upa 'ga upe.

¹²—A'ere nipo akokatu ma'e 'ga 'i etee 'gā nupe: “Pe'je pejewau ore wi. Najepytuna rūi pēē”, 'jau etee nipo 'ga 'gā nupe— 'jau Jejuī 'ga oree imome'wau.

¹³ Imome'upaw ire Jejuī 'ga 'jau oree:

—Nan tee futat nipo nepekwaawi je ruawa 'ara. A'eramū ki pēē pejemomoi ta etee pejemogayau je rur are— 'jau 'ga oree.

Kūima'e 'ga remiayuwa 'gā mome'uawet

(Luka 19.11-27)

¹⁴ A'ere Jejuī 'ga mama'e mū mome'wau oree, ore mu'jawamū nū, 'wyrīaramū Jarejuwarete 'ga omogoram are wējēmī nū.

—Anure nipo Janeruwarete 'ga je mogoi 'wyrīaramū pē nupe. Mama'e mū je amome'u pē nupe, pē mu'jawamū ee— 'jau Jejuī 'ga oree. —Kūima'e 'ga amū nipo awau watau oje'wyr awi. Oo enune nipo 'ga wemiayuwa 'gā nenūina 'gā mua oporogytau 'gā nupe. “Oo je teatau pē nū”, 'jau nipo 'ga wemiayuwa 'gā nupe. “Jekaraemā pearū jee”, 'jau nipo 'ga wemiayuwa 'gā nupe.

¹⁵ A'eramū nipo 'ga ka'aranūū ywope'i monou 'gā nupe. I'akwaap ma'e 'ga upe nipo 'ga imonou kwaiwete. Sīku ka'aranūū ywope'i monou 'ga upe. Mukūi tee nipo 'ga ka'aranūū ywope'i monou i'akwaa'wi ma'e 'ga upe. I'akwaawe'ema 'ga upe 'ga majepeī tee imonou. “Pemomytun jeka'aranūūa jee”, 'jau nipo 'ga 'gā nupe. 'Gā nupe imonopaw ire nipo 'ga awau watau 'gā nūi.

¹⁶ —'Ga o ypyrauwe sīku ka'aranūū ywope'i rerekwara 'ga ojeupe 'ga remimurera rerawau mama'e mua ipyu. A'ere 'ga imuripyrrera rerawau kwe pe ime'ega. Epyfera apyrapa ime'ega 'gā nupe. Aipo aporamū 'ga o'wyrīara 'ga ka'aranūū ywope'i momytuna 'ga upe.

¹⁷ Mukūi ka'aranūū ywope'i rerekwara 'ga nanē nānēwējēmī futat iapou nū. Ojeupe 'ga remimurera momytuna 'ga upe nū.

¹⁸ A'ere majepeī tee erekwara 'ga nanarūi iapoi. Uēma ypy we 'ga ywy rywykaita 'ga poroywera mimawamū. A'ere 'ga ityma imonou im'ina— 'jau Jejuī 'ga imome'wau oree ikue.

¹⁹—Anure wata ma'efera 'ga 'ua ojewya 'gā nupe nū. A'eramū 'ga wemiayuwa 'gā nenūina. “Maran sipo 'gā jeka'aranūū rerekoi rai'i? Ome'yi sipo 'gā nai'i?” 'jau 'ga ojeupe.

²⁰ —A'eramū 'ga wemiayuwa 'gā nenūina. A'eramū 'ga remiayuwa 'gā 'ua ajatykau 'ga ree, 'ga ka'aranūū mome'wau 'ga upe. Sīku rerekwara 'ga tāmējē 'ua 'jau 'ga upe: “Sīku ako ka'aranūū ywope'i eremut jee ikue. A'eramū je erawau imomytuna enee ikue kūi. 'Awamū teis eneka'aranūū ywope'ia”, 'jau nipo 'ga erua 'ga upe.

²¹ —A'eramū nipo 'ga 'jau wemiayuwa 'ga upe: “A'jea futat. Ene 'ā jeremiayuw esagea futat”, 'jau nipo 'ga 'ga upe. “Inānānī'i agawewi je ako imonoi enee ikue. A'ere 'ā ereme'yi jee rai'i. A'eramū je ene mogou teka'aranūū pykaramū tejeupe. Ere ejua eku'iramū je pyri”, 'jau nipo 'ga 'ga upe— 'jau Jejuī 'ga imome'wau oree.

²² —A'ere mukūja rerekwara 'ga 'ua nū: “Mukūi ako ka'aranūū ywope'ia eremut jee ikue. A'eramū je ime'yita enee ikue. 'Awamū irūpāwē eneka'aranūū ywope'ia”, 'jau 'ga 'ga upe imome'wau.

²³ —A'eramū 'ga 'jau aipo 'ga wemiayuwa 'ga upe: “A'jea futat. Ene 'ā jeremiayuw esagea futat ra'e”, 'jau 'ga 'ga upe. “Mukūi agawewi ako je imonoi enee ikue. A'ere 'ā ereme'yi jee rai'i. A'eramū je ene mogou teka'aranūū pykaramū tejeupe. Ere ejua eku'iramū je pyri”, 'jau nipo 'ga 'ga upe— 'jau Jejuī 'ga imome'wau oree.

²⁴⁻²⁵ —A'ere majepeī tee ka'aranūū ywope'i rerekwara 'ga 'ua 'jau 'ga upe nū: “Kweramū eneka'aranūūa. Namoyi etee je eneka'aranūūa. Akyje etee je ene wi. Akwaap je ene jepi. Enemara'ne 'ā ene. Emepy ekoetea te te 'ā erefutat ka'aranūū pyu. A'eramū 'ā ene eporowyky are jēmī ejea'are'emamū. A'eramū je tekyjau ene wi ai'i, eneka'aranūū momyawe'em ene wi ai'i. A'eramū je eneka'aranūū ywope'i auwana imima ywy kwara pype ai'i”, 'jau 'ga 'wyrīararete 'ga upe.

²⁶ —A'eramū nipo ka'aranūū jara 'ga amara'neramū 'ga ree. “Nenea'wyrī futari te 'ā ene. Nenepokagi tāmējē futat te 'ā ene”, 'jau nipo 'ga 'ga upe. “Erekwaap futat te 'ā jemara'nea jepi. A'jea futat ere aipo 'jau jee. 'Emepya te 'ā erefutat ka'aranūū pyu. A'eramū 'ā ene eporowyky are jēmī ejea'are'emamū, ere ako jee ko. A'jea futat ere jee. Ka'aranūūa etee je afutat”, 'jau 'wyrīararete 'ga aipo 'ga upe.

²⁷ “Ma'eramū sipo ene imomytune'ema jee rai'i? Je upe imomytun are efuwere'emamū amunipo 'ā eremono ka'aranūū rerekwara 'gā nupe rai'i kūi? A'eramū amunipo 'ā 'gā jeka'aranūū momyawera mepya enee jee rai'i kūi”, 'jau 'wyrīararete 'ga aipoa kūima'e 'ga upe.

²⁸—A'eramū 'ga 'jau ajepeja wemiayuwa 'gā nupe: “Pe'je jeka'aranūū ppyka 'ga wi. Imonou teis ka'aranūū ywope'i rerekwara 'ga upe.

²⁹ 'Ga je'eg imū ereko esageara 'gā opyygu'jap futat", 'jau 'ga 'gā nupe. “Ga je'eg imū ereko esageare'ema 'gā te ajee wemirerekofera miamū futat nopyygu'jawi", 'jau 'ga 'gā nupe.

³⁰ “Nia'wryi futari 'ga. A'eramū pēē 'ga ppyka 'ga monou imomoa ppytunaiwa pype. Peu futat nipo 'ga 'ūina waemamū wa'jykājamū”, 'jau 'ga wemiayuwa 'gā nupe— 'jau Jejuī 'ga imome'wau oree.

Werowiare'ema 'gā nui werowiara 'gā mojo'okawam

³¹ A'ere Jejuī 'ga 'uawa mome'wau oree:

—Anure nipo Pēneki'yramū je rekoī 'wryiaramū pē nupe. A'eramū nipo je tejuja tejewya nū. Tejenyfuga pype futat nipo tejuja nū. Ywagipewara 'gā juejue nipo 'ua je rupi. A'eramū nipo je teapyka 'wryiaretete renawa 'arimū.

³² A'eramū nipo 'awa ywy pewarera 'gā najuejue etee futat 'ua ajatykau je rowase. A'eramū nipo je tejerowiara 'gā mojo'oka tejerowiare'ema 'gā nui. Sā'ā wrya jara 'ga weymawa mojo'oga. Karupa'mī mojo'oga karupana'nī awi. Nan tee futat nipo je ywy pewarera 'gā mojo'ogi ajauī.

³³ Tejerowiaramū pē nupe nipo je 'i: “Ko katy pekwap, jejakwatawa katy”, 'jau nipo je tejerowiaramū pē nupe. A'eramū nipo je tejerowiare'ema 'gā nupe nipo je 'jau: “Kwe katy pekwap je wi”, 'jau nipo je 'gā nupe.

³⁴—A'eramū nipo je 'jau tejerowiaramū pē nupe: “Je rerowiara pejemogy. A'eramū Jeruwarete 'ga pē maku'iu. A'eramū pēē 'awamū pejejuja 'au je pyri. Ymā te 'ā, ywy apoe'ewe, Janeruwarete 'ga 'i jee ikue: ‘Anure nipo je ene rerowiara 'gā mogyi 'wryiaramū ene pyri', 'jau 'ga jee ikue. A'eramū pēē 'awamū pejeapyka 'au je pyri. 'Ga 'ā pē mogyi 'wryiaramū je pyri”, 'jau nipo je tejerowiaramū pē nupe.

³⁵ “Jepy'arayparamū ako pēē je mojemi'waa ai'i. Je'yuwejamū ako pēē 'y mua jee ai'i. Napēpytuna rūi agawewi futat je. A'etea ako pēē je mua pejeje'wyr ipe ai'i.

³⁶ Jeraitye'emamū ako pēē taity mua jee ai'i. Jekaruaramū ako pēē je fuanuga ai'i. Moromunepawa pype je renamū ako pēē pejewau je pyri ai'i”, 'jau nipo je tejerowiaramū pē nupe.

³⁷—A'eramū nipo pēē pejepronupa ee jee: “Maranime sipo ore ene mojemi'wari rai'i? Maranime sipo ore 'y monoi enee nanē rai'i nū?

³⁸ Maranime sipo ore ene muri oroje'wyr ipe rai'i nū? Maranime sipo ore taity monoi enee rai'i?

³⁹ Maranime sipo ore ene fuanugi rai'i? Maranime sipo ore arawau ene resaka moromunepawa pype ene renamū rai'i?” 'jau nipo pēē pejepronupa ee jee— 'jau Jejuī 'ga oree.

⁴⁰—A'eramū nipo je 'wryiareteteramū te'ūina 'jau pē nupe: “A'jea futat je 'i. Je rerowiara 'gā amū ako okaraemāe'emamū ikue. A'eramū ako pēē mama'e monou 'gā nupe ikue. Je rerowiara 'gā nupe mama'e mono re pēē je upe mama'e muara 'jawe futat jee”, 'jau nipo je tejerowiaramū pē nupe— 'jau Jejuī 'ga oree ikue.

⁴¹—A'eramū nipo je 'jau tejerowiare'ema 'gā nupe: “Pe'je pejewau je wi. Janeruwarete 'ga pē mono pē mogyau mama'eukwaawa rapyaw ipe. Aipoa tata 'ga wapo mama'eukwaawa 'wryiara upe tee rakue numiamū, emiayuwa reewe numiamū. A'ere 'ā pēē je rerowiare'emamū mama'eukwaawa remiayuwamū futat pejemogy. A'eramū Janeruwarete 'ga pē monou pē mogyau eewe futat iapyaw ipe”, 'jau nipo je 'gā nupe.

⁴² “Nepemuri 'ā mama'ea jee. Naje mojemi'wari nanē ako pejepe jepy'arayparamū ai'i. Je'yuwejamū nanē ako pēē 'y mure'ema jee ai'i.

⁴³ Naje muri nanē ako pejepe pejeje'wyr ipe ai'i, pejejepyri je ruramū ai'i. Jeraitye'emamū nanē ako pēē taity pe mure'ema jee ai'i. Jekaruaramū nanē ako pēē je fuanuge'ema ai'i. Moromunepawa pype je renamū nanē ako pēē pejewawe'em je pyri ai'i”, 'jau nipo je 'gā nupe.

⁴⁴—A'eramū nipo 'gā oporonupa ee jee: “Maranime sipo ore ene resagi enepy'arayparamū rai'i? Maranime sipo ore ene resagi ene'yuwejamū rai'i nū? Maranime sipo ore ene mure'ema oroje'wyr ipe rai'i? Maranime sipo ore ene resagi eneraitye'emamū rai'i? Maranime sipo ore ene resagi enekaruaramū rai'i? Maranime sipo ore ene resagi moromunepawa pype ene renamū rai'i?” 'jau nipo 'gā oporonupa ee jee.

⁴⁵—A'eramū nipo je 'wryiareteteramū te'ūina 'jau 'gā nupe: “A'jea futat je 'i. Je rerowiara 'gā ikaraemāe'ema 'gā nupe mama'e monoe'em ire pēē je upe mama'e muare'ema 'jawe futat”, 'jau nipo je 'gā nupe.

⁴⁶—A'eramū nipo aipo 'gā awau ajemogyau mama'eukwaawa rapyaw ipe. Je rerowiara 'gā etee te nipo oo osou ywag ipe Jarejuwarete 'ga pyri nakwaparimū rūi— 'jau Jejuī 'ga imome'wau oree ikue.

26

Jejui 'ga ree ifuwet ma'e 'gā

(Maku 14.1-2; Luka 22.1-2; Juā 11.45-53)

¹ Imome'upaw ire Jejui 'ga 'jau wemimu'eramū ore:

² —Ikoai'i maraka apoawa 'ara rekoi, Pasikwa 'jawa rekoi. Aipo rupi futat nipo 'gā Pēneki'yramū je pyygi je jukaawamū. Je rekoa futat nipo 'gā ipokutuka je monou je mu'ama 'pyeywar are— 'jau 'ga oree.

³ A'e pe a'eramū peramū mainana 'wyriara 'gā 'upa ajatykau judeu 'gā 'wyria'ri 'gā netee. Mainana 'wyriararete 'ga rog ipe 'gā 'upa, Kaifasi 'ga rog ipe 'gā ajatykau 'upa.

⁴⁻⁵ —Maran te jane Jejui 'ga rerekoi? Jemime te jane 'ga pyygi?— 'jau 'gā ajaupe 'upa. —Jerusareg ipewara 'gā iporomutat 'ga ree. A'eramū jane 'gā nowase jarekowe'em 'ga ree maraka apoaw ipe— 'jau 'gā ajaupe. —Kasi a'e pe wowase 'ga rerekoramū 'ga remiayuwa 'gā jane apisi ne. Jemime te sireko 'ga 'jau. 'Gā nowase atywi te jane 'ga juka— 'jau 'gā 'upa ajaupe.

Jejui 'ga ree jany kasiga reko'wokawet

(Maku 14.3-9; Juā 12.1-8)

⁶ Petani pe Jejui 'ga akou, Simāo 'ga rog ipe, ipito'om ma'efera 'ga 'wyr ipe.

⁷ Poje kūjā ēē mū 'ua 'ga rerowyka. Jany kasiga ryrūa ēē erua. Itasiga apopyra aipo yrūnamū, aripasi 'jawa apopyra. Jany kasig epy epy ete poromū. 'Ga jemi'wat 'ga renamū ēē ojany kasiga rerua eko'woka 'ga akag are.

⁸ Ēē remiapo resakawe ore Jejui 'ga remimu'eramū aramara'neramū ee. A'eramū ore 'jau arajaupe:

—Ma'eramū sipo ēē imomy ekoetei 'wei?

⁹ Epy te 'ā 'aga jany kasiga a'i kūi. A'eramū amunipo 'ā ēē ime'ega ka'aranūū are janee. A'eramū amunipo 'ā ēē epyfera mua janee. A'eramū amunipo 'ā jane imojo'oka ikaraemāe'ema 'gā nupe 'jau kūi— 'jau ore arajaupe.

¹⁰ A'ere Jejui 'ga arajaupe ore'eawera kwaawi. A'eramū 'ga 'jau oree:

—Ma'eramū pejemara'neramū ēē ree 'ū? Mama'e esagea te ēē wapo jee— 'jau 'ga oree.

¹¹ —Ikaraemāe'ema 'gā nooa'uweri futari pē nui. A'eramū pēē anure mama'e monou 'gā nupe. A'ere je te nako fukui futari pē pype— 'jau 'ga oree.

¹² —Je tymaw ipe je ree eko'wogipyrama futat jany kasiga numiamū. A'ere ēē 'awauwe eko'wogi je ree, je manū'e'emaue. Tene ēē iapoi jee— 'jau Jejui 'ga oree.

¹³ —A'jea futat je 'i. Anure nipo 'gā je mome'ui kwe pewara 'gā nupe. Amunawa tesirūmera moyka nipo 'gā awau je mome'wau kwe pewara 'gā nupe. Je mome'uramū nipo 'gā ēē remiapofera nanē imome'wau 'gā nupe nū. A'eramū nipo 'gā anure najuejue etee futat wea'aramū ēē remiapofer are— 'jau Jejui 'ga oree.

Mainana 'wyriara 'gā nupe Judas 'ga 'eawet

(Maku 14.10-11; Luka 22.3-6)

¹⁴ A'ere Jejui 'ga remimu'eramū ore mū oi oporogytau mainana 'wyriara 'gā nupe. Judas Iskariote 'ga futat poromū oo oporogytau 'gā nupe:

¹⁵ —Taesaukat Jejui 'ga pē nupe 'jau. A'eramū sipo pēē ma'ja mua jee 'ga resaukara repyramū?— 'jau 'ga awau 'gā nupe.

—Trīta prata apopyrera ka'aranūū ywope'ia simono enee 'jau— 'jau 'gā 'ga upe.

—Nai'i— 'jau 'ga 'gā nupe.

A'eramū 'gā trīta ka'aranūū ywope'ia monou 'ga upe, Jejui 'ga ojeupe esaukaawamū.

¹⁶ A'eramū Judas 'ga wea'aramū akou ee. “Ojeteē 'ga rekoramū tomono 'ga 'gā nupe 'jau kwy”, 'jau 'ga ojeupe. A'eramū 'ga Jejui 'ga rerekou weape.

Ae a'wyre'ema 'gā nupe

'ga monoara 'ga

(Maku 14.12-21; Luka 22.7-13, 21-23; Juā 13.21-30)

¹⁷ Awau owaēma mani'oko'o jopype'ema 'wawa upe, Pasikwa 'jawa apoawa upe. A'eramū Jejui 'ga remimu'eramū ore 'jau 'ga upe:

—Ma'ape te jane jemi'wari? karupa'mī ro'o reyri jarejee?— 'jau ore 'ga upe. —Awjja rog ipe ore erawau eya ki 'ei?— 'jau ore 'ga upe.

¹⁸ A'eramū Jejui 'ga 'jau oree:

—Pe'je pejewau Jerusareg ipe jarejekoty'aawa 'ga rog ipe. A'e futat je 'ga upe ai'i. A'eramū pēē pejewau 'jau 'ga upe: “Ku'jywa 'ga ore mut 'au. 'Nako fukui je 'gā nupe. A'eramū je enerog ipe tejemi'wariweramū tejemimu'e 'gā netee. Karupa'mī eyr are jeporo'uweramū tejemimu'e 'gā netee enerog ipe', e'i 'ga enee”, pe'je ki 'ga upe— 'jau Jejui 'ga oree.

¹⁹ A'eramū ore arawau iapou Jejui 'ga 'eawer imū etee futat. Maraka are ore iapou, Pasikwa 'jawa maraka are.

²⁰ Kaaruwamū Jejui 'ga awau ojemi'waa wemimu'eramū ore retee.

²¹ Orojemi'waaw ipe Jejui 'ga 'jau oree:

—A'jea futat je 'i. A'jea futat nipo pēē mū je mono pejepe je ree iporomutare'ema 'ga nupe je jukaukaa— 'jau 'ga oree.

²² Aipo renupawe ore aru'arasigamū 'ga je'eg are. A'eramū ore oroporonupa majepeinume ee 'ga upe aipo 'ga 'eramū:

—Je upe te ere poromū?— 'jau ore 'ga upe.

Majepeinumenume ore oroporonupa ee 'ga upe.

²³ A'eramū Jejui 'ga 'jau oree:

—Je pyri ojemi'wat ma'eramū futat nipo pēē mū je monou 'gā nupe— 'jau 'ga oree.

²⁴ —Ymā te Janeruwarete 'ga ka'arana kwasiarukari 'gā amū nupe rakue, jemanū are rakue. Pēneki'yra agawewi je 'ā. A'etea je ree iporomutare'ema 'gā je jukaukat 'gā nemikwasiarer imū etee futat. A'ere 'gā nupe je monoara 'ga tywereteramū te akou. Iporiay'i 'gā po pe je monoara 'ga numiamū. A'ere nipo Janeruwarete 'ga rereko tyweretei. Ma'eramū gatu nipo 'ā 'ga jeui rakue 'ja— 'jau Jejui 'ga oree.

²⁵ A'eramū ae a'wyre'ema 'gā po pe 'ga monoarama 'ga, Judas 'ga, oporonupa ee 'ga upe:

—Je upe te ere poromū, ki Ku'jyp?— 'jau futatee Judas 'ga 'ga upe.

—Ēē. Ene upe futat je 'i— 'jau Jejui 'ga 'ga upe.

Mani'oko'o'ia y'way reewe 'gā nupe imonoawet

(Maku 14.22-26; Luka 22.14-23; 1 Korītu 11.23-25)

²⁶ Orojemi'waaw ipe Jejui 'ga mani'oko'o'i pyyka. A'ere 'ga eramā'jāu ywau eroje'ega 'Uwarete 'ga upe:

—Au'jete mani'oko'o'ia eremut oree, Kiapi'ni— 'jau Jejui 'ga 'ga upe.

A'ere 'ga mani'oko'o'i mowoka imonou oree.

—Mani'oko'o'ia pepyyk i'wau. Koromū jero'oa— 'jau 'ga oree.

²⁷ A'ere 'ga y'way ryrū pyyka nū, eramā'jāu ywau nū. A'eramū futat 'ga oje'ega monou 'Uwarete 'ga upe nū:

—Au'jete y'waya eremut oree, Kiapi'ni— 'jau Jejui 'ga 'ga upe.

A'ere 'ga imua oree.

—Pe'je itykua pāwē pāwē.

²⁸ Koa y'way jerya futat. A'ere'ere'i nipo 'gā amū je jukai jery reko'woka. Aipoa jery jeko'woga pētywera omepey. Jemanū are futat Jeruwarete 'ga pē katu'ogi kwaiwete. 'Awamū karupa'mā nepejukau'jawi pejetywera mepyawamū. Poromū futat ako 'ga je'eg ymanera ai'i. A'ere 'awamū 'ga je'eg yaua. 'Awamū jerya tee pē pirei pētywer awi— 'jau 'ga oree. —Jemanū are tee Jeruwarete 'ga pētywera moia pē nui je rerowiaaramū. 'Awamū poromū futat Janeruwarete 'ga je'eg yaua 'awamū. A'ea 'ga je'ega nimojopy'ruawi futari 'awamū— 'jau 'ga oree.

²⁹ —A'jea futat je 'i. Je natykuru'jawi futari 'aga y'waya pē pyri. Anure tāmējē te nipo je itykuri pē pyri, Tejuwarete 'ga pyri pē neroo re tāmējē nū— 'jau Jejui 'ga oree ikue.

³⁰ 'Ga porogytapaw ire ore aramaraka'aga 'ga retee Jarejuwarete 'ga muorypawamū. Aramaraka'ag ire ore arawau ywytyr ipe, Oriweira 'jaw ipe.

Pedro 'ga momoranupawet

(Maku 14.27-31; Luka 22.31-34; Juā 13.36-38)

³¹ Arawaw ipe Jejui 'ga 'jau oree:

—Awamū futat nipo pekwasio'je wi je rejaa je mu'ama ojetee'i— 'jau 'ga oree. —Ymā te 'ā Janeruwarete 'ga ka'arana kwasiarukari 'ga amū upe ee rakue: “Tajuka karupa'mī are omaenun ma'e 'ga 'jau kwy. A'eramū 'ga reymawera 'gā awau okwasi'wau kwe pe 'jau kwy”, 'jau Janeruwarete 'ga ikwasiarukaa inuga ka'aran are rakue. A'eferupi tee futat nipo pekwasio'pejewau je wi— 'jau 'ga oree.

³² —A'ere je temanū re je ferawi nū. Teferaw ire nipo je oi Garireja ywy pe pē nenune— 'jau 'ga oree.

³³ A'eramū Pedro 'ga 'jau 'ga upe:

—Me te pa 'ga poromū 'jau nū. Je naejara'uweri futari ene mogou ojetee'i kūi. 'Gā te nipo opyamū ene wi ene rejaa ojetee'i kūi. A'ere je naejara'uweri ene kūi— 'jau Pedro 'ga 'ga upe.

³⁴ —A'jea futat sipo ere— 'jau Jejui 'ga 'ga upe. —Je te a'jea futat a'e enee nū'ū: 'Awa ppytuna rupi nipo je kwakuw ape muapyapyt katu 'gā nupe. “Nakwaawi je 'ga”, 'jau nipo ene wyrasokwē je'ege'emaue— 'jau 'ga Pedro 'ga upe.

³⁵ A'ere Pedro 'ga fuakaramū 'ga upe:

—Naani futari nū'ū. Na'ea'uweri futari je aipo 'jau nū'ū. “Nakwaawi je 'ga”, na'ea'uweri je. “Tene 'gā je jukai 'ga reewe futat”, a'e ete nipo je. Nakwakuwa'uweri futari je ene— 'jau Pedro 'ga Jejui 'ga upe.

Ore juejue nanē Pedro 'ga 'eawera rupi etee futat 'jau 'ga upe.

'Uwarete 'ga upe 'ga 'eawet

(Maku 14.32-42; Luka 22.39-46)

³⁶ Jejui 'ga awau owaēma Getsemani 'jaw ipe, wemimu'eramū ore retee. A'eramū Jejui 'ga 'jau ore:

—'Au ete pejup ra'ne. Iruupeu'i je oi teporogytau Tejuwarete 'ga upe ra'ne— 'jau 'ga ore.

³⁷ A'ere 'ga muapyra 'gā etee erooi ojeupi. Pedro 'ga, Tiago 'ga, Juā 'ga. Mīmera 'gā etee 'ga erawau ojeupi. Tiago 'ga, Juā 'ga retee Sepeteu 'ga ra'yra 'gā. Jejui 'ga 'arasiga 'ga mopy'awyrafenayau 'ga mogou.

³⁸ A'eramū 'ga 'jau muapyra 'gā nupe:

—Je'arasiga nipo 'ā je juka. Peser awi ete pejup. Peporogyta Jarejuwarete 'ga upe je pyri— 'jau 'ga 'gā nupe.

³⁹ A'eramū 'ga ojepe'au'i 'gā nui. Awau 'ūina peu'i wenupy'āu wapyka weakwara rerawau enūina ywy are futat erujaa oporogytau 'Uwarete 'ga upe:

—Kiapi'ni. 'Wyrira'ri 'gā imara'ne je ree. 'Gā nipo 'ā je rereko tywerete 'ja. Ojeupe ene iapoukare'em ire amunipo 'ā 'gā nuapoa'uweri nanuara je ree. A'ere 'ā najeremifutar imū rūi te ereapoukat. Ejemifutar imū etee te 'ā ereapoukat 'gā nupe jee— 'jau 'ga 'Uwarete 'ga upe.

⁴⁰ Oporogytapaw ire 'ga afu'ama awau muapyra 'gā pyri. A'ere 'gā seri 'upa. A'eramū 'ga 'jau Pedro 'ga upe:

—Peset te pejup? Pejeje'ega te nepemonoi'i Jarejuwarete 'ga upe je pyri? A'e'ja'wiramū miamū sipo nepoporogytai Jarejuwarete 'ga upe?— 'jau 'ga 'ga upe.

⁴¹ —Peser awi. Peporogyta Jarejuwarete 'ga upe. A'eramū pēē pejefuakaramū mama'e tywera apowe'em. Kasi a'e pe nepēfuakari ne. A'eramū pēē mama'e tywera etee iapou 'ga upe ne. Nepēparuapoweri agawewi nipo mama'e tywer are. A'etea nipo peapo. 'Ga upe pejeporogytawe'em 'eramū mama'e tywera etee futat peapo pejekou— 'jau 'ga 'ga upe.

⁴² Aipo 'ga upe 'e re Jejui 'ga awau 'gā nui nū oje'ega monou 'Uwarete 'ga upe nū:

—Kiapi'ni. Je ree iporomutare'ema 'gā ifuwet je ree. 'Gā te nipo 'ā je rereko tywerete 'ja. Ojeupe ene iapoukare'em ire amunipo 'ā 'gā nuapoi. A'ere 'ā najeremifutar imū rūi te ereapoukat. Ejemifutar imū etee te 'ā ereapoukat 'gā nupe jee— 'jau 'ga 'Uwarete 'ga upe.

⁴³ A'ere 'ga awau ojewya wemimu'e 'gā pyri nū. Nānēwējēmī 'gā 'upa nū. Osea etee 'gā 'upa nū. Wopepyejamū etee 'gā ajemogyau. A'eramū 'gā osea 'upa 'ga ruramū nū.

⁴⁴ A'eramū Jejui 'ga awau oporogytau 'japa 'Uwarete 'ga upe nū.

⁴⁵ 'Uwarete 'ga upe oporogyta re 'ga 'ua nū. Nānēwējēmī 'gā osea 'upa nū. A'eramū 'ga 'jau 'gā nupe nū:

—Peser etee futat nipo pejup nū ki sa? Au'je pejeser ire. 'Awamū futat 'gā Pēneki'yramū je monoi ae a'wyre'ema 'gā po pe.

⁴⁶ Pe'je iruukwe soo 'gā nekoaa 'jau. Kweramū ae a'wyre'ema 'gā po pe je monoara 'ga ruri— 'jau 'ga ore.

Jejui 'ga pyykawet

(Maku 14.43-50; Luka 22.47-53; Juā 18.3-11)

⁴⁷ Jejui 'ga porogytapawe'emauwe Judas Iskariote 'ga 'ua. Jejui 'ga remimu'eferamū ore mū poromū. Kwaiwete 'gā nerua erojemorypa Jejui 'ga ree. A'eramū mainana 'wyrira 'gā kwaiwete 'gā mua Judas 'ga rupi. Judeu 'gā 'wyrira'ri 'gā nanē kwaiwete 'gā mua 'ga rupi. Jyuua 'gā erua muap. Mīmera 'gā erua erojemorypa 'ga ree.

⁴⁸ Mainana 'wyrira 'gā nupe oporogytau Judas 'ga 'jau 'gā nupe rai'i: “Oo nipo je Jejui 'ga retywape pytea pē neape. A'eramū pēē a'e are 'ga kwaapa 'ga retywape pyteramū. A'erauwe futar iki pēē pejewau 'ga pyyka 'ga rerawau”, 'jau 'ga 'gā nupe rai'i.

⁴⁹ A'eramū 'ga owaēma ypy we awau Jejui 'ga rerowyka 'jau 'ga upe:

—'Au te ereko, ki Ku'jyp?— 'jau 'ga 'ga upe.

A'eramū futat 'ga 'ga retywape pytea.

⁵⁰ A'eramū Jejui 'ga 'jau 'ga upe:

—Ejemifutara eapo etee futat— 'jau Jejui 'ga 'ga upe.

A'erauwe Judas Iskariote 'ga remireroofera 'gā 'ua Jejui 'ga pyyka, 'ga pofaa.

⁵¹ A'ere Jejui 'ga remimu'eferamū ore mū ogyuu rekyita kūima'e 'ga amū ree, 'ga namī monoka. Furuk. Mainana 'wyrirarete 'ga remiayuwa 'ga namī yypa.

⁵² Aipo 'ga namī ywymū Jejui 'ga 'jau 'ga upe:

—Ereapo awi nanuara. Ere eju monou imunepa yrū pype kūi— 'jau 'ga 'ga upe. —Jyuu pyu ajajukaara 'ga te anure 'gā tajuka jyuu pyu 'jau— 'jau 'ga 'ga upe.

⁵³ —“Nopoari nipo 'ga ruwa 'ga 'ga”, pe'je nipo kūi. Ojeupe je enūi re amunipo 'ā Jeruwarete 'ga je poari futari. Kwaiwete amunipo 'ā 'ga ywagipewara 'gā mua je poaa— 'jau 'ga 'ga upe.

⁵⁴ —A'ere je naenūi 'ga upe. Wemifutar imū 'ga iapoa etee futat je afutat. Ymā te Jeruwarete 'ga ka'arana kwasiarukari 'gā amū nupe je pyyg are rakue. A'eramū je 'gā nemikwasiarer imū etee futat mama'e jeapo futaa tejee— 'jau 'ga oree.

⁵⁵ A'ere 'ga 'jau opyykara 'gā nupe:

—Ma'eramū pēē ma'eramū pejeua muawa pyu je nupāu ekoetei 'ū? muna'ywa 'jawe 'ū? Ma'eramū pēē muawa we erua jyuu reewe jejiara rupi 'ū? Jarejuwarete 'ga mogyaaw ipē 'gā mu'e je rekoramū miamū ako naje pyygi pejepe ai'— 'jau 'ga 'gā nupe.

⁵⁶ —Ymā te 'ā Janeruwarete 'ga ka'arana kwasiarukari 'ga amū upe jemanū are ikue. A'eramū 'ā pēē iapou 'ga remikwasiarer imū etee futat— 'jau 'ga 'gā nupe.

A'e renupawe ore Jejui 'ga remimu'eramū orokwasi'wau 'ga wi, 'ga reja, oroka'jama 'gā nui. Orokyjau 'gā oropyyg awi. A'eramū ore oroka'jama 'gā nui.

Anasi 'ga rog ipe 'ga rerooawet

(Maku 14.53-65; Luka 22.54-55, 63-71; Juā 18.13-14, 19-24)

⁵⁷ A'ere Jejui 'ga pyykara 'gā 'ga rerawau mainana 'wyriararete 'ga rog ipe, Kaifasi 'ga rog ipe. Peu futat judeu 'gā 'wyria'ri 'gā ajatykau Moisesi 'ga remikwasiarer are moromu'jara 'gā netee. A'eramū 'gā Jejui 'ga rerawau 'gā nupe.

⁵⁸ Pedro 'ga awau 'gā newiri. A'ere 'ga nuerowygi Jejui 'ga. Mukuu etee futat 'ga akou 'ga wi. Awau 'ga owaēma mainana 'wyriararete 'ga roga upe. A'ere Pedro 'ga nooi osou. Ukupepe etee futat 'ga awau akou 'oga osoma pype mainana 'ga remiayuwa 'gā pyri, Janeruwarete 'ga mogyaawa raarana 'gā pyri nanē nū. Jejui 'ga rereko renuw are Pedro 'ga oporenuwiweramū akou. A'eramū 'ga akou mukuu'i etee futat 'ga rereko renupa.

⁵⁹ Ojeupe 'gā Jejui 'ga reruramū mainana 'wyriara 'gā oje'ēma'e 'gā netee 'ga remiapo tywera mome'warām rekā. Judeu 'gā 'wyria'ri 'gā ajatykau 'gā nee nū.

—Sijuka futat 'ga 'jau— 'jau 'gā ajaupe. —A'ere jane nijuka ekoetei 'ga. Kasi a'e pe mytuna 'gā mara'neramū jane ree ne. A'eramū pēē i'me ma'e 'gā amū nerua. Jejui 'ga remiapo tywera 'gā tomome'u 'me janee 'jau— 'jau 'gā ajaupe.

⁶⁰ A'eramū kwaiwete 'gā 'ua o'meramū Jejui 'ga ree. A'ere 'gā naju'jaju'jawe rūi imome'ui 'gā nupe.

⁶¹ Poje mukūja 'gā 'ua o'meramū 'gā nupe:

—Ore aruenup 'ga je'ega ai'i. “Anure nipo je Jarejuwarete 'ga mogyaawa retygi. A'ere nipo je imuapyra 'ara rupi etee imowyri nū”, 'jau 'ga oreremianuwamū ai'— 'jau 'gā imome'wau mainana 'wyriararete 'ga upe.

⁶² Aipo ojeupe 'gā 'e renupawe mainana 'wyriararete 'ga afu'ama 'jau Jejui 'ga upe:

—Ma'ja ere te 'gā nupe? Nereje'egi te 'ā 'gā nupe aipo 'gā 'eramū a'i kūi?— 'jau 'ga 'ga upe.

⁶³ A'ere Jejui 'ga pigi etee u'ama. A'eramū mainana 'wyriararete 'ga 'jau 'ga upe:

—Jarejuwarete 'ga remianuwamū ere jee: Ene te Jarejuwarete 'ga remimurera? Ene futat te 'ga ra'yraretea?— 'jau 'ga 'ga upe.

⁶⁴ —A'jea futat ere poromū. Je te 'ā Pēneki'yraretea. Anure nipo je apygi Pājērete 'ga yse katy, 'ga jakwatawa katy. Peu je renamū nipo pēē je resaka. Anure nipo je ruri tejewya ywag awi ywasiga rupi— 'jau Jejui 'ga 'ga upe.

⁶⁵ A'erauwe mainana 'wyriararete 'ga waity monoroka amara'nea resaukaawamū.

—A'jea futat 'ga Jarejuwarete 'ga kurawi akou ra'e— 'jau 'ga 'gā nupe. —Jane futat te 'ā Jarejuwarete 'ga kurawa sienup 'awamū jarejemogyau. Na'gā amū rūi futat 'ā omome'u janee— 'jau 'ga 'gā nupe.

⁶⁶ —Ma'ja pe'je te 'ga upe?— 'jau 'ga 'gā nupe.

—Sijukaukat futat jane 'ga— 'jau 'gā 'ga upe. —Jarejuwarete 'ga te 'ā 'ga akurap.

⁶⁷ A'eramū futat 'gā onymuna 'ga reakwar are, opo afuapyka erofaa 'ga ree.

⁶⁸ Amumera 'gā 'jau 'ga nupā re 'ga upe:

—“Je te 'ā Jarejuwarete 'ga remimurera”, ere 'ā oree. A'eramū ene 'jau oree: Awŷja ene nupāu 'awamū 'ū?— 'jau 'gā 'ga upe, 'ga rerekoemāu erekou.

Pedro 'ga Jejui 'ga kwakupa

(Maku 14.66-72; Luka 22.56-62; Juā 18.15-18, 25-27)

⁶⁹ A'e pe Pedro 'ga 'ūina ukupepe. Poje mainana 'wyriararete 'ga remiayuwa ēē mū 'ua 'ga pyri 'jau 'ga upe:

—Ene Garireja ywy awi 'ut ma'efera kīā rewiri ako ma'eferamū ene, 'jau je rā, Jejui kīā rewiri ako ma'eferamū ene, 'jau je rā— 'jau ēē 'ga upe.

Janeruwarete 'ga mogytaawa raarana 'gā pyri 'ga renamū ēē 'jau 'ga upe.

⁷⁰—Tee. Naani nū ī. Nakwaawi je 'ga nū ī. A'eramū awyja upe ene 'jau ekou ī— 'jau futatee 'ga ēē upe, ojepeyriwara 'gā nemianuwamū. —Nakwaawi je ene'ea nū ī— 'jau 'ga ēē upe.

⁷¹A'erauwe 'ga afu'ama awau 'oga osoma rokwarea katy. Poje peu oporowyky ma'e ēē nū 'ga resaka nū. A'eramū ēē 'jau ojepeyriwara 'ga upe:

—Ko kīā Jejuu kīā rewiri ako ma'efera kīā futat. Nasare pe waranup ma'efera kīā rewiri ako ma'efera kīā futat— 'jau ēē 'ga upe.

⁷²A'eramū Pedro 'ga 'jau nū:

—Kuu. Ene'me awi ī. Manamū te je aipoa kūima'e 'ga kwaawi 'i ī— 'jau futatee 'ga ēē upe.

⁷³A'ere peu u'am ma'e 'ga amū 'jau 'ga upe nū:

—A'jea futat ēē 'i enee. Ene futat 'ga rewiri ako ma'eferamū— 'jau 'ga 'ga upe. —Sā'ā ene Garireja ywy pewara 'gā je'ega rerekoa. A'eramū ene 'ga rewiri ako ma'efera futat— 'jau 'gā Pedro 'ga upe.

⁷⁴—“Nakwaawi je 'ga” a'e je akiko. Janeruwarete 'ga remianuwamū te 'ā je 'eu'jawi. Nakwaawi je 'ga, 'jau. Nakwaawi je aipo pē'ea nū'ū. A'eramū pēē ma'ja upe 'jau pejejemogyau 'ū?— 'jau 'ga 'gā nupe. —Te'me re je Jarejuwarete 'ga tejereko tywera futari tejee nū'ū— 'jau 'ga 'gā nupe.

A'erauwe wyrasokwē je'egi.

⁷⁵A'erauwe Pedro 'ga wea'aramū Jejuu 'ga 'eawer are. “Wyrasokwē je'ege'emaue nipo 'Nakwaawi je 'ga' ereu'jau'jap 'gā nupe” 'eawer are Pedro 'ga wea'aramū. A'eramū 'ga ojenosōu aipo u'eawera rerawau enujāna pe awi. A'eramū futat 'ga u'arasigamū wea'aramū ee.

—Ma'eramū je aipo 'jau ra'e 'ū?— 'jau 'ga 'ūina u'arasigamū. —Mama'e esage na'ga 'ā wapo jee jepi re'ā. A'etea pa je 'ā aipo a'e ekoete 'gā nupe ra'e nū— 'jau 'ga ojeupe.

A'eramū 'ga ajaa'wau awau u'eawera raykau.

27

Piratu 'ga upe Jejuu 'ga reroowet

(Maku 15.1; Luka 23.1-2; Juā 18.28-32)

¹Ai'iwetetewe mainana 'wyriara 'gā judeu 'gā 'wyria'ri 'gā netee oje'ega ajaupe:

—“Je te 'ā Jarejuwarete 'ga ra'yraretea”, e'i ako Jejuu 'ga janee ko. A'eramū jane 'ga jukaukaa 'gā nupe— 'jau 'gā ajaupe.

²A'eramū 'gā 'ga faa, 'ga rerawau Piratu 'ga rog ipe. Romanū 'gā opytuna 'ga amū monou 'wyriaramū 'ga m'yina judeu 'gā nupe rakue, Piratu 'ga monou 'wyriaramū 'gā nupe rakue. A'eramū 'gā Jejuu 'ga rerawau Piratu 'ga upe.

Judas 'ga jejukaawet

(Atos 1.18-19)

³“Sijukaukat Jejuu 'ga 'gā nupe 'jau” 'e renupawe Judas Iskariote 'ga u'arasigamū 'gā nupe 'ga monoawer are. A'eramū 'ga Jejuu 'ga resaukaawera repyfera rerawau erojewya mainana 'wyriara 'gā nupe, judeu 'gā 'wyria'ri 'gā nupe nanē nū.

—Kweramū trīta ywope'ia je upe pēnemimurera.

⁴Mama'e tyweretea je aapo ai'i. Nuapoi futari 'ga mama'e tywera. A'etea je 'ga omono ekoete pē nupe ijukaukaa ai'i— 'jau 'ga awau 'gā nupe.

—Tee. Ene te futat te 'ā ere 'gā nupe rai'i— 'jau etee 'gā 'ga upe.

⁵Aipo ojeupe 'gā 'eramū Judas Iskariote 'ga ka'aranūū ywope'i monou imomopoa ywyu 'gā nowase. A'eramū 'ga uēma awau ojejukau tupaama pyu.

⁶Judas Iskariote 'ga ēmauwe mainana 'wyriara 'gā wowase 'ga remimomoporera ka'aranūū ywope'i mono'oga.

—Koa ako jane ka'aranūūa simono Jejuu 'ga resaukaawamū 'ga upe ai'i. A'eramū koromū 'ga repyfera futat— 'jau 'gā ajaupe. —“Aerepyfera perur awi Jarejuwarete 'ga mogytaaw ipe”, e'i 'ā Moisesi 'ga rakue. A'eramū jane imonowarū'em Jarejuwarete 'ga mogytaawa ka'aranūū ryrū pype— 'jau 'gā ajaupe. —Maran ajee jane erekoi 'ū?— 'jau 'gā ajaupe.

—Ywya simut ape judeue'ema 'gā nywymū kūi— 'jau 'gā ajaupe.

⁷Oporogytapaw ire 'gā erawau japepo apoara 'ga upe, 'ga ywy muawamū.

—Awa ywya judeue'ema 'gā nywya— 'jau 'gā ajaupe.

⁸Ka'aranūū ae repyfera 'gā imonou 'gā nupe ywy muawamū ojeupe. A'eramū 'gā aipo ywy re'roka, “wy rupap” 'jau 'gā e'roka.

⁹⁻¹⁰Ymā te 'ā Jeremi 'ga oje'ega kwasiari aipo are rakue:

“Ywya pemut 'ga repyfera pyu. Japepo apoara 'ga ywya pemut, ere ki 'gā nupe”, 'jau Ku'jywa 'ga jee ikue.

“A'eramū je 'ga 'eawera mome'wau 'gā nupe.

'Trīta ka'aranūū ywope'ia simono 'ga muawamū 'jau', 'jau 'ga rakue.
A'eramū 'gā 'ga repyfera pyu ywy mua, Ku'jywa 'ga 'eawer imū etee futat",
'jau Jeremi 'ga ikwasiaa rakue.

A'jea futat 'ga remikwasiarera. Ywya 'gā imua Jejui 'ga repyfera pyu, Jeremi 'ga 'eawer imū etee futat.

*Jejui 'ga upe Piratu 'ga poronupawet
(Maku 15.2-5; Luka 23.3-5; Juā 18.33-38)*

¹¹ Ojeupe Jejui 'ga reruramū Piratu 'ga oporonupa ee 'ga upe:

—A'jea te ene 'wyriaramū judeu 'gā nupe?— 'jau 'ga Jejui 'ga upe.

—A'jea futat— 'jau 'ga 'ga upe.

¹² A'eramū mainana 'wyriara 'gā 'ga je'ēwu'jaga judeu 'gā 'wyria'ri 'gā netee. A'ere 'ga noje'egi futari oje'ēwu'jagamū.

¹³ A'eramū Piratu 'ga 'jau 'ga upe:

—Nereenuwi te 'gā je'ega? Ma'eramū nā'ā nereje'egi 'gā nupe re'ā?— 'jau 'ga 'ga upe.

¹⁴ A'ere Jejui 'ga noje'egi futari 'gā nupe. O'meramū te 'gā 'i. A'eramū 'ga oje'ege'ema 'gā nupe. A'eramū Piratu 'ga oporesagamū etee 'ga ree. "Ma'eramū sipo 'ga noje'egi?" 'jau 'ga ojeupe.

*'Gā nupe Jejui 'ga monoawet
(Maku 15.6-15; Luka 23.13-25; Juā 18.39-19.16)*

¹⁵ Mani'oko'o jopype'ema 'wawa maraka apoawa rupi Piratu 'ga moromunepawa pype imunewipyrrera 'ga amū muēma judeu 'gā nupe jepi, 'gā nemienūiwera 'ga 'ga imuēma 'gā nupe jepi.

¹⁶ A'e pe a'eramū Parapasi 'ga 'ūina moromunepawa pype. Oporojuka ma'e 'ga. Judeu 'gā nemiesagete 'ga.

¹⁷ A'eramū Piratu 'ga 'jau 'gā nupe:

—Maranuara te je amuēm pē nupe? Jejui 'ga, Ku'jywa 'ga remimurera 'jawa 'ga te ra'u pefutat nū? Parapasi 'ga te ra'u pefutat nū?— 'jau 'ga 'gā nupe.

¹⁸ Piratu 'ga mainana 'wyriara 'gā kwaapa futat. "Werekoy pa 'gā 'ga ra'e. A'eramū pa 'gā a'eramū 'ga rerua jee ra'e", 'jau Piratu 'ga ojeupe. "A'ere mytuna 'gā poromutaramū 'ga ree. A'eramū nipo 'gā 'jau: 'Jejui 'ga emut oree', 'jau nipo 'gā jee", 'jau Piratu 'ga ojeupe.

¹⁹ 'Wyriara kanawa 'arimū Piratu 'ga 'ūina oporogytau 'gā nupe. Poje 'ga amū 'ua 'ga remireko ēē je'ega rerua 'ga upe: "Epoit kiā wi. Nuapoa'uweri kiā mama'e tywera. Afayup je kiā ree ko. Jefayuwa je mopiryi ko. A'eramū ene epoia kiā wi. Erereko tywet kasi kiā ne", 'jau ēē oje'ega mua omena 'ga upe, Piratu 'ga upe.

²⁰ A'e pype mainana 'wyriara 'gā judeu 'gā 'wyria'ri 'gā netee mytuna 'gā mojerowiarukaa oje'eg are.

—"Parapasi 'ga ki emuēm imua oree", sa'e 'ga upe 'jau. "A'eramū ene Jejui 'ga jukaukaa jefaruu 'gā nupe", sa'e 'ga upe 'jau— 'jau 'gā mytuna 'gā nupe, 'gā mojerowiarukaa ee.

²¹ A'eramū Piratu 'ga 'jau 'gā nupe:

—Maranuara 'ga te pefutat je imuēma pejejeupe?— 'jau 'ga 'gā nupe.

—Parapasi 'ga te ki emuēm imua oree— 'jau 'gā 'ga upe.

²² A'eramū Piratu 'ga 'jau 'gā nupe:

—Maran te jane Jejui 'ga rerekoi? "Ku'jywa 'ga remimurera" 'jawa 'ga rerekoi?— 'jau 'ga 'gā nupe.

—Ejukaukat 'ga 'ypeywar are— 'jau 'gā 'ga upe.

²³ A'eramū Piratu 'ga oporonupa ee 'gā nupe:

—Ma'ja te 'ga wapo ajukaawamū pē nupe rai'i?— 'jau 'ga 'gā nupe.

A'ere 'gā afukafukai tee ajemogyau:

—Ejukaukat futat Jejui 'ga 'ypeywar are 'gā nupe— 'jau 'gā wojere'emamū futat wafukaita 'ga upe.

²⁴ Niporenuwiweri 'gā 'ga je'eg are. A'eramū 'gā ojopy'rapy'rau etee futat wafukaita Piratu 'ga upe. A'eramū Piratu 'ga 'jau ojeupe: "Amono pa ajee je 'ga 'gā nupe kwy. Kasi a'e pe 'gā ore apisi ne kwy", 'jau 'ga ojeupe. A'eramū 'ga 'jau wemiayuwa 'ga amū upe:

—'Ya erut ara jee— 'jau 'ga 'ga upe.

A'eramū 'ga 'y rerua 'ga upe. A'eramū Piratu 'ga ojepoeita mytuna 'gā nowase.

—Peesak je jepoeja. Je najeporujukaweri 'ga ree. "Nuapoi 'ga mama'e tywera", a'e je ako pē nupe ko— 'jau Piratu 'ga 'gā nupe. —Je apoit futat 'ga wi, 'ga monou pēpo pe. A'eramū je tejepoeita pē nowase 'ga wi tepoiawa resaukaawamū— 'jau 'ga 'gā nupe.

²⁵ A'eramū mytuna 'gā 'jau 'ga upe:

—"Ejukaukat 'ga", aru'e ore enee. Ore te 'ā arajukaukat 'ga 'gā nupe. A'eramū nipo a'e are Janeruwarete 'ga ore rerekou tyweaete orera'yra 'gā neewe— 'jau 'gā 'ga upe.

²⁶ A'eramū Piratu 'ga Parapasi 'ga muēmukaa moromunepaw awi 'gā nupe. A'eramū 'ga 'jau jefaruu 'gā nupe:

—Pe'je Jejui 'ga rerawau 'ga nupāu jea'gue'em futat. 'Ga nupāmaw ire pēē 'ga rerawau 'ga mu'ama 'ypeywar are— 'jau 'ga 'gā nupe. —A'eramū 'ga peu etee futat amanūmū u'ama 'jau— 'jau 'ga 'gā nupe.

Jefaruu 'gā Jejui 'ga rerekoemāawet

(Maku 15.16-20; Juā 19.2-3)

²⁷ 'Ga nupā jea'gue'em ire jefaruu 'gā Jejui 'ga rerawau 'ga rerosou Piratu 'ga rog ipe nū. A'eramū 'gā opytuna 'gā majatykau 'ga ree.

²⁸ A'eramū 'gā 'ga raity mosoka 'ga wi. 'Wyriara raity piraga pyu 'gā 'ga kupe pīaa.

²⁹ A'ere 'gā juapekagūū muap'ina akagyrunamū iapou 'ga upe. A'eramū 'gā imonou imunepa 'ga akaga pype. A'ere 'gā wyyra'i'i monou 'ga po pe. A'ere 'gā wapyka wenupy'āu 'ga rowase 'ga rerekoemāawamū etee.

—Pemā'ē judeu 'gā 'wyriararete 'ga ree ki sa. 'Wyriara raity piraga 'ga wereko imunepa 'awamū. 'Wyriara akagyruā nanē 'ga wereko nū. Wyyra'i'ia nanē 'ga wereko opo pe. 'Wyriararete 'ga nipo ki sa— 'jau 'gā ajaupe 'ga jaita 'ga rerekoemāu.

A'ere 'gā 'jau Jejui 'ga upe:

—Ene te 'ā 'wyriararetea judeu 'gā nupe ra'e. 'Awamū ereko 'wyriarareteramū nakwaparimū rūi futat 'gā nupe— 'jau 'gā Jejui 'ga upe, 'ga rerekoemāu erekou.

³⁰ A'ere 'gā onymuna 'ga ree. Wyyra'i'i 'gā ekyita 'ga po awi, 'ga akaga nupāu ipyu.

³¹ A'ere 'gā 'ga rerekoemā re taity piraga moia 'ga wi nū. A'ere 'gā 'ga raity munepa 'ga wi nū. A'ere 'gā 'ga rerawau 'ga jukaaw ipe.

'Ypeywar are Jejui 'ga monoawet

(Maku 15.21-32; Luka 23.26-43; Juā 19.17-27)

³² Jerusareg awi Jejui 'ga renuēma ypy we 'gā Simāo 'ga rekoa, Sirene wyw pewara 'ga rekoa. A'eramū jefaruu 'gā 'jau 'ga upe:

—'Ypeywara erokwap 'ga upe— 'jau 'gā 'ga upe.

A'eramū 'gā iupirukaa 'ga upe.

³³ Awau 'gā owaēma *Gogata* 'jaw ipe. ('Gā je'eg imū *Gogata* 'ea Aeakagera 'jawewara 'ea futat poromū).

³⁴ 'Ga rerowaēm ire 'gā muaga monou y'way pype 'ga upe numiamū. A'ere 'ga reapyoramū ee. A'eramū 'ga itykure'ema.

³⁵ A'ere 'gā 'ga jywa pypiraa 'ypeywar are. A'ere 'gā itaju pyu 'ga pokutuka 'ypeywar are. A'ere 'gā 'ga py maju'aaaju'arimū ikutuka itaju pyu. A'ere 'gā 'ga mafu'ama 'ga monou 'ga mu'ama 'ypeywara reewe futat. 'Ga rekoa futat 'gā imonou imu'ama 'ypeywar are ipokutuka. 'Ypeywar are 'ga mu'am ire 'gā 'ga raityfera mojo'oka ajaupe. Ita'i 'jawewara 'gā imomopoa 'upa wywu. A'eramū 'gā ijewag are 'ga raityfer mojo'oka. Sā'ā ae jugu momora. Nan futat 'gā ita'i 'jawewara momopori 'upa 'ga raityfera mojo'okawamū.

³⁶ 'Ga raityfera mojo'og ire 'gā wapyka 'upa 'ga rarūmū.

³⁷ A'ere 'gā 'yjepa'nī are ikwasiaripyrera monou inuga ikutuka 'yw are 'ga apyte'rarimū. "Koromū futat judeu 'gā 'wyriararetea" 'ea 'gā imonou ikwasiaa 'yjepa'nī are. A'ere 'ga resakara 'gā 'ga jukaawera kwaawi.

³⁸ 'Ga reewe 'gā mukūja muna'ywa 'gā monou imu'ama 'ypeywar are. Muna'ywa pō'ō me 'gā Jejui 'ga mu'ama.

³⁹ 'Gā pyu okwap ma'e 'gā Jejui 'ga rerekoemāu 'ga kurapa:

⁴⁰ —"Anure nipo je Jarejuwarete 'ga mogytaawa retygi. A'ere nipo je imuapya 'ara rupi imowyri nū", ere 'ā rai'i. A'eramū ene ejua ejypa 'ypeywar awi. Ejepoat ejetee futat— 'jau 'gā 'ga upe. —"Jarejuwarete 'ga ra'yramū je", ere 'ā jepi. A'eramū ene ejua ejypa 'ypeywar awi— 'jau 'gā 'ga upe.

⁴¹ Mainana 'wyriara 'gā, Moisesi 'ga remikwasiarer are moromu'jara 'gā, judeu 'gā 'wyria'ri 'gā. Mīmera 'gā nanē 'ga rerekoemāu 'upa nū.

⁴² —Opoat 'ga 'gā jepi. A'ere 'ga nojepoara'uweri futari. Israeu juapyreramū jane'wyriararetea e'i na a'e 'ga jepi re'ā? Siesag iki ajee 'ga rura 'ga jywa 'wei. 'Ga jyp 'ga ruramū sirowiat 'ga 'jau 'wei— 'jau 'gā ajaupe.

⁴³ —"Jarejuwarete 'ga ree je jemogypygyi", e'i 'ga 'ā akou jepi. Siesak 'ga 'ga poara 'jau. "Je 'ā 'ga ra'yra", e'i 'ga 'ā akou jepi— 'jau 'gā 'ga rerekoemāu 'upa 'ga jaita.

⁴⁴ 'Ga pyri imu'amipyrera 'ga amū nanē 'ga kurapa nū.

Jejui 'ga manūawet

(Maku 15.33-41; Luka 23.44-49; Juā 19.28-30)

⁴⁵ Kwara okwapa aje owepa. Ypytuna 'jawe futat oypyntunaiwamū. Kwara ajerewamū tāmējē awau weny jesagamū nū.

⁴⁶ Kwara renye'emauwe Jejui 'ga wafukaita oje'eg imū futat.

—*Eli eli lama sabactani*— 'jau 'ga oje'eg imū.

Oje'eg imū 'ga 'eawera: “Kiapi'ni, Kiapi'ni, ma'eramū te erepoit je wi?” 'ga 'ea futat poromū 'ga afukaja.

⁴⁷ Aipo 'ga 'e renupara 'gā amū 'jau:

—Eliasi 'ga 'ga wenūi— 'jau 'gā ajaupe.

⁴⁸ 'Ga pyriwara 'gā amū ujāna amynejuranū ppyka imonou imunepa y'waynana pype.

A'ere 'ga imonou iupia 'ywa rapefā are imonou Jejui 'ga upe 'ga remiypyteramū.

⁴⁹ A'ere amumera 'gā 'i:

—Tene ra'ne. Siesak Eliasi 'ga rura 'ga mosoga 'yypeywar awi ra'ne 'jau— 'jau 'gā 'gā nupe.

⁵⁰ A'ere Jejui 'ga wafukaju'japa nū. A'eramū futat 'ga amanūmū.

⁵¹ A'eramū futat Janeruwarete 'ga mogytaawa my'jawa rowoppea taitya otoroka opojo'ogamū mytera rupi. Ywate awi we futat 'ua opojo'ogamū ywyu. Ywya otomoga 'ga manūnamū, itauu nanē ojekajekau nū.

⁵² Teumera monoawera nanē ojeawopytymo'woka nū. Janeruwarete 'ga remiayyuwa 'gā kwaiwete oferapa ū'jāu ita kwar awi.

⁵³ A'ere oferap ma'efera 'gā Jejui 'ga feraw ire etee te 'gā oi osou Jarejuwarete 'ga 'wyrarete pe, Jerusareg ipe. Kwaiwete Jerusareg ipewara 'gā 'gā nesaka.

⁵⁴ Jejui 'ga manūnamū 'ga rarūarera 'gā 'ga manū resaka. Jefaruu 'gā, o'wryiara 'ga retee 'ga manū resaka. Mama'e tesirūgatua nanē 'gā esaka ywy yya reewe. A'eramū 'gā okyjaau ajemogyau. A'eramū 'gā 'jau:

—A'jea futat 'ga Ku'jywa 'ga ra'yra futat ra'e— 'jau 'gā ajaupe.

⁵⁵ A'e pype nanē Jejui 'ga rewiri ako ma'efera 'gā kūjāmera 'gā 'upa muku'i 'ga manū resaka nū. Garireja ywy awi 'ga rupi 'ut ma'efera 'gā futat. 'Ga rewiri futat 'gā akou mama'ea 'ga upe iapoaramū. Poromū kūjāmera 'gā 'up 'ga manū resaka.

⁵⁶ Ēē mū rera Mari Matarena, ajepeja ēē rera Mari. Aipoa Mari ēē Tiago 'ga y ēē Jose 'ga retee. Sepeteu 'ga ra'ya 'gā y ēē nanē akou 'gā pyri nū.

Ita kwara pype Jejui 'ga monoawet

(*Maku 15.42-47; Luka 23.50-56; Juā 19.38-42*)

⁵⁷⁻⁵⁸ Kaaruwamū Jose 'ga, Arimateja pewarera 'ga awau Jejui 'ga reumera renūina Piratu 'ga upe.

—Amanū Jejui 'ga ko. 'Ga reumera toroo inuga ita kwara pype 'jau— 'jau 'ga awau Piratu 'ga upe.

A'eramū Piratu 'ga 'jau 'ga upe:

—Ere 'ga rerawau inuga ipype— 'jau 'ga 'ga upe.

A'eramū Piratu 'ga oje'ega monou jefaruu 'gā nupe: “Pemut Jejui 'ga reumera imojypa 'ypeywar awi imonou Jose 'ga upe”, 'jau 'ga oje'ega monou 'gā nupe. Jose 'ga Jejui 'ga rerowiaara 'ga futat. Ika'aranūi kwai ma'e 'ga.

⁵⁹ 'Ga poromū Jejui 'ga reumera weroo iauwana inuga taity yau pyu, linu 'jawa pyu.

⁶⁰ A'eramū 'ga 'ga reumera monou inuga ita kwara pype. Ita kwar yaua poromū. Jose 'ga futat iapoukaa rakue. Ojeupe futat 'ga iapoukaa rakue numiamū. A'ere 'ga Jejui 'ga reumera monoi inuga oma'eramera pype futat. 'Ga mono re 'ga itapewuu mojerapa imonou imyina ita kwara rawopytymawamū. A'ere 'ga awau jui.

⁶¹ Mari Matarena ēē ajepeja Mari ēē retee wapyka 'upa ita kwara rowase.

Ita kwara raarana 'gā

⁶² Ai'iwe mainana 'wryiara 'gā fariseu 'gā netee awau oporogytau Piratu 'ga upe:

⁶³ —Oreera'ar ore Jejui 'ga 'meawer are. Amanūme'ēwe 'ga 'meramū oreē ikue: “Anure nipo je manūi. A'ere nipo imuapyra 'ara rupi je ferawi nū”, e'i futatee 'ga ikue— 'jau 'gā imome'wau Piratu 'ga upe.

⁶⁴ —A'eramū jefaruu 'gā amū iarūmū oreē. Kasi a'e pe 'ga remiayyuwera 'gā nuri 'ga reumera rerawau imima kwe pe ne. A'eramū 'gā 'jau ne: “Oferap futat 'ga u'eawer imū etee futat ra'e”, 'jau futatee nipo 'gā 'ga reumera mim ire ne. Aipo 'e re taetu 'gā 'mea 'ga 'meawera apyraawi ne— 'jau 'gā Piratu 'ga upe. —“Je te 'ā Ku'jywa 'ga remimurera”, e'i futatee 'ga ako ikue. A'ere 'ga 'me ate 'ga rekoramū rakue. A'eramū 'ga reumera mimarera 'gā 'mea 'ga 'meawera apyraapa ne— 'jau 'gā Piratu 'ga upe.

⁶⁵ A'eramū Piratu 'ga 'jau 'gā nupe:

—Pe'je ajee jefaruu 'gā amū rerawau iaaranamū— 'jau 'ga 'gā nupe.

⁶⁶ A'eramū 'gā jefaruu 'gā nerawau ita kwar ipe. A'ere 'gā ita kwara rawopytymawa mojewaka. “Gā amū ipe'aramū torokwaap 'gā iawopytymo'wokawera imojewakawer are

'jau', 'jau 'gã jefaruu 'gã nupe. A'ere judeu 'gã awau imojewag ire. Jefaruu 'gã etee ejaa iarũmũ.

28

Jejuí 'ga ferapawet

(Maku 16.1-10; Luka 24.1-12; Juá 20.1-10)

- ¹ Ikoal'i, ku'emaíw are, Mari Matarena êê awau ajepeja Mari êê retee ita kwara resaka.
- ² Poje wyw oyyita 'gã nee. Janeruwarete 'ga pyriwara 'ga amũ 'ua ojypa ywag awi 'gã nupe, ita kwara rawopytymawa pe'au jui 'gã nupe. A'ere 'ga 'ũina i'arimũ 'gã nupe.
- ³ Wenyfugamũ 'ga tupã werawa 'jawe. 'Ga ryrũa nanê waparasi gayramũ 'ga ree nũ.
- ⁴ Ywag awi 'ut ma'efera 'ga resakawe ita kwara rarũara 'gã okyjau oyyita 'ga wi. A'eramũ 'gã ajemogymogyau etee amanũ ma'e 'jawe.
- ⁵ A'eramũ ywag awi 'ut ma'efera 'ga 'jau kũjãmera 'gã nupe:
—Pekyje awi je wi— 'jau 'ga 'gã nupe. —Jejuí 'ga resaka te 'ã pejot, 'ypeywar are amanũ ma'efera 'ga resaka te 'ã pejot.
- ⁶ A'ere 'ga nitywi 'au. Oferap ako 'ga ko, u'eawer imũ etee futat ko. Pe'je pejejua 'ga rupawera resaka— 'jau 'ga 'gã nupe.
A'eramũ 'gã awau osou esaka.
- ⁷ A'eramũ 'ga 'jau 'gã nupe nũ:
—Pe'je pejewau pejejäna imome'wau 'ga remimu'e 'gã nupe. “Oferap kiã awau Garireja wyw pe pẽ nenune. Peu nipo kiã peesak”, pe'je ki 'gã nupe— 'jau 'ga kũjãmera 'gã nupe. —A'jea futat je imome'ui pẽ nupe— 'jau 'ga kũjãmera 'gã nupe.
- ⁸ A'erauwe kũjãmera 'gã awau ù'jãu ita kwar awi. Awau ujãna Jejuí 'ga remimu'eferamũ orepiara rupi. “Pekwap imome'wau” 'e ypyrauwe 'gã ujãna awau orepiara rupi. Okyjau futat 'gã ywag awi 'ut ma'e 'ga wi numiamũ. A'ere 'gã ku'iramũ etee ajemogyau awau ujãna.
- ⁹ 'Gã waw ipe Jejuí 'ga 'ua 'gã nekoaa.
—'Au te peko ra'e? Pẽpy'ata'waawa owaem pẽ nupe— 'jau 'ga 'gã nupe.
A'erauwe kũjãmera 'gã 'ua 'ga rerowyka anuruka 'ua 'ga py pyyka opou. A'eramũ 'gã 'jau 'ga upe:
—Ene te 'ã eneresage oree, Ku'jyp— 'jau 'gã 'ga upe 'ga rowase wããpyramũ 'upa.
- ¹⁰ A'eramũ Jejuí 'ga 'jau 'gã nupe:
—Pekyje awi. Pe'je pejewau je mome'wau jeremimu'efera 'gã nupe. “Pe'je pejewau Garireja wyw pe. Peu tajesaukat pẽ nupe 'jau”, e'i kiã pẽ nupe ko, pe'je ki 'gã nupe— 'jau Jejuí 'ga 'gã nupe.
- ¹¹ A'e pype ita kwara rarũarera 'gã amũ awau osou Jerusareg ipe. Mainana 'wyriara 'gã nupe 'gã awau, wemiesagera mome'wau 'gã nupe.
- ¹² Ojeupe 'gã imome'u re mainana 'wyriara 'gã judeu 'gã 'wyria'ri 'gã majatykau ojee. A'eramũ 'gã ojeupe imome'upyrera mome'wau ajaupe:
—Ma'ja te jane siapo 'awamũ?— 'jau 'gã ajaupe.
—Simono kwaiwete ka'aranũũa iarũarera 'gã nupe kũi— 'jau 'gã ajaupe.
- ¹³⁻¹⁴ A'ere 'gã iarũarera 'gã nenũina oporonupa ee 'gã nupe. Imome'u re 'gã 'jau 'gã nupe:
—Pemome'u kasi 'gã nupe ne. Pẽ'me oree. “Ypytunimũ ore serauwe Jejuí 'ga remiayuwa 'gã amũ nuri amunarũmũ 'ga ree ra'e”, pe'je oree peje'meramũ— 'jau 'gã 'gã nupe.
A'eramũ esakarera 'gã 'jau 'gã nupe:
—Tee nũ'ũ. Mama'e rarũaramũ ae nosera'uweri nũ'ũ. “Oroser ore jui ra'e” 'e renuw ire 'wyriara 'ga amara'neramũ ore ree ne nũ'ũ— 'jau 'gã 'gã nupe.
—Naani. 'Wyriara 'ga pẽ nenuw ire ore je'egi 'ga upe pẽ nupe. A'eramũ 'ga amara'ne'emamũ pẽ nee— 'jau etee 'gã 'gã nupe nũ. —Simepy pẽ pẽ'meramũ 'jau— 'jau 'gã 'gã nupe.
- ¹⁵ A'eramũ 'gã aipo 'gã 'eramũ 'gã mojerowiaa etee.
—Nai'i— 'jau 'gã 'gã nupe.
A'eramũ 'gã ka'aranũũ pyyka 'gã nui.
A'eramũ 'gã awau o'me mokwasi'wau kwe pe. A'eramũ kwaiwete judeu 'gã 'gã 'me rerowiaa ajemogyau.

Jejuí 'ga remimu'efera 'gã 'ga resaka

(Maku 16.14-18; Luka 24.36-49; Juá 20.19-23; Atos 1.6-8)

¹⁶ “Garireja wyw pe pekwap Jejuí 'ga resaka”, 'jau ywagipewara 'ga kũjãmera 'gã nupe rai'i. A'eramũ ore Jejuí 'ga remimu'eferamũ arawau Garireja wyw pe. Peu oroo re ore arawau wytyr ipe, 'ga 'eawer ipe etee futat.

¹⁷ Jejuí 'ga resakawe ore 'ga muorypa arajemogyau.

—Ene te 'ã eneresage, ki Ku'jyp— 'jau ore 'ga upe 'ga resakawe.

'Ga resaka agawewi ore arajemogyau. A'etea 'gã amũ nuerowiari 'ga.

¹⁸ Jeju'i 'ga 'ua ore rerowyka oje'ega oree:

—Janeruwarete 'ga je mogo 'wyrriaramũ najuejue etee futat pẽ nupe 'awamũ. Ywagipewara 'gã nupe, ywy pewaramũ pẽ nupe nanẽ nũ— 'jau 'ga oree.

¹⁹ —A'eramũ je 'jau 'awamũ pẽ nupe: Pe'je pejewau je mome'wau kwe pewara 'gã nupe najuejue etee futat. Amunawa moymoyka pejewau je mome'wau 'gã nupe, je rerowiarukaa 'gã nupe. Je rerowiar ire pẽẽ 'gã pymĩau 'y pe. 'Gã pymĩau pẽẽ iapou Jarejuwarete 'ga rer imũ, 'Ga ra'yrareteramũ je rer imũ, 'Ga 'Agesage 'ga rer imũ. Mĩmeramũ ore rer imũ ki pẽẽ 'gã pymĩau 'y pe.

²⁰ A'eramũ pẽẽ 'gã mu'jau jeje'eg are. “Peenup katu katu ki 'ga je'ega”, pe'je ki 'gã nupe. Kwe pe pejewau pejejemogyau pejejea'aramũ je'e are. “Ywy teepawe'emamũ je rekoi pẽ pyri au'jeteramũ futat” je'e are pejejea'aramũ pejejemogyau au'jeteramũ futat— 'jau 'ga oree.

Maku

Maku 'ga Jejuu 'ga rerowiaara. A'ere 'ga kunumūūa te wyy pe Jejuu 'ga rekoramū rakue. A'eramū 'ga watawe'em Jejuu 'ga rupi. Na'ga remimu'efera rūi 'ga. A'ere ywag ipe Jejuu 'ga jewyr ire Janeruwarete 'ga 'Agesagea ka'arana kwasiarukari Maku 'ga upe. A'eramū 'ga ka'arana kwasiaa inuga Jejuu 'ga remiapofer are rakue.

Juā Batista 'ga remimome'ufet

(Mateu 3.1-12; Luka 3.1-18; Juā 1.19-28)

¹⁻² Jejuu Kristu 'ga je amome'u pē nupe. 'Ga 'ā Janeruwarete 'ga ra'yraretea. A'eramū je morogyta esage mome'wau pē nupe 'ga ree. Ymā Janeruwarete 'ga ka'arana kwasiarukari Isai 'ga upe wa'yra 'ga ree rakue:

“Teje'ega mome'wara 'ga ra'ne nipo je amono ene renune, ene raperugawamū.

³ Amunawe'em ipe nipo 'ga amū awau akou wafukaita 'gā nupe:

'Pe'je Jarejararete 'ga rape katu'oka imonou 'ga renune.

Pepyo esage etee futar iki imonou jarejeupe 'ga ruawamū', 'jau nipo 'ga akou wafukaita amunawe'em ipe”,

'jau Janeruwarete 'ga ikwasiarukaa Isai 'ga upe rakue. “Jarejararete 'ga rapea pekatu'ok 'ga renunewe”, 'jau 'ga 'gā nupe. Aipo upe 'ga 'i “pejetywer awi pepoit” e upe te 'ga 'i.

⁴ Isai 'ga remikwasiarer imū etee futat ajee 'ā Juā Batista 'ga reko amunawe'em ipe Jarejuwarete 'ga je'ega mome'wau 'gā nupe rakue:

—Pe'je pejepoia pejetywer awi. Jui pepoir ire je pē pymīāu 'y pe, pejetywer awi pēpoiawera resaukaawamū. A'eramū Janeruwarete 'ga pētywera moia pē nui, pē mogyau wemiayuwamū— 'jau 'ga akou 'gā nupe amunawe'em ipe rakue.

⁵ Judeja ywy pewara 'gā, Jerusareg ipewara 'gā netee awau Juā 'ga je'ega renupa. Otywer awi 'gā poir ire, Juā 'ga 'gā pymīāu 'y pe. Jotāuy pe 'ga 'gā pymīāu. “Awamū mama'e esage etee taapo 'jau, Jarejuwarete 'ga je'eg imū 'jau”, 'jau 'gā ojepymīāukaa 'y pe 'ga upe.

⁶ Juā 'ga kameru rawa apopyrera rerekou waityramū imunepa. Wyra pirera 'ga erekou aku'afaawamū. 'Ga remi'ua tukut, eit. Mīmera 'ga remi'ua rakue.

⁷ Jejuu 'ga ree 'ga aipo 'jau rakue:

—Je rewiri te nipo 'ga amū ruri. 'Ga te kūima'eeteetea. Je nakūima'eeteete rūi. Akotee'i ma'ea te je— 'jau Juā 'ga 'gā nupe. —Apoat te je 'ga tekou.

⁸ Je 'ā 'a'jea futat apymī pēē 'y pe tekou. A'ere 'ga te nipo Janeruwarete 'ga 'Agesagea amut pē nupe— 'jau Juā 'ga wenupara 'gā nupe rakue.

'Y pe Jejuu 'ga pymīawet

(Mateu 3.13-17; Luka 3.21-22; Juā 1.31-34)

⁹ Jotāuy pe Juā Batista 'ga rekoramū Jejuu 'ga 'ua owaēma 'ga upe rakue. Garireja ywy awi, Nasare 'jaw awi 'ga 'ua owaēma 'ga upe. A'e pe 'ga ojepymīāukaa 'y pe Juā 'ga upe rakue.

¹⁰ 'Y awi awua ypy we Jejuu 'ga amā'jāu ywau ywaga woga resaka. A'e awi Janeruwarete 'ga 'Agesagea 'ua ojypa 'ga ree. Pykau 'jawe 'ua ojypa 'ga ree.

¹¹ U'agesage jyw ire Janeruwarete 'ga oje'ega mua ywag awi wa'yra 'ga upe:

—Ene te 'ā Jera'yraretea. Ene 'ā jeremifutararetea. Ene 'ā je muorypararetea ejee— 'jau 'ga oje'ega mua ywag awi 'ga upe.

Amunawe'em ipe Jejuu 'ga rerawaawet

(Mateu 4.1-11; Luka 4.1-13)

¹² Aipo re Janeruwarete 'ga 'Agesagea Jejuu 'ga rerawau amunawe'em ipe 'ga rerekou.

¹³ Kwarēta 'ara magwapa Jejuu 'ga akou jū me. Aipo pe 'ga rekwaw ipe futat mama'eukwaawa 'wyrriara 'jau 'ga upe: “Tamotywerukat 'ga 'jau kwy”, 'jau mama'eukwaawa 'wyrriara Jejuu 'ga upe numiamū. A'ere Jejuu 'ga nomojerowiyari futari mama'eukwaawa 'wyrriara akou rakue. Aipo jū me wyra jarūa kwaiwete agawewi. A'etea wyra nokoi 'ga ree. Omojerowiare'emauwe mama'eukwaawa 'wyrriara ojepe'au 'ga wi. A'eramū ywagipewara 'gā amū 'ua ojejukau Jejuu 'ga ree.

Jejuu 'ga porowyky ppyrua

(Mateu 4.12-22; Luka 4.14-15; 5.1-11)

¹⁴ Anure Jejuu 'ga Juā Batista 'ga rera renupa. “Juā Batista 'ga 'gā opyky imonou imunepa im'ina moromunepawa pype ai'i” e renupawe Jejuu 'ga awau jui, awau ojewya Garireja ywy pe nū. Morogyta esagea 'ga awau imome'wau peuwara 'gā nupe, Jarejuwarete 'ga wi 'ut ma'efera morogyta esage mome'wau 'gā nupe.

¹⁵ A'eramū 'ga 'jau 'gā nupe:

—Wemiayuwamū pē mogy are Janeruwarete 'ga fueweramū. A'eramū ki pēē pejepoia pejetywer awi. Anurenure'i nipo Janeruwarete 'ga wemimureramū je mŷi 'wyririamū pē nupe. “Pejetywer awi pepoir ire 'ga pē katu'ogi pē mogyau wemiayuwamū”, aipo 'ea ki perowiat— 'jau Jejuī 'ga 'gā nupe.

¹⁶ Garireja ypiāu reme'y warimū wataaw ipe Jejuī 'ga pira rewara 'gā nesaka, mukūja 'gā nesaka. Simāo Pedro 'ga taityuu momoa wewirera 'ga, Andre 'ga retee.

¹⁷ A'eramū Jejuī 'ga 'jau 'gā nupe:

—Pe'je pejējua je rupi. Simu'e pēē 'jau. Naipira rewara rūi pēē 'awamū. Jarejuwarete 'ga je'ega mome'wara te nipo pēē 'awamū— 'jau 'ga 'gā nupe.

¹⁸ A'erauwe 'gā taityuu rejaa awau 'ga rupi.

¹⁹ Iruupeu'i Jejuī 'ga 'gā amū nesaka nū, Tiago 'ga 'ga rewirera 'ga, Juā 'ga retee nū. Sepeteu 'ga ra'ya 'gā poromū. Yaruū pype 'gā 'upa 'uwa 'ga pyri, taityuu momyka.

²⁰ A'eramū Jejuī 'ga 'gā mo'wya nū:

—Pe'je pejējua je rupi pēē nanē nū— 'jau 'ga 'gā nupe.

A'erauwe 'gā 'ua ū'jāu yaruū awi. 'Uwa 'ga 'gā ejaa, 'ga upe oporowyky ma'e 'gā neewe. A'eramū 'gā awau Jejuī 'ga rupi.

Mama'eukwaawa rerekwat

(Luka 4.31-37)

²¹ Jejuī 'ga wemimu'e 'gā nerekou eruatau. Awau 'gā owaēma Kafanaū pe. Morowykye'ema rupi 'gā awau osou judeu 'gā jatykaaw ipe. A'eramū Jejuī 'ga ajatyka ma'e 'gā mu'jau 'Uwarete 'ga je'eg are.

²² 'Ga renupara 'gā oporesagamū ajemogyau 'ga ree. 'Wyririara 'jawe 'ga oporogytau 'gā nupe. A'eramū 'ga 'gā moporesagakaa etee ojee.

—Kuu. 'Ga pa'e aipo e'i ae mu'jau ra'e nū. NaMoisesi 'ga remikwasiarar are moromu'jara 'gā 'jawe rūi 'ga porogytai. Moisesi 'ga 'eawer are moromu'jara 'gā Moisesi 'ga 'eawer imū etee futat 'gā ae mu'ei— 'jau 'gā ajaupe. —A'ere Jejuī 'ga nanarūi. U'eawer imū etee futat 'ga jane mueapyoi ee— 'jau 'gā ajaupe, oporesagamū Jejuī 'ga ree.

²³ A'e pype mama'eukwaawa rerekwara 'ga amū 'ua owaēma 'gā nupe. Mama'eukwaawa 'ga wereko. A'eramū 'ga muafukaita:

²⁴ —Jejuī! Nasare pe waranup ma'eramū je 'i ene upe: Ma'ja are te ereko ki sa?— 'jau mama'eukwaawa Jejuī 'ga upe. —Ore momapa te erejot ra'e? Akwaap je ene. Jane 'arimūwara 'ga remimurera te 'ā ene— 'jau mama'eukwaawa Jejuī 'ga upe.

²⁵ A'eramū Jejuī 'ga 'jau jupe:

—Epije ene ekou. Ere ejepe'au 'ga wi— 'jau Jejuī 'ga jupe.

²⁶ A'eramū 'ga piREWARA 'ga wi uēmawamū 'ga monou 'ga moyyita nanimenime. A'eramū 'ga piREWARA waemamū ojepe'au 'ga wi.

²⁷ A'eramū esakarera 'gā opiryyjamū 'ga piREWARA pe'aramū. A'eramū taetu 'gā oporesagamū 'ga ree. A'eramū 'gā 'jau ajaupe:

—Kuu. Maran te 'ga mama'eukwaawa pe'ai 'ga wi nū'ū? Mama'e yau are te 'ga jane mu'ei? Mama'eukwaawa miamū 'ga je'ega wenup a'i kūi. Oje'eg imū etee futat 'ga mama'eukwaawa mojepe'aukari erekwara 'ga wi— 'jau 'gā ajaupe, oporesagamū Jejuī 'ga ree.

²⁸ Mama'eukwaawa wejue 'ga imonou 'ga wi. A'eramū taetu Jejuī 'ga rera okwasi'wau Garireja ywy pype kamēsīete.

Pedro 'ga rojo ēē

(Mateu 8.14-15; Luka 4.38-39)

²⁹ A'ere Jejuī 'ga uēma judeu 'gā jatykaaw awi wemimu'e 'gā netee. A'eramū Simāo Pedro 'ga, wewirera Andre 'ga retee 'ga mo'wya oje'wyr ipe. A'eramū Jejuī 'ga awau. Tiago 'ga, Juā 'ga. Mīmera 'gā 'ga erawau.

³⁰ Simāo 'ga rojo ēē oro'yramū 'upa okama pype. Jejuī 'ga rerowaēmawe Pedro 'ga 'jau 'ga upe:

—Jerojo ēē iro'y. Esak ēē ēē ro'y awi— 'jau 'ga 'ga upe.

³¹ A'erauwe Jejuī 'ga awau ēē resaka. A'eramū 'ga ēē poppyka, ēē ro'ya moia ēē wi. A'eramū 'ga ēē mowya ēē kama awi. A'eramū futat ēē afu'ama mama'e apou 'gā nupe, 'gā mojemī'waa.

Ojero'wu ma'e

(Mateu 8.16-17; Luka 4.40-41)

³² Kwara rese re, peuwara 'gā ojero'wu ma'e 'gā nerua Jejuī 'ga upe. Mama'eukwaawa rerekwara 'gā nanē 'gā erua nū.

³³ Amunaw ipewara 'gā ajatykaupap futat ukaripe.

³⁴ A'eramū Jejuu 'ga ojero'wu ma'e 'gā majarueteupap. Mama'eukwaawa nanē 'ga ipe'au kwaiwete 'gā nui. Mama'eukwaawa Jejuu 'ga okwaap futat numiamū. A'ere Jejuu 'ga nomoje'egukari, erekwara 'gā nui ipe'au.

Garireja ywy pype Jejuu 'ga rekoii
(Luka 4.42-44)

³⁵ Ypytu'nīnauwe Jejuu 'ga afu'ama awau awotywe'eme oje'ega monou 'Uwarete 'ga upe.

³⁶ Simão Pedro 'ga, opytuna 'gā netee awau kwe pe Jejuu 'ga rekaa.

³⁷ 'Ga rekoar ire 'gā 'jau 'ga upe:

—Mytuna 'gā ene rekat, ki Ku'jyp. Soo jarejewya 'gā pyri 'jau— 'jau 'ga 'ga upe.

³⁸ A'eramū Jejuu 'ga 'jau 'gā nupe:

—Pe'je iruukwe. 'Awamū jane oi ajepeja amunaw ipe te— 'jau 'ga wemimu'e 'gā nupe. —Janeruwarete 'ga je mono kwe pe nū. “Kwe pe ekwap je mome'wau 'gā nupe”, e'i 'ga jee ikue. “Pejetywer awi pēpoiweramū Janeruwarete 'ga imoiri pē nui, pē mogyau wemiayuwamū”, ta'e 'gā nupe 'jau— 'jau 'ga 'gā nupe. —Kwe pewara 'gā nupe aipo mome'wawamū nanē je ruri nū— 'jau 'ga 'gā nupe.

³⁹ A'eramū Jejuu 'ga awau watau Garireja ywy raapa. Judeu 'gā jatykaaw ipe 'ga 'gā mu'jau morogyta esage are. “Pejetywer awi pēpoiweramū Janeruwarete 'ga imoiri pē nui, pē mogyau wemiayuwamū”, 'jau 'ga 'gā nupe, 'gā mu'jau ee. Mama'eukwaawa nanē 'ga imoia erekwara 'gā nui nū.

Ipito'om ma'e

(Mateu 8.1-4; Luka 5.12-16)

⁴⁰ Ipito'om ma'e 'ga 'ua Jejuu 'ga pyri. Wenupy'āu 'ga wapyka 'jau Jejuu 'ga upe:

—Je resag ape, ki Ku'jyp. “Jejuu 'ga ae katu'okara”, e'i 'gā jee. A'eramū je tejua tejesaukaa enee. Je ree ejemuaēmiweramū je mokā'ē ape— 'jau 'ga 'ga upe.

⁴¹ Aipo ojeupe 'ga 'erauwe Jejuu 'ga ajemuaēma 'ga ree. A'eramū 'ga opo monou ipito'om ma'e 'ga 'arimū.

—Ko ajee je ene mokā'ēi 'wei— 'jau Jejuu 'ga 'ga upe.

⁴² Oje'arimū 'ga po mono ppyrauwe okā'jāu 'ga pito'oma 'ga wi. A'eramū futat 'ga pira ojekatu'oka.

⁴³⁻⁴⁴ A'eramū Jejuu 'ga 'jau 'ga upe:

—Eremome'u kasi emokā'ēawera tekotee 'gā nupe ne. Ere ewau ejesaukaa mainana 'ga upe ra'ne. “Je resag ape. Jepito'oma okā'ē je wi”, ere ewau 'ga upe. “A'jea futat ra'e”, te'i 'ga enee 'jau, ene resaka 'jau— 'jau Jejuu 'ga 'ga upe. —A'ere ene ejeymawa mū rerawau 'ga upe. A'eramū 'ga iapyau Jarejuwarete 'ga upe, 'ga muorypa enekā'ēawer are— 'jau Jejuu 'ga 'ga upe. —Moisesi 'ga 'eawer imū etee futat ene ejeymawa mū rerawau iapyaukaa Jarejuwarete 'ga muorypawamū. Ejeymawa mū rapyaukara ene ekā'ēawera resaukaawa futat— 'jau Jejuu 'ga ipito'om ma'efera 'ga upe.

A'eramū Jejuu 'ga 'ga monou mainana 'ga pyri.

⁴⁵ A'ere ipito'om ma'efera 'ga omokā'ēawera nomimi futari, Jejuu 'ga rera mokwasi'wau amunawa pype. A'eramū Jejuu 'ga rera renupara 'gā aku'iramū 'ga ree.

—Kuu. Jejuu 'ga 'ga pito'oma omokā'ē 'ga wi. Niesagi futari jane 'ga amū 'gā pito'oma mokā'ēa jepi— 'jau 'gā ajaupe.

A'eramū 'gā oporesagiweramū Jejuu 'ga ree. A'eramū Jejuu 'ga osowe'em amunawa pype. Amowapirukare'emamū 'ga nosei amunawa pype. Awotywe'em ipe etee futat 'ga akou. A'eramū kwaiwete 'gā 'ua 'ga rekaa. Tesirūmer imūwara 'gā 'ua 'ga rekaa.

2

Iteu ma'e 'ga

(Mateu 9.1-8; Luka 5.17-26)

¹ Ko'iko'i ete Jejuu 'ga awau ojewya Kafanaū pe nū. A'erauwe 'ga rera okwasi'wau amunawa pype kamēsiete. “Ut Jejuu 'ga owaēma ra'e”, 'jau 'gā ajaupe.

² A'eramū mytuna 'gā awau ajatykau 'ga ree, ojejaga 'ga rekwawa 'oga pype. A'eramū 'gā 'oga matyneema. Nitywi futari ae pyrugawa. 'Okwar ipe miamū futat nitywi ae pyrugawa. A'eramū Jejuu 'ga Jarejuwarete 'ga je'ega mome'wau 'gā nupe. “Pejetywer awi pēpoiweramū Janeruwarete 'ga pētywera moiri pē nui, pē mogyau wemiayuwamū”, 'jau 'ga 'gā nupe.

³ A'e pype irūpāwē 'gā iteu ma'e 'ga rerua, 'ga rupia. 'Ga rupawa pype 'gā 'ga rerua 'ga upe.

⁴ A'ere 'oga nijumpykwarie ae pyu. A'eramū 'gā 'ga rerosowarū'em. A'eramū 'gā 'ga rerawau 'ga roerojeupia 'opewuu apyte'rarimū. A'eramū 'gā 'oga pyrau'jaw ape mopoka jui. Imopog ire 'gā iteu ma'e 'ga monou imojypa. 'Ga rupawa reewe futat imonou tupaama pyu Jejuu 'ga rowase.

⁵ A'eramū Jejuu 'ga 'jau ojeupe: “Je rerowiat pa 'gā ajemogyau ra'e”, 'jau 'ga ojeupe. A'eramū 'ga 'jau iteu ma'e 'ga upe:

—Enetywera je amoit ene wi ki 'ei— 'jau 'ga 'ga upe.

⁶ Jejuu 'ga 'e renupawe Moisesi 'ga remikwasiarer are moromu'jara 'gā amū 'jau ojeupe etee futat.

⁷ “Kuu. Maran te 'ga nokyjei aipo 'e awi nū'ū? Jarejuwarete 'ga 'ga akurap ra'e. Janeruwarete 'ga etee te janetywera omoit jane wi. A'ere 'ga 'Enetywera je amoit ene wi' eramū 'ga 'Je Jarejuwarete 'ga 'jawe je rekoī 'ga 'i”, 'jau 'gā ojeupe etee futat.

⁸ A'ere Jejuu 'ga 'gā kwaawi ojee. A'eramū 'ga 'jau 'gā nupe:

—Ma'eramū pēē poromū 'jau pejejeupe 'ū?— 'jau Jejuu 'ga 'gā nupe.

⁹ —Je upe naayi. Iteu ma'e mafu'amaramū ae nanē ojotywera moiri ajau nū— 'jau 'ga 'gā nupe.

¹⁰ —Pēneki'yra je 'ā. A'eramū je tepājē resaukaa pē nupe. Iteu ma'e 'ga je amafu'am pē neape. 'Ga fu'ama resaka tajakwaap pejepe 'jau— 'jau Jejuu 'ga 'gā nupe. —“Aeteufera 'ga amafu'am. Aetywera 'ga omoit nanē ae wi nū”, tepe'je 'jau. Jeruwarete 'ga te 'ā opājē amut jee. A'eramū je pētywera moia pē nui, iteu ma'ea mafu'ama nanē nū— 'jau 'ga 'gā nupe.

A'eramū 'ga 'jau iteu ma'e 'ga upe:

¹¹ —Ere efu'ama jui. Ejupawa pyyka erawau eje'wyr ipe— 'jau Jejuu 'ga 'ga upe.

¹² Aipo ojeupe 'erauwe iteu ma'e 'ga afu'ama 'gā neape. A'eramū 'ga wupawa pyyka erawau enuēma 'og awi. A'eramū 'ga resakarera 'gā 'jau:

—Kuu. Amafu'am 'ga 'ga ki 'ei— 'jau 'gā ajaupe.

A'eramū 'gā oporesagamū 'ga ree. A'eramū 'gā 'jau Jarejuwarete 'ga upe:

—Ene te 'ā eneresage. Naruesagi ore nanuara mama'ea jepi— 'jau 'gā Jarejuwarete 'ga upe, 'ga muorypa ee.

Levi 'ga mo'wyawet

(Mateu 9.9-13; Luka 5.27-32)

¹³ A'ere Jejuu 'ga awau Garireja ypiaup upe nū. Kwaiwete 'gā awau 'ga rewiri 'ga rekaa. Wekoaramū 'ga 'gā mu'jau 'Uwarete 'ga 'je'eg are.

¹⁴ Awaw ipe Jejuu 'ga Levi 'ga resaka. Aufeu 'ga ra'yra 'ga. 'Wyrriararete upe ka'aranūū pyykara 'ga poromū Leviramū. 'Ga porowyky 'ga renamū Jejuu 'ga 'jau 'ga upe:

—Ere ejua je rupi— 'jau 'ga 'ga upe.

A'erauwe Levi 'ga afu'ama awau Jejuu 'ga rupi.

¹⁵ Anure Jejuu 'ga ojemi'waa Levi 'ga 'wyr ipe wemimu'e 'gā netee. 'Gā neewe 'wyrriararete upe ka'aranūū pyykara 'gā ojemi'waa. Mama'e tywera apoara 'gā nanē ojemi'waa 'gā pyri nū. Jejuu 'ga rewiri oo ma'e 'gā poromū.

¹⁶ A'eramū Moisesi 'ga remikwasiarer are moromu'jara 'gā Jejuu 'ga resaka, mama'e tywera apoara 'gā pyri 'ga jemi'waa 'ga renamū. Aipo moromu'jara 'gā fariseua. Jejuu 'ga resakawe 'gā 'jau 'ga remimu'e 'gā nupe:

—Kuu. Ma'eramū pē mu'jara 'ga ojemi'waa 'wyrriararete upe ka'aranūū pyykara 'gā pyri 'ū? Nia'wyrī 'gā kūi. Mama'e tywera apoara 'gā pype nanē 'ga reni ojemi'waa kūi. Nojemi'wari noko ae 'gā pyri 'ja. Nia'wyrī 'gā ajemogyau kūi— 'jau 'gā 'gā nupe.

¹⁷ Aipo 'ga 'e renupawe Jejuu 'ga 'jau 'gā nupe:

—'Gā pyri je rekoī 'gā poaawamū te nū'ū. Je 'ā morofuanugara 'jawewara te ako 'gā nupe. Sā'ā morofuanugara 'ga muaga monoa ojero'wu ma'e 'gā nupe etee. Nomono ekoetei futari 'ga ijero'wue'ema 'gā nupe muaga. Nan tee futat je. Ia'wyr'e'ema 'gā katu'okawamū te je ruri ikue. “Je jeresage”, pe'je 'ā. A'ere je naesage ma'eramū rūi je ruri pē katu'oka. Itywet ma'e 'gā katu'okawamū tee je ruri ikue— 'jau 'ga 'gā nupe.

'Gā jemi'ware'em are 'gā mu'eawet

(Mateu 9.14-17; Luka 5.33-39)

¹⁸ Juā Batista 'ga remiayua 'gā oporogytau Jarejuwarete 'ga upe ojemi'ware'eme. Fariseu 'gā nanē 'gā 'jawe ete iapou nū. A'eramū 'gā amū 'jau Jejuu 'ga upe:

—A'jea futat nū'ū. Juā Batista 'ga remiayua 'gā ojemi'ware'ema futat oje'ega Jarejuwarete 'ga upe jepi. Fariseu 'gā nanē ojemi'ware'ema oporogytau 'ga upe nū. Ma'eramū ajee eneremiayua 'gā nanarūi 'ū? Niojeri agawewi 'gā 'ā ojemi'war awi. A'etea 'ā 'gā oje'ega omono Jarejuwarete 'ga upe— 'jau 'gā Jejuu 'ga upe.

¹⁹ A'eramū Jejuu 'ga 'jau 'gā nupe:

—Akokatu ma'e 'gā nekokaturamū sipo 'gā nekokatu resakara 'gā ty'ara rerajemogyi maraka are? Naani. Sā'ā akokatu ma'e 'gā nekoramū ae poire'ema ojemi'war awi.

²⁰ A'eramū 'gā ore tāmējē opoia ojemi'war awi oporogytau Jarejuwarete 'ga upe— 'jau Jejuu 'ga oje'ega 'gā nupe. —Nan tee futat jeremiayua 'gā niojeri ojemi'war awi oje'epiri je rekoramū. Ojowi je o re te nipo 'gā nojemi'wari ajemogyau. Je o re nipo 'gā 'arasigamū

ajemogyau je ree. A'eramū nipo 'gā ojemi'ware'ema ajemogyau wea'aramū je ree— 'jau Jejuī 'ga 'gā nupe.

²¹ —Ymā te 'ā aeypy 'gā pē mu'ei mama'e are rakue. A'ere je 'ā 'awamū pē mu'ei nū. Amutee are je 'awamū pē mu'ei nū. A'ere nepemojopypea'uweri jeporogyta aeypy 'gā nemimome'ufer are. Jeporogyta are ojemu'e ma'eramū ki a'ea etee futat peapo. Pemojopyte kasi morogyta ymaner are ne. Morogyta ymaner are ojemu'e ma'e 'gā nuapoi jeporogytau mama'ea— 'jau Jejuī 'ga 'gā nupe. —Naperugi ae taity ymanera taity yau pyu. Kasi a'e pe opoejamū taity yau erojefuapygi etee ne. A'eramū futat taity ymanera otoroka etee nū.

²² Y'way yau ae nueko'wogi yrū ymanera pype. Yrū yau pype te ae eko'wogi. Yrū ymana pype sieko'wok 'eramū ajaiwamū erujewi. A'eramū futat opy'apefugamū wajaiwamū yrū pype. A'eramū futat wyrū kakau. A'eramū ojeko'woka. Yrū yau pype eko'wog ire ojeko'woke'ema. Wyrūa kaw'em nanē nū. Nan tee futat nepemojopypearūi jeporogytafera morogyta ymanera pyu— 'jau Jejuī 'ga 'gā nupe, 'gā mu'jau ee.

Morowykye'em are 'gā mu'eawet

(Mateu 12.1-8; Luka 6.1-5)

²³ Morowykye'ema mū rupi Jejuī 'ga awau juowuurana ko pyterimū wemimu'e 'gā netee. Wataaw ipe 'ga remimu'e 'gā a'ŷja pa'wau opo pe erawau.

²⁴ 'Gā nesakawe fariseu 'gā amū 'jau Jejuī 'ga upe:

—Kuu. Emā'ē 'gā nee ki sa. Eneremiayuwa 'gā opo'o a'ŷja i'wau ra'e ki sa. “Noporowykyauweri ae morowykye'ema rupi”, e'i nā'ā Moisesi 'ga jepi re'ā. Juowuuran a'ŷja po'oa aeporowykyta futat. Ymā te 'ā Moisesi 'ga 'i rakue: “Peporowyky kasi morowykye'ema rupi ne”, 'jau 'ga 'ā rakue a'i kūi— 'jau 'gā Jejuī 'ga upe.

²⁵ A'eramū Jejuī 'ga 'jau 'gā nupe:

—Ma'ja ajee Davi 'ga wapo rakue? Nepemogytai nipo ka'arana 'ga remiapofer are? Davi 'ga 'ā opy'arayparamū opytuna 'gā netee akou rakue.

²⁶ A'eramū 'ā 'ga awau osou Jarejuwarete 'ga mogytaaw ipe rakue. Ymā Apiata 'ga 'ūina 'wyrriaramū mainana 'gā nupe rakue. 'Ga renaw ipe Davi 'ga osou Jarejuwarete 'ga mogytaaw ipe rakue. A'e pe 'ga kanape pyyka ojeupe rakue. A'eramū 'ga i'wau. Opytuna 'gā nupe nanē 'ga imonou 'gā i'wawamū rakue. Na'gā nemi'ua rūi poa numiamū. Mainana 'gā etee aipo a'u. A'etea Davi 'ga opy'araypara rerekou a'u opytuna 'gā netee rakue— 'jau Jejuī 'ga imome'wau 'gā nupe.

²⁷ A'eramū 'ga 'gā mueapyou morowykye'em are:

—Ymā Janeruwarete 'ga morowykye'ema mogoi janeypy 'gā nupe rakue, 'gā pytu'wawamū rakue. Omuorypawamū nanē 'ga iapou rakue nū. Namorowykye'ema rūi 'ga wapo tenune. Aeypy 'gā na'ne tee 'ga wapo rakue. A'ere te 'ga morowykye'ema apoi 'gā nupe rakue.

²⁸ Je 'ā pēneki'yraretea, Jarejuwarete 'ga remimurera. A'eramū je 'jau pē nupe: “Je 'ā morowykye'ema jara”, 'jau je pē nupe. A'eramū je tee pē mu'jau morowykye'ema rupi pēnemiapoe'em are— 'jau 'ga 'gā nupe.

3

Ipoteu ma'e 'ga

(Mateu 12.9-14; Luka 6.6-11)

¹ Anure Jejuī 'ga awau osou judeu 'gā jatykaaw ipe nū. A'e pe ipoteu ma'e 'ga wapyka 'ūina.

² 'Ga resakawe Jejuī 'ga ree iporomutare'ema 'gā amū 'jau ajaupe nū:

—'Awamū 'ā morowykye'ema. Maran sipo 'ga 'awamū ipoteu ma'e 'ga rerekoi nū?— 'jau 'gā ajaupe. —'Ga po katu'ogamū ki sa'e 'ga upe: “Nuenuwi futari 'ga Moisesi 'ga porogytafera ra'e”, sa'e ki 'ga upe a'i kūi— 'jau 'gā 'upa ajaupe.

³ A'ere Jejuī 'ga ikwaawi ojee. A'eramū Jejuī 'ga 'jau ipoteu ma'e 'ga upe:

—Ere ejua 'au je pyri— 'jau 'ga 'ga upe.

⁴ A'eramū 'ga 'jau wesakara 'gā nupe:

—Ma'ja e'i te Moisesi 'ga morowykye'ema upe rakue? “Esage ma'ea etee ki peapo”, e'i te 'ga janee rakue? “Ia'wyre'ema etee ki peapo”, e'i te ra'u 'ga janee rakue nū? “Pejokatu'og iki”, e'i te 'ga janee rakue, “Tene imanūi”, e'i te ra'u 'ga janee rakue nū?— 'jau Jejuī 'ga 'gā nupe.

A'ere 'gā noje'egi futari amū.

⁵ A'eramū Jejuī 'ga amā'jāu 'gā nee ra'ne 'gā moyka. Amara'neramū 'ga 'gā nee. A'ere 'ga 'arasigamū nanē 'gā nee nū. Naeapyoweri wejue 'gā 'ga je'eg are. A'eramū 'ga 'gā neru'arasiga. A'ere 'ga 'jau ipoteu ma'e 'ga upe:

—Epo epopyo— 'jau 'ga 'ga upe.

A'erauwe futat ipoteu ma'e 'ga opo popywau. A'eramũ futat 'ga po ojekatu'oka.

⁶ A'e resakawe fariseu 'gã ù'jàu 'ga remiaywau 'gã netee. Amara'neramũ 'gã Jejuu 'ga ree, morowykye'ema rupi 'ga 'ga katu'ogamũ. A'eramũ 'gã afueweramũ 'ga ree.

—Maran te jane Jejuu 'ga jukai?— 'jau 'gã ajaupe.

Ojero'wu ma'e

⁷ A'ere Jejuu 'ga awau wemimu'e 'gã netee Garireja ypiauu pe nũ. Kwaiwete 'gã awau 'ga rupi. Garireja ywy pewara 'gã,

⁸ Judeja ywy pewara 'gã, Jerusareg ipewara 'gã, Itumeja ywy pewara 'gã, Jotã ry owajara katiwara 'gã, Tiro 'jawa pyriwara 'gã, Sidoma 'jawa pyriwara 'gã. Mimer ipewara 'gã awau Jejuu 'ga pyri. 'Ga rera wejue 'gã wanup. A'eramũ 'gã awau 'ga pyri.

⁹⁻¹⁰ Kwaiwete 'gã nuri 'ga pyri. Kwaiwete wejue 'ga ojero'wu ma'e 'gã majarueteu. A'eramũ ojero'wu ma'e 'gã ajamuajãna 'ga ree 'ga pyyg are.

—Eryr'gi je wi. Je pa'e nũ, ene py'rau nũ— 'jau 'gã ajaupe.

A'eramũ Jejuu 'ga 'jau wemimu'e 'gã nupe:

—Yara perut amũ jee. Yar ipe too te'aa 'gã nui 'jau. Kasi a'e pe 'gã naje moporogytaaruukari ne— 'jau 'ga 'gã nupe.

¹¹ 'Ga resakawe mama'eukwaawa rerekwara 'gã u'aa ojenuga Jejuu 'ga rowase. A'eramũ 'gã wafukaita:

—Ene 'ã Ku'jywa 'ga ra'yraretea— 'jau mama'eukwaawa rerekwara 'gã wafukaita.

Mama'eukwaawa 'gã muafukaita.

¹² A'eramũ Jejuu 'ga 'jau jupe:

—Pêê we aipo pe'je awi. Pêê we 'ã aipo pe'je ekoete— 'jau 'ga mama'eukwaawa rerekwara 'gã nupe, oje'ega moywyrafena.

Jejuu 'ga remimonorama 'gã

(Mateu 10.1-4; Luka 6.12-16)

¹³ Anure Jejuu 'ga awau ojeupia ywyty'rarimũ. Wemifutara 'gã 'ga enũina:

—Pe'je pejejua 'au je pyri— 'jau 'ga 'gã nupe.

A'eramũ 'gã awau 'ga repejãna 'ga rerowyka.

¹⁴ A'eramũ 'ga 'gã amũ mü'jàu 'gã nui. 'Ga remimũ'ëmera 'gã pytuna tusi.

—Pêê je amũ'ë 'gã nui tejepyriwaramũ. Anure nipo je pê monoi kwe pe morogyta esage mome'waramũ 'gã nupe, "Pejetywer awi pêpoiriweramũ Janeruwarete 'ga imoiri pê nui, pê mogyau wemiayuwamũ" 'e mome'waramũ— 'jau 'ga 'gã nupe.

A'eramũ 'ga 'jau 'gã nupe nũ: "Jeremimonorama 'gã", 'jau 'ga 'gã nupe.

¹⁵ 'Gã nupe nanê 'ga opãjê monoi.

—Tepãjêa je amono pê nupe mama'eukwaawa pe'aawamũ erekwara 'gã nui— 'jau 'ga 'gã nupe.

¹⁶ Aipo 'gã 'ga imũ'jàu wemimonoramamũ: Simão 'ga. Anure Jejuu 'ga 'ga re'roka Pedroa pyu.

¹⁷ Tiago 'ga, Juã 'ga retee. Aipo 'gã nuwa Sepeteu. Oje'eg imũ Jejuu 'ga 'jau 'gã nupe *Puanerigi* 'jau 'ga 'gã nupe. Aeje'eg imũ *Puanerigi* 'ea Tupã ra'yra 'ea poromũ.

¹⁸ Andre 'ga, Filipe 'ga, Patarumeu 'ga, Mateu 'ga, Tome 'ga, Tiago 'ga. Ajepeja 'ga, Tiago 'ga Afeu 'ga ra'yra. Tadeu 'ga, Simão Serote 'ga,

¹⁹ Judas Iskariote 'ga. Kũima'e tywera 'gã nupe 'ga me'egara 'ga poromũ.

Mama'eukwaawa 'wyriara mome'uawet

(Mateu 12.22-32; Luka 11.14-23; 12.10)

²⁰ 'Og ipe 'ga oramũ mytuna 'gã ajatykau 'ga ree. Kwaiwetewete wejue 'gã. A'eramũ Jejuu 'ga ojem'i'wararũme'em wemimu'e 'gã netee.

²¹ Aipo renupawe Jejuu 'ga jara 'gã 'jau 'ga upe. "'Ga jemuaru'e'ema te 'ga wereko", 'jau 'gã Jejuu 'ga upe. A'eramũ 'gã awau 'ga upe.

—Ere ejua 'gã nui— 'jau 'gã awau 'ga upe.

A'ere 'ga nooi.

²² Jerusareg awi Moisesi 'ga remikwasiarer are moromu'jara 'gã nuri rai'i. A'eramũ 'gã 'jau 'ga upe:

—Mama'eukwaawa 'wyriara je'eg imũ etee 'ga mama'e apoi. Pesepu* pãjê mü etee 'ga 'gã pirewara pe'ai 'gã nui— 'jau 'gã 'ga upe.

²³ A'eramũ Jejuu 'ga 'gã nenũina ojepyri. A'eramũ 'ga 'gã mu'jau ee. Mama'ea 'ga imome'wau 'gã nupe, 'gã mu'jawamũ.

* 3:22 Mama'eukwaawa 'wyriara rera mukũ tapy'jja je'eg imũ. Satanasi 'jawamũ, Pesepu 'jau nũ.

—Maran sipo mama'eukwaawa 'wyrriara a'eramū wemiayuwa pe'ai 'gā nui? Nope'ai futari.

²⁴ Sā'ā wyy pypewara 'gā ajuee amara'neramū 'gā jo'oga ajau. A'eramū 'gā amunipo ajuapisau. A'eramū futat 'gā amunipo ojomateepapa— 'jau Jeju' 'ga' 'gā nupe.

²⁵ —Sā'ā majepeja amunaw ipewara 'gā. Ajau ojo'og ire majepeja amunaw ipewara 'gā nānēwējēmī ajuapisau nū.

²⁶ Nan iapo re amunipo 'ā mama'eukwaawa remiayuwa jomateepawi ajaupi etee futat. Mama'eukwaawa 'wyrriara nomonoifutari wemiayuwa erekwara 'gā nui— 'jau 'ga' 'gā nupe.

²⁷ —Ose sipo muna'ywa ifuakat ma'e 'ga rog ipe, 'oga jara 'ga fare'em ire? Naani. Nosea'uweri. Ifuakat ma'e 'ga far ire etee isei 'ga rog ipe, 'ga karaemā pojekau 'ga wi. Mama'eukwaawa 'wyrriara ifuakat ma'e 'jawe futat. Ipājē futat numiamū. A'ere Janeruwarete 'ga te pājērete, mama'eukwaawa 'wyrriara pājē apyraapa. Ma'eramū 'ā ae Jarejuwarete 'ga pājē mū etee mama'eukwaawa pe'ai 'gā nui— 'jau Jeju' 'ga' 'gā nupe.

²⁸ —Pēnea'at ki pēē je'e are. Janeruwarete 'ga pētywera moia pē nui, jui pēpoiweramū. Akuraparamū miamū 'ga pētywera moiri pē nui ojeupe pēē enūjamū.

²⁹ A'ere 'ga U'agesage kuraparamū 'ga naekatu'ogu'jawi. 'Ga' Agesage kurapara 'gā ojereko tywerukaa 'ga upe. Nomoiri futari 'ga aipo 'gā tywera 'gā nui— 'jau Jeju' 'ga' 'gā nupe, 'gā mu'jau ee.

³⁰ "Mama'eukwaawa 'wyrriara pājē mū te 'ga mama'eukwaawa pe'ai 'gā nui" 'eramū 'gā Jarejuwarete 'ga' Agesage kurawī. A'eramū 'ga' 'gā mu'jau ee.

Jeju' 'ga' y ēē, 'ga' rewirera 'gā netee

(Mateu 12.46-50; Luka 8.19-21)

³¹ Jeju' 'ga' y ēē 'ut owaēma 'gā nupe 'ga' rewirera 'gā netee. A'ere 'gā nosei. A'eramū 'gā ukupepe etee 'upa. A'eramū 'ga' y ēē 'jau ukupepewara 'gā nupe:

—Peenūi kīā jee. Toroporogyta kīā upe 'jau— 'jau ēē 'gā nupe.

³² Kwaiwete 'gā 'upa Jeju' 'ga' pyri. A'eramū 'ga' amū 'jau 'ga' upe:

—Eney ēē 'ut owaēma enerewirera 'gā netee. Ukupepe 'gā' nuri 'upa. "Toroporogyta kīā upe 'jau", e'i eney ēē oree— 'jau 'ga' Jeju' 'ga' upe.

Aipo ojeupe 'eramū Jeju' 'ga' 'jau 'ga' upe:

—A'jea— 'jau 'ga' 'gā nupe.

³³ A'eramū Jeju' 'ga' 'jau ojeypyriwara 'gā nupe:

—Maranuaramū te pēē jey 'jawe jee? Maranuaramū te pēē jerewirera 'gā 'jawe jee nanē nū?— 'jau 'ga' 'gā nupe.

³⁴ A'eramū 'ga' amā'jāu wenupara 'gā nee. A'eramū 'ga' 'jau 'gā nupe:

—'Aga jey ēē 'jawewara 'gā, jerewirera 'gā 'jawewara 'gā— 'jau 'ga' 'gā nupe.

³⁵ —Jarejuwarete 'ga' je'ega renuparamū pēē jeyptuna 'jawe pejemogy, jerewirera 'jawe pejemogyau nū. Kūjāmeramū jerenyra 'jawe pejemogy, jey 'jawe nanē nū pejemogyau nū. Jarejuwarete 'ga' remifutar imū mama'e apoaramū jeyptuna 'jawe pejemogy jee— 'jau Jeju' 'ga' 'gā nupe.

4

Mama'e a'yi tymawet

(Mateu 13.1-23; Luka 8.4-15)

¹ Anure Jeju' 'ga' awau Garireja ypia reme'y'warimū nū. Kwaiwete 'gā ajatykau 'ga' ree. A'eramū 'ga' awau u'aa wapyka yaruu pype. A'eramū 'ga' yaruu pype u'ar ire oporogytau ojee ajatyka ma'e 'gā nupe. 'Ga' renupara 'gā 'upa 'yisiga pype.

² Mama'e mū 'ga' imome'wau 'gā nupe, 'gā mu'jau 'Uwarete 'ga' ree.

³ —Kūima'e 'ga' amū awau juowuuran a'jja momopoa oko pe.

⁴ A'eramū a'jja mū u'aa pe pe 'ga' wi. A'ere 'ga' imomopor ire wyra' i ruri i'wau etee 'ga' wi.

⁵ Amumera u'aa wyy a'wyr'e'ema pype 'ga' wi. Kwaiwete ita. A'eramū 'jja otywe'emamū jupe. 'Yi tywe'ria te. Jaruete futat opopoa numiamū.

⁶ A'ere nooi apoa kwe pe. A'eramū kwaraya imom'ijaga etee. Ita rakuwa ijukau etee.

⁷ Amumera a'jja u'aa juemy pype. A'eramū jua imoteu etee 'ga' wi. A'eramū jawaiwa iapisau etee. A'eramū u'ae'emamū 'ga' upe.

⁸ Amumera a'yi te aje u'at wyy katurama pype. A'eramū opopoa. A'eramū wyy esage pype u'at ma'efera te u'aramū. Kwaiwete u'aramū. Ajepeja 'ywa'aa trīta i'aa. Ajepeja 'ywa'aa sesēta i'aa. Ajepeja 'ywa'aa sēg i'aa— 'jau Jeju' 'ga' imome'wau 'gā nupe.

⁹ —Ee pejejeapyoweramū ki peapyaka katu jeje'eg are— 'jau Jeju' 'ga' 'gā nupe.

¹⁰ Ojeupe 'ga' porogytapaw ire mytuna 'gā awau ojewya oje'wyr ipe nū. A'ere 'gā amū pytai oporonupa ee 'ga' upe. A'eramū opyta ma'e 'gā awau 'ga' repejāna oporonupa 'ga' remimome'u are 'ga' remimu'e 'gā netee:

—Ma'ja are te ore mu'e ape poromū morogytau ra'e? Norereapyoi ete ore ee ki 'ei— 'jau 'gā 'ga upe.

¹¹ A'eramū Jeju'i 'ga 'jau 'gā nupe nū:

—Tejuwarete 'ga je'eg imū futat je ruri pē mu'jau 'ga ree. 'Awamū Jeruwa 'ga pē mogyi wemiayuwamū jeje'ega renupa katu katuarāmū, a'e je pē nupe— 'jau 'ga 'gā nupe. —A'eramū je morogytau etee pē mu'jau ee. Nomome'uayayi tāmēje je pē nupe.

¹² Kasi a'e pe tesirūmera 'gā we ikwaaw ekoete ne, a'e je pē nupe— 'jau Jeju'i 'ga 'gā nupe. —Jeje'eg are eapyowere'ema 'gā wanup futat jeje'ega numiamū. A'ere 'gā naeapyoi futari ee. Wesak agawewi 'gā 'ā mama'ea jeremiapoa. A'etea 'gā naeapyoi ee. Ma'eramū je 'ā morogyta etee imome'ui pē nupe pē mu'jawamū. Imome'u katu re 'gā neapyo ekoeteramū ajemogyau ee ne. Ee weapyo re amunipo 'ā 'gā pōiri otywer awi. A'eramū te amunipo 'ā Janeruwarete 'ga 'gā katu'ogi 'gā tywer awi— 'jau 'ga 'gā nupe.

¹³ —Ee pejejeapyoe'em ire maran amusipo 'ā pēē pēneapyo mama'e are pejejeupe je imome'urāmū?— 'jau Jeju'i 'ga 'gā nupe oporonupa ee.

¹⁴ A'eramū 'ga 'gā mueapyou ee:

—Sā'ā y'wa a'ŷja. Nan tee futat Janeruwarete 'ga je'ega. 'Ga je'ega mome'wara 'gā y'wa a'ŷi tymara 'gā jawe.

¹⁵ A'ŷja mū 'ā u'aa pe pe 'ga wi. A'ea 'ā wyra'ia 'ua i'wau etee. Nan tee futat Janeruwarete 'ga je'ega renupara 'gā amū. 'Ga je'ega renuwi futari numiamū. A'ere 'gā naeapyoi ee. A'eramū mama'eukwaawa 'wyriara 'ua erowiarukare'ema 'gā nupe: “Perowiar awi”, 'jau 'ua 'gā nupe. A'eramū futat 'gā momoirukaa je rerowiar awi— 'jau Jeju'i 'ga 'gā nupe.

¹⁶⁻¹⁷ —Sā'ā y'wa a'ŷja mū 'ara ywy'wre'ema pype ipopora numiamū. A'ere nitywi apoa. A'eramū opapapa etee nū. Nan tee futat nipo Janeruwarete 'ga je'ega renupara 'gā amū. Enupawe 'gā erowiaa. A'ere 'gā naeapyoi ee. A'eramū 'gā opoia kamēsiete erowiar awi. Erowiarāmū nipo 'gā amū 'gā nerekou tyweaete ee. A'eramū 'gā opoia 'ga je'ega renuw awi. ¹⁸ Sā'ā y'wa a'ŷja 'ara ju pype. A'eramū 'ā opopoa futat numiamū. A'eramū 'ā ju imoteu etee. Nan tee futat nipo 'gā amū Jarejuwarete 'ga je'ega renuwaiwi etee.

¹⁹ A'eramū nipo 'gā wemifutar are etee wea'aramū ajemogyau nū. Ojeka'aranūūrug are etee wea'aramū ajemogyau. Ojemuorypaw are etee nipo 'gā wea'aramū ajemogyau. A'eramū 'gā wea'aru'jawe'emamū nipo 'ga je'eg are.

²⁰ —Amumera 'gā te nipo ajee. Sā'ā y'wa a'ŷja ywy katurama pype u'at ma'ea. A'ea awau waranupa u'aramū. Nan tee futat Ku'jywa 'ga je'ega renupara 'gā neapyoramū ajemogyau ee. Wago'oramū miamū 'gā nopōira'uweri futari je rerowiar awi. Ojemogyppyka etee futat nipo 'gā ajemogyau je ree. Janeruwarete 'ga pājē mū etee futat mama'e esage apou ajemogyau. Sā'ā ywy katurama pype u'at ma'e 'ara. A'eramū 'ā u'aramū kwaiwete. Ajepeja 'ywa'aa trīta i'aa. A'ere ajepeja 'ywa'aa sesēta i'aa. Ajepeja 'ywa'aa sēg i'aa. Nan tee futat jeje'ega renupara 'gā mama'e esage apoi Jarejuwarete 'ga remifutar imū etee futat— 'jau Jeju'i 'ga 'gā nupe, 'gā mueapyou 'Uwarete 'ga je'ega renuw are.

Arāparīn

(*Mateu 5.14-16; Luka 8.16-18; 11.33*)

²¹ A'ere Jeju'i 'ga 'jau 'gā nupe nū:

—Nomonyga'uweri ae arāparīna mū imŷina imima mama'e 'ag are. Imonyg ire ae imonoi imŷina ajuesawamū te. A'eramū ose ma'e 'gā esaka tenamū. Nan tee futat ki pēē. Ee eapyo ma'eramū ki pēē tekotee 'gā mu'jau Jarejuwarete 'ga porogyta are.

²² Mama'e jemima pēē ikwaape'ema. A'ere nipo anure te pekwaap.

²³ Ee pejejeapyoweramū ki peapyaka katu jeje'eg are— 'jau Jeju'i 'ga 'gā nupe.

²⁴ A'eramū 'ga 'jau 'gā nupe nū:

—Pejejuka ki je'e are. Pejejaupe pēē mama'e apo 'jawerimū etee futat nipo Janeruwarete 'ga mama'e apoi pē nupe. A'ere 'ga taetu aipo mama'e apoi pē nupe.

²⁵ Mama'e rereko esageara 'gā a'jeteetewi mama'ea werekō. A'eramū taetu 'ga mama'e ppyygu'japa ojeupe. A'ere mama'e rereko esageare'ema 'gā nuerekou'jawi futari mama'ea. Erekopyrera miamū futat 'ga erekou'jape'ema— 'jau Jeju'i 'ga 'gā nupe. —Nan tee pēneapyo Jarejuwarete 'ga je'eg are. Oje'ega pēē enuw ire 'ga pē mueapyou oje'eg are. Oje'ega pēē enuwe'emamū 'ga nepē mueapyou'jawi oje'eg are— 'jau Jeju'i 'ga 'gā nupe imome'wau.

Y'wa a'ŷi

²⁶⁻²⁹ A'ere 'ga mama'e mū mome'wau 'gā nupe 'gā mu'jau nū:

—Sā'ā ko jara 'ga y'wa a'ŷi tyma oko pe. A'ere 'ga 'ā awau jui. Wea'aru'jawe'emamū futat a'ŷja tymawer are. “Ko sipo 'wei”, 'jawe'em futat 'ga 'ā y'wa a'ŷja upe. Opopoa nā'ā ojetee futat re'ā, u'aramū 'jau nā'ā re'ā 'jau 'ga. Weapyoe'emamū agawewi itymarera 'ga ee. Ywy pype otyim ire 'ā awau u'aramū, otyarūmū ko jara 'ga upe. A'eramū 'ga 'ā ipa'wau. Nan tee futat Janeruwarete 'ga remiayuwa. Oje'ega rerowiarāmū Janeruwarete 'ga 'gā mogyau

wemiayuamū. Jane 'ā 'ga je'ega te simome'u. A'ere 'ga te 'gā mueapyoi ee erowiarukaa 'gā nupe— 'jau Jejuu 'ga 'gā nupe.

'Ga rerowiaara 'gā momytunawam

(Mateu 13.31-32, 34; Luka 13.18-19)

³⁰ A'ere Jejuu 'ga 'jau 'gā nupe nū:

—Ma'ja 'jawe ajee Janeruwarete 'ga remiayuwa 'gā?— 'jau 'ga 'gā nupe.

³¹ —Sā'ā y'wa a'yi'ī'ia, mostarda 'jawa.

³² A'ere 'ā o'tym ire 'ā opopoa awau o'ywuoramū. A'eramū 'ā wya'ia aja'yrapyau akā are, waity mogyau ee— 'jau Jejuu 'ga 'gā nupe nū.

Aipo upe Jejuu 'ga wemiayuwa jemomytunawama te imome'ui 'gā nupe. 'Awamū 'ga rerowiaara 'gā ināinānī'ī etee. A'ere 'gā anure kwaiwete 'gā jemomytuni nipo ajemogyau.

³³ Morogytau Jejuu 'ga mytuna 'gā mu'jau 'Uwarete 'ga ree. A'eramū 'gā weapyoramū 'ga ree.

³⁴ Mytuna 'gā nupe 'ga morogytau etee imome'wau. A'ere 'ga wemimu'e 'gā mueapyoi oje'eg are, wemiayuwa 'gā etee erekou.

Ywyrū muojeawet

(Mateu 8.23-27; Luka 8.22-25)

³⁵ Aipo 'ara rupi, ppytunimū, Jejuu 'ga 'jau wemimu'e 'gā nupe:

—Pe'je soo jareyaapa 'jau— 'jau 'ga 'gā nupe.

³⁶ A'eramū 'ga remimu'e 'gā mytuna 'gā monou ojewi.

—Pe'je pejewau pejeje'wyr ipe— 'jau 'gā 'gā nupe.

Yarū pype 'ga renamū 'ga remimu'e 'gā awau u'aa yarū pype Jejuu 'ga pyri. A'eramū 'gā awau 'ga rupi. A'ere amumera 'gā oi oyarū pype 'gā newiri.

³⁷ 'Gā yaapaw ipe ywyrū 'ua erujewi 'gā nupe. 'Y rjuapia yara matyneema imotyppywya ja'wyja'wy 'gā nupe.

³⁸ A'ere Jejuu 'ga seri etee futat 'upa yara ku'a pe. Wakaga rerupa akagytpapawa 'jawewara 'arimū. A'eramū 'ga remimu'e 'gā 'ga renūina 'ga momaka:

—Ku'jyp! Ere epaka kūi! Sapap jane kūi— 'jau 'gā 'ga upe.

³⁹ A'erauwe Jejuu 'ga fu'amī oje'ega ywyrū upe, 'y rajapetega upe nanē nū:

—Peojet ki 'y rajapetek ywyrū retee— 'jau 'ga jupe.

A'erauwe ywyrūa wojeramū. 'Y rajapetega nanē wojeramū nū.

⁴⁰ A'ere 'ga 'jau wemimu'e 'gā nupe:

—Ma'eramū pejegyau nanimenime 'ū? Naje rerowiari tāmējē 'ā pejepe pejejemogyau— 'jau 'ga wemimu'e 'gā nupe.

⁴¹ A'eramū 'gā kyjea 'gā nerekou.

—Kuu. Ma'e pājē 'ga te jane sireko jarejepype nū'ū?— 'jau etee 'gā ajaupe. —Ywyrūa te 'ā 'ga amuojet erujewi jarejewi a'i kūi. 'Y rajapetega nanē 'ga 'ā imuojea erujewi nū. Ma'e pājē 'ga te nū'ū? Naesagi pa je 'ga amū je'ega ywytu upe jepi nū, ywytu muojera erujewi jepi nū— 'jau 'gā ajaupe oporesagamū ete 'ga ree. —Janeruwarete 'ga te wapoukat 'ga upe nū'ū— 'jau 'gā ajaupe.

5

Mama'eukwaawa rerekwat

(Mateu 8.28-34; Luka 8.26-39)

¹ Garireja ypiāu raapaw ire 'gā awau ojekoka Gerasa ywy are.

² A'e pe Jejuu 'ga uēma yarū awi. Yar awi 'ga ēm ppyrauwe kūima'e 'ga amū 'ua 'ga repejāna. Mama'eukwaawa rerekwara 'ga poromū.

³⁻⁴ Tywy 'arimū ete futat 'ga rekoī. A'eramū 'ga 'ua tywy awi Jejuu 'ga repejāna. Ipoju te 'ga akou. A'eramū 'ga pyriwara 'gā okyjau 'ga wi 'ga rekoramū. Apo fat agawewi futat 'gā 'ga, 'ga kupy faa itaju pyu agawewi. A'etea 'ga omonoonoog etee futat. A'eramū 'gā 'ga pofaa, 'ga pyfaa 'jau itaju pyu. A'ere 'ga imopeni etee. A'ere 'ga nipoje'okawi futari 'gā nupe.

⁵ Ywytyra rupi 'ga awau akou awotywe'eme. Opytawaipe etee peu. A'ere 'ga awau tywy pe nū. Mama'eukwaawa 'ga maema. Ita pyu 'ga ojekysau.

⁶ Jejuu 'ga resakawe 'ga ujāna u'aa wapyka wenupy'āu 'ga rowase.

⁷ A'eramū mama'eukwaawa 'ga muafukaita:

—Jejuu. Ku'jywa 'ga ra'yra 'ā ene. Maran te ore rereko ape 'awamū? Ore rereko tywer awi ape— 'jau mama'eukwaawa Jejuu 'ga upe.

⁸ “Ejepe'a 'ga wi”, e'i Jejuu 'ga mama'eukwaawa upe ra'e. A'eramū mama'eukwaawa aipo werekwara 'ga mu'eukaa 'ga upe.

⁹ A'eramū Jejuu 'ga 'jau jupe:

—Ma'ja te enerera?— 'jau Jejuu 'ga mama'eukwaawa upe.

A'erauwe 'jau 'ga upe:

—Kwaiwete ore 'ga pirowaramū. A'eramū 'gā ore renūina “kwai” 'jau ore— 'jau mama'eukwaawa 'ga upe.

¹⁰ A'ere mama'eukwaawa 'jau Jeju 'ga upe:

—'Ga wi ore monou kasi muku ore monoukar ape ne— 'jau mama'eukwaawa 'ga upe.

¹¹ Mama'eukwaawa rerekwara 'ga upe Jeju 'ga porogyta 'ga 'amamū tajaurana ojemi'waa 'upa wyty'rariimū.

¹² A'eramū mama'eukwaawa 'jau 'ga upe:

—Tajaurana wyty'ripe ore mono ape ore mogyau— 'jau 'ga upe.

¹³ A'eramū Jeju 'ga 'jau jupe:

—Pe'je ajee pejewau— 'jau 'ga jupe.

Tajaurana pytuna tois miu. A'erauwe mama'eukwaawa ū'jāu rerekwarera 'ga wi awau ojejaga tajaurana pype. A'eramū tajaurana mama'eukwaawa ojepyte ijeagamū erowawaka erajemogyau. A'eramū erawau enujāna erojypa ywy'amuku rupi eropopoa erawau eropapa 'y pe.

¹⁴ A'eramū tajauran are omaenun ma'e 'gā awau imome'wau amunaw ipewara 'gā nupe, jū mewara 'gā nupe. Mīmera 'gā nupe 'gā 'ga rera mokwasi'wau. A'eramū kwaiwete 'gā 'ua 'ga resaka.

¹⁵ Jeju 'ga pyri 'uawe 'gā mama'eukwaawa rerekwarera 'ga resaka. 'Ga resakawe 'gā oporesagamū etee 'ga ree ajemogyau. Jeju 'ga pyri 'ga reni wapyka. Mama'e tywera ojewi iēm ire 'ga 'ūina wapyka ojeyrūwunepa. I'akwaap 'ga a'eramū futat. A'eramū amunaw awi 'ut ma'efera 'gā oporesagamū etee 'ga ree.

¹⁶ A'erauwe 'ga katu'oga resakarera 'gā imome'wau 'gā nupe:

—Jeju 'ga mama'eukwaawa ope'a 'ga wi ko. A'eramū 'ga imonoukaa tajaurana pype ko. Ojepyte mama'eukwaawa reseramū tajaurana awau opopoa wypy'awygamū 'y pe ko— 'jau 'gā imome'wau 'ut ma'efera 'gā nupe.

¹⁷ Weymawa manū re 'gā 'jau Jeju 'ga upe:

—Ere ejep'e au ore wi kūi. Ene nenea'wyri ra'e kūi— 'jau 'gā 'ga upe.

¹⁸ A'erauwe 'ga awau u'aa yaruu pype nū. A'e pype mama'eukwaawa rerekwarera 'ga 'jau Jeju 'ga upe:

—Tene je oi ene rupi, ki Ku'jyp— 'jau 'ga 'ga upe.

¹⁹ A'ere Jeju 'ga 'i etee 'ga upe:

—Naani. Eje'wyr ipe te ekwap ejemome'wau epytuna 'gā nupe. Janeruwarete 'ga ajemuaēm ene ree. A'eramū 'ga mama'e esage apou ene upe. A'eramū ene ewau imome'wau epytuna 'gā nupe— 'jau Jeju 'ga 'ga upe.

²⁰ A'ere mama'eukwaawa rerekwarera 'ga awau amunawa moymoyka okatu'okawera mome'wau kwe pewara 'gā nupe. Tekapuru ywy pe 'ga awau Jeju 'ga remiapofera mome'wau. A'eramū enuparera 'gā oporesagamū 'ga ree, okatu'okawera 'ga imome'uramū.

Jairo 'ga ra'jyt

(Mateu 9.18-19; Luka 8.40-42)

²¹ A'ere Jeju 'ga awau ypiauu raapa wemimu'e 'gā nupi nū. 'Gā jekog ire mytuna 'gā 'ua ajatykau 'ga ree 'yisiga pype.

²² A'eramū Jairo 'ga 'ua oporogytau Jeju 'ga upe. Aipo 'ga judeu 'gā jatykaawa raarana 'ga. 'Ga 'ut wapyka wenupy'āu Jeju 'ga rowase.

²³ —Jera'jyra ēē amanū ja'wyja'wy 'upa ki 'ei. A'eramū je ene poreawua kūi. Teresak ēē ju 'jau, 'jau je tejua enee kūi— 'jau 'ga Jeju 'ga upe.

²⁴ A'erauwe Jeju 'ga awau 'ga rupi. Kwaiwete 'gā awau 'gā newiri. Ojopypyppypk te 'gā awau.

Ojero'wu ma'e kūjā ēē

(Mateu 9.20-22; Luka 8.43-48)

²⁵ Poje kūjā ēē mū 'ua Jeju 'ga rakyfet katy 'ga repejāna. Ojero'wu ma'e ēē. Tusi kwara ēē imu'aa akou ojero'wau. Nuogi futari ēē rya ēē wi. Ymā te 'ā ēē reko rakue.

²⁶ Morofuanugara upe ojesaukaa numiamū. A'ere morofuanugara mepyetea ēē ka'aranū mateepapa ekoete ēē wi. A'ere ēē nojekatu'ogi futari akou. A'ere ēē jero'wu jerekoete ēē ree.

²⁷⁻²⁸ A'eramū ēē Jeju 'ga rera renupawe 'jau ojeupe etee futat: “Kīā raity pyygamū tajekatu'ok 'jau kwy”, 'jau ēē ojeupe etee futat. A'eramū ēē 'ua 'ga rewiri. 'Ga rupisikawe ēē 'ga raity pyyka.

²⁹ A'erauwe ēē ry uoka ēē wi. A'eramū ēē 'jau ojeupe etee futat: “A'jea futat kīā pājēa ra'e”, 'jau ēē ojeupe. “Jejaruete je 'awamū nū”, 'jau ēē ojeupe etee futat akou.

³⁰ A'erauwe Jejuu 'ga 'jau ojeupe etee futat: “Ga amū ijaruete jepājē mū”, 'jau 'ga ojeupe etee futat. A'eramū 'ga ojerowaka 'jau mytuna 'gā nupe:

—Awŷja te owyk jeraity are ra'e?— 'jau 'ga 'gā nupe.

—Tee. Naje rūi— 'jau 'ga rewiri oo ma'e 'gā 'ga upe.

³¹ A'eramū 'ga remimu'e 'gā 'jau 'ga upe:

—Kwaiwete agawewi 'gā 'ā. A'etea 'ā ere “Awŷja te owyk jeraity are ra'e?” ere oree— 'jau 'gā Jejuu 'ga upe. —Nereesagi nipo 'gā jopypypypya?— 'jau 'gā 'ga upe.

³² A'erauwe Jejuu 'ga amā'jāu 'gā moyka ojee owyk ma'efera rekaa.

³³ A'erauwe ijaruete ma'efera ēē 'jau ojeupe: “Najemima'uweri je kīā wi. Okwaap futat kīā”, 'jau ēē ojeupe. A'eramū ēē awau wapyka wenupy'āu 'ga rowase. Oyyita ēē ojemome'wau 'ga upe:

—Je ako awyk eneraity are ko. Ymā te jerya nuogi je wi. A'ere eneraity are je wygauwe iogi je wi ko— 'jau ēē 'ga upe.

³⁴ A'eramū Jejuu 'ga 'jau ēē upe:

—Je rerowiat wejue te ape. A'eramū je ako ene katu'oka ko— 'jau 'ga ēē upe. —A'eramū ki ene epy'ata'waramū ekou. Enejaruete ene ekou— 'jau 'ga ēē upe.

Jairo 'ga ra'jyra ēē ferapawet

(Mateu 9.23-26; Luka 8.49-56)

³⁵ Eē upe Jejuu 'ga porogyta 'ga 'amamū Jairo 'ga remiayuwa 'gā amū 'ua 'ga rewiri:

—Amanū katu enera'jyra ēē ki 'ei. Au'je 'ga reruri re— 'jau 'gā 'ua 'ga upe.

³⁶ A'ere Jejuu 'ga 'i etee 'ga upe:

—Ene'arasig awi. Je rerowiat ki ape— 'jau ete Jejuu 'ga 'ga upe.

³⁷ A'ere Jejuu 'ga 'jau wewiri oo ma'e 'gā nupe:

—'Au etee ki pejup. Ore tee oroo orosou ēē resaka— 'jau 'ga 'gā nupe.

A'eramū 'ga muapyra 'gā etee erawau ojeupi. Pedro 'ga, Tiago 'ga, 'ga rewirera Juā 'ga. Mīmera 'gā etee 'ga erawau ojeupi.

³⁸ Jairo 'ga 'wyr ipe owaēmawe 'gā amanū ma'efera ēē ree ajatyka ma'e 'gā nesaka. Jairo 'ga ra'jyra ēē rapirūmū ēē rerekou. Wafukaita 'gā ajemogyau.

³⁹ A'eramū Jejuu 'ga 'jau 'gā nupe:

—Ma'eramū te pejoo'o ēē ree? Namanūi futari ēē. Oset tee ēē 'upa— 'jau 'ga ajatyka ma'efera 'gā nupe.

⁴⁰ Aipo ojeupe 'ga 'eramū 'gā 'ga rerekoemāu etee:

—Ene'me awi nū'ū. Amanū futat akiko— 'jau 'gā 'ga upe.

“Amoferap je ēē”, 'jau 'ga ojeupe. A'eramū 'ga 'jau 'gā nupe “Oset tee ēē 'upa”, 'jau ete 'ga 'gā nupe.

A'ere Jejuu 'ga 'jau 'gā nupe:

—Pe'je pejewau peje'jāu ukupepe— 'jau 'ga 'gā nupe.

A'eramū 'ga muapyra 'gā nerawau, kūjāmuku'i ēē jara 'gā neewe. A'eramū 'gā awau osou imy'ja'wi pype.

⁴¹ A'eramū 'ga amanū ma'efera ēē poppyka oje'ega ēē upe:

—Ere ejua ewya, ky'ri— 'jau 'ga ēē upe.

(Oje'eg imū 'ga 'i: *Tarita kumi. Tarita kumi* 'ea ere ejua efu'ama jui 'ea poromū.)

⁴² A'erauwe kūjāmuku'i ēē afu'ama okama awi, afu'ama awau watau. Tusi kwara ēē amu'at. A'eramū ēē watau 'gā neape. A'eramū 'gā oporesagamū etee ēē ree. A'eramū futat ēē ruwa 'ga 'jau ojeupe: “Amanū ako jera'jyra ako re'ā. A'ere pa 'ga 'ā jera'jyra moferawī jee nū”, 'jau 'ga ojeupe.

⁴³ A'ere Jejuu 'ga 'jau 'gā nupe:

—Je mome'u kasi pejepe kwe pe 'gā nupe ne, 'au je iapoawera ne— 'jau 'ga 'gā nupe.

A'ere 'ga 'jau ēē jara 'gā nupe:

—Pe'je ēē mojemī'waa— 'jau 'ga ēē jara 'gā nupe.

6

Nasare pe 'ga oawet

(Mateu 13.53-58; Luka 4.16-30)

¹ Anure Jejuu 'ga awau ojewya Nasare pe nū, waranupawer ipe nū. Wemimu'e 'gā 'ga erawau ojeupi.

² Morowykye'ema rupi 'ga awau osou judeu 'gā jatykaaw ipe. A'eramū 'ga 'gā mu'jau 'Uwarete 'ga porogyta are. A'eramū enupara 'gā amū oporesagamū 'ga ree.

—Ma'ape te 'ga jemu'ei mama'e are nū'ū? Awŷja te 'ga amu'akwaap mama'e are nū'ū?— 'jau 'gā ajaupe. —Ma'ja pājē mū ajee 'ga aeremiapoe'ema apoi?— 'jau 'gā ajaupe. —Maran ajee 'ga mama'e apoi mīnamū nū, aeremiapoe'ema mama'e apou nū?— 'jau 'gā ajaupe.

³—Ma'eramū sipo 'ga jane mu'ei mama'e are? NaMoisesi 'ga remikwasiarer are momoru'jara rūi agawewi 'ga 'ā. A'etea 'ga jane mu'e are ifuwet— 'jau 'gā ajaupe. —'Yjepana pinara agawewi 'ga 'ā. A'etea 'ga 'ā jane mu'e are ifuwet. Mari ēē ra'yra 'ga te 'ā. 'Ga rewirera 'gā ako 'au jane pyri. Tiago 'ga, Jose 'ga, Judas 'ga, Simão 'ga. Mīmēra 'gā 'ga rewirera. 'Ga renyra 'gā nanē 'ā ajemogyau 'au jane pype nū. Ma'eramū sipo 'ga jane mu'e are afuweramū? Nienuwa'uweri jane 'ga porogytaa— 'jau 'gā ajaupe.

⁴A'eramū Jejuī 'ga 'jau 'gā nupe:

—Sā'ā Janeruwarete 'ga je'ega mome'wara 'gā oa kwe pe 'ga je'ega mome'ua. A'eramū 'ā kwe pewara 'gā jēmī 'gā je'ega rerowiaa. A'ere 'ā 'gā 'wyr ipewara 'gā jēmī nuerowiari 'ga. 'Ga pytuna 'gā miamū 'ā 'ga rerowiare'ema ajemogyau— 'jau Jejuī 'ga oje'wyr ipewara 'gā nupe. —Nan tee futat ajee 'ā kwe pewara 'gā jēmī je rerowiari. A'ere 'ā je'wyr ipewaramū jēmī naje rerowiari pejepe pejejemogyau— 'jau 'ga 'gā nupe.

⁵Nuerowiari wejue 'gā 'ga. A'eramū 'ga aeremiapoe'ema mama'e apoarūme'em 'gā pype. Ojero'wu ma'e 'gā amū etee 'ga imajarueteu, opo monou 'gā 'arimū.

⁶“Naje rerowiari te 'gā 'ā. A'eramū je 'gā poararūme'em”, 'jau 'ga ojeupe, oporesagamū 'gā nee.

Jejuī 'ga wemimu'e 'gā monoawet

(Mateu 10.5-15; Luka 9.1-6)

Aipo awi Jejuī 'ga awau Nasare pyri 'ut ma'e amunaw ipe, 'gā mu'jau 'Uwarete 'ga ree.

⁷Anure 'ga wemimu'e 'gā majatykau, tusi 'gā majatykau. A'eramū 'ga opājē monou 'gā nupe mama'eukwaawa pe'aawamū erekwara 'gā nui. A'eramū 'ga 'gā mokwasi'wau mukūi jujeue 'gā monou kwe pe.

—Pe'je pejewau je mome'wau kwe pewara 'gā nupe. Jerer imū ki pēē mama'eukwaawa pepe'a erekwara 'gā nui— 'jau 'ga 'gā nupe.

⁸—Pejemama'ea te kasi ajee peroo ne. Ywyrāa etee pēē erawau pejepe pe. Pejejemi'ua miamū pēē erawawe'em. Mama'e ryrū, ka'aranū. Mīmēra nanē pēē erawawe'em nū.

⁹Pejepyapaawunepa ete. A'ere pejejyrūa miamū pēē erawawe'em. Pejepir arewara etee futat pēē erawau. Nan tee futar iki pekwap— 'jau 'ga 'gā nupe.

¹⁰—'Gā 'wyrarete upe pejewaēma pēē majepeja 'oga pype etee futat pejejupa. Peo kasi kwe pe pejekou ne.

¹¹Pejeporogyta renuwe'emamū kamēsīete pejewau 'gā 'wyr awi. 'Gā nui pejewau ki pēē pejepytyry'wory'woka. “Nepeenuwi ete oreporogyta. A'eramū nipo Janeruwarete 'ga amara'neramū pē nee”, 'jau ki pēē 'gā nupe, pejepytyry'woka 'gā neape— 'jau Jejuī 'ga wemimono 'gā nupe.

¹²A'eramū Jejuī 'ga remimu'e 'gā awau peuwara 'gā mu'jau Jarejuwarete 'ga ree:

—Pejetywyr awi pēpoiireramū Janeruwarete 'ga imoiri pē nui. “Je katu'og ape”, pēē 'eramū 'ga pē katu'ogi futari, pē mogyau wemiayuwamū— 'jau 'gā awau 'gā nupe.

¹³Mama'eukwaawa 'gā ipe'au erekwara 'gā nui. Mīarakawenana 'gā imonou ojero'wu ma'e 'gā akag are. A'eramū Janeruwarete 'ga 'gā katu'oka 'gā jero'wu awi.

Juā Batista 'ga jukaukaawet

(Mateu 14.1-12; Luka 9.7-9)

¹⁴Jejuī 'ga rera okwasi'wasi'wau kwe pe. A'eramū Erote 'ga nanē 'ga rera renupa nū. A'eramū 'ga 'jau 'gā nupe:

—Awýja te poromū? Aeremiapoe'ema te a'e 'ga wapo a'i kūi— 'jau 'ga 'gā nupe.

A'eramū 'gā amū 'jau 'ga upe:

—Juā Batista 'ga nipo 'ut oferapa rai'i nū. A'eramū nipo 'ga a'eramū janeremiapoe'ema resaukaa janee— 'jau 'gā 'ga upe.

¹⁵A'ere amumera 'gā 'i:

—Eliasi 'ga nipo 'ut ojewya rai'i— 'jau 'gā 'ga upe.

Amumera 'gā 'jau:

—Janeruwarete 'ga je'ega mome'wara 'ga, ymāwarera 'jawewara 'ga futat— 'jau 'gā ajaupe.

¹⁶Aipo ajaupe 'gā 'e renupawe, Erote 'ga 'jau:

—Juā Batista futat 'ut oferapa rai'i nū. Ajuwonogukat agawewi ako je 'ga ikue. A'etea sipo 'ga oferawu'jap nū— 'jau Erote 'ga 'gā nupe.

¹⁷⁻¹⁸Ymā Erote 'ga wewirera 'ga remireko ēē pojekai 'ga wi rakue. Erotiasi ēē pojekau 'ga wi rakue, Filipe 'ga wi rakue. A'eramū 'ga ēē rerekou katu rakue. A'eramū Juā 'ga 'jau 'ga upe:

—Nia'wryi nanuara. Ejewirera remireko 'ā erepojeka 'ga wi. Ymā 'ā Janeruwarete 'ga oje'ega kwasiarukari Moisesi 'ga upe rakue: “Peko awi pejejemireko are”, 'jau 'ga ikwasiarukaa 'ga upe rakue. A'ere 'ā ereapo “Peapo awi” 'jawera rai'i. A'eramū ene etywereteramū ekou Jarejuwarete 'ga upe— 'jau Juā 'ga Erote 'ga upe rakue.

A'eramū Erotē 'ga amara'neramū Juā 'ga ree, 'ga pofaa, 'ga munewukaa moromunepawa pype.

¹⁹ Erotiasi ēē Juā 'ga raykau 'ga 'eawer are. A'eramū ēē afuwereteramū 'ga ree.

²⁰ A'ere Erotē 'ga kyjei 'ga juka awi. “Esage ma'e 'ga, Ku'jywa 'ga remiayuwā 'ga”, 'jau Erotē 'ga Juā 'ga upe. A'eramū 'ga okyjau 'ga juka awi. A'eramū 'ga 'ga jukaukare'ema Erotiasi ēē upe. 'Ga je'egamū Erotē 'ga wapyakau Juā 'ga je'eg are. 'Ga je'ega renupawe 'ga 'jau ojeupe: “Maran je 'ga rerekou 'ū”, 'jau 'ga ojeupe. A'ere 'ga nokwaawi futari.

²¹ A'ere Erotiasi ēē Juā 'ga juka rapesagi etee futat akou.

U'aawera 'ara rupi Erotē 'ga maraka apou. A'eramū 'ga kwaiwete 'gā mo'wy'wya omaraka are. Opoirū, jefaruu 'wyrat, Garireja ywy pewara 'gā 'wyrira'ri. Mīmera 'gā 'ga imo'wy'wya oje'wyr ipe. A'eramū 'gā wemimo'wyrera 'gā mojemī'waa.

²² 'Gā jemi'waaw ipe Erotiasi ēē ra'yra ēē awau osou ojerokyau maraka are ajatyka ma'e 'gā nowase. A'eramū Erotē 'ga aku'iramū ēē jerokey are wemimo'wy'wyrera 'gā netee. A'eramū Erotē 'ga 'jau ēē upe:

—Ma'ja te erefutat? Tamono eneremifutara enee 'jau— 'jau 'ga ēē upe.

²³ A'eramū 'ga 'jau nū:

—“Ma'ja te erefutat?” a'e ako je enee ko. Eneremifutara etee futat tamono enee 'jau, a'e ako je enee ko. Na'e okoetei je enee. Jarejuwarete 'ga remianuwamū je 'i. Amono futat je enee— 'jau 'ga ēē upe.

²⁴ A'erauwe ēē awau imome'wau oy ēē upe. A'eramū ēē 'jau ēē upe:

—Ma'ja te je aenūi kiā upe?— 'jau ēē oy ēē upe.

—“Juā Batista kiā akagera erurukat imonogukaa wā nupe jee”, ere ki kiā upe— 'jau ēē wa'yra ēē upe.

²⁵ A'erauwe ēē ra'yra ēē awau ojewya 'jau 'ga upe:

—Juā Batista kiā akagera erurukat paratu pype imonogukaa wā nupe jee kīī. 'Awauwe je ifutari— 'jau ēē 'ga upe.

²⁶ A'erauwe Erotē 'ga u'arasigamū aipo ēē 'erauwe. Niporujukaweri 'ga Juā 'ga ree. A'eramū 'ga a'eramū u'arasigamū. “Ma'eramū je 'jau ēē upe ra'e 'ū. Eneremifutara tamono enee 'jau, 'jau ēē upe ra'e 'ū”, 'jau 'ga ojeupe, u'arasigamū. A'ere 'ga wemimo'wy'wyrera 'gā nemianuwamū aipo 'ga 'i ēē upe. A'eramū 'ga ojenosōu. “Kasi 'gā a'e pe je iapoe'emamū naje rerowiari ne kwy, 'gā nekoī je'me are ne kwy”, 'jau 'ga ojeupe.

²⁷ A'eramū 'ga a'eramū jefaruu 'gā amū monou Juā 'ga juwonogukaa.

—Moromunepawa pype Juā 'ga 'amamū. Pe'je pejewau 'ga ajuwonoka. A'eramū pēē 'ga akagera rerua paratu pype ēē upe— 'jau 'ga 'gā nupe.

A'erauwe 'gā awau 'ga ajuwonoka.

²⁸ A'eramū 'gā paratu pype 'ga akagera rerua ēē upe. A'eramū ēē erua oy ēē upe rakue.

—Kweramū a'nī— 'jau ēē oy upe.

²⁹ “Erotē 'ga 'ga jukaukat 'ga upe” 'e renupawe Juā 'ga remiayuwā 'gā awau 'ga reumera upe erawau imonou inuga ita kwara pype rakue.

A'eramū Erotē 'ga wea'aramū Juā 'ga ree, Jejuī 'ga rera renupawe.

Kanape'i me'yitawet

(Mateu 14.13-21; Luka 9.10-17; Juā 6.1-14)

³⁰ Ko'iko'i ete Jejuī 'ga remimonofera 'gā 'ua ojewya nū. A'eramū 'gā wemiapofera mome'wau Jejuī 'ga upe. Oporogyta nanē 'gā imome'wau 'ga upe nū.

³¹ Kwaiwete 'gā ajatykau Jejuī 'ga ree. A'eramū Jejuī 'ga ojemi'wararūme'em wemimu'e 'gā netee. A'eramū Jejuī 'ga 'jau wemimonofera 'gā nupe:

—Pe'je soo awotywe'eme jarepytu'wau ra'ne 'jau— 'jau 'ga 'gā nupe.

³² A'eramū 'gā tee awau u'aa yaruū pype.

³³ A'ere kwaiwete 'gā 'gā oa resagi.

—Oo Jejuī 'ga— 'jau 'gā ajaupe.

A'eramū amunaw ipewara 'gā ojeko'woka 'ga piara rupi awau ujana ypia ywyrī owaēma 'gā nenune.

³⁴ Ojekog ire Jejuī 'ga uēma yaruū awi. Wenune 'ut ma'efera 'gā nesakawe, Jejuī 'ga ajemuaēma 'gā nee. “Karupa'mī jare'ema 'jawe pa 'gā jemogyi jee nū”, 'jau 'ga ojeupe. Nī'wyriri 'gā. A'eramū 'gā omogytawe'emamū. A'eramū 'ga a'eramū ajemuaēma 'gā nee. A'eramū 'ga 'gā mu'jau 'Uwarete 'ga ree.

³⁵ Kaaruwamū Jejuī 'ga remimonofera 'gā 'jau 'ga upe:

—Kaaru ki 'ei. Nitywi futari mama'ea 'au 'gā nemi'uramamū— 'jau 'gā 'ga upe.

³⁶ —Emono 'gā jarejewi. Too 'gā amunawa mū pype wemi'urama mua ojeupe 'jau— 'jau 'gā 'ga upe.

³⁷ A'ere Jejuī 'ga 'i 'gā nupe:

—Pěē te mama'ea pemono 'gā nupe— 'jau 'ga 'gā nupe.

A'eramū 'gā 'jau:

—Kuu. Mytuna 'gā nū'ū. Tusētu ka'aranūū oo kanape'i muawamū 'gā nupe kūi— 'jau 'gā 'ga upe.

³⁸ A'eramū Jejui 'ga 'jau 'gā nupe nū:

—Marāmaran te kanape'i pyu pētyp? Pe'je pejewau esaka— 'jau 'ga 'gā nupe.

A'erauwe 'gā awau esaka. A'eramū 'gā 'jau 'ga upe:

—Sīku etee kanape'ia. Mukū'i'ī etee ipira'ia 'jau ra'e— 'jau 'gā 'ga upe.

³⁹ A'eramū 'ga 'jau ojee ajatyka ma'e 'gā nupe:

—Pe'je pejepojo'oka'i pejejaii pejeapyka juo'wi 'arimū— 'jau 'ga 'gā nupe.

⁴⁰ A'erauwe 'gā opojo'ojo'o'giramū wapyka juo'wi 'arimū. Peu sēg 'gā wapyka. Peu sīkwēta 'gā wapyka. Peu sēg 'gā wapyka nū. Nan tee futat 'gā wapyka juo'wi 'arimū.

⁴¹ A'eramū Jejui 'ga kanape'i pyyka opo pe ipira'i reewe. A'ere 'ga eramā'jāu ywau opo pe. A'eramū 'ga 'jau 'Uwarete 'ga upe:

—Au'jete mama'ea eremut ore. Ene te 'ā eneresage ore— 'jau 'ga 'Uwarete 'ga upe.

A'erauwe 'ga kanape'i mowowoka imonou wemimu'e 'gā nupe. Omowowogamū ojeme'yita 'gā nupe. Ipira'ia nanē ojeme'yita 'gā nupe. A'eramū 'gā imonou wapyk ma'e 'gā nupe.

⁴² A'eramū wapyk ma'e 'gā juejue ojemi'waa wewegamū jui.

—Janeruwarete 'ga kumia ome'yi janee— 'jau 'ga 'gā nupe. —A'eramū 'ā jane jarejewegamū jarejupa. Jarejuwarete 'ga jarejeupe ime'yje'em ire amunipo 'ā jane ty'ara reruwi— 'jau 'gā ajaupe.

⁴³ A'eramū Jejui 'ga remimu'e 'gā emyrera mono'oga ijaga yrū pype. Tusi yrupemūā 'gā imatyneema emyrera pyu.

⁴⁴ Sīku miu agawewi kūima'e 'gā pytuna. A'etea 'gā na'upawi kumia. Wewegamū 'gā jui.

'Yrajape 'arimū Jejui 'ga ataawet

(Mateu 14.22-33; Juā 6.16-21)

⁴⁵ Emyrera 'gā ijag ire Jejui 'ga 'jau wemimu'e 'gā nupe:

—Pe'je pejewau peje'aa yaruu pype. Pesaita pe pejewau pejeyaapa je renune. Je apyta ra'ne. Tamono 'gā 'gā 'wyr ipe 'jau nū— 'jau 'ga 'gā nupe.

A'eramū 'gā awau 'ga wi 'ga rejaa ojetee'ī.

⁴⁶ Ojewi 'gā o re Jejui 'ga awau ojeupia ywytyra rupi. 'Uwarete 'ga upe 'ga awau oporogytau. Ojetee'ī futat 'ga awau akou.

⁴⁷⁻⁴⁸ Ypytunimū Jejui 'ga wemimu'e 'gā nesaka. Ypiauu pyter ipe 'gā 'upa. A'ere ywytua napywurukari 'gā nupe. A'eramū Jejui 'ga ku'em ja'wyja'wyrāmū awau 'gā nepejāna. 'Y rajape 'arimū 'ga awau watau. "Tafen 'gā 'jau kwy", 'jau 'ga ojeupe. Ojepyu 'ga kwap ja'wyja'wyrāmū 'gā 'ga resaka.

⁴⁹ —Ma'ja katu 'ut kweramū janee?— 'jau 'gā ajaupe. —Ajaga nipo kwe 'ut owaēma janee kūi— 'jau 'gā amū wafukaita ajaupe.

⁵⁰ A'eramū 'gā okyjau ajemogyau. 'Gā kyjea 'gā pifuaka'roka.

A'erauwe Jejui 'ga 'jau 'gā nupe:

—Pekyje awi je wi. Je tee ojot pē newiri— 'jau 'ga 'gā nupe.

⁵¹ A'erauwe 'ga awau yaruu pype u'aa 'gā pyri. A'erauwe ywytua wojeramū 'gā nupe. A'ere 'ga remimu'e 'gā yyi ajemogyau.

⁵² Naeapyoi 'gā kanape'i jeme'yitawer are. Naeapyoi wejue 'gā Jejui 'ga ree. A'eramū 'gā okyjau 'ga wi.

Genesare ywy pewat

(Mateu 14.34-36)

⁵³ A'eramū Jejui 'ga awau oyaapa wemimu'e 'gā netee. Awau 'gā ojekoka Genesare ywy are.

⁵⁴ Yaruu awi 'ga ēmauwe peuwara 'gā Jejui 'ga kwaapa.

⁵⁵ A'eramū 'gā awau u'jāna ojero'wu ma'e 'gā nerua amunaw awi. Amunawa moymoyka ojero'wu ma'e 'gā nerua 'gā nupawa pype Jejui 'ga upe.

⁵⁶ Jejui 'ga waw ipe 'gā ojero'wu ma'e 'gā nerua 'gā nuga 'ga kwapaw ipe. Amuna'wi'ī pewara 'gā, amunawarete pewara 'gā, jū mewara 'gā. Mīmer awi 'gā ojero'wu ma'e 'gā nerua 'gā nuga 'ga rape pe.

—Tene 'gā eneraity pypireme'ywa pyygi ene wi— 'jau 'gā 'ga upe.

A'eramū 'ga raity pypireme'ywa pyygarera 'gā ajaruetepawamū najuejue etee futat.

7

*Judeu 'gā nemiapo
(Mateu 15.1-9)*

¹ Anure fariseu 'gā amū Moisesi 'ga remikwasiarere are moromu'jara 'gā netee ajatykau Jejuu 'ga ree. Jerusareg awi 'ut ma'efera 'gā poromū.

² Jejuu 'ga remimu'e 'gā jemi'wara resaka ajemogyau. A'eramū 'gā 'jau ajaupe:
—Kuu. Nojepoei 'gā ojemi'war enune jareypy je'egawer imū— 'jau 'gā ajaupe. —Nuapoi 'gā jarejemiapoa ra'e— 'jau 'gā ajaupe.

³ Judeu 'gā mama'ea wapo oypy je'egawer imū etee futat. Fariseu 'gā taetu iapou. Ojemi'war enune 'gā ojepoeipoita.

⁴ Wemimurera kumia nanē 'gā ipireipireita nū. Oypy 'gā je'egawer imū etee futat kumi'wawa nanē 'gā ipireita nū. Kaneeku, 'y ryrū, japepo. Mīmera 'gā opirei. Oypy 'gā je'egawer imū etee futat 'gā iapou.

⁵ A'eramū fariseu 'gā Moisesi 'ga remikwasiarere are moromu'jara 'gā netee oporonupa ee Jejuu 'ga upe:

—Ma'eramū aje eeneremiayuwa 'gā nuapoi mama'ea jareypy 'gā je'eg ymaner imū 'ū? Nojepoei nanē 'gā 'ā jareypy je'egawer imū ojemi'war enunewe— 'jau 'gā Jejuu 'ga upe.

⁶ A'eramū Jejuu 'ga 'jau 'gā nupe:

—Pēē 'ā “mama'e esagea ore aruapo”, pe'je numiamū. A'ere 'ā pē'me ate pejemogyramū— 'jau Jejuu 'ga 'gā nupe.

—Ymā te 'ā Janeruwarete 'ga ka'arana kwasiarukari Isai 'ga upe rakue:
“Aramuoryw ore Orojuwarete 'ga, 'jau futatee 'gā jee”, 'jau Janeruwarete 'ga.
“A'ere 'ā 'gā 'meramū te. Nomyi 'gā weaa je ree. Naje rerowiari tāmējē 'gā.

⁷ U'eawer are etee 'gā jamu'ei. A'ere 'gā 'jau ajaupe: Jarejuwarete 'ga je'eg are je pē mu'ei, 'jau futatee 'gā ajaupe”,
'jau Janeruwarete 'ga ikwasiarukaa Isai 'ga upe rakue— 'jau Jejuu 'ga 'gā nupe, oje'ega moywyrafena.

⁸—Nepeenuwi agawewi 'ā Jarejuwarete 'ga je'ega pejemogyau. Na'ga je'eg imū rūi nanē pēē mama'e apou nū. Tesirūmera 'gā je'eg imū etee 'ā pēē mama'e apou— 'jau 'ga 'gā nupe.

⁹—Pejepoia 'ā Jarejuwarete 'ga je'ega renuw awi. A'eramū 'ā pēē pejemifutar imū etee mama'e apou.

¹⁰ Ymā Janeruwarete 'ga ka'arana kwasiarukari Moisesi 'ga upe rakue: “Peanuw etee ki pejejuwa 'ga je'ega. Pejey ēē je'ega nanē ianupa etee nū”, 'jau 'ga 'ā ikwasiarukaa 'ga upe rakue. “Ujara 'gā kurapara 'gā ki peapisi”, 'jau 'ga ikwasiarukaa rakue.

¹¹ A'ere 'ā pemu'e 'gā 'gā jara 'gā nee 'gā je'ega renuw etee'em are. “Pejajara 'gā nupe mama'e are pejeporomonowere'emamū ki pe'je 'gā nupe: 'Pē nupewara je amono Jarejuwarete 'ga upe ai'i. A'eramū je mama'e mū monowe'em pē nupe’, 'jau futatee ki pēē pejajara 'gā nupe.

¹² A'eramū ki pēē imonowe'em pejajara 'gā nupe”, 'jau 'ā pēē 'gā mu'jau tywet pejemogyau— 'jau Jejuu 'ga 'gā nupe.

¹³—Aipo 'jaramū pēē Jarejuwarete 'ga je'ega renupe'ema pejemogyau. Tesirūmera 'gā je'egawer imū te 'ā pēē mama'e apou. Namīmera etee rūi futat pēē iapou. Amumeramū taetu ajeē 'ā pēē mama'e tywera peapo— 'jau Jejuu 'ga fariseu 'ga nupe, Moisesi 'ga remikwasiarere are moromu'jara 'gā neewe.

*Ae motyweawa 'ga imome'uawet
(Mateu 15.10-20)*

¹⁴ A'ere Jejuu 'ga 'jau mytuna 'gā nupe:

—Pe'je pejejuwa pejeapyakau jeje'eg are— 'jau 'ga 'gā nupe. —A'eramū pēē pejejeapyoramū ee pejemogyau.

¹⁵⁻¹⁶ Napē pype oo ma'efera rūi pē motywet Janeruwarete 'ga upe pē mogyau. Pē nui uēm ma'ea te pē motywet Janeruwarete 'ga upe. Pēje'egaiwa te pē motywet Janeruwarete 'ga upe— 'jau Jejuu 'ga 'gā nupe.

¹⁷ A'ere Jejuu 'ga mytuna 'gā nejaa awau osou 'og ipe wemimu'e 'gā netee. 'Og ipe ose re 'ga remimu'e 'gā oporonupa 'ga upe:

—A'eramū ene ma'ja upe poromū 'jau ra'e 'ū? Norereapyoi ore ene 'e are ki 'ei— 'jau 'gā 'ga upe.

¹⁸ A'eramū Jejuu 'ga 'jau 'gā nupe:

—Pēē nanē nipo nepēneapyoi we ee ra'e ki sa? Ekoay pēē na'e ki 'ei. Pēē nanē meewe etee pēneapyo ee ra'e ki 'ei? Nepēneapyoi ymani te 'ā pēē je'eawer are a'i kūi. Pejemimi'waa nipo pēē. A'eramū nipo pēē pejemimi'u monou pejejuru pe. A'ere nipo pēē imokona.

¹⁹ Pēnemi'ua osou pēnawyrū pype etee futat. Nokwasi'oi pēywytera pype. Pēnawyrū pype etee futat mama'e oi. A'eramū okwapa etee pē nui. A'eramū mama'ea pē motywerukare'ema Janeruwarete 'ga upe— 'jau Jejui 'ga 'gā nupe.

Aiporamū futat Jejui 'ga 'i 'gā nupe: “Nitywi futari pēnemi'ue'ema mū mama'ea” 'e upe futat 'ga 'i poromū.

²⁰ A'eramū 'ga 'jau 'gā nupe nū:

—Pēywyter awi 'ut ma'efera tee pē motywet Janeruwarete 'ga upe.

²¹ Mama'e tywer are etee pēē pejejea'aramū. A'eramū pēē mama'e apou pejejea'ar imū etee futat. 'Ga amū wea'aramū mama'e are amunarū are. A'eramū 'ga amunarūmū ee. 'Ga amū wea'aramū oporojuka are. A'eramū 'ga oporojukau.

²² 'Ga amū wea'aramū wemirekoe'em are ako are. A'eramū 'ga akou kūjā ēē ree. 'Ga amū wea'aramū okaraemā momytun are etee. A'eramū 'gā okaraemā momytuna ekoete. 'Ga amū wea'aramū mama'e tesirū apo are te. A'eramū nipo 'ga otyweramū akou Jarejuwarete 'ga upe. Wemifutar imū etee o'meramū. Wea'ar imū etee ajuago'wau ajemogyau. 'Gā amū ajuerekoayau. 'Gā amū ojerowiaripa etee ojee. 'Gā amū ojemuarūme'em.

²³ Mīmera 'ā pēē iapou pejejemifutar imū etee futat. A'eramū pēē mīmera apoaramū te pejejemotywea Jarejuwarete 'ga upe. Napēnemi'ua rūi pē motywet 'ga upe. Pejepoeje'ema miamū nepē motyweri 'ga upe— 'jau Jejui 'ga 'gā nupe, 'gā mu'jau 'gā motyweawa mama'e are etee.

Judeue'ema ēē
(Mateu 15.21-28)

²⁴ A'ere Jejui 'ga awau pe awi. Tiro 'jawa pyri 'ga awau. Awau osou peuwara 'gā amū 'wyr ipe.

—Je mome'u kasi pejepe ne. “Au 'ga ruri akou”, pe'je kasi ne— 'jau 'ga 'gā nupe.

A'ere 'ga rera nimimawi futari.

²⁵ A'eramū kūjā ēē mū 'ga rera renupa. Mama'eukwaawa 'up ēē ra'ya ēē pir are. A'eramū ēē 'ua wapyka wenupy'āu Jejui 'ga rowase, 'ga rera renupawe.

²⁶ Najudeu arūi agawewi ēē. Sirufenisi pewara ēē te. Poromū 'ut oporogytau Jejui 'ga upe:

—Mama'eukwaawa epe'a jera'ya kynu wi, a'e je tejua enee— 'jau ēē 'ga upe.

²⁷ A'ere 'ga 'i etee ēē upe:

—Sā'ā ae kunumia mama'e 'ue'emamū ae kunumī remi'urama monoe'ema weymawa upe. Nan tee futat je. Judeu 'gā poaawamū je ruri 'au wyy pe ikue— 'jau Jejui 'ga ēē upe.

²⁸ A'eramū ēē 'jau 'ga upe:

—A'jea futat ere. A'ere wyyu mama'e 'ar ire wā neymawa i'ui futari— 'jau ete ēē 'ga upe.

²⁹ A'eramū Jejui 'ga 'jau ēē upe:

—Je rerowiat ape ekou ra'e a'i ī. Ere ewau ejewya eje'wyr ipe nū. Mama'eukwaawa ojepe'a 'awamū enera'ya ēē wi— 'jau 'ga ēē upe.

³⁰ A'eramū kūjā ēē awau ojewya oje'wyr ipe nū. ēē ra'ya ēē 'upa anuruka okama pype. Jaruete ēē 'upa. ēē pirewara ojepe'au awau ēē wi ra'e.

Iapyae'ema 'ga

³¹ Jejui 'ga awau pe awi. Sidoma pyu 'ga okwapa. A'ere 'ga awau Tekapuru wyy raapa awau owaēma Garireja ypiauu upe.

³² A'e pe kūima'e 'gā amū iapyae'ema 'ga rerua Jejui 'ga upe. Nuenuwi 'ga mama'ea. Nije'ēkarakatui nanē 'ga nū. A'eramū 'gā 'jau Jejui 'ga upe:

—Epo emono 'ga 'arimū. Tajekatu'ok 'ga 'jau— 'jau 'gā Jejui 'ga upe.

³³ A'eramū Jejui 'ga 'ga pe'au mytun awi. A'erauwe 'ga ofā monou 'ga apya rupi. 'Ga apya rupi ofā mono re 'ga onymuna opo are. A'ere 'ga weny monou 'ga kū are.

³⁴ 'Ga kū are weny mono re Jejui 'ga wowowyrāmū ywau ojeptyuekyjayau. A'e pe 'ga 'jau: —Ejeawopytymo'wok 'ga wi— 'jau 'ga.

(Oje'eg imū 'ga 'i Efata. Efata 'ea ejeawopytymo'wok 'ga wi 'ea futat poromū.)

³⁵ A'erauwe iapyae'ema 'ga wapyakwafugamū. 'Ga kūa nanē ojekatu'oka nū. A'eramū 'ga oje'eg esageayramū.

³⁶ A'eramū Jejui 'ga 'jau esakarera 'gā nupe:

—Pemome'u kasi ne— 'jau 'ga 'gā nupe numiamū.

A'ere 'ga rera nikokawi futari. A'ere 'gā 'ga rera muāi kwe pe.

³⁷ 'Ga rera renupara 'gā wea'aramū 'ga ree ajemogyau. A'eramū 'gā 'jau ajaupe:

—A'jeteetewi 'ga mama'e apoi ki sa! Iapyae'ema 'gā miamū 'ga imuapyau. Ije'ege'ema 'gā nanē 'ga imoje'egukaa— 'jau 'gā ajaupe.

8

Kwaturu miu 'gā mojemi'waawet
(Mateu 15.32-39)

¹ Anure 'gā awau ajatykau Jeju 'ga ree nū. Kwaiwete 'gā awau ajatykau 'ga ree. Temi'u teepawamū Jeju 'ga 'jau wemimu'e 'gā nupe:

² —Ajemuaēm je tekou 'gā nee. Muapyt 'ā 'gā kaaruwamū jane pyri. A'eramū 'awamū 'gā nemi'urama atepawamū 'gā nui.

³ A'eramū je teporomonowere'emamū 'gā nee 'gā nemi'urame'eme. Kasi a'e pe ty'ara 'gā pifuaka'rogi woga piara rupi 'gā oramū ne, a'e je. A'eramū je teporomonowere'emamū 'gā nee tejewi, 'gā nupe mama'e monowe'emamū. Kasi 'gā oje'wyr ipe awau 'gā manūaiwi ty'ara upe ne. Amumera 'gā taetu nā'ā muku awi 'ut re'ā, a'e je— 'jau Jeju 'ga wemimu'e 'gā nupe.

⁴ A'eramū 'ga remimu'e 'gā 'jau 'ga upe:

—Amunawe'em ipe jane rekoī nū'ū. Nitywi mama'ea 'au. Mō awi sipo ore mama'e muri 'gā mojemi'waawamū?— 'jau 'gā 'ga upe.

⁵ A'eramū Jeju 'ga 'jau 'gā nupe nū:

—Marāmaran pēkanape'i pytuna?— 'jau 'ga oporonupa ee 'gā nupe.

A'eramū 'gā 'jau 'ga upe:

—Sete ete ipytuna— 'jau 'gā 'ga upe.

⁶ A'eramū Jeju 'ga 'jau mytuna 'gā nupe:

—Pe'je pejeapyka ywyu— 'jau 'ga 'gā nupe.

A'erauwe 'gā wapyka.

A'ere 'ga kanape'i pyyika opo pe. A'ere 'ga 'jau 'Uwarete 'ga upe:

—Au'jete 'ā mama'ea eremut oree. Ene te 'ā eneresage oree, Kiapi'ni— 'jau 'ga 'Uwarete 'ga upe.

A'ere 'ga kanape'i mowowoka imonou wemimu'e 'gā nupe. Omowowogamū ojeme'yita 'gā nupe. A'eramū 'gā imonou wapyk ma'e 'gā nupe.

⁷ Ipira'ia nanē niapoi nū. A'ere Jeju 'ga eroje'ega opo pe 'Uwarete 'ga upe nū, 'ga muorypa ee. A'eramū 'ga ipira'i monou wemimu'e 'gā nupe. A'erauwe ipira'ia ojeme'yita nū. A'eramū 'ga remimu'e 'gā imonou wapyk ma'e 'gā nupe.

⁸ A'eramū 'gā ojemi'waa wewegamū. Weweg ire Jeju 'ga remimu'e 'gā emyrera mono'oga imonou yrūū pype. Sete yrupemūā 'gā imatyeema.

⁹ Kanape'i 'warera 'gā pytuna kwaturu miu agawewi 'gā pytuna.

'Gā jemi'war ire Jeju 'ga 'gā monou 'gā 'wyr ipe nū.

¹⁰ A'eramū 'ga 'ua yaru pype wemimu'e 'gā netee. Awau 'gā oyaapa awau ojekoka Taumanuta ywy are.

Aeremiapoe'ema fariseu 'gā enūinawet
(Mateu 16.1-4)

¹¹ Peu fariseu 'gā amū 'ua oporogytau Jeju 'ga upe. Nuerowiari 'gā 'ga. “Najarejuwarete 'ga pājē mū rūi 'ga mama'e apoi”, e'i etee 'gā ajaupe. A'eramū 'gā 'ua 'ga resaka. A'eramū 'gā 'jau Jeju 'ga upe:

—Aeremiapoe'ema eapo amū ore reape. Taruesak ene mama'e apoa orojemiesagamū 'jau. “Jarejuwarete 'ga pājē mū futat 'ga aeremiapoe'ema apoi ra'e”, taru'e enee 'jau. A'eramū ene mama'e apou 'ga pājē resaukaawamū oree— 'jau 'gā 'ga upe.

¹² A'eramū Jeju 'ga ojeptyuekyita 'gā nee. A'ere 'ga 'jau 'gā nupe:

—Naani. Naapoa'uweri je pēnemiapoe'ema pē neape. Naje rerowiari futari pejepe. A'eramū je mama'e apowe'em pēnemiesagamū— 'jau ete Jeju 'ga 'gā nupe.

¹³ A'eramū Jeju 'ga awau 'gā nui nū. Yaru pype 'ga awau 'ua wemimu'e 'gā netee. A'eramū 'gā awau oyaapa.

Wemimu'e 'gā momoranupawet
(Mateu 16.5-12)

¹⁴ A'ere 'ga remimu'e 'gā nuerooi kanape'i ojeupi. Amoka'jam 'gā erooa. Majepei'ia te 'gā erawau.

¹⁵ A'e pype Jeju 'ga 'jau 'gā nupe:

—Pejea'gu ki fariseu 'gā nui, 'gā mani'oko'o jopypeaw awi. Erote 'ga ma'e awi 'jau ki pejejea'gwau— 'jau 'ga 'gā nupe.

¹⁶ Aipo ojeupe 'ga 'eramū 'gā 'jau ajaupe:

—Kanape'i rerura ako jane simoka'jam ko. A'eramū 'ga poromū 'jau jane kūi— 'jau 'gā ajaupe.

¹⁷ A'ere Jeju 'ga 'gā 'e renuwi. A'eramū 'ga 'jau 'gā nupe:

—Naje rerowiari tāmējē pejepe pejejemogyau ki sa. Ma'eramū nā'ā aipo pe'je pejejaupe re'ā. “Kanape'i rerure'em are 'ga 'i poromū janee”, pe'je re'ā— 'jau Jejui 'ga 'gā nupe. —Ma'eramū sipo pēē pejejeapyoe'emamū je'eawer are pejejemogyau 'wei?

¹⁸ Pēnea 'ā pēē numiamū. A'ere 'ā nepeesagi mama'ea. Pejeapyaramū 'ā numiamū. A'ere 'ā nepeanuwi jeje'ega.

¹⁹ Pemoka'jam nipo jeremiapofera rai'i? Kanape'ia je ime'yitawera rai'i? Sīku etee agawewi ako ai'i. A'etea ako je kanape'ia omowowok imonou sīku miu kūima'e 'gā mojemi'waawamū ai'i. 'Gā jemi'wapaw ire marāmaran ajee yrūa pematyneem emyrera pyu rai'i?— 'jau Jejui 'ga 'gā nupe.

—Tusi yrūa ako tyneema ai'i— 'jau 'gā 'ga upe.

²⁰ A'eramū Jejui 'ga oporonuwu'japa ee 'gā nupe nū:

—A'ere ako je sete kanape'i mowowoka kwaturu miu 'gā mojemi'waawamū ai'i nū. 'Gā jemi'wapaw ire marāmaran yrūa ajee pematyneem emyrera pyu rai'i nū?— 'jau 'ga 'gā nupe.

—Sete yrūa ako tyneema ai'i— 'jau 'gā 'ga upe.

²¹ A'eramū Jejui 'ga 'jau 'gā nupe nū:

—Nepēneapyoi we tāmējē pēē ee? “Pejea'gu ki fariseu 'gā mani'oko'o mojoyypeaw awi”, a'e ako je pē nupe ko. A'ere ako je nakanape'i upe rūi je 'i ko. “Gā nemimu'e morogyta awi ki pejea'gu”, a'e te je ako pē nupe ko— 'jau Jejui 'ga 'gā nupe.

Eae'ema 'ga

²² A'ere Jejui 'ga awau owaēma Pesaita 'jawa upe wemimu'e 'gā netee. A'eramū peuwara 'gā amū eae'ema 'ga rerua Jejui 'ga upe.

—Epoa emono 'ga rea 'arimū. 'Ga rea tajekatu'ok 'jau— 'jau 'gā 'ga upe.

²³ A'erauwe Jejui 'ga eae'ema 'ga popyyka 'ga rerawau 'ga renuēma amunaw awi. A'erauwe 'ga onymuna opo are. A'ere 'ga weny monou 'ga rea are. A'ere 'ga opo monou 'ga 'arimū. A'ere 'ga 'jau 'ga upe:

—Ereesak te mama'ea 'awamū?— 'jau 'ga 'ga upe oporonupa ee 'ga upe.

²⁴ A'eramū eae'ema 'ga 'jau 'ga upe:

—Aesak futat je numiamū. A'ere 'gā 'ywa 'jawe etee jee wesagamū— 'jau 'ga Jejui 'ga upe.

²⁵ A'ere Jejui 'ga opo monou'japa 'ga rea 'arimū nū. A'eramū te 'ga mama'e resagi katu.

²⁶ A'erauwe Jejui 'ga eae'emera 'ga monou 'ga 'wyr ipe nū.

—Eje'wyr ipe ekwap. Ereo kasi amunaw ipe ne— 'jau 'ga 'ga upe, 'ga monou 'ga 'wyr ipe nū.

Pedro 'ga Jejui 'ga mome'uawet

(Mateu 16.13-20; Luka 9.18-20)

²⁷ A'ere Jejui 'ga awau Sesariafiripai wyw pe wemimu'e 'gā netee. Awaw ipe Jejui 'ga 'jau wemimu'e 'gā nupe:

—Ma'ja e'i te tekotee 'gā jee jepi?— 'jau 'ga 'gā nupe oporonupa ee 'gā nupe.

²⁸ A'eramū 'ga remimu'e 'gā 'jau 'ga upe:

—“Juā Batista 'ga te nipo 'ā 'ut oferapa rai'i nū”, e'i amumera 'gā enee jepi. Amumera 'gā: “Eliasi 'ga nipo 'ā 'ut ojewya rai'i nū”, 'jau enee. Amumera 'gā: “Jarejuwarete 'ga je'ega mome'warera 'gā amū te nipo 'ā 'ut oferapa rai'i nū. 'Agamū 'ua oporogytau akou janee nū”, 'jau 'gā enee jepi— 'jau 'gā 'ga upe.

²⁹ —Pēē nū. Ma'ja pe'je ajee jee jepi?— 'jau 'ga 'gā nupe.

—Ene Jarejuwarete 'ga remimurera, aru'e ore jepi— 'jau Pedro 'ga 'ga upe.

³⁰ A'eramū Jejui 'ga 'jau 'gā nupe:

—Pemome'u kasi ajee aipoa 'gā nupe ne— 'jau 'ga 'gā nupe.

Amanūawama mome'uawet

(Mateu 16.21-28; Luka 9.22-27)

³¹ Aipo pe futat Jejui 'ga ajukaawama mome'wau ppy ppy wemimu'e 'gā nupe.

—Je 'ā pēneki'yr ymanera. A'ere nipo 'gā anurenure'i je rereko tyweretei. 'Wyriara 'gā nipo je roeroyūmū. Judeuramū jane 'wyria'ri, mainana 'wyriat, Moisesi 'ga remikwasiarer are moromu'jat. Mimerā 'gā nipo je roeyrū. A'eramū nipo 'gā je jukaaukaa 'gā nupe. A'ere nipo imuapyra 'ara rupi Janeruwarete 'ga je moferawi nū— 'jau Jejui 'ga 'gā nupe.

³² Jejui 'ga ajukaawama mome'wau katu tāmējē 'gā nupe. A'eramū Pedro 'ga 'ga rorojepe'au'i 'gā nui. A'eramū 'ga oje'egayau 'ga upe:

—Ene'me awi nū'ū. Nene rereko tywera'uweri 'gā nū'ū. Janeruwarete 'ga nene rereko tywerukara'uweri 'gā nupe kūi— 'jau Pedro 'ga 'ga upe.

³³ A'erauwe Jejui 'ga ojerowaka amā'jāu wemimu'e 'gā nee. A'eramū 'ga 'jau Pedro 'ga upe: —Ejepe'a je wi, ki Satanasi. Mama'eukwaawa 'wyriara ene mu'eukat poromū jee, ki Pedro. “Tamomoirukat 'ga 'ga Ruwarete 'ga remifutara apo awi 'jau”, e'i te Satanasi jee.

A'eramū poromū ene mu'eukaa jee kūi. NaJarejuwarete 'ga remifutar imū rūi ere aipo 'jau jee. Ejemifutar imū te ere aipo 'jau jee— 'jau Jeju 'ga Pedro 'ga upe.

³⁴ A'ere Jeju 'ga mytuna 'gā majatykau ojee, wemimu'e 'gā neewe. A'eramū 'ga 'jau 'gā nupe:

—Jeremiyuwamū pejekoweramū ki pēē jeremifutar imū etee futat mama'ea peapo. Pejekyjawe'em futat pejerekoko tywer awi— 'jau 'ga 'gā nupe. —Pejemanū awi miamū pejekyjawe'em futat. “Tene 'gā je jukai kwy. Napoira'uweri je Jeju 'ga rerowiar awi”, pe'je etee ki— 'jau 'ga 'gā nupe.

³⁵ —“Najemanūweri je Jeju 'ga mome'u are” 'jara 'gā nooa'uweri futari ywag ipe Jarejuwarete 'ga pyri. “Je naapoa'uweri futari mama'ea Jeju 'ga remifutar imū” 'jara 'gā nanē nooa'uweri ywag ipe Jarejuwarete 'ga pyri— 'jau Jeju 'ga 'gā nupe. —Amumera 'gā te nipo ajee e'i “tene 'gā je jukai kwy. Je napoira'uweri 'ga mome'u awi”, 'jau. Aipo 'jara 'gā etee awau ywag ipe Jarejuwarete 'ga pyri— 'jau Jeju 'ga 'gā nupe.

³⁶ —Okaraemā mono'og are etee ea'at ma'e 'gā nanē ni'akwaawi futari. Kwaiwete agawewi 'gā karaemā. A'ere aipo 'gā miamū nooi futari ywag ipe. Nomŷi 'gā weaa Jarejuwarete 'ga ree. Okaraemā me'yi are etee 'gā fueweramū. A'ere 'gā je rerowiar are jēm'i wea'are'emamū. A'eramū 'gā awawe'em 'ga pyri. Mama'eukwaawa rapyaw ipe etee nanuara 'gā awau. Peu oo re 'gā nuēmarūi futari jui.

³⁷ Nitywi mama'e mū mama'eukwaawa rapyaw awi 'gā nenū'jāawamū— 'jau Jeju 'ga 'gā nupe.

³⁸ —Awamū ete 'gā naje rerowiar futari. Nomŷi futari 'gā weaa je ree. Kwaiwete 'gā mama'e tywera etee iapou. A'eramū nipo je rerowiaara 'gā o'meramū je rerowiare'ema 'gā nupe. “Na'ga rerowiaara rūi je”, 'jau futatee nipo 'gā ajemogyau 'gā nupe. Ojenosī 'gā jeje'ega mome'u awi. “Je 'ā Jeju 'ga remiayuwa”, 'jawe'em 'gā. Aipo 'ea 'gā enosōu. A'eramū nipo je anure tejewya je nanē futat aipo 'gā nui tejenosōu. Tejuawa rupi je ruri Tejuwarete 'ga renyfuga pype, ywagipewara 'gā nenyfuga pype 'jau. A'eramū je aipo 'ara rupi tejenosōu tekwaparera 'gā nui— 'jau Jeju 'ga 'gā nupe.

9

¹ A'eramū Jeju 'ga 'jau 'gā nupe nū:

—Anure nipo pēē mū je resak pejepe pejemanūme'ēwe peje'wyririamū je rekoa. Jarejuwarete 'ga pājēa nipo pēē mū esaka— 'jau 'ga u'ama 'gā nupe oporogytau.

'Gā neape Jeju 'ga jesowo'gōkawet
(Mateu 17.1-13; Luka 9.28-36)

² Anure seis oser ire Jeju 'ga awau wyty'ririmū. Muapyra 'gā etee 'ga erawau ojeupi. Pedro 'ga, Tiago 'ga, Juā 'ga. Mīmēra 'gā etee 'ga erawau erojeupia wyty'ririmū ojeupi. Peu Jeju 'ga ojesowo'gōka 'gā neape.

³ 'Ga raitya waparasi'amū 'ga ree. Iaparasi' enyfuk te 'ga raitya 'ga ree.

⁴ A'erauwe 'gā Moisesi 'ga resaka Eliasi 'ga reewe. Ywag awi 'gā 'ua oporogytau Jeju 'ga upe.

⁵ Ywag awi 'ut ma'e 'gā nesakawe Pedro 'ga 'jau Jeju 'ga upe:

—Awa esageay janee ra'e. 'Au etee sapyta 'jau, ki Ku'jyp— 'jau Pedro 'ga Jeju 'ga upe. —Muapyra tapŷja taruapo pē nupe 'jau. Ene upe, Moisesi 'ga upe, Eliasi 'ga upe 'jau— 'jau Pedro 'ga Jeju 'ga upe.

⁶ Jeju 'ga remimu'e 'gā kyjea 'gā nerekou. A'eramū Pedro 'ga u'akwaawe'emamū poromū 'jau Jeju 'ga upe.

⁷ 'Ga porogytapaw ire ywasiga 'ua ojypa 'gā nee nū. A'e rupi futat Janeruwarete 'ga oje'ega mua 'gā nupe:

—Koromū futat Jera'yrarete 'ga. Jeremifutararete 'ga. A'eramū ki pēē 'ga je'eg are pejeapykau— 'jau Janeruwarete 'ga oje'ega mua ywasiga rupi 'gā nupe.

⁸ A'erauwe 'gā warekou. A'ere 'gā Jeju 'ga etee futat esagī 'ga 'amamū. Ywag awi 'ut ma'efera 'gā awau ojeupia ywasiga rupi 'gā nui nū.

⁹ Ywytyr awi 'gā neruaw ipe Jeju 'ga 'jau 'gā nupe:

—Pemome'ua'ne kasi 'gā nupe ne. Pejeki'yramū je feraw ire tāmējē tepemome'u 'gā nupe 'jau— 'jau 'ga 'gā nupe.

¹⁰ Aipoa 'gā nomome'ui futari 'gā nupe. A'ere 'gā naeapyoī 'ga 'eawer are, “Je feraw ire” 'eawer are. A'eramū 'gā imome'waukaa ajaupe:

—Ma'ja upe 'ga aipo 'jau janee nū'ū? Ma'ja are sipo 'ga jane mu'ei? Ma'ja upe sipo 'ga 'i “jeferaw ire tepemome'u 'jau”, 'jau janee— 'jau 'gā ajaupe.

¹¹ A'eramū 'gā oporonupa ee Jeju 'ga upe:

—Ma'eramū ajee Moisesi 'ga remikwasiarer are moromu'jara 'gā 'i 'ū: “Ymā 'ā Janeruwarete 'ga ka'arana kwasiarukari 'ga amū upe rakue: 'Eliasi 'ga ra'ne nipo ojesaukat 'gā nupe. A'ere nipo 'ga rewiri jeremimonorama 'ga oi ojesaukaa 'gā nupe', 'jau 'ga 'ā ikwasiarukaa inuga ka'aran are rakue”, 'jau 'gā imome'wau oree— 'jau 'gā Jejuu 'ga upe.

¹²⁻¹³ A'eramū Jejuu 'ga 'jau 'gā nupe:

—A'jea futat 'gā 'i. Eliasi 'ga 'jawewara 'ga ra'ne futat ako 'ut ai'i. “Au'je ki mama'e tywera apo re. Pe'je ki pejepoia pejetywer awi. Janeruwarete 'ga tepē mogy wemiyuwamū 'jau”, 'jau ako 'ga awau pē nupe ai'i, je renune ai'i. Juā Batista 'ga futat Eliasi 'ga 'ut 'jawamū. A'ere nepekwaawi futari 'ga. A'eramū 'gā 'ga rerekou tyweaete wemifutar imū etee 'ā rai'i. Anure nipo 'gā je miamū je rereko tyweretei 'ga 'jawerimū futat. Ymā 'ā Janeruwarete 'ga ka'arana kwasiarukari 'gā nupe je rereko tyweaw are rakue. A'eramū nipo 'gā je rerekou tyweaete je roroyrūmū 'ga 'eawer imū etee futat— 'jau Jejuu 'ga 'gā nupe.

Kunumī 'ga katu'okawet

(Mateu 17.14-21; Luka 9.37-43)

¹⁴ Ywytyr awi oiyw ire 'gā 'gā nesaka kwaiwete wemimu'e 'gā wyyri. Moisesi 'ga remikwasiarer are moromu'jara 'gā amū oporogytau 'gā nupe.

¹⁵ A'ere 'ga resakawe mytuna 'gā oporesagamū Jejuu 'ga ree. A'eramū 'gā awau ujāna 'ga rapeje'ega.

¹⁶ A'erauwe Jejuu 'ga oporonupa ee 'gā nupe:

—Ma'ja are te pejamue pejejupa ra'e?— 'jau 'ga 'gā nupe.

¹⁷ A'eramū kūima'e 'ga amū mytuna 'gā pyter awi oje'ega mua 'ga upe:

—Teja'yra 'ga je arut enee, ki Ku'yyp. Mama'eukwaawa 'up 'ga pir are. A'eramū mama'eukwaawa 'ga moje'egukare'ema.

¹⁸ Mama'eukwaawa 'ga pyykawe 'ga moywyrupāu 'ga monou 'ga retyka. A'eramū 'ga moypipa, 'ga mua'yjkā'yjkāina 'ga motyjuita. A'eramū 'ga mopifuakare'ema 'ga mogou. “Pepe'a 'ga wi”, a'e futat je eneremimu'e 'gā nupe ko numiamū. A'ere 'gā nope'ai ete 'ga wi ko— 'jau 'ga Jejuu 'ga upe.

¹⁹ A'eramū Jejuu 'ga 'jau 'gā nupe:

—Maranime gatu nipo 'ā je rerowiat pejepe pejemogyau? Ymā agawewi 'ā je pē mu'ei. A'etea nipo 'ā naje rerowiar ymani pejepe 'ja. “Nako'a uweri je namutamutat pē pype”, a'e agawewi je 'ā pē nupe— 'jau 'ga wemimu'e 'gā nupe, tesirūmera 'gā neewe futat. —Pe'je 'ga ra'yra 'ga rerua jee— 'jau Jejuu 'ga 'gā nupe.

²⁰ A'erauwe 'gā 'ga rerua. A'ere Jejuu 'ga resakawe 'ga pirewara 'ga moyyita 'ga monou 'ga retyka 'ga mojererepapa wyyu. 'Ga motyjuita 'ga juru rupi.

²¹ A'eramū Jejuu 'ga oporonupa ee kunumī 'ga ruwa 'ga upe:

—Maranime te mama'eukwaawa ruwi enera'yra 'ga pir are rai'i 'ū?— 'jau 'ga 'ga upe.

A'eramū 'ga ruwa 'ga 'jau 'ga upe:

—'Ga kunumīa we futat mama'eukwaawa wereko opir are ikue— 'jau 'ga ruwa 'ga 'ga upe.

²² —Amumē mama'eukwaawa 'ga monoukaa 'ga retyka tata pe jepi. Amumē 'ga momorukaa 'y pe, 'y pe 'ga jukaawamū jepi numiamū. A'eramū ore 'ga rerua enee. Maran gatu nipo ene nanē ipe'awe'em 'ga wi nū. Ejemuaēm ore ree jera'yra 'ga retee— 'jau 'ga 'ga upe.

²³ —Tejerowiarāmū je mama'e apoi pē nupe. Nitywi futari mama'ea jeremiapoe'ema, pēē je rerowiaa 'eramū— 'jau Jejuu 'ga 'ga upe.

²⁴ A'eramū 'ga 'jau 'ga upe nū:

—Arowiat je ene. Ejerowiar wyyapiukat jee— 'jau 'ga wafukaita 'ga upe.

²⁵ A'eramū mytuna 'gā 'ua ajatykau 'gā nee. 'Gā nesakawe Jejuu 'ga 'jau mama'eukwaawa upe:

—Ejepe'a 'ga wi. Erejewyt kasi 'ga upe ne— 'jau 'ga mama'eukwaawa upe.

'Ga pirewara aipo 'ga kunumī 'ga muapyaukare'ema, 'ga moje'egukare'ema 'jau.

²⁶ Ojeupe Jejuu 'ga 'eramū 'ga pirewara 'ga mopapaga, 'ga maema. A'eramū ojepe'au 'ga wi. Amanū ma'e 'jawe 'ga monou 'ga retyka. A'eramū esakara 'gā 'jau ajaupe:

—Amanū ete nipo kwe 'ga— 'jau 'gā ajaupe.

²⁷ A'eramū Jejuu 'ga kunumī 'ga poppyka 'ga mafu'ama.

²⁸ A'ere Jejuu 'ga wemimu'e 'gā nerawau 'gā nerousou 'og ipe. A'eramū 'ga remimu'e 'gā 'jau 'ga upe:

—Maran ajee ore norope'arūi 'ga wi ra'e 'ū?— 'jau 'gā 'ga upe.

²⁹ A'eramū Jejuu 'ga 'jau 'gā nupe:

—Nepoporogytai tāmējē Jarejuwarete 'ga upe pejemogyau. A'e are nepēfuakari'i nanuara apou. A'eramū 'ā pēē a'eramū 'ga pirewara pe'arūme'em 'ga wi— 'jau 'ga 'gā nupe.

Amanūawama 'ga imome'wau'japa
(Mateu 17.22-23; Luka 9.43-45)

³⁰⁻³¹ A'eramū Jejui 'ga awau aipo awi, wemimu'e 'gā netee. Garireja wyw raapa 'gā awau. Wemimu'e 'gā mu'ea 'ga ifutaa. “Nafutari je mytuna 'gā tejeko kwaawa. Tamu'e tejemimu'e 'gā etee tejee 'jau”, 'jau 'ga ojeupe. A'eramū 'ga 'jau 'gā nupe:

—Pēneki'yra agawewi je 'ā. A'etea nipo 'ga amū anurenure'i je mono ae a'wyre'ema 'gā po pe. Janeruwarete 'ga nipo je pyygukaa je ree iporomutare'ema 'gā nupe. A'eramū nipo 'ga je jukaukaa 'gā nupe. A'ere nipo 'ga imuapyra 'ara rupi je moferawi nū— 'jau Jejui 'ga 'gā nupe.

³² A'ere 'gā naeapyoi 'ga 'eawer are. A'eramū 'gā “simome'uukat 'ga upe 'jau”, 'jau 'gā ajaupe numiamū. A'ere 'gā jenosi 'ga upe imome'uukar are.

Esageay ma'e are 'gā mu'eawet
(Mateu 18.1-5; Luka 9.46-48)

³³ Anure Jejui 'ga awau owaēma Kafanaū 'jawa upe wemimu'e 'gā netee. 'Og ipe ose re Jejui 'ga oporonupa ee 'gā nupe:

—Ma'ja are te peporogyta pejejaupe pe rupi ra'e?— 'jau 'ga 'gā nupe.

³⁴ A'ere 'gā pigi etee. “Manamū te jane Jarejuwarete 'ga upe esage ma'eramū jarejuapyraapa?” 'jau 'gā ajaupe, ajamueu ee. A'eramū 'gā ojenosou imome'u awi.

³⁵ A'ere Jejui 'ga 'gā 'eawera kwaawi. A'eramū 'ga wapyka oporogytau 'gā nupe:

—'Wyriaramū pejekoweramū mama'ea peapo etee futat, pejejopoa— 'jau 'ga 'gā nupe.

³⁶ Aipo 'e re 'ga kunumī 'ga pyyka 'ga mafu'ama wemimu'e 'gā pyter ipe. A'ere 'ga kunumī 'ga mana imome'wau wemimu'e 'gā nupe:

³⁷ —Kunumī 'gā nee ijejuka esage ma'eramū je reewe futat pejejuka esage. Je ree ijejuka esage ma'eramū je muarera 'ga reewe futat pejejuka esage— 'jau Jejui 'ga 'gā nupe.

Jane poaara 'gā janepytuna 'jawe futat
(Luka 9.49-50)

³⁸ A'eramū Juā 'ga 'jau Jejui 'ga upe:

—Kūima'e 'ga amū ore aruesak mama'eukwaawa pe'aa 'gā nui ko, enerer imū ko. A'ere norepytuna 'ga rūi. A'eramū ore 'jau 'ga upe ko: “Ereapo awi nanuara”, 'jau ore 'ga upe ko— 'jau 'ga imome'wau Jejui 'ga upe.

³⁹ Aipo 'eramū Jejui 'ga 'jau 'gā nupe:

—Aipo pe'je awi 'gā nupe. “Peapo awi nanuara”, pe'je awi 'gā nupe. Jerer imū aeremiapo'e'ema apoara 'gā naje kurawa'uweri.

⁴⁰ Najanepytuna 'gā nūi numiamū. A'ere 'gā jane poari te jane porowyky are. A'eramū 'gā janepytuna 'jawe futat ajemogyau.

⁴¹ 'Yro'ysaga etee agawewi nipo 'gā imonou jeremiayuwamū pēē mū nupe i'yuwei ma'eramū. A'etea Janeruwarete 'ga 'yro'ysaga monoarera 'gā mepyyau ee— 'jau 'ga 'gā nupe.

Jejui 'ga rerowiar awi 'gā momoirukaat
(Mateu 18.6-9; Luka 17.1-2)

⁴² A'eramū Jejui 'ga 'jau 'gā nupe nū:

—Kunumī'tī 'gā etee te a'jea futat je rerowiat ajemogyau. A'eramū nipo Janeruwarete 'ga je rerowiar awi kunumī'tī 'gā momoirukaara 'gā nerekou tyweaete. Nanuara apoara 'gā amunipo 'ā ita mogou tāmējē 'ga jur are. A'ere 'ga monou 'ga momoa 'y pe 'ga matepawamū. 'Y pe imomoripyra 'ga ako tywet futat numiamū. A'ere je rerowiar awi kunumī'tī 'gā mosiara 'gā te ia'wyre'emaretea. Janeruwarete 'ga miamū najemuaēmi nanuara 'gā nee— 'jau Jejui 'ga 'gā nupe.

⁴³⁻⁴⁴ —“Jepoa je motywerukat Jarejuwarete 'ga upe. Mama'e tywera apoukaa jee, je motywerukaa Jarejuwarete 'ga upe”, 'jau ki pejepoa pemonok imonou imomoa pejejewi. Aepo monoga ay futat numiamū. A'ere mama'eukwaawa rapyaw ipe pēoa te ayrete ma'ea. Peu tataa nowewa'uweri. Nateepawa'uweri mama'eukwaawa rapyawa tataa— 'jau Jejui 'ga 'gā nupe.

⁴⁵⁻⁴⁶ —“Jepya je motywet Jarejuwarete 'ga upe”, 'jau nipo pēē pejepy upe. A'eramū pēē imonoka imonou imomoa pejejewi. Aepy monoga ay futat numiamū. A'ere mama'e tywera apoara 'gā mama'eukwaawa rapyaw ipe 'gā oa te ayramū. A'jea futat ay ma'ea. A'eramū nipo waywayramū futat aipo pe imonopyrera 'gā nupe— 'jau Jejui 'ga 'gā nupe.

⁴⁷ —“Jerea je motywet. Ēē resage'em ire amunipo 'ā je najerea'ari ēē ree tekou”, 'jau nipo pēē pejejeupe. A'eramū je 'jau pē nupe: “Orereaa ore motywerukat”, 'jau pejejeaa pemosok imonou imomoa pejejewi. Kasi a'e pe pēnea pē motywerukaru'jaw ine nū— 'jau 'ga 'gā nupe. —Pēnea mosoga ay futat. A'ere mama'e tywera apoara 'gā mama'eukwaawa rapyaw ipe 'gā oa te ayramū. A'jea futat ayay aipo pype imonopyrera 'gā nupe— 'jau Jejui 'ga 'gā nupe.

⁴⁸—Mama'eukwaawa rapyaw ipe merua'yra amanūme'em futat peuwara 'gā no'o 'u awi. Nowewi futari tataa mama'eukwaawa rapyaw ipe— 'Jau Jeju'i 'ga 'gā nupe.

⁴⁹—Anure nipo Janeruwarete 'ga werowiare'ema 'gā nereko tyweretei 'gā monou mama'eukwaawa rapyaw ipe. A'ere 'ga wemiayuwamū pē nupe mama'eay resaukari mama'e tywera pēē iapoe'em are pē mu'jawamū— 'Jau Jeju'i 'ga 'gā nupe.

⁵⁰—Esage jukyra numiamū. A'ere mama'e tywer are imojopype re jane imote'ari. Imote'ar ire jane imuesageu'jape'ema. A'ere mama'e tywera ojepype imojopype re nia'wyru'jawi janee a'eramū— 'Jau 'ga 'gā nupe. —Pēē ki pejemogy jukyr esage 'jawe. Pejejomojyrūmū pejejaupe— 'Jau 'ga 'gā nupe.

10

Peetyg awi pejemirekoa

(Mateu 19.1-12; 5.31-32; Luka 16.18)

¹A'ere Jeju'i 'ga awau Judeja ywy pe. Jotāuy raapa 'ga oramū mytuna 'gā 'ua ajatykau'japa Jeju'i 'ga ree. 'Uwarete 'ga ree 'ga 'gā mu'ei jepi. A'eramū 'ga 'awamū nanē 'gā mu'jau 'ga ree nū.

²A'eramū fariseu 'gā amū 'ua oporogytau Jeju'i 'ga upe. “Siesak 'ga je'eg amuteea jarejee 'Jau", 'Jau 'gā ajaupe. “Ga je'eg amuteeramū, sa'e 'ga upe 'Jau: Nuenuwi 'ga Moisesi 'ga je'ega ra'e, sa'e 'ga upe 'Jau jaremu'e amuteeramū 'Jau", 'Jau 'gā ajaupe. A'eramū 'gā 'Jau 'ga upe: —Jarujete sipo kūima'e 'ga wemireko retygi?— 'Jau 'gā 'ga upe oporonupa ee.

³A'eramū Jeju'i 'ga 'Jau 'gā nupe:

—Ma'ja e'i Moisesi 'ga rakue?— 'Jau 'ga 'gā nupe.

⁴A'eramū 'gā 'Jau 'ga upe:

—“Pejemireko retyka ki ka'arana pekwasiarukat 'ga amū upe ēē ree. 'Aetyk je ene tejemirekoramū akiko', pe'je ki ikwasiarukaa pejemirekofera ēē ree, imonou ēē upe”, 'Jau 'ga ikwasiaa rakue— 'Jau 'gā Jeju'i 'ga upe.

⁵—A'jea futat— 'Jau Jeju'i 'ga 'gā nupe. —Niporenuwiwari wejue pēypy 'gā Jarejuwarete 'ga je'eg are rakue. A'eramū Moisesi 'ga 'gā mueapyoukaa aipo are rakue.

⁶A'ere Janeruwarete 'ga aipo ne'i aepyyp 'gā nupe rakue. “Kūima'e 'ga je aapo kūjā ēē reewe.

⁷A'eramū 'ga wemireko re kūima'e 'ga opojo'ogamū ujara 'gā nui ojemujaa wemireko ēē ree etee”, 'Jau Janeruwarete 'ga rakue.

⁸—“Ajuee ojemujar ire 'gā jemogyi majepi teewara 'jawe jee”, 'Jau Janeruwarete 'ga rakue. Ajuerekoe'ema 'gā mukūi futat 'gā nekoi. A'ere 'gā ajueroko re 'gā majepi 'jawe etee 'gā nekoi Jarejuwarete 'ga upe.

⁹Janeruwarete 'ga wejue 'ga werekoukat 'gā ajaupe. A'eramū pēē pejejo-mojo'ogarūme'em pejejai, pejejuereko re— 'Jau Jeju'i 'ga 'gā nupe.

¹⁰Og ipe ose re Jeju'i 'ga remimu'e 'gā oporonupa ee 'ga upe nū.

¹¹A'eramū Jeju'i 'ga 'Jau 'gā nupe nū:

—Wemireko retykarera 'gā kūima'e 'gā ajemogoukat kūjā wemirekoe'em are ako ma'e 'Jawewara ēē ree amutee ēē rerekou nū.

¹²Kūjā nanē nū. Omena retykarera ēē ajemogoukaa kūjāmene'ema 'jawe amutee 'ga etee erekou nū— 'Jau Jeju'i 'ga 'gā nupe, 'gā mu'Jau ee.

Jeju'i 'ga kunumī 'gā netee

(Mateu 19.13-15; Luka 18.15-17)

¹³Anure 'gā amū wa'yra 'gā nerua Jeju'i 'ga upe nū:

—Orera'yra apyte'rarimū epo emono a'i kīT— 'Jau 'gā erua 'ga upe. —Jarejuwarete kīa upe eporogyta wā nee. A'eramū Janeruwarete kīa ojejukau esage wā nee, aru'e ore enee kīT— 'Jau kūjāmera 'gā 'ga upe.

A'ere Jeju'i 'ga remimu'e 'gā 'i etee 'gā nupe:

—Perur awi pejeja'yra 'gā 'ga upe 'ga porogyta 'ga 'amamū. Nepemaruukari 'ga porogyta— 'Jau 'gā 'gā nupe.

¹⁴A'ere Jeju'i 'ga nafutari. A'eramū 'ga 'Jau 'gā nupe:

—Naani. Peapo awi nanuara. Tene kunumī 'gā nuri je pyri— 'Jau ete 'ga wemimu'e 'gā nupe. —Janeruwarete 'ga kunumī 'gā afutat wemiayuwamū. Kunumī 'Jawewara 'gā nupe etee Janeruwarete 'ga reni 'wyriaramū— 'Jau 'ga 'gā nupe.

¹⁵—Pēnea'ar iki je'e are. Kunumī 'gā ojemogyppyk te Jarejuwarete 'ga ree. Ojereko katuukat 'gā 'ga upe. 'Gā 'jawe pejemogyramū 'ga pē katu'ogi. Kunumī 'Jawewara 'gā etee te Janeruwarete 'ga omogy wemiayuwamū. A'ere 'ga ojee ijemogyppyke'ema 'gā Janeruwarete 'ga nomogyi wemiayuwamū. Nakunumī 'jawe rūi 'gā. A'eramū 'ga 'gā mogyawe'em wemiayuwamū— 'Jau Jeju'i 'ga 'gā nupe, 'gā mu'Jau ee.

¹⁶ A'eramū Jejuī 'ga kunumī 'gā mana enu'ama, opo monou kunumī 'gā apyte'rarimū. A'eramū 'ga 'jau 'gā nupe:

–Janeruwarete 'ga ojejuka esage pē nee, kunumī– 'jau 'ga 'gā nupe.

*Jarejuwarete 'ga pyri oo are 'ga poronupawet
(Mateu 19.16-30; Luka 18.18-30)*

¹⁷ Jejuī 'ga 'wyt 'ga rekoramū kūima'e 'ga amū 'ua ujāna wapyka wenupy'āu 'ga rowase. A'eramū 'ga 'jau 'ga upe:

–Ene 'ā eneresage. Ma'ja te je aapo 'awamū tejeupe, temanū re ywag ipe tejesawamū, Jarejuwarete 'ga pyri tewawamū?– 'jau 'ga 'ua Jejuī 'ga upe.

¹⁸ A'eramū Jejuī 'ga 'jau 'ga upe:

–Ma'eramū te aipo ere jee? Janeruwarete 'ga etee te esage. “Ene 'ā Jarejuwarete 'ga 'jawewara futat”, ere te jee?– 'jau Jejuī 'ga 'ga upe.

¹⁹ –Erekwaap nipo Moisesi 'ga remikwasiarera. “Peporojuka awi. Peko awi peje-juemireko are. Pemunarū kasi mama'e are ne. Peje'ēwu'jag kasi 'ga amū ne. Pē'me kasi pejejaupe ne. Pejejomoryteewe'em 'jau. Pejejara 'gā je'ega anupa etee 'jau”, 'jau 'ga 'ā ikwasiaa inuga ka'aran are rakue. Mīmera 'ā erekwaapap– 'jau 'ga 'ga upe.

²⁰ A'eramū 'ga 'jau 'ga upe nū:

–Je kunumīawe futat aipoa akwaap ikue. Moisesi 'ga je'eg imū etee futat je mama'e aipo tekou– 'jau 'ga 'ga upe.

²¹ Aipo 'ga 'eramū Jejuī 'ga amā'jāu 'ga ree, iporiaa 'ga 'ga ree. A'eramū Jejuī 'ga 'jau 'ga upe:

–A'jea futat ere. A'ere 'awamū mama'e mū eapo. Ekaraemā eme'ēmap. A'ere ene ka'aranūū monou ika'aranūū'e'ema 'gā nupe. Aipoa ene iapo re, Janeruwarete 'ga ene monoi ojeypyri ene manū re. Mama'e esagea te nipo 'ga amut enee anure, ekaraemā monoawera mepyyau enee anure nū. Ekaraemā me'eg ire ene ejua je rewiri– 'jau Jejuī 'ga 'ga upe.

²² Aipo ojeupe Jejuī 'ga 'eramū 'ga u'arasigamū etee okaraemā are. Kwaiwete te 'ga karaemā. A'eramū 'ga oporome'egiwere'emamū ee. A'eramū 'ga 'jau ojeupe etee futat: “Naani. Naapoa'uweri je nanuara”, 'jau 'ga ojeupe etee futat. A'eramū 'ga u'arasigamū awau Jejuī 'ga aipo ojeupe 'eramū.

²³ A'eramū Jejuī 'ga amā'jāu wemimu'e 'gā nee. A'eramū 'ga 'jau 'gā nupe:

–Ayay te ikaraemā kwai ma'e 'gā ajemogyau Jarejuwarete 'ga remiayuwamū– 'jau 'ga 'gā nupe.

²⁴ Aipo 'ga 'erauwe 'ga remimu'e 'gā oporesagamū 'ga ree. A'eramū 'ga 'jau'japa:

–Ayay te 'gā ajemogyau Jarejuwarete 'ga remiayuwamū. Kwaiwete 'gā karaemā. A'eramū 'gā okaraemā are etee wea'aramū. Okaraemā are etee aipo 'gā jemogyppygi akou. Najarejuwarete 'ga ree rūi 'gā jemogyppygi ajemogyau. Jeje'ega 'gā nuenuwi futari ajemogyau– 'jau Jejuī 'ga 'gā nupe.

²⁵ –Sā'ā kawaruu 'jawewara kamerua aguja kwara rupi ikwawe'ema. Nan tee futat ayayramū ikaraemā kwai ma'e 'gā ojekatu'ogukaa Jarejuwarete 'ga upe. Ikaraemā kwai ma'e 'gā nijekatu'ogukariwari futari Jarejuwarete 'ga upe– 'jau Jejuī 'ga 'gā nupe.

²⁶ Aipo renupawe 'ga remimu'e 'gā oporesagamū etee Jejuī 'ga ree ajemogyau. A'eramū 'gā oporonupa ee ajaupe etee futat:

–Maranuara 'gā tete Janeruwarete 'ga okatu'ok?– 'jau 'gā ajaupe.

²⁷ A'eramū Jejuī 'ga 'jau 'gā nupe nū:

–Pē nupe nayrareferi futari. Ayay futat mama'e aipo pē nupe. A'ere nitywi futari Janeruwarete 'ga remiapo'e'ema mū mama'ea. Mama'ea naayi futari 'ga upe. Ikaraemā kwai ma'ea miamū Janeruwarete 'ga okatu'ok, “Je katu'og ape”, ojeupe 'gā 'eramū– 'jau etee Jejuī 'ga 'gā nupe.

²⁸ A'eramū Pedro 'ga 'jau 'ga upe:

–Ore ako aruejat orokaraemā arajua ene rupi ai'i. Oropytuna nanē futat ako ore ejaa ai'i nū– 'jau Pedro 'ga Jejuī 'ga upe.

²⁹ A'eramū Jejuī 'ga 'jau 'ga upe:

–A'jea futat ako ai'i. A'eramū je 'jau pē nupe: Anure nipo Janeruwarete 'ga mama'e monoi omama'e rejarera 'gā nupe. Je mome'u are woga rejaarera 'gā, weki'yra rejaarera 'gā, wewirera rejaarera 'gā, wenyra rejaarera 'gā, oy rejaarera 'gā, 'uwa rejaarera 'gā, wa'yra rejaarera 'gā, oywy rejaarera 'gā.

³⁰ Mīmera 'gā nupe nipo Janeruwarete 'ga mama'e monoi. 'Awamū futat 'ga mama'e monoi 'gā nemiejarera apyraapa jēmī nū. Woga rejaarera 'gā nupe Janeruwarete 'ga kwaiwete 'oga monoi, sēg 'oga monou 'gā nupe. Weki'yra rejaarera 'gā nupe Janeruwarete

'ga kwaiwete 'gā mogyau 'gā neki'yra 'jawewaramū, sēg 'gā mogyau 'gā neki'yra 'jawewaramū. Wewirera rejaarera 'gā nupe Janeruwarete 'ga kwaiwete 'gā mogyau 'gā newirera 'jawewaramū, sēg 'gā mogyau 'gā newirera 'jawewaramū. Wenyra rejaarera 'gā nupe Janeruwarete 'ga kwaiwete 'gā mogyau 'gā nenyra 'jawewaramū, sēg 'gā mogyau 'gā nenyra 'jawewaramū. Oy rejaarera 'gā nupe Janeruwarete 'ga kwaiwete 'gā mogyau 'gā y 'jawewaramū, sēg 'gā mogyau 'gā y 'jawewaramū. Oywy rejaarera 'gā Janeruwarete 'ga imogyau kwaiwete ywy jaramū, sēg ywy jaramū. Je rerowiare'ema 'gā nanē 'gā nerekou tyweaete je mome'u are nū. A'ere nipo je mome'wara 'gā anure 'gā oi ajemogyau ywag ipe nakwaparimū ete rūi futat— 'jau Jejuī 'ga 'gā nupe.

³¹—Awamū 'gā amū reni 'wyriaramū ajaupe. A'ere anure nipo aipo 'gā jemogyi akotee ma'eramū etee nū. Awamū 'gā amū ajemogyau akotee ma'e 'gā 'jawe. A'ere nipo anure aipo 'gā jemogyi 'wyriara 'jawewaramū nū— 'jau Jejuī 'ga 'gā nupe.

Amanūawama Jejuī 'ga imome'wau'japa

(Mateu 20.17-19; Luka 18.31-34)

³² A'ere Jejuī 'ga awau watau wemimu'e 'gā nupi nū. Jerusareg ipe 'gā awau. A'eramū Jejuī 'ga awau tenune, 'ga remimu'e 'gā awau akou 'ga rewiri. "Jerusareg ipe nipo 'gā je jukai anure", 'jau 'ga imome'wau 'gā nupe rakue. A'eramū 'gā wea'aramū ojeupe Jejuī 'ga 'eawer are. A'eramū 'gā oporesagamū 'ga ree. A'ere tekotee 'ga rewiri oo ma'e 'gā oi 'gā newiri. Opy'a'wyramū 'gā awau. A'ere Jejuī 'ga 'i wemimu'e 'gā nupe:

—Pe'je pejejua pejejeupe 'au 'gā nui ra'ne. Taporogyta pē nupe etee 'jau— 'jau 'ga 'gā nupe. A'eramū 'gā ojepe'au 'gā nui. A'eramū Jejuī 'ga ajukaawa mome'wau 'gā nupe nū.

³³ A'eramū Jejuī 'ga 'jau 'gā nupe:

—Jerusareg ipe jane oi 'awamū. Peu futat nipo 'ga amū pēneki'yramū je monoi mainana 'wyriara 'gā nupe, Moisesi 'ga remikwasiarer are moromu'jara 'gā netee— 'jau 'ga imome'wau 'gā nupe. —A'eramū nipo 'gā 'jau jee: "Sijukaukat 'ga 'gā nupe 'jau", 'jau nipo 'gā jee. A'eramū nipo 'gā je monou judeue'ema 'gā po pe.

³⁴ A'eramū nipo judeue'ema 'gā je kurapa, je rerekoemāu. A'eramū nipo 'gā onymuna je ree, je nupānupāu, je monou, je mu'ama 'ypeywar are jepo kutuka je manamamū futat. A'ere nipo imuaprya 'ara rupi Janeruwarete 'ga je moferawi etee nū— 'jau Jejuī 'ga 'gā nupe.

Juā 'ga Tiago 'ga retee Jejuī 'ga upe 'gā 'eawet

(Mateu 20.20-28)

³⁵ A'ere Sepeteu 'ga ra'yra 'gā 'ua Jejuī 'ga pyri katu katu 'jau 'ga upe:

—Mama'e esagea eapo oree, ki Ku'jyp— 'jau Tiago 'ga 'ua, Juā 'ga retee 'ga upe.

³⁶ A'eramū 'ga 'jau 'gā nupe:

—Ma'ja pēē ifutaa pejejeupe je iapoa?— 'jau Jejuī 'ga 'gā nupe.

³⁷ A'eramū 'gā 'jau 'ga upe:

—Ore muapygukar iki ape ejepyri, 'wyriarareteramū e'yī re. 'Wyriarareteramū ene renamū nipo 'gā 'ua ene muorypa najuejue etee. A'eramū ore aruapygiweramū ene pyri. Ore mū ki emuapygukat ejakwatawa katy. Ajejejamū ki ore muapygukat ape ejau katy. 'Wyriaramū ore mogo ape ejepyri— 'jau 'gā 'ga upe.

³⁸ A'eramū Jejuī 'ga 'jau 'gā nupe:

—Nepēneapyoi futari ee. 'Wyriarareteramū teko enune nipo je jerayrūnamū ra'ne kwaiwete. Je rerekou tyweaete te nipo 'gā. Pejereko tywerukat sipo je pyri? Pēnuag sipo pejejereko tywera upe?— 'jau 'ga 'gā nupe.

³⁹ A'eramū 'gā 'jau 'ga upe:

—Oreruag futat nipo ore jupe nū'ū— 'jau 'gā 'ga upe.

A'eramū Jejuī 'ga 'jau 'gā nupe nū:

—A'jea futat nipo 'gā pē nerekou tywari anure.

⁴⁰ A'ere je miamū namuapygarūi pēē tejeypyri tepoaawamū. Je pyriwara 'gā Jeruwarete 'ga te okwaap. 'Ga etee te okwaap. Wemifutar imū etee 'gā amū mū'jāu 'gā muapygukaa je pyri— 'jau Jejuī 'ga 'gā mu'jau ojeypyri wapyk ma'e 'gā nee.

⁴¹ 'Gā je'ega renupawe amumera 'gā Jejuī 'ga remimu'e 'gā amara'neramū Tiago 'ga ree, Juā 'ga ree nanē nū.

⁴² A'ere Jejuī 'ga 'gā nenūi 'gā majatykau ojee. A'eramū 'ga 'jau 'gā nupe:

—Pekwaap judeue'ema 'gā 'wyriara 'gā nemiapoa. 'Gā 'wyriara 'gā wemiayuwa 'gā amono kwe pe mama'e apoukaa ojeupe.

⁴³⁻⁴⁴ A'ere pēē jeremiayuwamū na'gā 'jawe rūi pejemogy. 'Wyriaramū pejejekoweramū pēē mama'e apou pejejaupe, pejejopoa etee futat mama'e apou pejejaupe. Pejejaupe oporowyky ma'eramū etee futat pejejemogyau. A'eramū nipo je pē mogyi 'wyriaramū— 'jau 'ga 'gā nupe.

⁴⁵—Je 'ā pēneki'yaretea agawewi. A'etea je 'ā ojot 'awa ywy pe mama'e apou pē nupe. Natejeupe mama'e apoukaa rūi je ruri. Pē nupe mama'e apoawamū etee te je ruri. Temanūmū te 'ā je ruri 'au pē nupe. Pē katu'okawamū te je ruri 'awa ywy pe. A'eramū taetu 'gā taje rerowiat 'jau kwy, a'e te je 'ā— 'jau 'ga 'gā nupe.

Eae'ema 'ga

(Mateu 20.29-34; Luka 18.35-43)

⁴⁶Jeriko pe Jeju'i 'ga awau wemimu'e 'gā netee. Pe awi 'gā oramū mytuna 'gā awau 'gā nupī. Awaw ipe 'gā eae'ema 'ga amū resaka, Patimeu 'ga resaka. Aipo 'ga ruwa 'ga Timeua. Peyse pe eae'ema 'ga 'ūina ka'aranū renūina ojeppyu okwap ma'e 'gā nupe.

⁴⁷Poje 'ga amū 'jau 'ga upe:

—Jeju'i 'ga okwap 'awamū. Nasare pe waranup ma'efera 'ga okwap akou nū— 'jau 'ga amū 'ga upe.

A'erauwe 'ga Jeju'i 'ga rera renupawe wafukaita 'ga upe:

—Ku'jyp! Ene 'ā Davi 'ga juapyrera, Jarejuwarete 'ga remimurera! Erejemuaēm te je ree? Epājē mū je katu'og ape!— 'jau 'ga wafukaita Jeju'i 'ga upe.

⁴⁸A'eramū mytuna 'gā 'jau 'ga upe:

—Epije e'ŷina kūi— 'jau 'gā 'ga upe, 'ga afukai 'ga renamū.

A'ere 'ga jero'wuro'wui etee wafukaita 'ga upe:

—Ku'jyp! Ene te 'ā Davi 'ga juapyrera, Jarejuwarete 'ga remimurera. Ejemuaēm je ree. Je resag ape!— 'jau 'ga wafukaita ojero'waro'wau etee 'ūina, Jeju'i 'ga upe wafukaita.

⁴⁹A'erauwe Jeju'i 'ga opytau pe pe 'ga ree.

—Peenūi 'ga— 'jau Jeju'i 'ga wemiayuwa 'gā nupe.

A'eramū 'gā 'ga renūina.

—“Ere ejua”, e'i 'ga enee. A'eramū ene ekyjawe'em efu'ama ejua ore rupi— 'jau 'gā 'ga upe.

⁵⁰A'erauwe Patimeu 'ga opiaara momoa ywyu kamēsīete afu'ama awau Jeju'i 'ga repejāna.

⁵¹A'eramū Jeju'i 'ga 'jau 'ga upe:

—Ma'ja te erefutut ejeupe je iapoa?— 'jau 'ga 'ga upe.

—Tamā'ē 'jau nū, a'e te je enee, ki Ku'jyp. Jereapap je ikue— 'jau 'ga 'ga upe.

⁵²A'eramū Jeju'i 'ga 'jau 'ga upe:

—Je rerowiar ape ekou ra'e jepi. A'eramū je ene mamā'jāu nū— 'jau Jeju'i 'ga 'ga upe.

Aipo 'ga 'erauwe 'ga amā'jāu nū. A'eramū futat 'ga awau Jeju'i 'ga rewiri.

11

Kawaru'i 'arimū Jeju'i 'ga ataawet

(Mateu 21.1-11; Luka 19.28-40; Juā 12.12-19)

¹Jerusarega pyriu'i owaēmamū 'gā awau ywytyr ipe, Oriweira 'jaw ipe. Mukūi amunawa 'upa ywytyra pyri. Pefaje, Petani. Mīmera amunawa 'upa ywytyra pyri.

²A'eramū Jeju'i 'ga 'jau wemimu'e 'gā amū nupe, mukūja 'gā nupe:

—Pe'je pejewau pejekwapa je renune pejewau pejewaēma iruupeuwara amunawa upe. Pejesouwe nipo pēē kawaru'i mū resaka. Nuatai we 'ga amū i'arimū. A'ea ki perut iamioia jee— 'jau Jeju'i 'ga 'gā nupe.

³—“Ma'eramū te peko ee?” pejejeupe 'gā 'eramū ki “Janejara 'ga te e'i oree ko: Kawaru'ia perut jee ra'ne, e'i 'ga oree ko. A'ere nipo 'ga ko'iko'i ete imuri pē nupe nū”, pe'je ki 'gā nupe— 'jau Jeju'i 'ga 'gā nupe.

⁴A'eramū 'gā awau. Awau 'gā kawaru'i resaka. 'Oga rokwar ipe 'upa ojeamogou.

⁵'Gā iamoiramū 'gā amū 'jau 'gā nupe:

—Ma'eramū pēē pejekou ee ki 'ei? Ma'eramū pēē iamioia ki 'ei?— 'jau 'gā 'gā nupe.

⁶A'eramū 'gā 'jau 'gā nupe, ojeupe Jeju'i 'ga 'eawer imū etee futat:

—Janejara 'ga te e'i oree ko: “Kawaru'ia pekwap amū rerua jee ra'ne”, e'i 'ga oree ko. A'ere nipo 'ga ko'iko'i ete imuri nū— 'jau 'gā 'gā nupe.

A'eramū ee 'gā nupe oporonup ma'efera 'gā kawaru'i rerawaukaa 'gā nupe.

—A'jea. Pe'je ajee erawau 'ga upe— 'jau 'gā 'gā nupe.

⁷A'eramū 'gā kawaru'i rerawau Jeju'i 'ga upe. A'eramū 'gā amū opiaara mososoka imonou kawaru'i 'arimū Jeju'i 'ga apykawamū. A'ere Jeju'i 'ga wapyka i'arimū.

⁸Kwaiwete 'gā awau 'ga renunewe opiaara mososoka, imonou pe rupi imogyau 'ga kwapawamū. 'Ga ree oporomutaawa resaukaawamū 'gā iapou. Pinowa nanē 'gā imonou pe rupi 'ga kwapawamū.

⁹'Ga renune oo ma'e 'gā wafukaita 'ga rewiri oo ma'e 'gā netee:

—Au'je katu te 'ā Janeruwarete 'ga resageayramū janee. Ene 'ā 'ga remimurera futat.

¹⁰Ene 'ā ore 'wyriar ymanera juapyreramū, Davi 'ga juapyreramū. 'Awamū nipo 'ā ene e'ŷina 'wyriarareteramū oree. Janeruwarete 'ga ojejuka esage ene ree. Janeruwarete 'ga

'ā esage oree. Ene 'ā 'ga imua oree— 'jau 'gā wafukaita Jeju 'ga kawaru'i 'arimū 'ga rut 'ga rekoramū.

¹¹ Jerusarega upe owaēmawe Jeju 'ga ojypa kawaru'i 'ar awi awau osou 'Uwarete 'ga mogytaaw ipe. A'eramū 'ga peu ose re amā'jāu mama'e are, mama'ea ipypewar are. A'ere 'ga noje'egi 'gā nupe. Kaaruwamū futat. A'eramū 'ga uēma jui, awau Petani pe wemimu'e 'gā netee.

Y'wa 'ywa upe Jeju 'ga 'eawet
(Mateu 21.18-19)

¹² Ai'iwe 'gā awau ojewya Jerusareg ipe nū. Jeju 'ga opy'arayparamū akou aipo pe.

¹³ Awaw ipe 'ga y'wa 'ywa resaka, figu 'jawa 'ywa resaka, kwaiwete oowa resaka. A'eramū 'ga epejāna i'a rekaa. A'ere nitywi i'aa. Oowa etee esaka akā are. Nowaēmi we i'aawa upe.

¹⁴ A'eramū Jeju 'ga 'jau 'ywa upe:

—Au'je katu katu ki e'a re 'awa y'wa 'ywa mū— 'jau 'ga y'wa 'ywa upe.
Aipo 'ga 'ea 'ga remimu'e 'gā enupa.

Wyra me'egara 'gā mū'ēawet
(Mateu 21.12-17; Luka 19.45-48; Juā 2.13-22)

¹⁵ Jerusareg ipe owaēmawe Jeju 'ga awau osou Jarejuwarete 'ga mogytaawa osoma pype wemimu'e 'gā netee. Irāā'ā wyra me'egara 'gā jemogyramū. A'eramū Jeju 'ga amara'neramū 'gā nee:

—Pe'je pejewau peje'jāu 'aw awi. Nawyra me'egawa rūi te 'ā. Janeruwarete 'ga mogytaawa te 'ā 'oga. 'Au futat jane ruri jareporogytau 'ga upe. A'ere 'ā pēē nanarūi pereko. Pem'yi wyra me'egawamū etee. Pejejeymawa etee 'ā pēē erua ime'ega erupa 'ga mogytaawa 'oga pype— 'jau Jeju 'ga 'gā nupe.

Wyra muara 'gā neewe futat 'ga 'gā mū'jāu jui. Ka'aranūū mojoy'ruara 'gā 'yjepana 'ga imonou imuewiwya imojerepa 'gā nui. Aipo ka'aranūū mojoy'ruara 'gā kwe pewara 'gā ka'aranūū mojoy'rau ajaupe. A'eramū Jeju 'ga 'gā 'yjepana monou imuewiwya imojerepa 'gā nui. Ka'aranūū monou imomopomopoa 'gā nui. Pykau me'egara 'gā kanawaa nanē 'ga imojerepa nū.

¹⁶ Jarejuwarete 'ga mogytaawa rukara 'ga iaawukare'ema mama'e rerooara 'gā nupe.

¹⁷ A'eramū 'ga 'gā mu'jau ee:

—Ymā te 'ā Janeruwarete 'ga ka'arana kwasiarukari Isai 'ga upe rakue: “Agamū jemogytaawa 'oga futat. 'Au futat 'gā nuri oporogytau jee, najuejue etee 'gā nuri oporogytau jee”, 'jau 'ga ikwasiarukaa 'ga upe rakue. A'ere 'ā pem'yi wyra me'egawamū etee. Pejejeymawa me'ega pejejaupe pejejeymawa repy rowoupia ekoete 'ā pejejupa 'au pejejaupe. Ma'eramū pēē 'ga mogytaawa 'oga m'ina pejemunarūawamū ete 'ū? — 'jau 'ga 'gā nupe, oje'ega moywrafena.

¹⁸ Jeju 'ga remiapofera rera renupawe mainana 'wyrara 'gā, Moisesi 'ga remikwasiarer are moromu'jara 'gā netee amara'neramū 'ga ree. A'eramū taetu 'gā afuwereteramū 'ga ree.

—Maran tete jane Jeju 'ga jukaarūi?— 'jau 'gā ajaupe.

Okyje wejue 'gā mytuna 'gā nui. A'eramū 'gā poromū 'jau. Kwaiwete wejue 'gā porenuwiweramū Jeju 'ga 'e are. A'eramū 'gā oky'jau 'gā nui. “Ga jukaramū te 'gā jane apisi ete nū a'i kūi”, 'jau 'gā ajaupe.

¹⁹ Kaaruwamū Jeju 'ga awau uēma Jerusareg awi wemimu'e 'gā netee.

Jupe Jeju 'ga 'eawera y'wa 'ywa oypiwamū
(Mateu 21.20-22)

²⁰ Ai'iwe 'gā awau okwapa y'wa 'ywa pyu nū, jupe Jeju 'ga 'eawera 'ywa pyu nū. A'eramū 'gā esaka nū. Amanūmū osiniga u'ama. Apoa we futat oypiwamū.

²¹ A'eramū Pedro 'ga wea'aramū Jeju 'ga 'e are. A'eramū 'gā 'jau Jeju 'ga upe:

—Esak, ki Ku'jyp. Jupe ene'eawera ay y'wa 'ywa rai'i. Iypip u'ama amanūmū ojeupe ene je'eg ire rai'i— 'jau 'ga Jeju 'ga upe.

²²⁻²³ A'eramū Jeju 'ga 'jau 'gā nupe:

—Pēnea'ar iki je'e are. Jarejuwarete 'ga rerowiar ire pēē nanē pejemiapoe'ema peapo nū. Ywytyra miamū futat nipo pēē imojepe'auckaa tenaw awi imonou 'yē'ē rypyter ipe im'ina. “Ekwap 'aw awi 'yē'ē rypyter ipe e'yina”, ojeupe pēē 'eramū nipo awau pē'eawer imū etee futat. A'ere pēē nepeapoa'uweri pejemiapoe'ema Jarejuwarete 'ga rerowiar wwyapie'em ire— 'jau 'ga 'gā nupe.

²⁴—A'eramū je ako 'jau pē nupe jepi: Werowiar ire Janeruwarete 'ga mama'e monoi pē nupe, “mama'ea emut amū oreo”, ojeupe pēē 'eramū. “Amut 'ga jee” 'e rerowiar ire 'ga mama'e monoi pē nupe ojeupe pē'eawer imū etee futat— 'jau Jeju 'ga 'gā nupe.

²⁵⁻²⁶—Jarejuwarete 'ga upe pejeporogytaramū nipo pēē pejejea'aramū pejejeupe 'gā amū mama'e tywera apoower are. A'eramū ki pēē pejejeateeramū jui. A'eramū Janeruwarete 'ga pētywera moia pē nui— 'jau Jeju 'ga 'gā nupe, 'gā mu'jau ee.

*“Awŷja rer imū te erejot?” Jeju 'ga upe 'gā eawet
(Mateu 21.23-27; Luka 20.1-8)*

²⁷ A'eramū 'gā awau owaēma Jerusareg ipe nū. Jarejuwarete 'ga mogytaawa pype 'gā ata 'gā nekoramū, 'gā amū 'ua oporogytau Jeju 'ga upe. Mainana 'wyriat, Moisesi 'ga remikwasiarer are moromu'jat, judeu 'gā 'wyria'ri. Mīmera 'gā 'ua oporonupa ee Jeju 'ga upe:

²⁸—Awŷja rer imū te erejot rakue? Awŷja pājē mū te mama'e ereapo? Awŷja te ene mut oreo rakue?— 'jau 'gā 'ua oporonupa ee Jeju 'ga upe.

²⁹ A'eramū Jeju 'ga 'jau 'gā nupe:
—Pe'je ajee pēē na'ne imome'wau jee 'ū. Tejeupe pēē imome'u re je nanē tajemome'u pē nupe 'jau nū— 'jau ete Jeju 'ga 'gā nupe.

³⁰—Awŷja je'eg imū Juā Batista 'ga ruri ae pymīau 'y pe rakue 'ū? Jarejuwarete 'ga je'eg imū te 'ga ruri rakue? Kūima'e 'ga amū je'eg imū te ra'u nū?— 'jau Jeju 'ga oporonupa ee 'gā nupe u'ama.

³¹ A'eramū 'gā 'jau ajaupe:
—Ma'ja sa'e te jane 'ga upe? “Jarejuwarete 'ga je'eg imū 'ga ruri” ojeupe jane 'eramū te 'ga 'i janee nū a'i kūi, “A'etea neperowiari 'ga”, 'ga 'i etee janee nū a'i kūi— 'jau 'gā ajaupe.

³²—“Kūima'e 'ga je'eg imū 'ga ruri”, jane 'eramū nipo tekotee 'gā jane apisi ita pyu nū a'i kūi— 'jau 'gā ajaupe.

Okyje 'gā mytuna 'gā nui. “Juā 'ga Jarejuwarete 'ga je'ega mome'wara futat janee”, e'i 'gā jepi. A'eramū 'gā okyjau 'gā nui.

³³ A'eramū 'gā 'jau Jeju 'ga upe:
—Norokwaawi ore Juā 'ga muarera 'ga nū'ū— 'jau 'gā 'ga upe.
A'eramū Jeju 'ga nanē 'jau 'gā nupe nū:
—A'eramū je nanē temuarera 'ga mome'wawe'em pē nupe— 'jau Jeju 'ga 'gā nupe.

12

*Ko raaran a'wyre'ema 'gā
(Mateu 21.33-46; Luka 20.9-18)*

¹ A'ere Jeju 'ga mama'e mū mome'wau 'gā nupe 'gā mu'jawamū.
—Kūima'e 'ga amū y'wa 'ywa rakā otym oko pe, uwa 'jawa 'ywa rakā otym oko pe. Kwaiwete 'ga uwa rakā tyama. A'eramū 'ga oko osōu. A'ere 'ga y'wa apikawa apou. A'ere 'ga 'og ywate apou iaarana 'ga upe. A'eramū 'ga 'gā amū monou oko raaranamū imŷina ojeupe. A'eramū 'ga 'jau “Y'waa mū jema'ea futat. Emyreramū te ajee pēma'e futat pēporowykawera repya futat”, 'jau ijara 'ga 'gā nupe. A'ere 'ga awau watau 'gā nui.

² Y'wa tyarama upe iwaēmauwe ijara 'ga wemiayuwa 'ga amū monou oma'ea uwa 'a piaramū.

³ A'ere ko raarana 'gā 'ga pyygi ete 'ga nupānupāu etee 'ga mojewya 'ga monou. Nan etee futat 'gā 'ga monou nū.

⁴ A'ere ko jara 'ga 'ga amū monou nū, oma'e piaramū te 'ga 'ga monou numiamū. A'eramū ko raarana 'gā nānēwējēmī 'ga rerekoi nū. 'Ga pyygi etee 'ga akānupāu 'ga rerekou nū. A'erauwe 'ga ojewya awau nū.

⁵ A'eramū ko jara 'ga 'ga amū monou nū. A'ere ko raarana 'gā 'ga jukai etee. A'eramū ko jara 'ga 'gā amū monou nū. A'ere ko raarana 'gā 'gā pyygi ete 'gā nerekou tyweaete. 'Gā amū 'gā iapisau.

⁶ Nitywi futari ko jara 'ga remimonorama. Wa'yra etee 'ga wereko. A'eramū 'ga 'jau ojeupe: “Teja'yra 'ga pa je omono ipiaramū kwy. 'Ga 'ā jeremifutararetea re'ā. A'etea je 'ga amono tey'wa piaramū tejeupe”, 'jau 'ga ojeupe. “Jera'yra 'ga nipo 'gā opojeup re'ā. Jera'yra 'ga ree nipo 'gā pojyramū re'ā”, 'jau nipo 'ga ojeupe— 'jau Jeju 'ga imome'wau 'gā nupe.

⁷—A'ere 'gā 'ga ra'yra 'ga resakawe 'jau ajaupe: “Wa'yra 'ga 'ga amut y'wa piaramū ra'e. 'Ga futat 'uwa 'ga py'rau ko jaramū 'uwa 'ga manū re. A'eramū jane 'ga jukau jui. A'eramū janema'ea futat koa 'ga ruwa 'ga manū re kūi”, 'jau nipo 'gā ajaupe— 'jau Jeju 'ga 'gā nupe.

⁸—A'eramū 'gā 'ga pyyka 'ga jukau. 'Ga juka re 'ga reumera rerawau enuēma ko awi inuga— 'jau Jeju 'ga 'gā nupe imome'wau.

⁹ A'eramū Jeju 'ga 'jau mainana 'wyriara 'gā nupe:

—Maran sipo ko jara 'ga wa'yra jukaarera 'gā nereko'i? 'Ga futat oo ko raarana 'gā apisau. A'ere nipo 'ga 'gā amū monou 'gā py'rau oko raaranamū nū. Aipo 'gā te nipo y'wa mono ijara 'ga upe y'wa tyarūnamū— 'jau Jeju'i 'ga 'gā nupe.

¹⁰ —Pēnea'ar iki 'ga amū remikwasiarer are. Ymā te 'ā Janeruwarete 'ga oje'ega kwasiarukari 'ga amū upe rakue.

“Mīa ita nia'wyrui ra'e, 'jau nipo itaoga apoara 'gā ajaupe, ita monou imoma' ajaui.

A'ere 'ga amū aipoa ita eroyrūmyrera ita pyygi etee imonou imyina tenawera pype 'oga ppywotypawamū.

¹¹ Janeruwarete 'ga imyijukaa 'gā nupe rakue.

A'eramū 'ga remiapofera wesageayramū futat ore’’,

'jau 'ga ikwasiarukaa ka'aran are inuga rakue— 'jau Jeju'i 'ga 'gā nupe.

¹² 'Ga je'ega renupawe mainana 'wyrara 'gā 'jau fariseu 'gā nupe:

—Mama'e mū mome'uramū 'ga 'i janee poromū— 'jau 'gā ajaupe.

A'eramū taetu amara'neramū Jeju'i 'ga ree. Afueweramū 'ga ppyg are. A'ere 'gā kyjeetei mytuna 'gā nui.

—“Jeju'i 'ga te 'ā Jarejuwarete 'ga je'ega mome'wararetea ra'e”, 'jau 'gā ajemogyau ajaupe. A'eramū nipo 'gā jane apisi ete. Jeju'i 'ga jane ipyygamū nipo 'gā jane ppygi nanē nū— 'jau 'gā ajaupe, okyjau Jeju'i 'ga rerowiaara 'gā nui.

A'eramū 'gā 'ga ppyke'ema. A'eramū 'gā awau 'ga wi.

Jeju'i 'ga upe fariseu 'gā 'eawet

(Mateu 22.15-22; Luka 20.20-26)

¹³ A'eramū judeu 'gā 'wyrana'nī 'gā 'jau ajaupe:

—'Gā amū simono imoporogytaukaa 'ga upe 'jau. Morogyta 'ga imome'u tyweramū sipyyk 'ga 'jau— 'jau 'gā ajaupe.

A'eramū 'gā fariseu 'gā amū imonou Erote 'ga remiayuwa 'gā netee Jeju'i 'ga upe imoporogytaukaa.

¹⁴ A'eramū 'gā awau 'jau Jeju'i 'ga upe:

—A'jea futat 'ā ereporogyta ajeteetewi ra'e. Nereporogyta ekoetei te 'ā. A'jea futat te 'ā erejejuka pāwē pāwē ae ree. A'jea futat te 'ā ore mu'e ape mama'e are. Eneje'eg are 'gā amū oporenuwiwere'emamū agawewi. A'etea ene mama'e a'jea etee eremome'u— 'jau 'gā Jeju'i 'ga upe. —A'eramū ene 'awamū 'jau ore: Jane 'ā judeua. Simono te jane ka'aranūia 'wyrararete 'ga upe, Sesa 'ga upe? Naani te ra'u nū? Ma'ja e'i te Moisesi 'ga ee rakue? Najudeu arūi te 'ā 'wyrararete 'ga. Tapy'yi amuteea 'ga. Romanūa te 'ga. A'etea te jane simepy 'ga?— 'jau 'gā oporonupa 'me Jeju'i 'ga upe ee.

¹⁵ A'ere Jeju'i 'ga 'gā kwaawi ojee. “Jeje'ega renupa 'gā nuri numiamū. 'Siesak 'ga mama'e mū mome'ua sigaty jarejee 'jau', e'i te 'gā jee numiamū”, 'jau Jeju'i 'ga ojeupe. A'eramū 'ga 'jau 'gā nupe:

—Nepeporonui tee pejejua ee jee. “Simosimot ekoete jarejaupe 'ga 'eawera 'jau”, pe'je te jee— 'jau Jeju'i 'ga 'gā nupe. —Ka'aranūi ywope'ia pemut amū jee ra'ne, Sesa 'ga mepyawa mū jee ra'ne— 'jau ete Jeju'i 'ga 'gā nupe.

¹⁶ A'eramū 'ga amū imonou 'ga upe.

—Kweramū ajee 'wei— 'jau 'ga imonou 'ga po pe.

A'eramū Jeju'i 'ga ka'aranūi ywope'i resaukaa 'gā nupe:

—Aw'ya ra'agawa te 'up ee 'ga rera retee?— 'jau 'ga esaukaa 'gā nupe.

—'Wyrararete 'ga ma'ea futat— 'jau 'gā Jeju'i 'ga upe.

¹⁷ A'eramū Jeju'i 'ga 'jau 'gā nupe:

—'Ga ra'agawa rerekwara 'ga ma'ea futat. A'eramū pēē imonou 'ga upe etee futat. A'ere Jarejuwarete 'ga mama'ea pemono 'ga upe etee futat— 'jau Jeju'i 'ga 'gā nupe.

A'e renupawe 'ga upe imome'uukarera 'gā oporesagamū etee 'ga ree.

—Kuu. I'akwaap 'ga ra'e nū'ū— 'jau 'gā ajaupe.

A'eramū 'gā awau 'ga wi.

Oferap ma'e are 'gā mu'eawet

(Mateu 22.23-33; Luka 20.27-40)

¹⁸ Ko 'iko'i ete satuseu 'gā amū 'ua oporogytau Jeju'i 'ga upe nū. Aipo 'gā e'i ajaupe ra'e jepi: “Amanū re ae noferawu'jawi nū. Amanūmū ae teepawamū ywawuje futat”, 'jau agawewi satuseu 'gā ajaupe ra'e jepi. A'etea 'gā 'ut oporonupa ee Jeju'i 'ga upe.

¹⁹ A'eramū 'gā 'jau Jeju'i 'ga upe:

—“Moromu'jara 'ga” 'jau 'gā enee jepi. A'eramū ene ore mueapyou katu mama'e are. Ymā 'ā Moisesi 'ga ka'arana kwasiari inuga janee rakue. “Kūima'e 'ga amū nipo amanū wa'yre'emauwe. A'eramū nipo 'ga manū re 'ga rewirera 'ga 'ga remirekofera eē rerekou.

A'eramū nipo 'ga aja'yrapyau ēē pype. A'eramū nipo 'ga ra'yr ypy 'ga amanū ma'efera 'ga ra'yrera 'jawe futat', 'jau 'ā Moisesi 'ga ikwasiaa inuga rakue— 'jau 'gā Jeju 'ga upe.

A'eramū Jeju 'ga 'jau 'gā nupe:

—A'jea futat— 'jau Jeju 'ga 'gā nupe.

²⁰ A'eramū 'gā 'jau 'ga upe nū:

—A'ere nipo kūima'e 'ga amū 'ga ra'yra sete. A'eramū nipo u'ar ypy ma'efera 'ga kūjā mū rerekou. A'ere nipo 'ga wa'yre'emauwe 'ga manūi jui. A'eramū nipo 'ga amanūmū ēē wi ēē rejaā ēē mogou wewirerera 'gā nupe.

²¹ A'eramū nipo 'ga manū re 'ga rewirerera 'ga amū ēē rerekou 'ga py'rau nū. A'ere nipo 'ga nanē 'ga manūi wa'yre'emauwe nū, ēē rejaā ete wewirerera 'gā nupe nū.

²² A'eramū nipo 'gā ojopy'rapy'rau etee 'gā ēē ree, ajamanūnamū. A'ere nipo 'gā nata'yri'i futari ēē pype. Ojee 'gā jemoypaw ire nipo ēē nanē amanūmū nū.

²³ A'eramū nipo 'ga ae moferapawa 'ara rupi manamū sipo ēē menaretea? 'Gā juejue futat ēē weroko kūi— 'jau 'gā Jeju 'ga upe.

²⁴ A'eramū Jeju 'ga aipo ojeupe 'gā 'eramū 'jau 'gā nupe:

—Pē'me awi. Nanarūi. Nepēneapyoi Jarejuwarete 'ga je'ega rerekwara ka'aran are ra'e. 'Ga pājēa nanē pēē ikwaape'ema.

²⁵ 'Au etee te 'gā nemirekoramū kūi. A'ere 'gā oferaw ire naemirekou'jawi kūi. Ywagipewara 'gā 'jawe etee futat 'gā jemogyi. Niporerekoweru'jawi 'gā kūjā are. Kūjāmera 'gā nanē omenariwere'emamū futat nū, kūima'e 'gā 'jawe etee futat nū kūi— 'jau Jeju 'ga 'gā nupe.

²⁶ —Nepēneapyoi nipo Jarejuwarete 'ga 'eawer are. Nepemogytai nipo Moisesi 'ga remikwasiarera, ae feraw are 'ga ka'arana kwasiaripyra ra'i? Ka'a'i ikai are 'ga ka'arana kwasiari rakue. A'eramū 'ga 'jau: "Ka'a'ia je upe imueny re Janeruwarete 'ga oje'ega jee ikue. 'Je te 'ā Eneruwaretea. Enepytunera 'gā Nuwaretea 'jau. Abraão 'ga, Isaki 'ga, Jako 'ga. Mīmera 'gā Nuwaretea je ako', 'jau 'ga jee ikue", 'jau Moisesi 'ga ikwasiaa inuga janee rakue— 'jau Jeju 'ga 'gā nupe. —"Ymā te je 'gā Nuwaretea ikue", 'jawe'em Janeruwarete 'ga 'ga upe rakue. A'ere 'ga 'i: "Je te 'ā 'gā Nuwaretea ako", 'jau 'ga rakue— 'jau Jeju 'ga 'gā nupe.

²⁷ —Aipo 'gā amanū futat rakue numiamū, Moisesi 'ga tywe'emauwe futat rakue numiamū. A'ere 'gā 'aga namanūi futari. A'eramū Janeruwarete 'ga poromū 'jau Moisesi 'ga upe rakue. 'Gā 'aga tywe'em ire amunipo 'ā 'ga aipo ne'ia'uweri Moisesi 'ga upe rakue. Ako ma'e 'gā nupe etee te 'ga Aeruwaretea— 'jau Jeju 'ga 'gā nupe u'ama imome'wau. —A'eramū 'ā pēē 'gā mu'jau tywet aipo are. "Noferawu'jawi aea amanū re" 'e are pēē 'gā mu'jau tyweaete— 'jau Jeju 'ga 'gā nupe.

*Janeruwarete 'ga 'eaweraretea
(Mateu 22.34-40; Luka 10.25-28)*

²⁸ Moisesi 'ga remikwasiarer are moromu'jara 'ga amū 'gā je'ega renupa. A'eramū 'ga 'jau ojeupe: "A'jea futat 'ga 'i. Tamoporogytaukat 'ga mama'e are", 'jau 'ga ojeupe etee futat.

—Maranuara te ajee Janeruwarete 'ga 'eaweraretea?— 'jau 'ga Jeju 'ga upe.

²⁹ A'eramū Jeju 'ga 'jau 'ga upe:

—Awamū futat 'ga 'eaweraretea. "Peapyaka jeje'eg are ki Israeu juapyreramū. Je te 'ā pējararetea. Nitywi futari 'ga amū je 'jawe pē nupe",— 'jau Jeju 'ga 'gā nupe.

³⁰ —"Pēporomutat je ree pejepytuna 'gā apyraapa", e'i 'ā Janeruwarete 'ga pē nupe rakue. "Mama'ea peapo jee jeremifutar imū. Pejejea'aramū pejejemogyau je ree 'gā nee pejejea'ara apyraapa. Je upe mama'e apou pēē iapou etee futat. Pejefuakara pyu pēē mama'e apou je upe. Aipo aporamū nipo pejeporomutamū je ree a'jea futat 'gā nee pejeporomutara apyraapa pejejemogyau", e'i Janeruwarete 'ga pē nupe rakue— 'jau Jeju 'ga 'ga upe. —Poromū te 'ga 'eaweraretea.

³¹ Ajejeja 'ga 'eaweraretea nanē nū. "Pēporomutat pejepyriwara 'gā nee pejejee pejeporomutara 'jawe etee futat", 'jau 'ga 'ā ikwasiarukaa Moisesi 'ga upe rakue. Amumera 'ga 'eawera nuapyraawi futari aipo 'ga 'eaweraretea— 'jau Jeju 'ga 'ga upe.

³² A'eramū Moisesi 'ga remikwasiarer are moromu'jara 'ga 'jau 'ga upe:

—A'jea futat ere poromū. Majepei tee futat te 'ā Janeruwarete 'ga. Nitywi futari 'ga amū 'ga 'jawe.

³³ A'eramū ki jane jareporomutamū 'ga ree jarepytuna 'gā jareporomutara apyraapa. A'eramū jane a'jea futat jareporomutamū 'ga ree. 'Ga upe mama'e apou ki jane iapou 'ga remifutar imū etee futat. 'Ga ree ki jane jarejea'aramū jarejemogyau. 'Ga upe mama'e apou ki jane iapou a'jea futat. 'Ga remifutar imū ki jane jarejepyriwara 'gā nerekou esage jarejereko esage 'jawe etee futat— 'jau 'ga 'ga upe. —Aipo 'ga 'eawera renuwa wesageramū 'ga upe mama'e rapya apyraapa. 'Ga je'ega renuwa esage 'ga upe mama'e monoa apyraapa— 'jau 'ga Jeju 'ga upe.

³⁴ Aipo ojeupe 'ga 'eramū Jejuī 'ga 'jau ojeupe: “T'akwaap ma'e 'ga pa ra'e”, 'jau 'ga ojeupe etee futat 'ga resaka. A'eramū Jejuī 'ga 'jau 'ga upe:

—Ererowyk Jarejuwarete 'ga ekou ra'e— 'jau 'ga 'ga upe.

Aipo 'ga 'e renupawe mytuna 'gā ajemogymogyau etee futat. Ojenosōu 'ga wi. A'eramū 'gā imome'waukaru'jape'ema 'ga upe.

Janeruwarete 'ga remimurera 'ga Davi 'ga juapyret

(Mateu 22.41-46; Luka 20.41-44)

³⁵ Jarejuwarete 'ga mogytaawa pype akou Jejuī 'ga oporonupa ee 'gā nupe:

—Ma'eramū te Moisesi' 'ga remikwasiarer are moromu'jara 'gā 'i pē nupe: “Janeruwarete 'ga remimurera 'ga Davi 'ga juapyrera”, 'jau 'gā pē mu'jau ee.

³⁶ A'ere Janeruwarete 'ga 'Agesagea ka'arana kwasiarukari ee Davi 'ga upe rakue:

“Jeruwarete 'ga 'jau Jejararete 'ga upe rakue:

'Eapyk 'au je pyri. Je 'jawe futat ene. Enepājērete je 'jawe.

A'eramū ene eapyka je yse katy.

Anure nipo je ene mogoi 'wyriaramū 'gā nupe najuejue etee futat.

Ene ree iporomutare'ema 'gā 'arimū je ene magwukari.

A'eramū ene je iapoe'emauew eapyka 'au je yse katy', 'jau 'ga Jarejararete 'ga upe”,

'jau Davi 'ga ikwasiaa rakue— 'jau Jejuī 'ga 'gā nupe.

³⁷—Janeruwarete 'ga remimurera 'ga ree 'ga ka'arana kwasiari rakue. Ma'eramū sipo ajee Davi 'ga 'i “Jejararete 'ga”, 'jau ajuapyrera 'ga upe nū— 'jau Jejuī 'ga 'gā nupe.

Moisesi 'ga remikwasiarer are moromu'jat

(Mateu 23.1-36; Luka 20.45-47)

Mytuna 'gā oporenuwiweramū Jejuī 'ga porogyta are. 'Ga remimome'ufera 'gā muekōēina.

³⁸ A'eramū 'ga 'jau 'gā nupe:

—Pejea'gu ki Moisesi 'ga remikwasiarer are moromu'jara 'gā nui. 'Gā 'ā e'i ajemogyau ojeupe: “Je 'ā kūima'eteetea”, 'jau 'gā 'ā ajemogyau ojeupe, waity fuku rerekou. A'eramū 'gā ataramū 'gā naitya ajasimana 'gā nee. “Tiporesagete 'gā je ree 'jau”, 'jau 'gā akou ojeupe. Wapeje'ega tāmējē 'gā ifutaa. 'Wyriara apykawa 'arimū etee wapyka awau Jarejuwarete 'ga mogytaaw ipe.

³⁹ Ojemi'waaw ipe nanē nū 'wyriara renawa 'arimū etee wapygiweramū ojemi'waa.

⁴⁰ Kūjā men manū ma'efera 'gā nupe nanē 'gā 'jau nū: “Je tamaenun tekou enekaraemā are 'jau”, 'jau futatee 'gā 'gā nupe. “Je te nipo ako esage temaenuna enekaraemā are”, 'jau futatee 'gā 'gā nupe. A'ere 'ga etee 'gā karaemā pyygi ojeupe, ka'aranūna nanē nū. A'eramū 'gā 'jau ojeupe etee futat: “Kwakwai'i teje'ega monoi Jarejuwarete 'ga upe. Kasi a'e pe 'gā je kwaawi mama'e tywera je iaporamū ne kwy”, 'jau 'gā ojeupe etee futat. A'eramū nipo 'gā oje'ega monou fuku o'meramū akou Jarejuwarete 'ga upe, wemiapo tywera mimawamū. A'ere nipo anure Janeruwarete 'ga 'gā nereko tyweri 'gā nemiapo tyweawer are— 'jau Jejuī 'ga 'gā nupe.

Imen manū ma'efera ēē remimonofet

(Luka 21.1-4)

⁴¹ Jarejuwarete 'ga mogytaawa pype Jejuī 'ga wapyka 'ūina Jarejuwarete 'ga upe ka'aranū ryrū pyri. A'eramū 'ga ose ma'e 'gā nesaka 'ūina, yrū pype 'gā nemimonoa nanē 'ga esaka nū. Ika'aranū kwai ma'e 'gā ka'aranū monou Jarejuwarete 'ga ma'e yrū pype 'ga upe kwaiwete.

⁴² 'Gā nesepaw ire majawera ēē mū 'ua osou 'og ipe. Nika'arani ēē akou. Itywerete ēē akou. A'etea ēē oka'aranū ywope'i omonu ipype. Mukū'i'f etee ēē imonou ipype. Naepyi agawewi ēē remimonofera.

⁴³ ēē resakawe Jejuī 'ga 'jau wemimu'e 'gā nupe:

—Kweramū kūjāa ēē imen manū ma'efera ēē. Nitywa'uweri agawewi ēē mama'ea. A'etea ēē oka'aranū monoupap futat yrū pype. A'eramū ēē otywe'emamū futat mama'ea ojeupe imuawamū. ēē remimonofera ika'aranū kwai ma'e 'gā ma'e wapyraap futat Janeruwarete 'ga upe.

⁴⁴ 'Gā kwaiwete agawewi omonu 'ga upe. A'etea 'gā kwaiwete wējēmī wereko ojeupe nū. A'ere ēē ma'ea nitywi futari. Omonopap futat ēē 'ga upe. Naemyreri futari ēē upe. Wemi'urama muawa we futat ēē omonopap 'ga upe— 'jau Jejuī 'ga ēē mome'wau 'gā nupe.

13

Jejuī 'ga rur enune ojeapo ma'e

(Mateu 24.1-28; Luka 21.5-24)

- ¹ Jarejuwarete 'ga mogytaaw awi ũ'ē re Jejui 'ga remimu'e 'ga amũ 'jau 'ga upe:
 –Kuu. Ikaturam te Janeruwarete 'ga mogytaawa 'oga jā'nũ'ũ. Sã'ã itauu esagea epye te ma'ea. Mytuna 'gã ka'aranũua rerua kwaiwete Jarejuwarete 'ga mogytaawa 'oga muesageawamũ— 'jau 'ga 'ga upe.
- ² A'eramũ Jejui 'ga 'jau 'ga upe:
 –A'jea futat esageramũ numiamũ. A'ere nipo anurenure'i jane ree iporomutare'ema 'gã nuri imonou etyka. Nomỹ'i futari nipo 'gã itaa mũ aju'arimũ— 'jau 'ga 'gã nupe.
- ³ Anure Jejui 'ga wapyka 'ũina ywytyr apyte'rarimũ, Oriweira 'jawa apyte'rarimũ wemimu'e 'gã netee. Jarejuwarete 'ga mogytaaw are 'gã amã'jãu 'upa. Poje Pedro 'ga, Tiago 'ga, Juã 'ga, Andre 'ga, mĩmera 'gã oporonupa 'ga 'eawer are 'ga upe:
⁴ –Maranime sipo aipo 'gã Jarejuwarete 'ga mogytaawa monoi etyka? Ma'ja ra'ne sipo ajee ojesaukat oree iapo enune?— 'jau 'gã 'ga upe.
- ⁵ Aipo 'eramũ Jejui 'ga 'jau 'gã nupe:
 –Je renune 'ut ma'e 'gã nipo i'me ma'ea. Perowiat kasi 'gã 'mea ne.
- ⁶ Anure nipo kwaiwete 'gã nuri “Janeruwarete 'ga je mut pẽ katu'okaramũ. Je Janeruwarete 'ga remimurera ako”, 'jau futatee nipo 'gã 'ua pẽ nupe. A'ere kasi perowiat 'gã ne. O'meramũ te nipo 'gã 'i. Kwaiwete nipo 'gã 'gã moryteeu ojee— 'jau 'ga 'gã nupe.
- ⁷ –Anure nipo amutee amunaw awi 'gã nuri 'wyriararete rowajaa, 'ga remiayüwa reewe futat. A'ere kasi aipo renupa pẽpiryyi ne. Nan futat nipo mama'e teepaw enune. A'ere nipo naporomũ rũi mama'e mateepaawa. Naporomũ etee rũi futat nipo mama'ea rekoĩ— 'jau Jejui 'ga 'gã nupe.
- ⁸ –Akou'jau'jap futat nipo mama'ea. Amunap tesirũmera pypewara 'gã we futat nipo ajuowajat. Ywya we futat nipo oyyi peu peu peu 'jau. Ty'ara nipo amunawa pype peu peu 'jau. A'eramũ 'gã nipo kwaiwete ty'ara rerekou. Sã'ã kũjã wa'yra ray ppyrauwe wa'yra 'a ja'wyja'wy kwaawa. Ayyypeperaawe 'ã ã ã i'ara kwaapa. ã ã wĩ u'aa ja'wyja'wy taetu 'ã wayreteramũ ã ã upe. Nan tee futat nipo pẽ. Aipo ijeapo resakawe ki je rura pekwaap. “Owaẽm 'ga ruawa upe ra'e”, 'jau nipo pẽ pejejaupe.
- ⁹ –Peje'gu ki 'gã nui. Je rura'ne'emauwe nipo 'gã je rerowiaaramũ pẽ nereko tyweretei. Pẽ mũ nipo 'gã ipyyka imopimopika ae mopikawa pyu. Judeu 'gã jatykaawa pype miamũ nipo 'gã pẽ mopimopigi. Amumeramũ je ree nipo 'gã pẽ nerawau 'wyriara upe. A'eramũ pẽ 'wyriararete upe pejejerooramũ pẽ je mome'wau 'gã nupe. “Jejui 'ga iporokatu'ogiwet pẽ nee”, 'jau ki pẽ 'wyriara 'gã nupe.
- ¹⁰ Teepaw enune nipo 'gã je mome'ui amunawa moymoyka. Tesirũmera 'gã jeje'ega renuw ire te nipo mama'e atepawamũ— 'jau Jejui 'ga 'gã nupe.
- ¹¹ –Pẽ pyygamũ, 'wyriara 'gã nowase pejejerooramũ kasi pẽpy'a'wyt ne. “Ma'ja 'jau sipo je teje'ega 'gã nupe 'wei?” pe'je kasi ne. Janeruwarete 'ga te peje'egawa amut pẽ nupe peu pẽ nerooramũ. A'eramũ pẽ 'ga 'ea etee imome'wau 'gã nupe. Napejejea'ar imũ rũi pẽ peje'eg 'gã nupe. Pejejeupe Jarejuwarete 'ga 'Agesage 'eawera etee pẽ imome'wau 'gã nupe— 'jau Jejui 'ga 'gã nupe.
- ¹² –Kwaiwete nipo je rerowiare'ema 'gã weki'yra 'gã, wewirera 'gã we 'gã monou ia'wyre'ema 'gã nupe 'gã apisaukaa. 'Ga ruwa 'gã miamũ wa'yra 'gã monou 'gã nupe 'gã apisaukaa. 'Ga ra'yra 'gã nanẽ ujara 'gã imonou 'gã nupe 'gã apisaukaa.
- ¹³ Je rerowiare'ema 'gã nipo oporomutare'emamũ je rerowiaramũ pẽ nee. A'ere Janeruwarete 'ga je rerowiar awi ipoire'ema 'gã nerooi imogyau ojeypyri nakwaparimũ ete rũi futat— 'jau Jejui 'ga 'gã nupe.
- ¹⁴ A'eramũ Jejui 'ga 'jau 'gã nupe nũ:
 –Ymã te Janeruwarete 'ga ijeaporama kwasiarukari oje'ega mome'wara 'ga upe rakue, Danieu 'ga upe rakue. “Anure nipo 'ga amũ mama'e tywerete apoi Jarejuwarete 'ga mogytaaw ipe”, 'jau 'ga ikwasiaa inuga jane rakue. A'eramũ nipo 'ga amũ anure iapou Danieu 'ga 'eawer imũ etee futat. (A'eramũ je 'ga remikwasiarera ka'arana mogytaaramũ ee pẽneapyo futaa)— 'jau Jejui 'ga 'gã nupe. —A'eramũ pẽ Judeja ywy pewara ako ma'eramũ 'gã nesakawe pejejea'iteramũ pejewau pejeka'jama ywytyr ipe.
- ¹⁵ 'Opewuu apyte'rarimũ ako ma'eramũ pẽ pejewawe'em pejesowe'em pejekaraemã pyyke'ema. Pejeka'jamayayau etee futat pejewau.
- ¹⁶ Ko pewaramũ nanẽ pẽ pejejewyre'ema pejejog ipe pejejaity mojopy'rawe'em— 'jau Jejui 'ga 'gã nupe.
- ¹⁷ –Kũjãmera 'gã nipo ta'yryrũ ma'e 'gã iporiay'i ajemogyau. Ta'yky'ri ma'ea nanẽ nipo nũ. Nujãnarũi eweguu ma'ea. Ta'yky'ri ma'e nanẽ nujãnarũi nũ.
- ¹⁸ A'eramũ ki nanuar are pejeporogytau Jarejuwarete 'ga upe ee: “Eremurukat kasi 'gã 'ara ro'ysaga rupi oree ne”, 'jau ki pẽ Jarejuwarete 'ga upe ee— 'jau Jejui 'ga 'gã nupe.

¹⁹—Aipoa kwara rupi 'gā 'gā nerekou tyweaete. Ywy apo ppyramū nitywi futari ae rereko tywera aipo 'jawe rakue. Anure nanē nipo nitywi futari ae rereko tywera 'jawe nū— 'jau Jeju 'ga 'gā nupe.

²⁰—A'ere Janeruwarete 'ga mama'e tywera 'gā nupe iapoukaru 'jau 'jaw ire 'gā muojeri 'gā mogyau jui nū. Kasi a'e pe ywy pewaramū juejue 'gā papawi ne. A'ere Janeruwarete 'ga pēē mū mū 'jau 'gā nui pē katu'oka. A'eramū 'ga wemimū'ēmeramū pē nee Janeruwarete 'ga 'gā muojeri 'gā mogyau jui nū— 'jau Jeju 'ga 'gā nupe.

²¹—“Koromū Kristu 'ga”, pejejeupe 'gā amū 'eramū kasi perowiat 'gā ne. “Kwe pe 'ga oi”, 'gā 'eramū pēē 'gā nerowiare'ema pejejemogyau.

²²Jejewyt 'ja 'wyja'wyramū nipo kwaiwete 'gā nuri o'meramū pē nupe. “Je Jarejuwarete 'ga je'ega mome 'waramū”, 'jau futatee nipo 'gā pē nupe. Amumera 'gā nipo 'ua 'jau pē nupe: “Janeruwarete 'ga je mut. Je 'ga remimureraretea futat”, 'jau futatee nipo 'gā pē nupe. Pēnemiapoe'ema miamū nipo 'gā iapou pē neape je rerowiar awi pē momoirukaawamū. “Simomoirukat Ku'jywa 'ga remimū'ēmera 'gā 'ga rerowiar awi 'jau”, e' i te nipo 'gā pē nupe numiamū. A'eramū nipo 'gā mama'e apou pē neape. Ojerowiarukaawamū te nipo 'gā iapoi pē nupe numiamū. A'ere kasi a'e are miamū perowiat 'gā ne.

²³Perowiar iki aipoa je'eawera. Ijeapoe'emaue je imome'ui pē nupe, ee pē maeapyoawamū— 'jau Jeju 'ga 'gā nupe.

Janereki'yra 'ga ruawam

(Mateu 24.29-44; Luka 21.25-33)

²⁴A'eramū Jeju 'ga 'jau 'gā nupe nū:

—Pē nerekou tyweawa kwaw ire nipo ywag awi nanē mama'e jesaukari pē nupe nū. Kwara nipo owepa. Jaya nanē nipo owepa nū.

²⁵Jaytataa nipo ototoka ywag awi 'ua. Ywag ipewara nipo oyyita nū. Kwat, jay, jaytata. Mīmera nipo oyyita— 'jau Jeju 'ga 'gā nupe.

²⁶—A'ere nipo pēneki'yramū je tejuja tejewya ywasiga rupi. Tepājē mū nipo je ruri, tejenyuga pype futat tejuja nū.

²⁷A'eramū nipo je tejeupe oporowyky ma'e ywagipewara 'gā monou tejemiayuwa 'gā majatykaukaa. “Pe'je pejewau amunawa moy moyka jeremiayuwa 'gā majatykau 'gā nerua jee”, 'jau nipo je 'gā nupe. A'eramū nipo 'gā awau 'gā nerua jee— 'jau Jeju 'ga imome'wau 'gā nupe.

²⁸Anure Jeju 'ga mama'e mū mome'wau 'gā nupe, 'gā mu'jau ee:

—Mama'ea je amome'u pē nupe pē mu'jau tejuawa 'ar are— 'jau 'ga 'gā nupe. —Sā'ā ae siaka'gywa potyramū amana jewyra kwaawa. Ipotyrauwe 'ā ae amana jewyra kwaapa.

²⁹Nan tee futat ki je'eawer imū mama'e jeaporamuerauwe pe'je pejejaupe: “Ut ja'wyja'wy Jeju 'ga janee 'wyriaramū akou”, pe'je ki pejejaupe.

³⁰A'jea futat je 'i. Je'eawer imū mama'e jeapo resakara 'gā papawe'emaue nipo tejuja tejewya nū.

³¹Ywaga nipo atEEPawamū futat. Ywya nanē nipo atEEPawamū futat nū. A'ere nipo jeremimome'ufera nateepawa'uweri futari. Je'eawer imū etee futat nipo aipoa ojeapou— 'jau Jeju 'ga 'gā nupe.

³²A'ere Jeju 'ga 'jau 'gā nupe nū:

—Nitywi futari je ruawa kwaapara 'gā amū. Nepekwaawi futari je ruawa. Ywagipewara 'gā miamū ikwaape'ema. Je miamū nanē nakwaawi tejuawa 'ara. Jeruwarete 'ga etee te okwaap.

³³A'eramū ki pēē je rapesaka pejejemogyau.

³⁴Sā'ā kūima'e 'ga amū ooa iataa muku oje'wyr awi. A'eramū 'ā 'ga oo enunewe 'jau wemiayuwa 'gā nupe: “Aata je tewau. A'eramū pēē pejeporowykyau je'eawer imū etee futat”, 'jau 'ga 'gā nupe. 'Oga raarana 'ga upe 'ga 'jau: “Earū jeroga ra'ne muku je rekoramū. Je rura nanē ene apesaka nū”, 'jau 'ga 'ga upe. A'eramū 'ga awau watau muku oje'wyr awi.

³⁵Nan tee futat pēē je rura rapesakaramū pejejemogyau. Nepekwaawi je ruawa. A'eramū ki pēē pejeporowykyau pejejeupe je'eawer imū, je rura rapesaka pejejemogyau. Meewei 'ur ire ako re nipo wata ma'e 'ga 'ua ypyaje owaēma. Maranamū kwara ajerewamū, maranamū ai'iwe. Nokwaawi 'gā 'ga ruawa.

³⁶A'eramū nipo 'oga jara 'ga 'ua erujewi ojeupe oporowyky ma'e 'gā nupe. Opak sipo 'gā ajemogyau 'ga rapesaka?

³⁷Aipo are je 'i pē nupe: Je rura ki peapesak pejejemogyau— 'jau Jeju 'ga 'gā nupe.

14

Jeju 'ga ree ifuwet ma'e

(Mateu 26.1-5; Luka 22.1-2; Juā 11.45-53)

¹ Egitu wyy awi judeu ypyfera 'gā nenū'ēawer are wea'awa maraka upe iwaēm ja'wyja'wyraruwe mainana 'wyrriara 'gā ajatykau Moisesi 'ga remikwasiarer are mōromu'jara 'gā nee.

—Maran te jane Jejuu 'ga pyygi 'ga jukau?— 'jau 'gā ajaupe. —Jemime sipyyk 'ga 'jau.

² Jerusareg ipewara 'gā iporomutat 'ga ree. A'eramū jane 'gā nowase jarekow'e'm 'ga ree maraka apoaw ipe. Kasi a'e pe jane 'ga remiayuwa 'gā mamara'nei ne— 'jau 'gā ajaupe.

Jejuu 'ga ree jany kasiga reko'wokawet
(Mateu 26.6-13; Juā 12.1-8)

³ Petani pe Jejuu 'ga akou, Simāo 'ga rog ipe, ipito'om ma'efera 'ga 'wyr ipe. 'Gā jemi'waa 'gā nuwamū kūjā ēē mū 'ua ojanya kasiga ryrū rerua opo pe. Itasiga apopyrera aipo yrūnamū, aripasi 'jawa apopyrera poromū. A'eramū ēē yrū mopena, jany kasiga reko'woka Jejuu 'ga akag are. "Naritu" 'jau 'gā aipoa jany kasiga upe. Epy ete aipoa jany kasiga.

⁴ A'eramū wapyk ma'e 'gā amū amara'neramū jany kasiga ēē eko'wog are.

—Ma'eramū sipo ēē imomy ekoetei 'wei?

⁵ Epy te 'ā 'aga jany kasiga a'i kūi— 'jau 'gā ajaupe. —A'eramū amunipo 'ā ēē ime'ega ka'aranūū are janee. Tresētu ka'aranūūa 'ut ee. A'eramū amunipo 'ā ēē epyfera mua janee. A'eramū amunipo 'ā jane imojo'oka ikaraemāe'ema 'gā nupe 'jau kūi— 'jau 'gā ajaupe, kūjā ēē ago'wau.

⁶ A'eramū Jejuu 'ga 'jau 'gā nupe:

—Tene ēē iapoi. Ma'eramū pejemara'neramū ēē ree 'ū? Mama'e esagea te ēē wapo jee.

⁷ Ikaraemāe'ema 'gā nooa'uweri futari pē nui. A'eramū pēē anure mama'e monou 'gā nupe pejemifutar imū. A'ere je te ajeje nako fukui pē pype.

⁸ Je tymaw ipe je ree eko'wogipyrama futat jany kasiga numiamū. A'ere ēē 'awauwe eko'wogi je ree, je manūe'emaue. Tene ēē iapoi jee— 'jau Jejuu 'ga 'gā nupe.

⁹ —A'jea futat je 'i. Anure nipo 'gā je mome'ui kwe pewara 'gā nupe. Amunap tesirūmera moyka nipo 'gā awau je mome'wau kwe pewara 'gā nupe. Je mome'uramū nipo 'gā ēē remiapofera nanē imome'wau 'gā nupe nū. A'eramū nipo 'gā anure najuejue etee futat wea'aramū ēē remiapofer are— 'jau Jejuu 'ga 'gā nupe.

Mainana 'wyrriara 'gā nupe Judas 'ga 'eawet
(Mateu 26.14-16; Luka 22.3-6)

¹⁰ A'ere Jejuu 'ga remimu'e 'ga amū awau oporogytau mainana 'wyrriara 'gā nupe. Judas Iskariote 'ga futat poromū oo oporogytau 'gā nupe:

—Jejuu 'ga je apyygukat pē nupe. Je apoat pēē 'ga pyyka pē pyri— 'jau Judas Iskariote 'ga awau 'gā nupe.

¹¹ Ojeupe 'ga 'eramū mainana 'wyrriara 'gā aku'iramū 'ga ree. A'eramū 'gā 'jau 'ga upe:

—Ka'aranūūa nipo ore oromono ene upe 'ga pyyga repyramū— 'jau 'gā 'ga upe.

A'eramū Judas 'ga wea'aramū akou ee. "Ojetee 'ga rekoramū tomono 'ga 'gā nupe 'jau kwy", 'jau 'ga ojeupe. A'eramū 'ga Jejuu 'ga rerekou weape.

Ae a'wyre'ema 'gā nupe

'ga monoara 'ga

(Mateu 26.17-25; Luka 22.7-13, 21-23; Juā 13.21-30)

¹² Awau owaēma mani'oko'o jopype'ema 'wawa upe, Pasikwa 'jawa apoawa upe. Karupa'mī jukaawa 'ara upe 'gā owaēma. A'eramū 'ga remimu'e 'gā amū 'jau Jejuu 'ga upe:

—Ma'ape te jane jemi'wari, karupa'mī ro'o reyri jarejee?— 'jau 'gā 'ga upe.

¹³ A'eramū Jejuu 'ga mukūja 'gā monou amunawarete pe.

—Pe'je pejewau Jerusareg ipe. Peu nipo 'y ryrū rerekwara 'ga peekoat. A'eramū pēē pejewau 'ga rewiri.

¹⁴ 'Og ipe 'ga seramū pejeporogytau 'oga jara 'ga upe:

—Jarejara 'ga ore mut imome'waukaa enee: "Ma'ape te je karupa'mī eyra 'ui tejemimu'e 'gā netee?" e'i 'ga. 'Ma'ape te ore kumi apoi? Ma'ape te je tejemimu'e 'gā nerojemi'wari' e'i 'ga enee kūi", pe'je ki 'ga upe— 'jau Jejuu 'ga 'gā nupe.

¹⁵ —Aipo ojeupe pēē 'e re 'ga tepē neroo ywatewara imy'jawa pype 'jau. Ityp futat aejemi'waawa peu. Ae renawa nanē otywamū futat nū. A'eramū pēē pejejeupe 'ga esaukar ire peu futat iapou ewara reewe jarejeupe— 'jau 'ga 'gā nupe.

¹⁶ A'eramū mukūja 'gā awau amunawarete pe. A'eramū 'gā mama'e resaka ojeupe Jejuu 'ga 'eawer imū etee futat. A'eramū 'gā kumi apou maraka are.

¹⁷ Kaaruwamū Jejuu 'ga awau ojemi'waa wemimu'e 'gā netee.

¹⁸ Ojemi'waaw ipe Jejuu 'ga 'jau 'gā nupe:

—A'jea futat je 'i. A'jea futat nipo pēē mū je mono pejepe je ree iporomutare'ema 'gā nupe je jukaukaa— 'jau 'ga 'gā nupe.

¹⁹ Aipo renupawe 'ga remimu'e 'gā u'arasigamū ojeupe 'ga 'eawer are. A'eramū 'gā oporonupa majepeinume ee 'ga upe:

—Je upe te ere poromū?— 'jau 'gā 'ga upe.

Majepeinunume 'gā oporonupa ee 'ga upe.

²⁰ A'eramū Jeju 'ga 'jau 'gā nupe:

—Je pyri ojemi'wat ma'eramū futat pēē mū nipo je monoi 'gā nupe— 'jau 'ga 'gā nupe.

²¹ —Ymā te Janeruwarete 'ga ka'arana kwasiarukari 'gā amū nupe rakue, jemanū are rakue. Pēneki'yra agawewi je 'ā. A'etea je ree iporomutare'ema 'gā je jukaukat 'gā nemikwasiarer imū etee futat. A'ere 'gā nupe je monoara 'ga tywereteramū te akou. Iporiay'i 'gā po pe je monoara 'ga numiamū. A'ere nipo Janeruwarete 'ga 'ga rereko tyweretei. Ma'eramū gatu nipo 'ā 'ga jeuwi rakue 'ja— 'jau Jeju 'ga 'gā nupe.

Mani'oko'o'ia y'way reewe 'gā nupe imonoawet

(Mateu 26.26-30; Luka 22.14-23; 1 Korītu 11.23-25)

²² Ojemi'waaw ipe Jeju 'ga mani'oko'o'i pyyka. A'ere 'ga eramā'jāu ywau eroje'ega 'Uwarete 'ga upe:

—Au'jete mani'oko'o'ia eremut oree, Kiapi'ni— 'jau Jeju 'ga 'ga upe.

A'ere 'ga mani'oko'o'i mowoka imonou 'gā nupe.

—Mani'oko'o'ia pepyyk i'wau. Koromū jero'oa— 'jau 'ga 'gā nupe.

²³ A'ere 'ga y'way ryrū pyyka nū, eramā'jāu ywau nū. A'eramū futat 'ga oje'ega monou 'Uwarete 'ga upe nū:

—Au'jete y'waya eremut oree, Kiapi'ni— 'jau Jeju 'ga 'ga upe.

A'ere 'ga imonou 'gā nupe. A'erauwe 'gā itykua pāwē pāwē.

²⁴ A'eramū Jeju 'ga 'jau 'gā nupe:

—Koa y'waya jerya futat. A'ere'ere'i nipo 'gā amū jejukai jery reko'woka. Aipoa jery jeko'woga pētywera omepy. Jemanū are tee Jeruwarete 'ga pē katu'ogi kwaiwete. 'Awamū karupa'mā nepejukau'jawi pejetywera mepyawamū. Poromū futat 'ga je'eg ymanera numiamū. A'ere 'awamū 'ga je'eg yauramū. 'Awamū jery tee pē pīrei pētywer awi. Jemanū are tee Jeruwarete 'ga pētywera moiri pē nui je rerowiarāmū. Poromū futat Janeruwarete 'ga je'eg yaua 'awamū. A'ea 'ga je'ega nomojopy'ruawi futari 'awamū— 'jau 'ga 'gā nupe.

²⁵ —A'jea futat je 'i. Je natykuru'jawi futari 'aga y'waya pē pyri. Anure tāmējē te nipo je itykuri pē pyri, Tejuwarete 'ga pyri pē neroo re tāmējē nū— 'jau Jeju 'ga 'gā nupe.

²⁶ Oporogytapaw ire 'gā amaraka'aga Jarejuwarete 'ga muorypawamū. Amaraka'ag ire 'gā awau ywytyr ipe, Oriweira 'jaw ipe.

Pedro 'ga momoranupawet

(Mateu 26.31-35; Luka 22.31-34; Juā 13.36-38)

²⁷ Awaw ipe Jeju 'ga 'jau wemimu'e 'gā nupe:

—'Awamū futat nipo pekwasio' je wi je rejaa je mu'ama ojete'e— 'jau 'ga 'gā nupe. —Ymā te 'ā Janeruwarete 'ga ka'arana kwasiarukari 'ga amū upe ee rakue: “Tajuka karupa'mī are omaenun ma'e 'ga 'jau kwy. A'eramū 'ga reymawera 'gā awau okwasi'wau kwe pe 'jau kwy”, 'jau Janeruwarete 'ga ikwasiarukaa inuga ka'aran are rakue. A'eferupi tee futat nipo pekwasio' pejewau je wi— 'jau 'ga 'gā nupe.

²⁸ —A'ere je temanū re je ferawī nū. Teferaw ire nipo je oi Garireja ywy pe pē nenune— 'jau 'ga 'gā nupe.

²⁹ A'eramū Pedro 'ga 'jau 'ga upe:

—'Me te pa 'ga poromū 'jau nū. Je naejara'uweri futari ene imogou ojete'e' i kūi. 'Gā te nipo opyamū ene wi ene rejaa ojete'e' i kūi. A'ere je naejara'uweri ene kūi— 'jau Pedro 'ga 'ga upe.

³⁰ —A'jea futat sipo ere— 'jau Jeju 'ga 'ga upe. —Je te a'jea futat a'e enee nū'ū: 'Awa ppytuna rupi nipo je kwakuw ape muapyapyt katu 'gā nupe. “Nakwaawi je 'ga”, 'jau nipo ene mukūi wyrasokwē je'egauwe— 'jau 'ga Pedro 'ga upe.

³¹ A'ere Pedro 'ga fuakaramū 'ga upe:

—Naani futari nū'ū. Aipo na'ea'uweri futari je. “Nakwaawi je 'ga”, na'ea'uweri je. “Tene 'gā je jukai futari 'ga reewe futat”, a'e ete nipo je. Nakwakuwa'uweri futari je ene— 'jau Pedro 'ga Jeju 'ga upe.

'Ga remimu'e 'gā nanē Pedro 'ga 'eawer imū etee futat 'jau 'ga upe nū.

'Uwarete 'ga upe 'ga 'eawet

(Mateu 26.36-46; Luka 22.39-46)

³² Jeju 'ga awau owaēma Getsemani 'jaw ipe, wemimu'e 'gā netee. A'ere Jeju 'ga 'jau 'gā nupe:

—'Au ete pejup ra'ne. Iruupeu'i je oi teporogytau Tejuwarete 'ga upe ra'ne— 'jau 'ga 'gā nupe.

³³ A'eramũ 'ga muapyra 'gã etee erawau ojeupi. Pedro 'ga, Tiago 'ga, Juã 'ga. Mímera 'gã 'ga erawau ojeupi. 'Ga 'arasiga 'ga mopy'aywyrafenayau 'ga mogou.

³⁴ A'eramũ 'ga 'jau 'gã nupe:

—Je'arasiga nipo 'ã je juka. Peser awi etee. Peporogyta Jarejuwarete 'ga upe je pyri— 'jau 'ga 'gã nupe.

³⁵⁻³⁶ A'eramũ 'ga ojepe'au'i 'gã nui. Awau peu'i wenupy'au wapyka weakwara rerawau enũina ywy are futat erujaa oporogytau 'Uwarete 'ga upe:

—Kiapi'ni. 'Wyria'ri 'gã imara'ne je ree. 'Gã nipo 'ã je rereko tywerete 'ja. Ojeupe ene iapoukare'em ire amunipo 'ã 'gã nuapoa'uweri nanuara je ree. A'ere 'ã najeremifutar imũ rũi te ereapoukat. Ejemifutar imũ etee te 'ã ereapoukat 'gã nupe jee— 'jau 'ga 'Uwarete 'ga upe.

³⁷ Oporogytapaw ire 'ga afu'ama awau ojewya muapyra 'gã nupe nũ. Osea 'gã 'upa. A'eramũ 'ga 'jau Pedro 'ga upe:

—Ereset te ejupa? Eje'ega te neremonoi'i Jarejuwarete 'ga upe je pyri? A'e'ja'wiramũ miamũ sipo nereporogytai Jarejuwarete 'ga upe?— 'jau 'ga 'ga upe.

³⁸ —Peser awi. Peporogyta Jarejuwarete 'ga upe. A'eramũ pẽẽ pejefuakaramũ mama'e tywera apowe'em. Kasi a'e pe nepẽfuakari ne. A'eramũ pẽẽ mama'e tywera etee iapou 'ga upe ne. Nepẽparuapoweri agawewi nipo mama'e tywer are. A'etea nipo peapo pejeporogytawe'em 'ga upe 'eramũ mama'e tywera etee futat peapo pejekou— 'jau 'ga 'gã nupe.

³⁹ Aipo 'ga upe 'e re Jejui 'ga awau 'gã nui nũ oje'ega monou 'Uwarete 'ga upe nũ. 'Ga upe u'eawera 'ga 'jau'japa.

⁴⁰ A'ere 'ga awau ojewya wemimu'e 'gã nupe nũ. Nãnẽwẽjẽmĩ nũ. Osea 'gã 'upa. Wopepyejamũ etee 'gã ajemogyau. A'eramũ 'gã osea 'upa. Opag ire 'gã oporesagamũ etee 'ga ree. Ojenosũ 'gã 'ga wi. A'eramũ 'gã 'jawe'em 'ga upe.

⁴¹ A'eramũ Jejui 'ga awau oporogytau'japa 'Uwarete 'ga upe nũ. 'Uwarete 'ga upe oporogyta re 'ga 'ua nũ. Nãnẽwẽjẽmĩ nũ, 'gã set 'gã nuwamũ nũ. A'eramũ 'ga 'jau 'gã nupe:

—Peser ete futat nipo pejejupa nũ ki sa?— 'jau Jejui 'ga 'gã nupe. —Au'je pejeser ire. 'Awamũ futat 'gã pẽneki'yramũ je monoi ae a'wyre'ema 'gã po pe.

⁴² Pe'je iruukwe soo 'gã nekoaa 'jau. Kweramũ ae a'wyre'ema 'gã po pe je monoara 'ga ruri— 'jau 'ga 'gã nupe.

Jejui 'ga pyykawet

(Mateu 26.47-56; Luka 22.47-53; Juã 18.3-11)

⁴³ Jejui 'ga porogytapawe'emaue Judas Iskariote 'ga, Jejui 'ga remimu'efera 'ga futat, kwaiwete 'gã nerua erojemorypa Jejui 'ga ree. Mainana 'wyriara 'gã kwaiwete 'gã muri Judas 'ga rupi. Judeu 'gã 'wyria'ri 'gã nanẽ kwaiwete 'gã mua 'ga rupi. Jyuaa 'gã erua muap. Mímera 'gã erua erojemorypa 'ga ree.

⁴⁴ Mainana 'wyriara 'gã nupe oporogytaaw ipe Judas 'ga 'jau 'gã nupe rai'i: “Oo nipo je Jejui 'ga retywape pytea pẽ neape. A'eramũ pẽẽ a'e are 'ga kwaapa 'ga retywape pyteramũ. A'erauwe futar iki pẽẽ pejewau 'ga pyyka 'ga rerawau”, 'jau Jejui 'ga monoara 'ga 'gã nupe rai'i.

⁴⁵ A'eramũ 'ga owaẽma ppy we awau Jejui 'ga rerowyka 'jau 'ga upe:

—Au te ereko, ki Ku'jyp?— 'jau 'ga 'ga upe.

A'eramũ futat 'ga 'ga retywape pytea.

⁴⁶ A'erauwe Judas 'ga remireroofera 'gã 'ua Jejui 'ga pyyka 'ga pofaa.

⁴⁷ A'ere Jejui 'ga remimu'efera 'ga amũ ogyuu rekyita kũima'e 'ga amũ ree, 'ga namĩ monoka. Furuk. Mainana 'wyriararete 'ga remiayuwa 'ga namĩ yypa.

⁴⁸ A'ere Jejui 'ga 'jau opykyara 'gã nupe:

—Ma'eramũ pẽẽ ma'eramũ pejejua muawa pyu je nupãu ekoete 'ũ, muna'ywa 'jawe 'ũ? Ma'eramũ pẽẽ muawa we erua jyuu reewe jejiara rupi 'ũ?

⁴⁹ Pejepepye je rekoramũ miamũ ako naje pyygi pejepe ai'i. Jarejuwarete 'ga mogytaaw ipe ako je oi ai'iwe, ai'iwe 'jau ai'i. Peu futat ako je reni 'gã mu'jau Jarejuwarete 'ga ree ai'i. A'ete ako naje pyygi pejepe ai'i. A'ere jemanũawa upe iwaẽmi. A'eramũ Jeruwarete 'ga je pyygukaa rẽwẽjẽmĩ pẽ nupe. Ymã te Janeruwarete 'ga ka'arana kwasiarukari jemanũ are ikue. A'eramũ 'ã pẽẽ iapou 'ga remikwasiarera 'eawer imũ etee futat— 'jau 'ga 'gã nupe.

⁵⁰ A'e renupawe Jejui 'ga remimu'e 'gã okwasi'wau 'ga wi, 'ga rejaa, oka'jama 'gã nui. Okyjau 'gã opygy awi. A'eramũ 'gã oka'jama 'gã nui.

⁵¹ Kunumũũ 'ga amũ 'ua Jejui 'ga rewiri. Taity fuku pyu etee 'ga ojeuwana akou.

⁵² 'Ga amũ 'ga pyyka numiamũ. A'ere 'ga raity etee ipyygi. Waity pyygamũ 'ga opoia etee jui. A'eramũ 'ga awau ujãna taity'eeme.

Anasi 'ga rog ipe 'ga rerooawet

(Mateu 26.57-68; Luka 22.54-55, 63-71; Juã 18.13-14, 19-24)

⁵³ A'ere Jejuu 'ga ppykara 'gā 'ga rerawau mainana 'wyriararete 'ga rog ipe, Kaifasi 'ga rog ipe. Peu futat judeu 'gā 'wyria'ri 'gā ajatykau mainana 'wyriara 'gā nee. Moisesi 'ga remikwasiarer are moromu'jara 'gā nanē ajatykau 'gā nee nū.

⁵⁴ Pedro 'ga awau 'gā newiri. A'ere 'ga nuerowygi Jejuu 'ga. Mukuu etee futat 'ga akou 'ga wi. Awau 'ga owaēma mainana 'wyriararete 'ga roga upe. A'ere Pedro 'ga nooi osou. Ukupepe etee futat 'ga awau akou 'oga osoma pype ojepe'jau mainana 'ga remiyauwa 'gā pyri.

⁵⁵ Ojeupe 'gā Jejuu 'ga reruramū mainana 'wyriara 'gā oje'ēma'e 'gā netee 'ga remiapo tywera mome'waramū rekaa.

—Awŷja te 'ga remiapo tywera wesak rai'i? Ma'ja ajee 'ga wapo ajukaawamū rai'i?— 'jau 'gā ajaupe.

A'ere nitywi 'ga amū.

⁵⁶ Kwaiwete 'gā 'ua o'meramū Jejuu 'ga ree. A'ere 'gā naju'jaju'jawe rūi imome'ui 'gā nupe.

⁵⁷⁻⁵⁸ Poje 'gā amū 'ua o'meramū 'gā nupe:

—Ore aruenup 'ga je'ega ai'i. “Anure nipo je Jarejuwarete 'ga mogytaawa retygi. 'Awa 'ga mogytaawa kūima'e 'gā nemiapofera tee. A'ere nipo je imuapya 'ara rupi ajepēja 'ga mogytaawa mowya nū. Aipo 'ga mogytaawa nakūima'e 'gā nemiapofera rūi”, 'jau 'ga oreremianuwamū ai'i— 'jau 'gā imome'wau 'gā nupe.

⁵⁹ A'ere aipo 'gā nanē naju'jawe rūi imome'ui 'gā nupe.

⁶⁰ A'eramū mainana 'wyriararete 'ga afu'ama 'jau Jejuu 'ga upe:

—Ma'ja ere te 'gā nupe? Nereje'egi te 'ā 'gā nupe aipo 'gā 'eramū ai' kūi?— 'jau 'ga oporonupa ee 'ga upe.

⁶¹ A'ere Jejuu 'ga pigi etee u'ama. A'eramū mainana 'wyriararete 'ga 'jau 'ga upe:

—Jarejuwarete 'ga remimurera te ene? 'Ga ra'ya te ene?— 'jau 'ga 'ga upe.

⁶² A'eramū Jejuu 'ga 'jau 'ga upe:

—A'jea futat ere poromū. Je te 'ā pēneki'yraretea. Anure nipo je apygi Pājērete 'ga yse katy, 'ga jakwatawa katy. Peu je renamū nipo pēē je resaka. Anure nipo je ruri tejewya ywag awi ywasiga rupi— 'jau 'ga 'ga upe.

⁶³ A'erauwe mainana 'wyriararete 'ga amara'neramū. 'Ga mara'nea 'ga rerekou 'ga raity monorogukaa 'ga upe. A'eramū 'ga 'jau 'gā nupe:

—A'jea futat 'ga Jarejuwarete 'ga kurawi akou ra'e— 'jau 'ga 'gā nupe. —Jane futat 'awamū sienup 'ga kurawa jarejowase— 'jau 'ga 'gā nupe. —Na'gā amū rūi 'ā omome'u janee.

⁶⁴ Ma'ja pe'je ajee 'ga upe 'awamū?— 'jau 'ga 'gā nupe.

—Sijukaukat futat jane 'ga. Jarejuwarete 'ga te 'ā 'ga akurap.

⁶⁵ A'eramū 'gā amū onymuna 'ga ree. A'eramū 'gā 'ga reakwapiiaa taity pyu, opo afuapyka erofaa 'ga ree. A'eramū 'gā 'jau 'ga upe:

—Awŷja te ene nupā?— 'jau 'gā 'ga upe. —Ene 'ā i'akwaawete ma'ea. A'eramū ene enupāara 'ga mome'wau oree— 'jau 'gā 'ga upe.

A'erauwe jefaruu 'gā nanē 'ga ppyka opo rerofaa 'ga ree nū.

Pedro 'ga Jejuu 'ga kwakupa

(Mateu 26.69-75; Luka 22.56-62; Juā 18.15-18, 25-27)

⁶⁶ A'e pe Pedro 'ga 'ūina ukupepe. Poje mainana 'wyriararete 'ga remiyauwa ēē mū 'ua 'ga pyri.

⁶⁷ Tata are 'ga jep'e'eramū ēē 'ga resaka 'jau 'ga upe:

—Jejuu kiā rewiri ako ma'eferamū ene, 'jau je rā, Nasare pe waranup ma'efera kiā rewiri ako ma'eferamū ene, 'jau je rā— 'jau ēē 'ga upe.

⁶⁸ A'eramū 'ga 'jau ēē upe:

—Tee. Naani nū i. Nakwaawi je 'ga nū i. A'eramū awŷja upe ene 'jau ekou i— 'jau futatee 'ga ēē upe.

A'erauwe 'ga afu'ama awau 'oga osoma pyri. A'erauwe wyrasokwēa oje'ega.

⁶⁹ Peu oporowyky ma'e ēē mū 'ga resaka nū. A'eramū ēē 'jau ojeppyriwara 'gā nupe:

—Koromū futat Jejuu kiā rewiri ako ma'efera kiā mū— 'jau ēē 'gā nupe.

⁷⁰ A'eramū Pedro 'ga 'ga kwakupa nū. A'ere'ere'i peu u'am ma'e 'ga amū 'jau 'ga upe nū:

—A'jea futat ēē 'i enee. Garireja ywy pewaramū futat ene, 'ga 'jawe futat ene ra'e— 'jau 'ga 'ga upe.

⁷¹ A'eramū Pedro 'ga 'jau 'ga upe:

—Nakwaawi je 'ga, a'e je akiko. Jarejuwarete 'ga remianuwamū te 'ā je 'eu'jawi. Nakwaawi je 'ga, 'jau. Te'me re je Jarejuwarete 'ga tejereko tywera futari— 'jau 'ga 'gā nupe.

⁷² A'e pype wyrasokwē oje'ega nū. A'erauwe Pedro 'ga wea'aramū Jejuu 'ga 'eawer are. “Wyrasokwē je'egu'jaw enunewe nipo ereu'jau'jap, nakwaawi je 'ga, 'jau 'gā nupe” 'eawer are Pedro 'ga wea'aramū. A'eramū 'ga aipo u'eawera rerojenosōu. A'eramū 'ga awau ujāna

Jejuu 'ga kwakupawera renosōu. A'eramū futat 'ga u'arasigamū wea'aramū ee. A'eramū 'ga ajaa'wau awau u'eawera raykau.

15

Piratu 'ga upe 'ga reroowet

(*Mateu 27.1-2, 11-14; Luka 23.1-5; Juā 18.28-38*)

¹ Ai'iwetetewe mainana 'wyrriara 'gā ajatykau judeu 'gā 'wyrriari 'gā nee, Moisesi 'ga remikwasiarer are moromu'jara 'gā neewe. Opytuna 'gā nupe oje'ēma'e 'gā nanē ajatykau 'gā nee nū. A'eramū 'gā oje'ega ajaupe:

—“Je te 'ā Jarejuwarete 'ga ra'yraretea”, e'i ako Jejuu 'ga janee ko. A'eramū jane 'ga jukaukaa 'gā nupe— 'jau 'gā ajaupe.

A'eramū 'gā 'ga pofaa itaju pyu, 'ga rerawau Piratu 'ga upe.

² A'eramū Piratu 'ga oporonupa ee 'ga upe:

—A'jea te ene 'wyrriaramū judeu 'gā nupe?— 'jau 'ga 'ga upe.

—A'jea futat ere poromū— 'jau Jejuu 'ga 'ga upe.

³ A'eramū taetu mainana 'wyrriara 'gā 'ga je'ēwu'jauw'jaga etee futat.

⁴ A'eramū Piratu 'ga 'jau 'ga upe nū:

—Nereenuwi te 'gā je'ega? Nerewawagi te 'ā aipo 'e are a'i kūi?— 'jau 'ga Jejuu 'ga upe.

⁵ A'ere Jejuu 'ga noje'egi futari 'gā nupe. O'meramū te 'gā 'i. A'eramū Jejuu 'ga oje'ege'ema 'gā nupe. A'eramū Piratu 'ga oporesagamū etee 'ga ree. “Ma'eramū sipo 'ga noje'egi?” 'jau 'ga ojeupe.

'Gā nupe 'ga monoawet

(*Mateu 27.15-26; Luka 23.13-25; Juā 18.39-19.16*)

⁶ Mani'oko'o jopype'ema 'wawa maraka apoawa rupi Piratu 'ga moromunepawa pype imunewipyrera 'ga amū muēma judeu 'gā nupe jepi, 'gā nemienūiwera 'ga 'ga imuēma 'gā nupe jepi.

⁷ Jejuu 'ga pyykawa rupi Parapasi 'ga 'ūina moromunepawa pype. Parapasi 'ga futat amunaw ipewara 'gā mamara'neukaa 'wyrriara 'ga ree. Opytuna 'gā netee 'ga 'gā marara'neukaa 'wyrriara 'ga ree rakue. Oporojuka ma'efera 'gā wejue nū. A'eramū 'gā 'gā monou 'gā munepa 'gā mu'ama rakue.

⁸ A'eramū mytuna 'gā 'ua 'jau Piratu 'ga upe:

—Ejemiapou moromunepawa pypewara 'ga amū emuēmukat oree— 'jau 'gā 'ga upe.

⁹ A'eramū Piratu 'ga 'jau 'gā nupe:

—Pefutat te judeuramū peje'wyrriararete 'ga je imuēma pejejeupe?— 'jau 'ga 'gā nupe.

¹⁰ Piratu 'ga mainana 'wyrriara 'gā kwaapa futat. “Werecooy pa mainana 'wyrriara 'gā Jejuu 'ga. A'eramū pa 'gā 'ga rerua jee ra'e”, 'jau Piratu 'ga ojeupe. “A'ere mytuna 'gā poromutaramū 'ga ree. A'eramū nipo 'gā 'jau, Jejuu 'ga emut oree, 'jau nipo 'gā jee”, 'jau Piratu 'ga ojeupe.

¹¹ A'ere mainana 'wyrriara 'gā afuakaramū 'ga ree.

—Parapasi 'ga ki emuēm imua oree, sa'e 'ga upe 'jau. Jejuu 'ga kasi eremuēm oree ne, sa'e 'ga upe 'jau— 'jau 'gā mytuna 'gā nupe.

'Ga rerure'emauwe 'gā mogyau 'gā mu'akwaapa. A'eramū 'gā afuakaramū 'ga ree.

A'eramū Piratu 'ga oporonupa ee 'gā nupe:

—Pefutat te judeuramū peje'wyrriararete 'ga je imuēma pejejeupe?— 'jau 'ga 'gā nupe.

A'ere 'gā 'i etee 'ga upe:

—Naani. Parapasi 'ga te ki emuēm imua oree— 'jau 'gā 'ga upe.

¹² A'eramū Piratu 'ga 'jau 'gā nupe:

—Maran te jane Jejuu 'ga rerekoi, “judeuramū pēē 'wyrriararete 'ga” 'jawa 'ga rerekoi?— 'jau 'ga 'gā nupe.

¹³ —Emu'amukat 'ga 'ypeywar are 'ga pokutuka 'ga jukaawamū futat— 'jau 'gā wafukaita 'ga upe.

A'eramū 'ga:

¹⁴ —Ma'ja te 'ga wapo ajukaawamū pē nupe rai'i, a'e te je a'i kūi?— 'jau 'ga 'gā nupe.

A'ere 'gā afukafukai etee ajemogyau:

—Emu'amukat futat Jejuu 'ga 'ypeywar are 'gā nupe— 'jau 'gā wojere'emamū futat wafukaita 'ga upe.

¹⁵ Piratu 'ga oporomaku i'weramū mytuna 'gā nee. A'eramū 'ga Parapasi 'ga muēmukaa moromunepaw awi 'ga monou 'gā nupe. Jejuu 'ga jēmī 'ga imopigukaa jefaruu 'gā nupe.

—Pe'je 'ga rerawau 'ga mopika 'ga a'gwawe'em futat. Pēporia kasi 'ga nupāu ne. 'Ga mopig ire pēē 'ga rerawau 'ga mu'ama 'ypeywar are. A'eramū 'ga peu etee futat amanūmū u'ama— 'jau 'ga 'gā nupe.

Jefaruu 'gã Jejuí 'ga rerekoemãawet
(*Mateu 27.27-31; Juã 19.2-3*)

¹⁶ 'Ga mopig ire jefaruu 'gã Jejuí 'ga rerawau 'ga rerosou Piratu 'ga rog ipe. A'ere 'gã opytuna 'gã majatykau 'ga ree.

¹⁷ A'ere 'gã 'wyrriara raity piraga munepa 'ga wi. A'ere 'gã juapekagũũ muapĩina 'ga akagyruĩnamũ iapou 'ga upe. A'eramũ 'gã imonou imunepa 'ga akaga pype.

¹⁸ A'ere 'gã 'jau 'ga upe:

—Ene 'ã judeu 'gã 'wyrriararetea 'gã nupe ra'e jepi. 'Awamũ ereko 'wyrriarareteramũ nakwaparimũ rũĩ futat 'gã nupe— 'jau 'gã Jejuí 'ga upe 'ga rerekoemãũ erekou.

¹⁹ A'e pype 'gã 'ga akaga nupãu ywyrã'i'i pyu. Onymuna 'gã 'ga ree. A'ere 'gã wapyka wenyupũ 'au 'ga rowase, 'ga muorypa 'me. A'ere 'gã 'jau ajaupe:

—Pemã'ẽ judeu 'gã 'wyrriararete 'ga ree ki sa— 'jau 'gã ajaupe. —'Wyrriara raity piraga 'ga wereko imunepa 'awamũ. 'Wyrriara akagyruã nanẽ 'ga wereko nũ. 'Wyrriararete pype tãmẽjẽ 'ga 'ari ra'e— 'jau 'gã ajaupe 'ga rerekoemãũ. 'Ga jaita nanẽ 'gã nũ.

²⁰ 'Ga rerekoemã re 'gã taity piraga mosoka 'ga wi nũ. 'Ga raity munepa 'ga wi nũ. A'ere 'gã 'ga rerawau 'ga jukaaw ipe.

'Ypeywar are Jejuí 'ga monoawet

(*Mateu 27.32-44; Luka 23.26-43; Juã 19.17-27*)

²¹ 'Ga jukaawa piara rupi 'gã Simão 'ga rowosõu. Jũ awi 'ga 'ua akou awau amunawarete pe. Sirene ywy pewara 'ga poromũ Simãoramũ. Mukũĩ Simão 'ga ra'yra 'gã. Aresãri 'ga, Rufu 'ga. Mĩmera 'gã Simão 'ga ra'yra. Simão 'ga resakawe jefaruu 'gã 'jau 'ga upe:

—'Ypeywarã erokwap 'ga upe— 'jau 'gã 'ga upe.

A'eramũ 'gã iupirukaa 'ga upe.

²² A'eramũ 'gã Jejuí 'ga rerawau *Gogata* 'jaw ipe. ('Gã je'eg imũ *Gogata* 'ea Aeakagera 'jawewara 'ea futat poromũ).

²³ 'Ga rerowaẽm ire 'gã muaga monou y'way pype 'ga upe numiamũ. Mira 'jawa 'gã imonou y'way pype 'ga upe numiamũ.

—Koa etyikut ejayrũ upe— 'jau 'ga 'ga upe numiamũ.

A'ere 'ga notykuri.

²⁴ A'ere 'gã 'ga jywaa pypiraa 'ypeywar are. A'ere 'gã itaju pyu 'ga pokutuka 'ypeywar are. A'ere 'gã 'ga py maju'aaaju'arimũ ikutuka itaju pyu. A'ere 'gã 'ga mafu'ama 'ga monou 'ga mu'ama 'ypeywarã reewe futat. 'Ga rekoa futat 'gã imonou imu'ama 'ypeywar are ipokutuka. 'Ypeywar are 'ga mu'am ire 'gã 'ga raityfera mojo'oka ajaupe. Ita'i 'jawewara 'gã imomopoa 'upa ywyu 'ga raityfera mojo'okawamũ. Sã'ã ae jugu momora. Nan futat 'gã ita'i 'jawewara momopori 'upa 'ga raityfera mojo'okawamũ.

²⁵ Kwara awyruu 'iramũ etee 'gã 'ga mu'ama 'ypeywar are.

²⁶ A'ere 'gã 'yjepa'nĩ are ikwasiaripyretera monou inuga ikutuka 'yw are 'ga apyte'rarimũ. "Koromũ futat judeu 'gã 'wyrriararetea" 'ea 'gã amũ ikwasiaa 'yjepa'nĩ are rai'i. A'eramũ 'gã imonou inuga 'yw are 'ga apyte'rarimũ. A'eramũ 'ga resakara 'gã 'ga jukaawera kwaapa.

²⁷ 'Ga reewe 'gã mukũjã 'gã muna'ywa 'gã imonou imu'ama 'ypeywarã mu ree. Muna'ywa põ'õ me 'gã Jejuí 'ga mu'ama.

²⁸ Ymã te Janeruwarete 'ga ka'arana kwasiarukari ee rakue: "Mama'e tywera apoara pyri 'ga ami", 'jau 'ga ikwasiarukaa rakue. A'eramũ 'gã 'ga monou imu'ama muna'ywa põ'õ me, Janeruwarete 'ga je'egawer imũ etee futat.

²⁹ 'Gã pyu okwap ma'e 'gã Jejuí 'ga rerekoemãũ 'ga kurapa nanẽ nũ.

—"Anure nipo je Jarejuwarete 'ga mogytaawa retygi. A'ere nipo je imuapya 'ara rupi imowyrĩ nũ", ere 'ã rai'i.

³⁰ A'eramũ ene ejua ejypa 'ypeywar awi— 'jau 'ga pyu okwap ma'e 'gã 'ga upe, 'ga rerekoemãũ.

³¹ Mainana 'wyrriara 'gã, Moisesi 'ga remikwasiarere are moromũ'jara 'gã. Mĩmera 'gã nanẽ 'ga rerekoemãũ 'upa nũ:

—Opoat 'ga 'gã jepi. A'ere 'ga najepoara'uweri futari.

³² Israeu juapyreramũ jane'wyrriararetea e'i na a'e 'ga re'ã. Siesag iki ajee 'ga rura 'ga jywa 'wei. 'Ga jyp 'ga ruramũ sirowiat 'ga 'jau 'wei— 'jau 'gã ajaupe.

'Ga pyri imu'amipyretera 'gã, muna'ywa 'gã amũ nanẽ 'ga kurapa nũ.

Jejuí 'ga manũawet

(*Mateu 27.45-56; Luka 23.44-49; Juã 19.28-30*)

³³ Kwara okwapa aje owepa. Ypytuna 'jawe futat opyytunaiwamũ. Kwara ajerewamũ tãmẽjẽ awau weny jesagamũ nũ.

³⁴ Kwara renye'emauwe Jejuí 'ga wafukaita oje'eg imũ futat.

—*Eli eli lama sabactani*— 'jau 'ga oje'eg imũ.

Oje'eg imū 'ga 'eawera: “Kiapi'ni, Kiapi'ni. Ma'eramū te erepoit je wi?” 'ga 'ea futat poromū 'ga afukaja.

³⁵ Aipo 'ga 'e renupara 'gā amū 'jau:

—Eliasi 'ga 'ga wenū!— 'jau 'gā ajaupe.

³⁶ 'Ga pyriwara 'ga amū ujāna amynejuranū pyyka imonou imunepa y'waynana pype. A'ere 'ga imonou iupia 'ywa rafeā are imonou Jejuī 'ga upe 'ga remipyteramū. A'ere 'ga 'i etee esakara 'gā nupe:

—Tene jane 'ga resagi ra'ne. Siesak Eliasi 'ga rura 'ga mosoga 'ypeywar awi ra'ne 'jau— 'jau 'ga 'gā nupe.

³⁷ A'ere Jejuī 'ga wafukaita amanūmū.

³⁸ A'eramū futat Janeruwarete 'ga mogytaawa my'jawa rowopypea taity otoroka opojo'ogamū imytera rupi. Ywate awi we futat 'ua opojo'ogamū wyyu.

³⁹ 'Ga manūnamū jefaruu 'gā 'wyrīa'ri 'ga 'ga manū resaka. 'Ypeywarā rowase 'ga u'ama Jejuī 'ga afukajamū. A'eramū 'ga 'jau ojeupe:

—A'jea futat pa 'ga Ku'jywa 'ga ra'yra futat ra'e!— 'jau 'ga u'ama.

⁴⁰ Kūjāmera 'gā amū 'upa muku'i 'ga manū resaka nū. Ēē mū rera Mari Matarena, ajepeja ēē rera Sarume, ajepeja ēē rera Mari. Poromū Mari ēē ra'yra 'gā Jose 'ga, Tiago 'ga. Aipoa Tiago 'ga kunumūūa. Mīmera 'gā 'ga manū resaka amumera 'gā netee.

⁴¹ Poromū kūjāmera 'gā Jejuī 'ga rewiri ako ma'efera 'gā futat poromū. Garireja wyy pype 'ga rekoramū 'gā awau watau 'ga rupi, 'ga poaa mama'e apo are rakue. Amumera kūjāmera 'gā 'upa 'ga manū resaka. Aipo 'gā nanē 'ua 'ga rupi Garireja wyy awi Jerusareg ipe 'ga oramū rai'i nū.

Ita kwara pype Jejuī 'ga monoawet

(Mateu 27.57-61; Luka 23.50-56; Juā 19.38-42)

⁴²⁻⁴³ Kaaruwamū Jose 'ga, Arimateja pewarera 'ga awau oporogytau Piratu 'ga upe. Opytuna 'gā nupe oje'ēma'e 'ga poromū. A'ere 'ga Jejuī 'ga rerowiari. “Anure nipo Jejuī 'ga 'ūina 'wyrīaramū janee”, 'jau 'ga ojeupe. Morowykye'ema piara rupi 'gā Jejuī 'ga jukaukaa ra'e. A'eramū Jose 'ga awau “Jejuī 'ga reumera emut jee”, 'jau Piratu 'ga upe:

—Amanū Jejuī 'ga ko. 'Ga reumera toroo inuga ita kwara pype 'jau— 'jau 'ga Piratu 'ga upe.

Morowykye'ema rupi judeu 'gā nojotymi rakue. “Morowykye'ema piara rupi futat sitym 'ga 'jau”, 'jau Jose 'ga ojeupe etee futat. A'eramū 'ga Piratu 'ga pojeupe'ema futat awau Jejuī 'ga reumera renūina 'ga upe.

⁴⁴ —Amanū te 'ga ra'e?— 'jau Piratu 'ga 'ga upe.

—Amanū ako 'ga ko nū'ū— 'jau 'ga 'ga upe.

—Kuu. Kamēšiete nipo 'ga manūi ra'e— 'jau Piratu 'ga oporesagamū 'ga ree.

A'erauwe 'ga 'jau jefaruu 'gā 'wyrīa'ri 'ga upe:

—Maranime te 'ga manūi ra'e?— 'jau 'ga imome'waukaa 'ga upe.

⁴⁵ —Kwara jerewamū ako 'ga manūi ko— 'jau 'ga 'ga upe.

Aipo ojeupe jefaruu 'gā 'wyrīa'ri 'ga 'e re 'ga 'jau Jose 'ga upe:

—Ere 'ga rerawau inuga ita kwara pype— 'jau 'ga 'ga upe.

⁴⁶ A'erauwe Jose 'ga awau taity fuku mua Jejuī 'ga reumera auwanawamū. Linu 'jawa apopyrera 'ga imua. A'eramū 'ga Jejuī 'ga reumera mosoka imua 'ypeywar awi 'ga reumera auwana aipoa taity pyu. A'ere 'ga 'ga reumera monou inuga ita kwara pype. A'ere 'ga itapewuu mojerepa imonou imyina ita kwara rawopytymawamū.

⁴⁷ Kūjāmera 'gā amū awau 'ga imono resaka. Mari Matarena ēē, Mari ēē. Aipoa Mari ēē Jose 'ga ya. Mīmera 'gā Jejuī 'ga reumera rupawa resaka.

16

Jejuī 'ga ferapawet

(Mateu 28.1-8; Luka 24.1-12; Juā 20.1-10)

¹⁻² Ikoal'i, ku'ema'iw are, kūjāmera 'gā jany kasiga mua erawau Jejuī 'ga reumer are eko'wogipyramū. Mari Matarena ēē, Sarume ēē, Mari ēē. Poromū Tiago 'ga y ēē. Mīmera 'gā jany kasiga amut erawau. Ku'ema'iw are 'gā erawau Jejuī 'ga rupaw ipe.

³ Awau 'gā 'jau:

—Aw'yja sipo itaa ope'a jui janee?— 'jau 'gā ajaupe.

⁴ Tuwīuu wejue itaua. A'eramū 'gā poromū 'jau ajaupe. Awau 'gā owaēma ja'wyja'wy jue itauu resaka, ita kwara rawopytymawera resaka.

—Tyy. Ojepe'a jui ra'e— 'jau 'gā ajaupe.

⁵ A'erauwe kūjāmera 'gā awau osou ita kwara pype. Peu 'gā ywagipewara 'ga resaka kunumūū 'jawe. 'Ga raitya waparasingamū. Jejuī 'ga rupawera jakwatawa katy 'ga wapyka. 'Ga resakawe kūjāmera 'gā okyjau 'ga wi.

⁶ A'eramū 'ga 'jau 'gā nupe:

—Pekyje awi je wi— 'jau 'ga 'gā nupe. —Jeju 'ga resaka te 'ā pejot, Nasare pe waranup ma'efera 'ga resaka te 'ā pejot, 'ypeywar are amanū ma'efera 'ga resaka te 'ā pejot— 'jau ywagipewara 'ga kūjāmera 'gā nupe. —A'ere 'ga nitywi 'au. Oferap ako 'ga ko. Pe'je pejeju 'ga rupawera resaka— 'jau 'ga 'gā nupe.

A'eramū 'gā awau esaka.

⁷ A'eramū ywag awi 'ut ma'efera 'ga 'jau 'gā nupe nū:

—Pe'je pejewau imome'wau Pedro 'ga upe, amumera 'ga remimu'e 'gā nupe we: “Oferap kīā awau Garireja ywy pe pē nenune. Peu te nipo 'ga peesak nū, pejejeupe 'ga 'eawer imū etee futat nū”, pe'je ki 'gā nupe— 'jau 'ga 'gā nupe.

⁸ A'erauwe kūjāmera 'gā awau ujāna ita kwār awi. 'Gā kyjea 'gā nerekou 'gā moyyita. A'eramū 'gā ojeupe 'ga 'eawera mome'wawe'em awau 'gā nupe.

Mari Matarena ēē Jeju 'ga resaka

(Mateu 28.9-10; Juā 20.11-18)

⁹ Domingo rupi Jeju 'ga ferawi rakue. Ku'em enune 'ga ferawi rakue. Mari Matarena ēē upe ra'ne 'ga ojesaukaa. Ēē pirewara 'ga imoia ēē wi rakue. Sete ēē pirewara pytuna.

¹⁰ Ojeupe 'ga jesaukar ire ēē awau imome'wau 'ga remimu'e 'gā nupe rakue. U'arasigamū 'gā ajemogyau ajaa'wau Jeju 'ga ree. A'eramū Mari Matarena ēē awau imome'wau 'gā nupe:

—Oferap kīā ra'e. Ojesaukat kīā jee ko— 'jau ēē 'gā nupe.

¹¹ A'ere 'gā nuerowiari etee ēē ojeupe 'ga mome'uramū.

Mukūja 'gā Jeju 'ga resaka

(Luka 24.13-35)

¹² A'ere Jeju 'ga ojesaukaa mukūja werowiaara 'gā nupe. Jū me 'ga awau watau akou. Poje Jeju 'ga ojesaukaa 'gā nupe. A'ere 'ga jesowo'gōgi 'gā nupe. A'eramū 'gā 'ga kwaape'ema.

¹³ A'ere 'gā 'ga kwaaw ire awau ojewya 'ga mome'wau amumera 'ga remimu'e 'gā nupe. A'ere 'ga remimu'e 'gā nuerowiari etee 'gā 'ea.

Jeju 'ga remimu'efera 'gā 'ga resaka

(Mateu 28.16-20; Luka 24.36-49; Juā 20.19-23; Atos 1.6-8)

¹⁴ Poje Jeju 'ga ojesaukaa wemimu'e 'gā nupe. 'Gā jemi'waaw ipe 'ga ojesaukaa 'gā nupe. A'eramū 'ga 'jau 'gā nupe:

—Ma'eramū te neperowiari 'gā, “oferap 'ga” pejejeupe 'gā 'eramū ra'e 'ū? Ma'eramū sipo ajee neperowiari je 'eawera ra'e?— 'jau 'ga 'gā nupe oje'ega moywyrarena 'gā nupe.

¹⁵ A'eramū 'ga 'jau 'gā nupe:

—Pe'je pejewau je mome'wau kwe pewara 'gā nupe najuejue etee futat. Amunawa moymyka pejewau je mome'wau 'gā nupe, je rerowiarukaa 'gā nupe pejejemogyau.

¹⁶ Je rerowiaara 'gā ki pepymī 'y pe, otywer awi 'gā poira resaukaawamū. A'eramū je tejerowiaara 'gā katu'oka. Tejerowiare'ema 'gā nipo je nakatu'ogi. A'eramū nipo 'gā awau mama'eukwaawa rapyaw ipe amanū re— 'jau 'ga 'gā nupe.

¹⁷ —Tepājēa nipo je imonou tejerowiaaramū pē nupe. A'eramū pēē mama'eukwaawa moia erekwara 'gā nui jerer imū. Pejejemikwaawe'ema pejeje'ega nipo pēē iapou.

¹⁸ Moja pyyka miamū nepemanūi. Ae jukaara muaga 'wau miamū nanē nepē jukai. Oje'arimū je rerowiaaramū pejepo mono re ojero'wu ma'e 'gā ojekatu'oka ajemogyau— 'jau 'ga 'gā nupe.

Ywag ipe Jeju 'ga jeupiawet

(Luka 24.50-53; Atos 1.9-11)

¹⁹ 'Gā nupe oje'ēmaw ire Janeruwarete 'ga Janejararete 'ga, Jeju 'ga monoukaa 'ga mojeupirukaa ywag ipe. Ywag ipe 'ga waēmawe Janeruwarete 'ga 'jau 'ga upe: “Ene 'ā je 'jawe futat. A'eramū ene eapyka jejakwatawa katy”, 'jau Janeruwarete 'ga Jeju 'ga upe. A'eramū Jeju 'ga awau wapyka 'Uwarete 'ga jakwatawa katy.

²⁰ A'eramū 'ga remimu'e 'gā awau 'ga mome'wau kwe pe. “Werowiamū Jeju 'ga pētywera moia pē nui, pē katu'oka”, 'jau 'gā imome'wau kwe pewara 'gā nupe. Janejararete 'ga 'gā opoat. Aeremiapoe'ema 'ga wapoukat 'gā nupe. A'eramū 'gā nenupara 'gā 'gā 'eawera rerowiaa. “A'jea futat 'gā 'ea. Sā'ā Ku'jywa 'ga janeremiapoe'ema apoukara 'gā nupe”, 'jau enupara 'gā ajaupe, aipo 'gā 'e rerowiaa.

Luka

Jejuu 'ga rekwawera Luka 'ga omome'u ka'aran are inuga janee rakue.

Luka 'ga nuatai futari Jejuu 'ga rupi rakue. Najudeu arūi 'ga. A'ere 'ga Jejuu 'ga rerowiari. Morofuanugara 'ga. Janeruwarete 'ga 'Agesagea ka'arana kwasiarukari Luka 'ga upe. A'eramū 'ga ka'arana kwasiaa inuga Jejuu 'ga ree.

¹⁻⁴ Teofiru. Ene 'ā kūima'eeteetea. A'eramū je ene upe ka'arana kwasiaa inuga. Je Luka. Jejuu 'ga ree je ka'arana kwasiari inuga ene upe. A'eramū ene jeremikwasiarera mogytau. A'eramū ene “Na pa je 'gā a'jea futat imome'ui jee ra'e”, 'jau ene jeremikwasiarera mogytare.

Ae pype akou 'ā Jejuu 'ga awau watau kwe pe akou rakue, mama'eukwaawa pe'au 'gā nui rakue. Ojero'wu ma'e 'gā katu'oka 'ga awau kwe pe akou rakue. 'Gā mu'jau 'Uwarete 'ga je'eg are rakue. A'eramū 'gā 'awamū kwaiwete 'ga renuparera 'gā 'ga rera mome'wau awau kwe pe ajemogyau 'gā nupe. Amumera 'gā ka'arana kwasiaa 'ga ree, 'ga rekwawer are. A'ere 'gā nomome'upawī 'ga rekwawera rakue.

A'eramū je “amome'upap pa je ikwasiaa inuga ka'aran are 'gā nupe kwy”, 'jau je tejeupe. A'eramū je a'eramū tewau Jejuu 'ga resakarera 'gā nupe teporogytau tekou ai'i. Je naesagi futari Jejuu 'ga. A'eramū je tewau 'ga resakarera 'gā nupe teporogytau tekou. Namajepēi'i 'gā nupe etee rūi futat je porogytai. Kwaiwete je porogytai 'ga resakarera 'gā nupe tewau tekou ai'i. “Pemome'upap pejejemiesagera jee”, 'jau je 'gā nupe tewau tekou ai'i. “Jejuu 'ga remiapofera pemome'upap jee”, 'jau je tewau tekou 'gā nupe ai'i.

A'eramū 'gā imome'waupap jee. Wemiesagera 'gā imome'wau jee. A'eramū je 'awamū ka'arana kwasiaa inuga 'gā nemimome'ufer are pē nupe.

A'eramū ene jeremikwasiarera resaka ka'aran are. “A'jea futat 'gā Jejuu 'ga mome'ui jee rakue”, tere jeremikwasiarera mogytare 'jau.

Sakari 'ga upe ywagipewara 'ga eawet

⁵ A'ere je Juā Batista 'ga ra'ne imome'ui enee. Juā 'ga rekoramū Erote 'ga rekoi 'wyri-aramū judeu 'gā nupe rakue. Juā 'ga ruwa 'ga rera Sakari. Sakari 'ga mainana. Apiasi 'ga remiayuwa 'gā pyri 'ga oporowykyau Jarejuwarete 'ga mogytaawa pype. Mainana 'gā juejue Arāo 'ga juapyrera. Sakari 'ga remireko ēē nanē Arāo 'ga juapyrera ēē nū, Isapeu ēē.

⁶ ēē mama'e tywera nuapoi futari Jarejuwarete 'ga upe. Sakari 'ga nanē nuapoi futari 'ga upe nū. Jarejuwarete 'ga je'eg are 'gā apyakai. Jarejuwarete 'ga remifutar imū etee futat 'gā mama'e apou akou namutamutat 'ga upe.

⁷ Isapeu ēē nata'yri futari 'gā nupe. ēēmena 'ga nanē futat osawa'eramū. Nokoi'i futari 'gā na'yra mū. Namanūi futari 'gā na'yra mū. ēē ra'yre'em teea futat.

⁸ Jarejuwarete 'ga upe 'ga porowykyaw ipe Sakari 'ga ruramū 'ga pytuna 'gā 'jau 'ga upe:

⁹ —Awamū ene ekwap esou 'au myter ipewara pype jany kasiga rapyau, Jarejuwarete 'ga muorypawamū— 'jau 'gā 'ga upe.

A'erauwe 'ga awau osou jany kasiga rerawau iapyau. Awau osou imy'ja'wi pype.

¹⁰ Jany kasiga 'ga upe eroo iapyramū tekotee 'gā 'upa oporogytau ukupepe Jarejuwarete 'ga upe, 'ga ēma poromukuran.

¹¹ Jany kasiga imonygauwe ywagipewara 'ga 'ua ojesaukaa 'ga upe. 'Ua u'ama tata eny pyri. Jany kasiga 'ga iapyramū 'ga 'ua u'ama ojesaukaa 'ga upe. Iapyawa rowajara katy ojesaukaa 'ga upe.

¹² 'Ga resakawe Sakari 'ga okyjau etee 'ga wi.

—Kuu. Ma'ja te 'wei? Ma'ja te koromū 'ut ojesaukaa jee 'wei?— 'jau 'ga okyjau etee futat u'ama ywagipewara 'ga wi, ojeupe 'ga jesaukaramū.

¹³ Ojewi 'ga kyjeramū ywagipewara 'ga oje'ega 'ga upe:

—Erekyje awi. Janeruwarete 'ga eneje'ega wanup 'ūina — 'jau 'ga 'ga upe ojewi 'ga kyjeramū. —“Kunumia emut amū jee”, ere ako 'ga upe rakue. A'eramū 'ga 'awamū eneremifutara mua enee— 'jau 'ga 'ga upe. —Anurenure'i nipo eneremireko ēē ra'yramū— 'jau 'ga Sakari 'ga upe. —Eja'yra 'ga 'ar ire ki Juā enug 'ga ree. 'Ga 'aramū nipo eneku'i 'ga ree.

¹⁴ Enepytuna 'gā we futat nipo aku'iramū ene pyri 'ga 'aramū 'ga ree.

¹⁵ Waranuw ire nipo enera'yra 'ga kūima'eeteetea Jarejuwarete 'ga upe— 'jau 'ga 'ga upe u'ama. —'Ga aranuw ire ene kawājawiwa rykurukare'ema 'ga upe. Y'way ajaiwaye'ema miamū futat itykurukare'ema 'ga upe. 'Ga 'ar pyyrauwe Janeruwarete 'ga 'Agesagea 'ga rerekoi— 'jau 'ga 'ga upe imome'wau.

16—Waranuw ire nipo enera'yra 'ga awau akou kwe pe oporogytau Israeu juapyrera 'gā nupe. A'eramū nipo 'ga 'gā mojewyrukaa Jarejuwarete 'ga rerowiara upe nū— 'jau 'ga 'ga ruwa 'ga upe u'ama.

17—Sā'ā ymā Eliasi 'ga rekoa Jarejuwarete 'ga pājē mū etee mama'e apoa rakue. Nan tee futat nipo enera'yra 'ga rekoi, 'ga 'jawerimū etee futat. Jarejararete 'ga rur enune nipo enera'yra 'ga rekoi 'gā mu'jau. 'Gā na'yra mota'waukaa 'gā nuwa 'gā nupe— 'jau 'ga imome'wau 'ga upe. —A'ere te nipo Janejararete 'ga ruri enera'yra 'ga rewiri. Kwaiwete te 'ā 'gā Janeruwarete 'ga je'ega nuenuwi. A'eramū enera'yra 'ga a'eramū 'ua Janeruwarete 'ga je'ega renuwukaa 'gā nupe. Janejararete 'ga rura futarukaa 'gā nupe kwaiwete— 'jau ywagipewara 'ga Sakari 'ga upe u'ama imome'wau.

18 A'ere aipo 'eramū Sakari 'ga nuerowiari 'ga je'ega.

—Ene'me awi jee kūi. Iwāiwī jeremireko ēē nū'ū. Je nanē 'ā tesawa'eramū nū. A'jea futat sipo ēē wāiwī pype ēē ra'yramū?— 'jau 'ga ywagipewara 'ga upe.

19 A'eramū ywagipewara 'ga 'jau 'ga upe:

—Naani. Ereapo awi aipoa. Je 'ā Gaprieua futat. Je 'ā Ku'jywa 'ga pyriwara futat. 'Ga te 'ā je mut je moporogytaukaa enee. 'Ga te 'ā moranuw esage werurukat imome'waukaa enee jee.

20 A'ere 'ā 'ga nererowiari etee ejeupe je 'ga mome'uramū. A'eramū nipo 'ga ene je 'ēwoka'jama. Ije'ege'ema 'jawe nipo ekou. Enera'yra 'are'emauwe nipo nereje'egi. 'Ga 'ar ire te ereje'eg nū— 'jau ywagipewara 'ga Sakari 'ga upe. —Eja'yra 'aramū te nipo ejeupe jeporogytawera ererowiat. A'eramū te nipo ereje'eg nū— 'jau 'ga 'ga upe.

21 A'eramū ukupepewara 'gā Sakari 'ga rapesaka 'upa.

—Ma'ja te 'ga wapo 'ūina oporomukuramū 'i?— 'jau 'gā ajaupe 'upa.

22 Ojeupe ywagipewara 'ga porogytapaw ire Sakari 'ga 'ua uēma ukupepewara 'gā nupe. A'ere 'ga noje'egi futari 'ua. Opoa etee futat 'ga imowawaka 'gā nupe. A'eramū ukupepewara 'gā 'jau:

—Ywagipewara 'gā nipo kwe ojesaukaa 'ga upe ra'e. A'eramū 'ga oje'ēka'jamamū ra'e— 'jau 'gā ajaupe.

23 Oporowykypaw ire Sakari 'ga awau ojewya oje'wyr ipe.

24 Kamēsiete 'ga remireko ēē wa'yramū. A'eramū ēē 'ūina wog ipe etee futat. Watawe'em futat kwe pe awau. Sīku jaya moka'jama 'ūina wog ipe watawe'em.

25 A'eramū ēē 'jau ojeupe etee futat 'ūina: “Janeruwarete kīā esage jee”, 'jau ēē 'ūina. “Teja'yre'ema je anosī jepi. A'ere 'ā je 'awamū jera'yramū. Jemena agawewi je 'ā. A'etea je najera'yri jepi. A'ere 'ā 'awamū jera'yramū. A'eramū je 'awamū tejenosōumap”, 'jau ēē 'ūina ojeupe.

Mari ēē upe ywagipewara 'ga 'eawet

26-27 Isapeu ēē ra'yryrūūnamū, Janeruwarete 'ga ywagipewara 'ga mua Mari ēē upe, Nasare pewara ēē upe. Gaprieua ywagipewara 'ga rera. Gaprieu 'ga 'ua, Janeruwarete 'ga je'ega rerua Mari ēē upe. Nimeni we Mari ēē. Eēmērama 'ga Jose 'ga. Jose 'ga Davi 'ga juapyrera. Ippy we 'gā nupe 'wyriarareteramū 'ūi ma'efera 'ga futat poromū, Daviramū.

28 A'eramū Gaprieu 'ga 'jau Mari ēē upe:

—Ere eku'iramū ekou 'awamū, kari. Janeruwarete 'ga nipo 'ā ojejuka ene ree 'awamū i— 'jau 'ga ēē upe 'ua.

29 A'ere ēē naeapyoi ojeupe 'ga 'e are. “Ma'eramū kīā aipo 'jau jee 'ū?” 'jau ēē ojeupe.

30 A'eramū 'ga 'jau ēē upe:

—Erekyje awi, kari. Janeruwarete 'ga te ene rereko. Iku'i 'ga 'ūina ene ree.

31 Enera'yt nipo ene. Kūima'e 'ga nipo enera'yra 'ga. Jejui 'jau ki ene eja'yra 'ga renūina— 'jau 'ga ēē upe.

32-33 —Kūima'eeteete 'ga te nipo. Janeruwarete 'ga te'i pē nupe 'jau: “Koromū jera'yra 'ga”, te'i pē nupe 'ga resaukaa 'jau— 'jau 'ga ēē upe. —'Ga futat nipo anure Janeruwarete 'ga omogo 'wyriarareteramū pē nupe, judeuramū pē nupe, Jako 'ga juapyreramū pē nupe— 'jau 'ga ēē upe. —Ymā we te ako Davi 'ga juapyrera 'ga peapesak pejejemogyau ikue. “Maranime gatu nipo Davi 'ga juapyrera 'ga ruri 'wyriarareteramū akou janee?” pe'je 'ā pejejemogyau jepi. A'ere 'awamū 'ga ruri pē nupe. Enera'yramū 'ga 'ga muri pē nupe, pēnemiapesagera 'ga. Namutat 'ga rekoi 'wyriarareteramū pē nupe. Nipy'ruawi futari 'ga akou. Nateepawa'uweri futari nipo 'ga akou— 'jau 'ga ēē upe.

34 A'eramū Mari ēē 'jau 'ga upe:

—Kūjāmukua we te 'ā je ako. Nokoi we te 'ā kūima'ea je ree. Ma'eramū je kūima'e tejee ekoe'emauwe teja'yr ekoeteramū nūrā?— 'jau ēē 'ga upe.

35 A'eramū 'ga 'jau ēē upe nū:

—Ku'jywa 'ga 'Agesagea te nipo ene rereko ī. 'Ga te kunumīa amut enee ī. A'eramū nipo ene eja'yramū. Ku'jywa 'ga te wa'yra 'ga amut enee. A'eramū nipo 'ga wesageramū. Nitywi'i futari 'ga tywera 'ga ree— 'jau 'ga ēē upe.

³⁶ —Nenerēa'ari nipo epytuna ēē ree, Isapeu ēē ree? “Ta'yre'ema kynā”, 'jau 'gā 'ā ēē upe jepi. A'ere 'awamū ēē ra'yramū. Ta'yryrūū ēē. Owāiwi' pype ēē ra'yramū ai'i.

³⁷ Wapo katu katu te 'ā Ku'jywa 'ga mama'ea. A'eramū 'ga ēē mena 'ga ra'yra pyygukaa ēē upe. Nokoi'i te 'ā Ku'jywa 'ga remiapoe'ema mama'e mū— 'jau 'ga ēē upe.

³⁸ A'eramū ēē 'jau 'ga upe:

—Nai'i. A'jea futat Janeruwarete kīā jejararetea futat. Tene kīā iapoi jee wemifutar imū etee futat— 'jau Mari ēē ywagipewara 'ga upe.

Aipo 'epaw ire 'ga awau ēē wi ywag ipe nū.

Isapeu ēē pyri Mari ēē oawet

³⁹⁻⁴⁰ A'eramū Mari ēē ikoai'i awau Isapeu ēē 'wyr ipe. “Oo pa je kynā resaka tekou kwy”, 'jau ēē ojeupe. A'erauwe futat ēē okaraemā mogatyrūmū awau. Isapeu ēē Judeja ywu pewara. Ywytyra pyte'rarimū 'gā 'wyrā ruwi. A'eramū Mari ēē awau peu. Amunaw ipe owaēmawe Mari ēē awawayayau osou Isapeu ēē 'wyr ipe.

⁴¹ Mari ēē resakawe Isapeu ēē 'jau ēē upe:

—Tereko?

—Je rekoī 'we. Ene pyri je ruri tekou— 'jau Mari ēē ēē upe.

Mari ēē je'ega renupawe Isapeu ēē ra'yra 'ga omŷina ēē reweg ipe. A'erauwe futat Janeruwarete 'ga 'Agesage ruri osou Isapeu ēē pype. Ēē rerekwaramū futat 'ua.

⁴² A'eramū ēē 'jau Mari ēē upe:

—Janeruwarete kīā ojejuka ene ree kyn. Janeruwarete kīā esage janee. Ma'eramū 'ā ereko eku'iramū. Eneku'i 'ā ekou tekotee wā ku'i apyraapa— 'jau Isapeu ēē Mari ēē upe. —Enera'yra kīā ree taetu nipo kīā jejukai ene ree.

⁴³ Janeruwarete kīā esage jee. Ene 'ā jejara kīā ya— 'jau ēē Mari ēē upe. —Je te 'ā nakūjāeteete rūi te pē nupe. A'etea te 'ā erejot je resaka rai'i— 'jau ēē Mari ēē upe.

⁴⁴ —Ene te 'ā jarejara kīā ya. A'eramū jera'yra kīā omŷina aku'iramū jereweg ipe eneje'ega renupawe ko— 'jau ēē ēē upe.

⁴⁵ —“Tene ki kīā iapoi jee”, ere 'ā kīā upe rai'i. “Tene ki kīā kunumī muri jee”, ere 'ā kīā upe rai'i. A'eramū taetu kīā tojejuka ene ree 'jau— 'jau Isapeu ēē Mari ēē upe.

⁴⁶ A'eramū Mari ēē 'jau:

—Janejara kīā esage janee, a'e je jepi.

⁴⁷ Janeruwarete kīā jane katu'okara.

A'eramū je a'eramū teku'iramū tekou.

⁴⁸⁻⁴⁹ Je 'ā nakūjāeteete rūi agawewi.

A'etea kīā 'ā ojejuka je ree je rekoramū.

Janeruwarete kīā 'ā pājēreteā. Kīā 'ā aeremiapoe'ema wapo jee.

Anure nipo je manū re je rewiri 'ut ma'e wā 'jau jee:

“Janeruwarete kīā ojejuka kynā ree”, 'jau nipo wā 'ā jee je manū re.

Anure taetu nipo wā aipo wā 'i jee.

Janeruwarete kīā tekatu futat 'ā eteete ma'eramū akou.

Nokoi futari wā amū kīā 'jawe.

Kīā etee futat Okoeteete ma'eramū—

'jau Mari ēē Isapeu ēē upe 'ūina imome'wau.

⁵⁰ —Kīā 'ā ajemuaēm ojee iporomutat ma'e wā nee.

Ymā we te 'ā kīā jemuaēmi wā nee rakue.

Opoire'ema futat nipo kīā jane ree ajemuaēm awi.

Anure taetu nipo kīā jemuaēmi wā nee—

'jau ēē imome'wau ēē upe.

⁵¹ —Awamū taetu 'ā kīā opājē resaukaru'jau'japa wā nupe.

Ojee ojerowiarai'p ma'e wā kīā imomapa nipo.

Wā nemiaporama nipo kīā imateepapa wā nui—

'jau ēē 'ūina ēē upe.

⁵² —Wyrriara wā nipo kīā imuēma.

'Wyrriare'ema wā etee nipo kīā imŷina 'wyrriara py'rau nū.

⁵³ Ikaraemāe'ema wā nupe etee nipo kīā mama'e esage monou nū—

'jau ēē imome'wau ēē upe.

—A'ere nipo kīā ikaraemā kwai ma'e wā momoirukari wā karaemā awi.

A'eramū nipo kīā wā monou kwe pe, wā karaemāe'eme futat.

⁵⁴ Janeypy upe kīā 'jau rakue: “Ajemuaēm je pē nee.

A'eramū je pē poaa mama'e apo are", 'jau kiā rakue.

A'eramū kiā u'eawer imū etee mama'e apou wā nupe, wā poaa, Israeu kiā juapyrera wā poaa.

Wenuparera wā kiā ipooa.

Nomoka'jami futari kiā u'eawera.

⁵⁵ Wea'aramū etee futat kiā akou wā nee.

Kiā 'ā ajemuaēma janeypy wā nee rakue.

Abraão kiā ree, kiā juapyrera wā nee nanē futat kiā 'ā ojejukau rakue.

Oje'eg imū etee futat kiā 'ā iapoi—

'jau Mari ēē Isapeu ēē upe.

⁵⁶ Muapyra jay magwapa Mari ēē akou peu Isapeu ēē 'wyr ipe. A'ere ēē ojewya 'ua oje'wyr ipe nū.

Juā Batista 'ga 'aawet

⁵⁷ Oje'wyr ipe Mari ēē o re Isapeu ēē ra'yra 'ga u'aa ēē wi. Kūima'e 'ga futat ēē ra'yra.

⁵⁸⁻⁵⁹ A'eramū ēē pytuna 'gā aku'iramū 'ga ree. Kwaiwete futat 'gā aku'iramū 'ga ree. Ēē pyriwara 'gā nanē aku'iramū 'ga ree nū.

—Janeruwarete kiā 'ā esage kynu upe. Ajemuaēm kiā kynu ree. A'eramū kiā kynu mena ra'yra pyygukaa kynu upe— 'jau kūjāmera 'gā.

Kūima'efera 'gā we futat 'jau ēē upe:

—Esage te 'ā Janeruwarete 'ga 'gā nupe— 'jau 'gā ajaupe ēē ra'yra 'aramū. —Iwāiwi agawewi 'ā ēē. A'etea 'ā ēē ta'yt owāiwi pype— 'jau 'gā ēē upe ēē ra'yramū.

Majepeja etee kunumi 'ga morowykye'ema magwapa. A'ere 'gā 'ua 'ga mojewaga resaka. 'Ga mojewaga resaka 'ut ma'e 'gā 'jau ajaupe:

—'Ga ruwa 'ga rera etee futat sinug 'ga ree kūi, Sakari kūi— 'jau 'gā ajaupe.

⁶⁰ A'ere 'ga y ēē:

—Naani. Nafutari je. Juā te je afutat kiā reramū— 'jau ēē 'gā nupe. —Juā te je anug kiā ree— 'jau etee ēē 'gā nupe.

⁶¹ Aipo 'ga y ēē 'eramū 'gā 'jau ēē upe:

—Ma'eramū a'i i? Nitywi te 'ā enepytuna Juā pyu era a'i i— 'jau 'gā ēē upe. —Ma'eramū ene inuga ekoete 'ga ree a'i i?— 'jau 'gā ēē upe.

'Ga ruwa 'ga peu futat 'ūina. A'ere 'ga noje'egi 'ūina. Ije'ēka'jam 'ga.

⁶² A'eramū 'gā 'jau 'ga ruwa 'ga upe:

—Ma'ja pyu te jane 'ga renūi?— 'jau 'gā 'ga upe.

Opou etee futat 'gā oje'ega Sakari 'ga upe 'ga 'jawe.

⁶³ A'erauwe 'ga iapoi 'gā 'jawe etee futat 'gā nupe. Opo warawarau etee 'gā nupe.

—Ka'arana perut jee— 'jau 'ga.

Opou etee futat 'ga 'jau 'gā nupe.

A'erauwe 'gā ka'arana reruwa 'ga upe. Ka'arana 'ga ikwasiaa wa'yra 'ga rer are 'gā nupe. Ka'aran are 'ga rera kwasiaramū 'gā esaka.

—'Ga rera Juā futat ra'e kūi— 'jau 'gā ajaupe.

⁶⁴ Aipoa 'ga ikwasiaa 'ga renamū futat 'ga je'ega ojewya 'ga upe. A'eramū futat Janeruwarete 'ga 'ga je'ega mamuka 'ga wi, ywagipewara 'gā 'eawer imū etee futat. A'eramū futat 'ga imome'ui oje'eg imū 'gā nupe, 'ga oporogytau 'ūina 'gā nupe.

—Janeruwarete 'ga 'ā esage janee— 'jau 'ga oje'ega fug ire 'ūina, Jarejuwarete 'ga mome'wau 'gā nupe.

⁶⁵ 'Ga je'egauwe futat peuwara 'gā ajemogymogyau etee futat 'ga renupa.

—Kuu. Maran te 'ga je'egi nū 'wei?— 'jau 'gā ajemogyau etee futat 'ga je'ega rerowiare'ema 'ga je'egamū.

A'eramū futat 'gā awau kwe pe ēē rera mokwasi'wau ajaupe.

—Iwāiwi agawewi 'ā Isapeu ēē. A'etea ēē ta'yt. Ēē mena 'ga oje'ēka'jamamū ai'i. 'Ga ra'yra 'ga 'arauwe 'ga je'ega fugi 'ga wi ai'i nū. A'eramū futat 'ga oporogytau 'ūina Jarejuwarete 'ga upe ore ai'i— 'jau 'gā imome'wau ajaupe.

Amunawa moyka awau imome'wau 'gā nupe.

⁶⁶ A'eramū 'ga je'ega renupara 'gā 'jau:

—Ma'e kūima'e 'ga sipo 'i? Kūima'e esage 'ga nipo kūi— 'jau 'gā ajaupe, 'gā na'yra rera renupa.

A'eramū Juā 'ga 'ar ypyrauwe Janeruwarete 'ga ojejukau esage 'ga ree.

Jarejuwarete 'ga je'ega mome'uawet

⁶⁷ 'Ga je'ega mamug ire Janeruwarete 'ga U'agesage mua Juā 'ga ruwa 'ga upe, Sakari 'ga upe. 'Ga 'Agesagea 'ga rerekou 'ga moje'egukaa 'gā nupe. Janeruwarete 'ga remimurama 'ga 'ga imome'wau 'gā nupe, wa'yra 'ga rewiri 'ut ma'e 'ga 'ga imome'wau 'gā nupe.

68 —Ene 'ā eneresage oree, ki Ku'jyp.

Nitywi 'ga amū ene 'jawe oree.

Ene etee futat te 'ā eneresage oree, sa'e ki Jarejuwarete 'ga upe.

Janepypp 'gā 'ā, Israeu juapyrera 'gā 'ā, werowiat futat Jarejuwarete 'ga rakue.

Janeruwarete 'ga te 'ā wemiayuwa 'gā wenū'ēukat Egitu ywy awi rakue.

Anure nipo 'ga jane katu'okara 'ga muri janee.

69 Jane katu'okara 'ga 'ā pājēreteā.

Jane katu'okara 'ga 'ā Davi 'ga juapyrera, Janeruwarete 'ga upe oporowyky ma'efera 'ga juapyrera 'ga.

70 Ymā te 'ā Janeruwarete 'ga je'egi oje'ega mome'wara 'gā nupe rakue.

A'eramū 'ā 'ga 'eawera 'ga je'ega mome'wara 'gā imome'wau awau kwe pewara 'gā nupe rakue.

71 “Tajejuka pē nee 'jau,

pē jukaukare'ema pē nee iporomutare'ema 'gā nupe 'jau,

pē nereko tywerukare'ema 'gā nupe 'jau, e'i 'ā Janeruwarete 'ga janee rakue”,

'jau 'gā awau 'ga 'eawera mome'wau 'gā nupe rakue.

72 Janeruwarete 'ga 'ā ajemuaēm futat nanē janepytunera 'gā nee rakue.

U'eawer imū etee futat Janeruwarete 'ga iapoi 'gā nupe rakue.

73-75 Ymā te 'ā 'ga 'i Abraão 'ga upe rakue:

“Amuēm je ene ene ree iporomutare'ema 'gā nui”, 'jau 'ga 'ga upe rakue.

“A'eramū ene ekyjawe'em jeje'ega renupa.

Je'eawer imū etee futar iki ene mama'e apou ekou.

A'eramū ene etywere'emamū ekou jee.

Mama'e tywera apoare'ema ene.

A'eramū ene nan etee futat ewau emanūmū jee”, 'jau Janeruwarete 'ga Abraão 'ga upe rakue.

Aipo 'jau 'ga oje'ega Abraão 'ga upe rakue.

A'ere 'ga na'ga upe etee rūi 'ga 'i.

Abraão 'ga juapyreramū jane upe juejue nanē futat 'ga 'i nū—

'jau Sakari 'ga imome'wau 'gā nupe.

76 A'ere Sakari 'ga 'jau wa'yra 'ga upe:

—Ene 'ā Janeruwarete 'ga remimurera 'ga renunewara, kisit.

Ene aranuw ire nipo Janeruwarete 'ga 'jau enee:

“Je te 'ā pājēreteā”, 'jau nipo Janeruwarete 'ga enee.

“Juā 'ga jeje'ega mome'wara 'gā nupe”, 'jau nipo 'ga enee ene rekoramū.

Ene nipo kūima'eeteete futat ereko 'gā nupe.

Ene nipo ereo Jarejararete 'ga renunewe kwe pe 'gā mu'jau ekou Jarejararete 'ga rura futarukaa 'gā nupe.

Janeruwarete 'ga ajemuaēm ae ree.

A'eramū 'ga ene monou kwe pe ene moporogytaukaa 'gā nupe.

77-79 “Pejetywer awi pēpoireremū Janeruwarete 'ga imoiri pē nui, pē mogyau wemi-ayuwamū pē katu'oka”, 'jau nipo ene ewau ekou 'gā nupe.

“Janeruwarete 'ga ajemuaēma jane ree.

Ipota'wa te 'ā 'ga jane ree”, 'jau nipo ene ewau ekou 'gā nupe—

'jau 'ga wa'yra 'ga upe 'ūina oporogytau.

—Janejararete 'ga 'ara 'jawe futat.

Sā'ā ae kwara poromū mama'e resak katu katu.

Ypytunaiwa pypewara 'gā tee ajemogy oky'jau mama'e awi.

'Arimū wata ma'e 'gā nokyjei futari ajemogyau.

Nan tee Janejararete 'ga 'ur ire jane mu'ei 'Uwarete 'ga ree.

A'eramū jane 'ga kwaaw ire jarekyjawe'em.

'Ga kwaapare'ema 'gā tee okyje ajemogyau. Amanū awi 'gā kyjea 'gā nerekuo.

A'ere 'ga kwaapara 'gā nokyjei.

Okwaawamū Janeruwarete 'ga janekyje mateepawi.

Ojeupe jane porogytaramū Janeruwarete 'ga janetywera moia jane wi, jane monou wemiayuwamū.

A'eramū jane a'eramū jarekyjawe'em jaremanū awi—

'jau Sakari 'ga wa'yra 'ga upe.

80 Waranuw ire Juā 'ga awau akou kwe pe. Janeruwarete 'ga 'Agesagea futat 'ga rerekou. Ojete'e futat 'ga awau akou amunawe'em ipe namutamutat. A'ere Israeu juapyrera 'gā awau ajatykau 'ga porogyta renupa. A'eramū 'ga Jarejuwarete 'ga je'ega mome'wau 'gā nupe.

2

*Jeju'i 'ga 'aawet**(Mateu 1.18-25)*

¹ "Wyrjararete 'ga Augusto 'ga. A'eramū 'ga 'jau ojeupe: "Marāmaran te jeremiyauwa pytuna nū?" 'jau 'ga ojeupe. A'eramū 'ga 'gā nera kwasiarukaa ojeupe.

—Pekwap pejeje'wyr ipe pejejera kwasiarukaa 'gā nupe— 'jau 'ga 'gā nupe, oje'ega monou wemiyauwa 'gā nupe. —A'ere simojopyrū pēē 'jau, pēnera kwasiarukar ire 'jau— 'jau 'ga 'gā nupe.

² Aipoa 'ga iapoukaramū Sireniu 'ga 'ūina 'wyrjarāmū Siria ywy pewara 'gā nupe.

³ A'eramū 'gā awaupap wera kwasiarukaa wamŷja jeupawer ipe etee futat.

⁴ A'eramū Jose 'ga nanē awau Garireja ywy awi. Nasare awi 'ga awau Judeja ywy pe, wamŷja 'ga Davi 'ga 'wyrer ipe. Perēi me Davi 'ga 'ari rakue. A'eramū 'ga awau peu, wamŷja jeupawer ipe.

⁵ Wemirekoram ēē rerawau, Mari ēē rerawau ojeupi wera kwasiarukaa 'gā nupe. Ēē ra'y'ra ja'wya'wyrāmū 'ga ēē rerawau Perēi me. A'ere kwaiwete 'gā oi peu. A'eramū 'gā wawa 'oga ojumpykware'emamū 'gā nupe. A'eramū Jose 'ga ēē rerawau wyra jagawa pype erosou 'ara ro'ysag awi.

⁶⁻⁷ Peu 'gā nekoramū Mari ēē ra'y'r ppy 'ga u'aa. 'Ga 'ar ire 'ga auwana taity pyu, 'ga monou 'ga nuga ywya'ri pype*

Ywagipewara 'gā jesaukaawet

⁸⁻⁹ Jeju'i 'ga 'aramū ywagipewara 'ga 'ua ojyja ojesaukaa wyra jara 'gā nupe. Mukuu'i 'gā neko'i Perēi awi. Jū me 'gā neko'i weymawa pyri. Karupa'mīa 'gā neymawa. Ypytunimū agawewi. A'etea 'ara 'jawe imojesaka 'gā nupe. Tata eny 'jawewara reru erojyja 'gā nupe. Janeruwarete 'ga ojemuenuyū 'gā nupe. A'eramū 'gā oky'jau 'ga reny awi.

¹⁰ A'eramū jui 'gā kyjeramū ywagipewara 'ga 'jau 'gā nupe:

—Pekyje awi. Moranuw esagea te je arut amū imome'wau pē nupe. A'ea moranuwa pyu tamaku'i pēē 'jau— 'jau 'ga 'gā nupe. —A'ea nipo 'gā amaku'i imogyau najuejue etee.

¹¹ 'Awa 'ara rupi pē katu'okara 'ga 'ari Perēi me ko. Janeruwarete 'ga remimurera 'ga 'ari ko. Pējararete 'ga 'ari ko, pēnemiapesagera 'ga 'ari ko— 'jau 'ga 'gā nupe.

¹² —Taity pyu 'ga jeuwani 'upa ywya'ri pype. A'eramū pēē 'awamū pejewau 'ga resaka. Jeremimome'ufer imū etee futat nipo peesak 'ga ruwamū. "A'jea futat jane esagi 'ga remimome'ufer imū etee futat", 'jau nipo pēē pejejaupe— 'jau 'ga 'gā nupe.

¹³ Ojete'e'i ra'ne ywagipewara 'ga 'ua. A'ere kwaiwete 'gā 'ua ajatykau 'ur ppy ma'e 'ga ree. —Nitywi 'ga amū Janeruwarete 'ga 'jawe.

'Ga te 'ā esage—

'jau 'gā ajaupe.

¹⁴ —Ywagipewaramū ore 'jau: "Ene te 'ā eneresage jepi."

Ywy pewara 'gā nanē 'jau nū: "Ene te 'ā eneresage jepi" 'jau 'gā ajemogyau Jarejuwarete 'ga upe.

A'eramū 'ga ojee oryp ma'e 'gā mopy'ata'wau—

'jau 'gā ajemogyau.

¹⁵ A'ere ywagipewara 'gā awau ojewya ywag ipe nū. A'eramū wyra jara 'gā 'jau ajaupe:

—Pe'je ajeē soo Perēi me 'ga resaka 'ū. "Pe'je pejewau 'ga resaka, e'i Janeruwarete 'ga pē nupe", e'i ako ywagipewara 'ga janeē ko. A'eramū jane jarewau 'ga resaka— 'jau 'gā ajaupe.

¹⁶ A'eramū futat 'gā awau jupiwewe futat kunumīakrya 'ga resaka. Owaēm ire 'gā 'ga resaka. Mari ēē resaka Jose 'ga reewe. Kunumīakrya 'ga resaka ywya'ri pype 'ga ruwamū.

¹⁷⁻¹⁸ 'Ga resag ire 'gā awau 'ga mome'wau amunaw ipewara 'gā nupe:

—Ywagipewara 'ga 'ut ojesaukaa oree ko. "Pē katu'okara 'ga 'u'at Perēi me ko", e'i 'ga oree ko. A'eramū ore arajua 'ga resaka. A'ere a'jea'jea futat 'ga 'i ra'e. 'Ga 'eawer imū etee futat ore kunumīakrya 'ga resagi— 'jau 'gā 'gā nupe.

A'eramū 'gā aipo ojeupe 'gā 'eramū ajemogyau oporesagamū 'gā nee.

¹⁹ Mari ēē 'upa etee enupa 'gā porogytaramū. Wapyakau 'upa 'gā je'eg are. Wea'aramū etee 'upa wa'yra 'ga ree.

²⁰ A'ere wyra jara 'gā awau ojewya nū.

—Ene te 'ā eneresage oree— 'jau 'gā awau Jarejuwarete 'ga upe, 'ga muorypa akou. —Mama'e esagea te 'ā eremome'u oree. Nitywi 'ga amū ene 'jawe— 'jau 'gā awau akou pe rupi 'ga upe. —Ywagipewara 'gā nemimome'ufer imū etee futat jane esagi— 'jau 'gā ajaupe, awau akou pe rupi.

* 2:6-7 Ymā nitywi taityrete 'ga nugawa rakue. A'eramū 'gā 'ga monou ywya'ri pype.

Jarejuwarete 'ga mogytaaw ipe 'gā oawet

²¹ 'Ga 'ar ire 'gā majepeja etee morowykye'ema magwapa. A'ere 'gā 'ga mojewagukaa 'ga upe. Ywagipewara 'ga je'egawer imū etee futat 'gā 'ga re'roka, Jeju 'jau 'ga upe.

²²⁻²³ 'Ga mojewag ire 'ga ru'wyrā 'ga 'ga rerawau Jerusareg ipe 'ga y ēē retee. 'Ga rerawau esaukaa mainana 'ga upe. Moisesi 'ga 'eawer imū etee futat 'gā 'ga rerawau esaukaa mainana 'ga upe Jarejuwarete 'ga rowase. Ymā te Moisesi 'ga 'i 'gā nupe rakue: “Pēna'yr ypya nipo Janeruwarete 'ga remiayuwa futat. A'eramū pēē 'ga 'ar ire 'ga rerawau esaukaa mainana 'ga upe, Jarejuwarete 'ga rowase”, 'jau 'ga ka'arana kwasiaa inuga 'gā nupe rakue. A'eramū 'gā a'eramū 'ga rerawau esaukaa 'ga upe, Moisesi 'ga je'egawer imū etee futat.

²⁴ Ymā te Moisesi 'ga ka'arana kwasiari inuga ee rakue. “Mukūja ki pykaua peroō mainana 'ga upe iapyaukaa Jarejuwarete 'ga upe pejeja'yrā 'arauwe”, 'jau 'ga 'gā nupe rakue. “Pykau tywe'emamū mukūja wyrā'i rerawau iapyau”, 'jau 'ga ikwasiaa inuga rakue. A'eramū Jeju 'ga ru'wyrā 'ga 'ga rerawau erosou Jarejuwarete 'ga mogytaaw ipe. Mukūja pykaua 'ga erawau erosou ojeupi mainana 'ga upe.

²⁵⁻²⁷ Poje Janeruwarete 'ga 'Agesage oje'ega Simeão 'ga upe:

—Ere ewau esou peu, jemogytaaw ipe— 'jau Janeruwarete 'ga 'ga upe.

A'arauwe 'ga awau osou 'ga mogytaawa pype. Awau osou Jeju 'ga ru'wyrā 'ga resaka 'ga y ēē retee. Jeju 'ga nanē 'ga esaka nū. 'Ga resakawe 'ga 'ga rupia 'ga mua ojywa pe. A'arauwe 'ga oje'ega monou Jarejuwarete 'ga upe. Jerusareg ipewara 'ga futat Simeão 'ga. Esage ma'e 'ga te Jarejuwarete 'ga upe. Jarejuwarete 'ga upe oporogyta ma'e 'ga te poromū, Simeāonomū. Simeão 'ga akou ae katu'okara 'ga rura rapesaka rakue. Janeruwarete 'ga remimura 'ga rapesaka 'ga akou.

²⁸ A'eramū 'ga Jeju 'ga wuja rupia ojywa pe. A'eramū futat 'ga oje'ega monou Jarejuwarete 'ga upe:

²⁹⁻³¹ —Ku'jyp. Ene te 'ā mama'ea ereapo oree rakue.

Ene te 'ā mama'ea jararetea.

Nitywi futari 'ga amū ene 'jawewara.

Ene te 'ā mama'ea ereapo katu katu ore upe rakue.

Ymā te ako Ene'agesage je'egi jee ikue:

“Emanūme'ēwe nipo ae katu'okara 'ga ereesak”, 'jau ako ene jee ikue.

A'efer imū etee je 'ā 'ga resagi.

'Awamū je 'ga resagi tejeau.

A'eramū je 'awamū temanūarūmū.

Aesak je 'ga enu'ama 'awamū.

A'eramū je tewau ene pyri 'awamū.

³² 'Ga nipo 'ara 'jawe futat.

Sā'ā ae najuejue etee mama'ea resaga 'arimū.

Nan tee futat nipo 'ga Jarejuwarete 'ga kwaawukari 'gā nupe, 'ga je'ega mome'wau judeue'ema 'gā nupe.

Jeju 'ga 'ā judeua.

A'eramū nipo tesirūmera 'gā Jeju 'ga ree te judeu 'gā pojeupa ajemogyau.

Eneremiayuwa 'gā pojeupa ajemogyau—

'jau 'ga oje'ega Jarejuwarete 'ga upe u'ama.

³³ Aipo 'ga 'eramū Jeju 'ga jara 'gā oporesagamū Simeão 'ga ree.

—Ma'eramū 'ga aipo 'jau janera'yrā upe 'ū?— 'jau 'gā ajemogyau oporesagamū 'ga ree, 'ga porogyta 'ga 'amamū.

³⁴⁻³⁵ A'ere Simeão 'ga 'jau Jarejuwarete 'ga upe nū:

—Ejejuka esage ki 'ga jara 'gā nee, 'gā nekoramū— 'jau 'ga oje'ega monou Jarejuwarete 'ga upe.

A'eramū futat Jeju 'ga monou 'ga y ēē upe nū. A'eramū futat Simeão 'ga 'jau Mari ēē upe:

—Janeruwarete 'ga 'Agesagea 'ā kunumia amut enee rai'i— 'jau 'ga ēē upe. —A'ere nipo 'ga aranuw ire amumera 'gā niporomutari 'ga ree. 'Ga rerekou tyweaete nipo 'ga rekoramū— 'jau 'ga imome'wau ēē upe. —Aipo resaga nipo wayeteramū enee. Sā'ā ae jepokysia tuwuu raya. Nan futat nipo ayramū enee— 'jau 'ga imome'wau ēē upe u'ama. —'Ga rereko tywearera 'gā nipo Janeruwarete 'ga omomap. Amumera 'gā etee te nipo iporomutat enera'yrā 'ga ree— 'jau 'ga ēē upe imome'wau. —A'eramū futat nipo 'gā aku'iramū ajemogyau 'ga ree iporomutat ma'e 'gā nerekou— 'jau 'ga ēē upe.

A'eramū Simeão 'ga 'jau 'gā nupe:

—Anure te nipo Janeruwarete 'ga janerea'awa kwaap katu katuukari janee. Ae nokwaawa'uweri ajuea'awa. 'Ga tee okwaap katu katuukat aerea'awa ae upe— 'jau 'ga 'gā nupe imome'wau u'ama.

³⁶⁻³⁸ 'Ga porogyta 'ga 'amamū kūjā ēē mū 'ua 'gā nerowyka. Wāiwī ēē 'ua 'gā nerowyka. Jejuī 'ga resakawe wāiwī ēē oje 'ega Jarejuwarete 'ga upe:

—Ku'jyp. Eneresage 'ā oree. Ore katu'okara kiā eremut oree rai'i— 'jau Ana ēē 'ga upe u'ama.

A'eramū ēē 'jau ojepeyriwara 'gā nupe:

—'Awamū nipo 'ā kiā rekoī janee. Janeruwarete kiā remimurera kiā futat u'at rai'i— 'jau ēē ojepeyriwara 'gā nupe imome'wau. —Kiā futat nipo jane katu'ok, Jerusareg ipewaramū— 'jau ēē 'gā nupe.

Ana ēē Jarejuwarete 'ga je'ega mome'wara futat. Ēē ruwa 'ga rera Fanueu. Aseri 'ga juapyrera ēē. Ēē iwāiwī gatu gatu te. Oitētai kwaturu kwara amu'at. Ana ēē omenaat rakue. A'ere sete kwara magwaw ire, ēē mena manūi ēē wi. A'eramū ēē akou Jarejuwarete 'ga mogytaaw ipe. Jarejuwarete 'ga upe oje'ega 'ga muorypa akou.

—Ene te 'ā eneresage oree— 'jau ēē 'ga upe 'ūina. —Nitywi futari kiā amū ene 'jawe. Ene tee futat te 'ā eneresage oree— 'jau ēē oje'ega 'ga upe akou.

Ojemi'ware'ema ēē 'ga upe oje'eg enune. Ojety'ajaga etee te futat akou 'ga upe oje'egaw ipe. Aipo kūjā ēē futat Jejuī 'ga mome'wau ojepeyriwara 'gā nupe.

Ojewya 'gā awau Nasare pe nū

³⁹ Ēē porogytapaw ire Jejuī 'ga jara 'gā 'ga rerawau mainana 'ga upe mukūja pykaua retee. Moisesi 'ga 'eawer imū etee futat 'gā erawau imonou mainana 'ga upe. A'eramū mainana 'ga pykau apyau Jarejuwarete 'ga muorypawamū. A'ere Jose 'ga Mari ēē retee wa'yra 'ga rerawau erojewya Nasare pe nū. Nasare 'jawa amunawa 'upa Garireja wyy pype.

⁴⁰ Peu futat Jejuī 'ga waranupa. 'Ga wujawuja'ia we futat u'akwaakwaawamū. 'Ga Ruwarete 'ga ojejukau 'ga ree.

Jejuī 'ga opytau Jerusareg ipe

⁴¹ Maraka apoawa upe iwaēmauwe Jejuī 'ga jara 'gā awau Jerusareg ipe. Wea'aramū awau ajatykau. "Janeruwarete 'ga 'ā esage janee. Ymā te 'ga 'ā janepyntuna 'gā nenū'ēi Egitu wyy awi rakue", 'jau 'gā ajaupe wea'aramū ee.

Aipoa aejatykaawa rera pasikwa. Kwara 'arauwe 'gā awau ajatykau wea'aramū opyntuna 'gā nenū'ēawer are.

⁴² Tusi kwara Jejuī 'ga imu'ar ire 'ga jara 'gā 'ga rerawau poromū ojeupi. Majepeja etee 'gā morowykye'ema magwapa peu ajatykaaw ipe.

⁴³ Maraka teepaw ire 'gā okwasi'wau awau oje'wyr ipe. A'ere Jejuī 'ga nooi 'gā nupi. A'e pe 'ga pytai 'gā nui. Nokwaawi 'ga jara 'gā 'ga pytaa.

⁴⁴ Ojewyau ipe Mari ēē 'ga resake'ema. A'eramū ēē 'jau ojeupe: "Kūima'efera wā nupi nipo turi re'ā", 'jau etee ēē ojeupe. A'eramū ēē weae'amamū 'ga ree. Awau akou ko'aramuku watau. Awau 'gā peu okaaruwamū pe aje. Okaaruwau ipe 'gā 'ga rekaa.

—Peesak te jera'yra kiā ra'e?— 'jau ēē opytuna 'gā nupe.

—Naani nū i— 'jau etee 'gā ēē upe.

⁴⁵ 'Ga resake'emawe 'ga jara 'gā awau ojewya 'ga rekaa Jerusareg ipe nū.

⁴⁶ Mukūi 'gā osea 'ga rekaa. Imuapyra rupi 'gā awau Jarejuwarete 'ga mogytaaw ipe 'ga rekaa. A'e pe 'gā 'ga resaka. Moromu'jara 'gā nupe 'ga 'ūina oporogyta. A'eramū 'gā a'e pe 'ga renamū, awau owaēma 'ga upe.

⁴⁷ A'eramū moromu'jara 'gā oporesagamū ajemogyau 'ga ree:

—Tete 'ga 'akwaaweteramū, oporogytau 'ū— 'jau 'gā ajaupe ajemogyau.

⁴⁸ 'Ga jara 'gā nanē oporesagamū etee 'ga ree nū. A'eramū 'ga y ēē oje'ega 'ga upe:

—Ma'eramū ene epytau rai'i rā? Erejekarukat oree ki'i— 'jau ēē 'ga upe. —Arajemuaēm ore ene ree ki'i— 'jau 'ga y ēē 'ga upe. —"Oka'jam nipo 'ā rai'i", aru'e ore arakou ene rekaa ki'i— 'jau 'ga y ēē 'ga upe.

⁴⁹ —Ma'eramū pēē je rekaa i? 'Au te je rekoī Tejuwarete 'ga rog ipe tepytau nū i— 'jau 'ga oy ēē upe oje'ega wekat ēē rekoramū.

⁵⁰ A'ere 'gā naeapyoi 'ga je'eg are aipo 'eramū.

⁵¹ A'eramū futat 'gā 'ga rerawau oje'wyr ipe Nasare pe nū. Mari ēē akou wea'aramū wa'yra 'ga ree, 'ga muawer are.

⁵² 'Ga ru'wya 'ga futat 'ga muaranupa 'ga y ēē retee. Jejuī 'ga awau waranupa, 'gā je'eg imū etee futat mama'e apou akou. Wenuw etee futat 'ga 'gā je'ega. U'akwaawa 'ga erawau eruaranupa. A'eramū 'gā najuejue etee futat 'ga futaa. Janeruwarete 'ga nanē 'ga futaa nū.

3

Juā Batista 'ga remimome'ufet

(Mateu 3.1-12; Maku 1.1-8; Juā 1.19-28)

1-2 Amunawe'em ipe Juã 'ga rekoramũ Janeruwarete 'ga oje'ega 'ga upe rakue:

—Ekwap jeje'ega mome'wau 'gã nupe— 'jau Janeruwarete 'ga 'ga upe rakue, Sakari 'ga ra'yra 'ga upe rakue. —Ikwaapare'ema 'gã nupe jeje'ega mome'wau ewau— 'jau 'ga 'ga upe.

Tiperiu 'ga te futat 'wyriarareteramũ 'ũina romanũ 'gã nupe. Kĩsi kwara magwapa 'ũina 'wyriar ymanamũ 'gã nupe. A'eramũ 'ga 'wyriarareteramũ 'ga renauwe futat tesirũmera 'gã 'ga imogyau 'wyria'riramũ 'gã nupe. Põsiu Piratu 'ga 'ũina 'wyriaramũ Judeja ywy pewara 'gã nupe. Erote 'ga 'ũina 'wyriaramũ Garireja ywy pewara 'gã nupe. Erote 'ga rewirera 'ga, Filipe 'ga 'ũina 'wyriaramũ Iturea ywy pewara 'gã nupe. Trakoniki ywy pewara 'gã nupe nanẽ nũ. Lisantias 'ga 'ũina 'wyriaramũ Apireni ywy pewara 'gã nupe. Aipo 'gã jemogyramũ Anasi 'ga akou 'wyriaramũ mainana 'gã nupe Kaifasi 'ga retée.

Aipo 'gã jemogyramũ Janeruwarete 'ga oje'ega Juã 'ga upe:

—Ekwap jeje'ega mome'wau 'gã nupe— 'jau 'ga 'ga upe, Sakari 'ga ra'yra 'ga upe.

³ Ojeupe 'ga porogytapaw ire Juã 'ga awau akou kwe pe. Jotãuy pewara 'gã nupe 'ga awau Jarejuwarete 'ga je'ega mome'wau akou.

—Peru'arasig tee awi pejetywera. Pepoit tãmẽjẽ pejetywer awi. A'eramũ je pejetywer awi pepoir ire je pẽ pymĩau 'y pe. A'eramũ Janeruwarete 'ga petywera moia pẽ nui— 'jau 'ga 'gã nupe.

⁴ Isai 'ga je'eger imũ etee futat Juã 'ga awau imome'wau 'gã nupe nũ. Ymã te 'ã Janeruwarete 'ga je'egi Isai 'ga upe rakue. A'eramũ 'ga ojeupe 'ga 'e kwasiaa inuga ka'aran are 'gã nupe rakue:

“Peu 'ga amũ rekoï wafukaita amunawe'em ipe.

Janeruwarete 'ga porogyta are ae mu'jau, Jarejararete 'ga rura futarukaa 'gã nupe.

'Pe'je Janejararete 'ga rape katu'oka imonou 'ga renune.

Pepyo esage etee futar iki imonou imojewarawe'em.

Wyyaty'ria nanẽ ene imomẽmõumap nũ.

⁵ Wyyperewa ene imatyneema 'jau. A'eramũ akware'emamũ futat pe awau wyy kwara matyneem ire.

Ikwakwara ene imomẽmõu, 'jau 'ga wafukaita.

⁶ A'eramũ nan ene iaporamũ, 'gã najuejue etee futat ae katu'okara 'ga kwaapa,

'A'jea futat Janeruwarete 'ga ae katu'ogi ra'e, e'i nipo 'gã 'gã nupe najuejue etee",

'jau Isai 'ga ikwasiaa Juã 'ga ree inuga 'gã nupe.

⁷ A'eramũ 'gã awau kwaiwete ajatykau Juã 'ga ree numiamũ ojepymĩaukaa 'ga upe numiamũ. “'Y pe 'ga je pymĩ re nipo Janeruwarete 'ga je rerekou tywera'ema jetywer are”, 'jau 'gã ojeupe numiamũ. 'Aere Juã 'ga 'i etee 'gã nupe:

—Naani. Pejetywer awi ra'ne pepoit. 'Aere te je pẽ pymĩ— 'ga 'i etee 'gã nupe ojee 'gã jatykaramũ.

A'eramũ 'ga 'jau 'gã nupe nũ:

—Janeruwarete 'ga imara'ne pẽ nee. Petywer are 'ga mara'neramũ pẽ nee. A'eramũ nipo 'ga pẽ nerekou tyweaete petywer are. “Ene'me awi”, pe'je awi jee. 'A'jea futat nipo 'ga pẽ nerekou tyweretei. “Nore rereko tywera'uweri 'ga”, pe'je awi. 'A'jea futat 'ga pẽ nerekou tyweri nipo— 'jau Juã 'ga 'gã nupe.

⁸ —Pe'je pejewau mama'e esage mũ apou pejetywer awi pejepoira resaukaawamũ kũ— 'jau 'ga oje'ega moywrafena 'gã nupe.

—“O'meramũ 'ga 'i”, pe'je kasi jee ne. “Je 'ã Abraão 'ga juapyrera te. A'eramũ 'ga a'eramũ je rerekou tywera'em”, pe'je kasi ne. Janeruwarete 'ga ifutar ire amunipo 'ã 'ga ita mu'jagi Abraão 'ga juapyreramũ.

⁹ Sã'ã ae 'ywa i'a a'wyre'ema iypy mosoga. A'eramũ erawau imonou imomoa tata pe. Nan tee futat 'ga pẽ nerekoi pejetywer awi pepoire'emamũ— 'jau 'ga 'gã nupe.

¹⁰ A'eramũ 'gã 'jau Juã 'ga upe:

—Ma'ja ajee ore aruapo a'eramũ orotywer awi oropoiawamũ 'ũ?— 'jau 'gã 'ga upe.

—Au'je ki pejejee etee pejejea'ar ire. Najuejue etee ki 'awamũ pejejuka esage pejejee.

¹¹ Taity kwaiwete ma'eramũ pemono ape taitye'ema 'gã nupe. Emi'uram kwaiwete ma'eramũ pẽẽ mama'e monou emi'urame'ema 'gã nupe nũ— 'jau 'ga 'gã nupe, aipoa ojeupe 'gã 'eramũ.

¹² A'eramũ 'wyriara upe ka'aranũ pyykara 'gã oje'ega Juã 'ga upe nũ:

—Ma'ja ajee ore aruapo orojee, orotywer awi oropoiawamũ nũ'ũ?— 'jau 'gã 'ga upe.

¹³ A'eramũ Juã 'ga 'jau ka'aranũ pyykara 'gã nupe:

—Au'je ki ka'aranũ muruu re 'gã nui. 'Wyriara je'eg imũ etee futar iki ka'aranũia pepyyk pejekou 'ga upe— 'jau 'ga 'gã nupe, aipo ojeupe 'gã 'eramũ.

¹⁴ A'eramũ jefaruu 'gã 'jau 'ga upe nũ:

—Ore nũ'ũ? Ma'ja ajee ore aruapo orotywer awi oropoiawamũ 'ũ?— 'jau 'gã 'ga upe.

A'eramũ Juã 'ga 'jau jefaruu 'gã nupe:

—“Ka'aranūia tejeupe imure'emamū je ene nupāi ne”, ere kasi 'awamū 'gā nupe ne, 'gā je'ēwu'jage'ema ne. Mama'ea a'jea etee futat imome'wau ekou. “Temepy'i'ia je nafutari”, 'jawe'em pēē pejekou. “Temepyyua te je afutat”, 'jawe'em futat pejekou— 'jau 'ga jefaruu upe. —Pejeporowyky repy are etee futat pēnekōēai pejekou— 'jau 'ga 'gā nupe. “Topoit tetywer awi 'jau” 'jara 'gā jefaruu 'gā nupe 'ga 'jau poromū.

¹⁵ Aipo 'gā nupe Juā 'ga 'eramū 'gā amū 'upa 'ga porogyta renupa.

—Janeruwarete 'ga remimurera 'ga nipo kweramū ki sa— 'jau 'gā ajaupe 'upa. —'Ga futat nipo ae katu'okara— 'jau 'gā 'upa ajaupe.

¹⁶ Aipo 'gā 'eramū Juā 'ga enupa. A'eramū 'ga oje'ega 'gā nupe:

—Naani. Naae katu'okara rūi je. Naje rūi 'ga remimurera— 'jau 'ga 'gā nupe, aipo ojeupe 'gā 'eramū. —Naani. Janeruwarete 'ga remimura 'ga 'ā kūima'eteetea te— 'jau 'ga imome'wau 'gā nupe. —Je naani. Je akotee'i'ma'ea te. Apoat te je 'ga tekou— 'jau 'ga 'gā nupe u'ama. —Je 'ā a'jea futat apymī pēē 'y pe tekou. A'ere je rewiri 'ut ma'e 'ga te Jarejuwarete 'ga 'Agesage muri pē nupe— 'jau 'ga 'gā nupe imome'wau. —'Ga te amut 'Uwarete 'ga 'Agesagea werowiaaramū pē nupe. Werowiare'ema 'gā nupe te ajee 'ga namuri futari U'aga. Wereco tywerete futat nipo 'ga 'gā.

¹⁷ Sā'ā ae juowuuran ape 'oga. A'eramū 'ā ae a'yi esage imū 'jāu jui. A'eramū 'ā ae iapefera monou tata pe. Nan tee futat nipo 'ga werowiare'ema 'gā monou mama'eukwaawa rapyaw ipe. Aipoa tata nowewi futari. Nitywi futari imowepara 'ga amū— 'jau 'ga 'gā nupe imome'wau.

¹⁸ A'eramū Juā 'ga 'jau 'gā nupe nū.

—Peru'arasig tee awi pejetywera. Pepoit pejetywer awi. Pejetywer awi pēpoiweramū Janeruwarete 'ga imoia pē nui— 'jau 'ga 'gā nupe u'ama.

¹⁹⁻²² A'eramū 'gā a'eramū kwakwai'i opoia otywer awi. A'eramū Juā 'ga otywer awi 'gā poiaramū 'gā pymīāu 'y pe.

'Ype Jejuī 'ga pymīawet

(Mateu 3.13-17; Maku 1.9-11; Juā 1.31-34)

'Gā pymīmaw ire Jejuī 'ga 'ua 'gā pymīaw ipe owaēma 'ga upe. A'eramū Juā 'ga Jejuī 'ga monou ipymīāu 'y pe.

Juā 'ga opymī re Jejuī 'ga oje'ega monou u'ama 'Uwarete 'ga upe. Ojeupe 'ga je'ega monoramū Janeruwarete 'ga U'agesage mua 'ga upe. Pykau 'jawe 'ua ojyja 'ga jasi'ywarimū wapyka. Ywag awi 'ga upe U'agesage jywamū Janeruwarete 'ga oje'ega Jejuī 'ga upe.

—Ene te 'ā Jera'yraretea. Ene 'ā jeremifutararetea. Ene 'ā je muorypararetea ejee— 'jau 'ga wa'yra 'ga upe oje'ega mua.

Anure Erote 'ga Juā 'ga munewukaa 'gā nupe. Erote 'ga 'wyriaramū peuwara 'gā nupe. A'eramū 'ga 'ga munewukaa. Erote 'ga wewirera 'ga remireko ēē pojekau 'ga wi, Erotiasi ēē pojekau 'ga wi. A'eramū Juā 'ga 'jau 'ga upe:

—Nia'wyri nanuara. Ejewirera remirekoa 'ā erepojeka 'ga wi. Nenea'wyri ene ra'e. Kwaiwete enetywera ra'e— 'jau Juā 'ga 'ga upe.

A'eramū 'ga a'eramū Erote 'ga mamara'neukaa ojee. A'eramū 'ga Juā 'ga munewukaa 'gā nupe.

Jejuī 'ga pytunet

(Mateu 1.1-17)

²³ Trīta kwara magwaw ire Jejuī 'ga awau 'gā mu'jau 'Uwarete 'ga porogyta are.

Jose 'ga Jejuī 'ga ru'wya.

Eli 'ga Jose 'ga ruwa.

²⁴ Matate 'ga Eli 'ga ruwa.

Levi 'ga Matate 'ga ruwa.

Meki 'ga Levi 'ga ruwa.

Janai 'ga Meki 'ga ruwa.

Jose 'ga Janai 'ga ruwa.

²⁵ Matatiasi 'ga Jose 'ga ruwa.

Amosi 'ga Matatiasi 'ga ruwa.

Naum 'ga Amosi 'ga ruwa.

Esi 'ga Naum 'ga ruwa.

Nagai 'ga Esi 'ga ruwa.

²⁶ Maate 'ga Nagai 'ga ruwa.

Matatiasi 'ga Maate 'ga ruwa.

Semei 'ga Matatiasi 'ga ruwa.

Jose 'ga Semei 'ga ruwa.

Jota 'ga Jose 'ga ruwa.

²⁷Joanā 'ga Jota 'ga ruwa.

Resa 'ga Joanā 'ga ruwa.

Soropapeu 'ga Resa 'ga ruwa.

Saratieu 'ga Soropapeu 'ga ruwa.

Neri 'ga Saratieu 'ga ruwa.

²⁸Meki 'ga Neri 'ga ruwa.

Ati 'ga Meki 'ga ruwa.

Kosā 'ga Ati 'ga ruwa.

Ematāu 'ga Kosā 'ga ruwa.

Eri 'ga Ematāu 'ga ruwa.

²⁹Josue 'ga Eri 'ga ruwa.

Eriese 'ga Josue 'ga ruwa.

Jorim 'ga Eriese 'ga ruwa.

Matate 'ga Jorim 'ga ruwa.

Levi 'ga Matate 'ga ruwa.

³⁰Simeão 'ga Levi 'ga ruwa.

Juda 'ga Simeão 'ga ruwa.

Jose 'ga Juda 'ga ruwa.

Jonā 'ga Jose 'ga ruwa.

Eriakī 'ga Jonā 'ga ruwa.

³¹Merea 'ga Eriakī 'ga ruwa.

Mena 'ga Merea 'ga ruwa.

Matata 'ga Mena 'ga ruwa.

Natā 'ga Matata 'ga ruwa.

Davi 'ga Natā 'ga ruwa.

³²Jese 'ga Davi 'ga ruwa.

Opete 'ga Jese 'ga ruwa.

Poasi 'ga Opete 'ga ruwa.

Sara 'ga Poasi 'ga ruwa.

Nasom 'ga Sara 'ga ruwa.

³³Aminatape 'ga Nasom 'ga ruwa.

Amin 'ga Aminatape 'ga ruwa.

Arni 'ga Amin 'ga ruwa.

Esrom 'ga Arni 'ga ruwa.

Peres 'ga Esrom 'ga ruwa.

Juda 'ga Peres 'ga ruwa.

³⁴Jako 'ga Juda 'ga ruwa.

Isaki 'ga Jako 'ga ruwa.

Abraão 'ga Isaki 'ga ruwa.

Tera 'ga Abraão 'ga ruwa.

Nako 'ga Tera 'ga ruwa.

³⁵Seruki 'ga Nako 'ga ruwa.

Ragau 'ga Seruki 'ga ruwa.

Faleki 'ga Ragau 'ga ruwa.

Eperi 'ga Faleki 'ga ruwa.

Sara 'ga Eperi 'ga ruwa.

³⁶Kainā 'ga Sara 'ga ruwa.

Arfasate 'ga Kainā 'ga ruwa.

Sem 'ga Arfasate 'ga ruwa.

Nue 'ga Sem 'ga ruwa.

Lameki 'ga Nue 'ga ruwa.

³⁷Metusarem 'ga Lameki 'ga ruwa.

Enoki 'ga Metusarem 'ga ruwa.

Jarete 'ga Enoki 'ga ruwa.

Maleleu 'ga Jarete 'ga ruwa.

Kainā 'ga Maleleu 'ga ruwa.

³⁸Enosi 'ga Kainā 'ga ruwa.

Sete 'ga Enosi 'ga ruwa.

Atāu 'ga Sete 'ga ruwa.

Janeruwarete 'ga Atāu 'ga ruwa. Atāu 'ga ae ypy ypya. Janeruwarete 'ga remiapo ypyfera
 'ga. A'eramū 'ga a'eramū Atāu 'ga ruwa Jarejuwaretea futat.

4

Amunawe'em ipe Jeju 'ga rerawaawet

(Mateu 4.1-11; Maku 1.12-13)

¹ 'Y pe 'ga jepymi re Janeruwarete 'ga 'Agesagea Jeju 'ga rerawau amunawe'em ipe 'ga rerekou.

² Kwarëta 'ara 'ga imagwapa akou ojemi'ware'ema. A'eramü 'ga opy'arayparamü akou.

A'e pe 'ga rekwaw ipe mama'eukwaawa 'wyrriara 'ua 'ga resaka. "Taesak 'ga poira 'uwa 'ga rerowiari awi 'jau kwy", 'jau ojeupe etee futat. "Teje'ega taenuwukat esaka 'ga upe 'jau kwy", 'jau 'üina ojeupe etee futat numiamü.

³ A'eramü oje'ega Jeju 'ga upe:

—"Ku'jywa 'ga ra'ya je", ere 'ä. A'eramü ene ita mu'jaga ejemi'uramamü— 'jau mama'eukwaawa 'wyrriara Jeju 'ga upe.

⁴ Aipo ojeupe 'eramü Jeju 'ga 'jau jupe:

—Naani. Naene rüi je arowiat tekou. Tejuwarete 'ga etee te je arowiat tekou. Jeruwarete 'ga e'i oree: "Nawemi'uram are tee rüi ae rekol", 'jau oree jepi— 'jau 'ga jupe. —Oreruwarete 'ga te 'ä ae mogoara— 'jau etee 'ga jupe.

⁵ A'ere mama'eukwaawa 'wyrriara 'ga rerawau 'ga roeroeupia wwytyr apyte'rarimü nü. Peu 'ga rerowaem ire mama'eukwaawa 'wyrriara wwy resaukaa 'ga upe. Mama'ea ipype ajemogy ma'e reewe futat esaukaapap 'ga upe. Kamësiete futat wwy pypewara resaukaa 'ga upe.

⁶⁻⁷ —Ejuwarete 'ga rerowiari awi ene poir ire 'agera tomonopap enee 'jau— 'jau mama'eukwaawa 'wyrriara Jeju 'ga upe. —Tejerowiarämü tomonopap enee 'jau— 'jau 'ga upe oporogyta, mama'e resaukaa 'ga upe. —Ymä te ako 'ga 'agera muri jee ikue. A'eramü je ene tejerowiarämü 'agera monoupap enee nü. A'eramü je ene mogou 'wyrriarareteramü 'agera mama'upe. A'eramü ene e'üina jeje'eg imü etee futat 'wyrriaramü 'gä nupe. Je te omono enee temuoryw ire— 'jau mama'eukwaawa 'wyrriara Jeju 'ga upe.

⁸ A'eramü aipo ojeupe 'eramü Jeju 'ga 'jau jupe:

—Naani. Ymä Jeruwarete 'ga oje'ega kwasiarukari ka'aran are 'ga amü upe rakue. "Je te 'ä Pëjararetea. Je te 'ä Pënuwaretea. A'eramü ki pëë jeje'ega etee enupa pejemogyau. Je te ki je muoryp pejepe pejemogyau", 'jau 'ga ikwasiarukaa 'ga amü upe rakue— 'jau etee 'ga jupe.

⁹ A'ea wwyty'rar awi mama'eukwaawa 'wyrriara Jeju 'ga rerawau Jerusareg ipe nü. Janeruwarete 'ga mogyaawa apyte'rarimü 'ga rerawau eroeupia. Ywatewate 'ga mogya-
taawa. A'eramü 'jau 'ga upe nü:

—Ku'jywa 'ga ra'ya 'ä ene. A'eramü ene ewau epoa 'aw awi. Nerepena'uweri ewau. Jaruete ereo e'aa.

¹⁰⁻¹¹ Eneruwa 'ga futat oje'ega okwasiarukat pë nee rakue:

"Tejepyriwara 'gä je omono enee.

A'eramü 'gä ojejukau ene ree. A'eramü ene ejemokanäje'ema ewau e'aa.

Epya miamü ene imokanäje'ema ita are",

'jau ako Ku'jywa 'ga ka'arana kwasiarukaa wa'ya 'ga ree ikue— 'jau mama'eukwaawa 'wyrriara Jeju 'ga upe.

"Omorytee pa je 'ga kwy", 'jau ojeupe numiamü.

¹² A'ere Jeju 'ga 'i etee jupe:

—A'jea futat aipo 'ea numiamü. A'ere je narowiari futari eneje'ega. Jeruwarete 'ga ka'arana okwasiarukat 'ga amü upe nanë nü: "A'jea futat sipo ajee 'ga jejukai je ree, pe'je kasi jee ne, je rerowiare'ema ne", e'i 'ga ikwasiarukaa ajepeja 'ga upe rakue— 'jau 'ga jupe. —A'eramü je eneje'ega mojerowiare'ema— 'jau Jeju 'ga mama'eukwaawa 'wyrriara upe.

¹³ A'eramü mama'eukwaawa 'wyrriara awau Jeju 'ga wi. "Anurenure'i nipo tomorytee 'ga 'jau kwy", 'jau awau ojeupe etee futat.

Jeju 'ga porowyky ppyrua

(Mateu 4.12-17; Maku 1.14-15)

¹⁴⁻¹⁵ Mama'eukwaawa 'wyrriara ojewi io re Jeju 'ga ojewya awau Garireja wwy pe nü. 'Ga Ruwarete 'ga 'Agesagea 'ga rerekou. A'eramü 'ga a'eramü awau kwe pe watau akou. Judeu 'gä jatykaaw ipe 'ga awau akou 'gä mu'jau 'Uwarete 'ga je'eg are. A'eramü 'ga renuparera 'gä 'jau ajaupe:

—Ae mu'e katuram 'ga ra'e nü'ü— 'jau 'gä ajaupe. —'Ga porogyta are pa 'ä jeporenuwiw-
eramü nü. Esage te 'ä 'ga porogyta ra'e a'i küi— 'jau 'gä ajaupe.

A'eramü 'gä 'ga rera mokwasi'wau.

—Esage 'ga porogyta ra'e— 'jau 'gä 'ga rera mokwasi'wau amunawa pype.

Nasare pe Jeju'i 'ga oawet
(*Mateu 13.53-58; Maku 6.1-6*)

¹⁶⁻¹⁷ A'ere Jeju'i 'ga awau ojewya oje 'wyr ipe nū, Nasare pe nū. Waranupawer ipe 'ga awau ojewya nū opytuna 'gā nesaka. Morowykye 'ema rupi 'ga awau osou judeu 'gā jatykaaw ipe wapyka oporogytau 'gā nupe. Wemiapo etee futat 'ga iapou 'gā nupe. 'Gā jatykapaw ire 'ga awau afu'ama 'gā mogytaawa rowase katy. A'eramū ajatykaawa raarana 'ga ka'arana monou 'ga po pe. A'ere 'ga ipypekau esaka. A'eramū 'ga Isai 'ga remikwasiarer ipe ipypekau esaka. Isai 'ga Janeruwarete 'ga je'ega mome'warera rakue. A'eramū 'ga oje'ega Isai 'ga upe rakue. A'eramū Isai 'ga ojeupe 'ga je'egawera kwasiaa inuga ka'aran are. Aipoa ka'arana kwasiaripywera Jeju'i 'ga imogytau 'gā nupe:

¹⁸ “Janeruwarete 'ga Agesagea je rereko”,

'jau 'ga u'ama imogytau.

“‘Gā 'ā je mono morogyta esage mome'waramū itywerete ma'e 'gā nupe.

'Gā 'ā je mono moromunepawa pypewara 'gā mū'jāukaa jee.

'Gā 'ā je mono eae'ema 'gā mamā'ēukaa.

'Gā 'ā je mono 'gā nemirereko tywerete 'gā mū'jāukaa 'gā nui jee.

¹⁹ 'Gā futat 'ā je mono, “Awamū Janeruwarete 'ga ae katu'ogi' 'e mome'waukaa jee 'gā nupe”,

'jau 'ga imogytau u'ama 'gā nupe.

²⁰ Imogytapaw ire 'ga ka'arana mamana nū. A'ere 'ga ka'arana monou ojeupe imuarera 'ga po pe nū. 'Gā po pe imono re 'ga awau wapyka 'ūina.

A'eramū pewara 'gā ajemogyau oporesagamū 'ga ree.

—Aw'yi are te Isai 'ga ka'arana kwasiari rakue? “Je ree 'ga ikwasiasi inuga rakue”, e'i sipo kwe 'ga 'i?— 'jau pewara 'gā ajaupe.

²¹ A'eramū Jeju'i 'ga 'jau 'gā nupe:

—'Gā remikwasiarer imū etee futat je ruri— 'jau 'ga 'ūina wapyka oporogytau 'gā nupe.

²² A'eramū 'gā 'jau ajaupe:

—Kuu. Ae mu'e katuram 'ga ra'e nū'ū. Jane 'jawewara 'ga agawewi 'ā. A'etea 'ga morogyta esagea omome' u janee— 'jau 'gā aipo 'ga 'e 'ga renamū.

A'eramū 'gā amū 'jau:

—NaJose 'ga ra'yra 'ga rūi nipo ki sa? Maran ajee 'ga ae mu'ei aipo 'jau ki 'ei— 'jau amumera 'gā ajaupe.

²³ A'eramū Jeju'i 'ga 'jau 'gā nupe:

—“A'ere miapoe'ema 'awamū eapo amū ore”, pe'je 'ā jee. “Kafanaū pe 'ā ereapo futat. A'eramū ene 'au nanē iapou nū”, pe'je 'ā jee— 'jau 'ga 'gā nupe. —“E'aranupawer ipe eapo ore”, pe'je 'ā jee. “Ojero'wu ma'e 'gā 'ā erekatu'ok rai'i. A'ere 'awamū ene ejete'e futat erejekatu'ok”, 'jau nipo pēē jee. “Kafanaū pe 'ā ojero'wu ma'e 'gā erekatu'ok rai'i. A'eramū ene 'awamū e'aranupawer ipe taetu nanuara apou ore. Ore 'ā enepytuna futat. A'eramū ene epytunamū taetu ore katu'oka. Taruesak orokatu'oga 'jau”, 'jau nipo pēē jee— 'jau 'ga 'gā nupe.

²⁴—Janeruwarete 'ga je'ega mome'wara 'ga amū oo kwe pe 'ga je'ega mome'wau. A'eramū kwe pewara 'gā jēmī 'ga je'ega rerowiaa. A'ere 'ga 'wyr ipewara 'gā jēmī nuerowiari 'ga. 'Gā pytuna 'gā miamū 'ga rerowiare'ema ajemogyau— 'jau Jeju'i 'ga oje'wyr ipewara 'gā nupe. —Nan tee futat kwe pewara 'gā je rerowiari. A'ere je'wyr ipewaramū jēmī naje rerowiari pejepe— 'jau 'ga 'gā nupe.

²⁵⁻²⁶—Ymā te 'ā Janeruwarete 'ga Eliasi 'ga monoi ajepēja amunaw ipe rakue, Sarepata pe rakue. Sidoma wyw pe aipo 'upa. Peu futat 'ga 'ga monou kūjā ēē upe rakue, imen manū ma'efera ēē upe rakue. NaIsraeu juapyrera rūi ēē. A'etea Janeruwarete 'ga Eliasi 'ga monoukat imoporogytaukaa ēē upe. “Ene ejot ekou jeremi'urama rerua jee”, 'jau 'gā ēē upe. Muapyra kwara u'aa amana okyre'ema. A'eramū 'gā nemi'urama opapa 'gā nui. A'eramū 'gā a'eramū ty'ara rerajemogyau— 'jau 'ga imome'wau oje'pyriwara 'gā nupe. —Kwaiwete agawewi futat judeu 'gā jemogyi peu ty'ara rerajemogyi. A'etea Janeruwarete 'ga ēē upe etee futat mama'e nomateepawukari.

²⁷ Nānēwējēmī futat Janeruwarete 'ga judeue'ema 'ga amū katu'oka 'ga pito'om awi nū, Naamā 'ga katu'oka 'ga pito'om awi nū. Kwaiwete agawewi futat ipito'om ma'e 'gā Israeu juapyrera 'gā jemogyi peu. A'etea 'ga judeue'ema 'ga etee okatu'ok 'gā nui. Siria wyw pewara 'ga 'ga ikatu'ogukaa Eliseu 'ga upe— 'jau 'ga 'gā nupe imome'wau.

²⁸—Najudeu 'gā etee rūi 'ga opoat— 'jau Jeju'i 'ga 'gā nupe.

A'e renupawe 'gā amara'neramū Jeju'i 'ga ree.

²⁹ A'eramū 'gā 'ga rerawau wywytyra rupi 'ga roerojeupia 'ga rerawau iapyte'rarimū. 'Gā rerawau 'gā iāāpyraya 'arimū 'ga rerawau.

—Simono 'ga imomoa ijukau— 'jau 'gā ajaupe numiamū.

³⁰ A'ere 'ga kwawi 'gā pyterimū awau kwe pe 'gā nui.

*Mama'eukwaawa rerekwat
(Maku 1.21-28)*

³¹ Ajepeja 'gã 'wyrarete pe Jejuu 'ga awau, Kafanaü pe. Garireja ywy pype Kafanaü 'jawa amunawa 'upa. A'e pe 'ga awau 'gã mu'jau Jarejuwarete 'ga ree. Morowykye'ema rupi judeu 'gã mu'jau akou 'ga ree.

³² 'Wyrirara 'jawe 'ga oporogytau 'gã nupe. A'eramü 'ga 'gã moporesaka etee ojee.
—Kuu. 'Ga pa'e aipo e'i ae mu'jau ra'e nü— 'jau 'gã ajaupe. —NaMoisesi 'ga remikwasiarer are moromu'jara 'gã 'jawe rüi 'ga porogytai. Moisesi 'ga 'eawer are moromu'jara 'gã Moisesi 'ga 'eawer imü etee futat 'gã ae mu'ei— 'jau 'gã ajaupe. —A'ere Jejuu 'ga nanarüi. U'eawer imü etee futat 'ga jane mueapyoi ee— 'jau 'gã ajaupe, oporesagamü 'ga ree.

'Ga porogyta renupa etee ajemogyau, ojeupe 'ga 'eramü. Judeu 'gã jatykaawa pype 'ga oporogytau 'gã nupe.

³³ A'e pype mama'eukwaawa rerekwara 'ga amü akou. A'eramü 'ga muafukaita:

³⁴ —Jejuu! Nasare pe waranup ma'eramü je 'i ene upe: Ma'ja are te ereko ki sa?— 'jau mama'eukwaawa Jejuu 'ga upe. —Ore momapa te erejot ra'e? Akwaap je ene. Jane 'arimüwara 'ga remimurera te 'ã ene— 'jau mama'eukwaawa Jejuu 'ga upe.

³⁵ A'eramü 'ga 'jau jupe:

—Epije ene ekou. Ere ejepe'au 'ga wi— 'jau Jejuu 'ga jupe.

A'eramü 'ga pirewara 'ga wi uëmawamü 'ga moywyrupäu. A'ere namuayrüi 'ga uëma 'ga wi.

³⁶ A'eramü esakarera 'gã opiryjamü 'ga pirewara pe'aramü. A'eramü taetu 'gã oporesagamü 'ga ree. A'eramü 'gã 'jau ajaupe:

—Kuu. Opäjê mü futat ako 'ga mama'eukwaawa pe'ai 'ga wi ko— 'jau 'gã ajaupe. —Mama'eukwaawa miamü 'ã päjêa. Jejuu 'ga taetu päjêrete. Sã'ã 'ga mama'eukwaawa pe'aa 'ga wi— 'jau 'gã ajaupe.

³⁷ Mama'eukwaawa wejue 'ga imonou 'ga wi. A'eramü taetu Jejuu 'ga rera okwasi'wau Garireja ywy pype kamësiëte, amunawa moymoyka.

*Pedro 'ga rojo ëë
(Mateu 8.14-17; Maku 1.29-39)*

³⁸ Judeu 'gã jatykaaw awi uëm ire Jejuu 'ga awau Simão 'ga rog ipe. Simão 'ga rojo ëë oro'yramü 'upa. A'eramü 'gã 'jau Jejuu 'ga upe:

—Waiwa ëë iro'y 'upa. Ejot ëë resaka ëë ro'y awi— 'jau 'gã 'ga upe.

³⁹ A'erauwe Jejuu 'ga awau ëë resaka. A'eramü 'ga 'jau ëë ro'y upe:

—Ejepe'a ëë wi— 'jau 'ga ëë ro'y upe.

A'erauwe ëë ro'ya oia ëë wi. A'erauwe ëë afu'ama awau mama'e apou 'gã nupe 'gã mojemü'waa.

⁴⁰ Kaaruwamü peuwara 'gã ojero'wu ma'e 'gã nerua esaukaa Jejuu 'ga upe. Opoa etee agawewi 'ga imonou 'gã 'arimü. A'etea ojero'wu ma'e 'gã ojekatu'okapap.

⁴¹ Kwaiwete 'gã nui 'ga mama'eukwaawa pe'au.

—Pejepe'a 'gã nui— 'jau Jejuu 'ga 'gã pirewara upe.

A'eramü mama'eukwaawa awau wafukaita:

—Jane 'arimüwara 'ga ra'yra te 'ã ene— 'jau wafukaita 'ga upe. —Orokwaaw ore ene— 'jau mama'eukwaawa wafukaita 'ga upe.

Aipo ojeupe 'eramü 'ga 'jau mama'eukwaawa upe:

—Peafukai awi pejewau— 'jau 'ga jupe.

⁴² Ai'iwë, ppytu'ninauwe, Jejuu 'ga afu'ama awau awotywe'eme oje'ega monou 'Uwarete 'ga upe. A'ere Kafanaü pewara 'gã nuri 'ga rekaa. 'Ua owaëma 'ga upe. A'eramü 'gã 'jau 'ga upe:

—Ereo awi. Taruenup eneporogyta 'jau— 'jau 'gã 'ga upe numiamü.

⁴³ A'ere 'ga 'i etee 'gã nupe:

—Naani. Peuwara amunaw ipe je oi nü— 'ga 'i etee 'gã nupe, "Epyta" ojeupe 'gã 'eramü. —Janeruwarete 'ga je mono kwe pe nü. "Kwe pe ekwap je mome'wau 'gã nupe", e'i 'ga jee. "Pejetywer awi pëpöireramü Janeruwarete 'ga imoiri pë nui, pë mogyau wemiayuwamü", ta'e 'gã nupe 'jau— 'jau 'ga 'gã nupe.

⁴⁴ Najuejue etee futat 'ga awau akou imome'wau 'gã nupe. Judeu 'gã jatykaaw ipe etee te futat 'ga awau akou imome'wau. Amunawa moyka imome'wau akou.

—Awamü Janeruwarete 'ga 'wyrirareteramü janee. Pejetywer awi pepoiramü 'ga pë mogyi wemiayuwamü— 'jau 'ga awau akou imome'wau 'gã nupe.

5

Jejuí 'ga remimu'e ypy 'gã

(Mateu 4.18-22; Maku 1.16-20)

¹ Genesare ypia reme'y'warimũ Jejuí 'ga 'amamũ kwaiwete 'gã 'ua ajatykau 'ga ree, 'ga porogyta renupa. Ojopyppypyka 'gã 'ua.

² A'eramũ Jejuí 'ga yaruu resaka. Mukũ yaruua 'ua ojekoka 'upa. Yara jara 'gã ù'jãumap yar awi. Taityuua 'gã ipireita 'upa.

³ A'eramũ Jejuí 'ga awau u'aa Simão 'ga yara pype.

—Ty pyteripe'i eyara emono jee— 'jau 'ga Simão 'ga upe.

A'erauwe 'ga imonou ty pyteripe'i 'ga upe. A'erauwe Jejuí 'ga wapyka oporogytau 'yisiga pypewara 'gã nupe 'gã mu'jau Jarejuwarete 'ga je'eg are.

⁴ Oporogytapaw ire 'ga 'jau Simão 'ga upe:

—Tyyu'i pype eyara emono— 'jau Jejuí 'ga 'ga upe. —A'eramũ ene eirũ 'gã netee taityuu imomoa esaka— 'jau Jejuí 'ga 'ga upe.

⁵ —Aruetyg ore koypytunamuku arakou ko nũ'ũ. A'ere nojegagi'i amũ ore ko nũ'ũ. A'ere 'ã ene te ere ore. A'eramũ ore imomoa esaka nũ'ũ— 'jau Simão 'ga 'ga upe. —Ko ajee ore imonoi esaka nũ.

⁶ Etyg ypyrauwe ipira ojejaga taityuu pype 'gã nupe imatyneema. Kwaiwete ipira ojejaga ipype 'gã nupe. A'eramũ imonoroka werewi. Omonorok ja'wyja'wy futat. Ipira rarefe'ria te.

⁷ A'eramũ 'gã ojopeotyka opytuna 'gã nupe:

—Pejot imatãu ore pyri 'wei. Kwaiwete ipiraa. Norefuakari ore ee— 'jau 'ga 'gã nupe.

A'erauwe 'gã 'ua 'gã nepejãna. 'Ua owaẽma 'gã nupe. A'eramũ 'gã imatãu 'gã pyri, mukũja yaruu matyneema ipira pyu. Ipira poyja yara motypywka werewi 'gã nupe.

⁸⁻⁹ Ipiraa ojeupe i'aramũ 'gã ajemogymogyau etee 'gã kyjea 'gã nerekou. Ipiraa 'gã moporesaka etee ojee.

—Kuu. Kwaiwete ipiraa. Awỹja te koromũ ako nũ'ũ? Ae rekoetea nuapoa'uweri nanuara. Ku'jywa 'ga te nipo 'ã ako nũ'ũ— 'jau 'gã ajaupe.

A'eramũ Simão Pedro 'ga awau wenupy'ãu wapyka Jejuí 'ga rowase.

—Eyry'gi je wi. Jetywet noko je jepi 'ja. Ene te 'ã eneresage. A'eramũ ene je pyri epytawe'em— 'jau Pedro 'ga Jejuí 'ga upe.

¹⁰ Tiago 'ga, Juã 'ga. Mĩmera 'gã Pedro 'ga porowyky irũa. 'Gã nuwa rera Sepeteu, Tiago 'ga ruwa, Juã 'ga retee. Mĩmera 'gã ajemogyau oporesagamũ ipira are. A'eramũ Jejuí 'ga 'jau Simão 'ga upe, 'ga poirũ 'gã neewe:

—Pẽporesag awi ee. 'Awamuete je 'ã pẽ mu'ei. Naipira rewara rũi pẽẽ 'awamũ. Jarejuwarete 'ga je'ega mome'wara te pẽẽ 'awamũ— 'jau Jejuí 'ga 'gã nupe.

¹¹ A'erauwe 'gã yaruu mojekoka imonou 'yisig are. Peu etee futat 'gã yaruu rejaa inuga taityuu reewe. A'eramũ 'gã awau Jejuí 'ga rupi.

Ipito'om ma'e 'ga

(Mateu 8.1-4; Maku 1.40-45)

¹² Amunawaretea mũ pype Jejuí 'ga rekoramũ, ipito'om ma'e 'ga amũ 'ua owaẽma 'ga upe. Ymã te ipito'om ma'e 'gã nokoi futari opytuna 'gã pype rakue. Okyje 'gã ipito'om ma'e 'gã nui. 'Gã pito'oma pyyg awi 'gã kyjei. A'eramũ 'gã muku 'gã mĩina ojewi. A'eramũ aipo ipito'om ma'e 'ga Jejuí 'ga resakawe awau ojenuga 'upa ywyu 'ga rowase.

—Je resag ape, ki Ku'jyp. "Jejuí 'ga ae katu'okara", e'i 'gã jee. A'eramũ je tejua tejesaukaa enee. Je ree ejemuaẽmimeramũ je mokã'ẽ ape— 'jau 'ga 'ga upe.

¹³ Aipo ojeupe 'erauwe Jejuí 'ga opo monou 'ga 'arimũ:

—Ko ajee je ene mokã'ẽi 'wei— 'jau Jejuí 'ga 'ga upe.

Oje'arimũ 'ga po mono ppyrauwe okã'jãu 'ga pito'oma 'ga wi. A'eramũ futat 'ga pira ojekatu'oka.

¹⁴ A'erauwe Jejuí 'ga 'jau 'ga upe:

—Eremome'u kasi emokã'ẽawera tekotee 'gã nupe ne. Ere ewau ejesaukaa mainana 'ga upe ra'ne. "Je resag ape. Jepito'oma okã'ẽ je wi", ere ewau 'ga upe. "A'jea futat ra'e", te'i 'ga enee 'jau, ene resaka 'jau— 'jau Jejuí 'ga 'ga upe. —A'ere ene ejeymawa mũ rerawau 'ga upe. A'eramũ 'ga iapyau Jarejuwarete 'ga upe, 'ga muorypa enekã'ẽawer are— 'jau Jejuí 'ga 'ga upe. —Moisesi 'ga 'eawer imũ etee futat ene ejeymawa mũ rerawau iapyaukaa Jarejuwarete 'ga muorypawamũ. Ejeymawa mũ rapyaukara ene ekã'ẽawera resaukaawa futat— 'jau Jejuí 'ga ipito'om ma'efera 'ga upe.

¹⁵ 'Ga mokã'ẽnamũ Jejuí 'ga rera okwasi'wau amunawa moy moyka. A'eramũ futat 'gã ojeko'woka 'ga piara rupi ajatykaupap 'ga ree. 'Ga porogyta renupa 'ua, ojekatu'ogukaa nanẽ 'ua 'ga upe nũ.

¹⁶ A'eramũ futat Jeju'i 'ga uẽma etee 'gã nui. Awotywe'eme 'ga awau oporogytau 'Uwarete 'ga upe 'ũina.

Iteu ma'e 'ga

(Mateu 9.1-8; Maku 2.1-12)

¹⁷ Anure 'gã ajatykau Jeju'i 'ga ree. Jerusareg awi, Garireja ywy awi, Judeja ywy awi. Mimer awi 'gã 'ua ajatykau 'ga ree. Fariseu 'gã amũ 'ua, Moisesi 'ga remikwasiarer are moromu'jara 'gã netee ajatykau 'ga porogyta renupa. Janeruwarete 'ga pãjẽa 'ga rerekou. A'eramũ 'ga oporogytau 'gã nupe.

¹⁸ A'e pype 'gã iteu ma'e 'ga rerua Jeju'i 'ga upe. Wupawa pype 'ga 'upa ojenuga.

—Soo 'ga rerawau Jeju'i 'ga upe 'jau— 'jau 'gã ajaupe.

A'eramũ 'gã 'ga rupia 'ga rupawa reewe 'ga rerua 'ga upe.

¹⁹ A'ere 'gã nuerosearũi 'ga. Nijumypykware'i 'oga 'gã nupe. A'eramũ 'gã a'eramũ 'ga reosowe'em. A'eramũ 'gã 'opewuu apyte'rarimũ 'ga rerawau 'ga rerojeupia. 'Oga pyrape mopoka 'ga upe. Imopog ire 'gã 'ga monou imojypa tupaama pyu Jeju'i 'ga rowase.

²⁰ A'eramũ Jeju'i 'ga 'jau ojeupe: “Je rerowiat pa 'gã ajemogyau ra'e”, 'jau 'ga ojeupe. A'eramũ 'ga 'jau iteu ma'e 'ga upe:

—Enetywera je omoit 'awamũ ene wi ki 'ei— 'jau 'ga 'ga upe.

²¹ A'eramũ Moisesi 'ga remikwasiarer are moromu'jara 'gã, fariseu 'gã netee 'jau ajaupe:

—Kuu. Awỹja 'agamũ 'ũina Jarejuwarete 'ga kurapa 'ũ? Janeruwarete 'ga etee te 'ã janetywera omoit jane wi. “Enetywera je amoit ene wi” 'eramũ 'ga 'i “Je Jarejuwarete 'ga 'jawe” 'jau— 'jau 'gã ajaupe 'upa.

²² A'ere Jeju'i 'ga ikwaawi ojee. A'eramũ 'ga 'jau 'gã nupe:

—Ma'eramũ pẽẽ poromũ 'jau pejejeupe 'ũ?— 'jau 'ga 'gã nupe.

²³ —Je upe te naayi. Iteu ma'e mafu'amaramũ ae nanẽ ojotywera moiri ajau'i nũ— 'jau 'ga 'gã nupe.

²⁴ —Pẽneki'yra je 'ã. A'eramũ je tepãjẽ resaukaa pẽ nupe iteu ma'e 'ga mafu'ama pẽ neape— 'jau 'ga 'gã nupe. —'Ga fu'ama resaka taje kwaap pejepe 'jau— 'jau Jeju'i 'ga 'gã nupe. —“A'efera 'ga amafu'am. Aetywera 'ga omoit nanẽ ae wi nũ”, tepe'je 'jau. Jeruwarete 'ga te 'ã opãjẽ amut jee. A'eramũ je pẽtywera moia pẽ nui, iteu ma'e mafu'ama nanẽ nũ— 'jau 'ga 'gã nupe.

A'eramũ 'ga 'jau iteu ma'e 'ga upe:

—Efu'ama jui. Eatau ewau eje'wyr ipe nũ. Jaruete ene 'awamũ— 'jau 'ga 'ga upe. —Ere ewau. Ere ejupawa rerawau eje'wyr ipe nũ— 'jau 'ga 'ga upe.

²⁵ A'erauwe 'ga afu'ama. A'eramũ futat 'ga awau. 'Gã nowase 'ga afu'ama. Najuejue etee futat 'gã 'ga resaka. A'eramũ 'ga wupawa rerawau oje'wyr ipe nũ.

—Esage ete Janeruwarete 'ga. Je mafu'am 'ga— 'jau 'ga 'gã nupe awau, Jarejuwarete 'ga muorypa ee.

²⁶ A'eramũ peuwara 'gã oporesagamũ 'upa 'ga ree. A'eramũ 'gã 'jau ajaupe:

—Kuu. Ku'jywa 'ga 'ga amafu'am. Iteu ma'efera 'ga wata nũ— 'jau 'gã ajaupe. —Siesak ako jane 'ga mafu'ama akiko! A'eramũ nipo 'ga aetywera moia nanẽ ae wi nũ— 'jau 'gã ajaupe. A'eramũ 'gã Jarejuwarete 'ga muorypa ee.

Levi 'ga mo'wyawet

(Mateu 9.9-13; Maku 2.13-17)

²⁷ A'eramũ Jeju'i 'ga awau jui. Awau pe aje kũima'e 'ga amũ resaka, Levi 'ga resaka. Levi 'ga 'wryiararete upe ka'aranũũ pyykara 'ga. 'Ga porowyky 'ga renamũ Jeju'i 'ga awau owaẽma 'ga upe. A'eramũ Jeju'i 'ga 'jau 'ga upe:

—Ere ejua je rupi— 'jau 'ga 'ga upe.

²⁸ A'erauwe 'ga opoia oporowyky awi ejaa inuga a'e pe te futat. A'eramũ futat 'ga awau akou Jeju'i 'ga remiayuwamũ.

²⁹ A'ere Levi 'ga 'jau Jeju'i 'ga upe:

—Ere ejemiayuwa 'gã nerua erojemi'waa je pyri— 'jau 'ga oje'ega Jeju'i 'ga upe.

A'erauwe 'ga wemiayuwa 'gã nerawau erojemi'waa 'ga rog ipe. Kwaiwete 'gã jatykai ojemi'waa 'gã pyri 'wryiararete upe ka'aranũũ pyykara 'gã netee.

³⁰ Ae tywera pype 'gã jemi'wara resakawe fariseu 'gã Moisesi 'ga remikwasiarer are moromu'jara 'gã netee 'jau Jeju'i 'ga remiayuwa 'gã nupe:

—Kuu. Ma'eramũ pẽẽ pejejemi'waa 'wryiararete upe ka'aranũũ pyykara 'gã pype 'ũ? itywet ma'e 'gã pype 'ũ? Nojemi'wari noko ae 'gã pyri 'ja. Nia'wryi 'gã ajemogyau kũi— 'jau 'gã 'gã nupe, oje'ega moywrafena.

³¹ Aipo wemiayuwa 'gã nupe 'gã 'eramũ Jeju'i 'ga 'jau 'gã nupe:

—'Gā pyri je rekoī 'gā poaawamū te nū'ū. Je 'ā morofuanugara 'jawewara te ako 'gā nupe. Sā'ā morofuanugara 'ga muaga monoa ojero'wu ma'e 'gā nupe etee. Nomono ekoetei futari 'ga ijero'wue'ema 'gā nupe muaga.

³² Nan tee futat je. Ia'wyre'ema 'gā katu'okawamū te je ruri— 'jau 'ga 'gā nupe. —“Je jeresage”, pe'je 'ā. A'ere naesage ma'eramū rūi je ruri pē katu'oka. Itywet ma'e katu'oka tee je ruri— 'jau 'ga 'gā nupe. —Nan tee 'ā je rekoī, “Pejetywer awi pepoit”, 'jau 'gā nupe. “Pejetywer awi pēpoiriweramū Jeruwarete 'ga tomoit pē nui 'jau”, 'jau je 'ā tekou 'gā nupe. “Pē nui imoir ire 'ga pē mogyau wemiayuwamū”, 'jau je 'ā tekou 'gā nupe— 'jau Jejuī 'ga 'gā nupe.

'Gā jemi'ware'em are 'gā mu'eawet

(Mateu 9.14-17; Maku 2.18-22)

³³ Anure amumera 'gā 'ua oje'ega Jejuī 'ga upe nū:

—Juā Batista 'ga remiayuwa 'gā ojemi'ware'ema futat oje'ega monou Jarejuwarete 'ga upe jepi. Fariseu 'gā nemiayuwa 'gā nanē ojemi'ware'ema futat oje'ega monou 'ga upe jepi. Oporogytaawa upe iwaēmawe 'gā awau ojemi'ware'ema oporogytau Jarejuwarete 'ga upe jepi. A'ere 'ā eneremiayuwa 'gā nanarūi. Niojeri agawewi 'gā 'ā ojemi'war awi. A'etea 'ā 'gā oje'ega omono Jarejuwarete 'ga upe— 'jau 'ga 'gā Jejuī 'ga upe.

³⁴ A'eramū Jejuī 'ga 'jau 'gā nupe:

—Naani. Ojepyri je rekoramū 'gā niojeri futari ojemi'waa. Sā'ā ae ajuekokaturamū ty'ara rerekoe'ema. Nan tee futat 'gā ojepyri je rekoramū jeremiayuwa 'gā niojeri ojemi'waa. Akokatu ma'e 'gā nekokaturamū sipo 'gā nekokatu resakara 'gā opy'araypara rerajemogyi maraka are? Naani. Maraka teepaw ire te nipo 'gā nojemi'waru'jawi— 'jau Jejuī 'ga 'gā nupe.

³⁵ —Pe awi akokatu ma'e 'gā jepe'a re tee esakarera 'gā poiri ojemi'war awi oporogytau Jarejuwarete 'ga upe— 'jau Jejuī 'ga oje'ega 'gā nupe u'ama. —Nan tee futat jeremiayuwa 'gā niojeri ojemi'waa ojepyri je rekoramū. Je jepe'a re te nipo 'gā nojemi'wari ajemogyau. U'arasigamū ajemogyau je ree je o re. A'eramū nipo 'gā ojemi'ware'ema ajemogyau je ree, wea'aramū ajemogyau je ree— 'jau 'ga 'gā nupe.

³⁶ —Ymā te 'ā aepy 'gā pē mu'e'i nū. A'ere je 'ā 'awamū pē mu'e'i nū. Amutee are je 'awamū pē mu'e'i nū. A'ere nepemopyppea'uweri jeporogytafera aepy 'gā nemimome'ufer are. Jeporogytafer are ojemu'e ma'eferamū ki a'ea etee futat pejemu'e. Pemojopye kasi morogyta ymaner are ne. Morogyta ymaner are ojemu'e ma'e 'gā nuapoi jeporogytafer imū mama'ea— 'jau Jejuī 'ga 'gā nupe.

—Taity yaua ae nomonoroga'uweri taity ymanera perugawamū. Nia'wyri taity yaua awau taity ymanera perugawamū— 'jau 'ga 'gā nupe.

³⁷⁻³⁸ —Y'way yau ae nueko'wogi yrū ymanera pype. Yrū yau pype te ae eko'wogi. Yrū ymana pype sieko'wok'eramū waiiwamū kamēšiete. A'eramū futat opy'apefugamū wyrū kakau. A'eramū futat ojeko'woka— 'jau 'ga 'gā nupe.

³⁹ —Y'waya ajai'wi tykur ire ae notykuri futari y'way yaua. Nan tee 'ā pēē mū. Pejemu'e morogyta ymaner are tee. Pēnea'at aepy 'gā pejemu'eawer are etee. Pejemu'e yau are jēmī 'ā nepējemu'eweri— 'jau Jejuī 'ga 'gā nupe u'ama.

6

Morowykye'em are 'gā mu'eawet

(Mateu 12.1-8; Maku 2.23-28)

¹ Morowykye'ema mū rupi Jejuī 'ga awau juowuurana ko pyterimū. 'Ga rewiri oo ma'e 'gā a'ŷja pa'wau erawau opo pe. A'eramū 'gā ipe'oka i'wau.

² 'Gā nesakawe fariseu 'gā amū 'jau 'gā nupe:

—Ma'eramū te pepo'o a'ŷja? Nepeporowykya'uweri morowykye'ema rupi. A'ŷja po'oa aeporowykya futat. Ymā te 'ā Moisesi 'ga 'i rakue: “Peoporowyky awi morowykye'ema rupi”, 'jau 'ga 'ā rakue— 'jau 'gā Jejuī 'ga remiayuwa 'gā nupe.

³ A'eramū Jejuī 'ga 'jau 'gā nupe:

—Ma'ja te Davi 'ga wapo rakue? Nepemogytai nipo ka'arana 'ga ree? Ymā te 'ā 'ga py'arayparamū opytuna 'gā netee rakue.

⁴ A'eramū 'ga awau Jarejuwarete 'ga mogytaaaw ipe osou rakue. A'e pe 'ga kanape pyyka ojeupe rakue. A'eramū 'ga 'ā ape monou opytuna 'gā nupe rakue. Pekwaap 'ā aipoa. Na'gā nemi'u arūi poa numiamū. Mainana 'gā etee te a'u aipoa rakue. A'etea Davi 'ga a'u opytuna 'gā netee rakue. Ipy'araypat 'gā awau osou peu. A'eramū 'ga amū “Nepēa'wyri pēē” jawe'em 'gā nupe rakue— 'jau Jejuī 'ga 'gā nupe.

⁵ A'eramū Jejuī 'ga 'jau 'gā nupe nū:

—Je 'ā pēneki'yaretea, Jarejuwarete 'ga remimurera. A'eramū je 'jau pē nupe: Je 'ā morowykye'ema jara. A'eramū je te amunipo 'ā "peapo awi", 'jau pē nupe. Iapoare'emamū nepeje'eg ekoetei 'gā nupe. Je te 'ā iapoarera— 'jau 'ga fariseu 'gā nupe.

Ipoteu ma'e 'ga

(Mateu 12.9-14; Maku 3.1-6)

⁶ Ajepeja morowykye'ema rupi Jejui 'ga awau osou judeu 'gā jatykaaw ipe nū. A'e pe futat ipoteu ma'e 'ga wapyka 'ūina. 'Ga jakwatawa nia'wiri.

⁷ Moisesi 'ga remikwasiarer are moromu'jara 'gā fariseu 'gā netee Jejui 'ga resaka 'upa. A'eramū 'gā 'jau ajaupe:

—Awamū 'ā morowykye'ema. 'Awamū nipo 'ga 'ga katu'ogi 'ja? Ma'ja e'i sipo 'ga 'awamū oje'ega ipoteu ma'e 'ga upe? 'Ga po katu'ogamū ki sa'e 'ga upe: Nuenuwi futari 'ga Moisesi 'ga remikwasiarera ra'e, sa'e ki 'ga upe. Sā'ā 'ga porowykye morowykye'ema rupi. 'Ga poa 'ga wapokatu morowykye'ema rupi, sa'e 'ga upe 'jau— 'jau 'gā 'upa ajaupe.

⁸ A'ere Jejui 'ga 'gā kwaawie etee ojee. A'eramū 'ga 'jau ipoteu ma'e 'ga upe:

—Efu'am e'ama 'gā pyteripe. Tene resak 'gā 'jau— 'jau 'ga ipoteu ma'e 'ga upe.

A'erauwe 'ga afu'ama.

⁹ A'eramū Jejui 'ga 'jau moromu'jara 'gā nupe:

—Ma'ja e'i te Moisesi 'ga rakue? morowykye'ema upe rakue? "Esageay etee ki peapo", e'i te 'ga janee rakue? "Ia'wyr'e'ema etee ki peapo", e'i te ra'u 'ga janee rakue nū? "Pejokatu'og iki", e'i te Moisesi 'ga janee rakue nū? "Tene imanū", e'i te ra'u 'ga janee nū?— 'jau Jejui 'ga 'gā nupe. —Pekwaap futat 'ā. "Esageay etee ki peapo", e'i 'ā Moisesi 'ga janee rakue. "Pekatu'og iki 'gā", e'i 'ā 'ga janee rakue— 'jau Jejui 'ga 'gā nupe.

¹⁰ Aipo 'e re Jejui 'ga amā'jāu 'gā nee ra'ne 'gā moyka. A'ere 'ga 'jau ipoteu ma'e 'ga upe:

—Epo epopyo— 'jau 'ga 'ga upe.

A'erauwe futat 'ga opo popywau. A'erauwe futat 'ga poa ojekatu'oka.

¹¹ Morowykye'ema rupi 'ga katu'ogamū Moisesi 'ga remikwasiarer are moromu'jara 'gā amara'neramū 'ga ree. A'eramū 'gā 'jau ajaupe:

—Maran te jane Jejui 'ga rerekoi? Sijuka te jane 'ga? Naani te ra'u nū?— 'jau 'gā ajaupe.

Jejui 'ga remimu'e 'gā

(Mateu 10.1-4; Maku 3.13-19)

¹² Aipo 'gā nupe 'epaw ire Jejui 'ga awau ojeupia wyyty'rarimū. Awau oporogytau 'Uwarete 'ga upe. Koyptunamuku 'ga oporogytau 'Uwarete 'ga upe. Noseri futari 'ga.

¹³ Ai'iwetetewe 'ga wewiri oo ma'e 'gā majatykau ojee. Kwaiwete 'ga rewiri oo ma'e 'gā. A'ere 'ga tusi 'gā etee imū'ēi 'gā pytuna 'gā nui. A'eramū 'ga 'jau 'gā nupe:

—Pēē te 'ā jeremimu'ea. Je te 'ā amu'e pēē— 'jau 'ga 'gā nupe. —A'eramū je anure pē monou kwe pe tejemome'waukaa 'gā nupe— 'jau 'ga 'gā nupe.

¹⁴⁻¹⁶ Simão, Andre, Tiago, Juā, Filipe, Patarumeu, Mateu, Tome, ajepeja Tiago, ajepeja Simão, Judas, ajepeja Judas. Mīmera 'gā Jejui 'ga imū'jāu wemimu'eramū. Simão 'ga mukūi 'ga rera. Pedro 'jau Jejui 'ga inuga 'ga ree. Ajepeja Simão 'ga mukūi 'ga rera nanē nū. Serote 'jau 'ga rer irūa. Andre 'ga Pedro 'ga rewirera. Tiago 'ga Aufe'u 'ga ra'yra 'ga. Judas 'ga Tiago 'ga ra'yra 'ga. Ajepeja Judas 'ga mukūi 'ga rera. Iskariote 'jau 'ga rer irūa. Kūima'e tywera 'gā nupe 'ga monoara 'ga poromū.

Jarejuwarete 'ga remifutar are

'gā mu'eawet

(Mateu 4.23-25)

¹⁷ Jejui 'ga 'ua ojyja wyytyra apyte'rar awi nū. Wemimu'e 'gā nerua erojyja ojeewe. Waimy 'wyr ipe 'gā 'ua. Kwaiwete 'gā 'upa 'ga rapesaka. Judeja wyy pewara 'gā, Jerusareg ipewara 'gā, Tiro pewara 'gā, Sidom ipewara 'gā 'jau 'ua. Tiroa 'upa 'yē'ē pyri Sidoma nanē nū. Mīmer amunaw awi 'gā 'ua ajatykau 'ga rapesaka 'upa.

¹⁸ Kwaiwete 'gā 'ua. 'Ga porogyta renupa ajatykau 'ga ree. Ojero'wu ma'e 'gā nanē 'ua ajatykau 'ga ree. Ojekatu'ogukaa 'ua 'ga upe. Mama'eukwaawa rerekwara 'gā nanē nū. Ojekatu'ogukaa 'ua 'ga upe.

¹⁹ 'Ga Ruwarete 'ga opājē mua Jejui 'ga upe. A'eramū 'ga 'Uwa 'ga pājē mū te 'gā katu'oka. Opokoka etee agawewi 'gā Jejui 'ga ree. A'etea 'gā ojekatu'ok.

Iku'i ma'e

(Mateu 5.3-12)

²⁰ Ojero'wu ma'e 'gā katu'opaw ire Jejui 'ga amā'jāu 'gā nee, ojeypyri ajatyka ma'e 'gā nee. A'eramū 'ga oje'ega 'gā nupe:

—"Jetywerete je tekou. Ejejuka je ree" 'jaramū Janeruwarete 'ga pē poari futari.

"Jetywerete je. Je katu'og ape" 'jaramū Janeruwarete 'ga pē katu'ogi futari.

A'eramū pēē pejeku'iramū pejemogyau.

Pēē 'ā 'ga remiayuwamū 'awamū pejemogy.

A'eramū pēē anure nipo pejewau 'ga pyri.

²¹ Pēē 'ā “torokwaap 'ga 'jau”, pe'je.

A'eramū pēē a'jea futat 'awamū 'ga kwaapa katu katu pejemogyau.

A'eramū nipo pēē pejeku'iramū pejemogyau.

Nanamū pejetywera peru'arasig erajemogyau.

A'ere 'awamū Janeruwarete 'ga imoiri pē nui.

Pejewe imoiri ire pejemogyau pejeku'iramū nipo.

²² Jeremiayuwamū pejemogyamū nipo je rerowiare'ema 'gā niporomutari pē nee.

Je 'ā pēneki'yraretea agawewi.

A'etea 'gā je rerekou tyweaete.

A'eramū nipo Jeremiayuwe'ema 'gā pē nee taetu oporomutare'emamū ajemogyau. Je ree nipo 'gā pē ago'wau ajemogyau.

A'etea nipo pejeago'oramū nepēku'ipawa'uweri pejemogyau.

²³ Pē nereko tywerete agawewi nipo 'gā.

A'etea ki pēku'i etee pejemogyau.

Pēē 'ā pejemogy esage pejemogyau jeje'eg imū etee.

A'eramū pēē pejewau je rupi ywag ipe.

Peu te Janeruwarete 'ga mama'e esage monoi pē nupe.

Peu te 'ga pēneko esageawera repy monoi pē nupe.

Ymā te 'ā 'gā ypy 'gā Jarejuwarete 'ga je'ega mome'wara 'gā nereko tyweretei rakue.

A'ere 'ā nānēwējēmī 'gā pē nerekoī nū.

'Awamū ojeup ma'e 'gā nanē pē nereko tyweretei nū.

A'ere 'ā nānēwējēmī pēku'i etee pejemogyau nū—

'jau Jejuī 'ga oje'ega renupara 'gā nupe u'ama oporogytau.

²⁴ A'ere Jejuī 'ga 'jau ikaraemā kwai ma'e 'gā nupe, “nafutari je Jarejuwarete 'ga tepoara” 'jara 'gā nupe:

—'Awamū etee futat pēkaraemā pejemogyau. “Akwaap futat je Jarejuwarete 'ga”, pe'je numiamū.

A'ere 'ga anure namuru'jawi mama'ea pē nupe— 'jau Jejuī 'ga 'gā nupe.

²⁵ —Pēporiay'i pejemogyau numiamū.

'Awamū etee te pēku'i pejemogyau pejekaraemā kwaiwete are numiamū.

A'ere nipo anure peko tywet etee nū, pejekaraemā are pēku'iawera rayramū etee pē nupe nū.

Nepekwaawi futari Jarejuwarete 'ga.

Nepēporomutari te 'ā 'ga je'eg are.

A'eramū pēē 'ga resake'ema futat pejewau.

Pēporiay'i pejemogyau numiamū.

'Awamū pefuka etee pejemogyau numiamū.

Pejetywera etee 'ā pefutat.

A'ere nipo anure pejoo'o pejemogyau.

A'eramū nipo pēē pejemogyau, “Ma'eramū je tetywer are etee teku'iramū tekou rakue 'ū?” 'jau nipo pēē pejemogyau pejejaa'wau.

Anure peo futat pejemogyau tyweaete mama'eukwaawa rapyaw ipe.

²⁶ Pēporiay'i numiamū.

'Awamū kwaiwete 'gā poromutaramū pē nee numiamū.

Ymā te 'ā kūima'e 'gā amū 'i 'gā nupe rakue: “Je 'ā Jarejuwarete 'ga je'ega mome'wara”, 'jau futatee 'gā nupe o'meramū rakue.

A'etea 'ā pēypy 'gā 'gā nerowiaa rakue.

“Esage ma'e 'gā”, 'jau 'gā 'ā i'me ma'e 'gā nupe 'gā nekoramū rakue.

Nan tee 'awamū pēporiay'i pejemogyau numiamū.

A'eramū nipo 'gā najuejue etee pē futaa ajemogyau numiamū.

A'eramū pēē najeremiayuwa rūi. Jeremiayuwamū nipo 'gā amū niporomutari pē nee— 'jau 'ga 'gā nupe.

*Pēporomutar iki pejeeje iporomutare'ema 'gā nee
(Mateu 5.38-48)*

²⁷ A'ere Jejuī 'ga oje'ega 'gā nupe, oje'eg are wapyaka ajemogy ma'e 'gā nupe:

—'Awamū je je'egi pē nupe najuejue etee teje'ega renuparamū. Pejejuka esage ki pejeeje iporomutare'ema 'gā nee. Niporomutari nipo 'gā pē nee numiamū. A'ere ki 'gā pereko esage etee futat. Pēmara'ne kasi 'gā nee ne— 'jau Jejuī 'ga u'ama 'gā nupe.

28—Jarejuwarete 'ga upe pejeje'ega ki pe'je 'ga upe: “Ejejuka esage ki 'gā nee, ore ree iporomutare'ema 'gā nee”, pe'je ki 'ga upe pejeje'ega.

29 'Ga amū nipo pēnetywape nupāu. A'eramū ki pejejetywape nupānamū perowag etee pejejetywape owajara 'ga upe— 'jau Jejuī 'ga 'gā nupe u'ama. —'Ga amū nipo pēnaity poakuwuu rerawau pē nui. A'ere kasi pēnea ee ne. Tene ki 'ga erooi pēneteyrūa nanē nū— 'jau 'ga 'gā nupe.

30—“Mama'e mū emut jee”, pejejeupe 'ga amū 'eramū imonou etee futat 'ga upe— 'jau 'ga 'gā nupe u'ama. —'Ga amū nipo pēkaraemā pyyka erawau pē nui. A'ere kasi “pe'je imua jee nū”, pe'je 'gā nupe ne, pejeje'egayau ne.

31 Pefutat te 'gā pejereko esagea? A'eramū pēē nanē pejejujukau esage 'gā nee nū— 'jau 'ga 'gā nupe u'ama.

32—Pejejee te iporomutat ma'e 'gā nereko esagea etee sipo Janeruwarete 'ga afutat? Pejejee iporomutare'ema 'gā nereko tywera sipo 'ga afutat? Naani. Oporojuka ma'e 'gā miamū futat ipota'wa ajuee, ojee iporomutat ma'e 'gā nee. A'ere kasi pēē nanarūi ne. Pejejee iporomutare'ema 'gā nee miamū futat pejeporomutaramū— 'jau 'ga 'gā nupe u'ama.

33—Pejereko esageara 'gā nee etee pejeporomutaramū sipo Janeruwarete 'ga pē mepyi? Naani. Aetywera 'gā miamū futat nanuara wapo ojekoty'aawa upe. A'ere ki najuejue etee futat pēpota'wa 'gā nee— 'jau 'ga 'gā nupe u'ama oporogytau.

34—A'ere “Nipo 'gā imepyi jee re'ā” 'jara 'gā nupe etee kasi ekaraemā eremono ne— 'jau 'ga 'gā nupe. —A'ere 'ā aipoa miamū futat aetywera 'gā iapoi. A'ere kasi pēē nan ine. Nanarūi pēē. Pemono ekoete tee futar iki ikaraemāe'ema 'gā nupe. Karaemā mepye'ema 'gā nupe nanē pemono ekoete tee nū. Mama'ea 'gā nupe itywe'emamū ki pemono ekoete tee 'gā nupe— 'jau Jejuī 'ga 'gā nupe u'ama.

35—Nan pēē iaporamū Janeruwarete 'ga pēporowyky repy muri pē nupe anure. A'eramū 'ga pē mogyau wemiauyamū. 'Ga te 'ā Janeruwaretea janee— 'jau Jejuī 'ga 'gā nupe u'ama.

—Kwaiwete te 'ā Janeruwarete 'ga upe iporogytae'ema 'gā jemogyi. A'etea 'ā Janeruwarete 'ga esage 'gā nupe, ojeupe oje'eg ma'e 'jawe— 'jau Jejuī 'ga 'gā nupe imome'wau. —Itywerete ma'e 'gā nupe nanē 'ga 'ā mama'e esage monou nū, ajemuaēma 'gā nee nū.

36 A'eramū ki pēē nanē pejemuaēma 'gā nee nū, Jarejuwarete 'ga 'jawe nū— 'jau Jejuī 'ga 'gā nupe 'gā mu'jau u'ama.

Pejejuago'wawe'em

(Mateu 7.1-5)

37—“Nepēa'wyrī pēē Jarejuwarete 'ga upe”, pe'je kasi 'gā amū nupe ne. Aipo 'gā nupe 'e'emamū Janeruwarete 'ga nanē aipo ne'ī pē nupe— 'jau Jejuī 'ga 'gā nupe u'ama. —“Mama'e tywerete ereapo”, pe'je kasi 'gā nupe ne. Aipo pēē 'e'emamū Janeruwarete 'ga nanē aipo ne'ī pē nupe nū— 'jau Jejuī 'ga 'gā nupe u'ama. —'Gā pejereko tywearer are kasi pēnea'at pejemogyau au'jeteramū ne. Ee pēnea'aru'jawe'emamū Janeruwarete 'ga nanē futat naea'aru'jawi pētywer are nū— 'jau Jejuī 'ga 'gā nupe.

38—Mama'ea 'gā nupe pēē imonoramū Janeruwarete 'ga nanē mama'e muri pē nupe nū. Ināinānī't nipo pemono 'gā nupe. A'eramū Janeruwarete 'ga nanē imua ināinānī't etee pē nupe nū. Imonoawera 'jawerimū etee futat imua pē nupe nū— 'jau Jejuī 'ga 'gā nupe. —Mama'ea 'gā nupe imonou re te amunipo 'ā Janeruwarete 'ga i'jawerimū etee futat imuri pē nupe— 'jau Jejuī 'ga u'ama 'gā nupe 'gā mu'jau.

39—Eae'ema 'gā nokoi ajuee ojopopyyke'ema. Kasi 'gā a'e pe ajuerooi ajueru'aa ywy kwara pype ne. Nan tee pēē. Mama'e tywera apoaramū pēē najuejue etee. A'eramū pēē a'eramū “Mama'e tywera ereapo”, 'jawe'em futat pejejaupe— 'jau Jejuī 'ga 'gā nupe.

40—Ojemu'e yau ma'e 'gā amu'jara nuapyraawi futari. Amu'jara 'ga amu'e re tee 'ga ka'arana kwaawi. 'Ga 'jawe etee futat ikwaapa— 'jau Jejuī 'ga 'gā nupe oporogytau u'ama.

41-42—Najuejue etee te 'ā pētywet. A'eramū pēē “Itywet ma'ea pēē”, 'jawarūe'em pejejaupe. A'eramū pejepoia futat pejetywer awī. “Nitywi oretywera”, pe'je futat numiamū. A'ere pēē pētyyp futat. Pejetywer awī ra'ne pepoit. A'ere pejewirera tepepoat 'jau. “Ere epoia etywer awī”, tepe'je pejewirera 'gā nupe 'jau— 'jau Jejuī 'ga 'gā nupe u'ama.

—Sā'ā ae 'ywa tuwyrera weape i'aramū ajuea pewara resake'ema ajau. A'eramū 'ā ae weapewara ra'ne enuēm. Ojewi enuēm ire 'ā ae ojoma'e resaka ajuea awī. Nan tee futat ae otywer awī ra'ne ae poiri. A'ere ojopoa— 'jau Jejuī 'ga 'gā nupe.

Y'wa 'yp katuram

(Mateu 7.16-20; 12.33-35)

43—Y'wa 'ywa 'jawe ae. Y'wa 'yp katurama i'a katuram tāmējē futat. Y'wa 'yw a'wyr'e'ema o'ywa 'jawe etee futat ni'a'awyrī.

⁴⁴ A'e are y'wa 'ywa pekwaap i'a esage are. Sã'ã y'wa mü i'a'e'ema ojo'yw ekoete are. O'yw are etee i'aa— 'jau Jeju'i 'ga 'gã nupe oporogytau u'ama.

⁴⁵ —A'eramũ ae nan tee futat. Aeywyter esagea mama'e esagea etee futat imome'wau akou ojopooa. Aeywyter a'wyre'ema mama'e tywera etee futat imome'wau akou. Mama'e katurama jẽmĩ imome'wawe'em— 'jau Jeju'i 'ga 'gã nupe oporogytau u'ama.

I'akwaap ma'e
(Mateu 7.24-27)

⁴⁶ —Ma'eramũ ajee je renũi pejepe, “Jejara 'ga”, pe'je jee. A'etea 'ã nepeenuwi pejejeupe jeje'ega. “Jejara 'ga” 'jaramũ pẽẽ jeje'ega renupa katu katu. Jeje'ega renupare'emamũ kasi pe'je jee ne, “Jejara 'ga”, pe'je jee ne— 'jau 'ga 'gã nupe u'ama.

⁴⁷⁻⁴⁸ —Jeje'ega renuparamũ pẽ'akwaap pejejemogyau. Sã'ã i'akwaap ma'e 'ga 'oga mÿja ywy ãtã pype. A'eramũ 'y ruwiretea miamũ 'ã owaẽme'ema 'ga roga upe. A'eramũ 'ã aipo 'oga awawe'em ppy pe. Aipo 'og apoara 'ga i'akwaap. Nan tee pẽẽ jeje'ega renuparamũ— 'jau Jeju'i 'ga 'gã nupe.

⁴⁹ —A're jeje'ega renupare'emamũ pejemogy i'akwaawe'ema 'ga 'jawe. I'akwaawe'ema 'ga te ajee 'oga omÿi 'y apopewa pype. A'eramũ 'ã 'y ruwia 'ga roga rupia 'ga wi, imonou ppy pe 'ga wi. Ni'akwaawi 'ga akou. Nan pẽẽ jeje'ega renupare'emamũ. Aipo 'ga 'jawewaramũ nipo pẽẽ anure pejepapa— 'jau Jeju'i 'ga 'gã nupe u'ama.

7

Jefaruu 'ga remiayup
(Mateu 8.5-13)

¹ Aipoa 'gã nupe imome'upaw ire Jeju'i 'ga awau 'gã nui Kafanaũ pe.

² A'e pe futat jefaruu 'gã 'wyrria'ri 'ga reni. Amutee 'ga romanũ 'ga. 'Ga remiayuwa 'ga ojero'wu 'upa. Kwaiwete 'ga jero'wui 'upa. Amanũ ja'wyja'wy futat 'ga 'upa. Aipo 'ga ree 'wyrriara 'ga oporomutaramũ. A'eramũ 'ga a'eramũ ajemuaẽma 'ga ree.

³ A'eramũ 'ga Jeju'i 'ga rera renupawe, oje'ega judeu 'gã 'wyrria'ri 'gã nupe:

—Pe'je pejewau Jeju'i 'ga rerua jee. Jeremiayuwa 'ga tomoferap 'jau— 'jau 'ga 'gã nupe.

⁴ A'eramũ judeu 'gã 'wyrria'ri 'gã awau Jeju'i 'ga renũina:

—“Ejot”, e'i 'ga enee ko. “Jeremiayuwa amanũ ja'wyja'wy amũ 'upa”, e'i 'ga enee ko— 'jau judeu 'gã 'wyrria'ri 'gã awau Jeju'i 'ga upe. —Ejot 'ga remiayuwa resaka 'ga upe. Ore muara 'ga esageay te.

⁵ 'Ga futat judeuramũ janejatykaawa apoawera omeppy ai'i. A'eramũ ene ejua 'ga resaka ore rupi— 'jau 'gã Jeju'i 'ga upe.

⁶ A'eramũ Jeju'i 'ga awau 'gã nupi, ojero'wu ma'e 'ga resaka. 'Ga waẽm ja'wyja'wyrarauwe jefaruu 'gã 'wyrriara 'ga oje'ega ojekoty'aawa 'gã nupe:

—Pe'je pejewau 'jau 'ga upe: “Tut kasi 'ga osou 'au jerog ipe ne”, e'i 'ga enee ko, pe'je pejewau 'ga upe— 'jau 'ga 'gã nupe.

⁷ A'erauwe 'gã awau 'jau Jeju'i 'ga upe:

—“Tut kasi 'ga osou 'au ne”, e'i 'ga enee ko. “Naesage ma'ea rũi je. Nakũima'eteete rũi te 'ã je”, e'i 'ga enee ko— 'jau 'wyrriara 'ga jekoty'aawa 'gã awau oje'ega Jeju'i 'ga upe. —“Ojenosĩ je 'ga wi”, e'i 'ga enee ko. “Naesage ma'ea rũi te 'ã je”, e'i 'ga enee ko. “A'eramũ je a'eramũ tejenosũ 'ga wi tejog ipe 'ga reseramũ ne”, e'i 'ga enee ko. “‘Ga te 'ã esageay ma'ea”, e'i 'ga enee ko. “Peu etee futat pejewau pejeje'ega 'ga upe jee”, 'jau 'ga oree ko. “A'eramũ 'ga oje'eg imũ etee futat jeremiayuwa moferapa jee 'jau”, e'i 'ga enee ko— 'jau 'gã Jeju'i 'ga upe.

⁸ —“Je 'ã jefaruu. A'eramũ je 'ã te'wyrriara 'ga je'eg imũ etee futat mama'e apou tekou jepi. Je 'ã 'gã 'wyrria'ria. Ma'eramũ 'ã jeremiayuwa 'gã jeje'eg imũ etee futat mama'e apoi ajemogyau. 'Ga amũ upe je 'jau: Kwe pe ekwap ajepi amunaw ipe. A'eramũ 'ga awau ojeupe je'eaerw imũ. Amumera 'gã nupe je 'jau jepi: 'Au pejot je pyri, 'jau je 'gã nupe”, e'i 'ga oree ko. “Ma'eramũ 'gã 'ã jeje'eg imũ etee futat 'gã je'egi ajemogyau ajaupe. Tejeupe oporowyky ma'e 'gã nupe je 'jau: Pekwap mama'e apou jee, 'jau je 'ã 'gã nupe. A'erauwe 'gã jeje'eg imũ etee futat mama'e apou jee jepi. A'eramũ 'ga nan tee futat jeje'ega ojeupe imome'uramũ jeremiayuwa 'ga moferapa oje'eg imũ etee futat jee 'jau”, e'i 'ga enee ko— 'jau aipo 'gã awau Jeju'i 'ga upe.

⁹ Aipo ojeupe 'gã 'eramũ Jeju'i 'ga oporesagamũ 'gã nee. A'eramũ 'ga 'jau ojepyriwara 'gã nupe:

—Israeu juapyrera agawewi 'ã pẽẽ. A'etea 'ã naje rerowiari pejepe. Inãinãni'etee 'ã pẽẽ je rerowiari pejejemogyau. Ko 'gã muarera 'ga judeue'ema agawewi. A'etea 'ga je rerowiat kwaiwete ra'e jepi— 'jau Jeju'i 'ga ojepyriwara 'gã nupe.

¹⁰ O'wyrriara 'ga je'ega Jeju'i 'ga upe eroo re aipo 'gã ojewya 'ua nũ. Owaẽma ppy we 'gã ojero'wu ma'efera 'ga resaka:

—Kuu. Oferap nipo 'ga ra'e ki sa. Oje'eg imū etee futat 'ga 'ga moferawi ra'e— 'jau Jejui 'ga upe oporogyta ma'efera 'gā.

Majawera ēē ra'ya 'ga moferapawet

¹¹ Anure Jejui 'ga awau ajepeja amunaw ipe nū. Naī me 'ga awau, wemimu'e 'gā nerawau. Mytuna 'gā nanē awau 'gā nupi nū. Ojoywywywyr ipe 'gā awau watau.

¹² Aipoa amunawa ojeosōu. Awau 'gā owaēma iosoma rokwarā upe. 'Gā waēm ja'wyja'wyrāmū, Naī mewara 'gā amanū ma'e rerawau ityma numiamū. Majawera ēē ra'ya 'ga amanūmū. Ēē mena amanū rakue. A'eramū ēē omene'emamū akou. Majepei tee ēē ra'ya 'ga. A'e 'ga amanū ēē wi. Ēē ra'ya 'ga rerawau ityma numiamū. Kwaiwete 'gā awau ēē rupi.

¹³ Ēē resakawe Jejui 'ga ajemuaēma ēē ree.

—Erejoo'o awi ī— 'jau Jejui 'ga ēē upe.

¹⁴ Awau 'ga erowyka. A'erauwe 'ga pokogi ae rupiaw are. Erawara 'gā opytau imuapyka 'ga upe. A'eramū futat 'ga 'jau teumera upe:

—Ere ejua ewya— 'jau 'ga amanū ma'efera 'ga upe.

¹⁵ A'eramū futat amanū ma'efera 'ga owya oporogytau. A'eramū Jejui 'ga 'jau 'ga y ēē upe:

—Agamū enera'ya 'ga reni owya nū— 'jau 'ga ēē upe.

¹⁶ 'Ga ferawa resakara 'gā oporesagamū etee 'ga ree.

—Janeruwarete 'ga 'ā esage janee. Oje'ega mome'wara 'ga 'ga amut ojemome'waukaa janee— 'jau 'gā ajaupe. —Janeruwarete 'ga 'ga amut imojekaukaa jane ree— 'jau 'gā ajaupe.

¹⁷ Amanū ma'e 'ga imoferaw ire 'ga rera okwasi'wau amunawa pype. Amunawa pypiarugamap.

Juā Batista 'ga remiayup

(Mateu 11.2-19)

¹⁸ Moromunepawa pype Juā Batista 'ga renamū 'ga remimu'e 'gā awau Jejui 'ga mome'wau 'ga upe:

—Ekoay 'ga aeremiapoe'ema apou akou. Majawera ēē ra'ya 'ga omoferap imanū re ko— 'jau Juā 'ga remimu'e 'gā awau imome'wau 'ga upe, moromunepawa pype 'ga renamū.

¹⁹ A'erauwe Juā 'ga 'jau mukūja 'gā nupe:

—Pe'je pejewau pejeje'ega 'ga upe jee. “Ene te Jarejuwarete 'ga remimurera? 'Ga amū te ra'u nū?” pe'je ki 'ga upe jee— 'jau 'ga 'gā nupe. —“Ymā we te 'ā ore Jarejuwarete 'ga remimura 'ga rapesagi arajemogyau. Ene te? Naani te ra'u nū?” pe'je ki 'ga upe jee— 'jau Juā 'ga 'gā nupe, 'gā monou 'gā oporonupa ee Jejui 'ga upe.

²⁰ A'eramū 'gā awau oporonupa ee Jejui 'ga upe:

—“Ene te Jarejuwarete 'ga remimurera? 'Ga amū te ra'u nū?” e'i Juā 'ga enee ko— 'jau 'gā 'ga upe.

²¹ Aipo ojeupe 'e re 'ga ojepyriwara 'gā katu'oka. Kwaiwete 'gā katu'oka. Eae'ema 'gā mamā'jāu. Mama'eukwaawa rerekwara 'gā nui mama'eukwaawa pe'au. Iteu ma'e 'gā katu'oka.

²² 'Gā katu'og ire Jejui 'ga 'jau 'gā nupe:

—Peesak te je iapoa ra'e?— 'jau 'ga Juā 'ga remimonofera 'gā nupe. —Pe'je pejewau 'awamū pejejemiesagera mome'wau 'ga upe. “Iteu ma'e 'gā 'ga amafu'am ko. Ipito'om ma'e 'gā 'ga imokā'jāu. Eae'ema 'gā 'ga imamā'jāu”, pe'je ki pejewau imome'wau Juā 'ga upe— 'jau 'ga 'gā nupe. —“Iapyae'ema 'gā 'ga imuapyau ko. Amanū ma'efera 'gā nanē 'ga imoferapa ko nū”, pe'je ki imome'wau 'ga upe. “Pejetywer awi pēpoiweramū Janeruwarete 'ga imoiri pē nui. Pejeweji imoiri ire 'ga remiayuwamū tepeko 'jau”, e'i 'ga 'gā nupe, “Jarejuwarete 'ga takwaap 'jau” 'jara 'gā nupe 'ga 'i ko, pe'je ki 'ga upe.

²³ “Je rerowiar awi ipoire'ema 'gā niku'ipawi futari ajemogyau”, e'i 'ga enee ko, pe'je ki 'ga upe— 'jau Jejui 'ga 'gā nupe. —“Gā amū te nipo ajee mama'eaya ojeupe ijesaokaramū opoit je rerowiar awi”, e'i 'ga, pe'je ki 'ga upe. “Nakwaawi je 'ga iapoa. A'eramū je tepoia 'ga wi 'jara 'gā te nipo ajee niku' futari ajemogyau”, e'i 'ga, pe'je ki 'ga upe imome'wau— 'jau Jejui 'ga ojeupe Juā 'ga remimurera 'gā nupe. —“Je rerowiar awi ipoire'ema 'gā a'jea futat iku' ajemogyau”, 'jau ki pēē imome'wau 'ga upe— 'jau Jejui 'ga 'gā nupe.

²⁴ A'erauwe Juā 'ga remimonofera 'gā awau ojewya nū. 'Gā orauwe Jejui 'ga Juā 'ga ree oporonupa ojepyriwara 'gā nupe:

—Amunawe'em ipe pejewau te maran peesak 'ga rai'i? Ma'ja 'jawe te 'ga rai'i? Sā'ā juowa wyytua erojetyjetyga erekoa. Nan tee 'ga rai'i? Naani te ra'u rai'i nū?— 'jau 'ga 'gā nupe. —Nanarūi futat 'ga. Ae 'jawe etee futat 'ga oje'ega nanē nū 'gā nupe. “Pejetywer awi pēpoiweramū 'ga imoiri futari pē nui”, 'jau 'ga pāwē pāwē 'gā nupe ai'ī. Kūima'eeteete 'gā

nupe, akotee ma'e 'gā nupe 'jau 'ga akou imome'wau ai'i— 'jau Jeju 'ga Juā 'ga mome'wau 'gā nupe.

²⁵—Taity esagea sipo 'ga wereko eruatau pēnemiesagamū rai'i? Naani. Taity esage ma'e 'gā nupe 'og esage pype etee. A'ere Juā 'ga nanarūi.

²⁶ Juā 'ga 'ā Jarejuwarete 'ga mome'wararetea ako rai'i.

²⁷ Ymā te 'ā Janeruwarete 'ga ka'arana kwasiarukari inuga Juā 'ga rur are rakue. “Koromū jeje'ega mome'wara 'ga' 'ea 'ga ikwasiarukaa inuga 'gā nupe rakue. “Je tomono 'ga ene renunewe kwe pewara 'gā mueapyou ene ree ene rura futarukaa 'gā nupe 'jau”, 'jau 'ga ikwasiaa inuga rakue— 'jau Jeju 'ga 'gā nupe.

²⁸—Aeypy 'gā wesageramū agawewi rakue. A'ere 'ā Juā 'ga 'gā nesagea apyraawi Jarejuwarete 'ga upe. A'ere 'awamū je rerowiaara 'ga amū Juā 'ga apyraawi. Imu'epyre'ema 'ga agawewi. A'etea 'ga je rerowiarāmū 'ga apyraawi Jarejuwarete 'ga upe. A'eramū nipo 'ga je rerowiarāmū ojejukau 'gā nee— 'jau Jeju 'ga 'gā nupe imome'wau u'ama.

²⁹ Aipo renupa 'gā amū 'jau Jarejuwarete 'ga upe:

—Ene te 'ā eneresage oree. Nitywi 'ga amū ene 'jawewara esage ma'erāmū— 'jau 'gā 'ga maku'iu.

Aipo 'ga renupara 'gā amū ka'aranūū pykarera. Mytuna 'gā nanē 'ga renupa nū. Aipo 'gā Jarejuwarete 'ga je'ega renupa rakue. A'erāmū 'gā ojepymāūkaa 'y pe Juā 'ga upe rakue. Mīmera 'gā juejue Jarejuwarete 'ga muorypa ajemogyau.

³⁰ A'ere amumera 'gā mara'neramū 'ga ree ojeupe Juā 'ga mome'urāmū:

—Iro Juā 'ga eromome'u oree— 'jau 'gā amara'neramū 'ga ree.

Fariseu 'gā amara'neramū 'ga ree, Moisesi 'ga remikwasiarer are moromu'jara 'gā nanē amara'neramū 'ga ree nū. Aipo 'gā nuapai futari mama'ea Jarejuwarete 'ga remifutar imū. A'erāmū 'gā wemifutar imū etee futat oporowykyau ajemogyau.

“Pejetywer awi pepoit”, Juā 'ga ojeupe 'eramū amara'neramū etee 'ga ree. Nopoiri futari 'gā otywer awi. A'erāmū 'gā awawe'em futat ojepymāūkare'ema Juā 'ga upe. Jeju 'ga remimome'ua miamū futat 'gā nafutari. A'erāmū Jeju 'ga 'jau 'gā nupe:

³¹—Ma'ja 'jawe te aipo 'gā?— 'jau 'ga 'gā nupe.

³²—Kunumiarūte'ema 'jawe 'gā niapyai ajemogyau. Nuenuwi 'gā ujara je'ega. Sā'ā kunumā “soo jarejerokyau 'jau' 'eramū, “Naani. Najeataweretei je”, 'jau etee 'ā ajaupe. “Pe'je ajee sajeawotee 'ū”, 'jau 'ā kunumā ajaupe nū. “Najeawoteeweri futari je, a'e ako je ko”, 'jau ete 'ā kunumā ajaupe. Nan tee futat aipo 'gā niapyai— 'jau Jeju 'ga imome'wau 'gā nupe.

³³—Juā 'ga 'ā ojemi'ware'ema akou Jarejuwarete 'ga upe oporogytau rakue. A'erāmū 'gā 'ā “Mama'eukwaawa 'ga wereko opir are ra'e”, 'jau 'gā 'ā 'ga upe, 'ga jemi'ware'emamū rakue— 'jau Jeju 'ga 'gā nupe.

³⁴—A'ere 'ā je ruri Juā 'ga rewiri nū. Je 'ā tekou teojere'emamū tejemi'waa Jarejuwarete 'ga upe teporogytau. A'erāmū 'gā 'ā “Emi'uu 'ā 'ga ra'e”, 'jau etee jee nū. “Itywet ma'e 'gā jekoty'aawa 'ga ra'e”, 'wyriararete upe ka'aranūū pykara 'gā jekoty'aawa 'ga ra'e”, 'jau etee 'gā jee nū— 'jau 'ga 'gā nupe. —Kunumī 'jawe 'gā. Juā 'ga ree ra'ne 'gā 'ā oporomutare'emamū rakue. 'Awamū 'gā 'ā je ree nanē oporomutare'emamū nū. Kunumī 'jawe 'ā 'gā jemogyi— 'jau 'ga 'gā nupe.

³⁵—Jarejuwarete 'ga je'eg imū jane mama'e aporamū, jane pyriwara 'gā nipo 'jau: “A'jea futat. Janeruwarete 'ga 'ā i'akwaap. Sā'ā 'ga remiayua 'gā neko esagea”, 'jau nipo 'gā jane, janereko esage resag ire— 'jau Jeju 'ga 'gā nupe u'ama.

Jeju 'ga ree jany kasiga reko'wokawet

³⁶ Anure fariseu 'ga amū 'ua, Simāo 'jawa 'ga 'ua Jeju 'ga upe oje'ega:

—Ekwaw iki ejemi'waa ore pyri— 'jau 'ga 'ga upe.

³⁷ A'erauwe Jeju 'ga wemiayua 'gā nerawau ojemi'waa Simāo 'ga rog ipe. A'erāmū kūjā tywera ēē 'ga rera renupa. “Au 'ga ruri 'ūina ojemi'waa 'ga pyri” 'e renupa. A'erauwe ēē ojany kasiga pyyka erua. Itasiga apopyra aipo jany kasiga ryrūa, aripasi 'jawa apopyra. A'erāmū ēē ipyyka erua enafu'ama Jeju 'ga py pyri.

³⁸ 'Ua ajaa'wau 'ga ree. A'erāmū ēē 'ga py pireita weay pyu etee futat. A'ere ēē 'ga py mukagi u'awa pyu etee futat. A'ere ēē 'ga py sīmytea. A'ere 'ga py sīmyter ire jany kasiga reko'woka 'ga py are 'ga pyeita ipyu. Werowiarāmū Jeju 'ga ēē tywera moia ēē wi. A'erāmū ēē 'ua otywera moiawamū ēē 'ga py sīmytea, jany kasiga reko'woka 'ga py are. ēē ku'ia ēē rerekou.

³⁹ A'erāmū “ekwaw iki ejemi'waa ore pyri”, 'ga upe 'jarera 'ga 'jau ojeupe: “A'jea futat sipo 'ga Jarejuwarete 'ga je'ega mome'wara 'ga? Ma'erāmū sipo ajee 'ga kūjā tywera nokwaawi?” 'jau 'ga 'ūina ojeupe.

⁴⁰ A'erāmū Jeju 'ga ikwaapa aipo 'ga 'e 'ga renamū. A'erāmū 'ga 'jau 'ga upe:

—Morogyta mū je amome'u enee, ki Simāo. A'eramū ene ikwaapa 'jau— 'jau 'ga 'ga upe.

—Ere ki ajee imome'wau jee 'wei— 'jau Simāo 'ga Jejuī 'ga upe.

⁴¹ A'erauwe Jejuī 'ga mama'e mū mome'wau 'ga upe aipo ojeupe 'erauwe:

—Kūima'e 'gā amū ka'aranūū jara 'ga upe 'jau: “Ka'aranūūa emut ape oree”, 'jau 'gā awau 'ga upe. A'erauwe ka'aranūū jara 'ga ka'aranūū muri 'gā nupe. Majepeja 'ga “kwaiwete emut jee”, 'jau 'ga upe. Ajepeja 'ga “ināinānī'ī etee emut jee”, 'jau 'ga upe.

—Ko'iko'i ete nipo ka'aranūū jara 'ga ruri ojewi erawarera 'gā nupe 'jau: “Pe'je je mepyau. Teka'aranūūa ako je omono pē nupe ai'i”, 'jau 'ga awau 'gā nupe.

⁴² —A'ere 'ga wi ka'aranūū rerawarera 'ga 'i etee 'ga upe: “Nitywi ka'aranūūa. Noreka'aranūūi we ore”, 'jau etee erawarera 'gā ka'aranūū jara 'ga upe.

—A'eramū ka'aranūū jara 'ga 'jau 'gā nupe: “Au'je nipo ajee 'ja. Nafutari je ka'aranūūa. Nafutaru'jawi je tejeupe pēē imepya nanē nū. Najerea'aru'jawi je 'awamū ka'aranūū are”, 'jau nipo 'ga 'gā nupe— 'jau Jejuī 'ga Simāo 'ga upe.

A'eramū Jejuī 'ga 'jau Simāo 'ga upe:

—Mō 'ga te ka'aranūū jara 'ga afutarete?— 'jau 'ga Simāo 'ga upe. —Ināinānī'ī erawarera 'ga? Tuwīuu erawarera 'ga te ra'u nū?— 'jau 'ga 'ga upe.

⁴³ A'erauwe Simāo 'ga 'i:

—Tuwīuu erawarera 'ga te 'ga futarete. Ināinānī'ī erawarera 'ga 'ga ināinānī'ī etee afutat— 'jau Simāo 'ga Jejuī 'ga upe.

—A'jea futat ere. Kwaiwete te 'ā ēē tywera. Ma'eramū 'ā ēē ojewi je imoiramū je futari nanimenime. Ināinānī'ī etee itywet ma'e 'gā ināinānī'ī etee je futaa otywera moir ire— 'jau 'ga 'ūina imome'wau 'ga upe.

⁴⁴ Aipo 'e re Jejuī 'ga ojerowaka kūjā ēē ree. Ēē ree ojerowag ire 'ga oje'ega Simāo 'ga upe:

—Ereesak te 'aga kūjā ēē ra'e?— 'jau 'ga Simāo 'ga upe. —Sipokwaap te 'ā jane jarejuog ipe jaresea 'oga jara 'ga remiyuwa jarejepyje— 'jau 'ga Simāo 'ga upe. —A'ere ako nereapoi jee nan ko. A'ere 'ā ko kūjā ēē ruri weay pyu je pyeita. A'ere 'ā ēē jepy pirei re u'awa pyu etee futat jepy mukaga nū.

⁴⁵ Eje'wyr ipe je waēmamū ako najeretywape pyteri ape ko. Jarejemiapo 'ā nereapoi jee— 'jau 'ga Simāo 'ga upe. —A'ere 'ā koa kūjā ēē ruri owaēma jee jepy sīmytea. Jepy sīmyteru'jau'japa.

⁴⁶ Janya ako ene imonowe'em jeakag are ko. A'ere 'ā ēē jēmī jany monoi jepy are— 'jau 'ga Simāo 'ga upe.

⁴⁷ —Ēē tywera 'ā kwaiwete ēē rekoramū ra'e jepi. Ma'eramū 'ā ēē otywera ojewi je imoiramū je futari je rerekou— 'jau 'ga Simāo 'ga upe imome'wau.

⁴⁸ A'ere Jejuī 'ga 'jau kūjā ēē upe:

—Enetywera ako je omoit ene wi ko— 'jau 'ga ēē upe.

⁴⁹ Aipo Jejuī 'ga 'eramū 'ga pyriwara 'gā 'jau ajaupe:

—Aw'ja a'eramū ēē tywera moia ēē wi 'ū?— 'jau 'gā ajaupe. —Janeruwarete 'ga etee te wapo nanuara aetywera omoit ae wi— 'jau 'gā ajaupe, “omoit je ako enetywera ene wi ko” 'e renuw ire 'gā 'jau.

⁵⁰ A'ere Jejuī 'ga 'jau ēē upe:

—Je rerowiat te 'ā ape ekou rai'i. A'eramū je 'agamū tejerowiamū ene katu'oka enetywera pe'au ene wi— 'jau 'ga kūjā ēē upe.

A'eramū Jejuī 'ga 'jau ēē upe:

—Ere ewau eje'wyr ipe nū. Jaruete ene 'awamū. Ere ewau ejewya eje'wyr ipe. Enepy'a'wyt kasi ewau ekou ne— 'jau 'ga ēē upe oje'ega.

8

Kūjāmera 'gā Jejuī 'ga rupi 'gā ataawet

¹ Anure Jejuī 'ga awau akou watau amunawa moyka 'gā mu'jau:

—Pejetywer awi pēpōriweramū Janeruwarete 'ga imoiri pē nui. A'eramū 'ga pē mogyau wemiayuwamū— 'jau 'ga awau akou 'gā nupe oporogyta. —Pejemogy esage ki Jarejuwarete 'ga remifutar imū etee futat— 'jau Jejuī 'ga 'gā nupe akou.

'Ga remimu'e 'gā awau 'ga rupi. Tusi 'gā awau 'ga rupi. Tusi 'gā etee 'ga amū'ē wemiayuwamū rakue. A'eramū 'gā akou 'ga rewiri etee futat.

² Kūjāmera 'gā nanē awau 'ga rewiri nū. Kūjāmera 'gā nanē 'ga ikatu'oka rakue nū. Ojero'wu ma'e 'gā nanē 'ga ikatu'oka rakue, mama'eukwaawa rerekwara ēē retee rakue. A'eramū 'gā awau 'ga rupi. Okatu'og ire 'gā awau 'ga rupi, mama'e apoawamū akou 'ga upe, 'ga poaa akou. Ajepeja ēē rera Maria. Mari ēē rera mukūi. Matarena 'jau ēē upe. Janeruwarete 'ga okatu'oge'emamū ēē pirowara kwaiwete ēē ree rakue, sete ēē tywera rakue. A'ere Jejuī 'ga imoia ēē wi. A'eramū ēē awau 'ga rewiri.

³ Ajepeja ēē rera Juana. Ēē mena 'ga rera Kusa. Erote 'ga roga raarana 'ga poromū Kusaramū. Jejuu 'ga okatu'og ire Juana ēē awau 'ga rupi. Ajepeja ēē rera Susana. 'Gā pytuna 'gā awau 'gā nupi. Kwaiwete futat kūjāmera 'gā pytuna awau 'gā nupi.

Okaraemā 'gā imonou Jejuu 'ga upe. Ka'aranūū, taity, temi'uram. Mīnamū kūjāmera 'gā imonou 'ga upe 'ga poaa.

Mama'e a'yi tymawet

(Mateu 13.1-23; Maku 4.1-20)

⁴ Kwaiwete 'gā 'ua ajatykau Jejuu 'ga resaka. Amunap tesirūmer awi 'gā 'ua ajatykau 'ga ree. 'Gā jatykapaw ire Jejuu 'ga mama'e mū mome'wau 'gā nupe 'gā mu'jawamū:

⁵—Kūima'e 'ga amū juowuuran a'ŷja momopoa oko pe. A'eramū a'ŷja mū u'aa pe pe 'ga wi. A'eramū pe rupi oo ma'e 'gā a'e are opyruga 'ga wi. Wyrā'ia nanē futat 'ua ojypa i'wau 'ga wi nū.

⁶ Amumera ywy a'wyre'ema pype u'aa 'ga wi. A'eramū nipo opopoa futat numiamū. A'ere nipo ita rakuwa ijukai etee. Nitywi wejue 'yja jupe. A'eramū awau owaēma kamēšetei ita upe. A'eramū ita rakuwa ijukau etee.

⁷ Amumera u'aa juemy pype. A'eramū jua imoteu etee 'ga wi. Ikaapire'ema pype u'aa 'ūina. A'eramū jawaiwa iapisau etee.

⁸ Amumera a'ŷja te aje u'aa wwy katurama pype. A'eramū opopoa. A'eramū futat nipo awau u'aramū. Kwaiwete u'aramū. Aipo 'ywa sēg i'aa 'ga upe— 'jau Jejuu 'ga 'gā nupe imome'wau.

—Ee pejepeapoweramū ki peapyaka katu jeje'eg are— 'jau Jejuu 'ga 'gā nupe.

⁹ A'eramū Jejuu 'ga remimu'e 'gā 'jau 'ga upe:

—Norokwaawi ore. Ma'ja are te ore mu'e ape poromū?— 'jau 'gā 'ga upe.

¹⁰ A'eramū Jejuu 'ga 'jau 'gā nupe:

—Jeruwarete 'ga je mut pē mu'jau morogyta yau are. 'Awamū Jeruwa 'ga pē mogyi wemiayuwamū jeje'ega renupa katu katuaramū, a'e je pē nupe. A'ere je morogytai etee imome'ui pē nupe pē mu'jaawamū ee. Kasi a'e pe tesirūmera 'gā we, ikwaawi erujewi ne, a'e je. Jeje'eg are eapowere'ema 'gā wanup futat jeje'ega numiamū. A'ere 'gā naeapyoi futari ee. Amā'jāu agawewi 'gā jeremiapofer are. A'etea 'gā naeapyoi ee. Ma'eramū je 'ā morogytau etee imome'ui pē nupe pē mu'jawamū. Imome'u esage re 'gā neapyo ekoeteramū ajemogyau ee ne— 'jau Jejuu 'ga 'gā nupe.

¹¹—Peapyaka jeje'eg are. Tamueapyo pēē teje'eg are 'jau. Sā'ā y'wa a'ŷja mū 'ara pe pe 'ga wi. A'ea 'ā wyrā'ia 'ua i'wau etee.

¹² Nan tee futat Janerwarete 'ga je'ega renupara 'gā amū. 'Ga je'ega renuwi futari numiamū. A'ere nipo 'gā naeapyoi ee. A'eramū mama'eukwaawa 'wyrā'ia 'ua erowiarukare'ema 'gā nupe. "Perowiar awi", 'jau nipo 'ua 'gā nupe. A'eramū nipo 'gā momoirukaa je rerowiar awi— 'jau Jejuu 'ga 'gā nupe.

¹³—Sā'ā amumera y'wa a'ŷja 'ara wwy a'wyre'ema pype ipopora numiamū. A'eramū 'ā jawaiwa ijukau etee nū. Nan tee futat nipo 'gā amū je rerowiaa numiamū. A'ere nipo amumera 'gā nuri, "Iro ererowiat aipoa?" 'jau nipo 'ga 'ua 'gā nupe. A'erauwe nipo 'gā poiri je rerowiar awi, je upe oporogyta awi. "Nia'wyrī 'ga porogyta ra'e", ojeupe 'erauwe nipo 'ga poiri je rerowiar awi— 'jau Jejuu 'ga 'gā nupe u'ama imome'wau.

¹⁴—Amumera y'wa a'ŷja u'aa ju pype. A'eramū opopoa futat numiamū. A'ere jua imoteu etee. Nan tee futat nipo 'gā amū jeje'ega renuwaiwi etee. A'ere nipo 'gā wemifutar are etee wea'aramū akou nū. Wea'aru 'jawe'emamū nipo 'gā jeje'eg are. Ojemuorypaw are etee nipo 'gā wea'aramū akou. Okaraemā momytun are etee nanē nipo 'gā wea'aramū akou nū. A'eramū futat 'gā wea'aru 'jawe'emamū nipo 'gā jeje'eg are. Jeremifutar imū nipo mama'e apowe'em futat— 'jau Jejuu 'ga 'gā nupe u'ama imome'wau.

¹⁵—Amumera y'wa a'ŷja mū nipo u'aa wwy katurama pype. A'ea nipo awau waranupa u'aramū. Nan tee futat nipo Ku'jywa 'ga je'ega renupara 'gā neapyoramū ajemogyau ee. Wago'oramū miamū 'gā nopoirā'uweri futari je rerowiar awi. Ojemogyppyka etee futat nipo 'gā ajemogyau je ree. Jarejuwarete 'ga pājē mū etee futat nipo 'gā mama'e esage apou ajemogyau— 'jau Jejuu 'ga 'gā nupe u'ama imome'wau, 'gā mu'jau 'Uwarete 'ga je'ega renuw are.

Arāparīn

(Mateu 5.14-16; Maku 4.21-25)

¹⁶ A'eramū 'ga 'jau 'gā nupe nū:

—Peenup katu katu ki je'ea. Nomonyga'uweri ae arāparīna mū im'ina imima mama'e 'ag are. Imonyg ire ae imonoi jakatupe te im'ina ajuesawamū te. A'eramū ose ma'e 'gā esaka tenamū. Nan tee futat kasi jeje'ega pemim ine.

¹⁷ Mama'e jemima 'ā nepekwaawi. A'ere nipo anure te pekwaap. Sā'ā ae mama'e monoa imima im'ina. A'eramū 'ā ae mū esake'ema. A'ere 'ā ae anure esaka ajaupe. Nan tee futat pēē. 'Awamū jeje'ega nepekwaawi. A'ere anure te nipo pekwaap ikwaapare'emamū.

¹⁸ Peenup katu katu ki je'ea. Jeje'eg are eapyowet ma'eramū Janeruwarete 'ga pē mueapyoi ee. A'ere 'ga jeje'eg are eapyowere'ema 'gā namueapyoi ee. Ee 'gā neapyoweramū etee te 'ga 'gā mueapyoi ee— 'jau 'ga 'gā nupe. —A'ere ee eapyowere'ema 'gā amu'eawera moka'jamawi etee— 'jau Jejui 'ga 'gā nupe u'ama imome'wau.

Jejui 'ga y ēē, 'ga rewirera 'gā netee
(Mateu 12.46-50; Maku 3.31-35)

¹⁹ 'Ga porogyta 'ga 'amamū 'ga y ēē 'ua, 'ga rewirera 'gā netee 'ua owaēma 'ga upe. A'ere mytuna 'gā nuwi 'ga porogyta renupa. A'eramū 'ga y ēē 'ure'ema 'ga rerowyka.

²⁰ A'eramū 'ga amū 'jau Jejui 'ga upe:

—Eney ēē 'ut owaēma janee. “Taporogyta kīā upe 'jau”, e'i eneya. Enerewirera 'gā netee ēē ruri ra'e— 'jau 'ga Jejui 'ga upe.

Aipo ojeupe 'eramū Jejui 'ga 'jau 'ga upe:

—A'jea— 'jau 'ga 'ga upe.

²¹ A'eramū 'ga 'jau ojeppyriwara 'gā nupe:

—Jeruwarete 'ga je'ega renuparamū jerewirera 'jawe futat pejemogy jee— 'jau 'ga 'gā nupe. —Kūjāmeramū nanē Jeruwarete 'ga je'ega renuparamū jey 'jawe pejemogyau jee nū— 'jau Jejui 'ga u'ama 'gā nupe.

Ywyrūu muojeawet
(Mateu 8.23-27; Maku 4.35-41)

²² Jejui 'ga wemimu'e 'gā neru'aa erawau erekou eroyaapa yarūu pype.

—Soo jareyaapa 'jau— 'jau 'ga 'gā nupe.

A'eramū futat 'gā awau oyaapa.

²³ Oyaapaw ipe Jejui 'ga oseā 'upa yarūu pype. 'Ga set 'ga ruwamū ywyrūu 'ua 'gā nupe. A'eramū 'y monou yara pype 'gā nupe. Yarūu matyneema werewi 'y pyu 'gā nupe.

²⁴ A'eramū 'gā Jejui 'ga momaka:

—Ku'jyp! Ere ejua epaka kūi! Sapap jane kūi— 'jau 'gā 'ga upe.

A'erawue futat 'ga fu'ami oje'ega ywyrūu upe, 'y rajapetega upe nanē nū. A'eramū futat ywyrūu wojeramū. 'Y rajapetega nanē wojeramū nū.

²⁵ A'eramū 'ga 'jau 'gā nupe:

—Ma'eramū te nepejemogyppygi etee je ree? Nepeesagi nipo pejejepype je rekoa ki sa? Je te 'ā areko pēē— 'jau 'ga 'gā nupe.

A'eramū 'gā oporesagamū etee 'ga ree.

—Ma'e pājē 'ga te jane sireko jarejepype nū'ū?— 'jau etee 'gā ajaupe. —Ywyrūu te 'ā 'ga amuojet erujewi jarejewi a'i kūi. 'Y rajapetega nanē 'ga 'ā imuojea nū— 'jau 'gā ajaupe. —Ma'e pājē 'ga te nū'ū? Naesagi pa je 'ga amū je'ega ywytu upe jepi nū, ywytu muojera erujewi jepi nū— 'jau 'gā ajaupe oporesagamū 'ga ree. —Janeruwarete 'ga te wapoukat 'ga upe nū'ū— 'jau 'gā ajaupe.

Mama'eukwaawa rerekwat
(Mateu 8.28-34; Maku 5.1-20)

²⁶ Garireja ypiauu raapa 'gā awau akou. Kwe katywara 'gā 'wyrā katy 'gā awau akou. Gerasa 'jau 'gā oje'wyrā upe.

²⁷ Peuwara 'ga amū 'ua yar awi 'ga ēm ppyrauue 'ga repejāna. Mama'eukwaawa rerekwara 'ga 'ua 'ga repejāna. Aipo 'ga akou imara'ne ma'e 'jawe. Waitye'eme 'ga akou. Namutat 'ga akou. Nokoī 'ga 'og ipe. Tywy 'arimū etee futat 'ga akou.

²⁸⁻²⁹ Mama'eukwaawa 'ga pyyka 'ga rerekou. A'eramū peuwara 'gā okyjau 'ga wi. A'eramū 'gā 'ga kupyfaa itajuu pyu. A'ere 'ga imopeni etee. A'eramū mama'eukwaawa 'ga rerawau ejaa im'ina ae rekwawe'em ipe. A'e 'ga poromū 'ut Jejui 'ga resakawe u'aa 'ga rowase. A'eramū 'ga pirewara wafukaita Jejui 'ga upe:

—Jejui. Ku'jywa 'ga ra'ya'ā ene. Maran te ore rereko ape? Ore rereko tywet kasi ape ne— 'jau mama'eukwaawa Jejui 'ga upe.

Kūima'e 'ga wi uēme'emawe 'jau poromū 'ga upe, “ore rereko tywet kasi ape ne”, 'jau 'ga upe.

³⁰ —Ma'ja te enerera?— 'jau 'ga mama'eukwaawa upe.

—Kwai 'jau 'gā oree— 'jau etee 'ga upe.

Kwaiwete 'ga pirewara. A'eramū 'gā 'ga renūina, Kwai 'jau etee 'gā 'ga upe.

³¹ —Ore monoukat kasi ape ore rereko tyweaw ipe ne— 'jau 'ga pirewara Jejui 'ga upe. —Tajaurana ywyteripe ore mono ape ore mogyau— 'jau 'ga upe.

³² Aipo 'eramū tajaurana ajemogyau muku'i te ojemi'waa. "Tajaurana pype ore mono ape ore mogyau" 'erauwe 'ga 'jau jupe:

—Pe'je ajee pejewau— 'jau 'ga 'ga pirewara upe.

A'erauwe awau.

³³ A'eramū tajaurana mama'eukwaawa ojepype ijegamū erowawaka erajemogyau. A'eramū erawau enujāna erojyapa wyy'amuku rupi eropopoa erawau eropapa 'y pe.

³⁴ A'ere tajauran are omaenun ma'e 'gā awau imome'wau 'gā nupe:

—Jeju'i 'ga 'ga pirewara omono tajaurana pype ko. A'eramū opapa ko— 'jau 'gā awau imome'wau 'gā nupe 'gā moymoyka.

³⁵ A'eramū 'gā awau esaka. Awau 'gā amā'jāu mama'eukwaawa rerekwarera 'ga ree. Irāā'ā 'ga renamū 'ga apygamū. A'eramū futat 'gā mopy'a'wya etee.

—Nanarū'i 'ga rekoi jepi— 'jau 'gā ajaupe. —A'ere 'ga 'ā ojewi imoir ire 'ga rekoi ojekatu'oka. Ojeyrūwunepa 'ga 'ā akou 'awamū— 'jau 'gā ajaupe.

³⁶ 'Ga resakarera 'gā imome'wau tesirūmera 'gā nupe:

—Jeju'i 'ga mama'eukwaawa omoi't 'ga wi ai'i. A'eramū 'ga 'awamū ojekatu'oka akou— 'jau 'gā 'gā nupe.

³⁷ A'eramū peuwara 'gā okyjau Jeju'i 'ga wi. Nokwaawi wejue 'gā 'ga porowykyka. 'Ga pājēa nanē 'gā nokwaawi nū. A'eramū 'gā okyjau Jeju'i 'ga wi. A'eramū 'gā 'ga monou ojewi.

—Ere ejepe'au ore wi, ki Ku'jyp— 'jau 'gā Jeju'i 'ga upe.

A'erauwe 'ga awau u'aa yar ipe nū. A'eramū futat 'ga awau oyaapa nū.

³⁸ —Too ene rupi 'jau— 'jau mama'eukwaawa rerekwarera 'ga Jeju'i 'ga upe.

A'ere 'ga nuerooi 'ga.

³⁹ —Naani. Ere ewau eje'wyr ipe nū. Ekatu'okawera ekwap imome'wau ekou 'gā nupe— 'jau 'ga 'ga upe. —"Janeruwarete 'ga je katu'ok", ere ki epytuna 'gā nupe— 'jau 'ga 'ga upe.

A'erauwe 'ga ojewya awau oje'wyr ipe nū. A'eramū futat 'ga okatu'okawera mome'wau akou 'gā nupe:

—Janeruwarete 'ga je katu'ok ai'i. A'eramū 'ga 'agamū je katu'oka je mogou— 'jau 'ga 'gā nupe. —A'eramū je tejua tekou pē pype nū, mama'eukwaawa tejewi enuēm ire nū— 'jau 'ga 'gā nupe.

A'eramū 'ga awau akou amunawarete pyterimū imome'wau peuwara 'gā nupe.

Kūjā ēē mū kūjāmuku ēē retee

(Mateu 9.18-26; Maku 5.21-43)

⁴⁰ A'eramū Jeju'i 'ga awau ojewya oyaapa nū. Mytunū' 'gā ajatykau 'upa 'ga renune. A'eramū 'gā aku'iramū 'ga ree, 'ga ruramū.

⁴¹ A'eramū kūima'e 'ga amū 'ua owaēma Jeju'i 'ga upe. Jairo 'ga 'ua wapyka wenupy'āu 'ga rowase. Esage ma'e 'ga te Jairo 'ga. Judeu 'gā jatykaawa raarana 'ga. Jeju'i 'ga porogyta 'ga erowiaa. A'eramū 'ga 'ua wapyka wenupy'āu 'ga rowase, oje'ega 'ga upe.

—Ejot je'wyr ipe. Jera'jyra nipo 'ā amanū.

⁴² Ejot ēē resaka jee. Nirū'i jera'jyra ēē. Kūjāmuku'ia ēē— 'jau 'ga Jeju'i 'ga upe.

—Ere ajee iruukwe. Taesak ēē enee 'jau— 'jau Jeju'i 'ga 'ga upe.

A'eramū 'ga awau 'ga rupi. Kwaiwete 'gā awau 'gā newiri. Ojopyppypyka 'gā awau.

⁴³ Nan 'gā waw ipe kūjā ēē mū 'ua Jeju'i 'ga rupisika. Ojero'wu ma'e ēē 'ua 'ga rewiri. Tusi kwara ēē imu'aa akou ojero'wau. Nuogi futari ēē rya ēē wi. Ymā te ēē rekoi rakue. Morofuanugara 'gā nupe ojesaukaa rakue numiamū. A'ere 'gā nokwaawi ēē karuara. Ajepeja 'ga upe ēē awau ojesaukaa nū. A'ere 'ga nānēwējēmi nokwaawi ēē wi nū. A'eramū morofuanugara mepyetea ēē ka'aranū mateepapa ekoete ēē wi. A'ere ēē nojekatu'ogi futari. Nitywi futari muaga ēē upe.

⁴⁴ A'eramū ēē 'ua 'gā ata pype Jeju'i 'ga rewiri. "Kīā raity ppygamū tajekatu'ok 'jau kwy", 'jau ēē ojeupe. A'eramū ēē 'ua 'ga rupisika, 'ga raity pypireme'ywa ppyka. A'erauwe ēē rya uoka ēē wi.

⁴⁵ A'eramū Jeju'i 'ga 'jau 'gā nupe:

—Aw'ja te owyk jeraity are ra'e?— 'jau 'ga 'gā nupe.

—Tee. Naje rūi— 'jau tee 'ga rewiri oo ma'e 'gā 'ga upe.

A'eramū Pedro 'ga 'jau 'ga upe:

—Kwaiwete te 'gā 'ā ki jā. A'eramū 'gā okwaapawe'emamū. Ojopyppypyk te 'gā 'ā— 'jau Pedro 'ga 'ga upe.

⁴⁶ A'ere Jeju'i 'ga 'i 'ga upe:

—Naani. Akwaap je 'ga amū tepyyga. Jepājēa oo oporokatu'oka— 'jau etee Jeju'i 'ga.

⁴⁷ A'erauwe ijaruete ma'efera ēē 'jau ojeupe: "Najemima'uweri je kīā wi. Okwaap futat kīā", 'jau ēē ojeupe. A'eramū ēē awau wapyka wenupy'āu 'ga rowase. Oyyita ēē ojemome'wau 'ga upe:

—Je ako awyk eneraity are ko. Ymã te jerya nuogi je wi. A'ere eneraity are je wygauwe iogi je wi ko— 'jau êê 'ga upe.

⁴⁸ A'eramũ Jejuí 'ga 'jau êê upe:

—Je rerowiat wejue te 'ã ape ra'e jepi. A'eramũ je ako ene katu'oka ko— 'jau 'ga êê upe. —A'eramũ ki ene epy'ata'waramũ ekou. Enejaruete ene ekou— 'jau 'ga êê upe.

⁴⁹ Êê upe Jejuí 'ga porogyta 'ga 'amamũ, Jairo 'ga remiayuwa 'ga amũ 'ua 'ga rewiri.

—Amanũ enera'jyra ko. Au 'je 'ga reruri re— 'jau 'ga 'ua 'ga upe.

⁵⁰ A'ere Jejuí 'ga enuwi 'ga upe 'ga 'ea. A'eramũ 'ga 'jau 'ga upe:

—Ene'arasig awi. Tejerowiamũ je enera'jyra moferawi enee nũ— 'jau 'ga 'ga upe.

A'eramũ 'ga awau 'ga rupi.

⁵¹ 'Og ipe owaêmawe Jejuí 'ga 'jau wewiri oo ma'e 'gã nupe:

—Peu etee futar iki pejup. Ore tee futat oroo orosou êê resaka— 'jau 'ga 'gã nupe.

A'eramũ 'ga rupi oo ma'efera 'gã ukupepe etee futat 'upa. Pedro 'ga, Tiago 'ga, Juã 'ga, kũjãmuku êê y êê, êê ruwa 'ga. Mĩmera 'gã etee awau osou Jejuí 'ga rupi êê resaka.

⁵² Êê pytuna 'gã ajaa'wau êê ree. A'eramũ Jejuí 'ga 'jau 'gã nupe:

—Pejoo'ow awi êê ree. Oset tee êê 'upa.

⁵³ A'eramũ 'gã 'jau 'ga upe:

—Ene'me awi nũ'ũ. Amanũ futat akiko— 'jau 'gã 'ga upe.

—Amoferap nipo je êê re'ã", 'jau 'ga ojeupe. A'eramũ 'ga poromũ 'jau 'gã nupe, "Oset tee êê 'upa", 'jau etee 'gã 'gã nupe.

A'eramũ 'ga 'gã mũ'jãu ojewi.

⁵⁴ A'eramũ 'ga awau amanũ ma'efera êê poppyka.

—Ere ejua ewya, ky'ri— 'jau 'ga êê upe.

⁵⁵ A'eramũ futat êê oferapa. A'erauwe futat êê afu'ama. A'ere 'ga 'jau êê y êê upe:

—Pe'je êê mojemi'waa— 'jau 'ga êê upe.

A'erauwe êê wa'yra êê mojemi'waa.

⁵⁶ Êê ferawamũ êê jara 'gã oporesagamũ êê ree. A'eramũ futat êê ruwa 'ga 'jau ojeupe: —Amanũ ako jera'jyra ako re'ã. A'ere pa 'ga 'ã jera'jyra moferawi jee nũ", 'jau 'ga ojeupe.

A'eramũ Jejuí 'ga 'jau 'gã nupe:

—Je mome'u kasi ape kwe pe 'gã nupe ne, 'au je iapoawera ne— 'jau 'ga 'gã nupe.

9

Jejuí 'ga wemimu'e 'gã monoawet

(Mateu 10.5-15; Maku 6.7-13)

¹⁻² Anure 'ga wemimu'e 'gã majatykau, tusi 'gã majatykau. A'eramũ 'ga opãjê monou 'gã nupe:

—Pe'je pejewau je mome'wau kwe pewara 'gã nupe. Mama'eukwaawa ki pemoit 'gã nui jeje'eg imũ. Pekatu'og iki 'gã je 'jawe futat. "Je katu'og ape" eramũ Ku'jywa 'ga pê katu'ogi pê monou wemiayuwaamũ, pe'je ki tesirũmera 'gã nupe— 'jau Jejuí 'ga 'gã nupe.

³ —Pejemama'e mũ rerawawe'em futat pejejeupe. Ywyraa miamũ futat erawawe'em pejepo pe. Ka'aranũ ryrũa nanê erawawe'em nũ. Pejememi'urama nanê pêê erawawe'em futat nũ. Ka'aranũ miamũ pêê erawawe'em. Pejejyrũm rerawawe'em futat 'jau. Pejepit arewara etee futar iki peroo. Nan etee te futar iki pekwap.

⁴ 'Gã 'wyrarete upe pejewaẽma majepeja 'oga pype etee futat ki pejup. Peo kasi kwe pe pejejemogyau ne.

⁵ Pejeporogyta renuwe'emamũ pêê kamẽsiete pejewau amunaw awi. Ajepeja 'gã 'wyrarete pe pejewau nũ. 'Gã nui pejewau ki pejepypapaawa penupãnupã, 'jya motototoka juu. "Janeruwarete 'ga 'ã pê katu'og are ifuwet numiamũ. A'ere 'ã nepefutari etee," 'jau ki pêê pejewau pejejemogyau pejepypapaawa nupãu ajuee 'gã nupe— 'jau Jejuí 'ga 'gã nupe.

⁶ A'eramũ 'ga wemimu'e 'gã monou mukũi juejue amunawa moymoyka. Jejuí 'ga ree morogyta esagea 'gã awau imome'wau 'gã nupe. Ojero'wu ma'e 'gã katu'oka nanê nũ.

Juã Batista 'ga ree Erote 'ga rea'aawet

(Mateu 14.1-12; Maku 6.14-29)

⁷⁻⁹ Anure Erote 'ga, Garireja wyw pewara 'gã 'wyrara 'ga, Jejuí 'ga rera renupa. 'Ga amũ Jejuí 'ga remiapofera mome'wau 'ga upe. A'eramũ 'ga opy'a'wyrãmũ 'ga rer are. A'eramũ 'ga 'jau wemiayuwa 'gã nupe:

—Awýja te poromũ ako?— 'jau 'ga 'gã nupe.

A'eramũ 'gã amũ 'jau:

—Amanũ ma'efera 'ga amunipo 'ã 'ut oferapa rai'i nũ kũi— 'jau 'gã 'ga upe.

A'eramũ amumera 'gã 'jau:

—Nipo ajee Juā Batista 'ga 'ut oferapa rai'i nū 'ja. Maranamū nipo Eliasi 'ga kūi— 'jau 'gā 'ga upe.

A'eramū 'gā amū 'jau:

—Tee nū'ū. Amutee 'ga te nipo nū'ū— 'jau 'gā 'ga upe. —Naokoiwera 'gā nūi nipo nū'ū. Janeruwarete 'ga je'ega mome'wara 'ga amū te nipo nū'ū— 'jau 'gā 'upa 'ga rera renupa.

Aipo 'gā 'e 'gā jemogyramū Erote 'ga 'ūina etee futat 'gā je'ega renupa. A'eramū 'ga 'jau:

—Tee. A'jea futat nipo. Najūā Batista 'ga rūi. Je te ako 'ga ajukaukat ai'i. Ajuwonogukat 'ga ai'i. A'eramū sipo awyja 'wei?— 'jau 'ga 'ūina aipo 'eramū.

“Aesak werewi pa je 'ā 'ga nū”, 'jau 'ga 'ga rera renupa 'ūina. A'ere 'ga nuesagi 'ga.

Kanape'i me'yitawet

(*Mateu 14.13-21; Maku 6.30-44; Juā 6.1-14*)

¹⁰ Anure Jejuī 'ga remimonofera 'gā 'ua ojewya nū. Imome'wau 'ua Jejuī 'ga upe:

—Kwe pe ako ore mono ape ejemome'waukaa 'gā nupe ai'i. A'eramū ore ojero'wu ma'e 'gā katu'oka arakou ene 'jawe ai'i. Mama'eukwaaawa nanē ore imoia arakou 'gā nui ai'i nū— 'jau 'gā 'ua wekwawera mome'wau Jejuī 'ga upe.

Imome'upaw ire 'ga 'gā nerawau ajepeja amunaw ipe, Pesaita 'jaw ipe nū. Kwaiwete tekotee 'gā nejaa. 'Gā tee awau. Wemimu'e 'gā tee futat 'ga erawau numiamū.

A'ere tekotee 'gā 'ga o kwaawi futari.

¹¹ A'eramū 'gā 'jau ajaupe:

—Oo futat 'ga ra'e nū'ū— 'jau 'gā ajaupe. —Pe'je soo 'gā newiri— 'jau 'gā ajaupe.

A'eramū 'gā awau 'gā newiri. Ojeupe 'gā waēmamū Jejuī 'ga oporogytau 'gā nupe:

—Janeruwarete 'ga afutat pejetywer awi pepoira. Pejetywer awi pepoiramū 'ga pē monoi wemiayuwamū. Najuejut etee futat 'ga pejetywer awi pepoira futari— 'jau 'ga 'gā nupe.

'Gā nupe oporogytapaw ire, 'ga ojero'wu ma'e 'gā katu'oka nū.

¹² Kaaruwamū 'ga remimu'e 'gā 'jau 'ga upe:

—Emono 'gā amunaw ipe 'gā nemi'urama murukaa 'gā nupe. Nitywi mama'ea 'au. “Pe'je pejewau mama'e mua pejejeupe. Peu pekwap pejesea”, ere 'gā nupe— 'jau 'gā Jejuī 'ga upe.

¹³ A'ere Jejuī 'ga 'i etee 'gā nupe:

—Naani. Pēē futat mama'ea pemono 'gā nupe— 'jau etee 'ga 'gā nupe.

—Nitywi mama'ea. Mukū'i'i etee ipira'ia. Sīku etee nanē kanape'ia nū. A'ea niapoi 'gā nupe. Eneporomuriwet nipo mama'e mua 'gā nupe? Kwaiwete te 'ā 'gā a'i kūi— 'jau 'gā 'ga upe.

¹⁴ Kwaiwete 'gā. Sīku miu te kūima'efera 'gā nuri 'upa 'ga porogyta renupa. A'eramū 'gā poromū 'jau 'ga upe: “Niapoi mama'ea 'gā nupe”, 'jau 'ga upe.

A'ere Jejuī 'ga 'i etee 'gā nupe:

—Naani. Pemojo'ok 'gā. Kwaiwete 'gā 'ā. A'eramū pēē 'gā mojo'oka. 'Au sīkwēta 'gā pemuapyk. Peu sīkwēta 'gā muapyka 'jau. Peu nanē nū. Peu nanē nū 'jau 'gā muapykapap— 'jau 'ga 'ga nupe.

¹⁵ A'erauwe futat 'gā 'ga je'ega rupiwewe futat 'gā muapyka.

¹⁶ A'ere Jejuī 'ga kanape'i pyyka opo pe ipira'i reewe. A'ere 'ga eramā'jāu ywau opo pe. A'eramū 'ga oje'ega 'Uwarete 'ga upe:

—Au'jete mama'ea eremut ore. Ene te 'ā eneresage ore— 'jau 'ga 'Uwarete 'ga upe.

A'ere 'ga kanape'i mowowoka ipira reewe imopēpena 'gā nupe. A'ere 'ga imonou wemimu'e 'gā nupe.

—Pe'je imonou 'gā nupe— 'jau 'ga 'gā nupe.

A'eramū futat 'gā imonou 'gā nupe. 'Gā nupe omonorauwe ojeme'yita.

¹⁷ A'eramū 'gā ojomoyka kanape'i are ipira'i reewe. A'eramū futat 'gā wewegamū.

—Janerewek jane ki 'ei— 'jau 'gā ajaupe. —Niapoi agawewi akiko. A'etea ojeme'yi janee 'ga omowowogamū— 'jau 'gā ajaupe. —Janeruwarete 'ga te ome'yi janee. A'eramū 'ā jarejewegamū jarejemogyau— 'jau 'gā ajaupe.

Ojemi'wapaw ire 'gā emyrera monou ijaga yrū pype. Tusi yrupemū matyneema. 'Gā jemi'wapaw ire 'ga 'gā monou 'gā 'wyr ipe nū. Opy'araypare'emamū 'gā awau ajemogyau oje'wyr ipe nū.

Pedro 'ga Jejuī 'ga mome'uawet

(*Mateu 16.13-20; Maku 8.27-30*)

¹⁸ A'ere anurenure'i Jejuī 'ga 'ūina oporogytau 'Uwarete 'ga upe ojete'e'i. 'Ga porogytaaw ipe 'ga remimu'e 'gā 'ua owaēma 'ga upe. A'eramū 'gā 'ga rerowyka. A'eramū Jejuī 'ga 'jau 'gā nupe:

—Mā'ja e'i te tekotee 'gā jee jepi?— 'jau 'ga 'gā nupe.

¹⁹ —“Amanū ma'efera 'gā amū te nipo 'ā 'ut oferapa rai'i nū”, e'i 'gā enee jepi. Amumera 'gā: “Juā Batista 'ga te nipo 'ā 'ut oferapa rai'i nū”, 'jau 'gā enee jepi. Amumera 'gā: “Eliasi

'ga nipo 'ā 'ut ojewya rai'i nū", 'jau enee jepi. Amumera 'gā: "Janeruwarete 'ga je'ega mome'warera 'gā amū nipo 'ā 'ut oferapa rai'i nū", 'jau 'gā enee jepi— 'jau 'gā 'ga upe.

²⁰—Pēē nū. Ma'ja pe'je ajee jee jepi nū'ū?— 'jau 'ga wemimu'e 'gā nupe.

A'eramū Simão Pedro 'ga 'jau 'ga upe:

—"Janeruwarete 'ga remimurera 'ga", aru'e ore enee jepi— 'jau Pedro 'ga 'ga upe.

—Je mome'u kasi ajee pejepe 'gā nupe ne— 'jau 'ga 'gā nupe.

Amanūawama mome'uawet

(Mateu 16.21-28; Maku 8.31-9.1)

²¹ A'eramū Jejui 'ga 'jau 'gā nupe:

—A'jea futat pe'je.

²² Je 'ā a'jea futat pēneki'yraretea— 'jau 'ga 'gā nupe aipo ojeupe 'eramū. —Anure nipo 'gā je rerekō tyweretei. Kwaiwete nipo je ree iporomutare'ema 'gā. A'eramū nipo 'gā je rerekō tyweaete. Judeu 'gā 'wyria'ri, mainana 'wyriat, Moisesi 'ga remikwasiarer are moromu'jat. Mīmera 'gā nipo oporomutare'emamū je ree— 'jau 'ga 'ūina imome'wau 'gā nupe. —'Gā nipo je juka. A'ere nipo imuapya 'ara rupi Jeruwarete 'ga je moferawi etee nū— 'jau 'ga 'ūina imome'wau 'gā nupe.

²³⁻²⁴ —Jeremiayuwamū pejejekoweramū pēē jeremifutar imū etee futat mama'ea peapo. Pejekyllawe'em futat pejejekō tywer awi— 'jau 'ga 'gā nupe. —Pejemanū awi miamū pejekyllawe'em futat. Amumera 'gā nipo "Jejui 'ga rerowiaara je" 'eramū ifuwet pē apisi are. A'ere kasi "naJejui 'ga rerowiaara rūi je", pe'je 'gā nupe ne— 'jau 'ga wemimu'e 'gā nupe. —"Tene 'gā je jukai kwy", pe'je etee ki. "Napoira'uweri je Jejui 'ga rerowiar awi", pe'je etee ki. Jeremiayuwamū pejejekoweramū ki jeje'eg imū etee futat peko— 'jau 'ga 'gā nupe. —"Najemanūweri je Jejui 'ga mome'u are" 'jara 'gā nooa'uweri futari ywag ipe Jarejuwarete 'ga pyri— 'jau 'ga 'gā nupe. —"Je naapoa'uweri futari mama'ea Jejui 'ga remifutar imū" 'jara nanē awawe'em ywag ipe Jarejuwarete 'ga pyri— 'jau Jejui 'ga 'gā nupe. —Amumera 'gā te nipo ajee e'i "tene 'gā je jukai kwy", e'i ajemogyau. "Napoira'uweri je 'ga rerowiar awi" 'jara 'gā etee awau ywag ipe, Jarejuwarete 'ga pyri— 'jau 'ga 'gā nupe 'gā mu'jau ee.

²⁵ —Okaraemā mono'og are etee ea'at ma'e 'gā nanē ni'akwaawi futari. Kwaiwete agawewi 'gā karaemā. A'ere aipo 'gā miamū nooi futari ywag ipe. Nom'yi 'gā weaa Jarejuwarete 'ga ree. Okaraemā me'yi are etee 'ga fuweramū. A'eramū 'gā awawe'em 'ga pyri. Mama'eukwaawa rapyaw ipe etee 'gā awau— 'jau Jejui 'ga 'gā nupe.

²⁶ —Temome'u awi 'ga amū jenosi re je nanē nipo tejenosōu 'ga wi tejewya nū. "Je naJejui 'ga remiayuwā rūi" 'jara 'gā nipo okyjau je ree amanū awi. A'eramū je 'jau aipo 'jarera 'gā nupe: "Najeremiayuwā rūi 'ga", 'jau nipo je 'gā nupe tejewya nū— 'jau Jejui 'ga 'gā nupe.

—Amanū awi ikyje'ema 'gā te nipo 'jau, "Je te 'ā Jejui 'ga remiayuwā", 'jau 'gā 'gā nupe. Aipo 'jarera 'gā te nipo je anure tejewya naenosī 'gā— 'jau 'ga 'gā nupe. —Anure je ruri tejewya ywagipewara 'gā netee 'awa ywy pe nū. Mama'e tywera apoare'ema 'gā netee nipo tejua tejewya 'awa ywy pe nū. Tejuwarete 'ga renyfuga pype je tejua tejewya anure. A'eramū nipo 'gā 'jau jee: "Nitywi 'ga amū ene 'jawe esage ma'e 'gā. Ene tete 'ā eneresageay oree", 'jau nipo 'gā jee anure je jewyt je ruramū— 'jau Jejui 'ga u'ama oporogytau 'gā nupe. —Aipo 'ara rupi futat nipo je 'i 'gā nupe, 'gā nowase. "Agera 'gā jeje'ega wanuwa ajemogyau rai'i", 'jau nipo je 'gā nupe 'gā nowasewase— 'jau 'ga u'ama oporogytau 'gā nupe. —Tejeywyrū'japa te nipo je ruri pē nupe pē'wyriat pāwē pāwēnamū— 'jau Jejui 'ga 'gā nupe.

²⁷ —Anure nipo pēē mū je resak pejepe pejemanūme'ēwe peje'wyriaramū je rekoa. Jarejuwarete 'ga pājēa nipo pēē mū esaka— 'jau 'ga u'ama 'gā nupe oporogytau.

'Gā neape Jejui 'ga jesowo'gōkawet

(Mateu 17.1-13; Maku 9.2-8)

²⁸ Majepeja morowykye'ema magwaw ire, Jejui 'ga awau ywyty'rarimū oporogytau 'Uwarete 'ga upe. Muapya 'gā etee 'ga erawau ojeupi. Pedro 'ga, Juā 'ga, Tiago 'ga. Mīmera 'gā etee 'ga erawau ojeupi.

²⁹ 'Uwarete 'ga upe 'ga porogytaramū 'ga reakwara ojesowo'gōka. 'Ga reakwara wenyfugamū. 'Ga raitya nanē waparasiagamū 'ga ree nū. Iaparasi enyfyuk te 'ga raitya 'ga ree.

³⁰⁻³¹ A'eramū futat mukūja 'gā 'ua oporogytau 'ga upe. Ywag awi 'gā 'ua oporogytau 'ga upe. Moisesi 'ga, Eliasi 'ga retee 'ua oporogytau 'ga upe. Tata enyfyuga 'jawewara wywyteripe 'gā u'ama oporogytau. Jejui 'ga manūawama mome'wau 'ga upe:

—Jerusareg ipe nipo ereo emanūmū Jarejuwarete 'ga remifutar imū etee futat. "Ga manūa 'gā tywera tompy 'jau", e'i Janeruwarete 'ga enee— 'jau 'gā 'ga upe. —"A'eramū 'ga 'gā katu'okaramū akou 'jau", e'i Janeruwarete 'ga enee— 'jau 'gā 'ga upe imome'wau.

³² 'Gā porogytaramū 'ga rupi oo ma'efera 'gā osea 'upa. Poje 'gā opaka. Amā'jāmayayau Jejui 'ga renyfug are. Irāā'ā mukūja 'gā 'amamū 'gā porogytaramū 'ga upe.

³³ Mukūja 'gā oja'wyja'wyrāmū Pedro 'ga 'jau Jejuī 'ga upe:

—'Awa esageay janee ra'e. 'Au etee sapyta 'jau, ki Ku'jyp— 'jau 'ga 'ga upe. —'Au etee tapŷja taruapo amū pē nupe 'jau. Ene upe, Moisesi 'ga upe, Eliasi 'ga upe 'jau— 'jau 'ga 'ga upe.

Osera 'ga enafu'ama. A'eramū 'ga u'akwaawe'emamū oporogytau tyweruu 'gā nupe.

³⁴ 'Ga porogytarauwe ywasiga mū 'ua ojypa 'gā nee. A'eramū futat ywasiga 'gā mima 'gā nui. Ywasiga etee 'gā mopiryyita ojypa 'gā nee nū.

³⁵ A'erauwe futat Janeruwarete 'ga oje'ega muri imojypa ywasiga rupi 'gā nupe:

—Koromū je ra'yrarete 'ga, jeremimurera 'ga. A'eramū ki pēē pejeapyakau 'ga je'eg are— 'jau 'ga 'gā nupe, oje'ega mua.

³⁶ 'Ga porogytapawauwe ywasiga ojeupiapap 'gā nui nū. Irāā'ā Jejuī 'ga etee 'ga 'amamū ojete. Ywasiga rupi mukūja 'gā ojeupia awau. A'eramū futat 'ga remimu'e 'gā opika etee futat. Nomome'ui futari 'gā tekotee 'gā nupe, miamū ojewyr ire.

Kunumī 'ga katu'okawet

(Mateu 17.14-21; Maku 9.14-27)

³⁷ Ai'iwē 'gā 'ua ojypa ywyty'r ar awi nū. A'eramū futat kwaiwete 'gā 'ua Jejuī 'ga rowosōu. 'Ga porogyta renupa 'gā 'ua.

³⁸ Jejuī 'ga resakawe kūima'e 'ga amū 'ua wafukaita 'ga upe:

—Jejuī! Esak jera'yra 'ga jee. Majepei tee jera'yra 'ga. Nirūi 'ga jee. A'eramū ene ejua 'ga resaka jee.

³⁹ Mama'eukwaawa 'ga opyyk 'ga moypiwukaa 'ga muafukajukaa 'ga motyjuita 'ga juru rupi. A'ere 'ga pikapikapikau 'ga rerekou. Nopoiri futari 'ga wi. Esak 'ga jee— 'jau 'ga Jejuī 'ga upe.

⁴⁰ —'Pemoit 'ga wi", a'e futat je eneremimu'e 'gā nupe ko. A'ere 'gā nomoiri etee 'ga wi ko— 'jau 'ga Jejuī 'ga upe.

⁴¹ A'eramū Jejuī 'ga 'jau 'gā nupe:

—Ma'eramū sipo pēē je rerowiare'ema pejejemogyau 'ū? Ymā agawewi nā 'ā je pē mu'ei re'ā. A'etea nipo 'ā naje rerowiari tāmējē 'ā pejepe. "Nokoa'uweri je pē pype namutamutat", a'e je pē nupe jepi— 'jau 'ga tesirūmera 'gā nupe nanē nū.

A'ere 'ga 'jau kunumī 'ga ruwa 'ga upe:

—Ere 'ga rerua 'au jee. Taesak 'ga 'jau— 'jau 'ga 'ga upe.

⁴² A'erauwe futat 'ga wa'yra 'ga rerua. 'Ga upe 'ga waēm ja'wyja'wyrāmū mama'eukwaawa 'ga pyyka nū. A'eramū futat 'ga retyka ywyu.

A'eramū Jejuī 'ga 'jau 'ga pirewara upe:

—Ejepe'a 'ga wi— 'jau Jejuī 'ga jupe.

A'eramū futat 'ga imoia 'ga wi. A'ere Jejuī 'ga 'jau kunumī 'ga ruwa 'ga upe:

—Kweramū enera'yra 'ga nū. Jaruete 'ga nū— 'jau 'ga 'ga upe.

⁴³ A'eramū esakarera 'gā oporesagamū etee futat 'ga ree.

—Mama'eukwaawa miamū 'ā pājēa. Ku'jywa 'ga taetu te 'ā pājērete— 'jau 'gā 'upa ajaupe.

Amanūawama 'ga imome'wau'japa

(Mateu 17.22-23; Maku 9.30-32)

Aipo resakarera 'gā oporesagamū 'ga ree kunumī 'ga katu'ogamū.

—Janeruwarete 'ga 'ā pājērete futat. Nitywi 'gā amū 'ga 'jawe— 'jau 'gā ajaupe.

⁴⁴ Aipo 'gā 'eramū Jejuī 'ga 'jau 'gā nupe:

—Pēneki'yra agawewi je 'ā. A'etea nipo Janeruwarete 'ga je pyygukat anurenure'i je ree iporomutare'ema 'gā nupe— 'jau Jejuī 'ga wemiayuwa 'gā nupe.

⁴⁵ A'ere 'gā naeapyoi 'ga 'eawer are. Janeruwarete 'ga namueapyoi 'gā ee. A'ere 'gā jenosi 'ga upe oporonuw are.

Esageay ma'e are 'gā mu'eawet

(Mateu 18.1-5; Maku 9.33-37)

⁴⁶ A'ere 'ga remimu'e 'gā 'jau ajaupe:

—Manamū te jane Jarejuwarete 'ga upe esage ma'eramū jarejuapyraapa?— 'jau 'ga remimu'e 'gā 'upa.

Ajaupe etee futat oporogytau.

⁴⁷ A'ere Jejuī 'ga 'gā kwaawi. Ajaupe 'gā 'e kwaawi. Nuenuwi futari 'ga numiamū. A'ere 'ga ikwaawi futari ajaupe 'gā 'ea. A'eramū 'ga 'jau kunumī 'ga amū upe:

—Ere ejua 'au je pyri— 'jau 'ga 'ga upe.

A'erauwe kunumī 'ga amū 'ua 'ga repejana 'ga rerowyka.

⁴⁸ —Peesak te kunumī 'ga 'ama je pyri?— 'jau Jejuī 'ga 'gā nupe. —'Ga ree pejejuka esageramū je ree we futat pejajuka esage. Je ree pejejuka esageramū je muarera 'ga ree

we futat pejejuka esage— 'jau Jeju 'ga 'gã nupe u'ama. —Aipo apoara 'gã esage ma'eramũ Jarejuwarete 'ga upe— 'jau Jeju 'ga 'gã nupe.

A'eramũ 'ga 'jau 'gã nupe nũ:

—“Je jeresage” na'jara 'gã nũ esage ma'eramũ Jarejuwarete 'ga upe. A'ere ajuee ojejuka esage ma'eramũ te ae esage ma'eramũ 'ga upe— 'jau Jeju 'ga 'gã nupe, 'gã mu'jau esage ma'e 'gã nee.

*Jane poaara 'gã janepytuna 'jawe futat
(Maku 9.38-40)*

⁴⁹ A'eramũ Juã 'ga 'jau Jeju 'ga upe:

—Kũima'e 'ga amũ ore aruesak mama'eukwaawa pe'aa 'gã nui ko, enerer imũ ko. A'ere norepytuna 'ga rũi ko. A'eramũ ore 'jau 'ga upe ko: “Ereapo awi nanuara”, 'jau ore 'ga upe ko— 'jau Juã 'ga imome'wau Jeju 'ga upe.

⁵⁰ Aipo 'eramũ Jeju 'ga 'jau 'gã nupe:

—Aipo pe'je awi 'gã nupe. “Peapo awi nanuara”, pe'je awi 'gã nupe. Najanepytuna 'gã nũi numiamũ. A'ere 'gã jane poari te janeporowyky apo are. A'eramũ 'gã janepytuna 'jawe futat ajemogyau— 'jau Jeju 'ga u'ama 'gã nupe aipo 'gã 'eramũ.

Samari ywy pewara 'gã

⁵¹ Ywag ipe awawa upe iwaëm ja'wyja'wyräuwe Jeju 'ga 'jau 'gã nupe:

—Jerusareg ipe futat too 'jau— 'jau 'ga 'gã nupe.

⁵² A'ere 'ga wemiayuwa 'gã mũ ra'ne imonou wenune Samari ywy pe.

—Amunaw ipe pekwap 'oga mũ resaka jarejee jareseawamũ— 'jau 'ga 'gã nupe.

A'erauwe 'gã awau. Awau 'ga owaëma amunawa mũ upe. A'eramũ 'gã oporogytau peuwara 'gã nupe:

—Jeju 'ga ore mut 'au oroseawa mũ rekarukaa orojee ko— 'jau 'gã peuwara 'gã nupe. —A'ere nipo 'ga ruri ore rewiri. Ityp te oreseawa 'au?— 'jau 'gã peuwara 'gã nupe.

⁵³ A'ere peuwara 'gã 'i etee 'gã nupe:

—Nitywi pëseawa 'au nũ'ũ. Jerusareg ipe etee futat pekwap. Nepesera'uweri 'au— 'jau etee 'gã 'gã nupe.

Samari ywy pewara 'gã najudeu joporemũremũa rũi. Ojopypepype 'gã. A'eramũ 'gã judeu 'gã futat'ema peu ojepepe.

A'eramũ 'gã ojewya 'ua Jeju 'ga pyri nũ.

—“Nitywi pëseawa 'au”, e'i 'gã oree ko— 'jau 'gã 'ua Jeju 'ga upe.

⁵⁴ A'e renupa Tiago 'ga 'jau Juã 'ga retee Jeju 'ga upe:

—Jarejuwarete 'ga upe tee pa ore 'i “Tata emut 'gã nupe 'gã apisaupap”, aru'e te pa ore 'ga upe— 'jau 'gã Jeju 'ga upe.

⁵⁵ A'eramũ Jeju 'ga amã'jãu 'gã nee:

—Ma'eramũ pëe aipo 'jau ki 'ei. Naani. Aipo pe'je awi— 'jau 'ga 'gã nupe, oje'ega moywrafena.

⁵⁶ —Pe'je ajee soo ajepeja amunaw ipe etee— 'jau Jeju 'ga 'gã nupe.

A'eramũ 'gã awau.

“Too ene rupi 'jau” 'gã eawet

(Mateu 8.19-22)

⁵⁷ 'Gã waw ipe kũima'e 'ga amũ 'ua oje'ega Jeju 'ga upe:

—Too ene rupi 'jau— 'jau 'ga 'ua 'ga upe. —Taata tekou ene rewiri kwe pe ene orauwe 'jau— 'jau 'ga 'ua Jeju 'ga upe.

⁵⁸ A'eramũ Jeju 'ga 'jau 'ga upe:

—A'jea futat nipo eneatawet je rupi ki sa? A'ere 'ã je najerogi te tekou a'i kũi. Kasuru'niara te 'ã ok. Ywy kwara 'ã 'ga roga. Wyrã'i nanë 'ã waityramũ nũ. A'eramũ 'ã kaaruwauwe ojewya 'ua waity pype osea. A'ere je nanarũi. Aset ekoete te futat je tekou. Tekaarupaw ipe je tesea ekoete te futat tekou. Je 'ã pëneki'yra agawewi. A'etea 'ã je najerogi tekou. Jeremiayuwamũ nan tee futat pejemogy. A'etea futat te eneatawet je rupi?— 'jau 'ga 'ga upe.

⁵⁹ A'ere Jeju 'ga oje'ega ajepeja 'ga upe nũ:

—Erejet te je rupi? Naani te ra'u nũ?— 'jau 'ga 'ga upe.

—Naani. Nooi je 'awauwe ene rupi. Tene jeruwa 'ga manũ ra'ne. Tejuwa 'ga manũ re too ene rupi 'jau. 'Ga manũ re nipo a'jea futat tekou ywyapi ene rewiri. Tejuwa 'ga manũ ra'ne je aesak— 'jau 'ga Jeju 'ga upe.

⁶⁰ A'ere Jeju 'ga 'i etee 'ga upe:

—Naani. Ene'me awi. 'Awauwe futat ejot je rupi. Eneruwa 'ga manũnamũ amutee 'gã totym 'ga enee 'jau— 'jau 'ga 'ga upe. —Ene tereko “Pe'je pejepoia pejetywer awi” 'gã nupe

'jaramū 'jau— 'jau Jejuī 'ga 'ga upe. —“Pejetywer awi pepoiramū Janeruwarete 'ga pē monoi wemiayuwamū” gā nupe 'jaramū tereko 'jau— 'jau Jejuī 'ga 'ga upe.

⁶¹ A'ere 'ga amū 'jau Jejuī 'ga upe nū:

—Tene ajee je ra'ne. Too ene rupi 'jau— 'jau 'ga Jejuī 'ga upe. —A'ere je oi tepytuna 'gā momoranupa ra'ne, “Oo je 'ga rupi”, 'jau 'gā nupe ra'ne— 'jau 'ga Jejuī 'ga upe.

⁶² A'eramū Jejuī 'ga 'ga upe:

—Je rupi iatawet ma'eramū pejot ekoete te futat je rupi pejejea jewyre'emamū futat pejejemiejarera mama'e are. Wemiejarer are eajewyt ma'e 'gā nooi futari je rupi. Eajewyt ma'e 'gā nokoarūi je mome'waramū kwe pewara 'gā nupe— 'jau Jejuī 'ga 'gā nupe u'ama.

10

Setētai tois 'gā monoawet

¹ Anure Jejuī 'ga kwaiwete 'gā mū'jāu 'gā pytuna 'gā nui. Setētai tois etee 'ga 'gā mū'jāu. 'Gā mū'ē re 'ga 'gā mokwasi'wau. Mukūi juejue Jejuī 'ga 'gā monou amunaw ipe wenune.

—A'ere too pē newiri 'jau— 'jau Jejuī 'ga 'gā nupe.

² —Ināinānī etee Janeruwarete 'ga je'ega mome'wara 'gā. Kwaiwete je 'gā jemogyi Jarejuwarete 'ga kwaape'ema— 'jau Jejuī 'ga 'gā nupe. —A'eramū pēē pejeje'ega monou Jarejuwarete 'ga upe: “Emuru'jap ejemiayuwa 'gā amū emome'waramū”, pe'je ki 'ga upe— 'jau Jejuī 'ga 'gā nupe. —Sā'ā juowuurana. Omonookara tywe'emamū 'ā ototokapaw ekoete. Nan tee futat nipo 'gā je'ega ojeupe 'gā imome'ue'emamū 'gā pawī etee mama'eukwaawa rapyaw ipe— 'jau Jejuī 'ga 'gā nupe.

³ —Ma'eramū je 'ā pē monoi kwe pe, Jarejuwarete 'ga je'ega mome'waukaa 'gā nupe, ikwaapare'ema 'gā nupe. Sā'ā kasurua tajau jarūa pyterimū isea. A'eramū 'ā tajau iu'wau. Nan tee futat pēē. Jarejuwarete 'ga kwaapare'ema 'gā pyterimū pese. 'Gā amū nipo amara'neramū akou pē nee. A'ere nipo je jejukai pē nee— 'jau Jejuī 'ga 'gā nupe.

⁴ —Peroo kasi karaemā ne. Ka'arana nanē kasi peroo ne. Pejejemi'urama nanē kasi peroo ne. Pejepypapaawa nanē pēē erawawe'em nū. Pejepytawe'em nanē pe aje pejeporogytau 'gā nupe nū— 'jau Jejuī 'ga 'gā nupe u'ama.

⁵ —Amunaw ipe pejewaēmawe ki pe'je 'gā nupe: “Awamū Janeruwarete 'ga pē mopy'ata'wai pē mogyau”, pe'je ki pejesou pejewau 'gā nog ipe— 'jau Jejuī 'ga 'gā nupe u'ama.

⁶ —Pē nee 'gā ku'iramū Janeruwarete 'ga aku'i monoi 'gā nupe. Pē nee 'gā ku'ie'emamū 'ga aku'ia nomonoa'uweri 'gā nupe— 'jau Jejuī 'ga 'gā nupe.

⁷ —Pejejeupe 'oga resaukaripyra pype etee futat ki pejup. Pejejejyte'ema ajepeja 'oga pype. Pejejeupe imuripyrera 'wau etee futat— 'jau Jejuī 'ga 'gā nupe u'ama. —Sā'ā ae ojeupe ojomoporowyky re ojomepya. Nan tee futat nipo 'gā pēnemi'urama muri pē nupe ojeupe pēporogyta repyramū— 'jau Jejuī 'ga 'gā nupe u'ama.

⁸ —'Gā 'wyrarete upe pejewaēmawe ki pe'je 'gā nupe: “Au ore ruri Jarejuwarete 'ga porogyta mome'wau pē nupe”, pe'je ki 'gā nupe. “Pe'je ajee pejejeu 'ga imome'wau oreē” eramū peu pejepytau pejejupa imome'wau 'gā nupe. 'Gā 'wyr ipe etee futat pejejemogyau pejejeupe mama'e muripyra 'wau etee— 'jau Jejuī 'ga 'gā nupe u'ama oporogytau.

⁹ —Ojero'wu ma'e 'gā ki pekatu'ok. Jarejuwarete 'ga ree pēē 'gā mu'jau. “Werowiarāmū 'ga pē mogoi wemiayuwamū”, pe'je ki 'gā nupe— 'jau Jejuī 'ga 'gā nupe u'ama.

¹⁰⁻¹¹ —Pejewau nipo 'gā 'wyrarete mū upe pejewaēma. A'eramū nipo 'gā “noreporenuwieri ore Jarejuwarete 'ga je'eg are”, 'jau nipo 'gā pē nupe. A'eramū ki pe'je 'gā nupe: “Janeruwarete 'ga 'ā wemiayuwamū pē futat numiamū. A'ere 'ā nepefutari etee 'ga”, pe'je ki 'gā nupe. “A'eramū nipo 'ga anure pē mu'arasiga pē mogyau”, 'jau ki pēē 'gā nupe— 'jau Jejuī 'ga 'gā nupe u'ama. —A'eramū pēē 'gā 'wyrarete pyterimū pejewau pejejemogyau pejepypapaawa nupānupāu, 'yja motototoka jui. “Janeruwarete 'ga 'ā ifuwet pē katu'og are futat numiamū. A'ere 'ā nepefutari etee”, pe'je ki pejewau— 'jau Jejuī 'ga 'gā nupe u'ama.

¹² —A'jea futat je 'i. Anure, wowase pē majatykaaw ipe nipo Janeruwarete 'ga Sodom ipewarera 'gā nereko tyweretei nū. Sodom ipewarera 'gā itywetywet Janeruwarete 'ga upe rakue. A'eramū 'ga 'gā nerekou tyweaete 'gā tywer are nipo. A'ere “Noreporenuwieri ore Jarejuwarete 'ga je'eg are” 'jara 'gā Sodom ipewara 'gā tywera apyraawi. A'eramū 'ga a'eramū nipo 'gā nerekou tyweaete nū Sodom ipewarera 'gā apyraapa— 'jau Jejuī 'ga 'gā nupe u'ama.

Jejuī 'ga je'ega moywyrarafenawet

(Mateu 11.20-24)

¹³ A'eramū 'ga 'jau 'Uwarete 'ga ree oporomutare'ema 'gā nupe:

—A'e je ki 'ei pēporiayī 'ā pejejemogyau numiamū a'i kūi. Korasī pewaramū, Pesaita pewaramū. Mīmer ipewaramū 'ā pēporiayī pejejemogyau numiamū. Pē'wyr ipe ako je

Jarejuwarete 'ga mome'ui tekou pē nupe ikue numiamū. Ojero'wu ma'e 'gā katu'oka ako tekou pē neape ikue numiamū. A'ere ako nepēporenuwiweri jeje'eg are ikue. Nepēpoiweri ako pejetywer awi ikue. Pejetywera retee ako pēē ikue. Tiro pe 'gā katu'og ire amunipo 'ā peuwara 'gā pōiri otywer awi rakue. Sidom ipe nanē je iapo re amunipo 'ā peuwara 'gā pōiri futari otywer awi rakue. Tanimuga amunipo 'ā 'gā werekou wapyte'rarimū otywer awi opōira resaukaawamū. A'ere ako je 'au agawewi iapoi tekou pē'wyr ipe ikue. A'etea ako nepēpoiweri pejetywer awi ikue— 'jau Jejui 'ga u'ama 'gā nupe.

¹⁴—A'eramū nipo Jarejuwarete 'ga pē majatykaawa 'ara rupi Tiro pewara 'gā majatykau wowase. A'eramū nipo 'ga 'gā nerekou tyweaete. Sidom ipewarera 'gā nanē nipo 'ga erekou tyweaete nū. 'Gā tywer are wejue nipo 'ga 'gā nerekou tyweaete etee. A'ere nipo 'ga pēē te pē nerekou tyweretei kwaiwete. Pēē te 'ā neperowiari 'ga, 'ga pājē resakareramū miamū— 'jau Jejui 'ga 'gā nupe u'ama.

¹⁵—Pēporiay'i pejemogyau numiamū, a'e je 'ā pē nupe, Kafanaū pewaramū nanē nū. "Ore Kafanaū pewaramū oreresage. A'eramū ore arawau ywag ipe", pe'je pejejaupe numiamū. A'ere je 'i pē nupe: Mama'eukwaawa rapyaw ipe oo ma'eramamū futat pēē, a'e je 'ā pē nupe— 'jau Jejui 'ga Kafanaū pewara 'gā nupe. —Nepepoiweri te 'ā pejetywer awi. A'eramū pēē pejewau mama'eukwaawa rapyaw ipe futat— 'jau Jejui 'ga 'gā nupe.

¹⁶A'eramū 'ga 'jau wemimū'e 'gā nupe:

—Pe'je pejewau jeporogyta mome'wau kwe pe 'gā nupe— 'jau Jejui 'ga 'gā nupe u'ama. —A'eramū pē nee wapyaka ma'e 'gā je ree nanē futat wapyakau nū. Pēje'ega renupara 'gā futat jeje'eg are nanē wapyaka nū— 'jau 'ga 'gā nupe. —Pēje'ega renupare'ema 'gā je ree nanē nuapayakai nū— 'jau Jejui 'ga 'gā nupe. —Je renupare'ema 'gā nanē futat je muarera 'ga nuenuwi nū— 'jau Jejui 'ga 'gā nupe u'ama.

Setētai tois 'gā wekwawera mome'uawet

¹⁷A'eramū Jejui 'ga wemimū'ēmera 'gā monou kwe pe, 'gā mu'jau Jarejuwarete 'ga porogyta are. Setētai tois 'gā awau kwe pe 'gā mu'jau Jarejuwarete 'ga porogyta are. Anure 'gā 'ua ojewya nū. 'Gā ku'ia 'gā nerekou. A'eramū 'gā 'ua 'jau Jejui 'ga upe:

—Mama'eukwaawa miamū futat ore oromoit arakou 'gā nui ai'i— 'jau 'gā 'ua 'ga upe imome'wau. —"Jejui 'ga rer imū ore pē moiri 'gā nui", 'jau ore mama'eukwaawa upe ai'i— 'jau 'gā 'ua imome'wau Jejui 'ga upe.

¹⁸Aipo ojeupe 'eramū Jejui 'ga 'jau 'gā nupe:

—A'jea— 'jau etee futat 'ga 'gā nupe ojeupe imome'uramū. —Ymā te je mama'eukwaawa 'wyrriara resagi ikue, ywag awi tut i'ara resagi ikue, Satanasi turi 'ara resagi ikue. Sā'ā tupā werawa 'ara. Nan tee futat i'ari. Janeruwarete 'ga imuēma imua imomoa ikue. A'eramū je a'eramū esaka ikue. Janeruwarete 'ga ipājē renuēma jui ikue. A'eramū ināinānī'ē etee erekou. Ma'eramū 'ā emiayuwa pemoit 'gā nui rai'i. Tepājēa te ako je omono pē nupe ai'i. A'eramū 'ā pēē imoia pejemogyau 'gā nui rai'i— 'jau Jejui 'ga 'gā nupe.

¹⁹—Ma'eramū 'ā mama'eukwaawa 'wyrriara ipājēa niapoa'uweri pē nupe. Jeje'eg imū peata pē nekoramū mama'eukwaawa 'wyrriara nepē apisiukari mama'e tywera upe— 'jau Jejui 'ga 'gā nupe u'ama. —A'eramū nipo pēē pejepyruaga agawewi futat moi are. A'eramū nipo pē u'wau agawewi. A'etea nipo nepemanū jupe. Jawa'jyra nipo pē piau agawewi. A'ere nipo naya'uweri pē nupe— 'jau Jejui 'ga 'gā nupe u'ama oporogytau. —Jeje'eg imū peata pē nekoramū nitywa'uweri mama'e tywera pē nupe. Ma'eramū 'ā a'jea futat mama'eukwaawa pemoit pejemogyau 'gā nui.

²⁰A'ere kasi a'e are pejerowiaraip pejejee pejemogyau ne. Jeremiayuwamū wejue te pejemogy. Ma'eramū 'ā pēku'i pejemogyau— 'jau Jejui 'ga u'ama 'gā nupe oporogytau. —Jeremiayuwamū pēnera jekwasari 'upa jeka'aran are ywag ipe. A'e are ki pēku'i pejemogyau jeremiayuwamū— 'jau Jejui 'ga 'gā nupe.

Jejui 'ga ku'awet
(Mateu 11.25-27)

²¹Janeruwarete 'ga pājēa Jejui 'ga rerekou. A'eramū 'ga a'eramū aku'iramū akou oje'ega 'Uwarete 'ga upe:

—Kiapi'ni. Ene 'ā mama'e jararetea. Ene 'ā ywag ipewara mama'e jara. Ywy pewara jara nanē 'ā ene nū. Ene te 'ā mama'e jararetea. Nai'akwaap ma'e 'gā etee rūi 'ā eremueapyo jeje'eg are. Akotee ma'e 'gā na'ne 'ā eremueapyo ee nū. I'akwaap ma'e 'gā jēmī 'ā ene imueapyowe'em ee. Ejemifutar imū etee futat 'ā ene akotee ma'e 'gā mueapyo ee. Nanuara futat te 'ā erefutat rakue— 'jau 'ga oje'ega 'Uwarete 'ga upe. —Ma'eramū 'ā itywera 'gā etee futat eremueapyo ee— 'jau 'ga oje'ega 'Uwarete 'ga upe.

²²'Uwarete 'ga upe oje'eg ire Jejui 'ga 'jau wemiayuwa 'gā nupe:

—Jeruwarete 'ga je mu'akwaap mama'e are ikue. Ma'eramū je 'ā ikwaawi— 'jau 'ga 'gā nupe imome'wau.

—Jeruwarete 'ga je kwaap katu katu futat. Nitywi 'ga amū je kwaapara mū. Jeruwarete 'ga etee te je kwaap— 'jau Jejuu 'ga 'gā nupe u'ama imome'wau. —Je 'ā Tejuwa 'ga akwaap katu katu futat. A'ere 'ga nitywi amū je 'jawewara Jeruwa 'ga kwaapa katu katuara 'ga— 'jau Jejuu 'ga 'gā nupe. —Ma'eramū je 'ā tejemipyyrūmera 'gā mu'ei Tejuwarete 'ga ree. A'eramū 'gā a'eramū 'ga kwaapa je pyri— 'jau 'ga 'gā nupe.

²³ A'eramū Jejuu 'ga 'jau wemimu'e 'gā nupe etee:

—Jeporokatu'okawera 'ā peesak. Mama'eukwaawa rerekwara 'gā katu'oga nanē 'ā pēē esaka nū. Ma'eramū 'ā pēku'i pejejemogyau— 'jau 'ga wemimu'e 'gā nupe.

²⁴ —Janeypy 'gā 'ā iporesagiwet futat jeremiapo are rakue numiamū. A'ere 'ā 'gā manūi erujewi je rure'emauew rakue. 'Gā 'ā oporenuwiweramū jeje'eg are rakue numiamū. A'ere 'ā 'gā manūi erujewi je rure'emauew rakue— 'jau Jejuu 'ga u'ama 'gā nupe. —Pēē 'ā jeremiapo peesak katu katu. Ma'eramū 'ā 'gā ku'ia peapyraap— 'jau 'ga 'gā nupe u'ama.

Ajuee ajemuaēm ma'e

²⁵ A'eramū Moisesi 'ga remikwasiarer are moromu'jara 'ga amū 'ua oporonupa ee Jejuu 'ga upe. “Tomojenosī Jejuu 'ga 'jau kwy”, 'jau 'ga ojeupe numiamū.

—Maran ae awau Jarejuwarete 'ga pyri ki 'ei? Emome'u jee 'i— 'jau 'ga Jejuu 'ga upe.

²⁶ A'eramū Jejuu 'ga 'jau 'ga upe:

—Ma'ja e'i Moisesi 'ga ka'aran are ikwasiaa inuga rakue? Eremogyta nipo jepi? Maran enereapyo ee?— 'jau Jejuu 'ga 'ga upe.

²⁷ —Aipo e'i futat 'ā Moisesi 'ga ka'aran are ikwasiaa inuga rakue. “Peenup Jarejuwarete 'ga je'ega. Pēporomutat Jarejuwarete 'ga ree a'jea futat. Mama'ea peapo 'ga upe, 'ga remifutar imū. Pejejea'aramū pejejemogyau 'ga ree 'gā nee pejejea'ara apyraapa. Aipo aporamū nipo pejeporomutaramū 'ga ree a'jea futat”, e'i 'ga ka'aran are rakue. “Pēporomutat pejepyriwara 'gā nee pejejee pejeporomutara 'jawe etee futat”, e'i 'ga 'ā ka'aran are inuga janee rakue— 'jau 'ga Jejuu 'ga upe.

²⁸ —A'jea futat aipo 'ea— 'jau Jejuu 'ga 'ga upe. —Namutar iki peapo. A'eramū pejewau Jarejuwarete 'ga pyri pejemanū re— 'jau Jejuu 'ga 'ga upe.

²⁹ A'eramū 'ga 'jau Jejuu 'ga upe nū:

—A'eramū je maranuara 'gā nee tepota'waramū ki 'ei? Awŷja je pyriwaramū ki 'ei?— 'jau 'ga Jejuu 'ga upe.

³⁰ A'eramū kwe pe etee Jejuu 'ga mama'e mū mome'wau 'gā nupe nū, 'gā mu'jau ajuee 'gā pojekuka are.

—Kūima'e 'ga 'ut amū akou ojypa Jerusareg awi. Ajepeja amunaw ipe 'ga 'ua numiamū, Jeriko pe 'ga 'ua numiamū. A'ere 'ga ruaw ipe muna'ywa 'gā 'ga rekoari. A'eramū muna'ywa opokoka 'ga ree. 'Ga raitya mosoka 'ga wi 'ga nupānupāu 'ga monou 'ga nuga. 'Ga jukaaipa 'ga rejaa inuga peyse pe.

³¹ A'eramū mainana 'ga amū awau akou pe rupi. Awau owaēma 'ga upe. Irāā'ā 'ga ruwamū peyse pe. Amā'jāu etee 'ga ree. Okwapa etee 'ga pyu. A'ere mainana 'ga nokoi 'ga ree. Awau etee 'ga pyu.

³² A'ere 'ga amū 'ua nū. Levi 'ga juapyrera 'ga amū 'ua 'ga pyu nū. 'Gā pytuna 'ga futat numiamū. A'ere nānēwējēmī 'ga nokoi 'ga ree. Okwapa etee 'ga pyu nū— 'jau 'ga imome'wau 'gā nupe.

³³ —A'ere Samari ywy pewara 'ga 'ua pe rupi akou. Na'ga jekoty'aawa 'ga rūi agawewi. 'Ga ree iporomutare'ema 'ga agawewi.* Inupāmyrera 'ga judeua. A'etea Samari ywy pewara 'ga inupāmyrera 'ga resakawe ajemuaēm 'ga ree.

³⁴ A'eramū 'ga opytau 'ga ree. Na'ga remiesaga 'ga rūi agawewi. A'etea 'ga opytau 'ga ree. Oporiarāmū 'ga ree. Iporiay'i 'ga 'upa 'ga upe. “Maran poko ene 'i?” 'jau 'ga 'ga upe.

—“Muna'ywa opokok je ree ki 'ei, jekaraemā arewi ki 'ei”, 'jau 'ga 'ga upe.

—A'eramū futat 'ga muagy monou 'ga ree, 'ga pi'rokawer are. Muaga 'ga ree imono re ifaa 'ga wi. A'ere 'ga 'ga monou kawaru'i 'arimū, weymawa 'arimū 'ga rupia. A'eramū futat 'ga 'ga rerua erowaēma ae seawa 'og ipe. A'e pe futat 'ga 'ga fuanuga 'ga rerekou.

³⁵ —Ai'iwe 'ga, oo enune, oka'aranūū monou 'oga jara 'ga upe. “Efuanug 'ga jee. Maran gatu nipo owaēme'ema ka'aranūūa jupe. Jupe iwaēme'emamū tejewya tamepyypap ene 'jau”, 'jau 'ga 'oga jara 'ga upe— 'jau Jejuu 'ga 'gā nupe imome'wau.

³⁶ Imome'upaw ire Jejuu 'ga oje'ega moromu'jara 'ga upe nū:

—Muapyra 'gā inupāmyrera 'ga resaka. Maranuara 'ga ajemuaēma 'ga ree? 'Ga pytuna 'ga te ajemuaēm 'ga ree?— 'jau Jejuu 'ga 'gā nupe.

³⁷ —Naani. 'Ga pytune'ema 'ga futat ajemuaēm 'ga ree, ojekukau 'ga ree— 'jau 'ga 'ga upe.

* 10:33 Ymā judeu 'gā niporomutari Samari ywy pewara 'gā nee rakue.

—A'jea futat. 'Ga pyttune'ema 'ga futat ojejuka 'ga ree. A'eramū pēē nanē iapou nan— 'jau Jejuī 'ga 'ga upe. —Nan aeresage jejukai ajuee. Namutar iki pēē nanē peapo nū— 'jau Jejuī 'ga 'gā nupe.

A'eramū moromu'jara 'ga awau nū.

Jejuī 'ga awau Marta ēē 'wyr ipe

³⁸ Aipo mome'upaw ire Jejuī 'ga wemimu'e 'gā nerawau ajepeja amunaw ipe nū. Marta ēē rog ipe awau osou.

³⁹ Eē kypy'yra ēē, Mari ēē awau wapyka Jejuī 'ga pyri, 'ga porogyta renupa 'ūina.

⁴⁰ A'eramū Marta ēē kumi apou erekou. A'eramū ēē 'jau ojeupe: “Koo. Je tee 'i nipo aje ako mama'e apou jarejee”, 'jau ēē. “Maran tete Mari kynā nuapōi mama'ea je pyri. Wapyg etee pa 'ā kynā 'ūina kīā pyri nū”, 'jau ēē ojeupe.

A'eramū ēē 'ua oje'ega Jejuī 'ga upe:

—Emut kynā je poaa. Je etee ako teporowykyau. “Ekwap ēē poaa mama'e apou”, ere kynā upe jee— 'jau ēē Jejuī 'ga upe.

⁴¹ —Naani. Ene te 'ā eporowyky are etee enerea'at. Epytu'u'i jui. Erejemuaēm awi eporowyky are etee— 'jau 'ga ēē upe. —Tene Mari ēē reni. Jeporogyta are ēē porenuwieramū. Jaruete ēē reni je renupa, jeporogyta are wea'aramū— 'jau 'ga ēē upe.

⁴² —Ene te 'ā mama'e apoawamū etee ereko rakue. Eē jeje'ega renuparamū etee ako. Eē te 'ā oporowyky esagea wesak ojeupe. Nomomoirā'uweri 'gā ēē jui— 'jau Jejuī 'ga ēē upe 'ūina.

11

Jarejuwarete 'ga upe 'gā je'eg are

'gā mu'eawet

(Mateu 6.9-15; 7.7-11)

¹ Anure Jejuī 'ga 'ūina oporogytau 'Uwarete 'ga upe. 'Ga pig ire 'ga remiayuwa 'gā 'jau 'ga upe:

—Ore mu'e ape Jarejuwarete 'ga upe oroje'eg are ki jā— 'jau 'gā 'ga upe. —Sā'ā Juā Batista 'ga wemiayuwa 'gā mu'ea rakue. Nan ore mu'e ape, ene taetu— 'jau 'gā 'ga upe.

² Aipo ojeupe 'eramū Jejuī 'ga 'jau 'gā nupe:

—Nan iki peporogyta 'ga upe:

Kiapi'ni. Oroje'eg ore arajupa enee.

Tene muoryp ki 'gā najuejue etee.

Kamēsīete ki 'gā najuejue etee tene rerowiat ajemogyau.

Kamēsīete tere'yi 'wyrīaramū ore najuejue etee 'jau.

³ Awamū ki mama'ea emut ore oreremi'uramamū.

⁴ Norerea'aru'jawi ore mama'e tywera orojeupe 'ga iapoower are.

A'eramū ki ene ejea'aru'jawe'emamū ore tywer are.

Ore mamuakat futar iki ape mama'e tywera apoe'em are,

pe'je ki Jarejuwarete 'ga upe pejeje'ega— 'jau Jejuī 'ga 'gā nupe, 'gā mu'jau ee.

⁵ A'eramū Jejuī 'ga 'jau 'gā nupe nū:

—Jarejuwarete 'ga upe pejeporogyta awi kasi pepoit futar ine. Ojewi pepoire'emamū nipo 'ga mama'e esage muri pē nupe— 'jau 'ga 'gā nupe u'ama.

A'ere 'ga mama'e mū mome'wau 'gā nupe nū, 'gā mu'jawamū nū:

—Sā'ā nipo kūima'e 'ga amū rura iwaēma opytuna 'ga upe ppyaje. A'eramū nipo 'gā osea ajemogyau. A'eramū nipo 'ga 'ga momaka.

⁶ “Kanape'ia emut amū jee. Muapya kanape'ia emut jee. Jepyntuna 'ga 'ut amū owaēma jee. A'ere nitywi mama'ea 'ga upe. A'eramū je tejua, emut amū mama'ea jee, 'jau enee”, 'jau nipo 'ga 'ga upe.

⁷ A'eramū nipo oset ma'e 'ga 'jau ajaupe: “Aset je tejupa. Najefu'amiweri je. Jera'yra 'gā oset 'upa. Awopytym je 'okwara ko”, 'jau nipo ta'yt ma'e 'ga ajaupe.

⁸ —A'ere nipo 'ga pytuna ojero'waro'wau etee 'okwara mopoga u'ama 'ga upe w-jere'emamū. Pog pog pog. A'eramū nipo 'ga omogerukare'emamū afu'ama, kanape'i monou 'ga upe, opytuna 'ga omogerukare'emauwe.

⁹ —A'eramū je 'jau pē nupe: Nan tee futar iki pejemogy pejeje'ega Jarejuwarete 'ga upe pejeojere'emamū. A'eramū 'ga pēnemifutara mua pē nupe— 'jau Jejuī 'ga 'gā nupe u'ama.

—Ojeupe pēē mama'e renūjamū Janeruwarete 'ga imuri pē nupe. “Je poar ape” ojeupe 'eramū 'ga pē poari futari. Kamēsīete 'ga pejejoare'emamū, pejeje'ega pejejemogyau pejeojere'emamū 'ga upe. Sā'ā mama'e 'ara ae wī. A'eramū 'ā ae ijarāmū awau ekaa. Esag ire tāmējē 'ā ae opoia ekar awi. Nan tee futar iki pēē, pejeje'ega pejeojere'emamū futat 'ga upe mama'e renūi awi. A'eramū 'ga mama'e mua pē nupe— 'jau Jejuī 'ga 'gā nupe.

—'Okwara mopogara 'ga 'jawe ki peko. 'Okwara rawopytymo'wog ire etee 'ga poiri imopog awi. Nan tee futar iki pēē. Pepoit kasi 'ga upe pejeporogyta awi ne. A'eramū 'ga pē poari futari— 'jau Jejuī 'ga 'gā nupe.

¹⁰ —“Mama'e emut amū jee” 'jara 'gā nupe 'ga imuri futari. “Je poar ape” 'jara 'gā 'ga opoat futat. Ojeupe peje'egamū 'ga je'egi futari pē nupe— 'jau 'ga u'ama 'gā nupe oporogytau.

—Pejenosī kasi mama'ea 'ga upe enūina ne. Mama'e esage tee te 'ga amut pē nupe. Namura'uweri 'ga mama'e tywera pē nupe.

¹¹ Sā'ā pēē. “Mama'e emut amū jee, Kiapi'ni”, pejeja'yra pejejeupe i'eramū mama'e katurama etee imonoa pejeja'yra upe. Nan tee futat Janeruwarete 'ga mama'e esagea etee imuri pē nupe, “mama'e esagea emut jee” 'eramū. Moja sipo pemono pejeja'yra upe, “ipira emut jee” 'eramū? Naani. Mama'e esagea etee te pemono pejeja'yra upe.

¹² “Wyraupi'a emut amū jee” 'eramū sipo jawa'yra pemono pejeja'yra upe? Naani. Nepemonoa'uweri jawa'yra pejeja'yra upe. Nan tee futat Ku'jywa 'ga— 'jau Jejuī 'ga 'gā nupe u'ama.

¹³ —Pēē 'ā aetywera agawewi. A'etea 'ā mama'e esagea etee pemono pejeja'yra upe— 'jau Jejuī 'ga 'gā nupe. —Nan tee futat peapo numiamū. A'ere Ku'jywa 'ga te mama'e esagerete muri pē nupe “mama'e esagea emut oree” ojeupe pēē 'eramū— 'jau Jejuī 'ga 'gā nupe u'ama. —U'agesagea miamū futat 'ga amut pē nupe, “Emut E'agesagea jee” ojeupe 'eramū— 'jau 'ga oporogytau 'gā nupe.

Mama'eukwaawa rerekwat

(Mateu 12.22-30; Maku 3.20-27)

¹⁴ Oporogytapaw ire Jejuī 'ga mama'eukwaawa pe'au erekwara 'ga wi. A'ea 'ga moje'egukare'ema 'ga mogou. Ije'ege'ema 'jawe 'ga pirewara 'ga mogou. A'eramū 'ga ojewi ipe'a re oje'ega nū. A'e resakarera 'gā oporesagamū ajemogyau 'ga ree.

¹⁵ A'ere 'gā amū “o'meramū te 'gā 'i”, 'gā 'i etee ajaupe:

—Mama'eukwaawa 'wyriara je'eg imū te 'ga 'ga pirewara moiri 'ga wi— 'jau 'gā ajaupe. *
—Pesepu je'eg imū te 'ga imoiri 'ga wi— 'jau etee esakarera 'gā ajaupe. *

¹⁶ A'eramū peuwara 'gā 'jau 'ga upe:

—Oreremiesage'ema eapo amū oree. A'e resaka “A'jea futat ra'e”, taru'e enee 'jau. “Janeruwarete 'ga opājē muri 'ga upe ra'e”, taru'e enee 'jau— 'jau 'gā 'ga upe numiamū.

A'ere 'ga nuapoi 'gā nupe. “Mama'e tywera siapoukat esaka 'ga upe jarejee 'jau”, 'jau 'gā ajaupe numiamū. A'ere 'ga nuapoi 'gā nupe.

¹⁷ Okwaap 'ga 'gā je'eg jemima ojee. A'eramū Jejuī 'ga aipo 'jau etee 'gā nupe:

—Maran sipo 'gā amū a'eramū ojo'oka oywy pype ajamueu? Ajaupi etee futat ajuapisaupap, ojomateepapa ajaupi etee futat— 'jau Jejuī 'ga u'ama oporogytau 'gā nupe. —Maran sipo a'eramū ajepeja amunaw ipewara 'gā ojo'oka ajaupi etee futat ajuapisawamū? —'jau Jejuī 'ga 'gā nupe u'ama.

¹⁸ —Nan iapo re amunipo 'ā mama'eukwaawa remiayua ojomateepawi ajaupi etee futat— 'jau Jejuī 'ga 'gā nupe.

¹⁹ —“Pesepu pājē mū 'ga mama'eukwaawa pe'ai 'gā nui”, 'jau ako pēē jee ko. A'eramū je 'jau pē nupe: Ma'ja pājē mū ajee pēnemaiyuwa 'gā mama'eukwaawa pe'ai 'gā nui? Najaneruwarete 'ga pājē mū rūi nipo 'gā imoiri 'gā nui?— 'jau 'ga 'gā nupe.

²⁰ —Je nanē futat 'ā Jarejuwarete 'ga pājē mū etee je 'ā imoiri 'gā nui. A'eramū pēē a'e are je kwaapa. “Janeruwarete 'ga remimurera 'ga te nipo 'ā”, 'jau amunipo 'ā pēē jee— 'jau 'ga 'gā nupe u'ama.

²¹ —Ifuakat ma'e 'ga 'ā u'ywa renu'ama 'okwar ipe woga rarūmū. A'eramū 'ā muna'ywa osowe'em.

²² A'eramū ifuakararete ma'e 'ga 'ua 'ga muajāna 'ga monou 'ga retyka u'ywa pojekau 'ga wi. A'eramū futat osou 'ga karaemā upe. A'eramū futat 'ā erawau ime'ega ajaupe— 'jau 'ga 'gā nupe imome'wau.

—Mama'eukwaawa 'wyriara ifuakat ma'e 'jawe. Ipājē futat numiamū. A'ere Janeruwarete 'ga te pājērete. Mama'eukwaawa 'wyriara pājēa te 'ga wapyraap. Ma'eramū 'ā ae Jarejuwarete 'ga pājē mū mama'eukwaawa pe'ai 'gā nui— 'jau Jejuī 'ga 'gā nupe u'ama, oporogytau.

²³ —Je re iporomutare'ema 'gā najeremaiyuwa rūi— 'jau Jejuī 'ga 'gā nupe. —Jeporowyky are je poare'ema 'gā naje upe rūi oporowyky. Mama'eukwaawa upe te 'gā porowyky— 'jau Jejuī 'ga 'gā nupe.

Werekwarera upe mama'eukwaawa jewyawet

(Mateu 12.43-45)

* 11:15 Mama'eukwaawa 'wyriara rera mukūi tapy'ŷja je'eg imū. Satanasi 'jawamū, Pesepu 'jau nū.

²⁴ A'eramū Jeju'i 'ga 'jau 'gā nupe:

—Pē nui omoir ire mama'eukwaawa nipo ioi ywy akȳme'ema rupi opytaawa mū rekaa akou. A'eramū nipo opytaawa mū resake'emawe 'jau ojeupe etee futat nū: “Maran te 'ā nooi tejekwawer ipe etee futat tejewya nū 'i?” 'jau nipo ojeupe.

²⁵ A'eramū nipo ojewya 'ua werekwarera 'ga resaka. Erekwarera 'wyrriar amuteeramū nipo akowe'em ee. Ijekatu'oguu tuwamū.

²⁶ A'eramū nipo opytuna majatykau awau. Sete nipo opytuna rerua. A'ea te nipo itywerete. A'eramū te nipo erekwarera 'ga 'te'arareteramū— 'jau Jeju'i 'ga 'gā nupe imome'wau. —A'ere Janeruwarete 'ga 'Agesagea mama'eukwaawa rerekwarera pype ose re mama'eukwaawa noseu'jawi 'ua nū— 'jau 'ga 'gā nupe.

Jeju'i 'ga rerowiaara 'gā ku'ia

²⁷ A'ere Jeju'i 'ga oporogytapaw ire kūjā ēē mū mytun awi wafukaja mua 'ga upe:

—Iku'i nipo eney kynā nanimenime ene ree— 'jau ēē wafukaja mua 'ga upe.

²⁸ Aipo ojeupe 'eramū Jeju'i 'ga 'jau ēē upe:

—A'jea futat nū ī. Iku'i futat ēē je ree nū ī— 'jau 'ga ēē upe. —Je rerowiaara 'gā taetu nipo ēē ku'i wapyraap— 'jau 'ga ēē upe.

Aeremiapoe'ema fariseu 'gā enūinawet

(Mateu 12.38-42; 16.1-4; Maku 8.11-13)

²⁹ Ojee 'gā jatykapaw ire Jeju'i 'ga oje'ega 'gā nupe nū:

—'Awauwaramū miamū 'ā nepēa'wyrri futari pejejemogyau 'ga upe— 'jau 'ga 'gā nupe. —Oreremiapoe'ema epao amū oree, pe'je 'ā jee numiamū. A'e resaka “A'jea futat Janeruwarete 'ga opājē muri 'ga upe ra'e”, taru'e enee 'jau, pe'je 'ā jee numiamū. A'ere je naapoa'uweri mama'ea pē nupe pēnemiesagamū— 'jau Jeju'i 'ga 'gā nupe. —Juna 'ga ree etee je pē muea'ari pē mogyau— 'jau Jeju'i 'ga 'gā nupe.

³⁰ —Sā'ā ipira Juna 'ga mokona rakue. A'eramū 'ā imuapyra 'ara rupi 'ga rerua eropy'apoyyau rakue. Nan tee futat je ferawi imuapyra 'ara rupi. Je manū re nipo Janeruwarete 'ga futat je moferapa imuapyra 'ara rupi Juna 'ga 'jawerimū etee futat. Aiporamū tāmējē te nipo pekwaap. “Na pa je Janeruwarete 'ga 'ga muri rakue”, 'jau nipo pēē jee je feraw ire— 'jau 'ga 'gā nupe.

³¹ —Wowase pē majatykaaw ipe Janeruwarete 'ga 'jau pēē mū nupe. “Ko 'gā esage ra'e. Werowiat wejue 'gā jera'yra 'ga. A'eramū je 'gā mua tejemiayuwamū. A'eramū 'awamū 'gā 'ua osou ywag ipe je pyri. Jera'yra 'ga 'gā werowiat rakue”, 'jau nipo 'ga pē nupe. “Ko 'gā te aje nia'wyrri. Nuerowiari 'gā jera'yra 'ga rakue”, 'jau nipo 'ga pē nupe— 'jau Jeju'i 'ga 'gā nupe. —A'era'eramū nipo Sepa ywy pewara 'wyrriara ēē 'jau pē nupe: “NaKu'jywa kīā remiayuwā rūi agawewi je ikue. A'etea je ojet muku awi Sarumāu kīā je'ega renupa ikue”, 'jau nipo ēē pē nupe— 'jau Jeju'i 'ga 'gā nupe. —'A'ere 'ā Jejui kīā rekoī agawewi pē pype rakue. I'akwaap ma'e kīā jēmī. A'etea 'ā nepeanuwi kīā je'ega rakue”, 'jau nipo ēē oje'ega 'ua pē nupe— 'jau Jeju'i 'ga 'gā nupe. —A'jea futat ēē 'i. Sarumāu 'ga a'jea futat okwaap numiamū. A'ere 'ga nokwaapawi. Je te 'ā a'jea futat okwaap katu katu. A'etea 'ā jeje'ega nepeanuwi— 'jau Jeju'i 'ga 'gā nupe.

³² —Janeruwarete 'ga rowase pē majatykaaw ipe nipo Ninewa pewara 'gā afu'ama pē nupe. “Ore nanē nū. Norokwaawi ore Ku'jywa 'ga ikue. A'etea ore orojeupe Juna 'ga 'ga mome'u ypyrauwe oropoit orotywer awi ikue”, 'jau nipo 'gā pē nupe. “A'ere 'ā nepeanuwi futari Jeju'i 'ga je'ega rakue”, 'jau nipo 'gā pē nupe— 'jau Jeju'i 'ga 'gā nupe. —Juna 'ga a'jea futat esage ma'ea rakue. A'ere 'ā je te 'ga apyraawi. A'etea 'ā naje rerowiari pejepe pejejemogyau— 'jau Jeju'i 'ga 'gā nupe u'ama.

Arāparīn

(Mateu 5.15; 6.22-23; Maku 4.21-23)

³³ A'ere Jeju'i 'ga oje'ega 'gā nupe nū:

—Arāparīna monyg ire ae nomima'uweri mama'e 'ag are. Imonyg ire ae imonoi jakatupe te imȳina ajuesawamū te— 'jau 'ga u'ama 'gā nupe.

³⁴ —Tata eny 'jawe aereaa. Sā'ā tata enya mama'e resaukara janee. Nan tee futat jarejeau jane mama'e resagi. Ea ma'e 'gā wesak katu katu futat mama'ea. Eawep ma'e 'ga te aje 'ā nuesakatui mama'ea. Nan tee futat pēē. Ea ma'e 'gā 'jawewaramū pēē pēneapyo pejejemogyau jeje'eg are, erowiaa pejejemogyau. A'eramū pēē mama'e apou Jarejuwarete 'ga je'eg imū etee futat. A'ere eawep ma'e 'jawewaramū nepēneapyoī futari jeje'eg are. Neperowiari jeje'ega. A'eramū pēē pejejemifutar imū etee futat mama'e apou pejejemogyau. Ypytunaiwa pype wata ma'e 'jawe pēē— 'jau Jeju'i 'ga 'gā nupe.

³⁵ —A'eramū pēē jeje'ega renupa futat. Jeje'ega tata eny 'jawe. Sā'ā tata enya pe resaukara pē nupe. Nan tee futat jeje'ega pē mu'ei ywaga piar are.

³⁶ A'eramū pēē jeje'ega renuparamū tata eny pype futat pejemogoyau pejeatau. Jeje'ega renupara 'gā'a'jea futat ajemogoyau mama'e apou esage Jarejuwarete 'ga upe—'jau Jeju 'ga 'gā nupe.

Judeu 'gā nemiapo

(Mateu 23.1-36; Maku 12.38-40)

³⁷ Jeju 'ga porogytapaw ire fariseu 'ga amū 'jau 'ga upe:

—Ere ejua ejemi'waa je'wyr ipe—'jau 'ga 'ga upe.

A'eramū Jeju 'ga awau 'ga rupi.

'Ga rog ipe owaēm ire Jeju 'ga awau osou. Awau wapyka.

³⁸ A'eramū 'ga mo'wyarera 'ga 'jau ojeupe: "Kuu. Nojepoei futari nipo ajee 'ga ki sa", 'jau 'ga ojeupe. "Najane 'jawe rūi 'ga jepoei ojemi'war enune", 'jau 'ga 'ga ago'wau ojeupe etee futat.

³⁹ A'ere Jeju 'ga ikwaawi ojee.

—Ene 'ā jarejemiapou etee futat mama'ea ereapo ekou numiamū—'jau Jeju 'ga 'ga upe. —A'jeteetewi 'ā ene mama'e apou ekou numiamū. A'etea 'ā nenea'wyr. Pēē 'ā y'a kupe pireita futat numiamū. A'ere 'ā nepekatu'ogi waipy katy. Nan tee futat 'ā pēē. Pēpir esageay futat numiamū. Pejauk futat pejepiky'a awi numiamū. A'eramū 'ā pēpira ojekatu'oka numiamū. A'ere pēkurasāu nia'wyr futari. Iky'auuramū futat pēkurasāua. A'ere 'ā pejekurasāu nepekatu'ogi futari—'jau Jeju 'ga 'gā nupe oporogytau 'ūina.

⁴⁰ —Pē'akwaawe'ema pē nereko kūi —'jau Jeju 'ga oje'ega moywyrarfena 'gā nupe. —Janeruwarete 'ga 'ā pē apoarera. A'eramū 'ga afueweramū pē katu'og are numiamū. Napēpira katu'og are rūi 'ga fueweramū. Pēkurasāu katu'og are tee 'ga fueweramū numiamū—'jau 'ga oje'ega moywyrarfena 'gā nupe. —Pejetywer awi pepoir ire amunipo 'ā 'ga pē katu'ogi. A'eramū amunipo 'ā pēē pejesageramū pejemogoyau 'ga upe, 'jau je 'ā tekou pē nupe—'jau Jeju 'ga 'gā nupe.

⁴¹ —Pejekate'em awi pepoit. Ikaraemāe'ema 'gā nupe pejekaraemā pemono amū. Nan pēē iaporamū pejekatu'ok, pēpira we futat pēwyter ipe nanē nū—'jau Jeju 'ga 'gā nupe.

⁴² —Pēporiay'i pēē numiamū. A'ere nipo anure Janeruwarete 'ga pē nereko tyweri pejee pejeperomutare'em are. Fariseu 'ā pēē. A'eramū pēē mama'e mojo'oka pejepo 'jawe pejejeupe. Ko pypiara nanē imojo'oka nū. A'eramū pēē mapejeja monou Jarejuwarete 'ga upe. A'eramū emyrrera pēma'ea. Kumikasiga miamū pēē imojo'oka imonou Jarejuwarete 'ga upe. Nanuara te esage futat 'ga upe numiamū. A'ere namā etee rūi peapo. Pejeeue nanē futar iki pejejuka esage nū. Mīmera apoa esageay Janeruwarete 'ga upe—'jau Jeju 'ga 'gā nupe, 'gā mu'jau ee. —A'ere 'ā pēē nanarūi. Pēē 'ā pejuereko tywerete. A'eramū nipo Janeruwarete 'ga pejeeue pejeperomutare'em are pē nereko tyweaete—'jau 'ga 'gā nupe 'ūina. —Pejepytuna 'gā nereko esagearamū Jarejuwarete 'ga ree we futat pejejuka esage—'jau Jeju 'ga 'gā nupe. —A'ere pejepytun are pejejuka'emamū Jarejuwarete 'ga we futat pereko tywerete—'jau 'ga 'gā nupe 'ūina oporogytau.

⁴³ —Pēporiay'i nipo pēē numiamū. "Je jeresage" pe'je numiamū. A'ere nipo anure Janeruwarete 'ga pē nereko tyweretei. Pejatykaaw ipe pejewau 'ā kūima'eteete 'gā apykw ipe etee pēapygwet. Ukawō'ō me pejeatau pejemogoyau miamū 'ā pejeapeje'ega futaa—'jau Jeju 'ga 'gā nupe.

⁴⁴ —Judeuramū jane nipyru'gaweri tywy are. Tywya nia'wyr. Aeto'omera ajemogy. A'eramū jane jarepyruge'ema futat ee. A'eramū jane mama'e monou tāmējē futat im'ina tywy 'arimū imojewakawamū ajaupe. A'eramū ae tywy 'arimū opyruge'ema. Tywya 'ā 'ūina ojewage'emamū. A'eramū 'ā ae okwapa i'arimū. Ikwaape'ema rerekou. Nan tee futat pēē. Nepēwyter a'wyr pejemogoyau. A'ere 'gā nokwaaui te. Tywy jewage'ema 'jawe futat—'jau Jeju 'ga 'gā nupe. —"Oresageay" pe'je 'ā jepi numiamū. A'ere 'gā nepekwaawi te. Pēwyter a'wyr'e'ema nokwaaui te—'jau 'ga 'ūina 'gā nupe.

⁴⁵ A'eramū Moisesi 'ga remikwasiarer are moromu'jara 'gā amū 'jau Jeju 'ga upe, aipo 'ga 'eramū.

—'Gā nupe aipo 'jau te ore nanē futat ore ago'o ape e'yina nū—'jau 'gā 'ga upe aipo 'ga 'eramū.

⁴⁶ —Pēē nanē nipo moromu'jaramū pejemogy tywet 'gā 'jawe futat nū—'jau Jeju 'ga 'gā nupe. —Napejemimu'efer imū etee rūi te 'ā mama'ea peapo. A'eramū nipo Janeruwarete 'ga pē nereko tyweaete futat. Sā'ā 'gā amū mama'e poyja monoa aju'arimū. A'eramū 'gā ojopoare'ema iupia. Nan etee pēē. Pēē 'ā Moisesi 'ga remikwasiarer are pemu'e katu katu 'gā numiamū. "Peko esage 'ā pejemogoyau Moisesi 'ga je'eger imū. Pepoit kasi 'ga je'eger awi ne", pe'je 'ā 'gā nupe pejemogoyau numiamū. A'ere 'ā pēē te nepeko esagei pejemogoyau Moisesi 'ga je'eger imū—'jau 'ga 'gā mu'jara 'gā nupe.

⁴⁷ A'ere 'ga 'jau 'gā nupe nū:

—Pēporiay'i pēē pejemogyau numiamū. Nepeenuwi futari Jarejuwarete 'ga je'ega mome'wara 'gā je'ega. A'eramū nipo Janeruwarete 'ga pē nerekou tyweaete futat. Pēypy 'gā 'ā Janeruwarete 'ga mome'wara 'gā je'ega nuenuwi etee rakue. Ma'eramū 'ā 'gā 'ga je'ega mome'wara 'gā apisi rakue. Pēē nanē 'ā 'gā je'egera renupe'ema nū— 'jau Jeju 'ga 'gā nupe.

⁴⁸—Pejepy 'gā 'gā apisi re 'ā pēē ita esage monou 'gā nywy 'arimū peje'arasiga re-saukaawamū. A'ere 'ā pē'arasig 'mea te pē nerekoi. Pēku'ia te pē nereko 'gā apisiawer are— 'jau Jeju 'ga 'gā nupe.

⁴⁹—Janeruwarete 'ga 'ā i'akwaap tāmējē futat. A'eramū 'ga jane kwaapa. A'eramū 'ga 'jau “Teje'ega mome'wara 'gā tomono 'gā nupe 'jau kwy”, 'jau 'ga rakue. “Amumera 'gā te nipo 'gā weroko tywerete. Amumera 'gā te nipo ajee 'gā wapisi”, 'jau Janeruwarete 'ga 'gā nupe rakue— 'jau Jeju 'ga 'gā nupe.

⁵⁰—A'eramū Janeruwarete 'ga pē nerekou tyweaete werowiaara 'gā nepyaa. Nepē'arasigi te 'ā pejetywer are. Pejetywer are, jareypy 'gā tywer are. Mimer are 'ga pē nerekou tyweretei. Janepy 'gā 'ā Jarejuwarete 'ga je'ega mome'wara 'gā apisau ekoete rakue. Ywy apo ppyrauwe te 'ā 'gā 'ga rerowiaara 'gā apisi rakue— 'jau Jeju 'ga 'gā nupe 'ūina.

⁵¹—Apeu 'ga ra'ne te 'ā 'gā ajuka ppy ppy rakue. A'ere 'gā 'ā 'awamū taetu 'ga rerowiaara 'gā apisi kwaiwete. 'Awamue 'gā 'ā Sakari 'ga jukau rai'i nū— 'jau Jeju 'ga 'gā nupe. —Jarejuwarete 'ga rukawō'ō me 'ga 'amamū 'gā 'ā 'ga jukau rai'i. A'eramū nipo 'ga pē nerekou tyweaete iapisipyrera 'gā nepyaa— 'jau Jeju 'ga 'gā nupe.

⁵²—Moromu'jara pēē numiamū. Pēporiay'i pejemogyau numiamū. A'ere nipo anure Janeruwarete 'ga pē nerekou tyweri futari— 'jau Jeju 'ga 'gā nupe. —Jarejuwarete 'ga je'ega te 'ā neperowiari futari. A'eramū 'ā pēē erowiarukare'ema 'gā nupe. Pē'me etee 'ā 'gā nupe. A'eramū 'gā a'jea futat ikwaape'ema. A'eramū nipo anure Janeruwarete 'ga pē nerekou tyweaete— 'jau Jeju 'ga 'gā nupe.

⁵³ Oporogytapaw ire Jeju 'ga awau 'gā nui. Fariseu 'gā amū awau 'ga rupi Moisesi 'ga remikwasiarer are moromu'jara 'gā netee. A'eramū 'gā awau akou oporogytaw pe rupi. Ajamueu awau akou. Oje'ega moywyrafena 'ga upe, 'ga rerawau 'ga rerekou, 'ga moporogytakaa ojeupe. A'eramū 'gā 'jau ajaupe:

—Pe'je ajee 'ga simoporogytakat jarejee 'ū— 'jau 'gā ajaupe. —Siesak 'ga mama'e tywera mome'ua jarejee 'jau 'ū— 'jau 'gā ajaupe, ajuerawau ajuerekou. A'eramū 'gā a'eramū 'ga moporogytakaa 'ga rerawau 'ga rerekou pe rupi. A'ere 'ga morogyta a'jea etee imome'ui 'gā nupe 'gā nerawau 'gā nerekou. Nomome'ui futari 'ga mama'e tywera.

⁵⁴—'Ga je'eg ekoete 'ga rekoramū sipyyk 'ga 'jau— 'jau 'gā ajaupe numiamū.

A'ere 'ga morogyta a'jea etee imome'ui 'gā nupe 'gā nerekou.

12

Pekyje ki Jarejuwarete 'ga wi (Mateu 10.26-31)

¹ A'eramū 'gā ajatykau Jeju 'ga ree. 'Ga porogyta renupa 'ua ajatykau. Kwaiwete 'gā. A'eramū 'gā opyruga pāwē gatu etee te futat ojopy are. Opyrugawe'ema rerekou 'gā opyruga ajuee.

A'ere Jeju 'ga je'egi wemimu'e 'gā nupe etee ra'ne:

—Peko kasi fariseu 'gā 'jawe ne— 'jau 'ga wemimu'e 'gā nupe. —“Ore 'ā oreresageay”, e'i 'gā numiamū. A'ere o'meramū te 'gā 'i ajemogyau— 'jau 'ga 'gā nupe. —Nepeesagi te 'gā tywera. A'ere 'gā tywereteramū futat. Mama'e tywera 'gā wapo ajemogyau. A'ere 'gā imimi te. Kanape'i jopypeawa 'jawe 'gā tywera. Nuesaga'uweri ae kanape'i jopypeawa. A'ere imopy'apirupaw ire ae imopy'apiruawa kwaawi futari. Nan tee 'gā tywera. Ae nuesaga'nei nipo 'gā tywera. A'ere anure te nipo ae esagi futari. Pejemogy kasi 'gā 'jawe ne— 'jau Jeju 'ga 'gā nupe u'ama.

²—Nomima'uweri futari mama'e tywera. Anure te nipo imimipyrrera jesaukari 'gā nupe.

³ 'Awamū 'gā amū jemogyi jemime oje'ega ajaupe. A'ere aipo 'ara rupi te nipo 'gā amū imome'ui 'gā nupe wafukaita. A'eramū te nipo najuejue etee futat pekwaap— 'jau 'ga 'gā nupe u'ama.

⁴ A'ere Jeju 'ga 'jau 'gā nupe nū:

—Pekyje awi pejeapisi are ifuwet ma'e 'gā nui. Pē apisi 'gā numiamū. A'ere 'gā pē'aga nomateepawa'uweri.

⁵ Jarejuwarete 'ga wi te pekyje ete. 'Ga te a'jea futat pē mateepap ywawuje tee werowiare'emamū. Pē'aga we futat 'ga imonou mama'eukwaawa rapyaw ipe— 'jau 'ga imome'wau 'gā nupe. —'Ga te a'jea futat mama'e tywera ojeupe iaporamū ae apisi— 'jau 'ga 'gā nupe.

⁶—Janeruwarete 'ga te 'ā pājēreteā. A'ere 'ga jejukai esagei futari ae ree. Peesak wyra'ia. Wyra'ia 'ā niapoi agawewi. A'etea Janeruwarete 'ga imanūnamū wesak 'ūina.

⁷Ae taetu aje 'ā ae ate 'ga upe. Ma'eramū 'ā 'ga jejukai ae ree taetu— 'jau 'ga imome'wau 'gā nupe u'ama. —Pē'awa we futat ojemojopyrūmawa ajemogyau pēakag are. Aeakag are ijemogya we futat 'ga okwaapap. “Nojejukai nipo 'ga ore ree?” pe'je kasi ne. Naani. Ojejuka futat 'ga pē nee. A'eramū ki pēē pejekyjawe'em pejejereko tywera 'gā nui— 'jau 'ga 'gā nupe.

Pejenosī kasi Jejui 'ga mome'u awi ne
(Mateu 10.32-33; 12.32; 10.19-20)

⁸A'ere Jejui 'ga oje'ega 'gā nupe nū:

—Je 'ā pēneki'yaretea. Pejenosī kasi je mome'wau 'gā nupe ne— 'jau 'ga 'gā nupe. —'Gā nowase pēē je mome'u renosīe'em ire je nanē najenosī pē mome'wau nū. “Je Jejui 'ga remiayuwamū”, pēē 'eramū je ywag ipe peoramū je nanē futat ywag ipewara 'gā nowase a'e 'gā nupe nū: “Koromū noko jeremiayuwa 'gā 'ja”, 'jau nipo je pē nupe ywag ipe peoramū— 'jau Jejui 'ga 'gā nupe.

⁹—Pēē mū nipo 'jau 'gā nupe: “Je naJejui 'ga remiayuwa rūi”, 'jau nipo pēē. A'eramū nipo je nanē futat ywag ipe peoramū “Najeremiayuwa rūi koromū”, 'jau nipo je 'gā nupe— 'jau 'ga 'gā nupe.

¹⁰—Ojeupe peporogyta re Janeruwarete 'ga pētywera moiri pē nui. Je kuraw ire pētywere futat. A'ere nipo anure 'ga 'Agesage je'egi pē nupe, pētywera resaukaa pē nupe. A'eramū nipo pēē pejeipoia pejetywer awi. Jui pepoir ire Janeruwarete 'ga imoia pē nui— 'jau 'ga 'gā nupe imome'wau. —A'ere 'ga 'Agesage kuraw ire nitywi 'ga amū pētywera resaukaawamū pē nupe. A'eramū pēē jui pejeipoire'ema. Nan tee futat pejemoggyau. Pejetywer awi pēpoiwiwera'emamū Janeruwarete 'ga nomoiri futari pē nui. A'eramū aipo 'gā awau mama'eukwaawa rapyaw ipe— 'jau Jejui 'ga imome'wau 'gā nupe.

¹¹—Anure nipo 'gā amū je rowiaramū pē pyygi pē nerawau pejetykaaw ipe 'wyriara rowase pē moporogytaukaa jupe. “Ekoay 'ga akou mama'e tywera apou”, 'jau nipo 'gā pē nerawau 'wyriara upe pē mome'wau 'me jupe. A'eramū kasi pekyje pejejeoromū ne— 'jau 'ga 'gā nupe. —A'eramū “Ma'ja 'jau sipo je 'gā nupe teporogytau 'wei”, pe'je kasi ne, pejekyjau ne.

¹²Janeruwarete 'ga peu pē nerooramū 'gā nupe peje'egawa amut pē nupe— 'jau 'ga 'gā nupe u'ama.

Ika'aranūū kwai ma'e 'ga

¹³A'ere kūima'e 'ga amū mytun awi wafukaja mua Jejui 'ga upe:

—Jeruwa amanū ai'i. A'ere jerekī'ya 'ga arajuwa karaemāmera nomojo'ogi jee ai'i— 'jau 'ga wafukaja mua 'ga upe. —A'eramū ene eje'ega 'ga upe jee: “Emojo'ok pejejuwa karaemāmera ejewirera 'ga upe”, ere ki 'ga upe jee— 'jau 'ga oje'ega mua Jejui 'ga upe.

¹⁴A'eramū Jejui 'ga 'jau etee 'ga upe:

—Naejeki'ya ene iago'o anupa rūi je ruri ai'i— 'ga 'i etee 'ga upe, aipo ojeupe 'ga 'eramū. —Naamanū ma'e karaemā mojo'oka rūi je ruri ai'i— 'jau etee 'ga 'ga upe.

¹⁵A'eramū 'ga 'jau 'gā nupe nū:

—“Kwaiwete je karaemā futari”, pe'je awi. Nakaraemā rūi pē mogeukat ywag ipe. Tejerowiarāmū te je pē mogeukari ywag ipe Tejuwarete 'ga pyri— 'jau Jejui 'ga 'gā nupe.

¹⁶⁻¹⁷A'eramū Jejui 'ga mama'e mū mome'wau 'gā nupe nū:

—Kūima'e 'ga amū ikaraemā kwaiwete ma'e 'ga amū e'i ojeupe: “Kwaiwete te 'awamū jeko pypiaa 'wei. Kwaiwete jeremi'ua 'awamū 'wei” 'jau 'ga ojeupe. “A'ere ijagawa niapoi jupe. A'eramū je ma'ja apou jupe nū'ū. Najeporomonoweri je ee 'gā nupe”, 'jau 'ga 'ūina ojeupe.

¹⁸“Sikōi'i ma'ea pa je omono etyka kwy. Taapo tee amū tuwuu ma'e tejemi'u ryrūnamū 'jau kwy. Tekaraemā reewe tomono inuga tupaw yau pype 'jau kwy”, 'jau 'ga ojeupe.

¹⁹“A'ere ta'e tejeupe 'jau kwy: Kwaiwete te jeremi'ua 'wei. Noporowyki futari te je 'awamū 'wei. Ajemi'wat etee futat te je 'awamū te'yina 'wei” ta'e tejeupe etee futat 'jau kwy. “Teku'iramū tejemi'u are te'yina 'jau kwy”, 'jau 'ga ojeupe— 'jau Jejui 'ga 'gā nupe imome'wau.

²⁰—A'eramū nipo aipo 'ga upe Janeruwarete 'ga 'jau: “Eremut ekoete eje'ega e'yina ra'e”, 'jau nipo 'ga 'ga upe, amara'neramū 'ga ree. “Ene manū re awyja ma'ea eneremi'ua ki 'ei? 'Awauwe futat eramanū ejemi'u awi kūi”, 'jau nipo 'ga oje'ega mua 'ga upe— 'jau Jejui 'ga imome'wau 'gā nupe.

²¹—Pēē mū nipo pejekaraemā are etee futat pejejea'aramū. A'eramū Jarejuwarete 'ga ree jēmi nipo pejejea'are'emamū futat— 'jau 'ga 'gā nupe. —Aipoa kūima'e 'ga 'jawe futat nipo pēē. 'Ga 'jawe futat nipo pejemama'ea peetypap pejemanūnamū— 'jau 'ga 'gā nupe imome'wau.

*Pejemogypyk ki Jarejuwarete 'ga ree
(Mateu 6.25-34)*

²²⁻²³ A'eramū Jejuī 'ga 'jau wemiayuwa 'gā nupe nū:

—Ma'eramū 'ā je 'i pē nupe: Pēnea awi mama'e are etee pejejemogyau, je 'i pē nupe. “Ma'ja je 'i'wau 'awamū”, pe'je awi pejejeupe. Pēnea'ar awi pejejaity are etee pejejemogyau. Jarejuwarete 'ga ree te pejemogypyk pejejemogyau, 'jau je 'ā pē nupe— 'jau 'ga 'gā nupe. —'Ga te 'ā pē apo. A'eramū 'ga ojee pejemogypygamū mama'e mua pē nupe— 'jau 'ga 'gā nupe u'ama oporogytau.

²⁴ —Sā'ā wyra'ia. Wyra'ia 'ā nuapoi agawewi mama'ea. Nitywi agawewi 'ā mama'e tymawa. A'etea 'ā Janeruwarete 'ga mama'ea omono jupe— 'jau Jejuī 'ga 'gā nupe. —Niapoi agawewi wyra'ia 'ga upe. A'etea 'ga ojejekau ee. Pēē taetu aje 'ā aeramū. A'etea sipo 'ga nojejekai pē nee?— 'jau 'ga 'gā nupe.

²⁵ —Peko sipo amū pejeyman'e'm are ete ea'at ma'eramū amū pejeyman'e'mamū namutat?— 'jau 'ga 'gā nupe u'ama. —Naani. Nia'wyri futari aipoa miamū pē nupe ee pēnea'ara. A'etea te nipo pēyman pejejemogyau. Pejejywr are tee pejejea'aramū miamū pamanū futat. Mama'e are etee pēnea'at pē nekoa nepē koga'uweri— 'jau Jejuī 'ga 'gā nupe.

²⁶ —Ma'eramū pēē pejejea'aramū mama'e are etee pejejemogyau ki 'ei'?— 'jau Jejuī 'ga 'gā nupe.

²⁷ —Sā'ā 'ywyotyra. 'Ywa 'ā noporowykyi agawewi futat opotyrr are. A'ere ipotyra esageteeramū— 'jau 'ga 'gā nupe. —Ymā te janepyntunera 'ga, Sarumāu 'ga, ikaraemā kwai ma'ea rakue. 'Ga te 'ā taity esage ma'ea rakue. A'ere 'ā 'ywyotyra te 'ga raity esage apyraawi.

²⁸ 'Ywyotyra 'ā majepeī 'ara rupi etee wesageramū. A'eramū 'ā ai'iwe op'yijagamū. A'etea 'ā Janeruwarete 'ga omokaturam ipotyra jupe— 'jau Jejuī 'ga 'gā nupe. —Jupe iapo re sipo 'ga nomonoi mama'e esage pē nupe? Pēē taetu aje 'ā pēnesage 'ga upe. Ma'eramū pēē 'ga rerowiaraipe etee 'ū? Pe'je 'ga rerowiaa futat nanimenime. Perowiarai awi etee 'ga.

²⁹ Au'je mama'e are etee pēnea'ar ire. Pejemuaēm awi pejejemi'uram are etee. Peje-muaēm awi nanē pejejaity are etee nū. Jarejuwarete 'ga je'eg are etee pejejuka ete— 'jau Jejuī 'ga 'gā nupe.

³⁰ —Janeruwarete 'ga rerowiare'ema 'gā te 'ā ajemuaēm mama'e are etee. A'ere kasi pēē 'ga jawe peko ne. Janeruwarete 'ga pēnemifutara okwaap. Ojejuka 'ga pē nee— 'jau Jejuī 'ga 'gā nupe.

³¹ —Jarejuwarete 'ga je'ega peenup katu katu. 'Ga je'eg imū peko esage. A'eramū 'ga mama'e esage mua pē nupe, pēnemifutara mua pē nupe— 'jau Jejuī 'ga 'gā nupe u'ama.

*Nateepawi futari ywag ipe ako ma'ea
(Mateu 6.19-21)*

³² —Pekyje futat kasi mama'ea pejejewi teepap ja'wyja'wyrāmū ne. Pejemogypyk futar iki pejejemogyau 'ga ree. Janeruwarete 'ga ojee pejemogypygamū iku'i futat 'ūina pē nee. A'eramū 'ga mama'e esage mua pē nupe. Anure ywag ipe pē nesaka 'ga aku'iramū futat pē nee— 'jau Jejuī 'ga 'gā nupe.

³³ —Pejekaraemā ki peme'eg amū ka'aranūū are. A'e repyfera monou ikaraemā'e'ema 'gā nupe. A'eramū Janeruwarete 'ga ka'aranūūa 'gā nupe imonoramū ywag ipe mama'e mua pē nupe. Mama'ea pejejaupe imonoawera mepyau pē nupe. Peu mama'e nateepawa'uweri. Nitywi mama'e mateepaara. Nitywi agu'jaa peu. Nitywi jypemerua. Nitywi muna'ywa. A'eramū mama'ea atepawe'emamū futat peu— 'jau Jejuī 'ga 'gā nupe.

³⁴ —Pejekaraemā are etee pēnea'aramū 'au ywy pe etee futat pejekaraemā pereko. A'ere Janeruwarete 'ga ojee pēnea'aramū, ywag ipe nanē mama'e esage muri pē nupe nū. Auwara karaemā momytunara 'gā ojejuka 'au ojeapo ma'e are etee ajemogyau. A'ere ywag ipe karaemā momytunara 'gā jejekai Jarejuwarete 'ga ree te— 'jau 'ga 'gā nupe u'ama.

"Je rura ki peapesak" Jejuī 'ga 'eawet

³⁵⁻³⁶ —Anurenure'i nipo je oi Jarejuwarete 'ga pyri pē nui. Anure te nipo je ruri nū. A'eramū pēē je ruru'jawa rapesaka pejejemogyau— 'jau Jejuī 'ga 'gā nupe oporogytau 'ūina. —Sā'ā aeoporowykya 'wyriara upe. A'eramū 'ā 'wyriara 'ga awau watau wemiayuwa 'gā nui, maraka pe 'ga awau 'gā nui. A'eramū 'gā 'ā 'upa tata monyka im'yina 'ga rura rapesaka. Owaēmawe 'ga 'ā 'okwara mopoga wemiayuwa upe. A'erauwe 'ā 'wyriara 'ga remiayuwa iawopytymo'woka 'ga upe.

³⁷ A'eramū 'gā aku'iramū 'upa. 'Ga waēma rapesakara 'gā aku'iramū. “Au'je katu pa 'ga ruri jane sere'emauwe nū”, 'jau 'Gā ajaupe— 'jau Jejuī 'ga 'gā nupe. —A'ere nipo 'ga opiara mosoka, oje'ega wemiayuwa 'gā nupe: “Pe'je pejejua pejejemi'waa”, 'jau nipo 'ga ojewyra rapesakara 'gā nupe— 'jau Jejuī 'ga 'gā nupe.

³⁸ —Meeweī 'ur ire nipo 'ga ppyaje 'ua owaēma. A'etea nipo 'gā ajemogyau 'ga rapesaka. 'Ga waēmamū nipo 'gā aku'iramū.

³⁹⁻⁴⁰ Nan tee futat nipo pēē je rura rapesakaramū pejejemogyau au'jeteramū je rapesaka— 'jau Jejuī 'ga 'gā nupe. —Nepekwaawi futari je jeywya. A'eramū pēē pejejemogyau au'jeteramū je rapesaka— 'jau Jejuī 'ga 'gā nupe u'ama. —Sā'ā 'oga jara 'ga muna'ywa rura kwaawe'ema. Muna'ywa rura kwaaw ire amunipo 'ā 'oga jara 'ga awawe'em 'og awi. A'ere 'ga nokwaawi futari muna'ywa rura wog ipe. Nan tee futat nepekwaawi pejejekī'yramū je jeywya— 'jau Jejuī 'ga 'gā nupe.

*Kūima'e 'ga remiayūwa 'gā
(Mateu 24.45-51)*

⁴¹ Aipo 'ga 'eramū Pedro 'ga 'jau 'ga upe:

—Ore upe te ere aipo 'jau? Najuejue etee te 'ā ere oree nū?— 'jau Pedro 'ga Jejuī 'ga upe.

⁴² A'eramū Jejuī 'ga 'jau Pedro 'ga upe:

—Je rerowiaaramū etee futat pejemogy najuejue etee futat je rapesaka, je jeywya rapesaka— 'jau Jejuī 'ga Pedro 'ga upe.

A'eramū Jejuī 'ga mama'e mū mome'wau 'gā nupe, 'gā mū'jau 'uaw are nū:

—'Wyriara 'ga remiayuw esage 'ga i'akwaap ma'ea. O'wyriara 'ga je'eg imū etee futat mama'ea wapo. A'eramū 'wyriara 'ga wata enune wemiayuw esage 'ga m'ina wemiayūwa 'gā nesakawamū. "Aata je. A'eramū je ene m'ina 'gā nesakawamū", 'jau 'wyriara 'ga wemiayuw esage 'ga upe. "Mama'ea ki emono 'gā nupe 'gā nemi'uramamū", 'jau 'ga 'ga upe. A'eramū nipo 'ga 'wyriara 'ga awau watau 'gā nui. Anure nipo 'ga ojewya 'ua nū.

⁴³ 'Ga 'eawer imū etee mama'e apo re nipo 'wyriara remiayuw esage 'ga aku'iramū ajemogyau o'wyriara 'ga resakawe.

⁴⁴ A'eramū 'wyriara 'ga we futat aku'iramū 'ga ree wemifutar imū etee 'ga porowykyramū— 'jau Jejuī 'ga 'gā nupe. —A'eramū nipo 'ga 'a'jea futat 'ga monou 'ga m'ina okaraemā are ojejuka ma'eramū.

⁴⁵ A'ere nipo im'yimyrera 'ga amū 'i ojeupe: "Mukuu nā'ā je'wyriara 'ga oi re'ā, oporo-mukuramū re'ā", 'jau nipo 'ga ojeupe. A'eramū nipo 'ga opytuna 'gā amū nupānupāu. A'ere nipo 'ga awau ojemī'waa, kawī'ajaiwa rykua. A'eramū nipo 'ga weawyrywamū akou. Oporowykyawe'em nipo 'ga 'ūina.

⁴⁶ A'e pype nipo 'ga 'wyriara 'ga 'ua owaēma erujewi 'ga upe. Wapesage'emeteramū nipo 'ga 'ua owaēma erujewi 'gā nupe. A'eramū nipo 'ga 'ga rekoarū'e'ema resakawe 'ga mopimopika. A'ere nipo 'ga 'ga monou tata pe imomoa 'ga rerekou tyweaete— 'jau Jejuī 'ga 'gā nupe imome'wau.

⁴⁷ —'Gā amū nipo 'wyriara remifutara kwaapa futat numiamū. A'ere nipo 'gā nuapoi jupe. A'eramū nipo 'ga 'wyriara 'gā nupānupāukaa tesirūmera 'gā nupe— 'jau Jejuī 'ga 'gā nupe u'ama.

⁴⁸ —Amumera 'gā te nipo ajee nokwaap katui 'wyriara remifutara. A'e 'gā 'gā nonupāuui. Nonupāi kwaiwete. Ināinānī'ī etee nipo 'gā nupāi, mama'e tywera apo re— 'jau Jejuī 'ga 'gā nupe imome'wau.

—'Gā amū nipo 'wyriara remifutara kwaapa katu katu futat. 'Gā 'a'jea futat oporowyky jupe. Wemiesaga 'gā nee ojemogyppyka etee. Wemiesage'ema 'gā nee 'ga nojem-ogyppyga'uweri— 'jau Jejuī 'ga 'gā nupe u'ama imome'wau.

*Jejuī 'ga ree nipo ae ajamueu
(Mateu 10.34-36)*

⁴⁹ A'eramū Jejuī 'ga 'jau 'gā nupe:

—Mama'e mateepapa je ruri. Sā'ā tata mama'e tywera mateepawa. Nan tee futat nipo je ruri mama'e tywera mateepapa— 'jau Jejuī 'ga 'gā nupe. —Janeruwarete 'ga nipo je rerekou tywerukaa pētywer are 'gā nupe. A'eramū nipo 'ga werowiaara 'gā nerekou tywerukare'ema. A'ere je anure 'ga rerowiaare'ema 'gā etee ereko tyweretei— 'jau Jejuī 'ga 'gā nupe.

⁵⁰ —Anurenure'i nipo je rerowiaare'ema 'gā je rereko tyweri. A'e are etee je rea'aramū tekou— 'jau Jejuī 'ga 'gā nupe.

⁵¹ A'ere 'ga 'jau 'gā nupe:

—'Jarejuwarete 'ga remimurera 'ga rur ire nipo ore jamuepawi", pe'je kasi ne. Naani. Je ree taetu nipo pejamue pejejemogyau— 'jau 'ga 'gā nupe u'ama.

⁵² —Je ree naju'jaju'jawe tee rūi pēnea'at mama'e are. Mukūja 'gā nipo pēpytuna 'gā oporomutaramū je ree. Muapyra 'gā tee nipo ajee pēpytuna 'gā niporomutari je ree. A'eramū nipo 'gā naju'jaju'jawe tee rūi wea'aramū je ree— 'jau 'ga 'gā nupe.

⁵³ —Kūima'e 'ga amū nipo je rerowiaa. A'ere nipo 'ga ra'yra naje rerowiari. Kūjāmuku ēē mū nipo je rerowiaa. A'ere nipo ēē ja naje rerowiari. A'eramū nipo 'gā ajamueu je ree— 'jau 'ga 'gā nupe.

Naje kwaawi pejepe 'ga 'eawet
(Mateu 16.2-3)

⁵⁴ A'eramũ Jeju'i 'ga 'jau 'gã nupe nũ:

—Ywagũna resakawe 'ã pëë mũ 'jau pejejaupe: “Amana nipo 'ã 'ja”, 'jau 'ã pëë pejejaupe. A'eramũ a'jea futat amana.

⁵⁵ Ywytu ruramũ 'ã pëë, “Arasimiũna nipo 'ã”, 'jau 'ã pëë pejejaupe. A'eramũ 'arasimiũna futat— 'jau 'ga 'gã nupe.

⁵⁶ —Ywagũna resakawe 'ã pëë amana kwaapa pejejemogyau. Ywytu ro'ysag are 'ã pëë 'arasimiũna kwaapa— 'jau 'ga 'gã nupe. —Tejuwarete 'ga remiaporama je amome' u pë nupe. Ma'eramũ sipo nepekwaawi? Nepëporokwaawiwieri te 'ã ee. Ma'eramũ 'ã nepekwaawi— 'jau 'ga 'gã nupe.

Pemota'wa pejee iporomutare'ema 'gã
(Mateu 5.25-26)

⁵⁷ A'eramũ Jeju'i 'ga 'jau 'gã nupe:

—Ma'eramũ ajeë mama'e esagea pejejeupe iapoa nepekwaawi pejejemogyau 'ũ?— 'jau 'ga 'gã nupe.

A'ere Jeju'i 'ga mama'e mũ mome'wau 'gã nupe nũ:

⁵⁸ —“Mama'e tywera 'ga wapo jee”, pejejeupe 'ga amũ 'eramũ pejewau pejeporogytau 'ga upe, 'ga mota'wau pejejeupe. Kasi a'e pe 'ga pë nerooi 'wyrriara 'ga upe ne. A'eramũ 'wyrriara 'ga pë monookaa jefaruu 'ga upe, pë munewukaa ne.

⁵⁹ Moromunepawa pype pejemono re nipo nepe'ëarũi jui. Mama'e tywera apo mepy re tãmëjê te pe'ë jui— 'jau Jeju'i 'ga 'gã nupe, 'gã mu'jau ee. —Nan tee futat ki pëë. Mama'e tywera apo re peje'eg tãmëjê futat Jarejuwarete 'ga upe. A'eramũ 'ga pë katu'oka tãmëjê pë mogyau nũ. Ojeupe peje'ega'ne'emamũ 'ga pë nereko tyweretei aipo are— 'jau 'ga 'gã nupe.

13

Otywer awi ipoire'ema 'gã

¹ Jeju'i 'ga porogyta 'ga 'amamũ 'gã amũ 'ua owaëma 'ga upe.

—Ekoay 'wyrriara 'ga, Piratu 'ga Garireja ywy pewara 'gã apisaukaa Jarejuwarete 'ga upe 'gã porogyta 'gã nupawamũ. Itywerete nipo 'gã. Ma'eramũ nipo 'ã Janeruwarete 'ga 'gã apisaukaa 'gã nupe, aru'e ore kũi— 'jau 'gã 'ua u'ama imome'wau 'ga upe.

²⁻³ A'eramũ Jeju'i 'ga 'jau 'gã nupe:

—Naani. Nityweri 'gã kwaiwete. Ajepeja Garireja ywy pewara 'gã tywera 'gã nu-apyraawi. Pëë nanë pëtywerete futat nũ. Pejetywer awi pejeipoire'ema pëë nanë futat pamanũ 'gã 'jawe. Pamanũ re nipo, Janeruwarete 'ga pë'aga monou mama'eukwaawa rapyaw ipe— 'jau Jeju'i 'ga 'gã nupe u'ama.

⁴ —Awamũ 'ã 'og ywate u'aa Sirue pewara 'gã 'arimũ rai'i, 'gã apisau rai'i. Tesoitu 'gã pytuna. Itywerete ma'e 'gã sipo poromũ rai'i? Pëtywera sipo 'gã wapyraap rai'i?

⁵ Naani. Pëë juejue futat pepapap pejetywer awi pejeipoire'emamũ— 'jau Jeju'i 'ga 'gã nupe.

Y'wa 'yp

⁶ A'ere Jeju'i 'ga mama'e mũ mome'wau 'gã nupe nũ:

—Kũima'e 'ga amũ 'ũina. A'eramũ y'wa 'ywa u'ama 'ga ko pe. Y'wa 'aawa rupi 'ga awau y'wa 'ywa resaka. A'ere nokoi'i futari i'a mũ akã are 'ga upe.

⁷ A'eramũ 'ga 'jau wemiayuwa 'ga upe: “Muapya kwara 'ara rupi je ruri 'au y'wa 'ywa resaka ai'i. A'ere je naesagi amũ i'aa ai'i. A'eramũ ene etyka”, 'jau 'ga wemiayuwa 'ga upe.

⁸ —Aipo 'ga 'eramũ 'ga remiayuwa 'ga 'jau 'ga upe: “Tene i'ami ra'ne, 'awa kwara rupi tee ra'ne”, 'jau 'ga 'ga upe. “Taypywykai 'jau. A'ere 'yja esage tarut ara iypy are esaka 'jau”, 'jau 'ga 'ga upe. “Siesag i'a 'jau, 'yi esage oypy are erur ire 'jau.

⁹ I'aramũ simu'am gatu etee 'jau. A'jea futat i'ae'emamũ sietyk 'jau”, 'jau 'ga 'ga upe— 'jau Jeju'i 'ga 'gã nupe imome'wau u'ama.

—A'jea futat i'ae'emamũ ijetygi futari— 'jau Jeju'i 'ga 'gã nupe imome'wau. —Nan tee futat Janeruwarete 'ga mama'e tywera apo awi pepoira rapesagi ra'ne. Jui peipoire'emamũ 'ga nan tee futat pë netygi— 'jau 'ga 'gã nupe.

Iteu ma'ea kũjã

¹⁰ Morowykye'ema rupi Jeju'i 'ga awau osou judeu 'gã jatykaaw ipe oporogytau 'gã nupe.

¹¹ A'e pe ojero'wu ma'e ëë mũ 'ua 'gã pyri. Ymã ëë jero'wui akou rakue. Tesoitu te ëë kwara mu'ari akou ojero'wau. Mama'eukwaawa ëë erekou opir are. Iteu ma'e 'jawe ëë mougookaa. Najepyo futari ëë watau.

¹² Ëë resakawe Jeju'i 'ga oje'ega ëë upe:

—Erefu'am ĩ. Enejaruete ene 'awamũ ĩ— 'jau 'ga ěě upe.

¹³ A'ere 'ga opo monou ěě 'arimũ. ěě 'arimũ etee agawewi opo monou. A'erauwe ěě u'ama gatu. Ojepywau.

—Au'jete je katu'og ape wa'iko. Ene te 'ã eneresage jee— 'jau ěě Jarejuwarete 'ga upe.

¹⁴ A'ere judeu 'gã jatykaawa raarana 'ga amara'neramũ 'ga ree. Morowykye'ema rupi Jejui 'ga ěě mafu'ami. “Ae katu'oga ae porowykya futat”, 'jau 'ga ojeupe. A'eramũ 'ga amara'neramũ Jejui 'ga ree. A'eramũ 'ga a'eramũ 'jau 'gã nupe:

—Pejor awi pejejekatu'ogukaa morowykye'ema rupi— 'jau 'ga 'gã nupe. —Ymã te 'ã Moisesi 'ga ka'arana kwasiari inuga janee rakue. “Morowykye'ema rupi kasi peporowyky ne”, 'jau 'ga 'ã janee rakue. Ma'eramũ 'ã pejot morowyky rupi etee pejejekatu'ogukaa— 'jau 'ga 'gã nupe.

¹⁵ A'eramũ Jejui 'ga 'jau 'gã nupe:

—“Morowykye'ema rupi kasi peporowyky ne”, pe'je awi oree. Pěě naně te 'ã peporowyky pejejemogyau morowykye'ema rupi. Wyra jara agawewi 'ã pěě.

¹⁶ A'etea 'ã “ereporowyky awi morowykye'ema rupi”, pe'je jee. A'etea pejejemawawa pemoy'u morowykye'ema rupi. ěě taetu aea. Abraão 'ga juapyrera ěě. Janepytuna futat ěě. Ma'eramũ sipo je mama'eukwaawa moire'ema morowykye'ema rupi ěě wi? Ymã te 'ã ěě mama'eukwaawa rerekoi opir are rakue. Ma'eramũ je imoire'ema ěě wi morowykye'ema rupi 'ũ, a'e te je nũ a'i kũi— 'jau Jejui 'ga 'gã nupe.

¹⁷ Aipo 'eramũ 'gã opoyje'emamũ ajemogyau 'ga wi. 'Ga ree iporomutare'ema 'gã opoyje'emamũ. A'ere tesirũmera 'gã ku'iramũ 'ga ree, ěě wi imoiramũ.

'Ga rerowiaara 'gã jemomytunawam

(Mateu 13.31-33; Maku 4.30-32)

¹⁸ A'eramũ Jejui 'ga 'jau 'gã nupe nũ:

—Ma'ja 'jawe ajee je rerowiaara 'gã?— 'jau 'ga 'gã nupe.

¹⁹ —Sã'ã y'wa'ĩ'i'ĩia, mostarda 'jawa. A'eramũ 'ã ae ityma. A'eramũ 'ã opopoa awau 'ã o'ywuuramũ. A'eramũ 'ã wyra'ia aja'yrapyau akã are, waity mogyau ee. Nan tee futat je rerowiaara 'gã— 'jau Jejui 'ga u'ama 'gã nupe. —Awamũ 'gã inãinãni'ĩ etee. A'ere nipo 'gã anure kwaiwete je rerowiaara 'gã jemomytuni awau— 'jau 'ga 'gã nupe u'ama imome'wau.

²⁰ —Ma'ja'ja 'jawe ajee je rerowiaara 'gã?— 'jau 'ga oje'ega 'gã nupe nũ.

²¹ —Sã'ã kũjã u'i mojerawa. A'eramũ 'ã imojopyeawawa monou ipype. Inãinãni'ĩ etee agawewi 'ã imonou ipype. A'etea 'ã awua. Nan tee futat je rerowiaara 'gã jemomytuni nipo— 'jau 'ga 'gã nupe u'ama. —Awamũ 'gã inãinãni'ĩ etee je rerowiari. A'ere nipo anure je rerowiaara 'gã jemomytuni kwaiwete— 'jau 'ga 'gã nupe.

Ywag ipe oo ma'e

(Mateu 7.13-14, 21-23)

²² Jejui 'ga awau akou Jerusarega repejãna. Awaw ipe 'ga awau pe rupiwarã 'gã mu'jau akou.

²³ A'eramũ kũima'e 'ga amũ 'jau Jejui 'ga upe:

—Inãinãni'ĩ etee sipo ore oi ywag ipe?— 'jau 'ga Jejui 'ga upe.

²⁴ Aipo 'ga 'eramũ Jejui 'ga 'jau 'gã nupe:

—Pěnea't kasi pejejemogyau tesirũmera 'gã nee ne. Pejetywer awi pepoit. A'eramũ pěě pejepeporowykyau esage pejejemogyau pejejeupe ywag ipe pejejesawamũ— 'jau Jejui 'ga 'ga upe.

A'eramũ futat 'ga 'jau 'gã nupe:

—Ywaga rokwarã nokwaruui. Je rerowiaara 'gã etee te oo osou ywaga rokwarã rupi— 'jau 'ga 'gã nupe u'ama. —Jeje'ega renupare'ema 'gã nipo e'i “Ywag ipe je oi”, 'jau nipo 'gã numiamũ. A'ere jeje'ega renupare'ema 'gã nosea'uweri ywag ipe— 'jau 'ga 'gã nupe u'ama.

A'ere Jejui 'ga mama'e mũ mome'wau 'gã nupe u'ama nũ:

²⁵ —'Okwara motyw ire 'oga jara 'ga nuawopytymo'wogi tekotee 'gã nupe. A'ere 'gã amũ nipo 'ua 'okwara mopoga 'ga upe. “Toroo orosou 'jau”, 'jau nipo 'gã numiamũ. A'eramũ 'oga jara 'ga awau oje'ega 'gã nupe: “Pe'je pejewau je wi. Nakwaawi je pěě”, 'jau etee 'ga 'gã nupe.

²⁶ —Nan tee futat nipo peo peu ywag ipe jeje'ega renupare'emamũ 'okwara mopoga jee. A'ere nipo je “Najeremiayuwa rũ pěě”, je 'i etee pě nupe. “Pe'je pejewau pejejewya je wi”, je 'i etee pě nupe— 'jau 'ga 'gã nupe u'ama. —A'eramũ nipo pěě 'jau jee: “Orojemi'wat ako ore ene pyri ikue. Ore'wyr ipe futat ako ore mu'e ape ikue”, 'jau nipo pěě jee.

²⁷ A'ere nipo je 'i etee pě nupe: “Najeremiayuwa rũ pěě. Pe'je pejewau je wi”, 'jau etee nipo je pě nupe— 'jau 'ga 'gã nupe u'ama. —“Nepeenuwi futari jeje'ega. Pe'je pejewau je wi”, 'jau nipo je pě nupe— 'jau Jejui 'ga 'gã nupe.

²⁸—Aipoa 'ara rupi nipo pēē jareypy 'gā nesaka. Abraão 'ga, Isaki 'ga, Jako 'ga, Jeruwarete 'ga je'ega mome'wara 'gā. Mīmira 'gā nipo peesak ywag ipe numiamū. A'ere nipo pēē nepesei futari. A'eramū nipo pēē pejejaa'wau pejejupa pejese'ema rerekou. “Ma'eramū ore 'ga rerowiare'ema arakou rakue 'ū?” 'jau nipo pēē— 'jau Jejuu 'ga 'gā nupe u'ama.

²⁹—A'ere nipo kwe pewara 'gā 'ua ajatykau je ree. Najuejue etee nipo 'gā 'ua ajatykau je ree. Awau ojejaga ywag ipe ojemi'waa je pyri— 'jau Jejuu 'ga 'gā nupe oporogytau.

³⁰—Akotee nipo 'gā amū numiamū. A'etea nipo 'gā oo ojejaga ywag ipe je pyri ojemi'waa— 'jau 'ga 'gā nupe. —A'ere amumera 'gā nosea'uweri ywag ipe je pyri. “Je ika'aranūū kwaiwete ma'ea. Je kūima'eeteetea 'jau. A'eramū je Jejuu 'ga tepoara futare'ema” 'jara 'gā nosea'uweri ywag ipe— 'jau 'ga 'gā nupe imome'wau u'ama.

*Jerusareg ipewara 'gā nee 'ga 'arasigawet
(Mateu 23.37-39)*

³¹A'e pype fariseu 'gā amū 'ua oje'ega Jejuu 'ga upe:

—Eka'jam 'aw awi ewau. Erote 'ga ene juka are ifuwet. A'eramū ene ewau 'aw awi eka'jama kwe pe— 'jau 'gā Jejuu 'ga upe.

³²A'eramū Jejuu 'ga wea'aramū ojeupe 'gā 'e are: “Mō. Siesak 'ga poira oporowyky awi 'jau, e'i nipo 'gā jee”, 'jau 'ga ojeupe. A'ere 'ga 'i etee 'gā nupe:

—Naani. Naka'jama'uweri je tewau. Tejuwarete 'ga remifutara 'ara rupi te je manūi. Nopoiru'uweri je teporowyky awi. Erote 'ga 'me ate 'ga renamū. Pekwap 'jau 'ga upe: “Nopoiru'uweri je teporowyky awi. Mama'eukwaawa je omoi tekou 'gā nui. Ojero'wu ma'e 'gā je akatu'ok tekou, e'i etee 'ga”, pe'je 'ga upe pejewau— 'jau etee Jejuu 'ga aipo 'gā nupe. —“Namateepawi we je Tejuwarete 'ga porowyky, e'i 'ga”, pe'je 'ga upe pejewau— 'jau Jejuu 'ga 'gā nupe.

³³—Tejuwarete 'ga remifutar imū etee futat je porowykyi tekou. Oporowyky je iapopaw ire te nipo 'ga je jukaukari 'gā nupe— 'jau 'ga 'gā nupe u'ama. —Jerusareg ipe futat nipo tewau temanūmū. Peu futat Jeruwarete 'ga je'ega mome'wara 'gā apisara 'gā nuwi. A'eramū je peu futat tewau temanūmū nipo— 'jau Jejuu 'ga 'gā nupe u'ama.

³⁴A'eramū 'ga 'jau Jerusareg ipewara 'gā nupe:

—Jerusareg ipewaramū futat te 'ā pēē Jarejuwarete 'ga je'ega mome'wara 'gā apisaramū pejup— 'jau Jejuu 'ga 'gā nupe. —Sā'ā wyrasokwēa wa'yra majatyka wakape 'wyrripe imonoa kwanū awi. Nan tee futat je— 'jau Jejuu 'ga 'gā nupe. —“Tajejuka esage Jerusareg ipewara 'gā nee”, 'jau je 'ā pē nupe numiamū. A'ere 'ā nepefutari etee.

³⁵A'eramū 'awamū Janeruwarete 'ga opoia futat pē nui— 'jau Jejuu 'ga 'gā nupe. —A'eramū nipo pē nee iporomutare'ema 'gā 'ua pē'wyrarete pojekau pē nui. 'Awamū 'ā je nanē tewau pē nui nū. A'eramū pēē je resagu'jape'ema 'awamū. “Esageay Janeruwarete 'ga remimurera 'ga”, 'jawe'ewe pēē je resagu'jape'ema futat— 'jau Jejuu 'ga 'gā nupe u'ama.

14

Awuwut ma'e 'ga

¹Morowykye'ema mū rupi Jejuu 'ga awau osou fariseu 'ga amū rog ipe ojemi'waa. 'Wyrira'ri 'ga rog ipe awau osou. A'eramū fariseu 'gā amū 'ua Moisesi 'ga remikwasiarer are moromu'jara 'gā netee. 'Gā 'ua osou 'ga resaka.

—Pe'je soo 'ga resaka. Mama'e tywera 'ga iapo re sipyyk 'ga 'jau— 'jau 'gā ajaupe.

²Poje kūima'e 'ga amū 'ua osou Jejuu 'ga pyri. Awuwut ma'e 'ga 'ua osou 'ga pyri. A'eramū fariseu 'gā 'jau ajaupe:

—'Awamū 'ā morowykye'ema. A'etea sipo 'ga awuwut ma'e 'ga okatu'ok?— 'jau 'gā ajaupe. —Ae katu'oga ae porowyky futat morowykye'ema rupi. Nokatu'oga'uweri nipo 'ga 'awauwe 'ga— 'jau 'gā ajaupe.

³A'eramū Jejuu 'ga 'jau 'gā nupe:

—Ma'ja e'i te Moisesi 'ga rakue? “Pekatu'ok kasi 'gā morowykye'ema rupi ne”, e'i te 'ga janee rakue? Naani. Aipo ne'i 'ga rakue— 'jau 'ga 'gā nupe.

⁴A'ere 'ga ree ajatyka ma'e 'gā noje'egi futari. Ojenosi 'gā 'ga wi aipo ojeupe 'ga 'eramū.

A'eramū Jejuu 'ga opo monou awuwut ma'e 'ga 'arimū 'ga katu'oka. A'ere 'ga oje'ega 'ga upe 'ga katu'og ire:

—'Awamū enejaruete. A'eramū ene ewau eje'wyr ipe— 'jau 'ga awuwut ma'e'efera 'ga upe.

⁵A'eramū Jejuu 'ga 'jau esakarera 'gā nupe:

—Pejeja'yra ywy kwara pype i'aramū sipo nepenuēmi jui morowykye'ema rupi? Pejejejmawa ywy kwara pype i'aramū sipo nepenuēmi jui morowykye'ema rupi?— 'jau 'ga 'gā nupe. —Nepeejara'uweri pejeja'yra im'ina ywy kwara pype. A'ea 'ara rupi pēē iaporamū je nanē ojero'wu ma'e 'ga katu'ogi morowykye'ema rupi nū— 'jau 'ga 'gā nupe.

⁶A'ere 'gā noje'egi futari ajemogyau ojeupe 'ga 'eramū.

'Gā neko esage are 'gā mu'eawet

⁷Ojemi'war enune Jeju'i 'ga awau afu'ama wewiri oo ma'e 'gā nesaka. 'Gā apyga resaka u'ama. "Naakotee ma'e 'gā nenawa 'arimū rūi pa 'gā apygiweramū ra'e. Esage ma'e 'gā apykawa 'arimū etee pa 'gā apygiweramū ra'e", 'jau 'ga ojeupe 'gā nesaka.

A'eramū 'ga mama'e mū mome'wau 'gā nupe 'gā mu'jawamū:

⁸⁻⁹—'Ga amū nipo 'ua ene mo'wya, "Ere ejua ejemi'waa jerog ipe", 'jau enee. A'eramū nipo ene ewau eapyka esage ma'e 'gā apykawa 'arimū. A'eramū nipo esage ma'e 'ga amū 'ua wapykawa 'arimū ene renamū osou. A'eramū nipo ene mo'wyarera 'ga "Eryrk 'ga renaw awi", 'jau enee. A'eramū nipo ene ejenosōu ekou 'gā nowase— 'jau 'ga u'ama 'gā nupe.

¹⁰—A'eramū ene 'gā amū emo'wyramū eapyka akotee ma'e 'gā apykawa 'arimū te. A'eramū nipo ene mo'wyarera 'ga 'ua osou. A'eramū 'ga te 'jau enee: "Au te ejot eapyka je pyri", 'jau enee— 'jau 'ga 'gā nupe. —A'eramū ene ekou 'wyrira'ri 'jawe 'gā nowase— 'jau 'ga 'gā nupe.

¹¹—"Je 'ā kūima'eeteetea" 'jara Janeruwarete 'ga imogyau tywet. A'eramū Janeruwarete 'ga "Nakūima'eeteete rūi je" 'jara 'gā etee 'ga imogyau kūima'eeteeteramū 'gā nupe— 'jau Jeju'i 'ga 'gā nupe.

¹²A'eramū Jeju'i 'ga 'jau omo'wyarera 'ga upe:

—Eremo'wy'wyt kasi esage ma'e 'gā etee ne, epytuna etee ne. Ajemogy tee ma'e 'gā we futar iki emo'wyt imojemi'waa ejepyri— 'jau 'ga 'ga upe u'ama. —Esage ma'e 'gā etee ene imo'wy'wyramū 'gā nanē ene mo'wyrī ene rerawau oje'wyr ipe nū.

¹³Itywetywet ma'e 'gā nanē ki emo'wy'wyt imojemi'waa ejepyri nū— 'jau 'ga 'ga upe. —Iteu ma'e, eae'em. Mīmera 'gā nanē ki emo'wy'wyt eje'wyr ipe nū— 'jau 'ga 'ga upe.

¹⁴—'Gā nene mepya'uweri. A'eramū anure Janeruwarete 'ga 'gā mojemi'waawera mepya' enee— 'jau 'ga 'ga upe.

Maraka pe imo'wy'wyrīpyrera 'gā
(Mateu 22.1-10)

¹⁵A'eramū Jeju'i 'ga pyri ojemi'wat ma'e 'ga amū 'jau 'ga upe:

—'Au aejemi'wara miamū pa 'ā esage nū. Peu ywag ipe taetu 'ā aeku'iawa te— 'jau 'ga 'ga upe, 'gā nemianuwamū 'ūina. —Jarejuwarete 'ga pyri ojemi'wat ma'e 'gā taetu aku'iramū nanimenime— 'jau 'ga 'gā nupe.

¹⁶A'eramū aipo 'ga 'eramū Jeju'i 'ga 'jau 'ga upe:

—'A'jea futat nū'ū. 'A'jea futat ere poromū— 'jau 'ga 'ga upe.

A'eramū 'ga mama'e mū mome'wau 'gā nupe nū:

—Kūima'e 'ga amū kumia wapoukat 'gā nupe. Kwaiwete 'ga iapoukaa.

¹⁷A'ere 'ga erojyw ire oje'ega wemiayuwa 'ga amū upe: "Ere ewau 'gā nupe kwe pe, jeremimo'wy'wyrera 'gā nerua", 'jau 'ga 'ga upe oje'ega. A'eramū 'ga awau.

¹⁸Awau 'ga owaēma 'ga remimo'wy'wyrera 'ga amū upe: "Ere ejua ejemi'waa, e'i 'ga enee ko", 'jau 'ga awau 'ga upe.

—A'ere aipo 'ga 'i etee 'ga upe: "Naani ki 'ei. Ywya je amut ape ko ki 'ei. A'eramū je tewau esaka ki 'ei", 'jau etee 'ga 'ga upe.

¹⁹—Aipo ojeupe 'ga 'eramū 'ga awau ajepeja 'ga upe etee 'jau nū, 'ga remimo'wy'wyrera 'ga upe 'jau nū: "Ere ejua ejemi'waa, e'i 'ga enee ko", 'jau 'ga awau 'ga upe.

—"Tee. A'ere nipo je nooi nū'ū. Teis kwataua je amut ko. A'eramū je tewau tejemimurera resaka ra'ne", 'jau etee 'ga 'ga upe nū.

²⁰—Awau 'ga aipo 'ga wi nū. Awau 'ga ajepeja 'ga upe 'jau nū: "Ere ejua ejemi'waa, e'i 'ga enee ko", 'jau 'ga awau ajepeja 'ga upe etee nū. A'ere "Je nooi ki 'ei. Jeremireko je 'awamue ko. A'eramū je a'eramū ejararūme'em. Nooi je", 'jau etee 'ga 'ga upe nū.

²¹—A'eramū 'ga remiayuwa 'ga ojewya awau imome'wau 'ga upe. "Nuri etee 'gā je rupi ki 'ei", 'jau 'ga awau imome'wau 'ga upe. A'eramū 'ga a'eramū amara'neramū akou 'gā nee— 'jau Jeju'i 'ga 'gā nupe.

—A'eramū 'ga oje'ega 'ga upe nū, aipo 'ga upe wējēmī futat nū. "Ekwap ajemogy tee ma'e 'gā mo'wy'wya. Erut ekoete te futar iki 'gā. Eae'ema 'gā we futat ki erut. Iteu ma'e 'gā miamū futar iki erut. Itywet ma'e 'gā nanē ki erut. Mīmera 'gā futar iki erut", 'jau 'ga wemiayuwa 'ga upe nū.

²²—A'erauwe 'ga awau nū. A'eramū 'ga 'gā nerua, kwaiwete. A'ere 'gā nomatyneemi 'ga roga. A'eramū 'ga wemiayuwa 'ga mojewyru'japa nū.

²³—"Ere ajee ewau kwe pe nū. Kwe pe ekwap pe rupi nū. Pe rupiwara 'gā nerua imajatykau jee. Tejoga ryneem gatu gatua te je afutat", 'jau 'ga 'ga upe.

—A'erauwe 'ga ojewya awau nū. Ojewya awau 'gā nupe nū. A'eramū 'ga 'gā nerua, kwaiwete nū. A'eramū te 'ga 'ga roga matyneemi 'gā nerua.

²⁴ —“Amo'wy'wyt futat je 'gā ai'i numiamū, kwaiwete ai'i numiamū. A'ere 'ā 'gā jēmī nuri ojemi'waa je pyri. A'eramū 'gā 'awamū jeremi'u 'wawe'em futat. Nomonoī futari je tejemi'ua 'gā nupe”, 'jau 'ga 'gā nupe— 'jau Jejuī 'ga imome'wau 'gā nupe.

Jejuī 'ga remiayup
(*Mateu 10.37-38*)

²⁵ Anure Jejuī 'ga awau watau akou nū. Kwaiwete 'gā awau 'ga rupi. A'eramū 'gā awau akou oporogytau pe rupi.

²⁶ —Pēporomutat pēē pejeptytuna 'gā nee. Pejeje are, pejejuw are, pejejewirer are, pejejenyr are, pejeptytun are, pejejee nanē nū— 'jau 'ga 'gā nupe 'gā nerawau 'gā nerekou pe rupi. —A'ere je 'i pē nupe: Jeremiayuwamū pejejekoweramū ki pēporomutat je ree pejeptytuna 'gā nee pejeporomutara apyraapa. Je ree pejeporomutaramū ki pēē mama'e apou jeremifutar imū je muorypawamū. “Ereapo awi nanuara ki sa”, 'jau nipo pēpytuna 'gā pē nupe. A'ere kasi eremojerowiat 'gā ne. Jeje'eg imū etee futat pēē iapou. Kasi a'e pe pēē najeremiayuwa rūi ne— 'jau 'ga 'gā nupe 'gā nerawau 'gā nerekou.

²⁷ —Jeremiayuwamū pejejekoweramū jeremifutara etee futat pēē iapou, pejekyjawe'em 'gā pejejeroko tywer awi. “Tene 'gā je jukai kwy. Napoira'uweri je Jejuī 'ga rerowiar awi”, 'jau etee ki pēē— 'jau 'ga 'gā nerawau 'gā nerekou pe rupi.

²⁸ —Kūima'e 'ga amū nipo 'og ywate are aparupoweramū. A'eramū 'ga ka'aranūā ra'ne imojopyrūmū ūina. “Taesak ka'aranūā i'jawe jooa 'jau kwy, 'oga apoa 'jawe jooa 'jau kwy”, 'jau nipo 'ga ūina imojopyrūmū.

²⁹⁻³⁰ “Kasi 'gā a'e pe 'oga je imateepawe'emamū je jai ne kwy”, 'jau nipo 'ga ojeupe— 'jau Jejuī 'ga 'gā nupe imome'wau 'gā nerawau 'gā nerekou.

—Nan tee futat nipo pēē— 'jau Jejuī 'ga 'gā nupe. —A'eramū pēē je rerowiaaramū pejejemogyau pejejea'aramū ra'ne. “A'jea futat sipo je rekoī 'ga rerowiarareteramū 'wei?” 'jau ki pēē pejejemogyau pejejea'aramū ra'ne— 'jau 'ga 'gā nupe. —“A'jea futat sipo je 'ga porowyka etee futat iapoī 'wei”, 'jau ki pēē pejejeupe— 'jau Jejuī 'ga 'gā nupe.

³¹ —'Wyriara 'ga amū remiayuwa nipo amara'neramū ajepeja 'wyriara 'ga remiayuwa 'gā nee te. A'eramū nipo 'gā 'jau o'wyriara 'ga upe: “Soo 'gā apisau 'jau” 'jau nipo 'gā 'ga upe. A'eramū nipo 'wyriara 'ga 'jau 'gā nupe: “Tee. Tene ra'ne. Kwaiwete 'ga remiayuwa pytuna. Witi miu 'ga remiayuwa pytuna. Jane najanepytyuni. Teis miu etee te 'ā janepytyuna. Siapisipap sipo jane 'gā?” 'jau nipo 'ga wemiayuwa 'gā nupe.

—“Tee. Naani nipo nū'ū. 'Gā etee nipo jane apisipap”, 'jau 'ga remiayuwa 'gā 'ga upe. A'eramū nipo 'wyriara 'ga oje'ega ra'ne imonou ajaupe.

³² A'eramū 'gā oje'ega pyu etee futat ojomoyrūmū— 'jau Jejuī 'ga 'gā nupe imome'wau.

³³ —Nan tee futar iki pēē. Jeremiayuwamū pejejekoweramū pejejea'aramū ra'ne pejejemogyau— 'jau 'ga 'gā nupe. —Pēē je rerowiarāpa etee. A'ere etyka 'ea nia'wyrī— 'jau 'ga 'gā nupe imome'wau.

³⁴ —Sā'ā jukyra resagea futat numiamū. A'ere kumi pype omonoramū nomē'ēi futari. Aipoa jukyra nia'wyrī futari.

³⁵ A'ea jukyra numiamū. A'ere namuei mama'ea. A'eramū ae imonou imomoa yty apy'rarimū. Nan tee futat je rerowiar awi opoit ma'e 'gā— 'jau Jejuī 'ga 'gā nupe. —'Ga amū te nipo ajee mama'eya ojeupe ijesaukaramū opoit je rerowiar awi. 'Gā je rerowiaa numiamū— 'jau 'ga 'gā nupe. —Ee pejejeapyoweramū ki peapyaka katu jeje'eg are— 'jau 'ga 'gā nupe 'gā nerawau 'gā nerekou.

15

Oka'jam ma'ea karupa'mīa
(*Mateu 18.12-14*)

¹ Anure itywet ma'e 'gā 'ua Jejuī 'ga renupa 'upa. 'Wyriarāte upe ka'aranūū pyykara 'gā nanē kwaiwete nū.

² 'Gā nesakawe fariseu 'gā amū Moisesi 'ga remikwasiarer are moromu'jara 'gā netee Jejuī 'ga ago'wau 'upa:

—Kuu. Itywet ma'e 'gā jekoty'aawa 'ga ra'e— 'jau 'gā ajaupe 'upa. —Ojemi'waa nanē 'ga 'gā pyri ra'e nū— 'jau 'gā ajaupe.

³ A'e renupawe Jejuī 'ga 'jau 'gā nupe:

—Itywet ma'e 'gā werowiara we futat Janeruwarete 'ga afutat— 'jau 'ga 'gā nupe.

A'eramū 'ga mama'e mū mome'wau 'gā nupe 'gā mu'jau 'Uwarete 'ga ree.

⁴ —Kūima'e 'ga amū nipo wyra jara. Karupa'mīa nipo 'ga reymawa. Kwaiwete nipo 'ga reymawa. Sēg nipo 'ga reymawa pytuna. A'ere nipo karupa'mī amū ka'jami opytun awi ka'a pe. A'eramū nipo ijara 'ga ipytuna jaga ukaja pype inuga. Ipytuna jāmw ire nipo 'ga awau oka'jam ma'efera rekaa akou. A'eramū nipo 'ga awau owaēma jupe.

⁵ Esakawe aipo 'ga iupia imonou imopeywaa ojasi'y warimū erua. Aku'iramū 'ga oka'jam ma'efera rerua oje'wyr ipe nū.

⁶ Wog ipe owaēmawe nipo 'ga oje'ega monou opytuna 'gā nupe: “Pe'je pejejua pejeku'iramū je pyri. Tejejmawa je aesak ko”, 'jau nipo 'ga 'gā nupe— 'jau Jejuu 'ga 'gā nupe imome'wau.

⁷ —Nan tee futat Jeruwarete 'ga ku'iramū 'ūina. Otywer awi itywet ma'e 'ga poiramū 'ga ku'iramū 'ūina ywag ipe, ywagipewara 'gā netee— 'jau Jejuu 'ga 'gā nupe imome'wau. —Nan tee otywer awi opoit ma'e 'gā nee 'ga ku'iramū 'ūina. Esage ma'e 'gā nee aku'ia 'ga iapyraapa 'ūina itywet ma'efera 'gā nee— 'jau 'ga 'gā nupe 'gā mu'jau 'Uwarete 'ga ree 'ūina.

Ka'aranūū 'ywope'i etygi'pyret

⁸ A'ere Jejuu 'ga mama'e mū mome'wau 'gā nupe nū:

—Kūjā ēē mū 'ywope'ia wereko, ka'aranūū 'ywope'ia. Teis ēē ka'aranūū 'ywope'ia pytuna. Epyuu ma'ea juejue ēē upe. A'ere nipo amū 'ari ēē wi. A'eramū ēē tata monyka esakawamū 'oga peia imua imono'oga esaka.

⁹ Esakawe ēē oje'ega oje'pyriwara 'gā nupe: “Pe'je pejejua je pyri pejeku'iramū. Aesak je teka'aranūūa ko”, 'jau ēē 'gā nupe— 'jau Jejuu 'ga 'gā nupe imome'wau.

¹⁰ —Nan tee futat Janeruwarete 'ga ku'iramū otywer awi 'gā poiramū. Ywagipewara 'gā netee 'ga aku'iramū 'ūina— 'jau 'ga 'gā nupe 'gā mu'jau.

Oka'jam ma'ea kunumūū 'ga

¹¹ A'ere Jejuu 'ga 'ūina mama'e mū mome'wau 'gā nupe nū, 'gā mu'jau 'Uwarete 'ga ree:

—Kūjā 'e 'ga amū mukūi tee 'ga ra'yra 'gā. Kūima'ea jue 'ga ra'yra 'gā.

¹² Iwujaa 'ga 'jau 'uwa 'ga upe: “Anure ki ekaraemā emut oree. A'ere je tema'ea 'awauwe ifutari. Emanūme'ēwe jema'ea emut jee”, 'jau iwujaa 'ga 'uwa 'ga upe.

—A'erauwe 'ga okaraemā mojo'oka wa'yra 'gā nupe. Kwaiwete 'ga ka'aranūūa. A'eramū 'ga okaraemā kwajamū.

¹³ —Anurenure'i 'ga ra'yra 'gā awau 'ga wi, iwujaa 'ga awau muku 'ga wi. Tapy'jya mū 'wyrarete pe 'ga awau 'ga wi. Peu 'ga oka'aranūū momyaupap. Kūjāmene'em are, kawājajaiw are 'jau. Mimer are 'ga oka'aranūū momyaupap ekoete. Nan etee etee 'ga akou nū. Ika'aranūūe'ema 'jawe akou nū. Oka'aranūū momypaw ire 'ga akou ty'ara upe.

¹⁴ Aman ipe agawewi. A'etea amana nokyri 'gā nupe. A'eramū temi'ua opapapap. A'eramū pewara 'gā ty'ara upe ajemogyau. Peu oo ma'efera 'ga nanē akou ty'ara upe nū.

¹⁵ —A'eramū 'ga 'jau pewara 'gā nupe: “Jeporowykywet je tekou”, 'jau 'ga akou 'gā nupe, morowyky rekaa ojeupe. A'eramū 'ga amū 'jau 'ga upe: “Peu ekwap ekou, tajaarana poitawamū”, 'jau 'ga 'ga upe.

¹⁶ —A'erauwe 'ga awau akou tajaarana poitawamū. A'eramū 'ga ty'ara rerekou. Tajaarana futawa resaka 'ūina. A'eramū 'ga tajaarana futawa uweita jui numiamū. A'ere teymajara 'ga a'ea miamū na'uukari 'ga upe.

¹⁷ Ty'ara rerekou 'ga aipo 'jau. “Kwaiwete agawewi nā'ā jeruwa 'ga remiayuwa jepi re'ā. A'etea nā'ā kumia emyret jepi re'ā. A'ere pa je 'ā 'au ty'ara rerekoi nū. Maran te 'ā nooi tekou tejewya tejuwa 'ga resaka nū 'i”, 'jau 'ga akou ojeupe.

¹⁸ —Tajemome'u tejuwa 'ga upe 'jau kwy”, 'jau 'ga 'ūina u'arasigamū. “Jetywerete je tekou jarejee ai'i, Jarejuwarete 'ga upe nanē ai'i nū, ta'e imome'wau tejuwa 'ga upe 'jau kwy”, 'jau 'ga akou ojeupe.

¹⁹ —Eja'yra 'jawe kasi je rereko ape 'awamū ne, ta'e 'ga upe 'jau kwy. Au'je je rereko ape eja'yramū je rekoramū jepi, ta'e 'ga upe 'jau kwy”, 'jau 'ga ojeupe 'ūina. “A'eramū ene 'awamū je moporowykyau etee ejee, ta'e tejuwa 'ga upe 'jau kwy. Tejemi'ua tamepy tekou 'jau, ta'e tejuwa 'ga upe 'jau kwy”, 'jau 'ga 'ūina ojeupe— 'jau Jejuu 'ga 'gā nupe imome'wau.

²⁰ —A'erauwe 'ga afū'ama o'wya. Pe awi etee futat 'ga awau. Ojewya awau owaēma 'uwa 'ga upe. Muku 'ga rekorauwe 'ga ruwa 'ga 'ga resaka. “Kweramū nipo jera'yra ruri akou nū”, 'jau 'ga ojeupe.

—'Ga resakawe 'ga awau ujāna 'ga rowosōu awau 'ga mana.

²¹ —A'eramū 'ga 'jau 'uwa 'ga upe: “Jetywerete je tekou jarejee ai'i, Kiapi'ni. Jarejuwarete 'ga upe nanē ai'i nū, Kiapi'ni”, 'jau 'ga 'uwa 'ga upe. “Eja'yra 'jawe kasi je rereko ape 'awamū ne”, 'jau 'ga 'uwa 'ga upe. “Au'je je rereko ape eja'yramū je rekoramū jepi”, 'jau 'ga 'uwa 'ga upe oje'ega.

²² —A'ere 'ga ruwa 'ga 'i etee 'ga upe: “Ene'me awi. Eremur awi aipoa ki sira ko. Jera'yra futat ene kūi”, 'jau etee 'ga ruwa 'ga 'ga upe. “Nafutari je nanuara. Wesaga'uwe'emamū te ae poromū ae 'i ujara upe”, 'jau tee 'ga wa'yra 'ga upe— 'jau Jejuu 'ga 'gā nupe imome'wau.

—A'ere 'ga ruwa 'ga 'jau wemiayuwa 'ga amū upe: “Ekwap taity esage pe rerua kamēšiete imunepa 'ga wi. Fāyru reewe futar iki erut 'ga upe. Myapaawa nanē amū rerua 'ga pyapaawamū”, 'jau 'ga wemiayuwa 'gā nupe.

²³ “Wyra pejuka amū jera'yra 'ga upe. Kwatau ra'yru'ia, oreremimoky'rafera ki perut ijukau. Janeroryp jarejupa 'jau”, 'jau 'ga wemiayuwa 'ga upe.

²⁴ —“Jera'yra nipo 'ā amanū rakue”, a'e je tekou jepi. A'ere 'ā jaruete jera'yra reko'i ra'e jepi— 'jau 'ga 'gā nupe, ojeupe wa'yra 'ga poromū. “Oka'jam 'ga ako je wi ikue. A'ere 'ā ekoje ra'e jepi. A'ere 'ā turi opoa akou jee nū. A'eramū jane jarejemuekōēaina 'ga rur are”, 'jau 'ga 'gā nupe.

²⁵ —Wewirera 'ga waēmamū tuwi ma'e 'ga akou ko pe oporowykyau. A'ere 'ga 'ua. Oporowykypaw ire 'ua, maraka renupa.

²⁶ A'eramū 'ga 'jau 'gā amū nupe: “Ma'ja poromū nū?” 'jau 'ga 'gā nupe.

²⁷ —“Enerewirera 'ut ojewya akou ra'e. A'eramū eneruwa 'ga kwatau ra'yru'i jukaukaa oree ko. 'Sajemuekōēai jera'yra 'ga ree', 'jau 'ga oree ko”, 'jau 'gā 'ga upe— 'jau Jejui 'ga 'gā nupe imome'wau.

²⁸ —A'erauwe tuwi ma'e 'ga amara'neramū. A'eramū 'ga osowe'em. 'Ga mara'nea 'ga rerekou. A'eramū 'ga ruwa 'ga uēma 'ga resaka. “Ere ejua esou, kisit”, 'jau 'ga 'ga upe.

²⁹⁻³⁰ —A'eramū 'ga 'jau 'uwa 'ga upe: “Je ree jēmī 'ā enerorywi jepi. Nerejemogypygyi 'ā je ree jepi. Je etee agawewi 'ā oporowyky tekou enee. Tekotee 'jawe je 'ā eneje'ega oware'ema jepi”, 'jau 'ga 'uwa 'ga upe. Wewirera 'ga ree 'uwa 'ga rorywamū 'ga aipo 'jau 'ga upe. “Majawer are etee agawewi 'ga 'ā ka'arana momypap ekoetei rai'i. A'etea 'ā eneporia 'ga ree. Je ree jēmī 'ā eporiae'emamū jepi. Je upe jēmī 'ā jarejemawa mū jukawe'e mī jarejee jepi. Wyrasokwē miamū 'ā amū jukaukare'ema jarejee jepi, oporowyky ma'eramū jēmī jepi”, 'jau 'ga 'uwa 'ga upe— 'jau Jejui 'ga 'gā nupe imome'wau.

—Wyra jukaramū amara'neramū 'uwa 'ga ree.

³¹ A'ere 'ga ruwa 'ga 'i etee 'ga upe: “Ene 'ā jepir are ereko. Nereoi 'ā muku je wi. Janemama'ea enemama'ea futat”, 'jau 'ga wa'yra 'ga upe, aipo ojeupe 'ga 'eramū.

³² “Omomot sipo 'gā jera'yra rakue pa”, a'e je tekou jepi. A'ere 'ā turi akou opoa janee. A'eramū je 'jau 'gā nupe ko: “Sajemuekōēai 'ga ree 'jau, 'jau je 'gā nupe ko”, 'jau 'ga wa'yra 'ga upe— 'jau Jejui 'ga imome'wau 'gā nupe.

—Saa'e kūima'e 'ga ku'ia. Wa'yra ojeupe ijewyt turamū 'ga ku'ia rakue. Nan tee futat Janeruwarete 'ga ku'iramū 'ūina otywer awi opoit ma'e 'gā nee— 'jau Jejui 'ga 'ūina imome'wau 'gā nupe.

16

'Gā neko esage are 'gā mu'eawet

¹ A'ere Jejui 'ga mama'e mū mome'wau 'gā nupe nū:

—Kūima'e 'ga amū wemiayuwa 'ga omono okaraemā pykaramū numiamū. A'ere aipo 'ga nia'wyri. Ka'aranūū jara 'ga wi ka'aranūū momyaupap ekoete etee futat 'ūina 'ga wi. A'eramū 'ga a'eramū 'ga amū 'ua imome'wau 'ga upe. “Enekaraemā pykara 'ga nia'wyri ra'e ki 'ei. Ekoay 'ga enekaraemā mateepapa ekoete ki 'ei”, 'jau 'ga 'ua imome'wau karaemā jara 'ga upe.

² —A'eramū karaemā jara 'ga 'ga renūina, okaraemā raarana 'ga renūina. A'eramū 'ga 'jau 'ga upe: “A'jea te jekaraemā eromomypap ekoete e'yina?” 'jau nipo 'ga 'ga upe. “Ere ajee ewau ikwasiaa jee ka'aran are inuga”, 'jau 'ga okaraemā pykara 'ga upe. “'Gā nera ki ekwasiat inuga jee ka'aran are. Erararera 'gā nera ki ekwasiat inuga jee. 'Gā nemireroofera nanē ki ekwasiat inuga jee ka'aran are”, 'jau karaemā jara 'ga 'ga upe. “Aipo apo re tomono 'ga amū imyina ene py'rau 'jau nū”, 'jau 'ga 'ga upe— 'jau Jejui 'ga imome'wau 'gā nupe.

³ —A'eramū 'ga awau 'ga wi. A'eramū 'ga 'jau ojeupe: “Tÿy. Maran je tekou 'awamū 'ū? Ma'ja je iapou mama'ea tejeupe imuawamū 'ū? Najefuakara'uweri je teporowyky apou”, 'jau 'ga ojeupe. “Ajenosī je tekou mama'e renūina 'gā nupe ne kwy”, 'jau 'ga ojeupe etee futat 'ūina. “Ma'ja ajee je aapo 'awamū 'ga upe 'ū? Je muēm are 'ga fueweramū 'awamū”, 'jau 'ga ojeupe.

⁴ “Amorytee pa je tejara 'ga kwy”, 'jau 'ga ojeupe. “'Ga karaemā rerararera 'gā pa je apoat kwy”, 'jau 'ga ojeupe. “A'eramū 'gā je muēmamū 'Ere ejua 'au ore pyri. Mama'e toromono ene upe 'jau', 'jau jee kwy”, 'jau 'ga ojeupe etee futat 'ūina— 'jau Jejui 'ga imome'wau 'gā nupe.

⁵ —A'eramū 'ga 'ga karaemā rerararera 'gā nenūina: “Ma'ja te ererero rai'i?” 'jau 'ga 'ga amū upe.

—“Miara kawera ako je aroo ai'i”, 'jau erararera 'ga 'ga upe.

⁶ “Marana te ereroo rai'i?” 'jau 'ga erararera 'ga upe.

—“Kwaiwete je erooi ai'i. Sēg yrūū te je aroo ai'i”, 'jau erararera 'ga imome'wau 'ga upe.

—A'eramū 'ga 'jau erawarera 'ga upe: “Ekwasiat 'au. Sikwēta etee ki ekwasiat inuga ka'aran are”, 'jau 'ga erawarera 'ga upe. “Jane'me ijara 'ga upe 'jau”, 'jau 'ga 'ga upe.

⁷—A'ere 'ga ajepeja 'ga renūina nū: “Ma'ja te ene ereroo rai'i?” 'jau 'ga 'ga upe nū.

—“Juowuuran ako je aroo ai'i, miu yrū ai'i”, 'jau 'ga 'ga upe.

—“Ere ajee inuga ikwasiaa 'au oito sētu etee ka'aran are”, 'jau 'ga 'ga upe.

⁸—Aipo kwaapawe karaemā jara 'ga amara'neramū 'ga ree. “Ene 'ā muna'ywa. Jekaraemā are 'ā eremunarū ekou. A'etea 'ā ene'akwaap. 'Awamū nipo 'gā jejukai ene ree numiamū”, 'jau 'ga 'ga upe— 'jau Jejui 'ga 'gā nupe.

A'eramū Jejui 'ga 'jau 'gā nupe nū:

—A'jea futat. Janeruwarete 'ga je'ega renupare'ema 'gā i'akwaap futat numiamū. A'ere 'ga rerowiaara 'gā nanē nokwaawi katu 'ga remiapoa.

⁹A'eramū je pē mu'jau 'ga remifutar are. Pejekaraemā pemono amū ikaraemāe'ema 'gā nupe. Nanuara 'ga afutat 'ūina, a'e je 'ā pē nupe— 'jau Jejui 'ga u'ama 'gā nupe. —Nanuara pēē iaporamū Janeruwarete 'ga pē monoi peu ojeypiri. Nanuaramū 'ga pē napesagi 'ūina peu ywag ipe 'jau agawewi je 'ā pē nupe imome'wau— 'jau Jejui 'ga 'gā nupe.

¹⁰—Ika'aranūe'ema 'gā amū nipo oka'aranūa wereko esage, mama'e esage are etee imomyau. A'e 'ga nanē oka'aranūū kwajamū wereko esage futat nū, mama'e esage are etee imomyau. Imomyau ekoete'ema akou— 'jau Jejui 'ga 'gā nupe. —Ika'aranūe'ema 'gā amū oka'aranūū'īnamū imomyau ekoete etee futat. A'e 'ga nan tee futat oka'aranūū kwajamū omomy ekoete te futat ajemogyau— 'jau Jejui 'ga 'gā nupe imome'wau.

¹¹—Nan pēē iaporamū Janeruwarete 'ga namura'uweri omama'ea pē nupe— 'jau Jejui 'ga 'gā nupe imome'wau u'ama.

¹²—Janeruwarete 'ga ma'e ete ate 'agamū mama'ea. 'Ga te 'ā jane mogy 'agamū oma'ea wyy pype— 'jau 'ga 'gā nupe. —Oma'ea mama'e are ae jejuka esage'emamū 'ga namura'uweri mama'ea ae upe peu— 'jau 'ga 'gā nupe u'ama oporogyau.

¹³—Namukūja 'wyriara 'gā nemiayuwa rūi 'ga amū rekoi. Noporowykya'uweri 'ga amū mukūja 'wyriara upe. Kasi a'e pe 'ga ajepeja 'ga ree etee 'ga poromutaramū akou ne. Majepeja 'ga ree jēmī oporomutare'emamū ne. Wemifutara 'ga je'eg imū etee mama'e apou ne. A'eramū 'ga wemifutare'ema 'ga je'eg imū mama'e apowe'em ne. Nan tee futat pēē. Pejeka'aranūū kwaiwete are etee ea'at ma'eramū nep'ēnea'aru'jawi Jarejuwarete 'ga ree. Nepejemogyypya'uweri ka'aranūū are Jarejuwarete 'ga reewe— 'jau Jejui 'ga 'gā nupe imome'wau.

¹⁴Aipo 'ga 'erauwe fariseu 'gā 'ga rerekoemāu etee. Ka'aranūūa tee 'gā afutat. A'eramū 'gā Jarejuwarete 'ga je'ega jēmī futare'ema. A'eramū 'gā a'eramū Jejui 'ga rerekoemāu etee.

¹⁵A'eramū Jejui 'ga 'jau 'gā nupe:

—Pēē 'ā ka'aranūūa pemono ika'aranūe'ema 'gā nupe jepi. “Esage ma'e 'ga ra'e. Ka'aranūūa 'ga omonoi itywet ma'e 'gā nupe”, te'i etee 'gā oree 'jau, pe'je 'ā jepi. Ma'eramū 'ā ka'aranūūa pemono 'gā nupe jepi. A'ere naJaneruwarete 'ga rūi imonoukari pē nupe. Pemono ekoete te 'gā nupe. “Tore futarete 'gā 'jau”, pe'je tee jepi— 'jau Jejui 'ga 'gā nupe. —A'ere Janeruwarete 'ga pē kwaawi futari. Janeruwarete 'ga naea'ari pē 'jawe mama'e are etee— 'jau Jejui 'ga 'gā nupe. —Aeremifutara 'ga nafutari— 'jau 'ga 'gā nupe u'ama.

¹⁶—Ymā te 'ā Moisesi 'ga Janeruwarete 'ga je'ega kwasiari inuga ka'aran are janee rakue. Moisesi 'ga manū re 'ā, 'ga amū ete akou 'ga py'rau rakue. 'Ga upe nanē 'ā Janeruwarete 'ga oje'ega rakue nū. A'eramū 'ga nanē futat 'ā 'ga je'ega kwasiaa inuga ka'aran are janee rakue. Ymā we 'gā 'ā ajamu'jau Jarejuwarete 'ga je'eg are rakue— 'jau 'ga imome'wau 'gā nupe. —'Awamū 'ā Juā 'ga nanē pē mu'jau 'ga je'eg are rai'i nū. “Pejetywer awi pepoiramū Janeruwarete 'ga pē monoi wemiayuamū”, 'jau 'ā Juā 'ga pē nupe rai'i. A'eramū 'ā mytuna 'gā wekoweramū Janeruwarete 'ga remiayuamū rai'i. A'eramū 'ā 'gā opoia otywer awi rai'i. Juā 'ga ojeupe 'ga mome'uramū 'gā 'ā opoia kwaiwete otywer awi rai'i. A'eramū Janeruwarete 'ga 'gā monou wemiayuamū— 'jau Jejui 'ga imome'wau u'ama 'gā nupe.

¹⁷—A'jea futat 'gā nemikwasiarer ymanera resageramū janee 'awamū miamū futat. A'jea futat nateepawa'uweri Janeruwarete 'ga je'ega jane wi. Ywaga teepawamū wyy retee 'eramū miamū futat nateepawa'uweri Janeruwarete 'ga je'ega— 'jau Jejui 'ga 'gā nupe u'ama imome'wau.

¹⁸—“Kūima'e 'ga amū nipo wemireko retyka awau amutee rerekou nū” 'ea nia'wyri Janeruwarete 'ga upe. Itywerete a'e 'ga akou Janeruwarete 'ga rowase. Etygipyrer are, kūjā are nanē kasi peko ne nū. Imen futat aipoa kūjā akou. “Pejejemogyau nipo pejeuemireko are” 'ea Janeruwarete 'ga nafutari— 'jau Jejui 'ga imome'wau 'gā nupe u'ama.

Ika'aranūū kwai ma'e 'ga imama'e'ema 'ga retee

¹⁹A'ere Jejui 'ga mama'e mū mome'wau 'gā nupe nū, 'gā mu'jawamū nū:

—Kūima'e 'ga amū akou waity esagea te imunepa rakue, ika'aranūū kwai ma'e 'ga rakue. A'eramū 'ga maraka apou 'gā nupe au jeteramū akou rakue. Maraka apoaw ipe 'ga mama'e monou 'gā nupe. Kwaiwete 'gā mojemī'waa rakue.

²⁰⁻²¹—Ajepeja 'ga ipito'om ma'e 'ga otywereteramū. Lasaru 'ga rera. A'eramū 'ga pytuna 'gā 'ga rerawau 'ga m̄yina ika'aranūū kwai ma'e 'ga pyri 'ga rejaa. “Siesak 'ga mama'e'i mū mura 'ga upe 'jau”, 'jau 'gā numiamū. A'ere 'ga namuri'i mama'ea 'ga upe. Kasurua etee 'ua 'ga pira rerepa 'ga wī, 'ga pito'oma rerepa.

²² Anure ipito'om ma'e 'ga amanūmū. A'eramū 'ga manū re ywagipewara 'gā 'ua 'ga rerawau ojeypyri. Abraão 'ga pyri 'ga rerawau im̄yina, 'ga muapyka 'ga mojemī'waa. A'ere ika'aranūū kwai ma'e 'ga amanūmū nū. A'eramū 'ga pytuna 'gā 'ga rerawau 'ga tyma.

²³ 'Ga 'aga nanē awawayayau mama'eukwaawa rapyaw ipe nū. A'eramū 'ga ūina akou tyweaete. Tata rakuwa 'ga m̄yina 'ga rerekou tyweaete. A'eramū 'ga Abraão 'ga piresaka. Ipito'om ma'efera 'ga resaka Abraão 'ga pyri. Mukuu 'ga ūina Abraão 'ga resaka.

²⁴ A'eramū 'ga wafukaita 'ga upe: “Abraão! Ene 'ā jeram̄yja! Ejemuaēm iki je ree. 'Yia erurukat ara jee Lasaru 'ga upe, 'ga fā'i are etee jekū muak̄ymawamū. Ekoay jekū osinininiga”, 'jau ika'aranūū kwai ma'efera 'ga oje'ega Abraão 'ga upe— 'jau Jejui 'ga 'gā nupe imome'wau.

²⁵—A'eramū Abraão 'ga 'jau 'ga upe: “Naani nū'ū. 'Auwaramū ore 'ā norooarūa'uweri peu enerekwaw ipe. Pēē nanē pe awi pejejorarūme'em 'au orerekwaw ipe nū”, 'jau Abraão 'ga 'ga upe. “Nenerea'ari nipo ejekwawer are? Eka'aranūū are etee ako ejerowiaripa ikue. A'eramū ene 'awamū e'ŷina eko tyweaw ipe” 'jau 'ga 'ga upe. “A'ere ako Lasaru 'ga nitywi mama'ea ikue. A'eramū 'ga 'awamū akou 'au futat je pyri wekōēājamū. Wekōēāimawe'emamū futat 'ga akou 'awamū je pyri. A'eramū je a'eramū 'ga monowe'em futat kwe pe tejewi”, 'jau Abraão 'ga oje'ega 'ga upe.

²⁶ “Nerekwaawi nipo 'ga oarūe'ema kwe katy ki sa”, 'jau 'ga 'ga upe. “Maran 'ga awau kwe katy ene pyri ki 'ei? Maran 'ga awau ikwara apyraapa ene pyri ki 'ei? Nooarūi 'auwara 'gā kwe katy. Peuwaremū nanē pejejorarūme'em futat 'au nū”, 'jau Abraão 'ga oje'ega monou 'ga upe.

²⁷⁻²⁸—A'eramū mama'eukwaawa rapyaw ipe 'ūi ma'e 'ga 'jau Abraão 'ga upe: “Ere ajee 'ga monou jepytuna 'gā nupe, 'ga moporogytaukaa 'ū”, 'jau 'ga 'ga upe. “Siku futat jerewirera 'gā. Kasi 'gā nuri je pyri ne. Ekoay je tejua te'ŷina 'au tekou tywet, e'i enereki'yra pē nupe, te'i 'ga awau 'gā nupe peu ywyu jeruwa 'ga rog ipe 'gā nupe 'jau”, 'jau 'ga oje'ega Abraão 'ga upe. “Kasi 'gā nuri je pyri ne”, 'jau 'ga 'ga upe.

²⁹—Aipo 'ga eramū Abraão 'ga 'jau 'ga upe: “Naani. Okwaap futat 'gā 'ā Moisesi 'ga remikwasiarera numiamū. Janeruwarete 'ga je'ega mome'wara 'gā nemikwasiarera nanē 'ā ityp futat. Tene 'gā aipo etee erowiari”, 'jau Abraão 'ga 'ga upe.

³⁰—Aipo eramū 'ga 'jau Abraão 'ga upe: “Naani. Moisesi 'ga je'egera 'gā nuerowiari futari jepi”, 'jau etee 'ga upe. “Amanū ma'efera 'ga je'ega te nipo 'gā werowiat. A'eramū te nipo 'gā poiri otywer awi”, 'jau etee 'ga Abraão 'ga upe.

³¹—A'eramū Abraão 'ga 'jau 'ga upe: “Naani nū'ū. Moisesi 'ga je'egera renuwe'em ire 'gā amanū ma'efera 'ga je'ega taetu nuerowiara'uweri futari. Janeruwarete 'ga je'ega mome'wara 'gā nemikwasiarera mogytaw miamū te 'gā 'ā nuerowiari. Oferap ma'e 'ga je'ega taetu 'gā nuenuwi futari nū'ū”, 'jau Abraão 'ga 'ga upe— 'jau Jejui 'ga 'gā nupe imome'wau.

17

Iporiay'i ajaupe mama'e tywera apoukaara 'gā

(Mateu 18.6-7; Maku 9.42)

¹ A'ere Jejui 'ga 'jau wemiayuwa 'gā nupe nū:

—Nateepawi futari nipo ajaupe mama'e tywera apoukaara 'gā— 'jau 'ga 'gā nupe oporogytau. —Iporiay'i aipo 'gā numiamū. Aipo 'gā te nipo Ku'jywa 'ga wereko tywerete futat— 'jau 'ga 'gā nupe.

²—Sā'ā ae ita mogoa ojojuri. A'eramū 'ā ae ojomonou ojomomoa ajajukau 'yē'e pype nū. 'Y pe imomoripyrrera 'ga ako tywe'ri etee. Amanū etee 'ga. A'ere nipo kunumī upe mama'e tywera apoukaara 'gā te Janeruwarete 'ga ereko tyweretei.

³ A'eramū pēē pejejea'gwau pejejemogyau. Mama'e tywera kasi peapoukat 'gā nupe ne— 'jau Jejui 'ga oporogytau 'gā nupe.

—Je rerowiaara 'ga amū nipo mama'e tywera wapo pē nupe. A'eramū ki pejeporogytau 'ga upe. “A'jea futat ako je mama'e tywera apoi ene upe ai'i. A'ere je 'awamū naapou'jawi nū”, pejejeupe 'ga eramū pēē 'ga rerekou esage etee. Pejejea'aru'jawe'emamū futat ee— 'jau 'ga 'gā nupe.

⁴—Majepeja 'ara rupi etee mama'e tywera pejejeupe kwaiwete 'ga iaporamū pejewau pejeporogytau 'ga upe. “Mama'e tywera ereapo jee. A'eramū je ene raykau tekou. Au'je ki je rayka re ekou”, pe'je ki 'ga upe pejeporogytau. “Naapou'jawi je 'awamū”, pejejeupe 'gā 'eramū pejejea'aru'jawe'emamū ee. Pejepota'waramū 'gā nee— 'jau Jejuī 'ga 'gā nupe, 'gā mu'jau u'ama.

Perowiat Jarejuwarete 'ga

⁵A'eramū Jejuī 'ga remimu'e 'gā 'jau 'ga upe:

—Jejuī. Ejerowiarukat oree— 'jau 'gā oje'ega 'ga upe.

⁶A'eramū Jejuī 'ga 'jau 'gā nupe:

—Ināinānī'ī etee pēē 'ga rerowiaa 'eramū miamū Janeruwarete 'ga mama'e muri pē nupe— 'jau 'ga oje'ega 'gā nupe. —Pēē ināinānī'ī etee Jarejuwarete 'ga rerowiaa 'eramū miamū peje'eg 'ywu upe. “Ejemosok ywy awi jee. A'eramū ene ewau e'ama 'y rpypter ipe jee”, pe'je ki jupe. Janeruwarete 'ga pēē erowiarāmū 'ywa sogi pē nupe. Peje'eg imū etee futat awau u'ama peu pē nupe— 'jau Jejuī 'ga 'gā nupe.

Ajaupe oporowyky ma'e

⁷A'ere Jejuī 'ga mama'e mū mome'wau 'gā nupe:

—Sā'ā ae kūima'eramū ae wemiayuwamū monoa ko pe. Ajepejamū 'ā awau wyra poita. A'eramū 'ā ae kaaruwamū 'ua ojewya oporowyky re. 'Gā nur ire sipo ijara 'ga 'gā nenūi 'gā muapyka 'gā mojemī'waa ra'ne?

⁸Naani. Nanarūi. A'ere 'gā monoarera 'ga 'i etee 'gā nupe: “Je upe ra'ne mama'ea peapo. Je ra'ne je muewek pejepe. A'ere tepejemi'wat 'jau, je mueweg ire 'jau”, 'jau 'ga 'gā nupe.

⁹Mīnamū futat 'gā porowyky. A'e apoawamū futat 'ga 'gā mepyi— 'jau Jejuī 'ga imome'wau 'ga nupe.

¹⁰—Nan tee futat pēē. Jarejuwarete 'ga remiapo apo re “Ore resageramū”, pe'je kasi ne. “Ore arujara 'ga remiapo etee aruapo”, pe'je etee ki— 'jau Jejuī 'ga 'gā nupe u'ama.

Teis ipito'om ma'e gā

¹¹Jerusareg ipe Jejuī 'ga awau. Garireja ywy 'upa Samari ywy are oje'aa etee futat. A'eramū 'ga awau ipō'ō rupi

¹²owaēma amuna'wi'ī mū upe. 'Ga waēmauwe ipito'om ma'e 'gā 'ua 'ga rowosōu. Teis 'gā 'ua 'ga rowosōu.

¹³Mukuu we 'gā 'ua opytau wafukaita Jejuī 'ga upe:

—Ipito'om ma'eramū ore rekoī, aruafukaita enee. A'eramū ene ejemuaēma ore ree, ore mokā'jāu— 'jau 'gā Jejuī 'ga upe.

¹⁴'Gā nesakawe Jejuī 'ga 'jau 'gā nupe:

—Mainana 'ga upe pekwap, pejejesaukaa ra'ne— 'jau 'ga 'gā nupe.

A'eramū mainana 'ga repejāna 'gā orauwe 'gā pito'oma okā'jāu 'gā nui.

¹⁵Esakawe 'gā 'jau ajaupe:

—Tyy. Jane mokā'ēmap 'ga ra'e nū'ū— 'jau 'gā ajaupe.

A'eramū 'ga amū ojewya 'gā nui. Samari ywy pewara 'ga ojewya.

—Ene te 'ā eneresage oree, ki Ku'jyp— 'jau 'ga 'ua Jejuī 'ga upe.

¹⁶'Ua 'ga wenupy'āu wapyka Jejuī 'ga rowase.

—Ene te 'ā eneresage oree. Au'jete ore mokā'ē ape— 'jau 'ga 'ga upe.

'Ga ku'ia 'ga rerekou.

¹⁷⁻¹⁸A'eramū Jejuī 'ga 'jau 'ga upe:

—Mytuna 'gā te je 'ā amokā'ē. Ma'ape ajee enepytuna 'gā ki 'ei? Maran ajee ene tee erejewyt ejua ki 'ei? Maran ajee 'gā nojewyri ene rupi 'ū?— 'jau 'ga ojewyt ma'e 'ga upe.

A'ere Jejuī 'ga 'jau wewiri oo ma'e 'gā nupe:

—'Agamū Samari ywy pewara 'ga. Najanepytuna rūi agawewi 'ga. A'etea 'ga ojetee futat ojewyt 'ua oje'ega jee. Ajepeja 'gā juejue janepytuna futat numiamū, judeu 'gā futat numiamū. A'etea 'gā nojewyri 'ua, “Au'jete ore mokā'ē ape”, 'jawe'em jee— 'jau 'ga wewiri oo ma'e 'gā nupe.

¹⁹A'eramū Jejuī 'ga 'jau ojewyt ma'e 'ga upe nū:

—Ere ewau nū. Mainana 'ga upe ekwap ejesaukaa. Je rerowiat wejue 'ā ape ra'e jepi. A'eramū je ene mokā'jāu— 'jau 'ga 'ga upe. —Ere efu'ama. Ereka'ē futat ra'e— 'jau 'ga 'ga upe.

Werowiaara upe Jejuī 'ga reni 'wyriaramū

(Mateu 24.23-28, 37-41)

²⁰⁻²¹Poje fariseu 'gā amū 'ua oporogytau Jejuī 'ga upe:

—Maranime te Janeruwarete 'ga wemipyyrūmera 'ga muri imogou oree 'wyriaramū?— 'jau 'gā 'ua oporonupa ee Jejuī 'ga upe.

A'eramū Jejuī 'ga 'jau 'gā nupe:

—Janeruwarete 'ga remimureramū je na'awa ywy pewara 'wyriara 'jawe rūi. Ināinā'nī te je rekoī 'wyriaramū pē nupe— 'jau Jejuī 'ga aipo 'gā nupe. —'Awa ywy pewara 'wyriaramū te 'ā ae ojo 'wyriat pāwē pāwēnamū ae rekoī. A'ere je Jarejuwarete 'ga remimureramū je reni 'wyriaramū tejerowiaaramū pē nupe. Namajepēi ywy pype tee rūi jeremiayuwaṁ pejemogy. Ywy tesirūmera pype we futat jeremiayuwa 'gā jemogyi okwasi'wasi'wau najuejue etee. Na'au etee rūi te je 'ā 'wyriara. A'eramū pēē "'auwaramū etee 'ga 'wyriaramū janee", 'jawe'em pejejaupe. Najuejue etee futat je rekoī 'wyriaramū tejerowiaaramū pē nupe. A'ere 'awamū Janeruwarete 'ga remimureramū je rekoī pē pype— 'jau Jejuī 'ga fariseu 'gā nupe.

²² A'eramū Jejuī 'ga 'jau wemimu'e 'gā nupe:

—Anure nipo pe'je pejejaupe. "Ma'ape te 'ga? Taesak 'ga 'jau", 'jau nipo pēē pejejaupe. A'ere nipo naje resagī pejepe. A'eramū pēē pejejemogyau je jewyra rapesaka. A'eramū te nipo je resak pejepe najuejue etee— 'jau Jejuī 'ga 'gā nupe.

²³ —Je ruru'jawa'ne'emamū nipo amumera 'gā 'jau pē nupe: "Peu futat 'ga rekoī", 'jau nipo 'gā pē nupe. A'ere kasi perowiat 'gā ne.

²⁴ Je ruru'jawamū nipo najuejue etee je resak pejepe. Sā'ā tupā werawa. A'eramū 'ā ae najuejue etee esaka. Nan tee futat nipo je jewyramū najuejue etee je resak pejepe— 'jau Jejuī 'ga 'gā nupe.

²⁵ —A'ere nipo je o enune itywerete ma'e 'gā je rereko tyweretei ra'ne. Niporomutari nipo 'gā je ree. A'eramū nipo 'gā je monou je jukaukaa 'wyriara 'ga po pe.

²⁶⁻²⁷ A'ere nipo anure je ruru'jawi erujewi pē nupe. Je kwaapare'ema 'gā nipo aipoa 'ara rupi ajemogyau oporowykyau. Ojemi'waa, wemirekoramū 'jau nipo. Wemiapo apo are tee futat wea'aramū ajemogyau— 'jau Jejuī 'ga 'gā nupe u'ama. —Janeruwarete 'ga ree jēmī nipo 'gā wea'are'emamū ajemogyau. Sā'ā Nue 'ga rekoramū 'gā jemogya rakue. Janeruwarete 'ga ree 'gā 'ā wea'are'emamū rakue. Nan nipo 'ga ajemogyau. Poje 'ga 'ā amana mua 'gā nupe, 'gā apisaukaa jupe rakue. Nan tee futat nipo je kwaapare'ema 'gā jemogyi— 'jau Jejuī 'ga 'gā nupe.

²⁸ —Sā'ā Lo 'ga rekoramū nanē 'gā 'ā iapou rakue nū. Sodom ipewara 'gā awau kwe pe ojemi'waa ojekoty'aawa 'gā pyri. Oporowykyau akou oko tyma, amumera 'gā 'ā 'oga apou 'jau rakue.

²⁹ A'ere 'ā ywagipewara 'gā Lo 'ga renuēmi 'gā nui rakue. 'Ga ēm ire Janeruwarete 'ga tata mua 'gā nupe rakue, itatata reewe rakue, ēsōfyri 'jawa reewe rakue. Itywerete 'gā ajemogyau. Naea'ari futari 'gā Jarejuwarete 'ga ree. A'eramū 'ā Janeruwarete 'ga 'gā apisau rakue.

³⁰ Nan tee futat nipo pejemogy je ruramū— 'jau Jejuī 'ga 'gā nupe.

³¹ —Aipo 'ara rupi je jewyramū nipo ko pewara 'gā ojewyre'ema futat okaraemā pyyka. Ko pewara 'gā nanē nipo nooi futari osou okaraemā pyyka nū. Okaraemā are tee ea'at ma'e 'gā okaraemā reewe futat teepap.

³² —Pēnea'at Lo 'ga remireko ēē manūawer are. Niporejariwēri ēē okaraemā are rakue. A'eramū ēē awayayawe'em. A'eramū ēē amanūmū rakue.

³³ Pejekaraemā are tee ea'at ma'eramū nepeoi futari Jarejuwarete 'ga pyri. Jarejuwarete 'ga ree ea'at ma'eramū te peo 'ga pyri pejeferapa— 'jau 'ga 'gā nupe imome'wau.

³⁴ —Je jewyru'jawamū nipo 'gā amū ajuerosea ajuerupa. A'ere nipo 'ga amū ēmi ajai. Ajepeja 'ga nipo opyta. Naje rerowiari 'ga. A'eramū 'ga awawe'em je rupi nipo.

³⁵ Kūjāmera 'gā nipo 'upa mukūi ygu'ai. A'ere nipo majepeja ēē oi je repejāna. A'eramū nipo ajepeja ēē te awawe'em.

³⁶ 'Gā amū nipo awau oporowykyau ko pe akou mukūi. A'ere nipo majepeja 'ga etee 'ga oi je rowosōu. Ajepeja 'ga awawe'em nipo. Je rerowiare'ema 'gā nooi je rowosōu— 'jau Jejuī 'ga 'gā nupe 'gā mu'jau ojewyru'jaw are.

³⁷ A'eramū 'ga remimu'e 'gā 'jau Jejuī 'ga upe:

—Ma'ape sipo erejot poromū ejewyr ire?— 'jau 'gā Jejuī 'ga upe.

—Je ruramū te nipo pekwaap katu katu— 'jau etee 'ga 'gā nupe. —Sā'ā uruwua mama'e nema kwaawa. A'eramū 'ā 'ua ajatykau ee. Nan tee futat nipo pēē. Je jewyru'jawamū je kwaap katu katu pejepe— 'jau Jejuī 'ga 'gā nupe imome'wau.

18

Peojet kasi pejeje'ega Jarejuwarete 'ga upe ne

¹ Anure Jejuī 'ga 'jau wemiayuwa 'gā nupe:

—Peojet kasi pejejemogyau pejeporogytau Jarejuwarete 'ga upe ne— 'jau Jejuī 'ga 'gā nupe u'ama.

² A'ere 'ga mama'e mū mome'wau 'gā nupe nū:

—Tapy'jya 'wyrarete pe 'wyrriara 'ga amū rekoī. 'Gā ago'o anupawe 'ga 'jau 'gā nupe: “Ene te 'ā mama'e tywera ereapo 'ga upe. A'eramū ene te 'ga mepyau”, 'jau 'ga itywet ma'e 'gā nupe. “Ga mepy'e'amamū 'gā ene munewi ne”, 'jau 'ga 'gā nupe. Aipoa 'wyrriara nopojeuwi futari Jarejuwarete 'ga. Aea nanē futat nopojeuwi futari nū.

³ Aipo amunawa pype majawera ēē mū akou. 'Wyrriari 'ga upe ēē awau 'jau: “Jekaraemā rerawarera wā nomepyi jee”, 'jau ēē awau 'ga upe. “A'eramū ene je mepyukaa wā nupe”, 'jau ēē 'ga upe.

⁴ A'ere 'ga naani. Noje'egi futari aipo 'gā nupe. A'eramū ēē ojewya 'ga ree nū. A'ere ēē ojewyru'japa 'ga ree nū. Ojewyjewya akou 'ga ree, oporogytau 'ga upe. A'eramū 'ga 'jau ojeupe: “Ku'jywa 'ga miamū je 'ā nopojeuwi jepi re'ā. Ae 'gā taetu je 'ā nopojeuwi jepi re'ā”, 'jau 'ga ojeupe.

⁵ “A'ere pa 'ā koa majawera ēē je mopiroy'sāy'sagi nū”, 'jau 'ga ojeupe. “A'eramū pa je ēē karaemā rerawarera 'gā nupe ēē karaemā mepyukaa kwy”, 'jau 'ga 'ūina ojeupe. “Kasi a'e pe ēē ruru'jau'jawi 'au je marukare'ema ne nū kwy”, 'jau 'ga ojeupe— 'jau Jejuī 'ga imome'wau 'gā nupe.

⁶ —Aipoa 'wyrriari 'ga nia'wyrri. Nakamēsiete rūi 'ga ēē mepyukari 'gā nupe. A'etea 'ā pejemu'e 'ga ree.

⁷ Aipo 'ga kūima'e 'ga nia'wyrri agawewi futat. A'etea 'ga opoat ēē— 'jau Jejuī 'ga 'gā nupe. —Janeruwarete 'ga taetu 'ā esage futat. A'eramū 'ga 'ā wemiayuwa 'gā poari futari. Ojeupe oporogyta ma'e 'gā ojere'emamū 'ga 'gā poari futari.

⁸ 'Ga niporomukui futari ae poaa— 'jau Jejuī 'ga 'gā nupe.

Aipo 'e re Jejuī 'ga 'jau 'gā nupe:

—Tejoru'japa sipo je tejerowiaara 'gā amū nesagi? Je ruru'jawa poromukuran sipo 'gā jemogyi kwaiwete je rerowiaa? Kwaiwete tejerowiaara 'gā nesaga je afutat— 'jau Jejuī 'ga 'gā nupe. —A'eramū pēē je rerowiaarareteramū pejejemogyau. Jarejuwarete 'ga upe pejeje'ega pejeojere'emamū futat pejejemogyau— 'jau Jejuī 'ga 'gā nupe.

Mukūja 'gā oje'ega monou Jarejuwarete 'ga upe

⁹ A'ere 'ga mama'e mū mome'wau 'gā nupe nū, 'gā mu'jawamū nū. “Je jeresageay. Tekotee 'gā nia'wyrri. A'ere 'ā je jeresage” 'jara 'gā nupe te 'ga 'i.

¹⁰ —Mukūja kūima'e 'gā awau osou Jarejuwarete 'ga mogytaaw ipe oporogytau 'ga upe. Majepeja 'ga fariseua. A'eramū ajepeja 'ga 'wyrriara upe ka'aranūū ppykara 'ga.

¹¹ A'eramū fariseu 'ga ojemome'wau u'ama Ku'jywa 'ga upe. “Na'gā 'jawe rūi je rekoī ene reape, ki Ku'jyp”, 'jau 'ga 'ga upe u'ama. “Amumera 'gā te aje 'ā muna'ywamū ako ene reape. A'ere je 'ā nanarūi. Naapoa'uweri je 'ā mama'e tywera ene reape tekou, ki Ku'jyp. 'Gā 'ā nako esageī futari ene reape. A'ere 'ā je te je reko esageī ene reape”, 'jau 'ga oporogytau u'ama Jarejuwarete 'ga upe. “Gā 'ā okou futat ajumireko are. A'ere je 'ā nanarūi. Nokoa'uweri je 'gā nemireko are. Je 'ā na'gā 'jawe rūi futat. Kwe 'ga te 'ā 'wyrriara upe oreka'aranūū ppykara te”, 'jau 'ga, ajepeja 'ga kūima'e 'ga mome'wau u'ama Ku'jywa 'ga upe. “Nia'wyrri 'ga. A'ere je na'ga 'jawe rūi.

¹² Mukūi 'ara rupi je 'ā teporogytau tekou enee ty'ara rerekou. Teka'aranūūa miamū je 'ā imonou ene upe jepi. Teis ka'aranūū je majepeja monou enee jepi”, 'jau 'ga u'ama oporogytau Jarejuwarete 'ga upe numiamū. A'ere Janeruwarete 'ga nuenuwi. Ojeupe etee futat 'ga 'i u'ama— 'jau Jejuī 'ga 'gā nupe imome'wau.

¹³ —A'ere 'wyrriara upe ka'aranūū ppykara 'ga awau u'ama ojetee oporogytau Jarejuwarete 'ga upe. Aipo 'ga kūima'e 'ga werojenosī otywera enu'ama. A'eramū 'ga a'eramū wowowyre'emamū u'ama oporogytau Jarejuwarete 'ga upe. “Je 'ā jetywerete tekou enee jepi. Ejemuaēm je ree, ki Ku'jyp”, 'jau 'ga Jarejuwarete 'ga upe. A'eramū aipo 'ga 'eramū Janeruwarete 'ga 'ga tywera moia 'ga wi. A'eramū 'ga a'eramū 'ga katu'oka. Otywera renosiarera 'ga Ku'jywa 'ga ikatu'oka.

¹⁴ Aipo 'ga ikatu'ogipyra 'ga esage akou Janeruwarete 'ga upe. Ajepeja 'ga naani. Nia'wyrri 'ga 'ga upe. Wog ipe 'gā jewyramū 'ga remikatu'ogera 'ga etee futat wesageramū akou 'ga upe— 'jau Jejuī 'ga 'gā nupe imome'wau.

—“Je jeresage” 'jara 'gā Janeruwarete 'ga nafutari. Aipo 'jara 'gā nojekatu'ogukari Jarejuwarete 'ga upe. A'ere 'ga “je 'ā jetywerete” 'jara 'gā katu'ogi. Aipo 'jara 'gā etee ojekatu'ogukat Jarejuwarete 'ga upe— 'jau Jejuī 'ga 'gā nupe imome'wau u'ama, 'gā mu'jau ee.

Jejuī 'ga kunumī 'gā netee

(Mateu 19.13-15; Maku 10.13-16)

¹⁵ Anure amumera 'gā wa'yra 'gā nerua Jejuī 'ga upe:

—Orera'yra apyte'rarimū epo emono a'i kīTī— 'jau 'gā erua 'ga upe. —Jarejuwarete kīā upe epogyta wā nee. A'eramū Janeruwarete kīā ojekau esage wā nee, aru'e ore enee kīTī— 'jau kūjāmera 'gā 'ga upe.

A'ere Jeju 'ga remimu'e 'gā 'gā nesakawe 'gā 'i 'gā nupe:

—Perur awi pejeja'yra 'gā 'ga upe 'ga porogyta 'ga 'amamū. Nepemaruukari 'ga porogyta 'ga 'amamū— 'jau 'ga remimu'e 'gā 'gā nupe.

Aipo 'gā 'eramū Jeju 'ga oje'ega wemimu'e 'gā nupe:

—Naani. Peapo awi aipoa. Tene kunumī 'gā nuri je pyri— 'jau 'ga wemimu'e 'gā nupe.

¹⁶ A'eramū futat 'ga kunumīTī 'gā nenūina:

—Pe'je pejeju je pyri— 'jau 'ga kunumī 'gā nupe.

A'eramū 'ga 'jau:

—Janeruwarete 'ga kunumī 'gā afutat wemiayuwamū— 'jau 'ga 'gā nupe.

¹⁷ —Kunumī 'jawewara 'gā nupe etee Janeruwarete 'ga reni 'wyrriaramū. Kunumī 'gā ojemogyppyk te Jarejuwarete 'ga ree. Ojerekokatuukat 'gā 'ga upe. 'Gā 'jawe pejemogyramū 'ga pē katu'ogi. Kunumī 'jawewara 'gā etee te Janeruwarete 'ga omogy wemiayuwamū. A'ere 'ga ojee ijemogyppyke'ema 'gā Janeruwarete 'ga nomogy wemiayuwamū. Nakunumī 'jawe rūi 'gā. A'eramū 'ga 'gā mogyawe'em wemiayuwamū— 'jau Jeju 'ga 'gā nupe, 'gā mu'jau ee.

Jarejuwarete 'ga pyri oo are 'ga poronupawet

(Mateu 19.16-30; Maku 10.17-31)

¹⁸ A'ere judeu 'gā 'wyrriari' 'ga amū awau oporogytau Jeju 'ga upe:

—Jeju. Ene 'ā eneresage. Ma'ja te je aapo 'awamū tejee, temanū re ywag ipe tejesawamū, Jarejuwarete 'ga pyri tewawamū?— 'jau 'ga oporonupa ee 'ua Jeju 'ga upe.

¹⁹ A'eramū Jeju 'ga 'jau 'ga upe:

—Ma'eramū “Ene 'ā eneresage” 'jau jee eju 'ū? Janeruwarete 'ga etee te esage ma'ea kūi. “Ene 'ā Jarejuwarete 'ga 'jawewara”, ere te jee?— 'jau Jeju 'ga 'ga upe.

²⁰ —Ymā te 'ā Moisesi 'ga Jarejuwarete 'ga je'ega kwasiari inuga ka'aran are janee rakue. A'ea 'ā erekwaap. “Peko awi pejejuemireko are” 'ea 'ā erekwaap. “Peporojuka awi. Pemunarū kasi mama'e are ne. Peje'ēwu'jag kasi 'ga amū ne. Peanuw etee ki pejejara 'gā”. Mīmera 'ea 'ā erekwaap— 'jau Jeju 'ga 'ga upe.

²¹ A'eramū 'ga 'jau Jeju 'ga upe:

—Je kunumīawe futat aipo aapopap ikue, Moisesi 'ga je'egeer imū etee futat ikue— 'jau aipoa kūima'e 'ga Jeju 'ga upe oje'ega.

²² A'eramū Jeju 'ga 'jau 'ga upe:

—A'jea futat ere. A'ere 'awamū mama'e mū eapo. Ekaraemā eme'ēmap. A'ere ene ka'aranūū monou ika'aranūū'ema 'gā nupe. Aipoa ene iapo re, Janeruwarete 'ga ene monoi ojeppyri ene manū re. Mama'e esagea te nipo 'ga amut enee anure, enekaraemā monoawera mua enee anure. Ekaraemā me'eg ire ene eju je rewiri— 'jau Jeju 'ga 'ga upe.

²³ A'ere 'ga aipo ojeupe 'ga 'eramū 'ga 'arasigamū etee okaraemā are. Kwaiwete te 'ga karaemā. A'eramū 'ga okaraemā me'ega futare'ema. A'eramū 'ga 'jau ojeupe etee futat: “Naani. Naapoa'uweri je nanuara”, 'jau 'ga ojeupe etee futat. A'eramū 'ga u'arasigamū awau, Jeju 'ga aipo ojeupe 'eramū awau.

²⁴ 'Ga 'arasiga resakawe Jeju 'ga 'jau 'gā nupe:

²⁵ —Ayay te ikaraemā kwai ma'e 'gā ajemogyau Jarejuwarete 'ga remiayuwamū— 'jau 'ga 'gā nupe. —Ayay te ikaraemā kwai ma'e 'gā ojekatu'ogukaa Jarejuwarete 'ga upe. Kwaiwete 'gā karaemā. A'eramū 'gā okaraemā are etee wea'aramū ajemogyau. Okaraemā are etee aipo 'gā jemogyppygi akou. Na'Jarejuwarete 'ga ree rūi 'gā jemogyppygi ajemogyau. Jarejuwarete 'ga opoara futare'ema ajemogyau. Jeje'ega 'gā nuenuwi futari ajemogyau— 'jau Jeju 'ga 'gā nupe. —Sā'ā kawaruaa 'jawewara kamerua aguja kwara rupi ikwawe'ema. Nan tee futat ayramū ikaraemā kwai ma'e 'gā ojekatu'ogukaa Jarejuwarete 'ga upe. Ikaraemā kwai ma'e 'gā nijekatu'ogukariweri futari Jarejuwarete 'ga upe— 'jau Jeju 'ga 'gā nupe.

²⁶ A'eramū 'ga renupara 'gā 'jau 'ga upe:

—Maranuaramū aje 'ga ae katu'ogi ki 'ei?— 'jau 'gā 'ga upe.

²⁷ A'eramū Jeju 'ga 'jau 'gā nupe:

—Pē nupe nayrareferi futari. Ayay futat mama'e apoa numiamū. A'ere nitywi futari Janeruwarete 'ga remiapoe'ema amū mama'ea. Mama'ea naayi futari 'ga upe. Ikaraemā kwai ma'ea miamū Janeruwarete 'ga okatu'ok, “Je katu'og ape” ojeupe 'gā 'eramū— 'jau etee Jeju 'ga 'gā nupe.

²⁸ A'eramū Pedro 'ga 'jau 'ga upe:

—Ore ako aruejat orokaraemā arajua ene rupi ai'i. Oropytuna nanē futat ako ore ejaa ai'i nū. Ma'ja te ore mama'e rejaawera repya?— 'jau 'ga Jejuī 'ga upe.

²⁹ A'eramū Jejuī 'ga 'jau wemimu'e 'gā nupe:

—A'jea futat ako ai'i. A'eramū je 'jau pē nupe: Anure nipo Janeruwarete 'ga mama'e monoi pē nupe pēnemiejarera apyraapa. Je mome'u are woga rejaarera 'gā, wemireko rejaarera 'gā, weki'yra rejaarera 'gā, wewirera rejaarera 'gā, wenyra rejaarera 'gā, ujara rejaarera 'gā, wa'yra rejaarera 'gā.

³⁰ Mīmera 'gā nupe Janeruwarete 'ga mama'e monoi. 'Awamū futat 'ga mama'e monoi 'gā nemiejarera apyraapa. Amanū re je ree omama'e rejaarera 'gā juejue awau ajemogyau Jarejuwarete 'ga pyri— 'jau Jejuī 'ga Pedro 'ga upe.

Amanūawama Jejuī 'ga imome'wau'japa

(Mateu 20.17-19; Maku 10.32-34)

³¹ Aipo 'gā nupe 'e re Jejuī 'ga wemimu'e 'gā nenūina:

—Pejepe'a'i 'gā nui ra'ne. Taporogyta pē nupe etee 'jau— 'jau Jejuī 'ga 'gā nupe.

A'eramū 'gā ojepe'au mytuna 'gā nui 'ua. A'eramū 'ga 'jau 'gā nupe:

—Jerusareg ipe jane oi 'awamū. A'eramū je pē muea'aa Jarejuwarete 'ga je'ega mome'wara 'gā nemikwasiarer are— 'jau 'ga wemimu'e 'gā nupe.

—Ymā te 'ā 'gā ka'arana kwasiari Jarejuwarete 'ga je'eg are rakue, “Anure tamut teja'yra 'ga pē nupe 'jau” 'e are rakue. “A'eramū ia'wyre'ema 'gā jera'yra 'ga rerekou tyweaete nipo.

³² A'eramū nipo 'gā 'ga monou romanū 'wyrīara 'ga po pe 'ga jukaukaa. A'eramū nipo jefaruu 'gā 'ga kurapa, onymuna 'ga ree, 'ga nupānupāu, 'ga monou, 'ga mu'ama 'ypeywar are 'ga jywya pypiraa 'ga manūawamū futat”, 'jau 'ga 'gā nupe rakue— 'jau Jejuī 'ga 'gā muea'aa ikwasiari pyrer are.

³³ —“A'ere nipo je imuapyra 'ara rupi 'ga moferawi etee nū”, 'jau 'ā Janeruwarete 'ga 'gā nupe, ikwasiarukaa inuga rakue— 'jau Jejuī 'ga 'gā muea'aa ee.

A'eramū Jejuī 'ga 'jau 'gā nupe nū:

—Je 'ā pēneki'yraretea. Janeruwarete 'ga je mut pē nupe. A'eramū 'gā je ree futat poromū ka'arana kwasiaa inuga rakue— 'jau Jejuī 'ga 'ga nupe.

³⁴ A'ere 'gā nokwaawi 'ga 'ea. Naeapyoi 'gā 'ga 'e are.

—Ma'ja are te 'ga jane mu'ei?— 'jau etee 'gā ajaupe. —Ma'eramū 'ga aipo mome'wau jane?— 'jau 'gā ajaupe.

—Tee. Je nakwaawi ki 'ei— 'jau etee 'gā amū ajaupe.

Eae'ema 'ga

(Mateu 20.29-34; Maku 10.46-52)

³⁵ Jeriko 'jawa amunawa upe iwaēm ja'wyja'wyuuramū eae'ema 'ga amū 'ūina wapyka peyse pe:

—Ka'aranū'īa pemut ape jee— 'jau 'ga 'ūina pe rupi okwap ma'e 'gā nupe.

³⁶ Peyse pe 'ūinaw ipe 'ga 'ūina wapykau 'gā fu are. Kwaiwete 'gā fu renupa 'ūina. A'eramū 'ga 'jau:

—Aw'jja te poromū ako?— 'jau 'ga wafukaita 'gā nupe.

³⁷ —Jejuī 'ga ako, Nasare pe waranup ma'efera 'ga okwap akou— 'jau 'ga amū 'ga upe.

³⁸ A'eramū eae'ema 'ga wafukaita Jejuī 'ga upe:

—Jejuī! Ene 'ā Davi 'ga juapyrera, Jarejuwarete 'ga remimurera! Eremuaēm te je ree? Epājē mū je katu'og ape, ki Jejuī— 'jau 'ga wafukaita 'ga upe.

³⁹ A'eramū 'ga pyu okwap ma'e 'gā 'jau 'ga upe:

—Epije e'jina kūi. Aereau toko re'ā— 'jau 'gā 'ga upe.

A'ere 'ga jero'wuro'wuī etee wafukaita 'ga upe:

—Jejuī! Ene 'ā Davi 'ga juapyrera, Jarejuwarete 'ga remimurera. Ejemuaēm je ree. Je resag ape, a'e je enee— 'jau 'ga ojero'waro'wau etee wafukaita 'ūina.

⁴⁰ A'eramū Jejuī 'ga awau opytau pe pe.

—Pe'je ajee eae'ema 'ga rerua jee— 'jau 'ga 'gā nupe.

A'erauwe 'gā 'ga rerua 'ga upe.

⁴¹ Ojeupe 'ga rerurauwe Jejuī 'ga 'jau 'ga upe:

—Ma'ja te erefutat ejeupe je iapoa?— 'jau Jejuī 'ga 'ga upe.

—Tamā'ē 'jau nū, a'e je enee, ki Ku'jyp. Jereapap je ikue— 'jau 'ga Jejuī 'ga upe.

⁴² A'eramū Jejuī 'ga 'jau 'ga upe:

—Eremā'ē futat nū. Je rerowiar ape ekou ra'e. A'eramū je ene mamā'jāu nū— 'jau Jejuī 'ga 'ga upe.

⁴³ A'eramū 'ga opo monou 'ga reakwara 'arimū 'ga mamā'jāu nū. A'erauwe 'ga amā'jāu awau Jejuī 'ga rupi.

—Ene te 'ā eneresage jee— 'jau 'ga Jarejuwarete 'ga upe 'ga muorypa amamā'ēawer are.

'Ga resakara 'gā nanē oje'ega Jarejuwarete 'ga upe nū:
—Ene te 'ā eneresage oree— 'jau 'gā oje'ega 'ga upe.

19

Sakeu 'ga

¹ Jeriko 'jawa amunawa upe owaēmawe Jejui 'ga awau amunawa pyterimū akou. Kwaiwete 'gā awau 'ga rupi.

² A'eramū Sakeu 'ga oporesagiweramū Jejui 'ga ree. Sakeu 'ga ika'aranūū kwai ma'ea. 'Wyrriararete upe ka'aranūū pyykara 'gā nupe 'ga reni 'wyrriaramū.

³ 'Ga poromū iporesagiwet Jejui 'ga ree. A'ere 'ga nifukui. A'eramū 'ga a'eramū 'ga resake'ema.

⁴ A'eramū 'ga awau ujāna 'ga renune awau ojeupia 'ywa rupi. Figu 'ywa rakā 'arimū 'ga awau ojeupia 'ūina, Jejui 'ga kwapawa 'arimū. “Ko rupi futat nipo 'ga kwawi re'ā”, 'jau Sakeu 'ga ojeupe, awau 'ūina 'ywa rakā 'arimū 'gā nenune.

⁵ 'Ua Jejui 'ga owaēma 'ga upe. A'eramū Jejui 'ga amā'jāu 'ga ree. A'eramū Jejui 'ga 'jau 'ga upe:

—Sakeu. Ere ejua ejypa. Too ene rupi ene'wyr ipe 'jau— 'jau Jejui 'ga 'ga upe.

⁶ A'erauwe 'ga 'ua ojypa. A'eramū 'ga Jejui 'ga rerawau oje'wyr ipe. A'eramū futat Sakeu 'ga aku'iramū 'ga rerawau oje'wyr ipe.

⁷ A'eramū aipo resakarera 'gā 'jau ajaupe:

—Kuu. Nokwaawi 'ga Sakeu 'ga ra'e— 'jau 'gā ajaupe. —Sakeu 'ga 'ā 'wyrriararete upe janeka'aranūū pyykara. A'eramū 'ga ia'wyr'e'emamū akou. Nia'wyr'i ka'aranūū pyykara 'gā najuejue etee. Amunarū ma'e 'gā juejue te 'ā. A'etea Jejui 'ga oo 'ga 'wyr ipe jā'nū'ū— 'jau 'gā Jejui 'ga ago'wau 'upa.

⁸ Ojemī'war ire Sakeu 'ga 'jau Jejui 'ga upe:

—Apoit je tetywer awi 'awamū. A'eramū je tekaraemā mojo'oka ikaraemā'e'ema 'gā nupe. Amumera 'gā nui je ka'aranūū reroouu re je ka'aranūū monoi 'gā nupe nū. Irūpāwē juejue je imonoi 'gā nupe nū, 'gā nui eruripyrrera mepyau 'gā nupe nū— 'jau 'ga 'ga upe.

⁹ A'eramū Jejui 'ga 'jau wesakara 'gā nupe:

—Ko 'ga kūima'e 'ga judeua futat. A'etea 'ga mama'e tywera wapo akou rai'i. A'ere 'awamū Janeruwarete 'ga 'ga katu'ogi— 'jau Jejui 'ga 'gā nupe.

¹⁰ —Je 'ā pēneki'yrarete'a futat. Ma'eramū 'ā je ruri oka'jam ma'e 'jawewara 'gā nekāa tekou. Jeruwarete 'ga je'ega renupare'ema 'gā oka'jam ma'e 'jawewara futat ajemogy. A'eramū je 'gā nekāa te tjua etee. 'Gā katu'okawamū tejua etee— 'jau Jejui 'ga 'gā nupe.

Kūima'e 'ga remiayuwa 'gā mome'uawet (Mateu 25.14-30)

¹¹ Jerusarega pyri awauwe 'ga rupi oo ma'e 'gā 'jau ajaupe:

—Sawaēm ja'wyja'wy jane Jerusarega upe ra'e. 'Awamū futat nipo 'ga rekoī 'wyrriaramū janee— 'jau 'gā ajaupe.

¹² A'ere Jejui 'ga nenuwi agawewi futat 'gā 'ea. A'etea 'ga okwaap aipo 'gā 'ea ajaupe. A'eramū 'ga mama'e mū mome'wau 'gā nupe, 'gā mu'jawamū.

—'Wyrriararete 'ga ika'aranūū kwai ma'e 'ga renūina. “Ere ejua 'au je pyri. Tomono ene 'wyrriaramū 'gā nupe 'jau”, 'jau 'ga oje'ega monou 'ga upe. Mukuu 'wyrriararete 'ga rekoī.

¹³ —A'eramū 'ga oo enunewe wemiayuwa 'gā nupe oporogytau. Teis 'ga remiayuwa 'gā pytuna. A'eramū 'ga ka'aranūū 'ywope'i monou 'gā nupe. “Oo je teatau pē nui. A'eramū je ka'aranūū 'ywope'ia monou pāwē pāwē pē nupe. A'eramū pēē pejewau imomytuna jee je ruru'jawe'emauwe”, 'jau 'ga 'gā nupe, ka'aranūū monou 'gā nupe. Oporogytapaw ire 'ga awau 'gā nui.

¹⁴ —A'eramū 'ga 'wyr ipewara 'gā amū 'ga futare'ema 'wyrriaramū 'ga rekoa. “Kuu. Nia'wyr'i 'ga. Nifutari jane 'ga 'wyrriaramū 'ga rekoa jarejee”, 'jau 'gā ajaupe. A'eramū 'gā 'gā amū monou imoporogytaukaa 'wyrriararete 'ga upe. “Narafutari ore 'ga 'wyrriaramū orojeupe 'ga ruwa”, 'jau 'gā oje'ega monou 'wyrriararete 'ga upe.

¹⁵ —A'ere 'wyrriararete 'ga nomojerowiari 'gā je'ega. A'eramū 'ga 'ga mogou 'wyrriaramū 'gā nupe. A'eramū 'ga 'wyrriaramū omogo re 'ua ojewya oje'wyr ipe nū. Owaēm ire 'ga wemiayuwa 'gā nenūina. “Maran gatu nipo 'gā jeka'aranūūa rerekoī rai'i?” 'jau 'ga ojeupe. “Ika'aranūū kwaiwete sipo 'gā nai'?” 'jau 'ga ojeupe.

¹⁶ —A'ere 'ga amū 'ua owaēma 'ga upe nū: “majepē'i etee agawewi ako ka'aranūūa eremut jee ikue. A'ere 'awamū je imomytuni teis enee ai'i”, 'jau 'ga 'ga upe erua.

¹⁷ —“A'jea futat. Majepē'i etee agawewi ako je imonoi enee ai'i. Ene 'ā jeremiayuw esagea futat. A'eramū je a'eramū ene monou teis amunawa mo'wyrriaa”, 'jau 'ga 'ga upe.

¹⁸ —A'ere 'ga amū 'ua nū. “Majepei'i etee ako eka'aranūūa eremut jee ikue. A'ere je imomytuna sīku 'awamū ene upe”, 'jau 'ga o'wyrriara 'ga upe.

¹⁹ —“A'jea. 'Awamū je ene monoi 'wyrriana'nīnamū sīku amunawa mo'wyrriaa”, 'jau 'ga 'ga upe.

²⁰ —A'ere 'ga remiayuwā 'ga amū 'ua nū. “Kweramū eneka'aranūūa. Namomyi etee je. Akyje te je ene wi. A'eramū je iauwana taity pira pype imima erekou muna'yw awi ai'i.

²¹ Akwaap je ene jepi. Enemara'ne 'ā ene. Ejemepya te 'ā erefutut ka'aranūū pyu. A'eramū 'ā ene eporowyky are jēmī ejea'are'emamū. A'eramū je tekyjau ene wi ai'i, eneka'aranūūa momyawe'em ene wi ai'i”, 'jau 'ga 'wyrriara 'ga upe.

²² —A'eramū 'wyrriara 'ga amara'neeteeteramū 'ga ree. “Nenea'wyrri futari te 'ā ene. Erekwaa futat te 'ā jemara'nea jepi. A'jea futat ere aipo 'jau jee. 'Emepy ekoete ate te 'ā erefutut ka'aranūū pyu. A'eramū 'ā ene eporowyky are jēmī ejea'are'emamū', ere ako jee ko. A'jea futat ere jee. Ka'aranūūa etee je afutat”, 'jau 'wyrriararete 'ga aipo 'ga upe.

²³ —Ma'eramū sipo ene imomytune'ema jee rai'i? Je upe imomytuna ene ifutare'emamū amunipo 'ā eremou ka'aranūū rerekwara 'gā nupe rai'i kūi. A'eramū amunipo 'ā 'gā jeka'aranūū momyawera mepyau enee jee rai'i kūi”, 'jau 'wyrriara 'ga aipoa kūima'e 'ga upe.

²⁴ —A'eramū 'ga 'jau ojeppyriwara 'ga upe: “Ere ka'aranūū pyyka 'ga wi. Imonou teis ka'aranūū pyykarera 'ga upe”, 'jau 'ga 'ga upe.

²⁵ —A'eramū 'ga 'jau 'wyrriara 'ga upe: “Naani kūi. Kwaiwete 'ga ma'ea kūi. Teis 'ga ma'e pytuna kūi”, 'jau 'ga 'ga upe.

²⁶ —A'eramū 'ga 'jau 'ga upe: “A'jea futat. Ereko esageara 'gā opygyu'jap futat nū”, 'jau etee 'ga 'gā nupe. “Ereko esage'emara 'gā te ajee nuerekoi futari. Erekoypyra miamū futat 'ga erekowe'em”, 'jau 'ga 'ga upe.

²⁷ —A'ere 'ga 'jau 'gā nupe nū: “A'eramū pēē 'awamū je ree iporomutare'ema 'gā nerua iapisaupap 'au je rowase. Narafutari ore 'wyrriaramū 'ga rekoa 'jarera 'gā nerua iapisau je rowase”, 'jau 'ga 'gā nupe— 'jau Jeju'i 'ga imome'wau 'gā nupe, 'gā mu'jawamū.

Kawaru'i 'arimū Jeju'i 'ga ataawet

(Mateu 21.1-11; Maku 11.1-11; Juā 12.12-19)

²⁸ Aipo mome'upaw ire Jeju'i 'ga watau wemiayuwā 'gā nenune. A'eramū futat 'gā awau 'ga rewiri.

²⁹ A'eramū 'gā awau owaēma wytyra upe. Oriweira 'jawa upe owaēma. Kwaiwete aipoa 'ywa oriweira 'jawa peu. A'eramū 'gā a'eramū wytyra renūina, Oriweira 'jau jupe.

Mukūja amunawa 'upa aipoa wytyra pyri. Pefaje, Petani. Mīmera amunawa 'upa wytyra pyri.

³⁰ A'eramū Jeju'i 'ga 'jau wemimu'e 'gā amū nupe, mukūja 'gā nupe:

—Pe'je pejewau pejekwapa je renune pejewau pejewaēma irupeuwarā amunawa upe. Pejesouwe nipo pēē kawaru'i mū resaka. Nuatai we 'gā amū 'arimū. A'ea ki perut iamoiā jee— 'jau Jeju'i 'ga 'gā nupe.

³¹ —“Ma'eramū te peko ee?” pejejeupe 'gā 'eramū ki “Janejara 'ga te e'i ore ko: Kawaru'ia perut jee ra'ne, e'i 'ga ore ko. A'ere nipo 'ga ko'iko'i ete imuri pē nupe nū”, pe'je ki 'gā nupe— 'jau Jeju'i 'ga 'gā nupe.

³² A'eramū 'gā awau kawaru'i resaka. 'Ga je'eg imū etee futat 'gā kawaru'i resaka.

³³ Kawaru'i amoiramū, ijara 'ga 'jau 'gā nupe:

—Ma'eramū pēē pejekou ee ki 'ei? Ma'eramū pēē iamoiā ki 'ei?— 'jau 'gā 'gā nupe.

³⁴ A'eramū 'gā 'jau 'ga upe:

—Janejara 'ga te e'i ore ko: “Kawaru'ia pekwap amū rerua jee ra'ne”, e'i 'ga ore ko. A'ere nipo 'ga ko'iko'i ete imuri nū— 'jau 'gā 'ga upe.

—A'jea. Pe'je ajee erawau 'ga upe— 'jau 'ga 'gā nupe.

³⁵ A'eramū 'gā erawau Jeju'i 'ga upe. A'ere 'gā amū opiarā mososoka imonou kawaru'i 'arimū Jeju'i 'ga upe. A'ere 'gā kawaru'i pyyka Jeju'i 'ga upe 'ga apykawamū.

³⁶ A'eramū Jeju'i 'ga awau Jerusareg ipe kawaru'i 'arimū. A'ere 'ga rupi oo ma'e 'gā awau ujana 'ga renunewe opiarā mososoka, imonou pe rupi imogyau 'ga kwapawamū. 'Ga ree oporomutaawa resaukaawamū 'gā iapou.

Ymā 'gā aipo apou 'wyrriararete upe rakue, 'ga ree opojejuka resaukaawamū rakue. A'eramū 'gā a'eramū iapou Jeju'i 'ga upe.

—'Ga nipo ako 'awamū 'wyrriaramū janee— 'jau 'gā ajaupe numiamū.

³⁷⁻³⁸ Wytyra awau wāāpyramū Jerusarega upe. Jerusarega 'upa wytyray 'arimū. Jerusarega rerowykawe 'gā ajatykau wafukaita ajaupe:

—Janeruwarete 'ga esage futat ra'e. Koromū futat Jeju'i 'ga, Janeruwarete 'ga remimurera 'ga. Kwaiwete 'ga 'gā moferawi. Mama'eukwaawa rerekwara 'gā nanē 'ga okatu'ok nū— 'jau 'gā ajaupe wafukaita. —A'ea ore aruesak ai'i. Janeruwarete 'ga 'ā ene mua— 'jau 'gā ajaupe.

Kwaiwete 'gā awau Jeju 'ga repejāna. A'eramū 'gā a'eramū awau akou meewei. A'eramū 'gā amū 'jau 'ga upe wafukaite:

—Ene 'ā Janeruwarete 'ga remimurera.

Ene ree 'ā Janeruwarete 'ga ta'waramū akou oree.

Ywagipewara 'gā najuejue etee opy'ata'waramū ajemogyau nū.

'Ga te 'ā ene mut ore'wyriarareteramū.

Ene 'ā eneresage ekou oree.

A'eramū ene 'awamū ekou 'wyriarareteramū oree—

'jau 'gā 'ga upe.

A'ere 'gā amū 'jau Jarejuwarete 'ga upe:

—Ene te 'ā eneresage oree jepi. Ene 'ā Jeju 'ga eremut oree. Enejue'eg imū futat 'ga ruri. Nitywi futari 'ga amū ene 'jawe— 'jau 'gā Jarejuwarete 'ga upe, 'ga muorypa Jeju 'ga ree.

³⁹ A'eramū fariseu 'gā amū 'jau Jeju 'ga upe:

—Jeju! “Aipo pe'je awi”, ere 'gā nupe. Jarejuwarete 'ga upe te aipo jane 'i jepi— 'jau 'gā 'ga upe.

⁴⁰ A'eramū Jeju 'ga 'jau 'gā nupe:

—Naani. 'Gā je'ege'em ire amunipo 'ā itaa we futat ije'egi jee je muorypa— 'jau Jeju 'ga 'gā nupe.

Jeju 'ga ajemuaēma Jerusareg ipewara 'gā nee

⁴¹ Jerusarega pyri katu katu awauwe Jeju 'ga amā'jāu amunaw are. A'eramū 'ga u'arasigamū. A'eramū futat 'ga ajaa'wau. “Jerusareg ipewara 'gā Jeruwarete 'ga je'ega renupare'ema”, 'jau 'ga ojeupe.

⁴² —Je 'ā ae katu'okara futat. Je 'ā Jarejuwarete 'ga mota'waara pē nupe. Je rerowiamū nipo 'ga ota'waramū akou pē nupe. Aipo pēē ikwaawa je afutat numiamū. A'ere 'ā nepekwaawi futari. Ikwaaw ire amunipo 'ā ia'wyre'ema 'gā nepē nereko tyweri— 'jau 'ga amā'jāu Jerusareg are.

⁴³ —A'ere 'ā Jerusareg ipewaramū nepēporomutari je ree. A'eramū nipo ia'wyre'ema 'gā anure 'ua pē'wya osōu pē nee. A'eramū nipo pēē mū pejeka'jame'ema futat. Tujugeyra pyu pē osōu.

⁴⁴ A'eramū nipo 'gā pē'wyrarete mateepapa pē nui— 'jau 'ga 'ūina. —Pēē nanē futat pē apisaupap katu katu nū. Nepeka'jami futari nipo pēē mū. Kunumīaky'ria we futat nipo 'gā wapisipap katu katu. Pēnoga we futat etyka nipo pē nui. Iku'jo'joka pē nui imuāmuāina pē nui. Janeruwarete 'ga 'ā je mut ae katu'oka. A'ere 'ā nepēporomutari je ree. A'eramū 'awamū mama'e tywera ojeapou pē nupe— 'jau 'ga 'ūina amā'jāu 'gā 'wyr are.

A'eramū futat 'ga ajaa'wau.

Wyra me'egara 'gā mū'ēawet

(Mateu 21.12-17; Maku 11.15-19; Juā 2.13-22)

⁴⁵ 'Gā 'wyrarete upe owaēmawe Jeju 'ga ojypa kawaru'i awi. A'eramū 'ga awayayau osou Jarejuwarete 'ga mogytaaw ipe. Irāā'ā wyra me'egara 'gā nuwamū. A'eramū Jeju 'ga amara'neramū 'gā nee:

—Pe'je pejewau peje'jāu 'aw awi. Nawyra me'egawa rūi te 'ā. Jeruwarete 'ga mogytaawa te 'ā 'oga— 'jau 'ga wyra me'egara 'gā nupe, 'gā karaemā muāina, 'gā neymawa mopyamāu 'gā nui. A'ere 'ga 'jau 'gā nupe:

⁴⁶ —Ymā te Janeruwarete 'ga oje'ega kwasiarukari 'gā nupe rakue. “Jemogytaawa 'og ipe 'gā nuri oporogytau jee”, 'jau 'ga ka'arana kwasiarukaa rakue. 'Au futat Janeruwarete 'ga mogytaawa 'oga. 'Au futat jane ruri jareporogytau 'ga upe. A'ere 'ā pem'yi pejemunarūawamū ete. Pejejemawa etee 'ā pēē erua ime'ega erupa 'au. “Pe'je pejeju jereymawa mua iapyau Jarejuwarete 'ga upe”, 'jau 'ā pēē 'gā nupe pejeju. A'ere 'ā pemepyuukat pejejupe epy apyapa. Pejemunarūmū 'ā pejejupe pejejoka'aranūū are— 'jau Jeju 'ga oje'ega moywrafena 'gā nupe. —A'eramū pēē pejewau 'aw awi peje'jāu— 'jau Jeju 'ga 'gā nupe, amara'neramū 'gā nee.

⁴⁷ A'eramū Jeju 'ga awau ai'iwe ai'iwe 'jau, 'ga awau 'gā mu'jau Jarejuwarete 'ga mogytaaw ipe. Kwaiwete 'ga ree iporomutare'ema 'gā. Mainana 'wyriara' gā, Moisesi 'ga remikwasiarer are moromu'jara 'gā, 'wyrari'ri' gā. Mīmera 'gā amara'neramū 'ga ree. 'Ga juka are 'gā afuweramū.

⁴⁸ A'ere 'gā najukaarūi 'ga. Kwaiwete wejue Jeju 'ga ree iporomutat ma'e 'gā jemogyi. A'eramū 'gā okyjau 'gā nui, 'ga juka ekoete awi. Nokoi wejue Jeju 'ga tesirūgatu 'gā nupe. A'eramū 'gā a'eramū 'ga jukawarūe'em.

—'Ga ree janereko ekoeteramū 'ga ree iporomutat ma'e 'gā jane apisi ne— 'jau 'ga ree imara'ne ma'e 'gā ajaupe.

20

*“Awŷja rer imū te erejot?” Jejuī 'ga upe 'gā 'eawet
(Mateu 21.23-27; Maku 11.27-33)*

¹Uwarete 'ga mogytaaw ipe Jejuī 'ga akou 'gā mu'jau 'ga ree:
—Pejetywer awi pēpoiirweramū Janeruwarete 'ga pē katu'ogi futari, pē mogyau wemi-
ayuwamū— 'jau 'ga 'gā nupe u'ama.

²A'e pype mainana 'wyriara 'gā 'ua oje'ega Jejuī 'ga upe Moisesi 'ga remikwasiarer are
moromu'jara 'gā netee, judeu 'gā 'wyria'ri 'gā. Mīmera 'gā 'ua oje'ega 'ga upe:

—Awŷja rer imū te erejot rakue? Awŷja pājē mū te mama'ea ereapo? Awŷja te ene mut
oree rakue?— 'jau 'gā 'ua oporonupa ee Jejuī 'ga upe.

³A'eramū Jejuī 'ga nanē 'jau 'gā nupe nū:

—Pe'je ajee pēē na'ne imome'wau jee 'ū.

⁴Awŷja je'eg imū ajee Juā Batista 'ga ruri ae pymāū 'y pe rakue 'ū? Jarejuwarete 'ga je'eg
imū te 'ga ruri rakue? Kūima'e 'ga amū je'eg imū te ra'u nū?— 'jau Jejuī 'ga oporonupa ee 'gā
nupe u'ama.

⁵A'eramū 'gā 'jau ajaupe:

—Ma'ja sa'e te jane 'ga upe?— 'jau 'gā ajaupe etee futat. —“Jarejuwarete 'ga je'eg imū 'ga
ruri” ojeupe jane 'eramū te 'ga “te a'etea neperowiari 'ga” 'ga 'i janee nū a'i kūi— 'jau 'gā
ajaupe.

⁶—“Kūima'e 'ga je'eg imū 'ga ruri”, 'ga upe jane 'eramū nipo tekotee 'gā jane apisi ete ita
pyu nū'ū. “Juā 'ga Jarejuwarete 'ga je'ega mome'wara futat janee” e'i 'gā jepi. A'eramū nipo
'gā aipo jane 'eramū amara'neramū jane ree ne nū a'i kūi— 'jau 'gā ajaupe.

⁷A'eramū 'gā 'jau Jejuī 'ga upe:

—Norokwaawi ore Juā 'ga muarera 'ga nū'ū— 'jau 'ga o'meramū 'ga upe.

⁸A'eramū Jejuī 'ga nanē 'jau 'gā nupe nū:

—Je nanē temuara 'ga namome'ui futari pē nupe nū— 'jau 'ga 'gā nupe.

Ko raaran a'wre'ema 'gā

(Mateu 21.33-46; Maku 12.1-12)

⁹A'eramū Jejuī 'ga 'jau 'gā nupe nū:

—Peapyaka jeje'eg are. Mama'e mū je amome'u pē nupe, pē mu'jawamū ee, pē mueapyou
ee— 'jau 'ga 'gā nupe. —Kūima'e 'ga amū y'wa 'ywa rakā o'tym. Kwaiwete uwa 'jawa 'ywa
rakā 'ga o'tym oko pe. A'eramū ijara 'ga 'gā amū monou uwa ko raaranamū ojeupe. “Y'wa
mū jema'ea futat. Emyreramū te ajee pēma'e futat pēporowykawera repya futat”, 'jau ijara
'ga 'gā nupe. A'ere 'ga awau watau 'gā nui. A'eramū 'ga namutamutat akou muku 'gā nui.

¹⁰Uwa atyarama upe iwaēmauwe ijara 'ga wemiayuya 'ga amū monou oma'e uwa 'a
piaramū. A'ere ko raarana 'gā 'ga nupānupāi etee 'ga monou 'ga mojewya. Nan etee futat
'ga monou.

¹¹Aipo 'ga waēm ire ko jara 'ga 'ga amū monou nū, oma'e piaramū 'ga 'ga monou
numiamū. A'eramū 'ga awau owaēma uwa ko pe. “Uwa pemut amū jee, e'i ijara 'ga pē
nupe”, 'jau 'ga iaarana 'gā nupe. A'ere 'gā nānēwējēmī 'ga rerekoi nū. 'Ga ppygi etee 'ga
nupānupāu 'ga rerekoi nū. A'erauwe 'ga ojewya awau nū. “Namuri etee 'gā amū jee ki 'ei.
Je nupānupā etee 'gā je mua je mojewya nū ki 'ei. Ene agawewi ako je mono ape ai'i. A'etea
'gā nojepojeuwi etee ki 'ei”, 'jau 'ga 'ua ijara 'ga upe imome'wau.

¹²—A'eramū 'ga 'ga amū monou nū. A'ere 'gā nānēwējēmī 'ga rerekoi nū.

¹³A'eramū ko jara 'ga 'jau ojeupe: “Ma'ja ajee je aapo 'gā nupe 'ū? Teja'jara 'ga pa je omono
nū kwy”, 'jau 'ga ojeupe. “Jera'yra 'ga nā'ā jeremifutararetea re'ā. A'etea pa je 'ga omono 'gā
nesaka kwy. 'Ga nipo 'gā opojeup re'ā. Jera'yra 'ga ree nipo 'gā pojyramū re'ā”, 'jau nipo 'ga
ojeupe— 'jau Jejuī 'ga imome'wau 'gā nupe.

¹⁴—A'ere nipo 'gā 'ga ra'yra 'ga resakawe 'gā 'i ajaupe: “Wa'yra 'ga 'ga amut y'wa piaramū
ra'e. 'Ga futat 'uwa 'ga py'rau ko jaramū 'uwa 'ga manū re. A'eramū jane 'ga jukau jui.
A'eramū janema'ea futat koa 'ga ruwa 'ga manū re”, 'jau nipo 'gā ajaupe— 'jau Jejuī 'ga 'gā
nupe.

¹⁵—A'eramū 'gā 'ga ppyka 'ga rerauwu enuēma ko awi 'ga jukau— 'jau Jejuī 'ga imome'wau
'gā nupe.

A'eramū Jejuī 'ga 'jau 'gā nupe:

—Maran sipo ko jara 'ga wa'yra jukaarera 'gā nerekoi?

¹⁶'Ga futat oo ko raarana 'gā apisau. A'ere nipo 'ga 'gā amū monou 'gā py'rau oko
raaranamū nū— 'jau 'ga 'gā nupe imome'wau.

A'eramū aipo renupara 'gā 'jau 'ga upe:

—A'jea futat sipo 'gā 'ga ra'yra 'ga jukai?— 'jau 'gā ajaupe.

¹⁷A'eramū Jejuī 'ga 'jau:

—Ymā te 'ā Janeruwarete 'ga oje'ega kwasiarukari 'gā nupe rakue. Je ree futat 'gā ka'arana kwasiari rakue.

"Mīa ita nia'wyrui ra'e, 'jau nipo itaoga apoara 'gā ajaupe, ita monou imomoa ajai. A'ere 'ga amū aipoa ita eroyrūmyrera ita ppygi etee imonou imyina tenawera pype 'oga ppywotyapawamū",

'jau 'gā ka'arana kwasiaa je ree rakue— 'jau Jeju 'ga 'gā nupe.

¹⁸—'Ga amū nipo u'aa ita 'arimū. A'e 'ga open futat. A'ere 'ga amū 'arimū ita 'ar ire a'e 'ga ku'jo'jogi futari. Nan tee futat Janeruwarete 'ga oje'ega renupare'emamū iapoi pē nupe— 'jau Jeju 'ga 'gā nupe.

Jeju 'ga upe fariseu 'gā 'eawet

(Mateu 22.15-22; Maku 12.13-17)

¹⁹ A'eramū Moisesi 'ga remikwasiarer are moromu'jara 'gā, mainana 'wyrriara retee amara'neramū Jeju 'ga ree.

—Jane upe futat nipo ajee 'ga 'i u'ama— 'jau 'gā ajaupe. —Pe'je ajee sipyyk 'ga 'ū— 'jau 'gā ajaupe.

A'ere 'gā kyjei etee Jeju 'ga ree iporomutat ma'e 'gā nui. A'eramū 'gā 'ga ppyke'ema.

²⁰ A'eramū 'gā 'ga rerekou weape etee. 'Gā amū 'gā imepyau imonou 'ga rewiri 'ga resakawamū:

—Pe'je pejewau 'ga renupa pejejemogyau— 'jau 'gā 'gā nupe.

A'eramū 'gā awau 'ga rewiri akou 'ga renupa.

—Tepeenup 'ga 'wyrriararete 'ga kurawa 'jau— 'jau 'gā 'gā nupe. —'Wyrriararete 'ga kurawamū sipyyk 'ga 'jau. A'eramū 'wyrriara 'ga 'ga jukaukaa janee 'jau— 'jau 'gā aipo 'gā nupe, 'ga rewiri imonopyra 'gā nupe.

²¹ A'eramū imepyypra 'gā awau oporonupa ee 'ga upe:

—Jeju. A'jea futat 'ā ereporogyta esage. Nereporogyta ekoetei 'ā ekou. A'jea futat 'ā erejejuka pāwē pāwē ore ree. A'jea futat te ore mu'e ape mama'e are— 'jau 'gā Jeju 'ga upe oporonupa 'me ee.

²²—A'eramū ene 'awamū 'jau oree. Jane 'ā judeua. Simono te jane ka'aranūa 'wyrriararete 'ga upe? Naani te ra'u nū? Najudeu arūi te 'ā 'wyrriararete 'ga. Tapy'yi amuteea 'ga. Romanūa te 'ga. A'etea te jane simepy 'ga?— 'jau 'gā oporonupa 'me Jeju 'ga upe.

²³ A'ere Jeju 'ga 'gā kwaawi ojee. "Jeje'ega renupa 'gā nuri numiamū. Siesak 'ga 'wyrriararete 'ga kurawa 'jau, e'i 'gā jee numiamū", 'jau 'ga ojeupe.

²⁴ A'eramū 'ga 'jau 'gā nupe:

—Ka'aranūū 'ywope'ia pemut amū jee ra'ne, Sesa 'ga mepyawa mū ra'ne— 'jau 'ga 'gā nupe.

A'eramū 'gā amū imonou 'ga upe:

—Kweramū ajee 'wei— 'jau 'gā imonou 'ga po pe.

A'eramū 'ga esaukaa 'gā nupe:

—Awyja ra'agawa te 'up ee?

—'Wyrriararete 'ga ra'agawa 'up ee!— 'jau 'gā 'ga upe.

—Awyja rera ajee 'awamū ojekwasiat 'upa ikupe katy nū?— 'jau 'ga esaukaa 'gā nupe.

—'Wyrriararete 'ga rera futat 'up ee— 'jau 'gā Jeju 'ga upe.

²⁵—'Ga ra'agawa rerekwara 'ga ma'ea futat. A'eramū pēē imonou 'ga upe etee futat. A'ere Jarejuwarete 'ga mama'ea pemono 'ga upe etee futat— 'jau Jeju 'ga 'gā nupe.

²⁶ A'eramū 'ga upe ee oporonup ma'efera 'gā oporesagamū etee 'ga ree:

—Kuu. I'akwaap 'ga ra'e nū'ū. Nakurawi futari 'ga 'wyrriararete 'ga janee jā'nū'ū— 'jau 'gā ajaupe.

A'eramū 'gā ajemogyau etee futat.

Oferap ma'e are 'gā mu'eawet

(Mateu 22.23-33; Maku 12.18-27)

²⁷ Ko'iko'i ete satuseu 'gā amū 'ua oporogytau Jeju 'ga upe nū. Aipo 'gā e'i ajaupe: "Amanū re ae noferawu'jawi. Amanūmū ae teepawamū ywawuje futat", 'jau agawewi satuseu 'gā ajaupe jepi. A'etea 'gā 'ut imome'waukaa Jeju 'ga upe.

²⁸ A'eramū 'gā 'jau 'ga upe:

—"Moromu'jara 'ga" e'i 'gā enee jepi. A'eramū ene ore mueapyo katu mama'e are. Ymā te 'ā Moisesi 'ga ka'arana kwasiari inuga janee rakue. "Kūima'e 'ga amū nipo amanū wa'yre'emaue. A'eramū nipo 'ga manū re 'ga rewirera 'ga 'ga remirekofera ēē rerekou nū. A'eramū nipo 'ga wa'yramū ēē pype. A'ere nipo 'ga ra'yr ypya amanū ma'efera 'ga ra'yrrera 'jawe futat", 'jau Moisesi 'ga ikwasiaa inuga rakue— 'jau 'gā Jeju 'ga upe.

A'eramū Jeju 'ga 'jau 'gā nupe:

—A'jea futat— 'jau 'ga 'gā nupe.

²⁹ A'eramū 'gā oporogytau 'japa nū:

—Kūima'e 'ga amū nipo 'ga ra'yra sete. A'eramū nipo u'ar ypy ma'efera 'ga kūjā mū rerekou. A'ere nipo 'ga wa'yre'emauwe 'ga manūi jui. A'eramū 'ga wemireko ēē rejaa wewirerera 'gā nupe.

³⁰ A'eramū nipo 'ga manū re 'ga rewirerera 'ga amū ēē rerekou 'ga py'rau nū.

³¹ Ojopy'rapy'rau etee 'gā ēē ree, ajamanū re. A'ere 'gā nata'yri'i futari ēē pype.

³² Ojee 'gā jomoy paw ire ēē nanē amanūmū nū.

³³ A'eramū nipo 'ga ae mofera pawa 'ara rupi manamū sipo ēē menaretea?— 'jau 'gā Jejuu 'ga upe. —'Gā juejue futat ēē werekou kūi— 'jau 'gā Jejuu 'ga upe.

³⁴ A'eramū Jejuu 'ga 'jau 'gā nupe:

—'Au etee te 'gā nemirekoramū kūi.

³⁵ A'ere oferap ma'e 'gā nuerekou 'jawi kūjāa. Niporerekoweru 'jawi 'gā kūjā are. Kūjāmera 'gā nanē omenariwera 'emamū futat nū— 'jau Jejuu 'ga 'gā nupe.

³⁶ —Ywagipewara 'gā 'jawe futat 'gā jemogyi amanūu 'jape'ema futat. Janeruwarete 'ga 'gā omofera pawa imogyau nū. A'eramū 'gā a'eramū 'ga ra'yramū futat ajemogyau.

³⁷ Ymā te 'ā Moisesi 'ga jane mu'e ai ae feraw are rakue— 'jau Jejuu 'ga 'gā nupe. —'Ka'a'ia je upe imueny re Janeruwarete 'ga oje'ega jee ikue: Je 'ā Eneruwaretea, 'jau 'ga oje'ega jee ikue", 'jau Moisesi 'ga imome'wau rakue. "Je te 'ā Eneruwaretea. Enepytuna 'gā Nuwaretea je. Abraão 'ga, Isaki 'ga, Jako 'ga. Mīmera 'gā Nuwaretea je ako, 'jau 'ga jee ikue", 'jau Moisesi 'ga ka'arana kwasiaa inuga janee rakue— 'jau Jejuu 'ga imome'wau 'gā nupe.

³⁸ —Aipo 'gā amanū futat rakue numiamū, Moisesi 'ga tywe'emauwe futat rakue numiamū. A'ere 'gā 'aga namanūi futari. Ateepawe'emamū futat 'gā 'aga. A'eramū Janeruwarete 'ga poromū 'jau Moisesi 'ga upe. 'Gā 'aga tywe'em ire amunipo 'ā 'ga aipo ne'ia'uwera Moisesi 'ga upe. Ako ma'e 'gā nupe etee te 'ga ae ruwamū— 'jau Jejuu 'ga 'gā nupe u'ama imome'wau.

³⁹ A'eramū Moisesi 'ga remikwasiarer are moromu'jara 'gā amū 'jau 'ga upe:

—'A'jea futat— 'jau 'gā 'ga upe.

⁴⁰ A'ere amumera 'gā noje'egi futari ajemogyau. Ojenosi 'gā 'ga wi. A'eramū 'gā oje'ega'ema futat 'ga upe.

Janeruwarete 'ga remimurera 'ga Davi 'ga juapyret

(Mateu 22.41-46; Maku 12.35-37)

⁴¹ A'eramū Jejuu 'ga 'jau 'gā nupe:

—Maran sipo aje Ku'jywa 'ga remimurera 'ga Davi 'ga juapyreramū wējēmī 'ga rekoī nū? Ymā te Davi 'ga manūi rakue.

⁴²⁻⁴³ Davi 'ga futat ka'arana okwasiat inuga janee rakue, Saumu 'jawa ka'aran are 'ga ikwasiari inuga janee rakue:

"'Ga te eteetea. Janeruwarete 'ga 'jau Jejararete 'ga upe:

'Eapyk 'au je pyri. Je 'jawe futat ene.

Enepājeretea je 'jawe. A'eramū ene eapyka je yse katy.

Anure nipo je ene mogoi 'wyriaramū 'gā nupe najuejue etee.

Ene ree iporomutare'ema 'gā 'arimū je ene magwawukari.

A'eramū ene je iapoe'emauwe eapyka 'au je yse katy', 'jau 'ga Jejararete 'ga upe ai'i",

'jau Davi 'ga ikwasiaa rakue— 'jau Jejuu 'ga 'gā nupe.

⁴⁴ —Janeruwarete 'ga remimurera 'ga ree 'ga ka'arana kwasiari rakue. Ma'eramū sipo aje Davi 'ga 'i "Jejararete 'ga", 'jau ajuapyrera 'ga upe nū?— 'jau Jejuu 'ga 'gā nupe.

Moisesi 'ga remikwasiarer are moromu'jat

(Mateu 23.1-36; Maku 12.38-40)

⁴⁵ Mytuna 'gā ajemogyau Jejuu 'ga porogyta renupa. A'ere 'ga ojerowaka oje'ega wemimu'e 'gā nupe:

⁴⁶ —Pejega ki Moisesi 'ga remikwasiarer are moromu'jara 'gā nui— 'jau 'ga 'gā nupe. —'Gā 'ā e'i ojeupe: "Je kūima'eteetea", e'i 'gā 'ā ojeupe ajemogyau, waity fuku rerekou. A'eramū 'gā ataramū 'gā naitya ajasimana 'gā nee. "Tiporesag ete 'gā je ree 'jau", 'jau 'gā akou ojeupe. Wapeje'ega tāmēje 'gā ifutaa. 'Wyriara apykawa 'arimū etee wapyka awau pejejatykaaw ipe. Ojemi'waaw ipe nanē nū 'wyriara renawa 'arimū etee wapygiweramū ojemi'waa— 'jau Jejuu 'ga 'gā nupe.

⁴⁷ —Kūjā men manū ma'e 'gā nupe nanē 'gā 'jau: "Je tamaenun tekou enekaraemā are 'jau", 'jau futatee 'gā 'gā nupe. "Je tareko esage enekaraemā enee 'jau", 'jau futatee 'gā 'gā nupe. A'ere 'ga etee 'gā karaemā pygyi ojeupe, ka'aranūa nanē nū. A'eramū 'gā 'jau ojeupe etee futat: "Kwakwai'i teje'ega monoi Jarejuwarete 'ga upe. Kasi a'e pe 'gā je kwaawi mama'e tywera je iaporamū ne kwy", 'jau 'gā ojeupe etee futat. A'eramū nipo 'gā oje'ega monou fukuu 'me futat Jarejuwarete 'ga upe, wemiapo tywera mimawamū. A'ere nipo

anure Janeruwarete 'ga 'gā nereko tyweri 'gā nemiapo tyweawer are— 'jau Jejui 'ga 'gā nupe.

21

*Imen manū ma'efera ēē remimonofet
(Maku 12.41-44)*

¹ Jarejuwarete 'ga mogyaawa pype 'ūinaw ipe Jejui 'ga ose ma'e 'gā nesaka 'ūina. Ika'aranūū kwai ma'e 'gā ka'aranūū monou yrū pype Jarejuwarete 'ga upe kwaiwete.

² 'Gā nesepaw ire majawera ēē mü 'ua osou 'og ipe. Nika'arani ēē akou. Itywerete ēē akou. A'etea ēē oka'aranūū ywope'i omono ipype. Mukū'i'itee ēē imonou ipype. Naepyi agawewi ēē remimonofera.

³⁻⁴ ēē resakawe Jejui 'ga 'jau ojeupi oo ma'efera 'gā nupe:

—Kweramū kūjāa ēē imen manū ma'efera ēē. Nitywa'uweri agawewi ēē mama'ea. A'etea ēē oka'aranūū monoupap futat yrū pype. A'eramū ēē otywe'emamū futat mama'ea ojeupe imuawamū. ēē remimonofera ika'aranūū kwai ma'e 'gā ma'e wapyraap futat Janeruwarete 'ga upe. 'Gā kwaiwete agawewi omono 'ga upe. A'etea 'gā kwaiwete wējēmī wereko ojeupe nū. A'ere ēē ma'ea nitywi futari. Omonopap futat ēē 'ga upe. Naemyreri futari ēē upe. Wemi'urama muawa we futat ēē omonopap 'ga upe— 'jau Jejui 'ga 'gā nupe.

*Jejui 'ga rur enune ojeapo ma'e
(Mateu 24.1-14; Maku 13.1-13)*

⁵ Anure Jejui 'ga rewiri oo ma'e 'gā 'jau:

—Kuu. Ikaturam te Janeruwarete 'ga mogyaawa 'oga jā'nū'ū— 'jau 'gā ajaupe. —Sā'ā ita esagea. Mytuna 'gā ka'aranūū mom'yi Jarejuwarete 'ga mogyaawa 'oga apoawamū— 'jau 'gā.

⁶ A'eramū Jejui 'ga 'jau:

—A'jea futat esageramū numiamū. A'ere nipo anurenure'i jane ree iporomutare'ema 'gā nuri imonou etyka. Nom'yi'i futari nipo 'gā itaa mü aju'arimū— 'jau 'ga 'gā nupe.

⁷ A'eramū 'gā 'jau 'ga upe:

—Maranime sipo aipo 'gā Jarejuwarete 'ga mogyaawa monoi etyka? Ma'ja ra'ne sipo ajee ojesaukat oree iapo enune?— 'jau 'gā 'ga upe.

⁸ A'eramū Jejui 'ga 'jau 'gā nupe:

—Je renune 'ut ma'e 'gā nipo i'me ma'ea. Perowiat kasi 'gā 'mea ne. Anure nipo kwaiwete 'gā nuri, "Janeruwarete 'ga je mut pē katu'okaramū", 'jau nipo 'gā 'ua pē nupe. A'ere kasi perowiat 'gā ne. "O'meramū 'gā 'i", pe'je etee ki 'gā nupe. Kwaiwete nipo 'gā 'gā moryteeu ojee— 'jau Jejui 'ga 'gā nupe.

⁹ —Anure nipo amutee amunaw awi 'gā nuri 'wyriararete rowajaa 'ga remiyauwa 'gā neewe futat. A'ere kasi aipo renupa pekyje ne. Nan futat nipo teepaw enune. A'ere nipo naporomū rūi imateepaawa. Naporomū etee rūi futat nipo mama'e rekoī— 'jau Jejui 'ga 'gā nupe. —Akou 'jau 'jap futat nipo mama'ea.

¹⁰ Amunap tesirūmera pypewara 'gā we futat nipo ajuowajat.

¹¹ A'eramū nipo jero'wua ojeupa kwaiwete. Ywya we futat nipo oyyi peu peu peu 'jau. Amumera 'gā nipo opapa kwaiwete ty'ara rerekou. Ywag ipe nanē nipo mama'e mü ojesaukaa pē mogyjawamū.

¹² Jeremiayuwamū nipo 'gā amū pē nereko tyweretei. Pē monou nipo pē munepa pē mu'ama moromunepawa pype. Teepaw enune nipo 'gā pē monoi pē munepa pē mu'ama moromunepawa pype. Pē pyyka nipo 'gā pē nerawau judeu 'gā jatykaaw ipe pē moporogytaukaa. Amumeramū nipo 'gā pē nerawau 'wyriara upe.

¹³ 'Wyriararete upe pejejerooramū ki pēē je mome'wau 'gā nupe. "Jejui 'ga iporokatu'ogiwet pē nee", 'jau ki pēē 'wyriara 'gā nupe, moromunepawa pypewara 'gā nupe. Mīmera 'gā nupe ki je mome'wau— 'jau Jejui 'ga 'gā nupe.

¹⁴ —A'eramū "Ma'ja 'jau sipo je teje'ega 'gā nupe 'wei", pe'je kasi ne.

¹⁵ Je te 'gā nupe peje'egawa amut pē nupe peu pē nerooramū— 'jau Jejui 'ga 'gā nupe. —A'eramū 'gā "i'me 'ga ra'e", 'jawe'em pē nupe.

¹⁶ Pēpytuna 'gā we futat nipo pē mono amū ia'wyre'ema 'gā po pe, pē munewukaa. Pējara 'gā, pēnewirera 'gā, pēneki'yra 'gā, pējekoty'aawa 'gā. Mīmera 'gā miamū nipo pē monou ia'wyre'ema 'gā nupe pē munewukaa. A'eramū nipo 'gā pēē mü jukau futat.

¹⁷ Je rerowiaara 'ā pēē. A'eramū nipo je rerowiare'ema 'gā najuejue etee futat oporomutare'emamū pē nee.

¹⁸ A'ere nipo je nopoiri futari pē nui. Tejejukau esage etee pē nee.

¹⁹ A'eramū ki pēē je rerowiaa pejemogyau. Pejepoire'ema futat je rerowiar awi. A'eramū pēē pejemanū re pejewau ywag ipe je pyri— 'jau Jejuī 'ga oporogytau 'ūina 'gā nupe.

Jerusarega retygawam

(Mateu 24.15-21; Maku 13.14-19)

²⁰—Anure nipo pē nee iporomutare'ema 'gā nuri Jerusarega osōu. Aipo resakawe ki pe'je pejejaupe: “Awamū nipo 'ā 'gā Jerusarega retygi 'ja”, 'jau ki pēē pejejaupe.

²¹ A'eramū ki pēē Judeja ywy pe ako ma'eramū 'gā nesakawe pejeka'jama pejewau ywytyr ipe. Jerusareg ipe ako ma'eramū nanē pēē pejeka'jamayayau jui. Jū me ako ma'eramū pejewawe'em Jerusareg ipe. Jerusareg awi ki peka'jamp futat— 'jau Jejuī 'ga 'gā nupe.

²²—Jefaruua Jerusarega upe iwaēmauwe futat ki pe'je pejejaupe “owaēm Janeruwarete 'ga werowiare'ema 'gā nereko tyweawa upe ra'e”, pe'je ki. Ymā te 'ā 'gā ka'arana kwasiari ee rakue. “A'ere 'ga 'awamū ikwasiaripyreer imū etee futat iapoi”, 'jau ki pēē— 'jau Jejuī 'ga 'gā nupe.

²³—Oporai'iramū nipo ta'yryrū ma'e kūjā ajemogyau, ta'yky'ri ma'ea nanē nipo nū. Nujānarūi eweguu ma'ea. Ta'y'ri'i ma'e nanē nujānarūi nū— 'jau 'ga 'gā nupe. —Imara'ne te nipo Janeruwarete 'ga 'ūina. Ika'jame'ema 'gā nipo ako tywerete futat.

²⁴ Ika'jame'ema 'gā 'ga wapiisukat jyyu pyu 'gā nupe. Amumera 'gā nipo 'ga ipofarukaa 'gā nupe. A'eramū nipo 'gā 'gā nerawau kwe pe. Ajepeja ywy pe 'gā nerawau imunepa. Jerusareg ipe judeue'ema 'gā 'wyriara 'gā jemogyramū nipo ojeapou, kwaiwete futat. Janeruwarete 'ga remifutar imū etee futat nipo 'gā 'ūina. Awau nipo owaēma 'ga muēmawa upe. A'erauwe nipo Janeruwarete 'ga 'ga muēmukari— 'jau Jejuī 'ga 'gā nupe imome'wau.

Janereki'yra 'ga ruawam

(Mateu 24.29-35; Maku 13.24-31)

²⁵—Ywag ipe nanē nipo mama'e mū jesaukari pē nupe nū. Jay are, jaytata are, kwar are. Mīmer are nipo ojesaukaa pē mogyjawamū. 'Yē'ēa nanē nipo oyyita nū. A'eramū futat nipo wyjapetegamū. A'eramū nipo pēē pejeki'jau ipyamu awi.

²⁶ Ywag ipewara nanē nipo oyyita nū. Kwat, jay, jaytata. Mīmera nipo oyyita— 'jau Jejuī 'ga 'gā nupe imome'wau. —A'eramū nipo pēē ywy pewaramū najuejue etee pejeki'jau jui. Amumera 'gā nipo amanūaipa okyje rerekou. 'Gā kyjea nipo 'gā apisawaipa 'gā mogyau— 'jau Jejuī 'ga 'gā nupe imome'wau.

²⁷—Aipo pēē esag ire nipo pēneki'yramū je tejua tejewya. Ywasiga rupi nipo tejua tejpypa. A'eramū nipo ywy pewara 'gā je resaka, je ruramū. Tepājē mū nipo je ruri, tejeny'fuga pype futat tejua nū. A'eramū nipo 'gā 'jau jee: “Nitywi 'ga amū ene 'jawe. Ene te 'ā pājērete. Ene te 'ā esage ma'eramū. Nitywi futari 'ga amū ene 'jawe”, 'jau nipo 'gā jee— 'jau Jejuī 'ga 'gā nupe.

²⁸—Aipoa mama'ea pejejeupe ijesaugar ypyrauwe ki pejemogy pejeku'iramū. Aipo pēē esag ire nipo je anurenure'i je ruri pē nerawau 'aw awi— 'jau Jejuī 'ga 'gā nupe.

²⁹⁻³⁰ A'ere Jejuī 'ga mama'e mū mome'wau 'gā nupe, 'gā mu'jau ee ikue:

—Mama'ea je amome'u pē nupe pē mu'jawamū tejuawa 'ar are— 'jau 'ga 'gā nupe. —Sā'ā ae siaka'gywa potyramū amana jewyra kwaawa. Ipotyrauwe 'ā ae amana jewyt ja'wyja'wy kwaapa.

³¹ Nan tee futat ki je'eawer imū mama'e jeaporamuerawe pe'je pejejaupe: “'Ut ja'wyja'wy Jejuī 'ga janee 'wyriaramū akou ra'e”, pe'je ki pejejaupe.

³² A'jēa futat je 'i. Je'eawer imū mama'e jeapo resakarera 'gā papa katu katue'emauwe nipo tejua tejewya— 'jau Jejuī 'ga 'gā nupe.

³³—Ywaga nipo atepawamū futat. Ywya nanē nipo atepawamū futat nū. A'ere nipo jeremimome'ufera nateepawa'uweri futari. Je'eawer imū etee futat nipo aipoa ojeapou— 'jau Jejuī 'ga 'gā nupe ikue.

“Je rura ki peapesak” Jejuī 'ga 'eawet

³⁴ A'ere Jejuī 'ga oje'ega 'gā nupe nū:

—Pe'je pejemogyau je ruru'jawa rapesaka au'jeteramū futat. Pēnea'at kasi pejemogyau 'auwara mama'e are etee ne. Maraka apo are etee kasi pejemogy pejeje'aramū ne. Kasi a'e pe je rura pē mopiryyi erujewi ne— 'jau Jejuī 'ga 'gā nupe.

³⁵—Sā'ā ae ywy kwara resage'ema. A'eramū 'ā ae u'aa erujewi ipype. A'eramū 'ā ae opiryyjamū jui. Nan tee futat nipo pēē je jewyra rapesakare'emamū pēpiryyi erujewi aipoa mama'e resaka— 'jau Jejuī 'ga 'gā nupe.

³⁶—A'eramū pēē pejemogyau pejeje'ega Jarejuwarete 'ga upe, pejejere'emamū. “Ku'yyp. Je momoirukat kasi ape eja'yra 'ga rerowiar awi ne. Je poar ape, 'ga rerowiarukaa

jee”, pe’je ki ‘ga upe. “Mama’e tywera je aesak kwaiwete. A’ere je jemogypygyi ‘ga ree”, pe’je ki ‘ga upe. “Najepoiriweri je ‘ga wi”, pe’je ki ‘ga upe. Kasi a’e pe aipo pe’je’emamū nepeēma’uweri mama’e tywer awi ne— ‘jau Jejui ‘ga ‘gā mu’jau ee. —Je rerowiar awi pejepoire’ema pejejemogyau je ruramū tepēku’i ‘jau. Pejejua pejeku’iramū je rowase je jeyoramū ‘jau— ‘jau Jejui ‘ga ‘ūina ‘gā nupe.

³⁷ Aipo are ‘ga ‘gā mu’jau akou. Ai’iwe, ai’iwe ‘jau ‘ga awau Jarejuwarete ‘ga mogytaawa pype ‘gā mu’jau. A’ere ‘ga kaaruwauwe awau ojepe’au Jerusareg awi. Awau osea Oriweira ‘jaw ipe.

³⁸ Ai’iwe ‘ga ‘gā nerawau nū. Tekotee ‘gā nanē awau ‘ga rupi nū. Kwaiwete ‘gā awau ‘ga porogyta renupa nū. Jarejuwarete ‘ga mogytaawa pype awau ‘ga je’ega renupa ajatykau.

22

Jejui ‘ga ree ifuwet ma’e ‘gā

(Mateu 26.1-5; Maku 14.1-2; Juā 11.45-53)

¹⁻² Egitu wyy awi judeu ypy ypy ‘gā nenū’ēawer are wea’awa maraka upe iwaēm ja’wyja’wyrarauwe mainana ‘wyrriara ‘gā ajatykau Moisesi ‘ga remikwasiarer are momu’jara ‘gā nee.

—Maran te jane Jejui ‘ga pygyi ‘ga jukau?— ‘jau ‘gā ajaupe.

A’ere ‘gā kyjei ‘ga remiayuwa ‘gā nui.

—Jerusareg ipewara ‘gā iporomutat ‘ga ree. Soko kasi ‘ga ree mytuna pype ne— ‘jau ‘gā ajaupe. —Wowase ‘ga rerekoramū ‘ga remiayuwa ‘gā jane apisi ne. Awotywe’eme te sireko ‘ga ‘jau— ‘jau ‘gā ajaupe.

Mainana ‘wyrriara ‘gā nupe Judas ‘ga ‘eawet

(Mateu 26.14-16; Maku 14.10-11)

³ A’ere ‘ga remimu’e ‘ga amū ree mama’eukwaawa ‘wyrriara ruwi, Judas Iskariote ‘ga ree. Jejui ‘ga remimu’e ‘ga futat numiamū. A’ere mama’eukwaawa ‘wyrriara namu’akwaawukari ‘ga imogou.

⁴ A’eramū ‘ga awau oporogytau mainana ‘wyrriara ‘gā nupe:

—Je oo Jejui ‘ga resaukaa pē nupe. Tepepyyk ‘ga ‘jau. Je akwaap ‘ga rekwawa. A’eramū je pē nerawau ‘ga rekwaw ipe— ‘jau Judas ‘ga ‘gā nupe. —‘Ga upe jarewaēmawe nipo je ‘ga retywape pyteri ‘ga resaukaawamū pē nupe— ‘jau ‘ga ‘gā nupe.

⁵ A’eramū mainana ‘gā aku’iramū ‘ga ree, aipo ‘ga ‘eramū.

—‘Ga resaukaramū toromepy ene ‘jau— ‘jau ‘gā Judas ‘ga upe.

⁶ —Pe’je ki ajee ‘wei— ‘jau ‘ga ‘gā nupe.

A’eramū ‘gā ‘jau ‘ga upe nū:

—Tene ‘ga jepe’ai ra’ne. Emaenun etee ekou ee ra’ne. Ojete’e ‘ga rekoramū toropyyk ‘ga ‘jau. Jemime toropyyk ‘ga ‘jau, awotywe’eme ‘jau. A’eramū ‘ga rewiriwara ‘gā ikwaape’ema ‘jau— ‘jau ‘gā ‘ga upe.

—Nai’i— ‘jau ‘ga ‘gā nupe.

A’eramū ‘ga Jejui ‘ga rerekou weape.

Jejui ‘ga ‘gā monou kumi apoawamū

(Mateu 26.17-25; Maku 14.12-21; Juā 13.21-30)

⁷ Awau owaēma mani’oko’o jopype’ema ‘wawa upe, Pasikwa ‘jawa apoawa upe. Maraka fukua te poromū. A’e awi awau owaēma karupa’mi jukaawa ‘ara upe. A’e ‘ara rupi futat judeu ‘gā karupa’mi jukau i’wau.

⁸ Aipo ‘ara rupi Jejui ‘ga oje’ega Pedro ‘ga upe Juā ‘ga retee:

—Pe’je pejewau karupa’mi mū jukau eya jarejee— ‘jau ‘ga ‘gā nupe.

⁹ A’eramū ‘gā ‘jau ‘ga upe:

—Ma’ape ki ‘ei? Aw’ya rog ipe ki ‘ei?— ‘jau ‘gā ‘ga upe.

¹⁰ A’eramū Jejui ‘ga ‘jau ‘gā nupe:

—Pe’je pejewau Jerusareg ipe. Peu nipo ‘y ryrū rerekwara ‘ga peekoat.

¹¹ A’eramū pē pejewau ‘ga rewiri. ‘Og ipe ‘ga seramū pejeporogytau ‘oga jara ‘ga upe: “Janejara ‘ga ore mut imome’waukaa enee: ‘Ma’ape te je karupa’mi eyra ‘ui tejemimu’e ‘gā netee?’ e’i ‘ga kūi. ‘Ma’ape te ore kumi apoi?’ e’i ‘ga enee kūi”, pe’je ki ‘ga upe— ‘jau ‘ga ‘gā nupe. —“Tajemi’wat tejemiayuwa ‘gā pyri ‘jau, e’i ‘ga enee ko”, pe’je ki ‘ga upe— ‘jau ‘ga ‘gā nupe.

¹² —Aipo ojeupe pē ‘e re ‘ga tepē neroo ywatewara imy’jawa pype ‘jau. Ityp futat aejemi’waawa peu. Ae renawa nanē otywamū futat nū. A’eramū pē pejejeupe ‘ga esaukar ire peu futat iapou ewara reewe jarejeupe— ‘jau ‘ga ‘gā nupe.

¹³ Ojeupe Jejui ‘ga ‘e re ‘gā awau. Awau ‘gā ‘ga ‘eawer imū etee futat esaka. A’eramū ‘gā kumi apou maraka are wea’awamū. A’ere Jejui ‘ga awau ‘gā newiri, wemimu’e ‘gā nerawau.

Mani'oko'o'ia y'waya reewe 'gā nupe imonoawet

(Mateu 26.26-30; Maku 14.22-26; 1 Koritu 11.23-25)

¹⁴ Kumi apopaw ire Jeju'i 'ga awau wapyka kumi'wawa pyri wemiayuwa 'gā netee.

¹⁵ —Karupa'mīa je auwei tekou pē pyri jepi. Ko'iko'i ete 'gā nuri je pyyka je rerekou tyweaete.

¹⁶ 'Awamū 'ā maraka apoawa. Maraka apoawa upe iwaēmauwe 'ā peapo maraka jepi. A'ere je 'awamū etee futat iapoi pē pyri. Pē'wyriat pāwē pāwēnamū tejewya te nipo je iapou'jawi pē pyri nū. 'Aga maraka teepap kamēsiete. Aipo te nipo marakareteretea futat—'jau 'ga 'ūina 'gā nupe.

¹⁷ A'ere 'ga y'way pyyka, yrū pypewara reramā'jāu ywau eroje'ega 'Uwa 'ga upe:

—Ene te 'ā mama'ea eremut ore— 'jau 'ga 'Uwa 'ga upe.

'Uwa 'ga upe oje'eg ire 'ga itykurukaa 'gā nupe najuejue etee.

¹⁸ —Je natykuru'jawi pē pyri. Tejewyru'japa tāmējē tatykuru'jap pē pyri 'jau nū— 'jau 'ga wemimū' 'gā nupe.

¹⁹ A'ere 'ga mani'oko'o'i pyyka nū. A'eramū 'ga oje'ega 'Uwarete 'ga upe nū. 'Ga upe oje'eg ire 'ga imonou imo'jau 'gā nupe. 'Gā moykapap mani'oko'o'i pyu.

—Koromū futat jero'oa. Sā'ā mani'oko'o'i jemo'ia. Nan futat nipo jero'oa jemo'i— 'jau 'ga 'gā nupe. —Amanū je pē nupe pē katu'okawamū. A'eramū pēē jemanūawer are pejejea'aramū mani'oko'o'i 'wau pejejemogyau pejejere'emamū. Pejejea'aramū jemanūawer are mani'oko'o'i 'wauwe futat— 'jau 'ga 'gā nupe 'ūina.

²⁰ Ojemi'wapaw ire 'ga kaneeku pyyka nū.

—Sā'ā y'waya. Nan futat nipo jery jeko'wogi pē nupe— 'jau 'ga 'gā nupe 'ūina. —A'ere'ere'i futat nipo 'gā amū jery reko'wogi. A'eramū nipo jery reko'wog ire Janeruwarete 'ga pē katu'oka jery pyu— 'jau 'ga 'gā nupe. —Jery jeko'woge'em ire amunipo 'ā Janeruwarete 'ga nepē katu'ogi futari. A'eramū 'ga pē nee futat jery reko'wogukaa. 'Awamū karupa'mīa nepujukau'jawi pejetywera mepyawamū. Poromū futat 'ga je'eg ymanera numiamū. 'Awamū jerya tee pē nipi pētywer awi. Jemanū are tee Jeruwarete 'ga pētywera moiri pē nui je rerowiamū. Poromū futat Janeruwarete 'ga je'eg yaua 'awamū. A'ea 'ga je'ega nimojopy'ruawi futari 'awamū— 'jau 'ga 'gā nupe.

²¹ —'Au futat ia'wyre'ema 'gā po pe je monoara 'ga reni wapyka je pyri.

²² Amanū futat je Tejuwarete 'ga je'eg imū etee futat. Iporiay'ia'wyre'ema 'gā po pe je monoara 'ga numiamū. Anure nipo Janeruwarete 'ga aipo 'ga rereko tyweretei kwaiwete—'jau 'ga 'gā nupe 'ūina.

²³ Aipo 'ga 'eramū 'ga remimū'e 'gā amā'jāmā'jāu etee ajueakwar are:

—Aw'ya sipo 'ga monou poromū ia'wyre'ema 'gā po pe 'wei?— 'jau 'gā ajaupe.

Kūima'eeteete are 'gā mu'eawet

²⁴ A'ere 'ga remimū'e 'gā ewi ajamueu nū:

—Manamū te jane Jarejuwarete 'ga upe esage ma'eramū jarejuapyraapa?— 'jau 'gā ajaupe.

²⁵ A'e are 'gā ajamueramū Jeju'i 'ga 'jau 'gā nupe:

—Pekwaa'p judeue'ema 'gā 'wyriara 'gā nemiāpoa. 'Gā 'wyriara 'gā wemiayuwa 'gā amū monou mama'e apoukaa ojeupe: “Nan iki peapo jeje'egawer imū etee futat”, 'jau nipo 'wyriara oje'ega wemiayuwa 'gā nupe. Iapo esage'emamū nipo 'gā 'wyriara 'gā nereko tyweretei. A'etea nipo 'ga 'jau ojeupe: “Je 'ā 'gā nee ojejuka esage ma'ea”, 'jau nipo 'ga 'ūina ojeupe— 'jau Jeju'i 'ga 'gā nupe.

²⁶ —A'ere kasi pēē nanarū ne. 'Wyriaramū pejejekoweramū ki pēē mama'e apou etee futat pejejaupe, pejejopooa etee futat— 'jau 'ga 'ūina 'gā nupe.

²⁷ A'eramū 'ga 'jau 'gā nupe nū:

—Manamū te pē nupe kūima'eeteete 'ga? Kumi'wawa pyri wapyk ma'e 'ga, kumi apoara 'ga te ra'u nū?— 'jau 'ga 'gā nupe.

—Kumi'wawa pyri wapyk ma'e 'ga futat— 'jau 'gā 'ga upe.

—A'jea futat. A'ere 'ā je kumi apoara 'jawe futat je reko'i pē nupe— 'jau 'ga 'gā nupe.

²⁸ —Ja'wyre'ema 'gā ako je rereko tywerete agawewi ai'i. A'etea 'ā naje rejari pejepe je mogou ojetee'i. A'eramū je a'eramū anure pē mepyau.

²⁹⁻³⁰ Tejuwarete 'ga 'wyriaramū pē nupe temonoramū tomono pēē 'wyria'riramū imogyau 'jau, tepoaawamū 'jau. Israeu 'ga ra'ya 'gā pytuna tusi. A'eramū je pē monou pē mogyau 'wyria'riramū Israeu juapyrera 'gā nupe. A'eramū Israeu juapyrera 'gā nipo awau pē nowase. A'eramū nipo pēē 'jau mama'e esage apoara 'gā nupe: “Mama'e esage ereapo rakue, Jarejuwarete 'ga je'eg imū rakue. A'eramū 'ga ene mepyau eneremiapofer are”, 'jau nipo pēē 'gā nupe— 'jau Jeju'i 'ga 'gā nupe. —Mama'e tywera apoarera 'gā nupe nipo pēē 'jau: “Mama'e tywera etee ereapo Jarejuwarete 'ga upe rakue. 'Ga je'eg imū jēmī mama'e

apowe'em rakue. A'eramū 'ga ene mepyau eneremiapo tywer imū etee futat", 'jau nipo pēē 'gā nupe— 'jau 'ga 'gā nupe. —Aipo 'ara rupi nanē nipo pejewau pejejemi'waa je pyri nū— 'jau 'ga 'gā nupe.

Pedro 'ga momoranupawet

(Mateu 26.31-35; Maku 14.27-31; Juā 13.36-38)

³¹ A'eramū Jeju 'ga 'jau Simāo Pedro 'ga upe:

—Mama'eukwaawa 'wyrriara oje'eg jee ai'i. "Taesak eneremimu'efera 'gā poira ene rerowiar awi 'jau", e'i mama'eukwaawa 'wyrriara jee ai'i. Sā'ā ae juowuu apefera renū'ēa a'yi esage awi. Nan tee futat nipo mama'eukwaawa 'wyrriara pē nenuēm are ifueweramū jeremiayuwa 'gā nui.

³² A'ere 'ā je 'i Tejuwarete 'ga upe tekou ene ree. "Epoar iki Simāo 'ga. 'Ga moimurukare'ema je rerowiar awi", 'jau je 'ā 'ga upe tekou ene ree— 'jau Jeju 'ga 'ga upe imome'wau. —A'eramū nipo ene epoirapa etee je wi. A'ere nipo erejewyt je rerowiaa nū. A'eramū te nipo nerepoiru'jawi je rerowiar awi— 'jau Jeju 'ga 'ga upe. —A'eramū ene ejewirera 'gā poaa je rerowiarukaa 'gā nupe— 'jau 'ga 'ga upe.

³³ Aipo 'ga 'eramū Pedro 'ga 'jau:

—Naani kūi. Napoira'uweri je ene wi kūi. Moromunepaw ipe miamū futat je oi ene pyri ene munewamū kūi. Ene reewe futat temanūmū kūi— 'jau Pedro 'ga 'ga upe.

³⁴ —Ene'me awi kūi. 'Awa ypytuna rupi nipo ene'me 'gā nupe kūi. Muapyapyt katu nipo ene 'jau 'gā nupe: "Nakwaawi je 'ga", 'jau nipo ene 'gā nupe je kwakupa wyrasokwē je'ege'emauwe— 'jau 'ga Pedro 'ga upe.

³⁵ A'ere Jeju 'ga 'jau 'gā nupe nū:

—Ymā te ako je pē monoi kwe pe tejemome'waukaa 'gā nupe ai'i. "Peroo kasi pejekaraemā ne", 'jau ako je pē nupe ai'i. "Ka'aranūia miamū futat pēē erawawe'em. Pejepyapaawa miamū futat kasi peroo ne", 'jau je ako pē nupe ai'i. Kwe pe je pē monoramū te mama'ea nitywi pē nupe rai'i?— 'jau 'ga 'gā nupe.

—Naani nū'ū— 'jau 'ga remimu'e 'gā 'ga upe.

³⁶ —A'jea futat nū'ū. A'ere 'awamū nanarūi. Pejejemi'urama peroo 'awamū. Ka'aranūia peroo 'awamū. Jyuu tywe'emamū pēē pejejaity poakuwuu mū me'ega jyuu muawamū.

³⁷ Ymā te 'gā 'ā ka'arana kwasiari inuga je ree rakue: "Wereko tywerete nipo 'gā 'ga oporojuka ma'e 'jawe", 'jau 'gā ikwasiaa inuga je ree rakue— 'jau Jeju 'ga 'gā nupe 'ūina. —Ikwasiaripyre imū etee futat nipo 'gā je rereko tyweretei. 'Awamū futat 'gā je rereko tyweri— 'jau 'ga 'gā nupe 'ūina.

³⁸ A'eramū 'ga remimu'e 'ga amū 'jau 'ga upe:

—'Awamū mukūi jyuu ruwi kūi— 'jau 'ga 'ga upe.

A'eramū Jeju 'ga 'jau:

—Au'je ra'ne— 'jau 'ga 'gā nupe.

'Uwarete 'ga upe 'ga 'eawet

(Mateu 26.36-46; Maku 14.32-42)

³⁹ Ojemi'wapaw ire Jeju 'ga awau ywytyr ipe, Oriweira 'jaw ipe. Awawete pe 'ga awau. 'Ga remimu'e 'gā awau 'ga rupi.

⁴⁰ Owaēmawe 'ga 'jau 'gā nupe:

—Pe'je pejeporogytau Jarejuwarete 'ga upe. A'eramū pēē pejefuakaramū pejetywera apowe'em— 'jau 'ga 'gā nupe.

⁴¹ Ojepe'au'i 'ga awau 'gā nui. A'ere 'ga awau wenupy'āu wapyka, oporogytau 'Uwarete 'ga upe:

⁴² —Kiapi'ni. 'Wyrri'ri 'gā imara'ne je ree. 'Gā nipo 'ā je rereko tywerete 'ja. Ojeupe ene iapoukare'em ire amunipo 'ā 'gā nuapoa'uweri nanuara je ree. A'ere 'ā najeremifutar imū rūi ereapoukat. Ejemifutar imū etee te 'ā ereapoukat 'gā nupe jee— 'jau 'ga 'Uwarete 'ga upe.

⁴³ A'e pype ywag ipewara 'ga 'ua ojypa 'ga pyri, 'ga mojemogypygykaa 'ua ojee.

⁴⁴ A'eramū Jeju 'ga oje'egu'japa 'Uwarete 'ga upe nū. 'Ga 'arasiga 'ga py'a moywyrarafenayau 'ga m'ina. A'eramū 'ga ry'aja otykyka 'ga ry 'jawe ywyu.

⁴⁵ Oporogytapaw ire Jeju 'ga afu'ama awau wemimu'e 'gā pyri. A'ere 'gā seri 'upa. 'I'arasig 'gā 'ga ree. A'eramū 'gā a'eramū osea ajemogyau.

⁴⁶ A'eramū Jeju 'ga 'jau 'ua 'gā nupe:

—Ma'eramū te peset etee pejejupa? Pefu'am jui. "Pe'je pejeje'ega Jarejuwarete 'ga upe. A'eramū pēē pejefuakaramū mama'e tywera apowe'em", a'e je ako pē nupe ko. "Kasi a'e pe nepēfuakari mama'e tywer awi ne", a'e je ako pē nupe ko— 'jau 'ga 'gā nupe.

*Jejui 'ga ppykawet**(Mateu 26.47-56; Maku 14.43-50; Juã 18.3-11)*

⁴⁷ Aipo 'gã nupe 'ga 'e 'ga 'amamũ 'ga ppykara 'gã 'ua owaẽma 'gã nupe. Judas 'ga 'gã nerua pe resaukaa 'gã nupe.

—'Au 'ga ruri jepi— 'jau 'ga 'gã nupe.

A'eramũ 'ga 'gã nerawau peu. Tenune 'ga 'upa 'gã nupe. A'eramũ 'gã ojekyita 'ga rewiri. 'Ga porogyta 'ga 'amamũ 'gã 'ua owaẽma Jejui 'ga upe. A'eramũ Judas 'ga awau 'ga rerowyka 'ga retywape pytea.

⁴⁸ A'eramũ Jejui 'ga 'jau 'ga upe:

—Je resaukaawamũ te 'ã jeretywape pyter ape jejekoty'aawa 'jawe?— 'jau 'ga Judas 'ga upe.

⁴⁹ Aipo resakawe 'ga remimu'e 'gã ikwaapa.

—'Ga ppyka 'gã nuri ra'e— 'jau 'gã ajaupe.

A'eramũ 'ga remiayuwa 'gã 'jau Jejui 'ga upe:

—Ene ppyka 'gã nuri ra'e. Erefutat te ore jyuu pyu 'gã apisia?— 'jau 'gã Jejui 'ga upe.

⁵⁰ A'erauwe 'ga amũ ogy rekyita kũima'e 'ga amũ namĩ monoka. Mainana 'ga remiayuwa 'ga namĩ monoka 'ga wi. Furuk. Mainana 'wyriararete 'ga remiayuwa 'ga namĩ 'ga iyya.

⁵¹ Aipo 'ga namĩ ywamũ Jejui 'ga oje'ega 'gã nupe:

—Peapo awi nanuara— 'jau 'ga 'gã nupe.

A'eramũ Jejui 'ga 'ga namĩ ppyka imonou imỹina 'ga ree nũ, 'ga namĩ renawer ipe nũ.

⁵² A'eramũ Jejui 'ga oje'ega opyykara 'gã nupe. Mainana 'wyriara 'gã, Janeruwarete 'ga mogytaawa raarana 'wyriara 'gã, judeu 'gã 'wyria'ri 'gã. Mĩmera 'gã 'ua 'ga ppyka. A'eramũ 'ga 'jau 'gã nupe:

—Ma'eramũ pẽẽ ma'eramũ pejejua muawa pyu je nupãu ekoete 'ũ, muna'ywa 'jawe 'ũ?

⁵³ Pejejepype je rekoramũ miamũ ako naje pyygi pejepe ai'i. A'ere jemanũ'awa upe iwaẽmi 'awamũ. A'eramũ Jeruwarete 'ga je pyygukaa rẽwẽjẽmĩ pẽ nupe— 'jau Jejui 'ga 'gã nupe.

*Pedro 'ga Jejui 'ga kwakupa**(Mateu 26.57-58, 69-75; Maku 14.53-54, 66-72; Juã 18.12-18, 25-27)*

⁵⁴ A'eramũ futat 'gã Jejui 'ga ppyka 'ga rerawau mainana 'wyriararete 'ga rog ipe. Pedro 'ga awau 'ga rewiri. A'ere 'ga mukuu etee 'ga rekoĩ 'ga wi. Awau 'ga owaẽma mainana roga upe. A'ere 'ga oi akou ukupepe etee mainana 'ga remiayuwa pyri etee.

⁵⁵ Ukupepe mainana 'ga remiayuwa 'gã tata mojoy'wau 'upa 'ga roga pyri. A'eramũ Pedro 'ga awau wapyka ojepe'jau 'gã pyri.

⁵⁶ A'eramũ mainana 'ga remiayuwa eẽ mũ 'ga resaka.

—Mĩnamũ kiã rewiriwara kiã amũ reni ra'e— 'jau eẽ, 'ga resaka tata ypyu 'ga renamũ.

⁵⁷ Aipo eẽ 'eramũ Pedro 'ga 'jau eẽ upe:

—Tee. Naani nũ ĩ. Nakwaawi je 'ga nũ ĩ— 'jau futatee 'ga eẽ upe.

Oky'jau 'ga opyyg awi. A'eramũ 'ga o'meramũ eẽ upe.

⁵⁸ A'ere kũima'e 'ga amũ 'ga resaka nũ.

—Ene futat 'ga rewiri ako ma'efera, 'jau je 'ũ— 'jau 'ga Pedro 'ga upe.

A'ere Pedro 'ga 'i etee 'ga upe:

—Naani nũ'ũ. Naje rũi kũi— 'jau etee Pedro 'ga 'ga upe nũ.

⁵⁹ A'ere'ere'i ajepeja 'ga 'jau 'ga upe nũ:

—Ene futat 'ga rewiriwarera kũi. Garireja ywy pewara ene. A'eramũ ene a'jea futat kũi, 'ga rewiriwara futat ene kũi— 'jau 'ga Pedro 'ga upe.

⁶⁰ —Nakwaawi je aipo ene'ea nũ'ũ— 'jau futatee Pedro 'ga 'ga upe, Jejui 'ga kwakupa 'gã nũ.

Aipo 'ga 'e 'ga renamũ wyrasokwẽ oje'ega.

⁶¹ A'erauwe Jejui 'ga ojerowaka amã'jãu Pedro 'ga ree. A'eramũ Pedro 'ga wea'aramũ 'ga 'eawer are. "Wyraokwẽ je'ege'emauwe nipo je kwakuw ape 'gã nupe muapyt", 'ga 'eawer are.

—A'eferupi tee pa 'ã je 'ga kwakuwi nũ— 'jau 'ga wea'aramũ 'ga je'egawer are.

⁶² Aipo 'e re Pedro 'ga awau ujãna ojenosõu. A'eramũ futat u'arasigamũ wea'aramũ ee.

—Ma'eramũ je aipo 'jau ra'e 'ũ?— 'jau 'ga awau 'ũina u'arasigamũ. —Mama'e esage na'ga 'ã wapo jee jepi re'ã. A'etea pa je 'ã aipo a'e ekoete 'gã nupe ra'e nũ— 'jau 'ga ojeupe, u'arasigamũ u'eawer are.

A'eramũ 'ga ajaa'wau awau u'eawera raykau.

*Jejui 'ga rerekoemãawet**(Mateu 26.67-68; Maku 14.65)*

⁶³ 'Ga ppykara 'gã Jejui 'ga nupãu. 'Ga kurapa kypyre'emete futat 'ga rerekou 'ga nupã pype.

⁶⁴ A'eramū 'gā 'ga reakwapiāa taity pyu. A'ere 'gā 'jau 'ga upe:

—Ene 'ā i'akwaap ma'ea. Awŷja te ene nupā?— 'jau 'gā 'ga upe 'ga rerekoemāu erekou.

⁶⁵ A'e pype 'ga nupāara 'gā 'ga kurapa ajemogyau.

'Wyriara 'gā Jejuī 'ga moporogytaukaa

(Mateu 26.59-66; Maku 14.55-64; Juā 18.19-24)

⁶⁶ Ku'emamū mainana 'gā ajatykau 'wyriari 'gā, Moisesi 'ga remikwasiarer are moromu'jara 'gā netee:

—Perut 'ga 'au oree. Toromoporogytaukat 'ga 'au orojee 'jau— 'jau 'gā 'gā nupe. A'eramū 'gā 'ga rerua 'gā nupe.

⁶⁷ A'eramū 'gā 'jau 'ga upe:

—Ene futat te Jarejuwarete 'ga remimurera?— 'jau 'gā 'ga upe.

—“A'jea futat” je 'eramū naje rerowiari pejepe ne— 'jau etee Jejuī 'ga 'gā nupe.

⁶⁸ —Pejejeupe mama'e mū ree jeporonuwamū, nepemome'ui jee ne.

⁶⁹ A'ere anurenure'i je apygi Tejuwa 'ga yse katy. Tejuwarete 'ga 'jawe futat nipo je rekoi pājēreteramū. A'eramū nipo je 'ga yse katy te 'ŷina teapyka 'awamū— 'jau 'ga 'gā nupe.

⁷⁰ —Koromū futat nipo ajee ene Jarejuwarete 'ga ra'yramū?— 'jau 'gā 'ga upe.

—A'jea futat poromū pe'je— 'jau 'ga 'gā nupe.

⁷¹ Aipo 'ga 'eramū taetu 'gā amara'neramū 'ga ree kwaiwete.

—Aruenuw ore 'ga 'awamū. “Tejuwa 'ga 'jawe futat je rekoi nipo”, e'i 'ga oree— 'jau 'gā ajaupe. —Pe'je ajee sijuka 'ga 'ū— 'jau 'gā ajaupe. —Narafutari ore 'ga je'ega mome'wara 'gā. 'Ga futat 'awamū ojemome'u esage oree— 'jau 'gā ajaupe, amara'neramū 'ga ree.

23

Piratu 'ga rowase Jejuī 'ga rekoi

(Mateu 27.1-2, 11-14; Maku 15.1-5; Juā 18.28-38)

¹ Aipo 'e re 'gā 'ga rerawau 'wyriara 'ga upe, Piratu 'ga upe. Najuejue etee futat 'gā 'ga rerawau.

² A'eramū 'gā 'ga je'ēwu'jaga 'ga upe:

—Koromū 'wyriararete 'ga ree 'gā mamara'neukaara. “Pemepy awi 'wyriararete 'ga”, e'i 'ga oree ai'— 'jau futatee 'gā, Jejuī 'ga je'ēwu'jaga Piratu 'ga upe. —Koromū futat “Je Jarejuwarete 'ga remimureramū”, 'jau nanē 'ga oree ai'i nū. “A'eramū je 'awamū 'wyriarareteramū pē nupe. 'Ga py'rau tejua”, e'i 'ga oree ai'i. A'eramū ore 'ga ppyka 'ga rerua— 'jau futatee 'gā Jejuī 'ga je'ēwu'jaga Piratu 'ga upe.

³ A'eramū Piratu 'ga 'jau Jejuī 'ga upe:

—Ene futat nipo ajee judeu 'gā 'wyriararetea?— 'jau 'ga 'ga upe.

—A'jea futat ere poromū— 'jau Jejuī 'ga 'ga upe.

⁴ A'eramū Piratu 'ga 'jau 'gā nupe:

—Agamū ae kūima'e tywere'emamū, a'e je 'ā pē nupe jepi. Ma'eramū ajee jane 'ga jukai 'ū? Ma'ja 'ga iapou pē nupe rai'i 'ū?— 'jau etee Piratu 'ga 'gā nupe.

⁵ A'ere mainana 'gā 'i etee futat 'ga upe:

—Pe'je 'ga jukau futat. Kwe pe te 'ā 'ga oi ae mu'jau tyweruu akou. A'ere 'ga remi-mome'ufera nia'wyrī futari. Amunawa moyka oporogyta tywera pyu. Pēnemaiyuwa 'gā 'ga amu'e 'wyriararete 'ga rerowiarukare'em are. Garireja ywy pe ra'ne ako 'ga rekoi 'gā mu'jau ai'i. A'ere 'ā 'ga ruri akou 'au nū— 'jau futatee 'gā 'ga upe.

Erote 'ga upe 'ga rerooawet

⁶ Aipo ojeupe 'gā 'eramū Piratu 'ga 'jau 'gā nupe:

—Garireja ywy awi 'ut ma'efera 'ga nipo ajee?— 'jau 'ga 'gā nupe.

⁷ —Pe awi futat 'ga ruri— 'jau 'gā 'ga upe.

A'eramū Piratu 'ga 'jau 'gā nupe:

—Pe'je ajee 'ga rerawau Erote 'ga upe. Ako je nipo 'ga 'au. Garireja ywy pewara 'gā 'wyriara 'ga. A'eramū pēē 'ga rerawau imome'wau 'ga upe— 'jau Piratu 'ga 'gā nupe.

A'eramū 'gā 'ga rerawau Erote 'ga upe.

⁸ Jejuī 'ga resakawe Erote 'ga aku'iramū 'ga ree. Jejuī 'ga rera renupawe 'ga 'jau ojeupe: “Ymā we 'ā jeporesagiweramū 'ga ree numiamū. A'ere 'awamū 'ga ruri 'au je resaka. Ojero'wu ma'e 'gā 'ga okatu'ok. Amanū ma'e 'gā nanē 'ga omoferap nū, 'jau 'gā jee jepi. Ma'ja sipo ajee 'ga wapo jee wesagamū?” 'jau 'ga ojeupe, oporesagiweramū 'ga ree.

⁹ A'eramū Erote 'ga Jejuī 'ga moporogytaukaa ojeupe numiamū. A'ere Jejuī 'ga noje'egi Erote 'ga upe.

¹⁰ A'eramū mainana 'wyriara 'gā 'ua, Moisesi 'ga remikwasiarer are moromu'jara 'gā netee. Jejuī 'ga je'ēwu'jaga Erote 'ga upe nū.

¹¹ A'eramū Erote 'ga 'ga kurapa jefaruu 'gā netee. A'ere 'ga 'wyriara raity piraga pyu 'ga kupe piari, 'ga rerekoemāawamū.

—“Je 'wyriara” e'i 'ga. A'eramū pēē 'awamū pejemā'jāu 'ga raity esage are. 'Wyriara 'jawe futat 'ga— 'jau 'gā Jejuī 'ga rerekoemāu 'ga kurapa.

A'ere Erote 'ga 'jau 'gā nupe:

—Pe'je 'ga rerawau 'ga rorojewya Piratu 'ga upe nū— 'jau 'ga 'gā nupe.

A'eramū futat 'gā 'ga rerawau erojewya Piratu 'ga po pe nū.

¹² Aipoa 'ara rupi Piratu 'ga akou Erote 'ga jekoty'aawamū. Imara'ne 'gā akou ajuee. A'ere aipo 'ara rupi 'gā ta'waramū ajaupe nū.

'Gā nupe 'ga monoawet

(Mateu 27.15-26; Maku 15.6-15; Juā 18.39-19.16)

¹³ A'eramū Piratu 'ga 'gā majatykau. Mainana 'gā, judeu 'gā 'wyria'ri 'gā, tekotee 'gā. Mīmera 'gā 'ga imajatykau 'gā mua oporogyta anupa.

¹⁴ —Perur ete 'ā Jejuī 'ga. Erojewya jee nū. Pēē te 'ā perut ekoete 'ga rai'i. “Ekoay 'ga akou 'wyriararete 'ga rerowiare'em are 'gā mu'jau”, 'jau 'ā pēē 'ga upe. A'eramū 'ga ako teporonupa ee pē nowase 'ga upe ai'i. A'ere 'ā 'ga nuapoi futari mama'e tywera rai'i. O'meramū te 'ā pe'je. Peje'ēwu'jag ekoete 'ā 'ga— 'jau 'ga 'gā nupe.

¹⁵ —Erote 'ga nanē 'ā 'jau rai'i nū: “Nuapoi 'ga mama'e tywera ajukaawamū”, 'jau 'ga 'ā 'ga upe rai'i nū. A'eramū 'ga 'ā 'ga mua imojewya 'au rai'i nū— 'jau Piratu 'ga 'gā nupe. — Najeporojukaweri je 'ga ree. Nia'wyri je upe 'ga jukaa ekoetea.

¹⁶ A'eramū je 'ga nupāukaa etee 'gā nupe ra'ne. A'ere 'ga tomono imuēma 'jau nū, 'ga nupā re 'jau nū— 'jau Piratu 'ga 'gā nupe.

¹⁷ Mani'oko'o jopype'ema 'wawa maraka apoawa rupi Piratu 'ga moromunepawa pype imunewipyra 'ga amū muēma judeu 'gā nupe jepi. A'eramū Piratu 'ga 'jau ojeupe: “Jejuī 'ga wi jepoiriweramū”, 'jau 'ga ojeupe.

¹⁸ A'ere tesirūmera 'gā afukai etee 'ga upe:

—Erepori awi 'ga wi. Ejukaukat tāmējē 'ga oree. Moromunepawa pypewara 'ga te erejukaukar awi. Epoi etee 'ga wi oree. Parapasi 'ga te emuēm moromunepaw awi oree. A'eramū ene Jejuī 'ga jukaukaa oree— 'jau 'gā wafukaita 'ga upe.

¹⁹ Parapasi 'ga futat 'gā mamara'neukaa 'wyriara 'ga ree rakue. “Simuēm 'ga 'wyriaramū 'ga ren awi 'jau”, 'jau 'ga 'gā nupe, 'gā mamara'neukaa 'ga ree. Oporojuka ma'efera 'ga wejue nanē poromū nū. A'eramū 'gā 'ga monou 'ga munepa 'ga mu'ama rakue.

²⁰ A'ere Piratu 'ga 'ga muēm are nifueweri. A'eramū 'ga oje'egu'japa 'gā nupe nū:

—Naani futari. Jejuī 'ga wi futat je poi— 'jau etee 'ga 'gā nupe numiamū.

²¹ A'ere 'gā afukai etee 'ga upe nū:

—Naani futari. Erepori awi futat 'ga wi. Ere 'ga jukaukaa futat oree. Ere 'ga monoukaa futat imu'ama 'ypeywar are oree— 'jau judeu 'gā Piratu 'ga upe.

²² A'ere Piratu 'ga je'egu'jawi etee 'gā nupe nū:

—Natesirūgatu 'ga rekorāu rūi 'ā pejukaukat 'ga jee. Kūima'e esage te 'ga 'ā. Anupāukat etee futat je 'ga 'gā nupe. A'ere je 'gā momoirukaa 'ga wi— 'jau Piratu 'ga 'gā nupe numiamū.

²³ A'ere 'gā jopy'rupy'rui etee futat wafukaita 'ga upe nū:

—Naani futari. “Ere 'ga jukaukaa futat oree”, aru'e ako ore ko— 'jau etee 'gā wafukaita 'ga upe afuakaramū futat Piratu 'ga ree.

Wojere'emamū futat 'gā wafukaita 'ga upe aipo 'jau.

²⁴⁻²⁵ —Nepeenuwi etee 'ā jeje'ega. “Ere ki 'ga jukaukaa futat oree”, pe'je 'ā jee. A'eramū je 'ga jukaukaa pē nupe— 'jau Piratu 'ga 'gā nupe ojee 'gā fuakarauwe.

A'eramū Piratu 'ga oporojuka ma'efera 'ga jēmī imuēmukaa moromunepaw awi 'gā nupe. Aipoa imuēmipyra kūima'e 'ga futat 'wyriara 'gā ajuee 'gā mamara'neukarera. A'etea 'ga 'ga omomoirukat 'ga wi.

'Ypeywar are Jejuī 'ga monoawet

(Mateu 27.32-44; Maku 15.21-32; Juā 19.17-27)

²⁶ A'eramū futat jefaruu 'gā Jejuī 'ga rerawau 'ypeywar are 'ga pokutukaw ipe. A'eramū 'gā pe aje Simāo 'ga rekoaa, Sirene ywy pewara 'ga rekoaa.

—'Ypeywar erokwap 'ga upe. Ifuakapap 'ga ee— 'jau jefaruu 'gā Simāo 'ga upe, oje'ega moywyrafena.

A'eramū futat 'gā imonou 'ga 'arimū, 'ypeywar rupirukaa 'ga upe. A'eramū 'ga erawau erekou 'gā newiri.

²⁷ Kwaiwete 'gā ojekyita 'gā newiri awau.

—Siesak 'ga jukaa 'jau— 'jau 'gā ajaupe.

A'eramū 'gā ojekyita 'ga rewiri awau. Kūjāmera 'gā nanē awau Jejuī 'ga rewiri. Awau 'gā ajaa'wau 'ga ree:

—Esage ma'e kīā. Janepytuna ako kīā okatu'ok ai'i. A'ere wā 'awamū kīā rerooi ijukau—'jau 'gā ajaupe ajaa'wau 'ga ree.

²⁸ A'eramū Jeju'i 'ga ojerowaka 'gā nee, oje'ega 'gā nupe:

—Pejoo'o awi je ree. Pejeja'yra 'gā nee tepejoo'o pejejee nanē futat pejejaa'wau nū.

²⁹ Anure nipo pe'je pejejaupe: “Ta'yre'ema wā jaruete ajemogy. Jane te aje 'ā ta'yt ma'eramū jareja'yra eko tywera siesak jarejemogyau”, 'jau nipo pēē pejejaupe.

³⁰ Anure nipo peko tywet futat. Ywytyra upe nipo pēē 'jau: “Ejot e'aa ore 'arimū. Noreruagi ore arako tywera upe”, 'jau nipo pēē ywytyra upe. A'ere nipo nuri futari u'aa pē 'arimū—'jau 'ga 'gā nupe.

³¹ —Je 'ā Tejuwarete 'ga remifutar imū etee futat aporowyky. A'etea 'gā 'ā je jukau ekoete. Pēē taetu aje 'ā mama'e tywera peapo. Na'ga remifutar imū etee rūi pejemogy pejeporowykyau—'jau 'ga 'gā nupe. —Je miamū te 'ga 'ā je rereko tywerukat wa'yramū miamū. Pēē taetu aje 'ā 'ga rerowia'ria te. A'eramū 'ga pē taetu pē nerekou tyweaete futat—'jau Jeju'i 'ga 'gā nupe.

³² Mukūja muna'ywa 'gā nanē 'gā erawau iapisau Jeju'i 'ga reewe nū.

³³ Aeakagera 'jawewat 'jau ae apisawa rera. Mukūja muna'ywa pō'ō me 'gā Jeju'i 'ga mu'ama 'ypeywar are. 'Ga ryrū mosoka 'ga wi. A'ere 'gā 'ga monou imu'ama muna'ywa 'gā pō'ō me. Itaju pyu 'gā 'ga pokutuka ajuowai. 'Ga py maju'aa ikutuka. 'Ga rekoa futat 'gā imonou imu'ama 'ypeywar are ipokutuka.

³⁴ A'ere Jeju'i 'ga 'jau 'Uwarete 'ga upe:

—Enemara'ne kasi 'gā nee ne, Kiapi'ni. Je repyat kasi ape ne, Kiapi'ni. Nokwaawi 'gā je rekoa—'jau 'ga 'Uwarete 'ga upe oje'ega.

A'ere 'ga pokutukarera 'gā 'ga raityfera me'egawamū, ita'i 'jawewara momopoa 'upa ywyu. A'eramū ijewag are, 'ga raity mojo'oka. Sā'ā ae jugu momora. Nan futat 'gā ita'i 'jawewara momopori 'upa 'ga raityfera mojo'okawamū.

³⁵ A'eramū judeu 'gā 'wyrira'ri 'gā 'gā nesaka 'upa. 'Ga momoria 'ga rerekoramū 'gā 'upa 'ga rerekoemāu etee 'upa.

—“Janerwarete 'ga te ako je mut ikue”, e'i 'ga jepi. Opoat 'ga 'gā jepi. Siesak 'ga jepoara 'jau—'jau 'gā 'upa ajaupe.

—Ere ejua ejypa. Taruesak ene rura ene jywa 'jau kūi. Ene jyp ene ruramū taruerowiat ene 'jau kūi. “Na pa je 'ga Janerwarete 'ga remimurera futat ra'e”, taru'e enee 'jau kūi—'jau 'gā Jeju'i 'ga upe 'upa.

³⁶ Jefaruu 'gā nanē 'ga kurapa 'upa nū 'ypeywar are 'ga 'amamū nū. Y'way ajaiwaya 'gā erawau erojeupia itykurukaa 'ga upe numiamū. A'ere 'ga notykuri.

³⁷ —“Wyrira je” ere 'ā. A'eramū ene ejua ejypa esaka oree—'jau 'gā 'ga upe.

A'ere 'ga nojywi futari. Enupare'ema 'jawe etee futat 'ga u'ama 'ypeywar are werekoemānamū.

³⁸ A'ere Piratu 'ga 'yjepa'nī kwasiaa 'gā nupe: “Koromū futat 'wyriararetea judeu 'gā nupe” 'ea 'ga ikwasiaa 'yjepa'nī are. A'ere 'gā erawau ikutuka inuga 'ga apyte'rarimū 'yw are.

³⁹ 'Ga pyri u'am ma'ea mū muna'ywa oje'egayau 'ga upe:

—“Janerwarete 'ga remimurera je”, ere 'ā. A'eramū ene ewau ejypa jarejee, tore mosog ape 'ypeywar awi 'jau—'jau 'ga Jeju'i 'ga upe.

⁴⁰⁻⁴¹ Aipo 'eramū ajepaja muna'ywa 'ga amara'neramū aipo 'jara 'ga ree.

—Nerekyjei nipo 'ā Jarejuwarete 'ga wi? Ene we 'ā aipo ere e'ama 'ga upe. Noporujukai 'ga 'ā. A'etea nipo 'ga 'ā amanū. Au'je katu te 'gā jane taetu jane apisi. A'eramū jane 'awamū jaretywera mepyau. 'Ga tywere'ema miamū 'ā amanū—'jau 'ga ajaupe.

⁴² A'ere 'ga 'jau Jeju'i 'ga upe:

—Ejea'ar iki je ree, ki Jeju'i, 'wyriramū ejewya—'jau 'ga Jeju'i 'ga upe.

⁴³ A'eramū Jeju'i 'ga 'jau 'ga upe:

—Awauwe futat ereo je rupi jerupaw ipe. Esage te 'ā jerupawa. 'Awauwe futat jane oi peu—'jau 'ga 'ga upe.

Jeju'i 'ga manūawet

(Mateu 27.45-56; Maku 15.33-41; Juā 19.28-30)

⁴⁴ Kwara okwapa aje owepa. Ypytuna 'jawe futat opyytunaiwamū. Kwara ajerewamū tāmējē awau weny jesagamū nū.

⁴⁵ Janerwarete 'ga mogytaawa rowopypea my'jawa taity otoroka Jeju'i 'ga manūnamū.

⁴⁶ A'e pype Jeju'i 'ga wafukaita 'Uwarete 'ga upe:

—Amanū je. Te'aga je omono enepo pe, Kiapi'ni. Eneremifutar imū etee futat je manū 'gā tywera mepyau, Kiapi'ni—'jau Jeju'i 'ga 'Uwarete 'ga upe.

A'eramū futat 'ga amanūmū. Aipo 'e re 'ga opika amanūmū.

47 A'eramū jefaruu 'gā 'wyrriara 'ga enupa u'ama 'ga manū resaka. A'eramū 'ga 'jau Jarejuwarete 'ga upe:

—A'jea futat 'ga kūima'e esagea rai'i— 'jau 'ga u'ama.

48 'Ga manū resakara 'gā u'arasigamū awau ojewya oje'wyr ipe nū.

—Ma'eramū jane 'ga jukaukaa ekoete rai'i 'ū? Esage futat 'ga rai'i— 'jau 'gā ajaupe pe rupi awau akou.

A'eramū u'arasigamū awau ojewya oje'wyr ipe nū.

49 'Ga pytunera 'gā, kūjāmera 'gā. Mīmera 'gā muku'i 'upa 'ga manū resaka. Kūjāmera 'gā 'ua Garireja wvy awi Jeju'i 'ga rupi rakue. A'eramū 'gā 'upa 'ga manū resaka nū.

Ita kwara pype 'ga monoawet

(Mateu 27.57-61; Maku 15.42-47; Juā 19.38-42)

50 Kūima'e 'ga amū 'ūina Jeju'i 'ga manū resaka. Josea 'ga rera. Arimateja pewarera 'ga. Arimateja 'jawa amunawa 'upa Judeja wvy pype. Jose 'ga esage ma'ea. "Jeju'i 'ga Janeruwarete 'ga remimurera futat", 'jau 'ga akou ojeupe etee jepi. Jeju'i 'ga 'ga werowiat. Opytuna 'gā nupe oje'ēma'e 'ga poromū. A'eramū 'ga ajatykau ajepeja oje'ēma'e 'gā nee rakue.

51 Ajatykaaw ipe 'gā 'jau rakue: "Sijuka Jeju'i 'ga", 'jau 'gā ajaupe rakue. A'ere Jose 'ga 'i 'gā nupe: "Naani. Nafutari je 'ga jukaa", 'jau 'ga 'gā nupe rakue numiamū.

52 Aipo 'ga awau oje'ega Piratu 'ga upe:

—Amanū Jeju'i 'ga ko. 'Ga reumera toroo inuga ita kwara pype 'jau— 'jau 'ga Piratu 'ga upe.

—Ere 'ga rerawau inuga ipype— 'jau 'ga 'ga upe.

53 A'eramū 'ga awau Jeju'i 'ga reumera mosoka 'yypeywar awi. A'ere 'ga 'ga reumera auwana taity pyu. Iauwan ire 'ga erawau inuga ita kwara pype. Jeju'i 'ga reumera erawau inuga ita kwara pype, teumera monoawe'ema pype. Jeju'i 'ga tāmējē futat 'ga imonou aipoa ita kwara pype. Ymā te 'gā kwaiwete 'gā neumera monoi ita kwara pype ra'e jepi. A'ere aipoa nipa'ruawi we. Ita kwar yaua te poromū. A'eramū 'ga Jeju'i 'ga reumera tāmējē imonou ipype.

54 Sexta feira kaaruwa rupi 'ga 'ga monou ita kwar yau pype. Sabado morowykye'ema judeu 'gā nupe. A'eramū morowykye'ema piara rupi 'gā 'ga monou ita kwara pype.

55 Kūjāmera 'gā 'ua Garireja wvy awi 'ga rupi rakue. Aipo 'gā awau 'ga rupi ita kwara pype 'ga rerooramū.

—Taruesak ene imonoa 'jau— 'jau 'gā Jose 'ga upe.

—A'jea— 'jau 'ga 'gā nupe.

56 Jeju'i 'ga reumera mono resag ire 'gā awau wog ipe nū. Jany kasiga mogatyrūmū imogyau Jeju'i 'ga reumer are imonopyramū. A'ere 'gā sabado rupi 'gā noporowykyi. "Sabado rupi peporowyky awi", 'jau Moisesi 'ga 'gā nupe rakue. A'eramū 'gā oporowykyawe'em. Opytu'wau ajemogyau.

24

Jeju'i 'ga ferapawet

(Mateu 28.1-10; Maku 16.1-8; Juā 20.1-10)

1 Ikoai'i, ku'emaiw are, kūjāmera 'gā awau. Mari Matarena ēē, Juana ēē, ajepeja Mari ēē, Tiago 'ga y ēē. Amumera 'gā nanē awau 'gā nupi nū. Mīmera 'gā jany kasiga rerawau eko'woka Jeju'i 'ga auwanawa taity are. Ita kwar ipe 'gā erawau numiamū.

2 Owaēmawe 'gā itauw resaka. Ita kwara rawopytymawera 'gā esaka. Ojepe'au jui. Ita ojepe'au ikwar awi.

—Koo. Awŷja ita pe'au jui ra'e nūrā?— 'jau 'gā ajaupe.

3 A'eramū 'gā awau ita kwara pype osou. A'ere 'gā nuesagi Jeju'i 'ga reumera.

4 A'eramū 'gā 'jau:

—Ma'eramū kiā maran akou rai'i nūrā? Nitywi ra'e— 'jau 'gā ajaupe.

Poje mukūi ywagipewara 'gā 'ua ojesaukaa kūima'eramū etee 'gā nupe. 'Gā naitya wenyfugaiwayramū 'gā nupe.

5 A'eramū kūjāmera 'gā okyjau etee ajemogyau. Wāāpyramū ajemogyau. 'Gā kyjea 'gā nerekou. A'eramū 'gā nupe ojesaukat ma'e 'gā 'jau 'gā nupe:

—Ma'eramū te peekat 'ga 'au ita kwara pype? Oferap ako 'ga ko.

6-7 'Au 'ga nitywi. 'Ga Ruwarete 'ga 'ga moferap ko nū. Nepēnea'ari nipo 'ga 'eawer are? "Je 'ā pēneki'yra. A'eramū nipo 'gā jejywaa pypiraa 'yypeywar are. A'eramū nipo je temanūmū futat", 'ga 'eawer are?— 'jau 'gā 'gā nupe. —"A'ere nipo mukūi etee je seri. Imuapya 'ara rupi teferapa nū", pejejeupe 'ga 'eawer are nipo pejejea'are'emamū pejejemogyau? A'eferupi tee 'ā 'ga ferawi nū. Sā'ā 'ga 'amamū nū— 'jau 'gā kūjāmera 'gā nupe.

'Gā āāpyt 'gā jemogyaramū 'gā aipo 'jau 'gā nupe.

⁸ A'eramū futat 'gā wea'aramū ee. Ojeupe Jeju 'ga 'eawer are wea'aramū ajemogyau.

⁹⁻¹⁰ A'eramū futat 'gā ojewya awau imome'wau 'ga remimu'e 'gā nupe.

¹¹ A'ere 'gā nuerowiari 'gā.

—Pē'me nipo nū ī. Naruerowiari ore pēē— 'jau etee 'gā 'gā nupe, ojeupe 'gā imome'uramū. A'ere 'gā fuakaramū etee.

—A'jea futat kīā ferawi ra'e— 'jau etee 'gā 'gā nupe.

¹² A'ere Pedro 'ga fu'amī uēma awau esaka. Jeju 'ga monoawer ipe owaēmawe 'ga anuruka amā'jāu 'ga rupawer are. Irāā'ā taitya etee tuwamū 'ga rupawera pype. A'ere nitywi 'ga reumera. A'ere Pedro 'ga 'ua wog ipe nū. “A'jea sipo 'ga ferawi ra'e? Ma'ape sipo ajee 'ga rekoi? Aesak werewi pa 'ā je 'ga nū”, 'jau 'ga 'ūina. Ojeupe etee futat wea'aramū 'ūina.

Emausi pe oo ma'e 'gā Jeju 'ga resaka
(Maku 16.12-13)

¹³ Aipo 'ara rupiwe mukūja 'gā awau ajepeja amunaw ipe. Emausi pe 'gā awau. Jeju 'ga rewiriwarera 'gā futat poromū. Jerusareg ipyriuu Emausi 'upa.

¹⁴ Jeju 'ga ree 'gā awau akou wea'aramū. Oporogytau akou ajaupe.

¹⁵ 'Gā porogyta 'gā nekoramū Jeju 'ga 'ua 'gā nupisika pe aje. A'eramū futat 'ga oporogytau 'gā nupe.

¹⁶ 'Ga resakarera 'gā futat numiamū. A'ere 'gā nokwaawi 'ga.

¹⁷ A'eramū Jeju 'ga 'jau 'gā nupe:

—Ma'eramū pēē ma'ja 'jau pejejemogyau 'ū?— 'jau 'ga 'gā nupe.

A'eramū 'gā opytau. Ojeupe 'ga je'egauwe 'gā opytau. U'arasigamū opytau 'upa.

¹⁸ A'eramū Kreopas 'ga 'jau 'ga upe:

—Nerekwaawi nipo ekou ki sa? Jerusareg awi 'ut ma'e agawewi nā'ā ene re'ā. A'etea nipo nerekwaawi ekou ki sa?— 'jau 'ga 'ga upe.

¹⁹ —Ma'eramū maran ki 'ei?— 'jau Jeju 'ga 'gā nupe.

—Jeju 'ga Nasare pe waranup ma'efera 'ga. 'Ga poromū Jarejuwarete 'ga je'eg are ore mu'jarera. Jarejuwarete 'ga pājēa 'ga wereco ai'i kūi. Ojero'wu ma'e 'gā 'ga ikatu'oka 'jau ai'i kūi.

²⁰ A'ere mainana 'wyriara, ore 'wyria'ri 'gā netee 'ga monou Piratu 'ga po pe, 'ga jukaukaa ai'— 'jau 'gā 'ga upe.

'Ga jukaawera mome'wau Jeju 'ga upe.

²¹ —“Israeu juapyreramū jane'wyriara 'ga”, 'jau ore 'ga upe jepi numiamū. “Ga 'awamū jane pojeka tapy'jamū te 'wyriar awi”, 'jau ore ai'i numiamū. A'ere ako 'gā ikokaru'wi futat 'ga jukai ai'i.

²²⁻²³ A'eramū 'awamue futat orepytuna 'gā awau ita kwar ipe wyrasokwē je'egauwe ra'e. A'ere 'gā nuesagi 'ga reumera ra'e. “Ywagipewara wā etee ore aruesak ita kwara pype”, 'jau 'gā ko. “Oferap 'ga ko, 'jau wā ore”, 'jau kūjāmera 'gā imome'wau ore ko. A'eramū aipo 'gā 'ea ore moporesaka etee ore mogyau ko, ore ikwaape'ema arajemogyau ko.

²⁴ A'eramū orepytuna 'gā amū awau esaka ko nū. A'ere 'gā miamū nuesagi 'ga ra'e. “A'jea futat ra'e”, 'jau 'gā ore ko— 'jau 'gā 'ga upe, imome'wau.

²⁵ A'eramū Jeju 'ga 'jau 'gā nupe:

—Ma'eramū sipo pēē Jarejuwarete 'ga porogytafera mome'wara 'gā je'ega rerowiara'ne'ema pejejemogyau?

²⁶ Nepekwaawi we nipo. Wemimurera 'ga manū'em ire amunipo 'ā Janeruwarete 'ga nepē katu'oga'uweri futari. A'eramū 'ga amanūmū futat 'au. A'ere 'ga ferawi nū. A'ere 'ga awau ojeupia wvag ipe nū. Nan nipo “ga rekoi pē katu'okaramū” eawera— 'jau 'ga 'gā nupe.

²⁷ 'Gā mu'jau amanūawer are.

—Ymā te 'ā Moisesi 'ga ka'arana kwasiari 'ga manū are rakue. Janeruwarete 'ga je'ega mome'wara 'gā nanē futat, ka'arana kwasiaa 'ga manū are rakue— 'jau 'ga 'gā mu'jau, wataaw ipe 'gā nerekou.

²⁸ Emausi 'jawa amunawa upe owaēm ire Jeju 'ga 'jau 'gā nupe:

—Iruupeu'ī je oi— 'jau 'ga 'gā nupe.

²⁹ A'ere 'gā fuakaramū 'ga ree:

—Naani. 'Au etee futat eko ore pyri. Kaarup. Ipytunaiway enee ne— 'jau 'gā 'ga upe.

A'eramū futat 'ga awau osou 'gā nog ipe.

³⁰ A'eramū 'gā awau wapyka ojemi'waawa pyri. A'ere 'gā ojemi'war enune Jeju 'ga kanape'ī pyyka oje'ega 'Uwarete 'ga upe:

—Ene te 'ā eneresage ore. Mama'ea eremut ore eojere'emamū— 'jau 'ga Jarejuwarete 'ga upe.

A'eramū futat 'ga eruapyka kanape'ī mopena 'gā nupe.

³¹ Kanape'ī mopena resakawe 'gā 'ga kwaapa.

—Kuu. 'Ga futat ra'e kūi— 'jau 'gā ajaupe.

Okwaawauwe 'ga ojemoteu 'gā nui.

³² A'eramū 'gā 'jau ajaupe:

—Jarejeupe 'ga je'egamū janepy'ata'waramū akiko kūi. A'eramū jareku'iramū 'ga ree. Jarejuwarete 'ga je'eg are ako 'ga jane mu'jau jane reruaw ipe ko kūi. Jarepy'ata'waramū akiko, Jarejuwarete 'ga je'ega mome'urauwe— 'jau 'gā ajaupe.

³³ A'eramū futat 'gā afu'ama ojewya awau imome'wau Jeju 'ga remimu'e 'gā nupe Jerusareg ipe.

³⁴ A'ere 'gā imome'ue'emauewe 'gā amū 'jau 'gā nupe:

—A'jea futat 'ga ferawī rai'i kūi. Simāo 'ga “aesak je 'ga ko”, e'i ko kūi— 'jau 'ga 'gā nupe imome'wau.

³⁵ A'eramū Emausi 'jaw ipe oo ma'efera 'gā wemiesagera mome'wau 'gā nupe:

—Emausi pe ore oi ko. A'eramū 'ga ipiara rupi ojesaukaa oree ko. A'ere ore norokwaawi 'ga ko. 'Og ipe orowaēm ire 'ga kanape'i mopena oree ko. A'eramū te ore 'ga kwaawi ko— 'jau 'gā 'gā nupe.

Jeju 'ga remimu'efera 'gā 'ga resaka

(Mateu 28.16-20; Maku 16.14-18; Juā 20.19-23; Atos 1.6-8)

³⁶ Aipoa 'gā imome'u 'gā nuwamū Jeju 'ga ojesaukaa 'gā pyter ipe.

—Pēpy'ata'waawa owaēm pē nupe ki 'ei. Pēpy'ata'wa 'awamū ki 'ei— 'jau 'ga 'gā nupe.

³⁷ —Ajaga nipo 'ā 'ja— 'jau 'gā ajaupe.

A'eramū 'gā oky'jau 'ga wi.

³⁸ —Ma'eramū ajee pekyje etee je wi ki 'ei? Naje rerowiari nipo pejepe?— 'jau 'ga 'gā nupe.

³⁹ —Jepo are pemā'ē, jepy are 'jau. Jepo kutukawera peesak. A'e are je kwaap pejepe. Je ete ako. Pepokok je ree esaka. Taje rerowiari pejepe 'jau. Ajaga no'oi. Je futat ako. Pepokok je ree esaka. Tepeesak jero'oa 'jau— 'jau 'ga 'gā nupe.

⁴⁰ A'erauwe 'ga opo kutukawera resaukaa 'gā nupe. Opya nanē nū. Opy resaukaa 'gā nupe.

—Kuu. 'Ga futat ra'e kūi— 'jau 'gā ajaupe.

⁴¹ Aku'iramū 'ga ree. A'ere 'gā a'eramū miamū nuerowiari katu 'ga. A'eramū Jeju 'ga 'jau 'gā nupe:

—Ityp te 'au i'upyra?— 'jau 'ga 'gā nupe.

—Ityp futat nū'ū— 'jau 'gā 'ga upe.

⁴²⁻⁴³ A'eramū 'gā ipira eyra monou 'ga upe. A'eramū 'ga ojemi'waa 'gā neape.

⁴⁴ Ojemi'war ire 'ga oporogytau 'gā nupe:

—Ymā te 'ā Moisesi 'ga ka'arana kwasiari jemanū are rakue. “Imara'ne ma'e 'gā nipo 'ga ajuka”, 'jau 'ga ikwasiaa ka'aran are rakue. Jarejuwarete 'ga je'ega mome'wara 'gā nanē nū, Saumu 'jaw are ikwasiaa inuga jemanū are rakue. A'ea ako je amome'u pē nupe ai'i. A'eferupi te ako 'gā je rerekoi ai'i— 'jau 'ga 'gā nupe.

⁴⁵ A'eramū futat Jeju 'ga 'gā mueapyou ee, ikwasiaripyer are.

⁴⁶ —'Awamū tepekwaap. 'Gā nemikwasiarier imū etee futat je manūi. Imuapyra 'ara rupi etee teferapa nū.

⁴⁷ 'Awamū pe'je pejewau je mome'wau 'gā nupe. Jerusareg ipewara 'gā nupe ra'ne je mome'wau. “Jeju 'ga amanū futat. A'ere imuapyra 'ara rupi 'ga ferawī nū, jane katu'okaramū. A'eramū pēē pejepoia pejetywer awi”, pe'je ki 'gā nupe. “Pejetywer awi pēpoiirweramū Jeju 'ga ipe'ai pē nui pē katu'oka”, pe'je ki 'gā nupe. Anure kwe pe pejewau tekotee 'gā momoranupa— 'jau 'ga 'gā nupe.

⁴⁸ —Peesak futat ako je manūa ai'i. 'Awamū 'ā pēē je ferawa resaka nū. Je kwaap 'ā pejepe. “Janeruwarete 'ga je mut ae katu'okawamū” 'ea 'ā pekwaap. A'eramū pēē pejewau je mome'wau 'gā nupe, amunawa moy moyka— 'jau 'ga 'gā nupe, oporogytau.

⁴⁹ —A'ere 'awamū 'au etee futat pejemogy ra'ne. 'Au futat nipo je tepājē muri pē nupe— 'jau Jeju 'ga 'gā nupe. —Ymā te 'ā Jeruwa 'ga 'i jee: “Simono jarepājēa jarejerowiaara 'gā nupe 'jau”, e'i 'ga jee ikue. A'ere anure tomono oropājēa pē nupe 'jau. Pejejeupe imure'emamū 'au etee futat ipesaka pejejupa ra'ne. Pejejeupe je imono re tāmējē tepeata je mome'wau 'gā nupe 'jau— 'jau Jeju 'ga 'gā nupe.

Ywag ipe Jeju 'ga jeupiawet

(Maku 16.19-20; Atos 1.9-11)

⁵⁰ Aipo 'e re Jeju 'ga 'gā nerawau Petani pe. A'eramū 'ga opo monou 'gā 'arimū oporogytau 'Uwarete 'ga upe:

—Ejejuka 'gā nee jee, Kiapi'ni— 'jau 'ga 'Uwarete 'ga upe.

⁵¹ Oporogytau u'ama Jeju 'ga ojepe'au'i awau akou 'gā nui. A'ere 'ga Ruwarete 'ga 'ga mojeupirukaa 'ga monou ywag ipe 'gā nui.

⁵² 'Ga jeupira resakarera 'gã 'jau Jarejuwarete 'ga upe:

—Ene te 'ã eneresage. Naene 'jawe rüi 'ga amũ— 'jau 'gã Jarejuwarete 'ga upe, 'ga muorypa.

A'ere 'gã awau ojewya Jerusareg ipe nũ. Worywamũ 'gã awau.

⁵³ Namutamutat 'gã nekoi Jarejuwarete 'ga mogytaaw ipe.

—Ene te 'ã eneresage oree, Kiapi'ni. Naene 'jawe rüi 'ga amũ. Nitywi futari 'ga amũ kwe pe ene 'jawe— 'jau 'gã Jarejuwarete 'ga upe 'ga muorypa.

Juã

Juã 'ga ka'arana okwasiat inuga janee Jejuí 'ga kwaawukaawamũ rakue.

Juã 'ga Jejuí 'ga remimu'efera mũ. Jejuí 'ga rupi wata ma'efera 'ga. Jejuí 'ga rupi o enune Juã 'ga oporowykyau 'uwa 'ga pyri, wekí'yra 'ga pyri 'jau. Pira 'gã ipyyka taityuu pyu. A'eramũ 'gã ime'ega ka'aranũ are. A'ere Juã 'ga, Jejuí 'ga omo'wyr ire 'uwa 'ga rejari awau watau Jejuí 'ga rupi.

Ywag ipe Jejuí 'ga jewyr ire Janeruwarete 'ga 'Agesagea ka'arana kwasiarukari Juã 'ga upe rakue. A'eramũ 'ga ka'arana kwasiaa inuga Jejuí 'ga ree.

Jarejuwarete 'ga kwaawukaat

¹ Ywy apoe'emauwe Jarejuwarete 'ga kwaawukaara 'ga akou rakue. Jarejuwarete 'ga ra'yra 'ga futat 'ga kwaawukaara janee. 'Uwarete 'ga retee futat 'ga akou rakue. 'Uwarete 'ga 'jawe futat 'ga rekoi.

² Ywy apoe'emauwe futat 'ga akou 'ga pyri rakue.

³ Janeruwarete 'ga mama'e apoukaa 'ga upe. Nitywi futari 'ga amũ 'ga poaawamũ mama'e are rakue. Jarejuwarete 'ga kwaawukaara 'ga etee futat mama'e apou rakue.

⁴ 'Ga futat 'ara resaukaa ae upe. Jarejuwarete 'ga 'ga ikwaawukaa nanẽ ae upe nũ. Mama'e reny 'jawe 'ga. Sã'ã ae mama'e renyramũ mama'e resak katu katua. Nan futat 'ga Jarejuwarete 'ga kwaawukaa ae upe.

⁵ Ypytunimũ 'ã ae tata monyka. A'ere 'ã ypytunaiwa nomowewa'uweri tataa. Nan tee futat aetywera nomateepawa'uweri Janeruwarete 'ga kwaawa.

⁶ Janeruwarete 'ga 'ga amũ mua oje'ega mome'waramũ rakue. Aipo 'ga rera Juã.

⁷ Aipo 'ga upe Janeruwarete 'ga 'i rakue: "Ere ewau je kwaawukaara 'ga mome'wau 'gã nupe", 'jau 'ga 'ga upe rakue.

A'eramũ Juã 'ga awau 'ga mome'wau 'gã nupe, 'ga rerowiarukaa 'gã nupe rakue.

⁸ NaJuã 'ga rũi Janeruwarete 'ga kwaawukaara 'ga. A'ere 'ga ruri 'ga mome'wau te 'gã nupe rakue.

—Janeruwarete 'ga kwaawukaara 'ga mome'wau je ruri pẽ nupe— 'jau 'ga 'gã nupe rakue.

⁹ —'Au futat 'ga ruri. 'Ga ae mu'e oje'eg a'je are futat. Janeruwarete 'ga je'eg are nipo 'ga awau ae mu'jau. A'eramũ nipo 'ga Jarejuwarete 'ga kwaawukaa ae upe— 'jau Juã 'ga 'gã nupe rakue.

¹⁰ Jarejuwarete 'ga kwaawukaara 'ga 'ut 'au ywy pe rakue. 'Au futat 'ga oporogytau ywy pewaramũ ae upe. Ymã te 'ga ywy pewaramũ ae apoi rakue. A'etea 'ã 'gã 'ga rerowiare'ema.

¹¹ Opytuna 'gã ywy pe 'ga ruri. A'etea 'ã 'ga pytuna 'gã 'ga rerowiare'ema futat.

¹² A'ere 'gã amũ 'ga rerowiari. A'eramũ 'ga werowiaara 'gã mogyau 'Uwarete 'ga ra'yramũ.

¹³ Naywy pewara 'gã na'yra 'jawe rũi aipo 'gã. Omenar ire te 'ã kũjã wa'yramũ. A'eramũ 'ã ãẽ mena ra'yra u'aa ãẽ wi. A'ere nanarũi ae rekoi Jarejuwarete 'ga ra'yramũ. Wemifutar imũ etee futat Janeruwarete 'ga jane mogyau wa'yramũ. Wa'yrarete 'ga rerowiaara 'gã etee te 'ga imogyau wa'yramũ.

¹⁴ Jarejuwarete 'ga kwaawukaara 'ga ojemu'jaga aeramũ rakue. Jane pype 'ga akou rakue. Jane ree 'ga oporomutaramũ. 'Ga 'ã mama'e a'jea mome'wara te. Jarejuwarete 'ga nanẽ 'ga ikwaawukaa janee nũ. 'Ga futat Janeruwarete 'ga ra'yrarete. Nirũi futari 'ga. A'eramũ Janeruwarete 'ga wa'yrarete 'ga mogou oje'jawewaramũ.

¹⁵ Aipoa 'ga Juã 'ga imome'wau ojepyriwara 'gã nupe rakue:

—Je rewiri 'ga ruri, a'e je ako pẽ nupe ikue. Jejeuwe'emauwe futat 'ga rekoi rakue. A'eramũ 'ga a'eramũ kũima'eeteeteramũ akou. Je apyraapa akou kũima'eeteeteramũ— 'jau Juã 'ga 'gã nupe rakue.

¹⁶ Iporomutat 'ga nanimenime jane ree. A'eramũ 'ga opota'waramũ jane ree. Mama'e esagea 'ga iapou'jau'japa janee.

¹⁷ Ymã te Janeruwarete 'ga oje'ega monou Moisesi 'ga upe rakue. A'eramũ Moisesi 'ga janepygy 'gã mu'jau 'ga je'eg are. "Ga je'ega renup katu katuaramũ pẽnesageay Jarejuwarete 'ga upe", 'jau Moisesi 'ga 'gã nupe rakue. A'ere Jejuí 'ga 'i janee: "Pẽtywerete agawewi 'ã pẽ. A'etea 'ã Janeruwarete 'ga iporomutat pẽ nee", 'jau Jejuí 'ga janee. Jejuí 'ga amanũm janetywera mepyau. A'e pyu 'ga 'Uwarete 'ga mota'wau jane upe. 'Uwarete 'ga je'eg are nanẽ 'ga jane mu'jau nũ.

¹⁸ Nitywi 'ga amũ Janeruwarete 'ga resakara mũ. 'Ga ra'yrarete 'ga etee te 'ga wesak. A'eramũ 'ga etee futat 'Uwarete 'ga kwaawukaa janee.

Juã Batista 'ga

(Mateu 3.1-12; Luka 3.15-16)

¹⁹ Judeu 'gā 'wyrira'ri 'gā amū akou Jerusareg ipe. A'e 'gā 'jau mainana 'gā amū nupe, Levita 'gā amū netee:

—Pe'je pejewau pejepronupa Juā Batista 'ga upe. “Maranuaramū te ereko?” pe'je ki pejewau 'ga upe— 'jau 'gā 'gā nupe.

A'eramū 'gā awau 'yrete pe, Jotāuy pe. Ty owajara katy 'gā awau. Amunawa mū pyri 'gā awau, Petani 'jawa pyri. Owaēmawe 'gā 'jau Juā 'ga upe:

—Maranuaramū te ereko, aru'e ore enee kūi?— 'jau 'gā 'ga upe.

²⁰ A'eramū Juā 'ga 'jau 'gā nupe:

—Jarejuwarete 'ga remimura 'ga rapesakara nipo peko. Naa'eramū rūi je rekoī— 'jau etee Juā 'ga aipo 'gā nupe.

²¹ A'eramū 'gā 'jau 'ga upe nū:

—Maranuaramū ajee ereko ki 'ei? Eliasiramū nipo ereko? Saa'e ene rekoa 'ager imū Jarejuwarete 'ga mome'ua 'gā nupe rakue. A'eramū nipo ene?— 'jau 'gā 'ga upe.

—Naani. Na'ga rūi je— 'jau etee Juā 'ga 'gā nupe aipo 'ga 'eramū.

—Jarejuwarete 'ga je'ega mome'waramū te ra'u ene nū? Oreremiapesaga 'ga futat te ra'u ene nū?— 'jau 'gā 'ga upe.

—Naani. Naaipo arūi je— 'jau etee Juā 'ga 'gā nupe nū.

²² A'eramū 'gā 'jau Juā 'ga upe nū:

—Ejemome'u oree. Maran ajee ore aramuara 'gā nupe ene mome'ui ki 'ei?— 'jau 'gā 'ga upe.

²³ A'eramū Juā 'ga 'jau 'gā nupe:

—Ajemome'u je pē nupe. Pēnea'at nipo Jarejuwarete 'ga je'ega mome'wara 'ga je'eger are? Isai 'ga je'eger are? Ymā te 'ā Janeruwarete 'ga ka'arana kwasiarukari Isai 'ga upe rakue: “Amunawe'em ipe 'ga amū rekoī wafukaita. 'Pekwap Jarejararete 'ga rape katu'oka imonou 'ga renune, 'jau 'ga amū wafukaita akou”, 'jau Isai 'ga ikwasiaa inuga rakue— 'jau Juā 'ga 'gā nupe.

“Pekwap Jarejararete 'ga rape katu'ok imonou 'ga renune” 'ea “pejetywer awi pepoit” 'ea. A'eramū Juā 'ga aipo 'ga 'eawer imū etee futat 'ua wafukaita ojepeyriwara 'gā nupe.

—Pejetywer awi pepoit. Pe'je pejejekatu'oka Jarejararete 'ga ruawamū, 'jau je 'ā pē nupe tekou— 'jau Juā 'ga 'gā nupe.

²⁴ Aipo 'erauwe fariseu 'gā nemimurera 'gā 'jau nū:

²⁵ —Ma'eramū ajee 'gā erepymī ekoete ekou 'ū? “Najarejuwarete 'ga remimurera rūi je. NaEliasi 'ga rūi je. Napēnemiesaga rūi je”, ere te 'ā oree— 'jau 'gā Juā 'ga upe.

²⁶ Ojeupe aipo 'erauwe Juā 'ga 'jau 'gā nupe:

—Je futat 'ā apymī 'gā 'y pe. A'ere 'ga amū rekoī pē pype. Nepekwaawi we te 'ga.

²⁷ Je rewiri te nipo 'ga ruri. 'Ga te kūima'eeteetea. Je nakūima'eeteete rūi. Je akotee'i ma'ea te— 'jau Juā 'ga 'gā nupe.

²⁸ Jotāuy pe Juā 'ga otywer awi opoit ma'e 'gā pymīnamū 'gā 'ua oporonupa ee 'ga upe.

Jelui 'ga janetywera mepyat

²⁹ Ai'we Juā 'ga Jelui 'ga resaka. Wepejān 'ga ruramū 'ga 'ga resaka. A'eramū Juā 'ga 'jau tekotee 'gā nupe:

—Pe'je pejemā'jāu 'ga ree. Kwe 'ga ako je amome'u pē nupe ai'i. Kweramū Janeruwarete 'ga remimurera 'ga ruri. Sā'ā mainana 'gā karupa'mī jukaa iapya Jarejuwarete 'ga upe. A'e resag ire 'ā Janeruwarete 'ga janetywera moia jane wi. Nan tee futat nipo kwe 'ga. Anure 'ga manūi janetywera moiawamū. 'Ga manū are nipo Janeruwarete 'ga janetywera moia jane wi— 'jau Juā 'ga 'gā nupe.

³⁰ —Kaaruwamū ako je 'ga mome'ui pē nupe ai'i. “Je rewiri 'ga ruri”, 'jau je ako pē nupe ai'i. “Ga kūima'eeteetea. Naje 'jawe rūi 'ga”, 'jau je ako pē nupe te'ama kaaruwamū ai'i. “Je rewiri 'ut ma'e 'ga jejeuwe'emauwe 'ga rekoī rakue”, 'jau je ako pē nupe ai'i— 'jau 'ga 'gā nupe u'ama.

³¹⁻³⁴ —Ymā te Janeruwarete 'ga 'i jee ikue: “Ere ewau 'gā pymīāu 'y pe, otywer awi 'gā pōira resaukaawamū tekotee 'gā nupe. Anure 'ga amū ruri ojepeymīāukaa enee. 'Ga ree tereesak je 'Agesage jywa pykau 'jawe 'jau”, 'jau Janeruwarete 'ga jee ai'i— 'jau Juā 'ga 'gā nupe. —“Aipo 'ga anure nipo je 'Agesage omono pē nupe pēnerekwaramū”, 'jau Janeruwarete 'ga jee ai'i— 'jau Juā 'ga 'gā nupe. —“Je 'Agesagea tepē momyau 'jau”, 'jau Janeruwarete 'ga jee ikue— 'jau Juā 'ga 'gā nupe. —A'ea je aesak 'ga ree ai'i. 'Ga pymī re 'ua ojypa pykau 'jawe ai'i— 'jau Juā 'ga 'gā nupe. —A'eramū “ga futat Jarejuwarete 'ga ra'yra”, a'e je ako pē nupe ai'i— 'jau 'ga 'gā nupe. —Ymā te je 'i te'ŷina tejeupe ikue: “Awŷja sipo poromū Aeruwarete 'ga amut oree oretywera moiawamū?” 'jau je te'ŷina tejeupe ikue. Je nanē 'ga kwaape'ema futat ikue nū. A'etea ako je ojot pē pymīāu 'y pe tekou ai'i— 'jau 'ga 'gā nupe. —Ae pymīāu

je ruri Jarejuwarete 'ga ra'yra 'ga kwaawukaawamū Israeu 'ga juapyreramū pē nupe— 'jau 'ga 'gā nupe.

Jejui 'ga remiayuw ypy 'gā

³⁵ Ai'iwe Juā 'ga oporogytau u'ama wemiayuwa 'gā nupe nū. Mukūja 'gā nupe oporogytau u'ama.

³⁶ Poje Jejui 'ga okwapa 'gā pyu. 'Ga resakawe Juā 'ga 'jau wemiayuwa 'gā nupe:

—Kweramū Janeruwarete 'ga remimurera 'ga kwawi. Karupa'mī 'jawe futat nipo 'ga manū janetywera moiawamū— 'jau 'ga 'gā nupe.

³⁷ Ojeupe 'ga mome'urauwe Juā 'ga remiayuwa 'gā awau Jejui 'ga rewiri. A'eramū futat 'gā Jejui 'ga ree ojemojo'okaipa Juā 'ga wi.

³⁸ Wewiri 'gā orauwe Jejui 'ga ojerowaka 'gā nee:

—Ma'ja are te peko?— 'jau 'ga 'gā nupe.

—Naani. Ma'ape te ene'wyrā, aru'e tee ore enee— 'jau 'gā 'ga upe.

³⁹ —Pe'je pejejua je rupi. Tepeesak 'jau— 'jau 'ga 'gā nupe.

A'eramū 'gā awau Jejui 'ga rupi. Awau 'gā owaēma 'ga rekwawa upe 'ga pyri. Kwara jerewamū 'gā awau owaēma. Owaēm ire 'gā 'upa oporogytau kwara rese poromukuran.

⁴⁰⁻⁴¹ Jejui 'ga rewiri oo ma'e 'ga amū rera Andrea. Juā 'ga Jejui 'ga mome'ua renuparera poromū. A'eramū Andre 'ga awau 'ga rewiri. A'ere Andre 'ga awau weki'yra 'ga rog ipe, Simāo 'ga rog ipe:

—Janeruwarete 'ga remimurera 'ga ore aruesak ai'i— 'jau 'ga weki'yra 'ga upe awau.

Kristu 'jau 'gā Jarejuwarete 'ga remimurera 'ga upe.

⁴² A'eramū Andre 'ga weki'yra 'ga rerawau Jejui 'ga upe. 'Ga resakawe Jejui 'ga 'jau 'ga upe:

—Simāo nipo enerera. Eneruwa 'ga rera Juā. 'Awamū je ene re'rogi. *Sefa* je anug ene ree— 'jau 'ga 'ga upe.

'Gā je'eg imū *Sefa* 'ga inuga 'ga ree. Pedro 'ea futat poromū. Pedroa 'ea itaa.

Natanaeu 'ga upe Jejui 'ga 'eawet

⁴³ Ai'iwe Jejui 'ga 'jau 'gā nupe:

—Garireja ywy pe je oi— 'jau 'ga 'gā nupe.

Wata enunewe Jejui 'ga awau Filipe 'ga rekaa. 'Ga resakawe 'ga Filipe 'ga mo'wya:

—Ere ejua je rupi— 'jau 'ga 'ga upe.

—Nai'i— 'jau 'ga 'ga upe.

⁴⁴ Filipe 'ga Pesaita pewara. Simāo Pedro 'ga, Andre 'ga. Mīmera 'gā aipo pewara.

⁴⁵ Omo'wyrāuwe Filipe 'ga awau Natanaeu 'ga rekaa. 'Ga resakawe 'ga 'jau:

—Ymā te 'ā Moisesi 'ga ka'arana kwasiari inuga 'ga amū ree rakue. Aipo 'ga ore aruesak. Jarejuwarete 'ga je'ega mome'wara 'ga nanē ka'arana kwasiiaa 'ga ree rakue nū— 'jau 'ga 'ga upe awau. —'Ga futat ore aruesak ai'i. Jose 'ga ra'yra 'ga. Jejui 'ga. Nasare awi 'ga ruri— 'jau 'ga Natanaeu 'ga upe.

⁴⁶ Aipo 'ga 'eramū Natanaeu 'ga 'jau:

—A'jea sipo? Nasare awi sipo mama'e esage ruri?— 'jau Natanaeu 'ga Filipe 'ga upe, aipo 'eramū.

—Ere ejua 'ga resaka— 'jau Filipe 'ga 'ga upe.

A'erauwe 'ga awau 'ga resaka 'ga rupi.

⁴⁷ Werowygauwe Jejui 'ga Natanaeu 'ga resaka.

—Koromū esage ma'e 'ga. Israeu 'ga juapyrerarete 'ga— 'jau 'ga 'ga resakawe. —Ni'mei 'ga. Mama'e a'jea te tee noko 'ga omome'u. Niporerekoemāi 'ga— 'jau Jejui 'ga 'ga upe u'ama.

⁴⁸ —Kuu. 'Awamue te 'ā je resag ape kūi. Maran ene a'eramū je kwaapa ki 'ei?— 'jau 'ga Jejui 'ga upe aipo 'eramū.

—Figueira 'ywa 'wyr ipe ene renamū je ene resagi ai'i. Ene upe Filipe 'ga porogyta enunewe je ene resagi ai'i— 'jau Jejui 'ga 'ga upe.

⁴⁹ —Kuu. Jarejuwarete 'ga ra'yratea futat nipo ajee ene ki sa— 'jau Natanaeu 'ga Jejui 'ga upe. —Ene 'ā 'wyrararetea ore, Israeu 'ga juapyreramū ore— 'jau 'ga 'ga upe.

⁵⁰ —Figueira 'ywa 'wyr ipe je ene resagi 'erauwe te je rerowiar ape ra'e?— 'jau Jejui 'ga 'ga upe. —Anure nipo mama'e esagea pēnemiapoe'ema futat je iapoi. Aipoa tereesak 'jau— 'jau Jejui 'ga Natanaeu 'ga upe u'ama.

⁵¹ A'eramū Jejui 'ga 'jau 'gā nupe najuejue etee:

—Mama'e a'jea te tee je amome'u pē nupe. Je 'ā pēneki'yratea. Anure nipo pēē ywaga woga resaka. Ywagipewara 'gā jywa je ree tura nipo pēē esaka. 'Gā jeupira nanē nipo pēē esaka nū. A'eramū nipo pēē 'jau: "A'jea futat. Janeruwarete 'ga remimurera 'ga ra'e", 'jau nipo pēē jee aipo resag ire— 'jau Jejui 'ga 'gā nupe.

2

Ya Jeju'i 'ga imu'jaga y'wayramū

¹⁻² Mukūi oser ire Jeju'i 'ga awau ajepeja amunaw ipe, Kana 'jaw ipe. Peu 'gā amū akoukatu. A'eramū 'gā maraka apou 'gā ajuerekokatuawamū. A'eramū akokatu ma'e 'ga Jeju'i 'ga y ēē mo'wya wekokatu resaka. Jeju'i 'ga nanē imo'wya nū. 'Ga remimu'eramū nanē ore mo'wy'wya 'jau.

³ A'ere maraka teepawe'emauwe y'way teepawamū 'gā nui, 'gā nekokatuawa rewara teepawamū 'gā nui. A'eramū Jeju'i 'ga y ēē 'jau 'ga upe:

—Si'ri. Y'waya teepap— 'jau ēē 'ga upe.

⁴ Aipo 'eramū ēē ra'yra 'ga 'jau ēē upe:

—Tene ra'ne. Nowaēmi we futat Janeruwarete 'ga pājē resaukaawa upe jee— 'jau 'ga oy ēē upe.

⁵ Aipo 'ga 'eramū 'ga y ēē 'jau maraka'ywa 'ga remiayuwa 'gā nupe:

—Jera'yra kiā 'eawer imū etee ki peapo mama'ea— 'jau ēē 'gā nupe.

⁶ Aipoa 'gā jatykaaw ipe 'y ryrūa 'upa. Tuwiiu ma'ea. Aipoa 'y ryrūa 100 litro ppyka. Itakanafūa poromū. 'Gā jepoeitawa yrūa futat. Judeu 'gā au'jeteramū ojepoeita ojekatu'okawamū Jarejuwarete 'ga upe.

⁷ A'ere Jeju'i 'ga oje'ega maraka'ywa 'ga remiayuwa 'gā nupe:

—Pe'je pejewau 'y rerua 'y ryrū pype imatyneema— 'jau 'ga 'gā nupe.

Aipo 'ga 'erauwe maraka'ywa 'ga remiayuwa 'gā 'y rerawau 'y ryrū matyneema.

⁸ 'Y ryrūa 'gā imatyneem ire Jeju'i 'ga oje'ega imatyneemara 'gā nupe:

—Pe'je ara jaraa erawau maraka'ywa 'ga upe— 'jau 'ga 'gā nupe.

A'erauwe 'gā ara jaraa erawau 'ga upe.

⁹ Ojeupe erurauwe maraka'ywa 'ga itykua esaka. A'ere 'ga itykure'emauwe ijemu'jagi y'wayramū, uwayramū. Maraka'ywa 'ga nokwaawi 'y jemu'jaga y'wayramū. A'ere 'ga remiayuwa 'gā ikwaawi futari. 'Ga itykura resakawe 'ga akokatu ma'e 'ga renūina.

¹⁰ —Esageay ma'ea ra'ne te 'ā y'waya neretykurukari jarejee rai'i. 'Gā itykupaw ire amunipo 'ā y'waynana rykurukaa 'gā nupe rai'i. A'ere 'ā ene y'waynana ra'ne eretykurukat 'gā nupe. Y'wayrete m'yina mapawamū itykurukaripyramū 'gā nupe rai'i— 'jau 'ga akokatu ma'e 'ga upe.

¹¹ Aipo resaka taetu ore, 'ga remimu'eramū, 'ga rerowiaa.

—Jarejuwarete 'ga pājēa futat 'ga wereko ra'e— 'jau ore arajaupe.

Kana 'jawa amunaw ipe ra'ne Jeju'i 'ga aeremiapoe'ema apo ypy ore ikue. 'Uwarete 'ga pājē resaukaa ore ikue. Aipoa amunawa 'upa Garireja ywy pe.

¹² Aipo apo re Jeju'i 'ga awau ajepeja amunaw ipe nū, Kafana'ū pe nū. 'Ga y ēē, 'ga rewirera 'gā, 'ga remimu'eramū 'jau ore arawau 'ga rupi ikue. Peu oropytawai pa nū.

Wyra me'egara 'gā mū'ēawet

(Mateu 21.12-13; Maku 11.15-17; Luka 19.45-46)

¹³ Egitu ywy awi oropyy ppy 'gā nenū'ēawer are wea'awa maraka apoawa upe iwaēm ja'wyja'wyrauwe ore arawau Jerusareg ipe. Peu ore arawau orosou Jarejuwarete 'ga mogytaaw ipe.

¹⁴ 'Ga mogytaaw ipe osouwe Jeju'i 'ga wyra me'egara 'gā nesaka. Kwaiwete wyra me'egara 'gā 'upa peu. Kwatau, karupa'mī, pykau. Mīmera 'gā ime'ega 'upa. Amumera 'gā ajemogyau 'yjepana pyri ka'aranūū mojoy'rau judeu ka'aranūū are.

¹⁵ 'Gā nesakawe Jeju'i 'ga tupaama ppyka wyra mopikawamū. A'eramū 'ga ipyu imonou imū'jāu jui. Kwatau, karupa'mī. Mīmera 'ga imonou imū'jāu jui. Ka'aranūū mojoy'ruara 'gā 'yjepana 'ga imonou imuewiwya imojerepa 'gā nui. Ka'aranūū monou imomopomopoa futat 'gā nui.

¹⁶ Pykau me'egara 'gā nupe 'ga oje'ega:

—Pe'je pykau rerawau enū'jāu. Au'je Jeruwarete 'ga mogytaawa m'yi re pykau me'egawamū— 'jau 'ga oje'ega moywrafena 'gā nupe. —Au'je Jeruwarete 'ga mogytaawa m'yi re wyra me'egawamū. 'Ga muorypawa te 'ā 'aga 'oga— 'jau 'ga 'gā nupe.

¹⁷ Aipo renupawe orojea'aramū ikwasiaripyre are. A'eramū ore 'jau arajaupe:

—Ymā te Janeruwarete 'ga ka'arana kwasiarukari 'gā nupe aipo are rakue— 'jau ore arajaupe. —“Ku'jyp. Mama'e tywera 'gā wapo enemogytaawa 'og ipe. A'eramū je temara'neramū 'gā nee. A'eramū je tejejukau enerog are”, 'jau 'ga amū ikwasiaa inuga ymā rakue— 'jau ore arajaupe.

¹⁸ A'e pype judeu 'gā 'wyria'ri 'gā 'ua oje'ega Jeju'i 'ga upe:

—Ma'eramū ene 'gā mū'jāu 'ū? Aw'yja 'gā mū'jāukaa enee ki 'ei?— 'jau 'gā 'ga upe. — Jarejuwarete 'ga emur ire aeremiapoe'ema eapo amū ore 'ga pājē mū kūi. A'e resag ire

taru'e enee 'jau: "A'jea futat 'ga 'gā mū'ēi Ku'jywa 'ga je'eg imū ra'e", taru'e enee 'jau kūi—'jau 'gā 'ga upe.

¹⁹—Aga 'oga retyg ire je imuapyra 'ara rupi etee imowyrī kūi—'jau 'ga 'gā nupe.

²⁰—Kuu. Ereapo ekoete awi nū'ū. Namuapyra 'ara rupi etee rūi 'gā 'aga 'oga apoi rakue kūi. Kwarētai seis te 'gā kwara magwawi 'aga 'oga apoupap rakue kūi—'jau 'gā 'ga upe aipo 'ga 'eramū.

²¹A'ere 'ga naoga tee rūi imome'ui 'gā nupe. 'Aga 'oga 'eramū 'ga wete are te 'ga oje'ega rerekoi.

²²A'eramū ore anure Jejuī 'ga remimu'eramū 'ga 'eawer are orojea'aramū, 'ga feraw ire ikue. "A'jea futat Jejuī 'ga imome'ui ikue", 'jau ore arajaupe. A'eramū ore Jarejuwarete 'ga je'ega rerowiaa. Jejuī 'ga 'eawera nanē ore erowiaa nū.

Jejuī 'ga jane kwaapa katu katu

²³Jerusareg ipe Jejuī 'ga kwaiwete aeremiapoe'ema apou 'Uwarete 'ga pājē mū ikue. Aipo resag ire kwaiwete 'gā 'ga rerowiaa. A'ere amumera 'gā 'ga rerowiat 'mei etee.

²⁴A'eramū Jejuī 'ga ojemogypykye'ema 'gā nee. Okwaap 'ga 'gā. Wereco tywearama 'gā 'ga ikwaapa. A'eramū 'ga ojerowiare'ema 'gā nee.

²⁵A'eramū Jejuī 'ga oporonupe'ema ee: "Ma'ja e'i sipo 'gā ajaupe?" 'jawe'em Jejuī 'ga 'gā nupe. Jejuī 'ga ae kwaapa. Aerea'awa miamū 'ga okwaap katu katu.

3

Nikutemu 'ga upe Jejuī 'ga 'eawet

¹ Poje Nikutemu 'ga 'ua oporogytau Jejuī 'ga upe. Nikutemu 'ga opytuna 'gā nupe oje'ēma'ea. Fariseua nanē 'ga nū.

² Ypytunimū Nikutemu 'ga 'ua oporogytau Jejuī 'ga upe:

—Janeruwarete 'ga 'ga amut jane mu'jawamū, aru'e ore arajaupe ene ree jepi. Janeruwarete 'ga remiayuwamū etee ae aeremiapoe'ema apoi. 'Ga remiayuwe'emamū ae nuapoa'uweri. A'eramū ore 'jau enee: Janeruwarete 'ga pājē mū futat 'ga mama'e apoi. A'eramū ore 'jau arajaupe: Janeruwarete 'ga remimurera 'ga futat ra'e, 'jau ore arajaupe—'jau Nikutemu 'ga Jejuī 'ga upe.

³ Aipo 'erauwe Jejuī 'ga 'jau 'ga upe:

—Mama'e a'jea je amome'u amū enee. 'Ga amū nipo u'aru'jape'ema. A'eramū 'ga nosea'uweri Jarejuwarete 'ga rupaw ipe awau—'jau Jejuī 'ga Nikutemu 'ga upe.

⁴ A'eramū Nikutemu 'ga 'jau:

—Maran ae kūima'eramū u'aru'japa nū ki 'ei? Maran ae waranuw ire osou awau oy reweg ipe nū ki 'ei?—'jau Nikutemu 'ga Jejuī 'ga upe aipo 'eramū.

⁵⁻⁶—Pejey awi peje'aa pēē ēē mena ra'yra futat. A'ere Janeruwarete 'ga werowiar ire te pē mogyi wa'yramū. A'eramū 'ga U'agesage mua pē nupe pēnerekwaramū. A'eramū pēē pejejemogyau u'aru'jap ma'e 'jawe. 'Ga 'Agesage rerekware'ema 'gā nu'aru'jawi—'jau 'ga Nikutemu 'ga upe.

⁷—Eneporesag awi je ree aipo ejeupe 'eramū. A'jea futat je 'i enee. E'aru'jaw iki, a'e je enee. Aipoa a'jea futat.

⁸ Sā'ā wywtua. Neresaga'uweri 'ā wywtua. Ifua etee 'ā reenup. Nerekwaawa'uweri tuawa. Nerekwaawi nanē iwawa nū. Nan tee futat Janeruwarete 'ga 'Agesagea. Neresaga'uweri 'ga 'Agesagea. Wemifutar imū etee te Janeruwarete 'ga U'agesage monoi 'gā amū nupe, 'gā mu'aru'japa nū. A'ere nenereapyoi ee—'jau Jejuī 'ga Nikutemu 'ga upe.

⁹—Maran poa ojeapou ki 'ei? Nakwaawi je ene'ea ki 'ei—'jau Nikutemu 'ga 'ga upe.

¹⁰ A'eramū Jejuī 'ga 'jau 'ga upe nū:

—Ene 'ā moromu'jara agawewi Israeu 'ga juapyrera 'gā nupe. A'etea 'ā ene jeje'ega kwaape'ema?

¹¹ Mama'e a'jea te je amome'u pē nupe. Orojemikwaawa 'ā ore oromome'u pē nupe, orojemiesaga retee. A'etea 'ā neperowiari oreje'ega—'jau 'ga Nikutemu 'ga upe.

¹²—Ywy pewara agawewi je 'ā amome'u mama'ea pē nupe. A'etea 'ā naje rerowiari pejepe. Maran sipo ajeje je rerowiat pejepe ywag ipewara mama'ea je imome'uramū?—'jau 'ga 'ga upe.

¹³—Nitywi ae ywag ipe oo ma'eferamū. Je tee te 'ā ojot ywag awi ikue. A'eramū je tejemiesagera mome'wau pē nupe. Je 'ā pēneki'yra futat.

¹⁴—Enerea'at nipo ene jareypy are? Moja a'agawa apoawer are? Ymā te janyepy 'gā atai awau jū me rakue. A'ere 'gā kwaiwete nuenuwi Jarejuwarete 'ga je'ega. A'eramū 'ga oje'ega renupare'ema 'gā u'waukaa moja upe. A'eramū Janeruwarete 'ga 'jau Moisesi 'ga upe: "Ita eapo moja a'agawamū. A'ere imonou imu'ama ikutuka 'yw are", 'jau 'ga Moisesi 'ga upe rakue. A'eramū Moisesi 'ga ita apou moja a'agawamū rakue. Aipo apo re 'ga imonou

imu'ama 'yw are rakue. A'eramū moja remiu'ufera 'gā amā'jāu aipo itamoi a'agaw are. A'eramū futat moja remiu'ufera 'gā oferapap. Namanūi futari 'gā. Nan tee futat nipo imara'ne ma'e 'gā je monoi 'ypepywar are je mu'ama— 'jau Jejuī 'ga 'ga upe.

¹⁵ —A'eramū nipo je rerowiaara 'gā juejue awau ajemogyau Jarejuwarete 'ga pyri amanū'u'jape'ema futat— 'jau Jejuī 'ga Nikutemu 'ga upe, 'ga mu'jau ojee.

¹⁶ —Janeruwarete 'ga iporomutat nanimenime pē nee. A'eramū 'gā a'eramū wa'yramū je mua 'au wyy pe ikue. Majepei tee agawewi je 'ga ra'yramū. A'etea 'ga je mut 'awa wyy pe je jukaukaa pē nupe. A'eramū je rerowiaara 'gā amanūmū numiamū. A'ere 'gā oi oferapa Jarejuwarete 'ga rupaw ipe 'ga pyri amanū'u'jape'ema futat. Peu futat 'gā jemogyi nakwaparimū ete rūi— 'jau Jejuī 'ga Nikutemu 'ga upe.

¹⁷ —Napē nereko tyweawamū rūi 'ga je muri 'au wyy pe. Pē katu'okawamū te 'ga je muri— 'jau 'ga Nikutemu 'ga upe.

¹⁸ —Jeruwarete 'ga je rerowiaaramū pē nerekou tywere'em. A'ere 'ga je rerowiare'ema 'gā nupe 'ga 'i: "Pejerekoukat tywet futat nipo", 'jau. Naje rerowiari 'gā. A'eramū 'ga aipo 'jau 'gā nupe.

¹⁹ Janeruwarete 'ga ra'yramū je tejua 'au wyy pe pē mu'jau Tejuwarete 'ga ree. A'ere pēē mū nepēporokwaawiweri 'ga ree. 'Ga remifutar are nanē pēē pejeporokwaawiwere'emamū nū. Mama'e tywera etee pēē iapou. A'eramū pēē mama'e esage are pejeporokwaawiwere'emamū. A'eramū nipo Janeruwarete 'ga aipo 'gā nerekou tyweaete 'gā manū re— 'jau Jejuī 'ga 'ga upe.

²⁰ —Mama'e tywera apoara 'gā nioweri Jarejuwarete 'ga ra'yramū je pyri. Naapoi futari je mama'e tywera. A'eramū mama'e tywera apoara 'gā ojenosōu je pyri oo awi. "Omo'gōguu je 'ga tewau 'ga pyri ne", 'jau itywet ma'e 'gā ojenosōu je wi.

²¹ A'ere mama'e esage apoara 'gā nuri Jarejuwarete 'ga ra'yramū je pyri katu katu futat. A'eramū nipo 'gā nesakara 'gā 'jau: "A'jea futat. Jarejuwarete 'ga je'ega 'gā werowiat", 'jau nipo 'gā 'gā nemiapofera resag ire— 'jau Jejuī 'ga Nikutemu 'ga upe, 'ga mu'jau ojee.

Jejuī 'ga Juā Batista 'ga imome'wau'japa

²² A'e awi Jejuī 'ga wemimu'eramū ore rerawau Judeja wyy pe nū. Peu ore oropytawaiapa. Peu futat 'ga 'gā amū pymiāu 'y pe, otywer awi 'gā pōira resaukaawamū.

²³ Juā 'ga nanē 'gā amū pymiāu akou ajepeja amunaw ipe, Enom 'jaw ipe. Enom 'jawa 'upa Salim 'jawa pyri. Peu typyu'iramū 'ya. A'eramū 'ga 'gā pymiāu akou peu.

²⁴ Moromunepawa pype amunewe'emauwe Juā 'ga 'gā pymiāu akou aipo pe.

²⁵ A'eramū Juā 'ga remimu'e 'gā amū oje'ega moywyrafena judeu 'ga amū upe. Ae pymī are 'gā ajamueu.

²⁶ A'eramū Juā 'ga remimu'e 'gā amū awau oporogytau 'ga upe:

—Enerea'at te ene ejemimome'uawera 'ga ree? Jotāu tyowajara katy 'ga rekoī ene retee rakue. 'Awamū nanē 'ga akou 'gā pymiāu 'y pe nū. A'eramū 'gā awaupap 'ga rewiri ojepymīāukaa 'ga upe. Ene rewiri ako ma'efera 'gā we futat awau ojepymīāukaru'japa 'ga upe nū— 'jau 'gā awau imome'wawayau Juā 'ga upe.

²⁷ A'eramū Juā 'ga 'jau wemimu'e 'gā nupe:

—Je nanē jerekōēāi 'ga ree nū. Sā'ā Janeruwarete 'ga je monoa je moporowykyukara ojeupe ikue. Nan tee futat 'ga Jejuī 'ga monoi imoporowykyukaa ojeupe. Ojeupe Janeruwarete 'ga ore moporowykyukare'em ire amunipo 'ā ore noroporowykyi 'ga upe— 'jau 'ga imome'wau 'gā nupe.

²⁸ —A'e je ako pē nupe ai'i: "Najarejuwarete 'ga remimurera rūi je. 'Ga renunewara te je", 'jau je ako pē nupe ai'i— 'jau Juā 'ga 'gā nupe.

²⁹ —Sā'ā aeku'ia ajuee kūjāmu ku rerekokaturamū. Nan tee futat jeku'iramū tekou 'ga ree. "Kwaiwete 'gā oi 'ga rewiri" 'e renupa jeku'iramū— 'jau Juā 'ga 'gā nupe.

³⁰ —Jejuī 'ga rewiri oo ma'e 'gā oje'me'yi kwaiwete futat. Je rewiri oo ma'e 'gā te ajee nojeme'yi futari. Jema'e 'gā ināinānī'i etee futat— 'jau Juā 'ga 'gā nupe. —Nanuara futat esage je upe— 'jau etee Juā 'ga.

Ywag awi 'ut ma'efet

³¹ Ywy pewara 'gā akotee ma'ea futat. Wemiapo'i are tee 'gā porogytai. A'ere ywag awi 'ut ma'e 'ga nanarūi. 'Ga a'jea futat 'ga kūima'eeteetea. 'Ga ree te a'jea futat ae jemogyppygaretei.

³² Ywag ipe wemiesagera ywag awi 'ut ma'e 'ga imome'wau. Wemienuwera nanē 'ga imome'wau nū. A'ere 'gā ināinānī'i etee 'ga rerowiari. Nuerowiari 'gā kwaiwetewete 'ga.

³³ 'Ga je'ega rerowiaara 'gā 'jau ajaupe:

—A'jea futat 'ga Janeruwarete 'ga je'ega kwaawukaara 'ga ra'e— 'jau 'gā ajemogyau ajaupe.

³⁴ Janeruwarete 'ga U'agesage muapap wemimurera 'ga upe. A'eramū 'ga amuarera 'ga je'ega mome'wau katu 'gā nupe.

³⁵ Janeruwarete 'ga oporomutaramū wa'ya 'ga ree. A'eramū 'ga opājē mua wa'ya 'ga upe. A'eramū 'ga 'jau:

—Tepājēa je omono teja'ya 'ga upe. A'eramū 'ga mama'e esage apou jee— 'jau 'ga.

³⁶ Janeruwarete 'ga ra'ya 'ga rerowiaara 'gā ajemogyau ipyauramū. Amanū re 'gā awau Jarejuwarete 'ga pyri. Peu futat 'gā ajemogyau namutat. A'ere 'ga je'ega renupare'ema 'gā nanarūi. Nooi futari 'gā Jarejuwarete 'ga pyri amanū re. Nuenuwi 'gā 'ga ra'ya 'ga je'ega. A'eramū nipo 'ga 'gā nerekou tyweaete wojere'emamū futat.

4

Samari pewara kūjā ēē

¹ Anure 'gā amū awau Jejui 'ga mome'wau fariseu 'gā nupe:

—Ekoay Jejui 'ga kwaiwete 'gā pymiāu 'y pe. Wemiayuwamū 'ga 'gā pymi kwaiwete— 'jau 'gā awau imome'wau fariseu 'gā nupe. —Juā 'ga 'ā kwaiwete agawewi 'gā opymī. A'ere Jejui 'ga te Juā 'ga remipymimera 'gā apyraawi— 'jau 'gā awau imome'wau fariseu 'gā nupe.

² (Na'ga rūi agawewi 'gā pymiāu 'y pe. 'Ga remimu'eramū agawewi ore 'gā pymī. A'etea 'gā 'Jejui 'ga 'gā opymī 'y pe', e'i imome'wau fariseu 'gā nupe).

³ Fariseu 'gā nupe omome'u kwaaw ire, Jejui 'ga awau Judeja wyy awi.

—Garireja wyy pe soo jarejewya 'jau nū— 'jau 'ga oree.

⁴ —A'ere jeoweramū Samari wyy pyterimū. Kwe rupi futat jarewau jarewaēma Garireja wyy pe— 'jau Jejui 'ga oree.

⁵ A'eramū ore arawau Samari wyy rupi. Arawau orowaēma amunawa mū upe. Sika 'jawa upe orowaēma. Peu ore oropytawaipe. Ymā te janeypy 'ga, Jako 'ga wyy pe monoi wa'ya 'ga upe, Jose 'ga upe rakue. Sika 'jawa 'upa aipo wyya pyri.

⁶ Peu Jako 'ga remiywykaiwera wyy kwawukuua 'ūina, 'ymuawa. Aje kwara kwawamū arawau orowaēma 'ymuawa upe. A'eramū Jejui 'ga afuakapawamū. A'eramū 'ga wapyka 'ūina 'ymuawa reme'ywarimū.

⁷⁻⁸ 'Ga pytu'uramū ore arawau amunaw ipe orojemi'urama mua.

Orojemi'urama mua ore orauwe Samari pewara ēē mū 'ua 'y piaramū. A'eramū Jejui 'ga 'jau ēē upe:

—Emut ara 'ya jee— 'jau 'ga ēē upe.

⁹ A'eramū ēē 'jau 'ga upe:

—Ma'eramū ene eje'ega jee rā, judeuramū rā?— 'jau ēē 'ga upe. —Je Samari pewara— 'jau ēē 'ga upe.

Judeu 'gā niporomutari Samari pewara 'gā nee ra'e jepi. A'eramū ēē judeu ojeupe ije'egamū aipo 'jau 'ga upe.

¹⁰ A'eramū Jejui 'ga 'jau ēē upe nū:

—“Ya emut ara jee”, a'e ako je enee ko. A'ere 'ā naje kwaawi te ape. Jarejuwarete 'ga remimurama nanē nerekwaawi nū— 'jau 'ga ēē upe. —Je kwaaw ire amunipo 'ā “Ya emut ara jee”, ere jee ra'e. 'Ya tejeupe ene enūi re amunipo je 'ā 'y monoi enee ra'e— 'jau 'ga ēē upe 'ūina. —Je remimonoa amunipo 'ā ene mogou nakwaparimū warāu rūi— 'jau 'ga ēē upe.

¹¹ Aipo ojeupe 'ga 'eramū ēē 'jau 'ga upe:

—Nenetywi 'y muawa pyu. Ikwawukuu 'ymuawa. A'eramū ene imuawa pyu etywe'emamū, maran sipo ene 'y mua jee?— 'jau ēē 'ga upe.

Naeapyoi ēē ojeupe 'ga 'e are.

¹² —Janeramyiwera kiā Jako te 'ā kūima'eeteetea ako rakue. Ymā kiā futat wyy kwawukuu wyykajukari 'ymuawamū rakue. 'Aga 'ymuawa pypewara 'ya futat kiā itykua rakue. Kiā ra'ya wā, kiā reymap. Mīmera oy'wau 'au rakue. 'Awamū kiā remiapofera orema'ea futat 'ūina— 'jau ēē 'ga upe. —“Je te jarejam'ya aapyraap”, ere te jee poromū?— 'jau ēē Jejui 'ga upe.

¹³ A'eramū Jejui 'ga 'jau ēē upe:

—Aga 'y rykuara 'gā oo o'yuweju'jawa futat nū— 'jau 'ga ēē upe.

¹⁴ —A'ere 'gā jema'e tykur ire ni'yuweju'jawi akou. Jema'ea 'ywu'ywura 'jawe tee 'ūi itykuara 'gā wyyteripe, 'gā mogyau nakwaparimū rūi futat— 'jau 'ga ēē upe. —Sā'ā 'ywu'ywura rypawe'ema. Nan futat jema'ea. Jema'ea ae mogyau namutat. Jema'ea rykur ire nene'yuweju'jawi futari— 'jau 'ga ēē upe. —Jeporoywera ene mogo nakwaparimū rūi futat— 'jau Jejui 'ga ēē upe.

¹⁵ A'eramū kūjā ēē 'jau 'ga upe:

—Ere ajee ema'e ara mua jee rā. A'eramū je te'yuweju'jawe'emamū, tejoru'jape'ema 'au 'y piaramū— 'jau ēē 'ga upe.

¹⁶ —Ere ajee ewau emena 'ga rerua 'au jee ra'ne— 'jau Jejui 'ga ēē upe.

¹⁷ Aipo ojeupe 'ga 'eramū ēē 'jau:

—Najemeni je tekou— 'jau eë 'ga upe.

A'eramū Jejuí 'ga 'jau eë upe:

—A'jea futat ere nū ī. Nenemeni futari ene nū ī.

¹⁸ Nenemenu'jau'jawi tāmējē futat ene nū ī. Nomoygi tāmējē futat siku pyu nū ī— 'jau Jejuí 'ga eë upe, aipo 'eramū. —A'jea futat 'awamū nenemeni futari. Ene pyri ako ma'e 'ga naenemena rūi futat— 'jau 'ga eë upe.

¹⁹ Aipo ojeupe 'ga 'eramū eë 'jau 'ga upe:

—Koo. Maran ene je kwaapa a'i rā? Ene futat nipo Jarejuwarete kīā je'ega mome'wara.

²⁰ Ymā te oreypya Jarejuwarete kīā muorywī 'au futat rakue. A'ere pēē judeuramū "Jerusareg ipe tee futat Jarejuwarete 'ga simuoryp", pe'je ra'e jepi— 'jau eë 'ga upe.

²¹ A'eramū Jejuí 'ga 'jau eë upe nū:

—Anure nipo 'gā 'jawe'em 'aga wvytyra upe: "Agamū futat 'ga muorypawa wvytyra", 'jawe'em futat 'gā. Jerusarega upe nanē nipo 'gā aipo 'jawe'em futat nū— 'jau 'ga eë upe.

²² —"Ore Samari pewaramū Jarejuwarete 'ga aramuoryp", 'jau pēē na'e jepi numiamū. A'ere nepekwaawi 'ga. A'ere ore judeuramū 'ga kwaawi futari. 'Ga ojekwaawukaa oree. Judeuramū 'ga ore mū mogoi ae katu'okaramū— 'jau 'ga 'ūina eë upe imome'wau.

²³ —Anure nipo Jarejuwarete 'ga muorypara 'gā 'ga muorypa a'jea futat. 'Awamuete 'gā 'ga kwaawi ramue. 'Ga 'Agesagea 'ga muorywukaa 'gā nupe. Omuorypararetea Janeruwarete 'ga wekat ojeupe— 'jau 'ga eë upe.

²⁴ —Naae 'jawe rūi Janeruwarete 'ga. Nuesaga'uweri ae 'ga. No'oi 'ga ae 'jawe. A'eramū 'ga muorypara 'gā ojeapoarukaa 'ga 'Agesage upe. A'eramū 'gā 'ga muorypa futat, 'ga kwaapa futat— 'jau 'ga eë upe.

²⁵ A'eramū eë 'jau 'ga upe:

—A'jea futat aipoa. Anure nipo Jarejuwarete kīā remimurama kīā ruri futari, Kristu kīā. Kīā futat nipo jane mueapyou mama'e are— 'jau eë Jejuí 'ga upe.

²⁶ —Je futat aipoa. Je futat Kristua. Je futat aje'eg te 'yina enee— 'jau 'ga eë upe.

²⁷ Eë upe aipo 'epawa pype ore arajua orojewya amunaw awi nū. Eë upe 'ga porogyta 'ga renamū ore oroporesagamū etee 'ga ree. Judeu 'gā noje'egarūi futari kūjā upe ra'e jepi. A'ere ore a'eramū miamū noroporonuwi ee 'ga upe: "Ma'eramū te ereporogyta e'yina eë upe?" naru'ei futari ore 'ga upe.

²⁸ A'erauwe eë awau ojewya amunaw ipe. 'Y ryrūa eë ejaa im'yina awau peuwara 'gā nupe Jejuí 'ga mome'wau.

²⁹ —Pe'je pejejua soo kīā resaka 'jau. Jerekwawera kīā omome'upap jee ko— 'jau eë peuwara 'gā nupe. —Kristu kīā ra'u 'ut 'ūina peu ko. Janeruwarete kīā remimurera kīā ra'u 'ūi peu ko— 'jau eë awau imome'wau amunaw ipewara 'gā nupe.

³⁰ A'erauwe 'gā nuri ojekyita amunaw awi 'ga resaka.

³¹ Eë o pyyauwe ore 'jau Jejuí 'ga upe:

—Kweramū janeremi'urama. Ere ejemi'waa— 'jau ore 'ga upe.

³² —Naani. Irāinā'nī te 'ā jeremi'ua. Nepekwaawi futari jeremi'ua mama'ea— 'jau etee 'ga oree.

³³ —'Ga amū sipo mama'ea werut 'ga upe pa ra'e?— 'jau etee ore arajaupe.

³⁴ A'eramū 'ga 'jau oree:

—Pēē te 'ā pejejemi'urama tywamū etee pēnekōēāi pejejemogyau. A'ere je temuarera 'ga remifutar imū mama'e apo are te jerekōēājamū. 'Ga porowyky apoupap te je ruri ikue— 'jau etee 'ga oree.

³⁵ —"Irūpāwē jay magwaw ire oreko pypiara sinigi", 'jau pēē 'ā jepi. A'ere 'awamū je 'i pē nupe: Pemā'ē pejeko are esaka. Osinig futat ra'e. A'ere je napeko arūi imome'ui pē nupe. 'Awamū futat 'gā kwaiwete je rerowiari ja'wyja'wy. 'Awamū futat 'gā je rerowiari ojeupe pēē je mome'u re. Sā'ā pēē pejeko pypiara sinigamū peoa imono'oga. Nan tee futat 'awamū iwaēmi je rerowiarukaawa upe. Pēporomuku awi pejewau je mome'wau 'gā nupe— 'jau 'ga 'ūina oree.

³⁶ —Sā'ā kojara 'ga wemiayuwa 'gā mepya. A'yī tymara 'gā 'ga 'ā imepyau imono'ogara 'gā neewe. A'eramū 'gā 'ā wekōēājamū. Nan tee futat jeremiayuwa 'gā. A'yī tymara 'gā 'jawe je mome'wara 'gā. Ko pypiara mono'ogara 'gā 'jawe je rerowiarukaara 'gā— 'jau Jejuí 'ga oree. —Najuejue etee futat nipo 'gā wekōēājamū 'ga amū je rerowiarāmū. Je rerowiaara 'gā juejue nipo awaupap ywag ipe ajemogyau Jarejuwarete 'ga pyri amanū re— 'jau Jejuí 'ga oree.

³⁷⁻³⁸ —Amono je pēē kwe pe tejerowiarukaa kwe pewara 'gā nupe ikue. A'jea futat aipo jane'ea, "Ga amū nipo awau ityma. A'ere isinig ire nipo ajepeja 'ga 'ua imono'ogaramū", 'jau jane jepi— 'jau 'ga oree. —Nan futat je pē monoi tejemome'waukaa 'gā nupe ikue. 'Gā

amū 'ā awau pē nenunewe je mome'wau 'gā nupe rai'i. A'eramū kwaiwete 'gā a'eramū je rerowiat eneje'ega anupawe ikue— 'jau 'ga oree.

³⁹ Ore upe 'ga porogytapaw ire, Samari pewara 'gā 'ua kwaiwete 'ga resaka. “Jejui kiā jerekwawera amome'u jee”, kūjā ēē 'eramū 'gā awau kwaiwete Jejui 'ga resaka, 'ga rerowiaa kwaiwete.

⁴⁰ A'eramū 'gā 'jau Jejui 'ga upe:

—Epyta 'au ore pype ra'ne, 'jau 'gā 'ga upe.

A'eramū ore oropytau 'gā pyri. Mukūi etee orosea.

⁴¹ 'Gā pype akou Jejui 'ga ojemome'wau 'gā nupe. A'eramū tekotee 'gā nanē 'ga rerowiaa kwaiwete nū.

⁴² A'eramū 'gā 'jau kūjā ēē upe:

—Eneje'ega ra'ne ako ore aruerowiat ai'i. A'ere ore 'awamū 'ga je'ega rerowiari. Oje-mome'u 'ga oree— 'jau 'ga ēē upe. —“Ga futat 'ā ae katu'okara”, 'jau ore jepi— 'jau 'gā ēē upe.

Oje'eg imū etee 'ga katu'okawet

⁴³ Mukūi oloser ire ore arawau Garireja ywy pe nū.

⁴⁴ Jejui 'ga retea futat 'jau ikue: “Sā'ā Janeruwarete 'ga je'ega mome'wara 'ga oa kwe pe 'ga je'ega mome'wau. A'eramū 'ā kwe pewara 'gā jēmī erowiaa. A'ere 'ā 'ga 'wyr ipewara 'gā jēmī nuerowiari 'ga. 'Ga pytuna 'gā miāmū 'ā 'ga rerowiare'ema ajemogyau”, 'jau 'ga ikue.

⁴⁵ A'eramū ore arawau Garireja ywy pe nū, Jejui 'ga ywy pe nū. 'Ga resakawe pewara 'gā wekōēājamū ajemogyau. 'Gā nanē awau Jerusareg ipe maraka magwapa rai'i. Peu 'gā Jejui 'ga remiapofera resaka rai'i. A'e resakarera 'gā wekōēājamū ajemogyau oywy pe 'ga resakawe.

⁴⁶ Kana 'jawa amunaw ipe, Garireja ywy pype 'up ma'e pe, ore arawau orojewya nū. Peu futat 'ga 'y mu'jaga y'wayramū ai'i. A'e pe ore rekoramū 'wyriara 'ga remiayuwa 'ga 'ua Jejui 'ga renūina.

—Ejot jera'yra 'ga resaka jee— 'jau 'ga 'ua Jejui 'ga upe.

'Ga upe 'ut ma'e 'ga ra'yra futat ojero'wu ete 'upa, tapojete 'upa ajepei amunaw ipe 'upa, Kafanaū pe 'upa.

⁴⁷ “Judeja ywy awi Jejui 'ga ruri ojewya akou 'au nū” 'e renupawe ta'yjero'wu ma'e 'ga awau Kana 'jaw ipe Jejui 'ga poreawua:

—Ejot jera'yra 'ga resaka jee. Tapojete 'ga 'upa. Amanū ja'wyja'wy 'ga. A'eramū ene ejua 'ga resaka jee— 'jau 'ga Jejui 'ga upe.

⁴⁸ A'eramū Jejui 'ga 'jau:

—Aeremiapoe'ema apo resag ire tāmējē te je rerowiat pejepe. Je iapoe'emamū neper-owiari futari— 'jau 'ga 'gā nupe.

⁴⁹ A'ere ta'yjero'wu ma'e 'ga 'iu'jawi etee futat Jejui 'ga upe nū:

—Ere ejua futat je rupi jera'yra 'ga manūe'emauwe— 'jau etee 'ga 'ga upe.

⁵⁰ Aipo 'eramū Jejui 'ga oje'ega 'ga upe:

—Ere ewau ejewya eje'wyr ipe. Namanūi futari enera'yra 'ga— 'jau 'ga ta'yriara 'ga upe.

Aipo ojeupe 'eramū 'ga Jejui 'ga rerowiaa. A'eramū 'ga awau ojewya wa'yra 'ga resaka.

⁵¹ 'Ga waw ipe 'ga remiayuwa 'gā 'ua 'ga rowosōu.

—Namanūi futari enera'yra kūi. Ijaruete 'ga ai'i kūi— 'jau 'gā 'ga upe.

⁵² Aipo 'ga 'eramū ta'yriara 'ga oporonupa ee 'gā nupe:

—Ma'ape kwara kwawamū 'ga ajarueteramū rai'i ki 'ei?— 'jau 'ga 'gā nupe.

—Aje kwara kwawamū futat ai'i— 'jau 'gā 'ga upe.

⁵³ A'eramū 'ga ikwaapa:

—Aje kwara kwawamū futat Jejui 'ga 'i jee ai'i— 'jau 'ga Jejui 'ga mome'wau wemiayuwa 'gā nupe.

A'eramū ta'yriara 'ga Jejui 'ga rerowiaa nanimenime opytuna 'gā netee.

⁵⁴ Aiporamū futat Jejui 'ga aeremiapoe'ema apou'japa ikue. Garireja ywy pewara 'gā nupe ra'ne 'ga 'y mu'jaga y'wayramū ikue. A'ere 'ga poromū 'wyriara 'ga remiayuwa 'ga ra'yra majarueteu 'gā nupe nū. Judeja ywy awi 'ur ire 'ga aipo apou Garireja ywy pewara 'gā nupe ikue.

5

Iteu ma'e 'ga

¹ Anure Jejui 'ga awau Jerusareg ipe nū. Judeu 'gā maraka apou peu. A'eramū Jejui 'ga awau maraka apo resaka.

² Jerusarega ojeosōu futat. Kwaiwete iosoma rokware. Iosoma rokware mū rupi 'gā karupa'mī rerawau. A'eramū 'gā karupa'mī okwat 'jau jupe. Aipo okwara pyri 'yupawu'ia

mũ 'upa. Judeu 'gã aipo 'yupawu'ia renũina, Peseta 'jau jupe. Iywyri tapÿi'ia ajemogyau, siku tapÿja ajemogyau iywyri.

³ Aipoa tapÿja 'wyr ipe futat 'gã ojero'wu ma'e 'gã majatykau erua. Eae'em, ika'na ma'e, iteu ma'e. Mĩmera 'gã 'gã imajatykau, 'gã katu'okawa rapesaka 'gã nerua imogyau tapÿja 'wyr ipe. Kwaiwete 'gã 'upa ipesaka peu.

⁴ 'Yryjuapirauwe ipyriwara 'gã 'jau ajaupe:

—Ywagipewara 'ga nipo kwe 'ut 'y motyjuapiau jã'nũ— 'jau 'gã ajaupe.

Tyjuapi ypyrauwe ojero'wu ma'e 'gã awau ojemunepa 'y pe ajemogyau. A'ere ipype ose ypy ppy ma'e 'ga etee 'ga jekatu'ogi.

⁵ Iteu ma'e 'ga amũ 'ũina peu namutat. Trĩtai oito 'ga kwara magwapa oteuramũ 'ũina. A'ere 'ga nojekatu'og ymani.

⁶ Poje Jejui 'ga awau peu. A'eramũ Jejui 'ga 'ga resakawe 'jau ojeupe: “Ymã we te 'ga teuramũ rakue pa”, 'jau 'ga ojeupe. A'eramũ 'ga 'jau 'ga upe:

—Erefutat te je ekatu'oga?— 'jau Jejui 'ga 'ga upe.

⁷ —ËË. Afutat futat je tekatu'oga nũ'ũ— 'jau 'ga 'ga upe. —Naje poari'i 'gã amũ ki 'ei. 'Y ryjuapirauwe je rerawawe'em je munepe'ema 'y pe ki 'ei— 'jau 'ga 'ga upe 'ũina. —'Y repejãn je orauwe 'gã amũ na'ne 'gã oi je renunewe opo 'y pe jepi— 'jau 'ga 'ga upe 'ũina imome'wau.

⁸ A'eramũ Jejui 'ga 'jau 'ga upe:

—Efu'am ejupaw awi. Efu'am ejupawa pyyka erawau eruatau. Akatu'ok je ene 'awamũ— 'jau 'ga iteu ma'e 'ga upe.

⁹ Aipo ojeupe 'erauwe iteu ma'e 'ga ojekatu'oka. A'eramũ 'ga afu'ama wupawa pyyka erawau eruatau.

Judeu 'gã morowykye'ema rupi Jejui 'ga 'ga katu'ogi.

¹⁰ A'eramũ judeu 'gã 'wyrria'ri 'gã 'jau 'ga upe:

—'Awamũ morowykye'ema. Ejupawa kasi ereroo ne. “Mama'e rerooa ae porowykya futat”, e'i 'ã janeypya rakue— 'jau 'gã wupawa 'ga erooramũ.

¹¹ A'eramũ 'ga 'jau 'gã nupe:

—Je katu'okara 'ga, “ejupawa epyyk erawau eruatau”, e'i 'ga jee ko— 'jau 'ga 'gã nupe.

¹² —Awÿja te aipo e'i enee ra'e?— 'jau 'gã 'ga upe.

¹³ A'ere 'ga nokwaawi 'ga. 'Ga katu'oka ypy we Jejui 'ga oi mytuna 'gã wyterimũ. Kwaiwete ajatyka ma'e 'gã peu. A'eramũ Jejui 'ga 'ga katu'oka ypy we awawayayau ojepe'au 'ga wi.

¹⁴ A'ere Jejui 'ga iteu ma'efera 'ga resaka nũ, Jarejuwarete 'ga mogytaaw ipe nũ.

—Erejekatu'ok futat 'awamũ. Au'je ki mama'e tywera apo re— 'jau 'ga 'ga upe. —Kasi mama'e tywera jeapoi enee ne, kwaiwete enee ne— 'jau 'ga 'ga upe.

¹⁵ A'eramũ ikatu'ogipyrera 'ga awau Jejui 'ga mome'wau judeu 'gã 'wyrria'ri 'gã nupe:

—Jejui 'ga je katu'ok ko— 'jau 'ga awau 'gã nupe.

¹⁶ Morowykye'ema rupi Jejui 'ga 'ga katu'oka. A'eramũ judeu 'gã Jejui 'ga rerekou tyweramue morowykye'ema rupi ae katu'ogamũ.

¹⁷ —Jeruwarete 'ga mama'e esage wapo ae upe au'jeteramũ. A'eramũ je nanẽ aipo apou nũ— 'jau 'ga 'gã nupe.

¹⁸ Aipo ojeupe 'ga 'eramũ 'gã amara'neramũ 'ga ree.

—Sijuka 'ga 'jau. Morowykye'ema rupi 'ga porowykyi akou, 'gã katu'oka awau kwe pe— 'jau 'wyrria'ri 'gã ajaupe. —Morowykye'ema rupi oporowyky re 'ã 'ga aipo 'jau wẽjẽmĩ nũ. “Ku'jywa 'ga Jeruwaretea”, 'jau 'ga 'ã 'ga upe nũ— 'jau 'gã ajaupe. —“Je 'ã Ku'jywa 'ga 'jawe”, 'jau wẽjẽmĩ aipo 'ga janee nũ. Aipo taetu itywetywet— 'jau 'gã ajaupe amara'neramũ 'ga ree.

'Uwarete 'ga je'eg imũ etee mama'e apoawet

¹⁹ A'eramũ Jejui 'ga 'jau 'gã nupe nũ:

—A'jea futat je 'i. Je 'ã Ku'jywa 'ga ra'yra futat. Nateje'eg imũ rũi je mama'e apoi. 'Ga je'eg imũ etee te je mama'e apoi. 'Ga remiapoa je aesak. A'eramũ je nanẽ aipo apou 'ga 'jawe nũ— 'jau 'ga 'gã nupe.

²⁰ —Jeruwarete 'ga ipromutat nanimenime je ree. A'eramũ 'ga wemiapo resaukaa jee. A'eramũ je tewau ojero'wu ma'e 'gã katu'oka. Ae katu'oga esage futat. A'ere je anure mama'e esageay apoi futari tejuwa 'ga remifutar imũ. A'eramũ nipo pẽẽ pejeporesagamũ pejejemogyau ee— 'jau 'ga 'gã nupe.

²¹ —Amanũ ma'efera 'gã nipo Jeruwarete 'ga imũ'jãu imowywya tywy awi 'gã mogyau nũ. 'Ga 'jawe futat je tejemimũ'ẽ 'gã mogyau— 'jau 'ga 'gã nupe.

²² —NaJeruwarete 'ga rũi pẽ mojo'ok. 'Ga te 'ã pẽ mojo'ogukaa jee. A'eramũ nipo je ia'wyre'ema 'gã nupe 'jau: “Pẽẽ nepẽa'wyri. Mama'eukwaawa rapyaw ipe pekwap”, 'jau nipo je ia'wyre'ema 'gã nupe. Tejerowiaara 'gã nupe nipo je 'jau: “Je rowiat pejepe ra'e. A'eramũ je pẽtywera moia pẽ nũ. Pe'je pejejua 'au ore pyri”, 'jau nipo je tejerowiaara 'gã

nupe. Mímera 'gã nupe nipo je 'jau, je retea futat. Jeruwarete 'ga nipo je mu'eukaa 'gã nupe— 'jau Jejuí 'ga 'gã nupe.

²³—A'eramü nipo aipo are 'gã najuejue etee je pojeupa. 'Awamü 'gã Jeruwarete 'ga pojeuwi. A'eramü 'gã, 'ga 'jawe futat, je pojeupa nü. Je pojeupare'ema 'gã nanë Jeruwarete 'ga nopojeuwi futari, je muarera 'ga— 'jau Jejuí 'ga 'gã nupe.

²⁴—A'jea futat je 'i. Jeje'ega rowiaara 'gã ojemomyau jeje'eg imü. Je muarera 'ga nanë 'gã erowiaa nü. Tejerowiarayauramü je 'gã mogyau namutat. A'eramü 'gã najuejue etee futat awau akou Janeruwarete 'ga pyri amanü re. Na'gã nupe rüi je 'i: “Enetywerete Ku'jywa 'ga upe” 'jau. Natata pe oo ma'e 'gã nü ore rowiaara. Ywag ipe oo ma'e tee aipo 'gã— 'jau Jejuí 'ga 'gã nupe.

²⁵—A'jea futat je 'i. Je te 'ä Ku'jywa 'ga ra'yra. Amanü ma'e 'jawe futat mama'e tywera apoara 'gã. A'etea nipo 'gã anure jeje'ega wanup akou. 'Awamü futat 'gã enuwi. Jeje'ega renuw ire te nipo 'gã jemogyí oferapa— 'jau 'ga 'gã nupe.

²⁶—Nitywi 'ga amü Ku'jywa 'ga mogoaramü. Ojetee futat 'ga jemogoi. A'eramü 'ga ae nanë ae mogyau nü. Je nanë nü. Je Ku'jywa 'ga ra'yra. A'eramü 'ga ae mogyaukaa jee— 'jau 'ga 'gã nupe.

²⁷—Je futat 'ä pëneki'yra. A'eramü Jeruwarete 'ga 'jau jee: “Ene 'ä 'gã neki'yra. A'eramü ene 'gã mojo'oka. Itywet ma'e 'gã nupe ki ere: Pëtywerete pëë Ku'jywa 'ga upe, 'jau. Tata pe pekwap, 'jau ki ene 'gã nupe”, 'jau 'ga jee. “Ejerowiaara 'gã nupe ki ere: Je rerowiat 'ä pejepe. A'eramü pëë pejejua ywag ipe ore pyri, 'jau ki ene ejerowiaara 'gã nupe”, 'jau 'ga jee— 'jau Jejuí 'ga 'gã nupe.

²⁸⁻²⁹—Pëporesag awi je ree. A'jea futat je 'i. Anure nipo amanü ma'efera 'gã we jeje'ega renupawe 'gã nuri ü'jäu tywy awi. Mama'e esage apoara 'gã nipo awau ywag ipe Jarejuwarete 'ga pyri. Mama'e tywera apoarera 'gã nupe nipo je 'jau: “Naje rerowiari futari pejepe. Nepëpouriwari futari pejetywer awi. A'eramü pëë 'awamü pejekwapa tata pe”, 'jau nipo je 'gã nupe— 'jau Jejuí 'ga 'gã nupe.

³⁰—Nateje'eg imü rüi je mama'e mome'ui. Ku'jywa 'ga je'eg imü tee je 'i. 'Ga ra'ne 'ä oje'eg jee. A'eramü je 'ga 'eawera rupi etee futat imome'wau pë nupe. Natejemifutar imü rüi je je'egi. Ku'jywa 'ga, temuarera 'ga remifutar imü etee te je je'egi— 'jau Jejuí 'ga 'gã nupe. —Ma'eramü je 'ä a'jea futat mama'e mome'ui tekou pë nupe— 'jau 'ga 'gã nupe oporogytau.

³¹—Je tee tejemome'u re taetu amunipo 'ä naje rerowiari pejepe— 'jau 'ga 'gã nupe.

³²—A'ere nanarüi. 'Ga amü nanë je mome'wau nü. Ku'jywa 'ga je mome'wau. A'jea futat 'ga 'i— 'jau 'ga 'gã nupe.

³³—Awamueuu pëë 'gã amü monou 'ga moporogytaukaa Juá Batista 'ga upe rai'i nü. 'Ga remimome'ua a'jea futat.

³⁴—A'ere je naekari futari “a'jea futat 'ga 'ea” 'jara 'gã. Juá 'ga 'eawera je amome'u pë nupe tejerowiarukaawamü. Tejerowiar ire je pë katu'ogi— 'jau Jejuí 'ga 'gã nupe.

³⁵—Sã 'ä tataran'ña mama'e resaukara ae upe. Nan tee Juá 'ga. Juá 'ga pë mueapyou je ree. 'Ga 'eawer are pënekõëäi numiamü— 'jau Jejuí 'ga 'gã nupe.

³⁶—Juá 'ga ra'ne je mome'u pë nupe. A'ere je pënemiapoe'ema apoi pë neape. Jeruwarete 'ga aipo apoukaa jee. A'eramü pëë 'jau: “A'jea futat. Ku'jywa 'ga 'ga muri janee”, 'jau pëë jeremiapofera resag ire— 'jau Jejuí 'ga 'gã nupe.

³⁷—Jeruwarete 'ga nanë je mome'u nü, je muarera 'ga. Nepeesaga'uweri 'ga. 'Ga je'ega miamü futat nipo nepekwaawi pejeapyou.

³⁸—“Je 'ä 'ga remimurera”, 'jau agawewi je 'ä pë nupe. A'ere 'ä aipo je'ea miamü neperowiari. A'eramü pëë 'ga je'eg are taetu pejejea'are'emamü pejejemogyau— 'jau 'ga 'gã nupe.

³⁹—Jarejuwarete 'ga je'ega rerekwara ka'aran are pejejemu'jau. “Aipo are jarejeapy-oramü jane oi ywag ipe jarepytau”, 'jau 'ä pëë na'e jepi. 'Gã amü 'ä ka'arana kwasiaa agawewi je ree.

⁴⁰—A'etea 'ä pëë je rerowiare'ema. Je upe pëë 'jawe'em, “Ore mogy ape eje'jawe”, 'jawe'em 'ä pëë jee— 'jau Jejuí 'ga 'gã nupe.

⁴¹—“Esage ma'e 'ga”, pe'je ki jee, na'ei je pë nupe. “Je muooryp ki pejepe”, 'jawe'em je 'ä pë nupe.

⁴²—A'ere je pë kwaawi. “Niporomutari pa 'gã Ku'jywa 'ga ree ra'e”, 'jau je 'ä pë nupe— 'jau Jejuí 'ga 'gã nupe.

⁴³—Tejuwarete 'ga je'eg imü agawewi je ruri. A'etea jeje'ega nepeenuwi futari. A'ere anure nipo tekotee 'ga amü ruri oje'eg imü etee futat oje'ega pë nupe. A'ea nipo peanup, erowiaa pejejemogyau— 'jau 'ga 'gã nupe u'ama.

⁴⁴—Akotee ma'e 'gã “ga esage”, pejejeupe 'gã 'eramü nipo pejeku'iramü futat pejejemogyau. A'ere nipo nepënea'ari pejejeupe Ku'jywa 'ga 'e are. Ku'jywa 'ga etee te

Janeruwaretea. Nirüi futari 'ga. A'etea nipo nepënea'ari pejejeupe Ku'jywa 'ga 'e are. A'jea futat neperowiari 'ga— 'jau Jejuu 'ga 'gã nupe.

⁴⁵—Naje rüi pëtywera mome'u Ku'jywa 'ga upe. Moisesi 'ga te 'ã pëtywera mome'u 'ga upe— 'jau 'ga 'gã nupe. —“Moisesi 'ga je'egera ore aruenu. A'eramü 'ga ore mome'wau Ku'jywa 'ga upe”, 'jau pëë numiamü. A'jea futat 'ga pë mome'ui Ku'jywa 'ga upe. A'ere 'ga pëtywera tee imome'ui 'ga upe— 'jau 'ga 'gã nupe.

⁴⁶—Moisesi 'ga remikwasiarera rerowiar ire amunipo 'ã je nanë je rerowiari pejepe nü. Moisesi 'ga ka'arana okwasiat je ree futat rakue.

⁴⁷A'ere 'ã 'ga remikwasiarera neperowiari pejemogyau. A'eramü pëë je rerowiare'ema futat pejemogyau— 'jau Jejuu 'ga 'wyrria'ri 'gã nupe.

6

Kanape'i me'yitawet

(Mateu 14.13-21; Maku 6.30-44; Luka 9.10-17)

¹⁻⁴ Anure Jejuu 'ga ore rerawau ore reroyaapa Garireja ry owajara katy. Tiperia 'jau nanë 'gã aipo ypiauu upe. Egitu ywy awi oreypy renü'ëawer are wea'awa maraka apoawa upe iwaëm ja'wyja'wyräuwe ore arawau oroyaapa. Kwaiwete 'gã awau ore rewiri. 'Gã nemiapoe'ema Jejuu 'ga iapou 'gã neape. Ojero'wu ma'e 'gã 'ga ikatu'oka. A'eramü 'gã awau 'ga rewiri, kwaiwete.

—Siesak 'ga iapou'jawa jarejeape— 'jau 'gã ajaupe.

Ty owajara upe orowaëmawe ore arawau orojeupia wyty'ri rupi Jejuu 'ga rupi. Peu ore aruapyka arajupa.

⁵ Oree Jejuu 'ga porogyta 'ga renamü mytuna 'gã 'ua owaëma oree nü. Poje Jejuu 'ga ojerowaka 'gã nesaka. 'Gã nesakawe 'ga 'jau Filipe 'ga upe:

—Maran maran te jane mama'e muri 'gã mojem'i'wawamü?— 'jau Jejuu 'ga 'ga upe.

⁶ “Tamojem'i'wat 'gã 'jau”, 'jau Jejuu 'ga ojeupe. A'eramü 'ga poromü 'jau “Ma'ja 'i sipo Filipe 'ga oje'ega jee?” 'jau 'ga ojeupe.

⁷—Kuu. Mytuna 'gã nü'ü. 'Gã nemi'urama murawa niapoi 'gã nupe. Tusëtu agawewi futat ka'aranüü rerooi. A'etea nowaëmi futari mama'e muawamü 'gã nupe— 'jau Filipe 'ga 'ga upe, aipo ojeupe 'eramü.

⁸⁻⁹ A'eramü Andre 'ga 'jau 'ga upe:

—Koromü kunumü 'ga kanape'i rekeoi wemi'ura'minamü numiamü küi. Siku kanape'ia muküi pira'i 'jau 'ga erekou numiamü küi. A'ere mytuna 'gã nupe niapoi nü'ü— 'jau Andre 'ga Jejuu 'ga upe.

Aipoa Andre 'ga Simão Pedro 'ga rewirera. Jejuu 'ga remimu'e nanë 'ga nü.

¹⁰ A'eramü Jejuu 'ga 'jau oree:

—Pe'je pejewau 'gã muapyka. Peapyk, e'i 'ga, pe'je ki 'gã nupe— 'jau 'ga oree.

A'eramü ore arawau 'gã muapyka. Kwaiwete juo'wia peu. A'eramü ore a'e 'arimü 'gã muapyka 'gã mogyau. Kwaiwete küima'e 'gã. Siku miu küima'e 'gã.

¹¹ A'eramü Jejuu 'ga kunumü 'ga remi'urama pyyka enafu'ama, eroje'ega 'Uwarete 'ga upe:

—Au'jete mama'ea eremut oree. Ene 'ã eneresage oree— 'jau 'ga 'Uwarete 'ga upe oje'ega.

A'eramü 'ga 'Uwarete 'ga upe oje'ëmau ire kunumü 'ga remi'urama erawaukaa oree 'gã nupe. Ore 'gã nupe omonorauwe ojeme'yita aipoa kanape'ia ipira'i reewe. A'eramü ore erawau imonou wapyk ma'e 'gã nupe.

¹² Kwaiwete agawewi 'gã. A'etea 'gã omoyk. Wewegamü 'gã jui.

'Gã jemi'wapaw ire Jejuu 'ga 'jau oree nü:

—Pe'je pejewau emyrera rerua imono'oga yrü pype. Pemomy kasi emyrera ne— 'jau 'ga oree.

¹³ A'eramü ore arawau emyrera rerua ijaga yrü pype. Tusi yrupemüüa ore imatyneema emyrera pyu. Aipo kanape'i apopyra sewata.

¹⁴ Jejuu 'ga wemi'u me'yita opäjë mü. A'eramü aipo resakara 'gã 'jau:

—Jejuu 'ga 'ã ome'yi janee. 'Ga te nipo 'ã Jarejuwarete 'ga je'ega mome'wara. Janeremias-pesaga 'ga nipo 'ã— 'jau 'gã ajaupe.

¹⁵ A'ere Jejuu 'ga 'gã kwaawi ojee. “Je futat 'gã je mogou 'wyrriaramü”, 'jau 'ga ojeupe. “A'ere je na'awauwe rüi je reko'i 'gã nupe”, 'jau 'ga ojeupe. A'eramü 'ga awau ojepe'au ore wi. Ore rejaa peu futat. Ojeteë 'ga awau ojeupia wytyra rupi.

'Yrajape 'arimü Jejuu 'ga ataawet

(Mateu 14.22-33; Maku 6.45-52)

¹⁶ Ypytu'ninauwe Jejuu 'ga remimu'eramü ore arawau oroypa ypiauu pe nü.

¹⁷ “Pe'je pejewau 'aw awi Kafanaü pe”, 'jau 'ga oree ai'i. A'erawe ore arawau aru'aa yaruu pype nü.

—Soo Kafanaū pe 'jau— 'jau ore arajaupe.
A'eramū ore arawau oroyaapa nū. Ypytunimūwe futat ore arawau. A'ere Jejuī 'ga nuri ore rupi.

¹⁸ Poje ywytuua 'ua erujewi oree, 'y muorypa ore ree.

¹⁹ Mukuu ore wawa. Siku kilometro ore arawau oroyaapa. Poje ore 'y rypyter ipe arakou Jejuī 'ga resaka. Jejuī 'ga 'ua akou 'y rajape 'arimū, watau ore katy. 'Ga resakawe ore oropifuakare'emamū. Orekyjea ore rerekou, ore pifuaka'roka.

—Ma'ja katu nipo kwe kweramū 'ut 'ja?— 'jau ore arajaupe.

²⁰ Aipo ore 'eramū 'ga 'jau oree:

—Pekyje awi je wi. Je tee ojut pē newiri— 'jau Jejuī 'ga oree.

²¹ Aipo orojeupe 'gā 'eramū araku 'iramū 'ga ree.

—Ere ejua e'aa ore pype— 'jau ore 'ga upe.

Ore pype 'ga 'arauwe yaruua ojekoka erujewi ywy'am are.

Mytuna 'gā Jejuī 'ga rekaa

²² Ai'we kwe katy opyta ma'e 'gā Jejuī 'ga rekaa.

—Kaaruwamū ako majepi tee yara ruwi 'au ai'i. A'ere ako Jejuī 'ga remimu'e 'gā erooi ai'i— 'jau 'gā ajaupe. —A'ere nipo 'ā 'ga ma'ja pype katu 'ga oi 'gā newiri ra'e? Nooi 'ga 'gā nupi ai'i. Marupi ajee 'ga oi ra'e ki 'ei?— 'jau 'gā 'ga rekaa. —Ma'ape sipo ajee 'ga oi ra'e?— 'jau 'gā ajaupe.

²³ 'Gā 'ga rekaramū tekotee 'gā 'ua ojekoka ajepaja amunaw awi oyaruu pype. Tiperia 'jaw awi 'gā 'ua owaēma. Kanape'i 'waw ipe 'gā oyaruu mojekoka. Peu futat Jejuī 'ga porogytai 'Uwarete 'ga upe ai'i. Oporogytapaw ire Jejuī 'ga kanape'i monou 'gā nupe ai'i.

²⁴ 'Gā jekog ire 'yisiga pypewara 'gā 'jau 'gā nupe:

—Nitywi 'ga 'au. 'Ga remiayuwa 'gā nanē nitywi 'au nū— 'jau 'gā 'gā nupe. —Pēyara pype soo 'gā nekaa Kafanaū pe 'jau— 'jau 'gā 'gā nupe.

—Nai'i— 'jau yaruū jara 'gā aipo 'gā nupe.

Kanape'i 'jawewat

²⁵ Ty owajara katy ojekog ire 'gā Jejuī 'ga resaka. A'eramū 'gā 'jau 'ga upe:

—Maran te erejot rai'i, ki Ku'jyp?— 'jau 'gā 'ga upe.

²⁶ A'eramū Jejuī 'ga 'jau 'gā nupe:

—Nepēneapyoi we jeremiapofera are. "Jejuī 'ga 'ā Jarejuwarete 'ga remimurera", pe'je amunipo 'ā jee rai'i, jeremiapofera resag ire rai'i. Kwaiwete agawewi 'ā jeremiapofera. A'etea 'ā naje rerowiarī pejepe. Kaaruwamū ako je kanape'i me'yi pē nupe ai'i, pē mueweka ai'i. Aipo are nipo je rekat pejepe— 'jau 'ga 'gā nupe.

²⁷ —Pēpy'a'wyt kasi pejejemi'u are etee ne. Pēnea'at kasi pejejemi'u are etee ne. Pēnemi'ua pē mueweka 'au etee. A'ere mama'e mū rekoī temi'u 'jawe pē pype. A'ea pē mogy nakwaparimū rūi. Jeje'ega renuw ire pejejemomyau. Jeje'eg are ki pēnea'at pejejemogyau. Janeruwarete 'ga je mut 'au aeremi'u 'jawewara monoukaa pē nupe jee— 'jau Jejuī 'ga 'gā nupe. —Ku'jywa 'ga 'ā Jeruwaretea. Opājē mū 'ga 'ā pēnemiapoe'ema apoukari jee, pē nupe je resaukaawamū. "Jejuī 'ga jera'yraretea. Je 'ā 'ga mua pē nupe", 'jau 'ga 'ā pē nupe jee— 'jau Jejuī 'ga 'gā nupe.

²⁸ A'eramū 'gā 'jau 'ga upe:

—Ma'ja te Ku'jywa 'ga afutat ore iapoa?— 'jau 'gā 'ga upe.

²⁹ —Je 'ā 'ga remimurera. A'eramū ki pēē je rerowiaa. A'ea te 'ga amaku'i— 'jau 'ga 'gā nupe aipo 'eramū.

³⁰ —Ma'ja te ereapo epājē resaukaa oree? Aipo resakawe taruerowiat ene 'jau— 'jau 'gā 'ga upe.

³¹ —Ymā te janepyoi oi watau amunawe'em ipe rakue. Peu wataaw ipe 'gā kanape'i 'jawewara 'wau rakue, mana 'jawa 'wau rakue. Aipo are 'ga amū ka'arana kwasiaa inuga janee rakue. "Kanape'i 'ga amut ywag awi 'gā nemi'uramamū rakue", 'jau 'ga ikwasiaa inuga janee rakue. Moisesi 'ga aipo kanape'i monou 'gā nupe rakue. Ma'ja te eremut jareje 'awamū?— 'jau 'gā Jejuī 'ga upe.

³² A'eramū Jejuī 'ga 'jau 'gā nupe:

—A'jea futat je'ea. NaMoisesi 'ga rūi kanape'i omono 'gā nupe rakue. Jeruwarete 'ga te 'ā amut 'gā nupe rakue. 'Awamū 'ga poromuriweramū kanape'irete 'jawewar are pē nupe.

³³ 'Ga remimurera futat aipoa kanape'i 'jawewara. Ywag awi 'ga 'ga muri ae mogyaukaa nakwaparimū rūi futat— 'jau 'ga 'gā nupe.

³⁴ A'eramū 'gā 'jau 'ga upe:

—Aipoa emut ekou oree— 'jau 'gā 'ga upe.

³⁵ A'eramū Jejuī 'ga 'jau 'gā nupe nū:

—Tejeupe je aipo je 'i. Je te 'ã 'ga remimurera. Tejerowiar ire je pê momyau pê mogyau namutat. Je rerowiaaramũ pênekõëai pejejemogyau. Ipy'araypare'ema 'jawe, i'yuweje'ema 'jawe 'jau— 'jau 'ga 'gã nupe.

³⁶ —“Je resak agawewi 'ã pejepe pejejemogyau. A'etea pêë je rerowiare'ema pejejemogyau”, a'e ako je pê nupe ko.

³⁷ Jeruwarete 'ga je rerowiarukaa 'gã amũ nupe. A'eramũ nipo 'gã je rerowiaa futat. Namonoi futari je tejerowiaara 'gã amũ tejewi.

³⁸ Natejemifutara apou rũi je ruri ywag awi. Temuarera 'ga remifutara apou etee je ruri— 'jau Jejuí 'ga 'gã nupe.

³⁹ —A'eramũ je tejerowiaara 'gã momoirukare'ema tejerowiar awi. Tejerowiarukaa 'gã nupe. A'eramũ je 'gã mũ'jãu tywy awi 'gã mowywya 'gã mogyau tejua nũ. Aipoa je aapo futat 'ga remifutar imũ— 'jau Jejuí 'ga 'gã nupe.

⁴⁰ —Tejerowiaara 'gã juejue nipo je imonou tejemiayuwamũ. A'eramũ je tejeru'japa tejerowiaara 'gã mowywya 'gã mogyau nakwaparimũ warãu rũi. Aipoa Jeruwarete 'ga afutat— 'jau Jejuí 'ga 'gã nupe.

⁴¹ Aipo 'erauwe judeu 'gã oje'egaiwamũ 'ga ree:

—Kuu. “Ywag awi 'urete ma'ea je 'ã. Aeremi'uretea je”, e'i 'ga 'ã janee— 'jau 'gã ajaupe.

⁴² —Najose 'ga ra'yra rũi te 'ga jepi? Naaipo rũi te Jejuí 'ga ako? 'Ga jara 'gã ore orokwaap. Ma'eramũ gatú nipo 'ã 'ga 'i poromũ “ywag awi je ruri”, 'jau ekoete?— 'jau 'gã ajaupe.

⁴³ A'eramũ Jejuí 'ga 'jau 'gã nupe:

—Au'je ki je ree pejeje'egaiw ire.

⁴⁴ Jeruwarete 'ga te 'gã nupe je rerowiarukaara. 'Gã etee te je rerowiararũ. Tejerowiaara 'gã etee te je amũ'ë tywy awi 'gã mogyau nũ tejeru'japa— 'jau 'ga 'gã nupe.

⁴⁵ —Ymã te Janeruwarete 'ga je'ega mome'wara 'ga ka'arana kwasiari inuga 'ga je'eg are rakue. “Janeruwarete 'ga tamu'e 'gã najuejue etee 'jau”, 'jau 'ga ikwasiaa inuga rakue— 'jau Jejuí 'ga 'gã nupe. —Amu'eramũ Jeruwarete 'ga je'ega renupara 'gã juejue je rerowiari.

⁴⁶ Nitywi 'ga amũ Jeruwarete 'ga resakara 'ga. Je tee te 'ga aesak. 'Ga wi je ruri ikue. A'eramũ je 'ga resaka— 'jau Jejuí 'ga 'gã nupe.

⁴⁷ —A'jea futat je'ea. Tejerowiaara 'gã je amomyau imuesageu imogyau nakwaparimũ warãu rũi futat.

⁴⁸ Ywag awi te 'ga kanape'i muri pê nupe rakue, a'e je akiko. Je te 'ã aipoa. Je te 'ã amogy pêë nakwaparimũ warãu rũi.

⁴⁹ Ymã te 'ã pêypya mana 'jawa 'ui akou amunawe'em ipe rakue. A'ere 'ã po 'u re 'gã manũ etee rakue— 'jau 'ga 'gã nupe.

⁵⁰ —Awamũ ako Janeruwarete 'ga kanape'irete muri ywag awi ai'i. Aipo 'u re ae namanũ futari.

⁵¹ Je te 'ã aipoa kanape'ia. Ywag awi 'ut ma'ea te 'ã je. Je rerowiaara 'gã aipoa kanape'i 'wara 'jawe futat. 'Awamũ kanape'i 'waramũ pejemogy futat. A'ere je rerowiaara 'gã jemogyi namutat. Aipoa kanape'i 'jawewara jero'oa futat. Tejo'oa tomono pê nupe 'jau, pênemí'uramamũ 'jau. Anure nipo je temanũmũ namutat pê mogyukari. Temanũawa 'ara rupi je tejo'oa monoi pê nupe— 'jau 'ga 'gã nupe.

⁵² Aipo ojeupe 'erauwe judeu 'gã amara'neramũ 'ga ree. A'eramũ 'gã oje'egayau ajaupe:

—Maran sipo 'ga poromũ wo'o muri janee, janeremi'uramamũ?— 'jau 'gã ajaupe.

⁵³ —A'jea futat je'ea. Jero'o 'ware'emamũ nepejemogyi namutat. Jerya nanë nũ. Jerya tykuare'emamũ nepejemogyi je pyri.

⁵⁴ Jero'oa nipo 'gã amũ i'wau, jerya retee. 'Gã etee futat nipo ajemogy a'jea futat. A'eramũ je tejeru'japa 'gã mowywya— 'jau 'ga 'gã nupe.

⁵⁵ —Jero'oa nipo aeremi'urama a'jea futat jerya retee.

⁵⁶ Jero'oa 'gã amũ i'wau jerya retee. 'Gã etee futat je rerekou. Je nanë 'gã nerekou nũ— 'jau Jejuí 'ga 'gã nupe.

⁵⁷ —Jeruwarete 'ga 'ã okoeteete ma'ea. 'Ga 'ã je mut. 'Ga 'ã je mogou. Nan tee futat je tejo'oa 'wara 'gã mogyi— 'jau 'ga 'gã nupe.

⁵⁸ —Koromũ kanape'ia. Ywag awi 'ut ma'ea futat. Pëypy 'gã 'ã mana 'jawa a'u akou rakue. A'ere 'ã 'gã manũ etee rakue. Koa kanape'i 'wara 'gã te nipo ajemogyau namutat— 'jau 'ga 'gã nupe.

⁵⁹ Aiporamũ futat Jejuí 'ga 'gã mu'ei ojee 'gã jatykaaw ipe. Kafanaũ pe 'ga 'gã mu'jau.

Jejuí 'ga rerowiaara 'gã jemogy

⁶⁰ Aipo renupawe Jejuí 'ga rewiri oo ma'e 'gã 'jau ajaupe:

—Kuu. Janereapyoa'nei jane aipo are ra'e nũ'ũ. Nikwaapawi 'ga je'ega ra'e nũ'ũ. Sirowiar awi nũ'ũ— 'jau 'gã ajaupe.

⁶¹ Noje'egi agawewi 'gã 'ga upe. A'etea Jejuí 'ga aipo 'gã 'ea okwaap. A'eramũ 'ga 'jau 'gã nupe:

—Aipo are nipo pẽmara'ne je ree?

⁶² Je te 'ã pẽneki'yra. Ma'ja 'jau sipo pẽẽ ywag ipe jejeupira resaka nũ? Pe awi futat je ruri—'jau 'ga 'gã nupe.

⁶³ —Janeruwarete 'ga 'Agesagea te pẽ mogy. Naae rũi ojomogy. Jeje'ega renuw ire te Janeruwarete 'ga 'Agesagea pẽ monoi 'ga remiayuwamũ pẽ mogyau namutat.

⁶⁴ A'ere 'ã naje rerowiari pejepe— 'jau 'ga 'gã nupe.

Jejuí 'ga 'gã kwaapa. Ymã we 'ga werowiare'ema 'gã kwaawi akou rakue. A'eramũ 'ga ia'wrye'ema 'gã nupe omonoara 'ga kwaapa futat akou.

⁶⁵ —Pẽẽ mü jeje'ega rerowiare'emamũ pejemogy. A'eramũ je 'jau pẽ nupe akiko: “Jeruwarete 'ga je rerowiarukaa 'gã amũ nupe. 'Gã etee futat nipo je rerowiaa”, 'jau ako je pẽ nupe ko— 'jau Jejuí 'ga 'gã nupe.

⁶⁶ A'eramũ 'ga rewiri oo ma'e 'gã oporenuwiwere'emamũ 'ga je'eg are ojewya 'gã wi kwaiwete. Noou'jawi 'gã 'ga rewiri.

⁶⁷ A'eramũ Jejuí 'ga 'jau wemimu'eramũ oree:

—Pẽẽ nanẽ te pẽjewyriwet je wi nũ?— 'jau 'ga oree.

⁶⁸ A'eramũ Simão Pedro 'ga 'jau 'ga upe:

—Awýja rewiri ore arawau nũ ki 'ei? Ene tee te 'ã ore mu'e ape ore jemogy are. Eneje'ega rerowiaaramũ te 'ã ore mogyi namutat.

⁶⁹ Aruerowiar ore ene. Ene kwaaparamũ 'ã ore. Ene rerowiaaramũ 'ã ore rekoi. “Ga te 'ã Janeruwarete 'ga remimurera. 'Ga te 'ã esageay ma'ea”, aru'e ore enee jepi— 'jau Pedro 'ga 'ga upe.

⁷⁰ —Amũ'ẽ je pẽẽ 'gã nui, tejemimu'eramũ. Tusi 'ã pẽẽ— 'jau Jejuí 'ga oree. —A'ere pẽẽ mü mama'eukwaawa 'wryiara remiayua peko amũ— 'jau 'ga oree.

⁷¹ Aipo ore upe 'jau 'ga Judas 'ga upe te 'ga 'i numiamũ. Judas 'ga Simão Iskariote 'ga ra'yra. Judas 'ga Jejuí 'ga remimu'ea agawewi. A'etea 'ga Jejuí 'ga monou ia'wrye'ema 'gã po pe 'ga jukaukaa 'gã nupe.

7

Jejuí 'ga rewirera 'gã nuerowiari 'ga

¹ Anure Jejuí 'ga awau watau Garireja wyy pype etee. Judeja wyy pe 'ga awawe'em. “Judeja wyy pewara 'gã ifuwet je juka are”, 'jau 'ga ojeupe. A'eramũ 'ga peu awawe'em.

² A'ere maraka apoawa upe iwaẽmi ja'wyja'wy.* Aipo maraka upe 'gã tapýi apou oseawamũ. A'eramũ 'gã 'jau tapýi 'jawa maraka 'jau jupe.

³ A'eramũ Jejuí 'ga rewirera 'gã 'jau 'ga upe:

—Ere ki ekwapa Judeja wyy pe. A'eramũ peuwara 'gã, ene rewiri oo ma'e 'gã netee eneremiapoa resaka 'jau.

⁴ Ajaupe ojekwaawukaa ae mama'e apoi ajueape. A'eramũ ene ewau aeremiapoe'ema apou 'gã neape, ejesaukaa 'gã nupe— 'jau 'gã 'ga upe, 'ga rerekoemãu.

⁵ 'Ga rewirera 'gã miamũ nuerowiari 'ga.

⁶ —Naani. Nowaẽmi we je wawa upe. A'eramũ je tewawe'em. A'ere pẽẽ peoarũ je renune.

⁷ Napẽ nee rũi Janeruwarete 'ga rerowiare'ema 'gã amara'neramũ ajemogyau. Je ree tee 'gã mara'neramũ. 'Gã tywera je 'ã amome'u 'gã nupe. A'eramũ 'gã 'ã oporomutare'emamũ je ree— 'jau 'ga rewirera 'gã nupe.

⁸ —Pe'je pejewau maraka pe. Nooa'nei je— 'jau 'ga 'gã nupe.

⁹ A'eramũ Jejuí 'ga opytau peu futat, Garireja wyy pe.

Jejuí 'ga awau maraka pe

¹⁰ Maraka apoaw ipe wewirera 'gã o re Jejuí 'ga awau wewirera 'gã newiri. A'ere 'ga oi jemime, ojetee'i akou 'gã newiri.

¹¹ Judeu 'gã 'wryia'ri 'gã Jejuí 'ga rekaa. Maraka apoaw ipe 'gã 'ga rekaa ajemogyau.

—Ma'ape te 'ga? Nuri te 'ga ra'e?— 'jau 'gã ajaupe 'ga rekaa.

¹² Kwaiwete 'gã ajamueu Jejuí 'ga ree. Amumera 'gã 'jau ajaupe:

—Esage ma'ea futat 'ga— 'jau 'gã ajaupe.

Amumera 'gã:

—O'meramũ 'ga 'i. Nia'wryi 'ga. I'me 'ga akou— 'jau etee 'gã ajaupe.

¹³ A'ere 'gã nueropori futari oje'ega. 'Gã kyjea 'gã nerekou. 'Wryia'ri awi 'gã kyjei. A'eramũ 'gã oje'ega meewere'i etee ajemogyau ajaupe.

* 7:2 Jerusareg ipe 'gã maraka wapo jepi. Jerusarega 'upa Judeja wyy pype futat.

¹⁴ Majepeja tee 'gā morowykye'ema magwapa maraka apou. Muapyra oser ire, Jejuu 'ga awau osou Jarejuwarete 'ga mogytaaw ipe. A'eramū futat 'ga peuwara 'gā mu'jau.

¹⁵ Jejuu 'ga je'ega renupawe, judeu 'gā 'wyrīa'ri 'gā oporesagamū ajemogyau 'ga ree.
—Maran 'ga aipo kwaapa ki 'ei? Nojemu'euui agawewi te 'ga 'ā a'i kūi. A'etea te 'ga 'ā okwaap aipoa a'i kūi— 'jau 'gā ajaupe.

¹⁶ A'eramū Jejuu 'ga 'jau 'gā nupe:
—Nateje'eg are rūi je 'gā mu'jau. Temuarera 'ga je'eg are futat je 'gā mu'ei— 'jau 'ga 'gā nupe.

¹⁷ —Jarejuwarete 'ga remifutar imū mama'e apoara 'gā te'i 'jau: “A'jea futat. Jarejuwarete 'ga je'eg are futat 'ga ore mu'jau. Noje'eg ekoetei 'ga”, te'i 'gā jee 'jau— 'jau Jejuu 'ga 'gā nupe.

¹⁸ —Oje'eg ekoete ma'e 'gā “tajepojeuwukat 'gā nupe”, 'jau 'gā numiamū. A'ere Jarejuwarete 'ga rer imū oje'eg ma'e 'gā nanarūi. “Jarejuwarete 'ga tapojeuwukat 'ga 'gā nupe 'jau”, 'jau 'gā. Aipo 'gā 'ea a'jea futat— 'jau 'ga 'gā nupe.

¹⁹ —Ymā te Moisesi 'ga ka'arana kwasari Jarejuwarete 'ga je'eg are rakue. A'ere nepeenuwi'i futari 'ga je'ega. 'Ga je'ega renuw ire amunipo 'ā pejefuwere'emamū je ree— 'jau Jejuu 'ga 'gā nupe.

²⁰ —Kuu. Mama'eukwaawa aipo ene mu'eukat. Aw'ya sipo a'eramū ifuwet ene ree?— 'jau ajatyka ma'e 'gā 'ga upe.

²¹⁻²² —Morowykye'ema rupi je aeremiapoe'ema apoi. A'e resakawe 'ā pēē 'jau: “Ma'eramū 'ga nanuara apou morowykye'ema rupi ra'e ki 'ei?” 'jau 'ā pēē. A'ere 'ā pēē nanē futat peapo mama'ea morowykye'ema rupi— 'jau 'ga 'gā nupe. —Ymā te 'ā Moisesi 'ga 'i pē nupe rakue: “Majepeja etee ki morowykye'ema pemagwap. A'ere pejeja'ya 'ga rerawau imojewagukaa”, 'jau 'ga 'ā ikwasiaa inuga rakue. A'eramū morowykye'ema rupi pejeja'ya 'ar ire iko morowykye'ema rupi pejeja'ya rerawau imojewaka. A'ere naMoisesi 'ga rūi pē mu'e ppy aipo are rakue. Pēypy 'gā na'ne futat pē mu'e aipo are rakue. A'ere Moisesi 'ga 'jau rakue nū.

²³ 'Ga je'eg imū 'ā pēē pejeja'ya 'ga mojewaka morowykye'ema rupi. Aipo apo re 'ā ma'eramū ajee je ree pēmara'ne pejejemogyau morowykye'ema rupi kūima'e 'ga amū katu'ogamū?— 'jau Jejuu 'ga 'gā nupe.

²⁴ —Mama'e tywera etee 'ā ereapo ekou, pe'je 'ā jee. Au'je aipo 'e re. Pēneapyo ra'ne ki jeremiapo are. Jeremiapo are pejejeapyo re te mama'e a'jea 'ga wapo, pe'je jee— 'jau 'ga 'gā nupe.

Janeruwarete 'ga remimuret

²⁵ Jejuu 'ga resaka Jerusareg ipewara 'gā 'jau ajaupe:

—Na'ga ree rūi nipo jane'wyrīara 'gā afuweramū ki sa?— 'jau 'gā ajaupe.

²⁶ —Esak 'ga 'ama 'ga porogytaa janee. A'ere 'gā noje'egayi 'ga upe. “Jarejuwarete 'ga remimurera 'ga futat”, e'i te ra'u 'gā 'ga upe nū?— 'jau 'gā amū ajaupe.

²⁷ A'ere amumera 'gā 'i:

—NaJarejuwarete 'ga remimurera rūi 'ga. Nitywi ae amū Jarejuwarete 'ga remimurera 'ga ruawera kwaapara mū. A'ere jane Jejuu 'ga ruawera kwaawi. Garireja wyy awi futat 'ga ruri— 'jau 'gā ajaupe.

²⁸ A'ere Jejuu 'ga oje'ega momoa 'gā nupe nū. 'Uwarete 'ga mogytaaw ipe akou 'ga oje'ega 'gā nupe:

—A'jea'jea futat sipo je kwaap pejepe? A'jea futat sipo je ruawera pekwaap? Nateje'eg imū rūi je ruri. Temuarera 'ga je'eg imū tee je ruri. 'Ga te 'ā mama'e a'jea etee futat omome'u. A'ere nepekwaawi 'ga.

²⁹ 'Ga wi futat je ruri. 'Ga futat 'ā je muarera. A'eramū je 'ga kwaapa futat— 'jau 'ga u'ama 'gā nupe.

³⁰ Aipo 'ga 'e 'ga 'amamū 'gā 'ga pyyg are afuweramū numiamū. A'ere 'gā noppygi 'ga. Nowaēmi we 'ga pyykawa upe. A'eramū Janeruwarete 'ga 'ga pyygukare'ema 'gā nupe.

³¹ A'eramū 'gā kwaiwete 'ga rerowīaa. A'eramū 'gā 'jau ajaupe:

—Au 'ur ire 'ā Janeruwarete 'ga remimurera 'ga aeremiapoe'ema apoi, 'ga pājē resaukaa janee. Jejuu 'ga 'ā nanuara wapo jepi. A'eramū 'ga futat 'ga remimurera ra'e— 'jau 'gā ajaupe, Jejuu 'ga rerowīaa.

³² Aipo renuw ire fariseu 'gā 'jau mainana 'wyrīara 'gā nupe:

—Soo 'ga pyygukaa jefaruu 'gā nupe 'jau— 'jau 'gā 'gā nupe.

A'eramū 'gā jefaruu 'gā monou Jejuu 'ga pyygukaa numiamū.

³³ A'e pype Jejuu 'ga oporogytau akou wenupara 'gā nupe:

—Pē pype je pytaaiwi etee. Anurenure'i je oi tejewya temuarera 'ga pyri nū.

³⁴ A'eramū nipo pēē je rekaa. A'ere nipo naje resagi pejepe. Nepeoa'uweri je waw ipe. Nepekwaawi je wawa piara— 'jau 'ga 'gā nupe.

³⁵ A'eramũ judeu 'gã 'wyrria'ri 'gã 'jau ajaupe:

—Ma'ape te 'gã oi poromũ? Ma'ape te jane niesagi 'ga? Judeue'ema 'gã 'wyrarete pe te ra'u 'ga oi nũ? Janepytuna 'gã kwasi'ofera 'gã pyri te ra'u 'ga oi nũ?— 'jau 'gã ajaupe. —Judeue'ema pypewara 'gã pyri nũ? Judeue'ema 'gã mu'jau te ra'u 'ga oi nũ?

³⁶ Maran ajee poromũ 'ga 'i ki 'ei: “Naje resagi pejepe”, 'ga 'i ki 'ei. “Nepeoa'uweri je waw ipe”, 'ga 'i ki 'ei— 'jau 'gã ajaupe.

³⁷ Majepeja morowykye'ema poromukuran 'gã maraka apou. Maraka apo maapawa 'ar esagea 'gã nupe. Aipo 'ara rupi Jeju 'ga afu'ama oje'ega momoa 'gã nupe:

—Pẽ'yuwei te pẽẽ mũ? A'eramũ pẽẽ i'yuwei ma'eramũ pejejua je pyri. Mama'ea tomono pẽ nupe pẽnemi'uramamũ 'jau— 'jau 'ga 'gã nupe.

³⁸ —Aipo are janyepya ka'arana kwasiari rakue. “Je rerowiaara 'gã pype 'y 'jawewara tujãn 'gã wywyterimũ 'jau”, 'jau 'gã ikwasiaa Jarejuwarete 'ga je'ega rerekwara ka'aran are rakue— 'jau 'ga 'gã nupe. —Aipoa 'y 'jawewara 'gã mu'jaga Janeruwarete 'ga remiayuwamũ. A'eramũ itykuara 'gã ajemogyau namutat— 'jau Jeju 'ga 'gã nupe.

³⁹ 'Uwarete 'ga 'Agesage upe 'ga poromũ 'jau. A'ere Jeju 'ga 'ga 'Agesage muri werowiaara 'gã nupe, 'gã nerekwaramũ. A'ere aipo 'eramũ nuri we Janeruwarete 'ga 'Agesagea 'gã nupe. Jeju 'ga nojewyri we 'Uwarete 'ga pyri. A'eramũ Jeju 'ga 'ga 'Agesage mure'ema we werowiaara 'gã nupe.

⁴⁰ Aipo renupawe 'gã amũ 'jau:

—A'jea futat. 'Ga Jarejuwarete 'ga je'ega mome'wara ra'e— 'jau 'gã ajaupe.

⁴¹ Amumera 'gã 'jau:

—'Ga 'ã Jarejuwarete 'ga remimurera— 'jau 'gã ajaupe.

A'ere tekotee 'gã 'i ajaupe:

—Garireja wyy awi sipo Jarejuwarete 'ga remimurera 'ga ruri?— 'jau 'gã ajaupe.

⁴² —Janepyy 'gã 'ã ka'arana okwasiat Jarejuwarete 'ga remimurama 'ga ree rakue: “Davi 'ga juapyrera futat Jarejuwarete 'ga remimurama 'ga. Perẽi me nipo 'ga 'ari, Davi 'ga jeupawer ipe”, 'jau 'gã ikwasiaa inuga janee rakue— 'jau 'gã 'gã nupe.

Nokwaawi wejue 'gã Jeju 'ga 'aawera. Perẽi me futat 'gã 'ari rakue. A'ere 'gã nokwaawi te 'ga.

⁴³ A'eramũ 'gã amũ Jeju 'ga rerowiaa. A'ere amumera 'gã nuerowiari 'ga.

⁴⁴ 'Gã amũ oporopygyiwaramũ 'ga ree. A'ere 'gã nopygyi 'ga.

Judeu 'gã 'wyrria'ri 'gã

⁴⁵ 'Ga je'ega renuw ire jefaruu 'gã awau ojewya amuarera 'gã nupe. A'eramũ mainana 'wyrriara 'gã 'jau 'gã nupe, fariseu 'gã netee:

—Ma'eramũ te neperuri 'ga oree?— 'jau 'gã 'gã nupe.

⁴⁶ A'eramũ 'gã 'jau amuarera 'gã nupe:

—Naruanuwi ore 'ga amũ je'ega 'ga 'jawe jepi— 'jau 'gã awau amuarera 'gã nupe.

⁴⁷ —Pẽẽ nanẽ nipo 'ga pẽ morytee rai'i nũ? Pẽ nupe nanẽ nipo 'ga jerowiarukari rai'i nũ? — 'jau 'gã 'gã nupe.

⁴⁸ —Fariseuramũ te ore mũ 'ga rerowiari ra'e nũ? Jane'wyrria'ri 'gã amũ te werowiat 'ga ra'e nũ?— 'jau 'gã 'gã nupe. —Naani.

⁴⁹ 'Auwara 'gã 'ga werowiat kwaiwete. A'ere 'gã Moisesi 'ga remikwasiarera nokwaawi. A'eramũ nipo Janeruwarete 'ga 'gã momapa etee— 'jau fariseu 'gã jefaruu 'gã nupe.

⁵⁰ Aipo 'gã nupe 'e re Nikutemu 'ga oje'ega 'gã nupe. Fariseu 'ga amũ Nikutemu 'ga. Ypytunimũ Jeju 'ga upe oporogyta ma'efera 'ga poromũ. Aipo 'ga 'jau 'gã nupe:

⁵¹ —Ymã te Moisesi 'ga ka'arana kwasiari inuga janee rakue. “Naaipo kũima'e 'ga je'ega renupa rũi 'ã 'nia'wryi 'ga', pe'je ekoete 'ga upe”, 'jau Moisesi 'ga ikwasiaa inuga rakue— 'jau Nikutemu 'ga 'gã nupe. —A'eramũ jane 'ga je'ega renupe'emawe “Nia'wryi 'ga”, 'jawe'em 'ga upe— 'jau 'ga 'gã nupe.

⁵² —Kuu. Enejekoty'aawa te 'ga? Garireja wyy awi te erejot 'ga 'jawe?— 'jau 'gã aipo 'ga 'eramũ. —Ikwasiaripyer are ejemu'e. A'eramũ ene ikwaapa. Nuri futari Jarejuwarete 'ga je'ega mome'wara mũ Garireja wyy awi— 'jau etee 'gã Nikutemu 'ga upe.

⁵³ Oporogytapaw ire 'gã okwasi'wau awau oje'wyr ipe nũ.

8

Kũjãmene'ema eẽ

¹ 'Gã kwasi'opaw ire Jeju 'ga awau wytyr ipe. Oriweira 'jaw ipe 'ga awau osea.

² Ai'iwetetewe Jeju 'ga awau osou Jarejuwarete 'ga mogytaaw ipe. 'Ga serauwe peuwara 'gã 'ua ajatykau 'ga ree. A'eramũ 'ga wapyka 'ũina 'gã mu'jau 'Uwarete 'ga ree.

³ 'Gã mu'e 'ga renamũ Moisesi 'ga remikwasiarer are moromu'jara 'gã 'ua fariseu 'gã netee kũjã ãẽ mũ rerua erosou. Omene'em are ãẽ rekoĩ. A'eramũ 'gã ãẽ pyyka ãẽ rerua ãẽ mafu'amukaa 'gã nowase.

⁴ A'eramũ 'gã 'jau Jejui 'ga upe:

—Koa kũjã ãẽ oko omene'em are ko. A'eramũ ore ãẽ pyyka ãẽ rerua esaukaa enee, ki Ku'jyp— 'jau 'gã Jejui 'ga upe.

⁵ —Ymã te Moisesi 'ga ka'arana kwasiari inuga aipo are rakue: “Pejuka ki omene'em are oko ma'ea kũjã”, 'jau 'ga ikwasiaa inuga rakue. “Ita ki pemomot imonou aipo apoara akag are ijukau”, 'jau Moisesi 'ga ikwasiaa inuga rakue— 'jau 'gã.

A'eramũ 'gã 'jau Jejui 'ga upe:

—Ma'ja ere te jupe?— 'jau 'gã Jejui 'ga upe.

⁶ —Siesak 'ga je'ega amuteea te 'jau. 'Ga je'eg amuteeramũ “nuenuwi 'ga Moisesi 'ga je'egera ra'e”, sa'e 'ga upe 'jau, 'ga mome'wau 'wyrria'ri upe 'jau— 'jau 'gã ajaupe, kũjã ãẽ rerua 'ga upe.

Aipo ojeupe 'eramũ Jejui 'ga wããpyramũ 'ũina ywy kwasiaa ofã mũ.

⁷ A'ere 'gã nopigi futari aipo 'jau 'ga upe. A'eramũ 'ga 'gã pige'emamũ wowowyrãmũ 'gã nee, amã'jãu 'gã nee. A'eramũ 'ga 'jau 'gã nupe:

—Mama'e tywera apoare'emamũ ra'ne pemomot ita ãẽ ree, ãẽ jukau— 'jau 'ga 'gã nupe.

⁸ Aipo 'e re 'ga wããpyramũ nũ. A'eramũ futat 'ga 'ũina ywy kwasiaa ofã mũ nũ.

⁹ Aipo ojeupe 'ga 'e re 'ga pyriwara 'gã awau 'ga wi mapeinume. Sawa'e 'gã na'ne futat awaupap tenune 'ga wi. A'ere kunumũũ 'gã awaupap. A'eramũ 'gã ãẽ rejaa ãẽ tee'i ãẽ mu'ama Jejui 'ga rowase.

¹⁰ 'Gã o re Jejui 'ga wowowyrãmũ ãẽ ree nũ, oje'ega ãẽ upe:

—Ma'ape ajee ene ree ifuwet ma'e 'gã? Nopytai te 'ga amũ ra'e?— 'jau 'ga ãẽ upe.

¹¹ —Naani kĩĩ— 'jau ãẽ 'ga upe.

—Je miamũ naereko tyweri ene. Ere ewau. Ereapou'jap kasi mama'e tywera ne— 'jau 'ga ãẽ upe.

'Ara renyfuga 'jawewat

¹² Aipo re Jejui 'ga 'jau peuwara 'gã nupe nũ:

—Je te 'ã ywy pewaramũ pẽ nupe 'ara renyfuga 'jawewaramũ. Sã'ã jane 'ara kujaurauwe mama'e resaga. Nan tee futat je Jarejuwarete 'ga kwaawukaa pẽ nupe. Jeje'ega renupara 'gã nokoa'uweri ppytunaiwa pype. “Nakwaawi je Jarejuwarete 'ga remifutara”, 'jawe'em. Jeje'ega renupara 'gã Jarejuwarete 'ga remifutara okwaapap. 'Ara kujau pype futat 'gã nekoĩ— 'jau 'ga 'gã nupe.

¹³ A'eramũ fariseu 'gã amũ 'jau 'ga upe nũ:

—Kuu. Ejee futat nipo ajee ereporogyta. Natekotee 'gã nũi ene mome'u 'awamũ oree. Ejeje'eg ekoete etee 'ã ekou oree— 'jau etee 'gã 'ga upe.

¹⁴ A'eramũ Jejui 'ga 'jau 'gã nupe nũ:

—A'jea futat. Je jemome'ui pẽ nupe. A'ere je mama'e a'je are tee futat je je'egi. Nepekwaawi futat jeruawera. Je wawa nanẽ pẽẽ ikwaape'ema nũ. A'ere je ikwaawi tejuawera. Tewawa nanẽ je ikwaapa nũ— 'jau 'ga 'gã nupe.

¹⁵ —Pejuesak 'ã pejemogyau. Nepejokwaawi futari. A'eramũ pẽẽ 'jau ekoete pejemogyau, “Nenea'wyrri futari”, 'jau ekoete pejejaupe. A'ere je aipo na'ei pẽ nupe.

¹⁶ Aipo 'e re amunipo 'ã a'jea futat je'ea. Najetee rũi amunipo 'ã aipo a'e pẽ nupe. Jeruwarete 'ga we futat amunipo 'ã aipo e'i pẽ nupe. Jeruwarete 'ga je muarera— 'jau Jejui 'ga 'gã nupe.

¹⁷ —Ymã te 'ã 'ga amũ ka'arana kwasiari inuga pẽ nupe rakue: “Mukũja 'gã nipo oje'ega aju 'jawe etee futat 'eramũ ki sirowiat 'gã”, 'jau 'ga ikwasiaa rakue.

¹⁸ Je 'ã ajemome'u pẽ nupe. Jeruwa 'ga nanẽ 'ã je mome'wau pẽ nupe nũ. 'Ga 'ã je muarera— 'jau Jejui 'ga 'gã nupe 'ũina.

¹⁹ —Ma'ape ajee eneruwa 'ga ki 'ei?— 'jau 'gã aipo 'ga 'eramũ 'ga upe.

—Naje kwaawi 'ã pejepe. Jeruwa 'ga nanẽ 'ã pẽẽ ikwaape'ema nũ. Je kwaaw ire amunipo 'ã pekwaap 'ga— 'jau 'ga 'gã nupe.

²⁰ Aipoa Jejui 'ga imome'wau 'Uwarete 'ga mogytaaaw ipe 'gã nupe 'gã mu'jau. 'Ga mogytaaawa pype ka'aranũũ ppykawa 'upa. A'e pype judeu 'gã ka'aranũũ monou Jarejuwarete 'ga upe. Aipo pyri Jejui 'ga 'gã mu'jau 'ũina. 'Ga pyyg are 'gã amũ afuweramũ numiamũ. A'ere nowaẽmi we 'ga ppykawa upe. A'eramũ 'gã 'ga ppyke'ema.

Jejui 'ga ojemome'wau 'gã nupe

²¹ A'eramũ Jejui 'ga 'jau 'gã nupe:

—Anure nipo je oi 'aw awi. Je rekat nipo pejepe numiamũ. A'ere nipo naje resaga'uweri pejepe. Anure nipo peramanũ amũ pejetywera. A'eramũ nipo pêê pejewawe'em je waw ipe— 'jau 'ga 'gã nupe.

²² A'eramũ judeu 'gã 'wyrriari 'gã 'jau ajaupe:

—Ma'eramũ sipo 'ga aipo 'jau nũ 'wei? Ma'ape sipo 'ga oi? Ojejuka te ra'u 'ga nũ?— 'jau 'gã ajaupe. —Ma'eramũ sipo 'ga 'i poromũ “Nepeoa'uweri je waw ipe”, 'jau nũ 'wei?— 'jau 'gã ajaupe.

²³ A'eramũ aipo 'gã 'eramũ Jejui 'ga 'jau 'gã nupe nũ:

—Pêê 'awa wypywera futat. A'ere je na'auwara rui. Ywag awi je ruri. A'eramũ je mama'e tywer are tejea'are'emamũ.

²⁴ A'eramũ je ako aipo 'jau pê nupe ko: “Peramanũ nipo pejetywera”, 'jau je ako pê nupe ko. Ajemome'u je ako pê nupe ko. Je rerowiare'ema peramanũ futat pejetywera— 'jau 'ga 'gã nupe.

²⁵ —Ma'jaramũ ene ki 'ei?— 'jau 'gã 'ga upe.

—Ymã we te ako je jemome'ui pê nupe ikue. Aipo je'ea a'jea futat.

²⁶ Pênekoarũ'e'ema pê nupe imome'u re amunipo 'ã je a'jea futat imome'wau pê nupe, “Nepêa'wyrri futari te 'ã”, 'jau amunipo 'ã je pê nupe. Je muarera 'ga mama'e a'jea tee omome'u. Tejeupe 'ga remimome'ufera etee te je amome'u wypywaramũ pê nupe— 'jau 'ga 'gã nupe.

²⁷ 'Uwarete 'ga upe 'ga 'i, “Je muarera 'ga”, 'jau. A'ere 'gã naeapyoi 'ga je'eg are aipo 'ga 'eramũ.

²⁸ A'eramũ Jejui 'ga 'jau 'gã nupe nũ:

—Je 'ã pêneki'yra. 'Ypeywar are je mu'am ire nipo pêneapyo je ree. “A'jea futat 'ga 'i. Janeruwarete 'ga je muarera, 'ga 'i rai'i”, 'jau nipo pêê jee. “A'jea futat 'ga nuapoi mama'ea oje'eg imũ etee futat. 'Uwarete 'ga omu'e are futat 'ga jane mu'ei rai'i”, 'jau nipo pêê jee— 'jau Jejui 'ga 'gã nupe.

²⁹ —Je muarera 'ga ako je pyri etee futat namutamutat. 'Ga muorypawa etee je mama'e apou jepi. A'eramũ 'ga akou je pyri etee futat— 'jau 'ga 'gã nupe.

³⁰ Aipo 'ga 'e 'ga renamũ kwaiwete 'gã 'ga rerowiaa.

Abraão 'ga juapyret

³¹ A'eramũ Jejui 'ga 'jau werowiaara 'gã nupe:

—Jeje'ega rerowiar ire pêê jeremiyuwa futat.

³² A'jea futat je Jarejuwarete 'ga mome'ui. Aipoa jeje'ega renuparamũ pêê na'wyrriara tywera remiyuwa 'jawe rui pejemogy— 'jau Jejui 'ga 'gã nupe. —Sã'ã 'wyrriara tywera wemiyuwa rereko tyweretea. Aipo 'wyrriara remiyuwa 'jawe 'ã pejemogy rakue. A'ere a'jea futat je 'i Jarejuwarete 'ga ree. Aipo kwaaw ire pejememũ'jãu pejemogyau aipoa 'wyrriara tywera remiyuwa 'gã nui— 'jau Jejui 'ga 'gã nupe.

³³ A'eramũ 'gã 'jau 'ga upe:

—Ma'eramũ te aipo ere ore ki 'ei? Na'wyrriara tywera remiyuwa rui ore. Ore 'ã Abraão 'ga juapyrera te. Na'gã amũ nemifaja rui 'ã ore arajemogy— 'jau 'gã 'ga upe.

³⁴ A'eramũ Jejui 'ga 'jau 'gã nupe nũ:

—A'jea futat je'ea. Mama'e tywera apoara 'gã juejue mama'e tywera remifaja futat. 'Gã tywera 'gã nerekou.

³⁵ Wemifutar imũ nipo 'gã 'wyrriara 'ga wemifaja 'gã monou ojewi. A'ere nipo aipoa 'wyrriara 'ga wa'yra 'ga nomonoi futari ojewi.

³⁶ Je te 'ã Jarejuwarete 'ga ra'yratea futat. Pê katu'og ire je pê mũ'ëi mama'e tywera apoara 'gã nui. A'eramũ te nipo pejetywer awi pêneatee— 'jau 'ga 'gã nupe.

³⁷ —Abraão 'ga juapyreramũ pêê numiamũ. A'etea 'ã je juka are pêfuewet. Nepefutari jeje'ega.

³⁸ Tejeupe tejuwa 'ga remimome'ua tee je 'ã amome'u pê nupe. A'etea 'ã mama'e apou pejejuwa pejemu'eawer imũ etee rai'i— 'jau 'ga 'gã nupe.

³⁹ A'eramũ 'gã 'jau:

—Abraão 'ga juapyreramũ ore— 'jau 'gã 'ga upe.

—Abraão 'ga juapyreramũ ore 'e re amunipo 'ã mama'e esagea te peapo 'ga 'jawe.

⁴⁰ Pejeporujukawere'emamũ amunipo 'ã je ree. Tejeupe Tejuwarete 'ga remimome'ua te je amome'u pê nupe. A'jea futat aipoa. A'ere 'ã pêporujukawet etee je ree. Nanarui Abraão 'ga iapoi rakue.

⁴¹ Pejejuwa 'jawe futat pêê mama'ea peapo— 'jau 'ga 'gã nupe.

—Ku'jywa 'ga tee futat oreruwarete. Ore futat 'ga ra'yratea— 'jau 'gã 'ga upe.

⁴² A'eramũ Jejui 'ga 'jau 'gã nupe nũ:

—Ku'jywa 'ga oreruwaretea' e re amunipo 'ã pēporomutat je ree. Ku'jywa 'ga 'wyr awi futat je ruri. Nateje'eg imū rūi je ruri 'au ywy pe. 'Ga je'eg imū etee je ruri. 'Ga futat je muri ikue—'jau 'ga 'gã nupe.

⁴³ —Ma'eramū sipo ajee nepēneapoyi jeje'eg are? Nepēporenuwiweri 'ã ee. A'eramū pēē pejeapeyoe'emamū jeje'eg are.

⁴⁴ Mama'eukwaawa 'wyrara ra'ya futat pēē. A'eramū pēē emifutar are etee pejeparu-apoweramū pejejemogyau. Ywya Janeruwarete 'ga iapo ppy ypyrauwe mama'eukwaawa 'wyrara oporojuka ma'e futat. Nuenuwi futari mama'e a'jea. Mama'e a'jea miamū futat nafutari. Wemifutar imū etee futat e'i. I'me ma'ea futat. A'eramū emiayuwa nanē i'jawe etee futat o'meramū—'jau Jejui 'ga 'gã nupe.

⁴⁵ —A'eramū pēē i'me are etee pejeparuenuwiweramū. A'eramū pēē a'eramū je rerowiare'ema pejejemogyau. Mama'e a'jea etee je 'ã omome'u numiamū.

⁴⁶ Awŷja te jeremiapo a'wyr'e'ema wesak? Nitywi futari 'ga amū. Naapoi futari je mama'e tywera. Mama'e a'jea etee te je amome'u. Ma'eramū sipo pēē je rerowiare'ema?—'jau Jejui 'ga 'gã nupe.

⁴⁷ —Jarejuwarete 'ga remiayuwa 'gã wenup katu katu 'ga je'ega. A'ere pēē na'ga remiayuwa rūi. A'eramū pēē 'ga je'ega renupe'ema—'jau Jejui 'ga 'gã nupe.

Jejui 'ga ojemome'wau 'gã nupe

⁴⁸ A'eramū judeu 'gã 'jau:

—A'jea futat ore 'i. “Mama'eukwaawa 'ga wereko opir are”, ore 'i enee jepi 'ja. Esak ene je'eg ekoetea ene rekoa. “Nia'wyr'i 'ga. Samari ywy pewara nipo 'ga”, 'jau ore enee jepi—'jau 'gã 'ga upe.

⁴⁹ Aipo 'gã 'eramū 'ga 'jau 'gã nupe:

—Narekoi je mama'eukwaawa tepir are. Tejuwarete 'ga tee je amuoryp tekou. A'ere 'ã nepēporomutari je ree—'jau 'ga 'gã nupe.

⁵⁰ —Peje'eg esage ki je ree, na'ea'uweri je pē nupe. A'ere Jeruwarete 'ga je ree pēporomutara futari. “Nepēa'wyr'i pēē”, 'jau nipo 'ga je ree iporomutare'ema 'gã nupe.

⁵¹ A'jea futat je 'i. Jeje'ega renupara 'gã amanūme'em futat—'jau Jejui 'ga 'gã nupe.

⁵² —Kuu. 'Awamū taetu ore “mama'eukwaawa 'ga wereko”, ore 'i enee ki 'ei. Ymāwarera 'gã amanū futat rakue kūi. Abraão 'ga miamū amanūmū rakue. Janeruwarete 'ga je'ega mome'wara 'gã 'jau amanūmū rakue kūi. Ma'eramū sipo aipo ere oree, “Jeje'ega renupara 'gã namanūi futari”, ere ekoete oree a'i kūi—'jau 'gã 'ga upe.

⁵³ —Janepy 'ga, Abraão 'ga amanū futat rakue. Jarejuwarete 'ga je'ega mome'wara 'gã 'jau amanūmū rakue. “Je te eteete ma'e 'gã aapyraap”, ere te ra'u ekou nū?—'jau 'gã 'ga upe. —Ma'jaramū sipo je reko'i 'jau ene 'ū?—'jau 'gã 'ga upe.

⁵⁴ Aipo 'eramū Jejui 'ga 'jau 'gã nupe nū:

—“Je te 'ã aereteretea”, je 'e re taetu amunipo 'ã aipo pe'je. A'ere 'ã je natejee rūi agawewi je jerowiaraiwi. Jeruwarete 'ga 'ã aipo e'i jee. Pēē 'ã “Janeruwaretea 'ga” pe'je futatee Jeruwarete 'ga upe.

⁵⁵ Nepekwaawi agawewi 'ga 'ã. A'etea 'ã pēē “ore 'ga ra'ya”, pe'je futatee. A'ere je a'jea futat je 'i: “Je akwaap futat 'ga”, 'jau. “Nakwaawi je 'ga” je 'e re amunipo 'ã je nanē je'meramū pēē 'jawe nū. A'ere je 'ga kwaawi. 'Ga je'ega renupa je 'ã tekou.

⁵⁶ Abraão 'ga 'ã oporesagiweramū je rur are rakue. A'eramū 'ga je rura resakawe aku'iramū akou ikue—'jau 'ga 'gã nupe.

⁵⁷ A'eramū 'gã 'jau 'ga upe:

—Neremagwawi we agawewi 'ã sīkwēta kwara. Maran sipo ene a'eramū Abraão 'ga resaka? Ymā te 'ga manūi rakue!—'jau 'gã 'ga upe.

⁵⁸ —A'jea futat je 'i. Abraão 'ga 'are'emauwe je reko'i ikue—'jau Jejui 'ga 'gã nupe.

⁵⁹ Aipo ojeupe 'eramū 'gã itauu pyyka 'ga ree.

—Sijuka 'ga 'jau—'jau 'gã ajaupe. —“Jarejuwarete 'ga 'jawe je reko'i”, e'i 'ga janee ra'e—'jau 'gã ajaupe. —Sijuka 'ga 'jau—'jau 'gã ajaupe.

A'ere Jejui 'ga jemimi 'gã nui, awau uēma 'gã nui, Jarejuwarete 'ga mogytaaw awi.

9

Eae'ema 'ga

¹ Pe rupi aruatau arawau Jejui 'ga eae'ema 'ga resaka. U'aa ppy we futat aipo 'ga weae'emamū u'aa rakue. Ka'aranūū renūina 'ūina peyse pe 'gã nupe.

² 'Ga resakawe ore 'jau Jejui 'ga upe:

—Awŷja tywera sipo 'ga namamā'ēukari? 'Ga tywera te 'ga namamā'ēukari? 'Ga jara 'gã tywera te ra'u nū?—'jau ore 'ga upe.

³—Naani. Na'ga jara 'gā tywera rūi 'ga namamā'ēukari. Na'ga tywera rūi nanē nū. Jarejuwarete 'ga pājē resaukaawamū te 'ga naeai— 'jau 'ga oree.

⁴—Sā'ā jane porowykya 'arimū etee. Ypytunaiwauwe jareporowykyawe'em. Nan tee futat jane porowykyi temurera 'ga upe jarejemogywe. Jaremanū re jane niporowykyu'jawi 'ga upe— 'jau Jejuī 'ga oree.

⁵—Ywy pe tekou je 'ara 'jawe futat. 'Arimū etee te jane mama'e resagi. A'eramū 'ā jane mama'e kwaapa. Nan tee futat je Tejuwarete 'ga kwaawukari pē nupe— 'jau Jejuī 'ga oree.

⁶ Aipo 'e re 'ga onymuna ywyw imajakuanana 'yi are. Weny are imajakuanan ire 'ga imonou 'ga ropepir are.

⁷ 'Ga ropepir are imono re 'ga 'ga monoukaa 'ga mojawejukaa 'ymua'wi pe, *Siloe* 'jaw ipe. (Oje'eg imū 'gā 'i *Siloe*. *Siloe* 'ea imuripyrrera 'ea futat poromū.)

A'eramū eae'ema 'ga awau peu ojowaeita jui. Ojowaeita ppy we 'ga mama'e resaka katu katu. Ojekatu'okawe 'ga awau ojewya oje'wyr ipe nū.

⁸ 'Ga resakawe 'ga pyriwara 'gā 'jau ajaupe:

—Kuu. Najane upe ka'aranūū renūinarera 'ga rūi nipo kweramū ra'e ki sa?— 'jau 'gā ajaupe.

⁹ 'Gā amū 'jau ajaupe:

—'Ga futat kūi— 'jau 'gā ajaupe.

A'ere amumera 'gā 'i ajaupe:

—Tee nū'ū. Naani nū'ū. 'Ga 'jawewara 'ga te nū'ū— 'jau etee 'gā 'ga upe.

A'eramū eae'emera 'ga 'jau:

—'Ga futat. Ka'aranūū renūinareramū futat je rekoī— 'jau 'ga 'gā nupe.

¹⁰—A'eramū ene maran mama'e resaka 'awamū ki 'ei?— 'jau 'gā 'ga upe.

¹¹—Tee. Kūima'e 'ga amū te 'ut je resaka ko nū'ū, Jejuī 'jawa 'ga ko nū'ū. Onymuna ywyw ko. A'ere 'ga imajakuanana 'yi are ko. A'ere 'ga imonoi jeropepir are ko. A'ere 'ga 'jau jee ko: “Ekwap ejowaeita Siloe 'jaw ipe”, 'jau 'ga jee ko. A'eramū je tewau peu tejowaeita ko. A'eramū je 'agamū mama'e resaka katu katu tekou— 'jau 'ga 'gā nupe imome'wau.

¹² Aipo 'ga 'eramū 'gā 'jau 'ga upe:

—Ma'ape ajee 'ga ki 'ei?

—Tee. Ma'ape katu nipo 'ga rekoī? Nakwaawi je 'ga rekoa nū'ū— 'jau 'ga 'gā nupe.

¹³ A'eramū 'gā eae'emera 'ga rerawau fariseu 'gā nupe.

¹⁴ Morowykye'ema rupi Jejuī 'ga 'yja mo'omi weny pyu imonou 'ga ropepir are ra'e. A'eramū 'ga 'agamū amā'jāu ra'e. A'eramū 'gā 'ga rerawau 'gā nupe.

¹⁵ A'eramū fariseu 'gā 'jau 'ga upe:

—Maran te eremā'ē ra'e?

—Tee. Kūima'e 'ga amū tujururua omono jeropepir are ko nū'ū. A'ere je tewau tejowaeita jui 'y pyu ko. A'eramū je 'agamū mama'e resaka tekou nū— 'jau 'ga 'gā nupe.

¹⁶ A'eramū fariseu 'gā amū 'jau 'ga upe:

—Najarejuwarete 'ga rerowiaara 'ga rūi te aje ra'e. Nuenuwi futari 'ga Moisesi 'ga remikwasiarera ra'e. Sā'ā 'ga morowykye'ema rupi 'ga mamā'ēukara ra'e. Enuw ire amunipo 'ā 'ga namamā'ēukari 'ga morowykye'ema rupi— 'jau 'gā ajaupe 'upa.

A'ere amumera 'gā fariseu 'gā 'i:

—Tee. Namama'e tywera apoara rūi 'ga. Itywet ma'eramū ae nuapoi futari nanuara— 'jau 'gā ajaupe.

A'eramū 'gā aipo 'eramū ajamueu 'ga ree.

¹⁷ A'eramū 'gā 'jau imamā'ēpyrrera 'ga upe nū:

—“Je katu'ok 'ga”, ere 'ā oree. Maran te eremome'u 'ga 'awamū oree nū?— 'jau 'gā 'ga upe.

—Tee. Jarejuwarete 'ga je'ega mome'wara 'ga amū futat nipo nū'ū— 'jau etee 'ga 'gā nupe.

¹⁸ A'ere judeu 'gā 'wyrīa'ri 'gā nuerowiari 'ga.

—A'jea futat sipu 'ga 'ari weae'emamū rakue?— 'jau 'gā 'gā nupe.

A'eramū 'gā eae'emera 'ga jara 'gā nerurukaa, 'gā moporogytaukaa ojeupe.

¹⁹ 'Ga jara 'gā nurauwe 'gā 'jau 'gā nupe:

—Pēna'yra te 'ga? A'jea te 'ga naeai u'aa ipy we futat rakue?— 'jau 'gā oporonupa 'ga ree. —Maran ajee 'awamū 'ga mā'ēi akou?— 'jau 'gā 'ga jara 'gā nupe.

²⁰—A'jea futat 'ga orera'yra. A'jea futat 'ga 'ari weae'emamū ikue.

²¹ A'ere ore norokwaawi 'ga mā'ēawera. 'Ga mamā'ēara 'ga nanē ore ikwaape'ema nū— 'jau 'ga jara 'gā 'gā nupe. —Pe'je pēē futat pejeporonupa ee 'ga upe. Nakunumā rūi te 'ga 'ā. A'eramū 'ga futat imome'wau pē nupe— 'jau 'ga jara 'gā 'gā nupe.

²² 'Ga jara 'gā kyjea 'gā nerekoū, aipo 'gā mu'eukaa 'gā nupe. 'Wyrīa'ri 'gā nui 'gā okyjau akou. 'Jejuī 'ga jarejuwarete 'ga remimurera futat 'jara 'gā simū'ē jarejatykaaw awi 'jau', 'jau 'wyrīa'ri 'gā ajaupe 'upa rai'i. “Pejoru'jap futat kasi pejesou ne, 'jau jane 'gā nupe”, 'jau 'gā ajaupe 'upa rai'i.

²³ A'eramũ 'gã okyjau 'gã nui. A'eramũ 'ga jara 'gã 'jau 'gã nupe: “Nakunumĩa rũi futat 'ga 'awamũ. A'eramũ 'ga futat imome'wau pẽ nupe”, 'jau 'ga jara 'gã.

²⁴ A'eramũ fariseu 'gã eae'emera 'ga renũina nũ:

—“Janeruwarete 'ga rowase je 'ami. A'eramũ je mama'e a'jea etee imome'wau pẽ nupe”, ere ki oree— 'jau 'gã 'ga upe. —Ene mamã'ëara 'ga itywet ma'ea ra'e. Aipoa ore orokwaap— 'jau 'gã 'ga upe.

²⁵ —Tee. Nakwaawi je. Itywet ma'ea futat nipo 'ga ra'e? Nakwaawi je. A'jea futat ako je najereai ikue. A'ere je 'ã 'awamũ mama'ea resagi tekou— 'jau 'ga 'gã nupe.

²⁶ A'eramũ 'gã 'jau nũ:

—Maran 'ga ene rerekou ra'e ki 'ei? Maran te 'ga ene mamã'ëi ra'e?— 'jau 'gã 'ga upe.

²⁷ —Amome'u futat te ako je pẽ nupe ko. A'ere ako nepẽparuerowiariweri etee jeje'eg are ko. Ma'eramũ sipo je imome'wau 'japa pẽ nupe nũ? Pẽfuewet te ra'u pẽẽ nanẽ pejejemogyau 'ga remiayuwamũ nũ?— 'jau 'ga 'gã nupe.

²⁸ —Kuu. Ene me awi kũi. Ene tee futat 'ga remiayuwamũ eko. Ore 'ã Moisesi 'ga je'egera renupararetea te— 'jau 'gã amara'neramũ 'ga ree.

²⁹ —Janeruwarete 'ga oje'ega Moisesi 'ga upe rakue. A'ea ore orokwaap. A'ere ore aipo 'ga norokwaawi. 'Ga muarera nanẽ ore ikwaape'ema nũ— 'jau 'gã 'ga upe.

³⁰ —Kuu. Nepekwaawi nipo ajee 'ga. 'Ga muarera nanẽ nepekwaawi ra'e nũ. A'ere 'ga je mamã'ëi ko nũ'ũ— 'jau 'ga 'gã nupe.

³¹ —Ojeupe itywet ma'e 'gã porogytaramũ Janeruwarete 'ga nuenuwi. Aipoa 'ã jane sikwaap. A'ere 'ga werowiaara 'gã je'ega renuwi. Afutaara 'gã je'ega nanẽ 'ga enupa nũ.

³² Ywy apo ppy we “'ga amũ u'ar ppy we eae'ema 'ga mamã'ëi” 'ea jane nienuwi jepi.

³³ Jarejuwarete 'ga je'eg imũ iapoe'em ire nuapoarũi ae remiapoe'ema— 'jau 'ga 'gã nupe.

³⁴ —U'aa ppy we itywet ma'eramũ nipo aea jamu'ei mama'e are ki sa?— 'jau 'gã 'ga upe, amara'neramũ 'ga ree.

A'eramũ 'gã 'ga muẽma ajatykaaw awi.

—Ere eẽma 'aw awi. Ereroru'jap kasi esou 'au ne— 'jau 'gã 'ga upe.

³⁵ A'ere Jejui 'ga 'ga rera renuwi. “Eneremimamã'ëfera 'ga 'gã amuẽm ajatykaaw awi” 'e renupa. A'eramũ Jejui 'ga 'ga rekaa. 'Ga resakawe Jejui 'ga 'jau 'ga upe:

—Jarejuwarete 'ga remimurera 'ga te ererowiat ekou?— 'jau Jejui 'ga 'ga upe.

³⁶ —Awÿja te 'ga? 'Ga ree jeparuerowiariweramũ tekou— 'jau 'ga Jejui 'ga upe.

³⁷ A'eramũ Jejui 'ga 'jau 'ga upe:

—Awamũ futat te 'ã ereesak 'ga 'ama. 'Ga je'ega nanẽ 'ã ene enupa nũ. Je futat 'awamũ oje'eg te'ama enee. Je te 'ã 'ga remimurera— 'jau 'ga 'ga upe.

³⁸ —Arowiat je ene, ki Ku'jyp. Ene 'ã jejararetea— 'jau 'ga wapyka 'ũina wenupy'au 'ga rowase.

³⁹ A'eramũ Jejui 'ga oje'ega 'gã nupe nũ:

—Ywy pe je ruri Jarejuwarete 'ga kwaapara 'gã mojo'oka 'ga ree iporokwaawiwere'ema 'gã nui. Pẽẽ 'ã pekwaawi 'ga. A'eramũ je 'ga kwaawukaa pẽ nupe tejua. A'ere amumera 'gã o'meramũ te 'ga 'i. “Akwaap futat je Jarejuwarete 'ga”, 'jau futatee 'gã 'ã. A'ere 'gã niporokwaawiweri 'ga ree. A'eramũ je 'gã mogyau eae'ema 'jawe futat— 'jau Jejui 'ga 'gã nupe.

⁴⁰ Aipo renupa fariseu 'gã amũ 'jau 'ga upe:

—Ore upe te poromũ ere? Norereai nipo ore arajemogyau enee?— 'jau 'gã 'ga upe.

⁴¹ A'eramũ Jejui 'ga 'jau nũ:

—Pejejeae'em ire amunipo 'ã nepejekwai te pejejemogyau. A'ere 'ã “Orerea futat ore”, pe'je. “Jarejuwarete 'ga ore orokwaap futat”, pe'je 'ã. A'ere aipo pe'je ekoete te. Nepekwaawi Jarejuwarete 'ga. A'eramũ pẽẽ aipo pyu pejejeupi te futat pejejekwau pejejemogyau— 'jau Jejui 'ga 'gã nupe.

10

Weymaw are omaenun ma'e 'ga 'jawewat

¹⁻² A'eramũ Jejui 'ga mama'e mũ mome'wau 'gã nupe 'gã mu'jau ojee:

—Sã'ã karupa'mĩ a'gwara 'gã kaaruwamũ erura ijaga ukaja pype. A'eramũ 'ga amũ akou peu ppytunimũ iarũmũ 'miara mara'ne awi. Muna'yw awi 'jau 'ga akou omaenuna ee. Ia'gwara 'gã osou iosoma kwara rupi etee futat. Okwara rupi ise'ema 'gã ose ekoete futat. Iosoma 'arimũ awau osou amunarũmũ karupa'mĩ are— 'jau 'ga 'gã nupe imome'wau.

³ —Ai'iwetete'ewe karupa'mĩ jara 'gã 'ua ojewya ukai pe nũ. A'eramũ karupa'mĩ raarana 'ga 'ua okwara rawopytymo'woka jupe. Ose re ijara 'gã weymawa renũina. 'Ga reymawa 'ga je'ega kwaapa. A'eramũ futat 'ga je'ega kwaapara etee futat 'ua 'ga repejãna.

⁴ Weymawa renū'ē re 'ga awau enune. A'eramū 'ga reymawa awau 'ga rewiri. Awau 'ga oporogytau weymawa upe. A'eramū 'ga je'ega kwaapara etee awau 'ga rewiri.

⁵ 'Ga rewiri etee futat ajemogyau. Tekotee 'ga amū wenūjamū 'ure'ema 'ga repejana. 'Ga je'ega kwaape'ema. A'eramū awau okwasi'wasi'wau 'ga wi— 'jau Jejuī 'ga 'gā nupe imome'wau.

⁶ Aipo ojeupe 'ga 'eramū 'gā weapyoe'emamū 'ga je'eg are.

⁷ A'eramū Jejuī 'ga 'jau 'gā nupe:

—A'jea futat je'ea. Wosoma kwara rupi etee te karupa'mīa oi osou wosoma pype. A'eramū je karupa'mī osoma kwara 'jawewara futat. Je rupi etee te ywy pewara 'gā oi osou Jarejuwarete 'ga rupaw ipe. Je rerowiaara 'gā etee te ajemogy Jarejuwarete 'ga remiaiyuwamū— 'jau Jejuī 'ga 'gā nupe.

⁸ —Je renunewe 'ut ma'efera 'gā 'ā e'i pē nupe rakue: “Ore Jarejuwarete 'ga remimurera”, 'jau futatee 'gā pē nupe rakue. O'meramū te 'gā 'i rakue. Muna'ywa 'jawewara 'gā futat poromū. A'ere Janeruwarete 'ga remiaiyuwa 'gā nuenuwi 'gā je'ega rakue— 'jau Jejuī 'ga 'gā nupe.

⁹ —Iosoma kwara 'jawe je rekoī. A'eramū pēē pejejorarūmū 'jau jee: “Too ene rupi Jarejuwarete 'ga rupaw ipe 'jau”, 'jauwārū jee— 'jau 'ga 'gā nupe. —Tejeupe aipo 'eramū je 'gā mogyi Jarejuwarete 'ga remiaiyuwamū. A'eramū je 'gā mopy'ata'wau, 'gā 'agwau 'jau. A'eramū 'gā opy'a'wyre'emamū ajemogyau.

¹⁰ Muna'ywa 'jawewara Janeruwarete 'ga remiaiyuwa opyyk, imomapa. A'ere je nanarūi. Jarejuwarete 'ga kwaawukaa te je ruri pē nupe. Pē mogyau nakwaparimū rūi je ruri, pē mopy'ata'wau pē mogyau— 'jau Jejuī 'ga 'gā nupe.

¹¹ —Wyra jara 'ga ojejukau esage weymaw are. 'Miara mara'ne ruramū 'ga weymawa 'agwau jui. A'eramū 'ga weymaw are ipojejuka esage ma'e 'gā 'jawe. Tejemiaiyuwa 'gā je ia'gwau mama'e tywer awi. Temanūmū 'gā nekwawer ipe. A'eramū 'gā amanūarūme'em ojeupe— 'jau Jejuī 'ga 'gā nupe.

¹²⁻¹³ —Tekotee 'gā omepyrāmū etee omaenuna ajueymaw are. A'ere na'gā neymawa rūi karupa'mīa. A'eramū 'gā 'miara mara'nea jupe turamū ujāna etee awau jui, karupa'mī rejaa jupe. Najemuaēmi 'gā ee. Na'gā ma'e arūi. A'eramū 'gā ia'gwawe'em. A'eramū 'miara 'ua karupa'mīa mū pyyka, ipytuna mokwasi'wasi'wau ajau— 'jau Jejuī 'ga 'gā nupe.

¹⁴⁻¹⁵ —A'ere je naaipo 'jawe rūi. Je 'ā karupa'mī are ipojejuka esage ma'e 'jawewara te. Sā'ā Jeruwarete 'ga je kwaawa. Je nanē 'ā 'ga kwaapa nū. Nan tee futat je tejemiaiyuwa 'gā kwaawi. 'Gā nanē 'ā je kwaapa nū. Anure nipo je manūi 'gā nupe.

¹⁶ A'eramū nipo tekotee 'gā nanē jeremiaiyuwamū ajemogyau nū. Najudeu arūi 'gā. A'ere je te je jerowiarukari 'gā nupe. A'eramū nipo 'gā ajemogyau jeremiaiyuwamū. Teje'ega 'gā enuw ire nipo je 'gā nerua 'gā mojojypeukaa ajuee. A'eramū nipo majepeī tee 'ga jara 'gā nee ojejuka ma'ea— 'jau Jejuī 'ga 'gā nupe, 'gā mu'jau ojee.

¹⁷ —Je te nipo 'ā ajejukaukat 'gā nupe. A'ere je temanū re je ferawī etee nū. A'eramū nipo Jeruwarete 'ga oporomutaramū nanimenime je ree.

¹⁸ 'Gā nupe tejejukaukare'em ire amunipo 'ā nityyū futari je jukaara 'ga amū. A'ere je 'gā tejukaa futari. Tejejukaukaa nipo je 'ga nupe Tejuwarete 'ga remifutar imū etee futat. Teferawa nanē je afutat nū. Ymā te Jeruwarete 'ga 'i jee ikue: “Ere ewau ejejukaukaa 'gā nupe. Ene manū re je ene moferawī etee nū”, 'jau Jeruwarete 'ga jee ikue. A'eramū je tejua tejejukaukaa 'gā nupe— 'jau Jejuī 'ga 'gā nupe 'gā mu'jau ojee.

¹⁹ Aipo renuw ire peuwara 'gā ajamueu 'ga je'eg are.

²⁰ —Mama'eukwaawa nipo 'ga 'ā wereko— 'jau 'gā ajaupe. —Mama'eukwaawa nipo 'ā 'ga amoje'egukat ite'at ma'e 'jawe janee kūi. Ma'eramū sipo ajee pēporenuwiwet 'ga je'eg are pejejupa?— 'jau 'gā ajaupe.

²¹ A'ere amumera 'gā 'i:

—Nanarūi mama'eukwaawa rerekwara 'gā je'egi. Ae mamā'ē sipo mama'eukwaawa? Nana'uweri— 'jau 'gā ajaupe, ajamueu 'ga ree.

Judeu 'gā nuerowiari futari 'ga

²²⁻²³ Anure Jejuī 'ga awau Jerusareg ipe nū. Janeruwarete 'ga mogytaawa 'ogeikwara pakupa 'wyr ipe 'ga akou, Sarumāu 'ga ma'ea 'jawa 'wyr ipe 'ga akou. Judeu 'gā maraka wapo Jerusareg ipe rakue. Ymā te 'gā ypy 'gā Jarejuwarete 'ga mogytaawa apoi rakue. Iapopaw ire 'gā 'jau “Agamū ene mogytaawa, ki Ku'jyp”, 'jau 'gā Jarejuwarete 'ga upe rakue. A'eramū 'gā maraka apou aipo are wea'awamū. 'Ara ro'ysagūū rupi 'gā aipoa maraka apou wea'awamū.

²⁴ Jarejuwarete 'ga mogytaaw ipe Jejuī 'ga rekoramū, kwaiwete 'gā ajatykau 'ga ree. A'eramū 'gā 'jau Jejuī 'ga upe:

—Maranime te erejemome'u oree? Ene futat te Jarejuwarete 'ga remimureramū ereko?—
'jau 'gā 'ga upe.

²⁵ A'eramū Jejui 'ga 'jau 'gā nupe:

—Ajemome'u futat ako je pē nupe ko. A'ere ako naje rerowiari etee pejepe ko— 'jau 'ga 'gā nupe. —Tejuwarete 'ga je'eg imū 'ā je mama'e apou tekou. Kwaiwete je 'ā 'gā katu'ogi tekou. Aipoa amunipo 'ā je kwaawukat pē nupe.

²⁶ A'ere 'ā naje rerowiari etee pejepe. Najeremiayuwa rūi tāmējē 'ā pēē. A'eramū pēē je rerowiare'ema futat pejemogyau.

²⁷ Jeremiayuwa 'gā wenup jeje'ega. Okwaap je tejemiayuwa 'gā. A'eramū 'gā je rerowiaa. ²⁸ 'Gā te je amogy namutat. A'eramū nipo je anure 'gā nerawau Tejuwarete 'ga pyri. Nitywi futari 'ga amū je wi 'gā pojekaara 'gā— 'jau Jejui 'ga 'gā nupe.

²⁹ —Jeruwarete 'ga 'ā pājēeteetea. 'Ga te 'ā opājēa amut jee. A'eramū 'gā amū je wi jeremiayuwa 'gā pojekawe'em futat.

³⁰ Je te 'ā Tejuwarete 'ga 'jawewara. Majepi tee ako ma'e 'jawe ore rekoi— 'jau Jejui 'ga 'gā nupe.

³¹ Aipo ojeupe 'ga 'eramū, 'gā ita pyyka 'ga ree.

—Simono imomoa 'ga ree 'jau— 'jau numiamū.

³² A'ere Jejui 'ga 'i 'gā nupe:

—Mama'e esagea etee te je 'ā aapo tekou kwaiwete. Tejuwarete 'ga je'eg imū je iapoi. Maranuara jeporowyky are te je juka are pēfuewet?— 'jau Jejui 'ga 'gā nupe.

³³ —Naani. Naeneremiapofer are rūi orefueweramū ene ree. Janeruwarete 'ga te 'ā erekurap ekou. A'eramū ore oroporujukaweramū ene ree— 'jau 'gā 'ga upe. —Kūima'e teea te ene. A'ere 'ā ene "Je Jarejuwarete 'ga 'jawewara", ere oree. Aipo ene'ea 'ga kurapara te ereko— 'jau 'gā Jejui 'ga upe amara'neramū 'ga ree.

³⁴ A'eramū Jejui 'ga 'jau 'gā nupe:

—Ymā te 'ā pēypy 'gā ka'arana kwasiari Jarejuwarete 'ga je'eg are rakue. "Pēē 'ā Ku'jywa 'ga 'jawewara", 'jau 'ga 'ā 'gā nupe rakue. Aipo ojeupe 'ga 'e are 'gā ka'arana kwasiaa inuga rakue.

³⁵ Ni'mei futari Janeruwarete 'ga. A'eramū 'ga je'ega rerekwara ka'arana nanē o'me'emamū nū. Aipoa 'ā jane sikwaap. A'eramū 'ga a'jea futat aipo 'jau 'gā nupe rakue.

³⁶ Ma'eramū sipo a'jee je aipo 'jawarūe'em pē nupe, "Je 'ā Ku'jywa 'ga ra'yra", 'jawarūe'em pē nupe? Maran sipo je a'eramū aipo 'eramū 'ga ago'wau tekou? 'Ga te 'ā je mut ywy pe ikue— 'jau Jejui 'ga 'gā nupe.

³⁷ —Tejuwa 'ga porowykya je iapoe'emamū kasi je rerowiat pejepe ne.

³⁸ A'ere ki 'ga remiapoa je iapo re je rerowiat pejepe. Je rerowiare'emamū miamū ki jeremiapoa perowiat. A'eramū nipo pēē ore kwaapa. Tejuwarete 'ga rewiri etee futat je rekoi. 'Ga nanē akou je rewiri etee futat nū. Norojepe'ai futari ore arajau— 'jau Jejui 'ga 'gā nupe.

³⁹ Aipo 'e are 'gā 'ga pyyg are afueweramū nū. A'ere 'ga jepe'ai 'gā nui.

⁴⁰ A'eramū ore arawau oroyaapa Jejui 'ga reewe, Jotāu ry owajara katy. Juā 'ga ae pymiawer ipe ore arawau oropytau.

⁴¹ A'e pe kwaiwete 'gā awau Jejui 'ga rekaa.

—Juā 'ga nuapoi futari aeremiapoe'ema ako ikue. A'ere a'jea futat 'ga 'eawer imū etee futat Jejui 'ga iapoi 'awamū— 'jau 'gā ajaupe.

⁴² A'eramū peu oo ma'e 'gā kwaiwete Jejui 'ga rerowiaa nū.

11

Lasaru 'ga mofera pawet

¹ Lasaru 'ga ojero'wau wenyra 'gā nupe rakue. 'Ga renrya ēē rera Maria. Ajepeja ēē rera Marta. Petani pe 'gā wyra.

² Aipo Mari ēē futat jany kasiga reko'woka Jejui 'ga py are, 'ga py pireita ipyu. A'ere ēē 'ga py pirei re u'awa pyu etee futat 'ga py mukaga 'ga wi. A'e ēē kywyrā 'ga poromū ojero'wu.

³ A'eramū 'ga renrya 'gā 'ga amū monou Jejui 'ga renūina:

—“Enejekoty'aawa 'ga ojero'wu 'upa, ki Ku'jyp, ere ki kiā upe”, e'i 'ga renrya 'gā jee ai'i— 'jau 'ga Jejui 'ga upe awau.

⁴ A'eramū aipo ojeupe oporeawuara 'ga 'eramū Jejui 'ga 'jau:

—A'jea futat 'ga jero'wui 'upa. A'ere 'ga namanūi futari ojero'wu upe. 'Ga jero'wu are nipo pēē 'awamū Jarejuwarete 'ga pājēa peesak. “A'jea futat Janeruwarete 'ga ra'yra 'ga pājēreteā ra'e”, 'jau nipo pēē jee— 'jau Jejui 'ga oree.

⁵ Jejui 'ga jekoty'aawa Marta ēē, ēē kypy'yra ēē, 'gā kywyrā 'ga, Lasaru 'ga. Mīmera 'gā Jejui 'ga jekoty'aawa.

- ⁶ A'etea 'ga 'ga rera renuw ire miamũ opytau etee 'upa peu, mukũi 'ga osea peu.
⁷ Mukũi oser ire Jejuí 'ga oje'ega wemimu'eramũ oree:
 —Pe'je iruukwe. Soo Judeja ywy pe 'jau nũ— 'jau Jejuí 'ga oree.
⁸ A'eramũ ore 'jau 'ga upe:
 —Tee nũ'ũ. 'Awamueuu ako peuwara 'gã fueweramũ ita pyu ene juka are ai'i nũ'ũ. Te maran a'e pe jane oi etee jarejewya peu nũ?— 'jau ore 'ga upe.
⁹ A'eramũ Jejuí 'ga 'jau oree:
 —Arimũ wata ma'eramũ ae nitesirũgatui. Nu'ara'uweri ae 'arimũ wata ma'eramũ ywy kwara pype. 'Arimũ wata ma'eramũ ae nokyjei watau akou. Nan tee futat je rekoí tekyjawe'em. Je manũawa upe iwaẽme'emamũ 'gã naje pyyga'uweri. A'eramũ je tekyjawe'em.
¹⁰ Ypytunimũ wata ma'eramũ te ae 'ari ywy kwara pype otesirũgaturamũ— 'jau 'ga oree.
¹¹ Aipo 'e re Jejuí 'ga 'jau oree nũ:
 —Janejekoty'aawa 'ga, Lasaru 'ga oset 'upa. A'eramũ je tewau 'ga momaka 'ga ser awi— 'jau 'ga oree.
¹² A'eramũ ore 'jau 'ga upe:
 —Oser ire sipo ajee 'ga pagi, ojekatu'oka nũ— 'jau ore 'ga upe.
¹³ "Lasaru 'ga amanũ 'upa" 'ea futat 'ga poromũ imome'wau oree numiamũ. A'ere ore norereapyoi te ee aipo 'ga 'eramũ. "Ga set tee upe sipo 'ga 'i pa", 'jau etee ore.
¹⁴ A'eramũ 'ga imome'wau katu oree:
 —Amanũ Lasaru 'ga 'upa, a'e je pẽ nupe kũi.
¹⁵ A'ere aipoa je upe esageramũ 'ga pyri jane reko'e'ema. Jeroryp je 'awamũ tepãjẽa pẽ nupe esaukar are. Taje rerowiar ete ete pejepe 'awamũ taetu 'jau. A'eramũ jane jarewau 'ga resaka— 'jau 'ga oree.
¹⁶ Aipo 'erauwe kunumĩ jopewa 'jau, Tome 'ga 'jau:
 —Pe'je jane nanẽ. Soo jaremanũmũ 'ga rupi— 'jau 'ga oree. —Peu 'ga oramũ nipo 'gã 'awamũ 'ga jukai. A'eramũ jane nanẽ jarewau jaremanũmũ 'ga rupi— 'jau 'ga oree. A'eramũ ore arawau Petani pe Jejuí 'ga rupi.
¹⁷ Petani pe ore waẽm ire peuwara 'gã 'jau Jejuí 'ga upe:
 —Amanũ enekoty'aawa ai'i. A'eramũ ore erawau inuga ita kwara pype ai'i. Irũpãwẽ iseri 'awamũ— 'jau 'gã Jejuí 'ga upe.
¹⁸ Aipoa amunawa Petani 'jawa 'upa Jerusarega pyriuu. Tres kilometro etee mukua jui.
¹⁹ A'eramũ Jerusareg ipewara 'gã 'ua 'ga renyrera 'gã pyri. Mari ẽẽ, Marta ẽẽ. Mĩmera 'gã nesaka 'gã 'ua 'gã mojemogypykyka'i 'gã kokare'em awi.
²⁰ A'eramũ 'gã amũ awau Jejuí 'ga mome'wau Marta ẽẽ upe:
 —Jejuí 'ga 'ut owaẽma ra'e— 'jau 'gã amũ awau ẽẽ upe.
 A'erauwe Marta ẽẽ awau ore rowosõu. A'ere Mari ẽẽ reni oje'wyr ipe futat.
²¹ A'eramũ Marta ẽẽ etee awau, u'arasiga ẽẽ erawau Jejuí 'ga rowosõu.
 A'eramũ ẽẽ 'jau 'ga upe:
 —'Au ene reko re amunipo 'ã jekywyra kiã namanũi rai'i— 'jau ẽẽ 'ga upe.
²² —A'ere 'awamũ ojeupe ene porogytaramũ miamũ Janeruwarete kiã mama'e apoi enee. Akwaap je aipoa— 'jau Marta ẽẽ Jejuí 'ga upe.
²³ A'eramũ Jejuí 'ga 'jau Marta ẽẽ upe:
 —Oferap futat enekywyra 'ga enee nũ i— 'jau 'ga Marta ẽẽ upe.
²⁴ A'eramũ Marta ẽẽ 'jau 'ga upe:
 —A'jea futat aipoa. "Janeruwarete kiã 'awa ywy mateepaawa 'ara rupi ae mũ'ei tywy awi nũ" 'ea a'jea futat— 'jau ẽẽ 'ga upe. —A'ea 'ara rupi tãmẽjẽ te nipo jekywyra kiã ferawĩ nũ— 'jau Marta ẽẽ 'ga upe.
²⁵ A'eramũ Jejuí 'ga 'jau Marta ẽẽ upe nũ:
 —Je 'ã a'jea futat ae moferapara. Je futat 'ã ae mogyara. Je rerowiaaramũ pemanũ agawewi. A'ere peferaw etee nũ.
²⁶ Je rerowiaara 'gã, jeje'eg imũ etee mama'e apoara 'gã nooi futari mama'eukwaawa rapyaw ipe. Jarejuwarete 'ga pyri te je rerowiaara 'gã oi oferapa amanũu'jape'ema. Ererowiat ajee aipoa i?— 'jau Jejuí 'ga Marta ẽẽ upe.
²⁷ A'eramũ ẽẽ aipo 'ga 'e re 'jau 'ga upe:
 —Ma'eramũ rã. Arowiat futat je ene kiã. A'jea futat ene Jarejuwarete kiã remimureramũ ereko. A'jea futat ene kiã ra'rarereramũ ereko. Ymã te 'ã kiã "ywy pewara 'gã nupe ekwap", kiã 'i enee rakue— 'jau ẽẽ Jejuí 'ga upe.
²⁸ Aipo 'e re Marta ẽẽ awau ojewya oje'wyr ipe nũ. Okypy'ya ẽẽ renũina ẽẽ awau. Owaẽmawe ẽẽ 'jau okypy'ya ẽẽ upe, Mari ẽẽ upe:
 —Moromu'jara kiã, Jejuí kiã, 'ut owaẽma kyn. "Tene ẽẽ ruri oje'ega jee", e'i kiã enee ko kyn— 'jau ẽẽ meewere'i weweworamũ okypy'ya ẽẽ upe.
²⁹ Aipo ojeupe ẽẽ 'erauwe Mari ẽẽ weaiteramũ awau Jejuí 'ga repejãna.

³⁰ Norojori we ore orowaēma katu amunawa upe. Marta ēē ore rowosīawer ipe etee arajupa oropytu'wau.

³¹ Mari ēē orauwe ēē pyri ajatyka ma'efera 'gā awau ēē rupi.

—Tywy pe nipo kwe ēē oi ajaa'wau. Pe'je soo ēē rewiri— 'jau 'gā ajaupe awau ēē rewiri.

³² Ore upe owaēmawe Mari ēē awau wapyka wenupy'āu Jejuī 'ga rowase.

—Ku'jyp. 'Au ene reko re amunipo 'ā jekywyra kīā namanūi rai'i— 'jau Mari ēē Jejuī 'ga upe.

³³ A'eramū Jejuī 'ga Mari ēē joo'o resaka. Ēē rewiri oo ma'e 'gā joo'o resaka nanē nū. A'eramū 'ga u'arasigamū ajemuaēma 'gā nee.

³⁴ A'eramū 'ga 'jau 'gā nupe:

—Ma'ape ajee pemono rai'i?— 'jau Jejuī 'ga 'gā nupe oje'ega.

—Ere ejua esaka— 'jau 'gā 'ga upe.

³⁵ A'eramū Jejuī 'ga ajaa'wau u'ama.

³⁶ 'Ga joo'o resakawe 'gā 'jau ajaupe:

—Kuu. Noko 'ja. Noko Lasaru 'ga 'ga jekoty'aawaretea futat rai'i 'ja. Esak 'ga joo'oa 'ga ree kūi— 'jau 'gā ajaupe.

³⁷ A'eramū amumera 'gā 'jau:

—Maran ajee 'ga a'etea eae'ema 'ga amū mamā'ēi rai'i, a'e te je a'i kūi. Maran ajee 'ga Lasaru 'ga nuesagi 'ga jero'wu awi rai'i 'ū. 'Ga jukaukare'ema amunipo 'ā 'ga 'ga jero'wu upe rai'i— 'jau 'gā ajaupe.

³⁸ A'eramū ore arawau 'gā nupi. Jejuī 'ga u'arasiga rerawau erowaēma ita kwara upe. Ita kwara rawopytymawamū 'gā itauu monou imyīna iawopytyma.

³⁹ A'eramū Jejuī 'ga 'jau:

—Pe'je itauu pe'au jui— 'jau 'ga 'gā nupe.

A'eramū Marta ēē 'jau:

—Koo. Naani nūrā. Ipsogay nipo nūrā. Irūpāwē 'awamū iseri nūrā— 'jau etee ēē 'ga upe.

⁴⁰ A'eramū Jejuī 'ga 'jau ēē upe nū:

—Maran ajee je 'i enee ra'e a'i ī. "Je rerowiar ire nipo ereesak Jarejuwarete 'ga pājēa", je 'i enee ra'e a'i ī— 'jau 'ga Marta ēē upe.

⁴¹ A'eramū 'gā ita kwara rawopytymawa pe'au jui 'ga upe. A'erauwe Jejuī 'ga amā'jāu ywau:

—Kiapi'ni. Aje'eg je enee.

⁴² Ene 'ā jeje'ega ereenup e'yīna— 'jau Jejuī 'ga oje'ega 'Uwarete 'ga upe. —Jeje'eg are ako eneporenuwiwet jepi. A'eramū je aipo 'jau enee 'auwara 'gā nemianuwamū. Kasi a'e pe 'gā naje rerowiari ne. "A'jea futat Janeruwarete 'ga 'ga muri janee rai'i", te'i 'gā jee 'jau. 'Awa 'ara rupi 'gā enepājē resagi— 'jau Jejuī 'ga oje'ega 'Uwa 'ga upe.

⁴³ 'Uwarete 'ga upe oje'ēmaw ire Jejuī 'ga wafukaita Lasaru 'ga upe:

—Ere ejua ēēma, ki Lasaru— 'jau Jejuī 'ga oje'ega Lasaru 'ga upe.

⁴⁴ A'erauwe Lasaru 'ga ferawi 'ua uēma ita kwar awi. Wauwanawa taity rerua enafu'ama enuēma ita kwar awi wakaga auwanawa reewe. 'Ga ēmauwe Jejuī 'ga oje'ega 'ga resakara 'gā nupe:

—Pe'je 'ga piara rapa 'ga wi. Tuata 'ga 'jau— 'jau Jejuī 'ga 'gā nupe.

Jejuī 'ga ree ifuewet ma'e

(Mateu 26.1-5; Maku 14.1-2; Luka 22.1-2)

⁴⁵ A'eramū 'ga moferawa resakara 'gā Jejuī 'ga rerowiaa kwaiwete. Mari ēē rupi oo ma'efera 'gā 'ga rerowiaa kwaiwete.

⁴⁶ A'eramū 'gā amū awau imome'wau fariseu 'gā nupe:

—Jejuī 'ga Lasaru 'ga omoferap ko, irūpāwē 'ga ser ire ko— 'jau 'gā awau Jejuī 'ga mome'wau fariseu 'gā nupe.

⁴⁷ A'eramū fariseu 'gā ajatykau mainana 'wyriara 'gā netee. Opytuna 'gā nupe oje'ēma'e 'gā nanē ajatykau 'gā nee nū. Ajatykau oporogytau Jejuī 'ga ree:

—Maran te jane Jejuī 'ga rerekoī? 'Awamū 'ga tee te 'ā mama'ea janeremiapoe'ema wapo akou kwaiwete a'i kūi— 'jau 'gā oporogytau Jejuī 'ga ree.

⁴⁸ —Nanuwar awi 'ga momige'emamū nipo 'gā najuejue etee 'ga rerowiari. A'eramū futat nipo 'gā 'ga mogou 'wyriaramū ojeupe. A'eramū futat nipo jane'wyriararete 'ga Roma pewara 'gā 'wyriara 'ga wemiayuwa 'gā mua jane apisau, Janeruwarete 'ga mogytaawa retygukaa 'jau nipo 'ga 'gā murukaa— 'jau 'gā ajaupe.

⁴⁹ A'eramū mainana 'wyriararete 'ga, Kaifasi 'ga oje'ega 'gā nupe. Kaifasi 'ga 'wyriaramū 'ūina 'gā nupe aipoa kwara rupi rakue. A'eramū 'ga a'eramū oje'ega 'gā nupe:

—Nepēneapyoi we futat 'ga ree?

⁵⁰ 'Ga futat ijukapyramū. A'eramū 'ga etee futat amanūmarūmū najuejue etee jane apisiukare'ema— 'jau Kaifasi 'ga oje'ega wemiayuwa 'gā nupe.

⁵¹ A'ere Kaifasi 'ga naoje'eg imū etee rūi aipo 'ga 'i. Janeruwarete 'ga te aipo amu'eukat 'ga. Ojetee oje'ēma'e 'jawe 'ga poromū oje'ega ajaupe. "Jejui 'ga etee futat amanūarū jane apisiukare'ema", ga mu'eukaa ajaupe.

⁵² Judeu 'gā tywera upe futat 'ga manūi. A'ere na'gā tywera upe etee rūi Janeruwarete 'ga 'ga jukaukari. Judeu'e'ema 'gā nupe nanē 'ga manūi nū, majepēi 'ywetee jane mogyau.

⁵³ Aipoa ojeupe Kaifasi 'ga 'eramū 'gā 'jau ajaupe:

—Maran te jane Jejui 'ga pyygi 'ga jukau?— 'jau 'gā ajaupe oporogytau.

⁵⁴ A'eramū Jejui 'ga awawe'em Judeja wyy pe. Arawau Efrai 'jaw ipe etee. Aipoa 'upa jūmire'ema pyri. Aipo pe ore oropytau.

⁵⁵ Oreyppy 'gā Egitu wyy awi enū'ēawer awi wea'awa maraka upe iwaēm ja'wyja'wyrauwe judeu 'gā awau ajatykau peu Jerusareg ipe kwaiwete. Oje'wyr awi 'gā awau ajatykau Jerusareg ipe. Maraka apoawa upe iwaēme'ema'ewe 'gā mama'e apou Moisesi 'ga remik-wasiarer imū etee ojekatu'okawamū Jarejuwarete 'ga upe.

⁵⁶ A'eramū 'gā Janeruwarete 'ga mogytaaw ipe awau Jejui 'ga rekaa numiamū. A'ere 'gā nuekoari 'ga. A'eramū 'gā 'jau ajaupe:

—'Ut sipo 'ga 'au maraka are jane pyri?— 'jau 'gā ajaupe.

—Too. Maran gatu nipo 'ga 'ure'ema— 'jau 'gā ajaupe.

⁵⁷ A'eramū mainana 'wyrriara 'gā 'jau fariseu 'gā netee:

—Jejui 'ga resakaramū ki pejot 'ga mome'wau oree— 'jau 'gā maraka are 'ut ma'e 'gā nupe.

Jejui 'ga pyyg are 'gā afuweramū. A'eramū 'gā poromū 'jau, "pemome'u ki 'ga oree", 'jau 'ga 'gā nupe.

12

Jejui 'ga ree jany kasiga reko'wokawet

(Mateu 26.6-13; Maku 14.3-9)

¹ Egitu wyy awi oropyyfera 'gā nenū'ēawer are wea'awa maraka apoawa upe iwaēm ja'wyja'wyrauwe ore arawau Petani pe.

A'eramū Jejui 'ga ore rerawau wemimofawera 'ga 'wyr ipe, Lasaru 'ga 'wyr ipe.

² A'eramū peu ore waēm ire, peuwara 'gā mama'e apou oree, ore mojem'i'waawamū. Marta ēē mama'e rerua mama'e 'wawa 'arimū oree. A'eramū Lasaru 'ga nanē 'ua wapyka ojem'i'waa Jejui 'ga pyri.

³ A'eramū Mari ēē jany kasiga ryrū pyyka erua. Aipoa jany kasiga wepyeteramū agawewi. A'etea Mari ēē aipoa jany kasiga werut eko'woka Jejui 'ga py are. Naritu 'jau 'gā aipo jany kasiga upe. 'Ga py pireita ipyu. 'Ga py pirei re ēē u'awa pyu etee futat 'ga py mukaga. Jany kasiga okwasi'wau 'gā noga raipy pype.

⁴ A'ere Jejui 'ga remimu'eramū ore mū narafutari. Judas Iskariote 'ga nafutari aipoa. Judas 'ga futat ia'wyr'e'ema 'gā nupe Jejui 'ga monoara. 'Ga futat poromū nafutari jany kasiga pyu Jejui 'ga py pireja.

⁵ —Kuu. Ma'eramū sipo ēē ime'ege'ema ka'aranūū are 'wei. Epy te 'ā 'aga jany kasiga. Tresētu ka'aranūū 'ua ee. A'eramū amunipo 'ā ēē ime'ega ka'aranūū are ojeupe. A'eramū amunipo 'ā ēē epyfera mua janee. A'eramū amunipo 'ā jane imojo'oka ikaraemāe'ema 'gā nupe— 'jau 'ga 'ūina.

⁶ Judas 'ga najemuaēmi agawewi ikaraemāe'ema 'gā nee. O'meramū te 'ga 'i. Jejui 'ga remimu'ea futat 'ga numiamū. 'Ga futat ka'aranūū yrū rerekwara. A'eramū 'ga amunarūmū ka'aranūū are ojeupe jepi. Muna'ywa futat 'ga. A'eramū 'ga poromū jany kasiga me'eg are afuweramū. "Amojo'ok amunipo 'ā je epyfera tejeupe", 'jau 'ga ojeupe numiamū.

⁷ Aipo 'eramū Jejui 'ga 'jau 'ga upe:

—Tene ēē iapoi. 'Aga jany kasiga ēē om'yigatu je manūnamū je ree eko'wogipyramū te rai'i numiamū. A'ere ēē 'awauwe eko'wogi je ree. Tene ēē iapoi jee— 'jau Jejui 'ga 'ga upe.

⁸ —Ikaraemāe'ema 'gā nooa'uweri futari pē nui. A'eramū ene anure mama'e monou 'gā nupe ejemifutar imū 'jau. Je te nako fukui futari pē pype— 'jau Jejui 'ga 'gā nupe.

⁹ A'eramū judeu 'gā Jejui 'ga rekwawa kwaapa.

—Petani pe 'ga oi akou ra'e— 'jau 'gā ajaupe.

A'eramū 'gā kwaiwete awau Jejui 'ga rewiri. Lasaru 'ga resaka nanē 'gā awau nū. Jejui 'ga remimofawera 'ga futat poromū Lasaruramū.

¹⁰⁻¹¹ Lasaru 'ga mofarawamū 'gā kwaiwetewete Jejui 'ga rerowiaa. Mainana 'wyrriara 'gā nerowiar awi 'gā opoia. A'eramū 'gā Jejui 'ga rerowiaaretea futat ajemogyau. A'eramū

mainana 'wyriara 'gā amara'neramū 'gā nee. Lasaru 'ga resaka 'gā oramū mainana 'gā Lasaru 'ga juka are afueweramū.

Kawaru'i 'arimū Jeju'i 'ga ataawet

(*Mateu 21.1-11; Maku 11.1-11; Luka 19.28-40*)

¹²⁻¹⁸ Ai'iwe ore arawau Jerusareg ipe Jeju'i 'ga rupi. Kawaru'i aranuwamueuu 'arimū Jeju'i 'ga 'ua akou. A'eramū muku awi maraka are 'ut ma'e 'gā 'ga rera renupa.

—Aipo Jeju'i 'ga ruri akou— 'jau peuwara 'gā Jerusareg ipe 'ut ma'efera 'gā nupe. —'Ga futat 'awamue Lasaru 'ga omoferap ai'i. Ita kwara pype 'ga ruwamū 'ga wafukaita 'ga reumera upe ai'i. A'erauwe futat Lasaru 'ga ferawi 'ua uēma ita kwar awi ai'i— 'jau Lasaru 'ga ferawa resakarera 'gā imome'wau kwe awi 'ut ma'efera 'gā nupe. —Pe'je ajee soo Jeju'i 'ga resaka 'ū— 'jau 'gā ajaupe.

A'eramū 'gā kwaiwete awau 'ga rowosōu. 'Gā ku'ia 'gā nerekou. A'eramū 'gā a'eramū pinowa rerawau imowawaka 'ga repejāna. 'Ga resakawe 'gā wafukaita 'gā nupe:

—Janeruwarete 'ga 'ā esageay. Ene 'ā 'ga remimurera futat. Ene futat 'ā Israeu juapyreramū ore upe 'wyriarareteramū. A'eramū ki Janeruwarete 'ga ojejukau esage ene ree— 'jau 'gā wafukaita Jeju'i 'ga upe.

Kawaru'i 'arimū Jeju'i 'ga 'ua owaēma Jerusareg ipe. Ymā Sakari 'ga ka'arana kwasiari inuga aipo are rakue. “Pekyje kasi Jerusareg ipewaramū ne. Kwe pē'wyriararete ruri kawaru'i 'arimū”, 'jau 'ga ikwasiaa inuga ka'aran are rakue.

A'ere aipo are ore norereapyoi, aipoa 'ga waēmaw ipe iaporamū. A'ere anure ywag ipe Jeju'i 'ga o re tāmējē te orereapyoramue 'ga remikwasiarera ka'aran are ikue. “A'jea futat. 'Ga remikwasiarar imū etee futat 'gā iapoi rai'i”, 'jau ore arajaupe, ywag ipe 'ga o re.

¹⁹ Jeju'i 'ga repejāna 'gā oo resakawe, fariseu 'gā 'jau:

—Kuu. 'Gā juejue nipo oo Jeju'i 'ga repejāna ki sa, “perowiari awi 'ga” 'eramū etee pa 'gā 'ā nū— 'jau 'gā ajaupe.

Amanūawama Jeju'i 'ga imome'uwawet

²⁰ Grego 'gā amū awau judeu 'gā nupi Jerusareg ipe. Janeruwarete 'ga muorypa 'gā awau 'gā nupi maraka pe.

²¹ A'eramū 'gā awau oje'ega Filipe 'ga upe. Pesaita pewara Filipe 'ga. Garireja ywy pe aipoa amunawa Pesaita 'upa. A'eramū grego 'gā 'jau Filipe 'ga upe:

—Oreporesagiwer ore Jeju'i 'ga ree, ki Filipe— 'jau 'gā 'ga upe.

²² A'eramū Filipe 'ga Andre 'ga upe ra'ne awau imome'wau. A'eramū Andre 'ga Filipe 'ga rerawau Jeju'i 'ga upe.

—Grego 'gā 'ut amū ene resaka, ki Jejui— 'jau 'gā 'ga upe.

²³ A'eramū Jeju'i 'ga 'jau 'gā nupe:

—Je 'ā Jarejuwarete 'ga remimurera. A'eramū nipo anurenure'i je manū re 'gā 'jau kwaiwete jee: “Eteete ma'e 'gā apyraapara 'ga ra'e”, 'jau nipo 'gā jee, je manū resaka— 'jau Jeju'i 'ga 'gā nupe.

²⁴ —Sā'ā juowuu a'ŷja otyme'emamū ipytune'ema. Majepei tee futat a'ŷja. A'eramū futat ojemoteu otym ire te ipori. A'eramū futat waramū ojeme'yita wa'ŷja pyu. A'eramū te nojemoteei a'ŷja. Nan tee futat je manū re jeremiyauwa 'gā jeme'yi. Je manū re kwaiwetewete ajemogyau namutamutat— 'jau Jeju'i 'ga 'gā nupe.

²⁵ —Janeruwarete 'ga remifutara apoare'ema 'gā a'ŷi tyme'ema 'jawe. 'Gā nekoi ekoetei tee. Amanū re awawe'em futat Jarejuwarete 'ga pyri. A'ere Jarejuwarete 'ga remifutar imū mama'e apoara 'gā itymipyrera 'jawe. Nokyjei 'gā amanū awi. A'eramū nipo anure 'gā ajemogyau Jarejuwarete 'ga pyri nakwaparimū ete rūi futat— 'jau Jeju'i 'ga 'gā nupe oporogyau 'ūina.

²⁶ —Jeremiyauwamū pejejekoweramū ki jeje'ega peenup, jeremifutar imū etee futat mama'e apou. Nan pejemogy je pyri namutat a'jea futat. A'eramū nipo jeremiyauwa 'gā nupe Jeruwarete 'ga 'jau: “'Gā esageay jee”, 'jau nipo 'ga 'gā nupe jee— 'jau Jeju'i 'ga 'gā nupe.

²⁷ —Jepy'a'wyt je tekou. Maran te je reko'i, na'ea'uweri je Jarejuwarete 'ga upe. “Je rereko tywerukar awi ape 'gā nupe”, na'ei futari je 'ga upe nū. Nanuaramū futat je ruri ikue. Ijukapyramū futat 'ga je muri ikue. A'eramū nipo 'gā je rerekou tyweaete futat je jukau— 'jau Jeju'i 'ga 'gā nupe.

²⁸ Aipo 'e re Jeju'i 'ga oje'ega 'Uwarete 'ga upe:

—Mama'ea eapo ejemuorywukaa 'gā nupe, Kiapi'ni— 'jau 'ga oje'ega 'Uwarete 'ga upe.

Aipo ojeupe 'ga 'eramū 'ga oje'ega mua 'ga upe ywag awi:

—Mama'e mū futat ako je aapo tejemuorywukaa 'gā nupe ko. Anure tāmējē te nipo je iapou'jawi nū— 'jau Ku'jywa 'ga oje'ega mua wa'yra 'ga upe.

²⁹ Aipo renupawe peuwara 'gā amū 'jau ajaupe:

—Kuu. Ma'ja te poromū?

—Aman aunuga nipo aipo kūi— 'jau 'gā ajaupe.
 —Naani nū'ū. Ywagipewara 'ga amū te nipo aipo oje'ega amut 'ga upe nū'ū— 'jau amumera 'gā ajaupe.

³⁰ A'eramū Jejuī 'ga 'jau ore upe juejue:

—Naje ree rūi 'ga je'egi jee. Pē nee te 'ga je'egetei— 'jau 'ga ore upe imome'wau.

³¹ —'Awamū nipo Jeruwarete 'ga 'i: "Neperowiari jera'yra 'ga. A'eramū pēē pejejekwau jee", 'jau nipo 'ga 'gā nupe. A'eramū 'ga 'awamū futat je rerowiare'ema 'gā 'wyrriara pājē mateepapa jui— 'jau Jejuī 'ga oree.

³² —'Ypeywar are temono temu'am ire te nipo je tejerowiarama 'gā murukari tejepyri— 'jau Jejuī 'ga oree.

³³ Aiporamū futat 'ga amanūawama mome'ui oree.

³⁴ A'eramū 'ga je'ega renupara 'gā 'jau Jejuī 'ga upe:

—Ma'eramū ene poromū 'jau ki 'ei. Ymā te 'ā Janeruwarete 'ga ka'arana kwasiarukaa wemimurama 'ga ree rakue: "Namanūi futari Janeruwarete 'ga remimurera 'ga. Namutat 'ga rekoī amanūme'em", 'jau 'ga 'ā inuga ikwasiaa ka'aran are rakue: Ma'eramū ajee poromū ere oree, aru'e etee ore enee. 'Ypeywar are nipo 'gā je mu'ama, ere poromū nū, aru'e te ore enee a'i kūi. Nafarejuwarete 'ga remimurera rūi tāmējē futat nipo 'ā ene nū'ū? — 'jau 'gā Jejuī 'ga upe aipo 'ga 'eramū.

³⁵ A'eramū aipo 'gā 'eramū Jejuī 'ga 'jau 'gā nupe:

—Jarejuwarete 'ga je'eg are pē mu'jawamū nanē je ruri ikue. A'eramū ki pēē jeje'ega rerowiaa pejejepype je rekoramū. Jeje'ega renuparamū pēē pejejemogyau 'arimū wata ma'e 'jawe. Sā'ā ae 'arimū mama'e resaga katu katu. Nan tee futat je Tejuwarete 'ga resaukaa pē nupe. A'ere je anurenure'i je oi pē nui nū. Je o re taetu nipo nepēneapyoa'uweri ee. Ee pejejeapyoe'em ire nipo pēē iseraip ma'e 'jawe pejejemogyau. Iseraip ma'e 'jawe etee nipo pēē pejejemogyau peje'akwaawe'emamū. Ypytunimū iseraip ma'e 'gā mama'e nuesagi. 'Gā seraiwa mama'ea nuesaokari 'gā nupe— 'jau Jejuī 'ga 'gā nupe.

³⁶ —A'eramū ki pēē je rerowiaramū pejejepype je rekorauwe pejejeapyoramū jeje'eg are. A'eramū je tejerowiaramū pē monou tejemiayuwamū. Aiporamū pēē iseraiw'e'ema 'gā 'jawe. Mama'ea peesak katu katu pejejemogyau. A'eramū 'arimū wata ma'e 'jawe futat pēē— 'jau Jejuī 'ga 'ūina 'gā nupe.

Nuerowiari futari 'gā 'ga

Aipo 'gā nupe 'e re Jejuī 'ga awau ojepe'au ajemima 'gā nui.

³⁷ Opājē mū Jejuī 'ga 'gā nemiapoe'ema apou'jau'japa agawewi 'gā neape. A'etea 'gā nuerowiari 'ga ajemogyau.

³⁸ Ymā te 'ā Janeruwarete 'ga je'ega mome'wara 'ga Isai 'ga ka'arana kwasiari inuga jee rakue. "Ene 'ā Orejararetea. A'ere 'gā nitywi oreje'ega rerowiaara. Ene 'ā pājēreteā agawewi. A'etea 'gā enepājēā nuerowiari futari", 'jau Isai 'ga ikwasiaa inuga ka'aran are rakue. Aipoa a'jea futat Isai 'ga inuga ikwasiaa ka'aran are rakue. A'eramū a'jea futat Isai 'ga 'eawer imū etee futat poa.

³⁹ Isai 'ga ka'arana kwasiaru'japa 'gā nee wējēmī rakue nū:

⁴⁰ "Janeruwarete 'ga 'gā namueapyoukari ee.

A'eramū 'gā wapyakwafuge'emamū weapyoe'emamū ee.

A'eramū 'gā a'eramū opoiriwere'emamū otywer awi. Jekatu'og ape, 'jawe'em 'gā 'ga upe.

A'eramū 'ga a'eramū 'gā katu'oke'ema futat",

'jau Isai 'ga inuga ikwasiaa ka'aran are rakue.

⁴¹ Jejuī 'ga rurawam are Isai 'ga ka'arana kwasiaa inuga rakue. Isai 'ga weapyoramū Jejuī 'ga rurawam are. Esageay ma'e 'ga. Kūima'eeteete 'ga 'ea 'ga ikwaapa. A'eramū 'ga ka'arana kwasiaa inuga 'ga rurawam are rakue.

⁴² A'etea 'gā kwaiwete Jejuī 'ga rerowiaa. 'Wyrriari 'gā amū miamū futat 'ga rerowiaa. A'ere 'gā aipo 'eramū ewi nojemome'ui ajaupe. Fariseu 'gā wejue "Jejuī 'ga rerowiaara 'gā simū'ē jarejatykaaw awi 'jau. A'eramū futat imū'ēmyrera 'gā osou'jape'ema jarejatykaawa pype 'jau", e'i fariseu 'gā ajaupe rakue. A'eramū 'gā a'eramū wejue ojemome'wawe'em 'gā nemianuwamū.

⁴³ Ajuowase ako esage are etee 'gā wea'aramū. Janeruwarete 'ga rowase ako esage are jēmī 'gā wea'are'emamū.

⁴⁴ A'eramū Jejuī 'ga oje'ega momorayau ojee ajatyka ma'eramū juejue oree:

—Je rerowiaara 'gā je muarera 'ga nanē futat werowiat— 'jau Jejuī 'ga oree.

⁴⁵ —Araju'jawe etee futat ore. A'eramū je resakara 'gā nanē je muarera 'ga resaka futat— 'jau Jejuī 'ga oree.

⁴⁶ —'Awa ywy pe ako je ruri pē mueapyoawamū ai'i. A'eramū je rerowiaara 'gā weapyoramū je ree ajemogyau. Naypytunimū wata ma'e 'jawe rūi 'gā. Ypytunimū wata

ma'e 'gā mama'e tywera nuesagi wape awi. A'ere je rerowiaara 'gā nanarūi. 'Arimū wata ma'e 'jawe te 'gā. Je 'ā mama'ea aesaukat 'gā nupe. Mama'e are 'gā mueapyou— 'jau Jeju'i 'ga oree.

⁴⁷—'Gā amū nipo jeje'ega renupa ekoete akou. A'ere nipo 'gā nuerowiari jeje'ega. A'etea nipo je “nepē'a'wyrī pēē Jarejuwarete 'ga upe”, na'ea'uweri 'gā nupe. Naaipo 'gā nupe 'jarāmū rūi je ruri. Pētywer awi pē katu'okawamū te je ruri 'awa wyw pe ikue— 'jau Jeju'i 'ga oree.

⁴⁸—Pēē mū nipo jeje'ega rerowiare'ema 'eramū naje rūi areko tywet pēē. Janeruwarete 'ga te nipo wowase pē majatykaawa 'ara upe iwaēmamū e'i pē nupe: “Neperowiari Jera'ywarete 'ga je'ega rakue. A'eramū je pē nerekou tyweaete”, e'i nipo 'ga pē nupe— 'jau Jeju'i 'ga oree.

⁴⁹—Najetee rūi te 'ā ojoj ikue. Jeruwarete 'ga te je mut pē mu'jaukaa jee ikue. 'Ga 'eawer imū etee futat je tekou teje'ega pē nupe, 'ga je'ega mome'wau.

⁵⁰ 'Ga je'ega renuparamū 'gā jemogyi namutat. 'Au amanū re 'gā awau oferapa ywag ipe Ku'jywa 'ga pyri amanū'jape'ema. A'eramū futat 'gā awau ajemogyau peu. A'ea te je 'ā akwaap. A'eramū je a'eu etee futat imome'wau pē nupe— 'jau Jeju'i 'ga oree.

13

Wemimu'e 'gā py pireitawet

¹ Maraka apoawa upe iwaēm ja'wyja'wyrāuwe Jeju'i 'ga 'jau ojeupe: “Awamū iwaēmi 'gā maraka apoawa upe, Egitu wyw awi oypyfera 'gā nenū'ēawer are wea'awa maraka upe. A'eramū 'awamū futat owaēma ja'wyja'wy je manūawa upe. Temanū re nipo je oi tejewya ywag ipe Tejuwa 'ga pyri nū”, 'jau Jeju'i 'ga akou ojeupe etee futat.

Wemiyuwamū 'ga oporomutamū ore ree ikue. Amanū enunewe 'ga mama'e apou oree, ore ree oporomutaawa resaukaawamū ikue.

² Jeju'i 'ga 'ūina ojemi'waa ore pyri, wemimu'eramū. A'eramū mama'eukwaawa 'wyrīara Judas 'ga mu'akwaawukare'ema 'ga mogou. A'eramū 'ga 'jau ojeupe: “Oo pa je Jeju'i 'ga monou mainana 'gā po pe kwy”, 'jau 'ga ojeupe.

³ Ojemi'waaw ipe Jeju'i 'ga 'jau ojeupe: “Ku'jywa 'ga opājēa amut jee. A'eramū je pājēreteramū tekou”, 'jau 'ga ojeupe 'ūina. “Ku'jywa 'ga wi futat te ako je ruri ikue. A'eramū je 'awamū tewau tejewya 'ga pyri nū”, 'jau 'ga 'ūina ojeupe. “A'ere je teo enune 'gā mu'ei mama'e mū ree”, 'jau 'ga ojeupe 'ūina.

⁴ A'ere Jeju'i 'ga afu'ama weteyrū mosoka ojewi. A'ere 'ga ae piryypawa pyyka ojeku'afaa ipyu.

⁵ A'ere 'ga 'y reko'woka y'asiga pype. A'ere 'ga orepy pireita. Orepy pirei re 'ga imukaga ae piryypawa pyu, aku'au imamanipyra pyu.

⁶ Ore mū py pirei re 'ga ajepeja 'ga py pireita nū. A'ere ajepeja mū nū. A'ere ajepeja mū nū. Awau owaēma Simāo Pedro 'ga upe:

—Ere epy mua. Sipirei enepya 'jau— 'jau 'ga 'ga upe.

A'ere Pedro 'ga 'i etee 'ga upe:

—Kuu. Naani nū'ū. Najeremiyuwa rūi te 'ā ene. A'eramū ene jepy pireitarū'e'm— 'jau etee Pedro 'ga 'ga upe.

⁷ A'eramū Jeju'i 'ga 'jau Pedro 'ga upe:

—Awamū nenereapyoi futari jeremiapo are. Anure te nipo enereapyo ee— 'jau Jeju'i 'ga Pedro 'ga upe.

⁸—Naani futari. Nerepirei futari jepya— 'jau etee Pedro 'ga 'ga upe.

—Naani. Je enepy pireite'emamū ene najeremiyuwa rūi ereko— 'jau Jeju'i 'ga Pedro 'ga upe.

⁹ A'eramū aipo ojeupe 'ga 'erauwe Pedro 'ga 'jau 'ga upe:

—Jepya etee kasi ajee erepirei ne nū. Jepoa we futar iki ajee epirei 'ū, jeakaga 'jau a'i kūi — 'jau Pedro 'ga Jeju'i 'ga upe.

¹⁰—Naani. Sā'ā ojak ma'e 'gā piky'ae'ema. 'Gā pya etee 'ā oky'aramū. A'eramū 'ā 'gā opya etee ipireita. Nan tee futat pētywera Janeruwarete 'ga imoiri pē nui. A'eramū pēē ipiky'ae'ema 'jawewaramū 'ga upe. Pēē mū te ajee 'ā nepēpoiweri pejetywer awi rai'i. A'eramū Janeruwarete 'ga nanē imoire'ema 'ga wi. Aipo 'ga ipiky'a ma'e 'jawe ako ojekatu'oge'ema futat— 'jau Jeju'i 'ga oree.

¹¹ Jeju'i 'ga Judas 'ga kwaapa ojee. “Ga futat nipo je mono kūima'e tywera 'gā po pe” 'ea 'ga ikwaapa. A'eramū 'ga poromū 'jau oree: “Pēē mū nipo ipiky'a ma'e 'jawe futat”, 'jau 'ga oree.

¹² Orepy pireipaw ire 'ga afu'ama waity munepa nū. A'ere 'ga wapyka. Wapyg ire 'ga oje'ega oree:

—Nepēneapyoi futari jeremiapofer are.

¹³ A'eramū je pē mueapyou ee. “Ga jane mu'jara”, pe'je 'ā jee jepi. “Ga Janejararetea”, 'jau 'ā pēē. A'jea futat pe'je. Namutat je reko'i pē nupe.

¹⁴ Je te 'ā pē mu'jara. Je futat pējararetea. A'etea ako je pēpy pireita ko, pēnemaiyuwa 'jawe ko. Mama'ea je 'ā aapo pē nupe. A'eramū ki pēē nan tee futat mama'e apou pe'jejaupe je 'jawe— 'jau Jeju'i 'ga oree.

¹⁵ —Pēpy ako je apirei pē mu'jawamū pe'jejaupe mama'e apo are ko. “Je 'ā kūima'eeteetea. A'eramū je mama'e apowarū'em pē nupe”, pe'je kasi pe'jejaupe ne. Je 'jawe futar iki mama'ea peapo pe'jejaupe pe'jejopoa— 'jau 'ga oree, orep'y pirei re.

¹⁶ —A'jea futat je 'i. 'Wyrriara 'gā kūima'eeteetea. 'Ga remaiyuwa 'gā o'wyrriara nuapyaawi. Moranuwa rerooara 'ga nanē nuapyaawi omonoara 'ga. A'eramū je 'wyrriara 'jawe futat pē nupe. Jeremaiyuwa futat pēē. A'eramū pēē je 'jawe futat mama'e apou 'awamū.

¹⁷ 'Awamū pekwaap. A'eramū pēē je'eawer imū etee futat mama'e apou. “Pe'jopoar iki mama'e apo are”, je'eawer imū mama'e aporamū nipo pēē pe'jeku'iramū pe'jejemogyau— 'jau 'ga oree ore mu'jau.

¹⁸ —A'ere je napē nupe juejue rūi je 'i. Akwaap je pēē. Tejemimu'eramū je pē mū'ēi. Pēē mū futat nipo kūima'e tywera 'gā po pe je monou. Ymā we te 'ā 'ga amū ka'arana kwasiari inuga je ree rakue. “Je pyri ojemi'wat ma'e 'ga amū nipo je juka are ifuewet”, 'jau 'ga 'ā ikwasiaa inuga ka'aran are rakue. A'eferupi tee nipo pēē mū je monou 'gā po pe.

¹⁹ A'eramū je tejukae'emauwe aipo mome'wau pē nupe. A'eramū pēē je'eawer imū etee ijeapo re je'eawera rerowiaa. A'eramū nipo pēē 'jau jee: “A'jea futat. Jarejuwarete 'ga remimurera 'ga ra'e”, 'jau nipo pēē jee— 'jau 'ga oree.

²⁰ —A'jea futat je 'i jeremimokwasi'o 'gā nereko esageramū 'gā je nanē je rereko esage ajemogyau nū. Je rereko esageara 'gā je muarera 'ga nanē erekou esage ajemogyau nū— 'jau 'ga oree.

Ae a'wyre'ema upe 'ga monoara 'ga

(Mateu 26.20-25; Maku 14.17-21; Luka 22.21-23)

²¹ Aipo 'e re Jeju'i 'ga u'arasigeteteramū. A'eramū 'ga 'jau oree:

—A'jea futat je 'i. A'jea futat nipo pēē mū je mono pe'jepe je ree iporomutare'ema 'gā nupe je jukaukaa— 'jau 'ga oree.

²² A'eramū ore arajemogymogyau etee aramā'jāu arajuee.

—Aw'jja upe sipo 'ga 'i poromū?— 'jau ore arajemogyau.

²³ A'eramū je te'yina 'ga pyri katu katu teapyka, 'ga jekoty'aawaretea je.

²⁴ A'eramū Simão Pedro 'ga oje'poetyka jee.

—“Aw'jja upe te ere poromū?” ere 'ga upe— 'jau 'ga jee oje'poetyka.

²⁵ A'eramū je te'jeupe Pedro 'ga 'eramū te'jua 'ga rerowyka katu katu.

—Aw'jja upe te ere poromū, ki Ku'jyp?— 'jau je 'ga upe.

²⁶ A'eramū Jeju'i 'ga 'jau:

—Peesag iki je mani'oko'o'i ak'yma monoa 'ga po pe— 'jau 'ga jee aipo ojeupe je 'eramū.

'Ga mani'oko'o'i pyyka imuak'yma tyfera pype. A'ere 'ga imonou Judas 'ga po pe. Simão Iskariote 'ga ra'yra 'ga poromū.

²⁷ Mani'oko'o'ia 'ga po pe imono pyyrauwe mama'eukwaawa 'wyrriara 'ua osou 'ga pype. A'erauwe Jeju'i 'ga 'jau 'ga upe:

—Ere ewau ejemiaporama apou tāmējē kamēsīete— 'jau 'ga 'ga upe.

²⁸ A'ere ore 'ga pyri ojemi'wat ma'eferamū norereapoyi 'ga je'eg are.

—Ma'eramū sipo 'ga aipo 'jau 'ga upe 'wei?— 'jau ore arajaupe.

²⁹ —Mama'e mū mua nipo kwe 'ga 'ga monoi kūi. Ikaraemā'e'ema 'gā nupe ka'aranūū monou nipo kwe 'ga 'ga monoi kūi— 'jau etee ore arajaupe. “Ga futat nā'ā ka'aranūū yrū rerekwara re'ā”, 'jau ore. A'eramū ore poromū 'jau “mama'e mū nipo 'ga oo imua”, 'jau ore ee orojeapoye'ema rerekou.

³⁰ Jeju'i 'ga wi mani'oko'o'i pyyka ppy we Judas 'ga afu'ama awau uēma ore wi. Awau 'ga oporogytau mainana 'wyrriara upe, 'gā nupe Jeju'i 'ga mono are. Ypytunimū futat 'ga awau ore wi.

Pedro 'ga momoranupawet

(Mateu 26.31-35; Maku 14.27-31; Luka 22.31-34)

³¹⁻³² Judas 'ga ēm ire Jeju'i 'ga 'jau oree:

—Je pēneki'yraretea. 'Awamū futat nipo je manūi. Anurenure'i nipo pēē je manū re Jeruwarete 'ga pājē resaka. Jepājēa nanē nipo pēē esaka nū. A'eramū nipo pēē aipo resag ire 'jau oree: “Pēē te 'ā pājēretea. Pēnesage 'ā oree”, 'jau nipo pēē oree orepājē resag ire, ore muorypa— 'jau Jeju'i 'ga oree.

³³—Kunumīmet. Nako'a'uweri je namutat pē pype. Ko'iko'i ete je oi pē nui. Je o re nipo pēē pejewau je rekaa numiamū. A'ere nipo “nepeoa'uweri je waw ipe”, 'jau ako je judeu 'gā 'wyrria'ri 'gā nupe ikue. A'ere je 'awamū pē nupe nanē je 'i aipo 'jau nū— 'jau Jejuī 'ga oree.

³⁴—A'eramū je mama'e yau mū mome'wau pē nupe. Jeporomutat te je 'ā pē nee kwaiwete. A'eramū ki pēē nanē pejeporomutaramū pejejeue. Pejejuerekou esage ki je 'jawe.

³⁵A'eramū pejejuereko esage resakara 'gā 'jau pē nupe: “Jejuī 'ga remiayua 'gā futat. A'eramū 'gā oporomutaramū ajuee 'ga 'jawe. A'jea futat 'gā 'ga remiayua ra'e”, 'jau nipo 'gā pē nesaka— 'jau Jejuī 'ga oree.

³⁶Aipo 'ga 'eramū Pedro 'ga 'jau 'ga upe nū:

—Ma'ape ene ewau poromū, ki Ku'jyp?— 'jau Pedro 'ga 'ga upe.

A'eramū 'ga 'jau 'ga upe:

—Nereoa'uweri je rupi 'awamū. Anure te nipo ereo je rewiri— 'jau etee 'ga 'ga upe.

³⁷—Ma'eramū je tewawe'em ene rupi ki 'ei? Ene reewe futat je manūi tewau kūi— 'jau Pedro 'ga 'ga upe.

³⁸A'eramū Jejuī 'ga 'jau 'ga upe nū:

—“Ene reewe futat je oi temanūmū”, 'jau ene kūi. A'ere je te a'jea futat je 'i enee kūi. 'Awa ypytuna rupi futat nipo ene'me 'gā nupe muapyt, je kwakupa nipo 'gā nupe wyrasokwē je'eg enunewe kūi— 'jau Jejuī 'ga Pedro 'ga upe.

14

Janeruwarete 'ga rupap

¹Jejuī 'ga 'jau wemimu'eramū oree ikue:

—Pē'arasig kasi ne. Pejepy'a'wre'emamū nanē pejemogyau nū. Jarejuwarete 'ga ree etee pejemogyppyka pejemogyau. Je ree nanē pejemogyppyka pejemogyau nū.

²Jeruwarete 'ga rupap ipe kwaiwete 'oga. A'eramū je pēnupawa mogatyrūmū tewau. Aipo tywe'em ire amunipo 'ā je aipo na'ea'uweri pē nupe.

³Pēnupawa mogatyrūmaw ire nipo je tejua pē nupe, pē nerawau peu tejepyri pē mogyau.

⁴Pekwaap futat 'ā je wawa piara— 'jau Jejuī 'ga oree ikue.

⁵A'eramū Tome 'ga 'jau 'ga upe:

—Norokwaawi ore ene wawa, ki Ku'jyp. Maran sipo ore ene wawa piara kwaawi?— 'jau 'ga Jejuī 'ga upe.

⁶A'eramū Jejuī 'ga 'jau 'ga upe:

—Je futat 'ā pe 'jawewara. Je rupi etee te peo Jeruwarete 'ga pyri. Je 'ā mama'e a'jea etee omome'u. Je futat ae mogyara. Je futat omonoukat pēē imogyau Jarejuwarete 'ga pyri, a'e je 'ā pē nupe jepi.

⁷Je kwaaw ire Jeruwarete 'ga nanē pekwaap nū. 'Awamū 'ā pekwaap 'ga futat. A'eramū nipo pēē 'ga resaka futat— 'jau Jejuī 'ga oree ikue.

⁸A'eramū Filipe 'ga 'jau 'ga upe:

—Eesaukat Jarejuwarete 'ga oree, ki Ku'jyp. 'Ga resag ire torerekōēāi arajemogyau 'jau— 'jau 'ga 'ga upe.

⁹A'eramū Jejuī 'ga 'jau 'ga upe:

—Naje kwaawi we nipo ape ki sa? Ymā agawewi te 'ā je rekoi pē pype a'i kūi? Je resakara 'gā Jeruwarete 'ga nanē wesak futat nū kūi. Ma'eramū ene poromū “Jarejuwarete 'ga eesaukat oree”, 'jau jee 'ū?

¹⁰Jeruwarete 'ga je 'jawe futat kūi. Je nanē 'ga 'jawe futat kūi. Majepei teewara 'jawe futat ore rekoi kūi. Nererowiari nipo aipoa ki sa?— 'jau Jejuī 'ga Filipe 'ga upe.

A'eramū 'ga 'jau oree:

—Nateje'ega etee rūi je amome'u pē nupe 'agamū. Tejuwarete 'ga je'ega te je amome'u pē nupe kūi. Opājē mū futat 'ga mama'e apoukari jee.

¹¹Je rerowiat pejepe. Je futat ako Tejuwarete 'ga pir are. 'Ga nanē akou jepir are nū. Aipoa ki perowiat. Jeje'ega rerowiare'ema ki jeremiapofer are je rerowiat pejepe.

¹²A'jea futat je 'i. Je rerowiaara 'gā nipo mama'e apou je 'jawe etee futat. Tejuwarete 'ga pyri je oi 'awamū. A'eramū nipo je rerowiaara 'gā mama'e apou je apyraapa— 'jau Jejuī 'ga oree.

¹³—A'eramū pēē je rerowiaaramū je renūina “mama'ea eapo oree”, 'jau ki pēē jee. A'eramū je pē nemienūja apou pē nupe tejer imū pēē enūi re. A'eramū pēē mama'ea pejejeupe je iapo re Jarejuwarete 'ga muorypa, pejejeupe iapoawer are.

¹⁴A'jea futat je'ea. “Mama'ea eapo oree”, tejer imū tejeupe pēē 'eramū je iapoi futari pē nupe— 'jau Jejuī 'ga oree.

Janeruwarete 'ga Agesage

¹⁵—Je ree pejeporomutar ire nipo pēē jeje'ega renupa.

¹⁶ A'eramū je teje'ega renuw ire 'jau Tejuwarete 'ga upe: “E'agesagea emono je rerowiaara 'gā nupe 'gā poaawamū je 'gā poawera 'jawe”, 'jau nipo je 'ga upe. “Namutar iki E'agesagea emogo 'gā pype imoire'ema futat 'gā nui”, 'jau nipo je 'ga upe.

¹⁷ 'Ga 'Agesagea mama'e a'je are etee futat pē mueapyo Jarejuwarete 'ga ree. Je rerowiare'ema 'gā 'ga 'Agesagea kwaape'ema futat. A'eramū 'ga 'gā nupe U'agesage monowe'em futat. A'ere 'ā pēē 'ga 'Agesagea pekwaap. Pē pyri futat 'ga 'Agesagea rekoi. A'eramū anurenure'i futat akou pē pype, pēnerekwaramū. Janeruwarete 'ga 'Agesagea akou je rerowiaaramū pē pype— 'jau 'ga oree.

¹⁸ A'eramū Jejuī 'ga 'jau nū:

—Anure nipo je ruri tejewya pē nupe nū. Naetyga'uweri je pēē imogyau— 'jau 'ga oree.

¹⁹—Anurenure'i nipo je rerowiare'ema 'gā naje resagu'jawi. A'ere pēē je resagu'jap futat pejepe. Temanū re miamū je ferawi etee nū. A'eramū nipo je pē mogyau teje'jawe etee futat.

²⁰ Pē nupe 'ga 'Agesage rur ire pē mueapyou Jeruwa 'ga ree, je ree 'jau. “Uwarete 'ga pyri 'ga rekoi. Jane pyri nanē 'ga rekoi futari nū” 'e are pē mueapyoukaa. “Ga pyri nanē ore rekoi nū” 'e are nanē pē mueapyoukaa nū— 'jau 'ga oree ikue.

²¹—A'eramū ki pēē jeje'ega renupa katu pejejemogyau. Jeje'ega renup katuara 'gā iporomutat futat je ree. Aipo 'gā nee Jeruwarete 'ga poromutaramū futat. Je nanē 'gā nee teporomutaramū nū. 'Gā nupe je jekwaawukari futat— 'jau 'ga oree ikue.

²² A'eramū Judas 'ga oporonupa ee 'ga upe. Najudas Iskariote 'ga rūi. Ajepeja 'ga Judas 'ga te oporonup ee 'ga upe:

—Ma'eramū ene ejekwaawukaa ore upe etee 'ū? Ma'eramū sipo ene ejekwaawukare'ema ejerowiare'ema 'gā nupe?— 'jau Judas 'ga oporonupa ee 'ga upe.

²³ A'eramū Jejuī 'ga 'jau 'ga upe:

—Je ree iporomutat ma'e 'gā jeje'ega wenup futat. A'eramū Jeruwarete 'ga oporomutaramū aipo 'gā nee. Tejuwarete 'ga retée futat je rekoi 'gā nupe.

²⁴ Je ree iporomutare'ema 'gā jeje'ega nuerowiari futari. Nateje'ega rūi te 'ā je amome'u pē nupe. Tejuwarete 'ga je'ega te je 'ā amome'u, temuarera 'ga je'ega etee futat— 'jau 'ga 'ga upe ikue.

²⁵—Pē pype tekou je 'ā a'e mome'wau pē nupe.

²⁶ Anure nipo 'ga U'agesage muri jerekwawer ipe pē poaawamū, pē mu'jau mama'e a'je are, pē muea'aa je'eawer are— 'jau Jejuī 'ga oree.

²⁷—Je 'ā jepy'ata'wa futat. A'eramū je teje'jawe etee futat pē mogyau pē mopy'ata'wau. Je rerowiare'ema 'gā nojomopy'ata'wai futari. A'ere je nanarūi. Je te a'jea futat pē mopy'ata'waara. A'eramū ki pēē pejepy'ata'waramū pejejemogyau je ree. Pekiye kasi mama'e awi ne— 'jau Jejuī 'ga oree.

²⁸—“Awamū je oi pē nui. A'ere anure je ruri nū”, a'e je ako pē nupe ko. A'ea peenup je'eawer. Je ree iporomutat ma'eramū nipo pēku'i pejejemogyau je o re je ree. Tejuwarete 'ga pyri je oi. 'Ga 'ā je apyrapararete futat. A'eramū nipo pēē pejeku'iramū je o are— 'jau Jejuī 'ga oree.

²⁹—Teoa je amome'u pē nupe 'awamū. A'eramū pēē je o re jeje'ega rerowiaa.

³⁰ Amogytaaiw etee je pēē na'ne. Je rerowiare'ema 'gā 'wyrriara 'ut ja'wyja'wy jee. A'ere nuapoukara'uweri mama'ea jee.

³¹ Tejuwarete 'ga 'eawer imū etee futat je mama'e apoi tekou. A'ere je rerowiare'ema 'gā anure 'gā neapyoramū Jeruwarete 'ga ree jeporomutar are— 'jau 'ga oree.

Aipo 'epaw ire 'ga 'jau oree:

—Pe'je iruukwe'aw awi. Soo 'jau— 'jau 'ga oree wemimu'eramū.

A'eramū futat ore arawau aipo awi.

15

Uwa ywarete 'jawewat

¹ A'ere Jejuī 'ga mama'e mū mome'wau oree, ore mu'jawamū:

—Je 'ā uwa 'ywarete 'jawe. A'eramū pēē je rerowiaaramū akā 'jawe. A'eramū Jeruwarete 'ga uwa 'ywa jara 'jawe.

² Sā'ā uwa 'ywa tymara 'gā. I'aawa rupi 'gā awau esaka. A'ere amumera akā ni'ai. Amume'ria etee u'a'iramū. A'eramū ijara 'ga i'ae'ema akā monoka jui. I'a'i ma'ea etee 'ga imogatyrumū imogyau. A'ere imogatyrumy'era akā u'aramū kwaiwete. Nan tee futat nipo je rerowiaara 'gā. Jeje'ega renupare'ema 'gā akā'ae'ema 'jawe. “Je te 'ā Jejuī 'ga remiayuwaretea”, 'jau nipo 'gā numiamū. A'ere nipo 'gā nuapoi Jeruwarete 'ga remifutar imū mama'ea. Nenuwi 'gā 'ga je'ega. A'e 'gā 'ga ope'a je wi imonou muku. Amumera 'gā

te nipo ajee akā mogatyrūmyrera 'jawe. A'e 'gā a'jea futat Jeruwarete 'ga amu'akwaap 'gā mama'e tywera apoe'em are 'gā mogyau. Aipo 'gā akā mogatyrūmyrera 'jawe i'a kwaiwete ma'e 'jawe ajemogy jee. 'Gā a'jea futat 'ga remifutar imū etee mama'e wapo ajemogyau.

³ A'ere 'ga ako pē mogatyrūi ko. Jeje'ega a'jea futat peenup katu katu. A'eramū 'ga ako pē katu'oka ko— 'jau 'ga oree.

⁴—Sā'ā akāa o'yw are u'ama etee i'aa. O'yw awi akā open ire ni'au'jawi. Nan tee futat jepir are ajemogy ma'eramū etee Jeruwarete 'ga remifutar imū mama'ea peapo pejejemogyau. A'eramū je pē nerekou tejeape futat— 'jau 'ga oree.

⁵—Je uwa 'ywarete 'jawe futat. Pēē akā 'jawe. Jepir are pejejemogyau. Je tekou pē nee 'jau. A'eramū je pē poaa mama'ea apou Jarejuwarete 'ga remifutar imū. Pejepoare'emamū nepeapo'uweri mama'ea— 'jau 'ga oree.

⁶—Sā'ā uwa 'ywa jara 'ga akā ypiwera monoga imonoa iapya jui. Nan tee futat Jeruwarete 'ga jepir areware'ema 'gā monoi muku je wi.

⁷ Je ree ajemogy ma'eramū pēē jeje'ega renuparamū futat. A'eramū Jeruwarete 'ga "mama'e mū epoo jee", ojeupe 'eramū iapou futat pē nupe— 'jau Jejuu 'ga oree.

⁸—Jeruwarete 'ga remifutar imū pejejemogy re pēē mama'ea apou 'ga 'eawer imū etee. A'eramū pē nesakara 'gā 'jau pē nupe: "Janeruwarete 'ga 'ā esageay", 'jau nipo 'gā pē nupe pē nesag ire. "Gā 'ā a'jea futat Jejuu 'ga remiayuwa", 'jau nipo 'gā pē nesag ire— 'jau 'ga oree ikue.

⁹—Jeruwarete 'ga iporomutat je ree. A'eramū je nan tee futat teporomutaramū pē nee. A'eramū ki pēē jeje'ega renuparamū jeje'ega anupa ywyapi pejejemogyau. A'eramū je taetu teporomutaramū pē nee.

¹⁰ Sā'ā je Tejuwarete 'ga je'ega renup katu katua je rekoa. A'eramū 'ga a'eramū oporomutaramū a'jea futat je ree. Nan tee futar iki jeje'ega peenup pejejemogyau. A'eramū je jeporomutaramū pē nee pejemogyramū— 'jau 'ga oree.

¹¹—Aipoo je amome'u pē nupe pē muekōēāinawamū. Je 'ā ekōēāi ma'eramū. A'eramū je teje'jawe pēnekōēāi futaa.

¹² Jeporomutat je pē nee. A'eramū je tejejukau esage pē nee. A'eramū je 'jau pē nupe: Pēporomutar iki pejejee. Pejejuka esage ki pejejee, je 'jawe futat— 'jau 'ga oree ikue.

¹³—Ojekoty'aaw are iporomutat ma'e 'gā amanūmū ojekoty'aawa 'gā nekwawer ipe. Nitywi 'ga amū aipo 'ga apyrapara 'gā, ojekoty'aaw are iporomutara apyrapara 'gā.

¹⁴ Jeje'ega renuw ire pejejemogyau jejekoty'aawamū.

¹⁵—Naje upe oporowyky ma'e rūi pēē. Jejekoty'aawa te pēē. I'wyriat ma'e 'gā o'wyriara porowykyrama nokwaawi. Mama'e epoo amū 'eramū etee te 'gā o'wyriara porowyky apoi. A'eramū pēē 'awamū pejejemogyau jejekoty'aawamū. A'eramū je tejeupe Tejuwarete 'ga remimome'u mome'waupap pē nupe.

¹⁶ Napēē nūi ako je pyrū pejepe ikue. Je te apyrū pēē kwe pe imonopyramū mama'e esage apoukaawamū Jarejuwarete 'ga remifutar imū. Aipoo pēnemiapoo nateepawa'uweri futari. Nanuaramū Jeruwarete 'ga mama'e muri futari pē nupe jeje'eg imū ojeupe mama'e renūi re.

¹⁷ Ma'eramū 'ā je 'i poromū pē nupe. Pēporomutar iki pejejee pejejemogyau, je 'i pē nupe— 'jau Jejuu 'ga oree.

'Ga rerowiara 'gā nee iporomutare'ema 'gā

¹⁸—Je rerowiara'ema 'gā pejejee iporomutare'emamū ki pēnea'at je ree. Je ree ra'ne te 'ā 'gā niporomutari.

¹⁹ Oje'jawe pejejemogy re amunipo 'ā 'gā poromutaramū pē nee. A'ere 'ā na'gā 'jawe rūi tāmēje tepejemogy. Je 'ā amū'ē pēē 'gā nui pē mogyau tejemiayuamū. A'eramū 'gā oporomutare'emamū pē nee pejemogyramū— 'jau Jejuu 'ga oree.

²⁰—Je'ewer are ki pēnea'at, "I'wyriat ma'e 'gā o'wyriara nuapyraawa'uweri" e are. A'eramū 'gā je rereko tywer ire pēē nanē pē nerekou tyweaete futat nū. Jeje'eg are wapyaka re ki 'gā peje'eg are nanē tuapyaka nū.

²¹ Pēē 'ā je rerowiara. A'eramū 'gā pē nerekou tyweaete. Je muarera 'ga 'gā nokwaawi. A'eramū 'gā a'eramū pē nerekou tyweaete futat— 'jau Jejuu 'ga oree.

²²—'Au ako tejuja 'gā mu'jau Tejuwarete 'ga je'eg are ai'i nū. Je amu'e'em ire taetu amunipo 'ā 'gā 'jau: "Norokwaawi ore Jarejuwarete 'ga porogytaa. A'eramū ore orotywera kwaape'ema nanē nū", 'jau amunipo 'ā 'gā. A'ere 'gā 'ga porogyta kwaawi futari. A'eramū 'gā o'mearūe'emamū 'ga upe.

²³ Je ree iporomutare'ema 'gā Jeruwarete 'ga ree nanē niporomutari nū.

²⁴ 'Gā nemiapoe'ema ako je iapou'jau'japa agawewi 'gā neape ai'i. Nitywi 'ga amū aipo apou je 'jawe. Aipo resage'em ire amunipo 'ā 'gā 'iarūi "Naruesagi ore Jejuu 'ga remiapofera. A'eramū ore 'ga rerowiara'ema" e'iarū amunipo 'ā 'gā jee. A'ere ako 'gā esagi agawewi futat

ai'i. Je ree 'gã poromutare'em tee ate. Jeruwarete 'ga ree nanē nanuara 'gã niporomutari nū— 'jau Jejuí 'ga oree.

²⁵ —Ymã te 'ga amū ka'arana kwasiaa je ree rakue: “Naapoi agawewi je mama'e tywera. A'etea je ree 'gã poromutare'em tee ate”, 'jau 'ga amū inuga ikwasiaa rakue. Aipoa 'gã ikwasiaa inuga je ree rakue— 'jau 'ga oree.

²⁶ —Tejuwarete 'ga pyri tewaēm ire ta'e 'ga upe 'jau: “E'agesagea emono je rerowiaara 'gã nupe”, ta'e Tejuwarete 'ga upe 'jau. A'eramū nipo 'ga imua pē nupe je ree pē mu'jauwamū. Mama'e a'je are etee te 'ga pē mu'ei.

²⁷ A'eramū pēē je mome'wau 'gã nupe. Pejejepype je reko ypyrauwe ako pejeatau pejejemogyau je rewiri je'ega renupa ai'i. A'eramū pēē 'awamū pēē nanē 'gã mu'jau je ree nū— 'jau Jejuí 'ga oree ikue.

16

¹ A'ere Jejuí 'ga oporogytau oree nū:

—Aipoa je amome'u pē nupe tejerowiar awi pē momigukaawe'emamū.

² Anure nipo je rerowiare'ema 'gã pē mū'ei janejatykaaw awi. “Jejuí 'ga rerowiaara pēē. A'eramū pēē pejewau peje'jau ore wí”, 'jau nipo 'gã pē nupe. Pēē mū juka re nipo 'gã 'jau ajupe: “Jarejuwarete 'ga remifutar imū jane 'gã apisi”, 'jau futatee nipo 'gã ajemogyau.

³ Jeruwarete 'ga nipo 'gã ikwaape'ema agawewi. Je nanē nipo 'gã je kwaape'ema nū. A'eramū nipo 'gã pē nerekou tyweaete.

⁴ A'eramū je 'awamū 'gã nemiaporama mome'wau pē nupe. A'eramū pēē anure 'gã iaporamū pejea'aramū je'eawer are. “Omome'u tāmējē ako Jejuí 'ga janee ikue”, 'jau nipo pēē— 'jau 'ga oree.

Janeruwarete 'ga 'Agesage

—Pē pype tekou ako je aipo mome'wawa'ne'em pē nupe ai'i.

⁵ A'ere je 'awamū je oi pē nū. Temuarera 'ga pyri je oi tejewya nū. A'e are ako je pē mu'ei ko. A'etea 'ã pēē mū “Ma'ape te ereo?” 'jawe'em jee.

⁶ Peje'arasigamū etee 'ã aipo pejejeupe je 'eramū.

⁷ A'ere a'jea futat aipo je'ea. Je oe'em ire amunipo 'ã pē poara 'ga nura'uweri pē nupe. Teo re te je 'ga 'Agesage muri pē nupe pē poaawamū. A'eramū pēē pejeku'iramū je o are.

⁸ 'Ga 'Agesagea 'ut ywypewara 'gã mueapyou 'gã tywer are. Mama'e a'je are 'gã mueapyou 'ua. “Pētywer are Ku'jywa 'ga pē nereko tyweri” 'e are 'gã mueapyoawamū 'ga U'agesage muri pē nupe— 'jau Jejuí 'ga oree.

⁹ —Je rerowiare'ema 'gã naeapyoui “Jejuí 'ga rerowiare'emamū ae ia'wyre'emamū juejue ae jemogyi Ku'jywa 'ga upe” 'e are weapyou'emamū. Aipo are te 'ga 'Agesagea 'gã mu'akwaawi.

¹⁰ Mama'e esage are nanē 'ga 'Agesagea 'gã mueapyou nū. Je 'ã mama'e esagea etee iapou. A'eramū je tewau Tejuwarete 'ga pyri. Naje resagu'jawi pejepe.

¹¹ Ku'jywa 'ga ajuereko tywerete are nanē 'gã mueapyou. Mama'eukwaawa 'wyriara upe Ku'jywa 'ga 'i ikue: “Anure nipo ereo tata pe”, 'jau 'ga mama'eukwaawa 'wyriara upe ikue. Je rerowiare'ema 'gã mama'eukwaawa 'wyriara remiayuwa futat. A'eramū nipo 'gã awau tata pe o'wyriara rupiweve futat— 'jau Jejuí 'ga oree.

¹² —A'ere kwaiwete je pē nupe je remimome'urama. A'ere 'awamū nepēneapyoui we ee. A'eramū je imome'wawe'em pē nupe.

¹³ 'Ur ire te nipo Ku'jywa 'ga 'Agesagea pē mu'ei mama'e a'je are etee te. 'Ga je kwaawukari pē nupe. Naoje'eg imū rūi 'ga pē mu'ei. Wemienuwer are te 'ga pē mu'ei. Ijeaporam are nanē 'ga pē mu'ei nū.

¹⁴ Jeruwarete 'ga 'Agesagea jeje'ega renuw ire 'ga pē mu'ei ee. A'eramū te nipo pēneapyou je ree. “Jejuí 'ga esage” pē mu'eukaa pejejaupe.

¹⁵ Tejuwarete 'ga 'jawe futat jerea'aramū mama'e are. A'eramū je 'jau pē nupe: Ku'jywa 'ga 'Agesagea nipo pē mu'e je'eawer are, enuw ire, a'e je 'ã pē nupe— 'jau Jejuí 'ga oree.

“Tejuwarete 'ga pyri je oi” 'ga 'eawet

¹⁶ —Anurenure'i nipo pēē je resake'ema pejejemogyau. Anure tāmējē te nipo je resagu'jap pejepe nū— 'jau 'ga oree.

¹⁷ Aipo orojeupe 'ga 'eramū ore 'jau arajaupe:

—Ma'eramū te 'ga 'i poromū janee? “Anurenure'i nipo naje resagu'jawi pejepe. Anure tāmējē te nipo je resak pejepe nū”, e'i 'ga 'ã janee. “Tejuwarete 'ga pyri je oi, tejewya nū. A'eramū pēē a'eramū je resagu'jape'ema”, e'i 'ga 'ã janee. Ma'eramū 'ga poromū 'jau nū'ū? — 'jau ore arajaupe.

¹⁸ —Maranime sipo anurenure'ia? Maranime sipo anurea? Janereapyoui jane 'ga porogyta are nū'ū— 'jau ore arajaupe.

¹⁹ Jejuī 'ga aipo arajaupe 'e kwaapa 'ūina. "Iporonuwiwet 'gā je'e are", 'jau 'ga ojeupe. A'eramū 'ga 'jau oree:

—“Anurenure'i nipo pēē je resake'ema. Anure tāmējē te nipo je resagu'jap pejepe”, 'a'e ako je pē nupe ko kūi. A'e are nipo nepēneapyoi?— 'jau 'ga oree.

²⁰ —A'jea futat je 'i. Anure nipo pēē je rapirūmū je manū re. Je manū re nipo pē'arasig je ree. Je rerowiare'ema 'gā te nipo ajeē iku'i etee ajemogyau je manūnamū. Pēē te nipo ajeē pē'arasigaip je ree. A'ere nipo anure pejeku'iramū nū.

²¹ Sā'ā kūjāa wa'yray reru'arasiga ojewi wa'yra rayramū. A'ere 'ā ojewi wa'yra 'ar ire aku'iramū nū. Wea'aru'jawe'emamū 'ā wa'yra rayfer are. Aku'iramū etee 'ā wa'yra are nū.

²² Nan tee futat nipo pēē 'awamū peje'arasigamū pejejemogyau. A'ere nipo pēē anure je resagu'jaw ire pēku'i pejejemogyau nū. A'eramū nipo 'gā amū pēku'i mateepawarūme'em pē nū— 'jau 'ga oree.

²³ —Aipoa 'ara rupi nipo pēē 'jawe'em je upe, “ore mu'e ape aipo are”, 'jawe'em nipo pēē jee. Ku'jywa 'ga 'Agesagea te nipo pē mu'e mama'e are. A'jea futat je 'i. Pēē 'ā je rerowiaaramū. A'eramū 'ga “mama'ea eapo amū jee”, jerer imū ojeupe 'eramū Ku'jywa 'ga iapou pē nupe.

²⁴ Nepeenūi we te 'ā mama'ea 'ga upe jerer imū. A'eramū ki pēē 'awamū mama'e renūina 'ga upe. A'eramū 'ga imua pē nupe. A'eramū te nipo pēku'i 'a'jea'jea futat pejejemogyau— 'jau Jejuī 'ga oree.

²⁵ —Mama'e mū ako je amome'u pē nupe pē mu'jawamū ai'i. A'ere anure nipo je Tejuwarete 'ga mome'ui katu katu pē nupe.

²⁶ Naje rūi futat mama'e aenūi Ku'jywa 'ga upe pē nupe. Je rerowiat 'ā pejepe. A'eramū pēē futat mama'e renūina Jarejuwarete 'ga upe pejejeupe.

²⁷ Jeruwarete 'ga iporomutat pē nee. Je ree pēporomutaramū. “Ga wi je ruri” 'ea 'ā perowiat. A'eramū 'ga oporomutaramū pē nee. A'eramū 'ga mama'e apou pē nupe ojeupe pēē 'eramū.

²⁸ A'jea futat je ruri Tejuwarete 'ga wi 'au wyy pe ikue. A'ere 'awamū je oi tejewya ywag ipe 'ga pyri nū— 'jau 'ga oree.

²⁹ A'eramū ore 'ga remimu'eramū 'jau 'ga upe:
—'Awamū namorogytau rūi ore mu'e ape. Orereapyo ore 'awamū eneporogyta are ki 'ei— 'jau ore 'ga upe.

³⁰ —Ene 'ā 'a'jea futat enereapyo katu katu mama'e are. Arajaupe oreporogyta jemima we 'ā ene ikwaapa. A'eramū ene ore mueapyou ee, ee ore poronuwe'emaue. A'eramū ore “Ku'jywa 'ga wi je ruri” 'e rerowiaa— 'jau ore 'ga upe.

³¹ A'eramū 'ga 'jau oree:

—A'jea futat sipo je rerowiat pejepe 'awamū?— 'jau 'ga oree.

³² —A'ere'ere'i futat nipo pēē pekwasio pejewau pejeje'wyr ipe je wi. Nepepytai'i futari nipo amū je pyri. A'ere Jeruwarete 'ga te 'ga rekoi je pyri. A'eramū je natejetee'i rūi tekou.

³³ Aipoa je 'ā omome'u pē nupe pē mopy'ata'waawamū. A'eramū pēē pejekyjawe'em pejejemogyau. Je rerowiaara pēē. A'eramū pēē pejepy'a'wyre'emamū je ree pejejemogyau. Je rerowiare'ema 'gā nipo pē nerekou tyweaete. A'ere kasi pepojeuw ine. Je te 'ā 'gā 'wryriara pājēa 'arimū akwap— 'jau Jejuī 'ga oree.

17

'Uwarete 'ga upe oje'ega monoawet

¹ Wemimu'eramū ore upe oporogytapaw ire, 'ga amā'jāu ywau oje'ega 'Uwarete 'ga upe:
—Kiapi'ni. 'Awamū iwaēmi jeresage resaukaawa upe. Jeresagea esaukat 'gā nupe. A'eramū je nanē eneresage resaukararūmū 'gā nupe nū.

² Eneje'eg imū ako je ruri ikue. Ene futat 'ā je rerowiarukaa 'gā nupe. A'eramū je tejerowiaara 'gā mogyau nakwaparimū rūi futat. Je futat 'gā amomyau 'gā mogyau.

³ A'eramū jeremimomyaufera 'gā ene kwaapa. “Ga etee futat Janeruwaretea”, 'jau nipo 'gā enee. A'eramū nipo 'gā a'eramū je nanē je kwaapa nū. “Jejuī Kristu 'ga Janeruwarete 'ga remimurera futat”, 'jau nipo 'gā jee je kwaaw ire.

⁴ Eneporowykya je aapopap 'gā nupe ene'eawer imū. Eneresagea nanē je esaukaa 'gā nupe nū.

⁵ Ymā ako wyy apoe'emauewe jeresagea ereesaukat jarejepyriwara 'gā nupe ikue. A'eramū ene 'awamū nanē esaukaa ejepyri je o re nū— 'jau Jejuī 'ga oje'ega monou 'Uwa 'ga upe.

⁶ A'ere Jejuī 'ga wemimu'eramū ore mome'wau 'Uwarete 'ga upe:

—Ene 'ã je rerowiarukar ape 'gã nupe. A'eramũ je ene kwaawukaa tejerowiaara 'gã nupe ai'i. 'Gã 'ã eneremiayuwa rakue. A'eramũ ene 'gã mua jee, jeremiayuwa. Eneje'ega 'gã wanup.

⁷ A'eramũ 'gã 'awamũ ikwaapa, “tejuwa 'ga je'eg imũ tee je pẽ mu'ei” 'ea 'gã erowiaa.

⁸ Eneje'eg are je 'ã 'gã mu'ei. A'eramũ 'gã “Jeruwarete 'ga te 'ã je mut” 'ea 'gã erowiaa.

⁹ —'Gã nee je porogytai enee. Natejerowiare'ema 'gã nee rũi je porogytai enee. Tejeupe eneremimurera 'gã nee te je porogytai enee. Eneremiayuwa futat 'gã. A'eramũ je a'eramũ teje'ega monou ene upe 'gã nee.

¹⁰ Je rerowiaara 'gã juejue janeremiayuwa. Enema'eramũ, jema'eramũ 'jau. A'eramũ nipo 'gã neko esage resakara 'gã 'jau jee: “A'jea futat Jejui 'ga resageramũ ra'e. Sã'ã 'ga remiayuwa 'gã jemogy esagea”, 'jau nipo 'gã nesakara 'gã jee.

¹¹ —Kiapi'ni, Ene te 'ã eneresageay. A'ere'ere'i futat je oi peu ene pyri nũ. Napytai je 'au ywy pe. A'ere janeremiayuwa 'gã pytai 'au. A'eramũ ene epãjẽ mũ 'gã a'gwau mama'e tywer awi jarejeupe. Je upe ejemimurera 'jawerimũ etee futat 'gã a'gwau mama'e tywer awi jarejeupe. Majepei teewara 'jawe te 'ã jane rekoi. A'eramũ ene majepei 'yweteewara 'jawe 'gã mogyau jareje'jawe.

¹² —'Gã pype tekou je 'gã a'gwau mama'e tywer awi. Tejeupe ene epãjẽ muawer imũ etee futat je 'gã a'gwau. Noka'jami 'ga amũ je wi. Majepeja 'ga etee te ajee jeremiayuwa 'ga naje rerowiari. Nitywi 'ga amũ je rerowiarukarũmũ 'ga upe. Tata pe oo ma'e 'ga wejue te. Ymã te 'gã ka'arana kwasiari inuga 'ga ree rakue. A'eramũ nipo tata pe 'ga o re ka'arana mogytaara 'gã 'jau “a'jea futat ra'e. Mama'e a'je are 'gã ka'arana kwasiari inuga rakue”, 'jau nipo 'gã— 'jau Jejui 'ga u'ama 'Uwa 'ga upe.

¹³ —A'ere'ere'i futat je oi ene pyri. A'eramũ je 'au tekouwe aipo 'jau enee 'gã nemi-anuwaawe, 'gã maku'iaawamũ. Afutat je 'gã ku'ia teje'jawe.

¹⁴ Eneje'ega je imome'wau'jau'japa 'gã nupe 'gã nerekou. Je najerea'ara'uweri mama'e tywer are. Jeremimu'efera 'gã nanẽ wea'are'emamũ mama'e tywer are nũ. Natejerowiare'ema 'gã 'jawe etee rũi ore jemogyi mama'e tywera apou. A'eramũ nipo eneje'ega rerowiare'ema 'gã oporomutare'emamũ 'gã nee 'gã jemogyramũ.

¹⁵ Eroo jeremiayuwa 'gã je reewe 'awa ywy awi, na'ea'uweri je enee. Ea'gu ki 'gã mama'eukwaawa 'wyrar awi, a'e te je enee— 'jau Jejui 'ga oporogytau u'ama 'Uwarete 'ga upe.

¹⁶ —Na'auwara rũi te 'ã je. A'eramũ je ree ojemu'e ma'e 'gã nanẽ wea'are'emamũ mama'e tywer are ajemogyau 'jau. Mama'e esage apo are etee 'gã taea'at ajemogyau 'jau. Naje rerowiare'ema 'gã 'jawe rũi 'gã jemogyi— 'jau Jejui 'ga 'Uwarete 'ga upe u'ama oporogytau.

¹⁷ —Emogy 'gã ejemiayuwa. Eneje'ega a'jea futat. Eje'eg imũ ejekwaawukat 'gã nupe— 'jau Jejui 'ga 'Uwa 'ga u'ama.

¹⁸ —Ene te 'ã je mur ape 'au ywy pe eje'ega mome'waramũ. A'eramũ je nan tee futat 'gã mokwasi'wau eneje'ega mome'waramũ.

¹⁹ Awamũ je jemonoi enepo pe. Ene'eawer imũ etee futat nipo 'ã temanũmũ. A'eramũ nipo je rerowiaara 'gã ajemogyau eneremiayuwa je 'jawe, mama'e apou enee je 'jawerimũ— 'jau Jejui 'ga oje'ega 'Uwarete 'ga upe u'ama.

²⁰ —A'ere je natejewiriwara 'gã nee etee rũi je porogytai enee. Anure nanẽ nipo 'gã oi okwasi'wau kwe pe je mome'wau 'gã nupe. A'eramũ nipo 'gã nenupara 'gã amũ je rerowiaa nanẽ nũ. A'eramũ je tejerowiaarama 'gã nee nanẽ teje'ega enee nũ.

²¹ Afutat je majepei tee tup ma'e 'jawe 'gã jemogya. Sã'ã ae majepei tee aeruwa. Nan tee 'gã tojekoty'ar esage jane ree 'jau. Sã'ã jane majepei teewara 'jawe jane rekoi. Nan 'gã nekoa je afutat nanẽ jarejepyri. A'eramũ nipo majepei 'yweteewara 'jawe 'gã jemogyramũ 'gã nesakara 'gã je rerowiaa— 'jau Jejui 'ga 'Uwa 'ga upe.

²² —Je 'ã esage ma'ea. A'eramũ ako ene je muorywukaa jarejepyriwara 'gã nupe ikue, ywagipewara 'gã nupe ikue. A'eramũ je nan tee futat 'gã muesageu tejesage 'jawe. A'eramũ 'gã ajemogyau majepei 'yweteewara 'jawe jane 'jawe— 'jau Jejui 'ga oporogytau u'ama 'Uwa 'ga upe.

²³ —Je 'ã ako 'gã pype. Ene nanẽ 'ã ekou je pyri nũ. A'eramũ je rerowiaara 'gã majepei 'yweteewara 'jawe etee futat ajemogyau. A'eramũ nipo je rerowiare'ema 'gã weapyoramũ ee. “A'jea futat 'ga Ruwarete 'ga poromutaramũ nanimenime 'ga ree ra'e. A'eramũ nipo nan tee futat 'gã oporomutaramũ jane ree nũ” 'e are nanẽ nipo 'gã weapyoramũ ajemogyau— 'jau Jejui 'ga oje'ega 'Uwarete 'ga upe.

²⁴ —Kiapi'ni. Eneporomutat ako je ree ywy apoe'emauwe futat ikue. Ma'eramũ 'ã ako je muorywukar ape ywagipewara 'gã nupe ikue. Jeresagea ako ywagipewara 'gã esaka ikue. 'Awamũ 'ã ene 'auwara 'gã nupe je rerowiarukaa nũ. A'eramũ je ywag ipe tejerowiaara 'gã neroo futaa. A'eramũ 'gã jeresagea resaka— 'jau Jejui 'ga 'Uwarete 'ga upe u'ama oje'ega.

²⁵—Kiapi'ni. Eneresageay te 'ã. Ene rerowiare'ema 'gã nenekwaawi futari. A'ere 'ã je ene kwaawi futari. A'eramũ 'ã 'awamũ jeremimu'e 'gã ene kwaapa futat. "A'jea futat 'ga Ruwarete 'ga 'ga muri rakue" 'ea 'gã ikwaapa 'awamũ— 'jau Jejuí 'ga 'Uwa 'ga upe.

²⁶—Je akwaawukat ene 'gã nupe ai'i. 'Awamũ miamũ futat je tekou ene kwaawukaa 'gã nupe nũ. A'eramũ nipo 'gã je ree eneporomutara 'jawe etee futat 'gã oporomutaramũ ajuee. A'eramũ nipo je 'ã tekou 'gã pype— 'jau Jejuí 'ga oje'ega monou u'ama 'Uwarete 'ga upe.

18

Jejuí 'ga pyykawet

(*Mateu 26.47-56; Maku 14.43-50; Luka 22.47-53*)

¹ 'Uwarete 'ga upe oporogytapaw ire Jejuí 'ga awau jui. Wemimu'eramũ etee ore rerawau. A'eramũ ore arawau 'yekwa'wi raapa, Setrõ 'jawa raapa. Y'wa 'ywa tymaw ipe ore orowaẽma.

² Ore wawetea futat aipo jepi. Aipo pe futat Jejuí 'ga ore rerawau ore mogytau jepi. A'eramũ Judas 'ga aipoa arawawera kwaapa.

³ A'eramũ Judas 'ga peu futat jefaruu 'gã nerawau Jejuí 'ga pyygukaa.

'Gã oe'emauwe mainana 'wyrriara 'gã, fariseu 'gã netee 'jau jefaruu 'gã nupe: "Pe'je pejewau 'ga rupi Jejuí 'ga pyyka", 'jau 'ga 'gã nupe rai'i. Janeruwarete 'ga mogytaawa raarana 'gã nanẽ 'ga imonou 'gã nupi nũ. A'eramũ Judas 'ga 'gã nerawau Jejuí 'ga resaukaa 'gã nupe. Muawa 'gã erawau. Tata nanẽ 'gã erawau wape resakaawamũ nũ. 'Ua 'gã owaẽma Jejuí 'ga upe.

⁴⁻⁵ Judas 'ga akou jefaruu 'gã pype, 'gã po pe Jejuí 'ga monoara 'ga poromũ.

Opyyk 'gã nura Jejuí 'ga ikwaapa ojee. A'eramũ 'ga awau 'gã nowosõu.

—Awýja te peekat pejejemogyau?— 'jau 'ga 'gã nupe.

—Jejuí 'ga ore aruekat arakou, Nasare pe waranup ma'efera 'ga ore aruekat arakou— 'jau 'gã 'ga upe.

—Koromũ futat je rekoi— 'jau 'ga 'gã nupe aipo 'eramũ.

⁶ Aipo ojeupe 'ga 'eramũ, 'ga upe 'ut ma'efera 'gã ojewya akupeu, awau u'aa ywyu.

⁷ A'eramũ Jejuí 'ga 'jau 'gã nupe nũ:

—Awýja rekaa te pejot?— 'jau 'ga 'gã nupe nũ.

—Jejuí 'ga ore aruekat, Nasare pe waranup ma'efera 'ga ore aruekat arakou— 'jau 'gã 'ga upe.

⁸—Koromũ futat je rekoi, a'e je ako pẽ nupe ko. Je ree pejeoporopygiweramũ ki je etee futat je pyyk pejepe. Pekok kasi jeremimu'efera 'gã nee ne— 'jau 'ga 'gã nupe.

⁹ 'Uwarete 'ga upe oje'ega monopywawer are futat 'ga 'i rai'i. "Tejeupe eneremimurera 'gã a'gui, Kiapi'ni. Noka'jami futari 'ga amũ je wi", 'jau Jejuí 'ga 'Uwarete 'ga upe rai'i. A'eramũ 'ga a'e are 'jau jefaruu 'gã nupe "Tene ki 'gã oi", 'jau jupe.

¹⁰ Aipo Jejuí 'ga je'ega renupawe Simão Pedro 'ga ojyuu rekyita yrũ awi. A'eramũ 'ga mainana 'wyrriararete 'ga remiayuwa namĩ monoka ojyuu pyu. Furuk. 'Ga jakwatawa katywara 'ga namĩ yypa. Inamĩ ywipywera 'ga rera Mauku.

¹¹—Ereapo awi nanuara! Ere ejyuu munepa ejy ryrũ pype nũ— 'jau Jejuí 'ga Pedro 'ga upe. —Jeruwarete 'ga remifutar imũ futat 'gã nuri je pyyka. A'eramũ je tejereko tywerukaa 'gã nupe— 'jau Jejuí 'ga 'ga upe.

Anasi 'ga rog ipe 'ga rerooawet

¹² A'eramũ jefaruu 'gã, o'wyrriara 'ga retee Jejuí 'ga pyyka ifaa. Janeruwarete 'ga mogytaawa raarana 'gã nanẽ 'gã poaa Jejuí 'ga far are.

¹³ 'Ga far ire 'gã 'ga rerawau Anasi 'ga rog ipe ra'ne. Aiporamũ Kaifasi 'ga mainana 'wyrriararetea. Anasi 'ga Kaifasi 'ga ratyuwa.

¹⁴ Aipo Kaifasi 'ga futat 'jau judeu 'gã 'wyrriari upe rai'i: "Tene Jejuí 'ga manũ. 'Ga manũ re nipo romanũ 'gã jane apisawe'em", 'jau 'ga 'wyrriari upe rai'i.

Pedro 'ga Jejuí 'ga kwakupa

(*Mateu 26.57-58, 69-70; Maku 14.53-54, 66-80; Luka 22.54-57*)

¹⁵ Anasi 'ga rog ipe 'gã Jejuí 'ga rerooramũ, Simão Pedro 'ga awau 'ga rewiri. 'Ga amũ nanẽ awau 'ga rewiri nũ, Jejuí 'ga remimu'efera 'ga nanẽ awau 'ga rewiri nũ. Mainana 'wyrriararete remiesapytera 'ga poromũ. A'eramũ 'ga awau osou Jejuí 'ga rupi, mainana 'wyrriara 'ga roga osoma pype.

¹⁶ A'ere Pedro 'ga nosei 'gã nupi. Iosoma rokwar ipe te 'ga pytai. A'eramũ ose ma'e 'ga awau ojewya oje'ega iosoma rokwarara raarana eẽ upe:

—Tene jejekoty'aawa 'ga resei i— 'jau 'ga awau eẽ upe.

A'eramũ eẽ Pedro 'ga mogeu.

¹⁷ A'ere eẽ Pedro 'ga upe eẽ 'i:

—Nawā nemipygya kīā remiayuwa rūi nipo ene?— 'jau ēē 'ga upe.

—Naani nū ī— 'jau Pedro 'ga ēē upe.

¹⁸ Iro'ysagay 'gā nupe. A'eramū mainana 'wyrriara remiayuwa 'gā, Jarejuwarete 'ga mogytaawa raarana 'gā netee 'upa ojepe'jau tata are. A'eramū Pedro 'ga ojepe'jau u'ama 'gā pyri.

Mainana 'wyrriara 'ga poronupawet

(Mateu 26.59-66; Maku 14.55-64; Luka 22.66-71)

¹⁹ A'eramū mainana 'wyrriararetefera 'ga, Anasi 'ga 'jau Jeju 'ga upe:

—Ma'ja are te 'gā eremu'e jepi? Awŷja te eremu'e jepi?— 'jau 'ga 'ga upe.

²⁰ A'eramū Jeju 'ga 'jau 'ga upe:

—Pē neape futat te 'ā je porogytai 'gā nupe jepi. Judeu 'gā jatykaaw ipe, Jarejuwarete 'ga mogytaaw ipe. Mīmer imū je 'ā 'gā mu'jau pēnemiesagamū jepi— 'jau Jeju 'ga 'ga upe.

²¹ —Ma'eramū sipo je moporogytaukar ape ejeupe? Je renuparera 'gā tomome'u enee kūi. 'Gā okwaap futat je'eawera kūi— 'jau Jeju 'ga 'ga upe u'ama.

²² Aipo 'ga 'eramū jefaruuna'nī 'ga amū Jeju 'ga reakwapeteka.

—Aipo ere te nipo mainana 'wyrriararete 'ga upe ki sa?— 'jau 'ga 'ga upe.

²³ A'eramū Jeju 'ga 'jau 'ga upe:

—Mama'e tywera mū je imome'u re amunipo 'ā mama'e tywera ere jee 'auwara 'gā nemianuwamū. Mama'e a'jea je 'eramū ma'eramū ene je reakwapetegukaa 'ga upe ki 'ei?— 'jau Jeju 'ga Anasi 'ga upe.

²⁴ A'eramū Anasi 'ga Jeju 'ga rerawaukaa Jarejuwarete 'ga mogytaawa raarana 'gā nupe. 'Ga faa 'gā erawau Kaifasi 'ga upe. Mainana 'wyrriararete 'ga poromū Kaifasiramū.

Pedro 'ga 'ga kwakuwu'japa

(Mateu 26.71-75; Maku 14.69-72; Luka 22.58-62)

²⁵ A'e pype Pedro 'ga ojepe'jau u'ama. A'e pe ojepe'e ma'e 'gā amū 'jau 'ga upe:

—Na'ga remimu'ea rūi nipo ene ki sa?— 'jau 'gā 'ga upe.

A'eramū Pedro 'ga 'jau:

—Naani nū'ū.

²⁶ A'eramū mainana 'wyrriararete remiayuwa 'ga amū oporonupa ee Pedro 'ga upe nū. 'Ga upe ee oporonup ma'e 'ga inamī ywipywera 'ga pytuna 'ga.

—Naene rūi nipo ore aruesak Jeju 'ga pyykaw ipe ra'e ki sa?— 'jau 'ga 'ga upe.

²⁷ —Tee. Naani nū'ū. Nakwaawi je 'ga nū'ū. Awŷja upe pēē 'jau 'ū?— 'jau etee Pedro 'ga 'ga upe nū.

A'erauwe wyrasokwē oje'ega.

Piratu 'ga upe Jeju 'ga reroowet

(Mateu 27.1-2, 11-14; Maku 15.1-5; Luka 23.1-5)

²⁸ Ai'iwetetewe 'gā Jeju 'ga rerawau Kaifasi 'ga rog awi. 'Wyrriararete 'ga rog ipe 'gā 'ga rerawau, Piratu 'ga rog ipe. Ku'emaiaiw are futat 'gā 'ga rerawau 'ga rog ipe. Judeu 'gā 'wyrriari' 'gā Piratu 'ga roga pype osowe'em. Piratu 'ga judeue'ema. Judeu 'gā osowarūe'em judeue'ema 'gā nog ipe ra'e jepi. "Ga roga pype jarese re jane jemoky'ai Jarejuwarete 'ga upe. A'eramū jane mama'e 'wawarūe'em jarejatykaaw ipe", 'jau 'gā ajaupe. A'eramū 'gā osowe'em.

²⁹ A'eramū Piratu 'ga uēma oje'ega 'gā nupe:

—Mama'e tywera te 'ga wapo pē nupe ra'e?— 'jau 'ga 'gā nupe.

³⁰ —Mama'e tywera 'gā iapoe'em ire amunipo 'ā ore narueruri 'ga ene upe— 'jau 'gā 'ga upe.

³¹ A'eramū Piratu 'ga 'jau 'gā nupe:

—Pe'je ajee 'ga rerawau erekou tyweaete pejeypy 'gā nemikwasiarer imū etee futat— 'jau 'ga 'gā nupe.

—Naani. 'Ga juka are orefueweramū. A'ere 'ā pēē romanūnamū pe'je oree jepi: "Pejuka kasi 'ga amū ne. Ore tee arajukaarū 'gā amū", 'jau 'ā pēē oree jepi. A'eramū ore 'ga jukawarūe'em— 'jau 'gā 'ga upe. —Ere eje'ega mŷina oree. Toromono 'ga imu'ama 'ga jywa pypiraa 'ypeywar are 'jau— 'jau 'gā 'ga upe.

³² Ymā Jeju 'ga amanūawama mome'ui oree ai'i. "Ypeywar are nipo 'gā je monoi je mu'ama", 'jau 'ga ai'i. A'eramū Janerwarete 'ga te "ypeywar are 'ga monoukaa 'ga jukaukaa oree" 'e are 'gā mu'eukaa.

³³ Aipo 'erauwe Piratu 'ga awau osou wog ipe nū. Jeju 'ga rerurukaa 'gā nupe.

—A'jea te ene judeu 'gā 'wyrriaramū?— 'jau Piratu 'ga Jeju 'ga upe.

³⁴ —Ene futat te aipo ere? Amutee 'ga aipo 'ea te ra'u ere futat nū?— 'jau Jeju 'ga 'ga upe.

³⁵—Judeua sipo je ako enee? Enepytuna 'gā futat te 'ā 'au ene murukat ene moropogy-taukaa jee. Maran ene ekou 'gā nupe ra'e, a'e te je a'i kūi?— 'jau Piratu 'ga 'ga upe.

³⁶—Na'awa wyy pewara 'wryiara 'jawe rūi te 'ā je. 'Gā 'jawe je reko re amunipo 'ā jeremiayuwa 'gā 'gā nowajaa je monoukare'ema judeu 'gā 'wryia'ri 'gā po pe. A'ere je na'auwara 'wryiaramū rūi— 'jau Jejuī 'ga 'ga upe.

³⁷A'eramū Piratu 'ga 'jau 'ga upe nū:

—'Wryiararetea futat nipo ajee ene ki sa?— 'jau 'ga 'ga upe.

—A'jea futat je 'wryiaretea je rekoi. Mama'e a'je are 'gā mu'jaawamū je ruri wyy pe te'aa tey ēē wi ikue. Mama'e a'je renupara 'gā jeje'ega wenup. A'eramū 'gā ajemogyau jeremiayuwamū— 'jau Jejuī 'ga 'ga upe.

³⁸—Ma'ja a'eramū mama'e a'jea ki 'ei?— 'jau Piratu 'ga 'ga upe.

'Gā nupe Jejuī 'ga monoawet

(Mateu 27.15-31; Maku 15.6-20; Luka 23.13-25)

Aipo 'erauwe Piratu 'ga awau uēma, ukupepe oje'ega 'gā nupe nū:

—Nuapoi futari 'ga mama'e tywera ra'e. A'eramū je 'ga jukaukare'ema.

³⁹'Awa maraka apoawa upe iwaēmauwe je 'ā pēnemifutara 'ga renuēma moromunepaw awi jepi. Pefutat te je judeuramū peje'wryiararetea muēma?— 'jau 'ga 'gā nupe.

⁴⁰—Naani— 'jau 'gā wafukaita. —Naani. Na'ga rūi emuēm ore. Parapasi 'ga te emuēm ore— 'jau 'gā wafukaita 'ga upe.

Aipo Parapasi 'ga oporojuka ma'ea futat.

19

¹Aipo ojeupe 'erauwe Piratu 'ga 'jau jefaruu 'gā nupe:

—Pe'je 'ga rerawau 'ga mopimopika.

²A'erauwe 'gā 'ga rerawau 'ga mopika. A'ere 'gā juapekagūū muapŷina 'ga akagyrunamū iapou 'ga upe. A'eramū 'gā imonou imunepa 'ga akaga pype. A'eramū 'gā 'wryiararete raity piraga munepa 'ga wi, 'ga rerekoemāawamū.

³Ojewyjewya 'gā 'ga rerekoemāu 'ga rerekou:

—Ene te 'ā judeu 'gā 'wryiararetea ra'e jepi. A'ere 'awamū ereko 'wryiarareteramū nakwaparimū rūi futat 'gā nupe ki 'ei— 'jau 'gā 'ga upe.

'Ga jaita 'ga rerekou opo afuapyka erofaa 'ga ree.

⁴A'ere Piratu 'ga awau uēma oje'ega ukupepewara 'gā nupe nū:

—Peapyaka ki je ree. Arurukat je 'ga 'au nū. “Nuapoi futari 'ga mama'e tywera ra'e”, a'e je tekou pē nupe— 'jau 'ga 'gā nupe.

⁵A'e pype 'gā Jejuī 'ga rerua enuēma 'gā nupe nū. 'Wryiararete raitya 'gā imunepa 'ga wi juakagyrua reewe. 'Ga ēmauwe Piratu 'ga 'jau 'gā nupe:

—Pemā'ē 'ga ree— 'jau Piratu 'ga 'gā nupe.

⁶Jejuī 'ga resakawe 'gā 'jau:

—Emu'amukat futat Jejuī 'ga 'ypeywar are 'gā nupe— 'jau 'gā Piratu 'ga upe, wafukaita.

Aipo wafukai ma'e 'gā mainana 'wryiara 'gā neewe janeruwarete 'ga mogyaawa raarana 'gā neewe wafukaita Piratu 'ga upe.

—Pēē futat te aipo pe'je. Je najeporojukaweri 'ga ree. “Nuapoi 'ga mama'e tywera”, a'e je ako pē nupe ko— 'jau Piratu 'ga 'gā nupe. —Pēē te pejuka 'ga. Je najukaa'uweri 'ga— 'jau 'ga 'gā nupe.

⁷—Naani. “Je futat Jarejuwarete 'ga ra'yra”, e'i 'ga ore ikue. A'eramū ore oroporojukaweramū 'ga ree. Oreyy 'gā ka'arana okwasiat aipo are rakue. A'eramū ore oroporojukaweramū 'ga ree, 'gā nemikwasiarer imū etee futat— 'jau 'gā 'ga upe.

⁸Aipo renupawe Piratu 'ga okyjau kwaiwete u'ama.

⁹A'eramū Piratu 'ga awau osou wog ipe nū. A'ere 'ga oporonupa ee Jejuī 'ga upe:

—Mō awi ene ejua rai'i ki 'ei?— 'jau 'ga Jejuī 'ga upe.

A'ere Jejuī 'ga noje'egi 'ga upe.

¹⁰—Ma'eramū ene eje'ege'ema jee ki 'ei? Nerekwaawi nipo ejewi je 'gā momoirukara ki 'ei? Enemanūwet te ra'u nū?— 'jau Piratu 'ga 'ga upe.

¹¹—Jeruwarete 'ga te 'ā wapoukat rēwējēmī enee. A'eramū 'ā ene mama'e apou rēwējēmī je ree 'agamū. Jeruwarete 'ga tywe'em ire amunipo 'ā nereapouweri nanuara jee. A'ere 'ā Jeruwarete 'ga te nan je rerekoukari enee— 'jau 'ga 'ga upe. —A'eramū 'agamū ejeupe je reruara 'gā mama'e tywera apou ene apyraapa— 'jau Jejuī 'ga Piratu 'ga upe.

¹²Aipo renupa taetu Piratu 'ga Jejuī 'ga wi opoir are afuweramū.

—Apoit je 'ga wi— 'jau 'ga 'gā nupe.

A'ere 'gā 'i etee Piratu 'ga upe:

—'Ga wi epoir ire nipo naRoma ywy pewara 'gã 'wyrriara 'ga jekoty'aawa rüi ereko— 'jau 'gã wafukaita 'ga upe. —“Je futat 'wyrriararetea”, e'i te 'ã Jejuu 'ga oree. A'eramü 'ga akou jane'wyrriara 'ga ree iporomutare'emamü. A'eramü nipo jane'wyrriara 'ga, Sesa 'ga, amara'neramü ene ree 'ga wi ene poiramü— 'jau 'gã wafukaita 'ga upe.

¹³ Aipo 'erauwe Piratu 'ga Jejuu 'ga rerurukaa enuëma morogyta apoaw ipe. Piratu 'ga wapyka awau 'üina morogyta apoaw ipe. Peu 'gã itapewa monou ipypekau te'yjupawa py'apykawamü. Judeu 'ga je'eg imü 'gã enüina *Gapata* 'jau jupe.

¹⁴ Sexta feira rupi aje kwara kwawamü Piratu 'ga wapyka oje'ega 'gã nupe. Sabadoo maraka apoawa judeu 'gã nupe. A'eramü Piratu 'ga 'jau:

—Koromü pë'wyrriararetea 'awamü!— 'jau 'ga 'gã nupe.

¹⁵ —Naani. Ere ki 'ga mu'amukaa futat 'gã nupe 'ypeywar are, 'ga jywa pypirarukaa 'ga manüawamü— 'jau 'gã wafukaita 'ga upe.

—Pëfuewet futat nipo ajee peje' wyrriararetea je ijukaukar are?— 'jau 'ga 'gã nupe.

A'eramü mainana 'wyrriara 'gã 'jau 'ga upe:

—Sesa 'ga tee futat jane'wyrriararetea— 'jau 'gã 'ga upe.

¹⁶ A'eramü Piratu 'ga Jejuu 'ga monou jefaruu 'gã nupe.

—Pe'je 'ga rerawau 'ga mu'ama 'ypeywar are— 'jau 'ga 'gã nupe.

A'eramü 'gã 'ga rerawau.

'Ypeywar are Jejuu 'ga monoawet

(Mateu 27.32-44; Maku 15.21-32; Luka 23.26-43)

¹⁷ Jejuu 'ga futat 'ypeywaruu rerawau erekou. Erawau 'gã erowaëma ae apisawa upe, aeakagera 'jawewara 'jawa upe. Judeu 'gã je'eg imü era *Gogata*.

¹⁸ Peu futat 'gã 'ga monou imu'ama 'ypeywar are. 'Ga jywaa 'gã ipypiraa 'ypeywar are. Itajuu pyu 'gã 'ga pokutuka, 'ga pya nanë nü. A'ere 'gã 'ga monou imowya imu'ama 'ypeywar are futat. Muküja 'ga pō'ō me Jejuu 'ga mu'ama 'ypeywar are. 'Gã nekoa futat 'gã imonou imu'ama.

¹⁹ A'ere Piratu 'ga 'yjepa'nü kwasiaa imonoukaa inuga Jejuu 'ga apyte'rarimü. Jejuu 'ga Nasare pe waranup ma'efera 'ga. “Judeu 'gã 'wyrriararetea” 'ea 'ga imonou inuga 'yjepa'nü are. Muapyyra 'gã je'eg imü 'ga ikwasiaa inuga. Judeu 'gã je'eg imü, romanü 'gã je'eg imü, grego 'gã je'eg imü 'jau 'ga inuga ikwasiaa.

²⁰ Ae apisawa namukui 'upa Jerusareg awi. A'eramü 'gã kwaiwete okwapa ipyu. A'eramü 'gã Piratu 'ga remikwasiarera mogytaw.

²¹ Ikwasiaripyyra resakawe mainana 'wyrriara 'gã 'jau Piratu 'ga upe:

—“Judeu 'gã 'wyrriararetea 'ga” 'ea ereapo awi. “Je te 'ã judeu 'gã 'wyrriararete” 'ea te enug 'yjepa'nü are— 'jau 'gã Piratu 'ga upe.

²² —Naani. Anug ako je ikwasiaa ko. Tene a'ea etee futat tuwi— 'jau etee Piratu 'ga 'gã nupe.

²³ 'Ypeywar are Jejuu 'ga mu'am ire jefaruu 'gã 'ga raity me'ega ajaupe. Irüpawë 'gã ime'ega 'upa ajaupe. A'eramü 'gã juejue 'ga raity mü pyyka ojeupe. A'ere 'ga raity pe nojemomygi futari. Ipirugipyyra etee.

²⁴ A'eramü 'gã 'jau ajaupe:

—Simonorog awi. Ita'i 'jawewara simomot esaka ee 'jau, “Awÿja sipo weroo” 'e are 'jau— 'jau 'gã ajaupe.

Ymä Janeruwarete 'ga ka'arana kwasiarukari 'ga amü upe 'ga raity are rakue:

“Jeraitya nipo 'gã imojo'ojo'oka ajaupe.

Ita'i 'jawewara nipo 'gã imomoa jefaruu 'ga aipo apou 'ga raityfera mojo'okawamü.

'jau 'gã ikwasiaa rakue. A'eramü 'gã jejuu 'gã aipo apou 'ga raityfera mojo'okawamü.

²⁵ A'e pype Jejuu 'ga y'ëë u'ama wa'yyra 'ga pyri, 'ypeywar are 'ga 'amamü. 'Ga y'yyra ëë, Mari Matarena ëë, Kriopasi 'ga remireko ëë. Ëë rera Mari nanë nü. Mïmera 'gã u'ama 'ga pyri katu katu.

²⁶ Wemimutaramü je pyri oy ëë resakawe Jejuu 'ga 'jau ëë upe:

—Awamü 'ga enera'yyra 'jawe enee, a'nü— 'jau 'ga oy ëë upe.

²⁷ A'ere 'ga 'jau jee:

—Eney 'jawe ëë 'awamü enee. Ejejuka esage ki ëë ree— 'jau 'ga jee.

A'eramü je 'ga y'ëë rerawau teje'wyr ipe, tejejukau ëë ree.

Jejuu 'ga manüawet

(Mateu 27.45-56; Maku 15.33-41; Luka 23.44-49)

²⁸ Aipo 'e re Jejuu 'ga 'jau ojeupe: “Teporowykya je aapopap”, 'jau 'ga ojeupe. A'eramü 'ga 'jau 'gã nupe:

—Je'yuwei je.

Ymä 'ga amü ka'arana kwasiaa 'ga 'yuwei are rakue. A'eramü 'ga aipo 'jau.

²⁹Peu futat y'way ajaiwa 'ūina y'a pype. A'eramū jefaruu 'ga amū amynejuranūū monou ipymāu y'way ajaiwa pype. A'ere 'ga imonou 'ywa rafeā are, isipu 'jawa rafeā are imonou 'ga upe.

³⁰Ipyter ire Jejui 'ga 'jau:

—Aapopap je teporowykya— 'jau 'ga.

Aipo 'e re 'ga wakaga muāāpya. A'eramū futat amanūmū.

Jejui 'ga ywŷi kutukawet

³¹A'ere'ere'i judeu 'gā 'wyriria'ria awau oje'ega Piratu 'ga upe:

—Ypeywar arewara 'gā netymakaga emopēpenukat jefaruu 'gā nupe. Tamanū 'gā kamēšete wetymakaga mopenamū 'jau— 'jau 'gā 'ga upe. —Kwara rese'emaue 'gā netefera simut imojypa 'jau— 'jau 'gā awau 'ga upe.

Ai'iwe sabado. Sabado morowykye'ema 'gā nupe. Aipoa morowykye'ema 'gā maraka apoawa nanē nū. A'eramū 'gā 'gā neumerā mu'amukare'ema peu.

³²Aipo ojeupe 'erauwe Piratu 'ga jefaruu 'gā monou 'ypeywar arewara 'gā netymakaga mopēpenukaa 'gā nupe. A'erauwe 'gā awau ajepeja 'ga retymakaga mopena se'. Ajepeja 'ga ma'e nū se' imopēpena 'gā 'gā nui.

³³A'ere 'gā Jejui 'ga ma'ea nomopeni. Amanū 'ga 'gā nura renunewe. A'eramū 'gā 'ga retymakaga mopene'ema.

—Tŷy. Amanū 'ga ra'e nū'ū— 'jau 'gā ajaupe.

³⁴A'eramū 'ga amū Jejui 'ga ywŷi kutuka etee jyyu pyu. A'eramū 'ga rya ojeko'woka 'ga kutukawera rupi 'y reewe futat.

³⁵⁻³⁷Ymā 'ga amū ka'arana kwasiaa Jejui 'ga ree rakue: “Nomopeni futari 'gā 'ga kaga mū”, 'jau 'ga ikwasiaa inuga rakue. A'eferupi tee Janeruwarete 'ga 'ga retymakaga mopenukare'ema 'gā nupe. Ajepeja 'ga ikwasiaa ka'aran are: “Anure nipo 'gā wemiyyŷikutugera 'ga resagi”, 'jau nanē 'ga ikwasiaa ka'aran are rakue nū.

Jejui 'ga manūa je aesak. A'eramū je ikwasiaa ka'aran are pē nupe, Jejui 'ga rerowiarukaawamū pē nupe. Mama'e a'jea etee te je amome'u. Aesak futat je 'ga manūa. A'eramū je 'ga mome'wau futat pē nupe.

Ita kwara pype Jejui 'ga monoawet

(Mateu 27.57-61; Maku 15.42-47; Luka 23.50-56)

³⁸A'ere Jose 'ga, Arimateja pewarera 'ga awau oje'ega Piratu 'ga upe:

—Tene je Jejui 'ga reumera muri imojypa 'ypeywar awi— 'jau 'ga awau 'ga upe.

Aipoa 'ga Jose 'ga Jejui 'ga rerowiaara 'ga futat. A'ere 'ga nojemome'ui tee 'gā nupe rai'i. Okyje 'ga judeu 'gā 'wyriria'ri 'gā nui rai'i. Aipoa 'ga awau oje'ega Piratu 'ga upe.

Aipo ojeupe 'erauwe Piratu 'ga 'jau 'ga upe:

—Nai'i. Ere ajee ewau 'ga mosoka erawau ita kwaruu pype inuga— 'jau 'ga 'ga upe.

A'erauwe Jose 'ga awau 'ga mosoka 'ypeywar awi 'ga rerawau inuga ita kwaruu pype.

³⁹Nikutemu 'ga nanē awau Jose 'ga rupi. Ypytunimū Jejui 'ga upe oporogyta ma'efera 'ga futat poromū Nikutemuramū. 'Ga awau Jose 'ga rupi. Kwaiwete 'gā jany kasiga rerawau. Tritai siku kirua 'gā jany kasiga rerawau. Aipoa jany kasiga imojopypepyrera. Mira 'jawa 'gā imojopypeu aloes 'jaw are jany kasigamū.

⁴⁰Aipoa 'gā erawau taity fuku are eko'woka. Aipoa ee eko'wog ire 'gā 'ga reumera mamana taity fuku pyu. Aipoa judeu 'gā nemiapoa futat. A'eramū 'gā ipokwaapa.

⁴¹Ae apisawa pyri y'wa 'ywa tymawera 'upa. Itymawer ipe ita kwaruu 'ūina, aereumera ma'ea 'ūina. Aipoa ita kwaruua ipyau ate. Nomonoi we futat 'gā aereumera ipype. Jejui 'ga tāmējē futat 'gā omono aipo ita kwara pype.

⁴²A'e pe te futat 'gā 'ga monou. Namukui futari 'ga manūawer awi. A'eramū 'gā peu etee futat 'ga monou.

—Kwara rese'emaue simateepap 'jau, morowykye'ema upe iwaēme'emaue 'jau— 'jau 'gā ajaupe.

20

Jejui 'ga rupawet

(Mateu 28.1-8; Maku 16.1-8; Luka 24.1-12)

¹Ikoai'i, Mari Matarena ēē awau ita kwaruu pe, ppytu'nīnauwe. Domingo rupi ēē awau esaka. Ita kwaruu rawopytymawera ēē esaka. Ita ojepe'au ikwar awi.

²Esakawe ēē 'ua ujāna imome'wau oree. Simāo Pedro 'ga retee je tekou. A'eramū ēē 'ua imome'wau oree:

—Janejara kīā reumera wā wenuēm erawau rai'i. Nikwaawi jane 'awamū wā imonoawera— 'jau ēē oree 'ua imome'wau.

³Orojeupe aipo 'erauwe ore arawau arujāna ita kwaruu repejāna.

⁴ A'ere je Pedro 'ga feni. A'eramū je ra'ne tewau tewaēma jupe.

⁵ Tewaēmawe je tewau teāpyramū temā'jāu ikwara rupi. 'Ga auwanawera etee je esaka. A'ere je nasei esaka.

⁶ A'ere Simão Pedro 'ga ruri owaēma oswayayau awau ikwara pype. A'eramū 'ga nanē 'ga auwanawera etee esaka nū. Irāā'ā tuwamū.

⁷ 'Ga akaga auwanawera 'jau 'ga esaka. Aipoa taitya 'upe'ema 'ga reumera auwanawera pyri.

⁸ A'eramū je tesou esaka. Taity resakawe je Jejuī 'ga ferapawera rerowiaa.

⁹ 'Ga auwanawera resake'ema ore orojeapyo'e'eamū 'ga feraw are. Ymā 'gā amū ka'arana kwasiari Jejuī 'ga feraw are rakue. A'ere ore norereapyoī ee rai'i. A'ere je 'ga auwanawera resag ire 'ga ferapawera rerowiari.

¹⁰ A'eramū ore arawau orojewa orojog ipe nū.

Mari Matarena ēē Jejuī 'ga resaka

(Mateu 28.9-10; Maku 16.9-11)

¹¹ A'eramū Mari Matarena ēē awau ojewya ajaa'wau u'ama ita kwaruu pyri. Ajaa'waw ipe ēē wāāpyramū amā'jāu ita kwara raipy are.

¹² Mukūja ēē ywagipewara 'gā nesaka. 'Gā naitya waparasiayramū 'gā nee. Majepeja 'ga 'ūina 'ga akaga rupawer ipe. Ajepeja 'ga 'ūina 'ga py renawer ipe.

¹³ A'eramū 'gā oje'ega Mari ēē upe:

—Ma'ja are ene ejaa'wau ra'e i?— 'jau 'gā ēē upe.

A'eramū ēē 'jau:

—Jejararete kiā reumera wā weroo 'aw awi ra'e. Marupi katu nipo wā erooi ra'e?— 'jau ēē 'gā nupe.

¹⁴ A'e pype ēē ojerowaka'i wea yse'iramū Jejuī 'ga ree numiamū. ēē pyri agawewi 'ga u'ama. A'etea ēē nuesagi katu 'ga.

¹⁵ —Ma'ja ene iapirūmū ekou i? Awyja ene ekaa i?— 'jau 'ga ēē upe.

A'eramū ēē 'jau ojeupe: "Itymipyrrera raarana kiā sipō 'ā i", 'jau ēē ojeupe. A'eramū ēē 'jau 'ga upe:

—Ene nipo kiā reumera ererojyi ra'e. Emome'u etee jee. Too kiā reumera rerua tejepyri 'jau— 'jau ēē 'ga upe.

¹⁶ A'eramū Jejuī 'ga ēē renūina:

—Maria.

Wenūjamū ēē ojerowaka 'ga ree. Amā'jāu 'ga ree, 'ga resaka katu.

—Koo. Ene futat te ra'u nū, Ku'jyp!— 'jau ēē 'ga upe.

(Judeu 'gā je'eg imū ēē 'jau *Raponi*. Amu'jara 'gā nupe judeu 'gā aipo 'jau.)

¹⁷ —Je kog awi ape— 'jau 'ga ēē upe. —Nooi we je tejeupia Tejuwarete 'ga pyri. Ere ewau jeje'ega mome'wau je rerowiaara 'gā nupe: "Tejuwarete 'ga pyri je oi. Pēnuwaretea 'ga nanē nū. A'eramū je tewau Jarejuwarete 'ga pyri, e'i kiā oje'ega rerurukaa pē nupe ko", ere ki 'gā nupe— 'jau 'ga ēē upe.

¹⁸ A'eramū Mari Matarena ēē awau imome'wau oree:

—Jarejararete kiā je aesak ko nū— 'jau ēē oree.

A'eramū ēē Jejuī 'ga je'ega mome'wau oree.

'Ga remimu'efera 'gā 'ga resaka

(Mateu 28.16-20; Maku 16.14-18; Luka 24.36-49)

¹⁹ Aipo 'ara, ypytuna rupi, ore Jejuī 'ga remimu'eramū arajatykau 'og ipe arajupa. Orokyje ore judeu 'gā 'wyria'ri 'gā nū. A'eramū ore 'okwara motypa orojee. Poje Jejuī 'ga ojesaukaa ore pyter ipe:

—Pēpy'ata'wa etee te 'awamū ki 'ei— 'jau 'ga oree.

²⁰ Aipo 'e re 'ga opo kutukawera resaukaa oree. Oywŷi kutukawera nanē 'ga esaukaa. Orojararete 'ga resakawe ore orojekōējamū nū.

²¹ A'eramū Jejuī 'ga 'jau'japa oree nū:

—Pēpy'ata'waawa owaēm pē nupe. Janeruwarete 'ga je mut 'au ojemome'waukaa pē nupe ikue. Nan tee futat je pē monoi kwe pewara 'gā nupe tejemome'waukaa— 'jau 'ga oree.

²² Aipo 'e re 'ga opytuu ore pyau.

—Awamū je Jarejuwarete 'ga Agesage monoi pē nupe. Pejeku'iu 'ga pemut pejejepyri— 'jau 'ga oree.

²³ —'Gā amū nupe pēē 'jau, "Janeruwarete 'ga pētywera omoit pē nui", pēē 'eramū 'ga imoiri futari 'gā nū. 'Gā amū nupe "Pētywera 'ga nomoiri futari pē nui", 'gā nupe pēē 'eramū 'ga nomoiri futari 'gā nū— 'jau Jejuī 'ga oree ikue.

Tome 'ga nuerowiara'nei 'ga

²⁴ Ore upe Jejuu 'ga jesaukaramū 'ga remimu'efera 'ga amū otywe'emamū ore pype. Tome 'ga, kunumī jopewera 'ga, otywe'emamū.

²⁵ A'eramū ore Tome 'ga rekoa 'jau 'ga upe:

—Jarejararete 'ga ore aruesak ko— 'jau ore 'ga upe.

A'ere Tome 'ga nuerowiari tee oreje'ega.

—'Ga pokutukawera resake'ema je narowiari futari 'ga ferawa. Tefāa 'ga pokutukawer are imonowe'em je narowiari futari 'ga ferawa. 'Ga ywŷi kutukawer are tepo monowe'em je narowiari futari 'ga ferawa— 'jau etee 'ga oree, ojeupe ore imome'uramū.

²⁶ Ikwara morowykye'ema rupi ore Jejuu 'ga remimu'eramū arajatykau nū. Aiporamū Tome 'ga akou ore pype. Orojeawopytyma wējēmī futat arajupa arajatykau peu nū. Poje Jejuu 'ga 'ua u'ama ore pype nū.

—Pēpy'ata'waawa 'ut pē nupe nū ki 'ei— 'jau 'ga oree.

²⁷ A'eramū 'ga 'jau Tome 'ga upe:

—Efā erut imowyka jepo kutukawer are. Jeywŷi kutukawer are nanē ene epo mujaa nū— 'jau 'ga Tome 'ga upe. —Au'je ki je ferapawera rerowiare'em ire. Je ferapawera ki erowiat katu katu 'awamū— 'jau 'ga 'ga upe.

²⁸ A'eramū Tome 'ga 'jau 'ga upe:

—Ene te jejararetea. Ene te 'ā jarejuwarete 'ga 'jawe futat— 'jau Tome 'ga Jejuu 'ga upe.

²⁹ —Je resag ire etee 'ā je rerowiari ape? Je resake'ema miamū 'gā amū je rerowiari futari ajemogyau. Aipo 'gā ekōēai futat ajemogyau— 'jau 'ga 'ga upe.

³⁰ Aeremiapoe'ema Jejuu 'ga iapou kwaiwete ore reape ikue. A'ere je nomome'upawi pē nupe.

³¹ A'ere je mama'e mū mome'ui ikwasiaa ka'aran are inuga pē nupe, “Jejuu 'ga Jarejuwarete 'ga remimurera 'ga futat” e rerowiarukaawamū pē nupe. “Jejuu 'ga Jarejuwarete 'ga ra'yraretea futat” 'ea nanē je erowiarukaa pē nupe nū. Werowiar ire 'ga pē mogyi ojeypri nakwaparimū ete rūi futat.

21

'Yisiga pype 'ga jesaukaawet

¹ Anure Jejuu 'ga ojesaukaru'japa oree ikue nū, ypia reme'y'warimū ikue. Tiperia 'jawa reme'y'warimū 'ga ojesaukaru'japa oree ikue nū.

² Jejuu 'ga resakaw ipe ore arakou pāwē pāwē. Simāo Pedro 'ga, Tome 'ga. Kunumī jopewet 'jau ore Tome 'ga upe. Natanaeu 'ga. Aipo 'ga 'ua Kana 'jawa amunaw awi. Garireja ywy pype Kana 'jawa 'upa. Sepeteu 'ga ra'yramū ore, mukūi tekotee 'gā 'jau. Mimeramū ore arakou pāwē pāwē.

³ A'eramū Simāo Pedro 'ga 'jau:

—Oo je pira pyyka— 'jau 'ga oree.

—Ore nanē oroo futat ene rupi nū— 'jau ore 'ga upe.

A'eramū ore arawaupap aru'aa yaruu pype. Kopyytunamuku ore taityuu momoa arakou. A'ere ore noropyygi'i amū.

⁴ Kwara por pyrauwe Jejuu 'ga 'ua u'ama peu ypia reme'y'warimū 'yisiga pype. A'ere ore norokwaawi 'ga.

⁵ A'eramū 'ga 'jau oree:

—Pepyy'gi te amū?— 'jau 'ga oree.

—Naani etee ki 'ei. Noropyygi'i etee ore amū ki 'ei— 'jau ore 'ga upe.

⁶ A'eramū 'ga 'jau oree:

—Pe'je ajee imomoru'japa nū. Pejejakwatawa katy pemono imomoa esaka nū. A'eramū te nipo pira pepyyk— 'jau 'ga oree.

A'erauwe ore taityuu pypekau imonou imomoa nū. Etyg pyrauwe kwaiwete ipira ojejaga ipype. A'ere ore noropirarūi imua yara pype etyka. Ipoyi tee ipiraa.

⁷ A'erauwe je 'jau Pedro 'ga upe:

—Janejararete 'ga te nipo kwe u'am ra'e nū'ū!— 'jau je 'ga upe.

Aipo renupawe Pedro 'ga waity munepa, ojejaa ipyu. Ojefar ire Pedro 'ga opoa 'y pe awau Jejuu 'ga repejāna.

⁸ A'eramū ore arajua yaruu pype, taityuu rerua imatāu erekou. 'Y ywyri futat ore rekoi, sēg metro futat ore rekoi 'y ywyr awi.

⁹ Yaruu awi aru'ē re ore ipira resaka. Jejuu 'ga ipira reya u'ama. Kanape'ia nanē ore esaka nū.

¹⁰ A'eramū Jejuu 'ga 'jau oree:

—Pejemimu'arera perut amū jee— 'jau 'ga oree.

¹¹ A'eramũ Simão Pedro 'ga u'aa yaruu pype nũ. A'eramũ 'ga taityuu matãumap imua. Kwaiwete pira ojejaga ipype. Sêtu síkwêtai tres ipira, tuwiiu ma'ea. A'etea taityuuu otoroke'ema jupe.

¹² A'eramũ Jejuí 'ga 'jau ore:

—Pe'je pejejuu pejejemí waa— 'jau 'ga ore.

A'etea ore mũ noroporonuwi futari 'ga upe: “Awỹja te ene?” 'jawe'em futat ore 'ga upe. Orokwaaw ore 'ga. A'eramũ ore oroporonupe'ema ee 'ga upe.

¹³ A'eramũ Jejuí 'ga awau kanape'i pyyka imowowoka imua ore, pira eyra reewe.

¹⁴ Oferaw ire futat Jejuí 'ga poromũ ojesaukaru'jau'japa ore kwaiwete ikue. Poromũ futat ore upe 'ga jesaukara muapya.

Pedro 'ga upe Jejuí 'ga 'eawet

¹⁵ Ore jemí'war ire Jejuí 'ga 'jau Simão Pedro 'ga upe, Juá 'ga ra'ya 'ga upe:

—Eneporomutat te ene nanimenime je ree, ki Simão?

—Ëë. Ene te 'ã jejekoty'aawaretea futat. Aipo 'ã erekwaap futat— 'jau 'ga 'ga upe.

A'eramũ Jejuí 'ga 'jau 'ga upe:

—Karupa'mĩ jara 'gã ojejuka esage karupa'mĩ ra'yr yau are. Nan tee futat ejejuka esage je rerowiaar yau 'gã nee. Jeje'eg are ene 'gã mu'jau— 'jau Jejuí 'ga 'ga upe.

¹⁶ A'eramũ Jejuí 'ga 'jau'japa 'ga upe nũ:

—Eneporomutat te ene je ree ra'e, ki Simão?

—Ëë. “Erekwaap futat 'ã ejee jeporomutara”, a'e ako je enee ko— 'jau 'ga 'ga upe nũ.

A'eramũ Jejuí 'ga 'jau 'ga upe:

—Karupa'mĩ jara 'gã ojejuka esage weymaw are. Nan tee futat ejejuka esage je rerowiaara 'gã nee— 'jau 'ga 'ga upe.

¹⁷ A'eramũ Jejuí 'ga 'jau nũ:

—Eneporomutat te ene a'jea futat je ree ra'e, ki Simão?— 'jau 'ga 'ga upe.

Aipo ojeupe 'eu'jawauwe Pedro 'ga u'arasigamũ. A'eramũ 'ga 'jau 'ga upe:

—Ma'eramũ ene poromũ 'jau'japa jee ki 'ei? Orejararetea 'ã ene. Mama'ea 'ã erekwaap futat. Erekwaap futat 'ã ejee jeporomutara je rekoa— 'jau 'ga 'ga upe.

A'eramũ Jejuí 'ga 'jau 'ga upe nũ:

—Karupa'mĩ jara 'gã ojejuka esage futat weymaw are. Nan tee futat ejejuka esage je rerowiaara 'gã nee.

¹⁸ A'jea futat je'ea. Eywyrãmũ ene ejaity munepa eatau ewau ejemifutar imũ. A'ere nipo enesawa'e re 'gã amũ ene pofari eneyjwa pypiraa ene rerawau eneremifutare'em ipe— 'jau Jejuí 'ga Simão Pedro 'ga upe.

¹⁹ Aipo 'eramũ Jejuí 'ga 'ga manũawama mome'wau 'ga upe. 'Ga manũnamũ nipo 'ga manũ resakara 'gã 'jau: “Nopoiri futari 'ga Jarejararete 'ga rerowiar awi ra'e”, 'jau nipo 'gã ajaupe. A'eramũ nipo 'gã Jarejuwarete 'ga muorypa 'ga manũ resakawe.

²⁰ Aipo ojeupe 'eramũ Pedro 'ga ojerowaka je resaka. Je futat Jejuí 'ga upe 'jarera: “Awỹja te ene mono ia'wyre'ema 'gã po pe?” 'jarera 'ga manũ'e'mauwe orojemí'waaw ipe 'ga upe 'jarera. Je futat te'ama Pedro 'ga atykupe katy.

²¹ Je ree ojerowakawe Pedro 'ga 'jau Jejuí 'ga upe:

—Maran sipo ajee 'ga rekoi nũ, ki Ku'jyp?— 'jau 'ga Jejuí 'ga upe.

²² —Je ifutar ire amunipo 'ã 'ga rekoi nan etee futat je rura resaka. Erejemuaëm awi 'ga ree. Ene 'ã je renuw ape— 'jau 'ga 'ga upe.

²³ Anure Jejuí 'ga rerowiaara 'gã 'jau futatee ajaupe:

—“Ko 'ga nipo namanũi futari je ruru'jawe'mauwe”, e'i 'ga 'ga upe ikue— 'jau futatee nipo 'gã imome'wau.

A'ere naporomũ rüi 'ga je'ega. Wapo ekoete nipo 'gã ajemogyau. “Je ifutar ire amunipo 'ã 'ga jemogoi je ruru'jawa resaka. Maran aipoa enee?” 'jau 'ga Pedro 'ga upe ikue.

²⁴ Je 'ã Juãnamũ. “Ga nipo namanũi” 'gã 'jawamũ nipo je. Je te 'ã Jejuí 'ga remiapofera amome'u pẽ nupe. Je 'ã ka'arana kwasiaa aipo are pẽ nupe. A'jea futat aipo je'ea.

²⁵ Kwaiwete Jejuí 'ga remiapofera. Aipo are 'ga amũ ka'arana kwasiaapaw ire amunipo 'ã kwaiwete ka'arana 'au ywy pe. A'eramũ nipo 'ã ywya nipytu'ëi jupe.

Atos

Jeju 'ga remimonofera 'gã nekwawer are Luka 'ga ka'arana kwasiari rakue. Ywag ipe Jeju 'ga jewyr ire, Janeruwarete 'ga U'agesage monou Jeju 'ga rerowiaara 'gã nupe. A'eramũ 'ga remimu'efera 'gã awau watau Jeju 'ga mome'wau kwe pewara 'gã nupe. Janeruwarete 'ga 'Agesagea aeremiapoe'ema apoukaa 'gã nupe. A'eramũ esakara 'gã Jeju 'ga rerowiaa kwaiwete.

Janeruwarete 'ga 'Agesagea 'awa ka'arana kwasiarukaa Luka 'ga upe. A'eramũ 'ga ka'arana kwasiaa inuga 'ga 'Agesagea remiapofer are rakue.

¹ Je ako Lukaramũ ka'arana akwasiat inuga pẽ nupe ikue, ki Teofiru. Jeju 'ga remiapofer are je ka'arana kwasiari. 'Ga remimu'efer are nanẽ ako je ikwasiapawi inuga pẽ nupe ikue. Jeju 'ga porowyky ppy ppyawer are futat je ka'arana kwasiari inuga pẽ nupe ikue.

² Ywy pe akou Jeju 'ga mama'e esage apou kwaiwete rakue. A'efer are je ikwasiapawi inuga ka'aran are pẽ nupe ikue.

Ywag ipe ojeupir enune Jeju 'ga porogytai wemimu'efera 'gã nupe rakue. Ymã te 'ã 'ga 'gã amũ mũ'jãu imogyau wemimu'eferamũ rakue. A'eramũ Jeju 'ga ojeupir enune oje'ega 'gã nupe Jarejuwarete 'ga 'Agesage je'eg imũ rakue. A'e 'gã 'ga imonou kwe pe: "Kwe pe pekwap je mome'wau pejemogyau 'gã nupe", 'jau Jeju 'ga 'gã nupe rakue. A'eramũ 'gã 'jau "Jeju 'ga remimonofera 'gã" 'jau 'gã 'gã nupe.

³ 'Ga manũ re Janeruwarete 'ga Jeju 'ga moferawi nũ. A'eramũ Jeju 'ga oferaw ire ojesaukaru'jau'japa wemimonofera 'gã nupe. Wemiapo resaukaa 'gã nupe. A'eramũ 'gã 'ga rerowiaa. A'eramũ 'gã 'jau: "Jeju 'ga futat ra'e. Koromũ futat 'ga ferawi rai'i nũ. Sã'ã 'ga wemiapoa etee futat iapoa 'ga rekoa", 'jau 'gã ajaupe rakue.

Kwarẽta 'ara rupi etee Jeju 'ga jesaukaru'jaru'jawi wemimonofera 'gã nupe, 'gã mu'jau akou 'Uwarete 'ga ree rakue.

—Janeruwarete 'ga 'ã 'ũi 'wyrriarareteramũ pẽ nupe. Pejetywer awi pepoiramũ 'ga pẽ monoi wemiayuwamũ rakue— 'jau Jeju 'ga oporogytau wemimu'efera 'gã nupe rakue.

⁴ 'Gã pype akou 'ga 'gã mu'jau aipo are rakue. A'eramũ 'ga 'jau 'gã nupe:

—'Au pejup Jerusareg ipe Jarejuwarete 'ga 'Agesage rapesaka. Ymã te 'ã Janeruwarete 'ga oje'ega muri pẽ nupe rakue: "Te'agesagea je anure omono pẽ nupe", 'jau 'ã 'ga rakue. A'eramũ pẽẽ 'awamũ pejejupa Jerusareg ipe 'ga 'Agesage rapesaka ra'ne— 'jau Jeju 'ga 'gã nupe.

⁵ —Juã 'ga 'ã 'y pe ae pymi ikue. A'ere Janeruwarete 'ga nanarũi. U'agesagea te 'ga amut pẽ nupe pẽ nerekwaramũ— 'jau Jeju 'ga 'gã nupe rakue.

*Ywag ipe Jeju 'ga jeupiawet
(Maku 16.19-20; Luka 24.50-53)*

⁶ A'eramũ 'gã ojeyppe 'ga rekoramũ 'ga remimonofera 'gã oporonupa ee 'ga upe:

—Ymã te 'ã tapy'ÿja 'wyrriar amuteea etee ekoi oree jepi. 'Awamũ futat te ene ereko 'wyrriarãmũ Israeu juapyrerãmũ oree 'ga py'rau? 'Awamũ futat te ene, "Je futat Jarejuwarete 'ga remimurerãmũ ako 'awamũ 'wyrriarareterãmũ pẽ nupe", ere oree?— 'jau 'gã 'ga upe.

⁷ A'eramũ Jeju 'ga 'jau 'gã nupe:

—Naani nũ'ũ. Meewe tee te nipo je ruri pẽ'wyrriarãmũ. Janeruwarete 'ga te okwaap. Jane te 'ã nikwaawi. 'Ga te okwaap je ruawa nũ— 'jau etee 'ga 'gã nupe.

⁸ —A'ere nipo anurenure'i Janeruwarete 'ga 'Agesage ruri ojypa osou pẽ pype. Opãjẽa Janeruwarete 'ga imua pẽ nupe. A'eramũ futat nipo pẽẽ pejemogyau je mome'waramũ 'gã nupe— 'jau 'ga 'gã nupe. —A'eramũ pẽẽ pejeyppe ise re pejewau kwe pe je mome'wau 'gã nupe. Pẽẽ 'ã je resak pejepe. A'eramũ pẽẽ pejewau je mome'wau kwe pewara 'gã nupe. 'Auwara 'gã nupe ra'ne je mome'wau, Jerusareg ipewara 'gã nupe ra'ne. A'ere Judeja ywy pewara 'gã nupe, Samari ywy pewara 'gã nupe, mukuwara 'gã nupe 'jau pejewau je mome'wau— 'jau 'ga 'gã nupe.

Aipo 'gã nupe 'e re Jeju 'ga ojeupia 'gã nui awau ywag ipe.

⁹⁻¹¹ A'eramũ 'ga remimonofera 'gã 'upa amã'jãu ywau 'ga jeupira resaka. A'ere ywasiga 'ga mimi 'gã nui. A'eramũ 'gã 'upa 'ga wawera rupi amã'jãu. A'e pype mukũja ywagipewara 'gã 'ua ojypa 'gã nupe Jeju 'ga panekwapa. Waity aparasiga rerua erojypa enu'ama 'gã pyri.

—Ma'ja te peesak pejejupa?— 'jau 'gã 'gã nupe.

—Naani. Jeju 'ga jeupira te ore aruesak arajupa— 'jau 'gã 'gã nupe.

A'eramũ ywagipewara 'gã 'jau 'gã nupe:

—Oo futat 'ga ojeupia 'Uwarete 'ga pyri. Anure te nipo 'ga ruri ojewya nũ. Ojeupiawera 'jawerimũ etee futat nipo 'ga ruri ojewya nũ— 'jau ywagipewara 'gã imome'wau Jeju 'ga remimonofera 'gã nupe.

*Matias 'ga Judas 'ga py'rawarera
(Mateu 27.3-10)*

¹² Ywagipewara 'gā porogytapaw ire Jeju 'ga remimonofera 'gā 'ua ojewya Jerusareg ipe nū. Ywytyr awi 'gā 'ua ojewya, Oriweira 'jaw awi. Namukui Jerusareg awi Oriweira 'jawa 'upa. Majepei tee kilometro imukua jui.

¹³ A'eramū 'gā Jerusareg ipe owaēm ire awau 'og ywate pype 'upa. Pedro, Juā, Tiago, Andre, Filipe, Tome, Patarumeu, Mateu, ajepeja Tiago, Simão Serote, Judas. Mīmera 'gā awau 'upa 'og ywate pype. Tiago 'ga Aufeu 'ga ra'yra 'ga. Simão 'ga judeu 'gā etee ifutaa o'wyririamū. Judas 'ga Tiago 'ga ra'yra 'ga.

¹⁴ Gā ajatyka 'upa Jerusareg ipe. Jarejuwarete 'ga upe oje'ega monou 'upa. Kūjāmera 'gā nanē ajatykau 'ua 'gā nee 'og ywate pype. Jeju 'ga y ēē we futat akou 'gā pype, Mari ēē. Jeju 'ga rewirera 'gā nanē akou 'gā pype nū.

¹⁵ Jeju 'ga rerowiaara 'gā ajatykau 'ua 'gā nee kwaiwete. Sētui wīti 'gā pytuna. A'eramū Pedro 'ga afu'ama oporogytau 'gā nupe:

¹⁶ —Peapyaka jeporogyta are. Ymā te Janeruwarete 'ga 'Agesagea ka'arana kwasiarukari Davi 'ga upe Judas 'ga ree rakue, ae a'wyre'ema upe Jeju 'ga monoarama 'ga ree rakue—'jau Pedro 'ga u'ama 'gā nupe.

¹⁷ —Aipo Judas 'ga ako jane pype ikue numiamū. Wemimu'eferamū ako Jeju 'ga 'ga mogou ikue numiamū. A'ere ako mainana 'wyrira 'gā ka'aranūū monoi Judas 'ga upe rai'i, Jeju 'ga resaukaawamū rai'i. A'eramū ako 'ga Jeju 'ga monou 'gā po pe 'ga jukaukaa 'gā nupe ikue—'jau Pedro 'ga 'gā nupe.

¹⁸ Ka'aranūūa ojeupe imur ire Judas 'ga awau ywy mua. A'ere 'ga rea'aramū etee nū. “Ma'eramū je ma'eramū Jeju 'ga monou 'gā nupe 'ū?” 'jau 'ga ojeupe. A'eramū 'ga a'eramū ajejukau. 'Ga 'arasiga 'ga rerekou. A'eramū ywy mur ire awau ojeupia. A'eramū 'ga pe awi 'ua opoa. Wewega mowoka erua. Wye momopomopoa erua amanūmū rakue.

¹⁹ A'ea Jerusareg ipewara 'gā ikwaapa najuejue etee rakue. A'eramū 'gā Aketema 'jau Judas 'ga manūawera upe. Aketema 'ea wy rupap 'ea 'gā je'eg imū.

²⁰ A'eramū Pedro 'ga 'jau 'gā nupe:

—Ymā te Davi 'ga ka'arana kwasiari aipo Judas 'ga ree inuga janee rakue.

“‘Ga 'wyrer ipe nipo nitywi futari ae mū”,

'jau Davi 'ga ka'arana kwasiaa inuga janee rakue. A'eramū 'ga ikwasiaru 'japa 'ga ree rakue:

“‘Ga porowykyawer ipe ae nitywi futari amū.

A'eramū nipo 'ga amū etee akou 'ga rekwawer ipe nū, 'ga porowykyawera apou nū”,

'jau Davi 'ga ka'arana kwasiaa inuga janee rakue. Mīa ka'arana Saumu 'jawa—'jau Pedro 'ga 'gā nupe.

²¹ —A'eramū jane 'awamū 'ga amū mogou Judas 'ga rekwawer ipe 'jau nū, Jeju 'ga mome'waramū jarejepyri 'jau. Jarejepypewarera etee jane imogou. Awŷja te ako jane pype au'jeteramū?

²² Awŷja te wesak 'y pe Juā 'ga Jarejararete 'ga pymīa rakue? Awŷja te 'ga jeupira wesak rai'i? 'Gā etee futat jane simogo amū jarejepyri Jeju 'ga mome'waramū 'jau—'jau 'ga 'gā nupe. —Jeju 'ga ferapawera 'ga tomome'u jane pyri 'jau—'jau Pedro 'ga 'gā nupe.

²³ A'eramū 'gā mukūja 'gā mua. 'Ga amū rera Jose Barsabas. Justo 'ga rer irūa. Ajepeja 'ga rera Matias.

²⁴ A'ere 'gā oje'ega monou Jarejuwarete 'ga upe 'gā nee:

—Kiapī'ni. Ene te 'ā erekwaap. Ejemifutara 'ga ekwaawukat ore.

²⁵ Judas 'ga ajejuka rai'i. A'ere 'ga 'agera oi ako tyweaw ipe—'jau 'gā Jarejuwarete 'ga upe. —Mō 'ga te ore oromogo 'ga rekwawer ipe nū?—'jau 'gā Jarejuwarete 'ga upe.

²⁶ A'ere 'ga upe oporogytapaw ire ita'i 'jawewara momopoa 'upa. A'eramū Matias 'ga remimojewagera katu 'gā ipyyka. A'eramū 'gā Matias 'ga mogou Judas 'ga rekwawer ipe Jeju 'ga mome'waramū ojepyri nū.

2

Janeruwarete 'ga 'Agesagea 'ua

¹ Pētekosti 'jawa 'ara rupi 'gā jatyka 'gā nuwamū Janeruwarete 'ga 'Agesagea 'ua ojypa Jeju 'ga remiayua 'gā nupe rakue. Pētekosti 'jawa judeu 'gā jatykaawa rera.

² Poje ywytuu 'jawewara fua opo erujewi 'ua 'gā pyri 'og ywate pype 'gā nuwamū. Ywag awi 'ua osou 'og ipe. A'ere 'ga 'Agesagea 'gā nupe ise re tata'i 'jawewara ajemogyau 'gā apyte'rarimū. Wenyfu'giramū futat ajemogyau 'gā apyte'rarimū.

³ Nan Janeruwarete 'ga 'Agesagea 'ua osou 'gā nupe rakue. Opyamuramū 'ua 'gā nupe.

⁴'Ga 'Agesagea 'ua osou 'gã pype 'gã nerekwaramũ. 'Gã pype ose re 'gã je'ega mojoy'rau, 'gã moje'eg amuteeukaa. 'Gã nemikwaawe'ema 'gã je'ega apoukaa 'gã nupe. Naju'jawe rũi 'gã je'egi. Wemifutar imũ etee futat Janeruwarete 'ga 'Agesagea 'gã moje'egukaa.

⁵Kwaiwete judeu 'gã 'ua ajatykau muku awi Jerusareg ipe rakue. Ajatykaaw are 'ut ma'e 'gã nanẽ ifu renupa nũ. Ifu renupara 'gã Jarejuwarete 'ga upe oporogyta ma'e 'gã najuejue etee.

⁶Ifu renupawe 'gã ajatykau ukupepe 'og ywate pyri oporesagamũ ee. Oporenuwaiwamũ 'gã imome'u are. Jejui 'ga remimonofera 'gã 'gã je'ega apou.

⁷A'e renupawe enupara 'gã 'jau:

—Ma'eramũ 'gã janeje'egawe apou 'ũ? Garireja ywy pewara 'gã juejue nã'ã re'ã— 'jau 'gã ajaupe.

⁸—Janeje'eg imũ etee 'ã 'gã Jejui 'ga mome'ui janee— 'jau 'gã ajaupe. —'Auwara 'gã je'ega etee 'gã 'ã wapo jepi. A'ere 'gã 'awamũ kwe pewaramũ janeje'ega we iapoi. Kwe awi 'ã jane ruri.

⁹Partia ywy awi jane mũ ruri. Ajepejamũ Media ywy awi. Ajepejamũ Elam ywy pewara. Ajepejamũ Mesopotami ywy pewara. Ajepejamũ Judeja ywy pewara. Ajepejamũ Kapatosi ywy pewara. Põtu ywy awi jane mũ ruri. Asia ywy pewarera jane mũ.

¹⁰Frigia ywy awi, Pãfiria ywy awi, Egitu ywy awi jane mũ ruri. Ajepejamũ Libia ywy awi. Sirene 'jawa pyriwara poromũ. Ajepejamũ Roma pewara.

¹¹Jane mũ judeua futat. Ajepejamũ judeue'ema 'gã futat. A'ere 'gã judeuramũ jane 'jawerimũ 'gã Jarejuwarete 'ga rerowiari. Kreta 'yp'õ awi amũ ruri. Ajepeja 'gã 'ua Arabia ywy awi. A'eramũ 'gã maran janeje'eg imũ oje'ega ki 'ei?— 'jau 'gã ajaupe 'gã je'ega renupa. —Janeje'eg imũ futat 'gã Jarejuwarete 'ga remiapofer esage mome'ui janee— 'jau 'gã ajaupe. —'Auwara 'gã je'ega etee 'gã 'ã wapo jepi.

¹²A'ere 'gã 'ã kwe pewara 'gã je'eg imũ Jejui 'ga mome'ui 'upa— 'jau 'gã ajaupe.

A'eramũ 'gã wapyakau 'upa. A'eramũ 'gã amũ 'jau ajaupe:

—Maran te nũ 'wei?— 'jau 'gã ajaupe.

¹³A'ere amumera 'gã nuerowiari futari. A'eramũ 'gã 'gã nerekoemãu etee 'upa.

—Kawĩajaiwa 'gã otykut 'upa. A'eramũ 'gã oje'ëran ekoeteramũ 'upa— 'jau etee 'gã ajaupe 'gã nerekoemãu.

Mytuna 'gã nupe Pedro 'ga 'eawet

¹⁴A'eramũ aipo 'gã 'eramũ Pedro 'ga 'ua uẽma oporogytau 'gã nupe u'ama ukupepe. Ajepeja Jejui 'ga remimonofera 'gã netee futat 'ga 'ua oporogytau 'gã nupe, ajatyka ma'efera 'gã nupe.

—Jerusareg ipewaramũ, kwe awi 'ut ma'eferamũ nanẽ peapyaka je ree. “Kawĩajaiwa 'gã otykut 'upa”, pe'je ete 'ã oree.

¹⁵Norereawyrywi ore. Nakwarawyruru'irãu rũi kawĩajaiwa 'wara 'gã kawĩajaiwa rykuri— 'jau Pedro 'ga 'gã nupe u'ama. —“Maran te 'gã janeje'ega apoi?” pe'je 'ã pejejupa pejejaupe. A'eramũ je imome'wau pẽ nupe.

¹⁶Ymã te 'ã Janeruwarete 'ga oje'ega kwasiarukari oje'ega mome'wara 'ga upe rakue, Jueu 'ga upe rakue:

¹⁷“Anure nipo je mama'e teepaw enune Te'agesage muri imojypa pẽ nupe”, 'jau Janeruwarete 'ga ikwasiarukaa Jueu 'ga upe rakue— 'jau Pedro 'ga 'gã nupe imome'wau.

—“A'eramũ nipo pẽna'yra 'gã pẽna'yra 'gã netee jeje'ega mome'wau ojejyriwara 'gã nupe. A'eramũ nipo je kunumũũ 'gã momayupa sawa'e 'gã netee.

¹⁸Te'agesagea nipo je imua tejemiayuwa 'gã nupe. Kũima'e 'gã nupe, kũjãmera 'gã nupe nanẽ nũ. Mĩmera 'gã nupe nipo je imua.

A'eramũ nipo 'gã jeje'eg imũ etee futat je mome'wau kwe pewara 'gã nupe.

¹⁹Tepãjẽa nipo je esaukaa 'gã nupe. 'Gã nemiesage'ema mama'ea nipo je esaukaa 'gã nupe”, 'jau Janeruwarete 'ga ikwasiarukaa Jueu 'ga upe rakue— 'jau Pedro 'ga imome'wau.

—“Ywag ipe, ywy pe nanẽ taesaukat 'jau nũ. Wy, tata, tatasig. Mĩmera taesaukat pẽ nupe 'jau.

²⁰Kwara nipo je omoypytunaip. Jaya nipo je imowya. A'ere nipo pẽjararete 'ga ruri ojewya nũ. Ae mojo'oka 'ga ruri. Ae werowiaramũ nipo 'ga 'jau:

Ere ejua 'au je pyri, 'jau nipo 'ga werowiaaramũ ae upe.

A'ere nipo 'ga werowiare'ema 'gã nupe 'ga 'i:

Pẽẽ naani. Naje rerowiari pejepe. A'eramũ pẽẽ mama'eukwaawa rapyaw ipe pejewau, 'jau nipo 'ga 'gã nupe.

²¹Je katu'og ape 'jara 'gã etee te je akatu'ok. A'eramũ je 'gã mogyau tejepyri ajemogy ma'eramamũ”,

'jau Janeruwarete 'ga ikwasiarukaa 'ga upe rakue— 'jau Pedro 'ga 'gā nupe.

²² A'eramū Pedro 'ga 'jau 'gā nupe nū:

—Israeu juapyreramū peapyaka jeje'eg are. Jejui 'ga futat Janeruwarete 'ga remimurera. A'eramū ako Janeruwarete 'ga opājē resaukaa pē nupe ai'i. Pēnemiapoe'ema ako 'ga iapoukaa Jejui 'ga upe ai'i. Ojero 'wu ma'e, mama'eukwaawa rerekwat. Mīmēra 'gā ako 'ga ikatu'ogukaa 'ga upe ai'i, kwaiwete. A'e resakarera 'gā oporesagamū ee. A'ea 'ā pekwaap najuejue etee. Pē pype futat ako 'ga iapoi akou ai'i— 'jau Pedro 'ga 'gā nupe imome'wau u'ama.

²³ —A'ere ako Janeruwarete 'ga wea'aramū 'ga mono are pē nupe ai'i. Wemifutar imū etee futat ako 'ga 'ga monou pē nupe ai'i, 'ga pyygukaa ako pē nupe ai'i. A'eramū pēē ako 'ga pyygukaa ia'wre'ema 'gā nupe ai'i. A'eramū ako 'gā 'ga monou 'ga mu'ama 'pypeywar are ai'i. Pēē futat ako 'ga jukaukaa 'gā nupe ai'i— 'jau Pedro 'ga 'gā nupe u'ama imome'wau.

²⁴ —Amanū futat ako 'ga ai'i. A'ere ako 'ga ruwa 'ga 'ga moferawi ete ai'i nū— 'jau Pedro 'ga 'gā nupe.

²⁵ —Ymā te 'ā Davi 'ga ka'arana kwasiari inuga Jejui 'ga ree rakue— 'jau 'ga 'gā nupe imome'wau.

—“Akwaap je Tejararete 'ga. 'Ga 'ā ako je pyri.

Jejakwatawa katy 'ga rekoī. A'eramū je tekyjawe'em tekou.

²⁶ Teku'iramū etee tekou. Tepy'ata'waramū etee tekou. Temoferawa rapesaka nipo je te'jina.

A'eramū je teje'ega Jarejuwarete 'ga upe: Ene te 'ā eneresage jee, Kiapi'ni.

²⁷ Je manū re nerepōiri futari je wī. Jereumera neremonemukari.

Je 'ā eneremiayuwaretea futat. A'eramū ene je moferapa etee nū. Ene pyri nipo tewau ywag ipe.

²⁸ Ene 'ā ywaga piara ereesaukat jee. A'eramū je ene pyri tewau.

Jepy'ata'wa je ene ree tekou, 'jau je 'ga upe’’,

'jau Davi 'ga ka'aran are ikwasiaa inuga janee rakue— 'jau Pedro 'ga 'gā nupe imome'wau u'ama, Davi 'ga remikwasiarera mome'wau 'gā nupe u'ama.

²⁹ A'eramū 'ga 'jau 'gā nupe nū:

—Davi 'ga janyepya futat rakue. 'Ga je amome'u pē nupe. Ymā te 'ā Davi 'ga manūi rakue. A'ere 'gā 'ga monoi ita kwara pype rakue. Namukuu rūi futat ita kwara 'ūina rakue— 'jau Pedro 'ga imome'wau 'gā nupe.

³⁰ —Janeruwarete 'ga je'ega mome'warera 'ga Daviramū rakue. Janeruwarete 'ga oje'ega 'ga upe 'ga rekoramū rakue. “Ene juapyrama mū nipo 'wyrīaramū ako ene 'jawe. Jeremimurama 'ga futat nipo 'ūina enerenawer ipe’’, 'jau 'ga Davi 'ga upe rakue— 'jau Pedro 'ga 'gā nupe u'ama.

³¹ —A'eramū Davi 'ga ikwaapa, “Wemimurama 'ga nipo Janeruwarete 'ga omoferap ete nū’ ’e kwaapa rakue. A'eramū 'ga a'eramū ka'arana kwasiaa inuga 'ga ree. “Janeruwarete 'ga nipo nopōiri futari wemimurera 'ga wī. 'Ga reumera monemukare'ema futat nipo’’, 'jau Davi 'ga rakue— 'jau Pedro 'ga u'ama 'gā nupe.

³² —'Ga poromū Janeruwarete 'ga omoferap rai'i. Jejui 'ga omoferap futat. Ore 'ga aruesak 'ga feraw ire ai'i. A'eramū ore a'eramū imome'wau pē nupe— 'jau Pedro 'ga 'gā nupe.

³³ —A'ere Janeruwarete 'ga 'ga moferaw ire 'ga monou ywag ipe ojepyri ai'i. Peu 'ga ywag ipe 'ga monou imuapyka oyse katy. 'Ga 'jawe futat 'ga. A'eramū 'ga 'ga muapyka oyse katy. A'eramū futat 'ga U'agesage mua katu 'ga upe. Ojeupe 'Uwa 'ga imur ire 'ga imua ae upe nanē imojyja nū. 'Ga 'Agesagea te 'ga amut oree. A'ea peenup poromū— 'jau Pedro 'ga 'gā nupe imome'wau. —Ymā te 'ā Janeruwarete 'ga oje'ega muri janee rakue: “Anure nipo je Te'agesage monoi pē nupe’’, 'jau 'ga 'ā rakue. A'eramū 'ga 'awamū futat imua oree. 'Agamū pēnemienuwamū 'ga 'Agesagea iapoukaa oree— 'jau Pedro 'ga u'ama 'gā nupe.

³⁴ —Davi 'ga nooi ywag ipe rakue. Nuapygi 'ga Jarejuwarete 'ga yse katy. A'etea 'ga e'i rakue:

“Ymā te Janeruwarete 'ga 'jau Jejararete 'ga upe rakue:

'Ere ejua eapyka 'au je pyri. Je 'jawe futat ene. A'eramū ene eapyka je yse katy.

³⁵ Anure tamyi ene 'wyrīaramū 'gā nupe 'jau, ene rerowiaara 'gā nupe 'jau.

Ene rerowiare'ema 'gā we futat te'i enee 'jau, koromū futat 'wyrīararete 'ga, te'i enee 'jau', 'jau Janeruwarete 'ga Jejararete 'ga upe rakue’’,

'jau Davi 'ga ka'aran are ikwasiaa inuga janee rakue. Jejui 'ga upe te 'ga 'i rakue— 'jau Pedro 'ga 'gā nupe imome'wau u'ama.

³⁶ —A'eramū Janeruwarete 'ga 'jau: “Je te 'ā Jejui 'ga omono pē nupe. Jeremimurera futat 'ga’’, 'jau Janeruwarete 'ga rakue. A'e 'ga poromū pepokutuk, imonou, imu'ama 'pypeywar

are 'ga manūawamū. A'e 'ga Janeruwarete 'ga omogo Israeu juapyreramū jane'wyrriaramū—'jau Pedro 'ga 'gā nupe. —A'ea 'ā judeuramū juejue pekwaap.

³⁷ A'e renupawe 'gā u'arasigamū ajemogyau. 'Ga jukaawer are 'gā u'arasigamū ajemogyau kwaiwete. A'eramū 'gā 'jau Pedro 'ga upe 'ga pytuna 'gā netee:

—Maran te ore lapoi? Ma'ja te ore aruapo orojee, orojekatu'okawamū?—'jau 'gā 'gā nupe.

³⁸ —Pejetywer awi pepoit— 'jau Pedro 'ga 'gā nupe. —A'eramū 'ga pejetywer awi pēpoiireramū pē katu'oka. "Jeju'i 'ga rerowiaaramū ore reko'i 'awamū", pe'je 'gā nupe. A'eramū 'gā pē pymiāu 'y pe. A'eramū pē pymi re Janeruwarete 'ga U'agesage mua pē nupe pēnerekwaramū— 'jau 'ga 'gā nupe.

³⁹ —Ymā te 'ā Janeruwarete 'ga oje'ega kwasiarukari inuga janee rakue: "Pejetywer awi pēpoiireramū je pē katu'ogi. Pē katu'og ire je Te'agesage monou pē nupe", 'jau 'ga 'ā ikwasiarukaa rakue— 'jau Pedro 'ga 'gā nupe. —Aipo e'i 'ga pē nupe. Pēna'yt, tesirūmet, wemimū'ēmet 'jau. Mīmeramū 'ga aipo 'ga 'i pē nupe— 'jau Pedro 'ga 'gā nupe imome'wau. —A'eramū 'ga 'awamū u'eawer imū futat U'agesage mua imojypa janee— 'jau 'ga 'gā nupe imome'wau.

⁴⁰ A'eramū Pedro 'ga 'gā mu'jau afuakaramū etee futat aipoa morogyta are u'ama. A'eramū 'ga 'jau 'gā nupe:

—Pe'je pejejepe'au 'ga rerowiare'ema 'gā nui. Anure nipo Janeruwarete 'ga Jeju'i 'ga rerowiare'ema monoi mama'eukwaawa rapyaw ipe ojewi. Peo kasi 'gā newiri ne. Pēē 'ā Jeju'i 'ga perowiat. "Je mogo ape ejemiayuwamū", 'jau ki pēē 'ga upe— 'jau Pedro 'ga 'gā nupe u'ama.

⁴¹ Aipoa 'ga porogyta renupawe 'gā kwaiwete Pedro 'ga je'ega rerowiaa. Jeju'i 'ga nanē 'gā erowiaa ajemogyau nū. Tres miu 'gā 'ga rerowiaa. A'eramū 'gā 'gā nerawau ipymiāu 'y pe Jeju'i 'ga 'gā erowiara resaukaawamū.

⁴² A'ere 'gā awau ajatykau Jeju'i 'ga remimonofera 'gā nee, 'gā porogyta are wapyakau. A'eramū futat 'gā ajemogyau Jeju'i 'ga rerowiaareteramū. A'eramū futat Jeju'i 'ga rerowiaaramū opojekukaramū ajuee. Ajamajatykau kumi 'wau. Jarejuwarete 'ga upe oporogytau nanē 'gā ajatykau nū.

⁴³ Jeju'i 'ga remimonofera 'ga Janeruwarete 'ga pājē rerekou. A'eramū 'gā 'ga pājē resaukaa 'gā nupe, aeremiapoe'ema apou 'ga pājē mū, kwaiwete. A'eramū a'e resakara 'ga oporesagamū ajemogyau ee.

⁴⁴ Jeju'i 'ga rerowiaara 'gā juejue ajatykau ajemogyau. Ikaraemā ma'e 'gā okaraemā me'ega ka'aranūū are.

⁴⁵ Iywy ma'e 'gā nanē onywy me'ega ka'aranūū are nū. A'ere 'gā ka'aranūū rerua imojo'oka ajaupe. Ta'yt kwaiwete ma'e 'gā nupe 'gā kwaiwete imojo'oka. Ta'yre'ema 'gā nupe 'gā imojo'oka ināinānī'ī etee.

⁴⁶ Ai'iwe nū, ai'iwe nū, ai'iwe nū 'jau 'gā ajatykau ajemogyau peu. Jarejuwarete 'ga mogytaaw ipe ajatykau. Wog ipe nanē ajatykau ojemi'waa nanē nū. Mani'oko'o'i 'wau Jeju'i 'ga manūawer are wea'aramū ajemogyau. A'e pype opy'ata'waramū ajemogyau.

⁴⁷ —Ene te 'ā eneresage oree— 'jau 'gā oje'ega monou Jarejuwarete 'ga upe 'ga muorypa. Jeju'i 'ga rerowiare'ema 'gā miamū oporomutaramū 'ga rerowiaara 'gā nee ajemogyau. Janeruwarete 'ga Jeju'i 'ga rerowiarukaa 'gā nupe. Ai'iwe, ai'iwe, ai'iwe. A'eramū 'gā ojemomytuna. Kwaiwete Jeju'i 'ga rerowiaara 'gā ajatykau ajuee.

3

Iteu ma'e 'ga

¹ Poje Pedro 'ga awau Juā 'ga retee Jarejuwarete 'ga mogytaaw ipe. Kwara jerewamū 'gā awau. Aipo pe kwara kwawauwe 'e'e'emi 'gā awau Jarejuwarete 'ga mogytaaw ipe oje'ega monou 'ga upe.

² A'e pe iteu ma'e 'ga 'ūina Jarejuwarete 'ga mogytaawa rokwar ipe. 'Okwar esage 'jaw ipe wapyka. A'e pe 'ga 'ūina. Iteu 'ga u'aa rakue. A'eramū 'ga pytuna 'gā 'ga rerawau im'īina 'okwar ipe ka'aranūū are.

—Ka'aranūū'īa pemut ape jee— 'jau 'ga 'ūina 'gā nupe, Jarejuwarete 'ga mogytaaw ipe ose ma'e 'gā nupe.

A'eramū amumera 'gā imonou 'ga upe.

³ Poje Pedro 'ga 'ua Juā 'ga retee. A'eramū iteu ma'e 'ga 'gā nupe ka'aranūū renūina nū.

A'ere 'gā 'i etee 'ga upe:

⁴ —Emā'ē ore ree kūi— 'jau etee 'gā 'ga upe.

⁵ A'erauwe iteu ma'e 'ga amā'jāu 'gā nee. "Ka'aranūūa sipo 'gā amut jee pa", 'jau 'ga ojeupe amā'jāu 'gā nee.

⁶⁻⁷ A'eramū Pedro 'ga 'jau 'ga upe:

—Nitywi ka'aranūūa ki 'ei. A'ere je mama'e esage apoi enee— 'jau etee Pedro 'ga iteu ma'e 'ga upe. —Jejui Kristu 'ga, Nasare pe waranup ma'efera 'ga 'ā ore mogo wekwawer ipe ai'i. A'eramū je 'jau enee: Efu'am jui— 'jau 'ga 'ga upe.

⁸ A'erauwe futat Pedro 'ga 'ga poppyka 'ga mafu'ama. A'eramū futat iteu ma'efera 'ga pyju'ā oywyrafenamū. A'erauwe 'ga po 'ga pori awau wafukafukaita:

—Au'je katu pa, Ku'jywa 'ga je katu'ogī nū— 'jau 'ga wafukafukaita awau osou Jarejuwarete 'ga mogyaaw ipe 'gā netee.

⁹⁻¹⁰ A'eramū mytuna 'gā 'ga resaka.

—Kuu. Iteu ma'efera 'ga afu'am ra'e— 'jau 'ga resakara 'gā ajaupe.

Oporesagamū 'ga ree, 'ga po 'ga po 'ga rekoramū.

Pedro 'ga 'eawet

¹¹ Amafu'am ire iteu ma'efera 'ga rekoi Pedro 'ga pir are. 'Ogeikwara pakuja 'wyr ipe 'gā oi Juā 'ga retee. A'erauwe Janeruwarete 'ga mogyaaw ipe ose ma'efera 'gā 'ēi awau 'ogeikwara pakuja 'wyr ipe esaka, Sarumāu 'ga ma'e 'jawa 'wyr ipe awau esaka.

—Maran 'ga ako ra'e 'ū? Najema'uma'uwi'i te 'ga afu'am are jepi a'i kūi— 'jau 'gā ajaupe, ma'upawe'eme 'ga mafu'amamū.

A'eramū

—Awŷja 'ga mafu'ama ki 'ei?

—Pedro 'ga 'ga amafu'am kūi— 'jau 'gā ajaupe.

¹² 'Ga mafu'ama 'gā mopiryita. A'eramū Pedro 'ga 'jau 'gā nupe:

—Janeruwarete 'ga upe mama'e apoara 'ga te 'ga amafu'am nū'ū, Jejui 'ga nū'ū. Naore rūi 'ga aramafu'am. Noropājē mū rūi ore 'ga mafu'ami. Norojesageu rūi te 'ā ore 'ga mafu'ami. Jejui 'ga te 'ā 'ga mafu'amara te— 'jau Pedro 'ga 'gā nupe aipo 'gā 'eramū.

¹³ A'erauwe 'gā ajemogyau etee oporesagamū 'gā nee.

—Janeruwarete 'ga te ako wa'yra 'ga amut opoaawamū ikue. 'Ga te 'ga amafu'am— 'jau Pedro 'ga 'gā nupe. —Janeruwarete 'ga wa'yra 'ga omogo ipojeuwipyrāmū. Jarejuwarete 'ga te 'ā jane sirowiat. Ymā we te 'ā janeypy 'gā Jarejuwarete 'ga rerowiari rakue. Na'awamue rūi futat te 'ā jane 'ga rerowiari. Ymā we futat te 'ā Abraão 'ga 'ga rerowiari rakue. Isaki, Jako. Mīmera 'gā 'ga rerowiaa rakue— 'jau Pedro 'ga 'gā nupe. —A'eramū jane 'agamū 'ga rerowiaa jarejemogyau— 'jau Pedro 'ga 'gā nupe.

—Janeruwarete 'ga ako wa'yra 'ga mua janee ikue numiamū. A'ere ako pēē futat pejukaukat 'ga ikue. A'eramū ako pēē 'ga monou ekoete peje'wyrara upe ikue, Piratu 'ga upe ijukaukaa ekoete ikue. 'Ga ako "Opoit je 'ga wi", 'jau ikue numiamū. A'ere ako pēē "Ere 'ga jukaukaa futat oree", 'jau ako pēē ai'i.

¹⁴ Oporojuka ma'ea jēmī ako pēē imuēmukaa 'ga upe ikue— 'jau Pedro 'ga 'gā nupe. —Oporojuka ma'ea te amunipo 'ā pejukaukat rakue. A'ere ako mama'e tywera apoare'ema 'ga jēmī pejukaukat ikue. 'Ga Jarejuwarete 'ga remifutara etee te wapo. A'etea ako pēē 'ga jukaukaa ekoete ikue— 'jau Pedro 'ga 'gā nupe, oporogytau u'ama.

¹⁵ —'Ga te 'ā ae mogyara futat. A'ere ako pēē futat 'ga pejukaukat ikue numiamū. A'ere ako Janeruwarete 'ga 'ga moferawi etee ai'i nū. Ore futat 'ga moferaw ire 'ga resaka ai'i nū— 'jau 'ga 'gā nupe.

¹⁶ —'Ga pājē mū te ore 'agamū 'ga mafu'ami. Naore rūi 'ga aramafu'am. Aruerowiat te 'ā ore 'ga. A'eramū 'ga 'ga mafu'amukaa oree pē nowase— 'jau Pedro 'ga 'gā nupe oporogytau.

¹⁷ —Nepekwaawi nipo 'ga— 'jau Pedro 'ga 'gā nupe. —Nepekwaawi nipo Jarejuwarete 'ga remimurera 'ga. Pē'wyrari 'ga. Pē'wyrari 'ga nanē nokwaawi nū. Ajee ako 'ga pejukaukat ekoete ikue, peje'wyrara upe ikue— 'jau Pedro 'ga 'gā nupe, Jejui 'ga mome'wau.

¹⁸ —Ymā te 'ā Janeruwarete 'ga oje'ega kwasiarukari oje'ega mome'wara 'gā nupe rakue. A'e are 'gā ka'arana kwasiaa inuga janee rakue. "Anure nipo Janeruwarete 'ga remimurera 'ga ruri. A'ere 'ga pyriwara 'gā 'ga rerekou tyweaete 'ga mayrūmū", 'jau 'ā 'gā ka'arana kwasiaa inuga janee rakue— 'jau Pedro 'ga 'gā nupe u'ama imome'wau. —Ajee 'ā 'ga je'egawer imū etee futat 'ga rayrūnamū amanūmū janee.

¹⁹ A'eramū pēē 'awamū pejeipoia pejetywer awi. A'eramū pejeje'ega monou Jarejuwarete 'ga upe. "Jetywera epe'a je wi, ki Ku'jyp", pe'je ki 'ga upe. Ojeupe pēje'ega monorauwe, 'ga pētywera tomoit pē nui 'jau— 'jau Pedro 'ga 'gā nupe.

²⁰ —Pētywera pē nui imoir ire 'ga opājēa tamut pē nupe 'jau. A'eramū futat 'ga pē maku'iu pē mogyau. A'eramū pejetywer awi pejeipoia. Ymā te Janeruwarete 'ga 'i ojeupe rakue: "Teja'yra 'ga tomono 'gā nupe 'jau, 'gā katu'okawamū 'jau", 'jau 'ga 'ā ojeupe rakue. A'eramū 'ga 'ā Jejui 'ga mua janee rakue— 'jau Pedro 'ga 'gā nupe imome'wau.

²¹ —Awamū 'ga 'ūina ywag ipe, mama'e katu'okawa 'ara upe iwaēma rapesaka 'ūina. Anure te nipo 'ga ruri ojewya nū, 'awa ywy pe nū— 'jau Pedro 'ga 'gā nupe. —A'eramū futat 'ga ruwa 'ga ywy katu'oka nipo nū. A'eramū futat ipyau 'jawe iapou nū, ywy apou

nū. Saa'e ymā rakue. Nan futat iapou nū, ikatu'oka nū. Ymā te 'ā Janeruwarete 'ga oje'ega kwasiarukari Moisesi 'ga upe rakue:

²² “Anure te nipo Janeruwarete 'ga 'ga amū muri pē nupe, oje'ega mome'waramū pē nupe. Je 'jawerimū futat 'ga 'ua pē nupe oje'ega, Janeruwarete 'ga je'ega mome'wau pē nupe.

Sā'ā 'ga je mura. Nan futat nipo 'ga pēpytuna 'ga amū muri pē nupe oje'ēma'eramū.

²³ 'Ga nipo oje'ega renupare'ema 'gā omojo'ok wemiayuwa 'gā nui anure.

A'eramū nipo 'ga oje'ega renupare'ema 'gā monou mama'eukwaawa rapyaw ipe.

A'eramū ki pēē enupa etee 'ga je'ega”,

'jau Moisesi 'ga ikwasiaa inuga janee rakue— 'jau Pedro 'ga 'gā nupe.

²⁴ —Moisesi 'ga ra'ne akou oje'ega 'gā nupe rakue. A'ere Samueu 'ga oje'ega 'gā nupe nū. A'ere 'gā newiriwarera 'gā 'gā nemimome'ufer imū etee futat oporogytau 'gā nupe. Janeruwarete 'ga je'ega mome'wara 'gā juejue. Ymā te 'ā Janeruwarete 'ga porogytai 'gā nupe rakue— 'jau Pedro 'ga 'gā nupe. —Ma'eramū 'ā 'gā ka'arana kwasiari inuga 'ga je'eg are rakue— 'jau Pedro 'ga 'gā nupe. —A'eferupi te futat ajee 'ā Jeju 'ga manūi, 'Uwarete 'ga je'eg imū etee futat— 'jau Pedro 'ga imome'wau 'gā nupe.

²⁵ —A'ere 'ā 'ga na'gā nupe etee rūi 'ga porogytai rakue. Pē nupe nanē nū 'ga porogytai. “Enejuapyrama 'gā teje'ega anuwamū jeresageramū 'gā nupe, najuejue etee futat”, 'jau 'ā Ku'jywa 'ga Abraão 'ga upe rakue. Pēē 'ā Abraão 'ga juapyrera. Ma'eramū 'ā Ku'jywa 'ga porogytafera resageramū pē nupe nanē nū— 'jau Pedro 'ga imome'wau 'gā nupe.

²⁶ —Ma'eramū 'ā Ku'jywa 'ga 'awamū ojeupe mama'e apoara 'ga muri pē nupe ra'ne, wa'yra 'ga muri pē nupe ra'ne— 'jau Pedro 'ga 'gā nupe. —Mama'e esagea 'ga wapo pē nupe, mama'e tywer awi pē momoirukaawamū— 'jau Pedro 'ga imome'wau 'gā nupe.

4

'Gā nee 'wyriara 'gā mara'neawet

¹ 'Gā nupe Pedro 'ga oje'ega Juā 'ga retee 'gā nuwamū 'gā amū 'ua owaēma 'gā nupe. Mainan, Janeruwarete 'ga mogytaawa raarana 'gā 'wyriat, satuseu. Mīmera 'gā 'ua owaēma 'gā nupe 'gā je'egamū.

² —Jeju 'ga ako amanū ai'i— 'jau Pedro 'ga u'ama imome'wau 'gā nupe. —A'ere ako 'ga ferawi etee ai'i nū. A'eramū nipo jane nan tee futat jaremanū re jareferapa etee futat 'ga 'jawerimū. Jeju 'ga jewyramū te nipo jane 'ēi tywy awi jareferapa nū— 'jau Pedro 'ga imome'wau u'ama 'gā nupe.

A'e renupawe aipo 'ut ma'efera 'gā amara'neramū 'gā nee.

³ A'eramū 'gā 'gā pyyka 'gā monou 'gā munepa moromunepawa pype. Kaaruweteramū 'gā 'gā pyyka 'gā monou 'gā munepa moromunepawa pype. Peu etee futat 'gā osea 'upa. Peu futat 'gā aku'emamū.

⁴ A'ere kwaiwete 'gā nenuparera 'gā Jeju 'ga rerowiari. 'Ga rerowiaara 'gā ojeme'yita. A'eramū Jeju 'ga rerowiaara 'gā pytuna sīku miu.

⁵ A'eramū ai'iwe 'gā 'ai'ajatykau Jerusareg ipe. Judeu 'gā 'wyria'ri, 'gā nupe oje'ēma'e, Moisesi 'ga je'ege are moromu'jat. Mīmera 'gā 'ua ajatykau ajuee.

⁶ Anasi 'ga, mainana 'wyriararete 'ga ajatykau 'gā nee. Kaifasi, ajepeja Juā, Aresāri, Anasi 'ga pytuna mū. Mīmera 'gā ajatykau ajuee.

⁷ A'eramū 'gā moromunepawa pypewara 'gā, Jeju 'ga remimonofera 'gā nerurukaa jefaruu 'gā nupe.

—Pe'je pejewau 'gā nerua 'au ore rowase— 'jau 'gā jefaruu 'gā nupe.

A'eramū 'gā 'gā nerua. A'ere ajatyka ma'efera 'gā oporonupa 'gā nupe iteu ma'efera 'ga ree.

—Maran te iteu ma'efera 'ga pemafu'am rai'i?— 'jau 'gā oporonupa ee Pedro 'ga upe Juā 'ga retee. —Ma'e pājē mū pēē 'ga mafu'ama rai'i ki 'ei? Aw'jya je'eg imū rai'i ki 'ei?— 'jau 'gā 'gā nupe.

⁸ A'eramū Pedro 'ga oje'ega 'gā nupe. Ku'jywa 'ga 'Agesagea 'ga rerekou. A'eramū 'ga mogyjeukare'ema 'gā nui. A'eramū 'ga 'jau 'gā nupe:

⁹ —Maran te 'ga pemafu'am rai'i, pe'je 'ā oree. A'eramū je imome'wau pē nupe. Mama'e tywera nipo ore aruapo rai'i? Naani nū'ū. Mama'e esagea te ore aruapo ai'i nū'ū. A'etea 'ā ore rerurukat ekoete pejepe ore moporogytaukaa pejejeupe ki 'ei. A'eramū je imome'wau pē nupe— 'jau Pedro 'ga u'ama 'gā nupe.

¹⁰ —Naoropājē mū rūi ore 'ga mafu'ami. Jeju Kristu 'ga te 'ā 'ga amafu'am. Nasare pe waranup ma'efera 'ga, pēnemijukafera 'ga. Ako 'ga poromū Janeruwarete 'ga omoferap ai'i nū— 'jau Pedro 'ga 'gā nupe imome'wau u'ama. —'Ga te 'ga amafu'am opājē mū ai'i— 'jau 'ga 'gā nupe.

11 —A'etea ako pēē 'ga futare'ema ikue— 'jau Pedro 'ga 'gā nupe u'ama. —A'ere 'ā Janeruwarete 'ga 'ga muri janee, jane katu'ogukaa ete 'ā. Sā'ā ae 'oga aporamū kwaiwete 'ywa rerura tupaa mywamū. A'eramū 'ā ae 'ywa mū reroyrūmū. A'ere 'ā eroyrūmyrera jēmī 'yweteetea. A'eramū 'ā ae ijaramū, pea te futat pemono, ae 'i ajaupe. Nan tee futat 'ga 'i Jejuu 'ga upe. Janeruwarete 'ga 'ga amut janee. A'ere ako pēē peroyrū ete 'ga ai'i. “Nia'wyri 'ga ra'e”, pe'je 'ga upe ikue. “Narafutari ore 'ga”, pe'je Jejuu 'ga upe ai'i— 'jau Pedro 'ga 'gā nupe u'ama. —A'ere 'ā 'ga ruwa 'ga te 'ga futari. A'eramū 'ga 'ga mogou jane katu'okaramū etee nū. Afutare'em ire 'ā 'ga pē katu'oka etee 'ua nū— 'jau Pedro 'ga u'ama, 'gā nupe.

12 —'Ga te 'i futat Janeruwarete 'ga amut janee. Nirūi futari 'ga. 'Ga te 'i futat ae katu'oka akou. Janetywera pe'aara 'ga poromū 'ut janee— 'jau Pedro 'ga u'ama 'gā nupe.

Pedro 'ga Juā 'ga retee oporogytau 'gā nupe. Iteu ma'efera mafu'amawera mome'wau 'gā nupe.

13 A'eramū ajatyka ma'e 'gā oporesagamū 'gā nee:

—Kuu. Maran te 'gā nokyje'i oporogytau janee nū'ū? 'Gā te te 'ā nojemu'ei agawewi a'i kūi. A'etea te 'ā 'gā nojenosī imome'wau a'i kūi— 'jau 'gā ajaupe.

—Naani nū'ū— 'jau ajepeja 'ga 'gā nupe. —Jejuu 'ga rewiri ako ma'efera 'gā tee nū'ū. A'eramū 'gā a'eramū 'agamū ojenosōue'em jane wi— 'jau 'ga 'gā nupe.

14 A'ere iteu ma'efera 'ga oi 'gā nupi. 'Gā nemimafu'amera 'ga oi 'gā nupi. A'eramū 'wyriara 'gā 'ga resaka 'gā newiri 'ga rekoramū. A'eramū 'gā a'eramū oje'egarūme'em 'gā nupe: “Pē'me pēē”, 'jawe'em futat 'gā 'gā nupe.

15 A'eramū peuwara 'gā amū oje'ega Pedro 'ga upe Juā 'ga retee:

—Pē'ē pejewau ore wi ra'ne. Peu pekwap ore wi ra'ne— 'jau 'ga 'gā nupe.

A'erauwe 'gā 'ēi awau 'gā nui.

'Gā 'ē re 'gā oje'ega ajaupe:

16 —Maran te jane 'gā nereko'i 'awamū?— 'jau 'gā ajaupe.

—Tee.

—Okwaapap te 'ā 'gā a'i kūi, 'auwara Jerusareg ipewara 'gā a'i kūi. A'eramū jane “i'me 'gā”, 'jawe'em futat 'gā nupe. Okwaapap te 'gā 'ā.

17 A'eramū jane, “Au'je Jejuu 'ga mome'u mokwasio re”, sa'e 'gā nupe jareje'ega moywyrafena 'jau— 'jau 'gā ajaupe. —“Ga mome'uu'jawamū ore pē monoi pē munewu'japa ne nū”, sa'e 'gā nupe jareje'ega moywyrafena 'jau— 'jau 'gā ajaupe.

18 A'ere 'gā 'gā nenūina nū. A'erauwe Pedro 'ga 'ua Juā 'ga retee 'ua osou. A'erauwe 'gā 'jau 'gā nupe:

—Au'je ki 'awamū Jejuu 'ga mome'u re. 'Ga mome'uu'jawamū ore pē munewi ne nū. Narafutareetei futari ore 'ga mome'ua 'awamū— 'jau 'gā 'gā nupe.

19 A'ere Pedro 'ga Juā 'ga retee 'gā je'egi etee 'gā nupe:

—Ma'ja te Janeruwarete 'ga afutat? Peje'eg are oreapyaka te 'ga afutat? Oje'eg are oreapyaka te ra'u 'ga afutat nū? Napeje'eg are rūi te 'ā ore apyakai. Jarejuwarete 'ga je'ega te 'ā ore aruenup— 'jau etee Pedro 'ga Juā 'ga retee 'gā nupe.

20 —Amanū ako Jejuu 'ga ai'i numiamū. A'ere ako 'ga Ruwarete 'ga 'ga moferawi etee ai'i nū. A'eramū ore 'ga resaka ai'i. Oje'ega 'ga oree ai'i. A'eramū ore 'agamū 'ga resag ire te imome'wau arakou pē nupe. Noropoirau'weri futari ore 'awamū 'ga mome'u awi— 'jau etee Juā 'ga 'gā nupe.

21 Aipo 'gā 'eramū 'wyriara 'gā oje'ega moywyrafena 'gā nupe nū:

—“Au'je Jejuu 'ga mome'u re”, aru'e ako ore pē nupe ko. 'Ga mome'uu'jawamū ore pē pyygi pē nupānupāu nū'ū— 'jau 'gā oje'ega moywyrafena 'gā nupe.

'Gā nupe oje'ega moywyrafen ire opoia 'gā nui. A'ere 'gā nanupāi 'gā. Okyje 'gā mytuna 'gā nui. A'eramū 'gā a'eramū opoia esage te 'gā nui. Iteu ma'efera resakara 'gā wejue 'upa Jarejuwarete 'ga muorypa ee:

—Ene te 'ā eneresage oree. Ene te ako iteu ma'efera 'ga eremafu'am ai'i— 'jau 'gā 'ga upe 'ga muorypa ee 'upa.

22 Nakunumī arūi te 'ā iteu ma'efera 'ga. Sawa'ea te 'ā iteu ma'efera 'ga. Kwarēta kwara te 'ā 'ga amu'at.

Jarejuwarete 'ga upe 'gā eawet

23 Ojewi 'gā poir ire Pedro 'ga Juā 'ga retee ojewya awau opytuna 'gā pyri. A'eramū 'gā opytuna 'gā nupe werekwawera mome'wau:

—Ekoay mainana 'wyriara 'ga oje'ega moywyrafena oree ai'i. “Au'je ki Jejuu 'ga mome'u re”, e'i 'gā oree. “Ga mome'uu'jawamū ore pē pyygi pē nupānupāu ne”, e'i 'gā oree ai'i— 'jau Pedro 'ga mainana 'wyriara 'gā eawera mome'wau ajaupe.

24 Aipo Pedro 'ga imome'upaw ire 'gā oje'ega monou 'upa Jarejuwarete 'ga upe, 'ga muorypa.

—Ene te 'ā ore'wyrriararetea, ki Ku'jyp— 'jau 'gā 'upa 'ga upe. —Ene te 'ā mama'ea ereapo ore'e rakue. 'Y, wyw, ywak. Mīmera 'ā ereapo ore'e rakue, ipypewara reewe rakue. Ore nanē 'ā ene iapou rakue nū. Ene te 'ā Oreruwaretea— 'jau 'gā oje'ega monou 'ga upe 'upa 'ga muorypa.

²⁵—Ymā te 'ā ka'arana erekwasiarukat oreypy 'ga upe rakue, Davi 'ga upe rakue, ejeupe mama'e apoara 'ga upe rakue— 'jau 'gā oje'ega monou Jarejuwarete 'ga upe. —Ene'agesagea oje'ega 'ga upe rakue, 'ga mu'akwaapa rakue. A'eramū 'ga eneje'ega kwasiaa inuga ore'e rakue— 'jau 'gā Jarejuwarete 'ga upe 'upa.

—Aipo 'jau 'ga ikwasiaa inuga ore'e rakue:

“Ma'eramū te judeue'ema 'gā mara'neramū etee ajemogyau?

Ma'eramū te 'gā mama'e tywer are etee 'gā nea'aramū ajemogyau?

²⁶ 'Wyrriararete 'gā ajatykau 'wyrri'ri 'gā netee aparuwajaa ene ree eneremimurera 'ga ree nanē nū”,

'jau 'ga ikwasiaa inuga ore'e rakue— 'jau 'gā 'upa Jarejuwarete 'ga upe.

²⁷—Mama'e a'je are futat 'ga ka'arana kwasiari inuga ore'e rakue— 'jau 'gā 'ga upe. —'Ga remikwasiarer imū etee futat kwaiwete 'gā jatykai enera'yra 'ga ree. Enera'yra 'ga ree 'gā mara'neramū. A'eramū 'gā ajatykau 'ga ree. “Sijuka 'ga”, 'jau 'gā ajaupe. Erote, Pōsiu Piratu. Mīmera 'gā judeu 'gā werajatyka judeue'ema 'gā netee enera'yra 'ga ree. Nokoi agawewi 'ga tesirūgatu. A'etea 'gā ajatykau 'ga ree 'ga rerekou tyweaete— 'jau 'gā oje'ega monou Jarejuwarete 'ga upe. —Eneremimurera 'ga ree 'gā jatykai. Ene futat 'ā 'ga erepyrū ore'e rakue, ore katu'okawamū rakue. A'e 'ga ree ako 'gā jatykai kwaiwete ai'i— 'jau 'gā oje'ega monou Jarejuwarete 'ga upe.

²⁸—Davi 'ga remikwasiarer imū etee futat 'gā iapoi. Ene te 'ā pājērete. Nitywi 'ā 'ga amū ene 'jawe. A'etea 'ā ene eja'yra 'ga jukaukaa ako 'gā nupe ai'i. Eneremifutar imū etee futat 'gā iapoi— 'jau 'gā oje'ega monou 'ga upe. —Nan futat te 'ā erefutat rakue— 'jau 'ga oje'ega monou Jarejuwarete 'ga upe.

²⁹—Eapyaka ki 'gā je'egay are e'yina, ki Ku'jyp. Imara'ne 'gā ore ree. A'eramū ene E'agesage mua ore'e, ore mogyaukare'ema 'gā nui. Eje'ega mome'waukaa ore'e 'gā nui ore mojenosōukare'ema futat— 'jau 'ga Jarejuwarete 'ga upe.

³⁰—Epājēa emut ore'e, Kiapi'ni. Oreremiapoe'ema eapoukat ore'e. Ojero'wu ma'e 'gā ekatu'ogukat ore'e. A'eramū nipo tesirūmera 'gā oporesagamū ajemogyau ee— 'jau 'gā oje'ega monou Jarejuwarete 'ga upe. —Esage ma'e 'ga futat enera'yra 'ga. Ipojeuwipyra 'ga futat. 'Ga je'eg imū futat toroo 'gā katu'oka arakou 'jau, ki Ku'jyp— 'jau 'gā 'ga upe, oje'ega monou 'upa.

³¹ Ojeupe 'gā je'ēmaw ire 'ga 'oga motomoga 'gā nupe, opājē resaukaa 'gā nupe. A'eramū futat Janeruwarete 'ga 'Agesagea 'gā nerekou. A'eramū futat 'gā ojenosōue'em Jarejuwarete 'ga je'ega mome'wau awau ajemogyau.

Okaraemā me'egawet

³²⁻³⁵ Jejui 'ga remimonofera 'gā 'ga manūawera mome'wau akou 'gā nupe:

—Amanū ako Janejararete 'ga ai'i numiamū, Jejui 'ga ai'i numiamū. A'ere Janeruwarete 'ga 'ga moferawi etee ai'i nū— 'jau 'gā akou imome'wau ojeypyriwara 'gā nupe.

A'eramū Ku'jywa 'ga opājē monou wa'yra 'ga rerowiaara 'gā nupe. 'Ga nanē futat akou 'gā newiri nū. A'eramū Ku'jywa 'ga ojejukau wa'yra 'ga rerowiaara 'gā nee.

Nitywi'i futari “peapo awi mama'ea mū nan” 'gā nupe 'jara 'gā. Aju'jaju'jawe futat 'gā wea'aramū mama'e apo are. Nitywi'i futari mama'e mimara 'gā. Mama'ea 'gā imua pāwē etee futat ajaupe. Ka'aranūā 'gā erua Jejui 'ga remimonofera 'gā nupe. A'eramū 'gā ka'aranūū mojo'oka etee futat 'gā nupe. Ika'aranūūe'ema 'gā nupe nanē imonou nū. Ta'yt kwaiwete ma'e 'gā nupe kwaiwete imonou. Ta'yre'ema 'gā nupe imonou ināinānī'i etee. Mama'e muawamū 'gā imonou 'gā nupe. Ywy jara 'gā ywy me'ega amumera 'gā nupe. 'Oga jara 'gā nanē woga me'ega ka'aranūū are nū. A'e repyfera 'gā erua Jejui 'ga remimonofera 'gā nupe ajaupe imojo'ogipyramū. A'eramū ikaraemāe'ema 'gā amū akowe'em futat 'gā pype rakue.

³⁶⁻³⁷ Jose 'ga nanē oywy me'ega nū. A'eramū 'ga oywy repyfera rerua imonou Jejui 'ga remimonofera 'gā nupe. Jose 'ga u'at 'ypō'ōū pype rakue. Sipiri 'jau 'gā aipo 'ypō'ōū upe. Levi 'ga juapyrera poromū. Aipo Jose 'ga rera mukūi. Panapea 'ga rer irūa. Jejui 'ga remimonofera 'gā Panape nuga 'ga ree. Aemaku'iara 'ga. A'eramū 'gā poromū inuga 'ga ree.

5

¹ Anure 'ga amū nanē oywy me'ega nū. 'Ga rera Ananiasi. 'Ga remireko ēē rera Safira. Ananiasi 'ga oywy me'ega. A'ere 'ga ka'aranūū mojo'ogi ojeupe.

² —Simim ape jarejee 'jau— 'jau 'ga wemireko ēē upe. —A'ere soo jare'meramū 'gā nupe 'jau. “Koromū etee oreywy repyfera”, sa'e 'gā nupe 'jau— 'jau 'ga wemireko ēē upe.

A'eramū Ananiasi 'ga awau o'meramū Pedro 'ga upe:

—Koromū etee futat ka'aranūūa jeywy repyfera— 'jau futatee 'ga awau Pedro 'ga upe.

³ A'eramū Pedro 'ga 'jau 'ga upe:

—Ma'eramū ene mama'eukwaawa 'wyriara je'ega renupa 'ū? Ma'eramū te ene'me Jarejuwarete 'ga upe ra'e? Ywy repyfera eremim ape ejeupe. A'ere 'ā ene'me ejua.

⁴ Enema'ea futat wywa. A'eramū ime'eg ire enema'ea futat epyfera. Ma'eramū ene e'me ekoeteramū ejua jee 'ū? A'ere naje upe rūi ene'me. Jarejuwarete 'ga upe te ene'me— 'jau Pedro 'ga 'ga upe.

⁵ Aipo ojeupe 'eramū 'ga u'aa tii too awau amanūmū. A'eramū 'gā “o'me re Ananiasi 'ga manū” 'e renupara 'gā okyjau ajemogyau.

⁶ A'eramū kunumūū 'gā 'ga auwana taity pyu, 'ga rerawau inuga ita kwara pype.

⁷ A'eramū kaaruwamū 'ga remireko ēē 'ua owaēma Pedro 'ga upe. Nokwaawi ēē omena 'ga manūa.

⁸ A'eramū Pedro 'ga 'jau ēē upe:

—A'jea futat te koromū etee futat ka'aranūūa rai'i?— 'jau 'ga ēē upe.

—A'jea futat kweramū etee futat ai'i— 'jau ēē 'ga upe.

⁹ A'eramū Pedro 'ga 'jau ēē upe:

—Ma'eramū te pē'me Jarejuwarete 'ga upe? Nepekwaawi sipo “Janeruwarete 'ga ae'mea okwaap” 'ea? Kweramū futat enema ita kwara pype erawarera 'gā nuri. A'eramū 'gā 'awamū ene nanē ene rerawau nū— 'jau Pedro 'ga ēē upe.

¹⁰ Aipo ojeupe 'eramū ēē amanūmū u'aa Pedro 'ga rowase nū. A'erauwe kunumūū 'gā 'ua osou nū. Irāā'ā ēē reumera etee tuwamū nū. A'eramū 'gā ēē rerawau inuga ēē mena wywri pe.

A'eramū 'gā nera okwasi'wau.

—Ananiasi 'ga i'me Jarejuwarete 'ga upe. A'eramū 'ga amanūmū u'aa Pedro 'ga rowase. A'ere 'ga remirekofera ēē nanē amanūmū o'me are nū— 'jau 'gā imokwasi'wau.

¹¹ A'erauwe 'gā ajemogyau okyjau najuejue etee futat. Jeju 'ga rerowiaara 'gā, tesirūmera 'gā taetu okyjau.

—Kuu. Peenup te rai'i? “O'me re 'ga manū” 'ea rai'i? Noje'eg ekoetei ae Jarejuwarete 'ga upe! Ni'mea'uwari ae 'ga upe— 'jau 'gā ajaupe.

Aeremiapoe'ema apoawet

¹² A'eramū taetu Jeju 'ga remimonofera 'gā Jeju 'ga mome'wau 'gā nupe. A'eramū Janeruwarete 'ga 'gā nemiapoe'ema apoukaa 'gā nupe. Ojero'wu ma'e katu'ogukaa 'gā nupe. Opājē resaukaa werowiare'ema 'gā nupe. A'eramū 'gā oporesagamū ajemogyau ee.

Jeju 'ga rerowiaara 'gā ako ajatykau 'ogeikwara pakuja 'wyripe, Sarumāu 'ga ma'e 'jawa 'wyripe jepi. Amaraka'aga 'gā Jarejuwarete 'ga upe, oje'ega 'gā imonou 'ga upe 'jau.

¹³ Amumera 'gā oje'ariweramū Jeju 'ga rerowiaara 'gā nee numiamū. A'ere 'gā kyjei etee 'wyriara 'gā nui.

—Esage futat Jeju 'ga rerowiaara numiamū— 'jau 'gā ajaupe.

A'ere 'wyriara 'gā nui 'gā kyjea ete 'gā nomoje'arukari Jeju 'ga rerowiaara 'gā nee.

¹⁴ A'ere amumera 'gā nokyjei futari. A'eramū 'gā etee Jeju 'ga rerowiaa. Kūjā nanē nū. A'eramū futat 'gā ojemomytuna kwaiwete ajemogyau, Jeju 'ga rerowiarāmū.

¹⁵ A'eramū Jeju 'ga remimonofera 'gā nemikatu'ogera resakarera 'gā ojero'wu ma'e 'gā nerua imajatykau. 'Gā nerua inuga pe yse pe pinosiga pype. A'eramū Pedro 'ga kwawamū 'ga 'aga okwapa ojero'wu ma'e 'gā 'arimū. Janeruwarete 'ga 'Agesagea Pedro 'ga rerekou. A'eramū 'gā 'arimū Pedro 'ga 'aga kwawamū Janeruwarete 'ga ojero'wu ma'e 'gā katu'oka.

¹⁶ A'eramū Jerusareg wywriwara 'gā nanē ojero'wu ma'e 'gā nerua nū. Jerusarega pytepyter ipe katu 'gā nerua imajatykau mama'eukwaawa rerekwara 'gā netee. A'eramū Janeruwarete 'ga 'gā katu'ogukaapap Pedro 'ga upe.

Jeju 'ga remimonofera 'gā nereko tyweawet

¹⁷ A'eramū mainana 'wyriararete 'ga amara'neramū Jeju 'ga remimonofera 'gā nee.

—Ojerowiarukapap futat nipo 'ā 'gā 'gā nupe— 'jau 'ga opytuna 'gā nupe.

A'eramū 'ga a'eramū amara'neramū 'gā nee. 'Ga pytuna 'gā, satuseu 'gā nanē amara'neramū 'gā nee nū.

¹⁸ A'eramū 'ga 'gā pyygukaa 'gā munewukaa moromunepawa pype. Oje'wyrarete pyteripewara pype 'gā nerawau imunewukaa.

¹⁹ A'ere ypytunimū Janeruwarete 'ga ywagipewara 'ga amū muri 'okwara rawopytymo'woka 'gā nupe. A'erauwe 'ga 'gā nenū'jāu 'gā nerawau jui.

²⁰—Pe'je pejewau peu Ku'jywa 'ga mogytaaw ipe Jeju 'ga je'ega mome'wau 'gā nupe— 'jau ywagipewara 'ga Jeju 'ga remimonofera 'gā nupe.

Aipo 'gā nupe 'epaw ire ywagipewara 'ga awau ojewya ywag ipe nū. A'erauwe 'gā 'ga mojerowiaa.

²¹ Ai'iwetetewe Jeju 'ga remimonofera 'gā awau Jarejuwarete 'ga mogytaaw ipe Jeju 'ga je'ega mome'wau 'gā nupe. A'ere mainana 'wyriararete 'ga nokwaawi. A'eramū 'gā ojeupe oje'ēma'e 'gā majatykau. A'ere 'gā 'jau jefaruu 'gā nupe:

—Pe'je pejewau 'gā nerua. Saporogyta 'gā nupe 'jau— 'jau 'gā jefaruu 'gā nupe.

²² A'erauwe jefaruu 'gā awau moromunepaw ipe, iawopytymo'woka. A'ere 'gā nitywi. Ojeawopytym agawewi futat. A'etea 'gā nitywi. 'Gā nesage'emawe 'gā awau ojewya imome'wau mainana 'wyriara 'ga upe nū.

²³—Nitywi etee 'gā ki 'ei. Ū'ē 'gā na'e ki 'ei. Peu agawewi futat iaarana 'ga reko. A'etea 'gā nitywi etee. Marupi katu nipo 'gā 'ēi ra'e? Ojeawopytym agawewi futat. A'etea nipo marupi katu ū'ē ra'e— 'jau 'gā imome'wau mainana 'wyriara 'ga upe.

²⁴ Aipo ojeupe 'eramū mainana 'wyriara 'gā okyjau jefaruunana 'gā 'wyria'ri retee. Ajemogmogya etee worekokeu etee futat. 'Gā ikwaawe'ema 'gā nerekou.

²⁵ Aipo 'gā 'eramū kūima'e 'ga amū 'ua imome'wau 'gā nupe:

—Pēnemimunewera 'gā ako oo Jarejuwarete 'ga mogytaawa pype ojepeyriwara 'gā mu'jau ko— 'jau 'ga 'ua imome'wau 'gā nupe.

²⁶ A'erauwe jefaruu 'gā 'wyriara 'ga jefaruu 'gā nerooi peu Janeruwarete 'ga mogytaaw ipe 'gā nupe. A'eramū 'gā 'gā nerua nū. A'ere 'gā nuereko 'gā tesirūgatu. Okyje 'gā tesirūmera 'gā nui.

—Werowiat 'gā 'gā. 'Gā nupānamū 'gā jane apisi ita pyu ne— 'jau 'wyriara 'ga jefaruu 'gā nupe.

A'eramū 'gā 'gā nerekou esage etee.

²⁷ A'eramū 'gā 'gā nerawau oje'ēma'e 'gā nupe nū. A'eramū mainana 'wyriara 'ga 'jau 'gā nupe:

²⁸—Maran ajee ore 'i pē nupe rai'i? "Au'je ki 'ga mome'u re", ore 'i pē nupe rai'i 'ū. 'Ga rera 'ā pemokwasi'o pejemogya amunawa pype— 'jau mainana 'wyriara 'ga Jeju 'ga remimonofera 'gā nupe. —Pemokwasi'o 'ā 'ga rera amunawa pype. Jerusareg ipe taetu 'ā kwaiwete 'ga rera— 'jau mainana 'wyriara 'ga 'gā nupe, oje'ega moywyrafena 'gā nupe. —Ore kwa pejepe 'ga juka are. "Pēē futat ako 'ga pejukaukat ai'i", 'jau 'ā pēē ore— 'jau mainana 'wyriara 'ga oje'ega moywyrafena 'gā nupe.

²⁹ A'eramū Pedro 'ga nanē oje'ega jupe nū:

—Peje'ega nipo ore aruenup ki sa? Naani. Jarejuwarete 'ga je'ega te 'ā ore aruenup. Ma'eramū 'ā ore Jeju 'ga mome'ui arakou 'gā nupe— 'jau 'gā mainana 'wyriara 'ga upe. —Pēē futat ako 'ga pemonoukat ipokutugukaa 'ypeywar are, 'ga jukaukaa 'gā nupe ai'i. A'ere ako 'ga Ruwarete 'ga 'ga moferawi etee ai'i nū— 'jau Pedro 'ga mainana 'gā nupe.

³⁰—Ymā we te ako jane Jarejuwarete 'ga rerowiari ikue. 'Ga futat ako Jeju 'ga moferapa ai'i.

³¹ Jane katu'okawamū 'ga 'ā akou 'awamū. Ita kwar awi omofera ire 'ga 'ā akou ae katu'okaramū— 'jau 'ga mainana 'gā nupe. —Israeu ujeapyreramū jane'wyriaramū nanē 'ga 'ā akou nū. Janeruwarete 'ga te 'ā 'ga omogo oje'jawe. 'Ga te 'ā 'ga wapo jane katu'okawamū— 'jau Pedro 'ga mainana 'gā nupe.

—Judeua 'ā pēē, pejetywer awi pē poira Janeruwarete 'ga afutat. Ma'eramū 'ā 'ga 'ga mafu'ami ita kwar awi jane katu'okawamū. Otywer awi aepoiriweramū 'ga ipe'ai jane wi.

³² Ore 'ā Jeju 'ga manūawera aruesak. 'Ga feraw ire nanē ore 'ga resaka ai'i nū— 'jau Pedro 'ga 'gā nupe imome'wau u'ama. —A'eramū 'ā ore a'eramū 'ga mome'wau arakou pē nupe. Noropoiru'aweri ore 'ga mome'u awi. Janeruwarete 'ga 'Agesagea nanē Jeju 'ga kwaapa nū. Oje'ega renupara 'gā nupe Janeruwarete 'ga U'agesagea mua. Ma'eramū 'ā ore 'ga mome'ui arakou— 'jau Pedro 'ga 'gā nupe.

³³ Aipo Pedro 'ga 'eramū 'gā amara'neramū 'gā nee.

—Aruapisi ore pēē. Nanamū aipo pe'je ore— 'jau 'gā 'gā nupe.

³⁴ Aipo 'eramū 'ga amū afu'ama oje'ega opytuna 'gā nupe. Fariseu 'ga, Moisesi 'ga remikwasiar are moromu'jara 'ga, kūima'eeteetea 'ga. Gamarieua 'ga rera. 'Ga oje'ega opytuna 'gā nupe:

—Peroo 'gā ukupepe ore wi ra'ne. Toroporogyta ra'ne 'jau— 'jau 'ga 'gā nupe.

A'erauwe 'gā 'gā nerawau enū'jāu 'gā nui.

³⁵ 'Gā neroo enū'ē re 'ga oje'ega opytuna 'gā nupe:

—Peje'gu ki 'gā nui. Peapisia'ne kasi 'gā ne.

³⁶ 'Awamueu ako kūima'e 'ga amū 'ua 'gā nupe ai'i. Teutasi 'jara 'ga ako. "Awamū je reko'i 'wyrriarāmū pē nupe", 'jau ako 'ga 'gā nupe ai'i. A'erauwe ako 'gā ajatykau 'ga ree kwaiwete. 400 'gā ako ajatykau 'ga ree rai'i. 'Ga remiayuwamū 'ga ree 'gā jatykaramū ako jefaruu 'gā 'ga jukau ai'i. A'erauwe futat 'ga juka re 'ga remiayuwera 'gā okwasi'waupap ajau. Too.

³⁷ —Aipo 'ga juka re 'ga amū 'ua nū. Judas 'ga 'ua nū. Garireja ywy pewarera 'ga. 'Wyrriara ae mojoyrūkaawa rupi 'ga 'ua 'gā nupe. A'erauwe 'gā jatykai 'ga ree nū. A'ere nānēwējēmī futat 'gā 'ga jukai. A'erauwe ako 'ga remiayuwera 'gā okwasi'wau ajau ai'i nū.

³⁸ —Awamū ako 'ga amū 'ua janee ai'i nū, Jejui 'ga ai'i nū. A'ere ako 'gā 'ga jukai etee ai'i nū. A'eramū jane 'ga remiayuwera 'gā kwasi'o rapesaka ra'ne. Ikwasi'oe'emamū jane "A'jea futat 'ga Janeruwarete 'ga ma'ea ra'e", sa'e 'jau— 'jau 'ga 'gā nupe.

³⁹ —'Ga remiayuwera kwasi'oe'emamū nipo Jarejuwarete 'ga we futat peowajat. A'eramū pēē 'gā apisawa'ne'em— 'jau Gamarietu 'ga 'gā nupe.

A'erauwe 'gā erowiari.

—A'jea futat nipo— 'jau 'gā ajaupe. —Pe'je ajee siapesak ra'ne— 'jau mainana 'wyrriara 'ga 'gā nupe.

⁴⁰ A'ere 'gā Jejui 'ga remimonofera 'gā moge'i nū 'gā nupānupānupāu.

—Au'je ki Jejui 'ga mome'u re pejejeko re 'gā nupe— 'jau 'gā 'gā nupe.

A'ere 'ga opoia 'gā nui, 'gā nupā re.

⁴¹ Onupā re 'gā ū'jāu mainana rog awi. Aku'iramū etee awau.

—Janeruwarete 'ga te 'ā iku'i 'ūina jane ree— 'jau etee 'gā ajaupe. —'Ga ra'yra 'ga te jane 'ā sirowiat. A'e are te 'ā 'gā jane nupāi. Namama'e tywera apo are rūi te 'gā 'ā jane nupāi. Jejui 'ga rerowiarāmū te 'gā jane nupāi— 'jau 'gā ajaupe aku'iramū etee.

⁴² A'eramū taetu 'gā ojero'waro'wau etee futat ajemogyau Jejui 'ga mome'wau 'gā nupe. Jarejuwarete 'ga mogytaaw ipe osou imome'wau 'gā nupe.

—Jejui 'ga jane katu'okara. Janeruwarete 'ga ako 'ga amut jane katu'okaramū ikue— 'jau 'gā 'gā nupe imome'wau.

'Gā nog ipe nanē awau imome'wau 'gā nupe nū.

—Jejui 'ga jane katu'okara. 'Ga te ako Janeruwarete 'ga amut janee ikue, jane katu'okaramū ikue. Ma'eramū 'ga 'ā ae katu'ogi akou— 'jau 'gā ajemogyau imome'wau 'gā nupe.

6

Majawera 'gā nupe mama'e monoat

¹ Anure Jejui 'ga rerowiaara 'gā awau ajemogyau ojeme'yita, kwaiwete. Judeu 'gā juejue. A'ere 'gā amū grego je'ega apoi. Amumera 'gā epyreu je'ega apou. A'eramū grego je'ega apoara 'gā amara'neramū epyreu je'ega apoara 'gā nee.

—Nepemojo'og esage'i 'ā majawera 'gā nupe kumia. Pejepyntuna imen manū ma'e 'gā nupe ete 'ā kumia kwaiwete pemono. A'ere 'ā orepyntuna majawera 'gā nupe kumi tuwyre'ria etee pemono— 'jau 'gā ajaupe, amara'neramū ajuee.

² A'eramū Jejui 'ga remimonofera 'gā 'gā majatykau.

—Ore noromojopypea'uweri Jejui 'ga mome'ua. Nia'wryi 'ga mome'u awi ore poirā.

³ A'eramū pēē futat 'gā amū nesaka. Sete 'gā pemogy kumia majawera 'gā nupe imonoaramū. Ore noropoirā'uweri Jejui 'ga mome'u awi. 'Ga mome'wara te 'ā ore. A'eramū pēē futat 'gā amū mū'jāu imua pejewewi— 'jau Jejui 'ga remimonofera 'ga amū u'ama 'gā nupe. —Esage ma'e 'gā etee. I'akwaap ma'e 'gā etee futat ki pemono imū'jāu 'gā nupe. Jarejuwarete 'ga 'Agesage rerekwara 'gā etee ki pemū'ē imonou kumia 'gā nupe imonoaramū— 'jau 'ga 'gā nupe.

⁴ —A'eramū ore oropoire'ema Jarejuwarete 'ga je'ega mome'u awi. Jarejuwarete 'ga upe oroporogyta awi nanē oropoire'ema nū— 'jau 'ga 'gā nupe.

⁵ —A'jea futat. A'jea futat te 'ā 'ga je'ega resageramū— 'jau 'gā ajaupe. —Ko ajee ore 'gā amū muri etee imogyau, majawera 'gā nee ojejuka ma'eramū. Pēē 'ā 'ga je'ega mome'wara te. A'eramū ore 'gā amū mua te imogyau majawera upe kumi monoawamū— 'jau 'gā 'gā nupe.

A'erauwe 'ga 'gā amū muri 'gā mogyau majawera upe kumi monoawamū. 'Gā nemipyyrū 'gā nera Estevão, Filipe, Prokaro, Nikanu, Timāu, Pamenasi, Nikorau. Poromū 'gā nemipyyrūmera 'gā nera. 'Gā 'gā imonou imogyau majawer are ojejuka ma'eramū.

Jarejuwarete 'ga Estevão 'ga erowiar wyyapiau. Janeruwarete 'ga 'Agesagea 'ga rerekou nū.

Nikorau 'ga najudeu arūi. A'ere 'ga Janeruwarete 'ga rerowiari judeu 'jawe. Ātioki pewarera 'ga Nikorauramū.

⁶ 'Gā mū'ē re 'gā 'gā nerawau Jejui 'ga remimonofera 'gā nupe.

—Koromū ore 'gā muri majawera 'gā nee ojejuka ma'eramū ai'i— 'jau 'gā 'gā nupe.
 —A'jea. Nanuara futat esage. Au'jete 'gā pemut rai'i— 'jau 'gā 'gā nupe.
 A'erauwe 'gā je'egi Jarejuwarete 'ga upe 'gā nee:
 —Koromū 'gā 'gā muri majawera 'gā nee ojejuka ma'eramū rai'i. Ejejuka ki 'gā nee. Esag iki 'gā kumi monoa majawera upe. Emu'akwaap 'gā— 'jau 'gā oje'ega Ku'jywa 'ga upe.
 'Ga upe 'epaw ire 'gā opo monou 'gā apyte'rarimū.
 —Awamū majawera 'gā nee ojejuka ma'ea pēē— 'jau 'gā 'gā nupe.
 A'eramū futat 'gā kumi monoaramū ajemogyau majawera 'gā nupe.
⁷A'eramū futat 'gā Jejui 'ga mome'u mokwasi'wau kwe pewara 'gā nupe. Kwaiwete amunawa pypiarūpiaruga. A'eramū Jerusareg ipewara 'gā nanē Jejui 'ga rerowiaa, kwaiwete. Mainana 'gā amū nanē 'ga rerowiaa 'gā pyri nū.

Estevão 'ga ppykawet

⁸Estevão 'ga ako esage ma'ea. A'eramū Janeruwarete 'ga aku'iramū 'ga ree. A'eramū Janeruwarete 'ga opājē mua 'ga upe, 'ga remiapoe'ema apoukaa 'ga upe. A'eramū esakara 'gā oporesagamū ee ajemogyau.

⁹A'ere 'gā amū nuerowiari Estevão 'ga. Aipo 'gā judeua futat numiamū. Sirene pewaret, Aresāri pewaret. Mīmer awi 'gā nuri rakue. 'Gā jatykaawa rera “noporowykyu'jawi 'gā amuarera 'gā nupe” 'ea. Aipo 'gā ojemajatykau Sīrisia wyy pewarera 'gā nee, Asia wyy pewarera 'gā netee. A'eramū 'gā Estevão 'ga mueu.

¹⁰A'ere Janeruwarete 'ga 'Agesagea te Estevão 'ga mu'akwaawi 'ga mogou. A'eramū 'gā a'eramū wejue oje'egawarūnamū futat 'gā nupe.

¹¹A'eramū 'gā 'gā amū mepyyau Estevão 'ga je'ēwu'jagawamū.

—Koa kūima'e 'ga nia'wryi. Jarejuwarete 'ga 'ga akurap akou. Moisesi 'ga nanē 'ga ikurapa nū. Ore 'ga 'eawera aruenup— 'jau 'gā o'meramū 'gā nupe.

¹²Nan etee 'gā 'gā mamara'neu Estevão 'ga ree. 'Wryia'ri, Moisesi 'ga remikwasiarer are moromu'jat. Mīmera 'gā 'gā amamara'neukat Estevão 'ga ree. A'eramū 'gā Estevão 'ga ppyka erawau oje'ēma'e 'gā nupe. A'erauwe i'me ma'e 'gā nuri osou oje'ega 'wryiara upe.

¹³⁻¹⁴—A'jea futat 'ga 'ga kurawi akou. “Nia'wryi ako Janeruwarete 'ga mogytaawa ra'e”, e'i 'ga oree akou ai'i. “Moisesi 'ga taetu ako o'meramū akou ikue, oporogyau 'me akou ikue”, e'i 'ga oree akou. “Jejui 'ga, Nasare pe waranup ma'efera 'ga nipo 'ā Jarejuwarete 'ga mogytaawa omateepap”, e'i Estevão 'ga oree ai'i— 'jau futatee i'me ma'e 'gā 'wryiara upe. —“Moisesi 'ga je'ega nanē simojopy'rūpap 'jau nū”, 'jau 'ga oree— 'jau futatee 'gā 'gā nupe o'meramū, Estevão 'ga je'ēwu'jaga.

¹⁵Aipo 'eramū ajatyka ma'e 'gā amā'jāu Estevão 'ga reakwar are.

—Kuu. Maran te 'ga reakwara nū'ū. Janeruwarete 'ga pyriwara 'ga reakwara 'jawe futat 'ga jā'nū'ū— 'jau 'gā ajaupe.

'Ga reakwara renyfuga resakawe ajatyka ma'e 'gā oporesagamū etee 'ga ree 'upa.

7

Estevão 'ga 'eawet

¹A'eramū mainana 'wryiararete 'ga 'jau Estevão 'ga upe.

—A'jea futat nipo ajee ki sa?— 'jau 'ga 'ga upe.

²A'erauwe Estevão 'ga oje'ega 'gā nupe:

—Peapyaka jeje'eg are— 'jau 'ga mainana 'gā nupe. —Janeruwarete 'ga te 'ā esage janee nū'ū. Ymā te 'ga jesaukari janepyy upe rakue, Abraão 'ga upe rakue— 'jau 'ga 'gā nupe. —Mesopotami wyy pe Abraão 'ga rekoramū Janeruwarete 'ga oje'ega Abraão 'ga upe rakue:

³“Kwe pe ekwap epytuna 'gā nui ajepeja wyy pe. Jeremiesaukaram ipe ekwap”, 'jau 'ga 'ga upe rakue, 'ga muēma 'ga pytuna 'gā nui rakue— 'jau Estevão 'ga imome'wau 'gā nupe.

⁴—Kautei 'jawa wyy awi Abraão 'ga awau akou kwe pe. Awau owaēma Rarā 'jawa amunaw ipe. Peu 'ga opytawaipa. Peu futat 'ga ruwa amanūmū 'ga wi rakue. A'ere 'ga ruwa manū re Janeruwarete 'ga 'ga rerawau 'ga pytuna 'gā netee futat 'ga rerua erowaēma Kanaā 'jaw ipe rakue. 'Agamū 'ā jarejemogyau 'ga reruawer ipe etee futat— 'jau Estevão 'ga imome'wau 'gā nupe.

⁵—NaAbraão 'ga upe etee rūi 'ga wyya muri rakue. 'Ga juapyrera 'gā nupe nanē 'ga wyya muretei rakue. Aipo 'jau Janeruwarete 'ga Abraão 'ga upe: “Ene manū re enejuapyrera 'gā ajemogyau ipype”, 'jau Janeruwarete 'ga Abraão 'ga upe. Nata'yri we agawewi Abraão 'ga aiporamū rakue. A'etea Janeruwarete 'ga e'i poromū 'ga upe.

⁶“A'ere nipo enejuapyra 'gā neko'i tapy'yi amutee wyy pe oporowykyau jupe”, 'jau Janeruwarete 'ga Abraão 'ga upe rakue. “A'eramū nipo wyy jara 'gā 'gā mogyau wemifajamū, 'gā moporowykyau ojeupe. A'ere nipo 'gā nomepyi 'gā. A'eramū nipo 'gā 'gā nerekou

tyweaete. Kwaturu sētu kwara mū rupi nipo enejuapyrera 'gā ajemogyau oporowykyau jupe", 'jau 'ga Abraão 'ga upe— 'jau Estevão 'ga u'ama 'gā nupe.

⁷ —“Anure te nipo je enejuapyrera 'gā nereko tywearera 'gā nereko tyweretei", 'jau Janeruwarete 'ga Abraão 'ga upe. “Anure te nipo enejuapyrera 'gā nuri ojewya 'au je muorypa", 'jau 'ga Abraão 'ga upe rakue— 'jau Estevão 'ga u'ama 'gā nupe, oypy 'gā nekwawera mome'wau u'ama 'gā nupe.

⁸ —Aipo 'e re Janeruwarete 'ga 'jau Abraão 'ga upe rakue nū: “Eja'yramū ki eja'yra 'ga emojewak", 'jau 'ga 'ga upe. A'eramū Abraão 'ga 'ga je'ega rerekou katu wapyra pe. A'eramū 'ga anure wa'yra 'ga 'aramū wa'yra 'ga mojewaka. Wea'aramū Janeruwarete 'ga je'eg are wa'yra 'ga mojewag ire. “Eja'yra jewaga resakawe ki ejea'at jeporogytafer are ekou", 'jau Janeruwarete 'ga Abraão 'ga upe rakue. A'eramū 'ga akou wea'aramū 'ga porogytafer are rakue. Majepei tee Abraão 'ga morowykye'ema magwapa wa'yra 'ga 'ar ire. A'ere 'ga ajepeja rupi 'ga mojewagi rakue. Isaki 'ga Abraão 'ga ra'yra 'ga. A'ere anure Isaki 'ga wa'yramū nū. 'Ga ra'yra 'ga rera Jako. A'eramū 'ga nānēwējēmī futat wa'yra 'ga mojewaka nū. Anure Jako 'ga wa'yramū nū. Tusi 'ga ra'yra. A'eramū 'ga wa'yra mojewaka oje'jawe etee futat. Imojewakapap rakue. Jako 'ga ra'yra 'gā janepyra rakue— 'jau Estevão 'ga u'ama imome'wau 'gā nupe.

⁹ —Janepy 'gā oporerekoaywereteramū wewirera 'ga ree, Jose 'ga ree rakue. A'eramū 'gā wewirera 'ga me'ega kūima'e 'gā amū nupe, 'ga monou ka'aranū are. A'eramū aipo kūima'e 'gā Jose 'ga rerawau Egitu wyy pe rakue. Mukuu te Egitu wyya 'gā wyy awi. Peu 'gā Jose 'ga me'ega nū. A'eramū Jose 'ga muarera 'ga 'ga moporowykyaukaa 'ga mepyawe'em. A'ere Janeruwarete 'ga Jose 'ga rerekoi weape futat.

¹⁰ —A'eramū Janeruwarete 'ga 'ga muekōēina etee mama'e apoukaa 'ga upe. A'eramū Jose 'ga 'arasige'emamū akou. 'Ga mu'akwaapa etee Janeruwarete 'ga. A'eramū Farao 'ga 'ga futaa. Farao 'ga Egitu wyy pewara 'gā nupe 'wyriraretea. A'eramū 'ga 'jau Jose 'ga upe: “Ene je amogo tejemiayuwa rerekwaramū, jeroga raaranamū, jekaraemā raaranamū nanē nū”, 'jau 'ga Jose 'ga upe, 'ga mogou opoirūnamū rakue— 'jau Estevão 'ga u'ama imome'wau 'gā nupe.

¹¹ —A'ere anure Egitu wyy pewara 'gā ty'ara rerajemogyi. Nitywi mama'ea 'gā nupe. A'eramū ty'ara 'gā mu'arasiga 'gā mogyau. A'eramū Jose 'ga juowuurana monou 'gā nupe, 'gā nemū'uramamū. A'ere na'Egitu wyy pewara etee rūi ty'ara rerekoi rakue. Kanaā pewara 'gā nanē nitywi mama'e pyu rakue, janepy 'gā futat rakue.

¹² A'ere 'ga amū 'jau Jako 'ga upe rakue: “Egitu wyy pe mama'e tywamū. 'Gā 'wyrira 'ga juowuuran anugatu ime'egipyrāmamū”, 'jau 'ga amū imome'wau Jako 'ga upe rakue. A'erauwe Jako 'ga wa'yra 'gā monou Jose 'ga pyri juowuurana murukaa. A'ere 'gā nokwaawi Jose 'ga. A'eramū 'gā juowuurana mua 'ga wī. A'eramū 'gā erawau erojewya oje'wyr ipe nū— 'jau Estevão 'ga u'ama imome'wau 'gā nupe.

¹³ —Wemi'urama ojewi teepawauwe 'gā ojewya awau imua rakue nū. Aiporamū 'gā oramū futat 'gā newirera 'ga ojemome'wau 'gā nupe. “Je ako pēnewirera ikue”, 'jau 'ga 'gā nupe. A'eramū Jose 'ga reki'yra 'gā nesakara 'gā awau imome'wau 'wyrirarete 'ga upe. “Jose 'ga reki'yra 'gā 'au ako 'ga pyri”, 'jau 'gā 'wyrira 'ga upe rakue— 'jau Estevão 'ga imome'wau 'gā nupe.

¹⁴⁻¹⁶ —A'erauwe 'wyrira 'ga oje'ega Jose 'ga upe rakue: “Ere ajee ejuwa rerurukaa 'au ejepyri”, 'jau 'ga Jose 'ga upe rakue. A'erauwe Jose 'ga oje'ega weki'yra 'gā nupe: “Pe'je ajee jarejuwa 'ga rerua 'au pejepytuna 'gā neewe”, 'jau 'ga 'gā nupe rakue. A'erauwe 'ga reki'yra 'gā oi. 'Ga 'eawera mome'wau 'uwa 'ga upe. “Ere ejuwa 'au je pyri”, pe'je ki jarejuwa 'ga upe, e'i 'ga oree. “Pejepytuna 'gā juejue perut”, e'i 'ga oree, 'jau 'gā 'uwa 'ga upe rakue— 'jau Estevão 'ga imome'wau 'gā nupe u'ama.

—A'erauwe 'gā 'uwa 'ga rerawau Egitu wyy pe, wewirera 'ga rekwaw ipe rakue. Opytuna 'gā netee futat 'gā awapap Egitu wyy pe rakue. Kwaiwete te 'gā nakue. Setētai sīku te 'gā pytuna. A'eramū 'gā peu futat awau ajemogyau rakue— 'jau Estevão 'ga u'ama imome'wau 'gā nupe.

—Peu futat Jako 'ga amanūmū rakue. 'Ga manū re 'ga ra'yra 'gā 'ga rerua 'ga tyma Abraão 'ga remimurera wyy pe. Aipo wyya 'ga amut teumera rupawamū futat rakue, Sikwē 'jawamū rakue. Emora 'ga ra'yr awi imua rakue. Ka'aranū pyu futat 'ga imua rakue. Janepy 'gā manū re nanē 'gā peu futat 'gā nerooi ityma aipoa wyy pe rakue— 'jau Estevão 'ga u'ama imome'wau 'gā nupe.

¹⁷ —Peu Egitu wyy pe futat janepy 'gā ojeme'yita rakue. Kwaiwete 'gā ojeme'yita ajemogyau rakue. 'Au ojewyre'emauwe 'gā jeme'yita. 'Gā jeme'yi re Janeruwarete 'ga 'gā nerua erojewya 'au. U'eawer imū etee futat 'ga 'gā nerua erojewya 'gā wyy pe rakue nū.

18 —Gã neroo ja'wyja'wyrāmū futat 'wyrriara tywera osou 'gã nupe. A'ere aipoa 'wyrriara Jose 'ga nokwaawi. Jose 'ga manū re tee aipo 'wyrriara reni 'gã nupe. A'eramū 'ga Jose 'ga kwaape'ema.

19 A'eramū aipoa 'wyrriara janeypy 'gã nerekou tyweaete, janeypy 'gã mayrūmū. A'eramū aipoa 'wyrriararū'ema 'ga 'jau 'gã nupe: “Pejeja'yra pemomopot. I'ar ppyrauwe peroo ejaa kofera pype inuga. A'eramū amanūmū”, 'jau 'wyrriararū'ema 'ga 'gã nupe. A'ere 'gã jejukai wa'yr are. Imimi etee jui, imonou, imuaranupa. A'eramū 'gã ojemomytuna kwaiwete. A'eramū 'wyrriara amara'neramū 'gã nee— 'jau Estevão 'ga u'ama imome'wau 'gã nupe.

20 —Aipo 'wyrriara renamū futat Moisesi 'ga u'aa. A'eramū 'ga y'ēē 'ga mima 'ga rerekou. Muapyra jay maka'jam ire 'ga y'ēē yrupenana apou 'ga upe. A'ere ēē 'wywyga pyu iperuga wa'yra 'ga upe. A'e pype 'ga y'ēē 'ga rerawau 'ga nuga 'ga rejaa juowukuu pyteripe 'y'pe.

21 A'eramū 'wyrriara 'ga ra'jyra ēē 'ua 'ga joo'o renupa, Farao 'ga ra'jyra ēē 'ua 'ga renupa. A'eramū ēē 'ga rerawau ojeupe imuaranupa. 'Ga aranuw ire ēē 'jau 'ga upe: “Je te 'ā amuaranuwkat ene. A'eramū ene jera'yra futat ekou”, 'jau ēē Moisesi 'ga upe.

22 A'eramū Moisesi 'ga ojemu'jau Egitu ywy pe 'gã nemikwaaw are. A'jeteewi te 'ga porogytai. Oporowyky esage te 'ga— 'jau Estevão 'ga u'ama 'ga mome'wau 'gã nupe.

23 —Kwarēta kwara mu'ar ire Moisesi 'ga 'jau ojeupe: “Maran te 'ā nooi tepytuna resaka tekou 'i?” 'jau 'ga ojeupe. A'eramū Moisesi 'ga awau.

24 ‘Ga waēmamū Egitu ywy pewara 'ga amū 'ga pytuna 'ga rerekou tywea 'ga rowase. A'eramū Moisesi 'ga osou 'gã pyterimū 'gã pe'au ajau. A'ere 'ga Egitu ywy pewara 'ga jukau opytuna 'ga repyaa.

25 “Jepytuna 'gã nipo je kwaap. 'Awa ywy awi 'gã nenū'jāwamū je ene monoi Jare-juwarete 'ga 'ea nipo 'gã ikwaapa”, 'jau Moisesi 'ga ojeupe numiamū. A'ere 'gã nokwaawi. “Janeruwarete 'ga 'ga mut 'gã nenū'jāu Egitu ywy awi” 'ea kwaape'ema ajemogyau.

26 —Ai'iwē Moisesi 'ga oi opytuna 'gã pyri nū. A'eramū 'gã amū ajuerkou ajuowajaa nū. A'eramū Moisesi 'ga 'jau 'gã nupe: “Ma'eramū pēē pejepokoka ekoete pejejee pejejuerekou ki 'ei? Israeu juapyrera jue agawewi pēē”, 'jau Moisesi 'ga 'gã nupe.

27 A'ere ojonupāara 'gã Moisesi 'ga muajāni etee. A'eramū 'ga 'jau: “Awjya 'wyrriaramū ene mogou oreē ki 'ei? Awjya ene mua mama'e tywera apoukare'ema oreē ki 'ei? 'Tajuka 'ga amū kaaruwauwarera 'jawe', ere te? Kaaruwamū ako Egitu ywy pewara 'ga erejuka ai'i.

28 “Ga 'jawe tajuka amū nū', ere te?” 'jau 'ga 'ga upe rakue— 'jau Estevão 'ga imome'wau 'gã nupe.

29 —Aipo ojeupe 'erauwe Moisesi 'ga ojepe'au 'gã nui oka'jama awau ajepēja ywy pe Mitiā 'jaw ipe akou. Peu futat 'ga wemirekoramū. Wemireko re 'ga wa'yramū. Mukūi 'ga ra'yra 'gã— 'jau Estevão 'ga u'ama imome'wau 'gã nupe.

30 —Kwarēta kwara magwaw ire Moisesi 'ga awau akou jū myterimū watau. Wwytyra pyri 'ga awau watau, Sinai 'jawa pyri 'ga awau. Peu jū pype tata wenyramū erujewi 'ga upe. Ka'a'ia wenyramū 'ga upe. A'ea tata eny wyteripe ywagipewara 'ga ojesaukaa 'ga upe.

31 “Kuu. Ma'ja te nū'ū?” 'jau 'ga ojeupe. A'eramū 'ga epejāna esaka. A'e pype Janeruwarete 'ga oje'ega 'ga upe:

32 “Je te ako eneruwaretea jepi”, 'jau 'ga Moisesi 'ga upe. “Enepytuna 'gã ako je rerowiat iypy we ikue. A'eramū je 'ā eneruwaretea tekou”, 'jau 'ga 'ga upe. “Abraão, Isaki, Jako. Mīmera 'gã ako je rerowiat ikue”, 'jau 'ga Moisesi 'ga upe oje'ega— 'jau Estevão 'ga imome'wau 'gã nupe.

—A'ere Moisesi 'ga kyjei etee 'ga je'eg awi. Oyyita u'ama. Awawe'em 'ga 'ga pyri katu katu. 'Ga kyjea 'ga mamā'jāukare'ema ee.

33 A'eramū Janeruwarete 'ga oje'ega 'ga upe: “Ere epyapaawa mososoka. Je te 'ā pājēreteā. A'eramū pēē je pyri pejejua pejepyapaawa mososoka. A'eramū je pē nerowiaa. Na pa je rerowiari ra'e, ta'e pē nupe 'jau”, 'jau 'ga Moisesi 'ga upe— 'jau Estevão 'ga imome'wau 'gã nupe.

34 —“Aenup je tejemiayuwa wayrū rerofaema te'jina. Egitu ywy pewara 'gã jeremiayuwa 'gã wereko tywerete. A'eramū je 'au tejuā tejjpa teporogytaū enee. Tomono ene 'gã nenū'jāukaa peuwara 'gã nui 'jau”, 'jau 'ga Moisesi 'ga upe— 'jau Estevão 'ga imome'wau u'ama 'gã nupe.

35 —Ymā te 'ga amū Moisesi 'ga upe 'ga 'i rakue: “Awjya ene mut 'wyrriaramū oreē? Awjya ene mua mama'e tywera apoukare'ema oreē ki 'ei?” 'jau 'ga amū 'ga upe rakue, 'ga reroyrūmū rakue. A'ere 'ga futat Janeruwarete 'ga imogoi 'ga pytuna 'gã nenū'ēawamū Egitu ywy awi. Janeruwarete 'ga futat 'ga omogo 'wyrriaramū pē nupe rakue— 'jau Estevão 'ga imome'wau 'gã nupe u'ama.

—Janeruwarete 'ga 'jau ywagipewara 'ga upe: “Ekwap eje'ega Moisesi 'ga upe. 'Jeremiayuwa 'gã 'ga too erua enū'jāu jee Egitu ywy awi 'jau', e'i 'ga enee, ere ewau 'ga upe”, 'jau

'ga 'ga upe. A'eramū ywagipewara 'ga 'ua tata eny 'jawewara ywyteripe ojesaukaa oje'ega Moisesi 'ga upe rakue— 'jau Estevão 'ga imome'wau 'gã nupe.

³⁶ —Moisesi 'ga futat janeyppy 'gã nenũ'jãu Egitu ywy awi rakue. Peu futat Janeruwarete 'ga aeremiapoe'ema apoukaru'jau'japa Moisesi 'ga upe, opãjê resaukaawamũ. A'eramū Egitu ywy pewara 'gã oporesagamũ ajemogyau ee. 'Y pytag ipe nanê 'ga iapou 'gã nupe nũ. Amunawe'em ipe nanê 'ga aeremiapoe'ema apou akou 'gã nupe. Awau 'gã akou watau. Kwarêta kwara rupi 'gã awau akou watau.

—Peu 'ga 'gã ataaw ipe mama'e apou 'gã nupe, aeremiapoe'ema apou 'gã nerekou pe rupi.

³⁷ Ymã te Moisesi 'ga poromũ oje'ega opytuna 'gã nupe rakue. “Anure nipo Janeruwarete 'ga 'ga amũ muri jerekwawer ipe pẽ nupe oje'ega mome'waramũ pẽ nupe. Sã'ã 'ga je mura pẽ nupe. Nan tee futat nipo 'ga 'ga amũ muri pẽ nupe. Pẽpytuna 'ga futat nipo 'ga poromũ amut pẽ nupe”, 'jau 'ga opytuna 'gã, Israeu juapyrera 'gã nupe rakue— 'jau Estevão 'ga imome'wau 'gã nupe.

³⁸ —Moisesi 'ga futat opytuna 'gã nerawaara rakue. Awau 'gã owaẽma ywytyra upe, Sinai 'jawa upe. Ywytyra upe owaẽm ire 'gã opyttau. A'eramū futat 'gã ajatykau. A'ere Moisesi 'ga ojeupia ywytyra rupi 'gã nui. Awau oporogytau Jarejuwarete 'ga upe ywytyra apyte'rarimũ. A'eramū Janeruwarete 'ga ywagipewara 'ga mua 'ga moporogytaukaa Moisesi 'ga upe: “Tajuowajat kasi 'gã nee ne. Amunarũme'em nanê nũ. Mama'e tywera nanê 'gã iapowe'em. Akowe'em nanê 'gã ajuemireko are”, 'jau ywagipewara 'ga Moisesi 'ga upe rakue. Nateepawa'uweri futari Janeruwarete 'ga je'ega. Namutamutat 'ga je'ega reko— 'jau Estevão 'ga imome'wau u'ama 'gã nupe.

—Ojeupe ywagipewara 'ga imome'upaw ire Moisesi 'ga ojewyraipa 'ua ywytyra apyte'rar awi 'ga je'ega mome'wau opytuna 'gã nupe.

³⁹ A'ere janeyppy 'gã niporenuwiwari Moisesi 'ga je'eg are rakue. 'Ga reroyrũmũ etee 'gã nakue. “Pe'je ajee soo jarejewa jarejemogyau Egitu ywy pe nũ”, 'jau 'gã ajaupe rakue.

⁴⁰ —Ojewyru'jaw ire 'ga oporomukuramũ 'gã nupe rakue. A'eramũ 'gã oporonupa Arão 'ga upe ee: “Manamũ ajee jane reruareta 'ga ki 'ei?” 'jau 'gã Moisesi 'ga reki'yra 'ga upe rakue. “Tee. Maran gatu nipo 'ã 'ga reko rai'i”, 'jau 'ga 'gã nupe. “Amanũ nipo 'ã 'ga rai'i. Ere ajee itaa siapo jaremairamũ 'ũ, jarejee jarejerekwaramũ 'ũ, pea jarejeupe esaukaawamũ 'awamũ 'ũ”, 'jau 'gã 'ga reki'yra 'ga upe, Arão 'ga upe rakue— 'jau Estevão 'ga u'ama imome'wau 'gã nupe.

⁴¹ —A'erauwe 'gã opo'yra mua 'ga upe. Ita mo'yra rerekwara 'gã imua 'ga upe. A'eramũ 'ga kwataua'yra a'agawa apou mairamũ 'gã nupe. A'ere 'gã weymawa apisi iapyau jupe. Saa'e 'gã Janeruwarete 'ga upe weymawa rapya rakue. Nan futat 'gã kwataua'yra a'agawa upe weymawa rapyau ekoete. A'eramũ 'gã maraka apou jupe.

⁴² A'eramũ Janeruwarete 'ga opoirai'pa 'gã nui. Sã'ã ae Janeruwarete 'ga rerowiara. Nan futat 'gã kwataua'yt maira'me rerowiari jaytata retee. Jay, kwat. Mĩmera 'gã erowiaa imuorypa— 'jau Estevão 'ga imome'wau 'gã nupe.

—A'eramũ Janeruwarete 'ga opoirai'pa 'gã nui. A'ere anure 'ga ojewya 'gã nupe nũ. Ymã te 'ã Janeruwarete 'ga ka'arana kwasiarukari oje'ega mome'wara 'ga nupe inuga janee rakue. “Israeu juapyreramũ pẽẽ jeremiayuwa futat numiamũ. A'ere naje upe rui pejejeymawa peapy rakue.

Kwarêta kwara rupi amunawe'em ipe pejekou maira'me a'agawa upe etee pejejeymawa peapy rakue, pejejemiapofera upe etee futat rakue, 'jau 'ga wemiayuwa 'gã nupe rakue.

Pẽmaira mũ rera Moroki. Ajepeja rera Rêfã. Rêfã jaytata.

⁴³ Moroki ro'gi erawau Rêfã a'agawa retee futat. Naje muorywi pejepe rakue.

A'eramũ je futat pẽ monou kwe pe, Papironi atykupe katy pẽ monou.

A'eramũ je pẽ nerekou tyweaete, 'jau 'ga janeyppy upe rakue”, 'jau 'ga 'gã nupe, ka'arana kwasiari inuga janee rakue— 'jau Estevão 'ga u'ama imome'wau 'gã nupe.

⁴⁴ —Amunawe'em ipe watau awau taityoga rerawau wogamũ najuejue etee. Jarejuwarete 'ga upe nanê amũ rerawau nũ 'ga mogytaawamũ. 'Ga je'eg imũ etee futat Moisesi 'ga taityoga apoukaa 'gã nupe. A'e pype 'gã oporogytau Jarejuwarete 'ga upe. Jarejuwarete 'ga mogytaawa taityoga resaka 'gã 'jau ajaupe: “A'jea futat. Janeruwarete 'ga reko jane pype. 'Aga taityoga pype 'ga resei oporogytau janee”, 'jau 'gã ajaupe.

⁴⁵ Nuetygi futari 'gã Jarejuwarete 'ga mogytaawa taityoga. Moisesi 'ga manũ re Josue 'ga akou Moisesi 'ga rekwawer ipe. A'etea 'gã Jarejuwarete 'ga mogytaawa taityoga nuetygi futari. Erawau Kanaã ywy pe erowaẽma. Peu owaẽm ire 'gã judeue'ema 'gã nesaka. A'ere Janeruwarete 'ga 'gã ywy pojekaukari janeyppy 'gã nupe. A'eramũ 'gã judeue'ema 'gã mũ'jãu ojewi. A'eramũ 'gã etee futat 'upa peu. Janeruwarete 'ga mogytaawa taityoga 'gã peu etee

futat imÿina ojepyri Jarejuwarete 'ga mogytaawamũ. Nuetygi futari 'gã 'ga mogytaawa taityoga— 'jau Estevão 'ga imome'wau 'gã nupe.

⁴⁶—Kanaã ywy pe janepytuna 'gã nekoramũ Davi 'ga akou 'wyrriaramũ 'gã nupe rakue. Janeruwarete 'ga oporomutaramũ nanimenime Davi 'ga ree. A'eramũ Davi 'ga 'jau 'ga upe: “Awamũ ore naruatau'jawi”, 'jau 'ga 'ga upe. “A'eramũ je 'oga mũ apou Enemogytaawamũ”, 'jau 'ga 'ga upe. “Jako 'ga jepyra rakue. 'Ga 'ã ene rerowiat rakue. 'Awamũ je nanẽ ene rerowiaa tekou”, 'jau 'ga Jarejuwarete 'ga upe. “Ma'eramũ je 'ã 'oga mũ apoi enee, Enemogytaawamũ, ki Ku'jyp”, 'jau Davi 'ga Jarejuwarete 'ga upe.

⁴⁷ A'ere Davi 'ga 'oga nuapoi. 'Ga ra'yra 'ga te wapo rakue. Mama'e tesirũmera etee 'ga imajatykau wa'yra 'ga upe, Sarumãu 'ga upe. A'eramũ 'ga manũ re 'ga ra'yra 'ga iapou rakue— 'jau Estevão 'ga imome'wau 'gã nupe.

⁴⁸—A'ere Janeruwarete 'ga noko'a'uweri 'oga pype, aeremiapofera pype— 'jau Estevão 'ga 'gã nupe imome'wau. —'Ga te 'ã Janeruwaretea futat. 'Ga te 'ã eteetea. Ymã te Janeruwarete 'ga oje'ega kwasiarukari oje'ega mome'wara 'ga upe rakue:

⁴⁹ “Napytaa'uweri je pẽnemiapofera 'oga pype. Ywaga jepykwawa. Ywya jepyrugawa”, e'i 'ga rakue.

“Maran a'e pe je rekoi pẽnemiapofera pype nũ?

Maranuara katu nipo 'oga peapo jee?

Ma'ape a'eramũ jepytu'wawa?

⁵⁰ Naje rũi nipo 'agera mama'ea aapo rakue ki sa?

Jeremiapofera te 'ã 'agera mama'ea.

Je te 'ã 'agera mama'ea aapo katu katu”, 'jau Ku'jywa 'ga 'gã nupe rakue,

'jau 'ga ikwasiaa inuga janee rakue— 'jau Estevão 'ga imome'wau mainana 'wyrriara 'gã nupe.

⁵¹—A'ere nipo 'ã pẽẽ nanẽ nepeenuwi etee Jarejuwarete 'ga je'ega nũ. Jareypy 'gã 'jawerimũ etee futat nipo 'ã nepeenuwi etee 'ga je'ega. Nepẽapyai futari nipo 'ã pẽẽ. “Naani. Narafutari ore”, 'jau etee 'ã pẽẽ 'ga 'Agesage upe— 'jau Estevão 'ga 'gã nupe.

⁵²—Janepyy 'gã na'ne 'ã Jarejuwarete 'ga je'ega mome'wara 'gã nerekou tyweaete rakue, 'gã apisau rakue. Anure nipo Ku'jywa 'ga ojepyriwara 'ga muri pẽ nupe. Pẽnemiapesaga 'ga muri pẽ nupe 'eramũ 'gã 'gã nerekou tyweaete rakue— 'jau Estevão 'ga 'gã nupe, u'ama imome'wau. —A'ere ako Janeruwarete 'ga wa'yra 'ga muri janee ai'i. A'ere ako 'ga pejuka ai'i. Mama'e tywer apoare'ema 'ga te ako ai'i numiamũ. A'etea ako 'ga pemonoukat ipokutugukaa 'ypeywar are ai'i— 'jau Estevão 'ga 'gã nupe. —Jarejuwarete 'ga ra'yra 'ga ako pẽẽ imonou 'ga ree iporomutare'ema 'gã nupe ijukaukaa ai'i.

⁵³ Ymã te 'ã ywagipewara 'ga Janeruwarete 'ga je'ega reruri janepyy 'gã nupe rakue. A'ea 'gã 'ã omome'u pẽ nupe numiamũ. A'etea nipo 'ã nepeenuwi futari 'ga je'ega— 'jau Estevão 'ga 'gã nupe u'ama.

Estevão 'ga jukaawet

⁵⁴ Aipo ojeupe Estevão 'ga 'eramũ 'gã amara'neeteeteramũ 'ga ree kwaiwete. 'Gã mara'nea 'gã nerekou.

⁵⁵ A'ere Janeruwarete 'ga 'Agesagea Estevão 'ga rerekoi. A'eramũ 'ga amã'jãu ywau. Tata eny 'jawewara resaka ywag ipe. Owerapa 'ga upe. Sã'ã tupã werawa ppytunaiwayay pype. A'eramũ 'ã ae ajuesaka aju'amamũ. Nan 'ga Janeruwarete 'ga renyfuga pype Jeju'i 'ga resaka 'ga jakwatawa katy 'ga'amamũ. Enyfunyfuk 'ga upe. Janeruwarete 'ga wi te turi.

⁵⁶ A'e resakawe 'ga 'jau 'gã nupe:

—Pemã'ẽ ywau. Ywaga ojeawopytymo'wok jee— 'jau Estevão 'ga 'gã nupe. —Jeju'i 'ga, Jarejuwarete 'ga remimurera 'ga je aesak. 'Uwarete 'ga yse katy 'ga fu'ami u'ama— 'jau Estevão 'ga 'gã nupe.

⁵⁷ A'ere aipo 'ga 'eramũ 'gã joywaemi etee. A'eramũ futat wapyra rawopytyma 'ga je'eg awi.

—Kasi ore 'ga je'ega renuwi ne— 'jau 'gã wapyra rawopytyma 'ga je'eg awi. —O'meramũ futat.

⁵⁸ A'erauwe 'gã jãni awau 'ga repejãna ojepejopepa awau 'ga ppyka 'ga jywa are. 'Ga rerawau 'ga reroyryryrka amunaw awi. 'Ga rerawau 'gã muku'i amunawarete awi. A'erauwe 'ga je'ega renupara 'gã waity ju'ara mososoka imonou kunumũũ 'ga upe, Saulo 'ga upe. Niaturi 'gã naitya. A'eramũ 'gã imososoka imonou 'ga upe.

—Earũ oreraitya oree— 'jau 'gã Saulo 'ga upe.

A'eramũ 'gã ita ppyka imomopoa imonou 'ga ree ojeme'yita.

⁵⁹ Ita ojee imomopor ppyrauwe Estevão 'ga 'jau Jeju'i 'ga upe:

—Ene 'ã jejararetea. Ere ejua je'aga rerawau jepyri— 'jau 'ga Jeju'i 'ga upe.

⁶⁰ A'erauwe Estevão 'ga apygi wenupy'ãu wafukaita oje'ega monou Jeju'i 'ga upe:

—Je repyat kasi ape ne. Tene ki 'gã jemogyi nan etee futat. Ejejuka etee ki 'gã nee. Nafutari je tejepyara, ki Ku'jyp— 'jau 'ga Jarejuwarete 'ga upe.

'Ga upe oje'ëmaw ire 'ga amanũmũ. Saulo 'ga upe nanë Estevão 'ga manũa esageramũ rakue.

8

Saulo 'ga 'gã nereko tyweawet

¹⁻² 'Ga manũ re Jeju 'ga rerowiaara 'gã amũ Estevão 'ga reumera rerawau imonou inuga ita kwara pype. A'eramũ 'gã ajaa'wau 'ga ree.

Estevão 'ga manũawa rupi we futat Jerusareg ipewara 'gã Jeju 'ga rerowiaara 'gã nerekou tyweaete. A'eramũ 'gã okwasi'wau awau Jerusareg awi. Jeju 'ga remimonofera 'gã ajemogyau 'wyriaramũ 'ga rerowiaara 'gã nupe. A'eramũ 'gã etee futat opytau Jerusareg ipe. 'Ga rerowiar yau 'gã te ajee okwasi'opap 'gã nui. Amumera 'gã awau okwasi'wau Judeja ywy pe. Amumera 'gã awau Samari ywy pe.

³ A'ere Saulo 'ga 'jau ojeupe: “Oo pa je Jeju 'ga rerowiaara 'gã nerekou tyweaete kwy. A'eramũ 'gã opoia Jeju 'ga rerowiar awi kwy”, 'jau 'ga ojeupe.

A'erauwe 'ga awau Jeju 'ga rerowiaara 'gã amũ nog ipe 'ga rerowiaara 'gã ppyka. 'Gã noga moymoyka akou 'gã ppyka. Kũima'efera 'gã kũjãmera 'gã we futat erua ipyyka ijaga moromunepawa pype. A'eramũ 'gã opytuna pyygamũ oka'jama Saulo 'ga wi.

Samari ywy pe Filipe 'ga oawet

⁴ Jerusareg ipe Saulo 'ga rekoramũ kwaiwete 'gã awau oka'jama 'ga wi. A'eramũ futat okwasi'o ma'efera 'gã awau kwe pe akou Jeju 'ga mome'wau tesirũmera 'gã nupe. Janeruwarete 'ga je'ega retee futat 'gã imome'wau 'gã nupe.

⁵ Estevão 'ga 'gã ijuka re 'gã okwasi'wau awau. 'Gã kyjea 'gã nerekou. A'eramũ Filipe 'ga awau Samari ywy pe, Kristu 'ga mome'wau 'gã nupe.

⁶⁻⁷ A'eramũ 'gã kwaiwete wapyakau 'ga je'eg are ojeupe Jeju 'ga mome'uramũ. Ojero'wu ma'e 'gã 'ga ikatu'ogamũ 'gã nesakara 'gã ajemogyau oporesagamũ 'gã nee. Iteu ma'e 'gã katu'oka. Werekwara 'gã nui omoiramũ mama'eukwaawa wafukaita ũ'jau 'gã nui. Mĩmera 'gã esaka 'gã nui imoiramũ.

⁸ A'eramũ Samari ywy pewara 'gã aku'iramũ ee.

⁹ A'e pe futat kũima'e 'ga amũ ako. Simão 'jawa 'ga. Pãjetywera 'ga poromũ.

—Je pãjeretea 'ũ— 'jau futatee akou 'gã nupe rakue.

¹⁰ A'eramũ Samari ywy pewara 'gã 'ga rerowiaa.

—Janepãjeretea koromũ. Janeruwarete 'ga remiapoa 'ga wapo— 'jau 'gã ajaupe 'ga rerowiaa.

¹¹ Namutamutat 'ga mama'e apoi opãjẽ mũ 'gã neape. A'eramũ 'gã oporesagamũ 'ga ree.

¹² A'ere Filipe 'ga Jeju 'ga mome'ui 'gã nupe:

—Ymã we te 'ã jane Jarejuwarete 'ga remimura 'ga rapesagi jarejemogyau ikue. A'eramũ ako 'ga 'awamũ 'ga mua janee ai'i. Jejujamũ futat ako 'ga ai'i. A'ere ako 'gã 'ga jukai ai'i. Amanũmũ 'ga janetywera mepyawamũ etee ai'i. A'ere 'ga mukũja 'ara rupi etee 'ga ruwi ita kwara pype. Imuapyra 'ara rupi Janeruwarete 'ga 'ga moferapa nũ— 'jau Filipe 'ga 'gã nupe imome'wau. —A'eramũ ki pẽẽ 'awamũ 'ga rerowiaa. Werowiaramũ 'ga pẽ katu'ogi pẽ mogyau wemiayuwamũ— 'jau Filipe 'ga 'gã nupe.

Aipo ojeupe 'ga imome'uramũ 'gã 'ga rerowiaa kwaiwete. A'eramũ 'gã 'jau:

—Jeju 'ga rerowiaaramũ je reko 'awamũ. Arowiat je 'ga tekou 'awamũ— 'jau 'gã najuejue etee Filipe 'ga upe.

Aipo 'e re 'gã ojepymĩaukaa 'y pe Filipe 'ga upe. Jeju 'ga rerowiaara resaukaawamũ 'gã ojepymĩaukaa 'y pe 'ga upe. Kũima'efera 'gã, kũjãmera 'gã nanë ojepymĩaukaa 'y pe Jeju 'ga rerowiaara resaukaawamũ.

¹³ A'eramũ ipãjẽ ma'efera 'ga, Simão 'ga nanë Jeju 'ga rerowiaa nũ. A'eramũ 'ga nanë ojepymĩaukaa 'y pe 'ga upe. Opymĩ re 'ga akou Filipe 'ga rewiri etee futat. Filipe 'ga remiapoa 'ga esaka. Ojero'wu ma'e 'gã katu'oga 'ga esaka nũ. Mama'eukwaawa rerekwara 'gã nui mama'eukwaawa moira nanë 'ga esaka nũ. A'eramũ 'ga oporesagamũ akou ee. “Kuu. Okwaap futat nipo 'ga ojero'wu ma'e 'gã katu'oga”, 'jau 'ga ojeupe.

¹⁴ A'eramũ Jeju 'ga remimonofera 'gã 'gã nera renupa Jerusareg ipe. “Samari ywy pewara 'gã nanë Jeju 'ga werowiat nũ” 'e renupa. Najudeu joporemũ arũi Samari ywy pewara 'gã. Ojopypepype 'gã. A'etea 'gã Jeju 'ga werowiat. A'eramũ Jeju 'ga remimonofera 'gã aja mũ monou 'gã nesaka. Pedro 'ga 'gã imonou Juã 'ga retee. A'eramũ 'gã awau owaẽma 'gã nupe.

¹⁵ Owaẽm ire 'gã oje'ega monou Jarejuwarete 'ga upe:

—E'agesage emut 'gã nupe— 'jau 'gã Jarejuwarete 'ga upe.

¹⁶ –Ene'agesagea nitywi we 'gā nee. “Ore arako Jejui 'ga rerowiaaramū”, e'i 'gā nai'i. A'eramū 'ga 'gā pymīāu 'y pe rai'i. A'ere Ene'agesagea nuri we 'gā nupe.

¹⁷ A'eramū ene 'awamū E'agesagea mua 'gā nupe, 'gā nerekwaramū— 'jau Pedro 'ga Juā 'ga retee oje'ega monou Jarejuwarete 'ga upe.

Aipo 'ga upe 'e re 'gā opo monou Jejui 'ga rerowiaara 'gā apyte'rarimū. A'erauwe Janeruwarete 'ga 'Agesagea ruri osou 'gā pype 'gā nerekwaramū.

¹⁸ 'Ga 'Agesagea 'gā pype isea Simão 'ga esaka. “Kuu. 'Gā apyte'rarimū 'gā opo monorauwe Ku'jywa 'ga U'agesagea mua imogeu 'gā pype”, 'jau 'ga ojeupe.

¹⁹ A'eramū 'ga 'jau Pedro 'ga upe, Juā 'ga retee:

—Afutat je nanē Jarejuwarete 'ga pājēa pē 'jawe. Ka'aranūūa je omono ape pē nupe ee. Jarejuwarete 'ga 'Agesagea je nanē tajag 'gā pype tekou 'jau— 'jau 'ga Pedro 'ga upe.

²⁰ Aipo ojeupe 'eramū Pedro 'ga 'jau 'ga upe:

—“Ka'aranūū pyu nipo 'ga Janeruwarete 'ga 'Agesagea jagi ae pype”, ere nipo kūi. Janeruwarete 'ga tene mono mama'eukwaawa rapyaw ipe, eneka'aranūū reewe 'jau 'ū— 'jau Pedro 'ga 'ga upe oje'ega moywyrafena'i. —Ae ifutaramū te Janeruwarete 'ga U'agesagea muri ae upe. Naka'aranūū pyu rūi 'ga U'agesagea muri ae upe.

²¹ A'ere nereko'i ore rewiri ra'e nū'ū. Nerepouri we etywer awi ra'e nū'ū.

²²⁻²³ Akwaap je enetywera, ene porerekoaywera nanē nū. Epoit eporerekoaywer awi. Eporogyta Jarejuwarete 'ga upe ejee ra'ne: “Jetywera emoit je wi”, ere 'ga upe ra'ne kūi— 'jau Pedro 'ga 'ga upe.

²⁴ “Mama'eukwaawa rapyaw ipe Janeruwarete 'ga tene mono eneka'aranūū reewe 'jau 'ū”, ojeupe Pedro 'ga 'erauwe 'ga ajemuaēma.

—Naani. Peapoukat kasi aipoa Jarejuwarete 'ga upe jee ne— 'jau Simão 'ga 'gā nupe, ajemuaēma rerekou.

²⁵ A'ere Pedro 'ga Juā 'ga retee awau ojewya Jerusareg ipe nū. A'eramū 'gā awau pe wyyriwara amunawa pype Jejui 'ga mome'wau akou 'gā nupe.

Etiopi ywy pewara 'ga upe Filipe 'ga 'eawet

²⁶ A'eramū Janeruwarete 'ga 'Agesagea 'jau Filipe 'ga upe:

—Ekwap ajepeja pe jo'okawa rupi. 'Yē'ē katy oo ma'e rupi ekwap— 'jau Janeruwarete 'ga 'Agesagea oje'ega 'ga wyyteripe 'ga upe. —Jerusareg ipyriuu ijo'ogi. A'e awau Gasa 'jaw ipe. Nuataypeypei 'gā aipoa pe rupi. A'ea pe rupi ekwap— 'jau Janeruwarete 'ga 'Agesagea 'ga upe.

²⁷⁻²⁸ A'erauwe Filipe 'ga awau akou aipoa pe rupi. Pe rupi kūima'e 'ga amū rekoaa, Etiopi ywy pewara 'ga rekoaa. Jerusareg ipe 'ga awau oporogytau Jarejuwarete 'ga upe rai'i. A'efera 'ga 'ut akou oje'wyr ipe nū. 'Ga ywy pewara 'gā 'wyyriara kūjā ēē. Kātasi ēē rera. A'eramū 'ga ēē remiaywa. 'Ga futat ka'aranūū are omaenuna ēē upe. A'e 'ga Filipe 'ga wekoat pe aje. 'Ga 'ywa'yata 'arimū 'ga 'ua akou ka'arana mogytaw. Janeruwarete 'ga je'ega rerekwara ka'arana rerua erekou imogytau pe rupi. Isai 'ga remikwasiarera rerua erekou imogytau.

²⁹ A'eramū Janeruwarete 'ga 'Agesagea 'jau Filipe 'ga upe nū:

—Ere emy'emŷina'i ewau 'ga rupisika— 'jau 'ga 'Agesagea 'ga upe.

³⁰ A'erauwe 'ga awau 'ga rupisika 'ga ka'arana 'ga imogyta renupa. A'erauwe Filipe 'ga oporonupa ee 'ga upe:

—Enereapyo te ejemimogyta are?— 'jau Filipe 'ga 'ga upe.

³¹ —Naani nū'ū. Nakwaawi je nū'ū. Nitywi ee je mueapyoara 'ga amū— 'jau 'ga 'ga upe. —Terejot je rupi? Ere ejua e'aa 'au eapyka je pyri. Tajemu'e ape ee 'jau— 'jau 'ga 'ga upe.

A'erauwe Filipe 'ga awau ojeupia 'ywa'yata 'arimū wapyka 'ga pyri. A'eramū 'ga 'ga mu'jau Jarejuwarete 'ga je'eg are.

³² Aipo 'jau ka'aran are 'upa:

“Sā'ā karupa'mī raeme'ema weroo ajukaramū.

Amumera 'ā wawa monoogamū miamū waeme'emamū.

Nan tee futat nipo 'ga.

Noje'egi wereko tywereteramū.

³³ “Ga te futat te 'ā nia'wyr akou”, 'jau nipo 'gā ajaupe.

A'ere nipo 'gā 'me ate.

Nokoi'i futari nipo 'ga amū jaruete 'ga 'jara 'ga.

Nitywi 'ga amū 'ga ra'yra mome'wara. 'Kweramū 'ga ra'yra', na'jawi nipo 'ga upe.

'Ga ra'yre'emauwe 'gā 'ga jukai',

'jau Isai 'ga ikwasiaa ka'aran are rakue, aipoa 'ga imogytau Filipe 'ga wupisigamū erekou.

³⁴ A'eramū 'ga oporonupa ee Filipe 'ga upe:

—Ojee futat te 'ga ka'arana kwasiari inuga rakue? 'Gā amū nee te ra'u nū?— 'jau 'ga Filipe 'ga upe.

³⁵—Naani. Janeruwarete 'ga ra'yra 'ga ree te 'ga ikwasiari inuga janee rakue. Jeju 'ga ree te 'ga ikwasiari inuga rakue— 'jau Filipe 'ga 'ga upe imome'wau.

A'eramū futat Filipe 'ga 'ga mu'jau Jeju 'ga ree 'ga rerawau erekou pe rupi.

³⁶ Poje 'gā awau 'y upe owaēma.

—Koromū 'y rakwawi ra'e kūi. Eneporopymīwet te 'y pe je ree?— 'jau 'ga Filipe 'ga upe.

³⁷—Jeju 'ga rerowiarāmū je 'y pe ene pymī futari nū'ū— 'jau Filipe 'ga 'ga upe.

—A'jea futat je 'ga rerowiari. A'jea futat Jeju 'ga Janeruwarete 'ga ra'yra— 'jau 'ga 'ga upe.

³⁸ A'eramū 'ga 'jau wemiayuwa 'ga upe:

—Emory'we oree— 'jau 'ga 'ga upe.

A'eramū 'ga 'ywa'yata mory'weukaa 'y 'arimū. A'erauwe 'gā awau ojypa 'y pe. Peu futat Filipe 'ga 'ga pymiāu 'y pe rakue.

³⁹ 'Ga pymī re Janeruwarete 'ga 'Agesagea Filipe 'ga rerawau 'ga wi. A'eramū ipymīmyrera 'ga 'ga resagu'jape'ema. A'eramū 'ga awau akou nū. Aku'iramū 'ga awau akou pe rupi oje'wyr ipe nū. A'eramū 'ga tee awau oporogytau akou pe rupi Jarejuwarete 'ga upe.

—Nitywi 'ga amū ene 'jawe jee. Ene etee te 'ā eneresage— 'jau 'ga awau akou oporogytau pe rupi 'ga upe.

⁴⁰ 'Ga pymī re Janeruwarete 'ga 'Agesagea Filipe 'ga rerawau pe awi. A'eramū Filipe 'ga ajepeja amunaw ipe ojesaukaa erujewi 'gā nupe, Asoto 'jaw ipe nū. Peu 'ga akou 'gā mu'jau Jeju 'ga je'eg are nū. A'eramū 'ga awau akou pe rupi, pe wywriwara amunaw ipe 'gā mu'jau Jeju 'ga je'eg are. Awau Sesaria upe owaēma.

9

Saulo 'ga upe Jeju 'ga jesaukaawet

¹ Kwe pe Filipe 'ga rekoramū, Saulo 'ga akou Jerusareg ipe Jeju 'ga rerowiaara 'gā nerekou tyweaete. 'Gā apisi are 'ga afueweramū. A'eramū 'ga awau oporogytau mainana 'wyrriararete upe:

—Oo je kwe pewara 'gā nerua ipyykapap.

² A'eramū ene ka'arana kwasiaa jee. Toroo Damasco pe 'jau. Judeu 'gā jatykaawa raarana 'gā nupe, 'gā 'wyrriari 'ga upe toroo esaukaa 'jau. "Saulo 'ga oreremiayuwa. A'eramū pēē Jeju 'ga rerowiaara 'gā nerawau esaukaa 'ga upe" 'ea ene ikwasiaa inuga ka'aran are jee. A'eramū 'gā ka'arana mogyta re Jeju 'ga rerowiaara 'gā nesaukaa jee 'jau— 'jau 'ga 'ga upe. —A'eramū je 'gā pyyka imunepa moromunepawa pype 'jau. A'eramū je tejeupe 'gā pyypaw ire, 'gā pofaa, 'gā nerua 'au ene upe 'jau. Kūima'efera 'gā, kūjāmera 'gā we futat nipo je erua— 'jau Saulo 'ga mainana 'wyrriararete 'ga upe.

—Nai'i. Takwasiat enee 'jau— 'jau mainana 'wyrriararete 'ga Saulo 'ga upe.

A'erauwe 'ga ka'arana kwasiaa. A'ere 'ga imonou Saulo 'ga upe. Ojeupe imono re Saulo 'ga awau.

³ Damasco pe 'ga waēm ja'wyja'wyrwauwe tata eny 'jawewara 'ua ojypa 'ga upe. A'ere natata arūi. Ywag awi 'ua wenyramū 'ga upe.

⁴ A'e reny awi Saulo 'ga oky'jau u'aa ywyu. Awau 'ūina oyyita ywyu. A'eramū weny awi 'ga kyjeramū Jeju 'ga oje'ega mua 'ga upe:

—Ma'eramū te je rereko tywerete ape, ki Saulo?— 'jau 'ga 'ga upe.

⁵ A'eramū

—Awŷja poromū oje'ega jee 'ū?— 'jau Saulo 'ga.

—Jejujamū je je'egi enee. Je te 'ā je rereko tywerete ape— 'jau Jeju 'ga 'ga upe. —Ma'eramū te nanuara ereapo ekou?

⁶ Ere efu'ama ewau amunaw ipe. Peu 'ga amū tene mu'e eneremiaporam are jee 'jau— 'jau Jeju 'ga 'ga upe.

⁷⁻⁸ A'eramū Saulo 'ga afu'ama amā'jāu numiamū. A'ere 'ga rea wewi.

'Ga rupi oo ma'e 'gā enupa futat numiamū. A'ere 'gā nuesagi Jeju 'ga. A'eramū 'gā Saulo 'ga popyyka 'ga rerawau eruatau. Erawau erowaēma amunaw ipe.

⁹ Muapyra 'ara rupi 'ga nuesagi futari mama'ea. Mama'e resake'ema 'ga ojem'iware'ema futat. 'Ya miamū futat 'ga itykure'ema.

¹⁰ Aipo amunaw ipe kūima'e 'ga amū akou. Jeju 'ga rerowiaara 'ga. 'Ga upe Jeju 'ga ojesaukaa.

—Ananiasi.

—Ma'ja 'ū?

¹¹ —Peu ekwap ukawō'ō esage katy kūima'e 'ga amū rekaa. Judas 'ga rog ipe 'ga ruwi. Saulo 'ga rera. Tarsu pewarera 'ga. Peu 'ga reni oporogytau jee.

¹² A'ea 'ga renaw ipe futat Ananiasi 'jawa 'ga ojesaukaa 'ga upe opo monou 'ga reakwara 'arimū. A'eramū 'ga amā'jāu nū— 'jau Jeju 'ga 'ga upe imome'wau. —A'eramū ene ewau 'ga resaka— 'jau Jeju 'ga Ananiasi 'ga upe.

¹³ —Tee nū'ū. Akwaap je 'ga rera nū. Kwaiwete 'gā 'ga rera mome'ui jee jepi nū'ū. “Jerusareg ipe 'ga Jeju 'ga rerowiaara 'gā Saulo 'ga oppyk imunepa moromunepawa pype” 'ea je aenup jepi nū'ū.

¹⁴ A'ere 'ā 'ga ruri 'auwaramū ore pyyka ore rerawau Jerusareg ipe. Mainana 'wyriara 'gā 'ā 'ga mut ene rerowiaaramū ore pyyka— 'jau Ananiasi 'ga Jeju 'ga upe.

¹⁵ A'ere Jeju 'ga 'i etee 'ga upe:

—A'jea futat aipoa. A'ere 'ā je te Saulo 'ga pyyrūi tejeupe. Toporowyky 'ga jee 'jau. Jeje'ega 'ga tomome'u Israeu juapyrera 'gā nupe 'jau. Judeue'ema 'gā nupe, 'gā 'wyriara 'gā nupe. Mīmēra 'gā nupe 'ga toje mome'u 'jau— 'jau Jeju 'ga Ananiasi 'ga upe.

¹⁶ —Sā'ā ene je rerowiaara 'gā nereko tyweretea. Nan tee futat nipo je rerowiare'ema 'gā ene nereko tyweretei, ta'e 'ga upe 'jau. 'Awamū ene jeremiayuwa. A'eramū 'gā ene rerekou tyweaete nipo ene je rerowiaara 'gā nereko tyweawera 'jawerimū etee futat, ta'e 'ga upe 'jau— 'jau Jeju 'ga Ananiasi 'ga upe. —A'eramū ene ewau 'ga katu'oka— 'jau Jeju 'ga 'ga upe.

¹⁷ A'erauwe Ananiasi 'ga awau 'ga upe:

—'Au je ruri ene resaka ki 'ei. Janejararete 'ga je mut ene resaka ki 'ei. Jeju 'ga 'ā Janejararetea. Saa'e ene 'ga resaga pe aje rai'i. A'e 'ga je mut ene resaka ki 'ei. 'Awamū ene Jeju 'ga rerowiaaramū ereko je 'jawe— 'jau Ananiasi 'ga Saulo 'ga upe. —Ojeupe je porogyta re Janeruwarete 'ga ene mamā'ēi. U'agesagea nanē 'ga imua ene upe nū, enererekwaramū nū— 'jau 'ga 'ga upe.

A'erauwe 'ga opo monou 'ga reakwara 'arimū.

¹⁸ A'erauwe ipirapefera 'jawewara u'aa 'ua Saulo 'ga rea awi. A'eramū futat 'ga amā'jāu nū. Janeruwarete 'ga 'Agesage osou 'ga pype 'ga rerekwaramū. 'Ga mā'ē re 'ga 'ga rerawau 'ga pymāu 'y pe, Jeju 'ga 'ga erowiaa resaukaawamū.

¹⁹ Opymī re 'ga ojemi'waa. A'eramū futat opifuakaramū nū.

Damasco pewara 'gā nupe Saulo 'ga 'eawet

A'eramū 'ga akokou'i peu Jeju 'ga rerowiaar ymanera 'gā pyri.

²⁰ A'eramū 'ga judeu 'gā jatykaaw ipe awau Jeju 'ga rerowiaar ymanera 'gā netee. A'e pe Saulo 'ga 'jau:

—Jeju 'ga 'ā Janeruwarete 'ga ra'yraretea futat— 'jau 'ga 'gā nupe.

²¹ —Kuu. Poromū nipo Jeju 'ga rerowiaara 'gā apisi are ifuwet ma'efera 'ga 'i ki sa— 'jau 'gā ajaupe. —Jerusareg ipe 'gā apisi are ako 'ga fueweramū ikue re'ā. A'e reewi pa 'ā aipo 'ga 'i nū 'ī— 'jau 'gā ajaupe. —'Au na'e 'ga ruri 'gā pofaa 'gā neroo are afueweramū mainana 'wyriara 'gā nupe rai'i re'ā. A'e reewi pa 'ā aipo 'ga 'i nū 'ī— 'jau 'gā ajaupe oporesagamū 'ga ree.

²² Janeruwarete 'ga opājē monou 'ga upe. A'eramū taetu Saulo 'ga ojero'waro'wau etee futat 'ga mome'wau.

—A'jea futat. Jeju 'ga Janeruwarete 'ga ra'yraretea futat. 'Ga futat Janeruwarete 'ga amut janee, janetywera moiawamū rakue. U'eawer imū etee futat 'ga 'ga muri janee rakue— 'jau Saulo 'ga judeu 'gā nupe u'ama.

A'ere aipoa amunaw ipewara judeu 'gā nije'egawarūi 'ga upe.

²³ A'eramū 'gā anurenure'i ojemajatykau Saulo 'ga ree numiamū.

—Sijuka 'ga 'jau— 'jau 'gā ajaupe numiamū.

²⁴ A'eramū 'gā amunawa osoma rokware rarūmū 'ga ree numiamū. Wojere'emamū 'gā iarūmū 'ga ree. A'ere Saulo 'ga ikwaawi ojee. A'eramū 'ga uēme'ema.

²⁵ Poje 'ga jekoty'aawa 'gā 'jau 'ga upe:

—Paneru pype ese. Toromono ene kwe katy iosoma apyraapa 'jau— 'jau 'gā 'ga upe.

A'erauwe 'ga resei paneru pype. A'erauwe 'gā 'ga monoi iupia 'ga monou 'ga mojypa kwe katy iosoma atykupe katy.

A'eramū 'ga awau Jerusareg ipe 'gā nui.

Jerusareg ipe 'ga oawet

²⁶ Damasco awi Saulo 'ga awau oka'jama Jerusareg ipe. “Too teje'aa Jeju 'ga rerowiaara 'gā nee”, 'jau 'ga numiamū. A'ere 'gā kyjei 'ga wi.

—O'meramū te 'ga 'i. “Too etee 'gā nerekou tyweaete 'jau”, e'i te 'ga janee— 'jau etee 'gā ajaupe.

Okyjau etee 'gā Saulo 'ga wi.

²⁷ A'ere Panape 'ga 'ga rerooi Jeju 'ga remimonofera 'gā nupe, 'ga mome'wau 'gā nupe:

—Damasco pe 'ga waw ipe Janejararete 'ga jesaukari 'ga upe rai'i, oje'ega 'ga 'ga upe rai'i. A'eramū 'ga a'eramū akou Jeju 'ga rerowiaa rai'i— 'jau Panape 'ga 'ga mome'wau 'gā nupe.

—A'eramū 'ga a'eramū Jejuī 'ga mome'wau Damasco pewara 'gā nupe. Nokyjei futari 'ga imome'wau 'gā nupe— 'jau Panape 'ga 'ga mome'wau 'gā nupe.

A'erauwe futat 'gā okyjawe'em 'ga wi.

²⁸ A'eramū futat Saulo 'ga oje'aa Jejuī 'ga rerowiaara 'gā nee. A'erauwe futat Saulo 'ga akou Jejuī 'ga mome'wau Jerusareg ipewara 'gā nupe. 'Gā moymoyka imome'wau 'gā nupe. Nokyjei futari 'ga Jejuī 'ga je'ega mome'wau 'gā nupe, Jarejararete 'ga je'ega mome'wau 'gā nupe.

²⁹ Grego je'ega apoara 'gā nupe nanē 'ga Jejuī 'ga je'ega mome'wau akou nū. Judeu 'gā futat. A'ere 'gā grego je'ega tee iapoi. Saulo 'ga nanē grego 'gā je'ega apou nū. A'eramū 'ga a'eramū Jejuī 'ga mome'wau 'gā nupe akou. A'ere aipo 'gā mara'neramū etee Saulo 'ga ree. Niporenuwiweri 'gā 'ga ree.

—Iro 'ga Jejuī 'ga mome'ui oree. Pe'je ajee sijuka 'ga— 'jau 'gā ajaupe, Saulo 'ga ree amara'neramū.

³⁰ A'e renupawe Jejuī 'ga rerowiaara 'gā Saulo 'ga rerawau Sesaria pe. Pe awi 'gā 'ga monou Tarsu pe.

—E'aawer ipe, Tarsu pe ekwap ra'ne— 'jau 'gā 'ga upe.

A'eramū Saulo 'ga awau ojewya oje'wyr ipe nū.

³¹ A'eramū peuwara 'gā opota'waramū Jejuī 'ga rerowiaara 'gā nee. Nuereko tywera'uweri futari 'gā 'gā. Judeja ywy pewat, Garireja ywy pewat, Samari ywy pewat. Mīmera 'gā opota'waramū 'gā nee.

Janeruwarete 'ga Agesagea 'gā poaa akou, Jejuī 'ga rerowiarukaa peuwara 'gā nupe. A'eramū Jejuī 'ga rerowiaara 'gā ojemomytuna kwaiwete. Kwaiwete 'gā 'ga rerowiaa. Janeruwarete 'ga Agesagea wejue 'gā poaa. A'eramū 'gā a'eramū ojemomytuna kwaiwete.

Pedro 'ga ataawet

³² Pedro 'ga watau akou amunawa moyka akou. Jejuī 'ga rerowiaara 'gā nesaka akou. Poje 'ga awau Lida 'jaw ipe.

³³ Peu ika'na ma'e 'ga amū 'upa kama pype. Oito 'ga kwara mu'aa 'upa kama pype. Nuatai futari 'ga. Nojywi futari 'ga okama awi.

³⁴ A'eramū Pedro 'ga 'jau 'ga upe:

—Jejuī 'ga ene majaruete, ki Eneiiasi. Ere efu'ama, ekama nuga gatu— 'jau Pedro 'ga Eneiiasi 'ga upe.

A'erauwe Eneiiasi 'ga afu'ama.

³⁵ A'eramū 'ga majaruete resakara 'gā Jejuī 'ga rerowiaa ajemogyau. Lida pewara 'gā, Saron ipewara 'gā 'jau Jejuī 'ga rerowiaa ajemogyau.

³⁶ Jope 'jaw ipe kūjā ēē mū akou, wesageramū. Ēē rera Tabita. Grego je'eg imū Torika ēē rera. Jejuī 'ga rerowiaara ēē. A'eramū ēē mama'e apou imonou ikaraemāe'ema 'gā nupe.

³⁷ Poje ēē ojero'wau. A'eramū ēē amanūmū. A'eramū Jejuī 'ga rerowiaara 'gā ēē reumera pireita iauwana taity pyu. A'ere 'gā ēē rerawau inuga 'og ywate pype.

³⁸ Poje 'gā Pedro 'ga rera renupa.

—Lida 'jaw ipe Pedro 'ga reki— 'jau 'gā ajaupe. —Pe'je ajee sienūi 'ga— 'jau 'gā ajaupe. Ipyriuu'i Lida ruwi. A'eramū 'gā mukūja kūima'e 'gā monou 'ga renūina. Awau 'gā owaēma 'ga upe:

—Ene poreawua ore ruri, ki Pedro. “Em̄yem̄yī'i ejua Jope 'jaw ipe, ere ki 'ga upe”, e'i 'ga oree— 'jau 'gā 'ga upe.

³⁹ A'eramū Pedro 'ga awau 'gā nupi. Jope pe 'ga rerowaēm ire 'gā 'ga rerawau erojeupia 'og ywate pype. Peu imen manū ma'efera 'gā 'upa taity resaukaa ajaupe, ajaa'wau 'upa.

—Sā'a jeraitya. Tabita kynā wapo imua jee ikue— 'jau 'gā ajaa'wau 'upa, ēē remiapofera resaukaa Pedro 'ga upe.

⁴⁰ A'eramū Pedro 'ga 'jau 'gā nupe:

—Pekwap peje'jāu ra'ne— 'jau 'ga 'gā nupe.

A'erauwe 'gā awau ū'jāu. 'Gā 'ē re Pedro 'ga wapyka wenupy'āu oje'ega monou Jarejuwarete 'ga upe. A'ere 'ga amā'jāu amanū ma'efera ēē ree.

—Ere ewya nū— 'jau Pedro 'ga ēē upe.

A'erauwe ēē wopejerawamū Pedro 'ga resaka. A'eramū futat ēē owya.

⁴¹ A'eramū Pedro 'ga ēē powatāu ēē mojjypa kama awi.

A'erauwe Pedro 'ga wafukaita ū'ē ma'efera 'gā nupe:

—Pe'je pejejua ēē resaka. Koromū ēē ferawi nū— 'jau Pedro 'ga 'gā nupe.

⁴² A'eramū 'ga rera okwasi'wau amunawa pype. “Kūjā ēē Pedro 'ga omoferap Jejuī 'ga rerimū” 'ea okwasi'wau Jope pe. A'eramū kwaiwete 'gā Jejuī 'ga rerowiaa.

⁴³ A'e pe futat Pedro 'ga opytawaipa Simão 'ga rog ipe. Simão 'ga wyra pirera apoara. 'Ga rog ipe 'ga opytawaipa.

10

Koneriu 'ga Pedro 'ga renūinawet

¹ Sesaria 'jawa amunaw ipe kūima'e 'ga amū akou. Koneriu 'ga rera. Jefaruu 'gā 'wyrria'ria poromū. Itari yw pewara 'gā 'jau 'gā aipo jefaruu 'gā nupe.

² Najudeu arūi 'ga. A'etea 'ga oje'ega monou akou Jarejuwarete 'ga upe. 'Ga pytuna 'gā nanē Jarejuwarete 'ga muorypa nū. Ikaraemāe'ema 'gā nupe nanē 'ga mama'e monou nū.

³ Kwara jerewamū ywagipewara 'ga ojesaukaa oje'ega 'ga upe:

—Koneriu!— 'jau ywagipewara 'ga 'ga upe.

⁴ Koneriu 'ga okyjau ywagipewara 'ga resaka. A'etea 'ga 'jau:

—Ma'ja?— 'jau 'ga.

—Janeruwarete 'ga eneje'ega wanup. Ene kwaap 'ga ikaraemāe'ema 'gā nupe mama'e monoramū. A'eramū 'ga wea'aramū ene ree.

⁵ A'eramū ki ene 'gā amū monou Jope pe. Simão Pedro 'ga rerurukaa 'gā nupe.

⁶ Ajepeja Simão 'ga rog ipe 'ga rekoī, wyra pirera apoara 'ga rog ipe. Yē'ē pyri teni— 'jau ywagipewara 'ga 'ga upe.

⁷⁻⁸ A'erauwe ywagipewara 'ga awau 'ga wi. A'erauwe Koneriu 'ga wemiayuwa 'gā amū nenūina. A'eramū 'ga ojeupe ywagipewara 'ga jesaukaawera mome'wau 'gā nupe:

—Ywagipewara 'ga ojesaukat jee ko. "Kūima'e 'gā amū emono Jope pe. Peu Pedro 'ga rekoī Simão 'ga rog ipe", e'i 'ga jee ko. "A'eramū ene 'gā amū monou 'ga rerua", e'i ywagipewara 'ga jee ko. A'eramū pēē pejewau 'ga rekaa, 'ga rerua jee— 'jau Koneriu 'ga 'gā nupe.

A'erauwe muapyra 'gā oi. Mukūja 'gā 'ga remiayuwa etee 'gā. Ajepeja 'ga jefaruu. Jefaruu 'ga Jarejuwarete 'ga rerowiaara. A'eramū 'ga awau 'gā nupi.

⁹ Ai'iwe 'gā waēm enune Pedro 'ga awau ojeupia 'og ywate 'arimū 'ūina oje'ega monou Jarejuwarete 'ga upe. Aje kwara ruwamū 'ga 'ūina oporogytau 'ga upe.

¹⁰ Opy'arayparamū Pedro 'ga awau 'ūina oje'ega monou Jarejuwarete 'ga upe. No-jemi'wari we 'ga. Kumia 'gā wapo je erekou. A'eramū 'ga opy'arayparamū 'ūina.

¹¹ A'e pype mama'e resaka. Taity aparasiga 'ua ojypa ywag awi 'ga upe. Tuwiiu taitya. Taity apou imotatusimū.

¹² A'e pype 'ga wyra tesirūmera resaka. Wata ma'e, owewe ma'e, oyryryk ma'e. Mīmera 'ga esaka kwaiwete. Judeu 'gā nupe i'upyre'ema juejue 'ua ojypa taity pype 'ga upe. A'e pype 'ga Jarejuwarete 'ga je'ega renupa.

¹³ —Ere amū jukau i'wau, ki Pedro— 'jau Janeruwarete 'ga 'ga upe.

¹⁴ —Naani nū'ū. Na'ui je mama'e tywera jepi nū'ū.

¹⁵ Aipo 'ga 'eramū Janeruwarete 'ga 'jau 'ga upe:

—Naani. Oreremi'ue'ema ere awi jeremiapofera upe— 'jau Ku'jywa 'ga 'ga upe.

¹⁶ Muapyr etee 'ga oje'ega 'ga upe. A'ere taitya ojewya awau ywag ipe 'ga wi nū.

¹⁷ A'eramū 'ga 'ūina wea'aramū ee. "Ma'eramū sipo Janeruwarete 'ga esaukari jee 'wei? Ma'ja are sipo 'ga poromū 'eweramū je ree 'wei?" 'jau 'ga ojeupe.

A'e are Pedro 'ga rea'at 'ga renamū Koneriu 'ga remimonofera 'gā 'ua pe rupi.

¹⁸ —Ma'ape te Simão 'ga roga reni?— 'jau 'gā 'gā amū nupe.

—Peu teni— 'jau 'gā 'gā nupe.

A'eramū 'gā 'ua owaēma. Owaēm ire oporonupa 'ga ree:

—'Au te Simão Pedro 'ga rekoī?— 'jau 'gā 'gā nupe.

—Ēē. 'Au futat 'ga rekoī— 'jau peuwara 'gā 'gā nupe.

¹⁹⁻²⁰ A'e pype Janeruwarete 'ga oje'ega Pedro 'ga upe:

—Pedro, ekwap ejypa. Muapyra kūima'e 'gā 'ut akou ene rekaa. Ere ewau ejypa emyem'ina'ī. Tereo 'gā nupi 'jau. Ere ki ewau ejuāge'emamū futat. Je te 'ā 'gā amut 'au enee— 'jau 'ga 'ga upe.

²¹ A'erauwe 'ga awau ojypa kamēsīete futat.

—Koromū je pēnemiekarāmū je rekoī— 'jau Pedro 'ga 'gā nupe. —Ma'ja are te peko?— 'jau Pedro 'ga 'gā nupe.

²² —Naani. Ore'wyrriara 'ga te ore mut. Koneriu 'ga te ore mut ene upe. 'Ga nanē Jarejuwarete 'ga werowiat nū. 'Ga esage ma'ea. Judeu 'gā juejue 'ga opojeup. A'eramū Janeruwarete 'ga ojeypyriwara 'ga mua 'ga moporogytaukaa 'ga upe rai'i. A'eramū 'ga ore mua enee— 'jau 'gā 'ga upe imome'wau.

²³ A'erauwe Pedro 'ga 'i 'gā nupe:

—Pe'je ajee pejejua pejesou pejesea 'au. Ai'iwe soo 'jau— 'jau Pedro 'ga 'gā nupe.

A'eramū 'gā awau osou. Ai'iwe 'gā Pedro 'ga rerawau aipo awi. Jeju 'ga rerowiaara 'gā amū nanē awau 'gā nupi nū. Awau 'gā osea pe aje.

²⁴ Ai'iwe 'gā awau nū. Awau 'gā owaēma Sesaria pe. Peu judeue'ema 'gā 'upa ajatykau kwaiwete, 'gā waēma rapesaka.

²⁵ 'Gã waëm 'gã oramũ Koneriu 'ga 'ua wenupy'ãu wapyka Pedro 'ga rowase. A'ere Pedro 'ga 'i 'ga upe:

²⁶ —Naani. Ereapo awi nanuara. Ku'jywa 'ga rowase etee te ae nan iapoi. Aerefetee te je pë 'jawe. Nafjeui 'ga rüi je— 'jau Pedro 'ga Koneriu 'ga upe. —Ere efu'ama etee— 'jau Pedro 'ga 'ga upe.

A'erauwe Koneriu 'ga fu'ami.

²⁷ Oporogyta pype 'ga 'gã nerawau erosou wog ipe. Kwaiwete Pedro 'ga 'gã nesaka 'gã jatyka 'gã nuwamũ.

²⁸ A'eramũ Pedro 'ga 'jau 'gã nupe:

—Ore 'ã judeuramũ norosearũi judeue'emamũ pë'wyr ipe. Najudeuramũ orejekoty'aawa rüi agawewi judeue'emamũ pëë— 'jau Pedro 'ga 'gã nupe. —A'ere 'ã Janeruwarete 'ga te 'ga 'i jee. A'eramũ je 'ã 'agamũ tejua tesou pë'wyr ipe. “Norosea'uweri ore pë'wyr ipe”, ere kasi 'gã nupe ne, 'jau Janeruwarete 'ga jee. “Nepëa'wyr pëë”, 'jawe'em nanë ene 'gã nupe nũ, 'jau Janeruwarete 'ga jee— 'jau Pedro 'ga oporogytau 'gã nupe.

²⁹ —A'eramũ je 'ã tejua pëë tejenujamũ pë nesaka. Tefere'emamũ tejua— 'jau Pedro 'ga 'gã nupe. —A'eramũ je 'jau pë nupe: Ma'eramũ ajee je renũi pejepe rai'i ki 'ei? Pe'je imome'wau jee— 'jau Pedro 'ga 'gã nupe.

³⁰ A'erauwe Koneriu 'ga imome'wau 'ga upe:

—Ikokaru'wi je teje'ega monoi te'ÿina Jarejuwarete 'ga upe, kwara jerewamũ ai'i— 'jau 'ga 'ga upe. —A'eramũ ywagipewara 'ga amũ ojesaukaa erujewi jee. Waity enyfuga rerua erojyja jee.

³¹ A'eramũ 'ga 'jau jee: “Janeruwarete 'ga eneje'ega wanup. Ene kwaap 'ga ikaraemãe'ema 'gã nupe mama'e monoramũ”, 'jau 'ga jee.

³² “Jope pe kũima'e 'ga amũ rekoï, Simão Pedro 'ga rekoï. Ajepeja Simão 'ga rog ipe 'ga rekoï, wyra pirera apoara 'ga rog ipe 'ga rekoï. 'Ye'ë pyri 'ga roga reni. A'eramũ ene 'gã amũ monou 'ga upe”, e'i ywagipewara 'ga jee ai'i— 'jau Koneriu 'ga imome'wau Pedro 'ga upe.

³³ —A'eramũ je 'gã monou kamësiete enee ai'i. Au'je katu ajee 'ã erejot. A'eramũ 'ã 'awamũ jarejupa jarejatykau Jarejuwarete 'ga ree— 'jau 'ga 'ga upe. —Maran ajee ene ma'ja ki emome'u 'gã nupe, e'i ajee Janeruwarete 'ga enee rai'i?— 'jau Koneriu 'ga Pedro 'ga upe. —Ere imome'wau oree. Taruenup 'jau— 'jau Koneriu 'ga Pedro 'ga upe.

'Gã nupe Pedro 'ga 'eawet

³⁴ —A'jea futat rai'i— 'jau Pedro 'ga Koneriu 'ga upe. —Ymã te ako Janeruwarete 'ga judeuramũ etee 'ga jejukai ore ree ikue.

³⁵ A'ere 'awamũ 'ga jejukai pãwë pãwëi ae ree. A'jea futat ae wemifutara apoaramũ 'ga a'jea futat 'ga jejukai ae ree. Wemifutara apoare'ema 'gã nee te aje 'ga nojejukai futari— 'jau Pedro 'ga imome'wau 'ga upe, 'ga pytuna 'gã netee futat.

³⁶⁻³⁷ —Pëë 'ã judeue'ema agawewi. A'etea 'ã pekwaap “Jarejuwarete 'ga oje'eg judeuramũ oree” 'ea. Jejui Kristu 'ga Jarejuwarete 'ga mota'wau werowiaaramũ janee. 'Awamũ ore Jejui 'ga rerowiaa nanë nũ. A'eramũ 'awamũ Janeruwarete 'ga amara'ne'emamũ ore ree. Jejui 'ga futat te 'ã Janejararetea— 'jau Pedro 'ga 'gã nupe.

—Pënea'at te Juã Batista 'ga rekwawer are, Judeja wyy pe ako ma'efera 'ga rekwawer are? 'Ga ra'ne futat ako akou oje'ega 'gã nupe ikue: “Pejetywer awi pepoit. Jarejuwarete 'ga je'ega peenup”, 'jau ako 'ga akou Judeja wyy pe ikue— 'jau Pedro 'ga 'gã nupe.

³⁸ —'Ga futat ako Jejui 'ga, Nasare pe waranup ma'efera 'ga pymi 'y pe ikue. A'eramũ ako Janeruwarete 'ga 'ga pymi re U'agesage mua 'ga upe ikue. Opãjë esage mua ako imojyja Jejui 'ga upe ikue. A'eramũ ako 'ga watau amunawa moyka akou ikue. Aeteu katu'oka. Mama'eukwaawa rerekwara 'gã nui 'ga mama'eukwaawa moia. 'Uwa 'ga pãjë mü te ako 'ga mama'e apoi ikue.

³⁹ Aipoa ajee je 'ã amome'u pë nupe. Je 'ã 'ga resakarera— 'jau Pedro 'ga 'gã nupe. —'Ga poromofera'pawera nanë je 'ã esaka nũ. Israeu juapyreramũ oreywy pe 'ga iapou futat. Jerusareg ipe nanë 'ga ojero'wu ma'e 'gã katu'ogi kwaiwete nũ. A'ere ako 'gã 'ga monoi imu'ama 'y'peywar are 'ga jukau ikue— 'jau Pedro 'ga imome'wau 'gã nupe, Jejui 'ga rekwawera mome'wau 'gã nupe.

⁴⁰ A'eramũ Pedro 'ga 'jau nũ:

—Jejui 'ga manũ re ako 'ga ruwa 'ga 'ga moferawi etee ikue nũ. Imuapyra 'ara rupi 'ga 'ga moferapa. A'eramũ 'ga 'ga resaukaa oree.

⁴¹ Najuejue etee rüi 'gã 'ga resagi poromũ ikue. Wemiayuwamũ etee te 'ga jesaukari oree ikue. Oferaw ire 'ga 'ua ojemi'waa ore pyri ikue— 'jau Pedro 'ga 'gã nupe.

⁴² —A'ere 'ga 'jau oree ikue: “Morogyta esagea pemokwasio 'gã nupe”, 'jau 'ga oree ikue. “Tejerowiaramũ je 'gã katu'ogi”, e'i 'ga pë nupe ai'i, pe'je ki 'gã nupe imome'wau— 'jau 'ga

oree ikue. —“Pejetywer awi pēpoiriweramū je imoiri pē nui”, e'i 'ga pē nupe, pe'je ki 'gā nupe, 'jau 'ga oreo ikue— 'jau Pedro 'ga imome'wau 'gā nupe.

—Jejui 'ga futat Janeruwarete 'ga imogou ae mojo'okaramū. Amanū ma'eferamū, ajemogy ma'eramū. Mimeramū 'ga jane mojo'oka jarejau. 'Ga futat nipo anure 'ut ojewya 'awa ywy pe nū. A'eramū nipo 'ga ae mojo'oka. “Agera 'gā oo ywag ipe je pyri. Ko 'gā te ajee oo mama'eukwaawa rapyaw ipe”, 'jau nipo 'ga. Werowiaaramū nipo 'ga ae monou ywag ipe ojeypyri. Werowiare'ema 'gā nipo 'ga imonoukaa mama'eukwaawa rapyaw ipe— 'jau Pedro 'ga 'gā nupe.

⁴³ —Jarejuwarete 'ga je'ega mome'wara 'gā nanē 'ga mome'wau 'gā nupe rakue. “Werowiaramū Jejui 'ga aetywera moiri ae wi opājē mū”, 'jau Jarejuwarete 'ga je'ega mome'wara 'gā Jejui 'ga upe rakue— 'jau Pedro 'ga imome'wau u'ama.

Judeu'ema 'gā nupe U'agesage monoawet

⁴⁴⁻⁴⁶ Pedro 'ga porogyta 'ga 'amamū Janeruwarete 'ga U'agesage mua imogeu 'gā pype 'gā nerekwaramū. A'erauwe 'gā oje'eg amuteeramū Jarejuwarete 'ga muorypa.

—Nitywi 'ga amū ene 'jawe. Ene etee te 'ā eneresage oreo— 'jau 'gā oje'ega 'ga upe 'ga muorypa.

'Gā nemikwaawe'ema je'ega 'ga 'Agesage iapoukaa 'gā nupe. A'eramū judeu 'gā, Jope awi Pedro 'ga rupi 'ut ma'efera 'gā erowiaa.

—Kuu. Jane upe etee te sipo 'ga U'agesage muri pa, sa'e nā'ā jane re'ā. A'ere pa 'ga 'ā judeu'ema 'gā nupe we U'agesage muri nū— 'jau judeu 'gā ajaupe, oporesagamū ee.

A'eramū Pedro 'ga 'jau opytuna 'gā nupe:

⁴⁷ —Jane upe 'ga U'agesage muawera 'jawerimū 'ga U'agesage muri 'gā nupe. A'eramū 'gā 'awamū jane 'jawe futat ajemogyau— 'jau 'ga opytuna 'gā nupe. —Nepefutari nipo pēē mū 'gā pymia 'y pe jareje'jawe?— 'jau 'ga 'gā nupe.

—Naani nū'ū. Jaruete futari nū'ū— 'jau 'gā Pedro 'ga upe. —Jejui 'ga 'gā erowiar ire jane 'gā pymiāu 'y pe, Jejui 'ga rerowiara resaukaawamū— 'jau 'gā Pedro 'ga upe.

A'eramū 'gā 'jau:

—A'jea futat ore Jejui Kristu 'ga rerowiari— 'jau 'gā Pedro 'ga upe.

⁴⁸ A'eramū Pedro 'ga 'gā pymiāukaa 'y pe 'ga amū upe. Opymī re 'gā 'jau Pedro 'ga upe:

—Au ekoeko'i ore pyri— 'jau 'gā 'ga upe.

—Nai'i— 'jau Pedro 'ga 'gā nupe.

A'eramū 'ga akokou'i 'gā pyri.

11

Pedro 'ga wekwawera mome'uawet

¹ Poje judeu'ema 'gā nera okwasi'wasi'wau Judeja ywy pe. Jejui 'ga rerowiaara 'gā, Jejui 'ga remimonofera 'gā netee 'gā nera renupa. “Judeu'ema 'gā nanē 'awamū Jejui 'ga rerowiaaramū” 'e renupa.

² A'eramū 'gā amū ifutare'ema. Jerusareg ipe 'ga jewyramū peuwara 'gā amū oje'egayau Pedro 'ga upe:

³ —Ma'eramū sipo ene ewau esou judeu'ema 'gā nog ipe rai'i? Imojewagipyre'ema 'gā nog ipe rai'i?— 'jau 'gā Pedro 'ga upe. —Jane 'ā nisearūi judeuramū judeu'ema 'gā nog ipe. Ma'eramū sipo ene ejemi'waa 'gā pyri rai'i ki 'ei? Imojewagipyramū etee sipo Ku'jywa 'ga ae katu'ogi pa, sa'e nā'ā jane re'ā. A'ere 'ā ereo ijewage'ema 'gā pype ekou rai'i— 'jau 'gā Pedro 'ga upe oje'ega 'upa.

⁴ A'erauwe Pedro 'ga wekwawera mome'waupap 'gā nupe u'ama.

⁵ —Naani. Jope pe tekou je teje'ega monoi Jarejuwarete 'ga upe te'ŷina ai'i. A'e pype je taityuu resaka ai'i. Ae fayuwā 'jawe etee futat je esaka. Ywag awi ijyp turamū. Tuwi te taitya. Taity apou imotatusimū. A'e pype je wyra tesirūmera resaka.

⁶ Wata ma'e, oyyryrk ma'e, owewe ma'e 'jau je esaka ipype ai'i— 'jau Pedro 'ga 'gā nupe imome'wau.

⁷ —A'e pype Janeruwarete 'ga oje'ega jee: “Ere efu'ama amū jukau i'wau”, 'jau 'ga jee.

⁸ A'ere je 'i 'ga upe: “Naani. Wyraiwa 'agamū jee. Nara'ui ore 'aga wyra jepi”, 'jau je 'ga upe— 'jau Pedro 'ga imome'wau 'gā nupe.

⁹ —A'eramū 'ga aipo je 'eramū oje'egu'japa jee nū: “Naani. Aipo ere awi jeremiapofera mama'e upe. Je te 'ā aapo eneremi'uramamū. A'eramū ene aipo 'jawarūe'em jeremiapofera mama'e upe. Wyraiwa ere awi jeremiapofera upe”, 'jau 'ga jee ai'i— 'jau Pedro 'ga imome'wau 'gā nupe.

¹⁰ —Muapyr etee 'ga oje'ega jee. Muapyt je upe 'ga je'eg ire taityuua wyra rorojeywa erawau ywag ipe je wi nū— 'jau 'ga imome'wau 'gā nupe. —Tejewi ijeupir ire je te'ŷina tejea'aramū ee.

¹¹⁻¹² A'e pype Janeruwarete 'ga 'Agesagea oje'ega jeywyter ipe. "Muapypa 'gã 'ut owaëma enee", 'jau 'ga oje'ega jee. "Ekwaw iki 'gã nupi, ejuãge'emamũ futat. 'Oo te je judeue'ema 'gã nupi?" ere kasi ne. Ere ki ewau futat 'gã nupi", 'jau 'ga jee. A'e pype muapypa kũima'e 'gã 'ua owaëma jee— 'jau Pedro 'ga imome'wau 'gã nupe. —Sesaria awi Koneriu 'ga 'gã mua jee. A'eramũ je tewau 'gã nupi, tejuãge'emamũ futat. Jope pewara 'gã amũ awau ore rupi. Seis 'gã awau ore rupi. Jejui 'ga rerowiaara 'gã, judeu 'gã— 'jau 'ga 'gã nupe. —Sesaria pe orowaëm ire arawau orosou Koneriu 'ga rog ipe.

¹³⁻¹⁴ Oje 'wyr ipe ore waëmauwe 'ga wemiesagera mome'wau oree:

—“Ywagipewara 'ga 'ut amũ ojypa jee ai'i", 'jau Koneriu 'ga imome'wau jee. “Jope pe 'gã amũ emono Simão Pedro 'ga rekaa. 'Ga tene mu'e Jejui 'ga ree 'jau", 'jau 'ga jee. “A'eramũ ene ejekatu'oka epytuna 'gã netee", 'jau ywagipewara 'ga jee. “A'eramũ je 'gã amũ monou ene rekaa ai'i", 'jau Koneriu 'ga jee imome'wau— 'jau Pedro 'ga u'ama imome'wau 'gã nupe.

¹⁵ —A'erauwe je Jejui 'ga mome'wau 'gã nupe. Judeue'ema 'gã agawewi. A'etea je amome'u 'ga 'gã nupe— 'jau Pedro 'ga 'gã nupe. —'Gã nupe je porogyta je 'amamũ Janeruwarete 'ga U'agesage mua imogeu 'gã pype 'gã nerekwaramũ. Sooko 'ga jane upe imura ikue. Nan futat 'ga imua 'gã nupe. A'eramũ 'gã 'awamũ Jejui 'ga rerowiaa— 'jau Pedro 'ga 'gã nupe imome'wau u'ama.

¹⁶ —A'erauwe je tejea'aramũ Jarejararete 'ga je'eg are. “Juã 'ga ako pëë mũ pymãu 'y pe ikue. A'ere nipo je anure te Jarejuwarete 'ga 'Agesage muri imogeu pë pype pënerewaramũ" 'ga 'eawer are. “Nanuara upe pa 'ga 'i rakue", 'jau je esaka ai'i— 'jau Pedro 'ga 'gã nupe.

¹⁷ —A'jea futat ajee 'ga U'agesage muri judeue'ema 'gã nupe nanë ai'i nũ. Sooko 'ga wa'yra 'ga rerowiaaramũ U'agesage mura janee ikue. Nan tee futat 'ga U'agesage muri 'gã nupe ai'i— 'jau Pedro 'ga imome'wau u'ama 'gã nupe. —Je na'earũ Jarejuwarete 'ga upe "Ereapo awi nan", na'ea'uweri je 'ga upe— 'jau Pedro 'ga 'gã nupe.

¹⁸ Aipo ojeupe 'ga 'eramũ Pedro 'ga upe oje'ega moywyrarafenarera 'gã opika etee futat ajemogyau.

A'ere 'gã 'jau Jarejuwarete 'ga upe:

—Ene te 'ã eneresage oree. Judeue'ema 'gã agawewi 'ã. A'etea 'ã 'gã tywera eremoit 'gã nui— 'jau 'gã 'ga upe. —Otywer awi 'gã poiriweramũ 'ã ene 'gã katu'oka. A'eramũ 'gã nanë awau amanũ re ene pyri nũ. Ore 'jawe futat 'gã ajemogyau ene pyri nakwaparimũ ete rui futat— 'jau 'gã oje'ega monou Jarejuwarete 'ga upe, Pedro 'ga aipo mome'u re.

Panape 'ga Saulo 'ga rerooawet

¹⁹ Estevão 'ga 'gã ijuka re Jejui 'ga rerowiaara 'gã okwasi'wau amunawa pype Jejui 'ga mome'wau 'gã nupe rakue. Jejui 'ga rerowiare'ema 'gã wereko tywereterauwe futat 'gã okwasi'wau awau 'gã nui. Fenisia ywy pe, Sipiri 'ypõ'o me, Ātioki 'jawa amunaw ipe. Mĩmera pype 'gã okwasi'wau awau Jejui 'ga mome'wau. Judeu 'gã nupe etee futat 'gã awau ajemogyau imome'wau.

²⁰ A'ere amumera 'gã oi imome'wau Judeue'ema 'gã nupe we. Sipiri pewarera 'gã, Sirene pewarera 'gã netee 'gã oi imome'wau Judeue'ema 'gã nupe.

—Werowiaramũ Jejui 'ga pë katu'ogi— 'jau 'gã 'gã nupe.

²¹ Jarejuwarete 'ga pãjëa wejue te 'gã wereko. A'eramũ Janeruwarete 'ga wa'yra 'ga rerowiarukaa peuwara 'gã nupe. Kwaiwete Ātioki pewara 'gã Jejui 'ga rerowiaa, ajemogyau 'ga remiayuwamũ.

²² Anure Jerusareg ipewara 'gã Jejui 'ga rerowiaara ppyarera 'gã 'gã nera renupa. “Kwaiwete Ātioki pewara 'gã nanë Jejui 'ga rerowiaara nũ. Judeue'ema 'gã nanë 'ga rerowiaa nũ" 'e renupa. A'eramũ 'gã Panape 'ga monou Ātioki pe 'gã nesaka.

²³⁻²⁴ Esage ma'e 'ga te poromũ, Panaperamũ. Werowiat te 'ga Jejui 'ga. A'eramũ Janeruwarete 'ga 'Agesagea 'ga rerekou. A'eramũ 'ga a'eramũ wesageramũ akou.

A'eramũ 'ga awau Ātioki pe Jejui 'ga rerowiaara 'gã nesaka etee ra'ne 'ga akou. “A'jea futat Janeruwarete 'ga esageramũ 'gã nupe", 'jau 'ga ojeupe. A'eramũ 'ga aku'iramũ 'gã nee. A'eramũ futat Panape 'ga 'gã mu'jau Jarejuwarete 'ga je'eg are.

—Pe'je Jejui 'ga rerowiaa a'jea futat pejejemogyau. Pepoit kasi Jarejuwarete 'ga rerowiar awi ne— 'jau Panape 'ga Jejui 'ga rerowiaara 'gã nupe.

Peu Panape 'ga rekoramũ amumera 'gã nanë Jejui 'ga rerowiaa nũ, kwaiwete.

²⁵ A'eramũ Panape 'ga awau Tarsu pe Saulo 'ga rekaa.

²⁶ 'Ga rekoar ire 'ga 'jau Saulo 'ga upe:

—Ere iruukwe je rupi Ātioki pe. Najepoirũ je teje'ega 'gã nupe— 'jau Panape 'ga Saulo 'ga upe.

—Ere ajee iruukwe— 'jau Saulo 'ga Panape 'ga upe.

A'erauwe 'gā awau ojewya Ātioki pe nū. Peu 'gā kwara mū mu'aa Ātioki pe. Peuwara 'gā 'gā imu'jau Jejuu 'ga je'eg are. A'eramū Ātioki pe ra'ne 'gā 'jau “Kristu 'ga remiayup” 'jau 'gā Jejuu 'ga rerowiaara 'gā nupe rakue.

²⁷ Peu 'gā nekoramū 'gā amū awau Jerusareg awi Ātioki pe. Janeruwarete 'ga je'ega mome'wara 'gā awau. A'eramū 'gā ajatykau 'gā nee.

²⁸ Janeruwarete 'ga je'ega mome'wara 'ga amū rera Agapu. A'eramū 'ga afu'ama oporogytau 'gā nupe. Janeruwarete 'ga 'Agesagea 'ga rerekou. A'eramū 'ga 'Agesagea 'ga mu'eukaa Jejuu 'ga rerowiaara 'gā nupe:

—Anure nipo mama'ea teepawamū jane wi. A'eramū nipo jane najuejue etee futat ty'ara rerekou— 'jau 'ga 'gā nupe imome'wau.

'Ga 'eawer imū etee futat ojeapou 'gā nupe anure. Krautiu 'ga 'wyrriaramū 'ga renamū ojeapou 'gā nupe rakue.

²⁹ A'eramū Jejuu 'ga rerowiaara 'gā 'jau ajaupe:

—Janepytuna 'gā ty'ara wereko, Judeja ywy pewara 'gā. A'eramū jane ka'aranūū monou jarepytuna 'gā nupe— 'jau 'gā ajaupe.

A'eramū 'gā ka'aranūū mono'oga 'gā nupe imonopyramū. Ika'aranūū'e'ema 'gā ināinān'ī' etee imonou. Ika'aranūū kwai ma'e 'gā e'yjuu imonou 'gā nupe.

³⁰ A'eramū 'gā 'jau Panape 'ga upe Saulo 'ga retée:

—Pe'je jareka'aranūū rerawau 'gā nupe— 'jau 'gā 'gā nupe.

A'eramū 'gā ka'aranūū rerawau Jejuu 'ga rerowiaara 'gā 'wyrriara 'gā nupe Jerusareg ipe.

12

Tiago 'ga jukaawet

¹ Anure Erote 'ga teewi Jejuu 'ga rerowiaara 'gā nerekou tyweaete nū. Erote 'ga judeu 'gā 'wyrriara.

² A'eramū 'ga Tiago 'ga ajuwonogukaa jyyu pyu. Juā 'ga reki'yra 'ga Tiagoramū.

³ Judeu 'gā nupe Tiago 'ga jukaa esage futat. A'eramū Erote 'ga “esage nā'ā judeu 'gā nupe rer'ā”, 'jau 'ga ojeupe.

⁴ A'eramū 'ga Pedro 'ga pyygukaa imunewukaa jefaruu 'gā nupe. Irūpāwēa jefaruu 'gā 'ga rarūmū ajemogyau. A'ere 'gā py'rawara 'gā 'ga rarūmū. A'ere 'gā py'rawara 'gā 'ga rarūmū nū. A'ere 'gā py'rawara 'gā 'ga rarūmū nū. Ojopy'rapy'rau etee futat 'ga ree 'ga rarūmū.

Judeu 'gā ajatykau 'araiwa rupi, mani'oko'o jopype'ema 'wawa rupi. A'eramū Erote 'ga 'jau ojeupe: “Judeu 'gā maraka teepaw ire Pedro 'ga tarurukat 'gā nupe 'gā nowase 'jau kwy. Tomogyta 'ga 'gā neape 'jau kwy. Nia'wyrri 'ga, 'gā 'eramū je 'ga jukaaukaa”, 'jau Erote 'ga ojeupe numiamū.

⁵ A'eramū 'ga Pedro 'ga munewukaa moromunepawa pype. 'Ga pofaa itaju pyu. Mukūja itaju pyu 'gā 'ga pofaa 'ga nuga. Kwaiwete jefaruu 'gā 'ga resakara. Tesiseis jefaruu 'gā 'ga resakara. A'eramū ojopy'rapy'rau etee futat 'ga ree 'ga resaka 'ga rerekou.

—Kasi iēmi ne— 'jau 'ga 'gā nupe.

A'ere Jejuu 'ga rerowiaara 'gā nuwi oje'ega monou Jarejuwarete 'ga upe Pedro 'ga ree.

—Emuēmukat 'ga oree, ki Ku'jyp. Kasi 'gā a'e pe 'ga jukai ne. Narafutari ore 'ga jukaa— 'jau 'gā 'upa, oje'ega monou Jarejuwarete 'ga upe.

Moromunepaw awi Pedro 'ga renuēmawet

⁶⁻⁸ “Ai'iwe pa je Pedro 'ga rerurukari 'gā nowase kwy” Erote 'ga 'eawera ppytuna rupi Janeruwarete 'ga ywagipewara 'ga mua Pedro 'ga renuēmukaa jui. Tata 'jawe futat ywagipewara 'ga wenyfugamū 'ua Pedro 'ga upe. Jefaruu pō'ō me Pedro 'ga 'ūina moromunepawa pype osea. Mukūi itaju pyu 'gā 'ga pofaa 'gā nee. Moromunepawa rokwar ipe nanē jefaruu 'ga 'ami iarūmū nū. A'etea ywagipewara 'gā 'ut ojesaukaa Pedro 'ga upe. A'eramū ywagipewara 'ga Pedro 'ga jasi'ywyyka 'ga momaka 'jau 'ga upe:

—Ere ejua, ki Pedro— 'jau ywagipewara 'ga Pedro 'ga upe.

A'erauwe futat Pedro 'ga pofaawa jerawi 'ga wi ojetee futat.

—Ere epyapaawa munepa, eku'afaawa nanē nū— 'jau ywagipewara 'ga 'ga upe.

A'erauwe Pedro 'ga iapou.

—Epiara munepa ere ejua je rupi— 'jau ywagipewara 'ga 'ga upe.

⁹⁻¹¹ A'eramū Pedro 'ga afu'ama awau jefaruu pō'ō awi futat, awau ywagipewara 'ga rewiri. Tuwiiu moromunepawa. A'erauwe ywagipewara 'ga 'upa tenune Pedro 'ga upe, 'ga rerokwapa jefaruu pyu. A'eramū 'gā awau okwapa ajepeja jefaruu pyu. Awau 'gā owaēma itaju 'okwara upe. Pook. Ojeawopytymo'woka ojetee futat 'gā nupe. Awau 'gā uēma ukawō'ō me. Ukawō'ō mū rupi awauwe ywagipewara 'ga opojo'ogamū 'ga wi awau ojeupia ywag ipe nū.

A'erauwe Pedro 'ga apyakwafugamū. “Kuu. A'jea futat nipo ajee je ēmi ra'e. Afayup sipo je pa a'e nakwe je re'ā”, 'jau Pedro 'ga ojeupe. “Janeruwarete 'ga pa ywagipewara 'ga amut je renuēma ra'e, Erote 'ga wi ra'e”, 'jau Pedro 'ga ojeupe. “Toroo 'ga ijukau 'jau, e'i Erote 'ga jee numiamū. Judeu 'gā nanē je juka are ifuwet nū. A'ere Ku'jywa 'ga naje jukaukari 'gā nupe”, 'jau Pedro 'ga ojeupe.

¹² Ee weapyo re Pedro 'ga awau Mari ēē rog ipe, Juā Maku 'ga y ēē rog ipe. Peu 'gā kwaiwete 'upa Jarejuwarete 'ga mogytau Pedro 'ga ree.

—Emuēm 'ga imua oree— 'jau 'gā 'upa Jarejuwarete 'ga upe.

¹³ A'e pype Pedro 'ga 'ua 'okwara mopoga 'gā nupe u'ama. Pog pog pog. A'eramū 'gā nemaiyuwa ēē, Rode ēē awau 'okwar ipe.

—Awŷja te poromū ako?— 'jau ēē.

A'ere ēē 'okwara nuawopytymo'wogi esaka.

Aipo ojeupe 'eramū Pedro 'ga oje'ega ēē upe:

—Je ako Pedroramū— 'jau 'ga ēē upe.

¹⁴ Aipo ojeupe 'eramū ēē 'ga je'ega kwaapa. A'eramū ēē aku'iramū 'ga ree awau ujāna 'ga mome'wau 'gā nupe.

—Pedro kīā 'ut u'ama 'okwar ipe— 'jau ēē 'gā nupe.

A'ere 'gā nuerowiari etee ēē.

¹⁵ —Ene'me awi i— 'jau etee 'gā ēē upe.

—A'jea futat— 'jau etee ēē 'gā nupe.

—Ywagipewara 'ga nipo! Pedro 'ga ree ojejuka ma'e 'ga nipo!— 'jau etee 'gā ēē upe.

—Naani. Pedro kīā futat— 'jau etee ēē 'gā nupe.

¹⁶ A'ere Pedro 'ga niojeri futari u'ama 'okwara mopoga pog pog pog.

Poje 'gā 'jau ajaupe:

—Kuu. A'jea futat nipo aipo kūi— 'jau 'gā ajaupe.

A'eramū 'gā awau 'okwara rawopytymo'woka 'ga resaka.

—Kuu. A'jea futat ra'e kūi. Pedro 'ga futat ra'e kūi. O'meramū sipo ēē 'i pa, sa'e nā'ā jane re'ā— 'jau 'gā ajaupe.

¹⁷ A'erauwe Pedro 'ga opo mowyri 'gā nupe, 'gā momika.

—Pe'je pejepika. Jeje'ega tepeenup 'jau— 'jau 'ga 'gā nupe.

A'erauwe 'ga uēmawera mome'wau 'gā nupe. Imome'upaw ire

—Enupare'ema 'gā nupe nanē ki pemome'u nū. Ajepeja Tiago 'ga upe nanē ki pemome'u pejewau nū— 'jau Pedro 'ga 'gā nupe.

Imome'upaw ire Pedro 'ga awau 'gā nui.

¹⁸ Ai'iwetetewe jefaruu 'gā opaka. 'Ga faawera etee esaka.

—Tŷy. Marupi 'ga uēma ra'e 'ū?— 'jau 'gā. —Uēm 'ga ra'e nū'ū— 'jau 'gā ajaupe.

A'erauwe 'gā 'ga rekaa.

—Ojeawopytym agawewi futat nā'ā re'ā— 'jau 'gā ajaupe.

¹⁹ A'eramū 'gā 'wyriara 'ga, Erote 'ga 'gā monou 'ga rekaa. A'ere 'gā nuesagi 'ga. A'eramū 'ga resake'emamū Erote 'ga jefaruu 'gā apisaukaa.

Erote 'ga manūawet

Jefaruu 'gā apisiukar ire Erote 'ga awau Judeja ywy awi. Sesaria pe 'ga awau ajakawau.

²⁰ A'ere Erote 'ga mara'neramū Tiro pewara 'gā nee, Sidom ipewara 'gā nee we ra'e jepi. A'eramū 'gā awau oporogytau 'ga upe. Sidom ipewat, Tiro pewat. Mīmera 'gā awau oporogytau. Sidom ipety nitywi mama'ea. Tiro pe nanē nitywi nū. A'eramū peuwara 'gā amū awau Erote 'ga upe.

Erote 'ga roga raarana 'ga upe ra'ne, Parasitu 'ga upe ra'ne 'gā awau oporogytau, 'ga mojrūmū ojee. Parasitu 'ga esage 'gā nupe. Nimara'nei 'ga 'gā nee. A'eramū 'gā 'ga upe ra'ne awau oporogytau.

—Ma'eramū te 'wyriara 'ga mama'ea namurukari oree? Nitywi mama'ea ore'wyr ipe. Ekwap eje'ega e'wyriara 'ga upe oree— 'jau 'gā awau 'ga upe.

A'eramū Parasitu 'ga awau oje'ega Erote 'ga upe:

—Sidom ipewara 'gā, Tiro pewara 'gā netee 'ut oporogytau enee ra'e numiamū— 'jau 'ga awau 'ga upe.

²¹ —A'jea. “Ikoai'i 'gā tut oporogytau jee 'jau, e'i 'ga pē nupe”, ere ewau 'gā nupe— 'jau etee Erote 'ga 'ga upe.

A'erauwe Parasitu 'ga ruri 'jau 'gā nupe nū:

—“Ikoai'i 'gā tut oporogytau jee 'jau”, e'i etee 'ga pē nupe ko— 'jau 'ga awau 'gā nupe nū.

A'eramū 'gā awau etee nū. Muapyt oser ire 'gā 'ua nū. 'Gā nurauwe Erote 'ga 'wyriara raity munepa. 'Wyriara raity munew ire 'ga awau 'wyriara renawa 'arimū wapyka 'ūina oporogytau 'gā nupe.

²² Peu Erote 'ga pyriwara 'gā kwaiwete futat ajemogyau. 'Ga porogyta 'ga renamū 'ga pyriwara 'gā wafukaita.

—Maira futat 'ga. Naae 'jawewara 'ga rūi. Maireteete 'ga 'jawewara te nipo 'ā 'ūi oporogytau janee— 'jau 'gā ajaupe wafukaita.

Aipo ojeupe 'gā 'eramū Erote 'ga aku'iramū etee futat 'ūina. “Naani. Aipo pe'je awi. Namaira rūi je. Aerefetee te je pē 'jawe”, 'jawe'em futat 'ga 'gā nupe. Aku'iramū etee 'ūina 'gā 'eawer are.

²³ A'erauwe Janeruwarete 'ga ojeypyriwara 'ga mua. Ewo'iuu upe 'ga py'a monoogukaa-pap 'ga wi furuk furuk furuk. A'eramū 'ga monou 'ga retyka wenawa 'ar awi pōpēn amanūmū awau. “Ku'jywa 'ga 'jawewara 'ga futat 'ga” 'e are Erote 'ga ku'iramū, Janeruwarete 'ga amara'neramū 'ga ree. A'eramū ewo'iuu upe Erote 'ga py'a monoogukaa-pap.

²⁴ A'eramū 'gā Janeruwarete 'ga mome'u mokwasi'wau, kwaiwete. A'eramū amumera 'gā a'eramū futat Janeruwarete 'ga rerowiaa kwaiwete. Erote 'ga manūnamū 'gā Jarejuwarete 'ga pojeupa ajemogyau.

—Nia'wyri 'ga aipo 'eramū ra'e— 'jau 'gā ajaupe.

A'eramū 'gā Erote 'ga rera mokwasi'wau amunawa pype. “Erote 'ga amanū erujewi” 'ea 'gā imokwasi'wau amunawa pype, amunawa moyka.

²⁵ Erote 'ga manū re Panape 'ga Saulo 'ga retee awau ojewya Jerusareg ipe. Ka'aranūū rerawau Jerusareg ipewara 'gā nupe.

—Ātioki pewara 'gā ka'aranūū werurukat oree pē nupe— 'jau 'gā 'gā nupe. —“Ty'ara upe 'gā nekoi” 'ea 'gā wanup. A'eramū 'gā ka'aranūū rerurukaa oree pē nupe— 'jau 'gā imonou 'gā nupe.

Jejui 'ga rerowiaara 'gā 'wyriara upe ka'aranūū mono re Panape 'ga ojewya awau Ātioki pe Saulo 'ga retee nū. Pe awi 'gā kunumūū 'ga rerawau ojeupi, Juā Maku 'ga rerawau.

13

Saulo 'ga retee Panape 'ga ataawet

¹ Peu Ātioki pe Janeruwarete 'ga je'ega mome'wara 'gā ajemogyau. 'Ga je'eg are moromu'jara 'gā nanē nū. Panape 'ga, Saulo 'ga, Simão 'ga, Lusiū 'ga, Manaē 'ga. Mīmera 'gā Janeruwarete 'ga je'eg are moromu'jara 'gā ajemogyau Ātioki pe, Jejui 'ga rerowiaara 'gā pype. Simão 'ga ipiūnūū. A'eramū 'gā Piūnūū 'jau 'ga upe. Lusiū 'ga Sirene pewarera. Manaē 'ga waranupa Erote 'ga retee rakue. Aipo Erote 'ga 'ūina 'wyriaramū Garireja ywy pewara 'gā nupe rakue.

² Aipo 'gā ajatykau oje'ega monou Jarejuwarete 'ga upe. Ojemi'ware'ema futat 'gā Jarejuwarete 'ga upe oporogyta enune. A'e pype Janeruwarete 'ga 'Agesage oje'ega 'gā nupe:

—Pemū'ē 'gā amū jee, je upe oporowyky ma'eramū— 'jau Janeruwarete 'ga oje'ega 'gā nupe. —Panape 'ga, Saulo 'ga. Mīmera 'gā etee ki pemū'ē jee. Toporowyky 'gā jee 'jau— 'jau 'ga oje'ega 'gā nupe.

³ Ojemi'ware'emawe futat 'gā oje'ega monou Jarejuwarete 'ga upe. A'ere 'gā opo monou 'gā apyte'rarimū. A'ere 'gā 'jau 'gā nupe:

—Pe'je pejewau Jarejuwarete 'ga je'ega mome'wau kwe pe— 'jau 'gā 'gā nupe.

A'erauwe Panape 'ga awau Saulo 'ga retee.

⁴ Janeruwarete 'ga 'Agesagea 'gā monou kwe pe.

—Pe'je pejewau kwe pe Jejui 'ga mome'wau 'gā nupe— 'jau Ku'jywa 'ga 'Agesagea 'gā nupe. A'erauwe 'gā awau. Serusia pe 'gā awau. Juā Maku 'ga awau 'gā nupi 'gā poaawamū. A'e awi 'gā awau yaruū pype u'aa 'ypō'ōūū me awawamū, Sipiri pe awawamū. 'Gā awau Saramina 'jawa amunaw ipe ra'ne ra'ne awau ojekoka. Owaēm ire 'gā awau Jarejuwarete 'ga je'ega mome'wau 'gā nupe. Judeu 'gā jatykaaw ipe 'gā awau osou imome'wau.

⁶ 'Gā nupe imome'upaw ire 'gā awau 'ypō'ōūū raapa. Awau owaēma Pafusi 'jawa amunaw ipe nū. Peu owaēm ire 'gā pājētywera 'ga rekoaa. Barjesusi 'ga rera. Judeua 'ga. A'ere gregō 'gā 'je'eg imū Erimasi 'ga rer irūa.

—Je Jarejuwarete 'ga je'ega mome'waramū— 'jau futatee o'meramū 'gā nupe ra'e jepi.

⁷ Aipoa pājētywera 'ga Sergiu Paulo 'ga jekoty'aawa. Sergiu Paulo 'ga 'wyriaramū 'ypō'ō mewara 'gā nupe. 'Wyriara esage 'ga te poromū. I'akwaap te 'ga.

A'eramū 'wyriara 'ga Panape 'ga renūina Saulo 'ga retee.

—Pe'je pejejuā 'au je pyri Jarejuwarete 'ga porogyta mome'wau jee. Taenup Jarejuwarete 'ga porogytafera 'jau— 'jau 'ga 'gā nupe.

⁸ A'ere pājētywera 'ga nafutari 'gā nura 'gā porogytaa 'ga upe. Nafutari 'ga Sergiu 'ga Jejui 'ga rerowiara. A'eramū 'ga oporenuwiwere'emamū 'gā nee.

—Ereapyaka awi 'gã nee. O'meramũ te 'gã 'i akou— 'jau pãjetywera 'ga ojekoty'aawa 'ga upe.

⁹ Aipo 'ga 'eramũ Saulo 'ga amã'jãu 'ga ree. Saulo 'ga mukũ 'ga rera. 'Ga rer irũa Pauloa. A'eramũ Paulo 'ga 'ga resaka katu katu u'ama. Amara'neramũ 'ga ree.

—Ma'eramũ ene aipo 'jau ki 'ei— 'jau Paulo 'ga 'ga upe, 'ga reakwara resaka u'ama.

Janeruwarete 'ga 'Agesagea Paulo 'ga rerekou. A'eramũ 'ga 'ga pojeupe'ema futat oje'ega 'ga upe:

¹⁰ —Ene mama'eukwaawa 'wyriara upe oporowyky ma'eramũ epije ete ekou kũ — 'jau Paulo 'ga pãjetywera 'ga upe. —Ene te 'ã mama'eukwaawa 'wyriara remiayuwa. Enetywerete ene ekou— 'jau Paulo 'ga 'ga upe. —Ene te 'ã e'me are te ereko. Ajee 'ã nerefutari esage ma'ea. Nereapoa'uweri futari 'ã esage ma'ea ekou— 'jau Paulo 'ga 'ga upe. —Mama'e tywera etee tãmējē 'ã ereapo ekou. Jarejuwarete 'ga 'ã ereje'ẽwu' jag ekoete ekou— 'jau Paulo 'ga 'ga upe. —Ma'eramũ ene epoire'ema etywer awi 'ũ?— 'jau Paulo 'ga 'ga upe.

¹¹ —Ma'eramũ nipo 'ã Janeruwarete 'ga ene rereko tyweri. Enerea mowewaiwi ene wi— 'jau Paulo 'ga 'ga upe.

Aipo ojeupe 'erauwe 'ga weawewamũ. A'eramũ futat 'ga akou ojerowarowaka etee futat.

—Tÿy. Maran te 'awamũ je rekoi nũ? Pe'je pejejuwa je popyyka je rerawau je'wyr ipe— 'jau 'ga 'gã nupe.

A'erauwe 'ga amũ 'ga rerawau 'ga 'wyr ipe.

¹² Aipo 'ga rea wewa resaka Sergiu 'ga Jarejuwarete 'ga rerowiaa akou. Jarejuwarete 'ga je'eg are amu'eramũ 'ga 'jau: "Janeruwarete 'ga esage", 'jau 'ga ojeupe. A'eramũ 'ga a'eramũ 'ga rerowiaa.

¹³ Aipo re Paulo 'ga awau pe awi nũ, Pafusi 'jaw awi nũ, opytuna 'gã netee. Yaruu pype 'gã u'aa awau Periga 'jaw ipe. Pãfiria ywy pe Periga 'upa.

A'ere Juã Maku 'ga nooi kwe pe 'gã nupi. Pãfiria ywy awi futat 'ga jewyri 'gã nui, 'ua oje'wyr ipe nũ. Jerusareg ipe nũ.

¹⁴ A'eramũ Paulo 'ga etee awau Panape 'ga retee Ātioki pe. Pisiri ywy pe aipoa Ātiokia amunawa 'upa.

Morowykye'ema rupi 'gã awau judeu 'gã jatykaaw ipe. 'Gã awau osou wapyka enupa. 'Ga amũ Moisesi 'ga remikwasiarera pe mogytaw 'gã nupe. Jarejuwarete 'ga je'ega mome'wara 'gã nemikwasiarera pe nanē imogytau 'gã nupe nũ.

¹⁵ Imogytapaw ire peuwara 'gã 'wyriara 'gã oje'ega monou 'gã nupe:

—Ityp te mama'e mũ pẽnemimome'ua oree ore muekõēajawamũ? Pejejemikwaawa pe-mome'u oree— 'jau 'gã oje'ega monou 'gã nupe.

¹⁶ Aipo 'eramũ Paulo 'ga afu'ama opo mowya 'gã momika.

—Pe'je pejeapyakaw jeje'eg are. Pēē mũ judeua. Judeue'ema pēē mũ nanē nũ. Najuejue etee futat 'ã perowiat Jarejuwarete 'ga. Judeue'emamũ nanē 'ã perowiat 'ga nũ— 'jau Paulo 'ga 'gã nupe u'ama.

¹⁷ —Ymã te Janeruwarete 'ga judeuramũ oreypy 'gã mũ'ei 'gã nui rakue. Ojeupe futat 'ga 'gã mũ'jãu, 'gã momytuna. Egitu ywy pe 'gã nekoramũ 'ga 'gã momytuna ojeupe wemiayuwamũ— 'jau 'ga 'gã nupe u'ama imome'wau. —Na'gã ywya rũ agawewi peu Egitu ywya. A'etea 'gã ajemogyau peu. Pe awi Janeruwarete 'ga 'gã nerua opãjē mũ futat rakue. A'ere 'gã awau watau kwe pe ajemogyau.

¹⁸ Kwarēta kwara mu'aa 'gã awau ajemogyau watau amunawe'em ipe futat. Nitywi amunawa 'gã waw ipe. Nia'wyrĩ agawewi futat 'gã Jarejuwarete 'ga upe. A'etea Janeruwarete 'ga ojejuka 'gã nee rakue— 'jau 'ga 'gã nupe u'ama imome'wau.

¹⁹ —Kanaã ywy pe 'gã waēm ire Janeruwarete 'ga peuwara 'gã apisaukaa 'gã nupe. Sete amunawa pype Janeruwarete 'ga 'gã motaukarukaa rakue, mama'e tywera apoaramũ rakue. 'Gã ywy pojekaukaa 'gã nupe. A'eramũ Janeruwarete 'ga aipo ywy monou judeu 'gã nupe, wemiayuwa 'gã nupe, 'gã nupawamũ. A'eramũ 'gã ma'ea futat aipo ywya. Namutamutat 'gã ajemogyau aipo ywy pe.

²⁰ Kwaturu sētu sīkwēta kwara mu'aa ajemogyau aipo ywya ojeupe imonopyrera pype. 'Awamũ je judeuramũ oreypy 'gã nee Jarejuwarete 'ga jejukaawera mome'ui pē nupe— 'jau Paulo 'ga 'gã nupe.

—A'ere Janeruwarete 'ga 'gã amũ monou imogou 'wyria'riramũ 'gã nupe. Anure Janeruwarete 'ga Samueu 'ga mogou 'wyria'riramũ 'gã nupe. Janeruwarete 'ga je'ega mome'wara 'ga, Samueu 'ga.

²¹ 'Ga sawa'erauwe 'ga pytuna 'gã oje'ega monou Jarejuwarete 'ga upe: "'Ga amũ emÿi 'wyriaramũ oree", 'jau 'gã 'ga upe rakue— 'jau Paulo 'ga 'gã nupe u'ama.

—A'erauwe Janeruwarete 'ga Sau 'ga mogoi 'wyriarareteramũ 'gã nupe. Sau 'ga Kisi 'ga ra'yra 'ga. Pějãmĩ 'ga juapyrera 'ga. Kwarēta kwara rupi 'ga akou 'wyriaramũ. A'ere 'ga

nuenuwi Jarejuwarete 'ga je'ega. A'eramū Janeruwarete 'ga opoia Sau 'ga wi. A'eramū 'ga Davi 'ga etee imogou 'ga py'rau nū. Davi 'ga 'ga imogou 'ga renawer ipe nū.

²²—Davi 'ga Jese 'ga ra'yra 'ga. 'Ga jeremifutara wapo a'jeteetewi jee", 'jau Janeruwarete 'ga 'gā nupe. "Ma'eramū je 'ā jeporomutaramū 'ga ree. Jeje'ega 'ga 'ā wenup akou. A'eramū je 'ga mogou 'wyriaramū pē nupe", 'jau Janeruwarete 'ga 'gā nupe.

²³—Ymā te 'ā Janeruwarete 'ga 'i 'gā nupe rakue: "Davi 'ga juapyrama nipo je amut amū pē nupe, pētywera moiawamū", 'jau 'ga 'ā rakue. A'eferupi te aje ako 'ga Jejuī 'ga muri rakue, Israeu juapyreramū ore rakue, oretywera moiawamū rakue. U'eawer imū etee futat ako 'ga Jejuī 'ga muri rakue— 'jau Paulo 'ga 'gā nupe u'ama imome'wau.

²⁴—Jejuī 'ga rur enune 'ā Juā Batista 'ga awau judeu 'gā mu'jau rakue. "Pejetywer awi pepoit. Pejetywer awi pepoiramū tapymī pēē 'y pe 'jau", 'jau 'ga 'ā 'gā nupe rakue— 'jau Paulo 'ga u'ama imome'wau 'gā nupe.

²⁵—Oporowykypaw enune 'ā Juā 'ga oporonupa ee 'gā nupe rakue: "Je kwaap te pejepe? Naje rūi Janeruwarete 'ga remimurera. A'ere te 'ga ruri je rewiri", 'jau 'ā Juā 'ga 'gā nupe rakue. "Je rewiri te 'ga rekoī. Kūima'eeteete 'ga. Je akotee ma'ea te. A'ere 'ga te kūima'eeteetea. Apoat te je 'ga tekou", 'jau 'ā Juā 'ga 'gā nupe rakue— 'jau Paulo 'ga u'ama imome'wau 'gā nupe.

²⁶—Nan Janeruwarete 'ga oje'ega mua janee. Abraão 'ga juapyreramū, judeuramū ore 'ga imua rakue. Pē nupe judeue'emamū nanē 'ga oje'ega mua 'awamū nū. A'eramū pēē 'awamū pēē nanē 'ga rerowiaa nū. A'eramū pejejemogyau ore 'jawe. A'eramū 'ga oje'ega mua janee: "Pejetywer awi pēpoiriweramū je imoiri pē nui", 'jau 'ga janee rakue— 'jau Paulo 'ga imome'wau u'ama.

²⁷—A'ere Jerusareg ipewara 'gā nokwaawi "Jejuī 'ga aetywera moiara" 'ea. 'Gā 'wyria'ri miamū futat nokwaawi 'ga imoira. Morowykye'ema rupi 'gā ajatykau, Jarejuwarete 'ga je'ega mome'wara 'gā nemikwasiarera mogytaw. A'ere 'gā naeapyoi futari 'gā porogytafer are. Ymā te 'gā Jejuī 'ga juka are ka'arana kwasiari inuga janee rakue. A'eferupi tee futat ajee ako 'gā 'ga jukaukari Piratu 'ga upe rai'i. Jarejuwarete 'ga je'egawer imū etee futat 'gā 'ga jukau rai'i— 'jau Paulo 'ga imome'wau u'ama 'gā nupe.

—'Ga 'ā esage agawewi futat. A'etea 'ā 'gā amū "nia'wryi 'ga akou" 'gā e'i futatee Jejuī 'ga upe rai'i.

²⁸A'eramū 'gā 'jau Piratu 'ga upe: "Ejukaukat 'ga", 'jau 'gā 'ā Piratu 'ga upe 'ga jukaukaa ekoete rai'i— 'jau Paulo 'ga imome'wau 'gā nupe.

²⁹—A'ere Janeruwarete 'ga oje'egawer imū etee futat 'ga jukaukari. Ymā we futat te 'ā Janeruwarete 'ga oje'ega kwasiarukari ka'aran are inuga janee rakue. A'eramū 'gā a'eferupi tee futat 'ga jukau 'awamū rai'i. 'Ga manū re 'gā 'ga mua 'ga mojjpa 'ypeywar awi. 'Ga mojjw ire 'gā 'ga rerawau ita kwara pype 'ga nuga.

³⁰A'ere Janeruwarete 'ga 'ga moferawi etee nū. Amanū agawewi futat 'ga. A'etea 'ga oferaw etee futat. Janeruwarete 'ga 'ga moferapa etee futat nū— 'jau Paulo 'ga u'ama 'gā nupe imome'wau.

³¹—Omoferaw ire 'ga ojesaukaa ojeupi Garireja ywy awi 'ut ma'efera' 'gā nupe. Kwarēta 'ara rupi 'ga ojesaukaru'jau'japa akou 'gā nupe. 'Awamū 'ga resakarera 'gā awau akou 'ga mome'wau judeu 'gā nupe.

³²Ore nanē nū arajua 'awamū 'ga mome'wau pē nupe— 'jau Paulo 'ga 'gā nupe.

³³—Ymā te 'ā Janeruwarete 'ga 'i rakue: "'Ga manū re je te 'ā teja'yra 'ga amoferap", e'i 'ga janeypy 'gā nupe rakue. "A'eramū 'ga amanūu'jape'ema", 'jau Janeruwarete 'ga oje'ega kwasiarukaa 'gā nupe rakue— 'jau Paulo 'ga imome'wau. —U'eawer imū etee futat 'ga Jejuī 'ga moferawi. Ymā 'ga amū Jarejuwarete 'ga je'ega kwasiari inuga ka'aran are janee rakue, Saumu 'jaw are rakue:

"Awamū je ene mogoi teja'yramū.

'Awamū je rekoī eneruwamū",

'jau 'ga ikwasiarukaa inuga Saumu 'jaw are rakue. Jejuī 'ga upe 'ga aipo nuga rakue— 'jau 'ga 'gā nupe.

³⁴—A'ere Janeruwarete 'ga oje'ega wa'yra 'ga feraw are rakue nū.

"Amoferaw etee nipo je ene nū eneme'emamū futat nipo", 'jau 'ga 'ga upe,

'jau 'ga 'ā inuga ka'aran are janee rakue— 'jau Paulo 'ga 'gā nupe imome'wau u'ama.

—'Ymā te je 'i Davi 'ga upe ikue: Mama'e esagea tomono ene upe 'jau, a'e je 'ga upe ikue.

A'eramū je 'awamū mama'e esage monou 'ga juapyreramū pē nupe te'eawer imū etee futat",

'ea nanē Janeruwarete 'ga ikwasiarukaa Isai 'ga upe rakue. Aipoa nanē 'ga Jejuī 'ga ree inuga rakue nū.

³⁵—A'ea Davi 'ga inuga rakue nū:

“Ene te 'ā ejemiayuwa 'ga reumera neremonemukari, esage ma'e 'ga reumera neremone-mukari”,

'jau Davi 'ga inuga ikwasiaa rakue nū— 'jau Paulo 'ga imome'wau u'ama 'gā nupe.

³⁶—Amanūme'ēwe Davi 'ga akou Jarejuwarete 'ga remifutar imū etee futat oporowykyau rakue. A'ere 'ā Davi 'ga manūi rakue. A'eramū 'gā 'ga rerawau ityma rakue, 'ga pytuna pyri rakue. Onemamū 'ā 'ga opytunera 'gā 'jawe etee futat rakue. A'eramū 'ga naojee rūi ka'arana kwasiaa inuga janee rakue.

³⁷Jejuī 'ga ree te 'ga ikwasiaari inuga janee rakue. Jejuī 'ga manū re 'ā Janeruwarete 'ga 'ga moferawi rakue. A'eramū 'ga 'ā oneme'emamū rakue— 'jau Paulo 'ga u'ama imome'wau 'gā nupe.

³⁸⁻³⁹—Peenuw esage ki je 'ga mome'ua pejejeupe. 'Ga etee futat aetywera ope'a ae wi. Ae werowiamū 'ga ipe'ai ae wi— 'jau Paulo 'ga u'ama 'gā nupe.

—Ymā te Janeruwarete 'ga oje'ega monoi Moisesi 'ga upe rakue. A'ea Moisesi 'ga okwasiat inuga janee rakue. A'ere 'ga remikwasiarera nomoiri aetywera ae wi. Jejuī 'ga etee werowiamū aetywer awi ae katu'ok— 'jau Paulo 'ga imome'wau 'gā nupe.

⁴⁰⁻⁴¹—Ymā te Janeruwarete 'ga oje'ega kwasiarukari oje'ega mome'wara 'ga amū upe rakue, Apakuki 'ga upe rakue.

“Je te 'ā Pēnuwaretea.

Oporowyky agawewi je ako tekou pē pype ikue.

A'etea 'ā naje rerowiari pejepe.

Pē mu'e agawewi nipo 'ga amū.

A'etea nipo jeje'ega neperowiari futari.

Perekoemā etee nipo jeje'ega.

A'eramū nipo pēē pejemanūmū futat je rerowiare'emamū. Naje rerowiaara rūi pēē.

A'eramū ki pēē pejekyau pejejemogyau pejemanū awi”,

'jau 'ga 'ā ikwasiarukaa inuga janee rakue— 'jau Paulo 'ga imome'wau 'gā nupe.

—Pejea'gu ki pejejemogyau 'ga je'ega rerekoemā awi. 'Ga je'ega rerekoemā awi peje-jea'gue'emamū ywawuje futat pemanū, 'ga 'eawer imū etee futat— 'jau Paulo 'ga u'ama 'gā nupe.

⁴²Oporogytapaw ire Paulo 'ga uēma Panape 'ga retee judeu 'gā jatykaaw awi nū. Jui 'gā ēmamū 'gā amū 'jau 'gā nupe:

—Iko morowykye'ema rupi ki pejot 'au nū, aipo morogyta mome'wau oree nū— 'jau 'gā 'gā nupe.

—Nai'i— 'jau 'gā 'gā nupe.

⁴³A'eramū aipo mome'u renuparera 'gā amū awau 'gā nupi. Judeu 'gā awau 'gā nupi. Judeue'ema 'gā nanē amū awau 'gā nupi nū. Janeruwarete 'ga 'gā werowiat. A'eramū 'gā a'eramū awau 'gā porogyta renupa 'gā nupi. 'Gā nerawaw ipe Paulo 'ga oporogytau 'gā nupe Panape 'ga retee.

—Janeruwarete 'ga 'ā esage janee. Werowiaaramū 'ga ojejukau esage jane ree. Werowiare'ema 'gā nee te ajee 'ga 'ā nojekukai futari. A'eramū pēē 'ga rerowiaa 'a'jea futat pejejemogyau— 'jau 'ga 'gā nupe imome'wau pe rupi 'gā nerekou.

⁴⁴Iko morowykye'ema rupi 'gā ojewya 'ua nū, Judeu 'gā jatykaaw ipe nū. A'eramū peuwara 'gā ajatykau 'gā nee, 'gā porogyta renupa nū. A'eramū 'gā awaupap ja'wyja'wy 'gā nupi Jarejuwarete 'ga porogyta renupa.

⁴⁵A'eramū 'gā ojewi opytuna 'gā opap ja'wyja'wyrāmū judeu 'gā amū 'gā nerekoayau.

—O'meramū 'gā 'i akou pē nupe. Nia'wyrī 'gā. Pē mu'e tyweruu 'gā akou. O'meramū te 'gā 'i akou— 'jau judeu 'gā opytuna 'gā nupe, ojewi 'gā opap ja'wyja'wyrāmū 'gā poromū 'jau.

⁴⁶A'ere aipo ojeupe 'eramū Paulo 'ga je'egi etee 'gā nupe, Panape 'ga retee.

—Neperowiari 'ā Jarejuwarete 'ga. Nepēoweri etee 'ā 'ga pyri. Pē nupe ra'ne agawewi ako ore 'ga mome'ui ai'i. A'ere 'ā 'ga neperowiari etee ako ai'i— 'jau Paulo 'ga oje'ega judeu 'gā nupe, 'gā pojeupe'ema futat. —Au'je ajee ore pē nupe imome'u re. Oropoir ore 'awamū pē nū. Judeue'ema 'gā nupe te ore oi 'ga mome'wau— 'jau 'ga 'gā nupe.

⁴⁷—Ymā te Janeruwarete 'ga 'i janee rakue:

“Amū'ē je pēē 'gā nupe teje'ega mome'waramū, judeue'ema 'gā nupe teje'ega mome'waramū.

'Ga 'ā ae katu'ok, pe'je ki 'gā nupe.

Oje'ega rerowiaaramū 'ga ae katu'ogi, pe'je ki 'gā nupe”,

'jau 'ga ikwasiarukaa inuga janee rakue— 'jau Paulo 'ga 'gā nupe.

⁴⁸A'e renupa judeue'ema 'gā wekōēājamū ajemogyau.

—Esage te 'ā Janeruwarete 'ga je'ega— 'jau 'gā ajaupe.

A'eramū futat 'gā aku'iramū ajemogyau 'ga je'eg are. A'eramū 'gā amū Jarejuwarete 'ga rerowiaa. Jarejuwarete 'ga remipyyrūmera 'gā 'ga rerowiaa. 'Gā amū Janeruwarete

'ga ipyyrūmū ojepyyriwaramū nakwaparimū warāu rūi. Aipo 'gā futat 'ga rerowiaaramū ajemogyau.

⁴⁹ A'eramū futat 'gā awau Jejuu 'ga mome'wau kwe pewara 'gā nupe. Jarejararete 'ga je'ega mokwasi'wau awau 'gā nupe.

⁵⁰ A'ere judeu 'gā amū mara'neramū Paulo 'ga ree Panape 'ga retee. A'eramū 'gā awau 'wyrīa'ri 'gā nanē imamara'neukaa 'gā nee nū. Peu 'gā pyri kūjāmera 'gā amū ajemogyau. Ka'aranū kūwai ma'e 'gā. Judeue'ema agawewi. A'etea 'gā Jarejuwarete 'ga rerowiaa. 'Gā nanē 'gā imamara'neukaa Paulo 'ga ree nū. A'eramū 'gā a'eramū 'gā nerekou tyweaete. A'eramū 'gā 'jau 'gā nupe:

—Pe'je pejewau ore wi— 'jau 'gā Paulo 'ga upe Panape 'ga retee.

⁵¹ A'erauwe 'gā awau. O'wyawe 'gā opyapaawa mososoka opy awi inupānupāu ajuee, 'yja motototoka jui. 'Gā nee Janeruwarete 'ga jejukae'ema resaukaawamū 'gā opyapaawa nupānupāu ajuee 'gā nupe.

—Jejuu 'ga 'ā ore oromome'u arakou pē nupe numiamū. A'ere 'ā 'ga neperowiari etee. A'eramū nipo Janeruwarete 'ga amara'neramū pē nee. Werowiare'emamū 'ga pē katu'oke'ema futat— 'jau 'gā 'gā nupe. —A'eramū nipo pēē mama'eukwaawa rapyaw ipe futat pejewau— 'jau 'gā 'gā nupe opyapaawa nupānupāu ajuee.

A'eramū futat 'gā awau Ikoniū 'jaw ipe.

⁵² A'ere Jejuu 'ga rerowiaara 'gā ku'iramū ajemogyau, Ātioki pewara 'gā. Janeruwarete 'ga Agesagea 'gā nerekou.

14

¹ Ikoniū 'jaw ipe nānēwējēmī nū. Ikoniū 'jaw ipe owaēm ire 'gā awau osou judeu 'gā jatykaaw ipe Jejuu 'ga mome'wau 'gā nupe nū. A'eramū 'gā Jejuu 'ga rerowiaa, kwaiwete. Judeu 'gā judeue'ema 'gā netee Jejuu 'ga rerowiaa nū.

² A'ere judeu 'gā amū Jejuu 'ga nuerowiari. A'eramū 'gā Paulo 'ga je'ēwu'jaga futatee 'gā nupe. Panape 'ga nanē 'gā ije'ēwu'jaga nū. Judeue'ema 'gā nupe 'gā je'ēwu'jaga. A'eramū judeue'ema 'gā nanē 'gā futare'ema nū.

³ A'etea futat 'gā ako namutamutat peu Jejuu 'ga mome'wau 'gā nupe, okyjawe'em futat akou Jejuu 'ga mome'wau 'gā nupe:

—Janejararete 'ga 'ā ojejuka esage jane ree. Werowiarāmū 'ga ae katu'ogi— 'jau 'gā imome'wau 'gā nupe.

A'eramū taetu Janeruwarete 'ga aku'iramū 'gā nee. “A'jea futat 'gā jeje'ega mome'ui ra'e”, 'jau 'ga ojeupe. A'eramū taetu 'ga opājē esage mua 'gā nupe. A'eramū taetu 'gā aeremiapoe'ema apou akou. A'e resakara 'gā oporesagamū 'gā nee. A'eramū 'gā 'jau ajaupe:

—A'jea futat 'gā 'ea. Sā'ā Janeruwarete 'ga aeremiapoe'ema apoukara 'gā nupe— 'jau 'gā ajaupe.

⁴ A'ere naju'jaju'jawe tee rūi 'gā poromutamamū Paulo 'ga ree Panape 'ga retee. A'eramū amumera 'gā etee oporomutamamū judeu 'gā nee.

⁵ A'eramū 'gā ajatykau ojemoywrafena 'gā nee. Judeu, judeue'em. Mīmera 'gā ajatykau o'wyrīa'ri 'gā netee. Ita pyu 'gā juka are 'gā afuweramū.

—Pe'je ajee ita pyu sijuka 'gā 'ū— 'jau 'gā ajaupe.

⁶ A'ea 'ga amū enupa. A'eramū 'ga awau imome'wau Paulo 'ga upe.

—Ita pyu pē juka are 'gā fuweramū ki 'ei— 'jau 'ga Paulo 'ga upe.

A'eramū Paulo 'ga 'jau Panape 'ga upe:

—Pe'je ajee soo jareka'jama 'gā nui— 'jau 'ga 'ga upe.

—Nai'i. Ere ajee iruukwe— 'jau Panape 'ga 'ga upe.

A'eramū 'gā oka'jama jui. Likonia wywy pe 'gā awau oka'jama. Listra 'jawa 'upa Likonia wywy pe. Teripe 'jawa nanē 'upa Likonia wywy pe futat nū.

⁷ Kwe pe 'gā awau akou morogyta esage mome'wau 'gā nupe.

—Werowiarāmū Jejuu 'ga aetywera pe'ai ae wi— 'jau 'gā awau akou imome'wau 'gā nupe.

⁸ Listra 'jaw ipe ipyteu ma'e 'ga 'ūina wapyka. Nuatai futari 'ga u'aa pyy we futat.

Peuwara 'gā nupe Paulo 'ga Jejuu 'ga mome'uramū ipyteu ma'e 'ga nanē 'ūina enupa nū.

⁹ A'eramū ipyteu ma'e 'ga 'jau ojeupe 'ūina. “Kuu. Arowiat pa je 'ga kwy. Tajekatu'ok 'ga 'jau kwy”, 'jau 'ga 'ūina ojeupe tee futat.

Poje Paulo 'ga amā'jāu iteu ma'e 'ga ree. “Werowiat pa ipyteu ma'e 'ga Jejuu 'ga 'ūina ra'e”, 'jau 'ga ojeupe.

¹⁰ A'eramū 'ga 'jau 'ga upe:

—Efu'am jui— 'jau Paulo 'ga 'ga upe.

A'erauwe ipyteu ma'e 'ga pori pym afu'ama awau watau.

¹¹ A'eramū futat 'ga fu'ama resakara 'gā wafukaita:

—Kuu. Nakūima'e 'gā nūi ra'e nū'ū. Maira 'gā te 'ut owaēma janee ra'e— 'jau 'gā Paulo 'ga upe, iteu ma'e 'ga mafu'amamū.

Oje'eg imū etee 'gā ajemogyau wafukaita. A'eramū Paulo 'ga 'gā afukaja kwaape'ema.

¹² A'eramū 'gā omaira rera nuga 'gā nee. Jupete 'gā inuga Panape 'ga ree. Paulo 'ga oje'ega u'ama 'gā nupe. A'eramū 'gā Mekuriu nuga 'ga ree.

¹³ 'Gā maira roga, Jupete roga, 'ūina amunawa rowase. 'Gā maira rog are omaenun ma'e 'ga mukūja kwatau rerawau 'ywotyra reewe. 'Ywotyra monou kwatau are.

—Simuoryp Paulo 'ga Panape 'ga retee 'jau. Maira futat 'gā na'e. Sijuka kwatau iapyau 'gā nupe— 'jau 'gā ajaupe numiamū.

¹⁴ A'e resakawe Paulo 'ga 'jau Panape 'ga upe:

—Kuu. Maran te 'gā “kwataua sijuka 'gā nupe”, 'gā 'i janee 'wei?— 'jau Paulo 'ga Panape 'ga upe. —Jarejuwarete 'ga upe etee te 'ā ae kwatau jukai iapyau rakue. Jane upe niapyawarūi — 'jau Paulo 'ga Panape 'ga upe.

A'erauwe 'gā awau ujāna wafukaita 'gā nupe.

¹⁵ —Pē'me eteete awi nū'ū. Pē 'jawewara te ore. Namaira rūi ore— 'jau 'gā 'gā nupe.

Waity monoroka awau 'gā nepejāna wafukaita. 'Gā jemuaēma 'gā nerekou 'gā naity monorogukaa 'gā nupe.

A'eramū 'gā 'jau kwatau apisi are ifuwet ma'e 'gā nupe:

—Jejui 'ga je'eg are te ore ruri pē mu'jau— 'jau Paulo 'ga 'gā nupe. —Au'je ki maira'me rerowiar ire 'awamū. Jejui 'ga 'ā ako ma'ea. A'eramū pēē 'ga etee erowiaa ete Jarejuwarete 'ga retee. 'Gā te ako ma'ea. 'Gā nupe etee peporogyta etee. 'Gā te aeje'ega wanup— 'jau Paulo 'ga 'gā nupe. —'Aga maira'me a'agawa peje'ega nuenuwa'uweri. A'eramū pēē jepojoiā jui. Jarejuwarete 'ga te perowiat. 'Ga te namanūa'uweri. Aeje'ega wanup ojeupe aeje'egamū— 'jau Paulo 'ga 'gā nupe. —'Ga te 'agamū ywya wapo rakue. Mama'ea wapo katu katu rakue. Ywaga 'ga iapou. Wyra, wyra'i, ipira, 'y. Nitywi futari mama'e mū 'ga remiapoe'emera. Ma'eramū 'ā ae 'ga remiapofer imū etee futat 'ga kwaawi— 'jau Paulo 'ga 'gā nupe imome'wau.

¹⁶ —Ymā te Janeruwarete 'ga janeremifutara apoukari etee janee rakue.

¹⁷ A'ere jane 'awamū 'ga remiapofera esage resagi. A'eramū jane 'ga remiapofer imū etee futat 'ga kwaapa. 'Ga te 'ā amana amut janee. 'Ga te 'ā mama'e motyarūmū ityarama rupi etee futat. A'eramū'ua nanē nū. 'Ga te 'ā imua janee nanē nū. Mīmera 'ga 'ā iapou katu katu ae maku'iwamū— 'jau Paulo 'ga 'gā nupe.

¹⁸ A'ere aipo 'gā 'eramū miamū 'gā kwatau juka are 'gā fuweramū etee futat.

¹⁹ A'e pe judeu 'gā amū 'ua owaēma 'gā nupe. Ātioki 'jaw awi 'gā 'ua. Ikoniū 'jaw awi 'jau. Ikoniū 'jaw ipe 'gā nekoramū judeu 'gā amara'neramū 'gā nee rai'i. A'eramū Paulo 'ga ojee 'gā mara'neramū awau ajepeja amunaw ipe Panape 'ga retee. A'ere 'gā nee imara'ne ma'e 'gā oi tee 'gā newiri. A'e 'gā poromū 'ut o'meramū 'gā nekwaw ipewara 'gā nupe.

—Nia'wyri noko 'gā— 'jau futatee 'gā 'gā nupe.

A'eramū aipo amunaw ipewara 'gā nanē amara'neramū 'gā nee nū. “Nia'wyri noko 'gā”, 'ga 'e futateeramū.

A'eramū 'gā Paulo 'ga apiau ita pyu 'ga rerekou. A'eramū 'gā Paulo 'ga jukawaipa ita pyu.

A'eramū 'gā 'ga rerawau eroyryryka amunaw awi. 'Ga rerawau inuga yty apy'rarimū. “Amanū nipo 'ga re'ā”, 'jau 'gā 'ga rerawau inuga ejaa.

²⁰ A'ere Jejui 'ga rerowiaara 'gā oi 'ga ywyri ajatykau. Ojeywyri 'gā jatykaramū 'ga oferapa 'gā nupe nū. Afu'ama awau amunaw ipe osou nū, Panape 'ga retee nū. Ai'iwe Paulo 'ga Panape 'ga retee awau pe awi. Ajepeja amunaw ipe Teripe 'jaw ipe awau ajukaaiw ire nū.

²¹ Peu Teripe 'jaw ipe Paulo 'ga Panape 'ga retee Jejui 'ga mome'wau 'gā nupe nū:

—Jejui 'ga werowiarāmū 'ga ae katu'ok— 'jau Paulo 'ga 'gā nupe, Teripe 'jaw ipewara 'gā nupe.

A'eramū kwaiwete 'gā Jejui 'ga rerowiaa.

A'ere 'gā awau ojewya wekwawera amunaw ipe nū. Listra, Ikoniū, Ātioki. Mīmera amunaw ipe 'gā awau ojewya nū. Ātioki 'upa Pisiri ywy pe.

²² A'ea wekwaw ipewara 'gā nupe oporogytau, Jejui 'ga rerowiaara 'gā nupe.

—Pēē 'ā Jejui 'ga rerowiaara. A'eramū pēē pejeku'iramū, peje'arasige'emamū. Jejui 'ga rerowiaare'ema 'gā nipo “O'meramū te 'gā 'i”, e'i pē nupe. “Nia'wyri Jejui 'ga rerowiaara”, e'i pē nupe, pē nerekou tyweaete— 'jau 'ga 'gā nupe u'ama. —A'ere kasi Jejui 'ga rerowiaara peetyg ine. Pejejemogyppyka etee Jejui 'ga ree. “Ga rerowiar awi oropoire'em ire ore oi ywag ipe anure”, pe'je etee ki pejejaupe— 'jau Paulo 'ga Panape 'ga retee 'gā nupe. —“Janeruwarete 'ga ore'wyriara”, pe'je ete ki pejejaupe, aipo 'gā 'eramū— 'jau Paulo 'ga 'gā nupe.

Akou amunawa moyka, awawera amunaw ipe etee te futat 'gā awau akou 'gā mu'jau nū.

²³ A'eramū futat 'gā amunaw ipe owaēmawe 'gā 'ga amū muēma imogou 'wyrriaramū Jeju 'ga rerowiaara 'gā nupe, pastor 'jawa mogou 'gā nupe. Peu amunaw ipe owaēmawe nanē nū nānēwējēmī futat imuēma imogou 'gā nupe. Aipo apo re 'gā ojem'i'ware'ema Ku'jywa 'ga upe oporogytaawamū:

—Ku'jyp. Jeju 'ga rerowiaara 'gā 'wyrriara 'gā nee ore oroje'ega monoi enee. Ojem-ogyppyk 'gā ene ree. A'eramū ene ejejukau 'gā nee— 'jau 'gā oje'ega monou Jarejuwarete 'ga upe 'gā nee.

²⁴ A'ere Jarejuwarete 'ga upe oje'ega mono re awau nū. Awau Pisiri ywy raapa. Awau Periki 'jawa amunaw ipe, Pāfiria ywy pe 'up ma'e pe.

²⁵ A'e pe 'gā Jeju 'ga mome'wau peuwara 'gā nupe nū. A'e awi 'gā awau Ataria 'jawa amunaw ipe nū. Ataria 'upa 'yē'e 'arimū.

²⁶ A'e pe 'gā yaru pype u'aawa mepyau. Awau ojewya 'uawera amunaw ipe Ātioki pe nū. Siria ywy pe 'up ma'e nū. A'ea amunaw awi 'gā o enune Jeju 'ga rerowiaara 'gā oje'ega Jarejuwarete 'ga upe rai'i: “Ejejuka esage ki 'gā nee 'gā nerekou. Eneje'ega 'gā oo imome'wau akou kwe pe. A'eramū ene ejejukau 'gā nee”, 'jau 'gā oje'ega Ku'jywa 'ga upe rai'i. Aipo Jarejuwarete 'ga upe 'gā 'e re Paulo 'ga awau watau Panape 'ga retee akou Jeju 'ga mome'wau rai'i. A'ere 'gā aipo 'gā porowyky teepawamū 'awamū. A'eramū 'gā 'ua ojewya nū Ātioki pe nū.

²⁷ A'eramū 'gā owaēm ire Jeju 'ga rerowiaara 'gā majatykau. A'eramū futat 'gā wekwawera mome'wau, Jarejuwarete 'ga ojeupe iapoawera mome'wau 'gā nupe:

—A'jeteetewi te 'ga iapoi oree. Judeue'ema 'gā we futat werowiat— 'jau 'gā 'gā nupe. —Nanuara futat te 'ā Ku'jywa 'ga afutat Jeju 'ga rerowiaara. Najudeu 'gā etee rūi erowiaara futat te 'ā 'ga afutat. Judeue'ema 'gā erowiaara nanē futat te 'ā 'ga afutat nū. Nanuara futat te 'ā esage 'ga upe— 'jau 'gā ajaupe, worywamū 'gā imome'u are.

²⁸ A'eramū Paulo 'ga Panape 'ga retee akou fukuu 'gā pyri peu.

15

Jerusareg ipe 'gā oawet

¹ Anure judeu 'gā amū 'ua oje'wyr awi, Judeja ywy awi. Ātioki pe awau. A'e pe 'gā Jeju 'ga rerowiaara 'gā mu'jau tyweruu.

—“Pe'je pejewau pejemojewagukaa 'gā nupe. Moisesi 'ga remikwasiarer imū etee futat peapo. Kasi a'e pe Ku'jywa 'ga nepē katu'ogi ne”, e'i Moisesi 'ga rakue— 'jau 'gā 'gā nupe.

² A'eramū Paulo 'ga Panape 'ga retee 'jau 'gā nupe:

—Naani. O'meramū te 'gā 'i. Perowiat kasi 'gā ne. Judeu 'gā nupe etee te Moisesi 'ga 'i rakue— 'jau 'ga 'gā nupe. —A'ere pēē naani. Nepemojewakawi. Judeu 'gā 'jawe 'e re amunipo 'ā nan tee futat pejemojewak. A'ere naani. Niapoawi aipoa. Jeju 'ga ae erowiarāmū te Janeruwarete 'ga ae katu'ogi— 'jau Paulo 'ga Panape 'ga retee 'gā nupe.

A'eramū 'gā ajamueu kwaiwete aipoa morogyta are. A'ere 'gā nojomojerowiari etee. A'eramū Paulo 'ga awau Panape 'ga retee Jerusareg ipe oporonupa ee Jeju 'ga remimonofera 'gā nupe. A'eramū peuwara 'gā 'gā amū monou 'gā nupi. Peu Jerusareg ipe 'gā 'gā monou aipoa morogyta are 'gā momoranuwukaa.

—Pe'je pejewau peu Jeju 'ga remimonofera 'gā nupe pejeporonupa ee. “A'jea te ae judeurāmū etee aejemojewagi?” tepe'je 'gā nupe 'jau. “A'jea te ae ijewak ma'eramū etee ae jekatu'ogi?” pe'je pejewau Jeju 'ga remimonofera 'gā nupe. Jeju 'ga rerowiaara 'gā 'wyrriara 'gā nupe nanē pēē pejeporonupa ee nū— 'jau 'gā 'gā nupe 'gā monou peu.

³ A'eramū 'gā awau Jerusareg ipe oporonupa ee. Ātioki 'jaw awi 'gā awau. Awau 'gā Fenisia ywy raapa. A'ere Samari ywy raapa nū. Awaw ipe 'gā akou oporogytau Jeju 'ga rerowiaara 'gā nupe. Amunawa moyka.

—Ymāwarera 'gā 'awamū wetyppap. Jeju 'ga ete 'gā 'awamū werowiat. Judeue'ema 'gā we futat 'ga werowiat— 'jau 'gā Samari ywy pewara 'gā nupe imome'wau.

Aipo ojeupe imome'uramū 'gā aku'iramū.

—A'jea futat. Nanuara futat te 'ā Janeruwarete 'ga afutat— 'jau 'gā 'gā nupe.

⁴ Nan futat awau akou kwe pe imome'wau. Awau 'gā owaēma Jerusareg ipe. Jerusareg ipe 'gā waēm ire Jeju 'ga rerowiaara 'gā 'gā napeje'ega. Jeju 'ga rerowiaara 'gā 'wyrriat, Jeju 'ga remimonofet. Mīmera 'gā 'gā napeje'ega.

A'eramū Paulo 'ga Panape 'ga retee wekwawera mome'wau 'gā nupe.

—Kwe pe ore oi arakou Jeju 'ga mome'wau amunawa moyka ikue. A'eramū 'gā Jeju 'ga rerowiaa kwaiwete. Judeue'ema 'gā we futat erowiaa. Ymāwarera 'gā etykapap. A'eramū 'gā 'awamū Jeju 'ga rerowiaa ojekatu'okawamū— 'jau 'gā 'gā nupe, wekwawera mome'wau.

⁵ A'eramū fariseu 'gā amū afu'ama oje'ega 'gā nupe:

—Naani. Jejuu 'ga rerowiar ire judeue'ema 'gã we futat 'awamũ 'gã jemojewagi Moisesi 'ga je'eger imũ etee futat. 'Ga 'eawer imũ etee futat 'gã nanẽ mama'e apoi ore 'jawe nũ—'jau fariseu 'gã 'gã nupe.

⁶ A'ere Paulo 'ga nafutari etee futat. A'eramũ 'gã oporogytau kwaiwete aipoa morogyta are. "Simu'e wẽjẽmũ futat nipo aje jane 'gã Moisesi 'ga remikwasiarer are nũ? Naani futari te ra'u nũ?" 'e are 'gã ajamueu kwaiwete.

⁷ A'eramũ kwaiwete 'gã jamue re Pedro 'ga afu'ama oporogytau 'gã nupe:

—Kunumĩmet, Peapyaka je ree. Je te ako Jejuu 'ga je mogo judeue'ema 'gã nupe morogyta esage mome'waramũ ikue. A'eramũ pẽẽ ikwaapa 'ga 'eawera. "Tejerowiaramũ te je 'gã katu'ogi", e'i 'ga ikue. A'eramũ 'ga werowiaramũ te ae katu'oka— 'jau Pedro 'ga 'gã nupe.

⁸ —Janeruwarete 'ga okwaap katu katu mama'ea. A'eramũ 'ga ikwaapa werowiaramũ. A'eramũ ako 'ga U'agesage mua judeue'ema 'gã nupe nanẽ futat ai'i nũ. Sooko 'ga judeuramũ imura janee ikue. Nan futat ako 'ga imua 'gã nupe ai'i.

⁹ A'eramũ 'ga werowiaramũ te ae katu'oka— 'jau Pedro 'ga 'gã nupe. —Jarejuwarete 'ga upe jane aju'jaju'jawe etee futat. A'eramũ ako 'ga 'gã werowiar ypyrauwe 'gã katu'oka ikue— 'jau Pedro 'ga 'gã nupe, u'ama oporogytau.

—Sooko 'ga jane upe iapoa ikue nũ. Nan futat ako 'ga iapoi 'gã nupe ai'i.

¹⁰ Ma'eramũ sipo ajee Jarejuwarete 'ga je'ega erekoemãpyra 'jawe etee pereko? "Simamara'neukat 'ga jarejee", pe'je 'ã— 'jau Pedro 'ga 'gã nupe u'ama oporogytau.

—Ymã miamũ 'ã janeypy 'gã nuenupawa'uweri Moisesi 'ga je'egera rakue. Jane nanẽ nienupawa'uweri nũ. A'etea 'ã pẽẽ "Simu'e 'gã 'ga je'eger are", pe'je 'gã nupe.

¹¹ Na'ga je'egera renuparamũ rui Jejuu 'ga ae katu'ogi. Jejuu 'ga ipota'wata'wa ae ree. A'eramũ 'ga ae werowiaramũ etee ae katu'oka— 'jau Pedro 'ga oje'ega 'gã nupe u'ama.

¹² A'eramũ 'gã opika etee ajemogyau Pedro 'ga je'ega renupa. Wea'aramũ ajemogyau aipoa morogyta are.

A'eramũ Paulo 'ga Panape 'ga retee wekwawera mome'wau nũ:

—Kwe pe Janeruwarete 'ga ore monoi ai'i. A'eramũ judeue'ema 'gã 'ga rerowiaa kwaiwete. Aeremiapoe'ema nanẽ 'ga iapoukaa oree 'gã neape ai'i— 'jau 'gã 'gã nupe imome'wau.

¹³ 'Gã porogytapaw ire Tiago 'ga afu'ama oporogytau 'gã nupe nũ:

—Peapyaka je ree nanẽ nũ.

¹⁴ Simão Pedro 'ga je'ega jane ako sienup ko. Janeruwarete 'ga a'jea futat opãjẽa wesaukat judeue'ema 'gã nupe. A'eramũ 'ga opota'waramũ 'gã nee. A'eramũ 'ga 'gã amũ mũ'jãu werowiaramũ a'jea futat— 'jau Tiago 'ga 'gã nupe.

¹⁵ —Ymã te Janeruwarete 'ga ka'arana kwasiarukari aipo are oje'ega mome'wara 'gã nupe rakue:

¹⁶ "Je Pẽnuwaretea.

Ymã te je Davi 'ga mogoi 'wyriaramũ tejemiayuwa 'gã nupe ikue.

A'ere 'ga manũ re jeremiayuwa 'gã poiri je wi.

A'eramũ je 'gã mokwasi'waukaa.

A'ere nipo je anure 'gã majatykai nũ", 'jau 'ga rakue.

¹⁷ "Omajatykaramũ te nipo 'gã je rerowiari nũ.

Towajat tesirũmeretea we futat nipo je rerowiaa.

Tejemipyryũmera 'gã tejerowiaara futat, te je 'ã afutat",

¹⁸ 'jau Janeruwarete 'ga rakue— 'jau Tiago 'ga 'gã nupe imome'wau u'ama.

¹⁹ —Ma'eramũ je 'ã aipo je 'i pẽ nupe: Tene judeue'ema 'gã jemogyi. Jarejuwarete 'ga 'gã werowiat. Nanuara futat te 'ã esage Ku'jywa 'ga upe.

²⁰ A'eramũ jane ka'arana etee amũ monou ikwasiaa 'gã nupe aipo 'jau:

—Pe'u kasi maira'me a'agawa upe eroopyrera kumia ne. Ajepeja aipo 'jau. Wya rya ki pemonykyt jui. Wy monykyr ire etee ki miaro'o peeyt i'wau. Pe'u kasi wya ne. Wy monykyre'ema nanẽ pẽẽ i'wawe'em nũ. Ajepeja aipo 'jau. Kũima'eramũ ae ajumireko are akowe'em. Kũjã nanẽ nũ. Ojomen are akowe'em. Omena etee futat erekou. Ae nanẽ wemirekoa etee futat erekou nũ. Aipoa sa'e imonou ikwasiaa ka'aran are 'gã nupe— 'jau Tiago 'ga 'gã nupe.

²¹ —Ymã we futat 'gã 'ã Moisesi 'ga remikwasiarera mogyta renuwi ajemogyau judeu 'gã jatykaaw ipe rakue, morowykye'ema momagwamagwapa rakue. A'eramũ 'gã ikwaapa futat Jarejuwarete 'ga je'ega— 'jau Tiago 'ga u'ama 'gã nupe.

A'eramũ 'ga pytuna 'gã Tiago 'ga 'e futaa. A'eramũ 'gã 'jau ajaupe:

—A'jea futat aipo resageramũ. A'eramũ jane nan iapou— 'jau 'gã ajaupe.

Judeue'ema 'gã nupe 'gã 'eawer

²² A'eramũ Jejuu 'ga remimonofera 'gã amũ, Jejuu 'ga rerowiaara 'gã, 'gã 'wyriara 'gã netee ajatykau oporogytau ajaupe:

—Simono jarepytuna 'gā amū 'gā nupi Ātioki pe 'jau— 'jau 'gā ajatykau oporogytau. A'eramū 'gā 'gā monou 'gā nupi. Paulo, Panape. Mīmera 'gā nupi 'gā 'gā monoi. 'Ga amū rera Judas. Mukūi aipo 'ga rera. Pasapasi 'ga rer irūa. Ajepeja 'ga rera Silasi. Aipo kūima'e 'gā nee Jerusareg ipewara 'gā ojemogyppyka. A'eramū 'gā 'gā mū 'jau Ātioki pe 'gā monoawamū.

²³ A'eramū 'gā najuejue etee futat ka'arana kwasiaa imonou Ātioki pewara 'gā nupe:

Ore mū Jeju 'ga remimonofera, ore mū 'ga rerowiaara 'gā 'wyrriara, ore mū 'ga rerowiarypya. A'eramū ore ka'arana kwasiaa imonou pē nupe. Oropytuna 'gā amū nanē ore imonou pē nupe nū. “Jarujete te pejemogy” 'ea ore imonou pē nupe, 'ga rerowiaar yauramū Ātioki pewaramū, Siria ywy pewaramū, Sirisia ywy pewaramū nanē nū. Pēē judeu'ema juejue.

²⁴ Morogyta mū ore aruenup. Oropytuna judeu 'gā amū a'e oo peu Ātioki pe pē mu 'jau tyweruu rai'i. A'eramū 'gā a'e “pejemojewag iki”, 'jau pē nupe rai'i. “Kasi a'e pe Janeruwarete 'ga nepē katu'ogi ne”, 'jau 'gā a'e pē nupe rai'i. A'ere 'gā naoreje'eg imū rūi 'gā oi. Ojeteet futat 'gā oi ekoete pē mu 'jau tyweruu akou rai'i.

²⁵⁻²⁷ A'eramū ore a'eramū oropytuna 'gā amū monou 'gā moporogytaukaa pē nupe. Paulo 'ga futat ako 'ut Panape 'ga retee rai'i. 'Gā 'ā jarejekoty'aaw esagea futat. A'eramū 'gā nupi ore oropytuna 'gā monou. Silasi 'ga, Judas 'ga. Mīmera 'gā ore imonou 'gā nupi. Oroporogytafera nipo 'gā imome'wau pē nupe nū, 'jau 'gā imonou ikwasiaa ka'aran are.

Paulo 'ga Panape 'ga retee akou Jeju 'ga mome'wau 'gā nupe. Afueweramū agawewi 'gā 'gā nee rai'i. A'etea 'gā Jeju 'ga omome'u amunawa moyka rai'i. A'eramū a'e 'gā kwaiwete Jeju 'ga rerowiaa rai'i.

²⁸ A'eramū ore porogyta ore ruwamū Janeruwarete 'ga 'Agesagea ore poaa, ore mu'akwaapa. A'eramū ore Jarejuwarete 'ga 'eawer imū imonou ikwasiaa ka'aran are pē nupe.

²⁹ Pe'u kasi maira'me a'agawa upe eroopyrera kumia ne. Wya rya ki pemonykyt jui. Wy monykyr ire etee ki miaro'o peeyt i'wau. Pe'u kasi wya ne. Wy monykyre'ema nanē pēē i'wawe'em nū. Kūima'eramū ae ajuemireko are akowe'em. Kūjā nanē nū. Ojomen are akowe'em. Omena etee futat erekou. Ae nanē wemirekoa etee futat erekou nū.

Aipo renuw ire nipo a'jea futat pejemogy esage. Pejejuka esage ki pejejue. Teepap ore 'ea.

Aipo e'i ete ore je'ega ka'aran are.

³⁰ A'ere 'gā wemimuēmera 'gā monou judeu'ema 'gā nupe. A'eramū 'gā awau Paulo 'ga rupi, Panape 'ga reewe. 'Gā ka'arana rerawau Ātioki pewara 'gā nupe.

Ātioki pe owaēm ire 'gā Jeju 'ga rerowiaara 'gā majatykau. Ka'arana monou 'gā 'wyrriara 'ga upe.

³¹ A'eramū 'gā 'wyrriara 'ga imogytau 'gā nupe. A'eramū 'gā 'ga je'ega renupa. A'eramū futat 'gā aku'iramū ajemogyau. Kwaiwete 'gā ku'iramū.

³² Imogytapaw ire Judas 'ga Silasi 'ga retee oporogytau 'gā nupe. Jarejuwarete 'ga je'ega mome'wara 'gā poromū. A'eramū 'ga 'jau 'gā nupe:

—Pe'je pejejemogyppyka Jeju 'ga je'eg are. 'Ga je'ega peenup. A'eramū pēē erowiaa futat. Peetyk futat kasi 'ga rerowiara ne— 'jau Judas 'ga Silasi 'ga retee 'gā nupe.

³³ A'eramū 'gā akou fukuu'i 'gā pype. A'ere 'gā pype ako fukuu'i re 'gā o'wya akou 'gā nui nū.

—Ko ore oi arakou pē nui nū— 'jau 'gā 'gā nupe.

—Pe'je 'wei. Jarujete nipo peo pejekou 'ja. “Jarujete te pejemogy” 'ea 'gā amut pē nupe, pe'je ki jarejewirera 'gā nupe— 'jau Jeju 'ga rerowiaara 'gā 'gā nupe.

A'eramū 'gā awau ojewya oje'wyr ipe nū.

³⁴⁻³⁵ A'eramū Paulo 'ga Panape 'ga retee ete akou fukuu'i peu, 'gā mu 'jau nū, opytuna Jeju 'ga rerowiaara 'gā netee. A'eramū 'gā kwaiwete Jeju 'ga rerowiaa ajemogyau.

Panape 'ga wi Paulo 'ga pojo'okawet

³⁶ Anure Paulo 'ga 'jau Panape 'ga upe:

—Soo jarewawera amunawa momyrūmū jarekou Jeju 'ga rerowiaara 'gā nesaka 'jau nū. “Werowiat je sipo 'gā 'ga ajemogyau” 'e resaka 'jau— 'jau Paulo 'ga Panape 'ga upe.

³⁷ A'eramū Panape 'ga 'jau 'ga upe:

—Juā Maku 'ga ki ajee siroo jarejeupi nū— 'jau Panape 'ga Paulo 'ga upe.

³⁸ A'ere Paulo 'ga niparueroweri Juā Maku 'ga ree.

—Nanuara ako 'ga ojewyt etee jane wi ikue. Pāfiria ywy pe jane rekoramū ako 'ga jewyri jane wi ikue— 'jau etee Paulo 'ga Panape 'ga upe.

³⁹ A'eramū 'gā a'eramū ajamueu Juā Maku 'ga rerooe'em are. A'eramū 'gā opojo'ogamū ajau. A'eramū Panape 'ga Juā Maku 'ga retee awau yaruu pype. 'Ypō'ōūū me 'gā awau, Sipiri pe.

⁴⁰ A'eramū Paulo 'ga Silasi 'ga etee erawau oirūnamū nū. A'eramū 'gā pytuna 'gā oje'ega monou Jarejuwarete 'ga upe 'gā nee:

—Ku'jyp. Kwe pe 'gā oi watau akou. Esag iki 'gā e'ŷina. Emu'akwaaw iki 'gā imogyau— 'jau 'gā oje'ega Jarejuwarete 'ga upe, 'gā o enune 'gā nee.

⁴¹ A'ere Paulo 'ga Silasi 'ga rerawau erekou Jeju 'ga rerowiaara 'gā nupe eroporogytau. Awau 'gā Siria wyy raapa. A'eramū 'gā awau Sirisia wyy raapa nū. Jeju 'ga rerowiaara 'gā maku'iu 'gā awau oporogytau 'gā nupe.

16

Paulo 'ga rupi Timoteo 'ga oawet

¹ A'ere Paulo 'ga Silasi 'ga retee awau owaēma Teripe 'jaw ipe, Listra 'jaw ipe 'jau. Listra 'jaw ipe Jeju 'ga rerowiaara 'ga amū akou. 'Ga rera Timoteo. 'Ga y ēē judeua. Ēē nanē Jeju 'ga rerowiaa nū. A'ere 'ga ruwa 'ga gregoa.

² Listra 'jaw ipe ajemogy ma'e, Ikoniu 'jaw ipewara 'gā netee oporomutaramū Timoteo 'ga ree. A'eramū 'gā oporogytau esage Timoteo 'ga ree Paulo 'ga upe.

³ A'eramū Paulo 'ga Timoteo 'ga reroo are afueweramū ojeupi. A'eramū 'ga 'ga mojewaka judeu 'jawe. Peu ajemogy ma'e 'gā judeu 'gā okwaapap, "Gregoa Timoteo 'ga ruwa 'ga" 'e kwaapa. A'eramū 'ga ruwa 'ga Timoteo 'ga mojewake'ema rakue.

—Judeu 'gā pyri soo 'jau. A'eramū je ene mojewaka ra'ne— 'jau Paulo 'ga Timoteo 'ga upe. A'eramū Paulo 'ga 'ga mojewaka. 'Ga y ēē judeua wejue. A'eramū 'gā 'ga mojewaka.

⁴ 'Ga mojewag ire 'gā awau. Paulo, Silasi, Timoteo. Mīmera 'gā awau akou amunawa moyka Jeju 'ga rerowiaara 'gā nesaka. Jerusareg ipewara 'gā 'eawer are 'gā 'gā mu'jau awau akou. Jeju 'ga remimonofera 'gā 'eawera mome'wau 'gā nupe.

—Pēē 'ā judeue'ema. A'ere 'ā pēē jēmī Jeju 'ga perowiat. A'eramū ki pēē 'gā 'eawera renupa pejejomogyau— 'jau Paulo 'ga 'gā nupe.

⁵ A'eramū Jeju 'ga rerowiaara 'gā opoire'ema futat 'ga rerowiar awi. Ywawuje futat 'ga rerowiaa ajemogyau. A'eramū futat 'gā awau ajamu'jau Jeju 'ga je'eg are. A'eramū futat 'gā Jeju 'ga rerowiaa, kwaiwete. Ai'iwe amū nū, ai'iwe amū nū, ai'iwe amū nū. Kamēšiete futat Jeju 'ga rerowiaara 'gā awau ojemomytuna.

Masetoni wyy pewara 'ga Paulo 'ga mo'wyawet

⁶ 'Gā mu'epaw ire 'gā awau ajepeja wyy pe nū. Frigia wyy raapa awau. Garasi wyy pe nanē 'gā awau nū, peuwara 'gā mu'jau nū. Asia wyy pe te 'gā awau etee numiamū. A'ere Janeruwarete 'ga 'Agesage je'egi 'gā nupe:

—Kwe pe peo awi— 'jau 'ga 'Agesagea oje'ega 'gā nupe.

A'eramū 'gā awawem'em Asia wyy pe. Misia wyy pe etee 'gā awau.

⁷ Pe awi 'gā o'wya Pitinia 'jaw ipe numiamū. A'ere nānēwējēmī Janeruwarete 'ga 'i 'gā nupe nū:

—Peo awi kwe pe— 'ga 'i etee 'gā nupe nū. —Ajepeja amunaw ipe te pekwap— 'jau etee 'ga 'gā nupe nū.

A'eramū 'gā awau ajepeja wyy pe etee nū.

⁸ Awau 'gā Misia wyy raapa etee. Awau 'gā owaēma Troate 'jawa amunaw ipe. Peu etee Janeruwarete 'ga 'gā oo futari. 'Yē'ē 'arimū aipoa 'gā wawa 'upa.

⁹ Ypytunimū kūima'e 'ga amū ojesaukaa Paulo 'ga upe, Masetoni wyy pewara 'ga oje-saukaa 'ga upe.

—Ejot ore pyri 'au. Ejot 'au ore mu'jau— 'jau 'ga u'ama 'ga upe.

A'eramū Paulo 'ga wea'aramū wemiesager are. "Janeruwarete 'ga 'ga wesaukat jee. Masetoni wyy pe ekwap Jeju 'ga mome'wau peuwara 'gā nupe, e'i 'ga jee", 'jau 'ga ojeupe wea'aramū ee.

¹⁰ "Janeruwarete 'ga pa je renūi ra'e. Jeju 'ga ekwap imome'wau 'gā nupe, e'i pa 'ga jee ra'e", 'jau 'ga ojeupe. A'eramū 'ga wemiesagera mome'wau opytunamū oree. Imome'u re, Paulo 'ga 'jau:

—"Werowiamū Jeju 'ga pētywera moiri pē nui, ere ewau imome'wau 'gā nupe", 'jau 'ga jee ai'i— 'jau Paulo 'ga oree imome'wau.

Troate 'jaw ipe Lukaramū je rekoi ikue. A'eramū je tewau 'gā nupi, pe awi 'gā oramū.

Firiposi pe 'ga Jeju 'ga mome'uawet

¹¹ Ai'iwetetewe Paulo 'ga ore reru'aa yaruu pype. Arawau 'yē'ē raapa. Arawau orowaēma 'ypō'ōūū mū pe, Samutrasia 'jaw ipe. Peu ore orosea yara pype etee futat. Ai'iwetetewe ore

arawau 'y raapa nū. Arawau 'y owajara katy orojekoka. Neaporisi 'jaw ipe orojekoka. Peu ore yara rejaa arawau ywryi etee futat nū.

¹² Arawau ore orowaēma amunawa upe, Firiposi 'jawa upe. Amunawaretea futat poromū. Nitywi peu amunaw amū nū. Aipoa tāmējē futat 'up rakue. Roma pewara 'gā poromū iapou rakue, oje'wyrarete apou rakue. 'Gā 'wyrareteretea te poromū. Peu futat ore arakorakou'i ikue.

¹³ Morowykye'ema rupi ore aruēma arawau 'y 'arimū oroje'ega monou Jarejuwarete 'ga upe.

—Jarejatykaawa tywe'emamū 'ā jane judeuramū jane porogytai 'y 'arimū 'ga upe jepi— 'jau ore arajaupe.

A'eramū ore arawau 'y 'arimū oroje'ega monou Jarejuwarete 'ga upe. Peu ore arawau aruapyka oroporogytau kūjāmera 'gā nupe. Nitywi kūima'e 'gā. Kūjāmera 'gā etee futat 'up. A'eramū ore kūjāmera 'gā nupe etee futat ore Jeju 'ga mome' wau.

¹⁴ Paulo 'ga renupara mū, Lidia ēē. Jarejuwarete 'ga muorypara mū ēē. Taity esage me'egara ēē. Tiatira pewarera ēē. ēē poromū 'ūina Paulo 'ga Jeju 'ga mome'u renupa 'ūina. A'erauwe futat Jeju 'ga ēē mueapyou Paulo 'ga je'eg are. A'eramū ēē Jeju 'ga rerowiaa.

¹⁵ 'Gā nupe oroporogytapaw ire ore Lidia ēē pymīau 'y pe, ēē pytuna 'gā netee futat.

—Pēē 'ā Jeju 'ga perowiat. A'eramū ore pē pymīau 'y pe— 'jau ore 'gā nupe, 'gā pymīnamū. Opmī re ēē oje'ega oree:

—Pe'je iruukwe jerog ipe. "A'jea futat sipo ēē Jeju 'ga rerowiari ra'e", pe'je jee ne. Jeju kīā rerowiaara futat je 'awamū. A'eramū pēē pejejuu jerog ipe 'awamū pejepytu'wawaipa ore'wyr ipe. Tepekopeko'i ore pyri 'jau— 'jau ēē oree.

A'erauwe ore oi ēē rog ipe.

Paulo 'ga Silasi 'ga retee

¹⁶ Poje ore arawau arajemogyau Jarejuwarete 'ga upe oroporogytaaw ipe. Pe aje kūjāmuku ēē ore rowosōu 'ua. ēē mama'eukwaawa wereko opir are. ēē rupiwara ēē mu'jau mama'e jeaporam are. A'eramū tesirūmera 'gā 'ua oporonupa ijeaporam are ēē upe. A'eramū ēē rupiwara imome'waukaa ēē upe 'gā nupe. Kūima'e 'gā amū ēē jara. Ojeupe imome'u re ee oporonup ma'e 'gā ēē mepyau. ēē futat ka'aranūū pyyka imonou ujara 'gā nupe.

¹⁷ ēē poromū 'ut ore rowosōu. 'Ua ēē ore rewiri wafukaita ekoete.

—Koa kūima'e wā Ku'jywa kīā amut ae katu'oga mome'wau janee. "Jeju 'ga futat aetywera omoit ae wi, ae katu'oka", e'i wā akou imome'wau. "Werowiaramū Jeju 'ga janetywera moiri jane wi, jane katu'oka", e'i wā akou imome'wau janee— 'jau ēē akou wafukaita 'gā nupe, 'ua ore rewiri.

¹⁸ Namutat ēē rekoi iapou. Ai'iwe nū, ai'iwe nū.

Poje Paulo 'ga amara'neramū ēē ree. Omopiro'ysā'ysagamū 'ga ojerowaka ēē ree 'jau ēē upe:

—Jeju 'ga rer imū je 'i enee: Ere ejepe'au ēē wi, ēē tyweramū, 'jau je enee— 'jau 'ga mama'eukwaawa upe.

A'erauwe mama'eukwaawa ojepe'au ēē wi.

¹⁹ A'eramū ēē jara 'gā amara'neramū Paulo 'ga ree.

—ēē piwera eremoit ēē wi ra'e. 'Awamū pa ajee 'gā ka'aranūū namuri oree ra'e— 'jau 'gā amara'neramū Paulo 'ga ree.

A'eramū aipoa kūjā ēē jara 'gā Paulo 'ga pyyka Silasi 'ga retee 'gā nerawau ajatykaaw ipe 'wyriara rowase.

²⁰ —Ko 'gā 'ā kūima'e 'gā a'jea futat judeua ra'e— 'jau kūjā ēē jara 'gā 'gā nerawau 'gā mome'wau 'wyriara 'gā nupe. —A'ere 'ā 'gā nur ekoetei 'au mama'e tywera apou jane'wyr ipe— 'jau 'gā 'gā nupe. —'Gā 'ut ajamamara'neukaa. 'Gā nemimu'ea 'gā mamara'neukat 'gā nee— 'jau futatee 'gā 'wyriara 'gā nupe.

²¹ —Wemiapo are 'ā 'gā nuri jane mu'jau ekoete. Jane 'ā romanū 'wyriara 'ga remiayuwa. A'eramū jane jarejemu'jawe'em 'gā nemiapo are. 'Gā nemiapo are jane jemu'eramū jane 'wyriararete 'ga amara'neramū jane ree. A'eramū jane jarejemu'jawe'em 'gā nemiapo are— 'jau 'gā 'wyriara 'gā nupe.

²² A'erauwe futat peu ajatyka ma'e 'gā afukai:

—A'jea futat te 'ā 'gā mama'e tywera apo ekoetei 'ua 'au— 'jau 'gā wafukaita. —Pe'je ajee sinupā 'gā— 'jau 'gā wafukaita.

A'erauwe 'wyriara 'gā fu'ami 'gā naity monorogukaa 'gā nui.

²³ A'ere 'gā 'gā mopimopika ywyrā'i pyu. 'Gā mopig ire 'gā 'gā nerawaukaa imunewukaa moromunepawa pype. A'ere 'gā 'jau moromunepawa jara 'ga upe:

—Esag iki 'gā. Eremū'eukat kasi 'gā ne— 'jau 'gā 'ga upe.

A'erauwe 'ga rekoi peu moromunepaw ipe 'gã nesaka.

²⁴ Aipo ojeupe 'erauwe, 'ga 'gã nerawau myter ipewara pype 'gã munepa. 'Gã pyju'ã munepa 'jyepanũ kwara pype. A'ere 'ga imotywi 'gã nee. Tyyp 'jau agawewi futat. 'Gã pofaa itaju pyu. Typ.

²⁵ Awau ppyajeaje katu. A'eramũ 'gã 'upa oje'ega monou Jarejuwarete 'ga upe. Amaraka'aga nanẽ 'gã 'upa 'ga upe nũ. Ajepeja moromunepawa pypewara 'gã enupa 'upa.

²⁶ Poje wyy oyyita. Moromunepawa otomoga. Toomog. A'erauwe 'okwara ojeawopytymo'woka. 'Gã pofaawa nanẽ oia 'gã nui nũ. Wit.

A'ere moromunepawa jara 'ga seri 'upa.

²⁷ Poje 'ga opaka amã'jãu moromunepawa 'okwar are.

—Tÿÿ. Te i'ẽi ra'e ù— 'jau 'ga ojeupe.

A'erauwe 'ga fu'ami jyyu rekyita ojee.

—Ajejuka pa je kwyl— 'jau 'ga.

²⁸ A'eramũ Paulo 'ga wafukaita 'ga upe:

—Naani. Ereapo awi. Erejejuka ekoete awi. Naru'ẽi ore mũ ko— 'jau 'ga 'ga upe.

²⁹ A'erauwe moromunepawa jara 'ga je'egi wemiayuwa 'ga upe:

—Tata erut amũ jee 'wei— 'jau 'ga 'ga upe.

A'erauwe moromunepawa jara tata rerooi 'gã nepejãna. Ojeyyamũ 'ga Paulo 'ga wi. 'Ga kyjea 'ga moyyita 'gã nui. Te 'ga oi ty'y wenupy'ãu wapyka 'gã nowase.

³⁰ A'erauwe moromunepawa jara 'ga 'i 'gã nupe:

—Pe'je pejejuu ukupepe— 'jau 'ga 'gã nupe.

A'ere 'ga ukupepe 'gã neroo re 'jau 'gã nupe:

—Ma'ja je iapou tejee 'ũ, tejekatu'okawamũ 'ũ?— 'jau 'ga 'gã nupe.

³¹ —Jejui 'ga erowiat. Janejararete 'ga futat. Werowiarãmũ 'ga tene katu'ok 'jau enepytuna 'gã netee 'jau— 'jau Paulo 'ga 'ga upe.

³² A'erauwe Paulo 'ga Jejui 'ga 'ga mome'ui moromunepawa jara 'ga upe, 'ga pytuna 'gã netee futat. A'eramũ 'gã najueje etee futat Jejui 'ga rerowiaa.

³³ A'erauwe moromunepawa jara 'ga Paulo 'ga kupe piri 'ga ry awi. Silasi 'ga kupe nanẽ ipireita nũ. A'ere 'ga muaga monou 'gã kupe are. 'Gã kupe peruga muaga pyu.

Okupe piriipaw ire Paulo 'ga moromunepawa jara 'ga pymiãu 'y pe, 'ga pytuna 'gã netee. Ojemu'jagamap 'gã Jejui 'ga remiayuwamũ.

³⁴ 'Y pe opymi re moromunepawa jara 'ga 'gã nerawau wog ipe 'gã mojemi'waa. A'erauwe futat moromunepawa jara 'ga ku'iramũ akou. 'Ga pytuna 'gã nanẽ aku'iramũ nũ. Jarejuwarete 'ga 'gã maku'iwaka ojee.

³⁵ Ai'iwetetewe 'wryiara 'gã oje'ega jefaruu 'gã amũ nupe:

—Pekwap 'jau moromunepawa jara 'ga upe: Topoit 'ga 'gã nui 'jau— 'jau 'ga jefaruu 'gã nupe.

A'erauwe jefaruu 'gã oi.

—“Ere epoiã 'gã nui”, e'i 'wryiara 'gã enee ko— 'jau 'gã moromunepawa jara 'ga upe.

³⁶ A'erauwe moromunepawa jara oje'ega Paulo 'ga upe:

—“Epoi esage ki 'gã nui, e'i 'wryiara 'ga enee”, e'i 'gã 'ua jee ra'e. A'eramũ pẽ pejewau. Nepẽ mujãni futari 'gã— 'jau 'ga 'gã nupe.

³⁷ —Naani nũ'ũ. Norooi futari ore nũ'ũ. Jemime nipo 'gã ore mogeukari rai'i? Naani. 'Gã neape 'gã ore mogeukari ai'i— 'jau Paulo 'ga jefaruu 'gã nupe. —Naruapoi agawewi ako ore mama'e tywera ai'i. Romanũa agawewi ore, pẽ 'jawe. A'etea ako 'ga ore nupãnupãukat 'gã neape ai'i. A'eramũ 'ga 'gã neape futat 'ua ore renũ'jãu nũ'ũ— 'jau Paulo 'ga oje'ega moywyrãfena'i jefaruu 'gã nupe.

³⁸ Aipo ojeupe 'erauwe jefaruu 'gã awau ojeywa 'wryiara 'gã nupe 'jau:

—“Tene 'gã nuri. 'Gã futat ore monou”, e'i etee 'ga pẽ nupe ko— 'jau 'gã 'wryiara 'gã nupe.

—“Ore 'ã romanũ 'wryiara 'ga remiayuwa agawewi. A'etea 'gã 'ã ore nupã ekoete ako ai'i”, e'i etee 'ga ko— 'jau 'gã 'wryiara 'gã nupe.

Romanũ 'wryiara 'ga remiayuwa 'gã ae nanupã ekoetei. A'eramũ 'gã okyjuu etee 'gã nui nũ.

³⁹ A'erauwe 'wryiara 'gã awau moromunepaw ipe 'gã pyri:

—Ma'ja ere te ra'e?— 'jau 'gã awau 'gã nupe.

—Pe'je pejejuu ore renũ'jãu pẽ futat, aru'e ore pẽ nupe ko— 'jau Paulo 'ga 'gã nupe.

—A'jea. Pe'je ajee pejewau— 'jau 'wryiara 'ga 'gã nupe. —Pe'je pejewau kwe pe ore wi. Ajepeja amunaw ipe pekwap nũ— 'jau 'gã 'gã nupe. —Ore 'ã arureko tywerete pẽ. A'ere kasi pẽmara'ne ore ree ne. Pe'je pejewau ore wi— 'jau 'wryiara 'ga 'gã nupe.

⁴⁰ A'erauwe Paulo 'ga jewyri awau Silasi 'ga retee Lidia ẽẽ 'wyr ipe nũ. Peu 'ga wekwawera mome'wau Jejui 'ga rerowiaara 'gã nupe. A'erauwe 'gã aku'iramũ ajemogyau 'gã nee 'gã nekwawera renupawe.

'Gã nupe oporogytapaw ire Paulo 'ga awau ajepeja amunaw ipe Silasi 'ga retee nũ. A'eramũ 'gã a'eramũ aku'iramũ ajemogyau.

17

Amunawa moyka Paulo 'ga oawet

¹⁻² A'ere mukũja amunawa pyu 'gã kwawi etee. Anfiopolisi 'jawa pyu, Apolonia 'jawa pyu. Awau 'gã Tesarũna 'jaw ipe etee opytaw. Muapyra 'gã morowykye'ema magwapa aipo pe akou. A'e pe 'gã awau judeu 'gã jatykaaw ipe morowykye'ema rupi. Namutat 'ga akou Jarejuwarete 'ga mogytaawa upe owaẽmawe iapou jepi. A'eramũ 'ga poromũ awau aipo amunaw ipe judeu 'gã nupe oporogytau nũ.

³ Namutat Paulo 'ga akou oporogytau judeu 'ga jatykaawa pype jepi. Jeju 'ga mome'wau judeu 'gã nupe jepi. A'ere aipoa amunaw ipewara 'gã judeu 'gã nokwaawi Jeju 'ga. 'Ga Ruwarete 'ga etee te 'gã werowiat. A'eramũ Paulo 'ga 'gã mu'jau Jeju 'ga ree.

—Ymã te 'ã Jarejuwarete 'ga je'ega mome'wara 'gã ka'arana kwasiari inuga janee rakue. "Jarejuwarete 'ga remimura 'ga nipo ayrũ 'ua janee amanũmũ. A'ere nipo 'ga ruwa 'ga 'gã moferawũ etee nũ", 'jau 'gã ikwasiaa inuga janee rakue. U'eawer imũ etee futat aje 'ã Janeruwarete 'ga 'ga muri janee rai'i. 'Ga futat Jejujãmũ. 'Ga futat Janeruwarete 'ga remimurera 'ga— 'jau Paulo 'ga imome'wau 'gã nupe.

⁴ Paulo 'ga Silasi 'ga retee Jeju 'ga mome'uramũ 'gã amũ Jeju 'ga rerowiaa. A'eramũ 'gã ajemogyau Paulo 'ga rewiri.

Kwaiwete futat grego 'gã ajemogyau Janeruwarete 'ga rerowiaa rai'i. A'ere 'gã nokwaawi te 'ga ra'yra 'ga rai'i. Kũjãmera 'gã nanẽ Jarejuwarete 'ga rerowiaa nũ. Ika'aranũũ kwai ma'e 'gã poromũ kũjãmera 'gã. A'ere 'gã nokwaawi te Jeju 'ga. A'eramũ 'gã Paulo 'ga ojeupe 'ga mome'uramũ te 'ga rerowiaa. A'eramũ 'gã oje'aa Jeju 'ga rerowiaara 'gã nee.

⁵ A'eramũ 'ga rerowiare'ema 'gã ajemogyau peu oje'wyr ipe etee futat. A'eramũ 'gã opytuna ojewi ipojo'ogamũ 'gã nerekoayau ee.

—Ma'eramũ 'gã Paulo 'ga rerowiaa 'ũ? Ma'eramũ 'gã opoia ekoete jane wi 'ũ?— 'jau 'gã ajaupe amara'neramũ.

A'eramũ 'gã awau iarũe'ema 'gã amũ majatykau erua. A'eramũ aipo 'gã awau 'gã nekaa. Paulo, Silasi. Mĩmera 'gã nekaa 'gã awau.

—Sipyyk 'gã jarewau— 'jau 'gã 'gã nupe numiamũ.

A'ere 'gã nukoari 'gã. A'eramũ 'gã awawayau Jasãu 'ga rog ipe 'gã nekaa.

—Ma'ape te 'gã nekoi?— 'jau 'gã Jasãu 'ga upe. —Ma'ape te 'gã na'e? Ere 'gã mũ'jãu oree— 'jau 'gã wafukaita Jasãu 'ga upe.

A'ere Jasãu 'ga 'i:

—Nitywi futari 'gã 'au— 'jau etee Jasãu 'ga 'gã nupe.

⁶ A'eramũ 'gã Jasãu 'ga etee ipyyka erawau. 'Ga pytuna 'gã, Jeju 'ga rerowiaara 'gã netee erawau o'wyrriara 'gã nupe.

'Gã nerawau 'gã neruafukaita erekou:

—Ekoay kũima'e 'gã amũ mama'e tywerete apou akou jane'wyr ipe. Kwe pe 'gã oi amunawa moyka, mama'e tywera apou akou. A'ere 'ã 'awamũ 'gã nuri jane'wyr ipe mama'e tywera apou nũ.

⁷ Jasãu 'ga futat mama'e tywera mome'wara 'gã wereko oje'wyr ipe— 'jau 'gã wafukaita 'gã nerawau. —“NaSesa 'ga rũi pẽ'wyrriaretea”, e'i 'gã oree ai'i. “Jeju 'ga te pẽ'wyrriara”, e'i 'gã oree ai'i— 'jau futatee 'gã Jasãu 'ga rerawau erekou eruafukaita o'wyrriara 'ga upe.

⁸ A'e renupawe 'wyrriara 'gã amara'neramũ. Peu ajatyka ma'e 'gã nanẽ amara'neramũ nũ.

⁹ A'erauwe 'wyrriara 'gã oje'ega Jasãu 'ga upe 'ga pytuna 'gã netee:

—Pe'je ajee ka'aranũũ pe mua oree, pejejewi ore paira repyramũ. A'ere tepeo 'jau— 'jau 'gã 'gã nupe.

A'erauwe 'gã ka'aranũũ monou 'gã nupe ojemepyau. A'erauwe 'gã poiri 'gã nui, 'gã monoukaa.

¹⁰ Awau opytunaiwamũ. A'erauwe Jeju 'ga rerowiaara 'gã je'egi Paulo 'ga upe, Silasi 'ga retee:

—Pe'je pejewau 'aw awi, ore'wyr awi— 'jau 'gã 'gã nupe.

A'erauwe 'gã 'gã monoi Pereja 'jawa amunaw ipe ojewi.

Owaẽma ypy we 'gã awau judeu 'gã jatykaaw ipe. A'erauwe Paulo 'ga Jarejuwarete 'ga je'ega mome'wau 'gã nupe.

¹¹ Peuwara 'gã naTesarũn ipewara 'gã 'jawe rũi. 'Gã wapyaka etee ajemogyau ee. Kwaiwete 'gã ajatykau 'ga je'ega renupa. Paulo 'ga porogytapaw ire 'gã ka'arana pypekau esaka. Ymã te Janeruwarete 'ga ka'arana kwasiarukari oje'eg are rakue. Aipo ka'arana pypekau esaka.

—A'jea futat te Paulo 'ga 'ga je'ega mome'ui? Naani te ra'u nū?— 'jau 'gā.

A'erauwe 'gā ka'arana pypekai esaka.

—A'jea futat ra'e nū'ū. A'jea futat 'ga 'ga je'eg imū etee futat imome'ui ra'e. Sā'ā 'awamū 'ga je'ega ruwa ka'aran are— 'jau 'gā imome'wau ajaupe.

¹² A'erauwe futat 'gā Paulo 'ga je'ega rerowiari ka'arana resag ire.

A'eramū kwaiwete grego 'gā Jeju 'ga rerowiaa. Ka'aranū kwai ma'e kūjā 'gā nanē 'ga rerowiaa kwaiwete nū.

¹³ Poje judeu 'gā, Tesarūn ipewara 'gā, 'gā nera renupa.

—Pereja 'jaw ipe 'gā oi akou Jeju 'ga mome'wau 'gā nupe nū— 'jau 'gā ajaupe.

A'eramū 'gā awau 'gā newiri nū. A'eramū 'gā peuwara 'gā mamara'neukaa 'gā nee nū.

—O'meramū 'gā 'i. Oporogyta 'me te 'gā akou— 'jau 'gā awau peuwara 'gā nupe.

A'eramū peuwara 'gā teewi oje'egayau Paulo 'ga upe nū, 'ga juka are afuweramū nū.

¹⁴ 'Gā newiri 'gā nuramū Jeju 'ga rerowiaara 'gā Paulo 'ga monou ojewi.

—Ere ewau ore wi. Em̄em̄yi'i ewau— 'jau 'gā 'ga upe.

A'erauwe Paulo 'ga oi ojetee futat 'ga awau. 'Ga pytuna 'gā nooi 'ga rupi. Silasi 'ga Timoteo 'ga retee opytaw akou peu futat.

¹⁵ Peuwara 'gā amū ete awau Paulo 'ga rupi 'ga irūnamū. 'Y rupi 'gā 'ga rerawau 'ga rejaa Atenasi 'jawa amunaw ipe.

A'eramū Paulo 'ga oje'ega monou opytuna 'gā nupe, Pereja 'jaw ipe opyta ma'efera 'gā nupe:

—“Kamēsiete ki pejot je rewiri, e'i 'ga pē nupe ai'i”, pe'je ki 'gā nupe jee— 'jau Paulo 'ga oje'ega rerawaukaa 'gā nupe.

—A'eramū Paulo 'ga rerawarera 'gā ojewya 'ua Pereja 'jaw ipe nū. 'Ga rerawarera 'gā 'ua oje'ega Paulo 'ga pytuna 'gā nupe: “Kamēsiete ki pejot je rewiri”, e'i 'ga pē nupe— 'jau 'gā 'gā nupe.

A'erauwe opyta ma'efera 'gā awau Paulo 'ga rewiri nū.

¹⁶ Atenasi pe Paulo 'ga akou opytuna 'gā napesaka. Opytuna 'gā nura poromukuran 'ga akou amunawa momyrūmū. Peu maira'me a'agawa resaka. Kwaiwete maira'me a'agawa aipoa amunaw ipe. A'eramū Paulo 'ga 'jau ojeupe: “Maira'me a'agawa etee pa 'gā wapo ra'e. Nokwaawi pa 'gā Jarejuwarete 'ga ra'e”, 'jau 'ga ojeupe u'arasigamū akou 'gā nee, maira'me a'agawa apoara 'gā nee.

¹⁷ Poje Paulo 'ga awau judeu 'gā jatykaawa pype Jeju 'ga mome'wau 'gā nupe. Kwaiwete judeu 'gā awau peu Jarejuwarete 'ga upe oporogytau. Judeue'ema 'gā nanē awau nū. Judeue'ema 'gā agawewi. A'etea 'gā 'ga rerowiaa judeu 'gā 'jawe. A'eramū 'gā juejue 'ga mome'ū renupa.

Pe awi uēm ire Paulo 'ga awau oporogytau 'gā amunawarete pyter ipe ajemogy tee ma'e 'gā nupe.

¹⁸ Ojemu'e ma'efera 'gā nupe Paulo 'ga awau Jeju 'ga mome'wau. Epikureu 'gā nupe, Estoiku 'gā nupe nanē imome'wau nū.

—Jeju 'ga oferap rai'i nū, amanū re nū— 'jau 'ga u'ama imome'wau ojemu'e ma'efera 'gā nupe.

A'eramū 'gā 'jau:

—Ma'eramū 'ga ma'ja mome'wau janee ki 'ei?— 'jau aipo 'gā ajaupe.

—Tee. Maira mū futat nipo aipo 'ga wemiesaga omome'ū janee nū'ū— 'jau 'gā ajaupe.

¹⁹ A'eramū 'gā Paulo 'ga rerawau ajatykaaw ipe. Areopagu 'jaw ipe 'gā 'ga rerawau.

—Ere ajee iruukwe peu orejatykaaw ipe 'ū— 'jau i'akwaap ma'e 'gā Paulo 'ga upe.

A'eramū 'gā Paulo 'ga rerawau.

²⁰ —Ejemikwaawa emome'upap oree ki 'ei. Norokwaawi we ore aipoa ki 'ei. Maran gatu te aipo ra'e a'i kūi— 'jau 'gā 'ga upe.

A'erauwe Paulo 'ga porogytai 'gā nupe.

²¹ Namutat peuwara 'gā wapyakau ajemogyau morogyta yau are ra'e jepi. A'eramū 'gā Paulo 'ga je'eg are oporenuwiweramū.

—Soo 'ga porogyta yau renupa— 'jau 'gā ajaupe.

²²⁻²³ 'Gā jatykaaw ipe owaēm ire Paulo 'ga awau afu'ama oporogytau 'gā nupe.

—Kwaiwete te pēmaira a'agawa. Kwaiwete te je maira a'agawa resagi tekou teamunawupaw ipe ai'i. “Maira a'agawa 'gā afutat nanimenime”, a'e je tejeupe tewau tekou kwe pe amunawa pyterimū esaka tekou ai'i. A'ere pēē ajepeja ita mojewake'emawe. “Aga ita ore aramu'am oreremikwaawe'ema maira upe”, 'jau 'upa ita are ojekwasiaa— 'jau Paulo 'ga 'gā nupe imome'wau. —'Ga 'ā a'jea futat nepekwaawi we. Je ete te 'ā 'ga okwaap. A'eramū je 'awamū 'ga mome'wau pē nupe— 'jau Paulo 'ga u'ama 'gā nupe.

—'Ga 'ā Janeruwarete te. 'Ga te 'ā mama'ea wapo rakue.

²⁴ Ywya 'ā 'ga iapou rakue. Ywy pewara 'ā 'ga iapou rakue. Ywaga 'ga 'ā iapou rakue. 'Ga te 'ā mama'e jararetea— 'jau 'ga' gā nupe. —Na'oga pype rūi 'ga rekoi. Naeremiapofera pype rūi 'ga rekoi.

²⁵ Nitywi 'ga remifutara mū mama'ea. 'Ga te 'ā mama'e wapo rakue. A'eramū 'ga remifutara otywe'emamū. 'Ga futat te 'ā ae apou rakue. 'Ga futat 'ā ae momytupoa 'agamū rakue— 'jau Paulo 'ga u'ama imome'wau gā nupe.

²⁶ —Majepei'i etee futat 'ga 'ā kūima'e 'ga apou rakue. A'e 'ga juapyrera futat 'agamū ojemomytun— 'jau 'ga u'ama gā nupe imome'wau. —Ae ppy juapyrera te 'ā ajemogy 'agamū. 'Awamū te aje 'ā ae jemogyi okwasi'wasi'wau. 'Y amutee are 'ga gā monou gā mogyau gā mokwasi'wasi'wau— 'jau Paulo 'ga u'ama imome'wau gā nupe.

—Ae'aawera we futat 'ga okwaap. "Awamū futat nipo gā amū 'ari", 'jau 'ga ojeupe 'ūina — 'jau 'ga gā nupe. —"Anure gā amū tamogyukat 'jau", 'jau 'ga 'ūina. 'Ga 'ā jane juejue jane kwaapa, jane 'are'emauwe 'ga jane'aawa kwaapa. Jane manūawa nanē 'ga ikwaapa nū— 'jau Paulo 'ga u'ama imome'wau gā nupe.

²⁷ —Ojee aeporokwaawiweramū 'ga ojekwaawukaa jane upe. Takwaap Jarejuwarete 'ga 'jau 'jara gā nupe 'ga ojekwaawukaa.

²⁸ Namuku rūi futat 'ga rekoi ae wi. Muku ae wi 'ga reko re amunipo 'ā ae papawi— 'jau 'ga gā nupe u'ama. —A'ere 'ga jejukai ae ree. A'eramū ae opapape'ema— 'jau Paulo 'ga u'ama imome'wau gā nupe. —Ymā te 'ā pēypy gā amū ka'arana pe kwasiari inuga rakue: "Jane juejue 'ga ra'yra", 'jau gā ikwasiaa inuga pē nupe rakue— 'jau Paulo 'ga u'ama imome'wau gā nupe.

²⁹ —A'ere 'ā pēē maira a'agawa etee peapo. Maira a'agawa ra'yra nipo pēē? Naani. Janeruwarete 'ga namaira a'agawa 'jawe rūi. Pēē 'ā maira a'agawa etee iapou pejejeupe. A'ere nanarūi Janeruwarete 'ga. Janeruwarete 'ga te 'ā nae rūi wapo rakue. Okoeteete ma'e 'ga. Ojete futat 'ga jējuu rakue.

³⁰ Ymā te 'ā Janeruwarete 'ga ae resagi ete mama'e tywera aporamū rakue. "Too. Nia'wyrui gā. A'ere gā je kwaawe'ema te gā nerekoi. A'eramū je gā momape'ema ra'ne", 'jau 'ga ojeupe 'ūina rakue. Ymā te aipoa rakue— 'jau Paulo 'ga imome'wau gā nupe u'ama. —A'ere 'ga 'awamū 'ga je'egi janee: Pepoit pejetywer awi, 'jau 'ga 'ā janee. Najuejue etee futat pejejoia pejetywer awi, 'jau 'ga 'ā janee— 'jau Paulo 'ga imome'wau gā nupe.

³¹ —Wemifutara 'ara rupi etee futat nipo Janeruwarete 'ga ae momapa. 'Awamū te aje 'ga 'ā kūima'e 'ga amū muri imogou ae upe. A'e 'ga kūima'e 'ga ae kwaap katu katu akou. Anure nipo 'ga ae majatykau wowase. Werowiarāmū etee futat 'ga ae mogyau ojeypyri nipo. Werowiare'ema gā 'ga imonou etee mama'eukwaawa rapyaw ipe. 'Ga futat poromū, Jejujamū. A'e 'ga futat 'ut amanūmū 'au jane pyri rakue. A'ere Janeruwarete 'ga 'ga moferawi etee rai'i nū. A'jea futat aipoa. A'je'em ire amunipo 'ā 'ga nomoferawi futari 'ga rai'i— 'jau Paulo 'ga u'ama imome'wau gā nupe.

³² A'e renupawe kūima'e gā amū 'ga jaita etee.

—Kuu. Manamū tee aereumera ferawi 'i nū'ū. Naenuwi pa je aereumeramū oferaw etee nū 'ea jepi nū— 'jau gā 'ga rerekoemāu.

A'ere amumera gā jemogyi etee futat 'ga renupa, 'ga jaita'ema futat. A'eramū gā 'jau Paulo 'ga upe:

—Anure tereporogytau'jap ore 'jau nū. Taruenup katu katu 'jau— 'jau gā 'ga upe.

³³ Gā nupe oporogytapaw ire Paulo 'ga awau gā nui.

³⁴ A'ere amumera gā amū nekoi Jejui 'ga rerowiaaramū. Jejui 'ga rerowiaara 'ga amū rera Dionisio. Ojemu'e ma'efera 'ga. Kūjā ēē nanē 'ga rerowiaa nū. Ēē rera Damarisi. 'Gā amū nanē Jejui 'ga rerowiaa nū.

18

¹ A'e awi Paulo 'ga awau, Atenasi 'jaw awi. Korītu pe 'ga awau nū.

² A'e pe owaēma Paulo 'ga Akira 'ga rekoa. Pōtu wyw pewarera 'ga poromū Akiraramū. 'Ga remireko Prisira ēē. 'Awamue gā 'ua ajakawau Roma 'jaw awi. Itari wyw pewarera gā futat 'wyrirarete 'ga, Krautiū 'ga gā mua:

—Pe'je pejewau 'aw awi, Roma awi— 'jau peuwara gā 'wyrira 'ga gā nupe. —Judeuramū pejewaupap— 'jau 'ga judeu gā nupe.

Roma pewarera gā 'ga imonou pe awi. A'eramū Akira 'ga awau Korītu pe ajakawau wemireko ēē retee. Wyra pirera roga apoara Akira 'ga.

³ Peu Paulo 'ga awau gā nekoa. Paulo 'ga nanē taityoga apoara nū. A'eramū Paulo 'ga awau oporogytau gā nupe. A'eramū Paulo 'ga a'e pe futat akou opytau gā pyri. Wyra pirera roga apou gā pyri ime'ega ka'aranūū are.

⁴ Morowykye'ema rupi Paulo 'ga awau oporogytau judeu gā jatykaawa pype ajatyka ma'e gā nupe.

—Jejui 'ga 'ā Janeruwarete 'ga remimurera— 'jau Paulo 'ga awau imome'wau 'gā nupe, judeu 'gā nupe, grego 'gā nupe 'jau.

⁵ Ojete'e i futat Paulo 'ga akou poromū peu. Poje 'ga pytuna 'gā 'ua. Silasi 'ga Timoteo 'ga retee owaēma 'ga upe.

Opytuna 'gā nurauwe 'ga opoia taityoga apo awi. A'eramū futat 'ga akou Jejui 'ga mome'wau etee peuwara 'gā nupe nū, opytuna 'gā netee nū:

—Jejui 'ga futat Jarejuwarete 'ga remimurera— 'jau 'gā judeu 'gā nupe, 'gā mu'jau Kristu 'ga ree.

A'eramū futat Paulo 'ga niojeri Jejui 'ga mome'wau 'gā nupe. Ai'iwe nū, ai'iwe nū 'jau Paulo 'ga akou wojere'emamū futat 'ga mome'wau 'gā nupe.

⁶ A'ere 'gā nuerowiari etee 'ga.

—O'meramū 'ga 'i akou— 'jau etee judeu 'gā Paulo 'ga Jejui 'ga mome'uramū.

Paulo 'ga 'gā ikurapa. A'eramū Paulo 'ga amara'neramū judeu 'gā nee. A'eramū futat 'ga waity patukatukau waity tywyrera mototoka, amara'ne resaukaa 'gā nupe.

—Jejui 'ga je 'ā amome'u pē nupe numiamū. A'ere 'ā neperowiari ete 'ga. A'eramū je 'awamū tewau pē nui. Judeue'ema 'gā nupe etee je oi Jejui 'ga mome'wau nū— 'jau 'ga waity patukatukau. —“Paulo 'ga ore monou mama'eukwaawa rapyaw ipe”, pe'je kasi jee ne. Pēē futat te 'ā pēowet— 'jau Paulo 'ga 'gā nupe.

⁷ Awau 'gā nui. Judeue'ema 'ga rog ipe awau ojejyita. Tisiu Justo 'ga rog ipe awau. Jarejuwarete 'ga 'ga werowiat. Aipo kūima'e 'ga roga 'ūina judeu 'gā jatykaawa yse pe futat. A'eramū 'ga awau peu. 'Ga roga pype 'ga akou Jejui 'ga mome'wau 'gā nupe.

⁸ A'eramū judeu 'gā jatykaawa raarana 'ga Jejui 'ga rerowiaa, Krisipu 'ga 'ga rerowiaa opytuna 'gā netee. Tekotee 'gā nanē 'ga rerowiaa ajemogyau. A'eramū 'gā ojeypymāukaa 'y pe 'gā nupe.

⁹ Ypytunimū Janejararete 'ga ojesaukaa oporogytau Paulo 'ga upe:

—Ere je mome'wau ekou ekyjawe'em futat.

¹⁰ Je ako ene pyri. A'eramū ene efuwepawe'emamū futat ekou je mome'wau 'gā nupe. A'eramū je ene rerekou tywerukare'ema 'gā nupe. Kwaiwete te 'ā je rerowiaara 'gā 'au— 'jau Jejui 'ga ojesaukaa Paulo 'ga upe.

¹¹ A'eramū futat Paulo 'ga akou aipo 'ga 'wyr ipe etee futat Jarejuwarete 'ga je'ega mome'wau 'gā nupe. Majepeja te kwara mu'aa. Ajepeja rupi 'ga akou nū. Awau 'ga kwara 'aramū uēma 'gā nui.

¹² 'Wyrari yau ruramū judeu 'gā ajatykau. A'eramū futat Paulo 'ga pyyka 'ga rerawau Gariu 'ga upe, 'wyrari yau upe 'ga rerawau. Akaja ywy pewara 'gā nupe 'wyrariamū akou.

¹³ —Ko 'ga kūima'e 'ga 'ut ore mu'jau Jarejuwarete 'ga je'eg are numiamū— 'jau 'gā 'ga rerawau 'wyrariara upe. —A'ere 'ga naMoisesi 'ga remikwasiarera 'jawe rūi imome'ui oree— 'jau 'gā 'ga upe. —O'meramū te 'ga 'i akou. Wapo ekoete 'ga akou— 'jau 'gā 'ga rerawau 'wyrariara upe imome'wau.

¹⁴⁻¹⁵ Paulo 'ga oje'egaramet 'wyrariara 'ga upe. A'ere 'wyrariara 'ga je'egi erujewi. A'eramū Paulo 'ga oje'ege'ema.

—Mama'e tywera 'ga iapo re te amunipo 'ā je apykai pēje'eg are. A'ere 'ā 'ga naani. Nuapoi futari 'ga mama'e tywera. Pēē 'ā judeua. Pēē noko ako pejamue ekoete jepi. Pejejamiapo are miamū pejejamue jepi. A'eramū je teapyakawe'em futat pē nee. Je 'ā romanūa. Pē'wyrariamū futat je reko'i. A'eramū je pēnemiapo are teapyakawe'em. Najukai 'ga 'ga amū. Nakurawi 'ga 'ga amū. 'Wyrariaretea 'ga miamū 'ga nakurawi. Namama'e tywera rūi futat 'ga wapo. A'eramū je teapyakawe'em pē nee— 'jau etee 'wyrariara 'ga 'ga nupe.

¹⁶ A'erauwe 'wyrariara 'ga 'gā mū'jāu ojewi.

—Pe'je pejewau peje'jāu je wi— 'jau 'wyrariara 'ga 'gā nupe.

A'erauwe 'ga 'gā mū'ēukaa ojewi.

¹⁷ A'eramū 'gā awau amara'neramū akou. 'Gā mara'nea 'gā nerekou. A'eramū futat 'gā ajatykaawa raarana 'ga, Sostenesi 'ga pyyka 'ga nupānupāu ekoete futat. 'Wyrariara 'ga, Gariu 'ga 'gā nesaka agawewi futat. A'ere 'ga reko'i esakare'ema 'jawe etee futat.

¹⁸ Korītu pe Paulo 'ga akou namutamutat. Poje 'ga awau aipo awi. Sēkreja 'jaw ipe 'ga awau, aipo awi. Akira 'ga awau 'ga rupi, wemireko ēē retee. Awau 'gā owaēma Sēkreja 'jaw ipe. Peu wekwaw ipe Paulo 'ga ojeapina. Ojemuapesipesīga futat.

—Nan nipo je iapoi enee— 'jau 'ga Jarejuwarete 'ga upe rai'i.

U'ewar imū iapo re 'ga ojeapina.

A'ere 'gā awau u'aa yaru pype nū. Awau 'gā oyaapa. Awau 'gā owaēma.

¹⁹ Efesu pe awau owaēma ojekoka. Peu futat 'gā ū'jāu. Peu futat Akira 'ga opytau Paulo 'ga wi wemireko ēē retee.

Oo enune Paulo 'ga awau judeu 'ga jatykaaw ipe Jejui 'ga mome'wau 'gā nupe.

—Jejui 'ga 'ã Janeruwarete 'ga remimurera— 'jau 'ga awau 'gã nupe.

A'ere 'gã nuerowiari 'ga. A'eramũ 'gã ajamueu ee.

²⁰ A'eramũ peuwara 'gã 'jau 'ga upe:

—'Au epyta ore pyri nũ'ũ— 'jau 'gã.

—Tee nũ'ũ. Napytaa'uweri je nũ'ũ.

²¹ Anure te nipo je ruri tejewya nũ. Jarejuwarete 'ga temuramũ tejewya pẽ pyri nũ— 'jau Paulo 'ga 'gã nupe.

'Gã nupe oporogytapaw ire 'ga awau 'gã nui. Awau u'aa yar ipe nũ. Pe awi awau oyaapa. Awau 'ga 'y owajara katy oyaapa.

²² Sesaria pe 'ga awau ojekoka. Pe awi 'ga awau ywryi. Awau 'ga owaẽma Jerusareg ipe. Owaẽma ypy we Paulo 'ga awau oporogytau Jejui 'ga rerowiaara 'gã nupe. 'Gã nupe oporogytapaw ire 'ga awau nũ. Ātioki pe awau nũ, Siria ywy pe 'up ma'e pe nũ.

²³ A'e pe 'ga awau opytawaipa. Kamẽsiete 'ga awau a'e awi nũ. Awau 'ga Garasi ywy raapa awau, Frigia ywy raapa. Mĩmera wemiaawa ywy pe Paulo 'ga awau akou oporogytau Jejui 'ga rerowiaara 'gã nupe.

—Pe'je pejejemogyau 'ga rerowiaa. Pepoit futat kasi 'ga wi ne— 'jau 'ga awau akou oporogytau 'gã nupe. —Pejekyjawe'em futat pejejemogyau— 'jau 'ga akou 'gã nupe.

²⁴ Kwe pe Paulo 'ga oo 'ga rekoramũ judeu 'ga amũ awau Efesu 'jawa amunaw ipe akou. Aporu 'ga awau akou Efesu pe. Aresãri 'jaw ipe u'at ma'efera 'ga poromũ.

²⁵ 'Ga ojemu'e Jarejuwarete 'ga porogytafer are rakue. 'Ga omome'u esage 'ga je'ega 'gã nupe. A'eramũ 'ga awau akou wemikwaawa etee imome'wau 'gã nupe. Jejui 'ga 'ga ikwaapa futat numiamũ. A'ere 'ga Juã Batista 'ga porogytafera etee ikwaawi. Juã 'ga ae pymĩ 'y pe rakue. 'Ga porogytafera etee futat 'ga ikwaapa. 'Ga remimome'ufera etee 'ga ikwaapa akou.

²⁶ A'erauwe 'ga oi judeu 'gã jatyaaw ipe imome'wau 'gã nupe. A'jeteetewi 'ga 'ga mome'wau numiamũ. A'ere 'ga nokwaapawi. A'ea 'ga imome'u 'ga 'amamũ Akira 'ga 'ga renupa. A'erauwe 'ga oje'ega wemireko eẽ upe:

—Okwaap futat 'ga numiamũ. A'jeteetewi 'ga porogytai numiamũ ĩ. A'ere 'ga nokwaapawi katu we ra'e. Siroo 'ga jarejepyri nũ ĩ, 'gã mu'jaupap Jejui 'ga porogyta are nũ ĩ— 'jau Akira 'ga wemireko eẽ upe.

—Nai'ĩ. Siroo futat jane kiã— 'jau eẽ 'ga upe.

A'erauwe Akira 'ga oje'ega 'ga upe:

—Ere ejua ore rupi. Siroo ene oroje'wyr ipe, ene mu'jau Jejui 'ga ree 'jau— 'jau 'ga 'ga upe.

A'eramũ 'ga akou ojemu'jaukaa Akira 'ga upe.

²⁷ Omu'e re Aporu 'ga awau Akaja ywy pe. "Too Akaja ywy pe 'jau kwy", 'jau 'ga ojeupe. A'eramũ 'ga awau akou.

'Ga o enunewe 'ga mu'eawer ipewarera 'gã ka'arana monou ikwasiaa ajaupe.

"Pejejuka esage ki 'ga ree", 'jau 'gã ka'arana monou ikwasiaa ajaupe.

"Jane 'jawe futat 'ga. Jejui 'ga rerowiaaramũ 'ga reki.

A'eramũ pẽẽ pejejejukau 'ga ree",

'jau 'gã imonou, ajaupe ikwasiaa.

²⁸ Owaẽmawe 'ga awau judeu 'gã pyri Jejui 'ga mome'wau 'gã nupe:

—Ymã te 'ã Jarejuwarete 'ga je'ega mome'wara 'gã ka'arana kwasiari inuga Jarejuwarete 'ga remimurama 'ga ree rakue— 'jau Aporu 'ga oporogytau 'gã nupe. —Jejui 'ga 'ã 'ga remimurera. Jejui 'ga futat 'ã jane katu'okara— 'jau 'ga judeu 'gã nupe oporogytau.

Aipo pyu 'ga 'gã moje'egawaruũkare'ema futat.

19

Efesu pe Paulo 'ga rekoawet

¹ Korĩtu pe Aporu 'ga rekoramũ Paulo 'ga awau akou ywryi. Awau 'ga owaẽma Efesu pe. Peu owaẽm ire Paulo 'ga Jejui 'ga rerowiaara 'gã amũ nekoaa.

² A'eramũ Paulo 'ga oporonupa Jarejuwarete 'ga 'Agesage are 'gã nupe:

—Amut te Janeruwarete 'ga U'agesagea pẽ nupe rai'ĩ? Jejui 'ga pẽẽ erowiar ire rai'ĩ?— 'jau Paulo 'ga 'gã nupe.

—Tee. Naani nũ'ũ. Norokwaawi we te 'ã ore nanuara. A'eramũ ore 'ga orojeupe imura kwaape'ema nũ'ũ— 'jau 'gã Paulo 'ga upe.

³ —Awỹja iapoawer imũ ajee pejepymũukat 'y pe 'gã nupe rai'ĩ ki 'ei'?— 'jau Paulo 'ga 'gã nupe.

—Juã Batista 'ga remiapofer imũ tee 'ga ore pymĩ 'y pe ai'ĩ nũ'ũ— 'jau 'gã Paulo 'ga upe.

⁴ —A'jea futat Juã 'ga oi 'gã pymĩãu. Otywer awi 'gã poiramũ 'ga 'gã pymĩãu akou rai'ĩ. A'ere 'ã Juã 'ga 'ĩ rai'ĩ: "Kũima'e 'ga amũ 'ut je rewiri", 'jau 'ga Israeu juapyrera 'gã nupe rai'ĩ. "A'e

'ga kūima'e 'ga ki perowiat", 'jau 'ga 'ā 'gā nupe rai'i— 'jau Paulo 'ga 'gā nupe imome'wau. —A'e 'ga kūima'e 'ga rera Jeju— 'jau Paulo 'ga imome'wau 'gā nupe.

⁵ A'e renupawe 'gā 'jau 'gā nupe:

—'Awamū ore Jeju 'ga rerowiaaramū juejue futat. Jeju 'ga orejara— 'jau 'gā 'ga upe.

A'eramū 'ga 'gā nerawau 'gā pymiāukaa 'y pe Jeju 'ga rer imū.

⁶ 'Gā pymi re Paulo 'ga opo monou 'gā apyte'rarimū. A'erauwe Janeruwarete 'ga 'Agesage 'ua osou 'gā nupe. Ojeppe ise ypyrauwe 'gā oje'eg amuteeramū. Janeruwarete 'ga tee 'gā wereko poromū 'gā moje'eg amuteeu ojekwaawukaa 'gā nupe a'eramū futat. A'eramū 'gā akou Jarejuwarete 'ga je'ega mome'wau 'gā nupe.

⁷ Kwaiwete te kūima'e 'gā. Tusi te 'gā pytuna.

⁸ Peu Paulo 'ga muapyra jay moka'jama akou 'gā pype, Jeju 'ga mome'wau 'gā nupe. Judeu 'gā jatykaawa pype 'ga Jeju 'ga mome'wau 'gā nupe. Okyjawe'em oporogytau 'gā nupe. Jarejuwarete 'ga je'ega mome'wau 'gā nupe.

—Ymā te 'ā Janeruwarete 'ga oje'ega muri janee rakue. “Anure nipo je tejemipyyrūmera 'ga monoi pē nupe, pēnemiapesagera 'ga monoi pē nupe”, 'jau 'ga ūina janee rakue— 'jau Paulo 'ga imome'wau u'ama 'gā nupe. —A'eferupi tee 'ga 'ā 'awamū 'ga muri futari imogou janee. 'Ga rera 'ā Jeju. 'Ga 'ā ae katu'ok werowiarāmū— 'jau Paulo 'ga u'ama imome'wau 'gā nupe.

⁹ Aipo 'eramū amumera 'gā 'ga rerowiare'ema. Niporenuwiweri 'gā 'ga ree.

—Awjja sipo ajee poromū Jejuamū? Nia'wyri nipo 'ga rerowiaara— 'jau 'ga rerowiare'ema 'gā 'ga rerowiaara 'gā nowase.

Aipo 'eramū Paulo 'ga oje'ega Jeju 'ga rerowiaara 'gā nupe:

—Pe'je iruukwe 'gā nui. Nuerowiari futari 'gā na'e— 'jau 'ga 'gā nupe.

A'erauwe 'gā awau 'gā jatykaaw awi. Awau 'gā moromu'jawa 'og ipe. Tiranu 'ga peuwara 'gā mu'jara. Moromu'jawa 'og ipe 'ga awau 'gā mu'jau wjere'emamū futat. Ai'iwe nū, ai'iwe nū, ai'iwe nū 'jau 'ga awau Jeju 'ga mome'wau 'gā nupe, 'gā mu'jau 'ga ree.

¹⁰ Mukūja kwara Paulo 'ga imu'aa peu, 'gā mu'jau akou. A'eramū Asia wyw pewara 'gā najuejue etee futat 'ga porogyta renupa. Judeu 'gā, judeue'ema 'gā 'jau. Tesirūmera 'gā we futat 'ga porogyta renupa.

Sewa 'ga ra'yra 'gā

¹¹ A'ere Janeruwarete 'ga opājē mua Paulo 'ga upe. A'eramū aeremiapoe'ema apoukaa Paulo 'ga upe.

¹² A'eramū 'gā amū 'ua Paulo 'ga raity pe upe, taity peme'ri upe. A'erauwe 'gā erooi ipypiraa ojero'wu ma'e 'gā karuara 'arimū ipypiraa. A'erauwe 'gā ojekatu'oka. Mama'eukwaawa rerekwara 'gā 'arimū nanē 'gā erawau nū. Tok ipypekau'i erawau inuga 'gā 'arimū. A'erauwe mama'eukwaawa opoia 'gā nui. Janeruwarete 'ga opājē mua Paulo 'ga upe poromū iapoukaa 'ga upe.

¹³⁻¹⁴ A'eramū judeu 'gā amū nanē awau ekoete akou kwe pe. “Mama'eukwaawa simoit 'gā nui Jeju 'ga rer imū 'jau”, 'jau ajaupe numiamū. Sete 'gā pytuna. Sewa 'ga ra'yra 'gā. Mainana 'wyriara 'ga futat Sewa 'ga. 'Ga ra'yra 'gā poromū oje'eg ekoete Jeju 'ga rer imū mama'eukwaawa upe.

—Paulo 'ga oo Jeju 'ga mome'wau oree jepi. A'eramū ore Paulo 'ga remimome'ufera 'ga rer imū oje'ega pē nupe: Pe'je pejejepe'au 'gā nui— 'jau 'gā mama'eukwaawa upe.

¹⁵ A'ere mama'eukwaawa je'egi etee 'gā nupe:

—Jeju 'ga ore orokwaap. Paulo 'ga nanē ore ikwaapa nū. A'ere ore pēē norokwaawi— 'jau mama'eukwaawa 'gā nupe. —Awjja te pēē? Najeju 'ga rerowiaara rūi pēē— 'jau etee mama'eukwaawa 'gā nupe.

¹⁶ A'eramū mama'eukwaawa rerekwara 'ga 'gā pyyka. A'eramū futat 'gā nupānupānupāu 'gā naity monoronoroka. A'eramū 'gā oka'jama jui. Typ. 'Gā ujāna jui. 'Gā muayrūyrūmū etee 'gā monou, mama'eukwaawa ojeupe 'gā je'egamū.

¹⁷ A'e renuw ypyrauwe Efesu pewara 'gā okyjau ajemogyau.

—Peenup te Sewa 'ga ra'yra 'gā nera?— 'jau 'gā ajaupe. —Jeju 'ga rer imū 'gā je'eg ekoetei mama'eukwaawa upe 'ea? A'ere mama'eukwaawa rerekwara 'ga 'gā naity monoronorogi etee 'gā nui 'gā nupānupāu etee 'ea rai'i. Noje'eg ekoetei ae 'ga rer imū— 'jau 'gā ajaupe.

A'eramū taetu 'gā okyjau Jeju 'ga rer imū oje'eg ekoete awi. Judeu 'gā, judeue'ema 'gā netee okyjau ajemogyau nū.

¹⁸ A'eramū Jeju 'ga rerowiaara 'gā 'ua ojemome'wau Paulo 'ga upe, kwaiwete.

—Ymā te noko oretyweramū ikue 'ja. Mama'e tywera etee ore iapou ikue. A'ere ore 'awamū ore poiri orotywera apo awi. Aruerowiar ore Jeju 'ga 'awamū arajemogyau— 'jau 'gā 'ua ojemome'wau Paulo 'ga upe.

Peuwara 'gā nowase futat 'gā ojemome'wau.

¹⁹ Kwaiwete pājēa nanē Jejuī 'ga rerowiaa nū. A'e 'gā futat awau ka'arana upe. Aipo ka'arana mama'e tywer are 'gā mu'jau. A'ere 'gā pōiri mama'e tywera apo awi. A'eramū 'gā ka'arana rerua imajatykau iapyppyrāmū. Mama'e tywer are amu'eawera rerua imono'oga.

A'ere 'gā tata monygi ipype. Fu iapyau inuga. Iapy re 'gā imomyawera repy mojopyrūmū. Ka'arana repya sīkwēta miu ita 'ywope'ia. A'etea 'gā naeawyrūi futari oka'aranūi momyawer are.

²⁰ A'eramū Jejuī 'ga rerowiaara 'gā awau ojemomytuna ajemogyau. Kwaiwete te pājē 'gā Jejuī 'ga rerowiaa. A'eramū futat 'gā mama'e tywera apo awi opoia. A'eramū 'gā nesakarera 'gā imokwasi'wau imome'wau ajaupe.

Aipo renupawe kwaiwete 'gā Jejuī 'ga rerowiaa. A'eramū futat 'gā Jejuī 'ga je'ega mokwasi'wau. Amunawa moymoyka. A'eramū futat Jejuī 'ga rerowiaara 'gā ojemomytuna kwaiwete.

Efesu pewara 'gā mara'neawet

²¹ A'ere Paulo 'ga 'ūina wea'aramū. “Marupi te je oi tekou nū?” 'jau 'ga 'ūina. Ojeupe tee futat oporogytau. “Masetoni ywy raapa pa je oi tekou kwy. Akaja pyu 'jau tewau kwy. A'e awi futat tewau Jerusareg ipe tewaēma 'jau kwy. Jerusareg ipe tekoteko'i re tewau Roma pe 'jau kwy”, 'jau 'ga 'ūina wea'aramū ojetee futat. Oo enune 'ga 'ūina wea'aramū ee nū.

²² A'eramū 'ga ojekoty'aawa 'gā na'ne imonou wenune.

—Pe'je iruukwe pejewau je renune Masetoni ywy pe— 'jau 'ga 'gā nupe.

A'erauwe 'ga pytuna 'gā oi, Timoteo 'ga Erasto 'ga retee.

—'Au je rekoi ra'ne. Anure too pē newiri 'jau— 'jau 'ga 'gā nupe.

A'eramū Paulo 'ga peu akou.

²³⁻²⁴ Peu 'ga rekwaw ipe 'gā amū amara'neramū Paulo 'ga ree. Demetriu 'ga amara'neramū 'ga ree. Prata 'jawa apoara 'ga poromū Demetriuramū. Ita enyfu'gi are oporowyky ma'e 'ga. A'eramū 'ga futat 'o'gi'i apou. Maira'me a'agawa roga 'jawewara 'ga iapou. Diana 'jawa 'gā maira.

Ojeupe Paulo 'ga Jejuī 'ga mome'uramū aipo amunawa pewara 'gā amū Jejuī 'ga rerowiaa. A'eramū 'gā a'eramū opoia omaira rerowiar awi, Diana 'jawa rerowiar awi. A'eramū 'gā maira a'agawa ro'gi mure'ema ojeupe. A'eramū 'o'gi'i apoara 'ga, Demetriu 'ga amara'neramū Paulo 'ga ree.

²⁵ A'erauwe 'ga iapoara 'gā majatykau imua. A'eramū 'ga oporogytau 'gā nupe:

—Paulo 'ga 'ā jane porowyky nuapoukaru'jawi janee. Jane moka'aranūūukare'ema nipo 'ā 'awamū. Mama'e tywerete are 'ga 'auwara 'gā mu'ei.

²⁶ “Naeremiapoa rūi Janeruwarete 'ga”, e'i 'ā Paulo 'ga 'gā nupe. 'Agamū maira a'agawa ro'gi'i murukare'ema 'gā nupe jane wi. “Jarejuwarete 'ga te perowiat, Jejuī 'ga retee”, 'jau 'ā Paulo 'ga oporogytau 'gā nupe. A'eramū 'gā opoia kwaiwete Diana rerowiar awi. A'eramū 'gā Jejuī 'ga etee futat erowiaa ajemogyau kwaiwete. Ymā we 'ā 'auwara 'gā Asia ywy pewara 'gā netee Diana rerowiar ajemogyau kwaiwete rakue. A'ere 'ā 'awamū Paulo 'ga ruri 'au 'gā mu'jau omair are— 'jau 'ga 'gā nupe. —Mama'e tywerete are te 'ga 'gā mu'ei akou.

²⁷ Najuejue te 'ā jane jaremaira muorypa jepi. Ipojeupawuu ma'e futat ēē jepi. A'ere 'awamū 'gā poipawi ēē wi. Nuerowiaru'jawi 'gā Diana ēē 'awamū— 'jau Demetriu 'ga 'gā nupe. —Namuru'jawi 'gā 'awamū 'o'gi'ia jane wi. Jane moka'aranūūukare'ema nipo 'ā 'awamū. Opoipap 'gā 'awamū jui— 'jau Demetriu 'ga 'gā nupe.

²⁸ A'e renupawe imajatykapyrera 'gā amara'neramū ajemogyau Paulo 'ga ree. A'eramū futat 'gā wafukaita:

—Efesu pewara jane. Diana futat jane maira!— 'jau 'gā wafukaita ajemogyau.

²⁹ A'e renupawe 'gā nera erooi imuāina amunawa pype. A'eramū 'gā Paulo 'ga pytuna 'gā pyyka. Mukūja 'gā pyyka. Gaio 'ga pyyka Aristaku 'ga retee. Kwaiwete 'gā 'gā pyyka 'gā nerawau ajatykaaw ipe nū.

³⁰ A'erauwe Paulo 'ga 'jau 'gā nupe:

—Oo je teporogytau 'gā nupe— 'jau 'ga numiamū.

A'ere Jejuī 'ga rerowiaara 'gā nomonoukari Paulo 'ga.

³¹ 'Wyrīa'ri 'gā amū Paulo 'ga jekoty'aawa. A'eramū 'gā oje'ega monou 'ga upe:

—Ereo kasi ne— 'jau 'gā. —Erese kasi ewau peu 'gā nesaka ne— 'jau 'gā oje'ega monou 'ga upe.

³² A'eramū 'gā ajatykau kwaiwete 'gā nee. Ojoywaema ekoete futat 'gā ajemogyau. Ikwaapare'ema 'gā we futat ojoywaema ekoete futat ajemogyau.

³³ A'ere judeu 'gā amū 'jau Aresāri 'ga upe:

—Ere ewau eporogytau 'gā nupe, 'gā nowase katy a'i kūi— 'jau 'gā 'ga upe.

A'erauwe 'ga opo mowyri 'gā nupe 'gā momika numiamū. A'ere 'gā 'ga kwaaw ire nuapyakai futari 'ga je'eg are.

³⁴ —Judeu 'ga tee ra'e— 'jau etee 'gā ajaupe.
 A'eramū ojero 'waro'wau etee futat wafukaita 'ga upe.
 —Efesu pewara futat ore. Diana futat te 'ā oremaira— 'jau etee 'gā 'ga upe.
 Tuas ora poromukuran 'gā ajamueu wafukaita.
³⁵ Poje 'wyriara 'ga remiayuwa 'ga 'ua oje'ega 'gā nupe:
 —Pe'je pejepika— 'jau 'ga 'ua 'gā nowase.
 A'erauwe 'gā opika.
 —Aipo peapo awi— 'jau 'ga 'ua 'gā nupe. —Efesu pewaramū jane futat te 'ā najuejue etee futat sajejuka Diana ēē rog are— 'jau 'ga 'gā nupe. —Jane futat 'ā ēē ree ojejuka ma'ea. Aipoa 'ā 'gā najuejue etee ikwaapa— 'jau 'ga 'ua 'gā nupe.
 A'eramū futat 'gā opika.
 —Ymā te 'ā Diana a'agawa ruri u'aa janee ywag awi rakue. A'e are 'ā jane jejukai najuejue etee futat— 'jau 'ga 'ua 'gā nupe.
³⁶ —A'eramū pēē aipo apowe'em. Najuejue etee futat 'ā jane iapoi. A'eramū pēē pejepika. Enupa etee pejemogyau— 'jau 'ga 'ua 'gā nupe.
³⁷ —A'ere 'ā ko 'gā kūima'e 'gā perut ekoete 'au rai'i. Nakurawi agawewi 'gā 'ā janemaira. Namunarūi agawewi 'gā 'ā mama'e are. A'etea 'gā 'ā perut ekoete rai'i— 'jau 'ga oje'ega 'ua 'gā nupe.
³⁸ —Tene Demetriu 'ga oi oporogytau 'wyriara 'ga upe— 'jau 'ga 'gā nupe. —Maran gatu nipo 'ga mama'e tywera mū apowe'em 'ga upe rai'i. Tene 'ga oi oporogytau 'ga upe. Nanuara niapoawi 'au— 'jau 'ga 'ua 'gā nupe.
³⁹ —'Gā nupe pejeporogytaweramū pekwap 'wyriara 'gā nowase tāmējē pejeporogytau 'gā nupe— 'jau 'ga 'ua 'gā nupe. —Naeporogytaawa rūi te 'ā 'au. A'eramū pēē pejewau peu 'wyriara rowase pejeporogytau— 'jau 'ga 'ua 'gā nupe.
⁴⁰ —Kasi a'e pe jane 'wyriararete 'ga amara'neramū jane ree ne— 'jau 'ga 'gā nupe. —“Imara'ne nipo 'gā je ree. Je ago'o te 'gā”, 'jau nipo 'ga janee— 'jau 'ga 'gā nupe. —“Nafutari 'gā je rena 'wyriaramū ojeupe ra'e”, e'i nipo 'gā janee. “Ajepeja 'ga te 'gā afutat 'wyriaramū ra'e”, e'i nipo 'ga janee. Ai'i te 'ā pejup pejeafukaita ekoete— 'jau 'ga 'gā nupe.
⁴¹ Aipo 'erauwe 'ga peuwara 'gā mokwasi'wau, 'gā monou 'gā 'wyr ipe nū. A'eramū futat 'ga 'jau 'gā nupe:
 —Pe'je pejewau pejeje'wyr ipe nū— 'jau 'ga 'gā nupe.
 A'eramū futat 'gā awau.

20

Jeju'i 'ga rerowiaara 'gā nesaka 'ga ataawet

¹ Aipo teepaw ire Paulo 'ga oje'ega monou Jeju'i 'ga rerowiaara 'gā nupe:
 —Pe'je pejewa 'au. Taporogyta pē nupe 'jau— 'jau 'ga 'gā nupe.
 A'erauwe Jeju'i 'ga rerowiaara 'gā jatykai 'ga ree kwaiwete.
 —Ko je oi tekou pē nui. Masetoni wyy pe je oi— 'jau 'ga 'gā nupe. —Tepytuna 'gā newiri je oi. Peu ako je 'gā monoi ai'i. A'eramū je tewau 'gā newiri— 'jau 'ga 'gā nupe. —Pe'je pejemogyau Jeju'i 'ga rerowiaa. Pepoit kasi 'ga rerowiar awi ne— 'jau Paulo 'ga oporogytau 'gā nupe.
 Aipo 'e re 'ga awau 'gā nui opytuna 'gā newiri.
² Awau 'ga Masetoni wyy raapa, awau akou oporogytau amunaw ipewara 'gā nupe. Amunawa moy moyka akou Jeju'i 'ga mome'wau. A'erauwe futat Jeju'i 'ga rerowiaara 'gā ajemogyau worryamū 'ga ree. Paulo 'ga awau akou 'gā mojemogyppygukaa Jeju'i 'ga ree. Kwaiwete te 'gā norywamū Jeju'i 'ga ree, 'ga rerowiaa.
 —Pepoit kasi 'ga rerowiar awi ne— 'jau Paulo 'ga akou 'gā nupe amunawa moyka.
 Kwe pe futat awau akou imome'wau 'gā nupe 'gā maku'iu. Awau Akaja wyy upe owaēma.
³ Peu 'ga opytat. Muapyr etee 'ga jay moka'jama. A'eramū 'ga o'wya Siria wyy pe numiamū. A'e pype 'ga judeu 'gā ojee miewera renuwi. A'eramū 'ga awawe'em peu. Ojewya etee 'ga 'ua Masetoni wyy pe nū.
⁴ A'eramū peuwara 'gā, Jeju'i 'ga rerowiaara 'gā amū 'ua 'ga rupi. Sopatro, Aristaku, Segūtu, Gaio, Timoteo, Tikiku, Trofimū. Mīmera 'gā 'ua Paulo 'ga rupi. Sopatro 'ga Pereja pewarera 'ga. Piru 'ga 'ga ruwa. Aristaku 'ga, Segūtu 'ga Tesarūn ipewarera 'gā. Gaio 'ga Teripe pewarera 'ga. Tikiku 'ga, Trofimū 'ga Asia wyy pewarera 'gā. Mīmera 'gā 'ua 'ga rupi.
 Asia wyy raapa 'gā awau. Awau 'ga owaēma Firiposi 'jaw ipe. Pe awi 'gā awau Paulo 'ga renune.
⁵ Troate 'jaw ipe 'gā awau. Peu 'gā Paulo 'ga rapesaka.

Firiposi 'jaw ipe Paulo 'ga opytau je retee, Lukaramū. Firiposi 'jaw ipe ore rekoramū owaēma mani'oko'o jopype'ema 'wawa maraka upe. Ikwaw ire ore arawau yaruu pype aru'aa.

⁶ Siku oroser ire orowaēma Troate 'jaw ipe 'gā nupe. Orojenune oo ma'efera 'gā nekoaa arawau nū. Majeje tee morowykye'ema magwapa Troate 'jaw ipe arajemogyau.

⁷ Morowykye'ema piara rupi Jejuī 'ga rerowiaara 'gā ajatykau 'og ywate pype ore ree. Orojemi'waa ra'ne. Orojemi'wapaw ire Paulo 'ga oporogytau 'gā nupe. Kwet kwet kwet. Morogyta tee'ia miamū 'ā iporomuku omome'uramū.

—'Awauwe futat je porogytapawi. Ai'iwe te 'ā je oi nū— 'jau 'ga 'gā nupe.

Awau pypajeaje katu.

⁸ Kwaiwete te 'gā tata mogyi imonyka orojee.

⁹ A'eramū kunumūū 'ga amū 'ūina wapyka 'okwar ywate 'arimū 'ga porogyta renupa. Eutiku 'ga 'ūina wapyka wapyakau Paulo 'ga je'eg are. Poje nipo 'ga wopeyamū. A'eramū 'ga osea. Paulo 'ga je'ega 'ga mopeyita. A'eramū 'ga osea rakue. Poje 'ga awau wopopenamū 'okwar ywate rupi. Tii too. A'eramū futat 'ga awau amanūmū. A'eramū ajatyka ma'e 'gā awau ojypa 'ga resaka.

—Tÿÿ. Amanū futat 'ga ra'e nū'ū— 'jau 'gā ajaupe.

¹⁰ A'erauwe Paulo 'ga awau ojypa 'ga resaka.

—Pejemuaēm awi 'ga ree— 'jau Paulo 'ga 'gā nupe.

A'eramū Paulo 'ga 'ga mana anuruka. A'erauwe 'ga oferapa 'gā nupe.

¹¹ 'Ga feraw ire 'gā ojeupia awau nū, 'og ywate pype nū. Ojeupir ire Paulo 'ga mani'oko'o'i ppyka imo'jamo'jau orojee ore moyka. A'eramū futat ore orojea'aramū Jejuī 'ga manūawer are. A'ere Paulo 'ga oporogytau nū. Kwet kwet kwet ku'em.

¹² Awau aku'emamū. A'erauwe 'gā okwasi'wau. Awau 'gā ajemogyau oje'wyr ipe. Amanū ma'efera 'ga rerawau 'ga 'wyr ipe.

—Ekoay 'ga 'ua u'aa amanūmū oree ko. 'Okwar ywate rupi 'ga oi u'aa oree ko— 'jau 'gā aipo kunumūū 'ga pytuna 'gā nupe. —A'ere Janeruwarete 'ga 'ga moferawi ko nū— 'jau 'gā imome'wau 'gā nupe.

A'eramū 'gā aku'iramū ajemogyau 'ga ree.

¹³ Ku'emamū Paulo 'ga oje'ega oree:

—Pe'je iruukwe nū. Yar ipe pekwap. Je ywyrī too 'jau— 'jau 'ga oree.

A'erauwe ore jejagi yar ipe arawau Asosi 'jawa amunaw ipe.

—Asosi pe ki je rapesak pejepe— 'jau 'ga oree.

A'eramū Paulo 'ga awau ywyrī.

¹⁴ Peu Paulo 'ga orojeupe 'ga waēm ire ore arawau aipo awi. A'eramū 'ga awau yar ipe ore rupi. Arawau orowaēma Mitilene 'jawa amunawa upe. Arawau orojekokaipa etee peu.

¹⁵ Kamēsīete te oroiā jui nū. Ai'iwe ore orokwapa 'ypō'ōūū pyu, Kiosi 'jawa 'ypō'ōūū pyu. Ai'iwe ore orokwapa 'ypō'ō mū pyu nū, Samosi pyu nū. Imuaprya 'ara rupi ore arawau orowaēma Miretu 'jawa jemiar ipe. Peu futat ore orojekoka. Peu futat aru'jāu oropytau.

¹⁶ A'eramū Paulo 'ga 'jau oree:

—Efesu pe jane nipytai. Janera'nē jane jarekou. Kasi jane jarejatykaawa maraka nipyygi ne— 'jau 'ga oree. —Jerusareg ipe sawaēm tāmējē 'jau, maraka renunewe 'jau, a'e te je 'ā— 'jau 'ga oree.

A'eramū 'ga a'eramū wa'nēnamū ajemogyau maraka are.

Paulo 'ga 'eawet

¹⁷ Miretu 'jawa amunaw ipe owaēm ire Paulo 'ga oje'ega monou Efesu pe, Jejuī 'ga rerowiaara 'gā 'wyrīara 'gā nupe: “Pe'je pejejua je pyri. Taporogyta pē nupe 'jau”, 'jau 'ga oje'ega monou 'gā nupe.

¹⁸ A'erauwe 'wyrīara 'gā nuri oporogytau Paulo 'ga upe:

—Pēē 'ā jejekoty'aawa. Asia wpy pe je waēm pypyrauwe ako je kwaap pejepe ikue— 'jau Paulo 'ga 'gā nupe.

¹⁹ —Je 'ā Jejuī 'ga remimonofera te. Jeporowykyā 'ā Jejuī 'ga mome'ua tee futat ako pē nupe ai'i— 'jau 'ga 'wyrīara 'gā nupe. —Tejaa'wau ako je 'gā nee otywera 'gā etyge'emamū ai'i. Ma'eramū te 'gā nopoiri otywer awi nū, 'jau je tekou tejaa'wau 'gā nee ai'i.

—Judeu 'gā ako afuweramū je ree ai'i. “Sijuka 'ga 'jau”, 'jau ako 'gā jee ai'i. A'e are nanē ako je te'arasigamū tekou ai'i nū. “Kūima'eeteetea je”, 'jawe'em ako je tekou ai'i. Jejuī 'ga te je amome'u 'gā nupe ai'i numiamū. Tejerowiaraipe'ema futat ako tejee ai'i. A'ere ako 'gā je juka are etee 'gā fuweramū ai'i— 'jau Paulo 'ga 'gā nupe.

²⁰ —Pē nupe nanē ako je Jejuī 'ga mome'wau 'jau'japa pēnog ipe tekou pē nupe ai'i— 'jau Paulo 'ga 'gā nupe. —'Gā jatykaaw ipe nanē ako je 'ga mome'wau tekou 'gā nupe ai'i— 'jau 'ga 'gā nupe.

²¹—Judeu 'gā nupe, judeue'ema 'gā nupe. Mīmera 'gā nupe ako je Jejuu 'ga mome'wau ai'i. "Pejetywer awi pepoit. Pe'je pejejemogyau Jejuu 'ga rerowiaa. Janejararetea 'ga. A'eramū pēē 'ga rerowiaa", 'jau je ako pē nupe 'ga mome'wau ai'i— 'jau Paulo 'ga u'ama 'wyriara 'gā nupe oporogytau.

²²—A'ere 'awamū je oi Jerusareg ipe. Janeruwarete 'ga 'Agesagea e'i jee: "Jerusareg ipe ekwap", e'i jee. A'eramū je tewau Jerusareg ipe 'awamū. A'ere je nakwaawi 'gā tejerekoa. Ma'ja katu nipo 'gā wapo peu jee? Maran gatu nipo 'gā je rereko'i?— 'jau 'ga 'gā nupe u'ama.

²³—'Peu nipo 'gā ene pyygi", e'i Janeruwarete 'ga 'Agesagea jee je rekoramū. A'eramū nipo 'gā je pofaa je monou je munepa je mu'ama moromunepawa pype. Janeruwarete 'ga 'Agesagea te 'ā e'i jee je rekoramū. Amunawa upe je waēmauwe, amunawa upe je waēmauwe 'jau 'ā 'ga 'Agesagea jee— 'jau Paulo 'ga u'ama imome'wau 'gā nupe.

²⁴—A'ere 'ā ae 'ga rerowiaaramū nokyje'uweri te amanū awi. A'eramū nipo je teporowyky moyka futat. Jejararete 'ga te 'ā, Jejuu 'ga oporowykya wapoukat jee. A'eramū je 'ā teporowyky mateepaw are etee futat tejea'aramū. Morogyta esage mome'ua etee futat 'ā jeporowyky. Ma'eramū je 'ā "pe'je pejepoia pejetywer awi", je 'i tekou 'gā nupe. "Niapo'i agawewi jane mama'e esagea 'ga upe. A'etea 'ga jane katu'ok jaretywer awi janepoiriweramū", 'jau je 'ā tekou pē nupe— 'jau Paulo 'ga 'gā nupe.

²⁵—Pē pype tekou pē mu'jau Jejuu 'ga porogytafer are ikue. 'Ga porogytafera peenup, 'jau je 'ā tekou pē nupe— 'jau Paulo 'ga 'gā nupe u'ama. —A'ere nipo 'awamū naje resagu'jawi pejepe nū.

²⁶Jejuu 'ga je ako imome'wau pē nupe ikue. A'eramū pēē 'ga rerowiare'em ire pēē te futat pejejereko tywerukaa 'ga upe.

²⁷'Ga remifutara je 'ā imome'wau pē nupe. Wemifutara pēē iaporamū Janeruwarete 'ga aku'iramū pē nee, 'jau je ako pē nupe ikue— 'jau Paulo 'ga 'gā nupe.

²⁸—Pēē 'ā 'awamū 'wyriaramū Jejuu 'ga rerowiaara 'gā nupe. Janeruwarete 'ga 'Agesagea te 'ā pē mogyau 'wyriaramū 'gā nupe. A'eramū pēē pejejejukau esage 'gā nee— 'jau Paulo 'ga 'wyriara 'gā nupe. —Sā'ā ae jejuka esage weymawa karupa'mī are. Nan tee futat pēē pejejejukau esage 'gā nee. Janeruwarete 'ga 'ā wa'yra 'ga mua ijukaukaa janee rakue. A'eramū 'ga 'ā 'agamū janetywera moia jane wi. 'Ga manū'em ire amunipo 'ā 'ga janetywera nomoiri futari jane wi. Werowiaaramū 'ga jane pireita janetywer awi. A'eramū 'ga a'eramū janejaramū akou. 'Ga 'ā pē mogyau 'wyriaramū werowiaara 'gā nupe. A'eramū ki pēē pejejejukau esage 'gā nee— 'jau Paulo 'ga 'gā nupe u'ama.

²⁹A'eramū Paulo 'ga 'jau 'gā nupe:

—Akwaap je. Je o re nipo i'me ma'e 'gā amū nuri o'meramū pē nupe. "Je te je rerowiat pejepe", 'jau nipo 'gā pē nupe. "Perowiar awi Jejuu 'ga", 'jau nipo 'gā pē nupe. Pē mu'jau 'me nipo 'gā nuri. Jejuu 'ga rerowiar awi pē momoirukar are afuweramū. 'Miara 'jawe aipo 'gā. Sā'ā 'miara jemuaēme'ema pēneymaw are. Nan tee futat 'gā najemuaēmi pē nee. Jejuu 'ga rerowiar awi pē momoirukaawamū te 'gā nuri. A'eramū pēē pejeje'gawau nanuar awi.

³⁰A'ere nipo anure pēē mū we futat pē'me pejejaupe pejejemojo'okawamū— 'jau 'ga 'gā nupe.

³¹—A'eramū ki pēē pejejea'gwau i'me ma'e 'gā nui. Muapyra kwara je ako imagwapa tekou pē pype, Jejuu 'ga mome'wau pē nupe ikue. "Pe'je Jejuu 'ga rerowiaa pejeojere'emamū. Pepoit kasi 'ga rerowiar awi ne. I'me ma'e rerowiare'ema", 'jau je ako pē nupe ikue— 'jau Paulo 'ga 'gā nupe u'ama imome'wau. —A'etea pēē mū 'gā 'me are pejeapyakau. A'eramū je a'eramū tejaa'wau pē nee. Au'jeteramū je 'ā tekou pē mu'jau. A'jea futat jeremimome'ua. Perowiar awi i'me ma'e 'gā— 'jau 'ga 'gā nupe.

³²—'Awamū je pē mome'wau Jarejuwarete 'ga upe. Tojejuka 'ga pē nee 'jau. A'eramū pēē 'ga je'ega renupa pejejemogyau. Tepē poat 'ga 'jau, werowiar are 'jau. Wemiayuwa upe 'ga mama'e esage monou. A'eramū nipo 'ga imonou pē nupe— 'jau Paulo 'ga 'gā nupe.

³³—Je 'ā je kwaap katu pejepe. Je 'ā, "ka'aranū'ua pemut ape jee", na'ea'uweri tekou pē nupe. "Mama'ea pemut amū jee", 'jawe'em je 'ā pē nupe.

³⁴Je te futat teporowykyau tekaraemā are. Tepytuna 'gā karaemā muawamū nanē je 'ā je te futat teporowykyau tekou. "Pemut ape jee. Mama'ea pemut amū jee", na'ei je 'ā tekou pē nupe. Je te futat 'ā tekou teporowykyau— 'jau 'ga u'ama 'gā nupe.

³⁵—A'eramū pēē nanē nan tee futat iapou— 'jau Paulo 'ga 'gā nupe. —A'e are je 'ā pē mu'jau: "Pe'je pejeporowykyau mama'e muawamū pejejeupe, pejepytuna 'gā nupe nanē mama'e mua nū", 'jau je ako pē nupe ikue. Ymā te 'ā Jejuu 'ga 'i rakue: "Jarejeupe mama'e muramū janeku'iramū jarejemogyau. A'ere jane 'ga amū upe mama'e monoramū te janeku'ieteramū", e'i 'ā Jejuu 'ga rakue— 'jau Paulo 'ga 'gā nupe.

³⁶Oporogytapaw ire Paulo 'ga wapyka wenupy'au Jejuu 'ga rerowiaara 'gā netee, oje'ega monou Jarejuwarete 'ga upe.

³⁷⁻³⁸A'erauwe 'gā 'jau ajaupe:

—Oo futat 'ga jane wi— 'jau 'gā ajaupe.

A'erauwe futat 'gā ajaw'wau 'ga ree kwaiwete. Ojoo'opaw ire 'gā Paulo 'ga mana. Ojomoyka 'ga mana. 'Ga mamaw ire 'gā 'ga rerawau yaruu pe ejaa.

21

Jerusareg ipe Paulo 'ga oawet

¹Yaruu pype aru'ar ire Paulo 'ga 'jau ywya'marimūwara 'gā nupe:

—Ko ore ruri— 'jau Paulo 'ga 'gā nupe.

A'erauwe ywya'marimūwara 'gā je'egi oree:

—'Wei. Pe'je 'wei— 'jau 'gā oree.

Oroia ore oroyaapayayau arawau. Arawau orowaēma Kosi 'jawa 'ypō'ōūu upe. Peu ore oropytau. Ai'iwe ore oroia nū. Arawau Rodes 'jawa jemiar ipe orojekokaipa. A'ere oroia arawau nū. Patara 'jawa amunaw ipe arawau orojekoka. Peu futat aru'jāu yaruu awi.

²A'eramū ore Fenisia ywy pe oo ma'e yaruu pype ete aru'aa nū. Oroia nū. Arawau ore arakou 'y wwyri'i etee futat.

³Arawau 'ypō'ō mū resaka. Sipiri 'jawa resaka.

—Mīnamū 'ypō'ōūu reni ra'e kūi— 'jau ore arajaupe.

A'erauwe ore imoyaawi orokwapa 'ypō'ōūu pyu. Orokwapa etee futat 'ypō'ō atykupe katy. Arawau ore kwe katy ka'arete katy, Siria ywy katy. Arawau orowaēma ka'a wwyra upe nū. A'eramū arawau orowaēma Tiro upe. Arawau ore Tiro pe orojekoka. Peu futat aru'jāu yaruu awi. Yaruu jara 'gā karaemā 'gā enū'ēnamū ore arawau kwe pe amunawa momyrūmū.

⁴Arawau Jeju 'ga rerowiaara 'gā amū nekoa. A'eramū ore arawau arajemogyau Jeju 'ga rerowiaara 'gā nog ipe. Majepeja morowykye'ema magwapa arajemogyau peu Jeju 'ga rerowiaara 'gā pyri. Peuwara 'gā, Jeju 'ga rerowiaara 'gā 'jau Paulo 'ga upe:

—Ereo awi Jerusareg ipe. 'Au etee eko ore pyri— 'jau 'gā Paulo 'ga upe.

A'eramū 'gā 'jau 'ga upe:

—Janeruwarete 'ga 'Agesagea oje'ega oree ai'i: “Paulo 'ga nipo 'gā peu nuerekoarūi”, e'i 'ga 'Agesagea oree ai'i. A'eramū ore eneo futare'ema— 'jau 'gā Paulo 'ga upe.

A'ere Paulo 'ga 'i etee:

—Oo futat je— 'ga 'i etee.

⁵Arawawa upe iwaēmamū ore arawau nū, yaruu pype aru'aa nū. Kwaiwete peuwara 'gā awau oreo resaka wemireko 'gā netee, wa'ya 'gā netee. A'eramū ore 'yisiga pype aruapyka orojenupy'āu oroporogytau Jarejuwarete 'ga upe, yaruu pype aru'ar enune.

⁶Jarejuwarete 'ga upe oroporogytapaw ire Paulo 'ga oje'ega 'gā nupe:

—Orojoir ore— 'jau 'ga 'gā nupe.

A'erauwe ore aru'aa oroia. Oreo resaka 'ut ma'efera 'gā nanē ojewya awau oje'wyr ipe nū, ore ir ire nū.

⁷Tiro 'jaw awi ore arawau orowaēma Tolemaita 'jawa upe. Peu ore Jeju 'ga rerowiaara 'gā amū nekoa nū. A'eramū ore peu arajemogyau 'gā pyri. Kaarup. Majepei tee oroser ire aru'aa yaruu pype nū.

⁸Ai'iwe ore oroia nū. Arawau ore orojekoka Sesaria pe. Peu ore aru'jāu yaruu awi. A'eramū futat ore aru'aru'jape'ema yara pype.

Orojekog ire ore arawawayayau Filipe 'ga rog ipe oropytau. Jeju 'ga porogyta mome'wara 'ga Filiperamū. Jerusareg ipe Filipe 'ga rekoramū Jeju 'ga remimonofera 'gā 'ga mogou imen manū ma'e 'gā nupe kumi monoaramū rakue. Aipo 'ga Filipe 'ga rog ipe arawau oropytau.

⁹Irūpāwē Filipe 'ga ra'jyra. Kūjāmukua juejue 'ga ra'jyra ajemogyau. Janeruwarete 'ga porogyta mome'wara 'gā te 'ga ra'jyra nanē nū.

¹⁰Filipe 'ga rog ipe oropytawaipe. Peu ore rekoramū kūima'e 'ga amū 'ua owaēma oree. Agapu 'jawa 'ga 'ua owaēma oree Filipe 'ga rog ipe. 'Ga nanē futat Janeruwarete 'ga je'ega mome'wara nū. Judeja ywy awi 'ga 'ua.

¹¹Owaēm ppy we Agapu 'ga opajajamū Paulo 'ga ku'afaawa ppyka. Ojepofaa, ojepyfaa ipyu. Ojepofar ire 'ga 'jau Paulo 'ga upe:

—“Nan nipo 'gā 'ga pofari Jerusareg ipe”, e'i Janeruwarete 'ga 'Agesagea imome'wau jee— 'jau 'ga Paulo 'ga upe. —A'eramū nipo 'gā nan futat ene rerekou. A'ere nipo 'gā ene monou, judeue'ema 'gā po pe ene jukaawamū— 'jau Agapu 'ga imome'wau Paulo 'ga upe.

¹²A'e renupawe ore 'jau Paulo 'ga upe:

—Soo awi ajee Jerusareg ipe— 'jau ore 'ga upe.

¹³A'ere Paulo 'ga 'i etee oree:

—Pe'je pejepika pejemogyau. Pejoo'o awi pejemogyau. Je mu'arasig etee te pejepe nanamū. Oo futat je. Tene 'gā je pofari. Tene 'gā je jukai. Nakyjea'uweri ae 'ga rerowiaaramū nanuar awi— 'jau etee Paulo 'ga oree. —Jejui 'ga te 'ā jejararetea. 'Ga te 'ā je mono peu. A'eramū je tekyjawe'em temanū awi— 'jau etee 'ga oree.

¹⁴ Sijojeropytauk at 'ga 'jau, 'jau ore oroje'ega 'ga upe numiamū. A'ere 'ga nore mojerowiari etee. A'eramū ore 'jau arajaupe:

—Tene ajee 'ga oi. Janejararete 'ga te afutat 'ga oa ra'e— 'jau ore arajaupe.

¹⁵ Peu arakorako'i re ore orokaraemā mogatyrūmū. A'ere ore arawau Jerusareg ipe. Wyyri futat ore arawau a'eramū futat.

¹⁶ Jejui 'ga rerowiaara 'gā amū awau ore rupi. Sesaria pewarera 'gā amū awau ore rupi. Jerusareg ipe orowaēm ire ore rupi oo ma'efera 'gā futat ore rerawau Menasō 'ga rog ipe, Sipiri pewarera 'ga rog ipe. Aipo 'ga, Menasō 'ga, Jejui 'ga rerowiaar ymanera futat. A'eramū ore arajemogyau 'ga pyri peu.

Tiago 'ga pyri Paulo 'ga oawet

¹⁷ Jerusareg ipe orowaēm ppy we ore arawau Jejui 'ga rerowiaara 'gā nesaka. Ore resakawe 'gā aku'iramū ore ree. Ai'iwe Paulo 'ga ore rerawau Tiago 'ga resaka. Peu Jejui 'ga rerowiaara 'gā 'wyyriara 'gā ajatykau kwaiwete Tiago 'ga pyri.

¹⁸ Peu ojeupe ore waēmamū Jejui 'ga rerowiaara 'gā 'wyyriara 'gā ore rapeje'ega:

—Tepeko?— 'jau 'gā oree.

—'Wei. Ore rekoi 'wei— 'jau Paulo 'ga oje'ega 'gā nupe.

¹⁹ A'ere aruapeje'eg ire Paulo 'ga oporogytau 'gā nupe, wekwawera mome'wau 'gā nupe: —Kwe pe ako ore oi judeue'ema 'gā nupe Jejui 'ga mome'wau ikue. A'eramū kwaiwete 'gā ajemogyau Jejui 'ga rerowiaa ai'i— 'jau Paulo 'ga imome'wau 'gā nupe.

Wekwawera mome'waupap 'gā nupe.

²⁰ A'e renupawe 'gā 'jau Paulo 'ga upe:

—A'jea futat 'ā Janeruwarete 'ga resageramū a'i kūi. 'Aga morogyta 'ā ae muoryp a'i kūi— 'jau 'gā 'ga upe.

—'Au nanē kwaiwete judeu 'gā Jejui 'ga rerowiari nū. A'ere 'gā Moisesi 'ga remikwasiarer imū etee iapoi we ajemogyau— 'jau 'gā imome'wau Paulo 'ga upe.

²¹ —A'ere kwe pewara 'gā nuri o'meramū 'gā nupe rai'i. "Paulo 'ga oo akou kwe pewara 'gā judeu 'gā mu'jau tyweruu akou", 'jau 'gā 'ua ajaupe rai'i— 'jau 'gā imome'wau Paulo 'ga upe. —"Pepoit Moisesi 'ga remimu'efer awi", e'i Paulo 'ga awau akou 'gā nupe. "Pemojewag awi pejeja'yra", e'i nanē 'ga akou 'gā nupe nū, 'jau 'gā 'ua imome'wau ajaupe rai'i. "Jarejemiapo awi pepoit", e'i 'ga akou judeu 'gā nupe, 'jau 'gā 'ua ajaupe rai'i— 'jau 'gā imome'wau Paulo 'ga upe.

²² —A'ere nipo 'gā 'au ene rut ene waēma kwaawi ra'e. Maran aje jane iapoi 'gā nupe 'awamū ene rerowiarukaawamū 'ū?— 'jau 'gā Paulo 'ga upe.

²³ —Nan eapo 'awamū 'gā nupe. 'Au irūpāwē 'gā nuwi, ore orojesaukat Jarejuwarete 'ga upe 'jara'gā. Jarejuwarete 'ga upe 'gā jekatu'ogi u'eawer imū futat.

²⁴ A'eramū ene nanē ewau Jarejuwarete 'ga mogytaaw ipe 'gā nupi— 'jau 'gā Paulo 'ga upe. —Peu ene nanē ejekatu'oka Moisesi 'ga remimu'eawer imū Jarejuwarete 'ga upe. A'ere ene ka'aranūū monou mainana 'ga upe, 'gā pinawera mepyau 'ga upe 'jau. A'eramū nipo judeu 'gā ojomoyka ikwaapa— 'jau 'gā 'ga upe. —"Na pa je 'ga Moisesi 'ga jaremu'eawer imū etee futat iapoi akou ra'e", te'i 'gā ojomoyka ikwaapa 'jau. "A'etea pa 'gā i'me oree rai'i nū", te'i 'gā ajaupe 'jau— 'jau 'gā Paulo 'ga upe.

²⁵ —Judeuramū jane iapopawi Moisesi 'ga jaremu'eawer imū. A'ere judeue'ema 'gā nanarūū— 'jau 'gā imome'wau Paulo 'ga upe. —Ymā te ore ka'arana monoi ikwasiaa 'gā nupe ikue. "Nan tee ki peapo", 'jau ore imonou ikwasiaa ka'aran are 'gā nupe ikue.

—"Pe'u kasi maira'me a'agawa upe eroopyrera kumia ne. Wyyra rya ki pemonykyt jui. Wyy monykyr ire etee ki miaro'o peeyt i'wau. Pe'u kasi wya ne. Wyy monykyre'ema nanē pēē i'wawe'em nū. Kūima'eramū ae ajumireko are akowe'em. Kūjā nanē nū. Ojomen are akowe'em. Omena etee futat erekou. Ae nanē wemirekoa etee futat erekou nū", 'jau ore ikwasiaa imonou 'gā nupe ikue— 'jau 'gā Paulo 'ga upe.

²⁶ Ai'iwe Paulo 'ga awau irūpāwē 'gā nupi. A'eramū 'gā juejue ojekatu'oka Jarejuwarete 'ga upe Moisesi 'ga je'eger imū. A'ere awau osou Jarejuwarete 'ga mogytaaw ipe oporogytau mainana 'ga upe.

—Morowykye'ema mū magwaw ire ore jekatu'opawi. A'eramū ki ene wyyra amū iapisau iapyau oree juejue. Je tamepy orojee ene upe 'jau— 'jau 'ga mainana 'ga upe.

Paulo 'ga ppykawet

²⁷ Morowykye'ema teepap ja'wyja'wyramū Paulo 'ga awau osou Jarejuwarete 'ga mogy-taaw ipe. A'e pe judeu 'gā amū 'ga resaka, Asia ywy awi 'ut ma'efera 'gā 'ga resaka. A'e 'gā Paulo 'ga pyyka 'ga ku'a are.

²⁸ 'Ga pyyg ire 'gā 'ga reruafukaita 'ga rerekou:

—Pe'je pejejua 'ga pyyka ore pyri. Koa kūima'e 'ga pyyka ore pyri. Kwe pe 'ga oi 'gā mu'jau tywtw rakue— 'jau 'gā 'gā nupe. —“Peapo awi Moisesi 'ga remimu'efer imū”, e'i 'ga 'gā nupe rakue. “Juderuwarete 'ga mogytaawa nia'wyri”, e'i 'ga rakue— 'jau futatee 'gā 'gā nupe. —A'ere 'ga 'ā 'awamū judeue'ema 'gā neruri erosou Jarejuwarete 'ga mogytaaw ipe— 'jau 'gā 'ga rerekou eruafukaita 'gā nupe. —Judeue'ema 'gā ae nuerurarūi Jarejuwarete 'ga mogytaaw ipe. A'etea 'ga werut 'gā 'au— 'jau 'gā 'ga reruafukaita erekou.

²⁹ Jerusarega momyrūaw ipe 'gā Paulo 'ga resaka rai'i. Judeue'ema 'ga amū 'ga rewiri ekoramū rai'i. Efesu pewara 'ga, Trofimū 'ga akou 'ga rewiri rai'i. A'eramū 'gā nesakarera 'gā Paulo 'ga resaka Jarejuwarete 'ga mogytaaw ipe.

—Judeue'ema 'ga nipo 'ga werut erosou— 'jau 'gā ajaupe.

Nuesagi agawewi 'gā judeue'ema 'ga amū 'ga pyri. A'etea 'gā aipo 'jau ajaupe. A'eramū 'gā a'eramū Paulo 'ga pyyka eruafukaita erekou.

³⁰ Aipo 'gā 'eramū tesirūmera 'gā 'ua ajatykau 'ga pyykarera 'gā poaa Paulo 'ga ree. 'Ga rerauw eroyriryryka enuēma ukupepe. 'Okwara rawopytyma 'ga wi.

A'erauwe 'gā wafukaita ajaupe:

—Pe'je pejejua. Sijuka 'ga 'jau— 'jau 'gā ajaupe.

³¹ A'ea kūima'e 'ga amū enupa. A'eramū 'ga ujāna jefaruu piara rupi.

—Ejot. Ekoay nipo 'ā 'gā ajuapisau 'ja— 'jau 'ga awau jefaruu 'ga upe.

³² A'erauwe jefaruu 'gā 'wyrira'ri 'ga jefaruu 'gā majatykai erawau. A'erauwe jefaruu 'gā nuri ujāna. Peu we 'gā jefaruu 'gā nesaka. A'erauwe 'gā pōiri Paulo 'ga nupā awi.

³³ A'erauwe jefaruu 'gā 'wyrira'ri 'ga oi Paulo 'ga rerowyka 'ga pyyka. A'erauwe 'ga 'i jefaruu 'gā nupe:

—Pe'je pejejua 'ga pofaa itaju pyu— 'jau 'ga jefaruu 'gā nupe.

A'eramū 'gā 'ga pofaa. Mukūja itaju pyu 'ga pofaa.

'Ga pofar ire 'wyrira'ra 'ga 'jau Paulo 'ga nupāarera 'gā nupe:

—Aw'ya 'ga ki 'ei? Ma'ja 'ga iapou ra'e ki 'ei?— 'jau 'ga 'gā nupe.

³⁴ A'ere 'gā afukafukai ekoete tee futat waewaemamū. A'eramū 'gā ikwaape'ema. A'erauwe jefaruu 'gā 'wyrira'ri 'ga je'egi:

—Pe'je 'ga rerauw jareje'wyr ipe— 'jau 'ga jefaruu 'gā nupe.

³⁵⁻³⁶ A'erauwe 'gā 'ga rerauw oje'wyr 'og ywate pe. 'Og ywate jeupiawa upe Paulo 'ga reroawaem ja'wyja'wyramū mytuna 'gā 'ua ujāna jefaruu 'gā newiri wafukaita:

—Pe'je sijuka futat 'ga— 'jau mytuna 'gā 'ua jefaruu 'gā nepejāna.

A'erauwe jefaruu 'gā Paulo 'ga rupia. Wam. Ojasi'y'warimū 'ga rerauw 'ga roerojeupia.

'Gā nupe Paulo 'ga 'eawet

³⁷ Werose ja'wyja'wyrarū Paulo 'ga oje'ega jefaruu 'wyrira'ri 'ga upe:

—Tene je je'egi enee ra'ne. Toporogyta enee 'jau— 'jau 'ga 'ga upe.

—Kuu. Jeje'ega futat nipo ereapo ki sa?

³⁸ Nuapoi sipo 'ga jeje'ega pa, a'e naje 'ā re'ā— 'jau jefaruu 'gā 'wyrira'ri 'ga 'ga upe. —NaRoma 'wyrirarete muearera rūi nipo ene ki sa? 'Awamue futat ako Egitu ywy pewarera 'ga aparupisi ma'efera 'gā nerooi 'wyrira'ra mueu ai'i. Kwaturu miu aparupisi ma'efera 'gā 'ga erawau ai'i— 'jau 'ga imome'wau Paulo 'ga upe. —Amunawe'em ipe ako 'ga 'gā nerawau 'wyrira'ra mueu akōjai'i. Na'efera rūi nipo ene ki sa?— 'jau 'ga Paulo 'ga upe.

³⁹ —Naani nū'ū. Judeua te je nū'ū. Tarsu pe te je 'ari ikue. Sirisia ywy pe te Tarsu ruwi nū'ū. Tuwiiu te aipoa Tarsua— 'jau Paulo 'ga imome'wau 'wyrira'ri 'ga upe. —Tene je je'egi 'gā nupe— 'jau Paulo 'ga jefaruu 'gā 'wyrira'ri 'ga upe.

⁴⁰ —Nai'i— 'jau 'ga.

A'erauwe Paulo 'ga u'ama ojeupiawa 'arimū opo mowya 'gā nupe 'gā momika. 'Gā je'ega apou 'gā nupe. 'Gā momika etee 'gā mogyau. A'eramū Paulo 'ga oje'ega 'gā nupe. Judeu 'gā je'egarete 'ga iapou 'gā nupe, epyreu 'jawa apou 'gā nupe.

22

¹ —Pe'je pejeapyakau je ree. Tejekwawera je amome'u pē nupe. A'eramū pēē pe-jeapyakau jeporogyta are— 'jau Paulo 'ga 'gā nupe.

² —Kuu. Janeje'ega futat nipo 'ga wapo— 'jau 'gā ajaupe.

A'erauwe 'gā nuwi wapyakau etee oje'ega 'ga iaporamū.

³ —Je 'ā judeua te— 'jau Paulo 'ga oje'ega 'gā nupe. —Tarsu pe u'at ma'efera te 'ā je. Sirisia wvy pe u'at ma'efera te 'ā je. Tearanuw ire te je oi Jerusareg ipe, tejemu'jau ikue. Gamarieu 'ga upe tejemu'jaukaa ikue. 'Ga te je mu'jau Moisesi 'ga remikwasiarar are ikue. Jarejuwarete 'ga je'eg are 'ga je mu'jau ikue. A'eramū je 'ā pē 'jawe etee futat tekou Jarejuwarete 'ga rerowiaaramū. 'Ga remifutara etee te je aapo— 'jau Paulo 'ga 'gā nupe imome'wau u'ama.

⁴ —Ymā te jemara'neramū Jejui 'ga rerowiaara 'gā nee ikue. A'eramū je 'gā nerekou tyweaete. Je 'gā pyyka 'gā monou moromunepawa pype 'gā munepa ikue. Kūima'e, kūjā. Mīmera 'gā je ipyyka imonou imunepa ikue. "Tomomoirukat 'gā Jejui 'ga rerowiar awi 'jau", 'jau je tejeupe ikue numiamū. "Ga wi 'gā poire'em ire je 'gā apisiukaa 'gā nupe", 'jau je ikue— 'jau Paulo 'ga imome'wau.

⁵ —Mainana 'wyrariarete 'ga oje'ēma'e 'gā netee nanē futat ikwaapa nū. 'Ga futat ka'arana kwasiaa imua jee ikue. Damasco pewara 'gā nupe je eroopyramū 'ga ka'arana kwasiaa imua jee ikue. A'eramū je tewau 'gā nupe ikue numiamū. Jejui 'ga rerowiaara 'gā pyyka tewauramet futat ikue numiamū. "Tapofat 'gā erua Jerusareg ipe", 'jau je ikue numiamū— 'jau Paulo 'ga 'gā nupe.

⁶ —A'ere je Damasco pe je waēm ja'wyja'wyraruwe tata eny 'jawewara ruri ojyppa ywag awi jee ikue. Ajeaje katu kwara ruwamū tata eny 'jawewara 'ua jee. Enyfyk te aipoa tata eny 'jawewara. A'eramū je enywyter ipe futat te'ama.

⁷ Eny resakawe je tewau te'aa ywyu teyyita eny awi. Je o je 'arauwe 'ga amū oje'ega jee: "Ma'eramū te je rereko tywerete ape, ki Saulo?" 'jau 'ga jee— 'jau 'ga imome'wau 'gā nupe.

⁸ —Tejeupe 'ga je'egamū je 'jau 'ga upe: "Awjja te poromū oje'eg jee, ki Ku'jyp?" 'jau je 'ga upe. "Je Jejujamū aje'eg enee. Nasare pe waranup ma'efera je", 'jau 'ga jee. "Je 'ā je rereko tywerete ape", 'jau 'ga jee ikue— 'jau Paulo 'ga imome'wau 'gā nupe.

⁹ —Jeirū 'gā eny resaka futat numiamū. A'ere 'gā nuenuwi Jejui 'ga je upe ije'ega ikue. Je etee futat 'ga je'ega renupa.

¹⁰ A'eramū je 'jau 'ga upe: "Ma'ja te je aapo enee 'awamū?" 'jau je 'ga upe.

—Aipo ojeupe je 'eramū 'ga oje'ega mua jee: "Efu'am ewau Damasco pe. Peu 'ga amū tene mu'e je ree eneremiaporam are 'jau", 'jau 'ga jee oje'ega mua jee ikue— 'jau Paulo 'ga 'gā nupe.

¹¹ —A'ere je najereai. Aipo renyfera je reawowep. A'eramū jeirūa 'gā je popyyka je rerawau Damasco pe.

¹² Peu je waēm ire Ananiasi 'ga 'ua oporogyta jee. Ananiasi 'ga Janeruwarete 'ga rerowiaararetea. Moisesi 'ga remikwasiarar imū nanē 'ga mama'e apou nū. A'eramū peuwara 'gā judeu 'gā 'ga pojeupa ajemogyau.

¹³ A'e 'ga 'ua oje'ega jee— 'jau Paulo 'ga imome'wau. —"Awamū ene Jejui 'ga rerowiaaramū ereko je 'jawe", 'jau 'ga jee. "A'eramū je ene mamā'jāu", 'jau 'ga jee— 'jau Paulo 'ga imome'wau 'gā nupe. —A'erauwe je temā'jāu tejearamū nū.

¹⁴ A'ere Ananiasi 'ga 'jau jee: "Ymā we te 'ā Janeruwarete 'ga ene pyyrūi rakue", 'jau 'ga jee. "Janeypy 'gā 'ā ga rerowiaa rakue. 'Ga futat ene mut wemifutara kwaawukaa enee", 'jau 'ga jee. "Ga ra'yra 'ga futat oje'eg enee, ojesaukaa enee rai'i. Mama'e tywera apoare'ema 'ga ojesaukat enee rai'i", 'jau Ananiasi 'ga jee— 'jau Paulo 'ga imome'wau 'gā nupe.

¹⁵ —"Ene futat 'awamū ereko 'ga porogyta mome'waramū", 'jau 'ga jee. "Ejemiesagera mome'wau ekou 'gā nupe, ejemienuwera retee", 'jau 'ga jee ikue— 'jau Paulo 'ga 'gā nupe.

¹⁶ —Aipo 'e re Ananiasi 'ga 'jau jee: "Ere efu'ama jui. Eje'ega Jejui 'ga upe", 'jau 'ga jee. "Ojeupe eneje'egamū 'ga enetywera tomoit ene wi 'jau", 'jau 'ga jee— 'jau Paulo 'ga imome'wau 'gā nupe. —"Aipo ene iapo re je ene pymāu 'y pe 'jau", 'jau 'ga jee— 'jau 'ga 'gā nupe.

—A'erauwe je je'egi Jejui 'ga upe. 'Ga upe je je'eg ire 'ga je pymāu 'y pe— 'jau 'ga imome'wau 'gā nupe.

¹⁷ —A'ere je tejua tewau Jerusareg ipe ikue nū. 'Au tewaēm ire je tewau Jarejuwarete 'ga mogytaaw ipe teporogyta Jarejuwarete 'ga upe.

¹⁸ Ojeupe je porogyta je 'amamū Janejararete 'ga ojesaukaa jee. A'eramū 'ga 'jau jee: "Ekwap kamēšiete Jerusareg awi. 'Auwara 'gā naje rerowiari, ene je mome'uramū ne", 'jau Jejui 'ga jee ikue— 'jau Paulo 'ga 'gā nupe imome'wau.

¹⁹ —A'eramū je 'jau Jarejararete 'ga upe: "A'jea futat ako je ymā ene rerowiaara 'gā pyygi ikue. 'Gā jatykaaw ipe 'gā pyyka tekou ikue, 'gā nupāu tekou ikue", 'jau je 'ga upe.

²⁰ "Estevão 'ga ako ene mome'wara ikue. A'ere je 'ga jukaramū 'ga resagi te'ama ikue. 'Ga jukaara 'gā naitya je iarūmū te'ama ikue. Je nanē 'ga jukaa futaa ikue nū", 'jau je Jejui 'ga upe— 'jau Paulo 'ga 'gā nupe u'ama imome'wau.

²¹—A'eramū Jeju 'ga 'jau jee: “Ekwap 'aw awi, Jerusareg awi. Ekwap kwe pe mukuwara 'gā nupe je mome'wau”, 'jau 'ga jee ikue. “Judeue'ema 'gā nupe je mome'wau ewau muku”, 'jau 'ga jee ikue— 'jau Paulo 'ga imome'wau 'gā nupe.

²² A'eramū aipo renupa taetu najuejue etee futat wafukaita nū. “Judeue'ema 'gā nupe je mome'wau ewau”, 'jau 'ga jee ikue ojeupe 'e renupa taetu wafukaju'japa ajaupe nū:

—Pe'je ajee 'ga sijuka futat. Nia'wyri futari 'ga ra'e— 'jau 'gā wafukaita ajaupe.

²³ Ojomoyka wafukaita. A'eramū futat weteyrū mososoka ipatukau. 'Yja mosimoo imonou ywau. 'Gā mara'nea 'gā nerekou 'yja mosimorukaa 'gā nupe.

²⁴ A'erauwe 'wyriara 'ga je'egi jefaruu upe:

—Pe'je 'ga rerawau imunepa imu'ama jarejog ipe— 'jau 'wyriara jefaruu 'gā nupe.

A'erauwe jefaruu 'gā 'ga rerosou. A'ere 'wyriara 'ga 'jau:

—Ma'eramū 'gā ma'eramū amara'ne ekoeteramū 'ga ree 'ū? Nakwaakwaawi'i pa je 'ā judeu 'gā mara'neawa 'ga ree nū— 'jau 'wyriara 'ga 'gā mara'nea kwaape'ema.

Nokwaawi 'ga judeu 'gā je'egaretea. A'eramū 'gā 'gā afukai are nanē weapyoe'emamū nū. A'eramū 'ga 'gā mara'nea kwaape'ema.

A'eramū 'wyriara 'ga 'jau jefaruu 'gā nupe:

—Pe'je 'ga nupānupāu. Ma'ja te ereapo 'gā nupe ra'e, sa'e 'ga upe 'jau. Onupā re 'ga tomome'u janee 'jau— 'jau 'ga jefaruu 'gā nupe.

²⁵ A'eramū 'gā 'ga pofaa 'ga nupā enune. A'eramū Paulo 'ga 'jau jefaruu 'gā 'wyria'ri 'ga upe:

—Ma'eramū sipo pēē romanūa sinupā 'jau? Esage sipo romanūnamū ae nupā?— 'jau Paulo 'ga 'ga upe. —Namome'ui we je tejekwawera 'wyriara 'gā nupe. Jerekwawera renuw ire te nipo 'gā 'i pē nupe: “Mama'e tywera 'ga wapo futat rai'i”, 'jau nipo 'gā. “Naani. Nuapoi 'ga mama'e tywera rai'i”, 'jau nipo 'gā. Maranamū, “mama'e tywera 'ga wapo futat rai'i” 'eramū 'gā je nupāukaa. “Nuapoi 'ga mama'e tywera rai'i” 'eramū nipo 'gā je nupāukare'ema — 'jau Paulo 'ga jefaruu 'gā 'wyria'ri 'ga upe.

²⁶ A'erauwe jefaruu 'gā 'wyria'ri 'ga oi o'wyriara 'ga upe imome'wau:

—Ma'eramū te jane rekoi ekoete 'ga ree rai'i? “Romanūa je”, e'i 'ga oree ko nū'ū— 'jau 'ga awau o'wyriara upe.

²⁷ A'eramū 'ga 'wyriara 'ga awau oje'ega Paulo 'ga upe:

—A'jea futat te ene romanūa? “Romanūa je”, e'i 'ga oree ko, 'jau 'gā 'ū.

—A'jea futat je romanūa nū'ū— 'jau Paulo 'ga jefaruu 'wyriara 'ga upe.

²⁸ —Je ka'aranūū amono kwaiwete romanū upe ikue, romanūnamū tejekwawamū ikue. A'eramū je romanūnamū tekou 'awamū— 'jau 'wyriara 'ga Paulo 'ga upe.

—Je naani nū'ū. Je namonoi ka'aranūūa romanūnamū tejekwawamū ikue nū'ū— 'jau Paulo 'ga 'ga upe. —Je peu futat romanū ywy pe a'at ikue nū'ū. A'eramū je romanūrete futat nū'ū— 'jau Paulo 'ga 'wyriara 'ga upe.

²⁹ Aipo renupawe 'ga upe oporonup ma'efera 'gā awau 'ga wi. Jefaruu 'wyriara 'ga nanē okyjau 'ga wi. “Romanūa ae nopofar ekoetea'uweri”, 'jau 'ga ojeupe. A'eramū 'ga okyjau 'ga wi.

Judeu 'gā nupe oje'ēma'e 'gā nowase Paulo 'ga 'eawet

³⁰ A'ere jefaruu 'wyriara 'ga 'jau: “Ma'eramū te judeu 'gā mara'ne ekoeteramū 'ga ree rai'i 'ū?” 'jau 'ga ojeupe.

A'eramū ai'iwe 'ga 'gā majatykau. Mainana 'wyriara 'gā, judeu 'gā 'wyria'ri 'gā, 'gā nupe oje'ēma'e 'gā. Mīmera 'gā 'ga imua imajatykau.

—Ma'ja te 'ga wapo pē nupe rai'i?— 'jau 'ga 'gā nupe.

A'eramū jefaruu 'wyriara 'ga Paulo 'ga rerurukaa 'gā nupe nū.

23

¹ A'eramū Paulo 'ga osou ypy we ae upe oje'ēma'e 'gā nesaka, 'gā jatyka 'gā nuwamū. A'erauwe 'ga oje'ega 'gā nupe:

—Pēē 'ā judeua. Je nanē futat judeua nū. Namutamutat je rekoi pē pype. Je ako esage Jarejuwarete 'ga upe— 'jau Paulo 'ga 'gā nupe.

² Aipo 'ga 'eramū mainana 'wyriararete 'ga amara'neramū 'ga ree, Ananiasi 'ga amara'neramū 'ga ree. A'eramū 'ga 'jau Paulo 'ga pyriwara 'ga upe:

—Ejurunupā 'ga a'i kūi. Aipo ne'ia'uweri ae— 'jau 'ga Paulo 'ga pyriwara 'ga upe.

³ A'eramū Paulo 'ga 'jau 'ga upe:

—Je nupāukar ekoeteramū te Janerwarete 'ga ene rereko tyweretei nū a'i kūi— 'jau Paulo 'ga 'ga upe. —Ene te 'ā nenea'wyri. Ene te 'ā Moisesi 'ga remikwasiarer imū etee ere'yi eapypaka je ree je renupa— 'jau Paulo 'ga 'ga upe. —Ma'eramū ene, “enupā 'ga”, 'jau 'ga upe

'ū? NaMoisesi 'ga remikwasiarar imū rūi aipoa— 'jau 'ga 'ga upe. —“Nan peapo”, ere futatee 'ā ekou ae upe. A'ere 'ā ene miamū nereapoi 'gā nupe e'eawer imū— 'jau Paulo 'ga 'ga upe.

⁴ A'eramū 'ga pyriwara 'gā amū 'jau Paulo 'ga upe:

—Aipo ere awi 'ga upe 'gā nowase. Janeruwarete 'ga te ako 'ga omogo mainana 'wyrriarareteramū ai'i kūi— 'jau 'ga Paulo 'ga upe.

⁵ —Ikwaaw ire amunipo je 'ā aipo na'e 'ga upe ra'e nū'ū— 'jau Paulo 'ga wenupara 'gā nupe. —Nakwaawi te 'ā je. A'eramū je 'ā pē'wyrriara upe aipo 'jau akiko— 'jau 'ga 'gā nupe. —Janeruwarete 'ga te 'ā “Pekurap kasi peje'wyrriara ne”, e'i futat rakue. A'ere je 'ā nakwaawi te. A'eramū je 'ā pē'wyrriara kurapa rēwējēmī pē nupe— 'jau Paulo 'ga 'gā nupe.

⁶ A'ere Paulo 'ga 'jau ojeupe: “Kuu. 'Gā amū fariseua. 'Gā amū satuseua. Naju'jaju'jawe rūi 'gā nea'aramū mama'e are”, 'jau 'ga ojeupe. A'eramū 'ga wafukaita oje'ega 'gā nupe:

—Je nanē fariseua futat. Jeruwa 'ga fariseua futat rakue— 'jau 'ga wafukaita. —Arowiat futat je jaremanū re jane 'ēi tywy awi jarewywya nū 'ea. A'e rerowiarāmū te ako 'gā je pofari ai'i— 'jau Paulo 'ga 'gā nupe.

⁷ Aipo 'erauwe satuseu 'gā ajamueu fariseu 'gā nee.

⁸ “Amanū re ae noferawu'jawi”, e'i satuseu 'gā ajaupe jepi. “Nitywi ae ywag ipe”, 'jau 'gā jepi. “Nitywi futari ae 'agera”, 'jau 'gā jepi. A'ere 'ā fariseu 'gā 'i: “A'jea futat. Ae 'agera rekoi ywag ipe. Ywag ipe nanē futat ae jemogyi nū”, 'jau 'gā jepi.

⁹ A'eramū 'gā a'eramū ajamueu, afuakaramū ajaupe. Oje'ega momoa ajaupe. A'eramū 'gā amū afu'ama. 'Gā nupe moromu'jara 'gā. Fariseu 'gā. A'eramū 'gā afu'ama oje'ega ajaupe:

—Nuapoi te 'ga 'ā mama'e tywera akou. Ywagipewara 'ga nipo oje'eg 'ga upe rai'i. 'Ga 'Agesagea nipo oje'eg 'ga upe rai'i— 'jau 'gā 'gā nupe.

A'ere 'gā afukafukai etee futat.

¹⁰ A'eramū jefaruu 'gā 'wyrriara 'ga 'jau ojeupe: “Tÿÿ. Omonoronorok futat te 'gā Paulo 'ga 'awamū 'wei'?” 'jau 'ga ojeupe.

A'erauwe 'ga 'i jefaruu 'gā nupe:

—Pe'je 'ga rerawau peu jareje'wyr ipe 'gā nui nū. Kasi 'gā a'e pe 'ga jukai ne— 'jau 'ga jefaruu 'gā nupe.

A'eramū 'gā 'ga rerawau oje'wyr ipe 'ga munepa nū.

¹¹ Ypytunimū Janejararete 'ga ojesaukaa Paulo 'ga upe:

—Erekyje kasi 'gā nui ne. Sā'ā ene je mome'ua 'au Jerusareg ipewara 'gā nupe. Nan tee futat ene ewau je mome'wau Roma pewara 'gā nupe nū— 'jau 'ga 'ga upe.

Paulo 'ga ree ifuewet ma'e

¹² Ai'iwe judeu 'gā awau ajatykau oporogytau ajaupe:

—Pe'je sijuka futat Paulo 'ga 'jau— 'jau 'gā ajaupe. —'Ga jukawe'em jane nijemi'wari futari. Jarey'wawe'em futat nanē jane nū. 'Ga juka re tāmējē futat jane jarejemi'waa nū— 'jau 'gā ajaupe. —Jarejuwarete 'ga remianuwamū te 'ā jane 'i— 'jau 'gā ajaupe.

¹³ Kwaiwete 'gā ajatykau Paulo 'ga juka are oporogytau numiamū. Kwarēta 'ga ree ifuewet ma'e 'gā pytuna.

¹⁴ A'eramū 'gā awau oporogytau mainana 'wyrriara upe, judeu 'gā 'wyrriari 'gā netee:

—Jarejuwarete 'ga remianuwamū futat ore 'i ko, najuejue etee futat ko— 'jau 'gā 'gā nupe. —“Paulo 'ga jukawe'em jane nijemi'wari futari. 'Ya miamū futat jane itykure'ema”, 'jau ore ko— 'jau 'gā 'gā nupe.

¹⁵ —Eenūi 'ga oree. 'Au futat 'ga tut 'jau. “Emut 'ga 'au. Toroporogyta 'ga upe 'jau”, ere futatee jefaruu 'wyrriara upe— 'jau 'gā mainana 'wyrriara 'gā nupe oje'ēma'e 'gā netee. —'Ga renūjamū toroo 'ga rapesaka pe aje 'jau— 'jau 'gā 'gā nupe. —Nowaēmi futari nipo 'ga 'ua 'au. Peu ore oi 'ga rapesaka arajupa. Peu etee futat ore 'ga torojuka 'jau pe aje 'jau— 'jau 'gā mainana 'wyrriara 'gā nupe.

—Nai'i. Ai'iwe nipo je 'ga renūi— 'jau mainana 'ga 'gā nupe.

¹⁶ A'ere aipo 'gā 'eramū Paulo 'ga rekowiara 'ga enuwi. A'eramū 'ga awau imome'wau Paulo 'ga upe:

—“Sijuka 'ga 'jau”, e'i 'gā enee ko— 'jau 'ga awau imome'wau Paulo 'ga upe jefaruu 'gā 'wyr ipe.

¹⁷ A'eramū Paulo 'ga 'jau jefaruu 'gā 'wyrriari 'ga upe:

—Eroo koa kunumūū 'ga peje'wyrriara 'ga pyri. Taporogyta 'ga upe 'jau, e'i 'ga— 'jau Paulo 'ga 'ga upe.

¹⁸ A'eramū 'ga 'ga rerawau o'wyrriara 'ga upe:

—“Kunumūū 'ga eroo imoporogytaukaa 'ga upe”, e'i imunewipyrrera 'ga jee. A'eramū je koromū 'ga rerua ene pyri. “Toporogyta 'ga upe 'jau”, e'i 'ga enee ra'e— 'jau 'ga 'wyrriara 'ga upe.

¹⁹ A'eramū 'wyriara 'ga kunumīūū 'ga popyyka erawau erojepe'au'i 'gā nui oporogytau 'ga upe:

—Ma'ja are te eneporomome'uwet jee?— 'jau 'ga 'ga upe.

²⁰⁻²¹ A'erauwe kunumīūū 'ga 'jau:

—Judeu 'gā ajatyka 'upa peu jetutyra 'ga rapesaka. Jetutyra 'ga juka are 'gā fueweramū. A'eramū nipo ai'iwe 'gā 'wyriara 'gā 'jau enee, “Emut 'ga oree 'au. Toroporogya 'ga upe 'jau”, 'jau futatee nipo 'gā enee. O'meramū enee. Kwarēta kūima'e 'gā 'up 'ga rapesaka pe yse pe— 'jau 'ga imome'wau 'wyriara 'ga upe. —“Janeruwarete 'ga remianuwamū futat ore 'i”, e'i 'gā ko. “Paulo 'ga jukawe'em jane nijemi'wari futari. Niy'ui futari nanē nū”, e'i 'gā ko— 'jau 'ga imome'wau 'ga upe. —Awamū futat nipo 'gā nuwi eneje'ega rapesaka— 'jau kunumīūū 'ga 'wyriara 'ga upe.

²² A'erauwe 'wyriara 'ga oje'ega kunumīūū 'ga upe:

—Eremome'u kasi ajee 'gā nupe ne— 'jau 'wyriara 'ga 'ga upe.

A'erauwe 'ga kunumīūū 'ga monou 'ga 'wyr ipe nū.

'Wyriara 'ga upe Paulo 'ga monoawet

²³⁻²⁴ A'ere 'wyriara 'ga oje'ega jefaruu 'gā 'wyriari 'gā nupe, mukūja 'gā nupe:

—Pe'je jefaruu majatykau. Tusētu ki jefaruua pemajatyka. Setēta ki kawaruu 'arimū wata ma'e 'gā. Tusētu ki aparupisawa rerekwara 'gā nanē pemajatyka nū. Paulo 'ga upe nanē ki kawaruua peroo amū nū. Pejemogatyrumap tāmējē futar iki pejejupa. Kaaruwypyaje'i tepeo 'jau. Sesaria pe Paulo 'ga teperoo ejaa jare'wyriara 'ga upe, Ferisi 'ga upe 'jau— 'jau 'wyriara 'ga 'gā nupe.

²⁵ —Ka'arana takwasiat imonou 'ga upe 'jau— 'jau 'ga 'gā nupe.

A'erauwe 'ga ka'arana kwasiaa imonou 'ga upe.

²⁶ Ene 'ā ore'wyriara. Jerera 'ā Krautiu Lisia. Jaruete te ene? Paulo 'ga je amono enee.

²⁷ Judeu 'gā opyyk 'ga ai'i. A'ere 'gā “sijuka 'ga 'jau”, 'gā 'i etee ajaupe. A'ere Paulo 'ga romanūa ra'e. A'e kwaaw ire je tejemiayuwa 'gā monou 'ga pyyka judeu 'gā nui.

²⁸ A'ere je 'ga rerawau judeu 'gā nupe oje'ēma'e 'gā nupe. “Ma'ja te 'ga wapo pē nupe rai'?” 'jau je 'gā nupe.

²⁹ A'ere 'gā 'i jee, “Nuapoi 'ga mama'ea Moisesi 'ga remikwasiarer imū”, 'jau etee 'gā jee. A'ere 'ga nuapoi futari mama'e tywera janee. A'eramū je 'ga jukaukare'ema 'gā nupe.

³⁰ A'eramū 'ga amū 'ua 'jau jee: “Judeu 'gā ifuwet 'ga ree”, 'jau 'ga 'ua jee. A'eramū je 'ga monou kweramū ene pyri. A'ere je 'ga ree ifuwet ma'e 'gā tomono enee 'jau: Pe'je pejewau peu 'ga pyri, pejoporogytau 'ga upe 'ga rowase, 'jau nipo je 'gā nupe,

'jau 'ga imonou 'ga upe ikwasiaa.

³¹ A'eramū ppytunimū jefaruu 'gā Paulo 'ga rerawau Sesaria pe. O'wyriara 'ga je'eg imū etee futat 'ga rerawau. Awau owaēma ajepeja amunaw ipe ra'ne, Ātipatriti 'jaw ipe.

³² Peu futat 'gā aku'emamū. Ku'em ire jefaruu 'gā ojewya 'ua Jerusareg ipe nū. A'eramū kawaruu 'arimū wata ma'e 'gā etee Paulo 'ga rerawau erowaēma

³³ Sesaria pe, ka'arana rerawau imonou 'wyriara 'ga upe. Paulo 'ga nanē 'gā imonou 'ga po pe nū. A'ere jefaruu 'gā ojewya 'ua nū.

³⁴ A'erauwe 'wyriara 'ga ka'arana mogytau. Imogytapaw ire 'ga oporonupa ee Paulo 'ga upe:

—Ma'ape te ere'at rakue?

—Sirisia ywy pe je 'ari ikue nū'ū— 'jau Paulo 'ga 'ga upe.

³⁵ Aipo ojeupe 'eramū 'wyriara 'ga 'jau:

—Tene ajee ene ree ifuwet ma'e 'gā nuri owaēma ra'ne. A'ere taenup eneje'ega 'jau— 'jau 'wyriara 'ga 'ga upe.

A'erauwe 'wyriara 'ga je'egi jefaruu 'gā nupe:

—Peroo 'ga imunepa jee peu, Erote 'ga roguufer ipe— 'jau 'ga 'gā nupe.

A'eramū jefaruu 'gā 'ga rerawau imunepa imyina 'og ipe iawopytyma. Jefaruuna'nī 'gā amū opytau 'ga resakaawamū.

24

Paulo 'ga je'ēwu'jagawet

¹ Siku oser ire mainana 'wyriararete 'ga, Ananiasi 'ga, judeu 'ga 'wyriari 'gā amū nerooi Sesaria pe. Terturu 'ga nanē 'ga erawau ojeupi Ferisi 'ga upe Paulo 'ga mome'wawamū. Ananiasi 'ga Terturu 'ga rerawau oje'ega mome'waramū 'wyriara 'ga upe.

'Gā waēmauwe Ferisi 'ga Paulo 'ga rerurukaa 'gā nupe. Paulo 'ga rut 'ga reserauwe,

² Terturu 'ga afu'ama oje'ega 'wyriara 'ga upe:

—Ene 'ā ore'wyrriara. Ene 'ā eneresage oree. Ymā 'ā nitywi maruapisia jane'wyr ipe. Ene 'ā ore upe oje'ēma'e nanuara apoukare'ema 'gā nupe. Erejejuka esage 'ā ore ree. Mama'e esagea 'ā ereapo oree jepi. A'eramū ene ore muekōēina.

³ Au'jete ore muekōēai ape.

⁴ A'ere je teja'nē pype je porogytai enee. Kasi a'e pe je ete je porogytai eneporogytamer ipe ne. A'eramū ki ene eapykau jeje'eg are— 'jau Terturu 'ga 'wyrriara 'ga upe.

⁵ —Koa kūima'e 'ga nia'wyrri. 'Ga 'ā ako judeu 'gā 'wyrri moyka mama'e tywera mome'wau 'gā nupe. Moromamara'neara 'ga— 'jau Terturu 'ga imome'wau 'wyrriara 'ga upe. —Jeju 'ga rerowiaara 'gā 'wyrriara 'ga tāmējē. Nasare pe waranup ma'efera 'ga rerowiaara 'gā 'wyrriara 'ga. Aje 'ā 'ga reko'i imome'wau.

⁶ A'eramū 'ga judeu'ema 'ga rerawau werewi erosou Jarejuwarete 'ga mogytaaw ipe ai'i— 'jau 'ga Paulo 'ga mome'wau 'wyrriara 'ga upe. —A'eramū ore 'ga pyyka ai'i numiamū. "Siroo 'ga 'wyrriara 'ga rowase jareporonupa ee Moisesi 'ga 'eawer imū 'jau", 'jau ore ai'i numiamū. "A'jea futat pa 'ga mama'e tywera apoi rai'i, sa'e 'ga upe 'jau", 'jau ore ai'i numiamū.

⁷ A'ere jefaruu 'gā 'wyrriara 'ga ruri ojemomojyau oree 'ga pyyka ore wi ai'i.

⁸ A'ere 'ga ore wi 'ga pyyg ire 'jau oree ai'i: "Pe'je pejewau peu 'ga rowase pejeporogytau 'ga upe", 'jau 'ga oree ai'i. A'eramū ore arajua 'agamū ai'i— 'jau 'ga 'wyrriara 'ga upe. —A'eramū ene eporonupa ee esaka 'ga upe nū. Tereenup 'ga je'eawer imū etee futat 'ga porogyta ejeupe 'jau. A'jea futat 'gā je'ega, 'jau nipo 'ga pē nupe— 'jau Terturu 'ga 'wyrriara 'ga upe.

⁹ A'erauwe Terturu 'ga rupi 'ut ma'efera 'gā, judeu 'gā, oje'ega 'ga upe:

—A'jea futat— 'jau 'gā ojomoyka imome'wau 'ga upe.

'Wyrriara 'gā nupe Paulo 'ga jemome'uwawet

¹⁰ A'erauwe Ferisi 'ga 'jau Paulo 'ga upe:

—Ere ajee ejekwawera mome'wau oree. Taruenup 'jau— 'jau 'ga Paulo 'ga upe.

A'eramū Paulo 'ga oje'ega:

—Ene 'ā namutamutat erejup 'wyrriaramū oree. A'eramū je teporogytau enee. Teku'iramū tejemome'wau enee. Terekwaap mama'e tywera je iapoe'emawera 'jau— 'jau Paulo 'ga 'wyrriara 'ga upe.

¹¹ —Awamueuu je ruri Jerusareg ipe tewaēma ai'i, Jarejuwarete 'ga upe teporogytaawamū ai'i, 'ga muorypa ai'i. "Ene te 'ā eneresage oree", 'jau je 'ga upe— 'jau 'ga 'ga upe.

¹² —Je 'ā namuei 'gā tekou. Jarejuwarete 'ga mogytaaw ipe taetu aje je 'ā namuei 'gā tekou. Judeu 'gā jatykaaw ipe tewau miamū je nakurawa'uweri 'gā jepi— 'jau Paulo 'ga 'ga upe. —Ukawō'ō me taetu aje je 'ā namuei 'gā tekou. Ako esage te je 'ā 'gā pype numiamū.

¹³ A'ere 'ā 'gā je je'ēwu'jag ekoetei. A'ere 'ā je je'ēwu'jag ekoeteara je'ega naena'i ete je kwau— 'jau Paulo 'ga 'wyrriara 'ga upe.

¹⁴ —Je 'ā Jarejuwarete 'ga arowiat tekou. Oreypy 'gā 'ā Jarejuwarete 'gā werowiat rakue. Jeju 'ga nanē je 'ā arowiat nū. Jeju 'ga 'ā Janeruwarete 'ga ra'ya 'ga. A'e 'ga je arowiat. A'ere 'ā judeu 'gā nuerowiari 'ga. A'eramū 'gā 'ā amara'neramū je ree— 'jau Paulo 'ga imome'wau 'wyrriara 'ga upe. —Jarejuwarete 'ga je'ega je arowiat. Jarejuwarete 'ga je'ega mome'wara 'gā nemikwasaret, Moisesi 'ga remikwasaret. Mīmera je akwaapap.

¹⁵ "Aemanū re nipo Janeruwarete 'ga ae mū'ēi tywy awi ae mowywyapap nū. Ia'wyre'ema 'gā, esage ma'e 'gā. Mīmera 'gā nipo 'ga imū'jāu imowywya nū" 'ea judeu 'gā werowiat. Je nanē erowiaa nū.

¹⁶ A'eramū je tekou esage Jarejuwarete 'ga rowase. Ae rowase 'jau je iapou tekou. Naapoi futari je mama'e tywera Jarejuwarete 'ga rowase— 'jau Paulo 'ga ojemome'wau 'wyrriara 'ga upe.

¹⁷ —Namutat je reko'i teatau amunaw imū ai'i. 'Awamue te je ruri tejewya Jerusareg ipe ai'i nū. Ka'aranūū rerua teptytuna 'gā nupe ai'i. Jarejuwarete 'ga upe nanē je ape monou ai'i nū— 'jau 'ga 'ga upe.

¹⁸⁻¹⁹ —Moisesi 'ga je'eager imū je tewau tejauka ra'ne. A'ere je tewau tesou Jarejuwarete 'ga mogytaaw ipe ai'i. Ka'aranūū je erawau erosou 'ga upe. A'e je iaporamū judeu 'gā amū, Asia ywy awi 'ut ma'efera 'gā, je resaka. Nakwaiwete rūi 'gā ajemogyau je rewiri. "Nan kasi peapo ne", na'ei agawewi je 'gā nupe. Ako esage te je 'ā 'gā pype numiamū. A'etea 'gā je pyyk ekoete ai'i— 'jau 'ga imome'wau 'ga upe. —A'ere 'ā 'gā jēmī nuri je mome'wau 'au enee. 'Gā te amunipo 'ā 'ut je mome'wau 'au enee.

²⁰ Tene ajatyka ma'efera 'gā je mome'ui 'au enee. Tene 'gā mama'e tywera je iapoawera mome'ui enee, 'gā nupe oje'ēma'e 'gā nowase iapoawera— 'jau Paulo 'ga 'wyrriara 'ga upe.

21 —Gã nowase te'ama je aipo je 'i te 'gã nupe ai'i, “Amanũ re ae 'ëi tywy awi owywya nũ”, a'e je te'ama 'gã nupe 'gã nowase ai'i. A'e are te 'gã je pyyg ekoetei je rerua 'au ai'i— 'jau Paulo 'ga imome'wau 'ga upe.

22 Ferisi 'ga Jejui 'ga rerowiaara 'gã nemimu'efera rera kwaapa futat. A'eramũ 'ga 'jau Paulo 'ga upe:

—Tene jefaruu 'wyrriara 'ga ruri owaëma ra'ne, Lisia 'ga ruri ra'ne— 'jau 'ga 'ga upe. —'Ga waëmamũ taapyaka eneje'eg are 'jau nũ. A'jea futat pa 'ga mama'e tywera apoi rai'i, ta'e enee 'gã imome'uramũ 'jau— 'jau 'ga Paulo 'ga upe.

23 A'eramũ Ferisi 'ga 'jau jefaruu 'gã 'wyrriari 'ga upe:

—Jefaruuna'nĩ 'ga emono amũ imogou peu 'ga pyri, 'ga ree ojejuka ma'eramũ. Tene 'ga pytuna 'gã nuri 'ga resaka, mama'e rerua 'ga upe— 'jau 'ga 'ga upe.

24 A'ere, anurenure'i Ferisi 'ga wemireko ëë retee awau oje'ega 'ga upe. 'Ga remireko ëë judeua. Ëë rera Drusila. A'eramũ Ferisi 'ga 'jau jefaruu 'ga upe:

—Ekwap Paulo 'ga rerua. Toporogyta 'ga oree 'jau. Taruapyaka Jejui 'ga mome'u are 'jau— 'jau 'ga 'ga upe.

Ojeupe 'ga waëmamũ Ferisi 'ga 'jau Paulo 'ga upe:

—Jejui 'ga emome'u oree— 'jau 'ga Paulo 'ga upe.

A'erauwe Paulo 'ga Jejui Kristu 'ga mome'wau 'gã nupe.

25 A'eramũ Paulo 'ga 'jau 'gã nupe:

—Mama'e tywera kasi peapo ne. Jarejuwarete 'ga je'ega peenup. Pejemu'akwaap nanë mama'e tywera apoe'em are pejekou— 'jau Paulo 'ga 'wyrriara 'ga upe 'ga remireko ëë retee futat. —Anure nipo jane juejue jane oi jarejesaukaa Jarejuwarete 'ga rowase. A'e pe futat nipo 'ga 'gã amũ nupe 'jau: “Ene ekwap peu mama'eukwaawa rapyaw ipe. Nereenuwi jeje'ega rakue”, 'jau nipo 'ga 'gã nupe. A'eramũ nipo 'ga oje'ega renuparera 'gã amũ nupe 'jau: “Ene jeje'ega ereenup rakue. A'eramũ ene ejua 'au je pyri”, 'jau nipo 'ga ore mũ upe— 'jau Paulo 'ga 'ga upe.

Aipo renupa Ferisi 'ga okyjau Paulo 'ga remimome'u awi.

—Au'je nipo ra'ne 'ja. Anure taapyaka ene ree 'jau nũ. Ere ewau ore wi ra'ne— 'jau 'ga Paulo 'ga upe, okyjau aipo Paulo 'ga 'eramũ.

A'erauwe 'gã Paulo 'ga rerawau erojewya imunepa imyina nũ.

26 A'ere 'wyrriara 'ga 'i ojeupe etee futat: “Ka'aranũa sipo 'ga amut jee 'wei, omuëma repyramũ 'wei”, 'jau 'wyrriara 'ga ojeupe.

A'eramũ 'ga a'eramũ Paulo 'ga renũju'jau'japa kamësi'isiti 'ga renũina 'ga moporogytaukaa ojeupe. “Taesak 'ga ka'aranũu mura tejee 'jau kwy”, 'jau 'ga numiamũ. A'ere Paulo 'ga nomonoi futari ka'aranũa 'ga upe.

27 Mukũja kwara poromukuran Paulo 'ga akou peu. A'ere Ferisi 'ga ëmi 'wyrriaramũ 'ũi awi. Posiu Fesitu 'ga akou 'wyrriaramũ 'ga renawer ipe nũ. A'ere judeu 'gã nipoiriweri Paulo 'ga wi. A'eramũ Ferisi 'ga iapou judeu 'ga remifutar imũ etee futat 'gã nupe. A'eramũ 'ga opoire'ema Paulo 'ga wi.

25

'Wyrriararete 'ga pyri Paulo 'ga wataweramũ

1 Muapyr etee oser ire Fesitu 'ga awau Jerusareg ipe.

2 Peu mainana 'wyrriara 'gã, judeu 'gã, 'wyrriari 'gã netee awau oporogytau 'ga upe. Paulo 'ga je'ëwu'jaga 'ga upe nũ. A'ere 'gã 'jau:

3 —Paulo 'ga emut 'au imoporogytaukaa oree nũ. Taruapyaka 'ga porogyta are 'jau— 'jau 'gã 'wyrriara 'ga upe.

“Simorytee 'wyrriara 'ga. A'eramũ 'ga Paulo 'ga mua janee. A'eramũ jane 'ga jukau”, 'jau 'gã ajaupe.

4 A'ere 'wyrriara 'ga 'i etee 'gã nupe:

—Peu futat pekwap. Pëë futat pekwap peu pejeporogytau 'ga upe. Sesaria pe futat te 'ã Paulo 'ga rekoi moromunepawa pype. Peu futat je oi tejewya anurenure'i nũ.

5 A'eramũ pëë peje'wyrriara 'gã amũ monou je rupi. Peu futat 'gã tomome'u 'ga jee 'jau nũ, 'ga rowase 'jau— 'jau etee 'wyrriara 'ga 'gã nupe. —A'jea futat pa 'ga mama'e tywera apoi akou rai'i, ta'e 'gã nupe peu 'ga rowase 'gã 'ga mome'uramũ 'jau— 'jau 'wyrriara 'ga 'gã nupe.

6 Teis etee 'ga oseja Jerusareg ipe. A'ere 'ga ojewya awau Sesaria pe nũ. Ai'iwe 'ga awau wapyka peu aemogytaaw ipe 'ũina. Oporenuwaiwamũ 'ũina 'gã imome'u are. “Maran sipo 'ga mama'e tywera mũ apoi 'gã nupe rai'i”, 'jau 'ga ojeupe. A'eramũ futat 'ga Paulo 'ga renũina 'ga rerurukaa 'gã nupe.

7 Paulo 'ga reserauwe judeu 'gã Jerusareg awi 'ut ma'efera 'gã ojopowãna 'ga ree, 'ga mome'wau 'wyrriara 'ga upe:

—Nia'wyrri futari noko 'ga oree jepi. Mama'e tywera etee noko 'ga wapo oree jepi— 'jau judeu 'gā Paulo 'ga mome'wau 'wyrriara 'ga upe.

A'ere aipo 'gā 'ea naenae'i etee 'wyrriara 'ga upe.

⁸A'erauwe Paulo 'ga 'jau 'wyrriara 'ga upe:

—Naapoa'uweri noko je mama'e tywera tekou jepi. Moisesi 'ga remikwasiarer imū etee futā je mama'e apoi tekou jepi. Naapoi futari je mama'e tywera Jarejuwarete 'ga mogytaaw ipe jepi. 'Wyrriararete 'ga upe miamū je mama'e tywera naapoa'uweri jepi. 'Wyrriararete 'ga je'ega je aenup tekou jepi— 'jau Paulo 'ga 'wyrriara 'ga upe.

⁹A'ere Fesitu 'ga poromuorywiweramū judeu 'gā nee. A'eramū 'ga a'eramū 'jau Paulo 'ga upe:

—Judeu 'gā “Emut 'ga 'au Jerusareg ipe”, e'i jee ai'i. Eneowet te ene Jerusareg ipe? Peu futat too teapyakau ene ree 'jau nū— 'jau Fesitu 'ga 'ga upe.

¹⁰A'eramū Paulo 'ga 'jau 'wyrriara 'ga upe:

—Naani nū'ū. 'Au etee futat je reko'i nū'ū. Je romanūa. A'eramū je 'au etee futat tekou ene rowase. Naapoi futari je 'ā mama'e tywera judeu 'gā nupe. Aipo 'ā erekwaap futat.

¹¹Mama'e tywera je iapo re te amunipo 'ā je oi tejejukaukaa 'gā nupe. A'ere 'ā je naapoa'uweri te mama'e tywera. O'meramū te 'ā 'gā 'i. 'Gā 'mea te 'gā wereko. A'eramū ene je monowarūe'em futat 'gā nupe. Mama'e tywera je iapo re te amunipo 'ā je monoarū ape 'gā nupe— 'jau Paulo 'ga 'wyrriara 'ga upe. —A'eramū ene 'awamū je monou jare'wyrriararete 'ga pyri etee— 'jau etee Paulo 'ga 'ga upe.

¹²A'erauwe Fesitu 'ga oje'ega ojeupe oje'ēma'e 'gā nupe:

—Amono te je 'ga peu?— 'jau 'ga 'gā nupe.

A'erauwe 'gā oje'ega:

—Ere ajee 'ga monou— 'jau 'gā 'ga upe.

A'erauwe 'ga oje'ega Paulo 'ga upe:

—Ko ajee je ene monoi peu, Roma pe 'wyrriararete 'ga upe, tejeupe ene'eawer imū etee futat— 'jau 'ga Paulo 'ga upe.

A'erauwe 'ga Paulo 'ga rerawaukaa imunewukaa imu'ama nū. Yaruua mū rura poromukuran 'ga monou 'ga mu'ama 'ga munepa.

Agripa 'ga Berenise ēē retee

¹³Anurenure'i 'wyrriara mū 'ua owaēma Sesaria pe. Agripa 'ga 'ua wenyra ēē retee Fesitu 'ga upe oporogytau:

—Au'jete ereko 'wyrriaramū 'gā nupe— 'jau Agripa 'ga Fesitu 'ga upe.

Wenyra ēē Berenise ēē retee 'ga 'ua oporogytau 'ga upe.

¹⁴Peu 'gā nekoneko'i re Fesitu 'ga Paulo 'ga mome'wau 'gā nupe.

—Ferisi 'ga kūima'e 'ga amū om'yi 'au moromunepawa pype rakue. 'Ga rera Paulo— 'jau Fesitu 'ga imome'wau Agripa 'ga upe.

Agripa 'ga nanē 'wyrriaramū.

¹⁵—A'ere Jerusareg ipe je oramū, mainana 'wyrriara 'gā, judeu 'gā 'wyrriari 'gā netee, 'gā 'ga je 'ēwu'jaga jee— 'jau Fesitu 'ga imome'wau aipoa 'wyrriara 'ga upe. —A'ere 'gā 'jau jee: “Ere 'ga jukaukaa 'gā nupe oree. 'Ga juka are orefueweramū arajemogyau”, 'jau 'gā jee.

¹⁶A'ere je “Naani”, 'gā nupe. “Naani. Nojuka ekoetei ae romanūa”, je 'i etee 'gā nupe— 'jau 'ga imome'wau 'ga upe. —“Mama'e tywera apoara 'ga rowase tee ae porogytai ajatykau”, je 'i etee 'gā nupe. “A'eramū futat ae ojoje'ēwu'jagaramū ajuowase imome'wau ajaupe. Ore nan aruapo jepi”, 'jau je 'gā nupe— 'jau 'ga 'wyrriara 'ga upe.

¹⁷—A'eramū 'gā 'ua owaēma. 'Gā waēm ppyrauwe je, ai'iwe tefere'emamū futat tewau peu aemogytaaw ipe teapyka te'ŷina. “A'jea pa 'ga mama'e tywera apoi rai'i”, ta'e 'jau, 'jau je tewau te'ŷina teapyakau 'gā nee.

¹⁸A'ere judeu 'gā 'me ate. Namama'e tywera rūi futat 'ga wapo akou janee rai'i.

¹⁹“Nuapoi 'ga mama'ea Moisesi 'ga je'eger imū”, 'jau futatee 'gā jee. “Jeju'i 'ga etee 'ga oo imome'wau akou kwe pe 'gā nupe” 'ea te. “Jeju'i 'ga ako amanū rakue. A'ere 'ga ako 'ga ferawi etee rakue nū” 'ea 'ga akou imome'wau 'gā nupe 'ea etee je enupa. A'e are judeu 'gā amara'neramū Paulo 'ga ree rai'i, Jeju'i 'ga mome'ua 'ga rekoramū rai'i.

²⁰A'eramū je 'jau Paulo 'ga upe, “Je najereapoyi etee judeu 'gā ene je'ēwu'jag are. Enejewyriwet te ene peu ewau Jerusareg ipe ejemome'wau jee 'gā nowase?” 'jau je 'ga upe.

²¹“Naani. Najeoweretei je peu nū. Roma 'jaw ipe too 'jau. 'Wyrriararete 'ga upe too tejemome'wau 'jau”, 'jau etee 'ga jee— 'jau Fesitu 'ga Agripa 'ga upe. —A'eramū je 'jau jefaruu 'gā nupe, “Pe'je 'ga rerawau imunepa imu'ama nū. Anure tomono 'ga 'wyrriararete upe 'jau”, 'jau je 'gā nupe— 'jau 'ga 'ūina imome'wau 'ga upe.

²²A'eramū Agripa 'ga 'jau Fesitu 'ga upe:

—Jeporenuwiwet je 'ga porogyta are— 'jau Agripa 'ga Fesitu 'ga upe.

—A'jea. Ai'iwe tereenup 'ga porogyta 'jau— 'jau Fesitu 'ga Agripa 'ga upe.

²³ A'eramū ai'iwe Agripa 'ga waity mojoy'rau wenyra ēē retee. Waity esagea 'gā imunepa ojewi. Waity mojoy'ru re 'gā awau. Awau osou aemogytaaw ipe. Jefaruu 'gā, 'wyriri'ri 'gā netee awau. Mīmera 'gā awau osou 'gā nupi. A'erauwe Fesitu 'ga oje'ega jefaruu 'gā nupe:

—Perut Paulo 'ga oree. “Toroporogyta enup 'ga 'jau”, e'i 'ga— 'jau 'ga 'gā nupe.

²⁴ Paulo 'ga reserauwe Fesitu 'ga Paulo resaukaa Agripa 'ga upe:

—Koromū noko 'ga 'ja. Ko 'ga noko judeu 'gā Jerusareg ipe je oramū oje'ēwu'jag jee ikue 'ja— 'jau Fesitu 'ga 'ga resaukaa Agripa 'ga upe, ajatyka ma'efera 'gā nupe we. —A'ere 'gā 'ua 'au futat 'ga je'ēwu'jaga jee ai'i nū, 'aga aemogytaaw ipe futat ai'i nū. Namutamutat 'gā 'jau ajemogyau jee: “Ere 'ga jukaukaa 'gā nupe oree”, 'jau 'gā afuakaramū jee, je rerekou— 'jau 'ga imome'wau 'gā nupe.

²⁵ —A'ere je “Naani. Nuapoi 'ga mama'e tywera ajukaawamū”, je 'i etee 'gā nupe. A'eramū Paulo 'ga futat 'jau jee: “Je mono ape 'wyrirarete 'ga upe. Tajemome'ua 'ga upe 'jau nū”, 'jau 'ga jee. A'eramū je anure nipo 'ga monou Roma pe. A'ere je nakwaawi' i etee 'ga mama'e tywera apoawera. Maran gatu nipo ene 'ga jemome'uramū 'ga mama'e tywera iapowera mū rekoare'ema.

²⁶ Je naekoari amū ai'i. Ma'ja katu nipo 'ā je amono ikwasiaa 'wyrirarete 'ga upe. Nitywi te 'ā ikwasiaripyra mama'e tywera 'ga iapoawera. 'Ga jemome'u re te nipo je mama'ea mū resagi ikwasiaripyra.

²⁷ Mama'e tywera 'ga iapoe'emamū, je nomonoa'uweri ikwasiaa 'ga upe. Naje maran mama'e kwaape'ema imonou ekoete ikwasiaa 'ga upe, a'e te je nū ai'i kūi. Mama'e a'jea te 'ā ae omono ikwasiaa nanuara upe ja'nū'u, nan 'ga reko'i 'ea ja'nū'u— 'jau Fesitu 'ga Agripa 'ga upe.

26

Agripa 'ga upe 'ga 'eawet

¹ A'eramū Agripa 'ga 'jau Paulo 'ga upe:

—Ere ejemome'wau oree, ki Paulo. Taruenup eneporogyta 'jau— 'jau 'ga 'ga upe.

A'erauwe Paulo 'ga ojemome'wau 'ga upe:

² —Ene upe je jemome'ua je muekōēāi je m'ina.

³ Ene 'ā judeuramū ore kwaap katu ape. Oreremiapoa nanē 'ā ene ikwaapa katu nū. A'eramū ene eapyakau jeje'eg are— 'jau Paulo 'ga Agripa 'ga upe.

⁴ —Jerekwawera 'ā judeu 'gā okwaap katu ajemogyau. Je kunumia we futat tekou Jarejuwarete 'ga je'eg imū ikue. Teje'wyr ipe miamū je reko esagei jepi. Jerusareg ipe taetu aje je 'ā je reko esagei judeu 'gā pype.

⁵ Ma'eramū 'gā 'ā je kwaawi katu je rekoramū— 'jau 'ga imome'wau Agripa 'ga upe u'ama. —Je ree oporomome'uweramū 'gā tomome'u enee. Je 'ā fariseua te. A'eramū 'gā ojomoyka je kwaapa. Fariseu 'gā 'ā Jarejuwarete 'ga je'eg imū etee futat wapo jepi— 'jau Paulo 'ga Agripa 'ga upe u'ama imome'wau.

⁶ —Awamū 'ā je reko'i “opapaw ire ae 'ēi tywy awi owywya 'ua nū” 'e rerowiaa. Ymā te 'ā Janeruwarete 'ga 'i aepy 'gā nupe rakue: “Pemanū re je pē mū'ēi tywy awi pē mowywya nū”, 'jau 'ga ae upe rakue. A'ea je 'ā arowiat tekou— 'jau Paulo 'ga Agripa 'ga upe imome'wau u'ama.

⁷ —A'ea 'ā judeu 'gā juejue werowiat. A'eramū 'ā judeu 'gā ajemogyau oporowykyau 'ga upe. “Ore manūnamū Janeruwarete 'ga tore mū'ē tywy awi ore monou ojepyri 'jau kwy”, 'jau 'gā 'ā ajemogyau. A'eramū 'gā au'jeteramū oporowykyau ajemogyau. A'ea je arowiat 'gā 'jawe. A'etea 'gā oje'jawe je erowiamū je pyyg ekoete je munepa. Je je'ēwu'jaga ekoete 'gā nupe— 'jau Paulo 'ga Agripa 'ga upe imome'wau u'ama.

A'eramū Paulo 'ga ojerowaka amā'jāu judeu 'gā nee oje'ega 'gā nupe:

⁸ —Ma'eramū gatu nipo 'ā pēē judeuramū neperowiari “Jarejuwarete 'ga ae moferap” 'ea. Janepytuna 'gā 'ā najuejue etee futat werowiat “owywyt futat ae opapaw ire” 'ea. A'ere 'ā pēē tekatu etee neperowiari aipoa— 'jau Paulo 'ga ojerowaka 'gā nupe oje'ega.

⁹ —Ymā te je nanē futat Jeju'i 'ga rerowiaara 'gā nereko tyweretei ikue. “Esage sipo a'ea Janeruwarete 'ga upe pa”, 'jau je ikue. A'ere aipoa nia'wyr'i 'ga upe rakue.

¹⁰ A'ea je aapo Jerusareg ipe ikue. Mainana 'wyrira 'gā je monou Jeju'i 'ga rerowiaara 'gā pyygukaa jee ikue, Nasare pe waranup ma'efera 'ga rerowiaara 'gā je ipyyka imunepa ikue. Esage ete 'gā apisiukara jee ikue. Ikwaawe'ema je rerekou ikue.

¹¹ Namutat tekou Jeju'i 'ga rerowiaara 'gā nereko tyweaete ikue. 'Gā jatykaaw ipe tewau 'gā nupe 'gā nereko tyweaete ikue. “NaJaneruwarete 'ga remimurera rūi Jejujamū, tamu'eukat 'gā 'jau”, 'jau je tejeupe ikue numiamū. “Jeju'i 'ga takurawukat 'gā nupe

'jau', 'jau je tejeupe ikue numiamū. A'ere 'gā naani. Nopoiri futari Jejui 'ga rerowiar awi. Kwaiwete je temara'neramū 'gā nee. A'eramū je tewau kwe pe tekou 'gā nereko tyweaete— 'jau Paulo 'ga 'gā nupe imome'wau u'ama.

¹² —A'eramū je tewau Damasco pe numiamū. Jejui 'ga rerowiaara 'gā nereko tyw-ereteawamū je tewau numiamū. Mainana 'wyriara 'gā 'je'eg imū futat tewau tekou 'gā nereko tyweaete numiamū.

¹³ A'ere jewaw ipe mama'e mū ete ijesakari jee. Enyfyk te. A'eramū je te'aa wyyu eny awi. Tii. Teirū 'gā netee futat aru'aa arawau arajupa enywyter ipe. Ajeaje katu kwara ruwamū eny 'ari ore ree ywag awi 'ua. Kwara renya te wapyraap enyfyga.

¹⁴ A'eramū ore arajupa aru'aa enywyter ipe futat teirū 'gā netee. A'eramū Janejararete 'ga eny awi je 'aramū oje'ega jee. Judeu 'je'eg imū 'ga oje'ega jee. Epyreu 'jawa 'ga iapou jee. "Ma'eramū te je rereko tywerete ape, ki Saulo?" 'jau 'ga jee oje'ega. "Sā'ā ene ejeymawa ejenuwe'emamū, inupā wyrya pyu, imayrūmū. Nan tee futat je renuwe'emamū ene te futat erejemayrū. Je rerowiaara 'gā erereko tywerete jepi. A'eramū je ene mayrūkaa", 'jau 'ga jee— 'jau 'ga imome'wau 'gā nupe.

¹⁵ —A'eramū je 'jau 'ga upe, "Awŷja te pomomū oje'eg jee?" 'jau je 'ga upe. "Je Jejulamū aje'eg enee", 'jau 'ga jee. "Je te 'ā je rereko tywerete ape", 'jau 'ga jee ojeupe je je'egamū— 'jau 'ga 'gā nupe imome'wau.

¹⁶ —"Efu'am jui. Ajesakat je enee. A'eramū ene 'awamū ewau ekou kwe pe je mome'waramū. A'ere anure tamu'e ene 'jau. A'eramū ene ewau ekou 'gā nupe kwe pe je mome'wau", 'jau 'ga jee.

¹⁷ "Je te 'ā amono ene judeue'ema 'gā nupe temome'waramū. A'eramū nipo je tejejukau ene ree ene rekoramū", 'jau 'ga jee ikue. "Najudeu 'gā nūi ene resaka 'gā mogoukare'ema ene ree. Najudeue'ema 'gā nūi nanē nū", 'jau 'ga jee ikue. "Je te 'ā apyryū ene judeue'ema 'gā nupe temome'waramū", 'jau 'ga jee ikue— 'jau 'ga 'gā nupe.

¹⁸ —"A'eramū ene ewau 'gā mu'jau je ree, je kwaawukaa 'gā nupe, 'gā mu'akwaapa je ree", 'jau 'ga jee ikue— 'jau Paulo 'ga imome'wau Agripa 'ga upe. —"A'eramū 'gā ene je mome'uramū ene renupa etee. A'eramū 'gā ajemogyau je rerowiaaramū. Jarejuwarete 'ga remifutar imū etee iapou, 'jau 'ga pē nupe, ere ki ewau ekou 'gā nupe", 'jau 'ga jee ikue— 'jau 'ga imome'wau 'gā nupe. —"Ypytunaiwa pype wata ma'e 'jawe mama'eukwaawa 'wyriara remiayua 'gā jemogyi. 'Arimū wata ma'e 'jawe je rerowiaara 'gā jemogyi. A'eramū ene ewau mama'eukwaawa 'wyriara remiayua mū nerua imū'jāu jui, je rerowiarukaa 'gā nupe. 'Mama'e esagea te ki peapo pejejaupe', e'i 'ga pē nupe. 'Tejerowiamamū je 'gā katu'ogi', e'i 'ga pē nupe, ere ki 'gā nupe ekou. 'A'eramū futat je 'gā mū'jāu tejemogyawamū', e'i 'ga pē nupe, ere ki 'gā nupe", 'jau 'ga jee ikue— 'jau Paulo 'ga 'gā nupe, imome'wau.

¹⁹ —A'eramū je 'ā 'agamū tekou 'ga rerowiaaramū 'ga mome'wau 'gā nupe. 'Ga 'je'eg imū futat je iapoi— 'jau 'ga imome'wau Agripa 'ga upe.

²⁰ —Damasco pe ra'ne ra'ne futat je 'ga mome'u ppyruga 'gā nupe ikue. A'ere je tewau Jerusareg ipe 'ga mome'wau nū. A'ere Jerusareg awi je tewau Judeja ywy pewara 'gā nupe, 'gā mome'wau nū. A'e awi je tewau judeue'ema 'gā nupe 'ga mome'wau kwe pe tekou. "Pe'je pejeipoia pejetywer awi", 'jau je 'gā nupe. "Jarejuwarete 'ga perowiat pejemogyau. A'eramū pē pejeipoia pejetywer awi. A'eramū pēē mama'e esage apou pejemogyau", 'jau je 'gā nupe. A'eramū nipo 'gā 'jau pē nupe: "Kuu. Ajea futat. 'Gā otywer awi 'gā poiri ra'e. Sā'ā 'gā neko esagea etee", 'jau nipo 'gā pē nupe, 'jau je 'gā nupe ikue— 'jau 'ga 'ga upe.

²¹ —Judeue'ema 'gā je imome'uramū judeu 'gā je ppyka 'agamū ai'i. Jarejuwarete 'ga mogytaaw ipe je rekoramū 'gā je ppyka ai'i. "Sijuka 'ga", 'jau 'gā jee numiamū.

²² A'ere Janeruwarete 'ga rekoi te 'ā je pyri. A'eramū 'ga a'eramū je jukaukare'ema 'gā nupe— 'jau 'ga imome'wau 'ga upe. —A'eramū je 'ā 'au tekou 'ga mome'wau 'gā nupe. 'Wyriat, tesirūmet. Mīmera 'gā nupe je 'ā 'ga mome'ui tekou— 'jau 'ga 'ga upe. —Sā'ā Janeruwarete 'ga 'je'ega mome'wara 'gā imome'ua 'gā nupe rake. Nan tee futat je imome'ui 'gā nupe. Moisesi 'ga remikwasirera 'jawerimū etee futat je rekoi imome'wau— 'jau 'ga 'ga upe.

²³ —A'ere 'ā "Janeruwarete 'ga remimurera 'ga jereko tywerukari amanūmū janee rake", 'jau je 'gā nupe. A'ere 'ā 'ga manū re Janeruwarete 'ga, 'ga moferawi etee nū. "Ga ra'ne tāmējē futat te 'ā oferap janee", 'jau je 'gā nupe. "A'eramū 'ga werowiamamū jane katu'oka", 'jau je 'gā nupe— 'jau 'ga Agripa 'ga upe u'ama. —"Judeuramū ore, judeue'emamū pē. Mīmeramū futat nipo jane manū re Janeruwarete 'ga jane mū'jāu tywy awi jane mowywya nū. Sā'ā Jejui 'ga ferawa. Nan futat jane ferawi nū", 'jau je 'gā nupe— 'jau Paulo 'ga Agripa 'ga upe imome'wau.

²⁴ Aipo Paulo 'ga 'eramū Fesitu 'ga wafukaita 'ga upe:

—Ene'me eteete awi ekou kūi. Ene'akwaawe'ema te ene rereko kūi. Ka'arana mogytaetea te ene mo'meukat ene mogou kūi— 'jau Fesitu 'ga wafukaita Paulo 'ga upe aipo 'ga 'eramū.

²⁵ A'eramū Paulo 'ga 'jau 'ga upe:

—Naani nū'ū. Naje'mei futari je nū'ū. A'jea futat je 'i nū'ū— 'jau Paulo 'ga Fesitu 'ga upe.

²⁶ A'eramū Paulo 'ga 'jau Agripa 'ga upe:

—Enereapyo katu jeremimome'u are. A'eramū je tekyjawe'em imome'wau enee— 'jau 'ga Agripa 'ga upe imome'wau u'ama. —Jejui 'ga oo watau ae reape futat wemiapo apou ae upe. Najemime rūi futat 'ga oporowiyka apoi. Ae reape futat 'ga iapoi akou— 'jau 'ga 'ga upe.

²⁷ —Erekwaap katu futat 'ā Jarejuwarete 'ga je'ega, ki Agripa? Erekwaap te 'ga je'ega mome'warera 'gā nemikwasiarera? A'jea futat ene ikaapa katu 'ga je'ega— 'jau Paulo 'ga Agripa 'ga upe.

²⁸ A'eramū Agripa 'ga 'jau Paulo 'ga upe:

—“Kamēsīete futat 'ga tamogo Jejui 'ga rerowiaaramū 'jau” ere te jee?— 'jau 'ga Paulo 'ga upe.

²⁹ —Ēē. Afutat ete je pēē juejue 'ga rerowiaara nū'ū— 'jau Paulo 'ga 'gā nupe. —Afutat je pē nekoa teje'jawe. Anurenure'i sipo pejemogy je 'jawe, pēporomuku te ra'u pejemogyau je 'jawe nū. A'ere je teje'jawe pē jemogy futari. A'ere je nafutari teje'jawe pē pofara— 'jau Paulo 'ga u'ama Agripa 'ga upe.

³⁰ A'eramū 'gā awau ū'jāu 'ga wi. Fesitu 'ga, Agripa 'ga, Berenise ēē, 'gā pytuna 'gā. Mīmera 'gā awau ū'jāu 'ga wi.

³¹ —Nuapoi futari 'ga mama'e tywera amanūawamū ra'e. Opofar ekoete te 'gā 'ga mu'ama ra'e— 'jau 'gā awau oporogytau akou ajaupe. —Mama'e tywera 'ga iapo re te amunipo 'ā 'gā 'ga jukai— 'jau 'gā ajaupe.

³² —“Wyriararete 'ga upe je oi tejemome'wau” 'e'em ire amunipo 'ā 'ga muēmi 'awamū futat— 'jau Agripa 'ga Fesitu 'ga upe.

27

Roma pe Paulo 'ga oawet

¹ —A'ere ako jane “Itari ywy pe simono 'ga”, jane 'i te ai'— 'jau 'gā ajaupe.

Roma 'upa Itari ywy pe. A'eramū 'gā Paulo 'ga monou jefaruu 'ga po pe, 'ga pyri ipofaripyre'ra 'gā neewe. Juriu 'ga po pe imonou. Juriu 'ga jefaruu 'gā 'wyria'ri 'ga. A'eramū tesirūmera 'gā 'jau 'gā nupe “Wyriararete 'ga remiayup” 'jau 'gā 'gā nupe. A'eramū ore arawau. Je nanē tewau 'gā nupi, Lukaramū.

² A'eramū yara 'ua. Adramitiu 'jaw awi 'ua ojekoka. A'e pype futat arawau. Asia ywy pe futat aipoa yaruua awau. Jefaruu 'wyriara 'ga futat ore rerawau. A'eramū ore aru'aa ipype. Aristaku 'ga awau ore rupi. Tesarūn ipewarera 'ga. Tesarūna 'jawa 'upa Masetoni ywy pe. Aru'ar ire ore orōia jupiwewe futat. Arawau ka'a wywri etee futat arakou. Oropytunaapa ore nū.

³ Ai'iwe ore arawau orowaēma Sidom ipe. A'ere Juriu 'ga jejuka esagei Paulo 'ga ree. A'eramū 'ga 'ga muēmukaa yaruu awi. A'eramū Paulo 'ga awau ojekoty'aawa 'gā nesaka. A'eramū 'ga jekoty'aawa 'gā mama'e mua 'ga upe, 'ga remirerooramū, 'y rupi 'ga remi'uramamū. A'ere 'ga 'gā nesag ire ojewya 'ua, yaruu pype u'aa nū.

⁴ A'eramū ore orōia nū. Arawau 'ypō'ō atykupe katy ywytu awi. Ywytu ore monoukare'ema tpypterimū. A'eramū ore orokwapa 'ypō'ō atykupe katy etee ywytu awi. Orejau katy 'ypō'ōūū 'ūina, Sipiri 'jawa 'ūina.

⁵ Arawau 'ypō'ō sī rowaapa 'yrewiwa aapa. Arawau kwe katy ka'aeme'ywa pyyka nū. Arawau orowaēma Mira 'jawa amunaw ipe. Lisi ywy pe 'upa aipoa. Peu futat ore aru'jāu.

⁶ A'e pe futat Juriu 'ga yaruu mū resaka orōjee nū. Aresāri 'jaw awi 'ua aipo yaruua. Itari ywy pe oo ma'e futat poromū. A'eramū 'ga ore reru'aa ipype nū.

⁷ Ipype aru'ar ire ore orōia nū. A'ere ywytua nore mujānukari. A'eramū ore meewei arawau arakou orosea pytunū. Tpypterimū'i arawau arakou. Orokwapa Synito 'jawa pyu. Ay katu te ore yaawi arawau aipo 'ypō'ōūū atykupe katy jui. A'ere ywytua ore rowopepiri etee futat. A'eramū ore erowaka ywytu wawa katy etee futat jupe 'ypō'ō wywri arawau arakou. 'Ypō'ōūūa Kreta 'jawa atykupe katy arawau Salmona 'jawa pyu. Salmona 'jawa 'upa 'ypō'ō sī me.

⁸ A'eramū ore arawau 'ypō'ōūū rupi etee futat arakou. Ay katu te ore oi orowaēma Jemiaresagea 'jaw ipe. Laseja 'jawa pyri 'upa aipoa Jemiaresagea.

⁹ A'e pe ore arajupa oroporomukuaramū oropytau. Ywytua wejue opojyayramū oree. Judeu 'gā nupe 'araiwamū kwaw ire 'gā wea'aramū otywera moiawer are. “Janeruwarete 'ga janetywera omoit jane wi”, 'jau 'gā ajaupe. Aipo 'araiwa akou amāmyter ipe. Aipoa 'araiwa kwaw ire kwaiwete te amana, kwaiwete te ywytua nanē nū. A'eramū opojyayramū kwe pe ae wawamū awau yaruu pype ae ataa.

A'ere Paulo 'ga 'jau oree:

¹⁰ —'Araiwa ako okwaw ai'i. A'eramū jane jareapyakaakau ee ra'ne. Kasi a'e pe 'aw awi jane oramū nia'wyrri janee ne— 'jau 'ga oree. —Janeyara typywyk janee ne. Karaemā jane simonoukapaw ekoete ne. Ae 'gā we opaw ine— 'jau 'ga oree.

¹¹ A'ere yaruū waraara 'ga nuerowiari Paulo 'ga. Yaruū jara 'ga nanē futat 'ga rerowiare'ema nū.

A'eramū 'gā 'jau etee 'gā nupe:

—Naani nū'ū. Nipojya'uweri nū'ū. Soo tāmējē futat jane jarekou nū'ū— 'jau etee 'gā oree.

A'eramū jefaruū 'gā 'wyrriari 'ga 'gā nerowiaa.

¹² —'Au nia'wyrri janee amana pype jane rekoa— 'jau etee 'gā jefaruū 'wyrriara 'ga upe. —A'eramū jane jarewau futat. Fenise 'jawa amunaw ipe soo esaka 'jau— 'jau etee 'gā 'ga upe. Fenisea 'up 'ypō'ōū pype wējēmī futat nū. A'e pe ywytua nipytuū. A'eramū 'gā 'jau:

—Soo peu, Fenise 'jaw ipe 'jau. Peu futat soo ko amana magwapa 'jau— 'jau 'gā ajaupe numiamū.

Ywytuuretea 'ua 'gā nupe

¹³ Poje ywytu'i'ia 'ua oree. A'eramū 'gā 'jau:

—Jarуетe futat jane oi ra'e— 'jau etee 'gā ajaupe. A'eramū 'gā —Pe'je ajee soo etee 'ū— 'jau nū.

A'eramū ore arawau aru'aa yaruū pype nū. A'erauwe 'gā yaruū momytawa mua imatāu. A'eramū 'gā yaruū rerekou ywywyrri' i etee futat.

¹⁴ Poje ywytuuretea 'ua oree. 'Ypō'ōū arimū opytu mua oree. A'ea futat yaruū moyyita imotomotomoga oree.

¹⁵ Ywytuua 'ua ore rewiri tāmējē futat. A'eramū yaruū waraara 'gā

—Sirowak imonou imojekoka Jemiaresage are— 'jau numiamū.

A'ere ywytua nuerowagukari 'gā nupe. A'eramū ore rerawau typytera katy.

¹⁶ A'ere ore rerooi 'ypō'ō'ī atykupe katy etee. Ywytuua ore rerawau. 'Ypō'ō'ī rera Kauta. Ya'ria 'gā imogou yaruū ku'a are.

¹⁷ A'eramū 'gā ya'ri' i mua imatāu enuēma yaruū 'arimū.

—Kasi ywytuua erooi imonoka ne— 'jau 'gā.

A'ere 'gā tupaama pyu yaruū mamamani ywytu awi imotypa jupe.

—Kasi ikaikai jane ree ne— 'jau 'gā.

A'eramū 'gā tupaama pyu futat imamamana ywytu awi ifaa.

—Namukui 'awamū Libia ywy ruwi. Libia ywy pyri notypyri futari. Kwaiwete te 'yisiga jemogyi typyter ipe— 'jau 'gā ajaupe.

A'eramū 'gā a'eramū okyjau 'yisiga pype yaruū amī awi.

—Kasi ywytuua jane monoi 'yisig are ne, janeyara kakau jane ree ne— 'jau 'gā ajaupe okyjau. —'Yisiga pype iamīāu nipo ikaikai jane ree— 'jau 'gā ajaupe.

Yara orjowi ikaika awi 'gā okyjau. Ywytuua taity pirera pyu etee futat yara renujāna. A'eramū 'gā taity pirera moiapap jui.

—Kasi a'e pe jane rerooi jane renujāna 'yisig are ne— 'jau 'gā.

A'eramū 'gā taity pirera moiapap jui. A'etea ywytu ore reroo ore rerekou meewere' i etee futat ore renujāna.

¹⁸ A'ere niojeri futari ywytuua 'ua oree. A'eramū 'gā ai'iwe karaemā monou imomopoa 'y pe. A'eramū yara owewuuta' i oree.

¹⁹ Imuapyra 'ara rupi 'gā yaruū pypiara monou imomopoapap. Ywyrasig, taityuu pypekap, taityuu. Mīmera we futat 'gā imomopoapap yar awi. Opou futat 'gā imonou imomopoa yar awi.

²⁰ Kwaiwete ore seri kwara resake'ema. Jaytata miamū futat ore naruesagi' i futari. Amanarowoky' a esaukare'ema oree. A'etea ywytuua wojere'emamū futat 'ua oree. A'eramū 'gā 'jau ajaupe:

—Sapap futat nipo 'ā jane— 'jau 'gā okyjau kwara resake'emawe futat.

²¹ A'eramū ore arakou kwaiwete 'ara magwapa orojemi'ware'ema. Ore jemuaēma ore rerekou ore mojemi'warukare'ema.

A'eramū Paulo 'ga afu'ama oje'ega 'gā nupe:

—Peesak 'jau noko ako pēē je rerowiare'ema ai' i 'ja, 'au etee futat jane ruwi kwara 'ara rapesaka 'eramū ai' i 'ja— 'jau 'ga 'gā nupe. —Kreta pe jane pyta re amunipo 'ā janekaraemā nimonoukari futari. A'ere ako "Soo futat jane jarekou", pe'je etee ai' i.

²² A'ere je 'i 'awamū pē nupe: Pejemanū awi kasi pekyje ne. Yaruua typywyk futat jane wi. A'ere nipo jane mū nimanūi futari— 'jau Paulo 'ga 'gā nupe.

²³ —'Awa ypytuna rupi Janeruwarete 'ga ywagipewara 'ga amū muri je pyri ko. A'eramū 'ga imome'wau jee ko. Janeruwarete 'ga te 'ā jejararetea. Ma'eramū 'ga 'ā ojeypyriwara 'ga amū muri jee, imoporogytaukaa jee— 'jau Paulo 'ga 'gā nupe imome'wau.

²⁴—Ywagipewara 'ga 'jau jee ko: “Erekyje kasi ekou ne. Najukaukara'uweri je ene 'au. Ereo futat ewaēma 'wyrriararete 'ga pyri ejemome'wau 'ga upe 'jau”, 'jau 'ga jee ko. “Ene rupi oo ma'e 'gā nanē futat namanūi futari amū”, 'jau 'ga imome'wau jee ko. “Janeruwarete 'ga 'ā esage te. A'eramū 'ga ene rupi oo ma'e 'gā amū apisiukare'ema futat nipo”, 'jau 'ga jee ko— 'jau Paulo 'ga 'gā nupe imome'wau.

²⁵—A'eramū pēē pejepy'a'wyre'emamū. Je 'ā Jarejuwarete 'ga arowiat. 'Ga je'eg imū etee futat nipo 'ā ijeapoi janee. Jee imome'uawer imū etee futat nipo 'ga iapoi— 'jau Paulo 'ga 'gā nupe imome'wau.

²⁶—A'ere nipo ywytua jane rerooi jane rorojekoka futat 'ypō'ōū mū ree— 'jau 'ga 'gā nupe imome'wau.

²⁷ Mukūja morowykye'ema rupi ywytua ore rerawau ore rerekou ore renujāna. 'Yē'ē rypyterimū, Metiteraniu 'jawa rypyterimū awau ppyajeaje katu 'gā amū wea'aramū ywy are:

—Sojot nipo 'ā jane ywy pyri 'ja— 'jau yara waraara 'gā ajaupe.

²⁸ A'eramū 'gā itajuu mū apysāu tupaama sīāpyr are. A'ere 'gā imonou imomoa 'y pe tom. A'eramū trītai seis metro awau wapyka ywy are. A'ere 'gā ywy are iwyg ire imua nū. Arawau peu muku'i nū. A'eramū 'gā imonou imomoa nū tom. A'ea ināinānī'ē etee oo wīti seis metro etee awau wapyka ywy are.

²⁹ A'eramū 'gā kyjea 'gā nerekou poromū ia'agawyaukaa 'gā nupe.

—Ita 'arimū jane oi ne— 'jau 'gā ajaupe.

A'eramū 'gā yara momytawa monou imomopoa ita 'arimū arawawe'ēwe. 'Gā iku'a pewara monou imomoa. Tom tom. Irūpāwē monou imomoa. A'eramū futat yarau momytau orojeupe.

A'eramū 'gā 'jau ajaupe:

—Kamēsīete werewi pa 'ā ku'emamū nū— 'jau 'gā ajaupe.

³⁰ A'ere yara waraara 'gā amū ya'ri'i monoi imomoa 'y pe. Saka'jam 'jau numiamū.

—Yarau momytawa siroo imomoa iruupeu'i isī awi— 'jau futatee 'gā ajaupe numiamū.

³¹ A'eramū Paulo 'ga 'jau jefaruu 'gā 'wyrriari 'ga upe jefaruu 'gā netee:

—Yarau waraara 'gā ka'jamamū nipo ywawuje etee futat pepap. 'Gā ka'jam ire nipo Janeruwarete 'ga nojejukai pē nee— 'jau Paulo 'ga 'gā nupe.

³² Aipo ojeupe 'ga 'eramū jefaruu 'gā ya'ri'i sīāwonoka imonou imoia yarau awi.

³³⁻³⁴ Ku'em ja'wyja'wyruramū Paulo 'ga oje'ega 'gā nupe:

—Pe'je pejejua pejejemi'waa. Mukūja morowykye'ema rupi te 'ā nepejemi'wari— 'jau 'ga 'gā nupe. —Pe'je pejejemi'waa pejejemopifuakaawamū. Tepepifuakat 'jau. Nimanūi futari jane mū— 'jau 'ga 'gā nupe.

³⁵ Aipo 'e re Paulo 'ga kanape'i mua opo pe. A'eramū futat 'ga oje'ega monou Jarejuwarete 'ga upe:

—Au'jete mama'ea eremut oree— 'jau 'ga oje'ega monou 'ga upe 'gā nowase.

A'eramū futat 'ga ape monoka i'wau.

³⁶ A'eramū 'gā 'ga jemi'wara resakawe futat aku'iramū. A'eramū futat 'gā ojem'i'waa 'ga pyri.

³⁷ Kwaiwete ore yarau pypewaramū. Tusētū setētai seis te ore pytuna.

³⁸ A'etea 'gā iapopyrera a'upap. Ojomoyka i'wau. A'e pe 'ā 'gā imomopoa nū. Iapoe'emera momopoa nū. Kwaiwete juowuuranaku'ia 'gā imomopori. A'eramū futat yarau mawua imua orojee imowewuita.

'Yisiga pype yarau sīamīawet

³⁹ Ku'emamū yarau waraara 'gā 'jau:

—Ma'ape jane jarejua 'ū? Niesagi we te 'ā jane 'au jepi— 'jau 'gā ajaupe.

A'eramū 'gā 'yisiga resaka.

—Pe'je ajee soo peu jarejekoka esaka— 'jau 'gā 'yisiga repejāna imonou.

⁴⁰ A'eramū 'gā yarau momytawaama monoka. Furuk. Iku'ookawa 'gā irapa jui. A'ere 'gā taity pirera pypekau isī me ywytu upe numiamū.

—Jane reroo pea 'yisig are jane rorojekoka 'jau— 'jau 'gā ajaupe numiamū.

⁴¹ A'ere 'yisiga mū ruwi tpyter ipe yarau renune ypype'i rakue. A'eramū 'gā esake'ema. A'eramū ywytua ore rerawau ore renujāna i'arimū. Tyryk. 'Yisiga pype yarau sīamīau oree. Ywytuu fuakara futat yarau monou isīamīau ore wi. A'eramū futat 'gā imosokarūme'em. Nomosogarūi 'gā. Kwaiwete te 'y ryjuapia. A'eramū 'y ryjuapia futat iku'awopena.

⁴² A'eramū jefaruu 'gā 'jau 'wyrriara 'ga upe:

—Siapisi ose ma'efera 'gā 'jau. Siapisi tāmējē 'gā 'jau. Kasi 'gā ka'jami ne— 'jau 'gā 'wyrriara 'ga upe.

⁴³ A'ere 'gā 'wyrriari 'ga nifueweri Paulo 'ga juka are. A'eramū 'ga 'jau:

—Naani nū'ū. Peapisi awi 'gā nū'ū— 'jau 'wyrria'ri 'ga jefaruu 'gā nupe.
 A'ere 'wyrria'ri 'ga 'jau 'gā nupe:
 —Pe'je pejewau pejepopoa jui. Oytap ma'eramū pejewau tenune pejejtapa pejekokoa 'yisig are.
⁴⁴ Iytawe'ema 'gā yaruū pemer are too oytapa 'jau— 'jau 'ga 'gā nupe.
 A'eramū ore nan arawau. Orojekokoa pāwē pāwē futat ikue, aramanūme'em futat ore mū ikue.

28

Mauta 'jawa 'ypō'ō me 'gā nekoawet

¹ Arawau orojekokoa 'ypō'ō me aru'jāu 'y awi. Peu futat ore 'ypō'ō rera kwaapa.
 —Aga 'ypō'ō rera Mauta— 'jau ipype 'up ma'e 'gā imome'wau oree.
² A'eramū ore jekog ire peuwara 'gā 'ypō'ō mewara 'gā 'ua ore repejāna. Ore rapeje'ega 'gā 'ua. Opojejuka esageramū 'gā ore ree. Amanakya pype te ore ruri aru'jāu. A'eramū 'gā 'ua tata mojoy'wau ore ree. Iro'ysag awi tata mojoy'wau ore ree.
³ A'eramū Paulo 'ga 'yw akā ypiwera rerua imono'oga tataramū. A'eramū moja uēma tata rakuw awi. A'eramū 'ga po u'wau. Waekou akou 'ga po are.
⁴⁻⁵ A'ere 'ga imowawagi etee imonou tata pe.
 A'e resaka 'ypō'ō mewara 'gā 'jau ajaupe:
 —Kuu. Oporojuka ma'efera 'ga nipo 'ā koromū kūi — 'jau 'gā ajaupe. —'Y pe ako 'ga namanūi ko. A'ere 'awamū 'ga manūi. Nae u'uaiwi 'aga moja. Nauagi ae 'aga moja rāi ay upe— 'jau 'gā ajaupe. —Janemaira 'ga 'ga nomogoukari.
⁶ A'eramū 'gā ajemogyau oporesagamū 'ga ree.
 —Siesak 'ga po wuwura 'jau— 'jau 'gā ajaupe. —Siesag iki 'ga amanūa erujewi— 'jau 'gā oporesagamū ajemogyau 'ga ree.
 'Ga po wuwura rapesaka 'gā ajemogyau namutamutat numiamū. A'ere nowuwuri 'ga wi. Naayi 'ga upe.
 'Ga po wuwure'ema resakawe 'gā 'jau:
 —Kuu. Nowuwuri futari 'ga poa ra'e nū'ū. Namanūi futari 'ga jupe ra'e nū'ū. Maira 'ga te nipo 'ā 'ut owaēma janee— 'jau etee 'gā 'ga upe nū.
⁷ Yisiga pyri P'ublio 'ga ywya 'upa. P'ublio 'ga 'wyrriara 'ypō'ō mewara 'gā nupe. A'eramū 'ga 'ua oree, ore rerawau oje'wyr' ipe. A'e pe ore arajemogyau 'ga pyri muapyra orosea. Ojejukau esage futat ore ree.
⁸ Peu ore rekoramū 'ga ruwa 'ga ojero'wau 'upa. 'Ga tururua 'ga mory'wau. A'eramū 'ga 'upa oseawa pype etee futat afu'ame'ema 'upa. 'Ga tururua 'ga pifuaka'roka 'ga nuga 'ga ro'y reewe. A'eramū Paulo 'ga awau oje'ega 'ga upe. A'ere Paulo 'ga oje'ega monou Jarejuwarete 'ga upe 'ga ree:
 —Ekatu'ok 'ga, ki Ku'jyp— 'jau 'ga oje'ega monou 'ga upe.
 A'erauwe futat 'ga opo monou 'ga apyte'rarimū. A'erauwe futat 'ga afu'ama ajarueter-amū.
⁹ A'erauwe 'ga resakarera 'gā awau Paulo 'ga rera mokwasi'wau opytuna 'gā nupe. 'Ga rera renupawe ojero'wu ma'e 'gā 'ua ajatykau 'ga ree ojemajarutekuaa 'ga upe. A'eramū ojero'wu ma'e 'gā ajarueteppawamū.
¹⁰ A'eramū 'gā mama'e mua ore upe kwaiwete. Anure ore 'wyrāmū 'gā mama'e mua wējēmī futat oree nū. Oreremi'urama mua oree, oreremirooramū.

Pe awi Roma pe 'gā oawet

¹¹ Muapyra jay magwaw ire ore aru'aa yaruū mū pype nū. Aresāri 'jaw awi futat 'ua 'upa 'ypō'ō me amana magwapa rakue. Aipo yaruū rera Mait jopewet, 'jau 'gā e'roka. A'e yaruū pype aru'aa. Aru'ar ire ore oroia.
¹² Arawau orojekokoa Sirakusa 'jawa amunaw ipe. Peu ore muapyra orosea.
¹³ Muapyra oroser ire ore oroia arawau nū. Regiu 'jawa amunaw ipe etee orojekokoa. Majepei tee ore orosea peu. Ai'iwetetewe ywytua 'ua oree, oreatykupe katy 'ua ore upe. A'eramū ore oroia. A'e ywytua ore renujāna ore rerawau kamēsiete futat. Mukūi tee ore orosea. Arawau orowaēma Posuori 'jawa amunaw ipe. Peu ore aru'jāu yaruū awi.
¹⁴ A'e pe ore majepeja etee morowykye'ema magwapa. A'e pe futat ore Jejui 'ga rerowiaara 'gā amū nekoaa. A'eramū 'gā 'jau oree:
 —Pe'je pejejua 'au ore pyri, morowykye'ema mū magwapa— 'jau 'gā oree.
 A'ere ore morowykye'ema magwaw ire arawau nū. Ywryi futat ore oi poromū Roma 'jawa amunaw ipe arawawamū.
¹⁵ A'eramū Jejui 'ga rerowiaara 'gā ore rera renupa rakue. A'eramū 'gā 'ua ore rowosōu. Apiu 'jaw ipe, Tres Wēta 'jaw ipe. Mīmera amunaw ipe 'gā 'ua ore rowosōu.

Aipo 'gā nesakawe Paulo 'ga aku'iramū 'gā nee. A'eramū futat 'ga oje'ega Jarejuwarete 'ga upe:

—Ene te 'ā ore rereko ape ejeape. Ene te 'ā 'gā eremut ore maku'iukaa— 'jau Paulo 'ga Jarejuwarete 'ga upe oje'ega monou.

Roma pe Paulo 'ga renawet

¹⁶ Roma pe orowaēm ire jefaruu 'gā 'wyrriara 'ga 'jau Paulo 'ga upe:

—'Awamū eko 'oga mū pype— 'jau 'ga Paulo 'ga upe.

Jefaruu 'ga nanē 'ga amū imogou Paulo 'ga ree omaenun ma'eramū.

¹⁷ Muapyt oser ire Paulo 'ga oje'ega monou judeu 'gā 'wyrriara 'gā nupe:

—Pe'je pejejua je resaka 'au— 'jau 'ga 'gā nupe oje'ega monou.

A'erauwe judeu 'gā 'wyrriara 'gā ajatykau 'ga ree. Ojee 'gā jatykapawauwe Paulo 'ga ojemome'wau 'gā nupe:

—Jareypy 'gā nekwawer imū etee futat je iapoi tekou ai'i. A'etea judeu 'gā je ppyk, je pofaa, je monou romanū 'gā 'wyrriara 'ga po pe. Jerusareg ipe 'gā je ppygi ai'i. A'ere 'gā je monoi romanū 'gā 'wyrriara 'ga po pe.

¹⁸ A'ere 'gā opo pe je mono re romanū 'gā poronuwi jee. Je upe oporogytapaw ire 'gā 'jau ajaupe: “Nuapoi 'ga 'ā mama'e tywera amanūawamū ra'e”, 'jau 'gā ajaupe. “A'eramū ore 'ga jukawe'em. Pe'je ajee sapoit 'ga wi”, 'jau romanū 'gā ajaupe numiamū— 'jau 'ga 'gā nupe.

¹⁹ —A'ere judeu 'gā 'wyrriara 'gā nafutari je wi 'gā paira. A'eramū je 'jau 'gā nupe: “Too tejemome'wau 'wyrriarete 'ga upe 'jau”, 'jau je 'gā nupe. Ma'eramū 'ā je ruri tejemome'wau 'ga upe 'au— 'jau Paulo 'ga imome'wau 'gā nupe. —Natepytuna 'gā je 'ēwu'jaga rūi je ruri. Tejemome'wau te je ruri 'au ai'i— 'jau Paulo 'ga 'gā nupe u'ama.

²⁰ —Ma'eramū je 'ā pē majatykai tejemome'wau pē nupe. Ymā te 'ā judeuramū jane Jarejuwarete 'ga remimurera 'ga rapesagi. Jeju'i 'ga 'ā 'ga remimurera futat. A'e 'ga je 'ā arowiat tekou. A'eramū 'gā 'ā a'eramū 'ga rerowiarāmū je munepa je mŷina je pofaa itaju pyu— 'jau Paulo 'ga 'gā nupe.

²¹ A'eramū peuwara 'gā 'jau Paulo 'ga upe:

—Namuri futari 'gā ka'arana ikwasiaa oree enereko tywer are. Pe awi 'ut ma'e 'gā miamū nomome'ui futari ene rekoarūe'ema oree— 'jau 'gā Paulo 'ga upe.

²² —A'eramū ene Jeju'i 'ga mome'wau oree 'awamū. Taruenup ene imome'ua 'jau. “Kwe pewara 'gā 'ā Jeju'i 'ga rerowiaara 'gā je 'ēwu'jaga ajemogyau” 'ea 'ā ore a'jea futat aruenup arajemogyau. Ma'eramū 'ā ore “eporogyta oree”, ore 'i enee. Taruenup ene imome'ua orojeupe 'jau, 'jau 'ā ore enee.

²³ A'eramū nipo ore anurenure'i arajua eneporogyta renupa— 'jau 'gā Paulo 'ga upe.

A'ere 'gā awau aipo 'ga upe 'e re.

Ko'iko'i ete 'gā 'ua Paulo 'ga porogyta renupa. Amumera 'gā 'ua 'gā nupi 'ga porogyta renupa. A'erauwe Paulo 'ga oporogytau 'gā nupe. Ai'iwetetewe agawewi futat. A'etea 'ga oporogyta werokaarup 'gā nupe. Jarejuwarete 'ga mogyta are 'ga 'gā mu'jau.

—Anure nipo Janeruwarete 'ga reni 'wyrriaramū janee— 'jau Paulo 'ga 'gā nupe imome'wau. —Oje'ega renuparamū ae 'ga ae mowywya imonou ojejyri wemiayuwamū imogyau. Oje'ega renupare'ema 'gā te nipo ajee 'ga omono mama'eukwaawa rapyaw ipe— 'jau 'ga imome'wau 'gā nupe. —Ymā te 'ā Moisesi 'ga ka'arana kwasiari inuga janee rakue. Janeruwarete 'ga je'ega mome'wara 'gā nanē 'ā ka'arana kwasiiaa inuga Jeju'i 'ga ree janee rakue: “Anure nipo Janeruwarete 'ga wa'yra 'ga muri janee jane katu'okawamū”, 'jau 'gā ikwasiaa inuga janee rakue. Jeju'i 'ga 'ā Jarejuwarete 'ga ra'yra futat. Werowiarāmū 'ga pē katu'ogi pē mogyau wemiayuwamū futat— 'jau Paulo 'ga 'gā nupe.

²⁴ Aipo 'eramū 'gā amū 'ga je'ega rerowiaa. A'ere amumera 'gā 'ga je'ega nuerowiari ajemogyau.

²⁵ A'eramū 'gā awau 'ga wi.

'Gā o enune Paulo 'ga 'jau 'gā nupe nū:

—Ymā te 'ā Janeruwarete 'ga Agesage je'egi Isai 'ga upe rakue. A'eramū 'ga 'ga Agesage je'ega mome'wau janepytonera upe rakue. A'jea futat 'ga je'ega.

²⁶ A'e are 'ga ka'arana kwasiiaa inuga janee rakue:

“Ekwap eporogytau 'gā nupe:

Peenup futat nipo numiamū. A'ere nipo nepēneapyoi ee.

Pemā'ē esage agawewi nipo ee. A'etea nipo pēē esakare'ema 'jawe etee pejemogy.

²⁷ Pē'akwaawe'ema pē nereko.

Pejeapyakwara peawopytym. A'eramū pēē jeje'ega renupe'ema.

Pejeapymāu esakare'ema 'jawe. A'eramū pēē jeremiapofera resake'ema.

Peje'akwaaw ire amunipo 'ā pēē pejejea pemŷi je ree.

Pēapya amunipo 'ā enupa. A'eramū amunipo 'ā pēē pejejeapyoramū ee.

A'eramũ futat amunipo 'ã pẽẽ je rerowiaa pejemogyau.

A'eramũ futat amunipo 'ã je pẽ katu'oka",

'jau Janeruwarete 'ga ikwasiarukaa Isai 'ga upe rakue— 'jau Paulo 'ga 'gã nupe imome'wau u'ama.

²⁸ A'ere Paulo 'ga 'jau 'gã nupe:

—Janeruwarete 'ga 'ã oje'eg esage omono judeue'ema 'gã nupe. Judeue'ema 'gã nupe nanẽ ojemome'waukaa jee nũ. “Pe'je pejepoia pejetywer awi”, 'jau je 'gã nupe. “Pejetywer awi pepoiramũ 'ga pẽ katu'ogi”, 'jau je 'gã nupe. Judeue'ema 'gã nupe je aipo 'jau tekou. 'Gã 'ã werowiar ete— 'jau Paulo 'ga 'gã nupe.

²⁹ 'Ga porogytapaw ire judeu 'gã awau Paulo 'ga wi. Ajamueu awau 'ga 'eawer are ajemogyau.

³⁰ Mukũi kwara poromukuran Paulo 'ga ako peu, Roma pe ikue. Paulo 'ga ka'aranũũ monou 'oga mepyau ojeupe. Oje'wyr ipe oo ma'e 'gã mua esage ojepyri:

—Pe'je pejejua pejesou pejeapyka. Saporogyta 'jau— 'jau 'ga 'gã nupe 'ũina.

³¹ A'eramũ 'ga Jejui 'ga mome'wau 'gã nupe:

—Jejui 'ga je'ega ki peenup pejemogyau. “Nan ki pejemogy”, e'i Jejui 'ga janee rakue. A'eramũ jane 'ga 'eawer imũ etee futat mama'e apou jarejemogyau. Jejui 'ga futat janejararetea. A'eramũ jane 'ga je'ega etee futat erowiaa— 'jau Paulo 'ga 'ũina amowaara 'gã nupe imome'wau.

Okyjawe'em futat 'ũina imome'wau 'gã nupe.

Romanū

Janeruwarete 'ga 'Agesagea ka'arana okwasiarukat Paulo 'ga upe rakue. A'eramū Paulo 'ga 'aga kwasiaa imonou Roma pewara 'gā nupe.

Ymā te Janeruwarete 'ga Abraão 'gā juapyrera 'gā mū'jāu imogyau wemiayuamū rakue. Judeu 'gā Abraão 'ga juapyrera. Oje'ega Janeruwarete 'ga imonou Moisesi 'ga upe rakue. A'eramū judeu 'gā mama'e apou Moisesi 'ga remikwasiarer imū rakue. Ymā judeu 'gā etee Janeruwarete 'ga remiayuwa rakue.

A'ere Jeju 'ga rur ire Janeruwarete 'ga wearamū sigaty etee. 'Ypeywar are Jeju 'ga manū janetywera mepyawamū. A'eramū Janeruwarete 'ga 'awamū Jeju 'ga rerowiaaramū jane mogyau wemiayuamū. Judeu 'gā, judeue'emamū jane jarejemogyau jareju'jaju'jawe 'ga upe. A'eramū 'ga jane katu'oka pāwē pāwē, Jeju 'ga jane erowiarāmū.

Roma pewara 'gā naeapyo ee rakue. A'eramū Janeruwarete 'ga 'Agesagea ka'arana kwasiarukaa Paulo 'ga upe 'gā mueapyoawamū ee. A'eramū 'ga ka'arana kwasiaa inuga janee rakue.

¹ Je Pauloramū ka'aran akwasiat imonou Roma pewaramū pē nupe. Jeju Kristu 'ga 'ā Janeruwarete 'ga ra'yraretea. 'Ga 'ā je mogo ojeupe oporowyky ma'eramū. A'eramū 'ga ruwa 'ga je pyrūmū morogyta esage mome'waramū ikue. Aipo morogyta esagea Jeju 'ga mome'ua. A'eramū je a'eramū tekou 'ga mome'wau kwe pewara 'gā nupe.

²⁻³ Ymā we te 'ā Janeruwarete 'ga wa'yrarete 'ga mome'ui oje'ega mome'wara 'gā nupe rakue. A'eramū 'gā ka'arana kwasiaa 'ga ree rakue, Jarejararete 'ga ree rakue. "Anure nipo je teja'yra 'ga monoi wyw pe 'ga mogou wyw pewara 'gā pype", 'jau 'ga 'ā oje'ega mome'wara 'gā nupe rakue.

A'ere 'ā 'gā ka'arana kwasiaa inuga janee rakue. Janeruwarete 'ga ra'yrarete 'ga 'ā jarejararetea, Jeju Kristu 'ga. Wyw pe 'ua 'ā 'ga 'ari kunumiakramū, Davi 'ga juapyreramū rakue.

⁴ A'ere 'ga Janeruwarete 'ga ra'yraretea futat. Janeruwarete 'ga 'Agesagea 'ga wereko. A'eramū 'ga manū re 'ga Ruwarete 'ga opājē mū 'ga moferapa, 'ga kwaawukaa janee. "A'jea futat pa je Jeju Kristu 'ga Janeruwarete 'ga ra'yraretea ra'e. Wa'yrareteramū 'ga reko'e'em ire amunipo 'ā 'ga 'ga nomoferawi" 'e are jane mu'jaukaa.

⁵ Aipoa wa'yra 'ga upe futat Janeruwarete 'ga je mogoukari kwe pewara 'gā nupe ikue. "Paulo 'ga emogo kwe pewara 'gā nupe emome'waramū", 'jau 'ga wa'yra 'ga upe.

A'eramū Jeju 'ga je mogou 'agamū judeue'ema 'gā nupe omome'waramū ai'i. "Ekwap kwe pe je mome'wau, je rerowiarukaa ekou 'gā nupe. Je upe futat ewau je mome'wau 'gā nupe", 'jau 'ga jee. A'eramū je 'agamū tekou 'ga mome'wau pē nupe.

⁶⁻⁷ Roma pewaramū pēē nanē Janeruwarete 'ga pē mū'jāu Jeju Kristu 'ga remiayuamū. Wemiayuamū nanē 'ga pē mū'jāu nū. 'Ga 'ā oporomutaramū pē nee. A'eramū je ka'arana kwasiaa imonou pē nupe.

Ku'jywa 'ga Janeruwaretea. Jeju Kristu 'ga Jarejararetea. 'Gā nesagea pē nerekoa je afutat. Pē mopy'ata'waa nanē je afutat nū.

'Gā nee oje'ega monoawet

⁸ Kwe pewara 'gā najuejue etee futat pēnera renupa. "Roma pewara 'gā werowiarete futat Jeju Kristu 'ga" 'e kwasi'oa 'gā enupa. A'eramū je teku'iramū tekou pē nee. Jarejuwarete 'ga je imuorypa pē nee. "Ene te 'ā eneresage. Ene futat 'ā eja'yra 'ga rerowiarukaa Roma pewara 'gā nupe. 'Awamū kwe pewara 'gā 'gā nera renupa", 'jau je 'ga upe, 'ga muorypa pē katu'og are.

⁹⁻¹¹ Jeowet je pē nesaka. A'eramū je teporogytau tekou Jarejuwarete 'ga upe pē nee. 'Ga upe futat je porowykyi tekou teporomutaramū 'ga ree. 'Ga ra'yra 'ga je tewau imome'wau tekou. 'Ga je kwaapa. Teojere'emamū je teje'ega 'ga upe pē nee. "Jeowet je Roma pewara 'gā nesaka, Kiapi'ni. Naesagi we je 'gā. A'eramū ene ejemifutar imū je monou peu, 'gā nesaka", 'jau je 'ga upe tekou. Afutat je Jarejuwarete 'ga 'Agesagea mama'e esage apoa pē nupe, ojee pē mojemogyppygukaawamū.

¹² Pejejepyri je o re nipo jane jareku'iramū jarejuee. Pēē Jeju 'ga rerowiararetea nipo je maku'iu pē nee. Je 'ga rerowiararetea nanē nipo pē maku'iu nū. A'eramū jane jarejomogemyppygukaa 'ga ree.

¹³ Pēē Jeju 'ga rerowiaa pejejemogyau je 'jawe. A'eramū je tejemome'wau pē nupe. Jeparuesagiwet je pē nee. "Too 'gā nesaka 'jau", 'jau je tekou tejeupe numiamū. A'ere maran gatu gatu etee mama'ea jee. A'eramū je tewawe'em we. Afutat je Jeju 'ga rerowiarukara pē pyriwara 'gā amū nupe. Karanū je reko'i kwe pe judeue'ema 'gā amū

nupe, 'ga rerowiarukaa ai'i nū. Nan too tekou peuwara 'gā amū nupe 'ga rerowiarukaa, 'a'e futat je. A'ere nipo je oi futari 'gā amū mogytau Jarejuwarete 'ga upe 'jau.

¹⁴ Nanuar imū omome'wawamū futat Jejui Kristu 'ga je mogoi ikue. Ma'eramū 'ā je rekoi 'ga temogoawer imū etee futat kwe pe 'ga mome'wau 'gā nupe. "Wyrarete pewara 'gā nupe, ka'a pewara 'gā nupe, ojemu'e ma'e 'gā nupe, ijemu'e'ema 'gā nupe. Mīmera 'gā nupe ekwap je mome'wau", 'jau 'ga je ikue. A'eu te futat 'ā je tekou.

¹⁵ A'eramū je a'eramū Jejui 'ga ree teporomome'uweramū futat pē nupe Roma pewaramū nanē nū.

Jejui 'ga ree morogyta esagea

¹⁶ Opājē mū Janeruwarete 'ga morogyta esage rerowiaara 'gā katu'oka. Aipo morogyta esagea Jejui 'ga mome'ua. Judeu 'gā 'ga remikatu'og ppyfera. A'ere 'ga 'awamū judeue'ema nanē ikatu'ogi nū. A'eramū je morogyta esage mome'wau tekou 'gā nupe najuejue etee futat. Nojenosi je imome'wau tekou.

¹⁷ Morogyta esage renuw ire jane jarejeapyoramū 'ga 'e are. "Jejui 'ga rerowiaara 'gā etee ajemogyau je jekoty'aawamū", Jarejuwarete 'ga 'e are jane jarejeapyoramū. Ymā te 'ga oje'ega kwasiarukari 'gā nupe rakue: "Jejui 'ga rerowiaara 'gā etee wesageramū 'ga upe. Aipo 'gā etee 'ga imogyau ojejuryi nakwaparimū ete rūi", 'jau 'gā ikwasiaa ka'aran are rakue.

Ywy pewaramū janetywet

¹⁸ Janeruwarete 'ga amara'neramū mama'e tywera apoara 'gā nee, werowiare'ema 'gā nee. A'eramū 'ga 'gā nerekou tyweaete 'gā tywer are. Mama'e tywera apo are etee 'gā wea'aramū. Ku'jywa 'ga ree jēmī wea'are'emamū. A'eramū 'gā Janeruwarete 'ga kwaape'ema. 'Ga ree wea'ar ire amunipo 'ā 'gā 'ga kwaawi. Mama'e tywera etee 'gā iapou. A'eramū 'gā Janeruwarete 'ga kwaawukare'ema ajaupe.

¹⁹ 'Agamū futat 'ga ojekwaawukaa 'gā nupe. Opājē resaukaa 'gā nupe. A'ere 'gā 'ā nuerowiari 'ga. A'eramū 'ga aipoa werowiare'em are 'gā nerekou tyweaete.

²⁰ Ymā te 'ā 'ga ywy apoi rakue. A'eramū jane 'ga remiapofera resaka 'ga kwaapa. Niesagi jane 'ga numiamū. A'ere jane 'ga remiapofera resagi. A'eramū jane 'ga kwaapa, 'ga pājē kwaapa nanē nū. Nateepawi futari 'ga pājēa. A'eramū aipo 'gā 'jawarūe'em: "Nakwaawi je Ku'jywa 'ga", 'jawarūe'em 'ga upe.

²¹ Akwaap futat 'gā 'ga numiamū. A'ere 'gā nopojeuwi te 'ga. "Ene 'ā Orewuwaretea", 'jawe'em 'ga upe. Wesak futat 'gā mama'ea 'ga remiapofera. Niporomuorywiwieri te futat 'gā 'ga ree ojeupe iapopyrer are. Mama'e tywer are etee 'gā nea'aramū. Ypytunaiwa pype wata ma'e 'gā nuesagi futari mama'ea. Nan tee 'gā. Ni'akwaawi futari mama'e are. A'eramū 'gā mama'e tywera apou.

²² "Ore'akwaawarete futat ore", 'jau futatee 'gā. A'ere 'gā 'meramū etee. I'akwaap 'me ma'e 'gā.

²³ Janeruwarete 'ga 'ā okoeteete ma'ea. A'ere 'gā nomuorywi 'ga. Mama'eukwaawa etee 'gā wa'agawy ita pyu imu'ama ae 'jawe ojeupe. Wyra wewe ra'agawyau. Wyra wata ma'e, otryryk ma'e. Mīmera 'gā imogyau ia'agawyau ojeupe. Wemiapofera etee 'gā amuoryp 'gā jemogyramū, Janeruwarete 'ga amara'neramū nanuara 'gā nee.

²⁴ Nanuara 'gā nee Janeruwarete 'ga nojejukai. "Mama'e tywer are etee 'gā paruapoweramū. Tene 'gā jemogyi otywera etee iapou ra'ne", 'jau 'ga ojeupe. A'eramū taetu 'gā ajemogyau mama'e tywera apou ajaupe.

²⁵ Nuerowiara'uweri 'gā Jarejuwarete 'ga je'eg a'jea. O'mea etee futat erowiaa. Amuoryp 'gā Janeruwarete 'ga remiapofera etee. Iapoarera 'ga jēmī imuorype'ema. 'Ga futat imuorywipyraretea agawewi. A'etea 'gā 'ga muorype'ema. A'eramū 'ga opoia nanuara 'gā nui.

²⁶ Wemiapofera etee 'gā imuorywamū Janeruwarete 'ga opoia 'gā nui. "Mama'e tywer are etee 'gā paruapoweramū. A'eramū je tepoia 'gā nui", 'jau Janeruwarete 'ga ojeupe rakue.

A'eramū taetu mama'e tywera apoara 'gā wemifutar imū etee futat mama'e tywera apou. Kūjāmera 'gā omena ojee ekoa jēmī ifutare'ema. Kūjānamū etee futat 'gā wemiarūnamū ajuee.

²⁷ Kūima'e 'gā nanē opoia wemireko are oko awi nū. A'eramū 'gā kūima'eramū etee futat ajafutaa. Owy'aa kūima'eramū etee futat ajuee. A'eramū nanuara apoara 'gā ojemote'aa ojeteet futat, akou tywet nipo 'gā otywer are wemifutar imū etee futat.

²⁸ Niporokwaawiwieri 'gā Janeruwarete 'ga ree. A'eramū 'ga opoia 'gā nui. "Mama'e tywer are etee pēnea'aramū je poiri pē nui", 'jau 'ga 'gā nupe, mama'e tywera apoukaa 'gā nupe.

²⁹ Aipo 'gā nia'wryi futari. Akowarūe'em 'gā. Mama'e tywera etee 'gā iapou. Ojokaraemā 'gā ifutaa, ojomotesirūgatuu, iporerekoaywerete 'gā, oporojuka ma'e 'gā. Ajamue 'gā akou. O'meramū te 'gā 'jau. Morogyta mowuwuara 'gā.

³⁰ Ajuago'wau 'gā. Niporomutari 'gā Jarejuwarete 'ga ree. Nojejukai 'gā ajuee. Ojomotywerukat 'gā. Nuenuwi 'gā ujara 'gā je'ega. Ojerowiaraiw etee 'gā ojee.

³¹ Ni'akwaawi 'gā mama'e are. Nuapoi 'gā mama'ea u'eawer imū. Najemuaēmi 'gā ajuee. Nipy'ata'wai 'gā ajuee.

³² Aipo 'gā Janeruwarete 'ga imonou mama'eukwaawa rapyaw ipe. Nakamēsi etee rūi futat 'gā oi peu. A'ea 'gā ikwaapa agawewi. A'etea 'gā nopoiri futari mama'e tywera apo awi. Ojero'waro'wau etee otywera apou. A'eramū 'gā ojerowiarairaipa etee futat otywer are. Amumera 'gā mama'e tywerete agawewi wapo. A'etea 'gā 'jau: "Eneremiapoa esage futat", 'jau etee 'gā ajaupe, mama'e tywera aporamū.

Aipo 'gā nemiapoa mama'e tywera futat Janeruwarete 'ga upe.

2

Mama'e tywera apoara 'gā nereko tywet

¹ 'Gā nemiapofera mama'e tywera renuw ire pēē mū 'jau: "A'jea futat 'gā nemiapofera mama'e tywera futat", 'jau nipo pēē pejejaupe. "Aipo apoara 'gā ojomotywea Jarejuwarete 'ga upe", 'jau nipo pēē pejejaupe. A'ere aipo 'e reewi mama'e apou 'ga 'jawerimū etee futat nū 'eramū pēē nanē pejejekwau Jarejuwarete 'ga upe.

² "Mama'e tywera apoara 'gā Janeruwarete 'ga wereko tywet" 'ea jane ikwaapa. Mama'e a'jea etee Janeruwarete 'ga iapou. A'eramū jane 'jau, "Mama'e tywera apoara 'gā ojereko tywerukat futat", 'jau jane.

³ Ma'eramū sipo ajee pēē nanē mama'e tywera apou 'gā 'jawe etee nū, "pēnemiapofera nia'wyri 'ga upe", 'e re? Pēē sipo Janeruwarete 'ga nepē nereko tyweri mama'e tywera pēē iaporamū? Mama'e tywera pēē iaporamū 'ga pē nerekou tyweaete nanē 'gā 'jawe futat.

⁴ Pēē mū nipo 'jau: "Jane ree 'ga jemuaēmi. Ipotawa futat 'ga jane ree. Najane rerekou tywera'nei 'ga", 'jau nipo pēē. Aipoa a'jea futat. A'ere pēē nepēneapoi 'ga ree. Ajemuaēm futat 'ga pē nee pētywer awi pē momoirukaawamū pē nupe. Ma'eramū 'ā 'ga nepē motesirūgatua'nei. "Otywer awi 'gā poir ire je 'gā nerekou tywere'em", 'jau 'ga ojeupe.

⁵ A'ere nipo 'ā nepepoiri futari pejetywer awi. Pejejero'waro'wau etee futat 'ā 'ga je'ega renupe'ema. A'eramū nipo pēē 'ga mamara'neukaa etee te pejejee. A'eramū nipo 'ga pē nerekou tyweaete wowase ae majatykaawa 'ara rupi. Aipoa 'ara rupi 'ga mama'e tywera apoara 'gā nerekou tyweaete 'gā nemiapo tywer are etee futat. A'eramū nipo 'ga, mama'e tywera pēē iapo re, pēē nanē pē nerekou tyweaete, pēnemiapofere.

⁶ Akwaap 'ga janeremiapofera. A'eramū 'ga jane mepyau janeremiapofere are etee futat.

⁷ Jane mū mama'e esage apou jarejemogyau. Jarejuwarete 'ga je'ega jane enupa. "Tejeupe 'ga je'eg are jeporenuwiweramū tekou. 'Ene 'ā je renupa ekou. A'eramū ene eneresage futat jee' 'e are jeporenuwiweramū", 'jau jane. 'Ga pyri jareoa jane ifutaa. 'Ga pyriwara 'gā jarepojeuwa jane ifutaa jarejemogyau. Nan jane iaporamū 'ga jane mogyau ojeypyri nakwaparimū ete rūi futat.

⁸ A'ere ojee ea'are'ema 'gā nee Janeruwarete 'ga mara'neramū. Morogyta a'jea renupare'ema 'gā nee, mama'e tywera apoara 'gā nee, ojee ojerowiaraip ma'e 'gā nee. Mīmera 'gā nee 'ga amara'neramū. A'eramū 'ga 'gā nerekou tyweaete.

⁹ Mama'e tywera apoara 'gā juejue futat nipo 'ga erekou tyweaete. Judeu, judeue'em. Mīmera 'gā nipo 'ga 'gā nerekou tyweaete.

¹⁰ Mama'e esage aporeramū te nipo ajee 'ga 'i janee: "Pēē pēnesage jee", 'jau nipo 'ga janee. Jane mopy'ata'wau ojeypyriwara 'gā nowase. Aipo 'ga wapo mama'e esage apoara upe. Judeuramū ore 'ga iapoi, judeue'emamū pē nupe nanē 'gā iapou nū.

¹¹ Janeruwarete 'ga ojejuka pāwē pāwē jane ree. A'eramū 'ga mama'e tywera apoara 'gā juejue 'ga erekou tyweaete. Mama'e esage apoara 'gā juejue 'ga erekou esage.

¹² Ymā te 'ā Janeruwarete 'ga oje'ega kwasiarukari oreypy 'ga upe rakue, Moisesi 'ga upe rakue. A'eramū judeuramū ore 'ga remikwasiarera rerekou. A'ere judeue'emamū pēē nepētywi futari 'ga je'ega pyu. Janeruwarete 'ga nomonoi pē nupe rakue. A'etea Janeruwarete 'ga pē nerekou tyweaete mama'e tywera aporamū. A'eramū nipo 'ga judeuramū ore 'jau: "Nepeenuwi jeje'ega. A'eramū je pē nerekou tyweaete", 'jau nipo 'ga oreypy 'gā nupe rakue.

¹³ NaMoisesi 'ga remikwasiarera kwaapara 'gā tee rūi esage Janeruwarete 'ga upe. 'Ga je'eg imū mama'e apoara 'gā etee te esage 'ga upe.

¹⁴ Judeue'emamū pēypy 'gā nitywi futari 'ga je'ega rerekwara ka'arana pyu rakue. Nomonoi 'ga 'gā nupe. A'ere 'gā 'ga remifutara kwaawi ojee. A'eramū 'gā amū mama'e apou 'ga remifutar imū.

¹⁵ A'eramū 'gā nesakara 'gā nipo 'jau: "Nitywi futari 'gā Janeruwarete 'ga je'ega rerekwara ka'arana pyu. A'etea 'gā 'ga remifutara kwaapa ojee. Sā'ā 'gā mama'e apoara 'ga je'eg

imū”, 'jau nipo 'gā nesakara 'gā. Akwaap futat 'gā mama'e esagea. Akwaap futat 'gā mama'e tywera. A'eramū 'gā mama'e tywera aporamū 'jau ojeupe: “Aipoa nia'wryri”, 'jau ojeupe. Mama'e esage aporamū 'gā 'jau: “Aipoa esage”, 'jau 'gā ojeupe.

¹⁶ A'eramū wowase ae majatykaawa 'ara rupi nipo Janeruwarete 'ga jane mojo'ogukaa Jejuu Kristu 'ga upe. Janerekwawera 'ga ikwaapa, janerea'aawera nanē 'ga ikwaapa nū. A'eramū 'ga jane mojo'oka nipo wemiayuwamū, werowiare'ema 'gā nui. Nan je rekoi morogyta esage mome'waramū.

Ee judeu 'gā jemogyppykawet

¹⁷ “Jane 'ā judeua”, 'jau pēē mū pejemogyau. “Moisesi 'ga remikwasiarera 'ā jane erekou. A'eramū jane jarejesageramū jarejemogyau”, 'jau pēē pejejaupe numiamū. “Jane 'ā Jarejuwarete 'ga remiayuwaretea”, 'jau pēē pejejerowiaipa pejejee.

¹⁸ Jarejuwarete 'ga remifutara pekwaap numiamū. Moisesi 'ga remikwasiarer are pejemū'jau mama'e esage kwaapawamū.

¹⁹ Easig ma'eramū ae nuatai futari ojetee. A'eramū Janeruwarete 'ga kwaapare'ema 'gā eae'ema 'gā 'jawe futat. Mama'e a'je kwaapare'ema 'gā easig ma'e 'jawe. A'eramū pēē 'jau: “Ore ea ma'e 'jawewara aramueapyo 'gā 'ga ree”, 'jau pēē numiamū.

²⁰ “Takwaawe'ema 'gā ore aramu'e ee. Kunumī 'gā nanē ore imu'jau ee nū”, 'jau pēē numiamū. “Orokwaaw ore Moisesi 'ga remikwasiarera. Moisesi 'ga ore mueapyou mama'e are. Mama'e a'je are 'ga ka'arana kwasiari rakue. A'eramū ore 'gā mu'jau ee”, 'jau pēē numiamū.

²¹ Ma'eramū sipo ajee pēē pejemū'jau esage'em ee? Nepeenuwi futari 'ga je'ega. “Pemunarū awi”, 'jau agawewi pēē 'gā nupe. A'etea pēē aipo 'gā nupe 'e re pēē futat pemunarū.

²² “Peko awi pejejuemireko are”, 'jau pēē 'gā nupe. Ma'eramū sipo ajee aipo 'gā nupe 'e re pejekou pejejuemireko are? “Kūjāmeramū pejekowe'em pejejomēn are”, 'jau pēē 'gā nupe. Ma'eramū sipo pejekou pejejomēn are, aipo 'gā nupe 'e re? Nepēporomutari pēē maira'me a'agaw are. A'ere pejemunarūmū mama'e are maira'me a'agawa rog awi. Ymā te Moisesi 'ga jane mu'jau maira'me a'agaw are rakue. “Pemuoryp kasi maira'me a'agawa ne”, 'jau 'ga janee rakue. “Pemunarū awi mama'e are”, 'jau nanē 'ga rakue nū. A'eramū pēē pejemotywea Jarejuwarete 'ga upe pejemunarūmū mama'e are maira'me a'agawa rog awi.

²³ “Janeruwarete 'ga oje'ega kwasiarukaa Moisesi 'ga upe, inuga oree rakue”, 'jau pēē, pejejerowiaa ee. Ma'eramū sipo ajee pēē erowiare'ema? 'Ga je'ega renuwe'emamū pēē 'ga rerowiarukare'ema judeue'ema 'gā nupe.

²⁴ Ymā te 'ā 'ga amū ka'arana kwasiaa pē nee rakue. “Judeuramū pē nekoarū'e'em are judeue'ema 'gā Janeruwarete 'ga akurap”, 'jau 'ga ikwasiaa rakue.

²⁵ Je nanē judeua, pē 'jawe. Ymā te Janeruwarete 'ga 'jau janepy 'gā nupe rakue: “Pēē 'ā jeremiayuwaretea. A'eramū pēē pejejomowaka 'gā nupe pē kwaawukaawamū. A'eramū 'gā 'jau: 'Aipo 'gā Ku'jywa 'ga remiayuwaretea', 'jau nipo 'gā pē nupe, pejewaga resag ire”, 'jau Janeruwarete 'ga janepy 'gā nupe rakue. A'ere pēē mū 'jau: “Ore 'ā judeua. A'eramū ore Jarejuwarete 'ga remiayuwaretea. Sā'ā orejemowewaga”, 'jau nipo pēē. A'ere jane je'ega renuparamū etee janejewaga resageramū 'ga upe. Pejejerowiaipa etee pejewag are pejemogyau. A'ere 'ga je'ega renupare'emamū pēē ojewagipyre'ema 'jawe etee pejemogy 'ga upe. Pejewagamū futat numiamū. A'ere 'ga je'ega nepeenuwi. Judeue'ema 'gā 'jawe futat pejemogyau.

²⁶ Judeue'ema 'gā nojemowewagi futari. A'ere amumera 'gā amū mama'e apoi Jarejuwarete 'ga remifutar imū. Aipo 'gā judeu 'jawe futat Jarejuwarete 'ga upe, imojewagipyre'era 'jawe. Aipo 'gā Jarejuwarete 'ga remiayuwā futat.

²⁷ Jane 'ā judeuramū jareja'yra kūima'e mojewaka jarejemiapou. Jane 'ā Jarejuwarete 'ga je'ega rerekwara ka'arana rerekou. A'etea 'ā pēē mū nepeenuwi futari 'ga je'ega. A'eramū 'ā judeue'ema 'gā jēmī ajemogyau esage Janeruwarete 'ga remifutar imū. Nitywi 'gā 'ga je'ega rerekwara. Nomojewagi 'gā wa'yra 'gā. A'etea 'gā mama'e apou 'ga remifutar imū. A'eramū nipo 'gā 'jau pē nupe: “Pēē 'ā judeuramū pejewak futatee. Pē nupe 'ā 'ga oje'ega rerekwara monou. A'etea nepeenuwi 'ga je'ega. Ore 'ā noretywi agawewi futat ipyu. A'etea ore mama'e apou 'ga remifutar imū etee”, 'jau nipo 'gā pē nupe.

²⁸⁻²⁹ Janeruwarete 'ga oje'ega renupara 'gā mogyau wemiayuwamū. Naimojewagipyre'era 'gā etee rūi 'ga remiayuwā. Oje'ega renupara 'gā etee 'ga imogyau wemiayuwamū. 'Ga je'ega renupare'ema 'gā ojewak futateeramū akou. Na'ga remiayuwā rūi agawewi 'gā. 'Ga je'ega renupara 'gā Janeruwarete 'ga 'Agesagea 'gā mogyau 'ga remiayuwareteramū. Aipo 'gā nupe Janeruwarete 'ga 'jau: “Ene 'ā eneresage jee”, 'jau 'ga aipo 'gā nupe. Najane pyriwara 'gā nūi aipo 'i janee. Janeruwarete 'ga te e'iarū janee.

3

¹ A'eramū nipo pēē 'jau jee: “Judeu teea pa 'ā ore nū?” 'jau nipo pēē. “Orojewag ekoeteramū arajemogyau nū?” 'jau nipo pēē.

² Naani. Aipo pe'je awi, 'jau je pē nupe. Janeruwarete 'ga 'ā oje'ega mua judeuramū janepy 'gā nupe rakue. “Teje'ega je omono ikwasiarukaa pē nupe. A'eramū ki pēē jeje'ega renupa. Jeje'eg imū etee ki pēē mama'e apou. Pejejeapyo esageramū pēē je pejemu'eawer are”, 'jau 'ga janepy 'gā nupe rakue.

³ A'ere 'ā 'gā amū nuerowiari 'ga je'ega rakue. “Gā werowiare'emamū ma'eramū sipo Janeruwarete 'ga mama'e apowe'em u'eawer imū etee”, 'jau nipo pēē.

⁴ Naani. U'eawer imū etee futat 'ga mama'e apoi. Ni'mea'uweri futari 'ga. Ae te 'ā najuejue etee futat i'me. A'ere Janeruwarete 'ga ni'mei futari. Mama'e a'jea etee futat 'ga imome'wau. Ymā te 'ga amū ka'arana kwasiari 'ga ree rakue:

“Eneje'egamū nipo eneje'ega renupara 'gā 'jau, a'jea futat 'ga je'ega, 'jau nipo 'gā ene rerowiare'ema 'gā nupe.

O'meramū te Ku'jywa 'ga 'i, 'gā amū 'e renupa nipo amumera 'gā 'jau:

Naani. Ene te ene'me, 'jau nipo 'gā ene'me are ako ma'e 'gā nupe.

Ene ago'o ekoteeara 'gā nupe nanē nipo 'gā 'jau nū:

O'meramū te 'gā 'i. Ako esage Janeruwarete 'ga, 'jau nipo 'gā enee, ene ago'o ekoete renuw ire”,

'jau 'ga ikwasiaa inuga rakue.

⁵ A'eramū nipo pēē mū 'jau futatee: “Ko ajee ore narakoarūi”, 'jau nipo pēē. “Taruesak Jarejuwarete 'ga wesage resaukara 'jau”, 'jau futatee nipo pēē. “Jane rekoarūe'em are Janeruwarete 'ga wesage resaukaa 'gā nupe 'jau”, 'jau nipo pēē numiamū. Aipo a'je re amunipo 'ā Janeruwarete 'ga mama'e tywera apoi jane rerekou tyweaete jane rekoarūe'em are. A'ere naani. Nanarūi. (Aipoa 'eramū pēnea'awarūe'ema futat. Nia'wyrī aipoa pēnea'aawa. Nanarūi Ku'jywa 'ga rea'aramū ee.)

⁶ A'jeteetewi Janeruwarete 'ga mama'e apoi. A'eramū 'ga a'jeteetewi futat jane mepyau janeremiapofer are etee futat.

⁷ A'eramū nipo pēē mū 'jau futatee: “Esage ore'mea. Ore'me re nipo 'gā 'jau: Na'gā 'jawe rūi Janeruwarete 'ga mama'e a'jea etee omome'u, 'jau nipo 'gā ore'me renuw ire”, 'jau nipo pēē. “Ma'eramū sipo ore'mea Janeruwarete 'ga me'ma resaukare'ema. 'Ga 'me'ema resaukar ire ma'eramū sipo Janeruwarete 'ga je rereko tyweri je'me are”, 'jau nipo pēē.

⁸ Aipo are ea'at ma'eramū pēē mama'e tywer are ea'at ma'eramū nanē futat nū. “Jane-tywera nipo Ku'jywa 'ga resagea resaukaa 'gā nupe”, 'jau futatee pēē. A'ere aipoa pē'ea nia'wyrī.

Aipo 'e are 'gā amū je je'ēwu'jaga: “Mama'e tywera siapo 'jau Jarejuwarete 'ga resage resaukaawamū 'jau, e'i Paulo 'ga janee”, 'jau futatee 'gā je je'ēwu'jaga. A'ere 'gā 'me ate. Na'ea'uweri je aipo 'jau. A'eramū nipo aipo 'gā 'meawer are anure Janeruwarete 'ga 'gā nerekou tyweaete futat.

Najuejue etee futat janetyweramū

⁹ Maran te jane? Judeuramū futat nā'ā jane re'ā. Janeresage sipo jane judeue'ema 'gā nesage apyraapa sa'e nā'ā jane re'ā, 'jau nipo pēē? Naani. Najuejue etee futat janetyweramū Jarejuwarete 'ga upe judeuramū. Judeue'emamū pēē nanē oretywera 'jawe etee futat nū.

¹⁰ Ymā te Janeruwarete 'ga ka'arana kwasiarukaa 'gā amū nupe inuga janetywer are rakue:

“Nitywi futari 'ga amū esage ma'eramū Jarejuwarete 'ga upe.

¹¹ Naeapyo futari 'ga amū Jarejuwarete 'ga remifutar are.

Niparurowariwiri 'ga amū Jarejuwarete 'ga ree.

¹² Nokoi'i futari 'ga amū Jarejuwarete 'ga remifutar imū tāmējē mama'e esage apoaramū.

Nokoi'i futari 'ga amū Jarejuwarete 'ga remifutar imū mama'e esage are iporomutat ma'eramū.

¹³ Mama'e tywera etee 'gā imome'wau ajaupe.

O'me ekoeteramū etee futat.

Ajuago'wau ekoete tee futat 'gā ajemogyau.

¹⁴ Amara'ne ekoeteramū nanē nū.

Mama'e tesirūa etee futat imome'wau ajaupe.

¹⁵ Nokyjei 'gā ajuapisi ekoete awi.

¹⁶ Ojomotesirūgatu au'jeteramū.

¹⁷ Nipota'wai 'gā ajuee.

A'eramū 'gā ojomopy'ata'waukare'ema.

¹⁸ Nopojeuwi futari 'gā Jarejuwarete 'ga",
'jau 'ga ikwasiaa inuga rakue.

¹⁹ Ymā te Janeruwarete 'ga oje'ega kwasiarukari 'gā nupe rakue. Oje'ega rerekwara ka'arana 'ga imua oree, judeuramū oree. Ma'eramū 'ā ore: "Nikwaawi jane jarejekoarū'ema", naru'ea'uweri. Najuejue etee futat janetyweramū Ku'jywa 'ga upe. Judeuramū ore, judeue'emamū pēē nanē nū. A'eramū 'ga ae rerekou tyweaete aetywer are.

²⁰ Nuenupawi futari 'ga amū Moisesi 'ga remikwasiarera. A'eramū ojemuesage ma'ea nanē otywe'emamū nū. Moisesi 'ga je'ega renupaw ire amunipo 'ā jane janeresageramū. A'ere nitywi futari 'ga amū 'ga je'ega renup katu katuarera. A'ere jane jaretywera kwaawi 'ga je'ega renuw ire.

Werowiaara 'gā 'ga ikatu'oka

²¹⁻²² 'Awamū futat Janeruwarete 'ga jane mu'akwaapa ojeupe jane muesage are. Ymā te Moisesi 'ga Jarejuwarete 'ga je'ega kwasiari rakue. A'ere naaipoa rūi jane muesagei Janeruwarete 'ga upe. Jejui Kristu 'ga ree jane jemogypygamū te 'ga jane muesagei ojeupe. Jareju'jaju'jawe etee futat jarejemogyau. Ore judeuramū, pēē judeue'emamū nanē 'ga imuesageu Jejui 'ga ree jane jemogypygamū te.

²³ Najuejue etee futat 'ā janetyweramū Ku'jywa 'ga upe. Nitywi futari esage ma'e 'ga amū Ku'jywa 'ga upe. Esage ma'e 'gā etee ajemogyau Ku'jywa 'ga pyri. A'eramū jane najuejue etee futat jarejemogyau mukumuku 'ga wi. Najane mū upe etee rūi Ku'jywa 'ga 'i: "Ejetee ejemuesage jee", 'jawe'em.

²⁴ A'ere 'ga te jane muesagei Jejui Kristu 'ga jane erowiaramū. Niapoi agawewi futat jane mama'e esagea 'ga upe. A'etea 'ga jane muesageu ojeupe Jejui Kristu 'ga jane erowiaramū. Jejui 'ga amanūmū janetywera moiawamū rakue. A'eramū 'ga werowiaramū janetywera moia jane wi, jane mū'jāu mama'e tywera apoara 'gā nui. Jane wi janetywera moia 'ga 'Uwarete 'ga mota'wau janee.

²⁵ Janeruwarete 'ga Jejui 'ga mua ojeupe janetywera mepyawamū rakue. 'Ypeywar are amanūaw ipe 'ga janetywera mepyau 'Uwarete 'ga upe rakue. Jejui 'ga jane erowiaramū Janeruwarete 'ga janetywera moia jane wi. Jejui 'ga upe aetywera mepyukaawer are Janeruwarete 'ga wesage resaukaa janee.

Ymā te Jejui 'ga manūe'emaue Ku'jywa 'ga wea'are'emamū aetywer are rakue. Wuagamū 'ga janepygy 'gā tywera upe rakue. "Anure nipo Jejui 'ga manūi 'gā tywera mepyau", 'jau 'ga ojeupe rakue. A'eramū 'ga wea'are'emamū 'gā tywer are.

²⁶ Jejui Kristu 'ga aetywera mepyarera. A'eramū Janeruwarete 'ga 'awamū jane muesageu Jejui 'ga jane erowiaramū. Esagerete ma'ea Janeruwarete 'ga. A'eramū 'ga ojepyri aetywera io futare'ema. A'eramū 'ga wa'yra 'ga mua aetywera mepyawamū 'ga jukaukaa. A'eramū jane "a'jeteetewi 'ga mama'e apoi" 'e kwaapa jarejemogyau a'jea futat. Janetywer are Jejui 'ga manūe'em ire amunipo 'ā 'ga ae muesagewe'em futat. A'ere Jejui 'ga aetywera mepyi. A'eramū esagerete ma'e 'ga jane muesageu Jejui 'ga ree jane jemogypygamū.

²⁷ 'Ga te 'ā jane muesage. A'eramū jane 'jawe'em: "Je te 'ā jeresage 'gā nesagea apyraapa", 'jawe'em jane. NaMoisesi 'ga je'ega renuparamū rūi 'ga jane muesagei. Jejui 'ga rerowiaaramū te 'ga jane muesagei. A'eramū jane jarejerowiaraipe'ema jarejesage are. 'Ga te 'ā jane muesage.

²⁸ NaMoisesi 'ga je'eger imū mama'e aporamū rūi 'ga jane muesagei. Nienupawi futari jane 'ga je'egera. A'eramū 'ga, Jejui 'ga jane erowiaramū te, jane muesageu.

²⁹ Judeuramū etee sipo 'ga ore muesagei? Judeue'emamū sipo 'ga nepē muesagei? Naani.

³⁰ Majepei tee Janeruwarete 'ga. 'Ga etee futat janererekwat pāwē pāwēa. Jejui 'ga jane erowiaramū juejue 'ga jane muesageu ojeupe. Judeuramū ore, pēē judeue'emamū miamū 'ga jane muesageu Jejui 'ga rerowiaramū.

³¹ A'eramū miamū jane Moisesi 'ga 'eawera retyke'ema: "Jejui 'ga rerowiaaramū etee te Janeruwarete 'ga ae muesagei ojeupe. A'eramū jane Moisesi 'ga 'eawera renupe'ema", 'jawe'em jane 'gā nupe. Naani. Jejui 'ga rerowiar ire jane nanē Moisesi 'ga je'egera renupa jarejemogyau nū.

4

Abraão 'ga

¹ Pēnea'ar iki Abraão 'ga ree. 'Ga 'ā judeuramū orepyya. Maran ajee Janeruwarete 'ga 'ga muesagei rakue?

² Wemiapofer are ojemuesage re amunipo 'ā 'ga ojerowiaraipe ojee. "Je te 'ā ajemuesage tejetee", 'jau amunipo 'ā 'ga ojeupe. A'ere nanarūi. Naojeteē rūi 'ga jemuesagei. A'eramū 'ga ojerowiaraipe'ema ojee Jarejuwarete 'ga upe.

³ Ymā te Janeruwarete 'ga ka'arana kwasiarukari Abraão 'ga ree rakue:

“Abraão 'ga Jarejuwarete 'ga werowiat. A'eramū Janeruwarete 'ga 'jau: 'Abraão 'ga je rerowiat. A'eramū 'ga wesageramū jee', 'jau 'ga Abraão 'ga upe”, 'jau 'ga ikwasiarukaa 'ga amū upe rakue.

⁴ Sã'ã oporowyky jara 'ga. Ojeupe oporowyky ma'e 'gã 'ga imepyau 'gã porowyky are. Nomono tee rūi 'ga 'gã nupe epye'eme. Oporowyky te 'gã 'ga upe. A'eramū 'ga 'ã 'gã porowyky repy monou 'gã nupe.

⁵ A'ere nanarūi Janeruwarete 'ga. Naojeupe janeporowyky are rūi 'ga 'jau janee: “Aipo 'ga esage jee”, 'jau. Werowiarāmū te 'ga aipo 'jau janee. Mama'e tywera apoarera agawewi. A'etea Janeruwarete 'ga 'jau: “Ko 'ga je rerowiat. 'Ga tywera je omoit 'ga wi. A'eramū 'ga 'awamū wesageramū jee”, 'jau 'ga werowiaaramū 'gã nupe.

⁶ “Natejeupe pēporowyky are rūi je 'i: Pēnesage pejejemogyau jee, 'jau je pē nupe. Tejerowiar are tee je aipo 'jau pē nupe”, 'jau Janeruwarete 'ga rakue. Ymã te Davi 'ga nanē ka'arana kwasiari iku'i ma'e are rakue:

“Maranuara sipo aku'iramū akou?

⁷ Ojewi Janeruwarete 'ga otywera moiripyryera 'gã etee aku'iramū ajemogyau.

Otywer awi ipireipyryera 'gã etee aku'iramū ajemogyau.

⁸ Aipo 'gã tywer are Janeruwarete 'ga wea'aru 'jawe'emamū futat.

A'eramū aipo 'gã aku'iramū ajemogyau”,

'jau Davi 'ga ikwasiaa rakue.

⁹ Judeuramū ore upe etee te Davi 'ga aipo 'ga 'i? Naani. Judeue'emamū pē nupe nanē 'ga aipo 'jau nū. Werowiarāmū Janeruwarete 'ga 'i Abraão 'ga upe rakue: “Je rerowiar ape ekou. A'eramū ene 'awamū ejesageramū jee. Mama'e tywera apoare'ema 'jawe futat ene ekou jee”, 'jau 'ga 'ga upe rakue.

¹⁰ Judeuramū 'ã ore orojemowekaka. A'ere ojemowegagakare'emawe Abraão 'ga Jarejuwarete 'ga rerowiari rakue. A'eramū 'ga jewage'emauwe futat Janeruwarete 'ga 'jau 'ga upe rakue: “Abraão 'ga je rerowiat. A'eramū 'ga wesageramū jee”, 'jau 'ga 'ga upe rakue.

¹¹ Werowiar ire tee Janeruwarete 'ga 'jau Abraão 'ga upe rakue: “Ejemowegagakat 'ga amū upe. Eja'yra 'ga, ejemiayuwa 'gã nanē emojewagakat nū”, 'jau 'ga Abraão 'ga upe rakue. A'ere Abraão 'ga 'ga rerowiari ra'ne. Werowiar ire tee Ku'jywa 'ga 'i 'ga upe: “Ejemowegagakat 'ga amū upe”, 'jau. A'eramū 'ga jewaga Ku'jywa 'ga rerowiara resaukaa janee. A'eramū Janeruwarete 'ga rerowiaaramū jane juejue 'jau: “Abraão 'ga janeruwa 'jawewara. 'Ga 'ã Jarejuwarete 'ga werowiat rakue. A'eramū 'ga janeruwa 'jawewara janee”, 'jau jane jarejaupe Abraão 'ga ree. Judeuramū ore, judeue'emamū pēē 'jau. Pejewage'ema agawewi. A'etea 'ga, “eneresage jee”, 'jau pē nupe werowiarāmū. A'eramū pēē nanē 'jau: “Abraão 'ga janeruwa 'jawewara janee”, 'jau pēē nanē nū. Jarejuwarete 'ga rerowiaaramū juejue aipo 'jau Abraão 'ga upe.

¹² Abraão 'ga imojewag ypyryera 'ga. A'eramū 'ga akou judeuramū oreruwa 'jawewara. A'ere 'ga omojewage'emauwe Jarejuwarete 'ga rerowiari. Jarejuwarete 'ga rerowiar ire te 'ga janeruwa 'jawe 'ga rekoi janee. Jarejuwarete 'ga rerowiare'ema 'gã nupe 'ga na'gã nuwa 'jawe rūi 'ga rekoi 'gã nupe.

U'eawer imū 'ga mama'e apoi

¹³ Ymã te Janeruwarete 'ga 'i Abraão 'ga upe rakue: “Tamono 'gã ywya enee 'jau. A'eramū ywya ene ma'ea futat. Enejuapyrama 'gã ma'ea nanē nū”, 'jau Janeruwarete 'ga 'ga upe rakue. A'eramū Abraão 'ga 'ga rerowiaa. Werowiar ire Janeruwarete 'ga 'jau: “Esage 'gã jee”, 'jau 'ga 'gã nupe. Ma'eramū 'ã 'ga ywy monoi 'gã nupe 'gã nupawamū rakue. NaMoisesi 'ga je'ega renuw are rūi Janeruwarete 'ga ywy monoi 'gã nupe rakue. Werowiarāmū te 'ga imonoi 'gã nupe rakue.

¹⁴ “Tejerowiaara 'gã nupe etee je mama'e monoi”, 'jau Janeruwarete 'ga rakue. A'eramū 'ga mama'e monowe'em Moisesi 'ga je'egera renupara 'gã nupe werowiare'emamū. “Moisesi 'ga je'egera renupara 'gã nupe Janeruwarete 'ga mama'e mono re maran sipo jane Jarejuwarete 'ga rerowiari? A'jea sipo 'ga 'eawera?” 'jau 'gã. A'ere naani. Nanarūi futat.

¹⁵ Janeruwarete 'ga futat oje'ega okwasiarukat Moisesi 'ga upe rakue. A'eramū Janeruwarete 'ga 'ga remikwasiarera renupare'ema 'gã nerekou tyweaete. “Jeje'eg are nepēporenuwiweri. A'eramū je temara'neramū pē nee”, 'jau 'ga 'gã nupe. Aipoa 'ga je'ega tywe'em ire amusipo 'ã ma'ja are pejeporenuwiwere'emamū.

¹⁶ A'ere Janeruwarete 'ga 'i: “Tejerowiarāmū je mama'e esage monoi 'gã nupe”, 'jau 'ga. NaMoisesi 'ga je'egera renupara 'gã nupe etee rūi 'ga aipo 'jau. Werowiaara 'gã nupe juejue 'ga aipo 'jau. Abraão 'ga Jarejuwarete 'ga werowiat. A'eramū 'ga akou Janeruwarete 'ga rerowiaaramū janeruwa 'jawewaramū. A'eramū Janeruwarete 'ga 'jau Abraão 'ga ra'yra 'jawewaramū jane upe najuejue etee: “Mama'e esagea tomono 'gã nupe 'jau”, 'jau 'ga.

¹⁷ Ymā te Janeruwarete 'ga oje'ega kwasiarukari 'ga amū upe rakue, Abraão 'ga upe 'eawera kwasiarukaa 'ga amū upe rakue. “Abraão 'ga janeruwā 'jawewara, tamu'eukat judeue'ema 'gā amū, tejerowiaara 'gā nupe 'jau”, 'jau 'ga Abraão 'ga upe rakue. “A'eramū nipo enejuapyrama 'jawewara 'gā kwaiwete futat”, 'jau 'ga Abraão 'ga upe rakue. A'jea futat aipoa Janeruwarete 'ga Abraão 'ga upe 'eawera. Abraão 'ga Jarejuwarete 'ga werowiat a'jea futat. “Janeruwarete 'ga je rerekou. Amanū ma'ea 'ga imoferapa. Mama'e tywe'emamū Janeruwarete 'ga mama'e apou oje'eg imū etee. A'eramū nipo 'ga mama'e mua jee u'eawer imū etee futat. Jera'yre'ema agawewi. A'etea nipo 'ga jejuapyrama 'gā amut jee”, 'jau Abraão 'ga Jarejuwarete 'ga upe 'ga rerowiaa.

¹⁸⁻²¹ A'eramū Janeruwarete 'ga ojerowiaa Abraão 'ga ree werowiarāmū. “Kwaiwete enejuapyrama”, 'jau Janeruwarete 'ga Abraão 'ga upe rakue. Wa'yre'ema uwe agawewi Abraão 'ga 'ga je'ega rerowiaa. Sēg anu kwara mu'aa ja'wyja'wywe Abraão 'ga 'jau: “Jesawa'e je tekou. Jeremireko ēē nanē nū owāiwināmū nū. A'etea nitywi'i futari jera'yra mū”, 'jau 'ga ojeupe. A'ere 'ga Jarejuwarete 'ga je'ega nomoka'jami futari, “Kwaiwete nipo enejuapyrama” 'eawera moka'jame'ema futat. Nopoiri futari 'ga Jarejuwarete 'ga je'ega rerowiar awi. “Maran sipo Janeruwarete 'ga orera'yra muri oree”, 'jawe'em 'ga. Werowiarāmū Janeruwarete 'ga ojerowiarukaa etee te Abraão 'ga upe, 'ga mamuakaa. A'eramū Abraão 'ga 'ga muorypa. “Janeruwarete 'ga pājēreteā. A'eramū 'ga mama'e apou u'eawer imū”, 'jau Abraão 'ga, 'ga rerowiaa. Werowiarāmū wejue Janeruwarete 'ga kunumī mū mua 'ga upe, u'eawer imū etee futat.

²² Abraão 'ga Jarejuwarete 'ga werowiat. A'eramū Janeruwarete 'ga 'jau: “Esage 'ga jee”, 'jau Abraão 'ga upe.

²³ A'ere naAbraão 'ga upe etee rūi Janeruwarete 'ga 'i: “Esage 'ga jee”, 'jau.

²⁴ Werowiarāmū janee nanē 'ga aipo 'jau nū: “Esage 'ga jee”, 'jau nū. Jejui Kristu 'ga Janejararetea. “Ga manūnamū Janeruwarete 'ga 'ga moferapa nū. A'eramū 'ga jane werowiarāmū, “Esage 'ga jee”, 'jau janee.

²⁵ Janetywer are Janeruwarete 'ga Jejui 'ga mua ywy pe ijukaukaa. 'Ga manūawera futat 'ā janetywera mepyyau Jarejuwarete 'ga upe. A'eramū Janeruwarete 'ga 'ga moferapa jane muesageawamū ojeupe. Jejui 'ga amanūmū janetywera mepyawamū. Janetywera mepy re 'ga ruwa 'ga 'ga moferapa nū 'e rerowiarāmū 'ga 'i janee: “Esage 'ga jee”, 'jau. Werowiar ire Janeruwarete 'ga 'jau judeurāmū oree: “Pēnesage jee”, 'jau. Judeue'emamū pē nupe nanē 'ga aipo 'jau werowiar ire.

5

Werowiarāmū 'ga jane mogyi wemiayuwamū

¹ Jejui Kristu 'ga jane erowiarāmū Janeruwarete 'ga 'jau janee: “Ene eneresage jee”, 'jau 'ga janee. Jejui Kristu 'ga Janejararetea. 'Ga futat 'Uwarete 'ga mota'wau janee, janetywera mepyyau 'ga upe. A'eramū 'ga Jejui 'ga jane erowiarāmū, 'jau janee: “Ene eneresage jee”, 'jau 'ga janee.

² Werowiarāmū Jejui 'ga 'jau 'Uwarete 'ga upe: “‘Agamū je rerowiaara 'ga”, 'jau 'ga 'ga upe. A'eramū Janeruwarete 'ga a'e are janetywera moia jane wī, ojee jane mujaawamū. A'e are jane jareku'iramū jarejemogyau. “Anure taetu nipo 'ga jane mogyau oje'jawe futat. A'eramū jane jarejemogyau jareku'iramū 'ga ree”, 'jau 'ga ree jarejemogyppyyka.

³ Mama'eaya jarejeupe ijesakaramū miamū jane jareku'iramū etee futat jarejemogyau. Jarejeupe mama'eay jesaukaramū jane jareapyterātānamū jarejemogyau jupe. Mama'eaya jane mojemogyppyygukaa a'jea futat Jarejuwarete 'ga ree.

⁴ Mama'eay upe janeapyterātāa esage Janeruwarete 'ga upe. “Eneresage jee”, 'jau nipo 'ga janee mama'eay upe janeapyterātānamū. Aipo 'ga 'e kwaaw ire jane 'ga 'jawe futat jarejemogy rapesaka jarejemogyau.

⁵ Janeruwarete 'ga oporomutaramū jane ree. U'agesagea 'ga imua janee. 'Ga 'Agesagea jane mueapyou jane ree 'ga poromutar are. A'eramū jane jareku'iramū jarejemogyau 'ga 'jawe jarejemogy rapesaka.

⁶ Jane tee jaretywera nimoira 'uweri jarejewi. Ma'eramū 'ā 'Uwarete 'ga remifutarera 'ara rupi Jejui Kristu 'ga manūi janetywera mepyawamū rakue.

⁷ A'ere na'ga 'jawe rūi jane mū rekoī. Nimanūa'uwēri jane jarejaupe. Mama'e esage apoara 'gā nupe miamū jaremanūwere'emamū. Ojee ipota'wa ma'e 'ga upe amunipo 'ā 'ga amū manūi. A'ere jane nimanūa'uwēri futari jarejaupe jarejee iporomutare'ema 'gā nupe 'jau.

⁸ A'ere Janeruwarete 'ga poromutaramū jane ree nanimenime. Ojee janeporomutare'emamū miamū 'ga poromutaramū jane ree. A'eramū 'ga Jejui Kristu 'ga mua ywy pe amanū ma'eramū janee, jaretywera jane erajemogyramū.

⁹Jejui Kristu 'ga manū are Janeruwarete 'ga 'jau janee: “Pēnesage jee”, 'jau 'ga janee. Jejui Kristu 'ga jane erowiarāmū te 'ga aipo 'jau janee. Jejui 'ga janetywera mepyaupap 'ga upe janee. A'eramū taetu Janeruwarete 'ga jane rerekou tyweru'jape'ema janetywer are.

¹⁰Jarejewi 'ga jaretywera moire'emamū jane jarejemogyau jareporomutare'emamū 'ga ree. A'ere 'ga wa'yra 'ga manū are janetywera moiri jane wi. A'eramū jane 'awamū Jarejuwarete 'ga jekoty'aawamū jarejemogyau. Ota'waramū 'ga janee. A'eramū 'ga 'awamū jane monowe'em mama'eukwaawa rapyaw ipe. Wa'yra 'ga manū re 'ga 'ga moferapa nū. A'eramū nipo Jejui 'ga jane katu'oka oje'jawe. Jane manū re 'ga jane moferapa nū jane rerawau jane mogyau ojepyri.

¹¹A'ere naaipoa tee rūi. Jane upe Janeruwarete 'ga remiapoa jane maku'iu jane mogyau. “Jejui Kristu 'ga Janejararetea. Jejui Kristu 'ga 'ga amut 'ga jukaukaa ojee ae mojekoty'aawamū” 'e are te jane ku'iramū 'ga ree.

Janetywera mepyawamū 'ga manūawet

¹²Janepyppy 'ga, Atāu 'ga ra'ne mama'e tywera apo ppyruga rakue. A'eramū 'ga 'agamū ae motywerukaa. Amanūmū 'ga 'ā rakue. A'eramū jane 'ga 'jawe futat mama'e tywera apou. A'eramū jane najuejue etee jaremanūmū jarejemipofe are.

¹³Ymā te Moisesi 'ga Janeruwarete 'ga je'ega kwasiari ka'aran are rakue. A'ere Moisesi 'ga ka'arana kwasiare'emaue wyy pewara 'gā mama'e tywera apo ajemogyau rakue. A'ere 'gā naeapyoi mama'e tywer are. Nokwaawi 'gā wemiapofera mama'e tywera Jarejuwarete 'ga upe. A'ere Janeruwarete 'ga, Moisesi 'ga upe oje'ega kwasiarukare'emaue, janepyppy 'gā tywera kwasiare'ema oka'aran are rakue.

¹⁴A'etea janepyppy 'gā amanūmū. Atāu 'ga Jarejuwarete 'ga je'ega renupe'ema. “Pe'u kasi ne” 'jawa y'waa 'ga i'wau. A'eramū 'ga amanūmū. Atāu 'ga py'rauwarā 'ga nanarūi agawewi. Na'ui agawewi futat 'gā aipo y'waa. A'etea 'gā mama'e tywera wapo. Moisesi 'ga renunewewara 'gā juejue mama'e tywera apou amanūmū otywer are.

Sā'ā Atāu 'ga juapyrera 'gā mama'e tywera apo Atāu 'ga 'jawe etee futat rakue nū. Nan tee futat Jejui Kristu 'ga rerowiaaramū jane, 'ga 'jawe etee futat mama'e tywera apowe'em.

¹⁵A'ere naAtāu 'ga 'jawe rūi Jejui Kristu 'ga. Atāu 'ga te 'ā Jarejuwarete 'ga je'ega nuenuwi rakue. Ajuapyrera 'gā kwau 'agamū mama'e tywera apo upe rakue. Ku'jywa 'ga je'ega renupe'emawer ipe etee futat ajee 'ga 'ā ae momawukari aetywer are. A'ere Janeruwarete 'ga poromutaramū jane ree nanimenime. A'eramū 'ga mama'e esage apou janee. Niapoi agawewi jane mama'e esagea 'ga upe. Mama'e tywera etee agawewi jane siapo. A'etea 'ga mama'e esage apou janee. Sā'ā ae mama'e monoa ajaupe. Nan 'ga wa'yra 'ga mua janee rakue. Jejui Kristu 'ga 'ga imua ijukaukaa 'au wyy pe janetywera moiawamū futat rakue. Poromū futat Janeruwarete 'ga poroywera 'jawewara janee. A'eramū ojee jane jemogypygamū Jejui 'ga jane mogyau ojepyri nakwaparimū warāu rūi futat. Atāu 'ga 'ā ae kwau ae manū upe rakue. A'ere Jejui 'ga ae mogyaramū 'ga reko janee.

¹⁶Atāu 'ga oje'ega mojerowiare'emaue Janeruwarete 'ga 'jau 'ga upe rakue: “Awamū eremanū etywer are ki 'ei”, 'jau 'ga 'ga upe rakue. A'eramū 'ā 'agamū jarejemote'arukaa jaretywera upe. Najuejue etee 'ā jane 'agamū mama'e tywera apou. A'ere Jejui 'ga manūi jane katu'okawamū janetywera moiawamū jane wi. Majepei'i etee agawewi 'ga. A'etea 'ga jane katu'oka kwaiwete. A'eramū Janeruwarete 'ga 'jau janee: “Jera'yra 'ga perowiat pejejemogyau. A'eramū pēē 'awamū pejejesageramū jee”, 'jau 'ga janee. Niapoi jane mama'ea jarejemuesageawamū. 'Ga te 'ā jane muesage ojeupe, wa'yra 'ga jane erowiarāmū.

¹⁷Majepei tee agawewi Atāu 'ga tywera. A'etea 'ga jane mote'arukaa najuejue etee ipyy. 'Ga ra'ne 'ā amanūmū. A'eramū 'ā jane 'agamū jaremanūmū 'ga 'jawe etee futat. Jejui Kristu 'ga nanē majepei tee nū. A'etea 'ga werowiarāmū jane mogyau ojepyri nakwaparimū warāu rūi, jane mogyau 'wyrirāmū ojepyri. Werowiarāmū Jejui 'ga jane muesageu. Niapoi agawewi jane mama'e esagea 'ga upe. A'etea 'ga jane muesageu werowiarāmū.

¹⁸Atāu 'ga tywer are 'ā Janeruwarete 'ga 'jau wyy pewaramū janee: “Pētywerete jee”, 'jau 'ga janee. Jejui 'ga etee nuapoi mama'e tywera. Mama'e esagea etee 'ga iapou. Wenup katu katu 'ga 'Uwarete 'ga je'ega. Amanūaw ipe miamū 'ga 'Uwarete 'ga je'ega renupa akou rakue. 'Ga manū are Janeruwarete 'ga janetywera moia jane wi, ojepyri jane mogyawamū nakwaparimū warāu rūi futat.

¹⁹Jarejuwarete 'ga je'ega Atāu 'ga enupe'ema rakue. A'eramū jane 'agamū najuejue etee jaretyweramū Jarejuwarete 'ga upe Atāu 'ga ree. Jejui Kristu 'ga 'Uwarete 'ga je'ega renupa katu katu. A'e are jane jarejesageramū Jarejuwarete 'ga upe, Jejui 'ga jane erowiarāmū.

²⁰Wyy pewaramū jane najuejue etee mama'e tywera apou. A'eramū Janeruwarete 'ga oje'ega kwasiarukaa Moisesi 'ga upe rakue. Moisesi 'ga 'eawera kwaaw ire jane jaretywera kwaapa.

“Kuu. Janeruwarete 'ga upe jeremiapofera mama'e tywera futat”, 'jau 'gā amū, otywera kwaaw ire. A'ere 'gā otywera kwaawi agawewi. A'etea 'gā mama'e tywera wapo ojero'waro'wau etee futat ikwaapare'ema 'jawe. A'ere Janeruwarete 'ga jane futara mama'e tywera apyraawi etee futat. A'eramū 'ga janetywera moia jane wi wa'yra 'ga jane erowiarāmū.

²¹ Mama'e tywera apoa ae kwau ae manū upe. A'ere Jejuī 'ga werowiaaramū jane pojekai jane manū awi, jane mogyau ojeypyri nakwaparimū warāu rūi futat. Janeruwarete 'ga Jejuī Kristu 'ga mua ijukaukaa janetywera moiawamū, ojeupe jane muesageawamū. Poromū Jejuī Kristu 'ga Janejararetea.

6

'Ga rerowiaaramū jane pōiri jaretywer awi

¹ Janeruwarete 'ga jane futara mama'e tywera apyraapa. Ma'eramū sipo ajee “Mama'e tywera siapo 'jau”, pe'je pejejaupe? “Mama'e tywera jane iapo re nipo Janeruwarete 'ga jemuaēmi jane ree, mama'e esage apou janee kwaiwete”, 'jau nipo pēē pejejaupe?

² Naani. Aipo pe'je awi. Jejuī 'ga rerowiaaramū jane pōiri futari jaretywer awi. Sā'ā ae amanū ma'eferamū mama'e tywera apou'jawe'ema. Nan tee futat ae Jejuī 'ga rerowiaaramū mama'e tywera naruapou'jawi. Ma'eramū sipo ajee pēē amanū ma'e 'jawe pejejomogy re mama'e tywera peapou'jap nū?

³⁻⁵ Ypeywar are u'amaw ipe futat 'ga 'ā amanūmū jane wi janetywera moiawamū rakue. A'eramū jane 'ga rerowiarāmū jarepoia futat mama'e tywera apo awi jarejemujaa Jejuī 'ga ree. Amanū ma'e 'jawe jane mama'e tywera apowe'em.

Jejuī 'ga ree jarejemujar ire jane jarejepymāukaa 'y pe, 'ga ree jarejemujara resaukaa 'gā nupe. 'Ga manū 'jawe jane pymā. 'Ga ferapawera 'jawe etee futat jane jarewua 'y awi nū. Jarejepymānamū jane 'jau: “Jejuī 'ga je arowiat. 'Awamū je rekoī 'ga 'jawe mama'e tywera taapo eme 'jau”, 'jau jane jarejepymāu. Jejuī 'ga manū re 'ā 'gā 'ga monou inuga ita kwara pype. “Amanū futat ra'e”, 'jau 'gā 'ga upe, 'ga monou inuga. A'ere Janeruwarete 'ga opājē mū 'ga moferawi 'ga muēma ita kwar awi nū. A'eramū jane 'y pe jarejepymī re 'jau: “Awamū je pōiri futari mama'e tywera apo awi”, 'jau jane. 'Ga ferawa 'jawerimū 'y awi jareēm ire jarejomogyau ipyau 'jawe Jarejuwarete 'ga pājē mū. A'eramū jane 'ga pājē mū mama'e esage etee iapou.

⁶ Jejuī 'ga rerowiare'ema 'gā jara mama'eukwaawa 'wyrriara futat. Mama'e tywera apo momoirukare'ema wemiyauwa 'gā nui. A'ere Jejuī 'ga manūi mama'eukwaawa 'wyrriara pājē mateepapa rakue. A'eramū 'ga werowiarāmū jane mū'jāu mama'eukwaawa 'wyrriara remiyauwa 'gā nui. Werowiarāmū Jejuī 'ga jane mogyau wemiyauwamū. A'eramū jane 'ga je'ega etee erowiaa. Jare'wyrriar ymanera je'ega renuwu'jape'ema. Mama'e tywera apo awi jarejateeramū Jejuī 'ga pājē mū.

⁷ Nuapoi futari ae mama'e tywera amanū re. A'eramū jane amanū ma'e 'jawe futat mama'e tywer are jareparuapowere'emamū.

⁸ Jejuī Kristu 'ga manū are jane pōiri tāmējē mama'e tywera apo awi. A'eramū jane 'ga feraw ire jarejomogyau 'ga 'jawe futat namutamutat.

⁹ “Jejuī Kristu 'ga amanū rakue. 'Ga manū re 'ga ruwa 'ga 'ga moferapa nū. 'Awamū 'ga namanū'jawi” 'ea jane ikwaapa. Oferaw ire 'ga amanū'jape'ema futat.

¹⁰ Janetywer are Jejuī 'ga amanūmū janetywera moiawamū jane wi. Namanū'jau'jawi 'ga. Majepēi tee futat 'ga manūi. 'Ga manū re 'ga ruwa 'ga 'ga moferapa nū. Ma'eramū 'ā 'ga rekoī mama'e apou 'Uwarete 'ga remifutar imū etee. 'Uwarete 'ga ree 'ga jemujari.

¹¹ A'eramū jane aipo are jarejea'aramū, jane 'jau: “Jejuī Kristu 'ga amanū jetywer are”, 'jau jane jarejea'aramū ee. A'eramū jane 'awamū jarepoia mama'e tywera apo awi. Jejuī 'ga 'jawe mama'ea siapo Jarejuwarete 'ga remifutar imū 'jau. Jejuī 'ga ree jarejemujaa. A'eramū ki jane mama'e apou 'ga 'jawe futat.

¹² Jejuī Kristu 'ga rerowiare'emawe pētywera pē nerekou. A'ere Jejuī 'ga werowiarāmū pētywera moia pē nui. A'eramū ki 'awamū pēē pejetywera upe pejerekoukare'ema. Pem'yi kasi pejejea mama'e tywera apo are ne. Mama'e tywera apo are pejejea m'yi re nipo pēē mama'e tywera apou, pejejea'awer imū etee futat.

¹³ Pejejemifutar imū kasi mama'ea peapo ne. Jarejuwarete 'ga remifutar imū etee ki mama'e esagea peapo. Pētywera mepy re Jejuī 'ga pē muri 'Uwarete 'ga remiyauwamū. A'eramū ki pēē pejejekatu'oka 'ga upe, pejeporowykyau 'ga upe. “Eneremiyauwamū 'ā je rekoī”, 'jau ki pēē 'ga upe.

¹⁴ NaMoisesi 'ga je'egeera renuw are rūi pēnesage Jarejuwarete 'ga upe. Jejuī 'ga pēē erowiarāmū te Janeruwarete 'ga pētywera moiri pē nui. Aipoa 'ga iapo re pēē pejejesageramū 'ga upe. A'eramū ki pēē mama'e tywera apowe'em.

Janeruwarete 'ga remiayup

¹⁵ NaMoisesi 'ga je'eger imū rūi jane mama'e apou 'awamū. Janeruwarete 'ga te 'ā mama'e esagea wapo janee, jane wi janetywera moiramū. A'eramū Janeruwarete 'ga wesageramū janee, jane rerekou. A'eramū pēē mama'e tywera apou 'jape'ema.

¹⁶ Mama'eukwaawa 'wyrriara je'ega renupara 'gā mama'eukwaawa 'wyrriara remiayuwa futat. O'wyrriara reewe futat emiayuwā 'gā awau wapyaw ipe. A'ere Jejui 'ga, 'Uwarete 'ga je'ega pēē enuw ire pē mojekoty'ari 'Uwarete 'ga ree, pē mogyau 'Uwarete 'ga remiayuwamū futat. A'eramū 'ga 'jau pē nupe: "Pēē 'ā pēnesage jee", 'jau 'ga.

¹⁷ Ymā te pēē mama'eukwaawa 'wyrriara remiayuwamū pejemogy rakue. A'ere 'ā 'awamū pēē Jarejuwarete 'ga ree pejemu'eawera peenup katu katu pejejemogyau. A'eramū pēē 'jau: "Mama'e esagea siapo Jarejuwarete 'ga je'eg imū", 'jau pēē pejejemogyau. A'eramū je Ku'jywa 'ga muorypa pē nee. "Ene 'ā eneresage futat. Ene 'ā mama'e esage apo futarukaa 'gā nupe", 'jau je 'ga upe 'ga muorypa pē nee.

¹⁸ Janeruwarete 'ga mama'e tywera apo awi pē momoirukaa. Nepeapoi au'jeteramū mama'e tywera. 'Awamū 'ā pēē mama'e esage apoaramū Jarejuwarete 'ga upe. 'Ga remiayuwā futat pēē.

¹⁹ A'ere nepekwaawi katu katui we. A'eramū je imome'wau katu pē nupe. Ymā te 'ā pēē pejejea m̄yina mama'e tywera apo are etee rakue. A'eramū 'ā pēē mama'e tywera apou pejejemogyau rakue. A'eramū pēē au'je mama'e tywera apo re. 'Awamū pēnea'at mama'e esage apo are etee. Jarejuwarete 'ga remiayuwā pēē 'awamū. A'eramū ki pēē pejejemogyau esage 'ga upe.

²⁰ Mama'eukwaawa 'wyrriara remiayuwamū pejejemogyau pēē Jarejuwarete 'ga remifutar imū mama'ea nepeapoi rakue.

²¹ Mama'e tywera etee pēē iapou rakue. A'ere ki 'awamū pejejenosī pejejemiapofer are. Ma'ja sipo mama'e tywera apo repya? Mama'e esagea sipo mama'e tywera apo repya? Naani. Mama'e tywera apoara 'gā Janeruwarete 'ga omono mukuu ojewi. Aipoa 'gā nemiapofera repya.

²² A'ere 'awamū pēē Jarejuwarete 'ga remiayuwā. Pē nui 'ga pētywera moiri, pē muesageu ojeupe. Aipoa esage futat pē nupe. Anure nipo 'ga pē nerawau ojepyri, pē mogyau nakwaparimū warāu rūi futat.

²³ Anure nipo Janeruwarete 'ga jane mepyau janeremiapofer are. Mama'e tywera apoara 'gā 'ga imonou muku ojewi. Mama'eukwaawa rapyau ipe 'ga 'gā monou. Aipoa 'gā nemiapoferarū'e'ema repya. A'ere Jejui Kristu 'ga rerowiaaramū janee Janeruwarete 'ga mama'e esage apou. Jejui Kristu 'ga Janejararetea. 'Ga ree jarejemujar ire Janeruwarete 'ga ojoporoywera 'jawe imua janee. Wa'yra 'ga jane erowiarāmū 'ga jane mogyau ojepyri nakwaparimū warāu rūi futat nipo.

7

Amanū re ae mama'ea nuapou'jawi

¹ Kununimet. Pēē jerewirera 'jawe. Kūjāmeramū pēē jerenyra 'jawe 'jau. A'eramū pēē pejejeapyoramū pejejeupe jeremimome'u are. Jarekouwe jane mama'e apoi jarejemiapofer imū. Jaremanū re jane niapou'jawi jarejemiapofera nū.

² Sā'ā kūjāa. Omenar ire kūjāa omena nuetyga'uweri. Omena manū re tāmējē nipo ēē kūima'e 'ga amū rerekou. Omena manū re ēē akou ojeteewara 'jawe nū. A'eramū ēē omenararūmū.

³ A'ere omena manū'e'emaue kūima'e mū rerekoa nia'wryri ēē upe. Mama'e tywera ēē wapo. Kūjāmene'ema 'jawe ēē rekoi. Omena manū re amū rerekoa te esage futat.

⁴ Nan tee pēē. Ymā te pēē mama'e apou Moisesi 'ga remikwasiarer imū etee futat rakue. A'ere Jejui Kristu 'ga manūnamū 'ga ojee ojemujat ma'eramū jane mū'jāu Moisesi 'ga remikwasiarer imū mama'e apoara 'gā nui. Ymāwarera mama'e awi jane jarepoiapap. 'Awamū jane mama'e apou Jejui 'ga remifutar imū, oferap ma'e 'ga remifutar imū. A'eramū jane mama'e esage etee iapou Jarejuwarete 'ga upe. Sā'ā kūjā omenaru'jaw ire ēē omen yau je'ega etee enuwa. Omenera je'ega ēē enuwu'jape'ema. Nan tee futat pēē peje'wyrriar ymanera je'ega nepeenuw'jawi. Ymā te pēē mama'eukwaawa 'wyrriara remiayuwā rakue. A'ere Jejui 'ga werowiarāmū pē mū'ēi mama'eukwaawa 'wyrriara remiayuw awi pē mogyau wemiayuwamū futat. A'eramū pēē 'awamū peje'wyrriar yau je'ega etee enupa nū.

⁵ Ymā jane mama'e apoi jarejemifutar imū etee futat rakue. A'eramū 'ā Moisesi 'ga 'jau agawewi janee rakue: "Mama'e tywera kasi peapo ne", 'jau agawewi 'ga janee rakue. A'ere jane aipo 'ga 'eawera kwaaw ire miamū jane jero'wuro'wui etee mama'e tywera

apou. Mama'e tywera apo awi jarejeatee'em ire nipo jane oi mukuū Jarejuwarete 'ga wi jaremanū re.

⁶ A'ere 'awamū nanarūi. Janeruwarete 'ga jane mueateeukat mama'e ymanera apo awi. Jejuī 'ga rerowiarāmū jane jemu'jagi amanū ma'e 'jawewaramū mama'e ymanera apo awi. Ymā te aipo janeremiapofera jane rerekoi rakue. Jarejemifutar imū etee jane mama'e apou Jarejuwarete 'ga upe rakue. A'ere Jejuī 'ga 'awamū ojee jane jemu jar ire 'ga jane rerekoi. 'Uwarete 'ga 'Agesagea 'ga imua janee. A'eramū jane mama'e apou 'ga remifutar imū etee futat jarejemogyau.

⁷ Ma'ja sa'e sipo ajee jane aipo are? Nia'wryi tāmējē Moisesi 'ga je'egeera, sa'e sipo jane? Naani. 'Ga remikwasiarera ka'arana mogyta re te jane Jarejuwarete 'ga remifutara kwaawi. "Pejokaraemā are pejejea m'šina nia'wryi Jarejuwarete 'ga upe", 'jau 'ā Moisesi 'ga ikwasiaa rakue. "Tekotee 'ga karaemā futara ia'wrye'ema Jarejuwarete 'ga upe", 'jau 'ā Moisesi 'ga ikwasiaa rakue. A'eramū je Moisesi 'ga je'egeera kwaaw ire te je tetywera kwaapa. 'Ga je'egeera kwaawe'em ire amunipo 'ā je nanē "ojokaraemā are wea m'šinara 'gā ia'wrye'ema Jarejuwarete 'ga upe" 'e kwaape'ema futat tekou.

⁸ A'ere je Moisesi 'ga remikwasiarer are te je jemu'ei ai'i numiamū. "Moisesi 'ga remikwasiarera renuwa nipo je muesage Jarejuwarete 'ga upe", 'jau je tejeupe numiamū. A'ere je naenupawa'uweri 'ga je'egeera. Tejeatee'emamū futat je 'gā karaemā futar awi. Moisesi 'ga je'egeera kwaaw ire miamū futat je 'gā karaemā futaararete futat je rekoī ikue. Moisesi 'ga je'ega kwaape'ema je tetywera kwaape'ema. A'ere je 'ga remikwasiarera mogyta re tetywera kwaawi.

⁹ A'e pe je 'ga remikwasiarera mogytae'emawe "Je ako esage je", 'jau futatee je jepi. A'ere je 'ga je'egeera kwaaw ire je tetywera kwaawi. "Nakoa'wryi nipo je jepi", 'jau je tejeupe.

¹⁰ Tetywera kwaaw ire je 'jau tejeupe: "Jarejuwarete 'ga je'ega Moisesi 'ga ikwasiaa rakue. A'eramū je Moisesi 'ga remikwasiarer imū mama'e apowe'em ire je Jarejuwarete 'ga je'ega renupe'ema. Oje'ega renupare'emamū nā'ā Janeruwarete 'ga ae monou muku ojewi ae manū re re'ā. 'Awamū nanē 'ga ojejukawe'em je ree nū", 'jau je tejeupe tetywer are tejeapyoramū te'šina. "Oje'ega renupara 'gā etee nā'ā 'ga omogy ojeypyri nakwaparimū rūi futat re'ā", 'jau je tejeupe te'šina. A'ere je naenupawa'uweri 'ga je'ega.

¹¹ A'ere jeku'iteeramū tee tekou tetywer are rakue. "Aenupap katu katu sipo je 'ga je'ega pa", 'jau je tejeupe numiamū. A'ere naani rakue. "Moisesi 'ga remikwasiarera renuw ire nipo je oi Jarejuwarete 'ga pyri re'ā", 'jau je tejeupe. A'ere jeku'iteeramū ee rakue. Naenuwi futari je 'ga je'ega rakue. A'eramū je 'jau tejeupe: "Najea'wryi futari pa je tekou Jarejuwarete 'ga upe ra'e. A'eramū nipo je mukuū futat tewau 'ga wi", 'jau je te'šina.

¹² Esage futat Moisesi 'ga remikwasiarera. Jarejuwarete 'ga je'ega wejue 'ga okwasiat ka'aran are inuga rakue. A'eramū wesageramū futat 'ga remikwasiarera ae upe.

¹³ 'Ga remikwasiarera resagea sipo je mogo muku Jarejuwarete 'ga wi? Naani. Jetywera tee je mogoukat muku Jarejuwarete 'ga wi. "Mama'e tywera kasi peapo ne", 'jau 'ga ikwasiarukaa Moisesi 'ga upe rakue. Aipoa 'ga 'eawera esage futat. A'ere jetywera je rerekoi. A'eramū je mama'e tywera apou ra'e jepi. Esage futat Janeruwarete 'ga je'ega. A'ere jetywera te nuenuwukari 'ga je'ega jee ra'e jepi. A'ere je 'awamū jereapyoramū mama'e tywera apower are. A'eramū je 'ga je'ega renupe'ema ra'e jepi. A'ere najeremiapofera etee rūi ia'wrye'ema. Jeretea we futat wa'wrye'emamū. 'Ga je'ega kwaaw ire te jane jaretywera kwaap katui.

'Ga pājē mū ae mama'e tywera nuapoi

¹⁴ Moisesi 'ga remikwasiarera Janeruwarete 'ga je'ega a'jea futat rakue. A'ere je namaira rūi. Kūima'e teea te je. A'eramū jetywera je rerekou. Tejemifutar imū etee mama'e apou.

¹⁵ Najereapyoi je tejemiapoarūe'em are. "Mama'e esagea etee taapo 'jau", 'jau je numiamū. A'e reewi je mama'e tywera etee iapoi nū. Mama'e tywera apo are teparupowere'emamū agawewi. A'etea je mama'e tywera apou etee nū.

¹⁶ Aipo apo re je 'jau: "A'jea futat Janeruwarete 'ga je'ega. Nepēa'wryi pēē, 'ga 'ea a'jea futat", 'jau je tejeupe tekou.

¹⁷ Nafutari je mama'e tywera apoa. A'ere jetywera je rerekoi. A'eramū jetywera mama'e tywera apoukaa jee.

¹⁸ A'eramū je 'jau tejeupe: "Nitywi futari mama'e esagea je pype", 'jau je tekou. Mama'e esage apoa je ifutaa agawewi. A'etea je naapoi mama'e esagea.

¹⁹ Mama'e esage apoa je ifutaa. A'ere je naapoi tejemifutara. Mama'e tywera apoa je ifutare'ema agawewi. A'etea je tejemifutare'ema apou.

²⁰ A'ere je natejemifutar imū rūi mama'e tywera apoi. Jetywera te iapoukaa jee.

²¹ Ekoay je rekoa. Mama'e esage apoa je afutat agawewi. A'etea je mama'e tywera etee aapo.

²² “Janeruwarete 'ga je'ega renuwa esage futat. 'Awamū pa je 'ga je'ega etee enuwi kwy”, 'jau je tejeupe, tejekōējamū ee numiamū.

²³ A'ere je a'eramū miamū naenupawi 'ga je'ega. Ifaripyra 'jawe je tekou tejemifutara apowe'em. Sā'ā ipofaripyrrera mama'e apoe'ema wemifutar imū. Nan te je rekoī. Jetywera je rerekou. A'eramū je tejemifutara apowe'em. Mama'e tywera apo awi tejeatee'emamū.

²⁴ 'Awamū je'arasigamū tekou. “Aw'yi ajee je mueatee mama'e tywera apo awi 'ū?” 'jau je tejeupe.

²⁵ A'ere Janeruwarete 'ga te je mueateekari Jejuī Kristu 'ga upe. A'eramū je mama'e tywer awi tejeateeramū. A'eramū je Jarejuwarete 'ga muorypa ee.

Tejeteē je Jarejuwarete 'ga je'ega renupe'ema tekou. “'Ga je'ega renuwa tareko esage tejee”, 'jau futat je numiamū. A'ere je naapoa'uweri tejee. Opājēa 'ga ae upe imure'emamū ae nuapoi futari mama'e esagea. 'Ga pājē mū te ae mama'e esage apoi.

8

'Ga 'Agesagea jane muea'aa 'ga remifutar are

¹ A'ere ā Janeruwarete 'ga, Jejuī Kristu 'ga ree jane jemujar ire, jane kwawe'em janetywer are, jane monowe'em muku ojewi. Mama'eukwaawa rapyaw ipe 'ga ae monowe'em.

² Jejuī Kristu 'ga ree jane jemogyppygamū Janeruwarete 'ga 'Agesagea jane muesageu. 'Ga 'Agesage pājē mū jane mama'e tywera apowe'em. 'Awamū 'ga 'Agesagea jane rerekou jane katu'oka. Janetywera jane rerekou'jape'ema. A'eramū jane jarewawe'em mama'eukwaawa rapyaw ipe.

³ Ymā te Moisesi 'ga 'i rakue: “Mama'e esagea etee peapo”, 'jau 'ga ikwasiaa rakue. Esage futat 'ga je'egera. A'ere janetywera 'ga je'egera nuenuwukari janee. 'Ga je'egera renupare'ema 'jawe etee futat jane mogyaukaa rakue. Jarejeteē jane nienuwa'uweri 'ga je'ega. A'eramū Janeruwarete 'ga 'jau ojeupe rakue: “Ojeteē 'gā nuenuwa'uweri jeje'ega. Nojekatu'oga'uweri 'gā ojeteē”, 'jau 'ga ojeupe rakue. A'eramū 'ga 'ā 'agamū wa'ya 'ga mua wyy pe rakue. Jane 'jawe futat 'ga 'ua kunumīnamū. Jane 'jawe futat 'ga akou kūima'eramū. A'ere 'ga nuapoi mama'e tywera. Aerefeteē ate mama'e tywera wapo. A'eramū 'ga amanūmū janetywera mepyau. Janeruwarete 'ga Jejuī 'ga jukaukaa aetywer are. A'eramū 'awamū Jejuī 'ga werowiarāmū janetywera moia jane wi.

⁴ Ymā te Janeruwarete 'ga 'i rakue: “Teje'ega renupare'ema 'gā je amomap, 'gā monou mama'eukwaawa rapyaw ipe”, 'jau 'ga rakue. A'ere Jejuī 'ga manū janetywera moiawamū. Janetywera moir ire 'ga opājē mua janee. A'eramū jane 'awamū mama'e esage apoarūmū 'ga pājē mū, 'ga ree jarejemogyppygi. 'Awamū jane 'ga pājē mū Jarejuwarete 'ga je'ega renuwi jarejemogyau. 'Ga 'Agesagea jane mu'akwaapa jane rerekou. A'eramū jane 'awamū mama'e esage apoarūmū 'ga pājē mū. Jarejemifutar imū jane niapou'jawi mama'ea.

⁵ 'Ga 'Agesage rerekware'ema 'gā wemifutar imū etee futat mama'e apo are wea'aramū. A'ere Janeruwarete 'ga 'Agesage rerekwaramū jane jarejea'aramū 'ga 'Agesage remifutar are etee futat.

⁶ Wemifutar are etee ea'at ma'e 'gā awau mama'eukwaawa rapyaw ipe. A'ere Jarejuwarete 'ga 'Agesage remifutar are ea'at ma'e 'gā py'ata'waramū etee futat ajemogyau. Anure nipo aipo 'gā awau ajemogyau Jarejuwarete 'ga pyri nakwaparimū ete rūi futat.

⁷ Wemifutar are etee ea'at ma'e 'gā oporomutare'emamū Jarejuwarete 'ga ree. Nuenuwi futari 'gā 'ga je'ega. Niporenuwiweri futari 'gā 'ga je'eg are.

⁸ Wemifutar imū etee mama'e apoara 'gā nomuorywi Jarejuwarete 'ga.

⁹ A'ere nanarūi ae Jarejuwarete 'ga 'Agesage rerekwaramū. Mama'e esagea etee te ae wapo 'ga remifutar imū. Jarejuwarete 'ga 'Agesage rerekware'ema 'gā naKristu 'ga remiayuwa rūi futat.

¹⁰ Janepy 'gā 'ā nuenuwi Jarejuwarete 'ga je'ega rakue. A'eramū jane 'agamū jarepapa. Jarejuwarete 'ga 'Agesage rerekwaramū miamū futat jaremanūmū. A'ere jane ferawi etee jarewau Jarejuwarete 'ga pyri jarejemogyau nakwaparimū warāu rūi futat. Jejuī Kristu 'ga ree jane jemogyppygamū Janeruwarete 'ga 'jau janee: “Jejuī 'ga ree pejemogyppyk. A'eramū pēē pejejesageramū jee”, 'jau 'ga janee Jejuī 'ga ree jane jemogyppygamū.

¹¹ Janeruwarete 'ga 'Agesagea Jejuī 'ga moferapa 'ga manū re rakue. A'eramū Janeruwarete 'ga U'agesage rerekwaramū nanē janeretefera moferapa jane manū re nū. Jane moferawukaa U'agesage upe.

¹² Kunumīmet, kūjāmet. Janeruwarete 'ga 'Agesagea jane rerekou. A'eramū ki jane a'eramū mama'e apowe'em jarejemogyau jarejemifutar imū ne. Mama'ea siapo 'ga pājē mū etee futat.

¹³ Pejejemifutar imū mama'e apo re peo mama'eukwaawa rapyaw ipe. A'ere Jarejuwarete 'ga, U'agesage pājē mū mama'e tywera apo awi pepori ire, pē mogyi ojeypyri nakwaparimū warāu rūi futat. Nioi jane 'ga rerowiaramū mama'eukwaawa rapyaw ipe.

¹⁴ Jarejuwarete 'ga 'Agesage je'ega renupara 'gā Jarejuwarete 'ga ra'ya futat.

¹⁵ Ma'eramū sipo Janeruwarete 'ga U'agesage mua janee? Ojeupe jane moporowykukaawamū? Naani. Jane mogyjawamū? Naani. Wa'yramū jane mogyawamū te 'ga U'agesage muri janee. A'eramū 'ga 'Agesagea "Kiapi'ni" jane mu'eukaa 'ga upe.

¹⁶ Jejui 'ga jane erowiaramū Janeruwarete 'ga jane mogyau wa'yramū. A'eramū 'ga 'Agesagea "Kiapi'ni" jane mu'eukaa Jarejuwarete 'ga upe. 'Ga 'Agesagea nanē 'jau janee: "Ene Ku'jywa 'ga ra'ya", 'jau 'ga 'Agesagea janee.

¹⁷ Wa'ya 'ga upe Janeruwarete 'ga mama'e esage monou. A'eramū 'ga janee nanē mama'e esage mua nū, wa'yrate 'ga reewe futat, Kristu 'ga reewe futat nū. Wyw pe 'ua 'ā Kristu 'ga ruagamū wereko tywera upe rakue. 'Ga 'jawe ki janeruag jarejereko tywera upe. 'Ga 'jawe jane jemogy re nipo Janeruwarete 'ga jane moferapa nanē 'ga 'jawerimū etee futat nū. A'eramū tee 'ga jane monoi jane mogyau 'wyriaramū Jejui 'ga pyri.

Anure nipo 'ga mama'e esage muri janee

¹⁸ Awamū mama'eay jesaukari janee. A'ere nipo anure jane janerea'aru'jawi mama'eay are. Anure nipo Janeruwarete 'ga mama'e esage muri janee, mama'eay apyrapa. A'eramū jane jarejea'aru'jawe'emamū mama'eay are.

¹⁹ Anure nipo Janeruwarete 'ga jane resaukaa wemiapofera upe. "Agamū jera'ya 'gā futat", 'jau nipo 'ga jane resaukaa 'gā nupe. 'Ga remiapofera juejue futat 'ga ra'ya resaukaawa rapesaka 'upa.

²⁰ Ymā te 'ā Janeruwarete 'ga remiapofera jemote'ari rakue. Naite'at tee rūi 'ā rakue. Atāu 'ga oje'ega renuwe'emamū te Janeruwarete 'ga wemiapofera mote'ari rakue.

²¹ A'ere nipo anure Janeruwarete 'ga imomyau nū. Wa'yramū jane resaukaawa 'ara rupi futat nipo 'ga mama'e momyau nū. A'eramū futat nipo 'ga mama'e tywera mateepapa.

²² Sā'ā kūjā wa'yray upe aema wa'ya 'are'emamū. Nan tee futat Janeruwarete 'ga remiapofera waemamū ajemogyau ojekatu'okawa rapesaka.

²³ Na'ga remiapofera etee rūi waemamū ajemogyau ojekatu'okawa rapesaka. 'Ga 'Agesage rerekwaramū nanē jane jarejaemamū nū, 'au jane jemogyramū 'ā. Janeruwarete 'ga U'agesage mua janee ra'ne. A'ere nipo 'ga anure mama'e esage muri janee kwaiwete. Wa'yramū jane resaukaawamū 'ga janerete momyau Jejui 'ga 'jawe. A'eramū jane jarekaruare'emamū futat nipo, jareymanē'emamū, jaremanū'jape'ema nanē nū. Jejui 'ga 'jawe futat jane reki.

²⁴⁻²⁵ Ojee jane jemogyppygamū Janeruwarete 'ga jane muesageu ojeupe. A'e are jane 'i: "Anure nipo 'ga janerete momyau", 'jau jane. A'eramū jane jarejete momyau rapesaka jarejemogyau. 'Au we 'ga jarejete momyau re amunipo 'ā jane niapesagi jarejemogyau. A'ere 'ga nomomyaui we. A'e are jane iapesagi jarejemogyau. A'eramū ki jane jareapyterātānamū mama'eay upe.

²⁶ 'Ga 'Agesagea te jane poat. Nanane etee rūi sajemogy. 'Ga 'Agesagea te oporogyta Ku'jywa 'ga upe janee. Jane tee nikwaawa'uweri Ku'jywa 'ga upe jareporogytaa jarejee. A'eramū 'ga 'Agesagea te jane poaa, oporogytau 'ga upe janee. Nikwaawi jane 'ga 'Agesage je'ega. Naaje'ega 'jawe rūi. Aefaema 'jawe tete 'ga 'Agesage je'ega.

²⁷ Janeruwarete 'ga janerea'awa kwaapa. Janeremifutara nanē 'ga ikwaapa nū. A'eramū 'ga U'agesage je'ega nanē ikwaapa nū, ojeupe jane ree ije'egamū. 'Ga remifutar imū etee futat 'ga 'Agesagea oporogytau 'ga upe jane ree.

²⁸ Jarejuwarete 'ga ree janeporomutaramū jarejemogyau. 'Ga futat 'ā jane mū'jāu jane mogyau wemiayuwamū rakue. A'eramū 'ga, janee mama'eay mū jesaukaramū, mama'e esage apou ee nū.

²⁹ Ymā we te Janeruwarete 'ga jane pyrūmū ojee rakue. "Mīmera 'gā je amogy teja'yramū. Teja'yrate 'ga 'jawe je 'gā mogyi. A'eramū Jera'yrate 'ga 'gā neki'yramū akou. Kwaiwete jera'yrate 'ga rewirera 'gā, 'ga renyra 'gā 'jau", 'jau 'ga ojeupe rakue.

³⁰ A'eramū Janeruwarete 'ga wemimū'emeramū jane mogyau wemiayuwamū. A'eramū 'ga 'jau janee: "Pēnesage jee", 'jau 'ga janee. "Teja'yrate 'ga 'jawe je pē mogyi", 'jau 'ga janee. A'eramū 'ga jane mogyau 'wyriaramū ojeypyri nakwaparimū ete rūi futat nipo.

Jane ree 'ga poromutat

³¹ Ma'eramū 'ā jane nijemuaēmi mama'e upe: Janeruwarete 'ga 'ā jane rerekou. Jane retyk sipo 'ga amū? Naani. Janeruwarete 'ga jane pojeka re nitywa'uweri 'ga wi jane pojekaara mū. Ojejuka esage 'ga jane ree. Opājēa 'ga amut janee.

³² Esage Janeruwarete 'ga janee. Peesak 'ā 'ga rakate'eme'ema janee. Wa'yrarete 'ga miamū 'ā 'ga imua ijukaukaa janetywera mepyawamū rakue. A'eramū nipo 'ga mama'e esagea taetu imuri janee wakate'eme'emamū.

³³ Awyja sipo Janeruwarete 'ga remimū'ēmeramū jane ago'wau 'ga upe? Naani. Nitywi 'ga amū. Janeruwarete 'ga 'ā 'jau janee: "Esage 'gā jee", 'jau 'ga jane upe.

³⁴ Jejui Kristu 'ga amanūmū janetywera mepyau 'Uwarete 'ga upe. 'Ga manū re 'ga Ruwarete 'ga 'ga moferapa nū. Oferaw ire 'ga awau ojeupia 'Uwarete 'ga pyri. 'Uwarete 'ga jakwatawa katy 'ga reni, oporogytau 'Uwarete 'ga upe jane ree. A'eramū 'Nepēa'wryi pēē" 'jara otywe'emamū.

³⁵ Kristu 'ga 'ā iporomutat nanimenime jane ree. Awyja sipo 'ga momoirukat jane wi? Naani. Nitywi 'ga amū. Janee mama'eay jesaukaramū 'ga oporomutaramū jane ree. Werowiare'ema 'gā amū jane rereko tyweramū 'ga oporomutaramū jane ree. Ty'ara jane erekoramū 'ga oporomutaramū jane ree. Jarepiteea jane erajemogyramū 'ga oporomutaramū jane ree. Jane ree 'gā amū afuwet ojere'emamū 'ga oporomutaramū jane ree. Nitywi futari 'ga rerowiar ire mama'e mū jane kwaukaara 'ga upe. Jane manūnamū 'ga oporomutaramū nanimenime jane ree akou.

³⁶ Ymā te Davi 'ga ka'arana kwasiaa ee inuga rakue:

"Eneremiayuwa 'ā ore, ki Ku'jyp.

A'eramū ene ree iporomutare'ema 'gā afuweramū ore ree au'jeteramū.

Karupa'mī jukapyrama 'jawe 'gā afuweramū ore ree",

'jau Davi 'ga ikwasiaa inuga rakue. A'eramū nipo Janeruwarete 'ga ree iporomutare'ema 'gā aipo 'ga 'eawer imū etee futat jane ree nanē oporomutare'emamū.

³⁷ Aipoa sipo Janejararete 'ga momoirukaa jane wi? Naani. Iporomutat 'ga nanimenime jane ree jane jemogyramū. A'eramū 'ga jane muapyterātāu mama'eay upe. A'eramū mama'eaya jane maku'ipawukare'ema.

³⁸ Nitywi futari 'ga amū jane wi Janeruwarete 'ga momoirukaara. Iporomutat 'ga nanimenime jane ree jane jemogyramū. Jane manūnamū miamū futat 'ga oporomutaramū jane ree. Jane reko are taetu 'ga oporomutaramū jane ree. Noko'i futari mama'eukwaawa mū jane wi Janeruwarete 'ga momoirukaaramū. 'Awauwe ojesaukat ma'e, anure ojesaukat ma'e. Mīmera nomomoirukaru'uwari Janeruwarete 'ga jane wi.

³⁹ Ywag ipe ako ma'e, wry 'wyr ipe ako ma'e. Mīmera miamū nomomoirukari Janeruwarete 'ga jane wi. Nitywi futari jane wi Janeruwarete 'ga momoirukaara. Naeateei futari 'ga jane wi. Jejui Kristu 'ga ree jane jarejemogyppyka. 'Ga Janejararetea. A'eramū Janeruwarete 'ga oporomutaramū jane ree wojere'emamū futat.

9

Janeruwarete 'ga remiayup

¹ 'Awamū je tepytuna, judeu 'gā mome'ui pē nupe. Kristu 'ga remiayuwa wejue je. A'eramū je te'me'emamū tekou. A'jea futat je 'i 'gā nee. Janeruwarete 'ga 'Agesagea je rerekou. A'eramū 'ga 'Agesagea je mu'akwaapa mama'e a'je are. A'eramū je mama'e a'jea etee imome'wau.

² Jepyntuna 'gā, judeu 'gā je mu'arasig ojee. Nuerowiari 'gā Jejui 'ga. A'eramū a'ea je mu'arasimape'ema je mogou 'gā nee.

³ Afutat je 'gā Jejui 'ga rerowiaara numiamū. Joporopoariwet je 'gā nee Jejui 'ga rerowiar are numiamū. 'Gā nupe 'ga je'ega renuwukar ire amunipo 'ā je "Je rereko tywer ape 'gā nee", je 'i Ku'jywa 'ga upe. A'ere 'gā 'ā aipoa miamū nuerowiari. Ojemogyppyke'ema Jejui 'ga ree.

⁴ Ymā te 'ā Janeruwarete 'ga Israeu juapyreramū oreypy 'gā mū'ēi imogyau wemiayuamū rakue. "Pēē jera'yra 'awamū", 'jau 'ga 'gā nupe rakue. 'Gā pype etee futat 'ga akou rakue. 'Gā nupe etee futat 'ā Janeruwarete 'ga 'jau rakue: "Tejerowiar ire je mama'e esagea monoi pē nupe", 'jau 'ga 'gā nupe rakue. 'Gā nupe ppy ppy ra'ne futat 'ga oje'ega monoi ikwasiarukaa Moisesi 'ga upe rakue. 'Gā etee 'ga imu'akwaapa omuoryw are rakue. A'eramū 'gā 'ga muorypa a'jea futat rakue. 'Gā nupe etee 'ga 'jau'jau'japa: "Mama'e esagea tomono pē nupe 'jau", 'jau 'ga 'gā nupe rakue.

⁵ Judeu ppy ppy 'ga 'ā Abraão 'ga rakue. Isaki, Jako.* Mīmera 'gā judeu ppyfera 'gā. 'Gā juapyreramū ore judeua. Israeu 'ga juapyrera futat Jejui Kristu 'ga akou 'awa wry pe 'ur ire rakue. Janeruwarete 'ga 'ā wemiapoferamū ae 'wryriararetea agawewi. A'etea 'ga Israeu 'ga juapyreramū tāmējē ore mū'jāu wemiayuwareteramū rakue. A'eramū amunipo 'ā ore 'ga muorypa aruojere'emamū ee.

* 9:5 Mukūi Jako 'ga rera. Israeu 'ga rer irūa.

⁶ A'ere 'ā Israeu 'ga juapyrera 'gā amū nuerowiari Jarejuwarete 'ga. Amume'ri 'gā etee erowiaa'ā ajemogyau. A'etea jane 'jawe'em: "Ime nipo Janeruwarete 'ga", 'jawe'em. "Israeu 'ga upe 'ga 'i rakue: 'Amū'ē je enejuapyrama tejemiayuwamū, 'jau 'ga 'ga upe rakue. A'ere 'ga 'meramū aipo 'e are", 'jawe'em jane. NaIsraeu 'ga juapyrera 'gā juejue rūi 'ga amū'ē wemiayuwamū rakue. A'eramū 'gā amū 'ga rerowiare'ema.

⁷ NaAbraão 'ga ra'yra 'gā jue rūi Janeruwarete 'ga imogyau wa'yramū. Isaki 'ga etee 'ga ipyryrūmū. Ismaeu 'ga 'ga ipyryrūme'em.

⁸⁻⁹ Ymā te Janeruwarete 'ga 'i Abraão 'ga upe rakue: "Anure nipo eneremireko ēē, Sara ēē ra'yramū. Enera'yra tapyygukat ēē upe 'jau. Ikokwar are ene pyri je ruru'jawamū nipo ēē wa'yra rerekoi opo pe", 'jau 'ga 'ga upe rakue. Poromū Abraão 'ga ra'yra 'ga Isakia. Isaki 'ga etee Janeruwarete 'ga omogo wa'yramū. Amumera 'gā Abraão 'ga ra'yra 'gā najaneruwarete 'ga ra'yra rūi. 'Awamū Janeruwarete 'ga 'i "'agamū Abraão 'ga juapyrerarete", 'ga 'i u'eawer imū u'at ma'efera 'ga juapyrera upe, Isaki 'ga juapyrera upe.

¹⁰ A'ere Isaki 'ga remireko ēē, Repeka ēē, wa'yramū 'ga upe rakue. Mukūi tāmējē ēē ra'yra ojepepa. U'ar pyy ma'e 'ga rera Esau. Ajepeja 'ga rera Jako. Anure Janeruwarete 'ga Jako 'ga re'roka, Israeu nuga 'ga ree rakue.

¹¹⁻¹² 'Gā 'are'emauwe Janeruwarete 'ga 'jau 'gā y ēē upe, Repeka ēē upe: "Tewiri u'at ma'e 'ga nipo je amogo 'wryriaramū u'ar pyy ma'e 'ga upe", 'jau 'ga ēē upe rakue. Nu'ari we agawewi 'gā. A'eramū 'gā mama'e esage apowe'ewe agawewi. Mama'e tywera nanē 'gā iapowe'em nū. A'ere 'ga na'ga remiapofer are rūi 'ga ajepeja 'ga pyryūi imogou wemiayuwamū. Wemifutar imū te 'ga tewiri u'at ma'efera 'ga pyryūi imogou wemiayuwamū. Wemifutar imū te 'ga u'ar pyy ma'e 'ga pyryrūme'em.

¹³ Nan futat Janeruwarete 'ga ka'arana kwasiarukaa 'gā nee rakue. "Jeporomutat je Jako 'ga ree. A'ere je najeporomutari Esau 'ga ree", 'jau 'ga ikwasiarukaa rakue.

¹⁴ Maran sipo ajee jane 'i aipo are? Nia'wryi Janeruwarete 'ga, sa'e sipo ajee jane? Naani. Mama'e esagea etee te 'ga wapo.

¹⁵ Ymā te 'ga 'jau Moisesi 'ga upe rakue: "Tejemifutar imū etee te je jemuaēmi 'ga amū ree. Tejemifutar imū nanē je tejemuaēme'ema ajepeja 'ga ree", 'jau 'ga Moisesi 'ga upe rakue.

¹⁶ A'eramū najaneremifutar imū rūi Janeruwarete 'ga jane pyryrūmū jane mogyau wemiayuwamū. Najaneremiapofer are rūi nanē 'ga ajemuaēma jane ree nū. Wemifutar imū etee 'ga jane pyryūi jane mogyau wemiayuwamū.

¹⁷ Ymā te Janeruwarete 'ga oje'ega kwasiarukaa ka'aran are inuga janee rakue. Farao 'ga upe Janeruwarete 'ga 'jau: "Tepājēa je aesaukaru 'jau 'jap enee. A'e are nipo wyw pewara 'gā juejue jerera renupa. Ma'eramū 'ā je ene mogoi 'wryriaramū Egitu wyw pewara 'gā nupe", 'jau 'ga ikwasiarukaa inuga ka'aran are rakue.

¹⁸ A'eramū jane jarejeapyoramū 'ga remiapo are. Wemifutar imū etee futat Janeruwarete 'ga ajemuaēma 'gā amū nee. Wemifutar imū etee futat 'ga ojerowiarukare'ema amumera 'gā nupe.

¹⁹ A'e are nipo pēē mū 'jau jee: "Ma'eramū sipo 'ga ore rerekou tyweaete ore 'ga rerowiare'emamū? Ore upe 'ga nojerowiarukari futari. A'eramū ore 'ga rerowiaru'jape'ema. Naruapoa'uweri ore mama'ea 'ga orojeupe ojerowiarukare'emamū. Naruapoa'uweri agawewi 'ā ore mama'e tywera. A'etea 'ga nojejukai ore ree", 'jau nipo pēē.

²⁰ Aipo pe'je kasi ne. Janeruwarete 'ga futat te 'ā jane apo rakue. Imara'nearū sipo ae 'ga remiapoferamū 'ga ree 'ga mueue ojee? Naani. Oje'egay sipo japepoa wapoara upe wapoarū'emamū? Naani.

²¹ Sā'ā japepo apoara 'gā japepo apoa wemifutar imū etee futat. Amumera 'ā 'ga iapou wemipa'ruramū, amumera yty ryrūnamū. Wemifutar imū etee futat tujuga apoara 'gā mama'e apoi.

²² Nan tee futat Janeruwarete 'ga jane apoi rakue. A'eramū 'ga mama'e apou janee wemifutar imū etee futat. "Tejerowiare'ema 'gā nee jemara'neramū. Tepājēa nanē je ikwaawukaa 'gā nupe nū", 'jau 'ga rakue. A'ere na'awauwe rūi 'ga 'gā nereko tyweretei. Anure te nipo 'ga werowiare'ema 'gā nerekou tyweaete.

²³ Amumeramū te aje 'ga 'ā jane mū'ēi wemiayuwamū rakue. Jane ree 'ga jemuaēmi. A'eramū 'ga 'jau ojeupe: "Tejesagea je akwaawukat tejemimū'ēmera 'gā nupe", 'jau 'ga ojeupe. A'eramū 'ga mama'e esage apou janee wemifutar imū. Jane rereko esage are 'ga wesage kwaawukari janee. "'Ga 'ā wesageramū tekotee 'gā nesagea apyrapa", jane mu'eukaa.

²⁴ Jane 'ā 'ga remipyryrūmera. Ymā te 'ga jane pyryūi wemiayuwamū rakue. Judeuramū ore, judeue'emamū pēē. Mīmēra 'ga imū'jāu wemiayuwamū rakue.

²⁵ Ymā te Janeruwarete 'ga oje'ega kwasiarukaa ka'aran are Oseja 'ga upe rakue: "Tejemiyuwe'emera 'gā nipo je amogy tejemiayuwamū.

Tejemifutare'emera 'gā nupe nipo je 'jau: Jeporomutat je pē nee, 'jau.

²⁶ Ymā je 'i ikue: Najeremiayuwa rūi pēē, 'jau je ikue.

A'ere nipo anure je aipo te'eawer ipe te futat je 'i:

Je futat 'ā okoeteete ma'ea.

'Awamū pēē futat jera'yramū, 'jau nipo je, 'jau je ikue",

'jau Oseja 'ga ikwasiaa ka'aran are rakue.

²⁷ Isai 'ga nanē ka'arana kwasiaa Israeu 'ga juapyapyrera 'gā nee rakue.

"Kwaiwete Israeu 'ga juapyrama 'gā. Sā'ā 'yisigeaua pytuna. Nan tee futat Israeu 'ga juapyrama 'gā pytuna numiamū.

A'etea nipo ināinānīT 'gā etee ojekatu'ok otywer awi.

²⁸ Anure nipo Janeruwarete 'ga wyw pewaramū juejue werowiare'ema 'gā nereko tyw-ereitei ywawuje tee futat",

'jau Isai 'ga ikwasiaa ka'aran are rakue.

²⁹ Aipo jeapo enunewe Isai 'ga 'jau:

"Janeruwarete 'ga pājēreteā. Peesak 'ga Sodom ipewara 'gā momawa, Gomora pewara 'gā neewe rakue.

Janeruwarete 'ga jane mū mogye'em ire amunipo 'ā jane nanē jarepapa 'gā 'jawe nū",

'jau Isai 'ga ikwasiaa ka'aran are rakue.

³⁰ "Ma'ja are ajee 'ga jane mu'ei?" 'jau nipo pēē jee? Nan futat je 'i pē nupe: Ymā judeu'ema 'gā nafutari Jarejuwarete 'ga amuesagea rakue. A'ere Janeruwarete 'ga Jejuī 'ga rerowiamū 'gā katu'oka 'gā muesageu ojeupe.

³¹ A'ere 'ā ymā 'ga futaarera 'gā jēmī Israeu juapyrera 'gā naani. "Moisesi 'ga je'egeera renuw are jarejemuesageu Jarejuwarete 'ga upe", 'jau 'gā numiamū. A'ere 'gā nuenupawi 'ga je'ega.

³² A'eramū 'gā ojemuesageukare'ema 'ga upe. Niparuerowiarweri 'gā Jejuī 'ga ree. "Jejuī 'ga ree ojemogypyk ma'e 'gā etee wesageramū Jarejuwarete 'ga upe" 'e are aparuerowiar-were'emamū. A'eramū 'gā ojemuesageukare'ema futat 'ga upe. 'Gā nupe Jejuī 'ga ita 'jawe. Sā'ā ita rena pe pe. A'eramū 'ā pe rupi oma'e 'gā ojeypyapegāu ee. Nan tee Jejuī 'ga 'gā nupe. Nijemogypygiweri 'gā Jejuī 'ga ree. A'eramū 'gā u'aa 'ga ree. A'eramū 'gā awawe'em Jarejuwarete 'ga pyri.

³³ Ymā Janeruwarete 'ga aipo are ka'arana kwasiarukari inuga Isai 'ga upe rakue:

"Anure nipo je 'ga amū mogou judeu 'gā nupe. Jerusareg ipe je 'ga monoi. Jerusarega 'up wytyra pyri, Siāo 'jawa pyri.

Jeremimonorama 'ga ita 'jawe. Pe pe ita renamū 'ā, pe rupi oo ma'e 'gā 'ari ee.

Nan futat nipo kwaiwete judeu 'gā niporomutari jeremimonorama 'ga ree.

A'ere 'ga rerowiaara 'gā ku'iramū 'ga ree. Jaruete 'gā nekoi 'ga ree",

'jau Isai 'ga ikwasiaa ka'aran are rakue.

10

¹ Pēē 'ā jerewirera 'jawe. Kūjānamū pēē 'ā jerenyra 'jawe 'jau. A'eramū pēē pejeapykau jeje'eg are. Judeua futat je 'ā. A'eramū je teporomutamamū teptytun are. Jarejuwarete 'ga teptytuna 'gā katu'opawa je afutat. A'eramū je teje'ega monou te'ŷina 'gā nee 'ga upe. "Eja'yra 'ga erowiarukat Israeu juapyrera 'gā nupe, ki Ku'jyp", 'jau je te'ŷina Jarejuwarete 'ga upe 'gā nee.

² Teptytuna 'gā je akwaap te'ŷina. 'Gā 'jawe futat je rekoi ikue. Iporowykywet 'gā Jarejuwarete 'ga upe numiamū. 'Ga muoryw are nanē 'gā afueweramū nū numiamū. A'ere 'gā nokwaawi 'ga remifutara.

³ Naeapyoi 'gā "Janeruwarete 'ga Jejuī 'ga rerowiaara 'gā 'ga amuesage ojeupe" 'e are. A'eramū 'gā 'jau: "Moisesi 'ga je'egeera renupawer are wea mŷina Moisesi 'ga 'eawera futat jane muesage Janeruwarete 'ga upe", 'jau 'gā ajaupe numiamū. Jarejuwarete 'ga 'eawera jēmī 'gā erowiare'ema. "Teja'yra 'ga rerowiaara 'gā je amuesage tejeupe" 'ga 'eawera rerowiare'ema.

⁴ Kristu 'ga amanūmū jane katu'okawamū, 'Uwa 'ga upe jane muesageawamū. 'Ga rerowiaaramū etee jane jarejesageramū Jarejuwarete 'ga upe. A'eramū jane 'jawe'em: "Moisesi 'ga je'egeera renuw ire te janeresageramū Jarejuwarete 'ga upe", 'jawe'em. Moisesi 'ga je'egeera renuwa najane katu'oga'uweri. Jejuī 'ga rerowiamū etee te jane jarejekatu'ogi Ku'jywa 'ga upe.

Werowiamū 'ga jane katu'oka

⁵ Ymā te Janeruwarete 'ga oje'ega kwasiarukari Moisesi 'ga upe rakue. "Jeje'ega renup katu katu re pēē pejejesageramū jee. Jeje'ega renup katu katuare'emamū pēē nepēa'wryi

jee. Jeje'ega renup katu katu re nipo pejemogy nakwaparimū warāu rūi, e'i 'ga', 'jau Moisesi 'ga 'gā nupe numiamū. A'ere 'gā nuerowiari pāwē pāwē 'ga je'ega.

⁶ “Jera'yra 'ga rerowiaaramū etee pēnesage jee”, 'jau Janeruwarete 'ga rakue. A'ere kasi amumeramū: “Awŷja sipo awau ojeupia ywag ipe Kristu 'ga reruawamū wyw pe janee?” 'jau ne. 'Ut futat ako 'ga rakue.

⁷ “Awŷja nanē sipo ajee oo amanū ma'efera rerua imoferapa? pe'je nanē kasi ne nū”, 'jau Moisesi 'ga ikwasiaa ka'aran are inuga rakue. Omoferap nanē ako Janeruwarete 'ga 'ga rakue nū. A'eramū pēē aipo 'jawe'em.

⁸ “Jarejuwarete 'ga je'ega pekwaap. Najemimi futari pē nui. 'Ga je'ega ki pēē imome'wau pejejaupe. Pejejea'aramū ee nū”, 'jau Moisesi 'ga ikwasiaa rakue. Poromū futat ore imome'ui pē nupe, Kristu 'ga mome'ui pē nupe.

⁹ Jejui Kristu 'ga rerowiaara 'gā 'jau Janeruwarete 'ga okatu'ok. “Jejui Kristu 'ga jejararetea”, 'jau pēē. “Janeruwarete 'ga Jejui 'ga omoferap” 'ea pēē erowiaa. A'eramū Janeruwarete 'ga pē katu'oka, pē pireita pētywer awi.

¹⁰ “Jejui 'ga oferap” 'ea jane erowiar ire Janeruwarete 'ga 'jau janee: “Pēē jera'yra 'ga perowiat. A'eramū pēē pejejesageramū jee”, 'jau nipo 'ga janee, Jejui 'ga jane erowiarāmū. Jejui Kristu 'ga jejararetea jane 'eramū Janeruwarete 'ga jane katu'oka janetywer awi.

¹¹ Nan Isai 'ga ikwasiaa inuga ka'aran are janee rakue: “Janeruwarete 'ga nomojenosūkari Jejui 'ga rerowiaara 'gā wowase 'gā nekoramū”, 'jau 'ga ikwasiaa rakue.

¹² Aipo kwasiaramū 'ga jane mome'wau najuejue etee. Najudeuramū ore upe etee rūi 'ga 'i aipo 'jau. Judeue'emamū pē nupe nanē 'gā 'i aipo 'jau. Jejui Kristu 'ga Janeruwarete. Judeuramū Orejararetea 'ga 'ā, judeue'emamū Pējararetea nanē 'ga nū. 'Ga upe jane jareju'jaju'jawe etee futat. Mama'e esagea 'ga imua janee ojeupe enūjamū.

¹³ Ymā te Jueu 'ga ka'arana kwasiari inuga janee rakue. “Ojeupe je katu'og ape 'jara 'gā Janeruwarete 'ga okatu'ok”, 'jau Jueu 'ga ikwasiaa rakue. A'eramū 'ga judeu 'gā katu'oka, ojeupe aipo 'gā 'eramū. Judeue'ema 'gā nanē 'ga ikatu'oka ojeupe aipo 'gā 'eramū nū.

¹⁴ Maran sipo ae, 'ga rerowiare'em ire, “je poar ape”, 'jau 'ga upe. Ni'e ekoetea'uweri ae 'ga rerowiare'em ire. Maran sipo 'gā 'ga rerowiaa ewwi 'ga rera renupe'ema? Nuerowiari futari 'gā 'ga, 'ga rera renuwe'em ire. Sipo 'gā maran 'ga rera renupa 'ga amū ojeupe imome'ue'em ire? Nuenuwi futari 'gā 'ga rera 'ga amū ojeupe imome'ue'em ire.

¹⁵ Maran sipo 'gā amū 'ga mome'wau Jarejuwarete 'ga omonoe'em ire? Nooi futari 'gā amū 'ga mome'wau, Janeruwarete 'ga omonoe'em ire. A'ere Janeruwarete 'ga 'gā monoi futari Jejui 'ga mome'waukaa kwe pewara 'gā nupe. Ymā te Isai 'ga ka'arana kwasiari Jarejuwarete 'ga remimonofera 'gā nee rakue: “Esage futat morogyta esage mome'wara 'gā nura”, 'jau Isai 'ga ikwasiaa Jejui 'ga mome'wara 'gā nee rakue.

¹⁶ Janeruwarete 'ga 'gā amū monou Jejui 'ga mome'wau Israeu 'ga juapyrera 'gā nupe rakue. A'ere 'gā amū nuerowiari 'ga. Aipo are nanē Isai 'ga ka'arana kwasiaa 'gā nee rakue: “Nuerowiari futari 'ga amū oreje'ega, ki Ku'jyp. Ināinān'ī etee 'gā erowiaa'ī”, 'jau 'ga ikwasiaa ka'aran are rakue.

¹⁷ A'eramū je a'eramū 'jau pē nupe: Jejui 'ga mome'u renuw ire jane 'ga rerowiaa jarejemogyau.

¹⁸ A'jea sipo Israeu 'ga juapyrera 'gā nuenuwi Jejui 'ga mome'ua? Naani. Wenup futat 'gā numiamū.

“Najuejue etee futat wyw pewara 'gā Janeruwarete 'ga je'ega mome'wara 'gā je'ega renui. 'Gā je'ega ojemūaina wyw pe”,

'jau Davi 'ga ymā ka'arana kwasiaa inuga rakue.

¹⁹ Nokwaawi sipo Israeu juapyrera 'gā? Naani. Okwaap futat 'gā. A'ere 'gā nipaerowiariweri 'gā ee. Moisesi 'ga ra'ne Jarejuwarete 'ga je'ega mome'wau 'gā nupe rakue:

“Anure nipo je judeue'ema mogyi tejemiayuwamū. A'eramū nipo pēē 'gā nerekoayau ee”, 'jau Janeruwarete 'ga 'gā nupe.

“A'eramū nipo pēē pejemara'heramū 'gā nee. Ni'akwaawi 'gā Jarejuwarete 'ga ree, 'jau nipo pēē 'gā nupe numiamū.

A'ere je te 'gā mogyi tejemiayuwamū, e'i Janeruwarete 'gā”,

'jau Moisesi 'ga ikwasiaa ka'aran are rakue.

²⁰ Isai 'ga nanē okyjawe'em Israeu 'ga juapyrera 'gā nui. Mama'e a'je mome'u awi nanē 'ga okyjawe'em rakue.

“Ymā judeue'ema 'gā Janeruwarete 'ga ree oporokwaawiwere'emamū rakue. A'ere 'gā 'awamū 'ga kwaawi.

Ymā 'gā 'jawe'em rakue: Ku'jywa 'ga emome'u oree, 'jawe'em rakue.

A'ere 'ga 'awamū 'ga jekwaawukari 'gā nupe”,

'jau Isai 'ga ikwasiaa rakue.

²¹ Israeu 'ga juapyrera 'gā mome'uramū Isai 'ga 'i rakue:
 "Janeruwarete 'ga ojekwaawukat Israeu 'ga juapyrera 'gā nupe numiamū. Wojere'emamū
 'ga ojekwaawukaa esaka 'gā nupe.
 A'ere 'gā niporenuwiweri 'ga je'eg are. 'Ga ree 'gā jemogypygyiwere'emamū",
 'jau Isai 'ga judeu 'gā mome'wau rakue.

11

Israeu juapyrera 'gā nee 'ga jemuaēmawet

¹ Israeu juapyreramū ore wi sipo Janeruwarete 'ga poiri? Naani. Nopoiri futari 'ga ore wi. Je judeua. Abraão 'ga juapyreramū je rekoi. Abraão 'ga remyminūmera 'ga, Pējamī 'ga juapyreramū je.

² Nopoiri futari 'ga wemiayuw ypyferamū ore wi. Ymā we 'ga oreypy 'gā mū'ēi tekotee 'gā nui rakue. Ojeupe futat 'ga oreypy 'gā mū'jāu 'gā nui rakue. Ymā 'ā 'ga amū ka'arana kwasiari Eliasi 'ga 'eawer are rakue. 'Ga 'eawera pekwaap.

³ Ymā Eliasi 'ga 'jau rakue: "Ku'jyp. Eneje'ega renupare'ema 'gā eneje'ega mome'wara 'gā wapisipaw etee. Wyra rapyawa miamū 'gā wetypap. A'eramū jete'e futat tekou. 'Awamū 'gā je ree nanē afuweramū nū", 'jau Eliasi 'ga Jarejuwarete 'ga upe rakue.

⁴ A'eramū Janeruwarete 'ga 'jau 'ga upe rakue: "Naani. Naene etee rūi ereko je rerowiaaramū. Sete miu je rerowiaara 'gā pytuna jemogyi. Nopoiri futari 'gā je rerowiar awi. Namuorywi 'gā maira'me a'agawa, Pau 'jawa. Sete miu 'gā je ia'gwau mama'e tywer awi", 'jau Janeruwarete 'ga Eliasi 'ga upe rakue.

⁵ Nan tee futat 'awamū Janeruwarete 'ga judeuramū ore mū a'gui ojeupe. Naruapoi agawewi ore mama'e esage 'ga upe. A'etea 'ga iporomutat ore ree, ore a'gwau ojeupe.

⁶ Wemifutar imū etee 'ga ore mū'jāu ore mogyau wemiayuwamū. Naoreremiapofer are rūi 'ga ore mū'ēi ojeupe. Oreremiapofer are ore mū'ē re amunipo 'ā 'ga ore mū'jāue'em wemifutar imū. A'ere 'ga wemifutar imū etee futat ore mogyi wemiayuwamū.

⁷ Ymā Israeu 'ga juapyrera 'gā juejue amuesage futari rakue. A'ere Janeruwarete 'ga namuesagepawi 'gā. Wemimū'ēme'ri 'gā etee 'ga imuesageu ojeupe. Amumera 'gā oporenuwiwere'emamū 'ga je'eg are.

⁸ Aipo are 'gā amū ymā ka'arana kwasiari inuga rakue:
 "Wemimū'ēe'ema 'gā Janeruwarete 'ga nomoporenuwiwerukari oje'eg are, 'gā muapyak-wafugukare'ema oje'eg are.

'Awamū miamū aipo 'gā naeapyoi 'ga je'eg are. Nojemogypygyi 'gā 'ga ree",
 'jau 'ga amū ikwasiaa ka'aran are rakue.

⁹ Davi 'ga nanē ka'arana kwasiaa aipo are futat rakue nū:

"Maraka 'gā wapo futat Jarejuwarete 'ga muorypawamū numiamū. A'ere 'gā nopoiri futari otywer awi.

A'eramū nipo Janeruwarete 'ga 'gā nerekou tyweaete maraka pype futat.

¹⁰ Janeruwarete 'ga namueapyoukari 'gā mama'e a'je are. Wereco tywerete 'ga 'gā",
 'jau Davi 'ga ikwasiaa judeu 'gā nee rakue.

¹¹ Opoit futat te Janeruwarete 'ga Israeu juapyrera 'gā nui? Naani. Opoiraiw etee 'ga 'gā nui. Anure nipo judeu 'gā poiri futari otywer awi. Anure nipo 'gā jemogypygyi Jejuī 'ga ree. A'ere Janeruwarete 'ga, judeu 'gā Jejuī 'ga ree ijemogypygye'emaue, judeue'ema 'gā mojemogypygyukari Jejuī 'ga ree, 'gā katu'oka. Judeue'ema 'gā nesag ire nipo judeu 'gā 'jau: "Kuu. Judeue'ema 'gā Janeruwarete 'ga okatu'ok, 'gā mogyau wemiayuwamū", 'jau nipo 'gā 'gā nerekoayau 'gā nee. A'eramū nipo 'gā ojewya Jarejuwarete 'ga rerowiara upe.

¹² 'Awamū judeu 'gā nojemogypygyi Jejuī 'ga ree. A'eramū Janeruwarete 'ga mama'e esage apowe'em 'gā nupe. A'eramū 'ga judeue'ema 'gā mojemogypygyukaa Jejuī 'ga ree. A'eramū 'ga 'gā nupe ete mama'e esage apou, Jejuī 'ga ree 'gā jemogypygyamū wejue te. Anure te nipo judeu 'gā jewyri Jarejuwarete 'ga rerowiara upe nū. Ojeupe 'gā jewyramū nipo Janeruwarete 'ga mama'e esage monou ywy pewara 'gā nupe juejue. Ojeupe judeu 'gā jewyr are 'ga mama'e esage monou kwaiwete.

Judeue'ema 'gā katu'okawet

¹³ Pēē mū nupe, judeue'emamū pē nupe je judeuramū orojemome'ui. Ymā ako Janeruwarete 'ga je monoi Jejuī 'ga mome'wau judeue'emamū pē nupe ikue. Ajerowiat je aipo are.

¹⁴ Afutat je teptytuna 'gā amū juerekoaya pē nee. A'eramū nipo je a'e are Jejuī 'ga rerowiarukaa 'gā amū nupe. Aipoa je afutarete futat.

¹⁵ Judeu 'gā nui opoiraiw ire, Janeruwarete 'ga judeue'ema 'gā mota'wai ojeupe, Jejuī 'ga 'gā erowiarāmū. A'eramū nipo anure te Janeruwarete 'ga judeu 'gā mota'wai ojeupe nū. Judeu 'gā Jejuī 'ga rerowiaaw ipe jane tee jareku'i pāwē pāwēnamū jarejemogyau. Sā'ā

janeku'ia jarepytuna ferawamū. Nan tee futat nipo jane jareku'iramū judeu 'gā Jejuī 'ga rerowiarāmū.

¹⁶ Y'wa 'ywa jara 'ga sipo y'wa 'ywa rapo jara etee? Naani. Y'wa 'ywa jara 'ga na'ywa rapo jara etee rūi. I'ywarete jara nanē futat 'ga nū, i'a jara nanē nū. Nan tee futat Janeruwarete 'ga judeu ppy 'gā jararete. Janeruwarete 'ga remiayuyppyyfera 'ā ore judeuramū rakue. A'eramū 'ā ore juejue judeuramū 'ga remiayuwamū arajemogyau.

¹⁷ Sā'ā ae y'wa 'ywa tyma. A'eramū 'ā akā mū osiniga etee. A'eramū 'ā ae ijaramū akā sinigera monoka jui. A'eramū 'ā ijara 'ga awau y'wa 'yw ekoete rakā monoka erua imujaa akā sinigera renawer ipe, akā sinigera 'yw are. Imujar ire akā ojopyyka imonogipyrrera py'rau. Nan tee futat pēē. Judeuramū oreppya Janeruwarete 'ga remiayuwaretea. Oreppya 'gā 'ga ipyyrūmū imogyau wemiayuwamū. A'ere ore mū judeuramū naruerowiari 'ga. A'eramū 'ga werowiare'emamū 'gā amū mū'jāu wemiayuwamū ore wi. A'eramū 'ga judeue'emamū pēē mū mua pē mogyau wemiayuwamū werowiare'ema 'gā py'rau pē mujaa judeuramū oreppya are. A'eramū pēē pejemū'jau oreppya are.

¹⁸ A'eramū ki pēē judeu 'gā ago'wawe'em. Imū'ēmyrera 'gā ago'wawe'em pejemogyau. Pejerowiaraip kasi pejee ne. Najudeu ppy 'gā nūi pē nee imujaripyrrera. Pēē te 'ga pē mujat 'gā nee. A'eramū ki pēē pejerowiaraipe'ema pejee.

¹⁹ Pēē mū nipo 'jau jee: "Janeruwarete 'ga opoit judeu 'gā nui. A'eramū ore 'gā japy'rufura", 'jau nipo pēē numiamū.

²⁰ Nuerowiari te 'gā Jarejuwarete 'ga. A'eramū 'ga a'eramū opoia 'gā nui. A'ere perowiat wejue te 'ga. A'eramū 'ga a'eramū pē mogyau 'gā py'rau wemiayuwamū. A'eramū ki pēē pejerowiaraipe'ema pejee. A'eramū pēē Jarejuwarete 'ga pojeupa.

²¹ Werowiare'em are judeu 'gā nereko tywer ire, sipo 'ga judeue'emamū nepē nereko tyweri werowiare'em ire? Judeuramū ore y'wa 'ywa rakārete 'jawewara. Judeue'emamū pēē imujaripyrrera 'jawewara te. A'eramū nipo 'ga pēē nanē pē nereko tyweaete judeuramū oreko tyweawera apyraapa werowiare'em ire.

²² A'eramū jane Jarejuwarete 'ga kwaapa. Ajemuaēm 'ga werowiaara 'gā nee. A'ere 'ga werowiare'ema 'gā nereko tyweretei. 'Awamū pēē judeue'emamū 'ga rerowiaa pejemogyau. A'eramū 'ga opota'waramū pē nee. Wesageramū 'ga pē nupe. A'ere 'ga werowiar awi pepoir ire 'ga poiri pē nui, pē mū'jāu wemiayuw awi 'gā mū'ēawera 'jawe etee futat.

²³ Werowiare'em awi 'gā poir ire nipo Janeruwarete 'ga judeu 'gā nerua 'gā mogyau wemiayuwamū nū.

²⁴ Judeue'emamū pēē na'ga remiayuwaramū rūi. Werowiarāmū te 'ga pē mogyi wemiayuwamū. Judeu 'gā te 'ga remiayuwaretefera. Werowiare'emera 'gā 'ga imū'jāu wemiayuw awi. A'ere 'ga werowiaru'jaw ire 'gā mogyau wemiayuwamū nū. Aipoa taetu naayi futari 'ga upe. Sā'ā y'wa 'ywa jara wemimonogera rerura imujara imonokawera rowopyter are nū. A'eramū 'ā ojopyyka aye'em etee te. Nan tee futat 'ga judeu 'gā mogyau werowiaru'jaw ire wemiayuwamū aye'em etee te futat nū.

Jane ree 'ga pota'wa

²⁵ Pēē jerewirera 'jawe. Kūjānamū pēē jerenyra 'jawe. A'eramū je mama'e mome'wau pē nupe, pē mueapyoawamū. Janeruwarete 'ga je mu'akwaapa ee. A'eramū je pē mu'akwaapa ee nanē nū. A'eramū pēē pejerowiaraipe'ema pejee etee. 'Awamū Janeruwarete 'ga opoiraipe judeu 'ga nui. Nuerowiari 'gā 'ga. A'eramū 'ga poiraiwi 'gā nui. Anure te nipo 'gā 'ga rerowiarū nū. 'Awamū pēē judeue'emamū pēē Jarejuwarete 'ga rerowiaa pejemogyau. Ymā Janeruwarete 'ga judeue'emamū pēē mū pē mū'jāu ojeupe rakue. A'eramū wemimū'ēmera 'gā juejue werowiar ire nipo 'ga ojewya judeu 'gā nupe nū.

²⁶ Aiporamū te nipo judeu 'gā Jejuī 'ga rerowiaararete. Ymā te Isai 'ga aipo are ka'arana kwasiari inuga rakue:

"Anure nipo janetywera moiara 'ga ruti owaēma Jerusareg awi, Siāo 'jaw awi. Aiporamū u'aaw ipe nipo 'ga judeu 'gā kuru'oka.

'Gā tywera moia Jako 'ga juapyrrera 'gā nui.

²⁷ Janeruwarete 'ga 'jau judeu 'gā nupe:

Ymā te 'ā Janeruwarete 'ga 'i judeuramū pē nupe rakue:

'Anure nipo je pētywera moiri pē nui', 'jau ako je ikue.

A'eramū je pētywera moia pē nui te'eawer imū etee futat, 'jau Janeruwarete 'ga rakue",

'jau Isai 'ga ikwasiaa rakue.

²⁸ Judeuramū ore mū Jejuī 'ga rerowiare'ema. A'eramū Janeruwarete 'ga amara'neramū aipo 'gā nee. A'eramū 'ga 'jau: "Naje rerowiarai pejepe. A'eramū je tepoiraipe pē nui tejerowiarukaawamū judeue'ema 'gā nupe", 'jau 'ga werowiare'ema 'gā nupe. A'eramū 'ga opoiraipe 'gā nui. Aipoa esage judeue'emamū pē nupe. A'etea Janeruwarete 'ga

judeuramū oreypy mū'jāu ojeupe rakue. Nomoka'jami 'ga 'gā. A'eramū 'ga 'gā juapyrer awi opoikatuwe'em.

²⁹ Ymā Janeruwarete 'ga judeuramū oreypy mū'jāu ojeupe rakue. “Pēē 'ā je amū'ē imogyau tejemiayuwamū. Mama'e esage tomono pē nupe 'jau”, 'jau 'ga 'gā nupe rakue. A'eramū 'ga weatee'emamū futat wemimū'ēmera 'gā nui. Oreypy 'gā nee 'ga reatee'emamū futat ore wi.

³⁰ Ymā te judeue'emamū pēē Jarejuwarete 'ga je'ega nepeenuwi rakue. A'ere 'awamū Janeruwarete 'ga jemuaēmi pē nee. Judeu 'gā wenuwe'emamū Janeruwarete 'ga jemuaēmi pē nee.

³¹ 'Awamū judeu 'gā nuenuwi futari 'ga je'ega. A'etea nipo anure 'ga 'gā nee ajemuaēm nū. Pē nee ajemuaēmawera 'jawerimū etee futat nipo 'ga 'gā nee ajemuaēma nū.

³² Janeruwarete 'ga 'jau janee najuejue etee futat rakue: “Nuenuwi 'gā jeje'ega. Mama'e tywera 'gā wapo ajemogyau. A'eramū je 'gā mogyau ifaripyreera 'jawewaramū futat. 'Ga tywera 'gā nerekou”, 'jau 'ga rakue. A'eramū 'ga 'jau “Tajemuaēm 'gā nee 'jau”, 'jau 'ga janee rakue.

³³ A'jea futat Janeruwarete 'ga jemuaēmi jane ree. Ekoay te nipo janereapyo katui we 'ā jane 'ga ree. 'Ga 'akwaap, 'ga remikwaap. Mīmera jane nikwaakatupawi. 'Ga remiaporam are nanē jane jarejeapyoe'emamū nū.

³⁴ Ymā Isai 'ga ka'arana kwasiari rakue:

“Awŷja sipo Janejararete 'ga rea'awa okwaap?

Naani. Nitywi 'ga amū.

Awŷja sipo 'ga mu'jau mama'e are?

Naani. Nitywi futari 'ga mu'jara 'ga amū nū'ū”,

'jau Isai 'ga ikwasiaa rakue.

³⁵ Jo 'ga nanē ka'arana kwasiaa aipo are futat rakue nū:

“Awŷja sipo mama'e omono Jarejuwarete 'ga upe omepyawamū?

Naani. Nitywi 'ga amū”,

'jau 'ga ikwasiaa rakue.

³⁶ Janeruwarete 'ga futat mama'e wapopap rakue. Nitywi futari 'ga remiapoe'ema. 'Awamū miamū 'ga ojeukau mama'e are. Ojeupe futat 'ga mama'e apoi rakue. Ojeupe futat 'ga mama'e mogyau rakue. A'eramū ki jane 'ga muorypa ee. Jareojere'emamū futat ki 'ga muorypa ee.

12

Jarejuwarete 'ga upe oporowyky ma'e

¹ Janeruwarete 'ga ajemuaēm jane ree, a'e je pē nupe tekou. A'eramū je a'eramū 'jau tejewireramū pē nupe, tejenyramū pē nupe nanē je 'jau nū: Sajemogy Jarejuwarete 'ga upe oporowyky ma'eramū 'jau. Sā'ā janepy 'gā weymawa mū monoa 'ga upe, 'ga muorypawamū rakue. Nan tee futat jane 'awamū jarejemogyi 'ga upe oporowyky ma'eramū, mama'e apou 'ga upe 'ga muorypawamū. Aipoa jane iapoa 'ga muekōēina jane ree.

² 'Ga rerowiare'ema 'gā 'jawe kasi pejemogy ne. 'Gā nee kasi pejemu'e ne. 'Gā 'jawe kasi mama'ea peapo ne. Jarejuwarete 'ga upe ki pe'je: “Eje'jawe je muea'arukar ape mama'e are, ki Ku'jyp”, pe'je ki 'ga upe. Aipoa 'ga iaporamū nipo 'ga remifutara pekwaap. Aipoa esage 'ga upe. Aipoa 'ga muorypa. Mīmera pēē ikwaapa.

³ Janeruwarete 'ga 'ā opājē mua jee, je mogou oje'ega mome'waramū pē nupe ikue. A'eramū je pē mu'akwaapa mama'e are. Pejerowiaraip kasi pejejee etee ne. “Je te 'ā jeresage 'gā apyraapa”, pe'je kasi ne. Jarejuwarete 'ga rea'ara 'jawe pēnea'at pejejee. Werowiaramū 'ga opājē mua pē nupe ojeupe pē moporowykyawamū. A'eramū ki pēē pejejeupe 'ga remimurer imū mama'e esage apou 'ga upe. 'Ga pē poaa mama'e apo are. A'eramū ki pēē 'jau: “Natejeteē rūi je mama'e apoi. Janeruwarete 'ga je poat mama'e apo are”, pe'je ki.

⁴ Peesak jarejetea. Majepi teewara 'jawe futat janeretea. A'ere mukūi janereaa, mukūi janenamā, mukūi janepoa, mukūi janepya. Jarepou 'ā jane mama'e apou. Jarepyu 'ā jareatau. Jarejeau 'ā mama'e resaka. Jareapyau 'ā mama'e renupa. Naaju'jaju'jawe ete rūi futat 'ā oporowykyau.

⁵ Nan tee futat jane Jeju 'ga rerowiaaramū. Kwaiwete jane. Najareju'jawe ete rūi jane mama'e apoi. Jeju 'ga ree jarejemujar ire jane jarejemogyau majepi 'yweteewara 'jawe futat.

⁶ A'ere jane najareju'jawe ete rūi mama'e apoi. Opājēa Janeruwarete 'ga imua janee, mama'e apoukaa janee. Oje'ega 'ga imome'waukaa jane mū upe. A'eramū jane jarejeupe 'ga remimurer imū, 'ga je'ega mome'wau kwe pewara 'gā nupe.

⁷ Jane mū upe 'ga mama'e apoukaa 'gā nupe, 'gā poaawamū. A'eramū jane, 'ga rerowiarāmū mama'e apou 'gā nupe. Jane mū upe 'ga 'gā mu'jaukaa mama'e are. A'eramū 'ga rerowiarāmū jane 'gā mu'jau mama'e are.

⁸ Jane mū upe 'ga 'gā muapyterātāukaa. A'eramū jane, 'ga rerowiarāmū, 'gā amū muapyterātāu mama'eay upe. Jane mū upe 'ga mama'e monoukaa. A'eramū jane, jarejakate'eme'emamū, mama'e monou 'gā nupe. Jane mū 'ga imogyau 'wyriaramū 'gā nupe. A'e 'gā ojejukau esage 'gā nee. Jane mū upe 'ga ojopoarukaa mama'e apo are. A'eramū aipo 'ga 'gā poaa aku'iramū.

⁹ A'jea futar iki pēporomutat pejejemogyau pejejee. Pejejotywera kasi pefutar etee pejejemogyau ne. Pejemu'e ki mama'e esage apoara 'gā nee.

¹⁰ Jejui 'ga rerowiaaramū 'ā pejemogyau. A'eramū pēē pejejemujaa pejejemogyau pejejee rai'i. A'eramū ki pēē pejeporomutamū pejejee. Pejepeojukaa esageramū ki pejejee pejejemogyau.

¹¹ Pēwewue kasi pejejemogyau ne. Pejepokagamū ki pejejemogyau. Jarejararete 'ga upe pejejorywamū pejeporowykau.

¹² Anure nipo jane oi jarejemogyau Jarejuwarete 'ga pyri. A'eramū ki pēē pejejorywamū pejejemogyau. Pejejeupe mama'eay jesaukaramū, pejeapyterātānamū jupe. Jarejuwarete 'ga upe pejeje'ega monou pejejemogyau.

¹³ Jejui 'ga rerowiaaramū mama'e tywe'emamū pēē mama'e monou 'gā nupe. Muku awi Jejui 'ga rerowiaara 'gā nuramū pēē 'gā mua pejejog ipe.

¹⁴ Pē nee iporomutare'ema 'gā nipo pē nerekou tyweaeete. Pejereko tyweramū pēē pejeje'ega etee pemono Jarejuwarete 'ga upe 'gā nee. "Mama'e esagea emono je rereko tywearera 'gā nupe", pe'je ete ki 'ga upe 'gā nee. "Ereko jwet 'gā je ree", pe'je kasi ne.

¹⁵ 'Gā amū norywamū ki pēē 'gā neruorypa. 'Gā amū tyw'oramū ki pēē 'gā nerajaa'wau.

¹⁶ Pejepota'wa pāwēnamū etee futat ki pejejee. Pejerowiarap kasi pejejee etee ne. Ajemogy tywe'ri ma'e 'gā neewe futat pejeporomutamū pejejemogyau. "Je te 'ā i'akwaap ma'ea 'gā apyraap", pe'je kasi ne.

¹⁷ Pejejeupe 'gā amū mama'e tywera apo re miamū nanē pejejepyke'ema mama'e tywera apowe'em 'gā nupe. Mama'e esagea etee pēē iapou 'gā nupe. A'eramū pē nesakara 'gā pē ago'wawe'em.

¹⁸ 'Gā muewe'em futat. Pejepe'ata'waramū etee futat 'gā nee. 'Gā amū pejemueramū pejepota'wa esageramū etee 'gā nee.

¹⁹ 'Ga amū mama'e tywera pejejeupe iapo re, pēē pejejepyare'ema. Tene Janeruwarete 'ga te nipo pē nepyat, 'gā nerekou tyweaeete pē nee. A'eramū pēē pejejepyare'ema 'gā nui. Ymā Moisesi 'ga ka'arana kwasiari inuga aipo are rakue:

"Je te aepyat pēē, pē nupe 'gā mama'e tywera apo re.

Je te 'gā areko tywerete pē nee, e'i Janeruwarete 'ga",

'jau Moisesi 'ga ikwasiaa inuga rakue. A'eramū ki pēē pejejepyare'ema, a'e je 'ā pē nupe.

²⁰ Janeruwarete 'ga je'eg imū etee futar iki mama'ea peapo, 'jau je pē nupe.

"Pejejee iporomutare'ema 'gā py'arayparamū pēē mama'e monou etee 'gā nupe, 'ga mojemi'waa.

'Ga 'yuwejamū pēē 'y monou 'gā nupe. A'eramū 'ga ojeupe mama'e esagea pēē iaporamū ojenosōu wemiapo tywer are",

'jau 'ga amū ikwasiaa inuga ka'aran are rakue.

²¹ Pejereko tywearera 'gā motesirūgatue'em, pejejepyke'ema. Pejejeupe 'gā mama'e tywera aporamū mama'e esagea etee iapou 'gā nupe. A'eramū 'gā ota'waramū pē nupe.

13

Peje'wyriara je'ega peenup

¹ Peje'wyriara 'gā je'ega ki peenuw ete pejejemogyau. Janeruwarete 'ga te 'gā mogy 'wyriaramū pē nupe. A'eramū ki pēē 'gā je'ega renupa etee futat pejejemogyau.

² 'Gā je'eg are pejeporenuwiwere'em ire nipo pēē Jarejuwarete 'ga je'eg are nanē pejeporenuwiwere'emamū nū. Janeruwarete 'ga futat 'gā omogy 'wyriaramū janee. A'eramū 'gā je'ega renupare'ema 'gā Jarejuwarete 'ga je'ega nanē enupe'ema nū. A'eramū nipo Janeruwarete 'ga 'gā je'ega renupare'ema 'gā nerekou tyweaeete.

³ A'eramū pēē pejereko tywer awi pejejea'gwau mama'e esagea ete iapou. Mama'e esage apoara 'gā nokyjei o'wyriar awi. Mama'e tywera apoara 'gā te okyje o'wyriara 'gā nui, o'wyriara 'ga wereko tywer awi. Mama'e esagea etee iapo re pēē pejekyjawe'em

peje'wyrriara 'gā nui. Mama'e esagea pēē iapo re nipo 'gā 'i pē nupe: “Mama'e esagea etee peapo”, 'jau nipo 'gā pē nupe.

⁴ Janeruwarete 'ga te 'gā omŷi 'wyrriaramū pē nupe, pē poaawamū. A'ere mama'e tywera apo re, pekyje peje'wyrriara 'gā nui. A'jea futat nipo 'gā mama'e tywera apoara 'gā nerekou tyweri. Janeruwarete 'ga remimogyfera 'gā te 'ā 'wyrriaramū pē nupe. A'eramū 'gā Jarejuwarete 'ga upe oporowykyau. A'eramū Janeruwarete 'ga mama'e tywera apoara 'gā nerekou tywerukaa 'gā nupe.

⁵ A'eramū ki pēē peje'wyrriara 'gā je'ega renupa etee. Najarejereko tywer are etee rūi jane 'gā je'ega renuwi. “Jare'wyrriara 'gā je'ega renuwa te esage” 'ea jane sikwaap. A'eramū jane 'gā je'ega renupa.

⁶⁻⁷ Janeruwarete 'ga 'gā mŷina 'wyrriaramū janee. A'eramū 'gā oporowykyau Jarejuwarete 'ga upe. A'eramū jane ka'aranūū monou 'gā nupe jarejeupe 'gā enūjamū 'gā mepyau. Pepojeup peje'wyrriara 'gā.

Pēporomutar iki pejejee

⁸ Pejejauī mama'e mū mua pēē kamēsīete imepyau pejejaupe. A'eramū 'ga 'jawe'em: “naje mepyi 'ga”, 'jawe'em. Pejomama'e mepye'ema rerekoukare'ema pejejaupe. Peje-poromutarāmū pejejemogyau pejejee. Ajuee iporomutat ma'e 'gā Jarejuwarete 'ga je'ega wenup katu katu ajemogyau.

⁹ Ymā Moisesi 'ga Jarejuwarete 'ga je'ega kwasiari inuga janee rakue: “Peko awi pejejemirekoe'em are. Kūjānamū nanē pejekowe'em pejemene'em are. Peporojuka awi. Pemunarū awi mama'e are.

Pejejokaraemā futare'ema pejejemogyau”, 'jau Janeruwarete 'ga ikwasiarukaa Moisesi 'ga upe rakue.

Aipoa 'ga je'ega a'jea futat. Enuw ire pēē pejepeporomutarāmū tāmējē pejejee pejejemogyau. A'ere naaipo etee rūi 'ga je'ega.

“Pēporomutat pejepyrriara 'gā nee pejejee pejepeporomutara 'jawe etee futat.

Pejereko esage 'jawe etee futat pēē pejejuerekou esage”, 'jau Janeruwarete 'ga oje'ega kwasiarukaa Moisesi 'ga upe rakue.

¹⁰ Aipoa 'ga je'eg imū pejejee pejepeporomutar ire, pēē 'ga je'ega renupa katu katu. Ajuee iporomutat ma'e 'gā nuapoī mama'e tywera ajaupe.

¹¹ Ko futat nipo iwaēmi ja'wyja'wy Jejuī 'ga jewyawa upe. A'eramū ki pēē pejepeporomutarāmū pejejee. Pejejuerekou esage pejejemogyau. Ajuee iporomutare'ema 'gā oset ma'e 'gā 'jawe. “Ko futat nipo Jejuī 'ga jewyri ja'wyja'wy janee” 'ea 'gā ikwaape'ema. Oset ma'e 'jawe 'gā ajemogyau, wapyakwafuge'emamū. A'eramū kasi pēē oset ma'e 'jawe peko ne. Peje'akwaawamū pejejemogyau Jejuī 'ga rur are. 'Ga rerowiar pyramū jane 'jau jarejaupe: “Niporomukui nipo 'ga ruawa”, 'jau ako jane jarejaupe ikue. Nuri we 'ga. A'eramū je 'jau pē nupe: “Ko futat nipo 'ga ruri ja'wyja'wy”, 'jau je pē nupe. Jane rerawau nipo 'ga ywag ipe jane mogyau ojepyri nakwaparimū warāu rūi futat.

¹² Peesak futat 'ā ppytunimū wata ma'e 'jawewara kwaiwete mama'e tywera apoa. A'e are jane Jejuī 'ga jewyt ja'wyja'wy kwaapa. Mama'e tywera mateepapa 'ga 'ua. Mama'e tywera apoara 'gā 'ga erekou tyweaete nipo 'gā jemogyarū'emawer are. Sā'ā kwara pora ppytuna mateepawa. Nan tee futat 'ga mama'e tywera apo mateepapa 'ua. 'Ga rur ire nipo 'gā mama'e tywera apou'jape'ema futat. A'eramū ki jane a'jea futat jarepoia mama'e tywera apo awi. “Au'je ki mama'e tywera apo re”, 'jau je pē nupe. Sā'ā jefaruua itajuaity rerekoa ojea'gwawamū ajuka awi. Nan tee jane mama'e esage etee siapo jarejea'gwawamū jarejereko tywer awi jarejea'gwau. Mama'e esagea etee iapo re Janeruwarete 'ga jane rerekou tywere'em.

¹³ A'eramū ki jane jarejemogyau esage. Kawīajaiwa rykure'ema jarejemogyau. A'eramū pēē pejejeawrywe'emamū pejejemogyau. Jarejemirekoe'ema kūjā are jarekowe'em. Kūjāmera nanē okowe'em omene'em are nū. Jarejamuwe'em mama'e are. Jarejuerekoayawe'em nanē jarejee nū. 'Arimū wata ma'e 'jawe peko.

¹⁴ Au'je mama'e tywera apo re, pejejemifutar ymaner imū etee. Jejuī Kristu 'ga 'jawe futat pejemogy, mama'e esagea etee iapou.

14

Pejuago'o kasi ne

¹ Amumera 'gā Jejuī 'ga rerowiaara 'gā amū nipo weapyo katu'a'ne'emamū 'ga remifutara apo are. “Ma'ja te Jejuī 'ga afutat jane iapoa?” 'jau nipo 'gā ajemogyau. A'e 'gā pēē imua etee futat pejejepype, 'gā mueue'em futat nanē nū.

² “Janeruwarete 'ga mama'ea wapo janee janeremi'uramamū”, 'jau nipo pēē pejemogyau. A'ere nipo eapyo katua'ne'ema 'gā amū 'jau: “Na'ui ae wyro'oa. Aipoa esage Janeruwarete 'ga upe”, 'jau nipo 'gā amū ajemogyau.

³ Ma'eramū sipo ajee pēē wyro'o 'waramū wyro'o'ware'ema 'gā peago'o pejemogyau wyro'oa 'gā i'ue'emamū? Wyro'o 'ware'emamū nanē sipo pēē ma'eramū 'gā ago'wau wyro'oa 'gā i'uramū? Naani. Pejamue awi nanuar are. Janeruwarete 'ga te 'gā omogy wemiayuamū.

⁴ Janeruwarete 'ga janejararetea. Ma'eramū sipo pēē 'ga remiayuamū ago'wau? Napēnemiayuwa rūi 'gā. Ujara 'ga upe te 'gā mama'e apoi. Mama'e esagea 'gā iaporamū 'gā jara 'ga 'jau 'ga upe: “Mama'e esage peapo jee”, 'jau 'ga 'gā nupe. Mama'e tywera 'gā iaporamū 'gā jara 'ga 'jau 'gā nupe: “Aipo eneremiapofera mama'e tywera jee”, 'jau 'ga 'gā nupe. Janeruwarete 'ga wemiayuwa 'gā poaa mama'e apo are. A'eramū 'gā oporowykyau esage 'ga upe.

⁵ Pēē mū nipo 'jau: “Awamū 'araiwa. A'eramū jane jareporowykyawe'em 'awa 'ara rupi”, 'jau nipo pēē mū pejejaupe. A'ere nipo amumeramū pēē mū 'i: “Naani. Nanarūi. Aju'jaju'jawe etee futat 'ara”, 'jau nipo pēē mū pejejaupe. “Na'araiwa rūi 'awa 'ara” 'jaramū ki peporowyky etee futat jupi. Pejamue ekoete kasi nanuar are we ne. “Araiwa 'awa 'ara rupi” 'jara 'gā nanē peporowykyramū pē muewe'em nanē ee nū.

⁶ Awamū 'araiwa 'jara 'gā “Jarejuwarete 'ga pojeupawamū nipo ore iapoi”, e'i 'gā. A'eramū pēē 'gā nesaka etee futat nan 'gā jemogyramū. Wyro'o 'wara 'gā wyro'o 'wau Jarejuwarete 'ga muorypa aipoa wyro'o 'u are. Wyro'o 'ware'ema 'gā nanē wemi'u are Jarejuwarete 'ga muorypa nanē nū.

⁷⁻⁸ Mama'e apou 'ā jarejemogyau, Jarejuwarete 'ga muorypawamū etee futat jane mama'e apou. Jaremanūme'ēwe jane mama'e apou 'ga muorypawamū. Jane manū re nipo tekotee 'gā 'ga muorypa jane ree.

⁹ Janejararete 'ga, Jejuī 'ga oferapa etee amanū awi rakue, Janejarareteramū ako ma'eramū rakue. Najuejue etee futat 'ga akou Janejarareteramū 'ga. Ajemogy ma'eramū jane upe, amanū ma'efera 'gā nupe 'jau 'ga akou rakue.

¹⁰ Ma'eramū sipo ajee pēē pejepytuna 'gā Jejuī 'ga rerowiaara 'gā peago'o ekoete pejemogyau? Naani. Pejuago'o awi 'gā. Janeruwarete 'ga te jane kwaap. Wowase ae majatykaaw ipe te 'ga 'i jane mū upe: “Nia'wryi eneremiapofera jee”, 'jau nipo 'ga jane mū upe. Amumeramū nipo 'ga 'jau janee: “Esage eneremiapofera”, 'jau nipo 'ga janee. A'eramū jane “nia'wryi eneremiapofera”, 'jawe'em jarejaupe. Wemifutar imū mama'e apoara 'gā nipo 'ga imojo'oka wemifutare'em imū mama'e apoara 'gā nui.

¹¹ Ymā te Janeruwarete 'ga oje'ega kwasiarukaa Isai 'ga upe rakue:

“Je te 'ā okoeteete ma'ea. Anure nipo wyy pewara 'gā juejue futat wapyka wenupy'āu je rowase ajemogyau je pojeupawa resaukaawamū.

A'e pype nipo 'gā 'i jee: A'jea futat. Ene etee futat Oreruwareteramū ereko, 'jau nipo 'gā ajuemianuwamū jee”,

'jau 'ā Janeruwarete 'ga oje'ega kwasiarukaa Isai 'ga upe rakue.

¹² A'eramū jane a'eramū jarejemome'wau Jarejuwarete 'ga upe. Jarejekwawera jane imome'wau 'ga upe. Nimome'ui jane jarepytuna 'ga rekwawera ete.

¹³ A'eramū ki jane jarejuago'wawe'em.

Peapo awi mama'ea pejepytuna 'gā motywerukaawamū. Pēneko esage resaga te pēpytuna 'gā nomotywerukari.

¹⁴ Jarejararete 'ga ree je tejemujaa ikue. Ma'eramū 'ā je 'ga remifutara kwaawi. A'eramū je 'jau pē nupe: Nitywi futari i'upyre'ema mama'e mū janee numiamū. A'ere 'ā ae juawwywi te. “Tejemi'ue'ema 'ua nipo je motywet Jarejuwarete 'ga upe” 'jara 'gā nupe ia'wrye'ema futat.

¹⁵ A'eramū pēē aipo 'jara 'gā mu'arasige'ema nanuar are. Mama'e 'u enune nipo pēpytuna 'ga amū 'jau pē nupe: “Aga mama'e 'ua nia'wryi Janeruwarete 'ga upe”, 'jau 'gā pē nupe. Aipo pejejeupe 'ga 'eramū pēē i'wawe'em futat 'gā neape. Kasi a'e pe 'gā jane kwaukat Jarejuwarete 'ga upe “janeremi'ue'ema 'waukaa janee” 'gā 'i pē nupe ne. Nanuara pēē iapo re pejekwaukaa a'jea futat. Nepēporomutari futari poromū pejepytuna 'gā nee. Napē katu'okawamū etee rūi Jejuī 'ga manūi. Pēpytuna 'gā katu'okawamū nanē futat Jejuī 'ga manūi rakue. A'eramū ki pēē mama'e apowe'em pejepytuna 'gā motywerukaawamū Jarejuwarete 'ga upe.

¹⁶ “Mama'e esagea etee je aapo”, 'jau nipo pēē pejemiapofer are. A'ere nipo 'ga amū pēnemiapofera resag ire 'jau: “Aipoa nia'wryi Janeruwarete 'ga upe”, 'jau nipo 'gā. A'eramū pēē 'gā neape iapou'jape'ema. A'eramū nipo 'gā pēnemiapofer esage kurape'ema.

¹⁷ Janeruwarete 'ga jane'wyriraretea. Najarejemi'u are rūi jane jemogyi 'ga remi-ayuwamū. 'Ga remifutar imū mama'e apoararete jane jemogyi 'ga remiayuwamū, jane mopy'ata'wau, 'ga 'Agesagea jane maku'iu.

¹⁸ Nan jarejemogyau jane mama'e apou Jejuī 'ga remifutar imū. Aipoa jane iapo re Janeruwarete 'ga worrywamū jane ree. Jane resakara 'gā nanē 'jau nū: "Mama'e esage aipo 'gā wapo", 'jau nipo 'gā janee ojemu'jau jane ree jane resag ire.

¹⁹ Ma'eramū ki sajemogy esage futat jarejujukau esage jarejuee. Aipo apo re nipo jane jarejekoty'aa esage jarejuee. Jarejopoa esage 'jau aipo pyu. Jane jarejomojemogyppygukaa Jejuī 'ga ree.

²⁰ Janeruwarete 'ga Jejuī 'ga rerowiarukaa janepyutuna 'gā nupe. A'eramū pēē a'eramū 'ga rerowiar awi 'gā momoirukare'ema 'gā nemi'ue'ema 'u are. Nitywi futari i'upyre'ema mama'e mū pē nupe numiamū. A'ere jane jarepyutuna 'gā motywerukari Jarejuwarete 'ga upe 'gā nemi'ue'ema 'gā nupe i'uukar ire. Nia'wyrī nanuara.

²¹ A'eramū jane mama'e 'wawe'em nanuara 'gā neape jarejemogyau, "wyro'o 'ua je kwaukat je motywerukaa Jarejuwarete 'ga upe" 'jara 'gā neape. "Y'waynana rykura nanē je kwaukaa 'ga upe nū" 'jara 'gā neape nanē i'wawe'em nū.

²² Pēē mū nipo 'jau: "Nitywi futari i'upyre'ema jee", 'jau nipo pēē. A'eramū pēē etee futat i'wau pejejemogyau pejeapyakawe'em 'gā nee. 'Gā nowase te kasi ajee pe'u ne. "Pe'u etee" 'jawe'em nanē 'gā nupe 'gā muewe'em ne. Jarejuwarete 'ga upe etee pejeporogytau 'gā nee. "Jarejuwarete 'ga upe etee je esage ma'e apoi" 'jara 'gā aku'iramū akou. Nojenosī futari 'ga Jarejuwarete 'ga wi.

²³ "Aipo 'u re sipo je jemote'ari Jarejuwarete 'ga upe" 'jara 'gā ojekwau futat Jarejuwarete 'ga upe aipo 'u re. Nokwaawi 'ga Jarejuwarete 'ga remifutara aipo are. A'eramū 'ga aipo 'u re ojemotywea Jarejuwarete 'ga upe. "Aga nojemotyweri Jarejuwarete 'ga upe" 'e re jane mama'e apou. A'eramū jane jarejemotywere'ema 'ga upe.

15

Jejuī 'ga ree pejomojemogyppyk

¹ Jane Jejuī 'ga ree ojemogyppygarete ma'eramū ki jane 'ga ree ojemogyppyg'gi ma'e 'gā poaa 'ga ree 'gā mojemogyppyg are. A'eramū futat 'gā moywyrafena 'ga rerowiar are. Jarejee etee kasi janerea'ar ine.

² Jarepyutuna 'gā nee nanē ki janerea'at jarejemogyau. "Maran je tepytuna 'ga poaa, 'ga mojemogyppygukareteu Jejuī 'ga ree?" 'jau ki jane jarejeupe, jarejea'aramū 'gā nee. A'eramū jane jarejemogyau esage mama'e apou 'ga nowase Jejuī 'ga ree 'gā mojemogyppygukaawamū.

³ Naojeteē rūi Jejuī 'ga rea'aramū. Naojemuorypawamū ete rūi 'ga mama'e apoi, 'Uwarete 'ga je'ega 'gā enupa. 'Ga rerekou tyweaete agawewi 'gā. A'etea 'ga 'Uwa 'ga je'ega wenup. Ymā te 'ga amū ka'arana kwasiari 'ga ree rakue:

"Ene kurapa 'gā je nanē je kurapa nū, Kiapi'ni",

'jau 'ā 'ga je'ega 'upa ka'aran are ojekwasiaa rakue, Jejuī 'ga kurapawer are futat 'ga inuga rakue.

⁴ Naokwasiarukat tee rūi Janeruwarete 'ga ka'arana 'gā nupe rakue. Wemifutar are jane mu'jawamū te 'ga ka'arana kwasiarukari inugukaa 'gā nupe rakue. Imogytaramū jane jarejemu'jau mama'eay upe jareapyterātā are. 'Ga je'ega rerekwara ka'arana jane imogytaa jane maku'iu jane mogyau. A'eramū jane 'ga pyri jarejemogy rapesaka jarejemogyau.

⁵⁻⁶ Jarejuwarete 'ga upe teje'ega monou te 'yina pē nee: "Ene te 'ā Oreruwaretea, Kiapi'ni. Ene te 'ā ore muapyterātā ape mama'eay upe. Ene te 'ā ore maku'iu mama'e are. A'eramū ki ene eja'ya 'ga rerowiara 'gā mogyau majepeī 'yweteewara 'jawe", 'jau je Jarejuwarete 'ga upe pē nee. Majepeī 'yweteewara 'jawe pejemogyramū nipo pēē mama'e apou Jejuī Kristu 'ga 'jawerimū etee futat. A'eramū nipo pēē Jarejuwarete 'ga muorypa, Jarejararete 'ga, Jejuī Kristu 'ga Ruwarete 'ga muorypa pejeju'jaju'jawe etee futat.

⁷ Jejuī Kristu 'ga oporomutaramū pē nee. A'eramū ki pēē pejeporomutaramū pejejemogyau pejejee. Jejuī 'ga pejefutara 'jawe ete futat pejafutat. Aipoa aporamū nipo pē nesakara 'gā Jarejuwarete 'ga muorypa pē nee.

⁸ Ymā Janeruwarete 'ga 'jau judeu ypy 'gā nupe rakue: "Anure nipo je tejemipyrrūmera 'ga muri pē nupe pē katu'okawamū", 'jau 'ga 'gā nupe rakue. A'eferupi te futat aje 'ā 'ga wa'ya 'ga muri 'gā nupe. "U'eawer imū etee futat Janeruwarete 'ga mama'e apoi", 'jau jane jarejeapyoramū ee.

⁹ Jejuī 'ga mura Janeruwarete 'ga muorywukaa judeue'ema 'gā nupe. "Ene te 'ā ereje-muaēm ore ree. Ma'eramū 'ā eja'ya 'ga eremut ore katu'okawamū", 'jau judeue'ema 'gā Jarejuwarete 'ga muorypa ee. Ymā 'ga amū ka'arana kwasiari aipo are rakue:

“Anure nipo je maraka'agi ene upe judeue'ema 'gā pype.

'Mama'e esagea ereapo jee. A'eramū je ene muorypa ee', 'jau je temaraka'aga ene upe”,
'jau 'ga ikwasiaa ka'aran are rakue.

¹⁰ Aipo are wējēmī futat 'ga amū ka'arana kwasiaa rakue:

“Janeruwarete 'ga judeu 'gā amū'ē ypy imogyau wemiayuwamū.

'Gā netee futat judeue'ema 'gā Jarejuwarete 'ga muorypa ajemogyau”,
'jau 'ga ikwasiaa ka'aran are rakue.

¹¹ Aipo are wējēmī futat amū 'upa nū:

“Judeue'emamū nanē ki pēē Jarejuwarete 'ga muorypa.

Najuejue etee futat wyy pewaramū 'ga muorypa”,
'jau 'ga ikwasiaa inuga rakue.

¹² Isai 'ga nanē ka'arana kwasiaa aipo are futat rakue nū:

“Anure nipo Jese 'ga juapyra 'ga amū ruri pē nupe. Judeue'ema 'gā 'wryriaramū nipo 'ga akou.

Anure nipo 'ga jane rerawau jane mogyau ywag ipe, 'jau nipo judeue'ema 'gā 'ga upe”,
'jau Isai 'ga ka'arana kwasiaa inuga ee rakue.

¹³ Janeruwarete 'ga ojeapesagukaa janee. Anure ojeypyri jarejeroo jane iapesaka jare-jemogyau. Afutat je 'ga pē maku'ia. 'Ga pē mopy'ata'waa nanē je ifutaa nū. Werowiarāmū nipo 'ga aipo apou pē nupe. U'agesage pājē mū 'ga ojee pē mojemogypygukaa tāmējē. A'eramū nipo pēē pejejerowiaa ojeypyri 'ga pejejeroo are.

Paulo 'ga remifutat

¹⁴ Pēē jerewirera 'jawe. Kūjānamū pēē jerenyra 'jawe nanē nū. Pejepota'wa esageramū a'e pejejemogyau pejejuee. Aipoa je ikwaapa. Peje'akwaawamū nanē a'e pejejemogyau nū. A'eramū pēē pejejamu'akwaaparūmū mama'e are.

¹⁵ Aipoa a'jea futat. A'etea je ka'arana kwasiaa mama'e are pē muea'aawamū. Tejenosōue'em futat je ka'arana kwasiaa imonou pē nupe.

¹⁶ Janeruwarete 'ga je mogou Jejui 'ga upe oporowyky ma'eramū. Judeue'emamū pē nupe 'ga je monoi Jejui 'ga mome'waukaa pē nupe. A'eramū je pē mu'jau 'ga ree tekyjawe'em: Jejui 'ga pēē erowiarāmū Janeruwarete 'ga pē katu'oka pē mogyau wemi-ayuwamū. U'agesagea 'ga imua pē nupe, pē muesageawamū ojeupe, 'jau je pē nupe. 'Ga 'Agesagea pē muesage re 'ga worywamū 'ūina pē nee.

¹⁷ Jejui Kristu 'ga ree je jemujari. A'eramū je tejerowiaa Jarejuwarete 'ga upe teporowyky are te'ŷina.

¹⁸ A'eramū je 'ga upe teporowykyawera mome'wau pē nupe. Tejenosōue'em je imome'wau pē nupe. Natejeteē rūi je porowykyi 'ga upe. 'Ga te je moporowykyukat ojeupe. Jejui 'ga je mogou judeue'emamū pē nupe, 'Uwa 'ga je'ega renuwukaawamū pē nupe ikue. Te'eawer imū nipo je 'ga rerowiarukaa pē nupe ikue. Tejemiapofer imū nanē nipo je 'ga rerowiarukaa pē nupe nū.

¹⁹ U'agesagea 'ga imua jee. A'eramū je 'ga pājē mū aeremiapoe'ema apou. A'eramū 'gā aipo resag ire 'ga rerowiaa. Amunawa moyka je tewau tekou 'ga mome'wau kwe pewara 'gā nupe. Jerusareg ipe je 'ga mome'u ypyrugi ikue. A'e awi je tewau 'ga mome'wau tekou 'gā nupe amuna'wi pe. Amuna'wi moyka 'ga mome'wau ikue. Tewau tewaēma Iliria ka'a pe. A'eramū je Iliria ka'a pewara 'gā nupe nanē Kristu 'ga mome'wau ikue.

²⁰ Kristu 'ga ree jeporomome'uweramū 'ga rera renupare'ema 'gā nupe. Nafutari je 'ga mome'uawera amunaw ipe etee 'ga mome'ua tekoo 'ga amū py'rau nū. Najeporo-mome'uweri je 'ga rera renupara 'gā nupe ete. 'Ga rera renupare'ema 'gā nupe 'ga mome'u are te jefuweramū.

²¹ Ymā 'ga amū ka'arana kwasiaa ee rakue:

“'Ga rera renupare'ema 'gā nanē 'ga rera wenup futat nū.

'Ga rera kwaapare'ema 'gā nipo 'ga rer are eapyo nanē akou”,

'jau 'ga ikwasiaa ka'aran are rakue.

²² Ma'eramū je 'ā nooa'nei pē pyri. 'Ga rera renupare'ema 'gā nupe ra'ne je oi 'ga mome'wau.

²³⁻²⁴ 'Auwara 'gā nupe je Kristu 'ga mome'wau'jau'japa. A'eramū nipo je tewau pē nesaka. Ymā we jeparuesagiweramū pē nee. A'eramū nipo je tewau pē nesaka. Anure nipo je oi Espājā wyy pe. A'eramū je tewaw ipe Roma pe tekotekou'i tepytau ra'ne. Pejejepype je rekoramū nipo jane jareku'iramū jarejuee. A'eramū nipo pēē mama'e mua jee jeremirooramū je poawamū.

²⁵ A'ere je nooi we. Jerusareg ipe ra'ne je oi, Jarejuwarete 'ga remiayua 'gā poaawamū.

²⁶ Masetoni wyy pe Jejui 'ga rerowiaara 'gā ka'aranū pe muri jee Akaja wyy pewara 'gā netee ai'i, Jerusareg ipewara 'gā, Jejui 'ga rerowiaara 'gā nupe ai'i. Jerusareg ipewara

'gā amū nitywi futari mama'e pyu. A'eramū kwe pewara 'gā ka'aranūū mua 'gā nupe 'gā poaawamū. A'eramū je a'e rerawau Jerusareg ipe 'gā nupe.

²⁷ Wemifutar imū etee futat 'gā oka'aranūū majatykau 'gā nupe, 'gā poaawamū. A'ea 'gā nemiapoa esage futat. Judeu 'gā futat Jejuī 'ga mome'wau judeue'ema 'gā nupe rakue. A'eramū 'awamū judeue'ema 'gā ka'aranūū monou judeu 'gā nupe 'gā poaawamū. Aipoa esage futat.

²⁸ A'eramū je 'gā ka'aranūū rerawau 'gā nupe. 'Gā nupe eroo ejar ire te nipo je oi Espājā ywy pe. Tewaw ipe nipo je tepytawaipe pē pyri.

²⁹ Pē nupe tewaēm ire nipo je tejeupe Jejuī 'ga remiapofera mome'wau pē nupe. Pē pype je rekoramū nipo Kristu 'ga mama'e esage apou'jau'japa janee.

³⁰ Jejuī Kristu 'ga janejararetea. 'Ga ree jane jemogypygyi jarejemogyau. Janeruwarete 'ga 'Agesagea jarejafutarukaa janee. A'eramū ki pejeje'ega monou Jarejuwarete 'ga upe je ree, je poaawamū.

³¹ "Ea'gu ki Paulo 'ga ejerowiare'ema 'gā nui Judeja ywy pewara 'gā nui, Kiapi'ni. Ejerowiaara 'gā emaku'ukuk Jerusareg ipe Paulo 'ga remireroofer are. Judeue'ema 'gā ka'aranūū are ene 'gā maku'iu", pe'je ki 'ga upe pejeje'ega monou 'ga upe je ree.

³² Aipoa Jarejuwarete 'ga iapo re nipo jeku'iramū tewaēma pē nupe. Pē pyri Jarejuwarete 'ga teo futaramū nipo je oi futari pē pyri. A'eramū nipo jane jareku'iramū jarejuee.

³³ Janeruwarete 'ga jane mopy'ata'waara mama'e are. Pē pype 'ga rekoo je ifutaa tekou. A'jea futat je'ea.

16

Oje'ega 'ga imonou 'gā nupe 'gā futaa

¹ Anurenure'i nipo janerenyra ēē, Fepe ēē oi pē pyri. Jarejuwarete 'ga upe ēē porowykyi Sēkreja 'jaw ipe, Jejuī 'ga rerowiaara 'gā poaaramū.

² A'eramū ki pēē pejejeupe ēē waēmamū pēē ēē monou pejejog ipe. Jarejararete 'ga pejejeupe iwaēma 'jawe futat pēē ēē rerekou ēē monou pejejog ipe. Nanuara ki Jarejuwarete 'ga remiayuwamū siapo jarejaupe. Jejuī Kristu 'ga upe ēē porowykyi. A'eramū pēē ēē poaa, mama'e monou ēē upe ēē ifutaramū. Ymā ēē je poari ai'i. Tekotee 'gā nanē ēē ipooa nū.

³ Prisira ēē upe je teje'ega rerooukari ēē futaa. Eēmena 'ga upe nanē nū, Akira 'ga upe nanē je imonou nū. Je pyri futat 'gā nekoi oporowykyau Jejuī Kristu 'ga upe ikue.

⁴ 'Gā futat je jukaukare'ema ikue, je a'gwau ikue. 'Gā etee ojejukaukaa werewi je a'gwaaw ipe ikue. A'eramū je teku'iramū 'gā nee, 'gā mome'wau kwe pewara 'gā nupe. A'eramū judeue'ema 'gā nanē aku'iramū 'gā nee nū, 'gā je a'guawer are nū. "Au'jete pea'gu Paulo 'ga rakue", 'jau 'gā 'gā nupe je ree.

⁵ Akira 'ga rog ipe kwaiwete 'gā jatykai Jarejuwarete 'ga muorypawamū. A'eramū je 'gā nog ipe ajatyka ma'eramū 'gā nupe nanē teje'ega monou 'gā futaa nū.

Ipeneto 'ga jejekoty'aawaretea. 'Ga ra'ne Jejuī 'ga rerowiaa Asia ywy pe ikue. 'Ga upe je teje'ega monou 'ga futaa nū.

⁶ Mari ēē upe nanē je teje'ega monou ēē futaa nū. Pē nupe ēē porowykyi kwaiwete.

⁷ Ātrōniku 'ga upe, Juniasi ēē upe je teje'ega monou 'gā futaa. Jepyuna futat 'gā. Jejuī 'ga rerowiare'ema 'gā 'gā imonou imunepa moromunepawa pype je pyri ikue. 'Gā Jejuī 'ga remimonofera nanē futat rakue nū. Ymā Jejuī 'ga 'gā monou ojemome'waukaa rakue. Jejuī 'ga rerowiaara 'gā 'gā kwaapa najuejue etee futat. Kristu 'ga ree 'gā jemogypygyi je renunewe futat rakue.

⁸ Āpriatu 'ga upe nanē je teje'ega monoi nū. Jarejararete 'ga ree 'ga jemujari. Jejekoty'aawa 'ga.

⁹ Upanu 'ga upe nanē je teje'ega monou. Ore 'jawe 'ga porowykyi Kristu 'ga upe. Estaki 'ga upe nanē je teje'ega monou. Estaki 'ga jejekoty'aawaretea.

¹⁰ Apeles 'ga upe nanē je teje'ega monou nū. Mama'eay upe 'ga wapyterātānamū opoire'ema Kristu 'ga rerowiar awi. Aristaporu 'ga pytuna 'gā nupe nanē je teje'ega monou.

¹¹ Eroitāu 'ga upe nanē je teje'ega monou. Jepyuna futat 'gā ā. Narisu 'ga pytuna 'gā amū nupe nanē je teje'ega monou, Jejuī 'ga rerowiaaramū 'ga nupe.

¹² Trifena ēē upe, Trifosa ēē upe we je teje'ega monoi. Jarejararete 'ga upe nanē 'gā porowykyi nū. Persi ēē jejekoty'aawa. Jarejararete 'ga upe ēē nanē oporowykyau kwaiwete. Eē upe nanē je teje'ega monoi ēē futaa.

¹³ Rufu 'ga upe nanē je teje'ega monou nū. Jarejararete 'ga upe oporowyky ma'ereite 'ga. 'Ga y ēē upe nanē je teje'ega monou. Wa'yra 'jawe ēē je rerekoi jepi.

¹⁴ Asīkrito 'ga upe, Flegōte 'ga upe, Hermes 'ga upe, Patrobas 'ga upe, Hermas 'ga upe, 'gā pytuna 'gā nupe we.

¹⁵ Filologo 'ga upe, Julia ēē upe, Nereu 'ga upe, 'ga renyra ēē upe, Olīpas 'ga upe. Mīmera 'gā nupe je teje'ega monou 'gā futaa. 'Gā pyriwara 'gā nupe we futat je teje'ega monoi, Jarejuwarete 'ga remiayuwamū 'gā nupe juejue je teje'ega monou.

¹⁶ Pejoman pāwē pāwē ki 'gā 'gā futaa. Jejuī 'ga rerowiaara 'gā juejue oje'ega monou pē nupe, pē futaa.

Paulo 'ga 'gā mu'akwaapawet

¹⁷ Pēē jerewirera 'jawe. Kūjānamū pēē jerenyra 'jawe. A'eramū je pē mu'akwaapa mama'e are. Oo ekoete nipo 'gā amū o'meramū Jejuī 'ga rerowiaaramū pē nupe: “Simote-sirūgatu 'gā 'jau, 'gā mojo'okawamū 'jau”, 'jau nipo 'gā awau pē nupe. Pejea'gu ki 'gā nui. Perowiat kasi 'gā je'ega ne. “Gā pē mu'ea nia'wyrī futari. Ore te aramu'e esage pēē”, 'jau nipo 'gā awau pē nupe. Pejepe'a etee ki 'gā nui.

¹⁸ NaJanejarete 'ga remiayuwa 'gā nūi poromū. NaKristu 'ga upe rūi aipo 'gā porowykyi. Wemifutar imū etee 'gā ajamu'jau ekoete. O'meramū te 'gā 'i, i'akwaawe'ema 'gā moryteeu ee.

¹⁹ A'ere nanarūi pēē. Jejuī 'ga ree morogyta esagea pēē erowiaa pejejemogyau. A'eramū je teku'iramū pē nee. Afutat je pēē mama'e esage etee iapo. Pēē mama'e tywera apo. Je ifutare'ema.

²⁰ Janeruwarete 'ga jane mopy'ata'wararetea. Anurenure'i nipo 'ga mama'eukwaawa 'wyrīara pājē mateepapa pē nupe. A'eramū nipo emiayuwa pē moryteeu'jape'ema mama'e are. Jarejararete 'ga upe je je'egi pē nee tekou: “Mama'e esagea eapo 'gā nupe. Ejejuka esage Roma pewara 'gā nee”, 'jau je Jarejararete 'ga upe, Jejuī Kristu 'ga upe pē nee tekou.

²¹ Timoteo 'ga, je pyri oporowyky ma'ea 'ga nanē oje'ega monou pē nupe pē futaa. Lusiū 'ga, Jasāu 'ga, Sosipatu 'ga. Judeua 'gā je 'jawe. 'Gā nanē “Jarujete te 'gā jemogyi” 'ea werooukat pē nupe nū.

²² Tersiarumū je upe Paulo 'ga ka'arana kwasiarukari jee pē nupe. Jejuī 'ga rerowiaaramū je nanē teje'ega monou pē nupe nū.

²³⁻²⁴ Gaio 'ga rog ipe je rekoī. 'Au futat Jejuī 'ga rerowiaara 'gā ajatykau Jarejuwarete 'ga muorypawamū. Gaio 'ga nanē oje'ega monou pē nupe. Erasto 'ga nanē oje'ega monou pē nupe. 'Auwaramū ore 'wyrīara 'ga upe ka'aranūi raarana 'ga. Kwaritu 'ga nanē oje'ega monou pē nupe. Janerewirera 'jawe 'ga nanē futat.

Jarejuwarete 'ga muorypawet

²⁵ Simuoryp ki Jarejuwarete 'ga! 'Ga 'ā Jejuī 'ga rerowiarukararūmū pē nupe. Jejuī Kristu 'ga ree morogyta esagea je imome'wau kwe pewaramū pē nupe. Ymā Janeruwarete 'ga namueapyoi 'gā Jejuī 'ga ree rakue. A'ere 'awamū 'ga jane mueapyoi 'ga ree.

²⁶ Ymā Janeruwarete 'ga oje'ega kwasiarukaa ka'aran are oje'ega mome'wara 'gā nupe rakue. Jejuī 'ga ree 'gā ka'arana kwasiari. A'ere Janeruwarete 'ga 'gā namueapyo katui ee. A'eramū 'gā weapyoe'emamū ajemogyau ee rakue. A'ere 'awamū Janeruwarete 'ga, Okoeteete ma'e 'ga jane mueapyo katui ee. A'eramū 'ga Jejuī 'ga mome'waukaa jane. “Jejuī 'ga ree morogyta esagea pemome'u kwe pewara 'gā nupe najuejue etee. A'eramū 'gā 'ga rerowiaa, 'ga je'ega renupa”, 'jau 'ga janee jane monou 'ga mome'wawamū.

²⁷ A'eramū ki jane a'e are Jarejuwarete 'ga muorypa. 'Ga 'ā i'akwaaw ekoete ma'e 'gā wapyraap. Ymā 'ā 'ga Jejuī Kristu 'ga muri ywy pe 'ga jukaukaa janetywera mepyawamū rakue. A'eramū ki jane a'e are 'ga muorypa.

Kweramū jeje'ega.

1 Korītu

Paulo 'ga wata Jejuu 'ga mome'wau kwe pewara 'gā nupe rakue. A'eramū 'ga awau 'ga mome'wau Korītu pewara 'gā nupe. (Atos 18.1-18) Pe awi o re 'ga 'gā nera renupa. 'Ga amū mama'e tywera apou akou. A'eramū Paulo 'ga ajemuaēma 'gā nee. A'eramū Janeruwarete 'ga 'Agesage ka'arana kwasiarukaa Paulo 'ga upe. A'eramū Paulo 'ga ka'arana kwasiaa imonou 'gā nupe 'gā mu'akwaapa 'gā neko esage are rakue.

¹ Je Pauloramū ka'arana akwasiat imonou pē nupe. Sotene 'ga ako 'au futat je pyri. Je 'ā Jejuu Kristu 'ga remimonoferamū. Ymā ako Jejuu 'ga je monoi kwe pewara 'gā nupe omome'waramū ikue. “Kwe pe ekwap je mome'wau ekou 'gā nupe”, 'jau 'ga jee ikue. 'Uwarete 'ga remifutar imū etee futat 'ga ako je monou kwe pe ikue. A'ere 'ga namajepei amunaw ipe etee omome'wawāu rūi je mogoi ikue. Kwe pewara amunap tesirūmera pype omome'wawamū nanē 'ga je mogoi ikue nū.

² A'eramū je ka'arana kwasiaa tekou imonou Korītu pewaramū pē nupe, Jarejuwarete 'ga remiayuwamū pē nupe. Pēē 'ā pejemujat Jejuu Kristu 'ga ree rakue. Ymā te 'ā Janeruwarete 'ga pē mū'ēi werowiare'ema 'gā nui rakue. Jejuu Kristu 'ga pēē erowiaramū 'ga pē mū'jāu pē mogyau wemiayuwamū rakue. “Je poar ape mama'e apou ejemifutar imū”, Jarejararete 'ga upe 'jara 'gā nupe juejue nanē je ikwasiari imonou nū. Jejuu Kristu 'ga 'gā jararetea. Jarejararetea nanē 'ga nū. A'eramū je ikwasiaa tekou 'gā nupe.

³ Ku'jywa 'ga 'ā Janeruwaretea. Jejuu Kristu 'ga nanē 'ā Jarejararetea futat nū. 'Gā nesagea pē nerekoa je afutat. 'Gā pē mopy'ata'waa nanē je ifutaa nū.

Mama'e esagea jane upe 'ga iapoawet

⁴ Amuoryp je Jarejuwarete 'ga pē nee jepi. Jejuu Kristu 'ga pēē erowiaramū Janeruwarete 'ga pē mogyi wa'yramū. Opo'tawaramū 'ga pē nee nanē nū. A'eramū je 'ga muorypa ee.

⁵ Kristu 'ga ree ako pejemujat ikue. A'eramū Janeruwarete 'ga mama'e esage apou pē nupe kwaiwete. 'Awamū te 'ā 'ga futat jekwaawukari pē nupe. 'Ga futat 'ā pē katu'ok rai'i. 'Ga futat 'ā pē mueapyoukaa oje'eg are. 'Agamū 'ga futat 'ā ojemome'waukaa pē nupe.

⁶ A'jea futat Jejuu Kristu 'ga mome'u resei pē akaga pype rakue. A'eramū pēē 'ga rerowiar wyypiau pejemogyau.

⁷ Ma'eramū 'ā Janeruwarete 'ga a'jea futat pē mueapyoi wemifutar are. 'Ga futat 'ā oporowyky esage apoukaa pē nupe. A'eramū pēē Jejuu Kristu 'ga rura rapesaka pejemogyau, Jarejararete 'ga rura rapesaka. A'eramū Janeruwarete 'ga 'ga rura poromukuran mama'e esage apoukaa pē nupe.

⁸ 'Ga futat 'ā Jejuu 'ga rerowiar wywapiukat pē nupe rakue. A'eramū 'ga wowase jane majatykaaw ipe pē monowe'em muku ojewi. “Ene tee futat erejekwa je pyri ejore'em are rakue”, 'jawe'em pē nupe, Jejuu Kristu 'ga ruaw ipe.

⁹ U'eawer imū etee futat Janeruwarete 'ga mama'e apoi. A'eramū jane jarejemogyppyka jarejemogyau 'ga ree. 'Ga 'ā jane mū'ē werowiare'ema 'gā nui, jane mujaa jane mogyau wa'yra 'ga, Jejuu Kristu 'ga ree. Jarejararete 'ga ree jane mujaa jane mogyau. A'eramū jane jarejemogyppyka 'ga ree.

Kristu 'ga etee ki perowiat

¹⁰ Pēē 'ā Jejuu 'ga rerowiaa je 'jawerimū etee futat pejemogyau jee. A'eramū pēē pejemogyau jerewirera 'jawe jee. Kūjāmeramū pēē pejemogyau jerenyra 'jawe jee. Jarejararete 'ga je mogo opoirūnamū ikue. A'eramū je 'ga je'eg imū 'jau pē nupe: “Ma-jepi 'yweteewara 'jawe pejemogy. 'Awamū pejamue awi mama'e are. Mama'e are pejejea'aramū pejeju'jawe etee futat”, 'jau je pē nupe.

¹¹ Kylu ēē pytuna 'gā amū pē mome'wau jee ai'i. “Korītu pewara 'gā ajamue are ete ajemogy”, 'jau 'gā pē mome'wau jee ai'i.

¹² Amumeramū a'e pēē 'jau: “Je Paulo 'ga remimome'ua te arowiarete”, 'jau a'e pēē mū. Amumeramū a'e pēē 'jau: “Je Aporu 'ga remimome'ua te arowiarete”, 'jau a'e pēē mū. Amumeramū a'e pēē 'jau: “Je Pedro 'ga remimome'ua te arowiarete”, 'jau a'e pēē mū. Amumeramū a'e pēē mū 'jau: “Je Kristu 'ga te arowiarete”, 'jau a'e pēē mū.

¹³ A'eramū je teporonupa ee pē nupe: “Irūpāwē sipo Kristu 'ga pytuna 'ga rekoramū rakue, ajee nā'ā aipo pe'je re'ā”, 'jau je pē nupe. Naani. Majepei tee futat 'ā 'ga rekoi rakue. A'eramū pēē au'je aipo apo re. Kristu 'ga etee futat amanū 'ypeywar are janetywera mepyaawamū rakue. NaPauloramū rūi ako je manūi 'ypeywar are pētywera mepyau ikue. Jerer imū sipo 'ga amū pē pymī 'y pe rai'i? Naani.

¹⁴⁻¹⁵ Jejuu 'ga rer imū te ako 'gā pē pymī rai'i. Naje rūi ako apymī pēē 'y pe ai'i. Krisipu 'ga, Gaio 'ga. Mīmera 'gā etee je apymī 'y pe ai'i. A'eramū “Paulo 'ga je pymī 'y pe wemiayuwamū

je mogoawamū ai'i" 'jara 'gā amū otywe'emamū kwe pe. A'eramū je Jarejuwarete 'ga muorypa ee.

¹⁶ Estefana 'ga, 'ga pytuna 'gā netee nanē je 'gā pymīāu 'y pe ikue. Maran gatu nipo je mīmer imū 'gā amū pymīāwe'em rakue. Amoka'jam te nipo je kwe pe 'gā amū pymīāwera.

¹⁷ Na'gā pymīāwāu rūi Kristu 'ga je monoi kwe pe ikue. Omome'waramū te 'ga je monoi ikue. 'Ypeywar are 'ga manūawera etee je amome'u pē nupe. "Kristu 'ga amanū 'ypeywar are janetywera mepyawamū" 'ea etee je amome'u tekou pē nupe. Natejea'ara etee rūi je amome'u tekou pē nupe. Tejea'ara etee imome'u re amunipo 'ā je a'jea futat je porogyta ekoetei tekou. A'ere je 'ā Kristu 'ga tee imome'ui 'gā nupe. A'eramū nipo 'gā weapyoramū 'ga ree. A'eramū nipo 'gā amū 'ga rerowiaa. Werowiaramū nipo Kristu 'ga 'gā katu'oka, 'gā tywera moia 'gā nui, 'gā mogyau Jarejuwarete 'ga ra'yramū.

Janetywera mepyawamū 'ga amanūawet

¹⁸ "Ypeywar are Kristu 'ga manūi janetywera mepyawamū" 'e renupawe 'ga rerowiaaramū jane 'i: "Janeruwarete 'ga ra'yra 'ga amanū janetywera mepyawamū te. A'eramū 'ga jane katu'oka opājē mū wa'yra 'ga jane erowiarāmū", 'jau jane. A'ere mama'eukwaawa rapyaw ipe oo ma'erama 'gā nuerowiari futari nipo 'ga. A'eramū nipo 'gā 'jau ajaupe: "Ma'eramū gatu nipo 'ga manūi rakue? Amanū ekoete tee nipo 'ga rakue", 'jau etee futat nipo mama'eukwaawa rapyaw ipe oo ma'erama 'gā ajaupe.

¹⁹ Ymā te 'ā Janeruwarete 'ga ka'arana kwasiarukari 'ga amū upe rakue: "Amatepap je pē'akwaawa pē nui", 'jau 'ga ikwasiarukaa 'ga amū upe rakue. "U'akwaaw are ojerowiarap ma'e 'gā nura'uweri futari je pyri", 'jau Janeruwarete 'ga. "Jetywer are futat 'ā Jejui 'ga manūi rakue 'e rerowiaara 'gā etee te 'ut je pyri", 'jau Janeruwarete 'ga.

²⁰ Janeruwarete 'ga upe u'akwaaw are ojerowiarap ma'e 'gā i'akwaawe'ema 'jawe. Nuerowiari 'gā Jejui 'ga. A'eramū 'gā i'akwaawe'ema 'jawe ajemogyau Janeruwarete 'ga upe. Ojemu'e ma'e 'gā, oporogyta esage ma'e 'gā. Mīmera 'gā jemogyi i'akwaawe'ema 'jawe Janeruwarete 'ga upe Jejui 'ga rerowiare'em ire.

²¹ Janeruwarete 'ga 'ā i'akwaakwaap ma'ea. A'eramū 'ga ojekwaawukare'ema "Je'akwaap je" 'jara 'gā nupe. Naae'akwaaw ekoeteu rūi 'ga jekwaawukari ae upe. Omome'u rerowiarāmū te 'ga jekwaawukari ae upe. Kristu 'ga mome'u rerowiarāmū etee te jane 'ga kwaawi. "Kristu 'ga amanū jetywera mepyawamū rakue", jane 'eramū te 'ga jane katu'ogi. A'ere 'ga rerowiare'ema 'gā naeapyoi ee. "Nepē'akwaawi pēē", 'jau futatee nipo 'ga rerowiare'ema 'gā janee jane jemogyramū. "Jejui 'ga amanū janetywera mepyawamū, pe'je numiamū. A'ere pē'akwaawe'ema te pē nereko'i", 'jau futatee nipo 'gā janee. A'ere Janeruwarete 'ga te i'akwaap ma'e 'gā 'akwaawa apyraawi. Ma'eramū 'ga 'ā jane katu'ogi wa'yra 'ga jane erowiarāmū.

²² A'ea judeu 'gā nuerowiari. A'eramū 'gā 'jau ore: "Aeremiapoe'ema mū peapo amū ore reape. A'eramū te nipo ore pe'je'ega rerowiari", 'jau 'gā ore. "Na pa je ra'e. A'jea futat Janeruwarete 'ga aeremiapoe'ema apoukari 'gā nupe ra'e, taru'e 'jau", 'jau 'gā ore. "Ga je'eg imū futat 'ga ruri ra'e, taru'e esag ire 'jau", 'jau 'gā ore. Judeue'ema 'gā teewi nū, oporesagiweraiawamū u'akwaaw are.

²³ A'ere ore Jejui 'ga etee futat imome'ui 'gā nupe. "Ypeywar are Jejui 'ga manūi janetywera mepyawamū rakue", 'jau ete futat ore imome'wau 'gā nupe. A'ere judeu 'gā nafutari oreremimome'ua. "Nia'wyri Paulo 'ga remimome'ua ra'e", 'jau etee futat 'gā ajaupe. Judeue'ema 'gā judeu 'gā nui ete nū "morgyta ukwaawe'ema te 'ga omome'u akou ra'e", 'jau ete 'gā ore nū.

²⁴ A'ere Janeruwarete 'ga remimū'ēnamū Kristu 'ga mome'u resageteramū janee. Judeu-ramū 'ā janee, judeue'ema 'gā nupe. Mimeramū 'ā jane 'ga remimū'ēmeramū najuejue etee futat Kristu 'ga mome'u resageteramū janee. Kristu 'ga 'ā Janeruwarete 'ga pājē wesaukat janee, 'ga 'akwaawa nanē 'ga ikwaawukaa janee nū.

²⁵ Janeruwarete 'ga rerowiare'ema 'gā te nipo ajee e'i futatee ajemogyau: "Kristu 'ga manūa Janeruwarete 'ga 'akwaawe'ema wesaukat janee, 'ga pājē'ema resaukaa janee", 'jau futatee 'gā ajaupe. A'ere jane naani. Kristu 'ga manūa Janeruwarete 'ga 'akwaawa te wesaukat janee. 'Ga 'ā mama'e are eapyo katu katu ma'ea te werowiare'ema 'gā 'akwaawa apyraapa. 'Ga 'ā pājērete werowiare'ema 'gā pājē apyraapa.

²⁶ Pēē 'ā jerewirera 'jawe. Kūjāmeramū pēē pejejemogyau jerenyra 'jawe. A'eramū je 'jau pē nupe: pēnea'ar iki pejeko ymaner are, Janeruwarete 'ga pejekatu'oge'ema uwe pejejemogyawer are. "I'akwaawe'ema 'gā", 'jau nipo 'gā pē nupe pejemogyramū. "Na'wyriara rūi 'gā", 'jau nipo 'gā pē nupe. "Tore pojeupap 'jau, e'i 'gā numiamū", 'jau nipo 'gā pē nupe.

²⁷ A'ere 'ā Janeruwarete 'ga te jane mū'ēi 'gā nui wemifutar imū etee futat. Ijemu'e'ema 'gā 'ga omogy wemiayuwamū, "Je te 'ā je'akwaakwaap" 'jara 'gā mojenosdu etee nipo. "Tyy. Ma'eramū sipo 'ga ijemu'e'ema 'gā jēmī imogyau wemiayuwamū? Ma'eramū sipo

'ga ojemu'e ma'eramū jēmī ore mogowe'em wemiayuwamū?" 'Jau 'gā ojenosōu ajuowase. 'Wyriare'ema 'gā 'ga omogy wemiayuwamū 'wyriara 'gā mojenosūkaawamū.

²⁸ Ipojeupawipyre'ema 'gā 'ga omogy wemiayuwamū "jepojeupap je" 'jara 'gā mojenosūkaawamū. "Akotee ma'e 'gā", 'Jau 'gā 'ā jane mū nupe numiamū. A'ere Janeruwarete 'ga jane mogyi wa'yramū.

²⁹ Najane te rūi sajemogy 'ga ra'yramū. 'Ga te jane mogyi wa'yramū. A'eramū jane jarejerowiaraipe'ema jarejee Jarejuwarete 'ga rowase.

³⁰ Janeruwarete 'ga te 'ā jane mujat Jejui Kristu 'ga ree. A'eramū 'ga 'ā jane mu'akwaawukaa Jejui Kristu 'ga upe. A'eramū Jejui Kristu 'ga jane muesageu 'Uwarete 'ga upe. Jejui Kristu 'ga 'ā janetywera mepyau jane mū'jāu mama'eukwaawa 'wyriara remiayuw awi, jane mogyau 'Uwarete 'ga remiayuwamū. Jejui Kristu 'ga futat janetywera omoit jane wi.

³¹ A'eramū ki jane jarejerowiaa 'ga ree etee futat. Ymā we futat 'ā Janeruwarete 'ga ka'arana kwasiarukari Jeremi 'ga upe rakue: "Pejejararete 'ga ree etee ki pejerowiat pejejemogyau. Pejejeupe 'ga remiapofer are nanē ki pēē pejejerowiaa pejejemogyau nū", 'Jau 'ga ikwasiarukaa Jeremi 'ga upe rakue. A'eramū ki jane jarejerowiaa Jarejararete 'ga ree etee futat.

2

¹⁻² Pē pyri tekou ako je Jarejuwarete 'ga etee imome'ui pē nupe ikue. "Ymā te 'ā Janeruwarete 'ga wa'yra 'ga muri 'au wvy pe janetywera mepyawamū rakue. 'Ypeywar are 'ga ra'yra 'ga, Jejui Kristu 'ga amanūmū janetywera mepyawamū rakue", 'Jau je ako tekou pē nupe ikue. "A'eramū 'ga 'awamū jane werowiarāmū janetywera moia jane wi, jane katu'oka, jane mogyau wemiayuwamū", 'Jau je ako pē nupe ikue. Nasigaty rūi futat ako je imome'wau pē nupe ikue. "Jejui Kristu 'ga etee futat pa je amome'u tekou 'gā nupe kwy", 'Jau je tekou ikue. "A'eramū pa je 'ypeywar are 'ga manūawera etee futat imome'wau 'gā nupe kwy", 'Jau je tejeupe pē pype tekou ako ikue. A'eramū ako je 'ga etee futat imome'wau pē nupe ikue. Namome'u tesirūmeri nanē ako je pē nupe ikue nū. Jejui Kristu 'ga etee futat ako je imome'wau pē nupe ikue. Namorogyta teea rūi nanē ako je amome'u pē nupe ikue. Jarejuwarete 'ga je'ega te ako je amome'u pē nupe ikue. Ymā te janepypp 'gā naeapyoii ee rakue. A'ere Janeruwarete 'ga 'awamū jane mueapyoukari ee.

³ Najepifuakari agawewi ako je tekou pē pyri ikue. A'etea ako je ako tepifuakare'ema pype etee futat 'ga mome'wau pē nupe ikue. A'eramū je 'Jau tejeupe etee futat ikue: "Amome'u esage futat sipo je 'ga tekou 'gā nupe 'wei?" 'Jau je tejeupe etee futat ikue. Pē nupe 'ga mome'uarūe'em awi tekyjau ikue.

⁴ Nate'akwaaw imū rūi je ako pē mu'ei morogyta a'je are ikue. Namoromu'jara 'gā temu'eawer imū rūi nanē je ako pē mu'jau ee ikue nū. Jarejuwarete 'ga 'Agesagea temueapyoaw imū etee futat ako je imome'ui pē nupe ikue. Janeruwarete 'ga 'Agesagea je rereko. A'eramū 'ga 'Agesagea Jejui 'ga mome'waukaa jee pē nupe ikue. A'eramū ako 'ga 'Agesagea jeremimome'ufera rerowiarukaa pē nupe ikue. A'eremiapoe'ema nanē ako 'ga iapoukaa jee pē neape ikue nū. A'eramū ako pēē 'ga pājē resaka ikue.

⁵ 'Ga 'Agesagea futat ako Jejui 'ga rerowiarukaa pē nupe ikue. Napeje'akwaaw are rūi ako pēē 'ga rerowiaa ikue. U'agesageu te Janeruwarete 'ga Jejui 'ga rerowiarukari pē nupe.

Janeruwarete 'ga u'akwaawamū

⁶⁻⁷ A'ere je Jarejuwarete 'ga je'eg are eapyo ma'eramū pē mu'akwaawi mama'e are. Jarejuwarete 'ga 'akwaaw imū tee je pē mu'akwaawi mama'e are. Na'ga rerowiare'ema 'gā 'akwaaw imū rūi je pē mu'akwaawi ee. Na'ga rerowiare'ema 'gā 'wyriara 'gā 'akwaaw imū rūi nanē je pē mu'akwaawi ee nū. Anure nipo 'ga rerowiare'ema 'gā juejue amanūmū ekoete te futat. Ma'eramū 'ā je pē mu'akwaawi Jarejuwarete 'ga 'akwaaw imū etee futat ee. Naeapyoii janepypp 'gā Jarejuwarete 'ga remiaporam are rakue. Ywy apoe'emauwe futat 'ā Janeruwarete 'ga 'i ojeupe rakue: "Anure nipo jera'yra 'ga manūi 'ypeywar are 'gā tywera mepyawamū", 'Jau 'ga 'ā rakue. "A'eramū je 'ga rerowiaara 'gā katu'oka 'gā mogyau teja'yramū", 'Jau 'ga 'ā ojeupe rakue. A'ere 'ā janepypp 'gā naeapyoii ee rakue. "Anure Jejui 'ga manūi janetywera mepyawamū" 'e are 'gā weapyo'e'amamū ajemogyau rakue. A'ere jane 'awamū 'ga rerowiaaramū janereapyoramū ee.

⁸ Kristu 'ga rerowiare'ema 'gā 'wyriara 'gā nanē naeapyoii 'ga ree nū. 'Ga ree weapyo re amunipo 'ā 'gā namu'amukari 'ga 'ypeywar are rai'i. "Jejui Kristu 'ga 'ā Janejararetea. 'Ga 'ā jane katu'okara. 'Ga 'ā pājēeteeta" 'e are 'gā weapyo'e'amamū. Ee weapyo re amunipo 'ā 'gā namu'amukari 'ga 'ypeywar are rai'i.

⁹ Ymā te 'ā Janeruwarete 'ga ka'arana kwasiarukari Isai 'ga upe ee rakue: "Ojee iporomutat ma'e 'gā nupe Janeruwarete 'ga mama'e esage m'yigatu. Niesagi jane mama'e esagea Jarejeupe 'ga remim'yigatu 'Jawewara.

Nienuwi futari jane 'ga remiaporama rera. Janereapyoi futari jane 'ga remiaporam are.

A'ere 'ga ojee iporomutat ma'e 'gā nupe etee futat iapoi",
'jau 'ga ikwasiarukaa ka'aran are Isai 'ga upe rakue.

¹⁰ A'ere Janeruwarete 'ga jane mueapyoukari U'agesage upe ee. 'Ga 'Agesagea okwaapap futat. Nitywi futari 'ga 'Agesage remikwaawe'ema mū. Janeruwarete 'ga rea'ara miamū 'ga 'Agesagea okwaap.

¹¹ Sā'ā jane tee jarejea'ara kwaawa. Nan tee futat Janeruwarete 'ga 'Agesagea tee 'ga rea'ara kwaawi.

¹² Jejuī 'ga rerowiaaramū jane upe Janeruwarete 'ga U'agesage muri. Namama'eukwaawa rūi jane sireko. Jarejuwarete 'ga 'Agesagea te jane sireko. A'eramū 'ga 'Agesagea jane mueapyoukaa jane upe 'ga remimurer are.

¹³ A'eramū ore pē mu'jau Jarejuwarete 'ga 'Agesagea orojeupe 'eawer are. Na'auwara 'gā nea'ar are rūi ore pē mu'ei. Orojeupe 'ga 'Agesagea 'eawer are etee te ore pē mu'ei. 'Ga 'Agesagea nanē pē nereko nū. A'eramū 'ga 'Agesagea pē mueapyoukaa ee.

¹⁴ A'ere Jarejuwarete 'ga 'Agesagea rerekware'ema 'gā naeapyou Jarejuwarete 'ga je'eg are. Ojeupe 'ga je'ega jane imome'uramū nipo 'gā 'i etee ojeupe: "Ma'ja are gatu nipo 'gā je mu'ei? Ije'ēran ekoete tee 'gā ajemogyau", 'jau etee nipo 'gā ojeupe. Naeapyou 'gā ee. Janeruwarete 'ga 'Agesagea tee jane mueapyou ee. A'eramū 'ga 'Agesagea rerekware'ema 'gā weapyou'emamū futat ajemogyau ee.

¹⁵ 'Ga 'Agesagea rerekwaramū etee te janereapyoramū ee. 'Ga 'Agesagea jane mueapyoukari ee. Janeruwarete 'ga 'Agesagea rerekwaramū jane jarejeapyoramū 'ga 'Agesagea rerekware'ema 'gā nereko tyweaw are. A'ere 'gā naeapyou'aweri janejemogy are. Nuerekoi 'gā 'ga 'Agesagea. A'eramū 'gā amueapyouawe'emamū.

¹⁶ Ymā we te 'ā 'ga amū ka'arana kwasiari ee rakue: "Aw'ya sipo Jarejuwarete 'ga rea'awa okwaap? Naani. Nitywi futari 'ga amū. Aw'ya sipo 'ga mu'akwaapa mama'e are? Naani. Nitywi futari 'ga amū", 'jau Isai 'ga ikwasiaa ka'aran are rakue. A'ere Janeruwarete 'ga 'Agesagea rerekwaramū janerea'aramū mama'e are Kristu 'ga rea'ar imū etee futat.

3

Janeruwarete 'ga remiayup

¹ Pēē 'ā Jejuī 'ga rerowiaa je 'jawe. A'eramū pēē Jejuī 'ga rerowiar ire pejejemogyau jepytnamū. A'ere 'ā pejemogy 'ga rerowiare'ema 'gā 'jawe tee jee. A'eramū je pē mu'jauwū'em Jarejuwarete 'ga remifutar are. Sā'ā kunumīakya reapyou'ane'ema mama'e are. Nan tee 'ā pēē. Nepēneapyou ymani 'ā 'ga remifutar are.

² Sā'ā kunumīakya kamy'ia etee i'ua. Na'ua'aweri 'ā miaro'oa. Nan tee futat 'ā pēē. Nepejem'u ymani nipo 'ā Jarejuwarete 'ga remifutar are. Ma'eramū 'ā je mama'eaye'e'mī are etee futat pē mu'ei. Mama'eaye'e'mī are tee te 'ā pēneapyou. Nepēneapyou'aweri futari nipo 'ā pēē mama'eay are. Ma'eramū ako je pē mu'ei mama'eaye'em are etee ra'ne futat ai'i' numiamū.

³ A'eramū miamū 'ā pejejemogyau Jejuī 'ga rerowiare'ema 'gā 'jawe etee futat. Ma'eramū 'ā nepēneapyou'aweri mama'eay are. Jejuī 'ga rerowiare'ema 'gā 'jawe etee 'ā pejemara'ne ekoeteramū pejejee. 'Ga rerowiare'ema 'gā 'jawe etee 'ā pēē pejejamueu mama'e are. A'eramū ore 'jau pē nupe: "Jejuī 'ga rerowiare'ema 'gā 'jawe etee Korītu pewara 'gā", 'jau ore pē nupe.

⁴ Pēē mū a'e 'jau pejejaupe: "Je 'ā Paulo 'ga remimome'u rerowiaara te", 'jau a'e pēē mū. Amumeramū a'e pēē 'jau "Je 'ā Aporu 'ga remimome'ua te arowiat", 'jau pēē. Aipo 'jaramū pejemogy Jejuī 'ga rerowiare'ema 'gā 'jawe.

⁵ Jarejuwarete 'ga upe oporowyky ma'eramū jue futat ore. Pauloramū je, Aporu 'ga retee Jejuī 'ga mome'ui pē nupe ikue. A'eramū ako pēē 'ga rerowiaa ikue. Janeruwarete 'ga futat ore moporowykyaukaa ojeupe. A'eramū ore araju 'jau'jawe etee futat 'ga upe.

⁶ Sā'ā 'ga amū 'y'wa ra'yi tyma ko pype. A'ere 'ā amutee 'ga etee akou imuakymaramū. A'ere 'ā naitymarera 'ga rūi imuakymarera 'ga retee rūi imomoporukari. Janeruwarete 'ga tee omomoporukat imuaranupa 'jau. Nan tee futat ore. Je 'ā 'y'wa ra'yi tymara 'jawe. Aporu 'ga 'ā imuakymara 'jawe. Jejuī 'ga ako je amome'u pē nupe ikue. A'ere 'ā Aporu 'ga pē nui je o re awau pē mu'jau, 'ga remifutar are ra'i. A'ere 'ā Janeruwarete 'ga te Jejuī 'ga rerowiarukari pē nupe.

⁷ Y'wa ra'yi tymara 'gā, imuakymara 'gā. Mīmera 'gā 'ā ojejukau futat oko pypiar are numiamū. A'ere 'ā Janeruwarete 'ga te imomoporukari imuaranupa.

⁸ Nan tee futat 'ā ore. Je ra'ne ako Jejuī 'ga mome'wau pē nupe ikue. A'ere 'ā Aporu 'ga awau pē mu'jau 'ga remifutar are rakue nū. A'eramū ore araju'jawe etee futat mama'e

apou 'ga upe. Jarejuwarete 'ga upe ore mama'e apoi 'ga remifutar imū etee futat. A'eramū Janeruwarete 'ga anure ore mepyaou ojeupe oreremiapofer e.

⁹ Oromome'u pāwē pāwē etee futat ore 'ga araju'jawe. Jarejuwarete 'ga upe etee futat ore mama'e apoi. A'eramū pēē 'ga remiayuwaretea futat. 'Ga etee futat ojerowiarukat pē nupe.

'Oga jara 'jawe Janeruwarete 'ga jejuka esagei pē nee.

¹⁰ Sā'ā tujugeyra 'oga apoara 'ga ywyakape'ia ra'ne imogoa jupe. Iypykokara apoara 'jawe je ra'ne ako 'ga mome'ui pē nupe ikue. A'e 'ga ita jaga iypy pe iypymotyapawamū. Nan ako je 'oga ypykokara apoara 'jawe ai'i. A'eramū 'ā Aporu 'ga 'ua. Sā'ā 'oga apoara 'gā amū 'oga apoa iypymogatyru'arera 'ga remiapofera 'arimū. Nan tee futat ako je ra'ne Jejuu 'ga mome'ui esage pē nupe ikue. A'eramū je 'oga ypykokara apoara 'ga 'jawe futat. A'ere 'ā pē nupe je 'ga mome'u re 'ga amū 'ua pē mu'jau 'ga ree nū. Aipo 'ga 'oga apoara 'jawe. A'eramū 'ga iypykokara 'arimū etee futat 'ga 'oga apou esage etee futat.

¹¹ Janeruwarete 'ga Jejuu Kristu 'ga rerowiarukaa janee. "Jera'yra 'ga etee ki perowiat", 'jau 'ga janee rakue. "Perowiat kasi 'gā amū kwe pe ne. Jera'yra 'ga etee futat ki perowiat", 'jau 'ga janee rakue. A'eramū 'ā Jejuu Kristu 'ga futat akou 'oga ypykokar esage 'jawe. Nitywi futari 'oga ypykokar esage 'jawewara mū. Jejuu Kristu 'ga te 'ā akou 'oga ypykokara 'jawe janee.

¹² A'eramū jane jarejamu'e esagearamū 'oga mŷjeteeteara 'gā 'jawe. 'Oga mŷjeteeteara 'gā nemiapofera 'ā nu'ari futari 'oga. 'Oga apoara 'gā amū 'ywa'y paga etee iapou wogamū. A'eramū 'gā nemiapofera atee pawa'ne'emamū. 'Gā 'jawe 'gā amū mama'e a'je are etee ajamu'ei. Mama'e a'je are moromu'jara 'gā 'oga apoar esage 'gā 'jawe. A'ere amumera 'gā 'ywa'y page'ema pyu 'oga apoara 'gā 'jawe. A'eramū 'ā 'gā nemiapofera u'aa kamēsīete. Nā'ā juonanūū etee nanē ipira nū. Nan tee futat moromu'jara 'gā amū. Mama'e amutee are etee 'gā jamu'ei.

¹³ A'eramū nipo Jarejuwarete 'ga rowase ae jatykaaw ipe jane jareporowyky resaka. Sā'ā tata 'oga apopyrera resaukara. Itaoga 'ā nukai. A'eramū 'ā juowa pyu iapopyra ukaitapap. Nan tee futat nipo Janeruwarete 'ga janeporowykawera resaukari wowase ae majatykaaw ipe. A'eramū te nipo jane mama'e a'je are moromu'jarera 'gā kwaawi. Mama'e a'je are moromu'jarera 'gā itaoga apoarera 'gā 'jawe. Nukaipawi 'gā nemiapofera. Mama'e amutee are moromu'jarera 'gā nemiapofera nanē nipo jane ikwaapa nū. Mama'e sigaty are moromu'jarera 'gā juowoga apoarera 'gā 'jawe. Ukaipap 'gā nemiapofera.

¹⁴ A'eramū nipo Janeruwarete 'ga mama'e a'je are moromu'jarera 'gā mepyaou.

¹⁵ A'ere nipo 'ga mama'e amutee are ajamu'jarera 'gā nomepyi. Ukaipap 'gā nemiapofera. A'eramū 'ga 'gā mepyawem. 'Og ukai ma'e 'gā nūja'uweri woga 'wyrīpe. Wogakajamū 'ga ēmi 'oga 'wyr awi. A'eramū 'gā amanūme'em. A'eramū 'ga roga etee ukaitapap. Nan tee futat Janeruwarete 'ga remiayuwā 'gā amū. Janeruwarete 'ga 'gā nerawau 'gā mogyau ojeypyri. A'ere 'ga nomepyi 'gā porowykyawera, a'jeteetewi 'gā porowykye'em ire.

¹⁶ "Janeruwarete 'ga 'Agesagea jane sireko" 'ea 'ā pēē ikwaapa. 'Ga 'Agesagea jarejereko re jane jarejemogyau Jarejuwarete 'ga roga 'jawe.

¹⁷ Janeruwarete 'ga roga esage futat. Nitywi mama'e tywera ipype. 'Ga 'Agesage rerekwaramū jane jemogyi 'ga roga 'jawe. A'eramū mama'e amutee are moromu'jara 'gā 'ga roga mote'aara 'jawe. A'eramū 'ga jane mū woga mote'ar ire jane rerekou tyweaete ee.

¹⁸ Pēnoryp tee awi pejejee. "Je'akwaap je", 'jau nipo pēē mū pejejeupe numiamū. A'ere nipo aipoa pē'akwaawa naJaneruwarete 'ga 'akwaawa rūi. "Te'akwaawa je afutat" 'jaramū pēē pejejoia peje'akwaaw ekoete awi. A'eramū Janeruwarete 'ga te pē mu'akwaapa pē mogyau.

¹⁹ Pēē 'akwaawekoetea nia'wryi Janeruwarete 'ga upe. Ymā te 'ā 'ga amū ka'arana kwasiari ee rakue: "Janeruwarete 'ga 'je'akwaap je' 'jara 'gā nee ikwasiarukaa rakue: 'Nepē'akwaawi pēē pejejemogyau", e'i Janeruwarete 'ga 'gā nupe", 'jau 'ga amū ikwasiaa rakue.

²⁰ Ajepeja 'ga nanē 'ā ka'arana kwasiaa ee rakue nū: "Janeruwarete 'ga i'akwaaw ekoete ma'e 'gā nea'ara okwaap. A'ere niapoa'uweri aipoa 'ga upe", 'jau 'ga ikwasiaa rakue.

²¹ A'eramū ki jane jarejerowiaraipe'ema 'gā amū nee. Janeruwarete 'ga 'ā mama'e esage monou pē nupe.

²²⁻²³ Pauloramū 'ga 'ā je monou pē nupe pē mu'jaramū. Aporu 'ga, Pedro 'ga. Mīmeramū 'ga ore monou pē nupe pē mu'jaramū ojee. Ywya 'ga 'ā iapou janee rakue, ipyypira reewe rakue. Jane rekoramū Janeruwarete 'ga ojejukau esage jane ree. Jane manūnamū nanē 'ga ojejukau esage jane ree nū. 'Awamū 'ga jejuka esagei jane ree. Anure nanē nipo 'ga jejuka esagei jane ree nū. A'eramū ki jane jarejemua'ēme'ema mama'e are. Janeruwarete 'ga mama'e jararetea. Janeruwarete 'ga 'ā Kristu 'ga Ruwaretea. A'eramū Kristu 'ga janejaretea. A'eramū jane 'ga remiayuwamū mama'e jara 'jawe nanē jarejemogyau nū.

4

Kristu 'ga remimonofet

¹ Kristu 'ga upe oporowyky ma'eramū ore jemogyi. "Pekwap 'gā mueapyou Jarejuwarete 'ga je'eg are", 'Jau Kristu 'ga ore ikue. "Ymā 'ā pēypy 'gā naeapyou ee rakue. A'ere je 'awamū pē mueapyou ee. A'eramū pēē 'awamū 'gā mu'jau ee, 'gā mueapyou ee", 'Jau Kristu 'ga ore ikue.

² Maran oporowyky ma'e 'gā mama'e apoi morowyky jara 'ga upe? 'Ga 'eawer imū etee futat 'gā porowykyi 'ga upe. A'ea esage 'ga upe.

³ Nan tee futat je. Kristu 'ga upe je porowykyi tekou. A'eramū je tejeupe 'ga 'eawer imū etee teporowykyau. A'eramū nipo jeporowykyia 'ga muorypa. Najerorywi je pē'eawer are. "Paulo 'ga oporowyky esage Jarejuwarete 'ga upe" 'e are je najerorywa'uweri. Tekotee 'gā 'eawer are nanē je tejorywe'emamū nū. Kristu 'ga 'e are etee tejorywamū tekou. Tejea'ar are miamū je tejorywe'emamū.

⁴ Tejemiapo a'wyre'em are nanē je tejea'are'emamū tekou. A'eramū je tepy'a'wyre'emamū tejemiapofēr are. A'ere je na'ei tejeupe: "Jeresage te je tekou", na'ea'uweri je tejeupe. Jejararete 'ga etee futat e'iarū jee: "Eneresage ene jee", e'iarū jee. Jea'wyre'emamū nanē 'ga 'jau jee nū.

⁵ A'eramū ki pēē 'jawe'em pejejaupe: "Nenea'wryi ene Jarejararete 'ga upe", 'jawe'em pēē pejejaupe. Jajeararete 'ga te janea'wyre'ema okwaap. Ywag awi ojeywr ire te nipo 'ga jane majatykai wowase. A'eramū nipo 'ga janeremiapofera resaukaa jarejaupe. 'Awamū jane janereapyoui futari jemime jarejemiapofera mama'e are. A'ere 'ga anure esaukari jatee. Jarejuea'ar are janereapyou'e'ema miamū futat 'ga esaukaa jatee. A'eramū nipo Janeruwarete 'ga 'jau jatee: "Eneresage ene jee", 'jau nipo 'ga jatee, janereko esage re.

⁶ Pēneko esage are pē mu'jauwamū je jemome'ui pē nupe. Aporu 'ga nanē je amome'u pē nupe nū. A'eramū ki pēē pejejemū'jau ymāwarera 'gā nemikwasiarer are, "pejejuka esage pāwē pāwē etee ki 'gā nee", 'ga 'eawer are. Pereko tywet nanē kasi 'ga amū ne. Pereko esage pāwē pāwē etee futar iki 'gā.

⁷ Jarejuwarete 'ga upe jane jemogyi jareju'jaju'jawe etee futat. Naeakwar amuteetei futat ae ajemogyau 'ga upe. 'Ga etee futat mama'ea wapoukat jatee. 'Ga jarepoare'em ire amunipo 'ā jane niapoi mama'ea 'ga upe. 'Ga te 'ā mama'ea amut jatee. A'eramū pēē pejejemogyau peju'jaju'jawe etee futat. Nepētywi futari pēē mū pejejuapyraaparamū. A'eramū ki pēē pejejerowiaraipe'ema nanē pejejee nū.

⁸ "Oretyp katu ore mama'e pyu. A'eramū ore oroporiae'emamū", 'jau futatee nipo pēē pejejaupe. "Janeruwarete 'ga ore mogyau 'wryriaramū 'gā nupe", 'jau futatee nipo pēē pejejaupe. Aipo a'je re amunipo 'ā 'ga ymā we ore mogyi 'wryriaramū rai'i. Anure te nipo Janeruwarete 'ga jane mogyau 'wryriaramū a'jea futat. A'ere 'ga 'awamū najane mogyi we 'wryriaramū.

⁹ Ore 'ā Kristu 'ga remimonofera agawewi. A'etea 'ā Janeruwarete 'ga ore mogy akotee ma'e 'jawe etee futat. Iapisipyrama 'jawe etee futat 'gā ore rerekoi. Sā'ā 'gā ia'wyre'ema 'gā apisia ajuowase. Nan tee futat nipo ore jemogyi 'gā nowase. Ywagipewara 'gā nowase, ywy pewara 'gā nowase. Mīmera 'gā nowase nipo ore jemogyi ia'wyre'ema 'jawe.

¹⁰ A'eramū nipo Kristu 'ga rerowiare'ema 'gā 'jau ore: "T'akwaawe'ema 'gā ajemogy", 'jau nipo 'gā ore, Kristu 'ga ore imome'u are. A'ere 'ā pēē nanarūi pe'je: "Jane 'ā jane'akwaap Kristu 'ga ree", 'jau etee 'ā pēē pejejaupe, pejejerowiaraipe etee pejejee. A'ere 'ā ore akotee ma'e 'jawe ete. A'ere 'ā pēē 'wryriara 'jawe pejemogy. Ore ree 'ā 'gā opojeka esage'emamū. A'ere 'ā pē nee 'gā opojeka esageramū ajemogyau.

¹¹ Ore te 'ā aruata arawau kwe pe. Orojety'apoita 'ā arakou. Oro'yuweja rerekou. Orojaitypawamū futat 'ā arakou. Amumē 'gā amū ore nupāu jepi. Nitywi agawewi futat ore 'wrya.

¹² Oroporowykyau 'ā ore kwaiwete. A'eramū 'ā ore arafuakapawamū arajemogyau. Orojeupe 'gā je'egaiwamū 'ā ore 'jau etee 'gā nupe: "Jarejuwarete 'ga pē nereko esagea te ore arafutat", 'jau etee ore 'ā 'gā nupe orojeupe 'gā je'egaiwamū jepi. Orojereko tyweramū ore arajuagamū etee futat jupe jepi.

¹³ 'Gā amū arakurawamū ore oroje'ega esage etee futat 'gā nupe jepi. Jejui 'ga rerowiare'ema 'gā nupe ore jemogyi yty 'jawe.

¹⁴ A'ere je napē mojenosiawamū rūi je ka'arana kwasiari pē nupe. Pē mu'akwaapawamū te je ikwasari pē nupe. Pēē 'ā jera'yra 'jawe jee. Jeporomutat je pē nee. A'eramū je pē mu'akwaapa mama'e are.

¹⁵ Kwaiwete agawewi nipo pē mu'jara 'gā. Teis miu agawewi nipo 'gā pytuna. A'ere majepej tee pēnuwa 'jawewara. Pejejeupe Jejui 'ga je imome'uramū pēē 'ga rerowiaa pejejemogyau 'ga remiayuwamū. A'eramū je pēnuwa 'jawe.

¹⁶ A'eramū je 'jau pē nupe: Pejemu'e je ree. Mama'ea peapo je 'jawerimū etee futat, a'e je pē nupe.

¹⁷ A'eramū je Timoteo 'ga monou tejeko esage are pē muea'aawamū. Timoteo 'ga jera'yra 'jawe jee. Oporowyky esage 'ga Jarejararete 'ga upe. Jeporomutat je 'ga ree. A'eramū je 'ga monou pē nesaka. Jereko esage are nipo 'ga pē muea'ari. "Paulo 'ga ako esage etee Jarejararete 'ga remifutar imū", 'jau nipo 'ga pē nupe. "Jarejararete 'ga ree ojemujar ire 'ga reko esagei 'ga remifutar imū etee futat", 'jau nipo 'ga pē nupe, pē muea'aa je ree. Kristu 'ga rerowiaaramū pē nupe nanē nipo 'ga jeremimome'ufer are pē muea'aa nū. Pē pype tekou ako je pē mu'ei pēneko esage are ikue. A'eramū nipo 'ga pē muea'aa ee. Kwe pe 'gā mu'eawer imū etee futat ako je pē mu'jau tekou ikue.

¹⁸ "Nuru'jawi futari Paulo 'ga jane pyri nū'ū", 'jau nipo pēē mū pejejaupe rai'i. "A'eramū nipo 'ga oreremiapo resake'ema re'ā", 'jau nipo pēē mū pejejaupe rai'i. A'eramū nipo pēē aipo 'jaramū pejerowiaraipe pejejee rai'i numiamū.

¹⁹ A'ere nipo je oi futari pē pyri. Jarejararete 'ga teo futaramū nipo je oi futari pē nesaka. A'eramū nipo je ojee ojerowiaraipe ma'e 'gā nesaka, tejeau tāmējē 'gā nesaka. Maranamū nipo je 'gā nera renupawer imū etee futat 'gā nesaka. "Jarejuwarete 'ga pājēa te 'gā wereko? Naani te ra'u nū?" 'jau nipo je 'gā nesaka.

²⁰ Opājē mū mama'e apoara 'gā tee Janeruwarete 'ga omogy wemiayuwamū. "Janeruwarete 'ga je'wyrriara", 'jar ekoeteara 'gā te 'ga nomogyi futari wemiayuwamū. Opājē mū mama'e apoara 'gā etee te 'ga omogy wemiayuwamū.

²¹ Ma'ja sipo ajee pefutat? Pejejeupe jeje'eg wywrafena te ra'u pefutat nū? Pejejeupe jeje'eg wywrafene'ema te ra'u pefutat nū? Pejejeupe jeje'eg wywrafene'ema futaa ki pepoit mama'e tywera apo awi.

5

Mama'e tywera apoawet

¹ "Korītu pewara 'ga amū mama'e tywera wapo ajemogyau", 'jau 'gā amū pē mome'wau jee ai'i. "Uwa 'ga remireko ēē 'ga wereko", 'jau 'gā imome'wau jee ai'i. Nanuara nia'wryri Janeruwarete 'ga upe. Jejui 'ga rerowiare'ema 'gā miamū nuapoa'uweri aipoa. Ma'eramū ajee "Jejui 'ga rerowiaara je" 'jaramū aipo peapo nū? Nia'wryri aipo apoa.

² Ma'eramū sipo ajee pejerowiaraiw etee pejejee? Pejejepype mama'e tywera apoara 'gā amū nekoramū amunipo 'ā pē'arasig te ee. Pejeje'ega amunipo 'ā 'uwa remireko rerekwara 'ga upe rai'i, 'ga mosōu amunipo 'ā pēē nanuar awi rai'i. "Nia'wryri nanuara Janeruwarete 'ga upe", 'jau amunipo 'ā pēē 'ga upe rai'i. Ma'eramū sipo ajee pēē nanuar awi 'gā mosīe'em ire pejerowiaraipe ekoete pejejee? Pepe'a mama'e tywera apoara 'ga pejejewi. Maran gatu amunipo 'ā 'ga nan werekoramū ajemuaēme'ema.

³⁻⁵ Muku agawewi te 'ā je rekoī pē nui. A'etee je jerea'at au'jeteramū pē nee. A'eramū je pē pype ako ma'e 'jawe futat. A'eramū je 'jau pē nupe: Janejararete 'ga te ako opājēa amut jee ikue, je mogou omome'waramū ikue. A'eramū je 'jau aipoa mama'e tywera apoara 'ga upe: "Mama'e tyweretea a'e ereapo Jarejuwarete 'ga upe. Juī epoire'ema nipo nereoi futari 'ga pyri", 'jau je 'ga upe. Jejui 'ga je'eg imū je 'jau 'ga upe. Pejatykaramū tejea'aramū pē nee. A'eramū je pejatykaramū pē pype ako ma'e 'jawe tekou. A'eramū pēē pejejea'aramū je ree. Jarejararete 'ga je'eg imū je 'i pē nupe: Pejatykaaw ipe ki pe'je mama'e tywera apoara 'ga upe: "Ejepe'a ore wi. Mama'eukwaawa 'wyrriara upe te 'ā mama'ea ereapo ekou", 'jau ki pēē 'ga upe. "A'eramū ene ejemu'jaga mama'eukwaawa 'wyrriara remiayuwamū ekou", 'jau ki pēē 'ga upe. "A'eramū nipo ene ewawe'em Jarejuwarete 'ga pyri", 'jau ki pēē 'ga upe. Maran gatu nipo 'ga aipo renupa ajemuaēme'ema. A'eramū nipo 'ga ajemuaēm ire opoia juī. A'eramū nipo Janeruwarete 'ga 'ga tywera moiri 'ga wi nū, 'ga katu'oka Janejararete 'ga rowase jane jatykaaw ipe.

⁶ A'eramū pēē pejerowiaraipe'ema pejejee. Sā'ā kanape'i apoara 'gā ijopypeawa mojopypea u'i are. Inānānī'etee agawewi 'gā imonou imojopypeu ee. A'etee u'i omojerap. Nan tee futat ae mama'e tywera apoara 'gā nesag ire ae jemu'ei 'gā nee.

⁷ Sā'ā ore judeuramū kanape'i jopypeawa ymanera momopora orojewi, maraka apo enune. Nan pejekatu'ok mama'e tywer awi. A'eramū pēē pejejesageramū pejemogyau Jarejuwarete 'ga upe. Werowiarāmū Jejui 'ga pē katu'ogi pētywer awi. A'eramū futat pēē pejejeateeramū juī. Sā'ā ore judeuramū oreppy 'gā Egitu ywy awi o enune karupa'mī jukaa, wy reko'woga y'a pype rakue. A'eramū 'ā 'gā imonykya 'okwar are rakue. A'eramū 'ā 'oga pypewara 'gā amanūme'em rakue. Nan tee futat 'awamū Kristu 'ga manūi janetywera mepyawamū rakue. A'eramū 'ga werowiarāmū pē katu'oka pētywer awi.

⁸ Sā'ā ore judeuramū oreppy 'gā maraka apoa Egitu ywy awi wenū'ēawer are wea'aawamū. Maraka apou 'gā kanape'i jopype'ema apou i'wau rakue. Nan tee futat

iki jane jarejee Jejuī 'ga manūawer are janerea'at jarejemogyau. A'eramū ki jane jarepoia mama'e tywera apo awi, mama'e a'jea etee futat iapou.

⁹ Ka'arana je akwasiat imonou pē nupe ikue. "Pekotee mama'e tywera apoara 'gā nui", 'jau je ikwasiaa ka'aran are imonou pē nupe ikue.

¹⁰ Aipo are je ka'arana kwasiaa imonou pē nupe. NaJejuī 'ga rerowiare'ema 'gā nee rūi je imonou ikue. "Gā rerowiaara ore", 'jar ekoeteara 'gā nee te je ikwasiarī imonou ai'i. Jejuī 'ga rerowiare'ema 'gā 'ā mama'e tywera etee futat wapo. Ajuemireko are 'ā 'gā nekoī. Ojomen are 'ā kūjāmera 'gā nekoī. Okaraemā me'yi are etee 'ā 'gā nea'aramū. Amunarūmū 'gā 'ā mama'e are. Maira'me a'agawa etee 'gā 'ā amuoryp. Mīmēra etee 'ā Jejuī 'ga rerowiare'ema 'gā mama'e tywera wapo. A'eramū amunipo 'ā pēē 'gā nui pejejepe'a re ywy awi we futat pejejepe'au.

¹¹ A'ere je na'gā nee rūi aipoa ka'arana kwasiari pē nupe ai'i. "Ore Jejuī 'ga rerowiaaramū", 'jar ekoeteara 'gā nee te je ikwasiarī imonou pē nupe ikue. Jejuī 'ga rerowiaa 'me 'gā jeu'woge'em are etee je imonou ikwasiaa ai'i. Werowiat 'me te 'gā 'ga. A'ere 'gā naeateēi mama'e tywera apo awi. 'Gā amū nipo akou ajuemireko are. Kūjānamū nipo 'gā amū akou ojomen are. 'Gā amū nipo okaraemā me'yi etee wea'aramū ajemogyau. 'Gā amū nipo maira'me a'agawa muoryw are etee wea'aramū ajemogyau. 'Gā amū nipo ojoje'ēwu'jaga. 'Gā amū nipo kawīajaiwa rykua. 'Gā amū nipo amunarūmū mama'e are. Aipo 'gā nee te je ka'arana kwasiari imonou pē nupe ai'i. Pekotee ki 'gā nui. Pejemi'wat nanē kasi 'gā pyri ne, 'jau je pē nupe ai'i.

¹²⁻¹³ Janeruwarete 'ga te nipo e'i Jejuī 'ga rerowiare'ema 'gā nupe: "Nepēa'wryi pēē", e'iarū 'gā nupe. Je "Nepēa'wryi pēē", na'ea'uweri 'gā nupe. A'ere jane Jejuī 'ga rerowiaara 'gā mama'e tywera aporamū jane je'egi futari 'gā nupe: "Peapo awi nanuara", 'jau ki jane 'gā nupe. "Nepeapoi mama'ea Jarejuwarete 'ga remifutar imū ra'e", 'jau ki jane 'gā nupe, 'gā mosōu mama'e tywera apo awi. Ymā te 'ā Janeruwarete 'ga ka'arana kwasiarukari Moisesi 'ga upe ee rakue: "Pemono ki mama'e tywera apoara 'gā pejejewi", 'jau 'ga 'ā ikwasiarukaa 'ga upe rakue.

6

Jejuī 'ga rerowiaara 'gā nupe etee ki pejemogytaukat

¹ Jejuī 'ga rerowiaaramū kasi peo pejejaupe pejeje'egay re 'ga rerowiare'ema 'gā nupe pejemota'waukaa pejejaupe ne. Jejuī 'ga rerowiaara 'gā nupe etee futar iki pekwap pejejemome'wau. A'eramū 'gā futat oje'ega pē nupe pē mota'wau pejejaupe. "Nenea'wryi ene Jarejuwarete 'ga upe", 'jau nipo jane 'gā amū nupe. "Eneresage ene Jarejuwarete 'ga upe", 'jau nipo jane 'gā amū nupe. Aipoa pekwaap.

²⁻³ Anure nipo Janeruwarete 'ga jane mogyau opoirūnamū. A'eramū nipo jane 'ga rowase ijatykaarūe'ema 'gā pe'au 'ga wi. Ywy pewarera 'gā, ywagipewara 'gā. Mīmēra ijemogyarūe'ema 'gā nipo jane imonou 'ga wi Jarejararete 'ga poaa. Mīmēra apoaramū sipo ajee nepemojyrūarūi mama'e tywe'ri apoarera 'gā mogyau ajaupe? Nepejemogyppygi te ra'u Jejuī 'ga rerowiaaramū pejejee nū?

⁴ A'eramū ki pēē Jejuī 'ga rerowiaaramū pejewawe'em 'ga rerowiare'ema 'gā 'wryiara upe pejejemojyrūkaa pejejaupe. Na'gā nee rūi pejemogyppyk.

⁵ Ma'eramū sipo nepejenosī pejejemome'wau 'ga rerowiare'ema 'gā nupe? Nitywi sipo i'akwaap ma'e 'ga amū pē pype pejejaupe pejejemota'waawamū?

⁶ Ityp futat nipo Janeruwarete 'ga 'Agesage pyu i'akwaap ma'e 'gā amū. A'etea 'ā pejemome'u Jejuī 'ga rerowiare'ema 'gā nupe etee rai'i pejejaupe pejejemota'waawamū rai'i.

⁷ Pejāmēua nia'wryi Janeruwarete 'ga upe. Jejuī 'ga rerowiare'ema 'gā nupe pejomota'waukara taetu nia'wryi Janeruwarete 'ga upe. Pejejeupe 'ga amū mama'e tywera aporamū pejejuagamū jupe. "Pejejepyke'ema 'ga ree" 'ea te esage Janeruwarete 'ga upe. "Pejekaraemā are 'gā amū munarūnamū pejejuagamū jupe. Pejejepyke'ema 'gā nee" 'ea te esage futat.

⁸ A'ere 'ā pēē nanarūi. Pēē we 'ā mama'e tywera peapo pejejaupe. Pēē we 'ā pejemunarūmū pejejokaraemā are. Pejejewirera 'jawewara 'gā nui miamū 'ā pēē pejemunarūmū. Pēē nanē 'ā mama'e tywera peapo nū.

⁹ "Namama'e tywera apoara rūi Janeruwarete 'ga omogy 'wryiaramū ojeypyri ae upe" 'ea 'ā pekwaap. A'eramū ki pēē pejejemoryteewe'em pejejee. "Mama'e tywera apo awi je nopoiri agawewi. A'etea nipo Janeruwarete 'ga je mogou 'wryiaramū ojeypyri re'ā", pe'je kasi ne. Au'je ki pejemorytee re pejejee. NaJaneruwarete 'ga remiaiyuwamū rūi ae mama'e tywera apoi. Ajuemireko are ako ma'e 'gā na'ga remiaiyuwa rūi. Ojomen are ako ma'ea kūjāmera na'ga remiaiyuwa rūi. Maira'me a'agawa muorypara 'gā na'ga remiaiyuwa rūi.

Kūima'e 'gā amū nipo opoia wemireko are oko awi. A'eramū nipo 'gā kūima'eramū etee futat akou ajuee. Aipo apoara 'gā taetu na'ga remiayuwā rūi.

¹⁰ Mama'e are amunarū ma'e, okaraemā me'yi etee ea'at ma'e, kawīajaiwa 'wat, ooje'ēwu'jagat, ojomoryteeat. Mīmēra 'gā naJaneruwarete 'ga remiayuwā rūi.

¹¹ Nan tee futat 'ā pēē mū pejejemogyau rakue. A'ere 'ā 'awamū Janejararete 'ga ako pē pireita pētywer awi ikue. A'eramū 'ga 'Uwarete 'ga mota'wau pē nupe. A'eramū Janeruwarete 'ga 'Agesagea pē mogyau 'ga remiayuwamū.

Ojeupe mama'e esage apoawamū te 'ga jane apoi rakue

¹² Pēē mū nipo 'jau pejejeupe: "Aapo katu katu futat te je mama'ea 'wei", 'jau nipo pēē pejejeupe. "Nitywi futari 'Ereapo kasi aipoa ne', je upe 'jara 'gā 'wei", 'jau nipo pēē pejejeupe. A'jea futat peapo katu katu mama'ea numiamū. A'ere amumera nia'wyri pē nupe. Je nanē amunipo 'ā a'e pē nupe: "Tejemifutar imū etee futat je mama'e apoi" 'jaramū amunipo 'ā je 'i pē nupe. A'jea futat. Amumera resageramū jee numiamū. A'ere amunipo 'ā je teja te nam'yi wywapi ee.

¹³ Pēē amunipo 'ā 'jau mama'e resaka ppy we: "Janerewek jane ra'e", 'jau amunipo 'ā pēē pejeku'iramū mama'e are. A'eramū nipo pēē mama'e 'wau. A'ere anure nipo Janeruwarete 'ga temi'u mateepawi janerewega reewe. Nan tee nipo 'gā amū kūjā resaka ppy we 'jau ojeupe "Amogyta je kwea kūjā tejee ra'e", 'jau nipo pēē mū pejejeupe. A'eramū futat nipo aku'iaiwamū ee. A'jea futat 'ga ku'iaiwamū ee numiamū. A'ere nipo anure Janeruwarete 'ga 'ga ku'iaipawera mu'jagi 'ga 'arasigamū etee. Ymā te 'ā Janeruwarete 'ga jane apoi rakue. A'ere 'ga namama'e tywera apoawāu rūi jane apoi rakue. Nakūjā are etee rūi 'ga jane apoi rakue. Najomen are tee rūi 'gā 'ā kūjā apoi rakue. Ojeupe mama'e esage apoawamū te 'ga jane apoi rakue. 'Ga futat mama'e apoukaa janee nū.

¹⁴ 'Ga futat nanē Janejararete 'ga moferapa opājē mū etee futat 'ga manū re rakue. A'eramū 'ga anure jane nanē jane moferapa opājē mū etee futat nū.

¹⁵ Kristu 'ga ree jarejemujar ire jarejemogyau 'ga pira 'jawe etee futat. A'eramū janeretea 'ga ma'ea futat. Aipoa 'ā pekwaap. Ma'eramū sipo aje jane Jarejararete 'ga rete mujari kūjāmene'em are? Nimujararūi futari jane 'ga retea kūjā amū ree.

¹⁶ Ymā te 'ā Janeruwarete 'ga ka'arana kwasiarukari 'ga amū upe ee rakue: "Kūima'e 'ga amū wemireko ēē rerekokatu re 'gā majepēi teewara 'jawe futat 'gā nekoī", 'jau 'ga ikwasiarukaa 'ga amū upe rakue. A'eramū kūima'e 'ga kūjā mū rerekokatu re majepēi teewara 'jawe futat ajuerēkou.

¹⁷ A'eramū jane nan tee futat Jarejararete 'ga ree jarejemujar ire jarejemogyau majepēi teewara 'jawe 'ga upe.

¹⁸ A'eramū ki pēē pejekowe'em pejejemireko are. Kūjāmeramū nanē pēē pejekowe'em pejejomen are. Kunumūūnamū, kūjāmukuramū pejekowe'em pejejeue. Peko nipo pejejeue 'eramū pēē pejejerekou tāmējē. A'ea te Janeruwarete 'ga afutat. Amumera mama'e tywera apoa nomotyweri aeretea. A'ere ajuee ae rekoa aeretea we futat imotyweri.

¹⁹ Janeruwarete 'ga 'U'agesagea amut janee. A'eramū janepira Janeruwarete 'ga 'Agesage roga. A'eramū 'ga 'Agesage akou jane pype.

²⁰ 'Ypeywar are amanūmū Jejuī Kristu 'ga janetywera mepyau janee, jane mogyau 'ā wemiayuwamū. A'eramū ki jane jarejemogyau esage 'ga upe. Janejemogy esage resag ire nipo 'gā Jarejuwarete 'ga muorywi jane ree.

7

Emireko ma'e 'gā, imen ma'e 'gā netee

¹ Ka'arana 'ā pekwasiat imua jee rai'i. "Esage te aeremirekoa? Aeremirekoe'ema te ra'u esage nū?" 'jau 'ā pēē imua ka'aran are ikwasiaa jee rai'i. A'eramū je 'jau pē nupe: Esagea futat aeremirekoa. Aeremirekoe'ema nanē futat esageay nū.

² A'ere 'ā ae amumeramū kūjā mū esage pāwē gatū ete etee. A'eramū ki pēē nan etee pejekowere'emamū kūima'eramū pejejemirekoramū tāmējē futat. Kūjānamū nanē pēē pejemēnaa tāmējē futat nū.

³ Pejēmena pejejee ekoramū "najeremiarūi je ene ree", 'jawe'em pejemēna upe. Kūima'eramū nanē pēē kūjā pejejee ekoramū pēē nanē "najeremiarūi je ene ree", 'jawe'em pejejemireko upe.

⁴ Pejuereko ki pejejemifutar imū etee futat. Peje'er are kasi pejejaupe ne. Kūima'eramū, kūjānamū 'jau.

⁵ A'eramū pēē Jarejuwarete 'ga upe pejeporogytau etee pejekowe'em pejejeue ra'ne. "Jarejuwarete 'ga upe jareje'ega monou jane nikoi jarejeue", 'jau ki pēē pejejaupe. 'Ga upe pejeporogytau etee futat pejekowe'em pejejeue ra'ne. 'Ga upe pejeje'ega monopaw ire tāmējē peko pejejeue nū. Kasi a'e pe pejomogoukat kūjā mū ree ne. A'eramū futat nipo kūjā

nanē weateeramū kūima'e 'ga amū ree nū. A'eramū nipo pēē mama'eukwaawa 'wyrriara remifutar imū iapoukaa pejejaupe.

⁶ “Pēnemireko awi”, na'e'i je pē nupe. Pejejemirekoweramū ki pejejuereko etee futat.

⁷ Je 'ā najeremirekoi tekou. Je 'jawe pē neko amunipo 'ā esage futat jee numiamū. A'ere 'ā ae naju'jaju'jawe tee rūi te. Janeruwarete 'ga jane mū opoat mama'e tywera apoe'em are. A'eramū 'ā jane amumeramū jarejemirekoe'emamū futat. A'ere 'ā amumera 'gā nupe ayeteramū 'gā nemirekoe'ema. Nauagi 'gā kūjāe'eme oko upe. A'eramū ki pēē nanuaramū pejejemirekoramū tāmējē futat. Kasi a'e pe mama'e tywera peapo ne. A'eramū Janeruwarete 'ga 'gā nemireko futaa.

⁸ Ojeteē ijemogywet ma'eramū te ajee je 'i pē nupe: “Pēnemireko kasi ajee aipo 'jaramū pejejemogyau ne. Je 'jawe pejemogy”, 'jau je pē nupe.

⁹ A'ere ki pejejetee pejejemogy upe pejejuage'emamū pēnemireko tāmējē futat. Kūjā mū rowy'ar ekoete are aerea'ara nia'wryi Janeruwarete 'ga upe. Kūjāmeramū nanē nū kūima'e mū rowy'ar ekoete are etee pēnea'ara nanē nia'wryi Janeruwarete 'ga upe.

¹⁰ 'Awamū je 'i emireko ma'eramū pē nupe, omenat ma'eramū pē nupe nanē nū. Nateje'ega etee rūi je imome'ui pē nupe. Jarejararete 'ga 'eawer imū etee futat je imome'ui pē nupe. Pejemena kasi peetyg ine.

¹¹ Pejemenā retyg ire ki pejewyru'jap pejejaupe nū. A'eramū ki pejewyr esage etee futat pejejaupe. Pejejaupe pejewyru'jape'ema pēē pejejetee futat pejekou. A'eramū pēē kūima'eramū emireko ma'eramū pejejemireko retyke'ema futat.

¹² Amumeramū pē nupe je teje'ētea te imonoi 'awamū. (NaJarejararete 'ga je'eg imū rūi je imonoi pē nupe 'awamū. Teje'ēteu te je imonoi pē nupe 'awamū). Kūima'eramū nipo pēē mū Jejui 'ga rerowiaaramū pejekou. A'eramū nipo pēnemirekoa na'ga rerowiaara rūi. A'etea nipo ēē niporetygiweri ene ree. A'eramū ki pereko ete futat pejejemirekoa retyke'ema futat.

¹³ Kūjāmeramū nanē nipo pēē mū Jejui 'ga rerowiaaramū nū. A'eramū nipo pēmēna na'ga rerowiaara rūi. A'etea nipo 'gā niporetygiweri pē nee. A'eramū ki pereko etee futat 'gā netyke'ema.

¹⁴ Pēmēna nipo nuerowiari agawewi Jejui 'ga. NaJaneruwarete 'ga remiayuwa rūi agawewi nipo 'gā. A'ere pē nee wejue te 'gā nekoi Jarejuwarete 'ga remiayuwa 'jawewaramū. A'eramū nipo 'ga ojejukau esage 'gā nee, pē nee 'gā poretygiwēre'emamū wejue. Kūima'eramū nanē nipo pēē mū pejekou Jejui 'ga rerowiaa. A'ere nipo pēnemirekoa na'ga rerowiaara rūi. NaJaneruwarete 'ga remiayuwa rūi pēnemirekoa. A'ere 'gā omen are te 'gā nekoi 'ga remiayuwa 'jawewaramū. Ojejukau esage wejue 'ga 'gā nee, pē nee 'gā poretygiwēre'emamū wejue te. A'eramū pēē 'gā nerajemogyau esage. Kasi a'e pe pēna'yra 'gā Janeruwarete 'ga remiayuwe'ema 'gā na'yra 'jawe ne. 'Ga rerowiat pāwēara 'jawe futat pēē 'ga upe.

¹⁵ Janeruwarete 'ga pēta'waa afutat ajaupe. A'eramū kūjāmeramū kasi ajee pēpotyp pejemēna 'ga pejejewi iporetygiweramū ne. Kūima'eramū nanē kasi ajee pejejemirekoa pēpotyp pejejewi iporetygiweramū ne. A'ere pejejewi 'ga rerowiare'ema 'gā poretygiwēre'emamū pereko ete futat 'gā.

¹⁶ Maran gatu nipo pē nereko re pēmēna 'ga Jejui 'ga rerowiare'ema. A'eramū pēē 'gā netyke'ema. Kūima'eramū nanē nipo pē nee pēnemireko 'gā Jejui 'ga rerowiaa. A'eramū ki pēē pejejemireko 'gā netyke'ema pejejewi 'gā poirowere'emamū.

Mama'ea ki peapo 'ga remifutar imū etee

¹⁷ Janeruwarete 'ga opājē amut janee, ojeupe jane moporowykyaukaawamū. A'eramū ki pēē mama'e apou 'ga remifutar imū etee futat. Pejejopit jowatee are pejemā'jāue'em futat. 'Gā 'ā 'gā te nū. Pēē 'ā pēē te nū. Judeu 'gā etee te ijewak ma'ea ajemogy. Aipoa je amome'u pē nupe, Jejui 'ga rerowiaaramū pē nupe najuejue etee futat.

¹⁸ Amumeramū nipo pēē Jejui 'ga rerowiaaramū imojewagipyreramū pejejemogyau. A'ere kasi pejejewaga porera peyw ine. Amumeramū nipo pēē imojewagipyre'emamū futat. A'eramū kasi pēē nanē pejejemogyau 'gā nupe ne.

¹⁹⁻²⁰ Naajewag are rūi Janeruwarete 'ga ae futari. A'eramū pēē pejejea'are'emamū aipo are. 'Ga je'ega jane enuwa te esage 'ga upe. A'eramū pēē 'ga je'ega te enupa.

²¹ Jejui 'ga rerowiar enune 'ā pēē mū pejeme'egukat 'gā nupe ka'aranū are rakue. A'eramū pēē pejejemogyau 'gā nemifajamū. A'eramū ki pēē pejepeporowykyau pejejemogyau peje'wryiara 'ga upe etee futat. A'ere peje'wryiara ojewi pē nee iporomonoweramū, pejepe'a futat 'ga wi.

²² 'Gā nemifai 'gā 'ā mama'ea wapo o'wryiara 'ga remifutar imū etee futat. Nuapoi 'gā mama'ea wemifutar imū etee futat. A'ere 'ā ojeupe te oporowyky ma'e 'gā mama'e apoi

wemifutar imū etee futat. A'ere 'ā jane Jejuī 'ga rerowiar ire jane jemogyi jareju'jaju'jawe etee futat mama'e apou 'ga remifutar imū etee futat.

²³ Sā'ā 'gā amū ka'aranūū monoa ajaupe, ajamuawamū wemifajamū. Nan tee futat Janeruwarete 'ga jane muri ojeupe wa'yra 'ga janetywera mepy re. A'eramū ki jane mama'e apou 'ga remifutar imū etee futat. 'Ga rerowiare'ema 'gā nemifutar imū kasi mama'ea siapo ne. 'Ga remifutar imū etee futar iki mama'ea siapo.

²⁴ Pēē 'ā Jejuī 'ga rerowiaaramū je 'jawe. A'eramū je 'jau pē nupe: Ako etee futat ae Jejuī 'ga rerowiaaramū. Nojemojewagi futari ae 'ga rerowiaaramū. Naijewak ma'eramū etee rūi futat ae rekoī 'ga remiauwamū. 'Gā nemifajamū nipo pēē Jejuī 'ga rerowiaa. A'eramū pēē a'efer ipe etee futat pejejemogyau pejeporowykyau peje'wyrara 'gā nupe. Pejeka'jame'ema futat pejemurera 'gā nui. Pēē mū nipo pejeporowykyau pejejemogyau pejejeupe etee futat 'ga rerowiar enune. A'eramū nipo pēē a'efer ipe etee futat pejejemogyau pejeporowykyau pejejeupe pejejeme'ege'ema 'gā amū upe. Aipoa Janeruwarete 'ga afutat. 'Ga 'ā pē poaa mama'e apo are.

Ojeteewara 'gā, imen manū ma'e 'gā netee

²⁵ Je upe ka'arana kwasiaa imua ako pēē pejeporonupa ojeteewara 'gā nee jee rai'i. A'ere Janejararete 'ga namu'ei 'gā nee rakue. Aipo je'ea nipo jaruete futat 'ga upe. Ojeupe ia'wyre'em ire amunipo 'ā 'ga je mu'akwaawi ee. "Ene'me kasi 'gā nupe ne", 'jau amunipo 'ā 'ga jee. A'eramū je tejea'aw imū etee futat ikwasiaa ka'aran are pē nupe. Janeruwarete 'ga futat te 'ā ajemuaēm je ree. A'eramū 'ga je mogou ojeupe oporowyky ma'eramū. A'eramū ki pēē jeje'eg are pejejemogyppyka futat.

²⁶⁻²⁷ Anure nipo Jejuī 'ga rerowiare'ema 'gā 'ga rerowiaaramū jane rereko tyweretei. Ma'eramū 'ā ojeteewaramū nepēnemirekoi futari pejejemogyau. Emireko ma'eramū pēē pejejemireko retyke'ema futat.

²⁸ A'ere namama'e tywera apoa rūi poromū, pēnemirekoa. Kūjāmukuramū nanē pēē namama'e tywera apoa rūi pejemena nū. A'ere 'ā emireko ma'eramū namajepei tee rūi futat 'gā nemiapoa mama'ea. Ojemi'uekaa, oporowykyau ka'aranūū are wemireko raity muawamū. Emireko ma'e 'gā 'ā ajemuaēma kwaiwete mama'e are ajemogyau. A'eramū je a'eramū 'jau pē nupe: "Ojeteewaramū kasi pēnemireko futat pejejemogyau ne", 'jau je pē nupe. Mama'e are pēnea'are'ema je afutat. Kūjā nanē 'ā mama'e apou omena 'ga upe nū. A'eramū nanuara 'gā nupe wayramū rēwējēmī Jejuī 'ga mome'ua 'gā nupe. Nipoetai rēwējēmī 'gā ee. Ojeteewaramū te ajee 'ā aea majepe ete rēwējēmī aeoporowyky. A'eramū Jejuī 'ga mome'ua waye'emamū ae upe. 'Ga mome'u are etee futat 'gā wea'aramū.

²⁹ Kamēsīete nipo Jejuī 'ga ruri 'awa uwy mateepapa. A'eramū ki pēē emireko ma'eramū pejejemogyau Jejuī 'ga remifutar imū etee mama'e apou ojeteewara 'jawe.

³⁰ Ojoo'o ma'eramū pēē pejejea'are'emamū peje'arasig are etee. Kamēsīete nipo Jejuī 'ga ruri. A'eramū ki pēē pejejea m'yina 'ga ree etee futat. Iku'i ma'eramū ki pejejemogyau iku'ipap ma'e 'jawe. Au'je ki iku'i ma'eramū pēē pejeju'ī are etee pejejea m'yi re. Jejuī 'ga ree etee ki pejejea m'yina pejejemogyau. Mama'e muararamū pēē pejejemogyau mama'e jare'ema 'jawe. Pejejea m'yine'ema pejekaraemā are. 'Ga ree etee ki pejejea m'yina pejejemogyau.

³¹ Mama'e are ojejuka ma'eramū pejejemogyau mama'e are ijejuka'e'ema 'jawe etee futat. Kamēsīete futat nipo janekaraemā teepawamū jane wi. A'eramū ki pēē pejejea m'yine'ema ee.

³² A'eramū je aipo are poromū 'jau pē nupe: Mama'e are tee pēneaa je nafutari. Sā'ā ojeteewara 'gā jejukaa Jarejararete 'ga upe oporowyky are etee futat. Mama'ea 'gā amū iapou Jarejararete 'ga muorypawamū etee futat.

³³ A'ere 'ā emireko ma'e 'gā jejukai wemireko are ra'ne. A'ere 'ā Jarejararete 'ga remifutar are ojejukau wemireko futar ire.

³⁴ Wemirekoa mata'wa are wea'aramū, Ku'jywa 'ga maku'i are nanē 'ga wea'aramū nū. A'eramū emireko ma'e 'ga rea'ara ojo'ojo'ok ma'e 'jawe 'ga upe. A'eramū nanuara 'gā nupe wayramū rēwējēmī Jarejararete 'ga remifutara apoa.

Kūjānamū nanē nū. Ojeteewara 'gā mama'e apou Jarejararete 'ga upe. Kūjāmuku 'gā, imen manū ma'e 'gā. Mīmēra 'gā mama'e apou Jarejararete 'ga upe etee futat. Wea'aramū Jarejararete 'ga remifutar are etee futat. A'ere imen ma'e 'gā nanarūi. Omen are wemiarū are etee 'gā jejukai. Omena 'ga maku'iawa etee 'gā mama'e wapo.

³⁵ Aipoa je amome'u pē nupe pē mu'jawamū. "Pēnemireko kasi pejejemogyau ne", na'ei je pē nupe. Amueapyo te je pēē emireko ma'e 'gā nemiapo are. Jarejuwarete 'ga remifutar imū etee mama'e apo are te jeporopoariweramū pē nee. Jarejararete 'ga upe pēporowyky te je afutat. Au'jeteramū pēē Jarejararete 'ga muorywa nanē je afutat nū.

³⁶ Pēē mū nipo nepēnemirekoi we. A'eramū nipo 'ga kūjāmuku'i ēē mū mogou katu rakue. 'Awamū nipo 'ga 'jau ēē upe: "Tejetee toko 'jau, kwe pe je oi Jejuī 'ga mome'wau tekou", 'jau nipo 'ga ēē upe. A'ere nipo 'ga rea'aramū ēē ree nū. "Naani. Arekokatu tāmējē futat je ēē 'jau", 'jau nipo 'ga ojeupe etee futat. "Kasi a'e pe ēē rekoī ojetee ne kwy", 'jau nipo 'ga ojeupe etee futat. "Jeremiarū wejue ēē ree. A'eramū je ēē rerekou katu", 'jau nipo 'ga ojeupe etee futat. A'eramū ki 'gā tajuerekokatu tāmējē futat. Namama'e tywera apoa rūi futat poromū.

³⁷ Maranamū nipo 'ga ojetee wekowera futaa. A'eramū nipo 'ga ipyyrūmyrera ēē rerekou katue'em 'ea nanē esage nū. "Naapoi nipo je mama'e tywera re'ā. Nokoi nipo je kūjā mū ree re'ā", 'jau nipo 'ga ojeupe. Aipo 'jara 'ga nokoi futari kūjā mū ree 'ea nanē wesageramū futat aipo 'ga upe.

³⁸ A'eramū je 'jau pē nupe: Emireko ma'eramū esageramū futat pē nupe. A'ere emirekoe'ema 'ga nupe te nipo esageramū emireko ma'e 'ga apyraapa.

³⁹ Imen ma'ea kūjā omena manū'e'eamū omena mojopy'rawe'em futat. Omena 'ga etee futat ēē erekou. Omena manū re tāmējē te ēē omena mojopy'rui nū. A'eramū miamū Jarejararete 'ga rerowiaara 'ga etee erekou.

⁴⁰ A'ere nipo omenaru'jaw are ifuwere'ema ēē ku'iramū omenaru'jap ma'efera 'gā apyraapa, 'jau ete je. Janeruwarete 'ga 'Agesagea je rerekou. A'eramū je "Jarejuwarete 'ga 'Agesage remifutar imū nā'ā je 'i re'ā", 'jau tejeupe.

8

Maira'me a'agawa upe eroopyret

¹ 'Awamū je pē mu'ei maira'me a'agawa upe eroopyrera temi'u are. "Esage te ore maira'me a'agawa upe imonopyrera temi'u 'ua? Naani te ra'u nū?" 'jau ako pēē ka'arana jua jee rai'i. A'eramū je pē mu'jau ee. "Mama'ea jane sikwaapap katu katu", sa'e 'ā jane jarejaupe jepi. A'jea futat aipoa. A'ere 'ā pejerowiaraiw ekoete pejemikwaaw are ra'e jepi. A'ere jane jarejuee jarejejuka esage re Jejuī 'ga rerowiar wyyapiukari jarejaupe.

² "Je'akwaap je" 'jara 'gā ni'akwaawi we futat.

³ Jarejuwarete 'ga ree jareporomutar ire jane jemogyi 'ga jekoty'aawamū. 'Ga 'ā jane kwaap.

⁴ 'Awamū je pē mu'ei maira'me a'agawa upe eroopyrer are. Maira'me a'agap ekoete rerowiaara 'gā 'ā wyro'o mýina owase. A'ere 'gā 'ā jupe eroopyrera me'ega ka'aranūū are. Naekoa'uweri maira'me a'agawa. Janeruwarete 'ga te 'ā eko ma'ea. Majepei tee futat Janeruwaretea. Aipoa jane 'ā sikwaap.

⁵ A'ere 'ā Janeruwarete 'ga kwaapare'ema 'gā maira'me a'agaw are etee 'gā norywamū. Kwaiwete agawewi futat maira'me a'agawa. A'etea nitywi futari maireteetea mū kwe pe.

⁶ "Janeruwarete 'ga etee futat Maireteetea ako" 'ea 'ā jane sikwaap. 'Ga te 'ā mama'ea wapo rakue. Ojeupe etee futat 'ga jane apoi rakue. Majepei tee futat Janejararete 'ga. Jejuī Kristu 'ga te 'ā Janejararetea. Janeruwarete 'ga 'ā mama'ea apoukaa 'ga upe rakue. 'Ga futat 'ā jane mogyaukaa 'ga upe rakue.

⁷ Aipo 'ā jane sikwaap. A'ere 'ā amumera 'gā naeapyoī we ee. Maira'me a'agawa muoryparera 'gā tāmējē 'ā rakue. A'eramū 'gā maira'me a'agawa rowase imonopyrera 'wau wea'aramū etee futat ee. Aipo 'gā naeapyoī katu we futat Jarejuwarete 'ga ree. A'eramū nipo 'gā 'jau ojeupe: "Ajemotywet sipo je Jarejuwarete 'ga upe", 'jau etee nipo 'gā ojeupe maira'me a'agawa upe imonopyrera 'u re.

⁸ Naani. Natemi'ua are rūi Janeruwarete 'ga 'i janee: "Esage 'ga jee", 'jau. Najaneremi'ua rūi jane muesage Janeruwarete 'ga upe. Janeremi'uaaju'jau'jauwe etee futat 'ga upe. Wyro'o jane i'ua esageramū 'ga upe. Wyro'o jane i'ue'ema nanē esageramū 'ga upe nū. Maira'me a'agaw awi pēneatee'ema te nia'wyri 'ga upe.

⁹ Pēē mū te nipo ajee pēneatee ete jui rakue. A'eramū nipo pēē maira'me a'agawa upe imonopyrera 'ua wesageramū futat pē nupe. A'ere nipo Jejuī 'ga rerowiar yau 'gā nupe i'ua nia'wyri futari. Naeateei we 'gā jui. A'eramū pēē pejejea'aramū 'gā nee. Mímera mama'ea 'wawe'em 'ga rerowiar yau 'gā nowase. Kasi a'e pe pemuea'arukat etee 'gā maira'me a'agaw are ne.

¹⁰ Kasi a'e pe 'gā pē nesage ire 'i ojeupe ne: "Aipo 'ga Janeruwarete 'ga kwaapararetea. 'Ga 'ā maira'me a'agawa roga pype mama'e a'u. A'eramū je a'eramū tejemu'jau 'ga ree", 'jau nipo 'ga ojeupe etee futat. A'eramū futat pēē 'gā muea'arukaa maira'me a'agaw are etee ne nū. "Kuu. Maira'me a'agawa upe imonopyrera te je a'u nū'ū. 'Awamū pa ajee je manūi ra'e", pē mu'eukat 'gā ne. A'eramū futat wea'aramū etee maira'me a'agaw are ne nū. A'eramū futat 'gā Jejuī 'ga ree ojemogyppyg are jēmī weateeramū ne.

¹¹ Aipoa te 'gā omotywet Jarejuwarete 'ga upe. Kristu 'ga 'ā amanū agawewi 'gā tywera mepyau rakue. A'etea 'gā 'ā opoia 'ga ree ojemogyppyg awi. Pē nesag ire 'gā mama'e apou pē 'jawe. A'eramū aipo 'gā nemiapofera 'gā motywea Janeruwarete 'ga upe.

¹² A'eramū nipo pēē Jarejuwarete 'ga upe 'ga motywerukar ire pēē nanē pejejekwau 'ga upe nū. Kristu 'ga upe aipo apoaramū nanē mama'e tywera peapo nū. A'eramū pēē pejeje'gawau nanuara apo awi.

¹³ Je nafutari tejewirera 'jawewara 'gā jekwa mama'e tywera apo upe. A'eramū je tejewirera 'jawewara 'gā nupe wyro'o 'ua ia'wyre'emamū je nanē i'wau'jape'ema nū. A'eramū je mama'e tywera apoukare'ema 'gā nupe.

9

Kristu 'ga remimonofera 'gā

¹ Jarejuwarete 'ga upe je mama'e apoi. Jejui Kristu 'ga je mueapyoukat mama'e are. A'eramū je mama'e esage apou 'ga temu'eawer imū etee futat. Ymā te Jejui 'ga jesaukari jee ikue, Janejararete 'ga ojesaukaa jee ikue. 'Ga futat ako je monoukat kwe pe omome'wawamū ikue. Pejejeupe je 'ga mome'uramū ako pēē nanē 'ga rerowiaa ai' i nū.

² Tekotee 'gā nipo naje rerowiari ajemogyau. "NaJejui 'ga remimonofera rūi Paulo 'ga", 'jau etee nipo 'gā jee. Aipo 'gā 'e agawewi 'ā peenup. A'etea 'ā je rerowiat pejepejemogyau. Pejejeupe je Jejui 'ga mome'u re ako pēē 'ga rerowiaa ai'i. A'eramū ako pēē "Paulo 'ga 'ā a'jea futat Jejui 'ga remimonofera mū ako" 'e rerowiaa ai'i.

³ Teago'oramū je tejemome'wau etee futat 'gā nupe. "Je 'ā Jejui Kristu 'ga remimonoferamū futat", 'jau etee je 'ā 'gā nupe tekou.

⁴ "Ojeupe Jejui 'ga mome'uramū 'gā 'ā mama'e monou 'gā nupe, 'gā nemi'uramū rai'i. Aipoa 'ā wesageramū pē nupe rai'i. Ma'eramū sipo ajee je upe 'gā mama'e mura nia'wryi pē nupe?" 'jau je teago'oara 'gā nupe.

⁵ Amumera 'gā 'ā Jejui 'ga remimonofera 'gā wemireko 'gā nerawau ojeupi. Jejui 'ga rewirera 'gā, Pedro 'ga. Mīmēra 'gā 'ā wemireko 'gā nerawau ojeupi, kwe pe Jejui 'ga mome'wau rai'i. 'Gā 'jawe je nanē Jejui 'ga rerowiaara kūjā mū rerekoarūi tejemirekoramū numiamū. A'ere je najeremirekoweri te tekou. A'eramū je tejetee futat tekou.

⁶ "Amumera 'gā 'ā oporowykyawe'em ojeupe mama'e muawamū rai'i. Ma'eramū sipo ajee ore porowykyi Panape 'ga retee mama'ea ojeupe imuaw are?" 'jau nanē je 'gā nupe nū.

⁷ Aw'ya sipo oporowyky ekoete wepye'eme? Jefaruu 'gā miamū 'gā omepy 'gā porowyky are. Ko tymara 'gā nanē oko pypira a'u futat nū, oko tymawera repyramū. Karupa'mī are omaenun ma'e 'gā karupa'mī kamy rykua ee ojejuka repyramū. A'eramū amunipo 'ā je nan tee futat tekou. A'eramū amunipo 'ā pēē mama'e mua jee 'ga mome'u repy 'jawe.

⁸ Najetee rūi aipo 'jau. Ymā te 'ā Janeruwarete 'ga ka'arana kwasiarukari Moisesi 'ga upe ee rakue.

⁹ "Pesīmat kasi pejejeymawa juowuunan are ipyrug ekoramū ne iape'ogamū ne. Tene a'ya mū 'ui akou. Pē nupe futat 'ā iporowykyi. A'eramū pēē a'ya mū 'waukaa etee jupe", 'jau 'ga ikwasiarukaa ka'aran are rakue. Pēneymaw are etee futat sipo 'ga poromū ikwasiarukaa rakue?

¹⁰ Naani. Jane ree nanē futat 'ga aipo kwasiarukari rakue. Ko tymara 'gā 'ā 'jau ojeupe: "Anurenure'i nipo je teko pypira 'ui", 'jau 'gā 'ā ojeupe. Okaapit ma'e 'gā nanē aipo 'jau nū.

¹¹ A'eramū je ko tymara 'jawe Jejui 'ga mome'wau pē nupe. A'eramū amunipo 'ā wesageramū futat mama'ea je upe pēē imura.

¹² Amumera 'gā nupe 'ā pēē mama'e monou 'gā pejemu'eramū rai'i. Je ra'ne ako Jejui 'ga amome'u pē nupe ikue. Ma'eramū sipo ajee je upe tee katu ete mama'ea pēē imura nia'wryi 'gā nupe? "Mama'ea pemut amū jee", a'e futat amunipo je 'ā pē nupe. A'ere je 'ā aipo na'ea'uweri pē nupe. Je tee futat 'ā teporowykyau tekou tejeupe mama'e muawamū. Nafutari je 'gā teago'oa. Nafutari je 'gā amū 'ea tejeupe: "Omepy are tee 'ga Jejui 'ga mome'ui oree" 'gā 'ea je nafutari. A'eramū je teporowykyau tejeupe mama'e muawamū.

¹³ Sā'ā Jarejuwarete 'ga mogytaaw ipe oporowyky ma'e 'gā. Jarejuwarete 'ga upe tekotee 'gā nemirerurera wyra rapyawe'ēwe 'gā ape nuga ojeupe, ojemi'waawamū. Aipoa 'ā pēē ikwaapa.

¹⁴ Nan tee futat Janejararete 'ga 'i rakue: "Pemepy ki jeje'ega mome'wara 'gā. A'eramū ki pēē 'gā mama'e mua 'gā nupe", 'jau 'ga 'ā rakue.

¹⁵ A'ere je 'ā "mama'ea pemut amū jee, pejemu'e repyramū", na'ei pē nupe ai'i. 'Awamū nanē je na'ei aipo 'jau pē nupe nū. Ty'ara agawewi nipo je erekou. A'etea nipo je naenūi futari mama'ea pē nupe. 'Gā je mepye'ema je muekōēina futat.

¹⁶ Najerowiaraiw ekoetei je Jejuu 'ga mome'u are. 'Ga te ako je mono omome'wawamū ikue. A'eramū je 'ga mome'wau tejeupe 'ga 'eawer imū etee futat. Jeporiay'i amunipo 'ā je, 'ga je'ega renuwe'em ire.

¹⁷ Tejemifutar imū etee 'gā nupe 'ga mome'u re amunipo 'ā je mama'e renūi tekou 'gā nupe temepyawamū rai'i. A'ere 'ā Janeruwarete 'ga te je monoi wa'yra 'ga mome'waramū kwe pewaramū pē nupe ikue. A'eramū je Jarejuwarete 'ga remifutar imū etee futat Kristu 'ga mome'wau 'gā nupe ikue.

¹⁸ Pē nupe Jejuu 'ga mome'wau ako je mama'e renūine'ema pē nupe ai'i. "Mama'ea pemut amū jee" 'jawe'em ako je pē nupe ai'i. A'e are te jerekōēājamū te'ŷina. Jerekōēāja jeporowyky repy 'jawe jee.

¹⁹ Na'gā amū nupe oporowyky ma'ea rūi je. Je tee futat aporowyky tejeupe. A'ere je tee futat je jemogoi Jejuu 'ga upe oporowyky ma'eramū ikue. Jejuu Kristu 'ga je imome'wau 'gā nupe kwaiwete, 'gā nupe 'ga rerowiar wyyapiukaawamū. A'eramū je 'gā nupe oporowyky ma'e 'jawewara.

²⁰ Ymā te 'ā Moisesi 'ga judeuramū oreyppy 'gā mu'jau 'gā jemogy are rakue. A'eramū 'gā mama'e apou 'ga je'eg imū etee futat rakue. A'eramū je judeu 'gā pype tekou je mama'e apou 'gā 'jawe etee futat ai'i. Jejuu 'ga rerowiarāmū je tepoia Moisesi 'ga je'eger imū mama'e apo awi numiamū. NaMoisesi 'ga je'egera renuw are rūi Kristu 'ga jane katu'ogi. A'eramū je tepoia Moisesi 'ga je'eger are tejemogypyppyg awi. A'etea je judeu 'gā nupe Jejuu 'ga mome'uramū je mama'e apou Moisesi 'ga je'eger imū 'gā 'jawe etee futat. Kasi a'e pe 'gā niporenuwiweri je'je'eg are. A'eramū nipo 'gā Moisesi 'ga je'eger imū etee mama'ea je iaporamū oporenuwiweramū je'je'eg are. A'eramū nipo 'gā Jejuu 'ga rerowiaa ojeupe je 'ga mome'uramū re'ā, 'jau je tejeupe.

²¹ Judeue'ema 'gā pype tekou nanē je mama'e apou 'gā 'jawe etee futat. A'eramū nipo 'gā oje'jawe je rekoramū nipo 'ā 'gā porenuwiweramū je'je'eg are re'ā. A'eramū nipo 'gā nanē Jejuu 'ga rerowiaa je 'jawe re'ā, 'jau nanē je tekou ikue. Judeuramū ore upe Moisesi 'ga remikwasiarer imū tekowe'em futat. A'ere je Jarejuwarete 'ga je'eg imū etee futat je reko esagei. Kristu 'ga je'eg imū nanē je reko esagei nū. A'eramū je 'gā nerowiarukaa 'gā nupe tekou.

²²⁻²³ 'Gā amū te aje Jejuu 'ga rerowiaa ināinānī'i etee ikue. A'eramū je 'gā pype tekou mama'e apoi 'gā 'jawe etee futat ikue. 'Gā poaawamū Kristu 'ga rerowiar wyyapiukaawamū je tekou iapoi 'gā 'jawe etee futat ikue. Kristu 'ga 'gā erowiarāmū je teku'iramū tekou 'gā nee ikue. Mama'e tesirūmera je aapo Kristu 'ga rerowiarukaawamū 'gā nupe.

²⁴ Sā'ā ujan ma'e 'gā. "Siesak jarejana 'jau", 'jau 'gā 'ā ajaupe. A'eramū 'ā 'gā ujana pāwē pāwē esaka. Kwaiwete ujan ma'e 'gā ujana. A'ere 'ā majepeja 'ga etee iwaēmi opytu'wawa upe ajunenewe. A'eramū 'gā 'ā ajunenewe owaēm ma'e 'ga upe etee akagyrunanū'i monou 'ga akagyrunamū 'ga upe. Opia ma'e 'gā nowaēmi ajunenewe. Mama'e poyja rerekwara 'gā nanē nowaēmi ajunenewe nū. Nan jane Kristu 'ga rerowiaaramū. 'Ga pyri jareoweramū jane poiri te mama'e tywera apo awi.

²⁵ Ajaupi ujan enune ujan ma'e 'gā ojetee ra'ne te 'gā ujana. A'eramū 'gā ujana pokwaapa. A'eramū 'gā ujana pokwaaw ire oky'jawe'em futat akagyrunanū'i ppyge'em awi. Ojemogypyppk 'ga ujan are. Esage futat 'ga jānawa akagyrunanū'i'ia numiamū. Majepei 'ara rupi etee futat esageramū. Ka'a apopyrera ete poromū akagyrunanū'i'ia. A'eramū ai'iwe op'ijagamū etee futat. Nan tee futat jane Jejuu 'ga rerowiaaramū mama'e apoi 'ga 'eawer imū etee futat. A'ere jane naip'ijag etee ma'e are rūi iapoi. 'Ga pyri jarewawamū te jane iapoi.

²⁶ Ma'eramū je 'ā mama'e apoi 'ga 'eawer imū etee futat.

Peesak 'ā afuakara resaukaara 'gā ajaupe nanē nū. Ajuowajaa 'gā 'ā afuakara resaukaawamū. A'eramū 'ā ajuetykara 'ga afuakara resaukaa. Najoman ekoete rūi nanē 'gā ajuetykawamū nū. Ojoman esage te 'gā. Nan tee je noko ekoetei. Jejuu 'ga 'eawer imū etee futat je reko.

²⁷ Tejemu'akwaapa mama'e tywera apoe'em awi. Naapoi futari te je mama'e tywera. 'Ga remifutar imū etee futat te je mama'e apoi. "Werowiarāmū Jejuu 'ga pētywera moia pē nui, pē mogyau wemiayuwamū. A'eramū ki pēē mama'e apou 'ga remifutar imū etee futat", pē nupe 'e reewi je mama'e tywera apou teko re amunipo 'ā Janejararete 'ga naje monoi futari ojeppyri.

¹⁻² Pēnea'ar iki judeuramū oreypy 'gā nee. Ymā te 'ā Janeruwarete 'ga 'gā nenū'ēukari Egitu wyy awi Moisesi 'ga upe rakue. Pe awi 'gā oramū 'ā Janeruwarete 'ga ywasiga monou imogou 'gā 'arimū rakue. 'Gā au'jawamū 'ga ywasiga mogou 'gā 'arimū rakue. 'Yē'ē upe 'gā waēmamū 'ā Janeruwarete 'ga 'y mowoka 'gā nupe rakue. A'ere 'ā 'ga wyytu mua 'y mowokawera rupi wyy mukaga 'gā nupe rakue. A'eramū 'gā 'ā awaupap oyaapa rakue, opy muakŷme'ema futat rakue. Nan 'ā 'gā jemo'wyyriarukari Moisesi 'ga upe rakue.

³ Najuejue etee futat 'gā ojeupe Jarejuwarete 'ga remimurera 'wau rakue, mana 'jawa 'wau rakue. Ywag awi 'ga mana 'jawa mua 'gā nemi'uramū rakue. A'ea 'gā i'wau rakue.

⁴ Ojeupe 'ga remimurera 'ya nanē 'gā itykua rakue nū. Ymā te 'ā Janeruwarete 'ga 'i Moisesi 'ga upe rakue: "Itaaua enupā wyyra pyu", 'jau 'ga 'ā Moisesi 'ga upe rakue. A'eramū 'ā Janeruwarete 'ga 'y murukaa ita awi 'gā nupe. A'eramū 'gā 'ā oy'wau rakue. Aipoa ita 'jawe futat Kristu 'ga. Sā'ā 'gā ita awi imuripyra 'y rykura rakue. A'eramū 'gā 'ā amanūme'em o'yuweji upe rakue. Nan tee futat Kristu 'ga rekoī 'gā pype 'gā nee ojejuka esage ma'eramū. Nuesagi agawewi 'gā 'ga. A'ere 'ga futat 'gā nerekwaramū rakue.

⁵ A'ere oreypy 'gā najemogyi Jarejuwarete 'ga remifutar imū rakue. Nomuorywi 'gā 'ga rakue. Amume'ri 'gā etee 'ga muorypa rakue. A'eramū 'ga amara'neramū omuorypare'ema 'gā nee. A'eramū 'ga 'gā momawukaa 'gā ataaw ipe rakue, jū pyterimū amunawe'ema pyterimū 'gā o 'gā nekoramū rakue.

⁶ Janeruwarete 'ga ka'arana kwasiarukaa oreypy 'gā nee 'gā neko esage'emawer are rakue ee jane mueapyoukaawamū rakue. A'eramū jane jarejea mŷine'ema mama'e tywer are 'gā 'jawe.

⁷ 'Gā amū 'ā maira'me a'agawa muorypa rakue. Kwataua'yra a'agawa 'gā 'ā iapou omairamū rakue. A'e are nanē 'ā Janeruwarete 'ga ka'arana kwasiarukaa rakue nū. "Maira'me a'agawa upe wemimonofera kumi 'u re 'gā wagairan pāwēnamū etee kūjā are kūima'e are 'jau. Maira'me a'agawa muoryw ire taetu nipo 'gā otewereteramū, mama'e tywera apou ajuee", 'jau 'ga ikwasiarukaa 'gā nee rakue.

⁸ Anure nānēwējēmī rakue nū, 'gā wagairan pāwēnamū etee kūjā are kūima'e are 'jau rakue nū. A'eramū 'ga mama'e tywera apoarera 'gā Janeruwarete 'ga imomawukaa kwaiwete. Majepēi 'ara rupi etee futat 'ga 'gā apisau kwaiwete. Witi tres miu 'gā 'ga iapisau 'gā tywer are rakue. A'eramū ki jane jareagairane'emamū 'gā 'jawerimū.

⁹ Anure 'ā 'gā amū 'jau ojeupe etee futat: "A'jea sipo Janeruwarete 'ga je rereko tyweretei mama'e tywera je iapoawer are 'wei", 'jau 'ā 'gā ojeupe etee futat rakue. A'eramū 'ā 'gā mama'e tywera apou 'ga resakawamū rakue. Nuenuwi aipo 'gā Jarejuwarete 'ga je'ega. A'eramū Janeruwarete 'ga moja monou 'gā nupe. A'eramū moja 'gā u'wau 'gā apisau rakue. A'eramū ki jane iapowe'em 'gā 'jawerimū.

¹⁰ A'ere 'gā amū Jarejuwarete 'ga ago'wau rakue nū. A'eramū Janeruwarete 'ga ojeypyriwara mū monou 'gā apisau rakue.

¹¹ Aipo are nanē Janeruwarete 'ga ka'arana kwasiarukaa 'ga amū upe ee rakue, ee jane mueapyoawamū rakue. A'ere kasi jane mama'ea siapo 'gā 'jawerimū ne. Niporomukui futari nipo Jeju 'ga ruawa. A'eramū ki jane mama'e esage etee futat iapou 'ga muorypawamū.

¹² Iporiay'i "Jereapyo je mama'e are. A'eramū je mama'e tywera apowe'em jepi" 'jara 'gā. Anure nipo aipo 'jara 'gā mama'e tywera apoi.

¹³ "Mama'e tywera apoa nipo je etee futat areko re'ā", pe'je nipo. Naani. Najuejue etee futat mama'e tywera apo rekoī jane ree. A'ere Janeruwarete 'ga mama'e apoi u'eawer imū etee futat. Nuapoukari futari 'ga mama'eaya kwaikwaja janee. Janefuakara 'jawe etee futat 'ga mama'eay apoukari janee. A'eramū 'ga, ojeupe peje'egamū, pē mamuakaa mama'e tywera apoukare'ema pē nupe. A'eramū te mama'e tywera nepeapoi.

¹⁴ Pemuoryp kasi maira'me a'agawa pejejemogyau ne. Pēē 'ā jejekoty'aawa. A'eramū je aipo 'jau pē nupe.

¹⁵ Pēē 'ā i'akwaap ma'eramū. Pejejeupe je'eawer are 'ā pēē pejejeapyoramū pejejemogyau. "Janeremikwaawa resage 'jawe etee futat te Paulo 'ga 'eawer are? Naani te ra'u nū?" 'jau ki pēē pejejaupe je'eawer are pejejea'aramū pejejemogyau.

¹⁶ Pejejea'aramū nanē ki Jeju Kristu 'ga remiapofer are nū. Amanū enune 'ā Jeju Kristu 'ga y'way tykurukari wemiayuwa 'gā nupe rakue. "Koa y'waya jerya", 'jau 'ga 'gā nupe rakue. A'eramū jane 'awamū y'way rykua 'ga manūawer are jarejea'aawamū, 'ga muorypa ee. Mani'oko'o'ia 'ga imowowoka imonou wemiayuwa 'gā nupe rakue. "Koa mani'oko'o'ia jero'oa futat", 'jau 'ga 'gā nupe rakue. A'eramū jane 'awamū mani'oko'o'ia nanē jane i'wau 'ga manūawer are jarejea'aawamū nū.

¹⁷ Kwaiwete agawewi nipo jane 'ga rerowiaaramū. A'etea nipo jane majepēi tee mani'oko'o'ia mo'jomo'jou'i i'wau. Kwaiwete agawewi jane Jeju Kristu 'ga rerowiaaramū.

A'etea jane sajemogy majepe'i 'yweteewara 'jawe. Kristu 'ga 'ā majepe'i' i etee futat. A'eramū jane 'ga rerowiaaramū jarejemogyau majepe'i 'yweteewara 'jawe.

¹⁸ Jeju'i 'ga rerowiare'ema 'gā Israeu juapyrera 'gā wyra rerawau mainana 'ga upe. A'eramū mainana 'ga wyra jukau imo'jau. A'ere 'ga wyro'o pe rapyau Jarejuwarete 'ga upe. A'ere wyra reruarera 'ga wyro'o remyrer ape 'wau. "A'e pyu ore Jarejuwarete 'ga muorywi", 'jau 'gā.

¹⁹ A'ere amumera 'gā 'ga rerowiare'ema 'gā wyra mū rerooi imonou maira'me a'agawa upe. "Temaira upe je imonoi", 'jau 'gā ojeupe. A'jea sipo 'gā maira'me a'agawa mairaretea?

²⁰ Naani. Mama'eukwaawa upe te 'gā imonoi. Mama'eukwaawa te 'gā muoryp. NaJarejuwarete 'ga upe rūi 'gā imonoi. NaJarejuwarete 'ga rūi 'gā muoryp. A'eramū je 'jau pē nupe: "Mama'eukwaawa upe kasi mama'ea pemono ne", 'jau je pē nupe.

²¹ Jeju'i 'ga manū are pejejea'aramū nipo pēē y'way rykua. Aipoa y'way rykur ire kasi maira'me a'agawa upe imonopyrera y'waya petykur ine. Aipoa taetu nia'wyrī Janeruwarete 'ga upe. Jeju'i 'ga manūawer are pejejea'aramū pēē mani'oko'o'i 'wau. Aipo 'u re kasi mama'eukwaawa upe imonopyrera kumia pe'u ne. Kasi a'e pe mama'eukwaaw are te pēnea'ar ine. Aipoa nanē nia'wyrī Janeruwarete 'ga upe nū. Nepemuorywa'uweri Jeju'i 'ga mama'eukwaawa reewe.

²² Ma'ja te pefutat? Pejejee 'ga mara'nea te ra'u pefutat nū? 'Ga muoryw ire mama'eukwaawa muorypa 'ga mamara'neukaa pejejee 'ea te ra'u pefutat nū? A'jea sipo janefuakaramū Jarejuwarete 'ga fuakara apyraapa? Naani. Ifuakat 'ga janefuakara apyraapa. A'eramū ki pēē 'ga mamara'neukare'ema pejejee.

Jarejomote'aawa kasi siapo ne

²³ 'Gā amū nipo 'jau ajaupe: "Jarejemifutara etee futat jane siapo", 'jau nipo 'gā ajaupe. A'jea futat aipo 'gā 'ea. A'ere amumera nia'wyrī 'gā nupe. Mama'e mū najane mogypygyukari Jeju'i 'ga ree.

²⁴ A'eramū ki jane mama'e apou jarejopoaawamū. Najarejeupe etee rūi futat kasi mama'ea siapo ne.

²⁵ Miaro'o uweita pejewau miaro'o pe mua miaro'o me'egara 'gā nui. Pejeporonupe'ema ee. "Maira'me a'agawa upe imonopyrera te?" 'jawe'em pēē 'gā nupe.

²⁶ Ymā te 'ā Janeruwarete 'ga ka'arana kwasiarukari 'gā amū nupe ee rakue. "Ywya 'ā Janejararete 'ga ma'ea. Ywy pypiara nanē 'ā 'ga ma'ea futat nū", 'jau 'ga ikwasiarukaa 'gā amū nupe rakue. A'eramū ki jane mama'e 'wau jarepy'a'wyrē'emamū ee.

²⁷ Jeju'i 'ga rerowiare'ema 'gā amū nipo 'jau pē nupe: "Pejot pejejemi'waa ore pyri", 'jau nipo 'gā pē nupe. A'eramū pejewau etee futat pejejemi'waa. "Maranuara te kumia", 'jawe'em futat pejeporonupe'ema ee.

²⁸ "Maira'me a'agawa upe imonopyrera 'gā wapo kumiramū ko", pejejeupe 'gā amū 'eramū pēē i'wawe'em futat. Kasi a'e pe nepe'ukararūkari 'gā nupe ne. "Ekoay 'gā je mote'arukat Jarejuwarete 'ga upe", e'i 'gā pē nupe ne.

²⁹ Pēē 'ā pēneapyo ee numiamū. A'ere nipo 'gā naeapoyi we ee. A'eramū pēē i'wawe'em 'gā neape.

Maranamū nipo pēē mū 'jau: "Ma'eramū sipo jane ni'ui mama'ea 'gā 'jawe?" 'jau nipo pēē. "Mama'e mū apowe'em nanē 'gā neape nū?" 'jau nipo pēē.

³⁰ "Jarejemi'war enune nanē 'ā jane Jarejuwarete 'ga muorypa ee jepi. Ma'eramū sipo ajee 'gā je ago'oi wējēmī nū?" 'jau nipo pēē mū.

³¹ A'eramū je 'jau pē nupe: A'jea futat ki mama'ea siapo 'ga muorypaw imū etee futat. Mama'e 'wau miamū ki 'ga muorypaw imū etee si'u.

³² Jarejomote'aawa apowe'em futat jarejaupe. Judeu 'gā, judeue'ema 'gā, Jeju'i 'ga rerowiaara 'gā. Mīmera 'gā pēē imotywerukare'ema pejejee.

³³ Je 'jawerimū ki peko. Sā'ā je mama'ea apoa 'gā muorypawamū etee futat. Nan ki mama'ea peapo. Naapoi je mama'ea tejemifutar imū etee. Naapoi je mama'ea temuorypawamū etee. 'Gā muorypawamū etee je 'ā mama'ea apoi tekou. A'eramū nipo je Jeju'i 'ga rerowiarukaa 'gā nupe kwaiwete nanuar are.

11

¹ Kristu 'ga 'jawerimū je mama'e apoi. A'eramū ki pēē mama'e apou je 'jawerimū etee futat.

Jeju'i 'ga rerowiaara kūjā

² Jeku'i je pē nee. Pejejea'aramū pejejemogyau je ree, pejejeupe je'eawer are. Je jemu'eawer imū etee pēē mama'e apou. A'eramū je teku'iramū pē nee.

³ A'ere je 'awamū mama'e mū ree pē mu'ei nū. Kristu 'ga 'ūi 'wyrīaramū kūima'eferamū jane upe. Kūima'e 'gā 'ūina 'wyrīaramū wemireko 'gā nupe. Nan te Janeruwarete 'ga 'ūina 'wyrīaramū Kristu 'ga upe.

⁴ Najudeua rūi 'ā pēē. A'eramū ki pēē pejemīapou etee futat pejejemogyau. Pejejeueape Jarejuwarete 'ga upe pejeje'ega monou kasi kūima'eferamū pejeakaga peau'i taity pyu ne. 'Ga je'eg are pejejamu'jaw ipe nanē pēē pejeakaga au'jawe'em nū. Kūjāmera 'gā etee te ki ajee tajeakaga au'i. A'eramū kūima'efera 'gā wakaga au'jawe'em. Kūima'e 'ga wakaga au'i re amunipo 'ā 'gā amū 'i "kūjā 'jawe 'gā iapoī". A'eramū 'ga ojenosōu jui.

⁵ A'ere ki kūjāmeramū pejeakaga au'i futat pejejeueape Jarejuwarete 'ga upe pejeje'ega monou. 'Ga je'eg are pejejamu'jaramū nanē ki pēē pejeakaga au'jawe'em nū. Pejejemipok-wawer imū etee futat peko. Pejeakaga au'ie'eme nia'wryi pē nupe. Kūima'efera 'gā etee te oje'eg Jarejuwarete 'ga upe wakaga au'jawe'em. Kasi a'e pe kūjāmeramū pejeakaga au'ie'em ire "kūima'e wā 'jawe ore", pe'je ne. A'eramū pēē aipo pyu pejemena 'gā mojenosōu ne. Ijepinipyretera 'jawe ijeakaga au'ie'ema 'gā.

⁶ Pejeakag are pejeoporopariwere'emamū pēē kūjāmeramū peje'awa pina. Pē'awa pina pē mojenosī re pēē kūjāmeramū pejeakaga au'jawe'em futat.

⁷ Kūima'eferamū jane nipiari jareakaga. Janeruwarete 'ga 'jawewaramū jarejemogyau. Janeruwarete 'ga 'ūina 'wyrīaramū janee. Kūima'e 'gā ajemogyau 'wyrīaramū wemireko 'gā nupe. A'eramū 'gā nemireko 'gā 'gā je'ega renupa.

⁸ Nakūjāa rūi Janeruwarete 'ga remiapo ppyfera. Kūima'e 'ga ra'ne te 'ā 'ga wapo rakue. A'ere te 'ga 'ga arukaga mū mosogī 'ga wī kūjānamū iapopyramū rakue.

⁹ Nakūjā ēē upe rūi Janeruwarete 'ga kūima'e 'ga apoī rakue. Kūima'e 'ga upe te 'ga kūjā ēē apoī rakue.

¹⁰ A'eramū ki pēē kūjāmeramū pejeakaga au'jawe'em taity pyu. Aipo pyu pēē pejemena pejemo'wryiara resaukaa pejeakaga au'ia. Ywagipewara 'gā nee nanē pejeakaga piaa nū.

¹¹ Jejuī 'ga rerowiaaramū jane jarejopoa pāwē. Nakūima'eramū etee rūi jane Jejuī 'ga rerowiaara. Nakūjāmera 'gā etee rūi nanē 'ga rerowiaare'emamū. Najuejue etee futat jane 'ga rerowiaara. A'eramū jane jarejopoa pāwē etee futat.

¹² Ymā te Janeruwarete 'ga kūima'e ppy 'ga arukag awi kūjā ppy ēē apoī rakue. A'ere 'ā ae 'awamū kūima'eramū ae 'ari kūjā awi. A'ere jane Jarejuwarete 'ga remiapofera juejue futat jane.

¹³ Maran te pekwaap? Esage te kūjāmera 'gā oje'ega Jarejuwarete 'ga upe wakaga au'jawe'em? Naani te ra'u nū?

¹⁴ Jare'awukua jane 'ā kūima'eramū enosōu.

¹⁵ A'ere 'ā kūjāmeramū pēku'i te peje'awuku are. Pē'awukua ako pēakaga au'jawa 'jawe pē nupe.

¹⁶ Aipoa etee je'ea. Maranamū nipo 'gā amū je ago'wau aipo je'eawer are. A'ere ore Jejuī 'ga rerowiaara 'gā mu'ei aipo are nanē kwe pe ikue nū. A'eramū 'gā nanē ajemogyau ojeupe ore'eawer imū etee futat iapou. Ajepeja 'ga rerowiaara 'gā nanē aipo apou nū.

Jejuī 'ga manūawer are janerea'ap

(Mateu 26.26-30; Maku 14.22-26; Luka 22.14-23)

¹⁷ Awamū je pē mu'akwaawi mama'e mū ree. Najeku'i je pēnemiapo mū ree. Jarejuwarete 'ga muorypaw ipe pejejatykau a'e pēē na'ga muorypawamū etee rūi pejejatykau 'ga ree. Pejejamueu a'e mama'e are Jarejuwarete 'ga mogyaaw ipe.

¹⁸ "Najarejuwarete 'ga muorypawamū etee rūi 'gā jatykai. Omojopype wējēmī 'gā mama'e tesirū pyu nū. A'eramū 'gā ajamueu morogyta tesirū are", e'i 'gā amū 'ua pē mome'wau jee ai'i. "Maranamū nipo amumera je upe 'gā nemimome'ua a'jea futat", 'jau je pēnera renupa te'ŷina ai'i.

¹⁹ Pejejamueaw ipe nipo i'akwaap ma'e 'gā pekwaap. "Na pa ae i'akwaap ma'eramū ra'e", 'jau nipo pēē ijamue'ema 'gā nesaka. I'akwaap ma'e 'gā najamuei. Jarejuwarete 'ga je'eg imū etee futat 'gā mama'e apoī.

²⁰⁻²¹ "Sajatyka jarejemi'waa 'jau. Jarejemi'wapaw ire mani'oko'o'ia si'u Jarejararete 'ga manūawer are jareje'aawamū 'jau", 'jau a'e pēē pejejaupe. A'ere a'e nepejuapesagi. Pejejatykaupawe'ewe a'e pēē mama'e 'waupap pejejai. A'eramū a'e 'gā amū 'ua, mama'e 'upaw ire etee. A'eramū a'e pēē mū emi'uu ma'eramū. Pēē mū a'e pejejeawrywamū miamū. Nepemā'ēi sipo "ty'ara upe nipo jane 'gā amū mogyi" 'e are? Ma'eramū sipo pejejea nepeetygi pejejeuee?

²² Ty'ara rerekou pejeje'wyr ipe ra'ne pejejemi'waa. Pēpoyi etee te sipo 'gā nenunewe mama'e 'upaw ire? Aipoa nia'wryi. Ijemi'ware'ema 'gā pemojenosī aipo pyu. Emi'ue'ema 'gā taetu pereko tywerete aipo pyu. Aipo pēē iaporamū je "Esage aipoa", na'ea'uweri pē nupe.

²³ Jarejararete 'ga etee futat je mu'e mama'e are, amanūawer are janerea'aawamū janejatykaaw are. "Jemanūawer are pejejea'aramū pejejatykau ki nan peapo", 'jau 'ga jee ikue. A'eramū je pē mu'jau tejeupe 'ga 'eawer are. Ia'wyre'ema 'gā po pe omono enune 'ā Jeju 'ga mani'oko'o'i ppyka opo pe.

²⁴ A'ere 'ga 'Uwarete 'ga muorypa ee rakue. A'ere 'ga 'ā imo'jau imonou wemimu'efera 'gā nupe rakue. "Koromū jero'oa. Sā'ā mani'oko'o'i jemo'ia. Nan futat nipo jero'oa jemo'i pē katu'okawamū", 'jau 'ga 'ā 'gā nupe rakue. "Je manū re ki pēē mani'oko'o'i 'wau je manūawer are pejejea'aawamū", 'jau 'ga 'gā nupe rakue.

²⁵ Ojemi'wapaw ire 'ga kaneeku ppyka y'way reko'woka ipype. A'ere 'ga imonou 'gā nupe. "Koromū jerya. A'ere'ere'i nipo 'gā amū je jukai jery reko'woka. Jemanū are nipo Jeruwarete 'ga je rerowiaaramū pē katu'ogi najuejue etee. 'Awamū karupa'mīa nepejukau'jawi pejetywera mepyawamū. Poromū futat Janeruwarete 'ga je'eg ymanera numiamū. A'ere 'awamū 'ga je'eg yaua te. Je rerowiaaramū etee te 'ga 'awamū pētywera moiri pē nui. Poromū futat Janeruwarete 'ga je'eg yaua 'awamū. Y'way rykua ki pēnea'at je ree", 'jau Jeju 'ga 'gā nupe rakue.

²⁶ A'eramū je 'awamū 'jau pē nupe: Mani'oko'o'i 'u are pejejatykau pejejamuea'aa Jarejararete 'ga manūawer are. Y'waya nanē ki pēē itykua nū. 'Ga ruru'jawe'emauewe pēē namutat iapou pejejomogyau. Aipo apoa "Kristu 'ga manūi janetywer are rakue" 'e resaukaa ajemogy tee ma'e 'gā nupe.

²⁷⁻²⁸ A'ere ki jane i'u enune janerea'at ra'ne jarejee. "Najetyweri te je?" 'jau ki jane jarejeupe. Jarejuwarete 'ga jaretywera moir ire te jane aipoa mani'oko'o'i 'ui. Kasi a'e pe jane jemotyweri 'ga upe ne. 'Ga manū kurapara 'jawewaramū nanē jane poromū nū.

²⁹ A'eramū ki jane i'u enune jarejekatu'oka ra'ne te i'wawamū. Jarejararete 'ga manū are jarejee'aawamū te jane aipo mani'oko'o'i 'ui. Ma'eramū 'ā aetywere'ema etee futat i'ui. Kasi a'e pe Janeruwarete 'ga jane rereko tyweretei ee ne.

³⁰ A'ere a'e pēē nanarūi peapo rai'i. Pejetywera pype we futat a'e pēē i'wau rai'i. Ma'eramū a'e Janeruwarete 'ga pē nereko tyweretei ee rai'i. A'eramū a'e pēē mū pejekararamū rai'i. Pēpytuna 'gā a'e amū amanūmū rai'i.

³¹ A'eramū ki jane, i'u enune, jarejea'aramū jarejee: "Jeresage te je Ku'jywa 'ga upe?" 'jau ki jane jarejeupe. Jaretyweramū jane jareporogytau Jarejuwarete 'ga upe jarejee ra'ne. "Jetywera emoit je wi" 'jau ki jane 'ga upe ra'ne. A'ere te jane i'ui. Kasi a'e pe 'ga jane rereko tyweri ee ne.

³² Jeju 'ga rerowiaaramū miamū Janeruwarete 'ga jane rereko tyweri'i janetywer awi jane mosamamū. A'eramū nipo jane jarejemu'jau 'ga je'ega renuw are. A'eramū 'ga jane monowe'em mama'eukwaawa rapyaw ipe 'ga rerowiare'ema 'gā nupi.

³³ A'eramū ki pēē pejeptytuna 'ga rapesaka ra'ne. 'Gā jatykapaw ire tāmējē pēē Jarejararete 'ga ree pejejea'aawa mani'oko'o'i 'wau y'way rykua 'jau.

³⁴ Pejepy'arayaramū pēē pejejemi'waa pejeje'wyr ipe ra'ne. A'eramū pēē Jarejararete 'ga ree pejejea'aawa mani'oko'o'i 'wawamū etee futat pejejatykau pejejuee. A'eramū Janeruwarete 'ga pē nerekou tywere'em ee. Pē pyri tewau tāmējē tamueapyo pēē mama'e mū ree 'jau.

12

'Ga 'Agesagea mama'e apoukaa janee

¹ Je upe ka'arana mua ako pēē pejeporonupa Jarejuwarete 'ga 'Agesage are rai'i. Jeju 'ga jane erowiarāmū te Janeruwarete 'ga U'agesage muri janee. A'eramū jane mama'e apou 'ga pājē mū. A'eramū je pē mueapyou ee.

² Jeju 'ga rerowiare'emawe ako pēē maira'me a'agawa muorypa rakue numiamū. Noje'egi maira'me a'agawa. Nuenuwi pēje'ega. A'eramū 'ā pēē pejejemoryteeu ee rakue. 'Awamū ajee 'ā Jeju 'ga perowiat. 'Ga muorypa 'ā pēē 'awamū.

³ A'eramū je pē mueapyou mama'e are 'awamū. Jarejuwarete 'ga 'Agesage rerekwaramū jane je'egaiwi Jeju 'ga ree. Na'ga 'Agesage rerekwara rūi Jeju 'ga ago'oa. 'Ga 'Agesage rerekwaramū etee te jane 'i: "Jeju 'ga 'ā janejararetea", 'jau jane 'ga upe.

⁴⁻⁶ Janeruwarete 'ga 'Agesagea te 'agamū mama'e apoukaa janee. Najueapyo 'jawe ete rūi te aje 'ā 'ga ae mueapyo pāwēi mama'e are. Ae mueapyo tee te futat 'ga 'Agesagea 'ga remifutar are. Majepei tee futat 'ga 'Agesagea numiamū. A'ere najareju'jaju'jawe rūi janeremiapoa. A'ere jane Jarejararete 'ga upe etee futat iapoi. Najareju'jawe rūi agawewi jane mama'e apou. A'ere Janeruwarete 'ga etee futat iapoukari jane upe.

⁷ Janeruwarete 'ga 'Agesagea ako Jeju 'ga rerowiaaramū jane pype. A'eramū 'ga 'Agesagea mama'e apoukaa jane upe Jeju 'ga remifutar imū etee. 'Ga 'Agesagea futat mama'e apou ajuawyawukaa ae upe. Namajepei amū etee rūi 'ga 'Agesagea mama'e

apoukari ae upe. Wapo pāwē pāwē futat ae upe imajuawyawyou. U'agesagea 'ga imua ae upe ojopoaawamū.

⁸ Janeruwarete 'ga 'Agesagea ae mū mueapyou ae'akwaaw are. A'eramū aipo 'gā jane mu'akwaapa ee. Amumeramū 'ga 'Agesagea aeremikwaawe'ema kwaawukaa ae upe. A'eramū 'gā aeremikwaawe'ema kwaawukaa ae upe.

⁹ Amumeramū 'ga 'Agesagea Jejuī 'ga rerowiarukaa nanimenime ae upe. Amumeramū 'ga 'Agesagea ojero'wu ma'e 'gā katu'ogukaa ae upe.

¹⁰ Amumeramū 'ga 'Agesagea aeremiapoe'ema apoukaa ae upe. Amumeramū 'ga 'Agesagea Jarejuwarete 'ga je'ega mome'uukaa ae upe. Amumeramū 'ga 'Agesagea mama'eukwaawa kwaawukaa ae upe ae rereko are. Janeruwarete 'ga remiapo are nanē jane mueapyoukaa nū. Amumeramū 'ga 'Agesagea ae moje'eg amuteeukaa. A'eramū 'ga 'Agesagea wējēmī futat aeje'eg amutee kwawukaa ae mū upe nū. A'eramū 'ga imome'wau ikwaapare'ema 'gā nūpe.

¹¹ A'ere majepēi tee futat Janeruwarete 'ga 'Agesagea. A'ere mama'e apoi juawyawyukari ae upe wemifutar imū etee futat.

'Ga rete 'jawe jane 'ga rerowiaaramū

¹² Sā'ā aeretea majepēi tee futat. A'ere 'ā mukūi aejyuaa. Mukūi 'ā aeretymakaga. Mukūi 'ā aepya. A'ere 'ā majepēi tee futat aeretea. Nan tee Kristu 'ga rerowiaaramū jane jemogyi. Kwaiwete agawewi ae jemogyi. A'ere ae majepēi 'ywete futat ae jemogyi.

¹³ Jejuī 'ga rerowiaaramū ae jemogyi aju'jaju'jawe etee futat 'ga upe. Judeuramū ore, judeu'emamū pēē, ka'a pewara 'gā, oje'wyrarete pewara 'gā. Mīmēra ae Jejuī 'ga rerowiaaramū etee futat. A'eramū Janeruwarete 'ga U'agesagea mua jane. A'eramū 'ga 'Agesagea jane mogyau majepēi teewaramū futat.

¹⁴ Peesak 'ā aeretea. Majepēi tee futat 'ā. A'ere 'ā mukūi aejyuaa, mukūi aeretymakaga, mukūi aepya, mukūi aerea. A'ere 'ā naju'jawe rūi iporowykyi. Nan tee futat Janeruwarete 'ga 'Agesagea porowykya namajepēi 'ywete rūi.

¹⁵ Ma'eramū sipo pēē mū: "Naapoi je mama'ea 'ga 'jawe. A'eramū nipo je teporowykawe'em Jejuī 'ga upe", 'jau. Aepya amusipo 'ā "Na'ga poa rūi nā'ā je re'ā e'i. A'eramū je te'ŷine'ema 'ga rete are", e'i sipo aepya? Naani. Aipo e'i agawewi futat amunipo 'ā. A'etea amunipo 'ā jane nimonogi jarepya jarejewi.

¹⁶ "Na'ga reaa rūi je. A'eramū je te'ŷine'ema 'ga rete are", 'jau sipo aenamā? Naani. Aipo e'i agawewi amunipo 'ā. A'etea amunipo 'ā jane nimonogi jarenamā jarejewi.

¹⁷ Jarejea etee ereko re maran sipo jane mama'e retuna?

¹⁸ A'ere 'ā Janeruwarete 'ga janerete apoi wemifutar imū etee futat rakue.

¹⁹⁻²⁰ A'ere 'ā ae awowe'gi ma'e 'jawe. A'ere aeretea majepēi 'ywete futat. Nan tee futat jane Jejuī 'ga upe majepēi 'ywete futat. Naju'jawe rūi agawewi janeporowykya 'ga upe. A'etea jane jarejemogyau majepēi 'ywete futat 'ga upe.

²¹ A'eramū aerea 'jawarūe'em aepe upe: "Nafutari je ene", 'jawarūe'em. Aeakaga nanē aepe upe: "Nafutari je ene", 'jawarūe'em nū. Nan tee futat Jejuī 'ga rerowiaaramū jane ni'earūi jarejaupe: "Narafutari ore 'gā", 'jawarūe'em.

²² Sā'ā janepy'a ifuakare'ema agawewi. A'ere ipyu jaretywe'em ire amunipo 'ā niko'uweri.

²³ Jarepira renosī re amunipo 'ā jane ipiaa. Jarepira renosōue'em ire jane ipiare'ema futat. Jarepir a'wyre'em are miamū futat jane jejuka esagei.

²⁴ A'eramū jane esage ma'ea rerekou etee futat. A'ere 'ā Janeruwarete 'ga janerete apoi nan tāmējē rakue. A'eramū jane jarepir a'wyre'em are miamū jarejejukau esage etee futat. Nan ki sajejuka esage te jarejue. Sireko esage pāwē etee futar iki 'gā.

²⁵ Janeretea majepēi tee futat. Mukūi futat 'ā janepya numiamū. A'ere janepy oi ajuewiri etee futat. Janepya sipo oo amū ko katy ajepeja awau kwe katy 'jau? Naani. Ajaupi etee futat ioi. Nan tee ki jane Jejuī 'ga rerowiaaramū jane jarejopoa etee mama'e apou.

²⁶ Sā'ā jane jemuaēma jarejo'o tesirūgatu are. Nan tee futar iki sajemuaēm mama'e tywera aja iaporamū. 'Ga rerowiaaramū nipo jane mū ku'iramū. A'eramū jane 'ga 'jawe futat jareku'iramū 'ga pyri.

²⁷ Jejuī 'ga rerowiaaramū jane kwaiwete. A'ere jane jemogyi majepēi 'yweteewara 'jawe etee futat. Janeruwarete 'ga jane rerekou najuejue etee futat. A'eramū jane jarejemogyau Kristu 'ga rete 'jawe futat.

²⁸ Jarejuwarete 'ga Jejuī 'ga rerowiaaramū jane moporowykyukat ojeupe. Amumeramū nipo 'ga ae monou kwe pe Kristu 'ga mome'wau kwe pewara 'gā nupe. Wemimu'efera 'gā na'ne Kristu 'ga imonou kwe pewara 'gā nupe omome'waramū rakue. A'ere nipo 'ga ae monoi 'ga mome'waramū nū. Amumeramū nipo 'ga ae mogyau janerekwawa amunaw

ipe oje'ega mome'waramū etee futat. Amumeramū nipo 'ga ae mogyau moromu'jaramū oje'eg are. Amumeramū nipo 'ga aeremiapoe'ema apoukaa ae upe. Amumeramū nipo 'ga ojero'wu ma'e 'gā majarueteukaa. Amumeramū nipo 'ga ae mogyau ojopoaawamū. Amumeramū nipo 'ga ae mogyau 'wyriaramū ajaupe. Amumeramū nipo 'ga aeje'eg amutee pyu ae moporogytaukari ajaupe.

²⁹ Najuejue etee rūi 'ga ae mū'ēi kwe pe oo ma'eramū Kristu 'ga mome'waramū. Kwe pe oo ma'e 'gā kwe pe oo ma'e 'gā tee futat nū. 'Au 'ga je'ega mome'wara 'gā 'gā tee futat nū. Moromu'jara 'gā moromu'jara 'gā tee futat nū. Aeremiapoe'ema apoara 'gā 'gā tee futat nū.

³⁰ Ojero'wu ma'e majarueteara 'gā 'gā etee futat nū. Ije'eg amutee ma'e 'gā ajuowase imoje'egipyra 'gā 'gā tee futat nū. Ojoje'eg amutee are eapyo ma'e 'gā 'gā tee futat nū. A'eramū ae pāwēūjē etee ajuemiapo are jarekarakatue'emamū ajemogyau.

³¹ A'eramū ki pēē pejejea mýina Jarejuwarete 'ga upe pejeporowyky esage are etee. "Ene'agesagea tuapoukat jee eneremifutar imū etee", 'jau ki pēē 'ga upe.

'Awamū je pē mueapyoi mama'e esage mū ree nū.

13

Ajuee aeporomutat

¹ Kwaiwete agawewi mama'e esage apoa. A'etea ajuee aeporomutat taetu esage. 'Gā je'eg tesirūmera agawewi nipo je iapou. Ywagipewara 'gā je'ega we agawewi nipo je iapou. A'ere je 'gā nee teporomutare'em ire ae a'wyre'ema 'gā 'jawe etee futat je rekoī. Janeruwarete 'ga je imome'ua we futat nipo wa'wyre'emamū 'gā nupe. Itaju motenawera 'jawe etee futat nipo.

²⁻³ Ajuee aeporomutara te esage Janeruwarete 'ga je'ega mome'u esage apyrapa. Mama'e are nipo je tejeapyoramū agawewi. Jarejuwarete 'ga remiaporam are miamū nipo je tejeapyoramū. Kristu 'ga nipo je erowiar ywyapiau agawewi. Aeremiapoe'ema nipo je iapou agawewi. Tekaramā nipo je imonoupap agawewi ikaraemāe'ema 'gā nupe. Jejuī 'ga rerowiar are nipo je tejejukaukaa agawewi 'gā nupe. A'ere je 'gā nee teporomutare'em ire ia'wyre'emamū futat je rekoī.

⁴ Ajuee iporomutat ma'e 'gā ita'wa te ajemogyau ajaupe. Ojomogekogekowe'em akou. Ajuee iporomutat ma'e 'gā ota'uwe'emamū mama'e are. Nojerowiaraiwi ojee te.

⁵ Ajuee iporomutat ma'e 'gā nije'egaiwi ajaupe. Naea'ari 'gā ojee etee futat. Ajuee iporomutat ma'e 'gā nimara'nei ajuee. Najuyakai 'gā ojeupe mama'e tywera aja iapoower are. Naea'aru'jawi 'gā au'jeteramū ajemogyau mama'e tywera ojeupe aja iapoower are.

⁶ Ajuee iporomutat ma'e 'gā u'arasigamū ajuemiapo tywera resakawe. Niku'i etee 'gā ee. Mama'e esagea 'gā iapo re tee 'gā ku'iramū ajemogyau. Mama'e a'je are etee te 'gā ku'iramū.

⁷ Ajuee iporomutat ma'e 'gā niku'ipawi akou mama'eay jeaporamū. Aku'iramū etee akou ojopyri. Ajuee iporomutat ma'e 'gā ajuerowiaa, ojemogypyka ajuee. Ajuee iporomutat ma'e 'gā mama'e esage aja iapoa wapesak te ajemogyau. Ajuee iporomutat ma'e 'gā ota'waramū etee akou ajaupe. Najemogekogekoi ae.

⁸ Niporomutapawi futari ae Jejuī 'ga rerowiaaramū ajuee. Anure nipo jane Jarejuwarete 'ga je'ega nimome'uu'jawi. 'Awamū Janeruwarete 'ga oje'ega mome'uukari jane mū upe. A'ere nipo 'ga anure nomome'uukaru'jawi janee. Anure nipo jane nije'eg amuteeu'jawi. 'Awamū 'ā 'ga U'agesageu etee jane mū moje'eg amuteeukari. A'ere nipo 'ga anure najane moje'eg amuteeukaru'jawi. Anure nipo janereapyo teepawamū etee jane wi. 'Awamū 'ā 'ga jane mueapyoukari mama'e are. A'ere nipo 'ga anure najane mueapyoukaru'jawi ee.

⁹ 'Awamū 'ā 'ga najane mueapyopawukari mama'e are. Janereapyoi jane kwakwai'i ee. 'Awamū 'ā 'ga jane mueapyoi'i ete mama'e are. 'Awamū 'ā 'ga oje'ega nomome'upawukari janee. 'Awamū 'ā 'ga oje'ega mome'uukari'i etee janee.

¹⁰ Jejuī 'ga rur ire tāmējē te nipo janereapyopawamū mama'e are.

¹¹ Kunumīnamū tekou je kunumī remiapoa etee futat iapoi ikue. Kunumī je'eg imū je je'egi ikue. Kunumī rea'aw imū jerea'aramū mama'e are ikue. A'ere je tejemotuw ire je poiiri kunumī remiapou awi ikue.

¹² 'Awamū janereapyo'iramū etee 'ga ree. Sā'ā ae mama'e 'aga resaga weraweraw are jaramā'jāu. A'ere 'ā jane niesagi katui. Nan tee futat jane. 'Awamū Jejuī 'ga kwaawi'i etee. Anure te nipo jane 'ga resaka pyy we 'ga kwaawi' katu katu. 'Awamū jane Jarejuwarete 'ga kwaawi'i etee. Anure nipo jane 'ga kwaawi' ga jarekwaapawera 'jawerimū etee futat.

¹³ 'Awamū 'ā jane Jejuī 'ga rure'emaue 'ga rerowiari jarejemogyau. 'Ga rura jane iapesaka jarejemogyau. A'eramū jane jareporomutaramū jarejuee jarejemogyau. Jarejuwarete 'ga ree nanē jareporomutaramū nū. A'eramū jarejuee janeporomutara wesageramū futat mama'e esage apyrapa.

14

'Ga 'Agesagea mama'e apoukaa janee

¹ A'eramū ki pēē pejepeporomut esageramū etee futat pejejeue. Jarejuwarete 'ga upe nanē ki pe'je nū: "Epājēa emut jee. Mama'ea taapo enepājē mū etee enee 'jau", 'jau ki pēē 'ga upe. "Eje'ega taetu emome'uukat jee", 'jau ki pēē 'ga upe.

² Ije'eg amutee ma'e 'gā noje'egi ajaupe. Nokwaawi 'gā 'gā 'ea. Jarejuwarete 'ga upe etee te futat ije'eg amutee ma'e 'gā je'egi. Jarejuwarete 'ga remiaporama 'gā imome'wau Jarejuwarete 'ga 'Agesage pājē mū. A'ere 'gā je'ega renupara 'gā nokwaawi 'gā je'ega. Janeruwarete 'ga etee te okwaap.

³ A'ere Jarejuwarete 'ga je'ega mome'wara 'gā imome'ui oje'eg imū etee futat ajaupe. A'eramū aipo 'gā ajamueapyou ee ojomojemogygygukaa Jejui 'ga ree, 'gā mu'jau 'ga ree. I'arasig ma'e 'gā 'gā omaku'iuakat, 'gā mojemogygygukaa nanē 'gā 'ga ree nū.

⁴ Ije'eg amutee ma'e 'gā ojeupi etee futat ojomojemogygygukat Jejui 'ga ree. A'ere Jarejuwarete 'ga je'ega mome'wara 'gā Jejui 'ga rerowiar wyyapiukari 'ga rerowiaara 'gā nupe.

⁵ Pēje'eg amutee jeejeue je afutat. A'ere je pēē Jarejuwarete 'ga je'ega mome'u futaretei. Janeruwarete 'ga je'ega mome'ua taetu esage pejejatykaaw ipe. A'ere nipo Janeruwarete 'ga 'Agesagea 'gā amū mueapyoukari 'ga je'eg amutee are. A'eramū nipo 'ga amū ojoje'ega mome'wau ajaupe. A'eramū nipo aipo 'ga ajamueapyoukaa ee. Aipoa esage futat. Janeruwarete 'ga je'ega mome'u resage 'jawe futat aipoa.

⁶ Pejepepyri je oramū amū sipo maran pēneapyo jeje'eg are teje'eg amutee etee pejejeupe jeje'egamū? Nepēneapyoi futari amunipo 'ā ee. A'ere je pēje'eg imū etee futat tejeupe Jarejuwarete 'ga 'eawera mome'ui pē nupe pē mueapyoawamū. 'Ga je'eg are pē mu'jau je 'ga kwaawukari pē nupe. A'eramū je 'ga rerowiar wyyapiukaa pē nupe. A'ere amunipo 'ā jeje'eg amutee re nepēneapyoi ee. A'eramū amunipo 'ā je'ga rerowiar wyyapiukare'ema pē nupe.

⁷ Sā'ā maraka apoara 'gā. Jumi'a py a'wyre'emamū 'ā enupara 'gā ikwaawe'ema 'gā jemogya. Nan amunipo 'ā pēē.

⁸ Jumi'a 'jawewara 'gā 'ā ipyau jefaruu 'gā momoranupawamū ajuapisaw are. Ajuapisawa maraka renupa 'gā awau ajuapisaw ipe. A'ere ipy a'wyre'ema 'gā nipokawyī ipyau ajaupe. A'eramū jefaruu 'gā ikwaape'ema.

⁹ Nan tee futat pēje'ega renupara 'gā naeapyoi pēje'eg amutee are. Ee amueapyoukare'em ire 'gā jumi'a py a'wyre'ema renupara 'gā 'jawe. Naeapyoi futari ee.

¹⁰ Kwaiwete aeje'ega. Naju'jaju'jawe rūi aeje'ega. Oje'ega apoara 'gā etee te eapyoramū oje'eg are.

¹¹ 'Gā amū je'eg are tejeapyoe'em ire aipo 'gā towajar amutee futat 'gā jee. Je nanē towajar amutee 'jawe futat 'ga upe nū.

¹² Nan tee pēē pejepepyriwara 'gā nemikwaawe'ema etee iapo re. "Epājē emut jee mama'e apoukaawamū", 'jau 'ā pēē Jarejuwarete 'ga upe ra'e jepi. A'eramū ki pēē "Epājē emut jee ejerowiar wyyapiukaawamū ejerowiaara 'gā nupe", taetu 'jau ki pēē 'ga upe.

¹³ Ije'eg amutee ma'eramū ki pejeje'ega monou Jarejuwarete 'ga upe. "Je mueapyoukar ape jeje'eg amutee are, ki Ku'jyp. A'eramū je 'gā mueapyou ee", 'jau ki pēē 'ga upe.

¹⁴ Teje'eg amuteeramū je nanē tejeapyoe'emamū ee. Te'ag imū etee futat je je'egi Jarejuwarete 'ga upe. A'eramū je tejeapyoe'emamū teje'eg are.

¹⁵ Maranara sipo ajee je aapo? Naani. Aapo pāwē futat je. Te'ag imū teje'ega 'ga upe. Tejea'aw imū nanē teje'ega 'ga upe nū. Te'ag imū futat nanē temaraka'aga 'ga upe. A'ere je tejea'aw imū nanē temaraka'aga 'ga upe jepi nū.

¹⁶ A'ere 'ā peje'ag imū etee Jarejuwarete 'ga muoryw ire pē pyriwara 'gā nokwaawi pēje'ega. A'eramū 'gā Jarejuwarete 'ga muorype'ema futat mama'e are pē pyri. Nokwaawi 'gā pēje'ega.

¹⁷ Esage agawewi nipo pēje'ega. A'ere 'gā naeapyoi ee. A'eramū 'gā aku'ie'emamū ee.

¹⁸ Je nanē futat jeje'eg amutee jepi. Pē apyraapa je teje'eg amuteeramū jepi. A'e are je Jarejuwarete 'ga muorywi.

¹⁹ A'ere je Jejui 'ga rerowiaaramū pē pype tekou je pēje'ega etee iapoi jepi. Ināinānī'ē etee agawewi je teje'ega pēnemianuwamū. A'etea 'ā pēneapyo ee jepi pejeje'ega je iaporamū jepi. Kwaiwete teje'eg amutee iapo re amunipo 'ā nia'wryi pē nupe ee pēneapyoe'ema.

²⁰ Sā'ā jane 'ga rerowiaarareteramū janerea'ara jarejeue. "Jeremiapoa sipo Jejui 'ga rerowiar wyyapiukat 'gā nupe? Naani te ra'u nū?" 'jau 'ā jane ojemotup ma'eramū jarejeupe mama'e apo enune. A'eramū ki pēē pejejemogyau ojemotup ma'eramū. Ojemotup ma'e rea'ar imū tāmējē ki pēnea'at mama'e are. Kunumā 'ā ojee tee futat ea'at ajemogyau. A'eramū ki pēē kunumī 'jawe etee pejejea'are'emamū mama'e are. A'ere kasi mama'e

tywera peapo ne. Kunumīakya 'jawe ki pejemogy. Sā'ā kunumīakya mama'e tywera apoe'ema. Nan iki pejemogy kunumīakya 'jawe mama'e tywera apowe'em.

²¹ Ymā we futat 'ā Janeruwarete 'ga ka'arana kwasiarukari oje'eg are rakue:
"Nepeenuwi futari jeje'ega.

A'eramū je towajara 'gā murukaa pē nupe.

Nepekwaawi futari 'gā je'ega.

A'etea nepeenuwi futari jeje'ega",

'jau Janeruwarete 'ga 'ā ikwasiarukaa ka'aran are rakue.

²² Jareje'eg amuteeramū jane Jarejuwarete 'ga pājēa te esaukari 'ga rerowiare'ema 'gā nupe. A'eramū futat 'gā oporesagamū ajemogyau wemikwaawe'ema wowase jane iapoa renuw ire. A'ere 'gā naeapyo'i jane 'e are. A'eramū 'gā ojemu'jawe'em jane remimome'u are. Amumera 'gā amara'heramū ee. A'ere jane 'gā je'eg imū Jarejuwarete 'ga je'ega mome'ui 'gā nupe 'ga rerowiaara 'gā mu'jau ee.

²³ A'eramū pēē pejejea'aramū mama'e are. Amumē nipo tekotee 'gā 'ua osou pē jatykaaw ipe. Jejui 'ga rerowiaare'ema 'ga amū miamū nipo 'ua osou 'ga rerowiaaramū janejatykaaw ipe. A'eramū nipo 'ga wapyakau janeje'eg are. Janeje'eg amuteea renuw ire te nipo 'gā 'i: "Kuu. Ije'ēran ekoete ma'e 'gā te ra'e. Wapo ekoete te 'gā ajemogyau ra'e!" 'jau nipo 'gā janeje'ega renupa.

²⁴ A'ere nipo 'gā wemikwaaw imū etee Jarejuwarete 'ga je'ega mome'u renuw ire Jejui 'ga rerowiare'ema 'gā neapyoramū otywer are. A'eramū nipo 'gā 'jau ojeupe: "Jetywet je Jarejuwarete 'ga upe", 'jau nipo 'gā ojeupe wemikwaawa oje'eg imū imome'u re.

²⁵ A'eramū nipo 'gā 'jau ojeupe: "Jetywet je tekou", 'jau nipo 'gā ojeupe. A'eramū nipo 'gā amū "Jetywera emoit je wi je mogou ejemiayuwamū", 'jau nipo 'gā Jarejuwarete 'ga upe. A'eramū nipo 'gā 'jau pē nupe: "A'jea futat ra'e. Janeruwarete 'ga reko'i 'au pē pype ra'e", 'jau nipo 'gā pē nupe.

Jejui 'ga rerowiaaramū janejatykaap

²⁶ A'ere je 'awamū pē mu'ei pējatykaaw are. Pēē mū ki pejemaraka'aga 'ga upe pejejuowase. Pēē mū ki pejejamu'jau 'ga je'eg are. Pēē mū ki pejejeupe Jarejuwarete 'ga 'eawera mome'wau pejejaupe. Pēē mū ki pejeje'eg amuteeramū. Pēē mū ki pejejamueapyoukaa 'ga 'eawer are. Nanuara pyu pēē pāwēūjē etee futat Jejui 'ga rerowiar wyyapiukaa pejejaupe.

²⁷ Pejeje'eg amutee re majepeinume pejeje'ega. Kasi a'e pe nepejamueapyoukari ee ne. Pāwēūjē etee kasi peje'eg ine. Maranamū nipo mukūi pejeje'eg amuteeramū, maranamū nuapyt pejeje'eg amuteeramū. Oje'eg ppy ma'e 'ga je'ēmaw ire ki 'gā amū tomome'u 'ga remimome'ufera 'gā nupe, 'gā mueapyoukaa aipo 'ga 'eawer are. A'eramū nipo 'ga amū oje'eg amuteeramū nū.

²⁸ A'ere nipo ee oporomueapyo ma'e 'ga nitywi amū. A'eramū kasi aipo 'ga toje'eg ine. Jarejuwarete 'ga upe etee te aipo 'ga je'egi. Ojeupe etee nanē 'ga oje'ega nū.

²⁹ Mukūmukūi'ī 'gā etee ojeupe Jarejuwarete 'ga 'eawera mome'wau. A'eramū enupara 'gā 'jau: "Janeruwarete 'ga futat te 'ga moje'egukat jane upe ra'e? Naani te ra'u nū? 'Ga 'mea 'eramū nipo Najaneruwarete 'ga rūi 'ga moje'egukari", 'jau nipo enupara 'gā.

³⁰ Pējatykaaw ipe nipo Janeruwarete 'ga oje'ega pēē mū nupe, oje'ega renuparamū pēē mū nupe. A'eramū ki pē nowase oje'eg ma'e 'ga topik pejeje'ega anupa.

³¹ Pēē futat nipo pejamu'e Jarejuwarete 'ga je'eg are majepeinume pejeje'eg ire. A'eramū te nipo pejamu'e Jejui 'ga rerowiar wyyapiukaa pejejaupe.

³² Oje'eg ma'e 'gā oje'eg amue wemifutar imū etee futat. Oje'ega momigarūmū nanē wemifutar imū nū.

³³ Pāwēūjē etee peje'egamū sipo Janeruwarete 'ga ku'iramū pē nee? Naani. Majepeinume ajaupe omome'waramū te 'ga pē mu'ei. Janeruwarete 'ga nafutari oje'eg are pejamue ekoetea. Pēneko esagea te 'ga afutat.

Jejui 'ga rerowiaara 'gā mu'jau je 'gā mu'e pāwē aju'jawe etee futat.

³⁴ A'eramū ki kūjāmera 'gā topig etee Jejui 'ga rerowiaara 'gā jatykaramū, wapyakau etee pejemu'jara 'ga je'eg are. Ymā te Janeruwarete 'ga ka'arana kwasiarukari ee rakue. "Kūjāmeramū ki pejemena 'gā je'ega peenuw etee", 'jau 'ga ikwasiarukaa rakue.

³⁵ Nepēneapyo'i nipo mama'e are. A'eramū ki pejejemogyau etee enupa. A'eramū pēē pejeje'wyr ipe etee futat pejepononupa ee pejejaupe. Pejejatyka pype kasi kūjāmeramū pepononup pejejaupe ee ne, pejomojenosī ne.

³⁶ Pēē mū nipo je'eawera rerowiare'ema pejejemogyau. A'eramū je 'jau pē nupe: "Pē nupe ra'ne sipo Janeruwarete 'ga je'egi rakue? Pē nupe etee sipo 'ga je'egi?" Naani. Napē nupe ra'ne rūi 'ga je'egi rakue. Napē nupe etee rūi nanē 'ga je'egi nū.

³⁷ Pēē mū te nipo ajee a'jea futat Jarejuwarete 'ga je'ega mome'u are pēneapyo katu rai'i. "Ga te 'ā je mopājē", 'jau nipo pēē mū rai'i. A'eramū nipo aipo 'jara 'gā je'eawera kwaapa. "A'jea futat ra'e. Jarejuwarete 'ga 'eawera etee futat Paulo 'ga okwasiat ka'aran are ra'e", 'jau nipo 'gā.

³⁸ A'ere nipo 'gā amū je'eawera nuerowiari futari. A'ere kasi pēē nanē perowiat aipo 'gā je'ega ne.

³⁹ A'eramū ki pēē 'jau: "Jarejuwarete 'ga je'ega mome'ua je afutat", 'jau ki pēē pejejeupe. A'ere kasi pemosī 'gā je'eg amutee awi ne. "Au'je pejeje'eg amutee re", 'jawe'em pēē pejejaupe.

⁴⁰ Pejejemogyau esage etee futat mama'e apou Jarejuwarete 'ga remifutar imū.

15

Amanū re Kristu 'ga ferawī nū

¹⁻² Pēē 'ā jerewirera 'jawe futat. Kūjāmeramū 'ā pēē jerenyra 'jawe futat. A'eramū je pē muea'aa Jejuī 'ga mome'uawer are. Ymā te ako je Jejuī 'ga mome'ui pē nupe ikue. "Jejuī 'ga 'ā Janeruwarete 'ga ra'yraretea. A'etea 'ā Janeruwarete 'ga 'ga muri 'au ywy pe kunumīakyrāmū janee rakue. Ojemotuw ire 'ga 'ā 'gā mu'jau akou 'Uwarete 'ga ree rakue. A'ere 'ā 'ga ojejukaukaa ae a'wyre'ema 'gā nupe janetywer are rakue. Amanūmū 'ga 'ā janetywera mepyau 'Uwarete 'ga upe rakue. A'eramū Janeruwarete 'ga janetywera moia jane wi Jejuī 'ga jane erowiarāmū", 'jau ako je pē nupe ikue. A'eramū ako pēē aipo renuw ire Jejuī 'ga rerowiaa ai'i. 'Ga rerowiarāmū Janeruwarete 'ga pē mogyi wa'yramū. 'Ga mome'u rerowiarāmū Janeruwarete 'ga pē katu'oka, pētywera moia pē nui. A'ere 'ga pēē 'ga rerowia 'meramū Janeruwarete 'ga nepē katu'ogi.

³ Je upe Janejararete 'ga 'eawera resagesageramū futat. Aipoa etee futat je amome'u pē nupe. Ymā we te 'ā Janeruwarete 'ga ka'arana kwasiarukari 'gā nupe Kristu 'ga ree rakue. 'Gā nemikwasiarer imū etee futat 'ā Kristu 'ga amanūmū janetywera mepyawamū rakue.

⁴ 'Ga manū re 'gā 'ga monou 'ga nuga ita kwara pype rakue. A'ere Janeruwarete 'ga 'ga moferawi imuapyra 'ara rupi etee rakue nū. A'e are nanē 'ā Janeruwarete 'ga ka'arana kwasiarukari rakue nū.

⁵ Oferaw ire 'ā Kristu 'ga ojesaukaa Pedro 'ga upe ra'ne rakue. A'ere 'ā 'ga ojesaukaa pāwē wemimonofera 'gā nupe rakue.

⁶ A'ere 'ga jesaukari kwaiwete wewiri oo ma'efera 'gā nupe rakue. Kiētus 'gā 'ga resaka rakue. Kwaiwete 'gā nupe jēmī ojesaukaa rakue nū. 'Gā jatyka 'gā nuwamū 'ga jesaukari 'gā nupe rakue. Ajemogyau we futat 'ā 'ga feraw ire 'ga resakarera 'gā amū. Opapap futat 'ā amumera 'gā numiamū. A'ere kwaiwete je futat 'ga resakarera 'gā jemogyi.

⁷ A'ere 'ā 'ga jesaukari Tiago 'ga upe rakue nū. A'ere 'ā 'ga ojesaukaa wemimonofera 'gā nupe pāwēūjē etee rakue, 'gā jatyka 'gā nuwamū rakue nū.

⁸ A'ere je ywy pe 'ga rekoramū naesagi 'ga ikue. Naatai je tekou 'ga rupi ikue. Ywag ipe oo re te 'ga jesaukari jee ikue. Narowiari je 'ga 'gā pyri ikue. Anure te je 'ga rerowiari ikue. Sā'ā kunumīakrya 'ara'ne'ema oy awi. Nan tee futat je narowiara'nei Jejuī 'ga ikue.

⁹ Tea'wyre'emamū je tekou ikue, Jejuī 'ga remimonofera 'gā a'wyre'ema apyraapa ikue. Jejuī 'ga rerowiaara 'gā je erekou tyweaete tekou ikue. A'eramū je mojenosōmayau kwe pewara 'gā 'ea. "Paulo 'ga Jejuī 'ga remimonofera 'ga" 'ea je mojenosōmayau etee. Na'ga porowyky apoara rūi je ako ikue. A'eramū aipo 'gā 'ea je mojenosōmayau etee je mogyau 'ga rerowiar ire ikue.

¹⁰ Naapoi je mama'e esagea tekou Jarejuwarete 'ga upe ikue. A'etea 'ga ipromutar esage je ree je rekoramū ra'e jepi. A'eramū 'ga jetywera moia je wi ikue, je mogou omome'waramū ikue. A'eramū je 'ā 'agamū tekou rēwējēmī 'ga mome'waramū pē nupe. Ajepeja 'gā 'ga remimono ppy 'gā apyraapa 'ā tekou 'ga mome'wau pē nupe. A'ere najetee rūi iapoi. Janeruwarete 'ga te 'ga mome'uukat je upe.

¹¹ A'ere je Jejuī 'ga remimono ppy 'gā 'ga mome'u 'jawe etee futat 'ga mome'ui nū. Nasigaty rūi futat je 'gā nemimome'u awi imome'ui pē nupe. A'eramū ki pēē pejejea m̄ina pāwē etee futat ore 'ga mome'u are. Naimome'wara 'gā nee rūi pēē pejejea m̄ija. Jejuī 'ga mome'u are te ki pejejea pem̄yi ete. A'eramū pēē Jejuī 'ga rerowiaa pejejemogyau.

Kristu 'ga ferawa 'jawe nipo 'ga rerowiaaramū jane ferawī nū

¹² Ymā te ako ore Kristu 'ga ferawa mome'ui pē nupe ikue. "Janeruwarete 'ga Kristu 'ga omoferap imogou nū", 'jau ako ore pē nupe ikue. Ma'eramū sipo ajee neperowiari aipo ore'ea? Ma'eramū sipo ajee aipo pe'je amū: "Noferawi futari ae amanū re", pe'je pejejemogyau.

¹³ Amanū ma'eferamū ae noferawu'jawi futari 'e re amunipo 'ā Kristu 'ga nanē noferawi rakue nū.

¹⁴ Kristu 'ga ferawe'em ire amusipo 'ā je ma'eramū imome'wau pē nupe? Kristu 'ga ferawe'em ire amusipo 'ā ma'ja perowiat?

¹⁵ A'jea futat amanū ma'efera 'gā ferawe'em ire amunipo 'ā ore'meramū Jarejuwarete 'ga upe. "Janeruwarete 'ga Kristu 'ga moferaparera", aru'e ekoete te ra'u ore pē nupe rakue nū. A'eramū amunipo 'ā ore oro'meramū Jarejuwarete 'ga upe aipo 'e re rakue.

¹⁶ Amanū ma'efera 'gā ferawe'em ire amunipo 'ā Kristu 'ga noferawi futari rakue nū.

¹⁷ Kristu 'ga ferawe'em ire amunipo 'ā ore pē moryteei te 'ga ree. Oro'me amunipo 'ā ore erowiarukaa pē nupe rakue. A'eramū amunipo 'ā Janeruwarete 'ga pētywera moire'ema pē nui rakue. A'eramū amunipo 'ā pēē pejewau mama'eukwaawa rapyaw ipe pejemanū re.

¹⁸ Jejuī 'ga rerowiaara 'gā amū amanūmū rakue. A'ere 'gā nanē amunipo 'ā nowyru'jawi a'jea futat amanū ma'efera 'gā ferawe'em ire.

¹⁹ A'jea futat amanū ma'efera 'gā ferawe'em ire amunipo 'ā jane jarejemogypyka futatee futat jarejemogyau Kristu 'ga ree. A'ere amunipo 'ā jane kokari jarejemogyau. A'eramū amunipo 'ā jane jare'arasigamū tekotee 'gā 'arasiga apyrapaa.

²⁰ A'ere 'ā nanarūi futat. Kristu 'ga 'ā oferap futat rakue. A'eramū jane "Kristu 'ga rerowiaaramū nanē jareferapa jaremanū re nū" 'e rerowiaa futat.

²¹⁻²² Ymā 'e' Atāu 'ga nuenuwi Jarejuwarete 'ga je'ega rakue. A'eramū 'ā 'ga amanūmū rakue. A'eramū jane 'agamū jaremanūmū. 'Ga ree futat ajee 'ā jane nanē jane manūi nū. A'ere 'ā 'awamū Kristu 'ga ferawi amanū re rakue. A'eramū jane 'ga rerowiaaramū jane nanē jareferapa nū.

²³ Kristu 'ga futat jane upe oferaw ppy ma'efera. A'eramū nipo jane 'ga remiayuwamū nanē jareferapa 'ga ruramū nū.

²⁴⁻²⁸ A'ere 'ā 'ga nuri we. 'Ga rur ire te nipo Janeruwarete 'ga 'ga ree iporomutare'ema 'gā pājē pojekai 'gā nui. A'ere 'ā 'ga iapopawe'emawe 'ga futat 'ga reni 'wyriaramū jane. Ymā te 'ga amū ka'arana kwasiari ee rakue: "Anure nipo Janeruwarete 'ga Kristu 'ga m̄yi 'wyriaramū 'gā nupe najuejue etee futat", 'jau 'ga ikwasiaa rakue. Naojeupe rūi 'ga 'ga m̄yina 'wyriaramū. Tekotee 'gā nupe tee 'ga 'ga m̄yina 'wyriaramū. Kristu 'ga futat mama'eukwaawa 'wyriara remiayuwa momapa. Ae manūa nanē nipo 'ga imateepapa nū. A'eramū te nipo ae namanū'jawi futari. Kristu 'ga futat nipo mama'eukwaawa 'wyriara pājē pojekau jui. Emiayuwa pājē reewe futat nipo 'ga ipojekau jui. A'eramū futat nipo 'ga mama'e monoupap katu katu 'Uwarete 'ga po pe. 'Uwarete 'ga remifutar imū etee futat nipo 'ga iapou. A'eramū taetu nipo 'ga 'Uwarete 'ga mogou katu katu 'wyriararetereteramū jarejeupe. Ojeupe nanē 'ga 'uwa 'ga mogou 'wyriararetereteramū. A'eramū taetu nipo 'ga ruwa 'ga 'ūina mama'e jararetereteramū.

²⁹ Noferawi amanū ma'efera 'gā 'e re amunipo 'ā ma'eramū 'gā amū ojepymīāukaa ekoete 'y pe amanū ma'efera 'gā nee, 'gā ferawa resaukaa? Amanū ma'efera 'gā ferawe'em ire amunipo 'ā 'gā nojepymīukari tee 'y pe 'ga amū upe rakue.

³⁰⁻³¹ Amanū ma'efera 'gā ferawe'em ire amusipo 'ā ore ma'ja mome'wau arakou au'jeteramū orojejukaukaa ja'wyja'wyukat ee 'gā nupe. A'ere 'ā a'jea futat te Kristu 'ga ferawi rakue. A'eramū je tejekōēājamū pē nee. A'eramū je tejemome'wau pē nupe. Jejuī Kristu 'ga ree, Jarejararete 'ga ree ako jane jemujari ikue. A'eramū je tejemome'wau pē nupe. Jejuī Kristu 'ga upe je porowykyi tekou. A'eramū 'gā afuweramū je ree. Amanū ma'efera 'gā ferawe'em ire amunipo 'ā je naporowykyi futari Kristu 'ga upe. A'eramū amunipo 'ā 'gā afuwere'emamū je ree.

³² Efesu pe je rekoī. Iraikoāi futat 'auwara 'gā je rerekoi. Sā'ā 'miara ae 'u ja'wyja'wya. Nan futat 'auwara 'gā je ka'migi ja'wyja'wy je rerekou. Jejuī Kristu 'ga je imome'u are 'gā je ka'mika ja'wyja'wy je rerekou. Amanū ma'efera 'ga ferawe'em ire amusipo 'ā je 'gā mamara'neukar ekoetei tejee? Naani. Namamara'neukar ekoetei amunipo 'ā je 'gā tejee. 'Gā 'jawe etee futat amunipo 'ā je iapou. "Pe'je ki sajemi'wat, kawīajaiwa rykuā nanē nū. Al'iwe nipo jane manūi 'ja. Jaremanūme'ēwe sajemi'wa'wa'ri 'jau 'wei", 'jau ekoete amunipo 'ā je 'gā 'jawe etee tekou.

³³ A'ere je na'gā 'jawe rūi je rekoī. Pejemoryteeukat kasi 'gā nupe ne. Ia'wyre'ema 'gā pyri pejeko re pēē nanē pejemū'jag ia'wyre'emamū nū.

³⁴ Au'je mama'e tywera pēē iapo re. "Jarejuwarete 'ga remiayuwareteramū jane jemogyi", pe'je nipo nanuaramū numiamū. A'ere nipo pēē mū nepejemogyipygi futari 'ga ree. Aipo a'e je pē mojenosiūkaawamū.

Oferap ma'e

³⁵ Pēē mū nipo 'jau jee: "Maran sipo ajee Janeruwarete 'ga amanū ma'efera 'gā moferawi? Maran sipo ajee oferap ma'e 'gā netea?" 'jau nipo pēē.

³⁶ Aipo 'jaramū pēē nepekwaawi futari. Sā'ā ae y'wa'ŷja tyma. Y'wa'ŷja 'ā oto'omaw etee. A'eramū 'ā iywyter ipewara etee 'ua opoa jui y'wa 'ywa mū.

³⁷ A'ŷja etee 'ā pēē ityma. Nay'wa 'ywa rūi 'ā petym. Otym ire etee 'ā y'wa'ŷja opopoa, waranupa 'ā. Opopot ma'ea 'ā naa'ŷja 'jawe rūi. Nan tee futat oferap ma'e 'gā netea. Naamanū ma'efera 'jawe rūi 'gā netea.

³⁸ Wemifutar imū etee futat 'ā Janeruwarete 'ga y'wa'ŷi apoi rakue. Juowuu a'ŷja naamyneju a'ŷja 'jawe rūi. Opopor ire i'ywa naju'jawe rūi ajemogyau nū.

³⁹ Nan tee futat naju'jawe rūi eko ma'eramū aero'oa. Namiaro'o 'jawe rūi janero'oa. Nawyra'i o'o 'jawe rūi nanē janero'oa nū. Napira 'jawe rūi nanē janero'oa nū.

⁴⁰ Ywag ipewara naywy pewara 'jawe rūi. Ywy pewara esage futat. A'ere naywag ipewara resage 'jawe rūi.

⁴¹ Kwara 'ā enyfuakat futat. Jay nanē 'ā eny futat numiamū. A'ere nakwara reny 'jawe rūi jay renya. Najaytata reny 'jawe rūi nanē 'ā nū. Naju'jaju'jawe rūi 'ā eny ma'e renya.

⁴² Nan tee futat janerete yaua na'auwarera 'jawe rūi. 'Awamū jarejero'wau jaremanūmū. A'ere nipo anure jane ferawi jarejero'wu'jape'ema jaremanū'jape'ema futat nanē nū.

⁴³ Otymamū 'ā ae amanū ma'eramū afuakare'emamū. Aereumera 'ā nifuakari. Otyweruramū nanē 'ā ae nū. A'ere nipo anure oferapa 'ga fuakaramū, okaturamamū nanē nipo 'gā nū.

⁴⁴ 'Awamū 'ā ae ywy pe futat ojotymi. A'ere anure ae ferawi ywag ipe awawamū te. Ywy pewara 'gā netea naywag ipewara 'gā nete 'jawe rūi.

⁴⁵ Ymā 'ā Janeruwarete 'ga ka'arana kwasiarukari 'gā nupe ee rakue: "Kūima'e ypy 'ga, Atāu 'ga, Janeruwarete 'ga iapou rakue, eko ma'eramū rakue", 'jau 'ga ikwasiarukaa rakue. A'ere ajepeja kūima'e 'ga, Jejui Kristu 'ga te jane upe okoeteete ma'ea. A'eramū 'ga te jane mogyau ete Jarejuwarete 'ga ra'yramū. A'eramū nipo 'ga futat jane mū'jāu tywy awi.

⁴⁶ Janeypy 'ga te aje 'ā naywag awi rūi 'ut rakue. 'Yja apopyrera 'ga te 'ā poromū rakue. A'ere 'ā Jejui Kristu 'ga ywag awi 'ut ma'efera te. Anure te 'ā 'ga ruri rakue.

⁴⁷ Ymā te 'ā Janeruwarete 'ga 'yja apoi janeypyramū rakue. Aipo 'ga rera 'ā Atāua rakue. A'ere 'ā Jejui Kristu 'ga ruri ywag awi te rakue.

⁴⁸ Ywy pewaramū aje 'ā janeretea 'yja apopyrera 'ga retea 'jawe etee futat. A'ere nipo jane anure ywag ipe oo ma'eramū janerete jemu'jagi ywag awi 'ut ma'efera 'ga rete 'jawewaramū.

⁴⁹ 'Awamū jane jemogyi 'yi apopyrera 'ga 'jawe. Anure te nipo jane jemogyi ywag awi 'ut ma'efera 'ga 'jawe.

⁵⁰ 'Yi apopyrera janeretea nooi futari ywag ipe. Janero'o, janery. Mīmera nooi ywag ipe. 'Yi apopyramū jane jaremanūmū futat. A'eramū 'yi apopyrera awawe'em ywag ipe.

⁵¹⁻⁵² A'eramū je 'awamū pēnemikwaawe'ema mū ree pē mueapyoukaa. Jejui 'ga ruramū nipo jane 'ga rerowiaaramū jarejemogyau je futat amū. Najuejue etee futat nipo jare-jemu'jaga 'ga 'jawe. Amanū ma'efera 'gā, eko ma'e 'gā. Mīmeramū nipo jane jarejesowo'gōka 'ga 'jawe futat.

'Ga ruramū nipo ywagipewara 'ga amū jumi'aranūū pyau. Ipyrauwe nipo jane jare-jesowo'gōka kamēsīete Jejui 'ga 'jawe futat. Jumi'aranūū pyrauwe nipo amanū ma'efera 'gā nanē ū'jāu tywy awi nū. A'eramū futat nipo 'gā ojesowo'gōka imanū'jawe'emamū ajemogyau. Eko ma'efera 'gā nanē nipo ojesowo'gōka imanū'e'emamū.

⁵³⁻⁵⁴ Janerete yaua nipo 'ga a'eramū futat imua janee. A'ea namanūi janee. A'eramū futat nipo ae manūa ateeapawamū. Ymā te 'ā Janeruwarete 'ga ka'arana kwasiarukari aipo are 'gā amū nupe ee rakue:

"Anure nipo Janeruwarete 'ga reni 'wyriaramū jane upe.

A'eramū futat nipo ae amanū'jape'ema.

'Ga te 'ā ae manūa omateepap.

A'eramū ki jane 'ga je'ega etee futat enupa",

'jau 'gā 'ā ikwasiarukaa rakue. A'eramū nipo anure Janeruwarete 'ga amanū ma'erama 'gā mu'jaga 'gā sowo'gōka imanū'e'emamū etee futat nū. Ymāwarera 'gā nemikwasiarer imū etee futat nipo 'ga aipo apou.

⁵⁵ Sā'a jawa'jyra ae kutuga. A'eramū 'ā ae akutukarata jawa'jyra jukau. A'eramū 'ā aipo jawa'jyra ae kutugu'jape'ema. Nan tee futat Janeruwarete 'ga ae manū mateepawi ae wi. 'Ga imateepaw ire ae amanūme'em. A'eramū jane aipo rapesakaramū jarekyjawe'em jaremanū awi. Nitywi futari nipo ae jero'wua poromū. Ae manūa nanē nipo otywe'emamū nū.

⁵⁶ 'Awamū jane manūi futari janeypy 'ga 'ā jaremote'aawer are. Atāu 'ga 'ā nuenuwi Jarejuwarete 'ga je'ega rakue. A'eramū 'ga a'eramū amanūmū rakue. 'Ga ree 'ā jane nanē 'ga je'ega renupe'ema rakue nū. A'eramū jane nanē jaremanūmū nū.

⁵⁷ A'ere Janejararete 'ga, Jejui Kristu 'ga jane moferawi nū, werowiamamū nū. A'eramū futat nipo jane jaremanū'jape'ema. A'eramū ki jane Jarejuwarete 'ga muorypa ee.

⁵⁸ A'eramū ki pēē Jejuī 'ga rerowiar wyyapiāu pejejemogyau. Jarejararete 'ga upe etee pejeporowykyau pejejemogyau. Jarejuwarete 'ga upe jane porowykyramū janeremiāpoa esageramū 'ga upe. A'eramū ki pēē pejeporowykyau 'ga upe au'jeteramū futat, 'ga remifutara apou 'ga upe.

16

Judeja ywy pewara 'gā nupe ka'aranūū monoa

¹ 'Awamū je pē mu'ei Judeja ywy pewara 'gā nupe ka'aranūū pēē imono are. Jerusareg ipe kwaiwete ikaraemāe'ema 'gā jemogyi. A'eramū ki jane ka'aranūū monou 'gā nupe. Garasi ywy pewara 'gā, Jejuī 'ga rerowiaara 'gā je amu'e aipo are ai'i. A'eramū je 'awamū pēē nanē pē mu'jau ee nū.

² Morowykye'ema rupi pejejatykaaw ipe pēē ka'aranūū pe rerawau yrū pype 'gā nupe. Pēē mū nipo pejeporowykyau peje'wryiara 'gā nupe. A'eramū nipo 'gā pē mepyuu. A'eramū ki pēē kwaiweteu'i ka'aranūū pe monou'i yrū pype 'gā nupe. Pēē mū nipo ināinānī'ī etee pēporowyky repya. A'eramū pēē ināinānī'ī etee futat ape monou yrū pype 'gā nupe. Aipoa pēē tejenunewe iapo re nipo je ka'aranūū renūine'ema tekou pē nupe.

³ A'eramū nipo je pēnemimono'ogera etee futat tewau ipykyka imonou Jerusareg ipewara 'gā nupe. A'eramū ki pēē 'gā amū nesaka Jerusareg ipe erawaramū. Pēnemimū'ēmera 'gā kwaaw ire je ka'arana kwasiaa imonou 'gā nee. "Kweramū Korītu pewara 'gā nemimonofera 'gā. Ka'aranūūa 'gā werooukat pē nupe, pē poaawamū", ta'e inuga 'gā nupe ka'aran are ikwasiaa 'jau. A'eramū 'gā jeremikwasiarera rerawau pēnemimono'ogera ka'aranūū reewe Jerusareg ipewara 'gā nupe, Jejuī 'ga rerowiaara 'gā nupe 'jau.

⁴ Maranamū nipo je esageramū je nanē tewawe'em nū. Maranamū nipo je oi futari. Je oramū nipo pēnemimū'ēmera 'gā awau je rupi.

Paulo 'ga remiāpo

⁵ Masetoni ywy pe ra'ne je oi. A'e awi futat nipo tewau pē pyri.

⁶ Peu nipo je teptytau pē pyri amana po'oga poromukuran. Pejejewi je oramū ki mama'ea pemut jee jeremirooramū. Ma'ape katu nipo je oi aipo awi. Nakwaawi we je tewawa.

⁷ Najeoweri je kamēsīete pē pyri. Pē pyri tekofukuū'ia te je afutat, Jarejararete 'ga ifutar ire.

⁸ 'Awamū je rekoī Efesu pe. Nooa'nei we je 'aw awi. Pētekosti 'jawa 'ara kwaw ire te nipo je oi, jarejatykaawa 'ara kwapaw ire te nipo je oi 'aw awi.

⁹ Jejuī 'ga je amome'u 'auwara 'gā nupe. A'eramū 'gā kwaiwete 'ga rerowiaa. Amumera 'gā te ajee nafutari 'ga mome'ua. Nuerowiari nanē 'gā 'ga nū, je 'ga mome'uramū.

¹⁰ Janejararete 'ga upe Timoteo 'ga porowykyi je 'jawe etee futat. A'eramū ki pēē pejejejukau esage 'ga ree, pejejepyri 'ga oramū.

¹¹ Peago'o kasi 'ga ne. Mama'ea etee ki pēē imonou 'ga upe 'ga remirerooramū. Pejepota'waramū etee 'ga ree. Pē pyri oo re nipo 'ga ruri 'au je pyri nū. Janerewirera 'jawewara 'gā amū nupi nipo 'ga 'ua. A'eramū je 'gā napesaka nipo te'ŷina.

¹² 'Awamū je Aporu 'ga mome'ui pē nupe. "Ekwap Korītu pewara 'gā nesaka. Jarejewirera 'jawewara 'gā nupi ekwapa", a'e je Aporu 'ga upe ai'i. A'ere 'ga nioweri 'gā nupi. Meewei tee te nipo 'ga oi pē nesaka.

¹³ Perowiar wyyapi ki Jejuī 'ga. Pekiye kasi 'ga rerowiare'ema 'gā nui ne. Jejuī 'ga ki pemome'u 'gā nupe.

¹⁴ Pejepota'wa esageramū pejejeuee pejeporowykyau esage nanē Jejuī 'ga upe nū.

¹⁵ Estefana 'ga ako opytuna 'gā netee Jejuī 'ga rerowiar ypyramū Akaja ywy pe ikue. Jejuī 'ga rerowiaa ppy we ako 'gā oporowykyau 'ga upe ikue, ajamu'jau 'ga ree ikue.

¹⁶ A'eramū ki pēē 'gā je'ega renupa. Pejejeupe 'ga 'eawer imū etee futat pēē mama'e apou. Kwe pe nipo Jejuī 'ga ree moromu'jara 'gā amū akou 'gā nee nanē pejeapykaku nū. 'Gā pyri oporowyky ma'e 'gā nanē poromū nū.

¹⁷ Estefana 'ga, Fortunatu 'ga, Akaiku 'ga. Mīmera 'gā jemuekōēāina je pyri 'gā nura. Muku te 'ā peko je wī. A'eramū 'ā pēē je poare'ema. A'ere 'ā 'gā nuri je poaa rai'ī.

¹⁸ Je muekōēāina 'ā 'gā 'ua rai'ī. Pēē nanē nipo 'gā pē muekōēāina pē mogyau. A'eramū ki jane 'jau 'gā nupe: "Ore muekōēāi ako pejepe ai'ī. A'eramū pēē esage ma'eramū oree", 'jau ki jane 'gā nupe 'gā muorypa ee.

Oje'ega 'ga imonou 'gā nupe 'gā futaa

¹⁹ Asia ywy pe je rekoī. 'Auwara 'gā Jejuī 'ga rerowiaara 'gā oje'ega monou pē nupe pē futaa. Akira 'ga wemireko ēē retee, Prisira ēē retee oje'ega mono pē nupe pē futaa. 'Gā nog ipe Jejuī 'ga rerowiaara 'gā ajatykau ojemu'jau Jejuī 'ga ree. 'Gā nog ipe ajatyka ma'e 'gā nanē oje'ega monou pē nupe nū.

²⁰ Najuejue etee futat janerewirera 'gā oje'ega monou pē nupe pē futaa.

Jejui 'ga rerowiaaramū ki pejoman, pejejafutaa.

²¹ 'Awamū je rete futat ka'arana kwasiari inuga pē nupe: “Teje'ega amono pē nupe pē futaa”, Pauloramū je ikwasiari pē nupe.

²² Jarejuwarete 'ga Janejararete 'ga ree ipromutare'ema 'gā nereko tywera je afutat.

“Ere ejua kamēsīete, ki Jejui”, 'jau je Jarejararete 'ga upe.

²³ 'Ga rerowiaaramū je pē futari. Jarejararete 'ga resage pē nerekoa nanē je afutat nū.

²⁴ Jepromutar esage je pē nee. Jejui Kristu 'ga perowiat je 'jawe. A'eramū je tepota'wa esageramū pē nee.

Kweramū etee jeje'ega pē nupe.

2 Korītu

Korītu pewara 'gā amū nuerowiari Paulo 'ga. Nafutari 'gā 'ga remikwasiarera. A'eramū 'ga ka'arana kwasiaru'japa imonou Korītu pewara 'gā nupe, 'gā mueapyou oporowyky are. NaPaulo 'ga etee rūi ka'arana kwasiaa imonou 'gā nupe. Janeruwarete 'ga 'Agesagea ikwasiarukaa 'ga upe rakue.

¹ Je Pauloramū ka'arana akwasiat imonou pē nupe. Timoteo 'ga ako je pyri. Je 'ā Jejui Kristu 'ga remimonoferamū. Ymā te ako Jejui 'ga je monoi kwe pewara 'gā nupe omome'waramū ikue. “Kwe pe ekwap je mome'wau ekou 'gā nupe”, 'jau 'ga jee ikue. 'Uwarete 'ga remifutar imū etee futat 'ga je monou kwe pewaramū pē mu'jaukaa ojee ikue. A'eramū je ka'arana kwasiaa imonou Korītu pewaramū pē nupe, Jarejuwarete 'ga remiayuwamū pē nupe. Akaja ywy pe okwasi'o ma'eramū pē nupe nanē je ikwasiaa imonou nū. Jarejuwarete 'ga remiayuwamū pē nupe je imonoi.

² Ku'jywa 'ga Janeruwaretea. Jejui Kristu 'ga nanē 'ā Janejararetea futat nū. 'Gā nesagea pē nerekoa je afutat. 'Gā pē mopy'ata'waa nanē je ifutaa nū.

Jarejuwarete 'ga simuoryp

³ Janeruwarete 'ga futat 'ā Janejararete 'ga Ruwaretea, Jejui Kristu 'ga Ruwaretea. Ipota'wa 'ā 'ga jane ree jepi. Janeruwarete 'ga 'ā jane poat mama'e apo are kwaiwete. A'eramū ki jane 'ga muorypa ee.

⁴ Ore upe mama'e tywera jeaporamū, Janeruwarete 'ga ore mojemogypyka jui ojee ai'i. A'eramū ore nanē pē poaa 'ga oropoaawera 'jawerimū etee futat.

⁵ Ymā 'ā ia'wyre'ema 'gā Kristu 'ga rereko tyweretei rakue. Nan tee futat ajee 'gā 'ā ore rereko tyweri, Kristu 'ga rerowiaaramū ore jemogyramū. A'ere 'ga 'gā ore rereko tyweramū Kristu 'ga reko ore pyri ore mouagukaa ore rereko tywera upe.

⁶ 'Gā orojereko tywer ire miamū ore pē poari Jejui 'ga rerowiar uwyapiukaa pē nupe. Kristu 'ga wejue ore poat ore mouagukaa orojereko tywera upe. A'eramū ore nanē pē poararūmū pē mouagukaa nanē jupe nū.

⁷ Orojemogypyka arajemogyau Jarejuwarete 'ga pē poar are. 'Ga rerowiare'ema 'gā nipo pē nerekou tyweate ore rereko tyweawera 'jawerimū etee futat. A'eramū nipo “Janeruwarete 'ga pē poaa ore poaawera 'jawerimū etee futat” 'ea jane 'ā sikwaap.

⁸ Pēē 'ā jerewirera 'jawe. Kūjāmeramū pēē 'ā jerenyra 'jawe. A'eramū je 'awamū tejereko tywera mome'wau pē nupe. Asia ywy pe je rekoramū 'gā je rereko tyweretei kwaiwete.

⁹ Janeruwarete 'ga je jukaukaa werewi 'gā nupe. A'eramū je tejemuaēma tejee. “Je juka sipo 'gā pa”, 'jau je tejeupe etee futat ai'i. A'eramū je tepoia tejee tejemogypygy awi. A'eramū je tejemogypyka Jarejuwarete 'ga ree etee futat 'awamū. Ae moferapara 'ga ree etee futat je tejemogypyka tekou 'awamū.

¹⁰ Ma'eramū 'ga 'ā je a'gui 'gā nui je jukaukare'ema 'gā nupe. Anure nanē nipo 'ga je a'gui 'gā nui nū. Ajemogypyk je 'ga ree. “Janeruwarete 'ga nojejukaukari 'gā nupe. 'Ga te nā'ā nojejukaukari 'gā nupe re'ā”, 'jau je tejeupe jepi.

¹¹ A'eramū ki pēē pejeje'ega monou Jarejuwarete 'ga upe je ree. “Epoar iki Paulo 'ga, ki Ku'jyp. Ea'gu ki 'ga 'ga ree ifuewet ma'e 'gā nui”, 'jau ki pēē 'ga upe je ree. A'eramū 'ga je jukaukare'ema 'gā nupe, ojeupe pejeje'ega pēē imonou'jau'jaw ire. A'eramū nipo 'gā kwaiwete Jarejuwarete 'ga muorypa je jukae'em are.

Paulo 'ga wea'aramū kwe pe te nū

¹² Janeruwarete 'ga 'ā je poat akou jepi. A'eramū 'ga je mogo esageukaa wowase jepi. Pē neape taetu je 'ā tekou esage jepi. A'eramū je tejerowiaa pē pype teko esage are. Naje'mei je pē nupe. Pē pype tekou tejemuawapia tekou jepi. Aipoa Janeruwarete 'ga ifutaa. Najemogypygy futari je te'akwaaw ekoete are. Janeruwarete 'ga wejue opota'waramū je ree. Opājē 'ga imua jee. A'eramū taetu je tekou esage pē pype.

¹³ Namama'eay are rūi je ka'arana kwasiari pē nupe. Mama'e aye'em are etee te je ikwasiri imonou pē nupe. A'eramū pēē imogytau pejejeapyoramū ee. Ee pēneapyoa je afutat.

¹⁴ 'Awamū nipo nepēneapyopawi ee pejejemogyau. A'eramū ki pēē pejejea'aramū ee. A'eramū nipo pēē pejejeapokaturamū ee. A'eramū nipo pēē Jarejararete 'ga ruaw ipe pejeku'iramū je ree. Jejui 'ga ruaw ipe pejeku'iramū je ree pejejee jeku'i 'jawerimū etee futat.

¹⁵⁻¹⁶ Ee pēneapyo are je jemogypygy tekou ikue. A'eramū je 'jau tejeupe: “Too Korītu pewara 'gā nesaka 'jau nū kwy”, 'jau je tejeupe ikue numiamū. “Masetoni ywy pe tewau tapytaaip Korītu pewara 'gā pyri 'jau”, a'e je numiamū. “A'eramū tewau kwe pe 'gā nui.

A'ere je tejewya tepytaaiwu'japa 'gā pyri 'jau nū kwy", 'jau je tejeupe ikue numiamū. "A'eramū nipo je 'gā maku'iu'jawi tejee re'ā", 'jau je tejeupe numiamū. Je jewyramū amunipo 'ā pēē mama'e mua jee Judeja ywy pe jere mireroramū. A'ere je nooi.

¹⁷Jerea'at amutee te je nū. A'eramū nipo pēē mū 'jau jee: "T'me te Paulo 'ga oree 'we", 'jau nipo pēē mū jee. A'ere je naje'mei futari pē nupe. Maran gatu gatu etee mama'ea jee.

¹⁸Janeruwarete 'ga 'ā ni'mei futari. U'eawer imū etee futat 'ā 'ga mama'e apoi. A'eramū je nanē te'me'emamū pē nupe nū. Namoryteei je pēē te'eawer are.

¹⁹Jejui Kristu 'ga ako je amome'u pē nupe ai'i. Timoteo 'ga, Silasi 'ga. Mīmera 'gā netee ako je Janeruwarete 'ga ra'yra 'ga mome'wau pē nupe ai'i. Mama'e a'jea etee 'ā Jejui Kristu 'ga omome'u rakue. 'Ga futat ako Janeruwarete 'ga imome'waukaa oree ikue. A'eramū ore nanē mama'e a'jea etee imome'wau pē nupe.

²⁰U'eawer imū etee futat Janeruwarete 'ga mama'e apoi Jejui Kristu 'ga upe. U'eawer imū etee futat Janeruwarete 'ga Jejui Kristu 'ga muri janee. A'eramū jane 'ga je'ega rerowiaa. "A'jea futat 'ga remiapoā", 'jau jane 'ga upe. A'eramū jane 'ga muorypa Jejui Kristu 'ga ree.

²¹Janeruwarete 'ga futat 'ā Jejui Kristu 'ga rerowiarukaa oree. Pē nupe nanē 'ga futat 'ga rerowiarukaa rakue. 'Ga futat 'ā jane mujat Jejui Kristu 'ga ree. 'Ga futat 'ā jane mogyau wemiayuwamū.

²²Sā'ā jane jarejara kwasiara jarekaraemā are. A'eramū 'ā tekotee 'gā janekaraemā kwaapa. Nan tee futat Janeruwarete 'ga U'agesage muri wemiayuwamū janee. A'eramū jane jarejemogypyka 'ga 'eawer are: "Te'agesagea je amono pē nupe ra'ne. A'eramū je anure mama'e monou pē nupe kwaiwete" 'eawer are jane jarejemogypyka jarejemogyau.

²³Janeruwarete 'ga je kwaap. "Naje'mei je", a'e je 'ā 'ga remianuwamū. Najeje'eg wyrafeniweri weuje je pē nupe. A'eramū je tewawe'em pē pyri ai'i.

²⁴"Je te 'ā pē'wyrara. A'eramū ki pēē mama'e apou je'eawer imū", 'jawe'em je 'ā pē nupe. Pekwaap futat 'ā Jejui Kristu 'ga. A'eramū je 'jawe'em pē nupe: "Jejui 'ga ki perowiat", 'jawe'em je 'ā pē nupe. A'ere je pēnorywa tee ifutari. A'eramū je mama'e apou pē nupe pē muorypawamū.

2

¹Pēnorywa je afutat. Ma'eramū 'ā je nooi pē pyri. "Kasi je 'gā pyri tewau teje'ega moywyrafeni 'gā nupe ne kwy", 'jau je tejeupe. "A'eramū amusipo 'ā je 'gā mu'arasigu'japa etee", 'jau je tejeupe. A'eramū je a'eramū tewawe'em pē pyri. A'eramū je ka'arana etee ikwasiaa imonou pē nupe.

²Pē mu'arasig ire sipo awy'ja je maku'iu? Naani. Pejemu'arasig ire naje maku'i pejepe.

³A'eramū je a'eramū 'jau tejeupe ai'i: "Nooi pa je 'gā pyri kwy", 'jau je ai'i. "Kasi a'e pe je 'gā mu'arasigi etee tewau ne kwy", 'jau je tejeupe ai'i. "A'eramū je nanē te'arasigamū 'gā neewe ne kwy", 'jau je tejeupe ai'i. Pē'arasig ire nitywi je maku'lara 'ga amū. Ma'eramū 'ā je ka'arana etee ikwasiaa imonou pē nupe ikue, pē mosōu mama'e tywera apo awi ikue. "Peipoit mama'e tywera apo awi", 'jau je ka'aran are imonou pē nupe. Jere mikwasiarera resag ire mama'e tywera apo awi pejepoira je maku'i. A'eramū pēē nanē pejeku'iramū pejejemogyau je 'jawe futat.

⁴Pē nupe ka'arana kwasiaa je tejaa'wau pē nee ai'i. Najeporomu'arasigiweri je pē nee ai'i. A'eramū je tejaa'wau pē nee ai'i. "Ojee jeporomutara 'gā ikwaawa je afutat", 'jau je tejeupe etee futat ai'i. A'eramū je ka'arana kwasiaa imonou pē nupe ai'i.

Jaretywer awi janepoiriweramū 'ga imoia jane wi

⁵Mama'e tywera apoara 'ga, 'uwa 'ga remireko ēē rerekwara 'ga, je mu'arasig etee ojee ai'i. Pēē mū taetu nipo 'ga pē mu'arasiga pē mogyau rai'i.

⁶A'eramū nipo pēē 'ga rerekou tywea ee rai'i. A'eramū je 'awamū 'jau pē nupe: Au'je ki 'ga rereko tywer ire.

⁷'Awamū ki pēneatee futat 'ga remiapofer awi. Pemur iki 'ga pejejepype nū. Kasi a'e pe 'ga poireteetei Jejui 'ga rerowiar awi ne, 'jau je pē nupe.

⁸A'eramū je 'jau pē nupe: 'Ga ree pejeporomutara ki peesaukat 'ga upe. Pereko esage etee ki 'ga, 'jau je pē nupe.

⁹Pē nupe ka'arana kwasiaa je 'jau tejeupe etee futat ai'i: "Wenup sipo 'gā jeje'ega? Wapo sipo 'ga mama'ea ojeupe je'eawer imū?" 'jau je tejeupe ai'i. A'eramū je ka'arana kwasiaa imonou pē nupe ai'i. A'ere ako peenup tāmējē jeje'ega ai'i. A'eramū a'ea je muorypa.

¹⁰'Ga remiapofer awi pēneateeramū je nanē jereateeramū jui nū. Pē 'jawe etee futat tejeateeramū 'ga remiapofer awi. Kristu 'ga remianuwamū je 'i: 'Ga remiapofer awi jereateeramū tekou, 'jau je 'ga remianuwamū.

¹¹'Ga remiapofer awi jarejeatee'emamū nipo mama'eukwaawa 'wyrara jane mote'ari ee. "Janete'ara mama'eukwaawa 'wyrara afutat" 'ea jane 'ā sikwaap. A'eramū jane

jarejeateeramū aipo 'ga remiapofer awi. Kasi a'e pe mama'eukwaawa 'wyriara jane mote'areteetei ee ne.

Kristu 'ga retee jane mama'eukwaawa 'wyriara retygi

¹² Troate pe je oi peuwara 'gā nupe Jejuī 'ga ree morogyta esage mome'wawamū ai'i. Jejuī 'ga mome'wawamū je oi ai'i. Ojepyri je waēmamū 'gā aku'iramū je ree ai'i. "Taruenup eneje'ega 'jau", 'jau 'gā jee ai'i. Janejararete 'ga te 'gā moporenuwiwerukaa jeje'eg are ai'i. A'eramū 'gā oporenuwiweramū ee.

¹³ A'ere je jemuaēmi jarejewirera 'jawewara 'ga ree, Tito 'ga ree. "Peu futat je oi ene rekoa", e'i 'ga jee ikue. A'ere 'ga nuri we owaēma peu. A'eramū je a'eramū tewau pe awi ai'i nū. Tewau Masetoni wyw pe Tito 'ga rekaa ai'i.

¹⁴ A'eramū je Jarejuwarete 'ga muorypa 'ga remiapofer are. Janeruwarete 'ga te 'ā jane poaa mama'eukwaawa 'wyriara retyg are. Kristu 'ga 'ā mama'eukwaawa 'wyriara retyka rakue. A'eramū jane Kristu 'ga ree ojemujat ma'eramū etyka 'ga retee futat. Sā'ā jany kasiga reafena kwasi'oa jany kasiga ojee imono re. A'eramū 'ā jane pyriwara 'gā jany kasiga reafena renupa. Nan tee futat jane Jejuī 'ga mome'ui jarejepyriwara 'gā nupe, 'ga rera muāina 'gā nupe.

¹⁵ Sā'ā judeu 'gā mama'e kasiga rapya Jarejuwarete 'ga muorypawamū rakue. Nan tee futat jane 'ga muorywi Jejuī 'ga mome'uramū. Janeje'ega renupara 'gā amū nipo Jejuī 'ga rerowiaa ajemogyau. A'eramū nipo Janeruwarete 'ga 'gā katu'oka 'gā mogyau wemiayuwamū. A'ere nipo janeje'ega renupara 'gā amū neruowari futari Jejuī 'ga. A'eramū nipo 'gā awau ajemogyau mama'eukwaawa 'wyriara rape rupi.

¹⁶ Jejuī 'ga rerowiare'ema 'gā nupe Jejuī 'ga mome'ua mama'e pysoga 'jawe. Niparurowiariwari 'gā Jejuī 'ga ree. Sā'ā mama'e pysoga pyri ae oe'ema. Nan tee 'ga rerowiare'ema 'gā nupe 'ga mome'ua nia'wyri. A'eramū 'gā amanū re awau muku 'ga wi. Mama'eukwaawa rapyaw ipe te 'gā oi. A'ere Jejuī 'ga rerowiaaramū jane upe 'ga mome'ua jany kasiga 'jawe. Jareparurowiariweramū jarejemogyau 'ga ree. A'eramū Janeruwarete 'ga jane katu'oka jane mogyau wemiayuwamū. A'eramū 'ga jane manū re jane mogyau ojepyri nakwaparimū ete rūi futat. Aw'ya sipo ajee Jejuī 'ga mome'uarū kwe pewara 'gā nupe?

¹⁷ Ore futat 'ā 'ga oromome'uarū 'gā nupe. A'ere 'ā amumera 'gā Jejuī 'ga mome'ui ka'aranū are etee ajemogyau. "Jejuī 'ga pa je amome'u 'gā nupe kwy. A'eramū 'gā je mepyau 'jau kwy", 'jau imome'wara 'gā ajemogyau ojeupe. A'ere ore nanarūi. Janeruwarete 'ga 'ā ore monoukat Jejuī 'ga mome'wawamū. A'eramū 'ā ore Kristu 'ga remiayuwamū 'ga mome'wau a'jea futat kwe pewara 'gā nupe. Janeruwarete 'ga remianuwamū futat ore 'ga mome'ui.

3

Janeruwarete 'ga je'egyau

¹ Pē nupe aipo imome'wau sipo ore jerowiaraiwi etee orojee? Naani. Nore kwaawi sipo pejepe? Ore kwaap futat pejepe. A'eramū ore 'jawe'em arajaupe ikue: "Korītu pewara 'gā najane kwaawi we. A'eramū jane jarejemome'wau 'gā nupe", 'jawe'em ore arajaupe ai'i. Ore kwaap futat ako pejepe ai'i. A'eramū ako ore orojemome'wawe'em pē nupe nū. "Kweramū Janeruwarete 'ga remiayuwa 'ga amū. Paulo 'ga rera", aru'eu'jap sipo ore ka'arana monou ikwasiaa pē nupe ai'i nū? Naani.

² Pē futat ore mome'ui pejepe ka'arana 'jawe. A'eramū pē nesakara 'gā pēneko esage nanē esaka nū. A'eramū nipo pē nesakara 'gā 'jau ajaupe: "Mama'e a'jea etee Paulo 'ga omome'u. Sā'ā 'ga remimu'efera 'gā, Korītu pewara 'gā jemu'ea ako esage are", 'jau nipo pē nesakara 'gā. Ore nanē nipo pejemogy esage kwaapa nū.

³ Kristu 'ga 'ā pē mogyau wemiayuwamū pē nupe omome'u re. A'eramū pē pejemogyau 'ga remikwasiarera ka'arana 'jawe. Naitapew are ikwasiaripyri 'jawe rūi pē. A'eramū pē nesakara 'gā Kristu 'ga remiapofera resaka. Jarejuwarete 'ga 'Agesage pyu futat 'ā Kristu 'ga jane mu'jagi wemiayuwamū. A'eramū jane resakara 'gā 'ga remiapofera kwaapa.

⁴ Ore orojemogyppyk Jarejuwarete 'ga ree, Kristu 'ga ree nanē nū. A'eramū nipo ore pēneko esage resaka 'jau: "Janeruwarete 'ga te ako jane mono Korītu pewara 'gā mu'jau ikue. 'Gā nupe Kristu 'ga jane imome'uramū ako Janeruwarete 'ga 'ga rerowiarukaa 'gā nupe ikue", 'jau ore pē nesaka.

⁵ Naore tee rūi ako ore Jejuī 'ga rerowiarukara pē nupe ai'i. Janeruwarete 'ga te 'ga werowiarukat pē nupe. Janeruwarete 'ga te 'ga omome'uukat oree pē nupe.

⁶ Janeruwarete 'ga te Jejuī 'ga mome'uukat oree ikue. "Jejuī Kristu 'ga pē imome'uramū Je'agesagea te 'ga rerowiarukari 'gā nupe, 'gā mogyau jeremiayuwamū 'gā momyauu", 'jau

Janeruwarete 'ga ore ikue. A'eramū 'ga ore monou kwe pe Jejuī Kristu 'ga mome'wawamū ai'i. Ymā we futat 'ā Janeruwarete 'ga 'jau janyepy 'gā nupe rakue: "Teporogytafera renupare'ema 'gā je amono mukuu tejewi 'gā manū re", 'jau 'ga 'ā rakue. A'ere Janeruwarete 'ga 'Agesagea jane mogyi 'ga remiayuwamū Kristu 'ga rerowiaaramū etee te. A'eramū 'ga jane manū re jane mogyau ojeypyri nakwaparimū ete rūi.

⁷ Ymā te 'ā Janeruwarete 'ga Moisesi 'ga renūina rakue. "Ere ejua ejeupia 'au je pyri", 'jau 'ā 'ga 'ga upe rakue. A'eramū 'ā Moisesi 'ga awau ojeupia ywytyra apyte'rarimū Jarejuwarete 'ga pyri rakue. A'eramū 'ā Janeruwarete 'ga oje'ega kwasiarukaa itapew are Moisesi 'ga upe rakue. 'Ga je'ega kwasiaramū 'ā Moisesi 'ga reakwara wenyfugamū 'ga wi rakue. A'eramū 'ā Israeu juapyrera 'gā ojeypyri 'ga jewyramū amā'jāuarūme'em 'ga reakwar are rakue. 'Ga reakwara renyfuga 'gā neakawayau rakue. Esage te 'ā Janeruwarete 'ga je'eg ymanera rakue. A'ere 'ā janyepy 'gā nuenuwi futari Jarejuwarete 'ga porogytaa rakue. A'eramū 'gā 'ā amanūmū awau mukuu 'ga wi rakue.

⁸ A'ere 'ā Janeruwarete 'ga 'awamū U'agesage muri janee, Jejuī 'ga rerowiarukaawamū janee. Esage futat 'ga 'Agesage porowykya!

⁹ Esage futat Janeruwarete 'ga porogytaa rakue. 'Ga porogyta mogytaramū janyepy 'gā otywera kwaapa futat rakue numiamū. A'ere janyepy 'gā nopoiri otywer awi rakue. A'eramū 'gā amanūmū awau mukuu Jarejuwarete 'ga wi 'ga porogytaa renue'em ire etee futat. A'ere esageramū futat Jejuī 'ga mome'ua. 'Ga mome'ua jane erowiar ire Janeruwarete 'ga janetywera moia jane wi, jane mogyau wemiayuwamū. A'eramū jane jaremanū re jaweau jarejemogyau Jarejuwarete 'ga pyri nakwaparimū ete rūi. Aipoa 'ga porogyta yaua. "Teja'yra 'ga pēē erowiarāmū je pē mogyi tejemiayuwamū. A'eramū nipo je anure pē mogyau tejepyri" 'ea 'ga porogyta yaua.

¹⁰ Esage futat Janeruwarete 'ga porogyta ymanera rakue, Moisesi 'ga upe 'ga remikwasiarukarera rakue. 'Awawara morogyta yaua taetu aje 'ā esage ete Moisesi 'ga remikwasiarera resage apyraapa.

¹¹ Esage futat Janeruwarete 'ga porogyta ymanera. Namutamutarūi futat 'gā Moisesi 'ga remikwasiarera renuwi. A'etea esage futat 'gā nupe. A'ere jane 'awamū Jarejuwarete 'ga porogyta yau rerekoi. Esage futat 'ga porogyta yaua. Nateepawa'uweri futari 'ga porogyta yaua.

¹² Jarejuwarete 'ga porogyta are ore jemogyppygi arajemogyau. A'eramū ore orokyjawe'em Kristu 'ga mome'u awi.

¹³ Ymā 'ā Moisesi 'ga weakwara piari taity pyu weakwara renyfug awi rakue. Iwewa teepawa resaukaawe'emamū 'ga imonou oje'arimū rakue, Israeu juapyrera 'gā nupe esaukaawe'emamū rakue. Na'gā 'jawe rūi jane iapoi.

¹⁴⁻¹⁵ Ymā 'ā Israeu juapyrera 'gā naeapyoī futari 'ga porogyta are rakue. 'Awamū miamū aje 'ā 'gā naeapyoī ee. Moisesi 'ga remikwasiarera mogytaramū iapyaka'jam ma'e 'jawe etee 'gā jemogyi. Kristu 'ga ree ojemujar ire te 'gā neapyoramū Jarejuwarete 'ga porogyta are. A'eramū 'gā ajemogyau iapyakwafuk ma'e 'jawe.

¹⁶ Jejuī 'ga rerowiar ire nipo 'gā neapyoramū Jarejuwarete 'ga porogyta are. Sā'ā Moisesi 'ga weakwara piaro'woga Jarejuwarete 'ga pyri ojewyawamū rakue. Nan tee jane Jarejararete 'ga rerowiaaramū janereapyoramū 'ga porogyta are.

¹⁷ "Jarejararete 'ga", 'jau je. Jarejuwarete 'ga 'Agesage upe te je 'i. Werowiarāmū Jejuī Kristu 'ga janetywera moia jane wi, Janeruwarete 'ga 'Agesage muri janee. A'eramū 'ga 'Agesagea jane mu'jaga Janeruwarete 'ga remiayuwamū. 'Ga 'Agesage jane rekoramū jane jaretywe'emamū rēwējēmī jaretywera pyu.

¹⁸ Ymā Moisesi 'ga reakwara wenyfugamū Jarejuwarete 'ga pyri 'ga o re rakue. Nan tee Kristu 'ga remiayuwamū jane jarejemu'jaga 'ga 'jawe. Janeruwarete 'ga 'Agesagea jane mu'jaga Kristu 'ga 'jawewaramū. Anure taetu nipo jane jarejemogyau 'ga 'jawe futat.

4

Kristu 'ga ree etee ki jarejea simyi

¹ Janeruwarete 'ga ajemuaēma ore ree. A'eramū 'ga ore mogou ojeupe oporowyky ma'eramū. Jejuī Kristu 'ga mome'waramū 'ga ore mogou ojeupe ikue. A'eramū ore orojorypawe'emamū arajemogyau.

² A'eramū ore oropoia mama'e tywera apo awi. Jemime miamū futat ore mama'e tywera apowe'em. Oropoit futat ore mama'e tywera apo awi. Nore'mei futari ore Jejuī 'ga ree. Nasigaty rūi ore Jejuī 'ga mome'ui. Mama'e a'jea etee futat ore oromome'u arakou. 'Ga je'eg imū etee futat ore arajemogyau Jarejuwarete 'ga reape. A'eramū ore resakara 'gā 'jau nipo ajaupe: "Paulo 'ga ako esage Jarejuwarete 'ga je'eg imū etee futat ojeupi oo ma'e 'gā netee", 'jau 'gā ajaupe, ore resaka.

³ Jejuī 'ga nipo ore imome'wau esage agawewi. A'etea nipo amumera 'gā naeapyoī ee. 'Ga rerowiare'ema 'gā nipo naeapyoī futari ee. Mama'eukwaawa rapyaw ipe oo ma'e 'gā naeapyoī futari ee.

⁴ Mama'eukwaawa 'wyrīara wejue nuerowiarukari 'gā nupe. A'eramū 'gā weapyoē'emamū 'ga mome'u are. Mama'eukwaawa 'wyrīara Jejuī 'ga rerowiare'ema 'gā 'wyrīara. A'eramū wemiayuwa 'gā mueapyoukare'ema ee. Jejuī Kristu 'ga Janeruwarete 'ga 'jawe futat. A'eramū mama'eukwaawa 'wyrīara wemiayuwa 'gā mueapyoukare'ema 'ga ree.

⁵ Jejuī Kristu 'ga etee 'ā ore oromome'u 'gā nupe. "Jejuī Kristu 'ga perowiat", 'jau 'ā ore arakou 'gā nupe. "Ore rerowiat pejepe", naru'ea'uweri 'ā ore 'gā nupe. "Jejuī Kristu 'ga perowiat", aru'e te 'ā ore 'gā nupe. "Jejuī Kristu 'ga 'ā Janejararetea. A'eramū pēē 'ga te erowīaa", 'jau 'ā ore 'gā nupe. 'Ga upe etee futat ore porowykyi arakou. A'eramū ore mama'e apou pē nupe, pē poaa 'ga rerowiar are.

⁶ Ymā te 'ā Janeruwarete 'ga ywy apoi ywaga reewe rakue. A'e pype 'ga 'jau rakue: "Ypytunaiwa pype je 'ara mogoi", 'jau 'ga rakue. 'Awamū 'ā 'ga futat jane mueapyoukaa oporogyta are. Kristu 'ga kwaawukaa janee ikue. Janeruwarete 'ga 'ā esage ma'ea. 'Ga 'jawe etee futat Kristu 'ga. A'eramū jane Jarejuwarete 'ga kwaapa Kristu 'ga reewe futat.

⁷ Namaira rūi jane. A'etea 'ā Janeruwarete 'ga ojekwaawukaa janee. Wa'yra 'ga nanē 'ā 'ga ikwaawukaa janee nū. Sā'ā ae mama'e esage monoa mama'e ryrū pype. Mama'e esagea ae nomonoa'uweri japepo tywera pype. A'ere 'ā Janeruwarete 'ga oje'ega muri janetywera po pe rakue. A'eramū 'gā aipo jane imome'uramū wea m̄ina ee etee. Najane ree rūi 'gā wea m̄yi aipoa jane imome'uramū. Janeruwarete 'ga jane moporowykyuk at ojeupe. 'Ga pājē mū etee te jane mama'e apoi 'ga upe. A'eramū janeremiapofera resakara 'gā Jarejuwarete 'ga muorypa ee. "Ene te 'ā eneresage jepi. Mama'e esagea 'ā ereapoukat 'gā nupe epājē mū", 'jau 'gā 'ga upe 'ga muorypa ee.

⁸ Amumē 'ā mama'e tywera jeapoi janee. A'ere 'ā jane nipoiri futari Jejuī 'ga wi. Amumē 'ā jane jaremiaporama kwaape'ema. "Maran te je iapoi?" 'jau 'ā jane jarejeupe. A'ere Janeruwarete 'ga jane mueapyoī janeremiaporam are.

⁹ Kwaiwete agawewi nipo jane ree iporomutare'ema 'gā jane rerekou tyweaete. A'etea nipo Jejuī 'ga ako jane pyri.

¹⁰ Sā'ā 'gā ore rerekoa. 'Gā fuewepawe'ema ore wi. Kamēsī'īsi'ī 'gā afueweramū ore ree. Sā'ā 'gā Jejuī 'ga juka rakue. Nan tee futat 'gā fueweramū ore ree. A'ere Jejuī 'ga jejukai ore ree. Ore apisiukare'ema 'ga 'gā nupe. Amanū re 'ā Jejuī 'ga ferawi etee rakue nū. A'eramū 'ga akou ore pyri futat. A'eramū ore resakara 'gā 'ga ferawa rerowīaa.

¹¹ Kwe pewara 'gā nupe ore Jejuī 'ga mome'uramū 'ga ree iporomutare'ema 'gā afueweramū ore ree kamēsī'īsi'ī. A'ere 'ga nore apisiukari 'gā nupe. A'eramū ore resakara 'gā 'jau ajaupe: "Ako futat Jejuī 'ga 'gā pyri ra'e. Ojejuka futat 'ga wemiayuwa 'gā nee ra'e", 'jau 'gā ajaupe, ore resaka.

¹² Jejuī 'ga ore imome'uramū 'gā afueweramū ore ree. "Siapisi 'gā 'jau", 'jau 'gā ajaupe. A'ere 'ā pēē Jejuī 'ga perowiat aipo are taetu. A'eramū nipo pēē pejewau 'ga pyri pejemanū re nakwaparimū ete rūi futat pejemogyau.

¹³ Ymā 'ga amū ikwasīaa Janeruwarete 'ga je'ega rerekwara ka'aran are rakue. "Arowiat je tekou. A'eramū je imome'wau pē nupe", 'jau 'ā 'ga ikwasīaa rakue. 'Ga 'jawe ore rekoī. Jejuī 'ga ore aruerowiat arakou. A'eramū ore 'ga mome'wau kwe pewara 'gā nupe.

¹⁴ Janejararete 'ga manū re 'ā Janeruwarete 'ga Jejuī 'ga moferawi etee rakue nū. A'eramū ore "Jejuī 'ga jane erowīaaramū Janeruwarete 'ga jane moferapa etee jane manū re nū. A'eramū 'ga jane mogyau ojepyri nakwaparimū ete rūi" 'e rerowīaa arajemogyau. Ore nanē nipo 'ga ore rerawau ojepyri pē neewe.

¹⁵ Pē nupe Jejuī 'ga mome'u are ore orojereko tywerukaa etee futat 'gā nupe. Pejejeupe Jejuī 'ga ore imome'uramū pēē 'ga rerowīaa. "Janeruwarete 'ga iporomutat jane ree. A'eramū 'ga wa'yra 'ga mua ywy pe janetywera mepyawamū rakue" 'ea pēē erowīaa. Kwe pewara 'gā nanē nipo 'ga rerowīaa ojeupe ore 'ga mome'uramū. A'eramū ki jane Jarejuwarete 'ga muorypa jarekatu'og are.

Anure nipo 'ga mama'e esage muri janee

¹⁶ A'eramū ore a'eramū aruojere'emamū Jejuī 'ga mome'u awi. Oreretea nipo oymanamū futat numiamū. Afuakare'emamū agawewi futat. A'ere Janeruwarete 'ga ore'aga momyauī ore ore rekoramū.

¹⁷ Ore rerekou tyweaete agawewi futat 'gā. A'ere ore 'i etee orojeupe: "Anure nipo Janeruwarete 'ga mama'e esage muri janee, 'gā je rereko tywera apyraapa", 'jau etee ore orojeupe. A'eramū ore oropy'a'wre'emamū orojereko tyweramū. Ore upe Janeruwarete 'ga remimurama esage futat 'gā ore rereko tyweawera apyraapa.

¹⁸ Norom̄yi ore orojeaa 'auwara mama'e are etee. 'Auwara mama'e teepaw ete kam̄s̄iete. A'eram̄u ore orojea m̄yina Jarejuwarete 'ga ree etee futat. Janeruwarete 'ga te nateepawi futari. Ore upe 'ga remimurama nan̄e ateeepawe'emam̄u futat n̄u.

5

¹ Tap̄yja 'jawe janeretea. S̄ā'ā ae tap̄yi apoa. A'ere 'ā tap̄yja to'omi kam̄s̄iete. Nan tee futat nipo janeretea. Jane man̄unam̄u nipo janerete nemam̄u futat. A'ere nipo jane man̄unam̄u jane'aga oi ywag ipe. A'eram̄u nipo peu Janeruwarete 'ga janerete yau mua janee n̄u. Aipoa jarejete yau rerekou nipo jane niman̄ū'jawi futari.

² 'Awam̄u futar iki janerea'at ywag are. 'Awam̄u futat jareoweram̄u ywag ipe. Janerea'ar iki jarejete yaua jarejeupe imurawam̄u are. A'eram̄u jane jarefaemam̄u ee, jarejete yau futat are.

³ Ywag ipe jane o re nipo Janeruwarete 'ga janerete yau muri janee. A'eram̄u nipo jane jarejemogyawe'em jarejete'eme.

⁴ 'Au ywy pe jarejemogyau 'ā jane jarejaa'wau mama'e tywera rerajaa'wau. Janeman̄uweri jane 'ā numiam̄u. A'ere 'ā janeporomogyu'ruweram̄u futat jarejete are peu jareo re. Jarejete yaua jarejeupe imur ire jane jareman̄ū'jape'ema.

⁵ Janeruwarete 'ga nan̄e ojeypyri jarejemogyau afutat n̄u. U'agesagea ako 'ga amut janee ikue. "Awam̄u je Te'agesage monoi p̄e nupe. A'eram̄u je anure mama'e m̄u monou'japa p̄e nupe n̄u", 'jau ako 'ga janee ikue. Ma'eram̄u 'ā jane 'ga 'eawera rerowiari jarejemogyau, "Anure je p̄e mogyi 'au tejepyri nakwaparim̄u war̄au rūi. P̄enet̄e yau nipo je imonou p̄e nupe. A'eram̄u nipo p̄ē pejeman̄ū'jape'ema", 'ga 'eawera rerowiaa jarejemogyau.

⁶ A'eram̄u ore orojoywam̄u 'ga pyri orooram̄u are. 'Au ywy pe arakou ore narakoi 'ga pyri.

⁷ A'ere ore jemogypygyi 'ga ree. Naruesagi agawewi ore 'ga. A'etea ore orojemogypygyi 'ga ree. Norojemogypygyi ore orojiemiasag are te. 'Ga ree etee futat ore jemogypygyi.

⁸ A'eram̄u ore araku'iram̄u arajemogyau. Jarejuwarete 'ga pyri oreoweram̄u arajemogyau.

⁹ A'ere ore Jarejararete 'ga muorywa taetu ifutari mama'e m̄u futara apyraapa. A'eram̄u ore mama'e apou 'ga remifutar im̄u arakou. 'Ga remifutara 'ara rupi nipo ore oi peu 'ga pyri.

¹⁰ Anure nipo jane jatykai jarejemogyau Kristu 'ga rowase 'ga rerowiaaram̄u etee juejue. A'eram̄u nipo 'ga jane mepyyau janeremiapofer are. Janeremiapo tywer are nan̄e nipo 'ga jane mepyyau i'jawerim̄u etee futat. Janeremiapo esage are nan̄e 'ga jane mepyyau n̄u. Ma'eram̄u 'ā ore mama'e apou 'ga remifutar im̄u etee.

Jarejuwarete 'ga ree iporomutat ma'e

¹¹ "Mama'e tywera aporam̄u jane jemogyi Jarejuwarete 'ga kurapara 'jawewaram̄u 'ga upe" 'ea 'ā ore ikwaapa. Ma'eram̄u 'ā ore kyjei mama'e tywera apo awi. Ma'eram̄u 'ā ore p̄e mu'ei mama'e a'je are te. 'Gā nan̄e ore imu'jau ee ai'i n̄u. Janeruwarete 'ga orereko esage kwaapa. P̄ē ikwaawa nan̄e esage jee n̄u.

¹² Norojerowiaraiwi ore oroje etee. Orojemome'u 'ā ore p̄e nupe p̄e maku'iwam̄u oroje. A'eram̄u nipo p̄ē ore mome'wau ore ago'oara 'gā nupe. Aipo 'gā nipo 'jau ojeupe: "Je te 'ā esage ma'eram̄u. Esak jeraity esagea", 'jau nipo 'gā ojeupe etee futat. A'ere nipo 'gā naeapoyi ako a'wyre'em are.

¹³ Jējui 'ga je imome'uram̄u amumera 'gā 'jau jee: "Paulo 'ga 'ga 'akwaawe'ema 'ga wereko", 'jau amumera 'gā jee, je ago'wau ai'i. A'ere je Kristu 'ga mome'ui tekou. "Simuoryp Jarejuwarete 'ga 'jau", 'jau je tekou. Aipo je'ea sipo naje mu'akwaawukari je mogou? Amumera 'gā te aje "Paulo 'ga i'akwaawa akou", e'i jee. Je'akwaap futat je. A'eram̄u je Kristu 'ga mome'wau p̄e nupe, 'ga rerowiarukaa p̄e nupe.

¹⁴ Kristu 'ga iporomutat jane ree. Ma'eram̄u 'ā ore Kristu 'ga mome'ui p̄e nupe. Kristu 'ga aman̄u janetywera mepyyau rakue. A'eram̄u 'ga werowiaram̄u janetywera moia jane wi. A'eram̄u jane jarejemogyau r̄ew̄j̄ēm̄i mama'e tywera apoare'ema 'jawe Jarejuwarete 'ga upe. Kristu 'ga reewe aman̄u ma'efera 'jawe r̄ew̄j̄ēm̄i jarejemogyau.

¹⁵ Jane ree Kristu 'ga man̄ūi rakue, janetywera mepyyawam̄u rakue. Aman̄u re 'ga ferawi etee rakue n̄u. A'eram̄u ki jane 'ga rerowiaaram̄u mama'e apou'jape'ema jarejemifutar im̄u etee. 'Ga remifutar im̄u etee futat ki jane mama'e apou. Mama'e esagea jane iapoa te 'ga afutat. Ma'eram̄u 'ā 'ga man̄ūi jane ree rakue. Jane ree nan̄e 'ā Janeruwarete 'ga 'ga moferawi rakue n̄u.

¹⁶ A'eram̄u ki jane jarem̄ā'j̄āue'em tekotee 'gā naity are. "Ko 'ga nipo 'ā nia'wyri. S̄ā'ā 'ga taity tywe'ri ete erekoa", 'jawe'em jane jarejaupe. "Ko 'ga naje 'jawe rūi. Towajara te 'ga", 'jawe'em jane jarejaupe n̄u. "Kwe 'ga ipiūn̄ū", 'jawe'em jane jarejaupe. Nijokwaawi jane jarejauity are. Jarejopir are nan̄e jane nijokwaawi n̄u. Kristu 'ga upe miam̄u te 'ā

amumera 'gā 'i rakue: “Nakūima'eteete rūi 'ga. Sā'ā 'ga rekoa mama'e tywera apoara 'gā pype”, 'jau 'ā amumera 'gā Kristu 'ga upe rakue. Nokwaawi 'gā 'ga rakue. A'eramū ki jane jarejuago'wawe'em. Kristu 'ga taetu ki jane iago'wawe'em.

¹⁷ Kristu 'ga ree jarejemujar ire jane jarejemu'jaga 'ga 'jawewaramū. A'eramū futat jane mama'e apowe'em jarejekwawer ymaner imū. Janerekoteefera atEEPawamū futat jane wi. A'eramū futat jane jarejemogyau esage Kristu 'ga remifutar imū etee futat.

¹⁸ Janeruwarete 'ga 'ā jane momyauu Kristu 'ga jane erowiarāmū. Kristu 'ga rerowiare'ema jane jemogyi 'ga ree iporomutare'emamū. A'ere jane 'ga rerowiarāmū jane jemu'jagi Jarejuwarete 'ga ree iporomutat ma'eramū futat. A'eramū Janeruwarete 'ga ojee iporomutat ma'eramū jane jemogyia futaa. “Pe'je pejewau Kristu 'ga mome'wau 'gā nupe. A'eramū nipo 'gā nanē ojemu'jaga je ree iporomutat ma'eramū”, 'jau 'ga janee.

¹⁹ A'eramū jane 'jau 'gā nupe: “Kristu 'ga amanū 'ypewar are janetywera mepyawamū. A'eramū Janeruwarete 'ga Kristu 'ga jane erowiarāmū janetywera moia jane wi, jane mogyau ojee iporomutat ma'eramū”, 'jau ki jane 'gā nupe. Janeruwarete 'ga 'ā jane mono kwe pe Kristu 'ga mome'wau 'gā nupe. “Pe'je pejewau kwe pe Kristu 'ga mome'wau 'gā nupe. Kristu 'ga amanū janetywera mepyawamū rakue, pe'je ki 'gā nupe. Kristu 'ga rerowiarāmū je pē mogyi tejemiayuwamū, e'i Janeruwarete 'ga pē nupe, 'jau ki pēē 'gā nupe”, 'jau 'ga oree ikue.

²⁰ Ymā 'ā Janeruwarete 'ga ore mogoi ojuru irūnamū ikue, Kristu 'ga mome'wawamū kwe pewaramū pē nupe ikue. Kristu 'ga je'eg imū ore 'i pē nupe: “Ga remiayuwamū pejemu'jugakat Jarejuwarete 'ga upe. 'Ga 'ā pē momyauu”, 'jau ako ore pē nupe ikue.

²¹ Kristu 'ga nitywari futari. Nuapoi futari 'ga mama'e tywera. A'ere Janeruwarete 'ga janetywera monoi 'ga upe. A'eramū 'ga janetywera reramanūmū 'ypewar are rakue. A'eramū jane Kristu 'ga ree jarejemujar ire jarejemogyau 'ga remiayuwamū. A'eramū jane jaretywe'emamū rēwējēmī jaretywera pyu 'ga upe. A'eramū jane mama'e apou 'ga remifutar imū etee futat.

6

¹ Jarejuwarete 'ga retee jane porowykyi. A'eramū ore 'jau pē nupe: Pepoit futat kasi Jarejuwarete 'ga rerowiar awi ne. Ipota'wa 'ga pē nee. Jejui 'ga pēē erowiarāmū Janeruwarete 'ga pētywera moiri pē nui, pē mogyau wemiayuwamū. A'eramū ki pēē pejepoire'ema 'gā nerowiar awi.

² Ymā 'ā Janeruwarete 'ga ka'arana kwasiarukari Isai 'ga upe rakue:

“Pēpoaawa 'ara rupi je apyakai tejenūi are ikue.

Pē katu'okawa 'ara rupi je pē katu'oka ikue”,

'jau 'ga 'ā ikwasiarukaa 'ga upe rakue. A'ere je 'awamū je 'i pē nupe: 'Awamū futat iwaēmi 'ga pē poaawa upe, Jarejuwarete 'ga pē katu'okawa upe, a'e je 'ā pē nupe 'awamū.

³ Orojeko esagea ore arafutat arakou. Narafutari ore 'gā motyweawa apoa 'gā nowase. A'eramū nipo 'gā ore ago'wawe'em Kristu 'ga ore imome'uramū.

⁴ Orereko esage resag ire nipo 'gā 'jau oree: “Jarejuwarete 'ga upe Paulo 'ga porowykyi opytuna 'gā netee ra'e. Sā'ā 'gā neko esagea”, 'jau nipo ore resakara 'gā oree. Janeruwarete 'ga ree iporomutare'ema 'gā ore rerekou tyweaete agawewi ai'i. A'etea ore noropoiri futari Kristu 'ga mome'u awi. Amumē ore orotywe'emamū agawewi mama'e pyu. A'etea ore oreta'wa etee futat arakou. Orojeupe mama'e tywera jeaporamū orojemouaga jupe.

⁵ Amumē Jejui 'ga rerowiare'ema 'gā ore nupānupāu. Amumē 'gā ore munepa ekoete futat moromunepawa pype. Amumē 'gā ore mueue Jejui 'ga mome'u are. A'ere ore Jarejuwarete 'ga upe etee futat ore porowykyi aruojere'emamū. Amumē ore noroseri futari. Amumē mama'e otywe'emamū futat oree.

⁶ A'ere 'ā ore reko esagei pē pype. Naruapoi futari ore mama'e tywera. Orojeupe mama'e tywera jeaporamū oropota'waramū etee futat 'ā arakou pē nee. Noropoiri futari ore Kristu 'ga mome'u awi 'gā orojereko tyweramū miamū. Orojereko tywea'gā nerekou esage etee futat jepi. A'eramū ore resakara 'gā “A'jea futat ore porowykyi Jarejuwarete 'ga upe” 'e rerowiaa. Janeruwarete 'ga 'Agesagea ore poaa 'ga upe oreporowyky are. Ore poaa 'gā nee oreporomutar are.

⁷ Kristu 'ga ore imome'wau Janeruwarete 'ga 'Agesagea mama'e a'jea etee imome'waukaa oree. Janeruwarete 'ga 'Agesage pājē mū ore Jejui 'ga mome'ui. A'eramū pēē 'ga rerowiaa kwaiwete. 'Gā aramueramū orojemogyppyka Jarejuwarete 'ga ree etee. Aruago'oramū ore mama'e esage etee iapou 'gā nupe. Aipoa esage futat 'gā nupe. Janeruwarete 'ga upe nanē aipoa wesageramū futat nū.

⁸ Amumē 'gā ore mome'wau esage. Amumē 'gā ore mojenosōu. Amumē 'gā ore ago'wau etee. Amumē 'gā ore kurapa etee. Amumē 'gā “I'me 'gā”, 'jau etee 'gā oree. A'ere ore mama'e a'jea etee futat imome'ui.

⁹ Wemiesage'ema 'jawe 'gā ore rerekou. A'ere ore 'gā nemiesaga futat numiamū. Amumera 'gā au'jeteramū afuweramū ore ree. A'etea 'gā nore apisi we. Janeruwarete 'ga ore rereko tywerukaa 'gā nupe. A'ere 'ga nore apisiukari 'gā nupe.

¹⁰ Amumē 'gā ore mu'arasiga. A'ere orerorywamū Jarejararete 'ga ree. Kūima'e tywe'ri 'jawe ore arakou 'gā nupe. A'eramū ore Jejui 'ga mome'wau kwe pewara 'gā nupe. A'eramū 'gā ajemogyau ikaraemā kwai ma'e 'jawe. "Nitywi futari 'gā mama'e pyu", 'jau 'gā oree. A'ere Janeruwarete 'ga jejukai ore ree, mama'e esage mua oree. A'eramū ore arakou mama'e jara 'jawe.

¹¹ Korītu pewaramū 'ā pejemogy orejekoty'aawa 'jawe. A'eramū ore orojemome'wau katu pē nupe.

¹² Oroporomutamū ako ore pē nee ai'i. A'ere a'e peko iypy'i we te ore ree iporomutare'ema 'jawe etee a'e pejemogy.

¹³ A'eramū je pē mu'akwaapa pēnuwa 'jawe. Pēporomutat ore ree. Sā'ā oreporomutara pē nee.

Peje'ar awi 'ga rerowiare'ema 'gā nee

¹⁴ Peje'ar awi Jejui 'ga rerowiare'ema 'gā nee. Jarejuwarete 'ga ree iporomutat ma'eramū pejemogy. Ma'eramū sipo ajee peje'at 'ga ree iporomutare'ema 'gā nee? Ojopype sipo mama'e esagea mama'e tywer are? Naani. Kwara sipo ojopype pypytunaiw are? Naani.

¹⁵ Kristu 'ga 'jawe sipo mama'eukwaawa 'wyrriara rea'aramū mama'e are? Naani. Jejui 'ga rerowiara 'gā nojopypei futari 'ga rerowiare'ema 'gā nee. Kristu 'ga remiayuwamū jarejea'are'emamū mama'e are mama'eukwaawa 'wyrriara remiayuwa 'gā 'jawe.

¹⁶ Nitywi futari maira'me a'agawa Janeruwarete 'ga mogytaaw ipe. Janeruwarete 'ga remiayuwamū jane jemogyi 'ga rupawa 'jawe te. Jane pype futat 'ga rekoi. Ymā te 'ā Janeruwarete 'ga 'i rakue:

"Je te 'ā toko 'gā pype. Je futat 'ā tejemogou 'gā Nuwareteramū.

Je futat 'ā 'gā mogyau tejemiayuwamū",

'jau Janeruwarete 'ga rakue.

¹⁷ Ymā te 'ā 'ga 'i rakue nū:

"Pejea'gu ki je rerowiare'ema 'gā nui.

Pekotee ki 'gā nui", 'jau 'gā janee rakue.

"Peko kasi 'gā 'jawe ne. Mama'e tywera kasi peapo 'gā 'jawe etee ne.

Teje'ega renuparamū je 'i pē nupe:

Pe'je pejejua 'au je pyri, je 'i pē nupe.

¹⁸ A'eramū futat je tekou Pēnuwareteramū.

Pēē je pē mogyau teja'yramū",

'jau Janeruwarete 'ga janee rakue. Janeruwarete 'ga 'ā 'wyrriararetea janee. Pājēreteretea nanē 'ā 'ga nū.

7

¹ Naymāwarera 'gā nupe etee rūi Janeruwarete 'ga 'i aipo 'jau rakue. 'Awauwaramū jane upe nanē futat 'ga 'i aipo 'jau nū. A'eramū ki jane jarepoia mama'e tywera apo awi. Mama'e tywer are jarejea'ar awi nanē ki jane jarepoia nū. Pēē 'ā jejekoty'aawa. A'eramū je pē mu'akwaapa ee. Jarejuwarete 'ga ree pejeporomutamū pejemogyau. A'eramū ki pēē pejejepe'aa mama'e tywera apoar awi. "Simuoryp Jarejuwarete 'ga 'jau. Sajemogy 'ga remiayuwareteramū 'jau", 'jau ako je pē nupe ai'i.

Paulo 'ga aku'iramū

² "Pēporomutat ore ree", a'e ypy ako je pē nupe ko. A'eramū je 'awamū 'jau'japa pē nupe nū, "Pēporomutat ore ree", 'jau'japa pē nupe. Noromote'ari ore 'gā amū. Noroje'ewu'jagi futari ore 'gā amū. Noromoryteei nanē ore 'gā orojee orojeupe mama'e muawamū.

³ A'etea je aipo na'ea'uweri pē nupe pē ago'oawamū. Oreporomutar ore pē nee, a'e je akiko. 'Awamū je 'iu'jawi pē nupe nū: "Oreporomutar ore pē nee". Aramanū'e'ewe ore oroporomutamū pē nee. Aramanū re miamū futat nipo oreporomutamū pē nee arajemogyau.

⁴ Ajemogyppyk je pē nee. Ajerowiat je pē nee. A'e pe 'ā mama'e tywera ojeapou agawewi oree. A'etea je jeku'i tekou. Tepy'a'wyre'emamū je tekou.

⁵ Masetoni ywy pe orowaēma ypy we ore oropytu'wawe'e'mī futat arajemogyau. Mama'e tywera etee futat ore aruekoat 'ager imūwara amunawa pype. A'e pe 'ā 'gā ore rereko tywet. A'e pe 'ā 'gā ore ree 'gā mara'ne. A'eramū 'gā ore mopy'a'wyrayau etee ee.

⁶ A'ere 'ā Janeruwarete 'ga ae mopy'ata'wai. A'eramū 'ga ore mopy'ata'wau. Tito 'ga 'ga imua oree. A'eramū 'ga ore muorypa 'ga rur are.

⁷ Ore pyri owaēma ypy we 'ga pēnera mome'wau oree. A'eramū ore pēner are nanē araku'iramū nū. "Ene resaga'up Korītu pewara 'gā ajemogyau", 'jau 'ga jee. "U'arasigamū 'gā ene mu'arasigawer are. Paulo 'ga ako jane simu'arasig etee ai'i, e'i 'gā ajaupe, weapyoramū ee", 'jau 'ga jee ai'i. "A'jea futat Paulo 'ga jane mu'akwaawi rakue, 'jau 'gā ajaupe", 'jau Tito 'ga pē mome'wau jee ai'i. A'eramū je a'eramū teku'iramū pē nee.

⁸⁻⁹ Jeremikwasiarera nipo pē mu'arasiga agawewi. A'etea je najemuaēmi pē nee tejemikwasiarera pē mu'arasig are. "Jeremikwasiarera 'gā mu'arasiga te nipo 'gā momoirukat 'gā tywer awi re'ā", 'jau etee je. A'eramū je teku'iramū ee. "Eneremikwasiarera Korītu pewara 'gā amu'arasig imogyau" e kwaaw ire amunipo 'ā je tejemuaēma futat pē nee. A'ere 'awamū jeku'iramū pejetywer awi pepoiramū. Janeruwarete 'ga te 'ā pē mueapyoukat ee, pejetywer awi pē momoirukaawamū. A'eramū je pē mote'arukare'ema aipo tejemikwasiarera ka'arana upe.

¹⁰ Amumē Janeruwarete 'ga jane mu'arasigukari janetywer awi jane momoirukaawamū. A'eramū 'ga jane katu'oka janetywer awi. A'eramū jane jareku'iramū ee. Jejui 'ga rerowiare'ema 'gā te ajee i'arasig ekoete otywer are. A'ere 'gā nipoiriweri futari jui. A'eramū Janeruwarete 'ga 'gā katu'oke'ema futat. A'eramū 'gā awau mama'eukwaawa rapyaw ipe amanū re.

¹¹ Pejejea'aramū pejetywera reru'arasig are. Pejetywera reru'arasig ire pejejemueapyoukaa ee Jarejuwarete 'ga upe. A'eramū pēē 'jau pejejaupe: "Sireko tywet mama'e tywera apoara 'gā 'jau", 'jau 'ā pēē pejejaupe rai'i. 'Gā nereko tyweawer are te je pē kwaawi. Je resaga'up wejue 'ā pejepe pejejemogyau rai'i. Je ree pejeporomutaramū 'ā pejejemogyau je ree rai'i. A'eramū 'ā pēē kamēšete futat mama'e tywera apoara 'gā nerekou tyweate 'gā nemiapo tywer are rai'i. A'eramū je a'e are "Narafutari ore mama'e tywera orojeupe pēē iapoa" e are pē kwaapa.

¹² Ka'arana je akwasiat imonou pē nupe ikue. "Afutat je Jarejuwarete 'ga ore ree 'gā poria kwaawukara 'gā nupe", a'e je te'ŷina ikwasiaa ai'i. A'eramū je ka'arana kwasiaa imonou pē nupe ikue. Namama'e tywera apo awi 'gā momoirukaawamū rūi je ikwasiaa ai'i. Naereko tyweripywera 'ga ree rūi nanē je ikwasiaa ai'i nū. Pejejee oreporia kwaawukaawamū futat je ikwasiaa imonou pē nupe ikue.

¹³ A'eramū ore araku'iramū pēner are, "Korītu pewara 'gā pē nesaga'up ajemogyau" e are. Tito 'ga ku'i are taetu ore araku'iramū arakou. "Korītu pewara 'gā juejue ojejuka esage je ree ojeypyri je rekoramū", 'jau 'ga imome'wau oree. A'eramū ore araku'iramū 'ga 'eawer are.

¹⁴ Pē pyri 'ga o enune je 'jau 'ga upe ai'i: "Korītu pewara 'gā nipo ojejuka esage ene ree", 'jau je 'ga upe, tejemogyppyka pē nee ai'i. A'ere a'e 'ga pereko esage futat rai'i, je'eawer imū etee futat 'ga pereko esage rai'i. A'eramū je teku'iramū tekou ee. Mama'e a'jea etee je imome'wau Tito 'ga upe pē mome'wau 'ga upe.

¹⁵ 'Ga je'ega 'ā pēē enupa rai'i, mama'e apou pejejeupe 'ga 'eawer imū etee futat rai'i. Pejejejukau esage 'ā 'ga ree, pejejeyppe 'ga rekoramū rai'i. A'eramū 'ga 'awamū taetu oporomutaramū pē nee wea'aramū.

¹⁶ A'eramū je teku'iramū pē nee. 'Awamū taetu je jemogyppygi pē nee.

8

Pejejaupe mama'e monou pejeku'iramū

¹ Pēē 'ā orerewirera 'jawe futat. Kūjāmeramū 'ā pēē orerenyra 'jawe futat. A'eramū je Jarejuwarete 'ga remiapofera mome'wau pē nupe. Janeruwarete 'ga 'ā ipota'wa jane ree. A'eramū 'ga mama'e esage apou janee. Janeruwarete 'ga wa'yra 'ga werowiarukat Masetoni ywy pewara 'gā nupe kwaiwete rai'i. A'eramū 'ga 'gā mogyau wemiayuwamū.

² Mama'e tywera agawewi futat ojeapou Masetoni ywy pewara 'gā nupe. A'etea 'gā nopoiri futari Kristu 'ga rerowiar awi. Aku'iramū etee futat 'gā ajemogyau 'ga ree. Naika'aranūi kwai ma'e artū agawewi 'gā. Ako tywe'ri ma'e 'gā agawewi. A'etea 'gā oka'aranūi'ī mono'oga Judeja ywy pewara 'gā nupe imonopyramū. "Ty'ara 'gā werajemogy. A'eramū jane ka'aranūi'ī pe monou'ī jarejewirera 'jawewara 'gā nupe", 'jau 'gā ajaupe.

³ 'Gā amū nitywi futari agawewi ka'aranūi'ī pyu. A'etea 'gā oma'e'i pe monou'ī 'gā nupe. 'Gā amū otywe'e'miramū agawewi. A'etea 'gā omono'i ape 'gā nupe.

⁴ "Ka'aranūia pemono ape 'gā nupe", naru'e'i agawewi futat ore 'gā nupe. A'ere 'gā wemifutar imū etee futat imonoi. "Ore nanē ka'aranūia oromono 'gā nupe nū", 'jau 'gā oree. "Oromono futat ore ape 'gā nupe", 'jau 'gā oree, afuakaramū oree.

⁵ "Irāinānī'ī etee sipo 'gā imonoi 'gā nupe pa", 'jau ore 'gā nupe. A'ere 'gā imonouui futari orerea'awera apyraapa. Jarejararete 'ga upe 'gā 'i rakue: "Ore moporowykyukar

ape ejeupe, ki Ku'jyp', 'jau 'gā 'ga upe rakue. "Taruapo mama'ea eneremifutar imū 'jau", 'jau 'gā 'ga upe rakue. A'eramū 'gā 'jau ore upe nanē nū: "Mama'ea taruapo pē nupe 'jau", 'jau 'gā oree. Janeruwarete 'ga remifutar imū 'gā aipo 'jau oree.

⁶ 'Gā nesakawe ore orojea'aramū pē nee ai'i. A'eramū ore 'jau Tito 'ga upe ai'i: "Ere ewau Korītu pewara 'gā pyri nū", 'jau ore 'ga upe ai'i. "Ymā a'e ere Korītu pewara 'gā nupe rakue: Ka'aranūia simono'og imonou Jejuī 'ga rerowiaare 'gā nupe, Judeja ywy pewara 'gā nupe 'jau, 'jau a'e ene 'gā nupe rakue", 'jau ore 'ga upe. A'eramū ore ene monou 'gā nupe 'gā poaawamū imono'og are. Kasi a'e pe 'gā poiri imono'og awi ne", 'jau ore 'ga upe. "Ymā 'ā pēporomono'ogiwet pejeka'aranūū are 'gā nee pejemuaēma resaukaawamū rai'i. A'eramū ki pēē imono'oga futat imonou 'gā nupe, 'jau ki ene 'gā nupe", 'jau ore 'ga upe. A'eramū 'ga awau pē pyri pē poaa pēka'aranūū mono'og are Judeja ywy pewara 'gā nupe imonopyramamū, Masetoni ywy pewara 'gā nemimono'ogera retee.

⁷ Pēē 'ā Jejuī 'ga perowiar wyyapi tekotee 'gā apyraapa rai'i. Jejuī 'ga 'ā pēē imome'wau tekotee 'gā apyraapa rai'i. Pejejeapyoramū 'ā Jarejuwara 'ga porogytafer are tekotee 'gā apyraapa rai'i. Pejeporopoariweramū 'ā pēē 'gā nee rai'i. Pēē 'ā ore futaa 'gā apyraapa rai'i. A'eramū ore 'jau pē nupe: "Ka'aranūia ki pemono Judeja ywy pewara 'gā nupe 'gā nemimonorama apyraapa", 'jau ore pē nupe.

⁸ "Pemono futar iki pejeka'aranūia Judeja ywy pewara 'gā nupe", na'ea'uweri je pē nupe. "Gā nupe pēē imonoa esage futat", a'e te je pē nupe. Masetoni ywy pewara 'gā ako je amome'u pē nupe ko. "Masetoni ywy pewara 'gā pa je amome'u 'gā nupe kwy", 'jau je. "Gā nera renuw ire nipo Korītu pewara 'gā nanē oka'aranūū monoi Judeja ywy pewara 'gā nupe nū re'ā", a'e je tejeupe te'yina. A'eramū pēē 'gā nee pejeporoiaa resaukaa oree.

⁹ "Jane ree 'ā Janejararete 'ga poromutaramū a'jea futat" 'ea pēē 'ā ikwaapa. Ywag ipe 'ga mama'e jararetea agawewi. A'etea 'ga ruri 'au ywy pe imama'e'ema 'jawe jane ree. A'eramū 'ga ojejukaukaa 'gā nupe janetywer are rakue. A'eramū jane 'ga rerowiarāmū jarejemogyau mama'e jarareteramū 'ga 'jawe. A'eramū ki jane jareporomutaramū jare-juēe jarejee 'ga poromutara 'jawe.

¹⁰ 'Gā nupe pēka'aranūū mono are je tejea'aramū te'yina. A'eramū je ee tejea'ara mome'wau pē nupe. Ikokwara rupi we ako pēē pejeka'aranūū mono'og ppyruga rakue. A'eramū pēē 'awamū imono'ogamap. A'ea esage jee. Pēē na'ne 'ā pejefueweramū Judeja ywy pewara 'gā poar are rakue. Pēē na'ne futat 'ā ka'aranūia 'gā nupe imono'oga peypyrug rakue.

¹¹ A'eramū ki pēē 'gā nupe pejemimonorama mono'ogamap imonou 'gā nupe. Ymā 'ā pēfuewet 'gā nupe imono are rakue. A'eramū ki pejefueweawer imū etee futat pēē imono'ogamap imonou 'gā nupe. Pejeka'aranūū pe mono'oga imonou 'gā nupe. Peje-fuakara 'ja'jawe etee futat pēē imonou 'gā nupe.

¹² 'Gā nupe ee pēporomonowera esage futat Janeruwarete 'ga upe. Janeruwarete 'ga 'ā janekaraemā okwaap. Mama'e pyu janetywe'emamū Janeruwarete 'ga mama'e renūine'ema jane upe. Jarekaraemā pytuna 'jawe etee imonou 'gā nupe.

¹³⁻¹⁴ A'ere je: "Pejeka'aranūū ki pemonopap 'gā nupe", na'ei pē nupe. Kasi a'e pe nepētywi mama'e pyu ne. 'Awamū 'ā pejemogy ika'aranūū kwai ma'e 'jawe futat. A'eramū ki pēē pejeka'aranūū pe monou 'gā nupe. A'eramū pēē pejeju'jawe pejemogyau pe-jemama'e'iramū. Anure nipo nepētywi mama'e pyu. A'eramū nipo 'gā ojejpyka pē nee oka'aranūū pe monou'i pē nupe pē poaawamū.

¹⁵ Ymā 'ā Janeruwarete 'ga ka'arana kwasiarukari Moisesi 'ga upe rakue:

"Gā amū nipo omono'og kwaiwete agawewi.

A'etea nipo nitywi futari emyrera.

'Gā amū te nipo ajee ināinānī'i etee agawewi omono'og.

A'etea nipo nateepawi futari 'gā nui",

'jau 'ā Janeruwarete 'ga ikwasiarukaa Moisesi 'ga upe rakue.

Tito 'ga opytuna 'gā netee

¹⁶ Janeruwarete 'ga Tito 'ga moporopoariwerukaa pē nee. Je 'jawe futat 'ga poropoariw-eramū pē nee. A'eramū je Jarejuwarete 'ga muorypa ee.

¹⁷ A'eramū ore 'ga monoa futaa. A'eramū ore 'jau 'ga upe: "Oromono ore ene Korītu pewara 'gā pyri", 'jau ore 'ga upe. A'erauwe 'ga 'jau oree: "Jeowet futat je 'gā pyri", 'jau 'ga oree. A'eramū ore 'ga atawer imū etee futat 'ga monou pē nupe.

¹⁸ 'Ga rupi ore jarejewirera 'jawewara 'ga amū monou pē nupe. Jejuī 'ga rerowiaaramū ore 'ga kwaawi. "Jejuī 'ga 'ga omome'u a'jea futat ra'e", 'jau ore 'ga upe, orojerowiaa 'ga ree.

¹⁹ Masetoni ywy pewara 'gā aipo 'ga janerewirera 'jawewara 'ga ppyrūmū 'ga monou ore rupi ka'aranūū rerawaramū ai'i. Anure nipo ore pēnemimonorama ka'aranūū rerooi Judeja ywy pewara 'gā nupe Masetoni ywy pewara 'gā ma'e retee. "Oreporopoariweramū pē nee.

A'eramū Korītu pewara 'gā Masetoni ywy pewara 'gā netee ka'aranūū rerurukaa oree pē nupe. A'eramū ki pēē Jarejararete 'ga muorypa ee", sa'e ki 'gā nupe, 'gā nupe ka'aranūū monou.

²⁰ "Judeja ywy pe jarewau ki jane 'gā amū siroo jarejeupi. Kasi a'e pe 'gā amū jane ago'oi ne", 'jau ore arajaupe. Ka'aranūūa ore erawau imonou 'gā nupe kwaiwete. A'eramū ore 'gā amū nerawau orojeupi.

²¹ A'eramū nipo 'gā orereko esage resaka. Janeruwarete 'ga nipo orereko esage kwaapa. A'ere nipo 'gā ikwaawa nanē esageramū nū.

²² 'Gā nupi nanē nipo ore jarejewirera 'jawewara 'ga amū monoi nū. A'e 'ga oporowyky akou orojeypi. A'eramū nipo ore 'ga porowyky esage resaka. Ojeupe ore'eawer imū etee nipo 'ga mama'e apou. Mama'ea ore iaporamū aipo 'ga ore poaa iapo are. A'eramū ore 'ga monou 'gā nupi pē nesaka. Ojeupe ore pē mome'uramū 'ga ojerowiaa pē nee. "Oka'aranūūa 'gā tomono'i ape 'gā nupe 'jau", 'jau 'ga oree, ojemogyppyyka pē nee. A'eramū 'ga oweramū futat pē pyri, pē poaa imono'og are.

²³ Tito 'ga jeirūnamū je poaawamū. Oporowyky esage 'ga pē poaawamū jepi. 'Ga rupi oo ma'e 'gā Masetoni ywy pewara 'gā nemipyyrūmera 'gā futat. Kristu 'ga upe 'gā porowykyi. Tekotee 'gā Kristu 'ga muorypa 'gā nee. A'eramū je 'gā monou Tito 'ga rupi pē poaawamū.

²⁴ A'eramū ki pēē pejejejukau esage 'gā nee. A'eramū nipo Masetoni ywy pewara 'gā pēnera renupa. A'eramū nipo 'gā 'jau ajaupe: "Paulo 'ga ojerowiat Korītu pewara 'gā nee, 'gā mome'wau oree. A'jea futat 'ga 'gā mome'ui. Sā'ā 'gā jejuka esagea jarejewirera 'gā nee. Ka'aranūūa nanē 'gā imono'oga 'gā nupe imonopyramū nū", 'jau nipo 'gā ajaupe.

9

Judeja ywy pewara 'gā nupe ka'aranūūa monoawet

¹ Jarejewirera 'gā nupe ka'aranūū mono are je ka'arana kwasiari imonou pē nupe.

² "Oreporomonower ore ka'aranūū are 'gā nupe", pē'ea je akwaap futat te'jina numiamū. Ma'eramū 'ā je pē mome'ui Masetoni ywy pewara 'gā nupe ai'i, Jeju'i 'ga rerowiaara 'gā nupe ai'i. Amono tee te je pē nupe. "Ymā we 'ā Akaja ywy pewara 'gā nanē 'gā poromonoweramū ka'aranūū are 'gā nupe rakue", 'jau je pē mome'wau 'gā nupe ai'i, tejerowiaa pē nee ai'i. A'eramū pēnera 'gā muorypa ai'i. A'eramū 'gā 'jau ajaupe ai'i: "Pe'je ajee jane nanē simono ape 'gā nupe 'ū, 'gā 'jawe 'ū", 'jau 'gā ajaupe ai'i.

³ A'eramū je 'awamū Tito 'ga monou pē pyri 'ga pytuna 'gā netee pē muea'aawamū pē'eawer are. "Ka'aranūūa toromono 'gā nupe 'jau, 'gā poaawamū 'jau", pē'eawer are pē muea'aawamū je 'gā monoi. A'eramū Tito 'ga opytuna 'gā netee awau ka'aranūū mono'ogukaa pē nupe. Kasi a'e pe je pē mome'ui tee 'gā nupe ne.

⁴ Anure nipo je Masetoni ywy pewara 'gā amū nerooi pē pyri. Ka'aranūūa pēē imono'oge'em ire nipo je mojenosi pejepe 'gā nupe je'eawer are. Pēē taetu nipo pejejenosōu ore wi, pejejee orejemogyppyygawera renosōu.

⁵ Ma'eramū 'ā je 'i Tito 'ga upe ai'i: "Pekwap je renune 'gā muea'aa ore upe 'gā 'eawer are. Ka'aranūūa mono'oge'emamū ki pemono'ogukat 'gā nupe. Paulo 'ga upe peje'eawer imū etee ki ka'aranūūa pemono'og Judeja ywy pewara 'gā nupe imonopyramū, ere ki 'gā nupe", 'jau je 'ga upe ai'i. A'eramū nipo pēē imono'ogamap je waēme'emaue. A'eramū nipo je rupi oo ma'e 'gā 'jau ajaupe: "Wemifutar imū etee futat 'gā ka'aranūū mono'ogi Judeja ywy pewara 'gā nupe imonopyramū. NaPaulo 'ga rūi omono'ogukat 'gā nupe", 'jau nipo 'gā ajaupe.

⁶ Pēnea'ar iki aeje'egawa mū ree: "Ināinānī'i etee y'wa'jya tym ire 'ā itymara 'gā ināinānī'i etee y'wa 'a po'oi anure. Kwaiwete y'wa'jya tym ire te 'ga kwaiwete y'wa 'a po'oi anure". Nan tee futat nipo pēē. Anure Janeruwarete 'ga pē mepyi pēnemimonofera 'jawerimū etee futat.

⁷ A'eramū ki pēē pejejea'aramū ra'ne ee. "Marāmaran te je imonoi 'gā nupe?" 'jau ki pēē pejejeupe ra'ne. A'eramū ki pēē pejeka'aranūū monou pejejemifutar imū etee futat. Pejejemifutar imū etee imono re pejejemuaēme'ema ee. Kasi a'e pe "'ga amonoukat jee. Najeporomonoweri agawewi je ee", pē'je ne, peje'arasigamū ee ne. Ee pejejemuaēma kasi pemono 'gā nupe ne. Ee pejeporomonoweramū etee ki pemono 'gā nupe. A'eramū pēē pejeku'iramū imonou 'gā nupe. A'ea Janeruwarete 'ga afutat.

⁸ Janeruwarete 'ga 'ā pē poat mama'e apo are. 'Ga futat 'ā mama'e jararetea. A'eramū 'ga, ikaraemāe'ema 'gā nupe mama'ea pēē imono re, 'ga mama'e mua pē nupe kwaiwete. A'eramū taetu nipo pēē mama'e are pejeporiae'emamū pejejemogyau. A'eramū nipo pēē mama'e monou'japa 'gā nupe nū.

⁹ Ymā 'ā Isai 'ga ka'arana kwasiari ee rakue:

"Esage ma'e 'ga mama'e omono ikaraemāe'ema 'gā nupe kwaiwete.

Ipotā'wa ma'ea poromū. Najeaei 'ga ajuee",
'jau 'ga ikwasiaa ka'aran are rakue.

¹⁰ Sā'ā Janeruwarete 'ga y'wa'ŷja monoa y'wa'ŷja tymara 'ga upe. Mama'ea nanē 'ga 'ā imua oree oreremi'uramamū. Nan tee futat 'ga mama'e monoi pē nupe kwaiwete, 'gā nupe pēnemimonofera repyramū.

¹¹ Pejeka'aranūā pēē ape monou Judeja ywy pewara 'gā nupe. A'eramū nipo Janeruwarete 'ga mama'e monou'jau'japa pē nupe. A'eramū nipo pēē mama'e monou'jau'japa imama'e'ema 'gā nupe. A'eramū nipo 'gā kwaiwete Janeruwarete 'ga muorypa ojeupe pēnemirerooukara ka'aranūū reroo are. "Ene 'ā eneresage oree. Ene 'ā mama'e eremurukat oree 'gā nupe", 'jau nipo 'gā 'ga upe, 'ga muorypa ee.

¹² Janeruwarete 'ga remiayuwa 'gā nupe 'ā pēē ka'aranūū monou 'gā poaawamū. A'eramū nipo pēē Jarejuwarete 'ga muorywukaa 'gā nupe nū. Kwaiwete 'gā oje'ega monou Jarejuwarete 'ga upe, 'ga muorypa pēnemimonofera are.

¹³ Pē nee nanē nipo 'gā Jarejuwarete 'ga muorywi nū. "Kristu 'ga mome'u renuw ire Korītu pewara 'gā 'ga rerowiaru a'jea futat. Sā'ā 'gā ore poara Kristu 'ga porogytau etee futat", 'jau nipo 'gā pē nupe. A'eramū nipo 'gā Jarejuwarete 'ga muorypa pē nee. Ojeupe pēnemimonofera are nanē nipo 'gā 'ga muorywi nū. Tesirūmera 'gā Jejui 'ga rerowiaara 'gā nupe pēnemimonofera are nanē nipo 'gā 'ga muorywi nū.

¹⁴ A'eramū nipo 'gā oje'ega monou Jarejuwarete 'ga upe pē nee, pē futaa. "Janeruwarete 'ga oporomutaramū Korītu pewara 'gā nee. Judeue'ema 'gā agawewi. A'etea 'ga iporomutat 'gā nee", 'jau nipo 'gā pē nupe, Jarejuwarete 'ga muorypa pē nee.

¹⁵ Simuoryp Jarejuwarete 'ga jarejee 'ga poromutar are 'jau. Wa'ya 'ga 'ā 'ga amut janee 'ga jukaukaa janetywer are rakue. A'eramū ki jane 'ga muorypa ee. Nimome'upawa'uweri jane jarejeupe 'ga remiapofera.

10

Paulo 'ga Jejui 'ga remimonofet

¹ Awamū je Pauloramū pē mu'akwaawi mama'e are. Pēē mū nipo je rerekoemāu etee pejejemogyau. "Jane pype akou nipo Paulo 'ga kyjei jane wi", 'jau 'ā pēē je upe ra'e jepi. "A'eramū nipo 'ga oje'egayawe'em janee. A'eramū 'ga muku awi etee ka'aran are oje'ega moywyrafena imua janee", 'jau futatee 'ā pēē mū jee ra'e jepi. Kristu 'ga 'ā nimara'nei jane ree. Opota'waramū etee 'ā 'ga jane ree jepi. A'eramū je nanē teje'egaywere'emamū pē nupe, pē pyri tewau.

² A'eramū je 'jau pē nupe: Aipo pe'je awi, 'jau je pē nupe. A'jea futat amunipo 'ā je pēē teje'eganuwe'emamū teje'ega moywyrafeni pē nupe pē pyri tewau. Pēē mū amunipo 'ā 'jau jee: "Omuorypawamū te 'ā Paulo 'ga oi oporogytau 'gā nupe. NaJarejuwarete 'ga je'eg imū rūi te 'ā 'ga Jejui 'ga mome'ui. Wemifutar imū etee te 'ā 'ga 'ga mome'ui", 'jau futatee 'ā pēē mū jee ra'e jepi. Aipo 'e awi pepoire'emamū je teje'ega moywyrafeni futari pē nupe pē pyri tewau. Jarejuwarete 'ga je'eg imū futat je teje'ega moywyrafeni pē nupe pē mu'jaawamū ee.

³ A'jea futat jane ywy pewaramū jareju'jau'jawe etee futat. Jejui 'ga rerowiare'ema 'gā 'jawe etee futat ore reko'i 'gā pype. A'ere ore naruapoi te mama'ea 'gā 'jawe. Naorjemifutar imū rūi te ore mama'e apoi. Jarejararete 'ga remifutar imū etee te ore mama'e apoi. 'Ga je'eg imū etee futat ore 'ga mome'wau 'ga rerowiarukaa 'gā nupe.

⁴ Naoropājē mū rūi ore Jejui 'ga rerowiarukari 'gā nupe. Jarejuwarete 'ga 'Agesage pājē mū etee ore 'ga mome'ui 'gā nupe. A'eramū 'gā a'eramū wejue oje'egawarūme'emamū oree. A'eramū ore 'ga rerowiarukaa 'gā nupe 'ga pājē mū etee futat. A'eramū ore 'gā nenū'jaukaa mama'eukwaawa 'wyriara remiayuw awi.

⁵ Janeruwarete 'ga rerowiare'ema 'gā te ajee ojerowiaraip ojee etee futat. Ojee etee futat 'gā nea'aramū ajemogyau. A'eramū 'gā oporokwaawiwere'emamū Jarejuwarete 'ga ree. A'ere ore Jarejuwarete 'ga pājē mū 'gā muea'arukari Jejui Kristu 'ga ree, Kristu 'ga porogyta renuwukaa 'gā nupe.

⁶ Pēē mū nipo jeje'ega renuparamū. A'ere nipo amumeramū jeje'ega renuteearamū te pejemogy. Teje'ega renuparamū pē kwaaw ire je teje'ega renuteearamū pē nereko tyweri'i ee.

⁷ Pēnea'ar iki mama'e are. 'Ga amū a'e 'jau ojeupe: "Je 'ā Kristu 'ga remiayuwa. A'ere Paulo 'ga na'ga remiayuwa rūi", 'jau nipo a'e 'ga ojeupe. A'eramū ki aipo 'jaramū pejeje'aru'jauwamū peje'eawer are nū. Ore nanē 'ā Kristu 'ga remiayuwamū nū.

⁸ "Jarejararete 'ga je'eg imū etee futat ore porowykyi 'ga upe. 'Ga futat 'ā ore mogo ojeupe oporowyky ma'eramū", a'e je 'ā pē nupe jepi. Tejerowiaa agawewi orojeupe 'ga 'eawer are jepi. Ma'eramū je 'ā najenoši te'eawer are. Pē nupe werowiar wyyapiuakaawamū te 'ga ore

mogoi ojeupe oporowyky ma'eramū ikue. Nawerowiar awi pē momoirukaawamū rūi 'ga ore mogoi ojeupe oporowyky ma'eramū ikue.

⁹ Napē mogyjeukaawamū rūi je ka'arana kwasiari imonou pē nupe.

¹⁰ A'ere nipo je ree iporomutare'ema 'gā amū 'i jee: “Ka'aran are etee 'ā Paulo 'ga oje'ega moywyrafeni imua janee”, 'jau nipo a'e 'gā ajaupe. “Jane mogyjawamū etee te 'ā 'ga ikwasiari janee”, 'jau nipo a'e 'gā ajaupe. “Jane'wyriara 'jawe 'ā 'ga rekoi. A'ere 'ā 'ga jane rowase na'wyriara 'jawe rūi 'ga rekoi. Akotee ma'e 'jawe etee 'ā 'ga rekoi jane pype. A'eramū ki jane jareporenuwiwere'emamū 'ga porogyta are”, 'jau nipo a'e 'gā amū jee.

¹¹ A'ere aipo 'jara 'gā nore kwaawi futari. I'me ma'e 'gā tee poromū. Pē nupe orojemik-wasiarer imū etee futat ore mama'e apoi pē pype arakou.

¹² Pēē mū nipo pejekoweramū 'wyriaramū pejejaupe. A'eramū nipo pēē 'jau pejejeupe: “Jeresage te je 'gā apyraapa 'wei”, 'jau nipo pēē mū pejejeupe. A'ere je aipo na'ea'uweri. Aipo 'jara 'gā ojerowiaraiw akou ojee numiamū. A'ere i'akwaawe'emamū te 'gā nekoi. NaJarejuwarete 'ga rea'ar imū rūi 'gā 'i aipo 'jau. Wea'ar imū tee 'gā 'i aipo 'jau. Ije'ēran ekoete te 'gā.

¹³ A'ere ore nanarūi. Jarejuwarete 'ga oromonoe'em ire amunipo 'ā ore norooi kwe pe Jejui 'ga mome'wau. Jarejuwarete 'ga oromonoe'em ire amunipo 'ā ore 'jawe'em: “Jarejuwarete 'ga je'eg imū te 'ā ore oi Jejui Kristu 'ga mome'wau 'gā nupe”, 'jawe'em amunipo 'ā ore. A'ere 'ā 'ga te ore monoi kwe pe Kristu 'ga mome'wawamū ikue. Pē nupe miamū 'ga ore monoi, pē nupe Kristu 'ga mome'wawamū ikue. Aipo are etee ore jerowiari.

¹⁴ Jarejuwarete 'ga ore monoukat pē nupe ikue. A'eramū ore orojeupe 'ga 'eawera mojerowiaa arawau pē pyri Kristu 'ga mome'wau pē nupe ikue. Ore futat pē nupe Kristu 'ga mome'u ppyawera. Kwe pewara 'gā nupe nanē ore Kristu 'ga mome'u ppyawera nanē futat nū.

¹⁵ “Oreporowyky te”, 'jawe'em nanē ore 'gā amū porowyky upe nū. Ore renunewe nipo 'ga amū awau Kristu 'ga mome'wau 'gā nupe. A'eramū nipo ore 'jawe'em 'gā nupe, “Ore ra'ne te ako oroo Kristu 'ga mome'wau 'gā nupe ikue”, 'jawe'em nipo ore arakou 'gā nupe. Pēē Kristu 'ga rerowiar wyyapia te ore aruapesak arakou. Pēē 'ga rerowiar wyyapi re nipo ore arawau kwe pe Korītu 'jawa atykupe katy Jejui 'ga mome'wau kwe pewara amunawa pype 'gā nupe. Jarejuwarete 'ga remifutar imū etee futat ore oi Kristu 'ga mome'wau 'gā nupe.

¹⁶ A'ere nipo ore oi pē'wya atykupe katy, Jejui Kristu 'ga mome'wau mīmera amunaw ipewara 'gā nupe. Ore ra'ne nipo arawau 'ga mome'wau kwe pewara amunawa pypewara 'gā nupe. A'eramū ore 'gā nerekoayawe'em 'ga amū porowyky are.

¹⁷ Ymā te 'ā Janeruwarete 'ga ka'arana kwasiarukari Jeremi 'ga upe rakue: “Pejerowiarip kasi pejejee etee ne. Jarejararete 'ga remiapofer are etee ki pejerowiat”, 'jau 'ā 'ga ikwasiarukaa ka'aran are rakue.

¹⁸ “Jeresage je jepi”, 'jau nipo 'gā amū numiamū. Ojee te ojerowiarip ma'e 'ga aipo e'i ekoete akou. Maranamū nipo 'ga wesageramū futat. Maranamū nipo 'ga wa'wyre'em are ojerowiaa ekoete. “Janeruwarete 'ga te janereko esagea okwaap”, 'jau 'ga ikwasiaa rakue. A'ere jane upe Jarejararete 'ga “Esage aipo 'ga” 'eramū janeresageramū futat. A'jea futat 'ga 'ea.

11

I'me ma'e 'gā

¹ I'akwaawe'ema 'jawe agawewi 'ā je teporogytau pē nupe. A'etea 'ā pēnuag je upe.

² Jepy'a'wyt je tekou pē nee. Pē nee Jarejuwarete 'ga jemuaēma 'jawe je nanē je jemuaēmi pē nee nū. Sā'ā kūjāmuku ēē ruwa 'ga wa'jyra ēē monoa kūima'e 'ga amū upe 'ga remirekoramū. Majepeja 'ga upe etee 'ga 'ā ēē monou. Namytuna 'gā nupe rūi 'ga 'ā ēē monou. Nan tee futat je Kristu 'ga etee erowiarukari pē nupe. “Kristu 'ga etee ki perowiat”, 'jau je ako pē nupe ikue.

³ A'eramū je tepy'a'wyrāmū pē nee ikue. “Maran gatu nipo 'gā poire'ema Kristu 'ga rerowiar awi rai'i?” 'jau je tejeupe etee futat ikue. Sā'ā mama'eukwaawa 'wyriara kūjā ppy ēē, Ewa ēē moryteea o'me are rakue. Nan tee futat nipo 'gā amū poromoryteeweramū pē nee. 'Gā pejemorytee rerowiar ire nipo pejepoia Kristu 'ga rerowiar awi.

⁴ A'eramū je tepy'a'wyrāmū pē nee, Kristu 'ga rerowiar awi pepoir are. Naoreremi-mome'ua rūi agawewi nipo 'gā omome'u pē nupe. NaKristu 'ga rūi agawewi nipo 'gā omome'u pē nupe. A'etea nipo perowiat 'gā je'ega, pejeku 'iramū nipo 'gā nee. Ore te ako Jarejuwarete 'ga 'Agesagea oromome'u pē nupe ikue. Maranuar are sipo 'gā pē mu'ei. A'etea te nipo perowiat 'gā.

⁵ Pē nupe 'ut ma'e 'gā nipo 'jau: "Pē nupe ore futat Kristu 'ga remimonoferamū", 'jau futatee nipo 'gā pē nupe. A'ere nipo 'gā naKristu 'ga remimonofera rūi. I'me te nipo 'gā pē nupe. A'ere je te a'jea futat Kristu 'ga remimonofera.

⁶ Naje'egi je a'jeteetewi. A'etea je jereapyo Kristu 'ga mome'u are tekou. A'ea 'ā pekwaap. Ai'iwe ai'iwe 'jau ako je Kristu 'ga mome'wau pē nupe ikue. Mama'e a'jea etee ako je imome'wau pē nupe ikue. A'ea 'ā pekwaap.

⁷ Pē pype tekou ako "je mepy pejepe Jejuī 'ga mome'u are", 'jawe'em ako je tekou pē nupe ikue. Kristu 'ga mome'wau etee futat ako tekou pē nupe ikue. Pē poaawamū etee tekou pē pype ikue, pē mu'jau Kristu 'ga ree ikue. Naka'aranūū are rūi ako je rekoi pē pype ikue. "Je mepy ki pejepe", je 'e'ma sipo mama'e tywera poa rakue?

⁸ Pē pype je rekoramū ako mukuwara 'gā etee Jejuī 'ga rowiaara 'gā ka'aranūū murukaa jee ikue.

⁹ Mama'ea tejeupe itywe'emamū ako je mama'e renūine'ema pē nupe tekou ikue. Masoni ywy pewara 'gā Jejuī 'ga rowiaara 'gā etee ako mama'e rerurukaa jee ikue. Pe awi janerewirera 'jawewara 'gā amū nuramū ako 'gā mama'e rerurukaa 'gā nupe jee ikue. Ymā miamū ako je mama'ea naenūi pē nupe ikue. Anure taetu nipo je mama'ea naenūi pē nupe.

¹⁰ Kristu 'ga 'ā mama'e a'jea etee omome'u rakue. A'eramū je 'ga remiayuwamū je nanē mama'e a'jea etee imome'wau pē nupe 'ga 'jawe etee futat. A'eramū je 'jau pē nupe: "Akaja ywy pewaramū pē nupe Kristu 'ga mome'wau ako je mama'ea naenūi pē nupe ai'i", 'jau je pē nupe, teku'iramū te'e are. A'eramū nipo otywe'emamū je momikara.

¹¹ "Niporomutari futari 'ga jane ree. A'eramū 'ga mama'e renūine'ema oree", 'jau nipo pēē mū jee rai'i. Naani. Janeruwarete 'ga pē nee jeporomutara okwaap.

¹² Kristu 'ga remimono'e'ema 'gā te mama'ea wenūi ajemogyau pē nupe. A'ere je naenūi futari mama'ea pē nupe. Kasi a'e pe 'gā: "Paulo 'ga 'jawe etee futat jane mama'e renūi 'gā nupe", 'gā 'i ne. Tejemiapoa etee futat je aapo tekou pē pype.

¹³ "Ore Kristu 'ga remimonofera", e'i futatee nipo 'gā amū ajemogyau. A'ere nipo 'gā i'me ma'ea te. Omorytee te nipo 'gā 'gā ojee. NaKristu 'ga rūi futat 'gā omono kwe pe. Kristu 'ga upe oporowyky 'me ma'e 'gā te.

¹⁴ A'ere ore noreporesagi arajemogyau aipo 'gā nee. Mama'eukwaawa 'wyriara miamū ojesaukat futat Kristu 'ga mome'waramū 'jawe. A'eramū futat 'gā moryteeu ojee kwaiwete.

¹⁵ A'eramū mama'eukwaawa 'wyriara remiayua 'gā mama'e apou o'wyriara 'jawe etee futat. A'eramū 'gā ajemogyau mama'e esage apoara 'jawe ojee ae moryteeawamū futat. A'ere nipo anure Janeruwarete 'ga 'gā nereko tyweretei 'gā nemiapo tywer are, 'gā monou mama'eukwaawa rapyaw ipe.

Paulo 'ga ako tywet

¹⁶ Awamū je 'eu'jawi pē nupe nū: I'akwaawe'ema 'jawe agawewe je porogytai pē nupe. A'etea pēnuag jee. Tajemome'u pē nupe.

¹⁷ NaJarejararete 'ga je'eg imū rūi je je'egi 'awamū. I'akwaaw ekoete ma'e 'jawe etee futat je teje'ega 'awamū.

¹⁸ Sā'ā 'gā amū kwaiwete 'gā jerowiaraiwa ojee etee. Nan tee je jemome'ui pē nupe.

¹⁹ "Ore'akwaaw ore arajemogyau", 'jau pēē 'ā pejejemogyau jepi. Peje'akwaaw ire amunipo 'ā neperowiari Jejuī 'ga mome'u teera 'gā je'ega. I'akwaawe'ema 'jawe te 'ā pejemogy 'gā je'ega rowiaa.

²⁰ Wemifutara etee 'ā 'gā iapoukaa pē nupe. Ojee pē moryteeawamū te 'gā 'i. A'etea 'ā perowiat 'gā. A'eramū 'gā pēka'aranūū rerawau ojeupe etee futat. "Ore 'ā pē'wyriara", 'jau futatee 'gā pē nupe. A'e are pēē 'gā nerowiaa. Aipo 'gā pē kurapa, pē je'ēwu'jaga agawewi. A'etea 'ā pēē 'gā nenupa.

²¹ "Paulo 'ga nuapoi mama'ea ore 'jawe. Okyje 'ga pē nui", 'jau nipo 'gā jee. A'jea futat 'gā aipo 'gā 'i. Naapoi futari je mama'ea 'gā 'jawe. Ajenosi sipo je 'gā 'jawe mama'e apoe'em ire? Naani.

Ojee etee ojerowiaraip ma'e 'gā nee sipo pēē pejeporenuwiweramū? A'eramū je nanē tejemome'wau pē nupe.

²² "Epyreu 'ā ore", 'jau 'gā 'ā jepi. Je nanē 'ā epyreua futat nū. "Israeu juapyrera 'ā ore", 'jau 'gā 'ā jepi. Je nanē 'ā Israeu juapyrera futat nū. "Abraão 'ga juapyrera 'ā ore", 'jau 'gā 'ā jepi. Je nanē 'ā Abraão 'ga juapyrera futat nū.

²³ "Kristu 'ga upe ore porowykyi", 'jau 'gā 'ā jepi. Je nanē 'ā oporowyky Kristu 'ga upe nū. A'ere je 'ā mama'e apoi 'ga upe 'gā apyraapa. Ma'eramū sipo je jemome'ui pē nupe? Je'akwaawe'ema sipo je rerekou? Kristu 'ga upe je porowykyi kwaiwete 'gā apyraapa. Aipo are te je jerowiari. Moromunepawa pype 'gā Kristu 'ga mome'u are je munewu'jau'japa 'gā nereko tywera apyraapa. "Au'je Kristu 'ga mome'u re", 'jau 'gā jee je munewu'jau'japa moromunepawa pype. Amumē 'gā je nupāu Kristu 'ga mome'u are. Nakwaawi je tenupā

pytuna. Kwaiwete 'gā je rereko tyweretei aipo 'gā nereko tywera apyraapa. Tejujukaukaa ja 'wyja'wy tekou 'gā nupe namutamutat.

²⁴ Jepyntuna 'gā futat, judeu 'gā futat je pyygu'jau'japa je mopimopika ae mopikawa pyu. Je pyykawe 'gā je mopika. Trītai nowi te je mopiga pytuna ikue. Siku te 'gā je pyygi, je mopimopika i'jawerimū etee futat nū.

²⁵ Muapyt romanū 'gā je nupāu wyrya pyu ikue. Majepei tee 'gā ita pyu je juka are afueweramū, ita momopoa je ree je jukaawamū numiamū. Muapyt yaruua nanē wypywygamū jee ikue. Aipo mū wi futat je naēmi werewi ikue. Ko'aramuku je tekou 'y pe etee futat. Koypyntunamuku nanē je tekou 'y pe etee futat yaruu rypywyg ire ikue.

²⁶ Aata je kwe pe tewau Jejui 'ga mome'wau kwe pewara 'gā nupe. A'eramū jeataaw ipe mama'e tywera ojeapou jee kwaiwete ikue. Amumē 'ya je jukau werewi, 'y ruwiramū je ree. Amumē muna'ywa afueweramū je ree. Judeuramū ore'wyriana'nī 'gā, judeue'ema 'gā. Mīmera 'gā nanē afuewereramū je ree. 'Gā 'wyrarete pype, amunawe'em ipe, 'yē'ē me. Mīmer imū 'gā amū afueweramū je juka are. Je ree iporomutare'ema 'gā nanē je jukau werewi. Jejui 'ga rerowiaa 'me 'gā nanē afueweramū je ree nū.

²⁷ Teporowykyau tekou tefuakapawamū. Amumē je tesere'ema tekou. Amumē je tetywe'emamū temi'u pyu. Amumē je te'yuwejamū tekou. Amumē je tekou 'ara ro'ysaga upe taity poakuwuue'eme.

²⁸ Aipoa wayramū futat jee numiamū. A'ere mama'e mū te aipo ray apyraawi jee. Pē nee jepy'a'wrya te ay jee jereko tyweawera apyraapa. A'eramū je tepy'a'wryamū Jejui 'ga rerowiaaramū pē nee najuejue etee futat. "Maran gatu nipo 'gā opoire'ema Jejui 'ga rerowiar awi", 'jau je tejeupe tepy'a'wryamū pē nee.

²⁹ Jejui 'ga pēē mū erowiaraiw are je tepy'a'wryamū pē nee. Mama'e tywera pēē mū iapo are je te'arasigamū. Mīmera juejue ay jee jereko tyweawera apyraapa.

³⁰ Tejemome'u re je tejee te mama'e apoe'ema resaukaa pē nupe. Jarejuwarete 'ga tepoara je aesaukat pē nupe.

³¹ Janeruwarete 'ga je'me'ema okwaap. Mama'e a'jea etee te je amome'u pē nupe. Janeruwarete 'ga 'ā Jejui Kristu 'ga Ruwaretea. Simuoryp 'ga jareojere'emamū 'jau. 'Ga futat 'ā je'me'ema okwaap.

³² Damasco pe je rekoramū peuwara 'gā 'wryiara 'ga afueweramū je pyyg are ikue. A'eramū 'ga jefaruuna'nī monou amunawa osoma rokwara rarūmū je ree ikue numiamū. Aipoa 'gā 'wryiara 'ga 'wryiararete 'ga remiaiyuwa te, Areta 'ga remiaiyuwa te.

³³ A'ere jejekoty'aawa 'gā je a'gūi 'gā nui. A'eramū 'gā 'jau jee: "Paneru pype eapyk. Toromono ene ikwara rupi amunawa osoma apyraapa 'jau", 'jau 'gā jee ikue. A'erauwe je tefayka paneru pype. A'erauwe 'gā je monoi je mojjpa iosoma rowajara katy. A'eramū je teka'jama tejee ifuewet ma'e 'gā nui ikue. Jejekoty'aawa 'gā je poare'em ire amunipo 'ā je ree iporomutare'ema 'gā je pyygi futari, je jukau rakue.

12

Paulo 'ga remiesaget

¹ Tejemome'wau 'ā tekou pē nupe. Ma'eramū sipo je jemome'ui pē nupe? "Je te 'ā Jarejuwarete 'ga remimonoferamū" 'ea pē nupe esaukara sipo je afutat? Naani. A'etea je ajemome'u pē nupe. Tejeupe Jarejararete 'ga remiesaukarera te 'ā je amome'u pē nupe.

² Ymā te 'ā Janeruwarete 'ga je monoi ywag ipe ojeypyri ikue. Katosi je kwara mu'ari 'awamū 'ga tejeroo re. Maran gatu nipo je a'jea futat tewawe'em ywag ipe 'ga pyri rakue. Tefayupaw ipewara 'jawe ete te je oi ikue. A'eramū je a'eramū ikwaapa katue'em. Janeruwarete 'ga etee te okwaap.

³⁻⁴ Ma'upawe'eme te 'ga je rerooi erujewi ywag ipe ikue. A'eramū je peu ra'u futat tewau ikue. "Tefayupaw ipe te nipo je oi rakue?" a'e ako je ko. Nakwaawi je. Janeruwarete 'ga te okwaap. Peu tekou je ywagipewara 'gā je'ega renupa tekou ikue. A'ere je najepokawyi imome'wau jareje'eg imū. Nuarūi janeje'eg imū imome'ua. Janeruwarete 'ga nanē nafutari je imome'ua nū.

⁵ Tejemiesagera je amome'u pē nupe, tejerowiaa ee. A'ere je najerowiaraiwi etee tejee. Tejetee mama'e apoe'ema resaukaawamū te je jemome'ui pē nupe.

⁶ A'ere je mama'e a'jea etee imome'ui. A'eramū je tekowe'em i'akwaawe'ema 'jawe. A'ere je najerowiaraiwi etee tejee. Kasi a'e pe 'ga amū 'i jee ne. "Kuu. Paulo 'ga esage ma'ea ajuapyraapa", 'jau 'ga amū jee ne. Pejerowiaraiw kasi je ree pejejemogyau ne. Jeremimome'u are etee ki pēneapyo pejejemogyau. Jeremiapofer are nanē ki pejejeapyoramū pejejemogyau nū.

⁷ Mama'e esagea futat je aesak ywag ipe tekou ikue. A'eramū je teporesagamū etee ee ikue. A'eramū Janeruwarete 'ga 'jau ojeupe: "Mama'e tywera pa je amonoukat

mama'eukwaawa 'wyrriara upe Paulo 'ga upe kwy. Kasi a'e pe Paulo 'ga jerowiaraiwi etee ojeupe jeremiesaukarer awi ne kwy", 'jau 'ga ojeupe ikue. Sā'ā ju raya ae pokutuga. Nan futat mama'eukwaawa 'wyrriara remimurera rayramū jee. Ma'eramū 'ā je najerowiaraiwi tejee.

⁸ Muapyt te je 'i Jarejararete 'ga upe: "Epe'a je wi", 'jau'jau'japa je 'ga upe.

⁹ A'ere 'ga 'i etee jee: "Naani. Nape'ai futari je ene wi. A'ere je ene moywrafeni ete jupi", 'jau etee 'ga jee. "Ma'eramū 'ā nerefutari mama'ea. Jepota'wa je ene ree tekou. Au'je ejemuaēm ire. Tepājēa je amono enee mama'eay jeuwamū. A'eramū ene mama'e apou jepājē mū etee futat", 'jau etee 'ga jee. A'eramū je teku'iramū tejeupe mama'eay jeuw are. Je upe mama'eay jeuwamū taetu Kristu 'ga opājē muri jee.

¹⁰ Ma'eramū 'ā jeku'iramū mama'eay are. Tepifuakare'em are, Kristu 'ga ree 'gā tekuraw are, mama'e pyu tetywe'em are, tejeupe mama'e tywera jeapo are, tejereko tywerete are. Mimer are je teku'iramū etee futat tekou. 'Gā je rereko tyweramū Kristu 'ga opājē muri jee jepi. A'eramū je mama'e apou 'ga pājē mū etee futat.

Paulo 'ga wearamū 'gā nee

¹¹ Jjemome'ua je mojenosī. "I'akwaawe'ema 'jawe sipo je rekoī", a'e je tejeupe te'jina. A'ere 'ā naje mome'ui pejepe 'gā nupe. A'eramū je 'ā 'agamū je tee tejemome'wau tekou. "Akotee ma'ea te Paulo 'ga", 'jau nipo pēē mū jee. "Ore te 'ā Jejuī 'ga remimonofararetea", 'jara 'gā aipo e'i futat jee. Akotee ma'eramū agawewi je rekoī. A'etea Kristu 'ga je mono kwe pe ojemome'waukaa jee ikue.

¹² Pē pype 'ā je rekoī Jarejuwarete 'ga 'ā aeremiapoe'ema apoukaa jee, opājē mū 'ga 'ā iapoukaa jee. A'eramū 'ā pejejeporesagamū etee ee. Aipoa 'ā "Je futat Jejuī 'ga remimonofaramū" 'e resaukaa pē nupe. Najefuwepawi je pē nupe imome'ua are ikue.

¹³ Pē nupe Jejuī 'ga mome'wau jepota'waramū etee pē nee ikue. Kwe pewara 'gā nee nanē je tepota'waramū nū 'gā nupe 'ga mome'wau nū. Pejeju'jawe futat pēē jee. Areko esage pāwē etee futat je pēē. A'ere je naenūi ka'aranūūa pē nupe. A'e are sipo pēmara'ne je ree?

¹⁴ Mukūi je oi pē pyri ikue. 'Awamū nipo je tewau'japa pē pyri nū. Naenūi futari je ako mama'ea pē nupe ikue. Nafutari je pēka'aranūūa. A'ere jeporomutaramū pē nee. Tejemuaēma tekou pē nee. Jera'yra 'jawe 'ā pēē jee. A'eramū je teporomutaramū pē nee. Sā'ā ta'yriara 'ga mama'e monoa wa'yra upe. Nakunumī arūi 'ā mama'ea omono 'uwa upe. Nan tee futat je mama'ea naenūi pē nupe.

¹⁵ Temama'ea pē nupe imonopaw ire miamū amunipo 'ā je teku'iramū etee futat tekou. Mama'ea taetu je 'ā iapou pē nupe pē poaawamū, Jejuī 'ga rerowiar wywapiukaawamū pē nupe. Teporomutaramū 'ā je pē nee. Pē nee jeporomutara te ra'u nepē moporomutarukari je ree nū?

¹⁶ Naenūi agawewi futat je 'ā mama'ea pē nupe. A'ea 'ā pekwaap. A'etea nipo pēē mū 'jau jee: "Paulo 'ga ore morytee ojee. O'meramū 'ga oree", 'jau futatee nipo pēē mū jee.

¹⁷ Namoryteei je pēē. Mama'e a'jea etee futat je amome'ua pē nupe. Pē pyri ononoramū sipo 'gā mama'e renūi pē nupe rai'i? Naani.

¹⁸ Tito 'ga ako je omono pē pyri jarejewirera 'jawewara 'ga retēe ai'i. Mama'ea sipo 'gā wenūi ako pē nupe rai'i? Pē morytee sipo 'gā nai'i? Naani. Je 'jawe etee futat Tito 'ga mama'e apoi. Je 'jawe futat 'ga rekoī.

¹⁹ "Paulo 'ga ojemome'u oree, 'esage ma'e 'ga ra'e, te'i etee 'gā jee 'jau', e'i 'ga, aru'e ore", 'jau sipo pēē mū jee? Naani. Kristu 'ga je'eg imū etee futat ore pē mu'ei. Jarejuwarete 'ga remianuwamū ore mama'e mome'ui pē nupe. Mama'e apou ore mama'e apoi pē poaawamū etee futat.

²⁰ Tejemuaēma je pē nee. Pē pyri tewaēm ire sipo maran jerea'aramū pē nee? Maran sipo pēnea'at je ree? Jeremifutara 'jawe sipo peko? Pēnemifutara 'jawe sipo je rekoī? Jepy'a'wyt je pēneko are. "Maran sipo 'gā nekoī ojeypyri je oramū?" 'jau je tejeupe etee futat. "Maran gatu nipo 'gā ajamuewe'em mama'e are? Maran gatu nipo 'gā ajurekoayawe'em? Maran gatu nipo 'gā oporomutare'emamū ajuee? Maran gatu nipo 'gā jerowiaraipe'ema ojee? Maran gatu nipo 'gā ajakurape'ema ajemogyau? Maran gatu nipo 'gā ojoje'ēwu'jage'ema? Maran gatu nipo 'gā ajamamara'ne'ema", 'jau je tejeupe tepy'a'wyrāmū pē pyri teo are.

²¹ Tepy'a'wyrāmū tekou pē nekoarūe'em are. Pē nekoarūe'em ire nipo je 'arasigamū tekou pē pyri tewau. Pēē mū nipo mama'e tywera apou rakue. A'ere nipo nepejemuaēmi iapo re. Pejetywer awi pepoire'em ire nipo je tejaa'wau pētywer are. Nepēneateei nipo mama'e tywera apo awi. Kūima'efera 'gā ajuemireko mueupawe'emamū nipo je tejenosū pē nui. Kūjāmera 'gā nanē nū ojomena mueupawe'emamū nipo je tejenosū pē nui, tejaa'wau pētywer are nū.

13

'Gā mu'akwaapawet

¹ Pē pyri ako je oi mukūi ikue. 'Awamū nipo je 'ā tewau'japa pē nesaka nū. Ymā te 'ā Janeruwarete 'ga ka'arana kwasiarukari 'ga amū upe rakue:

"Majepeja 'ga etee nipo 'ga amū kwau 'eramū kasi peapyaka 'ga je'eg are ne.

Mukūja 'gā te nipo ajee omome'u 'eramū te ki perowiat.

Maranamū nipo muapyra 'gā imome'wau 'eramū nanē pejeapyakau 'gā je'eg are nū", 'jau 'ga ikwasiarukaa 'ga amū upe ee rakue.

²⁻³ 'Aeramū je 'awamū 'jau mama'e tywera apoaramū pē nupe. Pē pyri tewau ako je 'i pē nupe ikue: "Pē pyri tejoru'japa nipo je najemuaēmu'jawi pē nee", 'jau ako je pē nupe ikue. "Teje'ega nipo je omoywrafen pē nupe pēnemaiapo tywer are", 'jau ako je pē nupe ikue. 'Aeramū je 'awamū 'jau'japa pē nupe nū: "Teje'ega nipo je omoywrafen pē nupe", 'jau'japa pē nupe nū. Muku agawewi 'ā je rekoī pē nui. A'etea je aipo a'eu'jap pē nupe. "Kristu 'ga je'eg imū te nipo je teje'ega moywrafeni pē nupe mama'e tywer awi pēneatee'emamū", 'jau ako je pē nupe ikue. 'Aeramū nipo pēē 'jau jee: "Kristu 'ga je'eg imū futat Paulo 'ga mama'e apoi", 'jau nipo pēē je resag ire. Kristu 'ga ako opājē wesaukat pē nupe ikue. 'Awamū 'ga 'ā esaukaru'japa pē nupe nū. 'Ga pājē mū etee futat je pē nerekoī.

⁴ 'Ypeywar are Kristu 'ga manūnamū 'ā 'gā amū 'jau 'ga upe rakue: "Nifuakari futari 'ga", 'jau 'ā 'gā amū 'ga upe rakue. A'ere 'ā 'ga 'Uwarete 'ga pājē mū 'ga ferawi rakue nū. Kristu 'ga 'jawe futat ore norefuakari arakou. A'ere 'ga opājē muri te oree. Korītu pe ore oramū Kristu 'ga mama'e apoukari ore upe opājē mū etee futat.

⁵ Pēnea'ar iki pejejee. "Kristu 'ga ree sipo je jemogypygyi tekou?" 'jau ki pēē pejejeupe. "Kristu 'ga ako werowiaaramū ore pype" 'ea 'ā pekwaap. A'ere 'ga werowiar awi pepoir ire nokoi futari pē pype.

⁶ "Paulo 'ga nanē nopoiri futari Kristu 'ga rerowiar awi" 'ea 'ā pekwaap. "Ga poirū 'gā nanē nopoiri 'ga wi nū" 'ea pēē ikwaawa nanē je afutat nū.

⁷ Jarejuwarete 'ga upe teje'ega monou pē nee tekou. "Epoar iki Korītu pewara 'gā otywer awi 'gā poir are", 'jau je tekou 'ga upe pē nee. Nafutari je 'gā tejee te 'gā jemogypygya. "Paulo 'ga 'gā mu'e esage. Sā'ā 'gā jemogy esagea", tejeupe 'gā 'e are je najerea'ari. Pejemogy esage are tee je jerea'aramū.

⁸ Jejui 'ga rera mokwasi'wawamū etee je mama'e apoi. Naapoa'uweri je mama'ea Jejui 'ga mome'ua mateepaawamū.

⁹ Orojeupe mama'eay jesaukara 'eramū nipo Jejui 'ga rerowiar wyyapiukaa pē nupe. 'Aeramū ore araku'iramū orojeupe mama'e tywera jeuw are. Oroje'ega ore imonou Jarejuwarete 'ga upe pē nee jepi: "Ekatu'ok katu ki Korītu pewara 'gā. Jejui 'ga erowiar wyyapiukat 'gā nupe", 'jau ore 'ga upe pē nee jepi.

¹⁰ Pē nui muku tekou je tejea'ara kwasiaa ka'aran are imonou pē nupe jepi. 'Aeramū nipo pejepoia mama'e tywera apo awi. 'Aeramū nipo je pē pyri tewau teje'ega moywrafen'ema pē nupe. Napē muorypawamū rūi 'ga ore monoi ojeupe oporowyky ma'eramū ikue. Werowiar wyyapiukaawamū te 'ga ore monoi pē nupe ikue. 'Aeramū nipo je Jarejararete 'ga je'eg imū pē mu'jau esage 'ga ree, 'ga rerowiar wyyapiukaa pē nupe.

¹¹ Kunumīmet, kūjāmet. Mīmeramū je ka'arana kwasiari imonou pē nupe. Pejemogy esage ki Jarejuwarete 'ga upe. Peenuw iki pejejeupe je'eawer are. Pejeju'jawe pejejea'aramū mama'e are. Pēpota'wa ki pejejee. Nan pejemogyramū Janeruwarete 'ga futat 'ga rekoī pē pype. Janeruwarete 'ga ae ree iporomutat ma'ea. Ae mota'waramū nanē 'ga akou nū. 'Ga futat ako pē pype nan pejemogyramū.

¹² Jejui 'ga rerowiaaramū ki pēē pejejomana, pejejafutaa. Nan ae 'ga rerowiaaramū. Jarejuwarete 'ga remiayuwa 'gā juejue oje'ega omono pē nupe pē futaa.

¹³⁻¹⁴ Jarejararete 'ga, Jejui Kristu 'ga resagea pē nerekoa je afutat. Jarejuwarete 'ga pē nee 'ga poromutara nanē je afutat nū. Jarejuwarete 'ga 'Agesagea pē nee ita'waa nanē je afutat nū.

Kweramū etee jeremimome'ua.

Garasi

Ymā te Janeruwarete 'ga judeu 'gā mū'ēi imogyau wemiayuwamū rakue. A'eramū 'ga 'gā mu'jau wemifutar are. Judeu 'gā ojemojewagukaa ajaupe Jarejuwarete 'ga je'eg imū jepi. Mama'ea 'gā i'wau 'ga je'eg imū etee jepi. A'ere 'gā nupe etee 'ga aipo 'i rakue.

A'ere Jejuī 'ga ruri jane katu'oka najuejue etee futat. Werowiarāmū 'ga jane katu'ogi. Ywag ipe Jejuī 'ga jewyr ire 'ga remimū'efera 'gā awau 'ga mome'wau kwe pe rakue. A'eramū judeue'ema 'gā Jejuī 'ga rerowiaa kwaiwete rakue. A'eramū judeu 'gā amū awau 'gā newiri, judeue'ema 'gā mu'jau wemiapo are. A'ere 'gā judeue'ema futat. A'eramū 'gā mama'e apowe'em judeu 'gā nupe Janeruwarete 'ga 'eawer imū. Nojemojewagukari 'gā judeu 'gā 'jawe. 'Gā nemi'urama nanē najudeu 'gā ma'e 'jawe. A'ere 'gā Jejuī 'ga rerowiari futari. A'eramū Janeruwarete 'ga 'gā mogyau wemiayuwamū.

Garasi pewara 'gā judeue'ema futat. A'eramū judeu 'gā amū awau 'gā mu'jau wemi-
apofer are. A'eramū Paulo 'ga ka'arana kwasiaa imonou 'gā nupe 'gā mueapyou ee.
"Werowiarāmū Jejuī 'ga pē katu'ogi. A'eramū pēē mama'e apou 'ga remifutar imū etee
futat. Najudeu 'gā 'jawe rūi pēē. A'eramū pēē mama'e apowe'em 'gā 'jawe. Najaneremiapo
are rūi Jejuī 'ga jane katu'ogi. Werowiaaramū etee te 'ga jane katu'ogi" 'jau Paulo 'ga
ikwasiaa 'gā nupe, 'gā mueapyou ee.

NaPaulo 'ga etee rūi ka'arana kwasiaa imonou 'gā nupe. Janeruwarete 'ga 'Agesagea
ikwasiarukaa 'ga upe rakue. A'eramū 'ga ikwasiaa imonou inuga 'gā nupe.

¹ Je Pauloramū ka'aran akwasiat imonou pē nupe. Je 'ā Jejuī Kristu 'ga remimonoferamū.
Ymā te Jejuī 'ga je monoi kwe pewara 'gā nupe omome'waramū ikue. Nakūima'e tee 'ga rūi
je mono 'ga mome'waramū ikue. Jejuī 'ga futat je mogo omome'waramū ikue. Na'gā amū
nupe rūi 'ga 'i: "Pe'je pejewau jeje'ega mome'wau Paulo 'ga upe", 'jawe'em. Jejuī Kristu
'ga retea futat je mogo ojee 'gā mu'jaramū ikue. 'Ga manū re 'ā 'ga Ruwarete 'ga Jejuī 'ga
moferapa etee rakue. 'Uwarete 'ga retee 'ga je monoi kwe pewara 'ga mu'jawamū ojee ikue.

² 'Au je pyri janerewirera 'jawewara 'gā amū nekoi. 'Gā nanē oje'ega omono pē nupe,
Jejuī 'ga remiayuwamū Garasi wyw pewaramū pē nupe.

³ Ku'jywa 'ga Janeruwaretea. Jejuī Kristu 'ga nanē Janejararetea futat nū. Afutat je 'gā
nesagea pē nerekoa. 'Gā pē mopy'ata'waa nanē je ifutaa nū.

⁴ Ymā te 'ā Jejuī Kristu 'ga jejukaukari 'gā nupe rakue. Jane wi janetywera moiawamū
'ga ojejukaukaa 'gā nupe rakue. Ojejukaukaa 'ga 'gā nupe werowiaaramū jane mū'jāwamū
mama'e tywera apoara 'gā nui. Ojeupe jane katu'okawamū 'ga jejukaukari 'gā nupe.
Jarejuwarete 'ga remifutar imū etee futat 'ga jejukaukari 'gā nupe rakue.

⁵ A'eramū jane 'ga muorypa jareojere'emamū futat jarekatu'okawer are, 'jau je.

Morogyta esage

⁶ Jejuī Kristu 'ga 'ā pēē erowiaa rai'i. Janeruwarete 'ga futat 'ā pē pyrūmū pē mogyau
Jejuī Kristu 'ga remiayuwamū rai'i. Ma'eramū sipo ajee pepoit 'ga rerowiar awi kamēsiete
rai'i? Pepoit 'ā 'ga rerowiar awi kamēsiete rai'i. Ma'eramū te 'gā amū porogyta 'mea
perowiat rai'i? 'Gā pejemu'e 'me are 'ā pēē pejeapya m'ina ekoete rai'i. Pejejemoryteeukaa
ekoete 'ā 'gā nupe rai'i. Jeku'iaip je ako pē nee ai'i. A'ere 'ā je mu'arasig etee pejepe pejeje
nū.

⁷ Nitywi kwe pe morogyta esage amū. Nitywi futari morogyta yau mū kwe pe. Jejuī
Kristu 'ga mome'ua etee te morogyta esagea. A'ere 'ā 'gā amū oi pē pyri mama'e amutee
mome'wau pē nupe rai'i. "Toromojopy'ru Kristu 'ga 'eawera 'jau", 'jau 'gā 'ā rai'i numiamū.

⁸ Ymā te ako ore pē m'ei Jejuī Kristu 'ga je'eg are ikue. A'ere 'ā 'gā amū oi o'meramū
pē nupe rai'i. A'eramū je Jarejuwarete 'ga Kristu 'ga mome'u 'me ekoeteara 'gā nereko
tywera futaa. Ore mū agawewi amunipo 'ā mama'e amutee mome'wau. A'etea amunipo
'ā je Jejuī 'ga ree mama'e amutee te mome'wara 'gā nereko tywera futaa. Ywagipewara 'gā
amū agawewi amunipo 'ā 'ua o'meramū pē nupe. A'etea amunipo 'ā je Janeruwarete 'ga
i'me ma'e 'gā nereko tywera futaa. Mama'eukwaawa rapyaw ipe 'gā monoa amunipo 'ā je
ifutaa.

⁹ Ymā te ako ore morogyta esage mome'ui pē nupe ikue. Aipo renuw ire ako pēē Jejuī
Kristu 'ga rerowiaa ikue. A'eramū ako ore 'jau pē nupe ikue: "Arafutar ore Jarejuwarete 'ga
mama'e amutee are pē mu'jara 'gā monoa mama'eukwaawa rapyaw ipe", 'jau agawewi ako
ore pē nupe ikue. 'Awamū je aipo 'jau'japa pē nupe nū. Afutat je Jarejuwarete 'ga mama'e
ekoete are pē mu'jara 'gā monoa mama'eukwaawa rapyaw ipe, 'jau je 'awamū taetu te 'y'ina
pē nupe.

¹⁰ Na'gã amũ maku'iawamũ rüi je aipo 'jau. Naani. Afutat je Jarejuwarete 'ga ku'ia tejee. 'Auwara 'gã maku'iawamũ etee mama'e apo re amunipo 'ã je naapoi futari mama'ea Kristu 'ga remifutar imũ.

Paulo 'ga jemome'uawet

¹¹ Pëe 'ã jerewirera 'jawe. Kÿjãmeramũ pëe 'ã jerenyra 'jawe. A'eramũ je teporomome'uweramũ Kristu 'ga ree pë nupe. Na'auwara 'ga amũ je'ega rüi je ako amome'u pë nupe ai'i.

¹² Na'auwara 'ga amũ rüi imome'wau jee. Na'auwara 'gã amũ rüi te je mu'e ee ikue. Jejuu Kristu 'ga futat omome'u jee ikue.

¹³ Jeremiapofera nipo 'ga amũ omome'u pë nupe rakue. Je 'ã judeua futat. Ymã je mama'e apoï judeu remiapou etee ikue. Jejuu 'ga rerowiaara 'gã je erekou tywet ikue. "Tamateepap 'ga rerowiaara 'gã 'jau", 'jau je ikue. Najemuaëmi futari je 'gã nee.

¹⁴ Judeuramũ orojemiapou etee futat je mama'e apou ikue. Tepyutuna 'gã apyraapa je mama'e apou orojemiapofer imũ etee futat. Oroypy 'gã je'ega je enupa katu katu tekou ikue. Tekotee 'gã je imu'jau ee ikue.

¹⁵ A'ere Janeruwarete 'ga ymã we futat je pyyrüi oje'ega mome'waramũ rakue. Je'are'emaue futat 'ga je pyyrüi ojeupe mama'e apoaramũ rakue. Naapoi agawewi je mama'e esagea ikue. A'etea 'ga je pyyrüi ojeupe oporowyky ma'eramũ rakue.

¹⁶ Wa'yra 'ga 'ga esakaa jee ikue. "Ere ewau jera'yra 'ga mome'wau judeue'ema 'gã nupe", 'jau 'ga jee ikue. "Morogyta esagea ene imome'wau jera'yra 'ga ree 'gã nupe", 'jau 'ga jee ikue. Tejeupe aipo 'ga 'e pyyrauwe je 'ga rerowiaa. Ma'eramũ je 'ã na'gã amũ temu'akwaawer imũ rüi 'ga mome'ui 'gã nupe.

¹⁷ Jerusareg ipe miamũ je nooi, "je mu'e pejepe", 'jawe'em Jejuu 'ga remimono ppyfera 'gã nupe nũ. Je renunewe agawewi 'gã porowykyi Jejuu 'ga upe. A'etea je nooi, "je mu'akwaap pejepe", 'jawe'em 'gã nupe ikue. Tejeupe aipo 'ga 'e pyyrauwe je 'ga rerowiari ikue. Arabia wyy pe ra'ne je tewau ikue. A'e awi je tejua Damasco pe ikue nũ.

¹⁸ Muaprya kwara kwaw ire te je tewau Jerusareg ipe Pedro 'ga resaka ikue. 'Ga kwaapa je tewau. Muküja etee je morowykye'ema magwapa 'ga pyri tekou ikue.

¹⁹ A'ere je naesapawi Jejuu 'ga remimonofera 'gã. Tiago 'ga etee je esaka, Jarejararete 'ga rewirera 'ga etee je esaka.

²⁰ Mama'e a'jea etee je ikwasiaa ka'aran are imonou pë nupe. Janeruwarete 'ga je'me'ema akwaap.

²¹ Jerusareg awi je tewau kwe pe, Siria wyy pe, Sirisia wyy pe. Mïmer imũ je tewau ikue nũ.

²² Ma'eramũ 'ã Judeja wyy pewara 'gã naje resagi.

²³ Jerera etee 'gã enupa. "Jane rereko tywearera 'ga oo Jejuu 'ga mome'wau 'gã nupe, 'ga rerowiarukaa 'gã nupe" e renupa. "Ymã ako 'ga Jejuu 'ga rerowiaaramũ jane apisi are etee 'ga fueweramũ rakue" 'ea 'gã ikwaapa futat. "A'ere 'gã 'awamũ 'ga rerowiari jane 'jawe" 'ea nanë 'gã enuwu'jau'japa futat.

²⁴ A'eramũ 'gã Jarejuwarete 'ga muorypa je ree. "Paulo 'ga erekatu'ok rai'i. Eja'yra 'ga ererowiarukat 'ga upe rai'i, ore rereko tywearera 'ga upe rai'i. Aipoa esage oree", 'jau 'gã Jarejuwarete 'ga muorypa je ree.

2

Jerusareg ipe 'ga jemome'uawet

¹ Katosi kwara magwaw ire je tewau tejewya Jerusareg ipe ikue nũ. Panape 'ga awau je rupi. Tito 'ga nanë je erawau orojeupi nũ.

² Tejeupe Jarejuwarete 'ga 'eawer imũ etee je tewau peu. "Ekwap Jerusareg ipe", 'jau 'ga jee ikue. A'eramũ je tewau. Peu tewau je teporogytau Jejuu 'ga rerowiaara 'gã 'wyrriara 'gã nupe. Amueapyyo je 'gã judeue'ema 'gã nupe teje'eg are. "Peenup katu katu jeje'ega. Nan tee futat je 'gã mu'ei" 'jau je 'gã nupe, 'gã mueapyyou te'eawer are. 'Gã 'wyrriara 'gã nupe etee je imome'wau. A'eramũ je 'jau tejeupe: "Nia'wryi 'ga je'ega, e'i sipo 'gã jee", 'jau je tejeupe. A'eramũ je teporonupa ee 'wyrriara 'gã nupe etee: "Aje'eg ekoete te je tekou?" 'jau je teporonupa ee 'gã nupe. A'ere 'gã 'i: "Naani. A'jea futat eneje'ega", 'jau 'gã jee, jeje'ega renuw ire.

³ Jeremiroofera 'ga, Tito 'ga, gregoa. Najudeua rüi 'ga. A'eramũ 'ga ojewage'emamũ. A'etea Jejuu 'ga rerowiaara 'gã 'wyrriara 'gã 'ga mojewagukare'ema jee. "Eroo 'ga imojew-agukaa 'gã nupe jarejemiapou", 'jawe'em 'gã jee.

⁴ Ore porogytaramũ tekotee 'gã 'ua osou ore pyri. Oreje'ega renupa 'ua. Aipo 'gã i'me ma'ea. "Jejuu 'ga ore aruerowiat arajemogyau", 'jau futatee aipo 'gã oree. "Jejuu Kristu 'ga ree ojemogyppyk ma'e 'gã nuapoi mama'ea Moisesi 'ga remikwasiarer imũ. Aipoa nia'wryi

Janeruwarete 'ga upe', 'jau futatee 'gā oree. "Moisesi 'ga remikwasiarer imū 'gā mama'ea 'ga iapoe'emamū, Janeruwarete 'ga nokatu'ogi Jejuu 'ga rerowiaara 'gā', 'jau futatee 'gā oree. Aipo 'gā "Eroo ejeupi 'ut ma'efera 'ga imojewaka Moisesi 'ga remikwasiarer imū", 'jau jee.

⁵ A'ere ore naruerowiari 'gā. "NaMoisesi 'ga remikwasiarer imū mama'e apoara etee rūi 'ga okatu'ok. Jejuu Kristu 'ga rerowiaara 'gā etee te Janeruwarete 'ga okatu'ok", 'jau ete ore 'gā nupe. "Jejuu Kristu 'ga rerowiaaramū Janeruwarete 'ga 'jau janee: Eneresage jee, 'jau 'ga janee, 'ga rerowiaaramū 'ea morogyta esagea futat. NaMoisesi 'ga remikwasiarer imū mama'e apoara 'gā nupe rūi 'ga aipo 'ga 'i. Jejuu 'ga rerowiaaramū jane upe etee te 'ga aipo 'ga 'i', 'jau ore 'gā nupe.

⁶ A'ere Jejuu 'ga rerowiaara 'gā 'wyrriara 'gā oje'ega nomoywyrarafeni jee ikue. (Peuwara 'gā 'jau 'gā nupe, ore 'wyrriat, 'jau 'gā 'gā nupe. Jarejuwarete 'ga upe jane jareju'jawe etee futat jane jemogyi. Je upe nanē jane jareju'jawe ete jarejemogyau nū.) A'eramū 'ā 'gā 'wyrriara 'gā oje'ega nomoywyrarafeni jee ikue. "Nan etee emu'e 'ga", 'jawe'em 'gā jee ikue. A'jea futat je 'gā mu'eawera. A'eramū 'gā oje'ega moywyrarafene'ema jee. Tito 'ga nanē 'gā imojewagukare'ema jee.

⁷⁻⁸ Eapyo 'gā Jarejuwarete 'ga je mono are. Pedro 'ga ra'ne futat Janeruwarete 'ga omono judeu 'gā nupe Jejuu 'ga ree 'gā mu'jaramū rakue. Opājē 'ga imua 'ga upe ojeupe 'ga moporowykyukaawamū rakue. 'Ga 'jawe futat Janeruwarete 'ga opājē mua jee, je monou judeue'ema 'gā nupe wa'yra 'ga ree 'gā mu'jaramū.

⁹ A'eramū 'wyrriara 'gā 'jau oree: "A'jea futat. Janeruwarete 'ga pē mogoi Jejuu Kristu 'ga ree judeu'ema 'gā mu'jaramū. A'eramū pēē pejejemogou 'ga upe oporowyky ma'eramū ore pyri", 'jau ete 'gā jee, Panape 'ga retee. "Pe'je pejekou Jejuu 'ga mome'waramū judeue'ema 'gā nupe. Ore 'ā jarepytuna 'gā nupe 'ga mome'waramū", 'jau 'gā oree. Tiago, Pedro, Juā. Mīmēra 'gā aipo 'jau oree ikue.

¹⁰ Aipo e'i etee te aje 'gā oree ikue: "Pēnea'ar iki ikaraemāe'ema 'gā nee, Jerusareg ipewara 'gā nee. Pepoar iki 'gā, mama'e mua 'gā nupe", 'jau 'gā oree. Aipoa ore aruapo arakou. Mama'ea ore imonou arakou 'gā nupe. Aipoa esage jee.

Pedro 'ga upe oje'ega moywyrarafenawet

¹¹⁻¹⁴ A'ere Pedro 'ga awau owaēma Ātioki pewara 'gā pyri, Jejuu 'ga rerowiaara 'gā pyri. Peu akou 'ga ojemi'wat judeue'ema 'gā pype etee futat. Ymā ore judeuramū norojemi'wari judeue'ema 'gā pyri ikue. A'ere ore Jejuu 'ga rerowiar ire ore poiri aipo awi. A'eramū Pedro 'ga ojemi'waa ekoete te futat 'gā pyri. Poje Tiago 'ga pyriwara 'gā amū 'ua owaēma Jerusareg awi. 'Gā nesakawe Pedro 'ga opojo'ogamū judeue'ema 'gā nui. Okyje 'ga opytuna 'gā nui. "Gā nā'ā nopoiri futari orojemiapofer awi re'ā. Nojemi'wari futari nā'ā 'gā imojewagipyre'ema 'gā pyri re'ā", 'jau Pedro 'ga ojeupe. A'eramū 'ga opojo'ogamū judeue'ema 'gā nui. 'Ga pojo'oga resakawe ajepeja Jejuu 'ga rerowiaara 'gā nanē opojo'ogamū 'gā nui nū. Panape 'ga miamū ojemu'jau 'ga ree. A'ere 'gā najejuu 'ga remifutar imū rūi aipo apoi. A'eramū je 'gā nesakawe teje'ega moywyrarfena Pedro 'ga upe. "Ma'ja te ereapo, ki Pedro?", 'jau je 'ga upe 'gā nemianuwamū. "Ene 'ā judeua je 'jawe. Ymā te ako Moisesi 'ga Jarejuwarete 'ga je'ega kwasiari inuga ka'aran are judeuramū janee rakue. A'eramū ako jane mama'e apou 'ga remikwasiarer imū etee ikue. A'ere 'ā jane 'awamū jane jemogyi Jejuu 'ga rerowiaaramū. Niapou'jawi jane mama'ea Moisesi 'ga remikwasiarer imū. Ma'eramū ene judeue'ema 'gā mu'jau Moisesi 'ga remikwasiarer are? Ma'eramū sipo ene mama'e apoukaa Moisesi 'ga remikwasiarer imū 'gā nupe?" 'jau je Pedro 'ga upe teje'ega moywyrarfena.

Jejuu 'ga rerowiaara 'gā katu'okawet

¹⁵ Ore 'ā judeua. Judeua futat orejara 'gā. Ma'eramū 'ā ore judeuretea. "Namama'e tywera apoara rūi ore judeue'ema 'gā 'jawe", 'jau ore arajaupe jepi.

¹⁶ "Judeuramū agawewi futat ore. A'etea Jejuu Kristu 'ga rerowiaara 'gā etee esage Jarejuwarete 'ga upe' 'ea ore ikaapa. Janeruwarete 'ga nanē 'jau janee: "Jera'yra 'ga ererowiat ekou. A'eramū ene ejesageramū jee", 'jau 'ga janee Jejuu Kristu 'ga rerowiaaramū. NaMoisesi 'ga remikwasiarer imū mama'e apo are rūi 'ga aipo 'jau janee. Jejuu Kristu 'ga rerowiaaramū te 'ga 'i janee: "Jera'yra 'ga perowiat pejejemogyau. A'eramū pēē pejejesageramū jee", 'jau 'ga janee. Aipo ni'i ekoetei 'ga Moisesi 'ga remikwasiarer imū mama'e apoara 'gā nupe, Jejuu 'ga 'gā erowiare'emamū.

¹⁷ Kristu 'ga ree ore jemogyppygi arajemogyau. A'eramū ore orojesageramū Jarejuwarete 'ga upe. Kristu 'ga ree orojemogyppyg ire ore oropoiā Moisesi 'ga remikwasiarer are orojemogyppyg awi. "NaMoisesi 'ga je'egea renuw are rūi Janeruwarete 'ga 'i janee: Eneresage jee, 'jau. A'eramū jane jarepoia 'ga remikwasiarera rerowiar awi ee jarejemogyppyg awi 'jau", 'jau ore arajaupe. A'eramū 'gā amū 'jau oree: "Nia'wyrri futari

Moisesi 'ga je'egera renupare'ema 'gā. Judeue'ema 'gā nuenuwi 'ga je'egera. A'eramū 'gā wa'wyre'emamū Jarejuwarete 'ga upe", 'jau futatee 'gā amū ore. "A'eramū pēē pejea'wyre'emamū 'gā 'jawe. Kristu 'ga ree pejemogypygyg ire nepeanuwu'jawi Moisesi 'ga je'egera pejemogyau. Kristu 'ga pē motywerukat Jarejuwarete 'ga upe", 'jau futatee 'gā amū ore. A'ere naani. O'meramū te 'gā 'i. Kristu 'ga najane motywerukara'uweri 'ga upe.

¹⁸ A'ere je poiri Moisesi 'ga remikwasiarera rerowiar are tejemogypygyg awi ai'i. Na'ga remikwasiarera renuw are rūi Janeruwarete 'ga jetywera moiri je wi. Moisesi 'ga je'egera renuwa upe tejewyr ire amunipo 'ā je jemotyweri Jarejuwarete 'ga upe. "Taenupap Moisesi 'ga je'egera 'jau", a'e je tejeupe ikue numiamū. A'ere je naenupawi futari 'ga je'egera ikue. A'eramū je tejemotywea ete Jarejuwarete 'ga upe rakue.

¹⁹ Na'ga remikwasiarera renuw are rūi Janeruwarete 'ga jetywera moiri je wi. A'ere je 'ga remikwasiarera mogyta re futat tetywera kwaawi ikue. "Kuu. Naapoi futari je mama'ea Jarejuwarete 'ga remifutar imū tekou", 'jau je tejeupe 'ga remikwasiarera mogyta re. "Kristu 'ga amanū 'ypewwar are jetywera moiaawamū rakue. 'Ga manū are Janeruwarete 'ga jetywera moia je wi" 'e renupa ai'i. A'eramū je Moisesi 'ga remikwasiarera rerowiar are tejemogypygyg awi tepoia. Ymāwarera mama'e awi je tepoiapap 'awamū. A'eramū je "Awamū Jarejuwarete 'ga remifutar imū etee mama'e apou tekou", 'jau je tejeupe, tetywera 'ga imoir ire ai'i. Werowiarāmū Kristu 'ga je muēma Moisesi 'ga remikwasiarera renupara 'gā nui.

²⁰ Ma'eramū je 'awamū tefuwere'emamū futat tejemifutar imū mama'e apo are. Kristu 'ga ree je jemujari 'ga rerowiarāmū. 'Ga futat je rereko. Kristu 'ga Janeruwarete 'ga ra'yraretea. Je ree 'ga poromutaramū. Jetywera moiaawamū 'ga ojejukaukaa rakue. Ma'eramū 'ā je 'awamū jefuweramū mama'e apou 'ga remifutar imū etee.

²¹ Naapoi agawewi je mama'e esagea Jarejuwarete 'ga upe rakue. A'etea 'ga je katu'ok Kristu 'ga je erowiarāmū ai'i. A'eramū je tejemogypygyka Kristu 'ga ree etee. Kristu 'ga jane erowiarāmū Janeruwarete 'ga 'jau janee: "Jera'yra 'ga ererowiat. A'eramū ene ejesageramū jee", 'jau 'ga janee. Moisesi 'ga je'egera renuwa jane muesage re amunipo 'ā Kristu 'ga amanū ekoete rakue. A'ere naani. Namanū ekoetei 'ā 'ga rakue. Kristu 'ga futat jane mota'wa 'Uwarete 'ga upe. Kristu 'ga jane erowiarāmū tee 'ga 'i janee: "Pēnesage jee", 'ga 'i janee, wa'yra 'ga jane erowiarāmū.

3

Jarejuwarete 'ga jane erowiaa

¹ Pēē 'ā Garasi wyy pewaramū peje'akwaawe'ema pemut pejejeypy. Awŷja te pē morytee rai'i nū, 'jau je pē nupe. Amueapyo agawewi ako je pēē Jejui Kristu 'ga manū are ikue. "Ypewwar are amanūam ipe Kristu 'ga janetywera mepyi rakue. A'eramū Janeruwarete 'ga janetywera moia jane wi, Kristu 'ga jane erowiarāmū", 'jau je ako pē nupe ikue, pē mueapyou ee ikue.

² A'eramū ki pejejea'aramū je'eawer are. Moisesi 'ga 'eawera renuw ire sipo Janeruwarete 'ga U'agesage muri pē nupe? Naani. Kristu 'ga mome'ua pēē erowiar ire te Janeruwarete 'ga imuri pē nupe.

³ Ma'eramū sipo ajee peje'akwaawe'ema pemut pejejeypy? Kristu 'ga pēē erowiar pyparamū ako Janeruwarete 'ga opājē mua pē nupe ikue, wemifutara apoukaa ako pē nupe opājē mū ikue. Ma'eramū sipo ajee pepoit 'ga ree pejemogypygyg awi rai'i? Pejejewya 'ā pejejemiapofer ymanera upe ete rai'i nū?

⁴ Kristu 'ga ree pejemogypygamū ako tekotee 'gā pē nerekou tyweaete agawewi 'ga ree ikue. A'ete ako pēnuag pejejerako tywera upe ikue. Pēnuag ekoete sipo aipo upe rakue? A'eramū sipo pēē 'awamue pejeipoia Kristu 'ga rerowiar awi? Naani. Nepepoiri futari 'ga rerowiar awi.

⁵ Moisesi 'ga remikwasiarera renuw are sipo Janeruwarete 'ga U'agesage muri pē nupe? Naani. 'Ga je'egera renuw are sipo Janeruwarete 'ga aeremiapoe'ema apoukari pē nupe opājē mū? Naani. Jejui Kristu 'ga mome'ua pēē erowiarāmū te 'ga aeremiapoe'ema apoukari pē nupe opājē mū.

⁶ Pēnea'ar iki Abraão 'ga rekwawer are. Ymā Janeruwarete 'ga ka'arana kwasiarukari 'ga amū upe Abraão 'ga ree rakue. "Abraão 'ga Janeruwarete 'ga werowiat rakue. Werowiarāmū Janeruwarete 'ga 'i 'ga upe rakue: Abraão 'ga esage jee, 'jau 'ga 'ga upe werowiarāmū", 'jau 'ga ikwasiaa ka'aran are rakue.

⁷ A'eramū Janeruwarete 'ga rerowiaara 'gā juejue Abraão 'ga juapyrera 'jawewaramū ajemogyau. Aipoa 'ā pēē ikwaapa.

⁸ Ymã te Janeruwarete 'ga 'i aipo 'jau Abraão 'ga upe rakue: “Je rerowiaaramũ ereko. A'eramũ ene ejesageramũ ekou jee. Tejerowiaara 'gã nupe juejue nipo je 'i, pënesage jee, je 'i. Ene upe te'eawera 'jawerimũ etee futat je 'i 'gã nupe tejerowiarãmũ”, 'jau 'ga Abraão 'ga upe rakue. “Judeue'ema 'gã nupe miamũ nipo je 'i: Pënesage jee, je 'i, ene 'jawe 'gã tejerowiarãmũ”, 'jau 'ga Abraão 'ga upe rakue. A'eramũ Janeruwarete 'ga Abraão 'ga upe u'eawera kwasiarukaa 'ga amũ upe rakue.

⁹ Werowiarãmũ Janeruwarete 'ga mama'e esage monou Abraão 'ga upe. A'eramũ 'ga jane upe nanë mama'e esage mua nũ. Abraão 'ga upe imuawera 'jawe 'ga imua janee werowiarãmũ.

¹⁰ Moisesi 'ga je'egera renupara 'gã ojemote'aa Jarejuwarete 'ga upe. Nuenupawi futari 'gã 'ga je'egera. A'eramũ 'gã ojemote'aa Jarejuwarete 'ga upe. Ymã te 'ga amũ ka'arana kwasiari inuga aipo are rakue: “Anure nipo Janeruwarete 'ga Moisesi 'ga je'egera renuwaipara 'gã monoi mama'eukwaawa rapyaw ipe”, 'jau 'ga ikwasiaa inuga ka'aran are rakue.

¹¹ “Moisesi 'ga je'egera ereenup katu katu. A'eramũ ene ejesageramũ jee”, ne'i Janeruwarete 'ga 'ga amũ upe. Naani. Ojee ojemogypyk ma'e 'gã nupe etee te Janeruwarete 'ga 'i: “Pënesage jee. A'eramũ je pë mogyau 'au tejepyri nakwaparimũ warãu rüi futat”, 'jau 'ga 'gã nupe.

¹² Ymã Janeruwarete 'ga aipo 'jawe'em rakue: “Pejemogypyk iki je ree”, ne'i te rüi 'ga rakue. “Perowiat te ki jeje'ega”, e'i te 'ga rakue. “Moisesi 'ga remikwasiarera renup katuara 'gã etee te ajemogi nakwaparimũ rüi”, 'jau 'ga ikwasiarukaa 'ga amũ upe rakue. A'ere 'gã nuenupawi futari Moisesi 'ga remikwasiarera je'ega rakue. A'eramũ Janeruwarete 'ga 'jau 'gã nupe: “Nepeenupawi futari 'ga remikwasiarera je'ega. A'eramũ je pë nerekou tyweaete ee. Mama'eukwaawa rapyaw ipe nipo peo pejemanũ re”, 'jau 'ga 'gã nupe rakue.

¹³ A'ere 'ã Kristu 'ga manũi 'ypeywar are janetywera mepyawamũ rakue. Kristu 'ga Janeruwarete 'ga erekou tywerukaa janetywer are rakue. A'eramũ 'ga jane rerekou tyweru'jape'ema ee, Kristu 'ga jane erowiarãmũ. Ymã 'ã Janeruwarete 'ga oje'ega kwasiarukaa ka'aran are rakue: “Nia'wryi te 'ypeywar are u'am ma'e 'gã jee”, 'jau 'ga ikwasiarukaa 'ga amũ upe rakue. A'eramũ 'ga Kristu 'ga upe 'ypeywar are janetywera renu'ama upe aipo 'jau rakue. Janetywer are Janeruwarete 'ga Kristu 'ga rerekou tywerukaa rakue. A'eramũ 'ga, Kristu 'ga jane erowiarãmũ, jane rerekou tyweru'jape'ema futat. Naani. Kristu 'ga jane erowiarãmũ te 'ga 'i janee: “pënesage jee”, 'jau.

¹⁴ Ymã te 'ã Janeruwarete 'ga 'i Abraão 'ga upe rakue: “Je rerowiaaramũ ereko. A'eramũ ene ejesageramũ jee”, 'jau 'ga 'ga upe rakue. “'Ypeywar are Kristu 'ga manũa omepypap janetywera rakue. A'eramũ 'ga 'awamũ, pënesage jee”, 'jau judeue'emamũ pë nupe Jejui Kristu 'ga pëe erowiarãmũ. Kristu 'ga jane erowiarãmũ, Janeruwarete 'ga U'agesage mua janee, u'eawer imũ etee futat.

U'eawer imũ 'ga mama'e apoi

¹⁵ Pëe 'ã jerewirera 'jawe. Kijãmeramũ pëe 'ã jerenyra 'jawe. A'eramũ je, tamueapyo 'gã ee 'jau, 'jau je pë nupe. Sã'ã ae ajamama'e futaa ijara momoranuwa. A'eramũ 'ã ijara 'ga: “Nan ki ajee siapo jarejaupe”, 'jau 'ã 'gã ajaupe. A'eramũ 'ã 'gã u'eawer imũ etee futat ikwasiaa ka'aran are inuga. Ikwasiapaw ire 'ã 'gã wera kwasiaa ee. A'eramũ 'ã 'gã mama'e apou ajaupe wemikwasiarer imũ etee futat. Ikwasiapaw ire 'gã 'ã imoiru'jape'ema futat nũ. U'eawer imũ etee futat 'gã iapou ajaupe.

¹⁶ Nan tee futat Janeruwarete 'ga oje'ega Abraão 'ga upe rakue. “Tamono mama'e esagea ene upe 'jau. Enejuapyrama 'gã nupe 'jau nipo je imonou. Tekotee 'gã nupe nanë nipo je mama'e esage monou ene ree, enejuapyrama 'gã nee 'jau nipo je imonou”, 'jau 'ga 'ga upe rakue. Na'ga juapyra 'gã nupe juejue rüi 'ga 'i. 'Ga juapyrama 'ga amũ upe etee 'i te 'ga 'i aipo 'jau. Aipo 'ga upe 'ga 'ea, Kristu 'ga upe, 'ga 'ea te.

¹⁷ Abraão 'ga upe aipo 'e re Janeruwarete 'ga 'jau: “Taapo mama'ea te'eawer imũ etee futat 'jau”, 'jau 'ga rakue. A'ere, kwaturu sëtui trita kwara kwaw ire, Janeruwarete 'ga oje'ega kwasiarukaa Moisesi 'ga upe rakue. A'ere 'ga nomoka'jami futari Abraão 'ga upe u'eawera. A'eramũ 'ga 'awamũ Abraão 'ga upe je'eawera nia'wryi 'jawe'em 'ga. Naani. U'eawer imũ etee futat 'ga mama'e monoi Abraão 'ga upe, Abraão 'ga juapyra 'ga upe nanë nũ.

¹⁸ NaMoisesi 'ga je'ega renuw are rüi 'ga mama'e esage monoi 'ga upe. Naani. 'Ga upe u'eawer imũ etee te 'ga imonoi 'ga upe. Wemifutar imũ etee 'ga imonou 'ga upe u'eawer imũ etee futat.

¹⁹ A'eramũ nipo pëe mũ 'jau jee: “Ma'eramũ sipo ajee Janeruwarete 'ga oje'ega kwasiarukari Moisesi 'ga upe rakue?” 'jau nipo pëe mũ jee. Naani. Oje'ega 'ga ikwasiarukaa Moisesi 'ga upe. Oretywer are ore mueapyoawamũ te 'ga iapoukari rakue. Abraão 'ga juapyrama 'ga rure'emaue Moisesi 'ga remikwasiarera oretywera

kwaawukaa oree rakue. Kristu 'ga Abraão 'ga juapyrama. Kristu 'ga upe Janerwarete 'ga 'i rakue: "Tamono mama'e esagea 'gã nupe 'ga ree 'jau", 'jau 'ga Kristu 'ga mome'wau rakue. Ywagipewara 'gã nupe Janerwarete 'ga oje'ega rerurukari Moisesi 'ga upe rakue. 'Ga upe etee te 'ga erurukari. A'eramü Moisesi 'ga te imome'wau 'gã nupe. Anure Moisesi 'ga 'ga je'ega kwasiaa inuga ka'aran are oree rakue.

²⁰ A'ere Janerwarete 'ga oje'ega nuerooukari Abraão 'ga upe. Janerwarete 'ga retea futat oje'eg 'ga upe.

Kristu 'ga 'eawera Moisesi 'ga remikwasiarera py'rau

²¹ Abraão 'ga upe ra'ne Janerwarete 'ga oporogytau rakue. A'ere 'ga oje'ega monou Moisesi 'ga upe rakue. Moisesi 'ga upe 'ga 'eramü sipo 'ga 'i: "Abraão 'ga upe je'eawera nia'wyrri", 'jau sipo 'ga rakue? Naani. Kwe pe mama'e esage mü apoa ojepyri jane reroo re amunipo 'ã Janerwarete 'ga 'i rakue. A'eramü amunipo 'ã 'ga jane rerawau ojepyri jane mama'e apoower are. A'ere nitywi mama'e esagea mü kwe pe ywag ipe ae monoara.

²² "Nitywi futari mama'e esage apoara 'gã amü jee. Najuejue etee futat 'gã tywetyweramü jee. 'Gã tywera 'gã nerekou", 'jau 'ga ojeupe rakue. Ako esage agawewi futat 'gã. A'etea 'ga Jejui Kristu 'ga ree ojemogypyk ma'e 'gã ete omogy nakwaparimü ete rüi u'eawer imü etee futat. Kristu 'ga ree ojemogypyk ma'e 'gã etee 'ga imogyau ojepyri nakwaparimü rüi.

²³ Wyy pe 'ga rure'emauwe ore judeuramü Kristu 'ga rerowiarë'ema arajemogyau. 'Ga rure'emamü ore Moisesi 'ga remikwasiarera etee erekou. "Janerwarete 'ga ka'arana okwasiarukat Moisesi 'ga upe janetywer are jane mu'jawamü", 'jau ore. A'ere 'ga ne'i futari oree: "Moisesi 'ga remikwasiarera peenup. A'eramü pëë pejejesageramü jee", 'jawe'em 'ga oree Moisesi 'ga remikwasiarera renuw are. Jejui 'ga ore erowiar ire tee 'ga aipo 'jau oree.

²⁴ Sã'ã ae wa'yra monoa moromu'jara mü 'ga po pe, wa'yra mu'jaukaa. Nan tee futat Janerwarete 'ga oje'ega kwasiarukaa Moisesi 'ga upe rakue. 'Ga remikwasiarera mogytaramü ore orojemu'jau Jarejuwarete 'ga remifutar are numiamü. A'ere ore naruenupawi 'ga je'ega. Kristu 'ga 'ur ire, judeuramü ore mü 'ga rerowiaa. A'eramü Janerwarete 'ga 'jau oree: "Kristu 'ga perowiat pejejemogyau. A'eramü pëë pejejesageramü jee", 'jau 'ga oree, Kristu 'ga ore erowiar ire.

²⁵ 'Awamü ore Kristu 'ga rerowiar ire mama'ea naruapoi Moisesi 'ga remikwasiarer imü.

²⁶ 'Awamü pëë najuejue etee Kristu 'ga ree pejemogypyk pejejemogyau. A'eramü pëë najuejue etee pejejemogyau Jarejuwarete 'ga ra'yramü. Judeuramü, judeue'emamü. Mimeramü juejue futat pëë Jarejuwarete 'ga ra'yramü, Kristu 'ga pëë erowiar ire. 'Ga rerowiar ire pëë pejejemujaa 'ga ree nanë nü.

²⁷ Kristu 'ga pëë erowiarämü 'ga amü pë pymãu 'y pe Kristu 'ga rerowiaara re-saukaawamü. Pejepymü re pëë pejejemujaa 'ga ree. A'eramü 'ga pë nerekou.

²⁸ Jarejuwarete 'ga upe jane jarejemogyau jareju'jaju'jawe etee futat. Judeuramü, judeue'emamü, oje'wyrarete pewaramü, ka'a pewaramü, küima'eramü, küjänamü. Mimeramü jane jareju'jaju'jawe etee futat jarejemogyau 'ga upe. Kristu 'ga rerowiarämü jane jarejemujaa 'ga ree. A'eramü jane jarejemogyau jareju'jaju'jawe etee futat 'ga upe. Majepei 'ywetewara 'jawe jarejemogyau.

²⁹ Kristu 'ga remiayuwamü pejejemogy re pëë pejejemogyau Abraão 'ga juapyrera 'jawewaramü. A'eramü Janerwarete 'ga mama'e esage monou pë nupe, Abraão 'ga upe u'eawer imü etee futat.

4

¹ 'Awamü je pë mueapyoi kunumü are. Sã'ã jane jareja'yra 'gã nupe jarekaraemã monoa. A'ere 'ã kunumia naeapyoi we ee ojejuka are. A'eramü 'ã ae tuwamü 'jau wemiayua 'gã nupe: "Tekaraemã je amono teja'yra 'ga upe ai'i. A'ere 'ga nojemotuwü we. A'eramü 'ga ojejukawe'em ee. A'eramü pëë pejejejukau ee 'ga upe jee ra'ne. 'Ga jemotuw ire 'ga ma'ea futat, 'ga upe jeremimonofera", 'jau nipo 'ga ruwa 'ga wemiayua 'gã amü nupe. Waranupe'emawe futat kunumü 'ga 'uwa 'ga karaemã jaramü futat akou. A'etea 'ga 'uwa 'ga remiayua 'gã je'ega renupa.

² 'Ga aranuwe'emamü 'ga ruwa 'ga remiayua 'gã ojejukau 'ga ree, 'ga karaemã are. 'Uwa 'ga remifutara 'ara rupi kunumifera 'ga okaraemã mujaa etee te. A'eramü futat 'ga mama'e apou wemifutar imü etee futat.

³ Nan tee futat ore judeuramü mama'e apoi Jarejuwarete 'ga upe Moisesi 'ga remikwasiarer imü etee futat ikue. 'Ga ra'yra 'ga rure'emamü ore Moisesi 'ga je'ega renupa.

⁴ A'ere Janerwarete 'ga, wemifutara 'ara rupi, wa'yra 'ga muri wyy pe rai'i. Wa'yra 'ga 'ga imu'arukaa küjã ëë mü wi rakue. 'Ga ra'yra 'ga, Kristu 'ga etee te Moisesi 'ga je'egera wenup katu katu rakue.

⁵ 'Ga je'ega 'ga enupa katu katua ore mueateeupap mama'e ymaner awi, 'Uwarete 'ga ra'yramū 'ga ore mogyawamū 'jau. Werowiarāmū 'ga jane mogyau 'Uwarete 'ga ra'yramū. A'eramū Janeruwarete 'ga wa'yra 'gā nupe wemimonofera mua janee.

⁶ Pēē nanē 'ga ra'yramū nū. Sā'ā 'ga U'agesage mura pē nupe. A'eramū ore pē kwaapa. "Janeruwarete 'ga U'agesagea amut 'gā nupe", 'jau ore. A'eramū ore "Janeruwarete 'ga ra'yramū 'gā jemogyi" 'e kwaapa pē nesag ire. A'eramū 'ga 'Agesagea, Kiapi'ni, jane mu'eukaa Jarejuwarete 'ga upe.

⁷ A'eramū pēē a'eramū na'ga upe mama'e apoara etee rūi pejemogyau. Naani. 'Ga ra'yramū nanē futat pejemogy nū. A'eramū 'ga a'eramū wa'yra 'gā nupe wemimonofera monou pē nupe nanē nū.

Paulo 'ga wearamū 'gā nee

⁸ Ymā te 'ā nepekwaawi Jarejuwarete 'ga rakue. 'Ga kwaape'ema 'ā pēē maira'mea etee ipojeupa rakue, pejejorywamū ee rakue.

⁹ A'ere 'ā pēē 'awamū Jarejuwarete 'ga pekwaap pejemogyau. 'Ga futat pekwaap. Ojekwaawukat 'ga pē nupe, wemiayuwamū 'ga pē mogyau. Ma'eramū sipo ajee peje'akwaawe'emawera pemut ete te pejejeyyu rai'i nū? Pejewyt ete 'ā pejemaira'me upe rai'i nū? Nipājēi maira'mea. Janeruwarete 'ga te pājērete. A'etea 'ā pēē pejejewya ekoete maira'me pojeuwa upe rai'i nū?

¹⁰ Ymā te 'ā maraka peapo maira'me are pejejorypawamū rakue. 'Araiwa rupi, jay ru'wi are, kwar ipe, 'y ruwirāmū. Mīmera rupi 'ā pēē maraka peapo maira'me are pejejorypawamū rakue. A'ere 'awamū maraka peapo Jarejuwarete 'ga muorypawamū numiamū. Maira'me upe maraka apoawera 'jawe etee 'ā Jarejuwarete 'ga upe maraka peapo numiamū. A'ere naani. Nanarūi. "Nan jane iaporamū nipo Janeruwarete 'ga ku'iramū jane ree", 'jau nipo pēē. "Judeu 'gā 'jawe maraka apo re nipo jane jarejemuesageu Jarejuwarete 'ga upe", 'jau nipo pēē pejejaupe numiamū.

¹¹ Je ako amu'e pēē Jejui Kristu 'ga ree ikue. "Jejui Kristu 'ga rerowiarāmū jane resageramū Jarejuwarete 'ga upe", 'jau je ako pē nupe ikue, pē mu'jau ee ikue. Amu'e futat ako je pēē ee ikue numiamū? Pemoka'jam etee nipo je 'eawera rakue?

¹² Pēē 'ā jerewirera 'jawe. Kūjāmeramū pēē jerenyra 'jawe. A'eramū je 'jau pē nupe: Je 'jawe peko. Aetypap je ymāwarera mama'ea. Je 'ā judeua agawewi. A'etea je ako judeue'emamū pē 'jawe pē pype. Naapoi futari je mama'ea judeurāmū orojemiapofer imū, a'e je pē nupe. A'eramū pēē 'awamū pejememu'jau je ree. Peapo kasi mama'ea oreremiapofer imū ne, a'e je pē nupe. Pejejepype je rekoramū ako pēē pejejejukau esage je ree ai'i.

¹³ Pēnea'ar iki ee. Tekaruaramū je tekou ikue. Tefuakapawaiwamū ako je tekou ikue. A'eramū ako je tepytawaipa pē pype ikue. A'eramū ako je Kristu 'ga mome'wau pē nupe ikue.

¹⁴ Pejejeupe je waēmamū ako pēē je monowe'em pejejewi ikue. "Kuu. Ojero'wu ma'e 'ga 'ut ojeuanugukaa janee", 'jawe'em ako pēē jee ikue. Jekaruara agawewi je. A'etea ako naje rereko tyweri pejepe jekaruara are ikue. Je mua ako pejejepype. Sā'ā ae Jarejuwarete 'ga pyriwara 'ga mura. Nan tee futat ako pēē je mua pejejepype ikue. Jejui Kristu 'ga mura 'jawe ete ako pēē je mua pejejepype ikue.

¹⁵ A'e pe ako pēē pejeku 'iramū pejemogyau je ree ikue. "Ma'ja te jane siapo 'ga upe 'ga poaawamū?" 'jau ako pēē pejejaupe ikue. Ma'eramū sipo ajee pēku'ipap je ree 'awamū?

¹⁶ Mama'e a'jea etee je amome'u pē nupe. Ma'eramū sipo pē'me pejejaupe: "Niporomutari Paulo 'ga jane ree", 'jau futatee pejejaupe. Mama'e a'je imome'ua sipo je mogou pē nee iporomutare'emamū?

¹⁷ Mama'e ekoete are pē mu'jara 'gā te iporomutat 'me pē nee. "Simopojo'ok 'gā Paulo 'ga wi 'jau", e'i 'gā ajaupe. "Paulo 'ga wi opojo'og ire nipo 'gā jemu'ei jane ree", 'jau nipo 'gā ajaupe, oporomutat 'meramū pē nee.

¹⁸ A'ere je poromutaramū a'jea futat pē nee. Pē pype tekou taetu ako je teporomutaramū pē nee ikue. Muku pē nui tekou miamū je teporomutaramū pē nee mama'e esage apou pē nupe.

¹⁹ Pēē 'ā jera'yra 'jawewaramū jee. Sā'ā kūjā kunumīakyrā ray renūja. Nan tee futat je rayramū pē nee. Afutarete je pejemogyppyga Kristu 'ga ree. 'Awamū 'ā pepoit 'ga ree pejemogyppyg awi. A'eramū je tejemayrūmū pē nee. 'Ga ree pejemogyppygamū te jeku'iramū pē nee.

²⁰ Pē pyri tekoa je afutat. Pē pyri teko re amunipo 'ā je pē mueapyoi ee. A'ere 'ā je rekoī muku te pē nui. A'eramū je tejemuaēmetearamū pē nee.

²¹ “Moisesi 'ga remikwasiarer imū etee futat siapo mama'ea 'jau”, 'jau nipo pēē mū. “Ga remikwasiarer imū jane mama'e apo re nipo Janeruwarete 'ga 'i janee: Pēē mama'ea peapo Moisesi 'ga remikwasiarer imū. Ma'eramū 'ā pēnesage pejejemogyau jee, 'jau nipo 'ga janee”, 'jau nipo pēē pejejaupe. Pēneapyo katu sipo Moisesi 'ga remikwasiarer are? Naani.

²² Abraão 'ga ree nanē 'ā Janeruwarete 'ga ka'arana kwasiarukari Moisesi 'ga upe rakue: “Mukūi futat 'ā Abraão 'ga ra'yra 'gā nakue. Ajepeja 'ga rera Isakia. Abraão 'ga remirekorete ēē ra'yra, Sara ēē ra'yra 'ga poromū, Isakiramū. Ajepeja 'ga rera Ismaeua. Abraão 'ga remireko ēē remifai ēē ra'yra 'ga poromū, Ismaeuramū. Aga ēē ra'yra 'ga. Aga ēē 'ā mama'ea wapo o'wryara ēē 'eawer imū etee futat, Sara ēē 'eawer imū etee futat. Nuapoi ēē mama'ea wemifutar imū”, 'jau 'ga ikwasiaa rakue.

²³ “Abraão 'ga ēē rerekou, wemirekorete ēē remifai ēē rerekou, Aga ēē rerekou rakue. A'eramū ēē wa'yramū 'ga upe. A'eramū Abraão 'ga wa'yra 'ga re'roka. Ismaeua 'ga inuga wa'yra 'ga ree. A'eramū 'ga akou ujara 'ga upe mama'e apoaramū, oy ēē 'jawe. Ajepeja 'ga te aje 'ga ra'yra 'ga u'aa Jarejuwarete 'ga je'eg imū etee futat. 'Iwāiwi agawewi eneremirekorete ēē. A'etea je kunumīa amut ēē upe', 'jau Janeruwarete 'ga Abraão 'ga upe rakue. A'eferupi te futat Sara ēē wa'yramū u'aa Janeruwarete 'ga je'eg imū etee futat”, 'jau Moisesi 'ga ikwasiaa inuga rakue.

²⁴⁻²⁵ Mama'e a'je are ete 'ga ka'arana kwasiari rakue. Aipo mogyta re jane jarejemu'jau mama'e are. Sā'ā mukūja 'gā, kūjāmera 'gā nakue. Nan tee futat Janeruwarete 'ga 'eawera rakue. Aga ēē 'jawe Moisesi 'ga upe Janeruwarete 'ga 'eawera. Ymā 'ā Moisesi 'ga oi ywytyra apyte'rarimū rakue, Sinai 'jawa apyte'rarimū rakue. Arabia ywy pe aipoa Sinai 'jawa reni. Sinai 'jawa apyte'rarimū 'ga rekoramū futat 'ā Janeruwarete 'ga oje'ega mua 'ga upe, ikwasiaa ita are 'ga upe rakue. A'eramū Moisesi 'ga judeu 'gā mu'jau kwaiwete aipo Jarejuwarete 'ga je'eg are rakue. Sā'ā Jerusarega. Aga ēē 'jawe etee Jerusareg ipewara. Jerusareg ipewara 'gā, judeu 'gā, nuapoi mama'ea wemifutar imū. Moisesi 'ga je'eger imū etee 'gā mama'e apoi ajemogyau. A'eramū 'gā ajemogyau Aga ēē 'jawe. Aga ēē mama'ea wapo o'wryara ēē je'eger imū etee futat rakue. Eē 'jawe Jerusareg ipewara 'gā mama'e apoi Moisesi 'ga je'eger imū etee futat.

²⁶ A'ere jane 'awamū Jerusareg yau jane 'i ywag ipewara upe. Jejui Kristu 'ga ree jarejemogyppyyg ire jane jarejemogyau ywag ipe oo ma'eramamū, Jejui Kristu 'ga ree ojemogyppyyk ma'eramū etee futat. A'eramū jane mama'e apowe'em Moisesi 'ga je'eger imū.

²⁷ Ymā Janeruwarete 'ga ka'arana kwasiarukari Isai 'ga upe rakue:

“Ta'yre'emamū agawewi ene 'awamū.

A'etea neneku'ipawi ekou. Anure nipo kwaiwete enera'yra.

Enemena 'ga opoiraip ene wi enera'yre'em are. A'ere nipo anure 'ga jewyri enee nū.

Ene upe 'ga jewyri ire nipo enera'yra 'gā pytuna tesirūmera 'gā na'yra apyrapa”, 'jau 'ga ikwasiarukaa Isai 'ga upe rakue.

Jerusareg yau are 'ga jane mu'jau poromū. Anure nipo kwaiwete Jejui Kristu 'ga rerowiaaramū jane oi ywag ipe. Jerusareg yau 'e upe 'ga 'i poromū.

²⁸ Pēē 'ā jerewirera 'jawe. Kūjāmeramū pēē 'ā jerenyra 'jawe. A'eramū je pē mu'jau ee. Ymā Janeruwarete 'ga 'i Abraão 'ga upe rakue: “Anure nipo je kunumī monoi ene upe”, 'jau 'ga 'ga upe rakue. A'eramū Isaki 'ga u'aa Jarejuwarete 'ga 'eawer imū etee futat. Isaki 'ga 'jawe futat Kristu 'ga rerowiaaramū jane. U'eawer imū etee futat Janeruwarete 'ga jane mogyau wa'yramū, Jejui Kristu 'ga jane erowiamū.

²⁹ Mukūi futat Abraão 'ga ra'yra 'gā numiamū. A'ere ajepeja 'ga na'Janeruwarete 'ga 'eawer imū rūi 'ga 'ari, Abraão 'ga ra'yri ppy 'ga. Opyyg ekoete te Aga ēē 'ga ra'yra rakue. A'eramū ēē ra'yra 'ga, Ismaeu 'ga u'aa ēē wi rakue. A'ere Isaki 'ga nanarū 'ga ruri oy ēē upe. Janeruwarete 'ga 'eawer imū etee te 'ga ruri. Janeruwarete 'ga 'Agesage pājē mū te Sara ēē Abraão 'ga ra'yra pyygi rakue. Anure Ismaeu 'ga Isaki 'ga rereko tyweaete rakue. Nan tee futat nipo Moisesi 'ga je'egera renupara 'gā Jejui 'ga rerowiaaramū jane rereko tyweri.

³⁰ A'ere Janeruwarete 'ga ka'arana kwasiarukari Sara ēē je'eger are rakue.

“A'eramū ēē 'jau Abraão 'ga upe: 'Emono kynā jarejewi. Jeremiayuwa te ako kynā ikue numiamū’, 'jau ēē 'ga upe.

'Kynā ra'yra kīā reewe futat kynā monou jarejewi.

Jareja'yra kīā upe etee teremono karaemā 'jau', 'jau ēē 'ga upe.

'Nafutari je kynā ra'yra kīā upe we ene mama'e monoa', 'jau ēē Abraão 'ga upe rakue”,

'jau 'ga ikwasiarukaa 'ga upe rakue.

³¹ Sara ēē remiayuwa ēē ra'yra 'ga juapyrera 'jawewaramū Moisesi 'ga remikwasiarer imū mama'e apoara 'gā. A'ere Jejui Kristu 'ga rerowiaaramū jane Abraão 'ga remirekorete ēē

ra'yra juapyrera 'jawewara. A'eramū Janeruwarete 'ga mama'e esage apou janee Abraão 'ga upe u'eawer imū etee futat.

5

Jarejuwarete 'ga ree etee jane jarejemogyppyka

¹ Jejui Kristu 'ga amanū janetywera mepyawamū rakue. A'eramū 'ga ree jane jemogyppygamū Janeruwarete 'ga 'jau janee: “Pēē pēnesage jee”, 'jau 'ga janee, wa'yra 'ga ree jane jemogyppygamū. Werowiarāmū 'ga ae mū 'jāu Moisesi 'ga je'eger imū mama'e apoara 'gā nui. A'eramū ki pēē pejejewyre'ema Moisesi 'ga je'eger imū mama'e apo upe. Pē nupe owaēm ma'e 'gā amunipo l'me pē nupe: “Pejemojewagukat 'ga amū upe. Moisesi 'ga je'eger imū pejemojewagukat. 'Ga je'eger imū imojewagipyrrera 'gā etee te esage Jarejuwarete 'ga upe”, 'jau futatee nipo 'gā pē nupe rai'i.

² A'ere je, Pauloramū je 'i pē nupe: Naani. Pejemojewagukat kasi 'gā nupe ne. Najudeua rūi pēē. Ymā Janeruwarete 'ga 'i judeu ppy 'gā nupe rakue: “Imojewagipyrrera 'gā etee te jeremiyuwa”, 'jau 'ga rakue. A'ere 'awamū nanarūi. 'Awamū 'ga 'i: “Jera'yra 'ga ree ojemogyppyk ma'e 'gā etee te jeremiyuwa”, 'jau 'ga. Pejejemogyppygawar ire nipo pepoit Kristu 'ga ree pejejemogyppyg awi pejejemogyau.

³ Imojewagipyrrera 'gā ki ajee Moisesi 'ga je'egera tuenupap. 'Gā enupawe'emamū nipo Janeruwarete 'ga ne'i 'gā nupe: Pēnesage jee, 'jawe'em nipo 'ga 'gā nupe.

⁴ Moisesi 'ga je'egera renuw are ojemogyppyk ma'e 'gā nipo opoit Jejui Kristu 'ga ree ojemogyppyg awi. “Moisesi 'ga je'eger imū mama'ea jane iaporamū nipo Janeruwarete 'ga 'i janee: Pēnesage jee, 'jau nipo 'ga janee”, pe'je nipo pejejemogyau numiamū, Moisesi 'ga je'egera renuw are etee futat nipo pejemogy. Aiporamū nipo pepoit Kristu 'ga rerowiar awi. Kristu 'ga jane erowiarāmū te Janeruwarete 'ga 'i janee, “pēnesage jee”, 'jau 'ga janee. Niapoi agawewi te 'ā jane mama'e esagea 'ga upe rakue. A'etea 'ga aipo 'jau janee, Kristu 'ga ree jane jemogyppygamū.

⁵ Nanarūi ore. Orojemogyppyg ore Jejui Kristu 'ga ree. Anure nipo Janeruwarete 'ga 'jau ore: “Jejui Kristu 'ga perowiat. A'eramū pēē pejejesageramū jee”, 'jau nipo 'ga anure ore. Aipo 'ga 'e rapesaka ore 'ā arajemogyau, Janeruwarete 'ga 'Agesagea 'ā ore rerekou, 'ga rerowiarukaa ore.

⁶ Jejui Kristu 'ga ree jane jemujar ire Janeruwarete 'ga 'jau janee: “Pēnesage jee”, 'jau nipo 'ga janee. Imojewagipyrreramū ore, imojewagipyre'emamū pē nupe. Mimeramū juejue futat 'ga aipo 'jau janee, Jejui Kristu 'ga ree jarejemujar ire, jane jareporomutamū jarejuee.

⁷ Amome'u futat ako je Kristu 'ga pē nupe ikue. 'Ga mome'ua ako pēē erowiaa ikue numiamū. Aw'ija gatū nipo aje 'ā pē momoirukat 'ga rerowiar awi rai'i nū? Aw'ija te o'mea werowiarukat pē nupe rai'i?

⁸ NaJaneruwarete 'ga rūi werowiarukat 'gā 'mea pē nupe. Naani. 'Ga 'ā pē mū'ē mama'e apo are ojemogyppyk ma'eramū 'gā nui.

⁹ Sā'ā ae mani'oko'o jopypeawa monoa imojopypea ipype. Ināinānī'i etee agawewi imonou ipype. A'etea imojerapa. Nan tee futat l'me ma'e 'gā. Ajepeja 'ga ete agawewi 'ga 'meramū pē nupe rai'i. A'etea 'gā o'me rerowiarukaa pē nupe, pē momoirukaa Kristu 'ga rerowiar awi rai'i.

¹⁰ A'ere je jemogyppygī pē nee te'ŷina. Jarejararete 'ga ree jane jemujari jarejemogyau. A'eramū je 'jau tekou: “Nopoiri futari 'gā Kristu 'ga ree ojemogyppyg awi”, 'jau je tekou pē nupe. Janeruwarete 'ga te tuereko tywet pē mu'e tywearera 'gā ee 'jau.

¹¹ Jeje'ewu'jag ekoete nipo 'ga amū akou. “Pejemojewagukat 'gā nupe, e'i Paulo 'ga akou”, 'jau futatee nipo 'ga amū pē nupe. Naani. Nanarūi je ako pē mu'ei ai'i. Ma'eramū 'ā 'gā je rereko tywereti. Aipo je 'ere amunipo 'ā 'gā naje rereko tyweri. Aipo je 'ere amunipo 'ā 'gā nimara'nei je 'eawer are. A'ere 'gā mara'neramū futat je 'eawer are, “yypeywar are Kristu 'ga manūi janetywera moiawamū” 'eawer are.

¹² Afutat je i'me ma'e 'gā pojo'oga pē nui.

¹³ Pēē 'ā Janeruwarete 'ga pē mū'jāu 'gā nui. “Pepoit ymāwarera mama'e awi”, e'i 'ga pē nupe. “Au'je ki mama'e apo re Moisesi 'ga remikwasiarer imū pejejemuesageawamū”, 'jau 'ga pē nupe rai'i. Moisesi 'ga remikwasiarer imū agawewi nipo pēē mama'e apowe'em. A'etea kasi mama'e tywera peapou'jaw ine pejejemifutar imū ne. Peapo kasi mama'ea pejejemuorypawamū etee ne. Naani. Pejopoar iki mama'e apo are. Pejepota'waramū pejejuee.

¹⁴ Ymā te 'ā Janeruwarete 'ga oje'ega kwasiarukari Moisesi 'ga upe rakue: “Pēporomutat pejepeyriwara 'gā nee pejejee pejeporomutara 'jawe etee futat pejejemogyau. A'eramū pēē pejejereko esage 'jawe etee futat pejejuerekou esage”, 'jau 'ga ikwasiarukaa Moisesi

'ga upe rakue. Aipo 'ga 'eawera nateepawi. Jejui 'ga nanē aipo 'jau janee 'ūina. A'eramū aipo 'ga 'eawera wesageramū janee. Aipoa 'ga je'eg imū jarejuereko esage re jane 'ga je'ega renupawi.

¹⁵ Au'je ki pejuago'o re. Ajuago'oara 'gā 'miara mara'nea 'jawe. 'Miara mara'nea te 'ā ojou'u ojomomapa. Nan kasi pejemogy ne.

'Ga 'Agesage remifutara

¹⁶ Jarejuwarete 'ga 'Agesage remifutar imū etee ki mama'ea peapo. 'Ga pājē mū mama'ea apo re nipo pēē mama'ea tywera apou'jape'ema pejemifutar ymaner imū.

¹⁷ Najuejue etee futat te 'ā janetywera jemogyi jane ywyteripe jane jemogyramū. A'eramū jane jarejemifutar imū ete mama'ea apo re mama'ea apowe'em 'ga 'Agesage remifutar imū. Janeruwarete 'ga 'Agesage remifutara mama'ea irāimā'nī te. Najaneremifutara 'jawe rūi futat 'ga 'Agesage remifutar imū mama'ea apoawa. A'eramū jane mama'ea apowe'em jarejemifutar imū Jarejuwarete 'ga upe.

¹⁸ 'Ga 'Agesage remifutar imū mama'ea apoaramū jane niapoi futari mama'ea Moisesi 'ga remikwasiarer imū etee futat.

¹⁹ Janetywet tāmējē futat te 'ā jane jarejemogyau ipy we rakue. Ma'eramū 'ā jane, jarejemifutar ymaner imū ete mama'ea apo re ete, jarejemirekoe'em are jarekou. Kūjāmeramū nanē 'ā pēē pejemene'em are pejekou. Mama'ea tywer are etee jane 'ā jarejea'aramū jarejemogyau. Mama'ea tywera etee 'ā janeje'ega.

²⁰⁻²¹ Jarejemifutar imū mama'ea apo re ete jane 'ā maira'mea etee imuorypa. Jarejuee jarepājāgaiwa rete ete 'ā jarejemogyau. Jarejemogyau 'ā jarejuerekoayau mama'ea are. Mimer are ete 'ā jarejea'aramū 'jau. Jaremara'neramū jarejuee. Jarejee etee 'ā jarejea'aramū jarejemogyau. Jareporomutare'emamū 'ā jarejemogyau jarejuee. Jarejuowajar are etee nanē 'ā jarejea'aramū etee nū. Kawīajaiwa rykur are etee nanē 'ā jarejemogyau. Nanuara apoara 'gā nooi futari Jarejuwarete 'ga pyri. Ymā je ako pē mu'ei aipo are ai'i. 'Awamū je 'jau'japa pē nupe nū. "Naaiapo apoara 'gā nūi oo ajemogyau Jarejuwarete 'ga pyri amanū re", a'e ako je pē mu'jau ee ai'i.

²² A'ere jane, Jarejuwarete 'ga 'Agesage rereko re, janeporomutaramū jarejuee. Jareku'iramū jarejemogyau. Jarepy'ata'waramū jarejemogyau. Jarepota'waramū jarejemogyau jarejuee. Jarejekau esage jane jarejuee jarejemogyau. Jarejesageramū jarejemogyau jarejaupe. Mama'ea jane iapou jare'eawer imū etee futat.

²³ 'Ga 'Agesagea jane rerekou jane mopota'waukaa jarejuee. Jane mu'akwaapa mama'ea tywera apoe'em are. Nan te ae jemogyi Jarejuwarete 'ga je'eg imū.

²⁴ Jejui Kristu 'ga ree jarejemujar ire jane jarepoia jarejemifutar ymaner imū mama'ea apo awi. Niapou'jawi futari jane mama'ea jarejemifutar ymaner imū etee.

²⁵ Jejui Kristu 'ga jane erowiarāmū Janeruwarete 'ga 'Agesagea jane mogyi Jarejuwarete 'ga ra'yramū. A'eramū ki jane mama'ea apou 'ga 'Agesage remifutar imū etee futat.

²⁶ Sajerowiaraip kasi jarejee etee ne. Sajamamara'ne ekoete kasi jarejuee ne. Sajuerekoay kasi jarejuee ne.

6

Pejejopoa

¹ Pēē 'ā jerewirera 'jawe. Kūjāmeramū pēē jerenyra 'jawe. A'eramū je pē mu'jau Jejui 'ga rerowiaara 'gā nereko are. Jejui 'ga rerowiaara 'gā amū nipo mama'ea tywera apou akou. A'eramū pēē 'gā nemiapofera kwaaw ire Jarejuwarete 'ga 'Agesage rerekwaramū pēē 'gā mu'akwaapa iapoe'em are. A'ere kasi pejeje'ega pemoywyrafen 'gā nupe ne. Pejoporogyta esage etee futat 'gā nupe. 'Gā mu'jaramū nanē pejejea'gwau mama'ea tywera apo awi. Mama'ea tywera apo awi pejejea'gue'em ire pēē nanē mama'ea tywera peapo 'gā 'jawe ne. A'eramū pēē 'gā mu'jaramū pejejerowiaraipe'ema pejejee 'gā mu'jau.

² Pejejaupe mama'ea jesaukaramū pēē pejejopoa pejejamuapyterātāukaa etee jupe. Aipo apo re pēē Kristu 'ga je'ega renupa pejemogyau.

³ Sajerowiaraip kasi jarejee etee ne. Sā'ā je pē apyraawa jereapyo ee, pe'je kasi ne pejejerowiaraipe pejejee ne. Aipoa nia'wyri. Nakūima'eteete arūi aipo 'jara 'ga. Aipo e'i ekoete futat 'ga. Ojemorytee ae nanuaramū ojeupi tee futat.

⁴⁻⁵ Pejejemiapofer are ki pēnea'at. "Esage futat te jeporowykya?" pe'je ki pejejeupe. Mama'ea esage apo re pēē pejejerowiaa pejeku'iramū pejejemiapofer are. Aipoa esage. A'ere "mama'ea esagea je aapo 'gā apyraapa" 'ea nia'wyri Janeruwarete 'ga upe. Pejejoporowyky rerekoemāue'em. "Je te pa a'jeteetewi apo ra'e" 'ea nanē wa'wrye'emamū 'ga upe nū. Pejejoporowyky are pejejea'are'emamū. Pejejemiapofer are etee pejejea'aramū.

⁶ 'Ga amū nipo 'ua pē mu'jau Jarejuwarete 'ga ree. A'eramū ki pēē mama'ea esage monou pejemu'jara 'ga upe.

⁷ “Simorytee Jarejuwarete 'ga jarejemiafofer are”, pe'je kasi ne. Naani. Nimoryteeawi futari Janeruwarete 'ga. Okwaap 'ga pēē omoryteea. Sā'ā pekōa. Juowuu tym ire 'ā, pēē juowuu a'yi etee ipa'wau jui. Nepepo'oa'uweri 'ā yky'yja juowuu 'yw awi.

⁸ Nan tee futat jane jemogyi. Jarejemifutar imū mama'e tywera apou jarejemotywea Jarejuwarete 'ga upe. A'eramū Janeruwarete 'ga jane monou mama'eukwaawa rapyaw ipe. A'ere 'ga U'agesage remifutar imū ete mama'ea jane iapo re jane mogyi nakwaparimū ete rūi ojepyri jane manū re.

⁹ Mama'e esagea etee siapo jarejemogyau 'jau. Mama'e esage apo awi jane poire'emamū nipo Janeruwarete 'ga mama'e esagea muri janee anure, wemifutara 'ara rupi.

¹⁰ A'eramū ki pēē mama'e esagea etee iapou 'gā nupe najuejue etee futat. A'ere pēē Jeju 'ga rerowiaaramū 'gā nupe mama'e esage apo a'jea futat 'ga ree pejemogypygyga resaukaawamū 'gā nupe.

Oje'ega 'ga imonou 'gā nupe, 'gā futaa

¹¹ Awamū je ka'arana kwasiaawa pygyi tepou. Sā'ā jeremikwasiarera ruwuuu.

¹² Tamueapyo pēē mama'e are 'jau. 'Gā amū afuweramū judeu 'gā maku'i are etee. “Kristu 'ga manū mome'u are judeu 'gā jane rereko tyweretei. A'eramū jane judeuramū jarejemojewag are etee 'gā mu'jau. Ee 'gā mu'e re nipo judeu 'gā pōiri jane rereko tywer awi”, 'jau nipo 'gā ajaupe. A'eramū 'gā pē mu'jau judeu 'gā nemiapofer are. “Pejemojewagukat 'ga amū upe pejejee Jarejuwarete 'ga muorypawamū”, 'jau futatee nipo 'gā pē nupe. A'ere nanarūi jane 'ga muorywi. Jeju Kristu 'ga amanū janetywera moiawamū rakue. 'Ga jane erowiarāmū te Janeruwarete 'ga 'i janee: “Jera'yra 'ga perowiat. A'eramū pēē jeremesageramū jee”, 'jau 'ga janee.

¹³ Imojewagipyreera 'gā miamū nuenupawi Moisesi 'ga je'egera. A'etea 'gā pē mu'e ekoete pejemojewagukar are. “Ore te 'ā aramu'e 'gā, sa'e etee 'jau”, e'i futatee te 'gā pē nupe, judeu'emamū pē mu'jau ekoete judeuramū ore remiapofer are. “Ore te 'ā oromojewagukat 'gā orojemiapou, sa'e te 'jau”, e'i te ojerowiarāipa ojee.

¹⁴ A'ere je naani. Jeju Kristu 'ga ree etee te jejerowiari. 'Ypeywar are 'ga manū janetywera moiawamū rakue. Aipo are je jerowiari tekou. 'Ga rerowiar ire je pōiri 'ga rerowiare'ema 'gā nemifutar awi ikue. Nafutari futari je 'gā nemiapoa. 'Gā nanē jeremifutara futare'ema nū.

¹⁵ Janeruwarete 'ga namā'ēi janejewag are. Imojewagipyreeramū ore, imojewagipyre'emamū pēē. Mīmeramū jane jareju'jaju'jawe etee futat 'ga upe. Jeju Kristu 'ga ree ojemogypygy ma'eramū etee te 'ga 'i janee: “Pēnesage jee”, 'jau 'ga janee. Jeju Kristu 'ga ree jarejemogypygy ire jane pōiri futari jarejemifutar imū mama'e apo awi. Jarejuwarete 'ga 'Agesage remifutar imū etee futat jane mama'e apoi. Aipoa esage Janeruwarete 'ga upe.

¹⁶ U'agesage remifutar imū mama'e apoara 'gā Janeruwarete 'ga omopy'ata'wa imogyau. 'Gā nee 'ga jemuaēmi. Aipo 'gā etee Janeruwarete 'ga remiayuwaretea.

¹⁷ Tejereko tyweara 'gā nupe je 'i: Au'je je rereko tywer ire. Jeju Kristu 'ga futat jejararetea. Sā'ā jeaiwa. Jeju Kristu 'ga mome'u are 'gā je nupānupāu. A'eramū je 'ga ree tenupāawera porera rerekou, 'jau je 'gā nupe.

¹⁸ Pēē 'ā jerewirera 'jawe. Kūjāmeramū nanē pēē jerenyra 'jawe nū. A'eramū je Jarejararete 'ga, Jeju Kristu 'ga resagea pē nerekoa futaa, 'jau je.

Kweramū ete jeremimome'ua.

Efesu

Paulo 'ga awau akou Efesu pe rakue. Jejuu 'ga rerowiaara 'gā 'ga imu'jau Jarejuwarete 'ga ree. (Atos 19) Mukūi kwara magwaw ire Paulo 'ga oi pe awi nū. A'ere 'ga ka'arana kwasiaa imonou 'gā nupe rakue. Moromunepawa pype 'ga 'ūina Jejuu 'ga mome'u are. A'eramū Janeruwarete 'ga, peu 'ga renamū, ka'arana kwasiarukaa 'ga upe. A'eramū 'ga ikwasiaa imonou 'gā nupe rakue.

¹ Je Pauloramū ka'aran akwasiat imonou pē nupe. Je Jejuu Kristu 'ga remimonoferamū. Ymā Jejuu 'ga je monoi kwe pewara 'gā nupe omome'waramū ikue. “Kwe pe ekwap je mome'wau ekou 'gā nupe”, 'jau 'ga jee ikue. 'Uwarete 'ga remifutar imū etee futat 'ga je monoi kwe pewaramū pē nupe. A'eramū je ka'arana kwasiaa tekou imonou Efesu pewaramū pē nupe, Jarejuwarete 'ga remiayuwamū pē nupe. Pēē 'ā pejemujat Jejuu Kristu 'ga ree rai'i. A'eramū pēē 'ga rerowiaa etee te pejemogyau. A'eramū je ka'arana kwasiaa imonou pē nupe.

² Ku'jywa 'ga Janeruwaretea. Jejuu Kristu 'ga nanē 'ā Janejararetea nū. Afutat je 'gā jejuka esagea pē nee. Afutat je 'gā pē mopy'ata'waa pē mogyau.

Kristu 'ga mama'e esage apou janee

³ Simuoryp Jarejuwarete 'ga jarejeupe 'ga remiapofer are 'jau. 'Ga 'ā Jejuu Kristu 'ga Ruwaretea, Janejararete 'ga Ruwaretea futat 'ga. Iporiayi 'ga 'ūina jane ree. Jane resaka'i 'ga jane rerekou. Mama'e esagea etee 'ga iapou 'ūina au'jeteramū janee. 'Ga ra'yrarete 'ga Kristu 'ga ree jane jarejemujaa. A'eramū 'ga mama'e esage apou janee. Ywag ipe 'ga reko. A'eramū 'ga pe awi futat mama'e esage apou 'ūina janee.

⁴ Ymā we te 'ga 'ā jane mū'ēi wemiayuwamū rakue. Ywy apoe'ēwe futat 'ga jane mū'jāu wemiayuwamū Kristu 'ga ree ojemujat ma'eramū. “Tamū'ē 'gā tejemiayuwamū 'jau. Tomoit 'gā tywera 'gā nui 'jau. A'eramū 'gā ajemogyau esage je upe 'jau”, 'jau 'ga ojeupe rakue.

⁵ 'Ga oporomutaramū jane ree. A'eramū 'ga a'eramū jane mogyau wa'yramū. A'eramū 'ga 'jau ojeupe rakue: “Teja'yrarete 'ga, Jejuu Kristu 'ga rerowiaara 'gā tamogy teja'yramū 'jau. Tejemifutar imū etee futat 'gā mogyau teja'yramū. Teja'yramū 'gā mogya je maku'iu 'gā nee”, 'jau 'ga ojeupe rakue.

⁶ Ajemuaēm 'ga jane ree. A'eramū 'ga wa'yrarete 'ga mua janee. 'Ga remifutara agawewi 'ga ra'yra 'ga. A'etea 'ga amut janee. A'eramū 'ga wa'yrarete 'ga rerowiaaramū jane mogyau wemiayuwamū. Niapoi agawewi futat ako jane mama'e esagea 'ga upe ikue. A'ete ako 'ga ajemuaēm jane ree ikue. Wa'yra 'ga jane erowiamū 'ga jane mogyau wemiayuwamū. A'eramū jane 'ga muorypa ee.

⁷ Ymā 'ā Kristu 'ga manūi 'ypeywar are janetywera mepyawamū rakue. A'eramū Janeruwarete 'ga janetywera moia jane wi, wa'yrarete 'ga manū are. A'eramū futat 'ga wea'aru'jawe'emamū janetywer are. Niapoi agawewi jane mama'e esagea 'ga upe. A'etea 'ga iporomutat nanimenime jane ree. Mama'e esagea 'ga iapou janee.

⁸ 'Ga remiapoa esage futat. Na'gā nemiapo 'jawe rūi 'ga iapoi.

⁹⁻¹⁰ U'akwaaw imū etee futat 'ga mama'e apoi. “Anure nipo je Kristu 'ga rerowiaara 'gā mogyau majepēi 'yweteewara 'jawe. Ywag ipe ajemogy ma'e 'gā, ywy pe ajemogy ma'e 'gā. Mīmera 'gā nipo je amogy majepēi 'yweteewara 'jawe”, 'jau 'ga ojeupe rakue. Aipo u'eawer are 'ga jane mueapyou. A'ere 'ga janeypy 'gā namueapyoi aipoa mama'e are rakue. A'ere 'ga 'awamū jane mueapyoi ee.

¹¹ Janeruwarete 'ga remifutar imū etee futat mama'ea ojeapou. Wemifutar imū etee futat 'ga jane mū'jāu jane mogyau wemiayuwamū. Omuoryparamū 'ga jane mogyi. Wemifutar imū etee futat 'ga jane mū'jāu Kristu 'ga ree ojemujat ma'eramū. Ywy apoe'ēwe futat 'ga 'jau ojeupe etee futat rakue: “'Gā amū tamū'ē tejemiayuwamū 'jau”, 'jau 'ga ojeupe rakue.

¹² A'eramū ore, Kristu 'ga rerowiaar ppyramū ore Jarejuwarete 'ga muorypa ee: “Ene te 'ā eneresage oree, ki Ku'jyp. Ymā te 'ā ore mū'ē ape ore mogyau ejemiayuwamū rakue”, 'jau ore 'ga upe, 'ga muorypa ee.

¹³ A'eramū 'ā pēē nanē 'awamū Kristu 'ga rerowiaa rai'i. “Jejuu Kristu 'ga 'ā amanū janetywera mepyau 'Uwarete 'ga upe. A'eramū 'ga werowiaaramū janetywera moia jane wi” 'e renupa ppy we pēē 'ā 'ga rerowiaa rai'i. Ymā te Janeruwarete 'ga 'i rakue: “Teja'yrarete 'ga rerowiaara 'gā nupe Te'agesagea tomono”, 'jau 'ga ojeupe rakue. A'eramū 'ga u'eawer imū etee futat U'agesage monou pē nupe. Sā'ā jane jarejera kwasiara jarekaraemā are. A'eramū 'ā jane jarekaraemā kwaapa. Nan tee Janeruwarete 'ga U'agesage monoi wemiayuwamū 'gā nupe. A'eramū 'ga wemiayuwamū jane kwaapa. “'Agamū jeremiayuwamū 'ga. Sā'ā 'ga Je'agesage rerekoa”, 'jau nipo 'ga pē nesag ire.

¹⁴ U'eawer imū 'ga U'agesage mua janee. A'eramū jane a'eramū jarejemogypyka jarejemogyau jarejeupe 'ga 'eawer are. "Anure nipo je teja'yramū mama'e monoi pē nupe" 'e are nanē jane jarejemogypyka jarejemogyau. 'Ga janetywera omoit jane wi. A'eramū nipo 'ga anure 'ua janee, jane rerawau ojepyri. Ojepyri jane oramū 'ga wemim̄yigatufera mua janee. A'eramū ki jane 'ga muorypa ee.

Efesu pewara 'gā nee Jarejuwarete 'ga muorypawet

¹⁵⁻¹⁶ A'ere je Jarejuwarete 'ga muorypa pē nee. 'Gā amū 'ua pē mome'wau jee: "Efesu pewara 'gā Jeju 'ga werowiat tāmējē ajemogyau. Jeju 'ga 'ā janejararetea, e'i 'gā ajemogyau", 'jau 'gā 'ua pē mome'wau jee. "Jarejuwarete 'ga remiayuwa 'gā nee 'gā oporomutaramū. Ojejuka esage pāwē pāwē 'gā 'gā nee", 'jau 'gā 'ua pē mome'wau jee. A'eramū je Jarejuwarete 'ga muorypa pē nee. "Au'jete Jeju 'ga ererowiarukat Efesu pewara 'gā amū nupe", 'jau je 'ga upe, 'ga muorypa pē nee. Teojere'emamū futat je 'ga muorypa pē nee. 'Ga upe teje'ega monoaw ipe je pē nee nanē teje'ega monou 'ga upe Jeju.

¹⁷ Jarejararete 'ga Ruwarete 'ga upe, Jeju Kristu 'ga Ruwarete 'ga upe teje'ega monou tekou pē nee. 'Ga etee 'ā esage ma'ea. 'Ga upe je 'jau: "E'agesage ako ene imonou 'gā nupe ai'i, ki Ku'jyp. A'eramū ene 'gā mu'akwaapa mama'e apo are E'agesage pyu. Ejekwaapa katu katuukaa nanē 'gā nupe nū", 'jau je tekou Jarejuwarete 'ga upe pē nee.

¹⁸ "Emueapyoukat 'gā ejemiaporam are", 'jau je 'ga upe pē nee. 'Ga te 'ā pē pyyrū pē mogyau wemiayuwamū. A'eramū nipo 'ga anure pē nerawau ywag ipe pē mogyau ojepyri. A'ea ki peapesak pejemogyau. Ojepyri jane reroo re nipo 'ga wemim̄yigatufera mua wemiayuwamū janee, kwaiwete. Aipo are 'ga pē mueapyoukara je afutat.

¹⁹ "Emueapyoukat 'gā epājē are nanē nū", 'jau nanē je 'ga upe pē nee nū. Pājērete te 'ā 'ga. A'eramū 'ga opājē mua werowiaaramū janee, wemifutar imū mama'e apo are jane poawamū.

²⁰ Wa'yrarete 'ga, Kristu 'ga manū re 'ga 'ā 'ga moferapa ete rai'i nū. 'Ga ra'ya 'ga moferapawera futat 'ga pājērete wasaukat janee. A'eramū jane "pājērete 'ga" 'e kwaapa. A'eramū 'ā 'ga a'ea opājē futat imua janee. Kristu 'ga moferaw ire 'ga 'ga rerawau ywag ipe ojepyri. A'eramū 'ga 'ga m̄yina peu futat 'ga muapygukaa ajakwatawa katy. "Je 'jawe futat ene. Amogo je ene 'wyriaramū teje'jawe. A'eramū ene ejua eapyka 'au, jejakwatawa katy", 'jau 'ga Kristu 'ga upe 'ga moferaw ire.

²¹ A'eramū Kristu 'ga 'ūina 'wyriarareteramū janee. Nokoi futari 'ga amū 'ga 'jawe. Ywagipewara 'gā 'wyriara 'gā miamū nokoa'uweri 'ga 'jawe. 'Ga te 'ā pājērete amumera 'gā apyraapa. 'Awamū ako ma'e 'gā apyraapa. Anure ako ma'e 'gā 'ga iapyraapa nanē nū.

²² Janeruwarete 'ga Kristu 'ga mogou 'wyriarareteramū ywagipewara upe, ywy pewara upe 'jau. 'Ga Kristu 'ga mogou mama'e jarareteramū. "Amogo je ene jarejerowiaara 'gā 'wyriaramū", 'jau 'ga wa'ya 'ga upe.

²³ Sā'ā aeakaga rena 'wyriaramū aerete upe. Nan tee futat Kristu 'ga reni 'wyriarareteramū werowiaaramū janee. Wakaga tywe'emamū ae nuapoa'uweri mama'ea. Aeakage'ema mama'ea nuapoa'uweri. Aeakaga nanē nuapoa'uweri mama'ea aerete tywe'emamū nū. Nan tee futat Kristu 'ga werowiaaramū jane rereki. Werowiaaramū 'ga mama'e apoukari janee. Najarejete rūi mama'ea siapo. 'Ga retee futat jane mama'ea apoi.

2

'Awamū jane Kristu 'ga rerowiari

¹ Ymā te nepeenuwi futari Jarejuwarete 'ga je'ega rakue. Na'ga remiayuwa rūi pēē nakue. Mama'e tywera etee futat pēē iapou rakue. A'eramū pēē pejemogyau amanū ma'efera 'jawe Jarejuwarete 'ga upe rakue.

² Mama'e tywera 'ā pēē iapou 'ga rerowiare'ema 'gā pyri rakue. Mama'eukwaawa 'wyriara je'ega etee futat 'ā pēē enupa pejemogyau rakue. Jarejuwarete 'ga rerowiare'ema 'gā mama'eukwaawa 'wyriara remiayuwa futat. Mama'eukwaawa 'wyriara oje'ega omono 'gā akaga pype. A'eramū 'gā mama'e tywera apou.

³ Jane nanē ako najueje etee futat Ku'jywa 'ga je'ega renupare'emamū sajemogy ikue. Jarejemifutar imū etee futat ako jane nanē mama'e apou ikue nū. A'eramū ako Janeruwarete 'ga mara'neramū janeremiapo tywer are ikue. "'Gā nemiapo tywer are je 'gā nereko tyweretei", 'jau ako 'ga janee ikue.

⁴ A'ere 'ā Janeruwarete 'ga poromutaramū nanimenime jane ree. A'eramū 'ga ajemuaēma jane ree.

⁵ Ymā jane nienuwi futari 'ga je'ega rakue. A'eramū 'ā jane jarejemogyau amanū ma'e 'jawe 'ga upe. A'ere 'ga Jeju 'ga jane erowiarāmū jane mogyi ojepyri ajemogy ma'eramamū. Janeruwarete 'ga ajemuaēm etee futat jane ree rakue. A'eramū 'ga jane ree ajemuaēmawer

ipe te futat jane katu'oka. Wemifutar imū etee futat 'ga jane katu'oka. Niapoi agawewi jane mama'e esagea 'ga upe. A'etea 'ga mama'e esagea ete wapo janee, jane katu'oka.

⁶ Kristu 'ga rerowiarē'emamū jane jemogyi amanū ma'e 'jawe Ku'jywa 'ga upe. A'ere 'ga Kristu 'ga jane erowiarāmū jane mogyi imanū'ema 'jawe. Sā'ā 'ga Kristu 'ga moferawa, 'ga manū re rakue. Nan tee futat 'ga jane mogyi 'ga rerowiarāmū. 'Ga moferaw ire 'ga Kristu 'ga mojeupia imonou ywag ipe ojepyri 'ga muapygukaa 'ga mogou 'wyriaramū ojepyri. Nan tee futat 'ga Kristu 'ga jane erowiarāmū jane mogyau 'wyriaramū Kristu 'ga pyri, Jejui Kristu 'ga ree jane jemujar ire.

⁷ Aipoa futat jane ree 'ga jemuaēma kwaawukaa janee. A'eramū nipo ywag ipe jane rekoramū jane resakara 'gā 'jau: "Kuu. Ku'jywa 'ga a'jea futat ajemuaēm 'gā nee ra'e", 'jau nipo 'gā jane resag ire. Jejui Kristu 'ga 'ā iporomutat jane ree. A'eramū 'ga amanūmū janetywera mepyau. 'Ga 'jawe etee futat 'ga Ruwarete 'ga nanē oporomutaramū jane ree nū. Ma'eramū 'ā 'ga wa'yra 'ga muri 'au ijukaukaa janee. Jane ree oporomutare'em ire amunipo 'ā 'ga wa'yra 'ga namura'uweri ijukaukaa jane katu'okawamū rakue.

⁸ A'ere 'ā 'ga jemuaēmi te jane ree. A'eramū 'ga jane katu'oka, Jejui Kristu 'ga jane erowiarāmū. Niapoi agawewi futat 'ā jane mama'e esagea 'ga upe rakue. A'etea 'ā 'ga ajemuaēm jane ree, jane katu'oka. 'Ga futat Kristu 'ga rerowiarukaa janee.

⁹ Napēnemiapofera mepyawamū rūi 'ga pē katu'ogi. A'eramū pēē pejejerowiaraipe'ema pejejee 'ga rerowiaaramū ne.

¹⁰ Janeruwarete 'ga 'ā jane katu'oka. A'eramū jane 'awamū jarejemujaa Kristu 'ga ree. A'eramū 'ga jane momyauu mama'e esage apoukaa janee. "Teja'yra 'ga rerowiarāmū je mama'e esage apoukaa 'gā nupe. Mama'e esagea etee futat peapo jeremifutar imū. Pejejejukau esage pejejee, mama'ea pēē lapou pejejaupe, ta'e 'gā nupe 'jau", 'jau 'ga janee rakue, jane katu'oge'emawe rakue.

Majepei 'yweteewara 'jawe jane jemogyi

¹¹ Pēē 'ā judeue'emamū. A'eramū ore judeuramū 'jau pē nupe: "Ore 'ā judeuramū ijewak ma'eramū arajemogyau. A'eramū 'ā judeue'ema 'gā ojewage'emamū", 'jau ako ore judeuramū pē nupe ikue. Aipo 'jau ako ore orojewag are ikue. NaJaneruwarete 'ga rūi ore mojewaka. Ore etee futat orojomojewaka. A'etea ore 'jau orojeupe: Ore 'ā ijewak ma'eramū arajemogy. Pēnea'ar iki judeue'emamū ymā pejejemogyawer are.

¹² Ymā 'ā pēē Kristu 'ga kwaape'ema futat rakue. Najarejuwarete 'ga remiayuwamū rūi 'ā pēē nakue. Najudeue'emamū pē nupe ra'ne rūi te 'ā Janeruwarete 'ga je'egi rakue. Judeuramū ore ra'ne te 'ā 'ga je'egi rakue. "Tajejuka esage pē nee 'jau", 'jau 'ga 'ā judeuramū oreypy 'gā nupe rakue. Wemiayuwamū oreypy 'gā jemogyramū 'ga aipo 'jau 'gā nupe rakue. A'eramū 'ā 'ga pēypy 'gā mogyawe'em wemiayuwamū rakue. A'eramū 'ā 'ga aipo 'jawe'em pēypy 'gā nupe rakue. NaJaneruwarete 'ga remiayuw pyramū rūi pēē nakue. A'eramū 'ā pēē 'ga pyri pejeo rapesake'ema rakue.

¹³ A'ere 'ā pēē 'awamū Jejui Kristu 'ga perowiat pejejemogyau. Ymā te neperowiari futari Jarejuwarete 'ga pejejemogyau rakue. A'eramū pēē pejejemogyau muku 'ga wi ako ma'e 'jawe rakue. A'eramū ako Jejui 'ga amanūmū, owy reko'wogukaa 'gā nupe jane wi janetywera pireitawamū ai'i, ae katu'okawamū ai'i. A'eramū pēē nanē pejejemogyau Kristu 'ga rerowiaaramū, pejejemogyau Jarejuwarete 'ga remiayuwamū. 'Ga rerowiarāmū pēē pejejemujaa 'ga ree. A'eramū pēē pejejemogyau Jarejuwarete 'ga pyri ako ma'eramū 'awamū.

¹⁴ Kristu 'ga futat 'ā judeuramū ore mota'wa judeue'emamū pē nupe. Ymā ako jane namajepei 'yweteewara 'jawe rūi jane jemogyi ikue. Judeuramū ako ore oroporomutare'emamū judeue'emamū pē nee ikue. Judeue'emamū nanē ako pēē pejejoporomutare'emamū judeuramū ore ree ikue. A'ere ako Kristu 'ga manūaw ipe futat jarejee jane poromutare'ema teepawamū ai'i. A'eramū jane 'awamū jarejemogyau majepei 'yweteewara 'jawewaramū.

¹⁵ Judeuramū ore ako aramara'neramū judeue'emamū pē nee ikue. Judeuramū ako ore Moisesi 'ga je'ega renupa ikue. A'ere ako pēē nepeenuwi futari Moisesi 'ga je'egera ikue. A'eramū ore ako aramara'neramū pē nee ikue. A'ere Kristu 'ga 'i janee ra'i: "NaMoisesi 'ga je'egera renuw are rūi Janeruwarete 'ga pētywera pe'ai pē nui. 'Ypeywar are temanūmū te je pētywera mepyi. A'eramū futat 'awamū Janeruwarete 'ga pētywera pe'au pē nui, je rerowiarāmū etee futat", 'jau 'ga janee rakue. A'eramū 'ga werowiaaramū jane mujaa ojee. A'eramū jane 'ga rerowiaaramū majepei 'yweteewara 'jawe futat. Nan 'ga jane mota'waukari jarejaupe.

¹⁶ 'Ypeywar are amanūmū te Kristu 'ga jane mamara'nepawukari jarejee. Amanūmū 'ga werowiarāmū jane mogyau majepei 'yweteewara 'jawe. A'eramū 'ga jane mota'wau 'Uwarete 'ga upe.

¹⁷Ore judeuramū orokwaa'wi futat 'ga je'ega rakue numiamū. A'eramū ore muku'i etee ajemogy ma'e 'jawe arajemogyau 'ga wi rakue. A'ere 'ā pēē judeue'emamū nepekwaawi'i futari 'ga rakue. A'eramū pēē mukumuku 'ga wi ajemogy ma'e 'jawe rakue. Kristu 'ga 'ā 'ua morogyta esage mome'wau janee najuejue etee futat. "Tejerowiaara 'gā je amota'wa Tejuwarete 'ga upe" 'ea poromū morogyta esagea judeue'emamū pē nupe, judeuramū ore 'jau. Mīnamū 'ga imome'wau janee.

¹⁸A'ere 'ā amanū re Kristu 'ga jane mota'wai 'Uwarete 'ga upe. A'eramū jane 'ga rerowiaaramū jareje'ega monoarūmū Jarejuwarete 'ga upe. Werowiarāmū 'ga 'Uwarete 'ga 'Agesage mua janee najuejue etee futat. A'eramū jane 'ga 'Agesage retee futat jareje'ega monou Jarejuwarete 'ga upe.

¹⁹A'eramū 'ā pēē 'awamū judeue'emamū nanē pejejemogyau 'ga remiayuwamū nū judeuramū ore 'jawe. A'eramū pēē natapy'ŷjamū etee 'jawe rūi pejejemogyau ore 'awamū. 'Awamū 'ā pēē Jarejuwarete 'ga rerowiaa rai'i. A'eramū pēē 'awamū 'ga ra'ya 'jawe futat pejejemogyau judeuramū ore 'jawe. A'eramū pēē 'awamū pejejemogyau orepytunamū futat.

²⁰⁻²²'Ogarete 'jawe futat jane jarejemogyau. Sā'ā 'oga apoara 'gā tupaa'mywa mowywya ra'ne. A'ere 'ā 'gā tupaa'mywarete mŷina jupe. A'ere 'gā eikwaryta monou. A'ere 'ā 'gā iapyryta nuga jupe. A'ere 'ā 'ga ikaga nuga jupe. Nan tee futat Janeruwarete 'ga Kristu 'ga rerowiaaramū jane mogymogyau wemifutaaw ipe etee futat. Oje'ega mome'warera 'gā na'ne 'ga imogyau. A'ere 'ga Jeju Kristu 'ga remimonoferamū ore mogyau. A'ere 'ga Kristu 'ga ree ojemujat ma'eferamū nanē pē monou imajatykau amumeramū ore ree. Wemifutaaw ipe etee futat 'ga Kristu 'ga rerowiaaramū jane mogymogyau. Sā'ā tupaa'mywaretea 'oga koga. Nan tee futat Jeju Kristu 'ga rekoi janererekwarareteramū. A'eramū 'ga rerowiaaramū jane jarejemogyppyka 'ga ree jarejemogyau. Ymā Janeruwarete 'ga akou omogytaaw ipe ete rakue. A'ere 'ga 'awamū 'ga rekoi jane pype U'agesageu.

3

Judeue'ema 'gā nupe Jeju 'ga mome'uawet

¹Janeruwarete 'ga jane mogy majepēi 'yweteewara 'jawe. A'eramū 'ā je Pauloramū je teporomutaramū judeue'emamū pē nee, teje'ega monou Jarejuwarete 'ga upe nanē pē nee nū.

Moromunepawa pype ako 'gā je munewi je mŷina ai'i, Jeju Kristu 'ga mome'u are ai'i. 'Gā amū je munewi je mŷina judeue'emamū pē nupe je Jeju Kristu 'ga mome'u are. "Judeue'ema 'gā nanē Kristu 'ga okatu'ok, werowiarāmū", 'jau je tekou ai'i. A'eramū judeu 'gā amū amara'neramū je ree aipo je 'e je rekoramū. A'eramū 'gā je munepa je mŷina moromunepawa pype.

²Ymā we futat te ako Janeruwarete 'ga je pyrūi je mogou Jeju 'ga mome'waramū judeue'emamū pē nupe ikue. Iporomutat 'ga pē nee. Ma'eramū 'ā 'ga je monoi Jeju 'ga mome'waukaa pē nupe. Aipoa pekwaap pejejemogyau.

³⁻⁶Ymā we futat te ako Janeruwarete 'ga 'i ojeupe rakue: "Anure nipo je judeue'ema 'gā nanē imogy teja'yramū, judeu 'gā neewe. Teja'yrate 'ga rerowiarāmū nipo je 'gā mogyau tejemiayuwamū judeu 'gā neewe", 'jau 'ga ojeupe rakue. "Judeu 'gā nee je jejuka esage te'eawer imū etee futat. A'eramū je anure judeue'ema 'gā nee nanē tejejukau esage te'eawer imū etee futat nū", 'jau 'ga ojeupe rakue. "Anure nipo je teja'yrate 'ga, Jeju Kristu 'ga rerowiaara 'gā muri 'au ywag ipe 'gā mogyau tejeypyri futat. Judeu 'gā, judeue'ema 'gā. Mīmera 'gā nipo je imua 'au teja'yrate 'ga rerowiarāmū", 'jau 'ga ojeupe rakue. Ymā 'ga namueapyoi 'gā u'eawer are rakue. A'ere 'awamū 'ga 'Agesage 'ga upe oporowyky ma'eramū ore mueapyoi 'ga 'eawer are. Jeju Kristu 'ga remimono ppyferamū ore, Jarejuwarete 'ga je'ega mome'wara 'gā. Mīmeramū 'ga 'Agesage ore mueapyoi ee. Je nanē nū. Janeruwarete 'ga je mueapyou u'eawer are. Aipo are je ka'arana kwasiari tekou. Jeremikwasiarera ka'arana mogyta re nipo pe'je pejejaupe: "Paulo 'ga eapyo futat Jarejuwarete 'ga remifutar are rakue", 'jau nipo pēē pejejaupe. "Kristu 'ga rerowiaaramū najuejue etee futat Janeruwarete 'ga jane mogy wemiayuwamū. Ymā ako Janeruwarete 'ga nomome'ui aipoa 'gā nupe rakue. A'ere 'awamū 'ga imome'ui Paulo 'ga upe", 'jau nipo pēē pejejaupe, jeremikwasiarera mogyta re.

⁷Janeruwarete 'ga je mogo ojeupe oporowyky ma'eramū. "Ekwap jera'ya 'ga mome'wau judeue'ema 'gā nupe", 'jau 'ga jee ikue. Janeruwarete 'ga iporomutat je ree. A'eramū 'ga je moporowykyaukaa ojeupe. Opājē mū 'ga je mogou ojeupe oporowyky ma'eramū.

⁸Najea'wyrri agawewi je ikue. "Kristu 'ga remiayuwamū sipo je rekoi", na'etei je ikue. 'Ga remiayua 'gā juejue kūima'eteeteramū. A'ere noko je ako tywe'ri ma'e 'jawe etee jepi. A'etea Janeruwarete 'ga esage jee. Je mogou 'ga Kristu 'ga mome'waramū judeue'emamū

pē nupe ikue. “Ekwap Jera'yrarete 'ga mome'wau judeue'ema 'gā nupe”, 'jau 'ga jee ikue. “Jejuu Kristu 'ga 'ā esage ma'ea. A'ere 'ā nepēneapyopawa'uweri futari pejejee 'ga jemuaēmawer are. Mama'e esage are etee futat 'ga paruapoweramū pē nupe, ere ki 'gā nupe”, 'jau 'ga jee ikue.

⁹ Mama'e apo ypy we 'ā Janeruwarete 'ga namueapyoi aepy 'gā wemiaporam are rakue. A'ere 'ga 'awamū 'ga 'i jee: “Awamū enereapyo jeremiapo are. Jeporokatu'ogiwet je najuejue etee futat pē nee. Judeuramū, judeue'emamū. Mīmeramū pē nee je porokatu'ogiweramū te'yina pē nee”, 'jau 'ga jee ikue. “A'eramū ene 'gā mueapyo jeremifutar are”, 'jau 'ga jee ikue. A'eferupi tee 'ā je rekoi teatau teporogytau 'gā nupe najuejue etee futat. “Judeue'emamū pē nee nanē 'ā Janeruwarete 'ga oporokatu'ogiweramū pē nee”, 'jau je 'gā nupe.

¹⁰⁻¹¹ Jarejuwarete 'ga remikatu'ogeramū jane resakawe nipo ywagipewara 'gā 'wyriara 'gā nanē weapyoramū Janeruwarete 'ga ree. “Kuu. I'akwaap 'ga”, 'jau nipo 'gā Jejuu Kristu 'ga rerowiaaramū jane resakawe. “Gā tywera moir ire nipo Ku'jywa 'ga ywy pewaramū mogyau wemiayuwamū. Judeue'ema 'gā ako niporomutari agawewi judeu 'gā nee ikue. A'etea Jejuu Kristu 'ga 'gā erowiaaramū, Ku'jywa 'ga judeu 'gā mogyau wemiayuwamū, judeue'ema 'gā neewe”, 'jau nipo ywagipewara 'gā Jejuu 'ga rerowiaaramū jane resakawe. Ywy apoe'ēwe Janeruwarete 'ga 'jau ojeupe rakue: “Ae 'gā pa je aapo tejemiayuwamū kwy”, 'jau 'ga ojeupe rakue. A'ere 'ā aepy 'gā jemotyweri etee 'ga upe rakue. A'eramū 'ga 'agamū Janejararete 'ga Jejuu Kristu 'ga mua 'au ywy pe janetywera mepyawamū janee rakue. A'eramū 'ga 'ga mogou janejarareteramū janee.

¹² A'eramū 'ga Jejuu Kristu 'ga rerowiaaramū Janeruwarete 'ga janetywera moia jane wi. 'Ga rerowiaaramū jane jarejemujaa 'ga ree. A'eramū jane a'eramū jarejenosōue'em jareje'ega monou Jarejuwarete 'ga upe.

¹³ A'eramū je 'jau pē nupe: Pē'arasig kasi je ree ne. Judeue'emamū pē nupe Jejuu 'ga mome'u are 'gā je munewi moromunepawa pype agawewi. A'etea kasi pē'arasig je rereko tywer are ne. Je rereko tywera resakawe nipo tekotee 'gā 'i ajaupe: “Paulo 'ga ajemuaēm Efesu pewara 'gā nee ra'e. Sā'ā 'ga jereko tywerukara 'gā nee Jejuu Kristu 'ga mome'u are”, 'jau nipo 'gā ajaupe je ree. A'eramū ki pēē pejeku'iramū pejejemogyau ee.

'Gā nee Jarejuwarete 'ga upe oje'ega monoawet

¹⁴ Jarejuwarete 'ga remifutar are tejea'aramū je teapyka tejenupy'āu teje'ega monou 'ga upe pē nee.

¹⁵ Ku'jywa 'ga upe jane 'ga rerowiaaramū najuejue etee futat 'jau, “Janeruwarete 'ga”, 'jau jane 'ga upe. Ywag ipe ajemogy ma'e 'gā, ywy pe ajemogy ma'eramū jane 'jau. Najuejue etee futat jane “Janeruwarete 'ga”, 'jau jane 'ga upe. 'Ga upe je teje'ega monoi pē nee te'yina.

¹⁶ “Ene te 'ā eneresage, ki Ku'jyp. Ene te 'ā pājērete. A'eramū je 'jau enee: E'agesagea ako ene imonou Efesu pewara 'gā nupe ai'i. A'eramū ene 'gā mopājēu E'agesage pyu, ki Ku'jyp, 'jau je enee 'gā nee”, 'jau je 'ga upe. “E'agesage pyu ejerowiarukaa etee te ekou 'gā nupe, 'gā mojemogyppygukaa ejee”, 'jau je 'ga upe pē nee. 'Ga rerowiaarareteramū nipo pejepoire'ema 'ga rerowiar awi. Pejejeupe mama'eay jesaukar ire miamū nipo pejepoire'ema futat 'ga wi. 'Ga Agesageu pejejemogyppyg ire nipo pēē pejepoire'ema 'ga rerowiar awi mama'eay jesaukar ire miamū. Pejejeupe imur ire nipo pēē mama'e apou 'ga remifutar imū etee futat.

¹⁷ “Afutat je Kristu 'ga rekoo 'gā pyri”, 'jau je 'ga upe pē nee. “Werowiaaramū Kristu 'ga rekoi 'gā pyri. Aipoo'a afutat”, 'jau je 'ga upe pē nee. “Emoporomutarukat 'gā ejee. Ajuee nanē 'gā moporomutarukaa nū. Ajuee oporomutaramū nipo 'gā mama'e esagea etee iapoi ajaupe. Ejee 'gā moporomutarukaramū nipo 'gā mama'e esagea etee iapou ene upe”, 'jau je 'ga upe pē nee.

¹⁸ “Emueapyo 'gā 'gā nee eporomutar are”, a'e je 'ga upe pē nee. “Ejemiyuwamū najuejue etee futat emueapyo 'gā ee”, 'jau je 'ga upe pē nee. Kristu 'ga iporomutat pē nee a'jea futat. A'ere 'ā nepēneapyo katui we 'ga pejefutar are. A'eramū je 'jau Jarejuwarete 'ga upe pē nee: “Emueapyo 'gā ee”, 'jau je 'ga upe pē nee.

¹⁹ Afutat je pēē ikwaawa, “Kristu 'ga iporomutat jane ree a'jea futat” 'e are pēneapyoa. Janereapyopawa'uweri agawewi jane 'ga jarefutur are. A'etea je ee pēneapyo'ia afutat. A'eramū je 'jau Ku'jywa 'ga upe: “Emueapyo 'gā ejee, 'gā nee eporomutar are”, 'jau je 'ga upe pē nee. “Ojee eneporomutar are weapyo re, nipo 'gā jemogyi ene 'jawe”, 'jau je 'ga upe pē nee.

²⁰ Nitywi futari Janeruwarete 'ga remiapoe'ema mama'e mū. “Aga 'ga nuapoi”, na'jawi futari 'ga upe. Aye'emetete futat 'ga mama'e apoi. Aerefetee upe te mama'e apo rayramū rēwējēmī. A'ere Ku'jywa 'ga upe naayi futari mama'e apoa. “Mama'e esagea eapo jee”, ojeupe jane 'eramū 'ga mama'e esage apou janee, ojeupe janeremienūiwera apyraapa.

Naeapyoi futari ae 'ga remiaporam are. 'Ga te okwaap ae rerekoa. A'ere 'ga iapoi futari janee. U'agesagea 'ga imua janee, ojeupe mama'e apoukaawamū. A'eramū 'ga U'agesageu futat mama'e apou janee.

²¹ A'eramū ki Jejuu Kristu 'ga ree ojemujat ma'eramū jane Ku'jywa 'ga muorypa jareojere'emamū, jarejeupe 'ga remiapofer are. Jejuu 'ga rerowiaaramū jane najuejue etee futat 'ga muorypa jareojere'emamū, 'jau je pē nupe.

4

Majepei yweteewara 'jawe jane jemogyi

¹ Moromunepawa pype 'gā je munewi Jejuu 'ga mome'u are. A'eramū je 'jau pē nupe: Janeruwarete 'ga 'ā wa'yra 'ga mua 'au ywy pe janetywera moiawamū rakue. A'eramū pēē pejemogyau esage 'ga upe, 'jau je pē nupe. Ymā te 'ā 'ga pē pyyrūi wemiayuwamū rakue, wemifutar imū mama'e apoaramū rakue. A'eramū ki pēē pejemogyau esage 'ga upe. 'Ga remifutar imū etee futat pejemogyau 'ga upe.

² Pejerowiaraip kasi pejejee te ne. Pēpota'wa pāwē ki pejejee. Pejejeaite'ema pejejee. Pejemara'ne'emamū nanē pejejee nū. Pejejee pēmara'ne'ema pejejee pēporomutara resaukaa.

³ Janeruwarete 'ga 'Agesagea pē mogy majepei yweteewara 'jawe. A'eramū ki pēē jepepota'waramū pejemogyau pejejee. Mama'e tywera kasi peapo pejejaupe ne.

⁴ Kristu 'ga rerowiaaramū jane najuejue etee futat jane jemogyi majepei yweteewara 'jawe. Majepei tee futat 'ga 'Agesagea. Werowiaaramū 'ga jane rerawau najuejue etee futat 'Uwarete 'ga pyri ojeupi anure. Poromū 'ga ree jane jemogyppykawa 'ga rerowiaaramū.

⁵ Majepei tee Janejararete 'ga. 'Ga ree etee futat jane jemogyppyka jemogyau. 'Ga rerowiarāmū etee jane jarejepymāūkaa 'y pe 'ga amū upe. 'Jejuu Kristu 'ga je arowiat. 'Ga futat jetywera moia je wi. A'eramū je 'awamū mama'e esagea etee iapou 'ga upe', 'jau jane najuejue etee 'ga rerowiaaramū jarejepymāūkaa 'y pe 'ga amū upe.

⁶ Majepei tee futat Janeruwarete 'ga. 'Ga futat jane apou najuejue etee futat rakue. A'eramū 'ga Janejararetea. A'eramū jane apoarera 'ga etee futat jane mogyawarū wemifutara mama'e apoaramū. Jane pype futat 'ga rekoi U'agesagea pyu.

⁷ 'Ga 'Agesagea Kristu 'ga imua werowiaaramū janee najuejue etee futat. Ojeupe mama'e esage apoukaawamū 'ga imua janee. Opājēa 'ga imua janee ojeupe jane moporowykaūkaa wemifutar imū etee futat.

⁸ Ymā 'ga amū ka'arana kwasiari ee rakue:

“Ojee iporomutare'ema 'gā 'arimū nipo Kristu 'ga okwapa.

A'eramū nipo 'ga 'gā faa 'gā nerawau 'gā nerojeupia ywag ipe.

Nipojeupawi 'gā awamū 'e resaukaawamū 'ga 'gā nerawau.

Aipo rupi we futat nipo 'ga mama'e esage mua ywy pewaramū janee”,

'jau 'ga amū ikwasiaa ka'aran are rakue.

⁹⁻¹⁰ Ywy pe 'ga 'ua janee kunumiakramū rakue. A'ere 'ga 'ā waranuw ire ojejukaukaa 'gā nupe rakue. A'ere 'ga oferapa awau ojeupia ywag ipe nū, 'Uwarete 'ga pyri nū. A'eramū 'ga 'awamū akou Janejarareteramū futat janee. Ywy pewaramū Janejarareteramū, ywag ipewara 'gā Jarareteramū. Mīmeramū 'ga rekoi Janejarareteramū janee.

¹¹ 'Ga etee futat mama'e esage mua janee ywy pewaramū. 'Ga futat U'agesagea mua janee, ojeupe mama'e esage apoukaawamū. Jane mū upe 'ga 'jau: “Te'agesagea je omono pē nupe. A'eramū pēē pejewau je mome'wau kwe pe tekotee 'gā nupe, 'gā mueapyou je ree”, 'jau 'ga jane mū upe, jane monou kwe pe. Amumeramū jane mū upe 'ga 'jau: “Te'agesagea je omono pē nupe. A'eramū pēē Jarejuwarete 'ga je'ega mome'wau pejejepyriwara 'gā nupe”, 'jau 'ga jane mū upe. Ajepeja 'gā nupe nanē 'ga 'jau: “Te'agesagea je amono pē nupe teporogyta esage mome'wawamū. Kwe pe pelkwap jeporogyta esage mome'wau pejepytuna 'gā nupe, je rerowiarukaa 'gā nupe”, 'jau 'ga 'gā amū nupe. Amumera 'gā nupe 'ga 'jau: “Te'agesagea je amono pē nupe, pē mogyau 'wyrriaramū tejerowiaara 'gā nupe. Pemu'e je rerowiaara 'gā jeremifutar are”, 'jau Kristu 'ga 'gā nupe.

¹² Opājēa 'ga imua werowiaaramū janee ojeupe jane moporowykykaawamū. 'Ga pājē mū etee futat jane mama'e apoi 'ga upe. “Peporowyky jee”, 'jau 'ga janee. “Je rerowiaara 'gā pēē imojemogyppygukaa etee te je ree, 'gā mu'jau je ree”, 'jau 'ga janee. “Amumera 'gā je rerowiaara 'gā ojemogyppy'gi etee je ree. A'eramū pēē pejeporogytau 'gā nupe, 'gā mojemogyppygukaa etee te je ree”, 'jau 'ga janee.

¹³ A'eramū jane pāwēūjē etee futat jarejemogyppyka 'ga ree. A'eramū nipo jane pāwēūjē etee futat nanē Jarejuwarete 'ga ra'yra 'ga kwaapa nū. A'eramū jane jarejeapyoramū jarejemogyau Kristu 'ga ree. A'eramū jane jarejemogyau Kristu 'ga 'jawe futat. Mama'e esagea etee jane iapou 'ga 'jawe futat.

¹⁴ Kunumī 'jawe kasi sajemogy ne. Kunumīa werekoemāwe erowiaa. Nokwaawi 'gā werekoemā. A'ere kasi pēē nanarūi ne. Peenup katu ra'ne ki. Yara sīāmogoe'ema 'jawe nanē kasi pēē ne. Yara sīāmogoe'ema 'ā nuwi wupawer ipe ete. 'Y ryjuapi tete'ia we 'ā imuarekorekoukaa kwe katy awau ko katy ete 'ua nū 'jau akou. A'ere kasi pēē nanarūi ne. Peenup katu ra'ne ki morogytaa. Kasi a'e pe morogyta 'me upe pejemoryteeukar ine. Jejuī 'ga etee te jane sirowiat jarejemogyau. I'me ma'e 'gā nipo 'ut futat o'meramū janee, o'me rerowiarukaawamū janee. A'ere kasi sirowiat ne. "Simorytee 'gā 'jau", e'i te nipo 'gā o'meramū janee.

¹⁵ A'ere jane mama'e a'jea etee futat imome'ui jarejaupe. Jarepota'waramū jarejuee. A'eramū jane jarejemogyau Kristu 'ga 'jawe. Kristu 'ga 'ā werowiaaramū Janerwaretea. A'eramū Kristu 'ga aeakaga 'jawe. 'Ga rerowiaaramū jane jarejemogyau 'ga rete 'jawe.

¹⁶ Sā'ā aeakaga etee aerete mujara. Aerajyga 'ā ae mokuřjūka pāwē gatu etee te futat. Aerajyga 'ā ae koka. A'eramū 'ā aeretea otesirūgatue'emamū waranupa. Nan tee futat Kristu 'ga werowiaaramū jane mujari jarejuee. A'eramū jane najuepote etee futat mama'e esage apou Kristu 'ga rerowiarukaa ete ete jarejaupe. Jarejuee jarepota'waramū, jane Kristu 'ga rerowiarukaa ete ete jarejaupe. A'eramū jane jarejemogyau Kristu 'ga 'jawe.

Mama'e tywera apo awi ki sapoit

¹⁷ Jarejararete 'ga upe je porowykyi. A'eramū je 'jau pē nupe: Au'je ki mama'e tywera apo re. Au'je futat mama'e apo re Jejuī 'ga rerowiare'ema 'gā 'jawe. 'Ga rerowiare'ema 'gā naea'ari Jarejuwarete 'ga remifutar are.

¹⁸ Nokwaawi 'gā 'ga remifutara. Mama'eukwaawa 'wyrriara 'gā mueapyoukare'ema Janerwarete 'ga remifutar are. A'eramū 'gā afuewere'emamū 'ga kwaaw are.

¹⁹ Jejuī 'ga rerowiare'ema 'gā nuenosī mama'e tywera apoa. Mama'e tesirūa ete 'gā iapou. Wemirekoe'ema kūjā are 'gā akou. Kūjā 'gā nanē omene'em are akou. Najemuari futari 'gā ajemogyau. Ni'akwaawi 'gā mama'e tywera apoe'em are.

²⁰ A'ere naKristu 'ga rūi jane mu'ei mama'e tywera apo are. A'eramū jane Kristu 'ga rerowiaaramū, mama'e tywera apoara 'gā 'jawe ete iapowe'em.

²¹ Kristu 'ga rera renupa ypy we nipo pēē pejemujaa 'ga ree rai'i. A'eramū nipo Kristu 'ga mome'wara 'gā mama'e a'je are etee futat pē mu'jau rai'i.

²² A'eramū nipo 'ga mome'wara 'gā 'jau pē nupe: "Kristu 'ga rerowiare'ema 'ā pēē mama'e tywera apo are ete pejejea'aramū pejemogyau rakue. A'ere 'awamū 'ga perowiat pejemogyau. A'eramū ki pēē pejejeateeramū mama'e tywera apo awi", 'jau 'gā pē nupe, pē mu'jau ee. "Au'je ki mama'e tywera apo are pejemorytee re", 'jau nipo 'gā pē nupe, pē mu'jau ee.

²³ "Au'je ki mama'e tywer are pejejea'ar ire. Eje'jawe je muea'arukar ape mama'e are, ki Ku'jyp, pe'je ki 'ga upe", 'jau nipo 'gā pē nupe, pē mu'jau ee.

²⁴ "Pejemuesageukat Jarejuwarete 'ga upe. Oje'jawe pejemogy futat 'ga afutat. A'eramū ki pēē iapoukaa 'ga upe pejeje. 'Eje'jawe je mogo ape', pe'je ki 'ga upe. 'Ga 'jawe pejemogy re pēē mama'e esagea etee futat iapou 'ga 'jawe", 'jau nipo 'gā pē nupe, pē mu'jau ee.

²⁵ A'eramū ki pejejeateeramū peje'me awi. Au'je ki morogyta 'me mome'u re. Majepēi 'yweteewara 'jawe jane Jejuī 'ga rerowiaaramū jane jemogyi. A'eramū ki pēē mama'e a'jea etee futat imome'wau pejejaupe.

²⁶ Pejemara'neramū miamū kasi mama'e tywera peapo ne. Pejejeateeramū kamēsiete pejemara'ne awi. Pejekowe'em ko'aramuku pejemara'ne rerekou ne. Kamēsiete pejejeateeramū pejemara'ne awi. Kwara ose'emauwe ki pēmara'nepap.

²⁷ Kasi a'e pe pejemara'ne awi pēneateea'ne'emamū mama'eukwaawa 'wyrriara mama'e tywera apoukari pē nupe ne.

²⁸ Imuna ma'eramū nanē ki pepoit futat mama'e are pejemunarū awi. Peporowykyi ete ki pejejeupe mama'e muaw are. A'eramū pēē mama'e monou imama'e'ema 'gā nupe.

²⁹ Peje'egaip kasi pejejaupe ne. Mama'e esagea etee ki pemome'u pejejaupe, 'gā poaa Jejuī 'ga rerowiar are.

³⁰ Pemu'arasig kasi Jarejuwarete 'ga 'Agesagea ne. Esage ma'ea Janerwarete 'ga 'Agesagea. A'eramū pēē, mama'e tywera apo re, 'ga 'Agesage mu'arasiga ne. Mama'e esagea etee futat iapou 'ga 'Agesage muorypawamū. Kristu 'ga rerowiarāmū Janerwarete 'ga U'agesage mua janee ikue. Ymā Janerwarete 'ga 'i rakue: "Teja'yra 'ga 'gā erowiarāmū je Te'agesage monoi 'gā nupe, 'gā nerekwaramū", 'jau 'ga rakue. Anure nipo Kristu 'ga Jarejuwarete 'ga 'Agesage rerekwaramū jane rerooi Jarejuwarete 'ga pyri.

³¹ A'eramū ki pēē mama'e tywera apowe'em. Pejejeateeramū kamēsiete futat 'gā nayka awi. Pēmara'ne kasi 'gā nee ne. Pejeje'egayawe'em 'gā nupe, 'gā kurape'ema. Au'je futat pejejeupe pejeporomutare'em awi.

³² Pēpota'wa etee futar iki pejejee pejejemogyau. 'Ga amū mama'e tywera pejejeupe iapo re miamū, pejejea'are'emamū au'jeteramū 'gā nayka are. Pejejeateeramū kamēšiete futat 'gā nayka awi. Janetywera moir ire 'ā Janeruwarete 'ga wea'aru'jawe'emamū futat jane rayka are. 'Ypeywar are amanūaw ipe 'ā Kristu 'ga janetywera mepyau rakue. A'eramū 'ā 'ga aetywera moir ire wea'aru'jawe'emamū ee. A'eramū ki pēē nan tee futat pejejea'are'emamū au'jeteramū 'gā nayka are ne. Pejejeateeramū kamēšiete futat 'gā nayka awi. Pejejea'aru'jawe'emamū futat ee nū.

5

Sajemogy esage 'ga upe

¹ Pēē 'ā Jarejuwarete 'ga ra'yra. Oporomutaramū 'ga pē nee. A'eramū ki pejejemu'jau 'ga ree. Pejejemogyau esage 'ga upe.

² Kristu 'ga 'ā oporomutaramū jane ree. A'eramū 'ā 'ga amanūmū janetywera mepyawamū rakue. Ymā 'ā judeu 'gā weymawa etee ijukau iapyau otywera mepyawamū rakue. Jarejuwarete 'ga muorypawamū nanē 'gā iapyau rakue nū. Jany kasiga nanē 'gā iapyau 'ga muorypawamū rakue nū. A'ere ako 'awamū Kristu 'ga jejukaukari 'gā nupe janetywera mepyawamū ai'i. A'eramū ki pēē pejeporomutaramū pejejee, 'ga 'jawerimū etee futat.

³ Jarejuwarete 'ga remiayuwamū futat pejejemogyau. A'eramū ki pēē pejejemogyau esage 'ga upe. Pejejemogyawe'em futat tesirūgatu 'ga upe. Pejejemirekoe'ema kūjā are pejekowe'em. Kūjāmeramū nanē pejekowe'em pejemene'ema kūima'e are. Pejemuarū ki pejejemogyau. Pejekaemā kwai are etee nanē pejejea'are'emamū nū. Pejejea'are'emamū mīmera mama'e are. Aipoa mama'e mome'wawe'em pejejaupe.

⁴ Mama'e tywera mome'wawe'em futat pejejaupe. Peje'me'emamū nanē pejejaupe nū. Peje'eg esage etee futar iki pejejaupe Jarejuwarete 'ga muorypawamū. Pejejeupe Jarejuwarete 'ga mama'e apo re nanē pēē 'ga muorypa ee nū.

⁵ Janeruwarete 'ga jane'wyriararetea Jēju Kristu 'ga retee. 'Gā futat nipo anure ajemogou 'wyriarareteramū janee. A'eramū nipo 'gā anure wemiayuwamū jane rerawau ojepyri mama'e esage mua janee. A'ere nipo wemirekoe'em are ako ma'e 'gā na'gā nemiayuwa rūi. Omene'em are ako ma'e 'gā, okaraemā kwai are tee ojerowiaraip ma'e 'gā. Mīmera 'gā na'gā nemiayuwa rūi. A'eramū nipo 'gā awawe'em 'gā pyri amanū re. Okaraemā kwai are etee ojerowiaraip ma'e 'gā ojemogypyky okaraemā kwai are etee ajemogyau. Nojemogypygy 'gā Jarejuwarete 'ga ree. A'eramū okaraemā are ojemogypyky ma'e 'gā ajemogyau maira'me are ojemogypyky ma'e 'gā 'jawe Jarejuwarete 'ga upe. A'eramū Janeruwarete 'ga aipo 'gā nerawawe'em ojepyri anure. Aipoa jane ikaawa.

⁶ 'Gā amū nipo 'jau 'ua pē nupe: "Pē'je pejejuu mama'e tywera apou ore pyri", 'jau nipo 'gā pē nupe. A'ere kasi perowiat 'gā ne. Pē moryteeu te 'gā nuri. A'eramū nipo anure Janeruwarete 'ga 'gā nerekou tyweaete 'gā tywer are. Nuenuwi futari 'gā 'ga je'ega. A'eramū 'ga 'gā nerekou tyweaete oje'ega renuwe'em are.

⁷ A'eramū ki pēē mama'e tywera apowe'em futat 'gā pyri.

⁸ Ymā mama'e tywera peapo futat rakue. Ypytunimū wata ma'e 'jawe pēē pejejemogyau rakue. A'ere 'awamū Kristu 'ga pētywera moiri pē nui rakue. A'eramū pēē 'awamū pejejemogyau 'arimū wata ma'e 'jawe. A'eramū pēē 'awamū mama'e esage etee futat iapou 'ga upe.

⁹ 'Arimū wata ma'e 'jawewara 'gā mama'e esagea etee wapo. Mama'e a'jea etee nanē 'gā imome'wau. A'eramū pēē 'awamū mama'e esagea etee futat iapou a'jea futat.

¹⁰ Pejejemu'jau pejejemogyau Jarejuwarete 'ga remifutar are.

¹¹ Ypytunimū wata ma'e 'jawewara 'gā mama'e tywera etee wapo. A'ere kasi peapo mama'e tywera 'gā pyri ne. Mama'e esage etee futat iapou. A'eramū mama'e tywera apoara 'gā ojenosōu wemiapofera renosōu pē nui. Pēnemiapo esage resakawe 'gā wemiapo tywer are weapyoramū. A'eramū nipo 'gā 'jau: "Tÿÿ. Mama'e tywera etee nipo je aapo tekou ra'e jepi", 'jau nipo 'gā ojeupe, pēnemiapo esage resag ire.

¹² Nāinānī'ī rūi te 'ga remiapo mama'e tywera. Jemime agawewi 'gā iapoi. Eukwere ae mojenosī 'gā nemiapo tywera. A'eramū 'gā jēmī ojenosōue'em mama'e tywera renosōue'em.

¹³⁻¹⁴ Ypytunimū 'ā ae nuesagi mama'ea. A'ere 'ā ae 'arimū mama'e resagi katu katu. Nan tee futat jane ikaawa katu katu jarejemogyau. Ymā 'ā 'ga amū 'jau rakue:

"Mama'e tywera apoaramū pēē amanū ma'e 'jawe pejemogy Ku'jy'wa 'ga upe.

Oset ma'e 'jawe nanē pejejemogyau nū.

A'eramū ki pēē pejepaka, pejefu'ama pejejemiapo tywer awi.

A'eramū Kristu 'ga pē mogyau 'arimū wata ma'e 'jawe ojeupe",

'jau 'ga amū imome'wau rakue.

¹⁵ A'eramū ki pēē pejejea'gwau mama'e tywera apo awi. Mama'e esage etee futat pēē iapou. Pē'akwaap katu ki mama'e are. Peko kasi i'akwaawe'ema 'gā 'jawe ne.

¹⁶ Kwaiwete 'gā mama'e tywera etee iapoara 'gā. A'ere ki peko esage mama'e tywera apoara 'gā pype. Pejenosi awi Jejuu 'ga mome'u awi 'ga rerowiare'ema 'gā nupe. 'Gā pyri pejemogyau pēē 'ga mome'wau futat 'gā nupe.

¹⁷ Akotee ma'e 'gā 'jawe ete kasi pejemogy ne, pejeje'ēran ekoeteramū ne. Jejuu 'ga rerowiarāmū pēē 'ga je'ega te imome'wau pejejaupe, pejepamū'jau 'ga rerowiar are. Jarejuwarete 'ga remifutar imū etee futat pēē mama'e apou. Mama'e apo enune pēē 'jau pejejeupe: "Ma'ja te Janeruwarete 'ga afutat je iapoa?" 'jau pēē iapoe'ēwe. A'eramū pēē 'ga remifutar imū etee mama'e apou 'ga upe.

¹⁸ Kawīajaiwa taetu itykure'ema. Kawīajaiwa tykuara 'gā oje'egaw are amā'jāue'em. Oje'ega momoa ekoete te futat ajemogyau. A'eramū kasi pēē nan ine. Pejerekoukaa Jarejuwarete 'ga 'Agesage upe etee futat.

¹⁹ Jarejuwarete 'ga je'eg imū etee futat pejemomogytau. Jarejuwarete 'ga marakau etee futat pejepamūrypa. 'Ga remiapofer are pejemaraka'aga Jarejuwarete 'ga upe. Kristu 'ga remiapofer are nanē pejemaraka'aga 'ga upe nū.

²⁰ Ku'jywa 'ga Janeruwaretea. A'eramū pēē Kristu 'ga rerowiaaramū pejejeupe 'ga remiapofera mama'e are 'ga muorypa.

²¹ Kristu 'ga je'ega peenup pejemogyau. A'eramū ki pēē 'ga rerowiaaramū nanē pejeje'ega renupa pejemogyau nū.

Emireko ma'e 'gā, imen ma'e 'gā netee

²² Kūjāmeramū ki pēē, imen ma'eramū, peapyaka pejemena je'eg are. Kristu 'ga remiayuwamū nanē pēē. Kristu 'ga je'ega renupa pejemogyau. A'eramū ki pēē nan tee futat pejemena 'ga je'ega nanē enupa nū.

²³⁻²⁴ Kristu 'ga 'ā akou 'wyrīaramū werowiaaramū janee. A'eramū 'ā jane 'ga rerowiaaramū 'ga je'ega renupa jarejemogyau. 'Ga 'ā ae akaga 'jawe. 'Ga rerowiaaramū jane jarejemogyau 'ga rete 'jawe. 'Ga futat werowiaaramū jane katu'okara. A'eramū 'ā 'ga akou 'wyrīaramū janee. Nan tee futat kūima'efera 'gā jemogyi wemireko 'gā jaramū. A'eramū ki pēē kūjāmeramū pejemena je'ega renupa katu katu.

²⁵⁻²⁶ Kūima'eferamū nanē pēē pejeporomutaramū pejemireko are. Sā'ā Kristu 'ga poromutara werowiaaramū jane ree. Nan tee futar iki pēē pejeporomutaramū pejemireko are. Kristu 'ga 'ā oporomutaramū jane ree. A'eramū 'ā 'ga ojejukaukaa 'gā nupe jane ree oporomutaawer ipe etee futat jane katu'okawamū 'Uwarete 'ga upe. 'Ga je'ega rerowiarāmū jane jarejekatu'ogukaa 'ga upe. A'eramū 'ga janetywera moia jane wi. A'eramū jane jarejewi imoir ire jarejepymīāukaa 'y pe 'gā amū nupe, jaretywera 'ga imoira resaukaawamū.

²⁷ A'eramū nipo 'ga anure werowiaaramū jane rerawau ywag ipe ojeupi. A'eramū nipo 'ga werowiaaramū jane resakawe 'jau janee: "Esage ete je rerowiaara 'gā. Nitywi futari mama'e tywera 'gā pype", 'jau nipo 'ga ojeupe, ojepyri werowiaaramū jane reroo re.

²⁸ Pejejuka esage pejee. Nepejereko tyweri 'ā. Nan tee futat pēē pejemireko rerekou esage.

²⁹ Najuejue etee futat 'ā jane jekūai jarejee. Nitywi futari 'ā ojee ijekūae'ema 'gā amū. Jarepy'arayparamū 'ā jarejemi'waa. Jarejero'wau jarejefuanuga. Jarejereko tywere'ema 'ā. Nan tee futat Kristu 'ga jane poriaawetygi werowiaaramū. 'Ga rete 'jawe jarejemogyau 'ga upe. A'eramū 'ga ojejukau esage jane ree.

³⁰ Ojee jane jemujar ire 'ga ojejukau esage jane ree.

³¹ Ymā Janeruwarete 'ga oje'ega kwasiarukari 'ga amū upe rakue: "Kūima'e 'ga je aapo kūjā ēē reewe.

A'eramū nipo kūima'e 'gā wemirekorauwe opojo'ogamū ujara 'gā nui.

A'eramū futat oje'aa wemireko are.

Ajee oje'ar ire 'gā ajemogyau majepe teewara 'jawe jee", 'jau 'ga kwasiarukaa 'ga amū upe rakue.

³² Mama'e a'je are futat 'ga ka'arana kwasiarukari 'ga upe rakue. Ymā janepyy 'gā naeapyoi ee rakue. A'ere jane 'awamū janereapyoramū ee. Kristu 'ga ree nanē futat aipoa ka'arana kwasiara rakue, 'ga rerowiaaramū jane ree nanē futat e'i nū. Kristu 'ga ree jarejemujaa jane jemogyi majepe 'yweteewara 'jawe.

³³ A'eramū 'ga jane ree pāwē pāwē futat ikwasiarukaa rakue. A'eramū pēē kūima'eramū pejeporomutaramū futat pejemireko are pejee pejeporomutara 'jawe. Pejee 'ā pēporomutat pejemogyau. A'eramū pēē nan tee futat pejeporomutaramū pejemireko are. Kūjāmeramū pēē, imen ma'eramū pejemena mojerowiaa nanē nū.

6

Ta'yriara 'gā 'gā na'ya 'gā netee

¹ Kunumīnamū nanē pēe pejejara 'gā je'ega renupa etee pejejemogyau. Kristu 'ga remiayuwamū pēe. A'eramū pēe pejejara 'gā je'ega renuwa wesageramū futat.

²⁻³ Ymā Janeruwarete 'ga 'i janepy 'gā nupe we futat rakue: "Peanuw etee ki pejejuwa 'gā. Pejeje 'gā nanē pēe ianupa etee nū", 'jau 'ga 'gā nupe rakue. "Ujara 'gā nenupara 'gā lje'eganup ma'eramū ajemogy. 'Gā jaruete ajemogy. Ujara 'gā 'gā wenupe. A'eramū 'gā jaruete ajemogyau. Aipo 'gā ajemogy namutamutat. Namanūa'nei aipo 'gā", 'jau 'ga 'gā nupe rakue.

⁴ Pēe nanē 'gā nuwamū pejeja'ya 'gā nerekou esage nū. Pemue ekoete kasi 'gā ne. Kasi a'e pe 'gā mara neramū etee ajemogyau ne. A'eramū pēe kūima'eramū pejeja'ya 'gā mu'jau 'gā neko esage are. Kristu 'ga 'eawer imū pejeja'ya 'gā mu'jau 'gā mosōu mama'e tywera apo awi.

Oporowyky ma'e 'gā morowyky jara 'gā netee

⁵ Pēe mū nipo pejeporowykyau pejejerekwara 'gā nupe. A'eramū pēe pejejerekwara 'gā je'ega renupa etee. Pepojeup futar iki pejejerekwara 'gā. Sā'ā pēe Kristu 'ga je'ega renuwa. Nan tee futar iki pejejerekwara 'gā je'ega peenup.

⁶ 'Gā amū nipo oporowykyau esage werekwara 'ga remiesagamū etee. Werekwara 'ga remiesaga tywi nipo 'gā oporowykyau esage 'me. A'ere kasi nanarūi peapo ne. Pejejepyri pejejerekwara 'ga rekoe'emamū nanē ki mama'ea peapo esage pejejerekwara 'ga 'eawer imū etee futat. Pekwaap 'ā Jarejararete 'ga Jejui Kristu 'ga. A'eramū pēe pejeporowykyau esage 'ga muorypawamū. Aipoa Janeruwarete 'ga ifutaa.

⁷ Pejeporowykyau esage futat pejeku'iramū pejejemogyau. Napejejerekwara 'ga upe etee rūi peporowyky. Nanuaramū Jarejararete 'ga upe nanē futat peporowyky nū. A'eramū je 'jau pē nupe: Peporowyky esage ki, a'e je pē nupe.

⁸ Pēporowyky esage resag ire Janeruwarete 'ga pē mepyi pēporowyky esageawer are anure. Pejejerekwara 'gā nupe mama'e apoaramū, pejejeupe etee mama'e apoaramū. Mīmeramū nipo 'ga pē mepyi pēporowyky esageawer are anure. Aipo are ki pēnea'at pejejemogyau.

⁹ Pēe mū pejejeupe oporowyky ma'e 'gā nerekwara. Pejejeupe oporowyky ma'e 'gā nerekou esage, Jarejuwarete 'ga remifutar imū. Au'je ki pejeje'egay re 'gā nupe. Majepei tee Janejararete 'ga. 'Gā jararete 'ga pējara nanē futat nū. 'Ga upe jane jareju'jau'jawe etee futat. 'Ga futat ojejukau pāwē pāwē jane ree.

Mama'eukwaawa 'wyriar awi ki sajea'gu

¹⁰⁻¹¹ Ka'arana kwasiapawe'ēwe je pē mu'akwaapa mama'e tywera apo awi. Sā'ā jefaruua. Aparuowajare'emawe 'ā 'gā itajuaity munewa u'yw awi. Nan tee futat jane. Jarejuwarete 'ga remiayuwamū jane jemogyi jefaruu 'jawe. Jarejararete 'ga pājērete. A'eramū pēe pejejemujaa a'jea futat 'ga ree. A'eramū 'ga U'agesage mua pē nupe. A'eramū 'ga pājēa pē a'gwau mama'eukwaawa 'wyriar awi. "Tamote'arukat 'gā Ku'jywa 'ga upe 'jau", 'jau nipo mama'eukwaawa 'wyriara ojeupe pē nee. A'ere Janeruwarete 'ga U'agesage muri pē nupe. A'eramū pēe mama'eukwaawa 'wyriara je'ega renupe'ema.

¹² Najarejaupi rūi jane juowajari. Mama'eukwaawa 'wyriara remiayuya te jane siowajat. Pejefuakaramū futat mama'eukwaawa rowajaa. Ma'ja pyu jane iowajaa? Jarejuwarete 'ga 'Agesage pyu.

¹³ A'eramū futat 'ā Janeruwarete 'ga U'agesage rerekoukari pē nupe. 'Ga 'Agesage rereko re pēe mama'eukwaawa 'wyriara pojeupe'ema pejejemogyau. 'Ga 'Agesagea pēe ereko re mama'eukwaawa pē pojeupa futat.

¹⁴⁻¹⁷ Sā'ā jefaruu 'gā itajuaity rerekoa imunewa u'yw awi ojea'gwawamū. Opy'apiat, aku'afaap, itaju myapaap, itaju akagyry. Mīmera 'ā 'gā imunepa ojea'gwawamū u'yw awi. Itajupewuua 'ā 'gā erawau opo pe jyu reewe. Itajupewuua pyu 'gā jea'gui ojee iporomutare'ema 'gā nu'yw awi. Nan tee futat jane. Jarejuwarete 'ga remifutar imū etee futat mama'e apo re jane jemogyi itajuaity rerekwara 'gā 'jawe, opy'apiara rerekwara 'jawe jarejemogyau 'ga upe a'eramū. Mama'e a'jea etee imome'u re jane jarejemogyau itajuaity rerekwara 'jawe, aku'afaawa rerekwara 'jawe. "Janeruwarete 'ga porokatu'ogiweramū pē nee, ota'waweramū pē nupe" 'jara 'gā itaju myapaawa rerekwara 'jawe 'gā. "Jejui Kristu 'ga jetywera omoit je wī, je katu'oka" 'e are ea'at ma'e 'gā itaju akagyry rerekwara 'jawewara 'gā. Jejui Kristu 'ga rerowiaarareteramū jane jarejemogyau opo pe itajupewuua rerekwara 'gā 'jawe. Jejui Kristu 'ga rerowiaarareteramū jane jarejea'gwau mama'eukwaawa ru'yw awi jarejemogyau. Nosei futari jane pype. Jyu rerekwara 'jawe jane Jarejuwarete 'ga je'ega kwaaparamū jarejemogyau. Janeruwarete 'ga 'Agesagea jane muea'aa 'ga 'eawer are. A'eramū jane mama'eukwaawa 'wyriara rerowiare'ema jarejemogyau.

¹⁸ A'eramū jane jareje'ega mono awi jareojere'emamū futat jareje'ega monou Jarejuwarete 'ga upe. A'eramū mama'eukwaawa jane pojeuwi. "Je poar ape, ki Ku'jyp", pe'je ki 'ga upe. Jarejuwarete 'ga 'Agesage remifutar imū pejeje'ega monou 'ga upe. Au'jeteramū futat pejeje'ega monou Jarejuwarete 'ga upe. Pejejorypawe'emamū futat pejeje'ega monou pejejemogyau. 'Ga upe pejeje'ega monou pēē pejeje'ega 'ga remiayuwamū jarejuee.

¹⁹ Je ree nanē ki pejeporogytau Ku'jywa 'ga upe nū. "Eje'eg are emueapyo 'ga. 'Ga pyriwara 'gā emu'eukat Paulo 'ga upe. 'Ga mogyjeukare'ema ejemome'waukaa 'ga upe 'gā nupe. Eporogyta esage emome'u katu katuukat 'ga upe. Ymā janepy 'gā naeapyoi ee rakue. A'eramū ki ene 'ga poaa 'gā mueapyou ee", pe'je ki 'ga upe je ree.

²⁰ Moromunepawa pype agawewi je 'ami Kristu 'ga mome'u are. A'etea je Kristu 'ga amome'u 'gā nupe. A'eramū ki pēē pejeporogytau Jarejuwarete 'ga upe je ree. "Epoat 'ga imome'wau 'gā nupe 'gā mogyjeukare'ema", pe'je ki 'ga upe je ree.

Oje'ega 'ga imonou 'gā nupe 'gā futaa

²¹⁻²² Tikiku 'ga Kristu 'ga rerowiaara 'ga futat. A'eramū 'ga janerewireramū futat. Orejekoty'aawarete 'ga futat. Jarejararete 'ga upe ore pyri oporowyky ma'e 'ga futat. Oporowyky esage 'ga Jarejararete 'ga upe. Pē pyri je 'ga monoi orojemome'wawamū pē nupe. A'eramū nipo pēē pejeku'iramū ore ree.

²³ Ku'jywa 'ga 'ā Janeruwaretea futat. Jejui Kristu 'ga Jarejararetea. A'eramū je 'jau 'gā nupe pē nee: "Pēmopy'ata'wa ki Efesu pewara 'gā ajuee. 'Gā moporomutarukaa nanē ajuee nū. 'Gā mojemogyppygukaa nanē pejejee nū", 'jau je 'gā nupe pē nee.

²⁴ Jarejuwarete 'ga resagea Jejui Kristu 'ga ree iporomutat ma'eramū pē nerekoa je afutat, Jarejararete 'ga ree iporomutat ma'eramū pē neewe. 'Ga ree iporomutat ojere'emamū 'ga resagea pē nerekoa je ifutaa.

Kweramū ete jeremimome'ua.

Firiposi

Paulo 'ga awau Jejuu 'ga mome'wau Firiposi pewara 'gā nupe rakue. (Atos 16.12-16) Ojeupe 'ga 'ga mome'uramū Firiposi pewara 'gā amū 'ga rerowiaa. 'Gā nui o re Paulo 'ga ka'arana kwasiari imonou 'gā nupe. Jejuu 'ga mome'u are moromunepawa pype 'ūina 'ga ikwasiaa imonou 'gā nupe. Na'ga etee rūi ikwasiaari. Janeruwarete 'ga 'Agesagea ikwasiarukaa 'ga upe. A'eramū 'ga ikwasiaa imonou 'gā nupe rakue.

¹ Je Pauloramū ka'aran akwasiat imonou Firiposi pewaramū pē nupe. Timoteo 'ga 'au ako je pyri. Jejuu Kristu 'ga upe mama'e apoaramū 'ā ore. Pēē 'ā Jarejuwarete 'ga remiyauwa. Pejejemujaa Jejuu Kristu 'ga ree rakue. Pē nupe je ka'arana monou ikwasiaa pē'wyrara 'gā nupe, pē'wyrara pōirū 'gā nupe. Mīmeramū pē nupe ore imonoi.

² Ku'jywa 'ga Janeruwaretea. Jejuu Kristu 'ga nanē Janejararetea nū. 'Gā nesagea pē nerekoa je afutat. 'Gā pē mopy'ata'waa nanē je ifutaa nū.

'Gā nee 'ga oje'ega monoawet

³ Pē nee tejea'aramū je Tejuwarete 'ga muorywi pē nee: "Ene te 'ā eneresage oree, ki Ku'jyp. Firiposi pewara 'gā amū eremū'ē ejemiyauwamū. Erejerowiarukat 'ā 'gā nupe rai'ī", 'jau je 'ga upe. "A'eramū je ene muorypa 'gā nee", 'jau je 'ga upe pē nee.

⁴⁻⁵ Jejuu 'ga ree pejejemogypyka ypy we pēē je poaa morogyta esage mome'u are ikue. A'eramū je tejekōējamū pē nee Jarejuwarete 'ga upe teje'ega monou tekou. Ajemogypyk je pē nee.

⁶ Werowiar ypyrauwe ako Janeruwarete 'ga pē muesageu ramue ikue. 'Awamū taetu aje 'ā 'ga pē muesagei akou. A'eramū je a'eramū a'jea futat 'ga 'gā muesagepawi Jejuu Kristu 'ga rur enune 'e rerowiaa.

⁷ Pēē 'ā jejekoty'aawa. Pē nee je tejea'aramū te'ŷina. A'eramū wesageramū futat je jemogypyga pē nee. Pēē 'ā je poat pejepe pejejemogyau. "A'jea futat morogyta esagea Jejuu 'ga ree" 'gā nupe je 'eramū 'ā pēē 'jau, "nan futat nipo ore nanē imome'ui nū", 'jau 'ā pēē. "Jejuu 'ga ree morogyta esagea je imome'uramū ki perowiat", 'gā nupe je 'eramū pēē nanē aipo 'jau je poaa nū. 'Awamū 'ā 'gā je kupyfari je m'ŷina itaju pyu moromunepawa pype Jejuu 'ga mome'u are. A'etea 'ā je poat pejepe pejejemogyau. A'eramū je tejea'aramū pē nee, tepoaramū pē nee. Janeruwarete 'ga je poaa mama'e apou wemifutar imū. A'eramū 'ga je poara 'jawe pēē nanē pē poaa nū.

⁸ Jeporomutat je pē nee Jejuu Kristu 'ga 'jawe. Pē nesaga'upa je te'ŷina. Janeruwarete 'ga je kwaapa. A'jea futat aipo je'ea 'ga okwaap.

⁹⁻¹⁰ Jarejuwarete 'ga upe je teje'ega monoi pē nee, pejejuue pejejejuka esage are. A'eramū je 'jau 'ga upe: "Epoat 'gā ajuee ojejuka esage are. Epoat 'gā ejee 'gā poromutarete are nanē nū", 'jau je 'ga upe. Afutat je 'ga pē mu'akwaawa mama'e are. A'eramū nipo pēē mama'e esage are pejeparuapoweramū. A'eramū nipo pēē pejejesageramū pejejemogyau Jarejuwarete 'ga upe Jejuu Kristu 'ga ruawa rupi. Nepeapoi mama'e tywera. A'eramū nipo aipo 'ara rupi pētywera mome'wara 'gā otywe'emamū pē pype.

¹¹ Afutat je Jejuu Kristu 'ga pē muesagea 'ga rekoa. A'eramū nipo pēē pejejesageramū pejejemogyau 'ga 'jawe. A'eramū nipo pē nesakara 'gā Jarejuwarete 'ga muorypa pē nee: "Ene te 'ā eneresage. Ene te 'ā 'gā eremuesage", 'jau nipo pē nesakara 'gā 'ga muorypa pē nee.

Jejuu 'ga mome'u are 'ga fueweramū

¹²⁻¹³ Pēē 'ā jerewirera 'jawe. Kūjāmeramū pēē 'ā jerenyra 'jawe 'jau. A'eramū je 'awamū tejemome'wau pē nupe. Judeu 'gā nupe Jejuu Kristu 'ga je imome'uramū 'gā je munewukari je mu'ama je kupyfarukaa itaju pyu. Je rereko tywerete agawewi 'gā. A'etea je Jejuu 'ga amome'u tejeppyriwara 'gā nupe. A'eramū 'gā kwaiwete Jejuu 'ga rerowiaa. Je munewe'em ire amunipo 'ā 'gā nuapyakai futari Jejuu 'ga mome'u are. A'ere 'ā 'gā je munewi je m'ŷina. A'eramū je te'ŷina Jejuu 'ga mome'wau 'gā nupe. A'eramū 'gā 'ga rerowiaa. A'eramū 'gā 'awamū weapyoramū je munepawer are. Jefaruu 'gā, tekotee 'gā netee ikwaapa. "Jejuu Kristu 'ga mome'u are 'gā 'ga munewukari" 'e kwaapawe

¹⁴ 'gā jenosimawi. Janejararete 'ga 'gā mogyaupawukaa. A'eramū 'gā 'awamū awau kwe pe Jejuu 'ga mome'wau okyjawe'em.

¹⁵⁻¹⁷ Okwasi'wau 'gā awau kwe pe 'ga mome'wau 'gā nupe. "Sipoat 'ga 'jau", 'jau 'gā ajaupe. "Moromunepawa pype 'ūina Paulo 'ga nooarūi kwe pewara 'gā mu'jau morogyta a'je are. A'eramū jane 'ga poaa", 'jau 'gā ajaupe. Iporomutat 'gā je ree. A'ere amumera 'gā je rerekoayi ete. A'eramū 'gā awau Kristu 'ga mome'wau 'gā nupe je rereko tywerukaawamū.

“Jejui Kristu 'ga jane imome'u are nipo 'gā Paulo 'ga rerekou tyweaete ee”, 'jau 'gā ajaupe. “A'eramū nipo janerera renuwa wayramū 'ga upe”, 'jau 'gā ajaupe.

¹⁸ A'ere naani. Afutat je Jejui Kristu 'ga mome'ua. Aipoa je maku'iu. 'Gā amū Kristu 'ga mome'ua esage jee. 'Gā amū te ajee je rereko tywer are etee ifuwet. A'ere a'ea miamū 'gā Jejui 'ga mome'ua je maku'i je m'ina. Amumera 'gā Jejui 'ga mome'wau je poaawamū. Aipoa nanē wesageramū jee nū.

¹⁹⁻²⁰ Akwaap je pēje'ega monoa Jarejuwarete 'ga upe je ree. Aipoa je poat, je moywrafena, je muekōēāina. 'Ga 'Agesagea je rerekou je poaa Jejui Kristu 'ga mome'waukaa 'gā nupe, 'gā nowase je rekoramū. Aipo are je teku'iramū te'ina. Tejeupe ojeapo ma'erama je aapesak te'ina. Maran gatu nipo 'gā je rerekoi. Je rereko tywerete agawewi 'gā. A'etea je afutarete Jejui 'ga mome'ua te'ina tekyjawe'em. Je manū re miamū ki 'gā tamuoryp Jejui 'ga je ree. Nanuara je afutat. Je manū'e'emaue Jejui 'ga muorywa nanē esage jee nū. Je ree te 'gā 'ga muorywi. Nanuara esage jee.

²¹ Temanūme'ēwe je tekou Kristu 'ga remifutar imū etee mama'e apo futaa. A'ere, je manūa nanē futat esageramū jee. Temanū re tewau tekou 'ga pyri. 'Ga pyri je rekoa esage jee.

²² A'ere je 'gā tejukae'emamū je porowykyi tekou 'ga upe, 'ga rerowiarukaa 'gā amū nupe. Aipoa esage jueje futat jee. Māgatu nipo esage jee.

²³ Afutat futat je teoa Kristu 'ga pyri. Peu teoa je afutarete. Aipoa esage jee.

²⁴ A'ere pē nupe je rekoa nanē futat esageramū jee nū. Temanūme'ēwe je pē poaa.

²⁵ Ma'eramū 'ā je jerowiari tejeko are. Namanūi we nipo je. A'eramū nipo je pē poaa, pē mojemogypygykukaa etee te 'ga ree. 'Ga ree pejemogypygyg ire nipo pēē pejeku'iramū 'ga ree nū.

²⁶ Moromunepaw awi itaju awi temoir ire nipo je tewau pē pyri. A'eramū nipo pēē Kristu 'ga muorypa je ree, jaruete jereko are.

²⁷ Maran gatu nipo 'gā je jukawe'em. Maran gatu nipo 'gā je rerekoi. Maranamū nipo 'gā je jukau. Nakwaawi je. A'ere ki pēē je upe mama'e tywera jeapo re peko esage Kristu 'ga je'eg imū etee. A'eramū nipo je pē nesag ire pēneko esage kwaapa. Pē pyri tewawe'em nipo je pē nera renuwi. A'eramū nipo je Kristu 'ga ree pejemogypygyg are teapyakau. Majepe'i 'yweteewara 'jawe pejemogy pejeporowykyau Jejui 'ga upe. Morogyta esage mome'wau 'ga nupe, Jejui 'ga rerowiarukaa 'gā nupe. A'eramū nipo je teapyakau pē nee. “Kwe pe 'gā oi Jejui 'ga ree morogyta esage mome'wau 'gā nupe, Jejui 'ga rerowiarukaa 'gā nupe”, 'jau nipo 'gā pē mome'wau jee.

²⁸ Pekiye awi Jejui 'ga rerowiare'ema 'gā nui. Niporomutari nipo 'gā pē nee. A'ere kasi pekyje 'gā nui ne. Ojewi pekyje'emamū nipo 'gā 'jau ajaupe: “Nokyjei 'gā jane wi. Janeruwarete 'ga ree 'gā jemogypygygi ajemogyau. A'eramū 'gā okyjawe'em ajemogyau. 'Gā nipo Janeruwarete 'ga omono ojepyri. Jane nipo Janeruwarete 'ga jane mojenosōu wowase ae majatykaaw ipe”, 'jau nipo pē nesakara 'gā ajaupe. Janeruwarete 'ga pē poapooa. Opājēa 'ga amut pē nupe, pē mogyaukare'ema.

²⁹ Ymā Janeruwarete 'ga pē mū'jāu Jejui 'ga ree pē mojemogypygykukaa rakue. 'Ga 'ā pē mū'jāu Kristu 'ga upe mama'e apoawamū. Kristu 'ga ree nanē nipo 'ga rerowiare'ema 'gā pē nerekou tyweaete nū.

³⁰ Awamū futat nipo 'gā pē nerekou tyweaete, 'ga rerowiaramū, je 'jawe futat. 'Gā nipo pē nerekou tyweaete agawewi. A'etea ki pejemogy majepe'i 'yweteewara 'jawe, Jejui 'ga mome'wau 'gā nupe. Pē pype je rekoramū Jejui 'ga rerowiare'ema 'gā je pyyka je nupāu je munepa. A'eramū ako pēē je rereko tywera resaka ikue. 'Awamue nanē 'gā 'ā je rerekou tyweaete nū. Jejui 'ga mome'u are futat nū. Aipoa are nanē pejeapyakau nū. A'etea je napoiri futari 'ga mome'u awi. 'Awamū pēē je 'jawe futat peko tywerete 'ga ree.

2

Jejui Kristu 'ga eteete ma'ea

¹ Jejui Kristu 'ga ree pejemujari ikue. A'eramū ki pēē pejemouaga mama'e upe. 'Ga futat pē mouagakat mama'eay upe. Iporomutat 'ga pē nee. A'eramū pejepy'a'wyre'emamū pejemogogyau. Janeruwarete 'ga 'Agesagea pē nerekou. A'eramū pēē majepe'i 'yweteewara 'jawe pejemogogyau mama'e are. Pejemuaēma pejejee. Pejepy'ata'waramū pejejaupe.

² Pejekoty'aa pejejee. Jejui 'ga iporomutat pē nee. A'eramū ki pēē pejeporomutamū pejejee pejejee 'ga poromutara 'jawe. Pejejopooa mama'e apo are. Majepe'i 'yweteewara 'jawe ki pejemogogyau. Aipo aporamū pēē je maku'i. Nitywi mama'e mū je maku'iu aipoa apyraapa.

³ Pejemaku'i etee kasi ne. Mama'e apou pejejamaku'iu a'jea futat. Pejerowiarap kasi pejejee etee ne. Aipoa nia'wryi pē nupe. Pejomopojeka esageukat etee ki pejejaupe.

⁴Pejejea'are'emamū nanē pejejemifutar are etee nū. Pejejuemifutar are nanē ki pēnea'at nū.

⁵Jejui Kristu 'ga remiayuwamū pejejemogyau ki 'ga 'jawe futat pejemogy. Naojee etee rūi 'ga rea'aramū rakue.

⁶Ymā we te 'ā Kristu 'ga rekoi rakue.

Ywy apoe'emauwe 'ga rekoi rakue.

'Uwarete 'ga 'jawe futat 'ga rekoi.

A'ere 'ga ne'i: "Tako ene 'jawe etee futat namutamutat 'jau", 'jawe'em 'ga 'Uwa 'ga upe rakue.

⁷Wemifutar imū etee futat Kristu 'ga ruri ojemu 'jaga kūima'eramū.

Kūjā ēē ra'yramū 'ga 'ua ēē upe rakue.

Opojeuwa 'ga ejaa inuga ywag ipe rakue.

'Uwarete 'ga 'jawewar awi 'ga uēma'i ra'ne.

A'ere te 'ga jewyri jupe rakue nū.

'Au 'ga ruri 'Uwarete 'ga upe mama'e apoaramū rakue.

⁸Nojerowiaraiwi 'ga ojee etee.

Nuapoi 'ga mama'ea wemifutar imū etee.

'Uwarete 'ga remifutar imū te 'ga mama'e apou akou.

'Uwa 'ga je'ega 'ga wenup katu katu.

A'eramū 'ga awau amanūmū.

'Ypeywar are opokutugamū miamū 'ga 'Uwarete 'ga remifutar imū etee 'ga jejukaukari 'gā nupe rakue.

Mama'e tywera apoara 'jawe Kristu 'ga manūi 'ypeywar are.

⁹A'eramū 'ga Ruwarete 'ga 'ga moferapa etee rakue nū.

A'eramū 'ga 'ga monou, 'ga mojeupirukaa ywag ipe ojeypyri rakue nū.

A'eramū 'ga 'ga mogou 'wyriarareteramū janee.

Ipojeuwipyramū 'ga mogou najuejue etee 'gā apyraapa.

¹⁰A'eramū nipo anure najuejue etee futat 'gā wapyka wenupy'āu Kristu 'ga rowase, 'ga muorypa.

Ywagipewara 'gā, ywy pewara 'gā, amanū ma'efera 'gā.

Mīmēra 'gā juejue nipo wapyka wenupy'āu 'ga muorypa anure.

¹¹'Ga resakawe nipo 'gā 'jau 'ga upe:

"Ene te 'ā 'wyriararetea oree", 'jau nipo 'gā Kristu 'ga upe.

"Orejararetea 'ā ene", 'jau nipo 'gā 'ga upe, 'ga resakawe.

Aipo 'gā Jarejuwarete 'ga muorypa 'ga ra'yr are.

Pejemogy esage 'ga rerowiare'ema 'gā pype

¹²⁻¹³Pēē 'ā jejekoty'aawaretea. A'eramū ki pēē Jarejuwarete 'ga je'ega renupa. Pejejepype je rekoramū ako pēē enupa ikue. A'eramū pēē 'awamū aipo 'jawerimū 'ga je'ega rerowiaa pejejemogyau pejejepyri je rekoe'emamū. Aipoa je afutarete te 'yina. Janeruwarete 'ga jane poaa mama'e apou wemifutar imū. Wemifutar imū mama'e are janerea'ar are nanē 'ga jane poaa nū. Opājēa 'ga imua pē nupe ojee pē mojemogyppygukaawamū. Wemifutar imū mama'e apoukaawamū 'ga opājē muri pē nupe. A'eramū ki pēē pejejekatu'oka 'ga upe, 'ga muorypa. Pejea'gu ki mama'e tywera apo awi.

¹⁴Mama'e apou we kasi peje'egay pejejemogyau ne. Pejejamuewe'em nanē mama'e apo are nū.

¹⁵Aipo apoe'em ire nipo pēē pejejesageramū pejejemogyau Jarejuwarete 'ga upe. A'eramū nipo nitywi pē mojenosiāra. Jarejuwarete 'ga ra'yra futat pēē. A'eramū ki 'ga 'jawerimū futat peko, 'ga rerowiare'ema 'gā pype pejejemogyau. Mama'e tywera etee 'gā wapo. A'ere pēē na'gā 'jawe rūi. Sā'ā jaytata renya pyytunaiwa pype. Ypytunimū etee 'ā jaytata renya ojesaka. Nan tee pejemogy. Mama'e tywera apoara 'gā pype pejemogyramū pē nesakara 'gā pē nesage resaka. Sā'ā 'ye'ē raapara 'gā jaytata are etee wape kwaawa. Nan tee pejemogy 'gā pype.

¹⁶Ojeupe pēē Jejui 'ga mome'u re 'gā Jarejuwarete 'ga rape kwaawi. Jarejuwarete 'ga je'ega renuw ire 'gā nanē ajemogyau namutamutat 'ga pyri. Aipoa pēē iapo re Kristu 'ga ruaw ipe jeku'iramū tekou pē nee. A'eramū nipo je 'jau Jejui Kristu 'ga upe: "Naakotee rūi ako je Firiposi pe ikue. Peu tekou je ene mome'ui 'gā nupe ikue. A'eramū 'gā ene rerowiaa etee te", 'jau nipo je 'ga upe, 'ga ruaw ipe.

¹⁷"Anurenure'i nipo 'ga rerowiare'ema 'gā je jukai, jery reko'woka", 'jau je tejeupe. Jemanūa nipo Janeruwarete 'ga muorypa. Sā'ā janepy 'gā wyro'o monoa Jarejuwarete 'ga upe 'ga muorypawamū. Y'waya 'gā 'ā imonou eko'woka ee. Aipo resag ire Janeruwarete 'ga aku'iramū 'gā nee. Nan tee futat nipo 'gā jery reko'woka. Aipo resag ire nipo Janeruwarete

'ga aku'iramū je ree. "Nopoiri futari 'ga je rerowiar awi" 'jau nipo 'ga ojeupe aku'iramū je ree.

Pēē 'ā Jarejuwarete 'ga rerowiaa etee te. Pēē 'ga rerowiara nanē 'ga muorypa nū. Sā'ā 'ga ekōēāja ojeupe mama'e mur are rakue. Nan tee 'ga rekōēājamū jane ree werowiarāmū. A'eramū je Kristu 'ga mome'u are tejuka re tejekōēājamū ee.

¹⁸ A'eramū ki pēē nanē pejejekōēājamū je manū are nū, pejejemogyau je pyri nū.

Timoteo 'ga

¹⁹ Timoteo 'ga ree jeporomoweramū pē pyri. Jarejararete 'ga aipo futar ire nipo je 'ga monou pē nesaka. Pē nesag ire 'ga tut pēnera mome'wau jee 'jau. A'eramū nipo je tejekōēājamū 'ga pēnera reruramū.

²⁰ 'Ga tee futat ojejuka pē nee je 'jawe, pē nee jejejuka 'jawe. Opota'waramū 'ga pē nee je 'jawe.

²¹ Tekotee 'gā ojee tee 'gā jejukai. Ojee 'gā wea'aramū. Jejui Kristu 'ga porowyky are 'gā wea'are'emamū.

²² A'ere Timoteo 'ga nanarūi. Aipoa pekwaap. Sā'ā 'gā na'yra 'ga 'uwa 'ga poaara. Nan tee futat Timoteo 'ga rekoi jepoirūnamū, Jejui 'ga porowyky apou je pyri.

²³ A'eramū je pē nupe teporomonoweramū 'ga ree. Tejereko kwaaw ire nipo je 'ga monou pē nesaka.

²⁴ Je nanē teoweramū pē pyri nū. Aipo futar ire nipo Jejararete 'ga, Jejui 'ga, je muēmukaa 'gā nupe, je monou pē pyri. 'Ga ree je jemogyppygi te'yina.

²⁵ Epaftrotitu 'ga nipo je amono imojewya pē nupe. Janerewirera 'ga. Pēē 'ā 'ga mua 'au jejuru irūnamū Jejui 'ga mome'wau 'auwara 'gā nupe rai'i. 'Ga je poaa Jejui 'ga mome'wau je 'jawe etee futat. Amumera 'gā erowiare'emamū 'ga ojero'waro'wau etee futat imome'wau 'gā nupe je poaa. Mama'ea 'ga wapo jee nanē nū.

²⁶⁻²⁷ A'ere 'ga jero'wui, amanūmū werewi ai'i. A'ere 'ā Janeruwarete 'ga jemuaēmi jane ree. A'eramū 'ga 'ga majarueteu ai'i nū. Kwaiwete mama'ea wayramū jee. Ipytu'ēe'ema 'jawe futat te'yina. A'eramū amunipo 'ā 'ga manūa je mu'arasirasiga rai'i. A'ere Janeruwarete 'ga jemuaēmi je ree, je mu'arasigukare'ema. A'ere Epaftrotitu 'ga pē nesaga'uwī. "Ga amū nipo jekaruara mome'wau 'gā nupe. A'eramū nipo 'gā ajemuaēma ajemogyau je ree", 'jau 'ga opy'a'wyrāmū pē nee.

²⁸ A'eramū je 'awamū 'ga mono futaa. 'Ga resaga nipo pē mopy'a'wyre'ema nū. A'eramū nipo je nanē tepy'a'wypawamū pē nee.

²⁹⁻³⁰ Pejejeupe 'ga waēmamū pēē 'ga mua pejejepype, pejejorywamū. 'Ga 'ā Jarejararete 'ga rerowiaara futat. A'eramū 'ga janerewirera futat. Kristu 'ga upe oporowykyau 'ga amanūmū werewi. 'Ga 'jawewara 'gā nee juejue ki pēpojejuka esage. Nepejorarūi je pyri je poaa. A'eramū 'ga 'ua je poaa pē nupe.

3

Peje'gu ki i'me ma'e gā nui

¹ Pēē 'ā jerewirera 'jawe. Kūjāmeramū pēē 'ā jerenyra 'jawe 'jau. Pēku'i ki pejejemogyau Jejui 'ga ree. Pēē 'ā 'ga remiayuwa. A'eramū ki pēē pejeku'iramū pejejemogyau 'ga ree. Pē nupe tejemimome'ufer are je ka'arana kwasiaa nū. A'ere imome'uu'jawa resageramū jee. A'eramū nipo pēē imoka'jame'ema. A'eramū pēē ikwaapa pejejemogyau.

² Peje'gu ki Jarejuwarete 'ga je'eg are moromu'jat tywer awi. 'Gā amū awau kwe pewara 'gā mu'jau o'me are. "Judeu 'gā 'jawe imojewagipyre'gā etee Janeruwarete 'ga remiayuwa. Imojewagipyre'emamū pēē na'ga remiayuwa rūi", 'jau 'gā awau kwe pewara 'gā mu'jau ee. A'ere aipoa naa'jea rūi. 'Gā 'me ate. Aipo 'jara 'gā ia'wyre'emamū futat. A'eramū ki pēē 'gā nerowiare'ema pejejemogyau.

³ Naaeremiapofera rūi ae katu'ok. Jejui 'ga etee te ae katu'oka. Werowiaaramū 'ga ae katu'oka. Jane futat 'ā Jarejuwarete 'ga remiayuwa. 'Ga rerowiaaramū etee jane 'ga remiayuwa. Jane 'ā Jejui Kristu 'ga ree jarejemogyppyka. A'eramū Janeruwarete 'ga U'agesage mua janee janererekwaramū. A'eramū 'ga 'Agesagea Jarejuwarete 'ga muorywukaa janee. A'eramū jane jarejemogyau 'ga remiayuwareteramū futat. Jejui 'ga ree jane jarejemujaa.

⁴ Tejemiapofer are 'ga tekatu'og ire amunipo 'ā je tejee etee tejerowiaripa. A'ere je 'ā narowiari i'me ma'e 'gā je'ega. Je te amunipo 'ā ajerowiaraip tejee pejejee pejerowiaraiwa apyraapa.

⁵ Te'ar ire je majepi tee morowykye'ema magwapa ikue. A'ere 'gā je mojewaka ikue. Je 'ā Israeu 'ga juapyreramū futat. Judeu 'ā je. Pējamī 'ga juapyrera je. Jeruwa 'ga judeua. Jey ēē nanē judeua nū. A'eramū je judeureteramū futat. Fariseuramū je Moisesi 'ga je'ega renupa katu.

⁶ Jeju'i 'ga rerowiare'emawe je tewau 'ga rerowiaara 'gā nerekou tyweaete ikue. "Jarejuwarete 'ga remifutar imū je 'gā nerekou tyweri", 'jau futatee je tejeupe ikue. A'eramū je aipo apou. Judeuramū oroje miapoa tāmējē je iapou ikue. Moisesi 'ga remikwasiarer imū tee je mama'e aapo. "Nuapoi futari Paulo 'ga mama'e tywera", tejeupe 'gā 'e are amunipo 'ā je tejerowiaaraipa tejee.

⁷ A'ere je 'awamū najemogypygyi mīmer are. 'Awamū je Kristu 'ga ete ikwaapa. A'eramū mama'e ymanera wa'wyre'emamū jee. Najemogypygyu'jawi futari je mīmera mama'e are 'awamū.

⁸ 'Awamū Jejui Kristu 'ga jejararetea. 'Ga remifutar imū etee mama'e apoa je afutat. A'eramū je 'jau: "Yty 'jawe futat jeremiapofer ymanera rakue", 'jau je. "Jejui 'ga kwaawa etee esage jee", 'jau je tejeupe te'ŷina.

⁹ Kristu 'ga jewyramū jane juejue 'ga rowase jarejatykau. Aipo 'ara rupi nipo je teporenuwaiwiramū "Esage 'ga jee", tejeupe 'ga 'e are. "Je rerowiat 'ga akou rakue. A'eramū 'ga wesageramū jee", 'jau nipo Kristu 'ga jee aipoa 'ara rupi. "Esage 'ga jee", tejeupe 'ga 'e are tewau te'ama teporenuwaiwiramū 'ga rowase. NaMoisesi 'ga je'ega renupara upe rūi 'ga aipo 'jau. Naani. Werowiaaramū jane upe futat 'ga aipo 'ga 'i.

¹⁰ Kristu 'ga ree etee jeporokwaawiramū. 'Ga manū re Janerwarete 'ga Kristu 'ga moferawū nū. A'eramū Kristu 'ga opājēretereteramū akou. A'eramū je tejeupe 'ga opājē mura futaa. 'Au 'ga rekoramū 'ā 'ga rerowiare'ema 'gā 'ga rerekou tyweaete rakue. A'eramū je 'ga ree tejereko tywera futaa tekou. 'Ga 'jawe tejereko tywera je ifutaa. A'eramū je tekoweramū 'ga 'jawe etee futat. "Nan pa 'ga manū rayramū rakue" 'ea je ikwaapa 'awamū. Nawemifutar imū rūi futat 'ga manū. 'Uwarete 'ga remifutar imū etee 'ga manū.

¹¹ 'Ga 'jawe tekoa je afutat. A'eramū nipo 'ga je manū re je nanē je moferapa 'ga 'jawe nū. 'Ga pyri futat nipo je tewau teferaw ire tekou nakwaparimū ete rūi futat.

Mama'ea ki peapo 'ga remifutar imū

¹² Jejui Kristu 'ga je mogou wemiayuwamū okwaaparamū. A'ere je nakwaap katui we 'ga. Najereapyo katui we je 'ga 'jawe 'ga remiapo are. Anure te nipo jereapyo katuramū 'ga remifutara mama'e are. A'eramū te nipo je reko'i 'ga 'jawe futat.

¹³ "Nakwaap katui we je Jejui 'ga", 'jau je pē nupe, tejewireramū pē nupe, tejenyramū pē nupe. Nokoi we je 'ga 'jawe. A'ere je najerea'aru'jawi je tejemiapofer are 'awamū. Jejui 'ga kwaawa etee je afutat. Aipo are etee je tejea'aramū te'ŷina. 'Ga 'jawe tejekoram are tee jerea'aramū te'ŷina.

¹⁴ A'eramū je mama'e apou 'ga remifutar imū. Jejui Kristu 'ga ree etee je tejemogypygyka. A'eramū nipo je manūnamū 'ga je rerawau je mogou ojepyri nakwaparimū warāu rūi futat. Ojepyri je o re nipo 'ga 'jau jee: "A'jea futat. Jeremifutar imū etee mama'ea ereapo jee. Aipoa esage jee", 'jau nipo 'ga ojepyri je o re.

¹⁵ Jane 'ā 'ga rerowiaar ymaneramū janereapyoramū mama'e are. A'eramū jane aipo je'eawer imū jarejemogyau. Sikwaap katu 'ga 'jau, sa'e jarejaupe 'jau. Mama'e amutee 'ga amū iaporamū Janerwarete 'ga 'ga mu'akwaapa.

¹⁶ A'eramū jane jarejemikwaawer imū jarejemogyau 'jau. Sietyg eme jarejemikwaawera 'jau.

¹⁷ Ymā ako ore pē mu'ei pēneko esage are ai'i. Jereko esagea nanē ako pēē esaka ai'i nū. A'eramū ki pēē je 'jawe pejejemogyau esage. Ore'eawer imū ako ma'e 'gā nanē pēē esaka nū. Pēneapyo ki ako esage ma'e 'gā nee. A'eramū pēē 'gā 'jawe etee pejejemogyau mama'e apou.

¹⁸ Ymā ako je mama'e mome'ui pē nupe ai'i. 'Awamū je imome'wau'japa nū. Tejaa'wau je imome'wau pē nupe nū. 'Gā amū wemifutara etee wapo akou. Jejui Kristu 'ga 'ā amanūmū 'ypeywar are agawewi jane katu'okawamū. A'etea 'ā 'gā amū nuapoi futari 'ga remifutara. Wemifutara etee 'gā wapo. A'eramū 'ā 'gā Jejui 'ga ree iporomutare'ema 'gā 'jawewara futat ajemogyau, 'jau je pē nupe. Ma'eramū 'ā je joo'oi te'ŷina 'gā nee.

¹⁹ Anure nipo Janerwarete 'ga aipo 'gā monou maku ojewi. Mama'eukwaawa rapyaw ipe nipo 'ga 'gā monou. Wemifutar imū etee 'gā mama'e apou ojemaku'iu. Nojenosī 'gā wemiapofera tywer are. "Oresage ore", 'jau futatee 'gā. Naea'ari 'gā Jarejuwarete 'ga ree. Wemifutar are etee 'gā nea'aramū, omama'e are etee, okaraemā are 'jau.

²⁰ A'ere jane nanarūi. Ywag ipe oo ma'erama futat jane. A'eramū jane Jarejararete 'ga rura rapesaka jarejemogyau. Anurenure'i nipo Jejui Kristu 'ga ruri ywag awi. A'eramū jane jarekatu'okara 'ga rura rapesaka jarejemogyau.

²¹ 'Ua nipo 'ga jane mu'jagi oje'jawewaramū futat. Janeraretea miamū nipo 'ga imu'jaga oma'e 'jawe. A'eramū nipo jane 'ga 'jawe futat jaremanū'jape'ema. Opājē mū 'ga mama'e apou wemifutar imū. Opājē mū nanē nipo 'ga jane mu'jagi oje'jawe nū.

4

'Gā neko are 'gā mu'akwaapawet

¹ Anure nipo 'ga jane rerawau jane mogyau ojepyri. A'eramū ki jane jarejemogyau esage 'ga upe.

Pēē 'ā jerewirera 'jawe. Kūjāmeramū pēē 'ā jerenyra 'jawe 'jau. Pēē 'ā jejekoty'aawa. A'eramū je teku'iramū pē nee. Tejerowiaa pē nee te'ŷina. Jeparuesagiweramū te'ŷina pē nee numiamū. A'ere je noarūi we pē nesaka. A'eramū je 'jau pē nupe: Jeju 'ga ree ki pejemogyppyyk pejemogyau, 'jau je pē nupe. Pejemujaa Jarejararete 'ga ree.

² 'Awamū je pē mosi mama'e awi. Ewotia ēē upe, Sītiki ēē upe nanē je 'jau: Au'je ki pejejamue re. Pēta'wa ki pejejaupe. Pēē 'ā Jarejararete 'ga rerowiaara. A'eramū ki pēē majepei tee tup ma'e 'jawe pejemogyau 'ga upe.

³ A'eramū je 'jau enee, tejepyri oporowyky ma'eramū enee: Epoat 'gā 'gā mopota'wau ajuee, 'jau je enee. Aipoa kūjā, Kremēti 'ga, ajepeja 'gā. Mīmera 'gā juejue oporowyky Jeju 'ga upe, 'ga mome'wau kwe pewara 'gā nupe. 'Gā nera Janeruwarete 'ga okwasiat oka'aran are ywag ipe rakue, Jarejuwarete 'ga pyri ajemogy ma'e 'gā 'jawa ka'aran are rakue. A'eramū nipo jane juejue jarewau peu jaremanū re. A'eramū ki ene aipoa kūjā 'gā mota'waukaa ajaupe.

⁴ Pēē 'ā Jarejararete 'ga rerowiaara. 'Ga ree 'ā pejemujaa pejemogyau. A'eramū ki pejeku'iramū 'ga ree, pejeojere'emamū. A'eramū je aipo 'jau'japa pē nupe. Pe'je pejeku'iramū 'ga ree.

⁵ Anurenure'i nipo Janejararete 'ga jewyri nū. A'eramū ki pēē pejepota'waramū tekotee 'gā nee najuejue etee.

⁶ Kasi pēpy'a'wyt mama'e are ne. Jarejuwarete 'ga upe ki pejeje'ega pemono mama'e are pejemogyau. Pejemifutara ki peenūi 'ga upe. Pejejeupe 'ga remimurer are ki pēnea'at. "Ene te 'ā eneresage jee. Jeremifutara eremut jee", pe'je ki 'ga upe, 'ga muorypa pejejeupe imuripyrrer are.

⁷ Aipo apo re 'ga pē mopy'a'wyre'ema mama'e are. Mama'e are jarejea'aramū jarepy'a'wymū ee. A'ere ojeupe mama'e are jane je'egamū 'ga jane mopy'ata'wai. Jeju Kristu 'ga ree ako pejemujat ikue. A'eramū 'ga jane mopy'ata'wau mama'e are. 'Ga rerowiaare'ema 'gā naeapyoi aipo are. "Maran tete 'gā nipy'a'wyri mama'e are?" 'jau nipo 'gā ojeupe jane resag ire.

⁸ A'eramū je 'awamū pē mu'akwaapa. Mama'e tywer are kasi pēnea'ar ine. Mama'e esage are etee ki pēnea'at pejemogyau. Mama'e a'je are te ki pēnea'at pejemogyau. 'Gā amū nee pēnea'aramū kasi 'gā nemiapo tywer are etee pēnea'ar ine. 'Gā nemiapo esage are nanē pejejea'aramū nū. 'Gā 'eawer imū 'gā nemiapo esage are ki pēnea'at. 'Gā 'me'em are etee ki pēnea'at. Ajaupe 'gā nemiapofer esage are te ki pēnea'at. Jarejuwarete 'ga remifutar imū 'gā nemiapofer are pēnea'at. Ajuee 'gā pota'wa are ki pēnea'at. Mīmer are etee ki pēnea'at pejemogyau, pejejeue pejejea'aramū. Pejemu'e pejejuemiapofer esage are pejemogyau.

⁹ Pejejeupe je'eawer imū etee mama'ea peapo. Pejejeupe jeremiesaukar imū nanē pēē iapou nū. Jereko esagea ako peesag ai'i. A'eramū ki je 'jawe pejemogyau. Aipo apo re nipo Janeruwarete 'ga rekoi pē pype, pē mopy'a'wyre'ema oje'jawe.

Paulo 'ga aku'iramū 'gā nee

¹⁰ Jarejararete 'ga ree je jemujari. A'eramū je teku'iramū tekou 'ga ree. 'Awamū 'ā pejejea'aramū je ree rai'i nū, mama'e mua jee rai'i nū. Ymā ako mama'ea nepemuri jee ikue. A'ete ako pēē pejeporomutaramū pejemogyau je ree ai'i. Aipoa je akwaap.

¹¹⁻¹² "Ma'eramū sipo 'gā mama'e mure'ema jee", 'jawe'em je pē nupe. Mama'e tywamū miamū jerekōēājamū te'ŷina. Mama'e tywe'emamū miamū tejekōēājamū te'ŷina. Tejekōēāi are tejemu'jau ikue. Tejemū'uram kwajamū jerekōēājamū. Tejemū'urame'emamū miamū je tejekōēājamū te'ŷina jepi.

¹³ Jeju Kristu 'ga je mopājēu mama'e are. A'eramū je tejemouaga mama'e upe.

¹⁴ A'ere pēporoywera resageramū jee. Mama'eay upe jeruaga pype pēē mama'e mua jee. Epafrotitu 'ga nanē pēē imua jee. Aipoa esage jee.

¹⁵ Firiposi pewaramū pēē mama'e mua jee Jeju 'ga je imome'u ypyrauwe ako ikue, Masetoni ywy pe je tekou Jeju 'ga mome'wau ikue. Pe awi je oramū ako pēē ka'aranūū mua jee ikue. Pēē etee ako mama'e mua je poaawamū ikue.

¹⁶ Anure ako pēē Tesarūn ipe je rekoramū mama'e mua jee ikue nū. A'ere ako pēē imuru'japa jee ikue nū, je ifutaramū ikue.

¹⁷ Napesagi je pēē tejeupe mama'e mura te'ŷina. A'ere je "mama'ea je upe 'gā imuramū nipo Janeruwarete 'ga mama'e monoi 'gā nupe" 'e kwaawi. A'eramū je tejekōēājamū pēporoywer are.

¹⁸ Pēporoywera reruara 'ga, Epafrotitu 'ga, ka'aranūū muapap jee. Tekotee 'gā nanē mama'e mua jee nū. Kwaiwete 'gā jeremifutara apyraapa imua jee. A'eramū wemyreramū jee. Ojeupe mama'ea pēē imuramū Janeruwarete 'ga worywamū pē nee. Nan tee futat 'ga worywamū je upe pēē mama'e muramū. Sā'ā 'ga rorywa jany kasiga rapy are rakue. Nan tee futat 'ga rorywamū ee.

¹⁹ Mama'ea ako pemut jee ai'i. A'eramū nipo Janeruwarete 'ga mama'e mua pē nupe mama'e pyu pētywe'emamū. Jejui Kristu 'ga mama'e jararetea. 'Ga futat pēē erowiaa pejejemogyau. A'eramū 'ga Ruwarete 'ga pē nupe mama'e monoa ateeepawe'emamū futat.

²⁰ Ku'jywa 'ga 'ā Janeruwaretea. A'eramū ki jane 'ga muorypa. "Ene te 'ā eneresage ekou", 'jau ki jane 'ga upe. "Ene te 'ā Oreruwaretea, ki Ku'jyp. Nitywi futari 'ga amū ene 'jawewara", 'jau ki jane Jarejuwarete 'ga upe.

²¹ Teje'ega je omono Jarejuwarete 'ga remiayuwa 'gā nupe juejue 'gā futaa. Jejui Kristu 'ga rerowiaara 'gā. Janerewirera 'jawewara 'gā je pyriwara 'gā nanē oje'ega monou pē nupe pē futaa nū.

²² Janeruwarete 'ga remiayuwa 'gā oje'ega monou pē nupe pē futaa. Roma pewara 'gā 'wyrjararete 'ga roga pype oporowyky ma'e 'gā, Jejui 'ga rerowiaara 'gā oje'ega monou pē nupe akou pē futaa.

²³ Jarejararete 'ga Jejui Kristu 'ga resage pē nerekoa je afutat. Kweramū etee futat jeje'ega pē nupe.

Korosi

'Ga amū awau Jeju'i 'ga mome'wau Korosi pewara 'gā nupe. A'eramū 'gā 'ga rerowiaa kwaiwete. A'ere tekotee 'ga oi 'gā mu'jau tywet. A'eramū Korosi pewara 'gā amū opoia Jeju'i 'ga rerowiar awi. 'Gā nera renuwamū Paulo 'ga ka'arana kwasiaa imonou 'gā nupe. "Pejewyt Jeju'i 'ga rerowiara upe. Pepoit kasi 'ga rerowiar awi ne. 'Ga etee jane katu'ok, jane mogyau Jarejuwarete 'ga remiayuwamū. A'eramū pēē pejepoire'ema 'ga rerowiar awi" 'jau 'ga ikwasiaa imonou 'gā nupe. Janeruwarete 'ga 'Agesagea ikwasiarukaa Paulo 'ga upe. A'eramū 'ga ikwasiaa imonou 'gā nupe 'gā mu'akwaapawamū rakue.

¹ Je Pauloramū Jeju'i Kristu 'ga remimonoferamū. Ymā te 'ga je monoi omome'wawamū kwe pewaramū pē nupe ikue. 'Uwarete 'ga remifutar imū 'ga je mogoi ikue. Timoteo 'ga, janerewirera 'jawewara 'ga ako 'au je pyri.

² Ka'arana je akwasiat imonou Korosi pewaramū pē nupe, Jarejuwarete 'ga remiayuwamū pē nupe. Jeju'i Kristu 'ga rerowiaara 'ā pejemogy. 'Ga ree pejemumar ire 'ā pēē pejemogyau orerewirera 'jawewaramū. Kūjāmeramū pēē pejemogyau orerengya 'jawewaramū.

Ku'jywa 'ga 'ā Janeruwaretea futat. 'Ga resagea pē nerekoa je afutat. 'Ga pē mopy'ata'waa nanē je ifutaa nū.

Jarejuwarete 'ga muorypawet

³ 'Ga upe oroje'ega monou pē nee jepi. "Ene te 'ā eneresage, ki Ku'jyp", 'jau ore 'ga upe jepi. "Enera'yrarete 'ga, Jeju'i Kristu 'ga Orejararetea futat. Ene futat 'ā 'ga rerowiarukaa Korosi pewara 'gā amū nupe rai'i. A'eramū ore ene muorypa 'gā nee", 'jau ore 'ga upe jepi. "Au'jete erejerowiarukat Korosi pewara 'gā nupe", 'jau ore 'ga upe jepi.

⁴ 'Gā amū 'ua pē mome'wau oree. "Korosi pewara 'gā Jeju'i Kristu 'ga werowiat ajemogyau a'jea futat", 'jau pē nesakarera 'gā pē mome'wau oree. "Ojejuka esage pāwē etee futat 'gā Jarejuwarete 'ga remiayuwamū ajuee", 'jau 'gā pē mome'wau oree ai'i.

⁵ 'Ga amū 'ā awau Jeju'i 'ga mome'wau pē nupe rakue. "Jeju'i 'ga amanū janetywera moiawamū rakue, jane katu'okawamū rakue. Werowiaaramū 'ga anure jane rerooi jane mogyau ojeppyri", 'jau 'ga pē nupe rakue. Jeju'i 'ga rera renupa ppy we pēē 'ā 'ga rerowiaa rakue. Aipoa morogyta esagea a'jea futat. A'eramū pēē ojeppyri 'ga pejejeroo rapesaka pejemogyau. Ojeppyri jane oramū 'ga mama'e esage mua janee. Aipo rapesaga pē mojemogyppygukaa etee te Jeju'i 'ga ree. 'Ga pyri pēo rapesaga 'ga rerowiaara 'gā nerekoukaa esage pē nupe.

⁶ Jeju'i 'ga rera 'ā okwasi'wau kwe pewara 'gā nupe. A'eramū 'ā Jeju'i 'ga rerowiaaramū jane jarejemomytuna jarejemogyau. 'Ga rerowiarāmū jane 'ā 'ga je'ega renupa, mama'e esage apou 'ga remifutar imū. Pēē nanē 'ā Jeju'i 'ga rera renupawe 'ga rerowiaa rakue nū. Niapoi agawewi jane mama'e esagea 'ga upe. A'etea Janeruwarete 'ga ajemuaēma jane ree. A'eramū 'ga wa'yra 'ga mua 'ga jukaukaa jane katu'okawamū rakue. Aipo are pejejeapyorauwe 'ā pēē 'ga rerowiaa rakue.

⁷ Epafraasi 'ga futat awau pē mu'jau ee rakue. Epafraasi 'ga Jeju'i 'ga upe oreporowyky irūa futat. Orejekoty'aawarete 'ga futat jepi. Jeju'i 'ga upe oporowyky ma'e 'ga futat. Ore 'jawe futat 'ga Kristu 'ga mome'wau pē nupe rakue. A'jea futat 'ga 'ea.

⁸ 'Ga futat 'ut 'au ore pyri pē mome'wau oree ai'i. "Korosi pewara 'gā amū Jeju'i 'ga werowiat ajemogyau", 'jau 'ga oree ai'i. "Janeruwarete 'ga 'Agesagea ajafutarukaa 'gā nupe 'gā jemogyramū", 'jau 'ga pē mome'wau 'ua oree ai'i.

⁹ A'eramū ore 'ga orojeupe pē mome'uramū taetu oroje'ega monou arakou Jarejuwarete 'ga upe pē nee. "Emueapyo 'gā ejemifutar are, ki Ku'jyp", 'jau ore 'ga upe pē nee. "Mama'e are ene 'gā mu'akwaawukaa E'agesage pyu", 'jau ore 'ga upe pē nee.

¹⁰ Aipoa 'ga iaporamū nipo pēē mama'e apou 'ga remifutar imū etee futat, pejemogyau esage nipo 'ga remifutar imū futat. A'eramū nipo 'ga aku'iramū ūina pē nee. Pejejenosūe'em nanē nū. "Epoar iki 'gā mama'e esage apou", 'jau ore arakou 'ga upe pē nee. "Ejekwaawukat 'gā nupe", 'jau ore 'ga upe pē nee.

¹¹ Janeruwarete 'ga pājērete. A'eramū ore 'jau 'ga upe: "Epājēma emut 'gā nupe. A'eramū 'gā wuagamū mama'eay upe", 'jau ore 'ga upe. "A'eramū 'gā opoire'ema ene rerowiar awi", 'jau ore 'ga upe oroje'ega monou pē nee. A'eramū pēē pejekōējamū etee futat pejemogyau, pejejeupe mama'eay jesaukaramū miamū.

¹² Pēku'i te ki pejemogyau pejejeupe 'ga remimurama rapesaka. Ymā te 'ā Janeruwarete 'ga pē mū'jāu pē mogyau wemiayuwamū rakue. A'eramū 'ga mama'e esage m'yina gatū peu ojeppyri pē nupe. A'eramū ki pēē 'ga muorypa pejejeupe 'ga remiapofera resag ire. Anure

nipo jane oi 'ga pyri. Peu nitywi futari ypytuna. Nitywi futari mama'e tywera. Peu futat 'ga mama'e esage m̄ina gatu janee.

¹³ Jane katu'ogamū 'ga jane m̄'jāu mama'e tywera apoara 'gā nui rakue, jane mueateeu mama'eukwaawa 'wyrriara remiayuwa 'gā nui rakue. 'Ga futat jane mogyau wa'ya 'ga remiayuwamū, wemifutararete 'ga remiayuwamū.

¹⁴ 'Ga remifutararete 'ga futat ako 'ga ra'ya 'ga amanūmū janetywera mepyawamū 'Uwarete 'ga upe janee rakue. A'eramū 'agamū Janeruwarete 'ga janetywera moia jane wi, jane ifutaramū. A'eramū 'ga wa'ya 'ga remiayuwamū jane mogyau.

Jeju Kristu 'ga

¹⁵⁻¹⁷ Niesagi we jane Jarejuwarete 'ga. A'ere 'ga ra'yrarete 'ga, Kristu 'ga ruri 'Uwarete 'ga kwaawukaa janee rakue. 'Uwarete 'jawe futat Jeju Kristu 'ga. A'eramū jane Jeju Kristu 'ga resag ire 'ga Ruwarete 'ga ree jarejapyoramū. Jeju Kristu 'ga Janeruwarete 'ga ra'yraretea futat. Eteete 'ga wemiapofera apyraap. Mama'e apo enunewe Jeju 'ga akou 'Uwarete 'ga pyri futat rakue. A'eramū 'ga Ruwarete 'ga mama'e apoukaa 'ga upe rakue. Ywaga pypiat, ywy pypiat, ae upe esaukaripyt, ae upe esaukaripyre'em, ywagipewara 'gā, ywagipewara 'gā 'wyrriara 'gā. M̄imera 'gā Janeruwarete 'ga iapoukaa Jeju 'ga upe rakue. A'eramū 'ga 'ga futat imogou 'ga remiapofera mama'e jarareteramū. 'Ga mama'e apoe'em ire amunipo 'ā nitywi futari mama'ea. Nojeuw ekoetei mama'ea rakue. 'Ga futat mama'e apou rakue. A'eramū mama'ea ajemogyau 'ga remiapofer imū etee futat. Ojee 'ga jejukae'ema 'jawe mama'e jemogyi. A'ere 'ga jejukai futari ee ijemogyramū. Opājē mū 'ga mama'e mogyau.

¹⁸ Kristu 'ga akou 'wyrriaramū janee ojee janejemogyppygamū. 'Ga futat jane mogyau rakue. Amanū re 'ga oferapa ete rakue nū. 'Ga futat 'ā oferaw ppy ppy ma'efera. Namanū'jawi futari 'ga. A'eramū 'ga eteete ma'eramū akou.

¹⁹ Ymā ymā we te Janeruwarete 'ga 'i ojeupe rakue: "Teja'ya 'ga tomogo teje'jawe etee futat 'jau", 'jau 'ga rakue. A'eramū 'agamū Kristu 'ga 'Uwarete 'ga 'jawe etee futat akou.

²⁰ Wapo ppyramū 'ā mama'ea wesageramū futat rakue. A'ere aeypy 'gā nuenuwi Jarejuwarete 'ga je'ega. A'eramū 'gā mama'e motywerukaa 'agamū rakue. A'eramū Janeruwarete 'ga 'jau rakue: "Teja'ya 'ga je omono ywy pe, 'ypewar are amanū ma'eramū", 'jau 'ga ojeupe rakue. "A'eramū 'ga owy reko'wogukaa 'gā nupe mama'e tywera mepyawamū jee", 'jau 'ga ojeupe rakue. "Tamojenos̄imap 'gā tejee 'jau nū kwy", 'jau 'ga ojeupe. A'eramū 'agamū Kristu 'ga 'ua ywy pe amanūmū jane katu'okawamū rakue. Amanūmū 'ga mama'e mojewyapap 'Uwarete 'ga upe nū. Ywag ipe ajemogy ma'e, ywy pe ajemogy ma'e. M̄imera 'ga imojewyapap 'Uwarete 'ga upe rakue. Anure nipo 'ga akou 'wyrriarareteramū 'ga wemimurera mama'e upe nū.

²¹ Ymā 'ā pēē nanē nepēa'wryi Jarejuwarete 'ga upe rakue. Mama'e tywera etee futat 'ā pēē lapou pejejemogyau ra'e jepi. Mama'e tywera etee futat pēnea'awa pejemogyramū ra'e jepi. A'eramū pēē 'ga ree iporomutare'emamū te futat pejejemogyau rakue.

²² A'ere 'awamū Janeruwarete 'ga pē mota'waukari ojeupe wa'ya 'ga manū are. Jeju 'ga ry pyu futat 'ga pē pireita pētywer awi. A'eramū 'ga 'awamū werowiaaramū pē mularukaa ojee. Anure nipo 'ga pē nerawau ojeypyri. Kristu 'ga pētywera omoit pē nui. A'eramū nipo pēē Jarejuwarete 'ga rowase peje renos̄ue'em futat. Nitywi futari nipo "ga nia'wryi" 'jara 'ga amū. A'eramū pēē pejejesageramū pejejemogyau 'ga upe.

²³ Kristu 'ga rerowiar awi pejeppure'em ire pēē pejejenos̄ue'em 'ga rowase pejejo awi. A'eramū pēē 'ga rerowiaa tāmējē pejejemogyau. 'Ga ree pejejemogyppyg ire pejejeatee'emamū futat 'ga rerowiar awi. Sā 'ā 'oga rupaa'mywa oypytym ire, i'are'ema futat. Nan tee futat pēē. Kristu 'ga ree pejejemogyppyg ire pejeppure'ema futat 'ga rerowiar awi. Jeju Kristu 'ga mome'u renupa ppy we pēē 'ga rerowiaa. "Janeruwarete 'ga werowiaara 'gā omogy anure ojeypyri oo ma'eramū futat" 'ea pēē erowiaa. 'Ga rerowiar ppyrauwe Janeruwarete 'ga pē mogyau ojeypyri oo ma'eramū futat. A'eramū ki pēē Jeju 'ga rerowiarawū pejeppure'ema futat 'ga rerowiar awi. ('Ga rerowiar awi opoit ma'e 'gā nooi futari 'ga pyri anure.) 'Ga ree morogyta esage mome'u mokwasi'wau kwe pewara 'gā nupe. Je nanē Kristu 'ga ree morogyta esage mokwasi'wara futat kwe pewara 'gā nupe nū.

Paulo 'ga porowyky

²⁴ A'ere judeue'emamū pē nupe Kristu 'ga mome'u rayramū jee. Pejejeupe je Jeju 'ga mome'uramū ako pēē judeue'emamū je nupānupāu, je jukawaipa ako ikue. A'etea 'ā je teku'iramū etee futat tekou tejereko tywer are ikue. Wayrūnamū agawewi te 'ā Kristu 'ga jane katu'okawamū rakue. A'etea jane 'ga rerowiaaramū jarejayrūnamū wējēmī futat nū, 'ga rerowiarukaawamū 'gā nupe nū. Najanerayrūmawi we jane 'ga rerowiaarama 'gā nūi.

²⁵ Ymā te Janeruwarete 'ga je mogoi judeue'emamū pē nupe oje'ega mome'wawamū ikue. "Ere ewau je mome'wau judeue'ema 'gā nupe ekou, 'gā mu'jau jeporogytafer are.

Emu'epap 'gā ewau je'eawer are", 'jau 'ga jee ikue. A'eramū je teporopariweramū pē nee. Aporowyky je tekou pē nupe.

²⁶ Ymā te 'ā Janeruwarete 'ga namueapyoi aepy 'gā wemiaporam are rakue. A'eramū aepy 'gā weapyoe'emamū ee. "Anure je judeue'ema 'gā nanē ikatu'oka nū" 'e are 'gā weapyoe'emamū rakue. A'ere 'ga 'awamū wemiayuwamū jane mueapyoi ee.

²⁷ Wemiayuwamū 'ga jane mueapyou wemiapo are. Judeue'emamū pē nupe nanē Janeruwarete 'ga mama'e esage apoukaa wa'ya 'ga upe nū. Werowiarāmū Jejui Kristu 'ga jane mujaa ojee. Judeue'emamū nanē 'ga pē mujaa ojee werowiarāmū. A'eramū nipo 'ga "anure ojee ojemujat ma'efera 'gā nerawau ywag ipe ojepyrī" 'e are jane mueapyou.

²⁸ A'eramū ore arawau kwe pe Kristu 'ga mome'wau 'gā nupe ai'i. 'Ga rowiiaara 'gā ore imu'jau, imu'akwaapa 'ga remifutar are ai'i. Mama'e tywera apo awi nanē ore 'gā mu'akwaapa nū. Janeruwarete 'ga ore mu'akwaapa 'gā mu'jawamū. A'eramū ore 'gā mu'jau ee ai'i. Anure nipo ore Jarejuwarete 'ga rowase 'gā nesaukari 'ga upe: "Koromū ore Jejui Kristu 'ga rowiiaara 'gā mu'e ikue. Werowiat 'gā 'ga a'jea futat ajemogyau", 'jau nipo ore 'ga upe, 'gā nesaukaa. A'eramū ore 'awamū 'gā mu'jau 'ga ree ai'i.

²⁹ Ma'eramū 'ā je najejeri futari tekou, Kristu 'ga mome'wau 'gā nupe. Kristu 'ga opājē mua jee, ojeupe je moporowykyaukaa. A'eramū je 'ga pājē mū teporowykyau tekou 'ga upe.

2

¹ Afutat je pēneapyoa teporowyky are. Tejesakare'emamū pē nee miamū teporowykyau tekou. Korosi pewaramū pē nee, Laodiceja pewaramū pē nee, ajepeja tejesakare'ema 'gā nee. Mimeramū pē nee je porowykyi tekou kwaiwete.

² Nanuara jeporowykyja je rekoa pē nupe: Jejui 'ga ree pē mojemogyppygukaawamū, pejejeue pēporomutat pejemogyawamū, majepe 'yweteewara 'jawe pē mogyawamū. Majepe 'yweteewara 'jawe pejemogyramū pēē pejomojemogyppygukaa Jejui 'ga ree. Mīnamū jeporowykyja je rekoramū pē nupe. Jarejuwarete 'ga je'eg are je pē mu'jau. A'eramū nipo pēē 'ga 'eawer are pejejeapyo re 'jau: "A'jea futat Janeruwarete 'ga je'ega", 'jau nipo pēē, pejejeapyoramū a'jea futat 'ga je'eg are. Ymā te 'gā naeapyoi Jarejuwarete 'ga 'eawer are rakue. A'ere 'awamū janereapyoramū 'ga 'eawer are. Kristu 'ga ree 'ga 'i rakue.

³ Kristu 'ga te aje 'ā jane mueapyou 'Uwarete 'ga 'eawer are, 'ga remikwaaw are. Nitywi futari 'ga remikwaawe'emamū. Janereapyoi futari jane 'ga remikwaawa mama'e are. A'ere Kristu 'ga ikwaawi. A'eramū 'ga jane mueapyou ee. Ojee ymāwarera 'gā neapyoe'emawer are 'ga jane mu'akwaapa. A'eramū 'ga 'agamū jane mueapyoukaa ee.

⁴ Aipoa je amome'u pē nupe, 'gā amū 'me rerowiarukare'emawamū pē nupe. Perowiat kasi 'gā amū 'mea ne. Peenup katu ra'ne ki 'gā je'ega. Kasi a'e pe pejemoryteeukat 'gā nupe ne. Esage ma'e 'jawe futat nipo 'gā je'ega numiamū. A'ere o'meramū te 'gā 'i. A'eramū pēē 'gā nerowiare'ema pejejemogyau.

⁵ Muku agawewi je rekoi pē nui. A'etea je tejea'aramū tekou pē nee. A'eramū je pēē 'gā 'me rerowiara futare'ema. Jejui 'ga ree pejemogyppyga te je muoryp. Majepe 'yweteewara 'jawe nanē pejemogya nū, Kristu 'ga pēē erowiara. Mīmera je muoryp je mogou.

Kristu 'ga ree jane jemujari

⁶ 'Awamū 'ā pēē Jejui Kristu 'ga rerowiaa rakue. "Ene 'ā orejararetea", 'jau pēē 'ā 'ga upe rakue. 'Ga ree ojemujat ma'eramū pejemogy 'awamū. A'eramū ki pēē pejejemogyau esage 'ga je'eg imū etee futat.

⁷ Ymā te 'ā Epafraasi 'ga pē mu'ei Jejui 'ga ree rai'i. A'eramū pēē Jejui 'ga rerowiaa pejejemogyau rai'i. Pejemu'eawer imū etee futat ki mama'ea peapo pejejemogyau. Ojee pejemujar ire Kristu 'ga pē mojemogyppygukari a'jea futat ojee. A'eramū pēē 'ga rerowiaa futat. Jarejuwarete 'ga muorypa au'jeteramū pejejeupe 'ga remiapofera mama'e are.

⁸ Pejejea'gwau Jarejuwarete 'ga ree morogyta 'me mome'wara 'gā nui. Pejemu'jawe'em 'gā nee. Perowiat kasi 'gā 'mea ne. NaKristu 'ga je'ega rūi 'gā omome'u. Wea'aw are etee 'gā pē mu'ei. Morogyta ymanera etee futat 'gā omome'u akou. Mama'eukwaaw are etee 'gā pē mu'ei. NaKristu 'ga 'eawera rūi 'gā omome'u pē nupe.

⁹ A'eramū ki pēē 'gā porogyta rerowiare'ema pejejemogyau.

'Uwarete 'ga 'jawe katu katu futat Kristu 'ga. Jejui Kristu 'ga te 'ā 'ut 'au wyy pe 'Uwarete 'ga ree jane mu'jawamū rakue. Kūima'eramū jane 'jawe agawewi futat 'ga. A'ere 'ga 'Uwarete 'ga 'jawe futat.

¹⁰ Jejui Kristu 'ga ree futat 'ā pejejemujaa rakue, ipājērete ma'e 'ga ree futat 'ā pejejemujaa rakue. Ywagipewara pājēa apyraapara 'ga. Ywy pewara pājē, 'y pewara pājē. Najueje etee ipājē ma'ea. Mīmera pājē apyraapararete 'ga futat. Nitywi futari pājē mū 'ga apyraaparamū. 'Ga futat 'ūina 'wyrirareteramū mama'e upe. 'Ga ree pejemujar ire Janeruwarete 'ga opājē

muri pē nupe nanē nū. Ojee pejemujar ire Kristu 'ga rekoī pē pyri. Janeruwarete 'ga nanē akou pē pyri nū. A'eramū pēnemifutara atee pawe'emamū futat pē nū.

¹¹ Pēē 'ā Jarejuwarete 'ga remiayuwā nanē 'awamū nū. Ymā te oreyppy 'gā judeu 'gā etee Janeruwarete 'ga remiayuwā rakue. "Pejemojewag iki jee", 'jau 'ga 'gā nupe rakue. "Ijewak ma'e 'gā etee jeremiayuwamū", 'jau 'ga 'gā nupe rakue. A'ere 'awamū nanarū. Jejuī 'ga rerowiaara 'gā juejue te 'ga omogy 'awamū wemiayuwamū. Ijewak ma'e 'gā, ijewage'ema 'gā 'jau 'ga imogyau wemiayuwamū Jejuī 'ga jane erowiarāmū. Werowiarāmū Kristu 'ga janetywera moiri jane wi. A'eramū 'ga mama'e tywera apo awi jane mueateeukaa. Jarejemifutar imū mama'e apo awi nanē jane mueateeukaa nū.

¹² Pēnea'at Kristu 'ga manūawer are. 'Ga manū re 'ā 'gā 'ga monou inuga ita kwara pype rakue. Itā kwara pype 'ga mono 'ga nug ire 'ga Ruwarete 'ga 'ga moferapa etee opājē mū rakue nū. Nan tee futat nipo pēē. 'Ga rerowiarāmū pēē 'ga rerowiar ymanera 'ga amū upe pejepymāūkāa pejetywer awi pejepoira resaukaawamū. 'Y pe pē pymā: "Kristu 'ga amanū jetywera moiawamū rakue" 'e rerowiaara resaukaawamū pejejaupe. A'eramū je 'ga rerowiarāmū tekou 'awamū. "'Ga manū re 'ga Ruwarete 'ga 'ga moferapa opājē mū nū. Aipoa je erowiarāmū Janeruwarete 'ga opājē mua jee, mama'e esage apoukaawamū jee" 'e rerowiaara resaukaawamū pejejaupe. Oferaw ire Kristu 'ga uēma ita kwar awi, akou nū. Nan tee futat pē'ē 'y awi pejepymū re. A'eramū ki pēē pejejemogyau esage 'ga upe.

¹³ Ymā te 'ā pēē pejemifutar imū etee mama'ea peapo rakue. NaJarejuwarete 'ga remiayuwā rūi 'ā pēē nakue. Nepeenuwi futari 'ga je'ega rakue. Amanū ma'e 'jawe pejejemogyau 'ga upe rakue. A'ere 'ga 'awamū pē mogyi wemiayuwamū. Pētywera 'ga omoit pē nui. A'eramū 'ga pē mogyau oferap ma'e 'jawe ojeupe.

¹⁴ Ymā te Janeruwarete 'ga janetywera kwasiari inuga oka'aran are rakue. A'ere jane nienupawi Moisesi 'ga upe 'ga remikwasiarukarera rakue. A'eramū 'ga a'e renuwe'em are janetywera kwasiara inuga oka'aran are rakue. "Nuenupawi futari 'gā je'ega. A'eramū 'gā otywetyweramū jee. A'eramū je 'gā nerekou tyweate 'gā tywer are" 'ea 'ga inuga ikwasiaa oka'aran are. Sā'ā ae mama'e mura epye'eme. Epye'eme imuripyra 'jawe futat tuwi wepye'emamū 'ga upe rakue. A'ere Kristu 'ga, 'ypepywar are 'ga manū, janetywera mepyawamū. A'eramū Janeruwarete 'ga 'awamū Kristu 'ga remiayuwamū jane rerekou tywera'em janetywer are.

¹⁵ 'Ypepywar are amanūmū Kristu 'ga mama'eukwaawa 'wyriara pājē'oka. Emiayuwā reewe futat ako 'ga ipājē'okapap ai'i. Jane rowase futat ako 'ga mama'eukwaawa pājē'oka ai'i. Imojenosōu ako 'ga jane reape ai'i.

¹⁶ A'eramū ki pēē pejeapyakawe'em 'gā amū porogyta 'me are pejejemogyau ne. Iporogyta 'me ma'e 'gā nipo 'jau: "Peko kasi tesirūgatu ne. Pe'u tesirūmet kasi mama'ea ne. Pejeporowykyawe'em 'araiwa rupi. Jayru'wi are, morowykye'em are. Mīmer are nanē nū pejekowe'em tesirūgatu nū", 'jau futatee 'gā pē nupe. A'ere kasi peapyaka 'gā je'eg are ne.

¹⁷ Ymā janepypp 'gā nemiapofera te poromū mama'ea rakue. A'eramū pēē pejeapyakawe'em aipoa morogyta ymaner are. Morogyta ymanera Jejuī 'ga remiaporama resaukaawa te rakue. A'ere ako 'awamū Jejuī Kristu 'ga ruri janee ikue. A'eramū jane 'awamū 'ga kwaapa. A'eramū jane mama'e apowe'em morogyta ymaner imū. Jejuī Kristu 'ga te jane mu'e mama'e a'je are. 'Awamū jane mama'e apoi 'ga je'eg imū etee futat.

¹⁸ A'eramū ki pēē pejeapyakawe'em 'gā 'me are pejejemogyau. "Nepēa'wyri Jarejuwarete 'ga upe. A'eramū pēē pejeje'ega monowe'em 'ga upe tāmējē. 'Ga pyriwara 'gā nupe etee ra'ne pejeje'ega monou. A'eramū 'ga pyriwara 'gā etee oporogytau Jarejuwarete 'ga upe pē nee. Afayup futat je ee ko", 'jau futatee nipo 'gā pē mu'jau wyagipewara 'gā muore'y are, ofayup 'me are. A'ere kasi peapyaka aipo 'gā je'eg are ne. O'meramū 'gā 'i. Wemikwaawe'em are aipo 'gā jamu'ei ekoetei. Ojerowiaraipe ekoetei 'gā ojee. Wemifutar imū etee 'gā mama'ea apoi.

¹⁹ Aipo 'gā Kristu 'ga rerowiare'ema 'gā futat. Najamu'ei futari 'gā mama'e a'je are. NaKristu 'ga ree rūi 'gā jamu'ei. Morogyta tywer are tee 'gā jamu'ei. A'ere Kristu 'ga werowiarāmū Janejararetea futat. A'eramū 'ga ojejukau jane ree, jane mu'akwaapa janeremiapo are. 'Ga 'ā aeakaga 'jawe. Aeakaga aeretea muaranuwukaa. Aero'oa ojememōu aepēpenaw are. Aerajyga ae mokurējūka pāwē gatū etee te futat. A'ere aeakaga etee imuaranuwukari imujaa. Nan tee futat Kristu 'ga jerowiarukari tāmējē werowiarāmū janee. 'Uwarete 'ga remifutar imū etee futat 'ga lapou.

²⁰ Ymā te 'ā Kristu 'ga manūi 'ypepywar are janetywera moiawamū rakue. 'Ga 'ā pē mū'jāu mama'eukwaawa 'wyriara remiayuw awi. Kristu 'ga ree pejejemujaa 'awamū pejejemogyau. A'eramū pēē pejepoia pejetywer awi. A'eramū pēē 'awamū mama'e apowe'em tekotee 'gā je'eg imū. Sā'ā ae amanū re mama'e apou'jawe'ema. Nuenuwu'jawi ojoje'ega. Nan tee futat ki pēē 'awamū mama'e apou'jape'ema 'gā je'eg imū, pejeapyakau'jape'ema 'gā 'me are pejejemogyau.

²¹ Aipo 'jau nanē nipo 'gā 'mea pē nupe nū. Mama'e mū ree nanē nipo 'gā 'jau nū. "Peawyky kasi 'aga ne. I'wawe'em nanē esaka nū. Pejewyke'ema nanē ee nū", 'jau futatee nipo 'gā pē nupe, wemikwakup 'me are. A'e are sipo peapyaka pejemogyau? Naani.

²² Peapyaka kasi ee ne. Teepaw etee 'gā nemimome'ua. Najaneruwarete 'ga je'ega rūi aipo e'i. Wea'aw are etee aipo 'gā jamu'e'i ekoetei.

²³ Aipo are ajamu'jara 'gā i'akwaap ma'e 'jawe futat numiamū. A'ere i'me ma'e 'gā futat. Ymā te Janeruwarete 'ga janepy 'gā mu'e'i omuoryw are rakue numiamū. A'ere aipo 'gā niporomuorywiweri 'ga remifutar imū 'ga ree rakue. A'eramū 'gā 'agamū "Orojemifutar imū sipo ore Jarejuwarete 'ga muorywi pa", 'jau nipo 'gā ajemogyau numiamū. "Ore Jarejuwarete 'ga ore aramuoryp", 'jau futatee nanē nipo 'gā ajemogyau nū. "Pejereko tywet pēē te futat Jarejuwarete 'ga muorypawamū", 'jau futatee nanē nipo 'gā ajemogyau nū. A'ere 'gā nemimu'ea nia'wyri futari. Na'gā nemimu'efera rūi mama'e tywera apoukare'ema jatee. Jarejuwarete 'ga pājē mū te jane mama'e tywera niapoi.

3

¹⁻² Jejui Kristu 'ga manū re Janeruwarete 'ga 'ga moferapa 'ga mogou nū. Kristu 'ga ree pejemujar ire Janeruwarete 'ga pē mogyau oferap ma'e 'ga 'jawe. 'Ga moferaw ire Janeruwarete 'ga Kristu 'ga rerawau im'ina ojepeyri mama'e jarareteramū 'ga mogou 'wyriaramū. A'eramū ki pēē pejejea'aramū pejemogyau Jejui Kristu 'ga muorypawa mama'e are etee futat. Pejejea m'ynu'jape'ema futat 'ga muorypawe'ema mama'e are.

³ Awamū nepeapou'jaw arūi mama'e ymanera, pejemiapofer ymanera. Sā'ā ae amanū re mama'e tywera apou'jawe'ema. Nan tee futat pēē. Kristu 'ga rerowiar ire ae poiri mama'e tywera apo awi. 'Ga 'jawe etee futat jarejemogyau. Jejui Kristu 'ga jaawamū pejemogyau. 'Ga 'Uwarete 'ga ree ojemujat ma'ea. A'eramū ki pēē pejejea m'yna 'gā muorypawa mama'e are etee futat. 'Ga rerowiare'ema 'gā naeapyo'i futari Jarejuwarete 'ga ree pejemujara.

⁴ A'ere nipo 'gā anure 'gā neapyoramū ee. Kristu 'ga ruramū nipo Janeruwarete 'ga jane nua 'ga rupi. Kristu 'ga jane mogyau nakwaparimū etee warāu rūi. Oje'jawe futat nipo 'ga jane mogyau. A'eramū jane 'ga ruaw esage renyfuga rupi nipo jarejua 'ga rupi jarejypa.

Pēneatee mama'e tywer awi

⁵ A'eramū je 'jau pē nupe: Pēneatee mama'e tywera apo awi. Amanū ma'e 'jawe futat nepeapou'jawi mama'e tywera. Pejekowe'em pejemirekoe'ema kūjā are. Kūjāmeramū nanē pejemene'em are pejekowe'em nū. Pemogoukat kasi kūima'e amuteea pejee kūjāmeramū ne. Nia'wyri aipoa, 'jau je pē nupe. Pejekaraemā kwai are te nanē pejejea'are'emamū nū. Okaraemā kwai are etee ea'at ma'e 'gā okaraemā kwai are etee futat ojemogypyky. Okaraemā are ojemogypyky ma'e 'gā maira'me are ojemogypyky ma'e 'jawe futat. Nojemogypygyi 'gā Jarejuwarete 'ga ree. A'eramū okaraemā kwai are etee 'gā jemogypygya nanē wa'wyr'e'emamū nū.

⁶ A'eramū nanuara 'gā akou tyweaete Jarejuwarete 'ga upe. Nuenuwi 'gā 'ga je'ega. A'eramū Janeruwarete 'ga 'gā nerekou tyweaete nipo anure.

⁷ Jejui 'ga rerowiare'emawe pēē nanē mama'e apou pejemifutar imū etee futat rakue nū. Nepeenuwi futari 'ā 'ga je'ega rakue.

⁸ A'ere 'awamū peenuw 'ga je'ega. A'eramū pēē 'awamū mama'e tywera apou'jape'ema futat. Pejejuaykawe'em nanē 'gā amū pejereko tyweramū. Pejekowe'em pejemara'ne'emamū pejejee. Pejejoje'ēwu'jag ekoete'em nanē nū. Pejeje'egayawe'em nanē pejejaupe. Pejeje'egaiwe'emamū nanē pejejaupe.

⁹ Peje'me'emamū nanē pejejaupe. Mīmera kasi peapo ne, a'e je pē nupe. Ymā 'ā mama'e tywera ete peapo rakue. A'ere pēē 'awamū Jejui Kristu 'ga ree pejemogypyky. A'eramū pēē 'awamū mama'e tywera apou'jape'ema pejemogyau.

¹⁰ Awamū pejemujat Kristu 'ga ree. A'eramū pēē 'awamū ymāwarera mama'e tywera apoawer awi pejeateeramū futat. Pe'je pejemujau 'awamū Jejui Kristu 'ga ree. A'eramū Janeruwarete 'ga mama'e apoukaa pē nupe wemifutar imū. Oje'jawe 'ga pē mogyau mama'e esage etee iapoukaa pē nupe. Oje'jawe pēē mama'e aporamū 'ga ojekwaap katu katuukaa pē nupe. Aipoa 'ga afutat.

¹¹ 'Ga 'jawe ete mama'e apoaramū jane jarejemogyau jareju'jaju'jawe futat. Ore judeuramū, pēē judeue'emamū, imojewagipyre'era 'gā, imojewagipyre'ema 'gā, tapy'jja 'gā, towajat tesirūmera 'gā, o'wyriara upe te oporowyky ma'e 'gā, ojeupe te oporowyky ma'e 'gā. Mīmeramū nipo jane jarejemogyau jareju'jaju'jawe etee futat. A'eramū jane "najanepyituna rūi 'ga", 'jawe'em jarejeamutee 'gā nupe. Jarejuwarete 'ga remiayuwamū jane jareju'jaju'jawe etee futat. Kristu 'ga janejat pāwē pāwē futat. 'Ga etee te jane apyraap.

¹² Ymā we te 'ā Janeruwarete 'ga poromutaramū pē nee rakue. 'Ga 'ā pē mū'jāu wemi-ayuwamū pē mogyau rakue. A'eramū ki pēē nanē pejepota'wa esageramū pejejeue pejejemogyau 'ga 'jawe etee futat. Pejejemuaēma pejejeue. Pejejee etee pejejerowiaraipe'ema pejejemogyau. Pejejeaite'ema pejejeue.

¹³ Mama'e tywera pejejeue iaporamū pejemara'ne'emamū pejekou pejejeue namutamut. Pejeateeramū kamēsiete jui. Sā'ā Janejararete 'ga, Kristu 'ga, jane raykae'ema janetywer are, imoira etee jane wi. Jane wi janetywera moir ire 'ā 'ga wea'aru'jawe'emamū futat jane rayka are. A'eramū ki pēē nan tee futat, 'ga amū mama'e tywera pejejeupe iapo re, pejejea'are'emamū au'jeteramū 'gā nayka are. Pejejeateeramū kamēsiete futat 'gā nayka awi. Pejejea'aru'jawe'emamū futat ee nū.

¹⁴ Nan pejemogya esage futat. A'eramū je 'awamū 'jau'japa pē nupe nū. Pēpota'wa esage pejejeue. A'eramū pēē nanuara apo re pejejemogyau majepēi 'yweteewara 'jawe futat.

¹⁵ Ymā we te 'ā Janeruwarete 'ga pē pyyrūi rakue. "Tamopota'waukat 'gā ajaupe 'jau", 'jau 'ga ojeupe rakue. A'eramū 'ga pē pyyrūmū ojeupe rakue. Werowiaramū Kristu 'ga pē mopota'waukaa pejejaupe, pē mogyau wemiayuwamū. A'eramū pēē 'awamū pejejemogyau majepēi 'yweteewara 'jawe futat. Pejejeupe Jarejuwarete 'ga remiapofer are 'ga muorypa pejejemogyau.

¹⁶ Kristu 'ga je'eg are pejejea'aramū pejejemogyau 'eramū nipo pēneapyo futat 'ga 'eawer are. A'eramū pēē pejejamū'jau 'ga pejemū'eawer are. Pemaraka'ag ki 'ga 'eawer imū etee futat. Marakau futar iki 'ga remiapofera pemome'u 'gā nupe. Jarejuwarete 'ga muorypa 'ga marakau futat pejejemogyau. Pejejeupe 'ga remiapofer are 'ga muorypa a'jea futat.

¹⁷ Jejui 'ga remiayuwamū pēē. 'Ga futat Janejararete. A'eramū ki mama'ea peapo esage etee pejejemogyau 'ga ree. Peporogyta esage nanē ki pejejaupe 'ga ree nū. 'Ga futat jane mota'waukaa 'Uwarete 'ga upe. A'eramū pēē 'ga ree Jarejuwarete 'ga muorypa pejejemogyau 'agamū.

Pejemogy esage 'ga upe

¹⁸ A'eramū ki pēē kūjāmeramū, imen ma'eramū, pejeapyakau pejemena je'eg are. Kristu 'ga remiayuwamū pēē. A'eramū 'ga futat aipoa futaa.

¹⁹ Emireko ma'eramū ki pēē pejeporomutaramū pejemireko are. Peje'eg wywrafen kasi pejemireko upe ne.

²⁰ Kunumīnamū nanē pēē pejejara 'gā je'ega renupa etee pejejemogyau. Kristu 'ga remiayuwamū pēē. A'eramū pēē pejejara 'gā je'ega renuwa Jarejuwarete 'ga muorypa.

²¹ Pēē nanē ki ta'yriaramū pejeje'eg esage etee pejeja'ya 'gā nupe. Ojeupe peje'eg esage'emamū pēna'ya 'gā nuapoi futari mama'ea pēnemifutar imū ne. 'Gā norywa mateepa etee ne.

²² Pēē mū nipo pejeporowykyau pejejerewara upe. A'eramū ki pēē pejejerewara 'gā je'ega renupa. 'Gā amū nipo oporowykyau esage werewara 'ga reape etee. Werewara 'ga remiesaga tywi nipo 'gā oporowykyau esage'em. A'ere kasi nanarūi peapo ne. Pejejepyri pejejerewara 'ga rekoe'emamū nanē ki pēē mama'e apou esage pejejerewara 'ga 'eawer imū etee futat. Pekwaap 'ā Jarejararete 'ga Jejui Kristu 'ga. A'eramū pēē pejeporowykyau esage 'ga muorypawamū.

²³ Pejeporowykyau esage futat pejejemogyau. Napejejerewara 'ga upe etee rūi peporowyky. Nanuaramū Jarejararete 'ga upe nanē futat peporowyky. Ma'eramū 'ā je 'i pē nupe: Peporowyky esage ki, je 'i pē nupe.

²⁴ Pēporowyky esage resag ire Janeruwarete 'ga pē mēpyi pēporowyky esageawer are. Aipoa pekwaap. Kristu 'ga 'ā Janejararete. A'eramū Janeruwarete 'ga u'eawer imū etee futat pē mepyau esage Kristu 'ga upe pēporowyky esageawer are.

²⁵ Mama'e tywera apoara 'gā nanē nipo Janeruwarete 'ga imepyau pāwē pāwē 'gā nemiapoferarū'e'awer imū etee futat, 'gā nerekou tyweaete nipo 'ga 'gā nemiapofera tywer are.

4

¹ Pēē mū pejejeupe oporowyky ma'e 'gā nerekwara. Pejejeupe oporowyky ma'e 'gā nerekou esage. Mama'e monou 'gā nupe, pejejakate'eme'emamū futat. Mama'e pyu 'gā tywe'emamū pēē mama'e monou 'gā nupe. 'Gā jararete 'ga pējara nanē futat 'ga nū. 'Ga 'ā Jejui Kristu 'ga. Ywag ipe 'ga reni. Ojejukau esage 'ga pē nee nanē nū. A'eramū ki pēē pejejukau esage pejejeupe oporowyky ma'e 'gā nee 'ga 'jawe. Aipoa esage 'ga upe.

'Gā neko are 'gā mu'akwaapawet

² A'ere 'awamū je 'i Jejui Kristu 'ga rerowiaaramū juejue pē nupe. Jarejuwarete 'ga upe pejeporogyta kasi pēnea'at mama'e mū ree te ne. 'Ga muorypa nanē pejejeupe 'ga remiapofer are nū.

³ Je ree nanē pejeporogytau 'ga upe nū. Moromunepawa pype je reni. Kristu 'ga mome'u jereko are 'gā je munewi je mýina. Ymā te 'gā naeapyoi Kristu 'ga ree rakue. A'ere 'awamū je 'gā mueapyoi 'ga ree. A'eramū pēē pejeporogytau 'ga upe je ree. "Erooukat 'gā amū Paulo 'ga pyri, ki Ku'jyp. Nokwaawi we 'gā Kristu 'ga porogytafera. A'eramū ene 'gā nerawaukaa 'ga pyri. Ojepyri 'gā oramū Paulo 'ga Kristu 'ga porogytafera tomome'u 'gā nupe 'jau", pe'je ki 'ga upe je ree.

⁴ "Epoat Paulo 'ga Kristu 'ga mome'wau katu katuukaa 'gā nupe", pe'je ki 'ga upe je ree. Teporomome'ukatuweramū Kristu 'ga mome'u are 'gā nupe. A'eramū je a'eramū "Pejeje'ega pemono 'ga upe je ree", 'jau pē nupe.

⁵ Pejejemogyau esage nanē ki Kristu 'ga rerowiare'ema 'gā pype nū. Pejenosī awi Jejui 'ga mome'wau 'ga rerowiare'ema 'gā nupe. 'Gā pyri pejejemogyau pēē 'ga mome'wau futat 'gā nupe. A'ere ki pēneapyo ra'ne 'gā neko are. 'Gā neko esageramū tāmējē ki Kristu 'ga mome'wau 'gā nupe. Kasi a'e pe 'gā pēpy'aetūj'aiw ine, Kristu 'ga mome'wau 'gā nupe ne.

⁶ 'Gā nupe 'ga mome'wau pēē a'jeteewi futat 'ga mome'wau 'gā nupe. A'eramū te nipo 'gā wapyā mýi pēnemimome'u are. A'eramū nipo 'gā oporonupa pēnemimome'u are pē nupe. A'eramū taetu pēē pejejeupe ee 'gā poronuwamū 'ga mome'wau esage etee futat 'gā nupe. Nan iki Kristu 'ga pemome'u erowiarukaa 'gā nupe.

⁷⁻⁸ Tikiku 'ga nipo je omono pē pyri, pē nupe temome'wawamū. Tikiku 'ga Kristu 'ga rerowiaara 'ga futat. A'eramū 'ga janerewirera 'jawe futat. Orejekoty'aawarete 'ga futat. Jarejararete 'ga upe oreporowyky irū 'ga futat. Pē pyri je 'ga monoi temome'wawamū pē nupe. Kristu 'ga ree etee pē mojemogygyukaawamū nanē je 'ga monoi pē pyri nū.

⁹ Onesimu 'ga rupi je 'ga monoi pē pyri. Onesimu 'ga nanē janerewirera 'jawe futat nū. Jeporomutat je 'ga ree 'ga rekoramū. Pē'wyr awi futat 'ga ruri je pyri rai'i. A'eramū nipo 'gā 'au ojeapo ma'efera mome'wau pē nupe.

¹⁰ Aristaku 'ga ako 'au moromunepawa pype je pyri. Oje'ega 'ga werooukat pē nupe, pē futaawamū. Maku 'ga nanē oje'ega rerawaukaa pē nupe nū. Maku 'ga Panape 'ga rewirera 'ga. Sooko je ako teje'ega rerooukara pē nupe 'ga ree ikue. "Pejejepyri Maku 'ga oramū ki peroo esage 'ga pejejepyri", 'jau je ako teje'ega rerawaukaa pē nupe 'ga ree ikue. 'Ga futat nanē oje'ega werooukat pē nupe nū, pē futaawamū nū.

¹¹ Josue Justo 'ga nanē oje'ega werooukat pē nupe pē futaawamū. Aristaku 'ga, Maku 'ga, Josue Justo 'ga. Mīmera 'gā judeua futat. Kristu 'ga ree 'gā jemogygygyi ajemogyau. 'Gā futat jejuru irūnamū ajemogyau Kristu 'ga mome'wau je 'jawe pē nupe. "Pe'je pejejemogyau Ku'jywa 'ga remiayuwamū", 'jau 'gā 'gā nupe, jeje'egawa rupi etee futat. "Ku'jywa 'ga jane'wyrjararetea futat", 'jau 'gā ajemogyau 'gā nupe je'eawera 'jawe etee futat. A'ea je maku'iu 'gā nee. A'ere 'gā etee'i je poari Kristu 'ga mome'wau je pyri. Amumera 'gā judeue'ema 'gā jejuru irūa.

¹² Epafrasi 'ga nanē oje'ega werooukat pē nupe, pē futaawamū. Pē'wyr awi 'ut ma'efera 'ga futat. Kristu 'ga upe 'ga porowykyi ore pyri. Jarejuwarete 'ga upe 'ga oje'ega monoi akou pē nee jepi. "Epoat ejemiayuwa 'gā, Korosi pewara 'gā. Ejerowiarukat tāmējē 'gā nupe. Ejemifutar are 'gā emueapyo", 'jau 'ga akou Jarejuwarete 'ga upe pē nee.

¹³ Oporomutamū 'ga pē nee. Laodiceja 'jaw ipewara 'gā nee, Ieroporisi 'jaw ipewara 'gā nee. Mīmera amunawa pypewaramū 'ga poromutamū pē nee. A'eramū 'ga oje'ega monou Ku'jywa 'ga upe pē nee akou. Jeremianuwamū futat 'ga oje'ega monoi 'ga upe pē nee. A'eramū je 'ga 'eawera kwaapa.

¹⁴ Morofuanugara 'ga, Luka 'ga, nanē oje'ega rerawaukaa pē nupe, pē futaawamū. Luka 'ga janejekoty'aawaretea. Demas 'ga 'jau oje'ega rerawaukaa pē nupe, pē futaawamū.

¹⁵ A'eramū ki pejewau Laodiceja pe jee. "Paulo 'ga oje'ega werurukat pē nupe, pē futaawamū", pe'je ki jarejewirera 'gā nupe pejewau jee. Jarejenyra 'gā nupe nanē ki pe'je nū. Nīfa ēē upe nanē aipo 'jau nū, ēē rog ipe ajatyka ma'e 'gā nupe nanē jeje'ega mome'wau nū.

¹⁶ Jeremimonofera ka'arana mogyta re pēē erawaukaa 'ga amū upe, Laodiceja pewara 'gā nupe nanē imogytaukaa nū. 'Gā nupe jeremimonofera ka'arana nanē pēē imogytau pejejuemianuwamū nū.

¹⁷ Akipu 'ga upe ki pe'je jee: "Janejararete 'ga futat 'ā enu moporowykyukat ojeupe rai'i. A'eramū ene ejeupe 'ga remiapoukarera etee futat iapoupap 'ga upe, e'i Paulo 'ga enee rai'i", pe'je ki 'ga upe jee.

¹⁸ Teje'ega je akwasiarukat ka'aran are 'gā amū nupe tejee. A'ere je futat amū kwasiari inuga pē nupe. Pauloramū je teje'ega monou pē nupe pē futaawamū 'ea je ikwasiaa ka'aran are. A'eramū pēē jeremikwasiarera resaka. "Paulo 'ga futat okwasiat imua janee rai'i", 'jau pēē pejejaupe jeremikwasiarera ka'arana ruwamū.

Moromunepawa pype je reni. A'eramū pēē pejejea'aramū pejejemogyau je ree. Jarejuwarete 'ga upe pejeje'ega monou pejejemogyau je ree.

Jarejuwarete 'ga resagea pē nerekoa je afutat.
Kweramū jeje'ega pē nupe.

1 Tesarūn

Paulo 'ga Silasi 'ga retee awau watau kwe pe amunawa tesirūmera pype. A'ere 'gā kwa 'gā kwawi etee amunawa mū pyu. Awau 'gā Tesarūn ipe etee opytau. Muapya morowykye'ema magwapa. A'e pe Paulo 'ga Jejuī 'ga mome'wau 'gā nupe. A'eramū 'gā kwaiwete 'ga remimome'u rerowiaa. A'eramū 'ga renupara 'gā ajemogyau Jejuī 'ga rerowiaaramū.

A'eramū erowiare'ema 'gā ajuerekoayau 'gā nee. “Ma'ja are 'gā Paulo 'ga rerowiaa 'ū? 'Gā tete 'ā oo ekoete ajemogyau Paulo 'ga remimome'u rerowiaaramū a'i kūi”, 'jau 'gā jaupe.

A'eramū 'gā a'eramū Paulo 'ga ppyg are afueweramū. A'ere 'gā Paulo 'ga nuesagi rakue. A'eramū Jejuī 'ga rerowiaara 'gā Paulo 'ga moka'jamukaa ppytunimū. “Ere ewau ore wi nū”, 'jau 'gā 'ga upe, 'gā 'ga a'gwau Jejuī 'ga rerowiare'ema 'gā nui.

A'eramū 'gā a'eramū awau'jape'ema aipoa amunaw ipe. Ka'arana etee 'ga imonou ikwasiaa 'gā nupe. “A'jea futar iki Jejuī 'ga perowiat rai'i”, 'jau 'ga imonou ikwasiaa ka'aran are 'gā nupe rakue.

¹ Ka'arana je akwasiat Tesarūn ipewaramū pē nupe. Jejuī 'ga rerowiaara 'ā pēē, Jarejuwarete 'ga remiyauwa pēē. Janejararete 'ga, Jejuī Kristu 'ga remiyauwa nanē pēē nū. A'eramū je ka'arana kwasiaa pē nupe. Je 'ā Pauloa. Silasi 'ga, Timoteo 'ga. Mīmera 'gā ako 'au je pyri. A'eramū ore ka'arana kwasiaa imonou pē nupe pē mu'jau Jarejuwarete 'ga remifutar are.

Jarejuwarete 'ga resagea pē nerekoa je afutat. Pē mopy'ata'waa nanē je ifutaa nū.

'Gā nee Jarejuwarete 'ga muorypawet

²⁻³ Jarejuwarete 'ga upe ore oroje'ega monoi pē nee jepi. Oreku'ia ore rerekou pē nee. A'eramū ore 'jau Jarejuwarete 'ga upe: “Oreku'i ore Tesarūn ipewara 'gā nee”, 'jau ore 'ga upe jepi. “'Gā 'ā ene rerowiat tāmējē ajemogyau. A'eramū 'gā mama'e apou eneje'eg imū etee futat”, 'jau ore 'ga upe jepi. “'Gā 'ā iporomutat ene ree nanimenime. A'eramū 'gā eneporowykye etee iapou”, 'jau ore 'ga upe jepi. “Jejuī 'ga rura 'gā wapesak ajemogyau. A'eramū 'gā opoire'ema ene wi. Ene rerowiare'ema 'gā amū 'gā nerekou tyweaete agawewi. A'etea 'gā nopoiri ene wi. Ene rerowiat ete tāmējē 'gā ajemogyau”, 'jau ore 'ga upe oroje'ega monou, pē mome'wau jepi. A'eramū ore araku'iramū arakou pē nee jepi.

⁴ Pēē 'ā a'jea futat orerewirera 'jawe oree. Kūjāmeramū pēē pejejemogyau orerenyra 'jawe oree. Jarejuwarete 'ga remiyauwamū pēē pejejemogyau. A'eramū 'ā pēē pejejemogyau orepytuna 'jawewaramū oree. A'jea futat Janeruwarete 'ga poromutamū pē nee. A'jea futat 'ga pē pyyrūgē pē mogyau wemiayuwamū rakue. A'ea jane sikwaap.

⁵ Ymā ako ore oi morogyta esage mome'wau pē nupe ikue, Jejuī 'ga mome'wau pē nupe ikue. “Jejuī 'ga 'ā Janeruwarete 'ga ra'yraretea. 'Ga amanū janetywera mepyau 'Uwarete 'ga upe rakue”, 'jau ako ore 'ga mome'wau pē nupe ikue. “Je katu'og ape, ojeupe 'eramū 'ga pē katu'ogi pē mogyau wemiayuwamū”, 'jau ako ore pē nupe ikue.

Naoroporogyta etee rūi ako ore arawau pē nupe ai'i. Jarejuwarete 'ga remiapoa we futat ako ore esaukaa. Mama'ea ako ore iapou 'ga pājē mū etee pē neape ikue. Ore a'jea futat orokwaap, “ga pājē mū ore mama'e apoi” e kwaapa. “Janeruwarete 'ga jane katu'oga afutat” ea nanē ore ikwaapa nū. A'eramū 'ā pēē 'ga rerowiaa pejejemogyau. Arako esage ako ore pē pype ikue. Orereko esagea 'ā pekwaap. Au'jete ore resak pejepe.

⁶ A'eramū ako pēē pejejemogyau esage ore 'jawe ikue. Jarejararete 'ga ree nanē pejejemū'jau nū.

Pejejeupe Jejuī 'ga rera mome'uramū ako pejeku'iramū pejejemogyau ee ikue. A'ere 'gā amū Jejuī 'ga remiyauwamū pē nekoramū pē nerekou tyweaete. Jejuī 'ga rerowiare'ema 'gā pē nerekou tyweaete agawewi. A'etea pēku'i etee futat pejejemogyau oreje'eg are. Janeruwarete 'ga 'Agesagea pē nerekou pē maku'iukaa etee futat.

⁷ A'eramū 'ā Masetoni wyy pewara 'gā pēneko esage resaka 'ā rai'i. Akaja wyy pewara 'gā nanē 'ā esaka nū. Pēnemiapoa 'gā wesak. Pēnemimome'ua nanē 'ā 'gā enupa nū. A'eramū 'gā, Jejuī 'ga rerowiaara 'gā mama'e esage apou pē 'jawe.

⁸ Jejuī 'ga je'ega pemome'u pejejemogyau. A'eramū 'ā pēnemimome'ua okwasi'wasi'wau Masetoni wyy pewara 'gā nupe. Akaja wyy pewat, amunap tesirūmera pypewat. Mīmera 'gā nanē 'ā enupa rai'i nū. 'Awamū Tesarūn ipewara 'gā amū Jejuī 'ga rerowiaa 'ea awau okwasi'wau amunawa moymoyka. A'eramū ore a'eramū pē mome'wawe'em 'gā nupe. “Okwaap futat na'gā 'ā ne'ā”, 'jau ore arajaupe.

⁹ 'Gā we futat pē mome'u oree. “'Awamū Tesarūn ipewara 'gā Jejuī 'ga rerowiaara futat”, 'jau 'gā oree. “Ymā te 'gā nokwawwi futari Jarejuwarete 'ga ikue. Jejuī 'ga nanē

'gā ikwaape'ema nū. Maira'me a'agawa 'gā imuorypa erekou jepi. A'ere ako ereo peu 'gā mu'jau Jarejuwarete 'ga ree. Jejuu 'ga nanē ako ene imome'wau 'gā nupe ikue", 'jau 'gā oree imome'wau. "Eneje'ega renupawe 'gā amū opoia maira'me a'agawa rerowiar awi. A'eramū 'gā Jejuu 'ga rerowiaaramū ajemogyau nū. Jarejuwarete 'ga etee 'gā amuoryp 'awamū", 'jau 'gā pē mome'wau oree.

¹⁰ "Tesarūn ipewara 'gā Jejuu 'ga rura wapesak ajemogyau, Jarejuwarete 'ga ra'yrate 'ga rura rapesaka ajemogyau", 'jau 'gā oree pē mome'wau ai'i. "Ga manū re Janeruwarete 'ga Jejuu 'ga moferapa rakue nū. A'eramū 'ga anure 'ua werowiaaramū jane rerawau jane mogyau ywag ipe ojepyri, 'jau Tesarūn ipewara 'gā oree imome'wau", 'jau 'gā pē mome'wau oree. "Anure te nipo ajee Jarejuwarete 'ga rerowiare'ema 'gā jerekoukat tywari futari 'ga upe, wapyae'emawer ipe etee futat nipo 'gā ojemonoukaa mama'eukwaawa rapyaw ipe 'ga upe. Wa'yra 'ga rerowiaaramū te nipo ajee 'ga najane rereko tywera'uweri, 'jau Tesarūn ipewara 'gā amū oree", 'jau Masetoni ywy pewara 'gā pē mome'wau oree.

2

Jarejuwarete 'ga remiapofer are 'gā mued'aawet

¹ Naoroo tee rūi ore pē pyri ikue. Pēē 'ā ako Jejuu 'ga perowiat 'ga renupa ypy we ikue.

² Pē pyri oroo enune ore arawau ajepeja amunaw ipe ra'ne, Firiposi pe ra'ne arawau ikue. A'e pe peuwara 'gā ore munepa, ore m'ina moromunepawa pype. Ore kurapa nanē 'gā kypyre'emete nū. Ore rerekou tyweaete agawewi futat 'gā. A'etea ore norokyjei futari arawau Jejuu 'ga mome'wau pē nupe. A'eramū ako ore orojewi 'gā poir ire arawau pē pyri ikue. Janeruwarete 'ga ore mogyaukare'ema futat. A'eramū ako ore arawau Jejuu 'ga mome'wau. 'Ga rera renupawe ako pēē 'ga rerowiaa ikue. A'ere ako je 'i ko: "Naoroo tee rūi ore pē pyri", je 'i ko.

³ "Pe'je pēē Jejuu 'ga rerowiaa", 'jau ako ore pē nupe arakou ikue. Nore'mea'uweri ore pē nupe. A'jea futat ore 'ga mome'ui pē nupe. Namama'e tywera rūi te 'ā ore oromome'u pē nupe ikue. 'Ga kwaawukaa te ako ore oi pē nupe ikue. Mama'e esagea etee 'ā ore imome'wau pē nupe.

⁴ Jarejuwarete 'ga remifutar imū etee ako ore Jejuu 'ga mome'wau ikue. Janeruwarete 'ga te ako ore mogy omome'waramū pē nupe ikue. 'Ga muorypawamū te 'ā ore iapoi. Natesirūmera 'gā muorypawamū rūi te 'ā ore iapoi. Ku'jywa 'ga ore kwaap katu katu futat. "Je futat tāmējē 'gā na'e. Mama'e a'jea etee futat 'gā omome'u ra'e", 'jau Janeruwarete 'ga oree.

⁵ Nore'mea'uweri ako ore arawau pē nupe ai'i. "Pēē pēnesagesage ra'e", 'jawe'em ako ore pē nupe ikue. Nananuara rūi ako ore imome'wau pē nupe orojee pēporomutaawamū ikue. A'jea futat ako ore oi Jejuu 'ga mome'wau pē nupe ikue. Naka'aranūū are rūi ako ore oi oroporogytai pē nupe ikue. Jejuu 'ga mome'wau te ako ore oi pē nupe ikue. Janeruwarete 'ga ore kwaap katu katu futat.

⁶ "Pēē 'ā pēnesagesage, pe'je oree", naru'ei ako ore pē nupe ikue. Tekotee 'gā nupe nanē ako ore aipo 'jawe'em ikue nū. Jarejuwarete 'ga je'eg imū etee futat ore oi Jejuu 'ga mome'wau pē nupe.

⁷ Ore 'ā Jejuu 'ga remimonofera futat. A'eramū ore "mama'ea peapo amū oree", 'jawarū ore pē nupe numiamū. A'ere ako ore aipo naru'ea'uweri pē nupe ikue. Sā'ā kūjā wa'yra pita'gā are ijejukaa. Wa'yra upe mama'e murukare'ema ojeupe. Nan tee futat ore jejukai pē nee.

⁸ Oreporomutat wejue ore pē nee. Ma'eramū 'ā ore Jejuu 'ga mome'ui pē nupe. Aruapisi are ifuwet ma'e 'gā nesaka miamū amunipo 'ā ore noropoir'a'uweri futari Jejuu 'ga mome'u awi pē nupe.

⁹ Pē pype arakou ako ore oroporowykyau arakou ikue. Au'jeteramū ako ore oroporowykyau arakou ikue. Wyra pirera ore iapou 'ogamū. A'eramū ore ime'ega ka'aranūū are orojeupe. A'eramū ako ore "ka'aranūū pemut ape oree", 'jawe'em arakou pē nupe ikue. A'eramū ako ore Jarejuwarete 'ga je'ega etee imome'wau pē nupe ikue.

¹⁰ Pē pype arakou ako ore mama'e tywera apowe'em ikue. A'jeteetewi arajemogyau Jarejuwarete 'ga upe pē pype ikue. A'eramū tekotee 'gā ore ago'wawe'em. A'ea pekwaap. Janeruwarete 'ga nanē ikwaapa nū.

¹¹ Sā'ā ae kūima'eramū wa'yra mu'ea mama'e apo are. Nan tee futat ore pē mu'ei ee.

¹² "Pepoit kasi Jarejuwarete 'ga rerowiar awi ne. 'Ga remifutar imū etee mama'ea peapo pejejemogyau", 'jau ako ore pē nupe ikue. "Peko esage ki 'ga upe. 'Ga muorypawa etee iapou pejejemogyau", 'jau ako ore pē nupe ikue. 'Ga 'ā pē mū'ē ojeupe wemiayuwamū. Anure nipo 'ga pē monou pē mogyau ojepyri. Peu futat nipo pēē esage ma'e 'ga resaka. A'eramū ore 'ga remifutar imū etee mama'e apoukaa pē nupe.

¹³ Pē pyri arakou 'ā ore Jarejuwarete 'ga je'ega mome'wau pē nupe jepi. A'eramū ako pēē erowiaa pejejemogyau ikue. A'eramū pēē 'jau pejejaupe: "Nakūima'e tee 'ga je'ega rūi futat ra'e. Janeruwarete 'ga je'ega futat ra'e", 'jau ako pēē pejejaupe ikue. A'eramū ako pēē 'ga rerowiaa. Oje'ega renuwamū 'ga 'ā pē katu'oka oje'jawe. Pē muea'aa oje'jawe mama'e are. A'eramū ore 'jau Jarejuwarete 'ga upe: "Au'jete eje'ega ererowiarukat 'gā nupe", 'jau ore 'ga upe pē nee jepi.

¹⁴ Jejui 'ga rerowiaaramū pē nekoramū, pēpytuna 'gā, 'ga rerowiare'ema 'gā pē nereko tyweretei rai'i. A'ere napeu etee rūi 'ga rerowiare'ema 'gā 'ga rerowiaara 'gā nereko tyweretei. Judeja ywy pe nanē futat 'gā iapoi rai'i nū.

¹⁵ Ymā te judeu ypy 'gā Janeruwarete 'ga je'ega mome'wara 'gā apisau rakue. 'Awamū 'ā 'gā Jejui 'ga miamū ijukau rai'i. Janejararete 'ga 'gā ijukau rai'i nū. Ore nanē nū. Ore nanē 'gā ore mujānukaa pe awi, Jerusareg awi. Peu 'gā ore momytaukare'ema. Aipo apoara 'gā Jarejuwarete 'ga mamara'neukat ojee.

¹⁶ A'ere 'gā judeue'emamū pē nupe Jejui 'ga mome'u awi ore momig awi afuweramū numiamū. A'ere aipo 'gā Janeruwarete 'ga mamara'neukareteetei ojee. A'eramū 'ga 'awamū 'gā nereko tyweaete ee.

Paulo 'ga 'gā nesaga'upa

¹⁷ Orojot ete ako ore pē nui ikue. Pē pyri orepytaweramū numiamū. A'eramū ore aru'arasigamū arajemogyau pē nee orojea'aramū. "Gā pyri soo 'jau", 'jau ore arajaupe numiamū.

¹⁸ "Soo 'gā nesaka 'jau", 'jau'japa je tepytuna 'gā nupe jepi numiamū. A'eramū ore oro'wya jepi numiamū. A'ere nanēwējēmī. Mama'eukwaawa 'wyrriara nore monoukari ete nipo 'ā.

¹⁹ Jejui 'ga rerowiarāmū pēē 'ā ore maku'iu. Jejui 'ga ruramū nipo ore arawau 'ga pyri. A'eramū nipo ore 'jau 'ga upe: "Tesarūn ipewara 'gā nupe ako ore ene mome'u ikue. A'eramū 'gā ako kwaiwete oreje'ega rerowiaa ikue. A'eramū 'gā ajemogyau ene rerowiaaramū. 'Gā 'ā ene rerowiat nanimenime ajemogyau", 'jau nipo ore 'ga upe, 'ga pyri oroo re. A'eramū nipo 'ga 'jau oree: "A'jea. Jeporowykya peapo esage, je'eawer imū etee ra'e. A'eramū je teku'iramū tekou pē nee. Au'jete peapopap je'eawer imū etee rakue", 'jau nipo 'ga oree, ojeypyri ore oramū.

²⁰ Nitywi 'gā amū ore maku'iu pēē 'jawe. Pē nee ore jerowiari arajemogyau.

3

¹⁻² Orereaitapaw ore pē nee pēnera renupe'ema. Oreporesagiwer ore pē nee numiamū. A'ere ore norooarūi. A'eramū ore pē nesaga'upa arakou. A'eramū ore Timoteo 'ga etee imonou imorogytaukaa pē nupe. "Simono ene 'gā nesaka jarejee 'jau", 'jau ore 'ga upe ai'i. "Au toropyta Atenasi pe ene rapesaka 'jau", 'jau ore 'ga upe. Timoteo 'ga orerewirera 'jawe. Jarejuwarete 'ga porowykya 'ga wapo ore pyri ikue. Jejui 'ga mome'wara 'ga ore 'jawe. A'eramū ore a'eramū 'ga monou 'ga moporogytaukaa pē nupe. "Tesarūn ipewara 'gā te 'ā Jejui 'ga werowiat. A'ere 'gā ināinānī'i etee Jejui 'ga kwaawi. A'eramū ene ewau 'gā mu'jau esagesage 'ga ree. A'eramū 'gā ajemogyau erowiaa a'jea futat", 'jau ore Timoteo 'ga upe ai'i. "Pepoir awi Jejui 'ga rerowiar awi, 'jau ki ene 'gā nupe", 'jau ore 'ga upe.

³ "Pejereko tywereteramū miamū kasi pepoit Jejui 'ga rerowiar awi ne, 'jau ki ene 'gā nupe", 'jau ore 'ga upe. "Jejui 'ga rerowiaara 'ā jane. A'eramū 'gā amū jane rerekou tyweaete. Sā'ā ae yara mura imomora 'y pe esaga, ijerewa resaga. Nan tee futat Janeruwarete 'ga jane rereko tywerukari 'gā nupe. Taesak 'gā a'jea futat tejerowiara 'jau kwy, 'jau nipo 'ga janee, 'jau ki ene 'gā nupe", 'jau ore 'ga upe ai'i.

⁴ Pē pype arakou ako ore imome'ui pē nupe ikue. Pē nereko tywerete'ema uwe ako ore 'jau pē nupe ikue. "Awamū pēē Jejui 'ga rerowiaara. A'eramū nipo 'ga rerowiare'ema 'gā pē nereko tyweaete", 'jau ako ore pē nupe jepi. A'jea futat ore 'i pē nupe. Ore'eawer imū etee futat nipo 'gā pē nereko.

⁵ A'eramū je 'jau tepytuna 'gā nupe: "Maran gatu nipo 'gā jaruete ajemogyawe'em. Mama'eukwaawa 'wyrriara nipo 'gā omomoirukat Jejui 'ga rerowiar awi rai'i?" 'jau ore arajaupe. "Simome'u ekoete nipo jane Jejui 'ga 'gā nupe rakue?" 'jau ore arajemogyau pē nupe. A'eramū ore a'eramū kweramū Timoteo 'ga monou pē nesaka kamēšiete imoporogytaukaa pē nupe.

'Gā nera Paulo 'ga maku'iu

⁶ A'eramū 'ga awau pē nesaka ikue. 'Awamū 'ga 'ua pē mome'wau oree nū. "Tesarūn ipewara 'gā, Jejui 'ga rerowiaara 'gā ajemogy je 'ga rerowiaa. Nopoiri futari 'gā 'ga rerowiar awi", 'jau 'ga 'ua pē mome'wau oree. "Gā ojejuka je ajuee", 'jau 'ga oree pē mome'wau. "Pē nee nanē 'gā nea'aramū je ajemogyau nū", 'jau 'ga oree. "Pē nesaga'upa 'gā ajemogyau. Sā'ā pēē 'gā nesaga'uwa. Nan tee futat 'gā jemogyi pē nesaga'upa", 'jau 'ga oree imome'wau.

⁷ 'Ga pē mome'ua ore maku'iu pē nee. Mama'e tesirūa te ajee ojeup ore ai'i. 'Gā amū ore rerekou tyweaete ai'i. A'ere a'e pype Timoteo 'ga ruri pē mome'wau ore.

⁸ A'eramū pē mome'ua oreku'i mojerana ore ree. 'Ga rerowiarareteramū pejemogyramū nipo oreku'iramū arakou pē nee.

⁹ Jarejuwarete 'ga upe ore oroporogytai jepi. "Tesarūn ipewara 'gā, eneremiayuwa 'gā ene rerowiati ajemogyau. A'eramū ore a'eramū araku'iramū arakou 'gā nee", 'jau ore 'ga upe jepi.

¹⁰⁻¹¹ Jarejuwarete 'ga upe oroporogytai arakou. Au'jeteramū oroporogytai arakou. "Tene ore oi peu 'gā pyri 'gā mu'jau esage ene ree", 'jau ore 'ga upe jepi. "Tojemogyppyk katu katu 'gā ene ree 'jau", 'jau ore Jarejuwarete 'ga upe. Jeju 'ga janejararetea. 'Ga upe nanē ore 'jau nū. "Ore poar iki pejepe, ore mojewyrakaa 'gā pyri", 'jau ore 'gā nupe arakou.

¹² Pēporomutat pejemogyau pejejee. Tekotee 'gā nee nanē pēē pejeporomutaramū nū. A'eramū ore 'jau Jarejuwarete 'ga upe arakou: "Iporomutat 'gā ajuee. Ojejuka esage 'gā ajuee. A'eramū ene 'gā poaa 'gā mojejukau esage a'eramū taetu ajuee", 'jau ore 'ga upe oroporogytai pē nee arakou. Sā'ā oreporomutara pē nee. Nan tee futat pēporomutaramū pejejee.

¹³ "Epoar iki 'gā. Emamuakar iki 'gā mama'e tywera apoukare'ema 'gā nupe", 'jau ore Jarejuwarete 'ga upe pē nee arakou. A'eramū 'ga aipo apo re pēē mama'e tywera apo futare'ema. A'eramū nipo pēē Jeju 'ga ruramū pejemogyau esage 'ga upe. Anure nipo Janejararete 'ga ojewya wemiayuwa 'gā nerua ojeupi. Aipo 'ara rupi nitywi futari pē kwaukaara 'gā amū.

4

Jarejuwarete 'ga ki pemuoryp

¹⁻² Pē pype arakou ako ore pē mu'jau Jarejuwarete 'ga remifutar are ikue. "Pejemogyau esage Jarejuwarete 'ga pemuoryp", 'jau ako ore pē nupe ikue. "Ga je'eg imū etee pēē mama'e apou", 'jau ako ore pē nupe ikue. Pēnea'ar iki ore'eawer are. "Pe'je pejemogyau Jeju 'ga 'eawer imū etee futat", 'jau ako ore pē nupe ikue. Jeju 'ga 'ā pējararetea. 'Ga futat ako aipo ore mu'eukaa pē nupe ikue. A'eramū ki pēē ore'eawer imū etee futat pejemogyau esage a'jea futat. 'Ga remifutar imū etee futar iki pēē mama'e apou 'ga upe.

³ Mama'e tywera apowe'em futat. Peko esage a'jea futat 'ga upe. Kūima'eramū pejekowe'em pejemirekoe'em are. Pejemireko are etee ki peko. Kūjānamū nanē kasi pejemene'ema peenūi pejejee ne. Pejemena etee ki pereko. Aipoa esage Janeruwarete 'ga upe.

⁴⁻⁵ Kūima'e 'gā nupe nanē ore 'jau nū: Peko kasi Jeju 'ga rerowiaare'ema 'gā 'jawe etee ne. 'Gā 'ā oo akou wemirekoe'ema mue are etee kwe pe watau. Kūjā mue are etee wea'aramū ajemogyau. A'ere kasi nan peko ne. Pejemireko are etee futar iki pēnea'at.

⁶ 'Ga rerowiaaramū 'ā jane jarejuwireramū juejue futat. A'eramū kasi pēē, "Jerewirera 'ga remirekoa te nā'ā re'ā", pe'je ne, ipojekawe'em erawau pejejai ne. Aipoa apoara 'gā nipo Janeruwarete 'ga rerekou tyweaete ee. Aipoa ako ore oromome'u pē nupe ikue. A'eramū ore imome'wau'japa pē nupe nū.

⁷ Janeruwarete 'gā jane mū'ē werowiare'ema 'gā nui mama'e tywera apoukare'ema jane, jane mogyau esage wowase.

⁸ Najema'ea rūi futat jeje'ega poromū. Janeruwarete 'ga je'ega te poromū. Janeruwarete 'ga 'ā jane upe U'agesage muara. 'Ga 'eawera etee 'ā je amome'u pē nupe. A'eramū aipo renupare'ema 'gā Janeruwarete 'ga je'eganupe'ema futat.

⁹ Janeruwarete 'ga ako pē mu'e pejejee pēporomutar are ikue. Ma'eramū 'ā 'awamū pejejuka esage pejejee pejemogyau. A'eramū je aipo are ka'arana kwasiare'ema pē nupe.

¹⁰ Jeju 'ga rerowiaara 'gā nee pejejejukau esage pejemogyau, Masetoni wyy pewara 'gā nee. A'eramū ki pēē pejejejukau esage 'awamū taetu 'gā nee pejemogyau.

¹¹ "Pejemuawapir iki pejemogyau 'gā pype. Pēmara'ne kasi pejejee ne. 'Gā ago'wawe'em 'gā porowyky are. Pejeporowykya etee futat iapou pejejee pejemifutara muawamū. A'eramū pēē mama'e renūine'ema pejemogyau 'gā nupe", 'jau ako je pē nupe ikue. A'eramū ki pejemogyau pejejeupe je'eawer imū etee futat.

¹² Aipo apo re Jeju 'ga rerowiaare'ema 'gā oporomutaramū pē nee. A'eramū nipo 'gā 'jau: "A'jea futat Jeju 'ga rerowiaara 'gā nesageramū", 'jau nipo 'gā ajaupe, pē nesakawe.

Janejararete 'ga ruap

¹³ 'Awamū ore pē mu'ei amanū ma'efera 'gā nee, Jeju 'ga rerowiaara 'gā nee. Pē'arasig kasi pejemogyau 'gā nee ne. Jeju 'ga rerowiare'ema 'gā i'arasig futat ajemogyau. A'ere 'gā nuapesagi Jeju 'ga rura. A'eramū 'gā a'eramū u'arasigamū futat ajemogyau. A'ere

jane naani. 'Ga rura jane siapesak jarejemogyau. A'eramū jane jare'arasige'emamū jarejemogyau.

¹⁴ Amanū re 'ā Jejuī 'ga ferawi rakue nū. Oferaw ire 'ā Jejuī 'ga awau ywag ipe rakue nū. A'eramū 'ga amanū'jape'ema. A'ea 'ā jane sikwaap. Anure nipo Janeruwarete 'ga Jejuī 'ga mojewya 'ga mua 'awa ywy pe nū. Jejuī 'ga 'ua ojewya nū. 'Ga ruwa 'ga 'ga rerowiaara 'gā nerojewyrukaa 'au 'ga upe, amanū ma'efera 'gā nerojewya erua. A'eramū jane a'eramū jare'arasige'emamū 'gā nee.

¹⁵ Ojewyr are Janejararete 'ga jane mu'jau. A'eramū 'ā jane ikwaapa. 'Ga jewyawa rupi 'ga rerowiaaramū jane jarewau jarejeupia 'ga rowosōu. Amanū ma'efera 'gā na'ne awau 'ga rowosōu. A'ere imanū'e'emamū jane jarewau 'ga repejāna 'ga rowosōu.

¹⁶ Aipo 'ara rupi Jejuī 'ga ruri ojypa wafukaita wemiayuwamū jane upe. Ywagipewara 'gā 'wyriara 'ga nanē futat nipo wafukaita nū. A'ere nipo 'ga jumi'aranūū pyi 'gā nupe. A'eramū nipo jane Kristu 'ga rerowiaaramū jarewau jarejeupia 'ga rowosōu. Amanū ma'efera 'gā na'ne 'ga imonou imowywya ywy awi. Ywy awi amū'ē re 'gā awau ojeupia Kristu 'ga repejāna.

¹⁷ A'ere jane imanū'e'emamū jarewau jarejeupia jarejatykau 'gā nee 'ga rowosōu ywasiga pype. Wowosimaw ire nipo 'ga wemiayuwamū jane rerawau erojewya 'Uwarete 'ga pyri. A'eramū jane peu futat jarejemogyau nakwaparimū rūi 'gā pyri.

¹⁸ A'eramū pēē pejewau aipo mome'wau 'gā nupe kwe pe. Kasi 'gā jemogyi u'arasigamū 'gā nee ne, amanū ma'efera 'gā nee ne, Jejuī 'ga rerowiaara 'gā nee ne.

5

Jejuī 'ga rapesakap

¹⁻² “Maranime sipo ajee Jejuī 'ga ruri werowiare'ema 'gā nerekou tyweaete?” 'jau nipo pēē pejejaupe. Aipo pe'je kasi ne. “A'e rupi nipo 'ga ruri”, naru'ei ore pē nupe. “Nikwaawi jane 'ga ruawa”, 'jau ore pē nupe jepi. Sā'ā muna'ywa. 'Oga jara 'ga muna'ywa rura kwaawe'ema. Nan tee futat jane Jejuī 'ga ruawa nikwaawi.

³ Owaēm erujewi futat nipo 'ga ruawa upe. A'eramū jane jarejemogy esage are etee futat jarejea'aramū. “Nitywi mama'e tywera jane ree”, 'gā 'eramū nipo iwaēmi erujewi 'gā nereko tyweawa upe. Sā'ā kūjā ka'jame'ema wa'yray awi. A'eramū 'ā ojemouaga etee wa'yray upe. Nan tee futat Jejuī 'ga rerowiare'ema 'gā aipoa 'ara rupi noka'jamarūi wereko tywer awi. Taka'jam 'jau nipo 'gā ojeupe numiamū. A'ere nipo 'gā noka'jamarūi futari wereko tywer awi. Naako tywet nana'nī pype rūi futat 'gā awau poromū.

⁴ A'ere pēē Jarejuwarete 'ga pekwaap. A'eramū ki pēē mama'e tywera apowe'em Jejuī 'ga jewyra poromukuran. A'eramū 'ga rura jane mopiryryite'ema. Sā'ā muna'ywa 'ga amū pyyga erujewi 'ga mopiryryja. Nan kasi pejemopiryryjukat 'ga upe ne. Naypytunimū wata ma'e 'jawe rūi pēē. Ypytunimū wata ma'e 'gā nuesagi mama'ea. Jarejuwarete 'ga je'ega kwaapare'ema 'gā ypytunimū wata ma'e 'jawe. A'eramū 'gā mama'e tywera apou akou. Janeruwarete 'ga remiaporama kwaape'ema futat. “Ojewyt nipo Jejuī 'ga werowiare'ema 'gā nerekou tyweaete” 'e kwaape'ema.

⁵ A'ere pēē nanarūi. Pekwaap futat 'ga je'ega ore 'jawe. A'eramū jane juejue 'ga remiaporama kwaapa, Jejuī 'ga jewyra kwaapa. 'Arimū wata ma'e 'jawe jane. Sikwaap jane mama'ea.

⁶⁻⁷ A'eramū ore 'jau pē nupe: “Pe'je sajemogy 'ga rapesaka”, 'jau ore pē nupe. “Pe'je sajemu'akwaap mama'e tywera apo awi 'ga rura poromukuran”, 'jau ore pē nupe.

Jejuī 'ga rura rapesakare'ema 'gā oset ma'e 'jawe futat ajemogy. Nokwaawi futari 'gā mama'ea. Eawyrp ma'e 'jawe nanē 'gā mama'e kwaape'ema. I'akwaawe'ema 'gā. A'eramū 'gā mama'e tywera apou akou.

⁸ A'ere jane nanarūi. 'Arimū wata ma'e 'jawe jane. Jane'akwaap jane. A'eramū ore 'jau pē nupe: “Pe'je sajemogy esage 'ga upe. Pe'je sajemu'akwaap mama'e tywera apo awi”, 'jau ore pē nupe. Jejuī 'ga rura poromukuran sirowiat 'ga nanimenime 'jau, janeporomutat 'ga ree 'jau, janerea'at jarejemogyau 'ga ree. Aipo apoaramū jarejemogyau jefaruu 'jawe. Itajuaity rerekwara 'jawe jane jemogyi. Itajuaitya jefaruua wereko imunepa u'yw awi. Opy'apiara munepa. Itaju akagyruā nanē imunepa nū. A'eramū u'ywa osowe'em 'ga upe. Ojeafakau etee. Nan tee jane. Jane 'ga rerowiarāmū 'gā amū 'ga rerowiar awi jane momoirukare'ema.

⁹ Najane rereko tyweawamū rūi ako Janeruwarete 'ga jane mū'ēi 'gā nui ikue. Jane katu'oka te ako 'ga jane mū'ēi 'gā nui ikue. Janeruwarete 'ga jane katu'ogukaa Janejararete 'ga upe, Jejuī Kristu 'ga upe.

¹⁰ Jejuī 'ga amanū jane katu'okawamū futat. A'eramū jane a'eramū jarewau 'ga pyri jarejemogyau peu futat nakwaparimū ete rūi. 'Ga jewyre'emaue jaremanūmū jane jarewau 'ga pyri peu futat. Jaremanūme'ēwe 'ga jewyramū jane jarewau 'ga pyri.

¹¹ A'eramū pēē pejewau 'awamū 'ga ruawama mome'wau kwe pe pejejaupe. Aipo mome'ua 'ga rerowiarukaa pejejaupe. Nanuara 'ā pēē iapou pejejemogyau. A'eramū pēē taetu pejejopoa 'ga rerowiar wywapiukaa pejejaupe.

'Gā neko esage are 'gā mu'akwaapawet

¹² Jejuwa 'jawe pēē. A'eramū je pē mu'jau mama'e are. Peenup katu katu ki peje'wyriara 'gā je'ega. Janeruwarete 'ga 'gā amū'ē imonou pē nupe pē'wyriaramū. A'eramū pēē 'gā je'ega renupa esage.

¹³ Jarejuwarete 'ga je'eg are 'gā pē mu'ei. A'eramū ki pēē 'gā je'eg are pejeapyakau. Pejeporomutaramū 'gā nee nanē nū. Pe'je ki pejejekukau esage 'gā nee, pejemu'jara 'gā nee. Pejamue kasi ne. Pēta'wa ki pejejaupe.

¹⁴ Pēē mū peko futat iwewue ma'eramū pejejopype. A'eramū pēē pejeje'ega iwewue ma'e 'gā nupe, 'gā wewue awi 'gā momoia. "Pe'je pejewau pejeporowykyau", pe'je ki 'gā nupe.

Pēē mū nipo pejejorypawamū pejejemogyau. A'eramū ki pēē aipo 'gā poaa 'gā maku'iu. 'Gā amū nipo Jejuī 'ga rerowiaa ināinānī'ī etee. A'eramū pēē 'gā mu'jau 'ga ree, 'ga rerowiar wywapiukaa 'gā nupe. Peje'eg esage ki 'gā nupe najuejue etee. Pemoywyrafen kasi pejeje'ega 'gā nupe ne.

¹⁵ 'Gā amū nipo mama'e tywera apou pē nupe. A'ere kasi pejepyk 'ga ree ne. Mama'e esagea etee ki peapo pejejaupe. Tesirūmera 'gā nupe nanē mama'e esagea etee pēē iapou nū.

¹⁶ Pēnoryp ete futar iki pejejemogyau.

¹⁷ Au'jeteramū futat pejeje'ega monou Jarejuwarete 'ga upe.

¹⁸ "Au'jete mama'ea eremut jee, ki Ku'jyp", 'jau ki pēē 'ga upe. Mama'eaya nipo ojeapou pē nupe. A'etea ki pēku'i etee futat. A'ea Janeruwarete 'ga afutat. Jejuī Kristu 'ga ree ojemujat ma'eramū omuorywa Janeruwarete 'ga afutat.

¹⁹ Pejejeupe Jarejuwarete 'ga 'Agesage je'egaue ki pemojerowiat pejejemogyau. Au'jeteramū nipo 'ga 'Agesage je'ega nepeenuwi. A'eramū noje'egu'jawi pē nupe ne.

²⁰ Janeruwarete 'ga je mut je moporogytaukaa pē nupe, pejejeupe 'ga amū 'eramū ki a'e are peapyaka.

²¹ Pejejeupe 'ga amū mama'e mome'uramū ki, "a'jea futat sipo aipo 'ga 'ea?" pe'je ra'ne pejejeupe. A'jea 'eramū pēē a'jea futat erowiaa pejejemogyau. Mama'e a'je'ema 'eramū pēē imoka'jama kamēsīete. NaJaneruwarete 'ga 'Agesagea rūi 'ga mu'eukat.

²² Kwaiwete te 'ā mama'e a'wyre'ema. A'ere kasi peapo amū majepe'i etee miamū futat ne.

²³ Jarejuwarete 'ga upe ore 'i: "Emopy'ata'wa Tesarūn ipewara 'gā imogyau", aru'e ore 'ga upe arakou. "Emuesage ki 'gā. Eje'jawe 'gā mogyau esage", 'jau ore 'ga upe arakou. "Ene amuesage re 'gā tifuwet eme mama'e tywera apo are ajemogyau", 'jau ore pē nee 'ga upe. "Amuesage re 'gā wesageramū a'jea futat Jejuī Kristu 'ga jewyramū. Nitywi futari nipo 'gā tywera 'gā pype aipo 'ara rupi", 'jau ore pē nee 'ga upe.

²⁴ Janeruwarete 'ga futat 'ā jane mū'ē wemiyuwamū. 'Ga 'ā jane muesageu jane mogyau oje'jawe. Nomoka'jami futari 'ga u'eawera. U'eawer imū etee futat 'ga mama'e apou pē nupe.

²⁵ Orepytuna 'jawe pēē oree. A'eramū ki pēē pejeje'ega monou Jarejuwarete 'ga upe ore ree.

²⁶ Pe'je pejeje'ega Jejuī 'ga rerowiaara 'gā nupe jee. "Paulo 'ga oje'ega mua janee: Jaruete te pēē? 'e mua janee", pe'je ki pejejaupe, pejejomana.

²⁷ Koa ka'arana ki pemogytaayay futat. Jejuī 'ga rerowiaara 'gā nemianuwamū pemogyta, 'jau je pē nupe. Aipoa Janejararete 'ga afutat, 'jau je pē nupe.

²⁸ Jarejararete 'ga, Jejuī Kristu 'ga resagea pē nerekoa je afutat. Kweramū etee jeremimome'ua.

2 Tesarūn

A'ere Paulo 'ga ka'arana kwasiaru'japa imonou Tesarūn ipewara 'gā nupe rakue. Jejuī 'ga ruaw are 'ga ikwasiaa. A'ere na'ga etee rūi ikwasiaari. Janeruwarete 'ga 'Agesagea ikwasiarukaa 'ga upe rakue.

¹ Je Pauloramū ka'arana akwasiaru'jap Tesarūn ipewaramū pē nupe nū. Jejuī Kristu 'ga 'ā Janejararetea. 'Ga 'ā perowiat pejejemogyau. A'eramū pēē pejejemogyau 'ga remiaiyuwamū. Jarejuwarete 'ga remiaiyuwamū nanē 'ā pejejemogyau nū. Silasi, Timoteo. Mīmera 'gā ako je pyri. A'eramū ore ka'arana monou ikwasiaa pē nupe.

² Ku'jywa 'ga Janeruwaretea. Jejuī Kristu 'ga 'ā Janejararetea. 'Gā nesagea pē nerekoa je afutat. Pē mopy'ata'waa nanē je ifutaa nū.

Werowiare'ema 'gā nui werowiaara 'gā mojo'okawam

³ Pēē 'ā orerewirera 'jawe. Kūjāmeramū pēē orerenyra 'jawe. Jejuī 'ga 'ā perowiat pejejemogyau. 'Awamū taetu pēē 'ga rerowiaa a'jea futat. 'Awamū 'ā pēē pejejukau esage pejejee. A'eramū ore Jarejuwarete 'ga muorypa pē nee: "Tesarūn ipewara 'gā ene rerowiararetea, ki Ku'jyp. Aipo are oreku'iramū arajemogyau", 'jau ore 'ga upe. "Ojejukau esage nanē 'gā ajemogyau ajuee nū. Aipoa nanē ore maku'iu ore mogyau nū", 'jau ore 'ga upe arajemogyau.

⁴ Jejuī 'ga rerowiaara 'gā pype arajemogyau taetu ore pē mome'wau 'gā nupe jepi. "Tesarūn ipewara 'gā Jejuī 'ga rerowiaare'ema 'gā wereco tywerete agawewi. A'etea 'gā nopoiri futari 'ga rerowiar awi. 'Gā nereko tywera Jejuī 'ga rerowiar wyyapiukaa etee te futat 'gā nupe", 'jau ore pē mome'wau kwe pewara 'gā nupe, orojerowiaa pē nee 'gā nupe jepi.

⁵ Pejereko tywera upe pejemouaga resakawe Janeruwarete 'ga 'jau pē nupe: "A'jea futat pēē je rerowiaara ra'e. A'eramū pēē pejejea futat pejejemogyau je pyri nakwaparimū rūi futat", 'jau nipo 'ga pē nupe. "Anure nipo je rekoī 'wyriaramū pē nupe najuejee etee futat", 'jau nipo 'ga pē nupe. "Pejemouag te 'ā pejejemogyau pejejeroko tywera upe. Nepepoiri futari je rerowiar awi. A'eramū je a'eramū pē mua tejeypyri anure", 'jau nipo 'ga pē nupe. Poromū futat pēnepya. A'jea futat 'ga ae mepyi.

⁶⁻⁷ Wowase ae majatykaawa 'ara rupi nipo Janeruwarete 'ga ae resaka najuejee etee. 'Ga 'ā ae kwaap katu katu. A'eramū 'ga werowiaaramū jane kwaapa. Werowiaaramū etee nipo 'ga jane monou jane mogyau ywag ipe ojeypyri. A'eramū futat ae awau worrywamū 'ga pyri. Poromū futat janerepya. Werowiare'ema 'gā nanē 'ga ikwaapa nū. Werowiare'ema 'gā 'ga imonou mama'eukwaawa rapyaw ipe. Poromū futat 'gā nepya. 'Ga 'ā ae kwaap katu katu. A'eramū 'ga a'jea futat ae mepya aipo pyu.

Anure nipo 'ga Jejuī 'ga nua imojywa esaukaa 'au wyy pewara 'gā nupe najuejee etee. Tata reny 'jawewara pype nipo 'ga 'ua ojewya, ywagipewara 'gā, ipājē ma'e 'gā neewe. A'e pe Janeruwarete 'ga pē nereko tywearera 'gā nerekou tyweaete. A'ere aipoa 'ara rupi pē nereko tywera teepawamū pē nui.

⁸ Wemiayuwe'ema 'gā juejue Janeruwarete 'ga erekou tyweaete. "Werowiamū Jejuī 'ga pētywera moia pē nui, pē mogyau wemiayuwamū" e rerowiare'ema 'gā nanē Janeruwarete 'ga erekou tyweaete nū.

⁹ A'e 'gā nipo 'ga wereco tywet futat imuojere'ema mama'eukwaawa rapyaw ipe. Na-Jarejuwarete 'ga pyri rūi 'gā awau ajemogyau. Mukuu futat 'gā oi ajemogyau 'ga wi. Esage ma'ea te 'ā Janeruwarete 'ga. Pājērete futat 'ga 'ā. A'eramū 'ga wemiayuwe'ema 'gā murukare'ema ojeypyri. A'eramū 'ga mukuu futat 'gā monou ojewi. Aipo nipo 'ga iapou Jejuī 'ga jewyawa rupi 'gā nupe.

¹⁰ Aipo 'ara rupi 'ga remiaiyuwa 'gā juejee 'jau Jejuī 'ga upe: "Ene etee futat 'ā enesage. Nitywi futari 'ga amū ene 'jawe. Ene etee futat 'ā pājērete. Nitywi futari 'ga amū enepājē 'jawe", 'jau nipo 'gā 'ga resaka. Pēē nanē nipo aipo 'jau 'ga upe nū. Pejejeupe ore Jejuī 'ga mome'uramū pēē 'ga rerowiaa. A'eramū pēē 'ga resag ire aipo 'jau 'ga upe nanē nū.

¹¹ A'eramū ore oroje'ega monou Jarejuwarete 'ga upe pē nee jepi: "Epoar iki Tesarūn ipewara 'gā, ki Ku'jyp. 'Gā 'ā ene rerowiat. A'eramū ene 'gā poaa 'gā mogyau esage ejeupe", 'jau ore 'ga upe. "Ene 'ā eremū'ē 'gā imogyau eja'yramū. A'eramū ene epājē mū mama'e esage apoukaa 'gā nupe. Epoar iki mama'e esagea taapo 'jau 'jara 'gā", 'jau ore 'ga upe jepi.

¹² A'eramū nipo pēē 'jau pejejaupe: "Jejuī 'ga 'ā, Janejararetea. Esage futat 'ga tekotee 'gā nesage apyraapa. 'Gā pājēa nanē 'ga wapyraap nū", 'jau nipo pēē pejejaupe. Pēneko esage resag ire nipo tekotee 'gā 'jau: "Jejuī 'ga wemiayuwa 'gā omogy esage futat. Ojejuka esage Ku'jywa 'ga 'gā nee", 'jau nipo 'gā pē nesag ire. A'eramū futat nipo pēē Jejuī 'ga futarukaa 'gā nupe.

2

Mama'e tywera jat

¹ 'Awamū ore pē mu'ei Jejuī 'ga jewyaw are. Ojewya nipo Janejararete 'ga jane majatykau ojee.

² A'ere nipo 'ga jewyr enune 'gā amū 'i pē nupe: "Ut ako Janejararete 'ga ikue", 'jau futatee nipo 'gā pē nupe. A'ere kasi perowiar ine. O'meramū te nipo 'gā 'i. Peapyaka kasi nanuara 'gā je'eg are ne. "A'ea Paulo 'ga okwasiat inuga oree", 'gā 'eramū kasi peapyaka 'gā nee ne. O'meramū te nipo 'gā 'i. "Janeruwarete 'ga 'Agesagea ore mu'e aipo are", 'gā 'eramū miamū kasi peapyaka 'gā je'eg are ne. O'meramū te nipo 'gā 'i. Nuri we futat Jejuī 'ga. A'eramū nipo 'ga apoa erujewi janee.

³ Pejemoryteeukat kasi 'gā nupe ne. 'Ga jewyr enune nipo 'gā amū opoia Jarejuwarete 'ga rerowiar awi kwaiwete futat. Nooi futari nipo 'gā Jarejuwarete 'ga piara rupi a'eramū. A'e pype nipo kūima'e 'ga amū ojesaukaa ywy pewaramū janee najuejue etee. Mama'e tywera jara 'ga poromū ojesaukaa janee. Mama'eukwaawa rapyaw ipe oo ma'erama 'ga futat poromū.

⁴ Aipoa kūima'e 'ga nipo o'meramū ae upe. "Je 'ā pājērete futat. Nitywi 'ga amū je 'jawe", 'jau futatee nipo 'ga. "Pemuoryp kasi maira mū ne. Ku'jywa 'ga miamū kasi pemuoryw ine. Je etee futar iki je muoryp pejepe", 'jau nipo 'ga pē nupe najuejue etee. A'eramū nipo 'ga awau Jerusareg ipe miamū futat. Awau nipo 'ga osou Janeruwarete 'ga mogytaaw ipe wapyka 'gā nowase. "Je 'ā Pēnuwaretea futat", 'jau futatee 'ga awau ae upe. Aipoa mama'e tywera jara 'ga jesaukar ire te nipo Janejararete 'ga ruri.

⁵ Jeje'ega sipo pemoka jam rakue? Pē pype tekou ako je aipo mome'ui pē nupe ikue.

⁶⁻¹² A'ere 'awamū mama'e tywera apoara 'gā nuri. Ia'wyr'e'ema 'ga nipo mama'e tywera apoukaa 'gā nupe. A'ere aipo 'ga nikwaapawi we. Mama'e tywera jara 'ga ijesakuriwet 'gā nupe numiamū. A'ere ajepeja 'ga nafutari 'ga jesaukaraiaiwā 'gā nupe. Aipo 'ga 'ā pekwaap. Wemifutara 'ara rupi Janeruwarete 'ga 'ga pe'ai 'awa ywy awi. 'Ga 'ga pe'a re te nipo mama'e tywera jara 'ga 'ua. Ojesaukaa pa futat 'gā nupe amunawa moymoyka awau. Mama'eukwaawa 'wyrriara pājē mū mama'e tywera jara 'ga ruri. A'eramū nipo 'ga aeremiapoe'ema apou kwaiwete 'gā nowase. A'ere nipo 'ga o'meramū te 'ga 'i. "Ku'jywa 'ga pājē mū je mama'e apoi", 'jau futatee nipo 'ga. A'eramū nipo aipo 'ga remiapo resakara 'gā 'jau ajaupe: "Kuu. Ereesak te 'ga remiapofera ra'e? Janeruwarete 'ga remimurera 'ga futat nipo 'ā", 'jau nipo 'gā ajaupe.

Mama'e tywera jara 'ga nipo o'meramū te e'i akou 'gā nupe. A'eramū nipo mama'eukwaawa rapyaw ipe oo ma'erama 'gā wapyakau 'ga je'eg are. Nuapyakai futari 'gā mama'e a'je are rakue. A'eramū Janeruwarete 'ga 'gā katu'oke'ema 'gā mogyawe'em futat ojeypri. Aipo 'gā wapyaka futat mama'e tywera jara 'ga je'eg are. A'eramū nipo Janeruwarete 'ga 'jau ojeupe: "Nuerowiari wejue 'gā mama'e a'jea jepi. Tene ajee 'gā i'me ma'e je'ega etee erowiari ajemogyau", 'jau nipo 'ga ojeupe. A'eramū nipo 'ga a'eramū 'gā 'me rerowiarukaa aipo 'gā nupe. A'eramū Janeruwarete 'ga 'gā 'me are ako ma'e 'gā juejue futat imonou mama'eukwaawa rapyaw ipe. Mama'e tywera apoara 'gā nanē 'ga imonoukaa mama'eukwaawa rapyaw ipe nū. Aku'iramū akou mama'e tywera apo are. A'eramū 'ga mama'eukwaawa rapyaw ipe 'gā monou 'gā mogyau nakwaparimū ete rūi. Peu futat nipo 'gā ajemogyau tyweaete ojere'emamū futat. A'ere mama'e tywera jara 'ga rur ire nipo Janejararete 'ga ruri ojewya nū. Opājē mū futat Jejuī 'ga ruri. Wenyfugamū futat 'ga 'ua. Aipoa 'ara rupi Jejuī 'ga mama'e tywera jara 'ga jukau opytuu etee futat.

Janeruwarete 'ga remiayup

¹³ A'ere pēē Jarejuwarete 'ga remiayuwamū. Ymā we te, ywy apoe'emaue, Janeruwarete 'ga poromutarāmū pē nee rakue. A'eramū 'ga a'eramū pē mū'jāu wemi-ayuwamū. A'eramū ore 'jau 'ga upe: "Au'jete Tesarūn ipewara 'gā eremū'ē 'gā nui rakue", 'jau ore 'ga upe. "Au'jete 'gā erekatu'ok rakue", 'jau ore 'ga upe pē nee. 'Ga je'ega a'jea renupa ypy we futat pēē a'e rerowiaa pejejemogyau. A'eramū 'ga Ū'agesage mua pē nupe pēwytera katu'okawamū. A'eramū pēē 'awamū 'ga remiayuwamū pejejemogyau.

¹⁴ Jejuī 'ga ako ore imome'wau pē nupe ikue. "Werowiarāmū 'ga pē mogyi wemi-ayuwamū", 'jau ako ore pē nupe ikue. Ymā ako nepejemogyi Jarejararete 'ga 'jawe ikue. A'ere pēē 'awamū 'ga 'jawe pejemogy. 'Ga pājēa pē nerekou, 'ga resagea nanē pē nerekou nū.

¹⁵ A'eramū ki pēē oreremimome'ufera renupa katu katu. A'ea a'jea futat. Oreremik-wasiarera nanē nū, erowiaa nū.

¹⁶ Janejararete 'ga Jejuī Kristu 'ga jane futarete 'Uwarete 'ga retee. Esage 'gā akou janee. Jane poar iki 'gā jane mamuakaa mama'e tywer awi. Jane poar iki 'gā Jejuī 'ga ruru'jawa rapasaka.

¹⁷ Tepē maku'i ki 'gā pē mogyau. Tepē poar iki 'gā mama'e esage apou, pē moje'egukaa a'jeteetewi nanē nū.

3

Pemono ki pejeje'ega ore ree

¹ 'Awamū je 'i orojewirera 'jawewaramū pē nupe. Orojenyra 'jawewaramū pē nupe nanē je 'i nū. Jarejuwarete 'ga upe pejeje'ega pemono ore ree. Pē pype arakou ako ore Jarejararete 'ga je'ega mome'ui pē nupe ikue. Nan futat 'awamū ore oi kwe pe imome'wau 'gā nupe. A'eramū pēē 'jau Jarejuwarete 'ga upe: "Paulo 'ga oo kwe pe Jeju 'ga mome'wau 'gā nupe. Epoar iki 'ga 'ga mome'wau 'gā nupe, amunawa moyka. Ejerowiarukaa kwe pewara 'gā nupe", 'jau ki pēē 'ga upe pejeje'ega monou ore ree. Takwasi'o ki kamēšiete nanē Janeruwarete 'ga rera. Tuerowiar iki 'gā kwaiwete 'ga kamēšiete.

² Kwaiwete te 'ā 'ga rerowiare'ema 'gā. A'eramū ki pēē pejeje'ega monou 'ga upe je ree. "Ene te 'ā nerepyyugukari Paulo 'ga itywet ma'e 'gā nupe", pe'je ki 'ga upe, pejeje'ega monou je ree. "Ene 'ā Paulo 'ga rereko tywerete are ifuewet ma'e 'gā eremuojet 'ga wi, aipo 'gā iapowe'emauwe", pe'je ki 'ga upe je ree.

³ A'ere Jarejararete 'ga u'eawer imū etee futat mama'e apoi. 'Ga 'ā opājē amut pē nupe. 'Ga 'ā pē 'a'gu mama'eukwaawa 'wyriar awi.

⁴ Jarejararete 'ga ore mojemogygyukaa ore mogyau pē nee. 'Awamū pēē oreje'eg imū etee futat mama'e apou pejemogygyau. 'Awamū nepēojeri futari iapou pejemogygyau.

⁵ Jarejararete 'ga nopoiri futari pē nui pejemogygyamū. Iporomutat futat 'ga pē nee. 'Awa wyy pe 'ga rekoramū 'gā Jeju Kristu 'ga rerekou tyweaete rakue numiamū. A'ere 'ga nopoiri futari 'Uwarete 'ga rerowiar awi. 'Uwarete 'ga remifutara etee futat 'ga iapou rakue. A'eramū pēē 'awamū 'ga 'jawe etee futat pejemogygyau. Jarejuwarete 'ga remifutara etee futat peapo 'ga 'jawe.

Peporowyky ki mama'e muaw are

⁶ 'Awamū je pē mu'e'i iwewue ma'e 'gā nee. Jeju 'ga rerowiaara 'gā amū iwewue futat. Noporowykyi futari 'gā. Nuapoi futari mama'ea oreje'eg imū. A'eramū je, Jarejararete 'ga je'eg imū etee futat, 'jau pē nupe: Pe'je pejepojo'ogamū iwewue ma'e 'gā nui, 'jau je pē nupe.

⁷ Pē pype arakou ako ore oroporowykyau futat orojee ikue. A'eramū pēē 'awamū pejeporowykyau futat, ore 'jawerimū etee futat.

⁸ Mama'ea nanē ako ore imua orojemi'uramamū ikue. "Mama'ea pemut amū oree", 'jawe'em futat ako ore arakou pē nupe ikue. Naani. Au'jeteramū ako ore oroporowykyau arakou ikue, orojeupe mama'e muawamū ikue.

⁹ Aramu'e te ako ore pēē Jarejuwarete 'ga je'eg are ikue. A'eramū amunipo 'ā ore, "mama'ea pemut amū oree", 'jawarū pē nupe rakue. A'ere ako ore naruapoi futari aipoa ikue. Oroporowykyau etee futat nanē ako ore ikue. A'eramū pēē 'awamū ore 'jawe etee futat pejeporowykyau pejemogygyau peu.

¹⁰ Pē pype arakou ako ore 'jau pē nupe ikue: "Iporowykywere'ema 'gā kasi pemojemi'warukat futat ne", 'jau ako ore pē nupe ikue.

¹¹ 'Gā amū 'jau oree ai'i: "Tesarūn ipewara 'gā amū iwewue futat. Noporowykyi futari 'gā. A'ere 'gā poromu'akwaawiweramū ajuee 'gā porowyky are", 'jau 'gā oree ai'i.

¹² A'eramū ore 'awamū 'jau pē nupe: "Jarejararete 'ga, Jeju Kristu 'ga ore mu'eukaa pē nupe: Pejeporowyky ki pejekaraemā muawamū. Pe'je pejepoia 'gā ago'o awi, pe'je ki 'gā nupe", 'jau 'ga oree.

¹³ Mama'e esagea peapo pejemogygyau pejeojere'emamū futat.

¹⁴ 'Gā amū nipo niparuerowiarweri oreje'eg are. A'eramū ki pekotee 'gā nui. A'eramū 'gā wea'aramū 'ūina peje'eg are. Tepeesak 'gā jekatu'oga aiporamū 'jau.

¹⁵ Pereko tywet kasi 'gā ne. Pejeweirera 'jawe futar iki peporogyta 'gā nupe 'gā nerekou. Tepeesak 'gā jekatu'oga 'jau.

Oje'ega 'gā nupe imonoawet

¹⁶ Jarejararete 'ga 'ā mama'e esage jararetea. Tepē mopy'ata'wa ki 'ga pē mogyau. Ako futat 'ga pē pyri.

¹⁷ 'Awamū je ka'arana kwasiaawa pyyka tepo pe. Teje'ega je amono ikwasiaa ka'aran are pē nupe pē futaa. A'eramū pēē jeremikwasiarera resaka. "Paulo 'ga futat okwasiat imua janee rai'i", 'jau nipo pēē pejejaupe jeremikwasiarera ka'arana pejejeupe iwaēmamū. Teje'ega je omono pē nupe pē futaa najuejue etee.

¹⁸ Jarejararete 'ga resagea pē nerekoa je afutat.

Kweramū etee jeremimome'ua.

1 Timoteo

Timoteo 'ga Paulo 'ga remimu'efer amū. A'eramū Paulo 'ga ka'arana kwasiaa imonou Timoteo 'ga upe muku ojewi 'ga rekoramū 'ga mu'akwaapa mama'e are rakue. Jejuī 'ga rerowiaara 'gā nereko esage are 'ga ikwasiari imonou 'ga upe. Na'ga etee rūi ikwasiaa. Janeruwarete 'ga 'Agesagea te ikwasiarukaa 'ga upe. A'eramū 'ga ikwasiaa imonou Timoteo 'ga upe rakue.

¹ Je Pauloramū ka'arana akwasiat imonou enee, ki Timoteo. Jejuī Kristu 'ga 'ā je mono kwe pe ojemome'waukaa 'gā nupe ikue. 'Ga Ruwarete 'ga 'ā jane katu'okara. 'Ga nanē je mono Jejuī 'ga mome'waramū ikue nū. Jejuī 'ga ree sajemogyppyg ete jarejemogyau. A'eramū je a'eramū tewau 'gā je'eg imū kwe pe morogyta esage mome'wau tekou 'gā nupe.

² Ymā te ako je Jejuī 'ga mome'ui enee ikue, ki Timoteo. Aipo renupawe ako ene 'ga rerowiaa ikue. A'eramū ene jera'yra 'jawe ekou jee.

Ku'jywa 'ga 'ā Janeruwaretea. Jejuī Kristu 'ga 'ā Janejararetea. 'Gā nesagea ene rerekoa je afutat. Ene ree 'gā jemuaēma nanē je ifutaa nū, ene mopy'ata'waa 'jau.

Moromu'jat tywet

³ Efesu pe jarekou ako je 'i enee ikue: “Au etee eko ra'ne. Je tee oo peu Masetoni ywy pe”, 'jau ako je enee teo enune ikue. 'Awamū je 'ā 'jau'japa enee nū: Peu futat epyta je, a'e je enee. Peuwara 'gā amū ajamu'e tywerete tee ajemogyau. NaJarejuwarete 'ga je'eg are rūi 'gā jamu'ei. O'me are etee futat 'gā jamu'ei. “Pemu'e awi 'gā mama'e a'je'em are”, ere ki 'gā nupe. “Au'je aipo apo re”, ere ki 'gā nupe.

⁴ 'Gā 'ā oje'eg ekoete ajamu'jau. Morogyta ymaner are etee 'gā 'gā mu'ei ajemogyau. Ajamueu 'gā oypy 'gā nee. A'eramū ki ene 'gā je'eg ekoete momika 'gā nui. Aipo mome'ua nuerowiarukari Jejuī 'ga ae upe. Nanarūi ae Jejuī 'ga rerowiaaramū. Nije'eg ekoetei jane Jejuī 'ga rerowiaaramū. Jarejuwarete 'ga je'eg are etee ae jamu'ei. 'Ga je'ega renuw ire 'gā 'ga kwaawi futari.

⁵ “Jarejuwarete 'ga je'eg are etee futat pejamu'e, ere ki 'gā nupe”, a'e je ako ene upe ikue. 'Ga je'ega renuw ire nipo 'gā wywyter esageramū ajemogyau. Mama'e esage kwaapa ajemogyau, mama'e esage etee iapou ajemogyau 'ga upe. 'Ga je'ega renuw ire 'gā a'jea futat Jejuī 'ga rerowiari. A'eramū 'gā a'eramū oporomutaramū nanimenime 'ga ree. Ajuee nanē 'gā opota'waramū nū.

⁶ A'ere nipo 'gā amū ako esage awi 'gā poiri futari. 'Gā oje'eg ekoete akou. Ajamueu ekoete 'gā akou.

⁷ “Moisesi 'ga remikwasiarer are moromu'jaramū toko 'jau kwy”, e'i 'gā numiamū. “Je 'ā 'ga je'ega kwaapa katu katu”, 'jau 'gā. A'ere naani. Naeapyoi futari 'gā 'ga je'eg are. A'eramū 'gā 'gā mu'jawarū'em. 'Gā nokwaawi agawewi futat 'ga. A'etea 'gā 'gā mu'e ekoete akou. Naikwaapa rūi.

⁸ Ymā te 'ā Moisesi 'ga Jarejuwarete 'ga je'ega kwasiari ka'aran are rakue. Aipoa 'ga 'eawera esage futat. A'eramū jane 'ga je'eg imū mama'e apo re, jarejesageramū futat jarejemogyau 'ga upe.

⁹ A'eramū Moisesi 'ga remikwasiarera mama'e tywera apoaramū aetywera resaukaa ae upe. Nako esage ma'e 'gā nupe rūi Moisesi 'ga 'ga je'ega kwasiari rakue. Ako tywet ma'e 'gā nupe etee 'ga ikwasiari rakue. 'Gā tywer are 'gā mueapyoukaawamū te 'ga ikwasiari inuga rakue. Ako tywet ma'e 'gā nomojerowiari futari 'wyriara je'ega. Jarejuwarete 'ga remifutara 'gā nuapoi futari. Nomuowywi 'gā Jarejuwarete 'ga. Mama'e tywera etee futat 'gā wapo. Niporomutari 'gā Jarejuwarete 'ga ree. 'Ga je'ega nanē 'gā ifutare'ema nū. 'Gā oporojuka ma'ea futat. 'Uwa miamū futat 'gā ajuka. Oya miamū futat 'gā ajuka.

¹⁰ Ako tywet ma'e 'gā akou ajuemireko are. Kūjāmera 'gā nanē akou ojomen are nū. Kūima'eramū nanē akou ajuee nū. Kūjāmera nanē akou ajuee nū. A'ea nia'wyri futari Janeruwarete 'ga upe. Ako tywet ma'e 'gā nanē ojopyyka ojomoporowykyaukaa. A'eramū 'gā ojomepyawe'em. 'Gā o'meramū e'i akou. 'Gā o'joje'ēwu'jaga. Janeruwarete 'ga je'ega a'jea futat. A'ere 'gā 'ga je'eg imū mama'ea nuapoi. Aipo 'gā nupe Janeruwarete 'ga oje'ega kwasiarukari Moisesi 'ga upe rakue, aipoa mama'e tywer awi 'gā mosiawamū rakue.

¹¹ “Ekwap kwe pe je mome'wau 'gā nupe. Werowiaramū Jejuī 'ga pē katu'ogi, ere ki ewau 'gā nupe”, 'jau Janeruwarete 'ga jee ikue. A'eramū je 'ga je'ega etee imome'wau. Janeruwarete 'ga 'ā esage a'jea futat. Nitywi amū 'ga 'jawe esage ma'e 'gā.

Jarejuwarete 'ga muorypawet

¹² Janejararete 'ga, Jejuī Kristu 'ga te 'ā, opājēa amut jee ikue. A'eramū je a'eramū tewau 'ga je'ega mome'wau 'gā nupe tekou. A'eramū je 'jau 'ga upe: “Au'jete epājē eremut jee, je

moporowykyaukaa ejeupe”, 'jau je 'ga upe, 'ga muorypa ee. 'Ga 'ā je kwaap katu katu futat. Je 'ga remiesageeta. A'eramū 'ga ojemogypyka etee je ree, oporowyky apoukaa jee. “Paulo 'ga jeje'eg are 'gā mu'ea esage jee. Tamono 'ga tekotee 'gā nupe teje'ega mome'waramū 'jau kwy”, 'jau Janejararete 'ga ojeupe jee.

¹³ Ymā te Jejuī 'ga rereko tyweretei ikue, 'ga kurapa ikue. 'Ga remiayuwa 'gā nanē je erekou tyweaete ikue nū. A'etea 'ga ajemuaēma je ree ikue. Nakwaawi je 'ga ikue. A'eramū je 'ga rerowiare'ema tekou ikue. A'eramū je te'akwaawe'emamū tekou ikue. A'eramū 'ga a'eramū ajemuaēma je ree ikue.

¹⁴ Jetywerete agawewi je ikue. A'etea 'ga oporokatu'ogiweramū je ree ikue. Naapoi agawewi je mama'e esagea 'ga upe ikue. A'etea 'ga ajemuaēma je ree. 'Ga 'ā ojerowiarukaa jee. 'Ga 'ā je mopota'waukaa 'gā nee. Jejuī 'ga ree je jemujari 'awamue. A'ere 'ga naje upe etee rūi iapoi. Najuejue etee 'ga iapoi ojee ojemujat ma'e 'gā nupe.

¹⁵ “Ymā te Jejuī Kristu 'ga ruri ywy pe aetywera katu'okawamū rakue”, sa'e ki jarekou. Aipo 'ea a'jea futat. A'eramū ki jane aipo 'e rerowiaa. A'jea futat 'ga ruri aetywera katu'okawamū ikue.

Je ako jetywerete agawewi futat 'gā apyraapa ikue.

¹⁶ A'etea Janeruwarete 'ga ajemuaēma je ree ikue. A'eramū Jejuī 'ga je katu'oka je mogou wemiayuamū ikue. Je katu'og ire nipo je resakara 'gā 'jau: “Kuu. Paulo 'ga katu'og ire nipo 'ga jane nanē futat jane katu'ogi 'awamū”, 'jau nipo 'gā ajaupe. “Paulo 'ga wi opoire'ema nipo 'ga jane wi nanē futat opoire'ema nū”, 'jau nipo je resakara 'gā. A'eramū nipo 'gā nanē Jejuī 'ga rerowiaa, ojekatu'ogukaa 'ga upe. A'eramū 'gā nanē awau jane rupi ywag ipe. Jejuī 'ga pyri jarejemogyau nakwaparimū warāu rūi futat.

¹⁷ A'eramū ki sa'e Janeruwarete 'ga upe: “Ene te 'ā eneresage oree. 'Wyrirarete esageramū futat 'ā ereko oree”, sa'e ki 'ga upe. “Ene te 'ā okoeteete ma'ea. Neremanūi futari. Ore 'ā naruesagi agawewi ene. A'ere ore eneremiapofera resagi. A'eramū ore enereko kwaapa futat”, sa'e ki 'ga upe. “Ene te 'ā eneresage tekotee 'gā nesage apyraapa. Nitywi futari 'ga amū ene 'jawe. Namutamutat ene etee futat ereko”, sa'e ki Jarejuwarete 'ga upe.

¹⁸ Ene 'ā jera'yra 'jawe jee, ki Timoteo. Enup katu katu ki jeje'ega. Ymā te Janeruwarete 'ga 'gā amū moje'egukari ene ree rakue. “Timoteo 'ga nipo ako moromu'jaramū. Je ree nipo 'ga 'gā mu'jau”, 'jau Janeruwarete 'ga jee, 'jau 'gā enee ikue. Janeruwarete 'ga oje'ega 'gā nupe ra'ne. A'eramū 'gā aipoa mome'wau enee. A'eramū je 'jau ene upe: 'Gā 'eawer are eja'at ekou. 'Gā 'eawer imū etee futat ene 'gā mu'jau morogyta esage are. Eporowyky esage ki Jarejuwarete 'ga upe, 'jau je enee.

¹⁹ Erepoit kasi 'ga rerowiar awi ne. Mama'e esagea etee ki epou ekou. Mama'e esage kwaapa ki mama'e esagea etee apou. 'Gā amū nipo mama'e esage kwaapa futat numiamū. A'ere nipo 'gā mama'e tywera etee futat iapoi. A'eramū nipo 'gā 'jau: “Aipoa nia'wyrī agawewi. A'etea 'ga aapo”, 'jau nipo 'gā ojeupe. A'eramū nipo 'gā opoia futat Jejuī 'ga ree ojemogypyg awi. Sā'ā 'ga amū yara rape kwaawa agawewi. A'etea 'ā imonou ekoete ita 'arimū imamuka imote'aa. Nan tee futat ae mama'e esage apo kwaawi agawewi. A'etea mama'e tywera etee iapou. A'eramū 'gā ojemote'aa.

²⁰ Aipo apoara 'gā amū Imeneu 'ga, Aresāri 'ga retee. Mama'e esage apo kwaapa agawewi. A'etea 'gā ikwaapare'ema 'jawe etee mama'e tywera apou'jau'japa. A'eramū je 'jau: Tene mama'eukwaawa 'wyrīara 'gā nereko tyweretei ra'ne. A'eramū nipo 'gā ojewya Jejuī 'ga rerowiaa nū. A'eramū nipo 'gā opika Jejuī 'ga kuraw awi, 'jau je 'gā nupe.

2

Pemono ki pejeje'ega 'ga upe

¹ 'Awamū je 'i enee, ki Timoteo: Pe'je sajemogy jareje'ega monou Jarejuwarete 'ga upe 'gā nee najuejue etee, a'e je enee. “Epoar iki 'gā, Kiapi'ni. Ejejukau esage 'gā nee”, sa'e ki 'ga upe 'gā nee. Mama'e esagea 'ga wapo jane jepi. A'eramū jane 'jau 'ga upe: “Au'jete mama'e esagea ereapo oree”, 'jau ki jane 'ga upe, 'ga muorypa ee. “Ene 'ā ejejukau esage ore ree. Ene 'ā eneresage oree”, sa'e ki 'ga upe, 'ga resage mome'wau 'ga upe.

² Jare'wyrīara 'gā nee nanē ki jareje'ega simono Jarejuwarete 'ga upe nū. Jare'wyrīararete 'ga ree, jare'wyrīana'nīa 'gā nee. Mīmera 'gā nee ki jareje'ega simono 'ga upe: “Epoar iki ore'wyrīara 'gā, Kiapi'ni. Emu'akwaap 'gā 'gā porowyky are”, 'jau ki jane Jarejuwarete 'ga upe. Aipoa jane iapo re nipo 'gā ojejukau esage jane ree. A'eramū jane jarepota'waramū jarejemogyau jarejuee, jarejemogyau esage.

³ 'Ga upe jareje'ega monou nipo jane 'ga muorywi. Aipoa esage, 'jau nipo 'ga, ojeupe jane jareje'ega monoramū. 'Ga 'ā jane katu'okara.

⁴ 'Ga 'ā iporokatu'ogiwet ae ree najuejue etee. A'jea futat 'ga je'ega. A'eramū 'ga najuejue etee oje'ega kwaawa futaa.

⁵⁻⁶ Janeruwarete 'ga 'ā majepe etee. Nitywi 'ga amū 'ga 'jawe. 'Ga 'ā esage futat. A'eramū 'ga mama'e tywera upe wuage'emamū. Mama'e tywera 'ga mamara'neukaa. A'eramū 'ga mama'e tywera apoara 'gā nerekou tyweaete, 'gā monoukaa mama'eukwaawa rapyaw ipe. A'ere Jejuu Kristu 'ga ruri 'au ywy pe. Ae 'jawe futat 'ga ruri. A'eramū 'ga ojejukaukaa 'gā nupe, janetywera mepyawamū. A'eramū 'ga 'Uwarete 'ga mota'wau jane upe. Janetywera 'ga omepypap. Oporogyta 'ga 'Uwarete 'ga upe jane ree. A'eramū 'ga 'awamū najuejue etee 'gā katu'oga futaa. 'Awamū iwaēmi 'ga kwaapawa upe.

⁷ A'eramū Janeruwarete 'ga je monou imome'waukaa 'gā nupe, amunawa moymoyka ikue. "Ere ewau morogyta esage mome'wau 'gā nupe najuejue etee. Janeruwarete 'ga iporokatu'ogiwet pē nee, ere ki 'gā nupe", 'jau 'ga jee ikue. "Jejuu 'ga 'ā janetywera omepypap. A'eramū pēē 'awamū pejetywera moirukaa Jarejuwarete 'ga upe. A'eramū 'ga U'agesage monou pē nupe oje'jawe pē mogyau, ere ki 'gā nupe", 'jau 'ga jee ikue. A'jea futat 'ga je monou imome'waukaa judeue'ema 'gā nupe, okwaapare'ema 'gā nupe najuejue etee.

⁸ 'Awamū je pē mu'ei Jarejuwarete 'ga upe pēporogyta are. "Jejuu 'ga rerowiaara 'gā jatykaramū ki pejeje'ega pemono Jarejuwarete 'ga upe, ajatyka ma'e 'gā nowase", 'jau ki ene kūima'efera 'gā nupe. "Pejejuee pejemara'ne'emamū pejeporogytau 'ga upe. Pejejamuewe'em nanē pejeporogytau 'ga upe nū", 'jau ki ene 'gā nupe. "Esage ma'eramū pēē pejepoa pemowywyt pejeje'ega monou 'ga upe", 'jau ki ene 'gā nupe.

⁹⁻¹⁰ Kūjāmera 'gā nupe nanē ki ere nū: "Pejemokaturam kasi pejepira resaukaawamū etee ne. Napejemokaturama rūi pēnesagea wesaukat. Pē nesaka sipo 'gā ma'ja 'jau ajaupe? 'Kyna raity kynna muesage', e'i sipo 'gā ajaupe? Naani. Napēnaitya rūi pē muesage Janeruwarete 'ga upe. Pēneko esagea te pē muesage 'ga upe. Aipoa tee 'ga amuoryp. Aipo 'jaramū, 'Je 'ā Jejuu kīā remiaiyuwa', pe'je ekoete pejejemogyau. A'eramū ki pēē pejejemogyau esage 'ga upe", ere ki kūjāmera 'gā nupe. "Pejemojewaweg ekoete kasi pejejemogyau ne. Ita kamaap, ita mo'yt, ita fāyrū, taity esage. Mīmera nepē muesage'auweri Janeruwarete 'ga upe. Pēneko esagea tee Janeruwarete 'ga afutat", ere ki kūjāmera 'gā nupe, a'e je enee.

¹¹ Jejuu 'ga rerowiaara 'gā ajatykau ojemu'jau Jarejuwarete 'ga je'eg are te. A'eramū ki kūjāmera 'gā opika etee ajemogyau enupa.

¹² Ae jatykaaw ipe kūjāmera 'gā naae mu'earūi kūima'eramū. Kūima'eramū etee te ae jamu'akwaawi. Na'wyrriara rūi kūjāmera 'gā. A'eramū ki kūjāmera 'gā wapyakau etee ajemogyau.

¹³ Aeypy 'gā apou 'ā Janeruwarete 'ga kūima'e 'ga ra'ne iapoi rakue, Atāu 'ga ra'ne rakue. A'ere 'ga kūjā ēē apou rakue, Ewa ēē rakue.

¹⁴ NaAtāu 'ga upe rūi mama'eukwaawa 'wyrriara 'meramū rakue. Ewa ēē upe etee te i'meramū rakue. Ewa ēē ra'ne te 'ā mama'e omote'at rakue, Jarejuwarete 'ga je'ega anupe'ema rakue. A'eramū kūjāmera 'gā kūima'eramū ae mu'jawardū'em.

¹⁵ Ewa ēē ra'ne mama'e omote'at. A'eramū kunumū wayramū kūjāmera 'gā nupe. A'etea Janeruwarete 'ga kūjāmera 'gā katu'oka, Jejuu 'ga rerowiar awi 'gā poire'emamū. Ajuee ojejuka esage awi 'gā poire'emamū, ajemogy esage awi 'gā poire'emamū, Jarejuwarete 'ga muoryw awi 'gā poire'emamū. Mīmer awi 'gā poire'emamū Janeruwarete 'ga kūjāmera 'gā katu'ogi futari.

3

Jejuu 'ga rerowiaara 'gā 'wyrriat

¹ A'jea futat poa ae mu'e esageawa te. 'Awamū je ene mu'ei Jejuu 'ga rerowiaara 'gā nupe 'wyrriara amū mū'ē are, pastor amū mū'ē are. 'Ga amū nipo wekoweramū 'wyrriaramū Jejuu 'ga rerowiaara 'gā nupe. "A'e 'ga morowyky esagea afutat ojeupe oporowykyawamū", 'jau ore jepi. A'jea futat aipoa.

² A'eramū ene ajueape ako esage ma'e 'ga etee futat imogou 'wyrriaramū ajaupe. Ekoarū'e'ema 'ga kasi eremono 'wyrriaramū Jejuu 'ga rerowiaara 'gā nupe ne. Majepe tee ki 'ga remirekoa. I'akwaap ma'eramū ae poromū. Ako esage ma'eramū ae poromū. Oje'wyr ipe 'gā mo'wy'wyrara 'ga poromū, mama'ea 'gā nupe imonoara 'ga poromū. Ojemu'akwaap 'ga mama'e tywera apoe'em are. A'eramū 'ga Janeruwarete 'ga je'eg are oporomu'jau.

³ Kawīajaiwa 'wara 'gā nokoa'auweri Jejuu 'ga rerowiaara 'gā 'wyrriaramū. Nojonupāaramū rūi ae rekoi 'wyrriaramū ajaupe. Ajaupe ita'wa ma'eramū te ae rekoi 'wyrriaramū ajaupe. Naka'aranūū mono'og are etee ea'at ma'eramū rūi ae poromū.

⁴ Opytun are ojejuka ma'eramū ae poromū. Wa'yr are ojejuka ma'eramū ae poromū. Wa'yra upe oje'eg ma'eramū ae poromū. A'eramū 'ga ra'yra ojeupe 'ga je'egamū 'ga je'ega renupa etee. Wa'yra mu'jaramū ae poromū.

⁵ Wa'yra mu'e'em ire sipo ae maran Jeju'i 'ga rerowiaara 'gã mu'jau mama'e are? Naani.

⁶ Jeju'i 'ga rerowiar yau 'gã nanē kasi eremono 'wyriaramū ajaupe ne. Kasi a'e pe 'ga omogo re, je jeresage 'gã nupe, tekotee 'gã nesage apyraapa, 'ga 'i ne ojerowiaraipe ojee etee ne. Ojee ojerowiaraipe ma'e 'gã nia'wyri Janeruwarete 'ga upe. Ymã te mama'eukwaawa 'wyriara jerowiaraiwi ojee rakue. A'eramū 'ã Janeruwarete 'ga imuēma imua ywag awi rakue. Ojee ojerowiaraipe ma'e 'gã nanē Janeruwarete 'ga erekou tyweaete i'jawerimū etee futat.

⁷ Esage ma'e 'gã etee ki emono imogou 'wyriaramū 'gã nupe. 'Wyriarama 'gã ki tuereko esage Jeju'i 'ga rerowiare'ema 'gã. "Kuu. 'Ga esage", te'i 'gã ajaupe 'jau. A'ere kasi "nia'wyri 'ga", 'ga upe 'gã 'eramū eremono 'ga Jeju'i 'ga rerowiaara 'gã nupe 'wyriaramū ne. Kasi a'e pe 'ga mono 'ga mÿjamū, mama'eukwaawa 'wyriara ruri 'ga porowyky mote'aa 'ga wi ne. A'eramū ene esage ma'e 'ga etee imogou 'gã nupe. Nanuara 'gã etee ki emogo 'wyriaramū 'gã nupe.

'Wyriara 'ga poaat

⁸ 'Wyriara 'ga poaara 'gã nanē ki tako esage nū, diacano 'jawa nanē ki tako esage nū. O'wyriara 'ga 'jawe futar iki 'gã tako esage. Ti'me kasi 'gã ne. Ojemuwawapit ma'eramū te ae poromū. Kawñajaiwa 'wara 'ga noko'a'uweri 'wyriara 'ga poirūnamū. Naka'aranūū mono'og are etee ea'at ma'eramū rūi ae poromū nanē nū.

⁹ Jarejuwarete 'ga je'ega kwaaparamū te ae poromū. 'Ga je'eg are jarejemu'e re jane jarejemogy esagea kwaapa. A'eramū aipo 'ga je'eg are eapyo ma'ea etee futat akowarūmū. 'Ga je'eg are eapyo katu ma'eramū nanē ae poromū nū. Mama'e esage kwaapa ki 'ga mama'e esage etee futat tuapo.

¹⁰ Pejejeupe 'ga mono enune ki pejomajatyka ra'ne, pejeporogytau 'gã nee ra'ne. "Esage te 'gã pē nupe?" 'jau ki pēē pejejeupe. Nia'wyri 'gã 'eramū pēē 'gã mogowe'em. Esage futat 'gã oreē 'eramū pēē 'gã monou imogyau pejejeupe.

¹¹ 'Gã nemirekoa nanē ki tako esage nū. 'Gã nemirekoa nipo wa'wyre'emamū 'eramū nanē kasi eremogo 'gã 'gã nesakaramū ne. Namorogyta'ywa rūi kasi 'gã nemirekoa ne. Kawñajaiwa 'wara 'ga remireko 'eramū kasi 'ga eremono imÿina ne. Ojemuwawapit ma'e tee nipo ajee 'ga remirekoa. A'eramū ēē u'eawer imū etee futat mama'e apou.

¹² 'Wyriara poirū 'gã nemirekoa nirūi futari. Majepei tee futat 'ga remirekoa. Wa'yra upe oje'eg ma'eramū nanē nū. Wog ipe ajemogy ma'e 'gã nupe oje'eg ma'eramū nanē nū.

¹³ Oporowyky esage re nipo 'ga ojemu'jaga kūima'eeteeramū 'gã nupe. A'eramū nipo 'ga okyjawe'em Jeju'i 'ga mome'wau 'gã nupe kwe pe awau. "Jeju'i 'ga 'ã Janejararetea. 'Ga 'ã ore aruerowiat", 'jau nipo 'ga awau kwe pe 'gã nupe, tekotee 'gã nupe.

¹⁴ Jeatawerayay je ene pyri nuniamū, ki Timoteo. A'ere je nakwaawi wa tewawa. A'eramū je ka'arana kwasiaa imonou ene upe.

¹⁵ Jeo poromukuran iki ka'arana pemogyta. A'eramū pēē pejejemogy esage kwaapa. Jarejuwarete 'ga remiayuwa futat jane. Okoeteete ma'e 'ga remiayuwa futat jane. A'jea futat 'ga je'ega. 'Ga je'ega jane sikwaap. Jarejuwarete 'ga remiayuwa futat jane. Sã'ã tupaa'mywa 'oga ppykoga. Nan tee futat 'ga je'ega reko'i jane pype. 'Ga je'ega kwaapa nipo jane jarepoire'ema 'ga rerowiar awi mama'e tesirūa jarejeupe ijesaukaramū.

¹⁶ Ymã te 'ã janepypp 'gã naeapyo'i Jarejuwarete 'ga je'eg are rakue. Nokwaawi janepyppa, "Janeruwarete 'ga ra'yra 'ga nipo 'ut amanūmū ae katu'okawamū" 'ea rakue. A'ere 'ga 'awamū jane mueapyo'i ee.

"Jeju'i 'ga 'ua ywy pe rakue, kūima'eramū rakue.

Ywy pe 'ga rekoramū Janeruwarete 'ga 'Agesagea 'jau: 'Jeju'i 'ga esage.

Nuapoi futari 'ga mama'e tywera', 'jau 'ga 'Agesagea 'ga upe.

Ywagipewara 'gã nanē Jeju'i 'ga resaka nū, kūima'eramū 'ga reko resaka nū.

'Ga rerowiaara 'gã amū awau kwe pe 'ga mome'wau.

A'eramū 'gã 'ga rerowiaa kwaiwete.

A'eramū Janeruwarete 'ga 'ga mojewya 'ga monou 'ga mojeupia oje'wyr ipe nū."

4

Ime ma'e

¹ 'Awamū je ene mu'ei i'me ma'e 'gã nee nanē futat nū. A'eramū ene 'gã je'ega rerowiare'ema. Janeruwarete 'ga 'Agesagea e'i: "Anure nipo, Janeruwarete 'ga wemi- apofera mateepawe'emauwe 'gã amū poiri Jeju'i 'ga rerowiar awi. Mama'eukwaawa 'wyriara nipo o'meramū 'gã nupe ojerowiarukaa 'gã nupe. A'eramū nipo amumera 'gã opoia futat Jeju'i 'ga rerowiar awi", 'jau 'ga 'Agesagea janee. Mama'eukwaawa remiayuwa 'gã 'ã i'me ajemogyau janee.

² I'me ma'ea futat 'gā. Nokwaawi futari 'gā mama'e a'jea miamū. Namutamutat 'gā mama'e tywera apoi ajemogyau. A'ere 'gā 'awamū mama'e esagea ojeupe iapoa nokwaawi. Nojemu'akwaawa'uweri 'gā mama'e esage apo are. Nokwaawi futari 'gā wemiapo tywera.

³ “Ku'jywa 'ga aeremirekoa nafutari”, 'jau futatee nipo 'gā ajaupe ajemogyau. A'ere 'gā 'me ate 'gā jemogyamū. “Awa mama'ea pe'u. A'ere kasi pea pe'u ne”, 'jau 'gā 'me irūa ajamu'jau i'upyre'am are. A'ere naani. 'Gā 'me ate. Ymā te 'ā Janeruwarete 'ga mama'e apoi janeremi'uramamū futat rakue. A'ere ae Jejui 'ga kwaaw ire mama'e 'u katu katu etee futat jarejemogyau. 'Ga upe jareje'ega mono re jane mama'e 'ui katu katu etee futat. “Au'jete mama'ea eremut oree 'ga upe” e re ae mama'e 'ui katu katu etee.

⁴ Esage Janeruwarete 'ga remiapofera. Mama'ea 'ga wapo janeremi'uramamū futat rakue. A'eramū jane, mama'ea kasi pe'u ne, 'jawe'em 'gā nupe. A'ere ki “au'jete mama'e esagea eremut oree”, sa'e etee Jarejuwarete 'ga upe mama'e 'u enune.

⁵ “Mama'ea je aapo pēnemi'uramamū”, e'i 'ga 'ā janee rakue. A'eramū 'ā jane jarejemi'war enune 'jau 'ga upe jepi: “Au'jete mama'ea eremut oree. Oreremi'urama eremut oree”, 'jau jane 'ā 'ga upe jepi, jarejemi'war enune jepi. A'eramū jane mama'e 'wau katu katu etee futat. Nitywi mama'ea i'upyre'ema janee.

Jejui 'ga remiayuw esage

⁶ Aipo are ki 'gā emu'e, ki Timoteo. Jejui 'ga rerowiaara 'gā ki emu'e. 'Gā nupe aipo mome'u esageramū. Jejui Kristu 'ga remiayuw esageramū futat ereko. A'eramū ene ai'iwe, ai'iwe 'jau Jarejuwarete 'ga je'ega mogytai ekou. 'Ga je'ega a'jea futat. A'eramū ene imogytau ekou ejea'aramū ee. A'eramū ene 'ga je'eg imū etee futat ekou. A'eramū ene eojere'emamū futat mama'e apou ekou 'ga je'eg imū etee futat.

⁷ A'ere kasi morogyta ymaner are ereapyaka ne. 'Gā amū nipo janeypy 'gā je'ega mome'wara. A'ere kasi ereapyaka 'gā je'eg are ne. Aipo mome'ua najane mojemogyppyga'uweri jane mogyau Janeruwarete 'ga ree. Jarejuwarete 'ga je'eg are etee ejemu'jau ekou. 'Ga je'eg are etee ejemu'jau nipo 'ga remifutar imū etee futat mama'ea ereapo.

⁸ Janejemamuakara nanē esage 'ga upe nū. A'ere 'ga je'eg imū jane jemogyta te esageramū 'ga upe. “Janeruwarete 'ga je'ega nipo jane mogy esageukaa 'au ywy pe. A'eramū jane jaremanū re jarewau jarejemogyau ywag ipe 'ga pyri”, 'jau ore jepi.

⁹ Aipo 'ea a'jea futat. Tuapyaka esage ki 'gā ajemogyau ee. Tuerowiar iki 'gā aipoa.

¹⁰ Janeruwarete 'ga 'ā ywag ipe 'ūi. 'Ga 'ā jane sirowiat. 'Ga pyri jareoa 'ā jane siapesak jarejemogyau. A'eramū jane a'eramū jarewau 'ga mome'wau tekotee 'gā nupe. 'Gā amū nipo 'ga rerowiaa jane 'e renuw ire. 'Ga 'ā ae katu'okara. Najuejue etee ae katu'oga 'ga afutat. A'eramū 'ga werowiaara 'gā katu'oka a'jea futat.

¹¹ “Paulo 'ga je'ega ki peenup katu katu”, ere ki Jejui 'ga rerowiaara 'gā nupe. “Emu'e ki 'gā Jejui 'ga porogyta are. 'Ga je'ega ki peenup”, ere ki 'gā nupe. “Ga je'eg imū pejemogyau esage”, ere ki 'gā nupe.

¹² Ene 'ā kunumūūa agawewi. A'etea 'ā Janeruwarete 'ga ene mono peu 'gā mu'jaukaa ojee. A'eramū ene ekou esage 'gā nowase. A'eramū nipo 'gā, ene resag ire, ene 'jawe ajemogyau, mama'e esagea etee iapou. Eje'ega esageramū ekou 'gā nupe. Ejejuka esage ki ekou 'gā nee. Erowiar iki Jarejuwarete 'ga. Mama'e tywera kasi ereapo ne. Eko esage ki. A'eramū 'gā ojemu'jau ene ree.

¹³ Jeo poromukuran Jarejuwarete 'ga je'ega rerekwara ka'arana mogytai ekou 'gā nupe, ajatyka ma'e 'gā nupe. Emu'e ki 'gā morogyta esage are. Emu'akwaap ki 'gā 'gā neko esage are.

¹⁴ Ymā te ako Jejui 'ga rerowiaara 'gā 'wyriara 'gā amū opo monoi eneaptye'rarimū ikue, ene resaukaa 'gā nupe ikue, ene monou Jarejuwarete 'ga mome'waramū 'gā nupe ikue. A'e pe ako 'gā amū 'jau ene upe ikue: “Je 'ā tepājē omono 'ga upe 'ga moporowykyaukaa tejeupe, e'i 'ga enee, ere ki 'ga upe, e'i Janeruwarete 'ga jee”, 'jau ako 'gā amū ene upe ikue. A'eramū je 'awamū 'jau ene upe nū: 'Ga pājē mū etee futat eporowyky ekou, 'jau je ene upe.

¹⁵ 'Ga je'eg are ejea'aramū ekou. A'eramū nipo ene resakara 'gā 'jau enee: “Jejui 'ga je'eg imū etee futat 'ga rekoi oporowykyau”, 'jau nipo 'gā enee, ene resag ire.

¹⁶ Ejemuaēm iki ekou ejee. 'Ga je'eg imū etee futat eko eatau. Jarejuwarete 'ga je'eg are etee ki 'gā emu'e. Enup katu katu ki aipo 'ea. 'Ga je'ega etee ki emome'u 'gā nupe. Aipo apo re nipo ereo ywag ipe ekou Jarejuwarete 'ga pyri, emanū re. Eneremimu'efera 'gā nanē futat nipo awau 'ga pyri ene amu'e re nū.

5

Jejui 'ga rerowiaara 'gā neko esage

¹ 'Awamū je ene mu'ei Jejuī 'ga rerowiaara 'gā mu'akwaaw are. 'Gā 'ā Jejuī 'ga rerowiaar yaua. 'Awamū etee ako 'gā Jejuī 'ga rerowiari ai'i. A'eramū ene 'gā mu'jau Jarejuwarete 'ga remifutar are.

Sawa'e 'ga amū mama'e tywera aporamū kasi ereje'egay 'ga upe ne. Eporogyta esage etee ki 'ga upe, 'ga mu'jau ejuwa 'jawe futat. "Mama'e tywera apoa nia'wryi Janeruwarete 'ga upe. Mama'e esagea etee epao 'ga upe", ere esage etee ki 'ga upe, 'ga mu'jau Jarejuwarete 'ga remifutar are.

Ipyau 'gā nipo mama'e tywera mū apou. A'eramū nanē ki eje'ega 'gā nupe ejewirera 'jawe futat, 'gā mu'jau ee nū.

² Kūjāmera 'gā nupe eje'ega kasi ere ejeupe ne: Kuu. Te 'ā nooi te'apa amū fue'i, ere kasi ejeupe ne. Wāiwi ēē mū upe eje'ega, eje'eg esage etee futat ēē upe, ey 'jawe. Kūjāmuku 'gā nupe nanē eje'ega ejenyra 'jawe etee futat nū.

³ 'Awamū je ene mu'ei imen manū ma'efera 'gā nee nū, ipytune'ema 'gā nee. Tojejuka esage ki Jejuī 'ga rerowiaara 'gā 'gā nee.

⁴ Imen manū ma'e nipo wa'yramū amū, wemiarirūnamū nanē nipo nū. A'eramū ki 'gā tojejuka oy are maranamū ojarī: are 'jau. Aipoa Janeruwarete 'ga afutat. Pejepyttun are pēpota'wa pāwēa futat esage Janeruwarete 'ga upe. Janewuja'i are 'ā janey jejukai jane ree rakue. Mama'ea 'ā 'gā imua janee rakue. Janeruwa nanē 'ā mama'e mua janee, mama'e apou janee 'jau rakue, janewujaramū rakue. A'eramū jane 'awamū jarepojejukaramū jarey are ipy'rau. Jane jarepojejukaramū jarejuw are nanē nū. Jarejamī are, jarejarī are, mīmer are ki sajejuka 'gā nee 'gā py'rau.

⁵ Majawera 'gā amū nipo wa'yre'emamū amū wemiarirū'emamū nanē nipo nū, opytune'emamū nanē nipo 'gā nū. A'eramū nipo 'gā Jarejuwarete 'ga ree tee ojemogyppyka ajemogyau. Au'jeteramū nipo 'gā oje'ega monou akou 'ga upe. "Mama'ea emut jee. Nitywi mama'ea jee", 'jau nipo 'gā akou Jarejuwarete 'ga upe. Aipo 'gā ki sipoat, mama'e monou 'gā nupe. Sajejuka ki 'gā nee.

⁶ Imen manū ma'efera 'gā amū nipo awau aku'iramū etee akou ojee. Ojee tee wea'aramū awau. Jarejuwarete 'ga ree jēmī wea'are'emamū akou. A'e 'gā ako amanū ma'e 'jawe etee 'ga upe. Aipo 'gā nee kasi pejejuka ne.

⁷ A'eramū ki ene je'eawer imū etee 'gā mu'jau. Kasi a'e pe majawera 'gā nee jane jejukae'emamū jane resakara 'gā 'i ne: "Kuu. Jejuī 'ga rerowiaara 'gā nojejukai opytun are", e'i 'gā janee, jane ago'wau ne. A'eramū je 'jau pē nupe: Pejejuka ki majawera 'gā nee, a'e je enee. A'eramū jane resakara 'gā jane ago'wawe'em.

⁸ Jarepyttuna 'gā mama'e tywe'emamū jarejejukau 'gā nee. 'Gā nee jane jejukae'emamū ia'wrye'emamū futat jane rekoī Jarejuwarete 'ga upe Jejuī 'ga rerowiar awi opoit ma'e 'jawe. 'Ga rerowiare'ema 'gā miāmū opytuna 'gā nee ojejuka. Jane taetu 'ga rerowiaaramū jarepyttuna 'gā nee jarejejukae'em ire 'ga rerowiare'ema 'gā tywera siapyraaw ine.

⁹ Imen manū ma'e 'gā, wāiwi 'gā nera etee ene imonou ikwasiaa ka'aran are. Jarejuwarete 'ga upe oporowyky ma'ea 'jawa ka'aran are inuga. Aipo 'gā oporowyky Jarejuwarete 'ga upe. Wāiwi 'gā poromū. Sesēta kwara mu'aarera 'gā nera etee futat ene inuga ee. Majepēi tee imen ma'efera 'gā.

¹⁰ Wa'yra muaranuw esageara 'gā poromū. Oje'wyr ipe ae mo'wy'wyrera poromū. Jarejuwarete 'ga remiayua 'gā nee ojejuka ma'efera poromū, 'gā nupe mama'e monoarera poromū. Ojero'wu ma'efera 'gā nee ojejuka ma'efera ēē. Ajaupe mama'e esage apoarera ēē. Nanuara apoarera 'gā majawera 'gā nera etee ki ekwasiat inuga ka'aran are, Jarejuwarete 'ga upe oporowyky ma'ea 'jawa ka'aran are.

¹¹ Kūjā pyau 'gā amū mena nipo amanūmū ēē wi. A'e ēē rera kasi eremono Jarejuwarete 'ga upe oporowyky ma'ea 'jawa ka'aran are inuga ne. Anurenare'i nipo ēē oi kūima'e mū rekaa omenamū nū. A'eramū nipo ēē Jejuī 'ga porowyky awi opoia etee ne.

¹² Omena manū re nipo ēē 'jau ojeupe: "Awamū je nomenaru'jawi futari. 'Awamū je Jejuī kiā porowyky te futat taapo 'jau", 'jau nipo ēē ojeupe numiamū. A'e reewi nipo ēē anure ēē menaari nū. A'e ēē u'eawer imū mama'ea nuapoi futari. Aipoa nia'wryi Janeruwarete 'ga upe.

¹³ A'eramū ene aipo 'gā nera monowe'em Jarejuwarete 'ga upe oporowyky ma'ea 'jawa ka'aran are. Kasi a'e pe aipo ēē mama'e ojeupe imonoramū ēē wewueramū akou ne. Awau kwe pe oporogytau akou 'oga moyka morogyta a'wrye'ema pyu ne.

¹⁴ A'eramū ki nanuara 'gā tomenaru'jap tāmējē. A'eramū futat 'gā wa'yramū. A'eramū futat 'gā oporowykyau wa'yra upe omena upe 'jau. A'eramū Jejuī 'ga rerowiare'ema 'gā jane ago'wawe'em ajemogyau 'gā nee.

¹⁵ Amumera majawera 'gā te ajee opoit Jejuī 'ga rerowiar awi ai'i. Mama'eukwaawa 'wryiara remifutar imū etee 'gā mama'e apou ajemogyau ai'i. Aipoa nia'wryi futari.

¹⁶ “Pēpytuna nipo amū ako majaweramū. A'eramū pēē futat pejejejukau ēē ree”, ere ki Jejuu 'ga rerowiaara 'gā kūjāmera 'gā nupe. Pejejuka kynā ree, te'i kasi 'gā Jejuu 'ga rerowiaara 'gā nupe ne. Eē futar iki tojejuka opytun are. Jejuu 'ga rerowiaara 'gā ki tojejuka ipytune'ema 'gā nee etee.

¹⁷ Awamū je ene mu'ei jare'wyriara 'gā nee nanē nū, pastor 'jawa 'gā nee nū. Jare'wyriara 'gā nee ki sajejuka esage. Toporowyky esage ki 'gā akou. A'eramū ki simepyuu 'gā. Mukūi ki 'gā nepya simono 'gā nupe. Jarejuwarete 'ga je'ega mome'wara 'gā nupe, jaremu'jara 'gā nupe. Mīmera 'gā nupe ki simonouu mukūi 'gā nepya 'gā nupe.

¹⁸ Ymā te 'ā Janeruwarete 'ga oje'ega kwasiarukari 'gā nupe rakue: “Ejeupe ejeymawa iporowykyramū kasi eresimat ejeymawa ne. Tene ki ijemi'wari akou oporowykyaw ipē”, 'jau 'ga ikwasiarukaa inuga janee rakue. “Pejejeupe 'gā amū porowykyramū nanē ki 'gā pemepy”, 'jau nanē 'ga ikwasiarukaa inuga rakue nū. A'eramū ki pēē, peje'wyriara mepyau pejejeupe iporowykyawer are.

¹⁹ Peenup kasi peje'wyriara 'ga ago'oa ne. 'Ga amū nipo 'ua 'wyriara 'ga mome'wau pē nupe: “Ekoay jane'wyriara 'ga mama'e tywera apou akou”, 'jau nipo 'gā pē nupe, Jejuu 'ga rerowiaaramū pē nupe. Majepeja 'ga etee imome'uramū kasi perowiar ine. A'ere ki 'gā amū nuru'jawamū perowiat.

²⁰ Mama'e tywera 'wyriara 'ga iaporamū ki eje'ega emoywyrafen 'ga upe pejejowase. A'eramū enupara 'gā, aipo renupa, oky'jau mama'e tywera apo awi. “Mama'e tywera aporamū nipo 'ā 'gā oje'ega moywyrafeni janee 'gā nowase”, 'jau nipo 'gā ajaupe.

²¹ Jejuu 'ga rerowiaara 'gā mu'akwaaw are je ene mu'ei, ki Timoteo. A'eramū ene jeje'ega renupa katu katu. Jeje'eg imū etee ki mama'ea eapo, a'e je enee Jarejuwarete 'ga remianuwamū, Jejuu Kristu 'ga remianuwamū, ywagipewara 'gā, mama'e tywera apoare'ema 'gā nemianuwamū 'jau. Mīmera 'gā nemianuwamū je 'i enee. A'eramū ene jeje'ega renupa katu katu. Ejejuka pāwē pāwē ki 'gā nee.

²² Epoa kasi eremono ejemiesapytere'ema 'gā apyte'rarimū ne. Esapytet ra'ne ki 'gā. 'Gā neko esage ra'ne ki esak. 'Gā neko esage resag ire etee ene epo monou 'gā apyte'rarimū 'gā mogyau Jarejuwarete 'ga upe oporowyky ma'eramū. Ereko kasi mama'e tywera apoara 'gā 'jawe etee ne. Mama'e tywera apoara 'gā nui ki epoj'o'ok. Eko esage futar iki. Ereapo kasi mama'e tywera ne.

²³⁻²⁵ 'Gā amū mama'e tywera wapo najuejue etee ajueape. A'eramū jane 'gā tywera resaka. “Anure nipo Janeruwarete 'ga 'gā nereko tyweretei”, 'jau nipo jane 'gā tywera resaka. A'ere nipo amumera 'gā mama'e tywera nuapoi ajueape. Jarejowase mama'ea 'gā iaporamū jane 'ā 'gā nemiapofera kwaawi. A'ere jane jemime 'gā nemiapofera nikwaawi. A'ere nipo jane anure 'gā nemiapofera resagi katu katu. A'eramū ene 'gā nesaka katu katu ra'ne Jarejuwarete 'ga porowyky pype 'gā munew enune.

Timoteo, 'awamū je 'i enee. Ejejuka esage ki ejee. Enerewega 'ā nia'wyri. A'eramū ene y'way ajai'wi 'wau ejewega upe. 'Ya etee kasi eretykur ine.

6

¹ Awamū je ene mu'ei 'gā nemifaja 'gā nee. Ymā te 'ā 'gā amū nitywi ka'aranūū pyu rakue. A'eramū 'gā ojeme'egukaa 'gā nupe 'gā nemifajamū rakue. A'ere 'gā 'awamū Jejuu 'ga rerowiaaramū 'gā jemogyi. “Peenup katu katu ki pejejara 'ga je'ega”, ere ki 'gā nupe. “Peporowyky esageramū tekotee 'gā jane ago'o eme 'jau”, ere ki 'gā nupe. Janeje'ega nanē 'gā ikurape'ema nū. Nia'wyri aipoa, 'jawe'em 'gā janeje'ega upe.

² Pējara 'gā nipo ako amū Jejuu 'ga rerowiaaramū. “Jejara 'ga Jejuu 'ga rerowiaara. A'eramū nipo 'ga je nupāue'em. A'eramū je teporowykyau 'i'i etee ināināi'i etee, pe'je kasi ne”, ere ki 'gā nupe. Naani. “Pejejara 'ga Jejuu 'ga rerowiaara futat 'ga rekoramū taetu pēporomutat 'ga ree. A'eramū ki pēē pejepeporowykyau esage 'ga upe”, ere ki 'gā nupe. Emu'e ki 'gā je'eawer are, ki Timoteo. Je'eawer imū etee mama'e apoukaa 'gā nupe.

Jejuu Kristu 'ga je'ega a'jea futat

³ Janejararete 'ga, Jejuu Kristu 'ga je'ega a'jea futat. A'eramū jane 'ga je'ega renuparamū Jarejuwarete 'ga remifutar imū mama'e apou. A'ere nipo 'gā amū nafutari 'ga je'ega. A'eramū nipo 'gā mama'e amutee are te nipo ajamu'jau.

⁴ “Je 'ā je'akwaap 'gā akwaawa apyraapa”, 'jau futatee nipo 'gā. A'ere naani. Ajamue ekoete te 'gā. Ajakurap te 'gā. Iporerekoaywet 'gā ajuee. Ojoje'ēwu'jaga ekoete. Najerowiari 'gā.

⁵ A'eramū ajamueu etee akou. Nokwaawi 'gā mama'e a'je apoa. I'akwaawe'emamū ae poromū. Mama'e tywer are etee 'gā wea'aramū akou. “Jejuu 'ga rerowiaara 'gā ika'aranūū kwai ajemogyau”, 'jau futatee 'gā ajaupe. “Je nanē nipo Jejuu 'ga rerowiaaramū tekou jeka'aranūū kwai nū”, 'jau futatee 'gā numiamū. A'ere nanarūi.

⁶ Janeruwarete 'ga remifutara apoara 'gā a'jea futat ika'aranūū kwai ma'e 'jawe iku'i akou. 'Ga 'gā okwaap. 'Ga esage futat. Janeruwarete 'ga esage futat, tekotee 'gā nesage apyraapa. A'eramū ae 'ga kwaaparamū aku'iramū ajemogyau awau 'ga rape rupi.

⁷ Jarey awi jare'aa ppy 'ā jane niruri futari mama'ea jarepo pe. A'eramū jane jaremanūmū nanē mama'e rerawawe'em futat jarepo pe nū.

⁸ A'eramū jane jarejemi'urama tywamū jarejekōējamū jarejemogyau. Jarejaity tywamū jareku'iramū nanē nū.

⁹ Amumē ka'aranūū mono'ogara 'gā mama'e tywera wapo ka'aranūū mono'ogawamū ojeupe. Mama'e yau resaka nipo 'gā 'i: "Kuu. Afutat je aipoa", 'jau nipo 'gā. A'eramū nipo 'gā ipykaa jemime ojeupe. Sā'ā 'miara. Mama'e resag ire ipige'ema ipy'araypara imogeukaa ukaja pype. A'eramū 'ā ojejukaukaa wyra ukaja jara 'ga upe. Nan tee ka'aranūū mono'ogara 'gā. U'akwaawe'emamū awau mama'e tywera apou ka'aranūū are. A'ere nipo nanuara 'gā nayrūnamū anure. Nooi futari 'gā Jarejuwarete 'ga pyri.

¹⁰ Ka'aranūū futar are ea'at ma'eramū mama'e tywera ipyrygawa futat. A'eramū ka'aranūū mono'og are etee ea'at ma'e 'gā Jejuī 'ga rerowiar are jēmī wea'are'emamū ajemogyau. 'Gā amū ka'aranūūa futaa kwaiwete, Jejuī 'ga futara apyraapa. A'eramū nipo 'gā amū Jejuī 'ga rerowiar awi opoia futat. Kwaiwete agawewi 'gā ka'aranūūa. A'etea nipo 'gā i'arasigamū akou, ojeupi etee futat ojereko tywerukaa.

Timoteo 'ga mu'akwaapawet

¹¹ A'eramū ki ene Janeruwarete 'ga remifutara apoaramū mama'e tywera apo awi ejea'gwau, ki Timoteo. Mama'e esage etee iapou. Jarejuwarete 'ga remifutar imū etee futat mama'e apou ekou. Ejemogyppyg ete ki ekou 'ga ree. Ejejuka esage ki Jejuī 'ga rerowiaara 'gā nee. Ejeupe mama'ea'y ijesaokaramū kasi erepoit 'ga rerowiar awi ne. Epota'wa esageramū etee futat ekou 'gā nee.

¹² Sā'ā afuakara resaukaara 'gā. Ajuowajaa 'gā 'ā afuakara resaukaawamū. Nojoman ekoete rūi nanē 'gā ajuetyka nū. Ojoman esage te 'gā. Nan tee futat ejeko esagea resaukaa 'ga upe. A'eramū nipo ene ewau ekou Jarejuwarete 'ga rape rupi. A'eramū 'ga ene mujaa ojee. Ymā te ako 'ga ene muēmi werowiare'ema 'gā nui ene mogou wemiayuwamū ikue. Kwaiwete 'gā nowase ako ere ikue: "Je 'ā arowiat Jejuī 'ga. 'Ga 'ā jetywera omoit je wi ai'i", ere ako 'gā nowase ikue. "Ga rape rupi too 'jau", ere ako 'gā nowase ikue. A'eramū 'ga ene monou wemiayuwamū. A'eramū ene 'awamū ekou esage futat 'ga upe.

¹³ Janeruwarete 'ga ete 'ā jane mogy. 'Ga ra'yra 'ga, Jejuī Kristu 'ga 'ā oje'eg a'je mome'wau Pōsiu Piratu 'ga upe, okyjawe'em rakue. Ma'eramū 'ā je 'i 'awamū 'gā nowase enee.

¹⁴ Jarejuwarete 'ga je'ega ki enup katu katu. 'Ga je'eg imū etee futar iki mama'e apo ekou. A'eramū tekotee 'gā ene ago'wawe'em. A'eramū ene etywere'emamū ekou 'ga upe 'ga jewyramū.

¹⁵ Janeruwarete 'ga remifutara 'ara upe iwaēm ire Jejuī 'ga ruri ojewya nū. Janeruwarete 'ga esage ma'ea. Iku'i ma'ea 'ga. 'Ga 'ā 'wyriararetea futat. 'Ga tee Janejararetea futat.

¹⁶ 'Ga etee te namanūi. Okoeteete ma'e 'ga futat. Esage futat 'ga. Nitywi futari mama'e tywera 'ga ree. A'eramū 'ga wenyramū akou. 'Ga renya kwara reny apyraapa. Nitywi futari esage ma'e 'gā 'ga 'jawe. A'eramū itywet ma'e 'gā 'ga rerowyke'ema. Tamuoryp ki 'gā 'ga. 'Ga te 'ā pājērete futat namutat.

¹⁷ 'Awamū je ene moje'egukari ikaraemā kwai ma'e 'gā nupe: "Je te 'ā kūima'eeteetea, pe'je awi", ere ki 'gā nupe. "Anure nipo pēkaraemā teepawamū. A'eramū pēē pejemogyppyke'ema pejekaraemā are. Jarejuwarete 'ga ree te pejemogyppyk. 'Ga te 'ā mama'e amut janee, jane muorypawamū. A'eramū pēē 'ga ree te pejejemogyppyka", ere ki ikaraemā kwai ma'e 'gā nupe.

¹⁸ "Pe'je pejejukau esage 'gā nee", ere ki 'gā nupe. "Mama'e esage peapo pejekou. Pēnakate'em kasi pejejemogyau ne. Mama'e mū ki pemono imama'e'ema 'gā nupe", ere ki 'gā nupe.

¹⁹ "Gā nupe mama'e monoramū, Janeruwarete 'ga mama'e esage muri pē nupe, peu ywag ipe. Mama'e tywera sipo 'ga amut pē nupe? Naani. Mama'e eteetea te nipo 'ga amut pē nupe. Teepap sipo kamēsiete 'ga remimurera? Naani. 'Ga remimurera te enema'e namutamutat", ere ki 'gā nupe. "A'eramū tepeo 'ga pyri pejejemogyau nakwaparimū ete rūi", ere ki ikaraemā kwai ma'e 'gā nupe. "Peu 'ga pyri sipo pēku'i'i'i etee? Naani. Pēku'irete te peu", ere ki 'gā nupe.

²⁰ Timoteo. Ymā te Janeruwarete 'ga ene resagi ene muēma aipo 'gā nui, ene mopowkyaukaa ojeupe. A'eramū ene 'ga je'eg imū etee futat ekou. "Nan iki eapo jee", 'jawerimū etee futar iki ene iapou. Ejepe'a aipo ajamue ma'e 'gā nui. Ajamue ekoete 'gā. Aipoa nia'wyri Janeruwarete 'ga upe. Aipoa kasi ereapo ne.

²¹ “Ore 'ā ore'akwaap 'gā nemimu'e are”, e'i ekoete 'gā. A'ere naani. I'me etee 'gā. Aipo 'jara 'gā opiau etee ywaga piar awi. A'eramū 'gā opoia Jejui 'ga rerowiar awi. Jarejuwarete 'ga resagea ene rerekoa je afutat. Kweramū etee jeremimome'ua.

2 Timoteo

Jejui 'ga mome'u are gā Paulo 'ga munewi moromunepawa pype rakue. Moromunepawa pype akoaw ipe Paulo 'ga ka'arana kwasiaru'japa Timoteo 'ga upe rakue. Jejui 'ga rur enune ojeapo ma'e are 'ga ka'arana kwasiari. 'Agamū Paulo 'ga remikwasiarera mapawera. "Anurenure'i nipo gā je jukai", 'jau 'ga ikwasiaa 'ga upe. Na'ga etee rūi ikwasiaa. Janeruwarete 'ga 'Agesagea ikwasiarukaa 'ga upe. A'eramū 'ga ikwasiaa imonou 'ga upe rakue.

¹ Je Pauloramū ka'arana akwasiaru'jap imonou enee, ki Timoteo. Jejui Kristu 'ga je mono kwe pe ojemome'waukaa gā nupe ikue. 'Uwarete 'ga remifutar imū 'ga je monoi ikue: "Werowiamū Jejui 'ga jane mogyi wemiayuwamū. A'eramū jane 'ga rerowiaaramū jarewau jarejemogyau ywag ipe 'ga pyri jaremanū re, ere ki gā nupe", 'jau 'ga jee ikue, je monou morogyta esage mome'waukaa kwe pe ikue.

² Ene 'ā jera'yra 'jawe jee, ki Timoteo. Jeporomutat je ene ree. A'eramū je ka'arana monou ikwasiaa ene upe.

Ku'jywa 'ga 'ā Janeruwaretea. Jejui Kristu 'ga 'ā Janejararetea. 'Gā nesagea ene rerekoa je afutat, ki Timoteo. Ene ree gā jemuaēma, ene mopy'ata'waa. Mīmera je afutat.

Jarejuwarete 'ga muorypawet

³ "Ene 'ā eneresage, Kiapi'ni", 'jau je Jarejuwarete 'ga upe tekou jepi. 'Ga upe je porowykyi tekou. 'Ga je'eg imū etee je mama'e apoi tekou jepi. 'Ga remifutara kwaapa je aipoa etee iapou jepi. Jepyutuna gā 'ā oporowykyau 'ga upe rakue. A'eramū je nanē tejamyja 'jawerimū futat teporowykyau tekou 'ga upe nū. A'eramū je teje'ega monou Jarejuwarete 'ga upe jepi. "Jeku'i je tekou Timoteo 'ga ree jepi, Kiapi'ni. 'Ga ene rerowiat a'jea futat. A'eramū je teku'iramū tekou 'ga ree", 'jau je 'ga upe teje'ega monou tekou jepi. Au'jeteramū je tekou teje'ega monou 'ga upe ene ree.

⁴ Tejea'aramū tekou ene ree jepi. Ejewi je oramū ako ene eja'wau je ree ikue. "Nae-sagu'jawi nipo je 'ga re'ā", 'jau nipo ene rakue, eja'wau je ree rakue. A'e are je tejea'aramū jepi, enejoo'awer are jepi. Ene pyri jeoweramū numiamū. Ene resaga amunipo 'ā je muoryp kwaiwete ene ree. A'ere je nooarūi ene pyri. Je munep gā je m'yina 'au.

⁵ "Timoteo 'ga Jejui 'ga rerowiaara futat", a'e je te'yina tejeupe tejea'aramū ene ree jepi. Ymā te 'ā enejar'yī ēē Jejui 'ga rerowiaararetea ēē rakue, Loidē ēē rakue. A'ere 'ā eney ēē nanē 'ga rerowiari rakue nū, Eunisi ēē rakue nū. A'eramū ene 'awamū gā 'jawerimū etee futat 'ga rerowiaa.

⁶ A'eramū je a'eramū teje'ega monou ene upe ene mu'akwaapa. Ymā te ako je tepo monoi eneapye'rarimū ikue, ene mogou Jarejuwarete 'ga upe oporowykyi ma'eramū ikue. A'e pe ako 'ga opājē mua enee ikue. A'eramū 'awamū je 'jau ene upe: 'Ga pājē mū etee ki mama'ea eapo. 'Ga pājē mū etee ki eko, a'e je enee.

⁷ Janeruwarete 'ga ako U'agesage amut janee ikue, janererekwaramū ikue. A'eramū 'ga 'Agesagea jane rerekou. A'eramū 'ga 'Agesagea jane mogyjaukare'ema. 'Ga 'Agesagea jane mopota'waukaa gā nee. 'Ga 'Agesagea 'ā jane mu'akwaawukaa mama'e tywera apoe'em are.

⁸ Erejenosī kasi Jarejararete 'ga je'ega mome'u awi gā nupe ne. Je wi nanē ejenosōue'em nū. 'Au je reni moromunepawa pype. Kwe pe ako je oi morogyta esage mome'wau gā nupe ai'i. "Jejui 'ga amanū jane katu'okawamū", 'jau je ako tewau tekou gā nupe imome'wau kwe pe ai'i. A'eramū gā a'eramū je pyyka je mua je munepa je m'yina moromunepawa pype. A'ere kasi erejenosī je wi ne. Ene nanē nipo gā ene rereko tywerete je 'jawe futat nū. A'ere nipo Janeruwarete 'ga opājē muri ene upe, ene momoirukare'ema ojewi.

⁹ Janeruwarete 'ga ako janetywera omoit jane wi ikue. 'Ga ako jane katu'oka ikue. 'Ga te 'ā jane mū'ē werowiare'ema gā nui jane mogyau wemiayuwamū. Najaneremiapo esagefer are rūi 'ga jane mū'ēi' gā nui. Wemifutar imū etee futat 'ga iapoi. Ywy apoe'ēwe 'ga jemuaēmi jane ree rakue. "Jejui Kristu 'ga rerowiaara gā tamū'ē gā nui 'jau kwy, imogyau tejemiayuwamū 'jau kwy. Tapoat gā gā neko esage are 'jau kwy", 'jau 'ga ojeupe mama'e apoe'emawe rakue.

¹⁰ Ymā te 'ā ae nokwaawi futari 'ga remifutara rakue. A'ere jane 'awamū ikwaawi. Jejui Kristu 'ga ruri 'au ywy pe jane mu'jaawamū rakue. A'eramū 'ga 'ā Janekatu'okaramū akou. Janeruwarete 'ga 'ā ae katu'oga afutat. A'eramū 'ga Jejui 'ga mua 'au jane katu'okawamū. "Jejui 'ga ako amanū ai'i" 'ea 'ā jane sikwaap. "Amanū re 'ga ferawi etee nū" 'ea nanē 'ā jane ikwaapa nū. A'eramū jane a'e rerowiaa. A'eramū jane jaremanū re jareferapa etee nū. A'eramū jane jareferaw ire jarewau 'ga pyri jarejemogyau nakwaparimū rūi. Jejui

'ga ferawa kwaaw ire jane jarekyjawe'em jaremanū awi. A'eramū jane 'ga 'jawe futat jareferapa etee jarewau jarejemogyau 'ga pyri nakwaparimū rūi.

¹¹ Janeruwarete 'ga 'ā je monoukat kwe pe Jeju 'ga mome'waukaa 'gā nupe ikue. 'Gā mu'jau je tewau kwe pe morogyta esage are ikue, Jeju 'ga ree ikue.

¹² Ma'eramū 'ā Jeju 'ga rerowiare'ema 'gā je rereko tyweretei. A'etea je 'ā nojejeri futari te'ŷina morogyta esage mome'wau tejepyri 'ut ma'e 'gā nupe. Jeju 'ga ako je arowiat ikue. 'Awamū je 'ga kwaawi katu katu futat tekou. Ÿmā te 'ga 'i jee ikue: "Ekwap je mome'wau kwe pewara 'gā nupe", 'jau 'ga jee ikue. "Eojere'emamū futat ewau je mome'wau ekou", 'jau 'ga jee ikue. A'eramū je tewau 'ga mome'wau 'gā nupe ikue. A'ere natepājē mū rūi je oi 'ga mome'wau 'gā nupe ikue. 'Ga te 'ā pājērete. A'eramū je 'ga pājē mū etee futat 'ga mome'wau 'ga jewyra poromukuran.

¹³ Morogyta esage are ako je ene mu'ei ikue. A'eramū ene emu'eawer imū etee ekou esage. Jereko esagea ako ereesak ikue. A'eramū ene je 'jawe etee futat ekou esage. Erowiar ete futar iki Jeju 'ga ekou. Ejemyka esage ki ekou tekotee 'gā nee. Nan tee jane Jeju 'ga ree ojemujat ma'eramū jane jegyki.

¹⁴ Ÿmā te ako ore morogyta esage mome'ui enee ikue. A'e are etee ki ejea'at ekou. 'Gā 'mea kasi ererowiar ine. Janererekwara 'ā Janeruwarete 'ga 'Agesagea futat. A'eramū janererekwara jane muea'aa 'ga je'eg esage are.

¹⁵ A'ere Asia wyw pewara 'gā opawi je wi rai'i. Kwaiwete 'gā awau je wi jerera renupawe rai'i. Ojenosī 'gā je munepawer awi rai'i. A'eramū 'gā awaupap je wi. Figeru 'ga miamū awau je wi Erogemes 'ga retee.

¹⁶⁻¹⁷ A'ere Onesifuru 'ga nanarūi. Nojenosī 'ga je wi moromunepawa pype je rekoramū. Roma pe owaemawe 'ga 'ua je rekaa. Je resag ire etee nipo 'ga poiri je rekar awi. 'Ga je maku'iu'jau'japa.

¹⁸ Janejararete 'ga nanē nipo ajemuaēma 'ga ree wyw pe ojewya 'ur ire nū. Efesu pe je rekoramū 'ga ako je poari kwaiwete ikue, mama'e apou je pyri ikue. A'ea 'ā erekwaap futat.

2

Jeju Kristu 'ga remiayup

¹ Ene 'ā jera'yra 'jawe jee, ki Timoteo. Janeruwarete 'ga 'ā ojejuka jane ree jepi. Jane 'ā Jeju Kristu 'ga ree ojemujat ma'eramū futat. A'eramū 'ga ruwa 'ga ojejukau esage jane ree jepi. A'eramū ki ene eje'ega monou 'gā nupe ekyjawe'em.

² Je ako amu'e ene ikue, mytuna 'gā nemianuwamū ikue. A'eramū ene 'awamū 'gā mu'jau je 'jawerimū ekou. Ejerowiaawa 'gā etee ki emu'e. A'eramū 'gā ojemu'e re awau 'gā mu'jau nanē kwe pe nū.

³ Jeju Kristu 'ga rerowiaaramū jane jemouagi jarejereko tywera upe. A'eramū ene ejemouaga mama'eay upe.

⁴ Sā'ā jefaruua mama'e apoe'ema wemifutar imū. O'wyriara 'ga remifutar imū etee mama'e apoa ijemogyta. Nan tee jane. Niapoi futari mama'ea jarejemifutar imū. Jarejararete 'ga remifutar imū etee jane mama'e apou jarejemogyau.

⁵ Ÿjān ma'eramū nanē nū. Ijān esage ma'e 'ga upe etee futat 'ā 'gā 'ga jānawera repy monou. Ijān a'wyre'ema 'gā nopyyga'uweri mama'ea. Nan tee futat ene. Enereko esageramū Janeruwarete 'ga enereko esageawera repy muri enee.

⁶ Sā'ā ko pe oporowyky ma'e 'gā oko pypiaara 'ua ajuenune. Nan te 'ā ereporowyky esage Jeju Kristu 'ga upe. A'eramū nipo 'ga anure ojeupe eneporowykyawera mepyau enee.

⁷ Ejea'ar iki ekou jee'eg are. Janejararete 'ga nipo ene mueapyoukat ee.

⁸ Jeju Kristu 'ga ree ki ejea'at. 'Ga manū re Janeruwarete 'ga 'ga moferawi etee nū. A'eramū 'ga amanū'jape'ema futat awau ojewya oje'wyr ipe nū. 'Ga 'ā jane'wyriar ppy 'ga juapyrera, Davi 'ga juapyrera. A'eramū Janeruwarete 'ga Davi 'ga juapyrera moferapa nū, imojeupia imonou ywag ipe nū. Aipoa je amome'u tekou mūmer imū 'gā nupe jepi.

⁹ A'eramū 'gā Jeju 'ga ree morogyta esage mome'u je rekoramū, je ppyka, je pofaa itaju pyu muna'ywa 'jawe je m'ŷina. A'ere je najejeri futari te'ŷina tejepyri 'ut ma'e 'gā nupe imome'wau. Naje momiga'uweri futari 'ga rerowiare'ema 'gā morogyta esage mome'u awi.

¹⁰ Tejemouaga etee te'ŷina tejereko tywera upe. A'eramū nipo 'ga remimū'ēmera 'gā juejue morogyta esage renupa ajemogyau. Werowiar ire Jeju Kristu 'ga 'gā katu'oka jane 'jawe futat. A'eramū 'gā anure awau ajemogyau Jeju 'ga pyri jane 'jawe futat nakwaparimū warāu rūi futat. A'eramū 'ga pājēa 'gā nerekou namutamutat. 'Ga resagea nanē nipo 'gā nerekou nū namutamutat nū.

¹¹ 'Awamū je 'i ene upe:

“Ga remifutar imū jaremanū awi jarekyje'em ire jane oi jarejemogyau 'ga pyri.

12 Mama'eay upe jane jemouagamū nipo 'ga jane mogyi opoaawamū anure 'wyriaramū akou.

Je naJejui 'ga remiayuwa rūi 'jara 'gā nupe nipo 'ga najeremiayuwa rūi 'ga, 'jau.

13 'Ga rerowiar awi nipo jane poiraiwi agawewi.

A'etea 'ga u'eawer imū etee futat nipo mama'ea wapo."

Aipoa jeremimome'ua. A'jea futat je amome'u.

14 Aipoa ki jeremimome'ufera emome'u ejemiayuwa 'gā nupe. Jarejuwarete 'ga je'eg imū je 'i ene upe: "Pejamue kasi 'ga je'ega mome'u are ne", ere ki 'gā nupe, a'e je ene upe. Ee pejamue re nipo pejomomoirukat amū Jejui 'ga rerowiar awi.

15 Eporowyky esage ki Jarejuwarete 'ga upe. Eko esage nanē ki 'ga upe nū. A'eramū 'ga wowase enewaw ipe 'jau ene upe: "Ene 'ā jeremiayuw esagea futat. Ene a'jea futat jeje'ega eremome'u esage ekou. Ene a'jea futat ereporowyky esage jee", 'jau nipo 'ga ene upe, ojeupe ene eporowyky esageramū. 'Ga upe eporowykyau esage 'eramū ene ejenosōue'em 'ga rowase ewaw ipe. 'Ga je'eg are etee ki 'gā emu'e.

16 A'eramū ene ejepe'au ajamue ma'e 'gā nui. Oje'eg tee 'gā mama'e are. Najarejuwarete 'ga je'eg imū rūi 'gā mama'e mome'ui ajemogyau. Oje'eg ekoete te 'gā ajemogyau. Aipoa nia'wyri Janeruwarete 'ga upe. Ajamue ma'e 'gā je'ega renupara 'gā Jarejuwarete 'ga rape awi opia ma'e 'gā te poromū.

17 Sā'ā merua'yra miaro'o mateepawa. Nan tee futat ajamueara 'gā Jejui 'ga rerowiar awi ajamomoirukari futari. Ajamue ma'e 'gā amū nera Imeneu. Ajepeja 'ga Firetu.

18 'Gā ako opoit futat Jejui 'ga rerowiar awi ai'i. Wemimu'efera 'gā nanē 'gā imomoirukaa ja'wyja'wy jui nū. "Ku'jywa 'ga ako amanū ma'efera 'gā weroo ywag ipe ai'i. A'eramū 'ga jane rejaa jane mogyau takyfet katy", 'jau futatee 'gā 'upa o'meramū ajaupe. 'Gā amū 'gā nerowiaa. A'eramū 'gā ojemogypygyu'jape'ema Jarejuwarete 'ga ree.

19 A'ere 'ā jane nanarūi. Jane 'ā nipoiri futari Jejui 'ga rerowiar awi. Sā'ā ae 'oga mŷjeteetea. A'eramū 'ā u'ara'ne'ema. Nan tee jane a'jea futat jane 'ga rerowiari. A'eramū jane jarepaire'ema 'ga je'eg awi. Jane 'ā 'ga remiayuwa. Ymā te Janeruwarete 'ga oje'ega kwasiarukari ka'aran are 'gā amū nupe rakue. "Janejararete 'ga 'ā wemiayuwa okwaap." 'Ga amū nipo 'jau: "Je 'ā Ku'jywa 'ga remiayuwa 'jara 'gā ki topoit futat mama'e tywera apo awi nanē nū", 'jau.

20 Ikaraemā kwai ma'e 'gā kwaiwete 'gā karaemā, 'gā jemi'waawa 'jau. Amumera nipo wesageayramū. Amumera nipo yty yrūnamū. A'eramū ae kūima'eteete 'ga amū ojeupe iwaēmamū y'a esageay pype ojomojemi'waa.

21 Nan tee jane. Mama'e tywera apo awi jarepoir ire janeresagesageramū jarejemogyau Jarejuwarete 'ga upe. A'eramū nipo 'ga 'jau janee: "Pēnesagesage pejemogyau jee. A'eramū pēē 'awamū pejeporowykyarūmū jee. Jeku'i je tekou pē nee", 'jau nipo 'ga janee, mama'e tywera apo awi jane poiramū.

22 Nakanumīūū 'gā amū 'jawe rūi 'ā ereko, ki Timoteo. Ereapo kasi 'gā nemifutara ne. Mama'e tywera etee 'gā 'ā wapo ajemogyau. A'ere kasi ene nanarūi ne. Eko esage ki Jarejuwarete 'ga upe. Jejui Kristu 'ga erowiat ekou. Tekotee 'gā nee ejejukau esage ekou. Eta'waramū ekou 'gā nupe. Iywyter esage ma'e 'gā nipo e'i ajemogyau: "Je poar ape nanuara apou", 'jau nipo 'gā Jarejuwarete 'ga upe jepi. A'eramū ene nanē nanuara apou 'gā 'jawe.

23 Ereko kasi ajamue ma'e 'gā nee ne. Ajamue ma'e 'gā i'akwaawe'ema futat. Ni'akwaawi futari 'gā. A'eramū ene ekowe'em 'gā nee. Oje'egay ma'e 'gā te mīnamū. A'eramū ene ekowe'em 'gā nee. Kasi a'e pe 'gā ene muei ojee ne.

24 Janejararete 'ga remiayuamū jane nanarūi. Nijamuei jane. Janepota'wa esage te jane jarejuee. Sajamu'e esage te jane meewei jarejamueapyou 'ga je'eg are.

25 'Gā amū nipo akou 'gā mu'jau tywet mama'e are. A'eramū ki ere 'gā nupe: Na-Janeruwarete 'ga je'egarūi poa kūi. Eremu'e awi 'gā aipo are, ere ki 'gā nupe. Eje'eg esage etee 'gā nupe. A'eramū Janeruwarete 'ga 'gā momoirukaa 'gā tywer awi, 'gā mojewya, ae mu'jaukaa oje'eg are nū.

26 Mama'eukwaawa 'wyriara nipo 'upa 'gā nee, mama'e a'je'ema apoara 'gā nee, 'gā mogyaukaa wemifutar imū etee. Sā'ā wyra'i rena, isea wukaja pype. A'eramū 'ā ae opoia jui. A'eramū 'ā owewiau awau. Nan tee futat mama'eukwaawa 'wyriara 'gā pygyi, wyra'i 'jawe. A'eramū ene 'awamū 'gā pojekau jui nū, 'gā mu'akwaapa mama'e a'je are etee nū.

3

Mama'eay jesaukarawam

¹ Anure nipo mama'e teepaw enune kwaiwete mama'eay ijesaukari Jejui 'ga rerowiaara 'gā nupe. Ejea'ar iki ekou aipo are.

² A'ea 'ara rupi nipo 'gā tyweramū. 'Auwara 'gā nipo ojee etee futat wea'aramū ajemogyau. Naajuee rūi futat 'gā nea'aramū ajemogyau. Ka'aranū mono'ogara 'gā. Je te 'ā kūima'eteetea 'jara 'gā mīnamū. "Je jeresage", e'i 'gā numiamū. A'ere 'gā nia'wryi ajemogyau, ajakurapara 'gā te ajemogy. 'Uwa 'ga je'ega miamū 'gā nuenuwi futari. Oy ēē je'ega miamū futat 'gā nuenuwi. Aipo 'gā niapyakwafugi futari. Ojeupe mama'e muramū, "au'jete eremut jee", 'jare'emamū ae poromū. A'e 'gā nopojeuwi futari Jarejuwarete 'gā.

³ Nojejuka esagei 'gā ajuee. Najemuaēmi futari 'gā ajuee. Ota'wae'emamū akou ajaupe. Ojoje'ēwu'jagara 'gā mīnamū. Nojemu'akwaawi 'gā mama'e tywera apoe'em are. Kamēšiete futat 'gā amara'ne ekoeteramū akou. Nafutari futari 'gā mama'e esagea. Mama'e tywera etee 'gā afutat.

⁴ Opytuna 'gā miamū futat 'gā omono ijukaukaa tekotee 'gā nupe. Aipo 'gā mama'e tywera etee wapo. "Je jeresagesage", e'i nipo 'gā numiamū. A'ere 'gā nia'wryi ajemogyau. Aipo 'gā ojerowiarip ojee etee. Najarejuwarete 'ga muorypawāu rūi 'gā iapoi. Ojemuorypawamū etee te 'gā iapoi ajemogyau.

⁵ "Je 'ā Jarejuwarete 'ga remiayuwa", e'i 'gā ajemogyau numiamū. A'ere 'gā o'meramū te 'gā 'i ajemogyau. Nuerowiari futari 'gā "Janeruwarete 'ga pājēeteetea" 'ea. A'eramū 'gā mama'e apowe'em Jarejuwarete 'ga pājē mū ajemogyau. Nanuara 'gā nui ki ejepe'a.

⁶⁻⁷ Amumera 'gā nipo kūjā 'akwaawe'ema 'gā nupe o'meramū akou. A'eramū nipo kūjāmera 'gā mama'e tywera apou akou. "Jetywerete je", 'jau ekoete nipo 'gā ojeupe. A'eramū nipo 'gā okyjau 'me Jarejuwarete 'ga wi. "Kīā nipo je rereko tywerete", 'jau ekoete nipo 'gā ojeupe. A'etea nipo 'gā nopoiri futari otywer awi. "Arowiat je kīā je'eg esagea", 'jau nipo 'gā ojeupe numiamū. A'ere nipo naani. Ojemu'e 'me te 'gā ajemogyau 'gā je'eg are. Nuapoi 'gā mama'ea 'ga je'eg imū. A'eramū nipo i'me ma'e 'gā awau osou 'gā 'wyr ipe' 'gā mu'jau o'me are. "Jeje'eg imū etee ekou mama'e apou 'eramū nipo nereoi mama'eukwaawa rapyaw ipe", 'jau nipo 'gā o'meramū awau akou kūjāmera 'gā nupe. A'eramū nipo kūjāmera 'gā aipo 'gā je'ega rerowiaa futat. A'eramū nipo 'gā mama'e a'jea kwaape'ema futat. 'Gā 'mea etee nipo 'gā erowiaa ajemogyau.

⁸⁻⁹ Sā'ā ymā Moisesi 'ga je'ega Jarejuwarete 'ga je'eg imū etee futat rakue, Egitu ywy pewara 'gā 'wryiara 'ga upe rakue. A'ere 'ā peuwara 'gā amū nafutari Moisesi 'ga remimome'ua rakue. Janesi 'ga, Jāmisi 'ga. Mīmera 'gā 'ā ifutare'ema rakue. 'Gā 'jawe futat aipoa i'me ma'e 'gā nafutari mama'e a'jea. A'eramū 'gā u'akwaawe'emamū ajemogyau. Opoit futat 'gā Jeju 'ga rerowiar awi. A'eramū nipo 'gā kamēšiete 'gā 'me kwaapa, 'gā 'akwaawe'ema nanē nū.

Timoteo 'ga mu'akwaapawet

¹⁰ A'ere 'ā ene nanarūi, ki Timoteo. Jeje'eg imū ki eko esage. Jerekoa ako ereesak ikue. A'eramū ene je 'jawerimū futat ekou. Erekwaa futat 'ā je'eawera. "Jeju Kristu 'ga je arowiat" 'ea 'ā erekwaa. Ajejuka esage je 'ā tekotee 'gā nee jepi. Jepota'wa 'ā je tekou 'gā nee jepi. "Tejereko tyweramū miamū 'ā je nopoiri 'ga rerowiar awi te'ŷina" 'ea 'ā erekwaa futat.

¹¹ Jeju 'ga rerowiare'ema 'gā je rereko tywerete ikue. Ātioki pe, Ikoniu pe, Listra pe. Mīmera amunaw ipe je rekoramū 'gā je rereko tyweretei ikue. A'ere Janejararete 'ga naje jukaukari 'gā nupe ikue. Aipoa 'ā erekwaa futat.

¹² Jarejuwarete 'ga remifutar imū jane rekoramū nipo Jeju 'ga rerowiare'ema 'gā jane rereko tyweri futari a'jea futat.

¹³ Jeju 'ga 'awa ywy pe 'ga rut ja'wyja'wryamū taetu nipo i'me ma'e 'gā tywereteramū ajemogyau, mama'e tywera apoara 'gā neewe. A'eramū taetu nipo 'gā ote'areteeteramū ajemogyau mama'e a'wrye'ema apoaramū. Ae mu'jau tyweaete nipo 'gā awau ajemogyau kwe pe. O'meramū ajemogyau 'gā nupe mīmer imū. Ojomorytepu nipo 'gā ojomogyau. Imorytepyrera 'gā nipo ojepyka etee ojeupe i'me ma'efera 'gā nee.

¹⁴ A'ere 'ā ereko esage futat. Emu'jara 'gā je'eg imū etee futat 'ā ereko. A'ea mama'e a'je are etee futat ako ore ene mu'ei ikue. A'eramū ene 'awamū aipoa mama'e rerowiaa etee te ekou.

¹⁵ Enewujawe 'ā ojemu'e Jarejuwarete 'ga je'eg are rakue. A'eramū 'ā ene 'ga je'ega kwaapa katu katu futat. Jarejuwarete 'ga je'eg are jarejemu'e re jane 'ga remifutara kwaawi, "aejekatu'oga Janeruwarete 'ga afutat" 'ea 'ā erekwaa. "Jeju Kristu 'ga werowiar ire, ae katu'ok" 'ea 'ā erekwaa nanē nū.

¹⁶ Ymā te 'ā Janeruwarete 'ga oje'ega kwasiarukari 'gā nupe rakue. 'Ga je'eg are jarejemu'e re jane mama'e a'je kwaawi. 'Ga je'eg are jarejemu'e re jane jarejeapyoramū jaretywer are. A'eramū jane jaretywera reru'arasiga, jarepoia jui. 'Ga je'eg are jarejemu'e re jane 'ga remifutara kwaawi.

¹⁷ Aipoa 'ga je'ega kwaaw ire taetu 'ga remiayuwa 'gā neko esagei 'ga upe. Mama'e esagea etee futat iapou ajemogyau 'ga je'eg imū etee futat. Tekotee 'gā nanē imu'jau ee nū.

4

¹ Morogyta esagea etee ki emome'u ekou 'gā nupe najuejue etee, a'e je enee, ki Timoteo. Jarejuwarete 'ga remianuwamū je 'i enee, Jeju Kristu 'ga remianuwamū nanē je 'i enee nū. Anurenure'i nipo Jeju 'ga ruri ojewya nū, 'wyrarareteramū ae upe. Aipoa 'ara rupi nipo 'ga ae resaka 'ūina. Amanū ma'efera 'gā nanē nū nipo 'ga imū'jāu tywy awi imowywya wowase. Najuejue etee futat nipo 'ga jane resaka 'ūina. A'eramū futat nipo 'ga ae mepyau, ae rekwawera mepyau ae upe. 'Ga rerowiaaramū jane 'ga je'ega renuiw jarejomogyau. A'eramū 'ga jane monou jane mogyau ojepyri. Poromū futat janerepya. 'Ga rerowiare'ema 'gā nuenuwi futari 'ga je'ega ajemogyau. A'eramū nipo 'ga 'gā monoukaa mama'eukwaawa rapyaw ipe. Poromū futat 'gā nepya.

² A'eramū je 'jau enee: Morogyta esagea ki emome'u pāwē pāwē 'gā nupe, a'e je enee. "Werowiaaramū Jeju 'ga ae katu'ogi", ere ki ewau ekou 'gā nupe. "Werowiaara 'gā 'ga weroo ywag ipe ojepyri", ere ki 'gā nupe. "Werowiare'ema 'gā te ajee 'ga omonoukat mama'eukwaawa rapyaw ipe", 'jau ki ene imome'wau 'gā nupe. Aipoa ki emome'u 'gā nupe najuejue etee futat. Ee iporenuwiwet ma'e 'gā nupe, ee iporenuwiwere'ema 'gā nupe nanē nū 'jau. Mama'e tywera apoara 'gā nupe ki ere: "Mama'e tywera apoa nia'wyr Janeruwarete 'ga upe", ere ki 'gā nupe. "Au'je mama'e tywera apo re", ere ki 'gā nupe. "Pejomogy esage ki 'ga upe", ere ki 'gā nupe, efuakaramū. Jarejuwarete 'ga je'eg are 'gā mu'jau ekou. 'Gā amū nipo ikuwaape'ema. A'eramū ene 'gā mueapyou esage ee.

³⁻⁴ Anure nipo 'gā porenuwiwere'emamū 'ga je'eg a'je are. A'eramū nipo 'gā wemifutara etee iapou. Morogyta tee are te nipo 'gā ojemu'jau. A'eramū nipo 'gā morogyta ymaner are moromu'jara 'gā majatykau ojee. Niporenuwiweri 'gā morogyta a'je are.

⁵ A'ere 'ā ene nanarūi, ki Timoteo. E'akwaaw imū ki eata ekou kwe pe. Ejemouag iki ekou ejereko tywera upe, mama'eay upe 'jau. Morogyta esage mome'wara 'ā ene. A'eramū ki ene ewau kwe pe ekou morogyta esage mome'wau 'gā nupe. Ymā te ako Janeruwarete 'ga ene muēmi ene moporowykyaukaa ojeupe ikue. A'eramū ene 'awamū ewau 'ga porowykya etee futat iapou ekou 'ga upe. 'Ga remifutara apou katu katu futat 'ga upe, imateepapa katu katu futat 'ga upe.

⁶ Je naporowykyu'jawi 'awamū. Anurenure'i nipo 'gā nuri je jukau. Owaēm ja'wyja'wy 'gā je jukaawa upe 'awamū.

⁷ Aapopap katu je, nan iki eapo, jee 'jawera. Naetygi'i futari je ape. Jarejuwarete 'ga je'eg imū etee futat ako je oi kwe pe mama'e apou ikue. A'eramū 'gā je rerekou tyweaete agawewi ikue. A'etea je napoiri futari Jeju 'ga rerowiar awi ikue.

⁸ A'eramū nipo 'ga ojepyri je waēmamū Janejararete 'ga 'jau jee: "Je 'ā amuesage ene imogou. A'eramū ene 'awamū ejesagesageramū jee", 'jau nipo 'ga jee 'gā nowase ywag ipe. Wowase ae majatykaaw ipe nipo 'gā aipo 'jau jee. Janejararete 'gā 'ā esagesage futat. Janereko esagea 'ga wesak katu katu futat. 'Ga 'ā jane kwaap. A'eramū nipo 'ga 'jau wemiayuwa 'gā nupe: "Je 'ā akatu'ok pēē, pē muesageu pē mogyau. A'eramū pēē 'awamū pejesagesageramū pejemogyau jee", 'jau nipo 'ga wemiayuwamū jane. Naje upe etee rūi nipo 'ga aipo 'ga 'i. Ojewyra rapesakara 'gā nupe nanē futat 'ga 'i nū: "Ene 'ā eneresagesage jee", 'jau nipo 'ga 'gā nupe. Ojee ipromutat ma'e 'gā nupe juejue futat aipo 'jau.

"Ejor iki kamēšiete", 'ga 'eawet

⁹ Ejor iki je resaka kamēšiete, ki Timoteo. Jeirū 'gā oopap je wi ai'i.

¹⁰ Demas 'ga okaraemā mono'og are etee ea'at. A'eramū 'ga weateeramū je wi. Ajepeja amunaw ipe 'ga oi je wi, Tesarūn ipe 'ga oi je wi. Kresēte 'ga awau Garasi wyw pe. Tito 'ga awau Dalmacia wyw pe.

¹¹⁻¹² Tikiku 'ga te aje je omono Efesu pe ai'i. Luka 'ga etee akou 'au je pyri. A'eramū ene ewau Maku 'ga rekaa. A'eramū ene 'ga rekoa 'ga rerua jee 'au, je poaawamū.

¹³ Pejeju ki jeraity poakuwuua perut jee. Troate pe eajari ai'i, Kapu 'ga rog ipe ai'i. A'eramū pēē erua jee. Teka'arana je afutat te'jina. Wyra pir are ikwasiaripyra taetu je afutat te'jina. A'eramū ki pēē erua jee.

¹⁴ Itaju are oporowyky ma'e 'ga je rereko tywerete ikue, Aresāri 'ga ikue. Anure te nipo Janeruwarete 'ga je repyari.

¹⁵ A'eramū ki ene eja'gwau 'ga wi. Kasi a'e pe 'ga ene rereko tyweretei ne nū. Nafutari 'ga janeporogytaa.

¹⁶ Wyrara 'ga upe 'gā amū je rerur ypyrauwe futat 'gā jepe'apawi je wi ai'i. Nitywi'i futari 'ga amū "nuapoi 'ga mama'e tywera" 'gā nupe 'jara 'ga amū je pyri ai'i. Jeju 'ga rerowiaara

'gã miamũ futat ojepe'aupap je wi. A'ere je nafutari Jarejuwarete 'ga 'gã nereko tywera ee. "Erereko tywet kasi 'gã je rejaawer are ne, Kiapi'ni", a'e je 'ga upe.

¹⁷ A'ere 'ã Janejararete 'ga te 'ga rekoi je pyri. A'eramũ 'ga je jukaukare'ema 'gã nupe. Opãjẽa 'ga amut jee. A'eramũ je tewau morogyta esage mome'waupap judeue'ema 'gã nupe kwe pe ikue. A'eramũ 'gã kwaiwete je rerekou tyweaete ikue. "Siesak 'ga paira Jejui 'ga mome'u awi 'jau", 'jau 'gã ajaupe ikue numiamũ.

¹⁸ A'ere nipo Janejararete 'ga je a'gui 'gã nui. Anure nipo 'ga je rerawau peu ojepyri, ywag ipe. A'eramũ 'gã je pyyke'ema futat. Ma'eramũ 'ã jane 'i 'ga upe: "Ene 'ã pãjẽreteretea. Ene 'ã eneresagesage", jane 'i Jarejararete 'ga upe jepi. Namutamutar iki sa'e 'ga upe jarejemogyau.

¹⁹ "Jarujete te pãẽ? e'i Paulo 'ga pẽ nupe ai'i", ere ki jarepytuna 'gã nupe. Prisira ãẽ, Akira 'ga, Onesifuru 'ga pytuna 'gã. Mĩmera 'gã nupe je teje'ega monoi 'gã futaa.

²⁰ Erasto 'ga opyta Korĩtu pe ikue. Trofimũ 'ga ojero'wu. A'eramũ je 'ga rejaa Miretu 'jaw ipe ikue.

²¹ Kamẽsĩete ejoriweramũ ejua kamẽsĩete je resaka. 'Ara ro'ysagũũ renunewe ki ejot je resaka.

Janerewirera 'gã, Jejui 'ga rerowiaara 'gã juejue oje'ega monou enee, ene futaa. Eupuru 'ga, Prutẽti 'ga, Lino 'ga, Krautiu 'ga, tekotee 'gã nanẽ nũ. Mĩmera 'gã oje'ega monou enee, ene futaa.

²² Afutat je Jarejararete 'ga rekoa ene pyri, ki Timoteo. 'Ga resagea pẽ nerekoa nanẽ je ifutaa nũ.

Kweramũ etee jeremimome'ua.

Tito

Tito 'ga nanē Paulo 'ga remimu'efera nū. A'eramū Paulo 'ga ka'arana kwasiaa imonou 'ga upe rakue. Ypō'ō me Tito 'ga rekoramū Paulo 'ga ka'arana kwasiari 'ga mu'akwaapawamū mama'e are. Na'ga etee rūi ikwasiaa. Janeruwarete 'ga 'Agesagea ikwasiarukaa 'ga upe rakue. A'eramū 'ga ikwasiaa imonou 'ga upe rakue.

¹ Je Pauloramū ka'arana akwasiat imonou enee, ki Tito. Janeruwarete 'ga remiaiyuwa je. Jejui Kristu 'ga je mono kwe pe oje'ega mome'waukaa 'gā nupe ikue. Ymā te ako 'ga jemuēmi werowiare'ema 'gā nui ikue, je mogou omome'waramū 'gā nupe ikue. Jarejuwarete 'ga remimū'ēmera 'gā nupe omome'waramū ako 'ga je mogoi ikue. “Emu'e 'gā je ree, je rerowiar ywyapiukaa 'gā nupe”, 'jau Jejui 'ga jee ikue. “Jeje'ega a'jea futat. A'eramū ene jeje'eg a'je are etee 'gā mu'jau”, 'jau 'ga jee ikue.

² A'jea futat Janeruwarete 'ga je'ega. Ni'mea'uweri 'ga. A'eramū jane a'jea futat 'ga rerowiaa. Ymā te 'ā Janeruwarete 'ga 'i rakue, ywy apo'e'mauwe rakue: “Teja'yra 'ga rerowiaaramū je 'au futat 'gā muri 'gā mogyau tejepyri nakwaparimū warāu rūi”, 'jau 'ga ojeupe rakue. Aipo 'ea jane 'ā sirowiat jarejemogyau.

³ Ymā te 'ga aipo 'jau rakue. A'ere 'ga 'awamū je monoi wemifutara 'ara rupi imome'waukaa jee: “Wa'yra 'ga rerowiarāmū 'ga ae katu'ogukari wa'yra 'ga upe. A'eramū nipo 'ga ikatu'ogipyrrera 'gā nerawaukaa oje'wyr ipe”, 'jau je 'ā tekou imome'wau. Janeruwarete 'ga ae katu'okararetea. 'Ga futat je monou aipo mome'waukaa pāwē pāwē 'gā nupe. A'eramū je 'ga je'eg imū etee futat tewau imome'wau kwe pe 'gā nupe ikue.

⁴ Ene upe je ka'arana kwasiari, ki Tito. Jejui Kristu 'ga 'ā jane sirowiat. A'eramū ene jera'yra 'jawe ekou jee. Ku'jywa 'ga 'ā Janeruwaretea futat. 'Ga ra'yra 'ga 'ā, Jejui 'ga ae katu'okara. 'Gā nesagea ene rerekoa je afutat, ki Tito. Ene mopy'ata'waa nanē je afutat nū.

Kreta pype Tito 'ga reko

⁵ Peu jarekou ako jane jareporowykya nimateepawi ai'i. A'eramū ako je ene momytau 'ypō'ōūi pype ai'i, jareporowyky mateepaawamū ako je ene momytau peu ai'i. “Au etee eko ra'ne. Nimateepawi we jane jareporowykya, 'au Kreta pe”, 'jau ako je enee ai'i. “A'eramū ene ewau kwe pe amunawa moyka 'ga amū ene imogou 'wyrriaramū Jejui 'ga rerowiaara 'gā nupe”, 'jau je ako enee ai'i. A'eramū ki ene, 'ga amū mogo enune, ejea'aramū jeje'eg are. “Ako esage ma'e 'ga etee futat ene imogou 'wyrriaramū 'gā nupe”, 'jau ako je enee ikue. A'eramū je 'awamū imonou'japa ikwasiaa ka'aran are enee aipo 'jau etee futat nū.

⁶ “Nia'wyrri 'ga”, 'ga upe 'gā 'eramū kasi eremogo 'ga 'wyrriaramū 'gā nupe ne. Ako esage ma'e 'ga etee futar iki emono imogou 'wyrriaramū 'gā nupe. Aipo 'ga remirekoa ki majepe'i etee futat. 'Ga ra'yra 'gā nanē ki Jejui 'ga tuerowiat nū. A'eramū ki 'ga ra'yra 'gā ojeupe 'ga je'egamū 'ga je'ega renupa etee. A'e 'gā naerofeni futari. Nitywi futari nipo 'ga amū erofen ma'eramū: Erofen 'ga ra'yra 'gā 'jara 'ga amū nipo nitywi futari.

⁷ Jejui 'ga rerowiaara 'gā 'wyrriara 'gā Janeruwarete 'ga porowyky rerekwara futat. A'eramū 'gā a'eramū namama'e tywera apoara rūi futat. Ojee ojerowiaaip ma'e 'gā kasi eremono 'gā nupe ne. Imara'ne ma'e 'gā kasi eremogo 'gā nupe ne. Kawīajaiwa 'wara 'gā nanē ene imogowe'em nū. Ajanupāara 'gā, ka'aranūi mono'og are etee ea'at ma'e 'gā. Mīmera 'gā nanē kasi eremogo 'gā nupe 'wyrriaramū ne.

⁸ Oje'wyr ipe 'gā mo'wy'wyrri 'gā, mama'ea ajaupe imonoara 'gā. Mama'e esage apoara 'gā. Mama'e tywera apo awi ojemu'akwaap ma'e 'gā. Janeruwarete 'ga remifutara apoara 'gā. Mīmera 'gā etee ki emogo 'wyrriaramū 'gā nupe.

⁹ Janeruwarete 'ga je'ega a'jea futat. A'eramū 'gā 'wyrriara 'gā Janeruwarete 'ga je'eg imū etee futat ajemogyau mama'e apou. Jejui 'ga je'ega nanē a'jea futat nū. A'eramū ki 'wyrriara 'gā 'gā je'eg imū etee futat 'gā mu'jau, Jejui 'ga rerowiaara 'gā mu'jau. A'eramū 'gā a'jea futat ojemogypyka Jejui 'ga ree, 'ga je'ega kwaaw ire. A'eramū nipo 'gā aku'iramū akou 'ga ree. A'eramū 'gā 'ga rerowiar awi opoire'ema futat. 'Gā amū te nipo ajee 'ut 'gā mu'jau tywet morogyta are. Namu'ei 'gā 'gā mama'e a'je are. A'eramū ki 'wyrriara 'ga toje'eg 'gā nupe: Neremu'earūi 'gā mama'e a'je are. A'eramū ene 'gā mu'jawarūe'em, te'i ki 'ga 'ga upe. A'eramū nipo 'ga aipoa ojeupe 'ga 'eramū maran gatu opoire'ema otywer awi.

¹⁰ Kwaiwete 'gā Jejui 'ga rerowiar rakue nuiamū. A'ere 'gā 'ga rerowiaraiwi etee. 'Awamū 'gā nuenuwi futari Jejui 'ga je'ega. Nopoiri futari 'gā janyepy remimome'ufer awi. Morogyta ymaner are etee futat 'gā 'gā mu'ei ajemogyau. Ymā te janyepy jemogyi Moisesi 'ga je'eger imū etee futat rakue. A'ere jane 'awamū jane jemogyi Jejui 'ga je'eg imū etee futat. A'ere 'gā amū 'i 'gā nupe: “Naani. Peapo awi nanuara. Moisesi 'ga je'eg imū etee futar iki peko”, 'jau futatee 'gā 'gā nupe 'gā moryteeu.

¹¹ A'eramū ene 'jau 'gā nupe: “Peapo awi nanuara”, ere ki 'gā nupe. “Au'je 'gā mu'e re morogyta ymaner are”, ere ki 'gā nupe 'gā momika. Kasi a'e pe 'gā 'gā moryteei, 'gā pytuna 'gā neewe ne. A'eramū enuparera 'gā 'jau ajaupe ne: “Awŷja sipo morogyta a'je omome'u janee?” 'jau 'gā ajaupe ne. “I'me nipo 'ā Paulo 'ga akou janee”, 'jau 'gā ajaupe ne. Nokwaawi 'gā morogyta a'je mome'wara 'ga. “Mō 'ga gatu nipo morogyta a'jea omome'u akou janee?” 'jau 'gā ajaupe ne. A'eramū 'gā amū opoia Jejui 'ga rerowiar awi ne. Najemuaēmi morogyta 'me mome'wara 'gā ajuee. Ka'aranūū are etee te 'gā jemuaēmi. Ka'aranūū mono'og are etee te 'gā jamu'ei. A'eramū ene 'gā momika esaka nanuar awi.

¹² Ymā te Kreta pewara 'ga amū, ipojeuwipyra 'ga amū, opytuna 'gā mome'wau rakue. “Ypō'ōū pypewara 'gā najuejue etee futat i'me ma'ea. Imara'ne ma'e 'gā nanē nū. Iwewue ma'e 'gā nanē nū. Nipy'araypari agawewi 'gā. A'etea 'gā ojemi'waruuarete futat”, 'jau 'ga opytuna 'gā mome'wau rakue.

¹³ A'jea futat 'ga remimome'ufera. Peuwara 'gā nia'wryi futari. A'eramū ki ene 'jau 'gā nupe: “Au'je mama'e tywera apo re. Pepoit pejetywer awi”, ere ki 'gā nupe eje'ega moywrafena'i futat. A'eramū nipo 'gā aipo ojeupe 'eramū opoia otywer awi. A'eramū nipo 'gā Jejui 'ga rerowiaa ete nū.

¹⁴ “Peapyaka kasi morogyta ymaner are”, ere ki 'gā nupe. “Peapyaka awi Jejui 'ga rerowiar awi opoit ma'e 'gā je'eg are ne”, ere ki 'gā nupe. “Au'je pejeapyaka re 'gā 'me are”, ere ki 'gā nupe. A'eramū nipo 'gā 'gā 'me rerowiaru'jape'ema.

¹⁵ Esage ma'e 'gā nipo ea'at mama'e esage are etee futat. A'ere nipo ia'wyre'ema 'gā mama'e tywer are etee 'gā nea'aramū. 'Gā Janeruwarete 'ga rerowiare'ema. A'eramū 'gā mama'e tywer are etee wea'aramū ajemogyau. Ymā 'gā 'ā mama'e esage apo kwaawi futari rakue. A'ere 'gā mama'e tywera etee iapoi. 'Awamū 'gā nokwaawu'jawi futari mama'e esage apoa. Apokwaap 'gā mama'e tywera apoa.

¹⁶ “Jarejuwarete 'ga je akwaap”, 'jau futatee nipo 'gā. A'ere naani. Nuenuwi futari 'gā Jarejuwarete 'ga je'ega. A'eramū 'gā na'ga remiayuwa rūi. Imara'ne ma'e 'gā. A'eramū 'gā mama'e esage apowarū'em futat. A'eramū 'gā a'eramū a'je'em are etee ajamu'jau.

2

Jarejuwarete 'ga remifutar are ki emu'e 'gā

¹ A'ere 'ā ene nanarūi, ki Tito. Jarejuwarete 'ga je'eg are etee futat 'ā ene 'gā mu'jau, Jejui 'ga rerowiaara 'gā mu'jau. Janeruwarete 'ga je'ega a'jea futat. A'eramū ene a'e are etee futat 'ā 'gā mu'jau. “Janeruwarete 'ga je'ega a'jea futat. A'eramū ki pēē 'ga je'eg imū etee futat pejejemogyau esage”, 'jau ki ene 'gā nupe.

² Ene 'ā 'gā nupe oje'eg ma'eramū. 'Gā 'ā Jejui 'ga rerowiaar yaua. 'Awamue te 'ā 'gā Jejui 'ga rerowiarai'i. Nokwaawi we 'ā 'gā Jarejuwarete 'ga je'ega. A'eramū ene 'gā mu'jau Jarejuwarete 'ga remifutar are. Sawa'efera 'gā we futar iki emu'akwaap aipo are. “Kawīajaiwa kasi pe'u ne”, ere ki 'gā nupe. “Pejemuarū ki pejewau pejeporogytau 'gā nupe. Nakunumī arūi pēē. Sawa'ea pēē. A'eramū pēē pejejemuaawapia futat pejeporogytau 'gā nupe”, 'jau ki ene 'gā nupe. “Pejemu'akwaaw iki pejejemogyau mama'e tywera apo awi. Perowiar iki Jejui 'ga”, ere ki 'gā nupe. “Pejejuka esage ki pejejemogyau Jejui 'ga rerowiaara 'gā nee”, ere ki sawa'efera 'gā nupe. “Mama'e tywera pejejeupe ijesaokaramū kasi pepoit Jejui 'ga rerowiar awi ne”, ere ki sawa'efera 'gā nupe.

³ Wāiwīmera 'gā nanē ki emu'akwaap ee nū: “Pe'je pejejemogyau esage Jarejuwarete 'ga remifutar imū etee. Pejuago'o kasi ne. Pejekawīajaiwa 'wawe'ema nanē pejejemogyau. Mama'e esagea etee ki peapo 'ga upe. A'eramū ipyaufera kūjā 'gā ojemu'jau ajemogyau pē nee mama'e esage pēē iaporamū”, ere ki wāiwīmera 'gā nupe.

⁴ “Pēē futat ipyaufera 'gā pemu'e mama'e are. Pejejuka esage ki pejemen are, pejeja'yr are nanē nū, pe'je ki ipyaufera 'gā nupe”, ere ki wāiwīmera 'gā nupe.

⁵ “Pejemu'akwaaw iki mama'e tywera apo awi. Peko kasi pejejomena ne. Pejeje'wrya mogatyrū are etee pejejemogyau pejeporowykyau. Pejemen a je'ega renupa etee. Nan pejemogyramū nipo wā 'i pē nupe: Janeruwarete kiā je'ega esage futat ra'e, te'i wā pēneko esage resaka 'jau, pe'je ki ipyaufera 'gā nupe”, ere ki wāiwīmera 'gā nupe.

⁶ Kunumūū 'gā nanē ki emu'akwaap nū. “Pejemu'akwaap pejejemogyau mama'e tywera apoe'em are”, ere ki 'gā nupe.

⁷ Ene futar iki ejeko esagea eesaukat 'gā nupe, ki Tito. A'eramū 'gā ene ree futat ojemu'jau. Ene resaka 'gā ene 'jawe etee futat tajemogy 'jau. Ejemuarūmū ekou 'gā mu'jau. Morogyta esage are 'gā mu'jau ki eporogytau esage etee ekou. Ejemuawapia futat eporogytau 'gā nupe.

⁸ Morogyta a'je are etee futat ene 'gā mu'jau. A'jeteetewi ene imome'uramū tekotee 'gā najane ago'oa'uweri. A'eramū nipo jane ago'oarera 'gā ojenosōu ajemogyau ene wi mama'e esage ojeupe ene imome'uramū.

⁹ Ajaupe oporowyky ma'e 'gā nupe nanē ki ere: "Peenuw etee ki pejejerekwara 'gā je'ega. Pejeporowykyau esage 'gā nupe, 'gā nemifutar imū", ere ki 'gā nupe. "Mama'ea eapo jee ejeupe 'gā'eramū ki najefuweri je ee nū'ū", ere kasi 'gā upe ne.

¹⁰ "Peje'wyrriara 'gā karaemā rerawawe'em nanē pejejeupe nū", ere ki 'gā nupe. "Pejejuka esage etee ki pejejara 'gā karaemā are. A'eramū 'ga, 'esagesage je upe oporowyky ma'e 'ga, 'jau pē nupe. Namuna'ywa rūi 'ga. Jeremiayuw esage 'ga te', 'jau nipo 'gā ojerowiaa pē nee. Pēporowyky esage resag ire, 'Jejui 'ga rerowiaara 'ga. A'eramū 'ga oporowykyau esage jee', 'jau nipo 'gā ojerowiaa pē nee. 'A'jea futat Janeruwarete 'ga je'ega. 'Ga 'ā 'gā katu'oka futat. A'eramū 'gā natekotee 'gā 'jawe rūi', 'jau nipo 'ga ojeupe, jane katu'okara 'ga ree wea'aramū", 'jau ki ene 'gā nupe.

¹¹ Ymā te Janeruwarete 'ga 'i ojeupe rakue: "Jeporomutamutat je wyy pewara 'gā nee. A'eramū je teporokatu'ogiwaramū 'gā nee", 'jau 'ga 'ā ojeupe rakue. "'Gā katu'og ire 'gā tarut imogyau 'au tejepyri 'jau kwy", 'jau 'ga ojeupe rakue. A'eramū 'ga wa'yra 'ga mua 'au wyy pe jane katu'ogukaa 'ga upe.

¹² "Jera'yra 'ga amanū pē katu'okawamū. A'eramū pēē 'awamū 'ga rerowiaa. 'Ga rerowiar ire pejejemogyawe'em 'ga rerowiare'ema 'gā 'jawe. A'eramū pēē 'ga rerowiare'ema 'gā nemifutara apowe'em. Pejemu'akwaap pejejemogyau pejejetee mama'e tywera apoe'em are. Pejemogy esage etee. Jeje'eg imū etee pejejemogyau mama'e apou", 'jau Janeruwarete 'ga janee rakue, jane mu'jau jane jemogy esage are rakue.

¹³ Janeruwarete 'ga pājēeteetea futat tekotee 'gā pājē apyraapa. Anure nipo 'ga Jejui Kristu 'ga mojewya 'ga mua wyy pe nū, jane katu'okara 'ga mojewya nū. 'Ga rura rapesaka jarejemogyau. A'eramū jane 'ga jewyramū nipo jareku'iramū 'ga ree jarejemogyau. "Nitywi 'ga amū 'ga resage 'jawe", 'jau nipo jane 'ga upe. "Nitywi pājērete 'ga amū 'ga 'jawewara", 'jau nipo jane Jejui 'ga resaka, 'ga renyfuga 'ga ruramū.

¹⁴ Jejui Kristu 'ga 'ā poromū ojejukaukat 'gā nupe ae katu'okawamū rakue. Amanū 'ga janetywera mepyyau rakue. Janetywera moiawamū 'ga manūi janee rakue. Amanūmū 'ga jane pireita janetywer awi rakue. Amanū 'ga wemiayuwamū jane muawamū ojeupe rakue. Mama'e esage apoaramū jane jemogy 'ga afutat. A'eramū 'ga amanūmū jane mogyau mama'e esage apoaramū.

¹⁵ Jejui 'ga rerowiaara 'gā emu'e aipo are, ki Tito. Mama'e esagea etee ki eapoukat 'gā nupe. Mama'e tywera 'ga amū iaporamū ki ere 'ga upe: "Aipoa nia'wyrri Janeruwarete 'ga upe. Peapo awi nanuara", ere ki 'ga upe. Jarejuwarete 'ga je'eg imū etee ene rekoramū 'gā ene ago'wawarū'em.

3

Mama'e esage apo are ki emu'e 'gā

¹ Emuea'ar iki Jejui 'ga rerowiaara 'gā jeje'eg are. "Peenuw iki 'wyrriarete 'ga je'ega", ere ki 'gā nupe. "'Wyrriari 'ga je'ega nanē ki peenup nū. Mama'e esagea eapo jee ejeupe 'ga'eramū iapou etee futat 'ga upe", ere ki 'gā nupe.

² "Peago'o nanē kasi 'gā amū pejejemogyau ne. Pejemara'ne'emamū nanē pejejemogyau. Pejejujukau esage nanē pejejeue najuejue etee nū. Pejeta'waramū pejejemogyau 'gā nupe najuejue etee", ere ki 'gā nupe.

³ Ymā te ako jane Jejui 'ga rerowiaare'ema 'gā 'jawe etee futat jane jemogyi ikue. Jejui 'ga rerowiare'ema janetywereteramū jarejemogyau. Jare'akwaawe'emamū ako jarejemogyau ikue. Nianuwi futari ako jane 'gā amū je'ega ikue. Jarejuwarete 'ga je'ega miamū ako jane lanupe'ema ikue. Jarejemifutar imū etee futat ako jarewau mama'e apou ikue. Jarejee etee ako jarejea'aramū ikue. Jarejeupi etee futat ako jarewau jarejemaku'iu ikue. Jaremaran'eramū ako jarejemogyau 'gā nee ikue. 'Gā nanē ako amara'neramū jane ree ikue nū. 'Ga karaemā resakawe ako jane 'jau jarejeupe ikue: "Maran aje je jēmī najetywi nanuara pyu 'ū?" 'jau ako jane jarejemogyau jarejeupe ikue.

⁴ A'ere ako Janeruwarete 'ga 'awamū 'ga jekwaawukari janee ai'i. Janeruwarete 'ga 'ā jane katu'okaretea. Esagesage te 'ga. Iporomutat te 'ga jane ree najuejue etee.

⁵⁻⁶ Ajemuaēm te 'ga jane ree. Najaneremiapofer esage are rūi futat 'ga jane katu'ogi rakue. Ajemuaēm te 'ga ae ree. A'eramū 'ga a'eramū jane katu'oka. Werowiarāmū Jejui 'ga jane katu'ogi jane pireita janetywer awi. Sā'ā ae u'ar yau ma'eramū mama'e tywera apoe'ema. Nan tee futat jane jemogyi 'ga rerowiar ire, 'ga jarepirei re. A'eramū jane u'ar yau ma'e 'jawe jarejemogyau 'ga rerowiar ire 'ga upe. Jarey awi jare'aa ppy jane jarejuwa 'ga ra'yra futat. A'ere jane Jejui 'ga rerowiar ire u'aru'jap ma'e 'jawe nū. A'eramū futat Jarejuwarete

'ga ra'yramū jarejemogyau. Wa'yrarete 'ga rerowiaaramū 'ga jane mogyau wa'yramū. 'Ga 'Agesagea jane mogyau 'ga ra'yramū 'ga upe. 'Awamū 'ga U'agesagea mua janee. Nakate'emi futari Janeruwarete 'ga janee. Mama'e esage te 'ga amut janee. U'agesagea miamū futat 'ga amut janee, Jeju Kristu 'ga jane pirei re. Meewei a'eramū miamū 'ga 'Agesagea jane monoi jane katu'oka jane rerekou.

⁷ Janeruwarete 'ga iporomutat nanimenime jane ree. Ipota'wa 'ga akou janee. A'eramū 'ga jane katu'ogukaa Jeju 'ga upe. Jarekatu'og ire jarejemogyau iky'ae'ema 'jawe futat 'ga upe. A'eramū nipo 'ga 'jau janee: “Pêê 'ā pēnesage jee. A'eramū nipo je anure pē mua 'au tejepyri pē mogyau nakwaparimū warāu rūi futat”, 'jau nipo 'ga janee. A'eramū jane 'ga pyri jareo rapesaka jarejemogyau.

⁸ A'jea futat jeremimome'ua.

A'eramū ene Jeju 'ga rerowiaara 'gā mu'jau najuejue etee futat aipo are. A'eramū 'gā mama'e esagea etee iapou ajemogyau. Mama'e esagea etee iapo re nipo 'gā jopoari ajemogyau.

⁹ Amumera 'gā Jarejuwarete 'ga je'eg are ajamueara te. A'ere kasi 'gā ereje'egauwar ine. Opytunera 'gā je'eger are 'gā jamuei. Moisesi 'ga remikwasiarer are nanē 'gā ajamueu nū. Ajamue ekoete futat 'gā ajemogyau. A'eramū ene 'ga je'eg are eapyakawe'em.

¹⁰ Amumera 'gā nipo Jeju 'ga rerowiaat 'mea te. 'Gā nipo ajamu'jau mama'e amutee are. “Simojo'ok 'gā ajai jarejee 'jau”, e'i te nipo aipo 'gā. A'eramū ki ene eje'ega moywrafena nanuara 'gā nupe, 'gā momika nanuar awi: “Au'je 'gā mu'e re mama'e tywer are”, ere ki 'gā nupe. 'Gā pige'emamū, eje'ega moywrafenu'japa 'gā nupe nū. Mukūi etee eje'ega moywrafena esaka 'gā nupe. Jui 'gā pige'emamū ekou'jape'ema 'gā nee.

¹¹ Aipo 'gā nia'wuri futari. Opoit futat 'gā mama'e esage apo awi. 'Ga nemiapofet tywera resag ire ene 'gā kwaapa. “Nia'wuri futari 'gā na'e”, 'jau ki ene 'gā jekatu'oge'emamū.

¹² Anurenure'i te nipo aje je kūima'e 'ga amū monoi peu ene py'rau. Maranamū nipo Artemas 'ga. Maranamū te nipo Tikiku 'ga. Nakwaawi katu we je tejemimonorama 'ga. A'eramū ki ene ejeupe 'ga waēm ire ekwapa kamēsīete ajepeja amunaw ipe, Nikopo 'jaw ipe je rekoa. Peu futat nipo je oi amana magwapa aipo amunaw ipe.

¹³ Janepytuna 'gā amū nipo awau watau ene wī. A'eramū ene mama'e mū monou 'gā nupe 'gā nemirerooramū. Ajepeja 'ga rera Zena. Moisesi 'ga remikwasiarer are moromu'jara 'ga, Zena 'ga. Ajepeja 'ga rera Aporua.

¹⁴ Jarepytuna 'gā ki emu'e jarejemogy esage are. “Mama'e esagea peapo pejejemogyau”, 'jau ki ene 'gā nupe. “Pejekaraemā ki pemono amū ikaraemāe'ema 'gā nupe”, ere ki 'gā nupe. “A'ere kasi pemono amū iwewue ma'e 'gā nupe. Kasi a'e pe taetu 'gā wewue jerani etee 'gā nee ne”, ere ki 'gā nupe.

¹⁵ 'Auwara 'gā, je pyriwara 'gā, oje'ega monou enee, ene futaa. Je nanē teje'ega monou enee nū. A'eramū ki ene oreje'ega mome'wau orejekoty'aawa 'gā nupe, Jeju 'ga rerowiaara 'gā nupe.

Jarejuwarete 'ga resagea ene rerekoa je afutat.

Kweramū etee jeremimome'ua.

Firemō

Ymā te 'gā jamuri wemifajamū rakue. A'eramū imuripyrrera 'ga oporowykyau akou amuarera 'ga upe. A'ere 'ga muarera 'ga nomepyi 'ga. 'Ga mojemī'waa etee, 'ga muaityau etee nanē nū. Amumē imuripyrrera 'ga amū oka'jama amuarera 'ga wi. A'eramū 'ga muarera 'ga oje'ega monou kwe pe 'gā nupe: "Jeremifaja 'ga oka'jam je wi. 'Ga resaka ki pepyyk 'ga jee, 'ga mua imojewya jee nū", 'jau 'ga oje'ega monou kwe pe 'gā nupe. A'eramū 'ga resakara 'gā 'ga ppyka, 'ga monou imojewya 'ga muarera 'ga upe nū. A'eramū nipo 'ga waēm ire, 'ga muarera 'ga 'ga rerekou tyweaete, 'ga nupānupāu, 'ga jukawaipa.

A'eramū Paulo 'ga ka'arana kwasiaa imonou Firemō 'ga upe. Firemō 'ga remifaja 'ga oka'jam 'ga wi rakue. Oka'jam ma'e 'ga rera Onesimu. Oka'jam ire Onesimu 'ga awau owaēma Paulo 'ga pyri. A'eramū Paulo 'ga Jejuī 'ga mome'wau 'ga upe. A'e renupawe 'ga Jejuī 'ga rerowiaaramū akou. A'eramū Paulo 'ga 'ga monou imojewya 'ga muarera 'ga upe. 'Ga futat koa ka'arana ikwasiaripyrrera weroo ojara 'ga upe rakue.

1-2 Je Pauloramū ka'arana akwasiat imonou enee, ki Firemō. Timoteo 'ga ako je pyri. 'Ga 'ā janerewirera. A'eramū je ka'arana kwasiaa imonou ene upe. Ene 'ā orejekoty'aawa futat. Ene nanē 'ā ereporowyky ore 'jawe, Jejuī 'ga mome'wau ore pyri. Eneroga pype Jejuī 'ga rerowiaara 'gā ajatykau awau 'ga muorypa. A'eramū ore 'gā nupe nanē ka'arana kwasiaa imonou nū. Jarejenyra ēē upe, Afia ēē upe, nanē ore imonou nū. Akipu 'ga upe, jarejepyri oporowyky ma'e 'ga upe nanē ore imonou nū. Akipu 'ga nanē 'ā jane 'jawe futat ako ojemouaga oporowykyau. Mīmera 'gā nupe ore ka'arana monoi ikwasiaa.

Je 'ā a'yi moromunepawa pype. Kwe pe ako je oi Jejuī 'ga mome'wau ikue amunawa moyka ikue. A'eramū 'wyriara 'ga je pyygukaa 'gā nupe, je m'ina je munewukaa moromunepawa pype. A'eramū je ka'arana etee imonou ikwasiaa pē nupe.

³ Ku'jywa 'ga Janeruwaretea. Janejararete 'ga Jejuī Kristua. 'Gā nesagea pē nerekoa je afutat. 'Gā pē mopy'ata'waa nanē je ifutaa nū.

Firemō 'ga

⁴ Jarejuwarete 'ga upe teje'egawe je teje'ega monou 'ga upe ene ree jepi. "Esage Firemō 'ga ene rerowiaara", 'jau je 'ga upe ene ree jepi.

⁵ Tekotee 'gā ene mome'wau jee jepi. "Firemō 'ga iporomutat Jejuī 'ga rerowiaara 'gā nee. Ipota'wa te 'ga 'gā nee", 'jau 'gā jee jepi. "'Ga 'ā Jarejararete 'ga, Jejuī 'ga werowiat a'jea futat" 'jau 'gā jee jepi, ene mome'wau jepi.

⁶ A'eramū je 'jau Jarejuwarete 'ga upe ene ree jepi: "Taeapyo ki 'ga a'jea futat mama'e esagea ojeupe ene iapo are. Kristu 'ga ree ojemujat ma'eramū ene mama'e esage etee iapou ekou ore. A'eramū ki ene 'ga mueapyoukaa ee", 'jau je teje'ega monou 'ga upe ene ree jepi.

⁷ Jarejuwarete 'ga ree eporomutaramū nanimenime ekou. 'Ga remiayawa 'gā nee nanē eporomutaramū nū. Aipoa je maku'iu. Jarejuwarete 'ga remiayuwamū ore araku'iramū ene ree najuejue etee. A'eramū a'ea taetu je mafuewerukaa jeporowyky are Jarejuwarete 'ga upe.

Onesimu 'ga

⁸⁻¹⁰ Awamū je Onesimu 'ga mome'ui enee. Eneremifajamū futat 'ga. Eneremimurera futat 'ga. A'ere 'ga eneje'ega nuenuwi tee rakue. A'eramū 'ga 'ā oka'jama ene wi rakue. A'eramū 'ga 'ua owaēma jee 'au ai'i, Roma pe ai'i. Moromunepawa pype jerenaw ipe 'ga 'ua owaēma jee. A'eramū je tejeupe 'ga waēmamū Jejuī 'ga mome'wau 'ga upe. A'eramū 'ga 'ga rerowiaa ai'i. A'eramū 'ga 'awamū akou 'ga remiayuwamū. A'eramū je Jejuī 'ga ree 'ga mu'e re 'ga ruwa 'jawe te'ina 'ga upe. A'ere je 'awamū 'ga monoi imojewya ene upe nū.

A'eramū je 'awamū 'jau ene upe: Je 'ā Jejuī 'ga remimonofera futat. 'Ga je'eg imū etee futat ako je tewau 'ga mome'wau ikue. A'eramū je 'jau enee: "Ojejuka esage werewi pa'ā 'ga 'ga ree nū", 'jau je enee. A'ere je nomojekukaukari ene 'ga ree. 'Au etee tajejuka 'ga ree 'ga upe, a'e je numiamū. Tepoaawamū tareko 'ga, a'e je numiamū. A'ere 'ā 'ga ene poaawa te. A'eramū amunipo 'ā ene te eje'ega m'ina 'ga ree jee. A'eramū je kweramū 'ga monou enee. Ejejuka esage ki 'ga ree, a'e je enee 'awamū. Je 'ā jesawa'e futat. Je 'ā Jejuī 'ga je'ega mome'wara. A'eramū 'ga rerowiare'ema 'gā je ppyka je m'ina 'au moromunepawa pype. A'ere 'ā ene jejekoty'aawa. Janeporomutat jane jarejuee jepi. A'eramū je 'jau ene upe: Eneporomuorywiwet nipo je ree. A'eramū ene epojekuka esageramū 'ga ree, a'e je enee.

¹¹⁻¹² 'Au te'ina je Onesimu 'ga resagi. Jejuī 'ga rerowiar ire 'ga je poari futari. Mama'e esagea 'ga wapo kwaiwete jee, je poaawamū futat. A'etea je 'ga omono enee. Jeporomutat je nanimenime 'ga ree. 'Ga oa je mu'arasig futat numiamū. A'ere 'ga najeremimurera rūi

futat. Enema'ea futat 'ga. Ymā te 'ā 'ga eneremiayup tyweramū 'ga rekoi rakue. A'ere 'ga 'awamū eneremiayuw esagea futat.

¹³⁻¹⁴ Afutat je 'ga pytaa numiamū, 'au moromunepawa pype tejepyri numiamū. A'ere 'ā 'ga ene poaawa te. Mukuu ene rekoramū amunipo 'ā 'ga je poaa akou. A'ere 'ga najeremiayuwa rūi. Enema'ea te 'ga 'ā. A'eramū je 'ga momytawe'em eneremifutare'em imū. Peu 'ga reko futare'ema ki 'ga emut etee imojewya jee nū. A'e pe ene peu 'ga reko futaa peu etee futat 'ga mogou ejepyri. A'eramū je kamēsīete ki 'ga emut imojewya jee, 'jawe'em enee.

¹⁵ Ymā 'ā Onesimu 'ga ka'jami ene wi rakue. Ināinānī'ī etee 'ga rekoi mukuu ene wi. A'ere 'awamū 'ga oi ojewya ene pyri nū. 'Awamū nipo 'ga rekoi ene pyri futat. 'Awamū nipo 'ga noka'jamu'jawi ene wi.

¹⁶ Ymā 'ā 'ga eneremiayup teeramū 'ga rekoi rakue. A'ere 'ā 'ga 'awamū Jejui 'ga rerowiaaramū. A'eramū 'ga 'awamū janerewirera futat akou. Jeporomutat je 'ga ree. A'ere nipo ene te 'ga ree jeporomutara ereapyraap. Ene upe oporowyky ma'e 'ga te 'ā. Enerewirera nanē 'ga 'awamū nū.

¹⁷ Paulo 'ga jejekoty'aawa futat, ere 'ā jee jepi. A'eramū 'ā ene, ejepyri je oramū, je mua ejog ipe jepi. A'eramū ene nan tee futat Onesimu 'ga monou ejog ipe.

¹⁸ Maran gatu nipo 'ga eneka'aran epye'ema munuge'ema enepo pe rai'i. A'eramū ki ene 'ga amunug ire imonou inuga jeka'aran are. A'eramū je imepyau enee 'jau.

¹⁹ 'Awamū je ka'arana kwasiaaawa ppyka tepo pe ikwasiaa enee: Je 'ā Paulo. Je futat tamepy enee 'jau. Aipoa je futat akwasiat ka'aran are inuga enee. Ymā te je ako Jarejuwarete 'ga je'ega mome'ui enee ikue. A'eramū ene ako 'ga rerowiaa ikue. Je 'ga mome'ue'em ire amunipo 'ā nererowiari futari Jejui 'ga. Werowiare'em ire amunipo 'ā 'ga nene katu'ogi futari. Aipo are ejea'aramū ekou.

²⁰ A'ere jane juejue Jejui 'ga rerowiari futari. A'eramū ene ejejukau esage Onesimu 'ga ree, jarejewirera 'ga ree. Aipo apo re je maku'i ape.

²¹ Ajemogypyk je ene ree, ki Firemō. Ejejuka esage ki Onesimu 'ga ree, a'e je enee. A'ere je tejeupe etee futat je 'i: "Firemō 'ga nipo ojejuka esage Onesimu 'ga ree. Je'eawera nipo 'ga wapyraap", 'jau je te'ŷina tejeupe.

²² Jarejuwarete 'ga upe 'ā pēē 'jau jepi: "Emomoirukat 'gā Paulo 'ga wi", 'jau 'ā pēē 'ga upe pejeje'ega monou pejejemogyau je ree jepi. A'eramū nipo 'ga anure je monoukaa pē nesaka. A'eramū pēē jerupawa resaka jee.

²³ Epafrasi 'ga ako 'au je pyri moromunepawa pype. 'Ga nanē Jarejuwarete 'ga mome'wara nū. A'eramū 'gā 'ga ppyka imua im'ŷina 'au moromunepawa pype je pyri. 'Ga nanē oje'ega omono pē nupe pē futaa nū.

²⁴ Jepyutuna 'gā nanē oje'ega omono pē nupe pē futaa nū. Maku, Aristaku, Demas, Luka. Mīmera 'gā oje'ega monou pē nupe pē futaa.

²⁵ Jarejararete 'ga, Jejui Kristu 'ga resagea pē nerekoa je afutat. Kweramū etee jeremimome'ua.

Epyreu

'Ga amū 'awa ka'arana kwasiaa imonou judeu 'gā nupe, Jeju 'ga ree 'gā mu'jaawamū rakue. Nikwaawi jane ikwasiarera. A'ere na'ga etee rūi ikwasiari. Janeruwarete 'ga 'Agesage ikwasiarukaa 'ga upe. A'eramū 'ga ikwasiaa imonou 'gā nupe rakue. Judeu 'gā ner irūa epyreua.

Janeruwarete 'ga ra'yrarete 'ga

¹ Ymā Janeruwarete 'ga oporogytao oje'ega mome'wara 'gā nupe etee rakue. Mama'ea nanē 'ga lapou opājē mū ojee 'gā mueapyoukaawamū. Meeweī futat 'ga 'gā mueapyou oporogyta are rakue. Namueapyopawi 'ga 'gā ywawuje tee wemifutar are rakue. Ināinānī'ī etee ra'ne 'ga imome'wau 'gā amū nupe. A'ere 'ga anure ināinānī'ī etee oporogyta mū mome'wau 'gā amū nupe nū. Ojeupe 'ga porogytaawer imū etee futat 'ga je'ega mome'wara 'gā 'ga je'ega mome'wau ajemogyau janyepy 'gā nupe rakue.

² A'ere ako 'ga 'awamū 'ga je'egi wa'yrarete 'ga upe ra'i. A'eramū ako 'ga ra'yra 'ga te jane mueapyou 'ga je'eg are ai'i. Nikwaawi futari jane Jarejuwarete 'ga rakue. A'ere jane 'ga ra'yra 'ga resakawe jane Jarejuwarete 'ga kwaawi. Mama'ea 'ga iapoukaa wa'yra 'ga upe rakue. Ywy, ywak, ipypewat. Mīmera 'ga wapoukat wa'yrarete 'ga upe rakue. 'Ga futat 'jau wa'yra 'ga upe rakue: “Anure nipo je ene m'yi mama'e jarareteramū”, 'jau 'ga wa'yra 'ga upe rakue. A'eramū nipo 'ga wa'yra 'ga mogou mama'e jarareteramū futat.

³ Janeruwarete 'ga ra'yra 'ga esage 'Uwarete 'ga 'jawe etee futat. A'eramū jane Jarejuwarete 'ga resage kwaapa 'ga ra'yrarete 'ga resag ire. Oje'eg imū etee futat 'ga mama'e mogyaukararūmū imomytao. Kwat, jay, jaytata, ywy. Mīmera 'ga imogyau imomytaaw ipe etee futat. Amanūmū 'ga 'jau rakue: “Amanū je 'gā tywera mepyawamū. A'eramū je tejerowiaaramū 'gā tywera moia 'gā nui”, 'jau 'ga ojeupe rakue. Janetywer are amanū re 'ga oferapa awau wapyka 'Uwarete 'ga pyri. 'Uwarete 'ga pājērete 'jawe etee futat 'ga. Aju'jawe etee futat 'gā. A'eramū 'ga awawarūmū wapyka 'ga pyri, 'ga jakwatawa katy.

Ywagipewara 'gā apyrapat

⁴ Ywagipewara 'gā ajemogyau Ku'jywa 'ga upe oporowyky ma'eramū futat. A'ere 'ga wa'yra 'ga mogoi 'wyriaramū oje'jawe. A'eramū 'ga ra'yra 'ga ywagipewara 'gā apyrapa futat.

⁵ Naywagipewara 'gā amū nupe rūi 'ga 'i:
“Ene jera'yra. Je 'ā 'awamū ako eneruwamū enee”,
'jau rakue. Wa'yra 'ga upe etee 'ga 'i aipo 'jau. Naywagipewara 'gā amū nupe rūi 'ga 'i:
“Je 'ā ako eneruwamū.
Ene futat je amogo teja'yrareteramū”,
'jau rakue. Wa'yrarete 'ga upe etee te 'ga 'i aipo 'jau rakue.

⁶ Ywy pe wa'yrarete 'ga mua Ku'jywa 'ga 'jau rakue:
“Ywagipewara 'gā jera'yra 'ga tamuoryp 'jau”,
'jau 'ga ojeupe rakue.

⁷ Ywagipewara 'gā nupe Janeruwarete 'ga 'i:
“Je upe oporowyky ma'e 'gā. Ojeupe je je'eg ypyrauwe ywagipewara 'gā too kamēšiete mama'e apou je'eawer imū 'jau kwy”,
'jau 'ga ojeupe. Sā'ā ywytu rura. Namutat 'ga opājē monoi 'gā nupe.
“Sā'ā tupā werawa. I'jawe 'gā awau kamēšiete 'jau kwy”,
'jau 'ga ojeupe.

⁸ A'ere 'ga wa'yra 'ga upe 'ga 'i:
“Ene je 'jawewara. A'eramū ene e'yina 'wyriarareteramū ejemiyauwa 'gā nupe.
Nakwaparimū rūi futat e'yina 'wyriarareteramū 'gā nupe.
Mama'e a'jea etee te eremome'u 'gā nupe.
Mama'e tywera apoara 'gā etee ki ereko tywet 'gā nemiapo tywer are.

⁹ Mama'e esage etee te 'ā erefutat.
A'eramū ene mama'e esage etee iapou.
Mama'e tywera 'ā nerefutari. A'eramū ene mama'e tywera apowe'em.
A'eramū je Eneruwareteramū ene pyrūmū ene mogou enepytuna 'gā 'wyriarareteramū,
ene maku'iukaa”,
'jau Janeruwarete 'ga wa'yra 'ga upe.

¹⁰ “Ene futat ako ywya ereapo ikue, ywaga reewe ikue”,
'jau 'ga wa'yra 'ga upe.

¹¹ “A'ere nipo anure eneremiapofera teepawamū.

A'ere ene neneteepawa'uweri futari nipo.

A'efer ipe etee futat nipo ene ekou.

Sā'ā taity ymanera toropawa. Nan futat nipo eneremiapofera teepawamū.

A'ere ene neneteepawi futari nipo.

¹² Anure nipo ene ywy ymanera mojopy'rau ywy yau pyu.

Sā'ā ae taity ymana mojopy'rua taity yau pyu.

Nan futat nipo ene ywy mojopy'rau ywaga reewe.

A'ere ene neneteepawi futari.

Nene mojopy'rawi futari.

Neneymani futari nipo ene",

'jau Janeruwarete 'ga wa'yra 'ga upe rakue.

¹³ A'eramū Janeruwarete 'ga 'jau wa'yraete 'ga upe nū:

"Eapyk 'au je pyri. Je 'jawe futat ene.

Enepājērete je 'jawe. A'eramū ene eapyka je yse katy.

Ene 'ā je omogo 'wyriarareteramū pāwēūjē etee futat 'gā nupe",

'jau 'ga wa'yraete 'ga upe rakue.

"Ene ree iporomutare'ema 'gā 'arimū nipo je ene magwawukari.

A'ere je iapoe'emauwe eapyk 'au je yse katy",

'jau 'ga wa'yraete 'ga upe rakue. Naywagipewara 'gā amū nupe rūi 'ga 'i aipo 'jau rakue.

¹⁴ Maran sipo ywagipewara 'gā? 'Wyriaramū sipo 'gā ywy pewaramū janee Janeruwarete 'ga ra'yraete 'ga pyri? Naani. Ojeupe Janeruwarete 'ga 'eawer imū etee te 'gā mama'e apoi 'ga upe. Janeruwarete 'ga 'gā mua ojepyri oo ma'eramamū jane poaawamū.

2

Pepoit kasi 'ga rerowiar awi ne

¹ Janeruwarete 'ga ra'yra 'ga ywagipewara 'gā apyraapa. A'eramū ki jane 'ga je'ega rerowiaa futat jarejemogyau. 'Ga je'eg imū mama'e apo re nipo jane jarepoire'ema futat 'ga rerowiar awi.

² A'jea futat ymā ywagipewara 'gā Janeruwarete 'ga je'ega reruri imome'wau janepy 'gā nupe rakue. A'jea futat 'gā 'ea. A'eramū Janeruwarete 'ga 'gā 'eawera renupare'ema 'gā nerekou tyweaete rakue.

³ A'ere ako 'ga 'awamū wa'yra 'ga muri janee ikue. A'eramū 'ga wa'yra 'ga jukaukaa kūima'e tywera 'gā nupe rakue. Janetywera mepyawamū 'ga ruwa 'ga 'ga jukaukari 'gā nupe rakue. A'eramū nipo Janeruwarete 'ga wa'yra 'ga rerowiare'em ire taetu jane rerekou tyweaete a'jea futat. "Tejerowiarāmū je pētywera moiiri pē nui", 'jau 'ga janee amanūmū rakue. Janejararete 'ga, Jejui 'ga ra'ne futat imome'wau ojepyriwara 'gā nupe rakue. "Pēkatu'okawamū je manūi" 'e mome'wau 'gā nupe rakue. A'eramū 'ga je'ega renupara 'gā imome'wau janee. "Pētywera moiawamū je ruri, e'i 'ga oree ikue", 'jau 'gā imome'wau janee. "Tejerowiaara 'gā nui je 'gā tywera moia, 'gā katu'oka. A'eramū nipo je anure 'gā nerawau ywag ipe tejepyri, e'i 'ga oree ikue", 'jau 'gā imome'wau janee, jane mueapyou ee. "A'eramū nipo Janeruwarete 'ga wa'yra 'ga rerowiare'ema 'gā nerekou tyweaete", 'jau 'gā jane mueapyou ee.

⁴ Janeruwarete 'ga taetu aje 'ā jane mueapyoukat wa'yra 'ga je'eg are. "Mama'e a'jea etee jera'yra 'ga omome'u 'gā nupe", 'jau 'ga. A'eramū 'ga U'agesage mua wa'yra 'ga rerowiaaramū janee. A'e pyu jane jarejeapyoramū 'ga 'eawer are. Wemifutar imū etee futat 'ga U'agesage muri janee, aeremiapoe'ema apoukaa janee. A'eramū nipo esakara 'gā oporesagamū ajemogyau jane ree. 'Ga 'Agesagea nipo mama'e apoukaa janee. Mama'e a'jea wa'yra 'ga imome'ue'em ire amunipo 'ā 'ga U'agesagea namura'uweri janee wa'yra 'ga 'eawer imū.

Jejui 'ga rerowiaaramū jane

⁵ Anure nipo Janeruwarete 'ga wa'yra 'ga mogoi 'wyriaramū wemiapoferamū janee. Aipoa je amome'u pē nupe. Naywagipewara 'gā amū rūi 'ga omogo 'wyriaramū. Wa'yra 'ga etee futat 'ga omogo 'wyriaramū wemiayuwamū janee.

⁶ Ymā te 'ga amū ka'arana kwasiari ee rakue:

"Jeporesak tee je 'ā ywy pewaramū pē nee. Jarejuwarete 'ga remiapofera tywera 'jawe etee agawewi 'ā pēe.

A'etea 'ā 'ga ajemuaēm pē nee ywy pewaramū", 'jau 'ga ikwasiaa rakue.

"Ma'ja are sipo erejemuaēm ywy pewaramū 'gā nee, ki Ku'yyp? Nia'wyri agawewi 'gā.

A'etea 'ā erejemuaēm 'gā nee",

'jau 'ga ikwasiaa rakue.

7 “Naywagipewara 'gã pãjê apyraapa rûi agawewi ywy pewara 'gã. A'etea nipo ene anure 'gã muesageu 'gã pãjêruga ejepyrîwara 'gã 'jawe. A'eramû nipo 'gã najuejue etee futat ywy pewara 'gã pojeupa.

8 Ene 'ã 'gã mogyau 'wyrîaramû mama'e upe. Tejemîapofera upe nipo je 'gã mogyau 'wyrîaramû, 'jau 'ã ene rakue”, 'jau 'ga ikwasiaa Jarejuwarete 'ga upe rakue.

Anure nipo 'ga jane mogyau 'wyrîaramû mama'e upe wa'yra 'ga pyri. Kwat, jay, mama'eukwaap, ywagipewat. Mîmera wemiapofera upe nipo 'ga jane mogyau 'wyrîaramû 'ga pyri. A'ere na'awauwe rûi jane jemogyi 'wyrîaramû 'ga remiapofera upe.

9 Sikwaap futat 'ã jane 'awamû Jejuî 'ga rekwawera. Janeruwarete 'ga Jejuî 'ga mua 'au ywy pewaramû jane 'jawe rakue. A'eramû 'ga nanê ajemogou ipojeuwîpyre'emamû rakue nû. Ywagipewara 'gã pãjê'wyrî'i ako ma'e 'jawe nanê 'ga akou rakue nû. Ywy pewaramû jane 'jawe etee futat 'ga akou rakue. A'ere Janeruwarete 'ga poromutaramû jane ree. A'eramû 'ga wa'yra 'ga jukaukaa kûima'e tywera upe janetywera mepyawamû. Jane 'jawe akoe'em ire amunîpo 'ã 'ga namanûarûi janetywer are rakue. A'ere 'ga jemogoi jane 'jawe ra'ne futat janetywera mepyawamû. A'ere Ku'jywa 'ga 'awamû jane ree 'ga manû re 'ga rerooi 'ga mogou ojeprî nû, 'ga mogou ywagipewara 'gã apyraapa nû. A'eramû 'ga pyriwara 'gã 'awamû 'ga muorypa ajemogyau nû. A'ea jane 'ã sikwaap.

10 Ymã te Janeruwarete 'ga mama'e apoi rakue. 'Ga futat mama'e omogy. 'Ga futat erekwara nanê nû. Ma'eramû 'ã 'ga rea'aramû jane ree. “Tamogy tejemîapofera 'gã teja'yramû 'jau”, 'jau 'ga ojeupe rakue. “Anure nipo jera'yra 'ga rerowiaara 'gã jemomytuni kwaiwete. 'Gã juejue nipo je imogyau teja'yramû. Anure je 'gã muri 'gã mogyau 'au tejeprîi nakwaparimû warãu rûi futat”, 'jau 'ga ojeupe rakue. A'eramû 'ã 'ga wa'yrarete 'ga rerekou tywerukaa rakue, jane ree 'ga jukaukaa janetywera mepyawamû rakue. 'Ga futat Jejuî 'ga wereko tywerukat ae a'wre'ema upe. 'Uwarete 'ga remîfutar imû etee futat Jejuî 'ga mama'e apoi. A'eramû 'ga, 'ga remîfutar imû nanê 'ga ojereko tywerukaa 'gã nupe nû. Amanû are 'ga janetywera moia jane wi werowîaramû. Jane wi janetywera moir ire 'ga jane mogyau Ku'jywa 'ga ra'yramû. A'eramû Jejuî 'ga anure werowîaramû jane rerawau jane mogyau 'Uwarete 'ga pyri.

11 Jejuî 'ga jane katu'oka janetywer awi. A'eramû 'ga wemîkatu'ogeramû jane mogyau 'Uwarete 'ga ra'yramû. A'eramû 'ga Ruwarete 'ga Janeruwareteramû nanê futat nû. A'eramû nipo Jejuî 'ga aku'îramû jane ree. “Agamû jerewîrera 'gã. 'Agamû jerenyra 'gã”, 'jau nipo 'ga jane ree aku'îramû.

12 A'eramû nipo 'ga 'jau 'Uwarete 'ga upe: “Eneremîapofera tamome'u tejewîrera 'gã nupe 'jau. 'Gã pype tekou tamuoryp ene eneremîapofer are 'jau”, 'jau 'ga 'ga upe.

13 “Ajemogypyyk je ene ree”, 'jau 'ga 'Uwarete 'ga upe.

“Au je rekoi Tejuwarete 'ga ra'yra 'gã pyri.

Je pyri Jeruwarete 'ga 'gã murukarî, 'gã nee tejejukaawamû”, 'jau 'ga akou.

14 Jarejuwarete 'ga ra'yramû jane ywy pewaramû etee futat. O'o ma'eramû jarejemogyau wy ma'eramû nanê jarejemogyau nû. A'eramû Jejuî 'ga ajemogou ywy pewaramû jane 'jawe etee futat rakue. Ywy pewaramû jane 'jawe ajemogou 'ga amanûmû jane 'jawe. Ywy pewaramû jane 'jawe akoe'em ire amunîpo 'ã 'ga namanûi futari. Janeruwarete 'ga namanûi futari. A'ere Jejuî 'ga jemogoi ywy pewaramû jane 'jawe. A'eramû 'ga amanûmû rêwêjêmi'rai'i. A'ere 'ga manûi mama'eukwaawa 'wyrîara matepaaawamû. Mama'eukwaawa 'wyrîara pãjê'okawamû te 'ga manûi rai'i. Mama'eukwaawa 'wyrîara ywy pewaramû jane momawukaa. A'ea futat 'agamû jane momap. A'ea futat ako jane ree iporomutare'emamû. A'ere Jejuî 'ga ipãjê'ogi amanûmû rakue.

15 Ywy pewaramû jane jarekyjau jaremanû awi jarejemogyau. A'ere Jejuî 'ga jane momapara pãjê'ogi. A'eramû jane jarekyjau'jape'ema jaremanû awi, jaremopapara pãjê'okara 'ga rerowîaramû.

16 Naywagipewara 'gã poaawamû rûi Jejuî 'ga ruri 'au ywy pe rakue. Abraão 'ga juapyreramû jane poaawamû te 'ga ruri rakue.

17 Ajemogou 'ga 'ã wewîreramû jane 'jawe futat rakue. Ma'eramû 'ã 'ga janejemogyi kwaawi a'jea futat. A'eramû 'ã 'ga a'jea futat ajemuaêma jane ree. Jarejuwarete 'ga remîfutar imû 'ga mama'e apou. A'eramû 'ga akou Jarejuwarete 'ga upe oporogyta ma'eramû jane ree. Ymã te mainana 'gã etee mama'e rerooi îapyau Ku'jywa 'ga upe rakue, opytuna 'gã tywera mepyawamû rakue. Mainana 'wyrîararete 'ga etee te wyra ry rerawawarûmû erosou Jarejuwarete 'ga mogytaawa my'ja'wi pype 'ga upe, opytuna 'gã tywera mepyawamû rakue. A'ere ako 'awamû Jejuî 'ga jemogoi mainana 'wyrîara remiapofera rekwaw îpe janee ikue. Najukai futari 'ga wyra janetywera mepyawamû. 'Ga futat ojejukaukaa 'gã nupe janetywera mepyawamû.

¹⁸ Ywy pe 'ga rekoramū mama'eukwaawa 'wyrriara Jejui 'ga porowyky are oporo-mote'ariweramū rakue numiamū. A'ere Jejui 'ga nuapoi futari emifutar imū mama'e tywera rakue. 'Ga maruukare'ema agawewi futat akou rakue. A'ere 'ga jemouagi etee futat jupe rakue. Ma'eramū 'ā 'ga nanuara kwaawi katu katu tāmējē. A'eramū 'ga ajemuaēma jane ree. A'eramū 'ga jane poararūmū a'jea futat mama'eukwaawa 'wyrriara jane rereko tyweramū.

3

Jejui 'ga Moisesi 'ga retee

¹ Jejui 'ga rerowiaaramū pēē jejaap katu katu 'jawe jee. Kūima'eramū pēē jerewirera 'jawe jee. Kūjāmeramū pēē jerenyra 'jawe jee. Pēē nanē Janeruwarete 'ga pē pyyrūmū pē mogyau wemiayuwamū rakue. A'eramū ki pēē pejejeatee'emamū Jejui Kristu 'ga wi pejejemogyau. Janeruwarete 'ga 'ga amut ywy pe ojee jane mu'jawamū rakue. Mainana 'wyrriararete 'jawewaramū 'ga ruri jane mu'jau 'Uwarete 'ga ree. A'eramū jane Jejui 'ga rerowiaa jarejemogyau. 'Ga Ruwarete 'ga nanē jane erowiaa nū.

² Ymā te Janeruwarete 'ga Moisesi 'ga pyyrūi ojeupe oporowyky ma'eramū rakue. Moisesi 'ga mama'e apou Jarejuwarete 'ga remifutar imū etee futat rakue. Jarejuwarete 'ga remiayuwa 'gā nerawau erekou jū myter imū rakue. 'Awamū Janeruwarete 'ga wa'yra 'ga pyyrūi ojeupe mama'e apowamū. Moisesi 'ga 'jawe futat Jejui 'ga mama'e apoi 'Uwarete 'ga remifutar imū etee futat.

³ Ymā Moisesi 'ga rekoi kūima'eeteeteramū rakue. A'eramū janeypy 'gā opojejuka esager-amū 'ga ree rakue. A'ere Jejui 'ga te kūima'eeteetea Moisesi 'ga apyraapa. A'eramū ki jane 'ga muorypa jarejemogyau. Sā'ā 'oga apoararete 'ga resagea 'oga resage apyraawa. Nan tee futat Jejui 'ga resagea Moisesi 'ga resage apyraawi.

⁴ 'Oga apoara tywe'em ire amunipo 'ā 'oga nanē nitywi nū. Nawyri 'oga ojetee. Nan tee futat Janeruwarete 'ga mama'e apoi rakue. Iapoe'em ire amunipo 'ā nitywi futari mama'ea.

⁵ Moisesi 'ga Jarejuwarete 'ga remiayuwa a'jea futat rakue. Oporowyky 'ga a'jea futat Jarejuwarete 'ga upe rakue. Jarejuwarete 'ga je'ega 'ga enupa a'jea futat rakue. Jarejuwarete 'ga remiayuwa 'gā nee 'ga ojejukau esage rakue, 'ga je'ega mome'wau nanē 'ga 'gā nupe rakue. Ymā Moisesi 'ga akou Jarejuwarete 'ga upe oporowyky ma'eramū rakue. A'eramū 'ga Ku'jywa 'ga remiaporama mome'wau 'gā nupe rakue, 'gā mueapyou Jarejuwarete 'ga remiaporam are rakue.

⁶ A'ere Kristu 'ga Jarejuwarete 'ga ra'yraretea. A'eramū Janeruwarete 'ga 'ga mogou 'wyrriaramū wemiayuwa 'gā nupe. A'eramū 'ga 'Uwarete 'ga remiayuwa 'gā nee ojejukau esage. 'Uwarete 'ga remifutar imū etee futat Kristu 'ga ojejukau 'ga remiayuwa 'gā nee. Jane nanē jarejemogyau 'ga remiayuwamū. 'Ga ree jarejemogypygy awi jarepoire'em ire jane jarejemogyau 'ga remiayuwamū futat. "Anure nipo je pē nerooi pē mogyau Tejuwarete 'ga pyri nakwaparimū warāu rūi futat" 'e rerowiar awi jarepoire'em ire jane jarejemogyau 'ga remiayuwamū.

Wupaw ipe jane rerooawam

⁷ Jarejuwarete 'ga remiayuwamū ki sienup 'ga je'ega jarejemogyau. Ymā te Janeruwarete 'ga 'Agesagea ka'arana kwasiarukari 'ga amū upe ee rakue.

"Pejejeupe Ku'jywa 'ga je'egamū ki peenup katu katu 'ga 'eawera.

⁸ Iapyajeawopytytym ma'e 'jawe etee kasi peenup ne.

Janeypy 'gā oje'eganuwe'emamū 'ga upe rakue.

A'eramū pēē pejejemogyawe'em 'gā 'jawe pejeje'eganuwe'emamū.

Amunawe'em ipe weroo werekoramū 'ā janeypy 'gā Jarejuwarete 'ga je'ega renupe'ema rakue.

Siesak Jarejuwarete 'ga remiapoa 'jau.

A'jea futat sipo 'ga jejukai jane ree u'eawer imū etee futat, 'jau 'ga rerowiare'ema 'gā ojeupe rakue.

A'eramū ki pēē pejejemogyawe'em jarepyy 'gā 'jawe",

'jau 'ga 'Agesagea ikwasiarukaa 'ga amū upe rakue.

⁹ A'ere Janeruwarete 'ga ikwasiarukaa 'ga upe rakue nū:

"Kwarēta kwara magwapa agawewi 'gā ojeupe jeremiapofera resaka.

A'etea 'gā naje rerowiari futari ajemogyau.

A'jea futat sipo 'ga jejukai jane ree, 'jau etee 'gā ajaupe",

'jau Ku'jywa 'ga ikwasiarukaa 'ga upe rakue nū.

¹⁰ "A'eramū je temara'neramū 'gā nee. Nuenuwi futari 'gā jeje'ega.

Nojemogypygy futari 'ga je ree.

¹¹ A'eramū je temara'neramū 'gā nee.

A'eramū je 'gā monoukare'ema 'gā nupawa upe, 'gā nupe tejemimonorama wyy pe.
'Peu tepeo pejepytu'wau maruowajar awi 'jau, mara'ne awi 'jau' je'eawer ipe 'gā awawe'em.

A'ere 'ā 'gā naje rerowiari etee.

A'eramū jeje'ega rerowiare'ema 'gā awawe'em futat je'eawera wyy pe.

Mama'ea nanē je imonowe'em 'gā nupe te'eawer imū",

'jau 'ga 'Agesagea ka'arana kwasiarukaa ee 'ga upe rakue.

¹² A'eramū ki pēē Jejui 'ga rerowiaaramū pejejea'gwau Jarejuwarete 'ga rerowiar awi pejepoire'ema. Janeruwarete 'ga 'ā Okoeteete ma'ea.

¹³ Pejedomojemogyppygukaa 'ga ree pejeojere'emamū futat. "Sako esage 'ga upe 'jau. Sajemogyppyyk 'ga ree 'jau", 'jau pejeojere'emamū futat pejejemogyau pejejaupe. Aipo apo re nipo nepejomoryteeukari mama'e tywera upe, pejejopy'a moywyrafenukare'ema jupe.

¹⁴ Jejui 'ga rerowiaa ppy we jane jarejemogyppyyka a'jea futat 'ga ree. 'Ga ree jarejemogyppyyg awi jarepoire'em ire jane jarejemujaa Kristu 'ga ree. A'eramū ki jane jarepoire'ema 'ga ree jarejemogyppyyg awi jarejemogyauwe futat.

¹⁵ Ymā 'ga wējēmī futat ka'arana kwasiaa ee rakue:

"Pejejeupe Ku'jywa 'ga je'egamū ki peenup katu katu 'ga 'eawera.

Iapyajeawopytym ma'e 'jawe te kasi peenup 'ga je'ega ne.

Janeypy 'gā oje'eganuwe'emamū 'ga upe rakue.

A'eramū pēē pejejemogyawe'em 'gā 'jawe pejeje'eganuwe'emamū",

'jau 'ga ikwasiaa ee rakue.

¹⁶ Ymā te janeypy 'gā wapykau futat Jarejuwarete 'ga je'eg are rakue numiamū, Egitu wyy awi Moisesi 'ga reminū'ēmera 'gā nakue numiamū. A'ere 'gā anure Jarejuwarete 'ga je'eg are oporenuwiwere'emamū rakue.

¹⁷⁻¹⁸ A'e are Janeruwarete 'ga amara'neramū 'gā nee rakue. A'eramū 'ga 'gā mogyaukaa 'gā mojewarau jū myter imū kwarēta kwara magwapa rakue. Oje'eganuwe'emawer ipe etee futat 'gā opapa rakue. Oje'eganuwe'emamū 'ga 'gā monoukare'ema 'gā nupe esaukaripyrera wyy pe. "Naje rerowiari futari 'gā. A'eramū 'gā awawe'em ojeupe je'eawera wyy pe", 'jau 'ga rakue.

¹⁹ A'eferupi tee aipo 'gā nosei futari Jarejuwarete 'ga ojeupe imome'upyrera wyy pe rakue. Nuerowiari futari 'gā Jarejuwarete 'ga. A'eramū 'gā awawarūme'em ojeupe 'ga 'eawera wyy pe.

4

¹ 'Awamū nanē Janeruwarete 'ga 'i janee nū: "Tejee ojemogyppyyk ma'eramū je pē muri tejupaw ipe. A'eramū je mama'e monou pē nupe te'eawer imū etee futat", 'jau 'ga janee. A'eramū ki jane jarejemogyppyyka a'jea futat 'ga ree. Kasi a'e pe 'ga najane monoukari wupaw ipe ne.

² 'Awamū 'ā jane nanē Jarejuwarete 'ga je'ega mome'u renupa nū, jarepyy 'gā 'jawe rai'i nū, "Janeruwarete 'ga iporopoariwet pē nee" 'e renupa rai'i nū. Janeypy 'gā 'ga je'ega renupa tee rakue. A'ere 'gā nuerowiari 'ga rakue. A'e are Janeruwarete 'ga 'gā monoukare'ema 'gā nupe u'eawera pype rakue.

³ A'ere jane 'ga rerowiaaramū jane jemogyppyygi Kristu 'ga ree. A'eramū jane jaremanū re jarewau jarejemogyau Jarejuwarete 'ga pyri. A'eramū jane jarepy'ata'waramū jarejemogyau. A'ere 'ga werowiaare'ema 'gā nupe 'ga 'i:

"Naje rerowiari pejepe pejejemogyau.

A'eramū je temara'neramū pē nee.

A'eramū je 'jau pē nupe:

Nepesei futari pejejeupe imome'upyrera wyy pe, 'jau je pē nupe",

'jau 'ga werowiare'ema 'gā nupe rakue.

Ymā Janeruwarete 'ga wyy apoi ywaga reewe rakue. Seis etee 'ga mama'e roreosa iapoupap rakue. A'ere 'ga iapopaw ire oporowykyu'jape'ema futat ai'iwe ee rakue nū. Worywamū 'ga wemiapofer are rakue.

⁴ Ymā 'ga amū ka'arana kwasiari inuga janee ee rakue:

"Seis 'ara rupi Janeruwarete 'ga mama'e apoi rakue.

Iapopaw ire 'ga noporowykyi ai'iwe rakue nū.

A'eramū 'ga worywamū wemiapofer are rakue",

'jau 'ga ikwasiaa inuga janee rakue.

⁵ Anure aipo 'ga wējēmī futat ka'arana kwasiaru'japa ee nū:

"Naje rerowiari 'gā ajemogyau.

A'eramū je 'gā monoukare'ema 'gā nupe imome'upyrera wyy pe, 'jau Janeruwarete 'ga",

'jau 'ga ikwasiaa ka'aran are inuga janee rakue.

⁶ Ymã 'ga je'ega renuw ypyarera 'gã nuerowiari 'ga rakue. A'eramũ 'gã awawe'em ojeupe 'ga remimome'ufera ywy pe rakue. Werowiar ire amunipo 'ã 'ga wemimome'ufera ywy monoi 'gã nupe rakue. A'eramũ amunipo 'ã 'gã worrywamũ ee rakue. A'ere 'gã nuerowiari 'ga rakue. A'eramũ 'ga 'gã monoukare'ema aipo pe rakue. A'eramũ 'ga 'jau 'gã na'yrera 'gã nupe etee rakue nũ: "Pêê je rerowiat pejepe ra'e. A'eramũ je pê monoukaa pê nupe je'eawer ipe, pê muorypa ee", 'jau 'ga werowiaara 'gã nupe rakue.

⁷ Anure Janeruwarete 'ga oje'ega kwasiarukari ka'aran are Davi 'ga upe rakue nũ. U'eawer imũ etee futat 'ga 'jau'japa Davi 'ga upe rakue:

"Pejejeupe Ku'jywa 'ga je'egamũ ki peenup katu katu.

Iapyajeawopytym ma'e 'jawe kasi peenup jeje'ega ne",

'jau 'ga ikwasiaa ee rakue. A'eramũ jane jarejeapyoramũ 'ga 'eawer are. 'Ga je'ega renuparamũ jane upe juejue futat 'ga je'egi. Naymãwarera 'gã nupe etee rũi futat 'ga aipo 'jau. 'Awauwaramũ jane upe nanê futat 'ga 'i nũ.

⁸ Moisesi 'ga rekwawer ipe Josue 'ga etee futat opytuna 'gã nerawau erosou ojeupe Jarejuwarete 'ga remimome'ufera ywy pe rakue. Kanaã ywy pe rakue. A'ere naKanaã ywy upe etee rũi Janeruwarete 'ga 'i rakue. Kanaã ywy upe etee 're amunipo 'ã 'ga ne'iu'jawi Davi 'ga upe rakue nũ.

⁹⁻¹⁰ A'eramũ jane jarejeapyoramũ 'ga 'eawer are. Jane upe nanê 'ga 'i aipo 'jau rakue nũ. "Anure nipo 'ga werowiaaramũ jane rerawau ywag ipe ojepyri. A'eramũ jane nanê jarepytu'wau jareporowyky awi", 'jau ki jane jarejaupe. Wemiapofera apowap ire Janeruwarete 'ga oporowykyawe'em ai'iwe rakue nũ. Ywawuje futat 'ga pytu'ui wemiapo awi rakue. Nan tee futat 'ga jane mopytu'waukaa janeporowyky awi ojepyri jane jemogyramũ.

¹¹ A'eramũ ki jane jarejemogypyka 'ga ree. Kasi a'e pe jane jemogyi ymãwarera 'gã 'jawe ne. Nuerowiari 'gã Ku'jywa 'ga rakue. A'eramũ 'gã awawe'em ojeupe 'ga remimome'ufera ywy pe rakue.

¹² Ku'jywa 'ga 'eawera eko ma'e 'jawe futat. 'Ga 'eawer imũ etee futat mama'ea jeapoi. Ipãjê ma'e 'jawe futat 'ga 'eawera. Jyuu aime juowajuu 'jawe nanê Janeruwarete 'ga 'eawera nũ. Sã'ã ae jyuu aime juowajuu pyu wyro'o ikysi pãwê tãmêjê imonoa iywyterimũ. A'eramũ 'ã ae iywyter ipewara o'o resaka. Ikaga miamũ 'ã ae imowoka. A'eramũ 'ã ae ikagyawa resaka. Nan tee futat Janeruwarete 'ga 'eawera. Janeapya pype ose re 'ga je'ega jane mueapyoukaa janeremifutar are. Mama'e esage are janeparuapower are, mama'e tywer are janeparuapower are, jarejea'aresage are, jarejea'atywer are. Mĩmer are 'ga je'ega jane mueapyoukaa.

¹³ Nimimarũi jane mama'ea Jarejuwarete 'ga wi. Wesak katu katu 'ga mama'ea. Okwaap katu katu 'ga mama'ea. Janerea'ara miamũ 'ga okwaap. Nimimarũi jane mama'ea 'ga wi. 'Ga reape jane jemogyi. Anure nipo jane jarejemiapofera mome'ui 'ga upe. A'ere 'ga jane kwaawi katu katui. A'eramũ jane 'ga moryteearũme'em jarejee, 'ga upe jarejemome'uramũ.

Mainana 'wyriararete 'jawewat

¹⁴ A'eramũ ki jane Jejui 'ga rerowiar wywapiaw jarejemogyau. Jejui 'ga 'ã Jarejuwarete 'ga ra'yraretea. A'eramũ 'ga awau 'Uwarete 'ga pyri janee. Ymã 'ã mainana 'wyriararetea wyra jukai, wyrerawau erosou Jarejuwarete 'ga mogytaaw ipe opytuna 'gã tywera mepyawamũ rakue. A'ere 'ã Jejui 'ga jejukaikari 'gã nupe janetywera mepyawamũ rakue. Mainana 'wyriararete remiapofer ipe 'ga ajemogou janee.

¹⁵ Jejui 'ga 'ã jane kwaapap. Jane 'jawewaramũ 'ga ajemogou ywy pe 'uawamũ. A'eramũ 'ga jane kwaapa. A'eramũ 'ga ajemuaẽma jane ree. "Ywy pewara 'gã nifuakari mama'e tywera apo'e'em awi", 'jau 'ga ojeupe. A'eramũ 'ga ajemogou ifuakare'ema 'jawe, jane 'jawe rakue. A'eramũ mama'eukwaawa 'wyriara 'jau Jejui 'ga upe rakue: "'Ga fuakara pa je amateepap 'ga wi kwy. Teje'ega pa je aenuwukat 'ga upe kwy. Mama'e tywera taapoukat 'ga upe 'jau kwy", 'jau mama'eukwaawa 'wyriara ojeupe rakue numiamũ. A'ere 'ga nuenuwi futari ije'ega. Nuapoi futari 'ga mama'e tywera. A'eramũ 'ga ajemuaẽma jane ree, mama'eukwaawa 'wyriara janefuakar are iporomateepawiweramũ. A'eramũ 'ga oporogytau 'Uwarete 'ga upe jane ree, 'ga mota'waukaa janee.

¹⁶ A'eramũ ki jane jareporogytau Jarejuwarete 'ga upe jarekyjawe'em. 'Ga 'ã ajemuaẽma jane ree. Ipta'wa 'ga jane ree. A'eramũ 'ga mama'e esagea etee iapou janee. Ojeupe jane enũjamũ 'ga jane poari mama'ea apo are.

5

¹ Ymã Janeruwarete 'ga Israeu juapyrera 'ga amũ pyyrũi 'ga pytuna 'gã nupe rakue. A'eramũ 'ga 'jau 'ga upe: "Apyyrũi je ene 'gã nupe ene mogou mainana 'wyriarareteramũ.

A'eramū ene eporowykyau jee epytuna 'gā nee. Mama'e tywera 'gā iaporamū ene eporogytau 'gā nee jee, wyra jukau iapyau jee 'gā tywer are. Na'gā nūi oporogytau jee otywer are. Ene tee eporogyta jee 'gā nee, 'gā tywer are. Je upe mama'e are oporomuriweramū 'gā imonou ene upe. A'eramū ene ete imua jee 'gā nupe", 'jau Ku'jywa 'ga 'ga upe rakue.

² Opytuna 'gā 'jawe futat mainana 'wyriararete 'ga. A'eramū 'ga ajemuaēma opytuna 'gā nee mama'e tywera 'gā iaporamū. Amumē nipo 'gā mama'earūe'ema apou ikwaape'ema. Aipo 'gā nee nanē 'ga ajemuaēma akou.

³ Opytuna 'gā 'jawe futat 'ga. A'eramū 'ga nanē mama'earūe'em apou akou nū. A'eramū 'ga nanē otywer are wyra jukau iapyau Jarejuwarete 'ga upe. Naopytuna 'gā tywer are etee rūi 'ga iapyi. Otywer are nanē futat 'ga iapyau 'ga upe rakue nū.

⁴ Na'ga rūi ojeppyrymū ajemogou mainana 'wyriarareteramū. "Je ako mainana 'wyriarareteramū", 'jawe'em nanē 'ga nū. Janeruwarete 'ga te 'gā pyrymū 'gā mogyau mainana 'wyriarareteramū. Ymā Janeruwarete 'ga Arão 'ga pyryūi 'ga mogou mainana 'wyriar pyrymū rakue. Arão 'ga 'jawerimū etee futat 'ga 'gā amū pyrymū 'gā mogyau mainana 'wyriarareteramū.

⁵ Nan tee futat Kristu 'ga najepyyryūi ajemogou mainana 'wyriararete 'jawe rai'i. Janeruwarete 'ga futat 'ga pyrymū 'ga monou rai'i. A'eramū 'ga te 'ā 'jau 'ga upe rai'i:

"Ene 'ā Jera'yra. Je 'ā 'awamū ako eneruwamū", 'jau 'ga ikwasiarukaa ka'aran are 'ga amū upe rakue.

⁶ Anure 'ga 'jau 'ga upe nū:

"Sā'ā Mekiseteki 'ga rekoa mainanamū rakue.

Nan tee futat je ene mogoi mainana 'ga rekwawer ipe 'gā nupe.

A'ere ene nakwaparimū warāu rūi ereko 'gā nupe",

'jau 'ga ka'arana kwasiarukaa 'ga amū upe Jejuūi 'ga ree rakue.

⁷ Ywy pe akou Jejuūi 'ga oje'ega monou 'Uwarete 'ga upe. Wafukaja monou 'ga upe. "Je poar ape, Kiapi'ni. Ojeupe ene iapoukare'em ire amunipo 'ā 'gā nojujukaa'uweri. A'ere najeremifutar imū rūi ereapo. Ejemifutar imū etee te 'ā ereapoukat 'gā nupe je ree", 'jau 'ga oje'ega monou 'Uwarete 'ga upe. Ojoo'o pype 'ga oje'ega monou 'ga upe. "Ejemifutar imū etee te 'ā ereapoukat 'gā nupe je ree", 'jau 'ga 'Uwarete 'ga upe. A'eramū Janeruwarete 'ga 'ga je'ega renupa.

⁸ Janeruwarete 'ga ra'yrarete 'ga agawewi. A'etea 'ga ojemu'e 'Uwarete 'ga remifutara apo are. Wereco tywera pype 'ga ojemu'jau 'ga remifutara apo are. Nimanūweri futari 'ga numiamū. Nafutari futari 'ga wereco tywera numiamū. A'ere 'ga jejukaukari 'gā nupe, 'Uwarete 'ga remifutar imū etee rai'i.

⁹ Wenup katu katu 'ga ojeupe 'Uwarete 'ga eawera. Wapopap 'ga 'Uwarete 'ga remifutara. Ma'eramū 'ā 'ga jemogoi 'ga je'ega renuparamū jane katu'okaramū.

¹⁰ Ma'eramū 'ā Janeruwarete 'ga 'ga mogoi mainana 'wyriarareteramū, Mekiseteki 'ga 'jawe.

Pepoit kasi 'ga rerowiar awi ne

¹¹ Kwaiwete mama'e are pē mu'jawa numiamū. A'ere 'ā nepēneapyoa'nei jeremimome'u are. Pejeapya m'yine'ema 'ā jeje'eg are. A'eramū 'ā pejejeapyoa'ne'emamū ee.

¹² Ymā agawewi 'ā pēē Jejuūi 'ga rerowiaa rai'i. A'eramū amunipo 'ā pēē kwe pewara 'gā mu'jau ee. A'ere 'ā pēē 'awamue enupara 'jawe etee pejemogy. Pejejeapyoa'ne'emamū 'ā 'ga je'eg are. "Ore mu'jara emut amū oree. A'eramū miamū 'ga mama'eay are ore mu'jawe'em" 'jara 'jawe etee 'ā pēē pejejemogyau. Mama'eaye'em are etee 'ā pēē pejejemu'eweramū. 'Ga rerowiaar yau 'gā te a'jea futat ojemu'e mama'eaye'em are etee ra'ne.

¹³ Sā'ā kunumīaky'ri ika'mua etee ra'ne. Na'ui futari wyro'o eyra. Nan tee futat Jejuūi 'ga rerowiaar yau 'gā. Mama'eaye'em are etee ra'ne ore 'gā mu'jau. Naeapyoī we 'gā ako esage are.

¹⁴ Waranuw ire 'ā kunumīaky'rifera 'gā wyro'o 'u are weapyoramū. Nan tee futat Jejuūi 'ga rerowiaar ymanera 'gā. Weapyo katuramū Jarejuwarete 'ga je'eg are. 'Ga remifutar imū etee futat 'gā mama'e apou. Otywer awi 'gā opoiapap. Mama'e esage are 'gā weapyoramū. Mama'earūe'em are nanē 'gā weapyoramū ajemogyau.

6

¹ A'eramū ki jane jarejamu'akwaapa Jarejuwarete 'ga remifutar imū mama'e apo are. Jejuūi 'ga jane erowiar pyyrauwe 'gā amū jane mu'jau 'ga ree ikue. A'ere 'gā najane mu'ei mama'eay are. A'ere jane 'awamū Kristu 'ga kwaawi katu katui. A'eramū jane jarejamu'jau katu Jarejuwarete 'ga ree. Mama'eay are miamū jane jarejamu'jau. Jejuūi 'ga rerowiaar yau 'gā jane imu'jau 'ga rerowiar are. "Werowiarāmū etee Jejuūi 'ga pētywera moiri pē nui. Na'ga

upe pēnemiapofer are rūi 'ga pētywera moiri. Werowiarāmū te 'ga imoiri pē nui", 'jau jane 'ā 'gā nupe jepi.

²“Ga rerowiar ire pejepymūkat 'y pe 'ga rerowiaar ymana mū upe. 'Y pe jarejepymūkaa jane Jejuī 'ga rerowiaara resaukaawamū” e are jane 'ga rerowiaara 'gā mu'jau jepi. “Oropo monou ore pēapye'rarimū pē nupe Jarejuwarete 'ga Agesage muawamū” e are jane 'gā mu'jau jepi. “Anure nipo Janeruwarete 'ga amanū ma'efera 'gā mū'jau tywe awi najuejue etee futat. A'eramū 'ga werowiaara'ema 'gā monou mama'eukwaawa rapyaw ipe. Nakwaparimū ete rūi 'gā oi ajemogyau mama'eukwaawa rapyaw ipe. Werowiaaramū 'ga jane mua jane mogyau ojepyri nakwaparimū rūi” e are jane 'ga rerowiaara yau 'gā mu'jau jepi.

³A'ere pēē mīmera kwaawi. A'eramū ore 'awamū pē mu'jau mama'e yau are, Ku'jywa 'ga remifutar imū.

⁴Jejuī 'ga rerowiar awi 'gā amū poir ire maran sipo 'gā jewyri 'ga rerowiaa nū? 'Gā amū Jejuī 'ga rerowiaa numiamū. Janeruwarete 'ga 'gā tywera moia 'gā nui rai'i numiamū. U'agesagea miamū futat 'ga imua 'gā nupe rai'i numiamū.

⁵Oje'ega 'gā erowiarāmū Janeruwarete 'ga mama'e esage apou 'gā nupe numiamū. Opājē mū miamū futat 'ga mama'e apoukari 'gā nupe numiamū.

⁶A'ere 'gā anure 'gā poiri 'ga rerowiar awi. Maran sipo nanuara 'gā jemogyi 'ga remiayuwamū nū? Jarejuwarete 'ga ra'yrarete 'ga jukaara 'gā 'jawe nanuara 'gā jemogyi. A'eramū nipo Jejuī 'ga wi opoit ma'e 'gā nesakara 'gā Jejuī 'ga kurapa, 'ga rerekoemāu 'ga jaita 'gā nee.

⁷⁻⁸Sā'ā koa. Ko jara 'ga amū ko apou mama'e tyma. A'ere amana okya ee imuakūma. A'eramū itymipyra opopoa o'ywukuramū. A'eramū ko jara 'ga i'a 'wau jui. Janeruwarete 'ga itymipyra mopoporukaa imu'aukaa ko apoarera 'ga upe. A'ere nipo anure kofera ijawaiwamū etee. Imoteu etee itymipyra. A'eramū nipo 'gā amū kofera rapyaw etee. Nan tee futat jane mū Jarejuwarete 'ga rerowiaaramū. Jane mū nipo 'ga rerowiar ywyapiau. A'eramū jane mama'e esage etee iapou 'ga remifutar imū. Ko esage 'jawe jarejemogyau 'ga upe. A'ere 'ga rerowiaara 'gā amū nipo nuapoi mama'ea 'ga remifutar imū. Nuenuwi 'gā 'ga je'ega. Kofera 'jawe etee 'gā jemogyi 'ga upe. A'eramū nipo Janeruwarete 'ga anure werowiar awi opoit ma'e 'gā monoukaa mama'eukwaawa rapyaw ipe. Aiporamū futat 'gā nereko tyweawa.

⁹'Ga rerowiar awi opoit ma'e 'gā nupe je teje'egayau tekou. A'ere orejekoty'aawamū pēē nanarūi. Perowiat 'ga a'jea futat. Pejemogy esage 'ga upe. A'eramū ore orojerowiaa pē nee jepi. A'eramū ore 'jau: “Jarejuwarete 'ga rape rupi 'gā oi. A'eramū 'gā anure owaēma 'ga pyri”, 'jau ore pē nupe.

¹⁰A'jeteetewi futat Janeruwarete 'ga mama'e apoi. A'eramū nipo 'ga anure pē mepyau ojeupe pēnemiapofer are. Pejejekau esage pejeirū 'gā nee, 'ga rerowiaara 'gā nee pejejemogyau. Werowiaara 'gā nee pejejuka esageramū nipo 'ga 'jau ojeupe: “A'jea futat 'ga poromutarāmū je ree ra'e. Sā'ā 'gā jekuka esagea je rerowiaara 'gā nee”, 'jau nipo 'ga ojeupe. A'eramū nipo 'ga anure pē mepyau ee.

¹¹Pejemanūme'ēwe futat pejemogy esage 'ga upe. 'Ga ree pejejemogypyka a'jea futat. Mīmera je afutat. A'eramū anure Janeruwarete 'ga pē nerawau pē mogyau ojepyri. A'ea jane iapesaka jarejemogyau.

¹²Jejuī 'ga rerowiar are pēnorypawa je nafutari. 'Gā amū Jejuī 'ga werowiat a'jea futat ajemogyau. Ojemogypyka 'gā 'ga ree a'jea futat. Nopoiri futari 'gā 'ga rerowiar awi. A'eramū Janeruwarete 'ga mama'e esage monou 'gā nupe. A'eramū ki pēē pejejemogyau 'gā 'jawe etee futat. 'Gā 'jawe pejemogyramū Janeruwarete 'ga mama'e esage monou pē nupe nanē nū. U'eawer imū etee futat 'ga mama'e esage monoi pē nupe.

U'eawer imū etee 'ga mama'e apoi

¹³⁻¹⁴Ymā Janeruwarete 'ga 'i Abraão 'ga upe rakue: “Tareko esage ene 'jau. Mama'e esagea je imonou enee kwaiwete. Anure je enejuapya 'gā momytuni enee”, 'jau 'ga Abraão 'ga upe rakue. “A'jea futat je'ea. Te'eawer imū etee futat je mama'e apoi tekou. A'eramū je te'eawer imū etee futat iapou enee”, 'jau 'ga Abraão 'ga upe rakue.

¹⁵Abraão 'ga werowiat a'jea futat Janeruwarete 'ga ojeupe 'eawera rakue. A'eramū 'ga akou omaenuna etee futat Jarejuwarete 'ga iapo are u'eawer imū etee futat. A'eramū Janeruwarete 'ga anure iapou u'eawer imū etee futat rakue.

¹⁶Jarejaupe jarejemiaporama mome'u re jane imome'ui ipojewipyrarete 'ga rer imū etee futat. A'eramū jane jarejoje'ega rerowiaa jarejemogyau.

¹⁷Nan tee futat Janeruwarete 'ga iapoi rakue. “Tarowiarukat teje'ega 'gā nupe 'jau”, 'jau 'ga ojeupe rakue. “Nomojopy'rua'uweri futari 'ga ore upe u'eawera, 'jau nipo 'gā je rerowiaa”, 'jau 'ga ojeupe rakue. A'eramū 'ga 'jau: “Te'eawer imū etee futat je mama'e apoi

pē nupe. A'jea futat je 'i. A'eramū je aipo 'jau teje'egawer imū etee futat pē nupe", 'jau 'ga rakue. Nitywi futari ipojeuwipyra 'ga amū 'ga apyraapara. A'eramū 'ga oje'ega pyu etee futat 'jau 'gā nupe rakue.

¹⁸ Janeruwarete 'ga ni'mei futari. Mama'e a'jea etee futat 'ga omome'u. U'eawer imū etee futat 'ga mama'e apoi. Nomojopy'ruī 'ga u'eawera. A'eramū jane 'ga rerowiaa jarejemogyau. "Anure nipo je tejerowiaara 'gā neruri 'au tejepyrī" 'ea jane erowiaa jarejemogyau. A'eramū jane iapesaka jarejemogyau, ojepyrī 'ga jarejeroo rapesaka jarejemogyau.

¹⁹⁻²⁰ Jarejeapene'emamū futat Jejuī 'ga 'eawer are. 'Ga rerowiar wyyapiramū jane jarepoire'ema 'ga wi. "Tejerowiamū je pē nerawau ywag ipe Tejuwarete 'ga pyri", 'jau 'ga janee rakue. 'Ga ra'ne awau ywag ipe Jarejuwarete 'ga pyri. A'eramū jane "Je aroo pēē ywag ipe", 'ga 'e rerowiaa jarejemogyau. Ywag ipe awau 'ga rekoī mainana 'wyriararete 'jawewara janee. Ymā mainana 'wyriararete 'ga etee awawarū osou Jarejuwarete 'ga rupawarete pype, 'ga mogytaawa my'jawa pype rakue. Opytuna 'gā nee 'ga oi osou oporogytau Jarejuwarete 'ga upe. Nan tee futat Jejuī 'ga ra'ne awau ywag ipe 'Uwarete 'ga pyri. Wemiayuwamū jane ree 'ga oi oporogytau 'Uwarete 'ga upe. Janeruwarete 'ga 'ga mogou mainana 'wyriararete 'jawewaramū nakwaparimū ete rūi futat Mekiseteki 'ga 'jawe.

7

Mekiseteki 'ga

¹ Ymā Mekiseteki 'ga 'ūina 'wyriaramū Salem ipewara 'gā nupe rakue. Mainana nanē 'ga nū. Oporowyky 'ga Jarejuwarete 'ga upe rakue, Okoeteete ma'e 'ga upe rakue. Ymā Abraão 'ga Mekiseteki 'ga resaka rakue. Ojee iporomutare'ema 'gā 'wyriara' 'gā apisi re Abraão 'ga 'ua ojewya oje'wyrā katy. Aiporamū futat Mekiseteki 'ga Abraão 'ga rekoa rakue. 'Ga resakawe Mekiseteki 'ga 'jau Abraão 'ga upe: "Janeruwarete 'ga tuapo mama'e esage ene upe 'jau", 'jau 'ga Abraão 'ga upe rakue.

² A'eramū Abraão 'ga ojee iporomutare'ema 'gā nui wemipojekafera pe monou imojo'oka Mekiseteki 'ga upe rakue. Mekiseteki 'ea mama'e esage apoara 'gā 'wyriara' 'ga 'ea futat. Salem ipewara 'gā nupe 'ga 'ūina 'wyriaramū. Salem 'ea ipy'ata'wa ma'e 'gā 'wyrā 'ga poromū. A'eramū jane 'jau: "Mekiseteki 'ga ipy'ata'wa ma'e 'gā 'wyriara", 'jau jane 'ga upe.

³ Nikwaawi jane Mekiseteki 'ga 'ywa rera. 'Ga ryrufera rera nanē jane nikwaawi nū. 'Ga juapyrera nanē jane ikwaape'ema. 'Ga 'aawera 'ara nanē jane ikwaape'ema. 'Ga manūawera 'at. Mīmera jane nikwaawi futari. Janeruwarete 'ga ra'yra 'ga 'jawe etee futat 'ga ajemogou mainanamū nakwaparimū ete rūi.

⁴ Pēnea'ar iki Mekiseteki 'ga ree ra'ne. Janepy 'ga, Abraão 'ga kūima'eeteramū agawewi rakue. A'etea 'ga mama'e omono Mekiseteki 'ga upe rakue. Mekiseteki 'ga nanē kūima'eeteeteramū rakue. Ojee iporomutare'ema 'gā 'arimū okwaw ire Abraão 'ga 'gā karaemā pojekau 'gā nui rakue. A'ea wemipojekafera 'ga imojo'oka teis, imonou amū Mekiseteki 'ga upe rakue.

⁵ Anure Janeruwarete 'ga 'jau Moisesi 'ga upe rakue: "Teis ki pemojo'ok pejekaraemā. A'eramū pēē pejemimojo'ogera mū monou Levi 'ga juapyrera 'gā nupe, mainana 'gā nupe, e'i Janeruwarete 'ga pē nupe, ere ki epytuna 'gā nupe, Abraão 'ga juapyrera 'gā nupe te a'eramū miamū", 'jau Janeruwarete 'ga Moisesi 'ga upe rakue.

⁶ A'ere naLevi 'ga juapyrera rūi agawewi Mekiseteki 'ga. A'etea Abraão 'ga wemipojekafera mū omono 'ga upe rakue. A'eramū Mekiseteki 'ga 'jau 'ga upe rakue: "Janeruwarete 'ga tuapo mama'e esagea enee 'jau", 'jau 'ga 'ga upe rakue. Mekiseteki 'ga resag enune Janeruwarete 'ga 'jau Abraão 'ga upe rakue: "Tamomytun enējuapyrera 'gā enee 'jau", 'jau 'ga Abraão 'ga upe rakue. A'e are poromū Mekiseteki 'ga 'jau: "Janeruwarete 'ga tuapo mama'e esagea enee 'jau", 'jau 'ga 'ga upe rakue.

⁷ "Janeruwarete 'ga tuapo mama'e esagea enee 'jau" 'jara 'ga kūima'eeteetea 'ea 'ā jane ikwaapa. A'eramū jane "Mekiseteki 'ga kūima'eeteetea Abraão 'ga apyraapa" 'e kwaapa.

⁸ A'eramū jane Israeu juapyreramū jarekaraemā mū monou Levi 'ga juapyrera 'gā nupe. Amanū ma'erama 'gā agawewi nipo. A'etea jane mama'ea simono 'gā nupe. A'eramū 'gā manū re 'gā py'ruarera 'gā etee imujaa nū. A'ere Mekiseteki 'ga nanarūi rakue. Nopy'ruī 'gā 'ga. "Abraão 'ga okaraemā mū monou ako ma'e 'ga upe te rakue", 'jau Janeruwarete 'ga ikwasiarukaa 'ga amū upe rakue.

⁹⁻¹⁰ Levi 'ga Abraão 'ga juapyrera. A'ere Levi 'ga 'ar enunewe Abraão 'ga Mekiseteki 'ga rekoari rakue. A'eramū 'ga okaraemā mū monou 'ga upe rakue. A'eramū Levi 'ga 'ga reewe 'ga rekoarera 'jawe nanē futat akou. 'Ga reewe Mekiseteki 'ga upe mama'e monoarera 'jawe nanē 'ga akou nū. Anure Israeu juapyrera 'gā okaraemā mū monoi aipo Levi 'ga juapyrera 'gā nupe.

¹¹ Anure Janeruwarete 'ga oje'ega kwasiarukaa Moisesi 'ga upe rakue. Nanuar are 'ga 'jau Moisesi 'ga upe rakue: "Teje'ega je akwasiarukat enee. A'e are ene epytuna 'gã mul'jau. Levi 'ga juapyrera 'gã etee je apyrrũ temogytaaw ipe mama'e apoaramũ. Arão 'ga Levi 'ga juapyrera mũ. A'eramũ ene 'ga mogou mainanamũ 'ga ra'yra 'gã neewe. 'Gã etee futat oporowykyau mainanamũ jee"; 'jau Janeruwarete 'ga Moisesi 'ga upe rakue. Janeruwarete 'ga remifutur imũ agawewi Levi 'ga juapyrera mainana mama'e apoi. A'etea 'gã nomoirarũi futari opytuna 'gã tywera. Nokatu'ogi futari 'ga 'gã 'gã tywer awi. Ma'eramũ 'ã Janeruwarete 'ga Kristu 'ga muri. Mekiseteki 'ga 'jawewaramũ 'ga mogou mainana 'jawewaramũ ojee nakwaparimũ ete rũi.

¹² Mekiseteki 'ga 'jawewara 'ga mogoramũ Janeruwarete 'ga 'i: "NaArão 'ga juapyrera 'gã nũi mainana 'awamũ", 'jau 'ga ojeupe. A'eramũ jane mama'e apowe'em Moisesi 'ga remikwasiarer imũ. Mainana 'gã porowyky are Moisesi 'ga ka'arana kwasiari rakue. A'eramũ jane mama'e apowe'em 'ga remikwasiarer imũ. Jejuu 'ga je'eg imũ etee futat jane 'awamũ mama'e apoi. Mainana juejue futat Levi 'ga juapyrera rakue. Naajepeja 'ga amũ juapyrera rũi.

¹³⁻¹⁴ Jejuu 'ga upe tee Janeruwarete 'ga 'i: "Ene 'ã mainana 'jawewara jee nakwaparimũ ete rũi", 'jau 'ga 'ga upe rakue. A'ere Jejuu 'ga naLevi 'ga juapyrera rũi. Juda 'ga juapyrera te Jejuu 'ga. A'ere naJuda 'ga juapyrera 'gã nũi Moisesi 'ga imogyi mainanamũ 'gã nupe. NaJuda 'ga juapyrera 'gã nũi wya rapyau Jarejuwarete 'ga upe rakue. Levi 'ga juapyrera 'gã etee futat 'ga imogyau mainanamũ. A'ere Janejararete 'ga Juda 'ga juapyreramũ futat. A'eramũ jane jarejepyoramũ ee.

Jejuu 'ga Mekiseteki 'ga 'jawewat

¹⁵ A'ere ako 'awamũ Janeruwarete 'ga je'ega jopy'rupawi ai'i. Najareje'eg ymaner imũ rũi 'ga Jejuu 'ga mogoi mainana 'jawewaramũ ojeupe. Mekiseteki 'ga 'jawe te 'ga 'ga mogoi mainana 'jawewaramũ.

¹⁶ Naajeje'eger imũ rũi Jejuu 'ga jemogoi mainana 'jawewaramũ. Nawamỹi are rũi, naopyy are rũi. Namimer are rũi 'ga jemogoi mainana 'jawewaramũ. Okoeteete ma'e 'ga futat. Namanũ'jawi futari 'ga. Ma'eramũ 'ã 'ga jemogoi mainana 'jawewaramũ janee.

¹⁷ Ymã Janeruwarete 'ga ka'arana kwasiarukari Jejuu 'ga ree 'ga amũ upe rakue: "Ymã te Mekiseteki 'ga rekoi mainanamũ jee ikue.

Nakwaparimũ ete rũi ene ekou mainana py'rau jee",

'jau 'ga ikwasiarukaa inuga Jejuu 'ga ree rakue.

¹⁸ Ymã 'ã janeypy 'gã mama'e apoi Moisesi 'ga remikwasiarer imũ etee futat rakue. A'ere 'awamũ nanarũi. 'Ga remikwasiarer imũ janeypy 'gã mama'e apou agawewi rakue. A'etea 'gã nojekatu'ogi Jarejuwarete 'ga upe rakue.

¹⁹ Moisesi 'ga remikwasiarera 'gã nokatu'oga'uweri. A'ere ako 'awamũ Janeruwarete 'ga wa'yra 'ga jukaukari 'gã nupe ai'i, janetywera moiawamũ ai'i. A'eramũ jane 'ga rerowiaramũ jarejemogyau esage ma'eramũ Jarejuwarete 'ga upe. A'eramũ jane futat 'awamũ jareje'ega monoarũmũ Jarejuwarete 'ga upe.

²⁰⁻²¹ Mainana 'wyriara 'jawewaramũ Kristu 'ga jemogoukari Janeruwarete 'ga upe: "Te'eawer imũ etee futat je mama'e apoi. Je okoeteete ma'eramũ. Mama'e a'je etee je amome'u. Naje'mei je. A'eramũ je mama'e apou te'eawer imũ etee futat", 'jau 'ga Kristu 'ga upe rakue. Namainana 'gã nupe rũi 'ga aipo 'jau. NaLevi 'ga juapyrera 'gã nupe rũi 'ga aipo 'jau. A'ere 'ga mainana rekwawer ipe Kristu 'ga mogo re etee 'ga 'i 'ga upe. "Te'eawer imũ etee futat je mama'e apoi", 'jau. A'ere 'ga amũ ka'arana kwasiari ee inuga rakue.

"Ene je amogo mainana 'jawewaramũ tejemiayuwa 'gã nupe.

Neneteepawĩ futari e'yina mainana 'gã py'ru re.

Naje'mei futari je. Mama'e a'jea etee te je amome'u ene upe.

A'eramũ je ene mogou mainana 'jawewaramũ 'gã nupe te'eawer imũ etee futat, 'jau Janeruwarete 'ga Kristu 'ga upe rakue",

'jau 'ga amũ ikwasiaa ka'aran are inuga janee rakue.

²² Ymã te Janeruwarete 'ga oje'ega monoi Moisesi 'ga upe rakue. Peuwara 'gã nupe etee ra'ne 'ga 'i rakue. A'ere Jejuu 'ga ree 'ga 'eawera nateepawa'uweri. Mainana 'ga upe u'eawera py'rau futat Janeruwarete 'ga Jejuu 'ga mogoi.

²³ Ymã 'gã kwaiwete ajemogyau mainanamũ Israeu juapyrera 'gã nupe rakue. Amanũ futat 'gã. A'eramũ 'ga amũ 'ga py'rau Jarejuwarete 'ga upe oporowyky ma'eramũ.

²⁴ A'ere Jejuu 'ga namanũ'jawi futari. A'eramũ 'ga opy'ruawe'emamũ futat. Namutat 'ga rekoi amanũ'jape'ema.

²⁵ Ma'eramũ 'ã 'ga jane katu'okaramũ 'ga rekoi. Werowiaramũ 'ga jane muesageu jane mogyau ojeupe. 'Uwarete 'ga pyri futat 'ga reni oporogytau 'ga upe jane ree. "Epoat

je rerowiaara 'gã mama'e apo are. Jarejee emojemogypygy ywyapi 'gã", 'jau 'ga 'üina au'jeteramü 'Uwarete 'ga upe.

²⁶ A'eramü Jejuü 'ga 'üina mainana 'wyrriararete 'jawewaramü janee. 'Ga futat jane poat. Esage ete 'ga. Nitywi futari mama'e tywera 'ga pype. Janeruwarete 'ga worrywamü 'ga ree. A'eramü 'ga manü re 'ga Ruwarete 'ga 'ga moferapa etee rai'i nü, 'ga monou 'ga mojeupia ojepyri rai'i nü.

²⁷ Ymä mainana 'wyrriararete 'gã mama'e tywera apoü rakue. A'eramü 'gã wyra rapy ojere'ema futat rakue. Otywera mepyyawamü ra'ne 'gã wyra rapyau rakue. Otywera mepy re etee 'gã wyra rapyü opytuna 'gã tywera mepyyawamü rakue. A'ere Jejuü 'ga nanarüi. Nuapoi futari 'ga mama'e tywera. Janetywer are te 'ga manüi rakue. Majepeü tee futat 'gã 'ga jukau rakue. Najukau 'jawi futari 'gã 'ga rakue.

²⁸ Moisesi 'ga remikwasiarer imü etee futat Levi 'ga juapyrera 'gã ojemüina mainana 'wyrriaramü. Amumë aipo mainana 'wyrriara 'gã mama'e tywera apou. Nifuakari 'gã mama'e tywera apo'e'ema upe. A'etea 'gã 'üina mainana 'wyrriaramü opytuna 'gã nupe.

A'ere ako 'awamue Janeruwarete 'ga wa'yra 'ga mÿi mainana 'wyrriara 'jawewaramü janee ai'i. "Ene te 'ã esageay ma'ea. Nereapoi futari 'ã mama'e tywera. Jeremifutar imü etee 'ã ene mama'e apou", 'jau Janeruwarete 'ga wa'yra 'ga upe. "A'eramü je ene mÿina mainana 'wyrriara 'jawewaramü tejemiaywa 'gã nupe. Eëme'ema futat mainana 'wyrriar awi 'gã 'jawe", 'jau 'ga Kristu 'ga upe rakue. U'eawer imü etee futat 'ga 'ga mÿina mainana 'wyrriara 'jawewaramü janee.

8

Mainana 'wyrriararete 'jawewat

¹ Jejuü Kristu 'ga je amome'u pë nupe. Jejuü 'ga futat ako mainana 'wyrriararete 'jawewaramü janee. Janetywera mepypaw ire 'ga awau wapyka ywag ipe 'Uwarete 'ga pyri. Päjërete 'ga jakwatawa katy 'ga wapyka 'üina. 'Uwarete 'ga 'jawe 'ga. A'eramü 'ga wapyka 'Uwarete 'ga jakwatawa katy 'üina.

² Ymä te mainana 'wyrriara 'gã oi osou taityoga pype oje'ega Jarejuwarete 'ga upe opytuna 'gã nee rakue. 'Gã futat taityoga mÿina Jarejuwarete 'ga mogytaawamü rakue. A'ere Jejuü 'ga nokoi küima'efera 'gã nemiapofera pype. Jarejuwarete 'ga rupaw ipe te 'ga rekoü. 'Ga yse katy futat 'ga 'üina oporogytau 'ga upe jane ree.

³ 'Gã amü 'üina mainana 'wyrriarareteramü Jarejuwarete 'ga upe mama'e monoaramü rakue. 'Ga upe wyra rapyaramü nanë 'gã 'üina mainana 'wyrriaramü rakue. Mainana 'wyrriara 'jawewaramü 'üi re Jejuü 'ga nanë mama'e monoi 'Uwarete 'ga upe nü.

⁴ Ywag ipe Jejuü 'ga 'üina mainana 'wyrriara 'jawewaramü janee. Ywy pe akou amunipo 'ã 'ga 'üine'ema mainana 'wyrriara 'jawewaramü janee. Levi 'ga juapyrera 'gã etee 'ã ajemogyarü mainanamü 'au. Moisesi 'ga remikwasiarer imü Levi 'ga juapyrera 'gã mama'e monoi Jarejuwarete 'ga upe opytuna 'gã nee rakue.

⁵ Ymä te taityoga apo'e'mauwe Janeruwarete 'ga 'i Moisesi 'ga upe rakue: "Ywytyra apyte'rarimü jarejekwaw ipe je ako temogytaawa ra'agawa resaukaa enee ai'i, ywagipewara ra'agawa resaukari enee ai'i. A'eu etee futat ene iapoukaa 'gã nupe", 'jau 'ga 'ga upe rakue. A'eramü Moisesi 'ga iapoukaa 'gã nupe ojeupe 'ga remiesaukarer imü etee futat rakue. A'eramü 'gã nemiapofera pype mainana 'gã oporowykyau. 'Gã porowyky resag ire jane jarejeapyoramü ywag ipewara Jejuü 'ga porowyky are.

⁶ A'ere Jejuü 'ga porowyky esageay mainana 'gã porowyky apyraapa. Ymä Janeruwarete 'ga oje'ega monoi Moisesi 'ga upe rakue. Esage futat aipo 'ga je'eg ymanera. A'ere anure 'ga oje'ega monoi wa'yranete 'ga upe. Aipoa 'ga je'eg yaua esageay 'ga je'eg ymanera apyraapa. A'eramü 'ga oje'eg ymanera mojoy'rau oje'eg yau pyu. A'eramü 'ga upe u'eawera jane erowiarämü 'ga jane katu'oka. "Anure nipo je teje'ega rerowiaara 'gã murukari ywag ipe teje'pyri", 'jau 'ga 'üina. A'eramü jane jareku'iramü jarejemogyau ee.

⁷ Oje'eg ymanera 'gã enuwarü re amunipo 'ã 'ga namuri oje'eg yau oree.

⁸ A'ere janyepy 'gã nuenuwi Jarejuwarete 'ga je'ega rakue. A'eramü Janeruwarete 'ga 'jau: "Anure nipo je teje'eg yau monoi Israeu juapyrera 'gã nupe, Juda juapyrera 'gã nupe nanë nü.

⁹ Ymä te je teje'ega monoi 'gã ppy 'gã nupe ikue.

Egitu ywy awi 'gã neruaw ipe je teje'ega monoi 'gã nupe.

A'ere 'gã nuenuwi etee jeje'eg ymanera.

A'eramü je tepoia 'gã nui",

'jau Janeruwarete 'ga ikwasiarukaa Jeremi 'ga upe rakue.

¹⁰ "Anure nipo je teje'eg yau monoi Israeu juapyrera 'gã nupe, a'e je pë nupe.

A'ere je teje'ega mogeukari 'gã akaga pype.

A'eramū nipo 'gā wapya mŷina jeje'eg yau are.

A'eramū nipo 'gā oporenuwiweramū jeje'eg are.

A'eramū nipo 'gā je muorypa. 'Ku'jywa 'ga 'ā Janeruwaretea a'jea futat', 'jau nipo 'gā jee.

A'eramū nipo je futat 'gā Nuwaretea.

A'eramū nipo 'gā nanē jeremiayuwareteramū ajemogyau jee nū",

'jau Janeruwarete 'ga ikwasiarukaa 'ga upe rakue.

¹¹ "Anure nipo 'gā je kwaapa katu katu najuejue etee futat.

A'eramū te nipo 'gā ajamu'jawe'em je ree.

Je kwaapa nipo 'gā pāwēūjē etee futat ajemogyau.

'Gā 'wyriara 'gā, akotee ma'e 'gā.

Mīmera 'gā nipo je kwaapa anure.

¹² A'eramū nipo je 'gā tywera moia 'gā nui.

Najerea'aru'jawi futari nipo je 'gā tywer are",

'jau Janeruwarete 'ga ikwasiarukaa Jeremi 'ga upe rakue.

¹³ "Teje'eg yau je omon' 'gā nupe" 'e upe Janeruwarete 'ga oje'eg ymanera jane upe imojopy'ru upe te 'ga 'i. A'eramū jane 'awamū mama'e apou 'ga je'eg yauu. Anurenure'i nipo 'ga je'eg ymanera teepawamū.

9

Janeruwarete 'ga rupawarete

¹ Moisesi 'ga upe oje'ega monou nanē Janeruwarete 'ga 'gā mu'jau amuoryw are. "Taityoga peapo jemogytaawamū. A'eramū pēē a'e pype futat pejewau je muorypa", 'jau 'ga 'gā nupe 'gā mu'jau ee rakue.

² A'eramū 'gā iapou ojeupe 'ga 'eawer imū etee. Iapopaw ire 'gā imomy'japa taity poanamū pyu. Wesaw pyya upe 'gā 'jau "Janeruwarete 'ga rupap", 'jau 'gā jupe. A'e pype futat arāparīna 'ūina wenawa 'arimū. Mani'oko'o'i piru'i rupawa nanē 'upa peu. A'e 'arimū 'gā mani'oko'o'i piru'i rerawau inuga. "Janeruwarete 'ga ma'ea", 'jau 'gā jupe jepi.

³⁻⁴ Mama'e kasiga rapyawa 'ūina imy'jawa rowopype pyri. Ouru 'gā imonou ipir are ipiwoymawamū rakue. Imy'jawa raipy upe 'gā 'jau "Janeruwarete 'ga rupawaretea" 'jau 'gā jupe. Janeruwarete 'ga je'ega rerekwara ryrūa etee te 'ūina imy'jawa waipy pe rakue. Ipiwoyma 'gā ouru pyu nanē rakue nū. Ipype 'gā mama'e nuga. Janeruwarete 'ga je'ega rerekwara itapew, ita kanafū'ī, Arāo 'ga ywyrā. Mīmera 'gā imŷina ipype. Aipo ita kanafū'īa ouru apopyrera. Ipype 'gā mani'oko'o'i mŷina, mana 'jawa mŷina. A'e Arāo 'ga ywyrā opopoa rakue. Mukūi itapew are Janeruwarete 'ga je'ega jekwasiari rakue. A'eramū 'gā mīmera monou imŷina Jarejuwarete 'ga je'ega rerekwara ryrū pype rakue.

⁵ Jarejuwarete 'ga je'ega rerekwara ryrū au'jawa 'arimū 'gā mukūi ywagipewara ra'agawa mŷina, kerupī 'jawa mŷina. Ouru apopyrera poromū. Ijywa 'ga imonou ipypekau yrū au'jawa 'arimū. Ywagipewara ra'agawa resaka ae wea'aramū Jarejuwarete 'ga ree. "Janeruwarete 'ga ako jane pype" 'jau 'gā ajaupe esakawe. Janeruwarete 'ga je'ega rerekwara ryrū au'jawa are mainana 'wyriara 'ga wyra ry monoi imonykya. Wyra ry resag ire Janeruwarete 'ga wea'aru'jawe'emamū Israeu juapyrera 'gā tywer are rakue. A'ere na'awauwe rūi aipo mome'upaawa pē nupe.

⁶ Taityoga 'gā iapopaw ire mainana 'gā awau osou Jarejuwarete 'ga rupaw ipe mama'e apou Jarejuwarete 'ga 'eawer imū. Ai'iwe, ai'iwe 'jau 'gā awau osou mama'e apou 'ga upe rakue.

⁷ A'ere mainana 'wyriararete 'ga etee 'ga oi osou Jarejuwarete 'ga rupawarete pype. Kwara mu'ar ire mainana 'wyriara 'ga osou majepē tee futat 'ga rupawarete pype. Wyra rya 'ga erawau erosou imonykya Jarejuwarete 'ga je'ega rerekwara ryrū au'jawa 'arimū. Otywer are ra'ne 'ga imonykya. A'ere 'ga opytuna 'gā tywer are nanē imonykya nū. "Amumē ore mama'e tywera apoi ikwaape'ema jepi", 'jau 'ga erawau erosou. "A'eramū ene ejea'aru'jawe'emamū oretywer are", 'jau 'ga Jarejuwarete 'ga upe, wyra ry monykya yrū au'jaw are.

⁸ A'ere tekotee 'gā nosea'uweri Jarejuwarete 'ga rupawarete pype. A'ere Janeruwarete 'ga 'Agesagea jane mu'ei mama'e are. "Taityoga teepaw ire pēē pejesou pejeporogytau Pejejuwarete 'ga upe najuejue etee. Taityoga renamū te ako mainana 'wyriararete 'ga etee osou imy'jawa pype Pejejuwarete 'ga pyri jepi. A'ere teepaw ire pēē najuejue etee pese 'ga pyri pejeporogytau 'ga upe" 'e are 'ga 'Agesagea jane mu'ei.

⁹ Kristu 'ga manūe'emauwe janepytunera 'gā mama'e rerawau mainana 'gā nupe: "Koa mama'ea emome'u Jarejuwarete 'ga upe jee", 'jau 'gā mainana 'gā nupe mama'e rerua jepi. Mama'e tywera apo re 'gā weymawa mū rerua mainana 'gā nupe jepi: "Mama'e tywera je aapo Jarejuwarete 'ga upe. A'eramū je tejeymawa rerua tetywera mepyawamū. A'eramū

ene iapyau Jarejuwarete 'ga upe je ree', 'jau 'gā 'ā weymawa rerawau mainana 'gā nupe. Otywera mepyawamū 'gā weymawa monou iapyaukaa mainana 'gā nupe Jarejuwarete 'ga upe. A'ere aipoa namueateekari 'gā 'gā tywer awi. Nokatu'oga'uweri 'gā 'gā tywer awi.

¹⁰ Moisesi 'ga remikwasiarer imū nipo 'gā mama'e monoi Jarejuwarete 'ga upe. 'Ga remikwasiarer imū nipo 'gā ojekwakupa mama'e are. "Aga i'upyre'ema pē nupe", Moisesi 'ga 'eawera nipo 'gā na'ui agawewi. "Nan ki peapo pejekatu'okawamū Jarejuwarete 'ga upe", 'jau Moisesi 'ga 'gā mu'jau 'gā jekatu'og are rakue. A'eramū 'gā mama'e apou 'ga je'eg imū etee. A'ere 'gā nemiapofera namuesagea'uweri 'gā Jarejuwarete 'ga upe. Kristu 'ga jane katu'okarama resaukaawamū etee te 'gā aipo apoi rakue. Kristu 'ga rure'emauwe te jane mama'e apoi Moisesi 'ga remikwasiarer imū rakue.

¹¹ A'ere 'awamū Kristu 'ga ruri rai'i. A'eramū 'ga akou mainana 'wyriararete 'jawewaramū janee. "Mama'e esagea taapo pē nupe 'jau", 'jau 'ga akou mainana 'wyriara 'jawewaramū janee. Nataityoga pype rūi 'ga rekoī mainana 'wyriara 'jawe. Ywag ipe te 'ga rekoī. 'Uwarete 'ga pyri futat 'ga rekoī. Kristu 'ga rekwawa esageay taityoga apyrapa.

¹² Ymā te 'gā karupana'nī jukai wy reko'woka rakue. Kwataua'yra nanē 'gā ijukau wy reko'woka jui rakue. Wyra jukauwe mainana 'wyriara 'ga wy rerawau erosou taityoga my'jaw ipe, Jarejuwarete 'ga rupawarete pype opytuna 'gā tywera mepyawamū rakue. A'ere ikokwara rupi nānēwējēmī 'ga wyra mū jukau wy rerawau erosou rakue nū. A'ere nanarūi Kristu 'ga. Kristu 'ga ojekukaukat ia'wyre'ema 'gā nupe majepēi tee futat rakue. Awau 'ga 'ā 'ūina ywag ipe. A'eramū 'ga owy pyu janetywera mepyaupap 'uwa 'ga upe. A'eramū 'ga werowiarāmū janetywera moia jane wi ywawuje futat.

¹³ Ymā Israeu juapyrera 'gā jekatu'ogi Jarejuwarete 'ga 'eawer imū etee rakue. Ijekwakuwe'ema 'gā ojemote'at ma'e 'jawe Jarejuwarete 'ga upe. A'eramū 'gā ojekatu'oke'em ire osowe'em Jarejuwarete 'ga mogytaaw ipe 'ga muorypa. A'eramū mainana 'gā karupana'nī ry monyka 'gā nee. Kwataua ry 'jau 'gā imonyka ijekatu'oge'ema 'gā nee. Kwataua'yra nanē 'gā iapyaukaa nū. A'eramū 'gā ukuwera kosōu 'y are. A'ere 'gā imonyka 'gā nee 'gā katu'okawamū Jarejuwarete 'ga upe. Aipo apo re te ki 'gā too osou Jarejuwarete 'ga mogytaaw ipe 'ga muorypa. Peapyaka esaka je'e are. Teumera tymara 'gā Janeruwarete 'ga nomogeukari wog ipe. A'eramū 'gā teumera tym ire weymawa rerawau mainana 'ga upe. A'eramū mainana wy monyka 'gā nee 'gā nesawamū.

¹⁴ A'ere karupana'nī rya nokatu'ogi futari 'gā. Nopirei futari 'gā 'gā tywer awi. Karupa'mī rapya nanē nū. Karupa'mīa 'gā ijukau iapyau otywera mepyawamū. A'ere nomoira'uweri 'gā nui. A'eramū 'gā mama'e tywera apou'jaw ire 'gā nānēwējēmī weymawa mū jukau nū, otywera mepyawamū nū. A'ere Kristu 'ga jane katu'ogi ywawuje futat. Werowiarāmū 'ga janetywera moia jane wi. Amanūmū 'ga janetywera mepyaupap ywawuje futat rakue. Esage ete Kristu 'ga. Nuapoi futari 'ga mama'e tywera. 'Uwarete 'ga 'Agesagea' 'ga wereko, okoeteete ma'ea 'ga wereko. A'eramū 'ga 'ga 'Agesage pājē mū ojekukaukaa 'gā nupe, owy reko'wogukaa 'gā nupe, janetywera mepyawamū 'Uwarete 'ga upe. "Ajejukaukat je 'gā nupe 'gā tywera mepyawamū enee, Kiapi'ni. A'eramū je tejerowiaaramū 'gā tywera moia 'gā nui, 'gā katu'oka katu", 'jau Kristu 'ga 'Uwarete 'ga upe. A'eramū 'ga werowiarāmū janetywera moia jane wi, jane katu'oka katu 'Uwarete 'ga upe. A'eramū jane 'awamū jajejymawa rapyau'jape'ema janetywera mepyawamū. Jejui Kristu 'ga manūa janetywera mepyaupap ywawuje futat. Werowiaaramū 'ga janetywera moia jane wi, jane mogyau oje'jawewaramū, jane muea'arukaa mama'e are oje'jawe futat. A'eramū jane mama'e apou 'ga remifutar imū etee futat.

Janeruwarete 'ga je'egyau

¹⁵ Moisesi 'ga upe Jarejuwarete 'ga 'eawer imū etee Israeu juapyrera 'gā mama'e apou rakue numiamū. A'ere 'gā mama'e tywera apou'jau'jawi etee futat. A'ere Kristu 'ga te eteeta. Janetywera moia wereteramū 'ga manūi janee. Janetywer awi jane mueateekaawamū te 'ga iapoi janee. Werowiaaramū 'ga janetywera moia jane wi. A'eramū 'ga 'jau werowiaaramū janee: "Jeruwarete 'ga pē mū'ē 'gā nui je rerowiarukaa pē nupe. A'eramū nipo pēē anure pejeju 'au ore pyri nakwaparimū warāu rūi futat", 'jau 'ga werowiaaramū janee. "Orojepyri pē nuramū nipo Jeruwarete 'ga mama'e esage monou pē nupe u'eawer imū etee futat. Pē nupe 'ga remimonofera nateepawa'uweri", 'jau 'ga werowiaaramū janee.

¹⁶⁻¹⁷ Sā'ā ae ka'arana kwasiara okaraemā are. "Je manū re ki jekaraemāmera pe-mono jepytunera 'gā nupe" 'e kwasiara inuga ka'aran are. 'Ga manū re etee 'gā ka'arana kwasiararera 'ga karaemā monoi 'gā nupe. 'Ga manū'e'emauwe 'gā 'ga karaemā nomonoa'uweri 'gā nupe. Muku 'ga manū re miamū 'ga manū resakarera 'gā 'jau: "A'jea futat 'ga manūi ai'i. Aesak je 'ga manūa ai'i", 'jau 'gā ajaupe. A'eramū 'gā "amanū 'ga" 'e kwaaw ire etee 'ga karaemā monou 'gā nupe.

¹⁸⁻¹⁹ Nan tee futat Janeruwarete 'ga je'eg ymanera. Ojeupe Janeruwarete 'ga je'eg ire etee Moisesi 'ga 'ga je'ega mome'ui opytuna 'gā nupe rakue. A'ere 'ga karupana'nī ry kwatau ry reewe ikosōu 'y pype. A'ere 'ga 'yw akā'i amū pyyka ifaa inimo piraga pyu. Isipu 'jawa 'yw akā'i faa karupa'miawa apopyrera pyu. Karupa'miawa 'gā ipowāna rakue. A'ere 'gā imomiraga. A'e pyu 'gā 'yw akā'i fari. A'ere 'ga ipymāu wy pype. A'ere 'ga wy monykya Janeruwarete 'ga je'ega rerekwara ka'aran are. Israeu juapyrera 'gā nee nanē imonykya nū.

²⁰ A'ere 'ga 'jau 'gā nupe: “Wya je amonykyt Jarejuwarete 'ga je'ega rerekwara ka'aran are. Pē nee nanē je imonykyri nū. A'eramū ki jane 'ga je'ega renupa. Taruenup eneje'ega 'jau 'e are je wy monykyri pē nee ka'aran are we”, 'jau Moisesi 'ga 'gā nupe rakue.

²¹ Taityog are nanē Moisesi 'ga wy monykya nū taityoga pypewara are we.

²² Moisesi 'ga upe Jarejuwarete 'ga 'eawer imū mainana 'gā wy monykya mama'e are ikatu'okawamū Jarejuwarete 'ga upe rakue. “Wy pyu ekatu'ok mama'ea jee”, 'jau Janeruwarete 'ga 'gā nupe rakue. A'eramū 'gā wy monykya mama'e are ikatu'okawamū 'ga upe. Imonykyawe'em are etee 'gā imonykyre'ema. Ināinā'nī etee 'gā ikatu'oka. Opytuna 'gā tywer are nanē 'gā aipo apou wyra jukau wy reko'woka 'gā nee 'gā tywera mepyawamū Jarejuwarete 'ga upe. Wy reko'woke'em ire amunipo 'ā 'gā otywera nomepyi futari Jarejuwarete 'ga upe.

Janetywera mepyawamū 'ga manūawet

²³ Ee wyra ry monykyr ire Moisesi 'ga taityoga katu'ogi Jarejuwarete 'ga upe rakue, taityoga pypewara reewe rakue. Ywag ipe futat Janeruwarete 'ga muorypawarete reni. A'eramū nipo ikatu'okawa wesageramū wyra ry apyraapa.

²⁴ Na'gā nemiapofera taityoga pype rūi Kristu 'ga awau osou amanū re. Ywag ipe tee 'ga oi, 'Uwarete 'ga muorypawarete pe. Peu futat 'ga reni 'Uwarete 'ga pyri, mama'e renūina jane ree 'ga upe.

²⁵⁻²⁶ Ymā judeu 'gā nupe mainana 'wyriararete 'ga wyra ry rerawau erosou taityoga my'jaw ipe, Janeruwarete 'ga rupawarete pype rakue. Majepei tee futat 'ga erawau erosou kwara mū rupi rakue. Ikokwara rupi tāmējē 'ga wyra ry rerawau erosou 'ga rupawarete pype rakue nū. A'ere nanarūi Kristu 'ga. Nan Kristu 'ga reko re amunipo 'ā 'ga amanū'jau'japa wyy apo ppy we. A'ere nanarūi Kristu 'ga. Namanū'jau'jawi 'ga janetywer are. Sawaēm jane mama'e teepap ja'wyja'wy upe. A'eramū ako 'ga 'awamue te ojesaukaa janee amanūmū janetywera mepyaupap ywawuje tee rai'i.

²⁷ Wyy pewaramū jane jaremanūmū najuejue etee futat. Majepei tee futat jane manūi. Nimanū'jau'jawi jane. Jaremanū re nipo jane jarewau jarejesaukaa Jarejuwarete 'ga rowase. A'eramū nipo Janeruwarete 'ga wa'yra 'ga rerowiaaramū jane monou jane mogyau ojepyri. Wa'yra 'ga rerowiare'ema 'gā nipo 'ga imonou muku ojewi.

²⁸ Nan tee futat majepei tee Kristu 'ga jejukaukari 'gā nupe, janetywera mepyawamū. Nojejukaukaru'jau'jawi 'ga. Anure nipo 'ga ruri nū. A'ere 'ga najanetywera mepyawamū rūi 'ga ruri. 'Ua nipo 'ga wapesakaramū jane katu'okapap janetywer awi. A'eramū te nipo jane mama'e tywera niapou'jawi.

10

¹ Moisesi 'ga remikwasiarera mogytaramū Israeu juapyrera 'gā weapyo'iramū etee Jarejuwarete 'ga remiaporam are. Anure 'ga remiaporama a'agawa futat poromū wyra rapya rakue. A'ere 'gā naeapyo katui ee rakue. Weymawa 'gā ijukau iapyau otywera mepyawamū. Ikokwar are 'gā nānēwējēmī wyra mū jukau iapyau nū. A'ere wyra wya nokatu'ogi futari Janeruwarete 'ga rerowiaara 'gā nakue. A'eramū 'gā 'ga muoryparūme'em 'ga remifutar imū.

² Okatu'okatu re amunipo 'ā 'gā nueru'arasigi te mama'e tywera ojeupe iapoawera erekou. A'eramū amunipo 'ā 'gā weymawa rerawau'jape'ema ijukaukare'ema otywera mepyawamū rakue. A'ere wyra wya nokatu'ogi futari 'gā 'gā tywer awi.

³ Ma'eramū 'ā 'gā au'jeteramū weymawa mū roeroi ijukaukaa otywera mepyawamū rakue. Weymawa jukaramū 'gā wea'aramū otywer are nū.

⁴ Kwatau rya nomoira'uweri janetywera. Karupana'nī rya nanē nomoira'uweri nū.

⁵⁻⁶ A'eramū Kristu 'ga 'ua ojypa 'au wyy pe rakue. A'eramū 'ga 'jau 'Uwarete 'ga upe:

“Nerefutaru'jawi wyra rapya 'awamū.

Ejeupe 'gā mama'e mura nanē nerefutaru'jawi nū.

Wyra rapya nomoiri futari 'gā tywera.

Nenemaku'ia'uweri.

A'eramū ene je mogou wyy pewara 'gā 'jawe futat ra'ne.

'Gā no'oa 'ā ene imua jee jero'oramū.

A'eramū je tekou 'gā 'jawe futat.

⁷ Eneremifutara apoawamū je ruri.

Ymā te 'ā ka'arana erekwasiarukat 'gā nupe je ree rakue.

A'eramū je 'awamū mama'e apou eneremifutar imū etee futat, 'gā nemikwasiarer imū etee futat",

'jau 'ga 'ua ywy pe rakue.

⁸ Jarejuwarete 'ga je'eg ymaner imū 'gā wyra jukau iapyau otywera mepyawamū rakue. A'ere Jejui 'ga 'i 'Uwarete 'ga upe rakue: "Nerefutaru'jawi wyra jukaa 'awamū", 'jau 'ga 'ga upe. "Wyra jukaa nene muorywu'jawi 'awamū", 'jau 'ga 'ga upe rakue.

⁹ "Au je reko. Eneremifutar imū mama'e apou te je ruri", 'jau 'ga 'Uwarete 'ga upe rakue. A'eramū Janeruwarete 'ga 'awamū 'jau janee: "Kristu 'ga 'jawe pejemogy. Jeremifutar imū etee ki mama'ea peapo Kristu 'ga 'jawe jee", 'jau 'ga janee. "Nepeapyu'jawi wyraa 'awamū pejetywer are", e'i 'ga janee 'awamū.

¹⁰ 'Uwarete 'ga remifutar imū etee futat Jejui Kristu 'ga mama'e apoi rakue. A'eramū 'ga ojejukaukaa ae a'wyre'ema 'gā nupe rakue. A'eramū futat 'ga amanūmū janetywera mepyaupap ywawuje tee 'Uwarete 'ga upe rakue. Werowiarāmū 'ga jane katu'oka janetywer awi.

¹¹ Mainana 'gā wojere'emamū futat akou mama'e apou Jarejuwarete 'ga upe rakue. Wyra rapya 'gā imuojere'ema futat rakue. Ai'iwe, ai'iwe, ai'iwe 'jau 'gā iapou rakue. A'ere wyra rapya nomoira'uweri janetywera jane wi.

¹² A'ere Kristu 'ga jejukaukari 'gā nupe janetywera mepyawamū. A'ere 'ā 'ga awau wapyka 'Uwarete 'ga jakwatawa katy 'ūina. Namanū'jau'jawi 'ga janetywer are. Majepei tee futat 'ga manūi janetywera mepyawamū. Janetywera mepy re 'ga awau wapyka 'ūina 'Uwarete 'ga yse katy. 'Uwarete 'ga 'jawe futat 'ga. A'eramū 'ga wapyka 'ga jakwatawa katy.

¹³ Anure nipo Janeruwarete 'ga Kristu 'ga magwawukaa 'ga ree iporomutare'ema 'gā 'arimū. A'eramū 'ga iapesaka 'ūina.

¹⁴ Majepei tee futat 'ga manūi janetywer are rakue. A'eramū 'ga werowiarāmū janetywera moia jane wi, jane katu'oka tāmējē futat.

¹⁵ U'agesageu nanē 'ga jane mu'jau ee nū, 'gā nupe ka'arana kwasiarukaripyre are nū:

¹⁶ "A'ere nipo je teje'eg yau monoi 'gā nupe.

A'eramū nipo 'gā oporenuwileramū jeje'eg are.

Teje'ega nipo je imogeukaa 'gā akaga pype.

A'eramū nipo 'gā wapyakau ee",

'jau 'ga ikwasiarukaa 'gā nupe rakue.

¹⁷ A'jea futat 'ga 'i: "Najerea'aru'jawi futari nipo je 'gā tywer are", 'jau Janeruwarete 'ga ikwasiarukaa Jeremi 'ga upe rakue.

¹⁸ Jejui Kristu 'ga manū are Janeruwarete 'ga janetywera moiri jane wi. A'eramū 'ga wea'aru'jawe'emamū futat janetywer are. Ma'eramū 'ā jane niapou'jawi futari 'awamū mama'ea jaretywera mepyawamū. Kristu 'ga futat janetywera omepy amanūmū rakue.

Jareje'ega simono 'ga upe 'awamū

¹⁹ Pēē jerewirera 'jawe jee. Kūjāmeramū pēē jerenyra 'jawe jee. A'eramū je 'jau pē nupe: Jejui 'ga amanū janetywera mepyawamū rakue. Werowiarāmū 'ga janetywera moiri jane wi. A'eramū jane nanē jareje'ega monoarūmū Jarejuwarete 'ga upe.

²⁰ Namainana 'gā nūi oje'ega omono Jarejuwarete 'ga upe janee 'awamū. Ymā 'ā Israeu juapyrera 'gā Jarejuwarete 'ga mogytaawa taityoga momy'jawi taity pyu rakue. A'eramū 'ā mainana 'wyriara 'ga etee awau osou imy'jaw ipe Jarejuwarete 'ga upe oporogytau rakue. A'ere jane 'awamū Jejui 'ga manū are, jane porogytaaru Jarejuwarete 'ga upe. Amanū re Jejui 'ga ferawi rai'i nū. Namanū'jawi futari 'ga 'awamū. A'eramū jane jareje'ega monou Jarejuwarete 'ga upe au'jeteramū futat jarejee.

²¹ Jejui 'ga futat mainana 'wyriararete 'jawewaramū janee. 'Ga 'ā Janeruwarete 'ga om'yi 'wyriaramū wemiayuwamū janee. Ojejuka esage 'ga jane ree.

²² A'eramū ki jane Jarejuwarete 'ga muorypa a'jea futat. Kristu 'ga ree jarejemogyppyka jarejemogyau. A'eramū jane Jarejuwarete 'ga muorypa a'jea futat. Kristu 'ga 'ā janetywera amoit jane wi werowiarāmū. A'eramū jane jarejekwawe'em 'ga upe. Jarejewi 'ga jaretywera moir ire jane jarejepymāukaa 'y pe 'gā amū nupe. Sā'ā mama'ea opirei re esagea. Iky'ae'ema futat. Nan tee futat jane. Jarejewi janetywera moir ire jane jarejesageramū 'ga upe.

²³ U'eawer imū etee futat Janeruwarete 'ga mama'e apoi. A'eramū jane jarejemogyppyka 'ga 'eawer are, "Anure nipo je pē muri ywag ipe tejepyri" 'ga 'eawer are. A'eramū te jane 'ga pyri jareo rapesaka. 'Gā amū nanē ki jane imu'jau ee nū. "Anure nipo Janeruwarete 'ga werowiarāmū jane monoi ywag ipe ojepyri", 'jau ki jane jarejepyriwara 'gā nupe.

²⁴ A'eramū ki jane jarejea'aramū jarejuee. "Janepota'wa ki jarejuee. Sajopoar iki mama'e esage apo are", 'jau ki jane jarejaupe.

²⁵ 'Gā amū nipo opoia ajuee ajatyka awi. Nijatykaweri nipo 'gā ajuee Jarejuwarete 'ga muorypa. A'ere kasi sajemu'e 'gā nee ne. Sajatyka etee futar iki jarejuee 'ga muorypa. Anurenure'i nipo Jeju 'ga ruri nū. A'eramū ki jane Jarejuwarete 'ga rerowiar wyyapiukaa jarejaupe.

²⁶ "Kristu 'ga amanū janetywera mepya rai'i. A'eramū ki pēē mama'e apou 'ga remifutar imū etee" 'ea jane sikwaap. A'jea futat aipo 'ea. A'eramū ki jane mama'e tywera apowe'em Kristu 'ga ree jarejemu'e re. Jarejemifutar imū etee mama'e tywera apou jane jewyru'jawi jaretywera upe nū awyja sipo janetywera omepy janee nanuaramū? Nitywi futari 'ga amū. Kristu 'ga etee futat amanūmū janetywera mepyawamū rakue. 'Ga rerowiare'emamū nitywi futari janetywera moiara 'ga amū.

²⁷ A'eramū ki mama'e tywera apo upe ojewyt ma'e 'gā okyjau Jarejuwarete 'ga wi. Anure nipo 'ga wowase jane majatykaaw ipe ojee iporomutare'ema 'gā monoi mama'eukwaawa rapyaw ipe.

²⁸ Pekwaap 'ā jareypy 'gā Moisesi 'ga remikwasiarer imū etee iapoare'ema 'gā apisiukara rakue. Maranuara 'gā sipo poromū iapisipyramū rakue? "Peko kasi tesirūgatu ne" 'e renupare'ema 'gā janepy 'gā iapisau tāmējē rakue. Mukūja 'gā tesirūgatu 'ga amū reko resag ire 'gā 'ga jukau tāmējē aporiae'emamū futat 'gā nee rakue.

²⁹ Sā'ā 'gā Moisesi 'ga je'egea renupare'ema 'gā ijuka tāmējē rakue. Nanarūi sipo Janeruwarete 'ga wa'yrarete 'ga je'ega renupare'ema 'gā nereko'i? 'Ga taetu nipo 'ga wa'yra 'ga je'ega renuwe'emamū 'gā wereko tywerete a'jea futat. Kristu 'ga rerowiar ire nipo 'gā amū opoia 'ga rerowiar awi. Ojewi Kristu 'ga otywera moir ire nipo 'ga amū ojewya mama'e tywera apo upe nū. A'e 'gā: "Nia'wyri Kristu 'ga. Ma'eramū 'ā 'gā 'ga jukai au'je katu rakue" 'jara 'jawe Kristu 'ga rerowiar awi opoit ma'e 'gā. Janeruwarete 'ga 'Agesagea opota'waramū agawewi 'gā nee, Kristu 'ga rerowiarukaa agawewi 'gā nupe. A'etea 'gā 'ga 'Agesage kurapara 'jawe etee, Kristu 'ga rerowiar awi opoir ire. A'eramū nipo Janeruwarete 'ga aipo 'gā nerekou tyweaete.

³⁰ "Nanuara 'gā nui nipo je jepyari 'gā nemiapo tywer awi", 'jau Janeruwarete 'ga oje'ega kwasiarukaa Moisesi 'ga upe rakue. "Oje'eganuwe'emawer ipe etee te nipo 'ga jereko tywerukari jee", 'jau Janeruwarete 'ga ikwasiarukaa ka'aran are Moisesi 'ga upe rakue. Aipoa Janeruwarete 'ga 'eawera futat. A'ea jane ikwaapa.

³¹ Janeruwarete 'ga okoeteete ma'ea futat. Ma'eramū ki jane jarekyjau 'ga jarejereko tywer awi mama'e tywera apowe'em futat.

³² Pēnea'ar iki pejerekwawer are. Jeju 'ga pēē erowiar ypyrauwe 'ā 'ga rerowiare'ema 'gā pē nereko tyweaete 'ga ree. A'ere 'ā nepepoiri futari 'ga rerowiar awi rai'i.

³³ Amumē 'ā 'ga rerowiare'ema 'gā pē kurapa kypyre'emete agawewi rai'i. A'etea 'ā pēnuag etee futat 'gā pejereko tywera upe rai'i. Amumē 'gā 'ā pējekoty'aawa 'gā nereko kypyre'emete agawewi rai'i. 'Gā nereko tywera resakawe 'ā pēē pejeyatykau pejerekoty'aawamū 'gā nee rai'i. A'eramū 'ā 'gā pē nereko kypyre'emete 'gā neewe futat rai'i.

³⁴ Amumera 'gā 'gā imonou imunepa moromunepawa pype rai'i. A'e 'gā nee 'ā pēē pejemuaēma rai'i. Amumē 'gā pēkaraemā pojekau agawewi pē nui. A'etea nepēku'ipawi ee. "Janeruwarete 'ga poroywera te nipo nateepawi jane wi", pe'je etee nipo pejeku'iramū nan pejerekoramū.

³⁵ Werowiar awi pepoire'emamū a'jea futat Janeruwarete 'ga mama'e esage monoi pē nupe. A'eramū ki pejepoire'ema futat Jarejuwarete 'ga rerowiar awi.

³⁶ 'Ga rerowiar awi pejepoire'em ire nipo mama'ea peapo 'ga remifutar imū. A'eramū pēē pejepoire'ema 'ga rerowiar awi. Mama'e apou 'ga remifutar imū etee futat pejemogyau 'ga rerowiaa a'jea futat. A'eramū 'ga anure mama'e monou pē nupe u'eawer imū etee futat.

³⁷ Ymā Janeruwarete 'ga oje'ega kwasiarukari 'gā nupe rakue:

"Nanure rūi futat nipo 'ut ma'e 'ga ruri.

Kamēsīete futat nipo 'ga ruri.

³⁸ Jeremifutar imū mama'e apoara 'gā nipo ojemogyppyka ajemogyau je ree.

A'eramū nipo 'gā ajemogyau je pyri nakwaparimū ete rūi futat.

A'ere je tejerowiar awi 'gā amū poir ire je najeku'i 'gā nee",

'jau Janeruwarete 'ga oje'ega kwasiarukaa 'ga amū nupe rakue.

³⁹ Na'ga rerowiar awi opoit ma'eramū rūi futat jane. Nipoiri futari jane 'ga rerowiar awi. A'eramū 'ga jane monowe'em mama'eukwaawa rapyaw ipe. Jane 'ā sirowiat 'ga jarejemogyau. A'eramū nipo 'ga jane mogyau ojeypyri nakwaparimū rūi futat.

11

Janeruwarete 'ga rerowiaararete 'gã

¹ Werowiaaramū Janeruwarete 'ga mama'e esage muri janee. A'eramū ki jane 'jau jarejeupe: "Arowiat je Jarejuwarete 'ga 'jau. A'eramū 'ga anure mama'e mua jee 'jau kwy", 'jau ki jane. "Naesagi agawewi je tejeupe 'ga remimurama. A'etea je ajemogypyk 'ga ree", 'jau ki jane jarejeupe, 'ga rerowiaa.

² 'Ga ree ojemogypykaw imū etee futat janepy 'gã jejoarukari Jarejuwarete 'ga upe rakue. A'eramū Janeruwarete 'ga aku'iramū 'gã nee rakue. A'eramū 'ga 'jau rakue: "Je rerowiat 'gã ajemogyau. A'eramū 'gã wesageramū jee", 'jau 'ga 'gã nupe werowiaaramū rakue.

³ Jarejuwarete 'ga rerowiaaramū jane jarejeapyoramū 'ga remiapofer are. "Ymã te Janeruwarete 'ga mama'e apoi rakue. Ywy, ywak, kwat, jay, jaytata. Mímera 'ga iapou rakue. Oje'eg imū etee futat 'ga iapou. Esagipyre'ema futat 'ga wapo. 'Agamū 'ã jane esaka 'ga remiapofera. Oje'eg imū etee futat 'ga iapou rakue" 'ea 'ã jane erowiaa jarejemogyau.

⁴ Apeu 'ga nanē 'ã rakue nū, Jarejuwarete 'ga rerowiaa rakue. A'eramū 'ã Janeruwarete 'ga aku'iramū ojeupe Apeu 'ga remimurer are rakue. A'ere Apeu 'ga reki'yra 'ga, Kaĩ 'ga nuerowiari Jarejuwarete 'ga. A'eramū Janeruwarete 'ga aku'ie'emamū ojeupe Kaĩ 'ga remimurer are. Ojee Apeu 'ga jemogypygamū Janeruwarete 'ga 'jau ojeupe: "Apeu 'ga pa je rerowiat ra'e. A'eramū 'ga wesageramū jee", 'jau 'ga ojeupe. Ymã agawewi 'ã Apeu 'ga manū rakue. A'etea jane 'ã 'ga rekawera sikwaap. Apeu 'ga werowiat Jarejuwarete 'ga rakue. A'eramū ki jane 'ga 'jawerimū etee futat jarejemogyau.

⁵ Enoki 'ga nanē 'ã rakue nū, Jarejuwarete 'ga rerowiaa rakue nū. Namanūi futari Enoki 'ga rakue. Werowiaaramū Janeruwarete 'ga 'ga rerawau erojeupia rakue. 'Ga pyriwarera 'gã Enoki 'ga rekaa numiamū. A'ere 'gã nuesagi 'ga. Janeruwarete 'ga 'ga omojeupit imonou ojeypri. Ywag ipe ojeupire'ewe Enoki 'ga Jarejuwarete 'ga rerowiaa rakue. A'eramū Janeruwarete 'ga aku'iramū 'ga ree rakue. A'e are Janeruwarete 'ga ka'arana kwasiarukari 'gã nupe rakue.

⁶ Niku'ia'uweri Janeruwarete 'ga werowiare'ema 'gã nee. Maran sipo ajee jane 'ga muorywi, "Janeruwarete 'ga ako" 'e rerowiare'em ire? Nimuorywa'uweri jane 'ga "ako 'ga" 'e rerowiare'em ire. "Janeruwarete 'ga ako" 'e rerowiaaramū janeporokwaawiweramū 'ga ree. "Ojee iporokwaawiwet ma'e 'gã nupe Janeruwarete 'ga mama'e esage monoi" 'e rerowiaaramū jane jareporokwaawiweramū 'ga ree.

⁷ Nue 'ga nanē 'ã Jarejuwarete 'ga je'ega renupara rakue nū. "Anure nipo je amana monoi ywy pe tejerowiare'ema 'gã momapa. A'eramū pēē yaru apou 'y awi pejeje jagawamū", ojeupe Jarejuwarete 'ga 'eramū Nue 'ga 'ga rerowiaa rakue, yara apou 'ga je'eg imū etee futat rakue. Amana kyre'emaue Nue 'ga yara apou erekou. A'eramū 'ga, wa'yra 'gã netee futat amanūme'em rakue. Nue 'ga ra'yra 'gã etee Jarejuwarete 'ga je'ega renupa 'uwa 'ga pyri rakue. A'eramū 'gã etee futat ojejaga yara pype. 'Gã nesea Jarejuwarete 'ga rerowiaara resaukaa amumera 'gã nupe. Amumera 'gã nuerowiari Nue 'ga je'ega, ojeupe Nue 'ga Jarejuwarete 'ga je'ega mome'uramū. A'eramū 'ya 'gã apisau. Werowiaaramū Janeruwarete 'ga 'jau Nue 'ga upe: "Je rerowiar ape. A'eramū ene ejesageramū jee", 'jau Janeruwarete 'ga Nue 'ga upe rakue.

⁸ Abraão 'ga nanē rakue nū, Jarejuwarete 'ga rerowiaa rakue. A'eramū 'ga 'ga je'ega renupa ojeupe 'ga je'egamū rakue, "Ekwap 'aw awi. Taesaukat ywy pe enee 'jau", ojeupe 'eramū rakue. "Anure nipo je ene upe tejemiesaukarera monopawi katu katu ene upe enejuapyrera 'gã neewe futat. Enema'e katu katua futat nipo poa", 'jau 'ga 'ga upe rakue. Nokwaawi agawewi futat Abraão 'ga awawa. A'etea 'ga oo ojeupe Jarejuwarete 'ga 'eawer imū etee futat.

⁹ Jarejuwarete 'ga rerowiaaw imū etee futat Abraão 'ga awau owaēma "tamono 'awa ywya ene upe" 'jawa upe rakue. Tekotee 'gã ywy pe 'ga reko. Nuapoi 'ga 'ogaretea. Taityoga pype etee 'gã nekoi rakue. Wata 'gã ajemogyau. A'eramū 'gã akou taityoga pype etee futat. 'Ga juapyrera 'gã, Isaki 'ga, Jako 'ga. Mímera 'gã nanē ajemogy taityoga pype etee. 'Gã nupe nanē Janeruwarete 'ga 'i nū: "Tamono 'awa ywya pē nupe 'jau, pēnekawamū 'jau", 'jau 'ga 'gã nupe rakue. A'etea 'gã nanē taityoga pype etee ako.

¹⁰ Abraão 'ga 'ogarete apowe'em rakue. "Amunawaretea Janeruwarete 'ga wapo ywag ipe. Wemifutar imū etee futat 'ga iapoi. Nateepawa'uweri 'ga 'wyraretea. A'eramū je tejekoweramū 'ga 'wyrarete pype", 'jau Abraão 'ga ojeupe rakue.

¹¹ Abraão 'ga remireko ēē, Sara ēē wa'yre'emamū rakue. Abraão 'ga oymanamū akou. A'ere 'ga Jarejuwarete 'ga rerowiaari, "Anure nipo je kunumī mū muri pē nupe" 'e rerowiaa 'ga akou. A'eramū Janeruwarete 'ga 'ga ra'yra pyygukaa 'ga remireko ēē upe. Owaiwi pype futat ēē omena 'ga ra'yra pyyaka.

¹² Abraão 'ga nanē oymanamū nū. A'etea 'ga aja'yrapy ēē pype. Majepi tee agawewi Abraão 'ga rakue. A'etea kwaiwete 'ga juapyrera 'gā. Jaytata pytuna 'jawe 'ga juapyrera pytuna. 'Yisigeau pytuna 'jawe nanē 'ga juapyrera pytuna nū.

¹³ Aipo 'gā jemogyawera Jarejuwarete 'ga rerowiara wesaukat janee. Werowiat agawewi futat 'gā Jarejuwarete 'ga rakue. A'etea 'ga nomonoi mama'ea 'gā nupe u'eawer imū rakue. "Anure nipo 'ga imonoi janejuaapyrera 'gā nupe", 'jau etee futat 'gā worrywamū ee rakue. "Awa wyy pe jane rekoi kamēsī te. Najanerupawarete rūi 'awa wyya", 'jau 'gā rakue.

¹⁴ A'eramū jane 'jau "aipo 'jara 'gā oo wupawarete pe futat", 'jau jane 'gā nupe.

¹⁵ Nijewyriweri 'gā wupawera upe. Ojewyriwer ire amunipo 'ā 'gā jewyri wupaw manera upe.

¹⁶ A'ere 'gā nijewyriweri jupe. "Anure nipo jane oi jarejupaw esage pe, ywagipewara pype. Nakwaparimū ete rūi peu jarejemogyau", 'jau 'gā rakue. Nijewyriweri 'gā wupawer ipe. A'eramū Janeruwarete 'ga ojerowiaa 'gā nee. 'Ga futat 'gā nupawa wapo ywag ipe 'gā nupe rakue. A'eramū jane "ojerowiat 'ga 'gā nee rakue" 'e kwaapa.

¹⁷⁻¹⁸ Abraão 'ga werowiat a'jea futat Jarejuwarete 'ga rakue. A'eramū 'ga ojemogyppyka 'ga ree rakue. A'eramū 'ga 'ga je'ega renupa, "Eja'yra 'ga eroo iapyau jee" ojeupe 'ga 'eramū rakue. Ymā te Janeruwarete 'ga i'Abraão 'ga upe rakue: "Tamomytun enejuapyrera 'gā enee 'jau. Isaki 'ga 'ā enera'yra. A'eramū je 'ga juapyrera 'gā momytuna enee", 'jau 'ga Abraão 'ga upe rakue. A'eramū Abraão 'ga 'ga rerowiaa. Naeapyoi agawewi 'ga Jarejuwarete 'ga remiaporam are. A'etea 'ga 'ga je'ega wenup, wa'yra 'ga rerawau iapyaauramet 'ga upe numiamū.

¹⁹ Ikwaapara 'jawe 'ga wea'aramū: "Ga rapy re nipo Janeruwarete 'ga 'ga moferawi nū", 'jau nipo 'ga rakue. A'eramū 'ga weawyrūe'emamū futat wa'yra 'ga rerawau iapyaauramet rakue. A'eramū Janeruwarete 'ga 'jau 'ga upe rakue nū: "Erejuka awi eja'yra 'ga. A'jea futat je rerowiar ape ra'e", 'jau 'ga 'ga upe rakue. A'eramū 'ga karupa'mī resaukaa 'ga upe rakue. A'eramū 'ga karupa'mī jukau iapyau 'ga upe rakue. A'eramū Isaki 'ga akou imoferawipyryra 'jawewaramū Abraão 'ga upe rakue.

²⁰ Isaki 'ga nanē Jarejuwarete 'ga rerowiaa nū. A'eramū 'ga 'jau wa'yra 'gā nupe: "Anure nipo Janeruwarete 'ga mama'e esage apoi pē nupe", 'jau 'ga wa'yra 'gā nupe rakue. Jako 'ga upe, Esau 'ga upe. Mīmera 'gā nupe 'ga imome'wau rakue.

²¹ Jako 'ga nanē Jarejuwarete 'ga rerowiaa rakue nū. A'eramū 'ga, amanū ja'wyja'wywe, 'jau Jose 'ga ra'yra 'gā nupe: "Anure nipo Janeruwarete 'ga mama'e esage apoi pē nupe jue etee futat", 'jau 'ga Jose 'ga ra'yra 'gā nupe rakue. Jako 'ga iyman gatū gatū. A'eramū 'ga opokokaw are etee futat owya. A'eramū Jako 'ga, 'gā nupe aipo 'e re, owyryra koka wāāpyramū Jarejuwarete 'ga muorypa. "Ene te 'ā eneresageay oree, ki Ku'yyp. Erejuka esage 'ā ore ree jepi", 'jau 'ga 'ga upe 'ga muorypa.

²² Jako 'ga ra'yra 'ga, Jose 'ga, nanē Jarejuwarete 'ga rerowiaa nū. A'eramū 'ga amanūme'ēwe 'jau: "Anure nipo janepytuna 'gā oi ojewya jareje'wyr ipe nū, Israeu juapyrera 'gā oi ū'jāu Egitu wyy awi, awau ojewya jareje'wyr ipe nū, Kanaā wyy pe nū. A'eramū ki jekagera peroo ityma peu", 'jau 'ga opytuna 'gā nupe amanūme'ēwe rakue.

²³ Anure Moisesi 'ga u'aa rakue. 'Ga jara 'gā Jarejuwarete 'ga rerowiaa rakue. A'eramū 'gā 'ga mima 'ga rerekou muapryra jay magwapa. "Esage janera'yra 'ga", 'jau 'gā ajaupe. A'eramū 'gā o'wyriara 'ga je'ega renupe'ema, "Pejuka pejeja'yra kūima'ea", 'ga 'e renupe'ema. Okyjawe'em futat 'gā 'ga je'ega renupe'ema.

²⁴ Moisesi 'ga nanē Jarejuwarete 'ga rerowiaa rakue. Egitu wyy pewara 'gā 'wyriara 'ga ra'yra ēē Moisesi 'ga muaranupa rakue. A'ere 'ga aranuw ire nafutari "Wyriara 'ga ra'yra ēē remimuaranuwera 'ga, Moisesi 'ga" 'gā 'ea. "Wyriara 'ga ra'yra ēē ra'yra 'jawe 'ga, pe'je awi jee", 'jau ete 'ga 'gā nupe rakue.

²⁵ Oje'ariweramū 'ga Jarejuwarete 'ga remiayuwa 'gā nee etee futat rakue. "Israeu juapyreramū futat je", 'jau ete 'ga 'gā nupe rakue. "Ene Jarejuwarete 'ga remiayuwamū futat ene", pe'je etee ki jee, 'jau ete 'ga 'gā nupe rakue. "Egitu wyy pewara 'gā jepytuna 'gā wereko tywet. A'eramū je 'gā 'jawe etee futat tejereko tywera futaa", 'jau 'ga ojeupe rakue. "Najeparuapoweri je mama'e tywer are. Mama'e tywera apoara 'gā iku'i ee. A'ere 'gā kamēsīete 'gā eru'arasigī. A'eramū je teparuapower'e'emamū mama'e tywer are", 'jau 'ga ojeupe.

²⁶ "Anure nipo Janeruwarete 'ga 'ga amū muri wemiayuwa 'gā poaawamū. A'eramū je tekou 'ga remiayuwa 'gā pype etee futat. Tene Egitu wyy pewara 'gā je rereko tyweri 'gā pyri kwy", 'jau 'ga ojeupe rakue. Sā'ā 'ga rerowiare'ema 'gā anure Kristu 'ga rereko tyweretea rakue. Nan futat 'gā Moisesi 'ga rereko tyweretei rakue. "Anure nipo Janeruwarete 'ga mama'e esage muri jee, je rerawau ywag ipe ojeypyri. Aipoa je afutat. Nafutari je Egitu wyy pewara 'gā karaemā. Kwaparimūwara te 'gā karaemā. A'ere Janeruwarete 'ga remimurama te nakwaparimū warāu rūi", 'jau 'ga ojeupe rakue.

²⁷ Jarejuwarete 'ga Moisesi 'ga erowiar wwyapiau akou. A'eramū 'ga okyjawe'em Egitu wwy pewara 'gā 'wyriara 'ga wi rakue. Amara'neramū agawewi 'wyriara 'ga 'ga ree. A'etea 'ga nokyjei 'ga wi. A'eramū 'ga awau Egitu wwy awi. Moisesi 'ga ojemogypyka Jarejuwarete 'ga ree. Nuesagi agawewi ae 'ga. A'ere Moisesi 'ga rekoi 'ga resakara 'jawe. Jarejuwarete 'ga ree 'ga ojemogypyg wwyapiau. A'eramū 'ga awau Egitu wwy awi.

²⁸ Moisesi 'ga Jarejuwarete 'ga rerowiaa akou. A'eramū 'ga karupa'mī apisaaukaa Israeu juapyrera 'gā nupe, 'okwaryta mojewaka karupa'mī wwy pyu. A'eramū ae momapara Israeu juapyrera 'gā na'yr ppy apisaue'em 'gā nui, Egitu wwy pewara 'gā na'yr ppya apisiramū. Wwy pyu 'okwaryta mojewag ire 'gā karupa'mī ro'o reya i'wau. A'ere Moisesi 'ga 'jau 'gā nupe: "Na'awamū etee rūi futat jane iapoi. Namutat nipo jane jarejeymawa apisi jarejenū'ēawer are jarejea'aawamū", 'jau 'ga 'gā nupe.

²⁹ Israeu juapyrera 'gā nanē Jarejuwarete 'ga rerowiaa rakue. Ma'eramū 'ā Janeruwarete 'ga 'y pytaga mowogi 'gā nupe rakue. A'ere 'ga wwytu mua imowokawera rupi imukaga 'gā nupe rakue. A'e rupi 'gā awau oyaapa rakue. A'e rupi Egitu wwy pewara 'gā awau 'gā nakyfera rupi rakue numiamū. A'ere Janeruwarete 'ga 'gā wawera pea motei 'gā nui 'y pyu rakue. A'eramū 'ya Egitu wwy pewara 'gā a'myaa, 'gā apisaupap rakue.

³⁰ Israeu juapyrera 'gā werowiat Jarejuwarete 'ga rakue. A'eramū 'ga Jerikoa 'jawa osoma monou imuapopena 'gā nupe. Sete 'ara rupi 'gā imaman ire Janeruwarete 'ga imonou imuapopena 'gā nupe rakue.

³¹ Raape ēē nanē werowiat Jarejuwarete 'ga rakue. Kūjāmene'ema agawewi ēē. A'etea ēē werowiat Jarejuwarete 'ga, 'ga rera renupa ppy we. A'eramū ēē ojejukau wwy momyrūara 'gā nee, 'gā mima o'wyriara 'ga wi. Opotawaramū ēē 'gā nee. A'eramū Israeu juapyrera 'gā ēē jukawe'em ēē pytuna 'gā apisaupap ipe.

³² Gitiāu 'ga nanē rakue nū, Jarejuwarete 'ga rerowiaa rakue. Gitiāu 'ga, Paraki 'ga, Sāsāu 'ga, Jefite 'ga, Davi 'ga, Samueu 'ga, Jarejuwarete 'ga je'ega mome'wara 'gā nanē nū. Mīmera 'gā werowiat Jarejuwarete 'ga rakue. A'ere je namome'upawa'uweri 'gā pē nupe.

³³ Jarejuwarete 'ga rerowiaa 'gā ajemogyau rakue. A'eramū Janeruwarete 'ga 'gā poaa mama'e apou wemifutar imū rakue. 'Gā wwy pojekau tekotee 'gā nuramū Janeruwarete 'ga 'gā amū poaa 'gā mujānukaa 'gā wwy awi, 'gā apisaupap. Janeruwarete 'ga 'gā amū mogou 'wyriaramū. A'eramū 'gā mama'e esage apoara 'gā nerekou esage. A'ere 'gā mama'e tywera apoara 'gā nerekou tyweretei. A'eramū Janeruwarete 'ga mama'e esage monou 'gā amū nupe u'eawer imū etee futat. Jarejuwarete 'ga 'gā erowiaa ajemogyau. A'eramū 'ga 'gā amū apisaupap'ema 'miara upe.

³⁴ Tata upe nanē 'ga 'gā amū apisaupap'ema nū. Amumera 'gā 'ga iapisaukare'ema jyuu rerekwara 'gā nupe. Niywyrafeni agawewi futat 'gā ajemogyau. A'ere Janeruwarete 'ga te 'gā mamuakari rēwējēmī rakue. A'eramū 'ga 'gā poaa 'gā magwawukaa 'gā nee iporomutare'ema 'gā arimū. A'eramū 'gā 'gā moka'jamukaa 'gā wwy awi.

³⁵ Amumera kūjānamū 'gā Jarejuwarete 'ga rerowiaa ajemogyau. A'eramū 'ga, 'gā pytuna 'gā amū manūnamū, 'gā moferapa 'gā nupe rakue.

Kwaiwete wejue te 'gā Jarejuwarete 'ga rerowiari ajemogyau rakue. Amumera 'gā 'ga rerowiare'ema 'gā inupānupāu 'gā nerekou tyweaete, 'gā apisaupap. "Ga rerowiar awi pepoir ire ore naruapisi pēē", 'jau 'gā 'gā nupe. A'ere 'gā nopoiri futari Jarejuwarete 'ga rerowiar awi. "Noropoiri futari ore Jarejuwarete 'ga rerowiar awi. Ojowi ore poire'emamū 'ga ore rerooi ojeypyri pēē ore apisi re", 'jau etee futat 'gā 'gā nupe. "Ga pyri oroo re te nipo ore reko esagei", 'jau etee futat 'gā 'gā nupe, wapisie'ema uwe.

³⁶ Amumera 'gā 'gā erekoemāu. A'eramū 'gā 'gā mopimopika ae mopikawa tupaama 'jawewara pyu. Amumera 'gā 'gā erawau 'gā kupyfaa itaju pyu 'gā munepa moro-munepawa pype.

³⁷ Amumera 'gā 'gā iapisau ita pyu. Amumera 'gā 'gā iapisau 'gā mowoka 'yjepana mowowokawa pyu. Amumera 'gā 'gā iapisau jyuu pyu. Amumera 'gā 'gā erekou tyweaete 'gā murukare'ema 'gā 'wyr ipe. A'eramū 'gā ajemogyau ikaraemāe'ema 'jawe. I'wyre'ema 'jawe 'gā ajemogyau watau. Taitye'ema 'jawe 'gā ajemogyau. Karupa'mī pirera etee erajemogyau imunepa, karupana'nī pirera. Mīmera etee 'gā erekou imunepa waitiramū. 'Gā pyriwara 'gā 'gā nerekou tyweaete. "Pejejuwaretea 'jawa 'ga ree te 'ā pejemogypyk pejemogyau. A'eramū ore pē nerekou tyweaete", 'jau 'gā 'gā nupe.

³⁸ Aipo 'gā ajemogyau watau amunawe'em ipe etee futat. Jūmire'eme, wwytyra rupi. Mīmer ipe 'gā ajemogyau. Ita kwara pype, wwy kwara pype. Mīmera pype 'gā ajemogyau. "Nepēa'wyr i pēē", 'jau futatee 'gā 'gā nupe. A'ere Janeruwarete 'ga upe aipo 'gā esage ma'ea. A'eramū Janeruwarete 'ga 'jau 'gā nupe: "Nepepoiri futari je rerowiar awi. A'eramū pēē pejejesageramū je upe. A'eramū je pē mua pē mogyau 'au tejeypyri", 'jau 'ga 'gā nupe.

³⁹ Gã juejue futat Jarejuwarete 'ga rerowiaa ajemogyau. A'eramũ Janeruwarete 'ga 'jau: "Je rerowiaara 'gã esage ma'ea futat. Nopoiri 'gã je rerowiar awi je ree iporomutare'ema 'gã wereko tywereteramũ miamũ", 'jau Janeruwarete 'ga 'gã nupe.

'Gã papawe'emauwe Janeruwarete 'ga 'jau 'gã nupe rakue: "Anure nipo je pẽ katu'okara 'ga monoi pẽ nupe", 'jau 'ga 'gã nupe rakue. A'ere 'gã papawi 'ga 'ga mure'emauwe rakue. A'eramũ 'gã okatu'okara 'ga resake'ema rakue. A'ere 'gã jemogypygyi Jarejuwarete 'ga ree. 'Ga 'eawera 'gã erowiaa rakue.

⁴⁰ Anure nipo 'ga jane rerawau jane mogyau ojepyri werowiaar ymanera 'gã neewe. Peu ojepyri jane rerawau 'ga jane katu'oka ywawuje futat janetywer awi.

12

Ku'jywa 'ga 'ã Janeruwaretea

¹ Kwaiwete ymãwarera 'gã Jarejuwarete 'ga rerowiar wywapiaw rakue. A'eramũ ki jane 'ga rerowiar wywapiaw 'gã 'jawe etee futat. Sapoit futar iki 'ga ree jarejemogypygyukare'em awi. Sã'ã ujãn ma'e 'gã fuwepawe'ema ujãn awi. Taity poana'mĩ'ia etee 'gã 'ã erekou. Taity poyjuu rereko re amunipo 'ã 'gã nujãnarũi. Nan tee futat jane jarepoia jaremete'arukaaw awi. Jaremete'aawa mama'e tywer awi jarepoire'em ire nipo jane jarejemogyawe'em Jarejuwarete 'ga remifutar imũ. A'eramũ ki jane jarejorypawe'emamũ futat jarejemogyau,

² jarejea mĩina Jejui 'ga ree etee futat. 'Ga futat 'Uwarete 'ga rerowiarukaa jane upe rakue. 'Ga futat nipo jane rerawau 'Uwarete 'ga pyri anure. A'eramũ ki jane jarejemogypygy wywapiaw 'ga ree. Sã'ã pe apoara 'ga oa tenune pe resaukara. Nan tee futat Jejui 'ga ruri wyw pe 'Uwarete 'ga rape resaukaa janee rakue. 'Ypeywar are amanũaw ipe 'ga awawake'ema ojepyriwara 'gã 'e are rakue. "Moroka'miga 'ga futat ra'e. Sã'ã 'gã 'ga juka 'ypeywar are" 'e are 'ga awawake'ema rakue. "'Gã tywera mepyawamũ te je manũ 'ypeywar are. A'ere temanũ re je oi tejewya Tejuwarete 'ga pyri nũ", 'jau etee 'ga aku'iramũ ee. A'eramũ 'ga, amanũ re, oferapa rai'i nũ. A'eramũ 'ga awau ojeupia 'Uwarete 'ga pyri. Peu futat 'ga wapyka 'ũina 'Uwarete 'ga yse katy. "Aapopap je eneremifutara", 'jau 'ga 'ũina 'Uwarete 'ga upe. A'eramũ 'ga 'ga muapygukaa ajakwatawa katy, 'ga mĩina 'wyriaramũ oje'jawe.

³ Pẽnea'ar iki 'ga ree. 'Ga rerowiare'ema 'gã 'ã wereko tywerete agawewi Jejui 'ga rakue. A'etea 'ã 'ga nopoiri futari 'Uwarete 'ga remifutara apo awi rakue. A'eramũ ki pẽ pejejea'aramũ 'ga ree. 'Ga ree pejejea'ar ire nipo pẽ pejejorypawe'emamũ 'ga rerowiare'ema 'gã pejereko tyweramũ. A'eramũ nipo pejepoire'ema 'ga rerowiar awi.

⁴ Jejui 'ga 'ã ia'wyre'ema 'gã ijukau rakue. 'Ga rerowiaara 'gã amũ nanẽ nipo 'gã iapisau nũ. A'ere 'gã nepẽ apisi we, "pepoit pejetywer awi" ojeupe pẽ'eramũ.

⁵ Pemoka'jam sip pejejeupe Jarejuwarete 'ga 'eawera? Pẽ maku'iwamũ 'ga 'jau wa'yramũ pẽ nupe:

"Peje'eganuw iki Jarejuwarete 'ga pejejeupe 'ga je'eg wywrafe'nĩnamũ.

Pẽku'ipap kasi pejejeupe 'ga je'eg are ne.

⁶ Wemifutaramũ 'ga pẽ mu'akwaawi mama'e apo are.

Sã'ã kunumã mama'e tywera apoa.

A'e are 'ã tuwa 'ga kunumũ atũina tãmẽjẽ mama'e tywera apo awi.

Nan tee futat Janeruwarete 'ga wa'yra 'gã mosi tãmẽjẽ 'gã nemiapo tywer awi",

'jau 'ga amũ ikwasiaa ka'aran are rakue.

⁷ A'eramũ ki pejemomoga etee futat. Oje'ega pẽ enuwe'emamũ nipo 'ga mama'eay resaukari pẽ nupe, pẽjemogy esage are pẽ mu'jawamũ. A'eramũ ki pẽ pejejuagamũ jupe. Namu'akwaawi 'ga wa'yre'ema 'gã 'gã jemogy esage are. Sã'ã ae wa'yra etee imu'akwaawa 'gã jemogy esage are. Nan tee futat Janeruwarete 'ga wa'yramũ etee jane mu'akwaapa janejemogy esage are.

⁸ Jareja'yre'ema 'gã jane nimu'akwaawi 'gã jemogy esage are. Nan tee futat Janeruwarete 'ga namu'akwaawi wa'yre'ema 'gã. Pejemogy esage are 'ga pejemu'akwaawe'em ire amunipo 'ã pẽ na'ga ra'yra rui. Wa'yra 'gã etee te 'ga amu'akwaap wemifutar are.

⁹ Jaremu'akwaaw ire jane 'ã jarejuwa 'gã je'ega renupa jarejemogyau. Jarejuwarete 'ga je'ega taetu ki sienup. Oje'ega renuw ire 'ga jane rerooi ojepyri anure.

¹⁰ Sã'ã janewuja'ia we futat janeruwa 'gã jane mu'akwaawa janejemogy esage are wemifutar imũ etee futat. Nan tee futat Janeruwarete 'ga jane mu'akwaawi janejemogy esage are. "Teje'jawe je 'gã mogyi", 'jau 'ga ojeupe. A'eramũ nipo jane jarejemogyau 'ga 'jawe futat.

¹¹ Janeremiapo tywer are 'ga jaremu'akwaaw ire jare'arasigamũ jarejemogyau ee. Jareku'ie'emamũ nia'wyri rẽwẽjẽmĩ janee. A'ere 'gã neapyoramũ ee Jarejuwarete 'ga remimu'akwaawera 'gã ajemogyau esage. Opy'ata'waramũ nanẽ nipo 'ga ajemogyau.

'Gã mu'akwaapawet

- ¹² A'eramũ ki pëë pejemogypygy ywyapiau Jarejuwarete 'ga ree, pejeku'iramũ 'ga ree.
- ¹³ Pejemogy esage ki Jarejuwarete 'ga upe. A'eramũ 'ga rerowiaraira para 'gã amũ pë nesaka, ojemu'akwaapa 'ga rerowiar are pëë 'jawe.
- ¹⁴ Pëpy'ata'wa pëë pejemogyau pejejaupe. Pejemogy esage ki pejejopype. Jarejuwarete 'ga remifutar imũ pejemogy esage'em ire nipo pëë pejewawe'em 'ga pyri anure. A'eramũ ki pëë pejemogyau esage 'ga remifutar imũ.
- ¹⁵ Pejomomoirukat kasi Jarejuwarete 'ga rerowiar awi ne. Pejejuka esage ki pejejeue. Ka'a rowa 'jawe kasi pejemogy ne. Sã'ã ka'a rowa kumi mote'ara etee ipype ae imono re. Nan kasi pejemogy ne. Jarejuwarete 'ga pëë mũ erowiar wwyapie'em ire nipo pëë 'ga rerowiarukare'ema 'gã amũ nupe.
- ¹⁶ Pejopoar iki mama'e tywera apoe'em are. Kũima'e 'ga nipo akou kũjã mũ ree. A'eramũ ki pëë 'ga mu'akwaapa ee. Kũjã ëë mũ nipo akou omene'em are. A'eramũ pëë ëë mu'akwaapa ee. Mama'e tywera kasi peapoukat pejejaupe ne. Esau 'ga 'jawerimũ nanë kasi pejemogy ne. U'ar ypy ma'e 'ga poromũ rakue. A'eramũ 'ga 'uwa 'ga manũ re akouramet 'uwa 'ga rekwawer ipe rakue. A'ere 'ga kumana pyu 'ga jemojopy'ruĩ wewirera 'ga upe. A'eramũ 'ga rewirera 'ga akou u'ar ypy ma'e 'jawe 'ga py'rau rakue. Jarejuwarete 'ga Esau 'ga ipojeupe'ema rakue. Ojeupe Jarejuwarete 'ga remimuramer are 'ga ojemogyppyke'ema. A'eramũ 'ga ojemojopy'rau kumana are.
- ¹⁷ Anure Esau 'ga u'arasigamũ omojopy'ruawer are numiamũ. A'ere 'ga ruwa 'ga 'ga ma'eramera monoi 'ga rewirera 'ga upe rakue. "Jarejuwarete 'ga upe eje'ega emono je ree", 'jau 'ga 'uwa 'ga upe numiamũ. A'ere 'ga ruwa 'ga mononoi oje'ega Jarejuwarete 'ga upe 'ga ree. A'eramũ Esau 'ga ajaa'wau ee. Kumana are omojopy'ruawera 'ga 'uwa 'ga imojopy'rawarũme'em 'ga upe.
- ¹⁸ Jareypy 'gã 'jawe kasi pëë ne. Ymã janepygy 'gã, Israeu juapyrera 'gã owaëma wemiesaga upe rakue, Sinai 'jawa wwytyra upe rakue. A'ere 'gã kyjei etee jui rakue. Tata 'ua 'upa wwytyra 'arimũ. 'Ara oypyttunaiwamũ 'gã nupe. Wwyruua 'ua 'gã nupe.
- ¹⁹ Jumi'auu py 'jawewara 'gã enupa. A'e pype Janeruwarete 'ga oje'ega 'gã nupe rakue. A'eramũ 'gã 'jau rakue: "Ereje'eg awi oree, ki Ku'jyp", 'jau 'gã 'ga upe rakue.
- ²⁰ Nafutari 'gã 'ga 'eawera, "Pewyk kasi wwytyr are ne. Ee 'gã amũ wygamũ ki pejuka tãmëjê 'ga ita pyu. Wyra ee iwgy ire miamũ pëë ijukau ita pyu" 'ga 'e are 'gã oporenuwewere'emamũ. A'eramũ 'gã 'jau Jarejuwarete 'ga upe: "Ereje'eg awi oree, ki Ku'jyp", 'jau 'gã 'ga upe.
- ²¹ Mama'e pojya Janeruwarete 'ga esaukaa 'gã nupe rakue. Esakawe Israeu juapyrera 'gã okyjau ajemogyau. Wwytyt, tata, ppytunaip, wwyruu, jumi'a py 'jawewat, Janeruwarete 'ga je'eg. Mïmera 'gã moyyita 'gã mogyau rakue. Moisesi 'ga miamũ futat oyyita jui rakue. Nan ymã Janeruwarete 'ga je'egi 'gã nupe rakue, Sinai 'jawa upe 'gã waëmamũ rakue.
- ²² A'ere jane Jeju 'ga rerowiaaramũ Jarejuwarete 'ga rupawa pype oseayy ma'e 'jawe tãmëjê jane porogyta 'ga upe. Jarejuwarete 'ga rupawa upe jane 'jau Sião 'jau. A'eramũ jane Sião 'jawa wwytyra upe owaëmayay ma'e 'jawe tãmëjê. Jarejuwarete 'ga 'wyrarete pe jarewau, Okoeteete ma'e 'ga 'wyrarete pe. Jerusarega 'jawewar ipe jarewau, ywag ipe 'up ma'e pe. Peu futat kwaiwete ywagipewara 'gã jemogyi. Aku'iramũ 'gã ajemogyau.
- ²³ Peu futat Janeruwarete 'ga remiayuw ymanera 'gã ajemogyau. Jeju 'ga rerowiaaramũ janerera 'upa ojekwasiaa Jarejuwarete 'ga ka'aran are, ywag ipe 'up ma'e are. A'eramũ nipo jane jareje'aa pãwë etee futat 'ga rerowiaar ymanera 'gã nee. Jarejuwarete 'ga pyri jarejemogyau jareporogytau 'ga upe. Anure nipo 'ga jane majatykau wowase najuejue etee futat. A'eramũ nipo 'ga jane mepyau janeremiapofer are. Mama'e esage apoara 'gã 'ga imepyau 'gã nemiapo esage are. Mama'e tywera apoara 'gã nanë nipo 'ga imepyau 'gã nemiapo tywer are, 'gã nipo 'ga imonou mama'eukwaawa rapyaw ipe. Ymãwarera 'gã amũ nipo mama'e apou Jarejuwarete 'ga remifutar imũ etee futat rakue. A'eramũ Janeruwarete 'ga 'gã katu'okapap 'gã manũnamũ. 'Gã nee nanë nipo jarejejatykau nũ.
- ²⁴ Jeju 'ga ree taetu nipo jareje'aa pãwëjê etee futat. 'Ga ree Janeruwarete 'ga oje'eg yau mua janee. Ymãwarera 'gã nupe Janeruwarete 'ga 'jau rakue: "Teje'ega renupara 'gã etee je amogy tejemiayuwamũ", 'jau 'ga rakue. "Jeje'ega renupare'ema 'gã ki wyra tueroo mainana 'ga upe. A'eramũ 'ga ijukau wy monykya wyra rapyaw are. A'eramũ 'ga iapyau 'gã tywera mepyau jee", 'jau 'ga 'gã nupe rakue. A'ere 'ga 'awamũ oje'eg yau muri janee. "Jera'ya 'ga amanũ pëtywera mepyau jee. A'eramũ je pë mogyau tejemiayuwamũ, teja'ya 'ga pë erowiaramũ", 'jau 'ga janee. Jeju 'ga jukaaw ipe 'gã 'ga ry reko'woka janee. A'e are Janeruwarete 'ga janetywera moia jane wi, wa'ya 'ga rerowiaaramũ.
- Ymã Kaĩ 'ga wewirera 'ga jukau rakue, Apeu 'ga jukau rakue. A'eramũ 'ga ry jeko'woka wwyu rakue. A'e resaka Janeruwarete 'ga 'jau ojeupe: "Wewirera 'ga Kaĩ 'ga ajuka. A'eramũ je Kaĩ 'ga rerekou tywea 'ga ree 'awamũ", 'jau 'ga ojeupe rakue. A'ere 'ga wa'ya 'ga rerekou

tywerukari 'gā nupe jane ree. A'eramū 'ga 'ga jukaukaa 'gā nupe janetywera mepyawamū. "Teja'yra 'ga je amono wyw je 'gā tywera mepyawamū. A'eramū je 'ga rerowiaara 'gā nerekou tywere'em 'gā tywer are", 'jau 'ga rakue. A'eramū jane 'jau jupe: "Esage futat Jarejuwarete 'ga remiapoā", 'jau jane jupe.

²⁵ A'eramū ki pēē Jarejuwarete 'ga je'ega renupa. Iapyae'ema 'jawe kasi pejemogy ne. Ymā Moisesi 'ga Jarejuwarete 'ga je'ega mome'ui agawewi janepy 'gā nupe rakue. A'etea 'gā 'ga je'ega renupare'ema 'jawe etee ajemogy rakue. A'eramū Janeruwarete 'ga 'gā nerekou tyweaete oje'ega renuwe'emamū rakue. 'Awamū 'ā Janeruwarete 'ga oje'ega mua ywag awi jatee nū. A'eramū nipo 'ga oje'ega jane enuwe'emamū jane rerekou tyweaete ymāwarera 'gā apyrapa.

²⁶ Moisesi 'ga upe oje'egaw ipe Janeruwarete 'ga wyw moyyita rakue. A'ere 'ga 'awamū 'ga 'i jatee: "Anure nipo je wyw moyyju'jawi nū. A'ea te nipo ywaga reewe oyyi", 'jau 'ga jatee.

²⁷ A'eramū "oyyi ma'ea teepap ma'erama futat", 'jau 'ga jatee. A'eramū jane jarejeapy-oramū 'ga remiaporam are. A'ere 'ga remiapofera oyyi ma'ea teepap ma'erama futat. A'eramū iyyje'ema nateepap ma'erama rūi futat.

²⁸ A'eramū ki jane Jarejuwarete 'ga muorypa. Anure 'ga reni 'wyriarareteramū jatee. Nateepawī futari 'ga 'wyriarareteramū jane upe 'ūi re. Jane nanē nipo 'ga jane mogyau 'wyriaramū ojeypyri. A'eramū ki jane 'ga muorypa ee. 'Ga pojeupa jarejemogyau. A'eramū 'ga wemifutar imū jane mama'e apo re aku'iramū akou jane ree.

²⁹ A'eramū ki jane 'ga mamara'neukare'ema jarejee. Tata 'jawe Janeruwarete 'ga. Sā'ā tata mama'e mateepawa. Nan tee futat Janeruwarete 'ga oje'ega renupare'ema 'gā momawi. A'eramū ki pejekiyaup mama'e tywera apo awi.

13

Simaku'i Jarejuwarete 'ga jarejee

¹ Pēporomutat ki pejejeuee pejemogyau. Kristu 'ga 'ā pēē erowiaa najuejue etee futat. A'eramū pēē pejemogyau pejejopytuna 'jawewaramū futat. A'eramū ki pēē pejepota'wa esageramū pejejeue.

² Pejemiesage'ema 'gā miamū pēē imua pejeje'wyr ipe. Pejejejukau esage 'gā nee. Maranamū nipo pēnemiesage'ema 'ga nakūima'e arūi. Ywagipewara 'gā nipo. Sā'ā ymā 'gā amū ywagipewara 'gā amū mura oje'wyr ipe rakue. Nokwaawi agawewi 'gā 'gā nakue. A'eramū ki pēē nanē pejemiesage'ema 'gā mua pejeje'wyr ipe pejejeupe 'gā waēmamū.

³ Moromunepawa pypewara 'gā nee nanē pejejea'aramū nū. Pēē nanē amunipo 'ā moromunepawa pype peje'ama. Pēnea'at mama'e esagea pejejeupe 'gā iapo are. A'eramū ki pēē mama'e esage apou 'gā nupe.

Ereko tyweripyra 'gā nee nanē pejejea'aramū pejemogyau nū. Mama'e esagea ki peapo 'gā nupe. Pejereko tyweramū nipo pēē nanē 'gā nemiapo esagea pefutat nū. A'eramū ki pēē mama'e esage apou 'gā nupe.

⁴ Pēnemirekoa esage futat. Kūjānamū pēmenara nanē esage futat nū. A'eramū pēē pejemireko re pejekou pejemireko are etee futat. Kūjānamū pejemenar ire nanē pejekou pejemen are etee futat. Ojeteewaramū nanē pēē pejekowe'em 'gā amū nee nū. Kasi a'e pe anure Janeruwarete 'ga pē nerekou tywer ire.

⁵ Pejeja'aranūū kwaja upe nanē pejejemote'arukare'ema nū. Pejejekōēājamū pejemir-ereko mama'e are etee futat. "Napoiri futari je pē nui. Najepe'ai nanē je pē nui nū", 'jau Janeruwarete 'ga jatee.

⁶ A'eramū ki jane jarekyjawe'em.

'Jarejararete 'ga je poat.

A'eramū je tekyjawe'em tejereko tywera 'gā nui.

Je ree 'ga jejuka re maran 'ga amū je rereko tyweretei nū",

'jau je tejee. A'eramū je tekyjawe'em.

⁷ Pejejea'aramū peje'wyriar ypy 'gā nee. Jarejuwarete 'ga je'ega 'gā 'ā omome'u pē nupe rai'i. A'eramū ki pejejea'aramū 'gā nee. 'Gā neko esageawer are pejejea'aramū pejemogyau. Amanūme'ēwe 'gā ojemogypygy ywyapiau Jarejuwarete 'ga ree rai'i. A'eramū ki pēē pejemogypygyka 'ga ree 'gā 'jawerimū.

⁸ Jejuī Kristu 'ga ojesowo'gōke'ema futat. A'efer ipe etee futat 'ga rekoi. Nojesowo'gōgi futari 'ga.

⁹ Perowiat kasi mama'e amuteea ne. 'Gā amū nipo 'gā mu'jau mama'e sigaty are, i'upyre'em are. "Pejea'gu ki i'upyre'em awi", 'jau nipo 'gā 'gā nupe. A'ere 'gā nemimu'efera napē muesagei Jarejuwarete 'ga upe. Kristu 'ga mome'ua etee futar iki perowiat. 'Ga mome'ua te jane muesage Jarejuwarete 'ga upe, 'ga rerowiaaramū.

¹⁰ Ymāwareramū ojeupe judeuramū jane jarejeymawa rerooramū mainana 'gā miaro'o ape 'ui futari rakue. A'ere nanarūi 'awamū. Jejuī 'ga ako amanūmū janetywera mepyawamū ai'i. A'eramū ae Jejuī 'ga rerowiaaramū weymawa rerawau'jape'ema mainana 'gā nupe. Jejuī 'ga rerowiaaramū ae 'ga muorywi otywera moia'wer are. A'eramū ki jane jarejeateeramū ymāwarer awi. Ymāwarer awi jarejeatee'emamū jane poiri futari Jejuī 'ga rerowiar awi.

¹¹ Mainana 'wryriararete 'ga wyra wy rerawau Jarejuwarete 'ga mogytaaw ipe, 'ga rupawarete pype imonykya 'ga upe 'gā tywera mepya. A'ere 'gā wyra reumera rerawau enuēma amunaw awi. Amunawa atykupe katy 'gā erawau iapyau rakue.

¹² Nan tee futat Jejuī 'ga nanē amanūme'em amunawa pype rakue. 'Ga juka enune 'gā 'ga rerooi enuēma amunaw awi. Peu futat 'gā 'ga kutuka 'ga monou imu'ama 'ypepywar are. Peu futat 'ga amanūmū janetywera mepyawamū rakue. 'Ga kutugamū 'ga ry ojeko'woka 'ga wi rakue. Aiporamū futat 'ga owy reko'wogukaa janetywer awi jane pireitawamū.

¹³ Jejuī 'ga jukaara 'gā nopoiri futari ymāwarer awi. "Jarejuwarete 'ga je'eg ymaner imū etee futat jane mama'e apoi", 'jau 'gā ajaupe. A'eramū 'gā Jejuī 'ga rerawau enuēma amunaw awi, 'ga rerekou tyweaete 'ga rerekoemā pype 'gā 'ga jukau. A'eramū ki jane jarepoia ymāwarer awi. Jejuī 'ga rerowiar awi kasi sapoir ine. 'Ga 'jawe futat nipo 'gā jane rereko tyweretei 'ga rerowiar are. 'Ga 'jawe futat nipo 'gā jane pe'au ojewi. Tene ki 'gā jane rereko tyweri. Tene 'gā jane pē'ai ojewi. A'ere kasi pepoit futat 'ga rerowiar awi ne. 'Ga ree 'gā jarejereko tyweramū jane jarejuagamū 'ga 'jawerimū etee futat.

¹⁴ Anure nipo 'auwara janerupawa ateepawamū. A'eramū jane jareoweramū ywag ipe Jarejuwarete 'ga pyri. Peu jane oi nakwaparimū ete rūi jarejemogyau. Peuwara janerupawa nateepawi futari.

¹⁵ A'eramū ki jane Jarejuwarete 'ga muorypa ee. Jejuī Kristu 'ga jane erowiaa jarejemogyau. A'eramū 'ga jane katu'oka jane mogyau wemiayuwamū. A'eramū jane Jarejuwarete 'ga muorypa ee. Judeu 'gā 'ā weymawa jukau iapyau Jarejuwarete 'ga muorypawamū rakue. A'ere jane nanarūi 'ga muorywi. Jareje'eg imū te jane 'ga muorywi. "Ene 'ā ore'wryriararetea. Eja'yra 'ga erejukaukat 'gā nupe, oretywera mepyawamū. A'eramū ore ene muorypa ee", 'jau ki jane 'ga upe, 'ga muorypa ee.

¹⁶ Jarejuee jarejejuka esage re nanē jane 'ga muorypa jarejemogyau nū. Jarejopoaramū nanē jane 'ga muorypa ee nū. A'eramū ki pejepoire'ema pejejuee pejeporomutar awi.

¹⁷ Pē'wryriara 'gā 'ā ojejuka esage pē nee, pē mu'jau Jarejuwarete 'ga remifutar are. A'eramū ki pēē 'gā je'ega renupa te. Mama'ea pēē iapou pejejeupe 'ga 'eawer imū etee. Anure nipo 'gā pē nee opota'waawera mome'ui Jarejuwarete 'ga upe. A'ere 'gā opota'wa esageramū pē nee. A'eramū ki pēē 'gā je'ega renupa. Oje'ega pēē enuw ire 'ga mama'e apoi wekōēajamū. Kasi 'gā oje'ega renuwe'emamū 'gā 'arasigamū akou pē nee ne. A'eramū nipo pēē nanē peje'arasigamū pejejemogyau nū. Janeruwarete 'ga nipo pē nerekou tyweaete ee. A'eramū nipo pēē peje'arasigamū pejejemogyau.

¹⁸ Pejeje'ega ki pemono Jarejuwarete 'ga upe je ree pejeojere'emamū. 'Ga remifutar imū etee futat 'ā jeparuapoweramū mama'e are. A'eramū je tepy'a'wryre'emamū tekou tejemiapofer are.

¹⁹ 'Awamū je 'i pē nupe: Pejeje'ega ki pemono Jarejuwarete 'ga upe je ree. "Emurukat 'ga oree", 'jau ki pēē 'ga upe je ree. A'eramū nipo 'ga je monou pē pyri kamēsīete.

²⁰ Sā'ā karupa'mī are omaenun ma'e 'gā maenun esagea karupa'mī are. Nan tee futat Janejararete 'ga, Jejuī 'ga maenun esagei wemiayuw are. Jane ree 'ga jejukaukari 'gā nupe, owy reko'wogukari 'gā nupe. A'ere 'ā Janeruwarete 'ga 'ga moferawi rai'i nū. A'eramū Janeruwarete 'ga Jejuī 'ga jane erowiarāmū janetywera moia jane wi. "Teja'yra 'ga manū re je 'ga rerowiaara 'gā katu'ogi, 'gā tywera moia 'gā nui, 'gā mogyau tejemiayuwamū", 'jau Janeruwarete 'ga rakue. Aipoa 'ga je'eg yaua futat. Jejuī 'ga moferapara 'ga jane mopy'ata'wara.

²¹ 'Ga upe je teje'ega monoi pē nee. "Mama'e esage apoara 'gā nupe emono 'gā nemifutara. A'eramū 'gā mama'e esage etee iapou eneremifutar imū. 'Gā poarukaa Jejuī Kristu 'ga upe. Jejuī 'ga opoaramū nipo 'gā mama'e apoi eneremifutar imū etee futat. A'eramū nipo ene eku'iramū 'gā nee", 'jau je 'ga upe pē nee. A'eramū ki jane Jejuī Kristu 'ga muorypa jareojere'emamū, 'jau je pē nupe.

²² Pēē jerewirera 'jawe jee. Kūjāmeramū pēē pejejemogyau jerenyra 'jawe jee. A'eramū je teje'ega kwasiaa ka'aran are pē maku'iawamū. Natuwiiuu rūi je ikwasiari pē nupe. Ka'aran kwasia'ria te je aapo imonou pē nupe. A'eramū ki pēē jeje'ega renupa.

²³ Timoteo 'ga Jejuī 'ga werowiat jane 'jawe. A'eramū 'ga akou janerewirera 'jawe janee. A'eramū je 'ga mome'wau pē nupe. 'Awamue 'gā 'ga renuēma moromunepaw awi rai'i. Teoe'emaue 'ga rur ire nipo je 'ga rerooi tejeupi pē pyri.

²⁴ Teje'ega je amono Jejui 'ga rerowiaara 'gã 'wyrriara 'gã nupe, 'gã futaa. Jarejuwarete 'ga remiayuwa 'gã nupe najuejue etee futat je teje'ega monoi 'gã futaa. Itari ywy awi janerewirera 'gã amũ nuri rakue. 'Gã nanẽ oje'ega monou pẽ nupe, pẽ futaa nũ.

²⁵ Jarejuwarete 'ga resagea pẽ nerekoa je afutat.
Kweramũ etee jeje'ega.

Tiago

Tiago 'ga 'awa ka'arana kwasiaa imonou Jarejuwarete 'ga remiayuwa 'gā nupe, okwasi'o ma'e 'gā nupe. Tiago 'ga Jejuu 'ga rewirera. (Maku 6.3) 'Ga feraw ire Tiago 'ga Jejuu 'ga rerowiaa. A'eramū 'ga 'ūina 'wyrriaramū Jejuu 'ga rerowiaara 'gā nupe, Jerusareg ipewara 'gā nupe. (Atos 21.18)

Jejuu 'ga rerowiare'ema 'gā 'ga rerowiaara 'gā nerekou tyweaete rakue. A'eramū 'gā awau oka'ama Jerusareg awi. Okwasi'wau 'gā awau kwe pe. A'eramū Tiago 'ga ka'arana kwasiaa imonou 'gā nupe. Na'ga etee rūi ikwasiaa. Janeruwarete 'ga 'Agesagea ikwasiarukaa 'ga upe. A'eramū 'ga ikwasiaa imonou okwasi'o ma'e 'gā nupe rakue.

¹ Je Tiagoramū ka'aran akwasiat pē nupe. Je 'ā Jarejuwarete 'ga upe oporowyky ma'ea. Jarejararete 'ga, Jejuu Kristu 'ga porowyky apoaramū nanē je 'ā nū. A'eramū je ka'arana monou ikwasiaa pē nupe Jarejuwarete 'ga rerowiaaramū. Kwe pe okwasi'o ma'eramū pē nupe je ka'arana kwasiari imonou. Jaruete te pejemogy? a'e je pē nupe. Jerewirera 'jawe pejemogy jee, kūjāmeramū pēē jerenyra 'jawe 'jau.

Sirowiat Jarejuwarete 'ga

² Pejejeupe mama'eay jesaukaramū kasi pē'arasig pejejemogyau ne. Janeruwarete 'ga mama'eaya pē nupe ijeapoa okwaap. A'eramū pēē pejeku'iramū etee pejejemogyau pejejemogyppyyka etee Jarejuwarete 'ga ree.

³ "A'jea futat sipo 'gā jemogyppyygi je ree?" e'i te 'ga, mīnamū mama'eay resaukaa ae upe. A'eramū pēē pejejemogyppyyka etee futat 'ga ree. Ojee pē mojemogyppyygukaawamū te 'ga mama'eay resaukari pē nupe.

⁴ A'eramū pēē pejejemogyppyyka etee futat pejejemogyau 'ga ree pejeojere'emamū futat. Nanuara tee Janeruwarete 'ga afutat. Ojee pejemogyppyyg awi peojere'ema te 'ga afutat. Ojee ae ojemogyppyygamū 'ga ae mu'akwaawi mama'e are. A'eramū ae ajemogyau esage Jarejuwarete 'ga upe. A'eramū mama'e tywera otywe'emamū ae pype. Nanuara tee Janeruwarete 'ga afutat.

⁵ Jarejuwarete 'ga remifutar are pejejeapyoe'emamū pejeje'ega 'ga upe: "Ku'jyp. Nakwaawi ete je. Najereapyoi ete je eneremifutar are. A'eramū ene je mueapyou jereko esage are", 'jau ki pēē 'ga upe. A'eramū 'ga pē mu'akwaapa ee. Nije'eg wywrafena'uweri 'ga janee. Naoje'eg wywrafen imū rūi 'ga jane mu'e'i ojeupe ae je'egamū.

⁶⁻⁸ A'eramū pēē "je mu'akwaaw ape" 'ga upe 'e re pejejemogyppyyka etee 'ga ree. "Maran sipo 'ga je mu'akwaawi 'wei", pe'je kasi ne. Aipo 'jaramū ae 'y 'jawe. Sā'ā ywytua 'y pya ko katy. A'eramū 'ā 'y ryjuapi rerawau kwe katy. A'ere 'ā ipyau kwe katy nū. A'eramū 'ā erua ko katy nū. Nan ae Jarejuwarete 'ga rerowiaraiparamū. Werowiare'emamū 'ga, "mama'e mū emut jee", ojeupe pēē 'eramū, 'ga namura'uweri pē nupe ojeupe pēnemienūjā. A'eramū pēē, "mama'e mū emut jee", 'ga upe 'jau, 'ga ree etee futat pejejemogyppyyka pejejemogyau. A'eramū te 'ga iapoi pē nupe, a'jea futat ojee pejemogyppyygamū.

Janeku'i jane Jarejuwarete 'ga ree

⁹ Jarejuwarete 'ga ree ojemogyppyyk ma'e 'gā aku'iramū ajemogyau. Nitywi agawewi futat 'gā mama'ea. A'etea 'gā iku'iete futat ajemogyau. "Ku'jywa 'ga te nā'ā Jeruwaretea re'ā", 'jau ete 'gā ajemogyau. Okaraemā kwai re taetu amusipo 'ā 'gā ku'iramū okaraemā are etee? Naani. Jarejuwarete 'ga ree etee 'gā ku'ireteramū.

¹⁰⁻¹¹ Amumera 'gā nipo Janeruwarete 'ga rerowiaara 'gā okaraemā kwajamū. A'eramū sipo aipo 'gā okaraemā are aku'iramū? Naani. Jarejuwarete 'ga ree te 'gā ku'iramū. Okaraemā ojewi teepawamū sipo 'ga 'arasigamū okaraemā are? Naani. Jarejuwarete 'ga ree tee 'gā jemogyppyygi ikaraemāe'ema 'gā 'jawe futat. Nakaraemā are rūi 'gā jemogyppyygi. Ikaraemā kwai ma'e 'gā werowiat wejue Ku'jywa 'ga. A'eramū 'ga ikaraemāe'ema 'ga 'jawe etee futat akou aku'iramū. Sā'ā 'ywytyra, jū mewara. Kwaraya imom'ijaga imototoka. Nan tee futat ika'aranūū kwai ma'e 'gā. A'eramū pēē ika'aranūū kwai ma'eramū pejeka'aranūū are pejejerowiaraipe'ema. Jarejuwarete 'ga ree te ki pejerowiar ete. Ka'aranūū are ae rorypawera teepaw etee ae wī. Amanūmū erujewi jūi. To. A'eramū futat ateeepawamū aerorywa. A'ere Jarejuwarete 'ga ree aerorywa te nateepawa'uweri.

Mama'eaya ojesaukat janee

¹² Mama'eay upe aeruagamū a'jea futat werowiar awi ae poire'emamū nipo Janeruwarete 'ga 'jau janee: "A'jea futat je rerowiat pejepe ra'e. A'eramū pēē pejejuu 'au je pyri ywag ipe. Nakwaparimū warāu rūi futat pejejemogyau 'au je pyri", 'jau nipo 'ga janee. Aipo e'i futat 'ga janee afutaaramū najuejue etee futat. Aipo are jarejea'aramū jane jareku'iramū jarejemogyau 'awamū.

¹³ A'ere kasi mama'e tywer are pejeparuapoweramū pekwa ekoete Jarejuwarete 'ga ne. 'Janeruwarete 'ga mama'eay wesaukat jee. A'eramū 'ga mama'e tywera apoukaa jee", pe'je kasi ne. Niparuapowera'uweri 'ga mama'e tywer are. Mama'e tywera peapo, ne'ia'uweri 'ga janee.

¹⁴ Ae tee futat mama'e tywera wapo ekoete. Mama'e tywera peapo, naa'erāu rūi ae iapoi. Ae tee futat ea'at ekoete mama'e tywera apo are. A'eramū ae nanuaramū "'ga te mama'e tywera wapoukat jee", 'jawe'em.

¹⁵ Gā tee futat wapo mama'e tywera. A'eramū 'ga wemifutar imū etee futat mama'e tywera apou. A'ere ae mama'e tywera apoaramū ako re nooa'uweri Jarejuwarete 'ga pyri. Mama'e tywera apoara 'gā nupe Janeruwarete 'ga "'au pejot je pyri", ne'ia'uweri. "Muku pekwap pejemogyau je wi nakamēsi rūi futat. Ywawuje futat peo muku je wi", 'jau nipo Janeruwarete 'ga mama'e tywera apoara 'gā nupe.

¹⁶ Kunumimet, kūjāmet. Jepyntuna 'jawe pejemogy jee. Jeporomutat je pē nee. A'eramū je 'jau pē nupe: "Pejemorytee kasi ne. Janeruwarete 'ga mama'eay wesaukat jee. A'eramū 'ga mama'e tywera apoukaa jee ai'i" 'jara 'ga i'me te ajemogyau. Na'ga rūi mama'e tywera wapoukat pē nupe.

¹⁷ A'jea futar iki pēnoryp Jarejuwarete 'ga ree. 'Ga 'ā mama'e esagea juejue amut janee. 'Ga futat 'ā 'ara wapo rakue. Kwat, jay, jaytata. 'Ara 'ā 'ga iapou janee rakue. Ku'emamū 'ā kwara opoa janee. A'ere 'ā okaaruwamū kwara osou nū. A'ere 'ā Janeruwarete 'ga nanarūi. Nateepawa'uweri 'ga 'ūina jane wi. Nooa'uweri 'ga jane wi. Janeruwarete 'ga esage esage futat. Nitywi futari mama'e tywera 'ga ree.

¹⁸ Wemifutar imū futat 'ga 'ā ae apou rakue. A'eramū 'ga a'jea futat oje'ega rerowiaaramū jane mogyau wa'yramū. Jane ree 'ga jemuaēmi. A'eramū 'ga a'eramū oje'ega rerowiaaramū jane mogyau wa'yramū.

Janeruwarete 'ga remiayuwarete

¹⁹ Kunumimet, kūjāmet. Peapyaka ki je ree. Pejejeupe 'gā amū porogytaramū ki peenuw etee ra'ne 'gā pejejupa. Kamēšlete kasi 'ga peje'egawar ine. Pejemara'ne'emamū kamēšlete 'gā nee ne.

²⁰ Ae mara'nea naJaneruwarete 'ga remifutara rūi. A'eramū pēē pejekowe'em tesirūgatu 'ga upe. Ae mara'nea nuapoarūi Jarejuwarete 'ga remifutara.

²¹ A'eramū ki pēē mama'e tesirū apowe'em. Mama'e tesirū apo awi pejejoia. Nanuara te Janeruwarete 'ga afutat. A'eramū pēē Jarejuwarete 'ga remifutar imū etee futat mama'e apou. 'Ga je'eg are tee ki peapyaka pejemogyau. A'e are pejejea'aramū. A'eramū futat pejejeapyoramū ee. 'Ga rerowiaa nanē pejemogyau nū. 'Ga je'eg are eapyo ma'eramū jane 'ga remifutara kwaawi. Oporogyta jane erowiaaramū 'ga jane katu'ogi jane mogyau wemiayuwamū. A'eramū nipo 'ga anure jane rerawau ywag ipe jane mogyau ojeypyri futat.

²² 'Ga je'ega renuparamū pēē pejemoryteewe'em. A'jea futat pēē pejejea m'ina 'ga je'eg are. A'jea futat pejejeapyoramū 'ga je'eg are. Amumeramū te nipo ajee 'ga je'ega pekwaap futat tee. A'ere nipo nepeapoī mama'ea 'ga je'eg imū etee. A'eramū nipo pēē pejemoryteeu pejemogyau. Jarejuwarete 'ga porogyta renupar ekoeteara 'gā nuapoī mama'ea Jarejuwarete 'ga je'eg imū.

²³⁻²⁴ Sā'ā ae u'aga resaga weraweraw are. A'ere 'ā ae ojesag ire awau ojepe'au jui. A'eramū futat 'ā ae ojemoka'jama nū. Nan ae Jarejuwarete 'ga porogyta renuwaiparamū. Enuwi futari numiamū. A'ere 'gā nuerowiari te. Nuapoī 'gā mama'ea 'ga je'eg imū. Naea'aru'jawi 'gā 'ga porogytafer are.

²⁵ A'ere nipo amumera 'gā Jarejuwarete 'ga porogyta renuwi katu katu futat. Oporogyta renupara 'gā Janeruwarete 'ga ikatu'oka. A'eramū ikatu'ogipyrrera 'gā wea'aramū ajemogyau 'ga je'eg are au'jeteramū. Eapyo 'gā ajemogyau 'ga porogytafer are. A'eramū 'gā mama'e apou Jarejuwarete 'ga 'eawer imū etee futat, 'ga remifutar imū etee futat. 'Ga je'eg imū mama'e apo re jane poiri mama'e tywera apo awi. A'eramū Janeruwarete 'ga u'eawera rupi etee mama'ea jane iaporamū ojejukau esage jane ree. Ae poaa 'ga mama'e apou wemifutar imū.

²⁶ Amumera 'gā ojemoryteeu ojee ajemogyau. Ajuago'wau ekoete, ojoje'ēwu'jaga ajaupe. Ojoje'ēwu'jag ire 'gā 'jau, "Je Jarejuwarete 'ga rerowiaara. Je Jarejuwarete 'ga muorypara", 'jau futatee 'gā ajemogyau. Aipo e'i nipo 'gā numiamū. Ojeupi tee futat 'gā jemoryteei. Nanarūi jane Jarejuwarete 'ga muorywi.

²⁷ Ku'jywa 'ga, Janeruwarete 'ga 'ā jane mu'e wemifutar are. "Pejuereko esage ki. Kūjā imen manū ma'e are ki pejejuka esage. Kunumijare'ema 'gā nee nanē pejejukau esage nū. Mama'e tywera kasi peapo ne, Je rerowiare'ema 'gā 'jawe ne", 'jau 'ga 'ā rakue. Nanuara pyu te jane Ku'jywa 'ga muorywi.

2

Sajejuka pāwē ete futat 'gā nee

¹ Kunumīmet. Kūjāmet 'jau. Peapyaka ki jeje'eg are. Janejararete 'ga Jeju Kristu 'ga 'ā esagesage ma'ea. 'Ga 'ā perowiāt pejejemogyau. A'eramū pēē 'ga 'jawe etee futat pejejekau pāwē pāwē pejejeue.

²⁻³ Gā amū nipo 'ua owaēma pējatykaaw ipe, Jarejuwarete 'ga mogytaaw ipe. Waity esage munepa erua ofāyrū esage reewe. A'eramū nipo pēē mū 'jau pejejaupe: "Kuu. Kūima'eeteete 'ga nipo kwe", 'jau nipo pēē pejejaupe. A'eramū nipo pēē aipo 'ga ree pejejekau esage 'ga rerawau apykaw esage 'arimū 'ga muapyka. A'eramū nipo ajepeja 'ga 'ua osou pē nupe nū. A'eramū nipo pēē aipo 'ga raity are pejemā'jāu nū. "Kuu. Nia'wyrui 'ga raitya ra'e nū'ū", 'jau nipo pēē 'ga upe. "Efu'am etee futat e'ama kūi. Eapygiweramū wyyu etee eapyk ekoete futat kūi", 'jau nipo pēē aipo 'ga upe.

⁴ Aipo 'ga upe 'jaramū nepereko esagei 'gā aju'jawe. Aipo pē'ea, "Ikaraemā ma'e 'gā etee esage", pe'je. "Ikaraemā'e'ema 'gā nia'wryi", pe'je te pejejaupe poromū. A'ere naani. Aipoa nia'wryi Janeruwarete 'ga upe. Naju'jawe rūi 'gā pereko. Ikaraemā kwai ma'e 'gā nee etee pēpota'waa nia'wryi Janeruwarete 'ga upe.

⁵ Peapyaka jeje'eg are. Janeruwarete 'ga ikaraemā'e'ema 'gā amū'ē wa'yra 'ga, Jeju 'ga rerowiaaramū. A'eramū ae a'jea futat 'ga rerowiarareteramū 'ga futaa. A'e 'gā etee Janeruwarete 'ga omogy wemiayuwamū 'gā nerawau ywag ipe ojeypyri 'gā manū re.

⁶⁻⁷ A'ere 'ā nepereko esagei ikaraemā'e'ema 'gā. "Ywyyu etee eapyk ekoete futat", 'jau ete nipo pēē 'ga nupe pejejekau'em 'gā nee. Naikaraemā'e'ema 'gā nūi agawewi 'ā pē nereko tywet. Ikaraemā kwai ma'e 'gā agawewi 'ā pē nereko tywerete. 'Gā futat 'ā pē nerawau 'wryiara 'gā nowase, pē je'ēwu'jaga ekoete 'ā Jeju 'ga rerowiarāmū ajaupe. A'eramū 'ā ikaraemā kwai ma'e 'gā pē nereko tyweaete, Jeju 'ga kurapa pē nupe jepi. Ma'eramū sipo aje ikaraemā kwai ma'e 'gā nee tee pejejuka? pejejekau pāwē ete'em 'gā nee? Pejejuka esage pāwē ete futat 'gā nee.

⁸ Ymā te 'ā Janeruwarete 'ga oje'ega kwasiarukari ka'aran are rakue. "Sā'ā pejejuka esagea pejeje. Nan tee futar iki pejejuka pejejeue", 'jau 'ga oje'ega kwasiarukaa ka'aran are rakue. Aipoa 'ga je'ega rupi pejejemogyau esage 'ga upe.

⁹ Ikaraemā kwai ma'e 'gā nee etee pēporomutara sipo esage Janeruwarete 'ga upe? Naani. Aipoa nia'wryi 'ga upe. Na'ga je'eg imū rūi aipoa peapo pejejemogyau 'ga upe.

¹⁰ 'Ga amū nipo 'jau: "Jarejuwarete 'ga porogyta je aenupap ja'wyya'wy", 'jau nipo 'ga akou. "Amume'ri are ete te aje je najeparuapoweri. A'eramū je iapowe'em", 'jau nipo aipo 'ga akou. Aipo 'ga nia'wryi Jarejuwarete 'ga upe. Nuenupawi katu katu 'ga 'ga porogyta. Ināinānī'ī etee 'ga enuwi. Aipoa nia'wryi Janeruwarete 'ga upe. A'eramū 'ga ojekwau Ku'jywa 'ga upe.

¹¹ Janeruwarete 'ga 'ā 'jau janee rakue: "Peko awi pejejemirekoe'ema kūjā are", 'jau 'ga janee rakue. "Peporojuka awi", nanē nū 'jau 'ga janee rakue. A'eramū nipo amumera 'ga okowe'em futat wemirekoe'ema kūjā are numiamū. A'ere nipo 'ga 'ga amū jukai. A'e 'ga ojemotywet Jarejuwarete 'ga upe 'ga amū juka re. 'Ga nuenupawi katu Jarejuwarete 'ga porogyta.

¹²⁻¹³ A'eramū ki pēē 'ga je'ega renupa katu katu. 'Ga 'eawer imū etee futat pejejemogyau 'ga upe. Oporogyta renuw ire 'ga pē katu'ogi. A'eramū futat 'ga pē mueapyou oje'eg are, mama'e tesirū apoukare'ema pē nupa. A'eramū 'ga 'jau pē nupe: "Jeporogyta peenup katu katu ra'e. A'eramū pēē pejesageramū jee", 'jau nipo 'ga pē nupe. A'eramū ki pēē 'ga je'eg imū etee futat mama'e mome'wau 'gā nupe. Pejeporogyta esage pejejemogyau 'gā nupe 'ga je'eg imū etee futat. Anure nipo Janeruwarete 'ga ae majatykai wowase tapy'yi tesirūmera reewe futat. Aipoa 'ara rupi nipo 'ga jane mome'wau 'gā nupe 'gā nowase. Ajuee ae jemuaēme'emawera rerapoa 'gā nupe. Aipo 'gā nee Janeruwarete 'ga ajemuaēme'ema. Ajuee ajemuaēm ma'efera 'gā nee etee te nipo 'ga jemuaēmi. A'eramū nipo 'ga ajuee ajemuaēm ma'efera 'gā nereko tywere'ema, wowase ae majatykaawa 'ara rupi.

Jeju 'ga rerowiaararete 'gā ojopoa

¹⁴ Kunumīmet. Pēē 'ā jerewirera 'jawe. Kūjāmeramū 'ā pēē jerenyra 'jawe. A'eramū ki pēē jeje'ega renupa katu. 'Gā amū nipo, "Je Jeju 'ga rerowiaaramū ako", 'jau nipo 'gā ajaupe. A'ere nipo 'gā nako esagei Jarejuwarete 'ga je'eg imū. A'jea sipo poromū futat 'ga 'eawera? Naani. E'i ekoete 'ga akou. Jeju 'ga rerowiaararete 'gā ajemogy esage ete 'ga je'eg imū. A'eramū nipo 'ga werowiaararete 'gā etee imonou imogyau ojeypyri 'gā manū re.

¹⁵ Jeju 'ga rerowiaara 'ga amū nipo 'ua owaēma pē nupe waity torotoro'gi rerekou. Wemi'urame'emamū nanē nipo 'ga 'ua owaēma pē nupe 'eramū sipo pēē 'ga mama'e tywe'ema resakawe maran 'ga rerekou? Ma'ja sipo peapo 'ga upe?

¹⁶ A'ere nipo mama'e mü nepemonoi agawewi 'ga upe. A'etea nipo pëë, "Ere ewau epy'a'wyre'emamü ekou. Ejemi'war iki ekou. Ejaitya nanë imojopy'rau nü", 'jau nipo pëë 'ga upe. A'eramü 'ga ma'ja 'wau? Pemono sipo mama'e mü 'ga upe aipo 'ga upe 'jawamü? Pemono nipo taity ape 'ga upe "emajapy'ru ejaitya" 'ga upe 'jawamü? Naani. Aipo 'ga upe pe'e ekoetea sipo esage? Naani. Aipo pe'je ekoete te pejejemogyau 'ga upe. Nan ki peapo, ne'ia'uweri Janeruwarete 'ga janee rakue. "Pejopoar iki. Pëpota'wa esage ki pejejee", e'i te Janeruwarete 'ga janee rakue.

¹⁷ A'eramü pëë Jeju'i 'ga rerowiaaramü pejejopoa esage pejejujukau esage pejejee. Nan te ae 'ga porogyta renuparamü iapoi. Nanuara te Janeruwarete 'ga afutat. Jarejuwarete 'ga porogyta renupare'emamü pëë peje'eg ekoete, "Je 'ga rerowiaara", pe'je ekoete te.

¹⁸ Jeju'i 'ga rerowiaaramü nipo pëë mü 'jau, "Je nanë Jeju'i 'ga rerowiaara", 'jau nipo pëë. A'ere nipo nepeenuwi katu katu 'ga porogyta. A'ere nipo aipo 'e reewi nepejopoari, pejejemua'eme'ema pejejee. A'eramü nipo a'jea futat Jeju'i 'ga rerowiaarete 'ga 'jau aipo 'jara 'ga upe: "Jeju'i 'ga rerowiaara je, ere 'ä. A'ere 'ä nerepoari 'gä ekou. Je te 'ä a'jea futat 'ga rerowiararete. Esak je 'ga je'eg imü etee 'gä poara", 'jau nipo 'ga 'ga upe. A'eramü je a'eramü 'jau pë nupe: Jarejuwarete 'ga rerowiarareteramü ae 'ga porogyta renuwi. Opota'wa esageramü ajuee. 'Ga je'eg imü mama'e apoare'emamü ae 'ga rerowiare'ema 'gä 'jawe etee futat ae rekoi. A'eramü pëë Jeju'i 'ga rerowiarareteramü mama'e apou 'ga je'eg imü etee futat. A'eramü 'gä pë nesaka, 'ga je'eg imü mama'e aporamü. "Kuu. Nan te ae Jeju'i 'ga rerowiaaramü ra'e", te'i 'gä pë nesaka 'jau.

¹⁹ "Ku'jywa 'ga etee futat Janeruwarete. Nirüi futari 'ga", te'i 'ga pë nesaka 'jau. A'jea futat aipoa morogytaa. A'ere 'ä pëë 'ga porogyta renupare'emamü mama'eukwaawa 'wyrriara remiayuwäuwe pejemogy. Mama'eukwaawa nanë 'ä Janeruwarete 'ga okwaap futat numiamü. "Oporogyta renupare'ema 'gä 'ga omono tata rakuwa upe 'gä nerekou tyweaete" e 'ä ikwaapa futat numiamü. A'etea 'ä nuerowiari 'ga porogyta. Mama'e tywera apo are etee futat 'ä wea'aramü. Oyyita futat tee Janeruwarete 'ga wi. Ikyjea erekou imoyyita futat tee. A'etea 'ä nuerowiari 'ga porogyta.

²⁰ Pejeagairanamü etee 'ä pejejemogyau. "Jarejuwarete 'ga rerowiaara je", 'jau nipo pëë numiamü. A'ere nipo pë'me ate. Peenuw ete agawewi futat 'ga porogyta numiamü. A'etea pëë enupare'ema 'jawe ete peko, 'ga je'ega rupi etee pejejemogyawe'em. A'eramü pëë a'eramü pejejemoryteue pejejemogyau.

²¹ Pënea'ar iki Abraão 'ga ree. Abraão 'ga 'ä janeypya. 'Ga 'ä ako Jarejuwarete 'ga porogyta renuparareteramü rakue. Ma'ja ajee 'ga wapo oje'futarukaawamü Jarejuwarete 'ga upe rakue? Majepei tee 'ä Abraão 'ga ra'yra 'ga rakue. A'eramü 'ä 'ga oporomutaramü naninimene wa'yra 'ga ree rakue. A'eramü 'ä Janeruwarete 'ga 'jau ojeupe rakue: "Eja'yra 'ga ejuka lapyau jee, a'e pa je 'ga upe kwy. Taesak 'ga a'jea futat tejerowiara 'jau kwy", 'jau 'ä Janeruwarete 'ga ojeupe rakue. A'eramü 'ä 'ga 'jau Abraão 'ga upe rakue: "Eja'yra 'ga eroo ywytyra apyte'rarimü. Peu 'ga terejuka iapyau jee 'jau", 'jau 'ä 'ga 'ga upe rakue. A'eramü 'ä Abraão 'ga wa'yra 'ga rerawau 'ga 'eawer ipe rakue. A'ere 'ä Janeruwarete 'ga je'egi erujewi 'ga upe rakue nü. A'eramü 'ä 'ga 'ga ra'yra 'ga jukaikare'ema 'ga upe rakue. "A'jea futat je rerowiari ape ra'e. Je muoryw ape ipyu, jeporogyta renuwa pyu. Ene 'ä eneresagesage jee", 'jau Janeruwarete 'ga Abraão 'ga upe rakue.

²² Abraão 'ga werowiat 'ga porogyta rakue. A'eramü 'ga 'ga 'eawer imü etee futat mama'e apou akou Jarejuwarete 'ga upe. A'eramü Janeruwarete 'ga 'jawarü Abraão 'ga upe. "Ene 'ä a'jea futat je rerowiari ape", 'jau 'ga 'ga upe rakue.

²³ Ymä te 'ä Janeruwarete 'ga Abraão 'ga remiapofera kwasiarukari ka'aran are 'gä nupe rakue. A'jea futat aipo 'ea. "Abraão 'ga a'jea futat je rerowiaarete. Jejekoty'aawaretea nanë 'ga nü. A'eramü 'ga a'jea futat wesageramü jee", 'jau Janeruwarete 'ga oje'ega kwasiarukaa ka'aran are 'gä nupe rakue.

²⁴ Jane nanë nü, "Jarejuwarete 'ga je arowiat" 'e re mama'ea siapo 'ga je'eg imü etee. Oje'ega rupi etee mama'e apoare'ema 'gä nupe 'ga, "esagesage 'ga jee", ne'ia'uweri. Oporogyta renupara 'gä nupe etee 'ga 'i, "esage 'ga jee", 'jau.

²⁵ Nan tee Raape ëë rakue. KÛjämene'ema agawewi ëë rakue. A'etea ëë Janeruwarete 'ga rera renupawe werowiat akou rakue. A'eramü ëë 'ga remiayüwa 'gä mima oje'wyr ipe 'gä a'gwau 'gä nee ifuwet ma'e 'gä nü rakue. Kaaruwamü ëë 'jau 'gä nupe: "Ajepeja pe rupi pekwap pejeka'jama wä nü", 'jau ëë 'gä nupe rakue. A'eramü Janeruwarete 'ga 'jau ëë upe: "Je rerowiari ape ekou ra'e. Jeremiayuwa 'gä nee erejeka esage ra'e. A'eramü ene ejesageramü jee. A'eramü je ene rerekou tywere'em eneremiapofere", 'jau 'ga ëë upe, wemiayuwa 'gä ëë iapisiukare'emamü rakue.

²⁶ Sã'ä ywyrapara a'wyr'e'ema u'ywe'eme. Nan tee futat jane. "Jarejuwarete 'ga je arowiat", 'jarekoetaramü 'ga je'ega rupi etee mama'ea niapoi. Ia'wyr'e'emamü ae rekoi.

A'eramū ki pēē, “Jarejuwarete 'ga je arowiat” 'jaramū mama'e apou 'ga je'ega rupi ete nanē nū.

3

Au'je pejeje'egaiw ire

¹ Kunumīmet. Kūjāmet. Pēē mū nipo pēnekowet Jarejuwarete 'ga porogytafer are pejejamū'jaramū. A'ere ki pēneapyo ra'ne 'ga je'eg are pejejamū'e are. Kasi a'e pe 'ga pē nereko tyweretei pejejamū'e tyweramū ne. Moromu'jaramū tee 'gā 'jawe kasi pēē ne, pejejamū'e re peo pejejemogyau mama'e tywera apou 'gā nupe ae. Nanuaramū pejamū'e futat numiamū. A'ere pejejamū'e reewi mama'e tywera apou nū 'ea nia'wyri. Kasi a'e pe nanuaramū pēnemimu'efera 'gā 'i ajaupe ne: “'Ga 'jawe tee futat jane iapoi”, 'jau 'ga remimu'efera 'gā ajaupe ne. A'eramū nipo Janeruwarete 'ga ajamu'e tywearera 'ga rerekou tyweaete, oje'eg are 'gā nū'e tyweramū. Moromu'jatyweara 'gā akotee ma'e 'gā tywera wapyraap Jarejuwarete 'ga upe.

² A'je futat 'ā ae mama'e tywera apoare'emamū nokoi amū. Jeju 'ga rerowiaaramū miamū 'ā jane jare'aka'jāmaiwamū mama'e tywera apou. 'Ga amū ipyy we ajaupe oje'egaiw'em ire amunipo 'ā 'ga amū reko'i wesageramū. A'etea 'ā ae nitywi futari amū ipyy we ajaupe ije'egaiw'emamū rakue. Ippy we 'ga amū ajaupe oje'egaiw'em ire amunipo 'ā 'gā wesageramū futat ajemogyau. Nuapoi futari amunipo 'ā 'ga mama'e tywera. A'ere 'ā ae nitywi te nanuaramū rakue.

³ Sā'ā ae kawaruu 'arimū wapyg enune imory'weawa monoa ijuru pe. A'eramū 'ā ae imory'weawa iāma koka opo pe. A'eramū 'ā ae kwe katy ikwawiweramū kwe katywara iāma matāu jupe. Ko katy ikwawiweramū 'ā ae ko katywara iāma matāu jupe nū. Inugagatu pe rupi. Ee opomoroy'weweramū 'ā ae imory'weawa iāma matāu pāwē jupe. A'eramū futat 'ā opytau. Niapoi'ā agawewi futat 'ā imory'weawa. A'etea 'ā ae wereko.

⁴ Sā'ā yaruu ku'ookawa nanē nū 'ā niapoi'ā agawewi. A'etea 'ā iku'ookara 'ga anugatu iku'ooka'wi pyu, 'y rypojuaga rupi inuga esage.

⁵ Nan tee futat 'ā janekūa. Niapoi'ā agawewi futat. A'etea 'ā ae morogytauu mome'wau ipyy.

Tata 'ywa nanē 'ā niapoi'ā agawewi nū. A'etea 'ā kouu pype amu'aramū enyu ko pype oje'poje'ogukare'ema weny re.

⁶ Nan tee futat 'ā janekūa nanē nū. Morogyta mome'u re opike'ema futat nū okwasi'wau 'ā. Jarejemote'arukaa 'ā jareje'egaiwa pyu, jarejemogyau ipyy futat 'ā jarejoje'ēwu'jaga. Niapoi'ā agawewi 'ā janekūa 'upa janejuru pe. A'etea 'ā jane ipyy futat jarejemote'aa. Ipyu futat jane 'ā jareje'egaiwamū jarejemogyau. Najarejuwarete 'ga je'eg imū rūi jane 'ā jarejoje'ēwu'jaga jarejemogyau. Mama'eukwaawa 'wyriara je'eg imū te jane joje'ēwu'jagi.

⁷ Sā'ā ae wyra'ya pyyga imota'waa weymawamū. Wyra'ya 'ā ae ipyyka. Piraa'ya 'ā ae ipyyka. Mīmera 'ā ae ipyyka weymawamū imota'wau. Ota'wa re 'ā ojerekoukaa esage ae upe.

⁸ A'ere janekūa nanarūi. Nimota'waarūi futari jane jarekūa. Nitywi ae amū akū mota'waaramū. Sā'ā moja afuaga rerekoa ajuru pe ae apisawa. Nan tee futat jane jarejomote'aa rerekoi jarejuru pe. Jarekū mū futat jane jarejoje'ēwu'jaga.

⁹ Majepei tee agawewi futat 'ā janekūa. Ipyu etee futat 'ā jareporogytau esage Jarejuwarete 'ga upe. A'ere 'ā jane anurenure'i ipyy futat jarepytuna 'gā ago'wau nū 'jau. Janeruwarete 'ga 'ā jane apo oje'jawe futat rakue. Ma'eramū sipo ajee jane juago'oi? 'ga 'jawewaramū jane juago'oi?

¹⁰ “Ene 'ā eneresagesage”, 'jau futatee agawewi 'ā jane Jarejuwarete 'ga upe. A'ere 'ā jane aipo 'ga upe 'e re aipo 'ga upe 'jare'ema 'jawe etee jarewau morogyta tywera mome'wau nū 'jau. A'ere nanuara nia'wyri. Peapo awi nanuara.

¹¹ 'Ya te aje 'ā najane 'jawe rūi. 'Ywu'ywura rupi 'ā 'y esagea etee 'ua. Natypykureri 'ā 'ya 'ua 'ywu'ywura rupi. Iky'a ma'ea iky'a ma'ea etee futat nū. Iky'ae'ema 'ā iky'ae'ema etee futat nū. A'ere ae nanarūi. Ae wi morogyta paraparawamū 'ua. Majepeja aejuru rupi etee futat ae oporogytau esage oporogytau tywet 'jau.

¹² Sā'ā 'y'wa o'yw are etee futat i'aa. Nopopori 'ā 'y'wa'aa ojo'yw ekoete are. O'yw are etee te 'ā 'y'wa'aa opopoa. Y'waiwa'aa 'ā nopopori amyneju 'yw are. Mamāū'a 'ā opopore'ema 'yppo are. Nan tee futat 'ā ae 'y ky'a awi 'y esage pyyke'ema. Ma'eramū 'ā je 'i pē nupe: kunumīmet, kūjāmet 'jau. Jarepytuna 'gā ago'oaramū jarejemogy re maran Jarejuwarete 'ga muorypa? “Ene te 'ā eneresagesage”, Jarejuwarete 'ga upe 'e re jarepytuna 'gā ago'wau 'ea nia'wyri Janeruwarete 'ga upe, a'e je pē nupe.

¹³ Pêê mû te nipo ajee i'akwaap ma'eramû peko. Eapyo ma'e 'gã mama'e esagea tee wapo. Oje'ega esage etee ajemogyau. Eapyo ma'e 'gã ajemuaêma ajuee. Esagesage 'gã. Eapyo ma'e 'gã nojerowiaraiwi ojee etee. Nan te ae Jarejuwarete 'ga remimueapyoferamû. A'eramû nipo aipo 'ga resakara 'gã 'jau: "Ga 'ã eapyo ma'ea", 'jau nipo 'gã 'ga resaka.

¹⁴ A'ere nipo pêê mû iporerekoaywet ma'eramû peko. Pêê mû nipo imara'ne ma'eramû. Pêê mû nipo pejejuwee tee mama'e apou. A'ere poromû pê'me ate, "je te 'ã je'akwaap katu katu" pêê 'jawamû.

¹⁵ Nanarûi ae Jarejuwarete 'ga remimu'akwaaweramû. Naojee te rûi ae jerowiaraiwi. Ojee tee ojerowiaraipe ma'eramû pêê najarejuwarete 'ga 'Agesage arûi pê mueapyoi. Pejemeapyo ekoete te. Mama'eukwaawa 'wyrriara te pê mu'akwaaw ekoete mama'e tesirûmer are.

¹⁶ A'eramû nipo iporerekoaywet ma'e 'gã ajamueu. Ojee etee ea'at ma'e 'gã netee nipo 'gã ajamueu oje'eg are. A'eramû futat nipo 'gã ojomotywea Jarejuwarete 'ga upe.

¹⁷ A'ere jane Jarejuwarete 'ga remimueapyoferamû jane nanarûi. 'Ga porogyta kwaaparamû jane niapoi futari mama'e tywera. Jane 'ã jarejamueukare'ema. 'Ga porogyta kwaawa 'ã jane mojejukaukar esage etee te jarejuuee. Sã'ã y'wa 'yw esagea. Y'wa esagea etee 'ã i'aa y'wa 'yw esage are. Nan tee futat jane 'ga porogyta renuparamû. Mama'e esagea etee iapoi. Jarepota'wa pãwê pãwênamû ete futat jarejemogyau jarejuuee. 'Gã amû te nipo ajee ako esage janeremiesagamû etee. A'ere janereatywi akowarûe'em. Ojomoryteeu akou. A'ere jane nanarûi 'ga porogyta renuparamû. Jane a'jea futat jane reko esagei. Jarejuueatywi miamû futat jane reko esagei.

¹⁸ Jejui 'ga rerowiaara 'gã amû nipo oje'ega ajaupe, "au'je pejemara'ne re pejejuuee", 'jau nipo 'gã ajaupe. "Pêpota'wa esage etee pejejuuee", 'jau nipo 'gã ajaupe. A'eramû nipo ajuee imara'ne awi ojomosiara 'ga wesageramû akou Jarejuwarete 'ga upe.

4

Jarejuwarete 'ga remiaywarete

¹ Ma'eramû sipo pêê mû au'jeteramû pejejamueu? Pejee etee te pêne'at. Pejemeuaêma mama'e are etee pejejemogyau. A'eramû pêê a'eramû au'jeteramû pejejamueu pejejemogyau.

² Mama'e mû nipo pefutat pejejemogyau. A'ere nipo nepetywi pejejemifutara pyu. A'eramû nipo pêê pejefuweramû pejejemifutara rerekwara 'gã juka are. "Maran ajee jane nanê janetywi ipyu 'û?" 'jau nipo pêê pejejuerekoayau pejejomama'e are. A'eramû nipo pêê pejejamueu pejejemifutar are. Ma'eramû sipo pêê nanê nepetywi pejejemifutara pyu nû? Nepeenû te Jarejuwarete 'ga upe. A'eramû pêê a'eramû pejetywe'emamû pejejemifutara pyu.

³ Ma'eramû sipo 'ga imure'ema pê nupe ojeupe pêê enûjamû? Pejemaku'i eteeawamû te peenûi 'ga upe. A'eramû 'ga a'eramû imure'ema pê nupe.

⁴ Ma'eramû sipo pepoit Jarejuwarete 'ga rerowiar awi? Omen awi opoit ma'e 'jawe pêê. Nepekwaawi nipo "ymy pewara mama'e are etee ea'at ma'eramû ae rekoi Jarejuwarete 'ga ree iporomutare'emamû" 'ea? 'Ga rerowiare'ema 'gã nemifutar imû mama'e apoara 'gã nanê ajemogy Jarejuwarete 'ga ree iporomutare'emamû nû.

⁵ Ymã te Janeruwarete 'ga oje'ega kwasiarukari U'agesage are rakue. Nakwasiarukari tee 'ga ee. U'agesage 'ã 'ga amut werowiaaramû janee. A'jea futat 'ga 'Agesagea iro 'jau ae ree, 'ga wi ae poira futare'ema. Sã'ã ae kûjã are iro ae 'ea. Nan tee futat 'ga 'Agesagea iro'i ae ree.

⁶ A'ere 'ga 'Agesagea te jane mogyi jane mamuakaa 'agamû mama'e tywera apoukare'ema ae upe. Ymã te Janeruwarete 'ga ka'arana kwasiarukari aipo 'gã nupe rakue:

"Je poar ape 'jara 'gã je apoat tejemifutar imû mama'e apoukaa 'gã nupe.

Je nafutari 'ga tepoara 'jara 'gã te ajee je napoari.

Aipo 'jara 'gã ajemogy je ree iporomutare'emamû",

'jau 'ga inugukaa ka'aran are rakue.

⁷ A'eramû ki pêê Jarejuwarete 'ga rerowiaaramû "ore mu'e ape ejemifutar are. Taruenup eneje'ega 'jau", 'jau ki pêê Jarejuwarete 'ga upe pejeje'ega. Mama'eukwaawa 'wyrriara pejejuupe ije'egamû ki pe'je jupe "Naeneje'ega rûi je aenup. A'eramû ene ejepe'au je wi", 'jau ki pêê jupe. A'eramû ojepe'au pê nui.

⁸ Ojee te pêne'aramû Janeruwarete 'ga jekwaawukari pê nupe. Pejetywer awi pepoit. Pejemogy esage 'ga upe. "Je Jarejuwarete 'ga je'ega aenup", 'jau nipo pêê mû pejejea'aramû. A'ere nipo pêê aipo 'e re mama'e tywera apou 'ga remifutare'em imû nû. A'eramû 'ga je'ega renupare'ema 'gã 'jawe te pejemogy ne. Au'je nanuara apo re. 'Ga remifutar imû a'jea futat pêê iapoa te esage 'ga upe.

⁹Pejetywera peru'arasig erajemogyau. Pejoo'o pejetywera upe. Pejeku'iawera peroo'o erajemogyau, eru'arasiga.

¹⁰Ajemotywet je enee ojeupe pēē 'eramū Janeruwarete 'ga pētywera tomoit pē nui 'jau. Pejetywera pejejewi imoir ire pēnesage pejemogyau 'ga upe nū.

Au'je pejejuago'o re

¹¹“Ga 'ā nia'wryi akou Jarejuwarete 'ga upe”, pe'je awi pejejaupe. Au'je pejuago'o re. Janeruwarete 'ga 'ā “pejuereko esage ki”, e'i 'ga 'ā janee rakue. A'eramū pēē pejejuago'oramū 'ga porogyta renupe'ema. 'Ga porogyta renupa katuare'ema 'gā 'ga kurapara 'jawe ajemogy 'ga upe. 'Ga porogyta renupare'emamū nanē pēē 'ga kurapara 'jawe pejemogy 'ga upe. 'Ga porogyta kuraparamū nanē nepeenuwi 'ga porogyta. “Je te 'ā je'akwaap Jarejuwarete 'ga apyraap”, 'jau nipo pēē 'ga porogyta kuraparamū.

¹²Janeruwarete 'ga te jane kwaap. 'Ga te oje'ega amut janee. Oje'ega renupare'ema 'gā 'ga ikwaapa futat. Aeremiapofera nanē 'ga ikwaapa futat. 'Ga te ae katu'ok aetywer awi. 'Ga te e'iarū janee, “tata pe ekwap”, e'iarū janee. Aerefetee aipo ne'i arū ajaupe. Nijokwaawi jane. Nikwaawi jane jarejotywera. A'eramū ki pēē, “ga nipo 'ā nia'wryi akou Jarejuwarete 'ga upe”, 'jawe'em pejejaupe.

Janeremiaporam

¹³Peapyaka ki jeje'eg are. Pēē mū nipo pejeporogytau pejejaupe. “Ai'iwe je oi kwe pe ajepeja amunaw ipe teporowykyau, tejeka'aranūū ruga tekou. Teka'aranūū re nipo tejua ikokwar are nū”, 'jau nipo pēē pejejaupe. A'ere kasi aipo pe'je ne.

¹⁴Nikwaawi jane jarejamiaporama ai'iwe. Nikwaawi jane ai'iwe jaruete jarejekoa. Nikwaawi jane jaremanūa. Ywysiga 'jawe jane. Sā'ā ywysiga jywa ai'iwetetewe. A'ere 'ā kamēšete ojeupiapap nū. Nan tee futat jane. 'Awamū jaruete jane jemogyi numiamū. Ai'iwe nipo jane maran gatu jaruete'em jarejemogyau. Nikwaawi jane.

¹⁵A'eramū ki pēē aipo 'jau te pejeje'ega: “Jarejuwarete 'ga ifutar ire nipo je oi peu teporowykyau”, 'jau ki pēē pejeje'ega.

¹⁶A'ere 'ā pēē aipo nepe'jei. Peje'ēran ekoete te 'ā pejemogyau. Pejemiamiaporam are ete 'ā pejerowiarai. Mama'e are pejejea'awamū ete 'ā pēparuapowet mama'e are. “Je te futat mama'e aapo tejee. Najepoarukari je Jarejuwarete 'ga upe”, 'jau nipo pēē pejemogyau numiamū. A'ere aipo 'ea nia'wryi.

¹⁷Jarejuwarete 'ga remifutara 'ā pekwaap. A'eramū pēē 'ga remifutar imū mama'e apoe'em ire pejemotywea Jarejuwarete 'ga upe.

5

Ika'aranūū kwai ma'e gā neko tyweawam

¹Ika'aranūū kwai ma'eramū ki peapyaka jeje'eg are. Pēē mū 'awamū ika'aranūū kwai ma'eramū futat numiamū. A'ere nepeenuwi Jarejuwarete 'ga porogyta. A'eramū nipo pēē anure pejekou tywet. Pē'arasiga nipo pē nerekou. Peje'arasiga nipo pēē erajaa'wau erajemogyau.

²Pēkaraemā nipo i'mu'muga etee i'wau. Pēnaitya nipo kupi'ia tee i'waupap.

³Pēka'aranūū ywope'ia nipo weposipopawamū etee 'upa. A'eramū nipo Janeruwarete 'ga wowase ae majatykaaw ipe, tekotee 'gā 'jau pē nupe: “Esak ika'aranūū kwai ma'e gā. Ika'aranūū kwai agawewi 'gā 'ā jepi. A'etea 'gā 'ā akate'em ajaupe jepi. Nomonoi'i futari 'gā ape 'gā nupe. Weposipopawamū etee futat 'upa. A'eramū i'mu'muga etee futat i'waupap tuwamū”, 'jau nipo 'gā pē nupe. Sā'ā mirurua aero'o moto'oma ae mojero'wua. Nan tee futat nipo pēē ika'aranūū kwai ma'eferamū. Pēka'aranūū 'mu'mugera pēnakate'emawera resaukari. A'eramū nipo Janeruwarete 'ga pē nerekou tywet ee.

⁴Ka'aranūūa 'ā pemono'og ekoete jepi. A'ere 'ā nepemepyi pejemiamiyuwa 'gā jepi. A'eramū nipo 'gā pē mome'wau Jarejuwarete 'ga upe. “Kwaiwete agawewi 'gā ka'aranūūa. A'etea 'gā nomepyi ojeupe ore porowykyramū ikue”, 'jau nipo 'gā pē mome'wau Jarejuwarete 'ga upe, Pājēeteete 'ga upe.

⁵Awa wry pe pejemogyau kwaiwete futat pēka'aranūūa. A'eramū 'ā pēē pejeporowykyawe'em. Pejemimifutara etee 'ā pēē iapou. Sā'ā pēē pejejeymawa mū moky'ra i'upyamū. A'eramū 'ā pēē imoporowykyukare'ema. A'eramū 'ā pēē iky'ra re ijukau. Nan tee futat pēē. Nepeporowykyi. Pejemimifutara etee 'ā iapou. A'eramū nipo anure Janeruwarete 'ga pē monoukaa mama'eukwaawa rapyaw ipe pē nerekou tyweaete.

⁶Ika'aranūū kwai ma'eramū pēē mū pejejajukaukaa ekoete pejejaupe. 'Wryiara upe nipo pēē 'gā amū nerawau ekoete 'gā je'ēwu'jaga. “Ekoay 'gā mama'e tywera apou jee. Ejukaukat 'gā”, 'jau nipo pēē 'wryiara upe. A'eramū nipo pēē 'gā jukaukaa ekoete. Nuapoi agawewi nipo 'gā mama'e tywera. A'etea nipo 'gā 'gā jukaukaa ekoete. Nuerowiari

tāmējē 'gā, “naapoi je mama'e tywera” 'gā 'eramū. Nika'aranūi wejue 'ga. A'eramū 'ga ojepyare'ema.

Peapesak Jarejararete 'ga rura

⁷ Pēē 'ā jeyytuna 'jawe jee. Pejereko tyweramū kasi pejepyat ne. Janeruwarete 'ga te nipo pē nepyat anure. Jarejararete 'ga jewyra ete ki peapesak pejemogyau pejemogekowe'em futat. Sā'ā aeko jaramū ae jemogya ko pypiara tyarū rapesaga. Najema'nēma'nēi 'ā ae ityarū are.

⁸ Nan tee futat pejemogy Jarejararete 'ga rura rapesakaramū. Pejorypawe'emamū futat pejemogyau. Anurenure'i nipo 'ga ruri nū. Ko futat nipo iwaēmi ja'wyja'wy 'ga ruawa upe. A'eramū pēē pejemogypyka etee futat pejemogyau 'ga rura rapesaka.

⁹ Pejuago'o awi tesirūgatu Jejui 'ga rerowiaara 'gā amū nekoramū. Najane rūi sajuereko jarejaepe. Jejui 'ga te jane rereko weape. Anurenure'i futat nipo 'ga ruri. A'eramū 'ga te “nepēa'wryi pēē Jarejuwarete 'ga upe”, 'jwarū janee. Jane, nepēa'wryi pēē Jarejuwarete 'ga upe jarejaupe jane 'e re nipo Janeruwarete 'ga jane rereko tyweretei aipo jarejaupe 'eawer are.

¹⁰ Kunumimet. Kūjāmet 'jau. Pēnea'ar iki Jarejuwarete 'ga porogyta mome'warera 'gā nee. Ymā 'ā 'gā jemogyi Janeruwarete 'ga porogyta mome'waramū 'gā nupe rakue. A'ere 'ā Janeruwarete 'ga porogytafer are iporenuwiwere'ema 'gā 'gā nereko tyweretei rakue. A'ere 'ā 'gā wereko tywereteramū miamū 'gā nopoiri futari Jarejuwarete 'ga mome'u awi rakue. Uag ma'e 'gā te ajemogy wereko tywera upe. Ojemouaga etee futat wereko tyweramū. A'ere 'gā jero'wuro'wui etee futat Jarejuwarete 'ga porogyta mome'u are.

¹¹ “Jarejuwarete 'ga porogyta mome'warypyara 'gā iku'i ajemogyau rakue”, sa'e 'ā jane 'gā mome'wau jepi. “Nopoiri futari 'ā 'gā Jarejuwarete 'ga porogyta mome'u awi rakue”, 'jau jane 'ā jepi. Sā'ā Jo 'ga rakue. Jo 'ga rerekwawer are pēnea'at. Jo 'ga 'ā ojemouaga etee futat akou wereko tywera upe rakue. Opoire'ema futat Jarejuwarete 'ga rerowiar awi rakue. A'eramū Janeruwarete 'ga 'jau ojeupe: “Esagesage Jo 'ga jee. Wereko tywerete agawewi 'gā 'ga je ree. A'etea 'ga nopoiri futari je rerowiar awi”, 'jau Janeruwarete 'ga Jo 'ga upe, ojerowiaa Jo 'ga ree rakue. A'eramū Janeruwarete 'ga mama'e esage monou Jo 'ga upe. Janeruwarete 'ga 'ā a'jea futat ajemuaēm jane ree. Opota'waramū futat 'ga jane ree. A'eramū 'ga mama'e esage mua janee.

¹² 'Awamū je mama'e mū ree pē mu'ei. Pejejaupe pejeporogytau ki peporogyta esage etee futat. Mama'e a'jea etee futat ki pemome'u pejejaupe. “Mama'ea je aapo”, 'jau ki a'ea peapo peje'eawer imū etee. Amumera 'gā nipo o'eme ekoeteramū, “ywigipewara 'gā neape je mama'e apoi. Ywy apoarera 'ga reape nanē je iapoi nū. Je kwaap 'gā. Okwaap 'gā jeremimome'ua a'jea futat”, 'jau futatee nipo 'gā ajemogyau. A'ere kasi pēē aipo pe'je ne. “Je renūi ekoete kasi pejepe ne”, 'jau 'ā Janeruwarete 'ga janee rakue. Aipo pē 'e ekoeteramū nipo Janeruwarete 'ga 'i pē nupe: “Nepēa'wyretei jee”, 'jau nipo 'ga pē nupe, pē monou muku ojewi.

Pemono ki pejeje'ega 'ga upe

¹³ 'Arasig ma'eramū pejeje'ega monou Jarejuwarete 'ga upe. Iku'i ma'eramū maraka ra'aga 'ga muorypa. “Ene te 'ā eneresagesage ore”, 'jau ki pēē pejemaraka'aga Jarejuwarete 'ga upe.

¹⁴ Pejekaruarāmū ki Jejui 'ga rerowiaara 'gā 'wryiara 'gā peenūi amū. “Pejot pejeje'ega monou Ku'jywa 'ga upe je ree”, 'jau ki pēē 'gā nupe. A'eramū 'gā 'ua Jejui 'ga rer imū miarakawenana monou pēapye'rarimū oporogytau Jarejuwarete 'ga upe pē nee.

¹⁵ Ojeupe werowiaara 'gā porogyta re Janeruwarete 'ga pēkaruara pe'ai pē nui. Pētywera reewe ipe'au pē nui.

¹⁶ Pēē mū nipo mama'e tywera apo awi pejejeetea'ne'emamū. A'eramū ki pejemome'u pejejaupe. A'eramū pēē pejeje'ega pejejotywer are Jarejuwarete 'ga upe. Aipo 'jau: “Kiapi'ni. Mama'e tywera 'ga wapo akou. A'eramū 'ga 'awamū otywera reru'arasiga erekou. A'eramū ene 'ga katu'oka 'ga tywer awi. Emoit 'ga tywera 'ga wi”, 'jau ki pēē pejeje'ega Jarejuwarete 'ga upe pejejeue. A'eramū Janeruwarete 'ga 'ga katu'oka nū, 'ga mueateeu mama'e tywera apo awi. Ojeupe ako esage ma'e 'ga je'egamū Janeruwarete 'ga 'ga porogyta renuwi futari. Mama'ea 'ga wapo a'jea futat 'ga je'eg imū. Aeremiapoe'ema miamū 'ga wapoukat ae upe ojeupe enūi re.

¹⁷⁻¹⁸ Pēnea'at Eliasi 'ga ree. Esage ma'e 'ga. Ymā 'ā 'ga je'egi Jarejuwarete 'ga upe rakue. “Amana kyre'ema je afutat”, 'jau 'ga 'ā oje'ega Jarejuwarete 'ga upe rakue. A'eramū 'ā Janeruwarete 'ga 'ga 'eawera rupi ete futat muapyra kwara magwapa amana mogyrakare'ema rakue. A'eramū 'ā Eliasi 'ga muapyra kwara kwaw ire oje'ega Jarejuwarete 'ga upe rakue nū. “Ere amana mogyrakaa nū”, 'jau 'ga 'ā oje'ega Jarejuwarete 'ga upe rakue

nũ. A'erauwe 'ã Janeruwarete 'ga amana mogyrukaa rakue nũ. A'eramũ futat 'ã temi'ua ojeupa rakue nũ. Maira te Eliasi 'ga rakue? Naani. Aea futat 'ga, jane 'jawe futat 'ga.

¹⁹⁻²⁰ Kunumĩmet, kũjãmet. Janeruwarete 'ga porogyta 'ã a'jea futat agawewi. A'etea nipo pẽẽ mũ Jarejuwarete 'ga porogyta rerowiaraipe pejeipoia 'ga wi. A'ere ki Jarejuwarete 'ga porogytafer awi ipoire'emamũ peje'eg 'ga wi opoit ma'e 'gã nupe. Maran gatu nipo 'gã 'ã ojewyre'ema 'ga rerowiara upe nũ. A'eramũ nipo werowiaru'jawamũ Jejui 'ga 'gã tywera pe'au 'gã nui nũ, 'gã katu'oka 'gã mogyau nũ. A'eramũ 'gã awawe'em mama'eukwaawa rapyaw ipe. Jejui 'ga 'gã monoukare'ema peu. Werowiaru'jawamũ wejue 'ga 'gã nomonoukari 'gã mama'eukwaawa rapyaw ipe.

Pẽnoryw iki pejemogyau morogyta esage are, kunumĩmet, kũjãmeramũ nanẽ nũ je 'i pẽ nupe.

Kweramũ etee jeremimome'ua.

1 Pedro

Pedro 'ga, Jejuu 'ga remimu'efera 'ga, 'awa ka'arana kwasiaa imonou Jejuu 'ga rerowiaara 'gā nupe rakue. Jejuu 'ga rerowiare'ema 'gā 'ga rerowiaara 'gā nerekou tyweaete. A'eramū Pedro 'ga ka'arana kwasiaa imonou 'ga rerowiaara 'gā nupe 'gā mu'akwaapa ee rakue. Janeruwarete 'ga 'Agesage ikwasiarukaa 'ga upe. A'eramū 'ga ikwasiaa imonou 'gā nupe rakue.

¹ Je Pedroramū ka'arana akwasiat imonou pē nupe. Je Jejuu Kristu 'ga remimonoferamū. Ymā 'ga je monoi kwe pe ojemome'waukaa jee ikue. A'eramū je ka'arana kwasiaa imonou pē nupe. Pēē 'ā Jarejuwarete 'ga remiayuwa. Pē'wyr awi 'ā 'gā amū pē mokwasi'wau rakue. 'Awamū aje 'ā pejemogy pejekwasi'wau tekotee 'gā ywy pe. Pōtu ywy pe, Garasi ywy pe, Kapatosi ywy pe. Asia ywy pe, Pitini ywy pe. Mīmer imū 'ā pejekwasi'wau pejemogyau rakue. A'eramū je ka'arana kwasiaa imonou pē nupe.

² Ymā Janeruwarete 'ga pē pyyrūi ojeupe rakue. Wemifutar imū etee futat 'ga pē mū'jāu mama'eukwaawa 'wyrara remiayuw awi. A'eramū 'ga 'Agesagea pē mogyau Janeruwarete 'ga remiayuwamū, pē muesageu 'ga upe. "Agera 'gā je amū'ē teja'yra 'ga je'ega renuparamū", 'jau Janeruwarete 'ga pē nupe rakue. "Jera'yra 'ga amanū 'gā tywer are ako ikue", 'jau 'ga 'ā rakue. "A'eramū je Jejuu Kristu 'ga ree je jemogyppygi tekou 'gā 'eramū je 'gā tywera moia 'gā nui", 'jau 'ga 'ā pē nupe rakue.

A'eramū je 'jau 'ga upe pē nee: "Eneresagea 'gā nerekoa je afutat, ki Ku'jyp. Emopy'ata'wa nanē ki 'gā imogyau", 'jau je Jarejuwarete 'ga upe pē nee.

Pēku'i ki Jejuu 'ga ree

³ "Ene te 'ā eneresage oreo, sa'e ki Jejuu Kristu 'ga Ruwarete 'ga upe, Jarejararete 'ga Ruwarete 'ga upe", 'jau je pē nupe. 'Ga manū re 'ā Janeruwarete 'ga Jejuu Kristu 'ga moferapa rakue nū. A'eramū nipo Janeruwarete 'ga wa'yrarete 'ga rerowiaaramū jane mogyau wa'yramū. Jane ree 'ga poriaa te nipo 'ga rerekou. A'eramū nipo 'ga jane mogyau wa'yramū, wa'yrarete 'ga rerowiaaramū. A'eramū jane a'eramū Jarejuwarete 'ga pyri jarejemogy rapesaka jarejemogyau. Jejuu Kristu 'ga 'ga moferapa. Jejuu 'ga moferawe'em ire amunipo 'ā jane nanē niferawa'uweri nū. A'ere 'ā 'ga ferawi rakue. A'eramū jane "Jejuu 'ga 'jawerimū etee futat jareferapa nū, 'ga jane moferapa jane rerawau ojeypyri nū" e are jarejemogyppyka jarejemogyau.

⁴ A'eramū jane jarejeupe mama'e esagea 'ga imura rapesaka. Ojeypyri jane oramū 'ga mama'e esage mua wemiayuwamū janee. 'Awamū futat 'ga janee wemimurama m'yina gatu ojeypyri. Peu jane upe 'ga remimurama nateepawi. Peu nitywi futari jypemeruaa, mama'e 'wara. Nitywi futari mama'e mote'ara. Ma'eramū 'ā 'ga imy'i gatui peu futat janee.

⁵ Werowiaaramū 'ga ojejukau jane ree. Wemifutar imū etee futat 'ga mama'eay resaukaa janee, ojee janejemogyppyga resaukaawamū. 'Ga opājē mū jane momoirukare'ema ojewi. A'eramū nipo 'ur ire Jejuu 'ga jane rerawau ywag ipe jane mogyau ojeypyri nakwaparimū warāu rūi futat. A'eramū nipo Janeruwarete 'ga jane upe wemim'y'i gatufera mua janee. A'eramū nipo 'ga jane mueapyyu jarejeupe wemiapofer are.

⁶ 'Awamū nipo mama'eay jesaukari pē nupe kwaiwete. A'eramū nipo peje'arasigamū pejemogyau. A'ere 'ga pyri pejeo are pēnea'at pejeku'iramū pejemogyau.

⁷ Mama'eay upe pēnuagamū pē nesakara 'gā 'jau: "Na pa je ra'e. Werowiat 'gā Jejuu 'ga a'jea futat. Nopoiri futari 'gā 'ga wi ojeupe mama'eay jesaukaramū miamū", 'jau nipo pē nesakara 'gā. Sā'ā ourua. Itarewara 'ga 'ā ita rapyau ouru resakawamū. Nan tee futat Janeruwarete 'ga mama'eay resaukari pē nupe ojee pejemogyppyga resaukaawamū. "Taesak tejerowiaararete 'gā amū 'jau kwy", 'jau 'ga ojeupe, mama'eay resaukaa janee. Ojeupe mama'eay jesaukaramū 'ga rerowiaaraipara 'gā poiri 'ga rerowiar awi. A'ere 'ga rerowiaararete 'gā nopoiri futari 'ga wi. Wuagamū etee futat jupe. Mama'eay upe pejejugamū pēē pejemogyppyka etee te Kristu 'ga ree. A'eramū 'gā amū pē momoirukare'ema 'ga rerowiar awi. Ouru 'ā epy ete numiamū. A'ere anure ourua miamū teepawamū. A'ere Jejuu 'ga rerowiaaramū jane nanarūi. 'Ga etee te erowiarāmū nitywi futari 'ga rerowiar awi pē momoirukaara 'ga amū. A'eramū nipo Janeruwarete 'ga, Jejuu 'ga ruaw ipe, 'jau pē nupe: "Jera'yrarete 'ga perowiat nanimenime. Nepepoiri futari 'ga rerowiar awi pejejeupe mama'eay jesaukaramū miamū. A'eramū pēē pejejesageramū jee", 'jau nipo 'ga pē nupe. A'eramū 'ga pē monou ojeypyri nakwaparimū warāu rūi futat, pē pojeuwukaa oje'jawe 'gā nupe.

⁸ Nepeesagi agawewi Jejuu 'ga rakue. A'etea pēporomutat 'ga ree. 'Awamū nanē 'ā pēē 'ga resake'ema nū. A'etea perowiarete 'ga. A'eramū pejeku'iramū pejemogyau 'ga ree. Saa'e ywagipewara 'gā ku'ia 'ga ree. Nan tee futat pēku'i 'ga ree.

⁹ Ma'eramū sipo pēku'i pejejemogyau 'ga ree? Jeju'i 'ga perowiat nanimenime pejejemogyau. A'eramū 'ga pē katu'oka. Anure nipo 'ga pē mogyau ojeipyri nakwaparimū rūi. A'eramū ki pēku'i pejejemogyau.

¹⁰⁻¹¹ Ymā, Jeju'i 'ga rure'emaue, Janeruwarete 'ga je'ega mome'wara 'gā Jeju'i Kristu 'ga rura mome'ui ojeipyriwara 'gā nupe rakue. Janeruwarete 'ga 'Agesagea 'gā mu'akwaawukaa'i 'ga rur are. A'ere 'gā naeapyo'i katui ee. A'eramū 'gā 'jau: "Anure nipo Janeruwarete 'ga 'ga amū muri ae katu'okawamū. A'eramū nipo 'ga rerowiare'ema 'gā 'ga rerekou tyweaete, 'ga jukau. A'ere nipo 'ga manū re Janeruwarete 'ga mama'e esage apoi 'ga upe", 'jau 'gā nakue. A'ere 'gā naeapyo'i katui ee. Nokwaawi nanē 'gā Kristu 'ga ruawa nū. A'eramū 'gā oporokwaawiweramū ee. "Maranime sipo Janeruwarete 'ga 'ga muri?" 'jau 'gā ojeupe. "Maran sipo 'ga ruri?" 'jau 'gā ajemogyau. A'ere 'gā naeapyo'i katui 'ga ree.

¹² "Pejejeupe jeremimome'ufera pemome'u 'gā nupe", 'jau Janeruwarete 'ga oje'ega mome'wara 'gā nupe rakue. "Na'awamū ako ma'eramū pē nupe rūi je 'i aipo 'jau. Anure ojeup ma'eramū 'gā nupe ijeaporama te je amome'u pē nupe. A'eramū ojeapowe'em pē nekoramū", 'jau 'ga 'gā nupe rakue. 'Awamū 'ā 'gā amū awau Jeju'i 'ga mome'wau pē nupe rai'i. Ymā Janeruwarete 'ga U'agesage muri ywag awi janee ikue. A'eramū 'ga 'Agesagea 'awamū Jeju'i 'ga mome'waukaa 'gā nupe pē nupe. Ywagipewara 'gā 'ā weapyoweramū Jeju'i 'ga mome'u are numiamū. A'ere 'gā 'ā naeapyo'i futari ee. "Najereapyo'i je Jeju'i 'ga remiapofer are", 'jau 'gā 'ā ojeupe.

Pepoir iki mama'e ekoete apo awi

¹³ Janeruwarete 'ga pē katu'oka wa'ya 'ga pēē erowiarāmū. A'eramū ki pēē pejepoia mama'e ekoete apo awi. 'Ga remifutar imū etee futat pēē mama'e apou. Pēnea'at kasi mama'e ekoete apo are ne. Pejejea mŷina 'ga ree. Pejejemogyppyka etee ki pejejemogyau 'ga rur are. Anure nipo, Jeju'i Kristu 'ga ruaw ipe nipo Janeruwarete 'ga mama'e esage monoi pē nupe. Aipoa ki pepesak pejejemogyau.

¹⁴ Jarejuwarete 'ga ra'yramū pejemogy. A'eramū ki pēē 'ga je'ega renupa katu katu pejejemogyau. 'Ga rerowiare'ema ako pēē mama'e apou pejejemogyau pejejemifutar imū etee ikue. A'ere kasi 'awamū peapo mama'ea pejejemifutar imū etee pejejemogyau ne.

¹⁵ Jarejuwarete 'ga remifutar imū etee ki 'awamū mama'ea peapo. Ymā te 'ā 'ga pē mū'ēi mama'e tywera apoara 'gā nui, pē mogyau wemiayuwamū rakue. Nuapoi futari 'ga mama'e tywera. Niparuapoweri nanē 'ga mama'e tywer are nū. Mama'e esagea etee 'ga iapou. A'eramū ki pēē pejejemogyau esage 'ga 'jawe.

¹⁶ Ymā te 'ā Janeruwarete 'ga ka'arana kwasiarukari Moisesi 'ga upe rakue: "Naapoi futari je mama'e tywera. A'eramū ki pēē pejejemogyau esage je 'jawe. Pēē nanē mama'e tywera apowe'em nū, je 'jawe nū", 'jau 'ga ikwasiarukaa 'ga upe rakue.

¹⁷ Jarejuwarete 'ga jane enūina, Kiapi'ni, 'jau jane 'ga upe. 'Ga 'ā ojejuka pāwē pāwē jane ree. A'eramū 'ga anure jane mepyau janeremiapofer are. Mama'e tywera apoara 'gā 'ga erekou tyweaete. Mama'e esage apoaramū 'ga jane rerekou esage. A'eramū ki pēē pejejemogyau esage etee, 'ga pojeupa, 'ga pyri pejewawe'ewe futat.

¹⁸⁻¹⁹ Ymā te 'ā jane jemogy ekoetei tee rakue, ymāwarera jareppy 'eawer imū etee rakue. A'ere jane 'awamū "Jeju'i 'ga janetywera omepy, jane mū'jāu mama'e tywera apoara 'gā nui" e kwaawi. Ma'ja pyu sipo 'ga janetywera mepyi? Ouru pyu sipo 'ga imepyi? Naani. Prata pyu sipo 'ga imepyi? Naani. Jeju'i 'ga 'ā amanū janetywera mepyau rakue. Anure ouru, prata, mīmera miamū teepawamū etee futat. A'ere Jeju'i 'ga te 'ga manū janetywera mepyau 'Uwarete 'ga upe janee. Sā'ā ore judeuramū karupa'mī jukaa wy reko'woga orotywera mepyawamū ikue. Karupa'mī esagea etee ore ijukau 'ga upe. Karupa'mī teua ore narajukaa'uweri iapyawe'em Jarejuwarete 'ga upe. Nan tee futat Jeju'i 'ga ojejukaukaa 'gā nupe, owy reko'wogukaa 'gā nupe janetywera mepyawamū rakue. 'Ga etee te 'ā esageay ma'ea. A'eramū 'ga etee futat janetywera mepyarūmū. Epy ete te 'ā janetywera repya, karupa'mī repy apyraapa.

²⁰ Ymā te 'ā Janeruwarete 'ga ywy apoe'emaue, Jeju'i 'ga pyyrūi janetywera mepyawamū rakue. 'Awamū futat aje 'ā 'ga 'ga muri ywy pe pē poawamū rai'i. A'eramū 'ga 'ga kwaawukaa pē nupe rai'i.

²¹ Janeruwarete 'ga 'ā 'ga moferapa, 'ga mogou 'ga mŷina 'wyriaramū janee. A'eramū 'ā pēē Kristu 'ga ree Jarejuwarete 'ga rerowiaa pejejemogyau. Kristu 'ga ree pejejeupe Jarejuwarete 'ga remiaporama rapesaka pejejemogyau.

²² Jeju'i 'ga je'ega peenup katu katu pejejemogyau. A'eramū pēē jepoia mama'e tywera apo awi, pejejekatu'oka 'ga upe. A'eramū pēē pejeporomutamū Jeju'i 'ga rerowiaaramū pejejee. A'eramū ki pēē 'awamū taetu pejeporomutamū pejejee.

²³ Sā'ā ae kūima'eramū ae ja'yrapya. A'eramū 'ā u'ar ire kunumūa ajemogyau ta'yriara 'ga ra'yramū. A'ere 'ā anure tuwa amanūmū etee ju'i. A'ere nanarūi Janeruwarete 'ga reko'i

janeruwamū. Namanūi futari 'ga. 'Ga je'ega nanē aateepawe'emamū nū. A'eramū 'ga oje'ega pēē erowiarāmū Janeruwarete 'ga pē mogyau wa'yramū oje'jawe.

²⁴ Ymā Janeruwarete 'ga ka'arana kwasiarukari Isai 'ga upe rakue:

“Sā'ā 'ywotyra.

A'eramū 'ā ipotyra kamēsīete te futat op'yijagamū.

Kamēsīete te futat 'ā ipotyra u'aa o'yw awi.

Nan tee futat aea.

Kamēsīete te ae pawī.

²⁵ A'ere Janeruwarete 'ga je'ega nateepawi futari”,

'jau 'ga ikwasiarukaa 'ga upe rakue.

Aipoa 'ga je'ega a'jea futat. Pē nupe Jejuī 'ga ree morogyta esage mome'uramū 'gā aipoa 'ga je'ega futat 'gā imome'wau pē nupe.

2

Pejemu'e ki Jejuī 'ga ree

¹ 'Ga je'ega renuparamū pēē pejejekatu'oka pejejemogyau 'ga upe. A'eramū ki pēē a'eramū pejejoia mama'e tywera apo awi. Pē'me kasi ne. Pejuerekoay kasi mama'e are ne. Pejakurap kasi ne. Peapo kasi mama'e tywera ne.

² Kunumīakya 'jawe ki pejemogy. Sā'ā kunumīakya 'gā oy kamy uwejuweja. Nan tee futat ki pēē. Pejemu'e ki 'ga je'eg are au'jeteramū. Oy kamy are kunumīakya 'gā opifuakaramū ajemogyau. Nan tee futat pēē 'ga je'ega renuw ire pejejemogyau 'ga rerowiaarareteramū. 'Ga je'ega wesageramū etee futat pē nupe. Nitywi futari mama'e tywera ipype. A'eramū ki pēē 'ga je'eg are pejemū eweramū pejejemogyau. 'Ga je'eg are etee pejemū'e re 'ga remifutara kwaapa pejejemogyau.

³ Ymā Janeruwarete 'ga ka'arana kwasiarukari 'ga amū upe rakue. “Janejararete 'ga esage”, 'jau 'ga ikwasiarukaa 'ga amū upe rakue. Janeruwarete 'ga pē katu'oka rakue. A'eramū pēē “Janejararete 'ga esage” e kwaapa.

⁴ Jarejuwarete 'ga perowiat rakue. A'eramū ki 'awamū taetu pēē 'ga rerowiaa pejejemogyau. 'Oga apoara 'jawe Janeruwarete 'ga. Sā'ā 'oga apoara 'gā 'yw esagea etee imū'ēa tupaa'mywareteramū. 'Yw esagea etee nanē 'gā erawau inuga tupaa'mywamū. Itaoga apoara 'gā nanē ita esagea etee imū'jāu nū. A'eramū 'ā itaoga apoara 'ga ita amū monou imomoa ojewi. Aipoa ita nia'wyrī 'gā nupe. Nan tee futat judeuramū ore'wyrīara 'gā Jejuī 'ga reroyrūmū. A'eramū 'gā 'ga jukaukaa jefaruu 'gā nupe ikue. A'ere Janeruwarete 'ga 'gā nemiroyrūmera 'ga mogoi 'wyrīaramū wemiayuwamū jane. “Esage 'ga. A'eramū je 'ga monou 'wyrīarareteramū orojemiyauwū 'gā nupe”, 'jau 'ga rakue.

⁵ Itaoga apoara ita esage etee imū'jāu wog are. A'eramū 'ga im'yina tenaw ipe te tee. Nan tee futat Janeruwarete 'ga pē mū'jāu wemiayuwamū. A'eramū ki pēē pejejemogyaukaa 'ga upe 'ga remifutar imū etee futat. Ymā judeuramū ore mama'e reroi mainana 'gā nupe ikue: “Emono Jarejuwarete 'ga upe jee”, 'jau ore erawau 'gā amū nupe ikue. Mainana 'gā etee te oporowyky 'ga upe ikue. A'ere jane 'awamū jane jemogyi mainana 'jawe 'ga upe. Kristu 'ga rerowiaaramū jane juejue etee futat saporowyky 'ga upe. Ymā 'ā judeuramū ore orojejmawa monou 'ga upe rakue. A'ere jane 'awamū jane jemogyi 'ga upe oporowyky ma'eramū. “'Ga 'Agesage pājē mū je mama'e apoi 'ga upe, 'ga muorypa”, 'jau pēē 'ā 'awamū. Jejuī Kristu 'ga 'ā pēē erowiaa pejejemogyau. A'eramū nipo Janeruwarete 'ga 'jau pē nupe: “Esage 'gā porowykya jee”, 'jau nipo 'ga pē nupe.

⁶ Ymā te 'ā Janeruwarete 'ga oje'ega kwasiarukari ka'aran are Isai 'ga upe rakue:

“Sā'ā itaoga apoara 'gā.

Itapewuu renuēma jui.

A'eramū 'ā 'ga aipoa ita monou imojypa iypy pe.

A'eramū 'ā aipoa ajepeja ita koka imotypa.

A'eramū futat 'ā aku'jawe'em. Nan tee futat je tejemimono 'ga monoi Siāo 'jaw ipe,* 'ga rerowiaara 'gā nupe a'eramū futat nipo.

A'eramū futat nipo 'ga rerowiaara 'gā aku'ipawe'emamū futat 'ga ree”,

'jau 'ga ikwasiarukaa 'ga upe rakue.

⁷ Jejuī 'ga rerowiaaramū pēē 'jau: “Ita esage 'jawe 'ga”, 'jau pēē 'ga upe. A'ere nipo 'ga rerowiare'ema 'gā niporomutari 'ga ree. Ymā te 'ga amū ka'arana kwasiari 'ga ree rakue:

“Itaoga apoara 'gā weroyrū amū itaa numiamū.

Nia'wyrī aipoa itaa 'gā nupe. A'ere ajepeja 'ga ruri 'gā nemiroyrūmera ita pyyka imonou 'oga ppykokaramū”,

'jau 'ga ikwasiaa rakue.

* 2:6 Siāoa Jerusarega rer irū.

⁸ Anure Isai 'ga ikwasiaa ee nū:

“Aipo ita are nipo kwaiwete 'gā 'ari.

Aipo ita 'gā netygukaa”,

'jau Isai 'ga ikwasiaa rakue.

Nan tee futat nipo Jeju 'ga rerowiare'ema 'gā jemogyi ita are u'at ma'e 'jawe. Niporenuiwieri 'gā 'ga mome'u are. Niparurowiariwieri 'gā Jeju 'ga ree. A'eramū 'gā ojereko tywerukaa Janeruwarete 'ga upe. Nan Janeruwarete 'ga jane rerekoi Jeju 'ga mome'u are janeporenuiwieri'emamū. Ymā we futat 'ā Janeruwarete 'ga 'i rakue: “Teja'yra 'ga rerowiare'ema 'gā je areko tywet”, 'jau 'ga 'ā ojeupe rakue. A'eramū 'ga wemifutar imū etee futat 'gā nerekou tyweaete.

⁹ A'ere nanarūi Kristu 'ga rowiaaramū jane. Ymā we Janeruwarete 'ga jane mū'jāu 'gā nui, jane mogyau wemiayuwamū. Janeruwarete 'ga futat 'ā jane 'wyriararetereramū. Ojeupe oporowyky ma'eramū 'ga jane mogyau. Wemiayuwamū futat 'ga jane mogyau. Janeruwarete 'ga kwaapare'ema 'gā ypytunimū wata ma'e 'jawe. 'Gā nui futat 'ā 'ga jane mū'jāu jane mogyau okwaaparamū. A'eramū 'ā jane jarejemogyau 'arimū wata ma'e 'jawe mama'e apou 'ga remifutar imū. 'Ga jane mū'jāu 'gā nui wemiapofera mome'waramū. Janeruwarete 'ga esage. “Mama'e esagea etee 'ga wapo” 'e mome'waramū 'ga jane mū'jāu mama'e tywera apoara 'gā nui.

¹⁰ Ymā te 'ā pēe na'ga remiayuwa rūi rakue. A'ere 'awamū pejemogy 'ga remiayuwamū. Ymā te 'ā pēe “Janeruwarete 'ga ajemuaēm jane ree” 'ea nepekwaawi pejemogyau rai'i. A'ere pēe 'awamū pejemogy 'ga remiayuwamū. A'eramū pēe “Janeruwarete 'ga ajemuaēm jane ree” 'e are pejejapoyoramū pejemogyau.

Janeruwarete 'ga remiayup

¹¹ Pēe 'ā jejekoty'aawaretea. A'eramū je pē mu'akwaapa mama'e are. Napejeje'wyr ipe rūi pejemogy. Tekotee 'gā 'wyr ipe te pejemogy ra'ne. Au 'ā jane jemogyi kwaparimū warāu etee futat. Ywag ipe oo ma'eretea te jane. Aipoa te jane'wyraretea. A'eramū ki pēe mama'e tywera apowe'em pejemifutar imū etee ne. Pejemifutar imū etee mama'e apo re pēe mama'e tywera peapo pejemogyau ne.

¹² A'ere ki pejemogy esage Jarejuwarete 'ga rerowiare'ema 'gā pype. “Mama'e tywera 'gā wapo”, e'i futatee agawewi nipo 'gā pē nupe. A'etea ki pejemogy esage 'gā pype, mama'e esagea etee iapou pejemogyau 'gā pype. A'eramū 'gā pejemogy esage resaka. A'eramū nipo 'gā 'jau: “Na pa je ra'e. Ajemogy esage 'gā”, 'jau nipo 'gā ojeupe. A'eramū nipo 'gā anure Jarejuwarete 'ga muorypa pē nee. 'Ga rowase jarejatykaaw ipe nipo 'gā 'jau: “Ene te 'ā eneresage. Ejerowiara 'gā eremogy esage jepi”, 'jau nipo pē nee i'me ma'efera 'gā Jarejuwarete 'ga upe.

¹³⁻¹⁴ Pēe 'ā Jarejararete 'ga rerowiara. A'eramū ki pēe peje'wyrriara 'gā je'ega nanē enupa pejemogyau nū. Aipoa Janejararete 'ga amuekōēai. Pē'wyrriara 'ga nipo 'gā amū m'yina 'wyrriarimū pē nupe opoaawamū. “Mama'e tywera apoara 'gā nupe tereje'eg jee 'jau”, 'jau 'ga 'gā amū nupe. “Mama'e esage apoara 'gā nupe nanē ene eje'ega nū. Mama'e esagea peapo”, pe'je ki mama'e esage apoara 'gā nupe jee”, 'jau nipo 'ga 'ga upe. A'eramū ki pēe 'wyrriari 'ga je'ega nanē enupa nū.

¹⁵ Jare'wyrriara 'gā je'ega renupa nanē jane Jarejuwarete 'ga remifutararete apou. 'Ga remifutar imū etee jarejemogy resag ire jane resakara 'gā i'me ma'e 'gā je'ega rerowiare'ema ajemogyau. A'eramū futat nipo i'me ma'e 'gā o'meu'jawe'emamū janee.

¹⁶ Nitywi futari mama'ea pē nupe iapoukaara 'gā amū. Pēe tee futat mama'ea peapo pejemifutar imū etee futat. A'ere Janeruwarete 'ga janejararetea. A'eramū 'ga pē mū'jāu mama'e tywera apoara 'gā nui. A'eramū ki pēe pejejewyre'ema mama'e tywera apo upe. Jarejuwarete 'ga remifutar imū etee futat ki pēe mama'e apou pejemogyau.

¹⁷ Pejejuka esage pāwē pāwē ki pejejee. Pejeporomutaramū Jeju 'ga rerowiaramū pejejee. Peje'wyrriara 'gā ki pepojeup. Jarejuwarete 'ga taetu pēe ipojeupa.

¹⁸ 'Ga amū upe pejeporowykyau ki pejejerekwara 'ga je'ega peenup. Pēnerekwara 'gā amū nipo opota'waramū pē nee. A'eramū pēe 'gā je'ega taetu enupa etee. Pēnerekwaramū nipo pē nerekou tyweaete agawewi. A'etea pejeporowykyau esage ete futat pejemogyau 'gā nupe.

¹⁹⁻²⁰ Pejereko tywera 'gā je'ega pēe enuwete re Janeruwarete 'ga mama'e esage apoi pē nupe ee. “Je rereko tywerete agawewi nipo 'gā amū. A'etea je 'ga je'ega aenuw ete futat tekou”, pe'je ki. Aipoa Janeruwarete 'ga afutat. A'eramū ki pēe pejejuagamū jupe. Jupe pēnuag ire Janeruwarete 'ga mama'e esage apou pē nupe ee. Mama'e tywera apo are pejereko tywera upe pēnuagamū Janeruwarete 'ga nuapoi mama'e esagea pē nupe. Pēe tee futat pejereko tywerukaa pejerekwara 'ga upe. Mama'e esage pēe iaporamū nipo 'gā

pē nerekou tyweaete 'eramū te Janeruwarete 'ga jejukai pē nee, mama'e esage apou pē nupe ee.

²¹ Pejereko tywer ekoete upe pēnuaga Janeruwarete 'ga ifutaa.

Jeju Kristu 'ga 'ā mama'e esage etee agawewi wapo. A'etea 'gā 'ā wereko tywerete 'ga. Janetywera mepyawamū 'ga 'ā ojereko tywerukaa 'gā nupe. A'eramū ki pēē 'ga 'jawe futat pejejemogyau.

²² Nuapoi agawewi futat 'ga 'ā mama'e tywera. Ni'mei 'ga nanē nū.

²³ Okurawamū miamū 'ga 'gā kurape'ema. Wereko tywereteramū miamū 'ga ojepeke'ema 'gā nee: "Je rereko tywet pejepe. A'eramū je pē nerekou tyweaete", 'jawe'em 'ga 'gā nupe. Uwarete 'ga ree etee 'ga jemogyppygi. "Jeruwarete 'ga te nipo 'gā wereko 'gā nemiapofer are", 'jau etee 'ga ojeupe Uwarete 'ga ree ojemogyppyka. A'eramū ki pēē pejejemogyau 'ga 'jawe futat.

²⁴ Ypeywar are omafu'amamū Jeju Kristu 'ga janetywera mepyau. Na'ga tywer are rūi 'gā 'ga rerekou tywet. Janetywer are te 'gā 'ga rerekou tyweri. Aipoa 'ga iapou janetywer awi jane mueateewamū. Jane katu'okawamū 'ga manūi janetywera mepyau. 'Ga manū enune 'gā 'ga mopimopika. Omopig are 'ga jane katu'oka janejero'wu awi.

²⁵ Ymā 'ā neperowiari Jeju 'ga rakue. Jeju 'ga rerowiare'ema 'gā karupa'mī ka'jama 'jawe. Sā'ā karupa'mī ka'jama. A'eramū 'ā oka'jam ire karupa'mīa ojewyere'ema ojetee. A'eramū 'ā ijara 'ga awau weymawa rekaa. Wesag ire 'ā awau 'ga rewiri nū. Nan tee futat 'ā pēē nakue. Oka'jam ma'e 'jawe pejemogy. A'ere 'awamū Jeju 'ga pē nekari pē nerawau ojeupi 'Uwarete 'ga rape rupi.

3

Imen ma'e

¹⁻² 'Awamū je imen ma'eramū pē mu'akwaawi pejemogy are. Pejemenā 'gā je'ega ki peenuw ete. Amumeramū nipo pēmena Jeju 'ga rerowiare'ema. A'ere ki pejemogy esage. A'eramū nipo 'gā pejemogy esage resaka 'gā nanē Jeju 'ga rerowiaa nū. Jeju 'ga nipo pēē imome'wawe'em agawewi 'gā nupe. A'etea nipo 'gā Jarejuwarete 'ga rerowiaa pejemogy esage resag ire.

³ "Tajemokaturam wā nupe 'jau kwy", 'jau nipo pēē pejejeupe. Maran sipo Jeju 'ga rerowiaaramū kūjānamū pejekekatu'oka 'gā nupe? Taity esage munewa sipo pē katu'ok? Pejewaga munewa sipo pē katu'ok? Pejeakagawirywa sipo pē katu'ok? Naani. Pejewaga pyu pejekatu'oka sipo pē katu'ok? Naani.

⁴ Pēneko esagea etee pē katu'ok pē mogyau a'jea futat. Pejemuawapira te pē katu'ok pē mogyau. Pejejee pejepota'wa nanē pē katu'ok pē mogyau nū. Aipo kūjā esage ajemogyau Jarejuwarete 'ga upe. Nateepawi futari ēē resagea 'ga upe.

⁵ Ymā kūjā 'gā amū Jarejuwarete 'ga rerowiari nanimenime rakue. "Anure nipo Janeruwarete kīā je roeroi ojepyri", e'i 'gā ojeupe rakue. Poromū 'gā omena 'gā je'ega renuwi etee rakue. Nan 'gā jekatu'ogi Jarejuwarete 'ga upe rakue.

⁶ Sā'ā Sara ēē rakue. Omena 'ga je'ega ēē enupa ete, Abraão 'ga je'ega ēē enupa ete rakue. "Je Ku'jyp", 'jau ēē 'ga upe rakue, 'ga pojeupa rakue. A'eramū ki pēē ēē 'jawe pejejemogyeramū pejejemogyau esage. Mama'e awi nanē pejeky'jawe'em nū. A'eramū nipo pejejemogyau Sara ēē ra'ya 'jawe.

Emireko ma'e

⁷ 'Awamū je emireko ma'eramū pē mu'akwaawi pejemogy are. Pēnemireko 'gā nifuakari pē 'jawe. A'eramū ki pēē pejejemireko 'gā nerekou esage. Pejejejukau esage 'gā nee. Anure nipo Jeju 'ga pē roeroi pē mogyau ojepyri. Pēnemireko 'gā nanē 'ga rerowiaa nū. A'eramū 'ga pēnemireko 'gā nanē erawau imogyau ojepyri nakwaparimū rūi nū. A'eramū ki pēē 'gā nerekou esage etee futat. Kasi a'e pe Janeruwarete 'ga nuenuwi pēje'ega ojeupe peje'egamū ne.

Pejepyk kasi 'gā nee ne

⁸ Ka'arana kwasiapawe'emaue je pē mu'akwaawi pāwē pāwē, kūima'eferamū, kūjāmeramū 'jau. Majepēi 'yweteewara 'jawe ki pejemogy. Pejepota'waramū pejejee. Jeju Kristu 'ga ree pejejemogyppyka pejejemogyau. A'eramū pēē pejejemogyau pejejopytuna 'jawe. A'eramū ki pēē pejeporomutaramū pejejee. Jeju 'ga rerowiaaramū ae ojopytuna tee te 'jawe futat. A'eramū ki pejepota'waramū pejejee. Pejepoaa mama'e are. Pejerowiaraip kasi pejejee ne.

⁹ Pejepyk kasi 'gā nee ne. Pejejeupe mama'e tywera 'ga amū iaporamū kasi mama'e tywera peapo 'gā nupe ne, pejepepyke'ema 'gā nee. Mama'e esagea etee ki peapo 'gā nupe. 'Gā amū nipo pē kurapa. A'ere kasi pekurap 'gā ne. Pejekuraw ire pejeporogytau esage etee 'gā nupe, pejemara'ne'emamū 'gā nee. Mama'e tywera apoara 'gā nui pē mū'ē re

nipo Janeruwarete 'ga 'jau pē nupe: “Mama'e esagea taapo pē nupe 'jau”, 'jau 'ga pē nupe wemiayuwamū pē mogyau. A'eramū ki pēē mama'e esagea etee iapou pejejaupe.

¹⁰ Ymā te Janeruwarete 'ga ka'arana kwasiarukari aipo are 'ga amū upe rakue:

“Pejejekōēāiweramū ki peojet pejejuago'o awi.

Peje'eg tywet kasi pejejaupe ne.

Au'je ki pē'me re.

¹¹ Au'je ki mama'e tywera peapo re.

Mama'e esagea etee ki peapo.

Pejepota'waramū etee pejejemogyau pejejuue.

¹² Janejararete 'ga ojejuka esage mama'e esage apoara 'gā nee.

Ojeupe 'gā je'egamū 'ga mama'e esage apoara 'gā je'ega renupa.

A'ere 'ga mama'e tywera apoara 'gā nopoari”,

'jau 'ga ikwasiarukaa 'ga amū upe rakue.

¹³ Mama'e esagea pēē iapo re sipo 'gā pē nereko tyweri ee? Naani. Pē nereko tywerete ekoete te 'gā. Napēnemiapo esage are rūi 'gā pē nereko tyweri.

¹⁴ A'ere ki pēku'i etee pejejemogyau ee 'gā amū pejejereko tyweramū mama'e esage apo are. Janeruwarete 'ga mama'e esagea wapo ee pē nupe. A'eramū ki pejekiawem em pejejereko tywera 'gā nui. Pēpy'a'wyt kasi 'gā nee ne.

¹⁵ Pejemogypyk 'ā Kristu 'ga ree. 'Ga 'ā pējararetea. A'eramū ki pēē 'ga muorypa, 'ga je'ega renupa. 'Ga amū nipo oporonupa ee: “Ma'eramū pēē pejejemogypyka Jejui 'ga ree?” 'jau nipo 'gā pē nupe. A'eramū ki pēē 'gā mueapyou ee.

¹⁶ Pejeporogytau esage etee 'gā nupe. 'Gā nupe imome'uramū kasi pemue 'gā ne. A'eramū pēē mama'e esagea etee iapo re pēē pejejenosōue'em pejejemiapofera renosōue'em. Pejemogy esage. A'eramū nipo “Kristu 'ga rerowiaara 'gā mama'e tywera etee wapo” pē nupe 'jara 'gā ojenosōu u'eawer are.

¹⁷ Amumē Janeruwarete 'ga pē nereko tywerukat 'gā nupe mama'e esage etee pēē iapo re. “Tasak 'gā tejerowiara 'jau kwy” 'jau 'ga ojeupe. A'eramū pē nereko tywera wesageramū 'ga upe. Maranuara ajeje esage 'ga upe? Pēnemiapo tywer are 'gā pē nereko tywera? Pēnemiapo esage are te ra'u nū? Pēnemiapo esage are 'gā pē nereko tywera esage 'ga upe.

¹⁸ Sā'ā Kristu 'ga. Nuapoi 'ga mama'e tywera. A'etea 'gā 'ga wereko tywet 'ga jukau. Nan tee futat 'ga rerowiare'ema 'gā pē nereko tyweretei. Jejui Kristu 'ga esage ma'ea. Naotywer are rūi 'ga manūi ikue. Nitywi futari mama'e tywera 'ga pype. Janetywer are te 'ga manūi janetywera mepyawamū 'Uwarete 'ga upe ikue. Namanūu'jau'jawi 'ga. Majepei tee futat 'ga amanūmū mama'e tywera apoaramū jane katu'okawamū. Amanūmū 'ga janetywera mepyaupap. Esage ma'e 'ga amanū itywet ma'eramū jane ree. 'Uwarete 'ga pyri werowiaaramū jane reroowamū te 'ga manūi. 'Ga rerowiare'ema 'gā 'ga jukau ikue. 'Ga manū re 'ga remiayua 'gā amū Jejui 'ga rerawau inuga ita kwara pype. A'ere Janeruwarete 'ga 'Agesate 'ga moferawū nū.

¹⁹ Ita kwara pype 'ga ruwamū futat 'ga 'aga uēma 'ga wi. A'eramū 'ga 'aga oje'ega ae'agera upe. Ae'agera rupaw ipe awau. A'ere ae'agera nū'ēa'uweri pe awi. A'eramū Jejui 'ga awau oje'ega jupe. “Nepeenuwi Jeruwarete 'ga je'ega rakue. A'eramū nipo 'ga anure pē monou mama'eukwaawa rapyaw ipe”, 'jau 'ga oje'ega jupe.

²⁰ Ymā te Janeruwarete 'ga ruagamū aepy 'gā tywera upe rakue. Nue 'ga yaruu apo 'ga poromukuramū 'ga wuagamū 'gā tywera upe. A'ere 'gā nuerowiari futari 'ga. A'eramū 'gā osowe'em futat yaruu pype. A'eramū 'gā opapa 'y pyu rakue. Nue 'ga etee, opytuna 'gā netee awau osou jui. Ose ma'e 'gā pytuna oīto etee. Oīto 'gā etee osou 'y awi. A'eramū 'gā amanūmū'em 'y pe.

²¹ Yara pype 'gā sea Jejui 'ga rerowiaara 'gā pymāwama resaukaawamū rakue. Sā'ā yara pype ose ma'e 'gā manūe'ema. Nan tee futat Jejui Kristu 'ga Ruwarete 'ga 'ga moferawū jane katu'okawamū. Werowiarāmū Jejui Kristu 'ga jane katu'oka. A'eramū jane jarejepymāukaa 'y pe 'gā amū upe, Jejui 'ga rerowiaara resaukaawamū. Najarepiky'a awi jarepireitawamū rūi jane jarejepymāukaa 'y pe 'gā amū nupe. Jejui 'ga rerowiara resaukaawamū te jane jepymūkari 'y pe 'ga amū upe. 'Y pe jarejepymī enune jareje'ega Jarejuwarete 'ga upe: “Jetywera emoit je wi. Taenup eneje'ega 'jau” 'ga upe 'e re te jarejepymāukaa 'y pe 'gā amū nupe.

²² Amanū re 'ā Jejui 'ga oferapa nū, awau ojewya 'Uwarete 'ga pyri. Peu owaēm ire 'ga reni 'Uwarete 'ga pyri, 'Uwarete 'ga jakwatawa katy. A'eramū 'gā 'ūina 'wyriaramū ywagipewara 'gā nupe. Ywagipewara 'gā nupe, 'gā 'wyriara 'gā nupe. Mīmera 'gā nupe Jejui 'ga 'ūina 'wyriaramū. 'Ga je'ega 'gā wenup pāwē pāwē ajemogyau.

4

Kristu 'ga 'jawe ki pejemogy

¹ Kristu 'ga ako wayrūnamū jane ree ikue. Amanūmū nanē nū ako 'ga janetywera mepyawamū ikue. “Najerayrūweri je 'gā nee”, 'jawe'em futat 'ga rakue. A'eramū ki pēē pejemogyau 'ga 'jawe. 'Ga mome'u are nipo 'gā amū pē nerekou tyweaete. A'ere ki pēnuag pejejereko tywera upe. Werekou tywera upe uag ma'e 'gā opoit nanē mama'e tywera apo awi nū. Nuapou'jawi futari 'gā mama'e tywera.

² A'eramū ki pēē mama'e apou Jarejuwarete 'ga remifutar imū etee futat, ywy pe pejemogyau. Pejemifutar imū pēē mama'e apou'jape'ema.

³ Ymā te 'ā mama'ea peapo pejemifutar imū etee pejemogyau rakue. Neperowiari wejue Jejui Kristu 'ga rakue. A'eramū pēē mama'e tywera apou pejemogyau rakue. A'eramū pēē pejemirekoe'em are pejekou rakue. Kūjānamū pēē pejemene'em are pejekou. Kawīajaiwa rykuu pejemogyau. Maraka pēē iapou kawīajaiwa rykuu pejemogyau rakue. Mama'e tyweretea pēē iapou maira'me a'agaw are pejejorypawamū rakue. A'ere 'awamū nepeapou'jawi aipoa.

⁴ A'eramū 'awamū Jejui 'ga rerowiare'ema 'gā oporesagamū etee pē nee, mama'e tywera pēē iapou'jawe'emamū. A'eramū 'gā pē naykau ojepyri mama'e tywera pēē iapoe'emamū. A'eramū 'gā pē je'ēwu'jaga ekoete, pē kurapa.

⁵ A'ere nipo 'gā anure werekawera mome'ui Jarejuwarete 'ga upe. 'Gā nerekawera 'gā imome'u re nipo Janeruwarete 'ga 'gā mepyau ee. Wowase ae majatykaaw ipe nipo 'ga najuejue etee jane mepyau janerekwawer are. Amanū ma'efera 'gā 'ga imepyau. Imanūe'emamū nanē 'ga jane mepyau nū. Oje'ega renupara 'gā 'ga erawau imogyau ojepyri. Oje'ega renupare'ema 'gā 'ga imonou mama'eukwaawa rapyaw ipe.

⁶ Ma'eramū 'ā 'gā amū ruri Jejui 'ga mome'wau pē nupe rakue. Pēpytuna 'gā amū 'ā amanū rakue. Jejui Kristu 'ga rure'emaue ywy pewaramū 'ā jane manūi. A'eramū pēpytuna 'gā amū amanūmū rakue. A'ere 'ā 'gā amanūme'ēwe Kristu 'ga rerowiari rakue. A'eramū 'gā awau ajemogyau Jarejuwarete 'ga pyri nakwaparimū warāu rūi futat.

Mama'ea ki peapo pejejopoaawamū

⁷ Niporomukui futari nipo Kristu 'ga 'ua. A'eramū nipo 'ga remiapofera mama'ea ateepawamū. 'Ga rerowiaaramū jane jarewau 'ga pyri. 'Ga rerowiare'ema 'gā awau mama'eukwaawa rapyaw ipe ajemogyau. Ma'eramū 'ā je 'i pē nupe: Pem'yi kasi mama'e tywera apo are pejejea ne. Pejemogyau pejemogyau Jarejuwarete 'ga ree, je 'i pē nupe. Pejeje'ega monou au'jeteramū 'ga upe mama'e are.

⁸ Pejeporomutamū pejejee. Pejejee pēporomutara esage futat Ku'jywa 'ga upe. Pejejee pejeporomutamū pēē pejejea'are'emamū au'jeteramū pejejotywer are.

⁹ Pejejeupe Jejui 'ga rerowiara 'ga amū ruramū pēē 'ga mua pejejog ipe, pejejejukau esage 'ga ree, pejeku'iramū 'ga ree.

¹⁰ Janeruwarete 'ga 'ā mama'ea wapoukat janee. Najareju'jawe etee rūi jane 'ā mama'e apoi. Amumeramū 'ga 'ā jane mogyau moromu'jaramū jarejaupe, mama'e are jarejamu'jaramū. Amumera 'gā 'ga imogyau 'wyrirāmū 'gā nupe. A'eramū ki jane mama'e apou jarejopoaawamū Jarejuwarete 'ga muorypawamū etee futat.

¹¹ Jarejuwarete 'ga je'ega mome'waramū pēē 'ga je'ega etee futat imome'wau a'jea futat. 'Gā nupe mama'e esage apoaramū pēē mama'e apou Jarejuwarete 'ga pājē mūi etee futat. A'eramū pē nesakara 'gā Jarejuwarete 'ga muorypa pē nee, pēneko esage are. Jejui Kristu 'ga remiayuwamū jane jemogyi. A'eramū jane 'jau Jarejuwarete 'ga upe: “Ene te 'ā eneresage. Ene te 'ā pājērete. Neneteepawi futari 'ā e'jina”, 'jau jane 'ga upe. A'jea futat jane'ea.

Pēnuag iki mama'ey upe

¹² Pēē 'ā jejekoty'aawaretea. A'eramū je pē mueapyou pejemogy are. 'Awamū pētywerete pejemogyau. Mama'eaya ojesaukaa pē nupe, pē nerekou tyweaete. Jejui Kristu 'ga ree pejemogyapyka pejemogyau. A'eramū pēē 'ga ree pejemogyapyka are mama'eaya pejejeupe ijesaukaramū ki pejemogyapyka etee te pejemogyau 'ga ree. A'eramū pēē pejepy'a'wyre'emamū pejemogyau ee. “Ma'eramū je tejereko tywerukaa 'ga ree 'ū”, 'jawe'em pēē pejejeupe.

¹³ Ymā 'ā Kristu 'ga jereko tywerukari pē nee rakue. A'eramū pēē pejeku'iramū etee 'ga ree pejejerereko tyweramū. 'Ga ree pejejerereko tywerukari ire nipo pejeku'iramū anure 'ga ruramū. Najuejue etee futat jane 'ga resage resaka 'ga pājē reewe. A'eramū jane jareku'iramū 'ga ree, 'ga ruramū.

¹⁴ Pēē 'ā Kristu 'ga remiayuwa. Janeruwarete 'ga 'Agesagea 'ā pē nerekou. 'Ga 'Agesagea esage ete ma'ea. Poromū pē nerekou. A'eramū nipo 'gā amū pē kurapa 'ga ree. 'Ga

'Agesagea pē nerekoe'em ire amunipo 'ā 'gā nepē kurawa'uweri. A'ere 'ā 'ga 'Agesagea pē nerekoi. A'eramū 'gā pē kurapa. A'ere ki pēku'i etee pejekurawamū.

¹⁵ Mama'e tywera pēē iapo re 'gā pē nerekou tyweaete a'jea futat pēnemiapofer are. 'Ga amū pēē ijuka re te amunipo 'ā 'gā pē nerekou tyweretei ee. Mama'e are pemunarū re te amunipo 'ā 'gā pē nerekou tyweretei ee. Mama'e tywera pēē iapo re te amunipo 'ā 'gā pē nerekou tyweretei. Pejepamuawapirukare'em are. Mimer are amunipo 'ā 'gā pē nerekou tyweretei a'jea futat. A'ere kasi peapo mama'e tywera ne. Mama'e tywera apo are 'gā pejejeroko tyweramū nipo pejepoyje'emamū pejejemogyau.

¹⁶ A'ere kasi Kristu 'ga ree 'gā pejejeroko tyweramū pejenosī ne. Naani. Pejerowiat Kristu 'ga remiayuwamū pejejemogy are. "Au'jete je mogo ape Kristu 'ga remiayuwamū", pe'je ki Jarejuwarete 'ga upe, 'ga muorypa ee.

¹⁷ Owaēm futat 'ā jarejau Janeruwarete 'ga jane mojo'oga upe. 'Awamū miamū futat 'ga werowiaraparamū jane rereko tyweri'i janeremiapofera tywer are, mama'e tywera apo awi jane momoirukaawamū. Anure taetu nipo 'ga werowiare'ema 'gā nerekou tyweretei 'gā werowiare'em are, 'gā mojo'oka werowiaaramū jane wi, 'gā monou mama'eukwaawa rapyaw ipe.

¹⁸ Ymā te 'ā Janeruwarete 'ga ka'arana kwasiarukari Sarumāu 'ga upe rakue:

"Janeruwarete 'ga remiayuwa 'gā ojereko tyweruka'ri ywag ipe o enune.

A'ere 'ga remiayuwe'ema 'gā anure 'gā jereko tywerukari.

Nooi futari 'gā ywag ipe.

A'eramū taetu 'gā ojereko tyweaete ojere'emamū futat nipo",

'jau 'ga ikwasiarukaa 'ga upe rakue.

¹⁹ Wemifutar imū jane jereko tywerukar ire Janeruwarete 'ga ojejukau esage jane ree. 'Gā amū jarejereko tywerauwe kasi sapoit 'ga wi ne. A'eramū jane jarejemogyppyka 'ga ree, jareapoarera 'ga ree. U'eawer imū etee futat 'ga mama'e apoi. A'eramū ki jane mama'e apou 'ga remifutar imū etee futat, jarejemogyppyka 'ga ree.

5

Jeju 'ga rerowiaat

¹ 'Awamū je Jeju 'ga rerowiaara 'gā 'wyriaramū pē mu'akwaapa mama'e are. Je nanē 'ga rerowiaara 'gā 'wyriara nū. Ymā te je Kristu 'ga rayrū resagī ikue. 'Ypeywar are 'ga manūnamū je 'ga resaka ikue. Anure nipo je Kristu 'ga ruaw esage enyfuga rupi je oi tekou 'ga pyri. A'eramū je 'jau pē nupe: Janeruwarete 'ga pē mū'ē, pē mogyau werowiaara 'gā 'wyriaramū rai'i.

² A'eramū ki pēē pejejejukau esage 'ga rerowiaara 'gā nee. Sā'ā karupa'mī are omaenun ma'e 'gā jejuka esagea weymaw are. Nan tee futat pejejuka esage Jarejuwarete 'ga remiayuwa 'gā nee. Pejeku'iramū pejejemogyau 'gā nee pejejuka esage are. Ojeupe pejeporowyky are pēku'ia Janeruwarete 'ga ifutaa. 'Gā nee pejeporowyky repy are etee kasi pēnea'ar ine. 'Gā poaawamū te ki pejejuka esage 'gā nee.

³ Pēē 'ā 'gā 'wyriara. A'ere kasi pemoywrafen pejeje'ega 'gā nupe ne. Peko esage etee 'gā pype. A'eramū nipo 'gā ojemu'jau pē nee.

⁴ Kristu 'ga 'ūi 'wyriarareteramū werowiaaramū jane'wyriaramū. 'Ga 'ā jane rereko weape namutat. A'eramū 'ga werowiaara 'gā nee pejejuka esageramū pē mepyau 'gā nerekou esage are, pē nerawau pē mogyau ojeypyri.

⁵ 'Awamū je pē mu'akwaawi mama'e are kunumīmeramū, kūjāmukuferamū 'jau. Peenup katu katu ki iymanera 'gā je'ega. Nepekwaapawi we mama'ea. A'eramū ki pēē 'gā je'ega renupa.

'Awamū je 'i pē nupe najueje etee futat. Pejepoaa pāwē etee nanē mama'e apo are. Pejopoar iki mama'e apo are. A'ere kasi pejerowiarap pejepopoar are ne. Ymā te 'ā Janeruwarete 'ga ka'arana kwasiarukari Sarumāu 'ga upe ee rakue:

"Janeruwarete 'ga imara'ne ojee tee ojerowiarap ma'e 'gā nee.

Nopoari futari 'ga 'gā mama'e apo are.

Ojee tee ijerowiaraiwe'ema 'gā etee te 'ga opoat mama'e apo are",

'jau 'ga ikwasiarukaa ka'aran are rakue.

⁶ A'eramū ki pēē pejejerowiaraipe'ema pejee. Peenup katu katu Jarejuwarete 'ga je'ega. Pājērete'a 'ga. A'eramū 'ga oje'ega renupara 'gā poaa. A'eramū nipo 'ga anure pē mogyau 'wyriaramū wemifutara 'ara rupi.

⁷ Pejemuaēm kasi mama'e are pejejemogyau ne. Janeruwarete 'ga pē nerekou weape. A'eramū pēē pejepy'ata'waramū pejejemogyau.

⁸ Pejea'gu ki mama'eukwaawa 'wyrriar awi. Sā'ā 'miara ioa ijemi'uekara. Nan tee mama'eukwaawa 'wyrriara reko'i jane rewiri jane mu'akwaawukare'ema jane rekoramū. A'eramū Jarejuwarete 'ga je'ega renuwukare'ema janee.

⁹ A'eramū ki pēē Jeju'i 'ga ree te futat pejejemogypyka pejejemogyau. Perowiat kasi mama'eukwaawa 'wyrriara je'ega ne. Pēfuakar iki jupe. Pēnea'ar iki pejewirera 'jawewara 'gā nee, Jeju'i 'ga rerowiaara 'gā nee. 'Gā nanē 'ā ojeroko tywerukaa ajemogyau nū. 'Ga rerowiare'ema 'gā 'gā nerekou tyweaete. A'eramū 'gā ajemogyau tyweaete pē 'jawe futat. Amunawa moyka 'ga rerowiare'ema 'gā 'ga rerowiaaramū jane rerekou tyweaete.

¹⁰ A'ere nipo 'gā ināinānī'ī etee pē nereko tyweri pejemogyramū. A'ere nipo anure nepeko tyweru'jawi. Janeruwarete 'ga esage ma'ea. Wa'yra 'ga jane erowiarāmū 'ga jane mū'jāu mama'e tywera apoara 'gā nui, jane mujaa Kristu 'ga ree jane mogyau. A'eramū nipo 'ga anure jane rerawau jane mogyau ojepyri nakwaparimū rūi. Janeruwarete 'ga te 'ā pē mouagukaa mama'eay upe. A'eramū 'ā pēē pejepoire'ema Jeju'i 'ga rerowiar awi, pejejeupe mama'eay jesaukaawamū. Janeruwarete 'ga etee futat pē mojemogypygukaa etee te Kristu 'ga ree.

¹¹ Janeruwarete 'ga 'wyrriarareteramū 'ūi janee najuejue etee. Uēme'ema futat 'wyrri-aramū 'ūi awi. A'jea futat aipo 'ea.

¹² Teje'ega je akwasiarukat Silasi 'ga upe ka'aran are. Natuwiiu rūi je ikwasiarukari 'ga upe. Ka'aran kwasia'ria te je aapoukat 'ga upe. Silasi 'ga Jeju'i 'ga rerowiaararetea. A'eramū 'ga akou janerewirera 'jawewaramū. Ajemogypyk je 'ga ree tekou. A'eramū je teje'ega kwasiarukaa ka'aran are 'ga upe tejee. "Tamojemogypyk tāmējē 'gā Kristu 'ga ree 'jau kwy", 'jau je tejeupe. A'eramū je ka'arana kwasiarukaa imonou pē nupe, Kristu 'ga ree pē mojemogypygukaawamū. Janeruwarete 'ga ojejuka esage jane ree a'jea futat. A'eramū je a'e are ka'arana kwasiarukaa Silasi 'ga upe. A'eramū taetu ki pēē pejejemogypyka Kristu 'ga ree.

¹³ Pēnewirera 'jawewara 'gā, Papironi pewara 'gā oje'ega omono pē nupe, pē futaa. 'Gā nanē Janeruwarete 'ga imū'jāu imogyau wemiayuwamū nū. Jera'yra 'jawewara 'ga, Maku 'ga, nanē oje'ega monou pē nupe, pē futaa nū.

¹⁴ Kristu 'ga remiayuwamū pēē pejejomana pejeporomutaramū pejejee. Afutat je Jarejuwarete 'ga Kristu 'ga remiayuwamū pē mopy'ata'waa. Kweramū jeje'ega pē nupe.

2 Pedro

Pedro 'ga 'awa ka'arana kwasiaa imonou Jejuu 'ga rerowiaara 'gā nupe najuejue etee futat. 'Gā amū awau 'gā mu'jau tywet. A'eramū Pedro 'ga ka'arana kwasiaa imonou 'gā nupe, 'gā mu'akwaapa ee. "Peje'agu ki moromu'jat tywera 'gā nui. Perowiat kasi 'gā ne" 'jau 'ga ikwasiaa imonou 'gā nupe. Janeruwarete 'ga 'Agesagea ikwasiarukaa 'ga upe rakue. A'eramū 'ga ikwasiaa imonou 'gā nupe rakue.

¹ Je Simão Pedroramū ka'arana akwasiat imonou pē nupe. Jejuu Kristu 'ga Jejararetea. 'Ga upe futat je teporowykyau tekou. 'Ga remimonoferamū futat je tekou. Ymā 'ga je monoi kwe pe omome'waramū ikue. A'eramū je ka'arana kwasiaa imonou Jejuu Kristu 'ga rerowiaaramū pē nupe. Ore 'jawe futat perowiat 'ga. Jejuu Kristu 'ga jane katu'okararetea. 'Ga futat 'ā Maireteetea, 'Uwa 'ga 'jawe. 'Ga futat mama'e tywera apowe'em. Mama'e esage etee futat 'ga iapou akou. 'Agamū 'ā ojerowiarukaa janee.

² Jarejuwarete 'ga pekwaap. Jarejararete 'ga, Jejuu 'ga nanē 'ā pēē ikwaapa nū. A'eramū je 'gā pē mopy'ata'waa taetu ifutaa. Pē nee 'gā jejuka esagea nanē je ifutaa nū.

Wemiayuwamū 'ga jane pyyrūawet

³ Okwaaparamū janee Kristu 'ga opājē mua, wemifutar imū mama'ea jane iapoawamū. 'Ga 'ā jane mū'jāu 'gā nui jane mogyau okwaaparamū. "Tamū'ē 'gā 'gā nui 'jau, tejepyri mama'e esage apoawamū 'jau", 'jau 'ga ojeupe rakue. "Anure 'gā tamut 'au tejepyri 'jau", 'jau 'ga ojeupe rakue.

⁴ Opājē mū futat Kristu 'ga mama'e esage apou janee, oje'jawe jane mogyau. U'eawer imū etee futat 'ga iapou janee. "Je rerowiat pejepe pejejemogyau. A'eramū je pē mogyau tejemiyuwamū, pē katu'oka tejeupe, pē nupe te'eawer imū etee futat. A'eramū nipo je pē mogyau teje'jawe etee futat, mama'e esage etee futat iapoukaa pē nupe", 'jau 'ga janee. A'eramū 'ga u'eawer imū etee futat jane mogyau oje'jawe futat. 'Ga rerowiare'ema 'gā te nipo ajee wea om'yi mama'e tywera apo are etee futat. A'eramū nipo 'gā mama'e tywera etee futat iapou ajemogyau. A'ere pēē na'gā 'jawe rūi. Kristu 'ga opājē omono pē nupe oje'jawe pē mogyawamū, mama'e esagea pē nupe iapoukaawamū.

⁵ Mama'e esagea Kristu 'ga wapo pē nupe ikue. A'eramū ki pejejemogypyka 'ga ree pejejemogyau. A'eramū ki pēē pejejemogyau esage 'ga upe nū. Mama'e esagea etee iapou pejejemogyau. Jarejuwarete 'ga remifutar are te pejemū 'jau pejejemogyau.

⁶ Mama'e tywera apo are pejejea'aramū ki pēē kamēsīete pejejemū akwaapa mama'e tywera apoe'em are. Pejejemouaga mama'eay upe. Kristu 'ga je'eg imū etee futat pēē mama'e apou pejejemogyau.

⁷ Pejepota'wa esageramū pejejuee, pejeporomutaramū pejejuee.

⁸ Nanuara pēē iapo pejemogya tepē nesowo'gōk pē mogyau kamēsīete pejejeapyoramū 'ga remifutar are. Jejuu Kristu 'ga 'jawerimū pejejemogy re, pēē 'ga kwaapa katu katu pejejemogyau.

⁹ Nanuara apoare'ema 'gā ajemogy eae'ema 'gā 'jawe futat. Naeapyoi 'gā ojeupe Kristu 'ga remiapofer are. Aipo 'ga Kristu 'ga otywera ojewi imoiawer are wea'aru'jawe'emamū.

¹⁰ Ma'eramū 'ā je 'i pē nupe: "jerewirera 'jawewaramū ki pēnea'at pejejeupe Jarejuwarete 'ga remiapofer are", je 'i pē nupe. Jerenyra 'jawewaramū nanē pēē pejejea'aramū ee nū. Ymā te 'ā Janeruwarete 'ga jane mū'ēi 'gā nui ojeupe rakue. A'eramū ki jane jarejemogyau esage 'ga je'eg imū etee futat mama'e apou. Jaremū'ēawer are jarejeapyo re jarepoire'ema futat 'ga rerowiar awi.

¹¹ A'eramū nipo anure Janejararete 'ga, Jejuu Kristu 'ga, ojewi jane poire'emamū jane rerawau jane mogyau ojepeyri ywag ipe nakwaparimū warāu rūi. Anure nipo jane katu'okarera 'ga 'ūina 'wyrriararetereteramū janee. A'eramū 'ga jane rerawau jane mogyau ojepeyri ywag ipe.

¹² Ymā we futat 'ā pēē Jejuu 'ga mome'u renupa rakue. A'eramū 'ā pēē enupa ypy we pejejemogypyka 'ga ree pejejemogyau rakue. A'etea je amuea'at pēē ee nū.

¹³ "Temanūme'ēwe tamuea'at 'gā Kristu 'ga porogytafer are 'jau nū", 'jau je tejeupe. A'eramū je pē muea'aa ee tekou.

¹⁴ Anurenure'i nipo je manūi. Jarejararete 'ga, Jejuu Kristu 'ga, je mueapyou je manū are ai'i. A'eramū je "Anurenure'i nipo je manūi re'ā", 'jau tekou.

¹⁵ A'eramū je, temanūme'ēwe, pē muea'aa 'ga je'eg are tekou. A'eramū nipo pēē je manū re pejejea'aramū pejejemogyau 'ga je'eg are.

Orojemiesagera mome'uawet

¹⁶ Natekotee 'gā 'me are rūi ako ore pē mu'ei ai'i. Jejui Kristu 'ga rur are te ako ore pē mu'ei ai'i. "Anure nipo Janejararete 'ga, Jejui Kristu 'ga ruri ojewya nū", 'jau ako ore pē nupe, pē mu'jau 'ga ree ai'i. "Ua nipo 'ga opājē resaukaa janee", 'jau ore pē nupe, pē mueapyou 'ga rur are. Namorogyta teea rūi ore oromome'u pē nupe. Aruesak te ako ore orojeau 'ga gesage ikue. A'eramū ore ikwaapa.

¹⁷⁻¹⁸ Ymā ore oi ywyty'arimū Kristu 'ga rupi ikue. Peu ore rekoramū 'ga Ruwarete 'ga 'ga muesagamuteeu 'ga raity muenyfugaiwayau 'ga ree. 'Ga reakwara nanē wenyfugamū nū. Ywag awi Janeruwarete 'ga oje'ega mua 'ga upe ikue. "Koromū jera'yrarete 'ga. 'Ga ete je muekōēājay ojee", 'jau Janeruwarete 'ga oje'ega mua ywag awi 'ga upe ore ikue. Oje'wyr awi 'ga oje'ega mua ore ikue.

¹⁹ A'eramū jane Jarejuwarete 'ga je'ega mome'wara 'gā je'ega rerowiaa jarejemogyau, Jejui Kristu 'ga ree 'gā ka'arana kwasiari rakue. A'eramū ki pēē nanē pejejejukau 'gā nemikwasiarer are. Sā'ā ae tata monyga ppytunimū mama'e resakawamū. A'ere 'ā ae tata mowepa kwara por ire. Nan Jejui 'ga rure'emauwe jane Jarejuwarete 'ga je'ega mome'wara 'gā nemikwasiarera mogytat eete. A'eramū jane 'ga remifutara kwaapa. Kristu 'ga rura jaytataua ku'ema reruara 'jawe. Sā'ā ku'emamū ae mama'e resak katu katu. Nan tee futat Jejui 'ga 'ur ire jane mueapyo katu katui 'Uwarete 'ga ree.

²⁰⁻²¹ Naojeteē rūi Janeruwarete 'ga je'ega mome'wara 'gā ka'arana kwasiari rakue. Janeruwarete 'ga Agesagea te 'ga je'ega omome'u 'gā nupe rakue. A'eramū 'gā ikwasiaa ka'aran are. A'eramū jane nanē jarejeapyoe'emamū jarejeteē 'ga je'eg are. 'Ga 'Agesagea eete jane mueapyo 'ga je'eg are.

2

Moromu'jar a'wyre'em

¹ Ymā te 'ā 'gā amū oi janepy 'gā mu'jau tywet rakue. "Jarejuwarete 'ga je'eg are je pē mu'ei", 'jau futatee 'gā 'gā nupe rakue. A'ere o'meramū te 'gā 'i rakue. Nan tee futat nipo 'gā amū nuri pē mu'jau tywet. Oporogytau ekoete pē nupe pē mu'jau 'ua. "Simorytee 'gā 'jau", 'jau nipo 'gā pē nupe. Jejui 'ga rerowiar awi pē momoirukaawamū te nipo 'gā nuri pē mu'jau tywet. Aiporamū Jarekatu'okara 'ga rerowiar awi opoit ma'efera 'gā. Wea'aru'jawe'emamū futat Kristu 'ga otywera mepyawamū 'ga manūawer are. Opoia 'ga rerowiar awi. 'Gā tywera mepyawamū agawewi Jejui 'ga amanūmū rakue. A'etea 'gā ojemote'at Jarejararete 'ga upe. Opoia 'gā 'ga rerowiar awi. A'eramū nipo anure 'gā te futat ojemonoukaa mama'eukwaawa rapyaw ipe.

² A'eramū nipo 'gā amū ojemu'jau 'gā nee kwaiwete. A'eramū nipo 'gā nesakara 'gā 'jau: "Nia'wyrī Jejui 'ga rerowiaara 'gā na'e. Mama'e tywera eete te 'ā 'gā wapo ajemogyau", 'jau nipo 'gā. A'eramū nipo 'gā 'jau: "Jejui 'ga nanē nipo nia'wyrī futari", 'jau nipo 'gā nesakara 'gā, mama'e tywera 'gā iapo resag ire.

³ Mama'e tywer are moromu'jara 'gā nanē nipo 'jau ojeupe: "Mama'e are je 'gā mu'ei. A'eramū nipo 'gā je mepyau ka'aranūū pyu", 'jau nipo 'gā ojeupe. A'eramū 'gā ajamu'jau wea'ar are eete. A'ere Janeruwarete 'ga 'gā kwaawi. Ymā we futat 'ā Janeruwarete 'ga 'i rakue: "Mama'e tywer are moromu'jara 'gā nipo je areko tywerete, 'gā monou mama'eukwaawa rapyaw ipe", 'jau 'ga rakue. Anure nipo Janeruwarete 'ga aipo 'gā nerekou tyweaete u'ewer imū eete futat. A'eramū 'ga 'awamū 'gā nemiapo tywera resaka 'ūina.

⁴ Ymā nanē 'ā ywagipewara 'gā amū nuenuwi eete Janeruwarete 'ga je'eg rakue. A'eramū 'ā Janeruwarete 'ga 'gā mū'jāu ywag awi rakue, 'gā monou 'ā 'gā mogyau ppytunainaiwa pype. Peu futat 'gā ajemogyau 'awamū miamū futat Jejui 'ga wowase ae majatykaawa 'ara upe iwaēma rapesaka. Aipoa 'ara rupi tāmējē nipo Jejui 'ga 'gā nesaka nū. A'eramū futat nipo 'ga 'gā monou 'gā napyaw ipe.

⁵ Pēnea'ar iki Nue 'ga rekwawer are: Ymā Nue 'ga rekoramū 'ā Janeruwarete 'ga mama'e tywera apoara 'gā momapa 'y pyu rakue. Nue 'ga 'ā 'jau agawewi 'gā nupe rakue numiamū: "Au'je mama'e tywera apo re. Pejemogy esage Jarejuwarete 'ga upe", 'jau agawewi 'ga 'ā 'gā nupe rakue numiamū. A'ere 'ā 'gā nuenuwi 'ga je'ega rakue. A'eramū 'ā Janeruwarete 'ga Nue 'ga eete ia'gwau 'y awi 'ga pytuna 'gā neewe rakue. A'eramū 'ga yaruu apoukaa 'gā nupe 'y awi 'gā agwawamū rakue. A'eramū 'ā sete 'gā eete awau osou 'y awi Nue 'ga retee rakue. Aipo 'gā eete futat amanūme'em 'y pyu rakue.

⁶ Pēnea'ar iki nanē Sodoma pewarera 'gā nee, Gomora pewarera 'gā nee nanē nū. Mama'e tywera eete 'ā aipoa amunaw ipewara 'gā lapou 'upa rakue. A'eramū 'ā Janeruwarete 'ga aipoa amunawa mateepapa, ipypewara 'gā neewe futat. Tata pyu 'ā Janeruwarete 'ga 'gā momapa rakue. A'eramū 'ā 'ga Lo 'ga eete 'ga muēma pe awi rakue. Mīmera 'ā mama'e

tywera apoarera 'gã nerekou tyweawera wesaukat janee. A'eramũ nipo 'ga mama'e tywera apoarera 'gã monou 'gã mogyau mama'eukwaawa rapyaw ipe 'ea nanẽ jane ikwaapa nũ.

⁷Lo 'ga 'ga 'ã imuẽmukaa Sodoma 'jaw awi tata monowe'ẽwe futat rakue. Namama'e tywera apoara rũi Lo 'ga. A'eramũ 'gã nemiapo tywera 'ga mogekogekou etee 'ga mu'arasirasiga rakue.

⁸Lo 'ga 'ã esage ma'ea rakue. A'ere 'ga mama'e tywera apoara 'gã pype 'ga rekoi rakue. 'Gã nemiapo tywera resaga 'ga mu'arasiga ete 'ga mogou 'gã nee rakue. A'eramũ Janeruwarete 'ga 'ga muẽmukaa 'gã nũ, 'gã momape'emawe rakue.

⁹Ma'eramũ 'ã jane 'i jarejaupe: "A'jea futat. Janeruwarete 'ga jejuka esagei mama'e esage apoaramũ jane ree, jane a'gwau mama'e tywer awi", 'jau 'ã jane jarejaupe. Mama'e tywera apoara 'gã 'ga werekou tywerete, wowase ae majatykaawa 'ara upe iwaẽme'emauwe miamũ futat.

¹⁰Wemifutar imũ mama'e tywera apoara 'gã, oje'ega renupare'ema 'gã. Mĩmera 'gã taetu nipo 'ga erekou tyweaete.

Mama'e ekoete are moromu'jara 'gã nojenosĩ mama'e tywera apo awi. Ojerowiaraiapa etee wemiapo tywer are. Nokyjei 'gã ywagipewara 'gã kuraw awi. Akurap futat 'gã ywagipewara 'gã.

¹¹Ywagipewara 'gã te ipãjẽ moromu'jar a'wyre'ema 'gã pãjẽ apyraapa. A'etea 'gã nakurawi 'gã Jarejuwarete 'ga upe.

¹²A'ere 'agera moromu'jar a'wyre'ema 'gã ni'akwaawi ajemogyau. Sã'ã 'miara 'ã naea'ari mama'e are. Opajai ekoeteramũ etee. A'eramũ 'ã awau ojejukaukaa ae upe. Nan tee futat moromu'jar a'wyre'ema 'gã. Naeapyoi mama'e are. Wemikwaawe'ema mama'ea 'gã ikurapa etee. A'eramũ nipo anure Janeruwarete 'ga 'gã momapa. A'eramũ nipo 'gã awawe'em futat Jarejuwarete 'ga pyri amanũ re. Awau muku 'ga wi.

¹³Moromu'jar a'wyre'ema 'gã nipo wemimu'e 'gã nerekou tyweaete. A'eramũ nipo Janeruwarete 'ga 'gã nerekou tyweaete 'gã mepyau 'gã nemiapofere are. Ko'aramuku te 'ã 'gã mama'e tywera apo ajemogyau ajueape ojenosũe'em. Wemiapo tywera renosũe'em. Aipo 'gã nipo ajatykau pẽ nee ojem'i'waa numiamũ. "Ore 'ã Jujui 'ga rerowiaaramũ pẽ 'jawe", 'jau futatee nipo 'gã pẽ nupe. A'ere 'gã mama'e tywera etee iapoi pẽjatykaawa pype. Ojenosũe'em futat 'gã mama'e tywera apou ajuowase. Amumera 'gã nanẽ weawrywamũ ajemogyau nũ. Ojemote'at ae nanuaramũ ajemogyau ojopype.

¹⁴Kũjã resakaipẽ'ema. Kũjã eẽ mũ resakawe owy'aa tãmẽjẽ eẽ ree. "Tako eẽ ree 'jau kwy", 'jau 'gã ojeupe. Wojeremamũ 'gã mama'e tywera apo awi. I'akwaawe'ema 'gã 'gã imoryteeu. A'eramũ 'gã ojemotywea Jarejuwarete 'ga upe. Oka'aranũũ kwai are etee 'gã wea'aramũ ajemogyau. A'eramũ nipo anure Janeruwarete 'ga 'gã nerekou tyweaete 'gã monou mama'eukwaawa rapyaw ipe.

¹⁵Jarejuwarete 'ga rape awi opia ma'e 'gã poromũ. A'eramũ futat 'gã oka'jama. Nue-sagu'jawi futari 'gã 'ga rapea. Parãu 'ga ree 'gã jemu'ei. Ymã 'ã Parãu 'ga, Peo 'ga ra'yra 'ga, Jarejuwarete 'ga je'ega mome'waramũ rakue numiamũ. A'ere 'ã 'ga noporomu'earũũ rakue. 'Ga amũ wejue e'i 'ga upe: "Tamono ka'aranũũa enee 'jau. A'eramũ ene ewau Israeu juapyrera 'gã mu'jau mama'e tywera apo are 'jau", 'jau 'gã 'ga upe rakue.

¹⁶A'eramũ 'ga awau. A'eramũ 'ga waw ipe Janeruwarete 'ga upe reymawa moje'egukaa 'ga upe rakue. Ae 'jawe futat 'ga reymawa oje'ega, kawaru'ia oje'ega 'ga upe. Oje'egayau 'ga upe: "Ma'eramũ te ereapo mama'e tywera?" 'jau 'ga reymawa 'ga upe. A'eramũ futat Parãu 'ga opoia wemiaporamer awi.

¹⁷'Y ky'a 'jawe moromu'jar a'wyre'ema 'gã jemogyi. Sã'ã ae 'y resakawe jane 'ea jarejeupe: "Ay'u pa je kwy" 'jau 'ã ae ojeupe. A'ere 'ã ae natykura'uweri 'y ky'aa. Nan tee moromu'jar a'wyre'ema 'gã. Naa'jea rũi futat 'gã je'ega. Amana rowoky'a 'jawe nanẽ 'gã je'ega nũ. Sã'ã ae amana rowoky'a tee resakawe jane 'ea jarejeupe: "Okyt nipo kwe amana", 'jau jane 'ã. A'ere 'ã ywytuu ruri etee ipyau imonou kwe katy. A'eramũ 'ã amana okwapa etee okyre'ema. Nan tee futat ae. Moromu'jar a'wyre'ema 'gã nesakawe ae 'i: "Mama'e a'je are jane mu'jawamũ nipo 'gã nuri", 'jau nipo jane jarejaupe. A'ere naani. O'meramũ te 'gã 'i. A'e 'gã nipo Janeruwarete 'ga omono muku ojewi, ypytunaiwa pype 'gã mogyau. Nakwaparimũ warãu rũi futat 'gã oi ajemogyau.

¹⁸Ojerowiaraiapa 'gã ojee etee futat. I'akwaawe'ema 'jawe nipo 'gã 'jau 'gã nupe: "Pe'je pejejuwa pejemũ'jau ore ree. Esage futat jarejamuesage pãwẽ gatu etea", 'jau futatee nipo 'ga mama'e tywer awi opoir yau ma'e 'gã nupe. A'ere 'gã 'gã moryteei etee ojee. Wemifutar tywer are etee 'gã 'gã mu'ei.

¹⁹"Nitywi futari nepeapoi nanuara 'jara 'gã amũ", 'jau futatee 'gã 'gã nupe. "A'eramũ pẽẽ mama'e apou pejemifutar imũ etee futat", 'jau nipo 'gã 'gã nupe. 'Gã tywera 'gã nerekou. Aipo 'gã mu'jaukaa. Nopaira'uweri 'gã mama'e tywera apo awi. Mama'e tywera apoa etee 'gã nemiapoa. Mama'e tywera siapou'jau'jap 'eramũ janeremiapo tywera rekoi janejara

'jawe janee. A'eramū jane a'eramū taetu iapou'jau'japa jareojere'emamū. Nan tee futat 'gā.

²⁰ Amumera 'gā nipo Jarejararete 'ga, Jejuu Kristu 'ga rerowiaa ajemogyau numiamū. Aipo 'gā nipo 'ga okatu'ok futat 'gā tywer awi numiamū. A'ere nipo 'gā jewyri tee otywera upe nū. Otywera upe ojewyt ma'e 'gā ojemote'at futat Jarejuwarete 'ga upe. Jejuu 'ga rerowiare'emawe futat 'ā 'gā nia'wyri Jarejuwarete 'ga upe rakue. A'eramū 'gā Jejuu 'ga rerowiari awi opoir ire taetu 'gā wa'wyre'emamū futat 'ga rerowiare'emarete 'gā apyrapa.

²¹ Jarejuwarete 'ga ra'yra 'ga 'gā erowiaa futat numiamū. A'ere 'gā poiri ete 'ga rerowiari awi. Jejuu 'ga rerowiari enune 'gā wa'wyre'emamū Jarejuwarete 'ga upe rakue. A'eramū 'gā 'ga rerowiari awi opoir ire taetu wa'wyre'emareteramū 'ga rerowiare'ema 'gā apyrapa 'ga upe. Ma'eramū gatu nipo 'ā 'gā 'ga rerowiari rakue?

²² A'eramū jane mama'e tywera apo upe ojewyt ma'e 'gā nesag ire 'jau jarejaupe: "A'jea futat aipo jane'ea. Sā'ā kasuraa. Opy'apoy re ijewyra opy'apoy upe i'ua. Nan tee otywera upe ojewyt ma'e 'gā. Tajaurana nanē 'ā amuug ire ojewya awau tujururu upe ojejejepepa ipype nū. Nan tee futat mama'e tywera apo upe ojewyt ma'e 'gā", 'jau jane 'gā nesag ire.

3

Jejuu 'ga ruawam

¹⁻² Ka'arana ako je akwasiat imonou pē nupe ai'i. A'eramū je 'awamū je ka'arana kwasiaru'japa pē nupe nū. Pēē 'ā jejekoty'aawaretea. A'eramū je 'jau tejeupe: "Ka'arana pa je akwasiaru'jap imonou 'gā nupe nū kwy", 'jau je tejeupe. "Tamuea'at 'gā Jarejuwarete 'ga je'ega mome'wara 'gā nemikwasiarer are 'jau kwy", 'jau je tejeupe. Janejararete 'ga, jane katu'okara 'ga futat 'ā ore mu'jau wemifutar are ikue. A'eramū ako ore 'ga remimonoferamū imome'wau ako pē nupe ikue. Aipo are nanē je pē muea'aa nū.

³ Pēnea'ar iki je'eawer are. "Anure nipo Jejuu 'ga rure'emauwe 'ga rerowiare'ema 'gā nuri pē nerekoemāu pē jaita ete Jejuu 'ga pēē erowiarāmū. Wemifutar imū te nipo aipo 'gā mama'e tywera apoi", 'jau je pē nupe.

⁴ "Anure je ruri nū", e'i Jejuu 'ga oree ikue, 'jau pēē pejejemogyau. A'eramū nipo 'gā aipo pēē 'eramū "Manamū ajeje 'ga ruri", 'jau nipo 'gā pē nerekoemāu etee pē jaita. "Ymā te 'ā 'ga aipo 'ga 'i rakue a'i kūi. A'etea 'ga 'ā 'ure'emawe. 'Ga je'ega renuparera 'gā 'ā opapara rakue. A'etea 'ga 'ā 'ure'emawe", 'jau nipo 'gā pē nupe pē jaita etee. "Ywya jeapo ypyrauwe futat 'ā mama'ea nan etee futat rakue. Te marana'ape mama'e jesowo'gōgi nū", 'jau nipo 'gā pē jaita etee. "Aipo 'jau amunipo 'ā 'ga ruri ymā we mama'e mojoy'raupap rakue", 'jau ete nipo 'gā pē jaita etee.

⁵ A'ere nipo aipo 'jara 'gā o'meramū te 'gā 'i. Naea'ari 'gā Janeruwarete 'ga remiapofera mama'e are. Ymā Janeruwarete 'ga ywy apoi oje'eg imū etee futat rakue. Ywagā nanē 'ga iapou oje'eg imū etee futat nū. Nuapoi 'ga mama'ea opou rakue. Najane 'jawe rūi 'ga. Oje'eg etee te 'ga jupe. 'Y upe 'ga 'jau: "Ejepe'a ywy awi", 'jau 'ga 'y upe. A'eramū futat ywy ojesaukaa 'ya ojepe'au jui.

⁶ Anure 'ga 'y pyu wemiapofer ymanera momapa rakue.

⁷ Oje'eg imū te 'ā 'ga ywy apou rakue. Ywaga reewe 'ga 'ā iapoi rakue. Oje'eg imū etee futat 'ga auwara 'gā mogyau nū. A'eramū nipo 'ga a'jetete pa "'gā naje rerowiari ra'e pa", 'jau 'gā momapa tata pyu nū. A'ere 'ga ae majatykai ra'ne nipo wowase. A'eramū nipo 'ga werowiare'ema 'gā mū'jāu imonou mama'eukwaawa rapyaw ipe. Aipoa' ara rupi 'ā 'ga ywy a'wyre'ema mateepapa tata pyu ywag a'wyre'ema reewe.

⁸ Najane 'jawe rūi Janeruwarete 'ga. Jane upe te 'ā 'arawkawa ipytunū ma'e 'jawe rēwējēmī. Kwara 'ara we 'ā opytunamū rēwējēmī janee nū. A'ere Janeruwarete 'ga upe nanarūi. Aju'jaju'jawe etee 'ara 'ga upe. Miu anu majepe'i 'ara 'jawe ete 'ga upe. Majepe'i 'ara nanē miu anu 'jawe ete 'ga upe nū. Majepe'i 'yweteewara 'jawe mūmera mama'ea 'ga upe.

⁹ A'eramū 'gā "Ma'eramū sipo 'ga poromukuramū? Ma'eramū sipo 'ga 'ure'ema? Nuri futari nipo 'ga nū'ū", 'jau nipo 'gā pē nupe. A'ere 'ga ruri futari. U'eawer imū etee futat 'ga ruri. Ajemuaēm wejue 'ga werowiare'ema 'gā nee. A'eramū 'ga 'gā werowiaara rapesaka 'ūina. Kwaiwete wejue 'ga rerowiare'ema 'gā jemogyi. A'eramū 'ga a'eramū oporomukuramū. Nafutari 'ga jane mū oa muku ojewi numiamū. A'eramū 'ā 'ga wa'yra 'ga murukara'ne'ema.

¹⁰ 'Ua Janejararete 'ga ruri muna'ywa 'jawe. Sā'ā ae muna'ywa rura kwaawe'ema. Nan tee futat jane 'ga rura nikwaawi. Muna'ywa rura 'jawe futat nipo Kristu 'ga ruri janee. Nikwaawi jane 'ga ruawa. 'Ga ruramū nipo ywag aunuga. Ipoji te nipo iunuga. Mama'ea nipo opapa. Iunuga renupawe nipo 'ga rerowiare'ema 'gā opiryjamū ajemogyau. Ipoji

te nipo ywag aunuga. Kwat, jay, jaytata. Mīmera ukaitapap. Ywya nanē opypiyara reewe ukaitapap Kristu 'ga ruramū.

¹¹ “Anure nipo mama'e tywera kaipawi” 'ea pēē 'ā ikwaapa. A'eramū ki pēē 'ga rerowiarāmū pejejemogyau esage 'ga upe, mama'e apou 'ga je'eg imū etee futat.

¹² Anure nipo Janeruwarete 'ga wa'yrarete 'ga murukari futari. A'eramū pēē pejejemogyau esage 'ga upe 'ga rura rapesaka. 'Ga mome'wau pe'je pejewau 'ga rerowiarukaa 'ga rerowiare'ema 'gā nupe. Jejuī 'ga ruawa rupi Janeruwarete 'ga jane majatykai wowase Jejuī 'ga rerowiaaramū jane mopojo'oka 'ga rerowiare'ema 'gā nui. A'eramū futat 'ga mama'e tesirūmera rapyau. Kwat, jay, jaytata. Mīmera 'ga wapyapap.

¹³ Ymā we futat 'ā Janeruwarete 'ga 'i rakue: “Mama'e tywera rapy re je ywy yau apou ywag yau reewe nū. Aipoa jeremiapo yau pype nitywi futari mama'e tywera. Mama'e tywera apoara 'gā nanē otywe'emamū futat nū”, 'jau 'ga 'ā ikwasiarukaa inuga janee rakue. A'eramū jane 'ga remiaporama rapesaka jarejemogyau.

¹⁴ Pēē 'ā jejekoty'aawaretea futat. A'eramū je 'jau pē nupe: “Ga ruawa rapesakaramū pēē pejejemogyau esage Jarejuwarete 'ga upe. Mama'e tywera kasi peapo ne. 'Ga je'eg imū etee ki mama'ea peapo pejejemogyau 'ga upe, 'ga rapesakaramū. A'eramū pēē pejejesageramū pejejemogyau 'ga upe, 'ga rowase peje'amaw ipe”, 'jau je pē nupe.

¹⁵ Pejeku'iramū nanē ki pejejemogyau Jarejuwarete 'ga poromuku are. A'eramū 'ga nanē ajemogekowe'em 'ūina nū. “Jeporomukuramū nipo 'gā jemogypygeteetei je ree re'ā”, 'jau 'ga ojeupe. Janerewirera 'ga, Paulo 'ga 'ā nanē ka'arana kwasiaa ee nū, imonou pē nupe rai'i. Paulo 'ga 'ā janejekoty'aawaretea. Janeporomutat jane 'ga ree. 'Ga nanē Janeruwarete 'ga amu'akwaap wemiaporam are. A'eramū 'ga ka'arana kwasiaa ee pē nupe.

¹⁶ Kwe pewara 'gā nupe ikwasiaa Paulo 'ga 'gā mueapyou katu Kristu 'ga rur are. A'ere 'ga namueapyo katui 'gā ajepeja wemikwasiarer are. Mama'eay are nanē 'ga ka'arana kwasiari nū. Aipo 'ga remikwasiarer are jane jarejeapyoa'ne'emamū. A'eramū i'akwaawe'ema 'gā amū ajamu'jau tywet Paulo 'ga remikwasiarer are. Jejuī 'ga rerowiaa'ri 'gā nanē ajamu'jau tywet ee. Jarejuwarete 'ga je'ega mome'wara 'gā nemikwasiarer are nanē 'gā ajamu'jau tywet nū. A'eramū 'gā ojereko tywerukaa 'ga upe, ojemonoukaa mama'eukwaawa rapyaw ipe 'ga upe.

¹⁷ A'eramū ki pēē pejejea'gwau Jarejuwarete 'ga je'eg are moromu'jat tywera 'gā nui. Perowiat kasi 'gā je'ega ne. Kasi a'e pe pepoit Kristu 'ga rerowiar awi ne.

¹⁸ Jejuī Kristu 'ga ree taetu pejejemogyau pejejemogyau. 'Ga je'eg imū taetu pejejemogyau esage. A'eramū nipo pēē Jarejararete 'ga kwaapa katu katu. A'eramū taetu jane katu'okarera 'ga opota'waramū pē nee. A'eramū ki jane 'ga muorypa jarejemogyau. 'Awauwe futat, anure miamū futat jane 'ga muorypa jarejemogyau, jareojere'emamū. Nan iki sajemogy, a'e je pē nupe.

Kweramū etee jeje'ega pē nupe.

1 Juá

Ymã we 'gã 'i "Juã 'ga 'awa ka'arana kwasiari" 'gã 'i rakue. Nokwasiari agawewi 'ga wera 'awa ka'aran are. A'etea 'gã e'i "Juã 'ga remikwasiarera futat", e'i 'gã jupe. Juã 'ga Jejui 'ga remimu'efera.

"Pëporomutat ki pejejee", e'i 'ga ikwasiaa imonou Jejui 'ga rerowiaara 'gã nupe. Janeruwarete 'ga 'Agesagea ikwasiarukaa 'ga upe rakue. A'eramü 'ga ikwasiaa imonou 'gã nupe rakue.

Janeruwarete 'ga kwaawukaat

¹ Ka'arana je kwasiat imonou pë nupe. Jarejeupe Jarejuwarete 'ga kwaawukaara 'ga ree je ikwasiari. Kristu 'ga ree je ikwasiari. Oje'ega rerowiaaramü 'ga jane mogyi ojeypyri nakwaparimü rüi. Okoeteete ma'ea Kristu 'ga. Ymã te 'ã 'ga rekoi, ywy apoe'emaue Kristu 'ga rekoi rakue. A'ere ore 'awa ywy pe 'ga rekoramü ore 'ga resagi orojeau ikue. Orowyka 'ga pir are ikue. 'Ga je'ega ore enupa ikue. Aipoa ore oromome'u pë nupe.

² Ymã we te 'ã 'ga rekoi rakue. 'Awamü aje 'ã 'ga ruri 'awa ywy pe ojesaukaa ore ikue. A'ea ore oromome'u pë nupe. Ymã we futat te 'ã 'ga rekoi Jarejuwarete 'ga pyri aetywe'emaue rakue. A'ere 'ga 'awamü 'ga jesaukari ore ikue.

³ A'e resakawera ore oromome'u pë nupe. Orojemienuwera nanë ore imome'wau pë nupe nü. 'Ga rerowiarukaawamü ore imome'wau pë nupe. A'eramü pëë pejejemujaa Jarejuwarete 'ga ree ore pyri, 'ga ra'yrarete 'ga Jejui Kristu 'ga ree 'jau. A'eramü jane jarejemogyau 'ga ree etee futat jarejea m'ina.

⁴ A'eramü je 'agamü ikwasiaa ka'aran are jarejemuorypawamü.

'Ara renyfuga 'jawewat

⁵ Jejui 'ga je'ega ore enupa ikue. Ma'eramü 'ã ore orojeupe 'ga 'eawera mome'ui pë nupe. Aipo 'jau 'ga imome'wau ore ikue. "Janeruwarete 'ga esagesage. Nitywi futari 'ga mama'e tywera pyu. 'Ara renyfuga 'jawe te 'ga. Nitywi futari pyytuna 'ga pyri", 'jau 'ga imome'wau ore ikue.

⁶ 'Gã amü te nipo "Je Jarejuwarete 'ga remiayuwa", 'jau futatee. A'ere nipo aipo 'jara 'gã nekoï pyytunimü wata ma'e 'jawe. 'Gã nuetygi mama'e tywera apoa. A'e 'gã o'meramü te 'gã 'i. Na'ga remiayuwa rüi aipo 'gã. Nuenuwi 'gã mama'e a'jea. Nuapoi 'gã Jarejuwarete 'ga remifutar imü mama'ea.

⁷ Ku'jywa 'ga 'ara renyfuga 'jawe futat. Nuapoi 'ga mama'e tywera. Mama'e esagea etee te 'ga wapo. 'Ga 'jawe jarejemogy re jarejekoty'aa esage ete jarejee. Oje'jawe jane jemogy re 'ga wa'yra 'ga, Jejui Kristu 'ga ry pyu jane pireita akou, janetywera moia akou jane wi.

⁸ "Je najetywi tetywera pyu" 'jaramü jane jare'meramü Jarejuwarete 'ga upe. Jarejemoryteeu jane tee futat. Aipo 'e re mama'e a'jea apowe'em.

⁹ A'ere ojeupe jaretywera jane imome'uramü, Janeruwarete 'ga imoiri jane wi, jane katu'oka. U'eawer imü etee futat 'ga janetywera moia jane wi. Namama'e tywera apoara rüi te 'ga. Mama'e esagea etee futat 'ga ree. A'eramü 'ga janetywera moia jane wi. "Epe'a jetywera je wi", ojeupe jane 'eramü 'ga imoiri jane wi.

¹⁰ Najeeje etee futat aetyweramü. Nokoi futari ae mü itywere'emamü. "Je najetyweri" 'jaramü ae Jarejuwarete 'ga 'me are ako ma'eramü te ae poromü. 'Ga futat 'ã e'i rakue: "Nepëtywi futari pëë mü pejetywere'ema pyu", 'jau 'ga 'ã rakue. A'eramü ae "je najetyweri" 'jaramü Jarejuwarete 'ga 'me are jarejemogyau. 'Ga je'ega rerowiare'emamü te ae poromü ae 'i.

2

Kristu 'ga jane poaa

¹ Pëë 'ã jejeuwa 'jawe jee. A'eramü je ka'arana kwasiaa pë nupe mama'e tywera apo awi pë momoiawamü. "Au'je mama'e tywera apo re" 'ea je ikwasiaa ka'aran are imonou pë nupe. A'ere jane mama'e tywera jane iaporamü Jejui Kristu 'ga je'egi 'Uwarete 'ga upe jane ree. "Aipo 'ga je rerowiaara 'ga. Mama'e tywera 'ga wapo. A'ere 'ga nopoiri futari jane rerowiar awi. A'eramü ki eta'waramü etee e'ina 'ga upe", 'jau 'ga 'Uwarete 'ga upe oje'ega rerowiaaramü jane ree. Jejui 'ga 'ã naitywet ma'ea rüi. Esage ma'e 'ga te.

² 'Ga futat 'ã janetywera mepyau 'Uwarete 'ga upe janee. Amanümü janetywera 'Uwarete 'ga upe jane wi imoiawamü. A'ere 'ga najanema'e etee rüi janetywera mepyi. Ywy pewaramü janetywera jeeje futat 'ga omepy.

³ Jarejuwarete 'ga je'ega renuw ire jane a'jea futat 'ga remiayuwa. 'Ga remiayuwaretea 'ã jane 'ga je'ega renuparamü.

⁴ 'Gã amũ nipo 'jau, "Akwaap je Jarejuwarete 'ga", 'jau. A'ere aipo 'jara 'ga o'meramũ te 'ga 'i Jarejuwarete 'ga je'ega renuwe'em ire. I'me ma'eramũ te ae poromũ ae 'i akou.

⁵ 'Ga je'ega renuparamũ jane 'ga futaa a'jea futat. A'eramũ te ae a'jea futat ae 'i. "Je Jarejuwarete 'ga remiyauwa futat", 'jau jane.

⁶ Aipo 'jaramũ ki mama'e esage etee peapo, Jeju Kristu 'ga 'jawerimũ etee futat.

Pëporomutar iki pejejee

⁷ Tejekoty'aawamũ pë nupe je ka'arana kwasiari Jarejuwarete 'ga je'eg are. "Pëporomutar iki pëe pejejee. Pejejuka esage ki pejejee", 'jau 'ga rakue. Na'awamue rüi te 'ga 'ã aipo 'ga 'i janee rakue. Jeju 'ga rerowia ypy we futat te 'ã pejemu'e aipo are rakue. A'eramũ pëe aipo 'ga 'eawera kwaapa pejemogyau.

⁸ Aipoa morogyta are je ka'arana kwasiari pë nupe. A'ere aipoa morogyta ymanera jemu'jagi morogyta yau 'jawe. Jeju 'ga aipoa morogyta are jane mu'eramũ morogyta yau 'jawe futat janee. Jeju 'ga a'jea futat iporomutat jane ree. A'eramũ ki jane 'ga 'jawe futat jareporomutaramũ jarejee. A'eramũ nipo jane resakara 'gã 'jau, "A'jea futat Kristu 'ga 'ea ra'e", 'jau nipo 'gã. 'Ga rure'emamũ 'ã janyepy 'gã weapyoe'emamũ 'ga ree rakue. A'ere ako 'ga ruri jane mueapyou ojee ikue. Janereapyoe'em awi jane mueapyou ikue. Sã'ã jay reny ayyytuna mojesa'gia numiamũ. A'ere 'ã nomojesa'gi katu. Nan tee futat ako janyepy 'gã neapyo'iramũ etee Jarejuwarete 'ga je'eg are rakue. Jeju 'ga te ajee 'ã 'ut 'ara renyfuga 'jawe mama'e kwaawukaa katu katu janee, Jarejuwarete 'ga kwaawukaa janee. Jay reny 'jawewar awi jane mũ'jau 'ara renyfuga pype jane monoara 'jawe.

⁹ 'Gã amũ nipo 'jau, "je 'ara renyfuga pypewara futat", 'jau nipo 'gã. A'e reewi nipo 'gã niporomutari opytuna 'gã nee. A'eramũ jane aipo 'gã kwaapa. Aipo 'gã ppytunaiwa pypewara futat. Poromũ o'meramũ.

¹⁰ Opytun are iporomutat ma'eramũ te ae 'arimũ wata ma'ea. Nitywi futari mama'e tywera pyu, jarejomote'aawa pyu Jarejuwarete 'ga upe.

¹¹ A'ere ae opytuna 'gã nee iporomutare'emamũ ae ppytunaiwa 'jawewara pype wata ma'ea. Ypytunaiwa pype wata ma'eramũ ae awawa kwaape'ema. Ypytunaiwa esaukare'ema ae upe. Eae'ema 'jawe ae mogyaukaa.

¹²⁻¹⁴ Pëe 'ã jejeuwa futat. Peenuw esage ki jeje'ega. Jeju Kristu 'ga ree 'ã 'ga Ruwarete 'ga pëtywera moia pë nui pë katu'oka pë mogyau 'awamũ. Jarejuwarete 'ga 'ã pëe ikwaapa. A'eramũ je ka'arana kwasiaa pë nupe.

Sawa'eramũ pë nupe nanë je ka'arana kwasiari nũ. Wyw apoe'emaue Ako ma'e 'ga pekwaap pejemogyau rakue. A'eramũ je pë nupe nanë ka'arana kwasiaa nũ.

Kunumimet. Kũjãmet. Jeju 'ga perowiat pejemogyau. A'eramũ 'ã pëe mama'e apowe'em mama'eukwaawa 'wyrriara remifutar imũ. Jeju 'ga pãjë mũ pejejepojekau mama'eukwaawa 'wyrriara remiyuw awi. Jarejuwarete 'ga je'ega renupa pejemogyau. A'eramũ pëe mama'e apou'jape'ema mama'eukwaawa 'wyrriara je'eg imũ. A'eramũ je ka'arana kwasiaa imonou pë nupe.

¹⁵ Jarejuwarete 'ga ree iporomutare'ema 'gã 'ja'jawe ete kasi pëe pejemogy ne. 'Gã nemifutara kasi pefutar ine. 'Gã nemifutar are pejejea m'yine'ema. Jarejuwarete 'ga ree iporomutare'ema 'gã 'jawe tee mama'e apo re pëe nanë nepëporomutari Jarejuwarete 'ga ree ne.

¹⁶ Jarejuwarete 'ga ree iporomutare'ema 'gã mama'e tywera apo are etee ifuwet ajemogyau. Mama'e tywera resag ire 'gã aipo futaa. A'eramũ futat ojerowiaraiapa ajemogyau wemiapo a'wyre'em are etee futat. A'ere naJaneruwarete 'ga remifutara rüi aipoa. 'Ga ree iporomutare'ema 'gã nemiapote te poromũ.

¹⁷ A'ere nipo anure Janeruwarete 'ga werowiare'ema 'gã nemiapofera mateepapa etee. 'Gã nemifutara nanë nipo 'ga imateepapa etee 'gã nui nũ. A'ere jane Jarejuwarete 'ga remifutar imũ etee mama'e apotaramũ nipapawi. 'Ga pyri te jane oi jarejemogyau jareku'iramũ nakwaparimũ rüi futat.

Jeju 'ga ree iporomutare'emarete

¹⁸ Kunumimet. Kũjãmet 'jau. Jeje'ega ki peenup. Anurenure'i nipo mama'e teepap katu katuramũ. Peenup futat 'ã Jeju 'ga ree iporomutare'emarete 'ga rera rai'i. "Anurenure'i nipo Jeju 'ga ree iporomutare'emarete 'ga ruri", 'jau 'gã imome'wau pë nupe. A'jea futat 'gã 'ea. 'Awamũ miamũ kwaiwete Jeju 'ga ree iporomutare'ema 'gã jemogyi. A'eramũ 'ã jane a'e are ikwaapa "owaëm ja'wyja'wy wyw mateepaawa upe ra'e" 'e kwaapa.

¹⁹ Jeju 'ga ree iporomutare'ema 'gã awau ojepe'au muku jane wi. Najane pyri 'ga ree iporomutat ma'e 'gã nũi tãmëjë futat. Jane pyri 'ga ree iporomutar ire amunipo 'ã 'gã nojepe'ai jane wi. Jane wi 'gã ooa 'gã jepe'aa 'gã okwaawukat janee. A'eramũ jane 'jau jarejaupe: "Najane pyri 'ga ree iporomutat ma'e 'gã nũi tãmëjë futat 'gã", 'jau jane jarejaupe.

²⁰ Jejui Kristu 'ga 'Uwarete 'ga 'Agesage mua pē nupe rakue, pē mu'jawamū rakue. A'eramū pēē mama'e a'je kwaapa, Jejui 'ga mome'u a'jea futat.

²¹ Pēē 'ā Jejui 'ga ree mama'e a'jea porogyta pekwaap. A'eramū je ka'arana kwasiaa pē nupe. "Nepekwaawi", 'jawe'em je ikwasiaa pē nupe. Jejui 'ga mome'ua a'jea futat pēē ikwaapa. Mama'e a'je kwaaparamū ae mama'e a'jea etee futat imome'ui ajaupe. Nai'me ma'eramū rūi ae morogyta esage mome'ui.

²² Awŷja te i'me ma'ea? "NaJejui 'ga rūi Janeruwarete 'ga remimurera" 'jara 'gā te poromū e'i i'me ma'eramū. Jejui 'ga ree iporomutare'ema 'gā futat poromū. 'Gā nuerowiari futari Jarejuwarete 'ga je'ega, 'ga ra'yra 'ga je'ega nanē nū.

²³ "NaKu'jywa 'ga rūi Jejui 'ga Ruwaretea" 'e rerowiaara 'gā najarejuwarete 'ga remi-ayuya rūi ajemogy. A'ere "Jejui 'ga Jarejuwarete 'ga ra'yratea" 'e rerowiaara 'gā a'jea futat Jarejuwarete 'ga remiayuya.

²⁴ Jejui 'ga je'ega renupa ypy we futat 'ā pēē 'ga rerowiaa rai'i. Aipoa morogyta ki a'jea futat perowiat pejemogyau. Aipoa morogyta a'jea futat perowiat pejemogyamū, Janeruwarete 'ga ree pejemujaa a'jea futat. 'Ga ra'yra 'ga ree nanē pejemujaa nū.

²⁵ Ymā we futat 'ā Kristu 'ga 'i oree ikue: "Tomogy pēē orojeypyri nakwaparimū warāu rūi", 'jau 'ga oree ikue.

²⁶ 'Gā amū nipo awau pē pyri o'meramū pē nupe. "Tamomoirukat 'gā Jejui 'ga rerowiar awi 'jau kwy", 'jau 'gā ojeupe. Aipoa 'gā nee je ka'arana kwasiari imonou pē nupe.

²⁷ A'ere Jejui 'ga 'Uwarete 'ga 'Agesage muri pē nupe. A'eramū 'ga 'Agesagea pē mu'jara. A'eramū ki pēē mū moromu'jara futaru'jape'ema. 'Ga 'Agesagea a'jea futat pē mu'e mama'e a'je are. Ni'mei futari 'ga 'Agesagea. A'eramū ki pēē 'ga 'Agesagea pejemu'e renupa katu katu. A'e renupa pēē pejemujaa Jejui 'ga ree.

²⁸ Kunumīmet, kūjāmet 'jau. Jejui 'ga ree etee ki pejemujat. A'eramū pēē anure 'ga ruramū pejejenosūe'em pejewau 'ga repejana. Mama'e tywera apo re pejenosi 'ga rowase pejewaw ipe ne.

²⁹ Sikwaap jane 'ga jarejemogyau. "Jejui Kristu 'ga esagesage. Nuapoi 'ga mama'e tywera" 'ea jane ikwaapa. A'eramū "ae mama'e tywera apoare'emamū Janeruwarete 'ga ra'yramū futat ajemogyau" 'ea nanē jane ikwaapa nū.

3

Jejui 'ga rerowiaat

¹ Pēnea'ar iki "Janeruwarete 'ga iporomutat jane ree" 'e are. A'eramū 'ga wa'yra 'ga Kristu 'ga rerowiaaramū 'jau jane: "Jera'yra pēē", 'jau. A'ere Janeruwarete 'ga rerowiare'ema 'gā nokwaawi 'ga. A'eramū 'gā "Jejui 'ga rerowiaara 'gā Janeruwarete 'ga ra'yra futat" 'e are weapyoe'emamū.

² A'ere 'ā pēē jejekoty'aawa. Jeje'eg are ki peapyaka. A'jea futat a'e je pē nupe. 'Awamū futat 'ā jane jemogyi Jarejuwarete 'ga ra'yramū. Maran sipo 'ga jane rerekoi, sa'e te aje 'ā jane. Nikwaawi we jane aipoa. Esage te nipo 'ea etee aje 'ā jane sikwaap. Anure te nipo jane Jejui 'ga ruramū jane 'ga resagi. "Nan tāmējē pa 'ga ra'e", 'jau nipo jane 'ga resaka. A'eramū te nipo "jane jemogyi 'ga 'jawe katu katu" 'ea jane sikwaap.

³ A'eramū nipo jane 'ga rapesakaramū juejue jarepoia jaretywer awi jarejekatu'oka. Jejui 'ga re'ā mama'e tywera pyu otywe'emamū futat. A'eramū jane 'ga rapesakaramū jarepoia mama'e tywera apo awi.

⁴ Mama'e tywera apoara 'gā Jarejuwarete 'ga je'ega rerowiare'ema futat ajemogyau. Aipo 'gā futat itywet Jarejuwarete 'ga upe. 'Ga je'ega renupare'ema 'gā itywyetywet 'ga upe.

⁵ "Au wyw pe ako Jejui 'ga 'ua aetywera moiawamū ikue" 'ea jane ikwaapa. Nitywi futari mama'e tywera 'ga ree.

⁶ A'eramū jane 'ga ree ojemujat ma'eramū jarepoia mama'e tywera apo awi. Mama'e tywera apo awi ipoire'ema 'gā na'ga remiayuya rūi. Nokwaawi 'gā 'ga.

⁷ Kunumīmet. Kūjāmet 'jau. Perowiat kasi i'me ma'e 'gā ne. "Jejui Kristu 'ga esagesage" 'jaramū ae 'ga rerowiaaramū futat. Mama'e esagea etee futat iapou. Aipo 'gā wesageramū Jejui 'ga 'jawe.

⁸ Mama'e tywera apoara 'gā te aje 'ā nia'wyri futari 'ga upe. Mama'eukwaawa 'wyriara remiayuya futat 'gā. Ippy we futat 'ā mama'eukwaawa 'wyriara mama'e tywera etee futat iapoi akou rakue, wywa Janeruwarete 'ga iapo ypyrauwe rakue. A'ere 'ā Janeruwarete 'ga ra'yratete 'ga ruri mama'eukwaawa 'wyriara pājē pojekau jui. A'eramū 'ga ifuakara muapap jui. Mama'eukwaawa 'wyriara remiapoa mateepapa nanē 'ga ruri nū.

⁹ A'eramū wa'yramū ae rekoramū Janeruwarete 'ga U'agesage mua ae upe. A'eramū jane jarepoia mama'e tywera apo awi. Wa'yramū 'ga jane mogyi. A'eramū jane a'eramū mama'e tywera apou'jape'ema jarejemogyau.

¹⁰ Jarejuwarete 'ga ra'yramū jarejemogya jane sikwaap. Mama'eukwaawa 'wyrriara remiayua 'gā jemogya nanē jane ikwaapa. Mama'e tywera apoara 'gā, ajuee iporomutare'ema 'gā. Mīmera 'gā mama'eukwaawa 'wyrriara remiayua futat. NaJaneruwarete 'ga ra'yra rūi 'gā.

Pēporomutar iki pejejee

¹¹ Peenup futat 'ā Jejuí 'ga 'eawera, “pēporomutar iki pejejee” 'ea 'ā pēē enupa futat. 'Ga rerowia ypy we futat 'ā pēē aipo 'eawera renupa rakue.

¹² Kaí 'ga 'jawe kasi sajemogy ne. Mama'eukwaawa remiayua futat aipoa kūima'e 'ga, Kaí 'ga rakue. A'eramū 'ga wewirera 'ga, Apeu 'ga jukau ekoete rakue. Ma'eramū sipo 'ga wewirera 'ga jukau ekoete rakue? 'Ga rewirera 'ga, Apeu 'ga, mama'e esagea etee wapo. Jarejuwarete 'ga remifutar imū etee 'ga mama'e apoi. A'ere Kaí 'ga mama'e tywera etee iapoi. A'eramū 'ga wewirera 'ga rerekoayau ee. A'eramū 'ga 'ga jukau rakue.

¹³ Pēē 'ā jerewirera 'jawe jee. Kūjāmeramū 'ā pēē jerenyra 'jawe 'jau. Jejuí 'ga rerowiaaramū pejejemogyau. A'eramū nipo Jejuí 'ga rerowiare'ema 'gā oporomutare'emamū pē nee. A'ere kasi pēnea'at aipo 'gā nee pejejemogyau ne.

¹⁴ Jejuí 'ga rerowiarāmū 'ā aeporomutaramū ajuee. A'eramū jane namama'eukwaawa rapyaw ipe oo ma'e arūi. Jarewawa jane ikwaapa, “Ywag ipe jane oi Jarejuwarete 'ga pyri” 'ea jane ikwaapa. 'Ga rerowiare'ema 'gā te ajee 'ā mama'eukwaawa rapyaw ipe oo ma'ea futat. Nojejuka esagei 'gā ajuee. Oporomutare'emamū nanē 'gā ajuee nū. A'eramū aipo 'gā awawe'em futat Jarejuwarete 'ga pyri. Muku te 'gā oi 'ga wí.

¹⁵ “Oporojuka ma'e 'gā nooi Jarejuwarete 'ga pyri ywag ipe” 'ea jane sikwaap. A'ere ajuee iporomutare'emamū ae oporojuka ma'e 'jawe Jarejuwarete 'ga upe. A'eramū “ajuee iporomutare'emamū ae awawe'em 'ga pyri” 'ea nanē jane ikwaapa nū.

¹⁶ Jejuí Kristu 'ga ako amanūmū janee ikue, jane ree 'Uwarete 'ga poromutara re-saukaawamū janee ikue. “A'jea futat 'ga poromutaramū jane ree” 'ea jane 'ā ikwaapa. A'eramū ki jane jareporomutaramū jarejee 'ga 'jawerimū etee futat. “Je najemanūweri 'gā nee tejemua'emaw ipe”, pe'je kasi ne. Pēpota'wa ki pejejee.

¹⁷ Amumeramū nipo jane jaremama'e tywe'emamū. A'eramū ki imama'e ma'eramū pemono amū pejejaupe. Nan ae Jejuí 'ga rerowiaaramū mama'e apoi. Mama'ea ajaupe imonoare'emamū sipo ae “Je Jarejuwarete 'ga arowiat”, 'jau? Naani. O'meramū te ae 'i poromū.

¹⁸ A'eramū ki pēē pejeapyakau je'e are. Ajuee iporomutat ma'eramū ae jopoari mama'e apou, mama'e monou ajaupe. Nanuara aporamū janeporomutaramū a'jea futat jarejee. Mama'ea pejejaupe imonoare'emamū kasi “Jeporomutat je ene ree”, pe'je ekoete pejejaupe ne.

¹⁹ Jarejee iporomutat ma'eramū jane Jarejuwarete 'ga je'eg imū etee futat iapou. 'Ga 'eawer imū etee mama'e apo re “ae 'ga ra'yramū futat ae jemogyi” 'ea jane ikwaapa. A'eramū ae 'ga 'eawer imū etee mama'e apou ajemogyau ojenosōue'em 'ga rowase awaw ipe.

²⁰ Jarejuwarete 'ga rerowiar ire nipo pēē mū mama'e tywera apou. A'eramū nipo pēē pejepoyje'emamū Jarejuwarete 'ga upe. “Awamū Janeruwarete 'ga niporomutari je ree”, 'jau nipo pēē. A'ere 'ga 'ā mama'e kwaapararetea. A'eramū 'ga jarejeupe jane 'e kwaapa. A'ea 'ga okwaap agawewi futat. A'etea 'ga niporomutapawi pē nee, mama'e tywera pēē iapo re.

²¹ A'eramū jane 'ga jarefutara kwaaw ire jarejenosōue'em jareje'ega 'ga upe.

²² Oje'ega jane enuwamū 'ga mama'e mua janee. Ojeupe jane enūjamū 'ga imua jane upe. Janeremienūiwera mua janee, wemifutar imū etee jane mama'e apo re.

²³ “Perowiar iki jera'yraretea, Jejuí Kristu 'ga”, 'jau 'ga janee ikue. “Pēporomutar iki pejejee Kristu 'ga 'eawer imū etee futat”, 'jau 'ga janee ikue.

²⁴ Jarejuwarete 'ga je'ega renuparamū jane jarejemujaa 'ga ree. 'Ga nanē akou jane pype futat nū. U'agesagea 'ga imua janee ikue. A'eramū 'ga 'Agesagea jane mueapyou jane pyri 'ga reko are.

4

Janeruwarete 'ga 'Agesage

¹ Kunumīmet, kūjāmet 'jau. Pēē 'ā jejekoty'aawa. A'eramū je 'jau pē nupe: Perowiat kasi kamēšete tekotee 'gā porogytaa ne. Kwaiwete 'ā 'gā jemogyi okwasi'wau oporogytau tesirūmeruu. “Jarejuwarete 'ga 'Agesagea je mut pē mu'jaukaa jee”, 'jau futatee nipo 'gā pē nupe. A'ere kasi 'gā porogytaa perowiaraiw ine. 'Gā amū Jarejuwarete 'ga je'ega mome'u teeara. Peenup katu katu ra'ne ki 'gā je'ega. “A'jea futat sipo 'gā Jarejuwarete 'ga je'eg imū 'gā 'i akou”, 'jau etee ki pēē pejejaupe.

²“Maranuara sipo Janeruwarete 'ga 'Agesagea wereko?” 'jau nipo pēē pejejeupe. Tamu'e pēē ee 'jau. 'Gā je'ega peenup katu katu. “Jejuí 'ga futat Jarejuwarete 'ga remimurera. Ae 'jawe futat 'ā 'ga wa'yra 'ga muri janee rakue. Sā'ā ae 'ara kunumīakyramū ra'ne. Aere 'ā ae waranupa. Nan tee futat 'ga wa'yra 'ga muri kunumīakyramū janee rakue, 'awa ywy pe rakue” 'jara 'gā tee 'ga 'Agesagea wereko.

³“Naeramū rūi nipo Jejuí Kristu 'ga ruri. Ināinā'nī te nipo 'ga ruri” 'jara 'gā 'ga 'Agesage rerekware'ema futat. Aipo 'jara 'gā 'ga ree iporomutare'ema 'gā te poromū. “Anure nipo Jejuí 'ga ree iporomutare'emarete 'ga ruri” 'ea 'ā pēē enupa. Aere 'ā 'awamū futat 'ga 'jawewara 'gā amū nuri akou o'meramū janee.

⁴Kunumīmet, kūjāmet 'jau. Pēē 'ā Jarejuwarete 'ga ra'yra. A'eramū 'ga 'ā U'agesage mua pē nupe, pēnerekwaramū rakue. 'Ga pājēa te 'ā a'jea futat ifuakat, 'au ywy pewara 'gā pājē apyraapa. A'eramū pēē 'ā a'eramū wejue i'me ma'e 'gā porogyta rerowiare'ema. I'me ma'e 'gā 'ā mama'eukwaawa 'wryiara remiayuwa. Aere pēnerekwara pājēa 'ā mama'eukwaawa 'wryiara pājē apyraawi 'ā a'jea futat.

⁵Janeruwarete 'ga 'Agesage rerekware'ema 'gā 'awa ywy pewara etee omome'u ajemogyau. A'eramū Janeruwarete 'ga rerowiare'ema 'gā etee futat 'gā je'ega rerowiaa ajemogyau.

⁶Jane 'ā Jarejuwarete 'ga remiayuwa futat. A'eramū 'ga kwaapara 'gā wapyakau janeje'eg are. Aere 'ā 'ga remiayuwe'ema 'gā nuapyakai janeje'eg are. A'eramū jane 'gā kwaapa. Janeje'ega renupara 'gā Jarejuwarete 'ga 'Agesagea wereko. 'Ga 'Agesagea jane mu'jau mama'e a'je are tee. A'eramū 'ga 'Agesage rerekwara 'gā wapyakau janeje'eg are. Aere i'me ma'e rerowiaara 'gā mama'eukwaawa 'wryiara remiayuwa futat. A'eramū 'gā wapyakawe'em janeje'eg are.

Jarejuwarete 'ga ree iporomutat ma'e

⁷Kunumīmet, kūjāmet 'jau. Janeruwarete 'ga a'jea futat iporomutat jane ree. A'eramū 'ga oje'jawe futat jane moporomutarukaa jarejuee. Jarejuee iporomutat ma'eramū jane Jarejuwarete 'ga ra'yramū futat. 'Ga kwaapa nanē nū jane.

⁸Ywawuje etee 'ā Janeruwarete 'ga poromutamū ae ree pāwē pāwē etee futat. 'Ga futat te 'ā ae ree ipota'wa ma'ea ako. A'eramū ajuee iporomutare'ema 'gā 'ga kwaape'ema futat.

⁹Wa'yrarete 'ga ako 'ga imua jane katu'okawamū ikue. Majepei tee agawewi 'ga ra'yrarete 'ga. A'etea ako 'ga 'ga amut wemiarame'ema 'jawe ikue. Jane ree jemuaēmaw ipe te 'ga wa'yra 'ga murukari ijukaukaa 'au ywy pe janee, jane katu'okawamū. Ma'eramū 'ā jane a'jea futat Jejuí 'ga rerowiaaramū nipo 'ā jane jemogyi jareku'iramū. Nakwaparimū rūi futat nipo 'ā jane jarewau jarejemogyau jareku'iramū 'ga pyri. A'eramū 'ā jane “'Ga 'ā iporomutat jane ree” 'e kwaawi.

¹⁰Najane ra'ne rūi te 'ā Jarejuwarete 'ga ree janeporomutat rakue. 'Ga ra'ne tāmējē futat te 'ā iporomutat jane ree rakue. A'eramū ako 'ga wa'yra 'ga muri janetywera jane wi imoiawamū ikue. A'e are jane 'ā Janeruwarete 'ga iporomutat jane ree 'e kwaapa. Jarejeapyoramū 'ā jarejemogyau jarejee 'ga poromutar are.

¹¹Janeruwarete 'ga iporomutat jane ree. A'eramū ki jane nanē jareporomutamū jarejemogyau jarejuee.

¹²Nitywi futari ae mū Jarejuwarete 'ga resakaramū. Aere jarejuee janeporomutamū Janeruwarete 'ga rekoí futari jane pyri. Ma'eramū 'ā jane poromutamū a'jea futat 'ga ree.

¹³Janeruwarete 'ga 'ā U'agesage mua imogeu jane pype. A'eramū 'ā 'ga 'awamū ajemogyau jane pyri. Jane nanē jarejemujaa 'ga ree. Aipoa jane sikwaap.

¹⁴Orojemiesagera ete ore imome'wau: “Janeruwarete 'ga ako wa'yrarete 'ga amut 'awa ywy pewaramū ae katu'okawamū ikue” 'ea ore imome'wau. Ore 'ā 'ga ra'yra 'ga Jejuí 'ga resakarera futat. Ma'eramū 'ā ore imome'ui pē nupe.

¹⁵“Jejuí 'ga Janeruwarete 'ga ra'yra 'ga futat” 'jara 'gā pyri etee Janeruwarete 'ga rekoí. Aipo 'jara 'gā 'ga jekoty'aawa futat.

¹⁶“Janeruwarete 'ga iporomutat jane ree” 'ea nanē 'ā jane ikwaapa erowiaa 'jau 'ā jane. A'jea futat aipo 'ea.

Janeruwarete 'ga iporomutat ae ree. A'eramū jane jarejuee iporomutat ma'eramū jarejemujaa 'ga ree. Jane pyri futat 'ā 'ga rekoí.

¹⁷'Ga ree ojemogypyk ma'eramū jane jareporomutamū 'ga ree. Jareporomutamū jarejuee nanē nū. A'eramū jane wowase 'ga jaremajatykaaw ipe jarejenosōue'em jarejatykau 'ga upe. Jejuí 'ga rekwawera 'jawerimū jareko re jane nikyjei futari 'ga pyri jareo awi.

¹⁸Janeporomutat jane 'ga ree. A'eramū jane jarekyjawe'em futat 'ga wí. Wea'are'emamū ae wereko tywer are. Naerereko tywera'uweri 'ga ojee iporomutat ma'eramū. 'Ga je'ega rerowiare'ema 'gā tee a'jea futat okyje ajemogyau 'ga wí.

¹⁹ Janeruwarete 'ga ra'ne futat oporomutaramū jane ree rakue. A'eramū jane 'awamū jarejemogyau 'ga ree iporomutat ma'eramū. Jarejuee nanē jareporomutaramū nū.

²⁰ 'Ga amū nipo 'jau "Jeporomutat je Jarejuwarete 'ga ree", 'jau nipo 'ga. A'ere nipo 'ga aipo 'e reewi niporomutari Jejuí 'ga rerowiaara 'gā amū nee. Maran sipo 'ga a'eramū Jejuí 'ga rerowiaara 'gā nee oporomutare'm ire "Jarejuwarete 'ga ree jeporomutaramū", 'jau akou. Wesak agawewi te 'ā 'ga Jejuí 'ga rerowiaara 'gā. A'etea oporomutare'emamū 'gā nee. Nuesagi futari 'ga Jarejuwarete 'ga. A'jea sipo aipo 'ga Jarejuwarete 'ga ree iporomutat ma'ea? Naani.

²¹ Ymā te Jejuí Kristu 'ga 'i ikue: "Jarejuwarete 'ga ree iporomutat ma'eramū ki pēporomutat pejejuee", 'jau 'ga janee ikue.

5

Mama'e tywera apo awi opoit ma'e

¹ "Jejuí 'ga Janeruwarete 'ga remimurera futat" 'e rerowiaara 'gā juejue Janeruwarete 'ga ra'yra. Jarejuwarete 'ga ree iporomutat ma'e 'gā nanē oporomutaramū 'ga ra'yramū ajuee nū.

² A'jea futat jareporomutaramū Jarejuwarete 'ga ree, 'ga remimu'efer imū etee futat jane mama'e apou jarejemogyau. A'eramū te ae "a'jea futat jeporomutaramū 'ga ra'yra 'gā nee" 'e kwaawi nanē nū.

³⁻⁴ Jarejuwarete 'ga ree jareporomutaramū jane 'ga je'ega renupa katu katu. 'Ga je'ega renuw ire jane jarejemogyau 'ga ra'yramū futat. Opājēa 'ga imua janee. A'eramū 'ga je'ega renuwa waye'emamū janee. Werowiaaramū Jejuí 'ga jane mamuakaa mama'e tywera apo awi.

⁵ Maranuarāmū sipo ae poiri mama'e tywera apo awi? Jejuí 'ga rerowiaara 'gā etee te. "Jejuí 'ga a'jea futat Jarejuwarete 'ga ra'yratea" 'jara 'gā etee te nuapoi mama'e tywera.

Jejuí 'ga Janeruwarete 'ga ra'yratea

⁶ Jejuí Kristu 'ga ako ojeppymūkaaw ipe ojesaukaa katu katu janee ikue. Pykau 'jawe futat Janeruwarete 'ga 'Agesagea 'ua ojypa 'ga ree ikue. A'e are 'ga ojekwaawukaa katu janee. "Janeruwarete 'ga ra'yra futat 'ga ra'e" 'e kwaawukaa katu janee ikue. A'ere jane na'ga pymiawer are etee rūi 'ga kwaawi. Ypeywar are 'ga omu'amaw ipe owy reko'wokawer are nanē futat 'ga jekwaawukari janee. Janeruwarete 'ga 'Agesagea Jejuí 'ga kwaawukaa janee. A'jea futat aipoa. Ni'mei futari 'ga 'Agesagea.

⁷ Aipo resakawera Jejuí 'ga kwaawukaa janee.

⁸ Janeruwarete 'ga 'Agesagea Jejuí 'ga pymi are 'ga kwaawukaa janee. 'Ga ry reko'wokawer are nanē nū. Mīmera mama'e resakawer are jane "Jejuí 'ga Janeruwarete 'ga ra'yratea futat" 'e kwaapa 'agamū.

⁹ Jarejo'eawera 'ā jane erowiaa jepi. A'ere Janeruwarete 'ga 'ea ae mū 'eawera apyraawi. Jejuí 'ga upe 'ga 'jau: "Koromū jera'yratee 'ga", 'jau 'ga Jejuí 'ga mome'wau oree. U'eawer imū etee 'ga wa'yra 'ga rerowiarukaa janee.

¹⁰ Jarejuwarete 'ga ra'yra 'ga rerowiarāmū ae 'jau ojeupe. "A'jea futat Janeruwarete 'ga 'i", 'jau ae akou ojeupe. A'ere Janeruwarete 'ga rerowiare'ema 'gā 'i "o'meramū te 'ga 'i", 'jau etee 'gā 'ga upe, 'ga je'ega rerowiare'emamū. Nuerowiari futari 'gā 'ga ra'yra 'ga mome'ua. "Koromū futat jera'yratee 'ga" 'ea 'gā nuerowiari ajemogyau.

¹¹ "Jera'yratee 'ga amanū pē katu'okawamū. A'eramū 'ga werowiaaramū pē mogyau namutat oje'jawe. A'eramū nipo pēē pejemanū re pejejua 'au pejejemogyau ore pyri jera'yra 'ga rerowiaaramū pēē nakwaparimū warāu rūi futat", 'jau Janeruwarete 'ga janee rakue.

¹² 'Ga ra'yra 'ga rerowiaara 'gā ajemogyau namutat 'ga 'jawe. Amanū re awau ajemogyau Jarejuwarete 'ga pyri nakwaparimū warāu rūi futat. A'ere 'ga ra'yra 'ga rerowiare'ema 'gā nooa'uweri 'ga pyri amanū re. Muku te 'gā oi 'ga wi.

Jejuí 'ga ree ki pejemogypyk

¹³ Jejuí 'ga ree pejemogypyk pejejemogyau. A'eramū je ka'arana kwasiaa pē nupe, pē mu 'jau Jarejuwarete 'ga pyri jarejemogy are.

¹⁴ "Ojeupe mama'ea jane enūjamū 'ga apyakai janeje'eg are, wemifutara mama'ea ojeupe jane enūjamū" 'ea 'ā jane ikwaapa. A'eramū jane 'ga remifutar imū mama'e renūi awi jarekyjawe'em futat.

¹⁵ "Janeje'ega renuw ire 'ga janeremienūiwera mama'e mua janee" 'ea jane ikwaapa futat.

¹⁶ Jejuí 'ga rerowiaara 'ga amū nipo mama'e tywera apou akou. A'ea nipo pēē esaka. A'ere aipoa namama'eukwaawa rapyaw ipe ae monoukara rūi nipo aipo 'ga remiapofera mama'e tywera. A'eramū pēē pejeje'ega monou Jarejuwarete 'ga upe, aipo mama'e tywera apoarera 'ga ree. A'eramū Janeruwarete 'ga 'ga tywera moia 'ga wi 'ga momyauu nū.

A'ere mama'e tywera mū mama'eukwaawa rapyaw ipe ae monoawa futat. Aipoa mama'e tywera apoara 'ga ree te kasi ajee peporogyta Jarejuwarete 'ga upe ne, a'e je pē nupe.

¹⁷ Mama'e tywera juejue iapoa nia'wyrī Janeruwarete 'ga upe. A'ere 'ga ajepeja mama'e tywera moiri jane wi ojeupe jane je'egamū.

¹⁸ Jarejuwarete 'ga ra'yramū jane mama'e tywera niapoi futari jarejemogyau au'jeteramū. Janeruwarete 'ga ra'yrarete 'ga te 'ā jane a'gu mama'eukwaawa 'wyrīar awī. A'eramū jane pojekawarūme'em Jejuī 'ga wi.

¹⁹ Jarejuwarete 'ga rerowiaaramū jane 'ga remiayuwā futat. A'ere Janeruwarete 'ga rerowiare'ema 'gā mama'eukwaawa 'wyrīara remiayuwamū futat 'gā jemogyi najuejue etee.

²⁰ Janeruwarete 'ga ra'yra 'ga, Jejuī 'ga 'ā, 'ua 'awa ywy pe 'Uwarete 'ga kwaawukaa jane. 'Ga Ruwarete 'ga Maireteetea futat. A'eramū 'ā jane 'awamū jarejemujaa 'ga ree. 'Ga ra'yra 'ga, Jejuī Kristu 'ga ree nanē jane jarejemujaa nū. Janeruwarete 'ga 'ā a'jea futat ae mogyararetea. A'eramū "je rerowiaara 'gā amanū re 'ua je pyri ajemogyau nakwaparimū warāu rūi futat", 'jau 'ā 'ga rakue. A'jea futat aipo 'ga 'ea.

²¹ A'eramū je 'jau pē nupe: "Pēnoryp kasi maira'me a'agaw are ne. Jarejuwarete 'ga te ki pemuoryp, 'ga ra'yra 'ga reewe", 'jau je pē nupe.

Kweramū etee jeremimome'ua.

2 Juā

'Awa ka'arana upe nanē 'gā 'i, "Juā 'ga remikwasierera", e'i 'gā ymā we rakue. Janeruwarete 'ga 'Agesagea ikwasiarukaa 'ga upe rakue. A'eramū 'ga ikwasiaa imonou 'gā nupe.

¹ Ka'arana je akwasiat enee, Waip. Je 'ā Jejui 'ga rerowiaara 'gā 'wyrriaramū. Ene 'ā Jarejuwarete 'ga remipyryūmeramū. A'eramū je ka'arana kwasiaa enee. Enera'yra 'gā nupe nanē je ikwasiaari ene reewe nū. Jejekoty'aawa 'ā pēē. A'ere 'ā najejekoty'aawa etee rūi pejemogy. Morogyta a'je rerowiarareteramū ore najuejue etee ore oroporomutaramū pē nee.

² Morogyta a'jea te 'ā jane sirowiat. A'eramū 'ā jane 'agamū jareporomutaramū jarejemogyau jarejuee. Morogyta a'je renuparamū 'ā jane ee etee futat jarejea'aramū jarejemogyau. Nateepawi aipoa.

³ Ku'jywa 'ga 'ā Janeruwaretea. Jejui Kristu 'ga 'ā 'ga ra'yraretea futat. Afutat je 'gā nesagea jarejerekoa. Jarejee 'gā jemuaēma nanē je ifutaa nū. Jaremopy'ata'waa nanē je ifutaa nū. Morogyta a'je kwaaparamū jane jareporomutaramū jarejuee.

Janeporomutar iki jarejuee

⁴ Ymā te 'ā Janeruwarete 'ga 'i janee rakue: "Jeje'ega morogyta a'jea futat. A'eramū ki pēē enuparamū enupa katu. Je'eawer imū etee mama'e apou pejejemogyau", 'jau 'ga rakue. Ma'eramū 'ā enera'yra 'gā amū Jarejuwarete 'ga je'ega renuwi ajemogyau. Morogyta a'jeu etee 'gā mama'e apoi ajemogyau 'e renupa teku'iramū.

⁵ A'eramū je 'awamū 'jau enee ī: Janeporomutar iki jarejuee, jarejujukau esage jarejuee, 'jau je enee ī. Nomorogyta yau arūi te 'ā aipoa. Jejui 'ga rerowia ppy we futat te 'ā aipo 'ea erenup rai'ī.

⁶ 'Ga ree jareporomutaramū Jarejuwarete 'ga je'ega renupa jarejemogyau. 'Ga kwaapa ppy we 'ā "Ga je'ega peenup" 'ea pēē ikwaapa.

⁷ Kwaiwete 'ā 'ga je'ega renupare'ema 'gā jemogyi. Ae moryteera 'gā. A'eramū je 'jau pē nupe: Pejea'gu ki pejejemogyau 'gā nui. I'me ma'ea 'gā. "Naae 'jawe rūi Janeruwarete 'ga wa'yra 'ga muri ikue. Ināinā'nī te 'ga 'ga muri", 'jau futatee 'gā awau kwe pewara 'gā mu'jau. A'ere aipo 'jara 'gā i'me ma'ea te. Aipo 'jara 'gā niporomutari Jejui Kristu 'ga ree.

⁸ A'eramū ki pēē aipo 'gā nui pejejea'gwau. Perowiat kasi 'gā 'mea ne. 'Gā 'mea pēē erowiarāmū pejejoia Jarejuwarete 'ga rerowiar awi. A'eramū 'ga ojeupe pēporowyky repya namuri pē nupe ne. Ojewi pepoire'em ire te nipo Janeruwarete 'ga pē mepyau ojeupe pēporowyky are.

⁹ Kristu 'ga je'eg awi opoit ma'e 'gā naJaneruwarete 'ga remiayuwā rūi. A'ere Kristu 'ga je'ega rerowiaara 'gā jemogyi Jarejuwarete 'ga remiayuwareteramū. Kristu 'ga remiayuwamū nanē 'ā aipo 'gā nū. Aipo 'gā pyri Janeruwarete 'ga rekoī, wa'yrarete 'ga retee futat.

¹⁰ A'eramū ki pēē pejeje'wyr ipe pejemu'jat tywera 'gā amū waēmamū, 'gā mo-geukare'ema pejejog ipe. Peapeje'eg nanē kasi 'gā ne.

¹¹ Kasi a'e pe pejejog ipe 'gā moge re pēē 'gā 'jawe ete pejemogy ne. Pejejog ipe i'me ma'e 'gā moge re nipo pēē 'gā 'jawe futat pejemogy. A'eramū pēē pejejea'gwau i'me ma'e 'gā nui.

¹² Kwaiwete jeporogytaweramū enee. A'ere je ka'aran are najeporomome'uweri enee. Je retee tāmējē tamome'u enee 'jau, peu ene pyri teo re 'jau. A'eramū te nipo jane porogyta esagei jarejaupe kwaiwete. A'eramū nipo jane jareku'iramū jarejemogyau ee.

¹³ Ecerykiera ēē nanē Jarejuwarete 'ga remipyryūmera nū. A'eramū ēē ra'yra 'gā oje'ega monou pē nupe, pē futaa.

Kweramū etee jeremimome'ua.

3 Juā

'Awa ka'arana upe nanē 'gā 'i, "Juā 'ga remikwasiarera", e'i 'gā ymā we rakue. Janeruwarete 'ga 'Agesagea ikwasiarukaa 'ga upe rakue. A'eramū 'ga ikwasiaa imonou Gaio 'ga upe.

¹ Ka'arana je akwasiat imonou enee, ki Gaio. Jejui 'ga rerowiaara mū 'gā nupe 'wyrī-aramū je 'ā. Ene 'ā nanē 'ga rerowiaaramū. A'eramū ene jejekoty'aawareteramū ekou.

² Afutat je enerekoa jaruete. A'eramū je teje'ega monou Jarejuwarete 'ga upe ene ree: "Gaio 'ga ojemujat ene ree rai'i. Eneje'ega 'ga werowiat nanimenime akou. A'eramū 'ga akou esage ene upe. A'eramū je jaruete 'ga reko futaa. 'Ga jero'wue'ema je ifutaa. 'Ga upe mama'e mura nanē je ifutaa nū", 'jau je 'ga upe ene ree te'yīna.

³ Janerewirera 'jawewara 'gā 'uramū ene mome'wau jee. "Morogyta esageu ete futat Gaio 'ga reko'i mama'e apou", 'jau 'gā jee, ene mome'wau. A'ea je maku'iu kwaiwete ene ree.

⁴ "Enera'yra 'jawewara 'gā ajemogy Jarejuwarete 'ga je'ega renupa. Morogyta 'ajeu etee 'gā jemogyi mama'e apou" 'ea je maku'iu kwaiwete, mama'e mū ree jeku'i apyraapa.

⁵ Jarejuwarete 'ga 'eawer imū etee futat 'ā ene jarejewirera 'jawewara 'gā nerekou esage. Epojejuka esageramū 'gā nee. Eneremiesage'ema 'gā agawewi 'ā. A'etea 'ā ene epojejuka esageramū 'gā nee. Nanuara futat te 'ā Janeruwarete 'ga amuoryp.

⁶ 'Au ore pyri 'gā 'ua ene mome'wau ore jepi. "Esage te Gaio 'ga ore. Ore poaa esage", 'jau 'gā 'ua ene mome'wau ore jepi. Jarejuwarete 'ga muorypaw ipe ore jatyka ore ruwamū 'gā imome'wau ore ai'i. Ejewi 'gā amū ataramū ki ene 'gā poaa mama'e monou 'gā nupe 'gā nemirerooramū. Jarejuwarete 'ga upe te 'ā 'gā porowykyi ajemogyau. A'eramū ene 'gā poaa. Jarejuwarete 'ga rereko 'jawe ene 'gā nerekou esage.

⁷ Kwe pe awau Jejui 'ga mome'wara 'gā nuenūi mama'ea 'ga rerowiare'ema 'gā nupe.

⁸ A'eramū jane te ki mama'e monou 'gā nupe 'gā poaa. Jane 'gā poaa 'eramū jane 'gā pyri oporowyky ma'e 'jawe jarekou 'gā nupe.

⁹ Ka'arana je omono ikwasiaa peu ene pyriwara 'gā nupe ai'i, Jejui 'ga rerowiaara 'gā nupe ai'i. A'ere Tiotrifi 'ga nuerowiari etee jeje'ega ai'i. "Je te toko 'wyrīaramū 'gā nupe 'jau kwy", 'jau etee 'ga ojeupe. A'eramū 'ga wapyakawe'em jeje'eg are.

¹⁰ Ma'eramū nipo je ene pyri teo re 'ga tywera mome'ui pē nupe. Oje'egaiwamū 'ga jee ai'i. A'ere 'ga 'mea te 'ga rereko'i. A'ere naporomū etee rūi futat 'ga tywera. Ojeupe janerewirera 'jawewara 'gā Jejui 'ga mome'wara 'gā waēmamū 'ga 'gā mogerukare'ema wog ipe. Tekotee 'gā nog ipe 'gā nekoo miamū futat 'ga ifutare'ema. Jejui 'ga rerowiaara 'gā jatykaaw awi 'ga 'gā mogearama 'gā mū'jāu.

¹¹ Mama'e esage apoar are etee ki ejemu'e ekou. Mama'e tywera apoara 'gā nee kasi erejemu'e ne. Mama'e esage apoaramū ae Jarejuwarete 'ga remiayuwamū futat. Mama'e tywera apoara 'gā nokwaawi futari Jarejuwarete 'ga.

¹² "Demetriu 'ga te ajee esage ma'eramū ako", 'jau janerewirera 'jawewara 'gā jee ai'i. Nanuara te a'jea esage imome'ua. A'eramū Janeruwarete 'ga 'Agesagea nanuara 'gā poaa aipo mome'waukaa 'gā nupe. Je 'ā a'jea futat 'ga mome'wararetea. A'jea futat 'ā je'ea je rekoramū. Aipoa 'ā erekwaap futat.

¹³ Kwaiwete je remimome'ua numiamū. A'ere je ka'aran are najeporomonoweri ee enee.

¹⁴⁻¹⁵ Je retea tāmējē taporogyta enee 'jau. Jeowet je ene pyri. Anurenure'i nipo je oi. A'eramū tāmējē saporogyta jarejupa 'jau.

Epy'ata'wa ki ekou. "Janejekoty'aawa 'ga oje'ega amut janee rai'i", ere ki jarejekoty'aawa 'gā nupe najuejue etee futat. Enejekoty'aawa 'gā nanē oje'ega monou enee, ene futaa nū.

Kweramū etee jeremimome'ua.

Judas

Judas 'ga 'awa ka'arana kwasiaa rakue. “Tiago 'ga rewireramū je” 'jau 'ga. A'eramū 'ga nanē Jejuī 'ga rewirera nū. (Maku 6.3)

Ka'arana 'ga ikwasiaa imonou Jejuī 'ga rerowiaara 'gā nupe 'gā mu'akwaawamū. “Pe-jea'gu ki moromu'jat tywera 'gā nui. Perowiat kasi 'gā ne”, 'jau 'ga ikwasiaa imonou 'gā nupe. Janeruwarete 'ga 'Agesagea ikwasiarukaa 'ga upe rakue. A'eramū 'ga ikwasiaa imonou 'gā nupe.

¹ Je te 'ā Judas. Jejuī Kristu 'ga upe mama'e apoara je. Tiago 'ga rewireramū je 'ā. A'eramū je ka'arana kwasiaa pē nupe, Jarejuwarete 'ga remimū'ēmeramū. Ymā te 'ā Janeruwarete 'ga pē mū'ēi pē mogyau wa'yramū rakue. Ku'jywa 'ga 'ā Janeruwarete futat. Oporomutaramū 'ga pē nee. A'eramū Jejuī Kristu 'ga pē a'gwau mama'e tywer awi. A'eramū je pē nupe ka'arana kwasiaa inuga.

² Afutat je Jarejuwarete 'ga jemuaēma kwaiwete pē nee. Pē mopy'ata'wa, pē nee 'ga poromutat. Mīmera nanē je ifutaa nū.

³⁻⁴ Pēē 'ā jejekoty'aawamū. A'eramū je ka'arana kwasiaa imonou pē nupe. “Janeruwarete 'ga jane katu'ok jane mogyau wemiayuwamū” 'ea takwasiat imonou 'gā nupe 'jau kwy, 'jau je tejeupe te'yina numiamū. Janeruwarete 'ga oje'ega mua janee, jane erowiarāmū. A'e are je teporokwasariweramū te'yina. A'ere 'ā Janeruwarete 'ga ree iporomutare'ema 'gā amū oi o'meramū pē nupe rai'i. Jemime 'gā oi morogyta 'me mome'wau pē nupe rai'i. Jejuī Kristu 'ga etee te 'ā Janejararetea. A'ere 'ā i'me ma'e 'gā 'ga mome'u kwakuwi etee. “Najanejara rūi Jejuī Kristu 'ga. Jarejemifutar imū etee te jane mama'e apoi”, 'jau futate 'ā i'me ma'e 'gā pē nupe rai'i. A'ere 'ā nanuara 'gā nee Janeruwarete 'ga ka'arana kwasiarukari inuga ymā we rakue. “Mama'e ekoete are ete ajamu'jara 'gā mama'eukwaawa rapyaw ipe oo ma'ea futat”, 'jau 'ga ka'arana kwasiarukaa inuga rakue. A'eramū je ka'arana kwasiaa pē nupe, i'me ma'e 'gā je'ega rerowiar awi pē mošlawamū. Pepoit kasi morogyta a'je awi ne, 'jau je pē nupe. Jejuī 'ga ree etee futar iki pejemogyppyk.

⁵ A'eramū je pē muea'aa pēnemikwaawer are. Ymā te 'ā Janeruwarete 'ga Israeu juapyr-era 'gā nenū'ēi Egitu ywy awi rakue. A'etea 'ga 'ā anure werowiare'emamū omomap wemienū'ēmera 'gā amū rakue. Nuerowiari 'gā 'ga. A'eramū 'ga 'gā momapa rakue.

⁶ Ywagipewara 'gā amū nanē 'ā rakue nū. “Tejemifutar imū etee te je mama'e apoi tekou”, 'jau 'gā 'ā ojeupe rakue. Nuenuwi ete 'gā Janeruwarete 'ga je'ega. A'eramū 'gā ū'jāu ywag awi rakue. A'eramū Janeruwarete 'ga 'gā monou pyytunaiwa pype 'gā pofaa 'gā mogyau. Namutumutat 'ga 'gā mu'ama peu. Peu futat 'gā u'ama Jejuī 'ga rowase ae jatykaawa 'ara upe iwaēma rapesaka. Aipo 'ara rupi tāmējē nipo 'ga 'gā nesaka nū. A'eramū futat nipo 'ga 'gā monou mama'eukwaawa rapyaw ipe.

⁷ Sodom ipewara 'gā nee nanē je pē muea'aa nū. Gomora pewara 'gā nee, ipyriū'i ajemogy ma'e 'gā nee nanē nū. Ywagipewara 'gā 'jawe 'gā Ku'jywa 'ga je'ega nuenuwi. A'eramū 'gā kūima'erauwe ojo'wau. A'eramū Janeruwarete 'ga tata monou imojypa 'gā nee, 'gā apisaupap rakue. A'eramū jane “Janeruwarete 'ga mama'e tywera apoara 'gā wereko tywerete” 'e kwaapa. Anure nipo Janeruwarete 'ga mama'e tywera apoara 'gā monoukari mama'eukwaawa rapyaw ipe. Aipoa tataa owepe'ema futat.

⁸ Nan nipo pē mu'jar a'wyre'ema 'gā mama'e tywera apoi ymā ako ma'efera 'jawerimū. A'eramū nipo 'gā nanē ojemote'aa Jarejuwarete 'ga upe nū. Ku'jywa 'ga je'eg are jēmī nipo 'gā wea'are'emamū. Mama'e tywera apo are etee nipo weapyoramū. Ywagipewara 'gā we nipo 'gā ikurapa ekoete ajemogyau.

⁹ A'ere ywagipewara 'gā 'wyriara 'ga miamū te 'ā, Migeu 'ga nakurawi mama'eukwaawa 'wyriara rakue. Moisesi 'ga manūnamū Migeu 'ga mama'eukwaawa 'wyriara mui Moisesi 'ga reumer are rakue. A'etea 'ga nakurawi mama'eukwaawa 'wyriara “Je taroo Moisesi 'ga reumera”, 'jau ojeupe mama'eukwaawa 'wyriara 'eramū rakue. “Janeruwarete 'ga te nipo ene rereko tywerete”, 'jau ete Migeu 'ga, oje'ega moywyrafene'ema jupe rakue.

¹⁰ A'ere 'ā pē nupe 'ut ma'e 'gā nanarūi. Ajamue ekoete 'ā wemikwaawe'ema mama'e are. Wemiapoapa etee futat ae mama'e wapo. Sā'ā kasurua 'ā wea'are'ema mama'e are. Mama'e upe 'ā opajai ekoeteramū etee. Nan tee futat moromu'jar a'wyre'ema 'gā. Naea'ari mama'e esage are.

¹¹ Anure nipo Janeruwarete 'ga 'gā nerekou tyweaete 'gā tywer are. Ymā 'ā Kaī 'ga oporerekoaywereteramū wewirera 'ga ree rakue. Nan pē mu'jar a'wyre'ema 'gā Kaī 'ga 'jawe 'ga jemogyi. Parāu 'ga 'ā mama'e a'je'ema ete iapou ka'aranūū are rakue. Kore 'ga nanē 'ā Janeruwarete 'ga je'ega renupe'ema rakue. Mīmera 'ga 'ā oje'eganuwe'emamū

Jarejuwarete 'ga upe rakue. Aipo 'gā 'jawe ajee 'ā pē mu'jar a'wyre'ema 'gā jemogyi pē pype. A'eramū nipo Janeruwarete 'ga 'gā 'jawerimū etee futat 'gā monou mama'eukwaawa rapyau ipe anure.

¹² Pejejomajatykau pejejomojemi'waa pejejuee pejeporomutara resaukaawamū. A'ere nipo 'gā amū poyjeteeteramū 'ūina ojetee ojemi'waa mama'e'waupap ajai. Weawyry-wamū nanē nipo 'gā amū ajemogyau nū. Ojemote'aa ae nanuaramū ajemogyau ojopype. Amana rowoky'a tee 'jawe 'gā. Sā'ā amana rowoky'a tee resakawe ae "Kwe amana ruri janee", 'jau 'ā jane. A'ere 'ā nokyri. Nan tee futat moromu'jar a'wyre'ema 'gā jemogyi pē pype. Moromu'jara futat 'gā numiamū. A'ere 'gā mama'e a'je are nepē mu'ei. Sā'ā y'wa 'ywa 'ae'ema iypiwera 'jawe i'ae'ema. A'eramū 'ā ijaramū etyka, apo mososoka ywy awi. A'eramū taetu 'ā u'ae'emamū. Oypiwamū taetu. Nan pē mu'jar a'wyre'ema 'gā nuapoi mama'e esagea.

¹³ Sā'ā 'y ryjuapia mama'e tywera rerooa ejara ywy'a marimū. Nan pē mu'jar a'wyre'ema 'gā mama'e tywera apoi pē neape. Jaytatajāna 'ā ae esaka. 'Yē'ē raapara 'gā 'ā jaytata are amā'jāu wape kwaapawamū. A'ere jaytatajān are amā'ē re amunipo 'ā 'gā ka'jami etee. Nan pē mu'jar a'wyre'ema 'gā. Nepē mu'e esagei 'gā Jarejuwarete 'ga ree. A'e 'gā Janeruwarete 'ga omono muku ojewi anure. Ypytunaiwuu pype imomytau nakwaparimū warāu rūi futat.

¹⁴⁻¹⁵ Enoki 'ga 'ā ymā we Jarejuwarete 'ga ree iporomutare'ema 'gā mome'wau tāmējē rakue, pē mu'jar a'wyre'ema 'gā mome'wau tāmējē rakue. "Anure nipo Janejararete 'ga ruri ae resaka. Kwaiwete nipo 'ga ywagipewara 'gā nerua ojeupi. A'eramū nipo 'ga ojee iporomutare'ema 'gā nupu 'jau: 'Mama'e tywera etee peapo jepi. Je kuraw etee pejepe jepi', 'jau nipo 'ga ojee iporomutare'ema 'gā nupe. A'e 'gā nipo 'ga omono mama'eukwaawa rapyau ipe ojewi", 'jau Enoki 'ga rakue.

Ymā ae ppyfera 'ga Atāu 'ga juapyrera 'ga te poromū Enokiramū rakue. Pē nupe owaēm ma'e 'gā 'ga omome'u pē nupe rakue.

¹⁶ I'me ma'e 'gā oje'egaiwamū mama'e are. 'Gā mara'nea 'gā nerekou. Naekōēai futari 'gā. Tekotee 'gā 'gā iago'wau. Wemifutar imū te 'gā jemogyi mama'e tywera apou. "Ore te 'ā oreresage", 'jau futatee 'gā ojerowiaraipe ojee. "Pēē nanē 'ā pēnesage nū", 'jau futatee 'gā ajaupe. Ojee ojoporomutaawamū te 'gā 'i poromū "pēnesage pēē", 'jau futatee. Mama'e ojeupe imurukaawamū te 'gā 'meramū ajaupe.

¹⁷ A'ere ki pēnea 'at Jarejararete 'ga remimonofera 'gā 'eawer are.

¹⁸ "Anure nipo Jejui 'ga rure'ema uwe Jejui 'ga rerowiare'ema 'gā nuri pē jaita ekoete Jejui 'ga pēē erowiarāmū. Wemifutar imū te aipo 'gā mama'e tywera apoi", 'jau Jejui Kristu 'ga remimonofera 'gā janee ikue. Aipo 'gā futat owaēma pē nupe rai'i.

¹⁹ "Simote'at 'gā 'jau, 'gā mopojo'oka ajai 'jau", e'i te nipo nanuara 'gā pē nupe. NaJarejuwarete 'ga 'Agesage pājē mū rūi 'gā nekoi. NaJarejuwarete 'ga remifutar imū rūi 'gā nekoi mama'e apou. Wemifutar imū te 'gā mama'e apou ekoete.

²⁰ A'ere kasi pēē nanarūi ne. Jejui Kristu 'ga rerowiaara pēē. A'eramū pēē 'awamū taetu 'ga rerowiaa a'jea futat. 'Ga je'eg imū etee futat mama'e apou. Jarejuwarete 'ga 'Agesage pājē mū etee futat pejeje'ega monou Jarejuwarete 'ga upe.

²¹ Janeruwarete 'ga pē futaa a'jea futat. A'eramū pēē pejejemogyppyka katu katu 'ga ree pejejemogyau. Pejepoire'ema futat 'ga rerowiar awi. 'Ga je'ega pēē enupa katu pejejemogyau. Jejui Kristu 'ga ajemuaēma jane ree. A'eramū 'ga anure jane rerawau ywag ipe jane mogyau ojeppyri, nakwaparimū warāu rūi futat jane mogyau. A'eramū ki pēē aipo 'ga 'eawera rapesaka pejejemogyau.

²² 'Gā amū nipo Jejui 'ga rerowiaa'i etee. A'ere kasi pejeje'ega pemoywrafen 'gā nupe ne. Pepoar ete ki nanuara 'gā Jejui 'ga rerowiararete are.

²³ 'Gā amū nipo mama'eukwaawa rape are etee wea'aramū. A'eramū ki pēē Jejui 'ga rerowiarukaa 'gā nupe. Sā'ā tata pe 'ga amū 'ara ja'wyja'wy. Nan tee 'gā. Peppyk 'gā tata awi. Pejemuaēm iki tekotee 'gā nee. A'eramū ki pēē itywet ma'e 'gā nee pejejemuaēma. 'Gā tywera awi 'gā momoirukaa. "Gā te ajemogy otyweramū", pe'je ete kasi 'gā nupe ne. 'Gā tywera kasi pefutar ete ne. Kasi a'e pe pēē nanē peapo mama'e tywera 'gā 'jawe ne.

²⁴ Janeruwarete 'ga opājē mūa janee. Opājē mū mama'e tywera apoukare'ema janee. Jane muesageu opājē mū futat. A'eramū nipo 'ga anure jane rerawau jane mogyau wowase. Aipo 'ara rupi nipo jarejesageramū. Aipo 'ara rupi futat nipo jane jareku'iramū jarejemogyau 'ga rowase.

²⁵ "Ene tee te 'ā Oreruwaretea", 'jau ki jane 'ga upe. "Orojararete 'ga, Jejui Kristu 'ga ore erowiaa. Ene 'ā ore katu'oka ete, Jejui 'ga manū are. Eneresagea tekotee 'gā nesagea apyraapa", 'jau ki jane. "Ene 'ā a'jea futat ipojeuwipyretea. A'jea futat 'ā enepājēretea pājēnana 'gā pājē apyraapa. Ma'eramū 'ā ene a'jea futat Orejararetea. Ore'wyriarareteramū 'ā ekou ore a'jea futat. Na'awamue rūi te 'ā ereko. Nakwaparimū

rūi futat ore. 'Okoteete ma'ea je', 'jau ako ene ore ikue. Ywy tywe'emauwe 'ã ene ekou rakue. A'ea morogyta a'jea futat rakue", 'jau ki jane Jarejuwarete 'ga upe.
A'ea je anug ikwasiaa.

Apocalypse

Juā 'ga, Jejui 'ga remimu'efera 'ga, 'awa ka'arana kwasiaa rakue. Janeruwarete 'ga wemiaporama resaukaa Juā 'ga upe rakue. A'eramū Juā 'ga ka'arana kwasiaa wemiesager are imonou Jejui 'ga rerowiaara 'gā nupe rakue.

¹ 'Awamue je ka'arana kwasiari mama'e jeapowam are. Janeruwarete 'ga Jejui Kristu 'ga upe ra'ne esaukaa rakue. A'eramū 'ga 'jau wa'yra 'ga upe rakue:

—Anurenure'i jeremiesaukara jeapoi. A'eramū ene ejemiesagera resaukaa ejemiyauwa 'gā nupe— 'jau 'ga wa'yra 'ga upe rakue.

A'eramū 'ga aipoa 'uwa 'ga ojeupe esaukaripyrrera resaukaa jee ai'i.

Je Juānamū. Jejui Kristu 'ga upe mama'e apoaramū je rekoī. A'eramū 'ga ywagipewara 'ga amū mua imojypa ijeapoawama resaukaawamū jee, ijeapoawama je upe ik-waawukaawamū.

² A'eramū je tejemiesager are ka'arana kwasiaa inuga. Jarejuwarete 'ga remimome'ufer are, Jejui Kristu 'ga remimome'ufer are. Mīmer are je ka'arana kwasiari inuga.

³ 'Aga morogytaa Janeruwarete 'ga ma'ea te. A'ea ojopyter ipe imogytaara 'gā iku'i te ajemogyau. Janeruwarete 'ga muorypaw ipe ajatyka ma'e 'gā pyter ipe imogytaara 'gā jaruete ajemogyau. Enupara 'gā nipo aku'iramū ajemogyau enupawe. Jee 'ga remiesaukara nipo ojeapou kamēsiete futat.

Juā 'ga ka'arana kwasiaawet

⁴ Je 'ā Juānamū Jejui 'ga rerowiaaramū pē nupe je ka'arana kwasiari imonou. Asia ywy pe pejemogyau pejemomajatykau 'ga je'ega renuwamū. Sete pē'wyrarete pytuna. A'eramū je pē'wyrara 'gā nupe ka'arana monou ikwasiaa pē moymoyka.

Jarejuwarete 'ga resagea pē nerekoa je afutat, pē mopy'ata'wa pē mogya nanē nū. Janeruwarete 'ga Okoeteete ma'ea. Ywy apoe'ēwe 'ga rekoī rakue. 'Awamū futat 'ga rekoī. Anure miamū futat 'ga akou. 'Ga upe je 'i: “Mama'e esage emut 'gā nupe. Nuapoi agawewi 'gā mama'e esagea enee. A'etea ki mama'e katurama emut 'gā nupe”, 'jau je 'ga upe pē nee. 'Ga 'Agesagea nanē mama'e esage amut pē nupe nū, Jarejuwarete 'ga renawa rowase ajemogo ma'ea nū.

⁵ Jejui Kristu 'ga taetu mama'e esage amut pē nupe nū. Jejui 'ga morogyta a'jea futat omome'u janee 'Uwarete 'ga ree. Jejui 'ga Jarejuwarete 'ga remimofera ypy ppyfera. 'Ga 'ūina 'wyrirareteramū ywy pewaramū janee najuejue etee. Akotee ma'eramū jane upe, 'wyrara 'gā nupe. Mīmera upe 'ga 'ūina 'wyrirareteramū.

Jejui 'ga oporomutaramū jane ree. Amanū 'ga owy reko'wogukaa janetywera moiaawamū jane wi, mama'e tywera apoukaru'jape'ema jane.

⁶ 'Ga werowiaaramū jane mogyau 'Uwarete 'ga upe oporowyky ma'eramū. Jarejuwarete 'ga upe jareporogytau jarejepyriwara 'gā nee. Jarejepyriwara 'gā nupe nanē Jarejuwarete 'ga mome'wau nū. A'eramū je 'jau pē nupe: Simuoryp Jejui 'ga jarejemogyau 'jau, 'jau je pē nupe. 'Ga pājēretea. Nateepawi 'ga pājēa. A'eramū ki jane 'ga muorypa jarejemogyau. A'eramū ki jane 'ga mome'wau nanē 'gā nupe nū.

⁷ Pēnea'ar iki 'ga ree. Anurenure'i nipo Jejui 'ga ruri ojypa ywasiga rupi. Najuejue etee futat nipo jane 'ga resaka. 'Ga kutukarera 'gā miamū nipo 'ga resaka nū. Nikoi' i futari nipo jane mū ywy pewaramū 'ga resakare'emamū. 'Ga resakawe nipo 'gā ajaa'wau 'ga ree. Wereco tyweram awi nipo 'gā okyjau ajaa'wau 'ga ree. U'eawer imū etee futat nipo 'ga iapoi. A'jea futat je'ea.

⁸ —Je Okoeteete ma'ea. Ywy apoe'emaue je rekoī. 'Awamū miamū 'ā je rekoī. Anure taetu nipo je rekoī temanūme'em futat. Je pājēretea te 'gā pājē apyraapa— 'jau Janejararete 'ga.

Jejui Kristu 'ga jesaukaawet

⁹ Je futat ako Juānamū. Pēē 'jawe je jemogyppygi Jejui 'ga ree. A'eramū je pēneki'yramū tekou. Pēē 'jawe futat je rekoī, tejerekou tywerukaa 'ga rerowiare'ema 'gā nupe. Je rereco tywerete futat 'gā. Pēē 'ā Jarejuwarete 'ga je'ega perowiat. Je nanē 'ga je'ega arowiat nū. 'Ga jejararetea. Pēē 'jawe jeruagamū tejereko tywera upe. Napoiri futari je Jejui 'ga rerowiar awi. 'Ga jane rereco. A'eramū 'ga jane mamuakarakuaa mama'e tywera upe.

'Ypō'ō pype je rekoī ikue. Jejui 'ga porogyta a'jea je imome'wau kwe pewara 'gā nupe. Jarejuwarete 'ga je'ega nanē je imome'wau kwe pewara 'gā nupe tekou ikue. A'eramū 'ga rerowiare'ema 'gā je rerawau je rejaa 'ypō'ō me ikue, Patimu 'jaw ipe ikue. Moromunepawa pypewara 'jawe tekou 'ypō'ō pype ikue.

¹⁰ Janeruwarete 'ga 'Agesagea je rereko je pojekau ojeupe morowykye'ema rupi. A'eramũ je teatykupe katy 'ga amũ je'ega renupa. Jeatykupe katy oje'eg ma'e 'ga jumi'aranũũ fu 'jawe wafukaita jee:

¹¹ —Ejemiesaga ekwasiat ka'aran are. Ikwasiapaw ire ene imonou je rerowiaara 'gã nupe. Sete amunawa pype ajatyka ma'e 'gã nupe. Efesu, Esmirna, Pergamũ, Tiatira, Sardes, Filadelfia, Laodiceja. Mimerã amunawa pype je rerowiaara 'gã jatykai wapyakau jeje'eg are. A'eramũ ene 'gã nupe ka'arana monou ejemiesaga kwasiar ire— 'jau 'ga jee, jeatykupe katy u'ama.

¹² Aipo renupawe je tejerowaka tejakyfet katy tejeupe oje'eg ma'e 'ga resaka. Tejerowakawe je sete tatarana renawa resaka. Tatarana renawa ouru apopyrera.

¹³ Tatarana renawa pyter imũ 'ga amũ akou, kũima'e 'jawewara 'ga akou. Weteyrũ fukua 'ga erekou imunepa. 'Ga raitya 'ga ree imotypawa ouru apopyrera. 'Ga pasi'a 'arimũ imotypawa 'upa 'ga ree.

¹⁴ 'Ga 'awa waparasiããmũ amyneju 'jawe. Karupa'mĩ rawa 'jawe waparasiããmũ. 'Ga rea wenyfugamũ tata reny 'jawe.

¹⁵ Itaju 'jawe, prõsi 'jawa 'jawe, 'ga pya wenyfugamũ. Sã'ã wapy re prõsi 'jawa renyfuga. Nan tee 'ga pya. Oje'ëporogũnamũ ytuu pyamu 'jawe etee.

¹⁶ Opo pe 'ga jaytataa rerekou. Sete 'ga jaytata rerekoi opo pe, ojakwatawa katy. Jyuaa 'ua uẽma 'ga juru awi. A'ere nu'ari futari 'ga juru awi. Waime juowajamũ 'ua uẽma 'ga juru awi. A'ere nu'ari 'ga juru awi. 'Ga reakwara wenyfugamũ, aje kwara kwawa 'jawe wenyfugamũ.

¹⁷ 'Ga resakawe je te'aa 'ga rowase, amanũ ma'e 'jawe. A'erauwe 'ga opo monou, ojakwatawa katiwara monou, jeapye'rarimũ.

—Erekyje awi je wi. Ymã we ako ma'eferamũ je. Ywy apoe'emauwe je rekoi ikue. Mama'e teepaw ire miamũ nipo je etee futat je rekoi 'au— 'jau 'ga jee.

¹⁸ —Okoteete ma'ea 'ã je. Amanũ je ako ikue. A'ere ako je ferawi etee ikue nũ. Namanũ 'jawa'ueri je. 'Awamũ je ywy pewara 'gã manũawa kwaapawi. Je futat nipo 'gã moferapa nũ— 'jau 'ga jee.

¹⁹ —Awamũ ejemiesager are ka'arana ekwasiat. 'Awamũ 'ã je ojeapo ma'e resaukari enee. Anure ojeapo ma'ea nanẽ nipo ene esaka nũ. Aipoa ejemiesager are juejue ka'arana ekwasiat— 'jau 'ga jee.

²⁰ —Nenereapyoi ejemiesager are. A'eramũ je 'awamũ ene mueapyou ee. Sete jaytataa je areko tepo pe, tejakwatawa katy. Sete tatarana renawa nanẽ 'ã ene esaka. Sete tatarana renawa 'jawe futat je rerowiaara 'gã. Sete amunaw ipe 'gã jemogyi ajatykau ajamu'jau je ree. Jarejuwarete 'ga ree 'jau 'gã ajamu'jau akou. A'eramũ 'gã tatarana 'jawe ajemogyau. Sã'ã tatarana mama'e resaukara ae upe. Nan tee futat je rerowiaara 'gã jamu'ei je ree, Jeruwarete 'ga ree 'jau. Je rerowiaara 'gã 'wyrriara* 'gã ajemogy jaytata 'jawe— 'jau Jeju 'ga jee.

2

Efesu pewara 'gã nupe Jeju 'ga 'eawet

¹ A'eramũ Jeju 'ga 'jau jee:

—Jeje'ega ekwasiat inuga Efesu pewara je rerowiaara 'gã 'wyrriara 'ga upe— 'jau 'ga jee.

—Sete je jaytata areko tejakwatawa katy tepo pe. Sete tatarana renawa pyterimũ je teatau tekou. Ouru apopyrera pyterimũ tekou teatau. Je 'ã amu'akwaap pẽẽ mama'e are.

² Pẽnemiapofera je akwaap. Kwaiwete 'ã pejeporowykyau jee. Je rerowiare'ema 'gã 'ã pẽ nerokou tyweaete je rerowiamũ. A'ere 'ã pejereko tywera upe pẽnuag pejemogyau pejepoire'ema je rerowiar awi. Mama'e tywera apoara 'gã nee 'ã pejeporomutare'emamũ. 'Gã amũ 'ã 'ua owaẽma pẽ nupe ai'i. "Jeju 'ga 'ã ore mut pẽ mu'jau oje'eg are", 'jau futatee 'ã 'gã 'ua pẽ nupe rai'i. A'ere 'ã neperowiara'nei 'gã nai'i. "A'jea sipo Janeruwarete 'ga 'gã muri?" 'jau ete 'ã pẽẽ pejejaupe rai'i. 'Gã je'ega renup katu re 'ã pẽẽ 'gã kwaapa rai'i, 'gã 'me kwaapa rai'i.

³ Mama'eay upe 'ã pẽnuag je ree. Nepepõiri 'ã jeporowyky awi rai'i— 'jau 'ga ikwasiarukaa jee.

⁴ —A'ere je mama'e mũ re je je'egayi pẽ nupe. Je rerowiaa ppy ppy we 'ã pejeporomutaramũ je ree nanimenime rakue. A'ere 'ã pẽẽ 'awamũ inãinãni' etee pejeporomutaramũ je ree.

⁵ Pẽnearu'jau iki je rerowiar ppy ppyawer are. Je rerowiaa ppy ppy 'ã pẽẽ pejeporomutaramũ nanimenime je ree rakue. Mama'ea 'ã pẽẽ iapou jeremifutar imũ etee rakue. A'ere 'ã pẽẽ 'awamũ nai'jawe rui pejemogy. A'eramũ ki pẽẽ pejepoia pejetywer awi. Je

* 1:20 Pastor 'jawa poromũ.

rerowiar pyy ypwawera upe ki pejejewya nū. Kasi a'e pe je tatarana apykawa pe'ai pē nui ne. A'eramū nipo pēē jeje'ega mome'wau'jape'ema pejejaupe.

⁶ A'ere pēē, je 'jawe futat, Nikurai 'ga remiayuwa 'gā nemiapo are nepēporomutari. Aipoa esage jee. Nikurai 'ga remiayuwa 'gā o'me are ajamu'jau. A'eramū je 'gā nemiapofer are teporomutare'emamū tekou— 'jau Jejui 'ga ikwasiarukaa jee.

⁷ —Ee pejejeapoweramū ki Jarejuwarete 'ga 'Agesage je'ega peenuw esage je rerowiaara 'gā nupe 'ga je'egamū. Jarejuwarete 'ga je'ega renupara 'gā nipo awau amanū re 'ga pyri. Peu futat je y'wa mū monou 'gā nupe. Aipo y'wa 'wau 'gā ajemogyau nakwaparimū ete rūi 'ga pyri. Aipoa y'wa 'ywa u'am Jarejuwarete 'ga rupaw ipe— 'jau 'ga jee.

Aipoa 'ga 'eawera je ikwasiaa inuga Efesu pewara 'gā nupe 'ga je'eg imū etee futat.

Esmirna pewara 'gā nupe Jejui 'ga 'eawet

⁸ Aipo 'e re 'ga 'jau jee nū:

—Awamū jeje'ega ekwasiat inuga Esmirna pewara je rerowiaara 'gā 'wyrriara 'ga upe, a'e je enee— 'jau 'ga jee.

—Je ako pyy ma'ea. Maapawera nanē je nū. Je amanū ikue. A'ere je ferawi etee ako ikue nū. Je teje'ega kwasiarukaa 'ga upe imonou pē nupe.

⁹ Akwaap katu katu futat je pēē. Mama'eay upe pēnuag pejejemogyau je ree. Nepētywi pēē mama'e pyu 'au. A'ere pēē imama'e kwai ma'erama futat pejemogy. Jeremiayuwa pēē. A'eramū pēē iporiae'ema futat. 'Gā amū nipo pē ago'wau je ree. Aipo 'gā nipo 'jau: "Judeuretea futat ore. A'eramū ore Jarejuwarete 'ga remiayuwaretea futat. Ore te futat 'ga remiayuwaretea. Pēē naani", 'jau nipo 'gā pē nupe. O'meramū te 'gā 'i. NaJaneruwarete 'ga remiayuwa rūi agawewi 'gā. Mama'eukwaawa remiayuwa te 'gā. Mama'eukwaawa 'wyrriara tee 'gā amuorwp ajemogyau.

¹⁰ Pekyje awi pejereko tyweram awi. Anurenure'i nipo mama'eukwaawa 'wyrriara pēē mū munewukaa pē mu'ama moromunepawa pype. "Tesak 'gā 'ga rerowiar awi 'gā poira 'jau", 'jau nipo mama'eukwaawa 'wyrriara pē nupe. A'ere nipo teis etee peset 'gā pē nereko tyweretei. A'ere kasi pepoit Jarejuwarete 'ga rerowiar awi ne. Pē apisi agawewi nipo 'gā. A'ere kasi pepoit futat Jarejuwarete 'ga rerowiar awi ne. 'Ga rerowiar awi pepoire'emamū je pē mogyi nakwaparimū ete rūi Jarejuwarete 'ga pyri— 'jau 'ga ikwasiarukaa jee.

¹¹ —Ee pejejeapoweramū ki Jarejuwarete 'ga 'Agesage je'ega renupa esage, je rerowiaara 'gā nupe 'ga je'egamū. Jarejuwarete 'ga je'ega renupara 'gā nipo awau 'ga pyri amanū re. Oje'ega renupara 'gā 'ga nomonoukari mama'eukwaawa rapyaw ipe— 'jau 'ga jee.

Aipoa 'ga 'eawera je ikwasiaa inuga Esmirna pewara 'gā nupe 'ga je'eg imū etee futat.

Pergamū pewara 'gā nupe Jejui 'ga 'eawet

¹² A'eramū Jejui 'ga 'jau jee nū:

—Awamū jeje'ega ekwasiat inuga Pergamū pewara, je rerowiaara 'gā 'wyrriara 'ga upe— 'jau 'ga jee.

—Je jyuaa areko, ajuowai aime ma'ea rerekou tejuru pe.

¹³ Akwaap je pē'wyr. Mama'eukwaawa 'wyrriara futat 'ūi 'wyrriaramū aipo 'wyr ipewara 'gā nupe. A'etea nepepoiri je rerowiar awi. Naje kwakuwi pejepe 'gā nui. Ātipasi 'ga je mome'wau akou 'gā nupe rakue. A'eramū 'gā 'ga jukau peu futat je mome'uramū rakue. A'etea nepepoiri je wī rakue. Aipoa esage jee.

¹⁴ A'ere je mama'ea pēē mū iapoa nafutari. Pēē mū Parāu 'ga je'egera rerowiaa. Ymā te Parāu 'ga Paraki 'ga mu'ei maira'me a'agawa muoryw are rakue. "Amu'e je ene ee. A'eramū ene Israeu 'ga juapyrera 'gā mu'jau maira'me a'agawa muoryw are", 'jau 'ga 'ga upe rakue. Kwe pewara 'gā wyra monou ijukau inuga maira'me a'agawa rowase, imuorypawamū. "Pe'u kasi aipo wyro'o ne", 'jau Janeruwarete 'ga Israeu 'ga juapyrera 'gā nupe rakue. A'ere Parāu 'ga 'i 'ga upe: "Maira'me a'agawa rowase imonopyrera pe'u, ere ki 'gā nupe", 'jau 'ga Paraki 'ga upe. "Peko ki pejemirekoe'em are, ere ki kūima'efera 'gā nupe", 'jau 'ga Paraki 'ga upe rakue. "Pejemene'em are ki peko, 'jau ki ene kūjāmera 'gā nupe", 'jau 'ga Paraki 'ga upe rakue. A'eramū Paraki 'ga 'jau 'gā nupe rakue. A'ere 'ā pēē mū 'awamū miamū mama'ea peapo pejejemogyau 'ga 'eawerimū etee futat.

¹⁵ Pēē mū Nikurai 'ga je'egera rerowiaa pejejemogyau. Aipo nanē nia'wyrri jee nū.

¹⁶ Pepoit pejetywer awi. Kasi a'e pe je oi mama'e tywera apoara 'gā nowajaa tejuru pewara teyyuu pyu ne— 'jau 'ga ikwasiarukaa jee.

¹⁷ —Ee pejejeapoweramū ki Jarejuwarete 'ga 'Agesage je'ega peenup, je rerowiaara 'gā nupe 'ga 'Agesage je'egamū. 'Ga je'ega renupara 'gā nupe tamono mana 'jawa 'jau, 'gā nemi'urama 'jau. Imimipyrrera tamono 'gā nupe 'jau. Ita sīga nanē tamono 'gā nupe 'jau.

Ita sig are 'gā ner yaua tamono ikwasiaa 'gā nupe 'jau. Tekotee 'gā nipo nokwaawi futari 'gā ner yaua. Jeremie 'rogera 'gā tee te nipo wer yaua okwaap— 'jau 'ga jee. Aipoa 'ga 'eawera je ikwasiaa inuga Pergamū pewara 'gā nupe 'ga je'eg imū etee futat.

Tiatira pewara 'gā nupe Jeju 'ga 'eawet

¹⁸ Aipo 'e re Jeju 'ga 'jau jee nū:

—Tiatira pewara, je rerowiaara 'gā 'wyrriara 'ga upe aipo are ekwasiat inuga— 'jau 'ga jee.

—Je te 'ā Jarejuwarete 'ga ra'yraretea. Jerea enyfuk noko jee tata 'jawe. Itaju enyfuga 'jawe 'ā jepya wenyfugamū.

¹⁹ Je aje'eg pē nupe. Akwaap je pēē. Pēnekoa je akwaap. Jarejuwarete 'ga ree 'ā pejeporomutaramū 'ga rerowiaa nanē nū. Pēē pejejopoa 'ā mama'e apo are. Mama'eay upe 'ā pēē pejejuagamū pejejemogyau. Je rerowiar ppy we te 'ā mama'e esagea peapo jee. Ma'eramū 'ā 'awamū taetu mama'e esagea peapo pejejemogyau jee kwaiwete. Aipoa esage jee.

²⁰ A'ere mama'e mū nia'wyrri jee. Jesepeu ēē jeremiayuwa 'gā mu'jau tywet mama'e tywer are. “Je Jarejuwarete kiā je'ega mome'wara”, 'jau futatee ēē 'gā nupe. A'ere ēē 'mea te ēē rerekoi. Mama'e tywera apo are ēē jeremiayuwa 'gā mu'jau. “Pejejemirekoe'em are pēnekoa esage”, 'jau futatee ēē 'gā nupe. “Pejemene'em are pēnekoa esage”, 'jau futatee 'gā nupe, 'gā mu'jau tywet. “Maira'me a'agawa upe imonopyrera esageay pēnemi'uramamū”, 'jau futatee ēē 'gā nupe. A'etea 'ā ēē nepemuēmi pejejewi. A'eramū je te'arasigamū tekou pē nee.

²¹ Nareko tywera'nei je ēē ēē tywer are. Otywer awi ēē poira rapesaka te'ŷina. A'ere ēē nopoiri futari otywer awi.

²² Otywer awi ēē rerowiaarera 'gā poire'emamū nipo je 'gā nereko tyweaete 'gā tywer are. Eē nipo je imomoa ēē seawa reewe futat. Eē je'ega rerowiaara 'gā nanē nipo je

²³ iapisau ēē reewe futat. A'eramū nipo je rerowiaara 'gā 'jau: “ga a'jea futat ae kwaap”, 'jau nipo 'gā ajaupe. “Janerea'awa 'ga okwaap. Janeremifutara nanē 'ga ikwaapa nū. A'eramū nipo 'ga 'gā nekoawera repy monou 'gā nupe najuejue etee”, 'jau nipo 'gā ajaupe. Mama'e tywera apoara 'gā je areko tywerete. A'ere je tejerowiaara 'gā nupe mama'e esage monoi— 'jau 'ga ikwasiarukaa jee.

²⁴⁻²⁵ —Jesepeu ēē rerowiaara 'gā 'jau: “Mama'eukwaawa 'wyrriara remimu'efera ayay ikwaapa ore. A'eramū ore orojeapyoa'ne'emamū ee”, 'jau 'gā. A'etea 'ā pēē mū neperowiari ēē je'ega. Nepeenuwi mama'eukwaawa 'wyrriara je'ega pejejemogyau. A'eramū je pē nupe 'jau: Pepoir awi Jarejuwarete 'ga je'ega rerowiar awi je rura'ne'emamū. Mama'e mū ree je namu'ei pēē. A'ere kasi pepoit iymaner awi ne— 'jau 'ga ikwasiarukaa jee.

²⁶⁻²⁸ —Pejemanūme'ēwe pejejemogyau mama'e apou Jarejuwarete 'ga 'eawer imū ete 'eramū je anure pē mogyau i'wyrriaramū teje'jawe tejeypyri pejemogyramū. Sā'ā Jeruwarete 'ga je mogoa 'wyrriaramū je rerowiare'ema 'gā nupe. Nan tee futat je pē mogyau 'wyrriaramū teje'jawe. “Pejeje'ega renuwe'emamū ki pereko tywerete 'gā”, 'jau nipo je pē nupe. Sā'ā japepoa. Japepo jara 'ā ia'wyrre'emamū imonoa ikaikaa. A'eramū futat imateepapa. Nan tee futar iki pejejerowiare'emamū 'gā pereko, 'jau nipo je pē nupe. Jaytataua tamut pē nupe 'jau— 'jau 'ga ikwasiarukaa jee.

²⁹ —Ee pejejeapyoweramū ki Jarejuwarete 'ga 'Agesage je'ega renupa, je rerowiaara 'gā nupe 'ga 'Agesage je'egamū. Aipo ki peanup— 'jau 'ga ikwasiarukaa jee.

Aipoa 'ga 'eawera je ikwasiaa inuga Tiatira pewara 'gā nupe 'ga je'eg imū etee futat.

3

Sardes pewara 'gā nupe Jeju 'ga 'eawet

¹ Aipo 'e re Jeju 'ga 'jau jee nū:

—Sardes pewara, je rerowiaara 'gā 'wyrriara 'ga upe aipo are ekwasiat inuga— 'jau 'ga jee.

—Je Jarejuwarete 'ga 'Agesagea areko. Jaytata nanē je tepo pe erekou sete. Akwaap je pēē. Pēnemiapofera je akwaap. “Gā 'ā Jarejuwarete 'ga je'ega renupara. Ajemogy ma'e 'jawe 'gā”, e'i pē nesakara 'gā pē nupe. A'ere pemorytee te 'gā pejejee. Amanū ma'e 'jawe futat pejemogy. Nepeenuwi futari Jarejuwarete 'ga je'ega.

² Pe'je pejepaka. Oset ma'e 'jawe etee pēē. Au'je Jarejuwarete 'ga je'ega renuwaiw ire. Peenup katu katu 'ga je'ega.

³ Pēnea'at pejejemienuwer are. Je rerowiar ppy we ako jeje'ega peenup ikue. A'eramū pēē 'awamū pejejea'aru'jawamū ee nū. Aipoa ki perowiat. Pe'je pejejoia pejetywer awi. Oset ma'e 'jawe pejemogy. Pejepake'ema nipo je rura nepekwaawi. Sā'ā ae muna'ywa rura kwaawe'ema. Nan tee je rura nepekwaawi ne, pejetywer awi pejejoire'ema ne. Pejejekatu'oke'ema pejejemogyau 'eramū nipo je ruru'jawa nepeesagi.

⁴ A'ere nipo pēē mū nepejemotyweri. Mama'e tywera apoare'emamū te nipo aje anure pejot pejemogyau je pyri. Taity aparasiga rerekwara 'jawe pēē. Nepejemoky'ai Jarejuwarete 'ga upe.

⁵ Jarejuwarete 'ga je'ega renuparamū je pētywera moiri. Taity aparasiga nanē je imonou pē nupe nū. Naywi futari je pēnera Jarejuwarete 'ga ka'aran awi. Orojepyri pēē mū oramū nipo je pē nesaukari Jarejuwarete 'ga upe. "Agamū jeremiyuwa 'gā", 'jau nipo je 'ga upe. Ywagipewara 'gā nupe we futat nipo je pē nesaukaa— 'jau 'ga ikwasiarukaa jee.

⁶ —Ee pejeapoweramū pēē Jarejuwarete 'ga 'Agesage je'ega renupa katu, je rerowiaara 'gā nupe 'ga je'egamū— 'jau Jejui 'ga ikwasiarukaa jee. Aipoa 'ga 'eawera je inuga ikwasiaa Sardes pewara 'gā nupe 'ga je'eg imū etee futat.

Filadelfia pewara 'gā nupe Jejui 'ga 'eawet

⁷ Aipo 'e re Jejui 'ga 'jau jee nū:

—Filadelfia pewara, je rerowiaara 'gā 'wyrriara 'ga upe aipo are ekwasiat inuga— 'jau 'ga jee.

—Je Jarejuwarete 'ga remiayuwaretea. Nitywi futari mama'e tywera je pype. Mama'e a'jea etee te je amome'u. Saawia je areko. Ymā 'wyrriararete 'ga ma'ea rakue, Davi 'ga ma'ea rakue. A'ere 'awamū jema'ea. 'Okwara je iawopytymo'wog ire, nitywi 'ga amū iawopytymawa pyu. Je iawopytym ire 'gā nuawopytymo'woga'uweri aipo 'okwara.

⁸ Akwaap je pēnemiapofera. Akwaap je ināinānī'ī etee pēpājēa. A'etea pēywyrafen jeje'ega rerowiaa. Je'awer imū etee futat 'ā pēē mama'e apou pejemogyau. A'eramū je 'ā teporowykya apoukaa pē nupe. Nitywi futari pēmomiara 'gā amū.

⁹ Mama'eukwaawa 'wyrriara remiayuwa 'gā amū te nipo aje ajesakut futat amū pē nupe. "Ore judeuretea. A'eramū ore Jarejuwarete 'ga remiayuwareteramū arakou", 'jau futatee nipo 'gā. A'ere ki pēywyrafen aipo upe. Aipo upe pēywyrafenamū nipo mama'eukwaawa 'wyrriara remiayuwa 'gā amū 'jau: "A'jea futat Jejui 'ga pē futari ra'e", 'jau nipo 'gā pē nupe. "Judeue'ema agawewi futat pēē. A'etea 'ga iporomutat pē nee pē mogyau wemiayuwamū" 'jau nipo 'gā pē nupe.

¹⁰ "Pejejeupe mama'eay ijesakaramū pejeipoire'ema jeje'eg awi", 'jau ako je pē nupe ikue. Aipo je'ea 'ā pēē enupa pejemogyau. A'eramū je a'eramū pē a'gwau mama'e tywer awi. Anure nipo mama'e tywera apoara 'gā nuri je rerowiaara 'gā nerekou tyweaete. "Toromomoirukat 'gā Jejui 'ga rerowiar awi 'jau kwy", 'jau nipo 'gā 'ua. A'ere nipo je pē a'gui 'gā nui.

¹¹ Anure te nipo je oi nū. A'ere kasi pepoit je rerowiar awi ne. Je rerowiar awi pepoir ire nipo Jeruwarete 'ga oporoywera monoi tekotee 'gā nupe etee. Je wi ipoire'ema 'gā nupe etee 'ga oporoywera monoi— 'jau 'ga ikwasiarukaa jee.

¹² —Jarejuwarete 'ga je'ega renupara 'gā nipo je imogyau 'ga remiayuwareteramū. Sā'ā 'oga rupaa'mywaretea. Nitywi 'ga amū 'oga rupaa'mywarete maku'jara. Nan tee futat je rerowiar'ema 'gā nomomoirukari je rerowiararete 'gā je rerowiar awi. A'eramū nipo je Jarejuwarete 'ga rera kwasiaa 'gā nee. A'eramū 'gā Jarejuwarete 'ga remiayuwa futat ajemogyau. Sā'ā ae mama'e jaramū wera kwasiara imogya okaraemā are. A'eramū 'ā tekotee 'gā ijara kwaapa. Nan tee 'gā Jarejuwarete 'ga rera rerekwara 'gā kwaapa, 'ga remiayuwa 'gā kwaapa. Jarejuwarete 'ga 'wyrarete rera nanē nipo je ikwasiaa 'gā nee nū. Anure nipo Jerusareg yau ruri ojypa ywag awi. Aipoa Janeruwarete 'ga 'wyraretea. Tejer yaua nanē nipo je ikwasiaa 'gā nee— 'jau 'ga ikwasiarukaa jee.

¹³ —Ee pejeapoweramū pēē Jarejuwarete 'ga 'Agesage je'ega renupa esage, je rerowiaara 'gā nupe 'gā je'egamū— 'jau 'ga jee. Aipo 'ga 'eawera je akwasiat inuga Filadelfia pewara 'gā nupe, 'ga je'eg imū etee futat.

Laodiceja pewara 'gā nupe Jejui 'ga 'eawet

¹⁴ —Awamū aipo are jeje'ega kwasiari Laodiceja pewara, je rerowiaara 'gā 'wyrriara 'ga upe— 'jau Jejui 'ga jee.

—Tejuwarete 'ga je'eg are je 'jau, "Nan etee futat nanē je'ea nū", 'jau. Mama'e a'je mome'wara te 'ā je. Oje 'jawe etee futat Jeruwarete 'ga mama'e apoukari jee ikue.

¹⁵ Akwaap je pēē. Pēnemiapofera nanē je akwaap nū. Naje futaruui 'ā pejepe. A'ere pēē naje ree iporomutare'ema rūi. Ināinānī'ī etee je futara nia'wyrri jee. Kwaiwete jefutara te esage jee. Je futare'ema ywawuje tāmējē pepoit je wi.

¹⁶ Sā'ā 'y taku'wia. 'Y taku'wia otykaramū ae mopy'apojy etee. Nan tee futat je pē monoi tejewi. 'Y taku'wi 'jawe etee pēē.

¹⁷ "Ika'aranūi kwai ma'ea ore. A'eramū ore orotywe'emamū futat mama'e tywe'ema pyu", 'jau futatee pēē. A'ere je 'i pē nupe: Pē'me ate pejemogyramū nepēa'wyrri futari Jarejuwarete 'ga upe. A'eramū pēē mama'e tywe'ema 'jawewara futat. Neperowiari

Jarejuwarete 'ga. A'eramū pēē pejemogyau taitye'ema 'jawewaramū futat. Nepēneapyoi Jarejuwarete 'ga ree. Eae'ema 'jawe nanē pejemogyau.

¹⁸ A'eramū je 'jau pē nupe: Ourua pemut je wi. Je wi imuripyre nateepawi futari. Aiporamū tee pēē ika'aranūū kwai ma'e 'jawe futat peko. Taity aparasiga pemut pejemimunewamū, pejejenosī mateepawukaawamū. Muaga nanē pemut je wi pejejeape imonopyramū. Pejetywera pemoirukat jee. Aipoa ouru je wi imuripyre 'jawe. Pejemu-sageukat jee. Aipoa taity aparasiga munewa 'jawe jee. Pejemuapeyoukat jee. Aipoa aerea fuaga 'jawe jee.

¹⁹ Mama'e tywera 'gā iapo re je tejemifutara 'gā mu'akwaawi ee, 'gā nerekou tywe'ria 'gā mueapyoukaa ee. 'Gā futare'em ire amunipo 'ā je 'gā mueapyowe'em futat mama'e are. A'eramū ki pēē pejeipoia futat pejetywer awi. Pepoit 'me kasi pejetywer awi ne.

²⁰ Sā'ā ae oa ojo'wyr ipe. A'eramū 'ā aeoga jaramū 'Ere ejua esou', 'jau ajaupe. A'eramū 'ā ae 'ere ejua esou' 'eramū etee osou ojo'wyr ipe. Nan tee futat je 'Ere ejua esou' tejeupe 'e rapesagi tekou. 'Ere ejua esou' tejeupe pēē 'eramū je resei futari tewau pē pype tekou—'jau Jeju' 'ga ikwasiarukaa jee.

²¹ —Jarejuwarete 'ga je'ega je aenup katu katu— 'jau 'ga jee. —A'eramū 'ga je muapyka ojeypyri, je mogou 'wyrriaramū oje'jawe. A'eramū je oroje'ega renupara 'gā muapyka orojeypyri, 'gā mogyau 'wyrriaramū oroje'jawe— 'jau 'ga ikwasiarukaa jee.

²² —Ee pejejeapyoweramū ki Jarejuwarete 'ga 'Agesage je'ega peenup katu, je rerowiaara 'gā nupe 'ga je'egamū— 'jau Jeju' 'ga ikwasiarukaa jee. Aipoa 'ga 'eawera je ikwasiaa inuga Laodiceja pewara 'gā nupe 'ga je'eg imū etee futat.

4

Janeruwarete 'ga muorypap

¹ Tejeupe aipo 'epaw ire je amuteea ete esaka nū. 'Okwara rawopytymo'woga je esaka ywag ipe. Pe awi 'ga amū oje'ega jee:

—Ere ejua 'au ejeupia je pyri. Anure mama'ea ijeaporama taesaukat enee 'jau— 'jau 'ga jee.

Jumi'aranūū fu 'jawe 'ga wafukaita jee. Je upe oje'eg ypy ma'efera 'ga futat oje'egu'japa jee nū.

² A'erauwe Janeruwarete 'ga 'Agesagea je pojekau je rerawau ojeupi ai'i. Peu futat je 'wyrriarete renawa resaka ai'i. Peu futat 'ga amū 'ūina wapyka i'arimū ai'i.

³ I'arimū wapyk ma'e 'ga wenyfugamū futat 'ūina ita esage 'jawe. Ita owy 'jawe, jasipi 'jawa 'jawe. Ita piraga 'jawe nanē nū, saritonia 'jawa 'jawe. 'Ga renawa ywyr'i je'ywa okwapa imamana. Aipoa je'ywa okawuramū esimerauta 'jawa 'jawe. Esimerauta 'jawa ita esagea futat.

⁴ Wīti kwaturu 'wyrri'ri renawa 'wyrriarete renawa mamana. Aipo 'arimū wīti kwaturu 'gā wapyka ajemogyau, 'wyrri'ri 'gā. Aipo 'gā Jarejuwarete 'ga je'ega wenup katu katu futat. Taity aparasiga nanē 'gā erekou nū. 'Wyrriara akagyrua nanē 'gā erekou waka'garimū. Aipo akagyrua ouru apopyre te.

⁵ Ipyter ipewara, 'wyrriarete renawa wenyfugamū 'ūina tupā werawa 'jawe. Aunuga nanē 'ūina nū. Aman aunuga 'jawe futat 'ūina aunuga. Tupā 'jawe nanē afuramū 'ūina. 'Wyrriarete renawa rowase sete tata yyga 'jawewara wenyramū 'upa. Aipo tata yyga 'jawewara 'ga 'Agesagea futat.

⁶ 'Wyrriarete renawa rowase je ypiauu resaka. 'Y rypy esagea te poromū. Werawerawuu 'jawe typya ojesaka katu katu futat. 'Wyrriarete renawa pyri katu katu ma'ja katu je esaka, eae'yi ma'ea. Ea ipira moyka. Irūpāwē 'gā. 'Wyrriarete renawa rowase eae'yi ma'e mū akou, iyse katy amū akou, iyse owajara katy amū akou, ikupe katy 'jau eae'yi ma'e mū akou. Irūpāwē eae'yi ma'e pytuna.

⁷ Ajepei tee eae'yi ma'ea 'miara 'jawewara. Ajepeja eae'yi ma'ea kwatau 'jawewara. Ajepeja aereakwara 'jawewara rerekou. Maapawera kwanūwewe 'jawewara.

⁸ Aipoa eae'yi ma'ea kwaiwete ipepokaga ipir are, seis ipepokaga. Aipo jywa nanē ea moyka nū. Jarejuwarete 'ga upe amaraka'aga. Wojer'e'eamū futat 'gā 'upa amaraka'aga. "Esage te 'ā Janeruwarete 'ga.

Pājērete te 'ā 'ga.

Mama'e jararete te 'ā 'ga.

Ymā we te 'ā 'ga rekoi rakue.

'Awamū 'ā 'ga rekoi.

Anure nanē nipo 'ga rekoi je.

Okoteete ma'e 'ga futat",

'jau 'upa amaraka'aga Jarejuwarete 'ga upe.

⁹ Nan futat eae'yi ma'ea 'wyrirarete renawa 'arimū wapyk ma'e 'ga muorypa, amara'aga 'ga upe. 'Ga remiapofer are 'gā 'ga muorypa. "Okoteete ma'e 'ga" 'jau 'gā 'ga muorypa.

¹⁰⁻¹¹ 'Ga muorywauwe wīti kwaturu 'wyrīa'ri 'gā wāāpyramū Okoteete ma'e 'ga rowase, Aejararete 'ga rowase. Eae'yi ma'e 'gā 'ga muorywauwe 'gā nanē 'ga muorypa nū: "Ene te 'ā eneresage oree.

Ene te 'ā pājēreteā.

A'eramū ore ene etee imuorypa.

Ene te 'ā mama'ea ereapo rakue.

Nitywi futari eneremiapoe'ema.

Ejemifutar imū etee 'ā ene mama'e apou.

A'eramū 'ā ore ene etee ene muorywi",

'jau 'gā wāāpyramū oje'ega 'ga upe. Wakagyria 'gā imososoka imonou inuga 'ga rowase, 'ga muorypawamū.

5

Ka'arana jemaman

¹ A'ere je ka'arana jemamana resaka 'ga po pe, 'wyrirarete renawa 'arimū wapyk ma'e 'ga po pe, 'ga jakwatawa katy. Aipoa ojekwasiaa ajuowai. Ikupe katy, waipy katy 'jau ojekwasiaa. Ikwasiapaw ire 'ga imoga mairarata 'jawewara pyu. Aipoa ka'arana mogu'jau'japa, sete imogawera.

² A'eramū je ywagipewara 'ga amū resaka, ifuakat ma'e 'ga amū resaka. wafukajayau oje'ega mua:

—Esage ma'ea tee nipo ka'arana omopojo'ogarū ajau ore. Awjja te wapo oree?— 'jau 'ga wafukaita.

³ A'ere nitywi futari imopojo'okara 'ga amū. Ywagipe nanē nū nitywi futari. Ywy pe nanē otywe'emamū nū. Amanū ma'e rupaw ipe nanē otywe'emamū futat nū.

⁴ A'eramū je teje'arasigamū tejaa'wau te'yina ee.

⁵ A'eramū 'wyrīa'ri 'ga amū 'jau jee:

—Erejo'o awi ee. Emā'ē 'ga ree, Juda 'ga juapyrera 'ga ree. Nokyjei 'ga mama'e awi. A'eramū ore 'jau 'ga upe miara 'jawewara 'ga, 'jau ore. Davi 'ga juapyrera 'ga te 'ā. Ojee ipromutare'ema 'ga 'arimū 'ga kwawi. A'eramū 'ga imopojo'okarūmū— 'jau 'ga jee.

⁶ A'eramū je temā'jāu ee nū. Peu 'wyrirarete renawa pyri 'ga amū 'ami. Eae'yi ma'e 'gā, 'wyrīa'ri 'gā netee 'ga renawa mamana. Karupa'mī 'jawewara 'ga. Sā'ā 'gā karupa'mī juka otywera mepyawamū. Nan tee 'ga. Karupa'mī pikutukawera 'jawe 'ga iporera rerekou. Aipo 'ga sete 'ga rasā. Sete 'ga rea 'jau. 'Ga rea upe je 'jau, Janeruwarete 'ga 'Agesagea futat, 'jau. Janeruwarete 'ga U'agesagea ywy pe imūāina futat.

⁷ A'eramū aipo 'ga awau ka'arana rekyita 'wyrirarete renawa 'arimū wapyk ma'e 'ga po awi.

⁸ Ka'arana 'ga ipyyg ire irūpāwē eae'yi ma'e 'gā awau wapyka wenupy'āu 'ga rowase, 'ga muorypa. 'Wyrīa'ri 'gā, wīti kwaturu 'gā nanē awau wapyka wenupy'āu 'ga rowase nū. Maraka apoawa 'gā erekou opo pe. Harpa 'jawa 'gā erekou opo pe. Y'a nanē 'gā erekou opo pe nū. Aipo y'a ouru apopyrera. Aipoa y'a pype 'gā jany kasiga 'jawewara rerekou. Aipo jany kasiga 'jawewara Janeruwarete 'ga upe 'ga remiyauwa 'gā je'ega. Karupa'mī 'jawewara 'ga rowase wapyg ire 'gā amaraka'aga 'ga upe.

⁹ Maraka yaua 'gā iapou 'ga upe:

"Ene te 'ā eneresage.

Ma'eramū 'ā ka'arana eremopojo'ok ajau.

Ene te 'ā erejujukaukat 'gā nupe.

Emanūmū 'ā ywy pewara 'gā tywera mepyau, 'gā mua ejeupe.

Namajepeja 'ga etee rūi 'ā ene imua ejemiayuwamū.

Najuejue te 'ā ene 'gā mua 'gā mojuawyawau 'gā mua.

Tapy'yi, towajat, 'wyrarete pewat, ka'a pewat.

Mīmera 'gā 'ā ene imua ejeupe.

Ma'eramū 'ā ka'arana eremopojo'ogukat ajau.

¹⁰ Ene te 'ā ejemiayauwa 'gā eremoporowykyukat Jarejuwarete 'ga upe, 'gā 'wyrirarete 'ga upe 'jau.

Ene 'ā 'gā mogyau 'wyrīaramū ywy pewara 'gā nupe",

'jau 'gā amaraka'aga karupa'mī 'jawewara 'ga upe.

¹¹ A'ere je mā'ēi ee. Ywagipewara 'gā je'ega je enupa. Kwaiwete ywagipewara 'gā je esaka. A'eramū je 'gā mojoyrūme'em. Kwaiwete te 'gā. A'eramū je 'gā mojoyrūme'em

futat. 'Wyria'ri 'gã nipo peu ajemogyau 'gã wyteripe. Irûpãwê eae'yi ma'ea nanê ajemogyau 'gã wyteripe nû. Nikwaapawi 'gã. Kwaiwete te 'gã. A'eramû je 'gã mojoyrûme'em.

¹² A'eramû ywagipewara 'gã amaraka'aga:

"Esage te 'ã karupa'mî 'jawewara 'ga, karupa'mî jukapyrera 'jawewara 'ga.

Pãjêrete te 'ga. Mama'e jararetea te 'ga"

'jau 'gã 'upa.

"Takwaap te 'ga.

Ifuakat nanimenime 'ga nanê nû.

'Ga 'ã eteete ma'ea. Esage ma'ea te 'ga.

A'eramû jane 'ga muorypa",

'jau 'gã amaraka'aga 'ga upe.

¹³ A'erauwe je tekotee 'gã je'ega renuwi. Ywag ipewat, ywy pewat, amanû ma'efera rupaw ipewat, 'yê'ê mewat, 'y pewat. Mîmera 'gã je'ega je enupa.

"Pêê 'ã eteete ma'ea.

Pêê 'ã ore aramuoryp.

Pêê 'ã ore nanê ipojeupa nû.

Pêê 'ã pãjêrete.

A'eramû ore, pênemiapofer are juejue pë muorypa, aruojere'emamû",

'jau 'gã amaraka'aga 'gã nupe, 'wyriararete renawa 'arimû wapyk ma'e 'ga upe, karupa'mî 'jawewara 'ga upe 'gã 'jau.

¹⁴ Irûpãwê eae'yi ma'e 'gã 'jau:

—Nan tee ore 'jau nû. Simuoryp 'gã 'jau— 'jau 'gã 'gã nupe.

A'eramû 'wyria'ri 'gã awau wapyka wenupy'âu 'gã nowase 'gã muorypa.

6

Ka'arana mogawa mopojo'okawam

¹ Je reape karupa'mî 'jawewara 'ga ka'arana mogawa mopojo'oka. Ajepeja etee ra'ne 'ga imopojo'oka. Imogawypya 'ga imopojo'ogauwe je eae'yi ma'e 'ga amû je'ega renupa.

—Ere ejua— 'jau 'ga.

Aman aunuga 'jawe 'ga je'ega.

² A'erauwe 'ga amû 'ua, kawaruu siga 'arimû 'ga 'ua. I'arimû wapyk ma'e 'ga ywyrapara rerekou opo pe. 'Ga amû 'wyriara akagyrû monou 'ga upe.

—Ere ewau ekou amunap tesirûmer ipewara 'gã nowajaa 'gã fuakara mateepapa 'gã nui. Ekwap 'gã 'arimû— 'jau 'ga 'ga upe.

A'eramû kawaruu siga 'arimû wapyk ma'e 'ga awau.

³ A'eramû karupa'mî 'jawewara 'ga ka'arana mogawa mopojo'oka ajai nû. A'erauwe eae'yi ma'e 'ga amû oje'ega nû:

—Ere ejua.

⁴ A'erauwe 'ga amû 'ua kawaruu piragay 'arimû 'ua nû. A'eramû eae'yi ma'e 'ga 'jau i'arimû wapyk ma'e 'ga upe:

—Ere ewau kwe pe 'gã nowajarukaa ekou ajaupe, 'gã juapisaukaa— 'jau 'ga 'ga upe.

A'eramû 'ga jyu monou 'ga upe. A'eramû 'ga awau. Ojeupe jy mur ire kawaruu piragay 'arimû wapyk ma'e 'ga awau.

⁵ Aipo apo re karupa'mî 'jawewara 'ga ka'arana mogawa mû mopojo'oka jui nû. Imuapya mopojo'oka jui nû. A'eramû eae'yi ma'e 'ga amû oje'ega nû:

—Ere ejua.

A'erauwe 'ga amû 'ua, kawaruu ûna 'arimû 'ua nû. I'arimû wapyk ma'e 'ga wereko mama'e momoyitawa resakawa opo pe.

⁶ 'Ga resakawe je 'ga amû je'ega renupa, eae'yi ma'e 'gã pyter ipewara 'ga je'ega renupa:

—Epy ete temi'urama. Majepêi 'ara rupi etee aeoporowykawera repya teepawamû temi'uram are. Epy te temi'urama. Eremojopye kasi 'miara kawera 'y are tuwiiu ma'e 'jawe ne. Y'waya nanê kasi eremojopye 'y are tuwiiu ma'e 'jawe ne.

⁷ A'ere karupa'mî 'jawewara 'ga ajepeja ka'arana mogawa mopojo'oka jui nû. A'eramû maapawera eae'yi ma'e 'ga 'jau:

—Ere ejua.

⁸ A'erauwe 'ga amû 'ua, kawaruu jukyryuu 'arimû 'ua. I'arimû wapyk ma'e 'ga rera Teumet. Aipo 'ga rewiri ajepeja 'ga 'ua nû. Aipo 'ga rera amanû ma'efera rupap 'jau. A'eramû eae'yi ma'e 'ga amû oje'ega Teumera 'ga upe:

—Ere ewau kwe pe 'gã apisau, 'gã pytuna myterajeuu etee iapisau— 'jau 'ga 'ga upe. —Ere 'gã amû apisaukaa maruowajara 'gã nupe, 'gã amû apisaukaa ty'ara upe, amumera

apisaukaa jero'wu pyu, 'gã amũ apisaukaa 'miara upe— 'jau 'ga 'ga upe. —Eroo 'gã ejeupi amanũ ma'efera rupaw ipe ejewya.

⁹ Aipo re karupa'mĩ 'jawewara 'ga ka'arana mogawa mũ mopojo'oka jui nũ. A'erauwe je Jarejuwarete 'ga rerowiaara 'gã 'agera resaka. Wyra rapyawa 'wyrimũ 'gã 'upa. Jarejuwarete 'ga je'ega 'gã imome'wau kwe pewara 'gã nupe rakue. Jejui 'ga nanẽ 'gã imome'wau kwe pewara 'gã nupe rakue nũ. A'eramũ ia'wyre'ema 'gã 'gã apisau.

¹⁰ A'eramũ 'gã 'agera wafukaita Jarejuwarete 'ga upe:

—Ene te 'ã pãjērete. Ene 'ã orejararetea. Ene 'ã eneresage. Mama'e a'jea etee 'ã eremome'u oree. A'eramũ ene e'eawer imũ etee futat mama'e apou— 'jau 'gã wafukaita 'upa 'ga upe. —Maranime te ore repyar ape? Maranime te ore apisiarera 'gã erereko tywerete ore ree?— 'jau 'gã 'upa Jarejuwarete 'ga upe.

¹¹ A'eramũ 'ga amũ taity aparasiga monou 'gã nupe najuejue etee. Taity fukua poromũ. Otywer awi 'gã opoia rakue. A'eramũ 'gã taity aparasiga monou 'gã nupe, 'gã tywere'ema resaukaawamũ.

—Pe'je pejepytu'wau pejemogyau ra'ne— 'jau 'ga 'gã nupe. —Tene 'gã iapisipawi ra'ne. Anure nipo ia'wyre'ema 'gã pēpytuna 'gã amũ apisi, Jejui 'ga rerowiaara 'gã apisi. Pē apispaw ire te Janeruwarete 'ga pē nepyari— 'jau 'ga 'gã nupe.

¹² Aipo 'e re karupa'mĩ 'jawewara 'ga ka'arana mogawa mũ mopojo'oka jui nũ. A'erauwe wywa oyyita. Kwaiwete oyyita. Kwara ojemopytunaipa. Taity ùna 'jawe akou. Jaya ojemomiraga wy 'jawe.

¹³ Jayataa ototoka wywu 'ua. Sã'ã y'wa kyra wywruu ruramũ itotoga o'yw awi. Nan ototoka 'ua.

¹⁴ A'eramũ ywaga owoka ojemamana ka'arana jemamana 'jawe. Wytyt, 'ypõ'õ. Mĩmera wapopenamũ awau ojepe'au wenaw awi.

¹⁵ A'eramũ ywy pewara 'gã juejue awau ajemima ita kwara pype, itauu pyter ipe 'jau awau ajemima. 'Wyriat, 'wyriana'nĩ, jefaruu 'wyriat, ikaraemã kwai ma'e, ifuakat ma'e, akotee ma'e. Mĩmera 'gã juejue awau ajemima. 'Gã kyjea 'gã nerekou.

¹⁶ A'eramũ 'gã wafukaita itauu upe:

—Pe'je pejeju pejemono'oga ore 'arimũ ore mima 'wyriararete renawa 'arimũ wapyk ma'e 'ga wi. Karupa'mĩ 'jawewara 'ga imara'ne ore ree. A'eramũ pēẽ ore au'jau ore a'gwau 'ga wi— 'jau nipo 'gã wafukaita itauu upe numiamũ.

Wytyra upe nanẽ nipo 'gã aipo 'jau nũ. A'ere nu'ari futari 'gã 'arimũ.

¹⁷ —Awamũ iwaēmi 'gã jane rereko tyweawa upe. Imara'ne 'gã jane ree. 'Awamũ futat 'gã jane rereko tyweretei. Aw'ya sipu uag jupe?— 'jau 'gã wafukaita ajaupe.

7

Israeu 'ga juapyret

¹ A'ere je irũpãwẽ ywagipewara 'gã nesaka. Ywyu 'gã u'ama. Kwara poawa katy 'ga amũ, kwara resaawa katy 'ga amũ, iyse katy 'ga amũ, iyse owajara katy ajepeja 'ga u'ama. 'Gã futat ywytu pykara ajemogyau. Ywy pyaukare'ema jupe, 'y pyaukare'ema jupe, ka'a nanẽ ipyaukare'ema jupe nũ.

² A'eramũ je ajepeja ywagipewara 'ga resaka. Kwara poawa katy awi 'ga ruri ojeupia. Janeruwarete 'ga remiayuwa 'gã mojewakawa 'ga erekou opo pe. Okoeteete ma'e 'ga remiayuwa 'gã 'ga imojewaka aipo pyu. A'eramũ imojewakawa rerekwara 'ga wafukaita opytuna 'gã nupe, irũpãwẽ ywagipewara 'gã nupe. “Pe'je pejewau ywy mote'aa. 'Yē'ēa nanẽ ki pēẽ imote'aa nũ”, 'jau 'ga 'gã nupe.

³ A'eramũ majepeja 'ga ywagipewara 'ga wafukaita 'gã nupe:

—Tene ra'ne. Pemote'ara'ne awi ywya. 'Yē'ē, 'yp. Mĩmera pemote'ara'ne awi— 'jau 'ga 'gã nupe. —Tene ki ore Jarejuwarete 'ga remiayuwa 'gã mojewapawi ra'ne. 'Gã neapykaga toromojewapap ra'ne 'jau. A'eramũ 'gã nesakawe, tekotee 'gã 'gã kwaapa: Kweramũ Jarejuwarete 'ga remiayuwa 'gã na'e, te'i 'gã 'gã nupe 'jau— 'jau 'ga 'gã nupe.

⁴ Aipo 'e re 'ga 'gã pytuna mome'wau jee:

—Sētu kwarētai kwaturu miu 'gã Janeruwarete 'ga remiayuwa 'gã— 'jau 'ga jee. —Israeu juapyrera 'gã te 'ã ore oromojewak— 'jau 'ga imome'wau jee.

⁵ A'eramũ 'ga 'jau jee nũ:

—Tusi miu Juda 'ga juapyrera 'gã.

Tusi miu Rupē 'ga juapyrera 'gã.

Tusi miu Gade 'ga juapyrera 'gã.

⁶ Tusi miu Ase 'ga juapyrera 'gã.

Tusi miu Nafitari 'ga juapyrera 'gã.

Tusi miu Manase 'ga juapyrera 'gã.

7 Tusi miu Simeão 'ga juapyrera 'gã.
 Tusi miu Levi 'ga juapyrera 'gã.
 Tusi miu Isaka 'ga juapyrera 'gã.
 8 Tusi miu Sepurō 'ga juapyrera 'gã.
 Tusi miu Jose 'ga juapyrera 'gã.
 Tusi miu Pëjamī 'ga juapyrera 'gã—
 'jau 'ga imome'wau jee.

Mytuna 'gã 'ga esaka

9 Aipo 'eramū je temā'jāu mytuna 'gã nee. Kwaiwete 'gã. Nomojopyrūmawa'uweri te ae 'gã. Tapy'ŷja 'wyrarete tesirūmer awi tee 'gã nuri ojopypepypeu. Ka'a tesirūmer ipewara 'gã nanē 'ut ojopypepypeu nū. 'Wyrararete renawa rowase 'gã 'ua 'upa. Karupa'mī 'jawewara 'ga rowase nanē 'gã 'upa nū. Taity aparasiga 'gã erekou. Pinowa 'gã imowawaka 'gã muorypa.

10 A'eramū 'gã wafukaita 'gã muorypa.

—Ku'jywa 'ga 'ā Janeruwaretea.

'Ga 'ā wapyk 'ūina 'wyrararete renawa 'arimū.

Karupa'mī 'jawewara 'ga retee ore katu'oka 'ūina.

A'eramū ore 'gã muorypa—

'jau 'gã.

11 A'e pype tekotee 'gã ajemogyau 'wyrararete renawa ywyrī imamana. Ywagipewat, eae'yi ma'e, 'wyrīa'ri. Mīmera 'gã ajemogyau iywyrī imamana. Jarejuwarete 'ga renawa rowase ajatyka ma'e 'gã je'ega renupawe iywyrīwara 'gã juejue anuruka ywyu Jarejuwarete 'ga rowase. A'eramū 'gã 'ga muorypa.

—Janeruwarete 'ga 'ā orejararetea.

12 A'jea futat ki Jarejuwarete 'ga etee simuoryp.

'Ga te 'ā eteete ma'ea. 'Ga 'ā i'akwaap ma'ea.

'Ga 'ā mama'e amut janee. A'eramū jane 'jau 'ga upe:

“Ene te 'ā eneresage oree”, 'jau jane 'ga upe mama'e are.

'Ga 'ā ore'wyrararetea. 'Ga 'ā pājēreteā.

Namutat 'ga rekoi nakwaparimū ete rūi—

'jau 'gã, Jarejuwarete 'ga mome'wau.

13 Aipo re 'wyrīa'ri 'ga amū 'jau jee.

—Aw'ŷja te taity aparasiga rerekwara? Mō awi ajee 'gã nuri?— 'jau 'ga jee.

14 —Tee nū'ū. Ene te 'ā erekwaap— 'jau je 'ga upe.

A'eramū 'ga 'jau jee nū:

—'Gã 'gã wereko tywerete agawewi. A'etea 'gã nopoiri Jarejuwarete 'ga rerowiar awi. Ojekatu'ogukaa Jarejuwarete 'ga upe, ojepirejukaa. Sā'ā kūjā taity poeja. Nan tee 'gã jepirejukari otywer awi karupa'mī 'jawewara 'ga ry pyu.

15 Ma'eramū 'ā 'gã nuwi Jarejuwarete 'ga rowase wapykawarete 'arimū 'ga renamū. Wajere'emamū futat 'gã 'upa 'ga muorypa. A'eramū 'wyrararete renawa 'arimū wapyk ma'e 'ga 'gã a'gwau mama'e tywer awi. 'Ga 'gã wereko— 'jau 'ga jee.

16-17 —Karupa'mī 'jawewara 'ga ako 'wyrararete renawa pyri. A'eramū nipo 'ga ojejukau esage 'gã nee. Sā'ā wyra jara 'ga jejuka esagea weymaw are. Nan tee nipo 'ga jejuka esagei wemiayuwa 'gã nee. A'eramū nipo ty'ara otywu 'jawe'emamū. Ni'yuweju'jawi 'gã. 'Ga 'gã weroo 'ywu'ywur ipe. Aipoa 'ya 'gã omogy namutamutat. Nitywi kwaraya 'gã nupe. Nipirakuwi 'gã peu— 'jau 'ga jee. —Janeruwarete 'ga nipo 'gã neaya amukag 'gã nea awi. A'eramū 'ga ajaa'wau'jape'ema peu— 'jau 'ga jee.

8

Imogawa maapawera mopojo'okawam

1 Aipo apo re karupa'mī 'jawewara 'ga imoga maapawa mopojo'oka jui. Aiporamū 'arapiguua te futat ojeupa ywag ipe. Inānān etee te a'eramū miamū 'gã opika.

2 A'eramū je sete ywagipewara 'gã nesaka, Jarejuwarete 'ga rowasewara 'gã nesaka. A'eramū 'ga amū jumi'aranūū monou 'gã nupe najuejue etee.

3 A'ere ajepēja ywagipewara 'ga jany kasiga rapya'wia rerua enafu'ama opo pe. Jany kasiga rapyawuua pyri 'ga enafu'ama. 'Wyrararete renawa rowase aipo jany kasiga rapyawuua reni. Jany kasiga rapya'wia ouru apopyrera. 'Ga amū jany kasiga monou 'ga upe, kwaiwete. A'eramū 'ga 'jau 'ga upe:

—Janeruwarete 'ga remiayuwa 'gã oporogytai 'upa 'ga upe au'jeteramū. Sā'ā ae jany kasiga rapyamū watasimora. A'eramū 'ā ikasiga okwasi'wasi'wau 'oga pype. Ikasiga 'ā awau ojeupia Janeruwarete 'ga upe. Nan tee futat 'ga remiayuwa 'gã porogyta oi ojeupia 'ga

upe. A'eramū ene jany kasiga rapyau. A'eramū ikasiga ojeupia ojopypeu awau 'gā porogyta are 'ga upe— 'jau 'ga 'ga upe.

⁴ A'eramū 'ga imonou jany kasiga rapyawuu 'arimū iapyau. A'eramū ikasiga awau ojeupia ojopypeu awau 'gā porogyta are 'ga upe.

⁵ A'eramū ywagipewara 'ga tata pyyka iapyawuu 'ar awi. A'eramū 'ga imonou im'īina iapya'wi'i pype. A'eramū 'ga imonou imomoa wyy are. Aipo aporamū tupā awau u'aa, owerapa tupā werawa 'jawe ee. Ywya oyyita nanē nū.

Jumi'aranūā

⁶ A'eramū jumi'aranūū rerekwara 'gā jumi'aranūū pyyka erajemogyau eromaenuna tenunewara 'ga oma'e py rapesaka.

⁷ A'eramū tenunewara 'ga oma'e pyau. Ipy pyrauwe ama'na 'ua u'aa tataa reewe. Wy reewe 'jau 'ua u'aa wyy are. A'eramū wyy ape awau ukaita myterajeu'iu etee. 'Yp, juop, worryorywamū. Mīmera futat ukaitapap.

⁸ A'erauwe ajepeja 'ga jumi'aranūū pyau nū. Ipyrauwe je wyytyra 'jawewara ikajamū resaka nū. A'eramū 'ga amū ipyyka imonou imomoa 'yē'ē pype.

⁹ A'eramū 'yē'ē ara awau ojemu'jaga wyramū. Tyajeu'iu etee ojemu'jaga wyramū, 'y ojemu'jaga wyramū. Wyramū ojemu'jag ma'e katywara 'gā opapapap wyra reewe futat. Yaruua we futat ateepawamū. Wyra tesirūmera opapap. Nitywi'i futari ako ma'e amū.

¹⁰⁻¹¹ Aipo re ajepeja 'ga jumi'aranūū pyau. Ipyrauwe jaytatauaa mū 'ua u'aa ywag awi. Yyga reny 'jawe 'ua u'aa. Aipoa jaytatauaa u'aa 'ua 'yrete pype, 'ywu'ywura pype 'jau u'aa 'ua. A'e ry pyterimū futat irowa kwasi'oi. Nitykuawi futari. Aipo jaytatauu rera irop ma'ea 'jau jupe. A'eramū 'y moropa oje'jawe etee futat. Aipo 'y rykur ire itykuarera 'gā opapa kwaiwete.

¹² Aipo re ajepeja 'ga oma'ea jumi'aranūū pyau. A'erauwe kwara renya oorareferamū. Opytunaiwuuramū etee. Jay reny, jaytata reny 'jau. Kwara jerewypyrauwe kwara owepa. Ai'īwe tāmējē opoa nū. Ypytunimū nanē nū. Ypyajeu'i jay reny owepa nū, jaytata reny 'jau. Awau ku'em enuneu weny jesagamū jaya nū, jaytata reewe futat weny jesagamū nū.

¹³ A'eramū je kwanū 'jawewara resaka iwewe ekoramū. Ywatewate owewiau akou. A'eramū pe awi futat wafukaja mua:

—Muapya 'gā ywagipewara 'gā nopyi we jumi'aranūā. 'Gā ipy rauwe wyy pewara 'gā mama'e tywerete resaka. A'eramū muapyt wējēmī futat mama'eay ijesakare'emawe nū. Aipoa te ia'wyre'emetea— 'jau kwanū 'jawewara wafukaja mua.

9

¹ Aipo kwanū 'jawewara 'e re ajepeja 'ga jumi'aranūū pyi. A'eramū je jaytata 'jawewara 'ga resaka. Ywag awi 'ua u'aa wyy pe. A'eramū 'ga amū saawi monou 'ga upe. Aipoa saawia wyy kwawukuu rawopytymo'wokawa ma'ea. Wyy wyy pe te aipo wyy kwawukuu oi.

² A'eramū 'ga wyy kwawuku rawopytymawa mopoka jui. A'erauwe tatasiga 'ua ū'jāu jui. Tatasigawiūwiūna te 'ut ū'jāu 'ara moypyunaipa. A'eramū tatasiga kwara reny mowepa ywasiga 'jawe.

³ Tatasigawiūna rupi futat tukuruu 'jawewara 'ua ū'jāu. Tukuruua futat numiamū. A'ere Janeruwarete 'ga te ifuaga monoi jupe, jawa'jyra 'jawe.

⁴ A'ere 'ga 'jau tukuruu 'jawewara upe:

—Pe'je pejewau kwe pe. Jeremimojewage'ema 'gā etee ki pekutuk— 'jau 'ga jupe. —'Ywa kasi pekutug ine, pemomaw ine. Juo'wia 'jau kasi pēē i'wau ne— 'jau 'ga jupe.

⁵ A'eramū awau Janeruwarete 'ga remimojewage'ema 'gā kutuka 'gā mayrūmū 'gā mogyau. Sā'ā jawa'jyra raya. Nan tee tukuruu 'jawewara 'gā mayrūmū 'gā mogyau. A'ere 'gā nopawi futari ay upe. Siku jaya moka'jama 'gā mayrūmū 'gā mogyau.

⁶ Ay upe 'gā manūweramū ajemogyau numiamū. A'ere 'gā namanū'aweri.

⁷ Aipoa tukuruu 'jawewara kawaruu 'jawe. Sā'ā kawaruu jara 'gā maruowajaaw ipe oo enune itajuaity pyu kawaruu roowa. Nan tee aipo tukuruu 'jawewara. A'ere aipoa tukuruu 'jawewara 'wyriara akagyrū rerekoi. Ouru apopyrera aipoa akagyrūa. Tukuruu reakwara aereakwara 'jawe.

⁸ I'awa kūjā 'awa 'jawe. 'Āja 'miara rāja 'jawe.

⁹ Itajuaity rerekou opasi'a are. Owewiau. 'Ywa'yata 'jawe futat opyamuramū owewiau. Sā'ā kawaruua 'ywa'yata renujāna maruowajaaw ipe. Nan ipyamua.

¹⁰ Jawa'jyra raja 'jawe waja. Ipopiawa wai are futat. Aipoa opopiawa pyu ae mayrūmū, Ku'jywa 'ga remimojewage'ema 'gā mayrūmū. Siku jay magwapa 'gā mayrūmū 'gā mogyau.

¹¹ Tukuruu 'jawewara 'wyriara wyy kwawukuu pypewara 'wyriara nanē futat nū. Judeu 'gā je'eg imū era Apatō. Grego 'gā je'eg imū era Aporiāu 'jau. Aeje'eg imū era mama'e mateepaara 'jau.

¹² Aiporamū futat mama'eaya ojesaukaa 'gā nupe, kwanū 'jawewara 'eawer imū etee. A'ere mukūja nojesaukari we.

¹³⁻¹⁴ Aipoa re ajepeja 'ga ojumi'aranūū pyau nū. A'erauwe 'ga amū 'jau 'ga upe:
—Ere ewau epytuna 'gā faaro'woka. Peu futat irūpāwē 'gā nuwi ajekupyfaa Eufrates 'yrete pyri— 'jau 'ga 'ga upe, jumi'aranūū rerekwara 'ga upe.

Aipoa oje'eg ma'e 'ga u'ama jany kasiga rapyawa rafeā me. Aipoa ouru apopyrera te. A'ea 'upa Janeruwarete 'ga rowase.

¹⁵ A'eramū 'ga awau 'gā kupyfaaro'woka. Owaēma irūpāwē ikupyfariipyra 'gā paru-apisawa upe. A'eramū Ku'jywa 'ga 'gā kupyfaaro'wogukaa ywy pewara 'gā apisawamū. Akupyfaaro'wog ire irūpāwē 'gā 'jau ajaupe:

—Soo ywy pewara 'gā apisau 'gā pytuna jo'roka'i etee 'jau— 'jau 'gā ajaupe.

¹⁶⁻¹⁷ A'erauwe je kawaruu resaka, jefaruu 'gā je esaka kawaruu 'arimū 'gā nekoa. Kwaiwete 'gā. Tusētu mijōis 'gā pytuna. A'eramū je 'gā pyamu renupa. Jefaruu 'gā naitya itajuaitya etee te. 'Gā wereko opasi'a 'arimū. 'Gā amū ma'ea opiragayayramū. 'Gā amū ma'ea wowayayramū, safira 'jawa 'jawe. 'Gā amū ma'ea ojukyryayramū, aipoa ēsōfyria 'jawa 'jawe. Kawaruu akaga 'miara akaga 'jawe. Ijuru awi tataa 'ua ū'jāu. Tata sig, itatata. Mīmera 'ua ū'jāu ijuru rupi.

¹⁸ Kwaiwete ywy pewara 'gā opapa kawaruu juru rupi 'ut ma'e pyu.

¹⁹ A'eramū kawaruu 'gā apisau kwaiwete ojuru awi 'ut ma'e pyu. Owaja pyu nanē 'gā apisau nū. Kawaruu raja moja akaga 'jawe. A'eramū 'gā kutuka owaja pyu 'gā apisau.

²⁰ Aipoa iapisipyre 'gā opytunera 'gā nesaka agawewi. A'etea 'gā nopoiri futari otywer awi. Ni'arasigi 'gā ajemogyau otywer are. A'eramū 'gā mama'eukwaawa etee imuorypa ajemogyau. Maira'me a'agawa nanē nū 'gā imuorypa nū. Ouru, prōsi, prata, ita tee, 'yp. Mīmera 'gā iapou omairamū. A'ea te 'gā imuorypa ajemogyau. Aipoa 'gā maira nuesaga'uweri amū. Nuataa'uweri ajemogyau. Nuenuwi agawewi mama'ea. A'etea 'gā amuoryp ekoete ajemogyau.

²¹ Nopoiri futari 'gā mama'e tywera apo awi. Nopoiri futari 'gā aparupisi awi. Nopoiri 'gā ajuee opājāgaiw awi ajemogyau. Nopoiri 'gā wemirekoe'em are oko awi, omene'em are oko awi. Mīmer awi 'gā nopoiri. Amunarū awi nanē opoire'ema nū. Kwaiwete agawewi 'gā 'gā apisi resagi. A'etea 'gā nopoiri futari mama'e tywera apo awi.

10

Ka'ara'nī'ia

¹ A'eramū je ywagipewara 'ga amū resaka nū. Ifuakat te aipo 'ga. Ywasiga pype 'ga 'ua ojyppa. 'Ga aka'garimū je'ywa mū 'upa. 'Ga reakwara wenyramū kwara 'jawe futat. 'Ga retymakaga tupaa'mywa 'jawe. 'Ga retymakaga ojopy'wau werekoramū. Sā'ā 'yw ypiwera kaja tena. Nan futat 'ga retymakaga.

² Opo pe 'ga ka'ara'nī'ī jepypeka rerekou enafu'ama. Ojakwatawa katywara 'ga opy monou 'yē'ē pype imojyppa. Ojau katywara 'ga opy nuga ywy 'arimū.

³ A'eramū 'ga waemamū u'ama. 'Miara 'jawe 'ga waemamū. 'Ga raemauwe, tupā afuramū 'ga upe, sete tupā afuramū.

⁴ Ifurauwe je 'jau tejeupe: “Akwasiat pa je ka'aran are kwy”, 'jau je tejeupe numiamū. A'ere 'ga amū oje'ega muri ywag awi jee:

—Erekwasiat kasi ee ne. Eremome'u kasi ne— 'jau 'ga jee.

⁵ A'erauwe 'yē'ē pype opyrug ma'e 'ga opo mowya, ojakwatawa katywara.

⁶ A'eramū 'ga oje'ega Ku'jywa 'ga remianuwamū. Ku'jywa 'ga Okoeteete ma'ea. 'Ga te 'ā mama'ea wapo etee rakue. Ywak, ywy, 'yē'ē. Mīmera 'ga 'ā iapou ipypewara reewe rakue. A'eramū 'ga remianuwamū ywagipewara 'ga 'jau:

⁷ —Ymā te Ku'jywa 'ga 'i oje'ega mome'wara 'gā nupe rakue: “Jeremifutara 'ara rupi mama'ea jeapoi, je'eawer imū etee”, 'jau 'ga wemiayuwa 'gā nupe rakue. 'Ga je'ega renupara 'gā weapyoe'emamū ee rakue. Nomojeapoukara'nei Ku'jywa 'ga. A'ere, 'awamū maapawa 'ga jumi'aranūū pyramū mama'ea jeypyruigi Janeruwarete 'ga 'eawer imū— 'jau 'ga jee.

⁸ A'erauwe ywag awi oje'eg ma'e 'ga oje'egu'japa jee nū:

—Ere ewau ka'ara'nī'ī pypeka rekyita ywagipewara 'ga po awi— 'jau 'ga jee.

⁹ A'eramū je tewau 'ga pyri:

—Ka'ara'nī'ia emut jee— 'jau je 'ga upe.

A'eramū 'ga imua jee.

—Kweramū— 'jau 'ga jee. —Ere ipyyka i'wau. Enejuru pe akou nipo ē'ēnamū futat, eira 'jawe. A'ere nipo omokon ire, irowamū ene upe— 'jau 'ga jee.

¹⁰ A'eramū je ka'ara nīī pyyka 'ga po awi. Ipyykawe je i'wau. Jejuru pe akou wē'ēnamū eira 'jawe futat. A'ere je omokon ire je mopy'amukai etee.

¹¹ A'erauwe Janeruwarete 'ga 'jau jee:

—Jeje'ega emome'uu'jap 'gā nupe. Ywy pewar are je je'egi. 'Gā 'wyriar are nanē je je'egi nū. Aipoa emome'uu'jap 'gā nupe— 'jau 'ga jee.

11

Mukūja 'ga je'ega mome'wara 'gā

¹ A'ere 'ga amū mama'e ra'agawyawa mua jee. Ywyrā 'jawe aipoa. A'eramū Janeruwarete 'ga 'jau jee:

—Ekwap jemogytaawa ra'agawyau. Jany kasiga rapyawa nanē ki ia'agawyau nū. Je muorypara 'gā emojopyrū, 'gā pytuna kwaapa— 'jau 'ga jee.

² —Jemogytaawa osoma te kasi ajee erea'agawy ne. Jemogytaawa osoma je rerowiare'ema 'gā ma'ea futat. Kwarētai tois je rerowiare'ema 'gā jemogyi peu jay magwapa, je'wyrarete pe futat, imote'aa— 'jau 'ga jee.*

A'eramū Janeruwarete 'ga 'jau jee nū:

³ —Teje'ega mome'wara 'gā, mukūja 'gā tomono kwe pe teje'ega mome'waukaa 'gā nupe 'jau. Saku tywera etee 'gā tuereko waityramū u'arasiga resaukaawamū 'jau. Ku'jywa 'ga rerowiare'ema 'gā tywer are mukūja 'gā 'arasigamū akou. Kwarētai tois jaya magwapa 'gā awau akou jeje'ega mome'wau— 'jau 'ga jee.

⁴ Aipo 'gā, 'ga je'ega mome'wara 'gā, oriweira 'ywa 'jawe. Tatarana renawa 'jawe 'gā nanē nū. Ywy jara 'ga rowase 'gā 'ami. Tatarana reny 'jawe 'gā mama'e resaukaa ajaupe.

⁵ Kwaiwete 'gā 'jau:

—Sireko tywet 'gā 'jau— 'jau 'ga ajaupe.

A'ere 'gā juru awi tata ruri wereko tywearera 'gā apisau.

⁶ Jarejuwarete 'ga pājēa 'gā wereko. A'eramū amunipo 'ā 'gā Jarejuwarete 'ga je'ega mome'u pype ifutar ire amana mogyrukare'ema. 'Y mu'jaga amunipo 'ā wyramū. Mama'e tyweramū mojeapoukaru 'jau 'japa, amunipo 'ā 'gā ywy pewara 'gā nereko tyweru 'jau 'japa.

⁷ Ku'jywa 'ga je'ega mome'upaw ire nipo ja'waraiwa ruri. Ywy kwawukuu awi nipo ū'jāu 'gā nowajaa 'gā apisau.

⁸ A'eramū nipo 'gā neumera 'upa 'gā 'wyrarete rukawō'ō me. Ymā te peuwara 'gā mukūja 'gā jararete 'ga pokutugi 'ga monou 'ga mu'ama 'ypeywar are rakue. Aipoa oje'wyrarete pewara 'gā nupe 'gā 'jau: “Mama'e tywera 'gā wapo Sodom ipewara 'gā 'jawe. Egitu ywy pewara 'gā 'jawe 'gā 'gā nereko tyweri”, 'jau 'gā aipo 'wyrarete pewara upe. Aipo 'gā 'wyrarete pe Janeruwarete 'ga je'ega mome'wara 'gā jukau.

⁹ Imuapyra 'ara rupi 'gā amā'jāu 'gā neumer are. Tapy'jja 'wyrarete tesirūmer awi tee 'gā nuri. Ka'a tesirūmer ipewara 'gā nanē 'ua ojopypepypeu nū. Tesirūmerete 'gā 'ua amā'jāu 'gā nee.

—Peroo kasi inuga ita kwar ipe ne— 'jau 'gā ajaupe.

¹⁰ A'eramū ywy pewara 'gā worywamū 'gā neumer are. Oporoywera 'gā imonou ajaupe 'gā neumer are aku'iramū.

—Jane rereko tywerete ako 'gā ai'i. A'ere 'ā 'gā manūi. 'Gā manūa esage janee— 'jau 'gā ajaupe.

¹¹ A'ere muapyt 'gā ser ire Janeruwarete 'ga 'gā moferapa opytuu nū. A'eramū 'gā afu'ama. 'Gā fu'amauwe 'gā fu'ama resakara 'gā oky'jau kwaiwete 'gā nui.

¹² A'erauwe 'ga amū oje'ega mua ywag awi oferap ma'e 'gā nupe:

—Pe'je pejejua pejejeupia— 'jau 'ga oje'ega mua 'gā nupe, imoferawipyrera 'gā nupe.

A'eramū 'gā awau ojeupia ywasiga rupi. Ojee iporomutare'ema 'gā neape 'gā awau ojeupia 'gā nui.

¹³ 'Gā jeupirauwe ywya oyyita kwaiwete. A'eramū kwaiwete 'oga u'aa.

Kwaiwete 'gā amanūmū. Sete miu 'gā amanūmū. A'ere sesēta miu 'gā namanūi. A'eramū 'gā 'jau Jarejuwarete 'ga upe:

—Ene te 'ā pājēreteā— 'jau 'gā 'ga upe, 'gā kyjea 'gā nereko.

¹⁴ Poromū futat mama'eaya irūa ojesaukaa, kwanū 'jawewara 'eawer imū. A'ere nipo imuapyra niporomukui futari ojesaukaa nū.

Jumi'aranūū maapawet

¹⁵ Aipo re ywagipewara maapawa 'ga jumi'aranūū pyja nū. A'erauwe je ywagipewara 'gā je'ega renupa. Wafukajayau oje'ega mua:

* **11:2** Jerusarega upe 'gā 'jau Ku'jywa 'ga 'wyrarete 'jau. Peu futat judeu 'gā awau 'ga muorypa rakue. A'eramū Ku'jywa 'ga 'jau jupe, Je'wyrarete, 'jau 'ga jupe.

—Janeruwarete 'ga 'ā 'ūina ywy pewara 'gā 'wyrriarareteramū. Wemimonofera 'ga nanē imogou 'wyrriaramū ojepyri nū. Nitywi futari 'gā je'ega renupare'ema 'ga amū. Ywy pewara 'gā juejue futat 'gā je'ega renupa. Ateepawe'emamū futat 'gā 'ūina 'wyrriarareteramū— 'jau 'gā wafukaita.

¹⁶ A'erauwe 'wyrriari 'gā wapyka wenupy'āu wāāpyramū Ku'jywa 'ga rowase, 'ga muorypawamū. Witi kwaturu 'gā, 'wyrriaria renawa 'arimū wapyk ma'e 'gā ajemogyau wāāpyramū 'ga muorypa.

¹⁷ "Ene 'ā pājēreteā, Kiapi'ni.

Ene 'ā Okoeteete ma'ea. Nitywi 'ga amū ene 'jawe.

'Awamū 'ā ene 'wyrriarareteramū e'ŷja ypyruga oree.

A'eramū ore ene muorypa ee.

¹⁸ 'Awamū iwaēmi ene rerowiare'ema 'gā nereko tyweawa upe.

'Awamū futat 'gā nee emara'nea ereesaukat 'gā nupe.

A'eramū 'gā ajemogyau amara'neramū ene ree.

Amanū ma'efera 'gā nanē ene imoferapa imua ejowase.

Ejemiyauwa 'gā juejue nipo ene erua imogyau ejepyri.

'Ene 'ā jeje'ega renupara. Aipoa esage jee.

A'eramū ene ejua 'au je pyri', 'jau nipo ene 'gā nupe.

Eje'ega mome'warera 'gā nupe, emuoryparera 'gā nupe.

Eje'ega renupare'ema 'gā nipo ene imonou muku ejewi.

Wereco tywera ojere'ema pype nipo 'gā awau a'eramū futat.

'Pēē 'ā jeje'ega nepeanuwi. A'eramū pēē pejewau muku je wi', 'jau nipo ene 'gā nupe",

'jau 'gā 'ga upe.

¹⁹ A'e pype Janeruwarete 'ga mogyaawa rokware ojeawopytymo'woka, ywaga pype 'ūi ma'ea rokware ojeawopytymo'woka. A'eramū futat Janeruwarete 'ga je'ega rerekwara ita kwasiara ryrūa ojesaka. 'Okwara jeawopytymo'wogauwe tupā u'aa, aman aunuga, amana werawa, wwy mooyita, ama'na ototoka nanē kwaiwete nū. Mīmera ojeapou 'okwara ijeawopytymo'wogamū 'gā nupe.

12

Kūjā ēē tejuuranūū retee

¹ A'eramū je temopiryyitawa mū resaka. Kūjā ēē mū ojesaukaa jee ywag ipe. Kūjāeteete ēē te. Ēē resakawe je teporesagamū ēē ree te'ŷina. Ēēreteyrūa kwara futat. Wapyka ēē 'ūina. Opya ēē imonou jay 'arimū inuga. Jaytataa mamana enūina wakag are, akāmaawa 'jawe. Tusi jaytata renūina waka'garimū.

² Wa'yrayramū ēē 'ūina. A'eramū ēē 'ūina wa'yray upe waemamū.

³ A'erauwe mama'e mū ojesaukaa ywag ipe jee nū. Tejuuranūūa ojesaukaa jee. Piragūū ma'ea. A'eramū je teporesagamū ee. Kwaiwete iakaga. Sete tee iakaga. 'Wyrriara akagyru'tī mogyau wakag are, najuejue etee. Teis asiā.

⁴ Owaja pyu jaytataa pe'au ywag awi. Jaytata myterajeu'i etee ipe' aupap owaja pyu. Ywy pe imonou imomopoa. A'eramū awau 'upa kūjā ēē rowase. Ēē ra'ra 'ar are omaenuna 'upa. "T'arauwe ta'u ēē ra'yra 'jau kwy", 'jau tejuuranūūa 'upa ojeupe.

⁵ A'ere ēē ra'yra 'ari ēē wi. Anure nipo ēē ra'yra 'ga 'ūina 'wyrriaramū ywy pewara 'gā nupe. A'eramū ywy pewara 'gā juejue 'ga je'ega renupa. Oje'ega renupare'ema 'gā nipo 'ga erekou tyweaete. A'eramū aipo ēē ra'yra 'ga 'arauwe 'ga amū ēē ra'yra 'ga ppyka erawau Jarejuwarete 'ga upe, 'wyrriarete renawa 'arimū 'ga renamū.

⁶ A'eramū kūjā ēē awau ujāna oka'jama jui. Amunawe'em ipe ēē awau ojeupe Jarejuwarete 'ga reminuger ipe. Peu futat 'gā ojejukau ēē ree, kwarētai tois jay magwapa.

⁷ A'eramū ywagipewara 'gā tejuuranūū rowajaa. Migeu 'ga ywagipewara 'gā 'wyrriara. A'eramū Migeu 'ga wemiayuwa 'gā nerawau tejuuranūū rowajaa, emiyauwa reewe. Ywag ipe futat 'gā juowajari.

⁸⁻⁹ A'eramū Migeu 'ga wemiayuwa 'gā netee tejuuranūū fuakara apyraapa emiyauwa reewe. A'eramū Janeruwarete 'ga tejuuranūū mū'jaukaa ywag awi, emiyauwa reewe. Nopytaa'uweri ywag ipe. Ymā te tejuuranūū jesaukari mojamū rakue. Aipo mama'eukwaawa 'wyrriara futat. Eraretea Satanasi. A'ea ae moryteeara futat. Ywy pe Migeu 'ga imonou imū'jāu ywag awi.

—Pejewyt kasi ne— 'jau 'ga jupe.

¹⁰ A'erauwe 'ga amū oje'ega mua ywag awi:

—Uēm futat tejuuranūū ywag awi. Wojere'emamū janerewirera 'jawewara kwaukaa akou Janeruwarete 'ga upe rai'i. A'ere 'awamū Janeruwarete 'ga imonoi imuēma ywag awi. A'eramū nipo Janeruwarete 'ga wemiayuwa 'gā katu'okapap mama'e tywer awi. Opājēa

resaukaa janee. A'eramū 'ga 'ā ajemogou 'wyrriarateramū wemimonofera 'ga reewe janee. 'Ga 'ā werowiaara 'gā kwaukaara muēmukaa ywag awi. Janerewirera 'jawewara 'gā kwau Janeruwarete 'ga upe akou. Wojere'emamū 'gā kwau Janeruwarete 'ga upe. A'ere 'awamū Janeruwarete 'ga imuēmukari ywag awi— 'jau 'ga oje'ega mua ywag awi.

¹¹ —Janerewirera 'gā okyjawe'em amanū awi. A'eramū 'gā Jejui 'ga rerowiar awi opoire'ema. “Karupa'mī 'jawewara 'ga owya weko'wogukat janetywera moiawamū jane wi” 'e renupawe 'gā erowiaa ajemogyau. A'eramū 'gā nanē mama'eukwaawa 'wyrriara pājē mateepapa nū.

¹² A'eramū ywaga aku'iramū, ywagipewara 'gā neewe. Janeruwarete 'ga mama'eukwaawa 'wyrriara amuēmukat ywag awi. A'eramū ki pēē pejeku'iramū ee. A'ere ywy poria'y'iramū, 'yē'ē reewe. Jupe mama'eukwaawa 'wyrriara oi ojypa. Amara'neramū akou. “Anurenure'i nipo Janeruwarete 'ga je monoi tata pe” 'e kwaapa akou numiamū. “A'eramū je inānān etee te je ae rereko tyweri” 'e kwaapa akou.

¹³ Ywag awi ojypa ypy we tejuuranūa kūjā ēē rerekou tyweaete, ta'y'ra ma'efera ēē rerekou tyweaete. “Areko tywet pa je ēē kwy”, 'jau ojeupe numiamū.

¹⁴ A'eramū Janeruwarete 'ga kwanūū jywafera monou ēē upe, amunawe'em ipe ēē wewiawamū, ēē ree jejukaaw ipe. “Peu futat nipo wā je a'gui tejuuranūū awi re'ā”, 'jau ēē ojeupe. Kwarētai tois jay magwapa ēē opytau peu akou.

¹⁵ A'eramū tejuuranūūa 'y mua imuna ojuru awi. “Taupt ēē 'y pyu 'jau kwy”, 'jau ojeupe numiamū. 'Yrete 'jawe imua imuna ojuru awi ēē rupiawamū numiamū.

¹⁶ A'ere Janeruwarete 'ga ēē poari. A'eramū Janeruwarete 'ga ywy mowoka tejuuranūū juru awi 'ut ma'efera upe. A'eramū 'ya awau ojejagamap iwoga rupi etee ēē wi.

¹⁷⁻¹⁸ A'eramū tejuuranūūa amara'neramū akou kūjā ēē ree. A'eramū awau ēē pytuna 'gā nowajaa. Eē pytuna 'gā Ku'jywa 'ga je'ega renupara 'gā, Jejui Kristu 'ga je'ega rerowiaara 'gā nanē nū. A'eramū 'gā nowajaa awau. A'eramū tejuuranūūa awau opytau u'ama 'yisiga pype.

13

Mukūja ja'waraiḡ

¹ A'ere je ja'waraiwa resaka nū. 'Yē'ē awi iēma resaka. Sete iakaga. Teis asia. 'Wyrriara akagyru'tīi rerekou asī are, najuejue etee. Teis 'wyrriara akagyru'tīia. Iakaga jewaga Janeruwarete 'ga kurawa rerekou wakag are.

² Ja'wapinima 'jawe aipo ja'waraiwa. Ipya ursu 'jawa py 'jawe futat. Leāo 'jawe ijurua. A'ere tejuuranūūa imogoi 'wyrriaramū ojeypyri. Opājē mua jupe. A'eramū ywy pewara 'gā najuejue etee ije'ega renupa.

³ Aipo ja'waraiwa akaga mū waiwamū. A'eramū amanūmū werewi jupe. A'ere ikā'ēi jui nū. A'eramū wapikutukawera porera etee rerekou. A'eramū ywy pewara 'gā juejue amā'jāu iporter are.

—Kuu. Namanūi jupe ra'e nū— 'jau 'gā ja'waraiwa apikutukawera porera resag ire.

A'eramū 'gā ja'waraiwa rerowiaa ije'ega renupa.

⁴ Tejuuranūūa ja'waraiwa mogou ajuru irūnamū. A'eramū ywy pewara 'gā juejue tejuuranūū muorypa nanē nū. Ja'waraiwa nanē 'gā imuorypa nū.

—Nitywi 'gā amū ja'waraiwa 'jawe, ipājē apyraapa— 'jau 'gā ajaupe. —Nitywi futari iowajara 'ga amū. Nitywi futari imomapara 'gā amū— 'jau 'gā amū ajaupe.

⁵ Janeruwarete 'ga ojekurawukaa ja'waraiwa upe. Kwarētai tois jaya magwapa im'jyukaa 'wyrriaramū ywy pewara 'gā nupe.

A'eramū ja'waraiwa oje'ega:

—Je pājēreteā. Je Pēnuwarete 'ga aapyraap— 'jau futatee 'ūina, ojerowiaa ojee.

A'ere o'meramū te 'i.

⁶ A'eramū Janeruwarete 'ga kurapa 'ūina. Mama'e tywera 'jau 'ūina 'ga kurapa. Mama'e tywera te 'jau 'ūina Jarejuwarete 'ga rupawa upe. Ywag ipe ako ma'e 'gā nupe juejue nanē 'jau 'ūina nū. Mīmera ywa mama'e tywera 'jau 'ūina.

⁷ Ku'jywa 'ga wemiayuwa 'gā nereko tywerukaa ja'waraiwa upe. A'eramū 'gā nowajaa, 'gā rerekou tyweaete okwapa 'gā arimū. A'eramū ywy pewara 'gā nupe juejue ja'waraiwa 'ūina 'wyrriaramū. Tapy'jya 'wyrarete tesirūmer ipewat, ka'a tesirūmer ipewat. Mīmera 'gā nupe ja'waraiwa 'ūina 'wyrriaramū.

⁸ Ywy pewara 'gā ja'waraiwa muorypa. A'ere 'gā amū namuorywi ja'waraiwa. Ywy apoe'ewe Ku'jywa 'ga 'gā amū nera kwasiaa ka'aran are rakue, karupa'mī 'jawewara 'ga ka'aran are rakue. Karupa'mī 'jawewara 'ga ojejukaukaa werowiare'ema 'gā nupe ikue. A'eramū 'ga werowiaara 'gā mogyau ojeypyri nakwaparimū ete rūi. Aipo 'gā nera

ojekwasiaa 'ga ka'aran are rakue. A'eramū aipo 'gā ja'waraiwa muorype'ema. 'Ga ka'aran are ijekwasiare'ema 'gā etee ja'waraiwa amuoryp.

⁹ Mama'ea tomome'u pē nupe 'jau. Ee iporokwaawiwet ma'eramū pēē pejeapyakau ee.

¹⁰ Ifaripyrama 'gā nipo oje'faa futat. Jyuu pyu iapisipyrama 'gā nipo 'gā iapisau futat jyuu pyu. A'eramū Janeruwarete 'ga remiayuwa 'gā 'ga ree etee ojemogyppyka ajemogyau. 'Gā 'gā nerekou tyweaete agawewi. A'etee 'gā 'ga ree etee futat ojemogyppyk.

¹¹ Poje je ja'waraiwa mū resaka nū. Ywy awi 'ua uēma. Mukūja wasi nerekou, karupa'mī rasi 'jawe futat. Ije'ega wapefuramū tejuuranū je'ega 'jawe.

¹² A'eramū 'yē'ē awi 'ut ma'efera imogou opoirūnamū. A'eramū 'yē'ē awi 'ut ma'efera reape ywy awi 'ut ma'efera 'ūina 'wyrriaramū ywy pewara 'gā nupe. A'eramū ywy awi 'ut ma'ea 'yē'ē awi 'ut ma'e muorywukaa ywy pewara 'gā nupe najuejue etee. "Yē'ē awi 'ut ma'ea amanū werewi. A'ere iferawi etee nū. A'eramū pēē imuorypa najuejue etee", 'jau ywy awi 'ut ma'efera 'gā nupe.

¹³ A'eramū ywy awi 'ut ma'efera aeremiapoe'ema apou. Tataa miamū imua etyka ywag awi ywy pe. Ywy pewara 'gā neape futat imurukaa.

¹⁴ Wemiapofera apou 'yē'ē awi 'ut ma'efera reape. A'eramū ywy pewara 'gā moryteeu. Wemiapofer are 'gā moryteeu 'gā mogyau.

—Pe'je ita apou 'yē'ē awi 'ut ma'efera ra'agawamū. Jyuu pyu ijukau werewi. A'ere iferawi. A'eramū pēē ia'agawa apou ipojeupawamū— 'jau ywy pewara 'gā nupe.

¹⁵ Ia'agawa apopawauwe Ku'jywa 'ga imogoukaa ywy awi 'ut ma'efera upe. Opytu mujāna ia'agawa rupi. A'eramū ojeptytekyita oje'ega. A'eramū omuorypare'ema 'gā apisau.

¹⁶⁻¹⁷ "Ywy pewara 'gā juejue 'yē'ē awi 'ut ma'efera remiayuwa. Tomojewak 'gā 'jau kwy", 'jau ywy awi 'ut ma'efera ojeupe. A'eramū 'yē'ē awi 'ut ma'efera rera kwasiarukaa ywy pewara 'gā po are, 'gā jakwatawa katywar are ikwasiarukaa. 'Gā neapykag are 'jau era kwasiarukaa. Ikaraemā kwai ma'e 'gā nee, ikaraemāe'ema 'gā nee, kūima'eteete 'gā nee, akotee ma'e 'gā nee. Mīmera 'gā nee era kwasiarukaa. Era kwasiare'ema numeru etee inuga 'gā nee. Ijewage'ema 'gā namuri mama'ea. Nome'ega'uweri mama'ea 'jau.

¹⁸ Pe'je pejejea'aramū aipo are. Ee pejejea'aramū nipo numeru are pēneapyo. 'Yē'ē awi 'ut ma'efera numerua aema'ea futat, 666.

14

Jarejuwarete 'ga upe 'gā maraka'ag

¹ Aipo resag ire je temā'jāu ee nū. Poje karupa'mī 'jawewara 'ga u'ama wyytyra apyte'rarimū, Siāo 'jawa apyte'rarimū. 'Ga pyri kwaiwete 'gā ajemogyau. Sētu kwarētai kwaturu miu 'gā ajemogyau Siāo 'jawa apyte'rarimū 'ga pyri. Karupa'mī 'jawewara rera ojekwasiaa 'gā neapykag are rakue, 'ga ruwa 'ga rera nanē ojekwasiaa ee rakue nū.

² A'erauwe je 'ga amū je'ega renupa nū. Ywag awi 'ga oje'ega mua jee. Sā'ā ytuu pyamua. Nan 'ga oje'ega mua jee. Tupā 'jawe 'ga imua jee. A'ere esageramū futat 'ga je'ega. Maraka 'jawe futat, harpa 'jawa 'jawe futat esageramū.

³ A'eramū 'ga rera rerekwara 'gā amaraka'aga 'upa 'ga upe. 'Wyrriararete renawa rowase 'gā 'upa maraka yau ra'aga. Irūpāwē eae 'yi ma'e, 'wyrri'ri. Mīmera 'gā nowase sētu kwarētai kwaturu miu 'gā nuwi amaraka'aga 'ga upe. Jarejuwarete 'ga remikatu'ogera 'gā etee te amaraka'aga 'upa 'ga upe. Jejui 'ga 'ā owy weko'wogukat 'gā tywera mepyawamū rakue, 'gā mogyau wemiayuwamū rakue. Aipo are 'gā amaraka'aga 'upa. Okatu'okawer are 'gā 'ga muorypa. A'eramū ikatu'ogipypera 'gā etee te ojemu'jau ee, aipo maraka ra'aga 'ga upe.

⁴ Aipoa maraka ra'agara 'gā nuapoi futari mama'e tywera. Namuorywi 'gā maira'me a'agawa. Jarejuwarete 'ga etee te 'gā amuoryp. Nokoi futari 'gā wemirekoe'em are 'jau. Karupa'mī 'jawewara 'ga je'ega 'gā wenup katu katu ajemogyau. Ojemujat 'gā 'ga ree. Janeruwarete 'ga 'gā mū'jāu mama'e tywera apoara 'gā nui rakue.

—Tamogy 'gā tejemiayuwamū 'jau, karupa'mī 'jawewara 'ga remiayuwamū 'jau kwy— 'jau Janeruwarete 'ga, 'gā mū'jāu ojee rakue.

⁵ 'Gā ni'mei futari. Nuapoi futari 'gā mama'e tywera.

Muapyra ywagipewara 'gā

⁶ Poje je ywagipewara 'ga amū resaka. Ywate katu 'ga owewiau akou. Morogyta esage mome'wau 'ga awau. Aipoa morogyta esagea nateepawi futari. Ywy pewara 'gā nupe 'ga oi imome'wau 'gā moymoyka. Tapy'jja 'wyrarete tesirūmer ipewat, ka'a tesirūmer ipewat. Mīmera 'gā nupe 'ga awau imome'wau.

⁷ A'eramū 'ga wafukaita oje'ega mua ywy pewara 'gā nupe:

—Pejejuwarete 'ga ki pepojeup. Ene te 'ā eneresage oree ekou, pe'je ki 'ga upe. 'Awamū iwaēmi wemiayuwa 'gā nui ae mojo'okawa upe. 'Awamū futat 'ga oje'ega renupare'ema 'gā

mojo'ogi oje'ega renupara 'gã nui. “Nepeenuwi futari jeje'ega. A'eramũ pëe pejejore'ema je pyri. Tata pe pekwap”, e'i 'ga 'awamũ futat oje'ega renupare'emamũ 'gã nupe. Oje'ega renuparera 'gã nupe etee te 'ga 'i: Pe'je pejejua pejejemogyau je pyri. Jeje'ega peenup katu katu. Mama'e apoarera 'ga etee te 'ã pemuoryp. 'Ga te 'ã ywaga wapo rakue. Ywy, 'yë'ë, 'ywu'ywut. Mïmera 'ga 'ã iapou rakue. A'eramũ 'ã pëe 'ga etee imuorypa— 'jau 'ga wafukaita ywy pewara 'gã nupe.

⁸ A'ere ajepeja ywagipewara awau owewiau 'ga rewiri nũ. Aipo 'ga 'jau:

—'Gã 'wyraretea nipo 'gã wetyk futat, Papironi 'jawa. Aipoa amunaw ipewara 'gã oporomotyweriweramũ ajuee. “Pe'je pejejua mama'e tywera apou ore pyri”, 'jau 'gã ajaupe. Sã'ã kawïajaiwa 'wara 'gã juenũja kawïajaiwa 'uukara ajaupe. Nan futat aipo amunaw ipewara 'gã. A'eramũ Janeruwarete 'ga 'gã 'wyrarete mateepapa 'gã neewe futat— 'jau 'ga owewiau awau oje'ega.

⁹⁻¹⁰ Poje ajepeja ywagipewara 'ga awau 'gã newiri wafukaita nũ:

—'Yë'ë awi 'ut ma'efera muoryparera 'gã, ia'agawera muoryparera 'gã neewe oje-mote'awi Ku'jywa 'ga upe. 'Yë'ë awi 'ut ma'efera rera 'ga okwasiarukat ojee. Opo are ikwasiarukare'ema weapykag are ikwasiarukaa. Weapykag are ikwasiarukare'ema opo are ikwasiarukaa. Aipo 'gã ite'at futat Ku'jywa 'ga upe. A'eramũ Ku'jywa 'ga amara'neramũ 'gã nee. A'eramũ 'ga 'gã monou 'gã nereko tyweawa tata pype, itatata pype, ëšöfyri 'jawa pype. Aipo ëšöfyri 'jawa jutayyga 'jawe. Nowewi futari aipoa tata. Ateepawe'emamũ futat ae wi. A'eramũ 'ga 'gã monou peu futat 'gã nereko tyweawa pype. Ywagipewara 'gã nowase nipo 'gã mayrũmũ. Karupa'mi 'jawewara 'ga rowase nanë nipo 'gã mayrũmũ nũ.

¹¹ Tatasiga awau nipo au'jeteramũ futat ojeupia. Nowewi'i futari. Wojere'emamũ futat 'yë'ë awi 'ut ma'efera muoryparera 'gã mayrũ 'gã nerekou. Era rerekwara 'gã nanë 'gã mayrũmũ ojere'ema futat— 'jau ywagipewara 'ga awau wafukaita 'gã nupe.

¹² A'eramũ ki pëe Jarejuwarete 'ga remiayuwamũ 'ga je'ega renupa katu katu. Jejui 'ga nanë erowiaa nũ.

¹³ A'ere je 'ga amũ je'ega renuwi. Ywag awi 'ga oje'ega muri jee.

—Jeje'ega ekwasiat ekou ka'aran are— 'jau 'ga jee. —Jarejuwarete 'ga rerowiaara 'gã amũ nipo ojejukaukat 'ga rerowiare'ema 'gã nupe. Nopoiri futari 'gã 'ga rerowiar awi. A'eramũ 'ga rerowiare'ema 'gã 'gã apisau futat. A'ere aipo 'gã nekõëãjamũ ajemogyau— 'jau 'ga jee. —A'ea ekwasiat ka'aran are— 'jau 'ga jee.

A'erauwe Janeruwarete 'ga 'Agesagea 'jau jee:

—A'jea futat aipoa. Oporowyky te 'gã 'ã ajemogyau Ku'jywa 'ga upe. A'ere 'awamũ 'gã pytu'ui oporowyky awi. Anure nipo Ku'jywa 'ga 'gã mepyi ojeupe 'gã porowykyawer are— 'jau 'ga 'Agesagea jee.

Werowiaare'ema 'gã nereko tyweawam

¹⁴ A'eramũ je temã'jãu ee nũ. Poje je 'ga amũ resaka. Kũima'e 'jawewara 'ga je esaka. Ywasiga 'arimũ 'ga apygi 'ũina. 'Wyriara akagyriã 'ga erekou waka'garimũ. Aipoa ouru apopyrera te. Jyaparuu aimea 'ga enũina opo pe.

¹⁵ A'erauwe majepeja 'ga ywagipewara 'ga 'ua uëma Janeruwarete 'ga mogytaaw awi. Wafukaita 'ua uëma.

—Ekwap ywy pewara 'gã nesaka. Sã'ã ae ko pypiara isinigamũ imonooga. Nan tee futat ekwap Ku'jywa 'ga je'ega renupare'ema 'gã momapa. Ku'jywa 'ga je'ega renupare'ema 'gã apisawa upe iwaëmi. A'eramũ ene ewau 'gã momapa— 'jau 'ga 'ga upe.

—Nai'i— 'jau 'ga 'ga upe.

¹⁶ A'eramũ 'ga awau 'ga je'ega renupare'ema 'gã momapa. Ywasiga 'arimũ wapyk ma'e 'ga awau 'gã momapa.

¹⁷ A'erauwe majepeja 'ga ywagipewara 'ga 'ua uëma Janeruwarete 'ga mogytaaw awi. Jyaparuu aimea 'ga nanë erua nũ.

¹⁸ A'erauwe majepeja 'ga ywagipewara 'ga 'ua jany kasiga rapyaw awi nũ. Aipo 'ga tata rerekwara 'ga wafukaita jyaparuu aime rerekwara 'ga upe:

—Ekwap ywy pewara 'gã nesaka. Sã'ã ae y'wa'aa monooga imomoa y'wa pykawa pype. A'eramũ 'ã ae y'wa pikau. Nan tee futat ekwap Ku'jywa 'ga je'ega renupare'ema 'gã nerekou tyweaete. Ku'jywa 'ga imara'ne 'gã nee— 'jau 'ga 'ga upe.

¹⁹ A'eramũ 'ga awau 'gã apisau.

²⁰ Y'wa pikara 'jawe te 'gã nya. Iapisipyre'ã 'gã ny awau kwe pe 'yatawuu 'jawe. 'Y 'jawe futat awau wypojugamũ tresëtu kilometro 'gã ny oi aepasi'a ajeu te ikwawi 'gã ny rypya.

¹ Poje je mama'e mū resaka nū. Aipoa je mopiryyita. Irāā'ā sete ywagipewara 'gā nuwamū Janeruwarete 'ga je'ega renupare'ema 'gā nereko tyweara 'gā. Anurenure'i nipo 'gā 'gā nereko tywerete. Aipo teepaw ire 'gā 'gā nereko tyweru'jape'ema nū. Teepap futat. 'Gā nerekoa resag ire nipo esakara 'gā te'i 'jau: A'jea futat. Imara'ne futat Janeruwarete 'ga oje'ega renupare'ema 'gā nee, te'i 'gā 'gā nesag ire 'jau.

² A'eramū je temā'jāu nū. Ypiauu je esaka. Werawerawuu 'jawe. Ojesagete ma'ea. Tata are ojopype ma'ea. Aipo ypiauu 'arimū 'gā kwaiwete 'upa, 'yē'ē awi 'ut ma'e renupare'ema 'gā 'upa. Ia'agawa nanē 'gā imuorype'ema nū. Era nanē 'gā ikwasiarukare'ema weapykag are. Aipo 'gā 'upa ypiauu 'arimū. Janeruwarete 'ga maraka apoawa monou 'gā nupe rai'i, harpa 'jawa monou 'gā nupe rai'i. A'eramū 'gā aipo renafu'ama, maraka apou ipyu.

³ Amaraka'aga 'gā 'upa. Ymā te Janeruwarete 'ga wemiayuwa 'gā nenū'ēukari Egitu ywy awi Moisesi 'ga upe rakue. Aipo are 'gā amaraka'aga 'upa. A'ere karupa'mī 'jawewara 'ga jejukaukari 'gā nupe rakue. Aetywera moiawamū 'ga jejukaukari 'gā nupe rakue. Aipo are nanē 'gā amaraka'aga 'upa.

"Ene te 'ā Orejararetea, Kiapi'ni.

Ene te 'ā pājērete tekotee 'gā apyraapa.

Ene te 'ā Oreruwaretea.

Ene te 'ā aereapipe'ema ereapo ekou.

Erejejuka esage 'ā ore ree.

Nereapoi 'ā mama'e tywera.

Ene 'ā ywy pewaramū ore'wyriraretea.

⁴ Nitywi 'ga amū ene muorypare'ema 'gā.

Ore te 'ā najuejue etee ene muorypara.

Ene te 'ā eneresage oree, 'jau 'ā ore enee jepi.

Ene etee te 'ā eneresage. Nitywi 'ga amū ene 'jawe.

Amunawa tesirūmerete awi nipo 'gā nuri ajatykau ene muorypa, eneremiapofera mome'wau ajaupe.

Ejemiapofera ereapo ae reape futat.

A'eramū 'gā imome'wau ajaupe",

'jau 'gā amaraka'aga 'ga upe.

⁵ 'Gā maraka'āman ire je temā'jāu ywag are nū. Janeruwarete 'ga mogytaawa je aesak. Imy'jamy'jap te Janeruwarete 'ga rupawa. Ojeawopytymo'woka 'ūina jee.

⁶ Pe awi Janeruwarete 'ga je'ega renupare'ema 'gā nereko tyweara 'gā 'ua uēma. 'Gā naitya waparagamū. Wenyfugamū 'gā naitya. 'Gā pasi'a 'arimū imotyypawa okwapa. Ouru apopyrera 'gā naity motypawa.

⁷ A'eramū eae'yi ma'e 'ga amū 'y'a monou Janeruwarete 'ga je'ega renupare'ema 'gā nereko tyweara 'gā nupe juejue 'gā moyka. 'Y'a ouru apopyrera. Aipoa itay'a pype 'gā Janeruwarete 'ga mara'ne monou imatyneema ywagipewara 'gā nupe. Okoeteete ma'e 'ga mara'nea 'gā imonou 'gā nupe.

⁸ Poje tatasiga 'jawewara 'ua Janeruwarete 'ga wi, 'ga renyfug awi 'ua. Pājērete 'ga wi 'ua. A'eramū aipo tatasiga 'jawewara Janeruwarete 'ga mogytaawa matyneema. Nosea'uweri 'gā amū 'ga mogytaawa pype. Ae a'wyre'ema 'gā nereko tywera teepaw ire etee 'gā osou'japa 'ga mogytaaw ipe.

16

Janeruwarete 'ga mara'nea

¹ A'erauwe 'ga amū oje'ega sete ywagipewara 'gā nupe. Janeruwarete 'ga mogytaaw awi 'ga oje'ega mua 'gā nupe:

—Pe'je pejewau Jarejuwarete 'ga mara'ne reko'woka itay'a awi ywy are— 'jau 'ga 'gā nupe.

² A'erauwe majepeja 'ga awau eko'woka ywy are. A'erauwe mirurua opopoa 'yē'ē awi 'ut ma'efera rera rerekwara 'gā nee, ia'agawa muoryparera 'gā nee 'jau opopoa. Aipoa mirurua ayay te.

³ Aipo reko'wog ypyrauwe ajepeja 'ga oma'e mojerepa imonou 'yē'ē me nū. A'erauwe 'yē'ēa ojemu'jaga wyramū, teumera wy 'jawe ojemu'jaga. A'eramū 'yē'ē pypewara juejue opapa.

⁴ Aipo 'ga oma'e reko'wog ypyrauwe ajepeja 'ga oma'e reko'woka nū. 'Yrete pype nū, 'ywu'ywura pype 'jau 'ga oma'e monou eko'woka. A'erauwe 'ya ojemu'jaga wyramū.

⁵ A'erauwe 'ga oy'a mojerew ire 'jau Jarejuwarete 'ga upe:

—Ene te 'ā eneresage oree— 'jau 'ga 'ga upe. —Mama'e tywera nereapo ekoetei. Mama'e tywera apoara 'gā etee 'ā erereko tywerete. Ene te 'ā ereko ete rakue. 'Awamū nanē 'ā ekou nū— 'jau 'ga Jarejuwarete 'ga upe.

⁶—Ywy pewara 'gā 'ā eneremiayuwa 'gā wapisi, 'gā ny reko'woka, eneje'ega mome'wara 'gā nanē iapisau rakue nū. Ma'eramū 'ā 'ya wynamū eremu'jag 'gā nemitykuramū eje'ega mome'wara 'gā nepyaa— 'jau 'ga Jarejuwarete 'ga upe.

⁷A'erauwe wyra rapyawa pyri afu'am ma'e 'ga je'egi nū:

—Ene te 'ā Oreruwaretea, Kiapi'ni— 'jau 'ga 'ga upe. —Ene te 'ā pājēretea. Mama'e a'jea etee 'ā ene iapou. A'eramū ene eje'ega renupare'ema 'gā nereko tyweretea wesageramū futat— 'jau 'ga 'ga upe.

⁸A'erauwe ajepeja ywagipewara 'ga itay'a mojerepa kwar are. Ae rapyaukaa kwara upe. Tata pyu kwara ae rapyau.

⁹A'eramū kwara tata monou ae rapyau. A'eramū kwara remiapyfera 'gā Janeruwarete 'ga kurapa.

—Ene sare te 'ā mama'e tywera eremut oree— 'jau tata remiapyfera 'gā Janeruwarete 'ga upe, 'ga kurapa.

A'ere 'gā nopoiri futari otywer awi. Ni'arasigi futari 'gā otywer are. A'eramū 'gā aku'iramū etee ajemogyau. “Ene te 'ā pājēretea. Je katu'og ape”, 'jawe'em 'gā Janeruwarete 'ga upe.

¹⁰A'erauwe ajepeja 'ga itay'a mojerepa 'yē'ē awi 'ut ma'e renaw are nū. A'erauwe oypytunaiwamū jupe, emiayuwa 'gā nupe 'jau. Ay upe waemamū ajemogyau.

¹¹A'eramū 'gā Janeruwarete 'ga kurapa ay rerekou, opirakuwa ray rerekou, opiruru raya nanē 'gā erekou nū. Ywaga jara 'ga 'gā ikurapa wereko tyweramū. A'etea 'gā nopoiri futari mama'e tywera apo awi.

¹²A'eramū ajepeja ywagipewara 'ga itay'a mojerepa nū, ajepeja 'yrete mū ree nū, Eufrates ty are 'ga eko'woka. A'eramū otypawamū 'gā naperamū. Aipo pe rupi 'wyrriara 'gā amū nuri kwara poawa katy awi.

¹³A'eramū je mama'eukwaawa 'wyrriara remiayuwa resaka. Muapya je esaka. Majepeja 'ua uēma tejuuranū juru awi. Ajepeja 'ua uēma 'yē'ē awi 'ut ma'efera je'ega mome'wara juru awi. Ju'i 'jawewara 'ua ū'jau jui.

¹⁴Aipo ju'i 'jawewara ū'ē re awau aeremiapoe'ema apou ae rowase. Awau oporogytau ywy pewara 'gā 'wyrriara 'gā nupe:

—Pe'je pejejuwa Ku'jywa 'ga rowajaa. Pejejemiyuwa 'gā nerua 'ga rowajaa— 'jau awau 'gā nupe.

A'eramū Janeruwarete 'ga ojee iporomutare'ema 'gā majatykaukaa ojeowajarukaa 'gā nupe.

¹⁵Poje Jejui 'ga 'jau:

—Anurenure'i nipo je oi, muna'ywa 'jawe. Nepekwaawi muna'ywa rura. Nan tee futat nepekwaawi jeruawa. Aku'iramū futat je rapesakara 'gā ajemogyau. Sā'ā 'ga amū rapesakara 'gā sere'ema futat. Nomosogi waitya. Nan tee je rapesakaramū pēē nepejenosī pejejueape aitye'ema 'jawe— 'jau Jejui 'ga 'gā nupe.

¹⁶A'eramū ju'i 'jawewara ywy pewara 'gā 'wyrriara majatykau 'gā nemiayuwa 'gā neewe. Jū me 'gā majatykau. Epyreu 'gā je'eg imū 'gā 'jau Arimagetō 'jau 'gā aipo jū upe.

¹⁷A'erauwe ywagipewara 'ga maapawera 'ga oy'a mojerepa wyytu are. A'erauwe 'ga amū oje'ega afukaja mua Janeruwarete 'ga mogytaaw awi:

—Awamū futat Ku'jywa 'ga amara'ne resaukapawi— 'jau 'ga wafukaja mua, 'wyrriararete renaw awi oje'ega mua.

¹⁸A'erauwe tupā u'aa wyy pe. Aman aunuga 'jawe 'jau. Ywya oyyita kwaiwete. Wapopyramū ako ywya noyyi l'jawe rakue.

¹⁹Janeruwarete 'ga wea'aramū 'gā nemiapofer are, 'gā 'wyrarete pypewara 'gā nemiapofer are, Papironia 'jawa pypewara remiapofer are. Mama'e tywera 'gā wapo kwaiwete. A'eramū 'ga aipo 'gā 'wyrarete mowowowowoka mytera rupi. Amara'neramū 'ga 'gā nee 'gā tywer are. A'eramū 'ga 'gā nereko tyweaete. 'Gā 'wyraretea juejue 'gā etykapap 'gā nui.

²⁰Ypō'ōa oka'jamamap najuejue etee. Ywytyra nanē oka'jama nū. Nuesagu'jawi 'ga amū.

²¹Ama'nauu u'aa wyy are. Tuwi tuwi te aipo ama'nauua. Ipoi te. Kwarēta kirua te ipoyja. A'eramū ywy pewara 'gā amara'neramū Janeruwarete 'ga ree ama'na are. Janeruwarete 'ga kurakurapa mama'e tywer are.

—Nia'wryi futari Ku'jywa 'ga. Ama'nauua 'ga omototogukat janee. A'eramū 'ga wa'wrye'emamū futat— 'jau 'ga 'ga kurapa.

17

Kūjāmene'ema ēē

¹A'eramū itay'a rerekwarera 'ga amū 'ua oje'ega jee:

—Ere ejua. Taesaukat 'gã 'wyrarete pewara rereko tywera enee 'jau— 'jau 'ga jee.

'Gã 'wyrarete mû upe 'gã 'jau kûjãmene'em, 'jau 'gã jupe. Aipo pewara 'gã ia'wyr'e'ema futat. A'eramû 'gã 'jau kûjãmene'em 'jau jupe, Papironia 'jawa upe. Aipoa 'gã 'wyraretea 'up 'yrete jo'ojo'oga pyri.

² Ywy pewara 'gã 'wyrriara 'ua mama'e tywera apou aipo 'gã 'wyrarete pewara 'gã pyri. Sã'ã eawryyp ma'e 'gã. Nan tee ywy pewara 'gã nekoi mama'e tywera apo are u'akwaawe'emamû.

³ Poje Janeruwarete 'ga 'Agesagea je pojekau. Ywagipewara 'ga je rerawau amunawe'em ipe. Peu futat je kûjã êê mû resaka. Wapyka êê 'ũina ja'waraiwa kupe 'arimû. Piragay ma'e 'arimû êê 'ũina wapyka. Ku'jywa 'ga kurapawa ojekwasiaa ja'waraiw are. Kwaiwete 'ga kurapawa ojekwasiaa ee. Aipoa ja'waraiwa sete iakaga, teis asã.

⁴ Taity piraga aipoa kûjã êê erekou. Taity umy'gia nanê êê erekou imunepa nû. Ouru apopyrera êê wereco, ita esage, itafu'a'i, perua 'jawa 'jau êê erua ojemuesageawamû. Opo pe êê itay'a'i renûina. Itay'a'ia oura apopyrera. Itay'a wyneegatugaturamû mama'e tywe-tywera pyu. Mama'e tywer are etee wea'aramû. A'eramû aipoa pyu nanê ojematyneema nû.

⁵ Êê reapykag are 'ga amû era kwasiaa inuga. Naeapyoi ae aipo er are.

Je 'ã aipo 'wyrã, papironia 'jawa 'jawewara.

Je 'ã kûjãmene'ema jararetea.

Je 'ã mama'e tywera apoara wã ya,

'jau ojekwasiaa êê reapykag are 'upa.

⁶ Eawryyp ma'e 'jawe êê u'akwaawe'emamû. Jejui 'ga rerowiaara 'gã apisi are aku'iramû. Aipo 'gã nopoiri Jejui 'ga rerowiari awi. A'eramû 'ga rerowiari'ema 'gã 'gã apisau. A'e are êê aku'iramû eawryyp ma'e 'jawe.

Êê resaga je mopiryrita etee.

⁷ A'eramû ywagipewara 'ga 'jau jee:

—Ma'eramû te enepiryri e 'jina? Amueapyo je ene ee— 'jau 'ga jee. —Kûjã êê ree, ja'waraiw are. Mîmer are je ene mueapyoi— 'jau 'ga jee.

⁸ —Aipoa ja'waraiwa ako futat watau rakue. A'ere 'awamû nokou'jawi. Anure te nipo turi uêna ywy kwawukuu awi nû. A'ere juu iêm ire nipo 'gã imomawi etee— 'jau 'ga jee. —A'eramû nipo ywy pewara 'gã opiryryjamû ja'waraiw awi. Ku'jywa 'ga ka'aran are et jekwasiare'ema 'gã nipo opiryryjamû ja'waraiwa resaka. Ywy apoe'ewe te 'ã 'gã nera nojekwasiaari 'ga ka'aran are rakue. Aipo 'gã oporesagamû ajemogyau ee. "Ja'waraiwa ako futat rakue. A'ere ipawi rakue. A'ere 'awamû ekou'jawi nû", 'jau nipo 'gã ajaupe oporesagamû ee— 'jau 'ga jee.

⁹ —I'akwaap ma'e 'gã etee weapyoramû ee. Sete ja'waraiwa akaga. I'jawe etee iakagawytyra. Aipo 'arimû kûjã êê 'ũina wapyka. A'ere aipoa 'wyrriara jueje futat.

¹⁰ Sîku 'gã akoupap 'wyrriaramû. A'ere iêmi 'wyrriaramû ako awi. Majepeja ojesaukat 'awamû. A'ere maapawera 'ga nojesaukari we. Maapawera 'ga jesaukaramû inãinãnete 'ũina 'wyrriaramû.

¹¹ Anure ja'waraiwa etee 'ũina 'wyrriaramû ywy pewara 'gã nupe nû. Ja'waraiwa ako ma'e rakue. A'ere 'awamû nokou'jawi. Anure te nipo ekou'jawi nû. Sete 'gã 'ũina 'wyrriaramû enunewe. A'ere 'gã py'rau teni 'wyrriaramû. A'ere nipo 'gã ja'waraiwa momawi— 'jau ywagipewara 'ga jee.

¹² A'eramû 'ga 'jau jee nû:

—Amueapyo je ene ja'waraiwa rasã are nû. Asã teis 'gã 'wyrriaria. Nuapygi we 'wyrriaramû ajemogyau. A'ere ja'waraiwa 'gã mogyi opoirûnamû. Majepei ora rupi etee nipo 'ũina 'wyrriaramû.

¹³ Najueje etee 'wyrriari 'gã akou majepei tee tup ma'e 'jawe. Opãjêa 'gã imonou ja'waraiwa upe. A'eramû ja'waraiwa mama'e apou 'gã pãjê mû, 'gã je'eg imû 'jau iapou.

¹⁴ Karupa'mî 'jawewara 'ga 'gã iowajaa. A'ere Karupa'mî 'jawewara 'ga 'gã pãjê apyraawi. 'Ga 'ã Janejararetea. 'Ga 'ã 'Wyrriararetea. A'eramû 'ga a'eramû 'gã pãjê'oka wemiayuwa 'gã netee. Wemiayuwa 'gã 'ga amû'ê ajau rakue. 'Ga je'ega 'ga remiayuwa 'gã wenuw katu katu. Aipo 'gã netee 'ga 'gã pãjê'oka— 'jau ywagipewara 'ga jee.

¹⁵ A'eramû 'ga 'jau jee nû:

—Yrete jo'ojo'oga nanê ene esaka nû. 'Gã 'wyrarete 'up 'yrete pyri. Aipo 'yreteaa eea futat. Tapy'jja 'wyrarete tesirûmer ipewat, ka'a tesirûmer ipewat. Mîmera 'gã 'yrete 'jawe ajemogyau. Kwaiwete 'gã. A'eramû 'yrete 'jawe ajemogyau.

¹⁶⁻¹⁷ Ja'waraiwa rasã 'ã ereesak. "Aipo ywy pewara 'gã 'wyrriara" a'e je ako enee ko 'jau. Ku'jywa 'ga wemifutara futarukaa aipo 'wyrriara 'gã nupe najueje etee futat. A'eramû 'gã Ku'jywa 'ga remifutara apou. A'eramû 'gã opãjê monou ja'waraiwa upe, imogou 'wyrriaramû. Ku'jywa 'ga remifutara apopawe'emaue nipo 'gã 'ga remifutara etee iapoi—

'jau 'ga jee. —A'eramū aipoa 'wyrriara 'gā, ja'waraiwa reewe, oporomutare'emamū aipoa 'wyrarete pewara 'gā nee. A'eramū nipo 'gā 'gā karaemā pojekau 'gā nui. Sā'ā uruwua wyra reumera ro'ofera 'upawa. Nan tee futat 'gā mama'e pojekai 'gā nui. A'eramū nipo 'gā 'gā 'wyrarete rapyau— 'jau 'ga jee.

¹⁸—Aipoa kūjā ēē, eneremiesagera ēē, 'gā 'wyraretea futat, Papironia 'jawa futat. Ywy pewara 'gā 'wyrriara 'gā juejue aipo 'wyrarete pewara 'gā je'ega renupa, 'gā nemifutara apou— 'jau 'ga jee.

18

Papironi 'jawa retykawam

¹ A'ere je ajepeja ywagipewara 'ga resaka nū. Ywag awi 'ga 'ua ojyapa. Ipājē ma'e 'ga 'ua. Wenyfugamū 'ga 'ua ywy mojesakapap.

²⁻³ A'eramū 'ga wafukaita:

—Papironia 'gā wetyk 'awamū. Ipyewara 'gā nia'wryi futari. Tekotee 'gā nupe 'gā 'jau rakue: “Pe'je pejejua mama'e tywera apou ore pyri”, 'jau 'gā ajaupe rakue. A'eramū 'gā ojemotywea 'gā pyri. Sā'ā eawyrp ma'e 'gā kawīajaiwa monoa ajaupe. Nan tee 'gā 'jau ajaupe. “Pe'je pejejua mama'e tywera apou ore pyri”, 'jau 'gā ywy pewara 'wyrriara 'gā nupe. Karaemā me'egara 'gā ojemoka'aranūmū mama'e tywer are etee futat. A'eramū 'gā 'gā apisaupap. 'Awamū mama'eukwaawa etee ijemogyi peu, wyra tywera reewe. Mama'e tywera 'wara juejue etee wyraa ajemogyi peu— 'jau 'ga wafukaita.

⁴ A'eramū ajepeja 'ga amū oje'ega ywag awi nū.

“Pe'je pejewau, jeremiayuwamū, kamēsīete peje'jāu aipo 'gā 'wyrarete awi.

Kasi a'e pe mama'e tywera peapo 'gā pyri ne.

Mama'e tywera pēē iaporamū je pē nereko tyweri 'gā neewe ne.

⁵ Mama'e tywera 'gā wapo kwaiwete.

A'eramū Ku'jywa 'ga wea'aramū 'gā tywer are.

Tuereko tywet 'ga 'gā ee 'jau.

⁶ Pē nereko tywet 'gā nakue.

A'eramū pēē 'awamū pejewau pejejepyka 'gā nee.

Pejereko tyweawera apyraapa pēē 'gā nerekou tyweaete.

⁷ 'Awamueuu futat 'ā 'gā ipājē ma'ea rai'i.

I'karaemā kwai ma'ea 'gā nai'i.

A'ere 'awamū pēē te 'gā pereko tywerete kwaiwete, 'gā mu'arasiga kwaiwete.

'Ore te 'ā ywy pewara 'gā 'wyrriaretea.

Namajawera 'jawewara rūi 'ā ore.

Norojemayrūi ore mama'e are', 'jau aipoa oje'wyrarete pewara 'gā.

⁸ A'eramū 'gā wayramū futat ojee ojerowiarapaw ipe etee futat.

Majepeja 'ara rupi etee futat mama'e tywera jeapoi 'gā nupe jupiwewe futat.

Ay 'gā ajemogyau. Ojemayrūmū 'gā ajemogyau.

Ty'ara 'gā wereko.

A'ere nipo 'gā 'gā 'wyrarete rapyau.

Majepeja 'ara rupi etee futat nipo aipo mama'ea ojeapoupap.

Ku'jywa 'ga 'ā pājēretea.

'Ga 'ā 'gā nerekou tyweaete 'gā tywer are”,

'jau 'ga wafukaja mua ywag awi.

⁹ A'eramū nipo tatasiga resakawe ywy pewara 'gā 'wyrriara 'gā ojemayrūmū 'gā nee. “Ukaipap nipo kwe 'gā”, 'jau nipo 'gā ajaupe. Mama'e tywera 'gā iapou aipoa oje'wyrarete pewara 'gā pyri. Ojemoka'aranūmū mama'e tywera pyu. A'eramū nipo 'gā ajaa'wau ee.

¹⁰ Muku'i 'gā nekoi jui. Okyje 'gā wereko tywer awi.

—Ipyri jane oramū 'ga jane rapyi 'gā neewe ne— 'jau 'gā ajaupe.

—Iporyai'i Papironi pypewarera 'gā— 'jau 'gā. —Aipoa oje'wyrarete pypewara 'gā ojemoka'aranūmū numiamū. A'ere Ku'jywa 'ga ywawu je tee 'gā nereko tyweretei 'gā tywer are— 'jau 'gā ajemogyau, okyjau wereko tywer awi.

¹¹ Karaemā jara 'gā ajaa'wau ajemogyau ee.

—Papironi pewara 'gā orekaraemā amut ore wi jepi— 'jau 'gā. —A'ere 'awamū nitywi futari orekaraemā muara 'gā— 'jau 'gā ajaa'wau ee.

¹² Kwaiwete 'gā karaemā. Ouru, prata, ita esage, itafu'a'i perua 'jawa, taity esage, taity pirag, 'ywa kasig, mama'e ryrū esage ita apopyret, itaju apopyret, 'yw esage apopyret 'jau.

¹³ Kumi kasig, jany kasig, y'way, 'miara kawet, awasiku'iuu, juowuurana ra'yi, kwatau, karupa'mi, kawaruu, kamijā'i. Mīmera 'gā karaemā. 'Awamū nitywi futari 'gā karaemā

muara. Oporomuriwere'emamū 'gā wemifaja 'gā nee. Nitywi futari mama'e muara. A'eramū karaemā jara 'gā 'jau aipo oje'wyrarete kaiwer ipewarera 'gā nupe 'upa:

¹⁴ —Teepap katu katu pēnemifutara. Pēkaraemā nanē atepawamū nū. Ouru miamū atepawamū pē nui— 'jau 'gā 'gā 'wyrarete rapy resaka.

¹⁵ A'eramū 'gā nupe okaraemā me'egarera 'gā ajemogyau muku'i jui. Ojemoka'aranūū 'gā 'gā nee. A'ere 'gā kyjei wapy awi. “Ipyri jane o re nipo 'ga jane rapyau 'gā neewe”, 'jau 'gā ajaupe. A'eramū 'gā awawe'em ipyri. U'arasigamū etee ipypewarera 'gā nee. A'eramū 'gā wafukaita:

¹⁶ —Iporiay'i 'wyrarete pewara 'gā ajemogyau. Taity esagea 'gā amunep ojewi numiamū, taity pīraga 'jau. Kwaiwete 'gā oru apopyrera pyu 'gā ojemojewaka, ita esage pyu, itafu'a'i pyu 'jau, perua 'jawa pyu 'jau.

¹⁷ A'ere 'awamū ikaipawi ywawuje tee— 'jau 'gā ajaa'wau ee.

Iapyramū 'gā tatasiga resaka. Yaruu wararera 'gā, ipypewarera 'gā, iapoara 'gā, iperugara 'gā. Mīmera 'gā nipo tatasigūū resaka ikajamū.

¹⁸ Tatasiga resag ire nipo 'gā ajemogyau muku'i jui.

—Nuesagi'i 'ga amū aipo 'wyrarete 'jawewara— 'jau 'gā ajaupe.

¹⁹ 'Gā 'arasiga 'gā muafukajukaa:

—Iporiay'i ipypewarera 'gā— 'jau 'gā wafukaita. —'Gā 'ā okaraemā werooukat yaruu jara 'gā nupe. A'eramū 'gā yaruu jara 'gā mepyau 'gā moka'aranūūmū. Ywawuje tee nipo 'gā karaemā atepawamū— 'jau 'gā u'arasigamū ee.

²⁰ Pe'je pejeku'iramū ywag ipe oo ma'eferamū ee. 'Gā 'ā pē nereko tywerete rai'i. A'eramū Janeruwarete 'ga wemiayuwamū pē nepyaa, 'gā nerekou tyweaete pē nee. Jejuu 'ga remimonoferamū pē nee, 'ga je'ega mome'waramū pē nee. Mīmeramū pē nee 'ga 'gā nereko tyweretei.

²¹ A'ere ywagipewara 'gā amū, ifuakat ma'e 'ga amū itauu pyyka imomoa 'yē'ē me. Ipojuu agawewi. A'etea 'ga opyyk imomoa imonou 'yē'ē me. A'eramū 'ga 'jau:

—Sā'ā je itauu momora. Nan tee futat nipo 'gā Papiro ni retygi, ipypewara 'gā momapa. A'eramū 'gā etyg ire imōju'jape'ema futat.

²² Nopyu'jawi 'gā maraka apoawa ipype. Nomaraka'agu'jawi 'gā ipype. Nitywi futari mama'e apoara peu. Nitywi futari u'i apoara 'gā.

²³ Naenyfugu'jawi tatarana. Nuerekoi katu 'gā amū aipoa oje'wyrarete pype. Ka'aranūū are ojerowiarap ma'efera 'gā nitywi peu. Opājāgaiwa pyu ajamoryteea 'gā nanē nitywi nū.

²⁴ —Ymā te peuwara 'gā Jarejuwarete 'ga je'ega mome'wara 'gā apisi rakue. 'Ga rerowiaara 'gā nanē 'gā iapisau kwaiwete rakue nū. Tekotee 'gā nanē 'gā apisau rakue nū. Ma'eramū 'ā Ku'jywa 'ga 'gā nereko tywerukari 'gā nemiafofer are, 'gā 'wyrarete retygi 'gā nui— 'jau 'ga.

19

¹ A'eramū je mytuna 'gā je'ega renupa. Ywag ipe 'gā nuwi oje'ega:

—Simuoryp Jarejuwarete 'ga 'jau— 'jau 'gā 'upa. —'Ga te 'ā jane katu'ok. 'Ga te 'ā esage janee. 'Ga te 'ā pājēreteā.

² 'Ga te 'ā ae kwaap. A'eramū 'ga jane rerekou a'jeteetewi futat. Werowiare'ema 'gā nipo 'ga erekou tyweaete. A'ere 'ga werowiaara 'gā nereko esagei— 'jau 'gā oje'ega. —Ma'eramū 'ga 'ā Papiro ni pewara 'gā nereko tyweretei. Jane mū 'gā 'ā iapisau rakue. A'eramū Janeruwarete 'ga jane repyaa. A'eramū jane a'e are 'ga muorypa— 'jau 'gā oje'ega mua ywag awi.

³ —Aipoa 'gā 'wyrarete rapy re tatasiga awau ojeupia wojere'emamū futat. A'eramū jane Jarejuwarete 'ga muorypa ee— 'jau 'gā ajemogyau.

⁴ A'erauwe wīti kwaturu 'wyrari'ri 'gā awau, irūpāwē eae'yi ma'e 'gā netee 'gā wapyka wenupy'āu Jarejuwarete 'ga rowase 'ga muorypa. 'Wyrariarete apykawa 'arimū 'ga renamū 'gā awau 'ga muorypa.

—Nan tee ore 'jau. Simuoryp Jarejuwarete 'ga 'jau— 'jau 'gā.

Karupa'mū 'jawewara maraka

⁵ A'erauwe 'wyrariarete renawa pyri 'ūi ma'e 'ga amū 'jau nū:

—Nan tee je 'i pē nupe. Pe'je pēē taetu 'ga muorypa. 'Ga remiayup, 'Ga pojeupat, 'wyriana'nī, akotee ma'e. Mīmeramū pēē 'jau 'ga upe: “Ene te 'ā eneresage oree”, pe'je ki 'ga upe— 'jau 'wyrariarete renawa pyri ako ma'e 'ga 'gā nupe.

⁶ A'erauwe je kwaiwete 'gā je'ega renupa nū. Jarejuwarete 'ga muorypa 'gā ajemogyau. Ytuu pyamu 'jawe 'gā je'ega. Tupā 'jawe nanē afuramū.

—Pe'je ki Jarejuwarete 'ga muorypa. 'Ga 'ã Orejararetea. Pãjêretea 'ga 'gã apyrapa. 'Wyarareteretea 'ga 'ã— 'jau 'gã 'ga muorypa 'upa.

⁷⁻⁸ —Owaëm karupa'mi 'jawewara 'ga remirekoawa upe. 'Ga remirekoram êê ojekatu'opap 'ga upe. Janeruwarete 'ga taity aparasigayay monou êê upe. A'eramü êê taity esage munepa, taity aparasigayay munepa. A'eramü jane jarejekôêjamü jarejemogyau 'gã nee— 'jau 'ga jee.

'Ga remirekoram êê raitya 'jawewara Janeruwarete 'ga remiayuwa 'gã nemiapofera, mama'e esage apoawera.

⁹ A'erauwe ywagipewara 'ga 'jau jee:

—Ka'arana ekwasiat Jarejuwarete 'ga je'eg are. “Maraka nipo ore aruapo Karupa'mi 'jawewara 'ga rekokatuawamü. Maraka are imo'wy'wrypyrera 'gã aku'iramü ajemogyau”, 'jau Janeruwarete 'ga. Aipoa ekwasiat ka'aran are. A'jea futat 'ga 'eawera— 'jau 'ga jee.

¹⁰ A'erauwe je teapyka tejenupy'âu ywagipewara 'ga rowase 'ga muorypawamü. A'ere 'ga 'i jee:

—Ene'me awi. Ereapo awi nanuara. Jarejuwarete 'ga rowase te eapyk ejenupy'âu 'ga muorypa— 'jau etee 'ga jee. —Je rowase ereapo awi. 'Ga remiayuwa te je, ene 'jawe futat, enerewirera 'gã 'jawe 'jau. Jejui 'ga je'ega renuparamü jane jareju'jau'jawe etee futat— 'jau 'ga jee.

—Ymã te 'ã Janeruwarete 'ga 'Agesage je'egi 'ga je'ega mome'warera 'gã nupe rakue. 'Gã je'ega 'jawe te futat Jejui 'ga je'ega— 'jau 'ga jee.

Kawaruu siga 'arimü wapyk ma'e

¹¹ A'ere je ywaga woga resaka. A'eramü je kawaruu siga mü resaka iwoga rupi. I'arimü wapyk ma'e 'ga mama'e a'je mome'wara futat. A'eramü jane 'ga ree etee jarejemogyapygarümü. 'Ga te 'ã mama'e a'jea etee wapo. Mama'e a'jea etee futat 'ga omome'u. Ojee iporomutare'ema 'gã etee 'ga iowajaa.

¹² 'Ga rea wenyfugamü tata 'jawe. Kwaiwete 'ga 'wryiara akagyryü 'jawewara rerekou waka'garimü. Ojee 'ga wera kwasiaa. Nitywi 'ga amü 'ga rera kwaapara. 'Ga tee futat wera kwaapa.

¹³ 'Ga piara ojemuakÿma 'ga ry pype. “Jarejuwarete 'ga kwaawukaara 'ga”, 'jau 'gã 'ga upe.

¹⁴ 'Ga rewiri ywagipewara jefaruu 'gã akou. Kawaruu siga 'arimü nanê 'gã wapyka nü. Taity aparasiga 'gã erekou.

¹⁵ Tenune 'ut ma'e 'ga juru awi jyu aime juowai ma'e 'ua uëma. A'ere nu'ari 'ga juru awi. Aipo pyu 'ga werowiare'ema 'gã fuakara pojekau 'gã nü. A'eramü 'ga 'üina 'wryiaramü 'gã nupe. Oje'ega renuwe'emamü 'ga 'gã nerekou tyweaete. Janeruwarete 'ga pãjêretea. Amara'neramü 'ga werowiare'ema 'gã nee. A'eramü 'ga Jarejuwarete 'ga rerowiare'ema 'gã apisau 'gã ny reko'wogukaa 'gã nü. Sã'ã ae y'way apikaa. Nan.

¹⁶ 'Ga piar are 'ga reramü ojekwasiaa.

“Ae'wryiararetea. Aejarareteretea”

'gã 'ea ojekwasiaa 'upa 'ga piar are, 'ga 'uw ypy are 'jau ojekwasiaa 'upa.

¹⁷ A'ere je ywagipewara 'ga amü resaka nü. Kwara 'arimü 'ga u'ama. A'eramü 'ga wafukaita wyra upe, ywate owewe ma'e upe:

—Pe'je pejejua pejejemí'waa. Janeruwarete 'ga futat mama'ea omono pë nupe pënemí'uramamü.

¹⁸ Pe'je pejejua 'wryiara reumera 'wau. Jefaruu reumet, jefaruu 'wryiara reumet, kawaruu reumet, kawaruu 'arimü wapyk ma'efera 'gã neumet, akotee ma'e 'gã neumet. Mímera reumera 'wau pejejua— 'jau 'ga wafukaita wyra wewe upe.

¹⁹ A'ere je 'yê'ê awi 'ut ma'efera resaka nü. Peu ajatykau ywy pewara 'gã 'wryiara reewe, jefaruu reewe. Kawaruu siga 'arimü 'üi ma'e 'ga rowajaa 'gã nuri, 'ga remiayuwa 'gã neewe.

²⁰ A'eramü 'gã 'yê'ê awi 'ut ma'efera pyyka ipofaa, 'yê'ê awi 'ut ma'efera je'ega mome'wara retee. Aipoa aeremiapoe'ema apou rakue, 'yê'ê awi 'ut ma'efera rera rerekwara 'gã moryteeu ojee rakue. Ia'agawa muorypara 'gã nanê imoryteeu nü. A'eramü 'gã 'yê'ê awi 'ut ma'efera momoa imonou tata pe, 'yê'ê awi 'ut ma'efera je'ega mome'wara nanê nü. Sã'ã 'ywygyga kaja fufura iãja. Nan tee futat tuwi wenyramü. Ypiauu 'jawe mama'eukwaawa rapyawa. Itatata nanê 'upa ypiauu pype nü, êsöfyria 'jawa 'upa ipype nü. Ekou futat 'gã imonou imomoa mama'eukwaawa rapyawa pype.

²¹ Kawaruu siga 'arimü 'üi ma'e 'ga ja'waraiwa remiayuwa 'gã apisaupap ojyuu pyu. Ojuru awi 'ut ma'e pyu iapisaupap. A'eramü wyra eumera 'wau wewegamü jui.

¹ A'eramū je ywagipewara 'ga amū resaka nū. Ywag awi 'ut ma'e 'ga. Opo pe saawi rerekou. Itajuu nanē 'ga erekou opo pe nū. Aipo saawia ywy kwawukuu rawopytymawa ma'ea.

² A'eramū 'ga tejuuranū pyyka ikupyfaa itajuu pyu. Aipoa tejuuranūna mama'eukwaawa 'wyrriara futat. Satanasi 'jau 'gā jupe. Ymā ijesaukari mojamū aeypy upe rakue. Aipoa ywagipewara 'ga ikupyfaa itajuu pyu.

³ A'eramū 'ga imomoa imonou ywy kwawukuu pype.

—Au e'yi. Miu kwara magwapa e'yiina ywy kwawukuu pype— 'jau 'ga jupe imomor ire.

A'eramū 'ga iawopytymawa motypa saawi pyu ee. A'eramū mama'eukwaawa 'wyrriara uēme'ema ywy kwawukuu awi. A'eramū ywy pewara 'gā moryteeu'jape'ema. Miu kwara kwaw ire te 'gā imuēmukari kamēsūū etee.

⁴ A'eramū je 'wyrriara renawa amū resaka nū. I'arimū wapyk ma'e 'gā nupe Janeruwarete 'ga opājē monou, 'gā mogyau 'wyrriaramū Jejui 'ga pyri. Jejui 'ga ree je ijuwonogipyrera 'gā 'agera resaka nū. Jarejuwarete 'ga je'ega 'gā omome'u rakue. Jejui 'ga porogya a'jea nanē 'gā imome'wau nū. A'eramū ia 'wyre'ema 'gā 'gā juwonoka rakue. Aipo 'gā namuorywi futari 'yē'ē awi 'ut ma'efera. Ia 'agawa nanē 'gā imuorype'ema futat nū. Nomojewagukari 'gā weapykaga 'yē'ē awi 'ut ma'efera remifutar imū. Opo are nanē 'gā imojewagukare'ema rakue. A'eramū Jejui 'ga 'gā mū'jāu tywy awi, 'gā moferapa, 'gā mogyau 'wyrriaramū ojeppyri. Miu kwara 'gā 'ūina imagwapa Kristu 'ga pyri.

⁵ 'Gā tee ra'ne Jejui 'ga imū'jāu tywy awi aipo 'ara rupi. A'eramū 'gā tywy awi ae mū'ēpyyawet 'jau jupe. Tekotee 'gā 'ga imū'jāu jui miu kwara kwaw ire etee.

⁶ Imoferaw ypy ppyfera 'gā aku'iramū ajemogyau. Janeruwarete 'ga remiayuwa futat 'gā. A'eramū 'gā awawe'em mama'eukwaawa rapyaw ipe. A'eramū 'gā aku'iramū ajemogyau. Jarejuwarete 'ga upe 'gā oporowykyau. Jejui 'ga upe nanē 'gā oporowykyau nū. Miu kwara magwapa 'gā ajemogyau Jejui 'ga poirūnamū.

Iapyaw ipe mama'eukwaawa 'wyrriara monoawam

⁷ Miu kwara kwaw ire nipo 'gā mama'eukwaawa 'wyrriara muēma ywy kwawukuu awi. A'eramū futat nipo 'gā itajuu rawi ikupy awi.

⁸ A'eramū nipo mama'eukwaawa 'wyrriara awau ywy pewara 'gā moryteeu nū. “Ywy pewara 'gā tomomoit 'gā Nuwarete 'ga rerowiar awi 'jau kwy”, 'jau nipo mama'eukwaawa 'wyrriara awau 'ūina numiamū. Goga 'jaw ipe awau. Magoga 'jaw ipe nanē awau nū. A'eramū nipo mama'eukwaawa 'wyrriara wemimoryteefera 'gā majatykau 'gā moparuowajaa. Kwaiwete nipo 'gā ajatykau. Nomojopyrūa'uweri te nipo ae 'gā. Sā'ā 'yisigeau pytuna. Nan te nipo 'gā pytuna. Nimojopyrūawi futari.

⁹ Mama'eukwaawa 'wyrriara remimoryteefera 'gā awau okwasi'wau Janeruwarete 'ga remiayuwa 'gā nupawa mamana, 'gā 'wyrarete mamana. Aipoa 'gā 'wyraretea Janeruwarete 'ga afutat. A'eramū 'ga tata mua imojypa ywag awi, imamanara 'gā napyau-pap.

¹⁰ A'erauwe 'ga 'gā moryteeara, mama'eukwaawa 'wyrriara monou imomoa mama'eukwaawa rapyaw ipe. Peu futat akou tywet 'yē'ē awi 'ut ma'efera pyri, 'yē'ē awi 'ut ma'efera je'ega mome'wara pyri. Peu futat awau oteweramū ajemogyau tyweaete. Nateepawi futari 'gā nereko tywera.

Mama'eukwaawa rapyaw ipe werowiare'ema 'gā monoawam

¹¹ A'eramū je 'wyrriarete renawuu resaka nū. Aipoa waparasiyayramū. I'arimū wapyk ma'ea nanē je esaka nū. Ywya awau oka'jama 'ga wi, ywaga retee. Ika'jam ire nitywi 'gā amū oka'jam ma'efera resakara.

¹² A'eramū je amanū ma'efera 'gā nesaka. 'Wyrriarete renawa rowase 'gā nuri ajemogyau. 'Wyrriara 'gā, akotee ma'e 'gā netee 'ua 'upa 'ga rowase. A'eramū 'ga amū ka'arana pypekau imogytau. Ywy pewara 'gā nemiapofera rerekwara pypekau ra'ne esaka. A'eramū Jarejuwarete 'ga remiayuwa rerekwara ka'arana nanē ipypekau nū. Aipoa ka'aran are Janeruwarete 'ga wemiayuwa 'gā nera kwasiarukaa rakue. 'Gā tee ajemogyau Jarejuwarete 'ga pyri nakwaparimū rūi futat. A'eramū 'gā 'jau “ajemogy ma'ea ka'arana”, 'jau 'gā aipoa ka'arana upe. Ywy pewara 'gā nemiapofera rerekwara ra'ne 'ga amū imogytau. A'eramū Janeruwarete 'ga 'gā mepyau 'gā nemiapofer are.

¹³ 'Yē'ē pype amanū ma'ea nanē 'ua nū. 'Gā nanē 'ga imepyau. Amanū ma'efera 'gā juejue 'ua u'ama 'ga rowase. A'eramū 'ga 'gā mepyau najuejue etee futat.

¹⁴ Ae momapawa 'gā imonou imomoa mama'eukwaawa rapyaw ipe. Ma'eramū 'ā ae namanū'jawi futari numiamū. A'ere Janeruwarete 'ga werowiare'emamū ae pe'ai ojewi. A'eramū ae awau ajemogyau muku 'ga wi wayrūnamū nakwaparimū rūi futat. Nitywu'jawi ae'agera rupawa. Ippewarera nanē 'ga imonou mama'eukwaawa rapyaw ipe. Aipoa tata ypiauu 'jawe.

¹⁵ A'ere 'ga ajemogy ma'ea ka'arana resaka. Janeruwarete 'ga ree ojemogypyyk ma'e 'gā nera juejue ajemogyau ee. A'eramū ee ijekwasiare'ema 'gā 'ga imonou imomopoa mama'eukwaawa rapyaw ipe. Mama'eukwaawa rapyaw ipe oo ma'e 'gā amanūu'jap ma'e 'jawe futat. Sā'ā janemanūa jane mopojo'oga janepytun awi. Nan tee mama'eukwaawa rapyaw ipe oo ma'e 'gā pojo'ogamū Jarejuwarete 'ga wi.

21

Ywag yaua ywy yau retee

¹ A'erauwe je ywag yau resaka, ywy yau retee. Ywag ymanera atee pawamū ywy ymanera retee. 'Yē'ēa nanē oka'jama nū.

² A'eramū je Jarejuwarete 'ga 'wyrarete yau resaka, Jerusareg yaua je esaka. Kwe 'ua ojyja ywag awi. Janeruwarete 'ga futat imojewaka iapou imua. Sā'ā kūjāmuku ijemiesagea akokatuaw are. Nan tee futat turi ojyja.

³ A'erauwe je 'ga amū je 'ega renupa: "Awamū nipo Janeruwarete 'ga rekoi ywy pewara 'gā pype" 'ea je enupa. "Awamū nipo 'gā juejue Jarejuwarete 'ga remiayua. 'Ga 'ā 'gā Nuwaretea" 'ea je enupa.

⁴ "Ga nipo 'gā neaya amukag 'gā nui. Nojoo'ou'jawi 'gā. Namanūu'jawi futari 'ga amū. Nitywi futari ae mu'arasigawa. Nitywi futari mama'eaya. A'eramū 'gā ajaa'wawe'em. Mama'e ymanera oka'jamap jui" 'ea je aenupap. 'Wyriara renawa pyri oje'eg ma'e 'ga 'ūina.

⁵ A'eramū 'wyriararete renawa 'arimū wapyk ma'e 'ga 'jau:

—Mama'e ymanera teepap. 'Awamū ipyau etee je iapoi ipy'rau nū— 'jau 'ga.

A'eramū 'ga 'jau jee:

—Jeje'ega ekwasiat ka'aran are. A'jea futat je'ea. A'eramū pēē ee pejejemogypyygarūmū— 'jau 'ga jee.

⁶ —Teporowykya je aapopap. Mama'e apoe'emawe te 'ā je rekoi. Mama'ea teepaw ire miamū futat je rekoi nū. Nakwaparimū warāu rūi je. I'yuwei ma'e 'gā nupe 'ya tomono 'jau. Aipoa 'y rykuara 'gā ajemogy namawi rūi. A'eramū je 'gā mogyau teje pyri futat.

⁷ Teje'ega renupara 'gā je amogy teja'yramū futat. Je te 'ā 'gā Nuwaretea— 'jau 'ga jee.

⁸ —A'ere amumera 'gā oi mama'eukwaawa rapyaw ipe eeewe futat. Je rerowiar awi opoit ma'e 'gā, je rerowiare'ema 'gā, mama'e tywera apoara 'gā, oporojuka ma'e 'gā, mama'eukwaawa 'wyriara pājē pyu ipājē ma'e 'gā, maira'me a'agaw are oryp ma'e 'gā, i'me ma'e 'gā. Mīmēra 'gā awau opytaw mama'eukwaawa rapyawa pype, ypiauu 'jawewara pype. Ēsōfyri 'jawa iapyau ipype. Ēsōfyri wenyramū niry'wei futari. A'eramū wayramū 'gā nupe, 'gā nerekou tyweaete. Mama'eukwaawa rapyaw ipe oo ma'e 'gā amanūu'jap ma'e 'jawe futat. A'ere 'gā namanūi futari. Janeruwarete 'ga te 'gā nuerowiari. A'eramū 'ga 'gā monou muku ojewi amanūu'jap ma'e 'jawe— 'jau 'ga jee.

Jerusareg yau

⁹ A'ere ywagipewara 'ga amū 'ua oje'ega jee nū. Itay'a'i rerekwarera 'ga amū, Janeruwarete 'ga je 'ega rerowiare'ema 'gā nereko tywerarera 'ga amū 'ua oje'ega jee:

—Ere ejua je rupi. Taesaukat karupa'mī 'jawewara 'ga remirekorama enee 'jau— 'jau 'ga jee.

¹⁰ A'erauwe Janeruwarete 'ga 'Agesagea je pojekau ojeupe. A'eramū ywagipewara 'ga je rerawau ywytyt ywate 'arimū. Pe awi 'ga Jerusareg yau resaukaa jee. Janeruwarete 'ga 'wyr yau resaukaa jee. 'Ua ojyja ywag awi.

¹¹ Wenyfugamū 'ua. Peu futat Janeruwarete 'ga rekoi. A'eramū Janeruwarete 'ga renyfuga 'ga rerua erojyja. Ita esage 'jawe wenyfugamū, jasipi 'jawa 'jawe. Ojesagete ma'ea futat, kristau 'jawa 'jawe.

¹² Janeruwarete 'ga 'wyraretea ojeosōu. Iosoma ianam te, iywateuua nanē nū. Tusi iosoma rokware. Ywagipewara 'gā iosoma rokware rarūmū. Iosoma rokwar are Israeu 'ga ra'yra 'gā nera ojekwasiaa.

¹³ Kwara poawa katy muapyra iosoma rokware. Kwara resaawa katy muapyra iosoma rokware. Iyse katy muapyra iosoma rokware, iyse owajara katy muapyra 'jau.

¹⁴ Itauua ra'ne 'gā imonou imyina. A'ere 'gā iosoma iapou itauu 'arimū. Tusi itauua. Aipoa itauu are Karupa'mī 'jawewara 'ga remimonofera 'gā nera ojekwasiaa.

¹⁵ Je upe oje'eg ma'e 'ga ywya wereco opo pe. Ouru apopyrera 'ga ywya. Aipo pyu 'ga 'wyrarete ra'agawau. Iosom, iosoma rokwar. Mīmēra 'ga wa'agawy ipyu.

¹⁶ Janeruwarete 'ga 'wyrarete yau ojoumykakaga 'jawe etee futat ipytu'ēa. Opytu'ē pāwē pāwēnamū futat. Tois miu tusētu kilometro pytu'ēa. Tuwi tuwi te Jerusareg yaua. 'Ga 'wyrarete ywate ipytu'ē 'jawe etee futat.

¹⁷ Iosoma nanē 'ga ia'agawau nū. Sesētai kwaturu metro ianama. Ywy pewara mama'e ra'agawawa pyu futat 'ga ia'agawau.

¹⁸ Ita esage 'ga iapou oje 'wyrarete osomamũ. Jasipi 'jawa apou iosomamũ. Ouru 'ga iapou oje 'wyrareteramũ. Wenyfugamũ werawerawuu 'jawe.

¹⁹ Itauu 'arimũ 'gã iosoma apou. Aipo itauua ita esagea futat. Epy ete aipoa ita esagea. Ajepeja ita owyay ma'ea, jasipi 'jawa. Ajepeja ita owy ma'ea, safira 'jawa. Ajepeja ita warumama 'wiramũ, agata 'jawa. Ajepeja ita owyay ma'ea, esimerauta 'jawa.

²⁰ Ajepeja ita warumama 'wisigamũ, saritonia 'jawa. Ajepeja ita piraga, satiu 'jawa. Ajepeja ita ijukyryay ma'ea, krisoritu 'jawa. Ajepeja ita owy, periru 'jawa. Ajepeja ita ijukyryũ 'nĩ topasiu 'jawa. Ajepeja ita siga, krisopasi 'jawa. Ajepeja ita owy ma'ea, jasĩtu 'jawa. Maapawa ita umy'gi ma'ea, ametisita 'jawa.

²¹ Iosoma rokwaro majepei tee ita fu'asigũũa apopyrera, perua 'jawa apopyrera. Peuwara aeatawapy 'apykawa ouru apopyra etee futat. Okawuramũ werawerawuu 'jawe.

²² Naesagi je Janeruwarete 'ga mogyaawa peu. Peu futat Janeruwarete 'ga rekoj, pãjẽrete 'ga rekoj, Karupa'mĩ 'jawewara 'ga retee. A'eramũ peuwara 'gã 'gã muorypa au'jeteramũ ajemogyau. Nooa'uweri 'gã sigaty 'gã muorypa.

²³ Nitywi futari kwara. Jaya nanẽ otywe'emamũ nũ. Janeruwarete 'ga ete wenyfugamũ, Karupa'mĩ 'jawewara 'ga retee. A'eramũ opyytunaiwe'emamũ.

²⁴ Wyy pewara 'gã juejue Janeruwarete 'ga remiyauwa. 'Gã nupe nanẽ opyytunaiwe'emamũ nũ. 'Gã 'wryiara 'gã nipo okaraemã esage rerua aipoa oje 'wyrarete pe Jarejuwarete 'ga upe.

²⁵ Nuawopytymi futari 'gã iosoma rokwaro. Niyptuni futari peu. A'eramũ 'gã iosoma rokwaro rawopytyme'ema futat.

²⁶ Wyy pewara 'gã nipo okaraemã rerua Jarejuwarete 'ga upe.

—Ene te 'ã mama'ea ereapo rakue. A'eramũ ore erua ene upe nũ— 'jau nipo 'gã erua Jarejuwarete 'ga upe.

²⁷ A'ere 'gã mama'e tywera nuerura'uweri erosou aipoa 'ga 'wyrarete pe. Mama'e tywera apoara 'gã nanẽ aipoa 'ga 'wyrarete pe nosei nũ. I'me ma'e 'gã nanẽ nosei nũ. Karupa'mĩ 'jawewara 'ga ka'aran are ijekwasiaripyre 'gã etee te ose aipo 'ga 'wyrarete pe, ajemogy ma'ea ka'arana are ikwasiaripyre 'gã etee.

22

¹ A'ere ywagipewara 'ga 'yrete resaukaa jee.

—Koa 'y rykuara 'gã ajemogy nakwaparimũ ete rũi— 'jau 'ga jee.

Aipoa 'ya wyyysige'emamũ futat okwapa. Ojesaka etee futat typya, kristau 'jawa 'jawe. Janeruwarete 'ga renawa 'wyr awi futat turi. Karupa'mĩ 'jawewara 'ga ma'e 'wyr awi nanẽ 'ua nũ.

² 'Gã 'wyrarete pyterimũ futat okwapa, ukawõ'õ pyterimũ futat okwapa. 'Yrete reme'y'warimũ 'y'wa 'y'wa u'ama ajuowai. Aipoa 'y'wa 'y'wa 'u re ae mogyau nakwaparimũ ete rũi. Aipoa 'y'wa 'y'wa namajepei tee rũi i'aa. I'au'jau'jap futat. Majepei tee jaya moka'jami u'aramũ nũ. Majepeja jaya moka'jam ire u'aramũ nũ 'jau. Oowa muaga futat. Wyy pewara 'gã katu'okawa futat oowa.

³ Nitywi futari mama'e tywera aipoa 'wyrarete pype. Nitywi futari “mama'e tywera jee” Janeruwarete 'ga 'jawa.

Janeruwarete 'ga renawa 'ũi aipoa 'ga 'wyrarete pe futat. 'Ga remiyauwa 'gã 'ua 'ga muorypa au'jeteramũ futat peu.

⁴ Peu futat 'ga remiyauwa 'gã 'ga reakwara resaka. 'Ga rera 'gã erekou ikwasiaa weapykag are.

⁵ Nitywi futari ypytunaiwa peu. A'eramũ 'gã tata reny futare'ema peu. Kwara renya nanẽ 'gã ifutare'ema nũ. Janeruwarete 'ga futat 'ũi wenyfugamũ 'gã nupe. A'eramũ opyytunaiwe'emamũ. Janeruwarete 'ga wemiayauwa 'gã mogyau 'wryiaramũ ojepyri. A'eramũ 'gã ajemogyau 'wryiaramũ nakwaparimũ ete rũi.

Jeju 'ga ruawam

⁶ A'eramũ ywagipewara 'ga 'jau jee.

—A'jea futat aipoa morogytaa. A'eramũ pẽẽ pejemogypyka futat ee. Janeruwarete 'ga 'ã U'agesagea omono oje'ega mome'wara 'gã nupe. 'Ga 'ã je mut mama'e ijeapoarama resaukaawamũ wemiayauwamũ pẽ nupe— 'jau ywagipewara 'ga jee. —Niporomukui futari nipo eneremiesagera ojeapou— 'jau 'ga jee.

⁷ A'eramũ Jeju 'ga 'jau:

—Pe'je pejeapykau jeje'eg are. Anurenure'i nipo je oi nũ. A'eramũ pẽẽ jeje'ega renuparamũ pejekõẽãjamũ pejemogyau. Teje'ega je akwasiarukat ene upe. Anurenure'i nipo mama'ea jeapoi je'eawer imũ etee futat— 'jau 'ga jee.

⁸ Je Juānamū. Je 'ga je'ega renupara ai'i, tejeupe 'ga remiesaukarera resakarera nanē je nū. Tejeupe esaukapaw ire je teapyka tejenupy'au ywagipewara 'ga rowase, tejeupe esaukaara 'ga rowase, je 'ga muoryparamet ee.

⁹ A'ere 'ga 'i jee:

—Ereapo awi nanuara. Jarejuwarete 'ga te emuoryp. Ene 'jawe futat je 'ga remi-ayuamū, 'ga je'ega mome'wara 'gā 'jawe 'jau. 'Aga ka'arana rerowiaara 'gā 'jawe 'jau. Jareju'jawe jane rekoī. Jarejuwarete 'ga etee emuoryp— 'jau 'ga jee.

¹⁰ A'eramū 'ga 'jau jee nū:

—Eremim kasi ejemikwasiarera ne. Niporomukui futari nipo ene upe esaukaripyra ojeapou.

¹¹ Mama'e tywera apoara 'gā nipo mama'e tywera apou etee futat akou— 'jau 'ga jee. —Mama'e esage apoara 'gā nipo mama'e esagea etee iapou akou. Jarejuwarete 'ga upe mama'e apoara 'gā nipo mama'e apou 'ga upe etee futat. Nojopy'ruarūi 'awamū pēnemipoa. Teepap ja'wyja'wy— 'jau ywagipewara 'ga jee.

¹² A'eramū Jejuī 'ga 'jau jee nū:

—Pe'je pejeapyakau jeje'eg are. Nojeporomukui futari nipo je tewau nū. Pēnekawera repya nipo je erawau pē mepyau, pēnemipofera mepyau— 'jau 'ga jee.

¹³ —Je futat 'ā ywy apoe'emaue ako ma'ea. Mama'e teepaw ire miamū futat je rekoī. Je mama'e aapo ikue. A'eramū je futat imateepapa nū— 'jau 'ga jee.

¹⁴ —Ekōēāi nipo ojepirei ma'e 'gā, jery pyu ojepirei ma'e 'gā. Aipo 'gā nipo y'wa 'wau. “Aga y'wa 'wara ajemogyau nakwaparimū ete rūi” 'jawa y'wa 'wau. Jarejuwarete 'ga 'wyrarete pe nipo 'gā awau osou 'gā 'wyrarete osoma rokwarā rupi— 'jau Jejuī 'ga jee.

¹⁵ —A'ere ijepireje'ema 'gā noseī futari. Mama'e tywera apoara 'gā, mama'eukwaawa 'wyrāra pājē pyu ipājāgaip ma'e 'gā, wemirekoe'em are ako ma'e 'gā, omene'em are ako ma'e 'gā, oporojuka ma'e 'gā, maira'me a'agaw are oryp ma'e 'gā, i'me ma'e 'gā. Mīmera 'gā osowe'em futat Janeruwarete 'ga 'wyrarete pe. Muku 'gā oi ajemogyau 'ga 'wyrarete awi— 'jau Jejuī 'ga jee.

¹⁶ —Je te 'ā Jejujamū. Ywagipewara 'ga amū amono teje'ega mome'waukaa pē nupe, tejerowiaaramū pē nupe. Je Davi 'ga juapyrera. Je jaytata ku'ema reruara 'jawewara— 'jau Jejuī 'ga.

¹⁷ Janeruwarete 'ga 'Agesagea 'jau Karupa'mī 'jawewara 'ga remirekorama ēē retee:

—Ere ejua!

Jejuī 'ga je'ega renupara 'gā nanē 'jau:

—Ere ejua!

I'yuwei ma'eramū pe'je pejejua. “Aga 'yrykuara 'gā ajemogy nakwaparimū ete rūi” 'jawa petykut. A'eramū pēē pejejemogyau Jarejuwarete 'ga pyri nakwaparimū ete rūi. Aipoa 'ya Janeruwarete 'ga imonou “y emut ara jee” 'jara 'gā nupe. Nepemonoi ka'aranūa 'y muawamū. Janeruwarete 'ga omono ekoete te futat enūinara 'gā nupe.

¹⁸ Je Juānamū. Mama'e a'jea futat je amome'u pē nupe, Jejuī 'ga je'ega renuparamū pē nupe. Jeje'ega etee pemome'u pejejaupe. Irāinān kasi pemome'u pejejaupe ne. Irāinān pēē imome'uramū nipo Janeruwarete 'ga pē nereko tyweretei ikwasiaripyrer imū etee.

¹⁹ 'Gā imome'upawe'emamū 'aga y'wa Janeruwarete 'ga i'waukare'ema futat 'gā nupe, “aga y'wa 'wara 'gā ajemogy nakwaparimū ete rūi” 'jawa 'waukare'ema 'gā nupe. Aipo 'gā noseī futari Janeruwarete 'ga 'wyrarete pe.

²⁰ A'eramū imome'u katuara 'ga 'jau:

—A'jea futat. Anurenure'i nipo je oi nū— 'jau 'ga.

A'eramū je 'jau 'ga upe:

—Ere ejua, ki Jejuī. Ene te 'ā ore'wyrārareretea— 'jau je 'ga upe.

²¹ Jānejararete 'ga Jejuī 'ga resagea pē nerekoa je afutat.

Kweramū tejemiesagera mome'ua.